


Kupia



Kupia: Kupia New Testament (New Testament)

Kupia

Kupia: Kupia New Testament (New Testament)

copyright © 2018 Wycliffe Bible Translators, Inc.

Language: Kupia

Contributor: SIL International (in Asia)

All rights reserved.

2025-05-06

PDF generated using Haiola and XeLaTeX on 6 May 2025 from source files dated 6 May 2025

7ccb2690-4432-5e86-88c1-f8ee976f30f4

Contents

మత్తయి	1
మార్కు	72
లూకా	119
యోహాను	207
బారికుల్ కమెంట్	268
రోమా	342
1 కొరింధి	378
2 కొరింధి	408
గలతీ	428
ఎఫెసీ	441
పిలిప్పీ	453
కొలోస్సి	461
1 దెస్సలొనీ	469
2 దెస్సలొనీ	477
1 తిమోతి	481
2 తిమోతి	491
తీతు	498
సిల్వేమోను	503
ఎబ్రీయుల్	505
యాకోబు	531
1 పేతురు	540
2 పేతురు	550
1 యోహాను	556
2 యోహాను	565
3 యోహాను	567
యూదా	568
ప్రకటన	572

మత్తయి సుబుమ్ కబుర్ మత్తయి రెగిడ్లి సుబుమ్ కబుర్

యేసుక్రీస్తుచి వంసుమ్ వర్చ తెన్ రెగిడ్లిసి

(లూకా 3:23-38)

1 అబ్రాహామ్చి సెకుమ్తె జెర్మిలో దావీదు రానొచి వంసుమ్తే యేసుక్రీస్తు జా జెర్మిలన్. జోచి వంసుమ్ ఇసి జలి.

2 అబ్రాహామ్ ఇస్సాకుక పాయిలన్. ఇస్సాకు యాకోబుక పాయిలన్. యాకోబు యూదాక చి జోచ అన్నసీంక బావుడ్చివొక పాయిలన్.

3 యూదా తామారు మెలి తేర్చి తెన్ పెరెసుక చి జెరహుక పాయిలన్.

4 పెరెసు ఎస్రోముక పాయిలన్. ఎస్రోము అరాముక పాయిలన్. అరాము అమ్మినాదాబుక పాయిలన్.

5 అమ్మినాదాబు నయస్సోనుక పాయిలన్. నయస్సోను సల్మానుక పాయిలన్. సల్మాను రాహాబు మెలి తేర్చి తెన్ బోయజుక పాయిలన్. బోయజు రూతు మెలి తేర్చి తెన్ ఓబేదుక పాయిలన్. ఓబేదు యెస్సయిక పాయిలన్.

6 యెస్సయి దావీదు రానొక పాయిలన్. ఈంజో దావీదు రానొ ఊరియా మెలో ఎక్కిలోచి తేర్చి తెన్ సాలోమోనుక పాయిలన్.

7 సాలోమోను రెహాబాముక పాయిలన్. రెహాబాము అబీయాక పాయిలన్. అబీయా ఆసాక పాయిలన్.

8 ఆసా యెహోసాపాతుక పాయిలన్. యెహోసాపాతు యెహోరాముక పాయిలన్. యెహోరాము ఉజ్జియాక పాయిలన్.

9 ఉజ్జియా యోతాముక పాయిలన్. యోతాము ఆహోజుక పాయిలన్. ఆహోజు హిజ్కియాక పాయిలన్.

10 హిజ్కియా మనస్సేక పాయిలన్. మనస్సే ఆమోనుక పాయిలన్. ఆమోను యోసీయాక పాయిలన్.

11 పడ్డో యూదుల్క బబులోను దేసిమి విరోదుమ్ సుదల్ దెర గెలి కాలుమ్, యోసీయా యెకోన్యాక చి జోచ బావుడ్చివొక పాయిలన్.

12 యూదుల్క బబులోను దేసిమ్చి విరోదుమ్ సుదల్ దెర గెలి పడ్డో, యెకోన్యా నయల్తీయెలుక పాయిలన్. నయల్తీయెలు జెరుబ్బాబెలుక పాయిలన్.

13 జెరుబ్బాబెలు అబీహూదుక పాయిలన్. అబీహూదు ఎల్యాకీముక పాయిలన్. ఎల్యాకీము అజోరుక పాయిలన్.

14 అజోరు సాదోకుక పాయిలన్. సాదోకు ఆకీముక పాయిలన్. ఆకీము ఎలీహూదుక పాయిలన్.

15 ఎలీహూదు ఎలీయాజరుక పాయిలన్. ఎలీయెజెరు మత్తానుక పాయిలన్. మత్తాను యాకోబుక పాయిలన్.

16 యాకోబు మరియచొ మున్సుసి జలో యోసేపుక పాయిలన్. మరియచి పెట్టి క్రీస్తు మెంతో యేసు జెర్మిలన్.

17 ఇసి, అబ్రాహామ్ తెంతో మొదొల్ కెర, దావీదు రానొ ఎదక, వర్చ తెన్ మొత్తుమ్ చొప్ల తరుమ్లు జల. అన్నె, దావీదు రానొ తెంతో మొదొల్ కెర, యూదుల్క బబులోను దేసిమి విరోదుమ్ సుదల్ కడ నిలి ఎద చొప్ల తరుమ్లు జల. బబులోనుతె గెలి తెంతో అన్నె మొదొల్ కెర, క్రీస్తు ఎద కి చొప్ల తరుమ్లు జల.

యేసుక్రీస్తు జెర్మిలిసి
(లూకా 2:1-7)

18 *యేసుక్రీస్తు జెర్మిలిసి కీసి జలి మెలె, మరియచ అయ్యసిని, "అమ్చి

* 1:18 1:18 'ప్రబు' మెన రెగిడ్లి, 'ఎత్తిక ఏలువ కెర్తొసా' మెలి అర్దుమ్ తయెదె. యెహోవ అబ్సొన్క కి యేసు హుత్తుక కి 'ప్రబు' మెనుల.

బోదక తుక దెమ్దె” మెన యోసేపుక సంగిలి పడ్డై, జేవ్ దొగుల నే బెదితె అగ్గె, దేముడుచి[†] సుద్ది తిలి ఆత్మతెన్ మరియ అంగి జలి.

19 మరియుచొ మున్నుసి జంక తిలొ యోసేపు, జా దస్సి జా అస్సె మెన సూన కెర, జో పున్నిమ్ జలొసొ మాన్నుచి రిసొ, పడ్డై మాన్నుల్చి మొక్కె జాక లాజ్ కెరుక నెన కెర, గగ్గల్ నే జతె లుంకవ జాక ముల దెంక మెల ఉచర్లన్.

20 జో ఇసి కెరుక మెన ఉచర్తై తతికయ్, ప్రబుచొ దూత ఎక్కిలొ సిప్ప తెన్ జోక డీన కెర, “దావీదు రానొచి నెకుమ్చొ ఓ యోసేపు, తుచి తెర్ని జతి మరియక ఆననుక తుయి బి నాయ్. దేముడుచి సుద్ది తిలి ఆత్మనెక్కిక జా అంగి జా అస్సె.

21 జాచి పెట్టి ఏక్ పుత్తుసి జెర్మెదె. జొయ్యి జోచ ప్రజల్క జోవయించ పాపల్ తెంతొ రచ్చించువ కెరెదె. జాచి రిసొ, జోక ‘యేసు’ మెన నావ్ తీ” మెన జో దూత సంగిలన్.

22 ఈంజ ఎత్తి కిచ్చొక జర్లు జలి మెలె, దేముడు జోచ[‡] కబుర్లు సంగిలొసొచి అత్తి సంగిలి కోడు నెరవెర్లువ జంకయ్ ఇసి జలి.

23 “ఈందె, విడ్డి బోద అంగి జయెదె, చి జాచి పెట్టి ఏక్ పుత్తుసి జెర్మెదె. జోక ‘ఇమ్మానుయేలు’ మెన నావ్ తిస్సె,” జా నావ్చి అర్థమ్ కిచ్చొ మెలె, ‘దేముడు అమ్క తోడ్ తయెదె’.

24 జలె, యోసేపు నిజ తా ఉట్ట కెర, ప్రబుచొ దూత జోక సంగిలి రితి, జోచి తేర్పిక ఆనన్లన్.

25 దస్సి, జాచి పుత్తుసి నే జెర్మితె ఎదక, జాచి తెన్ బెద నిజె నాయ్, జో జెర్మితికయ్, యోసేపు జోక ‘యేసు’ మెన నావ్ తిలన్.

2

తూర్పు దేసిమ్చ పండితుల్ యేసుక చజ బక్తి కెర్లిసి

1 హేరోదు రానొ జా యూదయ ప్రదేసిమి ఏలువ కెర్తై తిలి పొది, జా ప్రదేసిమ్చి బేత్లెహేమ్ పట్టుమ్తె యేసు జెర్మిలి పిమ్మట్, ఈందె, తూర్పు దేసిమ్చ పండితుల్ సగ్ముజిన్ యెరూసలేమ్ మెలి వెల్లి పట్టుమ్తె జా కెర,

2 “యూదుల్చొ* రానొ జంక జెర్మిలొసొ కేనె అస్సె? తూర్పు పక్క జోచి సుక్కొక దెకిలమ్, చి జోక బక్తి కెరుక జా అస్సుమ్” మెన ప్రజల్క సంగితె తిల.

3 హేరోదు రానొ ఈంజ కోడు సూన కెర, జో కి, జో తెన్ యెరూసలేమ్ పట్టుమ్చ ఎత్తిజిన్ కి ‘అన్నెక్టొ రానొ జంక ఉచరెదె’ మెన బియకెర, పంబ్ర జా.

4 దేముడు నిసాన యూదుల్చ వెల్లెల పూజర్లక చి మోసె తెన్ దేముడు దిలి ఆగ్గుల్ సికడ్డన ఎత్తిజిన్క, బుకారా కెర, “క్రిస్తు కేనె జెర్మక అస్సె?” మెన పుసిలన్.

5 జేవ్, “ఈంజ యూదయ ప్రదేసిమ్చి బేత్లెహేమ్ పట్టుమ్తె జెర్మెదె.

6 ‘ఓ యూదయ ప్రదేసిమ్చి బేత్లెహేమ్ పట్టుమ్,

తుయి యూదయ ప్రదేసిమ్తె తిలి దాక్ పట్టుమ్ నెంజిన్.

కిచ్చొక మెలె, ఇస్రాయేలులు మెల

† 1:18 1:18 అప్పె తెంతొ జోవయింక ‘దేముడు’ మెన రెగుడుమెదె. ఒగ్గర్ పూర్ణమ్ తెంతొ జోక ‘యెహోవ’ మెన నావ్ తయెదె, గని యేసుచి జివతుమ్చి రిసొ రెగిడ్ల ఈంజ పున్కుమ్చ సాచులు బుల్తై తిల పొదులె, ‘యూదుల్’ మెన జో పూర్ణమ్ నిసాన ప్రజల్ జోచి నావ్ దెర్తి నాయ్. ‘యెహోవ’ మెలి నావ్చి అర్థమ్ కిచ్చొ మెలె, ‘ఎత్తి జెర్మిలొసొ, ఎత్తిక జివ్ దెత్తిసొ, కెయక తెయక తతోసా’. ‡ 1:22 1:22 ‘జోచ కబుర్లు సంగిలన’ మెలె, పూర్ణమ్ తెంతొ కక్క ప్రబు నిసాన, జోచ కబుర్లు మాన్నుల్క జేవ్ సంగితి రిసొ, జోచి ఆత్మనెక్కి జోవయింక దెయెదె.

* 2:2 2:2 ‘యూదుల్’ మెలె, ‘అంచయ్ మాన్నుల్ జతు, ఎక్కి అంకయ్ జోకర్లు’ మెన ప్రబు పూర్ణమ్ నిసాన ప్రజల్. ముక్కిమ్క ఇస్రాయేలు దేసిమి జవుల. యూదుల్తె, జా ఇస్రాయేలు దేసిమి, యేసు మాన్ను జా జెర్మన్, జా బుల్తై తిలన్. † 2:4 2:4 ‘క్రిస్తు’ మెలె, దేముడు టీచణ్ణొ దెర్కు జలొ రచ్చించువ కెర్తొసొ.

అంచ ప్రజల్క ఏలువ కెర్తొసొ తుచితె జెర్తొదె'

దేముడుచ కబుర్లు సంగిలో పూర్లుమ్చొ ఎక్కిలోచి అత్తి రెగ్గ అస్సె" మెన జబాబ్ దిల.

7 తెదొడి హేరోదు రానొ తూర్పు దేసిమి తెంతొ అయ్ల పండితుల్క గుట్టు తెన్ బుకారా కెర, జేవ్ దెకిలి సుక్కొ కెయ్ డీసిలి గే నూన కెర,

8 "తుమ్ గెచ్చ, జో బోద కేనె అస్సె గే సరిగా చజ దెక జా, అన్నె జా కెర, అంక సంగ. ఆవ్ కి గెచ్చ, జోక బక్తి కెరిందె" మెన మోసిమ్ తెన్ సంగ, జేక బేత్లెహేమ్ పట్టుమ్తె తెద్రయ్లన్.

9 జేవ్ పండితుల్ జో రానొచ కొడొ నూన కెర, బార్ జా గెతె తతికయ్, ఈందె, తూర్పు దేసిమి జేవ్ దెకిలి సుక్కొ జేవ్చి కంట అగ్గె ఇండ గెతె తా, జో బోద తిలో గేర్చి ఉప్పిరి టీవొ జలి.

10 జా సుక్కొ టీవొ జలిసి దెక కెర, ఒగ్గర్ సర్లసంతొసుమ్ జా,

11 జా గెరి పెన, మరియు అయ్యున్ తెన్ తిలో జో బోదక దెక, సెర్పు సేడ జోక జొకర, జోవయించ పెట్టెల్ ఉగ్గ కెర, బజార్, దూపుమ్, చెంగిలి వాసెన తేలు, దసచ, బపుమానుమ్క దిల.

12 బక్తి కెర్లి పిమ్మట్, "హేరోదు రానొతె అన్నె గెచ్చ నాయ్" మెన, సివ్వుతె దేముడు జేవ్క జాగర్త సంగితికయ్, జేవ్ వేర వాటు జోవయించి దేసిమి బుల, ఉట్ట గెల.

యోసేపుక ఐగుప్తు వెయిలు దేసిమి తెద్రయ్లలిసి

13 జేవ్ తూర్పు దేసిమ్చ ఉట్ట గెలి పిమ్మట్, ప్రబుచొ దూత ఎక్కిలో సివ్వు తెన్ యోసేపుక డీస కెర, "హేరోదు ఈంజొ బోదక మార గెలుక ఉచర్తయ్. జాచి రిసొ, తుయి ఉట్ట, ఈంజొ బోదక చి అయ్యున్క కడ దెరన, ఐగుప్తు దేసిమి ఉట్ట గో. ఆవ్ తుక అన్నె సంగితె ఎద

ఒత్త తా" మెన యోసేపుక జో దూత సంగితికయ్,

14 జో ఉట్ట కెర, అందరె బోదక చి అయ్యున్క కడ దెరన, ఐగుప్తు దేసిమి ఉట్ట గెచ్చ,

15 హేరోదు రానొ మొర గెతి ఎదక ఒత్త తా గెల. దేముడుచ కబుర్లు సంగిలో పూర్లుమ్చొచి అత్తి సంగిలి కొడొ నెరవెర్పువ జంకయ్ ఇసి జర్లు జలి.

"ఐగుప్తు దేసిమి తెంతొ అంచొ పుత్తుక బుకార్లయ్.", మెన సంగిలిసి.

16 తెదొడి, 'జా దీసి జా తిల పండితుల్ అంక మోసిమ్ కెర్ల' మెన హేరోదు రానొ జాన కెర, ఒగ్గర్ కోపుమ్ ఆనన, యేసుక మారుక మెన, కెయ్ జెర్మ తయెదె గే జేవ్ పండితుల్ అగ్గె సంగిల కొడొక ఉచర, బేత్లెహేమ్తె, పడ్డొ జా పట్టుమ్చి సుట్టునంతచ గావ్వొ ఎత్తితె, దొన్ని వెర్పుల్ తెంతొ మొదొల్ కెర, తొక్కి వయసుచ మున్నుబోదల్ ఎత్తిక మొరవ గెలన్.

17 ఇన్నెతెన్ కి యిర్మీయా మెలో పూర్లుమ్చొచి అత్తి దేముడు సంగిలి కోడు నెరవెర్పువ జలి.

18 "రామా మెలి పట్టుమ్చి ఎది దూరి తెంతొ, ఒగ్గర్ ఏడుకుడు జతిసి, దుకుమ్ జతిసి, నూన్ల.

జేవ్చ బోదల్ మొర గెలి రిసొ, రాహేలు ఏడ ఏడ సేంతుమ్ జయ్యె నాయ్."

యోసేపు సొంత దేసిమి అన్నె ఉట్ట అయ్లలిసి

19 హేరోదు రానొ మొర గెలి పడ్డొ, ఈందె, ప్రబుచొ దూత ఐగుప్తు దేసిమి యోసేపుక సివ్వు తెన్ అన్నె డీస కెర,

20 "తుయి ఉట్ట, బోదకచి అయ్యున్క కడ దెరన, తుమ్చి ఇస్రాయేలు దేసిమి అన్నె ఉట్ట గెచ్చ. బోదక మార గెలుక ఉచర్లొసొ మొర గెలన్" మెన సంగితికయ్,

21 జో ఉట్ట కెర, బోదకచి అయ్యన్క కడ దెరన, ఇస్త్రాయేలు దేసిమి అన్నె ఉట్ట అయ్ల.

22 జలె, హేరోదు రానొ మొర గెలి రిసొ, అప్పె జొ యాదయ ప్రదేసిమి జోచొ పుత్తుసి అర్కెలాయు ఏలువ కెర్తయ్ మెన నూస కెర, యోసేపు ఒత్త గెచ్చుక బియఁ కెర, అన్నెక్ సిన్న తెన్ ప్రబుచి అన్నెక్ కబుర్ నూస కెర,

23 గలెలయ ప్రాంతుమ్తె ఉట్ట గెచ్చు. నజరేతు గఁవ్వి జొ కెర, ఒత్త జితె తిల. ఒత్త జిలీన్ తెన్, “యేసుక ‘నజరేయుడు’ మెనుక జయెదె” మెన పూర్గుమ్ దేముడుచ కబుర్లు సంగిలనచి అత్తి జో సంగిలిసి కోడు నెరవెర్పువ జంకయ్ ఇసి జర్గు జలి.

3

యోహాను బాప్తిసుమ్ మెంతి ఉపదేసిమ్ దెతె తిలిసి (మార్కు 1:1-8; లూకా 3:1-9, 15-17; యోహా 1:19-28)

1 జొ దీసల్తె, బాప్తిసుమ్ దెతో యోహాను మెలోసొ బార్ జొ,

2 “దేముడుచి రాజిమ్ పాసి జొ అస్సె. జొకయ్ తుమ్చి పాపల్చి రిసొ దుకుమ్ జొ ఒప్పన, పాపుమ్బుద్ది ముల దాస” మెన యాదయ ప్రదేసిమ్చి బయిలె బుల బుల సొట్ట కెర్తె తిలన్.

3 జోచ కబుర్లు సంగిలో యెసయా పూర్గుమ్చొచి అత్తి ఈంజొ యోహానుచి రిసొయి దేముడు సంగిలి కోడు ఇన్నెతెన్ నెరవెర్పువ జలి.

“ఎక్కిలో అంచొ బారికి రితో జొ, అంచొ అవాడ్ రితో జొ. ప్రబు జెతికయ్ వాటు తిన్నగ కెర్లి రితి, తుమ్ ఎత్కిజిన్ బుద్ది జొ మెన,

బయిలె ప్రదేసిమి తొ కేక్ గల సొట్ట కెరెదె.”

4 ఈంజొ యోహాను ఒంటెచ రోమల్క పాలల్ గలన, చామ్క కెర్లి పట్ట నెడిమి బందన తయెదె. చిట్టల్చి ఒండె తేల్ జో కయెదె.

5 జొ దీసల్తె, యెరూసలేమ్ పట్టుమ్తెచ మాన్సుల్ కి, జొ ఒంటి యాదయ ప్రదేసిమ్చ మాన్సుల్ కి, ఒంటి యోర్దాను మెంతి గాడు పాసిచ మాన్సుల్ కి, యోహానుతె జొ కెర,

6 జేవ్ కెర్ల పాపల్ దుకుమ్ తెన్ ఒప్పన ఎదార్డుమ్ సంగ, యోర్దాను గడ్డె జోచి అత్తి బాప్తిసుమ్ నజన్తె తిల.

పరిసయ్యుల్క యోహాను గోల కెర్లిసి

7* పరిసయ్యుల్క కి, †నద్దూకయ్యుల్క కి, ఒగ్గర్జిన్ జొ బాప్తిసుమ్ నజనుక జెతిసి యోహాను దెక కెర, “అయివొచి రితి విస్సుమ్ పెట్టి తిలన, తుమ్! దేముడు కెర్లి సిచ్చ పిట్టవనుక ఉచరుక మెన తుమ్క సికణ్ణెసొ కొన్సొ?

8 తుమ్ కెర్ల పాపల్ ముల దా, చెంగిల్ బుద్దితె ఇండ, ఆత్మచి పంటో దెర.

9 పిమ్మట్, ‘అబ్రాహామ్ అమ్క అబ్బొ జయెదె, చి రిసొ దేముడు తెన్ బెద అస్సుమ్’ మెన తుమ్క తూమ్ ఉచరన, సొంత గవురుమ్ సంగనుక నాయ్. కిచ్చొక మెలె, ఇన్నెచ పత్రల్ తెన్ కి దేముడు అబ్రాహామ్చి రిసొ బోదల్క జెర్మవుక తెరె, మెన తుమ్క ఆవ్ సంగితసి.

10 ఈందె, అప్పె కి ప్రబు కురాడు వాండి కెర, రూకుక బుంది కండితి రితి, కురాడు దెర టీవొ జొ అస్సె. జలె, చెంగిల్ పంటో నే దెర్లి, ఎత్కి రూకుక కండ కెర ఆగితె గలుల” మెన, జేవ్క యోహాను సంగిలన్.

* 3:7 3:7 పరిసయ్యుల్ చి నద్దూకయ్యులు యూదుల్క ముక్కిమ్చ వెల్లెల మాన్సుల్ జవుల. ఎత్కిక వెల్లెల పూజర్లు తెన్ యూదుల్చి వెల్లి నబతె వెనుల. జేవ్ దీసల్తె ముక్కిమ్క జెవ్వి, మోసి తెన్ దేముడు దిలి ఆగ్గల్ సికడ్డన తెన్, దేముడుచి నిదానుమ్ ప్రజల్క సికడుక. † 3:7 3:7 నద్దూకయ్యులు మెలె జేవ్ దూతల్ అస్సి మెన సంవజతి నాయ్. మొర గెలన ఉటుల మెన సంవజతి నాయ్. జేవ్ కి యూదుల్ ముక్కిమ్చ ఎక్కి జటు. జేవ్ పరిసయ్యుల్ తెన్ బెద ఎదివాట్ నుటు యెసుప్రబుక పరిచ్చ కెర్ల.

11 తెదొడి, ప్రజల్క యోహాను “తుమ్ కెర్ల పావలచి రిసా తుమ్ దుకుమ్ జా ముల దెతి గుర్తుకయ్ ఆవ్ తుమ్క ఇసి పానితె బాప్తిసుమ్ దెతసి. గని, అంచి పడ్తో అన్నెక్లో అప్పె జెతయ్. జో అంచి కంట వెల్లో, జోక అదికారుమ్ ఒగ్గరి. జోచ జోడ్లు వయుక జెలకు, ఆవ్ విలువ నాయ్. జో, †దేముడుచి సుద్ది తిలి ఆత్మ తెన్ చి ఆగి తెన్ తుమ్క బాప్తిసుమ్ దెయెదె.

12 జోచి పూన్తి సూపు జోచి అత్తి అస్సె, చి జోచి కెల్లి సుబ్రుమ్ కెర, జోక కామ్క జెతికయ్ గోదుమ్ పంటొ గుడ్డ కెర కొట్టుతె కుడవనెదె, చి కో విజవుక నెతిర్లి ఆగితె పోటు గల, డయ గెలెదె” మెన సంగిలన్.

యేసు బాప్తిసుమ్ నజన్లసి
(మార్కు 1:9-11; లూకా 3:21-22)

13 జా సమయుమి, ఈంజ బాప్తిసుమ్ నజనుక మెన యేసు గలిలయ ప్రాంతుమ్ తెంతొ ఉట్ట జా కెర, యోర్దాను గడ్డె యోహానుతె అయ్లన్.

14 యోహాను జోక దెక కెర, “ఆవ్ తుచి అత్తి బాప్తిసుమ్ నజనుక అస్సె. తుయి కిచ్చొక అంచితె బాప్తిసుమ్ నజనుక జెతసి? బెదె నాయ్” మెన యేసుక సంగితికయ్,

15 యేసు “అల్లె, అప్పెచి మట్టుక ఇసి జర్గు జవున్. దేముడుచి నీతి ఎత్తి ఇసి నెరవెర్లుప కెరుక అమ్క చెంగిలి” మెన యేసు జబాబ్ దెతికయ్, యోహాను జోక బాప్తిసుమ్ దిలో.

16 యేసు ఈంజ బాప్తిసుమ్ నజన్ల బేగి, గడ్డె తెంతొ బార్ జతికయ్, ఆదె, పరలోకుమ్ ఉగ్గి జలి, చి దేముడుచి సుద్ది తిలి ఆత్మ పార్వ పిట్టచి రితి జా ఉత్త్ర జా కెర, యేసుచి ఉప్పిరి వెసిలిన్ జో దెకిలో.

17 “ఈందె, ఈంజొయి అంచొ ప్రేమ తిలో పూత్తు. ఇనాచి రిసా అంక సర్లసంతోసుమ్” మెన, ఇసి పరలోకుమ్ తెంతొ సంగిలిన్చి అవాడ్ అయ్లి.

4

యేసుక సయ్తాన్చి అత్తి పరిచ్చ జలిసి
(మార్కు 1:12-13; లూకా 4:1-13)

1 తెదొడి సయ్తాన్చి అత్తి జోచి పరిచ్చ కెరవనుక దేముడుచి సుద్ది తిలి ఆత్మ, జోక కో నెంజిలి డొంగై కడ నిలన్.

2 జలె, దొన్ని విస్సా పొదులు, దొన్ని విస్సా అందర్లు యేసు చువ్వె తతికయ్, జోక చూ కెర్తికయ్,

3 పాపుమ్ కెరవుక ఉచర సయ్తాన్ జోతె జా కెర, “తుయి దేముడుచొ పుత్తుసి జలె, ఈంజేవ్ పత్రల్ పోడియె జతి రితి సంగు” మెలన్.

4 తెదొడి యేసు,
“ ‘ఎక్కి పోడియె తెన్ నాయ్, గని దేముడుచి చొండి తెంతొ జెతి ఎత్తి కోడు తెన్ మాన్సుల్ జింక అస్సె’

మెన దేముడుచి కోడుతె రెగ్ల అస్సె” మెలన్.

5 తెదొడి సయ్తాన్ యేసుక దేముడుచి గుడి తిలి యెరూసలేమ్ పట్టుమ్తె కడ నా కెర, జా దేముడుచి గుడితెచి వెన్గొపుచి ఉప్పిరి జోక టీవొ కెర,

6 “తుయి దేముడుచొ పుత్తుసి జలె, ఎట్టొతో డేవు.

‘తుక ప్రమాదుమ్ నే జతి రితి, జోచ దూతల్క దేముడు ఆడ్ర దా తెద్రయెదె’,

‘తుచ చట్టొ పత్రె నే లయితి రితి, జేవ్ దూతల్ జోవయించ అత్తో చంపొ కెర, తుక ఉక్కులనుల,’

† 3:11 3:11 ‘దేముడుచి సుద్ది తిలి ఆత్మ’ మెలె, యోహాన్ దేముడు అబ్బొన్చి కి యేసు దేముడు పుత్తున్చి కి జయెది.

మెన దేముడుచి కోడుతె రెగ్గ అస్సె” మెన యేసుక సంగిలన్.

7 సయ్తాన్ దస్సి సంగితికయ్, యేసు జోక

“ ప్రబు జలో తుమ్చో దేముడుక

పరిచ్చ కెరుక నాయ్’

మెన అన్నెక్ టాన్తె రెగ్గ అస్సె” మెన సయ్తాన్క సంగిలన్.

8 పడ్డో అన్నె, ఒగ్గర్ డోంక్ తిలి ఏక్ డొంగుర్ ఉప్పిరి సయ్తాన్ యేసుక కడ నా కెర, ఈంజ లోకుమ్చ రాజిమ్లు ఎత్తి, జేవ్చి విలువ ఎత్తి జోక దెకవ కెర,

9 “తుయి సెర్ను నేడ అంక జొకరైగిన, ఈంజ ఎత్తి తుక దెయిందె” మెన యేసుక సంగిలన్.

10 యేసు జోక, “సయ్తాన్, తుయి ఉట్ట గో. కిచ్చొక మెలె,

‘ప్రబు జలో తుమ్చో దేముడుకయ్ జొకర,

జో ఎక్కిలొచి నేవ తుమ్ కెరుక అస్సె’

మెన రెగ్గ అస్సె.” మెన సంగిలన్.

11 తెదొడి సయ్తాన్ జోక ముల దా ఉట్ట గెలన్, చి ఈందె దేముడుచ దూత్ర్ల జా కెర, యేసుక సావైచన కెర, సుక్కుమ్ కెర్ల.

యేసు గలిలయ ప్రాంతుమ్తె బన జలిసి

(మార్కు 1:14-15; లూకా 4:14-15)

12 ఒత్త తెంతో ‘బాప్తిసుమ్ దెతో యోహానుక జేలి కెర జేల్తె గల అస్సి’ మెన యేసు నూన కెర, ఉత్తర పక్క గలిలయ ప్రాంతుమ్తె బుల ఉట్ట గెచ్చ కెర,

13 ఒత్తచి నజరేతు మెలి జో వడ్డిలి గావ్ తెంతో ముల దా కెర, జెబులూను చి నష్టాలి మెల పూర్గుల్చ నవ్వొ దిలి ప్రాంతుమ్తెచి సముద్రుమ్చి పాసిచి కపెర్నహూమ్ మెంతి పట్నుమ్తె ఉట్ట జా జితె తిలన్.

14 దేముడుచ కబుర్లు సంగిలో యెసయా పూర్గుమ్చొచి అత్తి జో సంగిలి కోడు ఇసి నెరవెర్నువ జలి.

15 “జెబులూను ప్రదేసిమి, నష్టాలి ప్రదేసిమి,

యోర్దాను గాడు ఒత్తల్తో తిలి వెల్లి సముద్రుమ్చి పక్క,

పూర్గుమ్ యూదుల్ నెంజిలన జితె తిలి గలిలయ ప్రాంతుమ్తె తిల పైజల్

16 అగ్గె అందర్బుద్ది తెన్ తిలె కి, అప్పె వెల్లి ఉజిడి దెక అస్తి.

జేవ్ పాపుమ్ తెన్ మొర గెల రిత జా తిలె కి,

జోవయింక రాత్ పాయిలి రితి జా, పరలోకుమ్చి ఉజిడి జోవయింక డీన అస్సి”

మెన సంగిలి కోడు.

17 జా దీసి తెంతో, జా ప్రాంతుమ్చ పైజల్క యేసు బోదన కెర్రిసి కిచ్చొ మెలె,

“పరలోకుమ్చి రాజిమ్ ఇన్నె పాచ జా అస్సె. జాచి రిసా, తుమ్చ పాపల్చి రిసా దుకుమ్ జా, పాపుమ్బుద్ది ముల దాన” మెన బోదన కెర్తె తిలో.

యేసు తొలితోవ సిస్సుల్క బుకార్లిసి (మార్కు 1:16-20; లూకా 5:1-11)

18 యేసు జా గలిలయ సముద్రుమ్చి గట్టుతె ఇండితె తా, ‘పేతురు’ మెన ఆసిమ్ నావ్ తిలో సీమోను, చి జోచొ అంద్రెయ మెలో బావొసి దొగులక దెకిలన్. జేవ్ దొగుల సముద్రుమ్తె వల గల్తె తిల. జేవ్ జాలర్లు.

19 జలె, జోవయింక దెక కెర, “జలె, తుమ్ అంచి పట్టి జా, చి మాన్సుల్ అంక నంపజతి రిసా తుమ్ జోవయింక అంచితె కడ ఆన్త జాలర్లు జతి రితి, తుమ్క ఆవ్ కెరిందె” మెన సంగిలన్.

20 ఇసి సంగ బుకార్లి బేగి, జేవ్ జోవయించ వలల్ ముల దా కెర, జోచి పట్టి గెచ్చ, జో తెన్ బులుక దెర్ల.

21 ఒత్త తెంతో ఇదిల్ దూరి గెచ్చ, యాకోబుచి యోహాను మెల అన్నె

దొంగుల అన్యోబాహొక యేసు దెక జేవ్ క బుకార్లన్. జేవ్ దొంగుల జెబెదయ మెలో అబ్బొసి తెన్ జోవయించి దొనితె వెన తా, జోవయించ వలల్ చెంగిల్ కెర్తె తిల.

22 యేసు బుకార్లి బేగి, జోవయించొ అబ్బొసిక చి దొనిక ముల దా కెర, జోచ సిస్సుల్ జతి రితి జోచి పట్టి గెల.

యేసు మాన్సుల్క చెంగిల్ కెర్లిసి

23 యేసు జా ఒండి గలిలయ ప్రాంతుమ్తె బుల బుల, యూదుల్చ ఒత్తచ నబ గెరలె గెచ్చు గెచ్చు, “పరలోకుమ్చి రాజిమ్ ఇత్తల్ పాచ జా అస్సె” మెన సుబుమ్ కబుర్ సంగ, ప్రెజల్క, కిచ్చొ జబ్బు తిలె కి, జబ్బులు బాదల్ ఎత్తి గెచ్చయలన్.

24 ఒండి సిరియ దేసిమ్చ ఎత్తిజిన్ జోచి రిసా నూన్ల, చి రగరగాల్చ జబ్బుల్ తిలనక, జొర్జొల్ నొప్పుల్ తిలనక, బూతల్ దెర్లనక, మోర్చల్క, చి అత్తో చట్టొ కదుల్ కెరుక నెత్తిర్లనక, ఇనచ ఎత్తిక యేసుతె కడ ఆన్తికయ్, జోవయింక చెంగిల్ కెర్లన్.

25 ఈంజ ఎత్తిచి రిసా, గలిలయ ప్రాంతుమ్ తెంతొ, దెకపొలి ప్రాంతుమ్ తెంతొ, యెరూసలేమ్ పట్టుమ్ తెంతొ, యూదయ ప్రదేసిమ్ తెంతొ, పడ్తోక యోర్దాసు గాడు ఒత్తల్తో తెంతొ, ఒగ్గర్జిన్ మాన్సుల్ జట్లు తెన్ జోచి పట్టి గెల.

5

యేసు మెట్టయ్ ఉపీర్ కెర్లి బోదన (లూకా 6:20-23)

1 యేసు జేవ్ ఒగ్గర్జిన్ పట్టి అయలనక దెక కెర, ఏక్ మెట్టయ్ వెగ వెసితికయ్, జోచ సిస్సుల్ జోతె జెతికయ్
2 జో చొండి పుటవ జేవ్ ఎత్తిజిన్క బోదన కెరుక దెర్లన్.

3 “అమ్ ఆత్మతె ఎద్గరె తొక్కిచ నుదల్ మెన కో చిననుల గే, జోవయింక చెంగిలి. కిచ్చొక మెలె, దన మాన్సుల్కయ్ పరలోకుమ్చి రాజిమ్తె వాట తయెదె.

4 “దుకుమ్ సేడ్డనక చెంగిలి, కిచ్చొక మెలె, దేముడు జోవయింక బురియవెదె.

5 “సొంత గవురుమ్ నే ఉచరంతనక చెంగిలి. కిచ్చొక మెలె, *జేవ్ ఈంజ బూలోకుమ్తె ఏలువ కెరుల.

6 “చూ తాన్ గెతె ఎదక మాన్సుల్ కీసి అన్నిమ్క పితిన్క ఆస జవుల గే, దస్సి, పున్నిమ్ ఇండుక కో ఎక్కి ఆస జవుల గే, జోవయింక చెంగిలి. కిచ్చొక మెలె, దేముడు జోవయింక పున్నిమ్ దా సర్దనంతొసుమ్ కెరెదె.

7 “మాన్సుల్క కన్కారుమ్ దెకితనక చెంగిలి. కిచ్చొక మెలె, దేముడు జోవయింక కన్కారుమ్ దెకెదె.

8 “పెట్టి సుద్ది తతనక చెంగిలి. కిచ్చొక మెలె, జేవ్ దేముడుక దెకుల.

9 “కోపుమ్ జలనక కో సేంతుమ్ కెర్తన జవుల గే, జోవయింక చెంగిలి. కిచ్చొక మెలె, దేముడుచ పుత్తర్పులు, మెన జోవయింక సంగుక జయెదె.”

10 “సత్తిమ్ ఇండితి రిసా కో అన్నె మాన్సుల్చి అత్తి అల్లర్లు సిచ్చులు సేడుల గే, జోవయింక చెంగిలి. కిచ్చొక మెలె, దన మాన్సుల్కయ్ పరలోకుమ్చి రాజిమ్తె వాట తయెదె.”

11 “తుమ్ అంచ మాన్సుల్ జలి రిసా తుమ్క మాన్సుల్ ఆరిక దూసుప కెర్లెగిన, అల్లర్ కెర్లెగిన, ఎత్తి రగల్ అబద్దుమ్ సంగిలెగిన, తుమ్క చెంగిలి.

12 జేవ్ దస్సి కెర్లె కి, సర్దనంతొసుమ్ తెన్ తా. కిచ్చొక మెలె, పరలోకుమ్తె తుమ్క వెల్లి బవుమానుమ్ దొర్కు జయెదె. పూర్లుమ్ కి, దేముడుచ కబుర్లు సంగిల మాన్సుల్ కి జేవ్ దన అల్లర్ కెర్లె.”

* 5:5 5:5 ‘ఆకర్క’ మెలె, ఈంజ లోకుమ్ నొవర్ జతి రితి ప్రబు మార్పుప కెర్లి పొదిక.

లోన్క చి ఉజిడిక టాలి
(మార్కు 9:50; 4:21; లూకా
14:34-35; 8:16)

13 “తుమ్ ఈంజ లోకుమ్క లోన్చి రితి జస్సె. గని జాగర్త తెన్ తా, లోన్చి కారు గెలెగిన, జా లోన్ కిసి అన్నె కారు జయెదె? అన్నె కిచ్చొక కి కామ్క నే జయె. ఎత్తి వెంట గెలుక జయెదె. దస్సి వెంట గెలెగిన, మాన్సుల్ నుడుక జయెదె.”

14 “తుమ్ ఈంజ లోకుమ్క ఉజిడి జా అస్సున్. ఏక్ పట్టుమ్ మెట్టచి ఉప్పిరి తిలెగిన, జా పట్టుమ్క లుంకడుక నెంజె.

15 దస్సి, మాన్సుల్ దీవు లంబడ తిలెగిన, జా దీవుక నాడి గట్ట డంకితి నాయ్, గని దీవు కంబుమ్తె టీవుల, చి జా గెరి తిలన ఎత్తిక జా ఉజిడి కామ్క జయెదె.

16 తుమ్చి తెన్ కి దస్సి తంక అస్సె. తుమ్ చెంగిల్ బుద్ది ఇండితిసి మాన్సుల్ దెక, పరలోకుమ్ తిలో అబ్బొది జలో దేముడుక గవురుమ్ దెతు మెన, తుమ్చి పెట్టి తిలి ఉజిడి మాన్సుల్చి ముక్కె లగితి రితి తుమ్ ఇండ.”

పూర్ణమ్ దిల ఆగ్గుల్చి రిసా యేసు సంగిలి బోదన

17 “మోసే పూర్ణమ్చొచి అత్తి దేముడు రెగ్గయ్ల ఆగ్గుల్ జలెకు, పూర్ణల్చి అత్తి సంగిల దేముడుచ కబుర్లు జలెకు, పెట గెలుక ఆవ్ అయ్లయ్ మెన తుమ్ ఉచర నాయ్. జా ఎత్తి నెరవెర్చుప కెరుకయ్ ఆవ్ అయ్లయ్, గని పెట గెలుక మెన తుమ్ ఉచర నాయ్.

18 కిచ్చొక మెలె, తుమ్క ఆవ్ కిచ్చొ కచితుమ్ సంగితసి మెలె, ఆగాసుమ్ బుయి పాడ్ జా గెతె ఎదక, మోసే పూర్ణమ్చొచి అత్తి రెగిడ్డిసి దేముడుచ ఆగ్గుల్చి కొడొ పూర్తి నెరవెర్చుప జతె

ఎదక, జేవ్తె ఎక్కి కోడు కి ఎక్కి కామ కి పిట్టె నాయ్.

19 జాచి రిసా, ఈంజ ఆగ్గుల్ రితి కెర్లిన్క కో విలువ దెకితి నాయ్ గే, చి విలువ నే దెకితి రితి అన్నె మాన్సుల్క సికడుల గే, పరలోకుమ్చి రాజిమ్తె జో దాకు జవుల. గని కో జేవ్ కొడొ రితి నిదానుమ్ కెర, దస్సి నిదానుమ్ కెరుక అన్నె మాన్సుల్క సికడుల గే, జెవ్వి పరలోకుమ్చి రాజిమ్తె గవురుమ్ జవుల.

20 తుమ్క ఆవ్ కిచ్చొ మెంతసి మెలె, మోసే తెన్ దేముడు దిలి ఆగ్గుల్ సికడ్డన చి పరిసయ్యుల్, కెర్లి కంట తుమ్ పున్నిమ్ ఇండిలెకయ్ నెంజిలె, తుమ్కచితుమ్ పరలోకుమ్చి రాజిమ్తె బెదున్ నాయ్.”

నీతిచి రిసా యేసు సంగిలి బోదన
21 ‘నరు అత్య కెర నాయ్. నరు అత్య కో కెర్లె, సిచ్చ జంక అస్సె’ మెన పూర్ణమ్చక సంగిలిసి తుమ్ సూన్తను.

22 ఆవ్, జలె, తుమ్క అన్నె కిచ్చొ సంగితసి మెలె, కక్క జలెకు కో జలెకు కోపుమ్ జలె, జో కోపుమ్ జలో సిచ్చ జతి తప్పు కెర అస్సె, కో జలెకు అన్నెక్కోక నిస్సారుమ్ సంగిలె, వెల్లి నబచి అత్తిచి సిచ్చ జతి తప్పు కెర అస్సె. కో జలెకు అన్నెక్కోక ‘తుయి గడ్డు’ మెలి ఎదిలి కోడు సంగిలె, వెల్లి ఆగిచి గొయిచి సిచ్చ జతి తప్పు కెర అస్సె.

23 జలె, తుమ్చితె కో గే కిచ్చొగె అర్పితుమ్ దెంక మొదొల్ కెర తిలె జవున్, ఈంజో మాన్సు కిచ్చొగె కెర్లిన్చి రిసా అన్నెక్కో ఇనాచి ఉప్పిరి కోపుమ్ తెన్ అస్సె మెన ఈంజో ఏదన్త కెర్లిగిన,

24 ఈంజో అర్పితుమ్ దెతిసి బలి దెతి టాన్తె నే దెతె, పాసి ముల దా కెర, తొలితో గెచ్చ, జో అన్నెక్కో తెన్ సేంతుమ్

† 5:18 5:18 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రెగ్గయ్లి ఆగ్గుల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పావ్ పున్తకుమ్తె రెగ్గయ్ జా అస్సె. ఈంజ దెకవుక మెన కుపియె బాసతె నొయ ప్రమానుమ్తె మోసే పూర్ణమ్చొచి అత్తి రెగిడ్డి దేముడుచ ఆగ్గుల్ మెన రర్జవ అస్సె.

కెరన, అన్నె జా కెర, ఇన్నెచి అర్చితుమ్ ఈంజో దెవును.

25 “తుమ్చితె ఎక్కిలోక కో గే నేరిమ్ వయడ తిలెగిన, తుమ్ బెద గెతె తా తీర్పు కెర్తి గెరి నే పాచితె అగ్గె, జో నేరిమ్ వయడ్తో మాన్సు తెన్, నేరిమ్ జలోసా బేగి సేంతుమ్ జంక అస్సె. నెంజెలె నేరిమ్ వయడ్తోసా తుమ్క తీర్పు కెర్తోసాతె సార్పు కెర్తె, జో తీర్పు కెర్తోసా తుమ్క జమాన్లుచి అత్తి సార్పు కెర్తె, జో జమాన్లు తుమ్క జేల్తె గల దెయెదె.

26 దస్సి, తుమ్క ఆవ్ కిచ్చొ కచితుమ్ సంగితిసి మెలె, తుమ్చితె కో సిచ్చు జవుల గే, ఆకర్చి కాసు ఎద కి పూర్తి తీర్పువ కెర్తె ఎదక, తుమ్క ములుక నెంజె.”

లంజెచి రిసాచి తీర్పు

27 “పడ్డో ‘తుమ్ లంజెకమొ కెర నాయ్’ మెన సంగిలి కోడు తుమ్ అగ్గె తెంతో సూన అస్సున్.

28 గని ఆవ్ తుమ్క సంగితిసి కిచ్చొ మెలె, ఏక్ తేర్బోదక దస్సి దెకుక కి కో దెకెదె గే, ఎక్కి దెకిలి రిసా, జోచి మెన్నుతె జా తెన్ లంజె కెర అస్సె.”

29 “జలె, తుమ్చితె కచి గే ఉజిల్ అంకి జవున్ జోక పాపుమ్ కెరవ తిలెగిన, పాపుమ్ నే కెర్తి రిసా, జో జా అంకి కడ వెంట గెలి రితి జవున్. జోవయించ ఆగ్గెతె తత్తన ఎత్తి తెన్ ఒండొయి మాన్సు వెల్లి ఆగి గొయ్తె గలి జతి కంట, జోచి ఆగ్గెతె తత్తనతె ఎక్కి జవున్ పిట్ట గెలి రితి జలె, జోక చెంగిలి.

30 దస్సి, తుమ్చితె ఎక్కిలోచొ ఉజిల్ ఆతు జవున్ జోక పాపుమ్ కెరవ తిలెగిన, జా దీసి తెంతో అన్నె దస్సి పాపుమ్ నే కెర్తి రిసా, జో ఆతు కండ గెలి రితి జా, జోచి తెంతో వెంట గెలి రితి జవున్. కిచ్చొక మెలె, జోచ ఆగ్గెతె తిల వాటల్ ఎత్తి తెన్

ఒండొయి మాన్సు వెల్లి ఆగి గొయ్తె గలి జతి కంట, జోచ ఆగ్గెతె తత్తన ఎక్కి ఆతు పిట్ట గెలి రితి జలె, జోక చెంగిలి.”

పెండ్లి జా ములవులి జలసచి రిసాచి తీర్పు

31 ‘కో జలెకు జోచి తేర్చిక ముల దెయెదె గే, జో జాక ముల దెంక మెన ఏక్ కాగుమ్ రెర్ల దెంక అస్సె’ మెన పూర్లుమ్ తెంతో సంగిలి కోడు అస్సె.

32 గని ఆవ్ తుమ్క కిచ్చొ మెన సంగితిసి మెలె, జా తేర్చి లంజె జలిన్క పిట్టవ, కో జలెకు తేర్చిక ముల దెయెదె గే, జొయ్యి జాక లంజె కెర్తయ్. అన్నె, మున్నున్ ముల దిలి తేర్బోదక పెండ్లి జతోసా కో జలెకు, లంజె జతయ్.

అప్పిడ్డిన్చి రిసాచి తీర్పు

(మత్త 19:9; మార్కు 10:11-12; లూకా 16:18)

33 “అన్నె, ‘ఆరిక అప్పుడుక నాయ్, గని కిచ్చొ జవున్ కెర్తి రిసా కో గే ప్రమానుమ్ తిలెగిన, †ప్రబుక సత్తిమ్ కెర్తి రిసా జో మాన్సు జో సంగిలిసి జర్లు కెరుక అస్సె’ మెన పూర్లుల్క సంగిలి కోడు తుమ్ సూన అస్సున్.

34 గని ఆవ్ తుమ్క సంగితిసి కిచ్చొ మెలె, ఎద్దె ఒట్టు గలన్క నాయ్. ‘పరలోకుమ్ సాచి’ మెన జవున్ ఒట్టు గల నాయ్. కిచ్చొక మెలె, జా †ఎత్తి అదికారుమ్ తిలొ దేముడుచి సిజాసనుమ్.

35 ‘బుయ్చి సాచి’ మెన జవున్, ఒట్టు గలన్క నాయ్. కిచ్చొక మెలె, జా దేముడు సుదితి పొడ్తో. అన్నె, ‘యెరూసలేమ్ పట్టుమ్ సాచి’ మెన జవున్, ఒట్టు గలన్క నాయ్. కిచ్చొక

† 5:33 5:33 ‘ప్రబు’ మెలె కి, ‘దేముడు’ మెలె కి, ‘పరలోకుమ్చొ రానొ జలో ప్రబు’ మెలె కి, ఎక్కిలోచి రిసా సంగితయ్. జేవ్ తిన్ని ఎక్కిలోక తిన్ని నవ్వొ జయెదె.

§ 5:34 5:34 ‘ప్రబు’ మెలె కి, ‘దేముడు’ మెలె కి, ‘పరలోకుమ్చొ రానొ జలో ప్రబు’ మెలె కి, ఎక్కిలోచి రిసా సంగితయ్. జేవ్ తిన్ని ఎక్కిలోక తిన్ని నవ్వొ జయెదె.

మెలె, *జా పరలోకుమచొ రానొ జలో దేముడుచి గుడిక నిసాన్ల పట్టుమ్.

36 అన్నె, 'బోడిచి ఒటు జవున్' మెననుక నాయ్. కిచ్చొక మెలె, ఎక్కి సెండి వాడొ కి నీడి జతి రితి జలెకు, చొక్కిల్ జతి రితి జలెకు మార్పుప కెరుక తూమ్ నెతుర్పు.

37 జలె, తుమ్ 'ఎఁ ఎఁ' మెనుక అస్సె మెలెగిన, 'ఎఁ ఎఁ' మెన. తుమ్ 'నాయ్' మెనుక అస్సె మెలెగిన, ఎక్కి 'నాయ్' మెన. ఇన్నెక జీన్ తిన్ నయ్ తాన్ తెంతొయ్ జతయి."

అల్లర్ కెర్తెన్చి రిసాచి తీర్పు
(లూకా 6:29-30)

38 'ఏక్ మాన్సుచి అంకి జవున్ అన్నెక్లో కోపుమక కడ్డెగిన, జో కడ్డెసాచి అంకి కి జో అంకి గెలో మాన్సు గెచ్చు కడుక అస్సె. అన్నె, ఏక్ మాన్సుచొ దాంతు అన్నెక్లో పెట బగయ్ లెగిన, ఈంజొ కి జోచి దాంతు పెట బగవ గెలుక అస్సె' మెన పూర్లుమ్ సంగిలి కోడు తుమ్ నూన అస్సెన్.

39 జలె, ఆచ్ తుమ్క కిచ్చొ సంగితిసి మెలె, తుమ్క అల్లర్ కెర్తెసొక తుమ్ అల్లర్ కెర్క నాయ్. మూర్కుడు జవున్ తుమ్చితె ఎక్కిలోక ఉజలె గలి జవున్ పెట్టెగిన, దెబ్బ కయ్ లొసా తుక్లె తా, జోచి డెబ్బి గలి కి జో అన్నెక్లో అన్నె పెటితి రితి, జోచి వక్క పస్లవుక అస్సె.

40 "అన్నె దస్సి, తుమ్చితె ఎక్కిలోక కో జలెకు తీర్పు కెర్తి గేరెతె కడన, ఇనెతె సొక్క నజిలె, ఈంజొ ఇనాచి కోటు కి దా గెల్పు.

41 కో జలెకు తుమ్చితె ఎక్కిలోక 'ఏక్ మయిలు దూరి బెద జె' మెన బలవంతుమ్ కెర్తెగిన, జో తెన్ ఈంజొ దొన్ని మయిలు దూరి బెద గెస్సు.

* 5:35 5:35 'ప్రబు' మెలె కి, 'ఎత్తి అదికారుమ్ తిలొ దేముడు' మెలె కి, 'పరలోకుమచొ రానొ జలో ప్రబు' మెలె కి, ఎక్కిలోచి రిసా సంగితయ్. జేవ్ తిన్ని ఎక్కిలోక తిన్ని నవ్వు జయిదె. † 5:46 5:46 'సిస్టు' మెలె, జా దేసిమక అక్కమించువ కెర్తి రోమ్ దేసిమచి ప్రబుతుమచి వాట డబ్బుల్. జా ప్రబుతుమచి నావ్ తెన్ వన్ను నజితనక యూదుల్ నిస్కారుమ్ దెకుల.

42 కో జలెకు తుమ్చితె ఎక్కిలోతె కిచ్చొ జవున్ నజిలె, దెంక. అన్నె, కో జలెకు తుమ్చితె ఎక్కిలోతె బదుల్ నజిలె, తుక నే దెయిండ్ మెనుక నాయ్, దెంకయి."

విరోదుమ్ సుదల్క ప్రేమ కెర్తెన్చి రిసాచి తీర్పు
(లూకా 6:27-28,32-36)

43 "అన్నె, 'తుమ్చి తెన్ బెదితనక ప్రేమ కెర' మెన, 'తుమ్క విరోదుమ్ జలనచి ఉప్పిరి విరోదుమ్ తెన్ తా' మెన సంగిలిసి నూన అస్సెన్.

44 గని ఆచ్ తుమ్క సంగితిసి కిచ్చొ మెలె, తుమ్క విరోదుమ్ జలనక ప్రేమ కెర. తుమ్క అల్లర్ కెర్తనచి రిసా 'చెంగిల్ జతు' మెన ప్రార్దన కెర్తె తా.

45 తుమ్ ఇసి కెర్తెగిన, తుమ్చొ పరలోకుమతె తిలొ దేముడు జలొ అబ్బొన్చ పుత్తర్లు జలదు మెన డీసెదె. కిచ్చొక మెలె, గార్ సుదల్క కి చెంగిల్ సుదల్క కి రోజుక జో పొద్దు బార్ కెర్తయ్. సత్తిమ్ ఇండితనచి రిసా కి, పాపుమ్ ఇండితనచి రిసా కి పాని పెటయ్ తయ్.

46 ఎక్కి తుమ్క ప్రేమ కెర్తనకయ్ తుమ్ ప్రేమ కెర్తెగిన, తుమ్క కిచ్చొ పున్నిమ్ జా? † సిస్టు నజితన కి దస్సి కెరుల.

47 ఎక్కి తుమ్చ సొంత మాన్సుల్క ముద్దు కెర్తె, గని వేర మాన్సుల్క నాయ్ మెలె, మాములుమ్ మాన్సుల్ కెర్తెసిచి కంట జా కిచ్చొ జిన్నిసి! దేముడుక నేన్ల మాన్సులి దస్సి కెరుల.

48 తుమ్, జలె, నూన. పరలోకుమ్ తిలొ అబ్బొసి జలొ దేముడు కిసి ప్రేమక పూర్తి అస్సె గే, తుమ్ కి దస్సి ప్రేమక పూర్తి జా తంక అస్సె."

6

దర్మము కిచ్చొ బుద్ధి తెన్ దెంక గే సికణ్ణిసి

(లూకా 11:2-4)

1 “మాన్సుల్చి మొక్కె గవురుమ్ ఆనన్తి రితి తుమ్చ నీతికమొ కెర నాయ్. మాన్సుల్చి గవురుమ్ ఆనన్తి రిసా కెర తిలెగిన, తుమ్చొ పరలోకుమ్ తిలో దేముడు జలో అబ్బొదెతె బవుమానుమ్ తుమ్క దొర్కు జయె నాయ్.

2 జాచి రిసా, తుమ్ దర్మమ్ దెంక జలె, నప్పిర్ బజయ్లి రితి జా మాన్సుల్చి మొక్కె గవురుమ్ జతి రిసా దాస నాయ్. కిచ్చొక మెలె, మాన్సుల్ గవురుమ్ దెతి రిసా ఉప్రమెన్సుచొ మాన్సుల్ సబ గెరలె జవున్, వీదులె జవున్, దస్సి, ఎత్కిజన్ దెకితి రితి, నప్పిర్ బజవ కెర దెతతి. దస్సి గవురుమ్ ఆనన్తనచి రిసా ఆవ్ తుమ్క కిచ్చొ కచితుమ్ సంగితసి మెలె, జేవ్ ఈంజయి లోకుమెతె జోవయించి బవుమానుమ్ నజన గెల అస్తి.”

3 “తుమ్, జలె, దర్మమ్ దెతె పొది, తుమ్చి దర్మమ్ గుట్టు తెన్ తతి రితి, తుమ్చొ ఉజిల్ ఆతు తెన్ దర్మమ్ దిలె, తుమ్చొ డెబ్బొ ఆతుక నేన్తె నే జాన్తి రితి దాస.

4 దస్సి తుమ్ దిలదు మెలె, అన్నె కోయి నేన్లె కి, తుమ్చొ దేముడు అబ్బొసి దెక, తుమ్క బవుమానుమ్ దెయెదె.”

ప్రార్థన కెరుక సికణ్ణిసి
(లూకా 11:1-4)

5 “పడ్డె, తుమ్ ప్రార్థన కెర్తి పొది, ఉప్రమెన్సుచొ మాన్సుల్చ రిత జా నాయ్. దస మాన్సుల్ సొంత గవురుమ్ ఆనన్తి రితి, మాన్సుల్ దెకుత్ మెన, సబ గెరలె, వీదులె టీవొ జా ప్రార్థన కెరుక ఓజ జా అస్తి. తుమ్క కచితుమ్ కిచ్చొ సంగితసి మెలె, జేవ్ జోవయించి బవుమానుమ్ నజన గెల అస్తి.

6 దస్సి తుమ్ ప్రార్థన కెరుక జలె, మాన్సుల్ నే దెకితి రితి, గని తుమ్చి గదితె పెన, కెప్పి డంకన, నే డీనయ్ జతో తుమ్చొ దేముడు అబ్బొన్క ప్రార్థన కెర. మాన్సుల్ నే దెకితిసి కి జో అబ్బొసి జలో దేముడు దెకితయ్, తుమ్ ప్రార్థన కెర్తిసి జో జానన, తుమ్క బవుమానుమ్ దెయెదె.

7 పడ్డె, తుమ్ ప్రార్థన కెర్తి పొది, దేముడుక నేన్ల మాన్సుల్ కెర్తి రితి పొన. మెలె, కామ్క నెంజిత కొడెచి ఉప్పిరి కొడె లట్టబా నాయ్. కిచ్చొక మెలె, దేముడుక నేన్ల మాన్సుల్ కిచ్చొ ఉచర్తతి మెలె, ‘ఒగ్గర్ ఒగ్గర్ కొడె సంగిలె దేముడు అమ్చ ప్రార్థనల్ మెన్సెదె’ మెన ఆరిక ఉచర్తతి.

8 తుమ్ జోవయించి రితి జా నాయ్. తుమ్ దేముడు అబ్బొన్తె నే నజితె అగ్గె, తుమ్క కిచ్చొ కామ్క జెయెదె గే జో జాన్సె.”

9 “జాకయ్, తుమ్ ఇసి ప్రార్థన కెర.

ఓ పరలోకుమ్ తిలో అమ్చొ దేముడు జలో అబ్బొ,

తుచి నావ్ గవురుమ్ జవున్.

10 తుచి రాజిమ్ అమ్చి తెన్ జెవును. తుచి ఇన్సుమ్ రితి పరలోకుమెతె కిసి కెర్తతి గే,

ఈంజ లోకుమెతె కి ఆమ్ కెరుక మెన, అమ్క దయ కెర సికడు.

11 అమ్క సరిపుచుప జతి అన్నిమ్ అమ్క రోజుక దె.

12 పడ్డె, అమ్క తప్పు కెర్ల మాన్సుల్క ఆమ్ కెర్తి చెమించుప కెర అస్సుమ్ గే, ఆమ్ కెర్ల తప్పుల్ తుయి అమ్క చెమించుప కెరు.

13 పడ్డె, అమ్ పాపుమ్ నే కెర్తి రితి, నయ్తాన్ కెరయ్తిసి తెంతొ అమ్క పిట్టవు, అన్నె, నయ్తాన్ కెర్ల అల్లర్ తెంతొ కి అమ్క పిట్టవు.”

14 “కిచ్చొక మెలె, కో కో తుమ్క తప్పు కెర తిలెగిన, తుమ్ జోవయింక

చెమించుప కెర్లెగిన, తుమ్చో పరలోకుమ్ తిలో దేముడు జలో అబ్బో తుమ్క చెమించువు కెరెదె.

15 గని మాన్సుల్ తుమ్క కెర్త తప్పుల్ తుమ్ నే చెమించుప కెర్లెగిన, తుమ్చో అబ్బో జలో దేముడు తుమ్క చెమించుప కెరె నాయ్.”

చువ్వె తతిన్చి రిసా సంగిలిసి

16 “పడ్డొక, తుమ్ చువ్వె తంక జలె, ఏడ్డి రితి మొకొమ్ తెన్ తా నాయ్. ఉప్రమెన్సుచో మాన్సుల్, జలె, ‘చువ్వె అస్సుమ్’ మెన, ‘అమ్క నీతి మెన మాన్సుల్ గవురుమ్ సంగుతు’ మెన, మొకొమ్ వెట్కారుమ్ తెయార్ కెరన తవుల. తుమ్క ఆవ్ కిచ్చొ కచితుమ్ సంగితసి మెలె, దస్సి కెర్త మాన్సుల్ జోవయించి బవుమానుమ్ నజన గెల అస్తి.

17 తుమ్, జలె, తుమ్ చువ్వె తతె పొది, మాన్సుల్ నేన్సి రితి, తుమ్చి బోడి తేలు గాంసన, ఓడన, తుమ్చి మొకొమ్ దోవన, సర్ల తెన్ తా.

18 మాన్సుల్ నే దెకిలెకి, తుమ్చో అబ్బోసి జలో దేముడు దెక కెర, తుమ్క బవుమానుమ్ దెయెదె.

19 “బూలోకుమ్తెచి ధనుమ్ తుమ్క తూమ్ కుడవన్క నాయ్. ఈంజ లోకుమ్చి దనుమ్ కుడవన్లెగిన, రుస్సి కా గెలెదె, నెంజిలె కివ్వొ కా గెలెదె, నెంజిలె చోర్లు గెరి బోరొ కెర చోర నెవుల.

20 తుమ్, జలె, రుస్సి కివ్వొ నే కతి లోకుమ్తె, చోర్లు నే పెసితి లోకుమ్తె, మెలె పరలోకుమ్తె, ఒత్తచి దనుమ్ కుడవన కెర్తన.

21 తుమ్ కేన్ లోకుమ్తె ధనుమ్ కుడవన తస్సె గే, ఒత్త తిలిన్చి రిసా తుమ్చి పెట్టి ఉచర్తె తస్సె.

22 “ఆగుక దీవు అంకివో. జాచి రిసా, తుమ్చ అంకివో టేంట తిలెగిన, తుమ్చి ఒండి ఆగ్ ఉజిడ్ తెన్ తయెదె.

23 తుమ్చ అంకివో మయ్ల జా తిలెగిన, తుమ్చి ఆగ్ ఎత్తి ఆమస్ రితి

అందర్ జా తయెదె. దస్సి, తుమ్చి పెట్టి తిలి బుద్ది అందర్చి తిలెగిన, కెర్ది అందర్ జయెదె!

24 “ఎక్కిలో గొత్తి సుదొ కో జలెకు దొగుల ఎజొమాన్లుచి సేవ ఎక్కె దడి కెరుక నెత్తె. ఎక్కిలోక విరోదుమ్ కెర, అన్నెక్కోక ప్రేమ కెరెదె. నెంజిలె ఎక్కిలోక నిదానుమ్ దెక, అన్నెక్కోక నిస్కారుమ్ దెకెదె. జలె, దేముడుక చి ఈంజ లోకుమ్చి దనుమ్క ఎక్కె దడి సేవ కెరుక నెతుర్పు.

25 జాకయ్, ఆవ్ తుమ్క కిచ్చొ మెంతసి మెలె, ‘కిచ్చొ కమ్దె గే కిచ్చొ పిమ్దె గే కిచ్చొ గలనుమ్దె గే కీసి జా జిమ్దె’ మెన, తుమ్చి మెన్సుతె చింత గలన నాయ్. అన్నిమ్చి కంట ఆత్మ విలువ, గెద. పాలల్చి కంట ఆగ్ విలువ, గెద.

26 “ఆగాసుమ్చ పిట్టల్చి రిసా ఉచర. జేవ్ పిట్టల్ ఉంపితి నాయ్. ఉంప లాయితి నాయ్. లాయ కొట్టుతె ఆన కుడవంతి నాయ్. జలెకి, తుమ్చో పరలోకుమ్ తిలో అబ్బో జలో దేముడు జోవయింక పొస్తయ్. తుమ్, జలె, జోవయించి కంట విలువ నెంజును గే?

27 పడ్డొ, తుమ్చితె కో కెర్ది చింత గలన్లెకి, జోచి బత్తుక కొల్లక ఏక అత్తెక్ జవున్ ఒగ్గర్ కెరనుక తెరె గే? నెత్తె.

28 “పాలల్చి రిసాచి చింత గలనుక కిచ్చొ? డొంగ్రిచ పుల్లో కీసి వడ్డితతి గే ఉచరన. జేవ్ కామ్ కెర్తి నాయ్, పాలల్ వీంతి నాయ్.

29 జలెకి, ఎదివాల్ సొమ్సారుమ్ కలుగు జలో సొలోమోస్సు మెలో పూర్లుమ్చో రానొ కి ఈంజేవ్ పుల్లోచి రితి సూటి కెరనుక నేన్లొ.

30 తుమ్ తొక్కి నముకుమ్ తిలస, ఏక్ కోడు ఉచరన. ఆజి తా కెర కలిక డయ దెతి చివ్వర్క దేముడు ఎదిలి సూటి కెర్తయ్ జలె, తుమ్క అన్నె ఒగ్గర్ చెంగిల్ గలంతిసి దొర్కు కెరె నాయ్ గే? దొర్కు కెరెదె.

31 “జాకాయ్, ‘కిచ్చొ కమ్దె గే, కిచ్చొ పిమ్దె గే, కిచ్చొ గలనుమ్దె’ మెన చింత గలన ఉచర నాయ్.

32 దేముడుక నేన్ల మాన్సుల్ కి ఇసీచి ఎత్తిక ఉచరంతె తవుల, అన్నె, ఇన సామన్లు తుమ్క కి దొర్కు జతతి మెన; తుమ్చో పరలోకుమ్ తిలో అబ్బొసి జలో దేముడు జానె.

33 తుమ్, కిచ్చొ కెరుక అస్సి మెలె, తొలితో దేముడుచి రాజిమ్ జోచి పున్నిమ్ చజ, జో సికడ్డి బుద్ది ఇండుక ఆన జా తా. తుమ్ ఇసి జలదు మెలె, తెదొడి ఎత్తి తుమ్క దొర్కు జవుల.

34 జాకాయ్, ‘కలిక కిసి జా జిమ్దె?’ మెన తుమ్ చింత గలన ఉచర నాయ్. కలికచి రిసా నమ్మందుమ్ జతిసి కలిక దొర్కు జయెదె. కేన్ దీసిచి బాద జయి దీసిక సాలు.”

7

తీర్పు కెర్తి బుద్దిచి రిసా సంగిలిసి
(లూకా 6:37-38, 41-42)

1 “తుమ్ ఎక్కిలోక ఎక్కిలో కుస్సిదుమ్ తెన్ తీర్పు ఉచర నాయ్, చి ఎత్తి అదికారుమ్ తిలో దేముడు తుమ్క తీర్పు కెర సిచ్చ కెరుక నాయ్.

2 కిచ్చొక మెలె, తుమ్ అన్నె మాన్సుల్క కిసి తీర్పు దెకితె గే, దేముడు తుమ్కయ్ కి దస్సి దెకెదె. తుమ్ అన్నె మాన్సుల్చి రిసా *కట్టణ్ణి కొల్ల రితి దేముడు తుమ్క కి జయ్యి కొల్ల తెన్ కట్టణ్ణెదె.

3 “తుమ్చితె ఎక్కిలోచి అంకితె ఏక్ దూలుమ్ బెర తిలెగిన, బావొచి అంకితె ఇదిలిదిల్ తొక్కు సేడ తిలెగిన, అంకితె దూలుమ్ తిలోసా కిచ్చొక జోచి బావొచి అంకితె తిలి ఇదిలిదిల్ తొక్కు దెకితసి, గని సొంత అంకితెచి దూలుమ్ దెకిన్ నాయ్?

4 నెంజిలె, తుచి అంకితెచి తొక్కు కడిందె” మెన చిల్ప అంకితె తిలోసా కిసి తుచో బావొక సంగుక జయెదె!

5 తుయి ఉప్రమెన్సుచొ, తొలితో తుచి సొంత అంకితెచి చిల్ప కడను, చి తుచొ బావొచి అంకితెచి తొక్కు కడితి రితి టేంట దెకితె.

6 “సుద్ది తిలిసి సూనర్లుక దాస నాయ్. అండ్రుల్చి చట్టె ముత్యల్ గల దాస నాయ్. అండ్రుల్క దిలె, విలువ నే దెకితె సుంద కెర, పన్ల కెర, తుమ్క చిర గెలుల.

7 “నజ తుమ్క దెయెదె. ఎక్కి మెన్సు తెన్ చజిలె, దొర్కు జయెదె. కెప్పితె పెట్టె, తుమ్క కెప్పె ఉగిడిందె.

8 కో సంగిలె, జోక దొర్కు జయెదె, చి చజిలె, దొర్కు జయెదె, చి జోచి కెప్పితె పెట్టె, జోచి రిసా ఉగ్గి జయెదె.

9 “తుమ్చి తెన్ కేన్ మాన్సు జలెకు జోచొ పుత్తుసి పొడి నజిలె, జోక పత్తురు దెయెదె గే? నాయ్.

10 జో పుత్తుసి మొస్సా నజిలె అయి దెయెదె గే? నాయ్.

11 జలె, తుమ్ మాన్సుల్ పాపుమ్ సుదల్ జలెకి, తుమ్చ బోదల్క చెంగిల్ వస్తువల్ దెంక జాన్సు. జలె, పరలోకుమ్ తిలో అబ్బొన్ జలో దేముడుతె కో చెంగిల వరల్ నజిలె, మాన్సుల్ దెతి కంట జో అన్నె ఒగ్గర్ చెంగిల్ వరల్ దెయెదె!

12 “మాన్సుల్ తుమ్క కిసి కెరుక మెన తుమ్ ఇస్టుమ్ జస్తె గే, తూమ్ కి జోవయింక దస్సి కెర. కిచ్చొక మెలె, మోసే పూర్గుమ్చొచి అత్తి దేముడు రెగ్గయ్ల ఆగ్గుల్, అన్నె పూర్గుల్చి అత్తి సంగిల దేముడుచ కబుర్లు ఎత్తితె ఈంజ కోడు బెదితయ్.

పరలోకుమ్ పెసితి గుమ్ముమ్చి రిసా సంగిలి బోదన
(లూకా 13:24)

13 “వెల్లో నాసెనుమ్తె గెతి వాట్ సుల్లు, జా వాట్ పెసితి గుమ్ముమ్ రూందు. జా వాట్ ఒగ్గర్జిన్ గెతతి. తూమ్, మాత్తుమ్, ఇర్కు వాట్చి గుమ్ముమ్ పెన.

14 కిచ్చొక మెలె, పరలోకుమతె బెదితి వాట్చి గుమ్ముమ్ ఇర్కు అస్సె, జా వాట్ సుల్లు నాయ్, చి ఒత్త పావితన ఒగ్గర్ తొక్కజిన్ జవుల.

15 “దేముడు తెంతొ కబుర్ ఆన్తోసా ఆవ్” మెన అబద్దుమ్క సంగితన సగుమ్జిన్ జెవుల, ఉప్రమెన్పుచ జేవ్. దస మాన్సుల్చి రిసా తుమ్ జాగర్ తెన్ తా. చెంగిల్ మాన్సుల్ రితి, జేవ్ మెండల్చ రోమల్ గలన డీసయ్ జవుల, గని జోవయించి పెట్టి తెడి డుర్కొవ రితి కుస్సిదుమ్ తిలన.

16 జోవయించ కమొచి పలితుమ్ దెకిలె, జోవయించి బుద్ది తుమ్ చినితె. కంట చెట్టి ద్రాచ పండ్లు కోడుక జయెదె గె? లస్సన్ రూకి తెన్ †అంజూరుమ్ పండ్లు కోడుక జయెదె గె? నెంజె.

17 ఎత్తి చెంగిలో రూక్తె చెంగిలి పండ్లు దెరుల, గని కామ్క నెంజితె రూక్తె కామ్క నెంజిత పండ్లు దెరుల.

18 చెంగిల్ రూక్తె కామ్క నెంజితి రగుమ్ పండ్లు దెర్తి నాయ్. కామ్క నెంజితె రూక్తె చెంగిల్ పండ్లు దెర్తి నాయ్,

19 అన్నె, చెంగిల పండ్లు నే దెర్తో ఎత్తి. రూకుక కండ కెర, ఆగితె గలుల.

20 తుమ్చితె జెతనచి పలితుమ్ దెకిలె, జోవయించి రగుమ్ చినితె.

21 “‘ప్రబు, ప్రబు!’ మెన, అంక సంగితన ఎత్తిజిన్ పరలోకుమచి రాజిమ్తె పెసితి నాయ్. గని పరలోకుమ్ తిలో అంచొ అబ్బొ జలో దేముడు సికడ్లి కోడు రితి కెర్తనయ్ ఒత్త గెచ్చుల.

22 ఈంజ లోకుమచ ఎత్తిక వెల్లి తీర్పు కెర్తి దీసిక, అంక ఒగ్గర్జిన్ మాన్సుల్, ‘ప్రబు, ప్రబు’, తుచి నావ్ తెన్ తూయి సంగిల కబుర్లు సంగిలమ్, నాయ్ గె? తుచి నావ్ తెన్ బూతల్ గట్టక ఉదడ్లమ్, నాయ్ గె? తుచి నావ్ దెర ఒగ్గర్ ఒగ్గర్

అద్దుతుమ్ కమొ కెర్లమ్, నాయ్ గె?” మెన సంగుల.

23 జలె “ఆవ్, తుమ్క అగ్గె తెంతొ నేని. తుమ్ గార్ కమొ కెర్తన, అంచి తెంతొ దూరి ఉట్ట గెచ్చు” మెన జోవయించ సంగెదె.

సాప్రయ్ బందిలో గేరుచి ఇస్కతె బందిలో గేరుచి రిసాచి టాలి (లూకా 6:47-49)

24 “అంచ కొణొ సూన అంచి కోడు రితి ఇండుల గె కీన జవుల, జో బుద్ది తిలోసా కిచ్చొ కెర్లొ మెలె, జోచొ గేరు రెంగ్చిచి ఉప్పిరి బందిలో.

25 బందితికయ్, పాని పెట్టి, వర్లల్ జలి, చి గట్టిజ వాదు జో గేరుచి సుట్టునంత కెర్లె కి, జా గేర్చి పునాది రెంగ్చిచి ఉప్పిరి తిలి రిసా, కెర్లె వాదు పాని కెర్లె కి, సేడె నాయ్.

26 “జలె, కో అంచ కొణొ సూన కి నే కెరుల గే, జేవ్ కిసి జవుల మెలె, బుద్ది నెంజిలో ఎక్కిలోచి రితి జవుల. జో బుద్ది నెంజిలోసా కిచ్చొ కెర్లొ మెలె, జోచొ గేరు ఇస్కచి ఉప్పిరి బందిలో.

27 జో గేరు ఇస్కచి ఉప్పిరి బంద తతికయ్, పాని పెట్టి, వర్లల్ అయ్లి చి గట్టిజ వాదు జో గేరుచి సుట్టునంత కెర్లె, చి జా గేరు సేడ గెలో. జా గేరు ఎద్దరె సేడయ్ గెలో!” మెన యేసు సంగిలన్.

28 యేసు ఈంజేవ్ కొణొ సంగ కేడయ్లి పడ్డా, జనాబ్ ఎత్తి జో కెర్లె బోదనచి రిసా ఆచారిమ్ జల.

29 కిచ్చొక మెలె, జేవ్చ మోసే తెన్ దేముడు దిలి ఆగ్గుల్ సికడ్లన కెర్తి రితి నాయ్, గని దేముడు దిలి అదికారుమ్ తెన్ జో సొస్టుమ్ బోదన కెర్తె తిలన్.

8

వెల్లి రోగిక యేసు చెంగిల్ కెర్లెసి (మార్కు 1:40-45; లూకా 5:12-16)

† 7:16 7:16 ‘అంజూరుమ్ పండ్లు’ మెలె, బొడ్డ పండ్లు రిత జవుల.

1 జేవ్ జా మెట్ట తెంతో ఉత్త జెతె తిలె, ఒగ్గర్ ఒగ్గర్జిన్ జనాబ్ జోచి పట్టి అయ్ల.

2 జేవ్ ఎత్తిజిన్ దస్సి ఉత్తిరై తతికయ్, వెల్లి రోగి ఎక్కిలో యేసుక దస్సుల్ జా, సెర్ను సేడ జోకర, “ప్రబు తుక ఇస్టుమ్ జలె, తుయి అంక చెంగిల్ కెర సుద్ది కెరుక తెర్చి” మెన సంగిలన్.

3 యేసు ఆతు చంప కెర జోక చడ, “అంక ఇస్టుమి. చెంగిల్ జా సుద్ది జా” మెన సంగిలి బేగి, జోచి వెల్లి జబ్బు గెతికయ్, చెంగిల్ జా సుద్ది జలన్.

4 యేసు జోక “వట్టె కక్క కిచ్చో సంగు నాయ్. గని, దేముడుచి గుడితె గెచ్చు, తుచి ఆగ్ సుద్ది జలి మెన, ఒత్త పూజరిక దెకవు, చి తుయి సుద్ది జలిసి ఒత్త తిల మాన్సుల్క రుజ్జు జతి రితి, మోసే పూర్ము సంగిలి కానుక దేసు” మెన సంగ, అన్నె ఉట్ట గెలన్.

పుంజెక్జిన్ జమాన్లుక వెల్లొచొ గొత్తి సుదొక యేసు చెంగిల్ కెర్గిసి

(లూకా 7:1-10; యోహా 4:43-54)

5 యేసు కపెర్నహూమ్ పట్టుమ్తె అన్నె పావితకయ్, రోమ్ దేసిమ్చొ పుంజెక్జిన్ జమాన్లుక వెల్లొ ఎక్కిలో జా కెర,

6 యేసుక “బాబు, అంచొ గొత్తి నాడు కదుల్ జంక నెత్త కెర ఒగ్గర్ బాద జా గెరి ఎంగ్గ తత్తయ్” మెన బతిమాల్పా జా సంగిలన్

7 యేసు జోక “ఆవ్ జెయిందె, చి జోక చెంగిల్ కెరిందె” మెన సంగిలన్.

8 గని జో పుంజెక్జిన్ జమాన్లుక వెల్లొ మాన్సు జోక, “ప్రబు, తుయి అంచి గెరి జెంక మెలె, ఆవ్ విలువ నాయ్. తుయి ఇన్నె తెంతో ఎక్కి సెలవ్ కోడు దిలది మెలె, అంచొ గొత్తి నాడు చెంగిల్ జయెదె.

9 ఆవ్ కి అదికారుమ్క బితోసా. అంచి తెడి జమాన్లు అస్తి. ఆవ్ ఎక్కిలోక ‘గో’ మెలె, గెచ్చెదె. అన్నెక్కోక ‘జె’ మెలె, జెయెదె. అంచొ గొతిమాన్సుక ‘ఈంజ

కామ్, జా కామ్ కెరు’ మెలె కెరెదె” మెన సంగిలన్.

10 యేసు ఈంజొ సంగిలిసి నూన సర్ద జా, పట్టి జెతె తిలసక దెక, జోవయంక, “తుమ్క ఆవ్ కిచ్చొ కచితుమ్ సంగితసి మెలె, అమ్చ ఇస్రాయేలుల్తె ఆవ్ కక్క కి ఎదిలి నముకుమ్ తిలసక అప్పె ఎదక కి దెకుక నాయ్.

11 తుమ్క కిచ్చొ మెంతసి మెలె, తూర్పు దేసిమ్లు తెంతో, పడమర దేసిమ్లు తెంతో కి యూదుల్ నెంజిల ఒగ్గర్జిన్ మాన్సుల్ జా, కెర, అమ్చ యూదుల్చ పూర్ముచ అబ్రాహామ్, ఇస్సాక్కు చి యాకోబు తెన్ పరలోకుమ్తె ఎక్కితె అన్నిమ్ కవుల.

12 గని, అమ్చి రాజిమ్చి రిసా తుమ్క నిసాన అస్సి మెన, అమ్చ యూదుల్క దేముడు సంగ తిలె కి, ఈంజేవ్ అమ్చ యూదుల్తె ఒగ్గర్జిన్ అందర్చి ఉప్పిరి అందర్తె బయలె గలి జవుల. ఒత్త మాన్సుల్ ఏడై తవుల, దంతో చప్పిల్తె తవుల.” మెన సంగ కెర,

13 యేసు జో పుంజెక్జిన్ జమాన్లుక వెల్లొక “సరె, గో. తుయి నంపజలి రితి తుక జర్లు జవున్” మెన సంగిలన్. సంగిలి బేగి, జో మాన్సుచొ గొత్తి నాడు చెంగిల్ జలన్.

పేతురుచి అత్తన్క యేసు చెంగిల్ కెర్గిసి

(మార్కు 1:29-34; లూకా 4:38-41)

14 పడ్డొ, యేసు పేతురు మెలొ జోచొ సిస్సుడుచి గెరి గెచ్చు కెర, పేతురుచి అత్తన్ జొర్ణొ సేడ ఎంగ్గ అస్సె మెన దెక కెర,

15 జాచి ఆతు దెర్తికయ్, జా జొర్ణొ గెలి, చి జా ఉట్ట కెర, యేసుక మరియాద ఎత్తి కెరుక దెర్తి.

16 సాంజ్ జతికయ్, ఒగ్గర్జిన్ బూతుమ్ దెర్లసక ఒత్త తిల ప్రెజల్ యేసుతె కడ ఆన్తికయ్, జేవ్ బూతల్

ఎక్కెక్క “ఉట్ట గో” మెన ఎక్కి కోడు తెన్ యేసు ఉదడ గెలన్. కిచ్చొ కిచ్చొ జబ్బుల్ తిలనక కి చెంగిల్ కెర్లన్.

17 “జొయ్యి అమ్చ బాదల్ జబ్బుల్ దెర గెచ్చయ్లో” మెన దేముడుచ కబుర్లు సంగిలో యెసయా పూర్ణమచొచి అత్తి జో సంగిలి కోడు నెరవెర్చుప జంకయ్ మెన ఇసి జలి.

యేసు తెన్ బుల్తన ఎక్కి మెన్సు నిదానుమ్ తంక మెన సంగిలిసి (లూకా 9:57-62)

18 నుట్టునంత ఒగ్గర్ ఒగ్గర్జిన బెర తిలిసి యేసు దెక, కెర, “సముద్రుమ్ ఒత్తల్తో గెచ్చుమ” మెన సిస్సుల్క సంగిలన్.

19 జలె, మోసి తెన్ దేముడు దిలి ఆగ్గుల్ సికడ్డొసా ఎక్కిలో యేసుతె జా కెర, “గురుబాబు, తుయి కేనె గెలె కి, ఆవ్ కి తుచి తెన్ బెద జెయిందె” మెన సంగిలన్.

20 యేసు జోక “నక్కల్క పార్లు, అగాసుమ్చ పిట్టల్క గూడలు, గని ఆవ్ *మాన్సు జా జెర్మున్ అయ్లోసొక బోడి వంపొ కెర్తి టాన్ నాయ్” మెన సంగితికయ్,

21 సిస్సుల్తె అన్నెళ్లొ యేసుక “ప్రబు, ఆవ్ తుచి తెన్ నే జెతె అగ్గె, గెచ్చు కెర, అంచొ అబ్బొ మొర గెతె ఎదక జోక పోస కెర, జో మొర్లె జోక రోవ గెలుక మెన, అంక సెలవ్ దె” మెన సంగిలన్. చి యేసు జోక దెక,

22 “మొర్లస జోవయించ సొంత మొర్లసక రోవ గెల్లు, గని తూయి బేగి అంచి పట్టి బులుక జె.” మెన జో సిస్సుడుక సంగిలన్.

యేసు దోనితె గెతె వాదుపానిక సింతుమ్ కెర్లిసి

(మార్కు 4:35-41; లూకా 8:22-25)

23 తెదొడి యేసు దోనితె వెగితికయ్, జోచ సిస్సుల్ జోచి పట్టి వెగిల.

24 జేవ్ సగుమ్ దూరి ఇండయ్తికయ్, సముద్రుమ్తె వాదు కెర్తికయ్, వెల్లెల కెర్లల్ జా దోనితె డేవితె తిల, గని యేసు నిజ తిలన్.

25 జేవ్ సిస్సుల్ జోతె గెచ్చు, ఉట్టవ కెర, “ప్రబు మొర గెతసుమ్. అమ్క రచ్చించుప కెరు!” మెన సంగితికయ్,

26 యేసు ఉట్ట కెర, జోవయింక “ఇదిల్ నముకుమ్చ, తుమ్, కిచ్చొక బితసు?” మెన జోవయింక సంగ కెర, వాదుక సముద్రుమ్క గట్టిజ ఆడ్ర దిలన్. వాదు కెర్లలు ముల దిలి, చి ఎత్కి అన్నె సింతుమ్ జలి రిసా,

27 సిస్సుల్, “ఈంజొ కీసా మాన్సు, చి వాదు కి సముద్రుమ్ కి ఇన్నెచి కోడక వంపొ జత్తయ్!” మెన ఆచారిమ్ జల.

బూతల్ దెర్ల దొగులక యేసు చెంగిల్ కెర్లిసి

(మార్కు 5:1-20; లూకా 8:26-39)

28 జో సముద్రుమ్ జిన కెర, †గదరేసులుచి ప్రాంతుమ్తె పావెతికయ్, బూతల్ దెర్లస దొగుల మెన్నె తెంతొ బార్ జా కెర, యేసుక దస్సుల్ జల. జేవ్ దొగులచి ఎదివాట్ కోపుమ్చి రిసా, కో కి జా వాట్ గెచ్చుక దయిరిమ్ నాయ్.

29 యేసు జా వాట్ జెతికయ్, “ఈందె, దేముడుచొ పుత్తుసి, అమ్చి తెన్ తుక కిచ్చొ? అమ్ సిచ్చు జతి పొది నే జెతె అగ్గె అమ్క అల్లర్ కెరుక ఇన్నె అయ్లది గే?” మెన కేకుల్ గలిల.

* 8:20 8:20 ‘మాన్సు జా జెర్మున్ అయ్లోసొ’ మెన బయ్బితె రెగ్గ తిల, జాచి అర్దుమ్ కిచ్చొ మెలె, ‘ఎత్కి అదికారుమ్ తిలొ దేముడు తెద్రయ్లో క్రీస్తు రచ్చించుప కెర్లిసా’. యేసు ఈంజ లోకుమ్తె బుల్లె తిలి పొది, బయ్బితె పొర్చి ప్రమానుమ్ ఒగ్గర్ నదు కెర్ల పండితుల్ జా అర్దుమ్ కెరసుల, గని మాములుమ్ మాన్సుల్ నేనీతి.
† 8:28 8:28 గెరాసినుల్ నావ్ కి తిలి

30 జలె, జోవయించి ఇదిల్ ఒత్తల్ క బగ్గర్ అండ్రుల్ తిలి మంద కతె తతికయ్,

31 జేవ్ బూతల్ యేసుక “తుయి అమ్క ఇన్నె తెంతో ఉదడ్డిగిన, అండ్రుల్ తిలి జా మందతె అమ్క తెర్వ” మెన, యేసుక బతిమాల్పా జా సంగిల.

32 జో జోవయింక “గెచ్చు!” మెన సంగితికయ్, జేవ్ బూతల్ బార్ జా, జేవ్ మాన్సుల్ క ముల దా, అండ్రుల్ చి పెట్టి పెన గెల, చి జా మందచ అండ్రులు ఎత్తి వెరి జా, జా వెల్లి గాటిక నిగ ఉత్త, సముద్రుమ్ తె సేడ మొర గెల.

33 దస్సి జర్గు జతికయ్, మంద రకితన బమ్మ జా, జా పట్టుమ్ తె నిగ గెచ్చు, బూతల్ దెర్లనక జర్గు జలిసి ఎత్తి, కిచ్చొ నే పిట్టి, పట్టుమ్ చక సంగిల.

34 జాచి రిసా, పట్టుమ్ చ ఎత్తి జిన్ యేసు తెన్ దస్సుల్ జంక మెన బార్ జా, దెక కెర, “అమ్చి దేసిమ్ తెంతో ముల దా ఉట్ట గో!” మెన బతిమాల్పా జా, జోక బమ్మ తెన్ సంగిల.

9

ఉట్టుక నెతిర్లో మాన్సుక యేసు చెంగిల్ కెర్రిసి
(మార్కు 2:1-12; లూకా 5:17-26)

1 ఒత్త తెంతో, యేసు దోనితె వెగ కెర, జా సముద్రుమ్ జిన కెర, జోచి సొంత పట్టుమ్ తె పాచితికయ్,

2 ఒత్త తిల మాన్సుల్ వాతుమ్ జొర్లో తెన్ తిలోసా, ఉట్టుక నెతిర్లో అంతుర్వొతె ఎంగ్గ తిలోసా ఎక్కిలోక జోతె కడ ఆన్ల. యేసు జేవ్ కడ ఆన్లనచి నముకుమ్ దెక కెర, జో ఉట్టుక నెతిర్లోసాక దెక, “ఓ పూత్తు, తుయి దయిరిమ్ జా. తుచి పాపల్ చెమించుప జా అస్తి” మెన జోక సంగిలన్.

3 జలె, ఒత్త తిల మోసే తెన్ దేముడు దిలి ఆగ్గుల్ సికడ్డన సగుమ్ జిన్ ‘యేసు

దేముడు తెన్ సమ్మందుమ్ సంగితయ్. జా వెల్లి పాపుమ్’ మెన బమ్మ జా, లట్టబన్.

4 యేసు జోవయించి మెన్సుతె తిలిసి చిన కెర, “తుమ్చి పెట్టి కిచ్చొక కుస్సిదుమ్ ఉచర్తను?

5 ‘తుచి పాపల్ చెమించుప జా అస్తి’ మెనుక నుల్లు గే, ‘ఉట్ట ఇండు’ మెనుక నుల్లు గే?

6 జలె, ‘మాన్సు జా జెర్మున్ అయ్లయ్ అంక అప్పె ఈంజ లోకుమ్ తె తిలె కి, మాన్సుల్ చి పాపల్ చెమించుప కెర్రి అదికారుమ్ అస్సె’ మెన తుమ్క రుజ్జు దెకయిందె” మెన, జో ఉట్టుక నెతిర్లో మాన్సుక అన్నె దెక, యేసు జోక, “తుయి ఉట్ట కెర, తుచి అంతుర్వొ వయన గెరి గో” మెన సంగితికయ్,

7 జో మాన్సు ఉట్ట కెర, గెరి గెలన్.

8 ఇసి జర్గు జతికయ్, ప్రెజల్ దెక కెర, బియఁ గెచ్చు, మాన్సుచి అత్తి జో ఇసి అదికారుమ్ దిలిన్ చి రిసా, దేముడుక గవురుమ్ కెల.

యేసు మత్తయిక బుకార్లన్
(మార్కు 2:13-17; లూకా 5:27-32)

9 యేసు ఒత్త తెంతో ఇదిల్ దూరి ఇండ గెచ్చు, జా పట్టుమ్ చి సిస్తు కడన్ తి గెరిచి వాట్ గెచ్చు కెర, ఒత్త పెన తిలో మత్తయి మెలో సిస్తు నజీతోసాక దెక, “అంచి పట్టి జా అంచొ సిస్సుడు జా” మెన జోక సంగిలన్, చి జో ఉట్ట కెర, యేసుచి పట్టి గెలన్.

10 జో మత్తయి మెలోసాచి గెరి అన్నిమ్ కంక మెన యేసు గెచ్చు వెన తతికయ్, జా దేసిమ్ చ నిస్కారుమ్ దెకిల సిస్తు నజీతన కి, చి నితి నే కెరంత ‘పాపుమ్ కెర్లన’ మెన ఒత్తచ యూదుల్ నిస్కారుమ్ దెకిలన ఒగ్గర్ జిన్ జోతె జా కెర, జో తెన్ సిస్సుల్ తెన్ వెసిల.

11 జేవ్ ఇన్నె బెద వెసిలిసి దెక కెర, పరిసయ్యుల్ మెంత వండితుల్ యేసుచ సిస్సుల్తె జా కెర, జోవయింక “తుమ్చొ గురు సిస్తు నజీతన తెన్ పాపుమ్ కెర్లన్ తెన్ కిచ్చొక వెస అన్నిమ్ కతయ్?” మెన పుసిల.

12 జేవ్ దస్సి సంగిలిసి యేసు నూన కెర, “జబ్బు తెన్ అస్సుమ్ మెన చినల్లన డాక్టర్ అవ్సురుమ్, గని జబ్బు నెంజులనక డాక్టర్ అవ్సురుమ్ నాయ్.”

13 జలె,

“తుమ్ కిచ్చొ కెర్లిసి అంచి ఆస మెలె, బలి దెతిసి నాయ్, గని మాన్సుల్క కన్కారుమ్ దెకితిసి

మెలి కోడుచి అర్దుమ్ కిచ్చొ జయెదె గే, తుమ్ గెచ్చు సిక్క. ‘ఆమ్ పాపుమ్ కెర్లన’ మెన చినంతనకయ్ బుకార్క ఆవ్ అయ్లయ్, గని ఆమ్ పున్నిమ్ తిలన మెన ఉచరంతనక బుకార్క నాయ్.” మెన యేసు సంగిలన్.

14 తెదొడి బాప్తిసుమ్ దెతె తిలొ యోహానుచ సిస్సుల్ యేసుతె జా కెర “పరిసయ్యుల్ కి ఆమ్ కి చువ్వె తంక అలవాట్, గని తుచ సిస్సుల్ చువ్వె తతి నాయ్. కిచ్చొక?” మెన, యేసుక పుసిల.

15 ఇసి పుసితికయ్, యేసు జోవయింక, “కేన్ పెండ్లితె, జోవయించి నెడిమి పెండ్లిఉబేడొ తిలె పొది, పెండ్లి విందుతె బుకార్లన ముసుర్న తవుల గె? నాయ్. బెదె నాయ్. జలె, పెండ్లిఉబేడొచి పచ్చెన జలనచి నెడమె తెంతో జోక దెర వేరతె కడ నిలె, జేవ్ పొదుల్క జోచ మాన్సుల్ ఏడ ఏడ చువ్వె తవుల.

16 “జలెకు, పొర్ని పాలుమ్ చిరి జా తిలెగిన, మాసికచి రిసా నే కేడయ్లి నే కేడ్తె నొవి బట్ట గండ కో జాన్ల మాన్సుల్ గల్తి నాయ్. దస్సిచి పొర్నిచితె గల తిలెగిన, జో పాలుమ్ కేడ్తె, జా మాసిక కడెదే. మాన్సు జా పాలుమ్ గలనై, అప్పు జలి పొర్ని బట్ట నొవి బట్టచి మాసిక

బెదయ్లి కుటు సొడి చిరి జయెదె, చి అగ్గెచి కంట వెల్లి బొరొ జయెదె.

17 పడ్డొ, జలె, ఒత్త నొవి ద్రాచ రస్సుమ్ పొర్నిచి కాయ తెన్ కో సువితీ నాయ్. జా కాయ పొర్ని జలి రిసా, దస్సితె నొవి రస్సుమ్ సువితెగిన, జా కాయ పులుక నెతిరి రిసా, జా రస్సుమ్ పొంగుప జలె, జా కాయ పుట్టెదె. పుట్టిలె, జా రస్సుమ్ నూయి జయెదె, చి కాయ కి పాడ్ జా గెచ్చెదె. జాచి రిసా, నొవి ద్రాచ రస్సుమ్ నొవి కాయల్తె సువుల. దస్సి, జా రస్సుమ్ కి జా కాయ కి పాడ్ నే జస్తె, చెంగిల్ తయెదె” మెన, జోక పరిచ్చ కెర్ల మాన్సుల్క యేసు సంగిలన్.

బార వెర్చుల్ బాద తెన్ తిలి తేర్బోడక యేసు చెంగిల్ కెర్లిసి

(మార్కు 5:21-43; లూకా 8:40-56)

18 ఒత్త జా తిల మాన్సుల్క యేసు ఈంజేవ్ కొడొ సంగితె తతికయ్, ఒత్తచి సబ గెర్చొ అదికారి ఎక్కిలో జా కెర, యేసుక దస్సుల్ జా, నెర్ను సేడ జొకర, “అంచి దూ అప్పె మొర గెచ్చు అస్సి. తుయి, జలె, అమ్తె జా కెర జాక చడిలెగిన, అన్నె జయెదె” మెలన్.

19 జో దస్సి మెంతికయ్, యేసు ఉట్ట కెర జోచి పట్టి గెలన్. జోచ సిస్సుల్ కి బెద గెల.

20-21 జేవ్ వట్టె గెతె తతికయ్, బార వెర్చుల్ తెంతొ లోయి గెతి బాద తెన్ తిలి ఏక్ తేర్బోడ యేసుచి పట్టి జా, పావ కెర, “అవ్ ఎక్కి జోచొ పాలుమ్ జవున్ చడిలెగిన, చెంగిల్ జయిందె” మెన, జాక జయ్యి ఉచరన, జోచొ పాలుమ్చి కొంగు చడిలి.

22 జా చడితికయ్, యేసు పడ్డొ వస్త జాక దెక, “ఓ దూ, దయిరిమ్ తెన్ తా. అంచి ఉప్పిరిచి తుచి నముకుమ్ తుక చెంగిల్ కెర్లి.” మెన సంగిలన్. జా బేగి చెంగిల్ జలి.

23 తెదొడి యేసు జో అదికారిచొ గెరి పావ కెర, నాడి మొర్లి రిసా మూరి

పుజీతన, చి బెర తిల ఏడుకుడు జతన ఒగ్గర్ గొడబ జతిసి దెక కెర,

24 “తుమ్ గెచ్చు. ఈంజ నాడి మొర గెచ్చె నాయ్. నిజ అస్సె” మెన జోవయింక సంగితికయ్, జోక ఆసిల.

25 జలె, జనాబ్ ఎత్కిక బార్ కెరవడ కెర, యేసు తెడి గెచ్చు, జా నాడిచొ ఆతు దెర్లి బేగి, జీవ్ జా ఉట్టి.

26 ఈంజ కామ్చి రిసా జా ప్రాంతుమ్ ఎత్కితె పావిలి.

దొగుల గుడ్డి మాన్సుల్క యేసు చెంగిల్ కెర్లిసి

27 యేసు బార్ జా కెర, ఒత్త తెంతొ గెరి గెతె తతికయ్, దొగుల గుడ్డి మాన్సుల్ జోచి పట్టి జా, “దావీదు రానిచి సెకుమ్తె జెర్మిలో రచ్చించువ కెర్తొసా, అమ్చి ఉప్పిరి కన్కారుమ్ తియ, అమ్క చెంగిల్ కెరు!” మెన కేకుల్ గల్తె తిల.

28 యేసు గెరి గెచ్చు పెసిలి పడ్డొ, జేవ్ గుడ్డి మాన్సుల్ ఒత్త జోతె అయ్ల. జెతికయ్, యేసు జోవయింక “తుమ్ ఉచర్లిసి అంక ‘కెరుక తెరె’ మెన తుమ్ నంపజతను గే?” మెన జోవయింక పుసితికయ్, జేవ్, “ప్రబు, అమ్ నంపజతనుమ్” మెన జోక సంగిల.

29 యేసు జోవయింక అంకివొతె చడ కెర, “ఆవ్ తుక ‘చెంగిల్ కెరుక తెరె’ మెన తుమ్ నంపజలిసి రిసాయి తుమ్క జర్గు జవున్!” మెన, సంగిలన్.

30 సంగిలి బేగి, జోవయింక అంకివొ డిసిల. పిమ్మట్, యేసు జోవయింక “ఈంజ కామ్ కో కి నేన్తె రితి దెకన, తుమ్ దొగుల తుక్లె తా” మెన గట్టిజ సంగిలన్.

31 గని, జేవ్ ఉట్ట గెచ్చు, జా ఒండి గలిలయ ప్రాంతుమ్తె జోచి గవురుమ్ సంగితె తిల.

గుల్లో కెర్తొ బూతుమ్క యేసు ఉదడ గెలిసి

32 యేసు సిస్సుల్ తెన్ బార్ జా కెర, అన్నె బులుక గెతె తతికయ్, బూతుమ్

దెర్లొ గుల్లో నుదొ ఎక్కిలోక జోతె కో గే కడ ఆన్ల.

33 యేసు జో బూతుమ్క ఉదడ గెలి బేగి, జో గుల్లో నుదొ లట్టబన్లొ. ఒత్త బెర తిల జనాబ్ ఆచారిమ్ జా, “అమ్చ ఇస్రాయేలుల్తె ఇనిచి జర్గు జలిసి కెయ్య దెకుమ్ నాయ్. ఆజి జర్గు జలి!” మెన లట్టబన్ల.

34 గని పరిసయ్యుల్ కిచ్చొ మెల మెలె, * “బూతల్క రానొ జలిసాచి నావ్ తెన్ ఈంజొ బూతల్క ఉదడయ్” మెన అరుగురు జా, గోసక సంగిల.

35 యేసు జా గలిలయ ప్రాంతుమ్ ఒండిచ పట్టలె గవ్వొలె బుల బుల, జోవయించ సబ గెరలె గెచ్చు, పరల్లోక్కుమ్చి రాజిమ్ ప్రాసి జా అయ్లిన్చి రిసాచి నుబుమ్ కబుర్ సంగ, ఎత్కి రగల్చ జబ్బులు నొప్పులు గెచ్చవ, మాన్సుల్క చెంగిల్ కెర్తె తిలన్.

36 దస్సి బులై పొది, ఒగ్గర్ జనాబ్ జోతె అయ్ల జేవ్ మాన్సుల్క దెక దెక, జేవ్ గొవుడు నెంజిల మెండల్ రిత మాలజ్ జా సైమల్ తెన్ తిలిసి దెక, జోవయించి ఉప్పిరి కన్కారుమ్ జా,

37 “గట్టిజ పంట్ొ పిక లాయితి సమయుమ్ జా అస్సె.

38 జాచి రిసా, ‘ఈంజ పంట్ొ లాయితి రితి, ఈంజ పంట్ొక ఎజొమాని జలొ ప్రబు లాయిత మాన్సుల్క తెద్రవును’ మెన, తుమ్ జోక ప్రార్దన కెర” మెన యేసు సిస్సుల్క సంగిలన్.

10

బారజిన్ సిస్సుల్క యేసు అదికారుమ్ దిలిసి
(మార్కు 3:13-19; 6:7-13; లూకా 6:12-16; 9:1-6)

1 తెదొడి యేసు జోచ బారజిన్ సిస్సుల్క పాసి బుకారా కెర, బూతల్ గట్ట ఉదడ గెలుక మెన, రగరగాల్చ జబ్బులు బాదల్ జల మాన్సుల్క చెంగిల్

* 9:34 9:34 ‘బూతల్క రానొ జలిసా’ మెలె, సయ్తాన్.

కెరుక మెన, జోవయింక అదికారుమ్ దిలన్.

2 జేవ్ బారజిన్ యేసుచ, బారికుల్చ నవ్వొ కిచ్చొ కిచ్చొ మెలె, తొలితో పేతురు మెన అన్నెక్ నావ్ తిలో సీమోను, చి జోచొ బావొసి అంద్రెయ. ఒత్త తెంతో, జెబెదయిచొ పుత్తుసి యాకోబు, చి యాకోబుచొ బావొసి యోహాను.

3 ఒత్త తెంతో, పిలిప్ చి బర్తొలోమయి, తోమా చి మత్తయి మెలో సిస్తు నజీతోసా. ఒత్త తెంతో, అల్ఫయిచొ పుత్తుసి యాకోబు, చి తద్దయి మెలోసా.

4 ఒత్త తెంతో, కనానుచొ సీమోను మెలో అన్నెక్లొ, చి పడ్డొ యేసుక దెర తిలో ఇస్కరియోతు మెలి గవ్వొచొ యూదా.

5 యేసు జేవ్ బారజిన్ అదికారుమ్ దా కెర బులుక తెద్రయ్లి పొది, కిచ్చొ సెలవ్ దిలన్ మెలె, “యూదుల్ నెంజిలనతె అప్పె గెచ్చుక పోన, చి సమరయ ప్రదేసిమ్చ పట్టలె పెన నాయ్.

6 జలె, పిట్ట గెల గొవుడు నెంజిలి మంద రితి జా తిల ఇస్రాయేలుల్తె తుమ్చ సొంత మాన్సుల్తె తుమ్ గెచ్చు.

7 తుమ్ గెచ్చు, చి ‘పరలోకుమ్చి రాజిమ్ పాసి జా అన్య’ మెన బోదన కెర.

8 జబ్బుమాన్సుల్క చెంగిల్ కెర. మొర గెలసక జీవ్ కెర. వెల్లి జబ్బుల్ తిలసక చెంగిల్ కెర సుద్ది కెర, చి బూతల్క ఉదడ గెల. ఆవ్ దెతిసి ఆరి తుమ్క దొర్కు జలి. మాన్సుల్క ఆరి తుమ్ దాస.

9 “తుమ్ బుల్తె పొది, బజార్ గే వెండి గే రాగిచ కాసుల్ గే, కిచ్చొ రగుమ్ డబ్బుల్ జలెకు దెరన బార్ జా నాయ్.

10 దస్సి, సెంచె జలెకు, దొన్ని సొక్కల్ జలెకు, జోడ్లు జలెకు, టెక్ని డండొ జలెకు దెరన బార్ జా నాయ్. తుమ్ కచి రిసా కామ్ కెర్తె గే, తుమ్ కెర్తె కామ్చి రిసా జో దెతి అన్నిమ్ తుమ్ నజనుక నాయిమ్.

11 “అన్నె, తుమ్ కేన్ పట్టుమ్తె జలెకు గవ్వొ జలెకు పెసితె పొది, ఒత్త

తగుప జలొసా కో గె జానన, చి తుమ్ ఒత్త తెంతో ఉట్ట గెతె ఎదక జోచితె తా.

12 జోచి గెరి తుమ్ పెసితె పొది, జా గేర్చక, తుమ్క సేంతుమ్ తవుసు మెన చెంగిల్ సంగ్.

13 జా గేర్ సేంతుమ్క తగుప జతిన్ జలె, తుమ్ ఆన్లి సేంతుమ్ జోవయింక జర్గు జా, తవుసు. జా గేర్చ సేంతుమ్క నే తగుప జతిన్ జలె, తుమ్ ఆన్లి సేంతుమ్ జోవయింక నే తతె తుమ్క అన్నె బుల జెయెది.

14 కో జలెకు తుమ్క మురియాద నే కెర్తెగిన, తుమ్ ఆన్తి కబుర్ నే నూన్లెగిన, జో గేరు జలెకు, జా గావ్ జలెకు ముల దా, తుమ్ ఉట్ట గెతె పొది, జా గుర్తుక, తుమ్చ చట్టొ జా టాన్తెచి లంబిలి దూడి పంప్ల గెల, చి ఉట్ట గెచ్చు.

15 ఈంజ లోకుమ్చక వెల్లి తీర్పు కెర్తె దీసి అయ్లె, సాదొమ చి గొమొరా మెల పూర్గుమ్ కుడ్డె నాసెనుమ్ జల పట్టల్చి గత్తిచి కంట, తుమ్క మురియాద నే కెర్తె కేన్ గవ్వొచచి గత్తి ఒగ్గర్ సిచ్చుచి జయెది, మెన నిజామి తుమ్క ఆవ్ సంగితసి.

16 “ఈందె, డొర్కొవచి నెడ్మె మెండల్క తెద్రయ్లి రితి, దస్సి, తుమ్క మాన్సుల్తె ఆవ్ తెద్రయ్తసి. జాచి రిసా, అయివొ కెర్తె తెలివి అన్తి గే, తుమ్ కి తెద్ది తెలివి జా తా. గని, దస్సి తెలివి జలెకి, పార్వ పిట్టల్చి రితి, తేట మెన్సు తిల సుద్దల్ జా తా.

17 కోపుమ్ జత మాన్సుల్చి రిసా జాగర్త తెన్ తా. జేవ్ తుమ్క తీర్పు కెర్తె నబల్తె సొర్పు కెర, జోవయించ నబ గెరలె తుమ్క కొర్డల్ తెన్ పెటలు.

18 తెదొడ్క అంచి రిసా జేవ్ మాన్సుల్ తుమ్క దెర అదికారుల్తె, రానల్తె ఒర్గొడ నెవుల. చి జోవయించి మొక్కె కి, వేర దేసిమ్లు తెంతో అయ్ల అమ్చ యూదుల్ నెంజిలనచి మొక్కె కి తుమ్ అంచి రిసా సాచి సంగితె.

19 మాన్సుల్ తుమ్క దస్సి సొర్పు కెర్తె పొదిక, కిసి లట్టబుక గే, కిచ్చొ సంగుక గే, ఉచర చింత గలన నాయ్. కిచ్చొక

మెలె, తుమ్ జోవయింక కిచ్చొ సంగుక గే, తెదోడకయ్ దేముడుచి సుద్ది తిలి ఆత్మ తుమ్క దెయెదె.

20 మెలె, తుమ్చొ అబ్బొసి జలో దేముడుచి సుద్ది తిలి ఆత్మ తుమ్చి పెట్టి తా కెర, జొయ్యి లట్టబెదె. తుమ్ ఉచర లట్టబ్బు నాయ్.

21 “జా పొదిక, అన్నొన్క బావొసి జలెకు, పుత్తున్క అబ్బొసి జలెకు, మొర్తి సిచ్చతె సార్ప దెవుల. అన్నె, పుత్తర్పుల్ అయ్యున్అబ్బొన్చి ఉప్పిరి విరోదుమ్ జా, జోవయింక మొరవుల.

22 అంచి నావ్చి రిసా ఒగ్గర్ ఒగ్గర్జిన్ తుమ్క విరోదుమ్ జవుల. ఈంజేవ్ అల్లర్ పూర్తి జతె ఎదక కో అంక నిదానుమ్ తా ఓర్పువ జవుల గే, రచ్చించువ జవుల.

23 మాన్సుల్ ఏక పట్టుమ్తె తుమ్క అల్లర్ కెర్తె, అన్నెక్ పట్టుమ్తె ఉట్ట నిగ. కిచ్చొక మెలె, తుమ్క ఆవ్ కిచ్చొ సంగితసి మెలె, ఆవ్ మాన్సు జా జెర్మున్ అయ్లోసా అన్నె జతె ఎదక, అమ్చ ఇస్రాయేలుల్చ పట్టల్ ఎత్తితె తుమ్ బుల కేడవుక నెతుర్పు.

24 “జోచొ గురుచి కంట సిస్సుడు వెల్లో నెంజె. దస్సి కి, జోచొ ఎజొమానిచి కంట గొత్తి మాన్సు వెల్లో నెంజె.

25 సిస్సుడు జోచొ గురుచొ రితొ, గొత్తి మాన్సు జోచొ ఎజొమానిచొ రితొ జలె, సరి జతయ్. దస్సి, ఆవ్ గెర్చొ ఎజొమానిక *‘బయెల్జెబూల్’ మెన కోవుమ్ జల మాన్సుల్ సంగ అన్సి జలె, తుమ్ అంచి గెర్చ ఎత్తిక కి కచితుమ్ దస్సి దూసువ కెరుల.

కక్క బింక గే నే బింక గే యేసు సంగిలిసి

(లూకా 12:2-7)

26 “జలె, జేవ్ అల్లర్ కెర్తసక తుమ్ బియఁ నాయ్. డంక తిలిసి కిచ్చొ జలెకి

కెయఁక తెయఁక నే డీస్తె తయె నాయ్, లుంకడ్డిసి కిచ్చొ జలెకి కెయఁక తెయఁక ఎత్తిక నే జాన్తి రితి తయె నాయ్. ఆకర్క డీసెదె, ఆకర్క జానన్క జయెదె.

27 ఆవ్ గుట్టు తెన్ తుమ్క సంగితిసి తూమ్ ఎదార్దుమ్ సంగ. కంగ్లయి తుమ్క ఆవ్ సంగితిసి తూమ్ మేడల్చ ఒర్పెలె తెంతొ సాట్ట కెర.

28 తుమ్చి ఆఁగుక మారుక తెర్లసక తుమ్ బియఁ నాయ్. కిచ్చొక మెలె, తుమ్క మార్లె కి, తుమ్చి ఆత్మక మారుక నెత్తిర్తి. గని ఆత్మక కి ఆఁగుక కి మార వెల్లి ఆగి గొయ్తె గల దా, నాసెనుమ్ కెరుక తెర్లొసాకయ్ తుమ్ బియఁ.

29 “ఈంజ దేసిమ్చ మాన్సుల్ దొన్సి గెర్పిట్టల్ ఎక్కి కాసుక వికుల. జలెకి, తుమ్చొ అబ్బొసి జలో దేముడుచి నెలవ్ నెంజిలె, దస పిట్టల్తె ఎక్కి కి బుఁయ్యె సేడె నాయ్.

30 తుమ్చి బోడిచ సెండి వాడల్ ఎత్తి మొత్తుమ్ కెత్తి అన్సి గే జొయ్యి జానె.

31 జాచి రిసా, తుమ్ బియఁ నాయ్. తుమ్ పిట్టల్చి కంట ఒగ్గర్ విలువ అస్సున్.

32 “కో అంక నంపజా, మాన్సుల్చి మొక్కె ఒప్పునుల గే, జోక అమ్చ మాన్సుల్ ఈంజేవ్ మెన, పరలోకుమ్ తిలో అబ్బొసి జలో దేముడుచి మొక్కె ఆవ్వె సాచి సంగిందె.

33 గని, మాన్సుల్చి మొక్కె కో అంచి రిసా ‘జోచొ నెంజి’ మెనుల గే, దస్సి పరలోకుమ్ తిలో అబ్బొసి జలో దేముడుచి మొక్కె జోక ‘అమ్చ నెంజితి’ మెన సంగిందె.

34 “ ‘జో బూలోకుమ్తె అయ్లిసి మాన్సుల్తె ఎక్కి సేంతుమ్ కెరెదె’ మెన తుమ్ అంక ఉచర నాయ్. సేంతుమ్ నాయ్, గని జట్టి కెరయ్తి రితి అయ్లయ్.

35 కీసి మెలె, ఆవ్ అయ్లి రిసా, జోచొ అబ్బొన్క పుత్తుసి, జాచి అయ్యున్క

* 10:25 10:25 ‘బయెల్జెబూల్’ మెలె, సయ్తాన్, బూతల్క రానొ జలోసా.

దువిసి, జాచి అత్తనక నూనుసి విరోదుమ్ జవుల.

36 దస్సి, ఏక్ మాన్సుచి కుటుంబుమ్చయ్ జోక విరోదుమ్ సుదల్ జవుల.

37 “అబ్బొనక జలెకు, అయ్యునక జలెకు అంచి కంట కో ఒగ్గర్ ప్రేమ కెరుల గే, దస్సి మెననుక అంక తగుప జలన నెంజితి. పుత్తునక జలెకు, దువిన్క జలెకు అంచి కంట కో ప్రేమ కెరుల గే, దస్సి మెననుక అంక తగుప జలన నెంజితి.

38 అంచి రితి జోవయించి సొంత సిలువ వయన్లి రితి జా, కో అంచి పట్టి జెతి నాయ్, దస్సి మెననుక అంక విలువ జలన నెంజితి.

39 కో జోచి సొంత ప్రానుమ్ రచ్చించుప కెరనుక చజాల గే, జోచి ప్రానుమ్ పాడ్ జా గెచ్చెదె. గని అంచి రిసా కో జోచి ప్రానుమ్ దెతి రితి ఎక్కి నిదానుమ్ ఇండుల గే, జోచి ప్రానుమ్ రచ్చించుప జా జోక దొర్కు జయెదె.

40 “తుమ్క కో మరియాద కెరుల గే, జేవ్ తుమ్క మరియాద కెర్లిసి, అంకయి మరియాద కెర్లిసి జతయ్. అన్యె, అంకయి కో మరియాద కెరుల గే, జేవ్ దస్సి కెర్లిసి అంక తెద్రయ్లోసాక కి మరియాద కెర్లిసి జతయ్.

41 జలె, ‘దేముడు సంగిలి కబుర్ ఆన్తోసా, ఈంజొ’ మెన కో దస మాన్సుల్క మరియాద దెకుల గే, జోవయింక కి ప్రబుచి కబుర్ సంగితోసాక దెతి రితి బవుమానుమ్ దొర్కు జయెదె. పడ్డె, ‘ప్రబుచి నీతి తెన్ తిలోసా, ఈంజొ’ మెన చిన, కో దసా మాన్సుక మరియాద కెరుల గే, జోక కి నీతి తిలోసాక దెతి రితి బవుమానుమ్ దొర్కు జయెదె.

42 పడ్డె, ‘యేసుచ సిస్సుల్’ మెన కో ఈంజేవ్ గవురుమ్ నెంజిల నంపజలనతె ఎక్కిలోక కి ఎక్కి బుక్కెక్ పాని కి పియడుల గే, జోవయింక కి బవుమానుమ్ దొర్కు జయెదె, మెన

నిజుమి సంగితసి” మెన సిస్సుల్క యేసు సంగిలన్.

11

1 యేసు జోచ బారజిన్ సిస్సుల్క బోదన కెర్లిసి కేడ్లి పడ్డె, జా గలిలయ ప్రాంతుమ్చ పట్టుల్తె బోదన కెరుక మెన బార్ జలన్.

జేల్తె తిలో యోహాను యేసుక తెద్రయ్లి కబుర్

(లూకా 7:18-35)

2 బాప్తిసుమ్ దెతో యోహానుక హేరోదు రానో జేల్తె గల తిలో. జలె, క్రీస్తు కెర్త కమొచి రిసా యోహాను జేల్తె నూన కెర, జోచ సిస్సుల్ తెన్ యేసుక కిచ్చొ కబుర్ తెద్రయ్లన్ మెలె, “దేముడు తెద్రయిందె మెలో రచ్చించుప కెర్లిసా నిజుమి తుయి గే, అమ్ అన్నెక్లొక రకుక గే?

3 మెన పున” మెన సంగ తెద్రయ్లో.

4 యేసు యోహానుచ సిస్సుల్క, దెక కెర నూన కెర, “తుమ్ గెచ్చు, చి దెకిలిసి సూన్లిసి ఎత్కి యోహానుక సంగ.

5 గుడ్డి జా తిల మాన్సుల్ దెకితతి, సొట్ట జా తిల మాన్సుల్ ఇండితతి, వెల్లి రోగుమ్ సేడ తిలన చెంగిల్ జా సుద్ది జతతి, బోయ్ రో జా తిల మాన్సుల్ నూన్తతి, మొర గెలన జీవ్ జతతి, సుబుమ్ కబుర్ బీద మాన్సుల్క నూనయ్తసి.

6 జలె, ‘కో జలెకు అంచి రిసా అన్యానుమ్ నెంతె తవుల గే, జోక చెంగిలి’ ” మెన యేసు సంగ తెద్రయ్లన్.

యోహానుచి రిసా యేసు సంగిలిసి
7 యోహానుచ సిస్సుల్ ఉట్ట గెతె తతికయ్, ఒత్త తిల ప్రెజల్క యోహానుచి రిసా యేసు ఇసి మెన సంగుక దెర్లన్. “తుమ్ కిచ్చొ దెకుక జా బయిలె గెచ్చు తిలదు? వాదుతె చివ్వర్ వెల్లి జతిసి దెకుక గెచ్చు తిలదు గే?

8 నాయ్ మెలె, కిచ్చొ వేరచి దెకుక గెలదు? సొమ్నార్లు గలంత పాలల్ గలన్లొ

మాన్యుక దెకుక గెలదు గే? ఈందె, దస్సు పాలల్ గలంతన రాసల్చి గెరలె తవుల.

9 జలె, కిచ్చొ దెకుక గెలదు? దేముడు తెద్రయ్లి కబుర్ సంగితోసా ఎక్కిలోక దెకుక గెలదు గే? నిజుమి. గని, జో ప్రబుచ మాములుమ్ కబుర్లు సంగితనచి కంట యోహాను ముక్కిమ్చొ జయెదె,” మెన తుమ్క ఆవ్ సంగితసి.

10 “ఈందె, అంచి కబుర్ సంగితోసా జతి రితి ఎక్కిలోక తుచి పురై తెద్రయ్తసి. తుచి కంట అగ్గె గెచ్చు, తుయి జెతిసి సాట్టు కెరెదె”

మెన రెగిడ్లి కోడ్ అస్సె. జా కోడు యోహానుచి రిసాయి ‘అంచి కబుర్ సంగితోసా’ మెన కచి రిసా సంగితయ్.

11 జాచి రిసా, తెర్నిమున్ను లట్టబ్లి రిసా జెర్మిలనతె బాప్తిసుమ్ దిలో యోహానుచి కంట వెల్లోచొ కోయి నాయ్ మెన ఆవ్ కచితుమ్ తుమ్క సంగితసి. జలెకి, పరలోకుమ్చి రాజిమ్తె బెదితనతె, కో ఎత్తిచి కంట దాక్ జవుల గే, జో యోహానుచి కంట వెల్లెల జవుల.

12 “బాప్తిసుమ్ దిలో యోహానుచ దీసల్ తెంతో మొదొల్ కెర, పరలోకుమ్చి రాజిమ్ పెలయ్లి రితి జెతె అస్సె, చి మాన్యుల్ బమ్మ తెన్ జేవ్తె బెదితతి.

13 యోహాను ఎదక దేముడుచ కబుర్లు సంగిలన, మోసే పూర్ణుమ్చొచి అత్తి దేముడు రెగ్గయ్ల * అగ్గుల్చి కొణొ ఎత్తి పరలోకుమ్చి రాజిమ్ జెత్తిన్చి రిసా సంగితయ్. జేవ్ ఎత్తిజిన్చి ఆకర్తె యోహాను అయ్లో.

14 అంచి కబుర్ పూర్ణుమ్ సంగిలో ఏలీయా రితోసా ఎక్కిలోక తెద్రయిందె” మెన ప్రబు అగ్గె సంగ తిలో. జలె, తుమ్ నంప కెరై గే నాయ్ గే, గని జో తెద్రయి జలొసా యోహాను.

15 నూన్త కంగ్గొ తిలన సూన.

అన్మానుమ్ జతనచి రిసా యేసు గోల కెర్లిసి

16 “జలె, ఈంజ ఉగుమ్చ మాన్యుల్చి బుద్దిక కిచ్చొ టాలి జయెదె? వీదులె వెస కెల్ల బోదల్చ రిత జతతి, జేవ్ బోదల్ జోవయింతెన్ బెద కెల్ల బోదల్ బుకార కెర,

17 తుమ్క ‘నచ్చుతు’ మెన బచ్చి పుంగిలెకి నచ్చును నాయ్. అమ్ ఏడ్లెకి, తుమ్ బెద ఏడ్పు నాయ్,

మెన దస బోదల్ కిసి సంగుల గే, దస్సి ఆవ్ చి యోహాను కిచ్చొ కెరై కి, తుమ్ మెన్నున్ నాయ్.

18 కిచ్చొక ఆవ్ ఇసి టాలి కెర్లిసి మెలె, యోహాను చువ్వె తన్నె తతోసాచి రిసా, ‘జోక బూతుమ్ దెర అస్సె’ మెన సంగిత తిల.

19 ఆవ్, జలె, మాన్యు జా జెర్మున్ అయ్లోసా, మాములుమ్ కతె పితె తతిన్చి రిసా కిచ్చొ మెంతతి మెలె, ‘ఆదె, కయ్లో మత్వాలో ఈంజో. సిస్తు నజితన తెన్ పాపుమ్ కెర్లన తెన్ బెదితోసా’ మెన అంక నిస్కారుమ్ సంగితతి. గని ఎక్కిలోచి పెట్టి చెంగిల్ తెంతో చి బుద్ది తిలె, జోచ కమొచి పలితుమ్తె రుజ్జు జయెదె” మెన యేసు సంగిలన్.

పట్నల్క యేసు గట్టిజ గోల కెర్లిసి (లూకా 10:13-15)

20 యేసు జా గలిలయ ప్రాంతుమ్తెచ సగుమ్ పట్నల్తె ఒగ్గర్ ఒగ్గర్ అద్బుతుమ్ కమొ కెర్లన్. ఈంజేవ్ కమొ జోచి అదికారుమ్క రుజ్జు దెకయ్లెకి, ఒత్త తిల మాన్యుల్ జేవ్ కెర్లె పావల్చి రిసా దుకుమ్ జతి నాయ్, ములితి నాయ్. జాచి రిసా, యేసు ఇసి మెన జోవయింక గోల కెరుక దెర్లన్:

* 11:13 11:13 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రెగ్గయ్లి అగ్గుల్ మెన అమ్ జానుమ్. ఈంజ కొణొ ఎత్తి బైబిల్తె అగేచి పావ్ పుస్తకుమ్తె రెగ్గయ్ జా అస్సె. ఈంజ దెకవుక మెన కుపియ బాసతె నొయ ప్రమానుమ్తె మోసే పూర్ణుమ్చొచి అత్తి రెగిడ్లి దేముడుచ అగ్గుల్ మెన రగ్గవ అస్సె.

21 “అయ్యో! కొరాజీనా పట్టుమీతెచ చి బేత్సయిదా పట్టుమీతెచ, తుమ్చి సిచ్చ పిట్టె నాయ్! తుమ్చి నెడిమి కెర్ల కమొ అమ్చ యూదుల్ నెంజిల తూర్పు చి సీదోను మెల పట్టల్తె ఆవ్ కెర్తయ్ జలె, జేవ్ పట్టల్చ మాన్సుల్ అగ్గెయి జేవ్ కెర్ల పాపల్క దుకుమ్ జా, ములిత. జేవ్ కెర్ల పాపల్చి దుకుమ్చి రుజ్జుక బస్తల్ బందన సార్ గాంసంత.

22 పూర్గుమ్ జేవ్ తూరు పట్టుమ్చ కి సీదోను పట్టుమ్చ కి ఒగ్గర్ పాపుమ్ కెర్తె తిలె కి, ఈంజ లోకుమ్చ ఎత్తిజిన్క వెల్లి తీర్పు కెర్తి జా దీసిక, తూమ్ జతి సిచ్చ జేవ్ పట్టల్ జతి సిచ్చచి కంట ఒగ్గరి జయెదె, మెన తుమ్క ఆవ్ కచితుమ్ సంగితసి.

23 “పడ్డె, తుమ్ కపెర్నహూమ్ పట్టుమ్తెచ, తుమ్ పరలోకుమ్తె ఉక్కిల్ జస్టె గే? నాయ్. తుమ్ మొర్లస రకితి టాన్తె ఉత్త గెతె. కిచ్చొక మెలె, తుమ్చితె ఇస వెల్లో కమొ అమ్చ యూదుల్ నెంజిలి సోదోమ పట్టుమ్తె పూర్గుమ్ కెర తత్తయ్ జలె, ఒత్త తిలన నంపజత, చి జా పట్టుమ్ నాసెనుమ్ నే జతె, ఆజి ఎద తత్తి.

24 సోదోమ పట్టుమ్చ మాన్సుల్ ఒగ్గర్ పాపుమ్ కెర్తె తిలె కి, ఈంజ లోకుమ్చ మాన్సుల్క వెల్లి తీర్పు కెర్తి దీసిక, తూమ్ జతి సిచ్చ జా పట్టుమ్చ జతి సిచ్చచి కంట ఒగ్గరి జయెదె, మెన ఆవ్ తుమ్క సంగితసి.” మెన యేసు సంగిలన్.

25 తెదొడి యేసు కిచ్చొ సంగిలన్ మెలె, “పరలోకుమ్క కి బూలోకుమ్క కి అదికారుమ్ తిలొ ఓ అబ్బొ, ‘జానుమ్’ మెన జేవ్క జెవ్వి గవురుమ్ ఉచరంతసక చి ఒగ్గర్ నదు కెర్లసక

ఈంజ జర్గు జతిసి ఎత్తిచి అర్దుమ్ లుంకడ, బాలబోదల్ జల రిత గవురుమ్ నెంజిలసక అర్దుమ్ దెకవ అస్సిసి మెన తుక జోబర, మెన అంచి సర్ల జతసి.

26 తుచి దయ తెన్ ఇసి కెర్లది” మెన ప్రార్దన కెర్లన్. దస్సి ప్రార్దన కెర, అన్నె ఇసి మెన సంగిలొ.

27 “అంచొ అబ్బొ ఎత్తి అంచి అత్తి సొర్పు కెర దా అస్సె. అన్నె, అబ్బొ ఎక్కిలొయి ఆవ్ పుత్తున్క సరిగా జానె అన్నె కో కి నేన్తి. పడ్డె, ఆవ్ పుత్తుసి అంక పిట్టవ కో కి అబ్బొక నేన్తి చి అన్నె కక్క ఆవ్ అబ్బొక దెకవుక మెన నిసాన్దె గే, జో కి జానెదె.

28 “నైమల్ బాదల్చ జాడ్లు వయ టక్క తిలన ఎత్తిజిన్ అంచితె జా, చి తుమ్చి జాడు ఆవ్ వయలి రితి జా, తుమ్క పుండయిందె.

29 అంచి తెన్ లంకె జా, చి అంచితె బుద్ది సిక్క. కిచ్చొక మెలె, ఆవ్ గవురుమ్ నే ఉచరంతె, పెట్టి అమ్మయికుమ్ తెన్ అస్సి, చి తుమ్చ అత్తల్తె పుండితె.

30 కిచ్చొక మెలె, ఆవ్ గల్లి పూండు సుల్లు అస్సె, ఆవ్ వయడ్డి జాడు సుల్లున అస్సె” మెన యేసు సంగిలన్.

12

బక్తి కెర్తి దీసి రిసో యేసు సంగిలిసి
(మార్కు 2:23-28; లూకా 6:1-5)

1 జా పొదులె, *సెలవ్ కడన్లి దీన్తె, యేసుచి సిస్సుల్, పంటొ పికిలి బుయి వాట్ గెతె తిల. జలె, యేసుచ సిస్సుల్క చూ కెర్తికయ్. జా వాట్ సొడిచి పికిలి పంటొచ ఎన్నులు దొన్ని కోడ కంక దెర్ల.

* **12:1 12:1** ఎత్తి సెస్వర్ యూదుల్క బక్తి కెర్తి సెలవ్ కడ దీసి జయెదె. జా దీసి జోవయింప నబ గెరెత్ గెచ్చ, దేముడుచ కొడె నూన కెర, ఎత్తి అదికారుమ్ తిలొ దేముడుక బక్తి కెరుల. జోక ‘యెహోవ’ మెన నావ్ తయెదె. జా దీసి ‘కిచ్చొ కామ్ కెర నాయ్’ మెన జో ఎత్తి అదికారుమ్ తిలొ దేముడు సంగిలిన్క యూదుల్చ వెల్లెల మాన్సుల్ ప్రెజల్క జాడు వయడ్డి రితి కెర కామ్ నే కెర్తెన్చి రిసో ఒగ్గర్ ఆగ్గుల్ అవ్వి ఉచర అస్సి. ఇన్నె, దొన్ని ఎన్నులు కోడ్లిన్క ‘కామ్’ మెన నింద కెర్లతి.

2 జలె, పరిసయ్యుల్ సగుమ్జిన్, జేవ్ సిస్సుల్ కెర్లిసి దెక కెర, “ఆదె, †బక్తి కెర్లి సెలవ్ కడన్లి దీసి కెరుక నాయిమ్ నెంజిలిసి తుచ సిస్సుల్ కెర్తతి” మెన యేసుక గోల కెర్తికయ్,

3 జో జోవయింక ఇసి మెలన్: “పూర్ణుమ్ తిలో దావీదు రానో, జోక చి జో తెన్ తిలనక చూ కెర్తికయ్, జో కెర్లిన్ చి రిసా తుమ్ సదు కెర్పు నాయ్ గే?

4 కిచ్చొ కెర్లిసి మెలె, దేముడుచి గుడితె జో పెసిలన్, చి ఒత్త తిల పూజర్లు అర్పితుమ్ దిల పోడియె కయ్ల. జేవ్ పోడియె పూజర్లు కంక జయెదె, గని అన్నె కో కంక జయె నాయ్. జో కి, జో తెన్ తిలన కి జా కంక నాయిమ్ నెంజిలె కి జేవ్ కయ్ల.

5 పడ్డో, ఎత్తి బక్తి కెర్లి సెలవ్ కడన్లి దీసి, దేముడుచ పూజర్లు దేముడుచి గుడితె సేవ కెర్తతి. జా సేవక ‘కామ్. సుద్ది దీసి పిట్టవ గార్ కెర్తతి మెన ఉచరుక జయెదె జలెకి, పాపుమ్ నెంజె’ మెన మోసి పూర్ణుమ్చొచి అత్తి రెగిడ్డి దేముడుచ †ఆగ్నల్తె తిలిసి సదు కెర్పు నాయ్ గే?

6 జలె, అవ్ తుమ్క సంగితిసి కిచ్చొ మెలె, దేముడుచి గుడిచి కంట వెల్లో సుదో ఇన్నె అన్నె.

7 ‘తుమ్ కిచ్చొ కెర్లిసి అంక ఆస మెలె, బలి దెతిసి నాయ్, గని మాన్సుల్క కన్కారుమ్ దెకితిసి’ మెన తెదొడి సంగిలి కోడు తుమ్ అర్దుమ్ కెరంతదు జలె, పాపుమ్ నే కెర్ల ఈంజేవ్ సిస్సుల్క ‘పాపుమ్ కెర్ల’ మెన, నింద కెర్దుదు నాయ్.

8 సెలవ్ కడన్లి దీసిచి ఉప్పిరి అవ్ మాన్సు జా జెర్మున్ అయ్లోసొక

అదికారుమ్ అన్నె.” మెన, జేవ్ పరిసయ్యుల్క యేసు సంగిలన్.

ఆతు లంబిలోసొక యేసు చెంగిల్ కెర్లిసి

(మార్కు 3:1-6; లూకా 6:6-11)

9 యేసు ఒత్త తెంతో గెచ్చు, జా కపెర్నూహూమ్ పట్టుమ్తెచి సబ గెరి వెసిల్లో.

10 ఓదె, ఆతు లంబ గెలోసొ ఎక్కిలో ఒత్త తిలన్. జేవ్ వండితుల్, కి, జో బాద తిలో మాన్సు అన్నె మెన దెక కెర, యేసుక నేరిమ్ వయడుక ఉచర, “సెలవ్ కడన్లి దీసి ఏక్ బాద తిలో మాన్సుక చెంగిల్ కెరుక నాయిమ్ గే, నాయ్?” మెన జోక పుసిల.

11 జో జోవయింక, “తుమ్చితె కేన్ మాన్సుక జలెకు ఎక్కి మెండ జవున్ తిలెగిన, జా మెండ బక్తి కెర్లి సెలవ్ కడన్లి దీసి ఏక్ గొయితె సేడ తిలెగిన, జో ఎజొమాని జాక జా గొయి తెంతో కడె నాయ్ గే?

12 జలె, మెండచి కంట మాన్సు ఒగ్గర్ విలువ. జాకయ్, సెలవ్ కడన్లి దీసి కి మాన్సుక చెంగిల్ కెరుక నాయిమి” మెన జబాబ్ దా,

13 యేసు జో ఆతు లంబిలోసొక దెక, “తుచి ఆతు చంపొ కెరు” మెలన్. జో మాన్సు ఆతు చంపొ కెర్లన్, చి ఈంజో ఆతు బేగి అన్నెక్ చెంగిల్ తిలి ఆతుచి రితి చెంగిల్ జలి.

14 గని యేసు దస్సి కెర్తికయ్, పరిసయ్యుల్ కిచ్చొ కెర్ల మెలె, బార్ జా కెర, యేసుక కీసి మారుక గే కుట్ర ఉచరన లట్టబన్.

15 జేవ్ పరిసయ్యుల్ ఉచర్లిసి యేసు జానెచి రిసా, ఒత్త తెంతో ఉట్ట గెలన్. ఒగ్గర్ ఒగ్గర్జిన్ జనాబ్ జోచి పట్టి గెల,

† 12:2 12:2 ఎత్తి అదికారుమ్ తిలో దేముడు ఒగ్గర్ పూర్ణుమ్ పొది సంగిలి రితి, యూదుల్ ముక్కిమ్క సెన్సర్ల దీసి నబతె గెచ్చు బోడన నూన బక్తి కెరుల, చి కిచ్చొ కామ్ కెర్లి నాయ్. కామ్ నే కెర్లి ఆగ్న ప్రజల్ నే పిట్టయ్ తి రితి, జోవయింక వెల్లెల మాన్సుల్, కన్కారుమ్ పచ్చు, ప్రబు సంగిలి కంట అన్నె ఒగ్గర్ ముడ్డో కెర్తతి. † 12:5 12:5 తెలుగు బైబిల్తె ధర్మశాస్త్రమ్ మెలె, మోసిచి అత్తి దేముడు రగ్గయ్లె ఆగ్నల్ మెన అమ్ జానుమ్. ఈంజ కొడో ఎత్తి బైబిల్తె అగేచి పావ్ పున్రుకుమ్తె రెగ్గయ్ జా అన్నె. ఈంజ దెకవుక మెన కుపియ బాసతె నొయి ప్రమానుమ్తె మోసి పూర్ణుమ్చొచి అత్తి రెగిడ్డి దేముడుచ ఆగ్నల్ మెన రగ్గవ అన్నె.

చి జోవయింతె జొర్జొ తిలన ఎత్తిజినకజో చెంగిల్ కెర,

16 “అంచి రిసా తుమ్ కేనె తెర్లె ఒత్త సంగ నాయ్” మెన, జేవ్ ప్రెజల్ క ఆడ్ర దిలన్.

17 ఈంజ ఎత్తి కిచ్చొక జర్గు జలి మెలె, దేముడుచ కబుర్లు సంగిలో యెసయా పూర్లుమ్చొచి అత్తి సంగిలి కోడ్ నెరవెర్చుప జతి రిసాయి.

18 “ఈంజొ, ఆవ్ నిసాన్ల అంచొ సేవ కెర్లొసా, ఈంజొ ఆవ్ ప్రేమ కెర్లొసా, చి రిసా అంక పూర్తి సర్లసంతోసుమ్. ఇనాచి పెట్టి అంచి ఆత్మ తియిదె, చి ‘యూదుల్ నెంజిల మాన్సుల్ కి రచ్చించుప జంక జయెదె’ మెన సూనవెదె.

19 ఈంజొ పోటి జయె నాయ్. గగ్గొల్ జయె నాయ్, అన్యె గవురుమ్ ఆనన్తి రితి వీదులె గట్టిజ లట్టబ జోచి అవాడ్ సూనయె నాయ్.

20 జలె, ఆకర్ దీసిక సత్తిమ్ తెన్ ఎత్తిక పరిచ్చ కెర తీర్పు కెర, సిచ్చల్ గే బవుమానల్ గే దెతి ఎద, కామ్క నెంజిలి పీరి గండక జో మోడ కెర వెంట గెల్లి నాయ్. సరిపుచుప జతి ఉజిడి నే దెతి వత్తి జో నే విజవ దెవుల.

21 పడ్డె, ఇనాచి నావచి తెడి యూదుల్ నెంజిలన దయిరిమ్ జా ఆస జవుల” మెన, దేముడు సంగిలి కోడు నెరవెర్చుప జలి.

యేసుక పండితుల్ దూసుప కెర్లెసి (మార్కు 3:20-30; లూకా 11:14-23; 12:10)

22 తెదొడి బూతుమ్ దెర్లి రిసా గుడ్డి జా గుల్లో జా తిలో మాన్సుక ఒత్త తిల మాన్సుల్ యేసుతె కడ ఆన్తికయ్, యేసు జోక చెంగిల్ కెర్లన్. జో మాన్సు లట్టబుక దెర్లొ చి అంకివొ డీసిల.

23 ఇస్సె జలి రిసా, ప్రెజల్ ఎత్తి ఆచారిమ్ జా, “ఈంజొ యేసు కొన్సొ?

దావీదు రానొచి సెకుమ్తె జెర్కుక తిలో రచ్చించుప కెర్లొసా ఈంజొ ఏక్ వేల జయెదె గే?” మెన లట్టబ్ క దెర్ల.

24 పరిసయ్యుల్, జా కోడు సూన కోపుమ్ జా. “బూతల్ క రానొ జలో బయెల్లెబూల్చి నావ్ తెన్ ఈంజొ బూతల్ క ఉదడ్డయ్” మెన గోసక సంగిల.

25 గని జేవ్ ఉచర్లెసి యేసుక జానెచి రిసా, ఇసి మెలన్. “కేన్ జవున్ రాజిమ్తెచ మాన్సుల్, జోవయింక జెచ్చి విరోదుమ్ జా వర్న వర్న జా యుద్దుమ్ కెరన్లె, జా రాజిమ్ పాడ్ జా గెచ్చెదె. కేన్ పట్టుమ్ జవున్ కేన్ గేరు జవున్ మాన్సుల్ వర్న వర్న జా జోవయింక జెచ్చి విరోదుమ్ కెరన్లె, జా పట్టుమ్ జవున్, గేరు జవున్ టీవొ జయె నాయ్.

26 దస్సి, సయ్తాన్చక సయ్తాన్ ఏక్ వేల ఉదడ గెలెగిన, జోవయింక జొయ్యి యుద్దుమ్ కెర్తయ్, జోవయింక జొయ్యి యుద్దుమ్ కెర్లె, జోచి రాజిమ్ కిసి జా టీవొ జయెదె?

27 ఆవ్ ఏక్ వేల బయెల్లెబూల్చి నావ్ తెన్ బూతల్ క ఉదడ్లెగిన, తుమ్చ సిస్సుల్ కచి నావ్ తెన్ ఉదడ్డతి? బూతల్ క ఉదడ్డ తుమ్చయ్ సిస్సుల్ అంచి రిసా తుమ్క తీర్పు సంగుతు!

28 దేముడుచి సుద్ది తిలి ఆత్మనెక్తిక ఆవ్ బూతల్ క ఉదడ గెల్లెసి జలె కచితుమ్ దేముడుచి రాజిమ్ తుమ్తె అప్పె పావ జా అస్సె.

29 “అన్నెక్ టాలి ఉచర, కిచ్చొ మెలె, కేన్ జవున్ బలుమ్ సుదొచి గెరి వెస జోచి అస్తి దెర గెచ్చుక చోరు ఉచర్లెగిన, తొలితో జో చోరు జో బలుమ్ సుదొక నే బంద తిలెగిన, చోరుక నెత్తె. జో బలుమ్ సుదొక తొలితో బందిలెగిన, గెరిచి సామన్ జో చోర గెలుక జయెదె” మెన సంగిలన్.

30 దస్సి సంగ, యేసు అన్యె, “కో అంచి పచ్చిన జయె నాయ్ గే, అంక విరోదుమ్ జా అస్సె, చి అంచి రాజిమ్తె

జేవ్ బెదిత్ రితి కో అంచి తెన్ మాన్సుల్క ఆనె నాయ్ గే అంచి మందక చెదుర్పు కెర్తయ్.

31 “జలె, ఆవ్ తుమ్క సంగితిసి కిచ్చొ మెలె, ఎక్కిక పిట్టవ మాన్సుల్ కెర్త పాపల్ దూసెనల్ ఎత్తి జోవయింక చెమించుప కెరుక జయెదె. గని, దేముడుచి సుద్ది తిలి ఆత్మక దూసుప కెర్తిసి చెమించుప జయె నాయ్.

32 కో గడియ బమ్మ జా ఆవ్ మాన్సు జా జెర్మున్ అయ్లోసాచి రిసా అన్మానుమ్ కోడ్ లట్టబెదె గే, జోవయింక చెమించుప కెరుక జయెదె. గని దేముడుచి సుద్ది తిలి ఆత్మక కో దూసుప కెరుల గే, ఈంజ ఉగుమ్తె కి జా ఉగుమ్క కి చెమించుప జతి నాయ్.

33 “రూకచి పండ్లు చెంగిల్చి జలె, జా రూకుక చెంగిల్ మెన ఒప్పున. రూకచి పండ్లు గర్చి జలె, జా రూకుక గర్చి మెన ఒప్పున. రూకచి పండ్లు దెకిలెగిన, జా రూకుక చెంగిల్ గే, గర్చి గే చినుక జయెదె.

34 పెట్టి అయివొచి రితి విస్సుమ్ తిల మాన్సుల్, తుమ్. తుమ్చి పెట్టి విస్సుమ్ తిలి రిసా తుమ్ కీసి చెంగిల్చి లట్టబుక జయెదె! పెట్టితె తిలి బుద్దిచి కొల్లి చోడి లట్టబెదె.

35 చెంగిల్ మాన్సు జోచి చెంగిల్ బుద్ది బెర్తుచి కొల్లి చెంగిల్చి బార్ కెరెదె. గర్చి మాన్సు జోచి పెట్టిచి విస్సుమ్చి బెర్తుచి కొల్లి విస్సుమ్ బార్ కెరెదె.

36 ఆవ్ తుమ్క సంగితిసి కిచ్చొ మెలె, ఈంజ లోకుమ్చ ఎత్తిక వెల్లి తీర్పు కెర్తి దీసిక మాన్సుల్ లట్టబ్లి ఎత్తి కామ్క నెంజిలి కోడుచి రిసా నేరిమ్ వయుల.

37 తుమ్చ కొణ్ణ తుమ్చి పెట్టి తిలిన్క సాచి జలి రిసా నీతి సుదొ గే, నెంజిలె పాపుమ్ సుదొ గే బార్ కెరెదె.” మెలన్.

జేవ్ యూదుల్ అన్మానుమ్

జలిన్చి రిసాచి తీర్పు
(మార్కు 8:11-12; లూకా 11:29-32)

38 తెదొడి పరిసయ్యుల్ చి మోసే తెన్ దేముడు దిలి ఆగ్నల్ సికడ్డన సగుమ్జిన్ యేసుక, “గురుబాబు, దేముడుచి అదికారుమ్ తుక అస్సె మెన రుజ్జు దెకయ్తి వెల్లి కామ్ ఏక్ అప్పె కెరు. దెకుమ్దె” మెన యేసుక సంగిల.

39 గని, జో జోవయింక కిచ్చొ జబాబ్ దిలన్ మెలె, “ప్రబుక నిదానుమ్ నెంజ లంజెబుద్ది పాపుమ్బుద్ది జల తుమ్ ఈంజ కాలుమ్చ మాన్సుల్, రుజ్జు దెకయ్త కమ్మెక కోర్ప జతసు. అంచి అదికారుమ్ దెకయ్తి రిసా ఎక్కి పిట్టవ, కేన్ వేర కామ్ కెర దెంక నెంజె. జా రుజ్జుచి కామ్ కీసిచి జయెదె మెలె, దేముడుచ కబుర్లు పూర్గుమ్ సంగిలో యోనాక జర్గు జలిన్చి రితి జయెదె.

40 మెలె, యోనా కీసి తిర్పతి అందరె మెద్దెనె సముర్తుమ్చి వెల్లి మొస్సాచి పెట్టి తిలన్ గె, దస్సి, మాన్సు జా జెర్మున్ అయ్లయ్ ఆవ్ తిన్ని అందర్లు తిన్ని మెద్దెనె బుయి తెడి తయిందె.

41 అస్సె, ఈంజ లోకుమ్ ఎత్తిక వెల్లి పరిచ్చ కెర్తి దీసిక, తుమ్ ఈంజ కాలుమ్చ అన్మానుమ్ జల యూదుల్ కి, యోనా బోదన కెర్ల నీనెవె పట్టుమ్చ పైజల్ కి, బెద టీవో జా, జేవ్ తుమ్క ‘గర్చ’ మెన రుజ్జు దెకవుల. కిచ్చొక మెలె, జా పట్టుమ్చ మాన్సుల్ యోనా కెర్లి బోదన సూన కెర, జేవ్ కెర్ల పాపల్చి రిసా దుకుమ్ జా, నంపజా, బుద్ది జల. ఈందె, యోనాచి కంట వెల్లో తుమ్చి నెడిమి అస్సె.

42 పడ్డె, వెల్లి తీర్పు కెర్తి జా దీసిక, దచ్చెన దేసిమ్చి పూర్గుమ్ తిలి రాని ఎక్కి ఈంజ కాలుమ్చ మాన్సుల్ తెన్ టీవో జా, తుమ్క ‘గర్చ’ మెన రుజ్జు దెకయెదె. కిచ్చొక మెలె, పూర్గుమ్ జా రాని ‘సాలోమోను రానొ సంగితి బుద్దిచి

కోడు నూనిందె' మెన, ఒగ్గర్ ఒగ్గర్ దూరి తెంతో అయ్యలి. గని, ఈందె, సొలోమోనుచి కంట వెళ్లొ సుదొ తుమ్చి నెడిమి అస్సె.

బేనివొ, అంచి అయ్య" మెన సంగిలన్.

13

బీ ఊంపిలిన్క టాలి
(మార్కు 4:1-9; లూకా 8:4-8)

1 జా దీసి, యేసు గెరి తెంతో బార్ జా, సముద్రుమ్చి ఒడ్డుతె గెచ్చ, వెసిలన్.

2 ఒగ్గర్ ఒగ్గర్జిన్ జనాబ్ జోతె జా కెర, సుట్టునంత బెర *పెలపెలి జలి రిసా, జో ఏక్ దోనితె వెగ వెసిలన్. అన్నె బెర తిల మాన్సుల్ ఎత్రిజిన్ సముద్రుమ్చి ఒడ్డుతె టీవొ జా తతికయ్,

3 యేసు జోవయింక దెక దెక, బోదన కెర్తి రిసా ఒగ్గర్ టాలివొ సంగుక దెర్లన్. "ఈందె, ఊంపితోసొ ఎక్కిలో బీ ఊంపుక బార్ జులన్.

4 జో ఊంపితె తతికయ్, సగుమ్ బీ బయిలె వాట్ పక్క సేడ్డికయ్, పిట్టల్ ఉత్త జా, జా బీ కా: గెల.

5 అన్నె సగుమ్ బీ ఒగ్గర్ మత్తి నెంజిలి పత్తురు బుయ్యె సేడ్లన్. ఉప్పిరి ఇదిలిదిల్ మత్తి తిలి రిసా, ఒత్త సేడ్డి బీ బేగి గజ్జల్ జలి

6 ఒప్పడ లయతికయ్, మొక్కల్ డడ్డ గెల. చి చెర్లొ బుయి తెడి పెన వడ్డుక నెత్తిరి రిసా, జేవ్ మొక్కల్ సుకా గెచ్చ, మొర గెల.

7 అన్నె సగుమ్ బీ కంట మొక్కల్ తిలిన్తె సేడ గజ్జల్ జా మొక్కల్ జల. గని ఒత్త తిల కంట మొక్కల్ వడ్డ కెర, ఒత్త సేడ్డి బీచ మొక్కల్క పెల గెల్లికయ్, జేవ్ మొక్కల్ పలితుమ్ దెర్తి నాయ్.

8 గని అన్నె సగుమ్ బీ చెంగిల్ బుయ్యె సేడ కెర, కేన్ మొక్క పుంజెక్ వంతుల్, †అరవయ్ వంతుల్, ముప్పయ్ వంతుల్, పలితుమ్ దిల.

9 సూన్త కంగ్గొ తిలస, సూన" మెన సంగిలన్.

43 "ఏక్ మాన్సుక బూతుమ్ దెర తిలెగిన, జా బూతుమ్ జో మాన్సుచి తెంతో ముల దా తత్తిచి రిసా టాన్ చజన, బయిలె గెచ్చ బుల్తె తయెదె, గని, టాన్ నే దొర్కు జలి రిసా,

44 జో ఊచరన, ఆవ్ ముల దిలో గెరి అన్నె గెచ్చిందె మెన, జా గేర్ విడి అస్సె మెన, జా గెర్చొ మాన్సు వడ్డవ కెర సుబ్రుమ్ కెర అస్సె మెన దెక కెర,

45 అన్నె గెచ్చ, జాచి కంట గర్పు సత్తు బూతల్క పట్టి కడ ఆనెదె, చి జేవ్ ఎత్తి జో మాన్సుచి తెడి పెన కెర, ఒత్తయ్ బన జవుల. జాచి రిసా, జో మాన్సుక అగ్గెచి కంట, ఆకర్క ఒగ్గర్ అల్లర్ తయెదె. గర్చి బుద్దిచి ఈంజ కాలుమ్చ మాన్సుల్ తెన్ దస్సి జయెదె." మెన, యేసు బోదన కెర్లన్.

46 యేసు ప్రెజల్క అన్నె బోదన కెర్తె తతికయ్, ఈందె, జోచి అయ్యసి బావుడ్డివొ జా కెర, 'జో తెన్ లట్టబుమ్దె' మెన వీదె టీవొ జా తిల.

47 కితెదొడి ఎక్కిలో "ఈందె, తుచి అయ్యది తుచ బావుడ్డివొ తుచి తెన్ లట్టబుక మెన వీదె టీవ అస్తి" మెన యేసుక సంగిలన్.

48 జోక సంగిలో మాన్సుక యేసు "కొన్సి అంక అయ్య, కొన్స అంక బావుడ్డు జవుల గే జాన్సు గే?" మెన సంగ,

49 జోచి సిస్సుల్ తిలి పక్క ఆతు చంప కెర, "ఈందె, అంచి అయ్య, అంచ బావుడ్డు.

50 కిచ్చొక మెలె, పరలోకుమ్ తిలో అంచొ దేముడు అబ్బొ సంగిలి రితి కో కెరుల గే, జెవ్వి అంచ బావుడ్డు, అంచ

§ 12:47 12:47 గ్రీకు బాస తెన్ ఈంజ మత్తెలి తొలితొ రెగిడ్ల సగుమ్ పుస్తకల్తె 47 కోడు తయె నాయ్.

* 13:2 13:2 పెలపులి † 13:8 13:8 తిని విస్సా

10 పడ్డో యేసుచ నీస్సుల్ జోతె జా కెర, “తుయి కిచ్చొక టాలివో సంగయ్ ప్రజల్క బోదన కెర్తని?” మెన జోక పునిల.

11 యేసు జోవయింక, “పరలోకుమ్చి రాజిమ్చి రిసాచి గుట్టుల్ జానన్క తుమ్క సెలవ్ దా అస్సె. గని జోవయింక జా సెలవ్ నాయ్. †

12 కిచ్చొక మెలె, తిలోసాక అన్నె దెంక జయెదె, చి జోక ఒగ్గర్ కలుగు జయెదె. గని, నెంజిలోసా జలె, జోక తిలిసి కి జోతె తెంతో కడ నెంక జయెదె.

13 జేవ్ ప్రజల్ దెక నే దెకిలి రితి, సూన నే సూన్లి రితి, అర్దుమ్ కెరంతి నాయ్. ఇసిచి రిసా ఆవ్ టాలివో కెరయ్ జోవయింక బోదన కెర్తసి.

14 జేవ్ నంప నే జత్తినచి రిసా యెసయాచి అత్తి పూర్లుమ్ దేముడు సంగిల్ కోడ్ కచితుమ్ నెరవెర్చువ జతయ్.

తుమ్ నిజుమ్ సొంత సూన్లె కి, కచితుమ్ కెయక అర్దుమ్ కెరన్సు నాయ్, నిజుమ్ సొంత దెకిలెకి, కచితుమ్ అర్దుమ్ చినున్ నాయ్.

15 కిచ్చొక మెలె, ఈంజ ప్రజల్చి పెట్టి బేడు బంద అస్సె, ఇనాచి కంగ్డల్ దిమ్మల్ డంకి జలి రితి జా అస్సి. ఇనయించ అంకివో డంకన్లి రితి జా అస్సి. నెంజిలె, ఇనయించ అంకివో దెక చినిత, ఇనయించ కంగ్డల్ సూన సూనిత, చి ఇనాచి పెట్టి అర్దుమ్ కెరంత, చి ఆవ్ ఇన్యెక చెంగిల్ కెర్తి రితి పసుల కెర అంచితె జైత”. మెన జేవ్చి రిసా సంగిలి కోడు.

16 “జలె, తుమ్ నంపజలనచ అంకివో డిస్తతిచి రిసా తుమ్క చెంగిలి. తుమ్క అర్దుమ్ సూనత కంగ్డల్ అస్తిచి రిసా తుమ్క చెంగిలి.

17 పూర్లుమ్చక చి కంట తుమ్క ఒగ్గర్ చెంగిలి మెన కచితుమ్ తుమ్క ఆవ్ సంగితసి. కిచ్చొక మెలె, పూర్లుమ్

దేముడుచ కబుర్లు సంగిలన ఒగ్గర్జిన్, సత్తిమ్ ఇండిలన ఒగ్గర్జిన్, తూమ్ దెకితిసి దెకుక జేవ్ కోర్ప జలెకి, దెకుక నెత్తిర్ల. తూమ్ సూన్తిసి సూనుక జేవ్ కోర్ప జలెకి, సూనుక నెత్తిర్ల. జా అవ్కాసుమ్ జోవయింక దొర్కు జయె నాయ్.

ఉంపిలి బీచి టాలిచి అర్దుమ్ యేసు సంగిలిన్
(మార్కు 4:13-20; లూకా 8:11-15)

18 “ఉంపితోసాచి రిసా సంగిలి టాలి తుమ్ అర్దుమ్ కెరన.

19 కో జలెకు పరలోకుమ్చి రాజిమ్చి రిసాచి బోదన సూన అర్దుమ్ నే కెరన్లె, సయ్తాన్ జా కెర, జో మాన్సుచి పెట్టి ఉంపిలి జా బోదన ఉర్ల కెర దెర గెచ్చెదె. వట్టెచి ఉంపిలి బీ ఈంజ జయెదె.

20 పత్రల్ బుయ్యె ఉంపిలిసి, కో జలెకు చి బోదన సూన్లి బేగి, సర్ల జా నంపజతసి మెనెదె,

21 గని జోచి సొంత పెట్టి సుబుమ్ కబుర్చ చెర్తో నెంజిలి రిసా, జో జలి రితి జా గడియ టీవో జా తిలె కి, సుబుమ్ కబుర్ జో నంపజలిన్చి రిసా కిచ్చొ జవున్ బాద నేడ్లె జలెకు, నెంజిలె విరోదుమ్ జలన జోక అల్లర్ కెర్లె జలెకు, జో మాన్సు బమ్మ జా, బే బేగి నముకుమ్ ముల దెయెదె.

22 కంట దుబ్బుల్ తిలి బుయ్యె ఉంపిలి బీ, కో జలెకు, చి బోదన సూన్లె కి, ఈంజయ్ లోకుమ్తె తిలిసి ఎత్కిక ఉచరై తా, కిసి జా జియిందె? మెన చింత గలనెదె జలెకు, సొమ్నూరుమ్ జంక ఆన జయెదె జలెకు, దస్సి, జా ఆన జవున్, జా చింత జవున్, జా బోదనక వెలగిలి రితి జతయ్చి రిసా జా బోదన జోతె పలితుమ్ దెరె నాయ్.

23 గని, చెంగిలి బుయ్యె ఉంపిలి బీ, చి బోదన సూన కో అర్దుమ్ కెరనెదె గె,

† 13:11 13:11 12 ఇన్నెచి అర్దుమ్ కిచ్చొ మెలె, ‘నంపజా అర్దుమ్ తిలనకయ్ అస్సె అర్దుమ్ సికడుక జయెదె...గని నంప నెంజి అర్దుమ్ నెంజిలనక తిలి అర్దుమ్ కి జోవయింతె తెంతో కడ నెంక జయెదె’.

జో మెలె, చెంగిలి బుయ్యో ఉంపిలి బీతె కేన్ గిడ్డ పుంజెక్ వంతుల్, అరవయ్ వంతుల్, ముప్పుయ్ వంతుల్ కిసి పలితుమ్ దెరుల గే, దస్సి, నూన అర్దుమ్ కెరంతో మాన్సు తమ్మన కిపలితుమ్ దెరెదె” మెన యేసు బోదన కెర్లన్.

చెంగిల మొక్కల్క చి వెరి మొక్కల్క టాలి

24 యేసు ప్రజల్క సంగిలి అన్నెక్ టాలి ఇసి జలి. “పరలోకుమ్చి రాజిమ్ తెన్ కిసి మెలె, జోచి వెడయ్ చెంగిల్ గోదుమ్చి బీ ఉంపిలిన్చి ఏక్ మాన్సు రితి జతయ్.

25 మాన్సుల్ నిజ గెల తతికయ్, జో ఉంపిలోసాచో విరోదుమ్చో జా కెర, జా చెంగిల్ బీ ఉంప తిలిన్తె వెరి గిడ్డల్ ఉంప దా, ఉట్ట గెలన్.

26 చెంగిల్ బీచ మొక్కల్ ఉట్ట వడ్డ ఎన్నులు దెర్లి పొది, జేవ్ వెరి మొక్కల్ కి డీసిల.

27 జో ఉంపిలో ఎజోమానితె జోచ గొత్తి సుదల్ జా కెర, ‘బాబు, తుయి తుచి వెడయ్తె చెంగిలి బీ ఉంపిలది. జలె కిసి ఒత్త వెరి మొక్కల్ కి ఉట్ట అస్తి?’ మెన పుసితికయ్,

28 జో జేవ్క, ‘ఈంజ కో గే విరోదుమ్చో కెర్లి కామ్ జయెదె’ మెన సంగిలన్. జోచ గొత్తి సుదల్ జోక, ‘దస్సి జలె, అమ్ వెడయ్ గెచ్చు జేవ్ వెరి మొక్కల్ కడ గెలుక తుక ఇస్టుమ్ గే?’ మెన పుసిల.

29 దస్సిజో, ‘పోన. జేవ్ వెరి మొక్కల్ అప్పె కడ్లెగిన, ఏక్ వేల జోవయింతెన్ ఎక్కె దడి గోదుమ్చ మొక్కల్ కి బెదవ కడితె. అప్పె పోన.

30 లాయితి కాలుమ్ ఎద దొన్ని కి బెద వడ్డుతు. లాయితె పొదిక, వెరి మొక్కల్ తోలితో కడ కెర, డయ గెల్లి రిసా కట్టల్ బందిలి పడ్డొక, గోదుమ్ లాయ కెర

అంచి కొట్టుతె ఆన’ మెన లాయితనక సంగిందె. మెన జో ఎజోమాని సంగిలన్” మెన యేసు సంగిలన్.

సొర్పు గిడ్డక టాలి
(మార్కు 4:30-34; లూకా 13:18-21)

31 యేసు జోవయింక అన్నెక్ టాలి సంగిలన్. “పరలోకుమ్చి రాజిమ్ ఏక్ మాన్సు జోచి పట్టయ్ ఉంపిలి సొర్పుగిడ్డచి రితి జతయ్.

32 గిడ్డల్ ఎత్కిచి కంట జా గిడ్డ ఇదిలిసి డీసిలెకి, జా మొక్క వడ్డిలి మెలె, రోన్తె గల్లి మొక్కల్ ఎత్కిచి కంట వెల్లో జా, రూకు జయెదె, చి ఆగాసుమ్చ పిట్టల్ జా కెర, జో చెట్టెచ కొమ్మల్తె గూడల్ బందుల” మెన సంగిలన్.

33 యేసు జోవయింక అన్నెక్ టాలి సంగిలన్. “పరలోకుమ్చి రాజిమ్ తెన్ కిసి మెలె, అన్నిమ్ కెర్లి పీట్ ఎత్కి పొంగుప జా పులితి రిసా, ఏక్ తేరబోద ఏక్ తీనడి పీట్తె గలిలి పులయ్తి పీట్చి రితి జతయ్. ఇదిలిదిల్ గలిలెకి, జా కలోయ్లి సామన్ ఎదివాట్ పుల కెర ఒగ్గర్ జయెదె”, మెన, యేసు సంగిలన్.

34 ప్రజల్క సంగితి బోదన ఎత్కి టాలివో తెన్ యేసు సంగితె తిలన్. టాలివో నెంతె జేవ్ ప్రజల్క జో కిచ్చి సంగె నాయ్.

35 ఇసి, దేముడు జోచ కబుర్లు సంగిలో ఎక్కిలోచి అత్తి రెగిడ్లి కోడ్ నెరవెర్చుప జలి.

“టాలివో సంగ ఆవ్ అంచి చోడ్డి పుట్టయిందె, చి బూలోకుమ్ జెర్మున్ జలి మొదోల్ తెంతో లుంకడ్డిసి సంగిమ్దె” మెన రెగిడ్లి కోడు.

బట్టి ఉంపిల వెరి గిడ్డల్చి టాలిక అర్దుమ్ సంగిలిసి

36 తెదోడ్ యేసు ప్రజల్చి జనాబ్క ముల దా, గెరి గెలన్. జోచ సిస్సుల్ జోతె

§ 13:23 13:23 ‘అత్తుపలితుమ్ దెరెదె’ మెలె, దసా మాన్సు ప్రబుచి బుద్ది ఇండెదె, చి అన్నె మాన్సుల్ దెక, జేవ్ కి ప్రబుచి రాజిమ్తె బెదుక ఇస్టుమ్ జా, నుబుమ్ కబుర్ నూన నంజా బెదుల.

జా కెర, “బట్టిచ వెర్రి మొక్కల్చి రిసా సంగిలి టాలి అమ్క అర్దుమ్ సంగు” మెన పుసితికయ్,

37 జో జోవయింక ఇసి మెలన్. “చెంగిల్ బీ ఉంపితోసా కొన్సొ మెలె, ఆవ్ మాన్సు జా జెర్మున్ అయ్లోసా.

38 బాటి కిచ్చొ మెలె, ఈంజ లోకుమ్. చెంగిల్ బీ కిచ్చొ మెలె, పరలోకుమ్చి రాజిమ్చ బోదల్ జల మాన్సుల్. వెర్రి మొక్కల్ కిచ్చొ మెలె, సయ్తాన్చ బోదల్ జల మాన్సుల్.

39 జా వెర్రి బీ ఉంపితోసా కొన్సొ మెలె, సయ్తాన్. పంటో లాయితి పొది కెయ్క మెలె, ఈంజ ఉగుమ్ పూర్తి జతి ఆకర్ దీసి. లాయితన కొన్సొ మెలె, దేముడుచి దూతల్.

40 “వెర్రి మొక్కల్క కిసి కుడవ ఆగితె గలుక జయెదె గే, దన, ఈంజ ఉగుమ్ పూర్తి జతి పొదిక, దస్సి సిచ్చ తయెదె.

41 జా పొదిక, ఆవ్ మాన్సు జా జెర్మున్ అయ్లోసా అంచ దేముడుచి దూతల్క తెద్రయిందె, చి పాపుమ్ కెరయ్తి వెట్కారుమ్చి ఎత్కిక కి, పాపుమ్ ఇండితన ఎత్కిక కి, ఈంజ లోకుమ్ తెంతో కడ కెర, ఎక్కితె కుడవ కెర,

42 జేవ్ దేముడుచి దూతల్ జోవయింక వెల్లి ఆగి గోయ్తె గల దెవుల. ఒత్త గలి జలస ఏడుల, దంతో చప్పిల్లె తవుల.

43 తెదొడ్క, పొద్దుచి ఉజిడి కెద్ది జతయ్ గే, దస్సి, అంక నంపజా పున్నిమ్ జలస జోవయించో దేముడు అబ్బొన్చి రాజిమ్తె ఉజిడి జవుల. సూన్త కంగ్గొ తిలస సూన.

లుంకడ్లి దనుమ్చి టాలి

44 “పడ్డొ, పరలోకుమ్చి రాజిమ్క కిచ్చొ టాలి కెరుక జయెదె మెలె, ఏక్ వెడయ్తె లుంకడ తిలి దనుమ్చి రితి జయెదె. ఎక్కిలో జా దనుమ్ చజ కెర, అన్నె లుంకడ కెర, జా దొర్కు జలి మెన, సంతోసుమ్ తెన్ గెచ్చ, జోక కలుగు

జలిసి ఎత్కి విక గెల కెర, జా దనుమ్ రోవిలి వెడ గెనెదె.

చెంగిలి ముత్యల్క చజ గెన్సొసాచి టాలి

45 “అన్నె, పరలోకుమ్చి రాజిమ్తె బెదితిసి చెంగిలి ముత్యల్ గెన్తో సావుకరి కెర్లిన్చి రితి జతయ్.

46 జో ఒగ్గర్ విలువచి ముత్యల్ ఏక్ చజ కెర, గెచ్చ, జోక కలుగు జలిసి ఎత్కి విక గెల కెర, జా ముత్యల్ గెనెదె.

సముద్రుమ్తె గల్లి వలచి టాలి

47 “అన్నె, పరలోకుమ్ రాజిమ్తె బెదయ్తెసి కిసి మెలె, సముద్రుమ్తె గలిలి రగరగార్లచ మొస్స దెర్తి వలచి రితి జతయ్.

48 జా బెరిలె పొది మాన్సుల్ జేక ఒడ్డుతె కడ కెర, వెస కెర, చెంగిలచ త్రితె బెరవ కెర, గర్చ బయిలె వెంట గెలుల.

49 దస్సి, ఈంజ ఉగుమ్ పూర్తి జతి ఆకర్ దీసిక అమ్చ దేముడుచి దూతల్ జా కెర, నంపజా పున్నిమ్ జలసక ఏక్తె, నంపనెంజిల్ రిసా గార్ జలసక వేరతె కుడవ తా,

50 జేవ్ నంపనెంజిలసక వెల్లి ఆగి గోయ్తె గల దెవుల. ఒత్త గలి జలస ఏడుల, దంతో చప్పిల్లె తవుల.

51 “ఈంజ ఎత్కిచి అర్దుమ్ కెరన్లదు గే నాయ్?” మెన యేసు జేవ్ సిన్సుల్క పుసిలన్, చి “అమ్క అర్దుమ్” మెల.

52 జేవ్ దస్సి సంగితికయ్, యేసు జోవయింక “జలె, కేన్ జలెకు మోసే తెన్ దేముడు దిలి ఆగ్గుల్ సికడ్డొసా, పరలోకుమ్చి రాజిమ్చి సుబుమ్ కబుర్ కామ్తె బెదితి రిసా కో సిన్సుల్ జా జవుల గే, జో ఏక్ గెర్చొ ఎజొమాని కిసి జోచి దనదాన్యుమ్ తెంతో నొప పొర్న సామన్లు వెంట వాడిక కెరెదె గే, దస్సి అస్సె.”

యేసు సొంత మాన్సుల్ జోచి అదికారుమ్ నే చినిలిసి (మార్కు 6:1-6; లూకా 4:16-30)

53 యేసు ఈంజేవ్ టాలివో సంగ కేడయ్లి పడ్డె, ఒత్త తెంతో బార్ జా ఉట్ట గెచ్చు,

54 జోచి సొంత గవ్వి పాచ కెర, జోవయించ సబ గెరలె బోదన కెరుక దెర్లొ. జో కెర్లె బోదన నూన ఆచారిమ్ జా, “ఈంజ గ్యానుమ్చి, ఈంజొ కెర్త కమొచి కెర్లె సెక్తి ఇన్నెక కేనె తెంతో అయ్లి?”

55 ఈంజొ మాములుమ్, ఈంజ గవ్వివో దారచ కామ్ కెర్లొసాచొ పుత్తుసి గెద? ఇన్నెచి అయ్యెచి నావ్ మరియ గెద? అన్నె, యాకోబు, సీమోను అన్నె యూదా జోచ బావుడ్లివో జవుల గెద?

56 ఇన్నెచ బేస్సివో ఎత్తిజిన్ అమ్చి తెన్ అస్తి గెద? దస్సి జలె, ఇన్నెక ఈంజ గ్యానుమ్ ఎత్తి కేనె తెంతో అయ్లి?” మెన లట్టబన్ల,

57 యేసుచి రిసా అన్మానుమ్ జా గెల. జేవ్ దస్సి జతికయ్, యేసు జోవయింక, “కేన్ జవున్ మాన్సు దేముడుచి కబుర్ ఆన్తోసా జలె, జోచి సొంత దేసిమ్చ మాన్సుల్ సొంత గెర్చ మాన్సుల్ జోక గవురుమ్ దెకిత్ నాయ్” మెన జోవయించి అన్మానుమ్చి రిసా సంగిలన్.

58 జలె, జా గవ్విచ మాన్సుల్చి అన్మానుమ్చి రిసా, యేసు ఒత్త వెల్లొ కమొ ఒగ్గర్ కెరె నాయ్.

14

హేరోదు రానో యేసుచి రిసా బిలిసి (మార్కు 6:14-29; లూకా 9:7-9)

1 జా సమయుమ్తె, హేరోదు మెలొ జా గలిలయ ప్రాంతమ్చొ అదికారి, యేసు కెర్త కమొచి రిసా నూన తా,

2 బియఁ కెర, జోచి గొత్తి సుదల్క బుకారా కెర, జోవయింక, “ఈంజొ యేసు, జో బాప్తిసుమ్ దెతె తిలొ యోహాను మొర గెచ్చ అన్నె జియ అస్సి. జాచి రిసా, ఇస వెల్లొ కమొ కెరుక జోక సెక్తి అస్సి” మెన ఉచర సంగిలన్.

3-4 కిచ్చొక జో అదికారి దస్సి బియఁ కెర ఉచర్లన్ మెలె, జోచొ పిలిప్ మెలొ అస్సొన్చి హేరోదియ మెలి తేర్చిక హేరోదు నెతికయ్, యోహాను జోక “తుయి జాక తియనుక నాయిమ్ నాయ్” మెన సంగితె తిలి రిసా, జో అదికారి యోహానుక దెర, బందవడ, జేల్తె గల తిలన్.

5 జోక మారుక ఉచర్లె కి, దేముడుచి కబుర్ సంగిలొసా, మెన ప్రెజల్ యోహానుక ఉచర్లె రిసా, జోవయింక బియఁ కెర, మారుక వాయిద కెర తిలన్.

6 జలె, హేరోదుచి జెర్మన్ పండుగు దీసి అయ్లె, జోచి హేరోదియ మెలి తేర్చిచి దువిసి విందుతె బుకారా తిలసచి నెడిమి నచితికయ్, హేరోదు రానొ మెస్సిలన్, చి

7 జో ఒట్టు గలన, “తుయి కిచ్చొ సజిలె కి దెయిందె.” మెన జాక సంగిలన్.

8 జా నాడిచి అయ్యెసి సంగితికయ్, బెర్ల మాన్సుల్చి మొక్కె జా దువిసి, “బాప్తిసుమ్ దెతో యోహానుచి బోడి, గండ కెరవ పలెరుమ్తె గల, అంక ఇత్తల్ ఆన దె” మెన రానొక సంగిలి.

9 ఈంజ కొడు నూన దుకుమ్ జలెకి, హేరోదు జేవ్ బుకార్ల మాన్సుల్చి మొక్కె ఒట్టు గల తిలి రిసా, జా సంగిలిసి దెంక మెన ఒచ్చన తిలొ, చి

10 జమాన్లక తెద్రవ కెర, “జేల్తె యోహానుచి బోడి కండ కెర దా” మెలొ.

11 జో జమాను, దస్సి కెర, యోహానుచి బోడి పలెరుమ్తె గల ఆన నాడిక దెతికయ్, జా నాడి అయ్యెన్క నా దిలి.

12 యోహానుచ సిన్సుల్ జో మొర్లిన్చి నూన కెర, జా కెర, పీనుమ్ ఉక్కుల దెర గెచ్చ రోప గెల, అన్నె యేసుతె జా కెర, జోక సంగిల.

పాచ్ వెయిల్జిన్ మాన్సుల్క యేసు అన్నిమ్ దిలిసి

(మార్కు 6:30-44; లూకా 9:10-17; యోహా 6:1-14)

13 యోహానుక జర్గు జలిసి యేసు నూన కెర, దోనితె వెగ కెర, మాస్సుల్ నెంజిలి టాన్తె గెచ్చుక మెన సముద్దుమ్ జిన, ఉట్ట గెలన్. యేసు ములిలి ఏక్ తిల జనాబ్ 'జో ఒత్తల్తో గెతయ్' మెన నూన కెర, పట్టుల్తె గవ్వెలె తెంతో బార్ జా, ఇండ కెర, జోచి పట్టి గెల.

14 యేసు జా ఒడ్డుతె పాచ కెర, ఒత్త బెర తిల పట్టి అయల ప్రెజల్ ఎత్తిక దెక కెర, జోవయించి ఉప్పిరి కన్యారుమ్ జా, జోవయింతె జబ్బుల్ తిల మాస్సుల్ ఎత్తిక చెంగిల్ కెర్లన్.

15 సాంజ్ జతికయ్, యేసుచ సిస్సుల్ జోతె జా కెర, "ఈంజ డొంగుర్ దేసిమ్ గెద, పొద్దు గెలి రిసా, అన్నిమ్ సామన్ గెనన్తి రిసా, ఈంజేవ్ ప్రెజల్క గవ్వెలె తెద్రవు" మెన సంగిల.

16 యేసు జోవయింక, "జేవ్ గెచ్చుక నాయ్. తుమి జోవయింక కిచ్చో జవున్ అన్నిమ్ దాస" మెన సంగిలన్.

17 జేవ్ సిస్సుల్ జోక, "అమ్చితె పాచ్ పోడియె, చి దొన్ని మొస్సు పిట్టవ, అన్నె కిచ్చో నాయ్" మెన, యేసుక సంగిల.

18 యేసు, "దస్సి జలె, జా తిలి సామన్ అంచితె ఆన దా" మెన, సిస్సుల్క సంగ కెర,

19 ప్రెజల్క దెక, "తుమ్ ఎత్తిజిన్ వెస" మెన సంగ, జా చివ్వర్చి బుయ్యె వెసడ కెర, జేవ్ పాచ్ పోడియె చి దొన్ని మొస్సు దెరన, ఆగాసుమ్ పక్క దెక, "ఈంజ అన్నిమ్ తుయి దిలది" మెన దేముడు అబ్బొన్క జొకర కెర, జేవ్ పోడియె మోడ కెర, జోచి సిస్సుల్క దెతికయ్, జేవ్ సిస్సుల్ ప్రెజల్క వంట దిల.

20 జేవ్ బెర తిల ప్రెజల్ ఎత్తిజిన్ పేట్ బెర్తు కయల. కయలి వడ్డో, సేంసిల గండల్ బార గంపల్తె బెర్తు సిస్సుల్ గుడ్డిల.

21 తేర్బోదల్ బాలబోదల్క ముత్తై, అన్నిమ్ కత్తన పాసి పాసి పాచ్ వెయిల్జిన్ ముస్సుబోదల్ జల.

యేసు సముద్దుమ్చి ఉప్పిరి ఇండిలిసి (మార్కు 6:45-52; యోహా 6:16-21)

22 జా ఎత్తి జర్గు జలి వడ్డో, "ప్రెజల్క అవ్వె తెద్రయిందె. తూమ్ దోనితె వెగ, అంచి కంట అగ్గె ఒత్తల్తోచి గట్టుతె గెచ్చు" మెన, సిస్సుల్క యేసు బలవంతుమ్ కెర్లొ.

23 వడ్డో, జో జేవ్ ప్రెజల్క తెద్రవ దా కెర, ప్రార్లన కెర్తి రిసా, మెట్టయ్ ఎక్కిలొయి వెగ గెలన్.

సాంజ్ జతికయ్, యేసు ఎక్కిలొయి ఒత్త తిలన్.

24 సిస్సుల్ తిలి జా దోని మాత్తుమ్, ఒడ్డు తెంతో దూరి గెతికయ్, వాదు కెర పెలయ్తె తతికయ్, కెర్లల్ జా దోనితె పెట్టి జస్తె తిల.

25 అందరి, పాసి పాసి కుకుడో వాంసెనె, యేసు జా సముద్దుమ్చి ఉప్పిరి ఇండ జా, జేవ్ సిస్సుల్ తిలిన్తె జెతె తిలన్.

26 జో సముద్దుమ్చి ఉప్పిరి ఇండిలిసి జోచి సిస్సుల్ దెక కెర, బమ్మ జా బియఁ గెచ్చు, "డుంబో!" మెన బియఁ కెర కేకుల్ గల్లికయ్,

27 యేసు బేగి, "దయిరిమ్ ఆనన. బియఁ నాయ్. ఆవ్వె జెతసి" మెన సంగిలన్.

28 యేసు "ఆవ్వె జెతసి" మెన సంగితికయ్, పేతురు జోక కేక్ గల, "ప్రబూ, తుయి జలె, ఆచ్ కి పానిచి ఉప్పిరి ఇండ తుచితె జెతి రితి అంక సెలవ్ దే" మెన సంగిలన్

29 యేసు జోక "జే!" మెంతికయ్, పేతురు దోని తెంతో ఉత్త కెర, యేసుతె గెతి రిసా పానిచి ఉప్పిరి ఇండ కెర, సగుమ్ దూరి గెలన్.

30 గని, వాడుక దెక కెర, బియ్యం కెర, డుంబ గెచ్చే తా, “ప్రబూ, ప్రబూ, అంక రచ్చించువ కెరు!” మెన, కేక్ గలన్.

31 యేసు బేగి ఆతు చంప కెర, పేతురుచి ఆతు దెరన, “తోక్కి నముకుమ్చో, తుయి కిచ్చొక అన్యానుమ్ జలది?” మెన పేతురుక సంగిలన్.

32 తెదొడి, జేవ్ దొగుల దోనితె వెగిల, చి వాదు ముల దిలి.

33 దస్సి జర్లు జలి రిసా, దోనితె తిలన యేసుక జోకర, “తుయి నిజమి దేముడుచో పుత్తుసి” నేన, జోచి గవురుమ్ చిన సంగిల.

గెన్నేసరెతు మెలి టాన్తె మాస్సుల్క యేసు చెంగిల్ కెర్రిసి
(మార్కు 6:53-56)

34 జేవ్ యేసు ఒత్తల్తోచి గట్టుతె పాచ కెర, గెన్నేసరెతు మెలి టాన్తె ఉత్తిర్ల.

35 ఒత్తచ ప్రెజల్ యేసుక చిన కెర, సుట్టుపట్టు గెచ్చిలె కబుర్లు తెద్రవ, జబ్బుల్ తిలన ఎత్కిజిన్క జోతె కడ ఆనయ్తెకయ్,

36 యేసుచో పాలుమ్చి అంచు జలెకు జేవ్ చడుక మెన బతిమాల్పా జా సెలవ్ నజన్తె తిల, చి జోచో పాలుమ్చి అంచు చడెలన ఎత్కిజిన్ చెంగిల్ జల.

15

అత్తో నే దొవన్తె కయ్లిన్చి రిసా పరిసయ్యుల్ యేసుక సంగిల
(మార్కు 7:1-23)

1 జా పొది, యెరూసలేమ్ పట్నుమ్ తెంతో పరిసయ్యుల్ చి మోసి తెన్ దేముడు దిలి ఆగ్నల్ సికడ్డన యేసుతె బెద జా కెర,

2 “తుచ సిస్సుల్ అత్తో నే దొవన్తె అన్నిమ్ కతతి. జేవ్ కిచ్చొక ఇసి పాపుమ్ కెర పూర్లుమ్చ వెల్లెల మాస్సుల్ సికయ్లి రితి కెర్రి నాయ్?” మెన సంగిల.

3 యేసు జోవయింక, “తూమ్ తుమ్చ పూర్లుమ్చ అచ్చి ఉచర్రిసి కెర్రి అనక, కిచ్చొక పాపుమ్ కెర దేముడుచి ఆగ్న రితి కెర్రి నాయ్?”

4 కిచ్చొ ఆగ్నచి రిసా ఆవ్ సంగితసి మెలె, అయ్యద్ అబ్బొద్క చెంగిల్ దెక గవురుమ్ కెర”

మెన సంగిలి కోడు. అన్నెక్ కిచ్చొ మెలె, “అబ్బొన్క జలెకు అయ్యున్క జలెకు కో దూసుప కెరుల గే, నే పిట్ట మొర్నుచి సిచ్చ దెంకయ్” మెన సంగిలి కోడు.

5 తూమ్, మాత్తుమ్, కిచ్చొ మెంతసు మెలె, తుమ్ అచ్చి ఉచర్రి కోడు.

కిచ్చొ కోడు మెలె, ‘అంచితె తుమ్క కిచ్చొ కలుగు జతి గే, జయ్యి అమ్చో దేముడుక దెంక సంగ అస్సి మెన కో అయ్యున్క అబ్బొన్క సంగుల గే, జేవ్ దస్సి సంగిలన అయ్యున్క జలెకు, అబ్బొన్క జలెకు, అన్నె తోడు దెంక నాయ్’, మెన, తుమ్ సంగితసు.

6 జలె, తుమ్ దస్సి మెన తుమ్చ పూర్లుమ్చక అచ్చి ఉచర్రిసి కెరుక ముక్కిమ్ మెలి రితి, ‘దేముడుక అదికారుమ్ నాయ్’ మెలి రితి జా, జో సంగిలి ఆగ్న మార్పుప కెర అస్సున్.

7 “తుమ్ ఉప్రమెన్సుచో! యెసయా పూర్లుమ్చోచి అత్తి దేముడు సంగిలి కోడు తుమ్చితె నిజమి నెరవెర్నువ జతయ్.

8 ఈంజ ప్రెజల్ అంక జేవ్చి ఒటో తెన్ గవురుమ్ కెర్రి రిత కొణొ సంగిలే కి, జోవయించి పేట్ అంక దూరి అస్సి.

9 మాస్సుల్ అచ్చి ఉచర్ల కొణొక ‘దేముడు సంగిలన’ మెన, ప్రెజల్క సికడ, అంక ఆరిక జోకర్తతి.

మెన తుమ్చి రిసాచి కోడు” మెన, యేసు జేవ్ వెల్లెల మాస్సుల్క సంగిలన్.

మాస్సుక గార్ కెర్రిసి కిచ్చొ జయెదె గే యేసు సంగిలిసి

10 యేసు జేషేక్ దస్సి సంగ కెర, పాసి తిల ప్రెజల్ క బుకారా కెర, జోవయింక ఇసి మెన బోదన కెర్లన్. “తుమ్ సూన అర్దుమ్ కెరన.

11 మాన్సుక గార్ కెర్తిసి కిచ్చొ మెలె, చోడి తెడి తెంతో గెతిసి నెంజె, గని చోడి తెంతో బార్ జతిసి. జయ్యి మాన్సుక గార్ కెర్తిసి” మెన సంగిలన్.

12 యేసు దస్సి సంగిలి పిమ్మట్, జోవ సిస్సుల్ జోతె జా కెర, “పరిసయ్యుల్ జా కోడు సూన కోపుమ్ జల మెన జాన్సి గె?” మెన, యేసుక పుసిల.

13 జలె జో, “వెర్రి రూకుక కిసి ఉట్టువుల గే, దస్సి, పరలోకుమ్ తిలొ అంచొ దేముడు అబ్బొ జోక కామ్క నెంజితో ఎత్తి మాన్సుక ఉట్టుయ్లి రితి గెచ్చవ కెర గెలెదె.

14 జాకయ్, జేష్ సంగితిన్చి రిసా తుమ్ చింత గలన నాయ్. జేష్ నంపు నెంజ ఆత్మ గుడ్డి జా, మాన్సుల్క వాట్ దెకడుక ఉచర్తిసి. గని గుడ్డి సుదొ గుడ్డి సుదల్క వాట్ దెకయ్లెగిన, జోకి ఈంజొ కి గొయితె సేడుల.” మెలన్.

15 జలె, పేతురు యేసుక, “జా టాలిచి అర్దుమ్ అమ్క సంగు” మెన సంగిలన్, చి

16 యేసు జోవయింక, “అప్పె ఎద తూమ్ కి అర్దుమ్ నెంతె అస్సున్ గే?

17 ఈందె, చోడి గలంతిసి కిచ్చొ జలెకి పెట్టి గెచ్చ కెర, కామ్క నెంజితెగిన, బార్ జా గెచ్చెదె, మెన తుమ్క అర్దుమ్ నాయ్ గె?

18 మాన్సుచి చోడి తెంతో బార్ జతి ఎత్తి కోడు, మాత్తుమ్, జోవయించి పెట్టితె జెర్దు కెర బార్ జతయ్. జా కోడు లట్టణ్ణొ మాన్సుక జయ్యి గార్ కెరెదె,

19 కిచ్చొక మెలె, గర్చ ఉద్దెసుమ్లు, నరు అత్యల్, లంజెకమె, చోరు కమె, అబద్దుమ్ సాచి, మాన్సుల్క దూసువ

కెర్తిసి, దనచ ఎత్తి, మాన్సుచి పెట్టి తెంతో జెయెదె.

20 దనచయ్ మాన్సుక గార్ కెరుల, గని అత్తొ నే దొవన్తె కతిసి మాన్సుక గార్ కెరె నాయ్” మెన యేసు బోదన కెర్లన్.

వేర దేసిమ్చి తేర్బోదచి దువిన్క యేసు చెంగిల్ కెర్తిసి

21 యేసు ఒత్త తెంతో బార్ జా ఉట్ట గెచ్చ, తూరు పట్టుమ్ చి సీదోను పట్టుమ్చి ప్రాంతుమ్తె గెతికయ్,

22 ఈందె, జా ప్రాంతుమ్చ కనానుచి సెకుమ్చి తేర్బోద ఎక్కి బార్ జా, జోక దస్సుల్ జా కెర, “ప్రబువ, దేముడు తెద్రయ్లో, దావీదు రానొచి సెకుమ్తె జెర్మిలో, క్రీస్తు జలొ రచ్చించువ కెర్తొసా తుయి. అంచి ఉప్పిరి దయ తీ. అంచి దూక బూతుమ్ దెర అస్సె, చి ఒగ్గర సైమ జతయ్” మెన యేసుక కేకుల్ గలిలి.

23 గని యేసు తుక్లె తా, జాక ఎక్కి కోడు కి జబాబ్ సంగె నాయ్. తెదొడి, జోచ సిస్సుల్ జోతె జా కెర, “ఈంజ అమ్చి పట్టి జా జా, కేకుల్ గలితయ్, ఇన్నెక తెద్రవ దేసు” మెన, యేసుక బతిమాల్పా జా సంగిల.

24 యేసు, “గొప్పుడు నెంజిల మెండల్ రిత జా అమ్చి ఇస్రాయేలుచ ప్రెజల్తెయి అంక అబ్బొ తెద్రయ్లన్, గని వేర మాన్సుల్తె నాయ్” మెలన్.

25 యేసు దస్సి మెలె కి, జా తేర్బోద అన్నె పాసి జా కెర, సెర్ను సేడ జోకర, “ప్రబు, అంక తోడు కెరు” మెన సంగిలి.

26 యేసు జాక దెక, “*బోదల్చి అన్నిమ్ గుడ్డ కెర, సూనకూనర్దుక గల దెంక చెంగిల్ నాయ్” మెన సంగిలన్.

27 జా కిచ్చొ మెలి మెలె, “నిజామి, ప్రబు, గని సూనకూనర్దు కి జోవయించొ ఎజొమానిచి బల్ల తెంతో సేడ్లి ఉస్టా వెంట కవుల” మెన, సంగిలి.

28 జా తేర్బోద దస్సి జబాబ్ దెతికయ్, యేసు జాక, “అమ్మ, తుయి గట్టిజ

* 15:26 15:26 ఎత్తి అదికారుమ్ తిలొ దేముడుచ ‘బోదల్’ రిత జల యూదుల్చి రిసా సంగితయ్.

నంపజతస్సి. తుయి కోర్ప జలిసి త్తుక జర్లు జవున్” మెన, జాక వరుమ్ దిలన్. చి బేగి జాచి దువిసి చెంగిల్ జలి.

29 యేసు ఒత్త తెంతో ఉట్ట గెచ్చు, గలిలయచి సముద్రుమ్తెచి ఒడ్డుతెచి వట్టె గెచ్చు, ఏక్ మెట్టయ్ వెగ వెసితికయ్,

30 ఒగ్గర్ ఒగ్గర్జిన్ జనాబ్ మాన్సుల్ జోతె సొట్ట జలనక, అత్తో చట్టో నెంజిలనక, గుడ్డి జలనక, గుల్ల జలనక, అన్నెవేర బాదల్ తిలన ఎత్కిక, కడ ఆన, జోచి పాసి వెసయ్తికయ్, యేసు జేక చెంగిల్ కెర్లన్.

31 గుల్ల మాన్సుల్ లట్టల్లిసి, అత్తో చట్టో నెంజిలన చెంగిల్ జలిసి, సొట్ట మాన్సుల్ ఇండిలిసి, గుడ్డి మాన్సుల్ దెకిలిసి ఒత్త తిల మాన్సుల్ దెక కెర, ఆచారిమ్ జా, ఇస్రాయేల్ ప్రెజల్చో దేముడుక గవురుమ్ కెర్ల.

చెత్తర్ వెయిల్ జినక యేసు అన్నిమ్ దిలిసి

32 జేవ్ జనాబ్ ఎత్కిజిన్ యేసు తెన్ జా మెట్టయ్ తిర్రతి తతికయ్, జోచి సిస్సుల్క యేసు పాసి బుకారా కెర, “ఈంజేవ్ ప్రెజల్ తిర్రతి అంచితె అస్తి. జోవయింక అన్నిమ్ కిచ్చో కి నాయ్, చి జోవయించి ఉప్పిర్ ఆచ్ కన్కారుమ్ జతసి. జేవ్ నే కతె ఉట్ట గెలిగిన, వట్టె మొకోమ్ గుంజు సేడుక జయెదె, చి రిసా జోవయింక చువ్వె తెద్రవుక అంక ఇస్టుమ్ నాయ్” మెన సంగిలన్.

33 సిస్సుల్ ఆచారిమ్ జా, జోవయింక “ఎతివాల్జిన్ మాన్సుల్క అన్నిమ్ దెంక మెలె, జోవయింక సరిపుచువ జతి అన్నిమ్ ఈంజ బయిలె అమ్క కేనే దొర్కు జవుల?” మెన సంగిల, చి

34 యేసు జోవయింక, “జలె, తుమ్చితె కెత్తి పోడియె అస్తి?” మెన పుసిలన్, చి జేవ్ సిస్సుల్ చజన కెర, “అమ్చితె సత్తు పోడియె, చి ఇదుద్ల మొస్సు దొన్ని అస్తి” మెన సంగితికయ్,

35 యేసు ప్రెజల్ ఎత్కిక “వెన” మెన సంగ కెర,

36 జేవ్ సత్తు పోడియెచి జేవ్ మొస్సు నజన, అత్తి దెరన, ‘తుయి దా దయ కెర్లదె’ మెలి రితి దేముడు అబ్బోన్క ఉచర, పోడియె మోడ కెర, జోచ సిస్సుల్క వంట దెతికయ్, జేవ్ సిస్సుల్ ప్రెజల్క జా ఎత్కి వంట దిల.

37 జేవ్ ప్రెజల్ ఎత్కిజిన్ పేట్ బెర్లు కయ్లి పడ్డె, సేసిల గండల్ సత్తు గంపల్తె సిస్సుల్ గుడ్డ బెరయ్ల.

38 తేర్బోదల్ బాలబోదల్క ముల్లె, చెత్తర్ వెయిల్జిన్ మున్సుబోదల్ కయ్ల.

39 పడ్డె, జేవ్ బెర తిల జనాబ్క తెద్రవ దా కెర, దోనితె వెగ, యేసుచి సిస్సుల్ మగదాన్ మెంతి ప్రాంతుమ్తె ఉట్ట గెల.

16

యూదుల్చి వెల్లి సబతె యేసుక పరిచ్చు కెర్లిసి

(మార్కు 8:11-13; లూకా 12:54-56)

1 తెదొడి, పరిసయ్యుల్ చి సద్దుకయ్యులు యేసుతె జా కెర, జోక పరిచ్చు కెర్లి రిసా, “అన్లె, తుక పరలోకుమ్చి అదికారుమ్ అస్సి మెన అమ్ చినితి రిసా, అమ్చి మొక్కె వెల్లి కామ్ ఏక్ కెరు” మెన, మోసిమ్క జోక సంగిల.

2 యేసు జోవయింక ఏక్ టాలి సంగిలన్. “సాంజ్ జతి పొది ఆగాసుమ్తె మబ్బు నెంజ పొద్దు బగుక ఎరన లగితయ్ మెన దెకిలిగిన, ‘కలిక చెంగిల్ కెరెదె’ మెన తుమ్ చినితను.

3 పడ్డె, వెందలె ఒగ్గర్ మబ్బు కెర్లిగిన, ‘వెల్లో పాని పెటెదె’ మెన చినితను గెద? జలె ఆగాసుమ్ కీసి తిలె కీసి కెరెదె గే తుమ్ చినితను, గని అప్పె జర్లు జత కమొచి అర్లుమ్ చినుక నెతుర్లు.

4 ప్రబుక నిదానుమ్ నెంజ లంజెబుద్ది పాపుమ్బుద్ది జల తుమ్ ఈంజ

కాలుమచ మాన్సుల్, రుజ్జు దెకయ్త కమొక కోర్ప జతసు. అంచి అదికారుమ్ దెకయ్తి రిసా, ఎక్కి ముల కేన్ వేర కామ్ కెర దెంక నెంజె. దేముడుచ కబుర్లు పూర్లుమ్ సంగిలో యోనాక జర్లు జలిన్చి రితి జయెదె.”

పండితుల్చి రిసా యేసు సిస్సుల్క జాగర్త సంగిలిసి
(మార్కు 8:14-21)

5 పడ్డో యేసు సిస్సుల్ తెన్ గాడు ఒత్తల్తో జీన ఒడ్డుతె పాచ కెర, “పోడియొ గట్ట ఆనుక పచ్చ గెలమ్” మెన సిస్సుల్ ఏద కెర్కయ్,

6 యేసు జోవయింక టాల్లి సంగిత్ రితి ఇసి మెలన్. “తుమ్ దెకన. పరిసయ్యుల్చి సద్దూకయ్యుల్చి పులయ్తి పీట్చి రిసా తుమ్ జాగర్త తెన్ తా” మెన, జోవయింక సంగిలన్.

7 జేవ్ ఎక్కిలో తెన్ ఎక్కిలో “కిచ్చొ పోడియొ రిసా సంగితయ్? అమ్ పోడియొ నే ఆన్లి రిసాయి ఇస్సె మెలన్.” మెన బమ్మ జా లట్టబన్.

8 యేసు, మాత్తూమ్, జేవ్ ఉచర్లిసి జాన కెర, “తోక్కి నముకుమ్చ, తుమ్. తుమ్చితె పోడియొ నెంజిలిన్చి రిసా కిచ్చొక ఉచరన లట్టబంతసు?

9 తుమ్ అప్పొక అర్దుమ్ కెరన్ను నాయ్ గె? పాచే పోడియొ పాచే వెయిల్ జిన్క వంటిత్కయ్, కెత్తి గంపల్తె సేంసిలిసి బెరయ్లదు గె?

10 సత్తు పోడియొ చెత్తర్ వెయిల్ జిన్క వంటిత్కయ్, కెత్తి గంపల్తె సేంసిలిసి బెరయ్లదు గె? తుమ్ ఏద కెర్చు నాయ్ గె?

11 జలె, ఆవ్ మాములుమ్ అన్నిమ్చి రిసా తుమ్క సంగుక నాయ్, మెన కిచ్చొక అర్దుమ్ కెరన్ను నాయ్? పరిసయ్యుల్చి, సద్దూకయ్యుల్చి పులయ్తి పీట్చి రితి బోదనచి రిసా జాగర్త తెన్ తా” మెన యేసు అన్నె సంగిలన్.

12 తెదొడి ‘మాములుమ్ పులయ్తి పీట్చి రిసా నాయ్, గని సద్దూకయ్యులు

చి పరిసయ్యుల్ సికడ్డిసిచి రిసా అమ్క జాగర్త సంగితయ్’ మెన సిస్సుల్ అర్దుమ్ కెరన్.

మాన్సుల్ అంక కో మెన ఉచర్తతి గె?
(మార్కు 8:27-30; లూకా 9:18-21)

13 యేసు సిస్సుల్ తెన్ ఇండ గెచ్చు కైసరియ పిలిప్పిచి ప్రాంతుమ్తె పాచ అయ్లె పొది, “మాన్సు జా జెర్మున్ అయ్లయ్ అంక, కో మెన ప్రెజల్ సంగితతి?” మెన పుసిల. జేవ్ సిస్సుల్ జోక,

14 “సగుమ్జిన్ తుక ‘బాప్తిసుమ్ దెతె త్రిలో యోహాను’ మెంతతి. సగుమ్జిన్ తుక ‘దేముడుచ కబుర్లు సంగిలో ఏలీయా జయెదె’ మెంతతి. అన్నె సగుమ్జిన్, యిర్మీయా, నెంజిలె ప్రబుచ కబుర్లు సంగిలో అన్నెజ్జో జయెదె.” మెన, సిస్సుల్ సంగిల.

15 యేసు జోవయింక, “జలె, తూమ్ అంక కో మెన ఉచర్తుసు?” మెన పుసితికయ్,

16 “తుయి ఎక్కిలో జీవ్ తిలో దేముడుచొ పుత్తుసి. జో తెద్రయ్లో క్రీస్తు మెలో రచ్చించుప కెర్లొసా తుయి” మెన, సిమోను పేతురు ఒప్పున సంగిలన్.

17 యేసు జోక, “ఓ సిమోను, యోహాను మెలోసాచొ పుత్తుసి, తుక చెంగిలి. కిచ్చొక మెలె, ఈంజ కోడు తుక కో మాన్సు సికయ్లిసి నెంజె, గని పరలోకుమ్ తిలో అంచొ అబ్బొయి జలో దేముడు తుచి ఆత్మతె ఇసి మెన సికడ అస్సె.

18 అన్నె, తుక ఆవ్ కిచ్చొ మెంతసి మెలె, తుక ‘పేతురు’ మెన నావ్ తియ్ అస్సె. ‘వెల్లొ పత్తుర్’ మెలి అర్దుమ్ తెన్. ఈంజ రంగ్గి వత్తుర్తె అంచి సంగుమ్ బందిందె, చి మొర్చు ఆన్త నెక్తివొ కి జేవ్చి ఉప్పిరి జినుక నెత్తిర్.

19 పరలోకుమ్చి తాలుమ్ము వాడిక కెరుక మెలి రితి, తుక అదికారుమ్

దేశాని. మెలె, బూలోకుమ్తె కిచ్చొది రిసా 'పోని' మెనిస్తె గే, పరలోకుమ్తె 'పోని' మెనుమ్దె. అన్నె, కిచ్చొది రిసా సెలవ్ దెస్తె గే, పరలోకుమ్చి సెలవ్ దెవ్దె" మెన, యేసు పేతురుక అదికారుమ్ దిలన్.

20 తెదొడి, "ఆవ్, 'ఎత్తి అదికారుమ్ తిలో దేముడు తెద్రయ్లో క్రీస్తు రచ్చించుప కెర్తొసా జెయెదె' మెన కక్క సంగ నాయ్" మెన, యేసు సిస్సుల్క గట్టిజ సంగిలన్.

యేసు సైమల్ సేడ మొర గెచ్చు అన్నె జివ్ జా ఉట్టిందె

(మార్కు 8:31-9:1; లూకా 9:22-27)

21 జా దీసి తెంతో, "ఆవ్ యెరూసలేమ్ పట్టుమ్తె గెచ్చు కెర, వెల్లి సబ కెర్త వెల్లెల మాన్సుల్, పూజర్లు చి మోసి తెన్ దేముడు దిలి ఆగ్గుల్ సికడ్తనతె, చి అత్తి ఒగ్గర్ సైమల్ సేడ మొరుక అస్సె. గని, తిర్రత్క అన్నె జివ్ జా ఉట్టిందె" మెన యేసు జోచ సిస్సుల్క సంగుక దెర్లన్.

22 తెదొడి, పేతురు జోక పక్కయ్ కడ నా కెర, "ప్రబు, దేముడుచి దయక తుక జా పిట్టవును! దస్సిచి తుక కెయ్యక కి జర్లు జవున్ నాయ్" మెన, యేసుక గోల కెర్లన్.

23 పేతురు దస్సి సంగితికయ్, యేసు పస్ల కెర, జోక దెక, "సయ్తాన్, అంచి పడ్డె గో! అంచి తిలి కామ్క తుయి అడ్డు అస్సిన్. దేముడుచి పచ్చెనచి బుద్ది ఉచర్లది నాయ్, గని మాన్సుల్ ఉచర్ది రగుమ్ ఉచర్లది" మెన, పేతురుక సంగిలన్.

నంపజలస నిదానుమ్ తెన్ అంచి పట్టి బులుక అస్సె

24 యేసు పేతురుక దస్సి సంగ కెర, సిస్సుల్ ఎత్తిక, "కో నంపజా, అంచి పట్టి బులుక ఉచరుల గే, జోచి సొంత ఇస్టుమ్

ఎత్తి ముల దా, జోచి సొంత సిలువ వయస్లి రితి జా, అంచి పట్టి బులుక అస్సె.

25 కిచ్చొక మెలె, జోచి సొంత ప్రానుమ్ రచ్చించుప కెరన తంక, కో కోర్ప జవుల గే, జోచి ప్రానుమ్ పాడ్ జా గెచ్చెదె. గని, అంచి రిసా కో జోచి ప్రానుమ్ దెతి రితి ఎక్కి మెన్సు నిదానుమ్ ఇండుల గే, జోచి ప్రానుమ్ రచ్చించుప జా జోక దొర్కు జయెదె.

26 ఈంజ లోకుమ్తె తిలిసి ఎత్తి కేన్ మాన్సు జవున్ కలుగు కెరన, జోచి సొంత ప్రానుమ్ పాడ్ కెరన్లెగిన, జోక కిచ్చొ లాబుమ్? కిచ్చొ లాబుమ్ నాయ్. అన్నె, కేన్ మాన్సుచి ఆత్మ పాడ్ జలెగిన, జోచి ప్రానుమ్ దేముడు తెన్ అన్నె బెదవంతి రితి కిచ్చొ దిలె సరిపుచుప జయెదె గే?

27 "కిచ్చొక ఈంజ ఎత్తి ఆవ్ సంగితసి మెలె, పడ్డెక ఆవ్ మాన్సు జా జెర్మన్ అయ్లోసా, అంచ దూతల్ తెన్, కచితుమ్ అంచొ అబ్బొసి జలో దేముడుచి పరలోకుమ్చి ఉజిడి తెన్, అన్నె జెంక అస్సె. ఎత్తి మాన్సు ఇండిలి కొల్లి జోక సిచ్చు గే బవుమానుమ్ గే దెయిందె.

28 అన్నె, తుమ్క ఆవ్ కిచ్చొ కచితుమ్ సంగితసి మెలె, ఇన్నె టీవొ జా తిలనతె సగుమ్జిన్ నే మొర్తె అగ్గె, ఆవ్ మాన్సు జా జెర్మన్ అయ్లోసా అంచి రాజిమ్చి అదికారుమ్ తెన్ డీస్తిసి దెకుల" మెన యేసు సంగిలన్.

17

సిస్సుల్చి మొక్కె యేసు పరలోకుమ్చి ఉజిడి జా మార్పుప జలిసి (మార్కు 9:2-13; లూకా 9:28-36)

1 అన్నె సొప్పు దీనల్ గెలి పడ్డె, యేసు పేతురుక, యాకోబుక చి యాకోబుచొ బావొన్ జలో యోహానుక పట్టి కడ దెరన, డోంక్ తిలి ఏక్ మెట్టయ్ వెగ కెర,

2 జోవయించి మొక్కె జోచి రూపుమ్ మార్పుప జా, జోచి మొకొమ్ పొద్దు రితి తల్పున ఉజిడ్ జలి, చి జోచ పాలల్ ఉజిడ్ రితి చోక్ డీసిల.

3 పడ్డె, ఈందె, పూర్ణమచ దేముడుచి కబుర్లు సంగిత మోసే చి ఏలీయా దొగుల యేసు తెన్ లట్టబై తా. జేవ్ తీగ్ల సిస్సుల్క డీనన్ సేడ్ల.

4 జేవ్ దొగుల పూర్ణమచ యేసు తెన్ లట్టబై తతికయ్, పేతురు యేసుక, “ప్రబు, అమ్ ఇన్నె తంక చెంగిలి. తుక ఇస్టుమ్ తిలె, ఏక్ తుక, ఏక్ మోసేక, ఏక్ ఏలీయాక, మొత్తమ్ తిన్ని కుడియల్ బందిందె” మెన సంగిలన్.

5 పేతురు దస్సి సంగితె తతికయ్, ఈందె, ఉజిడ్ తిలి ఏక్ మబ్బు జోవయింక డంకి జలన్, చి “ఈందె, ఈంజో అంచొ ప్రేమ తిలో సొంత పుత్తు. ఇన్నెచి రిసా అంక ఒగ్గర్ సర్దసంతోసుమ్. ఇన్నెచి కోడు తుమ్ నూన” మెన, జా మబ్బు తెంతో అవాడ్ సంగిలిసి నూన్ల.

6 సిస్సుల్ ఈంజి కోడు నూన పుడ్డె సేడ్ ఒగ్గర్ బియఁ గెల.

7 గని యేసు జోవయించి పాసి జా కెర, జోవయింక చడ, “ఉట్ట. బియఁ నాయ్” మెన సంగిలన్.

8 జేవ్ సిస్సుల్ అంకివో ఉగుడ దెకిలె, యేసు ఎక్కిలోయి డీసిలన్, అన్నె కక్క దెకిత్ నాయ్.

మొర గెలె అన్నె జీవ్ జతిన్చి రిసా యేసు అన్నె సంగిలిసి

9 యేసుచి సిస్సుల్ జా మెట్టయ్ తెంతో ఉత్త జెతె తతికయ్, “ఆవ్ మాన్సు జా జెర్మున్ అయ్లోసా మొర గెచ్చ అన్నె జీవ్ జతె ఎద, ఈంజి తుమ్క డీసిలీన్చి రిసా తుమ్ కక్క సంగ నాయ్” మెన యేసు జోవయింక సంగిలన్.

10 తెదొడి జోచ సిస్సుల్, “క్రీస్తు మెలో రచ్చించుప కెర్తొసా నే జెతె అగ్గె ఏలీయా పూర్ణమచొ జెంక అస్సి, మెన మోసే తెన్

దేముడు దిలి ఆగ్గుల్ సికడ్లన కిచ్చొక సంగితతి?” మెన, యేసుక పుసిల.

11 జో జోవయింక, “‘ఏలీయా పూర్ణమచొ జా కెర ఎత్తి తెయార్ కెరుక అస్సె’ మెన పూర్ణమ దేముడు సంగిలి కోడు నిజామి,

12 గని తుమ్క ఆవ్ కిచ్చొ మెంతసి మెలె, ఈంజో ఏలీయా అగ్గెయి అయ్లన్. అయ్లె కి, జేవ్ జోక చినితి నాయ్, చి జోవయింక ఇస్టుమ్ అయ్లి రితి జేవ్ జోక కెర్ల. ఆవ్ మాన్సు జా జెర్మున్ అయ్లోసా కి జోవయింతె దస సైమల్ సేడిందె” మెన యేసు సంగిలన్.

13 జో బాప్తిసుమ్ దెతె తిలో యోహానుచి రిసాయి ఏలీయా పూర్ణమచొ రిత్తోసా మెన యేసు సంగిలన్, మెన సిస్సుల్ అర్దుమ్ కెరన్ల.

మోర్పు సేడ్లె తిలో బూతుమ్ దెర్లొ నాడుక యేసు చెంగిల్ కెర్లిసి
(మార్కు 9:14-29; లూకా 9:37-43)

14 యేసుచి సిస్సుల్ జా మెట్టయ్ తెంతో ఉత్త జా కెర, ఒత్త బెర్లి జనాబ్తె పావితికయ్, ఎక్కిలో యేసుతె జా కెర, సెర్పు సేడ్ జోకర,

15 “బాబు, అంచొ పుత్తుచి ఉప్పిరి కన్కారుమ్ తీ. జో మోర్పు జబ్బు తెన్ ఒగ్గర్ బాద సేడ్లె తత్తయ్. జో కెయఁక తెయఁక ఆగితె నెంజిలె గడ్డె సేడుక అస్సె.

16 తుచ సిస్సుల్తె జోక కడ ఆన్లయ్, గని జోక చెంగిల్ కెరుక జేవ్ నెత్తిల్” మెన సంగిలన్.

17 యేసు, “నముకుమ్ నెంజిలి వెర్రి బుద్దిచి కాలుమ్చ, తుమ్. తుమ్చి తెన్ ఆవ్ కెత్తి దీసల్ తంక? కెత్తి దీసల్ తుమ్క ఆవ్ ఓర్పుప జంక? అల్లె, జో నాడుక అంచితె కడ ఆన” మెన, సంగిలన్.

18 జో నాడుక కడ ఆన్తికయ్, యేసు జోక దెర్లి బూతుమ్క గోల కెర్తికయ్, జా

బూతుమ్ జోక ముల దా, ఉట్ట గెలన్. గెలి వెంటనె, జో నాడు చెంగిల్ జలన్.

19 పడ్డో, అన్నె కో నెంతె, యేసుచ సిస్సుల్ జోతె జా కెర, “అమ్ కిచ్చొక జా బూతుమ్క ఉదడుక నెత్తిర్లమ్?” మెన పుసిల,

20 చి యేసు జోవయింక, “తుమ్ తొక్కి నంపతిలి రిసా, తుమ్క సార్పుగిడ్డవి విదిలి నముకుమ్ తిలెగిన, ఈంజ మెట్టక జవున్ దెక ‘ఇన్నె తెంతొ ముల దా, ఒత్తల్తో గో’ మెలె బేగి గెచ్చెదె. తుమ్ కిచ్చొ నంపజలెకి, జయ్యి జెయిమ్ జయెదె, మెన తుమ్క ఆవ్ కచితుమ్ సంగితసి

21 *గని ఎక్కి చువ్వె తా ప్రార్థన కెర్లెకయ్ ఇసిచిక ఉదడుక జయెదె.”, మెన యేసు సంగిలన్.

22 పడ్డో, జేవ్ గలిలయ ప్రాంతుమ్తె బెద బుల్తె తతికయ్. యేసు సిస్సుల్క దెక, “ఆవ్ మాన్సు జా జెర్మున్ అయ్లోసాక మాన్సుల్చి అత్తి విరోదుమ్ సుదల్ దెర దెవుల,

23 చి అంక జేవ్ మారుల. మార్లె కి, తిర్తత్క అన్నె జివ్ జా ఉట్టిందె” మెన, యేసు అన్నె సంగిలి రిసా, సిస్సుల్ ఒగ్గర్ దుకుమ్ జల.

దెంక తిలి పన్నుచి రిసా యేసు సంగిలిసి

(మార్కు 9:30-32; లూకా 9:43-45)

24 యేసు కపెర్నహూమ్ పట్టుమ్తె పాచిలి పొది, దేముడుచి గుడితె దెతి చెత్తర్ వెండ్లుచి †పన్ను నజీతన పేతురుతె జా కెర, “తుమ్క బోదన కెర్టొసా ఈంజ చెత్తర్ వెండ్లుచి పన్ను దెయెదె గే నాయ్?” మెన పుసిల, చి “దెయెదె” మెలన్.

25 జో పేతురు గెరి జా కెర, నే లట్టబ్బె అగ్గె, యేసు జా సంగతి జొన్లి రిసా, “ఓ

సీమోను, తుయి కిచ్చొ ఉచర్లసి? ఈంజ లోకుమ్చ రాసలు కచితె పన్ను నజుల? సాంత పుత్తర్పుల్తె గే, వేర మాన్సుల్తె గె?” మెన పుసిలన్,

26 చి పేతురు “వేర మాన్సుల్తె” మెంతికయ్, యేసు, “దస్సి జలె, పుత్తర్పుల్తె సంగుక నాయ్.

27 గని, దేముడుచి గుడిక ఈంజ పన్ను నజీతనక అన్యానుమ్ నే కెర్తి రిసా, తుయి సముద్రుమ్తె గెచ్చు, గాలుమ్ గలు. తొలితొ దెర్పు సేడ్డో మొస్సాక దెర, జో మొస్సాచి చోడి చిర దెకిలె, ఒత్త ఎక్ అట్టు వెండ్లుచి విలువచి కాసు డీసెదె. జా దెర జా కెర, తుచి రిసా కి అంచి రిసా కి జోవయింక దేసు” మెన, యేసు పేతురుక సంగిలన్.

18

పరలోకుమ్తె కో వెల్లో జయెదె గే (మార్కు 9:33-37; లూకా 9:46-48)

1 జా పొదుల్తె, యేసుచ సిస్సుల్ జోతె జా కెర, “పరలోకుమ్చి రాజిమ్తె కో వెల్లో జయెదె?” మెన పుసితికయ్,

2 జో ఏక్ బాలబోదక జోచి ప్లాసి బుకారా కెర, జోవయించి నెడిమి టీవో కెర,

3 ఇసి మెలన్. “తుమ్క ఆవ్ కిచ్చొ కచితుమ్ సంగితసి మెలె, తుమ్ బుద్ది మార్పుప కెరన బాలబోదల్ రిత గవురుమ్ నే ఉచరంతి రితి జలెకయ్, పరలోకుమ్చి రాజిమ్తె బెదుక తెరితె, జయె నాయ్.

4 జాకయ్, ఈంజో బోదచి రితి కో డాక్ కెరన తయెదె గే, జొయ్యి పరలోకుమ్చి రాజిమ్తె వెల్లో జయెదె.

* 17:21 17:21 గ్రీకు బాస తెన్ ఈంజ మత్తెలి తొలితొ రెగిడ్ల పుస్తకల్తె 21 కోడు తయె నాయ్. † 17:24 17:24 ‘పన్ను’ మెలె, సిస్సుచి రితి జయెదె. ఈంజ పన్ను జలె, విస్సుక్ వెర్పుల్చి జలి తెంతొ ఎత్తి. యూదుడు వెర్సెక్ వెర్సెక్ దేముడుచి గుడిచి రిసా చెత్తర్ వెండ్లు దెంక తిలిసి.

5 అన్నె * ఇన బాలబోదల్తె ఎక్కిలోక జలెకు, కో † అంచి నావ్ తెన్ మరియాద కెరుల గే, అంకయి మరియాద కెర్లి రితి జవుల.

6 గని అంక సంపజల ఇన బాలబోదల్తె జల రితనతె ఎక్కిలోక కి, కో ‡ పాపుమ్ కెరవుల గే, జోవయించి టొట్రయ్ తిర్వేలి రితో వెల్లో పత్తురు ఒడోవ దా, జోక నముద్దుమతె బుడ్డవ గెలుక చెంగిలి.

7 “అయ్యో! కిపాపుమ్ కెరయ్ తిన్ చి రిసా ఈంజ లోకుమ్ క క్షుమ్! * పాపుమ్ కెరయ్ తిసి కచితుమ్ జెయెదె, గని కచి అత్తి దన అల్లర్ జవుల గే,

8 అయ్యో! జాచి రిసా, తుమ్ చితె ఎక్కిలోచో ఆతు జలెకు, చాటు జలెకు, జోక † పాపుమ్ కెరవ తిలెగిన, జోచి ఆతు జవున్, జోచి చాటు జవున్, కండ గెల వెంట గెలి రితి జవున్. కిచ్చొక మెలె, దొన్ని అత్తో దొన్ని చట్టో తెన్ కెయ్ నే విజితి ఆగితె గలి జతి కంట, ఆతు జలెకు, చాటు జలెకు నెంజ పరలోకుమ్ చి రాజిమతె బెదుక తుమ్ క చెంగిలి.

9 అన్నె, తుమ్ చితె ఎక్కిలోచి అంకి జవున్ తుమ్ క ‡ పాపుమ్ కెరవ తిలెగిన, అన్నె జా అంకి జోతె తెంతో కడ వెంట గెలి రితి జవున్. కిచ్చొక మెలె, దొన్ని అంకివో తెన్ వెల్లి ఆగి గోయ్ తె గలి జతి కంట, ఎక్కి అంకి తెన్ పరలోకుమ్ చి రాజిమతె బెదుక తుమ్ క చెంగిలి.

సంపజతనక దేముడు విలువ దెకిత్తిన్

10 “ఈంజేవ్ బాలబోదల్తె రితనతె ఎక్కిలోక కి నిస్కారుమ్ నే దెకితి రితి దెకన. కిచ్చొక మెలె, ఇన్నెక రకిత

దూతల్ కెయ్ క తెయ్ క పరలోకుమ్ తిలో అబ్బొచి మొకోమ్ దెకితె తవుల మెన ఆవ్ తుమ్ క కచితుమ్ సంగితసి.

11 కిచ్చొక మెలె, ఆవ్ మాన్సు జా జెర్మున్ అయ్ లోసా కిచ్చొక అయ్ లయ్, మెలె, జోవయించి ఆత్తుక నెన గెల మాన్సుల్క రచ్చించుప కెరుక అయ్ లయ్.

నెన గెలి మెండపిల్లచి రిసాచి టాలి

12 “అల్లె, తుమ్ కిచ్చొ ఉచర్తను? ఏక్ మాన్సుక పుంజెక్ మెండల్ తిలె, జోవయింతె ఎక్కి పిట్ట తిలెగిన, ఏక్ తకు పుంజెక్ మెండల్ క ఒత్త డొంగె ముల దా కెర, జా పిట్ట గెచ్చ తిలి మెండక చజుక గెచ్చె నాయ్ గె?

13 అన్నె జేవ్ కెయ్ నే నాసిల ఏక్ తకు పుంజెక్ మెండల్ చి రిసా సంతోసుమ్ జతి కంట, ఈంజ * నాన గెలి మెండక చజెలె, డీసిలె, జో గొవుడు ఒగ్గర్ సర్లసంతోసుమ్ జయెదె మెన, తుమ్ క కచితుమ్ ఆవ్ సంగితసి.

14 దస్సి కి, ఈంజేవ్ బోదల్ ఎక్కిలో కి నాసెనుమతె గెచ్చుక పరలోకుమ్ తిలో అబ్బొన్ క ఇష్టుమ్ నాయ్.

15 “తుమ్ చితె బావో ఎక్కిలోక అన్నెక్లో పాపుమ్ కెర తిలెగిన, జో జా పాపుమ్ నే కెర్లొసా పాపుమ్ కెర్లొసాతె గెచ్చ కెర, అన్నె కో నెంతె, జో కెర్లొ పాపుమ్ జోకయ్ సంగుక అస్సె. జో పాపుమ్ కెర్లొసా జా కోడు సూన్లెగిన, నిజమి, పాపుమ్ కెర్లయ్ మెన, ఒప్పున సంగిలెగిన, జోక అన్నె బెదవన తస్సె.

* 18:5 18:5 ఇన బాలబోదల్తె మెలె, బాలబోదల్తయ్ ఇసి మెనుక జయెదె, నెంజెలె సంపజా బాలబోదల్తె జా దాక్ కెరన్లక కి ఇసి మెనుక జయెదె. దొన్ని అర్లల్ కి కెరనుక జయెదె. † 18:5 18:5 నెంజెలె 5. మొత్తము: అన్నె జో అంక సంపజలి రిసా, ఇన బాలబోదల్తె ఎక్కిలోక జలెకు కో మరియాద కెరెదె గే, అంకయ్ మరియాద కెర్లి రితి జయెదె. ‡ 18:6 18:6 నెంజెలె జోవయించి నముకుమ్ పిట్టవుల గే, § 18:7 18:7 నెంజెలె, ‘నముకుమ్ పిట్టయ్ తిన్ చి రిసా’. * 18:7 18:7 నెంజెలె ‘నముకుమ్ పిట్టయ్ తిన్ చి’. † 18:8 18:8 పాపుమ్...రిసా, నెంజెలె ‘నముకుమ్ పిట్టయ్ తి రితి జలెగిన, జా దీసి తెంతో అన్నె దస్సి నే జతి రిసా’ చి అర్దుమ్ కి గ్రీకు బాన తెన్ ఈంజ తొలితో రెగిడ్లిన్ తెన్ బెదెదె. ‡ 18:9 18:9 పాపుమ్...రిసా, నెంజెలె ‘నముకుమ్ పిట్టయ్ తి రితి జలెగిన, జో దీసి తెంతో అన్నె దస్సి నే జతి రిసా’ చి అర్దుమ్ కి గ్రీకు బాన తెన్ ఈంజ తొలితో రెగిడ్లిన్ తెన్ బెదెదె. § 18:11 18:11 గ్రీకు బాన తెన్ ఈంజ ఎత్తి తొలితో రెగిడ్ల సగుమ్ పుస్తకల్తె 11 నంబర్ చి కోసు తన్నె నాయ్. * 18:13 18:13 పిట్ట గెలి

16 గని, జో నే నూనైగిన, జా తగుచి రిసా తుమ్ లట్టబ్బినచి రిసా దొగుల తీగ్గ సాచి జతి రితి, అన్నెక్లొక గే అన్నె దొగులక గే కడన, జో పాపుమ్ కెర్లొసాతె గెచ్చు, సంగ.

17 జో తీగ్గచి కోడు నే నూనైగిన, అంక నంపజలన మొత్తుమ్ బెద సబ కెర్తినతె జా తగు నూనవ. జో జా సంగుమ్ సబ కెర్తినచి కోడు కి నే నూనైగిన, జోక తుమ్చితె నే బెదవంతె, బార్ కెర, దస్సి, యూదుల్ నెంజిలసక కి సిస్తు నజితసక కి యూదుల్ కిసి బెదవంతి నాయ్ గే, దస్సి దెక సిచ్చు కెర.

18 తుమ్ నంపజలన బెద ఈంజ లోకుమ్తె సబ కెర కిచ్చొ రుజ్జు సంగితె గే, జాకయ్ పరలోకుమ్ తిలి అమ్చి అదికారుమ్ దెతనుమ్, మెన నిజమి తుమ్క ఆవ్ సంగితసి.

19 “పడ్డొ, తుమ్క అన్నె కిచ్చొ మెంతసి మెలె, ఈంజ లోకుమ్తె తుమ్చితె కోకో, ఎక్కి దొగులయి జలెకి, మెన్నుతె ఎక్కి రితి ఉచర, కిచ్చొచి రిసా ప్రార్దన కెర్తె గే, పరలోకుమ్ తిలొ అంచొ అబ్బొ తుమ్చి రిసా జాక జర్గు కెరెదె.

20 కిచ్చొక మెలె, దొగుల తీగ్గ అంచి నావ్ తెన్ కేనె ఎక్కితె తవుల గే, ఒత్త జోవయించి నెడిమి ఆవ్ తయిందె” మెన, యేసు సంగిలన్.

మాన్సుల్క కెత్తి సుట్టు చెమించుప కెరుక గే

21 తెదొడి పేతురు పురై జా కెర, యేసుక, “ప్రబు, కేన్ జవున్ బావొ అంక కెత్తి సుట్టు పాపుమ్ కెర్తిన, ఆవ్ జోక చెమించుప కెరుక? సత్తు సుట్టు ఎద గే?” మెన, పుసిలన్.

22 యేసు జోక, “సత్తు సుట్టు నాయ్. తిని విసా సత్త సుట్టు ఎదక.” మెలన్.

ఎక్కిలోక ఎక్కిలో చెమించుప కెర

23 “పరలోకుమ్చి రాజిమ్తె బెదిత్తస ఎక్కిలోక ఎక్కిలో చెమించుప కెర్తినచి రిసా కిచ్చొ టాలి సంగుక జయెదె మెలె,

జోచ గొత్తి సుదల్ దెంక తిలి డబ్బుల్ ఏక్ రానొ నజనుక దెర్లొ.

24 నజనుక దెర్లి పొది, ఈందె, జోక దెన్ను వెయి వెండ్లు దెంక తిలొ ఎక్కిలోక బుకార్తికయ్, జమాన్లు జోక జో రానొతె కడ ఆన్ల.

25 జా రునుమ్ తీర్పుప కెరుక మెన జో మాన్సుతె కిచ్చొ నెంజిలి రిసా, జోచొ ఎజొమాని, ‘జోక కి జోచి తేర్నిక కి, జోచ బోదల్క కి, జోక కలుగు జలిసి ఎత్తి కి విక గెల కెర, రునుమ్ తీర్పుప కెరవడ’ మెన, జమాన్లుక సంగిలన్.

26 జలె, రునుమ్ జలొ జో గొత్తి సుదొ సెర్ను సేడ, జొకర, బాబు, అంచి ఉప్పిరి దయ తియ, దొరత్ రక్కు. జా రునుమ్ ఎత్తి ఆవ్ తీర్పుప కెరిందె” మెన, బతిమాల్ప జా సంగితికయ్,

27 జో రానొ జోచి ఉప్పిరి కన్కారుమ్ జా, జోక ముల కెర, జోచి రునుమ్ చెమించుప కెర్లన్.

28 “గని, జో దస్సి బార్ జా కెర, జోచి జతవ గొతి మాన్సుల్తె ఎక్కిలో జోక దొన్ పుంజొ †వెండ్లు దెంక తిలొసొక దన్నుల్ జా, జోచి పీకతె దెర, ‘తుయి అంక దెంక తిలిసి అంక దే’ మెన సంగిలన్.

29 జోచి జతవొ జో గొత్తి సుదొ సెర్ను సేడ, జొకర జొకర, ‘అంచి ఉప్పిరి దయ తియ దొరత్ రక్కు. తుక దా గెలిందె’ మెన, బతిమాల్ప జా సంగిలే కి,

30 జో నే ఒప్పన్తె, జో అన్నెక్లొ దెంక తిలిసి దా గెల్తె ఎద జోక జేల్తె గలయ్లన్.

31 “తెదొడి, ఈంజొ కన్కారుమ్ నే దెకిలొ గొత్తి సుదొచి ఒత్తవ గొత్తి సుదల్ జా జర్గు జలిసి దెక కెర, ఒగ్గర్ బాద సేడ, జర్గు జలిసి ఎత్తి. జోచొ ఎజొమానిక సంగిల.

32 తెదొడి, జో ఎజొమాని, జో కన్కారుమ్ నెంజిలొ గొత్తి సుదొక బుకారా కెర, జోక, ‘తుయి, గర్బొ గొత్తి సుదొ,

తుయి అంక బతిమాల్పా జా జోకర్లది, చి త్తుచి ఎదివాట్ తిలి రునుమ్ పెట గెలయ్.

33 ఆవ్ తుక చెమించుప కెర్లి రితి, తుయి తుచో జతచో గొత్తి సుదోక చెమించుప కెరుక తిలి నాయ్ గె? మెన, జోక సంగ కెర,

34 జో గొత్తి సుదో రునుమ్ జలిసి ఎత్తి దెతె ఎద, సిచ్చల్ కెర్తనతె జో జేలి తంక మెన జోచో ఎజోమాని సార్ప కెర దిలన్.

35 “జలె, తుమ్తె కో తుమ్చో బావో జలో అన్నెక్కోక పెట్టి ఎత్తి చెమించుప నే కెర్లె, పరలోకుమ్ తిలో అంచో అబ్బొ కచితుమ్ జో మాన్సుక సిచ్చ దెయెదె” మెన యేసు బుద్ది సంగిలన్.

19

1 యేసు ఈంజేవ్ కొడొ సంగ కేడయ్లి పడ్డె, గలిలయ ప్రాంతుమ్ తెంతో ముల దా, యూదయ ప్రదేసిమ్తెచి యోర్దాను గాడు ఒత్తల్తో పక్క ఉట్ట అయ్లన్.

2 ఒగ్గర్జిన్ జనాబ్ జోచి పట్టి జెతికయ్, జోవయించ జబ్బులు ఒత్త చెంగిల్ కెర్లన్.

పెండ్లి జలన ముల ములి జతిన్చి రిసా యేసు సంగిలిసి

3 పరిసయ్యుల్ సగుమ్జిన్ యేసుక పరిచ్చ కెర, తెర్లె నింద కెరుక మెన, జోతె అయ్ల, అన్నె, “కేన్చి రిసా జలెకు మున్నుబోద జోచి తేర్చిక ములుక నాయిమ్ గె?” మెన, పుసిల, చి యేసు జోవయింక,

4 “ఈంజ లోకుమ్ జెర్మయ్లి పొది తెంతో, మున్నుబోద తేర్బోద మెన, జెర్మిలోసా జేక జెర్మయ్లో.

5 ఇసికయి మున్నుబోద అయ్యన్అబ్బొన్క ముల దా, జోచి తేర్చి తెన్ బెద తంక అన్నె, అన్నె జేవ్ దొగుల ఎక్కి ఆగ్ జా తవుల మెన జెర్మయ్లోసా సంగిలన్

మెన నదు కెర్పు నాయ్ గె?

6 జలె, జేవ్ దొగుల ఎక్కి జివ్ జా అన్తి. జాచి రిసా, దేముడు పెండ్లితె కక్క జత కెరవ తయెదె గే, కేన్ మాన్సు ములవుక జయె నాయ్.” మెన యేసు సంగిలన్.

7 జేవ్ పరిసయ్యుల్ యేసుక “జలె, ‘ముల దెతి పుస్తకుమ్ రెగ్ల దిలెగిన ముల దెంక జయెదె’ మెన మోసే పూర్ముచో కిచ్చొక ఆడ దిలన్?” మెన, సంగిల.

8 యేసు జోవయింక, “తుమ్ రాడ్ జివ్చ మాన్సుల్చి రిసా ‘తుమ్చ తేర్చివొక ముల దెంక జయెదె’ మెన మోసే సెలవ్ దిలన్, గని మాన్సుల్క జెర్మయ్లి కెర్లి మొదోల్ తెంతో దస్సి తయె నాయ్.

9 ఆవ్ కిచ్చొ మెన తుమ్క సంగితసి మెలె, జా లంజె జలి రిసా పిట్టవ, కో జలెకు జోచి తేర్చిక ముల దా అన్నెక్కిక పెండ్లి జయెదె గే, లంజె వంసుమ్చో జతయ్, మెన గట్టిజ సంగితసి” మెన, జోవయింక సంగిలన్.

పెండ్లి నే జతిన్చి రిసా సిస్సుల్ ఉచర పుసిలిసి

10 ఈంజ కోడు సూన కెర, యేసుచ సిస్సుల్ జోక “తెర్చిమున్ను చి నెడిమి ఇసి తిలెగిన, పెండ్లి నే జలెగిన చెంగిల్.” మెన యేసుక సంగిల,

11 చి యేసు జోవయింక, “దేముడు జా సెక్కి దిలెకయ్, నెంజిలె కో కి జా కోడు ఓర్పువ జంక నెత్తిర్తి.

12 ఈందె, జెర్మన్ తెంతో గొడ్డు జలన తవుల, మాన్సుల్ సగుమ్జిన్క గొడ్డు జతి రితి కెర్లె, పడ్డె పరలోకుమ్చి రాజిమ్చి నేవ ఎక్కి మెన్ను తెన్ కెర్లి రిసా, సగుమ్జిన్ కి గొడ్డు రిత జా తవుల. జలె, తుమ్ ఉచర్లి రితి తంక కో తెరుల గే, దస్సే తత్తు.” మెన సంగిలన్.

యేసు బాలబోదల్క చడ వరుమ్ దిలిసి

13 పడ్డె, యేసు జోవయింక చడ ప్రార్దన కెరుక మెన, సగుమ్జిన్ జోవయించ బాలబోదల్క జోతె కడ అన్న.

14 జలె, జేవ్ బోదల్క కడ అన్ల మాన్సుల్క యేసుచ సిన్సుల్ “పోన” మెన గోల కెర్ల. గని, యేసు, “జోవయింక అడ్డు కెర నాయ్. బోదల్ అంచితె జెతు. కిచ్చొక మెలె, పరలోకుమ్చి రాజిమ్ ఇన సుదల్చియి” మెన, సిన్సుల్క సంగిలన్.

15 జేవ్ బోదల్క బోడి చడ కెర ఒత్త తెంతో ఉట్ట గెలన్.

పరలోకుమ్చి రాజిమ్తె కిసి బెదుక గే యేసు సంగిలిసి
(మార్కు 10:17-31; లూకా 18:18-30)

16 పడ్డొ, ఈందె, ఉబెడొ ఎక్కిలో యేసుతె జా కెర, “గురుబాబు, జొబర. ఆవ్ పరలోకుమ్చి రాజిమ్తె కెయెక తెయెక జితి వాట అంక దొర్కు జంక మెలె, ఆవ్ కిచ్చొ చెంగిల్ కామ్ కెర్లె జయెదె?” మెన పుసిలన్.

17 యేసు జోక, “కేన్ చెంగిల్చి మెన కిచ్చొక అంక తుయి పుసితసి? చెంగిల్ తిలోసా ఎక్కిలోయి. అన్నె కోయి నాయ్. పరలోకుమ్తె జితి వాట కావలె మెలె, దేముడుచ ఆగ్గుల్ రితి కెర్తె తా” మెన సంగిలన్.

18 జో ఉబెడొ, “కేన్ కేన్ ఆగ్గుల్ రితి కెరుక?” మెన యేసుక పుసిలన్, చి యేసు,

“నరు అత్య కెరు నాయ్,
లంజెకమొ కెరు నాయ్,
కిచ్చొ చోరు నాయ్,
అబద్దుమ్ సాచి సంగు నాయ్,

19 అయ్యద్అబ్బొద్క గవురుమ్ దెకితె త్తా,
అన్నె, తుక్క తుయి కిసి ప్రేమ కెరంతసి గే దస్సి, వేర సుదల్క కి ప్రేమ కెర్తె త్తా”
మెన సంగిలన్.

20 జో మాన్సు యేసుక, “ఇసచ ఎత్తి ఆవ్ నిదానుమ్ కెర దెకన్తసి. గని కిచ్చొగె పిట్ట అస్సె మెన అంక అజ్జ. అన్నె కిచ్చొ పిట్ట అస్సె?” మెన పుసిలన్, చి యేసు జోక, “తుయి పూర్తి జంక ఆస తిలెగిన, గో, చి

21 తుచి అస్తి ఎత్తి విక కెర, బీద సుదల్క దేసు, చి పరలోకుమ్తె తుక అస్తి కలుగు జెయెదె. అన్నె, అంచి తెన్ బెద, అంచి పట్టి జే!” మెలన్.

22 గని, జో ఉబెడొ ఒగ్గర్ సొమ్నారుమ్చి రిసా, యేసు దస్సి సంగితికయ్, దుకుమ్ జా మొకోమ్ ఇదిలిసి కెర ఉట్ట గెలన్.

సొమ్నార్లు పరలోకుమ్చి రాజిమ్తె బెదుక కన్సుమ్

23 తెదొడి యేసు జోచి సిన్సుల్క, “ఆవ్ తుమ్క కిచ్చొ కచితుమ్ సంగితసి మెలె, సొమ్నార్లు పరలోకుమ్చి రాజిమ్తె బెదుక కన్సుమ్.

24 అన్నె, దన సొమ్నార్లు దేముడుచి జా రాజిమ్తె బెదితి కంట, నూజిబొరొ వాట్ ఒంటె గెచ్చుక సుల్లు, మెన తుమ్క ఆవ్ సంగితసి” మెన సంగిలన్.

25 సిన్సుల్ ఈంజ కోడు నూన కెర, ఆచారిమ్ జా, “దస్సి జలె, కో రచ్చించుప జంక జయెదె?” మెన, సంగితికయ్,

26 యేసు జోవయింక దెక, “మాన్సుల్ కెర్క నెత్తిరిసి, గని ఎత్తి జర్లు కెరుక కి దేముడుక సెక్తి అస్సె.” మెన సంగిలన్.

27 పేతురు, “ఈందె, ఆమ్ ఎత్తి ముల దా తుచి పట్టి బులితనుమ్, చి రిసా అమ్కయి కిచ్చొ దొర్కు జయెదె?” మెన పుసిలన్.

28 యేసు జోవయింక ఇసి మెలన్, “తుమ్క ఆవ్ కిచ్చొ కచితుమ్ సంగితసి మెలె, ఈంజ లోకుమ్క నొవర్ చెంగిల్ కెర్లె పొదిక, ఆవ్ మాన్సు జా జెర్మున్ అయ్లోసా ఎత్తిక ఏలుప కెర్తి రిసా, అంచి పరలోకుమ్చి ఉజిడచి సింగాసనుమ్తె వెసితె పొదిక, అంక నంపజా తుమ్ భారజిన్, భార సిజాసనల్తె వెస, ఇస్సాయెలుల్చ భార సెకుమ్లుచక అంచి తెడి తుమ్ తీర్పు కెర్తె.

29 అన్నె, అంచి నావ్చి రిసా గెరల్ జలెకు, అన్నొబావొక జలెకు, బయిబేసిక జలెకు, అబ్బొన్క జలెకు, అయ్యన్క

జలెకు, బోదల్క జలెకు, బుయి జలెకు, జో ముల తయెదె గే, జోక దనచ పుంజెక వంతుల్ దొర్కు జయెదె, అన్నె, పరలోకుమతె గెచ్చ కెయెక తెయెక చెంగిల్ తా జివుల.

30 ఈంజ అగ్గె జల మాన్సుల్ ఒగ్గరజిన్ పడ్డె జివుల, పడ్డె జలన అగ్గె జివుల.”

20

ద్రాచ తోటచో ఎజోమానిచి దయచి రిసా టాలి

1 “పరలోకుమచి రాజిమ్తె మాన్సుల్క బెదయ్తోసాచి దయ కిసి మెలె, ఎజోమాని ఎక్కిలోచి దయచి రితి జయెదె. జో జోచి ద్రాచ తోటతె కామ్ కెరవుక మెన, కూలి మాన్సుల్క బుకార్తి రిసా, పెందలె బార్ జా కెర,

2 ఏక్ దీసిచి కామ్క ఏక్ ఒండి మెద్దెన్చి కూలి *డబ్బుల్ దెయిందె” మెన, జేవ్ కూలి మాన్సుల్చి మొక్కె ఒప్పున సంగ తా, ద్రాచ తోటతె జేవ్ కామ్ కెర్తి రిసా జోవయింక తెద్రయ్లో.

3 “పిమ్మట్, పాసి పాసి నొప్పు గంటల్క, జో ఎజోమాని, సంతపిది గెచ్చ కెర, కామ్ నెంజ ఆరి టీవో జా తిలన్క సగుమ్జిన్ ఒత్త తిలిసి దెక కెర,

4 తూమ్ కి అంచి ద్రాచ తోటతె గెచ్చ, కామ్ కెర, చి సరిపుచుప జతి కూలి డబ్బుల్ తుమ్క దెయిందె” మెన, జోవయింక సంగితికయ్, జేవ్ జోచి కామ్తె గెల.

5 అన్నె, పాసి పాసి బార గంటల్ మెద్దెనె కి, తిన్ని గంటల్క కి, జా వీదె జో ఎజోమాని గెచ్చ కెర, అన్నె దస్సి కెర్లన్.

6 “ఒత్త తెంతో, పాచ్ గంటల్ సంజె, జా వీదె అన్నె గెచ్చ కెర, అన్నె సగుమ్జిన్ దస్సి ఒత్త టీవో జా తతికయ్, తుమ్ ఒండి మెద్దెనె కిచ్చొక దస్సి, కామ్ నే

కెర్తె కిచ్చొక టీవో జా అన్నె?” మెన పుస్తితికయ్,

7 జేవ్, “కో అమ్క కూలి కెరయ్తి నాయ్” మెన సంగిల. సంగితికయ్, జో ఎజోమాని, “జలె, తూమ్ కి అంచి ద్రాచ తోటతె గెచ్చ కామ్ కెర” మెన, జోవయింక కి తెద్రయ్లన్.

8 “సాంజ్ జతికయ్, జో ద్రాచ తోటచో ఎజోమాని జోచో గెర్చి డబ్బుల్ దెకితో మాన్సుక, ‘జేవ్ కూలి కెర్లసక బుకారా కెర, పడ్డె అయ్లసక తెంతో తోలితో అయ్లసక ఎద, ఎత్కిక ఆవ్ సంగిలి కూలి డబ్బుల్ దేసు’ మెన, జోక సంగిలన్.

9 జాచి రిసా, పాచ్ గంటల్ సంజె జా కెర గడియయ్ కామ్ కెర్లసక కి, ఒండి మెద్దెన్చి ఎదిలి కూలి డబ్బుల్ దిలన్.

10 జేవ్ ఆల్నిమ్ అయ్లసక తెద్దిలి దిలి రిసా, జేవ్ అగ్గె అయ్లస, ‘అమ్క ఒగ్గర దెయెదె’ మెన ఉచర్ల. ఎత్కిజిన్క ఎక్కి రితి ఒండి మెద్దెన్చి కూలి డబ్బుల్ దొర్కు జలి.

11 జాచి రిసా, జేవ్ అగ్గె అయ్లస జా కూలి డబ్బుల్ నజన, ‘పెందలె తెంతో సాంజ్ ఎద ఒప్పుడక కెర్తి నైమ జా, అమ్ కామ్ కెర్లమ్.

12 జేవ్ ఎక్కి గంట కెర్లసక అమ్చి తెన్ సమానుమ్ దిలది’ మెన గోన లట్టబ, ఎజోమానిక సంగిల.

13 ఈంజో ఎజోమాని జోవయింతె ఎక్కిలోక, ‘నేస్తమ్†, ఆవ్ తుమ్క అన్యాయిమ్ కెరుక నాయ్. తుయి ఏక్ ఒండి మెద్దెన్చి కూలి డబ్బుల్ నజనుక ఒప్పున్లది.

14 అల్లె, తుయి ఒప్పుస్సిని నజన గో మెన సంగ కెర, పడ్డె అయ్లో ఎక్కిలోక దెకవ, జో తోలితో అయ్లోసాక అన్నె, ‘తుక దిలి రితి, ఈంజో పడ్డె అయ్లోసాక కి దెంక అంక ఇన్సుమ్ జలి.

* 20:2 20:2 ఏక్ దీసిచి కామ్క కూలి ఏక్ దేనారము ఇస్రాయేలు దేసిమ్చ దా అస్సి † 20:13 20:13 మింత

15 అంచి సొంత ఆస్తి అంచి ఇస్తుమ్ అయ్యేలి రితి వంట దెంక నెంజె గే? అంచి సర్లక జోవయింక దర్ముమ్ తెన్ దిలి రిసొ తుమ్క గోస గే? మెన, జో ఎజొమాని సంగిలో మెన యేసు సంగ కెర,

16 అన్నె, జలె, తొలితో బెదిలస పడ్డె బెదిలస జవుల. పడ్డె బెదిలస తొలితో బెదిలస జవుల”, మెన సంగిలన్.

యేసు మొర అన్నె జింక తిలిన్చి రిసొ అన్నెక్ సుట్టు సంగిలిసి
(మార్కు 10:32-34; లూకా 18:31-34)

17 యేసు యెరూసలేమ్ పట్టుమ్తె గెచ్చుక మెన బార్ జా, ఇండ గెతె తిలి పొది, వట్టె గెతనతె తెంతో జోచ బారజిన్ సిస్సుల్క పాసి బుకారాన, ఇసి మెలన్.

18 “ఈందె, యెరూసలేమ్తె గెతనుమ్. ఒత్త కిచ్చొ జయెదె మెలె, ఆవ్ మాన్సు జా జెర్మున్ అయ్యేలోసొక, మాన్సు దెర్లె, వెల్లెల మాన్సుల్ పూజర్లుతె చి మోసి తెన్ దేముడు దిలి ఆగ్గుల్ సికడ్డనతె దెర్ను సేడిందె, చి జేవ్ అంక మొర్తి సిచ్చ వయడ కెర,

19 అంక కొంకడ్డి రిసొ, అంక కొర్తల్ తెన్ పెటితి రిసొ, అంక సిలువతె టీవో కెర మార్తి రిసొ, అమ్చ యూదుల్ నెంజిల అదికారుల్చి అత్తి అంక సొర్ప కెర దెవుల. గని తిర్తత్క అన్నె జీవ్ జా ఉట్టిందె” మెన సంగిలన్.

అయ్యసి జాచి దొగుల పుత్తర్పులుచి రిసొ కోర్ప జలి

20 తెదొడి యేసుచ సిస్సుల్ జల జెబెదయచ దొగుల పుత్తర్పుల్చి అయ్యసి, జేవ్ పుత్తర్పుల్ తెన్ యేసుతె జా కెర, సెర్ను సేడ జొకర, “ఏక వరుమ్ దే” మెన, సంగితికయ్,

21 యేసు జాక, “తుయి కిచ్చొ కోర్ప జతసి?” మెన పుసిలన్, చి ఈంజ, “తుచి రాజిమ్తె అంచ పుత్తర్లు దొగుల, తుచి ఉజెతో పక్క ఎక్కిలో, డెబ్రి పక్క

ఎక్కిలో వెన తతి రితి ఆడ్ర దేను” మెన సంగిలి.

22 చి యేసు, “తుమ్ కిచ్చొ పుసితను గే, తుమ్ నేన్సు. అంచి గిన్నతె బెద పితి రితి, ఆవ్ సేడుక తిలి దుకుమ్తె బెదుక ఓర్పుప జంక తెర్పు గే?” మెన సంగితికయ్, జేవ్ “అమ్ తెరుమ్దే” మెలె.

23 దస్సి జబాబ్ దెతికయ్, యేసు, “ఆవ్ పితి గిన్నచి తుమ్ పిస్తె, గని అంచి ఉజెతో పక్క ఎక్కిలో, అంచి డెబ్రి పక్క అన్నెక్తో తుమ్ వెసుక మెన సెలవ్ దెంక అంచి అత్తి నాయ్. పరలోకుమ్ తిలో అంచొ దేముడు అబ్బొ కక్క కక్క సెలవ్ దా తయెదె గే, జెవ్వి ఒత్త వెసుల.” మెలన్.

24 తెదొడి, జేవ్ దొగుల బావుడ్లు ఎత్కిచి కంట వెల్లెల మాన్సుల్ జంక ఉచర్లిన్చి రిసొ సేసిల దెస్సుజిన్ సిస్సుల్ జా ఎత్కి నూన కెర, జోవయించి ఉప్పిరి ఒగ్గర్ కోపుమ్ జల.

సిస్సుల్ ఎక్కిలోక ఎక్కిలో కిసి దెకుక గే యేసు సంగిలిసి

25 తెదొడి యేసు జేవ్ బారజిన్ సిస్సుల్క జోతె బుకారా కెర, “యూదుల్ నెంజిల అదికారుల్ జోవయించి తెడి తిల వెల్లెల మాన్సుల్, సొంత గవురుమ్ ఉచరన, ప్రెజల్క జాడ్లు వయడ్లి రితి, జోవయింక పొటి తెన్ ఏలుప కెర్తతి మెన తుమ్ జాన్సు.

26 గని తుమ్చితె దస్సి తంక జయె నాయ్. తుమ్చితె కో వెల్లో జంక ఉచరెదె గే, జొయ్యి తుమ్చొ సేవ కెర్తొసొ రితో జా తంక.

27 తుమ్చితె కో ముక్కిమ్ జంక ఉచరెదె గే, జో తుమ్చొ గొతిమాన్సు రితో జా తంక.

28 దస్సి, ఆవ్ మాన్సు జా జెర్మున్ అయ్యేలోసొ కి మాన్సుల్చి అత్తి సేవ కెరవడనుక నాయ్, గని మాన్సుల్క ఆవ్ సేవ కెరుకయ్ అయ్యలయ్. మెలె, ఒగ్గర్జిన్ మాన్సుల్క సయ్తాన్చి

రాజిమ్ తెంతో నెతోవ గెల్లి రిసాయి మొర అంచి ప్రానుమ్ దెంక అన్నచి రిసా ఈంజ లోకుమ్తె అయ్లయ్” మెన సిస్సుల్క యేసు సంగిలన్.

దొగుల గుడ్డి జలనక యేసు చెంగిల్ కెర్లిసి
(మార్కు 10:46-52; లూకా 18:35-43)

29 పడ్డొ, యేసుచి సిస్సుల్ యెరికో పట్టుమ్ తెంతో బార్ జా, యెరూసలేమ్ పట్టుమ్తె గెతె తిలి పొది, ఒగ్గర్జిన్ ప్రెజల్ జోచి పట్టి గెతె తిల.

30 జలె, ఈందె, వాట్ సొడి దొగుల గుడ్డి మాన్సుల్ వెన తిల. యేసు జా వాట్ జెతయ్ మెన సూన తా, “ఓ యేసుప్రబు, దావీదు రానొచి సెకుమ్తె జెర్మిలో రచ్చించువ కెర్తొసా, అమ్చి ఉప్పిరి కన్కారుమ్ తియ, చెంగిల్ కెరు!” మెన, బతిమాల్పా జా కేక్ గల.

31 తిల జనాబ్, జలె, “తుక్లె తా” మెన గోల కెర్లె కి, జేవ్ గుడ్డి మాన్సుల్ అన్నె, “ప్రబు, దావీదు రానొచి సెకుమ్తె జెర్మిలో రచ్చించువ కెర్తొసా, అమ్చి ఉప్పిరి కన్కారుమ్ తియ చెంగిల్ కెరు!” మెన, అగ్గెచి కంట గట్టిజ కేకుల్ గల్తికయ్,

32 యేసు టీవొ కెర, జోవయింక బుకారా కెర, “ఆవ్ తుమ్క కిచ్చొ కెరుక మెన తుమ్ ఉచర్లను?” మెన పుసిలన్.

33 జేవ్ జోక, “అమ్చ అంకివొ దెకితి రితి కెరు” మెన సంగిల.

34 జేవ్చి ఉప్పిర్ యేసు కన్కారుమ్ జా, జోవయించ అంకివొ చడిలన్. చడిలి బేగి, జోవయించ అంకివొ టేంట డీసిల, చి జేవ్ జోచి పట్టి గెల.

21

యేసు యెరూసలేమ్ పట్టుమ్తె

గెచ్చు పాచిలిసి

(మార్కు 11:1-11; లూకా 19:28-38; యోహా 12:12-19)

1 పడ్డొ, యేసు ఇసి ఇండ జా యెరూసలేమ్ పట్టుమ్చి పాసి జా కెర, * ఒలీవ మెలి మెట్టచి పాసి తిలి బేత్తుగే మెలి గవ్వి అయ్లి పొది, జోచి సిస్సుల్తె దొగులక,

2 “తుమ్చి మొక్కె తిలి గవ్వి గెచ్చు వెన, చి బేగి, ఒత్త బంద తిలి ఏక్ గాడ్డెచి, జాచి తెన్ తిలి ఏక్ గాడ్డె పిల్ల తుమ్క డీసుల. జోవయింక యిప కెర, అంచితె ఉద్దడ ఆన.

3 కో జలెకు తుమ్క కిచ్చొ జలెకు సంగిలెగిన, ‘ఇన్నెతెన్ ప్రబుక కామ్ అన్నె’ మెన సంగ. సంగిలె, బేగి జో మాన్సు జేవ్ గాడ్డెల్క తెద్రయెదె” మెన సంగిలన్.

4 పూర్గుమ్ దేముడు జోచి కబుర్ సంగిలొ అత్తి సంగిలి కోడు నెరవెర్చువ జంక మెన, ఈంజ జర్గు జలి.

5 “తుమ్చొ సేంతుమ్ తిలొ రానొ గాడ్డె పిల్లతె వెగ జెతయ్, మెన దేముడు నిసాన † సీయోసు పట్టుమ్తెచ ప్రెజల్క సాట్పు కెరు” మెన, రెగిడ్లి కోడు.

6 జలె, జేవ్ దొగుల సిస్సుల్ గెచ్చు, యేసు జోవయింక సంగిలి రితి కెర,

7 జా గాడ్డెక చి, జాచొ పిల్లక ఉదడ ఆన, జోచి సిస్సుల్ జోవయించ దుప్పట్లు జా పిల్లచి ఉప్పిర్ గల్తికయ్, యేసు వెగ వెసిలన్.

8 అన్నె, ఒత్త బెర్ల జనాబ్తె ఒగ్గర్జిన్ జోవయించ దుప్పట్లు వట్టె అంతిర్ల. అన్నె సగుమ్జిన్ రూక్చ మట్టల్ రొడ్డల్ కండ కెర వట్టె అంతిర్ల.

9 అంత్ర కెర, జోవయించి పురెతో గెతె తిలన కి పడ్డొ గెతె తిలన కి, “దావీదు రానొచి సెకుమ్తె జెర్మిలో

* 21:1 21:1 ఒత్త ఒలీవ పండ్లు రూకుల్ తవుల చి ఇసి నావ్ తయెదె. † 21:5 21:5 ‘సీయోసు’ మెలి, యెరూసలేమ్ పట్టుమ్క అన్నెక్ నావ్ జయెది.

అమ్మచో †రచ్చించువ కెర్తొసొక శిజోబర, జోబర! దేముడు ప్రబుచి నావ్ తెన్ జెతోసొక ఓనన్ను, ఓనన్ను! ఎత్తిచి కంట ఉప్పిర్చి టాన్తె తిలోసొక ఓనన్ను!” మెన, కేకుల్ గల్తె తిల.

10 జలె, యేసు యెరూసలేమ్తె పావితికయ్, పట్టుమ్చ ఎత్తిజిన్ “ఈంజో కో?” మెన, బమ్మ జతికయ్.

11 ఒత్త జో తెన్ అయ్ల ప్రెజల్ కిచ్చొ మెల మెలె, “దేముడుచి కబుర్ ఆన్తో, గలలయ ప్రాంతుమ్చి నజరేతు గవ్విచొ, యేసు ఈంజో” మెన సంగిల.

దేముడుచి గుడితె సామన్లు వికితన గట్రిక యేసు ఉడడ్డిసి

(మార్కు 11:15-19; లూకా 19:45-48; యోహా 2:13-22)

12 తెదొడి యేసు *దేముడుచి గుడితె వెన కెర, ఒత్త, సామన్లు వికితన, గెంతన ఎత్తిజిన్క ఉడడ కెర, డబ్బుల్ పల్లయ్తనచ, బల్లల్ చి పార్వ పిట్టల్ వికితనచ, బల్లల్ సేడవ దా.

13 “ ‘అంచి గేరు ప్రార్దన కెర్తి గేరు జా అస్సె. దస్సి తవున్’

మెన రెగ్గ అస్సె, గని తుమ్ కిసి కెర అస్సున్ మెలె, ఈంజ దేముడుచి గేరుక, చోర్లు జితో రితో గేరు జతి రితి తుమ్ మార్పున కెర అస్సున్” మెన సంగిలన్.

14 తెదొడి, గుడ్డి మాన్సుల్, సొట్ట మాన్సుల్ దేముడుచి గుడితె యేసుతె అయ్ల, చి జోవయింక చెంగిల్ కెర్లన్.

15 గని, వెల్లెల పూజర్లు, మోసే తెన్ దేముడు దిలి ఆగ్గుల్ సికడ్డన కి, యేసు కెర్ల కమె దెక, పడ్డొ, “దావీదు రానొచి

సెకుమ్తె జెర్మిలో అమ్మచో రచ్చించువ కెర్తొసొ, తుక జెయ్యి, జెయ్యి!” మెన, దేముడుచి గుడితె బోదల్ యేసుక కేకుల్ గల్తె తిలిసి దెక, కోపుమ్ జల.

16 కోపుమ్ జా, యేసుక, “ఈంజేవ్ సంగిలిసి తుయి సూన్తసి గే?” మెన పుసిల, చి యేసు జోవయింక, “సూన్తసి. ఈందె, బాలబోదల్చి కొవ్న బోదల్చి చోడివాట్ గవురుమ్ ఆనన్లది”

మెన దేముడుచి కొడతె రెగిడ్లి కోడు తుమ్ కెయ్యి నదు కెర్పు నాయ్ గే? మెన, జేవ్ వెల్లెల మాన్సుల్క సంగ కెర,

17 జోవయింక ముల దా కెర, జా పట్టుమ్తె తెంతో బార్ జా, బేతనియ గవ్వి గెచ్చు, ఒత్త నిద్ర తిలన్.

పండ్లు నే దెర్లొ రూకుక జర్లు జలిసి (మార్కు 11:12-14,20-24)

18 అన్నెక్ దీసి పెందలె, యేసు యెరూసలేమ్ పట్టుమ్తె అన్నె జెతె తతికయ్, జోక చూ కెర్లన్.

19 తెదొడి వాట్ సొడి తిలో ఏక్ †అంజూరుమ్ రూకుక దెక కెర, రూక్చి పాసి గెలె, జా రూక్తె‡ అక్కడ్లు పిట్టవ అన్నెకిచ్చొకి నాయ్. జాకయ్, జో రూకుక దెక, “అప్పె తెంతో తుచితె కెయ్యెక కి కాయల్ దెర్లు నాయ్” మెన సంగిలన్, చి జా రూకు బేగి సుక్క గెలి.

ప్రార్దన కెర్తినచి రిసొ యేసు బోదన కెర్తిన

20 యేసుచ సిస్సుల్ జా జర్లు జలిసి దెక బమ్మ జా, “ఈంజ రూకు కిసి జా బేగి సుక్క గెలి గే?” మెన లట్టబంతికయ్,

‡ 21:9 21:9 ‘రచ్చించువ కెర్తొసొ’ మెన జేవ్ సంగిలె, ఈంజ లోకుమ్చి రగుమ్చి రాజిమ్క ఏలువ కెర జోవయింక ఆక్రమించువ కెర్లన తెంతో జోవయింక ఈంజ లోకుమ్చ బాదల్ తెంతో రచ్చించువ కెరెదె మెన జేవ్ ప్రెజల్ ఒగ్గర్జిన్ ఉడదర్. జోచి రాజిమ్ ముక్కిమ్క అత్తు రగుమ్చి జయెదె మెన అర్దుమ్ కెరంతి నాయ్. § 21:9

21:9 జోవయిం చి బాన తెన్ ‘జోబర, జోబర!’ మెలి అర్దుమ్ తెన్ ‘ఓనన్ను!’ మెన కేక గల్తె తిల. * 21:12 21:12 అర్పితుమ్ దెత పిట్టల్ గట్రి గెనుక జలె, జోవయింక ఆక్రమించువ కెర్తి రోమ్ దేసిమ్చి ప్రబుతుమ్చి డబ్బుల్ దిలె నెంజె. జేక, జోవయిం చి డబ్బుల్ పల్లవన, దేముడుచి గుడితె కామ్క జెతికయ్ రగుమ్ డబ్బుల్కయ్ పిట్టల్ గట్రి గెనుక, నెంజెలె డబ్బుల్ కి దేముడుచి గుడిక దెంక జయెదె. † 21:19 21:19 అంజూరుమ్ రూక్చి కాయల్ బొడ్డ పండ్లు రిత జవుల. ‡ 21:19 21:19 రూకు చెంగిలొచొ జలె, అక్కల్ దెర్లె పొది పండ్లు కి దెర తంక.

21 యేసు, “తుమ్క ఆవ్ కిచ్చొ కచితుమ్ సంగితసి మెలె, తుమ్ నంపజా ఎదిలి అన్యానుమ్ కి నే జతె నంపజలెగిన, ఈంజొ చెట్టొక జర్గు జలి రితి తూమ్ కి వెల్లొ కమొ కెర్తె. గని అన్నె, ఈంజ మెట్టక జలెకు దెక, ఉట్కి జా, సముద్రుమతె గలి జా మెన సంగిలెగిన, దస్సి జర్గు జయెదె మెన తుమ్క నిజమి ఆవ్ సంగితసి.

22 మెలె, తుమ్ ప్రార్దన కెర్తె పొది కిచ్చొ నజితె గే, జా దొర్కు జలి మెన నంపజలెగిన, తుమ్ నజీలిసి నే పిట్టె తుమ్క దొర్కు జయెదె.” మెన, యేసు సంగిలన్.

వెల్లెల మాన్సుల్ యేసుక అన్నె పరిచ్చ కెర్ల
(మార్కు 11:27-33; లూకా 20:1-8)

23 యేసు దేముడుచి గుడితె పాచ కెర బోదన కెర్తె తతికయ్, వెల్లెల పూజర్లు చి అన్నె వెల్లెల మాన్సుల్ జోతె జా కెర, “తుయి కెర్తె కమొ కెరుక, తుయి ఇన్నె బోదన కెరుక తుక కిచ్చొ అదికారుమ్ అస్సె? కొస్సొ తుక అదికారుమ్ దిలన్?” మెన జోక పుసీల.

24 యేసు జోవయింక, “ఆవ్ కి తుమ్కయ్ ఏక్ కోడు పుసింది. ఈంజ కొడుక తుమ్ జబాబ్ సంగిలెగిన, ఆవ్ కిచ్చొ అదికారుమ్క ఇసి కెర్తెసి గే, తుమ్క సంగిందె.

25 యోహాను బాప్తిసుమ్ దెతె తిలిన్చి అదికారుమ్ కేనె తెంతొ చి? పరలోకుమ్ తెంతొ చి గే, మాన్సు తెంతొ చి గె?” మెన పుసీలన్. జలె, జేవ్ వెల్లెల మాన్సుల్ ఎక్కిలో తెన్ ఎక్కిలో బమ్మ తెన్ లట్టబన, ‘పరలోకుమ్ తెంతొ చి’ మెన అమ్ సంగిలెగిన, ఈంజొ ‘దస్సి జలె, తుమ్ కిచ్చొక జోక నంప కెర్పు నాయ్?’ మెన అమ్క సంగిందె.

26 గని, ‘మాన్సు తెంతొ చి’ మెన అమ్ సంగిలెగిన, జనాబ్ కిచ్చొ మెనుల గే బితసుమ్. కిచ్చొక మెలె, యోహానుక

‘దేముడుచి కబుర్ సంగిలోసా జయెదె’ మెన ఎత్కిజిన్ నంపజతతి మెన వెల్లెల మాన్సుల్ జోవయింక జెవ్వి ఉచరన, “అమ్ నేనుమ్” మెన జబాబ్ సంగిలె.

27 జేవ్ వెల్లెల మాన్సుల్ దస్సి సంగితికయ్, యేసు “జలె, కిచ్చొ అదికారుమ్తె ఆవ్ ఈంజేవ్ కమొ ఆవ్ కెర్తెసి గే, తుమ్క సంగి నాయ్” మెన సంగిలన్.

దొగుల పుత్తర్లుచి రిసా సంగిలి టాలి

28 ఒత్త తెంతొ వెల్లెల మాన్సుల్క యేసు అన్నె ఇసి మెలన్. “ఏక్ టాలి ఉచర. ఏక్ మాన్సుక దొగుల పుత్తర్లు తిల. అబ్బొసి జో వెల్లొ పుత్తున్క ‘ఓ పూత్తు, తుయి ఆజి గెచ్చు, అమ్చి ద్రాచ తోటతె కామ్ కెరు మెన’ మెలన్.

29 జో పుత్తుసి ‘నెసి’ మెన జబాబ్ సంగిలో, గని పడ్డె తప్పు ఒప్పున దుకుమ్ జా బుద్ది ఆననా, జా కామ్తె గెలన్.

30 పడ్డె జో అబ్బొసి అన్నెక్లొ పుత్తున్తె జా కెర, తొలితొచొక సంగిలి రితి, ఇన్నెక కి సంగిలన్, చి ‘గెచ్చిందె, బ’ మెలన్. గని గెచ్చె నాయ్.

31 “జలె, ఈంజేవ్ దొగులతె కో అబ్బొన్చి కోడు రితి కెర్లొసా జయెదె?” మెన, యేసు జేవ్ వెల్లెల మాన్సుల్క పుసితికయ్, జేవ్ “తొలితొచొ” మెన సంగితికయ్, యేసు జోవయింక, “తుమ్క ఆవ్ కిచ్చొ కచితుమ్ సంగితసి మెలె, ఈంజ దేసిమ్చ తుమ్ నిస్కారుమ్ దెకిత సిస్టు నజీతన కి లంజె కమొచ తేర్బోదల్ కి తుమ్చి కంట సుల్లు తెన్ దేముడుచి రాజిమ్తె బెదుల.

32 కిచ్చొక మెలె, యోహాను సత్తిమ్ వాట్ ఇండ, సత్తిమ్ వాట్ దెకయ్తి రిసా తుమ్చితె అయ్లె కి, తుమ్ జోక నంపజను నాయ్. గని, సిస్టు నజీతన కి లంజె కమొచ కి జోక నంపజల. జలె, జేవ్ నంపజా చెంగిల్ జలిసి తుమ్ దెకిలెకి, తుమ్ కెర్తె పాపల్క విసారుమ్ జను నాయ్, చి యోహానుచి

కోడు నంపజను నాయ్.” మెన రుజ్జు సంగిలన్.

ద్రాచ తోటచో గుత్త మాన్సుల్చి టాలి (మార్కు 12:1-12; లూకా 20:9-19)

33 పిమ్మట్ యేను, “అన్నెక్ టాలి సంగిందె. నూన, ఏక్ ఎజొమాని తిలన్. జో ద్రాచ తోట రోవడ కెర, జా తోట సుట్టునంత కోట గలవ కెర, ఒత్త ద్రాచ రస్సుమ్ కడవనుక వెల్లో పత్తుర్ కూనవ కెర, తోట రకితి గోపురుమ్ బందవ కెర, రకితసక నిసాన, జోవయింక జా తోట గుత్త దా కెర, వేర దేసిమ్ ఉట్ట గెలన్.

34 “పండ్లుచి పంటో లాయితి సమయుమ్ జెతికయ్, జోచి వాట నజన్తి రిసా, తోట రకితసతె జోచ గొత్తి సుదల్క, జో ఎజొమాని తెద్రయ్లో.

35 గుత్త నజీలన, ఒత్త రక తిలన జో ఎజొమానిచ గొతి మాన్సుల్తె ఎక్కిలోక దెర పెట్ట, అన్నెక్కోక మార గెల, అన్నెక్కోక పత్తల్ గల పెట్ట.

36 జేవ్ రకితన దస్సి కెర్తికయ్, జో ఎజొమాని అగ్గెచి కంట ఒగ్గర్జిన్ వేర గొత్తి సుదల్క తెద్రయ్లన్, గని జేవ్ తోట రకితన ఇన్నెయింక కి దస్సి అల్లర్ కెర్ల.

37 “పడ్డొ, జో ఎజొమాని కిచ్చొ కెర్లన్ మెలె, ‘అంచొ పూత్తుక తెద్రయ్లెగిన, జోక మరియాద దెకుల, కిచ్చొగె’ మెన, పుత్తున్క జేవ్ గర్చ రకితసతె తెద్రయ్లన్.

38 జేవ్ జో ఎజొమానిచొ పుత్తున్క దెక కెర, ‘ఇన్నెకయి అబ్బొన్చి దనుమ్ కలుగు జయెదె, అల్లె, ఇన్నెక మార కెర, ఇన్నెక జెతి దనుమ్ అమ్క కడనుమ.’ మెన ఉచర,

39 జోక దెర కెర, ద్రాచ తోట తెంతొ బార్ కెర మార్ల.

40 జలె, జా తోటచొ ఎజొమాని అయ్లె, గుత్త నజీలన, జేవ్ రకితసక కిచ్చొ కెరెదె?” మెన యేసు పుసిలన్.

41 జో ఎజొమాని, “జేవ్ గార్చ సుదల్క మార, పంటో లాయితె పొదిక జోచి వాట జోక నిదానుమ్ తెన్ దెతు మెన, వేర మాన్సుల్క నిసాన, జోవయింకయి జా తోట రకుక గుత్త దెయెదె” మెన జబాబ్ దిల.

42 జలె, యేసు జోవయింక, “దేముడుచి కొడతె రెగిడ్డిసి కెయ నదు కెర్చు నాయ్ గే?

‘గేర్ బందిత సుదల్ కామ్క నే జయె మెన పక్కయ్ పెలవ దిలి పత్తుర్ మెన ఉచల్లె కి, జొయ్యి పత్తురు బోడిపత్తురు జయెదె. ప్రబుయి సొంతయ్ ఇసి జర్లు కెర్లొ. జో ఇసి కెర్లి రిసా, అమ్ దెకిలె ఆచారిమ్ జతయి!’

మెన రెగిడ్డి కోడు.

43 దేముడుచి రాజిమ్క దెకితి కామ్ తుమ్చితె తెంతొ కడ కెర, జోచి రాజిమ్ తెన్ బెదితి పలితుమ్ దెర్ల ప్రజెల్చి అత్తి దెయెదె మెన తుమ్క కచితుమ్ సంగితసి.

44 5 “పడ్డొ, ఈంజొ ముక్కిమ్ జలొ పత్తుర్చి ఉప్పిరి కో సేడుల, బద్దల్ జా గెచ్చుల, గని కచి ఉప్పిరి పత్తురు సేడెదె గే, జోక బీడవ గెలెదె” మెన యేసు సంగిలన్.

వెల్లెల మాన్సుల్ యేసుక దెరుక కోర్ప జలిసి

45 వెల్లెల పూజర్లు చి పరిసయ్యుల్ జో సంగిల టాలిచొ నూన కెర, “అమ్చి రిసాయి సంగితయ్” మెన అర్దుమ్ కెరన,

46 యేసుక దెరుక మెన ఉచర్ల. గని జనాబ్ జోక దేముడు తెద్రయ్లో కబుర్ సంగితొసా మెన ఉచర్లి రిసా, జోవయింక బియఁ కెర, జా పొది జోక దెరుక ముల దిల.

§ 21:44 21:44 గ్రీకు బాస తెన్ ఈంజ మత్తెలి తొలితొ రెగిడ్ల సగుమ్ పుస్తకల్తె 44 నంబర్చి కోడు తయె నాయ్.

22

పెండ్లి విందు దిలో ఎక్కిలో రానొచి టాలి

(లూకా 14:15-24)

1 అన్నెక్ టాలి కెర, యేసు జేవ్ కోపుమ్ జల వెల్లెల మాన్సుల్క ఇసి సంగిలన్

2 “పరలోకుమ్చి రాజిమ్తె బెదుక బుకార్లసి కీసి మెలె, జోచో పుత్తున్చి రిసా పెండ్లి విందు దిలో ఎక్కిలో రానొ కెర్లన్చి రితి జయెదె.

3 జా పెండ్లి విందుతె బుకార్లసక కడ ఆన్తి రిసా, జో రానొ జోచ గొత్తి సుదల్క తెద్రయ్లన్. గని, జేవ్ బుకార్లస జెంక నెసిల.

4 జాకయ్, జో రానొ, ‘ఈందె, అంచి విందు తెయార్ కెర అస్సి. బెయిలల్క, బేడు జల సొమ్ముల్క కండ అస్సి. ఎత్తి తెయార్ కెర అస్సి. విందు కంక జా’ మెన బుకార్లసక అన్నె సంగ” మెన, వేర గొత్తి సుదల్క జో రానొ అన్నె సంగ తెద్రయ్లన్.

5 జేవ్ బుకార్లస జో మాన్సు బుకార్లినక మరియాద నే దెకితె, జోవయింతె ఎక్కిలో జోచి బుయింతె గెలో, అన్నెక్లొ జోచి బియ్యారెత్ ఉట్ట గెలో.

6 అన్నె, సేన్ల సుదల్, జో రానొచ కబుర్ గెల గొత్తి సుదల్క దెర కెర, జోక నిస్కారుమ్ కెర, మార గెల.

7 జాచి రిసా, జో రానొ కోపుమ్ జా, జోచ జమాన్సుక తెద్రవ దా, జేవ్ అత్య కెర్లసక మొర్తి సిచ్చ దిలో, చి జోవయించి పట్టుమ్క ఆగి లంబడ డయవడ్డె.

8 “తెదొడి జో రానొ గొత్తి సుదల్ ఇసి మెన సంగిలన్. ‘పెండ్లి విందు తెయార్ కెర అస్సి, గని బుకార్లస ఈంజ విందుతె జెంక తగువ జలన్ నెంజి.

9 జాచి రిసా, వీదుల్తె గెచ్చ కెర, తుమ్క డిన్సన ఎత్తిక పెండ్లి విందుతె జా మెన, తుమ్ బుకారా.’ మెన, జోచ గొత్తి సుదల్క జో రానొ తెద్రయ్లన్.

10 జేవ్ గొత్తి సుదల్ వీదుల్తె గెచ్చ కెర, ఒత్త డీసిల మాన్సుల్ ఎత్తిక విందుతె బుకారా ఆన్, చి జా పెండ్లి బడ్డెతె బెర్ల.

11 “పడ్డొ జో రానొ, ‘పెండ్లి బడ్డెతె వెసిలసక దెకిన్దె’ మెన, జా పెండ్లి బడ్డెచి తెడి జా కెర, ఒత్త పెండ్లి పాలల్ నే గలన్లొ ఎక్కిలోక దెక కెర,

12 ‘ఓ *నేన్తమ్, తుయి పెండ్లి పాలల్ నెంజితె ఇన్నె కీసి అయ్లది?’ మెన, జో రానొ సంగితికయ్, జో మాన్సు బియఁ గెచ్చ, తుక్లె తిలన్.

13 తెదొడి రానొ, ‘ఇన్నెక చట్టొ అత్తొ బంద కెర, ఇన్నెక బయిలె అందర్చి కంట అందర్తె గల దాస. ఒత్త గెతన ఏడ ఏడ, దంతో చప్పిలై తవుల’ మెన, జోచ గొత్తి సుదల్క రానొ సంగిలన్.

14 పరలోకుమ్చి రాజిమ్తె బెదుక బుకార్లస ఒగ్గరిజిన్ గని నిసాన జలస తొక్కిజిన్ జవుల.” మెన సంగిలన్.

యేసుక కొడొతె అడ్డవుక మెన మాన్సుల్క జోతె తెద్రయ్లిసి (మార్కు 12:13-17; లూకా 20:20-26)

15 తెదొడి పరిసయ్యుల్, కొడొతె యేసుక అడ్డవుక మెన,

16 హేరోదు పచ్చెన జతన తెన్ పరిసయ్యుల్ జోచ సొంత సిస్సుల్క కి యేసుతె తెద్రయ్తికయ్, జేవ్ యేసుక, “గురుబాబు, తుయి సత్తిమ్చో మెన జానుమ్. మొకమాటుమ్ నే దెకితె, వెల్లెల మాన్సుల్ కిచ్చొ ఉచరుల గే నే బితె, దేముడు దెయ్లి వాట్చి రిసా సత్తిమ్ తెన్ బోదన కెర్లసి మెన జానుమ్” మెన, పులయ్తి రితి సంగ, అన్నె,

17 “జలె, రోమ్ దేసిమ్చొ క్లెసర్ రానొక అమ్ †సిస్సు దెంక నాయిమ్ గే నాయ్ గే? తూయి కీసి ఉచర్లసి? తుయి అమ్క

* 22:12 22:12 మింత † 22:17 22:17 జా సిస్సు మెలె, రోమ్ దేసిమ్చి ప్రబుతుమ్చి సిస్సు.

సంగు” మెన, పరిసయ్యుల్ తెద్రయలన యేసుక పుసిల.

18 గని యేసు జోవయించి పెట్టిచి విస్సుమ్ జాన, “ఉప్రమెన్సుచొ మాన్సుల్, తుమ్. అంక కిచ్చొక పరిచ్చ కెర్తసు?

19 అలై, జా సిస్తు దెతి డబ్బుల్చి కాసు ఏక్ అంక దెకవ” మెన, జోవయింక సంగితికయ్, జేవ్ జోక ఏక్ వెండి కాసు దెకయ్ల.

20 యేసు “ఈందె, ఇన్నె కచి పోలిక, కచి నావ్ డీస్తయ్?” మెన జోవయింక పుసిలన్,

21 చి జేవ్, “కైసర్ రానొచి” మెంతికయ్, యేసు జోవయింక, “కైసర్ క దెతిసి కైసర్ క, దేముడుక దెతిసి దేముడుకయ్ దెంక అస్సె” మెన, జోవయింక సంగిలన్.

22 జోచి కోడు నూన ఆచారిమ్ జా, జేవ్ వెల్లెల మాన్సుల్ తెద్రయల మాన్సుల్ యేసుక ముల దా, ఉట్ట గెల.

సద్దూకయ్యులు యేసుక పరిచ్చ కెరుక అయ్లీసి
(మార్కు 12:18-27; లూకా 20:27-40)

23 ‘మొర గెలెగిన అన్నె జీవ్ జంక నెంజె, అన్నెక్ లోకుమ్తె గెచ్చుక నెంజె’ మెన ప్రెజల్ క సికయ్త సద్దూకయ్యులు జా దీసి యేసుతె జా కెర,

24 “ఓ గురుబాబు, ఎక్కిలో బోదల్ నెంజెతె మొర గెలెగిన, జోచొ బావొసి జో అన్నొన్చి తేర్చిక పెండ్లి జా, జోచొ అన్నొన్చి నావ్ తెన్ బోదల్ పాయ దెంక అస్సె,

మెన, మోసే పూర్ణుమ్చ సంగిలన్.

25 జలె, అమ్చి తెన్ సత్తుజిన్ బావుడ్లు తిల. వెల్లొ పెండ్లి జా మొర గెలన్. ఇన్నెక్ బోదల్ నెంజిలి రిసా, ఇన్నెచి పట్టి జెర్మిలో బావొన్క ఈంజ తేర్చి పెండ్లి కెరన్చి.

26 తొల్సూర్ తెంతొ కర్వోవొ ఎద, వర్చ తెన్ వెల్లొచి తేర్చిక దస్సి పెండ్లి జర్గు కెరన మొర గెల.

27 ఎత్తి మొర గెలి పడ్డొ, ఈంజ తేర్ బోద కి మొర గెలి.

28 జలె, మొర గెలన అన్నె జీవ్ జతె పొదిక, ఈంజేవ్ సత్తుజిన్తె కక్క ఈంజ తేర్చి జా తయెదె? ఈంజేవ్ సత్తుజిన్ వర్చ తెన్ ఇన్నెక్ పెండ్లి జా తిల గెద?” మెన యేసుక పుసిల.

29 గని, యేసు జేవ్ క, “తుమ్ దేముడుచి కొడొ నేన అస్సన్. కిచ్చొక మెలె, దేముడుచి కొడొతె రెగ్గయ్లి తుమ్ సదు కెర్లె కి, ఒత్త తిలిసి అర్దుమ్ కెరన్చు నాయ్, చి జో దేముడు కెరయ్త కమొ దెకిలెకి, జోచి అదికారుమ్, నెక్తి, కెద్ది గే చినున్ నాయ్.

30 మెలె, మొర గెచ్చ అన్నె జీవ్ జతినెతె, పెండ్లివొ నే జతె, మాన్సుల్ దూతల్చి రితి దస్సి తవుల.

31 పడ్డొ, ‘మొర గెలన అన్నె జితి నాయ్’ మెన ఉచర, తుమ్ అన్మానుమ్ తెన్ అస్సన్. జలె, దేముడు తుమ్క సొంత సంగిలిసి సదు కెర్చు నాయ్ గె? మొర జివు జా ఉట్టితి రిసా,

‘ఆవ్ అబ్రాహామ్ క, ఇస్సాకుక చి యాకోబుక దేముడుయి’, మెన, దేముడు సంగిలి కోడు.

32 జలె, జేవ్ పూర్ణుల్ మొర తిలె కి, జోవయింక జో దేముడు జా తా కామ్క జెతయ్ జలె, అన్నెక్ లోకుమ్తె గెచ్చ జిచ్చి అస్తి మెన రుజ్జు జతయ్. రితి మొర గెలసక నాయ్, గని జీవ్ తిలసకయ్ జో దేముడు.” మెన, యేసు జేవ్ సద్దూకయ్యుల్ క సంగిలన్.

33 ప్రెజల్, జలె, జో బోదన కెర్లెచి రిసా నూన కెర, ఆచారిమ్ జల.

పరిసయ్యుల్ యేసుక అన్నె పరిచ్చ కెర్లెసి
(మార్కు 12:28-34; లూకా 10:25-28)

34 'యేసు నద్దూకయులు చి చోడి ముద్దొ కెర దిలో' మెన పరిసయుల్ నూన కెర, యేసుతె బెద అయ్ల,

35 చి జోప్యంతె మోసే తెన్ దేముడు దిలి ఆగ్గుల్ సికడ్డొసా ఎక్కిలో యేసుక పరిచ్చ కెరుక మెన, ఏక్ కోడు పుసిలన్.

36 "గురుబాబు, ఒండి మోసే పూర్గుమ్చొచి అత్తి దేముడు దిలి †ఆగ్గుల్ తెన్ కేన్ ఆగ్గు తొలితోచి ముక్కిమ్చి?"

37 యేసు జోక,

"తుమ్చొ ప్రబు జలో దేముడుక తుమ్చి ఒండి ఏపెట్టి తెన్, తుమ్చి ఒండి ఆత్మ తెన్, ఒండి మెన్పు తెన్ ఎక్కి ప్రేమ కెర్తె తంక.

38 ఎత్తి ఆగ్గుల్తె ఈంజ తొలితో చి, ముక్కిమ్చి.

39 అన్నె, 'తుమ్క తుమీ కెద్ది ప్రేమ కెరంతసు గే, తుచి పక్క సుదొక కి తెద్ది ప్రేమ కెర్తె తంక' మెన, అన్నెక్ ఆగ్గు ముక్కిమ్.

40 మోసే పూర్గుమ్చొచి అత్తి దేముడు రెగ్గయ్ల ఆగ్గుల్ ఎత్తిక కి, దేముడుచ కబుర్లు సంగిలన సంగుల ఎత్తి కోడు కి, ఈంజేవ్ దొన్ని ఆగ్గుల్ ఆదారుమ్ జా అస్తి" మెన, యేసు సంగిలన్.

41 పరిసయుల్ ఎత్తి, యేసుచి సుట్టునంత బెర తతికయ్, యేసు జోవయింక ఏక్ కోడ్ పుసిలన్.

42 "రచ్చించుప కెర్తొసా జతో క్రీస్తుచి రిసా తుమ్ కిచ్చొ మెన ఉచర్తసు? జో కచ్చొ పుత్తుసి జయెదె?" మెన పుసితికయ్, జేవ్ జోక, "దావీదు రానొచొ పుత్తుసి, జోవయించి సెకుమ్చొ" మెలన్.

43 జేవ్ దస్సి సంగితికయ్, యేసు జోవయింక, "దస్సి జలె, క్రీస్తు దావీదుక పుత్తుసి జలెగిన, దేముడుచి సుద్ది తిలి

† 22:36 22:36 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రగ్గయ్ల ఆగ్గుల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పొచ్ పుస్తకుమ్తె రెగ్గయ్ జా అస్సి. ఈంజ దెకపుక మెన కుపియ బాసతె నొయి ప్రమానుమ్తె మోసే పూర్గుమ్చొచి అత్తి రెగ్గి దేముడుచ ఆగ్గుల్ మెన రగ్గవ అస్సి. § 22:37 22:37 పేట్ తెన్

ఆత్మ సికయ్తికయ్, దావీదు రానొ కిచ్చొక క్రీస్తుక 'ప్రబు' మెన సంగిలన్. కిచ్చొ కోడుతె దస్సి సంగిలన్ మెలె;

44 'తుచ విరోదుమ్ సుదల్క తుయి సుదితి రితి ఆవ్ కెర్తె ఎద, అంచి ఉజెతో పక్కయ్ తుయి పెస తా' మెన, ప్రబు అంచొ ప్రబుక సంగిలన్."

45 దస్సి దావీదు రానొ క్రీస్తుక 'ప్రబు' మెన సంగితయ్ జలె, జో క్రీస్తు కిసి జా జోక పుత్తుసి జయెదె? ఉచర మెన యేసు జేవ్ వెల్లెల మాన్సుల్క సంగితికయ్,

46 కో కి అన్నెక్ కోడ్ సంగుక నెత్తిర్. అన్నె, జా దీసి తెంతొ, జోవయింతె కో కి యేసుక ఎక్కి కోడు కి పుసుక దయిరిమ్ తిలె నాయ్.

23

ప్రజల్క సిస్సుల్క యేసు జాగర్త సంగిలిసి (మార్కు 12:38-40; లూకా 11:37-52; 20:45-47)

1 తెదొడి యేసు జా దేముడుచి గుడితె బెర్ల ప్రజల్క కి జోచ సిస్సుల్క కి ఇసి మెలన్.

2 "మోసే తెన్ దేముడు దిలి ఆగ్గుల్ సికడ్డన చి పరిసయుల్ మోసే పూర్గుమ్చొచి పీటతె వెసిలి రితి జా ప్రజల్క మోసే తెన్ దేముడు దిలి ఆగ్గుల్ సికడుక అదికారుమ్ అస్సి.

3 జాకయ్, జేవ్ తుమ్క సికయ్తిసి ఎత్తి కెర, గని, జోవయించ కమొ రితి తుమ్ కెర నాయ్. జేవ్, ఇసి కెర, దస్సి కెర, మెన సంగితిసి జేవ్ సొంత కెర్తి నాయ్.

4 పిమ్మట్, కూలి మాన్సుల్క సావుకర్లు కిసి కంది వయితి జాడు వయడుల గే, దస్సి ఈంజేవ్ వెల్లెల మాన్సుల్, ఒగ్గర్ ఆగ్గుల్ రితి కెరుక అస్సి మెన, ప్రజల్క

జాడు వయడ్డి రితి కెర్తతి. గని, జేవ్ వయడ్డ జాడ్లు రిత కమొ సుల్కన కెర్తి రిసా జేవ్చి కిడి ఊంటి కి నే తెన్ జవున్ కదుల్వ కెర్తి నాయ్, పైజల్ క కన్కారుమ్ జతి నాయ్.

5 జోవయించ కమొ కిచ్చొ బుద్ది తెన్ కెర్తతి మెలె, అమ్ కెరంతి పున్నిమ్ మాన్సుల్ మెన్సుతు మెన, దేముడుచ ఆగ్గుల్ రెగ్గ రచ్చల్ రిత బంద, రూందు వెల్లో కెర, నిర్ది బందంతతి, చి జోవయించ పాలల్చ జుల్పల్ దీగు కెర్తతి.

6 పడ్డొ, విందుల్తె ముక్కిమ్ టాన్లుక కోర్ప జతతి. అన్నె, జోవయించ నబ గెరలె కి ముక్కిమ్చ వెసిత పీటల్ కడన్తతి.

7 పడ్డొ సంతవీదులె, మాన్సుల్ ఎత్తి అమ్క జొకర్తు మెన కోర్ప జతతి. పడ్డొ, మాన్సుల్ జోక 'గురుబాబు' మెన జొకరుక కి కోర్ప జతతి" మెన యేసు సంగిలన్.

యేసు సంగిలి బోదన

8 "తూమ్, జలె, తుమ్తె కక్క 'గురుబాబు' మెన నాయ్. తుమ్క ఎక్కిలొయి తుమ్చొ గురుబాబు రితొ జా అన్నె, చి తుమ్ ఎత్తిజిన్ ఎక్కి జతి రిత బావుడ్లు జా అన్నున్.

9 అన్నె, ఈంజ లోకుమ్తెచ కక్క కి 'దేముడు జలొ అబ్బొ' మెలి రితి నావ్ తియ నాయ్. కిచ్చొక మెలె, ఎక్కిలొయి తుమ్చొ అబ్బొసి జలొ దేముడు, పరలోకుమ్తె తిలొసా.

10 అన్నె, తుమ్తె కక్క 'గురు' మెనుక పొన. కిచ్చొక మెలె, తుమ్క క్రిస్తు ఎక్కిలొయి గురు జా అన్నె.

11 అన్నె, తుమ్చితె కో వెల్లో జయెదె గే, జో తుమ్క గొత్తి సుదొ జా సేవ కెర్పు.

12 కో జోవయింక జెవ్వి గవురుమ్ కెరంతి రితి జవుల గే, జేవ్ దాక్ జవుల,

చి కో జోవయింక జెవ్వి దాక్ కెరనుల గే, వెల్లెల్ జవుల" మెన యేసు సంగిలన్.

పరిసయ్యుల్క యేసు సంగిలి తీర్పు

13 పడ్డొ వెల్లెల మాన్సుల్క యేసు ఇసి మెన తీర్పు సంగిలన్. "అయ్యొ! ఉప్రమెన్సుచొ పరిసయ్యుల్ చి మోసే తెన్ దేముడు దిలి ఆగ్గుల్ సికడ్డన, నాసెనుమ్ జస్తె! కిచ్చొక మెలె, మాన్సుల్చి మొక్కె తుమ్ పరలోకుమ్చి కెప్లివొ డంకితను. కిచ్చొక మెలె, తుమ్ జా రాజిమ్తె సొంత బెదున్ నాయ్, చి బెదుక ఇన్సుమ్ జలన బెదుక తుమ్ ఒప్పున్ నాయ్.

14 *అయ్యొ! తుమ్ మోసే తెన్ దేముడు దిలి ఆగ్గుల్ సికడ్డన, పరిసయ్యుల్, నాసెనుమ్ జస్తె! తుమ్ రండెల్ మాన్సుల్చ గెరల్ విక కయ్లెకి, 'మాన్సుల్ అమ్చి బుద్ది చినుతు నాయ్' మెన మాన్సుల్చి మొక్కె దిగిల ప్రార్దనల్ కెర్తను. జాకయ్ తుమ్చి పాపుమ్ ఒగ్గర్, చి వెల్లి సిచ్చ జస్తె.

15 "అయ్యొ! ఉప్రమెన్సుచొ పరిసయ్యుల్, మోసే తెన్ దేముడు దిలి ఆగ్గుల్ సికడ్డన, నాసెనుమ్ జస్తె! తుమ్ కక్క జలెకు తుమ్చి మొత్తుమ్తె బెదవంతి రిసా, సముద్దుమ్ బుయి దెకజెతను, చి జో తుమ్చితె బెదిలొ మెలె, జోవయించి బుద్ది తుమ్చి బుద్దిచి కంట దొన్ని వాటల్ గార్ జతి రితి కెర్తను, చి వెల్లి ఆగి గొయ్తె తూమ్ గెతె జలె, జో అన్నె దస్సి సిచ్చ జంక విలువ జయెదె.

16 "అయ్యొ! తుమ్ గుడ్డి రిత జా, 'మాన్సుల్క చెంగిల్ వాట్ దెకడుమెదె' మెన తుమ్క తూమ్ ఉచర్లె కి, చెంగిల్ వాట్ పిట్టయ్తన, తుమ్ నాసెనుమ్ జస్తె. తుమ్ సికడ్డిసి ఏక్ కిచ్చొ మెలె, ఎక్కిలొ 'దేముడుచి గుడి తోడు' మెన ఒట్టు గలనె కిచ్చొ నెంజె, గని 'దేముడుచి

* 23:14 23:14 గ్రీకు బాస తెన్ ఈంజ మత్తెలి రెగిడ్డ నగుమ్ పుస్తకల్తె 14 నంబర్చి కోడు తయె నాయ్.

గుడితె తిలి బజరి తోడు' మెన ఒట్టు గలనై, జో గలిలి ఒట్టు నెరవెర్చుప కెరనుక అస్సె మెన తుమ్ సంగితను.

17 తుమ్ బుద్ది నెంజిల గుడ్డి జల మాన్సుల్. దొన్నితె కేన్ ముక్కిమ్? బజరి గే, బజర్క చెంగిల్ కెర్తి దేముడుచి గుడి గే?

18 "అన్సె, 'బలి దెతి టాన్ సాచి' మెన ఎక్కిలో ఒట్టు గలనై కిచ్చొ నెంజె, గని 'జాచి ఉప్పిరి తిలి అర్పితుమ్ సాచి' మెన ఒట్టు గలనై, జో మాన్సు గలిలి జా ఒట్టు నెరవెర్చుప కెరనుక అస్సె" తుమ్ మెంతను.

19 తుమ్ గుడ్డి జల రిత మాన్సుల్, దొన్నితె కేన్ ముక్కిమ్? అర్పితుమ్ గే, అర్పితుమ్క సుద్ది కెర్తి బలి దెతి టాన్ గే?

20 జలె, బలి దెతి టాన్ తోడు మెన కో ఒట్టు గలన తవుల గే, 'జేవేచి ఉప్పిరి తిలిసి ఎత్తి సాచి' మెన ఒట్టు గలన్లి రితి జతయ్.

21 పడ్డా, 'ఈంజ దేముడుచి గుడి సాచి' మెన కో ఒట్టు గలన తవుల గే, దేముడు సాచి మెన ఒట్టు గలన్లి రితి జతయ్. జో ఒత్త జితయ్చి రిసా.

22 అన్సె, 'పరలోకుమ్ తోడు' మెన కో ఒట్టు గలన తవుల గే, 'దేముడుచి సిజాననుమ్ తోడు' మెలి రితి జా, 'ఒత్త వెసితోసా తోడు' మెలి రితి ఒట్టు గలన్లి రితి జతయ్.

23 "అయ్యో! ఉప్రమెన్సుచొ, మోసే తెన్ దేముడు దిలి ఆగ్గుల్ సికడ్డన చి పరిసయ్యుల్, తుమ్ నాసెనుమ్ జస్తె! తుమ్ పొచెర్డొ రొడ్డతె, చెరమల్లితె, జిల్లకరతె, దన్నచతె దెన్ను వంతుల్ కెర, ఏక్ వంతు దేముడుక దెతను, గని మోసే తెన్ దేముడు దిలి ఆగ్గుల్ తెచ ముక్కిమ్ జల సెలవ్ కొడొ పచ్చ అస్సును. కిచ్చొ కిచ్చొ సెలవ్ కొడొ రితి కెరుక ముల అస్సున్ మెలె, సత్తిమ్ తెన్ రుజ్జు కెర తీర్పు కెర్తిసి, కన్కారుమ్ జతిసి, చి దేముడుచి ఉప్పిరి నిదానుమ్

నముకుమ్ తితిసి. జోవయించి వంతు దన్న వస్తువల్క దెంక తప్పు నాయ్, గని అన్సె ముక్కిమ్ జల సెలవ్ కొడొ రితి తుమ్ కెర్తదు జలె, తుమ్క చెంగిల్ తత్తి

24 గుడ్డి జల రిత వాల్ దెకయ్తన, తూమ్. పిత్తిన్తె డోమ తిలె జాక వెంట గెల, ఒంటి తిలె కి నాయ్ మెన జాక గిడ్డి రితి జతను.

25 "అయ్యో! ఉప్రమెన్సుచొ, మోసే తెన్ దేముడు దిలి ఆగ్గుల్ సికడ్డన చి పరిసయ్యుల్, నాసెనుమ్ జస్తె! గలన్సు గిన్నలు ఉప్పిరి పక్క మంజితి రితి, చెంగిల్ వేసిమ్ గలంతి రితి జతను, గని తుమ్చి పేట్ తెడి పక్క చోరు బుద్దిచి ఆన బెర అస్సె.

26 తుమ్ గుడ్డి రిత పరిసయ్యుల్, గలన్ చి గిన్న తెడి సుబ్బుమ్ కెరుక కిసి ముక్కిమ్ తయెదె గే, దస్సి, తుమ్చి బుద్ది చెంగిల్ జలెగిన, నిజుమి పున్నిమ్ రితి చెంగిల్ జంక జయెదె.

27 "అయ్యో! ఉప్రమెన్సుచొ, మోసే తెన్ దేముడు దిలి ఆగ్గుల్ సికడ్డన, పరిసయ్యుల్, తుమ్ నాసెనుమ్ జస్తె! తుమ్ చున్నుమ్ సరొయ్లి మెన్సున్చి రితి అస్సున్. ఉప్పిరి చొక్కిల్ సూటి డిస్తయ్, గని తెడి మొర గెల మాన్సుల్చ అడ్డొ, కువ గెలి ముక్కల్ తయెదె.

28 దస్సి, తుమ్క దెకిత మాన్సుల్క సీతిసుదల్చ రిత డిస్తను, గని తుమ్చి ఆత్మ తెడి ఉప్రమెన్సు, మూర్కుమ్ బుద్ది బెర అస్సె.

29 "అయ్యో! ఉప్రమెన్సుచొ, మోసే తెన్ దేముడు దిలి ఆగ్గుల్ సికడ్డన చి పరిసయ్యుల్, తుమ్ నాసెనుమ్ జస్తె! దేముడుచ కబుర్లు సంగిలసక తుమ్చ పూర్గుమ్చ మార్లి రిసా తుమ్క లాజుచి రిసా, జేవ్ సీతిసుదల్చి రిసా తుమ్ మెన్సునిలు బందవ, సూటి కెరవ,

30 ఆమ్ అమ్చ పూర్గుమ్చ తిల దీసలె జితమ్ జలె, దేముడుచి కబుర్

అన్లనక మార్గిన్తె ఆమ్ బెదితమ్ నాయ్” మెనన, నీతి సంగితను, తుమ్.

31 దస్సి మెనన, దేముడుచి కబుర్ అన్లనక మార్గనచ పుత్తర్లులు జా అస్సుమ్ మెన, తుమ్చి ఉప్పిరి తుమీ సాచి లట్టబంతను.

32 తుమ్చ పూర్గమ్చ మొదోల్ తెంతో కెర్లిసి తుమ్ పూర్తి నెరవెర్లుప కెర, జలె.

33 “పెట్టి అయిచి విస్సుమ్చ, తుమ్. విస్సుమ్చ అయివోచి జట్టుచ, వెల్లి ఆగి గోయ్తెచి సిచ్చ తుమ్ కిసి పిట్టవన్తె? పిట్టవనుక నెతుర్పు.

34 జాచి రిసా, దేముడుచి కబుర్ అన్తనక కి, బుద్ది సుదల్క కి, అంచి సుబుమ్ కబుర్ సికడ్డనక కి తుమ్చితె తెద్రయిందె. గని జోవయింతె సగుమ్జిన్క మార్తె, సిలువల్తె గలుల. అన్నె సగుమ్జిన్క తుమ్చ సబ గెరలె కొర్డల్ తెన్ పెట కెర, అల్లర్ కెర, ఏక్ పట్టుమ్ తెంతో అన్నెక్ పట్టుమ్ ఎద, ఉదడ గెల్తె త్తన్.

35 తుమ్ దస్సి కెర్తనుచి రిసా, మాన్సుల్చి అత్తి మొర గెల నీతిసుదల్ ఎత్తిజిన్చి లోయిచి పాపుమ్ తుమ్క లయెదె. నీతి జలో హేబెలుక మార్గి తెంతో మొదోల్ కెర, దేముడుచి గుడిచి నెడిమి బలి దెతి టాన్ సొడి తుమ్చ అబ్బదింసి మార్గో బరక్యిచో పుత్తున్ మెలో జెకర్యాచి లోయి ఎద,

36 జా పాపుమ్ ఎత్తి ఈంజ కాలుమ్చ మాన్సుల్క లయెదె మెన, తుమ్క ఆవ్ కచితుమ్ సంగితసి.

37 “ఓ యెరూసలేమ్చ, అమ్చి యెరూసలేమ్చ మాన్సుల్! అమ్ తెద్రయల కబుర్ అన్లనక, బోదన కెర్లనక పత్తల్ గల మార్తను. కిచ్చో ప్రమాదుమ్ నే లయితి రితి కుకిడి జాచి పిల్లల్క జాచి రెప్పల్ తెడి కిసి ముద్దో కెరన తయెదె గీ, ఆవ్ తుమ్క కెత్తిగే సుట్టు ముద్దో కెరంతి

రితి తుమ్క చెంగిల్ కెర్తయ్, గని తుమ్ నెసిలదు.

38 ఈందె, తుమ్చి గేర్ కో నెంజితె రితి తుమ్క తూమి ముల దెన్తి.

39 అప్పె తెంతో మొదోల్ కెర, ప్రబుచి నావ్ తెన్ జెతోసాక ‘జెయ్యి, జెయ్యి!’ మెన తుమ్ సంగుక దెర్తె ఎదక తుమ్ అంక దెకుక నెతుర్పు మెన, కచితుమ్ సంగితసి” మెన, యేసు సంగిలన్.

24

దేవులుమ్ పాడ్ జంక తిలిన్చి రిసా యేసు సంగిలిసి (మార్కు 13:1-31; లూకా 21:5-33)

1 తెదొడి యేసు దేముడుచి గుడి తెంతో బార్ జా ఉట్ట గెతె తతికయ్, జోచ సిస్సుల్, ‘ఈంజ దేముడుచి గుడి కెర్ది సూటి కెర అన్తి!’ మెన జోక దెకవుక అయ్ల.

2 జాచి రిసా యేసు జోవయింక, “ఈంజ ఎత్తి తుమ్ దెకితను, గని, తుమ్క ఆవ్ కిచ్చో కచితుమ్ సంగితసి మెలె, పత్తుర్చి ఉప్పిర్ పత్తుర్ దొంత్రల్ అప్పె తిలె కి, ఎక్కి జలెకు నే టీవో నే జతి దీసి జెయెదె” మెన, సంగిలన్.

3 పిమ్మట్, యేసు దేముడుచి గుడిచి మొక్కె తిలి ఒలీవ మెట్టయ్ గెచ్చు వెసితికయ్, అన్నె కో నెంతె సిస్సుల్ జోతె జా కెర, “తుయి సంగిలిసి కెయ్క జర్గు జయెదె? పిమ్మట్, తుయి ఈంజ లోకుమ్తె అన్నె జెతిసి కి, ఈంజ ఉగుమ్ మార్పుప జతిసి కి పాసి జెతయ్ మెన, అమ్ కిసి చినుక జయెదె?” మెన పుసిల.

4 జలె యేసు జోవయింక ఇసి మెలన్. “కో జలెకు తుమ్క మోసిమ్ నే కెర్తి రితి, తుమ్ జాగర్త దెకన.

5 కిచ్చోక మెలె, ఒగ్గర్జిన్ మాన్సుల్, ‘అంచి నావ్ తెన్ జా కెర అవ్వి క్రిస్తు’ మెన సంగుక జలెకు, ఒగ్గర్జిన్క మోసిమ్ కెర, వేర బుద్ది సికడుల.*

* 24:5 24:5 కెయ్క మెలె, యేసు పరలోకుమ్తె వెగ గెచ్చు అన్నె నే జెతె అగ్గె.

6 పిమ్మట, 'యుద్ధుమ్ జతయ్' మొన జలెకు, 'యుద్ధుమ్ జెయెదె' మొన జలెకు, తుమ్ సూన్తె. గని, బమ్మ నెంతె తా. ఇనచ ఎత్తి జర్గు జంక అస్సె, గని ఈంజ ఉగుమ్ తెద్ది బేగి పూర్తి జయె నాయ్.

7 పిమ్మట, దేసిమ్చి ఉప్పిర్ దేసిమ్, రాజిమ్చి ఉప్పిర్ రాజిమ్ యుద్ధుమ్క టీవో జవుల. అన్నె, వేర వేర దేసిమ్లుతె కరులు కి బూకంపల్ కి జర్గు జవుల.

8 అంచి రాజిమ్ ఏలుప కెర్తి ఉగుమ్క జెర్మయ్తి అగ్గె జెతి నల్వ నొప్పుల్ రితి జా, ఇనచ మొదొల్ జవుల.

9 "దస్సి జర్గు జతి పొదిక, ప్రెజల్ తుమ్క సైమల్ కెర్తి రిసా అదికారుల్తె సార్పు కెర మొరవుల. అంచి నావ్చి రిసా, దేసిమ్లు ఎత్తితె తుమ్క విరోదుమ్ కెరుల.

10 దస్సి జర్గు జతిన్చి రిసా, ఒగ్గర్జిన్ బమ్మ జా అంక ముల దా, ఎక్కిలోక ఎక్కిలో మోసిమ్ కెర అదికారుల్చి అత్తి దెరవ దెవుల, చి ఎక్కిలోక ఎక్కిలో విరోదుమ్ జవుల.

11 "జేవ్ దీసల్క, ఒగ్గర్జిన్ మాన్సుల్ 'దేముడుచి కబుర్ సంగితోసా ఆవ్' మొనన, తుమ్చితె జా కెర, వేర బుద్ది సికడ, ఒగ్గర్జిన్క అంక ములవ దెవుల.

12 అన్నె, 'పాపుమ్ కెర్తిసి ఒగ్గర్ జా గెతయ్' మొన, ఒగ్గర్జితె ఎక్కిలోక ఎక్కిలో ప్రేమ కెర్తిసి పిట్ట గెచ్చెది.

13 దస్సి జలెకి, ఆకర్ ఎద నముకుమ్ తెన్ తా, కో ఒర్పువ జవుల గే, జెవ్వె రచ్చించువ జవుల.

14 " 'ఒండి లోకుమ్చ ప్రెజల్ ఈంజ సాచి సూన తత్తు' మొన, ఈంజ లోకుమ్ ఎత్తిక పరలోకుమ్చి రాజిమ్చి రిసాచి ఈంజ అంచి సుబుమ్ కబుర్ సూనయింది. ఎత్తితె సూనయ్లెకయ్ ఆకర్ దీసి జెయెదె" మొన యేసు సంగిలన్.

యెరూసలేమ్ పట్టుమ్ పాడ్ జంక తిలిన్చి రిసా యేసు సంగిలిసి

15 "జాకయ్, †పిమ్మటక, 'జర్గు జయెదె' మొన దానియేలు పూర్గుమ్చొచి అత్తి రెగ్లయ్లి కోడు తిలిసి, మెలె, దేముడుక విరోదుమ్ జా జోక బలే దూసుప కెర నాసెనుమ్ కెర్తిక దేముడుచి గుడితె టీవో జంక, తుమ్ దెకితె, ఇన్నెచి అర్దుమ్ కిచ్చొ మెలె, ఈంజ సదు కెర్తన తుమ్ చెంగిల్ ఉచరన, జలె, జా గుర్తు తుమ్ దెకిలె,

16 యూదయ ప్రదేసిమ్తెచ మాన్సుల్ చట్టున డొంగ్రలె ఉట్టు నిగుతు.

17 జా జర్గు జతిసి తుమ్ దెకిలె, కేన్ మిద్దెచి ఉప్పిర్ తిలొ సుదొ, ఉత్త కెర, జోచి గెరి తెంతొ కిచ్చొ జలెకు వెంట నెంక ఉత్త జెంక నాయ్.

18 వెడయ్ తిలొ సుదొ, కామ్చి రిసా కడ్ల జోచ సొక్కల్ జవున్ వెంట నెంక ప్ల జెంక నాయ్.

19 "అయ్యొ! జేవ్ దీసల్క వయ్ తిల తేర్బోదల్, బోదల్ వడ్డివో ఉట్టు నిగుక నెత్త ఒగ్గర్ సైమల్ జవుల.

20 'చల్లి పొది జవున్, ‡సెలవ్ కడన్ దీసి జవున్ అమ్క ఈంజ ఉట్టు నిగితి సైమ జెవున్ నాయ్' మొన, తుమ్ ప్రార్దన కెర.

21 కిచ్చొక మెలె, లోకుమ్ జెర్మన్ జలి తెంతొ అప్పె ఎదక, దస్సి సైమ కెయ్యెక

† 24:15 24:15 యేసు జెర్మ డబ్బయ్-70-వెర్సల్ గెలి పడ్డొ ఈంజ సప్టుమ్ జర్గు జలి. మెలె, యేసు పరలోకుమ్తె గచ్చు అన్నె విస్సెక్ సత్తు-27-వెర్సల్ గెతికయ్. ‡ 24:20 24:20 ఎత్తి సెన్సర్ యూదుల్క బక్తి కెర్తి సెలవ్ కడ దీసి జయెదె. జా దీసి జోవయింప నబ గెరలె గెచ్చొ, దేముడుచి కొణొ సూన కెర, ఎత్తి అదికారుమ్ తిలొ దేముడుక బక్తి కెరుల. జోక 'యెహోవ' మొన నావ్ తయెదె. జా దీసి 'కిచ్చొ కామ్ కెర నాయ్' మొన జో ఎత్తి అదికారుమ్ తిలొ దేముడు సంగిలిన్క యూదుల్చ వెల్లెల మాన్సుల్ ప్రెజల్క జాడు వయ్డ్లి రితి కెర కామ్ నే కెర్చిన్చి రిసా ఒగ్గర్ ఆగ్గల్ అవ్వె ఉచర అస్సి. ఇన్నె, దొస్సి ఎన్నులు కోణ్ణిన్క 'కామ్' మొన నింద కెర్తితి.

కి కలుగు జయె నాయ్, చి తెద్ది సైమ కెయ్యోక కి అన్నె జయె నాయ్.

22 జాచి రిసా, తొక్కి దీనల్క దన సైమల్ జతి రితి ప్రబు సెలవ్ దెత్తి నాయ్ జలె, కో కి రచ్చించువ జంక నెత్త. గని, నంపజతి రిసా రచ్చనక నిసాన జలన పాడ నే జతి రిసాయి, జేవ్ సైమల్ తొక్కి దీనల్ తతి సెలవ్ అస్సె.

యేసు అన్నె జెతిసి కిసి తయెదె గే జొయ్యి సంగిలీసి

23 “జా కాలుమ్క, ‘ఈందె, క్రీస్తు!’, ‘ఓదె క్రీస్తు’ మెన కో జలెకు తుమ్క సంగిలెగిన, తుమ్ నంప కెర నాయ్.

24 కిచ్చొక మెలె, అబద్దుమ్చ జా కెర, ‘ఆవ్ క్రీస్తు’ మెనన జలెకు ‘ఆవ్ దేముడుచి కబుర్ ఆన్ తొసా’ మైనన జలెకు, రచ్చనక నిసాన్లనక మోసిమె కెర జోవయించి నముకుమ్ పిట్టపుక మెన ఉచర, వెల్లెల మాయకమొ కెరుల.

25 ఈందె, ఈంజ నే జతె అగ్గె తుమ్క ఆవ్ సంగితసి.

26 జాకయ్, కో జలెకు, ‘ఈందె, క్రీస్తు జా బయిలె అస్సె’ మెన సంగిలె జవున్, తుమ్ ఒత్త గెచ్చు నాయ్. నెంజిలె, ‘ఈందె, గేర్ తెడి మూలయి పెన అస్సె’ మెన సంగిలె జవున్, నంప కెర నాయ్.

27 కిచ్చొక మెలె, బిజిలి తూర్పు పక్క మొల్క, వడమర పక్క గెతె ఎదక కిసి ఉజిడ్ జతయ్ గే, దస్సి కి ఆవ్ మాన్సు జా జెర్మన్ అయ్లోసా అన్నె జెతె పొదిక, దస్సి, కేన్ పక్క కి డీసిందె.

28 పీనుమ్ కేనె తయెదె గే, ఒత్త గిద్దుల్ బెరుల.

29 “ఆవ్ సంగిలి జా వెల్లి సైమచి దీనల్ కేడ్లె, బేగి పొద్దు అందర్ జయెదె. జోను కి ఉజిడ్ దెయె నాయ్. ఆగాసుమ్ తెంతొ సుక్కల్ గెసురుల, ఆగాసుమ్తె ఎత్తి అద్దుర్ జయెదె.

30 తెదొడ్క ఆవ్ మాన్సు జా జెర్మన్ అయ్లోసా జెతిన్క గుర్తు ఆగాసుమ్తె డీసెదె. సాస్టుమ్ డీసెదె, చి ఆవ్ మాన్సు

జా జెర్మన్ అయ్లోసా ఆగాసుమ్చ మబ్బుల్తె ఉత్త, అంచి అదికారుమ్ అంచి పరలోకుమ్చి ఉజిడి తెన్ జెతిసి బూలోకుమ్ తిలి ఎత్తి ప్రెజల్చ మాన్సుల్ ఎత్తిజిన్ దెక, జేవ్ కెర్ల పాపల్చి రిసా దుకుమ్ కెరనుల.

31 తెదొడ్క నప్పిర్ గట్టిజ బజవ, అంచ దూతల్క తెద్రయిందె, చి చెత్తర్ పక్కల్ తెంతొ ఆవ్ నిసాన అంక నంపజల మాన్సుల్క జేవ్ ఎక్కితె కుడవుల.

32 “అంజూరుమ్ రూకుక టాలి కెర అర్దుమ్ కెరన. మెలె, దసా రూక్చ కొమ్మల్ కొవ్ని జా పలోయ్లె, ‘వేసెగు అప్పె పావ జెయెదె’ మెన, తుమ్ చినితె.

33 దస్సి, ఆవ్ సంగిల గుర్తుల్ తుమ్ దెకిలె, జా గుమ్ముమె పావిల్ రితి జా అన్నె జెతికయ్ సమయుమ్ పాసి జా అస్సె మెన తుమ్ జాన్తె.

34 ఆవ్ సంగిల సైమల్, గుర్తుల్ పూర్తి జలెకయ్ ఈంజ ఉగుమ్ అంతుమ్ జయెదె మెన తుమ్క ఆవ్ కచితుమ్ సంగితసి.

35 జలె, ఆగాసుమ్ బుయి నాసెనుమ్ జా గెచ్చుల, గని అంచ కొడొ ఎద్గెరె పిట్టితి నాయ్.

కో నేన్సి పొదిక అన్నె జెయిందె మెన యేసు సంగిలీసి

36 “జలె, కేన్ దీసిక ఈంజ లోకుమ్తె అన్నె జెయిందె గే, జా దీన్, జా గడియ కెయ్యోక జెయెదె గే, మెన దేముడు అబ్బొక పిట్టవ కేన్ మాన్సు జలెకు, పరలోకుమ్చ దూతల్ జలెకు, దేముడు అబ్బొచొ పుత్తుసి జలెకు, కోయి నేనుమ్.

37 నోవహు పూర్గుమ్చొ తిలి పొది ఎత్తి కిసి తిలి గే, దస్సి ఆవ్ మాన్సు జా జెర్మన్ అయ్లోసా అన్నె జెతె పొదిక దస్సి తయెదె.

38 మెలె, నోవహు తిలి పొది, దేముడు సంగిలే కి, జా దీనల్తె తిల మాన్సుల్ నంప కెర్ల నాయ్, చి జా వర్లల్చి పాసి పెటుక దెర్లి పొది కి, నోవహుచి కుటుంబుమ్ వెల్లి ఓడతె పెన కెల్లి డంకిలి

ఎద, అన్నెకోకి కతె తా, పితె తా, పెండ్లివొ కెరై తా, కిచ్చొ నే జతి రితి బుల్తై తిల.

39 జా వర్దల్ పాని గెడ్డువ జతిసి నిజుమి జర్గు జంక తిలి మెన నంప నే కెరంతికయ్, జా జర్గు జతికయ్, జేవ్ ఎత్తిజినక బూరుమ్ గుడ్డ నిలి, చి డుజ గెల. దస్సి, ఆవ్ మాన్సు జా జెర్మున్ అయ్లోసా అన్నె ఉత్త జెతిసి తెన్ కి, ఒగ్గర్జిన్ మాన్సుల్ అంక నే సూన్తె, జోవయింక ఇన్సుమ్ అయ్లి రితి కెరై తవుల, చి తెదొడక నాసెనుమ్ జాఁ గెచ్చుల.

40 “జా కాలుమ్క, దొగుల బట్టి తిలె, ఎక్కిలోక ముల దా, అన్నెక్కోక కడ నెవుల.

41 దొగుల తేర్బోదల్ తిర్వోల్ తెన్ రొడ్డె తిలె, ఎక్లిక ముల దా, అన్నెక్లిక కడ నెవుల.

42 “జలె, కేన్ సమయుమ్క తుమ్చొ ప్రబు ఆవ్ అన్నె జెయిందె గే, తుమ్ నేన్సు. జాచి రిసా, తుమ్ తెలివి తా, అంక రకితె తా.

43 గని ఏక్ టాలి అర్దుమ్ కెరన. ‘కేన్ సమయుమ్క చోరు జెయెదె గే, గెర్చొ ఎజొమాని కో జలెకు జాన్తో జలె, జో జా సమయుమ్క చెద్దొయి తా, రకితె తా, జోచొ గెరి చోరు నే పెసిత్తి రితి దెకన్తో’ మెలి కోడుక తుమ్ అర్దుమ్ కెరన.

44 మెలె, తుమ్ నే ఉచర్తి సమయుమ్క ఆవ్ మాన్సు జా జెర్మున్ అయ్లోసా అన్నె జెయిందె. జాచి రిసా, తుమ్ తెయార్ జా, తెలివి తెన్ రకితె తా.

45 “జలె, ప్రయానుమ్ గెచ్చుక మెన ఎజొమాని బార్ జంక జలె, జోచ గేర్చక దెక సమయుమ్క అన్నిమ్ దెంక మెన జో నిసాన్లొ బుద్ది తిలొ నిదానుమ్చొ గొత్తి సుదొ కో జవుల?

46 జో ఎజొమాని అన్నె ఉట్ట అయ్లె, జో గొత్తి సుదొ జో ఎజొమాని తియార్లి కామ్ కెరై తిలె, జోక చెంగిలి.

47 దస్సి నిదానుమ్ కెరై తిలొ మెలె, జో ఎజొమాని అయ్లె, జోచి అస్తి ఎత్తిచి

ఉప్పిరి జో గొత్తి సుదొక అదికారుమ్ దెయెదె, తుమ్క ఆవ్ కిచ్చొ కచితుమ్ సంగితసి.

48 “జో గొత్తి సుదొ గార్ సుదొ జలె, ‘ఎజొమాని ఆల్నిమ్ కెర్తయ్’ మెన ఉచర,

49 జోచి తెన్ తిల గొత్తి సుదల్క పెట్టుక మొదొల్ కెర, సూర్ పిత మాన్సుల్ తెన్ బెద, జేవ్ కతిసి పితిన్తె బెద దస్సు అలవాట్లు సికిదె.

50 ‘ఎజొమాని ఆజి జెయె నాయ్’ మెన గొత్తి సుదొ ఉచర, నే రకితె దీసిక గడియక జో ఎజొమాని ఉట్ట అయ్లె,

51 జోక మొర్తి సిచ్చ తియడ కెర, ఉప్తమెన్సుచ మాన్సుల్ సిచ్చ జతిన్తె గలెదె. ఒత్త గెతన సిచ్చక ఏడ్తె తవుల, దంతొ చప్పిల్తై తవుల.

25

తెలివి తా ఆవ్ అన్నె జెతిన్క రకితె తా

1 “పరలోకుమ్చి రాజిమ్చి ఉజ్జడి తెన్ ఆవ్ అన్నె జెతిన్క రకితిసి కీసి జయెదె మెలె, పెండ్లి ఉబేడొక దస్సుల్ జంక మెన, దెస్సుజిన్ ఉబెడివొ దివ్వొ దెరన బార్ జలిన్చి రితి జయెదె.

2 జోవయింతె బుద్ది నెంజిలన పాఁజిన్, చి బుద్ది తిలన పాఁజిన్ తిల.

3 బుద్ది నెంజిలన జోవయించ దివ్వొ దెరన, తేల్ నే దెరై గెల.

4 గని బుద్ది తిలన, మాత్రుమ్, జోవయించ దివ్వొ కి, అన్నె సుపితి తేల్ కి దెరన గెల.

5 “పెండ్లిఉబేడొ ఆల్నిమ్ కెర్తికయ్, జేవ్ దెస్సుజిన్ గూన్క జుమ నిజిల.

6 సొక్కుక, ఈందె, పెండ్లిఉబేడొ జెతయ్. జోక దస్సుల్ జంక బార్ జా” మెన, బారికి కేకుల్ గల్లికయ్,

7 జేవ్ దెస్సుజిన్ ఉబెడివొ ఎత్తిజిన్ సూన కెర, ఉట్ట, జోవయించ దివ్వొచ వాటివొ చెంగిల్ కెరన,

8 జోవయింతె జేవ్ పాచ్జిన్ బుద్ది నెంజిలన, అమ్చ దివ్వో విజ గెతతి. తుమ్చి తేల్ సగుమ్ అమ్క దా మెన, బుద్ది తిల తెయార్ జలనక సంగిలి

9 జేవ్ తెలివి జా తిలన అమ్తె తిలిసి అమ్క తుమ్క పావై నాయ్. సావుకర్లుతె తుమ్ గెచ్చ, తుమ్చి రిసా గెనన మెన సంగిలి.

10 “జలె, సమయుమ్క బుద్ది నెంజిలన తేల్ గెనుక గెతె తతికయ్, పెండ్లిఉబేడో పాచ అయ్లన్, చి తెయార్ జా తిలన జోవయింతెన్ బెద పెండ్లి గెరి పెన, విందుతె వెసెల. తెదొడి, విందు దెతోసా కెప్పి డంక దిలో.

11 డంక దిలి పిమ్మట్, బుద్ది నెంజిల ఉబెడివో ఒత్త జా కెర, ‘బాబు, బాబు, అమ్క కెప్పి ఉగుడ దే’ మెన సంగిల.

12 జో ఎజొమాని జోవయింక, ‘ఆవ్ తుమ్క నేని మెన తుమ్క నిజుమి ఆవ్ సంగితసి’ మెన సంగెదె.

13 జలె, ఆవ్ ఉట్టు గెలె, కేన్ దీసిక కేన్ గంటక అన్నె జెయందె గే, తుమ్ నేన్ను, చి రిసా తెలివి తా రకితె తా.

తలంతుల్ దొర్కు కెరన్లు తిగ్గచి టాలి (లూకా 19:11-27)

14 “ఏక్ మాన్సు ప్రయానుమ్ గెచ్చుక తిలి రిసా, జోచ గొత్తి సుదల్క బుకారా కెర, ‘చెంగిల్ రకుతు’ మెన జోచి ఆస్తి ఎత్తి జోవయించి అత్తి సార్ప కెర దిలన్.

15 ఎక్కిలోక పాంచ్ తాలంతుల్, ఎక్కిలోక దొన్ని తాలంతుల్, ఎక్కిలోక ఎక్కి* తాలంతు, దస్సి. కక్క జేవ్ వాడిక కెర్తి నెక్కిచి ఎదిలి వంట దా కెర, బార్ జా, ఉట్ట గెలన్.

16 జలె, జేవ్ గొత్తిమాన్సుల్తె పాంచ్ తాలంతుల్ కడన్లొసా గెచ్చ, జేవ్ తెన్ బియ్యార్ కెర, అన్నె పాంచ్ తాలంతుల్ లాబుమ్ కెరన బెదయ్లన్.

17 దస్సి, దొన్ని తాలంతుల్ కడన్లొసా అన్నె దొన్ని తాలంతుల్ లాబుమ్ కెరన బెదయ్లన్.

18 జలె, ఏక్ తాలంతు కడన్లొసా గెచ్చ, బుయి కూన కెర, జోచో ఎజొమాని దిలి దనుమ్ లుంకడ దిలన్.

19 “ఒగ్గర్ దీనల్ గెలి పిమ్మట్, జేవ్ గొత్తి సుదల్చో ఎజొమాని అన్నె జా కెర, జోవయింక దిలి జోచి డబ్బుల్ లెక్క కెర నజనుక మెన, జోవయింక బుకార్లో.

20 తెదొడి, పాంచ్ తాలంతుల్ కడన్లొసా పురై జా కెర, బాబు తుయి పాంచ్ తాలంతుల్ అంక దిలది, చి ఈందె, ఆవ్ అన్నె పాంచ్ తాలంతుల్ బెదయ్లయ్” మెన, జా డబ్బుల్ ఎత్తి ఆన దెకయ్లన్.

21 జలె, జా ఎజొమాని జోక, “తుయి నిదానుమ్ తిలో చెంగిలో గొత్తి సుదో, ఈంజ ఇదిల్ తుక దిలయ్, గని తుచో ఎజొమానిచి రిసా నిదానుమ్ తెన్ లాబుమ్ కెర్లది చి రిసా, ఇన్నెచి కంట ఒగ్గర్ ఆస్తిచి ఉప్పిరి తుక అదికారుమ్ దెయిందె. తుచో ఎజొమానిచి సంతోసుమ్తె తుయి బెదు” మెన జోక సంగిలన్.

22 “దస్సి, దొన్ని తాలంతుల్ కడన్లొసా కి పురై జా కెర, ‘బాబు, తుయి అంక దొన్ని తాలంతుల్ దిలది, చి ఈందె ఆవ్ దొన్ని తాలంతుల్ లాబుమ్ బెదయ్లయ్’ మెన సంగితికయ్,

23 జోచో ఎజొమాని, ‘నిదానుమ్ తిలో చెంగిలో గొత్తి సుదో, తుయి. ఈంజ ఇదిల్ తెన్ అంచి కామ్ నిదానుమ్ కెర్లది. అప్పె ఒగ్గర్చి ఉప్పిరి కి తుక అదికారుమ్ దెయిందె. తుచో ఎజొమానిచి సంతోసుమ్తె తుయి బెదు’ మెన జోక సంగిలన్.

24 “పిమ్మట్, ఎక్కి తాలంతు కడన్లొసా జా కెర, బాబు, తుయ్ ‘కన్కారుమ్ నెంజిలొసా’ మెన, ‘తుయి నే ఉంపిలి వంటో, లాయితోసా’ మెన, ‘తుయి నే ప్హాన్సిన్తె కుడవంతొసా’ మెన, ఆవ్ జాని.

25 జాచి రిసా, ఆవ్ తుక బియ్ కెర, తుయి దిలి తాలంతు జాగర్త తెన్ బుయ్యో రోవ దిలయ్, చి జెతికయ్,

* 25:15 25:15 తాలంతు మెలి బజర కాసు. దేనార కాసు మెలి ఎక్కి దీసిక కూలి. ఎక్కి తాలంతు, 6000 దేనార.

ఉట్కువ అన్నయ్. ఈందె, కడను” మెన సంగిలన్.

26 గని, జోచొ ఎజొమాని జోక, “గర్బొచొ బద్దుకుమ్చొ గొత్తి సుదొ తుయి. ఆవ్ నే ఉంపిలిన్తె లాయితోసా మెన, నే ప్లాన్సి కుడవంతొసా మెన తుయి జాన్లది?

27 జలె అంచి డబ్బుల్ కేన్ జవున్ సావుకారితె తుయి దా తత్తది జలె, ఆవ్ అయ్లె అంచి డబ్బుల్ వడ్డి తెన్ నజన్తయ్” మెన, జో గొత్తి సుదొక గోల కెర,

28 జా తాలంతు జో గొత్తి సుదొ తెంతొ నజన, దెస్సు తాలంతుల్ తిలోసొక దేసు.

29 ఇదిల్ జవున్ తిలోసొక అన్నె దెంక జయెదె, గని నెంజిలోసాతె తెంతొ జోక తిలిసి కి కడ గెలుక జయెదె.

30 జో కామ్క నెంజిలో గొత్తి సుదొక అందర్చి కంట రితి అందర్తె బయిలె గల దాన. ఒత్త గెలస జా సిచ్చక ఏడ ఏడ, దంతొ చప్పిలై తవుల మెన, ఎజొమాని ఆడ్ర దిలన్.

మెండల్ అన్నె గొర్రెల్

31 “ఆవ్ మాన్సు జా జెర్మున్ అయ్లోసా, అంచ దేముడుచి దూతల్ తెన్ పరలోకుమ్చి ఉజిడి తెన్ అన్నె జెతె పొదిక, అంచి ఒత్తచి ఉజిడ్చి సింగాసనుమ్తె వెసిందె.

32 మంద రకితోసా, మంద ఎత్కి ఎక్కితె కుడవన, కిసి మెండల్ తెంతొ గొర్రెల్క వేర కెరెదె గే, తెదొడ్క ఆవ్ అన్నె జెతె పొదిక దేసిమ్లు ఎత్కితెచ ప్రెజల్ ఎత్కిజిన్క అంచి మొక్కె కుడవన కెర, నంపజలన తెంతొ నంపనెంజిలసక వేర కెరిందె.

33 అంచి ఉజెతో పక్క మెండల్ రిత నంపజలసక, డెబ్లి పక్క గొర్రెల్ రిత నంపనెంజిలసక బీచొ కెరెదె.

34 “ఒత్త తెంతొ, ఆవ్ పరలోకుమ్చొ రానొ, అంచి ఉజెతో పక్క తిలసక కిచ్చొ మెనిందె మెలె, అంచొ అబ్బొ రచ్చన వరుమ్ దిలస, తూమ్. బూలోకుమ్

జెర్ముయ్లి పొది తెంతొ తుమ్చి రిసా తెయార్ కెర్లి రాజిమ్తె తుమ్చి వాట తూమ్ నజన.

35 కిచ్చొక మెలె, అంక చూ కెర్లికయ్, తుమ్ అంక అన్నిమ్ దిలదు, అంక తాన్ కెర్లికయ్, తుమ్ పాని దిలదు. వేర దేసిమ్చొ జా తిలయ్, గని అంక తుమ్చితె బెదవన్లదు.

36 అంక సరిపుచువ జత పాలల్ నెంజితికయ్, అంక పాలల్ దిలదు. జొర్జొ తెన్ తతికయ్, అంక దెకుక అయ్లదు. జేల్తె తతికయ్, ఒత్త అంక దయిరిమ్ కెరుక అయ్లదు” మెన, సంగిందె.

37 “జా కోడు సూనై, పున్నిమ్ మెన జో తీర్పు సంగిలస కిచ్చొ మెనుల మెలె, ప్రబు, తుయి కెయ్య చూ జలిసి దెకిలమ్ చి అన్నిమ్ దిలమ్? తుక కెయ్య తాన్ కెర్లిసి దెకిలమ్ చి పాని దిలమ్?

38 తుయి కెయ్య వేర దేసిమ్ తెంతొ అయ్లిసి దెకిలమ్ చి అమ్చి తెన్ బెదవన్లమ్? కెయ్య తుక పాలల్ నెంజిలిసి దెకిలమ్ చి పాలల్ దిలమ్?

39 తుక జొర్జొ తిలిసి, తుయి జేల్తె తిలిసి కెయ్య దెకిలమ్, చి దయిరిమ్ కెరుక గెలమ్? కెయ్య నాయ్, కిచ్చొగె” మెన సంగుల, జేవ్, పున్నిమ్ జలస.

40 జేవ్ దస్సి సంగిలె, రానొ జోవయింక కిచ్చొ మెనిందె మెలె, తుమ్క ఆవ్ కిచ్చొ కచితుమ్ సంగితసి మెలె, అంచ బావుడ్లు జల ఈంజేవ్ అంచ మాన్సుల్క తుమ్ మరియాద కెర్లిసి, అంక కి మరియాద కెర్లి రితి జలి మెనిందె.

41 “పడ్డొ, జా దీసిక అంచి డెబ్లి పక్క తిలసక కిచ్చొ మెనిందె మెలె, గర్బు, తూమ్, గెచ్చు! సయ్తానుక చి జోచ దూతల్క గల్లి రిసా తెయార్ కెర్లి నే విజితి ఆగితె తుమ్ నేడ!

42 కిచ్చొక మెలె, అంక చూ కెర్లి పొది తుమ్ అంక అన్నిమ్ దిలదు నాయ్. అంక తాన్ కెర్లికయ్, పాని దిలదు నాయ్.

43 వేర దేసిమ్చొ ఆవ్ అయ్యలె కి, అంక తుమ్ బెదవన్ను నాయ్. సరిప్పుచువ జత పాలల్ నెంజిలి పొది, అంక తుమ్ పాలల్ దిలదు నాయ్. జబ్బు తెన్ తిలి కి, జేల్తె తిలి కి, తుమ్ అంక దెకుక అయ్లదు నాయ్, మెన అంచి డెబ్రి పక్క తిలసక సంగిందె.

44 తెదొడ్క జేవ్ కి ఇసి మెన జబాబ్ దెవుల. ప్రబు, తుక చూ కెర్తికయ్, తాన్ కెర్తికయ్, తుయి వేర దేసిమ్చొ జెతికయ్, పాలల్ నెంతె తతికయ్, జొర్జొ తెన్ తతికయ్, జేల్తె తతికయ్, అమ్ తుక తోడు కెరుక నాయ్ గె? మెన సంగుల.

45 జోవయింక ఆవ్ కిచ్చొ జబాబ్ దెయిందె మెలె, తుమ్క ఆవ్ కిచ్చొ కచితుమ్ సంగితసి మెలె, అంచ మాన్సుల్తె కక్క కి తుమ్ ఇసి నే కెర్లిసి, అంక కి నే కెర్లి రితి జలి, మెన జోవయింక సంగుమ్దె,

46 చి కెయెక తెయెక సిచ్చు జలిన్తె గెచ్చుల, గని పున్నిమ్ జలస కెయెక తెయెక పరలోకుమ్తె జింక గెచ్చుల.” మెన సిస్సుల్క యేసు సంగిలన్.

26

అంక విరోదుమ్ సుదల్ దెర్తి సమయుమ్ పాసి జా అస్సె

(మార్కు 14:1-2; లూకా 22:1-2; యోహా 11:45-53)

1 యేసు సిస్సుల్క ఈంజేవ్ కొడొ ఎత్కి సంగ కేడయ్లి పిమ్మట్ జర్గు జలిసి కిచ్చొ మెలె, జో జోచ సిస్సుల్క,

2 “దొరతి గెలె, *పస్కా పండుగు జెయెదె మెన తుమ్ జాన్సు. జా పొదిక, ఆవ్ మాన్సు జా జెర్వున్ అయ్లోసొక

సిలువతె టీచొ కెర మార్తి రిసా, అంక దెర దెయెదె” మెన యేసు సంగిలన్.

3 జా సమయుమి, వెల్లెల పూజర్లు కి వెల్లెల మాన్సుల్తె అన్నె సగుమ్జిన్ కి, కయప మెంతొ ఎత్కిక వెల్లో పూజరిచి గేర్తె బెద జా కెర,

4 కీసిగె లుంకచోరు యేసుక దెర, మారుక మెన, బెద ఉచర్ల, గని,

5 “పండుగు పొది పోసి, నెంజిలి పండుగక బెర అయ్లెల ప్రెజల్ కుమ్మత్ తెన్ గగ్గోల్ జా అమ్క బలే అల్లర్ కెరుల” మెన సంగితె తిల.

తేర్బోద వాసెన తేల్ యేసుచి బోడి సువిలిసి

(మార్కు 14:3-9; యోహా 12:1-8)

6 జలె, యేసు బేతనియ గెవ్వి గెచ్చు కెర, సీమోను మెలో వెల్లి రోగి జా తిలో ఎక్కిలోచొ గెరి తిలి పొది,

7 ఏక్ తేర్బోద, ఒగ్గర్ చెంగిలి విలువచి వాసెన తేల్చి బుడ్డి దెరన, జోతె అయ్లి. అన్నె, జో అన్నిమ్ కంక వెన తతికయ్, జోచి బోడి ఉప్పిరి సువిలి.

8 సిస్సుల్ దెక కెర, కోపుమ్ జా, “ఈంజ నస్టుమ్ కిచ్చొక?

9 ఈంజ తేల్ ఒగ్గర్ కరిద్క వికిలెగిన, బీద మాన్సుల్క దర్ముమ్ దెంక జతి” మెన సంగిల.

10 యేసు జా కోడు జాన్లి రిసా, “ఈంజ తేర్బోద అంక కెర్లిసి చెంగిల్ వెల్లో కామ్. తుమ్ కిచ్చొక ఇన్నెక ఉస్సుర్ కెరుక?

11 బీద మాన్సుల్ కెయెక కి తుమ్చి తెన్ తవుల, గని ఆవ్ కెయెక తెయెక తుమ్చి తెన్ ఈంజ లోకుమ్తె ఇసి తయె నాయ్.

12 ఈంజ తేర్బోద ఈంజ వాసెన తేల్ అంచి ఆగ్తె సువ కిచ్చొ గుర్తు కెర్తయ్ మెలె, ఆవ్ నే మొర్తె అగ్గె, అంక నే రోవితె

* 26:2 26:2 పూర్ణుమ్ పొది యూదుల్ ఐగుప్తు దేసిమి తా గొతిమాన్సుల్ జలిసి తెంతొ ప్రబు రచ్చించువ కెర్లిసి ఏద కెర్తి పండుగు, ఈంజ. ముక్కిమ్క కిచ్చొ ఏద కెరుల మెలె, ‘అమ్చ యూదుల్క విడ్డల్ కెర్లు’ మెన ఐగుప్తు దేసిమ్చ కుటుంబల్ ఎత్కిచ తొల్పూర్ జల మున్సుబోదల్క దూత మార్లిన్తె యూదుల్చ తొల్పూర్ బోదల్ నే మొర్తి రితి ప్రబు జోవయింక పిట్టయ్లిసి ఏద కెరుక. తెదొడి, పూర్ణుమ్చి జా రాతి కేన్ గెరి యూదుల్ తిల గే, జా గేర్చ దార్బంద్రల్తె అర్పొతుమ్ జలో ఏక్ మెండపిల్లచి లోయి దెరవుల, చి దూత దెకిలె, జా గేర్చ తొల్పూర్ బోదక మారె నాయ్. నిర్ణమకాండుమ్ 12:21-30.

అగ్గి, అంచి ఆగ్ తెయార్ కెర్తి గుర్తు కెర్తయ్.

13 తుమ్క ఆవ్ కిచ్చొ నిజుమి సంగితసి మెలె, ఒండి లోకుమ్తె కేనె ఈంజ అంచి సుబుమ్ కబుర్ బోదన కెరుల గే, ఒత్తయ్ ఈంజ అప్పె కెర్లిసి సంగ, ఇన్నెచి రిసా ఉచరవడుల” మెన యేసు సంగిలన్.

యూదా యేసుక దెర దెంక ఉచర వెల్లెల పూజర్లుతె గెచ్చు సంగిలిసి
(మార్కు 14:10-11; లూకా 22:3-6)

14 తెదొడి, బారజన్ సిస్సుల్తె తిలో ఇస్కరియోతు గవ్విచొ యూదా, వెల్లెల పూజర్లుతె గెచ్చు కెర,

15 “ఆవ్ యేసుక తుమ్క దెర దిలెగిన, తుమ్ అంక కిచ్చొ దెస్తె?” మెన పుసిలన్. జేవ్ జోక ముప్పయ్ వెండి బిల్లె దిల.

16 జా గడియ తెంతో యూదా యేసుక దెర దెంక మెన సమయుమ్ చజితె తిలన్.

యేసు సిస్సుల్ తెన్ వస్కా పండుగు కెర్తతి
(మార్కు 14:12-21; లూకా 22:7-14,21-23; యోహా 13:21-30)

17 నే పులయ్ల పోడియె కతి పండుగక తొలితొ చి దీసి, సిస్సుల్ యేసుతె జా కెర, “తుయి పస్కా అన్నిమ్ కెర్తి రిసా, అమ్ కేన్ టాన్ తెయార్ కెరుక?” మెన, జోక పుసిల.

18 చి యేసు జేవ్క, “యెరూసలేమ్తె తిలో పలాన్ సుదొతె తుమ్ గెచ్చు కెర, ‘అంచి సమయుమ్ పాచ జా అస్సె. అంచ సిస్సుల్ తెన్ తుచి గెరి పండుగు కెరిందె’ మెన, ప్రబు తుక సంగ మెన అమ్క తెద్రయ్లో” మెలన్.

† 26:17 26:17 ‘వస్కా పండుగు’ మెలె, యూదుల్ ఒగ్గర్ పూర్ణమ్ ఐగుప్తు దేసిమి గెచ్చు గొతిమాస్సుల్ జా ఒగ్గర్ సైమల్ సిద్ధి తతికయ్ మోసే పూర్ణమచొచి అత్తి ప్రబు జోవయింక విడ్డల్ కెర బార్ కెర్తన్. జా రచ్చున నే వచ్చితే రితి ఎత్తి వెర్సి వస్కా పండుగు కెర్తతి. ‡ 26:26 26:26 ‘దేముడు అబ్బొన’ మెన కేన్ సుట్టు రెద్ద తిలె, దేముడుచి రిసా సంగితయ్.

19 యేసు జోవయింక, సంగిలి రితి జేవ్ సిస్సుల్ కెర, వస్కా అన్నిమ్క దొర్కు జలిసి తెయార్ కెర్ల.

20 సాంజ్ జతికయ్, యేసు జేవ్ బారజన్ సిస్సుల్ తెన్ అన్నిమ్ కంక వెసిల.

21 జేవ్ అన్నిమ్ కత్తె తతికయ్, యేసు జేవ్క, “తుమ్క ఆవ్ కిచ్చొ కచితుమ్ సంగితసి మెలె, తుమ్చితె ఎక్కిలో అంక విరోదుమ్ సుదల్చి అత్తి సార్పు కెర దెయెదె” మెలన్.

22 దస్సి మెంతికయ్, జేవ్ ఒగ్గర్ దుకుమ్ తెన్ ఎత్తి మాన్సు, “ప్రబు, ఆవ్ గే?” మెన పుసిల,

23 చి యేసు కిచ్చొ జబాబ్ దిలన్ మెలె, “అంచి తెన్ పలెరుమ్తె కో ఆతు గల పోడి గండ బుడ్డవ తయెదె గే, జొయ్యి అంక దెర, సార్పు కెర దెయెదె.

24 “ఆవ్ మాన్సు జా జెర్మున్ అయ్లోసాచి రిసా రెగిడ్లి రితి ఆవ్ ఉట్ట గెచ్చిందె. గని, అయ్యె! ఆవ్ మాన్సు జా జెర్మున్ అయ్లోసాక, కేన్ మాన్సు దెర విరోదుమ్ సుదల్చి అత్తి సార్పు కెర దెయెదె గే, జో మాన్సు జతి సిచ్చుచి రిసా, జో నే జెర్ము తిలె జోక చెంగిల్ తత్తి” మెన, యేసు సంగిలన్.

25 జోక దెర దెతో యూదా “గురుబాబు, ఆవ్ గే?” మెన సంగితికయ్, యేసు జోక, “తుయి జా సంగిలి” మెన సంగిలన్.

26 యేసు, సిస్సుల్, జా వస్కా అన్నిమ్ కెర్తె తా, యేసు పోడియె దెరన, “దయ కెర్లది” మెలి రితి దేముడు అబ్బొన్క జోకర కెర, జా పోడియె మోడ, సిస్సుల్క వంట దా, జోవయింక, “తుమ్ ఈంజ కడన కా. అంచి ఆగ్రుక ఈంజ గుర్తు జయెదె” మెన కెర,

27 ఏక్ గిన్నుచి ద్రాచ రస్సుమ్ దెర, దేముడు అబ్బొన్క అన్నె ఉచర,

సిస్సుల్ క దా కెర, “ఇన్నెచి రన్నుమ్ పియ.

28 కిచ్చొక మెలె, ఈంజ రన్నుమ్ కిచ్చొ గుర్తుచి మెలె, ఒగ్గర్జిన్ మాన్సుల్చి పాపుమ్ గెచ్చయ్తి రిసా అంచి లోయి నూఁయి జంక అస్సె మెన నొవి ప్రమానుమ్.

29 అంచొ అబ్బొచి రాజిమ్తె తుమ్చి తెన్ ఇసి ఆవ్ ద్రాచ రన్నుమ్ నొవర్ పితి ఎద, ఇసిచి అన్నె పియ నాయ్ మెన తుమ్క సంగితసి” మెన, సంగిలన్.

30 తెదొడి, జేవ్ దేముడుక గనుమ్ గాయ కెర, బార్ జా కెర, ఒలీవ మెట్టయ్ ఉట్ట గెల.

31 తెదొడి యేసు జోవయింక, “ఆజి రాతిక, తుమ్ ఎత్తిజిన్ అంచి రిసా బమ్మ జా అంక ములితె. కిచ్చొక మెలె, మెండల్ రకితోసాక మొరయిందె, చి జోచ మెండల్ ఎత్తిజిన్ చెదుర్ప జా గెచ్చుల

మెన దేముడు రెగ్గయ్లి కోడు నెరవెర్పుప జంక అస్సె.

32 గని, ఆవ్ అన్నె జివ్ జా ఉట్టి పిమ్మట్, తుమ్చి కంట అగ్గె గలిలయ ప్రాంతుమ్తె గెచ్చిందె” మెన, ప్రమానుమ్ కెర్లన్.

33 జాకయ్ పేతురు, “తుచి రిసా ఎత్తిజిన్ బమ్మ జా తుక ములితెకి, ఆవ్ తుక కెయంక ములి నాయ్” మెన సంగిలన్.

34 యేసు జోక, “తుక ఆవ్ కిచ్చొ నిజుమి కచితుమ్ సంగితసి మెలె, ఆజి రాతిక, కుకుడొ నే వాఁసితె అగ్గె, ‘జోక నేని’ మెన అంచి రిసా తివ్వెరి తుయి సంగితె” మెన, సంగిలన్.

35 పేతురు జోక అన్నె, “ఆవ్ తుచి తెన్ మొరుక అస్సె మెలె కి, ఆవ్ తుక ‘నేని’ మెన, కెయ్యెక కి సంగి నాయ్” మెన సంగిలన్, చి సిస్సుల్ ఎత్తిజిన్ కి దస్సి మెల.

గెత్సేమనే మెంతి తోటతె యేసు దుకుమ్ సేడ ఏడ్లిసి

36 తెదొడి యేసు సిస్సుల్ తెన్ గెత్సేమనే మెంతి తోటతె గెచ్చ కెర, జో “ఆవ్ ఒత్తల్తొ గెచ్చ ప్రార్దన కెర జెతి ఎద, తుమ్ ఇన్నె వెస తా” మెన సంగ కెర,

37 ఎక్కి పేతురుక చి జెబెదయిచ దొగుల పుత్తర్పుల్ జత యాకోబుక చి యోహానుక పట్టి కడన, ఇదిల్ దూరి గెచ్చ కెర, దుకుమ్ దా, మెన్నతె ఒగ్గర్ బాద సేడుక దెర్లొ.

38 తెదొడి, “అంచి పెట్టి తిలి దుకుమ్ రిసా మొర గెచ్చుక జయెదె. తుమ్ ఇన్నె తా, అంచి తెన్ చెదొయి తా” మెన, సంగ కెర,

39 సగుమ్ దూరి గెచ్చ కెర, సెర్ను సేడ, దేముడు అబ్బొన్క ఇసి మెన ప్రార్దన కెర్లన్. “ఓ బ, జతి లెక జలె, ఈంజ గిన్నుచి ఆవ్ నే పితి రితి అంక పిట్టవు, గని అంచి ఇస్టుమ్ పొని. తుచి ఇస్టుమ్ జర్లు జవున్” మెన, ప్రార్దన కెర, ఉట్ట కెర,

40 జేవ్ సిస్సుల్తె అన్నె ఉట్ట జా, జేవ్ నిజ అస్తి మెన దెక కెర, పేతురుక, “జలె, ఎక్కి గడియ జలెకు అంచి తెన్ తుయి రకితె తంక నెతిర్లది గె?

41 జత అల్లర్తె తుయి పాపుమ్ నే కెర్తె రితి జాగర్త తా ప్రార్దన కెర్తె తా. ‘అత్తు నిదానుమ్ అస్సె’ మెన ఉచరన్లెకి, ఆగ్గెక సెక్తి నాయ్” మెన యేసు సంగ కెర,

42 అన్నెక్ సుట్టు ఇదిల్ దూరి ఉట్ట గెచ్చ కెర, “ఓ బ, ఈంజ సైమచి గిన్ను ఆవ్ పిలెకయి గెచ్చెదె జలె, తుచి ఇస్టుమ్ జర్లు జవున్” మెన ప్రార్దన కెర,

43 అన్నె ఉట్ట అయ్లె, జేవ్ సిస్సుల్ గూన్క నెత్త కెర అన్నె నిజ అస్తి మెన దెక కెర,

44 జోక అన్నె ముల దా, ఉట్ట గెచ్చ, అన్నెక్ సుట్టు తెదొడచ కొడొ ప్రార్దన కెర్లన్.

45 తెదొడి యేసు జోచ సిస్సుల్తె అన్నె ఉట్ట జా, జోవయింక, “అప్పొకయ్ సెలవ్ కడన, నే రకితె నిజ అస్సున్ గె? ఈందె,

సమయుమ్ జయి గెలి. ఆవ్ మాన్సు జా జెర్నున్ అయ్లోసా పాపుమ్ కెర్తనచి అత్తి దెర్ను సేడిందె.

46 జొమ్మ, గెచ్చుమ! ఈందె, అంక దెర దెతోసా పాసి జా అస్సి” మెన, సిస్సుల్క సంగిలన్.

యూదా చి జనాబ్ యేసుక దెరుక అయ్లీసి (మార్కు 14:43-50; లూకా 22:47-53; యోహా 18:3-12)

47 యేసు లట్టబై తతికయ్, బారజిన్ సిస్సుల్తె జో అగ్గె తిలో యూదా పాచ అయ్లన. జో తెన్ కి ఒగ్గర్జిన్ జనాబ్ కత్తుల్ డండల్ దెరన యూదుల్చ వెల్లెల పూజర్లు చి అన్నె వెల్లెల మాన్సుల్తె యూదా తెన్ అయ్ల.

48 జలె, ఈంజ నే జతె అగ్గె, “ఆవ్ కక్క చుంబిందె గే, జొయ్యి యేసు. జోకయి దెర్న” మెన యేసుక దెర దెతో యూదా జేవ్ జనాబ్క గుర్తు సంగ తిలన్.

49 జాచి రిసా, జో యేసుతె బేగి జా కెర, “గురుబాబు, జోబర!” మెన సంగ, జోక చుంబిలన్.

50 యేసు జోక దెక, “ఓ నేస్తము, తుయి కిచ్చొ కెరుక అయ్లది గే, జయి కెరు” మెన, జోక సంగిలన్. జేవ్ అయ్లన పాసిక జా, యేసుక దెర్ల.

51 జలె, యేసు తెన్ తిలోసా ఎక్కిలో, అతు చంపొ కెర, కత్తి కడన, ఎత్తిక వెల్లో పూజరిచొ గొత్తి సుదొక పెట, జోచొ కండ్లొ సింద గెలన్.

52 యేసు జోక, “తుచి కత్తి తియ దేసు. కత్తివొ తెన్ యుద్దుమ్ కెర్తన కత్తి తెన్ మొరుల.

53 అల్లె, ఈంజ సమయుమ్ ఆవ్ అంచొ అబ్బొక ప్రార్దన కెరుక నెతిరి మెన ఉచర్తసి గె? నెంజిలె, ప్రార్దన కెర్లెగిన, జో డబ్బయ్ వెయిలు దూతల్క బేగి తోడ్ తెద్రవుక నెత్తె మెన తుయి ఉచర్తసి గే?

54 గని, దస్సి కెర్లెగిన, అంక ఈంజ ఎత్తి జర్లు జంక అస్సి మెన దేముడుచి

కొడొతె రెగిడ్డిసి కిసి నెరవెర్నుప జయెదె!” మెన జో సిస్సుడుక సంగిలన్.

55 తెదొడి, జయి గడియయ్, యేసు జనాబ్క, “ఆవ్ కిచ్చొ చొర్లయ్ చి కత్తులు డండల్ దెరన అంక దెరుక తుమ్ అయ్లదు గే? ఆవ్ రోజుక దేముడుచి గుడితె పెన బోదన కెర్లె కి, అంక జా పొది దెర్ను నాయ్.

56 జలె, దేముడుచి కబుర్లు రెగిడ్డనచి అత్తి రెగిడ్ల కొడొ నెరవెర్నుప జతి రిసాయి ఈంజ ఎత్తి జర్లు జలి” మెన, యేసు సంగితికయ్, సిస్సుల్ ఎత్తి బియఁ కెర, జోక ముల దా, ఉట్ట నిగిల.

ఎత్తిక వెల్లో పూజరిచి మొక్కె యేసుక టీవడ్ల

(మార్కు 14:53-65; లూకా 22:54-55,63-71; యోహా 18:13-14,19-24)

57 ఒత్త తెంతొ, యేసుక జేవ్ విరోదుమ్ సుదల్ దెర కెర, కయప మెలో ఎత్తిక వెల్లో పూజరితె జోక కడ నెతికయ్, ఒత్త దేముడు మోసి తెన్ దిలి ఆగ్గుల్ సికడ్తన చి అన్నె వెల్లెల మాన్సుల్ బెర తిల.

58 పేతురు, మాత్తుమ్, దూరి దూరి యేసుచి పట్టి జా జా, జో ఎత్తిక వెల్లో పూజరిచి వీదె పాచ కెర, వీదె పెన కెర, ఆకర్క కిచ్చొ జర్లు జయెదె గే దెకుక మెన, జమాన్లు తెన్ వెసిలన్.

59 వెల్లెల పూజర్లు చి అన్నె వెల్లి నబ కెర్తన ఎత్తిజిన్ యేసుక మారుక కోర్ప జా, జోక నేరిమ్ వయడ్డి సాచి చజితె తిల.

60 గని అబద్దుమ్ సాచి సంగితన ఒగ్గర్జిన్ పురె జలెకి, సరి జతి సాచి దొర్కు జయె నాయ్. గని, ఆకర్క, దొగుల పురె జా కెర,

61 “ఈంజొ మాన్సు ‘దేముడుచి గుడి ఆవ్ సేడవ గెల కెర, తిర్తక అన్నె బందిందె’ మెన సంగిలో” మెన సంగిల.

62 జేవ్ దస్సి సంగితికయ్, ఎత్తిక వెల్లో పూజరి టీవొ జా, యేసుక దెక,

“ఈంజేవ్ సంగిలిన్ క కిచ్చొ జబాబ్ దెంక నెతిర్చి గే? ఈంజేవ్ తుక కిచ్చొ నేరిమ్ వయడ్తతి?” మెన, పుసితికయ్ కి

63 యేసు తుక్కె తిలన్. జాకయ్, ఎత్కిక వెల్లో పూజరి జోక అన్నె, “తుయి దేముడుచొ క్రిస్తు జలో పుత్తుసి జస్తె జలె, ‘జీవ్ తిలొ దేముడు తోడు’ మెన, జోచి నావ్ తెన్ అమ్చి మొక్కె ఒప్పన సంగు” మెల,

64 యేసు జోక, “తుయి సంగిలి రితి. గని తుమ్క ఆవ్ కిచ్చొ మెంతసి మెలె, ఆకర్క ఎత్కి నెక్తి అదికారుమ్ తిలొసాచి ఉజెతో పక్క ఆవ్ మాన్పు జా జెర్మున్ అయ్లోసా వెస తతిసి కి, ఆగాసుమ్చి మబ్బుతె, ఆవ్ వరలోకుమ్ తెంతొ అన్నె ఉత్త జెతిసి కి తుమ్ దెకితె” మెన, సంగిలన్.

65 జో ఎత్కిక వెల్లో పూజరి, కోపుమ్క జో గలన్లి దిగిల్ చొక్క చిరన గెల కెర, “అయ్యో! ‘దేముడుక సమానుమ్ జతసి’ ఈంజొ సంగ్గుక ప్రబుచి విలువ కడ వెల్లి పాపుమ్ కెర్తయ్. అమ్క అన్నె సాచుల్ అక్కర్ నాయ్. ఈందె, దేముడుక ఈంజొ సమ్మందుమ్ సంగన్లిసి. తుమ్ అప్పె సొంత నూన్లదు ఈంజయి సరి జతయ్.

66 తుమ్ కిచ్చొ రుజ్జు సంగితె?” మెన నబ కెర్తసక పుసితికయ్, జేవ్, “ఈంజొ మొర్తి సొచ్చుచి ఎదిలి తప్పు కెర అన్నె” మెన సంగ,

67 యేసుచి మొక్కె తుంక దా, జోక కుందిల. అన్నె, సగుమ్జిన్ జోక పెట కెర,

68 “క్రిస్తు, తుక కో పెట్ల గే తుయ్ క్రిస్తు గద, అమ్క సంగు!” మెన కొంకడ్ల.

పేతురు యేసుక “జోక నేని” మెన సంగిలిన్
(మార్కు 14:66-72; లూకా 22:56-62; యోహా 18:15-18,25-27)

* 27:2 27:2 రోమ్ దేనిమ్చి ప్రబుతుమ్ జా దేనిమ్ అక్రమించువ కెర విలువ కెర్త తతికయ్, జా రోమ్ దేనిమ్చి ప్రబుతుమ్చి నావ్ తెన్ పిలాతు అదికారి జా అన్నె.

69 ఈంజ మదెనె, పేతురు వీదె వెస తతికయ్, ఒత్తచి తేర్బోద గొత్తి సుది ఎక్లి జోతె జా కెర, “తుయి కి గలిలయ ప్రాంతుమ్చొ యేసు తెన్ తిలది” మెన, జోక సంగిలి.

70 జా దస్సి మెన సంగితికయ్, పేతురు, “తుయి సంగిలిసి అంక అర్దుమ్ జయె నాయ్” మెన, ఎత్కిజిన్చి మొక్కె, యేసుక నేన్లి రితి సంగిలన్.

71 పేతురు అన్నె వీదిచి గుమ్ముమ్ పక్క గెతికయ్, అన్నెక్లి తేర్బోద గొత్తి సుది జోక దెక కెర, “ఈంజొ కి నజరేతు గచ్చొచొ యేసు తెన్ తిలొ” మెన, ఒత్త టీవ్ తిలనక సంగిలి.

72 జలె పేతురు ఒట్టు గలన, “జో మాన్పుక ఆవ్ నేని” మెన సంగిలన్.

73 గడియ గెలి పిమ్మట్, ఒత్త టీవొ జా తిలన పేతురుతె జా కెర, “నిజామి, తుయి జోచ సిస్సుల్తె ఎక్కిలో. తుయి లట్టబ్బె చినుక ఒత్తయ్” మెన, సంగిల.

74 జేవ్ దస్సి సంగితికయ్, పేతురు, “జో మాన్పుక ఆవ్ నేని” మెన సపెన గల కెరన ఒట్టు గలనుక దెర్లో, చి బేగి కుక్కుడొ వాసిలన్.

75 జాచి రిసా, “కుకుడొ నే వాన్తె అగ్గె, ‘జోక నేని’ మెన, తుయి తివ్వెరి అంచి రిసా సంగితె” మెన యేసు అగ్గె సంగిలిసి ఏదన్ల కెర, పేతురు బార్ జా ఎదివాట్ దుకుమ్ జా ఏడ గెలన్.

27

యేసుక అదికారి జలొ పొంతి పిలాతుతె నజిలిసి
(మార్కు 15:1; లూకా 23:1-2; యోహా 18:28-32; బారి కమ్మొ 1:18-19)

1 రాత్ పాయితికయ్, వెల్లెల పూజర్లు చి యూదుల్చ అన్నె వెల్లెల మాన్పుల్ ఎత్కిజిన్ నబ కెర, యేసుక మారుక మెన తీర్పు కెర,

2 జోక బంద కడన, * అదికారి జలో పిలాతుతె సార్చ దిల.

3 తెదొడి, యేసుక దెర దిలో యూదా, “యేసుక నేరిమ్ వయడ అస్తి, చి మారుల” మెన దెక కెర, “పాపుమ్ కెర్లయ్” మెన దుకుమ్ జా బమ్మ జా, జేవ్ ముప్పయ్ వెండి బిల్లల్ జేవ్ వెల్లెల పూజర్లుతె చి అన్నె వెల్లెల మాన్సుల్తె అన్నె ఆన కెర,

4 “కేన్ తప్పు నే కెర్లొ నీతి తిలోసాక ఆవ్ దెర దా ఆవ్ పాపుమ్ కెర్లయ్” మెన సంగిలన్. గని జేవ్ వెల్లెల మాన్సుల్ కిచ్చొ మెల మెలె, “జాకయ్ అమ్క కిచ్చొ? అమ్చి పూచి నెంజె. తుయి దెకన్” మెన, సంగితికయ్,

5 జో యూదా జేవ్ వెండి బిల్లల్ దేముడుచి గుడితె గల దా, గెచ్చు, ఉరి గలన, మొర గెలో.

6 యూదా దస్సి కెర్లికయ్, వెల్లెల పూజర్లు జా డబ్బుల్ వెంట కెర, కిచ్చొ మెలె, “ఈంజ ఎక్కిలోచి లోయి సువిలి పాపుమ్ డబ్బుల్. జాచి రిసా, దేముడుచి గుడిచి డబ్బుల్ పెటెతె ఈంజ డబ్బుల్ గలుక జయె నాయ్” మెన

7 లట్టబన, ఉచరన, ‘యూదుల్ నెంజిల వేర దేసిమ్చ మాన్సుల్క ఒత్త రోవ గెలుక జయెదె’ మెన, కుమ్మరొ ఎక్కిలోచి బాటి జా డబ్బుల్క గెనిల.

8 జాచి రిసా, ఆజి ఎద, జా బాటిక † ‘ఎక్కిలోచి లోయి సువిలి పాపుమ్చి డబ్బుల్క గెన్లి బాటి’ మెంతతి.

9 ఇసి జర్లు జలిసి తెన్, దేముడుచి కబుర్ సంగిలో యిర్మీయాచి అత్తి రెగిడ్లి కోడు నెరవెర్చువ జలి.

“ప్రబు సంగిలి రితి, ఇస్రాయేలులు సగుమ్జిన్, ఎక్కిలోక గెనుక మెన ఒప్పున్లి సొమ్ముక, మెలె ముప్పయ్ వెండి బిల్లల్క,

10 కుమ్మరొచి వెడ ఏక్ గెనిల,” మెన రెగిడ్లి కోడు.

అదికారి యేసుక పరిచ్చు కెర్లిసి

11 యూదుల్చ వెల్లెల మాన్సుల్ యేసుక జో పిలాతు మెలో అదికారిచి మొక్కాటీచొ జలో, చి జో అదికారి యేసుక “యూదుల్చొ రానొ తుయి గె?” మెన పుసితికయ్, యేసు “తుయి సంగిలి రితి,” మెన జబాబ్ మెలన్.

12 గని వెల్లెల పూజర్లు చి అన్నె వెల్లెల మాన్సుల్ జోచి ఉప్పిరి నేరిమ్ వయడ్లికయ్, జో జబాబ్ కిచ్చొ కి సంగె నాయ్.

13 జాకయ్, పిలాతు యేసుక అన్నె, “తుచి ఉప్పిరి ఈంజేవ్ కెత్తి నేరిమ్లు వయడ్లితి గే, తుయి సూన్సి నాయ్ గె?” మెన జోక సంగిలే కి,

14 జేవ్ మాన్సుల్ సంగిల నేరిమ్లుతె ఎక్కి కి యేసు జబాబ్ సంగె నాయ్, చి అదికారి ఎదివాట్ ఆచారిమ్ జలన్.

15 జలె, జా పండుగు షొది, ప్రెజల్ కోర్వ జలో కేన్ జలెకు జేలి జలోసాక ముల దెంక జో అదికారిక అలవాట్ జా అన్నె.

16 జా కాలుమ్, జలె, బరబ్బు మెలో ఎత్తిజిన్ జాన్లొ ఒగ్గర్ మూర్కుమ్ తిలో జేలి జలో ఎక్కిలో అదికారిచి జేల్తె తిలన్.

17 జలె, ప్రెజల్ బెర తతికయ్, పిలాతు జోవయింక “ఆవ్ కక్క ముల దెంక మెన తుమ్ కోర్వ జతను? బరబ్బుక గే, క్రీస్తు మెంతొ యేసుక గె?” మెన జోవయింక పుసిలన్.

18 జో అదికారి కిచ్చొక ఇసి జేవ్ ప్రెజల్ నిసానుక సెలవ్ దిలో మెలె, యూదుల్చ వెల్లెల మాన్సుల్ ఎక్కి గోనచి రిసా యేసుక తీర్పు కెర్తి టాన్తె ఆన అస్తి మెన జానె.

19 పిమ్మట్, రుజ్జు కెర్తి షొది వెసితి పీటతె, జో అదికారి తెదొడి వెసితికయ్, జోచి తేర్చి ఏక్ గొత్తి సుదిచి అత్తి, జో

† 27:8 27:8 నెంజిలె ‘లోయిచి బాటి’.

తెన్ కబుర్ తెద్రయ్లి. “జో నీతి తిల మాన్సుక జేవ్ యూదుల్ కెర్నీతె తుయి జోలిక గో నాయ్. అజ్జి ఆవ్ జోచి రిసా సిప్పు దెక అల్లర్ జలయ్” మెన, అదికారి జలో మున్సునతె కబుర్ తెద్రయ్లి.

20 గని, వెల్లెల పూజర్లు చి అన్నె వెల్లెల మాన్సుల్ కిచ్చొ కెర్ల మెలె, “ ‘బరబ్బుక ముల దేసు!’ మెన సంగ” మెన ప్రెజల్తక సికడ్డె తిల.

21 జలె, అదికారి జనాబ్క అన్నె కిచ్చొ పుసిలన్ మెలె, “దొగులతె ఆవ్ కక్క ముల దెంక?” మెన పుసిలన్, చి జేవ్ “బరబ్బుకయ్” మెన కేక గల్లికయ్,

22 పిలాతు “దస్సి జలె, క్రీస్తు మెంతో యేసుక ఆవ్ కిచ్చొ కెరుక?” మెన పుసిలన్. జేవ్ జనాబ్ ఎత్తిజిని, “సిలువతె గల, మొర్తి సిచ్చ కెరు!” మెన సంగిల.

23 జేవ్ జనాబ్ దస్సి జతికయ్, జో అదికారి “కిచ్చొక? ఈంజొ కిచ్చొ నేరిమ్ కెర అస్సె?” మెన పుసిలన్, గని, “సిలువతె గల, మొర్తి సిచ్చ కెరు!” మెన గట్టిజ కేకుల్ గలిల.

24 జలె, ‘కెద్ది సంగిలే కి కామ్క నెంజె, గని ప్రెజల్ అన్నె గగ్గల్ జతతి, చి ఒగ్గర్ అల్లర్ కెరుల. యేసుచి రిసా పూచి సేడుక అంక కిచ్చొ లాబుమ్ నాయ్’ మెన పిలాతు దెక కెర, పాని నజన, ప్రెజల్చి మొక్కె అత్తో దోవన, “ఈంజొ నీతి మాన్సుక మార్దీన్చి రిసా తుమి దెకన్. జోచి లోయి అంచి పూచి నాయ్” మెన ప్రెజల్చి మొక్కె సంగిలన్.

25 జో అదికారి దస్సి సంగితికయ్, ప్రెజల్ ఎత్తి, “జోచి లోయిచి పూచి, అమ్చి ఉప్పిర్ చి అమ్చ బోదల్చి ఉప్పిర్ తవున్.” మెన ఒప్పున, కేకుల్ గలిల.

26 తెదొడి, జేవ్ కోర్ప జలి రితి, పిలాతు బరబ్బుక ముల కెర, యేసుక కొర్డల్ తెన్ పెటవడ, ‘జోక సిలువతె గల్లు, జలె’ మెన జోవయింక జమాన్లుతె సార్ప దిలన్.

జమాన్లు యేసుక కొంకడ్లిసి
(మార్కు 15:16-20; యోహా 19:2-3)

27 తెదొడి, అదికారి తెచ జేవ్ జమాన్లు యేసుక అదికారి గేర్చి తెడిచి గదితె కడ నా కెర, జమాన్లు ఎత్తిక ఒత్త అనవ కెర,

28 యేసుచ సొంత ప్లాల్ కడ గెల కెర, ఏక్ ఎరన రగుమ్చి పాలుమ్ యేసుక గల దా,

29 కంటక ఏక్ కిరీటుమ్ గంచ కెర, యేసుచి బోడితె గల దా కెర, ఏక్ డండో జోచి ఉజల్ అత్తి దెరవ కెర, జొకర జోచి పురెతో సెర్పు సేడ, “యూదుల్చొ రానె, తుక జెయ్యి!” మెన జోక కొంకడ్ల.

30 పిమ్మట్, జోచి ఉప్పిరి తుంక, జా డండో కడ కెర జా తెన్ జోక బోడితె పెట పెట,

31 జోక దస్సి దూసుప కెర్ల వడ్డో, జోక గల తిలి ఎరన పాలుమ్ కడ కెర, జోచ సొంత పాలల్ జోక అన్నె గల దా కెర, సిలువతె గల్లి రిసా జోక కడ నిల.

యేసుక సిలువతె టీవడ్లిసి
(మార్కు 15:21-32; లూకా 23:26-39; యోహా 19:17-19)

32 యేసుక సిలువతె గల్లి రిసా, జేవ్ ఎత్తిజిన్ గెతె తతికయ్, కురేనియు దేసిమ్చొ సీమోను మెలో ఎక్కిలోక డీస్తికయ్, యేసుక గల్లి సిలువ వయితి రిసా జోక బలవంతుమ్ కెర్ల.

33 గొల్లొతా మెంతి టాన్తె, మెలె గిడ్లి పొలికచి ఏక్ మెట్టయ్, పాచ కెర,

34 నొప్పి తొక్కి కెర్ల ఓస్తు బెదయ్లి ద్రాచ రస్సుమ్ యేసుక జమాన్లు దా కెర,

‡ 27:32 27:32 సిలువ కిసి తయెది మెలె, ఏక్ టీవ్తి చి ఏక్ అడ్డుమ్ జతి దొస్సి డండల్ బెదవుల. జా సిచ్చ జతో మాన్సుక జా సిలువతె ఎంగ్లవ కెర, జోచ అత్తో చట్టో చంపొ కెరవ, అత్తోచట్టోతె మేకుల్ పెట సిలువ బుయ్యె టీవ రోవ కెర దస్సి ములుల. జో సిచ్చ జతోసా దస్సి ఒడయ్ జా మొరెది. రోమ్ దేసిమ్చి అలవాట్ తెన్ చి సిచ్చ జా.

“పి” మొన సంగితికయ్, జో జా చక దెక, పియె నాయ్.

35 పిమ్మట్, సిలువతె గల టీవడ కెర, “జోచ పాలల్ వంటనుమ” మొన చీట్లు గల, వంటన్న.

36 తెదొడి జోక రకుక మెన ఒత్త వెసిల.

37 అన్నె, “ఈంజో యేసు, యూదుల్చో రానో” మొన, జోచి ఉప్పిరి నేరిమ్ రెగిడ్డి కిదారుగండ ఏక్ జోచి బోడిచి ఉప్పిరి ఒడోవ దిల.

38 యేసుచి ఉజెతో పక్క ఎక్కిలోక, డెబ్రి పక్క ఎక్కిలోక, దొగుల చోర్లుక కి ఎక్కెక్ సిలువల్తె గల టీవడ.

39 జా వాటు గెతె తిల మాన్సుల్ యేసుక ఆస, ఆస బోడి దున్నోవ,

40 “దేముడుచి గుడి నేడవ తిర్రతక అన్నె బందితోసా తుయి జలె, తుక తూయి రచ్చించువ కెరను. తుయి దేముడుచో పుత్తుసి జలె, జా సిలువ తెంతో ఉత్తు” మొన జోక దూసుప కెర్ల.

41 వెల్లెల పూజర్లు, మోసే తెన్ దేముడు దిలి ఆగ్గుల్ నీకడ్డన, చి అన్నె వెల్లెల మాన్సుల్ కి, జోక దూసుప కెర్లి రితి,

42 కిచ్చొ మెన కొంకడ్ల మెలె, “ఈంజో వేర సుదల్క రచ్చించువ కెర్లె కి, జోక జోయ్యి రచ్చించువ కెరనుక నెత్తె. ఈంజో ఇస్రాయేలు ప్రెజల్చో రానో జలె, అప్పె సిలువతె తెంతో ఉత్తును, చి జోక నంపజమ్దె.

43 జో దేముడుచి ఉప్పిరి నంపజా అన్నె బెర్తె. ఆవ్ ఎత్తి అదికారుమ్ తిలో దేముడుచో పుత్తుసి, మెలన్ గెద? జలె, దేముడుక ఇస్టుమ్ తిలె, ఈంజో నే మొర్తి రితి ఇన్నెక రచ్చించువ కెర్ను!” మొన, ఆస ఆస, దూసుప కెర్ల.

44 యేసు తెన్ బెదవ సిలువల్తె టీవడ దొగు చోర్లు కి, జోక దన్ను దూసువ కెర్ల.

యేసు మొర్తిసి

(మార్కు 15:33-41; లూకా 23:44-49; యోహా 19:28-30)

45 జలె, బార గంటల్ మెద్దెనె తెంతో మొదోల్ కెర, తిన్ని గంటల్ ఎద, జా ఒండి దేసిమి అందర్ డంక తిలి.

46 జలె, పాసి పాసి తిన్ని గంటల్క, యేసు, “ఏలీ, ఏలీ, లామా సబ్బానీ” మొన సంగ, గట్టిజ ఒర్న దిలన్. జా కొడుక కిచ్చొ అర్దుమ్ మెలె, ‘అంచో దేముడు ప్రబు, అంచో దేముడు ప్రబు, అంక కిచ్చొక ఆతు ముల దిలది?’

47 “జలె, ఒత్త టీవో జా తిలనతె సగుమ్జన్ జా కొడు సూన కెర, ‘ఈంజో ఏలీయా పూర్లుమ్చొక బుకార్తయ్, కిచ్చొగె’ ” మెల.

48 బేగి జోవయింతె ఎక్కిలో నిగ గెచ్చు, బూంజు రితిసి వెంట, అమ్డి ద్రాచ రస్సుమ్తె బుడ్డవ కెర, ఏక్ రివ్వతె బంద, చంప కెర, యేసుక ‘పి’ మొన దిలన్.

49 గని పాసి తిలన, “పోని. ఏలీయా జోక రచ్చించువ కెరుక ఉత్తెదె గే, నాయ్ గే, దెకుమ” మొన కొంకడ్ల.

50 తెదొడి, యేసు అన్నె గట్టిజ కేక్ గల కెర, ప్రానుమ్ ముల దిలన్.

51 యేసు మొర గెలి గడియయ్ దేముడుచి గుడితె ఒడోవ తిలి తెర, *ఉప్పిర్ తెంతో ఎట్టో ఎదక చిరి జా దొన్ని గండల్ జలి. బుయి అద్దుర్ జలి. రంగ్వివత్తల్ పుట్ట గెల.

52 అన్నె, మెన్సున్లు ఉగ్గి జతికయ్, ఒగ్గర్జిన్ నిజ తిల దేముడుచో సుదల్ మొర్లున్ మెన్సున్తె జీవ్ జా, ఉట్ట.

53 యేసు జీవ్ జా ఉట్టి పడ్డో, మెన్సున్లు తెంతో బార్ జా, దేముడుచి గుడి తిలి యెరూసలేమ్ పట్టుమ్తె గెచ్చు కెర, ఒగ్గర్జిన్క డీసిల.

§ 27:37 27:37 యూదుల్క కొంకడ్డి రిసా పిలాతు అదికారి జా దార్ గండ రెగ్గ తిలన్. యోహాను 19:19.

* 27:51 27:51 ఎక్కి ఎత్తిక వెల్లో పూజరి వెర్నెక్క ఎక్కి సుట్టు పెన అర్తితుమ్ దెతి గదిక అడ్డు కెర్ల తెర, ఈంజ.

54 జలె, యేసుక రక తిల జమాన్లు, జోవయించో పుంజెక్జీన్ జమాన్లుక వెల్లో తెన్, బూకంపుమ్ కెర్లి పొది జర్లు జలిసి ఎత్కి దెక కెర, బలే బియఁ కెర, “నిజుమి, ఈంజో దేముడుక పుత్తుసి జా తిలో” మెన సంగిల.

55 యేసుక సవైచన కెర్లి రిసా, గలిలయ ప్రాంతుమ్ తెంతో జోచి పట్టి జా తిల తేర్బోదల్ ఒగ్గర్జిన్ కి జో మొర్లి పొది ఒత్త తిల.

56 జోవయింతె కో కో తిల మెలె, మగ్గలేనే పట్టుమ్చి మరియ మెలిసి, పడ్డో యాకోబుక చి యోసేపుక అయ్యసి జలి †మరియ, పడ్డో జెబెదయిచ పుత్తర్పుల్చి అయ్యసి.

యేసుచి పీనుమ్ వెంఠ గెలిసి (మార్కు 15:42-47; లూకా 23:50-56; యోహా 19:38-42)

57 సాంజ్ జతికయ్, యేసుక నంపజా సిస్సుడు రితో జలో యోసేపు మెలో అరిమతయ్ గవ్వెచో సామ్సారి ఎక్కిలో జా కెర,

58 పిలాతు అదికారితె గెచ్చు కెర, “యేసుచి పీనుమ్ అంక దే” మెన సంగితికయ్, జో అదికారి జోక దాస మెన ఆడ్ర దిలన్.

59 జలె, యోసేపు జా పీనుమ్ ఉత్తవ జాక నొవి విలువచి బట్ట పంగ్రవ కెర,

60 జోచి రిసా నొవర్ కెరవ తిలి రంగ్ని పత్తురచి డొల్మి కెర్లి మెస్సున్తె నా కెర, తెడి రోవ దిలన్, చి గుమ్ముమె వెల్లో పత్తురు వెలవ దా డంక గెల కెర, ఉట్ట గెలన్.

61 తెదొడి మగ్గలేనే పట్టుమ్చి మరియ చి జా అన్నెక్ †మరియ ఒత్త మెస్సున్చి మొక్కై వెన తిల.

† 27:56 27:56 ఈంజ మరియ యేసుచి అయ్యసి జయెదె; మత్తయి 13:55. † 27:61 27:61 యేసుచి

అయ్యసి జయెదె. * 28:1 28:1 ఎత్కి సెన్సర్ యూదుల్క బక్కి కెర్లి సెలవ్ కడ దీసి జయెదె. జా దీసి జోవయించ నబ గెరలె గెచ్చు, దేముడుచి కొడో నూన కెర, ఎత్కి అదికారుమ్ తిలో దేముడుక బక్కి కెరుల. జోక ‘యెహోవ’ మెన నావ్ తయెదె. జా దీసి ‘కిచ్చి కామ్ కెర నాయ్’ మెన జో ఎత్కి అదికారుమ్ తిలో దేముడు సంగిలిన్క యూదుల్చ వెల్లెల మూస్సుల్ ప్రైజల్క జాడు వయడ్లి రితి కెర కామ్ నే కెర్లిన్చి రిసా ఒగ్గర్ అగ్గుల్ అవ్వె ఉచర అన్సి. ఇన్నె, దొన్ని ఎన్నులు కోడ్లిన్క ‘కామ్’ మెన నింద కెర్తతి.

మెస్సున్క డిట్టుమ్ బంద కెర తిలిసి 62 అన్నెక్ దీసి, మెలె పండుగచి బోగి దీసిక అన్నెక్ దీసి, వెల్లెల పూజర్లు చి పరిసయ్యుల్ పిలాతు అదికారితె బెద జా కెర,

63 జోక, “బాబు, జో మోసిమ్ కెర్లొసా జీవ్ తిలి పొది, మొర్లె తిర్తత్క ఆవ్ అన్నె జీవ్ జా ఉట్టిందె మెలిసి ఏదర్ల కెర్లనుమ్.

64 జాకయ్, తిర్తత్ ఎద మెస్సున్క చెంగిల్ బందు కెరవడు, నెంజిలె జోచ సిస్సుల్ జా కెర, జోక ఉక్కుల నా కెర, యేసు జీవ్ జా మెస్సు తెంతో బార్ జలో మెన, ప్రైజల్క సికడుల, చి అగ్గెచి మోసిమ్చి కంట ఆకర్చి మోసిమ్ ఒగ్గర్ జయెదె” మెన, యూదుల్చ జేవ్ వెల్లెల మూస్సుల్ అదికారిక సంగిల.

65 పిలాతు “జమాన్లుక కడన రకవడ, చి తుమ్ గెచ్చు కెర, తుమ్ తెర్లి ఎదిలి డిట్టుమ్ బందు కెరవడ” మెన, జేవ్క సంగిలన్.

66 జేవ్ గెచ్చు కెర, రకితనక టీవడ కెర, జోక అడ్డు కెర్లొ పత్తురు డిట్టుమ్ రెచ కెర, ముద్ద గల దా, మెస్సున్క కో లుంకచోరు నే ఉగిడ్డి రితి కెర్ల.

28

యేసు జీవ్ జా ఉట్ట అస్సె (మార్కు 16:1-8; లూకా 24:1-12; యోహా 20:1-10)

1 *సెలవ్ కడన్లి దీసి జిన గెలి పడ్డో, సెలవ్ కడన్లి దీసి రాత్ పాయితె తతికయ్, మగ్గలేనే పట్టుమ్చి మరియ కి, జా అన్నెక్ మరియ కి, జా మెస్సున్ దెక్కుక గెల.

2 ఒత్త పావెలె, ఈందె, దేముడుచి దూత ఎక్కిలో పరలోకుమ్ తెంతో

ఉత్తిర్తికయ్, ఒగ్గర్ బూకంపుమ్ జర్గు జలి, చి జో దూత జో అడ్డు తిలో పత్తురు ఒన్నుల్ కెర, పత్తుర్చి ఉప్పిరి వెసిలన్.

3 జోక దెకిలె, ఉజిడ్ తిలి రితి డీసిలో, జోచ పాలల్ మంచుచి ఎదిలి చొక్కిల డీసిల.

4 జోక బియఁ కెర, ఒత్త రక తిల జమాన్లు మొర గెల రిత జల.

5 గని, జో దేముడుచి దూత జేవ్ దొగుల తేర్బోదల్క దెక, జేవ్క, “తుమ్ బియఁ నాయ్. నిలువతె జేవ్ టీచడ్డో యేసుక తుమ్ చజితను మెన ఆవ్ జాని.

6 జో ఇన్నె నాయ్. జో సంగిలి రితి, జివ్ జా ఉట్ట అస్సి. ఈందె, తుమ్ జా కెర, జో తిలి టాన్ దెక కెర,

7 బే బేగి గెచ్చ, చి జోచ సిస్సుల్క ఇసి మెన సంగ. యేసుప్రబు మొర గెచ్చ తా, జివ్ జా ఉట్ట అస్సి, చి ఈందె, జో తుమ్చి కంట అగ్గె గలిలయతె గెతయ్. తుమ్ ఒత్త జోక దెకితె, మెన జోవయింక సంగ దాస.” మెన జేవ్ తేర్బోదల్క జో దూత సంగిలన్.

8 జాచి రిసా, జేవ్ దొగుల బి తెన్, సర్ల తెన్, మెన్నె తెంతో బార్ జా, యేసుచ సిస్సుల్తె గెచ్చ జా కబుర్ బేగి సంగుక మెన, ఉట్ట నిగెల.

9 జేవ్ దొగుల తేర్బోదల్ యేసుచ సిస్సుల్తె గెచ్చుక నిగితె తతికయ్, యేసు జోవయింక వట్టె దస్సుల్ జా, “చెంగిల్ అస్సున్ గే?” మెన సంగిలన్, చి జేవ్ జోచి పాసి జా కెర, జోచ చట్టో దెరన జోకర్తికయ్,

10 యేసు జోవయింక, “బియఁ నాయ్. అంచ సిస్సుల్తె గెచ్చ జోవయింక కిచ్చో మెన సంగ దాస మెలె, గలిలయతె గెచ్చ, ఒత్త అంక దెకితె మెన యేసు తుమ్క సంగ తెద్రయ్లన్, మెన సంగ దాస” మెన యేసు సంగిలన్.

11 జేవ్ దొగుల తేర్బోదల్ యేసుచ సిస్సుల్తె గెతె తతికయ్, జా మెన్నె రక తిల జమాన్లు సగుమ్జిన్

యెరూసలేమ్తె గెచ్చ కెర, మెన్నె జర్గు జలిసి ఎత్తి వెల్లెల పూజర్గుక సంగిల.

12 జాకయ్ జేవ్ పూజర్గు, అన్నె వెల్లెల మాన్సుల్ తెన్ సబ కెర, లట్టబన, జేవ్ జమాన్లుక లంచుమ్ దా కెర,

13 జోవయింక ఇసి మెన సికడ్ల. “ప్రెజల్క తుమ్ ఇసి మెన: ‘జోవయించ సిస్సుల్ అందెరె జా కెర, అమ్ నిజ తతికయ్, జోక ఉక్కుల నిల’ మెన సంగ.

14 ఈంజ ఎత్తి అదికారిక నేన్తె జలెగిన, తుమ్ కిచ్చో సిచ్చ నే జతి రితి అమ్ జోక సేంతుమ్ కెరుమ్దే” మెన, యూదుల్చ వెల్లెల మాన్సుల్ పూచి సేడ్ల.

15 జేవ్ వెల్లెల మాన్సుల్ దస్సి సంగితికయ్, జేవ్ జమాన్లు జా లంచుమ్ కడ నా కెర, జోవయింక సంగిలి రితి కెర్ల. ఆజి ఎద కి జా అబద్దుమ్ యూదుల్ సూన సంప కెర్లతి.

యేసు సిస్సుల్ తెన్ అన్నె దస్సుల్ జలిసి కామ్ తియార్లిసి

16 ఎగరజిన్ సిస్సుల్ గలిలయతెచి యేసు సంగిలి మెట్టతె ఉట్ట గెల.

17 గెచ్చ, జోక దెక కెర, సెర్ను సేడ జోక జోకర్ల. గని సగుమ్జిన్ అన్మానుమ్ జల.

18 తెదొడి, యేసు జోవయించి పాసి జా కెర, “పరలోకుమ్తె, బూలోకుమ్తె ఎత్తి అదికారుమ్ అంక దొర్కు జా అస్సి.

19 జాచి రిసా తుమ్ దేసిమ్లు ఎత్తితె గెచ్చ కెర, మాన్సుల్ ఎత్తితెచ ప్రెజల్తె అంక సంపజా సిస్సుల్ జతి రితి కెర, అబ్బొసి జలో దేముడుచి, దేముడు పుత్తున్చి, దేముడుచి సుద్ది తిలి ఆత్మచి నావ్ తెన్, జోవయింక బాప్సినుమ్ దాస.

20 అన్నె, ఆవ్ తుమ్క కిచ్చో కిచ్చో సంగ బోదన కెర అస్సి గే, జా ఎత్తి జేవ్ సంపజతసక కి సంగ బోదన కెర. ఈందె, ఉగుమ్ పూర్తి జతె ఎదక కి, కెయక తెయక తుమ్చి తెన్ ఆవ్ తోడ్ అస్సి” మెన యేసు సిస్సుల్క సంగిలన్.

మార్కు సుబుమ్ కబుర్ మార్కు రెగిడ్లి సుబుమ్ కబుర్

క్రీస్తు రచ్చించుప కెర్తొసొ జెతినచి రిసొ యోహాను సొట్టు కెర్తొసి (మత్త 3:1-12; లూకా 3:1-9,15-17; యోహా 1:19-28)

1 *దేముడుచొ పుత్తుసి జలో యేసుక్రీస్తుచి† సుబుమ్ కబుర్ ఇసి మొదొల్ జతయ్.

2 †దేముడుచు కబుర్ సంగిలో యెసయా పూర్ణుమ్చొచి అత్తి దేముడు రెగిడ్లి రితి జర్గు జలి.

“ఈందె, తుక వాట్ తెయార్ కెరయ్తి రితి, అంచొ బారికి జతొ ఎక్కిలోక తుచి కంట అగ్గె తెద్రయిందె”

మెన, 3 అన్నె,

“ఎక్కిలో అంచొ బారికి రితి జా, అంచి అనాడ్ రితి జా, ‘ప్రబుకయ్ వాట్ చెంగిల్ కెరు. జోక వాట్ తిన్నగ కెర్లి రితి తుమ్ ఎత్తిజిన్ బుద్ది ఆననా’ మెన, బయిలె ప్రదేసిమి తా కేక్ గల సొట్టు కెరెదె”

మెన, రెగిడ్లి కోడు.

4 ఈంజేవ్ కొడొ కీసి నెరవెర్చుప జల మెలె, బాప్తిసుమ్ దెతో యోహాను మెలోసొ బయిలె బార్ జా బులుక దెర కెర, “తుమ్చి పాపల్చి రిసొ తుమ్ పెట్టి దుకుమ్ జా, పాపుమ్ ముల్లి బుద్ది జా, దేముడు తుమ్చి పాపుమ్ చెమించుప

కెర్తి గుర్తుక, తుమ్ బాప్తిసుమ్ నజన.” మెన సొట్టు కెర్తొ తిలన్.

5 యోహాను ఇసి కెర్తొ తతికయ్, యూదయ మెలి జా ప్రదేసిమ్చ పైజల్ ఒగ్గర్ ఒగ్గర్జిన్ జా ప్రదేసిమ్చి కీయెరూసలేమ్ మెలి వెల్లి పట్టుమ్చ పైజల్ ఒగ్గర్ ఒగ్గర్జిన్, జోతె జా బయిలె జా కెర, జేవ్ కెర్ల పాపల్చి రిసొ పెట్టి దుకుమ్ జా, ఎదార్దుమ్ తెన్ బచ్చన సంగ కెర, యొర్దాను మెంతి ఒత్తచి గడ్డె, జోచి అత్తి బాప్తిసుమ్ నజన్తె తిల.

6 యోహాను కీసొ తిలో మెలె, ఒంటచ రోమల్చ పాలల్ గలన, చామ్ తెన్ కెర్లి పట్టు కెరంట బందన, డొంగ్రిచి ఒండొల్ తేల్, చిట్కల్ కతోసొ.

7 కిచ్చొ మెన యోహాను బోదన కెర్తొ తిలన్ మెలె, “అంచి పట్టి అన్నెక్కో జెతయ్, అంచి కంట జోక అదికారుమ్ ఒగ్గరి. ఆవ్ వంపొ జా జోచ చట్టొతెచ జోడ్లుతెచ వాలివొ యిపుక జలెకు అంక విలువ నాయ్.

8 ఆవ్ జలె, పానితె తుమ్క బాప్తిసుమ్ దెతసి, గని అప్పె జెతోసొ జలె, దేముడుచి సుద్ది తిలి ఆత్మతె తుమ్క బాప్తిసుమ్ దెయెదె” మెన సొట్టు కెర్తొ తిలన్.

యేసు బాప్తిసుమ్ నజన్లిసి

9 తెదొడి ఏక్ దీసి, యేసు గలిలయ ప్రాంతుమ్తెచి నజరేతు గవ్వొ తెంతొ ఉట్ట జా కెర, ఒత్త యొర్దాను గడ్డె యోహానుచి అత్తి బాప్తిసుమ్ నజన్లొ.

10 యేసు పాని తెంతొ బార్ జలి బేగి యోహాను కిచ్చొ దెకిలన్ మెలె, పరలోకుమ్ ఉగ్గి జలి, చి దేముడుచి

* 1:1 1:1 అప్పె తెంతొ జోక ‘దేముడు’ మెన రెగడుడుదె. † 1:1 1:1 ‘సుబుమ్ కబుర్’ మెలె ఎత్తి అదికారుమ్ తిలో దేముడు దొర్కు కెర్లి రచ్చనచి కోడు. అమ్చ పాపల్ జో చెమించుప కెర్తొనచి రిసొచి కబుర్. యేసుయి దొర్కు జలో రచ్చించుప కెర్తొసొ జతినచి కబుర్. జో అర్చితుమ్ జా పాపల్ గెచ్చయలి రిసొ నంపజల మాన్యుల్ పరలోకుమ్చి రాజిమ్తె బెదితి అవ్కానుమ్ దొర్కు జలిన్చి కబుర్. ‡ 1:2 1:2 ‘జోచ కబుర్లు సంగిలస’ మెలె, పూర్ణుమ్ తెంతొ కక్క, ఎత్తి అదికారుమ్ తిలో దేముడు ప్రబు నిసాన, జోచ కబుర్లు మాన్యుల్క

జేవ్ సంగితి రిసొ, జోచి ఆత్మన్కి జోవయింక దెయెదె. § 1:5 1:5 యెరూసలేమ్ పట్టుమ్ యూదుల్క ఒగ్గర్ ముక్కిమ్ జయెదె. కిచ్చొక మెలె, ఒత్త దేముడుచి గుడి తయెదె. ఒండి బూలోకుమ్క ఎక్కి ఒత్తయ్ జోవయించి దేముడుచి గుడి తయెదె.

నుద్ది తిలి ఆత్మ, పార్వ పిట్టచి రితి జా, ఉత్త జా యేసుచి ఉప్పిరి టీవో జలి.

11 అన్నె, “తుయి అంచో ప్రేమ తిలో పూత్తు. తుచి రిసా అంక సర్లసంతోసుమ్” మెన పరలోకుమ్ తెంతో సంగిలిన్చి అవాడ్ అయ్లి.

సయ్తాన్చి అత్తి యేసు పరిచ్చి జా జిస్సిసి

(మత్త 4:1-17; లూకా 4:1-15)

12 దస్సి జలి బేగి, కో నెంజిలి బయిలె యేసు గతి రితి, దేముడుచి నుద్ది తిలి ఆత్మ జోక వెలవ నిలన్.

13 యేసు ఒత్త దొన్ని విసా దీసల్ తతికయ్, సయ్తాన్ జోక పాపుమ్ కెరవుక ఉచర్లన్. ఒత్త రితయ్ జంతువుల్ తిల. దేముడుచి దూతల్ జా కెర, యేసుక సావైవన కెర, సుక్కుమ్ కెర్ల.

14 జా పొది, బాప్తిసుమ్ దెతె తిలో యోహాను జేలి జల్లో. జో యోహాను జేలి జలి పిమ్మట్, యేసు, దేముడు జలో అబ్బోన్చి సుబుమ్ కబుర్ బోదన కెర కెర, బుల బుల, గలిలయ ప్రాంతుమ్తె అన్నె ఉట్ట అయ్లన్.

15 “*దేముడుచి రాజిమ్ ఈంజ లోకుమ్తె జెతిన్క రకితి కాలుమ్ పూర్తి జా అస్సె. దేముడుచి రాజిమ్ పాసి జా అస్సె. జాచి రిసా, తుమ్ కెర్ల పాపల్చి రిసా పెట్టి దుకుమ్ జా. పాపుమ్ ముల్లి బుద్ది జా, సుబుమ్ కబుర్ సూన నంపజా” మెన బోదన కెర్తె తిలన్.

చెత్తర్జిన్ సిస్సుల్క యేసు నిసాన బుకార్లిసి

16 యేసు జా గలిలయ ప్రాంతుమ్చి నముద్దుమ్చి గట్టుతె ఇండితె తా,

సీమోనుక చి అంద్రెయ మెలో సీమోనుచో బావోన్క దెకిలన్. జేవ్ దొగుల గడ్డె వల గల్తె తిల. జేవ్ మొస్స దెర్తన.

17 జలె, యేసు జోవయింక దెక, “తుమ్ అంచి పట్టి జా, చి మాన్సుల్ అంక సంపజతి రిసా, జోవయింక తుమ్ అంచితె కడ ఆన్తి రితి తుమ్క సికడందె” మెన సంగిలన్.

18 ఇసి సంగ బుకార్లి బేగి, జేవ్, జోవయించ వలల్ ముల దా కెర, జోచి పట్టి గెచ్చ, జో తెన్ బులుక దెర్ల.

19 ఒత్త తెంతో అన్నె ఇదిల్ దూరి గెచ్చ కెర, జెబెదయి మెలో ఎక్కిలోచ దొగుల పుత్తర్పుల్క యేసు దెకిలన్. వెల్లిచి నావ్ యాకోబు, బావోన్చి నావ్ యోహాను. జేవ్ దొగుల జోవయించి దోనితె వెన తా, చిరి జల వలల్ చెంగిల్ కెర్తె తిల.

20 జోవయింక దెకిల్ బేగి, యేసు జోవయింక బుకార్లన్. జెబెదయి మెలో జోవయించో అబ్బోన్క, జోవయింతె కూలి కెర్తనక కి దోనితె ముల దా, జేవ్ దొగుల బావుడ్లు జోచ సిస్సుల్ జతి రితి యేసుచి పట్టి గెల.

బూతుమ్ దెర్లొ మాన్సుక యేసు చెంగిల్ కెర్లిసి

(లూకా 4:31-37)

21 జలె, యేసు, జేవ్ సిస్సుల్ తెన్ కపెర్నూహూమ్ పట్టుమ్తె బెద గెల. అన్నెక్ †సెలవ్ కడల్లి దీసి, దేముడుక బక్తి కెర్తి యూదుల్చి ఒత్తచి నబ గెరి గెచ్చ, తెడి పెన కెర, యేసు బోదన కెరుక దెర్లన్.

22 మోసి తెన్ దేముడు దిలి ఆగ్గుల్ సికడ్డన కెర్తి రితి నాయ్, గని దేముడు దిలి అదికారుమ్ తెన్ యేసు సొస్టుమ్ బోదన కెర్లన్, చి ఒత్త తిల మాన్సుల్ బలే ఆచారిమ్ జల.

* 1:15 1:15 మత్తయి మెలో యేసుచి సిస్సుడు రెగిడ్డి రితి, పరలోకుమ్చి రాజిమ్ యేసు తెన్ పాసి జా అయ్లోన్చి కబుర్, ఈంజ. మత్తయి 3:2,3. † 1:21 1:21 ఎత్తి సెస్సర్ల యూదుల్క బక్తి కెర్తి సెలవ్ కడ దీసి జయెదె. జా దీసి జోవయించ నబ గెరెల గెచ్చ, దేముడుచి కొణె సూన కెర, ఎత్తి అదికారుమ్ తిలో దేముడుక బక్తి కెరుల. జోక ‘యెహోవ’ మెన నావ్ తయెదె. జా దీసి ‘కిచ్చొ కామ్ కెర నాయ్’ మెన జో ఎత్తి అదికారుమ్ తిలో దేముడు సంగిలిన్క యూదుల్చె వెల్లెల మాన్సుల్ ప్రెజల్క జాడు వయడ్లి రితి కెర కామ్ నే కెర్లిచి రిసా ఒగ్గర్ ఆగ్గుల్ అవ్వి ఉచర అస్తి. ఇస్సె, దొన్ని ఎన్సులు కోడ్లిన్క ‘కామ్’ మెన నింద కెర్తెతి.

23 తెదొడి జేవ్ తిలి సబగేరి బూతుమ్ దెల్లొ ఎక్కిలో డీసిలో.

24 జో జలె “ఓ నజరేతు గవ్వెచ్చొ యేసుప్రబు, అమ్చి తెన్ తుక కిచ్చొ కామ్? అమ్క పాడ్ కెరుక జా అస్సిన్ గే? తుయి కొన్సొ గే జాని. దేముడుచి †నుద్ది తిలోసా, తుయి.” మెన కేక్ గలో.

25 యేసు, జలె, “తుక్కె తా ఇన్నెక ముల దా గో!” మెన జో మాన్సుక దెర్లి బూతుమ్క గోల కెర్లన్.

26 బూతుమ్ జో మాన్సుక అద్దర్ కెర దా, గట్టిజ ఒర్నవడ కెర, జోక ముల దిలో.

27 జర్గు జలిసి ఎత్తిజిన్ దెక ఆచారిమ్ జా, “అబ్బరేయ్య! ఈంజ కెద్ది అదికారుమ్ తిలి బోదన. నొవి రగుమ్. బూతల్క కి అదికారుమ్ తెన్ ఈంజొ గో!” మెన సంగిలె, జా సూన, ఈంజొ సంగిల్ రితి ఉట్ట గెతతి!” మెన బమ్మ తెన్ ఎక్కిలోక ఎక్కిలో సంగన్ల.

28 జా దీసి తెంతొ, జా ఒండి గలిలయ ప్రాంతుమ్తె, కేనె ఒత్త, యేసుచి రిసా ఎత్తిజిన్ సూన్ల.

29 బూతుమ్ దెర్లొసాక చెంగిల్ కెర్లి బేగి, సబ గెరి తెంతొ బార్ జా ముల కెర, యాకోబు చి యోహాను తెన్ యేసు బెద గెచ్చ, సిమోను చి అంద్రెయ చి గెరి గెల.

30 జలె, గెరి పెసిలె, సిమోనుచి అత్తన్ జొర్లొ సేడ నిజ అస్సె. దస్సి అస్సె మెన దెక కెర, సిస్సుల్ యేసుక సంగిల.

31 యేసు జాచి పాసి జా కెర, ఆతు దెర ఉట్టయ్తికయ్, జొర్లొ జాక ముల దిలి, చి చెంగిల్ జలి, జా మంతిరి గెరి తిలసక సవైచన ఎత్తి కెర్లి.

ఒగ్గర్జిన్ బాద తిలసక యేసు చెంగిల్ కెర్లిసి

32 జా దీసి సాంజ్ జతికయ్, ఒగ్గర్ ఒగ్గర్జిన్ జబ్బుల్ తిలసక కి, బూతుమ్ దెర్లసక కి యేసుతె ప్రెజల్ కడ ఆన్ల.

33 జా పట్టుమ్చ ప్రెజల్ ఎత్తిజిన్ జా గెర్చి వీదె బెర జా, గుమ్ముమె టీవొ జా తిల.

34 జోవయింతె రగరగాల్చ జబ్బుల్ తిల మాన్సుల్క యేసు చెంగిల్ కెర్లన్, ఒగ్గర్ బూతల్క ఉదడ గెలన్. గని జో కొన్సొ గే బూతల్ చినిలి రిసా, జా గుట్టు బార్ కెర్లు నాయ్ మెన, జేవ్ బూతల్ లట్టబుక నెలవ్ నీ దెలో.

35 అన్నెక్ దీసి, రాతి నే పాయితె ఒగ్గర్ అందర్ తత్తయి, యేసు ఉట్ట కెర బార్ జా, కోనెంజలి టాన్తె గెచ్చ, ప్రార్దన కెరుక దెర్లన్.

36 ప్రార్దన కెర్తె తతికయ్, సిమోను, జో తెన్ తిలస కి, యేసుచి వట్టి జా చజన,

37 జోతె పాచ కెర, “ఇన్నెచ మాన్సుల్ ఎత్తిజిన్ తుక చజితతి” మెన యేసుక సంగితికయ్,

38 జో, “జొమ్మ, ఈంజ ప్రాంతుమ్తెచ అన్నె గవ్వెలె గెచ్చుమ, ఆవ్ ఒత్త కి బోదన కెర్లి రిసా. జాకయ్ బార్ జలయ్!” మెన యేసు సంగిలన్.

39 జలె, జా గలిలయ ప్రాంతుమ్ ఎత్తితె బుల బుల, ఒత్తచ యూదుల్చ సబ గెరలె బోదన కెర్తె తిలన్, చి మాన్సుల్క దెర్ల బూతల్క ఉదడ గెల్తె తిలన్.

వెల్లి రోగిక యేసు చెంగిల్ కెర్లిసి
(మత్త 8:1-4; లూకా 5:12-16)

40 జా పొది, వెల్లి రోగి ఎక్కిలో యేసుతె జా కెర, నెర్ను సేడ, “తుక ఇస్టుమ్ తిలె, తుయి అంక చెంగిల్ కెర సుద్ది కెరుక తెర్చి.” మెన బతిమాల్పా జా జొకర్తికయ్,

41 యేసు కన్యారుమ్ జా, ఆతు చంప కెర, జోక చడ, “అంక ఇస్టుమి. తుయి చెంగిల్ జా సుద్ది జా” మెన సంగిలన్.

42 వెల్లి రోగుమ్ బేగి జో మాన్సుక ముల దిలి, చి చెంగిల్ జా సుద్ది జలన్.

† 1:24 1:24 దేముడు తెద్రయ్లో క్రీస్తు, రచ్చించుప కెర్లొసా

43-44 తెదొడి యేసు జోక, “జర్గు జలిసివి రిసా కక్క సంగు నాయ్, గని దేముడుచి గుడితె గెచ్చు, ఒత్త సేవ కెర్తొ పూజరితె గెచ్చు, తుయి చెంగిల్ జలిసి జోక దెకవ, తుయి చెంగిల్ జాసీ సుద్ది జలిసి ఎత్తిజిన్ క రుజ్జు దెకయ్ తి రితి, మోసే పూర్లుమ్ చొ సంగిలి కానుక దేసు” మెన యేసు ఆడ్ర దా జోక సంగిలన్.

45 గని, “కేనె ఒత్త సంగు నాయ్” మెన యేసు సంగ తిలె కి, జో మాన్సు బార్ జా ఉట్ట గెచ్చు కేనె ఒత్త సంగుక దెర్లన్. జర్గు జలిసి జో దస్సి ఎత్తిజిన్ క సూసయ్ తికయ్, ‘కేన్ పట్టుమ్ తె ఇస్టుమ్ అయ్ లి రితి ఎదార్లుమ్ పెసుక నెంజె’ మెన, యేసు జా బయిలె తాఁ గెలో. ఒత్త జా బయిలె తతికయ్, చెత్తర్ దిక్కుల్ తెంతొ కి, ప్రెజల్ జోతె బెర గెతె తిల.

2

ఉట్టుక నెత్తిర్లో రోగిక యేసు చెంగిల్ కెర్లన్

(మత్త 9:1-8; లూకా 5:17-26)

1 సగుమ్ దీసల్ గెలి పడ్డొ, యేసు కపెర్నహూమ్ పట్టుమ్ తె అన్నె బుల జెతికయ్, జో ‘గెరి అస్సె’ మెన సూన కెర,

2 ఒగ్గర్ ఒగ్గర్ జిన్ జనాబ్ జోతె బెర అయ్ ల. బెర అయ్ లి రిసా, జోచి గదితె కి, గుమ్ముమె కి, అన్నె కక్క టాన్ నాయ్.

జలె, యేసు జనాబ్ క దేముడుచి* బోదన కెర్తె తతికయ్,

3 వాతుమ్ జొర్ణొ తెన్ తిలోసా ఉట్టుక నెత్తిర్లో మాన్సు ఎక్కిలోక, చెత్తర్ జిన్ యేసు తిలిన్ తె కడ ఆన్. జో మాన్సుక

కడ ఆన్ల సతె తిల చెత్తర్ జిన్ జోక జోచి అంతుర్నొ తెన్ వయ ఆన తిల.

4 జలె, జో రోగిక యేసు తె పాసి కడ ఆనుక చజెలె కి, బెర్ల జనాబ్ చి రిసా నెత్తిర్. జోచి పాసి జెంక నెత్తిర్ రిసా, జో తిలి గదిచి ఉప్పిర్ ఒర్పెచి వెల్లి బోరో కెర, జో ఎంర్ల తిలి అంతుర్నొ తెన్ జో రోగిక జా బోరో వాల్ ఉత్తవ దా, యేసుచి పాసిక పాఁడల్.

5 జలె, ‘కడ ఆన ఉత్తవ తిల జేవ్ మాన్సుల్ నంప తెన్ అస్తి’ మెన యేసు రుజ్జు దెక కెర, ఉట్టుక నెత్తిర్లో జో రోగిక దెక, “ఓ పూత్తు, తుచి పాపల్ చెమించువ జా అస్తి” మెన సంగిలన్.

6 జలె, మోసే తెన్ దేముడు దిలి ఆగ్గుల్ సికడ్డన సగుమ్ జిన్ ఒత్త వెన అస్తి. యేసు సంగిలిసి జేవ్ సూన కెర బమ్మ జా,

7 “ఈంజొ మాన్సు కీసా జా లట్టబ్ తయ్! ఇసి లట్టబ దేముడుచి విలువ కడ పాపుమ్ కెర్తయ్! దేముడు ఎక్కిలోక పిట్టవ, కో కి పాపల్ చెమించువ కెరుక నెత్తిర్!” మెన, జోవయిచి పెట్టి ఉచరన్.

8 జోవయిచి పెట్టి తిలి అన్మానుమ్ యేసు జోచి ఆత్మ తె బేగి చిన కెర, “తుమ్ చి పెట్టి కిచ్చొక దస్సి అన్మానుమ్ తియంతసు?

9 ఉట్టుక నెత్తిర్లో ఈంజొ మాన్సుక ‘తుచి పాపల్ చెమించువ జా అస్తి’ మెన సంగుక సుల్లు గే, ‘ఉట్టు, తుచి అంతుర్నొ వయన ఇండు’ మెనుక సుల్లు గే?

10 జలె, †మాన్సు జా జెర్మున్ అయ్ లయ్ అంక, ఈంజయ్ లోకుమ్ తె కి

§ 1:43-44 1:43-44 వెల్లి రోగిచి వెల్లి రోగుమ్ గెలె, ‘సుద్ది జలన్’ మెన తెదొడవ యూదుల్ సంగితి తిల. కిచ్చొక మెలె, ఏక్ మాన్సుక వెల్లి రోగుమ్ తిలె, ‘జో గవ్వి తంక గార్’ మెలి రితి, ‘జోచి జబ్బు డేవ అమ్ కయ్ దెరెదె’ మెలి రితి బియ: కెర గవ్వి తెంతొ ఉడడుల. దేముడుచి దయచి రిసా వెల్లి రోగుమ్ పూర్ గెలె, ‘సుద్ది జలొ’ మెన గవ్వి అన్నె పెనడుల. * 2:2-2:2 ఇన్నెక ‘సుబుమ్ కబుర్’ కి మెనుక జయెదె. † 2:10 2:10 ‘మాన్సు జా జెర్మున్ అయ్ లోసా’ మెన పొర్ని ప్రమానుమ్ తె రెగిడ్డి తెంతొ జా కోడు కచి రిసా నావ్ తయెదె మెలె ఎత్తి అదికారుమ్ తిలో దేముడు ‘తెర్లయిందె’ మెన సంగ తిలో ‘క్రీస్తు’ మెలో దొర్కు. జలొ రచ్చించువ కెర్తొసొక ఈంజ అన్నెక్ నావ్ తయెదె; జా నావ్ చి అర్దుమ్ పండితుల్ కెరన్లెకి, యేసుక ‘జొయ్యి’ మెన ఒప్పుసుక నెన ఒగ్గర్ అల్లర్ కెరుల.

పాపల్ చెమించువ కెర్తి అదికారుమ్ అస్సె మెన రుజ్జు దెకయిందె, మెన జేవేక సంగ కెర, ఉట్టుక నెతిర్లో జో మాన్సుక అన్నె దెక కెర,

11 'అల్లె, తుయి ఉట్ట, తుచి అంతుర్నో వయన ఇండ గెరి గో, మెన తుక ఆవ్ సంగితసి!' " మెన యేసు సంగిలన్.

12 బేగి, జో మాన్సు ఉట్ట కెర, జోచి అంతుర్నో ఉక్కుల వయన, జేవ్ ఎత్కిజిన్చి మొక్కె ఇండుక దెర, బార్ జా కెర, ఉట్ట గెలన్. ఇసి జర్లు జలి రిసా, ఒత్త బెర తిలస ఎత్కిజిన్ ఆచారిమ్ జా, "ఇన కమొ అమ్ కెయ్య దెకుక నాయ్. ఆజి దెకిలమ్" మెన, దేముడుక గవురుమ్ సంగిల.

లేవీ మెలో సిన్తు నజితోసాక యేసు బుకార్లిసి

(మత్త 9:9-13; లూకా 5:27-32)

13 యేసు అన్నె బార్ జా, †సముద్రుమచి జా గాడుచి ఒడ్డుతెచి వాట్ గెలన్. ఒత్త ఒగ్గర్జిన్ జనాబ్ జోతె బెర జెతికయ్, జోవయింక బోదన కెరుక దెర్లన్. బోదన కెర కెర,

14 అన్నె ఇదిల్ దూరి గెలి, కి సిన్తు నజితి గెరి ఒత్త వట్టి అస్సె. జా గెరితె అల్పయి మెలో ఎక్కిలోచో లేవీ మెలో పుత్తుసి ఎక్కిలో వెన అస్సె. యేసు జోక దెక కెర, "అంచి పట్టి జా, అంచో సిన్సుడు జా" మెన జోక బుకార్లన్. బుకార్లి బేగి, జో ఉట్ట, యేసుచి పట్టి గెలన్.

15 జలె, లేవీయింతె యేసు అన్నిమ్ కంక గెలన్. జోతె అన్నిమ్ కంక మెన యేసు సిన్సుల్ తెన్ వెన తతికయ్, జో తెన్ జా దేసిమ్చ నిస్కారుమ్ కెర్ల

ఒగ్గర్జిన్ బెద వెన తిల. కొన్న మెలె, సిన్తు నజితస కి, నీతి రితి నే కెర్తస కి సగుమ్జిన్, దస మాన్సుల్ ఒగ్గర్జిన్ యేసుచి పట్టి గెచ్చ ఒత్త తిల.

16 జలె, *పరిసయ్యుల్ తెన్ బెదిత మోసే తెన్ దేముడు దిలి ఆగ్గుల్ సికడ్డస సగుమ్జిన్ తిల. 'సిన్తు నజితస తెన్, నీతి నెంజిలస తెన్ యేసు వెన కతయ్' మెన జేవ్ మోసే తెన్ దేముడు దిలి ఆగ్గుల్ సికడ్డస దెక కెర, "సిన్తు నజితస తెన్, పాపుమ్ సుదల్ తెన్ ఈంజో కిచ్చొక కతయ్?" మెన యేసుచ సిన్సుల్క పుసిల.

17 జేవ్ వెల్లెల మాన్సుల్ పుసిలిసి నూస కెర, యేసు జోవయింక దెక, "జబ్బు తెన్ అస్సుమ్ మెన చినన్లసక డాక్టర్ అవ్సురుమ్, గని జబ్బు నెంజిలసక డాక్టర్ అవ్సురుమ్ నాయ్. జలె, పాపుమ్ సుదల్ ఆమ్ మెన్ చినంతసకయ్ బుకార్క ఆవ్ అయలయ్, గని ఆమ్ పున్నిమ్ సుదల్ మెన ఉచరంతసక బుకార్క నాయ్" మెన యేసు సంగిలన్.

చువ్వె తతిన్చి రిసా ప్రెజల్ యేసుక పుసిలిసి

(మత్త 9:14-17; లూకా 5:33-39)

18 బాప్తిసుమ్ దెతె తిలో యోహానుచ సిన్సుల్ కి, పరిసయ్యుల్ కి చువ్వె తతికయ్, ప్రెజల్ సగుమ్జిన్ యేసుతె జా కెర, "యోహానుచ సిన్సుల్, పరిసయ్యుల్చ సిన్సుల్, చువ్వె తంక అలవాట్, గని తుచ సిన్సుల్ చువ్వె తత్తి నాయ్. కిచ్చొక?" మెన జోక పుసిల.

19 ఇసి పుసితికయ్, యేసు జోవయింక, "కేన్ పెండ్లితె, జోవయించి నెడిమి పెండ్లిఉబేడో తిలె పొది పెండ్లి

† 2:13 2:13 ఇత్తల్ జా గాడు సముద్రుమచి రితి రూండు తయెది. § 2:14 2:14 'సిన్సు' మెలె, జా దేసిమ్క ఆక్రమించువ కెర్తి రోమ్ దేసిమ్చి వాట డబ్బుల్. జా ప్రబుతుమచి నావ్ తెన్ సిన్సు నజితసక యూదుల్ నిస్కారుమ్ దెకుల; వేర ప్రబుతుమచి నావ్ తెన్ జా డబ్బుల్ నజితతిచి రిసా కి, జేవ్ కెర్త మోసిమ్లుచి రిసా కి. * 2:16 2:16 పరిసయ్యుల్, మోసే తెన్ దేముడు దిలి ఆగ్గుల్ సికడ్డస, సద్దూకయ్యులు యూదుల్క ముక్కిమ్చ వెల్లెల మాన్సుల్ జవుల. ఎత్కికె వెల్లెల పూజర్లు తెన్ యూదుల్చి వెల్లి సబతె వెసుల. జేవ్ పొదులె ముక్కిమ్క జెవ్వె ఎత్కి అదికారుమ్ తిలో దేముడుచి నిదానుమ్ ప్రెజల్క సికడుక.

విందుతె బుకార్లన చువ్వె తవుల గే? నాయ్! జలె, పెండ్లిఉబేడో జోవయించి నెడిమి తతి ఎదిలి సేంపుక జేవ్ చువ్వె తంక బెదె నాయ్. సర్ల తెన్ తవుల.

20 జలె, పెండ్లిఉబేడోచి పచ్చెన జలనచి నెడిమి తెంతో జోక దెర వేరతె కడ నిలె, జేవ్ మాన్సుల్ ఏడ ఏడ చువ్వె తవుల.

21 “అన్నె, పొర్ని పాలుమ్ చిరి జా తిలెగిన, మాసికచి రిసా నే కేడయ్లి నే కేడై నోవి గండ కో జాన్ల మాన్సుల్ గల్లి నాయ్. ఏక్ వేల, దస్సె, తొలితో నే కేడై నే కేడయ్తె గల తిలెగిన, జా ఒండి పాలుమ్ కేడై, జా మాసిక కడెదే. మాన్సు జా పాలుమ్ గలనై, అప్పు జలి పొర్ని బట్ట నోవి బట్టచి మాసిక బెదయ్లి కుటు సాడి చిరి జయెదె, చి అగ్గెచి కంట వెల్లి బొరొ జయెదె.

22 “పిమ్మట్, పొర్నిచి కాయ తెన్ ఒత్త నోవి ద్రాచ రస్సుమ్ సువితి నాయ్. కిచ్చొక మెలె, జా కాయ పొర్ని జలి రిసా, జాచితె నోవి ద్రాచ రస్సుమ్ సువితిగిన, జా పులుక నెతిరి రిసా, జా రస్సుమ్ పొంగుప జలె పొది జా కాయ పుట్టెదె, జా రస్సుమ్ నూయి జయెదె. దస్సె, కాయ, రస్సుమ్, దొన్ని కి పాడ్ జా గెచ్చుల. జాకయ్, నోవి ద్రాచ రస్సుమ్క నోవి కయల్ అప్సరుమ్.” మెన్ జోక పుసితి మాన్సుల్క యేసు సంగిలన్.

పండితుల్ యేసుక గోల కెర్లిసి
(మత్త 12:1-8; లూకా 6:1-5)

23 జా పొదులె, † ఏక్ సెలవ్ కడన్లి దీసి, యేసుచి సిస్సుల్ పంటో పికిలి బుయి వాట్ గెతె తిల. వాట్ సాడి పికిలి పంటోచ ఎన్నులు దొన్ని జోచ సిస్సుల్ కోడ కయ్ల.

† 2:23 2:23 ఎత్తి సెన్సర్ యూదుల్క బక్తి కెర్తి సెలవ్ కడ దీసి జయెదె. జా దీసి జోవయించ నబ గెరలె గెచ్చ, దేముడుచి కొణో నూన కెర, ఎత్తి అదికారుమ్ తిలో దేముడుక బక్తి కెరుల. జోక ‘యెహోవ’ మెన నావ్ తయెదె. జా దీసి ‘కిచ్చొ కామ్ కెర నాయ్’ మెన జో ఎత్తి అదికారుమ్ తిలో దేముడు సంగిలిన్క యూదుల్చ వెల్లెల మాన్సుల్ ప్రజల్క జాడు వయడ్లి రితి కెర కామ్ నే కెర్లినిచి రిసా ఒగ్గర్ అగ్గల్ అచ్చి ఉచర అచ్చి. ఇన్నె, దొన్ని ఎన్నులు కోడ్లిన్క ‘కామ్’ మెన నింద కెర్తి. † 2:25 2:25 దావీదు ఒగ్గర్ పూర్ణమ్ యూదుల్క రానొ జా తిలన్. యేసు జోచి నెకుమతె జెర్లిలన్. అబ్రాహామ్ తెన్, అన్నె దొగుల తీగ్ల తెన్, దావీదుక ‘ముక్కిమ్చొ పూర్ణమ్చొ’ మెనల.

24 జేవ్ సిస్సుల్ ఎన్నులు కోడ్లిసి, జలె, పరిసయ్యుల్ సగుమ్జిన్ దెక కెర, ‘జేవ్ దస్సి కెర్లిసి కామ్ కెర్లి రితి జతయ్’ మెన, “ఈందె, సెలవ్ కడన్లి దీసి కెరుక నాయిమ్ నెంజిలిసి కిచ్చొక తుచ సిస్సుల్ కెర్తి?” మెన యేసుక గోల కెర్ల.

25 యేసు జోవయింక, “† దావీదు పూర్ణమ్చొ జో తెన్ తిలన, చూ కెర్తికయ్ కిచ్చొ కెర్ల గే తుమ్ కెయ సదు కెర్చు నాయ్ గే?

26 మెలె, అబ్యాతారు మెలోసా ఎత్తిక వెల్లో పూజరి జా తిలి కాలుమ్, దేముడుచి గుడి తెడి దావీదు పెన కెర, దేముడుచి గుడిచ పూజర్లు దేముడుక అర్పితుమ్ దిల పోడియె వెంటన, పూజర్లు కంక జయెదె గని అన్నె కో కి కంక నెంజె మెన జాన్లె కి, జో తెన్ తిలనక వంట దా, జోవయింతెన్ కయ్ల!” మెన జేవ్ పరిసయ్యుల్క యేసు సంగిలన్. జోవయింక అన్నె,

27 “సెలవ్ కడన్లి దీసి మాన్సుల్క ఒగ్గర్ ఏలుప కెర్తు మెన నాయ్, గని మాన్సుల్క ‘చెంగిల్ తత్తు’ మెనయ్ దేముడు సెలవ్ కడన్లి దీసి దిలన్.

28 జలె, సెలవ్ కడన్లి దీసిచి ఉప్పిరి ఆవ్ మాన్సు జా జెర్మున్ అయ్లోసొక అదికారుమ్ అస్సి” మెన పరిసయ్యుల్క యేసు జబాబ్ దిలన్.

3

అతు లంబ గెలో మాన్సుక యేసు చెంగిల్ కెర్లిసి

(మత్త 12:9-14; లూకా 6:6-11)

1 తెదోడి జా కపెర్నహూమ్ పట్టుమ్తె యూదుల్చి నబ గెరి యేసు అన్నె గెచ్చ,

† 2:23 2:23 ఎత్తి సెన్సర్ యూదుల్క బక్తి కెర్తి సెలవ్ కడ దీసి జయెదె. జా దీసి జోవయించ నబ గెరలె గెచ్చ, దేముడుచి కొణో నూన కెర, ఎత్తి అదికారుమ్ తిలో దేముడుక బక్తి కెరుల. జోక ‘యెహోవ’ మెన నావ్ తయెదె. జా దీసి ‘కిచ్చొ కామ్ కెర నాయ్’ మెన జో ఎత్తి అదికారుమ్ తిలో దేముడు సంగిలిన్క యూదుల్చ వెల్లెల మాన్సుల్ ప్రజల్క జాడు వయడ్లి రితి కెర కామ్ నే కెర్లినిచి రిసా ఒగ్గర్ అగ్గల్ అచ్చి ఉచర అచ్చి. ఇన్నె, దొన్ని ఎన్నులు కోడ్లిన్క ‘కామ్’ మెన నింద కెర్తి. † 2:25 2:25 దావీదు ఒగ్గర్ పూర్ణమ్ యూదుల్క రానొ జా తిలన్. యేసు జోచి నెకుమతె జెర్లిలన్. అబ్రాహామ్ తెన్, అన్నె దొగుల తీగ్ల తెన్, దావీదుక ‘ముక్కిమ్చొ పూర్ణమ్చొ’ మెనల.

పెన, కిచ్చొ దెకిలన్ మెలె, ఆతు లంబ గెలోసా ఎక్కిలో ఒత్త అస్సె.

2 జలె, 'బక్తి కెర్తి సెలవ్ కడన్లి దీసి యేసు జో మాన్సుక చెంగిల్ కెరెదె గే నాయ్ గే' మెన దెకుక మెన, వెల్లెల మాన్సుల్ రకితె అస్తి. 'జోక చెంగిల్ కెర్లిగిన, సెలవ్ కడన్లి దీసి కామ్ కెర్లి రితి జయెదె, చి యేసుక నేరిమ్ వయడుక జయెదె' మెన ఉచర అస్సి.

3 జేవ్ వెల్లెల మాన్సుల్ దస్సి రకితె తతికయ్, యేసు జో ఆతు లంబిలోసొక దెక, "ఇత్తల్ జే!" మెన సంగ కెర,

4 జేవ్ వెల్లెల మాన్సుల్క దెక, "సెలవ్ కడన్లి దీసి ఎక్కిలోక చెంగిల్ కెరుక నాయిమ్ గే, గార్ కెరుక నాయిమ్ గే? జోచి ప్రానుమ్ రచ్చించుప కెరుక గే, జోక మార గెలుక చెంగిల్ కి?" మెన జోవయింక పుసిలన్. గని జేవ్ తుక్కి తిల.

5 జోవయించి మెన్సుతె ఇదిల్ కన్కారుమ్ కి జతి నాయ్, చి రిసా యేసు దుకుమ్ జా, కోపుమ్ తెన్ ఒత్త తిలనక దెక కెర, జో మాన్సుక అన్నె దెక, "తుచ్చొ ఆతు చంపొ కెరు" మెన జోక సంగితికయ్, జో ఆతు చంపొ కెర్లన్, చి జా ఆతు చెంగిల్ జలి.

6 యేసు కెర్లిసి దెక కెర, పరిసయ్యుల్ బార్ జా, హేరోదు పచ్చెన జతన తెన్ నబ కెర, "జోక కిసి మారుమ?" మెన కుట్ర ఉచర్ల.

బార్జిన్ మాన్సుల్ యేసుతె జా కెర బెర తిలిసి

7 యేసు బార్ జా కెర, జోచి సిన్సుల్ తెన్ జా గలిలయ ప్రాంతుమ్చి నముద్దుమ్ గాడుచి ఒడ్డుతె గెలన్. ఒత్తవ ప్రెజల్ బార్జిన్ జనాబ్ జోచి పట్టి

* **3:4 3:4** ఎత్తి సెన్సర్ యూదుల్క బక్తి కెర్తి సెలవ్ కడ దీసి జయెదె. జా దీసి జోవయింక నబ గెరెత్ గెచ్చు, దేముడుచి కొడో సూన కెర, ఎత్తి అదికారుమ్ తిలో దేముడుక బక్తి కెరుల. జోక 'యొహోవ' మెన నావ్ తయెదె. జా దీసి 'కిచ్చొ కామ్ కెర నాయ్' మెన జో ఎత్తి అదికారుమ్ తిలో దేముడు సంగిలిన్క యూదుల్వ వెల్లెల మాన్సుల్ ప్రెజల్క జాడు వయడ్లి రితి కెర కామ్ నే కెర్లిన్చి రిసా బార్జిన్ ఆగ్గుల్ అచ్చి ఉచర అస్సి. ఇన్నె, దొన్నె ఎన్నులు కోడ్లిన్క 'కామ్' మెన నింద కెర్తతి.

గెల. పిమ్మట్, జో కెర్ల కమొచి రిసా సూన తా, యూదయ ప్రదెసిమ్ తెంతో,

8 యెరూసలేమ్ పట్టుమ్ తెంతో, ఇదుమయ ప్రాంతుమ్ తెంతో, యోర్దాను గాడు ఒత్తల్తో తెంతో, పడ్డో సీదోనుచి తూరు మెల పట్టల్చి ప్రాంతుమ్ తెంతో, దూర్దూరిచ మాన్సుల్ బగ్గర్ బగ్గర్జిన్ జనాబ్ జా కెర, ఒత్త యేసుతె జా బెర్ల.

9 జలె, "ఈందె, ప్రెజల్ వెలపెలి జతతి. ఇసి జలె, దస్సి ప్రమాదుమ్ నే జతి రిసా, దోని ఏకక సంగ తా" మెన, సిన్సుల్క సంగిలన్.

10 కిచ్చొక మెలె ప్రెజల్తె బగ్గర్ బగ్గర్జిన్చ జొర్టోల్ గట్రక యేసు గెచ్చయ్తికయ్, "జోక చడిలె జలెకు చెంగిల్ జమ్దె" మెన, అన్నె జబ్బు తిలన ఎత్తిజిన్, జోక చడుక మెన పెలపెలి జతె తిల.

11 పిమ్మట్ జా పొది అన్నె కిచ్చొ జర్లు జతె తిలి మెలె, బూతల్ యేసుక దెకిలె, జేవ్ దెర్లనక సెర్లు సేడవ దా, "దేముడుచొ పుత్తుసి, తుయి" మెన జేవ్ దెర్లనచి చొడివాట్ బూతల్ యేసుచి రిసా కేకుల్ గల్తె తిల.

12 గని, "ఆవ్ కొన్నొ గే తుమ్ కక్క కి సంగుక నాయ్" మెన బూతల్క యేసు ఆడ్ర దిలన్.

బార్జిన్ సిన్సుల్క యేసు అదికారుమ్ దిలిసి

13 తెదొడి యేసు ఏక్ మెట్టయ్ వెగ గెచ్చు, జో ఇస్టుమ్ జల మాన్సుల్క బుకార్లన్, చి జోతె అయ్ల.

14-15 యేసు బార్జిన్ బారికుల్క నిసాన, "తుమ్ అంచి తెన్ తత్తి రిసా తుమ్క ఆవ్ నిసాన అస్సి. పడ్డో, అంచి నావ్ తెన్ తుమ్ బోదన కెర్తి రిసా, అంచి నావ్ తెన్ బూతల్క తుమ్ ఉదడ్డి

రిసా తుమ్క ఆచ్ తెద్రయ్ తసి” మెన, జోవయింక అదికారుమ్ దిలన్.

16 జో నిసాన అదికారుమ్ దిల బారజన్ కొన్స మెలె, ఎక్కిలో సీమోసు మెలోసా, జోక ‘పేతురు’ మెన యేసు పడ్డో ఆసిమ్ నావ్ తిలన్.

17 జెబెదయి మెలో ఎక్కిలోచ దొగుల పుత్తర్కులు, మెలె, యాకోబు చి యోహాను మెలో బావోసి. ‘ఉర్ముల్ జల మాన్సుల్’ మెలి అర్దుమ్ తెన్ ‘బోయనేర్గన్’ మెన జేవ్ దొగులక యేసు ఆసిమ్ నావ్ దిలన్.

18 పిమ్మట్, అన్నె కొన్స మెలె, అంద్రెయ, పిలిప్, బర్తోలోమయి, మత్తయి, తోమా. పడ్డో అల్పుయి మెలో ఎక్కిలోచో యాకోబు మెలో పుత్తుసి, పడ్డో తదయి, †కనానుచో జలో సీమోసు మెలో అన్నెక్కో.

19 అన్నె కొన్సో మెలె, ఇస్కరియోతు మెలి గవ్విచో యూదా మెలోసా. జో పడ్డో విరోదుమ్ సుదల్చి అత్తి యేసుక దెర దిలోసా. తెదోడి యేసు కపెర్నహూమ్ గెరి గెలన్.

20 యేసు గెరి గెతికయ్, ఒగ్గర్జిన్ జనాబ్ జోతె అన్నె బెర్లె. జేవ్ ఒత్త బెర్లి రిసా, అన్నిమ్ కంక కి యేసుక సెలవ్ నాయ్.

21 దస్సి యేసు జోచి బోదన జోచ కమొ కెరుక ఆన జా ఎద్దెరె పుండె నాయ్ చి రిసా “వెర్రి జా తయెదె” మెన మాన్సుల్ సంగిత్ తిలిసి నూన కెర, జోక దెర, గెరి కడ నెంక మెన, జోచి కుటుంబుమ్చ ‡ బార్ జల.

పండితుల్ యేసుక నింద కెర దూసుప కెర్లిసి

22 జా మదెనె, యెరూసలేమ్ పట్టుమ్ తెంతో జా తిల, మోసే తెన్ దేముడు దిలి ఆగ్నల్ సికడ్డన, యేసు ఉత్తిర్గితె అయ్ల. జా కెర, యేసుచి రిసా

“ ‘బయెల్జెబూల్’ మెలో జో వెల్లో బూతుమ్ జోక దెర అస్సె”, “బూతల్క కిరానొ జల్చి నావ్ తెన్ ఈంజో బూతల్క ఉదడ్డయ్” మెన సంగితె తిల.

23 జలె, యేసు జోవయింక పాసి బుకారా కెర టాలివో కెర ఇసి మెలన్. “సయ్తాన్ కిసి జా జోక జోయ్యి ఉదడెదె! బెదె నాయ్!

24 మెలె, కేన్ జవున్ రాజిమ్చ ప్రెజల్ జలెకు విరోదుమ్ కెరన వర్స వర్స జా జోవయింక జెవ్వి యుద్దుమ్ కెరన్లె, జా రాజిమ్ టీవో జంక నెత్త నాసెనుమ్ జా గెచ్చెదె.

25 పడ్డో, కేన్ గెర్చ జలెకు జోవయింక జెవ్వి విరోదుమ్ కెరన్లె, వర్స వర్స జా గెచ్చుల, చి కట్టు పిట్టవన పాడ్ జా గెచ్చుల.

26 జలె, దస్సి, సయ్తాన్ జోక జోయ్యి విరోదుమ్ జలి రితి జా జోచ సాంత సేవ కెర్సక ఉదడుక బెదె నాయ్. జో దస్సి జోక జోయ్యి విరోదుమ్ జలెగిన, జోచి రాజిమ్ టీవో జయె నాయ్, నాసెనుమ్ జా గెచ్చెదె.

27 “గని, కేన్ గెర్చో ఎజోమాని బలుమ్ సుదో జలె, జోకయ్ తొలితో బందిలెకయ్, జోచి గెరి పెన జోచి సామన్ చోరుక జయెదె. గని జోక తొలితో బంద తిలె, జోచి గెర్చి ఎత్కి చోర గెలుక జయెదె.

28 “ముక్కిమ్క తుమ్క ఆచ్ గట్టిజ సంగితసి. కిచ్చో మెలె, ఎక్కిక పిట్టవ, మాన్సుల్ కెర్త పాపల్ దూసెనల్ ఎత్కి జోవయింక చెమించుప కెరుక జయెదె.

29 గని, దేముడుచి సుద్ది తిలి ఆత్మక కో దూసుప కెరుల గే, జెవ్వి కెయ్యక కి చెమించుప జతి నాయ్. జోవయించి పాపుమ్ కెయ్క తెయ్క తయెదె, చి నాసెనుమ్తె గెచ్చుల” మెన జేవ్క యేసు సంగిలన్.

† 3:18 3:18 ‘కనానుడు జలో సీమోసు’ మెన రెగ్గ అస్సె. సాంత దేసిమ్ ఏలుప కెరంతి ఆన తిల ఒత్తవ మాన్సుల్క ‘కనానులు’ మెన ఆసిమ్ నావ్ తయెదె, బెర్రి. ‡ 3:21 3:21 జోచి నజరేతు గవ్వి తెంతో బార్ జల. యేసు కపెర్నహూమ్ పట్టుమ్తె తిలన్. § 3:22 3:22 ‘బూతల్క రానొ జలోసా’ మెలె, సయ్తాన్.

30 కిచ్చొక మెలె, యేసుచి నుద్ది తిలి ఆత్మ జలెకి, 'జోక సయ్తాన్చి ఆత్మ అస్సె' మెలి రితి, "జోక బూతుమ్ దెర అస్సె" మెన జేవ్ దూసుప కెర తిల.

కొన్న యేసుక కుటుంబుమ్ జవుల గే జొయ్యి సంగిలిసి
(మత్త 12:46-50; లూకా 8:19-21)

31 తెదొడి, యేసుచి అయ్యసి, బావుడ్లులు, జో తిలిన్తె పాచ కెర, విదె టీవొ జా కెర, "అమ్ జా అస్సుమ్. బార్ జవున్" మెన సంగ తెద్రయ్ల.

32 జలె, యేసుచి నుట్టునంత ఒగ్గర్జిన్ జనాబ్ వెన తిల. జేవ్ జలె, జోక "ఈందె, అయ్యది చి తుచ బావుడ్లు జా కెర, విదె టీవొ జా కెర తుక బుకార్తతి" మెన సంగ దిల.

33 యేసు జోక కిచ్చొ జబాబ్ దిలన్ మెలె, "కొన్న అంక అయ్య బావుడ్లు జవుల గే జాన్సు గె?" మెన సంగ,

34 జోచి నుట్టునంత వెన తిల ప్రెజల్క దెక, జోవయింక దెకవ, "ఈందె, అంచి అయ్య, అంచ బావుడ్లు!

35 దేముడుచి ఇస్టుమ్ రితి కో కెరుల గే, జెవ్వి అంక బావొ, బేని, అయ్య జవుల" మెన సికడ్లన్.

4

టాలివొ సంగ యేసు బోదన కెర్లన్
(మత్త 13:1-9; లూకా 8:4-8)

1 యేసు నముద్దుమ్ గాడుచి ఒడ్డుతె అన్నె గెచ్చు కెర, అన్నె బోదన కెరుక దెర్లన్, గని ఒగ్గర్జిన్ జనాబ్ జోచి నుట్టునంత బెర వెలవెలి జతె తిలి రిసా, యేసు ఏక్ దోనితె వెగ వెన, ఒడ్డు తెంతో ఇదిల్ దూరి గెలన్. బెర తిల మాన్సుల్ ఎత్కిజిన్ జా ఒడ్డుతె టీవొ జా తిల.

2 యేసు జోవయింక కిచ్చొ కిచ్చొ సికడ్డి రిసా, ఒగ్గర్ టాలివొ సంగ బోదన కెరుక దెర్లన్.

బుయ్యె ఉంపిలి బీక టాలి

జో జోవయింక బోదన కెరుక,
3 "ఈందె, తుమ్ నూన! ఉంపితొసా ఎక్కిలో, బీ ఉంపుక బార్ జలన్.

4 జో ఉంపితె తతికయ్, సగుమ్ బీ బయిలె వాట్ పక్కయ్ సేడ్డికయ్, పిట్టల్ ఉత్త జా కా గెల.

5 అన్నె సగుమ్ బీ ఒగ్గర్ మత్తి నెంజిలి పత్తురు బుయ్యె సేడ్లన్. ఉప్పిరి ఇదిలిదిల్ మత్తి తిలి రిసా, ఒత్త సేడ్డి బీ బేగి గజ్జల్ జలి.

6 బేగి గజ్జల్ జలె కి, ఒప్పడ్ లయితికయ్, పత్తలె మొక్కల్ డడ్డ గెల, చి చెర్రో బుయ్యె తెడి వెన వడ్డుక నెత్తిర్లి రిసా, జేవ్ మొక్కల్ నూకా గెచ్చు మొర గెల.

7 అన్నె సగుమ్ బీ కంట దుబ్బుల్ తిలిన్తె సేడ గజ్జల్ జా మొక్కల్ జలన్. గని ఒత్త తిల కంట మొక్కల్ వడ్డ కెర ఒత్త సేడ్డి బీచ మొక్కల్క వెల గెల్లికయ్, జా బీచ మొక్కల్ ఎన్నులు నే దెర్తె కిచ్చొ పలితుమ్ దెయె నాయ్.

8 గని, అన్నె సగుమ్ బీ చెంగిలి బుయ్యె సేడ కెర, చెంగిల్ వడ్డ చెంగిల్ పంటో పిక, విస్సెక్ దెన్ను వంతుల్, తిని విస్సా వంతుల్, పుంజెక్ వంతుల్, పలితుమ్ దిలి."

9 అన్నె, "నూన్త కంగ్గొ తిలన నూన!" మెన యేసు సంగిలన్.

10 బెర తిల మాన్సుల్ ఉట్టు గెతికయ్, యేసు తెన్ బెదిల మాన్సుల్ సగుమ్జిన్ జోచ బారజిన్ సిస్సుల్ తెన్ బీచి రిసాచి టాలిచి అర్దుమచి రిసా పుసిల.

11 చి, జో జోవయింక, "దేముడుచి రాజిమచి రిసాచి గుట్టు జలిసి జానస్తూ మెన తుమ్క నెలవ్ దా అస్సె, గని అమ్చి తెన్ నే బెదిలనక ఎత్కి టాలివొ తెన్ని సంగుక అస్సె.

12 కిచ్చొక మెలె, పూర్ణుమ్ రెగిడ్డి రితి,

* ఆవ్ కెర్త కమొ కచితుమ్ దెకుత్ గని అర్దుమ్ చినుత్ నాయ్. ఆవ్ సంగితి బోదన కచితుమ్ సూనుల, గని అర్దుమ్ కెరంతు నాయ్. నెంజిలె అర్దుమ్ కెరన్లెగిన బుద్ది మార్కుప జా అంచి తెన్ పన్ల చెమించుప జత, మెన రెగ్ల అస్సె.” మెన సంగిలన్.

ఉంపిలి బీచి టాలిచి అర్దుమ్ యేసు సంగిలిసి

13 తెదొడి యేసు జోవయింక అన్నె, “ఈంజ టాలిచి అర్దుమ్ కెరన్సు నాయ్ గె? దస్సి జలె, అన్నె టాలివొచి అర్దుమ్ కీసి కెరంతె!

14 ఈందె, ఉంపిల్సొ బీ ఉంపిలి రితి, ఆవ్ బోదన సూనయ్తసి.

15 వట్టె ఉంపిలి బీక జర్గు జలిసి, జలె, ఈంజ బోదన సగుమ్జిన్ సూన్లినచి రితి జతయ్. వట్టె ఉంపిలి బీక పిట్టల్ కీసి జా కెర కా గెల గే, దస్సి, సగుమ్జిన్ మాన్సుల్ ఈంజ బోదన సూన్ల బేగి, సయ్తాన్ జా కెర, జోవయింక పెట్టి తెంతో ఉర్లిలి రితి కెర వచ్చు వడ్డయ్.

16 “పత్తురు బుయ్యె ఉంపిలి బీక జర్గు జలిసి, జలె, అన్నె సగుమ్జిన్ మాన్సుల్చి బోదన సూన జితిన్చి రితి జతయ్. మెలె, జా బీ బేగి గజ్జల్ జలి రితి జా, జేవ్ మాన్సుల్ సుబుమ్ కబుర్ సూన్ల బేగి, సర్ల జా, ‘నంపజతసుమ్’ మెనుల.

17 గని జోవయింక సొంత పెట్టి సుబుమ్ కబుర్చ చెర్రో నెంజిలి రిసొ, గడియ జిలి రితి డీసిలెకి, చి రిసొ కిచ్చొ జవున్ బాద సేడ్లె జలెకు, నెంజిలె వేర మాన్సుల్ జాచి రిసొ జోవయింక అల్లర్

కెర్లె జలెకు, జేవ్ మాన్సుల్ బమ్మ జా, బే బేగి నమకుమ్ ముల దెవుల.

18 “అన్నె సగుమ్జిన్ మాన్సుల్, చి బోదన సూన, కంట దుబ్బుల్ తిలిన్తె ఉంపిలి బీ రితి జతయ్. మెలె, చి బోదన జేవ్ సూన్లె కి,

19 ఈంజయ్ లోకుమ్తె తిలిసి ఎత్కిక ఉచర్తె తా, ‘కీసి జా జిమ్దె’ మెన చింత గలనుల, సొమ్మారుమ్ జంక ఆస జవుల, దస్సి, జా ఆస జవున్, జా చింత జవున్, జోవయింక పెట్టి పెన తా, జా బోదనక పెలగెలి రితి జయెదె, చి రిసొ, జా బోదన జోవయింతె పలితుమ్ దెయె నాయ్.

20 “అన్నె సగుమ్జిన్ మాన్సుల్ బోదన సూన, చెంగిల్ బుయ్యె ఉంపిలి బీ రితి జతయ్. మెలె, చెంగిలి బుయ్యె ఉంపిలి బీతె విస్సిక్ దెస్సు వంతుల్, తిన్ విసొ వంతుల్, పుంజెక్ వంతుల్ కీసి పలితుమ్ దెవుల గే, దస్సి, జేవ్ మాన్సుల్ కి బోదన సూన, నంపజా గెచ్చ, †పలితుమ్ దెవుల” మెన బోదన కెర్లన్.

దీవు లగితిన్క టాలి
(లూకా 8:16-18)

21 సిస్సుల్క యేసు అన్నె సంగిలిసి కిచ్చొ మెలె, “దీవు దీవుకంబుమ్చి ఉప్పిరి తివుల గని ఆరి నాడిచి తెడి జవున్, మంచుమ్చి తెడి జవున్ తింకయ్ మెన కేన్ గెర్చ మాన్సుల్ దీవు ఆనుల గే? నాయ్. ‘కామ్క జెవున్’ మెన దీవుకంబుమ్చి ఉప్పిరి తివుల.

22 జలె, డీసున్ మెనయ్ కిచ్చొ జవున్ లుంకడ తవుల. ఆకర్క బార్ కెర్లి రిసొయి కిచ్చొ జవున్ గుట్టు లుంకడ తవుల.

23 సూన్తన కంగ్గొ కక్క తిలె, సరిగా సూన్సు!”

* 4:12 4:12 నెంజిలె “జోవయింక పాపుమ్ చెమించుప జతి రితి పసుల అంచితె జెతు నాయ్ మెన, తుమ్ కచితుమ్ దెకితను గని అర్దుమ్ చినుతు నాయ్, ఆవ్ సంగితి బోదన కచితుమ్ సూన్తు, గని అర్దుమ్ కెరంతు నాయ్”. † 4:20 4:20 ‘అత్తుపలితుమ్ దెరుల’ మెలె, దన మాన్సుల్ ప్రబులి బుద్ది ఇండుల, చి అన్నె మాన్సుల్ దెక, జేవ్ కి ప్రబుచి రాజిమ్తె బెదుక ఇస్టుమ్ జా, సుబుమ్ కబుర్ సూన నంపజా బెదుల.

24 అన్నె జోవయింక, “తుమ్ కిచ్చొ సూన్తె గే, సరిగా అర్దుమ్ కెరన దెకన. †తుమ్ కేన్ కొల్ల తెన్ కట్టడతె గె, జయి కొల్ల తెన్ అన్నె తుమ్కయ్ కి కట్టడ దెవుల. తుమ్క అన్నెయ్ మీన దెయిందె.

25 తిలోసాక అన్నె దెంక జయెదె, గని నెంజిలోసాక జలె, జోవయింక తిలిసి కి జోతె తెంతొ కడ నెంక జయెదె” మెన యేసు సంగిలన్.

బీ గజ్జల్ జా వడ్డితిచి టాలి

26 యేసు సిస్సుల్క అన్నెక్ టాలి సంగిలన్. “ఎక్కిలో బుయ్యె బీ గల్లి రితి అస్సె. జా బీ కిసి జయెదె గే, దేముడుచి రాజిమ్ పూర్తి జతిన్ తెన్ కి దస్సి.

27 జలె, జో మాన్సు జోచి బట్టి బీ గల తా, జో అలవాట్ జలి రితి, రోజుక అందరె నిజ, పెందలె ఉట్ట, మాములుమ్ జితె తయెదె. మదెనె, జా బీ గజ్జల్ జా వడ్డుక దెరెదె. కిసి వడ్డితయ్ గే జో మాన్సు నేనె.

28 గని జా బీ బుయ్యె తా, దస్సి జేవ్చి ఇస్టుమ్క మెలి రితి జియ గజ్జల్ జా వడ్డ, తొలితో మొక్క, పడ్డె ఎన్నులు, పడ్డె పికిలి పంటొ దెయెదె.

29 జలె, పంటొ పికిలి పొది, ‘లాయితి సమయుమ్ జా అస్సె’ మెన చీన, జో మాన్సు బార్ జా లాయెదె” మెన సిస్సుల్క యేసు సంగిలన్.

సార్సు గిడ్డ రూకు జా గెతిన్చి టాలి (మత్త 13:31-32,34-35; లూకా 13:18-19)

30 జో అన్నె ఇసి మెలన్, “దేముడుచి రాజిమ్ కిసి జతయ్ గే తుమ్ అర్దుమ్ కెరంతి రిసా కిచ్చొ టాలి ఉచరుమ్?

31 ఇసి జయెదె, బుయ్యె ఉంపిలి సార్సు గిడ్డక జర్లు జతిన్చి రితి జయెదె. మెలె, జా గిడ్డ ఈంజ లోకుమ్చ గిడ్డల్

ఎత్కిచి కంట ఇదిలిసి తిలె కి, ఉంపిలె, గజ్జల్ జా వడ్డిలి మెలె,

32 రోన్తె గల్లి మొక్కల్ ఎత్కిచి కంట వెల్లో జా, జా మొక్కచ కొమ్మల్ వడ్డిలె, జా రూక్చ కొమ్మల్చి నీడతె ఆగాసుమ్చ పిట్టల్ జోవయించ గూడల్ బంద చెంగిల్ తంక జయెదె” మెన యేసు బోదన కెర్లన్.

33 ఒగ్గర్ టాలివొ సంగయ్ యేసు ప్రెజల్క నుబుమ్ కబుర్ బోదన కెర్లన్, జేవ్ సూనుక అర్దుమ్ కెరనుక తెరితి రితి.

34 టాలివొ నెంతె జోవయింక సికడ్డె నాయ్. గని ప్రెజల్ నెంజిలి పొది, జోచ సొంత సిస్సుల్కయ్ అర్దుమ్ ఎత్కి సికడ్డె తిలన్.

35 జా దిసి సాంజ్ జతికయ్, “సముద్రుమ్ జీన ఒత్తల్తో గెచ్చుమ్,” మెన సిస్సుల్క యేసు సంగిలన్.

36 బెర తిల జనాబ్క సిస్సుల్ ముల దా కెర, యేసు అగ్గె తెంతొ వెన తిలి దోనితె వెగ కెర, జోవయింతెన్ గాడు ఒత్తల్తో గెచ్చుక మెన దోని జీనవుక దెర్ల. అన్నె సగుమ్ దోనివొ కి జో తిలి దోని తెన్ తిల.

37 జలె, యేసు దోనితె గెతె తతికయ్, వాదు ఒగ్గర్ కెర్తికయ్, కెర్తల్ దోనితె పెట్టి జా డేచిత్ తిలి రిసా, దోనితె పాని బెరితె తిలి.

38 ఇసి జతె తిలె కి, యేసు దోనితెచి పడ్డెచి బల్లయ్ నిజ తిలన్. నిజ తతికయ్, సిస్సుల్ బమ్మ జా, గురుబాబు, అమ్ మొల్లె తుక బాద నాయ్ గె? మెన కేక్ గల, జోక ఉట్టుయల.

39 జో ఉట్ట, వాదుక గోల కెర, “సేంతుమ్ జా తుక్లె తా” మెన సముద్రుమ్క సంగితికయ్, వాదు ముల దిలి, చి ఎత్కి అన్నె సేంతుమ్ జా గెలి.

ఇసి సేంతుమ్ జతికయ్,

† 4:24 4:24 ఇన్నెచి అర్దుమ్ కిచ్చొ మెలె, ‘తుమ్ అర్దుమ్ కెరంతి కొల్లి తుమ్క అన్నె సికడుక జయెదె. అన్నెయ్ సికడిందె 25 అర్దుమ్ తిలోసాక అన్నె సికడుక జయెదె, గని అర్దుమ్ నెంజిలసక తిలి అర్దుమ్ జోవయింతె తెంతొ కడ నెంక జయెదె’.

40 జేవ్ సిస్సుల్క యేసు, “కిచ్చొక బితను? అంచి రిసా తుమ్క ఇదిల్ కి నముక్తుమ్ నాయ్ గే?” మెన సంగితికయ్,

41 జేవ్ ఎత్కిజిన్ బియఁ గెచ్చు, ఎక్కిలోక ఎక్కిలో “ఈంజొ కొన్నె జయెదె? వాదు సముద్రుమ్ కి ఇన్నెచి కోడ్ రితి కెర్తతి!” మెన ఆచారిమ్ జా లట్టబనుక దెర్.

5

బూతల్ దెర్గొసాక యేసు చెంగిల్ కెర్సిసి

(మత్త 8:28-34; లూకా 8:26-39)

1 యేసు జోచ సిస్సుల్ తెన్ సముద్రుమ్ జిన కెర, ఒత్త తిలి *గెరాసేనుల్చి ప్రాంతుమ్తె పావెల.

2 యేసు దోని తెంతో ఉత్తిర్లి బేగి, బూతుమ్ దెర్లి మాన్సు ఎక్కిలో మెన్నెలె తెంతో బార్ జా, జోక దన్నుల్ జలో.

3 జో మాన్సు మెన్నెలె జితె తిలో. జోక బూతల్ దెర్లి రిసా, గొల్పుల్ తెన్ కి జోక కో అన్నె బందుక నెతిర్ల.

4 ఒగ్గర్ దవులు జోచ అత్తో చట్టొక గొల్పుల్ తెన్ మాన్సుల్ అగ్గె బంద తిల, గని కెత్తి సుట్టు జవున్, కెద్ది డిట్టుమ్ బంద తిలె కి, అత్తోచ గొల్పుల్ కుట్టవుక, చట్టొచ గొల్పుల్ గండల్ కెరుక, దన్నె జితె తిలో. జోక అన్నె ముద్దొ కెరుక కో కి నెతిర్ల.

5 జో రాతి మెద్దెనె మెన్నెలె డొంగ్రలె బుల బుల, కెద్దొడి తెదొడి ఒర్న, జోక జొయ్యి పత్రల్ తెన్ పెటన, బాద కెరంతె తిలన్.

6 జలె, జో దూరి తెంతో యేసుక దెక, నిగ జా, నెర్ను సేడ యేసుక జోకర,

7 “ఓ యేసుప్రబు, ఎత్కిచి ఉప్పిరి తిలో దేముడుచొ పుత్తుసి, తుయి. అంచి తెన్ తుక కిచ్చొ కామ్? అంక అల్లర్ నే కెర్తి

రితి దేముడుచి నావ్ తెన్ ఒట్టు గలను.” మెన గట్టిజ కేకుల్ గలుక దెర్లొ.

8 కిచ్చొక దన్నె జలొ మెలె, “ఓ బూతుమ్, ఈంజొ మాన్సు తెంతో బార్ జా ముల దేను!” మెన యేసు సంగ తిలో.

9 జలె, యేసు జో బూతుమ్క అన్నె, “తుచి నావ్ కిచ్చొ?” మెన పుసిలన్, చి జో యేసుక “అంచి నావ్ ‘సయ్న్యమ్’. ఎత్తివాట్ జిన్ బూతల్ అన్నుమ్” మెన సంగ,

10 “అమ్క ఈంజ దేసిమ్ తెంతో ఉదడ గెలు నాయ్.” మెన జో బూతుమ్ యేసుక బతిమాల్పా జా సంగిలన్.

11 జలె, జా మెట్టయ్ వెల్లి మంద అండ్రులు కతె తిల.

12 చి “అదె, జేవ్ అండ్రుల్క అమ్ దెర్లి రితి సెలవ్ దా, అమ్క జోవయింతె తెద్దవు” మెన యేసుక జేవ్ బూతల్ బతిమాల్పా జా సంగిల.

13 దన్నె జతికయ్, యేసు సెలవ్ దిలన్. సెలవ్ దెతికయ్, జేవ్ బూతల్ బార్ జా జో మాన్సుక ముల దా, జేవ్ అండ్రుల్చి పెట్టి పెసిల, చి జేవ్ పాసి పాసి దొన్ని వెయలు బోడియె అండ్రులు బమ్మ జా, ఒత్తచి గాటిక నిగ ఉత్త గెచ్చు, గడ్డె సేడ డుజ మొర గెల.

14 జేవ్ అండ్రుల్ దన్నె జతికయి, మంద రకితన బమ్మ జా ఉట్ట నిగ, పట్టుమ్తె, ఒండి ప్రాంతుమ్తె సూనయల, చి జర్గు జలిసి దెకుక మెన, ప్రెజల్ ఎత్కి బార్ జల.

15 జేవ్ ప్రెజల్ ఎత్కి యేసుతె జా, ఒగ్గర్ బూతల్ దెర తిలో జో వెర్లి జా తిలోసా అప్పె చెంగిల్ బుద్ది జా పాలల్ గలన ఒత్త వెన తిలిసి దెక, బియఁ గెల.

16 జో చెంగిల్ జలిసి జర్గు జలి పొది సొంత దెక తిల మాన్సుల్, జలె, జో బూతల్ దెర వెర్లి జా తిలోసాక చి జేవ్

* 5:15:1 గెరాసేనులుక ‘గదరేసులు’ కి నగుమ్తె రెర్ల తవుల. మత్తయి 8:28తె ‘గదరేసులు’ మెన రెర్ల అస్సి.

అండ్రుల్ క జర్గు జలిసి ఎత్తి. పిమ్మట్ అయ్లసక జేవ్ సాచి సంగిల.

17 ఒత్తచ మాన్సుల్ ఎత్తిజిన్ “అమ్చి ప్రాంతుమ్ ముల దా ఉట్ట గో” మెన యేసుక బతిమాల్పా జా సంగిల.

18 పడ్డో యేసు, సిన్సుల్, ఉట్ట గెచ్చుక మెన దోనితె తతికయ్, బూతల్ అగ్గె దెర తిలో జో మాన్సు పట్టి జా, “ఆచ్ కి తుమ్చి తెన్ బెద జెంక అంక సెలవ్ దే.” మెన బతిమాల్పా జా సంగిలన్.

19 గని యేసు దస్సి సెలవ్ నే దెతె, జోక, “పోని, తుయి గెరి గెచ్చు తుచ సొంత మాన్సుల్ క, †ప్రబు తుక కన్కారుమ్ దెక చెంగిల్ కెర ఎదివాట్ దయ కెర్లిసి నంగు” మెన సంగిలన్.

20 జో మాన్సు యేసుక ముల దా ఉట్ట గెచ్చు, యేసు జోక ఎదివాటు దయ కెర్లిన్చి రిసా దెకపోలి మెలి జా ప్రాంతుమ్తెచ పట్టుల్ ఎత్తితె నూనవుక దెర్లో. జా నూనయ్తికయ్, ఎత్తిజిన్ ఆచారిమ్ జల.

యాయారు మెలో అదికారి యేసుచి తోడు నజీలిసి (మత్త 9:18-26; లూకా 8:40-56)

21 యేసు అన్నె దోనితె వెగ గాడు అన్నె జీనీతికయ్, జోచి సుట్టునంత ఎదివాట్ జిన్ జనాబ్ బెర అయ్ల. జో జా ఒడ్డుతె ఉత్త తతికయ్,

22 యూదుల్చి ఒత్తచి సబ గెర్చి అదికారి జలో యాయారు మెలోసా జా కెర, యేసుక దెక కెర, జోచి చట్టె సెర్ను సేడ,

23 “అంచి నాడి జొర్జొ సేడ, జియెదె గే, నాయ్ గే, దస్సి జా అస్సె. తుయి, అమ్తె జా కెర జాక చడిలెగిన, జా చెంగిల్ జా అన్నె జియెదె.” మెన బతిమాల్పా జా జో సంగితికయ్,

24 యేసు జో తెన్ బెద గెలన్. జేవ్ వట్టె గెతె తతికయ్, ఒగ్గర్

ఒగ్గర్ జిన్ జనాబ్ యేసుచి పట్టి జా జోచి సుట్టునంత తా వెలవులి జతె తిల.

25 జలె, బార వెర్సుల్ తెంతో లోయి గెతి బాద తిలి తేర్బోద ఎక్లి జా జనాబ్తె అస్సె.

26 జా సైమచి రిసా చెంగిల్ కెరంతి రిసా, ఎక్కిలోచి పిమ్మట్ అన్నెక్కో గురుతె వర్సు తెన్ గెచ్చు గెచ్చు, జాక తిలి దనుమ్ ఎత్తి విక కెరవన తిలి. దస్సి కెర కెర జలెకి, జా బాద తెన్ నే చెంగిల్ జతె, ఒగ్గర్ జతె తిలి.

27 జలె, యేసుచి రిసా నూన తా, “ఆచ్ జోచ పాలుమ్ జవున్ చడిలె చెంగిల్ జయిందె” మెన ఉచర,

28 యేసుచి సుట్టునంత తిలి జనాబ్చి తెడి పెన, యేసుచి పడ్డో పాసి పాచ కెర, జోచో పాలుమ్క చడిలి.

29 చడిలి బేగి లోయి గెత్తిసి బందు జలి, చి బాద గెచ్చు జివ్ చెంగిల్ జలి మెన చిన్చి.

30 యేసు మాత్రుమ్, జోచి సెక్తిక కో గే, చెంగిల్ జా అస్తి మెన చినిలి బేగి, జా జనాబ్చి నెడిమి టీవో జా పడ్డో పస్ల, “అంచి పాలుమ్ చడిలోసా కో?” మెన సంగిలన్.

31 జోచ సిన్సుల్ జోక, “తుచి ఉప్పిరి మాన్సుల్ పెలవెలి జలెకి, ‘అంక చడిలోసా కో?’ మెన కిచ్చొక పునీతసి?” మెన సంగిల.

32 జలె, కో చడిలన్ గే జానన్క మెన, యేసు అన్నె పస్ల దెకితికయ్,

33 జా తేర్బోద జాక జర్గు జలిసి జాన, బియఁ కెర, అద్దుర్ జా, యేసుచి పురెతో సెర్ను సేడ, జర్గు జలిసి ఎత్తి సత్తిమ్ తెన్ జోక సంగిలి.

34 యేసు జాక, “ఓ పుత్తరి, అంచి ఉప్పిరి తుయి నముకుమ్ తిలి రిసా తుయి చెంగిల్ జా అస్సిసి. సేతుమ్ తెన్ గెచ్చు, చెంగిల్ జా, చెంగిల్ తా” మెన సంగిలన్.

† 5:19 5:19 ‘ప్రబు’ మెలి కిచ్చొ అర్దుమ్ మెలి, ‘ఎత్తిక ఏలుప కెర్తెసా, ఎత్తిక వెల్లో జలోసా’. జా నావ్ యెహోవ దేముడు అబ్సొన్క కి నంగుల, యేసు దేముడు పుత్తున్క కి నంగుల.

6

35 జా తేర్బోదక యేసు దస్సి సంగితె తిలి పొది, దువినచి రిసా యేసుతె జా తిలో అదికారిచి గేర్చ సగుమ్జిన్ జా కెర, జో అదికారిక “తుచి నాడి మొర గెచ్చ అస్సె. ఈంజో గురుబాబుక బుకార్లె లాబుమ్ నాయ్. గురుబాబుక జా బాద పోని” మెన జోక సంగిల.

36 జలె, జేవ్ సంగిలిసి నూన నే నూన్లి రితి జా, యేసు నబగేర్చో జో అదికారిక దెక, “జేవ్ సంగిలిన్క కాతర్ నే కెర్తె, బి నాయ్. నంపజా దయిరిమ్ తెన్ తా” మెన జోక సంగిలన్.

37 ఒత్త తెంతో పేతురు, యాకోబు, యాకోబుచో బావొసి యోహానుక పిట్టవ, జోచి పట్టి అన్నెకో జెంక సెలవ్ నే దా కెర,

38 యేసు, జేవ్ తెన్ జో అదికారిచి గెరి పావ కెర, ఒత్త తిలస ఏడుకుడు జా గోల జతిసి దెకిలన్.

39 జో గెరి పెన, ఒత్త తిలసక దెక, “తుమ్ గోల జా ఏడ్లను కిచ్చొక? ఈంజ బోద మొర గెచ్చె నాయ్ నిజ అస్సె.” మెన యేసు సంగిలన్.

40 దస్సి సంగితికయ్, జేవ్, జోక ఆనిల. గని యేసు జేవ్ ఎత్తిజిన్క బార్ కెర దా, నాడిచ అయ్యన్అబ్బోస్క కి, జో తెన్ అయల సిస్సుల్క కి కడ ఆన, జా నాడి తిలిన్తె గెచ్చ,

41 జా నాడిచి అతు దెర, జాక “ఆవ్ సంగిలయ్, నాడి, ఉట్టు!” మెలి అర్దుమ్ తెన్ “తలీతా కుమి” మెన సంగిలన్.

42 సంగిల్ బేగి, జా నాడి ఉట్టు కెర, ఇండుక దెర్లి. ఒత్త తిలస ఎత్తిజిన్ ఆచారిమ్ జా బలె ఉచర్ల.

43 పడ్డో, జర్గు జలిన్చి రిసా కక్క, సంగుక జయె నాయ్ మెన జాగర్ల సంగ, “నాడిక కిచ్చొ జవున్ అన్నిమ్ దాస” మెన, జా గేర్చక యేసు సంగిలన్.

నజరేతు గవ్విచ మాన్సుల్ యేసుక నే నంపజలిసి (మత్త 13:53-58; లూకా 4:16-30)

1 యేసు ఒత్త తెంతో ముల దా కెర, నజరేతు మెలి జోచి సొంత గవ్వి ఉట్ట జెతికయ్, జోచ సిస్సుల్ జోచి పట్టి అయ్ల.

2 బక్తి కెర్తి సెలవ్ కడన్లి * దీసి, ఒత్తచి సబ గెరి గెచ్చ, యేసు బోదన కెరుక దెర్లన్. జో సంగిలి బోదన నూన, ఒగ్గర్జిన్ మాన్సుల్ ఆచారిమ్ జా, “ఇసి బోదన ఇన్నెక కేనే తెంతో అయ్లి? ఇన్నెక దిలి గ్యానుమ్ కిసిచి? కెర్తి అందుమ్చ వెల్లెల కమె ఇన్నెచి అత్తి జర్గు జతతి!

3 గని ఈంజో దార్చ కామ్ కెర్తొసా జయెదె, మరియచో పుత్తుసి గెద? యాకోబుక, యోసీక, యూదాక, సీమోనుక అన్నొసి జయెదె గెద? ఇన్నెచ బేన్సివో ఇన్నె అమ్చి తెన్ అన్తి గెద?” మెన యేసుచి రిసా అన్మానుమ్ జా నంప కెర్తి నాయ్.

4 జేవ్ దస్సి అన్మానుమ్ జతికయ్, “కేన్ జవున్ మాన్సు దేముడుచి కబుర్ ఆన్తోసా జలె, జోచి సొంత దేసిమ్చ మాన్సుల్, సొంత గేర్చ మాన్సుల్ జోక గవురుమ్ దెకిత్ నాయ్” మెన యేసు, జోవయించి అన్మానుమ్చి రిసా సంగిలన్.

5 ఒత్తచ మాన్సుల్చి అన్మానుమ్చి రిసా, జలె, ఒత్త యేసు కేన్ వెల్లో కమె కెరుక బెదిలన్ నాయ్. ఎక్కి సగుమ్జిన్ జబ్బు తిల మాన్సుల్క బోడి చడ చెంగిల్ కెర్లన్.

‡ 5:41 5:41 మాములుమ్ ప్రజల్ లట్టల్లి అరమయ్ బాస తెన్ చి కోడు, ఈంజ. * 6:2 6:2 ఎత్తి సెన్గర్ల యూదుల్క బక్తి కెర్తి సెలవ్ కడ దీసి జయెదె. జా దీసి జోవయించ సబ గెరెల గెచ్చ, దేముడుచి కొడో నూన కెర, ఎత్తి అదికారుమ్ తిలో దేముడుక బక్తి కెరుల. జోక ‘యోహోవ’ మెన నావ తయెదె. జా దీసి ‘కిచ్చొ కామ్ కెర నాయ్’ మెన జో ఎత్తి అదికారుమ్ తిలో దేముడు సంగిలిన్క యూదుల్చ వెల్లెల మాన్సుల్ ప్రజల్క జాడు వయట్టి రెతి కెర కామ్ నే కెర్తెచి రిసా ఒగ్గర్ ఆగ్గుల్ అచ్చె ఉచర అన్తి. ఇన్నె, దొన్నె ఎన్నులు కోట్లినక ‘కామ్’ మెన సింద కెర్తె.

6 జా పలాన్చ మాన్సుల్చి అన్మానుమ్చి రిసా ఆచారిమ్ జా, విసారుమ్ జలన్. గని, జా ప్రాంతుమ్చ గవ్వొలె బుల బుల బోదన కెర్తె తిలన్.

సిస్సుల్క దొగుల దొగులక తెద్రయ్లీసి (మత్త 10:1,5-15; లూకా 9:1-6)

7 ఒత్త తెంతొ, జేవ్ బారజిన్ సిస్సుల్క యేసు పాసి బుకారా కెర, జేవ్క దొగుల దొగులక గవ్వొలె బులుక మెన తెద్రవుక దెర్లన్. తెద్రయలి పొది, బూతల్క జేవ్ ఉదడ్డి రితి జోవయింక అదికారుమ్ దిలన్.

8 తెదొడి కిచ్చొ ఆడ్డ దిలన్ మెలె, “ప్రయానుమ్చి రిసా టెక్సి డండొ పిట్టవ, పోడి జలెకు, సెంచె జలెకు, కెరంటెచి బెల్లుచి జేబితె డబ్బుల్ జలెకు దెరన నాయ్.

9 జోడ్లు గలన, గని దొన్ని సాక్కల్ పోన. ఎక్కి నరి జతయ్” మెన సంగ.

10 అన్నె, “తుమ్ కేనె జలెకు పాచిలె పొది, కేన్ గెర్చ తుమ్క టాన్ దెవుల గే, జా గావ్ తెంతొ ఉట్ట గెతె ఎదక జయ్యి గెరి బన జా తా.

11 గని, కేన్ టాన్తె జలెకు తుమ్క మరియాద కెర్తి నాయ్ గే, తుమ్చి కబుర్ సూసుక ఎదగె ఇస్టుమ్ జతి నాయ్ గే, తుమ్ ఒత్త తెంతొ ఉట్ట గెచ్చు. ఉట్ట గెతె పొది, ‘జేవ్ దస్సి జలి రిసా, జేవ్ దేముడుచ నెంజితి’ మెలి రితి గుర్తుక తుమ్చ చట్టొచి దూడి పంష్ట గెలన” మెన యేసు సంగిలన్.

12 యేసు దస్సి అదికారుమ్ దా బులుక తెద్రయ్తికయ్, జేవ్ సిస్సుల్ దొగుల, దొగుల బార్ జా, “తుమ్ కెర్లె పాపల్చి రిసా పెట్టి దుకుమ్ జా పాపుమ్ ముల్లి బుద్ది జా” మెన బోదన కెర బుల్తె తిల.

13 వడ్డొ, మాన్సుల్క దెర్ల ఒగ్గర్ బూతల్క ఉదడ గెల, చి ఒగ్గర్జిన్ జబ్బుల్ తిలసక బోడి తేల్ సువ దా

యేసుచి నావ్ తెన్ జోవయింక చెంగిల్ కెర్లె.

హేరోదు రానొ యేసుచి రిసా ఉచర్లీసి (మత్త 14:1-12; లూకా 9:7-9)

14 యేసుచ కమొచి రిసా హేరోదు మెలో జా గలిలయ ప్రాంతుమ్క ఏలువ కెర్తొ రానొ కి సూన్లొ. జా ఒండి దేసిమి యేసుచి రిసా ఎత్కిజిన్ సూన తిల. సగుమ్జిన్ జోక “బాప్తిసుమ్ దెతో యోహాను అన్నె జీవ్ జా అన్నె, కిచ్చొగె, చి ఇన వెల్లొ కమొ కెర్తి నెక్తి జోచి పెట్టి అన్నె” మెంతె తిల.

15 అన్నె సగుమ్జిన్, “ఏలీయా పూర్లుమ్చొ జా తయెదె” మెంతె తిల. అన్నె సగుమ్జిన్, “దేముడుచ కబుర్లు పూర్లుమ్ సంగిలో ఎక్కిలో రితొ జయెదె. దసొచొ జా తయెదె” మెంతె తిల.

16 హేరోదు, మాత్రుమ్, సూన, కిచ్చొ ఉచర్లన్ మెలె, “ఆవ్ బోడి గండ కెరవ తిలో యోహాను జా తయెదె. అన్నె జీవ్ జా అన్నె, కిచ్చొగె” మెన బియఁ గెలో.

బాప్తిసుమ్ దెతె తిలో యోహానుక హేరోదు మార తిలీసి

17 హేరోదు రానొ కిచ్చొక దస్సి బిలన్ మెలె, జోచొ పిలిప్ మెలో బావొసిచి హేరోదియ మెలి తేర్నిక ఆనన హేరోదు జాక పెండ్లి జా తిలో.

18 దస్సి, అన్నెక్లొచి తేర్నిక పెండ్లి జతికయ్, యోహాను హేరోదుక “తుచొ బావొదిసి తేర్నిక తుయి తియనుక నాయిమ్ నాయ్” మెన సంగితె తిలన్. జాక, హేరోదు యోహానుక జేలి కెరవ, జేల్తె గల బందవడ తిలన్.

19 జేల్తె గల తతికయ్, యోహానుచి ఉప్పిరి హేరోదియ కుస్సిదుమ్ తా, జోక మారుక ఆన జా అన్నె. గని నెత్తె. కిచ్చొక మెలె,

20 యోహాను, దేముడుచొ సత్తిమ్ సుదొ, నీతి సుదొ, మెన హేరోదు జాన కెర, జోక కిచ్చొ ప్రమాదుమ్ నే జతి రితి రకవ అన్నె. అన్నె, యోహాను సంగితి తీర్పుక

హేరోదు బాద సేడ్లె కి, రోజుక సంతోసుమ్ తెన్ జోచి బోదన సూన్తె తిలన్.

21 జలె, జా మదెనె జా తేర్బోద యోహానుక కిచ్చొ కెరుక నెత్తిర్లె కి, అకర్క జోక మొరవుక అవ్కాసుమ్ అయ్లి. హేరోదుచి జెర్మన్ పండుగు దీసి జెతికయ్, జోచ మంత్రివొక, వెల్లెల మాన్సుల్క, చి గలిలయ ప్రాంతుమ్చ వెల్లెల మాన్సుల్ ఎత్తిజిన్క వెల్లి విందుతె రానొ బుకార్తో.

22 జా విందు కెర్లి పొది, హేరోదియ మెలి జా తేర్బోదచి దువినీ విందుతె బుకార్లనచి నెడిమి జా నచిలి. హేరోదు, బుకార్లన, ఎత్తిజిన్ జా నచిలిసి మెన్సు గెల, చి హేరోదు జా నాడిక, “కిచ్చొ ఇస్తుమ్ జస్తె గే అంక సంగు చి జయ్యి దెయిందె” మెన అన్యె,

23 “తుయి కిచ్చొ నజీలె కి, అంచి రాజిమ్తె ఏక్ అర వాట నజీలె కి, జయ్యి దెయిందె” మెన ఒట్టు గలన్లన్.

24 జలె, జా నాడి బార్ జా, అయ్యన్తె గెచ్చు, “ఆవ్ కిచ్చొ నజుక?” మెన పుసితికయ్, అయ్యసి, “బాప్తిసుమ్ దెతో యోహానుచి బోడి అంక దే మెన సంగు” మెన దువినీక సంగిలి.

25 సంగిలి బేగి, జా నాడి హేరోదుతె నిగ జా, “బాప్తిసుమ్ దెతో యోహానుచి బోడి ఏక్ పలెరుమ్తె అంక దే” మెన సంగిలి.

26 నాడి ఇసి సంగితికయ్, జో రానొ బలే దుకుమ్ జలెకి, జో గలన తిలి ఒట్టుచి రిసా, విందుతె బుకార్లనచి మొక్కె జాక సంగిలిసి పిట్టవుక నెన కెర,

27 బేగి, “జోచి బోడి ఆను” మెన జమాను ఎక్కిలోక తెద్రయ్లన్. జో జమాను గెచ్చు, జేల్తె యోహానుచి బోడి గండ కెర,

28 పల్లెరుమ్తె ఆన, జా నాడిక దెతికయ్, జా నాడి అయ్యన్క నా దిలి.

29 జలె, యోహానుచ సిన్సుల్ సూన కెర, జా కెర, పీనుమ్ నజన ఉక్కుల నా, మెన్సి రోవెల.

బారజిన్ సిన్సుల్ యేసుతె అన్నె ఉట్ట అయ్లిసి

(మత్త 14:13-21; లూకా 9:10-17; యోహా 6:1-14)

30 యేసు తెద్రయ్ల జోచ బారజిన్ సిన్సుల్ బోదన కెర కెర మాన్సుల్క చెంగిల్ కెర కెర, జోతె అన్నె బుల జా, జేవ్ కెర తిలిసి, బోదన కెర తిలిసి ఎత్తి జోక సంగిల.

31 జలె, ఒగ్గర్ ఒగ్గర్జిన్ మాన్సుల్ జోవయింతె జెంక గెచ్చుక జతె తిలి రిసా, అన్నిమ్ కంక కి పుండితి సమయుమ్ దొర్కు నెంజితికయ్, యేసు సిన్సుల్క “జొమ్మ, తుమ్ గడియ పుండితి రిసా, కేనెగె, మాన్సుల్ నెంజిలి టాన్తె బెద గెచ్చుము” మెన సంగిలన్.

32 జేవ్ బార్ జా దోనితె వెగ, అన్నె కోయి నెంజిలి టాన్తె గెచ్చుక బార్ జల.

33 గని, జేవ్ బార్ జా ఉట్ట గెలిసి ఒగ్గర్జిన్ దెక, జోవయింక చిన, వేర వేర పట్టులె గవ్విలె తెంతో బార్ జా నిగ, నిగ జోవయించి తొల్లితో జేవ్ గెతె తిలిన్తె పావెల.

పావ్ వెయిల్జిన్ మాన్సుల్క యేసు అన్నిమ్ దిలిసి

34 యేసు జా ఒడ్డుతె పావ, దోనితె తెంతో ఉత్త, ఒగ్గర్ ఒగ్గర్జిన్ జనాబ్ బెర అయ్లిసి దెక, ‘గొవుడు నెంజిల మెండల్ కీసి జా కేనె తెర్లె ఒత్తలి ఉట్ట గెతె తవుల గే దస్సి, ఈంజేవ్ ప్రెజల్ అస్తి’ మెన యేసు కన్కారుమ్ జా, ఈంజ ఎత్తి బోదన జోవయింక సికడుక దెర్లన్.

35 సాంజ్ జంక దెర్తికయ్, యేసుచ సిన్సుల్ జోతె జా కెర, “ఈంజ డొంగుర్ దేసిమ్. పొద్దు ఒగ్గర్ జలి, తొక్కి అన్యె.

36 ఈంజేవ్ ప్రెజల్ ఎత్తి ఈంజ పల్లల్చ గవ్విలె గెచ్చు, కిచ్చొ జవున్ అన్నిమ్ గెనన్తి రిసా ఇన్నెక తెద్రవు.” మెన సంగిల.

37 ఇసి సంగితికయ్, యేసు సిస్సుల్ కిచ్చొ జబాబ్ దిలన్ మెలె, “తుమ్ జోవయింక కిచ్చొ జవున్ అన్నిమ్ దాస”. ఇసి యేసు సంగితికయ్, జేవ్ జోక, “జోవయింక అన్నిమ్ దెంక మెన †దొన్ పుంజొ వెండ్లుచ పోడియొ గెనుక ఆమ్ గెచ్చుక గే?” మెంతికయ్,

38 యేసు జోవయింక, “తుమ్తె కెత్తి పోడియొ అస్తి గే, గెచ్చు దెక” మెలన్, చి జేవ్ గెచ్చు దెక జా కెర, “పాచ్ పోడియొ చి దొన్ని మొస్సు అస్తి” మెన జోక సంగిల.

39 జో, జేవ్ జనాబ్ క దెక, జోవయింక “తుమ్ ఎత్తిజిన్ వర్సవర్సల్ తెన్ బుయ్యె వెస” మెన జా చివ్వర్ బుయ్యె వెసడ్లన్.

40 జాకయ్ జేవ్ ఎక్కె వర్సల్తె పుంజెక జిన్, యాబయ్ జిన్ వెసెతికయ్,

41 యేసు జేవ్ పాచ్ పోడియొ దొన్ని మొస్సు దెర, ఆగాసుమ్ వక్క దెక, ‘ఈంజ తూయి దిలది’ మెన దేముడు జలో అబ్సొన్ క జోకర కెర, జేవ్ పోడియొ మోడ కెర, “ఎత్తిజిన్ క వంట దాస” మెన సిస్సుల్ చి అత్తి సార్ప కెర దా, జేవ్ దొన్ని మొస్సుక కి ఎత్తిజిన్ క వంట దిలన్.

42 జేవ్ జనాబ్ ఎత్తిజిన్ పేట్ బెర్దు కతికయ్,

43 సేనిల పోడి గండలు, మొస్సు గండలు బార గంపల్తె సిస్సుల్ గుడ్డ బెరయ్ల.

44 జా దీసి పోడియొ కయ్లన, పాచ్ వెయిల్ జిన్ †మున్సుబోదల్ జల.

యేసు పానిచి ఉప్పిరి ఇండిలిసి వాదుక సేంతుమ్ కెర్లిసి

(మత్త 14:22-33; యోహా 6:16-21)

45 తెదొడి బేగి, యేసు ప్రెజల్ క నే తెద్రయ్తె తొలితో, “తుమ్ దోని వెగ అంచి కంట తొలితో గాడు జీన,

బేత్సయిదా గవ్వి గెచ్చు” మెన సిస్సుల్ క తెద్రవ దా,

46 జేవ్ ప్రెజల్తె సెలవ్ నజన తెద్రవ దా, ప్రార్దన కెర్లి రిసా యేసు డొంగ్రె వెగిలన్.

47 ఒగ్గర్ సాంజ్ జతికయ్, సిస్సుల్ తిలి జా దోని సముద్రుమ్ రితి జా గాడుచి మదెనె పాచ్ తతికయ్, యేసు ఎక్కిలో గట్టుతె తా,

48 కిచ్చొ దెకిలో మెలె, దోనిక వాదు పెలయ్తె తిలి రిసా, దోని ఇండవుక సిస్సుల్ కస్సుమ్ జతె అస్తి.

జలె, అందరె, పాసి పాసి కుకుడొ వానెనె, యేసు జా సముద్రుమ్ చి ఉప్పిరి ఇండ జా, సిస్సుల్ చి పాసి పాచ్ అయ్లో. జోవయింక జిన్తె ఉట్ట గెచ్చుక మెనల్లో.

49 గని, పానిచి ఉప్పిరి జో ఇండ గెతిసి సిస్సుల్ దెక, “డుంబొ, కిచ్చొగె” మెన ఉచర బమ్మ జా ఒర్పిల.

50 జేవ్ ఎత్తిజిన్ జోక దెక దస్సి వంబ్ర జలి బేగి, జో, “దయిరిమ్ జా. ఆవ్వి, తుమ్ బియఁ నాయ్” మెన జోవయింక సంగ

51 దోనితె జోవయించి నెడిమి వెగితికయ్, వాదు ముల దిలి. జాచి రిసా జేవ్ క జెవ్వి ఆచారిమ్ జా ఒగ్గర్ బమ్మ జల.

52 గని పోడియొక యేసు జర్గు కెర్లిసి అర్దుమ్ నే కెరన తిలి రిసా, జో కొన్సొగె, జోచి పెట్టి బేడు బందిల్ జోచి సెక్తి అదికారుమ్ కేనెచి గే అర్దుమ్ నే కెరంతె, బలే ఆచారిమ్ తెన్ తిల.

అన్నె ఒగ్గర్ జిన్ క యేసు చెంగిల్ కెర్లిసి

(మత్త 14:34-36)

53 జేవ్ దోనితె గాడు జీన గెన్నేసరెతు ప్రాంతుమ్తె పాచ్ దోని ఒడ్డుతె బంద కెర

† 6:37 6:37 నెంజెలి, దొన్ పుంజొ జిన్ మాన్సుల్ క ఏక్ దీన్ చి కూలి డబ్బుల్ దెతి ఎదిలి డబ్బుల్. ‡ 6:44 6:44 తేర్బోదల్ బాలబోదల్ కి తిల, గని మత్తయి 14:21 తె రెగిడ్లి రితి, తేర్బోదల్ బాలబోదల్ క ఒత్త లెక్క కెర్లి నాయ్.

54 దోని తెంతో ఉత్తిర్లి బేగి, ఒత్త తిల మాన్సుల్ జోక చిన కెర,

55 జబ్బు తిల మాన్సుల్ జా ఒండి పలానెతె కేనె తిల ఒత్త గెచ్చు, జేవ్ నిజ తిలి అంతుర్నొ తెన్ ఉక్కుల కెర యేసు కేనె అస్సె గే నూన్లె, ఒత్తయ్ వయ ఆన్తె తిల.

56 జా ప్రాంతుమ్చ పట్టలె గెవ్విలె బయిలె, కేన్ జలెకు టాన్తె జో అయ్లో గే, బాద తిలనక కడ ఆన, సంతవీదులె జలెకు ఎంగ్లవ దా, యేసుచొ పాలుమ్చి అంచు జలెకు జేవ్ చడుక మెన బతిమాల్పా జా సెలవ్ నజన్తె తిల. కో జలెకు చడిల గే, జేవ్ చెంగిల్ జల.

7

అలవాట్లు చి రిసా వెల్లెల మాన్సుల్క యేసు సంగిలి తీర్పు
(మత్త 15:1-20)

1 * యెరూసలేమ్ పట్టుమ్ తెంతో సగుమ్జిన్, మోసే తెన్ దేముడు దిలి ఆగ్గుల్ సికడ్డన కి పరిసయ్యుల్ సగుమ్జిన్చి ఒత్త జా తా, యేసుతె బెద జా కెర,

2 జోచ సిస్సుల్తె సగుమ్జిన్ గర్బ అత్తో తెన్, మెలె నే దొవన్తె, అన్నిమ్ కెర్తిసి దెక కెర, బమ్మ జల.

3 కిచ్చొక మెలె, పరిసయ్యుల్ కి యూదుల్ ఎత్తిజిన్ కి 'పూర్గుమ్చ వెల్లెల మాన్సుల్ సికయ్లిసి కెరుకయ్' మెన, గుర్తు అత్తో దొవన్లెకయ్ కవుల, నెంజిలె నాయ్.

4 అన్సె, సంతయ్ తెంతో గెరి అయ్లె, 'నే దొవన్లె గారు' మెన, †పాని చించన్లెకయి కవుల, నెంజిలె నాయ్. దస్సి, గిన్నలు, గేడివొ, కంచు సామన్, ఈంజ జా ఎత్తి కెయ్క దోవుక గే, కిసి దోవుక గే, కిచ్చొ కిచ్చొ అలవాట్లు రితి

కెరుక పూర్గుమ్చ జోవయించ వెల్లెల మాన్సుల్ సికడ అస్సి.

5 జాచి రిసా, జేవ్ పరిసయ్యుల్ చి మోసే తెన్ దేముడు దిలి ఆగ్గుల్ సికడ్డన యేసుక, "తుచ సిస్సుల్ కిచ్చొక వెల్లెల మాన్సుల్ సంగిలి రితి ఇండుక ముల దా, గర్బ అత్తో తెన్ అన్నిమ్ కతతి?" మెన పుసిల.

6 జలె, యేసు జోవయింక, "తుమ్ ఉప్రమెన్సుచొచి రిసా యెసయా పూర్గుమ్చొచి అత్తి దేముడు సంగిలి కోడు సత్తిమ్.

ఈంజ ప్రజల్ అంక గవురుమ్ కెర్త రిత కొడొ సంగిలె కి, జోవయించి పెట్టి అంక దూరి అస్సి.

7 మాన్సుల్ అవ్వి ఉచర్ల కొడొక 'దేముడు సంగిలన' మెన ప్రజల్క సికడ, అంక ఆరిక జొకర్తతి"

మెన తుమ్చి రిసాచి కోడు.

8 "తూమ్, దేముడు దిలి ఆగ్గు ముల దా, మాన్సు అవ్వి ఉచర్లిసి ఎక్కి మెన్సు నిదానుమ్ కెర్తసు" మెన జేవ్ వెల్లెల మాన్సుల్క యేసు సంగ,

9 జోవయింక అన్సె, "తుమ్చ పూర్గుమ్చ అవ్వి సికయ్ల అలవాట్లు నిదానుమ్ కెర్తి రిసా దేముడుచి ఆగ్గు రితి ఇండుక ముల అస్సున్. కిస మాన్సుల్, తూమ్!

10 తుమ్ ములిలి కేన్ ఆగ్గుచి రిసా ఆవ్ అప్పె సంగితసి మెలె, తుమ్చ అయ్యద్ అబ్బొద్క చెంగిల్ దెక, గవురుమ్ కెర"

మెన, పిమ్మట్,

"అయ్యున్క జలెకు, అబ్బొన్క జలెకు, కో దూసుప కెరుల గే, కచితుమ్ జోక మొర్పుచి సిచ్చ దెంక"

మెన మోసేచి అత్తి రెగిడ్లి కోడు అస్సె.

11 "గని, తుమ్ జలె ఇన్నె మెంతసు, అంచితె తుమ్క కిచ్చొ కలుగు జతి

* 7:17:1 ఎత్తి అదికారుమ్ తిలో దేముడుచి గుడి తిలి పట్టుమ్, జా. † 7:37:3 'అంచయ్ ప్రజల్ జతు' మెన ఎత్తి అదికారుమ్ తిలో దేముడు పూర్గుమ్ నిసాన్లె ప్రజల్. ‡ 7:4 7:4 నెంజిలె, సంతయ్ తెంతో అన్లె సామన్ దొవలెకయ్ కవుల.

గే, జయ్యి 'కొర్బాను' మెలె 'ప్రబుక దెంక బప్పన అస్సి', మెన కో పుత్తుసి అయ్యున్ అబ్బొనక సంగిలెగిన,

12 'జా దీసి తెంతో, జో మాన్సుచి పూచి నాయ్' తుమ్ సంగిల్ రితి జా, జో అయ్యున్ అబ్బొనక దెంక తిలి సాయిమ్ జో మాన్సు దెంక తుమ్ ఒప్పున్ నాయ్.

13 తుమ్ దస్సి జా, తుమ్ చ పూర్గుమ్ చ అయ్యి ఉచర్ల అలవాట్లు ప్రెజల్ కెర్తు మెన, 'దేముడు సంగిలి కోడుక అదికారుమ్ నాయ్' మెన సికడ్డి రితి జా, తుమ్ దేముడుచి కోడు మార్పుప కెర్లి రితి కెర్తును. అన్నె దస్సు మాయల్ ఒగ్గర్ కెర్తును." మెన, జేవ్ వెల్లెల మాన్సుల్ క యేసు గోల కెర్లన్.

మాన్సుక గార్ కెర్తిసి కిచ్చొ జయెదె గే యేసు సంగిలిసి

14 తెదొడి యేసు ప్రెజల్ క అన్నె పాసి బుకారా కెర, జోవయింక ఇస్సె మెలన్. ఆవ్ సంగితి కోడు తుమ్ ఎత్కిజిన్ ఏక్ కోడు సూన అర్దుమ్ కెరన.

15 బయిలె తెంతో మాన్సుచి పేట్ తెడి కిచ్చొ వస్తువ పెసిలె, జయ్యి జో మాన్సుక గార్ కెరుక నెత్తె. గని, మాన్సుచి పెట్టి తిలి బుద్ది గార్ జలె, జయ్యి జో మాన్సుక గార్ కెరెదె.

16 క్రిస్మాన్ త కండ్లొ కక్క తిలె, సరిగా నూన్సు!

17 జేవ్ ప్రెజల్ క ముల దా గెరి గెచ్చు తెడి పెసిలి పొది, జోచ సిస్సుల్ ఈంజు టాలిచి రిసా పుసిల.

18 యేసు జోవయింక, "తూమ్ కి అర్దుమ్ నెంతె అస్సున్ గే? మాన్సు కయ్లె, బయిలె తెంతో జో మాన్సుచి పెట్టి కిచ్చొ పెన తయెదె గే, జో మాన్సుక గార్ కెరుక నెత్తె మెన అర్దుమ్ కెరన్సు నాయ్?

19 ఈందె, జోచి పేట్ వాట్ గెచ్చు, అన్నె బార్ జయెదె. జోచి పెట్టితె పెసె నాయ్!

జాకయ్, జోక గార్ కెరె నాయ్" మెన సంగిలన్. ఇసి మెన యేసు సంగిలిన్ చి అర్దుమ్ కిచ్చొ మెలె, "కిచ్చొ కి కంక గారు మెనుక నెంజె. కిచ్చొ కి కంక జయెదె" మెన సెలవ్ సంగిల్ రితి జతయ్.

20 తెదొడి యేసు సిస్సుల్ క "మాన్సుచి పెట్టితె మొదొల్ జా, కిచ్చొ కిచ్చొ బార్ జయెదె, జయ్యి జోక గార్ కెరెదె.

21 మెలె, గర్చ ఉద్దెనుమ్లు, లంజెబుద్ది, చోరు బుద్ది, అత్య కెర్తి బుద్ది, లంజెకమొ,

22 అన్నె మాన్సుల్ చి ఆస్తిక ఆన జతిసి, పాపుమ్ ఇండితి ఆన, మోసిమ్ బుద్ది, గోసలు, మాన్సుల్ క దూసుప కెర్తిసి, గవురుమ్ ఉచరంతిసి, కామ్ క నెంజిత కొడొ, దసచ ఎత్కి, మాన్సుచి తెడి జోచి పెట్టితె మొదొల్ జతతి.

23 గర్చ బుద్దుల్ ఎత్కి మాన్సుచి పేట్ తెడి మొదొల్ జా బార్ జతతి. దసచయ్ మాన్సుక గార్ కెర్తితి" మెన అన్నె సంగిలన్.

తేర్బోదచి దువిన్ క యేసు చెంగిల్ కెర్తిసి

(మత్త 15:21-28)

24 యేసు ఒత్త తెంతో బార్ జా, తూరు చి సీదోను మెల పట్నల్ చి ప్రాంతుమ్ తె ఉట్ట గెచ్చు, ఏక్ గెరి గెలన్. జో ఒత్త తిలి రితి కో క్రిస్మానుక జో నెసిలె కి, జో తిలిసి లుంకడుక నెత్తిర్ల,

25 చి బేగి, బూతుమ్ దెర్లి ఇదిలిన్ దువిసి తిలి ఏక్ తేర్బోద, యేసుచి రిసా సూన కెర, జోతె జా కెర, జోచి చట్టె నిర్ను సెడ్డి.

26 జా తేర్బోద కేనెచి మెలె, జా *సిరియ దేసిమ్ చి జా పెనికయ ప్రాంతుమ్ తె జెర్మిలి, గ్రీకు మెలి వేర దేసిమ్ చి మాన్సు. జలె, జా తేర్బోద యేసుతె జా కెర, "అంచి దూక దెర్లి

S 7:16 7:16 గ్రీకు బాన తెన్ ఈంజు మత్తెలి తొలితో రెగిడ్ల సగుమ్ పుస్తకల్ తె 16 నంబరచి కోడు తయె నాయ్.

* 7:26 7:26 నెంజిలె 'సురోపెనికయ ప్రదేసిమ్ చి మాన్సు' మెనుల.

బూతుమక ఉదడ గెల్లె గె?" మెన యేసుక బతిమాల్పా జా సంగితికయ్,

27 జో జాక, † "సొంత బోదల్ తొలితొ కతు. బోదల్చి వంతు అన్నిమ్ గుడ్డ కెర, నూనకూనర్లు కతి రితి గల దెంక చెంగిల్ నాయ్" మెన సంగిలన్.

28 జా జోక, "నిజుమి, ప్రబు, గని నూనకూనర్లు కి అన్నిమ్ కెర్తి బల్లచి ఎట్టొ రక తా, బోదల్ సేడయ్లి ఉస్టా కవుల" మెన సంగిలి.

29 ఇసి సంగితికయ్, తెదొడి యేసు జాక, "ఈంజ తుయి సంగిలి తుచి నముకుమ్చి రిసా, సేంతుమ్ తెన్ గో. బూతుమ్ తుచి దువిదక ముల దా గెచ్చు అస్సె" మెన సంగిలన్.

30 ఇసి సంగితికయ్, జా తేర్బోద గెరి గెచ్చు కిచ్చొ దెకిలి మెలె, బూతుమ్ ముల దా గెలి రిసా, జా నాడి మంచుమ్తె నిజ తిలిసి.

తొత్తో జలో బోయ్రోక యేసు చెంగిల్ కెర్లిసి

31 ఒత్త తెంతొ యేసు తూరు ప్రాంతుమ్ ముల దా సీదోను ప్రాంతుమ్ వాట్ గెచ్చు, దెకపొలి ప్రాంతుమ్ వాట్ కి గెచ్చు. గలిలయ ప్రాంతుమ్చి నముద్దుమ్ రితి గాడు పక్క అన్నె ఉట్ట అయ్లన్.

32 ఉట్ట జెతికయ్, బోయ్రో తిలో తొత్తో మాన్సు ఎక్కిలోక మాన్సుల్ యేసుతె కడ ఆన, "ఇన్నెక చడ చెంగిల్ కెర్తె గె?" మెన యేసుక బతిమాల్పా జా పుసిల.

33 జలె, పైజల్తె తెంతొ యేసు జోక ఎక్కిలోక పక్క కడన, జో మాన్సుచ కంగ్గొతె ఏక్ ఏక్ ఊంటివొ గల దా తుంక, జో తొత్తోచి జీబు చడ జోచి సొంత లాడు దెరవ దా,

34 ఆగాసుమ్ పక్క దెక, కన్కారుమ్ తెన్ పెట్టి ఏడ్డి రితి జా, 'ఉగ్గి జా' మెలి అద్దుమ్ తెన్, ఒత్తచి బాస తెన్ "ఎప్పాతా" మెన సంగ యేసు సంగిలన్.

35 యేసు దస్సి సంగితికయ్, జో బోయ్రోచ కంగ్గొ ఉగ్గి జలి చి చెంగిల్ జలన్, చి జీబు బులుక దెర్తికయ్, సొస్టుమ్ లట్టబుక దెర్లన్.

36 తెదొడి, "కక్క సంగ నాయ్" మెన ఒత్త తిల మాన్సుల్క యేసు సంగిలన్. గని "సంగుక పోన" మెన జో కెత్తి సుట్టు సంగిలే కి, జేవ్ అన్నె ఒగ్గర్ జా కేన్ తెన్ సంగితె తిల.

37 జర్గు జలిన్చి రిసా ఎదివాట్ ఆచారిమ్ జా, యేసుచి రిసా "ఈంజొ కిచ్చొ కెర్తి కి జెయిమ్ జతయ్. బోయ్ర మాన్సుల్ నూనతి రితి కెరుక జానె, తొత్త మాన్సుల్ సొస్టుమ్ లట్టబ్బి రితి కెరుక జానె. ఎత్తి చెంగిల్ కెర అస్సె" మెన ఎత్తిజిన్ సంగితె తిల.

8

చెత్తర్ వెయిల్ జిన్క యేసు అన్నిమ్ దిలిసి (మత్త 15:32-39)

1 జేవ్ దీసలె అన్నెక్ సుట్టు ఒగ్గర్జిన్ జనాబ్ యేసుతె బెర తతికయ్, జోవయింక కతిసి కిచ్చొ నెంజిలి రిసా, యేసు జోచ సిస్సుల్క పాసి బుకారా, జోవయింక

2 "పైజల్ అప్పెక తిర్రతి ఎద అంచి తెన్ అస్తి. జోవయింక కతిసి కిచ్చొ కి నాయ్ చి రిసా జోవయించి ఉప్పిరి ఆవ్ కన్కారుమ్ జా అస్సి.

3 జోవయింక చువ్వెచి పెట్టి గెరి తెద్రయ్లెగిన, వట్ట ఏక్ వేల మొకొమ్ గుంజు సేడుల. జోవయింతె సగుమ్జిన్ దూర్ తెంతొ జా అస్తి." మెన సంగిలన్.

4 జేవ్ సిస్సుల్ ఆచారిమ్ జా, "ఈంజ బయిలు దేసిమి ఎతివాట్జిన్ మాన్సుల్క అన్నిమ్ దొర్కు కెరుక కిసి?" మెన అన్కారుమ్ జా సంగిల.

† 7:27 7:27 దేముడు దెతి వరుమక 'అన్నిమ్' మెన టాలి కెర

5 ఇసి సంగితికయ్, యేసు జోవయింక “తుమ్తె కెత్తి పోడియొ అస్తి?” మెన పుసిలన్, చి “సత్తు” మెన జబాబ్ దిల.

6 జలె, యేసు జా జనాబ్ క “బుయ్యె వెస” మెన ఆడ్ర దా, జేవ్ సత్తు పోడియొ దెర, “తుయి దా దయ కెర్లది” మెన దేముడు అబ్బొన్ క ఉచర, జేవ్ పోడియొ మోడ కెర, “ప్రెజల్ క వంట దాస” మెన సిస్సుల్ క దెతికయ్, ప్రెజల్ క వంట దిల.

7 దొన్ని ఇదుద్ల మొస్సు కి తతికయ్, యేసు దేముడు అబ్బొన్ క అన్నె దస్సి జోకర, “ఈంజేవ్ మొస్సు కి వంట దాస” మెన ఆడ్ర దెతికయ్, సిస్సుల్ ప్రెజల్ క వంట దిల.

8 ఎత్కిజిన్ పేట్ బెర్తు కతికయ్, సేసిల గండలు సిస్సుల్ గుడ్డిల, చి సత్తు గంపల్తె బెర్ల.

9 అన్నిమ్ కత్తస కెత్తిజిన్ జల మెలె, పాసి పాసి చెత్తర్ వెయిల్ జిన్ జల.

10 జలె, యేసు ప్రెజల్ క గెరి తెద్రవ దా, సిస్సుల్ తెన్ బేగి దొన్తె వెగ, దల్లనూతా ప్రాంతుమ్తె ఉట్ట గెల.

పరిసయ్యుల్ యేసుక అన్నె పరిచ్చ కెర్లిసి

11 యేసు ఇసి ఒత్త తిలి పొది, పరిసయ్యుల్ సగుమ్ జిన్ జా కెర, యేసు తెన్ జట్టి జతి రితి జా, జోక “తుచి అదికారుమ్ పరలోకుమ్ తెంతో చి జలె, అమ్క రుజ్జు దెకయ్ తి రిసా కిచ్చొ జవున్ వెల్లి కామ్ కెరు.” చెంగిల రితి జోక పరిచ్చ కెర్ల.

12 యేసు, జలె, జోచి మెస్సుతె ఒగ్గర్ దుకుమ్ జా ఏడ్లి రితి జా, “తుమ్ ఈంజ కాలుమ్చ మాస్సుల్ కిచ్చొక అంచి రిసా రుజ్జు దెకయ్ త కమొక ఆస జతసు? ఆవ్ తుమ్క కిచ్చొ కచితుమ్ సంగితసి మెలె, తుమ్ అన్మానుమ్ జల ఈంజ కాలుమ్చ మాస్సుల్ తుమ్ ఉచర్లి సాచి

కామ్ ఎక్కి కి కెర దెంక నెంజె.” మెన జేవ్ వెల్లెల మాస్సుల్ క సంగ కెర,

13 జోవయింక ముల దా, సిస్సుల్ తెన్ దొని అన్నె వెగ, గాడు జీన ఒత్తల్తో గెచ్చుక మెన బార్ జల.

పండితుల్ సికయ్ తి బుద్దిచి రిసా యేసు జాగర్ల సంగిలిసి (మత్త 16:5-12)

14 దొన్తె ఎక్కి పోడి తిలి, గని అన్నె పోడియొ ఆనుక సిస్సుల్ పచ్చ తిల.

15 జలె, యేసు జోవయింక కిచ్చొ సంగిలన్ మెలె, “తుమ్ దెకన. పరిసయ్యుల్ చి రానొ జలో హేరోదుచి పులయ్ తి పీట్ చి రగుమ్ చి రిసా తుమ్ జాగర్ల తెన్ తా” మెన సంగిలన్.

16 ఇసి సంగితికయ్, జేవ్ ఎక్కిలోక ఎక్కిలో “అమ్క పోడి నాయ్. కిచ్చొక ఇసి మెన అమ్క సంగితయ్?” మెన లట్టబంతె తిల.

17 యేసు జేవ్ ఉచర్లిసి జానెచి రిసా, జో “ ‘అమ్క పోడియొ నాయ్’ మెన కిచ్చొక లట్టబంతసు? తుమ్ అప్పెక అర్దుమ్ కెరన్ను నాయ్ గే? తుమ్క పెట్టి బేడు బంద అస్సె గే, చి అర్దుమ్ కెరనుక ఇస్టుమ్ జసు నాయ్ గే?

18 తుమ్క అంకివొ తిలి కి దెకున్ నాయ్ గే? తుమ్క కంగర్ల తిలి కి నూన్ సు నాయ్ గే? అప్పె రితి జర్లు జలిసి కి ఏదస్స కెర్లు నాయ్ గే?

19 జేవ్ పావ్ వెయిల్ జిన్ మాస్సుల్ క ఆవ్ పావ్ పోడియొ మోడ వంట్టి దీసి, కెత్తి గంపల్తె సేసిల గండల్ గుడ్డ బెరయ్ లదు?” మెన సంగితికయ్, జేవ్ “బార గంపల్తె” మెన జబాబ్ దిల.

20 “అన్నె, జేవ్ చెత్తర్ వెయిల్ జిన్ మాస్సుల్ తిలిన్ తె జేవ్ సత్తు పోడియొ మోడ వంట్టి దీసి, కెత్తి గంపల్తె సేసిల గండల్ గుడ్డ బెరయ్ లదు?” మెన సంగితికయ్, జేవ్ “సత్తు గంపల్తె” మెన జబాబ్ దిల.

21 జాకాయ్ జో జోవయింక “జలె, అప్పొక కి తుమ్ అర్దుమ్ కెరన్ను నాయ్ గే?” మెన యేసు సంగిలన్.

గుడ్డి మాన్సుక యేసు చెంగిల్ కెర్లిసి

22 తెదొడి యేసు, సిస్సుల్, బేత్నయిదా గవ్వొచి ఒడ్డుతె దొనితె పాచ ఉత్తిర్ల. గుడ్డి మాన్సు ఎక్కిలోక ఒత్తచ మాన్సుల్ సగుమ్జిన్ యేసుతె కడ ఆన, “దయ కెర, ఇన్నెక చడ చెంగిల్ కెరు” మెన బతిమాల్పా జా సంగిల.

23 జలె, యేసు జో గుడ్డి మాన్సుచి ఆతు దెర, జా గవ్వొ తెంతో ఇదిల్ దూరి కడ నా కెర, జోచ అంకివొతె తుంక, చడ, “తుక కిచ్చొ జలెకు డీస్తయ్ గే?” మెన పుసిలన్, చి

24 జో మాన్సు, “మాన్సుల్క దెకితసి, గని జేవ్ రూకుల్ ఇండితి రితి డీస్తతి” మెన సంగిలన్.

25 జలె, జో మాన్సుచ అంకివొతె యేసు అన్నె చడితికయ్, జో చెంగిల్ దెక, ఎత్తి సొస్తుమ్ దెకిలో.

26 ఇసి చెంగిల్ జతికయ్, యేసు జోక, “తుయి గవ్వొ అన్నె నే పెసితె కి తుచి సొంత గెరి ఉట్ట గో” మెన తెద్రవ దిలన్.

ఈంజొయి ‘క్రీస్తు’ మెలో జెంక తిలో రచ్చించుప కెర్లొసా

(మత్త 16:13-20; లూకా 9:18-21)

27 ఒత్త తెంతో యేసు, జోచ సిస్సుల్ తెన్ కైసరియ పిలిప్పి మెలి ప్రాంతుమ్చ గవ్వొలె ఇండ గెతె తత్తికయ్, “కొన్నొ మెన పైజల్ అంక సంగితతి?” మెన సిస్సుల్క పుసిలన్.

28 జేవ్ జోక “బాప్తిసుమ్ దెతో యోహాను జా తయెదె మెన సగుమ్జిన్

తుక సంగితతి. అన్నె సగుమ్జిన్ తుక ‘ఏలీయా పూర్లుమ్చొ జా తయెదె’ మెంతతి. అన్నె సగుమ్జిన్, ‘దేముడుచి కబుర్ పూర్లుమ్ సంగిలో అన్నెక్లొ జా తయెదె’ మెన తుక సంగితతి” మెన సిస్సుల్ సంగిల.

29 ఇసి సంగితికయ్, జో జేవ్క, “తుమ్, జలె, కొన్నొ మెన అంక సంగితను?” మెన పుసిలన్. జలె, పేతురు, “తెద్రయిందె మెన దేముడు సంగ తిలో *‘క్రీస్తు’ మెలో రచ్చించుప కెర్లొసా, తుయి” మెన ఒప్పున సంగిలన్.

30 పేతురు ఇసి మెన ఒప్పునతికయ్, యేసు జోక, “అంచి రిసా తుమ్ చినిలిసి కక్క సంగ నాయ్” మెన జాగర్త సంగిలన్.

జో మొర అన్నె జీవ్ జంక తిలిన్చి రిసా యేసు సంగిలిసి

(మత్త 16:21-28; లూకా 9:22-27)

31 +“ఆవ్ మాన్సు జా జెర్మున్ అయ్లోసా ఒగ్గర్ సైమల్ సేడ, వెల్లెల మాన్సుల్చి అత్తి, వెల్లెల పూజర్లుచి అత్తి, మోసే తెన్ దేముడు దిలి ఆగ్గుల్ సికడ్డనచి అత్తి, మొరుక అస్సె. గని తిర్రతి గెలె, అన్నె జీవ్ జా ఉట్టుక అస్సె” మెన యేసు జోచ సిస్సుల్క బోదన కెరుక దెర్లన్.

32 జో ఈంజ కొడే ఒండిజిన్క సొస్తుమ్ సంగిలన్. దస్సి సంగితికయ్, పేతురు జోక ఏక్ పక్కయ్ కడ నా కెర, “దస్సి సంగు నాయ్. తుక దస్సిచి పొని!” మెన పేతురు జోక గోల కెరుక దెర్లన్.

33 పేతురు ఇసి సంగితికయ్, యేసు పన్ల, సిస్సుల్క దెక, పేతురుక, “సయ్తాన్, అంచి పడ్డె గో! తుయి

* 8:29 8:29 ఒగ్గర్ పూర్లుమ్ తెంతో “పాపుమ్ గెచ్చయ్తో దొర్పు. జలో రచ్చించుప కెర్లొసాక తెద్రయిందె” మెన ఎత్తి. అదికారుమ్ తిలో దేముడు సంగ రెగ్గవ తిలన్. క్రీస్తు మెలె ఈంజ అర్దుమ్ తయెదె. † 8:31 8:31 ‘మాన్సు జా జెర్మున్ అయ్లోసా’ మెన బయబిల్తె రెగ్గ తిలె, జేవ్చి అర్దుమ్ కిచ్చొ మెలె, ‘తెద్రయిందె’ మెన ఎత్తి. అదికారుమ్ తిలో దేముడు దెద్రయ్లో క్రీస్తు రచ్చించుప కెర్లొసా. యేసు ‘ఆవ్ మాన్సు జా జెర్మున్ అయ్లోసా’ మెన సంగిలె, బయబిల్చి పొర్ని ప్రమానుమ్ నదు కెర్ల వండితుల్ జా అర్దుమ్ కెరనుల, గని యేసుక ‘జొయ్యి’ మెన ఒప్పునుక నెన కెర, జోవయింక ఒగ్గర్ అల్లర్ కెరుల. ఒగ్గర్ నదు నే కెర్ల పైజల్, సిస్సుల్, జా అర్దుమ్ ఇదిల్ ఆల్పిమ్ కెరనుల.

దేముడుచి వచ్చెనచి బుద్ధి ఉచర్లద నాయ్, గని మాన్సుల్ ఉచర్తి రితి ఉచర్లది” మెన యేసు గోల కెర్లన్.

34 తెదొడి జోచ సిస్సుల్క, ప్రజల్చి జనాబ్క, జోచి పాసి బుకారా కెర, యేసు జోవయింక, “కో నంపజా అంచి పట్టి బులుక ఉచరుల గే, జోచి సొంత ఇస్టుమ్ కెరుక ముల దా, జోచి సొంత సినిలువ వయన అంచి పట్టి బులుక అస్సె.

35 కిచ్చొక మెలె, జోచి సొంత ప్రానుమ్ రచ్చించుప కెరనుక కో కోర్ప జవుల గే, జోచి ప్రానుమ్ గెచ్చువానెదె. గని అంచి రిసా, అంచి సుబుమ్ కబుర్ నూనయ్తి రిసా, కో జోచి ప్రానుమ్ దెతి రితి ఎక్కి మెన్ను నిదానుమ్ ఇండుల గే, జోచి ప్రానుమ్ రచ్చించుప జెయెదె.

36 మెలె, ఈంజ లోకుమ్తె తిలిసి ఎత్తి కేన్ మాన్సు జవున్ కలుగు కెరన జోచి ప్రానుమ్ గెచ్చువాన్లెగిన, జోక కిచ్చొ లాబుమ్? కిచ్చొ లాబుమ్ నాయ్.

37 మెలె, జో మాన్సుచి ఆత్మ గెచ్చువాన్లెగిన, జోచి ప్రానుమ్ దేముడు తెన్ అన్నె బెదయ్తి రితి కేన్ మాన్సు కిచ్చొ దిలె సరిపుచుప జయెదె గే?

38 మెలె, గర్బ కమె కెర్తి ఈంజ పాపుమ్చి లంజెచి ఉగుమ్తెచి బుద్ధి కెరన, అంచి సత్తిమ్ జవున్, అంచ కొడెచి సత్తిమ్ జవున్, కో లాజ్ జా నే ఒప్పున్తె తవుల గే, ఆచ్ మాన్సు జా జెర్మున్ అయ్లోసా పరలోకుమ్తె గెచ్చు అబ్బొసి జలో దేముడుచి పరలోకుమ్చి ఉజిడ్చి గవురుమ్ తెన్ సుద్ది తిల దూతల్ తెన్ బెద ఈంజ లోకుమ్తె అన్నె జెతి దీసిక, జేచ్ మాన్సుల్క ‘అంచ’ మెన ఒప్పున్తి రితి అమ్చి తెన్ బెదవన్సుక అంక లాజు తయెదె.” మెన సిస్సుల్క ప్రజల్క యేసు సంగిలన్.

‡ 8:34 8:34 ‘సిలువ’ మెన కిచ్చొక సంగితయ్ మెలె, యేసుక విరోదుమ్ సుదల్ కిసి మారుల మెలె, జోక ‘సిలువ’ మెలిన్తె ఆత్తిలె చట్టలె మేకుల్ పెట బీవడ మొర్తి రితి ములుల. జోక జా సిలువతె నే టీవడ్లె అగ్గె, యేసుచి సొంత సిలువ జోక మార్చిన్తె జో గడియ సొంత వయుక నెత్తిర్; యోహాను 19:17. వడ్లె సిమాను మెలొ ఎక్కిలో వయితి రితి తియార్; మార్కు 15:21. సిలువ మెలె, ఏక్ డేడిక అన్నెక్ డేడి రితి డండె అడ్డుమ్ కెర బుయ్యె రోవ టీవడుల.

9

1 జో ఇసి సంగ, “దేముడుచి రాజిమ్ అదికారుమ్ తెన్ జా అస్సె మెన, ఇన్నె టీవొ జా తిల సుదల్తె నగుమ్జిన్ నే మొర్తి అగ్గె దెకుల మెన తుమ్క ఆచ్ కచితుమ్ సంగితసి” మెన సిస్సుల్క ప్రజల్క యేసు సంగిలన్.

యేసు గడియ పరలోకుమ్చి ఉజిడి జలిసి
(మత్త 17:1-13; లూకా 9:28-36)

2 సావ్యు దీసల్ గెలి పిమ్మత్, యేసు పేతురుక యాకోబుక, యోహానుక, అన్నె కో నెంజిలి డోంక్ తిలి మెట్టయ్ కడ నిలన్. మెట్టయ్ వెగితికయ్, జేచ్చి మొక్కె యేసుచి రూపుమ్ మార్పుప జలి.

3 జోచ పాలల్ కిసి జల మెలె, ఈంజ లోకుమ్తె కేన్ సార్ కేన్ సబ్బు తెద్ది చోక్ కెరుక నెత్తిర్ రితి, ఉజిడ్ జా చోక్ జల.

4 తెదొడి, పూర్ణమ్చ దేముడుచి కబుర్లు సంగిత మోసేచి ఏలీయా దొగుల యేసు తెన్ లట్టబై తా, జేచ్ సిస్సుల్క డీసన్ సేడ్ల.

5-6 ఇసి జతికయ్, జేచ్ సిస్సుల్ బలే బియఁ గెతికయ్, తెదొడి పేతురు, కిచ్చొ మెనుక గే నేన గెచ్చు, యేసుక “గురుబాబు, అమ్ ఇన్నె తంక చెంగిలి. తుక ఏక్, మోసేక ఏక్, ఏలీయాక ఏక్, మొత్తుమ్ తిన్ని కుడియల్ ఇన్నె బండుక అమ్క నిలవ్ దే” మెన సంగిలన్.

7 సంగితె తతికయ్, తెదొడి మబ్బు ఏక్ ఉత్త్ర జా, జోవయింక డంకిలన్, అన్నె, “ఈంజొయి అంచొ పుత్తు, అంచొ ప్రేమ తిలొ పుత్తు. ఇన్నెచి కోడు తుమ్ నూన” మెన, మబ్బు తెంతొ అవాడ్ సంగిలిసి నూన్ల. ఇసి జలి బేగి,

8 సిస్సుల్ సుట్టునంత అంకి గలెకి, యేసుక పిట్టవ జో తెన్ అన్నె కో కి డీస్తి నాయ్.

9 జేవ్ జా మెట్టయ్ తెంతో ఉత్ర జెతె తతికయ్, “ఆవ్ మాన్సు జా జెర్మన్ అయ్లోసా మొర గెచ్చు అన్నె జీవ్ జా ఉట్టితి ఎద, తుమ్ అప్పె ఇన్నె దెకిలిసి కక్క కి సంగ నాయ్” మెన సిస్సుల్క యేసు సంగిలన్.

10 ఇసి సంగితికయ్, జర్గు జలిన్చి రిసా తుక్లె తా గెల, గని “మొర గెచ్చు అన్నె జితిన్చి రిసా సంగిల్ కోడుక కిచ్చో అర్దుమ్?” మెన ఉచరంతె తిల.

11 తెదొడి జోక కిచ్చో పుసిల మెలె, “రచ్చించుప కెర్తొసా జతో క్రీస్తుచి అగ్గె ఏలీయా పూర్గుమ్చో జెంక అస్సె, మెన మోసే తెన్ దేముడు దిలి ఆగ్గుల్ సికడ్డన కిచ్చొక సంగితతి?” మెన పుసిల.

12 యేసు జోవయింక, “ఎత్తి తెయార్ కెర్తి రిసా *ఏలీయా తొలితో జెంక అస్సె మెలి కోడు సత్తిమ్. జా ఏక్,

రచ్చించుప కెర్తొసా, ఆవ్ మాన్సు జా జెర్మిలె ఒగ్గర్ సైమల్ సేడుక అస్సె

మెన, మాన్సుల్ జోక నిస్కారుమ్ దెకుల” మెన రెగిడ్డిసి కిచ్చొచి రిసా గే తుమ్ ఉచర.

13 అస్సె, జలె ఆవ్ తుమ్చి తెన్ సంగితిన్ కిచ్చొ మెలె, జో ఏలీయా తొలితో జా తిలన్ మెన ఆవ్ తుమ్క కచితుమ్ సంగితసి. జో జా తిలొ, అన్నె జోచి రిసా రెగిడ్డి కోడు కి నెరవెర్చుప జలి.

“జేవ్చి ఇస్టుమ్ అయ్లి రితి మాన్సుల్ జోక కెల మెన రెగిడ్డి కోడు” మెన యేసు సంగిలన్.

సిస్సుల్ ఏక్ బూతుమ్క ఉదడుక

నెతిర్రిసి

(మత్త 17:14-20; లూకా 9:37-43)

14 యేసు, జేవ్ సిస్సుల్, మెట్టక ఎట్టొ తా గెల సిస్సుల్తె పాచ కెర, జోవయించొ సుట్టునంత ఒగ్గర్జిన్ జనాబ్ బెర అస్తి, చి మోసే తెన్ దేముడు దిలి ఆగ్గుల్ సికడ్డన జోవయింతెన్ గగ్గొల్ జతె అస్తి మెన యేసు ఇసి దెకిలొ.

15 జలె, జేవ్ జనాబ్ యేసుక దెకిల్ బేగి, ఒగ్గర్ ఆచారిమ్ జా, జోతె నిగ జా జోకర్ల.

16 యేసు, జలె, “జోవయింతెన్ కిచ్చొచి రిసా లట్టబ్బను?” మెన పుసిలన్.

17 జనాబ్తె తిలొ ఎక్కిలొ, “గురుబాబు, గుల్లొ కెర్తి బూతుమ్ దెర్లొ అంచొ పుత్తుక తుచితె కడ ఆన్లయ్.

18 జా బూతుమ్ జోక కేనె దెరెదె గే, ఒత్త సేడవ దెయెదె. సేడయ్లె, ఈంజొ పొగుర్లు బార్ కెరవన, దంతొ చప్ప, మోర్పు సేడుక. ‘జా బూతుమ్క ఉదడ దాన’ మెన తుచ సిస్సుల్క బతిమాల్పా జా సంగిలే కి, జేవ్ నెతిర్ల.” మెన జో నాడుచొ అబ్బొసి సంగిలన్.

19 తెదొడి యేసు కిచ్చొ జబాబ్ దిలన్ మెలె, “నముకుమ్ నెంజిలి కాలుమ్చ, తుమ్! తుమ్చి తెన్ ఆవ్ కెత్తి దీసల్ తంక? కెత్తి దీసల్ తుమ్చి బుద్ది ఆవ్ ఓర్పుప జంక? జో నాడుక అంచితె కడ అన” మెన సంగితికయ్,

20 నాడుక యేసుతె ఆన్ల. ఆన్తికయ్, జా బూతుమ్ యేసుక దెకిలి బేగి, జో నాడుక పొర్లు కెరవ గెల్తికయ్, నాడు బుయ్యె సేడ ఎంగ్ల ఎంగ్ల జా పొగుర్లు కెరవన, పొర్లుప జతె తిలన్.

21 దస్సి జతె తతికయ్, “ఇన్నెక కెత్తి దీసల్ తెంతో ఈంజ బాద అస్సె?” మెన యేసు నాడుచొ అబ్బొన్క పుసిలన్, చి

* 9:12 9:12 మత్తయి 17:13తె దెకిలె, ‘ఏలీయా రితిసా’ మెన బాప్తిసుమ్ దెతె తిలొ యోహానుచి రిసా సంగిలన్ మెన రుజ్జు జతయ్.

జో “బాల తతె తెంతో. బాల తతె తెంతో దస్సి జా జా,

22 ఇన్నెక నాసెనుమ్ కెర్తి రిసా ఒగ్గర్ ఒగ్గర్ సుట్టు ఆగితె పానితె సేడయ్లి. తుయి కిచ్చో జలెకు కెరుక తెర్లెగిన, అమ్చి ఉప్పిరి కన్కారుమ్ తియ అమ్క తోడ్ కెరు!” మెన సంగ జోకర్తికయ్,

23 తెదొడి యేసు జోక, “తుయి తెర్లెగిన’ మెంతసి అంక, కిచ్చోక? కో అంక నంపజలోసాక, జోక ఎత్తి జెయిమ్ జయెదె!” మెన సంగిలన్.

24 బేగి నాడుచో అబ్బోసి, “ఆవ్ నంపజతసి. అంచి నముకుమ్ తొక్కి చి జలె, ఒగ్గర్ జతి రితి అంక తోడు తా!” మెన ఏడ కేక్ గలన్.

25 తెదొడి ఒగ్గర్జిన్ జనాబ్ ఎక్కితె బెద పాసి నిగ జెతతి మెన యేసు దెక కెర, “ఓ గుల్లో కెర్తి బోయ్ రో కెర్తి బూతుమ్. తుయి ఇన్నెక ముల దా, కెయ్యుక కి ఇన్నెక అన్నె దెరు నాయ్ మెన ఆవ్ తుక ఆడ్ర దెతసి,” మెన జా బూతుమ్క యేసు గోల కెర్తికయ్,

26 బూతుమ్ గట్టిజ కేక్ గల, నాడుక గట్టిజ పార్లు కెరవ బార్ జా ముల దిలన్, చి నాడు మొర గెలి రితి జలి. “మొర గెలో” మెన ఒగ్గర్జిన్ సంగిల,

27 గని యేసు నాడుక ఆతు దెర ఉట్టయ్తికయ్, జో చెంగిల్ జా టీవో జలన్.

28 జలె, యేసు గెరి గెచ్చ తెడి పెసితికయ్, జోచ సిస్సుల్, “అమ్ కిచ్చోక జా బూతుమ్క ఉదడుక నెతిర్లమ్?” మెన కో వేర మాస్సుల్ నే సూన్తి రితి యేసుక పుసిల.

29 పుసితికయ్, జో † “ప్రార్దన కెర్లెకయ్ ఇనిచి ఉదడుక జయెదె, నెంజిలె నాయ్” మెన సంగిలన్.

మొర గెచ్చ అన్నె జీవ్ జా ఉట్టిందె

మెన యేసు సంగిలిసి (మత్త 17:22-23; లూకా 9:43-45)

30 యేసు, సిస్సుల్, ఒత్త తెంతో బార్ జా గలిలయ ప్రాంతుమ్ వాట్ గెల. ‘అమ్ ఇన్నె తిలిసి ప్రెజల్ నేన్తు’ మెన గుట్టు తెన్ గెతె తిల.

31 కిచ్చోక మెలె, యేసు జోచ సిస్సుల్క బోదన కెర్తె తిల. “ఆవ్ మాస్సు జా జెర్మున్ అయ్లోసాక మాస్సుల్చి అత్తి దెర దెవుల, చి అంక మార గెలుల. జేవ్ అంక మార గెలి కి, తిర్తతక అన్నె జీవ్ జా ఉట్టిందె” మెలన్.

32 గని జో సంగిలిసి అర్దుమ్ నే కెరన్లెకి, పుసుక బియ కెర, తుక్లె తిల.

33 తెదొడి యేసు, సిస్సుల్, కపెర్నూహూమ్ పట్టుమ్తె పాచ గెరి గెచ్చ తెడి పెసిలి పొద్ది, యేసు జోవయింక “వట్టె ఎక్కిలో తెన్ ఎక్కిలో కిచ్చోచి రిసా వాదెన జతె తిలదు?” మెన పుసిలన్.

34 జేవ్ తుక్లె తిల. కిచ్చోక మెలె, “అమ్చితె కొన్సొ వెల్లో జయెదె?” మెన జేవ్ వట్టె లట్టబన తిల.

35 తెదొడి యేసు వెన, జేవ్ బారజిన్క పాసి బుకారా కెర, జోవయింక, “కొన్సొ జలెకు వెల్లో జంక ఉచరెదె గే, జో గవురుమ్ నే ఉచరంతె తా, ఎత్తిచి కంట దాక్ కెరన, ఎత్తిజిన్క సేవ కెర్తొసా జంక అస్సె” మెన సంగ,

36 ఏక్ బాలబోదక దెర, జోవయింది నెడమె టీవో కెర, ఉక్కుల, జోవయింక అన్నె,

37 ‡ “ఇన బాలబోదల్తె ఎక్కిలోక జలెకు కో అంచి నావ్ తెన్ మరియాద కెరుల గే అంకయ్ మరియాద కెర్లి రితి జవుల. అన్నె, అంకయ్ కో మరియాద కెర తవుల గే, ఎక్కి అంకయ్ నాయ్, గని అంక తెద్రయ్లోసాకయ్ మరియాద కెర్లి రితి జవుల” మెన యేసు బోదన కెర్లన్.

† 9:29 9:29 ఈంజ మత్తెలి గ్రీకు బాస తెన్ తొలితొ రెగిడ్ల పుక్కుల్తె “చువ్వె తా ప్రార్దన కెర్లెకయ్...” మెన రెగ్ల అస్సె. ‡ 9:37 9:37 నెంజిలె “జో అంక నంపజలి రిసా ఇన బాలబోదల్తె ఎక్కిలోక జలెకు కో మరియాద కెరెదె గే, అంకయ్ మరియాద కెర్లి రితి జయెదె.”

38 తెదొడి యోహాను మెలో సిస్సుడు యేసుక కిచ్చొ మెన సంగిలన్ మెలె, “గురుబాబు, ఎక్కిలో తుచి నావ్ తెన్ బూతల్క ఉదడ్డిసి దెకిలమ్. జో అమ్చి పట్టి జెతోసా నెంజెచి రిసా జోక అడ్డు కెర్లమ్” మెన సంగిలన్.

39 జలె యేసు, “జోక అడ్డు కెర నాయ్. కిచ్చొక మెలె, కో జలెకు అంచి నావ్ తెన్ ఏక వెల్లి కామ్ కెరెదె గే, జా జర్గు జలి తెంతో అంచి రిసా విరోదుమ్ లట్టబుక నెత్తె.

40 అమ్చి కామ్చి ఉప్పిరి విరోదుమ్ నెంజెలోసా అమ్చి పచ్చెన జెతోసా జయెదె.

41 “ఆవ్ క్రీస్తు జలొసా తెన్ తుమ్ బెదిలి రిసా, కో జలెకు తుమ్క బుక్కెక్ పాని జలెకు దెయెదె గే, జో దస్సి కెర్లి రిసా కచితుమ్ జోక బవుమానుమ్ పిట్టె నాయ్, మెన తుమ్క ఆవ్ కచితుమ్ సంగితసి.

42 “గని అంక నంపజల ఇన బాలబోదల్ రిత జలనతె ఎక్కిలోక కి, కో పాపుమ్ కెరవుల గే, జోక జెతికయ్ సిచ్చుచి కంట, జోక టొట్రయ్ తిర్వెలి రితొ వెల్లి పత్తురు ఒడొవ దా, సముద్రుమ్తె బుడ్డవన్మయ్ జోక చెంగిలి.

43 తుమ్చితె ఎక్కిలోచొ ఆతు జలెకు జోక *పాపుమ్ కెరవ తిలెగిన, జో ఆతు జోకండన గెలి రితి జవున్. కిచ్చొక మెలె, దొన్ని అత్తో తెన్ తా వెల్లి ఆగి గొయ్తె, కెయక నే విజయ్తి ఆగితె, గలి జతి కంట, పాపుమ్ కెరయ్తో ఆతు జలెకు నెంజెలి రితి జా పరలోకుమ్తె బెదుక చెంగిలి.

44-45 † దస్సి, తుమ్చితె ఎక్కిలోచొ చాటు జలెకు జోక *పాపుమ్ కెరవ తిలెగిన, జో చాటు కండన గెలి రితి జవున్. కిచ్చొక మెలె, దొన్ని చట్టో తెన్ తిలి రితి తా వెల్లి ఆగి గొయ్తె గలి జతి కంట, పాపుమ్ కెరయ్తి చాటు జలెకు నెంజెలి రితి జా పరలోకుమ్తె బెదుక చెంగిలి.

46-47 కీతుమ్తె ఎక్కిలోచి అంకి జలెకు జోక * పాపుమ్ కెరవ తిలెగిన, జా అంకి కడ వెంట గెలి రితి జవున్. కిచ్చొక మెలె, దొన్ని అంకివొ తెన్ తిలి రితి తా వెల్లి ఆగి గొయ్తె గలి జతి కంట, ఎక్కి అంకి తెన్ జలి రితి జా దేముడుచి రాజిమ్తె బెదుక చెంగిలి.

48 వెల్లి ఆగి గొయ్తె కిచ్చొ మొర్లి నాయ్, చి జా ఆగి విజె నాయ్.

49 “ ‘సుద్ది జవున్’ మెన బలి దెతి ఎత్తితె లోన్ దెరవుక అస్సె. దస్సి, లోన్క, ఆగిక మెలి రితి, ఎత్తి మాన్సుక సుద్ది నిదానుమ్ కెరుక అస్సె.

50 “లోన్ చెంగిలిచి. గని జా లోన్చి కారు గెచ్చు చప్పుయ్ జలెగిన, జా అన్నెక్ సుట్టు కీసి కెర కారు కెరుక జయెదె! నెంజె. తూమ్, జలె, తుమ్చి పెట్టి లోన్ దెర్లి రితి జా, చి ఎక్కిలో తెన్ ఎక్కిలో సేంతుమ్ తెన్ తా” మెన సిస్సుల్క యేసు బోదన కెర్లన్.

10

యేసు తిరిమ్ తిరిమ్ యెరూసలేమ్ గెచ్చుక మొదొల్ కెర్లిసి
(మత్త 19:1-12)

§ 9:42 9:42 నెంజెలె ‘జోవయించి నముకుమ్ పిట్టవుల గే...’ * 9:43 9:43 పాపుమ్...రిసా నెంజెలె, నముకుమ్ పిట్టయ్తి రితి జలెగిన, జా దీసి తెంతో అన్నె దస్సి నే జతి రిసాచి అర్దుమ్ కి గ్రీకు బాన తెన్ ఈంజ తొలితో రెగిడ్డిన్ తెన్ బెదెదె. † 9:44-45 9:44-45 గ్రీకు బాన తెన్ ఈంజ మత్తెలి తొలితో రెగిడ్డి సగుమ్ పుస్తకల్తె 44 నంబర్లవ కొడొ తతి నాయ్. గని తిలె, 44 చి 46చి కొడు 48 నంబర్చి కొడుచి రితి జవుల. ‡ 9:44-45 9:44-45 పాపుమ్...రిసా నెంజెలె, నముకుమ్ పిట్టయ్తి రితి జలెగిన, జా దీసి తెంతో అన్నె దస్సి నే జతి రిసాచి అర్దుమ్ కి గ్రీకు బాన తెన్ ఈంజ తొలితో రెగిడ్డిన్ తెన్ బెదెదె. § 9:46-47 9:46-47 గ్రీకు బాన తెన్ ఈంజ మత్తెలి తొలితో రెగిడ్డి సగుమ్ పుస్తకల్తె 44 నంబర్లవ కొడొ తతి నాయ్. గని తిలె, 44 చి 46చి కొడు 48 నంబర్చి కొడుచి రితి జవుల. * 9:46-47 9:46-47 పాపుమ్...రిసా నెంజెలె, నముకుమ్ పిట్టయ్తి రితి జలెగిన, జా దీసి తెంతో అన్నె దస్సి నే జతి రిసాచి అర్దుమ్ కి గ్రీకు బాన తెన్ ఈంజ తొలితో రెగిడ్డిన్ తెన్ బెదెదె.

1 యేసు కపెర్నూహామ్ పట్నమ్ము తెంతో ముల దా యూదయ ప్రదేసిమ్ వాట్ గెచ్చు, యోర్దాను గాడు ఒత్తల్తో ఉట్ట గెలన్. ఒత్త తతికయ్, ఒగ్గరజిన్ జనాబ్ అన్నె జోతె బెర జెతికయ్, జో అలవాట్ జలి రితి జోవయింక బోదన కెరుక దెర్లన్.

పెండ్లి జలన ముల ములి జతిన్చి రిసా యేసు సంగిలి (మత్త 19:1-12)

2 జా పొది, పరిసయ్యుల్ సగుమ్జిన్ జోక పరిచ్చు కెర తెర్లె నింద కెరుక మెన, జోతె జా కెర, “మున్నుబోద జోచి తేర్చిక ములుక నాయిమ్ గె?” మెన పుసిల.

3 యేసు “మోసే పూర్ణుమ్చో తుమ్క కిచ్చొ ఆడ దిలన్?” మెన పుసిలన్.

4 ఈజో ఇసి సంగితికయ్, జేవ్ “ముల దెతి కాగ్గుమ్ రెగ్ల దెలిగిన ముల దెంక జయెదె మెన మోసే పూర్ణుమ్చో సెలవ్ దిలన్” మెన జబాబ్ దిల.

5 జలె, యేసు జోవయింక, “తుమ్ రాడ్ జివ్చ మాన్సుల్చి రిసా మోసే జా ఆగ్గు రెగిడ్లన్.

6 గని లోకుమ్ జెర్తయ్లి మొదోల్ పొది తెంతో ‘మున్నుబోద తేర్బోద’ మెన దేముడు దొన్ని రగల్ జర్గు కెర్లొ” మెన, అన్నె

7 “జాకయ్ మున్నుబోద అయ్యున్ అబ్బొన్క ముల దా జోచి తేర్చి తెన్ బెద తంక అన్నె.

8 అన్నె జేవ్ దొగుల ఎక్కి ఆగ్ జా తవుల మెన దేముడు రెగ్లయ్లి కోడు అన్నె. జాచి రిసా, పెండ్లి జలి తెంతో జేవ్ దొగుల నెంజితి. ఎక్కి ఆగ్ జా అస్తి.

9 జాకయ్, దేముడు పెండ్లితె కక్క జట్టు కెరవ తయెదె గే, కేన్ మాన్సు ములవుక జయె నాయ్” మెన జేవ్క సంగిలన్.

10 యేసు, సిస్సుల్, జేవ్ బస జతి గెరి గెచ్చు తెడి పెసిలి పడ్డొ, ఈంజ కోడుచి రిసా సిస్సుల్ అన్నె పుసిల.

11 యేసు సిస్సుల్క, “కో జలెకు జోచి తేర్చిక ముల దా అన్నెక్కిక పెండ్లి కెరనెదె గే, జో లంజె వంసుమ్చో జా తేర్చిక లంజె కెర్తయ్,

12 అన్నె, మున్నున్క తేర్చి ముల దా అన్నెక్కిక పెండ్లి కెరన్లెగిన, జయ్యి లంజె జతయ్” మెన సంగిలన్.

బాలబోదల్క యేసు చడ చెంగిల్ కెర్రిసి

(మత్త 19:13-15; లూకా 18:15-17)

13 ఒత్త తిలి పొది, ‘అమ్చ బోదల్క చడ చెంగిల్ జవున్’ మెన, సగుమ్జిన్ జోవయింక యేసుచి పాసి కడ ఆన్తికయ్, సిస్సుల్, “పోస” మెన కడ అన్సక గోల కెర్లె.

14 గని జేవ్ గోల కెర్రిసి యేసు దెక, బాద సేడ, “బోదల్ అంచితె జెతు. జోవయింక అడ్డు కెర నాయ్. దేముడుచి రాజిమ్ ఇన బాలబోదల్ జల సుదల్చియి.

15 తుమ్క ఆవ్ కిచ్చొ కచితుమ్ సంగితసి మెలె, గవురుమ్ నే ఉచరంతె బాలబోదల్చి రితిచ్చి నముకుమ్ తెన్ దేముడుచి రాజిమ్తె బెదితి రితి నజ్లెకయ్, పరలోకుమ్తె గెచ్చుక జయెదె. ఇసి నే జలిగిన, కోకి ఒత్త బెదుక జయె నాయ్” మెన సంగ

16 జేవ్ బోదల్క ఉక్కుల దెర, జోవయింక ఎక్కెక్లక బోడి చడ, ‘చెంగిల్ తత్తు’ మెన యేసు సంగిలన్.

పరలోకుమ్చి రాజిమ్తె కిసి బెదుక గే

(మత్త 19:16-30; లూకా 18:18-30)

17 యేసు అన్నె బార్ జా వట్టె గెతె తతికయ్, ఉబెడొ ఎక్కిలో నిగ జా, యేసుచి పురైతో సెర్ను సేడ జోకర, “చెంగిల్ తిలో గురుబాబు, పరలోకుమ్చి రాజిమ్తె కెయ్క తెయ్క జితి వాట, అంక దొర్కు జంక మెలె, ఆవ్ కిచ్చొ కెర్లె జయెదె?” మెన పుసిలన్.

18 పునీతికయ్, యేసు, “చెంగిల్ తిలోసా మెన అంక కిచ్చొక సంగిలది? దేముడు ఎక్కిలోయి చెంగిలోసా, గని అన్నె కో కి చెంగిలస నెంజితి.

19 జో దిల ఆగ్నల్ మెలె, తుయి జాన్సి. ‘నరు అత్య కెరుక జయె నాయ్, లంజెకమొ కెరుక జయె నాయ్, చోరుక జయె నాయ్, అబద్దుమ్ సాచి సంగుక జయె నాయ్, మోసిమ్ కెరుక జయె నాయ్, అయ్యుద్ అబ్బొద్ క గవురుమ్ దెకితె తంక అస్సె

దసచయ్” మెన జోక యేసు సంగిలన్.

20 జో మాన్సు, “గురుబాబు, బాల తెంతో ఈంజేవ్ ఆగ్నల్ రితి నిదానుమ్ కెర దెకన్ తసి” మెన జబాబ్ దిలన్.

21 యేసు జోక దెక కన్కారుమ్ జా, “తుక ఎక్కి పిట్ట గెచ్చు అస్సె. తుయి గెచ్చు, తుచి అస్తి ఎత్తి విక గెల కెర, బీద నుదల్ క దేసు. దస్సి కెర్లెగిన, పరలోకుమ్ తె తుక అస్తి కలుగు జెయెదె. అన్నె, అంచి తెన్ బెద, అంచి పట్టి జే!” మెన యేసు సంగిలన్.

22 జలె, జో ఉబెడొక ఒగ్గర్ సొమ్మారుమ్ చి రిసా, దుకుమ్ జా మొకోమ్ ఇదిలిసి కెర ఉట్ట గెలన్.

సొమ్మార్లు పరలోకుమ్ తె బెదుక కస్టుమ్

23 జో సొమ్మారుమ్ చొ ఉట్ట గెతికయ్, యేసు పళ్ల సిస్సుల్ క దెక జోవయింక, “సొమ్మార్లు దేముడుచి రాజిమ్ తె బెదుక జలె, కస్టనె జలెకయ్ జయెదె” మెన సంగిలన్.

24 జోచ ఈంజేవ్ కొడొక సిస్సుల్ ఎదివాట్ ఆచారిమ్ జతికయ్, జోవయింక అన్నె, “ఓ పుత్తర్లు, *ఈంజ లోకుమ్ తెచి అస్తిక నముకుమ్ తిల నుదల్ దేముడుచి రాజిమ్ తె బెదుక కెద్ది కస్టుమ్!

25 ఇసా సొమ్మారి దేముడుచి రాజిమ్ తె బెదితి కంట, నూజిబొరో వాట్ ఒంటె గెచ్చుక సుల్లు!” మెన సంగిలన్.

26 జేవ్ ఎదివాట్ ఆచారిమ్ జా, “దస్సి జలె, కో రచ్చించువ జంక జయెదె?” మెన జోక పుసీల.

27 యేసు జోవయింక దెక, “మాన్సు ఈంజ కెర్కు నెత్తిర్లిసి, గని దేముడు జా ఎత్తి జర్లు కెరుక తెరె.” మెన సంగిలన్.

28 జలె, పేతురు జోక, “ఈందె, అమ్ ఎత్తి ముల దా తుచి పట్టి బులితనుమ్” మెన సంగుక దెర్లన్.

29 జలె యేసు జోవయింక, “తుమ్ క ఆవ్ కిచ్చొ కచితుమ్ సంగితసి మెలె, అంచి రిసా, అంచి సుబుమ్ కబుర్ చి రిసా, గేరు జలెకు, అన్నొబావొక జలెకు, †బయిబేనిక జలెకు, అయ్యున్ అబ్బొన్ క జలెకు, బోదల్ క జలెకు, బుయి జలెకు, కో ముల తవుల గే,

30 అప్పె ఈంజ లోకుమ్ తె కి, జోవయింక గెరలు, అన్నొబావొ, బయిబేని, అయ్యుసి,సి, బోదల్, బుయి, దసచ ఎత్తి జోవయింక దొర్కు జయెదె. అన్నె, జెతి కాలుమ్ తె, కెయెచ తెయెచ పరలోకుమ్ తె జితి వాట జోవయింక దొర్కు జయెదె.

31 గని తుమ్ జాగర్త ఉచరన. అప్పె అగ్గె జలన ఒగ్గర్ జిన్ పడ్డె జవుల. అప్పె పడ్డె జలన ఒగ్గర్ జిన్ అగ్గె జవుల” మెన యేసు సంగిలన్.

మొర గెచ్చు అన్నె జివ్ జా ఉట్టిందె మెన యేసు సంగిలిసి (మత్త 17:22-23; లూకా 9:43-45)

32 యేసు, సిస్సుల్, యెరూసలేమ్ పట్టుమ్ తె గెతి రిసా వట్టె గెతె తతికయ్, యేసు దయిరిమ్ తెన్ జోవయించి అగ్గెతో ఇండిలిసి సిస్సుల్ దెక, బలే బమ్మ జల. జోచి పడ్డె గెతె తిలనక కి బలే బిడ్డి. దెర గెలి. జలె, యేసు సిస్సుల్ క అన్నె

* 10:24 10:24 గ్రీకు బాస తెన్ ఈంజ మత్తెలి తొలితో రెగిడ్ల సగుమ్ పుస్తకల్ తె ఈంజ...నుదల్ చి కొడొ తతి నాయ్. † 10:29 10:29 అప్పిబేనిక

పాసి కెరన, జోక జర్గు జంక తిలన్చి రిసా జోవయింక అన్నె సంగుక దెర,

33 “ఈందె నూన, అమ్ యెరూసలేమ్తె గెతనుమ్. ఒత్త గెలమ్ మెలె, ఆవ్ మాన్సు జా జెర్మున్ అయ్లోసొక వెల్లెల పూజర్లుతె, మోసె తెన్ దేముడు దిలి ఆగ్గుల్ సికడ్డనతె దెర దెవుల, చి జేవ్ వెల్లెల మాన్సుల్ అంక మొర్తి సిచ్చు వయడ దా, యూదుల్ నెంజిల అదికారుల్తె అంక సార్పు కెర దెవుల.

34 దస్సి కెర్లె, జేవ్ అంక కొంకడ, తుంక దా, కొర్డల్ తెన్ పెట కెర, అంక మారుల. మార్లె కి, తిర్తత్క అన్నె జీవ్ జా ఉట్టిందె” మెన యేసు సిస్సుల్క అన్నె సంగిలన్.

దొగుల సిస్సుల్ వెల్లో జంక కోర్వ జలిసి
(మత్త 20:20-28)

35 తెదొడి యాకోబు, యోహాను మెల జెబెదయి మెలోసొచ దొగుల పుత్తర్పుల్ పురైతో జా, యేసుక “గురుబాబు, కిచ్చొ అమ్ నజుమమ్దె గె అమ్క దెంక.” మెన సంగిల.

36 ఇసి సంగితికయ్ యేసు “ఆవ్ తుమ్క కిచ్చొ జర్గు కెరుక మెన తుమ్ కోర్వ జతను?” మెన పుసితికయ్,

37 జేవ్ జోక, “తుచి పరలోకుమ్చి ఉజిడచి రాజిమ్తె తుయి ఏలువ కెర్తి పొదిక అమ్ దొగుల, తుచి ఉజెతో పక్క ఎక్కిలో, తుచి డెబ్లి పక్క ఎక్కిలో వెసితి రితి అమ్క సెలవ్ దే” మెన సంగిల.

38 యేసు జలె, జోవయింక, “తుమ్ కిచ్చొ పుసితను గే తుమ్ నేన్ను. అల్లె, అంచి గిన్నతె బెద పిలి రితి, ఆవ్ సేడుక తిలి దుకుమ్తె బెదుక ఓర్పువ జంక జలెకు, అంచి తెన్ అంచి బాప్తిసుమ్ నజున్లి రితి జా, ఆవ్ సేడుక తిలి నైమతె బెదుక జలెకు తెరితె గే?” మెన జేవ్ దొగులక సంగితికయ్,

39 జేవ్ ‘తెరుమ్’ మెన సంగిల. దస్సి సంగితికయ్, యేసు జోవయింక, “ఆవ్ పితి గిన్న దుకుమ్ తుమ్ పిస్తె.

ఆవ్ సైమల్ సేడ్డి బాప్తిసుమ్ తూమ్ కి నజన్తె,

40 గని అంచి ఉజెతో పక్క ఎక్కిలో, అంచి డెబ్లి పక్క ఎక్కిలో వెసుక మెన సెలవ్ దెంక అంచి అత్తి నాయ్. పరలోకుమ్ తిలో అంచో దేముడు అబ్బొ కక్క కక్క సెలవ్ దా తయెదె గే, జెవ్వి ఒత్త వెసుల.” మెన జబాబ్ దిలన్.

41 జలె, యాకోబు యోహాను ఎత్కిచి కంట వెల్లో జంక ఉచర్లిసిచి రిసా సేంసెల దెస్సుజిన్ సిస్సుల్ నూన కెర, జోవయించి ఉప్పిరి కోపుమ్ జంక దెర్ల.

సిస్సుల్ ఎక్కిలోక ఎక్కిలో కిసి దెకుక గే యేసు సంగిలిసి

42 తెదొడి యేసు జేవ్ బారజిన్ సిస్సుల్క జోతె బుకారా కెర, “యూదుల్ నెంజిల వేర అదికారుల్ అన్నె జోవయించి తెడి తిల వెల్లెల మాన్సుల్ సొంత గవురుమ్ ఉచరన, ప్రైజల్క జొడ్లు వయడ్లి రితి జోవయింక పోటి తెన్ ఏలువ కెర్తెతి మెన తుమ్ జాన్సు.

43 గని తుమ్చి తెన్ దస్సి తంక జయె నాయ్. తుమ్చితె కో వెల్లో జంక ఉచరెదె గే, జొయ్యి తుమ్చో సేవ కెర్తొసా జా తంక.

44 తుమ్చితె కో ముక్కిమ్ జంక ఉచరెదె గే, జో ఎత్కిజిన్క గొతిమాన్సు జా తంక.

45 కిచ్చొక మెలె, ఆవ్ మాన్సు జా జెర్మున్ అయ్లోసొ కి మాన్సుల్చి అత్తి సేవ కెరవన్ను జెయ్యి నాయ్, గని మాన్సుల్క ఆవ్ సేవ కెరుకయ్ అయ్లయ్. మెలె, ఒగ్గర్జిన్ మాన్సుల్క సయ్తాన్చి రాజిమ్ తెంతో అన్నె గెనన్తి రిసాయి మొర అంచి ప్రాసుమ్ దెంక అస్సిచి రిసా ఈంజ లోకుమ్తె అయ్లయ్” మెన సిస్సుల్క యేసు సంగిలన్.

గుడ్డి జలో బర్తిమయిక యేసు

చెంగిల్ కెర్లసి

(మత్త 20:29-34; లూకా 18:35-43)

46 ఒత్త తెంతో యేసు సిస్సుల్ వట్టె గెచ్చు గెచ్చు యెరికో పట్టుమ్తె జా కెర, సిస్సుల్ తెన్ కి, ఒగ్గర్ ఒగ్గర్జిన్ జనాబ్ తెన్ కి ఒత్త తెంతో బార్ జతె తతికయ్, తిమయిచో వుత్తుసి, బర్తిమయి బిచ్చిమ్ నజీతో గుడ్డి జలోసా, వాట్ సొడి పెన అస్సె.

47 ఒత్త వెన తా, “జెతోసా నజరేతు గవ్వెచో యేసు” మెన జో నూన కెర, “ఒ యేసుప్రబు, దావీదు రాణోచి సెకుమ్తె జెర్మిలో రచ్చించువ కెర్లొసా, అంచి ఉప్పిరి కన్యారుమ్ తియ, అంక చెంగిల్ కెరు!” మెన కేక గలన్.

48 జలె, పాసి తిలస ఒగ్గర్జిన్ “తుక్కె తా” మెన గోల కెర్లె కి, జో గుడ్డి మాన్సు అన్నె, “దావీదుచి సెకుమ్తె జెర్మిలో రచ్చించువ కెర్లొసా, అంచి ఉప్పిరి కన్యారుమ్ తియ, అంక చెంగిల్ కెరు!” మెన అగ్గెచి కంట గట్టిజ కేకుల్ గలో.

49 ఇసి జతికయ్, యేసు టీవో జా కెర, “జోక ఇత్తల్తో బుకారా” మెన సిస్సుల్క సంగిలన్. జేవ్, జలె, “అల్లె, దయిరిమ్ జా ఉట్టు! యేసు తుక బుకార్తయ్” మెన జో గుడ్డి మాన్సుక బుకార్తికయ్,

50 జో చట్కున ఉట్ట జోచి దుప్పటి పక్కయ్ వెంట గల, యేసుతె అయ్లో.

51 యేసుతె జెతికయ్, “ఆవ్ తుక కిచ్చొ కెరుక మెన తుయి కోర్ప జతసి?” మెన పుసితికయ్, జో గుడ్డి మాన్సు, “గురుబాబు. ఆవ్ దెకిత్ రితి కెరు.” మెన సంగిలో.

52 జలె, యేసు జోక “గో, అంచి ఉప్పిరిచి తుచి నముకుమ్ తుక చెంగిల్ కెర అస్సె.” మెన సంగిలన్. బేగి, జో మాన్సుచ అంకివో డీసిల, చి జో యేసుచి పట్టి వట్టె గెలో.

11

యేసు యెరూసలేమ్ పట్టుమ్క ఉట్ట అయ్లీసి

(మత్త 21:1-11; లూకా 19:28-40; యోహా 12:12-19)

1 యేసు సిస్సుల్ తెన్ వట్టె గెచ్చు గెచ్చు, యెరూసలేమ్ పట్టుమ్క పాసి అయ్లి పొది, బేత్తుగే బేతనియ మెంత గావెలిచి పాసిచి * ఒలివ మెట్టయ్ పావెలి పొది, యేసు జోచ సిస్సుల్తె దొగులక బుకారా,

2 “తుమ్చి మొక్కె తిలి గవ్వె గెచ్చు వెన, చి బేగి బంద తిలి గాడ్డె పిల్ల ఏక్ డీసెదె. జాచి ఉప్పిరి కేన్ మాన్సు కెయఁ కి వెనుక నేతయ్. జాక యిప కెర ఉదడ అస్సె.

3 కొన్సొ జలెకు తుమ్ కిచ్చొక దస్సి కెర్తను?” మెన సంగిలెగిన, “ఇన్నెతెన్ ప్రబుక కామ్ అస్సె. కామ్ జలి బేగి ఇత్తల్తో అన్నె బే బేగి తెద్రయెదె, మెన సంగ” మెన సిస్సుల్క యేసు సంగ, తెద్రయ్లన్.

4 జలె, జో సంగిలిన్తె జేవ్ గెతికయ్, ఏక్ వీదె ఏక్ గుమ్ముమె బంద తిలి ఏక్ గాడ్డె పిల్ల జోవయింక డీసిలి.

5 జేవ్ జాక యిపితె తతికయ్, జా వీదె టీవో జా తిల మాన్సుల్, “తుమ్ కిచ్చొక జా గాడ్డె పిల్లక యిపితను?” మెన జోవయింక పుసిల.

6 జేవ్ పుసితికయ్, యేసు సంగిలి రితి సిస్సుల్ సంగిల. జేవ్ మాన్సుల్, “దస్సి జలె, దెర గెచ్చు!” మెన సెలవ్ దిల.

7 సిస్సుల్ జా గాడ్డె పిల్లక యేసుతె ఉదడ ఆన, జోవయించ దుప్పట్టు గట్ట గాడ్డెచి ఉప్పిరి గలిల, చి యేసు వెగ వెస్సెలన్.

8 పిమ్మట్ ఒగ్గర్జిన్ మాన్సుల్ జోవయించ దుప్పట్టు గట్ట వటె వటె అంతిర్ల. అన్నె సగుమ్జిన్ వాట్ సొడిచ

* 11:1 11:1 ‘ఒలివ చెట్ల’ మెలి, జా డీసిమ్క ముక్కిమ్ జలి ఏక్ రగుమ్ పండ్లు. దస్సి కంక జయెదె, నెంజలి తెల్ పేడుక జయెదె. జేవ్ రూకుల్క ఈంజ మెట్టక నావ్ తియ అస్సె.

బట్టిలె తిల చెట్లె కండిల రొడ్డల్ మట్టల్ అన, వట్టె అంతిర్ల.

9 దస్సి అంత్ర అంత్ర, పురైతో గెతన పడ్డొ గెతన “జోబర, జోబర!” మెలి అర్దుమ్ తెన్ “ఓసన్న, ఓసన్న!” మెన, “దేముడు ప్రబుచి నావ్ తెన్ జెతొసాక ఓసన్న!

10 అమ్చొ దావీదు పూర్గుమ్చొ తెన్ మొదొల్ జలి †రాజిమ్ ముక్కిమ్ జా అన్నె బార్ జతిన్క జోబర! ఎత్కిచి కంట ఉప్పిర్చి టాన్తె తిలొసాక ఓసన్న!” మెన కేకుల్ గల్తె తిల.

11 జలె, యేసు యెరూసలేమ్తె పాచ, దేముడుచి గుడితె గెచ్చ, పెన, సుట్టునంత అంకి గల, ఎత్కి దెక, సాంజ్ జలి రిసా అన్నె బార్ జా, బారజిన్ సిస్సుల్ తెన్ బేతనియ గవ్వె అన్నె ఉట్ట గెల.

అంజూరుమ్ రూకుక యేసు సాపెన గల కెర్తిసి

(మత్త 21:18-19)

12 అన్నెక్ దీసి, జేవ్ బేతనియ గవ్వె తెంతొ యెరూసలేమ్తె అన్నె గెతె తత్తికయ్, యేసుక చూ కెర్తి.

13 జలె అక్కల్ తిలి ఏక్ ‡అంజూరుమ్ రూకుక దెకిలన్. జలె, జో రూకెత పండ్లు దెర అస్సి గే నాయ్ గే మెన దెకుక గెలో. అక్కుడొలీ గని అన్నె కిచ్చొయ్ నాయ్. కిచ్చొక మెలె, జా రూకెతె జా కాలుమ్ పండ్లు దెర్తి నాయ్.

14 యేసు జలె, జో రూకుక, “అప్పె తెంతొ తుచి తెంతొ కో కి పండ్లు కతు నాయ్” మెన రూకుక సంగిలన్. జో సంగిలీసి జోచ సిస్సుల్ నూన్ల.

దేముడుచి గుడితె గెచ్చ వికితనక గొల కెర్తిసి

(మత్త 21:12-17; లూకా 19:45-48; యోహా 2:13-22)

15 తెదొడి జేవ్ యెరూసలేమ్తె పాచ కెర, యేసు దేముడుచి గుడితె పెన, దేముడుచి గుడిచి తెడి కిచ్చొ కిచ్చొ వికితనక గెంతనక దెక, జోవయింక ఉదడుక దెర, కిడబ్బుల్ పల్లయతనచ బల్లల్, అర్పితుమ్ దెత పార్వ పిట్టల్ వికితనచ బల్లల్ సేడవ దా,

16 కో కి, కిచ్చొ కి దేవులుమ్ వాటు వయ నెంక కి బప్పె నాయ్.

17 దస్సి కెర తా,

“ ‘దేసిమ్లు ఎత్కిచ మాస్సుల్ అంచితె జెతి రితి, అంచి గేరు ప్రార్దన కెర్తి గేరు జా, దస్సె తవున్.’

మెన దేముడుచి కొడొతె రెగ్లవ అస్సి. తూమ్ జలె, జాక చొర్లు జితొ గేరు జతి రితి ఈంజొ దేముడుచి గుడిక మార్కువ కెర అస్సున్” మెన సంగిలన్.

18 వెల్లెల పూజర్లు, మోసే తెన్ దేముడు దిలి ఆగ్గుల్ సికడ్డన నూన కెర, పిమ్మట్ జొయ్యి కెర్తి బొదనక సర్ల తెన్ నూన పైజల్ ఎత్కిజిన్ ఆచారిమ్ జతతి మెన దెక, జో యేసు వెల్లో జయెదె మెన బియె కెర, “జోకీసి మారుమ” మెన కుట్ర ఉచరన్ల.

19 సాంజ్ జతికయ్, యేసు పట్టుమ్ తెంతొ అన్నె బార్ జలొ.

20 పెందలె, యేసు సిస్సుల్ అన్నె యెరూసలేమ్తె గెతె తతికయ్, వట్టె జో అంజూరుమ్ పండ్లు రూకుక దెకిలె, చెర్లి తెంతొ మొదొల్ జా ఒండి నుకా గెచ్చ అస్సి.

† 11:10 11:10 యేసుచి రాజిమ్క ‘ఈంజ లోకుమ్చి రగుమ్చి’ మెన పైజల్ ఉచర్లె తిల. ఈంజ లోకుమ్చ జోవయించ బాదల్ తెంతొ, జోవయింక ఆక్రమించుప కెర్లన తెంతొ రచ్చించుప కెరెదె మెన ఉచర్లె తిల, గని జోవయించి రాజిమ్ జోవయించి రచ్చన ముక్కిమ్క ఆత్మ రగుమ్చి మెన నేనీతి. ‡ 11:13 11:13 బొడ్డ పండ్లు రిత పండ్లు దనా రూకెతె దెరుల. రూకు మాములుమ్ చెంగిలీచి జలె, అక్కల్ దెర్లి పొది పండ్లు కి దెర తంక. § 11:15 11:15 అర్పితుమ్ దెత పిట్టల్ గల్ల గెనుక జలె, జోవయింక ఆక్రమించుప కెర్లి రోమ్ దేసిమ్చి ప్రబుతుమ్చి డబ్బుల్ దిలె నెంజె. జేక, జోవయించి డబ్బుల్ పల్లవన, దేముడుచి గుడితె కామక జెతికయ్ రగుమ్ డబ్బుల్కయ్ పిట్టల్ గల్ల గెనుక, నెంజిలె దేముడుచి గుడిక డబ్బుల్ దెంక. డబ్బుల్ పల్లయతన నాయుమ్ నెంజిలెచి ఎదిలి లాబుమ్ కి కెరనుల.

21 నుకాగెలిన్ దెక, జో రూకుక యేసు సంగిలి కోడు ఏదన్లు కెర, పేతురు, “గురుబాబు, ఆదె! తుయి సాపెన దిలో రూకు సుకా గెచ్చు అస్సె” మెన సంగిలన్.

22 యేసు సిస్సుల్క దెక కిచ్చొ సంగిలన్ మెలె, “దేముడుచి ఉప్పిరి తుమ్ నమ్మకుమ్ తియన్.

23 తుమ్క ఆవ్ కిచ్చొ కచితుమ్ సంగితసి మెలె, ఈంజ మెట్టక జవున్ దెక, ‘ఓ మెట్ట, ఉట్టి జా సముద్రుమ్తె గలి జా’, మెన పెట్టితె కిచ్చొ అన్మానుమ్ నెంతె తా, పూర్తి నంపజా నెరవెర్నుప జయెదె మెన, కొన్సొ జలెకు సంగెదె గే, జయ్యి జోచి రిసా ప్రబు జర్లు కెరెదె మెన తుమ్క ఆవ్ కచితుమ్ సంగితసి.

24 జాకయ్ తుమ్క ఆవ్ కిచ్చొ మెంతసి మెలె, ప్రార్థన కెర్తె పొది తుమ్ కిచ్చొ సంగిలే కి, ‘జా అమ్క దొర్కు జలి’ మెన తుమ్ నంపజా, చి కచితుమ్ తుమ్క దొర్కు జయెది.

25 గని ప్రార్థన కెర్తె పొది తుమ్క కిచ్చొ బుద్ది తంక మెలె, తుమ్తె ఎక్కిలో అన్నెక్కోక కిచ్చొ జవున్ అల్లర్ కెర తిలిగిన, అల్లర్ కెర్లొసాక, జో అల్లర్ సేణ్లొసా చెమించుప కెరుక అస్సె. తుమ్ దస్సి ఎక్కిలోక ఎక్కిలో చెమించుప కెర్తె, పరలోకుమ్ తిలో తుమ్చో అబ్బొ జలో దేముడు తుమ్క చెమించుప కెరెది.

26 *తుమ్ అన్నెక్కో మాన్సుల్క చెమించుప నే కెర్లెగిన, దస్సి పరలోకుమ్ తిలో అబ్బొ జలో దేముడు తుమ్క చెమించుప కెరె నాయ్” మెన యేసు సికడ్లన్.

యేసుక అన్నె పరిచ్చు కెర్తిసి
(మత్త 21:23-27; లూకా 20:1-8)

27 జలె, యెరూసలేమ్తె అన్నె పాచిలి. యేసు దేముడుచి గుడితె అన్నె గెచ్చు ఒత్త బుల్తె తతికయ్, వెల్లెల పూజర్లు, మోసి తెన్ దేముడు దిలి

ఆగ్గుల్ సికడ్లన, అన్నె సగుమ్జిన్ వెల్లెల మాన్సుల్ కి, జోతె జా కెర,

28 “తుయి కెర్త కమొ కెరుక, తుయి బోదన కెరుక తుక కిచ్చొ అదికారుమ్ అస్సె? కొన్సొ తుక అదికారుమ్ దిలన్?” మెన జోక పుసిల.

29 జాకయ్ యేసు జోవయింక, “ఆవ్ కి తుమ్క ఏక్ కోడ్ పుసిందె. తుమ్ చెంగిల్ జబాబ్ సంగిలె, ఆవ్ కిచ్చొ అదికారుమ్క ఇసి కెర్తసి గే, ఆవ్ కి తుమ్క సంగిందె.

30 జలె, యోహాను బాప్తిసుమ్ దెతె తిలిన్చి అదికారుమ్ కేనె తెంతొ చి? పరలోకుమ్ తెంతొ చి గే, మాన్సు తెంతొ చి గే, తుమ్ సంగ” మెన వెల్లెల మాన్సుల్క యేసు పుసిలన్.

31 దస్సి పుసితికయ్, జేవ్ వెల్లెల మాన్సుల్ కిసి జల మెలె, ఎక్కిలో తెన్ ఎక్కిలో బమ్మ తెన్ లట్టబన, ఇసి మెంతె తిల, “ ‘పరలోకుమ్ తెంతొ చి’ మెన అమ్ సంగిలిగిన, దస్సి జలె, తుమ్ కిచ్చొక జోక నంప కెర్ను నాయ్?” మెన అమ్క సంగెది.

32 “ ‘మాన్సు తెంతొ చి’ మెన సంగుక నెంజె” మెన ఉచర్లన. కిచ్చొక మెలె, ‘యోహాను నిజుమి దేముడుచి కబుర్ ఆన్లొసా’ మెన ప్రైజల్ ఎత్కిజిన్ నంపజా అస్సి మెన జేవ్ వెల్లెల మాన్సుల్ ప్రైజల్క బితె తిల.

33 జాచి రిసా “నేనుమ్” మెన జబాబ్ సంగిల. జేవ్ దస్సి సంగితికయ్, యేసు జోవయింక “దస్సి జలె, కేన్ అదికారుమ్క ఆవ్ అంచ కమొ కెర్తసి గే, ఆవ్ తుమ్క సంగి నాయ్” మెన సంగ ముద్దొ కెర్లన్.

12

ద్రాచతోటచి రిసా యేసు సంగిలి టాలి
(మత్త 21:33-46; లూకా 20:9-19)

* 11:26 11:26 గ్రీకు బాస తెన్ ఈంజ మత్తెలి రెగిడ్ల సగుమ్ పున్సకల్తె 26 నంబర్ కోడు తయి నాయ్.

1 తెదొడి యేసు వెల్లెల మాన్సుల్క దస్సి సంగ, జోవయింక టాలివో సంగ అన్నె బోదన కెరుక దెర్లన్. తెదొడి కిచ్చి టాలి ఏక్ సంగిలన్ మెలె, ఇని జతయ్; “ఏక్ మాన్సు ద్రాచ తోట రోవడ కెర, జాచి సుట్టునంత కోట గలవడ కెర, ద్రాచ రస్సుమ్ కడ గన్న వెల్లో పత్తుర్ కూనవ కెర, తోట రకితి మాటు రితిసి బందవ కెర, రకితసక నిసాన, జోవయింక జా తోట గుత్త దా, వేరతె ఉట్ట గెలన్.

2 “పంటొ పికిలి పొది, జేవ్ గుత్త నజిలసతె జా తోటచి పంటొ ఏక్ వాట నజ అనీతి రిసా, గొత్తి సుదొ ఎక్కిలోక ఎజొమాని తెద్రయ్లన్. జో ఒత్త పాడితికయ్,

3 గుత్త నజిల జేవ్ రకిత మాన్సుల్ జో గొత్తి సుదొక దెర, పెట, కిచ్చొ నే దెతె ఉడడ.

4 ఒత్త తెంతొ, అన్నెక్లొ గొత్తి సుదొక జో ఎజొమాని తెద్రయ్లన్, గని జేవ్ రకితన జోచి బోడి పెట కెర దా, మరియాద నెంతె జోక ఉడడ గెల.

5 పిమ్మట్ అన్నెక్లొక ఎజొమాని తెద్రయ్తికయ్, జేవ్ రకితన జోక మార గెల. అన్నె ఒగ్గర్జిన్క తెద్రయ్తికయ్, జోవయింతె సగుమ్జిన్క పెట గెల, సగుమ్జిన్క మార గెల.

6 “జలె, జో ఎజొమానిక అన్నెక్లొ తిలన్, కొన్సొ మెలె, సొంత ప్రేమ తిలొ పుత్తుసి. ‘అంచొ పుత్తుక మరియాద దెకుల, కిచ్చొగె’ మెన, ఆకర్క జోకయ్ తెద్రయ్లన్.

7 గని జేవ్ గుత్త నజిలస ‘ఇన్నెకయ్ అబ్బొసిచి దనుమ్ కలుగు జయెదె. అల్లె, ఇన్నెక మారుమ, చి ఇన్నెక కలుగు జతి వాట అమ్కయ్ దొర్కు జయెదె’ మెన జోవయింక జెచ్చొ లట్టబన్.

8 జేవ్ ఎజొమానిచొ పుత్తున్క దెర కెర, మార కెర, పీనుమ్ జా ద్రాచ తోట తెంతొ బార్ కెర వెంట గెల.

9 జలె, దస్సి కెర్లి రిసా, జా తోటచొ ఎజొమాని కిచ్చొ కెరెదె మెలె, జో జా కెర, జేవ్ గుత్త నజిలసక నాసెనుమ్ కెర, జా తోట వేర మాన్సుల్క గుత్త దెయెదె.

10 “అల్లె, ఆవ్ అప్పె తుమ్క సంగితిసిచి రిసా, దేముడుచి కొడొతె రెగిడ్లిసి తుమ్ కెయ్య సదు కెర్సు నాయ్ గె?

‘కామ్క నెంజె’ మెన ఉచర, గేర్ బందిలస పిటయ్ల పత్తురు, బోడిపత్తురు జలన్.

11 ప్రబు సొంతయ్ ఇని జర్గు కెర్లొ. జో ఇసి కెర్లి రిసా, అమ్ దెకిలె ఆచారిమ్ జతయి!” మెన జేవ్ కోపుమ్ జల వెల్లెల మాన్సుల్క యేసు సంగిలన్.

12 “అమ్చి రిసాయి యేసు సంగితయ్” మెన వెల్లెల మాన్సుల్ చినన కోపుమ్ జా, జోక దెరుక ఉచర్ల, గని ప్రెజల్ కోపుమ్ జా అల్లర్ కెరుల మెన, జోవయింక బియఁ కెర, జోక ముల దా ఉట్ట గెల.

వెల్లెల మాన్సుల్ యేసుక పరిచ్చ కెరయ్లిసి
(మత్త 22:15-22; లూకా 20:20-26)

13 ‘యేసుక కొడొతె అడ్డవ నేరిమ్ వయడుమ’ మెన, సగుమ్జిన్ పరిసయ్యుల్క కి హేరోదు పచ్చెన జతన సగుమ్జిన్క కి, జేవ్ కోపుమ్ జల వెల్లెల మాన్సుల్ తెద్రయ్తికయ్,

14 జేవ్ యేసుతె జా కెర, “గురుబాబు, తుయి సత్తిమ్చొ మెన జానుమ్. తుయి మొకమాటుమ్ నే దెకితె, వెల్లెల మాన్సుల్ కిచ్చొ ఉచరుల మెన నే బితె, దేముడు దెకయ్లి వాట్చి రిసా సత్తిమ్ తెన్ బోదన కెర్లిసి మెన అమ్ జానుమ్” మెన పులయ్తి రితి సంగ, అన్నె, “రోమ్ దేసిమ్చి ప్రబుతుమ్చొ కైసర్ రానొక అమ్ *సిస్తు దెంక నాయిమ్

గే, నాయ్ గే? అమ్ జా సిస్తు దెంక గే పోని గే? సంగు” మెన యేసుక సంగిల.

15 ఇసి సంగితికయ్, యేసు జోవయించి ఉప్రమెన్ను జాన, “అంక కిచ్చొక పరిచ్చ కెర్తసు? డబ్బల్ కాసు ఏక్ అంచితె ఆన దెకవ” మెన సంగితికయ్, ఆన్.

16 జేవ్ జో తెన్ జా కాసు ఆన్లి పొది, జా కాసు దెకవ, “ఇన్నెకచి పోలిక, కచి నావ్ డీస్తయ్?” మెన జోవయింక పుసిలన్, చి జేవ్ జోక, “కైసర్ రానొచి” మెన సంగిల.

17 యేసు జోవయింక, “కైసర్ క దెతిసి కైసర్ క, దేముడుక దెతిసి దేముడుకయ్ దెంక అస్సె” మెన, జోవయింక జబాబ్ దిలన్. దస్సి జబాబ్ దెతికయ్, వెల్లెల మాన్సుల్ తెద్రయ్ల మాన్సుల్ ఆచారిమ్ జల.

సద్దూకయ్యుల్ యేసుక పరిచ్చ కెర్లిసి (మత్త 22:23-33; లూకా 20:27-40)

18 తెదొడి, ‘మొర గెలెగిన అన్నె జివ్ జంక నెంజె, అన్నెక్ లోకుమ్తె గెచ్చుక నెంజె’ మెన పైజల్ క సికయ్త సద్దూకయ్యులు సగుమ్జిన్ యేసుతె జా కెర,

19 “గురుబాబు, ఈందె, ‘ఎక్కిలోచొ అన్నొసి బోదల్ నెంతె మొర గెలె, తేర్చిక ఎక్కిల్ క ముల దా గెలెగిన, జోచొ బావొసి అన్నొన్చి తేర్చిక ఆనన, అన్నొన్చి నావ్ తెన్ బోదల్ పాయిక అస్సె’ మెన మోసే పూర్గుమ్చొ అమ్ యూదుల్చి రిసా రెగిడ్డె గెద?

20 జలె సత్తుజిన్ బావుడ్లు తిల. జోవయింతె తొల్పుర్ తెర్చి ఆనన, బోదల్ నెంతె మొర గెలన్.

21 ఒత్త తెంతొ, జో మాన్సుచి పట్టి జెర్మిలోసా జా తేరబోదక ఆనన, జో కి బోదల్ నెంతె మొర గెలన్. జోచి పట్టి జెర్మిలోసా కి దస్సి కెరన దస్సి జలన్.

22 జేవ్ సత్తుజిన్ బావుడ్లు ఎత్తిజిన్ వర్న తెన్ దస్సి కెరన మొర గెల. జేవ్

ఎత్తిజిన్ మొర గెతికయ్, జా తేరబోద కి మొర గెలి.

23 జలె, మొర గెలన అన్నె జివ్ జతి పొదిక, జోవయింతె కక్క తేర్చి జా తయెదె? జేవ్ సత్తుజిన్ వర్న తెన్ జా తెన్ పెండ్లి జల గెద?” మెన యేసుక పుసిల.

24 ఇసి జతికయ్, యేసు జోవయింక, “తుమ్ పొరపాట్ జా గెతసు. కిచ్చొక గే తుమ్ ఉచర. మెలె, దేముడు పూర్గుమ్ రెగ్లయ్లిసి సదు కెర్లె కి, ఒత్త తిలిసి అర్దుమ్ కెరన్ను నాయ్, చి జో కెరయ్త కమ్మ దెకిలెకి, జోచి నెక్తి అదికారుమ్ చిన్సున్ నాయ్.

25 మెలె, మొర గెచ్చు అన్నె జివ్ జతిన్తె పెండ్లివొ నే జతె, పరలోకుమ్తె మాన్సుల్ దూతల్చి రితి దస్సి తవుల.

26 పడ్డొ, ‘మొర గెలన అన్నె జతి నాయ్’ మెన ఉచర, తుమ్ అన్మానుమ్ తెన్ అస్సున్. గని జా సుట్టు, పూర్గుమ్, రూకు తెడి జా ఆగి లగితె తిలిన్చి రిసా రెగిడ్డిన్తె

ఆవ్ అబ్రాహామ్ క, ఇస్సాకుక చి యాకోబుక దేముడుయి, మెన దేముడుచి కోడు మోసే రెగిడ్డి పుస్తకుమ్తె సదు కెర్చు నాయ్ గే?

27 జలె, జేవ్ మొర్ల పూర్గుల్ క మోసేచి కాలమ్ ఎద కి జోవయింక జో దేముడు తా కామ్ క అయ్లిన్ తెన్ జేవ్ అన్నెక్ లోకుమ్తె గెచ్చు జివ్వి అస్తి మెన రుజ్జు జతయ్, రితి మొర గెలనక నాయ్, గని జివ్ తిలనకయ్ జో దేముడు. తుమ్ ఎదివాట్ పొరపాట్ జా అస్సున్” మెన జేవ్ సద్దూకయ్యుల్ క యేసు సంగిలన్.

వెల్లి ఆగ్గుచి రిసా యేసుక పుసిలిసి (మత్త 22:34-40; లూకా 10:25-28)

28 ఈంజి కోడుచి రిసా జేవ్ సద్దూకయ్యుల్ తెన్ పరిసయ్యుల్ గగ్గొల్ జంక దెర్ల. ఇసి జతికయ్, మోసే తెన్ దేముడు దిలి ఆగ్గుల్ సికడ్డొసా ఎక్కిలో సూన, జోవయించి నెడిమి జా కెర, జేవ్

వెల్లెల మాన్యుల్చ పరిచ్ఛల్క యేసు చెంగిల్ జబాబుల్ దెతయ్ మెన దెక, జోక, “ఆగ్గుల్ ఎత్కితె ముక్కిమచి కేన్?” మెన పుసిలన్.

29 యేసు జోక, “ముక్కిమచి ఇసి జతయ్;

‘ఓ అమ్చ ఇస్రాయేలులు, నూన, ప్రబు జలో అమ్చో దేముడు ఎక్కిలో. జో ఎక్కిలోయి అదికారుమ్ తిలో దేముడు. అన్నె కోయి నాయ్’

మెన, అన్నె;

30 ‘తుచొ ప్రబు జలో దేముడుక తుమ్చి ఒండి పెట్టి తెన్, తుమ్చి ఒండి ఆత్మ తెన్, తుమ్చి ఒండి మెన్సు తెన్, తుమ్చి ఒండి బుద్ది తెన్, తుమ్చి సెక్తి ఎత్కి తెన్ ప్రేమ కెరై తంక.’

మెన మోసేచి అత్తి రెగిడ్లి దేముడుచ ఆగ్గుల్తె ముక్కిమ్.

31 పడ్డొ,

‘తుమ్క తుమి కెద్ది ప్రేమ కెరంతసు గే, పక్కయ్చక కి తెద్ది ప్రేమ కెరై తంక’

మెన అన్నెక్ ఆగ్గు కి ముక్కిమ్ అస్సె. ఈంజేవే దొన్ని ఆగ్గుల్చి కంట కేన్ ఆగ్గుకి జినె నాయ్” మెన జోక యేసు సంగిలన్.

32 జలె, జో మోసే తెన్ దేముడు దిలి ఆగ్గుల్ సికడ్డొసా యేసుక “నిజుమి, గురుబాబు. ‘జో ఎక్కిలోయి’ మెన, ‘అదికారుమ్ తిలో దేముడు అన్నె కోయి నాయ్’ మెన తుయి సత్తిమ్ సంగిలది.

33 అన్నె, ‘ఒండి పెట్టి తెన్, తుమ్చి ఒండి బుద్ది తెన్, తుమ్చి ఎత్కి సెక్తి తెన్ జోక ప్రేమ కెరుక’ మెన, అన్నె ‘తుమ్క తుమి కెద్ది ప్రేమ కెరంతసుమ్ గే, పక్కయ్చక తెద్ది ప్రేమ కెరై తంక ముక్కిమ్’ మెన తుయి అన్నె మాన్యుల్క సంగిలీసి సత్తిమ్. బలి గట్ట ఎత్కిచి కంట ఈంజేవే దొన్ని ఆగ్గుల్ రితి కెరుక విలువ” మెన మోసే తెన్ దేముడు దిలి

ఆగ్గుల్ సికడ్డొసా ఒప్పున యేసుక జబాబ్ దిలన్.

34 ‘ఇసి సంగ బుద్ది తెన్ జబాబ్ దిలో’ మెన యేసు దెక, జోక “దేముడుచి రాజిమ్క తుయి ధూరి నాయ్” మెన సంగిలన్. జలె, యేసు బలె బుద్ది తెన్ ప్రస్సుల్ ఎత్కిక బులవ సంగితికయ్, మోసే తెన్ దేముడు దిలి ఆగ్గుల్ సికడ్డొసాక, జో జా కోడు సంగిలి తెంతొ, కో కి కేన్ కోడుక కి యేసుక పుసుక దయిరిమ్ కెరై నాయ్.

క్రీస్తు దావీదు పూర్ణమచొక ప్రబు కి పుత్తున్ కి

(మత్త 22:41-46; లూకా 20:41-44)

35 యేసు దేముడుచి గుడితె అన్నె బోదన కెరై తత్తికయ్, “రచ్చించువ కెరొసా జలో క్రీస్తు దావీదు రానొచి సెకుమ్తె జర్మొ జోక పుత్తుసి జయెదె మెన మోసే తెన్ దేముడు దిలి ఆగ్గుల్ సికడ్డన కిసి సంగుక జతయ్?

36 మెలె, దేముడుచి సుద్ది తిలి ఆత్మ దావీదుచి పెట్టి సికయ్తికయ్

తుచ విరోదుమ్ సుదల్క తుయి సుదితి రితి ఆవ్ కెరై ఎద, అంచి ఉజెతో పక్కయ్ తుయి వెన తా, మెన ప్రబు అంచొ ప్రబుక సంగిలన్.

మెన దావీదు రానొ సొంత సంగిలన్.

37 దస్సి దావీదు రానొ క్రీస్తుక ‘ప్రబు’ మెన సంగితయ్ జలె, జో క్రీస్తు కిసి జా జోక పుత్తుసి జయెదె? ఉచర” మెన ఒత్త తిలసక యేసు సంగిలన్. జలె, ప్రజెల్చి ఒగ్గరజిన్ జనాబ్ నర్ల తెన్ జోచ కొడొ సూన్తె తిల.

38 యేసు అన్నె బోదన కెరై తిలి పొది ఇసి మెలన్. “దిగిల సూటిచ ప్పాలల్ గలంత గవురుమ్ ఉచరంత మోసే తెన్ దేముడు దిలి ఆగ్గుల్ సికడ్డనచి రిసా తుమ్ జాగర్ల తెన్ తా. జేవ్ సంతవీదులె టీవ, మాన్యుల్ ఎత్కి అమ్క జొకర్లు మెన కోర్ప జతతి.

39 సబ గెరలె ముక్కిమ్చ టాన్లుతె, విందుల్తె ముక్కిమ్చ టాన్లుతె వెసుక కోర్ప జతతి.

40 జేవ్ మోసిమ్లు కెర రండెల్ మాన్సుల్చ గెరల్ విక కతతి, అన్నె ఉప్రమెన్సుక దిగిల ప్రార్దనల్ కెర్తతి. దస్సి, జోవయిం చి పాపుమ్ ఒగ్గరి, చి వెల్లి సిచ్చు సేడుల” మెన జేవచి రిసా యేసు సంగిలన్.

బీద సుద్ది జాక కలుగు జలిసి ఎత్తి దేముడుక దిలిసి
(లూకా 21:1-4)

41 తెదొడి యేసు దేముడుచి గుడితె తతి, దేముడుచి కామ్క కానుక దెతి డబ్బుల్ పెట్టెల్చి మొక్కె వెసిలన్. ఒత్త వెస, బెర అయల మాన్సుల్ ఒత్త డబ్బుల్ గల దెతిసి దెకితె తిలో.

జలె, ఒగ్గర్జిన్ సామ్సార్లు ఒగ్గర్ డబ్బుల్ జేవ్ పెట్టెల్తె గల్తె తతికయ్,

42 ఎద్గరె నెంజిలి రండెల్ మాన్సు ఎక్కి జా కెర, దొన్ని ఇదుల రాగి కాసుల్ పెటెతె గలిలి.

43 గల్తికయ్, యేసు జోచ సిస్సుల్క పాసి బుకారాన, “ఈందె, జేవ్ సామ్సార్లు ఎత్తిజిన్ మొత్తుమ్ దిలిన్చి కంట ఈంజ ఎద్గరె నెంజిలి రండెల్ మాన్సు ఒగ్గర్ దా అస్సె” మెన కచితుమ్ సంగితన్.

44 కిచ్చొక మెలె, జోవయిం చి ఎదివాల్ సామ్సారుమ్ తెంతో సేసిలిసి జా దా అస్సి. ఇన్నెక, కిచ్చొ నెంజిలె కి, కలుగు జలిసి ఎత్తి దా గెల అస్సె” మెన సిస్సుల్క బుద్ది దెకయ్లో.

13

దేముడుచి గుడి నాసెనుమ్ జయెదె మెన యేసు సంగిలిసి
(మత్త 24:1-44; లూకా 21:5-33)

1 ఒత్త తెంతో, యేసు దేముడుచి గుడి తెంతో బార్ జతె తతికయ్, జోచ సిస్సుల్తె ఎక్కిలో, “ఈందె, గురుబాబు, ఈంజ దేముడుచి గుడి బందిల పత్రల్,

కెద్ది బమ్మ జతి రితి అస్సె!” మెన దెకయ్లన్.

2 దస్సి మెన దెకయ్తికయ్, యేసు జోవయింక “ఈంజేవ్ ఎత్తి దెకితను, గని అప్పె పత్తుర్చి ఉప్పిర్ పత్తురు దొంత్రల్ తిలె కి, ఎక్కి జలెకు నే టీవో నే జతె, గలి జతి దీసి జెయెదె” మెన జబాబ్ దిలన్.

3 తెదొడి దేముడుచి గుడిచి మొక్కె తిలి ఒలీవ మెట్టయ్ యేసు గెచ్చు వెసిలన్, చి పేతురు యాకోబు యోహానుచి అంద్రెయ మెల సిస్సుల్ జోతె జా కెర, అన్నె కో నెంతె,

4 “గురుబాబు, తుయి సంగిలిసి కెయ్చ జర్గు జయెదె గే అమ్క సంగు. ఈంజ నెరవెర్చుప జతి పొది అయ్లి మెలె, అమ్ చినితి రిసా కిచ్చొ గుర్తు తయెదె?” మెన యేసుక వుసిల.

5 జో జోవయింక “కొన్సొ జలెకు తుమ్క అంచి రిసా మోసిమ్ నే కెర్తి రితి తుమ్ జాగర్త దెకన.

6 కిచ్చొక మెలె, ఒగ్గర్జిన్ మాన్సుల్ క్రిస్తుచి నావ్ తెన్ జా అస్సి, మెన సంగుక జలెకు, ‘ఆవ్ క్రిస్తు’ మెన సంగుక జలెకు, ఒగ్గర్జిన్క మోసిమ్ కెర, వేర బుద్ది సికడుల.

7 అన్నె, ‘యుద్దుమ్ జతయ్’ మెన జలెకు, ‘యుద్దుమ్ జయెదె’ మెన జలెకు తుమ్ నూన్తె. గని బమ్మ నెంతె తా. ఇనచ ఎత్తి జర్గు జంక అస్సె. గని ఈంజ ఉగుమ్ ఒగ్గర్ బే బేగి పూర్తి జయె నాయ్.

8 అన్నె, దేసిమ్చి ఉప్పిరి దేసిమ్, రాజిమ్చి ఉప్పిరి రాజిమ్ యుద్దుమ్క టీవో జవుల. వేర వేరతె బూకంపల్, కరువుల్ జర్గు జవుల. గని ఈంజ ఎత్తి అంచి రాజిమ్ ఏలుప కెర్తి ఉగుమ్ జెర్మయ్త నొప్పుల్ రితె జా, ఇనచ ఎక్కి మొదోల్ జవుల.

9 “తుమ్ మాత్రుమ్, జాగర్త దెకన. కిచ్చొక మెలె, జా పొదిక మాన్సుల్ తుమ్క తీర్పు కెర్త సబల్తె సార్పు దెవుల. అమ్చ

యూదుల్చ సబ గెరలె తుమ్క పెట గెలుల. జేవ్ దస్సి విరోదుమ్ కెర్లె, అంచి నావ్చి రిసా, అంచి రిసా సాచి సంగితి రిసా, అదికార్లుచి మొక్కె రాసల్చి మొక్కె తుమ్ టీవో జస్సె.

10 గని తొలితొ, ఉగుమ్ నే మార్కుప జతె, అగ్గె, ఒండి లోకుమ్చ కేన్ దేసిమ్చ ప్రజల్క కి సుబుమ్ కబుర్ సూసపుక అస్సె. సూసయ్లెకయ్, ఈంజ ఉగుమ్చి ఆకర్ దీసి జెయెదె.

11 “జలె, తుమ్క మాన్సుల్ నేరిమ్ వయడ అదికారుల్తె సార్ప దెతి పొదిక, ‘కిచ్చొ సంగుక గే?’ మెన తుమ్ చింత గలన నాయ్. తుమ్ సంగుక మెన జయ్యి గడియయ్ దేముడుచి సుద్ది తిలి ఆత్మ కిచ్చొ దెయెదె గే, జయ్యి సంగ. కిచ్చొక మెలె, తుమి లట్టబ్బు నాయ్. దేముడుచి సుద్ది తిలి ఆత్మయి లట్టబెదె. తుమ్క తుమి సంగున్ నాయ్.

12 “జా పొదిక అన్నె కిచ్చొ బాద తయెదె మెలె, అన్నొన్క బావొసి జలెకు, పుత్తున్క అబ్బొసి జలెకు, మొర్తి సిచ్చతె సార్ప దెవుల. అన్నె, అయ్యున్అబ్బొన్క పుత్తర్లు సగుమ్జిన్ విరోదుమ్ జా, జోవయింక మొరవుల.

13 అన్నె, తుమ్ అంచి నావ్ తెన్ బులితె తత్తెచి రిసా ఎతివాట్జిన్ తుమ్క విరోదుమ్ జవుల. గని ఇన అల్లర్ జలెకి, ఆకర్ ఎద కో నముకుమ్ తెన్ తా ఓర్పుప జవుల గే జెచ్చొ రచ్చించుప జవుల” మెన యేసు సంగిలన్.

యెరూసలేమ్ పట్టుమ్ పాడ్ జంక తిలిన్చి రిసా యేసు సంగిలిసి

14 “జలె, *పిమ్మట్, దేముడుక విరోదుమ్ జా జోక బలె దూసుప కెర నాసెనుమ్ కెర్తిక ఏక్, దేముడుచి గుడితె టీవో నే జతి టాన్తె టీవో జంక తుమ్ దెకిలె, ఇన్నెచి అర్దుమ్ కిచ్చొ మెలె, ఈంజ సదు కెర్తన తుమ్ చెంగిల్ ఉచరన. జా

గుర్లు తుమ్ దెకిలె, ఈంజ యూదయ ప్రదేసిమ్తెచ మాన్సుల్ చట్కున డొగ్రలె ఉట్ట నిగుతు!

15 జా పొదిక కేన్ మిద్దెచి ఉప్పిరి కో తవుల గే, ఉత్త కెర, జోచి గెరి తెంతొ కిచ్చొ జలెకు వస్తువ వెంట నెంక జవున్ గెరి పెసుక జయె నాయ్.

16 వెడయ్ గట్ట కో తవుల గే, కామ్చి రిసా కడ్ల జోచ పాలల్ జవున్ వెంట నెంక పస్ల జెంక నాయ్.

17 అయ్యు! జేవ్ దీసల్క వయ తిల తేర్బోదల్, బోదల్ వడ్చివో, ఉట్ట నిగుక నెత్త ఒగ్గర్ సైమల్ జవుల!

18 “ ఈంజ ఎత్తి చల్లి పొది జర్లు జవున్ నాయ్” మెన తుమ్ ప్రార్దన కెర.

19 కిచ్చొక మెలె, లోకుమ్ జెర్మయ్లి తెంతొ అప్పె ఎద కలుగు జల సైమల్చి ఒగ్గర్ సైమల్ జేవ్ దీసల్క ఎత్తివాట్ తయెదె. జలి మెలె, ఒత్త తెంతొ అన్నె కెయంక కి తెద్ది సైమ తయె నాయ్.

20 జాచి రిసా, జేవ్ అల్లర్ జత దీసల్ తొక్కి జతి రితి ప్రబు సెలవ్ దెతో నాయ్ జలె, కో కి మాన్సుల్ రచ్చించుప జంక నెత్తిర్ తా. గని సంవజతి రిసా రచ్చనక నిసాన జల మాన్సుల్ పాడ్ నే జతి రిసాయి, ‘జేవ్ సైమల్ తొక్కి దీసల్ తత్తు’ మెన ప్రబు సెలవ్ దా అస్సె.

21 అన్నె తెదొడ్క, ‘ఈందె క్రీస్తు!’, ‘ఓదె క్రీస్తు! మెన కో జలెకు తుమ్క సంగిలె, జా సంవ కెర నాయ్.

22 కిచ్చొక మెలె, అబద్దుమ్చ జా కెర, ‘ఆవ్ క్రీస్తు’ మెనన జలెకు, ‘ఆవ్ దేముడుచి కబుర్ ఆన్తొసా’ మెనన జలెకు, రచ్చనక నిసాన జలనక మోసిమ్ కెర జోవయించి నముకుమ్ పిట్టవుక మెన ఉచరన, వెల్లో మాయకమొ కెరుల.

23 అల్లె, చెంగిల్ దెకన. ఈంజ ఎత్తి నే జతె అగ్గయ్ తుమ్క ఆవ్ సంగితసి.

* 13:14 13:14 యేసు జెర్ల డబ్బయ్; 70; వెర్నల్ గెలి వడ్చి ఈంజ సస్టుమ్ జర్లు జలి. మెలె యేసు పరలోకుమ్తె గెచ్చు అన్నె విస్కెక్ సత్తు; 27; వెర్నల్ గెతికయ్.

24 “జేవ్ దీనల్క, ఆవ్ సంగిల జేవ్ సైమల్ పూర్తి జలె పిమ్మట్క, పొద్దు అందర్ జయెదె, జోను కి ఉజిడి దెయె నాయ్.

25 ఆగాసుమ్ తెంతో సుక్కల్ గెసురుల, చి ఆగాసుమ్తె ఎత్తి అద్దుర్ జయెదె.

26 తెదొడ్క ఎదివాట్ అదికారుమ్ తెన్, పరలోకుమ్చి ఉజిడి తెన్, ఆవ్ మాన్సు జా జెర్మున్ అయ్లోసా మబ్బుల్తె పరలోకుమ్ తెంతో ఉత్త జెయిందె. ఆవ్ దస్సి ఉత్త జెతిసి లోకుమ్ ఎత్తి దెకుల.

27 తెదొడ్క అంచ దూతల్క తెద్దయిందె, చి జేవ్, చెత్తర్ దిక్కుల్ తెంతో, లోకుమ్చి ఏక్ పక్క తెంతో, అన్నెక్ పక్క ఎద, కేన్ దేసిమ్చక నే పిట్టె, రచ్చనక ఆవ్ నిసాన్ల మాన్సుల్క ఆనవ, ఎక్కితె కుడవనిందె.

అంజూరుమ్ రూకుక టాలి

28 “అంజూరుమ్ రూకుక టాలి కెర అర్దుమ్ కెరన. మెలె, దసా రూక్చ కొమ్మల్ కొవ్ని జా పలోయ్లె ‘వేసెక్ అప్పె పాఠ జెయెదె’ మెన తుమ్ చినితె.

29 దస్సి, ఆవ్ సంగిల గుర్తుల్ జర్గు జతిసి తుమ్ దెకిలె, జా గుమ్ముమె పాచిలె రితి జా, అన్నె జెతికయ్ సమయుమ్ పాసి జా అస్సె మెన తుమ్ జాన్తె.

30 ఆవ్ సంగిల సైమల్ గుర్తుల్ పూర్తి జలెకయ్ ఈంజ ఉగుమ్ అంతుమ్ జయెదె మెన తుమ్క ఆవ్ కచితుమ్ సంగితసి.

31 జలె, ఆగాసుమ్ బుయి నాసెనుమ్ జా గెచ్చుల, గని అంచ కొడె ఎద్దరె పిట్టితి నాయ్.

32 “జలె, కేన్ దీసిక ఈంజ లోకుమ్తె అన్నె జెయిందె గే, జా దీసిక కేన్ గడియక జెయిందె గే, దేముడు జలొ అబ్బొక

పిట్టవ కేన్ మాన్సు జలెకు, పరలోకుమ్చ దూతల్ జలెకు, దేముడు అబ్బొచొ పుత్తుసి జలెకు, కోయి నేనుమ్.

33 జాకయ్, జాగర్త తెన్ తా, తెలివి తా, ప్రార్దన కెర్తె తా. జా కాలుమ్ కెయెక జెయెదె గే నేన్సు.

34 ఆవ్ అప్పె దేముడు జలొ అబ్బొతె గెతిసి, ఈంజ లోకుమ్తె అన్నె జెతిసి కిసి మెలె, ప్రయానుమ్ గెతో మాన్సు కెర్తెన్చి రితి జయెదె. జో మాన్సు గెచ్చుక బార్ జతి పొది, జోక కలుగు జతిసి జోచ గొత్తి సుదల్క రకితి రితి జోవయింక అదికారుమ్ దా, జోవయింక ఎక్కిలోక కమె దా, గుమ్ముమ్ రకితోసా ఎక్కిలోక రకవ, ఉట్ట గెచ్చెదె. అంచ తెన్ కి దస్సి.

35 “జలె, తుమ్ జాగర్త తెన్ రకితె తా. కిచ్చొక మెలె, గేర్చొ ఎజోమాని కెర్లి రితి ఆవ్ ఉట్ట గెలె, సంజెక జెయిందె గే, సొక్కుక జెయిందె గే, కుకుడో వాంసెనె జెయిందె గే, పెందలె జెయిందె గే, కెదొడ్క జెయిందె గే, తుమ్ నేన్సు.

36 తెలివి తా రకితె తా. నెంజిలె, తుమ్ నే రకితె నిజల్ రితి బదుకుమ్ జా తిలె పొది ఆవ్ అయ్లె, దెకిలె, తుమ్ కిసి జస్తె!

37 తుమ్కయ్ మెన నాయ్, ఎత్తిజిన్ మాన్సుల్క ఆవ్ కిచ్చొ జాగర్త సంగితసి మెలె, ఈంజ లోకుమ్తె ఆవ్ అన్నె జెతిన్క తెలివి తెన్ రకితె తా” మెన సిస్సుల్క యేసు ఈంజ బోదన ఎత్తి సంగిలన్.

14

యేసుక మారుక మెన వెల్లెల మాన్సుల్ కుట్టె కెర్లిసి

(మత్త 26:1-5; లూకా 22:1-2;

* 14:1 14:1 పూర్ణమ్ పొది యూదుల్ ఐగుప్తు దేసిమి తా గొతిమాన్సుల్ జలిన్ తెంతో ప్రబు రచ్చిండువ కెర్లిసి ఏద కెర్లి వండుగు, ఈంజ. ముక్కిమ్క కిచ్చొ ఏద కెరుల మెలె, ‘అమ్చ యూదుల్క విడ్డల్ కెర్తు’ మెన ఐగుప్తు దేసిమ్చ కుటుంబల్ ఎత్తిచ తొల్పుర్ జల మున్సుబోదల్క దూత మార్లిన్తె యూదుల్చ తొల్పుర్ బోదల్ నే మొర్చి రితి ప్రబు జోవయింక పిట్టయ్లిసి ఏద కెరుక. తెదొడి, పూర్ణమ్చి జా రాతి కేన్ గెరి యూదుల్ తిల గే, జా గెర్చ దార్ బంద్రల్తె అర్పితుమ్ జలొ ఏక్ మెండపిల్లచి లోయి దెరవుల, చి దూత దెకిలె, జా గెర్చొ తొల్పుర్ బోదక మారె నాయ్.

యోహా 11:45-53)

1 దొరతి గెలి పిమ్మట్ *పస్కా పండుగు, జలె నే పులయ్ల పొడియొ కతి పండుగు, నే జెతె అగ్గె, వెల్లెల పూజర్లు చి మోసే తెన్ దేముడు దిలి ఆగ్గుల్ సికడ్డన కుట్ర ఉచర ఉచర, “కీసి కెర జలెకు గుట్టు తెన్ యేసుక అప్పొయి దెర మారుమ” మెన ఆస తెన్ తిల.

2 గని, “పండుగు పొది పొని, కిచ్చొక మెలె పండుగక బెర అయ్ల ప్రెజల్ కుమ్మత్ తెన్ గగ్గోల్ జా అమ్క బలే అల్లర్ కెరుల.”

3 యేసు బేతనియ గవ్వొ గెచ్చు, సీమోను మెలో వెల్లి రోగుమ్ జా తిలో ఎక్కిలోచి గెరి తా, అన్నిమ్ కంక వెన తతికయ్, ఏక తేర్బోద ఒగ్గర్ విలువచి వాసిన తేలుచి బుడ్డి దెరన జా, జా బుడ్డి పుట్టవ కెర యేసుచి బోడి ఉప్పిరి సువిలి.

4 ఒత్త తిలన సగుమ్జిన్ కోపుమ్ జా “ఈంజ తేల్ ఇసి పాడ్ కెరుక కిచ్చొక?

5 ఈంజ తేల్ సొవ్వు పుంజొ వెండ్లుచి కంట అన్నె డబ్బుల్క వికుక జతి, చి బీద సుదల్క దర్ముమ్ దెంక జతి” మెన లట్టబన, జా తేర్బోదక గోల కెర్ల.

6 జలె యేసు, “ఇన్నెక గోల కెర నాయ్. కిచ్చొక ఇన్నెక ఉన్నర్ కెర్లను? అంచి రిసా ఈంజ కెర్లిసి వెల్లి కామ్.

7 బీద సుదల్ కెయ్క కి తుమ్చి తెన్ తవుల చి రిసా తుమ్క కెయ్క ఇస్టుమ్ అయ్లె, జోవయింక దర్ముమ్ దెంక జయెదె. గని ఆవ్ కెయ్క తెయ్క తుమ్చి తెన్ ఈంజ లోకుమ్తె ఇసి తయె నాయ్.

8 ఇన్నెచి అత్తి తిలిసి సర్లక ఈంజ కెర అస్సె. ఆవ్ నే మొరై అగ్గె, అంక నే రోవితె అగ్గె, అంచి ఆగ్గె తెయార్ కెర్తి గుర్తు రితి కెర అంక ఈంజ తేల్ బోడి సువ దా అస్సె.

9 అన్నె ఆవ్ తుమ్క కిచ్చొ నిజుచి సంగితసి మెలె, ఒండి లోకుమ్తె కేనె

అంచి రిసా సుబుమ్ కబుర్ బోదన కెరుల గే ఒత్తయ్ ఈంజ అప్పె కెర్లిసి సంగ, ఇన్నెచి రిసా ఉచరవడుల” మెన యేసు సంగిలన్.

యూదా మెలో సిస్సుడు యేసుక దెర దెంక ఒప్పన్లిసి

(మత్త 26:14-16; లూకా 22:3-6)

10 యేసుచ బారజిన్ సిస్సుల్తె ఎక్కిలో ఇస్కరియోతు గవ్వొచొ యూదా మెలోసా, తెదొడి జో, యేసుక దెర వెల్లెల పూజర్లుచి అత్తి దెంక ఉచర, జోవయింతె గెచ్చు, సంగిలన్.

11 జేవ్ నూన సర్ల జా, “తుక డబ్బుల్ దెమ్దె” మెన ఒప్పన్తికయ్, యేసుక కీసి కెర కెయ్క దెర దెంక గే, యూదా వాట్ చజితె తిలో.

12 నే పులయ్ల పొడియొ కతి పండుగచి మొదొల్ కెర్తి దీసి, మెలె, ‘పస్కా’ మెన మెండపిల్లక అర్పితుమ్ దా †జోచి లోయి సువెతి దీసి, సిస్సుల్ యేసుక “తుయి పస్కా అన్నిమ్ కెర్తి రిసా అమ్ కేన్ టాన్ తెయార్ కెరుక?” మెన జోక పుసిల.

13 జో సిస్సుల్తె దొగులక పాసి బుకారా, “తుమ్ ‡పట్టుమ్తె గెచ్చు, చి పట్టుమ్ తెడి పెసిలదు మెలె, పాని వయితోసా ఎక్కిలో తుమ్క దస్సుల్ జయెదె. జోచి పట్టి గెచ్చు,

14 చి కేన్ గెరి జో పెనెదె గే, జా గేర్చొ ఎజొమానిక తుమ్ కిచ్చొ మెన మెలె, ‘అంచ సిస్సుల్తెన్ ఆవ్ పస్కా అన్నిమ్ కతి గది కేన్?’ మెన అమ్చొ గురుబాబు పుసితయ్ మెన సంగ, చి

15 తెయార్ కెర్తి వెల్లి అంతస్తు గది ఏక్ తుమ్క దెకయెదె. ఒత్తయ్ అమ్చి రిసా పస్కా అన్నిమ్ తెయార్ కెర తా” మెన యేసు సంగిలన్.

16 జేవ్ సిస్సుల్ బార్ జా పట్టుమ్తె గెచ్చు, జో సంగిలి రితి ఎత్తి జర్లు జా అస్సె

† 14:12 14:12 యేసు కి ఈంజ పస్కా పండుగు పొది మాన్సుల్చి పాపుమ్ గెచ్చయ్త అర్పితుమ్ జా జోవయింక లోయి సువ దెయెదె. ‡ 14:13 14:13 మెలె యెరుసలేమ్ పట్టుమ్.

మెన దెక, జా పస్కా అన్నిమ్క దొర్కు జలిసి తెయార్ కెర్ల.

17 సాంజ్ జతికయ్, యేసు జేవ్ బారజిన్ సిస్సుల్ తెన్ జా గదితె జా కెర,

18 జేవ్ వెన అన్నిమ్ కెర్తె తతికయ్, యేసు “తుమ్క ఆవ్ కిచ్చో కచితుమ్ సంగితసి మెలె, తుమ్ అంచి తెన్ కతసతె ఎక్కిలో అంక దెర విరోదుమ్ సుదల్చి అత్తి సార్ప కెర దెయెదె” మెన సంగిలన్.

19 ఇసి సంగితికయ్, జేవ్ దుకుమ్ జా, “ఆవ్ గె?” మెన ఎక్కిలోచి పడ్డె ఎక్కిలో ఎత్తిజిన్ సంగుక దెర్ల.

20 జలె, జో జోవయింక, “తుమ్ బారజిన్తె ఎక్కిలో దస్సి కెరెదె. అంచి తెన్ ఆతు తప్పెలయ్ పోడి బెద బుడ్డయ్తో ఎక్కిలో.

21 ఆవ్ మాన్సు జా జెర్మిలోసాచి రిసా రెగిడ్లి లెక్క ఉట్ట గెచ్చిందె. గని, అయ్యె! ఆవ్ మాన్సు జా జెర్మిలోసాక కేన్ మాన్సు దెర విరోదుమ్ సుదల్చి అత్తి సార్ప కెర దెయెదె గే, జో మాన్సు జతి సిచ్చచి రిసా జో నే జెర్మి తిలె జోక చెంగిల్ తత్తి!” మెన సంగిలన్.

22 యేసు, సిస్సుల్ జా పస్కా అన్నిమ్ కెర్తె తా, యేసు పోడియె దెరన “దయ కెర్లదె” మెలి రితి కీదేముడు అబ్బోస్క జోబర సంగ కెర, జా పోడియె మోడ, సిస్సుల్క వంట దా, జోవయింక “తుమ్ ఈంజ కడన కా. అంచి ఆగ్గేక ఈంజ గుర్తు జయెదె” మెన కెర,

23 ఏక్ గిన్నచి ద్రాచ రస్సుమ్ దెర, దేముడు అబ్బోస్క అన్నె ఉచర, సిస్సుల్క దెతికయ్, జేవ్ ఎత్తిజిన్ జా గలన్చి ద్రాచ రస్సుమ్ వర్స తెన్ పిల.

24 తెదొడి యేసు “ఈంజ రస్సుమ్ కిచ్చోచి గుర్తు మెలె, ఒగ్గరిజిన్ మాన్సుల్చి పాపుమ్ గెచ్చయ్తి రిసా అంచి లోయి సూయి జంక అస్సె మెన అంచి నోవి ప్రమానుమ్.

25 తుమ్క ఆవ్ కిచ్చో నిజుమి సంగితసి మెలె, అబ్బోసి జలొ దేముడుచి రాజిమ్తె ఆవ్ నోవర్ పితె ఎద, ఇసి ద్రాచ రస్సుమ్ పియి నాయ్” మెన సిస్సుల్క సంగిలన్.

బమ్మ జా అంక ములితె మెన సంగిలిసి

26 తెదొడి జేవ్ దేముడుక గనుమ్ గాయ కెర బార జా, ఒలివ మెట్టయ్ ఉట్ట గెల.

27 యేసు జోవయింక, “తుమ్ ఎత్తిజిన్ బమ్మ జా అంక ములితె. కిచ్చోక మెలె,

మెండల్ రకితోసాక ఆవ్ మొరయిందె, చి జోచ మెండల్ ఎత్తిజిన్ చెదుర్ప జా గెచ్చుల, మెన దేముడు కోడుతె రెగ్గయ్లిసి నెరవెర్పువ జంక అస్సి.

28 గని ఆవ్ అన్నె జీవ్ జా ఉట్టి పిమ్మబ్క, తుమ్చి కంట అగ్గె గలిలయ ప్రాంతుమ్తె గెచ్చిందె” మెన ప్రమానుమ్ కెర్లన్.

29 యేసు ఇసి సంగితికయ్, పేతురు జోక “ఎత్తిజిన్ తుక ములిలెకి, ఆవ్ తుక ములి నాయ్” మెన సంగిలన్.

30 జలె యేసు జోక, “తుక ఆవ్ కిచ్చో నిజుమి కచితుమ్ సంగితసి మెలె, ఆజి రాతిక, కుకుడొ తివ్వెరి నే వానితె అగ్గె, ‘జోక నేని’ మెన అంచి రిసా తుయి తివ్వెరి సంగితె” మెన సంగిలన్.

31 దస్సి సంగిలే కి, పేతురు బమ్మ తెన్ “ఆవ్ తుచి తెన్ మొరుక అస్సి మెలె కి, ఆవ్ తుక ‘నేని’ మెన కెయ్యలక కి సంగి నాయ్” మెన పేతురు గట్టిజ సంగిలన్. జేవ్ సిస్సుల్ ఎత్తిజిన్ దస్సి సంగిల.

గెత్తేమనే తోటతె (మత్త 26:36-46; లూకా 22:39-46)

32 ఒత్త తెంతో యేసు సిస్సుల్ గెత్తేమనే మెంతి తోటతె గెచ్చ, జో “ఆవ్

§ 14:22 14:22 ‘దేముడు అబ్బోసి’ మెన కేన్ సుట్టు రెగ్గ తిలె, ఎత్తి అదికారుమ్ తిలొ దేముడుచి రిసా సంగితయ్.

ఒత్తలేతో గెచ్చు ప్రార్థన కెర జెతి ఎది ఎద తుమ్ ఇన్నె వెన తా” మెన జేవ్ సిస్సుల్క సంగ,

33 ఎక్కి పేతురుక, యాకోబుక చి యోహానుక వట్టి కడన ఇదిల్ దూరి గెచ్చు తా, దుకుమ్ జా మెన్నుతె ఒగ్గర్ బాద సేడుక దెల్లొ. దస్సి బాద సేడ,

34 “అంచి పెట్టి తిలి దుకుమ్క మొర గెచ్చుక జయెదె. తుమ్ ఇన్నె తెలివి తెన్ రకితె తా” మెన సంగ,

35 నగుమ్ దూరి గెచ్చు కెర, సెర్ను సేడ, దేముడు అబ్బోనీక ఇసి మెన ప్రార్థన కెర్లన్. “ఓ బ, తుక జంక తిలెగిన, ఈంజ దుకుమ్ జతి గడియ నెంజెలి, జతి లెక జలె అంక పిట్టవు” మెన అన్నె,

36 “ఓ బ, ఎత్తి తుచి అత్తి అస్సె. ఈంజ గిన్నచి ఆవ్ నే పితి రితి అంక పిట్టవు. గని అంచి ఇస్టుమ్ పోని. తుచి ఇస్టుమ్ జర్లు జవున్” మెన ప్రార్థన కెర,

37 జేవ్ సిస్సుల్కతె ఉట్ట జా, జేవ్ నిజ అస్తి మెన దెక కెర, పేతురుక, “ఓ సీమోను, తుయి నిజ అస్సిన గే? ఎక్కి గడియ జవున్ రకితె తంక నెతిర్లది గే?

38 జెత అల్లర్తె తుయి పాపుమ్ నే కెర్తి రితి జాగర్త తెన్ తా, ప్రార్థన కెర్తె తా. ‘ఆత్మ నిదానుమ్ అస్సె’ మెన ఉచరనైకి, ఆగేక నెక్తి నాయ్,” మెన పేతురుక యేసు సంగిలన్.

39 అన్నెక్ సుట్టు ఇదిల్ దూరి ఉట్ట గెచ్చు కెర, తొలితో ప్రార్థన కెర్ల కొడొ, అన్నెక్ సుట్టు ప్రార్థన కెర్లొ.

40 దస్సి ప్రార్థన కెర, అన్నె బుల జా, జేవ్ సిస్సుల్ గూనీక నెత్త కెర నిజ అస్తి మెన దెకిలన్. దెకితికయ్, జేవ్ లాజ్ జా, జోక కిచ్చొ సంగుక గే నేన గెల.

41 అన్నెక్ సుట్టు కి యేసు దస్సి గెచ్చు అన్నె జా, మొత్తుమ్ తివ్వెరి జేవ్ నిజిలిసి దెక, “అప్పెకయ్ సెలవ్ కడన నే రకితె నిజ అస్సున్ గే? సాలు. ఈందె సమయుమ్ జా గెలి గే. ఆవ్ మాస్సు జా

జెర్మున్ అయ్లోసా పాపుమ్ కెర్తనచి అత్తి దెర్ను సేడిందె.

42 జొమ్మ, గెచ్చుమ! ఓదె, అంక దెర దెతోసా పాసి జా అస్సె” మెన జోవయింక సంగిలన్.

యూదా చి జనాబ్ యేసుక దెరుక అయ్లీసి

43 యేసు దస్సి లట్టబై తతికయ్, జోచ బారజిన్ సిస్సుల్కతె అగ్గె బెద తిలో యూదా పావ అయ్లో. వెల్లెల పూజర్లు, మోసి తెన్ దేముడు దిలి ఆగ్గుల్ సికడ్తనచి అన్నె వెల్లెల మాస్సుల్ తెద్రయ్ల జనాబ్ కి, కత్తులు డండల్ దెరన, యూదా తెన్ అయ్ల.

44 జలె ఈంజ నే జెతె అగ్గె, “కక్క ఆవ్ చుంబిందె గే, జొయ్యి యేసు. జోకయ్ దెరన కో నే పిట్టయ్తి రితి చెంగిల్ రక కడన” మెన యేసుక దెర దెతో యూదా జేవ్ జనాబ్క గుర్తు సంగ తిలన్.

45 జో అయ్లీ బేగి, యేసుతె జా కెర, “గురుబాబు” మెన సంగ చుంబితికయ్,

46 జేవ్ బెద అయ్లస యేసుక దెర్ల.

47 జలె, ఒత్త టీవొ జా తిలో ఎక్కిలో కత్తి కడన, ఎత్కి వెల్లొ పూజరిచ్చొ గొత్తి సుదొక పెట జోచ్చొ కంగ్గొ కండ గెలన్.

48 తెదొడి జోక దెర్లసక యేసు, “ఆవ్ కిచ్చొగె చొర్లయ్ గే, చి తుమ్ కత్తులు డండల్ దెరన అంక దెరుక తుమ్ అయ్లదు గే?

49 ఆవ్ రోజుక తుమ్చి తెన్ దేముడుచి గుడితె తా బోదన కెర్లొ కి, జా పొది అంక దెర్ను నాయ్. జలె, దేముడుచి కొడొతె రెగిడ్డిసి ఎత్కి జర్లు జవున్!” మెన సంగిలన్.

50 జలె, సిస్సుల్ ఎత్కిజిన్ బమ్మ జా, జోక ముల దా ఉట్ట నిగిల.

51 జలె, వట్టి బందన తిలో ఏక్ ఉబెడొ యేసుచి వట్టి గెతె తిలన్ యేసుక కడ నెత మాస్సుల్కతె సగుమ్జిన్ జో ఉబెడొక దెర్ల.

52 గని, జో జా పట్టి సేడవ దా డుమ్డోయ్ ఉట్ట నిగిలన్.

ఎత్కిక వెల్లో పూజరిచి మొక్కె యేసుక పరిచ్చ కెర్లిసి

53 *యేసుక ఎత్కిక వెల్లో పూజరితె కడ నిల. ఒత్త కడ నెతికయ్, వెల్లెల పూజర్లు, మోసే తెన్ దేముడు దిలి ఆగ్గుల్ సికడ్డన, వెల్లెల మాన్సుల్ ఎత్కిజిన్ ఒత్త బెర తిల.

54 పేతురు, జలె, దూరి దూరి తా యేసుచి పట్టి జా జా, జో ఎత్కిక వెల్లో పూజరిచి వీదె వెన, ఆగితె తపితి రిసా జమాన్లు తెన్ వెన తిలో.

55 వెల్లెల పూజర్లు చి అన్నె వెల్లెలో సబ కెర్తన ఎత్కిజిన్ యేసుక మార గెలుక మెన జోక నేరిమ్ వయడ్డి సాచిక చజితె తిల, గని సరి జతి సాచి దొర్కు జయె నాయ్.

56 మెలె, ఒగ్గర్జిన్ జోచి ఉప్పిరి అబద్దుమ్ సాచి సంగిలే కి కచి, కచి సాచి ఎక్కి రితి జయె నాయ్.

57-58 తెదొడి, సగుమ్జిన్ టీవో జా, “మాన్సు బందిలి ఈంజ దేముడుచి గుడి సేడవ కెర తిర్తకయ్ మాన్సు నే బందిలి ఏక్ దేముడుచి గుడి బందిందె, మెన ఈంజో సంగిలిసి నూన్లమ్” మెన అబద్దుమ్ సంగిల.

59 గని జేవ్ సంగిలి సాచి కి సరిగా బెదె నాయ్.

60 తెదొడి, ఒత్త తిల మాన్సుల్చి నెడమె ఎత్కిక వెల్లో పూజరి టీవో జా కెర, యేసుక “ఈంజేవ్ సంగితిన్క కిచ్చి జబాబ్ దెంక నెతిర్ని గే? ఈంజేవ్ తుక కిచ్చి నేరిమ్ వయడ్డతి?” మెన పుసిలన్.

61 గని యేసు తుక్లె తా, కిచ్చి జబాబ్ కి సంగె నాయ్. యేసు తుక్లె తతికయ్, ఎత్కిక వెల్లో పూజరి జోక అన్నె “పరలోకుమ్ తిలో అమ్చో దేముడు

ప్రబుచో పుత్తున్ జలో క్రిస్తు తూయి గే?” మెన యేసుక పుసితికయ్,

62 జో “అవ్వె, అన్నె, ఆకర్క, ఎత్కి సెక్తి అదికారుమ్ తిలోసాచి ఉజెతో పక్కయ్ ఆవ్ మాన్సు జా జెర్మున్ అయ్లోసా వెన తతిసి కి, ఆగాసుమ్చ మబ్బుల్ తెన్ ఆవ్ పరలోకుమ్ తెంతో అన్నె ఉత్త జెతిసి కి తుమ్ దెకితె” మెన సంగిలన్.

63 ఇసి సంగితికయ్, జో ఎత్కిక వెల్లో పూజరి కోపుమ్ జా, జో గలన్లి దిగిల్ సొక్క చిరన గెల కెర, “అన్నె సాచి సంగితన అమ్క అక్కర్ నాయ్.

64 దేముడుక ఆవ్ సమ్ముందుమ్ జతసి మెన ఈంజో సంగ ప్రబుచి విలువ కడ వెల్లి పాపుమ్ కెర్లిసి తుమ్ ఎత్కిజిన్ సొంత నూన్లదు, తుమ్ కిచ్చి తీర్పు సంగితె?” మెన సబ కెర్తనక పుసితికయ్, “మొర్తి సిచ్చచి తప్పు కెర అస్సె” మెన జేవ్ ఎత్కిజిన్ తీర్పు సంగిల.

65 తెదొడి జోవయింతె సగుమ్జిన్ యేసుక తుంకుర్క దెర, నిస్కారుమ్ కెర్ల. అన్నె, జోచి మొక్కె పాలుమ్ డంక దా జోక పెట, “తుక కో పెల్ల గే, తుయ్ క్రిస్తు గే సంగు!” మెన కొంకడ్డ. అన్నె, జమాన్లు జోక ఎత్తివాట్ దెబ్బల్ పెట గెల.

“జోక నేని” మెన యేసుచి రిసా పేతురు సంగిలిసి (మత్త 26:69-75; లూకా 22:56-62; యోహా 18:15-18,25-27)

66 పేతురు ఎట్టో వీదె తతికయ్, జో ఎత్కిక వెల్లో పూజరితెచి తేర్బోద గొత్తి సుది ఎక్కిల్ జా కెర,

67 పేతురు ఆగితె తపిత్ తిలిసి దెక కెర, “తుయి కి నజరేతు గవ్వెచో యేసు తెన్ తిలది, గెద” మెలి.

68 ఇసి మెన సంగితికయ్, “నాయ్, గెద. తుయి సంగితిసి కిచ్చి గే, ఆవ్ నేని. అంక అర్దుమ్ జయె నాయ్” మెన

* 14:53 14:53 ‘ఎత్కిక వెల్లో పూజరి’ మెలె, వెల్లెల పూజర్లు మొత్తుమ్తె ఎక్కిలో ముక్కిమ్చో పూజరి జయెదె. తెదొడి కయప మెలోసా ఎత్కిక వెల్లో పూజరి జా తిలో.

సంగ, జా వీదెచి ఒత్తల్తోచి గుమ్ముమె ఉట్ట గెలన్.

69 గని జా గొతిమాన్సు జోక ఒత్త అన్నె దెక, “ఈంజో కి జోచ సిస్సుల్తె ఎక్కిలో” మెన ఒత్త టీచో జల సుదల్క సంగితికయ్,

70 పేతురు అన్నె, “ఆవ్ నెంజి” మెన సంగిలన్. అన్నె గడియ గెతికయ్, ఒత్త తిలన పేతురుక దెక, “తుయి, నిజుమి జోతె తిలోసా. తుయి కి గలిలయ ప్రాంతుమతెచో మాన్సు గెద?” మెన సంగిల.

71 జాకయ్ పేతురు, “తుమ్ సంగిలో మాన్సుక ఆవ్ నేని” మెన సాపెన గల కెరన ఒట్టు గలనుక దెర్తికయ్,

72 బేగి కుకుడో వాసిలన్. జలె ఇన్నెతెన్ దొవ్వెర్ జలి, చి “కుకుడో తివ్వెరి నే వాసితె అగ్గె, తుయి అంక ‘నేని’ మెన తివ్వెరి సంగితె” మెన యేసు అగ్గె సంగిలిసి ఏదస్ట కెర, పేతురు ఎదివాట్ దుకుమ్ జా ఏడ గెలన్.

15

పిలాతు యేసుక పరిచ్చ కెర్లిసి

(మత్త 27:1-2,11-14; లూకా 23:1-5; యోహా 18:28-38)

1 రాత్ పయతికయ్, వెల్లెల పూజర్లు, వెల్లెల మాన్సుల్, మోసి తెన్ దేముడు దిలి ఆగ్గుల్ సికడ్డన, వెల్లి సబ కెర్త సుదల్ ఎత్తిజిన్ బెద వెన, యేసుక కిచ్చొ కెరుక గే ఉచర, జోక బంద కడన, *అదికారి జలో పిలాతు మెలోసాతె సార్ప దిల.

2 పిలాతు యేసుక దెక, “తుయి గే యూదుల్చో రానో?” మెన పుసిలన్, చి యేసు “తుయి సంగిలి రితి” మెన జబాబ్ దిలన్.

3 తెదొడి వెల్లెల పూజర్లు యేసుక ఒగ్గర్ నేరిమ్లు వయడ్డికయ్,

4 పిలాతు మెలో జో అదికారి జోక్ అన్నె, “తుయి జోవయింక కిచ్చొ జబాబ్

దెసి నాయ్ గే? ఈందె, తుక కెత్తి నేరిమ్లు వయడ్డతి గే నూను”, మెన సంగిలన్.

5 గని యేసు అన్నె కిచ్చొ జబాబ్ దిలో నాయ్, చి రిసా పిలాతు ఒగ్గర్ ఆచారిమ్ జలో.

6 జలె, జా పండుగు పొది, ప్రెజల్ కోర్ప జలో కేన్ జలెకు జేలి జలోసాక ముల దెంక పిలాతుక అలవాట్ జా అన్నె.

7 జలె, ప్రబుతుమ్క విరోదుమ్ జా అదికారుల్క విత్తేకుమ్ కెర అత్య కెర్ల మాన్సుల్ సగుమ్జిన్ జా పొది జేల్తె తిల. జోవయింతె బరబ్బు మెలో ఎక్కిలో తిలో.

8 జలె, ఒత్త తిల జనాబ్ పిలాతుచి పాసి బెర జా కెర, “తుయి ఈంజ పండుగ్క అలవాట్ జలి రితి అమ్క కెరు!” మెన బలవంతుమ్ కెర్ల.

9 జాకయ్ జో పిలాతు జోవయింక “తుమ్ యూదుల్క రానో జలోసాక తుమ్క ఆవ్ ముల దెంక తుమ్చి ఆస గే?” మెన పుసిలన్.

10 కిచ్చొక మెలె, ఎక్కి గోసకయ్ వెల్లెల పూజర్లు యేసుక జో తెన్ ఆన అస్తి మెన జో జానె.

11 గని, “ ‘యేసుక పొని. బరబ్బుక ములు!’ మెన సంగ” మెన వెల్లెల పూజర్లు జేవ్ బెర తిల జనాబ్క సికయ్తె తిల.

12 తెదొడి పిలాతు జేవ్క అన్నె, “దస్సి జలె, తుమ్ యూదుల్చో రానో మెలోసాక ఆవ్ కిచ్చొ కెరుక?” మెన పుసిలన్,

13 చి జేవ్ జనాబ్ “జోక సిలువతె గల మొర్తి సిచ్చ కెరు!” మెన ఒర్పిల.

14 జేవ్ ఇని జతికయ్, పిలాతు అన్నె, “కిచ్చొక? కిచ్చొ నేరిమ్ కెర అన్నె?” మెన పుసిలన్. గని జేవ్, అగ్గెచి కంట ఒగ్గర్ విస్సుమ్ తెన్ “సిలువతె గల మొర్తి సిచ్చ కెరు!” మెన గట్టిజ కేకుల్ గలిల.

15 జాకయ్ పిలాతు, ప్రెజల్క ముద్దొ కెరుక మెన, జేవ్ సంగిలో బరబ్బుక ముల

* 15:1 15:1 రోమ్ దేసిమచి ప్రబుతుమ్ జా దేసిమ్ ఆక్రమించుప కెర ఏలుప కెర్త తతికయ్, జా రోమ్ దేసిమచి ప్రబుతుమ్చి నావ్ తెన్నె పిలాతు అదికారి జా అన్నె. † 15:9 15:9 యేసుక ‘యూదుల్చో రానో’ మెన సంగిలె, వెల్లెల పూజర్లు కోపుమ్ జవుల మెన జోవయింక కొకడ్డి రిసా దస్సి మెలన్.

కెర, యేసుక కొర్డల్ తెన్ పెటవడ, 'జోక సిలువతె గల్తు, జలె' మెన సార్ప దిలన్.

జమాన్లు యేసుక కొంకడ్డిసి

16 తెదొడి అదికారితెచ జమాన్లు సుదల్ యేసుక 'ప్రేతోరియమ్' మెంతి అదికారి గేర్చి తెడిచి గదితె కడ నా కెర, నయన్యుమ్ ఎత్కిజినక ఒత్త బుకారా కెర,

17 † ఊద రంగుచొ ఏక్ ప్లాలుమ్ జోక గల దా, కంటక ఏక్ కిరీటుమ్ గంచ కెర, జోచి బోడితె గల దా కెర,

18 యూదుల్చొ రానొ, తుక జెయ్యి, జెయ్యి! మెన కొంకడ కొంకడ జోకర,

19 ఏక్ డండొ తెన్ జోక బోడి పెట, జోక తుంక కెర, సెర్పు సేడ జోకర కొంకడ్డ.

20 దస్సి దూసుప కెర్లి పిమ్మట్, జోక గల తిలి ఊద రంగుచొ ప్లాలుమ్ కడ గెల కెర, జోచొ సొంత పాలుమ్ జోక అన్నె గల కెర, జోక సిలువతె గలుక మెన కడ నిల.

యేసుక సిలువతె టీవడ మార్గిసి (మత్త 27:32-44; లూకా 23:26-39; యోహా 19:17-19)

21 వట్టె గెతె తతికయ్, కురేనియు దేసిమ్చొ సీమోసు మెలొ ఎక్కిలో పాసిచి బయిలె తెంతొ జా, ఒత్త పావెలన్. జో, అలెక్సంద్రు రూపు మెల దొగులక అబ్బొసి జయెదె. జలె, జోకయ్ "యేసుచి సిలువ తుయి వయు" మెన జమాన్లు సుదల్ బలవంతుమ్ కెర్ల.

22 జలె, యేసుక గొల్గొతా మెలి మెట్టయ్ కడ నిల. 'గొల్గొతా' మెలె, 'గిడ్డి పొలికచి టాన్'. జలె, జోక ఒత్త కడ నా కెర,

23 నొప్పి తొక్కి కెర్లి ఓస్తు బెదయ్లి ద్రాచ రస్సుమ్ యేసుక నయన్యుమ్ సుదల్ "పి" మెన దిలెకి, పియె నాయ్.

24 తెదొడ్ జోక ఏక్ కిసిలువతె గల టీవడ సిలువక బుయ్యె రోవ కెర, "జోచ పాలల్ వంటనుమ" మెన చీటి గల వంటన్ల.

25 జోక సిలువతె గలిలి సమయుమ్ కెర్లి జలి మెలె, పెందలె నొప్పు గంటల్ జలి.

26 "* యూదుల్చొ రానొ, ఈంజొ" మెన జోచి నేరిమ్ రెగిడ్డి దార్చిగండ యేసుచి బోడిచి ఉప్పిరి సిలువతె ఒడొవ దిల.

27 అన్నె, ఉజెతో పక్క ఎక్కిలోక, డెబ్బి పక్క ఎక్కిలోక, దొగుల చొర్లుక ఎక్కిక్ సిలువతె గలిల.

28 † జేవ్ తెన్ దేముడు పూర్ణమ్ రెగ్గయ్లి ఏక్ కోడు నెరవెర్చువ జలి.

"జో పాపుమ్ నెంజిలోసా జలెకి, నేరిమ్ వయడ, జోక 'పాపుమ్ కెర్లొసా' మెన పాపుమ్ కెర్లన్ తెన్ బెదవ సిచ్చ కెర్ల."

సిలువతె తతికయ్ జోక మాన్పుల్ కొంకడ్డిసి

29 జా వాట్ గెతె తిల మాన్పుల్ యేసుక ఆన, ఆన బోడి దున్నొవ, "దేవులుమ్ సేడవ తిర్రతక అన్నె బందితోసా, తుయి.

30 జలె, తుక తూయి రచ్చించువ కెరన, జా సిలువ తెంతొ ఉత్తు!" మెన జోక కొంకడ దూసుప కెర్ల.

31 దస్సి, వెల్లెల పూజర్లు, మోసే తెన్ దేముడు దిలి ఆగ్గుల్ సికడ్డన తెన్ బెద జా, ఎక్కిలో తెన్ ఎక్కిలో ఆన, ఆన "ఈంజొ వేర సుదల్క రచ్చించువ కెర్లన్, గని జోక జొయ్యి రచ్చించువ కెరనుక నెత్తె.

‡ 15:17 15:17 ఎరన చి నిలిమ్ రంగుల్ బెదయ్లె, ఊద రంగు జయెదె. § 15:24 15:24 'సిలువ' కిసి తయెదె మెలె, ఏక్ టీవ్తెచి ఏక్ అడ్డుమ్ జతి దొన్ని డండల్ బెదవుల. సిచ్చ జతో మాన్కుక జా సిలువతె ఎండ్లవ కెర, జోచ అత్తె చట్టొ చంపొ కెరవ, అత్తెచట్టెతె మేకుల్ పెట సిలువ బుయ్యె టీవ రోవ కెర దస్సి ములుల. జో సిచ్చ జతోసా దస్సి ఒడయ్ జా మొరెదె. రోమ్ దేసిమ్చి అలవాట్ తెన్ చి సిచ్చ, జా. * 15:26 15:26 రోమ్ దేసిమ్చి నావ్ తెన్ ఏలువ కెర్లొ పిలాతు ఈంజ దార్ గండ రెగ్గ తిలన్; యూదుల్క కొకడ్డి రితి. యోహాను 19:19. † 15:28 15:28 గ్రీకు బాన తెన్ ఈంజ మత్తెలి రెగిడ్డ సగుమ్ పుస్తకల్తె 28 నంబర్చి కోడు తయె నాయ్.

32 అమ్ దెక నంప కెర్తి రిసా, ఈంజొ క్రిస్తు, ఇస్రాయేలు ప్రెజల్ దొ రానొ జలె, సిలువ తెంతొ ఉత్త జెవును!" మెన యేసుక దూసుప కెర్ల.

జో తెన్ బెదవ సిలువల్తె గలిల దొగుల చొర్లు కి జోక దూసుప కెర్ల.

యేసు మొర గెలిసి
(మత్త 27:45-56; లూకా 23:44-49; యోహా 19:28-30)

33 బార గంటల్ మెద్దెన్ జలి తెంతొ, మొదొల్ కెర తిన్ని గంటల్ ఎద జా ఒండి దేసిమి అందర్ డంక తిలి.

34 జలె, తిన్ని గంటల్క యేసు, "ఏలీ, ఏలీ, లామా నబక్తానీ" మెన అరమయ్ బాస తెన్ "అంచొ దేముడు ప్రబు, అంచొ దేముడు ప్రబు, అంక కిచ్చొక ఆతు ముల దా అస్సిసి?" మెన గట్టిజ ఒర్న దిలన్.

35 జలె, ఒత్త టీవొ జా తిలసతె సగుమ్ జిన్ జా కోడు సూన కెర, "ఆదె, ఏలీయా పూర్గుమ్ చొక బుకార్తయ్, కిచ్చొగి" మెల.

36 జోవయింతె ఎక్కిలో నిగ గెచ్చు, బూంజు రితి తిలి ఏక్ వస్తువ వెంట, అమ్డి ద్రాచ రస్సుమ్ తె బుడ్డవ కెర, ఏక్ రివ్వతె బంద, చాంప కెర, జోక "పి" మెన దా, "అల్లె, ఇన్నెక సిలువ తెంతొ ఉత్తవుక మెన ఏలీయా తోడ్ జా ఉత్త జెయెదె గీ, నాయ్ గే దెకుమ!" మెన కొంకడ్లన్.

37 జలె, యేసు గట్టిజ కేక్ గల దా, ప్రానుమ్ ముల దిలన్.

38 మొర గెలి గడియయ్, దేముడుచి గుడితె ఒడొవ తిలి తేర, ఉప్పిర్ తెంతొ ఎట్టొ ఎద చిరి జా దొన్ని గండల్ జా గెలి.

39 తెదొడి, యేసుక మొక్క రక తిలొ పుంజెక్ జిన్ జమాన్లుక వెల్లొ యేసుక మొర గెలొ మెన దెక కెర, "నిజమి, ఈంజొ మాన్సు దేముడుచొ పుత్తుసి జా తిలొ" మెన సంగిలన్.

40 యేసు మొర్లి పొది, సగుమ్ జిన్ తేర్ బోదల్ దూరి తెంతొ దెకితె తిల. జోవయింతె సగుమ్ జిన్ కొన్న మెలె, మగ్గలేనే పట్టుమ్ చి మరియు మెలి ఎక్కి, దకిలొ జలొ యాకోబు అన్నె యోసే మెల ఉబెడల్ చి కీ మరియు మెలి అయ్యసి, పడ్డొ సలోమే మెలి ఎక్కి తిల.

41 యేసు తిలి ప్రాంతుమ్ తె బుల్లె తిలి పొది, ఈంజేవ్ తీగ్ల జోవయిం చి పట్టి గెచ్చు సవైచన కెర్తె తిల. యేసు యెరూసలేమ్ తె ఉట్ట అయేలి పొది అన్నె ఒగ్గర్ జిన్ తేర్ బోదల్ కి జా తిల. జో మొర్లి పొది, జేవ్ కి సిలువ తిలిన్ తె రకితె తిల.

యేసుచి పీనుమ్ వెంట గెలిసి
(మత్త 27:57-61; లూకా 23:50-56; యోహా 19:38-42)

42 యూదుల్క బక్తి కెర్తి సెలవ్ కడన్ల దీసి జయెదె, జలె జా దీసి సెలవ్ కడన్ల దీన్క అగ్గెచి దీసి.

43 జలె సాంజ్ జలి పొది, యూదుల్ చి వెల్లి నబతె బెదితొ 'చెంగిలొ మాన్సు' మెన ఎత్కి జిన్ జాన్ తొ, అరిమతయ్ గవ్వెచొ యోసేపు, దయిరిమ్ కెరన, పిలాతు తె గెచ్చు, "యేసుచి పీనుమ్ జోక దా" మెన వెంట గెల్తి రిసా నజిలొ. జో యోసేపు, 'దేముడుచి రాజిమ్ ఈంజ లోకుమ్ తె ఏలువ కెర్తి కాలుమ్ కెయెచ జెయెదె.' మెన, నిదానుమ్ తెన్ రకితె తిలొ.

44 జలె, పిలాతు "జో తెద్ది బేగి మొర గెలన్ గె?" మెన అన్యానుమ్ జా, పుంజెక్ జిన్ జమాన్లుక వెల్లొక బుకారా, "నిజమి జో తెద్ది బేగి మొర గెచ్చు అస్సి గె?" మెన పుసిలన్.

45 "నిజమి మొర గెచ్చు అస్సి" మెన జో పుంజెక్ జిన్ జమాన్లుక వెల్లొచి అత్తి సూన, యోసేపు పీనుమ్ వెంట గెలుక మెన పిలాతు సెలవ్ దిలన్.

‡ 15:38 15:38 ఎక్కి వెల్లొ పూజరి వెర్చెక్ ఎక్కి సుట్టు వెన అర్చితుమ్ దెతి గదిక అడ్డు కెర్తె తర, ఈంజ. S 15:40 15:40 ఈంజ మరియు యేసుచి అయ్యసి జయెదె; మార్కు 6:3.

46 జాకాయ్, జో విలువచి బట్ట ఆన, యేసుచి పీనుమ్ సిలువ తెంతో ఉత్తవ దా, జో పాలుమ్ పంగ్రవ దా, రంగ్ని పత్తుర్ డొల్మి కెరయలి బొరొచి మెస్సున్ తె ఎంగ్డవ దా, జా బొరొచి గుమ్ముమె వెల్లో పత్తురు ఒన్కవ కెర డంకిలన్.

47 కేనె ఎంగ్డవ దా వెంట గల గే, మగ్దలేనే పట్టుమ్చి మరియు మెలిసి కి, యోసే మెలోసాచి *మరియ మెలి అయ్యసి కి దెకిల.

16

యేసు జీవ్ జా ఉట్ట అస్సె

(మత్త 28:1-8; లూకా 24:1-12;

యోహా 20:1-10)

1 సెలవ్ కడన్లి దీసి కేడ గెలి రాతి, మగ్దలేనే పట్టుమ్చి మరియు, యాకోబుచి అయ్యసి మరియు, సలోమే తెన్, యేసుక గాంసుక మెన, చెంగిల్ వాసెన తేల్ గెనన్ల, చి

2 జా *అయ్తర్ దీసి ఒగ్గర్ పెందలె ఉట్ట, బార్ జా, పొద్దు బార్ జలి నమయుమి జా మెస్సు పావ,

3 “మెస్సు డంపిలో పత్తుర్ అమ్చి రిసా కో ఒన్కవ దెవుల గె?” మెన ఎక్కి తెన్ ఎక్కి †లట్టబై తిల.

4 ఇసి లట్టబ లట్టబ, ఉప్పిరి దెక, పత్తురు ఒన్క జా అస్సె మెన దెకిల. జో పత్తుర్ ఒగ్గర్ వెల్లోచొ.

5 తెదొడి, మెస్సు గెచ్చు పెస, కిచ్చొ దెకిల మెలె, జా మెస్సు తెడిచి ఉజెతో వక్క, చొక్కిల పాలల్ గలన తిలో ఉబెడొ రితొ దేముడుచి దూత వెస అస్సె. జోక దెక, ఆచారిమ్ జా పంబ్ర జల.

6 జేవ్ ఇసి జతికయ్, జో దేముడుచి దూత జోవయింక “పంబ్ర జా నాయ్. సిలువతె గల మొర్ర తిలో నజరేత్తు గవ్విచొ యేసుక తుమ్ చజితసు. జో

జీవ్ జా ఉట్ట అస్సె. జో ఇన్నె నాయ్. ఈందె జోక ఎంగ్డవ తిలి టాన్క అంకి గల.”

7 అన్నె, సిస్సుల్క, పేతురుక “తుమ్చి కంట అగ్గెతో, యేసు గలిలయతె ఉట్ట గెతయ్. తుమ్క జో అగ్గె సంగిలి రితి, జోక ఒత్త దెకితె మెన తుమ్ గెచ్చు సంగ” మెన దూత సంగిలన్.

8 జేవ్ తేరబోదల్ బమ్మ తెన్ మెస్సు తెంతో బార్ జా, సిస్సుల్క జా కబుర్ సంగుక ఉట్ట నిగ గెల. గట్టిజ ఆచారిమ్ జా, అద్దుర్ జా గెచ్చు తిల, చి బియ్ కెర, సిస్సుల్క పిట్టవ, కక్క కి కిచ్చొ సంగితి నాయ్.

మగ్దల పట్టుమ్చి మరియు యేసు డీసిలిసి

9 యేసు ‡అయ్తర్ దీసి జీవ్ జా ఉట్ట, జా దీసి పెందలె మగ్దల పట్టుమ్చి మరియుక తొలితో డీసిలన్. ఒగ్గర్ అగ్గె, జాచిక దెర్ల బూతల్క యేసు ఉదడ గెల తిలన్. జా తేరబోద ఈంజయి.

10 జలె, యేసు జాక డీస్తికయ్, జా జో తెన్ బులై తిల సిస్సుల్ జివ్వి అస్సె మెన నేన కెర దుకుమ్ జా ఏడ్డె అస్సి, మెన జా జాన కెర, జా మాన్సు జోవయింతె గెచ్చు కెర, “జీవ్ జా అస్సె. ఆవ్ సొంత దెక అస్సి” మెన సాచి సంగిలి.

11 గని జో జీవ్ జలిసి జా దెకిలిసి సున్లె కి, తెదొడి నంప కెర్తి నాయ్.

12 ఒత్త తెంతో, బయిలుచి వట్టె దొగుల సిస్సుల్ ఇండ గెతె తతికయ్, యేసు, జోచి పొలిక ఇదిల్ వేర మార్పుప జా తా, జోవయింక డీసిలన్.

13 తెదొడి జేవ్ దొగుల అన్నె బుల గెచ్చు, అన్నె సిస్సుల్క సంగిల. గని జేవ్ అన్నె సిస్సుల్ తెదొడి నంప కెర్తి నాయ్.

* 15:47 15:47 ఈంజ మరియు యేసుచి అయ్యసి జయెదె; మార్కు 6:3.

* 16:2 16:2 సత్తు పొదుల్తె

అగేచి దీసి † 16:3 16:3 ఎక్కితె తెన్ ఎక్కిల్ ‡ 16:9 16:9 సత్తు పొదుల్తె అగేచి దీసి

ఎగరజిన్ సిస్సుల్క యేసు డీసిలిసి (మత్త 28:16-20; లూకా 24:36-49; యోహా 20:19-23; బారి కమ్మొ 1:6-8)

జోవయింక తోడ్ తా జేవ్ సిస్సుల్చి అత్తి వెల్లో కమొ కెరవ కెరవ, జేవ్ సంగిలి చి సత్తిమ్క రుజ్జు దెకయలన్సీ.

14 జాచి పిమ్మట్, ఎగరజిన్ సిస్సుల్ అన్నిమ్ కంక వెస తిలి పొది, యేసు జోవయింక డీసిలన్, చి గోల కెర్లన్. జో జీవ్ జలి పిమ్మట్ జోక దెక తిలస, జోక సాచి సంగ తిలె కి, జేవ్ రాడ్ జీవ్ తెన్ తిలి రితి అన్మానుమ్ జా నంప నే కెర్లి రిసా గోల కెర్లన్.

15 తెదొడి యేసు సిస్సుల్క, “తుమ్ దేసిమ్లు ఎత్తితె గెచ్చ, లోకుమ్చ ఎత్తిక అంచి రిసా సుబుమ్ కబుర్ బోదన కెర.

16 కో నంపజయి గెచ్చులచి బాప్తిసుమ్ సజనుల గే, జేవ్ రచ్చించుప జవుల. గని కో నంప నే జవుల గే, మొర గెలె, సిచ్చతె గెచ్చుల.

17 “అంక నంపజతస తెన్ అంచి అదికారుమ్ అస్సె మెన కీస గుర్తులు తయెదె మెలె, అంచి నావ్ తెన్ బూతల్క ఉడడ గెలుల, జేవ్ అగ్గె నే సికిల బాసల్ తెన్ లట్టబుల,

18 అయివొక ఉక్ల దెర్లె జవున్, మొర్తిసి పిల్లె జవున్, జోవయింక ప్రమాదుమ్ జయె నాయ్. అన్నె, జోర్ణొ జబ్బుల్ తెన్ తిల మాన్సుల్క అంచి నావ్ తెన్ బోడి చడిలె, చెంగిల్ జవుల.”

19 ప్రబు జలో యేసు, జలె, సిస్సుల్ తెన్ లట్టబ బోదన కెర కేడయలి ఇదిల్ పడ్డొ, జోవయించి మొక్కె ఆగాసుమ్తె వెగ, పరలోకుమ్తె దేముడు అబ్బిన్చి ఉజెతో పక్కయ్ వెసిలన్.

20 అన్నె, జో సంగిలి రితి, సిస్సుల్ కేనె ఒత్త గెచ్చ బోదన కెరె తతికయ్, ప్రబు

§ 16:20 16:20 మార్కుచి అత్తి రెగిడ్లి ఈంజ పుస్తకుమ్తె, ఈంజ అద్యయిమ్చి నొవ్యు నంబర్ తెంతొచ కొడొ ముల, ఆకర్చి కోడు కొట్టు జవున్ మెలి రితి ఇదిలిసి కోడు కెయగె గలిల. గని దూతల్చి అత్తి సంగిలి కబుర్ ఎత్తి, పేతురుక చి జోవయింతెన్ తిల సిస్సుల్క జేవ్ తేర్బోదల్ సంగిల. ఒత్త తెంతొ, సుబుమ్ కబుర్ సూనయెతి రిసా యేసు జేవ్ సిస్సుల్క చెత్తర్ దిక్కుల్తె తెద్రవ దిలన్. యేసు తెన్ రచ్చన వాట్ దొర్కు జలి, చి పరలోకుమ్చి రాజిమ్తె బెద కెయెక తెయెక ఒత్త చెంగిల్ తంక జయెదె చి సుబుమ్ కబుర్, గెద. జా సుబుమ్ కబుర్ పరలోకుమ్చి సత్తిమ్ తెన్ అన్నె. కో పొడ్ కెరుక నెత్తిర్. తెద్దిలి.

లూకా సుబుమ్ కబుర్ లూకా రెగిడ్లి సుబుమ్ కబుర్

1 యేసుక్రీస్తు ఈంజ లోకుమ్తె అయ్లసి, జో ఇన్నె తిలి పొది అమ్చితె ఎత్కి జర్గు కెర్ల కమొ ఎత్కి మొదోల్ తెంతో *సగుమ్జిన్, సొంత దెక సాచుల్ జా, జా ఎత్కిచి రిసాచి సుబుమ్ కబుర్ సూనయ్త సేవ కెర్తన జల.

2 జలె, జో యేసుక్రీస్తు అయ్లసి తెన్ †నెరవెర్చుప జలిసి ఎత్కిచి రిసా జేవ్ సాచుల్ అమ్క జాన కెర అస్తి, అమ్చి అత్తి జా సుబుమ్ కబుర్ దా అస్తి, చి యేసు తెన్ జర్గు జలిన్ ఎత్కిచి మత్తెలితెవ బెదవ ఒగ్గరిజిన్ రెగ్ల అస్తి.

3-4 జలె, ఓ వెల్లో దెయొపిలా, ఈంజ ఎత్కి సూన ఆవ్ సరిగా పరిచ్చ కెర అస్తి, చి తుక 'జో సూస్లిన్చి రిసా సత్తిమ్ చినున్' మెనయ్, తుచి రిసా ఈంజ ఎత్కి వర్చ తెన్ ఆవ్ రెగుడుక అంక చెంగిల్ డీస్తయ్, చి ఇన్నె రెగ్లితసి.

క్రీస్తు రిసా సాట్టు కెర్తో యోహాను జెర్మెదె

5 హేరోదు రానో ‡ యూదుల్చి ఒండి దేసిమి ఏలుప కెర్తె తిలి పొది, ఏదేముడుచి గుడితె జోచి సేవ కెర్తో పూజరి జలో జెకర్యా మెలో ఎక్కిలో తిలన్. పూజర్లుతెచో అబీయా పూర్గుమ్చోచి *తెగచో జో. జోచి

తేర్చి, †అహరోను పూర్గుమ్చో జలో యూదుల్చో తొలితోచో ఎత్కిక వెల్లో పూజరిచి సెకుమ్తెచి తేర్బోద జా తిలి. జాచి నావ్ ఎలీసబెతు.

6 జేవ్ దొగుతెర దేముడుచి కోడు తెన్ సత్తిమ్ ఇండితె తిల. నే పిట్టయ్తె నెంతె దేముడు దిల ఆగ్నల్ ఎత్కి తెన్ నాయిమ్ ఇండితె తిల.

7 గని ఎలీసబెతు గొడు జా తిలి రిసా జోవయింక బోదల్ నాయ్. జేవ్ ఒగ్గర్ వెర్చుల్ వయసుచ మంత్రో మంతిరి జా తిల.

8 జెకర్యా తిలి తెగవ పూజర్లు దేముడుచి గుడితె సేవ కెర్తె కాలుమ్ జా తిలి, చి జెకర్యా దేముడుచి జా సేవ కెర్తె తిలి పొది,

9 దేముడుచ పూజర్లుతె కీసి కెర్తెతి గే, దస్సి జోయ్యి జో ప్రబు జలో దేముడుచి గుడితెచి దూపుమ్ డయ్యుక మెన చిట్టు గల్క జోచి నావ్ ‡సేడ్డి.

10 దూపుమ్ డయిలి పొది ప్రెజల్ ఒండిజిన్ దేముడుచి గుడిచి కోటచి తెడి బయిలె ప్రార్దన కెర్తె తిల.

11 తెదొడి దేముడు ప్రబుచో దూత ఎక్కిలో జా దూపుమ్ డయితి టాన్చి ఉజెతో పక్క టీవ డీసిలన్.

12 జెకర్యా జో దూతక దెక కెర బేగి బమ్మ జా బియఁ గెలన్,

13 గని దూత జోక, "జెకర్యా, తుయి బి నాయ్. తుయి కెర్తె ప్రార్దన దేముడు సూన అస్సె. చి తేర్చి ఎలీసబెతు తుక పుత్తు పాయ దెయెదె. జోక 'యోహాను' మెన నావ్ తిస్తి.

* 1:1 1:1 జోవ బారజిన్ బారికుల్ చి అన్నె ఒగ్గరిజిన్. † 1:2 1:2 'నెరవెర్చుప జలిసి' మెలి కోడు కిచ్చొక ఒత్త అస్సె మెలె, పూర్గుమ్ తెంతో 'దొర్లు జలో రచ్చింఠుప కెర్తెసా జత్రో క్రీస్తుక తుమ్తె తెర్తయిందె, ఇసి దస్సి కెరెదె' మెన ఎత్కి అదికారుమ్ తిలో దేముడు సంగ తిలన్, చి దేముడుచి కొణెతె రెగ్లవ తిలన్, చి యేసు అయ్లసి, బులిలిసి, మొర్లిసి, అన్నె జలిసి చి పరలోకుమ్తె అన్నె వెగ గెలిసి తెన్ జా ఎత్కి నెరవెర్చుప జలి. ‡ 1:5 1:5 నెంజెలె 'ఒండి యూదయ దేసిమి' మెనక జయెదె, రోమ్ దేసిమిచి ప్రబుతుమ్చి నావ్ తెన్ జో హేరోదు ఏలుప కెర్తె తిలన్. 4:44 చి ఎట్టాచి కోడు దెక. § 1:5 1:5 ఎత్కి అదికారుమ్ తిలో దేముడుక ఈంజ లోకుమ్తె ఎక్కి దేముడుచి గుడి తయెదె. కేనె మెలె; యెరూసలేమ్తె, యూదుల్చి వెల్లె వట్టుమ్తె. యెరూసలేమ్ యూదయ ప్రదేసిమి తిలి. * 1:5 1:5 పూర్గుమ్ జా అలనాబ్ దిలి తెంతో, యూదుల్చ పూజర్లుతె విస్సెక్ చెత్తెరిజిన్ తిల. జోవయింతె ఏక జట్టుచో వెల్లో మూస్సు అబీయా. † 1:5 1:5 అహరోను మోసి పూర్గుమ్చో అస్సె. ‡ 1:9 1:9 కేన్ పూజరిచి జీవితముతె ఎక్కి సుట్టుచి సేవతె జో జా దూపుమ్ డయ్యుక జయెదె. జేక జా సమయమ్ జెకర్యాక ఒగ్గర్ ముక్కిమిచి.

14 జో బోద జెర్మిలె తుయి సర్దనంతోసుమ్ జస్తె. అన్నె ఒగ్గర్జిన కి జా సర్ద జవుల.

15 పడ్డొ, ప్రబుచి కామ్ కెర్దనతె జోక 'వెల్లొ' మెన ప్రబు దెకెదె. అంబడ్డి ద్రాచ రన్నుమ్ కి, కిచ్చొ మచ్చితి సూరు కి జో పియె నాయ్. చి జో దేముడుచి సుద్ది తిలి ఆత్మ

జోచి పెట్టి బెర తయెదె; అయ్యసచి పెట్టి జో తిలి మొదొల్ తెంతొ కి.

16 ప్రబు జలో జో జోక దేముడుక జేవ్ అన్నె సత్తిమ్ కెరుక దెర్ది రితి జో యోహాను ఒగ్గర్జిన ఇస్రాయేలుల్క దేముడుచి పక్క పళ్లయెదె,

17 చి ఏలీయా పూర్గుమ్చొక తిలి ఆత్మసెక్తి, ప్రబుచ కబుర్లు సంగితి ఆత్మసెక్తి, యోహానుచి పెట్టి తయెదె చి, ప్రబుచి పురె జో గెచ్చెదె.

పురె గెచ్చు అబ్బుదింసి జోవయించ బోదల్క అన్నె చెంగిల్ దెకిత్ రితి జోవయింక పనులవెదె, అన్నె బుద్ది సుదల్చి గ్యానుమ్ జేవ్ సూన్తి రితి దేముడుచి నీతి కోడు తెన్ అగ్గె నెసిలసక పనులవ దెయెదె. కిచ్చొక మెలె, ప్రబుచి సేవ జేవ్ కెర్ది రితి మాన్సుల్క తెయార్ కెర్ది రిసాయి”

మెన దూత జెకర్యాక సంగిలన్.

18 గని, “ఈంజ కోడుచి సత్తిమ్క అంక కిచ్చొ రుజ్జు? ఆవ్ మంత్రొ మాన్సు, చి అంచి తెర్చి ఒగ్గర్ వెర్పుల్చి మంతిరి” మెన జెకర్యా అన్మానుమ్ సంగిలన్.

19 దూత జోక కిచ్చొ జబాబ్ దిలన్ మెలె, “ఎత్కి అదికారుమ్ తిలొ దేముడుచి పురెతో టీవ్తో జోచి సేవ కెర్తొసొ ఆవ్. అంచి నావ్ గబ్రియేలు.

తుక ఈంజ కోడు ఆవ్ సంగుక మెన, తుక ఈంజ సర్దచి కబుర్ ఆనుక మెన, దేముడు అంక తెద్రయ్లొ.

20 ఈందె, సూను, ఆవ్ సంగిల కొడొ తుయి నంప కెర్దది నాయ్ చి రిసొ, జా ఎత్కి జర్గు జతి ఎద తుయి గుల్లొ జా తస్తె. జేవ్ కొడొ కచితుమ్ దేముడు దిలి కాలుమ్కయ్ ఎత్కి జర్గు జయెదె” మెన దూత జబాబ్ దిలన్.

21 జలె, మదెనె, జెకర్యా అన్నె బార్ జతిన్క ప్రెజల్ రకితె తిల. దేవులుమ్తె జో ఆల్సిమ్ తా గెలి రిసొ ఆచారిమ్ జల.

22 జలె, జో బార్ జలె, జోవయింతెన్ లట్టబుక నెత్తిర్లి రిసొ, ‘దేముడుచి గుడితె కిచ్చొ జవున్ డీసన్ సేడ్డిన్ దెకిలన్’ మెన చినిల, అన్నె, గుల్లొ జా తా అత్తొ తెన్ జోవయింక సయ్నల్ కెర్లన్.

23 అన్నె, జోచి సేవచ దీసల్ బెర జోచి సేవ కెర కీకడవ కెర, గెరి ఉట్ట గెలన్.

24 సగుమ్ దీసల్ గెలి పడ్డొ, జోచి తేర్చి ఎలీసబెతు అంగి జలి, అన్నె పావ్ జొన్నొ ఎద లుంకిల్ రితి జా గెరి తా గెలి.

25 “ఆవ్ మంతిర్ జా అయ్లి పొద్ది ప్రబు అంక చెంగిల్ దెక చెంగిల్ వరుమ్ దా అస్సె. అంక ‘గొడ్డు జా అస్సె’ మెన మాన్సుల్ అగ్గె ఆస్తె తిల, గని అప్పె అంగి జా అస్సిచి మరియాద అయ్లి. దేముడుచి దయక అంక మరియాద దిలొ. అంచి అవమాన్సుమ్ కడ గెలొ.” మెన ఎలీసబెతు సర్ద తెన్ తిలి.

యేసుచి జెర్మన్ రిసొ దూత మరియక సంగిలిసి

26 ఎలీసబెతు అంగి జా సొవ్వు జొన్నొ జతికయ్, దేముడు జో గబ్రియేలు మెలొ దూతక గలిలయ ప్రాంతుమ్చి నజరేతు మెలి గవ్వి కబుర్ తెద్రయ్లన్.

27 యూదుల్చొ *దావీదు పూర్గుమ్చొచి సెకుమ్చొ యోసేపు మెలొ ఎక్కిలొక పెండ్లి కెరుక మెన అయ్యసిసి

§ 1:23 1:23 సత్తరెక చి సేవ, బెర్తె, కెర తయెదె. * ముక్కిమ్చొ రానొ జా తిలన్.

1:27 1:27 పూర్గుమ్ పొద్ది జేవ్ యూదుల్క దావీదు

సంగ తిలి విడ్డి బోదతె తెద్రయ్లన్. జా విడ్డి బోదచి నావ్ మరియ.

28 జలె, జో దూత జాతె జా కెర, “ఓ మరియ, తుక జోబర, తుయి సంతోసుమ్ జా. ఎత్కి అదికారుమ్ తిలో దేముడు తుక చెంగిల్ దెక అస్సె. తుక చెంగిల్ వరుమ్ దెతయ్. జో తుక తోడు అస్సె” మెన సంగిలన్.

29 గని జా నాడి ఈంజ కోడు సూన బలే ఆచారిమ్ జా ఇదిల్ బాద నేడ కిచ్చొ కెరుక గే నేన కెర, “ఈంజ కోడుచి అర్దుమ్ కిచ్చొ?” మెన ఉచరన బియ: గెలి.

30 “మరియ, తుయి బి నాయ్. కిచ్చొక మెలె, ఎత్కి అదికారుమ్ తిలో దేముడు తుక దయ దెక అస్సె.

31 ఈందె, సూను, తుయి అంగి జస్తె. పుత్తు పాయితె, చి జో బోదక ‘యేసు’ మెన నావ్ తిస్తె.

32 జో ముక్కిమ్ జయెదె, చి ‘ఎత్కిచి ఉప్పిరి తిలోసాచొ పుత్తుసి’ మెన

జోచి రిసా సంగుల. అన్నె, దావీదు రానొచి సెకుమ్తె జెర్తెదె, చి జో ఒగ్గర్ పూర్ణమ్ తిలో ముచ్చితాత్సోన్ జలో రిసా

† దావీదుచి సింగాసనుమ్తె జో వెసయెదె జోచి రాజిమ్క జో ఏలువ కెర్తి రితి ప్రబు జలో దేముడు దెయెదె.

33 ‡ యాకోబు పూర్ణమ్చొచి సేకుమ్చచి ఉప్పిరి జో

కెయ:క తెయ:క ఏలువ కెరెదె. జోచి రాజిమ్ కెయ:క కి అంతుమ్ జయె నాయ్” మెన మరియక జో దూత సంగిలన్.

† 1:32 1:32 యూదుల్క ఒగ్గర్ పూర్ణమ్ సొంత రానల్ తిల, చి జేవ్ రానల్తె దావీదు ముక్కిమ్చొ జలో. “తుచి సెకుమ్తె దొర్కు జలో రచ్చింఱువ కెర్తొసాక జెర్తయిందె” మెన జో దావీదుక దేముడు సంగ తిలన్. దావీదుచి సెకుమ్తె జో జెర్త ఏలువ కెరుక తిలిన్చి రిసా ‘మాములుమ్ ఈంజయ్ లోకుమ్చి అప్పెచి రగుమ్చి రాజిమ్తె ఏలువ కెరెదె’ మెన యూదుల్ ఉచర్తి తిల, గని ఆత్మయి రగుమ్చి రాజిమ్చి అర్దుమ్ ఇన్నె ముక్కిమ్ తయెదె. ఆకర్కయ్, దేముడు ఈంజ లోకుమ్క మార్పువ కెర్తి వడ్డొకయ్, జోచి రాజిమ్ డీసెదె. ‡ 1:33 1:33 యాకోబు పూర్ణమ్చొ కి యేసు జెర్తిలి వంసుమ్చొ జయెదె జోక ‘ఇస్రాయేలు’ మెన అన్నెక నావ్ తయెదె, చి జోచి సెకుమ్చక ‘ఇస్రాయేలుల’ మెన కి యూదుల్ సంగుల. § 1:36 1:36 అప్పసి జయెదె గే, అత్తసి జయెదె గే, పాపసి జయెదె గే, కిచ్చొ జయెదె గే నేన్ తి. * 1:37 1:37 నెంజలె, జో సంగిలి కోడుక ‘జో జర్గు కెరుక నెత్తె’

34 దూత దస్సి సంగితికయ్, మరియ జోక, “ఈంజ కిసి అంక జర్గు జయెదె? ఆవ్ మున్నుక నే గెలి మాన్సు, గెద” మెన సంగిలన్.

35 దూత జాక, దేముడుచి సుద్ది తిలి ఆత్మసెక్తి తుచి పెట్టి జెయెదె.

జో ఎత్కిచి ఉప్పిరి తిలోసాచి ఆత్మసెక్తి తుచి సుట్టునంత జోచి నీడ సెక్తి డంక తయెదె.

జాచి రిసా, తుచి పెట్టి జెర్తుక తిలో బోదక “పూర్తి దేముడుచి సుద్ది తిలోసా, జోచొ సొంత పుత్తుసి”

మెనుల. 36 అన్నె, “ఈందె, అన్నెక్ కోడు కి సూను.

తుమ్చి కిమాన్సు జతి ఎలీనబెతు కి మంతిరి జలి పొది అంగి జా అస్సె, చి పుత్తు పాయెదె. జా అగ్గె గొడ్డు జా తిలిసి అంగి జా అప్పె సొప్పు జొన్నొ జా అస్సె.

37 జలె, * కిచ్చొచి రిసా కి ‘జో జర్గు కెరుక నెత్తె’ మెన అమ్చొ దేముడుచి రిసా సంగుక నెంజె, గెద. జో ఎత్కి తెరె” మెన దూత సంగిలన్. సంగితికయ్,

38 మరియ, “ఆవ్, ప్రబుచి సేవ కెర్తొ సుది, తుయి సంగిలిసి అంక జర్గు జవున్” మెన సంగిలి చి దూత జాచి తెంతో బార్ జా ఉట్ట గెలన్.

మరియ ఎలీసబెతుతె గోత్ గెలిసి 39 జలె, ఒగ్గర్ దీసల్ నే గెతె అగ్గె ఏక్ దీసి, మరియ బార్ జా, బే బేగి గెచ్చు యూదయ ప్రదేసిమ్చి డొంగుర్ దేసిమ్ పక్కచి ఏక్ గెవ్వి పా:విలన్.

40 జెకర్యాచి గెరి గెచ్చు ఎలీసబెతుక దస్సుల్ జా జొకర్లన్.

41 మరియు జొకర్లి కోడు ఎలీసబెతు సూన్లి బేగి, జాచి పెట్టి తిలో బోద డేవిలన్. తెదొడి జాచి పెట్టి దేముడుచి సుద్ది తిలి ఆత్మ బెర్తికయ్,

42 జా ఆత్మసెక్తిక కిచ్చొ మెన గట్టిజ అవాడ్ తెన్ ఎలీసబెతు కేక్ గలిలన్ మెలె,

“తేర్బోదల్ ఎత్కిచి కంట దేముడు తుకయ్ దీవెన దిలన్ అస్సె, చి తుచి పెట్టి జెర్మితో బోద చెంగిల్చొ!

43 అంచొ ప్రబుక పాయితి అయ్యసి అంచితె జెంక దేముడు కిచ్చొక వరుమ్ దా అస్సె?

44 ఈందె, తుయి జొకర్లి కోడు అంచి కంగ్గల్ సూన్లి బేగి

అంచి పెట్టి తిలో బోద సర్దక అంచి పేట్ తెడి డేవిలన్.

45 ఒహొ, దేముడు జాక సంగ తెద్రయ్లి కోడుక ‘నిజమి జర్గు జయెదె’ మెన నంప కెర్లి తేర్బోదక చెంగిలి!” మెన ఎలీసబెతు కేక్ గల్తికయ్,

46 మరియు జా ఇసి మెలి.

దేముడుచి గవురుమ్ మరియు గాయిలిసి అంచి జీవు ప్రబు జలో దేముడుచి గవురుమ్ కెర్తసి.

47 అంచొ రచ్చించువ కెర్తొసొ జలో దేముడు జర్గు కెర్లిన్చి రిసొ అంచి ఆత్మతె సర్ద జతసి.

48 ఆవ్ జోచి సేవ కెర్తొ సుది ఒగ్గర్ దాకు జలెకి, అంక జో చెంగిల్ దెక అస్సె. మెలె, ఈందె, “జాక చెంగిలి” మెన అప్పె తెంతో యుగల్చి ఉప్పిరి యుగల్చ మాన్సుల్

అంచి రిసొ దీవెన పాయిలిసి మెన సంగుల.

49 ఒండి సెక్తి తిలో దేముడు జోచి దయక

అంక గొప్ప కామ్ కెర అస్సె, జోచి నావ్ పరలోకుమ్చి సుద్ది తిలిసి.

జో సుద్ది తిలిన్క జోచి నావ్ కెర్ది గవురుమ్ కెరుక జయెదె!

50 యుగుమ్చి ఉప్పిరి యుగుమ్చ జోక బిత మాన్సుల్క జో కన్కారుమ్ దెకితె తయెదె.

51 †జో అప్పె జర్గు కెర్లిన్ తెన్ కచితుమ్ జోచి ఆతుచి ఒగ్గర్ సెక్తి కమొ కెర కెర, జోచి సెక్తి దెకవ అస్సె.

వెల్లో మెనన్లనచి పెట్టిచ ఆలోసుమ్లు పాడ్ కెర, జోవయింక చెదుర్పు కెర అస్సె,

52 ఏలుప కెర్తొనక జోవయించ సిజాసనల్ తెంతో సేడవ గెల కెర,

విలువ నెంజిల రిత మాన్సుల్క జో విలువ దా అస్సె.

53 చూ జలనక చెంగిల్ అన్నిమ్ దొర్కు కెర అస్సె, చి

సొమ్సార్లుక కిచ్చొ నే దెతె రితి తెద్రవ దా అస్సె.

54-55 అమ్చ పూర్గుల్క, ముక్కిమ్క అబ్రాహామ్ పూర్గుమ్చొక,

“తుక, చి యుగుమ్చి ఉప్పిరి యుగుమ్చ తుచి సంతానుమ్ జతనక

తోడు తయిందె” మెన జో ప్రమానుమ్ సంగిలన్, గెద, జలె, జా రచ్చనచి రిసొచి ప్రమానుమ్చి జోవయించి కన్కారుమ్ నే పచ్చితె.

56 మరియు ఎలీసబెతు తెన్ తిన్ని జొన్నొ తా కెర గెరి అన్నె ఉట్ట గెలి.

57 జలె, ఎలీసబెతుచి కంట్టు పాచ అయ్లి, చి మున్సుబోద జెర్మిలన్.

58 జెర్మితికయ్, దేముడు జాచి ఉప్పిరి కన్కారుమ్ జా అస్సె మెన, జేవ్చి గేర్ పాసిచ గెరల్చ మాన్సుల్చి జేవ్చ అన్నొబావొ చి బందుగులు

† 1:51 1:51 51-53 ఈంజేవ్ కొడొ ముక్కిమ్క జర్గు జంక తిలిన్చి రిసొచ కొడొ జవుల, గని జా ఎత్కిక ‘కచితుమ్ జర్గు జయెదె’ మెలి ఎత్కి అదికారుమ్ తిలో దేముడు జోచి సెక్తిక దిలి దయిరిమ్కయ్ జా ఎత్కిక అప్పె కి జర్గు జలి రితి సంగితయ్.

ఎత్కిజిన్ నూన కెర, జేవ్ తెన్ ఒగ్గర్ సర్లసంతోసుమ్ జల.

59 జలె, బోద జెర్మ అట్టు పొదుల్ జతికయ్, యూదుడు కెర్తి సున్నతి జో బోదక కెరుక చి, జోక నావ్ తింక మెన ఎత్కిజిన్ బెద అయ్ల. 'జెకర్యా' మెన అబ్బొన్చి నావ్ జో బోదక తిల.

60 గని అయ్యసి కిచ్చొ మెలి మెలె, "పోన. జోక † 'యోహాను' మెన నావ్ తింక అస్సె" మెలన్.

61 దస్సి మెంతికయ్, "జేవ్ తుమ్చ మాన్సుల్తె కక్కయ్ జా నావ్ నాయ్. జా నావ్ కిసి తితె!" మెన ఒత్త బెర్లస సంగ కెర.

62 "బోదక కిచ్చొ నావ్ తింక?" మెలి రితి అబ్బొన్క సయ్న కెర్ల.

63 రెగిడ్డి ఏక్ బల్ల జో నజన, "జోచి నావ్ యోహాను" మెన జా బల్లయ్ రెగ్ల దెతికయ్, జేవ్ ఎత్కిజిన్ ఆచారిమ్ జల.

64 జా నావ్ జెకర్యా రెగ్ల దెకయ్లి బేగి, జోక చోడి పుట్టి చి జిబు బులిలి, లట్టబుక దెర తోలితో దేముడుచి గవురుమ్ సంగిలన్.

65 జలె, జా జర్గు జలిసి ఎత్కిచి రిసా జా పల్లెల్చ మాన్సుల్ ఎత్కిజిన్ బియిఁ గెల, చి జర్గు జలిన్ ఎత్కిచి రిసా, జా యూదయ ప్రదేసిమ్చి డొంగుర్ దేసిమ్చ మాన్సుల్ గావ్వొ ఎత్కితె లట్టబై తిల.

66 అన్నె, జర్గు జలిన్చి రిసాచ కొడొ సూన్లస ఎత్కిజిన్ మెన్సు చెంగిల్ ఉచర, 'జో' నాడు దేముడుచి అత్తి అస్సె.

జొయ్యి జోక తోడు' మెన చిన కెర, "ఈంజొ బోద వడ్డిలె కిచ్చొ కామ్ కెరెదె, కిసాచొ జయెదె?" మెన ఉచరై తిల.

67 జలె, యోహానుక నావ్ తిలి గడియ దేముడుచి సుద్ది తిలి ఆత్మ జెకర్యాచి పెట్టి బెర, దేముడు దెతి రచ్చన తెదొడి తెంతో ఎత్కి జర్గు జంక దెరుక తిలిన్చి రిసా చోడి పుట్టవ జెకర్యా ఇసి మెలన్;

68 "ప్రబు జలో అమ్చ ఇస్రాయేలుల్చొ దేముడుక జోబర! కిచ్చొక మెలె, జోచయ్ ప్రెజల్ జల అమ్చ ఇస్రాయేలుల్క

అన్నె కెగనన రచ్చించువ కెర్తి రిసా జో ఉత్త జా అస్సె.

69 జోచొ సేవ కెర్తొసా జలో దావీదు పూర్గుమ్చొచి సెకుమ్తె సెక్తి తిలో రచ్చించువ కెర్తొసాక జో జెర్మవ అస్సె;

అమ్క రచ్చించువ కెర్పు మెన.

70 దస్సి కెరిందె, మెన దేముడుచ కబుర్లు సంగిల పూర్గుల్చి చోడి పుట్టవ సంగిలన్, గెద.

71 అమ్క విరోదుమ్ జల మాన్సుల్ తెంతో అమ్క విరోదుమ్ కెర్తన ఎత్కిజిన్చి అత్తి తెంతో అమ్క రచ్చించువ కెరుక మెన జో సంగ అస్సె.

72-73 ఒగ్గర్ అగ్గెచ అమ్చ పూర్గుల్క ప్రమానుమ్ సంగిలి కోడు

† 1:60 1:60 యోహాను మెలి నావ్చి అర్దుమ్ కిచ్చొ మెలె, 'ఎత్కి అదికారుమ్ తిలో దేముడు ప్రబు దయ కెర్తొసా జయెదె' మెలి అర్దుమ్ తయెదె. § 1:68 1:68 ఎత్కి అదికారుమ్ తిలో దేముడు కక్క డబ్బుల్ గల్ల దెంక నాయ్, గని కేన్ జవున్ మాన్సు గొతిమాన్సు జా తిలె, కో జవున్ డబ్బుల్ దా, జో గొతిమాన్సుక విడ్డల్ కెరవుక జయెదె. దస్సి, 'ఎత్కి అదికారుమ్ తిలో దేముడు రచ్చించువ కెర్తొసాక తెర్లవ అమ్క అమ్చ బాదల్ తెంతో, అమ్క ఆక్రమించువ కెర్లన తెంతో విడ్డల్ కెరెదె' మెన యూదుల్ ఆన జా నంప తెన్ అస్సి. 'క్రీస్తు జలో రచ్చించువ కెర్తొసాక తెర్లయందె' మెన ఎత్కి అదికారుమ్ తిలో దేముడు నిజమి పూర్గుమ్ తెంతో ప్రమానుమ్ సంగ తిలో, గని 'జా రచ్చన ముక్కిమ్క అమ్ కెర్లె పాపల్చి నిచ్చ తెంతో చి రచ్చన' మెన అర్దుమ్ కెరంతి నాయ్. ఆకరీకయ్, ఉగుమ్ జో మార్పువ కెర్తి పొదికయ్, గర్చి ఎత్కి బాదల్ ఎత్కి పూర్చి గెచ్చవ గెల కెర, నొబె ఆగానుమ్ నొబె బూలోకుమ్ జతి రితి ఎత్కి అదికారుమ్ తిలో దేముడు మార్పువ కెరెదె. జలె, పాపుమ్ గెచ్చయ్తి రిసా, ఆకరీక గర్చి ఎత్కి బాదల్ ఎత్కి గెచ్చయ్తి రిసా, ఎత్కి అదికారుమ్ తిలో దేముడు దిలిసి కిచ్చొ మెలె, యేను అర్చితమ్ జలిన్ తెన్ చి జో సువడ్డి లోయి. జో అన్నె గెనంతిని, జలె, ఈంజ ఎత్కిక టాలి జయెదె.

జర్గు కెరుకయ్ మెన,
జేవ్ పూర్గుల్తె అమ్చొ అబ్రాహామ్
పూర్గుమ్చొక ఒట్టు గలన

దేముడు సంగిలి నిజుమ్ కోడు
నే పచ్చితె జర్గు కెరుకయ్ మెన
జో బచ్చన అస్సె, జర్గు కెరెదె!

74-75 ప్రమానుమ్ జర్గు కెర్రిన్తె అమ్క జో
కిచ్చొ గుర్తు దెతయ్ మెలె.

అమ్క విరోదుమ్ సుదల్ జలనచి అత్తి
తెంతో అమ్ ములవుక జలె,
బయిమ్ నెంతె పూర్తి జోచయ్ జా జో దెతి
సుద్ది సత్తిమ్ ఇండ
అమ్చి జీవితమ్ పూర్తి జోచి నేవ అమ్
కెర్తె తంక

వాటు జెయెదె.

76 తుయి, పుత్త, తుయి వడ్డిలె

తుకయ్ కిచ్చొ మెనుల మెలె,
ఎత్కిచి కంట వెల్లో తిలోసాచి కబుర్
సంగితోసా జో
మెన సంగుల. కిచ్చొక మెలె,
ప్రబు జెతికయ్ జోక వాటు తెయార్
కెరవుక

తుయి జోచి పురైతో బుల్తె తన్నె;

77 జోచ ప్రెజల్క జో ప్రబు రచ్చన దెతిన్చి
కోడు

జాన కెర, కేన్ రచ్చన మెలె,

జోచ పాపల్ చెమించుప కెర్రిసి.

78 దేముడుచి పెట్టిచి కన్కారుమ్చి
జోచి దయచి రిసాచి రచ్చన. ఈంజ
రచ్చనచి రిసా,

పరలోకుమ్ తెంతో ఉజిడి అమ్చి ఉప్పిరి
లగిలి,

నావి దీసి అయ్లి రితి అమ్క ఉజిడి
దెయెదె.

79 అందర్తె వెసిల, మొర్నుచి నీడతె
వెసిల రిత మాన్సుల్క

దొర్ను జలి ఉజిడి దెతి రిసాయి.

జో దెతి రచ్చనచి సేంతుమ్ వాటు అమ్
ఇండితి రితి
అమ్క వాటు దెకయ్తి రిసాయి

అమ్చొ దేముడు ఈంజ ఉజిడి అమ్చి
ఉప్పిరి దెకయెదె.”

మెన జెకర్యా దేముడుచి సుద్ది తిలి ఆత్తు
తెన్ చొండి పుట్టవ సంగిలన్.

80 జలె, జో బోద యోహాను వడ్డ
ఆత్మక డిట్టుమ్ జలన్ అస్సె, జోచ
ఇస్రాయేలుల్తె జో బార్ జా, జోక దిలి
కామ్ మొదొల్ కెరుక మెన దేముడు
సంగిలి కాలమ్ ఎద జో బయిలు దేసిమి
తాఁ గెలన్.

2

యేసు జెర్రిలిసి
(మత్త 1:18-25)

1 జేవ్ పొదులె, బెగుస్తు మెలో *కైసర్
రానో రోమ్ దేసిమ్ తెంతో ఒగ్గర్ దేసిమ్లు
ఏలుప కెర్తె తిలి పొది, “ఒండి లోకుమ్తె
కెత్తిజిన్ ప్రెజల్ జవుల గే తుమ్ లెక్క కెర
రెగుడ” మెన మాన్సుల్క ఆడ్ర దిలన్.

2 జేవ్ పొదులె కురేనియు మెలోసా
సిరియ దేసిమి అదికారి జా తిలి పొది
జా ప్రెజల్ లెక్క కెర్ల. ఇన ప్రెజల్ లెక్కల్
రెగుడుక ఈంజ తోలితో చి.

3 జలె, ప్రెజల్ ఎత్కి కేనెచ మాన్సుల్
ఒత్త జేవ్చ సాంత టాన్లుతె జేవ్చ నవ్వొ
రెగ్లవనుక గెల.

4 దస్సి, యోసేపు దావీదు
పూర్గుమ్చొచి వంసుమ్చొ జోచి తెగచొ
మాన్సుచి రిసా, గలిలయ ప్రాంతుమ్చి
జో జితె తిలి నజరేతు గవ్వొ తెంతో బార్
జా, యూదయ ప్రదేసిమ్చి బేత్లెహేమ్
మెంతి గవ్వొ ఉట్ట గెలన్.

5 తేర్ని జతి మరియ తెన్ ప్రెజల్
లెక్కతె ఒత్త జోవయించ నవ్వొ రెగ్లవనుక
మెన గెల. జా జలె, అంగి జా తిలి.

6 జలె, జేవ్ ఒత్త తిలి పొది జాచి
కంట్లు పాచ అయ్లి, చి

7 తొల్గుర్ మున్సుబోద లడెన్ జలన్.
జోక పాలల్ గుడియవ, జేవ్ తిలి
సామ్ముల్ సాడె తిలి సామ్ముల్ దొవ్నొ

* 2:1 2:1 ‘కైసర్’ మెలె, గ్రీకు జాన తెన్ బెదితయ్. నెంజిలె ‘సిజరు’ కి మెనుల. ‘సిజరు’ మెలె, ఇంగ్లీస్ తెన్ బెదితయ్. తెలుగు తెన్ ‘వెల్లో రానో’ మెన అస్సి.

పితి దోనెతె పెటెతె నిజవ తిల. ఒత్తయ్ కిచ్చొక మెలె, జా గవ్వొ జేవ్ తంక, కేనె టాన్ విడి నాయ్.

గొవుడ్లుక దూతల్ డీన యేసు జెర్మిలిన్చి రిసా సంగిలిసి

8 జలె, జా రాతి జా గావ్క పాసి, మెండల్ రకిత గొవుడ్లు సగుమ్జిన్ బయిలె మెండల్ రకితె తిల.

9 రకితె తిలె, దేముడుచొ, దూత ఎక్కిలో జోవయింక డీసిలన్, చి జో ప్రబుచి పరలోకుమ్చి ఉజిడి జోవయించి నుట్టునంత లగిలి, చి ఒగ్గర్ బియ్ గెల.

10 తెదొడి దూత జోవయింక, "తుమ్ బియ్ నాయ్. తుమ్క చెంగిల్ కబుర్ ఆన్తసి. ప్రెజల్ ఎత్కిక ఒగ్గర్ సర్దనంతోసుమ్ ఆన్తి కబుర్, ఈంజ.

11 ఆజి దావీదు పూర్లుమ్చొచి గవ్వొ తుమ్చొ రచ్చించువ కెర్తొసా జెర్మి అస్సె. కొన్సొ మెలె, క్రిస్టు జలొ ప్రబుయి.

12 జోక తుమ్ చినితి రిసా తుమ్క కిచ్చొ గుర్తు దెతసి మెలె, జో బోదక పాలల్ గుడియవ తా జోక ఏక సొమ్మూల్ సాడె తిలి సొమ్మూల్ దొవ్నొ పితి దోనెతె నిజవ తవుల" మెన దూత కబుర్ సంగిలన్.

13 సంగిలి బేగి, పరలోకుమ్ తెంతో ఒగ్గర్జిన్ దూతల్ ఉత్త జా కిచ్చొ మెన దేముడుచి గవురుమ్ గాయిల మెలె,

14 "పరలోకుమ్తె దేముడుక జొబర! చి బూలోకుమ్తె జో దయ దెకిత మాన్సుల్తె

జో దెతి సేంతుమ్ ఏలువ కెర్చు!" మెన గనుమ్ గాయిల.

15 జలె, దూతల్ జా గనుమ్ గాయ ఉట్ట గెల. చి మెండల్ రకిత జేవ్ గొవుడ్లు "బేత్లెహేమ్తె గెచ్చుమ, చి 'జర్లు జలి' మెన దేముడు అమ్క జానయ్లిసి

దెకుమ. జొమ్మ!" మెన ఎక్కిలోక ఎక్కిలో సంగన్.

16 గవ్వొ బే బేగి నిగ గెచ్చు, మరియక, యోసేపుక, చి సాడెచి సొమ్మూల్ దొవ్నొ పితి దోనెతె నిజ తిలో బోదక చజ దెకిల.

17 జా రుజ్జు దెకిల్ రిసా, జో బోదచి రిసా దూత జేవ్క జానయ్లి కోడు ఎత్కికక్క కక్క,

18 జేవ్ గొవుడ్లు సంగిలిసి నూన్ల ఎత్కిజిన్ ఆచారిమ్ జా గెల.

19 మరియ మాత్రుమ్ ఈంజేవ్ కొడె ఎత్కి జాచి పెట్టితె తియ్ జోచి అర్దుమ్ కిచ్చొ జయెదె గే ఉచర్తె తిలి.

20 జలె, మెండల్ రకితసక దూత సూనయ్లిసి చి జేవ్ సాడె దెకిలిసి ఎక్కి రితి బెదిలి రిసా దేముడుక జొకర, గవురుమ్ గాయ గాయ, జేవ్ రకిత మెండల్తె అన్నె ఉట్ట గెల.

యేసుక నావ్ తిలిసి

21 బోద జెర్మి అట్టు పొదుల్ జతికయ్, జోక యూదుడు కెర్తి సున్నతి కెర దిల, చి జోక 'యేసు' మెన నావ్ తిల. అయ్యసి అంగి నే జతి అగ్గె 'యేసు' మెన నావ్ తిత్తు మెన దూతచి అత్తి దేముడు ఈంజ నావ్ దా తిలన్.

యేసుక దేముడుచి గుడితె కడ నిలిసి

22 మోసే పూర్లుమ్చొచి అత్తి రెగిడ్లి దేముడుచి ఆగ్గుల్ రితి మరియక అన్నె సుద్ది కెర్తి కామ్చి కీదీసి అయ్లి పొది, జా కామ్క మెన అన్నె యేసుక దేముడుచి టాన్తె జోవయించి పురె టీచడుక మెన యోసేపు జోక యెరూసలేమ్తె దేముడుచి గుడితె కడ నిలన్.

23 కిచ్చొక మెలె, మోసే పూర్లుమ్చొచి అత్తి దేముడు రెగ్గయ్ల * ఆగ్గుల్చి రిసా,

† 2:11 2:11 'క్రిస్టు' మెలె 'తెర్తయందె' మెన ఎత్కి అదికారుమ్ తిలో దేముడు ప్రమానుమ్ సంగ తిలో రచ్చించువ కెర్తొసా. ‡ 2:21 2:21 జా నావ్చి అర్దుమ్ కిచ్చొ మెలె. యెహోవ రచ్చించువ కెర్తొసా జా అస్సె. 'యెహోవ' మెలె, ఎత్కి అదికారుమ్ తిలో దేముడుచి నావ్. § 2:22 2:22 బోద జెర్మి దొన్సొ విసా పొదుల్ జలి జా సుద్ది కామ్క దేముడుచి గుడితె గెచ్చుల. * 2:23 2:23 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రగ్గయ్లి ఆగ్గుల్ మెన అమ్ జానుమ్. ఈంజ కొడె ఎత్కి బైబిల్తె అగేచి పాచ్ పున్సుకుమ్తె రెగ్గయ్ జా అస్సె. ఈంజ దెకవుక మెన కుపియ బాసతె నొయి ప్రమానుమ్తె మోసే పూర్లుమ్చొచి అత్తి రెగిడ్లి దేముడుచి ఆగ్గుల్ మెన రగ్గవ అస్సె.

“తొల్నర్ బోద పుత్తు జలె, జోక ప్రబుకయ్ †అర్చితుమ్ దిలోసా’ మెనుక అస్సె”

మెన రెగిడ్లి కోడు.

24 జలె, మోసే పూర్గుమ్చొచి అత్తి దేముడు రెగ్గయల ఆగ్గుల్తె రెగ్గయలి రితి,

“పూజరిచి అత్తి దొన్ని పన్కో పిట్టల్ జలెకు, దొన్ని పార్వ పిట్ట పిల్లల్ జలెకు దెంక”

మెన రెగిడ్లిసి జర్గు కెరుక మెన, అయ్యున్క సుద్ది కెర్తి రుజ్జుక దనచ దెంక జేవ్ దేముడుచి గుడితె గెల.

25 జలె, జా కాలుమ్ యెరూసలేమ్తె ఏక్ మాన్సు తిలన్. జోచి నావ్ సుమెయోను. జో మాన్సు సత్తిమ్ ఇండితొసా.

దేముడుక నిదాసుమ్ బక్తి కెర్తొసా. ‘అమ్చ ఇస్రాయేలుల్చొ రచ్చించుప కెర్తొసా కెయచ జెయెదె గె,’ మెన జో దెకితె తిలన్. దేముడుచి సుద్ది తిలి ఆత్మ జో తెన్ తిలి.

26 “దేముడుచొ క్రీస్తుక తుయి దెకిలెకయ్ మొర గెతె” మెన జో దేముడుచి సుద్ది తిలి ఆత్మ జో సుమెయోనుక సూనవ తిలన్.

27 జలె, ‘క్రీస్తు రచ్చించుప కెర్తొసా జాఁ అస్సె’ మెన జో జొన్లి రితి, జయ్యి దీసి జో సుమెయోను దేముడుచి గుడితె గెతి రితి దేముడుచి సుద్ది తిలి ఆత్మ జోక వెలవ నెతికయ్, ఒత్త గెలన్. ‘తొల్నర్ బోద’ మెన మోసే పూర్గుమ్చొచి అత్తి దేముడు రెగ్గయల ఆగ్గుల్తె రెగిడ్లి రితి యేసుచి రిసా కెరుక మెనయ్, జోక అయ్యుసిసి దేముడుచి గుడి తెడి పాయ ఆన్తికయ్,

28 జో సుమెయోను జోక దెర పాయ దేముడుచి గవురుమ్ సంగ ఇసి మెన జోఒర కెర్తన్:

29 “ఓ ప్రబువ, ఆవ్ తుచొ గొత్తి సుదొ, అప్పె సేంతుమ్ తెన్ మొర గెతి

సెలవ్ తుయి దెతసి, తుయి అంక సంగిలిసి ఎత్తి జర్గు కెర అస్సెన్,

30 తుయి తెద్రయ్లో రచ్చించుప కెర్తొసాక దెక అస్సి.

31 ఈంజ లోకుమ్ ఎత్తిచ ప్రెజల్ దెకితె రితి

ఈంజ రచ్చన తుయి తెయార్ కెర్లది.

32 యూదుల్ నెంజిలన సత్తిమ్ ఇండితి రితి

ఈంజొ రచ్చించుప కెర్తొసాచి ఉజిడి వాట్ దెకయెదె, చి

తుచయ్ ప్రెజల్ జల అమ్చ ఇస్రాయేలుల్క జోవయించి ఉజిడి

‡అన్నె గవురుమ్ ఆనెదె.”

మెన, సుమెయోను దేముడుచి సుద్ది తిలి ఆత్మనెక్తిక చొండి పుట్టవ సంగిలన్.

33 జలె, యేసుచి రిసా సంగిలిన్చి రిసా అయ్యున్ కీఅబ్బొన్ ఆచారిమ్ జా గెల.

34 తెదొడి “దేముడుచి దయ తుమ్చి ఉప్పిరి తవున్” మెన సుమెయోను జేవ్క దీవెన సంగిలన్, చి దేముడుచి సుద్ది తిలి ఆత్మ తెన్ యేసుచి అయ్యున్ మరియక జో సుమెయోను అన్నె ఇసి మెలన్.

“ఈందె, ఈంజొ బోదచి రిసా అమ్చ ఇస్రాయేలుల్తె

ఒగ్గర్జిన్ నంపజా రచ్చించుప జవుల.

గని ఒగ్గర్జిన్ అన్మానుమ్ జా పాడ్ జవుల,

దేముడుచి గుర్తుక ఈంజొ టీవ్దె, చి

ఇన్నెచి ఉప్పిరి ఒగ్గర్జిన్ విరోదుమ్ లట్టబుల,

35 ఒగ్గర్జిన్చి పెట్టిచి బుద్దిక ‘కిసిచి గే’

చినుక జయెదె.

ఈంజ ఎత్తిచి రిసాయి జో ఈంజ లోకుమ్తె జా అస్సె,

తుచి పెట్టి ఏక్ కండా బూసి జయెదె

† 2:23 2:23 తొల్నర్ పుత్తుక ‘దేముడుక దిలోసా. అమ్ అన్నె గెనసుక’ మెనయ్, బోదచ అయ్యుసిసి దేముడుచి గుడితె ఇదిల్ డబ్బుల్ దెవుల. ‡ 2:32 2:32 నెంజిల, ‘తుచి ఉజిడి అన్నె సొస్సుమ్ దెకయెదె’.

§ 2:33 2:33 యోసేపు నిజామి అబ్బొసి నెంజ. ఎత్తి అదికారుమ్ తిలో దేముడు సొంత అబ్బొసి జయెదె, గని మరియ యోసేపుక పెండ్లి జా అస్సె చి దిస్సి మెన్తయ్.

తుక దుకుమ్ జెయెదె,”
మెన సుమెయోను మరియక సంగిలన్.

అన్నామెలి మంతిరి కి యేసుచి రిసా
ఒత్త సర్ల లట్టల్లిసి

36 జలె, దేముడుచ కబుర్లు సంగితి
'అన్నా' మెలి మంతిరి దేముడుచి
గుడితె తిలి. జా ఆసేరు పూర్ణుమ్చొచి
తెగచి మాన్సు. పనూయేలు మెలోసాచి
దువిసి జయెదె. జా ఒగ్గర్ వెర్పుల్
వయసుచి మంతిరి. జా బాల తతె పెండ్లి
జా సత్తు వెర్పుల్ మున్సున్ తెన్ తిలన్,

37 చి రండెలి జా అప్పె చెత్తర్ విస్సా
చెత్తర్ వెర్పుల్ జా తా, దేవులుమ్ నే
ముల్లె, చువ్వె తా, రాతి మెద్దెన ప్రార్దన
కెర్తె తా బక్తి కెర్తె తయెదె.

38 తెదొడి జయ్యి గడియయ్
మరియయింసితె జా కెర, యేసుచి రిసా
దేముడుక “ఇన్నెక తెద్రవ తుయి దయ
కెర్లది” మెన ప్రార్దన కెర్లన్. అన్నె తెదొడి
*‘రచ్చించుప కెర్తొసా కెయెక జా కెర
యెరూసలేమ్క విడ్డల్ కెరెదె’ మెన రకిత
మాన్సుల్ ఎత్తిజిన్ “ఈంజొయి జో”
మెన యేసుచి రిసా సంగిలి.

39 మోసే పూర్ణుమ్చొచి అత్తి దేముడు
రెగ్గయల ఆగ్గుల్తె రెగ్గయలిన్తెచ జేవ్
కెరుక తిల కమె ఎత్తి కెర కేడవ కెర,
గలిలయ ప్రాంతుమ్చి జోవయించి
సొంత గావ్ జలి నజరేతు గవ్యి
మరియయింసి అన్నె ఉట్ట గెల.

40 జో బోద వడ్డ డిట్టుమ్ జలో, ఒగ్గర్
బుద్ది సుదొ జలో, దేముడుచి దయ జోచి
ఉప్పీర్ తిలి.

యేసు యెరూసలేమ్తె పండుగక
గెలిసి

41 యేసుచ అయ్యసిసి వెర్పు
వెర్పు †పస్సా పండుగక యెరూసలేమ్
పట్టుమ్తె దేముడుచి గుడితె గెచ్చుక
అలవాట్.

42 జలె, యేసుక బార వెర్పుల్ జా తిలి
పొది జోవయించి అలవాట్క పండుగక
ఒత్త గెల.

43 జలె, పండుగు కేడ జేవ్
గెరి గెచ్చుక బార్ జలె, యేసు
యెరూసలేమ్తె తా గెలన్, గని
అయ్యసిసి నేన్తి.

44 ‘యేసు అమ్చి తెన్ జెత్తన్
తెన్ అస్సె’ మెన ఉచర తా, ఏక్
ఒండి మెద్దెన్చి ఎదిలి ప్రయాసుమ్
గెలి వడ్డె, జోవయించ మాన్సుల్తె చి
గోత్సుదల్తె చజిల.

45 గని డీసి నాయ్, చి జోక చజన
చజన యెరూసలేమ్తె అన్నె గెల.

46 ‡ఒత్త పాచిలె, అన్నెక్ దీసి యేసు
దేముడుచి గుడితె ఒత్త పండితుల్చి
నెడిమి పెన తిల్లి డీసిలన్. జో జేవ్చ
కొడొ నూన, జేవ్క ప్రస్సుల్ కి పుసితె
తిలన్.

47 ఒత్త తిలన ఎత్తిజిన్ యేసుచ
కొడొ, చి జోచ ప్రస్సుల్ నూన, జోచి బుద్ది
గ్యానుమ్చి రిసా పండితుల్క జో దెత
జబాబుల్చి రిసా బలే ఆచారిమ్ జతె
తిల

48 జలె, దస్సి జతె తతికయ్,
అయ్యసిసి జోక దెక, జేవ్ కి బలే
ఆచారిమ్ జల, చి అయ్యసి జోక కిచ్చొ
పుసిలి మెలె “కిచ్చొక, పుత్త, అమ్క ఇసి
అల్లర్ కెర్లది? ఈందె, అబ్బొది ఆవ్ గొప్ప

* **2:38 2:38** యూదుల్ మాములుమ్ ఈంజ లోకుమ్చ బాదల్ తెంతో చి రచ్చనక రకితె తిలె, చి ఆకర్క
జయి ఎత్తి కి మార్పువ జయెదె, గని అప్పెచి మట్టుకచి రచ్చనక ‘అత్తుయ రగుమ్’ మెన నేన కెర, యేసుక
‘ఈంజ లోకుమ్తె ఎదార్దుమ్ ఏలువ కెరె నాయ్’ మెన, జోవయింక ‘జొయ్యి దొర్కు జలో రచ్చించుప కెర్తొసా’ మెన
జోవయింతె ఒగ్గర్జిన్ చినితి నాయ్. ‘యెరూసలేమ్’ మెలె, ఇన్నె యూదుల్ ఎత్తిచి రిసాచి టాలి జయెదె. జా
మదెన, రోమ్ దేసిమచి ప్రబుతుమ్ జోవయింక ఏలువ కెర్తె తిల, చి ‘జా బాద తెంతో కి రచ్చించుప కెర్తొసా అమ్క
విడ్డల్ కెరెదె’ మెలి రితి ఉచరె తిల. † **2:41 2:41** ‘పస్సా పండుగు’ మెలె, పూర్ణుమ్ యూదుల్ ఇగుప్పు
(ఇగుప్పు) దేసిమి గొతిమాన్సుల్ జా విడ్డల్ జా దేసిమ్ తెంతో బార్ జా సొంత దేసిమి అయ్యలిసి ఏద కెర్తె పండుగు.
‡ **2:46 2:46** నెంజలె, ‘తిర్రతి గెతికయ్, డీసిలన్’. ఇసి మెన ఒగ్గర్జిన్ ఉచరెత్తె: జేవ్ అయ్యసిసి దేముడుచి
గుడి తెంతో బార్ జా ప్రయాసుమ్ గెలిసి ఏక్ దీసి దెర్లి, దేముడుచి గుడితె జేవ్ అన్నె గెచ్చుక చి అన్నెక్ దీసిచి
ప్రయాసుమ్ తెన్ దొరతి జలి, చి అన్నెక్ దీసి డీసిలన్.

దుకుమ్ నేడ ఒండి చజితె తిలమ్” మెన సంగిలన్.

49 యేసు జేవేక కిచ్చొ సంగిలన్ మెలె, “అంచి రిసా కిచ్చొక చజుక? ఆవ్ అంచొ అబ్బొచి గెరి తంక మెన తుమ్ నేన్సు గె?” మెలన్.

50 జలె, జో సంగిలి కోడు జేవేక అర్దుమ్ జయె నాయ్.

51 జలె, జోవయింతెన్ యేసు నజరేతు గవ్వి అన్నె ఉట్ట గెలన్. చి జోవయింతెన్ జియె జేవ్ సంగిల్ కోడు రితి ఇండితె తిలో. అయ్యసి, జలె, దేముడుచి గుడితె జో సంగిలిసి పెట్టి తియన, ఒత్త జర్గు జలిసి ఎత్కిచి రిసా జాచి పెట్టి ఉచర్తె తిలి.

52 జలె, యేసు ఆగ్గ కి బుద్దిక కి వడ్డిలన్, చి మాన్సుల్ జోక మెన్సితె తిల, చి దేముడుచి దయ జోచి ఉప్పిర్ తిలి.

3

దేముడు దెతి రచ్చనక యోహాను సాట్టు కెర్లిసి

(మత్త 3:1-12; మార్కు 1:1-8; యోహా 1:19-28)

1 తిబెరియ మెలో కైసర్ రానొ పనర వెర్సుల్ రోమ్ పట్టుమ్ తెంతో ఒగ్గర్ దేసిమ్లు ఏలుప కెర్తె తిలి పొది, జోవయించి తెడి పొంతి పిలాతు యూదయ ప్రదేసిమి అదికారి జా తా, హేరోదు మెలోసా గలిలయ ప్రాంతుమ్తె అదికారి జా తా, జోచొ బావొసి పిలిప్ ఇతూరయ అన్నె త్రకొనీతి మెల ప్రాంతుమ్లుతె అదికారి జా తా, లుసానియ అబిలేనే ప్రాంతుమ్తె అదికారి జా తా,

2 అన్నా మెలోసా ఎత్కిక వెల్లో పూజరి జా తా, దూజాంవోన్ జలో కయప తెదొడి ఎత్కిక వెల్లో పూజరి జా తిలి పొది, జెకర్యాచొ పుత్తుసి యోహాను బయిలు దేసిమి *బుల్తె తిలి పొది, దేముడుచి జో సంగుక తిలి కబుర్ జోక అయ్లి.

3 జలె, జోచి కబుర్ జో సంగుక దేముడు తియార్తికయ్, “తుమ్చి పాపల్చి రిసా తుమ్ దుకుమ్ జా, అమ్చొ దేముడు తుమ్చి పాపుమ్ చెమించుప కెర్తి గుర్తుక తుమ్ బాప్తిసుమ్ నజన” మెన యోర్దాను గాడు పాసి ఒండి బుల బుల సాట్టు కెర్తె తిలన్.

4 దేముడుచ కబుర్లు సంగిలో యెసయాచ కోడు రెగిడ్లి పుస్తకుమ్తె రెగిడ్లి రితి;

“ఎక్కిలో అంచొ బారికి జా, అంచి అవాడ్ రిత్తో జా, ప్రబు జెతికయ్ వాటు తిన్నగ కెర్తి రితి తుమ్ ఎత్కిజిన్ బుద్ది జా మెన, బయిలె ప్రదేసిమి తా కేక గల సాట్టు కెరెదె.

5 ఎత్కి డొంగుర్, ఎత్కి మెట్ట, ఎత్కి లోయ సదూనుమ్ జవుల, వంకుడ వట్టో తిన్నగ జవుల, చి గర్కు తిల వట్టో మిన్న జవుల,

6 దేముడు మాన్సుల్క కిసి రచ్చించుప కెరెదె గే ఎత్కిజిన్ దెకుల.” మెన రెగిడ్లి కోడు.

బాప్తిసుమ్క అయ్లనక యోహాను గోల కెర బుద్ది సంగిలిసి

7 జలె, జోచి అత్తి బాప్తిసుమ్ నజనుక మెన బార్ జల ఒగ్గర్జిన్ జనాబ్క దెక కెర, యోహాను జోవయింక ఇసి మెలన్: “అయివొచి రితి విస్సుమ్ పెట్టి తిలన, తుమ్! దేముడు కెర్తి సిచ్చ పిట్టవనుక ఉచరుక మెన తుమ్క సికణ్ణొసా కొన్సె?”

8 తుమ్ కెర్తె పాపల్ ముల దా, చెంగిల్ బుద్ది ఇండ, ఆత్మపలితుమ్ దెర. పడ్డె, ‘అబ్రాహామ్ అమ్క అబ్బొ జయెదె చి రిసా, దేముడు తెన్ బెద అస్సుమ్’ మెన తుమ్క తూమ్ ఉచరన సొంత గవురుమ్ సంగుక నాయ్. కిచ్చొక మెలె, దేముడుక ఇన్నెచ పత్రల్ తెన్ అబ్రాహామ్చి రిసా బోదల్క జెర్తువుక తెరె, మెన తుమ్క ఆవ్ సంగితసి.

* 3:2 3:2 1:80 డెక.

9 ఈందె, అప్పె ప్రబు కురాడు వాండి కెర, రూకుక బుంది కండుక, కుర్రడి దెర టీవ అస్సె, జలె, చెంగిల్ పలితుమ్ నే దెర్లో ఎత్తి, రూకుక కండ కెర ఆగితె గలుల,” మెన యోహాను జాగర్త బుద్ది సంగిలన్.

10 జో ఇసి సంగితికయ్, “దస్సి జలె, అమ్ కిచ్చొ కెరుక గే అమ్క సంగు” మెన జనాబ్ పుసిల,

11 జో జోవయింక కిచ్చొ జబాబ్ దిలన్ మెలె, “కక్క దొన్ని సొక్కల్ తవుల గే, ఎద్దెర సొక్క నెంజిలోసొక ఏక్ దెంక. కక్క అన్నిమ్ తిలె, జో అన్నిమ్ నెంజిలోసొక అన్నిమ్ దెంక.” మెలన్.

12 జలె, బాప్తిసుమ్ నజనుక మెన సిస్తు నజిత సుంకర్లు కి యోహానుతె అయ్ల, చి “గురుబాబు, అమ్ కిచ్చొ కెరుక?” మెన పుసిల.

13 జో జోవయింక, “తుమ్ కెద్ది సిస్తు నజుక నాయిమ్ తయెదె గే, తెద్దిలి నజ. అన్నె ఒగ్గర్ నజ నాయ్” మెలన్.

14 “అమ్, జలె, కిచ్చొ కెరుక?” మెన సయన్యుమ్ సుదల్ పుసిలె, యోహాను జోవయింక, “బియండె జవున్, ఆరిచ నిందల్ కెర జవున్, కచి ఆస్తి దొర్కు కెరన నాయ్. దస్సి కెర్లె చొర్లి రితి జయెదె. జా పోన, గని తుమచి నాయిమ్ తెన్ చి జీతుమ్ నజన, ‘సాలు’ మెన సర్ల తెన్ జియ,” మెన యోహాను సంగిలన్.

క్రీస్తుచి రిసా యోహాను బోదన కెర్లసి

15 ‘జెతో క్రీస్తు జా తయెదె’ మెన ప్రెజల్ ఎత్తి అజ్జ కెరన, యోహానుచి రిసా “ఈంజొ ఏక్ వేల క్రీస్తు జా తయెదె” మెన పెట్టి ఉచరంతె తతికయ్,

16 జో ఇసి మెన జబాబ్ దిలన్. “ఆవ్ పానితె తుమ్క బాప్తిసుమ్ దెతసి, గని అంచి కంట అదికారుమ్ తిలోసా

జెతయ్. జోచ చట్టొతెచ జోడ్లుచ వాలివొ యివుక జలెకు అంక విలువ నాయ్. జో, జలె, దేముడుచి సుద్ది తిలి ఆత్మ తెన్, †ఆగి తెన్ తుమ్క బాప్తిసుమ్ దెయెదె.

17 జోచి పూనితి సూపు జోచి అత్తి అస్సె. జోచి కెల్లి సుబుమ్ కెర జోక కామ్క జెతి పంటొ గుడ్డ కెర కొట్టుతె కుడవ, కో విజవుక నెత్తిర్లి ఆగితె పోటు గల డయ గెలెదె,” మెన యోహాను సంగిలన్.

18 ఒగ్గర్ దన దయిరిమ్ కొడె సంగిత జాగర్త సంగిత కొడె తెన్ ప్రెజల్క దేముడు దెతి రచ్చనచి రిసా యోహాను సుబుమ్ కబుర్ బోదన కెర్లన్.

19 గలిలయ ప్రాంతుమ్చొ అదికారి జలో హేరోదు, జలె, బావోన్చి తేర్ని హేరోదియక ఆనన తిలన్, చి అన్నె కిచ్చొ కిచ్చొ గర్బ కమె ఒగ్గర్ కెర్లె తిలన్. జాచి రిసా యోహాను జోవయింక గోల కెర్లె తిలన్, చి రిసా

20 అన్నెక్ పాపుమ్ కి కెర్లన్. కిచ్చొ మెలె, యోహానుక జేలి కెర జేల్తె గలిలన్.

యేసు బాప్తిసుమ్ నజన్లసి

21 జా నే జతె అగె, జలె, ప్రెజల్ ఎత్తిజిన్ బాప్తిసుమ్ నజన్తికయ్, యేసు కి బాప్తిసుమ్ నజన ప్రార్లన కెర్లె తతికయ్, పరలోకుమ్ ఉగ్గి జలి.

22 దేముడుచి సుద్ది తిలి ఆత్మ పార్వు పిట్టచి రితి ఉత్తజా, జోచి ఉప్పిరి టీవెలి, చి “తుయి అంచొ ప్రేమ తిలో పుత్తు. తుచి రిసా అంక సర్లనంతోసుమ్” మెన, పరలోకుమ్ తెంతొ అవాడ్ అయ్లి.

యేసుచి వంసుమ్ వర్స తెన్ రెగిడ్లిసి

23 యేసు సేవ మొదొల్ కెర్లి పొది, జోచి వయసు పాసి పాసి ముప్పుయ్ వెర్చుల్

† 3:16 3:16 బారికుల్ 2:3-4 దెక. అన్నె అన్నె కిచ్చొ అర్దుమ్ తయెదె మెలె, ఆగిక బజార్ గర్బ సుబుమ్ కెరుక జయెదె, నెంజిలె, ఆగితె అర్బితుమ్ దెతసి సుబుమ్ జయెదె. దస్సి, ఆగిచి బాప్తిసుమ్ మాన్చుచి అత్తక ఎత్తి, అదికారుమ్ తిలో దేముడు సుబుమ్ కెర్లెన్క టాలి గుర్తు జయెదె. † 3:23 3:23 గని ఎత్తి, అదికారుమ్ తిలో దేముడుచి పరలోకుమ్చి సుద్ది అత్తకయ్ మరియ యేసుక అంగి జా తిలి, గెద.; 1:26-38.

జా తిలి. †యేసుక యోసేపుచో పుత్తుని
 మెంతె తిల.
 యోసేపు హేలీచో పుత్తుని,
 24 హేలీ మత్తతుచో పుత్తుని,
 మత్తతీయ లేవీచో పుత్తుని, లేవీ మెల్కీచో
 పుత్తుని,
 మెల్కీ యన్నుచో పుత్తుని, యన్ను
 యోసేపుచో పుత్తుని,
 25 యోసేపు మత్తతీయచో పుత్తుని,
 మత్తతీయ
 ఆమోసుచో పుత్తుని, ఆమోసు
 నాహాముచో పుత్తుని,
 నాహాము ఎస్లిచో పుత్తుని, ఎస్లి నగ్గయిచో
 పుత్తుని,
 26 నగ్గయి మయతుచో పుత్తుని,
 మయతు మత్తతీయచో
 పుత్తుని,
 మత్తతీయ సిమియచో పుత్తుని, సిమియ
 యోశేకుచో పుత్తుని,
 యోశేకు యోదాచో పుత్తుని,
 27 యోదా యోహన్నుచో పుత్తుని,
 యోహన్ను రేసాచో పుత్తుని, రేసా
 జెరుబ్బాబెలుచో పుత్తుని,
 జెరుబ్బాబెలు సయల్తీయేలుచో పుత్తుని,
 సయల్తీయేలు నేరిచో
 పుత్తుని,
 28 నేరి మెల్కీచో పుత్తుని, మెల్కీ అద్దిచో
 పుత్తుని,
 అద్ది కోసాముచో పుత్తుని, కోసాము
 ఎల్మదాముచో పుత్తుని,
 ఎల్మదాము ఏరుచో పుత్తుని,
 29 ఏరు యెహోసువచో పుత్తుని,
 యెహోసువ ఎలీయెజెరుచో పుత్తుని,
 ఎలీయెజెరు యోరీముచో
 పుత్తుని, యోరీము మత్తతుచో పుత్తుని,
 మత్తతు లేవీచో పుత్తుని,
 30 లేవీ సిమోనుచో పుత్తుని, సిమోను
 యూదాచో పుత్తుని,
 యూదా యోసేపుచో పుత్తుని, యోసేపు
 యోనాముచో పుత్తుని,

యోనాము ఎల్యాకీముచో పుత్తుని,
 31 ఎల్యాకీము మెలెయాచో
 పుత్తుని, మెలెయా మెన్నుచో పుత్తుని,
 మెన్ను మత్తతాచో పుత్తుని,
 మత్తతా నాతానుచో పుత్తుని, నాతాను
 దావీదుచో పుత్తుని,
 32 దావీదు యెస్సయిచో పుత్తుని,
 యెస్సయి ఓబేదుచో పుత్తుని,
 ఓబేదు బోయజుచో పుత్తుని, బోయజు
 సల్యానుచో పుత్తుని,
 సల్యాను నయస్సోనుచో పుత్తుని,
 33 నయస్సోను
 అమ్మినాదాబుచో పుత్తుని, అమ్మినాదాబు
 అరాముచో పుత్తుని,
 34 అరాము ఎస్రోనుచో పుత్తుని,
 ఎస్రోము పెరెసుచో పుత్తుని, పెరెసు
 యూదాచో పుత్తుని,
 35 యూదా యాకోబుచో పుత్తుని,
 యాకోబు ఇస్సాకుచో పుత్తుని,
 ఇస్సాకు అబ్రాహామ్చో పుత్తుని,
 అబ్రాహామ్ తెరహుచో పుత్తుని,
 తెరహు నాహోరుచో పుత్తుని,
 36 నాహోరు సెరూగుచో పుత్తుని,
 సెరూగు రయూచో పుత్తుని, రయూ
 పెలెగుచో పుత్తుని,
 పెలెగు హెబెరు పుత్తుని, హెబెరు షేలహు
 పుత్తుని,
 37 షేలహు
 కేయినానుచో పుత్తుని, కేయినాను
 అర్పక్షదుచో పుత్తుని,
 అర్పక్షదు సేముచో పుత్తుని, సేము
 నోవహుచో పుత్తుని,
 నోవహు లెమెకుచో పుత్తుని,
 38 లెమెకు మెతూసెలచో పుత్తుని,
 మెతూసెల హనోకుచో పుత్తుని, హనోకు
 యెరెదుచో పుత్తుని,
 యెరెదు మహాలలేలుచో పుత్తుని,
 మహాలలేలు కేయినానుచో
 పుత్తుని,
 39 కేయినాను ఎనోపుచో పుత్తుని,

† 3:33 3:33 నెంజిలె, అరాముచి కోడు నగుమ్ పుస్తకల్తె తయె నాయ్.

ఎనోపు నేతుచొ పుత్తుసి, నేతు
 ఆదాముచొ పుత్తుసి,
 ఆదాము దేముడుచొ *పుత్తుసి.

4

సయతాన్ యేసుక పరిచ్చ కెర్లిసి
 (మత్త 4:1-11; మార్కు 1:12-13)

1 దేముడుచి సుద్ది తిలి ఆత్మ యేసుచి
 పెట్టి బెర తా, జో యోర్దాను గాడు పక్క
 ముల దా, జా ఆత్మ జోక పెలవ నెతికయ్,
 ఒత్తల్తోచి బయిలు దేసిమి గెచ్చ, ఒత్త
 బుల్తె తిలన్.

2 జా డొంగుర్ దేసిమి దొన్ని విస్సా
 దీసల్ తిలన్క సయతాన్ జోక పాపుమ్
 కెరవుక మెన ఉచర, జా దొన్ని విసా
 దీసల్ అల్లర్ కెర్తె తిలన్. జేవ్ దొన్ని విసా
 పొదుల్ గెతికయ్, యేసుక చూ కెర్లి.

3 తెదొడి సయతాన్ యేసుతె జా కెర
 జోక, "తుయి దేముడుచొ పుత్తుసి జలె,
 ఈంజొ పత్తురు పోడియొ జతి రితి
 సంగు" మెలన్.

4 యేసు జోక ఇసి సంగిలన్,
 "మాములుమ్ పోడిచి సెక్తి తెన్
 మాన్సుల్ జితి నాయ్.
 †దేముడుచి కొడొతె రెద్ద
 అస్సె."

మెలన్.
 5 తెదొడి సయతాన్ యేసుక ఒగ్గర్
 డొంకుతె కడ నా కెర, ఎక్కి నిమ్ముమ్కయ్
 జోక ఒండి లోకుమ్చ రాజిమ్లు దెకవ
 కెర,

6 "ఈంజ ఎత్కిచి ఉప్పిరి ఏలువ
 కెర్లి అదికారుమ్, ఈంజేవ్ రాజిమ్లు
 ఎత్కితె తిలిన్చి గవురుమ్ తుక
 దెయిందె. ఈంజ ఎత్కి అంచి అత్తి అస్సె,
 కక్క దెయిందె గే అంచి ఇస్టుమ్.

7 జాక, తుయి అంక జొక్కరెగిన,
 తుకయ్ దెయిందె" మెన సయతాన్
 సంగిలన్.

8 దస్సి సంగితికయ్, యేసు ఇసి మెన
 జబాబ్ దిలన్,
 "ప్రబు జలొ తుమ్చొ దేముడుకయ్
 తుమ్ జొకర. జో ఎక్కిలోచి నేవ
 తుమ్ కెరుక అస్సె.

మెన కొదేముడుచి కొడొతె రెద్ద అస్సె."

9 తెదొడి సయతాన్ యేసుక
 యెరూసలేమ్ పట్టుమ్తె కడ నా కెర,
 దేముడుచి గుడిచి వెన్సొపుచి ఉప్పిరి జోక
 టీవడ కెర, ఇసి మెలన్,
 "తుయి దేముడుచొ పుత్తుసి జలె,
 ఎట్టొతె డేవు.

10 కిచ్చొక మెలె,
 తుయి ప్రమాదుమ్ నే జతి రితి
 జోచ దూతల్క దేముడు అడ్ర దా
 తెద్రయెదె

11 తుచ చట్టొ పత్తె నే లయితి రితి జేవ్
 దూతల్
 జోవయించ అత్తో చంపొ కెర తుక
 ఉక్కులనుల,

మెన *దేముడుచి కొడొతె రెద్ద అస్సె"
 మెన సయతాన్ సంగిలన్.

12 యేసు జోక,
 "ప్రబు జలొ తుమ్చొ దేముడుక పరిచ్చ
 కెరుక నాయ్
 మెన †దేముడుచి కొడొతె సంగ అస్సె"
 మెన యేసు జబాబ్ దిలన్.

13 జలె, సయతాన్ జేవ్ అల్లర్ కెర్తె,
 పరిచ్చ కెర్తె కొడొ సంగ కేడవ కెర, 'అన్నె
 కెయ్చ గే అవ్కాసుమ్ అయ్లె, అన్నె
 దస్సి అల్లర్ కెరిందె' మెనయ్ ఉచర, ఉట్ట
 గెలన్.

యేసు తొల్లితో గలిలయతె బోదన
 కెర్లిసి

(మత్త 4:12-17; మార్కు 1:14-
 15)

14 జలె, అబ్బొన్చి జోచి దేముడుచి
 సుద్ది తిలి ఆత్మ పెలవ నెతికయ్ యేసు

* 3:38 3:38 మెలె, మాన్సుల్ ఎత్కితె జోకయ్ దేముడు తొలితో జెర్తయ్లె. * 4:4 4:4 మత్తయ 4:4 దెక.
 † 4:4 4:4 ఎత్కి అదికారుమ్ తిలొ దేముడుచి కోడు రితి ఇండితిసి. ‡ 4:4 4:4 ద్విత్వీయోపదేశ కాండుమ్
 8:3. § 4:8 4:8 ద్విత్వీయోపదేశ కాండుమ్ 6:13. * 4:11 4:11 కీర్తనలు 91:11, 12. † 4:12
 4:12 ద్విత్వీయోపదేశ కాండుమ్ 6:16.

జో వడ్డిలి గలిలయ ప్రాంతుమతె అన్నె గెలన్, చి జా ప్రాంతుమ్ ఎత్కితెచ సుట్టునంతచ గవ్విలె జోచి రిసా ఎత్కిజిన్ నూన్.

15 అన్నె, జా ప్రాంతుమ్చ యూదుల్చ సబ గెరల్ ఎత్కితె బోదన కెర్తె తిలన్, చి ఎత్కిజిన్ జోచి గవురుమ్ సంగితె తిల.

16 జో బాల తతె తెంతో వడ్డిలి ఒత్తచి నజరేతు గవ్వి యేసు అయ్లన్, అన్నె, సెలవ్ కడన్ల దీసి యూదుల్చి సబ గెరల్ గెలన్. రోజుక సెలవ్ కడ దీసి దస్సి సబగెరి గెచ్చుక జోక అలవాట్. జలె, జయ్యి దీసి ఒత్తచి సబగెరి గెచ్చు కెర, దేముడుచి కొడె సదు కెరుక మెన టీవ్విలన్.

17 జలె, దేముడుచ కబుర్లు సంగిలో యెసయా పుస్తకుమతెచి కొడె సదు కెర్చు మెన జోచి అత్తి దిల, చి జా ఉగ్గ కెర, సదు కెర సూనయ్లన్.

18 “దేముడుచి సుద్ది తిలి ఆత్మ అంచి వెట్టి అస్సె.

బీద సుదల్క సుబుమ్ కబుర్ ఆవ్ నూనయ్తి రిసా జో జోవయింది అత్తనక్తి అంచి బోడి సుదా అదికారుమ్ దా అస్సె.

జేలి జలన విడ్డల్ జతినీ ఆవ్ సాట్ట కెర్తి రితి, వడ్డె గుడ్డి జలన అన్నె దెకితినచి రిసా ఆవ్ సాట్ట కెర్తి రితి,

అన్నె మాన్సుల్ నిస్కారుమ్ కెర్త మాన్సుల్చ బాదల్

ఆవ్ పిట్టవ దన బాదల్ తెంతో విడ్డల్ కెర్తి రిసా,

19 ‘ఎత్కి అదికారుమ్ తిలో దేముడు ప్రబు

జోచి దయ మాన్సుల్క దెకయెదె’ మెన ఆవ్ సాట్ట కెర్తి రిసాయి జో అంక తెద్రవ అస్సె”

మెన దేముడుచ కబుర్లు సంగిలో యెసయాచి అత్తి రెగిడ్డి కోడు యేసు సదు కెర సూనవ కెర,

20 జా పుస్తకుమ్ డంప కెర, జా సబగేర్చొ సేవ కెర్తొన్క అన్నె దా కెర, అన్నె వెసిలన్. జా సబగెరి తిలస ఎత్కిజిన్ జోక చెంగిల్ దెకితె తిల.

21 తెదొడి జోవయింక, “దేముడుచి కొడెతెచ ఆవ్ అప్పె తుమక సూనయ్ల కొడె ఆజి ఎత్కి జర్లు జంక దెర అస్తి” మెన సంగిలన్.

22 తెదొడి, “చెంగిలో మాన్సు, ఈంజొ సంగిల కొడె నిజుమి సత్తిమచ” మెన జేవ్ ఆచారిమ్ సంగ తా, “గని ఈంజొ యోసిప్పచొ పుత్తుసి, నెంజె గె?” మెన అన్నె ఇదిల్ అన్మానుమ్ జా సంగిల.

23 జలె, యేసు జోవయించి బుద్ది జాన కెర, జోవయింక అన్నె, “డాక్టర్, తుకయ్ తూయి చెంగిల్ కెరను” మెంతె అంక, అన్నె ⁵ “కపెర్నహూమ్ పట్టుమ్తె ఇన దన వెల్లెల కమె కెర్లన్ మెన తుచి రిసా నూన అస్సుమ్. ఇన్నె కి తుచి సొంత దేసిమి దన కమె కెరు మెన అంక సంగితె, కిచ్చొగె?”

24 అన్నె, “తుమక ఆవ్ కిచ్చొ కచితుమ్ సంగితినీ మెలె, దేముడుచ కబుర్లు సంగితో కేన్ మాన్సుక కి జోచి సొంత దేసిమ్చ మాన్సుల్ ఇస్టుమ్ జతి నాయ్” మెలన్.

25 గని తుమక ఆవ్ కిచ్చొ మెంతసి మెలె, ఏలీయా పూర్లుమ్చొ తిలి పొది, తిన్ని వెర్చుల్ నర పూర్తి కిచ్చొ పాని పెటె నాయ్. చి ఒండి దేసిమి ఒగ్గర్ కరు

‡ 4:16 4:16 యూదుల్చి అలవాట్ తెన్, సత్తరెక్క, సత్తు దీసల్ కిచ్చొ కామ్ నే కెర్తె దేముడుక జొకర్తి దీన్. సెలవ్ కడన్ల దీసి-తెలుగు. ఎత్కి సెనగర్ యూదుల్క బక్తి కెర్తి సెలవ్ కడ దీసి జయెదె. జా దీసి జోవయించ సబ గెరల్ గెచ్చు, దేముడుచి కొడె సూన కెర, ఎత్కి అదికారుమ్ తిలో దేముడుక బక్తి కెరుల. జోక ‘యెహోవ’ మెన నావ్ తయెదె. జా దీసి ‘కిచ్చొ కామ్ కెర నాయ్’ మెన జో ఎత్కి అదికారుమ్ తిలో దేముడు సంగిలినక యూదుల్చ వెల్లెల మాన్సుల్ ప్రజల్క జాడు వయ్డి రితి కెర కామ్ నే కెర్తినచి రిసా ఒగ్గర్ ఆగ్గల్ అచ్చొ ఉచద అస్తి. ఇన్నె, దొన్ని ఎన్నులు కోడ్లినక ‘కామ్’ మెన నింద కెర్తతి. § 4:23 4:23 కపెర్నహూమ్ పట్టుమ్ కి జోవయించి దేసిమ్చి పట్టుమ్, దస్సి లట్టబ్తతి.

జా గెలి. జలె, అమ్చ ఇస్రాయేలుల్ అమ్ యూదుల్ మొత్తుమ్తె జా పొది ఒగ్గర్జిన్ రండెలివొ తిల.

26 గని జేవ్ మొత్తుమ్జిన్తె ఎక్లితె కి దేముడు ఏలీయాక తోడు తెద్రయె నాయ్. సీదోను ప్రాంతుమ్చి సారెపతు గవ్వెచి *రండెలి ఎక్లితె జోక తోడు తెద్రయ్లో.

27 పడ్డె, దేముడుచ కబుర్లు సంగిలో ఎలీషాచి కాలుమ్ అమ్చ †ఇస్రాయేలుల్తె వెల్లి రోగుమ్ దెర్ల మాన్సుల్ ఒగ్గర్జిన్ తిల. జలె, జోవయింతె కో కి చెంగిల్ జతి నాయ్. గని సిరియ దేసిమ్చో అమ్చో యూధుడు నెంజిలో ‡నయ్యమానుయి చెంగిల్ జలో; యేసు సంగిలన్.

28 జలె, యూదుల్క నాయ్, గని వేర దేసిమ్చక దేముడు చెంగిల్ కెరయ్లినచి రిసా యేసు సంగిలిసి సూన్ కెర, జా సబ గెరితె తిల యూదుల్ ఎత్కిజిన్క ఒగ్గర్ కోపుమ్ అయ్లి.

29 జేవ్ ఉట్ట జా, యేసుక పట్టుమ్ తెంతో ఉదడ కెర, జోవయించి పట్టుమ్ టీవెలి మెట్టచి కొసా ఎద ఉదడ; 'ఒత్త తెంతో గలి జవున్' మెన సేడయ్తి రిసా,

30 గని యేసు ప్రమాదుమ్ నే జతె జోవయించి నెడిమ్మి తెంతో బార్ జా జో గచ్చుక ఉచర్లి వాట్క గెలన్.

కపెర్నహూమ్ పట్టుమ్చి సబగేరితె యేసు (మార్కు 1:21-28)

31 తెదొడి జా గలిలయ ప్రాంతుమ్చి కపెర్నహూమ్ పట్టుమ్తె యేసు ఉట్ట గెచ్చు, సెలవ్ కడన్లి దీసి మెన, సబగేరి గెచ్చు జా పట్టుమ్చ యూదుల్క బోదన కెర్లన్.

32 దేముడు దిలి అదికారుమ్ కొల్లి బోదన కెరై తతికయ్, జనాబ్ ఆచారిమ్ జల.

33 జలె, జేవ్ తిలి సబ గెరి బూతుమ్ దెర్లో ఎక్కిలో తిలో. జో జలె, గట్టిజ అవాడ్ కెరన కిచ్చొ మెన కేక గలన్ మెలె,

34 "ఓ నజరేతు గవ్వెచొ యేసుప్రబు, అమ్చి తెన్ తుక కిచ్చొ? అమ్క పాడ్ కెరుక జా అస్సిన్ గె? తుయి కొన్సొ గే ఆవ్ జాని. తుయి దేముడుచి కీసుద్ది తిలోసా తుయి, అమ్క ములు" మెన కేక గలన్ గిలో.

35 యేసు, జలె, "తుక్కె తా ఇన్నెక ముల దా గో!" మెన జో మాన్సుక దెర్లి బూతుమ్క గోల కెర్లన్. గోల కెర్లికయ్, ఎత్కిజిన్చి నెడిమి బూతుమ్ జో మాన్సుక సేడవ దా, జోక ప్రమాదుమ్ నే కెరై జోతె తెంతో బార్ జలన్.

36 జర్లు జలిసి ఎత్కిజిన్ దెక ఎక్కిలోక ఎక్కిలో, "ఇన్నెచి కోడు కిచ్చొ అదికారుమ్చి? బూతల్క గో! మెన ఆడ్ర దెతయ్, చి జేవ్ బార్ జా గెతతి" మెన ఆచారిమ్ జా సంగిల.

37 జా దీసి తెంతో ఒండి ప్రాంతుమ్తె జో కెర్ల కమెచి రిసా జాన్ల.

పేతురుచి అత్తన్క యేసు చెంగిల్ కెర్లిసి

(మత్త 8:14-17; మార్కు 1:29-34)

38 జలె, యేసు ఉట్ట సబ గెరి తెంతో బార్ జా సీమోనుచి గెరి గెలన్. జలె, సీమోనుచి అత్తన్క జోర్జొ తా ఆగ్ ఒగ్గర్ తాత్ తతికయ్, జాక "చెంగిల్ కెరు" మెన జేవ్ బతిమాల్పా జా సంగిల, చి

39 యేసు జాచి పాసి టీవ జోర్జొ గోల కెర్లికయ్, జోర్జొ చట్కున గెలి, చి బేగి జా ఉట్ట కెర, జేవ్క సవెచన కెర్లి.

40 జా సంజె పొద్దు గెతె తతికయ్, కచ మాన్సుల్క కిచ్చొ కిచ్చొ జోర్జొల్ తిల గే, యేసుతె జోవయింక కడ ఆన్ల, చి

* 4:26 4:26 జా రండెల్ మాన్సుక కతిసి నెంజితికయ్, ఏలీయా ప్రార్లన కెర్లొ, చి సరిపుచువ జతిసి ఒత్త తెంతో జేక దొర్కు జతె తిలి, చి పుత్తుసి మొర్లికయ్, ఏలీయా ప్రార్లన కెర్లికయ్, జలన్. 1 రానల్ పుస్తకుమ్ 17 అద్యయిమ్. † 4:27 4:27 మెలె 'యూదుల్తె'. ‡ 4:27 4:27 రానల్ దొన్నిచి పుస్తకుమ్ 5 అద్యయిమ్.

§ 4:34 4:34 దేముడు తెద్రయ్లో క్రిస్తు, రచ్చించువ కెర్లొసా

జోవయింతె ఎత్తి మాన్సుక చడ, చెంగిల్ కెర్లన్.

41 అన్నె, ఒగ్గర్జిన్ మాన్సుల్ తెంతో బూతల్ బార్ జా, “తుయి, దేముడుచొ పుత్తుసి.” మెన కేక్ గల. గని జేవ్ బూతల్క యేసు గోల కెర్లన్, అన్నె జేవ్ లట్టబుక సెలవ్ దెయె నాయ్. కిచ్చొక మెలె, జోక *‘క్రీస్తుయి’ మెన జేవ్ జాన్లి రిసా.

యేసు కపెర్నహూమ్ పట్టుమ్ ములిలిసి (మార్కు 1:35-39)

42 రాత్ పాయితికయ్, యేసు బార్ జా కోయి నెంజిలి టాన్తె గెలన్, గని ప్రెజల్ జోక చజన జోతె అయ్ల, చి “అమ్క ముల దా గో నాయ్” మెన జో ఉట్ట గెచ్చుక అడ్డు కెర్క దెకిల.

43 జో జోవయింక, “దేముడుచి †రాజిమ్చి రిసాచి ‡సుబుమ్ కబుర్ ఆవ్ అన్నె తిల పట్నాలతె కి సూనపుక అస్సె. ఈంజయ్ కామ్కయ్ దేముడు అంక తెద్రవ అస్సె.” మెన జబాబ్ దిలన్.

44 జలె, కీయాదయ దేసిమ్చ సబ గెరలె బుల బుల యేసు బోదన కెర్తె తిలన్.

5

యేసు ప్రెజల్క బోదన కెర్లిసి (మత్త 4:18-22; మార్కు 1:16-20)

1 జలె ఏక్ దీసి కిచ్చొ జలి మెలె, యేసు *గెన్నేసరెతు మెంతి గాడు పాసి టీచ

* 4:41 4:41 ‘క్రీస్తు’ మెలె, ‘దొర్కు జలో రచ్చించువ కెర్తొసాక తెద్రయిందె’ మెన ఎత్తి అదికారుమ్ తిలో దేముడు పూర్ణమ్ తెంతో సంగ తిలోసా. † 4:43 4:43 ‘ఎత్తి అదికారుమ్ తిలో దేముడుచి రాజిమ్’ మెలె, ‘పరలోకుమ్’ ఏక్ అర్దుమ్, గని అన్నె కిచ్చొ మెలె, జో పరలోకుమ్ తెంతో ఏలువ కెర్లిసి. జో ఏలువ కెర్లిసి మెలె, ఉగుమ్ మార్పువ జలెకయ్ ఎదార్దుమ్ ఈంజ లోకుమ్తె ఏలువ కెరెదె, గని మదెనె కి 1. జోక నంపజల మాన్సుల్చి పెట్టి ఏలువ కెర్తయ్, చి 2. జోచి సెక్తి ఈంజ లోకుమ్తె కామ్ కెర్తయ్. ‡ 4:43 4:43 ఎత్తి అదికారుమ్ తిలో దేముడుచి రాజిమ్చి రిసాచి మెలె, జోచి రాజిమ్ పావ జా అయ్లిన్చి కబుర్, మత్తయ 12:28, మార్కు 1:15, పడ్డె జో పావల్ చెమించువ కెర్లిన్చి కబుర్, యేసుయి దొర్కు జలో రచ్చించువ కెర్తొసా జలిన్చి కబుర్, పడ్డె పరలోకుమ్తె గెతి అవ్కాసుమ్ జో దొర్కు కెర్లె రచ్చనచి రిసాచి కబుర్. § 4:44 4:44 ఇన్నె ‘యాదయ దేసిమ్’ మెలె, యూదుల్చి ఒండి దేసిమ్. మెలె యూదయ ప్రదేసిమ్ కి, సమరయ ప్రదేసిమ్ కి, గలిలయ ప్రాంతుమ్ కి మొత్తుమ్ బెదయ్లిసి. జా మొత్తుమ్ బెదయ్లిన్కయ్ ‘యాదయ దేసిమ్’ మెన ఇన్నె సంగితయ్ మెన సగుమ్జిన్ ఉచర్తతి. మత్తయ 4:23-25 దెక, చి మార్కు 1:39, 3:7-10 * 5:1 5:1 ఈంజ గాడుక మత్తయ చి మార్కు రెగిడ్డిన్తె ‘గలిలయ ప్రాంతుమ్చి గాడు’ మెంతతి. † 5:1 5:1 నెంజిలె ‘సుబుమ్ కబుర్’; మార్కు 1:14. నెంజిలె ‘యేసుచి బోదన’; మత్తయ 4:7.

తతికయ్, దేముడు దిలి †కోడు సూసుక జోవయింక ఇస్తుమ్ అయ్లి రిసా, ప్రెజల్ బెర జా జోచి ఉప్పిరి డంకి జల.

2 జలె, గాడు సాడి దొన్ని దోనివో తిలిసి యేసు దెకిలన్. జాలర్లు జోవయించ జేవ్ దోనివో తెంతో ఉత్తజాత జోవయించ వలల్ దోవితె తిల్లి.

3 జేవ్ దోనివోతె ఏక్ సీమోసు మెలోసాచి, జో సీమోసుచి దోనితె యేసు వెగ కెర, జోక “ఒడ్డు తెంతో దోని ఇదిల్ పెలవ దేసు” మెన సంగిలన్, చి పెలవ దెతికయ్, యేసు వెన కెర, దోని తెంతో ప్రెజల్క బోదన కెరుక మొదొల్ కెర్లన్.

సీమోసీంసి ఒగ్గర్ మొస్స దెర్తి రితి యేసు కెర్లి వెల్లి కామ్

4 యేసు బోదన కెర కేడయ్లి పడ్డె, “దీగు తిలిన్తె త్తుమ్చ వలల్ గల చి మొస్స దెర్తి” మెన సీమోసుక సంగిలన్.

5 దస్సి సంగితికయ్, “గురుబాబు, ఒండి సరారాతి వలల్ గల తిలమ్, గని కిచ్చొ దెరుమ్ నాయ్. గని తుయి సంగిలె, అమ్చ వలల్ గలమ్దె” మెన సంగ

6 గలిల, చి ఒగ్గర్ మొస్స వలతె సేడ్డికయ్, వలల్ కుట్టిత్ రితి జల.

7 అన్నెక్ దోనితె తిల జోవయించ గోత్తుసుదల్క “త్తుమ్ తోడ్డు జా” మెన సయ్న కెర్ల. జేవ్ తోడు అయ్ల, చి జేవ్ దొన్ని దోనివో బెర్తు బెరయ్ల, చి దోనివో బుడ్డుక దెర్ల.

8 జర్కు జలిసి జో సీమోసు పేతురు దెక కెర, యేసుచి చట్టె సెర్కు నేడ, “ప్రబువ,

అంక ముల దా ఉట్ట గో, ఆవ్ పాపుమ్ సుదో” మెన సంగిలన్.

9 కిచ్చొక మెలె, జేవ్ దెర్ల మొస్తుచి కొట్టె ఎదివాట్ మెన దెక కెర, జో కి, జో తెన్ తిలన ఎత్కిజిన్ కి ఒగ్గర్ ఆచారిమ్ జల.

10 దస్సి సీమోను మొస్తు దెర్ల జట్టుచ జెబెదయిచ పుత్తర్లు యాకోబు చి యోహాను కి, జో తెన్ ఆచారిమ్ జల. యేసు, జలె, “తుమ్ బియఁ నాయ్. అప్పె తెంతో, మాన్సుల్ అంక నంపజతి రితి జోవయంక కడ ఆన్త జాలర్లు తుమ్ జస్సె” మెన సీమోనుక సంగిలన్,

11 జలె, దోనివో ఒడ్డుతె ఒగ్గడ ఆన కెర, ఎత్కి ముల దా, యేసుచ సిస్సుల్ జంక జోచి వట్టి గెచ్చు, జో తెన్ బులుక దెర్ల.

వెల్లి రోగుమ్ తిలొసాక యేసు చెంగిల్ కెర్లిసి (మత్త 8:1-4; మార్కు 1:40-45)

12 యేసు ఏక్ గవ్వొ తిలి పొది, వెల్లి రోగుమ్ బెర్తు తిలొ ఎక్కిలొ ఒత్త అయ్లొ, అన్నె, యేసుక దెక సెర్ను సేడ, “ప్రబు, తుక ఇస్టుమ్ తిలె, †తుయి అంక చెంగిల్ కెర సుద్ది కెరుక తెర్ని” మెన బతిమాల్పు జా సంగిలన్.

13 దస్సి సంగితికయ్, యేసు ఆతు చంపొ కెర జోక చడ, “తుయి చెంగిల్ జంక, అంక ఇస్టుమి. తుచి వెల్లి రోగుమ్ గెచ్చు సుద్ది జా” మెన సంగిలన్, చి బేగి జోచి వెల్లి రోగుమ్ గెలి.

14 యేసు జోక కిచ్చొ ఆడ్ర దిలన్ మెలె, “కక్క, సంగు నాయ్, గని దేముడుచి గుడితె గెచ్చు, ఒత్త సేవ కెర్తొ పూజరితె గెచ్చు, తుచి ఆగ్ చెంగిల్ జలిసి జోక దెకవ, మోసి పూర్లుమ్ సంగిలి రితి,

తుయి చెంగిల్ సుద్ది జలిసి ఎత్కిజిన్క రుజ్జు దెకయ్ తి రితి, ఒత్త కాసుక దేసు.”

15 “కక్క, సంగు నాయ్” మెన జో మాన్సుక యేసు సంగ తిలె కి, అగ్గెచి కంట అప్పె అన్నె ఒగ్గర్జిన్ యేసుచి రిసా కీసూన్ల, చి ఒగ్గర్జిన్ “యేసుచి బోదన సూనుమ్దె” మెన, “అమ్చ జొర్జొల్ గెచ్చువెదె” మెన బెర జెతె తిల.

16 గని ఎక్కెక్ సుట్టు యేసు కో నెంజిలి టాన్తె గెచ్చు *ప్రార్లన కెరెదె.

ఉట్టుక నెతిర్లొ రోగిక చెంగిల్ కెర్లిసి (మత్త 9:1-8; మార్కు 2:1-12)

17 ఏక్ దీసి యేసు బోదన కెర్తె తతికయ్, పరిసయ్యుల్ చి మోసి తెన్ దేముడు దిలి ఆగ్గుల్ సికడ్డన పాసి వెన తిల. ఈంజేవ్ గలిలయ ప్రాంతుమ్చ చి యూదయ ప్రదేసిమ్చి గావ్వొ ఎత్కి తెంతో చి యెరూసలేమ్ పట్టుమ్ తెంతో జా తిల. అన్నె, మాన్సుల్చ జొర్జొల్ బాదల్ జో గెచ్చువుక మెన యేసు దేముడుచి సెక్తి తెన్ తిలొ.

18 జలె, కిచ్చొ జర్లు జలి మెలె, ఓదె, వాతుమ్ జొర్జొ తెన్ తిలొసా ఉట్టుక నెతిర్లొ మాన్సు ఎక్కిలొక అన్నె మాన్సుల్ అంతుర్నొ తెన్ వయ ఆన, యేసుతె ఆన కెర జోచి చట్టె తియ దెంక మెన వాట్ చజిల.

19 గని జనాబ్ ఒగ్గర్జిన్ బెర తిలి రిసా యేసు తిలి గెరి పెసుక వాట్ నాయ్ మెన, ఒర్నె వెగ కెర, జో తిలి గదిచి ఉప్పిర్ ఒర్నెచి వెల్లి బొరో కెర, జా బొరో వాట్ పైజల్చి నెడిమి యేసుచి పుర్తెతోక జో మాన్సుక అంతుర్నొ తెన్ ఉత్తవ దిల.

20 జలె, జేవ్ కడ ఆన్ల మాన్సుల్చి జో ఉట్టుక నెతిర్లొ మాన్సుచి నముకుమ్

† 5:12 5:12 జా దేసిమి వెల్లి రోగిచి వెల్లి రోగుమ్ గెలె, సుద్ది జలన్ మెన తెదొడచ యూదుల్ సంగితె తిల. కిచ్చొక మెలె, ఏక్ మాన్సుక వెల్లి రోగుమ్ తిలె, ‘జో గవ్వొ తంక గారు’ మెలి రితి ‘జోచి జబ్బు డేవ అమ్కయ్ దెరెదె’ మెలి రితి బియ కెర, గవ్వొ తెంతో ఉదడుల. దేముడుచి దయచి రిసా వెల్లి రోగుమ్ పూర్తి గెలె, ‘అన్నె సుద్ది జలొ’ మెన గవ్వొ అన్నె పెనడుల. 17:14చి ఎట్టెచి కోడు కి దెక. § 5:15 5:15 జొయ్యి మాన్సు నూనయ్తె తిలొ.

మార్కు 1:45. * 5:16 5:16 దేముడు అబ్బొన్చి ఇస్టుమ్ నూసుక మెన, జోచి సెక్తి అన్నె సెక్తి జంక మెన.

యేసు దెక కెర, “నేస్తము, తుచి పాపల్ చెమించుప జా అస్తి” మెన జో ఉట్టుక నెత్తిర్లో మాన్సుక సంగిలన్.

21 జో దస్సి సంగితికయ్, మోసే తెన్ దేముడు దిలి ఆగ్గుల్ సికడ్తన చి పరిసయ్యుల్ బమ్మజా, “ఈంజో మాన్సు కొన్సో? ఇని లట్టబ దేముడుచి విలువ కడ పాపుమ్ కెర్తయ్. దేముడుక పిట్టవ కో కి పాపల్ చెమించుప కెరుక నెత్తిర్!” మెన ఎక్కిలో తెన్ ఎక్కిలో లట్టబన్.

22 జలె, జేవ్ అన్మానుమ్ జా లట్టబంతె తిలిసి యేసు పూర్తి జాన కెర, జోవయింక కిచ్చో జబాబ్ దిలన్ మెలె, “తుమ్చి పెట్టి కిచ్చొక దస్సి అన్మానుమ్ తియంతసు?

23 ‘తుచి పాపల్ చెమించుప జా అస్తి’ మెనుక సుల్లు గే, ‘ఉట్ట ఇండు’ మెనుక సుల్లు గే తుమ్ ఉచర.

24 జలె, †మాన్సు జా జెర్మున్ అయ్లయ్ అంక, ఈంజయి లోకుమ్తె కి పాపల్ చెమించుప కెర్తి అదికారుమ్ అస్సె మెన రుజ్జు దెకయిందె, మెన జేవ్క సంగ కెర, ఉట్టుక నెత్తిర్లో జో మాన్సుక అన్నె దెక కెర, అల్లె, తుయి ఉట్ట, తుచి అంతుర్నొ వయన ఇండ గెరి గో మెన తుక ఆవ్ సంగితసి!” మెన యేసు సంగిలన్.

25 బేగి జో మాన్సు, జో ఎంగ్గ తిలిసి ఉక్కుల వయన, దేముడుచి గవురుమ్ సంగ, సంగ గెరి ఉట్ట గెలన్.

26 దస్సి జర్లు జతికయ్, ఒగ్గర్ ఆచారిమ్ జేవ్ ఎత్తిజిన్క దెర్రి, చి “ఆజి

బలే ఆచారిమ్చి క్రామ్ దెకిలమ్” మెన దేముడుక గవురుమ్ కెర్ల, చి జోచి నెక్తిచి ఉప్పిర్చి బయిమ్ జోవయించి పెట్టి బెర్రి.

లేవీ మెలోసొక యేసు బుకార్తిసి (మత్త 9:9-13; మార్కు 2:13-17)

27 ఇన్నెచి పడ్డె, యేసు బార్ జా ఒత్త తెంతో గెచ్చు, సిస్తు నజితో సుంకరో ఎక్కిలోక దెకిలో. జోచి నావ్ †లేవీ. జో సిస్తు నజితి టాన్తె వెన తిలన్, చి “అంచి పట్టి జా అంచో సిస్సుడు తుయి జా” మెన యేసు జోక బుకార్లన్.

28 బుకార్తికయ్, సుంకరో జలో జో లేవీ, ఉట్ట జోచి కామ్ ఎత్తి ముల దా, యేసుచి పట్టి ఉట్ట గెలన్.

29 లేవీ యేసుక గెరి కడ ఆన కెర, జోక వెల్లి విందు దిలన్. సిస్తు నజితన చి వేర మాన్సుల్ ఒగ్గర్జిన్ జోవయింతెన్ అన్నిమ్ కంక వెసిల.

30 జలె, పరిసయ్యుల్ చి జోవయింతెన్ బెదిత మోసే తెన్ దేముడు దిలి ఆగ్గుల్ సికడ్తన జా దెక కెర, “కిసిస్తు నజితన తెన్ *పాపుమ్ కెర్ల సుదల్ తెన్ తుమ్ కిచ్చొక వెన అన్నిమ్ కత్తను?” మెన యేసుచ సిస్సుల్క గోల కెర్ల.

31 దస్సి జతికయ్, యేసు జేవ్క కిచ్చొ సంగిలన్ మెలె, “జబ్బు తెన్ అస్సుమ్ మెన చినన్లన డాక్టర్ అవ్సురుమ్, గని జబ్బు నెంజిలనక డాక్టర్ అవ్సురుమ్ నాయ్.

32 జలె, ‘పాపుమ్ కెర్లొసొ అమ్’ మెన చినంతనక ‘జోవయించి పాపుమ్చి

† 5:24 5:24 ‘మాన్సు జా జెర్మున్ అయ్లోసొ’ మెన బయ్బితె రెగ్ తిలె, జేవ్చి అర్దుమ్ కిచ్చొ మెలె, ఎత్తి అదికారుమ్ తిలో దేముడు తెర్తయ్లో క్రిస్తు రచ్చించుప కెర్లొసొ. పూర్ణమ్ పొది క్రిస్తు రచ్చించుప కెర్లొసొక తెర్తవుక జో సంగ తిలో, చి నగుమ్తె జయి టాలిక జోవయింక ‘మాన్సు జా జెర్మున్ అయ్లోసొ’ మెన పూర్ణమ్ తెంతో రెగ్ల అస్తి. దానియేలు 7:13 దెక. ‡ 5:27 5:27 మార్కుతె కి జోక ‘లేవీ’ మెన రెగ్ల అస్సి. జోచి అన్నెక్ నావ్ ‘మత్తయి; మత్తయి 10:3.

§ 5:30 5:30 సిస్తు నజితనక, అన్నె యూదుల్ నిస్కారుమ్ దెకితె తిల. కిచ్చొక మెలె, జోవయింక ఆక్రమించుప కెర్లి రోమ్ దేసిమ్చి ప్రబుతుమ్చి సేవ కెర్లె తిల, వడ్డె సిస్సుచి డబ్బుల్ నజితి పొది, నాయమ్చి కంబ అన్నె నజితె తిల. తెదోడెచ యూదుల్ ‘అమ్క నీతి, చి వేర జాతివొక నాయ్’ మెనుల. రోమ్ దేసిమ్చ మాన్సుల్ యూదుల్ నెంజితి, చి సిస్తు నజిత సుంకర్లు యూదుల్ నెంజిలనచి సేవ కెర్లె తిల. జాకయ్ యూదుల్ జోవయింక నిస్కారుమ్ దెకితె తిల. * 5:30 5:30 ‘పాపుమ్ సుదల్’ మెన కిచ్చొక సంగిల మెలె, జేవ్ పండితుల్ సికడ్డి నీతి నే కెరంతనక దస్సి నిస్కారుమ్ దెకుల. జోవయింతె నగుమ్జిన్ నిజుమి ఎత్తి అదికారుమ్ తిలో దేముడు ‘పాపుమ్’ మెంత కముక అలవాల్ జా తవుల, గని నగుమ్జిన్ ఎక్కి పండితుల్చి కోడు పిట్టయతతి.

రిసా దుకుమ్ జా ముల దెతు', మెన జోవయింకయ్, బుకారుక మెన అయ్లయ్ గని 'పాపుమ్ కెర్లొసా నెంజుమ్, అమ్క పున్నిమ్' మెన ఉచరంతనక బుకారుక నాయ్" మెన జోవయింక యేసు సంగిలన్.

చువ్వె తతిన్చి రిసా యేసుక పుసిలిసి
(మత్త 9:14-17; మార్కు 2:18-22)

33 జలె, సగుమ్జిన్ మాస్సుల్ యేసుక, "యోహానుచ సిస్సుల్ చువ్వె తా ప్రార్దన కెరుక అలవాట్. పరిసయ్యుల్చ సిస్సుల్ కి దస్సి కెరుల, గని తుచయ్ సిస్సుల్ కంక పింక జతతి" మెన అన్యానుమ్ తెన్ పుసిల.

34 యేసు జోవయింక ఇసి సంగిలన్. "కేన్ పెండ్లితె, జోవయించి నెడిమి పెండ్లిఉబేడో తిలె పొది పెండ్లి విందుక బుకార్లన చువ్వె తతి రితి కెరుక జయెదె గె?"

35 జలె, పెండ్లిఉబేడోచి పచ్చెన జలనచి నెడిమి తెంతో జోక దెర వేరతె కడ నిలె, జేవ్ దీసల్క జోచ మాస్సుల్ ఏడ ఏడ చువ్వె తవుల" మెలన్.

36 యేసు జోవయింక అన్యెక్ టాలి కి సంగిలన్. కిచ్చో మెలె, "నొవి పాలుమ్ తెంతో గండ చిర పొర్ని పాలుమ్తె మాసిక గల్లి నాయ్. దస్సి కెర్లె, జా నొవి పాలుమ్ చిరి జా తయెదె, చి జా గండ పొర్ని పాలుమ్ తెన్ బెదె నాయ్.

37 వడ్డొ జలె, ఒత్త నొవి ద్రాచ రస్సుమ్ పొర్నిచి కాయ తెన్ కో సువితి నాయ్. కిచ్చోక మెలె, జా కాయ పొర్ని జలి రిసా దస్సితె నొవి ద్రాచ రస్సుమ్ సువిలిగిన, జా కాయ పులుక నెత్తెచి రిసా జా రస్సుమ్

పొంగువ జలె పొది జా కాయ పుట్టెదె. పుట్టిలె, జా రస్సుమ్ నూయి జయెదె, చి కాయ కి పాడ్ జా గెచ్చెదె.

38 నొవి ద్రాచ రస్సుమ్ నొవి కాయల్తె సువుక అస్సె.

39 అన్నె, తొలితొ పొర్ని ద్రాచ రస్సుమ్ పియ తిలె, నొవి ద్రాచ రస్సుమ్క కోర్ప జతి నాయ్. కిచ్చోక మెలె, 'నొవిచి కంట పొర్నిచి చెంగిలి' మెనుల" మెన యేసు టాలి సంగ బోదన కెర్లన్.

6

విస్రాంతి దీసి సిస్సుల్ కెర్లెన్చి రిసా పండితుల్ గోల కెర్లెసి

(మత్త 12:1-8; మార్కు 2:23-28)

1 ఏక్ సెలవ్ కడన్ల దీసి, *యేసు జోచ సిస్సుల్ తెన్ పంటో పికిలి బుయి వాట్ గెతె తా, వాట్ సాడి తిల ఎన్నులు దొన్ని జోవయించ సిస్సుల్ కోడ అత్తో తెన్ రెర్ల చొప్పు జేడవ కతె తిల.

2 జలె, పరిసయ్యుల్ సగుమ్జిన్ పాసి తా యేసుచ సిస్సుల్ కెర్లెసి దెక కెర, "జేవ్ దస్సి కెర్లెసి 'కామ్ కెర్లె రితి జతయ్' మెన, ఈందె, సెలవ్ కడన్ల దీసి కెరుక నాయిమ్ నెంజిలిసి తుమ్ కిచ్చోక కెర్లెసు?" మెన జోవయింక గోల కెర్లె.

3 జలె యేసు జేవ్క కిచ్చో జబాబ్ దిలన్ మెలె, "పూర్లమ్ తిలో దావీదు రానో, జోక, చి జో తెన్ తిలనక కి చూ కెర్లికయ్, జాచి రిసా కిచ్చో కెర్లె గె, కెయ్ తుమ్ సదు కెర్లు నాయ్ గె?"

4 కిచ్చో కెర్లెసి మెలె, దావీదు దేముడుచి గుడితె పెన కెర, ఒత్త తిల పూజర్లు దేముడుక అర్పితుమ్ దిల

† 5:35 5:35 'పెండ్లిఉబేడో' మెన జోవయించి రిసా జొయ్యి టాలి సంగితయ్. జోవయింక వడ్డొక విరోదుమ్

సుదల్ దెర మారుల, గెద. * 6:1 6:1 యూదుల్చి అలవాట్ తెన్, సత్తరక్క సత్తు దీసల్ కిచ్చో కామ్ నే కెర్లె దేముడుక జోకర్లె దీసి. విస్రాంతి దీసి-తెలుగు. ఎత్తి సెన్వరే యూదుల్క బక్తి కెర్లె సెలవ్ కడ దీసి జయెదె. జా దీసి జోవయించ సబ గెరలె గెచ్చ, దేముడుచి కొడో నూన కెర, ఎత్తి అదికారుమ్ తిలో దేముడుక బక్తి కెరుల. జోక 'యోహోవ' మెన నావ్ తయెదె. జా దీసి 'కిచ్చో కామ్ కెర నాయ్' మెన జో ఎత్తి అదికారుమ్ తిలో దేముడు సంగిలిన్క యూదుల్చి వెల్లెల మాస్సుల్ ప్రైజల్క జాడు వయడ్లి రితి కెర కామ్ నే కెర్లెన్చి రిసా ఒగ్గల్ అగ్గల్ అవ్వె ఉచర అస్సి. ఇన్నె, దొన్ని ఎన్నులు కోర్లెన్క 'కామ్' మెన నింద కెర్లెతి.

పోడియొ వెంటన, జేవ్ పోడియొ పూజర్లుయి కంక జయెదె గని అన్నె కో కంక జయె నాయ్ మెన జాన్లె కి, జేవ్ పోడియొ వంట దా, దావీదు కి జో తెన్ తిలస కి నాయిమ్ నెంతె కి కయ్ల.” మెలన్.

5 తెదొడి జోవయింక అన్నె, “సెలవ్ కడన్ల దీసిచి ఉప్పిరి †ఆవ్ మాన్సు జా జెర్మున్ అయ్లోసొక అదికారుమ్ అస్సె” మెన జేవ్ పరిసయ్యుల్క సంగిలన్.

ఆతు లంబ గెలో మాన్సుక యేసు చెంగిల్ కెర్లిసి

(మత్త 12:9-14; మార్కు 3:1-6)

6 అన్నెక్ సెలవ్ కడన్ల దీసి యేసు జా పట్టుమ్తెచి యూదుల్చి సబ గెరి గెచ్చు పెన బోదన కెర్తె తతికయ్, ఒత్త ఉజిల్ ఆతు లంబ గెలో మాన్సు ఎక్కిలో తిలో.

7 జలె, మోసె తెన్ దేముడు దిలి ఆగ్గుల్ సికడ్డన చి పరిసయ్యుల్ యేసుక చెంగిల్ దెకితె తిల. కిచ్చొక మెలె, “సెలవ్ కడన్ల దీసి యేసు జో మాన్సుక చెంగిల్ కెరెదె గే నాయ్ గె” మెన దెకుక మెన, రకితె అస్తి. “జోక చెంగిల్ కెర్లిగిన, సెలవ్ కడన్ల దీసి కామ్ కెర్లి రితి జయెదె, చి యేసుక నేరిమ్ వయడుక జయెదె” మెన ఉచర అస్తి.

8 గని జేవ్చి మెన్సుతె ఉచర్లిసి యేసుక ఎర్కె, చి ఆతు లంబ గెలో జో మాన్సుక కిచ్చొ మెలో మెలె, “ఇత్తల్ జా ఎత్తిజన్ దెకిత్ రితి నెడిమి టీవ.” మెలన్, చి జో ఉట్ట ఒత్త టీచిలన్.

9 తెదొడి యేసు జేవ్క, “సెలవ్ కడన్ల దీసి ఎక్కిలోక చెంగిల్ కెరుక గే కన్లుమ్ కెరుక నాయిమ్? జోవయించి ప్రానుమ్ రచ్చించుప కెరుక గే పాడ్ కెరుక నాయిమ్?” మెన సంగిలన్.

10 సుట్టునంత అంకి గల జోవయింతె ఎత్తి మాన్సుక చెంగిల్ దెక కెర, ఆతు లంబ గెలో మాన్సుక దెక, “తుచొ ఆతు చంపొ కెరు” మెన సంగిలన్, చి యేసు సంగిల్ రితి జో మాన్సు కెర్లికయ్, జోచొ ఆతు చెంగిల్ జలి.

11 పరిసయ్యుల్ చి మోసె తెన్ దేముడు దిలి ఆగ్గుల్ సికడ్డన జర్లు జలిసి దెకిలె, జోవయింక ఒగ్గర్ కోపుమ్ అయ్లి, చి “యేసుక కీసి †కెరుమ?” మెన ఎక్కిలో తెన్ ఎక్కిలో లట్టబన్.

యేసు బారజిన్ సిస్సుల్క నిసాన్లిసి (మత్త 10:1-4; మార్కు 3:13-19)

12 జలె, కిచ్చొ జలి మెలె, జేవ్ పొదులె ఏక్ దీసి, ప్రార్దన కెరుక మెన యేసు బార్ జా డొంగై గెలన్. జో ఒండి సరారాతి ఒత్త ప్రార్దన కెర్తె తిలో.

13 జలె, రాత్ పాయితికయ్, యేసు జోవయించ సిస్సుల్క బుకారా కెర, జోవయింతె బారజిన్క నిసాన, ఈంజేవ్ బారజిన్క ‘సీబారికుల్’ మెన నావ్ తిలన్.

14 జేవ్ కో కో మెలె, ఎక్కిలో సీమోను మెలోసా. జోక ‘పేతురు’ మెన యేసు అన్నెక్ నావ్ తిలన్. పడ్డొ పేతురుచొ బాచొసి అంద్రెయ. ఒత్త తెంతొ యాకోబు చి యోహాను. ఒత్త తెంతొ పిలిప్ చి బర్తోలోమయ.

15 పడ్డొ *మత్తయి చి తోమా. ఒత్త తెంతొ అల్పుయిచొ పుత్తుసి యాకోబు, పడ్డొ †సాంత దేసిమ్ ఏలుప కెరంతి ఆస తిలో సీమోను మెలో అన్నెక్కో,

16 యాకోబుచొ పుత్తుసి యూదా, పడ్డొ ఇస్కరియోతు మెలి గవ్వెచొ యూదా మెలోసా. ఈంజొ యూదా పడ్డొ యేసుక దెర విరోదుమ్ సుదల్చి అత్తి దిలో.

† 6:5 6:5 5:24చి ఎట్టచి కోడు దెక. ‡ 6:11 6:11 నెంజెలె ‘మారుమ’. మార్కు 3:6, చి మత్తయి 12:14 దెక. § 6:13 6:13 నెంజెలె ‘ఆవ్ తెద్రయలన్’. గ్రెకు మెలి ఈంజ ఎత్తి తొలితొ రెగిడ్డి బాస తెన్ ‘తెద్రయలన్’ మెలి అర్దుమ్ తయెదె. * 6:15 6:15 జోవయించి అన్నెక్ నావ్ ‘పేవి’ గెద. 5:27 దెక. † 6:15 6:15 రోమ్ దేసిమ్చి ప్రబుతుమ్ తెదొడి జోవయింక ఏలుప కెర్తె తిలన్, గెద.

యేసు బోధన కెర కక్క చెంగిల్ కెర్లిసి
(మత్త 4:23-25; 5:1-12)

17 జలె, యేసు జో నిసాన్ల బారజిన్ తెన్ డొంగె తెంతో ఉత్త జా, నదూసుమ్ తిలి ఏక్ టాన్తె టీఏదిల్ల చి జోచ అన్నె సిస్సుల్ జో తెన్ తిల, చి †ఒండి యూదయ దేసిమ్చ మాన్సుల్, యెరూసలేమ్ పట్టుమ్చ మాన్సుల్, వెల్లి సముద్దుమ్చి పాసి తిల తూరు చి సీదోను పట్టల్చ మాన్సుల్ ఒగ్గర్జిన్ ఒత్త తిల. ఈంజేవ్ జోచి బోధ నూనుక చి “అమ్చ జొర్ణోల్ గెచ్చవెదె” మెన జా తిల.

18 యేసు బూతల్ ఉదడ, బూతల్ దెర్ల మాన్సుల్చ చెంగిల్ కెర్లొ.

19 ప్రెజల్ ఎత్కి యేసుక చడుక మెన అత్తో చంపా కెర్తె తిల. కిచ్చొక మెలె, జోక చడిలె, జోతె తెంతో సెక్తి జెయెదె, చి జా సెక్తిచి రిసా చెంగిల్ జవుల. జోక చడ్లస ఎత్కిజిన్ దస్సి చెంగిల్ జల.

కిన బుద్దుల్చ మాన్సుల్చ చెంగిల్ తయెదె

20 యేసు జోచ సిస్సుల్ జల మాన్సుల్చ చెంగిల్ దెక ఇసి మెన సంగిలన్.

“బీద సుదల్ తుమ్క చెంగిలి. కిచ్చొక మెలె, దేముడుచి రాజిమ్తె తుమ్క కీవాట తయెదె.

21 తుమ్ అప్పె చూ జలసక చెంగిలి. కిచ్చొక మెలె, పడ్డొక తుమ్క సరిపుచుప జతిసి దొర్కు జయెదె.

తుమ్ అప్పె ఏడ్లసక చెంగిలి. కిచ్చొక మెలె, పడ్డొక సర్లక ఆన్లె.

22 “పడ్డొ, * ఆవ్ మాన్సు జా జెర్కున్ అయ్లోసొక తుమ్ నంప కెర్లి రిసా మాన్సుల్ తుమ్క విరోదుమ్ దెకిలె,

తుమ్క అమ్చి తెన్ బెదుత్ నాయ్ మెన సంగిలె, తుమ్క దూసుప కెర్లె, పడ్డొ జోవయింక నంపజా గార్ జల, చి జోవయించి నావ్ కి సంగుక నెంజె, మెన తుమ్చి రిసా మాన్సుల్ సంగిలె, తుమ్క చెంగిలి.

23 దస్సి జర్గు జతి దీసిక సర్ల సంతోసుమ్క తుమ్ నచ్చు. కిచ్చొక మెలె, ఈందె, పరలోకుమ్తె తుమ్క వెల్లి బవుమానుమ్ దొర్కు జయెదె. తుమ్కయ్ మాన్సుల్ కిస అల్లర్ కెరుల గే అగ్గెయ్ దేముడుచ కబుర్లు సంగిలసక కి, జేవ్క అబ్బదింసి దనయ్ అల్లర్ కెర్లె.” మెన యేసు సంగిలన్.

ఆకర్క కక్క నస్టుమ్ తయెదె గే యేసు సంగిలిసి తెదొడి యేసు అన్నె,

24 “అబ్బవోమ్మ! తుమ్ అప్పె సొమ్నారుమ్ తిలసక కెర్లి నస్టుమ్ జెయెదె!

కిచ్చొక మెలె, ఈంజయ్ లోకుమ్చి రగుమ్చి సుక్కుమ్

పూర్తి దొర్కు కెరస అస్సున్ ఈంజయ్ లోకుమ్తె.

25 అబ్బవోమ్మ, తుమ్ అప్పె ఈంజ లోకుమ్తె పెట్టి బెరవన్లస, తుమ్ కెర్లి నస్టుమ్ జస్తె!

తెదొడ్క చూ జస్తె. అబ్బవోమ్మ, తుమ్ అప్పె ఈంజ లోకుమ్తె ఆన్లస,

తుమ్ కెర్లి నస్టుమ్ జస్తె! తెదొడ్క ఏడ్లె, ఏడుకుడు జస్తె.

26 అబ్బవోమ్మ, ఈంజేవ్ చెంగిల మాన్సుల్ మెన తుమ్చి రిసా ఎత్కిజిన్ సంగిలె,

తుమ్క కెర్లి సంతోసుమ్ జెయెదె! కిచ్చొక మెలె,

† 6:17 6:17 ఇన్నె ‘ఒండి యూదయ దేసిమ్’ మెలె, ఏక్ వేల యూదుల్చి ఒండి దేసిమ్క సంగితయ్. మెలె, గలిలయ ప్రాంతమ్, సమరయ ప్రదేసిమ్, చి యూదయ ప్రదేసిమ్ మొత్తుమ్ బెదయ్లిసి. S 6:20 6:20 లూకా 22:29, 30 దెక. * 6:22 6:22 5:24చి ఎట్టొచి కోడు దెక.

తుమ్క ఈంజేవ్ కిసి అప్పె దస్సి సంగితతి గే, దేముడుచ కబుర్లు సంగితసుమ్ మెన అబద్దుమ్క సంగిల పూర్లుక ఇనయించ అబ్బదింసి దస్సి కెర, ” మెన సంగిలన్.

విరోదుమ్ సుదల్క ప్రేమ కెర్తినచి రిసాచి తీర్పు

(మత్త 5:38-48; 7:12)

27 ఒత్త తెంతో యేసు అన్నె, “తుమ్ సూన్తనక ఆవ్ కిచ్చో మెంతసి మెలె, తుమ్చ విరోదుమ్ సుదల్క తుమ్ ప్రేమ కెర్తె తా, చి తుమ్క విరోదుమ్ కెర్తనక చెంగిల్ దెకితె తా.

28 తుమ్క సాపెనల్ దెతనక, దేముడు జోవయింక చెంగిల్ దెకున్.” మెన తుమ్ ఇస్టుమ్ జా, చి తుమ్క దూసుప కెర్తనచి రిసా ‘చెంగిల్ తత్తు’ మెన తుమ్ ప్రార్దన కెర.

29 తుమ్చితె ఎక్కిలోక జవున్ కో జలెకు అన్నెక్లో గలి పెట్టెగిన, దెబ్బ కయ్లోసా తుక్లె తా, జోచి అన్నెక్ గలి కి జో అన్నెక్లో పెటతి రితి, జోచి పక్క పసులవున్. అన్నె, తుమ్చితె ఎక్కిలోచి కోటు జవున్ కో జలెకు అన్నెక్లో దెరన గెలె, జోచి సొక్క కి ఈంజో అన్నెక్లో దెర గెతి రితి జో అడ్డు కెర్పు నాయ్.

30 తుమ్చితె కో జలెకి కిచ్చో జవున్ నజిలె, దెంక. అన్నె, తుమ్చితెచో కేన్ జవున్ మాన్సుచి సామన్ అన్నెక్లో దెర గెలె, జో సంతోసుమ్ జలొసా “అంచి వస్తువ అంకదె” మెన జోచి సామన్ అన్నె నజన్పు నాయ్.

31 మాన్సుల్ తుమ్క కిసి కెరుక మెన తుమ్ ఇస్టుమ్ జస్తె గే, తూమ్ కి జోవయింక దస్సి చెంగిల్ కెర.

32 “ఎక్కి తుమ్క ప్రేమ కెర్తనకయ్ తుమ్ ప్రేమ కెర్తెగిన, అన్నె మాన్సుల్క నాయ్ మెలె, తుమ్క కిచ్చో పున్నిమ్ జా? పాపుమ్ సుదల్ కి జోవయింక ప్రేమ కెర్తనక ప్రేమ కెరుల.

33 తుమ్కయ్ చెంగిల్ దెకితనకయ్ చెంగిల్ కెర్తనక, అన్నె వేర మాన్సుల్క నాయ్ మెలె, జయి తుమ్క కిచ్చో పున్నిమ్? పాపుమ్ సుదల్ కి దస్సి కెరుల, గెద.

34 తుమ్క పూర్తి అన్నె దెంక సెక్తి తిలనకయ్ తుమ్ కిచ్చో జవున్ తోడు దిలె, అన్నె మాన్సుల్క నాయ్ మెలె, జయి తుమ్క కిచ్చో పున్నిమ్? తెద్దిలి అన్నె నజితి రితి పాపుమ్ సుదల్ కి ఒప్పున పాపుమ్ సుదల్క తోడు దెవుల.

35 “తూమ్, జలె, తుమ్చ విరోదుమ్ సుదల్క ప్రేమ కెర, చి ఎత్తిజిన్క చెంగిల్ దెక, చి కిచ్చో అన్నె దొర్కు కెరనుక ఆస నే జతె, మాన్సుల్క తోడు దాన. తుమ్ ఇసి బుద్ది ఇండిలె, తుమ్క వెల్లి బవుమానుమ్ దొర్కు జయెదె, చి ‘ఎత్తిచి ఉప్పిరి తిలొ దేముడుచ పుత్తర్లు ఈంజేవ్’ మెన తుమ్చి రిసా రుజ్జు జయెదె. కిచ్చోక మెలె, ఎక్కి జోచి దయ ఒప్పున్తనకయ్ మెన నాయ్, గని అన్నె జో కెర్లి దయ నే ఒప్పున్లనక కి, ఏక్ జోవయింకయ్ జెచ్చి దెకన్తనక కి, జో ఎత్తి అదికారుమ్ తిలొ దేముడు సొంత దయ దెకితయ్.

36 జో పరలోకుమ్ తిలొ అబ్బొసి జలొ దేముడు మాన్సుల్క కిసి కెర్ది కన్కారుమ్ దెకితయ్ గే, తుమ్ కి అన్నె మాన్సుల్క కన్కారుమ్ దెక.

మాన్సుల్క తీర్పు కెర్తిచి రిసా సంగిలిసి

(మత్త 7:1-5)

37 “అన్నె మాన్సుల్క కుస్సిదుమ్చ తీర్పుల్ తుమ్ ఉచర నాయ్, చి దేముడు తుమ్కయ్ తీర్పు కెర సిచ్చు కెరుక నాయ్. అన్నె మాన్సుల్క నేరిమ్లు వయడ నాయ్ చి, దేముడు తుమ్కయ్ నేరిమ్ వయడుక నాయ్. అన్నె మాన్సుల్క చెమించుప కెర చి, దేముడు తుమ్కయ్ చెమించుప కెరెదె.

38 అన్నె మాన్సుల్క తోడు దాన చి, దేముడు తుమ్కయ్ తోడు దెయెదె. కిసి దెయెదె మెలె, చెంగిల్ మీన, గట్టిజ పెల, దున్నొవ, పూర్తి బెరవయ్, తుమ్చి ఒట్టు సువ దెయెదె. తుమ్ అన్నె మాన్సుల్క కిసి మీన తస్తె గే, ఎత్తి అదికారుమ్ తిలో దేముడు తుమ్కయ్ దస్సి మీన దెయెదె.” మెన యేసు ఒత్త బెర తిలనక సంగిలన్.

39 తెదొడి యేసు ఈంజ టాలి సంగిలో. కిచ్చొ మెలె, “కేన్ జవున్ గుడ్డి సుదొ అన్నెక్కో గుడ్డి సుదొక వాల్ దెకవుక నెత్తె, గెద! వాల్ దెకవుక దెర్లె, జేవ్ దొగుల కి కేన్ జవున్ గొయితె సేడుల.

40 సిస్సుడు జోచొ గురుచి కంట వెల్లో నెంజె, గని జో గురుచి లెక పూర్తి సికిలో సిస్సుడు, జోచొ గురుచొ రితొ జా తయెదె.

41 “తుమ్చితె ఎక్కిలోచి అంకితె ఏక్ చిల్ప బెర తిలెగిన, బావొచి అంకితె ఇదిలిదిల్ తొక్కు. సేడ తిలెగిన, అంకితె చిల్ప తిలోసా కిచ్చొక జోచి బావొచి అంకితె తిలి ఇదిలిదిల్ తొక్కు దెకితసి, గని సొంత అంకితెచి చిల్పక ‘అస్సె’ మెన దెకిన్ నాయ్?

42 నెంజెలె, అంకితె చిల్ప తిలోసా కో జలెకు, జోచి సొంత అంకితెచి చిల్ప నే దెకిలె, బావొ, తుచి అంకితెచి తొక్కు కడిందె మెన తుచొ బావొక తుయి కిసి సంగుక జయెదె! తుయి ఉప్రమెస్సుచొ, తొలితొ తుచి సొంత అంకితెచి చిల్ప కడను, చి తెదొడెకయ్ తుచొ బావొచి అంకితెచి తొక్కు కడితి రితి బేంట దెకితె.

చెంగిలో రూకు మెన చి గర్చొ రూకు మెన టాలి

43 “కేన్ చెంగిలో రూకు జలెకు గర్చు పండ్లు దెరె నాయ్, చి గర్చొ రూకు చెంగిల్ పండ్లు దెరె నాయ్.

44 రూకుక చెంగిలోచొ గే గర్చొ గే చినుక జలె, జో దెర్లె పండ్లుక దెకిలె

డిసెదె. కంట రూకతె† అంజూరుమ్ పండ్లు కోడుక నెంజె, దుబ్బల్తె ద్రాచ పండ్లు కోడుక నెంజె, గెద!

45 చెంగిలో మాన్సు జోవయించి పెట్టిచి చెంగిల్ బుద్ది బెర్తుచి కెద్ది చెంగిల్ బుద్దిచ కొడొ లట్టబెదె. గర్చొ మాన్సు, జలె, జోచి పెట్టిచి విస్సుమ్చి బెర్తుచి గర్చు కొడొ లట్టబెదె. జోచి పెట్టి కేన్ రగుమ్చి బెర్తు జా తిలె, జయ్యి జోవయించి చోడి లట్టబెదె.

చెంగిల్ పునాదితె బందిలో గేరుక టాలి
(మత్త 7:24-27)

46 “ ‘ప్రబు, ప్రబు’ మెన అంక కిచ్చొక సంగితను? అంక దస్సి సంగితను, గని అంచి కోడు రితి ఇండున్ నాయ్.

47 కో అంచితె †జా కెర అంచ కొణ్ణా సూన అంచి కోడు రితి ఇండుల గే కిస జవుల గే ఏక్ టాలితె సంగిందె.

48 దసా మాన్సు కిసా జయెదె మెలె, గేరు బందిలో ఏక్ మాన్సు దీగుక గొయి కూన కెర, రెంగ్చిచి ఉప్పిరి పునాది గల కెర జా పునాదిచి ఉప్పిరి గేరు బందిలో. జలె, పాని గట్టిజ పెట, బూరుమ్ జా జో గేరుచ కుడ్డిలె జా బూరుమ్ కెర్లల్ జా గట్టిజ లయితె తిలె కి, జా గేరు చెంగిల్ డిట్టుమ్చి పునాదితె తిలి రిసా, ఎదిలి కి కదుల్ జయె నాయ్.

49 గని అంచి కోడు సూన్లె కి కో కెర్తి నాయ్ గే కిసి జవుల మెలె, జో మాన్సు పునాది నే కెర్తె, రితి మత్తిచి ఉప్పిరి గేరు బందిలో, చి పాని పెట బూరుమ్ జా అయ్లె, గేరుచి కుడ్డి బూరుమ్ కెర్లల్ జా అయ్లి బేగి జా గేరు సేడ్డి, చి జా గేరు పూర్తి నాసెనుమ్ జా గెలి” మెన యేసు బోదన కెర్లన్.

7

*పుంజెక్జిన్ జమాన్లుక వెల్లొచొ గొత్తి

† 6:44 6:44 అంజూరుమ్ పండ్లు బొడ్డ పండ్లు రిత జవుల

‡ 6:47 6:47 మెలె, ‘కో అంక నంప కెర....’

* 7: 7:1 పుంజెక్జిన్ చి ఉప్పిల్ అదికారి జా తిలోసా

నుదొక యేసు చెంగిల్ కెర్లిసి

(మత్త 8:5-13; యోహా 4:43-54)

1 ఈంజేవ్ కొడొ ఎత్కి ప్రైజల్ సూన్తి రితి సంగ కేడయ్లి పడ్డో, యేసు కపెర్నూహామ్ పట్టుమ్తె అన్నె గెచ్చు వెసిలన్.

2 జలె, ఒత్త రోమ్ దేసిమ్చి పుంజెక్జిన్ జమాన్లుక వెల్లో ఎక్కిలో తిలో. జోక ఒగ్గర్ ప్రేమ తిలో గొత్తి సుదొ ఎక్కిలో తిలన్. జో గొత్తి సుదొ గట్టిజ జొర్ణొ సేడ మొర్తి రితి జా తిలన్.

3 జలె, జో పుంజెక్జిన్ జమాన్లుక వెల్లో యేసుచి రిసా సూన కెర, యూదుల్చ వెల్లెల మాన్సుల్తె సగుమ్జిన్క యేసుతె తెద్రయ్లన్; యేసుక “జెపున్ చి అంచొ గొత్తి సుదొక చెంగిల్ కెర్లు” మెనయ్ జోవయించి అత్తి కబుర్ తెద్రయ్లన్.

4-5 జలె, జేవ్ వెల్లెల మాన్సుల్ యేసుతె జా కెర, “జో పుంజెక్జిన్ జమాన్లుక వెల్లోచొ గొత్తి సుదొక తుయి చెంగిల్ కెరుక జో తగుప జలొసా. కిచ్చొక మెలె, అమ్ యూదుల్చ ప్రైజల్క జో ప్రేమయ్ అస్సె, చి అమ్చి సబగేర్ జొయ్యి బందిలో” మెన, యేసుక బతిమాల్పా జా సంగిల.

6 జలె, యేసు జోవయింతెన్ బార్ జా గెలాచి. జో గెరి నే పాచితె అగ్గె ఇదిల్ దూరి తిలి పొది, జో పుంజెక్జిన్ జమాన్లుక వెల్లో మాన్సు, జోచ మితర్పుల్ సగుమ్జిన్క యేసుతె కబుర్ తెద్రయ్లన్. కిచ్చొ మెలె, “ప్రబు, అమ్చి రిసా తుయి అన్నె అల్లర్ సేడు నాయ్. తుయి అంచి గెరి జెంక మెలె, ఆవ్ తగుప జలొసా నెంజి.

7 అంక విలువ నాయ్ చి రిసా తుచితె సొంత జా దస్సుల్ జంక నిసాని నాయ్. గని ఒత్త తెంతో కి తుయి సెలవ్ కోడు సంగిలె, అంచొ గొత్తి సుదొ చెంగిల్ జయెదె.

8 ఆవ్ కిసి జాని మెలె, అవ్ కి అదికారుమ్క బితొసా, అంచి తెడి జమాన్లు అస్తి. ఆవ్ ఎక్కిలోక ‘గో’ మెలె,

గెచ్చెదె. అన్నెక్కోక ‘జె’ మెలె, జెయెదె. అంచొ గొత్తిమాన్సుక ‘ఈంజ కామ్, జా కామ్ కెరు’ మెలె, కెరెదె” మెన. జో పుంజెక్జిన్ జమాన్లుక వెల్లో జేవ్ వెల్లెల మాన్సుల్చి అత్తి సంగ తెద్రయ్లన్.

9 జలె, ఈంజ కోడు సూన కెర, జో పుంజెక్జిన్ జమాన్లుక వెల్లోచి నముకుమ్చి రిసా యేసు ఆచారిమ్ జలన్. అన్నె జోచి పట్టి జెత ప్రైజల్చి పక్క పసుల జోవయింక, “తుమ్క ఆవ్ కిచ్చొ మెంతసి మెలె, అమ్చ ఇస్రాయేలుల్తె ఎదిలి నముకుమ్ తిలసక అప్పె ఎద కి ఆవ్ దెకుక నాయ్” మెన సంగిలన్.

10 తెదొడి, కబుర్ అయ్లస జో పుంజెక్జిన్ జమాన్లుక వెల్లోచొ గెరి అన్నె కిచ్చొ దెకిల మెలె, జో గొత్తి సుదొ చెంగిల్ జా చెంగిల్ తిలిసి.

రండెల్ మాన్సు ఎక్కిలోచొ మొర గెల్లొ పుత్తున్క యేసు చెంగిల్ కెర్లిసి

11 ఒత్త తెంతో అన్నె కిచ్చొ జర్గు జలి మెలె, యేసు నాయీను మెలి పట్టుమ్తె గెచ్చుక మెన బార్ జలన్, చి జోవయించ సిన్సుల్ చి ఒగ్గర్జిన్ ప్రైజల్ జోవయింతెన్ గెలె.

12 జా పట్టుమ్చి కోటచి గుమ్ముమ్ పాసి పాచిలె, ఈందె, ఒత్త మాన్సుల్ ఏక్ పినుమ్ జా గుమ్ముమ్ వాట్ బయిలె వయ నెతె తిలె. జా పినుమ్ కచి మెలె, రండెల్ మాన్సు ఎక్కిలోచి ఎక్కిలో పుత్తుసి. జా పట్టుమ్చ ఒగ్గర్జిన్ మాన్సుల్ జా రండెలి తెన్ ఒత్త తిలె.

13 జలె, ప్రబు జా రండెలిక దెక జాచి ఉప్పిరి కన్కారుమ్ జలొ, చి “ఏడు నాయ్, అమ్మ” మెన సంగ కెర,

14 పినుమ్క పాసి జా, పినుమ్ వయిలి కట్టి చడిలన్, చి ఒత్త జేవ్ వయ నెతె తిలస టీచిలె. తెదొడి “నాడు, ఉట్టు మెన తుక ఆవ్ సంగితసి” మెన సంగిలన్.

15 జలె, జో మొర్లో †ఉబెడొ జీవ్ జా వెస కెర లట్టబుక మొదోల్ కెర్లన్, చి యేసు అయ్యున్క బుకారా కెర, “ఈందె, తుచో పుత్తుది” మెన జోక జాచి అత్తి అన్నె దిలో.

16 ఇసి జర్గు జతికయ్, ఒత్త తిల జనాబ్ ఎత్కిజిన్ బియఁ, యేసుచి రిసా “అమ్చి నెడిమి దేముడుచ కబుర్లు సంగితో గొప్పు కమొ కెర్తొసా బార్ జా అస్సె. వెల్లోచొ, ఈంజొ” మెన, అన్నె “ఎత్కి అదికారుమ్ తిలో దేముడు అమ్తె ఉత్త జా అస్సె” మెన, దేముడుచి గవురుమ్ సంగితె తిల.

17 ఒత్త తెంతో, జా దీసి యేసు జర్గు కెర్లన్చి రిసా ‡యూదుల్ జతి ఒండి దేసిమి, చి నుట్టునంతచ ఎత్కి గవ్వొలె ఎత్కిజిన్ సూన్.

బాప్తిసుమ్ దెతె తిలో యోహాను యేసుతె కబుర్ తెద్రయలిసి (మత్త 11:2-19)

18 జలె, బాప్తిసుమ్ దెతె తిలో యోహానుచ సిస్సుల్ జోతె గెచ్చ, యేసు జర్గు కెర్ల కమొ జోక సంగిల.

19 యోహాను, జోచ సిస్సుల్తె దొగులక బుకారా కెర, “దేముడు తెద్రవుక సంగ తిలో రచ్చించువ కెర్తొసా నిజమి తుయి గే, అమ్ అన్నెక్లోక రకుక గె? తుమ్ పుస” మెన కబుర్ తెద్రయలన్.

20 జలె, జేవ్ మాన్సుల్ యేసుతె జాఁ కెర, “దేముడు తెద్రవుక సంగ తిలో రచ్చించువ కెర్తొసా నిజమి తుయి గే, అమ్ అన్నెక్లోక రకుక గె?” మెన సంగ మెన “బాప్తిసుమ్ కిదెతో యోహాను అమ్క తుచితె తెద్రవ అస్సె.” మెన జా కబుర్ సంగిల.

21 జలె, జయ్యి గడియయ్ ఒగ్గర్జిన్ జబ్బుల్ బాదల్ తిలనక చి బూతల్

దెర్లనక యేసు చెంగిల్ కెర్లన్, చి ఒగ్గర్జిన్ గుడ్డి జలనక చెంగిల్ కెర్లన్.

22 తెదొడి యేసు జేవ్ కబుర్ అయలనక కిచ్చొ జబాబ్ దిలన్ మెలె, “తుమ్ యోహానుతె గెచ్చ కెర, తుమ్ దెకిలిసి, సూన్లిసి ఎత్కి జోక సంగ. గుడ్డి జా తిల మాన్సుల్ దెకితతి, సొట్ట జా తిల మాన్సుల్ ఇండితతి, వెల్లి రోగుమ్ సేడ తిలన చెంగిల్ జతతి, బోయ్ రల్ జా తిల మాన్సుల్ సూన్తతి, మొర గెలన జీవ్ జతతి, చి నుబుమ్ కబుర్ బీద మాన్సుల్క ఆవ్ సూనయ్తసి.

23 జలె, కో జలెకు అంచి రిసా అన్యానుమ్ నెంతె తవుల గే, జోవయింక చెంగిలి.” మెన యేసు యోహానుచ సిస్సుల్క సంగిలన్.

యోహానుచి రిసా ప్రెజల్క యేసు సంగిలిసి

24 యోహాను కబుర్ తెద్రవ తిలన ఉట్ట గెలి బేగి, జో యోహానుచి రిసా ఒత్త తిల ప్రెజల్క యేసు ఇసి మెన సంగుక దెర్లన్. “జేవ్ పొదులె తుమ్ కిచ్చొ దెకుక జా బయిలె గెచ్చ తిలదు? వాదుతె చివ్వర్ పెల్లి జతిసి దెకుక గెచ్చ తిలదు గె?

25 నాయ్ మెలె, కిచ్చొ వేరచి దెకుక గెలదు? సొమ్నార్లు గలంత పాలల్ గలన్లొ మాన్సుక దెకుక గెలదు గె? ఈందె, చెంగిల పాలల్ గలంత నుక్కుమ్ తెన్ జితన రానల్చ మేడల్తె తవుల.

26 జలె, కిచ్చొ దెకుక గెలదు? దేముడు తెద్రయలి కబుర్ సంగితో ఎక్కిలోక దెకుక గెలదు గె? నిజమి, గని జో ప్రబుచ మాములుమ్ కబుర్లు సంగితనచి కంట యోహాను అన్నె ముక్కిమ్చొ జయెదె మెన, తుమ్క ఆవ్ సంగితసి.

27 కిచ్చొక మెలె, ఈందె, అంచి కబుర్ సంగితో బారికి జతి రిత్తి ఎక్కిలోక తుచి పురె తెద్రయ్తసి.

† 7:15 7:15 జోవయిం చి వయసు విస్సెక్ చెత్తర్ వెర్పుల్క తకు నాయ్, దొస్సొ విసా వెర్పుల్క ఒగ్గర్ నాయ్ బెరె.

‡ 7:17 7:17 నెంజిలె ‘ఒండి యూదయ దేసిమి’. § 7:20 7:20 గని జా మదెనె యోహాను జేతె తిలన్. మత్తయి 11:2 దెక.

తుచి కంట అగ్గె గెచ్చు,
 తుయి జెతిసి సాట్టు కెరెదె
 మెన రెగిడ్డి కోడు అస్సె. జా కోడుతె
 'అంచి కబుర్ సంగితోసా' మెన ఈంజ
 యోహానుచి రిసాయి రెగ్గి జా అస్సె.

28 తుమ్క ఆవ్ కిచ్చొ మెంతసి మెలె,
 తేర్బోదల్క జెర్పిలసతె, యోహానుచి
 కంట వెల్లొచొ కోయి నాయ్. జలెకి,
 దేముడుచి రాజిమ్తె కో ఎత్కిచి కంట
 దాక్ జవుల గే, జో యోహానుచి కంట
 వెల్లొ జవుల" మెన యేసు ప్రెజల్క
 సంగిలన్.

29 జలె, ఈంజ కోడు మాములుమ్
 ప్రెజల్ ఎత్కిచి సిస్తు నజీత సుంకర్లు
 సూన కెరె, "ఎత్కి అదికారుమ్ తిలో
 దేముడుచ తీర్పుల్ సత్తిమ్చ" మెన
 ఒప్పున్. జేవ్, అగ్గె యోహానుచి అత్తి
 బాప్తిసుమ్ నజన తిల.

30 గని పరిసయ్యుల్ చి మోసే తెన్
 దేముడు దిలి ఆగ్గుల్ సికడ్డొసా సికడ్డన
 జోచి అత్తి బాప్తిసుమ్ నజీత్ నాయ్.
 యోహానుచి అత్తి బాప్తిసుమ్ జేవ్
 నజుక నెసిలిన్ తెన్ జోవయించి రిసాచి
 దేముడుచి *ఇష్టుమ్ జేవ్ నెసిలిన్చి
 రుజ్జు దెకవ తిల. అప్పె కి యేసుచి కోడు
 నెసిల.

అన్యానుమ్ జతనచి రిసా యేసు
 గోల కెర్రిసి

31 యేసు అన్నె, "ఈంజ ఉగుమ్చ
 మాన్సుల్చి బుద్దిక కిచ్చొ టాలి సంగుక
 జయెదె? జేవ్ కిసి జతతి?

32 వీదులె వెస కెల్ల బోదల్చ రిత
 జతతి. జేవ్ బోదల్ ఎక్కిలోచి ఉప్పిరి
 ఎక్కిలో అన్యానుమ్ జా,

* 7:30 7:30 మెలె, "క్రీస్తు రచ్చించువ కెర్రిసా జెతయెచి రిసా తుమ్ కెర్లె పాపల్క దుకుమ్ జా ఒప్పున ముల దా
 బుద్ది జా, చి జా గుర్లక బాప్తిసుమ్ నజన" మెనయ్ యోహాను బోదన కెరె బాప్తిసుమ్ దెతె తిలన్. పరిసయ్యుల్
 గట్ట దస్సి దాక్ కెరెన బుద్ది జంక నెసిల. ఎత్కి అదికారుమ్ తిలో దేముడు తెర్పుయ్లో రచ్చించువ కెర్రిసాక నంప
 కెరుక నెసిల. † 7:34 7:34 దేముడుచి కొణెతె అన్నె పూర్ణుమ్ రెగిడ్డినెతె "మాన్సు జా జెర్పున్ అయ్లోసా" మెన
 సంగిలె, 'తెర్పుయిందె' మెన ఎత్కి అదికారుమ్ తిలో దేముడు సంగిలో రచ్చించువ కెర్రిసా మెలి అర్దుమ్ తయెదె.
 దానియేలు 7:13 దెక. ‡ 7:35 7:35 నెంజలె, ఎత్కి అదికారుమ్ తిలో దేముడుచి బుద్ది కచి కచి పెట్టి తిలె,
 జా బుద్ది అన్నె మాన్సుల్తె దెకిలె, జాక జో దిలి బుద్ది మెన ఒప్పునుల. మత్తయి 11:19చి కోడు దెక. § 7:37
 7:37 పీరిమచి చెంగిల్ వాసెన తేలు, జా.

తుమ్క 'నచ్చుత్' మెన బచ్చి పుంగిలెకి
 నచ్చున్ నాయ్.

అమ్ ఏడ్లెకి, తుమ్ బెద ఏడ్డు నాయ్"
 మెన దన బోదల్ కిసి సంగుల గే, దస్సి
 ఆవ్ చి యోహాను కిచ్చొ కెర్లె కి, తుమ్
 మెన్సున్ నాయ్.

33 కిచ్చొక ఆవ్ ఇసి టాలి కెర్లెసి మెలె,
 బాప్తిసుమ్ దెతె తిలో యోహాను కిచ్చొ
 అన్నిమ్ నే కతె చువ్వె తతోసా, కిచ్చొ
 ద్రాచ రస్సుమ్ గట్ట నే పితె తన్నె తతోసా
 తుమ్తె అయ్లో, చి జోచి రిసా "జోక
 బూతుమ్ దెర అస్సె." మెంతసు.

34 ఆవ్ జలె, †మాన్సు జా జెర్పున్
 అయ్లోసా, మాములుమ్ కతె పితె
 తతిన్చి రిసా తుమ్ కిచ్చొ మెంతసు
 మెలె, " అదె, కయ్రో మత్వాలో ఈంజో.
 సిస్తు నజీత సుంకర్లు తెన్ పాపుమ్
 సుదల్ తెన్ బెదితోసా" మెన, అంచి రిసా
 సంగితను.

35 ‡గని కచి కచి పెట్టి దేముడుచి
 బుద్ది తిలె, జేవ్ ఎత్కిజిన్చ కమొచి
 పలితుమ్తె రుజ్జు జయెదె" మెన యేసు
 సంగిలన్.

పరిసయ్యుడుచి గెరి యేసు అన్నిమ్
 కంక గెతికయ్

36 పరిసయ్యుడు జలొ ఎక్కిలో
 యేసుక అన్నిమ్క బుకార్లన్, చి జో
 పరిసయ్యుడుచి గెరి గెచ్చు. జా దేసిమ్చ
 సామ్నార్లువ గెరలె అన్నిమ్క కిసి ఒర్లు జా
 బల్లయ్ కవుల గే, దస్సి, అన్నిమ్ కతన
 ఎత్కిజిన్ తెన్ యేసు కి ఒర్లు జలన్.

37 జలె, ఈందె, లంజె జితె తిలి జా
 పట్టుమ్చి తేర్బోద ఎక్లి యేసుక 'జో'
 పరిసయ్యుడుచి గెరి అన్నిమ్ కంక గెచ్చు

అస్సె' మెన సూన కెర, ఏక్ బుడ్డితె కి అత్తర్ తేల్ దెరన అయిలె.

38 యేసుచి పడ్డొ జోచ చట్టుక పాసి టీవ వంపొ జా ఏడుక దెర్లి, చి జాచి ఆసునొ నువి జతికయ్ యేసుచ చట్టు తిమిలచి, జాచి నెండి తెన్ జా తేర్బోద జోచ చట్టొ పుంచ, జోక చుంబ కెర, జా అత్తర్ తేలు గాసిలి.

39 జలె, యేసుక బుకారా తిలో పరిసయ్యుడు జా ఎత్కి దెక కిచ్చొ ఉచర్లన్ మెలె, "ఈంజొ నిజుమి ఎత్కి అదికారుమ్ తిలో దేముడుచ కబుర్లు సంగితొసా జలె, జోక చడితి తేర్బోద కొన్ని జయెదె, కీసిచి జయెదె గే జాన్తో. ఇన్నెక 'పాపుమ్ సుది' మెన జాన్తో."

40 జలె, జో ఉచర్లని జాన కెర, యేసు జోక కిచ్చొ జబాబ్ దిలన్ మెలె, "ఓ సీమోను, తుక ఏక్ కోడు సంగిందె" మెన సంగిలన్, చి "కిచ్చొ, గురుబాబు? సంగు" మెన సీమోను సంగిలన్.

41 సంగితికయ్, యేసు ఏక్ టాలి సంగిలన్. "ఏక్ సావుకారితె దొగుల రునుమ్ జా తిల. జేవ్ దొగులతె ఎక్కిలో పాచ్ వుంజొ *పొదుల్చి కూలిచి ఎదిలి డబ్బుల్క బాకి జా అస్సె, అన్నెక్కో యాబయ్ పొదుల్చి కూలిచి ఎదిలిక బాకి జా అస్సె.

42 జేవ్ జోవయించి రునుమ్ కుట్టవుక నెత్తిర్లి రిసొ, సావుకరి దొగులచి రునుమ్కి ముల దా చెమించుప కెర్లన్. జలె, తుయి సంగు, ఈంజేవ్ దొగులతె కేన్ మాన్సు జో సావుకరిక ఒగ్గర్ ప్రేమ జయెదె?" మెన యేసు జో సీమోనుక పరిచ్చ కెర్లన్, చి

43 జో కిచ్చొ జబాబ్ దిలన్ మెలె, "ఒగ్గర్ బాకి జా తిలోసా, కిచ్చొగె" మెలన్, చి "తుయి సరిగా ఉచర్లది" మెన యేసు జోక సంగ కెర,

44 జా తేర్బోదచి పక్క పసుల సీమోనుక అన్నె ఇసి మెలన్: "ఈంజ

తేర్బోదక దెకితసి గె? జలె, ఆవ్ తుచి గెరి అయిలయ్, గని ఆవ్ చట్టొ దొవన్తి రిసొ తూయి పాని దెసి నాయ్. ఈంజ, జలె, ఇన్నెచి ఆసునొ తెన్ అంచ చట్టొ దోవ అస్సె, చి ఇన్నెచి నెండి తెన్ పుంచ అస్సె.

45 తూయి అంక చుంబిన్ నాయ్, గని ఆవ్ ఈంజ గెరి అయిలి తెంతొ ఈంజ అంచ చట్టొ చుంబుక దెర ములె నాయ్.

46 అంచి బోడి తూయి తేల్ కి నువిన్ నాయ్. గని ఈంజ అంచ చట్టెలె అత్తర్ తేలు గాన దా అస్సె.

47 జాచి రిసొ తుక ఆవ్ కిచ్చొ మెంతసి మెలె, ఇన్నెచ పాపల్ ఒగ్గర్ జా తిలె కి, చెమించుప జా అస్తి. ఈంజ చెమించుప జలిన్క కిచ్చొ రుజ్జు మెలె, ఇన్నెచి ఒగ్గర్ ప్రేమయ్ జా రుజ్జు దెకయ్తయ్. గని కక్క తొక్కి పాపుమ్ చెమించుప జా తయెదె గే, జోచి పెట్టి తొక్కి ప్రేమ తయెదె" మెన యేసు జో పరిసయ్యుడుక సంగ కెర,

48 జా తేర్బోదక, "తుచ పాపల్ చెమించుప జా అస్తి" మెలన్.

49 జో దస్సి మెంతికయ్, జోవయింతెన్ అన్నిమ్ కెర్తె తిలన జోవయించి పేట్ తెడి కిచ్చొ మెల మెలె, "ఈంజొ పాపల్ చెమించుప కెర్తయ్ జలె, ఈంజొ కొన్నె?" మెన పేట్ తెడి ఉచర్లన్.

50 జలె, "తుయి అంచి ఉప్పిరి తుచి నముకుమ్ తిలి రిసొ రచ్చించుప జా అస్సిసి. సేంతుమ్ తెన్ గో." మెన యేసు జా తేర్బోదక సంగిలన్.

8

యేసు తెన్ బుల సగుమ్జిన్ కెర్తె సావైచన

1 ఈంజ ఎత్కి జర్లు జా ఒగ్గర్ దీసల్ నే గెతె అగ్గె, యేసు బార్ జా పట్టలె గవ్విలె

* 7:41 7:41 ఎక్కి దేసారము ఎక్కి పొదుల్చి కూలి

బుల బుల, దేముడుచి *రాజిమ్చి రిసాచి †సుబుమ్ కబుర్ బోదన కెర్తె తిలో. జో తెన్ జోచ బారజన్ సిస్సుల్ బుల్తె తిల.

2 అన్నె కొన్న మెలె, యేసు అగ్గె సగుమ్జిన్ జబ్బుల్ తిల తెర్బోదల్చ జబ్బుల్ గెచ్చవ చెంగిల్ కెర తిలన్, సగుమ్జిన్ తెర్బోదల్క బూతల్ దెర్తికయ్ ఉదడ జోవయింక కి చెంగిల్ కెర తిలన్. జేవ్ తెర్బోదల్తె సగుమ్జిన్, జలె, యేసు తెన్ సిస్సుల్ తెన్ బుల్తె తిల. జోవయింతె ఎక్కి కొన్ని మెలె, మగ్గల పట్టుమ్చి మరియ, జాక దెర్ల సత్తు బూతల్క యేసు ఉదడ తిలన్.

3 అన్నె కొన్న మెలె, హేరోదు రానొచి గేర్క దెకితో కూజా మెలోసాచి తేర్చి యోహన్న, వడ్డో సూసన్న చి అన్నె ఒగ్గర్జిన్, జోవయింక తిలి సొంత డబ్బుల్క యేసుక చి సిస్సుల్క సావ్రెచన కెర్తె తిల.

ఉంపిలి బీక టాలి

4 ఒగ్గర్జిన్ జనాబ్ కుప్పల్ కుప్పల్ బెర జా, పట్టల్ ఎత్కి గావ్చో ఎత్కి తెంతో యేసుతె అయ్లి. జో ఏక్ టాలి జోవయింక సంగిలన్.

5 “ఎక్కిలో జోచి బీ ఉంపుక బార్ జలన్. ఉంపితె తతికయ్, సగుమ్ బీ బయిలె వట్టి సేడ్లన్, చి వట్టి జెతన గెతన జా బీ నుదిల, చి పిట్టల్ జేవ్ దాన్ వెంట కా గెల.

6 అన్నె సగుమ్ బీ పత్తురు బుయ్యో సేడ్లన్ చి, తెడి సాల్వ నాయ్ చి రిసా గజ్జల్ జలెకి, డడ్డ మొర గెల.

* **8:1 8:1** ‘ఎత్కి అదికారుమ్ తిలో దేముడుచి రాజిమ్’ మెలె, ‘పరలోకుమ్’ ఏక్ అర్దుమ్, గని అన్నె కిచ్చొ మెలె, జో పరలోకుమ్ తెంతో ఏలువ కెర్తెసి. జో ఏలువ కెర్తెసి మెలె, ఉగుమ్ మార్పువ జలెకయ్ ఎదార్దుమ్ ఈంజ లోకుమ్తె ఏలువ కెరెదె, గని మదెనె కి 1. జోవయింక నంపజల మాన్సుల్చి పెట్టి జో ఏలువ కెర్తయ్, చి 2. జోవయింక అత్తనక్తి ఈంజ లోకుమ్తె కామ్ కెర్తయ్. † **8:1 8:1** ‘ఎత్కి అదికారుమ్ తిలో దేముడుచి రాజిమ్చి రిసాచి సుబుమ్ కబుర్’ మెలె, జోవయింక రాజిమ్ పాచ జా అయ్లిన్చి కబుర్, మత్తయి 12:28, మార్కు 1:15, వడ్డో జో పాపల్ చెమింఛువ కెర్తెన్చి కబుర్, యేసుయి దొర్కు జలో రచ్చింఛువ కెర్తెసా జలిన్చి కబుర్, వడ్డో పరలోకుమ్తె గెతి అవ్కాసుమ్ జో దొర్కు కెర్తి రచ్చనచి రిసాచి కబుర్. ‡ **8:10 8:10** యెసయా 6:9. § **8:10 8:10** మత్తయి 13:13, 15 దెక. జేవ్ మాన్సుల్ దెకిలెకి సూన్లె కి జోవయింక ఇస్టుమ్ నాయ్; జోవయింక పెట్టి బీడు బందెల్ రితి, చి “జోవయింక ఇస్టుమ్ నెంజెలె, కిచ్చొక జోవయింక రితి సంగుక?” మెలి రితి సంగితయ్. * **8:11 8:11** నెంజెలె ‘సుబుమ్ కబుర్’; మార్కు 1:14. నెంజెలె ‘యేసుచి బోదన’; మత్తయి 4:17. † **8:12 8:12** మెలె, సయ్తాన్ తెంతో, పాపుమ్ తెంతో.

7 అన్నె సగుమ్ బీ కంట దుబ్బుల్తె సేడ్ల చి, కంట దుబ్బుల్ తెన్ వడ్డితికయ్, కంట మొక్కల్ ఈంజేవ్ మొక్కల్క పెల గెల్తికయ్, ఈంజేవ్ మొక్కల్ పలితుమ్ దెర్తి నాయ్.

8 అన్నె సగుమ్ బీ చెంగిల్ బుయ్యో సేడ్లన్ చి, వడ్డ పంటో పికిలె, పుంజెక్ వంతుల్ పలితుమ్ దిలి” మెన సంగ యేసు అన్నె, “సూన్త కండ్లో తిలన సూన!” మెన కేక్ గలన్.

9 జలె, వేర మాన్సుల్ ఉట్టి గెతికయ్, “ఈంజ టాలిచి అర్దుమ్ కిచ్చో?” మెన యేసుక సిస్సుల్ పుసీల చి,

10 జోవయింక, “దేముడుచి రాజిమ్చి రిసాచ గుట్టుల్ జాన్సుప మెన, అంచ సిస్సుల్ జతి తుమ్క నెలవ్ దా అస్సె, గని వేర మాన్సుల్చి రిసాయి టాలివో తెన్ సంగితసి. కిచ్చొక మెలె, పూర్గుమ్ దేముడుచి కొడెతె †రెగిడ్లి రితి. తుమ్ దెకుతను, గని అర్దుమ్ చినుతు నాయ్, ఆవ్ సంగితి బోదన సూన్తు, గని అర్దుమ్ కెరంతు నాయ్.” §

ఉంపిలి బీచి టాలిచి అర్దుమ్ యేసు సంగిలిసి

11 “జలె, జా టాలిచి అర్దుమ్ సంగిందె. తుమ్ సూన, బీ మెలె, దేముడు దిలి *కోడు.

12 వట్టి సేడ్ల గిడ్డల్చి అర్దుమ్ కిచ్చొ మెలె, సగుమ్జిన్చి బోదన సూన అన్చి, గని సయ్తాన్ జా కెర, జోవయింక పెట్టి తెంతో జా బోదన ఉర్ల కెర, వచ్చుడ్తయ్;

‘నంపజా †రచ్చించువ జతు నాయ్’ మెన.

13 పత్తురు బుయ్యో సేడ్డి బీ జలె, సగుమ్జిన్ సుబుమ్ కబుర్ నూన్లి పొది సర్లసంతోసుమ్ తెన్ సూన్తతి గని, జోవయించి పెట్టి సుబుమ్ కబుర్చ చెర్రో నెంజలి రిసా గడియ నంపజలి రితి జలెకి, జోవయించి నముకుమ్ పిట్టయ్తి రితి కిచ్చొ జవున్ అల్లర్ అయ్లె, నముకుమ్ ముల దెతతి.

14 జలె, కంట దుబ్బుల్తె సేడ్డి బీ కిచ్చొ మెలె, సగుమ్జిన్ సూన్తతి గని, జేవ్ జోవయించి వట్టె గెతె తా, ఈంజ లోకుమ్చి జీవితమ్చ బాదల్, సొమ్సారుమ్, సుక్కుమ్ జోవయింక పెల్లితయ్ చి, జోవయించి పంటొ పికె నాయ్.

15 జలె, చెంగిల్ బుయ్యో ఉంపిలిన్ కిచ్చొ మెలె, సగుమ్జిన్ సుబుమ్ కబుర్ చెంగిల్ నిదానుమ్ పేట్ తెన్ సూన, దెరన, జా కోడ్ రితి నిదానుమ్ ఇండ బాదల్ ఓర్పుప జా ఆత్మపలితుమ్ దెరుల.

దీవు లగితిన్క టాలి కెర యేసు సంగిలి బోదన (మార్కు 4:21-25)

16 “ఏక్ దీవు లంబడ తిలె, జా దీవుక ఆరి లంబడ్డి రితి నాడిచి తెడి జవున్ కో డంకితి నాయ్, మంచుమ్చి తెడి జవున్ కో లుంకడ్డి నాయ్. జా దీవుకంబుమ్చి ఉప్పిరి తివుల; ‘ఓత్త తిలె, గెరి జెత ఎత్తిజిన్క, జా ఉజిడి కామ్క జెవున్’ మెనయ్.

17 లుంకాడ తిలిసి ఎత్తి వడ్డొక డీసెదె, అప్పె గుట్టు తిలిసి ఎత్తి జాన్తి రితి జా బార్ జయెదె.

18 “జలె, తుమ్ కిసి సూన్తె గే జాగర్త దెకన. కిచ్చొక మెలె, తిలోనాక ‡ అన్నె

దెంక జయెదె, గని నెంజిలోసా జలె, ‘అంక అన్నె’ మెన జో ఉచరంతిసి కి జోతె తెంతొ కడ నెంక జయెదె” మెన యేసు సంగిలన్.

“దేముడు దిలి కోడు నంపజా కో ఇండుల గే జెచ్చొ అంచి కుటుంబుమ్” (మత్త 12:46-50; మార్కు 3:31-35)

19 ఏక్ దీసి యేసుచి అయ్యసి జోవయించి కిబావుడ్డివో జోతె అయ్ల, గని యేసు తిలి గదితె ఒగ్గర్జిన్ జనాబ్ బెర తిలి రిసా, జోతె పావుక నెత్తిర్.

20 జలె, “తుచి అయ్యది, తుచ బావుడ్డివో తుక దెకుక మెన జా కెర, వీదె టీవ అస్తి” మెన కో గే యేసుక సంగిలన్.

21 గని జో జోవయింక, “అంచి అయ్య, అంచ బావుడ్డు కో జవుల మెలె, దేముడుచి కోడు సూన జయ్యి రితి కెర్తసయ్” మెన సంగిలన్.

దోనితె గెతికయ్ ఒగ్గర్ వాదు కెర్తల్ కెర్లిన్క యేసు సేంతుమ్ కెర్లిసి (మత్త 8:23-27; మార్కు 4:35-41)

22 ఏక్ దీసి యేసు జోచ బారజిన్ సిస్సుల్ తెన్ దోనితె వెగ కెర, “గాడు ఒత్తల్తో గెచ్చుమ, జొమ్మ” మెన సంగిలన్, చి జినుక దెర్ల.

23 జలె, నెడిమి గడ్డె పావెలిత యేసు నిజ గెలన్. తెదొడి వాదు పాసి గట్టిజ కెర, జేవ్ తిలి పక్క ఉడ్డ అయ్లి చి, కెర్తల్క దోనితె ఒగ్గర్ పాసి బెర్తికయ్, ప్రమాదుమ్ జతి.

24 జేవ్, యేసుక పాసి జా “*ప్రబు, ప్రబు, అమ్ మొర గెచ్చుమ్దే!” మెన సిస్సుల్ కేక్ గల ఉట్టయ్తికయ్, జో ఉట్ట వాదుక చి కెర్తల్క గోల కెర్లన్, చి వాదు

† 8:18 8:18 ఈంజ టాలిచి అర్దుమ్ కిచ్చొ మెలె, అంచితె సిక కో బుద్ది దెరసుల గే, జోవయింక అన్నె ఒగ్గరి సికడెందె. గని సూన్లె కి కో బుద్ది అనన్ నాయ్ గే, చి అర్దుమ్ కెరన అన్నె మెన జో ఉచర్లె కి, జోవయింక కామ్క నెంజి మెన, జా కి జోతె తెంతొ కడ నెంక జయెదె. § 8:19 8:19 మెలె ఎత్తి అదికారుమ్ తిలో దేముడుచి సుద్ది తిలి ఆత్మసెక్తిక మరయి యేసుక అంగి జా పాయిలెకి, పడ్డె మాములుమ్ మున్నున్ జలో యోసిపు తెన్ అన్నె

‡ బోదల్ పాయ తిలి. * 8:24 8:24 నెంజిలె ‘బాబు, బాబు’.

ముల దిల, చి ఎత్తి అన్నె నేంతుమ్ జా గెలి.

25 తెదొడి యేసు జోవయింక, “తుమ్చి నముకుమ్ కేతె?” మెలన్, చి బియఁ గెచ్చ, ఆచారిమ్ జా, ఎక్కిలోక ఎక్కిలో కిచ్చొ మెల మెలె, “ఈంజొ కొన్నొ జయెదె, చి వాదుక పానిక ఆడ్రల్ దిలె ఇన్నెచి కోడుక లొంగుప జా కెర్తతి?” మెన జేవ్ ఆచారిమ్ జల.

బూతల్ దెర్లొ మాన్సుక యేసు చెంగిల్ కెర్లెసి

(మత్త 8:28-34; మార్కు 5:1-20)

26 జలె, యేసు సిస్సుల్ తెన్ గాడు జీన గలిలయచి మొక్కెచి గాడు ఒత్తల్తోచి గెరాసీనుల్చి ప్రాంతుమ్తె ప్పాచ్చిల.

27 యేసు దోని తెంతొ ఉత్త కెర ఒడ్డుతె టీవితికయ్, జా గవ్విచొ ఎక్కిలో జోవయింక దస్సుల్ జలన్. జో మాన్సుక బూతల్ దెర తిల. ఒగ్గర్ దీసల్ జలి జో కిచ్చొ పాలల్ గలనె నాయ్, చి కేనె జితె తిలన్ మెలె, గెరి నాయ్, గని మెస్సున్తె.

28-29 జో బూతుమ్ జో మాన్సుక ఒగ్గర్ సుట్టు దెర తిలన్, చి అగ్గె గవ్విచ జోక చట్టెలె అత్తిలె గొల్పుల్ బంద రకితె తిల, గని జేవ్ గొల్పుల్ కుట్టవనెదె, చి జో బూతుమ్ జోక బయిలు టాన్తె పెలవ నెయెదె. జలె, బూతుమ్ దెర్లొ జో మాన్సు అప్పె యేసుక దెక కెర, కేక్ గల జోచి చట్టె సెర్పు సేడ్లన్, చి “ఓ బూతుమ్, ఈంజొ మాన్సుచి తెంతొ బార్ జా తుయి ఉట్ట గో!” మెన యేసు ఆడ్ర దిలన్. జో మాన్సు గట్టిజ అవాడ్ కెరన, “ఓ యేసుప్రబు, ఎత్తిచి ఉప్పిరి తిలొ దేముడుచొ పుత్తుసి తుయి, అంచి తెన్ తుక కిచ్చొ కామ్? అంచి ఉప్పిరి దయ తియ అంక అల్లర్ కెర్ను నాయ్!” మెన కేక్ గలన్.

30 తెదొడి, “తుచి నావ్ కిచ్చొ?” మెన యేసు బూతుమ్క పుసిలన్, చి

† “ఎతివాట్జిన్” మెలన్. కిచ్చొక మెలె, ఒగ్గర్జిన్ బూతల్ జోక దెర తిల.

31 “జా వెల్లి †గొయ్యితె అమ్క తెద్రవు నాయ్” మెన యేసుక బతిమాల్పా జా సంగిల.

32 జలె, జా మెట్టయ్ వెల్లి మంద అండ్రుల్ కతె తిల, చి “అండ్రుల్చి తెన్ అమ్ పెసిత్తే రితి అమ్క సెలవ్ దె.” మెన యేసుక జేవ్ బూతల్ బతిమాల్పా జా సంగితికయ్, జో సెలవ్ దిలన్.

33 తెదొడి జో మాన్సుచి తెంతొ బూతల్ బార్ జా ముల దా, అండ్రుల్ తెన్ పెసిల, చి జా అండ్రుల్ మంద మొత్తుమ్ ఒత్తచి గాటిక నిగ ఉత్త గెచ్చ, గడ్డె సేడ డుజ మెుర గెల.

34 జా అండ్రుల్ మంద రకితస జర్గు జలిసి దెక కెర, బమ్మ జా నిగ గెచ్చ, ఒండి పట్టుమ్తెచి సుట్టునంతచ గవ్వొ ఎత్తితె సూనయ్ల.

35 తెదొడి జర్గు జలిన్చి రుజ్జు సొంత దెకుక మెన ప్రెజల్ ఎత్తి బార్ జల, చి యేసుతె జా కెర కిచ్చొ దెకిల మెలె, బూతల్ ముల దిలొ మాన్సు యేసుచి చట్టె వెన అస్సె. పాలల్ గలన తా అప్పె వెర్రి నెంతె మాములుమ్ చెంగిల్ బుద్ది తెన్ అస్సె, మెన దెక కెర, బియఁ గెల.

36 అన్నె, జర్గు జలి పొది దెక తిల మాన్సుల్, జలె, బూతల్ దెర తిలొ మాన్సుక యేసు కిసి చెంగిల్ కెర్లొ గే జేవ్ పడ్డొ అయ్లసక సంగిల.

37 తెదొడి జేవ్ గెరాసీనుల్చి ప్రాంతుమ్ ఎత్తిచ మాన్సుల్ ఎత్తిజిన్ “అమ్చి దేసిమ్ తుయి ముల దా ఉట్ట గో” మెన యేసుక బతిమాల్పా జా సంగిల. కిచ్చొక మెలె, జోవయింక ఒగ్గర్ బయిమ్ దెర తిలి. జాకయ్ యేసు దోనితె వెగ ఉట్ట గెలన్.

38 బూతల్ ముల దిలొ మాన్సు, జో నే గెతె “ఆవ్ కి తుచి తెన్ బెద జెంక అంక

† 8:30 8:30 నెంజలె, ‘జమాన్లుచ ఎట్లయ్జిన్’. ‡ 8:31 8:31 డీసయ్లిసి 9:1, 20:3 దెక. ఆగి గొయ తెన్ బెదితి మాటు నెంజలి గొయ, జా.

సెలవ్ దె” మెన బతిమాల్పా జా సంగిలన్.
గని యేసు జోక,

39 “తుచి గెరి గో చి, దేముడు తుక చెంగిల్ కెర ఎదివాట్ దయ కెర్లిసి ఒత్త సంగు” మెన యేసు తెద్రవ దిలన్ చి, జో ఉట్ట గెచ్చ, యేసు జోక ఎదివాట్ దయ కెర్లిన్చి రిసా జా ఒండి పట్టుమ్తె సూనయ్లన్.

యాయారు మెలో అదికారి యేసుచి తోడు నజీలిసి

40 యేసు గాడు అన్నె జిన గట్టుతె పావితికయ్, జో అన్నె జెతినక రక తిల చి రిసా ప్రెజల్ ఒగ్గర్జిన్ జోక దస్సుల్ జల.

41 జలె, యాయారు మెలో ఎక్కిలో ఒత్త అయ్లో. జో యూదుల్చి నబగేర్చొ అదికారి జయెదె. జో యేసుచి చట్టె సెర్ను సేడ్లన్, అన్నె “అమచి గెరి జె” మెన యేసుక బతిమాల్పా జా సంగిలన్.

42 కిచ్చొక మెలె, జాక బార వెర్సుల్ వయసుచి ఎక్కి దువిసి, మొరెదె గే జయెదె గే, దస్సి జా తిలి.

జలె, యేసు జో అదికారి తెన్ గెల, చి వట్టె ఒగ్గర్జిన్ ప్రెజల్ జోచి సుట్టునంత తా పెలవులి జతె తిల.

43 జలె, బార వెర్సుల్ తెంతో లోయి గెతి బాద తిలి తేర్బోద ఎక్కి ఒత్త తిలి. కో కి జాచి బాద గెచ్చవుక నెత్త గెచ్చ తిల.

44 జా, జలె, యేసుచి పడ్డొ జా పాసి జా, జోచి పాలుమ్చి కొంగు చడిలి చి, బేగి జా లోయి గెతిసి బండు జా గెలి.

45 దస్సి జతికయ్, “కో అంక చడిలన్?” మెన యేసు పుసిలన్ చి, పేతురు యేసుక “గురుబాబు, జనాబ్ ఎత్తి తుచి సుట్టునంత బెర పెలవులి జతతిచి లయడ్ జతతి, గెద” మెలన్,

46 “గని అంక చడుక మెన, కో గే అంక చడిలన్. అంచి తెంతో ఆత్మసెక్కి బార్ జా గెచ్చ అస్సె.” మెన యేసు సంగిలన్.

47 జలె, జా కెర్లిసి గుట్టు తయె నాయ్, మెన జా తేర్బోద చిన కెర, అద్దుర్ జా యేసుచి చట్టె సెర్ను సేడ్లన్,

అన్నె “‘అంచి బాద గెస్సు’ మెన తుక చడిలయ్ చి, చడిల్ బేగి చెంగిల్ జలయ్” మెన ఎత్తిజిన్ ప్రెజల్చి మొక్కె ఒప్పున్లన్.

48 ఒప్పున్తికయ్, యేసు జాక, “పుత్త, అంచి ఉప్పిరి తుయి నముకుమ్ తిలి రిసా, తుయి కిచెంగిల్ జా అస్సిని. సేంతుమ్ తెన్ గో” మెలన్.

49 జా తేర్బోదక యేసు దస్సి సంగితె తిలి పొది, దువిన్చి రిసా యేసుతె జా తిలో అదికారిచి గెర్చ సగుమ్జిన్ జా కెర, జో అదికారిక “తుచి నాడి మొర గెచ్చ అస్సె. ఈంజొ గురుబాబుక బుక్కార్లె లాబుమ్ నాయ్. జోక జా బాద పోని” మెన సంగిల.

50 యేసు ఈంజ కొడు సూన, “జేవ్ సంగిలిన్క కాతర్ నే కెర్తె, తుయి బి నాయ్. నంపజా దయిరిమ్ తెన్ తా చి, తుచి నాడి చెంగిల్ జయెదె.” మెలన్.

51 జలె, యాయారుచి గెరి పావిలె, పేతురుక యోహానుక చి యాకోబుక, చి నాడిచి అయ్యున్అబ్బొన్క పిట్టవ, అన్నె కోయి జో తెన్ జా నాడి తిలిన్తె గెచ్చుక యేసు ఒప్పె నాయ్.

52 నాడి మొర గెలి రిసా ఎత్తిజిన్ ఏడుకుడు జతె తిల, గని “తుమ్ ఏడ నాయ్. ఈంజ మొర గెచ్చె నాయ్. జా నిజ అస్సె.” మెన సంగిలన్.

53 జాకయ్ జా నాడి ‘నిజుమి మొర గెచ్చ అస్సె’ మెన జాన కెర, జోక జేవ్ ఆన గెల.

54 గని జో, జా నాడి తిలిన్తె గెచ్చ కెర, జాచి ఆతు దెర, “నాడి, ఉట్టు!” మెలన్.

55 జాచి జీవ్, జాచి పెట్టి అన్నె అయ్లిచి, బేగి ఉట్టి. తెదొడి “ఇన్నాక తుమ్ కిచ్చొ జలెకు కవడ” మెన యేసు సంగిలన్.

56 జా నాడిచ అయ్యుసిని బలే ఆచారిమ్ జల, గని “జర్లు జలిసి కక్క సంగ నాయ్” మెన యేసు ఆడ్ర దిలన్.

9

హేరోదు అదికారి చి ప్రజల్ సగుమ్జిన్ యేసుచి రిసా ఉచర్లిసి (మత్త 14:1-12; మార్కు 6:14-29)

బారజిన్ సిస్సుల్క యేసు అదికారుమ్ దా బులుక తెద్రయ్లిసి (మత్త 10:5-15; మార్కు 6:7-13)

1 వడ్డొ, యేసు జోవ బారజిన్ సిస్సుల్క ఎక్కితె బుకారా కెర, ఎత్కి రగల్ బూతల్క జేవ్ ఉదడ్డి రిసా, జబ్బుల్ జేవ్ గెచ్చయ్తి రిసా జోవయింక సెక్తి అన్నె అదికారుమ్ దిలన్.

2 అన్నె, “దేముడుచి *రాజిమ్ పాచ జా అయ్లిన్చి రిసా తుమ్ బోదన కెర చి, మాన్సుల్చ జబ్బుల్ గెచ్చవ” మెన తెద్రయ్లిన్.

3 తెద్రయ్తె పొది ఇసి మెలన్: “ప్రయానుమ్చి రిసా కిచ్చొ దెరన గెచ్చ నాయ్. టెక్కి డండొ జలెకు, సెంచె జలెకు, అన్నిమ్ జలెకు, డబ్బుల్ జలెకు, దొన్ని సొక్కల్ జలెకు దెరన గెచ్చ నాయ్.

4 వడ్డొ కేన్ గెరచ తుమ్క టాన్ దెవుల గే, తుమ్ జా గావ్ జవున్ ములై ఎదక, జయ్యి గెరి బన జా తా.

5 అన్నె, కేన్ పట్టుమ్తె జవున్ తుమ్క †మరియాద కెర్తి నాయ్ గే, జా పట్టుమ్ తెంతొ బార్ జతె పొది ‘జేవ్ దస్సి జలి రిసా దేముడుచ ‡నెంజితి’ మెన గుర్తుక తుమ్చ చట్టొచి దూడి పంట్లన గెల” మెన యేసు సంగిలన్.

6 తెదొడి జేవ్ బారజిన్ సిస్సుల్ బార్ జా గావ్వొ ఎత్కితె బుల బుల, చి రిసా బోదన కెరై తా, మాన్సుల్చ జబ్బుల్ గెచ్చయ్తె తిల.

7 జా పొది, గలిలయ ప్రాంతుమ్తె ఏలుప కెర్తొ అదికారి హేరోదు, యేసు జర్గు కెర్ల కమొ ఎత్కిచి రిసా నూన్లి రిసా, కిచ్చొ ఉచరుక నేన కెర బాద సేడ్డొ. కిచ్చొక మెలె, యేసుక “యోహాను మొర తా అన్నె జివ్ జా అన్నె” మెన సగుమ్జిన్ సంగితె తిల,

8 గని అన్నె సగుమ్జిన్ “పూర్లుమ్ దేముడుచ కబుర్లు సంగిలో కీవలీయా అన్నె జా అన్నె” మెల, చి అన్నె సగుమ్జిన్ “పూర్లుమ్ దేముడుచి కబుర్లు సంగిలో అన్నెక్లొ మొర, అన్నె జివ్ జా అన్నె జా అన్నె” మెన ఉచర్తె తిల.

9 జా ఎత్కి నూన కెర, హేరోదు, “యోహానుక *బోడి గండల్ కెర గెలయ్, గని ఈంజేవ్ కమొ కెర్తొసొచి రిసా ఆవ్ ఒగ్గర్ నూన్తసి. ఈంజొ కొన్సొ జయెదె?” మెన, యేసు తెన్ దస్సుల్ జంక మెన వాటు చజితె తిలో.

యేసుచ బారజిన్ బారికుల్ అన్నె ఉట్ట అయ్లిసి (మత్త 14:13-21; మార్కు 6:30-44; యోహా 6:1-14)

10 యేసుచ బారజిన్ †బారికుల్, జలె, జేవ్ బులుక మెన జో తెద్రయ్లిన్ తెంతొ అన్నె ఉట్ట జా, జేవ్ జర్గు కెర్లిసి ఎత్కి జోక సంగిల చి, జో వేరతె జోవయింతెన్ గడియ తతి రితి, బేత్పుయిదా మెంతి గచ్చి జోవయింక కడ నిలన్.

పావ్ వెయిల్జిన్ మాన్సుల్క యేసు అన్నిమ్ దిలిసి

* 9:2 9:2 మత్తయి 10:7. యేసు అయ్లిన్ తెన్ జా రాజిమ్ పాచ జా అన్నె మెనుక జయెది. ఈంజ మదెనె డీసె నాయ్, గని జోవయింక సంపజల మాన్సుల్చి పెట్టి జో ఏలుప కెర్తయ్, చి అప్పొ కి ఈంజ లోకుమ్తె జోవయించి అత్తసెక్తి కామ్ కెర్తయ్. ఉగుమ్ మార్పుప జలె, జోవయించి రాజిమ్ పూర్తి డీసెది. † 9:5 9:5 నెంజితి ‘బెదపంతి నాయ్’. ‡ 9:5 9:5 నెంజితి, ‘జోవయించి కోపుమ్ జోవయించి ఉప్పిరి అన్నె’ § 9:8 9:8 ఏలీయా పూర్లుమచొ మొరి నాయ్, గని ఎత్కి అదికారుమ్ తిలో దేముడు జోవయింక దస్సి పరలోకుమ్తె కడ నిలన్. రాసల్ దొన్నిచి పుస్తకుమ్ 2:11. * 9:9 9:9 మత్తయి 14:10, మార్కు 6:27, 28. † 9:10 9:10 లూకా 6:13-16 దెక. సగుమ్తె ‘బారజిన్ సిస్సుల్’ మెన అన్నె. జేవ్ ఈంజేవ్ ఎక్కి. తెలుగు-అపోస్తలులు

11 జలె, జోవయింక 'ఒత్త బేత్తయిదాతె గెతయ్' మెన యేసుచి రిసా ప్రెజల్ జనాబ్ నూన కెర, జోచి పట్టి గెల. జోతె పావితికయ్, జో జోవయింక పాసి కెరన్లన్ చి, దేముడుచి ఃరాజిమ్చి రిసా జోవయింక బోదన కెర, జోవయింతె జోర్జొల్, బాదల్ తిలసక చెంగిల్ కెర్లన్.

12 జలె, పొద్దు గెచ్చుక దెర్లి చి, యేసుచ బారజిన్ సీసిస్సుల్ జోతె జా కెర, "ఈంజేవ్ జనాబ్ అన్నిమ్ దొర్కు కెరంతి రితి, నిద్ద తతి రిసా ఇన్నెక సుట్టునంతచ గెవ్విలె తెద్రవు బయిలు దేసిమి అస్సుమ్, గెద. ఇన్నె కిచ్చోయ్ దొర్కు జయె నాయ్" మెల,

13 గని జో జోవయింక, "తుమి జోవయింక కిచ్చో జవున్ అన్నిమ్ దాస" మెలన్. దస్సి మెంతికయ్, జేవ్ "అమ్చితె ఎక్కి పాచ్ పోడియె చి దొన్ని మొస్స అస్తి. నెంజిలె, అమ్ గెచ్చు ఈంజేవ్ ఎత్తిజిన్క అన్నిమ్ గెన ఆసుక గె?" మెల.

14 జా జనాబ్తెచ మున్నుబోదల్ కెత్తిజిన్ జవుల మెలె, పాచ్ వెయిల్జిన్. గని యేసు సిస్సుల్క "యాబయ్ జిన్క ఏక్ దవుని, యాబయ్ జిన్క అన్నెక్ దవుని, దస్సి దవుని దవునివొ తెన్ జేవ్ ఎత్తిజిన్క వెసడ" మెన సంగిలన్.

15 జేవ్ దస్సి కెర ప్రెజల్ ఎత్తిజిన్క వెసడ్ల.

16 తెదొడి యేసు జేవ్ పాచ్ పోడియె చి దొన్ని మొస్స దెర, ఆగాసుమ్ పక్క దెక, 'ఈంజ తూయి దిలది' మెన దేముడు అబ్బొన్క జోబర సంగ కెర, జేవ్ పోడియె మోడ కెర, "ఎత్తిజిన్క వంట దాస" మెన సిస్సుల్చి అత్తి సార్వు కెర దిలన్.

17 జేవ్ ఎత్తిజిన్ పేట్ బెర్దు కయ్ల చి, సేంసెల పోడియె గండల్ మొస్స

గండల్ బార గంవల్తె బెర్దు జల.

యేసుక 'క్రీస్తు' మెలో జెంక తిలో రచ్చించుప కెర్లొసా (మత్త 16:13-19; మార్కు 8:27-29)

18 ఏక్ సుట్టు, యేసు ఎక్కిలోయి ప్రార్దన కెర్తె తిలన్, గని జోచ బారజిన్ సిస్సుల్క ఒత్తయ్ తిల, చి "కొన్సొ మెన ప్రెజల్ అంక సంగితతి?" మెన యేసు సిస్సుల్క పుసిలన్.

19 పుసితికయ్, "బాప్తిసుమ్ దెతె తిలో యోహాసు" మెన సగుమ్జిన్ తుక సంగితతి. అన్నె సగుమ్జిన్ తుక "దేముడుచి కబుర్లు సంగిలో ఏలీయా జా తయెదె" మెంతతి చి, అన్నె సగుమ్జిన్ "దేముడుచి కబుర్లు సంగిలో అన్నెక్లో పూర్గుమ్చో జీవ్ జా అమ్చితె జా అస్సె." మెంతతి మెల.

20 జేవ్ దస్సి మెంతికయ్, యేసు "తుమ్, జలె, కొన్సొ మెన అంక సంగితను?" మెన జోవయింక పుసిలన్ చి, "తెద్రయిందె" మెన దేముడు సంగ తిలో క్రీస్తు మెలో రచ్చించుప కెర్లొసా తుయి" మెన పేతురు జబాబ్ దిలన్.

21 గని "జా కోడు అన్నె కక్క కి సంగ నాయ్" మెన జోవయింక యేసు కచితుమ్ తెన్ ఆడ్ర దిలన్.

22 అన్నె జో, "ఆవ్ *మాన్సు జా జెర్మున్ అయ్లోసా ఒగ్గర్ సైమల్ సేడుక అస్సె. †వెల్లెల సుదల్, వెల్లెల పూజర్లు చి, మోసే తెన్ దేముడు దిలి ఆగ్గుల్ సికడ్డన అంక 'జవున్ నాయ్' మెనుక అస్సె చి, ఆవ్ మొరుక అస్సె. గని తిర్తెత్ ఆవ్ అన్నె జీవ్ జా ఉట్టుక అస్సె" మెన యేసు సంగిలన్.

దేముడుచి రాజిమ్ (మత్త 16:21-28; మార్కు 8:30-9:1)

‡ 9:11 9:11 4:43చి ఎట్టచి కోడు, చి 9:2 దెక. § 9:12 9:12 నెంజిలె 'బారికుల్'. * 9:22 9:22 5:24చి ఎట్టచి కోడు దెక. † 9:22 9:22 వెల్లెల మాన్సుల్, వెల్లెల పూజర్లు చి మోసే తెన్ దేముడు దిలి ఆగ్గుల్ సికడ్డన మొత్తుము యూదులచి వెల్లి నబ వెసెతన జవుల. వెల్లెల మాన్సుల్తె వరినయ్యుల్ చి నడ్డూకయ్యుల కి తవుల.

23 తెదొడి ఎత్తిజీనక యేసు, “కో అంక సంపజా అంచి పట్టి బులుక ఉచరుల గే, జోచి సొంత ఇస్తుమ్ కెరుక ముల దా, రోజుక జోచి సొంత సీలువ వయన అంచి పట్టి బులుక అస్సె.

24 కిచ్చొక మెలె, జోచి సొంత ప్రానుమ్ రచ్చించుప కెరనుక కో కోర్ప జవుల గే, జోచి ప్రానుమ్ పాడ్ జా గెచ్చెదె. గని అంచి రిసా కో జోచి ప్రానుమ్ దెతి రితి ఎక్కి మెన్ను నిదానుమ్ ఇండుల గే, జోచి ప్రానుమ్ రచ్చించుప జయెదె.

25 మెలె, ఈంజ లోకుమ్తె తిలిసి ఎత్తి కేన్ మాన్ను జవున్ కలుగు కెరన జోచి ప్రానుమ్ పాడ్ కెరన్లెగిన, జేవ్క సిచ్చు జలెగిన, జోక కిచ్చొ లాబుమ్? కిచ్చొ లాబుమ్ నాయ్.

26 కో జలెకు అంచి రిసాచి అంచ కొణెచి రిసా లాజ్ జా సత్తిమ్ నే ఒప్పునుల గే, ఆవ్ మాన్ను జా జెర్మున్ అయ్లోసా పరలోకుమ్ గెచ్చు అంచి అన్నె అబ్బొసి జలొ దేముడుచి దూతల్చి పరలోకుమ్చి ఉజిడెచి గవురుమ్ తెన్ ఈంజ లోకుమ్తె అన్నె ఉత్ర జెతి దీసిక, జేవ్ మాన్సుల్క ‘అంచ’ మెన ఒప్పున్తి రితి అంచి తెన్ బెదవనుక అంక లాజ్ తయెదె.

27 గని తుమ్క ఆవ్ కిచ్చొ కచితుమ్ సంగితసి మెలె, ఇన్నె టీచ తిలన సగుమ్జిన్ నే మొరై అగ్గె దేముడుచి కిరాజిమ్ దెకుల” మెన యేసు సంగిలన్.

త్రిగ్ల సిస్సుల్చి మొక్కె యేసు గడియ పరలోకుమ్చి ఉజిడి జలిసి (మత్త 17:1-8; మార్కు 9:2-8)

28 జలె, యేసు ఈంజేవ్ కొణె సంగ పాసి పాసి అట్టు దీసల్ గెతికయ్, ప్రార్దన

కెరుక మెన, పేతురుక యోహానుక చి యాకోబుక వట్టె కడ దెరన, యేసు డొంక తిలి మెట్టయ్ గెచ్చు వెగిల.

29 యేసు ప్రార్దన కెరై తతికయ్, జోచి *మొకొమ్ మార్పుప జలన్ చి, జోచ పాలల్ చొక్కిల జా దగదగాల్న మెర్పుప జల.

30 అన్నె, ఈందె, దొగుల మున్నుబోదల్ డీస యేసు తెన్ లట్టబ్బ. కొన్న మెలె, పూర్ముచ దేముడుచి కబుర్లు సంగిత మోసే అన్నె ఏలీయా తిల.

31 జేవ్ పరలోకుమ్చి ఉజిడె తెన్ డీసిల చి, కిచ్చొచి రిసా లట్టబ్బె తిల మెలె, దేముడుచి కోడు తెన్ రెగిడ్లి రితి యేసు †మొరుక తిలిన్చి రిసా, జో మొర్తిసి ‡ఉట్ట గెతిసి యెరూసలేమ్తె జర్లు జంక తిలిన్చి రిసా.

32 పేతురు చి జోపయింతెన్ తిల దొగుల గూన్క నిజ తిల గని, అన్నె చెద్దొయి జలె. యేసు పరలోకుమ్చి ఉజిడి జలిసి చి, జో తెన్ జేవ్ దొగుల పూర్ముచ టీచిలిసి దెకిల.

33 జలె, జేవ్ పూర్ముచ యేసుక ములుక దెర్లి పొది పేతురు యేసుక “గురుబాబు, అమ్ ఇన్నె తతిసి చెంగిలి. తుక ఏక్, మోసేక ఏక్, ఏలీయాక ఏక్ మొత్తుమ్ తిన్ని కుడియల్ బందుమ్దె” మెలన్, గని జో కిచ్చొ సంగితయ్ గే నేనె.

34 జలె, జో ఇని సంగితె తతికయ్, మబ్బు ఏక్ ఉత్ర జా జోవయింక డంకిలన్ చి, డంకి జతికయ్, సిస్సుల్ బియఁ గెల.

35 మబ్బు తెంతొ “ఈంజొ అంచొ పుత్తు, అవ్ కినిసాన్లసా. ఇన్నెచి కోడు తుమ్ నూన” మెన జా మబ్బు తెంతొ

‡ 9:23 9:23 ‘సిలువ’ మెన కిచ్చొక సంగితయ్ మెలె, యేసుక విరోదుమ్ సుదల్ కిసి మారుల మెలె, జోవయింక ‘సిలువ’ మెలిన్తె అత్తిలె పట్టెలె మేకుల్ పెట టీచడ మొర్తి రితి ములుల. జోవయింక జా సిలువతె నే టీచడై అగ్గె, వట్టె గెతె తిలి పొది, జోవయింక సొంత సిలువ జోవయింక మార్పిన్తె యేసు గడియ సొంత వయక తియార్ల; యోహాను 19:17. పడ్డొ నీమోసు మెలొ ఎక్కిలొ వయతి రితి తియార్ల; మార్కు 15:21. సిలువ మెలె, డేడిక అన్నెక్ డేడి రితి డండొ అడ్డుమ్ కెర బుయ్యె రోవ టీచడుల. § 9:27 9:27 మత్తయి 16:28, చి మార్కు 9:21 దెక. * 9:29 9:29 మత్తయి 17:2. † 9:31 9:31 ఈంజ లోకుమ్చ మూన్నుల్చ పాపల్ వయన గెచ్చయి తి రిసా. ‡ 9:31 9:31 మొరై, అన్నె జివ్ జా, పరలోకుమ్తె కి ఉట్ట గెచ్చెదె. § 9:35 9:35 నెంజిలె, ఈంజ మత్తెలి రెగిడ్ల తొలితొచ సగుమ్ పున్కల్తె ‘ఆవ్ ప్రేమ తిలోసా’ మెన రెగ్ల అస్సె.

అవాడే సంగిలిసి సూన్లు.

36 జలె, జా కోడు సంగ కేడయలి బేగి, యేసు ఎక్కిలోయి జేవ్ తీగ్గ సిస్సుల్ తెన్ తిలో. జలె, జర్గు జలిన్చి రిసా సిస్సుల్ తుక్లె తా, జేవ్ పొదులె కక్క కి జేవ్ దెకిలిన్చి రిసా ఎక్కి కోడు కి సంగితి నాయ్.

మార్పు సేడ్తె తిలో బూతుమ్ దెర్లో నాడుక యేసు చెంగిల్ కెర్లిసి

(మత్త 17:14-18; మార్కు 9:14-27)

37 అన్నెక్ దీసి, జేవ్ మెట్టయ్ తెంతో ఉత్త జెతికయ్. ఒగ్గర్జిన్ జనాబ్ యేసుక దస్సుల్ జలె.

38 ఈందె, జేవ్ జనాబ్తెచొ మాన్సు కేక్ గలో. “గురుబాబు, అంక ఎక్కిలో పుత్తు. జోక దెకు, మెన తుక ఆవ్ బతిమాల్పా జతసి!

39 ఈందె, ఏక్ బూతుమ్ జోక దెరుక అలవాట్ అస్సె చి, కెయ దెర్లె, ఈంజొ కేక్ గలన ఒర్నెదె చి, బూతుమ్ జోక పొర్లువ కెరెదె చి, చోడివాట్ ఈంజొ పొగుర్లు బార్ కెరవంతయ్ చి, ఇన్నెక ఒగ్గర్ అల్లర్ కెర పూర్తి అల్పు కెర కస్టనె ముల ఉట్ట గెతయ్.

40 అన్నె బూతుమ్క ఉడడ దాస మెన తుచ సిస్సుల్క బతిమాల్పా జా సంగితె తిలయ్, గని జేవ్ నెతిర్ల” మెన జో మాన్సు యేసుక సంగిలన్.

41 సంగితికయ్, యేసు కిచ్చొ జబాబ్ దిలన్ మెలె, “నముకుమ్ నెంజిలి వెర్రి బుద్దిచి కాలుమ్చ, తుమ్. తుమ్చి తెన్ ఆవ్ కెత్తి దీసల్ తంక? కెత్తి దీసల్ తుమ్క ఆవ్ ఓర్పువ జంక? అల్లె, జో నాడుక అంచితె కడ ఆను!” మెన సంగిలన్.

42 జలె, జో నాడు పాసి జెతె తతికయ్, బూతుమ్ జోక పొర్లు కెరవ గిజ్జిగిజ్జిల్ కెరయలన్. గని యేసు జో బూతుమ్క

గోల కెర్లన్ చి, జో నాడుక చెంగిల్ కెర, అబ్బొన్చి అత్తి జోక అన్నె సార్లు కెర్లన్,

43 “దేముడు అమ్చొ కెర్ది సెక్తి అదికారుమ్చొ!” మెన ఎత్కిజిన్ జోచి ఆచారిమ్ సంగితె తిల చి, యేసు జర్గు కెర్లిన్చి రిసా ఎత్కిజిన్ జోచి ఆచారిమ్ సంగితె తతికయ్, యేసు జోచ బారజిన్ సిస్సుల్క,

44 “ఆవ్ అప్పె సంగితిసి తుమ్ చెంగిల్ సూన. మెలె, ఆవ్ మాన్సు జా జెర్మున్ అయ్లోసాక విరోదుమ్ నుదల్ అన్నె మాన్సుల్చి అత్తి సార్లు కెర దెంక అస్సె” మెన సంగిలన్.

45 గని జా కోడుచి అర్దుమ్ జోవయింక జయె నాయ్. జేవ్ జా అర్దుమ్ నే కెరంతి రితి ఎత్కి అదికారుమ్ తిలో దేముడు లుంకడ్లన్ చి, యేసుక పుసుక బియఁ తుక్లె తిల.

“అమ్చితె కో వెల్లో జయెదె?”

(మత్త 18:1-5; మార్కు 9:33-37)

46 జలె, “అమ్చితె కో వెల్లో ముక్కిమ్ జయెదె?” మెన సిస్సుల్ లట్టబన ఇదిల్ గగ్గోల్ జలె.

47 గని జోవయించి పెట్టి ఉచర్లిసి యేసు చిన కెర, ఏక్ బాలబోదక దెర, జోచి పక్క టీచడ,

48 జోవయింక ఇసి మెలన్. “* ఈంజొ బాలబోదక జవున్ అంచి నావ్ తెన్ కో జలెకు మరియాద కెరెదె గే, అంకయ్ మరియాద కెర్లి రితి జయెదె. అన్నె, కో జలెకు అంకయ్ మరియాద కెరుల గే, అంక తెర్దయ్లో దేముడు అబ్బొక కి మరియాద కెర్లి రితి జయెదె. తుమ్ ఎత్కిజిన్తె కో దాకు కెరనెదె గే, జోయ్యి వెల్లో జయెదె” మెన జోవయింక సంగిలన్.

బూతల్క ఉడడ్లొ ఎక్కిలోచి రిసా సిస్సుల్ ఆచారిమ్ జలిసి

(మార్కు 9:38-40)

* 9:48 9:48 మార్కు 9:37 దెక.

49 తెదొడి యోహాను మెలో సిస్సుడు యేసుక కిచ్చొ మెన సంగిలన్ మెలె, “గురుబాబు, ఎక్కిలో తుచి నావ్ తెన్ బూతల్క ఉదడ్డిసి దెకిలమ్. జో అమ్చి తెన్ తుచి పట్టి గెతోసా నెంజెచి రిసా జోక ఆటంకుమ్ కెర్లమ్” మెన సంగిలన్.

50 గని యేసు జోవయింక, “జోక ఆటంకుమ్ కెర నాయ్. కిచ్చొక మెలె, కో తుమ్చి కామ్చి ఉప్పిరి విరోదుమ్ కెరె నాయ్ గే, తుమ్చి పచ్చెన జతోసా జయెదె” మెన యేసు సంగిలన్.

సమరయ ప్రదేసిమ్చి ఏక్ గవ్వెచ మాన్సుల్ యేసుక టాన్ నే దిలిసి

51 ఒత్త తెంతొ కిచ్చొ జర్లు జలి మెలె, యేసు మొర్తి పరలోకుమ్తె అన్నె గెతి సమయుమ్ పాసి జా అయ్లి పొది, ‘యెరూసలేమ్తె అప్పె ఉట్ట గెచ్చుక అస్సె’ మెన జాన కెర బార్ జలన్, అన్నె వట్టె గెతె తా,

52 ‘అంక టాన్ తెయార్ కెర్తు’ మెన, సగుమ్జిన్క యేసు పురై కబుర్ తెద్రయ్లన్. దస్సి మెన జేవ్ గెచ్చ, సమరయ సుదల్చి ఏక్ గవ్వె గెల.

53 గని జా గవ్వెచ ప్రెజల్ యేసుక టాన్ దెంక నెసిల. కిచ్చొక మెలె,† యెరూసలేమ్తె గెచ్చుక జోచి ఉద్దెసుమ్.

54 ‘జా గవ్వెచ దస్సి బుద్ది తెన్ అస్తి’ మెన యేసుచ సిస్సుల్ యాకోబు చి యోహాను దెక కెర, కిచ్చొ మెల మెలె, “ప్రబువ, ఇన్నెక డయ గెలి రితి ఆగాసుమ్ తెంతొ ఆగి ఆనవుమ గె?” మెన పుసిల.

55 గని యేసు పసుల జోవయింక †గోల కెర్లన్.

56 జోచ సిస్సుల్ తెన్ తోడ్ అయ్ల తేర్బోదల్ తెన్ వట్టె గెచ్చ, అన్నెక్ గవ్వె గెల.

యేసు తెన్ బుల్లన ఎక్కి మెన్సు తెన్ తంక మెన సంగిలిసి
(మత్త 8:19-22)

57 యేసు సిస్సులీసి తెన్ వట్టె గెతె తతికయ్, ఏక్ మాన్సు యేసుతె జా కెర, “తుయి కేనె గెలె కి, అవ్ కి తుచి తెన్ బెద జెయిందె” మెన యేసుక సంగిలన్ చి,

58 యేసు జోక, “నక్కల్క పార్లు, ఆగాసుమ్చ పిట్టల్క గూడలు, గని ఆవ్ మాన్సు జా జెర్మున్ అయ్లోసాక బోడి వంపొ కెర్తి టాన్ నాయ్” మెన జబాబ్ దిలన్.

59 అన్నెక్లొక, “అంచి పట్టి జె” మెలన్, గని “ప్రబు, ఆవ్ తుచి తెన్ నే జెతె అగ్గె గెచ్చ కెర, అంచొ అబ్బొ మొర గెతె ఎదక జోక పోస కెర, జో మొర్తె జోక రోవ గెలుక మెన, అంక సెలవ్ దె” మెన సంగిలన్.

60 యేసు జోక కిచ్చొ సంగిలన్ మెలె కి, “మొర్లన జోవయించ సొంత మొర్లనక రోవ గెల్ల, గని తుయి కిచ్చొ కెరుక అస్సె మెలె, ‘దేముడుచి రాజిమ్ పాచ జా అస్సె’ మెన, తుయి గెచ్చ, జా రాజిమ్చి రిసాచి సుబుమ్ కబుర్ బోదన కెరు” మెన ఆడ్ర దిలన్.

61 ఒత్త తెంతొ అన్నెక్లొ “తుచి పట్టి జెయిందె, ప్రబు. గని తోలితో ఆవ్ గెరి గెచ్చ, గెర్చ మాన్సుల్క ఆవ్ సంగ జెతి రితి సెలవ్ దె” మెన యేసుక సంగిలన్.

62 జోక యేసు, “కో జెలెకు నాజెల్ దెర కేసుక మొదోల్ కెర పడ్డె దెకితె తిలె, జో మాన్సు దేముడుచి రాజిమ్చి కామ్క నెంజె” మెన జబాబ్ దిలన్.

† 9:53 9:53 యెరూసలేమ్తె యేసు గెలె కిచ్చొక జేవ్ సమరయ సుదల్ కోపుమ్ జతతి మెలె, “ఎత్తి, అదికారుమ్ తిలో దేముడుక బక్తి కెరుక మెలె, ఎక్కి అమ్చి యెరూసలేమ్చి దేముడుచి గుడితె సత్తిమ్ బక్తి కెరుక జయెదె” మెన యూదుల్ సంగితతి, అన్నె సమరయ సుదల్క నిస్కారుమ్ ఉచర్తతి, చి రిసా జా కోపుమ్క యెరూసలేమ్తె గెతనక మరియాద దెతి నాయ్. † 9:55 9:55 ఈంజ మత్తెలి తోలితో రెగిడ్ల సగుమ్ పున్లకల్తె ఇసి అస్సె: గోల కెర, తుమ్చి బుద్ది కేనె తెంతొ చి గే నేస్సు. కిచ్చొక మెలె, ఆవ్ మాన్సు జా జెర్మున్ అయ్లోసా కిచ్చొక అయ్లయ్ మెలె, మాన్సుల్చ జివతుమ్క పాడ్ కెరుక నాయ్, గని జోవయింక రచ్చించువ కెరుకయ్ అయ్లయ్ మెలన్.

10

డబ్బయ్జిన్ మాన్సుల్ దొగుల దొగులక యేసు తెద్రయ్లినీ

1 ఇన్నెచి పడ్డె యేసు అన్నె *డబ్బయ్జిన్ మాన్సుల్క నిసాన, జేవ్ దొగుల దొగుల బార్ జా, జో గెచ్చుక తిలి ఎత్తి పట్టుమ్, ఎత్తి టాన్తె జేవ్ పుర్రె గెచ్చుక మెన జోవయింక తెద్రయ్లన్.

2 తెద్రయ్లి పొది జోవయింక, "గట్టిజ పంటో పిక †లాయితి కాలుమ్ జా అస్సె‡. పంటో బలేగ ఒగ్గర్ అస్సె, గని పికిల్ పంటో లాయ ఆన్తి రిసా దస్సి ఆన్త మాన్సుల్ తొక్కిజిన్ అస్తి. జాకయ్, ఈంజ పంటో లాయితసక బార్ కెర తెద్రవు" మెన ఈంజ పంటో పికడ్డె ఎజోమానిక తుమ్ ప్రార్దన కెర.

3 అల్లె, బార్ జా గెచ్చు. ఈందె, నక్కల్చి నెడిమి మెండ పిల్లల్క తెద్రయ్లి రితి తుమ్క ఆవ్ తెద్రయ్తసి.

4 డబ్బుల్ నెంచె జవున్, జోడ్లు జవున్ దెరన గెచ్చు నాయ్, అన్నె వట్టె సమయుమ్ పాడ్ కెర్తి రితి కచి తెన్ లట్టబా నాయ్.

5 అన్నె, కేన్ గెరి తుమ్ గెతె గే బేగి, "ఈంజ గేరుచి ఉప్పిరి దేముడుచి సేంతుమ్ తవున్!" మెన తుమ్ సంగ.

6 జా గెరితె సేంతుమ్చొ మాన్సు తిలె, తుమ్ సంగిలి సేంతుమ్ జోవయించి ఉప్పిరి తయెదె. గని దసొ మాన్సు నెంజిలె, తుమ్ ఆన్లి సేంతుమ్ ఒత్త నే తయెదె, పసుల తుమ్చితె అన్నె బుల జెయెదె.

7 జలె, కేన్ సేంతుమ్ గెర్చ తుమ్క టాన్ దిలె జయ్యి గెరి తా, వేరచితె ఉట్ట గెచ్చు నాయ్. అన్నె, తుమ్ ఒత్త తిలె పొది, జేవ్ దెతిసి కతె పితె తా జా గెరి తా, కిచ్చొక మెలె కామ్ కెర్తొసా జోచి

* 10:1 10:1 సగుమతె 'డబ్బయ్దొన్సిజిన్' మెన రెగ్ల అస్సె. † 10:2 10:2 యోహాను 4:35-38 దెక. ‡ 10:2 10:2 మాన్సుల్ సుబుమ్ కబుర్ నూన అంక నంపజా దేముడుచి రాజిమెతె బెదితి కాలుమ్ జా అస్సె. S 10:12 10:12 సొదొమ పట్టుమ్ పూర్ణుమ్ కిసి నానసుమ్ జలి మెలె, ఎత్తి అదికారుమ్ తిలొ దేముడు జా పట్టుమ్చి ఉప్పిరి ఆగి సువ దిలన్. ఆదికాండుమ్ 13:12, చి 18:20-19:29.

జీతుమ్ న్జనుక నాయిమ్. గేర్ గేర్ బుల నాయ్.

8 తుమ్ కేన్ పట్టుమ్ గెలె కి, జేవ్ తుమ్క మరియాద కెర, జేవ్ తుమ్క కిచ్చొ దిలెకి జా కా.

9 అన్నె, జా పట్టుమ్చ జొర్జొల్ జబ్బుల్ తిల మాన్సుల్క చెంగిల్ కెర చి, "దేముడుచి రాజిమ్ తుమ్క పాసి జా అస్సె." మెన జోవయింక బోదన కెర.

10 గని కేన్ పట్టుమ్ తుమ్క కిచ్చొ మరియాద కెర్తి నాయ్ గే, జా పట్టుమ్చ వీదులె తుమ్ గెచ్చు, ఇసి మెన సంగ.

11 "అమ్చ చట్టెలె లంబిలి తుమ్చి పట్టుమ్చి దూడి కి తుమ్చి బుద్దిచి ఉప్పిరి సాచి తతి రితి పంప్త దా ఉట్ట గెతనుమ్. గని కిచ్చొ కోడు తుమ్ ఉచరన మెలె, దేముడుచి రాజిమ్ పాసి జా అస్సె మెన తుమ్ సాచి సంగ.

12 తుమ్క ఆవ్ కిచ్చొ మెంతసి మెలె, ఈంజ లోకుమ్చ మాన్సుల్క వెల్లి తీర్పు కెర్తి దిసి అయ్లె, సొదొమ మెలి పూర్ణుమ్ కుడ్డె కీనానెనుమ్ జలి పట్టుమ్చి గత్తిచి కంట, తుమ్క మరియాద నే కెర్తి కేన్ పట్టుమ్చచి ఉప్పిర్ ఒగ్గర్ సిచ్చు జయెదె" మెన యేసు సంగిలన్.

తిన్ని పట్నల్క యేసు గట్టిజ గోల కెర్తిసి

(మత్త 11:20-24)

13 "అయ్యె! కొరాజినా పట్టుమ్చ చి బేత్నయిదా పట్టుమ్చ, తుమ్చి సిచ్చ కెర్తి! తుమ్చి నెడిమి ఆవ్ కెర్ల కమ్మె అమ్చ యూదుల్ నెంజిల తూర్చు చి సీదొను మెల పట్నలె ఆవ్ కెర్తయ్ జలె, జేవ్ పట్నల్చ మాన్సుల్, జేవ్ కెర్ల పాపల్క రిసా అగ్గెయి దుకుమ్ జా ములిత, జేవ్ కెర్ల పాపల్చి రిసాచి దుకుమ్క బస్తల్ బందన, సార్ గాంసన

వెన తా జేవ్ జోవయించి పాపుమక దుకుమ్ జలిన్చి రుజుల్ దెకయత.

14 గని పూర్ణమ్ జేవ్ తూరు పట్టుమ్చ కి సీదోసు పట్టుమ్చ కి ఒగ్గర్ పాపుమ్ కెరై తిలి కి, ఈంజ లోకుమ్చ ఎత్తిజిన్కవెల్లి తీర్పు కెర్తి జా దీసి తుమ్క జతి సిచ్చ జేవ్ పట్నల్ జతి సిచ్చచి కంట ఒగ్గరి జయెదె.

15 పడ్డై తూమ్, కపెర్నహూమ్ పట్టుమ్చ మాన్సుల్, తుమ్ *పరలోకుమ్తె ఉక్కిల్ జస్తె గె? నాయ్, గెద, తుమ్ వెల్లి ఆగి గోయ్తె ఉత్త గెతె” మెన యేసు సంగిలన్.

16 తెదొడి యేసు జోచ సిస్సుల్క, “తుమ్చి కోడు కో నూనుల గే, అమ్చి కోడు నూన్లి రితి జయెదె. తుమ్కయ్ కో మరియాద కెర్తి నాయ్ గే, అంకయ్ కి మరియాద నే కెర్లి రితి జయెదె. కో అంకయ్ మరియాద కెర్తి నాయ్ గే, అంక తెద్రయ్లో దేముడు అబ్బొక కి మరియాద నే కెర్లి రితి జతయ్” మెన సంగిలన్.

యేసు గవ్వెలె అగ్గె తెద్రయ్ల డబ్బయ్జిన్ ఉట్ట అయ్లిసి

17 యేసు అగ్గె గవ్వెలె తెద్రయ్ల †డబ్బయ్జిన్ జోవయించి కామ్ కెర కేడవన, సర్దసంతోసుమ్ తెన్ యేసుతె అన్నె ఉట్ట జా కెర, “ప్రబు, గెచ్చు మెన బూతల్క తుచి నావ్ తెన్ ఉదడ్లె, అమ్చి కోడు జేవ్ కి నూన ఉట్ట గెతతి” మెన జోవయించి సర్ద సంగిల.

18 యేసు జోవయింక, “సయ్తాన్ పరలోకుమ్ తెంతో, జోచి టాన్ తెంతో బిజిలి మొల్కిలి రితి. డీస నేడ గెలిసి ఆవ్ దెకిలయ్.

19 ఈందె, తుమ్క కెర్ది అదికారుమ్ దా అస్సి మెలె, తుమ్ అయిచొక, పొట్టల్క

నుదిలె జవున్ తుమ్ కిచ్చొ ప్రమాదుమ్ జసు నాయ్, సయ్తాన్చి సెక్తి తిలస ఎత్తిచి ఉప్పిరి తుమ్ ప్రమాదుమ్ నెంతె జీన్తె. తెద్ది సెక్తి అదికారుమ్ తుమ్క దా అస్సి.

20 గని ముక్కిమ్క తుమ్ కిచ్చొచి రిసా సర్దసంతోసుమ్ తంక మెలె, బూతల్ గట్ట తుమ్క బియఁ ఉట్ట గెతినచి రిసా నాయ్, గని ‘ఇన్నె జెవుల’ మెన తుమ్చ నవ్వొ పరలోకుమ్తె రెగిడ్డిన్చి రిసాయి తుమ్ సర్దసంతోసుమ్ జా” మెన యేసు జోవయింక సంగిలన్.

దేముడు అబ్బొన్చి రిసా సిస్సుల్క సంగిలిసి (మత్త 11:25-27; 13:16-17)

21 జయ్యి గడియయ్ దేముడుచి సుద్ది తిలి ఆత్మసెక్తిక యేసు ఒగ్గర్ సర్దసంతోసుమ్ జా దేముడు అబ్బొన్క కిచ్చొ మెన ప్రార్దన కెర్లన్ మెలె, “పరలోకుమ్క కి బూలోకుమ్క కి అదికారుమ్ తిలో ఓ బ, ‘జానుమ్’ మెన జోవయింక జెవ్వె గవురుమ్ ఉచరంతనక చి ఒగ్గర్ సదు కెర్లనక ఈంజ జర్లు జతిసి ఎత్తిచి అర్దుమ్ లుంకడ, బాలబోదల్ జల రిత గవురుమ్ నెంజిలనక అర్దుమ్ దెకవ అస్సిసి మెన తుక జోబర, మెన అంచి సర్ద ఆవ్ సంగితసి. తుచి దయతె ఇసి కెర్లది, గెద” మెన ప్రార్దన కెర్లన్.

22 “అంచొ అబ్బొ ఎత్తి అంచి అత్తి సార్పు కెర దా అస్సి. అన్నె, ఆవ్ పుత్తుసి కొన్సొ జయిందె గే అబ్బొ ఎక్కిలొయి జానె, చి అబ్బొ కొన్సొ జయెదె గే, ఎక్కి ఆవ్ పుత్తుసి జాని, చి అన్నె కక్క జోవయింక దెకయిందె గే, జెవ్వె జాన్తి” మెన సంగిలన్.

* 10:15 10:15 నెంజిలి ‘ఉప్పిర్ గెచ్చు గవురుమ్ జస్తె గె? నాయ్, గెద, ఎట్టొ గెచ్చు నిస్కారుమ్-జస్తె’ మెలి అర్దుమ్ కి ఉచరక జయెదె. కపెర్నహూమ్ పట్టుమ్చ మాన్సుల్ ‘ఆమ్ యూదుల్ జమ్దెచి రిసా ఆమ్ చెంగిల్ జమ్దె. తూరు చి సీదోసుచ మాన్సుల్ యూదుల్ నెంజితిచి రిసా గార్ జవుల’ మెన ఉచరల. † 10:15 10:15 నెంజిలి ‘వెల్లి ఆగి గోయ్తె’. ‡ 10:17 10:17 నెంజిలి ‘డబ్బయ్చొన్జిన్’.

23 తెదొడి యేసు జోచ బారజిన్ సిస్సుల్ తిలి పక్క పసుల ఎక్కి జోవయింకయ్, “తుమ్ దెకితిసి దెకిత మాన్సుల్క చెంగిలి!

24 తుమ్క ఆవ్ కిచ్చొ మెంతసి మెలె, పూర్గుమ్చక చి కంట తుమ్క ఒగ్గర్ చెంగిలి. కిచ్చొక మెలె, పూర్గుమ్ దేముడుచ కబుర్లు సంగిలస ఒగ్గర్జిన్, రానల్ ఒగ్గర్జిన్ తుమ్ దెకితిసి దెకుక జేవ్ కోర్ప జలెకి, దెకుక నెతిర్ల. తూమ్ సూన్తిసి సూనుక జేవ్ కోర్ప జలెకి, సూనుక నెతిర్ల. జా అవ్కాసుమ్ జోవయింక దొర్కు జయె నాయ్” మెన యేసు సిస్సుల్క సంగిలన్.

ప్రేముబుద్ది తిలో సమరయ సుదొచి రిస్తా సంగిలి టాలి

25 ఏక్ సుట్టు యూదుల్చి మోసే తెన్ దేముడు దిలి ఆగ్గుల్ సికడ్డొసా ఎక్కిలో టీచ కెర, యేసుక పరిచ్చ కెరుక ఉచర ఇసి పుసిలన్. “గురుబాబు, పరలోకుమ్చి రాజిమ్తె ఆవ్ బెద కెయ్క తెయ్క జితి వాట్ అంక దొర్కు జంక మెలె, ఆవ్ కిచ్చొ కెర్లె జయెదె?” మెన పుసిలన్.

26 జో దస్సి పుసితికయ్, యేసు జోక, “మోసే పూర్గుమ్చొచి అత్తి దేముడు రెగ్గయ్ల కిఆగ్గుల్తె కిచ్చొ మెన రెగ్గ అస్సె? ఒత్త కిచ్చొ సంగితయ్?” మెన పుసిలన్.

27 జో యేసుక కిచ్చొ జబాబ్ దిలన్ మెలె,
*“తుమ్చొ ప్రబు జలో దేముడుక తుచి ఎత్తి పెట్టి తెన్, తుచి ఎత్తి మెన్సు తెన్,
తుచి ఎత్తి నెక్తి ఎత్తి తెన్,
తుచి ఎత్తి బుద్ది తెన్ నిదానుమ్ ఎక్కి ప్రేమ కెర్లె తంక. అస్సె,

తుమ్క తుమి కెర్ది ప్రేమ కెరంతసు గే, తుచి పక్కయ్చక కి తెర్ది ప్రేమ కెర్లె తంక” నేన దేముడు మోసేచి అత్తి దిలి ఆగ్గుల్చి కోడు సంగిలన్.

28 జో దస్సి జబాబ్ దెతికయ్, యేసు జోక “తుయి సరిగా జబాబ్ దిలది. తుయి సంగిల్ రితి కెర్లె తిలె, పరలోకుమ్తె తుయి బెద కెయ్క తెయ్క జితి వాట తుక దొర్కు జయెదె” మెలన్.

29 జో మాన్సు, జలె, జో అన్నె సగుమ్జిన్క చెంగిల్ నే దెకితిన్క, ‘తప్పు నెంజె’ మెన రుజ్జు దెకుక ఉచర, “జలె, అన్నె మాన్సుల్క మెలె, కక్క?” మెన పుసిలన్.

30 పుసితికయ్, యేసు ఏక్ టాలి సంగ జబాబ్ దిలన్. ఇసి మెన; “అమ్చొ యూదుడు ఎక్కిలో యెరూసలేమ్ తెంతో యెరికో పట్టుమ్తె గెచ్చుక మెన వట్టి గెతె తిలన్, చి చోర్లుచి అత్తి దెర్ను సేడ్లన్క, జేవ్ జోచ పాలల్ కడ కెర జోక పెట గెల కెర, జోక ఇదిలిదిల్ జీవ్ తతె, జో మొర్ది రితి ముల దా ఉట్ట గెల.

31 “జలె, కిసి గే పూజరి ఎక్కిలో జయి వాట్ అయ్లన్, అన్నె, జో మాన్సుక దెక పాసి నే గెతె వాట్చి ఒత్తల్తో పక్క ఉట్ట గెలన్.

32 దస్సి, దేముడుచి గుడితెచి సేవ కెర్లొ †లేవీయుడు ఎక్కిలో కి జా టాన్తె అయ్లె, జో కి దెక కెర, వాట్చి ఒత్తల్తోచి పక్క ఉట్ట గెలన్.

33 “గని ‡నమరయ సుదొ ఎక్కిలో జా వట్టి ప్రయానుమ్ గెతె తా, జో మాన్సు సేడ తిలిన్తె అయ్లన్, అన్నె జోక దెక కెర, యూదుల్ నిస్కారుమ్ దెకితో ఈంజొ సమరయ సుదొ, జో సేడ తిలో యూదుడుచి ఉప్పిరి కన్కారుమ్ జా,

34 పాసి గెచ్చ దెబ్బల్ లయిలిన్తె తేలు చి ద్రాచ రన్నుమ్ ‘ఓస్తు’ మెన సువ

§ 10:26 10:26 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రెగ్గయ్లి ఆగ్గుల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పాచ్ పుస్తకుమ్తె రెగ్గయ్ జా అస్సె. ఈంజ దెకవుక మెన కుపియ బాసతె నొయి ప్రమానుమ్తె మోసే పూర్గుమ్చొచి అత్తి రెగ్గి దేముడుచ ఆగ్గుల్ మెన రెగ్గవ అస్సె.

* 10:27 10:27 ద్విస్తీయోపదేశ కాండుము 6:5 చి లేవీయకాండుమ్ 19:18. † 10:32 10:32 మెలె, లేవీ పూర్గుమ్చొచి నెకుమ్చొ. ‡ 10:33 10:33 నమరయ సుదల్క యూదుల్ నిస్కారుమ్ దెకితతి.

దా, కట్టు బందిలన్ చి, ఇన్నెచి సొంత గాడ్డెచి ఉప్పిరి వెగడ దా, ఏక్ అద్దె గెరితె న కెర, జోవయింక దొర్కు జలి సావ్రెచన కెర్లన్.

35 అన్నెక్ దీసి, దొరత్ చి కూలిచి ఎదిలి డబ్బుల్ జేబితె తెంతో వెంట కెర, జా అద్దె గెరిచొ సావుకరిక దా, ఈంజో మాన్సుక చెంగిల్ దెకితె తా, ఇన్నెచి రిసా అన్నె కిచ్చొ కర్చు సేడ్డె గే, ఆవ్ అన్నె అయ్లి పొది తుక దెందె మెన ఈంజో సమరయ సుదొ బప్పన్.

36 “జలె, చొర్లుతె దెర్ను సేడ్డె జో అన్నెక్లో ఈంజేవ్ తిగ్లతె కేన్ మాన్సు ప్రేమ కెర్లొసా జలొ? కిచ్చొ ఉచర్లసి? సంగు” మెన జోక యేసు పరిచ్చ కెర్లన్.

37 “జోక కన్కారుమ్ దెకిలొసా” మెన జబాబ్ దిలన్చి, రిసా యేసు జోవయింక, “తుయి గో, చి అన్నె మాన్సుల్క దస్సి ప్రేమ కన్కారుమ్ దెకితె తా” మెన సంగిలన్.

మార్త మరియుచి గెరి యేసు గోత్ గెలిసి

38 జలె, యేసు అన్నె సిస్సుల్ వట్టె గెతె తతికయ్, ఏక్ గవ్వి పాచ అయ్లక, మార్త మెలి తేర్బోద జోవయింక మరియుద కెరుక మెన గెరి బుకార్లన్.

39 జాక మరియు మెలి బేన్సి తిలి. జా, జలె, ప్రబుచి చట్టె వెన జో సంగితె తిలి బోదన నూన్తె తిలి.

40 మార్త, కిగెర్చి కామ్ కెరుక మెన బమ్మ జతె తిలి, అన్నె, యేసుతె గెచ్చ కెర, “ప్రబు, ఆవ్ ఎక్కిలి ఈంజ కామ్ కెర్తి రితి అంచి బేని బద్దుకుమ్ జా ములితయ్ మెన దెకిన్ నాయ్ గె? జా అంక తోడు కెర్చు. సంగు” మెలన్.

41 గని ప్రబు జేవ్క కిచ్చొ జబాబ్ దిలన్ మెలె, “మార్త, మార్త, తుయి ఒగ్గర్ కమె తియన బమ్మ జా పంబ్ర జతసి.

42 ఎత్తి కమెతె ఎక్కి ముక్కిమ్చి సుబుమ్ కబుర్ నూన్తి జయ్యి వాట మరియు నజన అన్నె, జా జాచి తెంతో కడుక జెయె నాయ్.” మెన జాక సంగిలన్.

11

ప్రార్థన కెర్తినచి రిసా యేసు బోదన కెర్తిన

(మత్త 6:9-15)

1 ఏక్ దీసి కిచ్చొ జర్గు జలి మెలె, యేసు ఏక్ టాన్తె ప్రార్థన కెర్తె తిలన్, అన్నె, ప్రార్థన కెర కేడయ్లె, జోవ సిస్సుల్తె ఎక్కిలొ జోక “ప్రబు, బాప్తిసుమ్ దెతె తిలొ యోహాను జోవ సిస్సుల్క ప్రార్థన కెరుక సికడ్లి రితి, అమ్క కి ప్రార్థన కెరుక తుయి సికడ.” మెన సంగిలన్.

2 దస్సి సంగితికయ్, యేసు జోవయింక ఇసి మెలన్. “తుమ్ ప్రార్థన కెర్తె పొది ఇసి మెన;

* ఓ బ, తుచి నావ్ గవురుమ్ జవున్.

తుచి రాజిమ్ అమ్చితె జెవున్.

3 సరిపుచుప జతి అన్నిమ్ అమ్క రోజుక దొర్కు కెర దె.

4 పడ్డొ, అమ్క పాపుమ్ కెర్త మాన్సుల్క ఆమ్ †చెమించుప కెర్తనుమ్, చి ఆమ్ కెర్త పాపల్ తుయి అమ్క చెమించుప కెరు.

అమ్ పాపుమ్ నే కెర్తి రితి, సయ్తాన్ పాపుమ్ కెరయ్తిన్ తెంతో దయ కెర అమ్క సిట్టవు, మెన తూమ్ ప్రార్థన కెర” మెన యేసు సిస్సుల్క సికడ్లన్.

లాజ్ నెంతె పున్తి మింతు (మత్త 7:7-11)

5 తెదొడి జోవయింక అన్నె, “తుమ్తె కో జలెకు ఎక్కిలొ మితుసి జలె, అందరె సొక్కుక మింతున్చి గెరి గెచ్చ, ఓ

§ 10:40 10:40 నెంజిలె, ‘అన్నిమ్ తెయార్ కెరుక మెన’.

* 11:2 11:2 నెంజిలె ‘ఓ పరలోకుమ్ తిలొ

అమ్చొ దేముడు అబ్బొ’. † 11:4 11:4 మెలె, జేవ్ అమ్క పాపుమ్ నే కెర్తి రితి అమ్ దెకితనుమ్.

నేస్తము, అంక తిన్ని పోడియొ బదుల్ దె.

6 అంచో అన్నెక్లొ మిత దూరి ప్రయానుమ్ జా అస్స చి, జోక అన్నిమ్ దెతిసి అమ్తె కిచ్చొ కి నాయ్”.

7 పోడియొ సంగుక గెలి గెర్చొ ఎజొమాని, జలె, గేర్ తెడి తెంతో “అంక ఇసి అల్లర్ కెరుక పోని. కెప్పి డంక అస్సి చి, ఆవ్ అంచ బోదల్ నిజ అస్సుమ్. అప్పె ఉట్ట దెంక నెతిరి” మెనెదె,

8 జలె, తుమ్క ఆవ్ కిచ్చొ మెంతసి మెలె, జో జోక మింతున్ జయెదె చి రిసా నాయ్; మింతున్ జలెకి నెసె, గెద; గని జో లాజ్ నెంతె పుసితె తత్తయ్చి రిసా, జో ఉట్ట కెర జోక దొర్కు జలిసి ఎత్తి దెయెదె.

9 జాకయ్ తుమ్క ఆవ్ కిచ్చొ మెంతసి మెలె, దొర్కు జలిసి ఎత్తి, దేముడుతె తుమ్ సంగితె తా, తుమ్క దెయెదె. ఎక్కి మెన్ను తెన్ చజలె దొర్కు జయెదె. కెప్పితె ఉంక్రయ్తె తిలె, తుమ్క కెప్పి ఉగ్గ దెయెదె.

10 కో నజిలె, జోక దొర్కు జయెదె, చజిలోసాక, దొర్కు జయెదె. కెప్పితె కో ఉంక్రయ్లె, జోచి రిసా ఉగ్గ దెయెదె.

11 తుమ్తె సగుమ్జినక బోదల్, తుమ్తె కేన్ జవున్ మాన్సుచొ పుత్తుసి † “మొస్సా రోన్ దె” మెలె, అబ్బొసి అయి దెయెదె గె? నాయ్, గెద.

12 నెంజిలె “అండొ దె” మెలె, పొట్టె దెయెదె గె? నాయ్, గెద.

13 జలె, తుమ్ మాన్సుల్ పాపుమ్ సుదల్ తిలె కి తుమ్చ బోదల్క చెంగిల్చి దెంక జాన్సు జలె, పరలోకుమ్ తిలొ దేముడు అబ్బొతె కో జోచి సుద్ది తిలి ఆత్మక నజిలె దెయె నాయ్ గె? కచితుమ్ దెయెదె.

14 ఏక్ సుట్టు యేసు గుల్లో కెర్తో ఏక్ బూతుమ్క ఉదడ్డె తిలొ. జో బూతుమ్

జో మాన్సుక ముల దిలె, జో మాన్సు లట్టబుక మొదోల్ కెర్తో, చి దెకిల ప్రెజల్ బగ్గర్ ఆచారిమ్ జలె.

15 గని జోవయింతె సగుమ్జిన కిపండితుల్ నూన కెర కిచ్చొ మెల మెలె, “బూతల్క రానొ జలొ * బయెల్లెబూల్చి నావ్ తెన్ ఈంజొ బూతల్క ఉదడ్డయ్” మెన సంగిలె.

16 అన్నె సగుమ్జిన, జోక పరిచ్చ కెరుమ మెన ఉచర, “తుచి నెక్కి పరలోకుమ్చి అదికారుమ్చి తిలె, జా రుజు దెకయ్తి కిచ్చొ జవున్ వెల్లి కామ్ అమ్చి మొక్కె కెరు” మెన సంగిలె.

17 గని యేసు జోవయించి మెన్నుతె తిలిసి జానె చి, జోవయింక, “కేన్ జవున్ రాజిమ్తచ మాన్సుల్ జోవయింక జెచ్చి విరోదుమ్ జా వర్న వర్న జా యుద్దుమ్ కెరన్లె, జా రాజిమ్ పాడ్ జా గెచ్చెదె, అన్నె, † కేన్ గేరు జవున్ మాన్సుల్ వర్న వర్న జా జోవయింక జెచ్చి విరోదుమ్ కెరన్లె, జా గేరు జవున్ సేడెదె.

18 దస్సి, సయ్తాన్ సయ్తాన్చి ఉప్పిరి జొయ్యి యుద్దుమ్ కెర్లె, జోచి రాజిమ్ కిసి టీవెదె, టీవుక నెత్తె మెలె, అంక బయెల్లెబూల్ జోవయింక సాయిమ్ తతికయ్ బూతల్క ఉదడ్డయ్” మెన తుమ్ సంగితసు.

19 జలె, ఏక్ కోడు తుమ్ ఉచర. ఆవ్ ఏక్ వేల బయెల్లెబూల్చి నావ్ తెన్ బూతల్క ఉదడ్డెగిన, తుమ్చయ్ సిస్సుల్ కచి నావ్ తెన్ ఉదడ్డతి? బూతల్క ఉదడ్డె తుమ్చయ్ సిస్సుల్ అంచి రిసా తుమ్క తీర్పు సంగుతు!

20 గని దేముడుచి ఆతుక మెలి కోడు జోచి నెక్కికయ్ ఆవ్ బూతల్క ఉదడ్డె గెల్లసి జలె, కచితుమ్ దేముడుచి రాజిమ్ తుమ్తె అప్పె పావ జా అస్సె.

21 కేన్ జవున్ † బలుమ్ సుదొ, జోచ

‡ 11:11 11:11 నెంజిలె ఈంజ తొలితొ రిగిడ్ల సగుమ్ పుస్తకల్తె అన్నె కిచ్చొ బెద తిలి మెలె, “పోడియొ దె” మెలె, అబ్బొసి పత్తురు దెయెదె గె? నెంజిలె “మొస్సా రోన్...”... § 11:15 11:15 మత్తయి 12:24, మార్కు 3:22. * 11:15 11:15 మెలె, సయ్తాన్. † 11:17 11:17 మత్తయి 12:25, మార్కు 3:25. ‡ 11:21 11:21 సయ్తానుక టాలి జయెదె.

అయదల్ ఎత్తి దెరన జోచి సొంత గేరు రకితె తిలె, కో నే దెర గెతి రితి జోచ ఆస్తుల్ చెంగిల్ తవుల.

22 గని జోచి కంట ఒగ్గర్ కిసెక్తి తిలోసా అయలె, జోక పెట జీన్లె, జో మాన్సు నంప కెర్ల అయదల్ ఈంజో అన్నె సెక్తి తిలోసా వెంట గెల కెర, జోచ ఆస్తుల్ దెర గెచ్చు జోచ మితర్నుల్ తెన్ వాటల్ కెరన వంటనుల.

23 “జలె, కో అంచి పచ్చెన జయె నాయ్ గే, అంక విరోదుమ్ జా అస్సె, చ్చి అంచి రాజ్మతె జేవ్ బెదితి రితి కో అంచి తెన్ మాన్సుల్క అంచితె ఆనె నాయ్ గే, అంచి మందక చెదుర్పు కెర్లయ్.” మెన యేసు సంగిలన్.

బూతుమ్ ముల దిలి గెరి అన్నె ఒగ్గర్ బూతల్ ఉట్ట జా బన జతిన్చి టాలి

(మత్త 12:43-45)

24 తెదొడి యేసు అన్నెకోడు సంగిలో, “ఏక్ మాన్సుక బూతుమ్ దెర తిలెగిన, జో బూతుమ్ జో మాన్సుచి తెంతో ముల దా తత్తిచి రిసా టాన్ చజన బయిలె గెచ్చు బుల్తె తయెదె, గని టాన్ నే దొర్కు జలి రిసా, ఉచరన, ఆవ్ ముల దిలో గెరి అన్నె గెచ్చిందె మెన

25 జో గెరి అయలె, జో గెరిచో మాన్సు వడ్డవ కెర సుబ్రుమ్ కెర అస్సి మెన దెక కెర

26 గెచ్చు, అన్నె జాచి కంట గర్పు సత్తు బూతల్క పట్టి కడ ఆనెదె చి, జేవ్ ఎత్తి జో మాన్సుతె పెస కెర, ఒత్తయ్ బన జవుల. జాచి రిసా, పట్టో జో మాన్సుక అగ్గెచి కంట ఒగ్గర్ అల్లర్ జయెదె” మెన యేసు సంగిలన్.

కక్క ఒగ్గర్ చెంగిల్ గే యేసు సంగిలిసి

27 యేసు ఈంజ కోడు సంగితికయ్, కిచ్చో జర్గు జలి మెలె, ఒత్త బెర తిల జనాబ్తె ఏక్ తేర్బోద “తుక

పాయిలి దూదు పియడ్లి అయాద్క ఒగ్గర్ చెంగిలి!” మెన కేక్ గలిలి.

28 జలె, యేసు కిచ్చో జబాబ్ దిలన్ మెలె, “నాయ్, గెద. కక్క ఒగ్గర్ చెంగిల్ మెలె, దేముడుచి కోడు నూన, జయ్యి కోడ్ రితి ఇండితనకయ్” మెలన్.

జేవ్ యూదుల్చి అన్మానుమ్ బుద్దిచి రిసా సంగిలిసి

(మత్త 12:38-42; మార్కు 8:12)

29 అన్నె ఒగ్గర్జిన్ ప్రెజల్ బెర జెతె తతికయ్, యేసు ఇసి మెన బోదన కెరుక దెర్లన్. “ఈంజ కాలుమ్చ మాన్సుల్ ఒగ్గర్ పాపుమ్చ. అంచి అదికారుమ్క రుజ్జు దెకయ్త వెల్లెల కమొక కోర్ప జతసు, గని అంచి అదికారుమ్ దెకయ్తి రిసా ఎక్కిక పిట్టవ, కేన్ వేర కామ్ కెర దెంక నెంజె. కేన్ మెలె, దేముడుచ కబుర్లు సంగిలో యోనా పూర్గుమ్చొక జర్గు జలిసి జా వెల్లి కామ్ టాలి జయెదె.

30 *యోనా పూర్గుమ్చొ తిర్రతి వెల్లో మొస్సొచి పెట్టి తా బార్ జలిసి నీనెవె పట్టుమ్చ మాన్సుల్క ఏక్ రుజ్జు జలి, గెద. దస్సి, మాన్సు జా జెర్మన్ అయలయ్ అంక †జర్గు జతిసి దొర్కు జలి రుజ్జు జయెదె.

31 “జలె, ఈంజ లోకుమ్చ మాన్సుల్క వెల్లి తీర్పు కెర్తి దీసిక, తుమ్ ఈంజ కాలుమ్చ అన్మానుమ్ జల యూదుల్ కి, యోనా బోదన కెర్ల నీనెవె పట్టుమ్చ ప్రెజల్ కి, బెద టీచితె. జేవ్ తుమ్క ‘గర్పు’ మెన రుజ్జు దెకవుల. కిచ్చొక మెలె, జా దేసిమ్చ మాన్సుల్ యోనా కెర్లి బోదన నూన కెర, జేవ్ కెర్ల పాపల్చి రిసా దుకుమ్ జా, మెన్సు మార్చుప, నంపజా బుద్ది జల గని తూమ్ నాయ్. ఈందె, యోహానుచి కంట వెల్లో తుమ్చి నెడిమి ‡అస్సె.

§ 11:22 11:22 యేసుక్రీస్తుక టాలి జయెదె. * 11:30 11:30 యోనా 1-4 అద్యయల్. † 11:30 11:30 మెలె, యేసు మొర తిర్రతక అన్నె జివ్ జా ఉట్టితిసి. లూకా 23, 24 అద్యయల్. ‡ 11:31 11:31 సొంతచి రిసా సంగితయ్.

32 పడ్డొ, వెల్లి తీర్పు కెర్తి జా దీసిక, కీసేబా మెలి దచ్చెన దేసిమ్చి పూర్ణమ్ తిలి రాని ఎక్కి, ఈంజ కాలుమ్చ మాన్సుల్ తెన్ టీచ, తుమ్క 'గర్బ' మెన రుజ్జు దెకయెదె. కిచ్చొక మెలె, పూర్ణమ్ జా రాని 'సాలోమోను రానొ సంగితి బుద్ది సూనిందె' మెన, ఒగ్గర్ ఒగ్గర్ దూరి తెంతొ అయ్లీ. గని, ఈందె, సాలోమోనుచి కంట వెల్లో తుమ్చి నెడిమి * అస్సె.

మాన్సుచి పేట్ తెడి చెంగిల్ ఉజిడి కావలె మెలిసి

33 "కేన్ జవున్ మాన్సు ఏక్ దీవు లంబడ తిలె, జా దీవుక ఆరి లంబడ్డి రితి గెర్చి మజ్గెర్తె కుల్లి గొయితె జవున్ తితి నాయ్, నాడిచి తెడి జవున్ డంకితి నాయ్, గని గెరి జెత ఎత్తిజిన్క జా ఉజిడి దెతి రిసా దీవుకంబుమ్చి ఉప్పిరి తివుల.

34 "తుమ్చి ఆంగుక తుమ్చ అంకివో దీవు జలె, తుమ్చ అంకివో †బేంట తిలె, తుమ్చి ఒండి ఆగ్ ఉజిడ్ తెన్ తయెదె. గని తుమ్చ అంకివో మయల జా తిలె, తుమ్చి ఆగ్ ఎత్తి ఆమన్ రితి అందర్ తెన్ తయెదె.

35 జాకయ్, తుమ్చి పెట్టి తిలి ఉజిడి అందర్ నే జతి రితి జాగర్త తెన్ తా.

36 జలె, తుమ్చి ఒండి అగి కేన్ పక్క కి అందర్ నెంజితె రితి ఉజిడి బెర తిలె, దీవుచి ఉజిడి కీసి తుమ్క ఉజిడి దెకయెదె గే, దస్సి, తుమ్చి పెట్టిచి ఉజిడి సాన్సుమ్ డీసెదె" మెన యేసు సంగిలన్.

పరిసయ్యుల్క చి దేముడుచి కొడొ సికడ్డసక యేసు తీర్పు సంగిలిసి
(మత్త 23:1-36; మార్కు 12:38-40; లూకా 20:45-47)

37 యేసు జా బోదన సంగ కేడయ్తికయ్, పరిసయ్యుడు ఎక్కిలో యేసుక జోచి గెరి అన్నిమ్ కా జె మెన

బుకార్లన్, చి యేసు జో తెన్ గెరి గెచ్చు అన్నిమ్ కంక వెసిలన్.

38 జలె, యేసు అత్తో నే దొవన్తె అన్నిమ్ కతయ్ మెన దెక కెర జో ఆచారిమ్ జలో.

39 యేసుప్రబు జోక, "తుమ్ పరిసయ్యుల్ గలస్సు గిన్నలు ఉప్పిర్ పక్క దోవ, తుమ్చి ఆంగుచి ఉప్పిరి దొవన్తను, గని గలసు గిన్న తెడి ముర్కి తా గెలి రితి, తుమ్చి పేట్ తెడి కిచ్చొ అస్సె మెలె, ఆన బుద్ది పాపుమ్బుద్ది బెర అస్సె.

40 తుమ్ బుద్ది నెంజిలన, ఉప్పిరి తిలిసి జెర్మయ్లో దేముడు, తెడి తిలిసి కి జెర్మయ్లోసా నెంజె గె? కెర్లొ, గెద!

41 జలె, తెడి తిలిసి దర్ముమ్క దాస, చి ఈందె, తుమ్క ఎత్తి సుద్ది జయెదె.

42 "అయ్యె తుమ్ పరిసయ్యుల్, తుమ్క సిచ్చ పిట్టె నాయ్! కిచ్చొక మెలె, తుమ్ పొచ్చెన్ రొడ్డెతె చెరమల్లితె దనచ ఎత్తితె దెస్సు వంతుల్ కెర, ఏక్ వంతు ఎత్తి అదికారుమ్ తిలో దేముడుక దెతను. గని మాన్సుల్చి ఉప్పిరి సత్తిమ్ తీర్పు కెరుక చి, దేముడుక ప్రేమ కెరుక తుమ్ పచ్చితను. జలె, కిచ్చొ కిచ్చొ వస్తువల్తె దెస్సు వాటల్ కెర ఏక్ వాట జోవయింక దెంక తప్పు నెంజె, గని ముక్కిమ్క సత్తిమ్ తీర్పు కెర్తె తత్తదు జలె, దేముడుక ప్రేమ కెర్తె తత్తదు జలె, తుమ్క చెంగిల్ తత్తి!

43 "అయ్యె, తుమ్ పరిసయ్యుల్, తుమ్క సిచ్చ పిట్టె నాయ్! కిచ్చొక మెలె, సబ గెరిచ ముక్కిమ్ టాన్లుతె వెసుక కోర్ప జతను, సంతవీదురి ఎత్తిజిన్ అమ్క జొక్కర్తు మెన కోర్ప జతను.

44 అయ్యె, తుమ్క సిచ్చ పిట్టె నాయ్!

§ 11:32 11:32 సొంతచి రిసా సంగితయ్. * 11:32 11:32 రానల్ మొదొల్ పుస్తకుమ్ 10 అద్యయిమ్.
† 11:34 11:34 'బేంట అంకివో' మెలె, ఎత్తి అదికారుమ్ తిలో దేముడు తెన్ యేసు తెన్ బెద జోవయించి బుద్ది దెరన జయ్యి బుద్దిక సత్తిమ్ ఇండితీసి. 'మయల అంకివో' మెలె, నయ్తాన్ తెన్ బెదిలిసి; జోవయించి పొరపాట్ బుద్ది, పాపుమ్బుద్ది దెరన పాపుమ్ ఇండితె తా గార్ జతిసి.

తుమ్ కీసి జతసు మెలె, బయిలె తతా నే డిస్త మెన్నల్ రిత అస్సున్. 'మెన్నల్' మెన నేన కెర, మాన్సుల్ ఒత్త నుదితతి" మెన యేసు టాలి కెర సంగిలన్.

45 తెదొడి, మోసే తెన్ దేముడు దిలి ఆగ్నల్ సికడ్తసా ఎక్కిలో యేసుక, "గురుబాబు, తుయి ఇసి సంగిలె, †అమ్క కి మరియాద కడ్తసి" మెలన్.

46 యేసు జోక కిచ్చొ జబాబ్ దిలన్ మెలె, "తుమ్ మోసే తెన్ దేముడు దిలి ఆగ్నల్ సికడ్తన, అయ్యో! తుమ్క కి సిచ్చ పిట్టె నాయ్! కిచ్చొక మెలె, కూలి మాన్సుల్క సాపుకర్లు కీసి కంది వయితి జాడు వయడుల గే, దస్సి తూమ్, ఒగ్గర్ ఆడ్ర రితి కెరుక అస్సె మెన, ప్రెజల్క జాడు వయడ్డి రితి కెర్తను. గని తుమ్ వయడ్డ జాడ్లు రిత ఆడ్ర సుల్కాన కెర్తి రిసా తుమ్చి కిడి ఊంటి కి నే చంపొ కెర్తి రితి, జేవ్ ప్రెజల్క కన్కారుమ్ జసు నాయ్.

47 అయ్యో, తుమ్చి సిచ్చ పిట్టె నాయ్! కిచ్చొక మెలె, తుమ్చ పూర్లుమ్చ దేముడుచ కబుర్లు సంగిలసక మార్ల, చి జా టాన్క జోవయించి రిసా కీచెంగిల మెన్సున్లు తుమ్ బందయ్తను.

48 దస్సి, జోవయించి పాపుమ్తె తుమ్ బెదిలిన్చి రిసా తుమ్చి ఉప్పిరి జోవయించి ఉప్పిరి సాచుల్ జతను. కిచ్చొక మెలె, జేవ్ జోవయింక మార్ల, చి తూమ్ జోవయింక మెన్సున్లు బందయ్తను.

49 జాకయ్ దేముడుచి గ్యానుమ్ సంగిలిసి కిచ్చొ మెలె, అంచ కబుర్లు సంగితన సగుమ్జిన్క, అంచ బారికుల్ జతన సగుమ్జిన్క, జా కాలుమ్క అమ్చ యూదుల్తె తెద్రయిందె, చి జా కాలుమ్క అమ్చ యూదుల్ జోవయింతె

సగుమ్జిన్క మారుల, సగుమ్జిన్క వేర సిచ్చల్ అల్లర్ కెరుల" మెన అస్సె.

50 దస్సి, బూలోకుమ్ జెర్మయ్లి తెంతో అప్పె ఎద అబ్బుదింసి తూమ్ దేముడుచ కబుర్లు సంగిలసచి లోయి సువిలి పాపుమ్ తుమ్ ఈంజయ్ కాలుమ్చ వయితె. కెయ తెంతో సూయ జలిసి మెలె,

51 *హేబెలు అన్నొసి అత్య కెర్లి తెంతో మొదొల్ కెర, †దేముడుచి గుడిచి నెడిమి బలి దెతి స్తంబుమ్ సొడి మాన్సుల్ మార్లొ జెకర్కాచి లోయి సువిలి ఎదచి లోయి. నిజుమ్ తుమ్క ఆడ్ కచితుమ్ సంగితసి, జేవ్ ఎత్తిజిన్చి లోయి సువిలి పాపుమ్చి సిచ్చ ఈంజయ్ కాలుమ్చక లయెదె.

52 "అయ్యో, తుమ్ మోసే తెన్ దేముడు దిలి ఆగ్నల్ సికడ్తన, తుమ్క సిచ్చ పిట్టె నాయ్! కిచ్చొక మెలె, దేముడు రెగిడ్డిన్తెచి బుద్ది గ్యానుమ్చి †గేరుచి తాలల్ కడి తుమ్ దెర గెచ్చు లుంకాడ అస్సున్. తూమ్ కి ఒత్త పచ్చ నాయ్, చి ఒత్త పెనుక గెల అన్నె మాన్సుల్క కి అడ్డు కెర, ఒత్త పెనడ్పు నాయ్" మెన యేసు సంగిలన్.

53 యేసు ఒత్త తెంతో ఉట్ట గెతికయ్, మోసే తెన్ దేముడు దిలి ఆగ్నల్ సికడ్తన చి పరిసయ్యుల్ జోచి ఉప్పిరి ఒగ్గర్ కున్సిదుమ్ జా, కిచ్చొ కిచ్చొచి రిసా జోవయింక పున లట్టబడ పరిచ్చ కెర్లి రితి జతె తిల.

54 'ఏక్ వేల జో కిచ్చొ జవున్ తప్పు సంగిలె జోక దెరుక జయెదె' మెన, రకితె తిల.

12

మాయబుద్దిచి రిసా యేసు సంగిలిసి

‡ 11:45 11:45 కిచ్చొక మెలె, మోసే తెన్ దేముడు దిలి ఆగ్నల్ సికడ్తన పరిసయ్యుల్ తెన్ బెదితన జవుల.

§ 11:47 11:47 మత్తయి 23:29-30. * 11:51 11:51 ఆదికాండుమ్ 4:8. † 11:51 11:51 2

దిస: పుస్తకుమ్ 24:20-22. యేసు నే జెతె అగ్గె ఎత్తి అదికారుమ్ తిలో దేముడుచ కబుర్లు సంగిలో ఆకర్చొ మాన్సు ఈంజొ జెకర్కా మెలొసా. ‡ 11:52 11:52 మత్తయి రెగిడ్డిన్తె, మత్తయి 23:13తె కిచ్చొ అస్సె

మెలె, "మాన్సుల్చి మొక్కె తుమ్ పరలోకుమ్చి కెప్పొవొ డంకితను....". * 12:1 12:1 నెంజెలె, జా అర్దుమ్క

'లచ్చుజిన్ మాన్సుల్' మెన రెగ్గ అస్సె.

1 తెదొడి * ఒగ్గర్ ఒగ్గర్జిన్ మాన్సుల్ యేసుతె బెర జా ఎక్కిలోక ఎక్కిలో నుడ నుడి జతె తతికయ్, యేసు తొలితో జోచ సిన్సుల్ తెన్ లట్టబుక దెర, “పరిసయ్యుల్ జేవ్ సొంత సికడ్డి బుద్ది ఇండితి నాయ్. పోడియొ కెర్తి పీట్తె కీసి జా పోడియొ కెర్తిసి ఎత్తిక పులయెదె గే, దస్సి పరిసయ్యుల్ చి జా మాయబుద్ది దెకిలె, అన్నె మాన్సుల్ కి దస్సి మాయబుద్ది సికుక జయెదె. జాకయ్ తుమ్ జాగర్ దెకన.

2 డంకి జలిసి కిచ్చొ జలెకి కెయళ తెయళ నే డీసై తయె నాయ్. లుంకడ్డిసి కిచ్చొ జలెకి కెయళ తెయళ ఎత్తిక నే జాన్తి రితి జెయె నాయ్. ఆకర్క డీసెదె, ఆకర్క జానుప జయెదె.

3 అందరితె తుమ్ కిచ్చొ సంగ తస్తె గే, ఉజిడతె నూనయ్ జయెదె, చి అన్నె కోయి నెంతె కెప్పెవో డంకన కిచ్చొ కచి కండయి సంగ తస్తె గే, మేడల్చ ఒర్నెల్ తెంతో సొట్టు జయెదె.

కక్క బింక గే నే బింక గే యేసు సంగిలీసి
(మత్త 10:28-31)

4 “జాకయ్, గోతుసుదల్, తుమ్క ఆవ్ కిచ్చొ మెంతసి మెలె, తుమ్చి ఆగ్గుక మార్కు తెరితనక తుమ్ బియఁ నాయ్. జేవ్చి పడ్డో తుమ్క అన్నె కిచ్చొ అల్లర్ కెరుక నెత్తిర్తి

5 నాయ్, గని తుమ్ కక్క బింక గే తుమ్క సంగితసి. కక్క మెలె, మాన్సుచి ఆగ్గుక మార్లి పడ్డో జోవయింక వెల్లి ఆగి గ్గొయ్తె గల్ల దెత్తి అదికారుమ్ తిల్లి దేముడుకయ్ తుమ్ బియఁ తుమ్ జోకయ్ బియఁ మెన తుమ్క ఆవ్ సంగితసి.

6 “ఈంజ దేసిమ్చ మాన్సుల్ పావ్ గెర్పిట్టల్ దొన్ని కాసుక వికుల, గెద. జలె, దనచక ‘విలువ’ మెన మాన్సుల్ నే దెకిలెకి, దేముడు జోవయింతె ఎక్కిక కి పవ్నె నాయ్.

7 దేముడు తుమ్చి ఉప్పిర్ కెద్ది ప్రేమ అస్సె మెలె, తుమ్చి బోడిచ నెండి వాడల్ ఎత్తి మొత్తుమ్ కెత్తి అస్తి గే, జోయ్యి జానె. జాచి రిసా తుమ్ బియఁ నాయ్. తుమ్ పిట్టల్చి కంట ఒగ్గర్ విలువ అస్సున్.

యేసుక సంపజరిగిన, మాన్సుల్చి మొక్క ఒప్పున సంగుక అస్సె
(మత్త 10:32-33; 12:32; 10:19-20)

8 “జలె, తుమ్క ఆవ్ కిచ్చొ మెంతసి మెలె, కో అంక సంపజా యేసుక్రీస్తుకయ్ ఆవ్ సంపజా అస్సి, మెన మాన్సుల్చి మొక్క ఒప్పునుల గే, అంచయ్ మాన్సుల్, మెన, పరలోకుమ్తె దేముడుచ దూతల్చి మొక్క ఆవ్ మాన్సు జా జెర్మున్ అయ్లోసా ఒప్పునిందె.

9 గని, మాన్సుచి మొక్క కో అంచి రిసా జోచొ నెంజి మెనుల గే, దస్సి, ఒత్త దూతల్చి మొక్క జోవయించి రిసా ‘అంచ నెంజితి’ మెన ఆవ్ సంగిందె.

10 “అన్నె, కో గడియ బమ్మ జా కెర ఆవ్ మాన్సు జా జెర్మున్ అయ్లోసాచి రిసా అన్మానుమ్ కోడు లట్టబుల గే, జోవయింతె ఎత్తి మాన్సుచి జా పాపుమ్ చెమించుప కెరుక జయెదె. గని, దేముడుచి నుద్ది తిలి ఆత్మక కో దూసుప కెరుల గే, జోవయింతె కచి పాపుమ్ చెమించుప జయె నాయ్.

11 “అన్నె కిచ్చొ మెలె, తుమ్చి ఉప్పిరి కోపుమ్ జల యూదుల్ తుమ్క నిందల్ కెర జోవయించ సబ గెరల్ నెంజిలె అదికార్లుచి మొక్క, నెంజిలె రాసల్చి మొక్క పరిచ్చ కెరుల, గని తుమ్ కీసి రుజ్జు నజనుక గే, కిచ్చొ జబాబ్ దెంక గే, తుమ్ కిచ్చొ సంగుక గే, తుమ్ బియఁ నాయ్.

12 కిచ్చొక మెలె, తుమ్ కిచ్చొ సంగుక గే తెదొడ్క, జయి గడియయ్ పరలోకుమ్చొ దేముడుచి నుద్ది తిలి ఆత్మ తుమ్క సికడెదె” మెన యేసు సంగిలన్.

సామ్యారుమ్ జతి ఆనక జితిన్చి రిసా యేసు సంగిలీసి

13 తెదొడి ప్రైజల్తె ఎక్కిలో యేసుక ఇసి మెలన్: “ప్రబు, అమ్చి ఆస్తితెచి అంచి వాట దెవున్ మెన అంచొ అన్నొక సంగు” మెలన్.

14 యేసు, జలె, జోక, “ఓ మాన్సు, జోక చి తుక నెడిమి తీర్పు దెతోసా ఆవ్ జతి రితి, జోచి తుచి ఆస్తి వంటీతి రితి, దస్సి కెరిందె మెన కో అంక టీచ అస్సి?”

15 జనాబ్క అన్నె, “తుమ్ సూన. సామ్యారుమ్ దొర్కు కెరంతి ఆన నే జతి రితి తుమ్ జాగర్త తెన్ తా. మాన్సుక కెద్ది సామ్యారుమ్ తిలెకి, †జోవయించి ఆత్మక జియడ్డిసి నెంజె, జా” మెలన్.

బుద్ది నెంజిలో సామ్యారిచి టాలి

16 తెదొడి జనాబ్క యేసు ఏక్ టాలి సంగిలన్. కిచ్చొ మెలె, “సామ్యారి ఎక్కిలో తిలన్. జోచి బుయితె చెంగిల్ పంటొ పికడ్లన్.

17 గట్టిజ పంటొ పికిత్కయ్ కిచ్చొ ఉచర్లన్ మెలె, ‘అంచి దాను సువుక టాన్ దెరె నాయ్. కీన్ కెరుక?’ మెన ఉచర, అస్సె,

18 ఒహో, జాని. దాన్ కొట్టు తియంత గెరల్ సేడవ కెర, అన్నె వెల్లెల్చ బందయిందె, చి ఒత్తయ్ అంచ దాన్ చి అంచి సామన్ ఎత్తి తియనిందె.

19 అన్నె, కిచ్చొ మెననిందె మెలె, తుయి అద్రుస్తుమ్చొ! కెత్తిగి వెర్పుల్ తుక కామ్క జెతిసి తుక సామ్యారుమ్ అస్సె. సుక్కుమ్ తెన్ తా, చి ఇస్టుమ్ అయ్లి రితి కా పియ సర్ద కెరంతె తా జి మెననిందె మెలన్.

20 గని దేముడు జో మాన్సుక, ‘తుయి బుద్ది నెంజిలో వెర్రి సుదొ, తుచి. జీవు ఆజి రాతికయ్ కడ నెంక జెవుల. జయ

అంచి ఆడ్ర. తుకయ్ తుయి కుడవన్లీసి తెదొడక కచి జయెదె?’ మెలన్.

21 జలె, కో ఈంజ లోకుమ్చి ఆస్తి కుడవన సామ్యారుమ్ కెరనుల చి దేముడుక పచ్చ జో దెతి ఆత్మ సామ్యారుమ్ జోక తయె నాయ్ గే, జోచి గత్తి ఈంజ టాలిచొ మాన్సుచి గత్తి ఎక్కి” మెన యేసు సంగిలన్.

‘కీసి జా జిమ్దె?’

(మత్త 6:25-34; 6:19-21)

22 “జాకయ్, ఆవ్ తుమ్క కిచ్చొ మెంతసి మెలె, ‘కిచ్చొ కమ్దె గే, కిచ్చొ గలనుమ్దె గే, కీసి జా జిమ్దె’ మెన తుమ్చి మెన్సుతె చింత గలన నాయ్.

23 కిచ్చొక మెలె, అన్నిమ్చి కంట మాన్సుచి †ఆత్మ ముక్కిమ్ గెద, పాలల్చి కంట ఆగ్ విలువ గెద?

24 కాడల్చి రిసా తుమ్ ఉచర. జేవ్ ఉంపితి నాయ్, పంటొ లాయితి నాయ్, చి జోవయింక కొట్టు నాయ్ కొట్టు గెరల్ నాయ్ జలెకి, దేముడు జోవయింక అన్నిమ్ దెతయ్. జలె, పిట్టల్చి కంట తుమ్ ఒగ్గర్ విలువ అస్సున్ గెద? కచితుమ్ తుమ్క దొర్కు జలిసి జో దొర్కు కెరెదె.

25 పడ్డె, తుమ్చితె కో కెద్ది చింత గలన్లెకి, కిజోచి బత్తుక కొల్తక అత్తెక్ జవున్ ఒగ్గర్ కెరనుక తెరె గే? నెత్తె.

26 దస్సు ఇన ఇదుద్ల కమె జర్గు కెరుక నెతుర్పు జలె, అన్నె తిల కమె జర్గు కెరుక కిచ్చొక బమ్మ జతను?

27 “డెంగెచ పుల్లో కీసి వడ్డితతి గే, తుమ్ ఉచర. జేవ్ కామ్ కెర్రి నాయ్, పాలల్ వీంతి నాయ్. జలెకి, ఎదివాట్ సామ్యారుమ్ కలుగు జలొ పూర్గుమ్చొ రానొ సాలొమోను కి ఈంజేవ్ పుల్లోచి రితి సూటి కెరనుక నేన్లొ.

28 తుమ్ తొక్కి నముకుమ్ తిలన, ఏక్ కోడు ఉచర. ఆజి బట్టి వడ్డితి, గని కలిక

† 12:15 12:15 నెంజిలె, ‘జో ఒగ్గర్ దీసల్ జతి రితి నెలవ్ దెతిసి నెంజె’. నెంజిలె ‘జోవయింక జియడ్డిసి నెంజె, జోవయించి జిచితుమ్క నిజమ్ ముక్కిమ్ తిలిసి నెంజె’. ‡ 12:23 12:23 నెంజిలె ‘జీవు’. § 12:25 12:25 నెంజిలె, ‘జోవయింక దిల దీసల్చి కంట జోవయించి ఇస్టుమ్క అన్నె దీసల్ జింక జయెదె గే?’

డయ దెతి వెర్రి చివ్వర్క దేముడు ఎదిలి సూటి కెర్తయ్, జలె, కచితుమ్ తుమ్ మాన్సుల్క అన్నె చెంగిల్ గలంతిసి దొర్కు కెరెదె.

29 అన్నె, 'అన్నిమ్ కిసి దొర్కు జయెదె, పితిసి కిసి దొర్కు జయెదె?' మెన తుమ్ బమ్మబుద్ది తెన్ తా నాయ్.

30 కిచ్చొక మెలె, ఈంజ లోకుమ్చ ఎత్కి మాన్సుల్ ఇన వస్తువల్ దొర్కు కెరనుక ఆస జతతి. ఇన సామ్ము తుమ్క కి దొర్కు జతతి మెన తుమ్క అబ్బొది జతో దేముడు జానె.

31 తూమ్, కిచ్చొ కెరుక అస్సె మెలె, *జోచి రాజిమ్తె బెద, జోక గవురుమ్ కెర్తి బుద్ది ఇండుక ఆస జా, చి దొర్కు జల ఈంజేవ్ అన్నె వస్తువల్ కి తుమ్క జో దొర్కు కెరెదె.

పరలోకుమ్తెచి ఆత్మ సామ్నారుమ్క ఆస జతిన్చి కోడు

32 "అంచి ఇద్దిలిసి మంద జల అంక నంపజలన, తుమ్ బియఁ నాయ్. కిచ్చొక మెలె, †జోచి రాజిమ్తె తుమ్ బెద జో తెన్ ఏలువ కెర్తి రితి అంచో అబ్బొసి జలో దేముడుచి ఉద్దెనుమ్.

33 తుమ్చ ఆస్తుల్ విక గెల కెర, బీద సుదల్క జా డబ్బుల్క తుమ్ దర్ముమ్ దాన. పరలోకుమ్తెచి పొర్న నే జతి రగుమ్ పాడ్ నే జతి రగుమ్ సంచెల్ కోడు దొర్కు కెరన తా. జేవ్ సంచెల్తె కిచ్చొ తంక మెలె, పాడ్ నే జతి, కేన్ చోరు జా దనుమ్క పాసి గెచ్చుక నెత్తిర్తి, చి కేన్ కీవు జాక కంక నెత్తిర్తి.

34 తుమ్ కేన్ లోకుమ్తె దనుమ్ సంపాదన కెరన తస్తె గే, ఒత్త తిలిన్చి రిసా తుమ్చి పెట్టి ఉచర్తె తస్తె.

యేసు అన్నె ఉత్త జెతిన్క తెయార్ జా (మత్త 24:42-51)

35-36 "పెండ్లి విందు తెంతో బుల జెతో కేన్ ఎజొమాని గెరి అన్నె జెతిన్క జోచ సేవ కెర్తన జోచ పాలల్ చెంగిల్ కుంచన దీవు లంబడ తా, జో అయ్లె కెప్పితె ఉంక్రయ్లె కెప్పి ఉడ్గ దెంక మెన, రకితె తవుల, గెద. తుమ్, జలె, దస్సి తెయార్ జా తా.

37 ఆవ్ ఎజొమాని అన్నె ఉట్ట అయ్లె, అంచ సేవ కెర్తన రితనతె కో చెదొయ్ తా రకితె తిలె, జోవయింకయ్ చెంగిలి. తుమ్క కిచ్చొ కచితుమ్ మెంతసి మెలె, ఆవ్ అంచి పాలుమ్ కుంచన జోవయింక అన్నిమ్క వెనడ దా, జోవయించి రిసా జోగుడ దెయిందె.

38 అన్నె ఆల్సిమ్ అయ్లి రితి సొక్కుక నెంజిలె కుకుడో వాంసెనె అయ్లె, తెద్ది గడియ గెలె కి కో దస్సి చెద్దొయ్ తా రకితె తవుల గే, జోవయింక చెంగిలి!

39 "గని ఏక్ టాలి తుమ్ చెంగిల్ అర్దుమ్ కెరన. కిచ్చొ మెలె, కేన్ సమయుమ్క చోరు జెయెదె మెన గెర్చొ ఎజొమాని కో జలెకు జాన్తో జలె, ‡జో చెదొయి తత్తో, అన్నె చోరు జోచి గెరి పెసితి అవ్కానుమ్ తతి రితి గేర్ ములితో నాయ్.

40 జలె, తుమ్ తెయార్ జా తా రకితె తంక అస్సె. కిచ్చొక మెలె, తుమ్ నే ఉచర్తి సమయుమ్క ఆవ్ మాన్సు జా జెర్మున్ అయ్లొసా అన్నె జెయిందె" మెన యేసు సంగిలన్.

41 తెదొడి పేతురు "ప్రబు, ఈంజ టాలి కీఅమ్కయ్ సంగితసి, గే ఎత్కిజిన్చి రిసా గె?" మెన యేసుక పుసిలన్.

42 యేసుప్రబు జోక, "ప్రయానుమ్ గెచ్చుక మెన ఎజొమాని బార్ జంక జలె, జోచ గేర్చక దెక సమయుమ్క అన్నిమ్

* 12:31 12:31 నెంజిలె 'జోచి రాజిమ్ ఈంజ లోకుమ్తె ఎదార్దుమ్ బార్ జతిన్క ఆస జాచి జోక గవురుమ్ కెర్తి బుద్ది ఇండ'. † 12:32 12:32 లూకా 22:29-30, డీనయ్లిసి 5:10, 20:4, 6 వి తిమోతిక రెగిడ్లి దొన్నె నంబర్ ఉత్తమ్ 2:12 దెక. ‡ 12:39 12:39 ఈంజ మత్తెలి తొలితో రెగిడ్లి సగుమ్ పున్కల్తె 'జో చెద్దొయి తత్తో, అన్నె' చి కోడు తయె నాయ్. § 12:41 12:41 ఏక్ వేల సిన్సుల్కయ్ పేతురు ఉచర్తయ్.

దెంక మెన జో నిసాన నిదానుమ్చో గొత్తి సుదో కో జవుల?

43 జో ఎజొమాని అన్నె ఉట్ట అయ్లె, జో గొత్తి సుదో జో ఎజొమాని తియార్రి కామ్ కెరై తిలె, గొత్తి సుదోక చెంగిలి.

44 దస్సి నిదానుమ్ కెర తయెదె మెలె, తుమ్క ఆవ్ కిచ్చో కచితుమ్ మెంతసి మెలె, జో ఎజొమాని అయ్లె, జోచి ఆస్తి ఎత్తిచ్చి ఉప్పిరి జో చెంగిల్ రకిలో గొత్తి సుదోక అదికారుమ్ దెయెదె.

45 గని జో గొత్తి సుదో ఏక్ వేల ఎజొమాని అల్నిమ్ కెర్తయ్ మెన ఉచర, జోచి జత జల అన్నె మున్నుబోద గొత్తి సుదల్క జలెకి, తేరబోద గొత్తి సుదల్క జలెకి, పెటుక చి కంక పింక సూరు పియ మచ్చుక దెరై,

46 'ఎజొమాని ఆజి జెయె నాయ్' మెన గొత్తి సుదో ఉచర నే రకితె దీన్క, గడియక జో ఎజొమాని ఉట్ట జెయెదె చి, జోక *మొర్తి సిచ్చు తియడ కెర, జోక †నంప నెంజిలన సిచ్చు జతిన్తె జో గలెదె.

47 "జో కిచ్చో కామ్ కెరుక మెన జోచో ఎజొమాని తియార అస్సె గే కేన్ గొత్తి సుదో జానె గని జోచో ఎజొమానిచి ఇస్టుమ్ జర్గు కెరె నాయ్ అన్నె జా జర్గు కెరుక తెయార్ కి జయె నాయ్ గే, జోవయింక ఎజొమాని గట్టిజ పెటయెదె.

48 జోచో ఎజొమానిచి ఇస్టుమ్ కిచ్చో జయెదె గే నేన కెర, పెట్టి సిచ్చుచి ఎదిలి తప్పు కేన్ గొత్తి సుదో కెరెదె గే, జోక ఎజొమాని తొక్కి పెటయెదె. కక్క దేముడు ఒగ్గర్ బుద్ది గే, నెక్తి గే, ఆస్తి గే, కిచ్చో గే దా తయెదె గే, జో మాన్సు నిదానుమ్ తెన్ జా వాడిక కెర ప్రబుచి సేవ కెరుక అస్సె, చి అమ్క 'దస్సి నిదానుమ్ కెర్ల గే, నాయ్ గే' జో ప్రబు దెకెదె. దస్సి, కచి అత్తి జో ఒగ్గర్ సొర్పు కెర తయెదె గే, జో మాన్సు అన్నె లాబుమ్

తెన్ అన్నె దెంక అస్సె.

యేసు అయ్లిసి ఎక్కి సేంతుమ్ కెరయ్తిసి నెంజె (మత్త 10:34-36)

49 "బూలోకుమ్చి ఉప్పిరి ఆగి సువుక అయ్లయ్, చి జా ఆగి అప్పె లంబ తత్తి జలె ఆవ్ 'చెంగిల్' మెన్తయ్.

50 ఏక్ మాన్సు మాములుమ్ పానిచి బాప్తిసుమ్ నజనుక జలె, కీసి పానితె డుజుక తయెదె గే, దస్సి ఆవ్ నైమల్తె డుజ మొరుక అస్సె, చి జా పూర్తి జర్గు జతె ఎదక అంచి పెట్టి కెద్ది బాద సేడ్తసి!

51 "జలె, అంక 'జో బూలోకుమ్తె అయ్లిసి మాన్సుల్తె ఎక్కి సేంతుమ్ కెరెదె' మెన తుమ్ ఉచర్లసు గె? ఆవ్ అయ్లిసి సేంతుమ్ దెయె నాయ్, గని ఆవ్ అయ్లి రిసా మాన్సుల్ జట్లు జవుల.

52 మెలె, అప్పె తెంతో ఎక్కి గెరి పాచ్జెన్ తిలె, జట్లు జవుల. దొగుల ఏక్ జట్టు జా, తీగ్ల ఏక్ జట్టు జా, దొగులచి ఉప్పిరి తీగ్ల విరోదుమ్ జవుల. నెంజిలె, తీగ్లచి ఉప్పిరి దొగుల విరోదుమ్ జవుల.

53 దస్సి, పుత్తున్చి ఉప్పిరి అబ్బొసి విరోదుమ్ జయెదె, అబ్బొన్చి ఉప్పిరి పుత్తుసి విరోదుమ్ జయెదె, దువిన్చి ఉప్పిరి అయ్యసి చి, అయ్యన్చి ఉప్పిరి దువిసి విరోదుమ్ జవుల, చి సూనున్చి ఉప్పిరి అత్తన్, చి అత్తన్చి ఉప్పిరి సూనుసి విరోదుమ్ జవుల" మెన యేసు సంగిలన్.

కాలుమ్ కిసిచి గే చినితిన్చి రిసాచి కోడు (మత్త 16:2-3)

54 యేసు ప్రెజల్క, "పడమర పక్క పాని దెతి మబ్బు అయ్లె, 'పాని పెటెదె', మెన తుమ్ బేగి సంగితను గెద, కచితుమ్ జర్గు జతయ్.

* 12:46 12:46 నెంజిలె టాలిక 'కండ గెలెదె'. † 12:46 12:46 నెంజిలె 'నిదానుమ్ నెంజిలనక'.

55 వణ్ణొ దచ్చెన పక్క తెంతో వాడు వీర్లె, 'ఆజి గట్టిజ వేడి కెరెదె' మెన చినితె చి, దస్సి జర్లు జయెదె గెద?

56 తుమ్ ఉప్రమెన్సుచో మాన్సుల్! తుమ్ చినితినక 'నేనుమ్' మెంతను. బుయియక చి అగాసుమక దెకిలె క్రీసి కెరెదె గే చినితను జలె, ఈంజ కాలుమతె జర్లు జతిసి దెకిలె ఈంజ కాలుమక కీసిచి గే చినుక నెతుర్పు గ? చినుక తెరితను, గెద" మెన సంగిలన్.

నేరిమ్ వయణ్ణొసా తెన్ నేరిమ్ జలోసా సేంతుమ్ కెరెంతినచి టాలి (మత్త 5:25-26)

57 యేసు అన్నె కిచ్చొ బుద్ధి జోవయింక ఉచరయలన్ మెలె, "తుమ్ కిచ్చొ కెర్లె చెంగిల్ తయెదె గే, కిచ్చొక చినున్ నాయ్?

58 తుచి తగు సూనితో తీర్పు కెర్లాన్తె గెచ్చుక మెన తుక నేరిమ్ వయణ్ణొసాచి తుయి నేరిమ్ జలోసా వట్టె గెతె తిలె పొది, జోవయింతెన్ తుయి సేంతుమ్ జంక దెకను. నెంజిలె, తీర్పు కెర్లాసాతె తుక ఒగ్గడ తిలె, తుచి తగు సూన్లె, తీర్పు కెర్లాసా తుక జమాన్లుచి అత్తి సార్ప కెర దెయెదె, చి జమాన్లు తుక జేల్తె గల దెయెదె.

59 †ఆవ్ తుమ్క కిచ్చొ మెంతసి మెలె, తుయి తుచి సిచ్చుచి ఆకర్ కాసు ఎద కి తుయి పూర్తి తీర్పుప కెర్లె ఎదక, తుక ములుక నెంజె."

13

సగుమ్జిన్ ప్రమాదుమ్ జా మొర్లిన్చి రిసా సంగిలిసి

‡ 12:59 12:59 ఈంజ కోడుచి అర్లుమ్ కిచ్చొ మెలె, 59. తుమ్క ఆవ్ కిచ్చొ మెంతసి మెలె, తుమ్చి పాపుమ్చి రిసా తుమ్క నేరిమ్ వయణ్ణొ అమ్మి, అదికారుమ్ తిలో దేముడు తెన్ తుమ్చితె కో మదెన సేంతుమ్ జను నాయ్ గే, ఈంజ లోకుమ్చ మన్సుల్క పరిచ్చు కెర తీర్పు కెర్లి పొదిక, సిచ్చు జస్సె, చి జా సిచ్చుచి రునుమ్చి ఆకర్చి కాసు ఎద కి పూర్తి తీర్పుప కెర్లె ఎదక మెలి కోడు, తుక ములుక నెంజె. జా తీర్పుప కెరుక నెతుర్పుచి రిసా జా సిచ్చు కుట్టె నాయ్. కీసి సేంతుమ్ జంక మెలె, అమ్చి పాపుమ్ ఒప్పున యేసుక నంపజా పాపుమ్బుద్ధి ముల జోచి ఇన్ఘమ్ కెరుక దెరుక. * 13:1 13:1 గలిలయల్ మెలె, గలిలయ ప్రాంతుమ్చ యూదుల్. † 13:1 13:1 గలిలయల్తె సగుమ్జిన్, బెర్లె, జోవయింక ఆక్రమించుప కెర్లె రోమ్ దేనిమ్చి ప్రబుతుమ్క ఉదడుక ఉచర కిచ్చొ కిచ్చొ అల్లర్ కెర్లె తిలె. ఏక్ వేల ఈంజేవ్ మాన్సుల్క 'అమ్చి ప్రబుతుమ్క అల్లర్ దెత్తి' మెన ఉచరయ్ పిలాతు కండయలన్.

1 యేసు జేవ్ కొణ్ణొ సంగిలి సమయుమ్ తిలస సగుమ్జిన్ జోక, సగుమ్జిన్ గలిలయల్ మొర్లిన్చి

రిసా సంగిల. "జేవ్ *గలిలయల్ యెరూసలేమ్తె దేముడుక బలి దెతె తతికయ్, పిలాతు అదికారి జోవయింక †కండయలన్, చి జేవ్ అర్పితుమ్ దిల్లిన్తె జోవయించి లోయి కల్యోమ్ జలి" మెన సంగిల.

2 యేసు జోవయింక కిచ్చొ జబాబ్ దిలన్ మెలె, "ఈంజేవ్ గలిలయల్ ఇసి మొర గెలి రిసా, తిల గలిలయల్చి కంట ఒగ్గర్ పాపుమ్చ జవుల మెన ఉచర్తసు గ?

3 నాయ్, దస్సి నాయ్, మెన తుమ్క ఆవ్ సంగితసి. గని తుమ్క కిచ్చొ ఆవ్ సంగితసి మెలె, తుమి పాపుమ్ ఇండుక ముల దెంకయ్, నెంజిలె తూమ్ కి ఇసి మొర గెతె.

4 "నెంజిలె, అమ్చి యెరూసలేమ్తె సిలోయము పక్కచి గోపురుమ్ సేడ గెలి పొది జాచి తెడి తిల అట్టర జిన్ మాన్సుల్ తెడి తా మొర్లిన్క ఉచర్లె, అన్నె యెరూసలేమ్తె తిల మాన్సుల్చి కంట, జేవ్ అన్నె పాపుమ్చ జా తిల మెన తుమ్ ఉచర్తసు గ?

5 దస్సి నాయ్ మెన ఆవ్ సంగితసి గని, తుమ్క ముక్కిమ్క ఆవ్ కిచ్చొ సంగితసి మెలె, తుమి పాపుమ్ ఇండుక ముల దెంకయ్, నెంజిలె తూమ్ కి ఇసి మొర గెతె" మెన యేసు సంగిలన్.

పలితుమ్ నే దిలి అంజూరుమ్ రూక్చి టాలి

6 తెదొడి యేసు ఈంజ ట్రాలి సంగిలన్: "ఎక్కిలోక ఏక్ అంజూరుమ్ రూకు అస్సె. తిన్ని వెర్నుల్ జలి జో రూకు జోచి ద్రాచ తోటతె రోవ అస్సె. జలె, జో ఎజోమాని

‘జా రూకతె పండ్లు అన్ని కిచ్చొగి. దొన్ని కోడిందె’ మెన రూకతె అయలె, ఎక్కి పండు కి నాయ్.

7 తెదొడి జా తోటక దెకితో గొత్తి సుదొక ఎజొమాని, ఈందె, పండ్లు చజ కోడుక మెన కిత్తిన్ని వెర్పుల్ జలి ఆవ్ జెతసి, గని కేన్ పండు కి దెరె నాయ్. ఈంజొ రూకు కండ గెలు. ఆరి ఈంజ టాన్క పాడ్ కెర్తయ్” మెలన్.

8 జో ఎజొమాని దస్సి సంగితికయ్, జా తోట రకితోసా, “బాబు, ఏనుమ్ జవున్ దెకుమ. రూకుక మత్తి వెగవ కెర, సావును సువ దెకిన్దె,

9 పోరుమ్క పండ్లు దెర్లె రూకు తవున్, నే దెర్లె, కండ గెలుమ” మెలన్.

సొగ టీవ్క నెత్తి తేర్బోదక విస్తాంతి దీసి యేసు చెంగిల్ కెర్లిసి

10 జలె, ఏక్ సెలవ్ కడన్లి దీసి, యేసు సబగేరి బోదన కెర్తె తతికయ్,

11 బూతుమ్ చి రిసాచి జబ్బు తిలి తేర్బోద ఒత్త తిలన్. జా తేర్బోదక జా జబ్బు జా అట్టర వెర్పుల్ జా తిలి. జా కుట్టి జా, వంపొ జా ఎద్దరె టీవ్క నెత్తి.

12 జలె, యేసు జాక దెక కెర, “పాసి జె” మెన జాక బుకారా కెర, “అమ్మ, తుచి జబ్బు తెంతో చెంగిల్ జా అస్సిన్” మెన సంగ,

13 జేవ్క చడ్డిల్ బేగి సొగ జా టీవెలన్, అన్నె దేముడుచి గవురుమ్ సంగిలన్.

14 గని సెలవ్ కడన్లి దీసి జా తేర్బోదక చెంగిల్ కెర్లి రిసా జేవ్ యూదుల్చి జో సబగేరిచొ అదికారి కోపుమ్ జా, ప్రెజల్క, “సత్తరెక్క మాన్సుల్ కామ్ కెర్తి రిసా సాప్పు పొదుల్ అస్సి. తుమ్క జొర్టొల్ గట్ట తిలె, సెలవ్ కడన్లి దీన్ నాయ్, గని తిల సాప్పు పొదుల్తె జా” మెన సంగిలన్.

15 దస్సి సంగితికయ్, యేసు జోవయింక కిచ్చొ జబాబ్ దిలన్ మెలె, “తుమ్ ఉప్రమెన్సుచ, సెలవ్ దీన్ కామ్ కెరుక నెంజె మెంతను, గని సెలవ్ కడన్లి దీసి కి తుమ్చ బెయిలల్ కి గాడ్డెల్ కి కిచ్చొ సామ్ముల్ జలికి యిప జేవ్ పాని పింక మెన గడ్డె ఉదడ నెను నాయ్ గె? దస్సి కెర్తను, గెద.

16 జలె, ఈంజ తేర్బోద, అమ్ యూదుల్చి అబ్రాహామ్చి సెకుమ్చి తేర్బోదక సయ్తాన్ బంద, అట్టర వెర్పుల్ జా అస్సి. జలె, తుమ్చ సామ్ముల్క సెలవ్ కడన్లి దీసి యిపుక జతయ్ జలె, సెలవ్ కడన్లి దీసి జలికి ఈంజ తేర్బోదక బందిలిన్ తెంతో ఇన్నెక యిప, విడ్డల్ కెరుక అన్నె ముక్కిమ్ నాయ్ గె?” మెన యేసు సంగితికయ్,

17 జోక ‘తప్పు కెర్తయ్’ మెన ఉచర్లస ఎత్కిజిన్ ‘అమ్చి తప్పు’ మెన లాజ్ జల చి, జోచి అత్తి జర్గు జల వెల్లెల కమె ఎత్కిచి రిసా ప్రెజల్ ఎత్కి సర్దసంతోసుమ్ జా గెల.

దేముడుచి రాజమ్క చి సొర్పు గిడ్డక సంగిలి టాలి
(మత్త 13:31-33; మార్కు 4:30-32)

18 జో జర్గు కెర్లిన్క ప్రెజల్ దస్సి సర్దసంతోసుమ్ జతికయ్, యేసు, “దేముడుచి రాజమ్ కిసి జతయ్ గె ఉచరుమ. జాక కిచ్చొ టాలి ఉచరుమ?

19 ఈందె, సొర్పు గిడ్డక జలిన్చి రితి జతయ్. ఏక్ మాన్సు సొర్పు గిడ్డ ఆన, జోచి పట్టయ్ రోవిలన్, చి మొక్క వడ్డ రూకు జా గెలన్, చి జేవ్చ కొమ్ముల్తె

‡ 13:7 13:7 యేసు తిన్ని వెర్పుల్ బుల బుల బోదన కెర్తె తిలన్, జొర్టొ బాదల్ తిల మాన్సుల్క చెంగిల్ కెర్తె తిలన్, గని ఒగ్గర బుద్ది పలితుమ్ జేవ్ ప్రెజల్తె నే దెర్లి రితి తిలి, చి “తుమ్చి బుద్ది నే మార్కుప జలి, తుమ్చి పాపుమ్ నే ములిలె, చెంగిల్ బుద్దిపంట్ నే దెర్లి, తుమ్చి సిచ్చ వయితె” మెన ఈంజ టాలి తెన్ జాగర్ల సంగితయ్.

పిట్టల్ గూడల్ బంద జిల” మెన Sటాలి బెదవ సంగిలన్.

పులయ్తి పిట్చి రిసాచి టాలి (మత్త 7:13-14,21-23)

20 ఒత్త తెంతో యేసు అన్నెక్ కోడు పుస *కిచ్చొ టాలి సంగిలన్ మెలె, “దేముడుచి రాజిమక కిచ్చొ అన్నెక్ టాలి ఉచరుమ?

21 ‘పోడియె కెర్తి పిట్ ఎత్తి. పొంగువ జా పులున్’ మెన, ఏక్ తేర్బోద తీనడి పిట్తె పులయ్తి పిట్ గలిలి. గల జా పాకుమ్ పులితి రితి తియ దిలి, చి జా పులయ్తి పిట్ ఇదిలిదిల్ జలెకి. జా కలొయ్లి పాకుమ్ తిరిమ్ తిరిమ్ పుల, ఒగ్గర్ జా గెలి” మెన సంగిలన్.

పరలోకుమతె పెసితి గుమ్ముమచి రిసాచి బోదన

22 జేవ్ పొదులె యేసు †యెరుసలేమతె గెచ్చుక మెన ప్రయానుమ్ గెతె తిలన్. జలె, వట్టె అన్నె ఒగ్గర్ పట్టలె గెవ్విలె గెలన్.

23 జేవ్ పొదులె కో గే జోక కిచ్చొ మెన పుసిలన్ మెలె, “ప్రబు, పాపుమ్ తెంతో రచ్చించువ జా పరలోకుమతె గెతన తొక్కిజిన్ జవుల గె?” మెన పుసిలన్, చి యేసు ఒత్త తిలనక,

24 “పరలోకుమచి గుమ్ముమ్ ఇర్కు జయెదె. జా ఇర్కు గుమ్ముమె తుమ్ పెసితి రితి ‡దొర్కు జలిసి కెరనుక దెకన. కిచ్చొక మెలె, జా గుమ్ముమె పెనుక

మెన ఒగ్గర్జిన్ ఉచర్లె కి, జోవయింతె ఒగ్గర్జిన్ నెత్తిర్.”

25 “పరలోకుమ్క ‘గేరు’ మెనును. జో గేర్చొ ఎజోమాని ఉట్ట తెదొడెక కెప్పి డంక దెయెదె, చి తెదొడెక తుమ్ జా కెప్పి ఇత్తలతో బయిలె టీవ ఉంక్కుక దెర, ‘ప్రబువ, అమ్క కెప్పి ఉగ్గ దె’ మెంతె, చి జో తుమ్క కిచ్చొ జబాబ్ దెయెదె మెలె, ‘తుమ్ కేనె తెంతొచ గే నేని’ మెనెదె.S

26 తెదొడెక తుమ్ కిచ్చొ మెంతె మెలె, ‘తుచి తెన్ బెద అన్నిమ్ కయ్లమ్ పిలమ్, చి అమ్చి విదులె తుయి బోదన కెర్లది’ మెంతె,

27 గని జో తుమ్క కిచ్చొ మెనెదె మెలె, ‘నాయ్, తుమ్ కేనె తెంతొ జెతను గే నేని. తుమ్క కచితుమ్ నేని. తుమ్ గార్ కమె కెర్లసా అంచి తెంతొ దూరి ఉట్ట గెచ్చు’ మెనెదె.

28 జలె, అమ్చ పూర్లుల్ అబ్రాహామ్, ఇసాకు, యాకోబు తెన్ దేముడుచ కబుర్లు సంగిల పూర్లుమచ జోచి రాజిమ్తె పరలోకుమతె తిలిసి తుమ్ తెదొడెక దెకితె, గని తుమి ఒత్త పెనుక సెలవ్ తయె నాయ్ చి రిసా ఏడుకుడు జస్తె, దంతో చప్లనతె తస్తె.

29 తుమ్ నంప నెంజిలన ఒత్త పెనున్ నాయ్, గని తూర్పు పక్క తెంతొ, పడమర పక్క తెంతొ, ఉత్తర పక్క తెంతొ చి దచ్చెన పక్క తెంతొ యూదుల్ నెంజిల ఒగ్గర్జిన్ మాన్సుల్ జా కెర, దేముడుచి పరలోకుమచి రాజిమ్తె వెన, జో తెన్ అన్నిమ్ కవుల.

S 13:19 13:19 ఈంజ టాలిచి అర్దుమ్ కిచ్చొ మెలె, ఎత్తి అదికారుమ్ తిలొ దేముడుచి రాజిమి మొదొల్క తొక్కిజిన్ మాన్సుల్ తిలెక, జా రాజిమ్ వడ్డెదె, చి అకర్క ఒగ్గర్జిన్ జేవెతె బెద తవుల, చి పిట్టల్ రూకెతె గూడల్ బందిలిసి అమ్ ఉచర్లె, జా రాజిమ్తె బెదిల మాన్సుల్క జా రాజిమ్ నీడ, చెంగిల్ తతి టాన్, దిలి రితి జయెదె.

* 13:20 13:20 ఈంజ టాలిచె దొన్సి ఉచరుక జయెదె. తొలితో తొక్కిజిన్ జా రాజిమ్తె తిలె కి, పడ్డొ తిరిమ్ తిరిమ్ ఒగ్గర్జిన్ జా రాజిమ్తె బెదిలిసి ఉచరుక జయెదె. పడ్డొ జా ఓస్తు కీని జా కలొయ్లి పిట్టచి రూపుమ్ జేవెచి వాసిన గట్టక మార్పువ కెరెదె గే, దన్సి ఎత్తి అదికారుమ్ తిలొ దేముడుచి రాజిమ్ ఒగ్గర్జిన్క మార్పువ కెరెదె, చి జోవయింబి బుద్ధిక మార్పువ కెర చెంగిల్ కెరెదె. † 13:22 13:22 9:51, 53 దెక. ‡ 13:24

13:24 బారికుల్ 4:12, 16:31, యోహాను 3:15, 16 ఏ లూకా 10:25-28. S 13:25 13:25 జానె. జేవ్ యూదుల్ జవుల చి “అమ్కయ్ రచ్చన దొర్కు జయెదె. అమి పరలోకుమతె గెచ్చుమదె” మెన జేవ్ ఉచర్లె కి

జేవ్ నంపనెంజిలి రిసా దన్సి సంగితయ్. * 13:30 13:30 జా కాలుమ్క అగ్గవ బూలోకుమ్ గెచ్చవ గెల కెర, ఎత్తి అదికారుమ్ తిలొ దేముడు నొచి బూలోకుమ్ జర్కు కెరెదె, చి రచ్చించువ జల పరలోకుమచి రాజిమ్తె బెదిల జోచయ్ జల మాన్సుల్ తెన్ జయెదె, డీసయ్లిసి 21:1-8, చి జోవయింతెన్ బెద ఏలువ కెరుల, లూకా 22:29-30

30 అన్నె, అప్పె వడ్డొ జలన జా అగ్గె జవుల, చి అగ్గె జలన *వడ్డొ జవుల” మెన యేసు సంగిలన్.

యేసుక పరిసయ్యుల్ బియఁడ ఉదడుక ఉచర్లసి (మత్త 23:37-39)

31 జయి గడియయ్ పరిసయ్యుల్ సగుమ్జిన్ యేసుతె జాఁ కెర జోక కిచ్చొ మెల మెలె, “తుయి కేనెగె వేరతె గో. హేరోదు అదికారి తుక మారుక ఉచర్లయ్” మెల.

32 జేవ్ దస్సి మెంతికయ్, యేసు జోవయింక, “తుమ్ గెచ్చ, జో †నక్కొ రితొ మాన్సుక కిచ్చొ మెన మెలె, ‘ఈందె, ఆజి చి కలిక ఆవ్ బూతల్క ఉదడ్డని చి, జబ్బుల్ తిల మాన్సుల్క చెంగిల్ కెర్తసి చి, పేర్క అంచి కామ్ పూర్తి జయెదె.

33 జెలకి, ఆజి కలికచి పేర్క ఆవ్ అంచి ప్రయానుమ్ గెచ్చ గెచ్చ యెరూసలేమ్తె పావుక అస్సె. మెలె, దేముడుచ కబుర్లు సంగితొ మాన్సు యెరూసలేమ్క వేర టాన్తె మొరుక బెదె నాయ్” మెన జోక తుమ్ సంగ” మెన పరిసయ్యుల్క యేసు సంగిలన్.

34 తెదొడి యేసు కిసి జులన్ మెలె, “ఓ యెరూసలేమ్చ, అమ్చి యెరూసలేమ్చ మాన్సుల్! అమ్ తెద్రయ్ల కబుర్ ఆన్లసక చి బోదన కెర్లసక పత్రల్ గల మార్తసు! కిచ్చొ ప్రమాదుమ్ తుమ్క నే లయితి రితి కుకిడి జాచ పిల్లల్క రెప్పల్ తెడి కిసి ముద్దొ కెరన తయెదె గే, దస్సి, ఆవ్ తుమ్క కెత్తిగే నుట్లు ముద్దొ కెరంతి రితి

తుమ్క చెంగిల్ కెర్తయ్, గని తుమ్ నెసిలదు.

35 ఈందె, తుమ్చి గేర్ కో నెంజితె రితి తుమ్క తూమి ముల దెస్సె. అన్నె అప్పె తెంతొ మొదొల్ కెర †‘ప్రబుచి నావ్ తెన్ జెతోసాక జెయ్యి! జెయ్యి!’ మెన తుమ్ కేక్ గల్లి దీసి ఎద అంక అన్నె దెకున్ నాయ్ మెన తుమ్క ఆవ్ కచితుమ్ సంగితసి.” మెన యేసు సంగిలన్.

14

విస్తాంతి దీసి అత్తో చట్టొ పుల తిలొ మాన్సుక యేసు చెంగిల్ కెర్లసి

1-2 అన్నె కిచ్చొ జర్గు జలి మెలె, సెలవ్ *కడ దీసి, అన్నిమ్క మెన యేసు పరిసయ్యుల్చొ అదికారి ఎక్కిలోచి గెరి గెచ్చ తతికయ్, అత్తో చట్టొ పుల తిలొ మాన్సు ఎక్కిలో యేసుచి మొక్కె తిలన్, చి “యేసు కిచ్చొ కెరెదె గే దెకుమ్” మెన ఒత్త తిల మోసాన్ తెన్ దేముడు దిలి ఆగ్గుల్ సికడ్డన చి పరిసయ్యుల్ చెంగిల్ దెకితె తిల.

3 జలె, జేవ్ పరిసయ్యుల్చి మోసాన్ తెన్ దేముడు దిలి ఆగ్గుల్ సికడ్డనచి మెన్సుతె తిలి జోవయించి ఉప్పిర్చి కుస్సిదుమ్ యేసు జాన కెర, జోవయింక, “సెలవ్ కడన్ల దీసి జబ్బు తిలసక చెంగిల్ కెరుక అమ్చి మోసాన్చి అత్తి దేముడు దిలి ఆగ్గుల్ తెన్ బెదితయ్ గే నాయ్? గె? తుమ్ సంగ” మెన పునిలొ.

4 గని జేవ్ ఎత్తిజిన్ తుక్లె తిల. తెదొడి జో అత్తో చట్టొ పుల తిలొ మాన్సుక యేసు పాసి బుకారా కెర జోక చెంగిల్ కెర “గో” మెలన్.

† 13:32 13:32 ‘నక్కొ రితొ మాన్సు’ మెలె, జోక తెల్వచ మోసిమ్ కెర్ల ఉద్దెనుమ్ల తవుల. వడ్డొ యూదుల్ తెన్ ఇదిల్ దకిలొ రితొ సిస్సారుమ్ జలొ మాన్సుక దస్సి మెనుల. జెతె. జో హేరోదు అదికారి జయెదె, గని జోచి బుద్దికయ్ యేసు దస్సి సంగితయ్. ‡ 13:35 13:35 ఈంజ కోడు ఎత్తి అదికారుమ్ తిలొ దేముడు తెద్రయ్తొ రచ్చించువ కెర్లసాక సంగితి కోడు. *

14:1-2 14:1-2 యూదుల్చి అలవాట్ తెన్, సత్తరెక్క, సత్తు దీసల్ కిచ్చొ కామ్ నే కెర్ల దేముడుక జొక్కర్ల దీసి. విస్తాంతి దీసి-తెలుగు. ఎత్తి సెన్వర్ల యూదుల్క బక్తి కెర్ల సెలవ్ కడ దీసి జయెదె. జా దీసి జోవయించ సబ గెరలె గెచ్చ, దేముడుచి కొడొ సూన కెర, ఎత్తి అదికారుమ్ తిలొ దేముడుక బక్తి కెరుల. జోక ‘యెహోవ’ మెన నావ్ తయెదె. జా దీసి ‘కిచ్చొ కామ్ కెర నాయ్’ మెన జో ఎత్తి అదికారుమ్ తిలొ దేముడు సంగిలినక యూదుల్చ వెల్లెల మాన్సుల్ ప్రజల్క జాడు వయడ్లి రితి కెర కామ్ నే కెర్లచి రిసా ఒగ్గర్ ఆగ్గుల్ అచ్చొ ఉచర అస్సి. ఇన్నె, దొన్ని ఎన్సులు కోట్లినక ‘కామ్’ మెన నింద కెర్తతి.

5 తెదొడి యేసు జేవ్ పండితుల్క అన్నె కిచ్చొ పుసిలన్ మెలె, “తుమ్చి తెన్ ఎక్కిలోక పుత్తున్ జలెకు, బెయిలు జలెకు తిలె, జో పుత్తున్ జలెకు బెయిలు జలెకు సెలవ్ కడన్లి దీసి కుండితె సేడ తిలె, జయ్యి దీసి, సెలవ్ కడన్లి దీసి జలెకి, బేగి జోక జా కుండితె తెంతో కడె నాయ్ గె? కడెదే, గెద” మెలన్.

6 ‘జో సంగిలిసి సత్తిమ్’ మెన జేవ్ కిచ్చొ జబాబ్ దెంక నెత్తిర్ల.

గవురుమ్ నే ఉచరంతిన్చి రిసాచి కోడు

7 జలె, జా అన్నిమ్క జో పరిసయ్యుడు బుకార్లనతె సగుమ్జిన్ వెసుక మెన గవురుమ్చ టాన్లు నిసాన, యేసు జోవయింక ఇసి మెన ఏకీ టాలి సంగిలన్.

8 “కో జలెకు తుమ్చితె కక్క జలెకు పెండ్లి విందుతె బుకార్లెగిన, విందుతె అయ్లోసా తుయి గవురుమ్చి టాన్తె వెసు నాయ్, నెంజిలె తుచి కంట వెల్లో మాన్సుక జో బుకారా తిలె,

9 జో వెల్లో మాన్సు అయ్లె, తుక చి జోక బుకార్లొసా తుచితె జా: కెర ‘ఈంజొ మాన్సుక జా టాన్ దేసు’, మెన సంగిలె, తుయి లాజ్ జా ఎత్కిచి కంట తొక్కి గవురుమ్చి టాన్తె తుయి తిరిమ్ గెచ్చు వెసిస్తె.

10 తుక కో జలెకు బుకార్లె, ఎత్కిచి కంట తొక్కి గవురుమ్చి సాడిచి టాన్తె గెచ్చు వెసు, చి తుక బుకార్లొసా అయ్లె తుక ‘మిత, అన్నె చెంగిల్తె వెసు’, మెన సంగిలెగిన, జా విందుక తుచి తెన్ వెన తిల ఎత్కిజిన్చి మొక్కె తుయి గవురుమ్ జన్సె.

11 కిచ్చొక మెలె, కో జోవయింక జొయ్యి గవురుమ్ కెరనెదె గే, దేముడు జోవయింక దాక్ కెరెదె, గనికో జోవయింక జొయ్యి దాక్ కెరనెదె గే, దేముడు

జోవయింక వెల్లో కెరెదె” మెన యేసు సంగిలన్.

విందుల్తె ముక్కిమ్క కక్క బుకారుక గే యేసు సంగిలిసి

12 తెదొడి జా అన్నిమ్క బుకార్లొ పరిసయ్యుడుక యేసు, “తుయి మెద్దెన్చి జవున్ సంజెచి జవున్ అన్నిమ్క మాన్సుల్క బుకారుక ఉచర్లె, ముక్కిమ్క మితర్లుల్క జవున్, బావొదింసిక జవున్, తుమ్చ బందుగుల్క జవున్, నెంజిలె అన్నె సామాన్లుక జవున్ బుకారా నాయ్.

కిచ్చొక మెలె, †జేవ్ జోవయించ అన్నిమ్తె తుమ్క అన్నె బుకారుక జోవయింక నెక్తి అస్సె, చి తుమ్క జేవ్ బుకార్లె, ఈంజయ్ లోకుమ్తె తుమ్చి బవుమానుమ్ సంగుక తన్సె.

13 తుమ్ ‡అన్నిమ్క మాన్సుల్క బుకారుక మెలె, కక్క బుకారా మెలె, బీద సుదల్క, మొండివొ మాన్సుల్క, సొట్ట మాన్సుల్క, గుడ్డి మాన్సుల్క, చి

14 జేవ్ తుమ్క అన్నె బుకారుక నెత్రితన్చి రిసా తుమ్క చెంగిల్ జయెదె. కిచ్చొక మెలె, సత్తిమ్ ఇండిలన అన్నె జీవ్ జా ఉట్టితి పొదిక తుమ్క ఎత్కి అదికారుమ్ తిలొ దేముడు బవుమానుమ్ దెయెదె” మెన యేసు సంగిలన్.

వెల్లి విందుచి టాలి (మత్త 22:1-10)

15 జా అన్నిమ్క యేసు తెన్ వెన తిలొ మాన్సు ఎక్కిలో జోచి జా కోడు నూన కెర, “దేముడుచి రాజిమ్తె, కో జో తెన్ బెద అన్నిమ్ కవుల గే, జోక ఒగ్గర్ చెంగిలి!” మెలన్.

16 యేసు టాలిక కిచ్చొ మెలన్ మెలె, “ఏకీ మాన్సు వెల్లి విందు తెయార్ కెర, ఒగ్గర్జిన్క బుకార్లన్.

† 14:12 14:12 అన్నెక్ అర్దుమ్ కి ఇన్నె ఉచరుక జయెదె. కిచ్చొ మెలె, తుమ్క అన్నె బుకారుక నెక్తి తిలసక బుకార్లె గని నెంజిలె మాన్సుల్క నాయ్ మెలెగిన, జా కిచ్చొ ఒగ్గర్ ప్రేమ? మత్తయి 5:46, 6:2-4, 16-18 దెక.

‡ 14:13 14:13 నెంజిలె ‘విందుతె’.

17 జలె, విందు వంటితి సమయుమ్ జా అయ్లీ షాది, 'తుమ్ జా, విందు తెయార్ జా అస్సె' మెన బుకార్ల సుదల్క సంగు మెన ఎజొమాని జోచొ గొత్తి సుదొక తెద్రయ్లన్.

18 గని జేవ్ బుకార్లన ఎత్కిజిన్ ఎక్కి బుద్ది జా, జోవయింతె ఎత్కి మాన్సు జెంక నెతిరి మెల. జోవయింతె తొలితొ జో ఎజొమాని తెద్రయ్లలో గొత్తి సుదొక, 'ఆవ్ బుయి గెన అస్సి, చి జా దెకుక మెన గెచ్చుక అస్సె. దయ కెర, ఆవ్ నే జెతిసి చెమించుప కెరు' మెలన్.

19 పడ్డె అన్నెక్కో, 'ఆవ్ పాచ్ జతల్ బెయిలల్ గెన అస్సి చి, జేవ్ చెంగిల్ కామ్ కెరుల గె నాయ్ మెన దెకుక గెతసి. దయ కెర, ఆవ్ నే జెతిసి చెమించుప కెరు' మెలన్.

20 పడ్డె అన్నెక్కో, 'ఆవ్ అప్పె పెండ్లి జలయ్ చి, జాకయ్ ఆవ్ జెంక నెతిరి' మెలన్.

21 "జాకయ్ జో గొత్తి సుదొ ఎజొమానితె అన్నె ఉట్ట జా కెర, జేవ్ మాన్సుల్ సంగిలీసి ఎత్కి జో ఎజొమానిక సంగిలన్, చి జో ఎజొమాని ఒగ్గర్ కోపుమ్ జా, జోచొ గొత్తి సుదొక, 'తుయి బేగి గో, చి పట్టుమ్చ వీదులె వట్టలె కో బీద సుదల్, మొండివొ మాన్సుల్, గుడ్డి మాన్సుల్చి సొట్ట మాన్సుల్ తవుల గే, జోవయింక అంచి విందుతె కడ ఆను' మెన సంగిలన్.

22 సంగితికయ్, జో దస్సి గెచ్చు దస్సి కెర, అన్నె జా కెర ఎజొమానిక బాబు, తుయి సంగిల్ రితి కెర అస్సి, గని విందుతె అన్నె టాన్ అస్సె, మెలన్,

23 జో గొత్తి సుదొక ఎజొమాని అన్నె, జలె, పట్టుమ్ ఒత్తల్తోచి బయిలె తుయి గెచ్చు ఒత్తచ వట్టలె కో తిలె, ఏడెల్చి తెడి

కో బిచ్చిమ్ నజితస జవున్ వెన తిలె, జేవ్ ఎత్కిజిన్క బలవంతుమ్ కెర కడ ఆను. అంచొ గేరు కిబెరుకయ్ మెలన్.

24 జలె, తుమ్క ఆవ్ కిచ్చొ మెంతసి మెలె, జేవ్ తొలితొ బుకార్లనచ రిత జల మాన్సుల్తె కో కి *అంచి విందు కంక ఆవ్ సెలవ్ దెయి నాయ్." మెన యేసు సంగిలన్.

యేసు సిన్సుడు జంక కో ఉచర్లె, చెంగిల్ ఉచరుక (మత్త 10:37-38)

25 జలె, యేసు యెరూసలేమ్తె గెతి రిసా వట్ట గెతె తతికయ్, ఒగ్గర్జిన్ జనాబ్ జో తెన్ బెద గెతె తిల. తతికయ్, యేసు పనుల జోవయింక,

26 "అంచొ సిన్సుడు జంక మెన కో అంచితె జెయెదె గే, అంక ప్రేమ కెర్తి కంట అబ్బిన్క, అయ్యున్క, తేర్చిక, జోవయింక బోదల్క, అన్నసీంసిక, అప్పసీంసిక చి జోకయ్ తొక్కి ప్రేమ నే కెర్లె, నెంజె.

27 జోచి సొంత సిలువ వయన, కో అంచి పట్టి జెయె నాయ్ గే, జో, అంచొ సిన్సుడు జంక నెత్తె.

28 "తుమ్చితె కో జలెకు ఉప్పిర్ గేర్ బందుక ఉచర తిలె, జా పూర్తి బందితి రిసా డబ్బుల్ సరిపుచుప జయెదె గే నాయ్ గే దెకుక మెన, లెక్క కెరుక మెన వెనెదె.

29 జో తొల్లితొ జా లెక్క నే కెర్లె జా ఉప్పిర్ గేర్చి పునాది గలిలె పడ్డె డబ్బుల్ సరిపుచుప నే జతిసిచి రుజ్జు పడ్డె దెక పూర్తి బందుక నెత్త ముల దిలె, దెకితస ఎత్కిజిన్ జోక ఆనుల.

§ 14:23 14:23 నెంజలె బెరుక. 24. తుక ఆవ్ కిచ్చొ మెంతసి మెలె, జేవ్ ఆవ్ తొలితొ బుకార్ల మాన్సుల్తె కో కి అంచి విందు కంక ఆవ్ సెలవ్ దెయి నాయ్ మెన జో ఎజొమాని సంగిలొ మెన యేసు టాలి సంగిలన్.

* 14:24 14:24 యేసు దెతి విందు కిచ్చొ మెలె, పరలోకుమ్తెచి విందు మెలి రితి మెలె, పరలోకుమ్తె గెచ్చు కెయక తెయక ఎత్కి అదికారుమ్ తిలొ దేముడు తెన్ యేసు తెన్ జతిసి. † 14:27 14:27 లూకా 9:23 దెక, అన్నె జా 9:23 కోడుచి ఎట్టచి కోడు దెక. ‡ 14:30 14:30 ఈంజ టాలిచి అర్దుమ్ కిచ్చొ మెలె, 'అంచొ సిన్సుడు జంక ఉచర్లె, అకర్ ఎద అంచి కామ్ కెర కేడవుక తుమ్క సెక్తి అస్సి గే నాయ్ గే తుమ్ చెంగిల్ ఉచర' మెన యేసు సంగితయ్.

30 'ఈంజొ మాన్సు ఉప్పిర్ గేర్ బండుక మొదొల్ కెర్లొ, గని పూర్తి బండుక నెత్' మెన ఆసుల.‡

31 "అన్నె, ఏక్ రానొ అన్నెక్లొ రానొచి ఉప్పిరి యుద్దుమ్ కెరుక ఉచర్తయ్. ఈంజొ రానొక దెస్సు వెయిల్జిన్ సయన్యుమ్ సుదల్ తిలె, గని జొ అన్నెక్లొ రానొక విస్సెక్ వెయిల్జిన్ సయన్యుమ్ సుదల్ తిలె, ఈంజొ తొక్కి సయన్యుమ్ తిలొసా తొలితొ వెస, 'జొ అన్నెక్లొచి ఉప్పిరి జీనుక సెక్తి అస్సె గే, నాయ్ గే' మెన ఉచరెదె.

32 "జీనుక సెక్తి నాయ్' మెన డీసిలె, ఈంజేవ్ జొక దూరి తా పాసి నే జతె అగ్గె, 'అమ్ కట్టు జమ. తుమ్క అమ్ కిచ్చొ దెంక గే తుమ్ సంగ' మెన ఈంజొ రానొ జొ అన్నెక్లొ రానొక కబుర్ తెద్రయెదె.‡

33 "దస్సి, తుమ్చితె కో జొక తిలిసి ఎత్తి ములె నాయ్ గే, అంచొ సిస్సుడు జంక నెత్తె" మెన యేసు సంగిలన్.

కామ్క నెంజిలి లొన్చి కోడు (మత్త 5:13; మార్కు 9:50)

34 "లోన్ చెంగిల్ అస్సె, గని లొన్చి కారు గెలెగిన, జా లొన్ కీసి అన్నె కారు జయెదె? జయె నాయ్. అన్నె

35 జా కారు గెలి లొన్క 'ఎరు' మెన బుయ్యె సువుక కి కామ్క నెంజె. ఆరి వెంట గెలుక జయెదె. సూన్త కంగ్గొ కక్క తిలె, సూన్తు!"

15

నెన గెలి మెండపిల్లచి టాలి (మత్త 18:12-14)

1 ఏక్ సుట్టు *సిస్టు నజిత సుంకర్లు చి 'పాపుమ్ సుదల్' మెన యూదుల్ నిస్కారుమ్ దెకిత అన్నె ఒగ్గర్జిన్

§ 14:32 14:32 ఈంజ టాలిచి అర్దుమ్ కిచ్చొ మెలె, 'అంక దొర్లు జలి సేవ నే కెర్లొ ఓడువ జస్సె గే నాయ్ గే తుమ్ చెంగిల్ ఉచర' మెన యేసు సంగిల్ రితి జతయ్. * 15:1 15:1 'సిస్టు సంగిత సుంకర్లు' చి 'పాపుమ్ సుదల్' మెలిన్చి అర్దుమ్క 5:30చి ఎట్టచ జాచి కచ కొడె దెక. † 15:8 15:8 జా దేసిమి ఏక్ వెండి కాసు కెడ్డి విలువ జయెదె మెలె, ఏక్ దీసిచి కూలిచి ఏదిలి డబ్బుల్.

యేసుచి బొదన నూనుక మెన పాసి జెతె తిలె, చి

2 పరిసయుల్ చి మోసే తెన్ దేముడు దిలి ఆగ్గుల్ సేకడ్డన దెక కెర, "ఈంజొ మాన్సు పాపుమ్ సుదల్ బెదవన జొవయింతెన్ అన్నిమ్ కతయ్" మెలె.

3 జాకయ్ జొవయింక ఈంజ టాలి యేసు సంగిలన్. ఇసి జతయ్:

4 "తుమ్తె, మెనుమ, ఎక్కిలోక పుంజెక్ మెండల్ తిలె, చి జొవయింతె ఏక్ నెన తిలె, జేవ్ తిలి బయిలె తిల ఏక్ తకు పుంజెక్ మెండల్క ముల దా కెర, జొ నెన తిలొ మెండపిల్ల చజనుక గెచ్చెదె.

5 గెచ్చు చజ, డీసిల్ బేగి సర్లసంతోసుమ్ జా కందిగొడె కెరన

6 గెరి దెరన జెయెదె, అన్నె, గొతుసుదల్క చి పాసి గెరల్చ మాన్సుల్క బుకారా కెర, 'అంచి సంతోసుమ్తె తుమ్ బెద. కిచ్చొక మెలె, నెన తిలి అంచి మెండపిల్ల అన్నె దొర్లు జా అస్సె' మెనెదె.

7 దస్సి తుమ్క ఆవ్ కిచ్చొ మెంతసి మెలె, తుమ్చి తెన్ పుంజెక్ మెండల్తె ఏక్ నెన తిలె, జా ఏక్ అన్నె దొర్లు జలె కిసి సర్లసంతోసుమ్ జస్సె గే, దస్సి, పుంజెక్ జిన్ మాన్సుల్తె ఏక్ తకు పుంజెక్జిన్ 'పాపుమ్ సుదల్ నెంజుమ్' మెన ఉచరల్లన తిలె, గని అన్నెక్లొ జొ కెర్లొ పాపల్ చినన దుకుమ్ జా పాపుమ్ ములె దిలె, జేవ్ ఏక్ తకు పుంజెక్జిన్చి రిసాచి కంట జొవయించి పాపుమ్ ములె మార్పుప జలొసాచి రిసా పరలోకుమ్తె ఒగ్గర్ సర్లసంతోసుమ్ జవులె.

నెన గెలి వెండి కాసుచి టాలి

8 "అన్నెక్ టాలి ఉచరుమ. ఏక్ తేర్బొదక దెస్సు †వెండి కాసుల్ తిలె, జొవయింతె ఏక్ సేడ గెలె, జా కిచ్చొ

§ 14:32 14:32 ఈంజ టాలిచి అర్దుమ్ కిచ్చొ మెలె, 'అంక దొర్లు జలి సేవ నే కెర్లొ ఓడువ జస్సె గే నాయ్ గే తుమ్ చెంగిల్ ఉచర' మెన యేసు సంగిల్ రితి జతయ్. * 15:1 15:1 'సిస్టు సంగిత సుంకర్లు' చి 'పాపుమ్ సుదల్' మెలిన్చి అర్దుమ్క 5:30చి ఎట్టచ జాచి కచ కొడె దెక. † 15:8 15:8 జా దేసిమి ఏక్ వెండి కాసు కెడ్డి విలువ జయెదె మెలె, ఏక్ దీసిచి కూలిచి ఏదిలి డబ్బుల్.

కెరెదె? దీవు లంబడ, గేరు వడ్డవ, జా డీస్తె ఎదక సరిగా చజెదె, గెద!

9 జలె, జా డీసిలె, బేగి జేవ్ చ గోతుసుదల్క చి జేవ్ చి గేర్ క పాస్సి తిల గెరల్ చ మాన్సుల్ క బుకారా కెర, 'అంచి సంతోసుమతె తుమ్ బెద. కిచ్చొక మెలె, నెస తిలి అంచి వెండి కాసు అన్నె డీస అస్సె' మెనెదె.

10 దస్సి, తుమ్ క ఆవ్ కిచ్చొ మెంతసి మెలె, కో జలెకు ఎక్కిలో కి జో కెర్ల పాపల్ చినన దుకుమ్ జా పాపుమ్ బుద్ది ముల దిలె, పరలోకుమతె దేముడుచ దూతల్ సర్లసంతోసుమ్ జవుల" మెన యేసు సంగిలన్.

నెస గెలో పుత్తున్ చి రిసాచి టాలి

11 తెదొడి యేసు అన్నె, "ఏక్ మాన్సుక దొగుల పుత్తర్లు తిల.

12 జేవ్ పుత్తర్లుతె దకిలో పుత్తుసి అబ్బొన్ క ఇసి మెన సంగిలో. 'ఓ బ, తుచి అస్తితె అంక జెతి వాట అప్పె దె' మెలన్. జలె, జో అబ్బొసి జోచి అస్తిక దొన్ని వాటల్ కెర, జేవ్ దొగుల ఎక్కిక్లక జెత వాటల్ జోవయింక వంట దిలన్.

13 "జలె, ఒగ్గర్ దీసల్ నే గెతె అగ్గె, జో దకిలో పుత్తుసి జోచి వాట సామన్లు ఎత్తి కి బెదవన కెర, ఏక్ దూరి దేసిమి గెచ్చుక మెన బార్ జలన్. జా దూరి దేసిమి గెచ్చు తా, ఈంజో కిచ్చొ కెర్లన్? బుద్ది నెంజిల కమొతె జోక దిలిసి ఎత్తి పాడ్ కెర గెలన్.

14 జా పూర్తి కేడ్డికయ్, జా దేసిమి వెల్లి గార్ జా గెలి, చి జింక అల్లర్ జలన్.

15 జింక అల్లర్ జా, జా దేసిమ్ చొ మాన్సు ఎక్కిలోతె కామ్ నజనుక గెలో, చి 'అంచ అండ్రుల్ కతిన్ తె గెచ్చ జేవ్ క రక్కు' మెన కామ్ దిలన్, చి యూదుల్ తెన్ జా కామ్ నిస్కారుమ్ చి జలెకి, కెర్లన్. §

16 జలె చూ బమ్మక జో ఉబెడొ కిసి జలో మెలె, జేవ్ అండ్రుల్ *కతిసి జో కి సర్ల తెన్ కతొ, గని జోక కో దెతి నాయ్.

17 "దస్సి, జోక కొవ్ ని నాయ్, తోడు నాయ్ చి రిసా సగుమ్ దీసల్ గెతికయ్, జోక బుద్ది అయ్ లి, చి కిచ్చొ మెన ఉచరన్లన్ మెలె, 'అబ్బొచ గొతిమాన్సుల్ క సరిపుచుప జతి అన్నిమ్ అస్సె, గని ఆవ్ పుత్తుసి ఇన్నె చుక మెర గెతసి. ఈంజ అల్లర్ ఆవ్ కిచ్చొక సేడుక?

18 అబ్బొతె గెచ్చిందె, చి ఓ బ, దేముడుక అన్నె తుక విరోదుమ్ జలి రితి, ఆవ్ పాపుమ్ కెర అస్సి.'

19 'అంచొ పుత్తు' మెన తుయి అంక సంగుక జలె, అంక విలువ నాయ్, గని అంక 'అంచొ గొతిమాన్సు' మెన తుయి అంక తియన కామ్ దె" మెన సంగిందె మెన జో ఉబెడొ ఉచరన,

20 ఉట్ట, అబ్బొన్ తె అన్నె గెచ్చుక బార్ జలో. జలె, అబ్బొన్ చొ గేరుక అన్నె దూరి తిలి పొది, అబ్బొసి జోవయింక దెక కెర, జో బుద్ది నెంజ తిలో గని అప్పె ఇదిల్ బుద్ది జలో పుత్తున్ చి ఉప్పిరి కన్కారుమ్ జా నిగ జా కెర, జోక అమ్ డ చుంబిలన్.

21 "తెదొడి జో పుత్తుసి జోక 'ఓ బ, దేముడుచి ఉప్పిరి, అన్నె తుచి ఉప్పిరి విరోదుమ్ జలి రితి, ఆవ్ పాపుమ్ కెర అస్సి. అంచొ పుత్తు మెన తుయి అంక సంగుక అంక విలువ నాయ్,' మెలన్.

22 గని అబ్బొసి జోవయించ గొత్తి సుదల్ క బుకారా కెర, 'అమ్ చ పాలల్ ఎత్తితె చెంగిల్ చి బే బేగి ఆన ఇన్నెక గల దాస, చి ఇన్నెచి ఊంటితె ఊంగారుమ్ చి చట్టెలె జోడ్లు గల దాస.

23 దస్సి కెర్లదు మెలె, అమ్ బల్పువ జలో పోతుప్పిల్ల తుమ్ ఆన కండ, చి ఈంజో గెరి ఉట్ట అయ్ లి సర్లక విందు కెరుము.

‡ 15:13 15:13 నెంజిలె 'ఏక కెర, డబ్బుల్ దెరన,....' § 15:15 15:15 యూదుల్ అండ్రు ముక్కల్ కతి నాయ్. * 15:16 15:16 ఏక్ రగుమ్ రూక్ చ కాయల్, బెర్తె, అండ్రుల్ క ఒత్తవ కవడుల.

24 కిచ్చొక మెలె, ఈంజొ అంచొ పుత్తు మొర గెచ్చు అన్నె జియ అస్సె. నెస తిలో, చి అన్నె దొర్కు జలో' మెన అబ్బొసి సంగిలో, అన్నె, ఎత్తి తెయార్ జతికయ్, సర్ల కెరనుక దెర్ల.

25 "జలె, ఈంజొ గెరి ఉట్ట అయ్లో ఉబెణొచొ అన్నొసి జోవయించి బుయితె కామ్ కెర్తె తిలో, చి గెరి అన్నె ఉట్ట జెతె తిలి పొది పాసి అయ్లె, బాజె నచితి అవాడ్ నూస్లన్.

26 నూన కెర, గొత్తి సుదొ ఎక్కిలోక బుకారా కెర, 'కిచ్చొక బజయితతి, సర్ల కెరంతతి?' మెన పుసిలన్,

27 చి గొత్తి సుదొ జోక, 'బావొది గెరి అయ్లన్ చి జో జివ్ తా గెరి ఉట్ట జా అస్సెచి రిసా అబ్బొది బేడు తిలో పోతుపిల్ల కండయ్లన్.'

28 "జలె, జో మాన్సుచొ ఈంజొ వెల్లో పుత్తున్క కోపుమ్ అయ్లి, చి గెరి పెసుక కి జోక ఇస్టుమ్ నాయ్. జాకయ్ అబ్బొసి బార్ జా, తెడి జె మెన బతిమాల్ప జా సంగిలన్, గని

29 అబ్బొన్క జో, 'ఈందె, ఎత్తి వెర్పుల్ తుచి నేవ కెర్లయ్, తుయి సంగిలిసి నిదానుమ్ కెర, కెయ్య కి పిట్టివి నాయ్. జలెకి, అంచ గోతుసుదల్ తెన్ ఆవ్ సర్ల తెన్ విందు కెరంతి రితి కెయ్య కి ఏక్ ఇదిలిసి గొరె కి దెస్సి నాయ్.

30 గని సానివొ తెన్ బెద తుచి †ఆస్తి పాడ్ కెర్లొ ఈంజొ పుత్తుది గెరి జెతికయ్, తుయి బేడ్డు తిలో పోతు కండయ్లది! కిచ్చొ సత్తిమ్, జా!' మెన జో వెల్లో పుత్తుసి సంగిలన్, చి

31 అబ్బొసి జోక, 'ఓ పుత్త, తుయి కెయ్క కి అంచి తెన్ అస్సిసి, చి అంచి ఆస్తి ఎత్తి తుచి.

32 జలెకి, ఈంజొ తుచొ బావొది మొర గెచ్చు అన్నె జివ్ జలన్. నెస తిలన్, గని అన్నె దొర్కు జలోచి రిసా ఇసి విందు దా

సర్ల కెరనుక చెంగిలి' మెన సంగిలన్, మెన సిస్తు సంగిత నుంకర్లుక చి 'పాపుమ్ సుదల్' మెన అన్నె మాన్సుల్ నిస్కారుమ్ సంగిలన జోవయింక నంప కెర్తిన్చి రిసా యేసు పండితుల్క టాలి సంగ జేవ్ పండితుల్చి తప్పుచి రిసా ఉచరయ్లన్."

16

తెల్వి తిల గొత్తి సుదొచి టాలి

1 తెదొడి యేసు జోచ సిస్సుల్క, "సొమ్మారి ఎక్కిలో తిలన్. జోచి గెర్చి కామ్ ఎత్తి దెకుక చి జోచి ఆస్తి ఎత్తి దెకుక జోతె ఏక్ మాన్సు తిలో. జలె, 'తుచి ఆస్తి దెకితోసా జా ఆస్తి పాడ్ కెర్తయ్' మెన జో ఎజొమానిక కబుర్ అయ్లి.

2 జోజోచి ఆస్తి దెకితోసాక బుకారా కెర, 'తుచి రిసా ఆవ్ నూస్లిసి కిచ్చొ? అప్పె తెంతో తుక ఇన్నె కామ్ నాయ్. తుచి అత్తి ఆవ్ సార్పు కెర్లిన్క కిచ్చొ కెర అస్సిన్ గే కక్క కెద్ది దా అస్సిన్ గే లెక్కల్ కెర రెగుడ అంక దెకవు' మెన ఎజొమాని సంగిలో.

3 "జలె, ఎజొమానిచి ఆస్తి దెకితో ఈంజొ మాన్సు కిచ్చొ తెలివి ఉచరన్లన్ మెలె, అంచొ ఎజొమాని అంక కడ గెలెదె జలె, ఆవ్ కిచ్చొ కెర్లె జయెదె? కూలి కామ్ కెరుక అంక సత్తు నాయ్, అవ్ నెతిరి. బిచ్చిమ్ నజుక లాజు, మెన ఉచర అస్సి.

4 ఎజొమాని అంక కడ గెలె పొది మాన్సుల్ అంక సినేతుమ్ జా తా జోవయించ గెరలె బుకార్లె బాద తయె నాయ్ మెన ఉచరన కెర,

5 ఎక్కిలోచి పడ్డె అన్నెక్కిలోక వర్లు తెన్ జోచొ ఎజొమానితె రునుమ్ జల ఎత్తిజిన్క బుకారా కెర, తొలితొచొక అంచొ ఎజొమానిక తుయి కెద్ది బాకి జా అస్సిసి? మెన పుసిలన్.

6 జో రునుమ్ జలొసా చెత్తర్ వెయిల్ కాయల్ తేలు మెలన్, చి ఈంజొ జలె తుచి బాకి నజ తిలి పుస్తకుమ్ బేగి

† 15:30 15:30 నెంజలె 'డబ్బుల్'.

చజన వెన 'దొన్ని వెయిలు' మెన రెగుడు మెలన్.

7 "తెదొడి ఎజొమానిచొ గేర్ దెకితోసా అన్నెక్లొక బుకారా కెర, 'తుయి కెద్ది బాకి జా అస్సినీ', మెన పుసిలన్, చి జో 'వెయి నాడివొ గోదుమ్' మెంతికయ్, 'దన్నీ జలె, తుచి బాకి కాగ్దుమ్ వెంట అట్టు పుంజొ' మెన రెగ్గును మెలన్.

8 "జలె, జోచి అస్తిక దెకితో జో అబద్దుమ్ కెర్లొ మాన్సుచి తెలివి దెక, తెలివి కామ్ కెర్లది మెన జో ఎజొమాని సంగిలొ. ఈందె, దేముడుచి ఉజిడ్ బుద్ది జలనచి కంట ఈంజ లోకుమ్చి బుద్ది తిలస జోవయించి ఈంజ క్కాలుమ్చ మాన్సుల్ తెన్ బలె తెలివి దెకనతతి.

9 "జలె, తుమ్క ఆవ్ కిచ్చొ మెంతసి?

* ఈంజ లోకుమ్చి దనుమ్ తెన్ తుమ్క నేస్తమ్ కెరన, చి జా డబ్బుల్ కేడ్లె పరలోకుమ్తె ఎల్లకాలుమ్ జియతస్తితె తుమ్క † బెదవనుల. ‡

10 ఈందె, కో జలెకు ఇదిలిన్ కామ్తె నిదానుమ్ కెరెదె గే, వెల్లి కామ్తె కి నిధానుమ్ కెరెదె. గని కో జలెకు ఇదిలిన్ కామ్తె అబద్దుమ్ కెరెదె గే, వెల్లి కామ్తె కి అబద్దుమ్మి కెరెదె.

11 జాకయ్, మాములుమ్ ఈంజ లోకుమ్చి డబ్బుల్ వాడిక కెర్సితె తుమ్ నిదానుమ్ నే కెర తిలెగిన, పరలోకుమ్చి దనుమ్ తెన్ తుమ్ కామ్ కెర్తి రితి దేముడు కిసి తుమ్చి అత్తి జా సొర్పు కెర దెయెదె! తుమ్క జో కిసి నంప కెరుక జయెదె!

12 అన్నె, జోవయించి అస్తిక తుమ్ దెకుక మెన అన్నెక్లొ తుమ్చి అత్తి సొర్పు కెర తిలె, గని తుమ్ జా అస్తిక నిదానుమ్ నే కెర్లె, తుమ్క జెతికయ్ తుమ్చి సొంత

అస్తికో తుమ్క దెవుల! దిలె, పాడ్ కెరుల మెనుల.

13 కేన్ గొతిమాన్సు ఎక్కె దడి దొగుల ఎజొమాన్సుచి సేవ కెరుక నెత్తె. కిచ్చొక మెలె, ఎక్కిలోక విరోదుమ్ కెర, అన్నెక్లొక ప్రేమ కెరెదె, నెంజిలె జో అన్నెక్లొక నిదానుమ్ కెర, తొలితొచొక నిస్కారుమ్ దెకెదె. జలె, దేముడుక చి ఈంజ లోకుమ్చి దనుమ్క ఎక్కె దడి సేవ కెరుక నెతుర్పు" మెన యేసు జోచ సెన్సుల్క సంగిలన్.

యేసు సంగిల దొన్ని కొడొ (మత్త 11:12-13)

14 ఈంజ లోకుమ్చి దనుమ్చి రిసా యేసు తెదొడి సెన్సుల్క సంగిలిసి పరిసయ్యుల్ నూన కెర జోక కొంకడ్లె. కిచ్చొక మెలె దేముడుచి సేవ కెర్తునుమ్ మెనల్లె కి, డబ్బుల్క జోవయంక ఒగ్గర్ ప్రేమ.

15 యేసు జోవయంక, "మాన్సుల్చి మొక్కె పున్నిమ్ తిలి రితి డీసుక ఆస జతన తుమి. గని తుమ్చి పెట్టి కిచ్చొ బుద్ది అస్సె గే దేముడు జానె. జలె, ఈంజ లోకుమ్చ మాన్సుల్ కిచ్చొచి రిసా 'ముక్కిమ్చి' మెనుల గే, దస్సిచిక దేముడు వెట్టారుమ్చి మెనెదె.

16 "బాప్తిసుమ్ దెతె తిలొ యోహాను బార్ జలి ఎదక మోసే పూర్ణుమ్చొచి అత్తి దేముడు రెగ్గయల ఆగ్గుల్, అన్నె పూర్ణుల్చి అత్తి సంగిల దేముడుచ కబుర్లు రెగిడ్లిసి ముక్కిమ్ జా తిల. గని యోహాను అయ్లి తెంతొ, దేముడుచి రాజిమ్ పాచ జా అయ్లిన్చి రిసొచి, సుబుమ్ కబుర్ నూనయి జతయ్, జో

* 16:9 16:9 ఎజొమాని మెలె, ఎత్తి అదికారుమ్ తిలొ దేముడుక టాలొ జతయ్. † 16:9 16:9 నెంజిలె, ఎజొమాని, మెలె ఎత్తి అదికారుమ్ తిలొ దేముడు బెదవనెదె. ‡ 16:9 16:9 నెంజిలె గ్రీకు తెన్ చి ఈంజ 9 నంబర్ కోడు తొలితొ రెగిడ్లిన్చి అర్దుమ్ కిచ్చొ మెన అన్నె సగుమ్జిన్ ఉచర్తతి మెలె, 9. జలె, తుమ్క ఆవ్ కిచ్చొ మెంతసి మెలె, ఈంజ లోకుమ్చి డబ్బుల్ పాపుమ్చి జలెకి, తుమ్ బుద్ది తెన్ ఎత్తి అదికారుమ్ తిలొ దేముడుచి సేవ కెర్తి రితి జా డబ్బుల్ వాడిక కెరన నేస్తమ్ కెరన, చి జా కేడ్లె తుమ్ మొర గెలె, పరలోకుమ్తె తుమ్క బెదవనుల నెంజిలె ఎత్తి అదికారుమ్ తిలొ దేముడు బెదవనెదె. గ్రీకు బాస తెన్ తిలిసి కిసి జతయ్ మెలె, 'పాపుమ్చి డబ్బుల్క నేస్తమ్ కెరన, చి జా డబ్బుల్ కేడ్లె, పరలోకుమ్తె తుమ్క బెదవనుల. గని ఉప్పిరి జా మత్తెలి రెగిడ్లిన్తె రెగిడ్లి రితి అర్దుమ్ అన్నె సంగితయ్' మెన ఉచర్తునుమ్.

సూనయ్లో, ఆవ్ సూనయ్తసి, చి పాచ జా అయ్లి ఈంజ రాజిమ్తె బెదితన ఎత్తిజిన్ బెదుక మెన బమ్మ జతతి.

17 మోసే పూర్గుమ్చొచి అత్తి దేముడు రెగ్లయ్ల ఆగ్గుల్చి ఎక్కి అచ్రుమ్చి విలువ గెచ్చె నాయ్, జెతె కేన్ అచ్రుమ్ కామ్క నెంజితి రితి జతి కంట, పరలోకుమ్ బూలోకుమ్ కేడ గెచ్చుక సుల్లు.

18 “కో జలెకు జో జోచి తేర్చిక ముల దా అన్నెక్కి పెండ్లి కెరన్లె, లంజె వంసుమ్చొ జతయ్, చి జాకయ్ పెండ్లి ముల దిలి కేన్ తేర్బోదక కో పెండ్లి జయెదె గే, జో కి లంజె వంసుమ్చొ జతయ్.

లాజర్ మెలో బీద సుదొ చి సొమ్మారుమ్ తిలోన్చి రిసా టాలి

19 “సొమ్మారి ఎక్కిలో తిలన్. జో రోజుక చెంగిల చెంగిల సొమ్మార్లు గలంతి ఊద రంగుచ ఒగ్గర్ కరీద్చ పాలల్ గలనెదె, చి రోజుక ఇస్టుమ్ అయ్లి సర్ల కెరన సుక్కుమ్ తెన్ జితె తిలో.

20 జలె, జో సొమ్మారొచి మేడచి గుమ్ముమె లాజర్ మెలో బీద సుదొ ఎంగ్ల తయెదె. జోచి ఆగ్ బెర్తు గావ్వో తిల.

21 జో సొమ్మారొ అన్నిమ్ కెర్తి బల్లయ్ తెంతో సేడ్డ చింబో గిడ్డల్ జో బీద సుదొక దొర్కు జలె, సర్ల తెన్ కతో, తెద్ది మాలజ్ జా తెద్ది చూ జా తిలో, అన్నె సూనర్లు జోచ గావ్వో లేంవితె తిల.

22 “జలె, ఏక్ దిసి జో బీద మాన్సు మొర గెలో, చి పరలోకుమ్తె అబ్రాహామ్ పూర్గుడు తెన్ తతి రితి దూతల్ జో బీద జలో లాజర్క వయ కడ నిల. జలె, జో సొమ్మారొ కి మొర గెలన్, చి జోక మాన్సుల్ రోవ గెల.

23 అన్నె జో వెల్లి ఆగ్ లగితి గొయితె ఒగ్గర్ సిచ్చల్ జతె తా, ఉప్పిరి దెకిలె,

దూరిక అబ్రాహామ్క చి జోచి పాసి వెస తిలో లాజర్క దెకిలన్.

24 దెక కెర, ‘ఓ అమ్చొ అబ్రాహామ్ తాతో, అంచి ఉప్పిరి కన్యారుమ్ తీ, చి జోచి ఊంటి పానితె బుడ్డవ అంచి జీబుతె ఇదిల్ లయడ తిమడ్డి రిసా జో లాజర్క అంచితె తెద్దవు. ఈంజ ఆగి అంక ఒగ్గర్ నొప్పి దెతయ్చి రిసా’ మెన సొమ్మారొ బతిమాల్పా జా సంగిలన్.

25 గని అబ్రాహామ్ జోక, ‘పుత్ర, తుయి బూలోకుమ్తె జితె తిలి పొది కీత్తుక ఇస్టుమ్ అయ్లిసి దొర్కు కెరన సుక్కుమ్ తెన్ జితె తిలది. గని లాజర్ కస్టల్ సేడ్డె తిలన్. గని అప్పె జో ఇన్నె సుక్కుమ్ జా అస్సె, చి తుయి ఒత్త సిచ్చల్ సేడ్డె తత్తసి.

26 అన్నె కిచ్చొ మెలె, తుమ్క అమ్క మదెనె వెల్లి గొయి అడ్డు అస్సె. ఏక్ వేల ఇన్నె తెంతో నగుమ్జిన్ ఒత్త గెచ్చుక ఉచర్లె అడ్డు తవుసు. నెతుర్పు’ చి ‘ఒత్త తిలన కో కి ఇన్నె డేచ జెతు నాయ్ మెన జా గొయి అడ్డు అస్సె’ మెన

27 అబ్రాహామ్ సంగితికయ్, సొమ్మారొ అన్నె, దస్సి జలె, తాతో, అంచి ఏక్ మనవి సంగిమ్దె. దయ కెర, అంచొ అబ్బొచి గెరి జో లాజర్క తెద్దవు.

28 అంక పాచ్జిన్ బావుడ్లు అస్సి, చి జేవ్ కి ఈంజ సిచ్చ జతి లోకుమ్తె నే ఉత్త, సేడ్డి రితి జోవయింక బుద్ది సికడ్పు మెలన్.

29 గని అబ్రాహామ్ జోక అన్నె, ‘మోసేచి అత్తి రెగిడ్డి దేముడుచి ఆగ్గుల్, అన్నె దేముడుచ కబుర్లు సంగిల పూర్గుల్ రెగిడ్ల పుస్తకల్ ఎత్తి జోవయింక అస్సె. ఒత్త తిలిసి సరిగా సూన్తు, చి జేవ్ బుద్ది జంక జయెదె’ మెన అబ్రాహామ్ సంగిలన్.

30 గని జో అన్నె అబ్రాహామ్ తెన్, ‘నాయ్, ఒత్త తిలిసి సూన్లె కి కెర్తి నాయ్, గని మొర గెలోసా కో జలెకు జేవ్తె గెచ్చ బుద్ది సంగిలె, జేవ్ కెర్ల పాపల్

చినన దుకుమ్ జా పాపుమ్బుద్ది ముల మార్పుప జవుల' మెలన్.

31 చి ఆకర్క అబ్రాహామ్ జోక కిచ్చొ జబాబ్ దిలన్ మెలె, 'మోసేచి అత్తి దేముడుచి ఆగ్గుల్ రెగిణ్ణి కొణ్ణె కి, దేముడుచ కబుర్లు సంగిల పూర్గుల్ రెగిణ్ణి కొణ్ణె సూన నంప నే కెర్తె, కో జవున్ మొర్లొ మాన్సు అన్నె జీవ్ జా ఉట్టెకి నంప కెర్తె నాయ్.' ", మెన పరిసయుల్క యేసు సంగిలన్.

17

పాపుమ్ కెరయ్ తిన్ చి రిసాచి కోడు (మత్త 18:6-7,21-22; మార్కు 9:42)

1 తెదొడి యేసు జోవయింప సిస్సుల్క, "పాపుమ్ కెరయ్ త అల్లర్ కచితుమ్ జెయెదె, గని కచి అత్తి దన అల్లర్ జెవుల మెలె, అయ్యె, జోవయింక సిచ్చ పిట్టె నాయ్!

2 అంక నంపజల ఇస బాలబోధల్ జలసతె ఎక్కిలోక కి, కో పాపుమ్ కెరయెదె గే, జోచి టొట్రయ్ తిర్వెలి పత్తురు. ఒడొవ దా జోవయింక సముద్దుమ్ తె బుడ్డవ గెలుక చెంగిలి.

3 తూమ్ జాగర్త తా. తుమ్చితె కో గే మెనుమ. తుచొ కేన్ జవున్ బావొ పాపుమ్ కెర్లెగిన, జోవయింక బుద్ది సంగు, చి జోవయించి తప్పుక దుకుమ్ జా బుద్ది జెలిగిన, జోవయింక చెమించుప కెరు.

4 అన్నె, రోజుక సత్తు సుట్టు కి తుక పాపుమ్ కెర జేవ్ సత్తు సుట్టు తుచి పక్క వసుల 'అంచి తప్పు. చెమించుప కెరు' మెన జో సంగిలెగిన, తుయి జోక చెమించుప కెరుక అస్సె" మెన యేసు జోచ సిస్సుల్క బుద్ది సంగిలన్.

నముకుమ్చి రిసాచి కోడు

5 తెదొడి యేసుచ జేవ్ బారజిన్ బారికుల్ యేసుప్రబుక కిచ్చొ మెలన్ మెలె, "అమ్క అన్నె ఒగ్గర్ నముకుమ్ దె" మెల చి,

6 యేసు జోవయింక, "సార్సుగిడ్డచి ఎదిలి నముకుమ్ తుమ్క తిలె, ఈంజొ కీమారోడు రూకుక 'ఉట్టి జా సముద్దుమ్ తె గెచ్చు రోవి జా' మెలె, తుమ్ సంగిలె, జా కోడు సూన్లె జా దస్సి జయెదె."

సేవ నిదానుమ్ కెరుక తిలిన్ చి కోడు 7 "తుమ్చితె ఎక్కిలోక గొత్తి సుదొ తయెదె మెనుమ, చి జో గొత్తి సుదొ కేస్సొతో జవున్, మెండల్ రక తా జవున్ గెరి అన్నె అయెలె, 'తుయి బేగి గెచ్చు అన్నిమ్ కెరు' మెన ఎజొమాని సంగెదె గె?

8 నాయ్, గెద. 'తోలితో అంచి రిసా అన్నిమ్ తెయార్ కెర తుచొ పాలుమ్ కుంచన అంక జొగుడ దె, చి ఆవ్ అన్నిమ్ కెర పాని పిలి పడ్డొ తుయి కా, పి' మెన ఎజొమాని సంగెదె.

9 అన్నె, జో గొత్తి సుదొ జోక దిలి కామ్ కెర జోచి పూచి తిలిసి కెర్లి రిసా జో ఎజొమాని జోక 'తుయి దయ కెర్లెదె' మెనెదె గె? నాయ్, గెద.

10 జలె, తుమ్చి పూచి తెన్ కి దస్సి, దేముడు తుమ్క సంగిలిసి ఎత్తి కెర తుమ్చి పూచి కెర తిలె, తుమ్ కిచ్చొ మెన మెలె, 'అమ్ రితయ్ గొత్తి సుదల్. అమ్ గవురుమ్క విలువ నాయ్. అమ్క పూచి తిలిసి కెర అస్సుమ్. తెద్దిలి' మెన తుమ్" మెన యేసు సిస్సుల్క సంగిలన్.

వెల్లి రోగుమ్ దెర్ల దెస్సుజిన్క యేసు చెంగిల్ కెర్లిసి

11 ఒత్త తెంతో అన్నె కిచ్చొ జర్గు జలి మెలె, యేసు యెరూసలేమ్ పట్టుమ్ తె గెచ్చుక మెన సమరయ ప్రదేసిమ్క చి గలిలయ ప్రాంతుమ్క మదెనె గెతి వట్టె గెతె తా,

* 17:1 17:1 నెంజెలె, 'నముకుమ్ పిట్టయ్ త...' పిట్టయెదె గె.....' † 17:5 17:5 6:13 దెక. జోవయింప బారజిన్ సిస్సుల్ బారజిన్ బారికుల్ ఎక్కి.

§ 17:6 17:6 ఏక్ రగుమ్ వండ్లు దెరెదె.

12 ఏక గావక పాసి అయ్యె, వెల్లి రోగుమ్ దెర్ల దెస్సుజిన్ మాన్సుల్ జోక దస్సుల్ జంక మెన అయ్యె, అన్నె, ఇదిల్ దూరి తా

13 కేక గల. కిచ్చొ మెన కేక గల మెలె, "యేసుప్రబు, బాబు, అమ్చి ఉప్పిరి కన్కారుమ్ తి" మెన కేక గల.

14 జలె, యేసు జోవయింక దెక కెర "దేముడుచి గుడితె తుమ్ గెచ్చు, ఒత్తచ *పూజర్లతె దెకవన" మెన సంగిలన్, చి ఒత్త యెరూసలేమ్తె గెచ్చుక మెన వట్టి గెలె కిచ్చొ జర్గు జలి మెలె, జోవయించి ఆగ్ చెంగిల్ జా సుద్ది జల.

15 జలె, జోవయింతె ఎక్కిలో జో చెంగిల్ జలిసి దెకన, గట్టిజ అవాడ్ కెరన దేముడుచి గవురుమ్ సంగ సంగ, యేసు తిలిన్తె ఉట్ట అయ్యెల్.

16 ఉట్ట జా, "అంక రచ్చించువ కెర దయ కెర్లది" మెన యేసుక జోచి సర్ల సంగ యేసుచి చట్టి సెర్ను సేణ్ణె. జో మాన్సు †సమరయ సుదొ.

17 జలె, యేసు తెదొడి, "దెస్సుజిన్క చెంగిల్ కెర్లయ్, గెద. జేవ్ అన్నెక్ నొప్పుజిన్ కేతె?

18 ఈంజొ యూదుడు నెంజిలోసొక పిట్టవ, జేవ్ అమ్చ చ యూదుల్తె అన్నె కో జోవయించి సర్ల సంగుక జెతి నాయ్ గె?" మెన పున కెర,

19 జో చెంగిల్ జలోసొక అన్నె, "తుయి ఉట్ట, గెరి గో. అంచి ఉప్పిరి తుయి నముకుమ్ తిలి రిసొ †చెంగిల్ జా అస్సిసి" మెన యేసు జో మాన్సుక సంగిలన్.

దేముడుచి రాజిమ్చి రిసొచ కొడొ (మత్త 24:23-28,37-41)

20 జలె, "దేముడుచి రాజిమ్ కెయ్చక జెయెదె?" మెన సగుమ్జిన్ పరిసయ్యుల్ యేసుక పుసిల చి, జో, "దేముడుచి రాజిమ్ డిస్సిసి నెంజె. కెయ్చక గే డిస జెయెదె మెన నాయ్.

21 'ఈందె, ఇన్నె అస్సె' జలెకు, 'ఓదె, ఒత్త అస్సె' జలెకు మెనుక బెదె నాయ్. కిచ్చొ మెలె, దేముడుచి రాజిమ్ అప్పెయి కి కీతుమ్చి నెడిమి అస్సె" మెన సంగిలన్.

యేసు ఎదార్లుమ్ ఏలువ కెరుక మెన అన్నె జెతిన్చి రిసొచి కోడు

22 జోచ సొంత సిస్సుల్క యేసు, అవ్ మాన్సు జా జెర్మున్ అయ్లోసొక "ఏక్ దీసి గడియ జవున్ డిసున్" మెన తుమ్ ఒగ్గర్ ఆన జత దీసల్ జెవుల, గని జా మదెనె అంక దెకుక నెతుర్ను.

23 అన్నె, "ఓదె, ఒత్త అస్సె. ఓదె, ఒత్తయ్ అస్సె" మెన సగుమ్జిన్ తుమ్క సంగుల, గని జోవయించి పట్టి తుమ్ గెచ్చు నాయ్.

24 కిచ్చొక మెలె, బిజిలి మొల్కొలె, కిసి ఆగాసుమ్ పూర్తి ఏక పక్క తెంతో అన్నెక్ పక్క ఎద ఉజిడి దెయెదె, దస్సి, అవ్ మాన్సు జా జెర్మున్ అయ్లోసొ *ఏలువ కెరుక మెన ఉత్త జెతి దీసిక కేన్ పక్క కి డిసిందె.

25 గని జా నే జతె అగ్గె తొలితో అవ్ ఒగ్గర్ బాదల్ సైముల్ సేడుక అస్సె, ఈంజ కాలుమ్చ †మాన్సుల్ అంక "అమ్క నాయ్. మొర్చు!" మెనుక అస్సె.

* 17:14 17:14 యూదుల్ తెన్ వెల్లి రోగుమ్ ఏక మాన్సుక ముల తిలె, జో మాన్సుక 'చెంగిల్, సుద్ది జలో' మెన రుజ్జు సంగుక ఎక్కి పూజర్లకయ్ అదికారుమ్, 5:12చి ఎట్టొచి కోడు దెక. † 17:16 17:16 సమరయ సుదల్క యూదుల్ నిస్కారుమ్ దెకుల, గని జేవ్ యూదుల్ ఇన్నె బుద్ది ఉచర్తి నాయ్. ఎక్కి సమరయ సుదొ బుద్ది ఉచర్తి.

‡ 17:19 17:19 నెంజిలె 'రచ్చించువ జా అస్సిసి'. § 17:21 17:21 కిచ్చొక దస్సి మెన్తయ్ మెలె, జో యేసు అయ్యెల్ తెన్ జా రాజిమ్ అయ్యె, చి ఎత్తి అదికారుమ్ తిలె దేముడుచి సుద్ది తిలి అత్తొ జోవయించి అత్తి, అన్నె జోవయించ సెస్సుల్చి అత్తి జా రాజిమ్చి రచ్చించువ కెర్తి కామ్ జో కెర్తయ్. 'తుమ్చి నెడిమి అస్సె' మెలి కోడుక సగుమ్జిన్ 'తుమ్చి పెట్టి అస్సె' మెన రెగ్ల అస్సి, గని సంపతిలసచి పెట్టి జా రాజిమ్ తయెదె, గని

నంపనెంజిలసచి పెట్టి నాయ్. జేవ్ పరిసయ్యుల్తె ఒగ్గర్జిన్ యేసుక సంప కెర్తి నాయ్. * 17:24 17:24

లూకా 1:32-33, డిసయ్యెలిసి 5:10, చి 20:4-6 దెక. † 17:25 17:25 లూకా 9:22 దెక.

26 నోవహు పూర్ణమచొచి కాలుమ్ మాన్సుల్ కీన్ జతె తిల గే, దస్సి, ఆవ్ మాన్సు జా జెర్మున్ అయ్లోసా అన్నె నే జెతె అగ్గెచి మదెనె ఆవ్ జెతె ఎదక మాన్సుల్ దస్సి జతె తవుల.

27 మెలె, 'జోవయించి పాపుమ్చి రిసాచి సిచ్చక' మెన ఎత్తి అదికారుమ్ తిలో దేముడు వెల్లి వర్లచి పాని గెడ్పువ కెరయ్లి గడియ ఎద, నోవహు జోచి కుటుంబుమ్ తెన్ జా వెల్లి ఓడతె పెన కెడ్డి డంకిల్ ఎద, నే నంప కెర్తె మాన్సుల్ కతె తా, పితె తా, పెండ్లివొ కెర్తె తా, పెండ్లివొ జతె తా జతె తిల, చి †జేవ్ ఎత్కిజిన్క వర్లచి పాని గిడ గెలి.

28 పడ్డో లోతు పూర్ణమచొచి కాలుమ్ కి జో జతె తిలి సాదోమ పట్టుమ్చ దస్సి జతె తిల. ప్రెజల్ కతె తా, పితె తా, బియ్యారి కెర్తె తా, పంటో పిక్యతె తా, గెరల్ బందితె తిల.

29 గని కోలోతు జా సాదోమ పట్టుమ్ తెంతో బార్ జా ముల దిలి దీసి, ఎత్కి అదికారుమ్ తిలో దేముడు పరలోకుమ్ తెంతో జా పట్టుమ్చి ఉప్పిరి ఆగిచి ఎడ్డి రితి ఇంగుడు సువ దిలన్, చి జా పట్టుమ్చ ఎత్కిజిన్ మొర గెల.

30 అన్నె, ఆవ్ మాన్సు జా జెర్మున్ అయ్లోసా ఏలుప కెరుక మెన అన్నె ఉత్త జా డిస్సి దీసి జెతి ఎద దస్సి మాన్సుల్ అంక నే ఉచర్తె, బుద్ది నే ఉచర్తె ఇస్టుమ్ అయ్లి రితి జతె తవుల, చి తెదోడక *తీర్పు జా సిచ్చ జవుల.

31 "జా దీసిక జోచి గేరుచి ఒర్నె కో తవుల గే, జోచి సామన్ గెరి తిలె కి, జా వెంట నెంక మెన ఉత్తుతు నాయ్, అన్నె కో జోచి బట్టి జవున్ తిలె, కిచ్చొ వెంటుక పసుల్తా నాయ్, †గని బే బేగి ఉట్ట గెతు.

32 లోతుచి తేర్పి జా సాదోమ

పట్టుమ్క ఇదిల్ ఇస్టుమ్ జా జాక దెకుక మెన పసుల లోనచి †పత్తురు మర్లు జా గెలి, గెద. జలె, జాక దస్సి జర్గు జలిసి తుమ్ పచ్చ నాయ్.

33 కిచ్చొక మెలె, సొంత ప్రాసుమ్ రచ్చించుప కెరనుక కో ఉచరుల గే, జోవయించి ప్రాసుమ్ పాడ్ జా గెచ్చెదె, గని దేముడు దిలి వాటు ఎక్కి సత్తిమ్ ఇండుక మెన జోవయించి ప్రాసుమ్ కో దెవుల గే, జోవయించి ప్రాసుమ్ రచ్చించుప జయెదె.

34 "జా రాతిక దొగుల ఎక్కితె నిజ తిలె, ఎక్కిలోక ముల దా, అన్నెక్లొక కడ నెవుల.

35 దస్సి, దొగుల తేర్బోదల్ రోడ్డె తిలె ఎక్కిక ముల దా, అన్నెక్కిక కడ నెవుల,

36 కీఅన్నె, దొగుల మున్నుబోదల్ బట్టి తిలె, ఎక్కిలోక ముల దా, అన్నెక్లొక కడ నెవుల" మెన యేసు సంగిలన్.

37 దస్సి సంగితికయ్, "కేనె కడ నెవుల, ప్రబు?" మెన సిస్సుల్ పుసిల, చి జోవయింక, "పీనుమ్ కేనె తయెదె గే, ఒత్త గిడ్దుల్ బెరుల." మెన సంగిలన్.

18

తీర్పు కెర్తి టాన్తె తోడు సంగితో ఎక్కిలోచి టాలి

1 తెదోడి యేసు జేవ్ సిస్సుల్క ఈంజ టాలి సంగిలన్. కిచ్చొక మెలె, *జో తీర్పు కెర ఏలుప కెరుక మెన అన్నె జెతె ఎదకచి మదెనె జేవ్ బద్దుకుమ్ గే అన్మానుమ్ గే నే జతె ప్రార్దన కెర్తె తంక మెన జోవయింక సికడ్డి రిసా సంగిలన్.

2 ఇసి జతయ్ "విక్ పట్టుమ్తె తీర్పు కెర్తి టాన్తె తీర్పు దెతోసా ఎక్కిలో తిలో. జో అన్నె మాన్సుల్క బియె నాయ్, దేముడుక బియె నాయ్.

‡ 17:27 17:27 అదికాండుమ్ 7 అద్యయిమ్.

* 17:30 17:30 లూకా 21:34-36 డెక. † 17:31 17:31 మత్తయ 24:15-18. ‡ 17:32 17:32 అదికాండుమ్ 19:26. § 17:36 17:36 ఈంజ మత్తెలి తోలితె రెగిడ్ల సగుమ్ పుస్తకల్తె 36 నంబర్చి కోడు తయె నాయ్. * 18:1 18:1 లూకా 21:5-36.

§ 17:29 17:29 అదికాండుమ్ 18:16-19:29.

3 పడ్డొ, జయి పట్టుమ్తె రండెల్ మాన్సు ఎక్కి తిలి. ఈంజ జలె, రోజుక జో తీర్పు దెతొసాతె గెచ్చ కెర, 'విరోదుమ్ సుదొ ఎక్కిలో అంచి ఉప్పిరి దావ దా అస్సె. అంచి సంగిలీన్ సూన్లె జో మాన్సు సంగిలి నిందక ఆరిచి మెన రుజ్జు దెకయ్ తిన్తె అంక తోడు తా' మెన పునీతె తిలన్.

4 ఒగ్గర దీసల్ జో ఒప్పునె నాయ్, గని పడ్డొ కిచ్చొ బుద్ది జోక అయ్లి మెలె, ఆవ్ దేముడుక బితొసా, మాన్సుక బితొసా నెంజి, గని

5 ఈంజ రండెలి అంక అల్లర్ దా పుసుక ములె నాయ్ చి రిసా, జాచి సంగిలీన్ సూన్ తిస్తి తోడు సంగిమదె. నెంజిలె, జా రోజుక జెతె తతిన్క అంక పూర్తి అల్పు కెరెదె మెలన్" మెన యేసుప్రబు టాలి సంగిలన్.

6 కిచ్చొ అర్దుమ్ సంగిలన్ మెలె, "అదె, జో బుద్ది నెంజిలో తీర్పు దెతొసా కీన్ సంగిలో!

7 జలె, రాతి మెద్దెనె జాక జాచి బాదల్ కస్టల్ సంగిత జో నిసాన్ల జోచయ్ జల మాన్సుల్చ ప్రార్దనల్ దేముడు సూనె నాయ్ గె? జోవయింక తోడు జెయె నాయ్ గె? కచితుమ్ సూనెదె, తోడు జెయెదె. అన్నె జా తోడు జెంక ఆల్సిమ్ కెరెదె గె? నాయ్ గెద.

8 బే బేగి తోడు జెయెదె. గని, జాగర్త, ఆవ్ మాన్సు జా జెర్మున్ అయ్లిసా ఈంజ లోకుమ్తె అన్నె ఉత్త జెతి పొదిక మాన్సుల్ †నిదానుమ్ నముకుమ్ తవుల గే నాయ్ గె?" మెన యేసు సంగిలన్.

పరిసయ్యుడుచి సుంకరోచి రిసా సంగిలి టాలి

9 పడ్డొ 'అమ్క పున్నిమ్' మెనన అన్నె మాన్సుల్క నిస్కారుమ్ ఉచర్ల మాన్సుల్క 'సూన్తు' మెన యేసు అన్నెక్ టాలి సంగిలన్.

10 "ప్రార్దన కెరుక మెన దొగు మాన్సుల్ అమ్చి దేముడుచి గుడితె గెల. జోవయింతె ఎక్కిలో పరిసయ్యుడు, ఎక్కిలో సిన్తు నజీతో సుంకరో.

11 జలె, పరిసయ్యుడు పురైతొ టీచ, జోచి పెట్టి ఉచరన ఇని ప్రార్దన కెరన్లన్, 'ఓ అమ్చొ దేముడు, ఆవ్ జేవ్ అన్నె మాన్సుల్చి రితి నెంజిల్ రిసా తుక అంచి సర్ద ఆవ్ సంగితసి. జేవ్, జలె, మాన్సుల్క బియడ, జోవయించి ఆస్తి దొర్కు కెరంతతి, కిచ్చొ కిచ్చొ నాయిమ్ నెంజిల కమొ కెర్తతి, లంజెకమొ కెర్తతి, చి సగుమ్జిన్ కి జో ఒత్తల్తోచొ సిన్తు నజీతోసాచి రితి జతతి.

12 గని అవ్ సత్తరెక్క తివ్వెరి చువ్వె తత్తసి, చి అంక దొర్కు జతిన్ ఎత్కితె దెస్సు వాటల్తె ఏక్ వాట తుక దెతసి' మెన దేముడుక ప్రార్దన కెర్లన్.

13 "గని, జో సిన్తు నజీతోసా, ఇదిల్ దూరి టీచ తా, మాములుమ్ జేవ్ యూదుల్ కెర్తి రితి నే కెర్తె, ఉప్పిరి నే దెకితె, లాజుక మొకోమ్ లుంకడ గుండెతె వెటన 'ఓ దేముడు, ఆవ్ పాపుమ్చొ మాన్సు. అంచి ఉప్పిరి కన్యారుమ్ జా అంచ పాప్ల చెమించుప కెరు!' మెన ప్రార్దన కెర్లన్.

14 జలె, జేవ్ దొగులతె కక్క 'సత్తిమ్ జలొ' మెన దేముడు దెకిలన్? జో గవురుమ్ ఉచరన్లొసాక, నాయ్, గని పాపుమ్ ఒప్పున్లొ ఈంజొ సుంకరోకయ్, మెన తుమ్క ఆవ్ సంగితసి. జోచి పాపుమ్ చెమించుప జా గెరి ఉట్టు గెలన్. కిచ్చొక మెలె, కో జోక జోయ్యి గవురుమ్ కెరనెదె గే, జోక దేముడు దాక్ కెరెదె, గని కో జోక జోయ్యి దాక్ కెరనెదె గే జోక దేముడు వెల్లొ కెరెదె" మెన సంగిలన్.

బాలబోదల్క యేసు చడ వరుమ్ దిలిసి (మత్త 19:13-15; మార్కు 10:13-16)

† 18:8 18:8 నెంజిలె, 'నిదానుమ్ ప్రార్దన కెర్తి నముకుమ్ తెన్ తవుల గే నాయ్ గె?'

15 జలె, జా దీసి 'యేసు జోవయింక చడ చెంగిల్ వరుమ్ దెవుసు' మెన, సగుమ్జిన్ పైజల్ జోవయించ బాలబోదల్క జోతె కడ ఆన్తె తిల. గని జేవ్ జెతె తిలిసి యేసుచ సిస్సుల్ దెక కెర, జేవ్ బోదల్క కడ ఆన్ల మాన్సుల్క "పోన" మెన గోల కెర్ల.

16 గని యేసు జా దెక కెర, జోవయింక పాసి బుకారా కెర, "బోదల్ అంచితె జెతు. జోవయింక ఆటంకుమ్ కెర నాయ్. కిచ్చొక మెలె, దేముడుచి రాజిమ్ ఇన బాలబోదల్ జల సుదల్చియి.

17 తుమ్క ఆవ్ కిచ్చొ కచితుమ్ సంగితసి మెలె, మాన్సు గవురుమ్ నే ఉచరంతె బాలబోదల్చి రితిచి నముకుమ్ తెన్ దేముడుచి రాజిమ్తె బెదితి వరుమ్ నజ్లెకయ్, పరలోకుమ్తె గెచ్చుక జయెదె" మెన యేసు సంగిలన్.

సామ్నారుమ్ తిలో ఉబెడె ఎక్కిలో దేముడుచి రాజిమ్చి రిసా యేసుక పుసితికయ్

(మత్త 19:16-30; మార్కు 10:17-31)

18 యూదుల్చో అదికారి ఎక్కిలో యేసుతె జా కెర, "చెంగిల్ తిలో గురుబాబు, పరలోకుమ్చి రాజిమ్తె ఆవ్ కెయ్క తెయ్క జితి వాట అంక దొర్కు జంక మెలె, ఆవ్ కిచ్చొ కామ్ కెర్లె జయెదె?" మెన పుసిలన్.

19 పుసితికయ్ యేసు, " 'చెంగిల్ తిలోసా' మెన అంక కిచ్చొక సంగిలది? చెంగిలోసా దేముడు ఎక్కిలోయి, గని అన్నె కో కి చెంగిలోన నెంజితి.

20 జో దిల ఆగ్గుల్ మెలె తుయి జాన్సి. లంజెకమొ కెరుక జయె నాయ్, నరు అత్య కెరుక జయె నాయ్, చోరుక జయె నాయ్, అబద్దుమ్ సాచి సంగుక జయె నాయ్, అయ్యద్అబ్బొద్క గవురుమ్ దెకితె తంక అన్నె. దసచయ్" మెన జోక యేసు సంగిలన్.

21 సంగితికయ్ జో మాన్సు, "బాల తతె తెంతో ఈంజేవ్ ఆగ్గుల్ రితి ఆవ్ నిదానుమ్ కెర దెకన్తసి" మెన జబాబ్ దిలన్.

22 జా కోడు సూన కెర యేసు, జోక, "అప్పొక తుక ఎక్కి పిట్ట అన్నె. తుచి అన్తి ఎత్తి తుయి విక కెర, జా వికిలి డబ్బుల్ బీద సుదల్క దేను, దస్సి కెర్లెగిన పరలోకుమ్తె తుక అన్తి కలుగు జయెదె. అన్నె అంచి తెన్ బెద అంచి పట్టి జె!" మెన సంగిలన్.

23 గని ఈంజ కోడు సూన కెర, జోక ఒగ్గర్ సామ్నారుమ్ తిలిచి రిసా జో మాన్సు ఒగ్గర్ విసారుమ్ జలో.

24 తెదొడి, జో మాన్సు దస్సి విసారుమ్ జలిసి దెక కెర యేసు, "సామ్నార్లు దేముడుచి రాజిమ్తె గెచ్చుక జలె, కెద్ది గే కస్తుమ్ జలెకయ్ జయెదె.

25 కిచ్చొక మెలె, ఇన సామ్నార్లు దేముడుచి రాజిమ్తె బెదితి కంట, సూజిబోరో వాట్ ఒంటె గెచ్చుక సుల్లు!" మెన సంగిలన్.

26 జలె, జా కోడు సూన్లన "దస్సి జలె, కో ఖరచ్చించువ జంక జయెదె?" మెన బమ్మ జలె.

27 గని యేసు, "మాన్సు కెర్క నెత్తిర్లిసి కి, దేముడు జర్గు కెరుక తెరె" మెలన్.

28 తెదొడి యేసుచ బారజిన్ బారికుల్తె తిలో పేతురు మెలో సిస్సుడు "ఈందె, అమ్చ గెరల్ ఎత్తి ముల ధా ఆమ్ తుచి పట్టి బులితసుమ్" మెలన్.

29 యేసు జేవ్ బారికుల్క, నిజామి, అన్నె తుమ్క ఆవ్ కిచ్చొ కచితుమ్ మెంతసి మెలె, దేముడుచి రాజిమ్చి కామ్ కెర్లె రిసా గేరు జలెకు, తేర్లిక జలెకు, అన్నోబావొక జలెకు, అయ్యన్అబ్బొన్క జలెకు, బోదల్క జలెకు కో ముల తవుల గే,

30 అప్పె ఈంజ లోకుమ్తె ఈంజ కాలుమ్తె కి జోక దసచ అన్నె ఒగ్గర్

‡ 18:26 18:26 మెలె, పాపుమ్ తెంతో రచ్చించువ జంక, చి ఎత్తి అదికారుమ్ తిలో దేముడుచి రాజిమ్తె బెదుక.

వంతుల్ రితి దొర్కు జయెదె, అన్నె, జెతి కాలుమ్తె, కెయచ తెయచ పరలోకుమ్తె జితి వాట జోక దొర్కు జయెదె.

జో మొరుక తిలిన్చి రిసా యేసు అన్నెక్ సుట్టు సంగిలిసి

31 తెదొడ్డి జేవ్ యెరూసలేమ్తె గెతె తిలి వట్టె యేసు జోచ బారజిన్ సిస్సుల్క పక్క కడన ఇసి మెలన్. “ఈందె, అమ్ యెరూసలేమ్తె గెతనుమ్, చి ఆవ్ మాన్సు జా జెర్మన్ అయ్లోసాచి రిసా దేముడుచ కబుర్లు సంగిలన రెగిడ్డిసి ఎత్తి కచితుమ్ పూర్తి జర్లు జయెదె.

32 కిచ్చొక మెలె, యూదుల్ నెంజిలనచి అత్తి అంక సార్ప కెర దెవుల, చి అంక కొంకడుల, అంచి మరియాద కడుల, చి అంక తుంక దెవుల.

33 అంక కొర్తల్ తెన్ పెటుల, చి అంక మారుల, తిర్రతక అన్నెజీవ్ జా ఉట్టెందె” మెలన్.

34 గని ఇన్నెచి కిచ్చొ అర్దుమ్ కి కెరంతి నాయ్. జా అర్దుమ్ లుంకిల్ రితి తిలి, చి జో కిచ్చొచి రిసా సంగిలో గే నేన్ల.

గుడ్డి జలో మాన్సుక యేసు చెంగిల్ కెర్లిసి

(మత్త 20:29-34; మార్కు 10:46-52)

35 యెరూసలేమ్తె గెచ్చుక మెన యేసు వట్టె గెతె తా యెరికో పట్టుమ్క పాసి అయ్లి పొది, గుడ్డి జలో మాన్సు ఎక్కిలో వాట్ సొడి వెన తా, బిచ్చిమ్ నజీతె తిల్లో.

36 ఒగ్గరిజిన్ మాన్సుల్ జా వాట్ గెతె తిలిన్చి అవాడ్ సూన కెర, “కిచ్చొక ఒగ్గర్ జనాబ్ ఈంజ వాట్ గెతతి?” మెన పుసిలన్.

37 పుసిలె, జేవ్ “నజరేతు గవ్విచొ యేసు ఈంజ వాట్ గెతయ్” మెన జోక సంగిల,

38 చి సూన, జో “ఓ యేసుప్రబు, దావీదు రానొచి సెకుమ్తె జెర్మిలో

రచ్చించుప కెర్తొసా, అంచి ఉప్పిరి కన్కారుమ్ తియ, అంచ చెంగిల్ కెరు!” మెన కేక గలన్.

39 తెదొడ్డి పురైతొ ఇండితె తిలన సగుమ్జిన్ జో గుడ్డిమాన్సుక “తుక్కెతా” మెన గోల కెర్ల, గని జో అన్నె, “దావీదు రానొచి సెకుమ్తె జెర్మిలో రచ్చించుప కెర్తొసా, అంచి ఉప్పిరి కన్కారుమ్ తియ చెంగిల్ కెరు!” మెన అగ్గెచి కంట గట్టిజ కేకుల్ గలో.

40 ఇసి జతికయ్, యేసు టీచ కెర, “జోక ఇత్తల్ కడ ఆన” మెన ఆడ్ర దిలన్, చి జోక జోచితె కడ అన్లన పాసి జెతికయ్,

41 “ఆవ్ తుక కిచ్చొ కెరుక మెన తుయి కోర్ప జతసి?” మెన పుసితికయ్, జో గుడ్డి మాన్సు, “ప్రబు, ఆవ్ దెకిత్ రితి కెరు” మెలన్.

42 యేసు జోక, “ఈందె తుచ అంకివొ డీస్తు. అంచి ఉప్పిరి తుయి నముకుమ్ తిలి రిసా తుయి కెచెంగిల్ జా అస్సిసి” మెన సంగితికయ్,

43 బేగి జో మాన్సుచ అంకివొ డీసిల చి, దేముడుచి గవురుమ్ సంగ యేసుచి వట్టి గెలన్. అన్నె, ప్రెజల్ ఈంజ ఎత్తి దెక తా, జేవ్ కి దేముడుచి గవురుమ్ సంగిల.

19

జక్కయ్య మెలో సిస్తు నజీతొ సుంకరో

1 జలె, యేసు యెరికో పట్టుమ్ పెన జా పట్టుమ్ వాట్ గెచ్చు ముల్తి పొది,

2 ఒత్త జక్కయ్య మెలో మాన్సు తిలన్. జో సిస్తు నజీత సుంకర్లుచొ అదికారి, చి జో ఒగ్గర్ సొమ్నారుమ్ తిలో.

3 జలె, ‘యేసు కీసాచొగ దెకిన్దె’ మెన ఇన్టుమ్ జలన్, గని జో పాట్టి మాన్సు, చి యేసుచి సుట్టునంత బెర్ల జనాబ్ అడ్డు జా అస్తి.

4 జాకయ్ జో కిచ్చొ కెర్లన్ మెలె, యేసు జా వాట్ గెచ్చెదె, చి జో పురెతో నిగ గెచ్చు, ఏక్ బొడ్డ రూక్తె వెగిలన్.

5 జలె, యేసు ఒత్త పాచ కెర, ఉప్పిరి రూక్తె దెక, “జక్కయ్య, బే బేగి ఉత్తు. ఆజి ఆవ్ తుచి గెరి తంక అన్న” మెలన్.

6 దస్సి మెంతికయ్, జక్కయ్య బమ్మ తెన్ జా రూక్తె తెంతో ఉత్త జా, సర్ద తెన్ యేసుక గెరి కడన, మరియాద ఎత్తి కెర్లన్.

7 ఇసి జర్గు జలిసి దెక కెర ప్రెజల్ ఎత్తి కుసుమ్కసుమ్ లట్టబ్బ. “పాపుమ్ సుదొచి గెరి జో గోత్ గెచ్చుక కిచ్చొక?” మెల.

8 జలె, యేసు ఒత్త తిలి పొది, జక్కయ్య పురె జా టీచ ప్రబుక కిచ్చొ కోడు సంగిలన్ మెలె, “ఈందె, ప్రబు, అంచి అస్తితెచి ఏక్ వంతు బీద సుదల్క దా గెలిందె. అన్నె, డబ్బుల్క ఆవ్ కక్క మోసిమ్ కెర తిలె, జోవయింక ఆవ్ మోసిమ్ కెర నజీలి కంట అన్నె అన్నె చెత్తర్ వాటల్ జోవయింక అన్నె దెయిందె” మెన ఒప్పల్లన్.

9 దస్సి జతికయ్, యేసు జోక, “దేముడు పాపల్ చెమించుప కెర్తి రచ్చున ఆజి ఈంజ గెరి పాచ అన్నె. పాపుమ్ ఇండితె తిలె కి ఈంజొ కి *అబ్రాహామ్ చి సెకుమ్చొ, గెద.

10 మెలె, ఆత్మక నెస గెలసకయ్ చజన జోవయించ పాపల్ తెంతో రచ్చించుప కెరుక మెనయ్ ఆవ్ మాన్సు జా జెర్మున్ అయ్లోసొ ఈంజ లోకుమ్తె అయ్లయ్”.

బజర్చ కాసుల్చి టాలి (మత్త 25:14-30)

11 యేసు సంగిలి కోడు ప్రెజల్ సూన్తె తిలి పొది, యెరూసలేమ్క పాసి జెతె తిల, చి ప్రెజల్ జేవేచి పెట్టి కిచ్చొ మెన

ఉచర్తె తిల మెలె, “యేసు అమ్చి యెరూసలేమ్ పట్టుమ్తె పాచిలె, దేముడుచి రాజిమ్ ఎదార్దుమ్ ఏలుప కెరుక మొదోల్ జయెదె.” మెన ఉచర్తె తిల.

12 జాకయ్ యేసు జోవయింక ఏక్ టాలి సంగిలన్. “వెల్లొ మాన్సు ఎక్కిలో తిలో. ఈంజ దేసిమ్క రానొ జంక మెన, రాసల్క టీచడ్డొసొ తిలి దూరి దేసిమి ఉట్ట గెచ్చు జెంక మెన, ఈంజొ బార్ జలొ.

13 గని, నే గెతె అగ్గె, జోచ దెస్సుజిన్ గొత్తి సుదల్క బుకారా కెర, జోవయింక ఎక్కెక్లొక ఎక్కెక్ †బజర్చ కాసుల్ దా కెర, ‘ఆవ్ జెతె ఎదక ఇన్నెతెన్ బియ్యారి కెర్తె తా’ మెలన్.

14 గని జోవయించ ప్రెజల్ జోక ఒగ్గర్ విరోదుమ్ జా అస్తి, చి ‘ఈంజొ మాన్సు అమ్చి ఉప్పిరి ఏలుప కెరుక మెలె, అమ్క ఎద్దె ఇస్టుమ్ నాయ్’, మెన జో మాన్సుచి పట్టి కబుర్ తెద్రయ్లన్.

15 “గని, జో మాన్సు రానొ జా బుల అయ్లన్, చి జో డబ్బుల్ దా తిల గొత్తి సుదల్ బియ్యారి కెర కెద్ది లాబుమ్ కెర అస్తి సూసుక మెన జేవేక బుకార్లన్.

16 తొలితోచొ జా కెర, రానొచి పురెతో టీచిలన్ అన్నె, ‘బాబు, తుయి దిలి బజార్ కాసుక అన్నె దెస్సు బజార్ కాసుల్ లాబుమ్ దొర్కు జా అన్నె’ మెలన్, చి

17 ‘బొల్లొయ్ కెర్లది, తుయి చెంగిలో గొత్తి సుదొ. ‡ఇదిలిసి కామ్ దెతికయ్ తుయి నిదానుమ్ కెర్లది, చి తుయి దెస్సు పట్టల్చి ఉప్పిరి ఏలుప కెరుక మెన తుక ఆవ్ అదికారుమ్ దెతసి’ మెన రానొ సంగిలన్.

18 తెదొడి అన్నెక్లొ గొత్తి సుదొ అయ్లో, అన్నె, ‘బాబు, తుయి దిలి బజార్ కాసుక అన్నె పాచ బజార్ కాసుల్ లాబుమ్ దొర్కు జా అన్నె’ మెలన్, చి

19 ‘బొల్లొయ్ కెర్లది, తుయి చెంగిలో

* 19:9 19:9 యూదుల్క అబ్రాహామ్ ముక్కిమ్చొ పూర్దుమ్చొ జా తిలో. † 19:13 19:13 ఏక్ బజార్ కాసుచి ఏలుప కెర్తి మెలె, పుంజెక్ పొదుల్చి కూలి డబ్బుల్చి ఎదిలి. ‡ 19:17 19:17 లూకా 16:10 దెక.

గొత్తి నుదొ, పాచ్ పట్టల్చి ఉప్పిరి ఏలుప కెరుక మెన తుక ఆచ్ అదికారుమ్ దెతసి' మెన రానొ సంగిలన్.

20 "తెడిడి అన్నెక్లో గొత్తి నుదొ అయ్లో అన్నె, 'బాబు, ఉంద, తుచి బజార్ కాసు. ఇన్నెక మూటొ బంద తియ దిలయ్'.

21 కిచ్చొక మెలె, తుయ్ 'కన్కారుమ్ నెంజిలోసా' మెన బిలయ్. తుయి కామ్ నె కెర్లిసి నజన్తసి, తుయి నె ఉంపిలిసి లాయితసి మెలన్.

22 జలె, జోక జో రానొ కిచ్చొ జబాబ్ దిలన్ మెలె, 'తుయి గర్బొ గొత్తి నుదొ! తుయి సొంత సంగిలిసి తుకయ్ నేరిమ్ వయడ్తయ్. అంక కన్కారుమ్ నెంజిలోసా, సొంత కామ్ నె కెర్లిసి నజిత్సా, సొంత నె ఉంపిలిసి లాయిత్సా' మెన తుయి జాన్సి.

23 జలె, 'అంచి డబ్బుల్ కిచ్చొక సావుకర్తె జవున్ తిసి నాయ్? సావుకర్తె జవున్ తితది జలె, ఆచ్ బుల అయ్లి పొది సర్ల తెన్ వడ్డి నజన్తయ్' మెన జో గర్బొ గొత్తి నుదొక సంగ కెరె,

24 పాసి టీచ తిల మాన్సుల్క, జా బజార్ కాసు జోతె నజన, దెన్ను బజార్ కాసుల్ తిలో జో అన్నెక్లో గొత్తి నుదొక దాస, మెలన్.

25 జో దస్సి మెంతికయ్, జేవ్ తిల గొత్తి నుదల్ గోస జా, గని బాబు, జోక దెన్ను బజార్ కాసుల్ అన్సి! జోక అన్నె కాసుల్ కిచ్చొక దెంక! మెల.

26 గని జో రానొ కిచ్చొ సంగిలన్ మెలె, 'తుమ్క కిచ్చొ మెంతసి మెలె, కిక్క తిలె, జోక అన్నె దెంక జయెదె. కక్క నెంజిలె, జోక తిలిసి కి జోతె తెంతొ అన్నె కడ గెలుక జయెదె.

27 జలె, అంక అమ్చి ఉప్పిరి జో

ఏలుప కెరుక మెలె, అమ్క ఎద్దరె ఇన్సుమ్ నాయ్' మెల అంచ విరోదుమ్ సుదల్క కిచ్చొ కెరుక? జోక ఇన్నె కడ ఆన, చి అంచి మొక్కె కండ గెల మెన రానొ సంగిలన్" మెన యేసు *టాలి సంగిలన్.

యేసు గాడ్డె పిల్లతె వెగ యెరూసలేమ్ పట్టుమ్క అయ్లిసి (మత్త 21:1-11; మార్కు 11:1-11; యోహా 12:12-19)

28 యేసు ఈంజ టాలి సంగ కేడవ కెర, యెరూసలేమ్తె గెచ్చుక మెన జోచ సిన్సుల్చి పురె గెలన్.

29 జలె, బేత్సగే చి బేతనియ మెల గచ్చొక పాసిచి †ఒలీవ మెంతి మెట్టయ్ పావెలి పొది, యేసు జోచ సిన్సుల్తె దొగులక పాసి బుకారా కెర,

30 "తుమ్చి మొక్కె తిలి గచ్చి తుమ్ పెన, చి గచ్చి పెసిలదు మెలె, బంద తిలి ఏక్ గాడ్డె పిల్ల బేగి తుమ్క డీసెదె. జాచి ఉప్పిరి అప్పె ఎద కో కి వెగుక నేతయ్. జాక యిప కెర ఉడడ ఆన.

31 అన్నె, 'కిచ్చొక యిపితను?' మెన తుమ్క కో జవున్ పుసిలె, తుమ్ కిచ్చొ మెన మెలె, 'ఇన్నెతెన్ ప్రబుక కామ్ అన్నె' " మెన సంగ, మెన యేసు జేవ్ దొగుల సిన్సుల్క సంగ జా గచ్చి తెద్రయ్లన్.

32 జలె, జో తెద్రయ్ల దొగుల గెచ్చు కెర, యేసు సంగిల్ రితి జలి మెన దెకిల.

33 జేవ్ జా గాడ్డె పిల్లక యిపుక దెర్తికయ్, "గాడ్డె పిల్లక కిచ్చొక యిపితను?" మెన జేవ్చ సావుకర్లు పుసిల.

34 పునితికయ్, "ఇన్నెతెన్ ప్రబుక కామ్ అన్నె" మెల.

35 జలె, జేవ్ సిన్సుల్ జా గాడ్డె పిల్లక యేసుతె ఉడడ ఆన కెర, జోవయించ

§ 19:26 19:26 మత్తయి 25:29 దెక. ఇన్నెచి అర్దుమ్ కిచ్చొ మెలె 'ఇదిల్ జవున్ బుద్ది తిలోసాక అన్నె బుద్ది సికడుక జయెదె, గని బుద్ది నెంజిలోసాతె తెంతొ జో సిక తిలిన్ కి కడ గెలుక జయెదె'. * 19:27 19:27 ఈంజ టాలితె రాన్ కో మెలె, యేసు. జోవయించ విరోదుమ్ సుదల్ కో మెలె, యూదుల్చ వెల్లెల మాన్సుల్. గొత్తి నుదల్ మెలె, జోక నంపజలన. డబ్బుల్ వాడిక కెర్లిసి మెలె, జో దిలి కామ్. డబ్బుల్ మెలె, జో దిల నెక్తివో. † 19:29 19:29 'ఒలీవ మెట్ట' మెన కిచ్చొక నావ్ తియ అన్సి మెలె, ఒత్త ఒలీవ పండ్లు రూకుల్ తిల.

దుప్పట్లు గాడ్డెచి ఉప్పిరి గల దా, యేసుక వెగడ్డ,

36 అన్నె, యెరూసలేమ్తె జో గెతె తతికయ్, జో గెతి వట్టి †జనాబ్ జోవయించ పాలల్ అంతిర్ల.

37 అన్నె, యేసు జా ఒలీవ మెట్టచి కొన్న జిన యెరూసలేమ్ పట్టుమ్ పక్క ఉత్త పాసి పాచిలి పొది, జోక నంపజల ప్రెజల్ ఎత్కిజిన్ సర్లసంతోసుమ్ జా గట్టిఒ అవాడ్ కెరన,

38 “దేముడుచి నావ్ తెన్ జెత్తో రానొక జోఒర, జోఒర! పరలోకుమ్తె సేంతుమ్, చి ఎత్కిచి ఉప్పిర్ టాన్తె తిలోసొక జోఒర!” మెన కేకుల్ గల, యేసుచి అత్తి కెర్ల జేవ్ దెకిల కమెచి రిసా దేముడుచి గవురుమ్ సంగితె తిల.

39 తెదొడి జేవ్ జనాబ్తె బెద్ద తిల సగుమ్జిన్ పరిసయ్యుల్ యేసుక “గురుబాబు, తుచ సిస్సుల్ తుక్లె తతి రితి సంగు” మెలె,

40 గని యేసు జేవ్ కిచ్చొ సంగిలన్ మెలె, “తుమ్క ఆవ్ కిచ్చొ మెంతసి మెలె, ఈంజేవ్ తుక్లె తత్త జలె, ఈంజేవ్ పత్తల్ కేక్ గలుల” మెలన్.

యెరూసలేమ్ పట్టుమ్క జెంక తిల అల్లరచి రిసా యేసు ఏడ్డిసి

41 యేసు యెరూసలేమ్ పట్టుమ్క అన్నె పాసి జా జాక దెక కెర, జాచి రిసా ఏడ్లన్.

42 కిచ్చొ మెన ఏడ్లన్ మెలె, “ఓ యెరూసలేమ్, దేముడు తెన్ కిసి సేంతుమ్ జంక తుయి ఆజి జాన్తతి జలె, చెంగిల్ తత్తి! గని నాయ్, అప్పె జా అర్దుమ్ ఎత్కి తుమ్క లుంకిల్ రితి అన్నె.

43 ఓ యెరూసలేమ్ పట్టుమ్, తుయి ఒగ్గర్ల సైమల్ సేడ్డి ఏక్ కాలుమ్ జెతయ్.

జేవ్ దీసల్క తుక కిచ్చొ జయెదె మెలె, తుచ విరోదుమ్ సుదల్ తుచి సుట్టునంత మత్తి డిబ్బల్ వెగడ, తుచి సుట్టునంత బెరజా, ఎత్కి పక్కల్ తెంతో పెల జెవుల.

44 తుచ కోటల్, తుచ గెరల్ పూర్తి సేడవ గెల కెర, తుచి తెడి తిల మాన్సుల్ ఎత్కిజిన్క జేవ్ మారుల, చి తుచితె పత్తుర్చి ఉప్పిరి పత్తురు తతి రితి ములితి నాయ్. కిచ్చొక మెలె, దేముడు తుక రచ్చించుప కెర్తి వాటు ఆవ్ దెకయలయ్, గని చినున్ నాయ్” మెన యేసు కియెరూసలేమ్చి రిసా ఏడ గెలన్.

వెల్లెల మాన్సుల్ యేసుక మారుక మెన రకితె తిలిసి
(మత్త 21:12-17; మార్కు 11:15-19; యోహా 2:13-22)

45 యేసు పట్టుమ్తె పాచ కెర, దేముడుచి గుడితె పెన కెర, ఒత్త *సామన్ వికితనక ఉడడ గెలుక దెర,

46 జోవయింక, “ ‘అంచి గేరు ప్రార్దన కెర్తి గేరు, జా దస్సి తవున్’ మెన దేముడుచి కొడొతె రెగ్డవ అన్నె, గని తూమ్ చోర్లు జితో రితో గేరు జతి రితి జాక మార్పువ కెర అన్నున్.” మెన సంగిలన్.

47 జలె, జా దొరతి యేసు రోజుక దేముడుచి గుడితె బోదన కెర్తె తిలన్, అన్నె వెల్లెల పూజర్లు, మోసే తెన్ దేముడు దిలి ఆగ్గుల్ సికడ్డన చి, యూదుల్చ వెల్లెల మాన్సుల్ జోక మారుక వాట్ చజితె తిల, గని

48 ప్రెజల్ ఎత్కి రోజుక జెతె తా జోవయించ కొడొ ఒగ్గర్ల సర్ల తెన్ సూన్తె తిల, చి నెత్తిర్ల.

† 19:36 19:36 మత్తయి 21:8, చి మార్కు 11:8 దెక. § 19:44 19:44 యేసు జెర్ల ముప్పుయ్ తిన్ని వెర్గుల్క ముర అన్నె జిలన్, చి యేసు జెర్ల డబ్బయ్ వెర్గుల్క రోమ్ దేసిమ్చ నయన్సుమ్ సుదల్ యెరూసలేమ్ పట్టుమ్క, దేముడుచి గుడిక పాడ్ కెర్ల. జా పట్టుమ్ దస్సి జా జా పట్టుమ్చ మాన్సుల్ జా సిచ్చ జవుల మెంతి గుర్తుక యేసు ఇసి సంగిలన్. * 19:45 19:45 మత్తయి 21:12-13, చి మార్కు 11:15-17 చి యోహాను 12:12-19 దెక.

20

వెల్లెల సుదల్ యేసుక పరిచ్చ కెర్లిసి
(మత్త 21:23-27; మార్కు
11:27-33)

1 తెదొడి ఏక్ దీసి, యేసు దేముడుచి గుడితె ప్రెజల్క బోదన కెరె తా సుబుమ్ కబుర్ సంగితె తతికయ్, వెల్లెల పూజర్లు, మోసే తెన్ దేముడు దిలి ఆగ్గుల్ సికడ్డన చి అన్నె సగుమ్జిన్ వెల్లెల మాన్సుల్ జోతె జా కెర,

2 “తుయి కెర్త కమె కెరుక, తుయి బోదన కెరుక, తుక కిచ్చో అదికారుమ్ అస్సె? కొస్సో తుక అదికారుమ్ దిలన్?” మెన జోక గోల కెర్త.

3 యేసు జోవయింక కిచ్చో జబాబ్ దిలన్ మెలె, “ఆవ్ కి తుమ్కయ్ ఏక్ కోడు పుసిందె. జలె, అంక తుమ్ సంగ.

4 యోహాను బాప్తిసుమ్ దెతె తిలిన్చి అదికారుమ్ కేనె తెంతో చి? పరలోకుమ్ తెంతో చి గే, మాన్సు తెంతో చి గే, తుమ్ సంగ” మెన వెల్లెల మాన్సుల్క యేసు పుసిలన్.

5 దస్సి పుసితికయ్, జేవ్ వెల్లెల మాన్సుల్ కిసి జల మెలె, ఎక్కిలో తెన్ ఎక్కిలో బమ్మ తెన్ లట్టబన, ఇసి మెంతె తిల, “పరలోకుమ్ తెంతో చి మెన అమ్ సంగిలెగిన, ‘దస్సి జలె, తుమ్ కిచ్చొక జోక నంప కెర్సు నాయ్?’ మెన ఈంజో అమ్క సంగెదె.

6 గని, ‘మాన్సు తెంతో చి’ మెన సంగిలె, జనాబ్ అమ్క పత్రల్ తెన్ పైట మారుల. యోహానుక ‘అమ్బొ దేముడుచ కబుర్లు సంగితోసొ కచితుమ్ తిలో’ మెన జేవ్ జనాబ్క నముకుమ్.”

7 జాకయ్ జేవ్ యేసుక కిచ్చో జబాబ్ దిలి మెలె, “జా అదికారుమ్ కేనె తెంతో గే నేనుమ్” మెల.

8 జేవ్ దస్సి సంగితికయ్, యేసు జోవయింక, “దస్సి జలె, కేన్ అదికారుమ్క ఆవ్ అంచ కమె కెర్తసి గే, ఆవ్ తుమ్క సంగి నాయ్” మెన సంగ జేవ్క ముద్దొ కెర్తన్.

ద్రాచ తోటచో ఎజొమానిచో పుత్తున్క మార్లిన్చి టాలి యేసు సంగిలిసి
(మత్త 21:33-46; మార్కు 12:1-12)

9 తెదొడి యేసు ప్రెజల్క ఈంజ ఏక్ *టాలి సంగుక దెర్లన్. “ఏక్ మాన్సు ద్రాచ తోట రోవడ కెర, రకితసక నిసాన, జేవ్క జా తోట గుత్త దా, ఇదిల్ ఒగ్గర్ దీసల్ వేర దేసిమి గెచ్చు తంక మెన, ఉట్ట గెలన్.

10 జలె, పంటో పికిలి పొద్ది, ‘సమయుమ్ జా అయ్లి’ మెన, జేవ్ గుత్త నజిలసతె జా తోటచి పంటో ఏక్ వాట నజ ఆన్తి రిసొ, గొత్తి సుదొ ఎక్కిలోక ఎజొమాని తెద్రయ్లన్. గని జో గొత్తి సుదొ ఒత్త పావెతికయ్, గుత్త నజిల జేవ్ రకిత మాన్సుల్ జోక పెట గెల కెర, కిచ్చొ నే దెతె ఉదడ్డొ.

11 “ఒత్త తెంతో, అన్నెక్కో గొత్తి సుదొక జో ఎజొమాని తెద్రయ్లన్, గని జేవ్ రకితస జోక కి పెట కెర జోచి మరియాద కడ, జోక కి కిచ్చొ నే దెతె ఉదడ గెల.

12 ఒత్త తెంతో అన్నెక్కో గొత్తి సుదొక ఎజొమాని తెద్రయ్లన్ చి, ఇన్నెక కి బలే అల్లర్ కెర గంటివో గాయిమలు కెర దా ఉదడ గెల.

13 “తెదొడి జా ద్రాచ తోటచో ఎజొమాని, ‘ఆవ్ కిచ్చొ కెర్లె జయెదె? నాయ్, గెద, ఇసి కెరిందె. అంచో ప్రేమ తిలో పుత్తుక తెద్రయిందె. జోకయ్ మరియాద దెకుల, కిచ్చొగె’ మెన ఆకర్క జోకయ్ తెద్రయ్లన్.

* 20:9 20:9 ఈంజ టాలితె, ‘గుత్త నజ తోట రకితస’ కొస్సు మెలె, ముక్కిమ్క యూదుల్క ఎత్తి అదికారుమ్ తిలో దేముడు దెకయ్లి వాట్ సికడ్డ వెల్లెల మాన్సుల్, మోసే తెన్ దేముడు దిలి ఆగ్గుల్ సికడ్డన, పరిసయ్యుల్, పూజర్లు. ‘ఎజొమాని’ మెలె, ఎత్తి అదికారుమ్ తిలో దేముడు. ‘ఎజొమాని తెద్రయ్ల గొత్తి సుదల్’ మెలె, జోవయింక కబుర్లు సంగిలెన. ‘ఎజొమానిచో పుత్తుసి’ మెలె, యేసు. ‘ద్రాచ తోట’ మెలె, యూదుల్, చి ఎత్తి అదికారుమ్ తిలో దేముడుచి బక్తి కెర్త అన్నె మాన్సుల్.

14 జేవ్ తోట గుత్త నజీలన జోక దెక కెర, 'ఇన్నెకయ్ అబ్బొన్చి దనుమ్ కలుగు జయెదె. అల్లె, ఇన్నెక మారుమ, చి ఇన్నెక కలుగు జతి వాట అమ్కయ్ దొర్కు జయెదె' మెన జోవయింక జెవ్వి లట్టబన,

15 జో ఎజొమానిచొ పుత్తునక దెర కెర, జోక తోట తెంతో వెలవ న కెర, †బయిలె మార గెల. జలె, జేవ్ ఎజొమానిచొ పుత్తునక దస్సి కెర్లి రిసా, జా తోటచొ ఎజొమాని జోవయింక కిచ్చొ కెరెదె?

16 కిచ్చొ కెరెదె మెలె, జా కెర, జేవ్ గుత్త నజీలనక మొరవ కెర, జా తోట వేర మాన్సుల్క గుత్త దెయెదె" మెన యేసు సంగిలన్. ప్రెజల్ జాక నూన కెర, దస్సి కెయక జర్గు జంక జయె నాయ్! మెల.

17 గని యేసు జోవయించి పక్క పసుల దెక, "జలె, దేముడు దేముడుచ కొడెతె రెగ్గయ్లి ఏక్ కోడు సంగిందె, జాచి అర్దుమ్ కిచ్చొ గే తుమ్ ఉచర.

'కామక నెంజె' మెన గేరు బందిలన జా ఏక్ పత్తురు పిట్టవుక మెన ఉచరెల్లె కి, జయ్యి పత్తురు గేరుక బోడిపత్తుర్ జలన్. మెన రెగిడ్లి కోడు.

18 ఈంజొ పత్తుర్చి ఉప్పిరి కో సేడుల గే, జేవ్ బద్దల్ జా గెచ్చుల, గని కచి ఉప్పిరి ఈంజొ పత్తుర్ సేడెదె గే, జోక బీడవ గెలెదె." మెన యేసు‡ సంగిలన్.

19 పంటొ నజుక గెలనక మార్ల సంగిలన మెన అమ్చి రిసా యేసు సంగితయ్ మెన మోసే తెన్ దేముడు దిలి ఆగ్గుల్ సికడ్డన చి వెల్లెల పూజర్లు చినన కోపుమ్ జా, జోక జయ్యి

గడియయ్ దెరుక ఉచర్ల, గని 'ప్రెజల్ కోపుమ్ జా అల్లర్ కెరుల' మెన, జోవయింక బియ్ కెర, తుక్లె తిల.

సిస్టు డబ్బుల్ దెతిన్చి రిసా యేసుక పరిచ్చ కెరయ్లిసి
(మత్త 22:15-22; మార్కు 12:13-17)

20 జలె, 'వాట్ అయ్లె యేసుక దెరుమ్దె' మెన మోసే తెన్ దేముడు దిలి ఆగ్గుల్ సికడ్డన చి వెల్లెల పూజర్లు దెకితె తిల చి, సగుమ్జినక లంచుమ్ దా కెర, "తుమ్ సత్తిమక పుసిల్ రితి డీస" మెన, జేవ్ మాన్సుల్ యేసుక ఏక్ కోడు పుసితి రితి తెద్రయ్ల. జోవయించి ఉద్దెసుమ్ కిచ్చొ మెలె, 'యేసు కిచ్చొ జపున్ తప్పు సంగిలె, జోక దెర, రోమ్ దేసిమ్చొ అదికారితె సార్ప కెర దెంక జయెదె చి, యేసుచి రిసా నూన, సిచ్చ దెయెదె' మెన కోర్ప జతతి.

21 జలె, జేవ్ మాన్సుల్ యేసుతె జా కెర, "గురుబాబు, తుయి సత్తిమ్ లట్టబ, సత్తిమ్ బోదన కెర్తసి మెన. తుయి మొకమాటుమ్ నే దెకితె, వెల్లెల మాన్సుల్ కిచ్చొ ఉచరుల గే నే బితె, దేముడు దెకయ్లి వాట్చి రిసా సత్తిమ్ తెన్ బోదన కెర్తసి మెన జానుమ్" మెన పులయ్తి రితి సంగ,

22 అన్నె, "రోమ్ దేసిమ్చి ప్రబుతుమ్చొ కైసర్ రానొక అమ్ సిస్టు దెంక నాయిమ్ గే నాయ్ గె?" మెన పుసిల.

23 గని యేసు జోవయించి కిఉచరర్ల, జోవయించి ఉప్రమెన్సు చిన కెర,

† 20:15 20:15 యేసుక కి పడ్డొ యెరూసలేమ్ పట్టుమ్ తెంతో బయిలె కడన మార్ల; సిలువతె. లూకా 23:26-33. ‡ 20:18 20:18 ఈంజు టాలితె 'దేముడుచి గుడి' మెలె, ఎత్తి అదికారుమ్ తిలో దేముడుచి రాజిమ్, యేసుక సంపజా జోవయింక నిదానుమ్ జలన మొత్తుమ్ జన్. బోడిపత్తుర్ మెలె, యేసు. 'బోడిపత్తుర్ నెసిలన' మెలె, ముక్కిమ్క యూదుల్వ వెల్లెల మాన్సుల్. 'పత్తురు జోవయించి ఉప్పిరి సేడ బీడయ్తిసి' మెలె,

జేవ్ పూర్తి నంపనెంజలిన్ నెసిలిన్చి సిచ్చ. § 20:23 20:23 జోవయించి కిచ్చొ ఉచర్ల మెలె, 'అమ్క ఆక్రమించువ కెర్లి రోమ్ దేసిమ్చి ప్రబుతుమ్క సిస్టు దెంక నెంజె' మెన ఏక్ వేల జో సంగిలె, జా ప్రబుతుమ్చి మొక్కి జోవయింక నేరిమ్ వయడ సిచ్చ కెరవుక జయెదె. గని 'జా సిస్టు దెంక చెంగిల్' మెన జో సంగిలె మాములుమ్ ప్రెజల్ కోపుమ్ జవుల. మెలె, జా వేర దేసిమ్చి ప్రబుతుమ్క సిస్టు దెంక ఆగ్గు తిలి కి, జేవ్ యూదుల్ నెసితి.

* 20:24 20:24 యెరూసలేమ్తె దొన్పు రగల్ కానుల్ తవుల. ఏక్ రగుమ్ దేముడుచి గుడితె దెతిసి, ఏక్ రగుమ్ ప్రబుతుమ్క దెతిసి, మాములుమ్ బియ్యార్కు వాడిక కెర్తిసి.

24 “ఏక్ వెండ్లి *కాసు అంక దెకవ” మెలన్, చి జేవ్ ఆన దెకయ్తెకయ్, “ఇన్నెతె కచి బొమ్మ కడ అస్తి? కచి నావ్ డీస్తయ్?” మెన పుసిలన్ చి, “కైసర్ రానొచి” మెన జనాబ్ సంగిల.

25 యేసు జోవయింక, “దస్సి జలె, కైసర్ క దెతిసి కైసర్ క, దేముడుక దెతిసి దేముడుకయ్ తుమ్ దాస.” మెన, జోవయింక జబాబ్ దిలన్.

26 దస్సి, జో సంగిలీన్తె తప్పు నాయ్ చి, ప్రెజల్ చి మొక్కె జో కిచ్చొ తప్పు సంగితిన్ చి రుజ్జు దెకవుక నెతిర్ల, చి దెరుక నెతిర్ల. గని జో దిలి జబాబ్ చి తెల్విక ఆచారిమ్ జా, తుక్కె జల.

సద్దూకయ్యలు మెల పండితుల్ యేసుచి తెలివి పరిచ్చ కెరుక (మత్త 22:23-33; మార్కు 12:18-27)

27 పడ్డొ, ‘మొర గెలెగిన అన్నె జివ్ జంక నెంజె, అన్నెక్ లోకుమ్తె గెచ్చుక నెంజె’ మెన ప్రెజల్ క సికయ్త సద్దూకయ్యలు సగుమ్ జిన్ యేసుతె జాఁ కెర,

28 “గురుబాబు, ఈందె, ‘ఎక్కిలోచొ అన్నొసి పెండ్లి జా బోదల్ నెంతె మొర గెలెగిన, జో బావొసి అన్నొచి తేర్చిక ఆనన, అన్నొచి నావ్ తెన్ బోదల్ పాయిక అస్సె’ మెన, మోసే పూర్లుమ్చొ అమ్ యూదుల్ చి రిసొ రెగ్ల అస్సె.

29 జలె, సత్తుజిన్ బావుడ్లు తిల. జోవయింతె తొల్పుర్ తెర్చి ఆనన, బోదల్ నెంతె మొర గెలన్.

30 జో మాన్సుచి పట్టి జెర్మిలోసొ కి జాక ఆనన, బోదల్ నెంతె మొర గెలన్.

31 జోచి పట్టిచొ, జోచి పట్టిచొ, దస్సి వర్స తెన్ సత్తుజిన్ మొత్తుమ్ జా తెన్ పెండ్లి జా సంతానుమ్ నెంతె మొర గెల.

32 ఆకర్ క జా తేర్ బోద కి మొర గెలి.

33 జాకయ్, మొర గెలస అన్నె జివ్ జతి పొదిక, జా తేర్ బోద జోవయింతె

కక్క తేర్చి జా తయెదె? జేవ్ సత్తుజిన్ వర్స తెన్ జా తెన్ పెండ్లి జల, గెద” మెన యేసుక పుసిల.

34 ఇసి జతికయ్, యేసు జేవ్ సద్దూకయ్యుల్ క, “ఈంజయ్ కాలుమ్ చ మాన్సుల్ పెండ్లి జా పుత్తర్పుల్ క పెండ్లివొ కెర్తతి,

35 గని ‘అన్నె జివ్ జా పరలోకుమ్తె జా కాలుమ్ క జితు’ మెన కక్క దేముడు విలువ దెకెదె గే, ఒత్త పెండ్లివొ నెంతె దస్సి తవుల.

36 కిచ్చొక మెలె, ఒత్త గెలె దూతల్ కిసి మొర్తి నాయ్ గే, దస్సి, ఈంజేవ్ కి కెయక కి అన్నె మొర్తి నాయ్. అన్నె, జేవ్ మొర గెచ్చ అన్నె జివ్ జలి రిసొ, జేవ్ దేముడు చ పుత్తర్లు జా అస్సి.

37 “జలె, ‘మొర గెలస అన్నె జివ్ జవుల’ మెన †రూకు తెడి జా ఆగి లగితె తిలిన్ చి రిసొ జో రెగిడ్లిన్తె అమ్చొ మోసే పూర్లుమ్చొ కి దెకయ్తయ్. కేన్ కోడుతె మెలె, దేముడుచి రిసొ ‘అబ్రాహామ్చొ దేముడు, ఇస్సాకుచొ దేముడు, చి యాకోబుచొ దేముడు’ మెన ఏక్తె సంగితయ్, గెద.

38 జలె జేవ్ మొర్ల పూర్లుల్ క మోసేచి కాలుమ్ ఎద కి జో దేముడు తా కామ్ క అయ్ లిన్ తెన్ జేవ్ అన్నెక్ లోకుమ్తె గెచ్చ జివ్వి అస్తి మెన రుజ్జు జతయ్. రితి మొర గెలసక నాయ్, గని జివ్ తిలసకయ్ జో దేముడు తయెదె. కో దేముడుచి రిసొ జియె మొర అస్సి గే, జోవయింక రిసొ జితతి” మెన యేసు సంగిలన్.

39 జలె, మోసే తెన్ దేముడు దిలి ఆగ్గుల్ సికడ్డన కి ఒత్త తిల. జేవ్, జలె, పరిసయ్యుల్ తెన్ బెదితన జవుల చి, మొర్లె జివ్ జంక జయెదె, అన్నెక్ లోకుమ్తె గెచ్చుక జయెదె మెన నంప కెర్తతిచి రిసొ “గురుబాబు, తుయి చెంగిల్ జబాబ్ దిలది!” మెన సంగిల.

40 ఒత్త తెంతొ జోవయింతె అన్నె కో కి యేసుక కిచ్చొ పుసుక కి దయిరిమ్ జతి

† 20:37 20:37 నిర్ణయకాండము 3:1-6.

నాయ్.

దేముడు తెద్రయ్లో క్రీస్తు
(మత్త 22:41-46; మార్కు
12:35-37)

41 తెదొడి యేసు జోవయింక ఇసి
మెలన్. “దేముడు తెద్రయ్లో

రచ్చించుప కెర్తొసా జతో క్రీస్తు అమ్చొ
దావీదు రానొచి సెకుమ్తె జెర్మ జోక
పుత్తుసి జయెదె’ మెన కీసి సంగుక
జతయ్?” మెన, అన్నె,

42-43 కీర్తనల్తె దావీదు,
‡“తుచ విరోదుమ్ సుదల్ తయె సుదితి
పొర్తొ జతి రితి ఆవ్
కెర్తి ఎది ఎద

తుయి అంచి ఉజెతో పక్కయ్ వెన తా
అంచి తెన్ ఏలుప కెరు, మెన
ప్రబు అంచొ ప్రబుక సంగిలన్
మెన రెగిడ్లన్.

44 దస్సి, దావీదు రానొ క్రీస్తుక ‘ప్రబు’
మెన సంగితయ్ జలె, జో క్రీస్తు కీసి జోక
సీపుత్తుసి జయెదె? తుమ్ ఉచర” మెన
ఒత్త తిలసక యేసు సంగిలన్.

దేముడుచి కొడొ సికడ్లసచి రిసా
ప్రెజల్క యేసు జాగర్త సంగిలిసి

(మత్త 23:1-36; మార్కు 12:38-
40; లూకా 11:37-54)

45 ప్రెజల్ ఎత్తి సూన్తె తతికయ్,
యేసు జోచ సిస్సుల్క ఇసి మెలన్.

46 “దిగిల సూటిచ పాలల్ గలన
బులిత గపురుమ్ ఉచరంత అమ్చ
మోసే తెన్ దేముడు దిలి ఆగ్గుల్
సికడ్లసచి రిసా తుమ్ జాగర్త తెన్ తా.
జేవ్ సంతవీదులె టీవ మాన్సుల్ ఎత్తి
అమ్క జొకర్తు మెన కోర్ప జతతి. సబ
గెరలె ముక్కిమ్చ టాన్లుతె, విందుల్తె
ముక్కిమ్చ టాన్లుతె వెసుక కోర్ప జతతి.

‡ 20:42-43 20:42-43 కీర్తన 110:1. § 20:44 20:44 కీసి మెలె, యేసు ఎత్తి అదికారుమ్ తిలొ
దేముడుచొ పుత్తున్ జయె దేముడి జతయ్, గని మాన్సు జా దావీదు రానొచి సెకుమ్తె జెర్మ జోవయింక పుత్తున్
రితో జతయ్. సగుమ్జన్ ప్రెజల్ జా కోడు ఒప్పన్ల; మత్తయి 9:27, 21:9. ‘మాన్సు జా జెర్మన్ అయ్లోసా’ మెలి
జో యేసు సంగన్లె నావ్తె కి జా అర్దుమ్ ఇదిల్ లుంకిల్ రితి అన్లు. * 21:5 21:5 ఇస్టుమ్ తిల సొమ్మార్దు
బజార్ వన్సువల్ ఎత్తి అదికారుమ్ తిలొ దేముడుక దెతికయ్, దసచక దేముడుచి గుడి సూటి కెర తిల. † 21:5
21:5 మార్కు 13:1, మత్తయి 24:1 దెక.

47 జేవ్ మోసిమ్లు కెర రండెల్
మాన్సుల్చ గెరల్ విక కతతి, అన్నె
ఉప్రమెన్సుక దిగిల ప్రార్దనల్ కెర్తతి. దస్సి,
జోవయించి పాపుమ్ ఒగ్గరి, చి వెల్లి సిచ్చ
సేడుల” మెన యేసు సంగిలన్.

21

బీద జలి రండెల్ మాన్సు ఎక్కి జాక
కలుగు జలిసి ఎత్తి దేముడుక దిలిసి
(మార్కు 12:41-44)

1 దేముడుచి గుడితె డబ్బుల్ దెతి
కాన్సుక పెటె ఏక్ తయెదె. దేముడుచి
కామక మెన మాన్సుల్ ఒత్త డబ్బుల్
గలుల. జలె, యేసు జా పక్క అంకి
గల, సొమ్మార్దు జోవయించి డబ్బుల్ జా
పెట్టెతె గల్తె తిలిసి దెకిలన్.

2 తెదొడి ఎద్గరె నెంజిలి రండెల్ మాన్సు
జా డబ్బుల్ దెతి కానుక పెట్టెతె దొన్సి
ఇదుల రాగి కాసుల్ గలిలిసి యేసు
దెకిలన్.

3 జా దెక కెర, యేసు, “నిజుమి
తుమ్క ఆవ్ కిచ్చొ మెంతసి మెలె,
జేవ్ సొమ్మార్దు ఎత్తిజిన్ మొత్తుమ్
దిలిన్చి కంట ఈంజ ఎద్గరె నెంజిలి
రండెల్ మాన్సు ఒగ్గర్ దా అన్లు.

4 జోవయించి ఎదివాల్ సొమ్మారుమ్
తెంతొ సేంసిలిసి జేవ్ దా అన్సి. ఇన్నెక,
మాత్తుమ్, కిచ్చొ నెంజిలె కి, కలుగు
జలిసి ఎత్తి దాయె గెల అన్లు” మెన
యేసు సంగిలో.

దేముడుచి గుడి పాడ్ జంక తిలిన్చి
రిసా సంగిలిసి

5 దేముడుచి గుడి “చెంగిల్ పత్తల్
తెన్ కెద్ది సూటి తెయారె కెర అన్సి, * కెద్ది
తమ్మన్ వస్తువల్క సూటి కెర అన్సి!”
మెన సీస్సుల్ యేసుక దెకయ్ల.

6 యేసు, “తుమ్ దెకితిసి ఎత్తి జలె, సగుమ్ దీసల్ గెలె కిసి జయెదె మెలె, అప్పె పత్తురచి ఉప్పిరి పత్తురు దొంత్రల్ తిలె కి, ఎక్కి జలెకు నే టీవితె గలి జతి డీసి జెయెదె” మెన సంగిలన్.

ఉగుమ్ మార్పుప జతిన్చి రిసా యేసు సంగిలసి

7 తెదొడి యేసుక, జోచ బారజిన్ సిస్సుల్ “గురుబాబు, తుయి సంగిలసి కెయక జర్గు జయెదె? ఈంజ జర్గు జతి పొది అయ్లి మెలె, అమ్ చినితి రిసా కిచ్చొ గుర్తు తయెదె?” మెన పుసిల.

8 జో జోవయింక, “కొన్సొ జలెకు తుమ్క అంచి రిసా మోసిమ్ నే కెర్తి రితి తుమ్ జాగర్త దెకన. కిచ్చొక మెలె, ‘ఆవ్వి క్రీస్తు’ మెనన జలెకు. క్రీస్తు జెతి సమయుమ్ జా అయ్లి మెన జలెకు, కో కో మాన్సుల్ బార్ జవుల. జోవయింక పట్టి తుమ్ గెచ్చు నాయ్.

9 అన్నె, దేసిమ్చి ఉప్పిరి దేసిమ్ యుద్దుమ్ కెర్తినచి రిసా జలెకు, ఏక్ దేసిమ్చ జోవయింక ఉప్పిరి జెవ్వి యుద్దుమ్ కెర్తినచి రిసా జలెకు తుమ్ సూన్లె, తుమ్ బమ్మ జా నాయ్. దనచ ఎత్తి జర్గు జంక అన్నె, గని ఈంజ ఉగుమ్ తెద్ది బేగి పూర్తి జయె నాయ్” మెన సంగ కెర

10 జోవయింక అన్నె, దేసిమ్చి ఉప్పిరి దేసిమ్, రాజిమ్చి ఉప్పిరి రాజిమ్ యుద్దుమ్క టీవెల.

11 వేర వేరతె బూకంపల్ కరువుల్ చి, కిచ్చొ కిచ్చొ కన్టల్ నన్టల్ జర్గు జవుల చి, ఆగాసుమ్ తెంతో జెత ఒగ్గర్ బయిమ్ దెత వెల్లో గుర్తులు జెవుల.

12 “గని ఈంజ ఎత్తి జర్గు నే జతె అగ్గె, మాన్సుల్ తుమ్క దెర, జోవయింక కోపుమ్క తుమ్క కిచ్చొ కిచ్చొ అల్లర్ కెర, ‘అదికారుల్ జోవయింక సిచ్చు కెర్తు’

మెన అమ్క యూదుల్చ సబ గెరలె జోవయింక అత్తి సొర్పు కెర దెవుల, చి తుమ్క జేతె గల దెవుల. అంచి నేవ తుమ్ కెర్తనుచి రిసా, రానల్చి మొక్కె అదికార్లుచి మొక్కె తుమ్ తీర్పు జతి రిసా సిచ్చల్ జతి రిసా తుమ్క టీవడుల.

13 జేవ్ దస్సి కెర్తి పొదిక, అంచి రిసా తుమ్ సాచి సంగితె.

14 తుమ్ అప్పె మెన్సుతె కిచ్చొ బుద్ది దెరన మెలె, మాన్సుల్చి మొక్కె తుమ్ పరిచ్చు జంక జలె, జా నే జతె అగ్గె, జేవ్ పరిచ్చు కెర్తె కిచ్చొ జబాబుల్ దెమ్దె?, మెన తుమ్ ఉచరంతె తా నాయ్.

15 కిచ్చొక మెలె, తుమ్క చోడి దెయిందె, తుమ్క దొర్కు జలి బుద్ది గ్యానుమ్ దెయిందె. తుమ్చ జబాబుల్చి తెల్విచి ఉప్పిరి జేవ్ అల్లర్ కెర్తసతె వెల్లెల మాన్సుల్తె కో జీనుక నెత్తిర్తి, తుమ్క కిచ్చొ జబాబ్ సంగుక నెత్తిర్తి.

16 “అదికారుల్చి అత్తి తుమ్క సొర్పు కెర దెతసతె సగుమ్జిన్ కొన్సొ జవుల మెలె, తుమ్చ అయ్యుదింసి, అన్నొబావొదింసి, తుమ్చ బందుగులు, తుమ్చ సినేతులు. అన్నె, తుమ్తె సగుమ్జిన్క మాన్సుల్ మారుల.

17 అన్నె, తుమ్ అంచి నావ్ తెన్ బులితె తత్తెచి రిసా, ఎతివాట్జిన్ తుమ్క విరోదుమ్ జవుల.

18 గని, కిపరలోకుమ్తె తుమ్ జెతిన్క ఉచర్తె, తుమ్చ సెండివాడల్తె ఎక్కి కి నాసెనుమ్ జా గెచ్చె నాయ్, ఈంజ లోకుమ్తె ఈంజ ఆగ్గెక మార్లె కి, తుమ్ పరలోకుమ్తె గెతిసి అడ్డు కెరుక నెత్తిర్తి.

19 తుమ్ ఎక్కి నిదానుమ్ ఓర్పువ జా, చి పరలోకుమ్తె గెతి రితి తుమ్చి జీవు దొర్కు కెరన తా.

యెరూసలేమ్ పట్టుమ్ పాడ్ జంక

‡ 21:6 21:6 యేసు జెర్మ డబ్బుయ్ వెర్సుల్ గెతికయ్, రోమ్ దేసిమ్చ సయ్యుమ్ పాడ్ కెర్తె. § 21:18 21:18 నెంజలె, ‘ఎత్తి అదికారుమ్ తిలో దేముడుచి సెలవ్ నెంతె తుమ్చ సెండివాడల్తె ఎక్కి కి నాసెనుమ్ జా గెచ్చె నాయ్’.

తిలిన్చి రిసా యేసు సంగిలిసి
(మత్త 24:15-21; మార్కు
13:14-19)

20 “గని యెరూసలేమ్ పట్టుమ్క నయన్యుమ్ ఒండి సుట్టునంత బెర తతిసి తుమ్ కెయడ దెకితె గే, ‘పట్టుమ్ పాడ్ జంక తిలి సమయుమ్ పావ జా అస్సె’ మెన చినితె.

21 జా గుర్తు దెకిలె, తుమ్చితె కో ఈంజ యూదయ ప్రదేసిమి తవుల గే, చట్కున డొంగ్రలె ఉట్ట నిగుతు చి, పట్టుమ్చి తెడి తిలన బార్ జా ఉట్ట గెతు, చి పట్టుమ్ ఒత్తలతోచి బయిలె గవ్వెలె జవున్ కో తవుల గే, పట్టుమ్తె అన్నె పెనుత్ నాయ్.

22 కిచ్చొక మెలె, జోవయింక పచ్చెల్ రితి ఇండిల జోవయించ అమ్చ యూదుల్క దేముడు సిచ్చ దెత్ దీసల్ జవుల, జేవ్. జో అగ్గె రెగిడ్లిసి దస్సి జర్గు జా పూర్తి జంక అస్సె.

23 “అయ్యో! జేవ్ దీసల్క వయ తిల తేరబోదల్, బోదల్ వడ్లివో ఉట్ట నిగుక నెత్త ఒగ్గర్ సైమల్ జవుల! ఈంజ దేసిమి ఒగ్గర్ కన్తల్ సిచ్చల్ జవుల!

24 అమ్చ యూదుల్తె సగుమ్జిన్క కండ గెలుల, సగుమ్జిన్క దెర వేర దేసిమ్లుతె కడ నెవుల. అన్నె యూదుల్ నెంజిల్లన ఈంజ యెరూసలేమ్ పట్టుమ్చి ఉప్పిరి, ఈంజ దేముడుచి గుడిచి ఉప్పిరి ఏలుప కెర్తి కాలుమ్ కేడ్డె ఎదక జేవ్ ఈంజ ఎత్తి నుండ గెలుల.

దేముడుచి రాజిమ్ ఎదార్దుమ్ ఏలుప కెరుక దెర్తిసి చి రిసా యేసు సంగిలిసి
(మత్త 24:29-35; మార్కు
13:24-31)

25 “పడ్డొక, పొద్దుతె, జోనుతె, చి సుక్కల్తె కిచ్చొ కిచ్చొ గుర్తుల్ డీసుల చి, తుపాన్ కెర్లె సముద్దుమ్చ కెర్లెల్ ఎదిలి డొంకక జా, బుయ్యె ఉట్ట జా గెరల్ గుడ్డ దెర గెలె, జా అల్లర్ జా అవాడ్ కీన్ తయెదె గే, దస్సి జయెదె చి, ద్రసచ్చచి రిసా ఒండి లోకుమ్తె వేర వేర దేసిమ్లుచ మాన్పుల్ సైమల్ నేడుల చి, కిచ్చొ ఉచరుక గే నేన గెచ్చుల.

26 ఈంజ లోకుమ్తె జెంక త్రిల అల్లర్చి రిసాచి జోవయించి బయిమ్క మాన్పుల్చి మొకొమ్ గుంజు నేడుల. కిచ్చొక మెలె, ఆగాసుమ్తె సెక్తి తిలిసి ఎత్తి అద్దుర్ జా గెచ్చెదె.

27 తెదొడ్క, ఎదివాల్ అదికారుమ్ తెన్, పరలోకుమ్చి ఉజిడి తెన్ ఆవ్ మాన్పు జా జెర్కున్ అయ్లోసా మబ్బుతె పరలోకుమ్ తెంతో ఉత్త జెతిసి * ఎత్తిజిన్ దెకుల.

28 “జలె, ఈంజ ఎత్తి జర్గు జంక దెర్లె పొది, అమ్చి రచ్చన పాసి జా జెతయ్ మెనన, తుమ్ సోగ టీవ దయిరిమ్క ఉప్పిరి దెక, సర్దసంతోసుమ్ జా” మెన యేసు సంగిలన్.

29 తెదొడి యేసు జోవయింక అన్నె కిచ్చొ టాలి సంగిలన్ మెలె, “అంజూరుమ్ రూకుక చి అన్నె రగల్ రూకుల్క ఉచరుమ.

30 జేవ్ పలోయిలె బేగి, ‘వేసెగు అప్పె పావ జెయెదె’ మెన తుమ్ చినితను, జాన్సు.

31 దస్సి, ఆవ్ సంగిల గుర్తుల్ జర్గు జతిసి తుమ్ దెకిలె, † ‘దేముడుచి రాజిమ్ పావ జా అస్సె చి జెయెదె’ మెన జాన్తె.

32 “తుమ్క ఆవ్ కిచ్చొ కచితుమ్

* 21:27 21:27 మత్తయి 24:30. † 21:31 21:31 మత్తయి 24:33 అన్నె మార్కు 13:29 తె యేసు అన్నె ఉత్త జెతిన్చి రిసాచి కోడు అస్సె. మెలె, జో అన్నె ఉత్త జెతిసి తెన్నె ఎత్తి అదికారుమ్ తిలో దేముడుచి రాజిమ్ ఎదార్దుమ్ ఏలుప కెరుక దెరెదె. జా రాజిమ్ ఏలుప కెర్తినె తె యేసుయి రాన్ జయెదె, చి ఎత్తిచి ఉప్పిరి జిన్తో మెలె, దేముడు అబ్బొన్చి అత్తి జో ఎత్తి సార్ప కెర దెయెదె, చి అబ్బొన్ కెయడ తెయడ ఎత్తిచి ఉప్పిరి పూర్తి ఏలుప కెరెదె. ఇన్నెక కొరిందియల్క పప్పులు రెగిడ్లి ఏక్ నంబర్ ఉత్తము 15:24-28 నదు కెర. యేసు ఏలుప కెర్లె పొదిక, జోవయించి తెడి జోవయింక సంపజా జోవయించయ్ జల మాన్పుల్ కి ఏలుప కెరుల. ఇన్నెక డీసయ్లెసి 5:10 నదు కెర.

సంగితసి మెలె, ఆవ్ సంగిల సైమల్ గుర్తుల్ పూర్తి జర్గు జతి ఎద ఈంజ ఉగుమ్ అంతుమ్ జయె నాయ్.

33 ఆగాసుమ్ బుయ్యె నానినుమ్ జా గెచ్చుల, గని అంచ కొడె †ఎద్దరె పిట్టితి నాయ్.

‘తెలివి తా పాపుమ్తె దెర్ను నే సేడ్డి రిసా ప్రార్దన కెర్తె తా’

34 “తుమ్ మెన్సుతె కిచ్చొ బుద్ది ఇండితె గే తుమ్ జాగర్త దెకన! నెంజిలె, తుమ్ ఓడుప జతి రితి ఒగ్గర సూరు పియ మచ్చితిన్ గట్ట, దస్సి మచ్చితిన్క వెర్రి రితి ఇండితిన్ గట్ట చి, ఈంజ లోకుమ్చ రోజుకచ బాదల్ చి రిసా ఉచర్తిసి తుమ్క పెల గెలెదె. తుమ్ దసచతె అలవాల్ జా తిలె, ఈంజ ఉగుమ్చి జా ఆకర్ దీసి అయ్లె, బోనుక ‘అస్సె’ మెన జంతు నేన్లె కీసి చట్కున దెర్ను సేడుక జయెదె గే, దస్సి తుమ్ చట్కున లాజ్ బెట్టుక జయెదె.

35 కిచ్చొక మెలె, బూలోకుమ్ తిలన ఎత్తిజిన్క జా దీసి లయెదె.

36 ఈంజేవ్ సైమల్తె జా దీసి జెతికయ్ గుర్తుచ అల్లర్ ఎత్కితె తుమ్ ఓర్పువ జా జిన్తి రితిచి, జిన ఆవ్ మాన్సు జా జెర్నున్ అయ్లోసా ఏలువ కెరుక మెన అన్నె జెతి పొదిక అంచి మొక్కె తుమ్ టీవేతి రితి, తుమ్ జాగర్త దెకన, జా ఎత్కిక దొర్కు జలి సెక్తి తుమ్క తవున్ మెన తుమ్ ప్రార్దన కెర్తె తా” మెన యేసు సిస్సుల్క సంగిలన్.

37 జలె, జా దొరతి యేసు రోజుక మెద్దెన్ పొది దేముడుచి గుడితె గెచ్చ

బోదన కెర్తె తయెదె చి, రోజుక నంజె పట్టుమ్ తెంతో బార్ జా ఓబలీవ మెట్టయ్ నిద్ర తయెదె.

38 రోజుక వెందల్ పొది ప్రెజల్ ఎత్కి బే బేగి బార్ జా జోచి బోదన సూనుక మెన దేముడుచి గుడితె గెచ్చుల.

22

జా దేసిమ్చ వెల్లెల మాన్సుల్ యేసుక దెర మారుక మెన కుట్ట కెర్లిసి (మత్త 26:1-5,14-16; మార్కు 14:1-2,10-11; యోహా 11:45-53)

1* పస్కా వండుగు, జలె నే పులయ్ల పొడ్డియె కతి వండుగు పాసి జా అయ్లి.

2 తెదోడి “కెయ్క కీసి ప్రెజల్క బమ్మ నే కెర్తె యేసుక మారుమ?” మెన వెల్లెల పూజర్లు చి మోసి తెన్ దేముడు దిలి ఆగ్గుల్ సికడ్డన కుట్ట ఉచర్తె తిల. కిచ్చొక మెలె, ప్రెజల్క †బితె తిల.

యూదా యేసుక దెర దెంక ఒప్పన్లిసి 3 తెదోడి, యేసుచ బారజిన్ సిస్సుల్తె తిలో †ఇస్కరియోతు మెలో యూదాక నయ్తాన్ దెర్లన్.

4 యూదా వెల్లెల పూజర్లుతె చి దేముడుచి గుడిచ జమాన్లు సుదల్చ అదికారుల్తె గెచ్చ కెర, “యేసుక తుమ్చి అత్తి ఆవ్ దెర దెయిందె. కీన్ కెరుమ?” మెన జోవయింతెన్ లట్టల్లు,

5 జేవ్ సర్ద జా “తుక డబ్బుల్ దెమ్దె” మెన ఒప్పన్లు.

‡ 21:33 21:33 నెంజిలె ‘నెరవెర్పువ జంక ఎద్దరె పిట్టితి నాయ్’. § 21:37 21:37 మార్కు 11:11-12, చి 19-20 తె దెకిలె, ‘బలీవ మెట్టయ్’ మెన నాయ్, గని ‘బేతనియ గవ్వి’. బేతనియ గావ్ బలీవ మెట్టకయ్ పాసి తయెదె.

* 22:1 22:1 ‘ఇసి దస్సి వండుగు కెర’ మెన ఎత్కి అదికారుమ్ తిలో దేముడు సంగిలిసి కేనె నదు కెరుక జయెదె మెలె, నిర్దుమకాండుమ్ 12 అద్యయిమెతె. † 22:2 22:2 ‘ప్రెజల్క బితె తిల’ మెలె, దొస్సిచి రిసా ఉచరుక జయెదె. యోహాసు 11:48 తె దెకిలె, ‘యేసుక కిచ్చొ నే కెర్తె దస్సి బోదన కెర్తె తయెదె, చి ప్రెజల్ పూర్తి జోవయింక సంవశా గెచ్చుల, చి రోమ్ దేసిమ్చ నయ్సుమ్ అమ్చి దేముడుచి గుడి పాడ్ కెరుల, అమ్చి అదికారుమ్ కుడ్డె గెచ్చుల’, మెన బితె తిల. జా ఏక్, గని అస్సె కిచ్చొ మెలె, మత్తయి 26:5 చి మార్కు 14:2 తె దెకిలె, వండుగు పొది జోవయింక మారుక పాసి, నెంజిలె వండుగ్క బెర అయ్లె ప్రెజల్ అల్లర్ దెప్పల మెన జేవ్ వెల్లెల మాన్సుల్ బితె తా అల్లర్ జలిన్చి రిసా సంగితయ్. ‡ 22:3 22:3 జోవయింక ‘ఇస్కరియోతు’ మెన కిచ్చొక జోవయింక నాన్ తిలె మెలె, జో ఇస్కరియోతు గవ్విచో మాన్సు జయెదె.

6 జో కి ఒప్పుణ్ణొచి, జనాబ్ నెంజిలిన్ తె యేసుక దెర దెంక మెన వాట్ చజితె త్తిలో.

పస్కా వండుగ్గిచి అన్నిమ్ యేసుచ సిస్సుల్ తెయార్ కెర్లిసి
(మత్త 26:17-25; మార్కు 14:12-21; యోహా 13:21-30)

7 తెదొడి నే పులయ్ల పొడియొ కతి దీసి అయ్లి. జా దీసి పస్కా వండుగ్గిచి రిసాచి కీమెండపిల్ల కండ అర్చితుమ్ దెవుల.

8 జాకయ్ యేసు పేతురుక చి యోహానుక “తుమ్ గెచ్చు, చి పస్కా వండుగు అన్నిమ్ అమ్ కతి రిసా దొర్కు జలిసి తెయార్ కెర” మెలన్.

9 “అమ్ కేనె తెయార్ కెరుక తుచి ఆన?” మెన జేవ్ పుసిల.

10 జోవయింక, “ఈందె, పట్టుమ్చి తెడి పెసిలదు మెలె, పాని వయితొసా ఎక్కిలో తుమ్క దస్సుల్ జయెదె. జోచి పట్టి తుమ్ గెచ్చు చి, కేన్ గెరి జోపెనెదె గే,

11 జో గెర్చొ ఎజొమానిక తుమ్ కిచ్చొ మెన మెలె, ‘అంచ సిస్సుల్ తెన్ ఆవ్ పస్కా అన్నిమ్ కతి గది కేన్ మెన అమ్చొ గురుబాబు సంగితయ్’ మెన తుమ్ సంగ,

12 సామన్ తెయార్ కెర్లి వెల్లి అంతస్తు గది ఏక తుమ్క జా దెకయెదె. ఒత్తయ్ అమ్చి రిసా పస్కా అన్నిమ్ తుమ్ తెయార్ కెర తా” మెన యేసు సంగిలన్.

13 జేవ్ గెచ్చు కెర, ‘జో సంగిల్ రితి ఎత్తి జర్గు జా అస్స’ మెన దెక కెర, జా పస్కా అన్నిమ్క దొర్కు జలిసి ఎత్తి తెయార్ కెర్ల.

యేసు సిస్సుల్ తెన్ వండుగ్గి అన్నిమ్ కంక
(మత్త 26:16-30; మార్కు 14:22-26; 1 కొరి 11:23-25)

14 వండుగ్గి అన్నిమ్ కెర్లి సమయుమ్ పావ జెతికయ్, యేసు సిస్సుల్ తెన్ జా అన్నిమ్ కంక మెన వెసిల.

15 తెదొడి యేసు జోవయింక, ఆవ్ సేడుక తిల సైమల్ నే జెతె అగ్గె తుమ్చి తెన్ ఈంజ పస్కా అన్నిమ్ కంక మెన ఆవ్ ఒగ్గర్ ఆస జలయ్.

16 కిచ్చొక మెలె, దేముడు ఎదార్దుమ్ ఏలుప కెరుక అయ్లె పొదిక, జోచి రాజిమ్తె ఈంజ పస్కా వండుగు * గుర్తు జతి రచ్చునచి ముక్కిమ్చి అర్దుమ్చి కామ్ పూర్తి జర్గు కెర్లె ఎదక ఈంజ మదెనె, ఈంజ వండుగ్గి అన్నిమ్ ఆవ్ అన్నె కయ నాయ్ మెన తుమ్క ఆవ్ సంగితసి.

17 జా వండుగ్గి అన్నిమ్ పితి డొమ్ము ద్రాచ రస్సుమ్ యేసు తెదొడి దెర కెర, ‘ఈంజ తుయి దా దయ కెర్లది’ మెన దేముడు అబ్బొన్క సంగ కెర, సిస్సుల్క “ఉంద, ఇన్నె తిలిసి తుమ్ వర్స తెన్ పియ వంటన.

18 కిచ్చొక మెలె, దేముడుచి రాజిమ్ ఎదార్దుమ్ ఏలుప కెర్లి రితి జెతె ఎదక ఈంజ మదెనె ఆవ్ ద్రాచ రస్సుమ్ పియ నాయ్ మెన తుమ్క ఆవ్ సంగితసి” మెన యేసు సంగ కెర,

19 పొడి వెంట ‘తుయి ఈంజ దయ కెర్లది’ మెన దేముడు అబ్బొన్క సంగ కెర, జా పొడి మోడ కెర, సిస్సుల్క దా “ఉంద, ఈంజ అంచి ఆగ్. † అంక తుమ్ ఏద కెర్లి గుర్తుక తుమ్ ఇసి కంక అలవాట్ జా.

§ 22:7 22:7 యేసు కి జయి వండుగు కెర్లి పొది అర్చితుమ్ జలన్. జో, జెలి, కెయెక తెయెక సరిపుమవ జలి అర్చితుమ్ జలన్. జొయ్య అర్చితుమ్ జలిసి తెంతో అన్నె అర్చితల్ నాయ్. ఎబ్రియల్ 9:28, 10:10.

* 22:16 22:16 జా పస్కా వండుగు మెన మాములుమ్ యూదుల్ కిచ్చొక కెరుల మెలె, పూర్దుమ్ పొది జేవ్ ఐగుప్తు దీసిమి తా గొతిమాస్సుల్ జలిసి తెంతో ఎత్తి అదికారుమ్ తిల్ దేముడు జోవయింక రచ్చించువ కెర్లిసి ఏద కెరుక. నిర్ణమకాండుమ్ 3 అద్యయిమ్ తెంతో యెహోసువ ఎద ఈంజ మత్తెలి పూర్తి తయెదె. ముక్కిమ్క అప్పి నిర్ణమకాండుమ్ 12, 13 అద్యయల్ దెకిలె సగుమ్ అర్దుమ్ జెయెదె. గనె ‘పస్కా వండుగ్గిచి గుర్తు జతి ముక్కిమ్చి రచ్చున’ మెలె, పాపుమ్ తెంతో, పాపుమ్చి ఉగుమ్ తెంతో, పాపుమ్చి లోకుమ్ తెంతో మాస్సుల్ రచ్చించువ జా పరలోకుమ్చి రాజిమ్తె బెదితిసి, పరలోకుమ్తె గెతిసి. † 22:19 22:19 ఈంజ ఎత్తి తొలితొ రెగిడ్ల సగుమ్ పున్కల్తె ‘తుమ్చి’ తెంతో 20 నంబర్చి కోడు పూర్తి తెన్ చ కొడె తయె నాయ్.

ఉంద కా," మొన దిలన్.

20 దస్సి, జా అన్నిమ్ కా కేడయ్లి పొది †గలన్ అన్నె దెర, "ఈంజ గలన్ ద్రాచ రస్సుమ్, ఆవ్ దెతి నొవి ప్రమానుమ్. తుమ్చి పాపుమ్ గెచ్చయ్లి రిసా సువ దెతి అంక లోయి. జా లోయిచి గుర్తు ఈంజ ద్రాచ రస్సుమ్.

21 "ఈందె, అంక దెర, సార్పు కెర దెతోసా ఈంజ బల్లతె వెన అంచి తెన్ అన్నిమ్ కెర్తయ్. జోచి ఆతు అంచి ఆతు తెన్ ఈంజ బల్లచి ఉప్పిరి అస్సె.

22 కిచ్చొక మెలె, 'జర్లు జంక అస్సె' మెన దేముడు అగ్గె తెంతో రెగిడ్డి రితి ఆవ్ మాన్సు జా జెర్మున్ అయ్లోసా కిగెచ్చుక అస్సె, గని అయ్యె! కేన్ మాన్సు అంక దెర విరోదుమ్ సుదల్చి అత్తి సార్పు కెర దెయెదె గే, జోమాన్సు జతి సిచ్చ కెడ్డి!" మెన సంగిలన్.

23 జో దస్సి సంగితికయ్, 'ఆవ్ గె? ఆవ్ గె?' మెన ఎక్కిలో తెన్ ఎక్కిలో లట్టబుక దెర్ల.*

ఎక్కిలోక ఎక్కిలో సేవ కెర్తి బుద్ది తెన్ తతిసి చి కోడు

24 జలె, జోవయింతె కొన్సొ వెల్లో జయెదె గే సిస్సుల్ లట్టబనుక దెర్ల.

25 జేవ్ దస్సి జతికయ్, యేసు జోవయింక, "యూదుల్ నెంజిల వేర రానల్ సొంత గవురుమ్ ఉచరన ప్రెజల్క జాడ్డు వయడ్డె తిలి రిత జోవయింక పోటి తెన్ ఏలుప కెర్తతి, అన్నె ప్రెజల్చి ఉప్పిర్చ అదికారుల్ 'దర్ముమ్ కెర్తన' మెనంతతి.

26 గని తుమ్చి తెన్ దస్సి తంక జయె నాయ్. తుమ్చి తెన్ వెల్లో జతోసా

ఎత్తిచి కంట దకిలో రితో జవున్ చి, తుమ్క ఏలుప కెర్తోసా సేవ కెర్తోసా రితో జవున్.

27 మాములుమ్ ఈంజ లోకుమ్చి రగుమ్ ఉచర్లె, కొన్సొ వెల్లో జయెదె? అన్నిమ్క బల్లతె వెసితోసా గే జోవయించి అన్నిమ్ వంట దెతో గొత్తి సుదో గె? బల్లతె వెసితోసా వెల్లో జయెదె, గెద. జలె, ఆవ్ తుమ్చి నెడిమి తా వంట దెతో †గొత్తి సుదోచొ రితో జతసి. ఈంజ అర్దుమ్ కిచ్చొ జయెదె గే తుమ్ ఉచర.

28 "†తుమ్ అంచ సిస్సుల్ ఆవ్ సేడ్ల బాదల్ ఎత్తితె బెద నిదానుమ్ తా అస్సున్,

29 అన్నె, జోచి రాజిమ్చి ఉప్పిరి ఆవ్ ఏలుప కెర్తి రిసా కిసి అంచొ దేముడు అబ్బొ అంక అదికారుమ్ దా అస్సె గే, దస్సి

30 తుమ్ అంచి రాజిమ్తె అంచి బల్లతె వెన కంక పింక చి, కితుమ్ బారజిన్ బార సిజాసనల్తె వెన, ఇస్రాయేలుల్చ బార సెకుమ్లుచక అంచి తెడి ఏలుప కెరుక మెన తుమ్క ఆవ్ నిసాన అస్సె" మెన యేసు జోచి సిస్సుల్క సంగిలన్.

పేతురుక " 'జోక నేని' మెన అంచి రిసా తుయి తివ్వెరి సంగితె"

(మత్త 26:31-35; మార్కు 14:27-31; యోహా 13:36-38)

31 వడ్డె, పేతురుచి అగ్గెచి నావ్ దెర, "సీమోను, సీమోను, ఈందె, తేర్బోద కిసి తందుడు పూన నినెదె గే, దస్సి తుమ్క నిసితి రితి అల్లర్చి పరిచ్చ కెరుక మెన నయ్తాన్ సెలవ్ నజన అస్సె.

32 గని తుచి నముక్కుమ్ పాడ్ జా గెస్సు నాయ్ మెన ఆవ్ ప్రార్దన కెర

‡ 22:20 22:20 దన పండుగ్ అన్నిమ్తె బెర్తె, చెత్తర్ సుట్టు ద్రాచ రస్సుమ్ పివుల. § 22:22 22:22

మెలె, 'మొరుక అస్సె'. * 22:23 22:23 ఒత్త తెంతో యేసుక దెర దెతో యూదా బార్ జా అదికారుల్తె గెలో. యోహాను 13:30. † 22:27 22:27 యోహాను 13:2-16. ‡ 22:28 22:28 యూదా జోవయింతె

నాయ్. 23నంబర్ కోడుచి ఎట్టాచి కోడు దెక. § 22:30 22:30 'తుమ్ బారజిన్' మెలె, జో యూదా పిట్టె, గెద-యేసుక విరోదుమ్ సుదల్చి అత్తి సార్పు కెర దిలోచి రిసా. గని యేసు జివ్ జా పరలోకుమ్తె వెగ గెలి వడ్డె, తిల సిస్సుల్ ప్రార్దన కెర అన్నెక్లొక, మెలె మత్తియ మెలోసాక నిసాన బెదవన్ల, చి అన్నె బారజిన్ జా గెల. బానికుల్ 1:15-26.

అస్సి. అన్నె, తుమ్ అన్నె బుద్ది జా అంచి పచ్చెన అన్నె జెతి రితి తుమ్ మార్పున జలదు మెలె, తుమ్చ బావుడ్లు జల అంక సంపజల అన్నె మాన్సుల్చి నముకుమ్ తుమ్ డిట్టుమ్ కెర” మెన యేసు పేతురుక చి, అన్నె సిన్సుల్క సంగిలన్.

33 తెదొడి పేతురు “ప్రబు, తుయి జేల్తె జేలి తంక జలెకి, మొరుక జలెకి, తుచి తెన్ బెద జేలి జయిందె జవున్, మొరిందె జవున్, అంక బి నాయ్” మెలన్.

34 జలె, పేతురు దస్సి సంగితికయ్, యేసు జోక, “ఓ పేతురు, తుక ఆవ్ కిచ్చొ మెంతసి మెలె, జోక ఆవ్ నేని మెన, తుయి తివ్వెరి అంచి రిసా సంగితె ఎదక కుకుడొ వాసె నాయ్”.

డబ్బుల్, సామనచి కడ్డుమచి రిసా యేసు సంగిలిసి

35 తెదొడి యేసు సిన్సుల్క అన్నె, “జా సుట్టు దేముడుచి రాజమ్ పాసి జా అయ్లిన్చి రిసాచి నుముమ్ కబుర్ సంగ సంగ మాన్సుల్క చెంగిల్ కెర కెర తుమ్ బుల” మెన తుమ్క ఆవ్ తెద్రయ్లి పొది “నెంచె నెంతె, డబ్బుల్ నెంచె నెంతె, చి జోడ్లు నెంతె గెచ్చు మెన *సంగిలయ్ గెద. జలె, దసచ నెంతె గెతికయ్, తుమ్క కిచ్చొ జలెకు కొత్తు తిలి గె?” మెన పునిలన్, చి “కిచ్చొయ్ కొత్తు నాయ్” మెల.

36 †దస్సి జబాబ్ దెతికయ్, జోవయింక అన్నె, “అప్పె జలె, కక్క సెంచె గే డబ్బుల్ సెంచె గే అస్సె గే, దెర తంక, చి కక్క కండా తయె నాయ్ గే, జోవయించి కోటు విక కండా గెననుక.

* 22:35 22:35 లూకా 10:4, 9:3. † 22:36 22:36 ఈంజ 36నంబర్చి కోడు కిచ్చొక సంగితయ్, బెర్తె, ‘అల్లర్ జెప్పల చి తుమ్ డిట్టుమ్ తతి రిసా తెయార్ జా’ మెలి అర్దుమ్కయ్. గని ‘మాములుమ్ అయ్దల్క యుద్దుమ్ కెరుక తెయార్ జా’ మెలి అర్దుమ్క యేసు సంగె నాయ్. పడ్డొ పేతురు జో మాన్సుచి కండ్లొ కండా తెన్ సిందితికయ్ యేసు గోల కెర్లన్. మత్తయి 26:52, యోహాను 18:11, లూకా 22:51. ‡ 22:37 22:37

యెనయా 53:12. § 22:38 22:38 నెంజలె కడ్డుమలుచి రిసాచి టాలి సిన్సుల్ అర్దుమ్ నే కెర్లె రిసా “ఈందె ప్రబు, అమ్చితె దొన్నె కడ్డుమలు అస్తి” మెల, చి “సాలు, అన్నె దస్సి లట్టబా నాయ్” మెలన్. * 22:43 22:43 ఈంజ ఎత్తి రెగిడ్ల సగుమ్ పుస్తకల్తె 43 చి 44నంబర్లచ కొడొ తయె నాయ్. † 22:44 22:44 ఈంజ ఎత్తి రెగిడ్ల సగుమ్ పుస్తకల్తె 43 చి 44నంబర్లచ కొడొ తయె నాయ్.

37 కిచ్చొక మెలె, తుమ్క ఆవ్ కిచ్చొ సంగితసి మెలె,

‡క కి ‘నేరిమ్ కెర్లొసా’ మెన తీర్పు కెరు మెన దేముడుచి కొణొతె రెగ్గయ్లి కోడు అంచితె పూర్తి జర్లు జంక అస్సి. కిచ్చొక మెలె, అంచి రిసా రెగిడ్లసి ఎత్తి కచితుమ్ జర్లు జయెదె” మెలన్.

38 కితెదొడి సిన్సుల్, “ఈందె, ప్రబు, అమ్చితె దొన్నె కడ్డుమలు అస్తి” మెల, చి “సాలు” మెలన్.

యేసు మొరుక తిలిన్చి రిసా జో ప్రార్దన కెర్లిసి

(మత్త 26:36-46; మార్కు 14:32-42)

39 యేసు ఒలీవ మెట్టయ్ గెచ్చుక అలవాట్ తిలి చి, తెదొడి బార్ జా ఒత్తయ్ గెలన్. జోచ సిన్సుల్ కి జో తెన్ బెద గెల.

40 జలె, ‘గెత్నేమనే’ మెంతి జో గెతి ఒత్తచి తోటతె పావ కెర, సిన్సుల్క యేసు, “అప్పె జెత అల్లర్ తుమ్క ఏక్ పరిచ్చు రితి జయెదె. ఈంజ ఎత్తితె తుమ్ పాపుమ్ నే కెర్లి రిసా ప్రార్దన కెర్లె తా” మెన యేసు సంగ కెర,

41 పత్తురు గల్తి ఎదిలి దూరి గెచ్చు కెర, మొగ్రల్ టిక,

42 “ఓ బ, తుక ఇస్టుమ్ తిలె, ఈంజ గిన్నుచి ఆవ్ నే పితి రితి అంక పిట్టవు, గని అంచి ఇస్టుమ్ పొని. తుచి ఇస్టుమ్ జర్లు జవున్” మెన దేముడు అబ్బొన్క ప్రార్దన కెర్లన్.

43 *పరలోకుమ్ తెంతొ దూత ఎక్కిలొ డీన జోక డిట్టుమ్ కెర్లన్.

44 †తెదొడి జోచి పెట్టి ఒగ్గర్ బాద దుకుమ్ సేడ, అన్నె ఒగ్గర్ ఆస తెన్ ప్రార్దన కెర్లన్ చి, జోచి గాము కిసి పుట్టిలి మెలె, సుక్కల్ లోయి జా బుయ్యె సేడ గెలన్.

45 జలె, యేసు ప్రార్దన కెరుక ముల ఉట్ట కెర సిస్సుల్ తిలిన్తె అయ్లె, జేవ్ ఒగ్గర్ దుకుమ్క అల్పు జా నిజ గెల అస్తి.

46 అన్నె, జోవయింక “తుమ్ కిచ్చొక నిజుక? ఉట్ట, చి ఈంజ జెతి అల్లర్చి పరిచ్చుతె తుమ్ పాపుమ్ నే కెర్తె రితి ప్రార్దన కెర్తె తా” మెలన్.

యేసుక దెరుక మెన యూదా చి జనాబ్ జట్టు తెన్ అయ్లిసి
(మత్త 26:47-56; మార్కు 14:43-50; యోహా 18:3-11)

47 యేసు జా కోడు సంగితె తతికయ్, ఒగ్గర్జిన్ జనాబ్ మాన్సుల్ జట్టు తెన్ అయ్ల, చి కో జోక పురై గెచ్చు వాట్ దెకయ్తె తిలన్ మెలె, యేసుచ బారజిన్ సిస్సుల్తె తిలో ఇస్కరియోతు యూదా. జో యూదా, జలె, యేసుక చుంబుక మెన జోచి పాసి అయ్లన్,

48 గని యేసు జోక, “ఓ యూదా, ఆవ్ మాన్సు జా జెర్నున్ అయ్లోసాక దెర దెతి పొది ఉవ్రమెన్సుక చుంబ దెతె గె?” మెన జోక పుసిలన్.

49 జలె, ‘జోక దెరుల’ మెన యేసు తెన్ తిల జోచ సిస్సుల్ దెక కెర, “ప్రబు, అమ్చ కథుమ్లు తెన్ జోవయింక కండుమ గె?” మెన పుసిల.

50 జోవయింతె †ఎక్కిలో కిచ్చొ కెర్లొ మెలె, †ఎత్తిక వెల్లో పూజరిచొ గొత్తి సుదొక కండుక గెచ్చు, జోచొ ఉజిలో కంగ్గొ సింద గెలన్.

51 జలె యేసు “అన్నె దస కమొ పొస” మెన సంగ కెర, జో గొత్తి సుదొచొ కంగ్గొ చెంగిల్ కెర్లన్.

52 తెదొడి జోక దెరుక మెన బార్ జా అయ్ల వెల్లెల పూజర్లుక, దేముడుచి గుడిచ సయ్న్యుమ్ సుదల్చ అదికారుల్క చి వెల్లెల సుదల్క యేసు, “ఆవ్ కిచ్చొ చొల్లయ్ గే, చి కత్తులు *డండల్ దెరస తుమ్ అయ్లదు?”

53 ఆవ్ రోజుక దేముడుచి గుడితె గెతె తిలె కి, తెదొడి తుమ్ అంక దెర్లద్ నాయ్. గని తుమ్చి కామ్ తుమ్ జర్గు కెర్తి గడియ ఈంజ, అందర్ లోకుమ్చి నెక్తి ఏలువ కెర్తి గడియ ఈంజ” మెన సంగిలన్.

యేసుచి రిసా ‘జోక నేని’ మెన పేతురు తివ్వెరి సంగిలిసి
(మత్త 26:57-58,69-75; మార్కు 14:53-54,66-72; యోహా 18:12-18,25-27)

54 తెదొడి యేసుక దెర ఎత్తిక వెల్లో పూజరిచి మేడతె కడ నిల. కడ నెతె తిలి పొది పేతురు, జలె, దూరి దూరి యేసుచి పట్టి గెతె తిలన్, అన్నె,

55 ఎత్తిక వెల్లో పూజరిచి మేడచి వీదిచి నెడిమి సగుమ్జిన్ చల్లిక ఆగి లావ తప్పక మెన వెన తతికయ్, పేతురు జోవయింతెన్ వెసిలన్.

56 పేతురు దస్సి ఆగిచి ఉజిడతె వెన తతికయ్, తేర్బొద గొత్తి సుదొ ఎక్కి జోక దెక కెర, చెంగిల్ దెక కెర, “ఈంజొ మాన్సు యేసు తెన్ బుల్తె తిలో” మెలి.

57 గని పేతురు “అమ్మ, జోక ఆవ్ నేని” మెన సంగిలన్.

58 పడ్డొ అన్నె గడియ గెతికయ్, అన్నెక్లొ పేతురుక దెక కెర, “తుయి కి జో తెన్ తిలోసా” మెలన్, గని “బాబు, ఆవ్ నెంజి” మెన పేతురు సంగిలన్.

‡ 22:50 22:50 కొన్నె మెలె, పేతురు. యోహాను 18:10 దెక. § 22:50 22:50 ‘ఎత్తిక వెల్లో పూజరి’ మెలె, మొత్తమ్ వెల్లెల పూజర్లుతె ఎక్కిలో ‘ఎత్తిక వెల్లో పూజరి’ జయెదె. దేముడుచి గుడిచ సగుమ్ కమొ జో ఎక్కిలోయి కెరెదె. జేవ్ ఎత్తిక జో వెల్లో జయెదె. * 22:52 22:52 నెంజిలె ‘బెడ్డివో’. † 22:59 22:59 యేసు యూదయ ప్రదేసిమేచి యెరుసలేమ్ పట్టుమ్తె జెర్మిలెకి గలిలయ ప్రాంతుమ్తె వడ్డిలన్.

59 అన్నెక్ గంట గెతికయ్, అన్నె అన్నెక్లో పేతురుచి రిసా “నిజామి, ఈంజో మాన్సు కచితుమ్ జో యేసు తెన్ తిలన్. ఈంజో కి †గలిలయు సుదో గెద!” మెలన్.

60 పేతురు “బాబు, తుయి సంగితిన్చి అర్దుమ్ ఆవ్ నేని” మెలన్, జో అన్నె లట్టబై తతికయ్, బేగి కుకుడో వాసిలన్.

61 తెదొడి యేసుప్రబు పసుల పేతురుక చెంగిల్ దెకిలన్ చి, “కుకుడో ఆజి నే వాసితె అగ్గె తుయి తివ్వెరి అంచి రిసా ‘జోక నేని’ మెంతె” మెన యేసుప్రబు సంగిలిసి పేతురు ఏదన్త కెర్లను, చి

62 జా వీదె తెంతో బార్ జా బయిలె గెచ్చు కొక్క కొక్క ఏడ్లన్.

యేసుక రకితె తిలస జోక కొకడ పెట్టిసి

(మత్త 26:59-68; మార్కు 14:55-65; యోహా 18:19-24)

63 తెదొడి యేసుక రకితె తిల మాన్సుల్ యేసుక కొకడ కెర దెబ్బల్ పెట్ట చి,

64 జోచ అంకివొతె కచ్చల్ బంద కెర, “తుకకో పెట్ల గే †తుయ్ క్రీస్తు గెద, అమ్క సంగు!” మెల, అన్నె

65 జోక దూసుప కెర్త అన్నె ఒగ్గర్ కొడో సంగిల.

66 రాత్ పాయితికయ్, యూదుల్చ వెల్లెల సుదల్, జోవయించ వెల్లెల పూజర్లు చి, మోసీ తెన్ దేముడు దిలి ఆగ్గుల్ సికడన తగు కెరుక మెన వెసిల చి, జా తగు కెర్సిన్తె యేసుక కడ ఆన్ల.

67 “‘తెర్తయిందె’ మెన దేముడు సంగిలో క్రీస్తు రచ్చించుప కెర్తొసా తుయి గే?” మెన అగ్గెతె వెసిలస పుసిల. యేసు కిచ్చొ సంగిలన్ మెలె, “ఆవ్ తుమ్క సంగిలె, అంక నంప కెర్చు నాయ్,

68 అన్నె, తుమ్క ఆవ్ ఏక్ కోడు పుసిలె, అంక జబాబ్ దేసు నాయ్,

69 గని ఇన్నెచి పడ్డో ఆవ్ మాన్సు జా జెర్చున్ అయ్లోసా ఎత్తి సెక్కి అదికారుమ్ తిలో అమ్చొ దేముడుచి ఉజెతో పక్క వెన తతిసి దెకితె” మెలన్.

70 “దస్సి జలె, అమ్చొ దేముడుచొ పుత్తుసి తుయి గె?” మెన పుసిల, చి జో జోవయింక “తుమ్ సొంత సంగిల్ రితి జొయ్యి ఆవ్” మెలన్.

71 యేసు దస్సి సంగితికయ్, ‘దేముడుచొ పుత్తుసి ఆవ్’ మెన యేసు ఒప్పన్లిసి జో దేముడు తెన్ సమ్మందుమ్ సంగన్లి రితి జతయ్. జా తప్పు మెన ఉచర, “అమ్క అన్నె సాచి అవ్సురుమ్ నాయ్. జో సొంత సంగితికయ్ సూన్లమ్.”

23

పిలాతు అదికారిచి మొక్కె యేసుక నింద సంగిలిసి

(మత్త 27:1-2,11-14; మార్కు 15:1-5; యోహా 18:28-38)

1 తెదొడి తగుతె వెసిల వెల్లెల సుదల్ ఎత్తి ఉట్ట యేసుక పిలాతు *అదికారితె కడ నిల చి,

2 జోచి మొక్కె జోక టీచడ కెర, కిచ్చొ నేరిమ్ సంగిల మెలె, “†కైసర్ రానొచి అమ్క ఏలుప కెర్తొ ప్రబుతుమ్క సిస్తు దాస నాయ్” మెన. “ఆవ్ క్రీస్తు, ఆవ్ రానొ మెనన, ఈంజో మాన్సు అమ్చ పైజల్క వెర్రి సికడయ్”.

3 పిలాతు అదికారి యేసుక కిచ్చొ పుసిలన్ మెలె, “తుయి యూదుల్చొ రానొ గె?”. “తుయి సంగిల్ రితి మెన”, యేసు జబాబ్ దిలన్.

4 తెదొడి వెల్లెల పూజర్లుక చి జనాబ్క “ఈంజో మాన్సు కిచ్చొ నేరిమ్ నే కెర్లి రితి

‡ 22:64 22:64 మత్తయి 26:68 దెక. * 23:1 23:1 పిలాతు అదికారి రోమ్ దేసిమ్చి నాన్ తెన్ యూదయ ప్రదేసిమ్చి ఉప్పిరి చి సమరయ ప్రదేసిమ్చి ఉప్పిరి ఏలుప కెర్తె తిలన్. † 23:2 23:2 కైసర్ రానొ రోమ్ దేసిమ్చి ఉప్పిరి జేవ్ ఆక్రమించుప కెర్ల దేసిమ్లుచి ఉప్పిరి వెల్లో రానొ జా తిలో.

అంక డీస్తయ్” మెన పిలాతు అదికారి తీర్పు సంగిలన్.

5 జేవ్ కిచ్చొ మెల మెలె, గలిలయతె మొదొల్ కెర ఈంజ యెరూసలేమ్ ఎద కి “అమ్చ యూదుల్ జితిన్ ఎత్తితె, ఈంజొ కిచ్చొ కిచ్చొ సికడ, ప్రబుతుమ్చి ఉప్పిర్ ప్రెజల్చి సేంతుమ్ పిట్టయ్తయ్” మెన యేసుచి రిసా పిలాతుక బియఁడుక ఉచర అబద్దుమ్ సంగిల.

హేరోదుతె పిలాతు యేసుక తెద్రయ్లినీ

6 గలిలయచి కోడు పిలాతు అదికారి నూన కెర, యేసుచి రిసా “దస్సి జలె, ఈంజొ మాన్సు గలిలయుడు గె?” మెన పుసిలన్

7 ‘హేరోదు ఏలుప కెర్తి గలిలయతె తెంతొ యేసు బార్ జలొ’ మెన నూన కెర, జోక జో హేరోదు రానొతె తెద్రయ్లన్. జా పొది హేరోదు యెరూసలేమ్తె జా తిలన్.

8 జలె, హేరోదు యేసుక దెక కెర, సర్లసంతొసుమ్ జలొ. కిచ్చొక మెలె, జోచి రిసా అగ్గెయ్ తెంతొ నూన తిలొ చి, ‘జో కెర్తి కిచ్చొ జవున్ వెల్లి కామ్ దెకిన్దె’ మెన హేరోదు జోక దెకుక ఒగ్గర్ ఆన జా తిలొ.

9 జాకయ్, యేసుక జేవ్ మాన్సుల్ ఒత్త కడ నెతికయ్, హేరోదు ఒగ్గర్ కొడొల్ జోక పుసిలన్, గని యేసు ఎక్కి కోడు కి జబాబ్ దెయె నాయ్.

10 తెదొడి వెల్లెల పూజల్ల చి మోసె తెన్ దేముడు దిలి ఆగ్నల్ సికడ్డన పురె టీచ కెర, ఒగ్గర్ విస్సుమ్ తెన్ యేసుచి ఉప్పిరి నేరిమ్లు వయడుక దెర్ల.

11 అన్నె హేరోదు అదికారి జోచి సయన్యుమ్ తెన్ జోక నిస్కారుమ్ దెకిత్ రితి మార్పుప జా, కొంకడ్ల చి, చెంగిల పాలల్ జోక గల దా, పిలాతుతె అన్నె తెద్రయ్లన్.

12 చి హేరోదు చి పిలాతు అగ్గె తెంతొ ఎక్కిలోక ఎక్కిలో విరోదుమ్ జా తిలె కి, జయ్యి దీసి తెంతొ సినేతుమ్ బందిల.

పిలాతు యేసుక జోవయించి అత్తి సార్పు కెర్లినీ

(మత్త 27:15-26; మార్కు 15:6-15; యోహా 18:39-19:16)

13 తెదొడి పిలాతు వెల్లెల పూజల్లక చి యూదుల్చ అదికారుల్ ఎత్తిక బుకారా కెర,

14 జోవయింక, “ ‘ప్రెజల్ ప్రబుతుమ్చి తెడి సేంతుమ్ నే తతి రితి ఈంజొ సికడ్డయ్’ మెన సంగ తుమ్ ఈంజొ మాన్సుక అంచితె కడ ఆన్లదు, అన్నె, తుమ్చి మొక్కి ఆవ్ పరిచ్చ కెర్లె, ఈందె, ఇన్నెక ఉప్పిరి తుమ్ సంగిల నేరిమ్లుతె కేన్ కి ‘కెర్లొ’ మెన రుజ్జు డీసె నాయ్.

15 హేరోదు కి పరిచ్చ కెర్లొ చి, జోక అమ్తె అన్నె తెద్రయ్లొ, గెద. ఈందె, మొర్తి సిచ్చ జతి కిచ్చొ నేరిమ్ కి కెరె నాయ్.

16 జాకయ్, ఇన్నెక ఇదిల్ బుద్ది సికడ్డి రితి అంచ సయన్యుమ్లు కొర్డల్ తెన్ పెటుతు చి, ఇన్నెక విడ్డల్ కెరిందె” మెలన్.

17 కిచ్చొక మెలె, యూదుల్క సర్ల కెర్తి రితి వెర్ని వెర్ని జా పండుగు పొది జేలి జలొ కేన్ జవున్ మాన్సుక విడ్డల్ కెరుక జో అదికారిక అలవాట్.

18 గని “జో మాన్సుక పొని. జోక మారు చి, బరబ్బుక ములు. జోకయ్ అమ్క కావలె” మెన ఎక్కి జట్టు జా కేక్ గల.

19 బరబ్బు, జలె, కొన్సొ మెలె, యెరూసలేమ్ పట్టుమ్తె ప్రబుతుమ్చి ఉప్పిరి ప్రెజల్ విరోదుమ్ కెర్తి రితి జో అల్లర్ కెర తిలి రిసాచి, నరు అత్య జో కెర తిలి రిసా జోక జేలి కెర జేల్తె గల తిల.

20 తెదొడి కిచ్చొ జలి మెలె, యేసుక విడ్డల్ కెరుక మెన తెదొడి ఎద పిలాతుక ఇస్టుమ్ తిలి రిసా, దస్సి మెన కేక్ గల బెర తిలసక అన్నెక్ సుట్టు సంగుక దెర్తికయ్,

21 జేవ్ ఎత్కిజిన్ “జోక సీలువతె గల టీవడ మొర్తి సిచ్చ కెరు! మొర్తి సిచ్చ కెర!” మెన కేక్ గల.

22 తెదొడి అన్నెక్ సుట్టు, ఇన్నెతెన్ మొత్తుమ్ తివ్వెర్ జలి, పిలాతు “కిచ్చొక? ఈంజొ కిచ్చొ నేరిమ్ కెర అస్సె? మొర్తి సిచ్చ జతి ఎదిలి కేన్ నేరిమ్ ఈంజొ కెర్లెసిచి రుజ్జు అంక డీసె నాయ్. జాకయ్ ఇన్నెక కొర్తల్ తెన్ పెట బుద్ది సికడ్తు చి, విడ్డల్ కెరిందె” మెలన్.

23 గని బెర తిల జనాబ్ “జోక సీలువ గలు! మొర్పు!” మెన కేకుల్ గల గల, బలవంతుమ్ కెర జిన్.

24 జాకయ్ “జేవ్ బలవంతుమ్ కెర సంగిలి రితి జర్గు జవున్” మెన పిలాతు తీర్పు దిలన్,

25 అన్నె, ప్రబుతుమ్చి ఉప్పిరి పైజల్ క విరోదుమ్ సికడ్తో నరు అత్య కెర తిలో బరబ్బుకయ్ ముల దిలన్; బెర తిల జనాబ్ బలవంతుమ్ కెర తిలి రిసా-చి “యేసుక కిచ్చొ కెర్తె గే కెర తుమ్చి ఇస్టుమ్ తుమ్చి పూచి” మెన, జోవయిచి అత్తి జోక సార్ప కెర దిలన్.

యేసుక సీలువతె టీవడకు మెన కడ నిలిసి (మత్త 27:32-44; మార్కు 15:21-32; యోహా 19:17-19)

26 జలె, యేసుక పట్టుమ్ ఒత్తల్తోచి బయిలె కడ నెతె తా, ‘యేసుక టీవడ్డి సీలువ వయన జోవయిచి పట్టి ఇండున్’ మెన, కేనె గే బయిలు దేసిమ్ తెంతో జా వాట్ జెతె తిలో సీమోసు మెలో

కురేనియు ప్రాంతుమ్చొ మాన్సుక దెర కెర, జోక జా సీలువ వయడ్ల.

27 అన్నె, యేసుచి పట్టి ఒగ్గర్జిన్ జనాబ్ జెతె తిల, అన్నె జోవయింతెన్ ఒగ్గర్జిన్ తేర్బోదల్ గుండెతె పెటన ఏడుకుడు జతె తిల.

28 గని యేసు పనుల జోవయింక, “ఓ యెరుసలేమ్చ తేర్బోదలు, అంక జెతి బాద చి రిసా తుమ్ ఏడ నాయ్, గని తుమ్ కిచ్చొచి రిసా ఏడుక మెలె, తుమ్క చి తుమ్చ బోదల్ క రిసాయ్ ఏడ.

29 మెలె, ఈందె, ‘గొడ్డు జలసక, బోదల్ నే పాయిలసక, దూద్ నే పియడ్లసక చెంగిలి!’ మెన తుమ్ సంగిత దీసల్ జెవుల.

30 కిచ్చొక మెలె, జేవ్ దీసల్ కచ సిచ్చల్ దెక కెర, ‘అమ్చి ఉప్పిరి నేడ అమ్క డంక గెల’ మెన డొంగ్రల్ క చి మెట్టల్ క సంగుల.

31* అవ్వి తిలి మట్టుక మాన్సుల్ ఇసి కెర్లె, సుకా గెలి మట్టుక కిచ్చొ కెరులగే?” మెన జేవ్ క సంగిలన్.

32 యేసు తెన్ మొర్తి సిచ్చ జతి రిసా అన్నె దొగులక కి ఒత్త కడ నిల. జేవ్ నిజుమి నేరిమ్లు కెర్లెన.

యేసుక సీలువతె టీవడ్డిసి

33 జలె, ‘గిడ్డి రితి పోలికచి మెట్ట’ మెలిన్తె జేవ్ ఎత్కిజిన్ గెచ్చ పావ కెర, యేసుక జోచి సీలువతె టీవడ్ల చి, జో డెబ్బి పక్క ఎక్కిలోక చి ఉజెతో పక్క ఎక్కిలోక జేవ్ దొగుల నేరిమ్ కెర్లెనక కి ఎక్కిక్ సీలువల్తె టీవడ్ల.

34 † అన్నె, జోక దస్సి కెర్లెనచి రిసా యేసు “ఓ బ, ఇన్నెక చెమించుప కెరు.

§ 23:21 23:21 ‘సీలువ’ మెలె, ఏక్ టీవేత్ చి ఏక్ అడ్డుమ్ జతి దొన్నె డండల్ బెదవుల. జా సిచ్చ జతె మాన్సుక జా సీలువతె ఎగ్గువ కెర, జోవయింప అత్తో చట్టో చంపొ కెరవ, అత్తోచట్టోతె మేకుల్ పెట, సీలువ బుయ్యె టీవ రోవ కెర, దస్సి ములుల. జో సిచ్చ జతె మాన్సు దస్సి ఒడొయె జా మొరెదె. రోమ్ దేసిమ్చి అలవాట్ తెన్ చి సిచ్చ, జా. * 23:31 23:31 నెంజెలి, ‘అవ్ తిలో దారు జలోసొక మాన్సుల్ ఇసి కెర్లె, తుమ్ సుకా గెలి దారు జతెనక కిచ్చొ కెరుల?’ † 23:34 23:34 ఈంజె ఎత్కి తోలితో రెగిడ్డి గ్రీకు బాసచ నగుమ్ పుస్తకల్తె ఈంజె ‘అన్నె’ తెంతో ‘ప్రావన కెర్లెన’ ఎదచి కోడు తయె నాయ్.

కిచ్చొ కెర్తతి గే నేనీతి” మెన దేముడు అబ్బోనీక ప్రార్థన కెర్తన.

జోక సిలువతె టీదడ్ల †జమాన్లు సుదల్ జోచ పాలల్ వంటనుక మెన చీటి గలిల.

35 పైజల్ పాసి టీద తా దెకితె తిల, “జో అన్నె మాన్సుల్క రచ్చించుప కెర్లొ, గెద. దేముడు ‘తెద్రయిందె’ మెన సంగ తిలో రచ్చించుప కెర్లొసా క్రీస్తు జయెదె జలె, జోయ్యి నిసాన్లొసా జయెదె జలె, జోక జోయ్యి రచ్చించుప కెరన్ను!” మెన యూదుల్చ అదికారుల్ జోక ఆసెల.

36 జమాన్లు సుదల్ కి జోక కొకడ్ల, జోచి పాసి జా కెర, †అమ్డి తిలి ద్రాచ రన్నుమ్ చంపొ కెర దా,

37 “తుయి యూదుల్చొ రానొ జలె, తుకయ్ తుయి రచ్చించుప కెరను!” మెన కొకడ్లె తిల.

38 పడ్డె అన్నె కిచ్చొ కెర్ల మెలె, * “యూదుల్చొ రానొ ఈంజొ” మెన రెగిడ్డి దార్చిగండ యేసుచి బోడిచి ఉప్పిరి ఒడోయ్ల.

యేసు తెన్ సిలువల్తె ఒడోయ్ జా తిల దొగుల చోర్లు

39 ఒత్త అన్నె సిలువల్తె ఒడోయ్ జా తిల నేరిమ్ కెర్ల దొగులతె ఎక్కిలో, జలె, “ ‘తెద్రయిందె’ మెన దేముడు సంగిలో క్రీస్తు రచ్చించుప కెర్లొసా నెంజిన్ గె? జలె, తుకయ్ తుయి రచ్చించుప కెరను చి అమ్క కి రచ్చించుప కెరు!” మెన యేసుక దూసుప కెర సంగిలన్.

40 జలె, జో ఎక్కిలో దన్నె లట్టబ్బికయ్, అన్నెక్లొ జోక “ఇన్నెతెన్ తుయి ఎక్కి రితి సిచ్చ జలెకి, దేముడుక బిస్సి నాయ్ గె?

41 ఆమ్ జలె, అమ్ నేరిమ్లు కెర్లి రిసాయి నాయిమ్ తెన్ అమ్క సిచ్చ కెర అస్తి, అమ్ కెర్ల కమొక జెతి సిచ్చతె అమ్క గల అస్తి. గని ఈంజొ మాన్సు కిచ్చొ ఇదిలిన్ తప్పు కి కెరె నాయ్” మెన ఈంజొ అన్నెక్లొ †చోరు తొల్లితొచొక గోల కెర.

42 జో యేసుక, “ఓ యేసువ్రబు, తుయి రానొ జా ఏలుప కెర్తి తుచి అదికారుమ్ తెన్ అన్నె జెతి పొదిక అంక ఉచర ధయ దెకు” మెన సంగిలన్.

43 యేసు జోక, “తుక ఆవ్ కచితుమ్ సంగితసి మెలె, ఆజి కి చెంగిల్ తోట రితి †వరదెనుతె అంచి తెన్ తస్త” మెన సంగిలన్.

యేసు మొర గెలిసి (మత్త 27:45-56; మార్కు 15:33-41; యోహా 19:28-30)

44 మెద్దెనె, బార గంటల్ జలి పొది తెంతొ, జలె, తిన్ని గంటల్ ఎద, పొద్దు అందర్ జా గెలి చి, †జా దేసిమి ఒండి అందర్ జా గెలి.

45 అన్నె కిచ్చొ జర్గు జలి మెలె, దేముడుచి గుడితె ఒడోవ తిలి *తెర ఉప్పిర్ తెంతొ ఎట్టొ ఎద చిరి జా దొన్ని గండల్ జా గెలి.

46 తెదొడి యేసు గట్టిజ అవాడ్ కెరన “ఓ బ, తుచి అత్తి అంచి జీవు ఆవ్ సొర్వ కెర దెతసి” మెన సంగ ప్రానుమ్ ముల దిలన్.

47 జలె, యేసుక దెకితె తిలో †పుంజెక్జీన్ జమాన్లుక వెల్లొ, జర్గు జలిసి ఎత్కి దెక కెర, దేముడుక గవురుమ్ కెర్లొ చి, “ఈంజొ మాన్సు కచితుమ్ పున్నుమ్చొ!” మెన సంగిలన్.

‡ 23:34 23:34 యోహాను 19:23. § 23:36 23:36 రానల్, సొమ్మార్లు నెంజిల మాములుమ్ మాన్సుల్

పితి రగమ్ అమ్డి తిలి ద్రాచ రన్నుమ్ * 23:38 23:38 యోహాను 19:20తె దెకిలె, పిలాతు అదికారి జా దార్ గండ సొంత రెగ్ల తిలన్. తిన్ని బాసల్ తెన్ రెగ్ల తిల; గ్రీకు బాస తెన్, రోమ్ దేసిమిచి లాటిన్ బాస తెన్, చి జేవ్ యూదుల్చి సొంత ఎబ్రీ బాస తెన్. † 23:41 23:41 మత్తయి 27:44. ‡ 23:43 23:43 నెంజిలె

‘పరలోకుమ్తె’. § 23:44 23:44 నెంజిలె ‘ఒండి బూలోకుమ్తె’. * 23:45 23:45 ఎక్కి ఎత్కిక వెల్లొ పూజరి వెర్లొక ఎక్కి సుట్టు పెస అర్చితుమ్ దెతి గదిక అడ్డు కెర్లొ తెర, జా. జా చిరి జా దొన్ని గండల్ జలిన్చి అర్దుమ్ కిచ్చొ మెలె, యేసు మొర్లిన్ తెన్ ఎత్కి అదికారుమ్ తిలో దేముడుక చి మాన్సుల్క అడ్డు తిల పాపుమ్ జో యేసు గెచ్చయ్లిన్చి అర్దుమ్. ఏబ్రీయులుక రెగిడ్డి ఉత్తమ్ 10:19, 20. † 23:47 23:47 జో రోమియుడు జయెదె జలెకి.

48 అన్నె, కిచ్చొ జర్గు జయెదె గే దెకుమ మెన ఒత్త గెచ్చ తిల మాస్సుల్ ఎత్తిజిని, జర్గు జలిసి దెక కెర, గుండెతె పెటన గెరి ఉట్ట గెల.

49 అన్నె యేసుచ గోతుసుదల్, చి గలిలయ ప్రాంతుమ్ తెంతో జోచి పట్టి జా †నవైచన కెర తిల తేర్బోదల్ కి సిలువల్క ఇదిల్ దూరి టీవ తా జర్గు జలిసి ఎత్తి దెకితె తిల.

యేసుచి పీనుమ్ ఎంగ్లవ దిలిసి

(మత్త 27:57-61; మార్కు 15:42-47; యోహా 19:38-42)

50 అరిమతయ్ మెంతి ఏక్ గెచ్చిచొ యోసేపు మెలో ఎక్కిలో తిలో. యూదుల్చి వెల్లి తగుతె వెసితోసా జయెదె, జో, చెంగిలో సత్తిమచొ మాస్సు జయెదె.

51 జేవ్ అన్నె వెల్లెల సుదల్ యేసుచి ఉప్పిరి కుట్ర కెర్లన్తె జో బెదె నాయ్, జోక ఇస్టుమ్ నాయ్ చి, 'ఎత్తి అదికారుమ్ తిలో ద్రేముడుచి రాజిమ్ కెయ్యుక ఎదార్దుమ్ డీసెదె, జా రాజిమ్చొ క్రీస్తు రానో ఏలుప కెరెదె?' మెన జో రకితె తిలన్.

52 ఈంజో మాస్సు, జలె, పిలాతు అదికారితె గెచ్చ కెర, "యేసుచి పీనుమ్ అంక దె" మెన జా ఉత్తవ వెంట గెల్లి రిసా సెలవ్ నజీలన్,

53 అన్నె, ఉత్తవ కెర, జోచి ఉప్పిరి చెంగిల్ విలువ కీబట్ట గండ పంగ్రవ కెర, కక్క అగ్గె నే రోవ తిలి సాప్రయ్ డొల్లి కెర్లి మెస్సున్తె రోవ దిలన్.

54 *కెన్ దీసి దస్సి కెర్లన్ మెలె, యూదుల్చి సెలవ్ కడన్లి దీసిక బోగి జయెదె.

55 యేసుక †నవైచన కెరుక మెన అగ్గె గలిలయ ప్రాంతుమ్ తెంతో జో తెన్ బెద

జా తిల తేర్బోదల్ జలె, †యోసేపుచి పట్టి జా తిల, మెస్సున్ దెక, యేసుచి పీనుమ్ కిసి ఎంగ్లవ దిల గే దెకిల.

56 దెక కెర, జేవ్ తతా గెరలె గెచ్చ కెర, జోక పట్టో గాఁసుక మెన చెంగిల వాసెన తేల్లు తెయార్ కెర్ల. అన్నె దేముడు మోసే తెన్ దిలి అగ్గుల్తె రెగిడ్లి రితి సెలవ్ కడన్లి దీసి తుక్కె తిల.

24

యేసుక 'జీవ్ జా అస్సె' మెన రుజ్జు అయ్లిసి

(మత్త 28:1-10; మార్కు 16:1-8; యోహా 20:1-10)

1 సెలవ్ కడన్లి దీసి రాత్ పాయితె తతికయ్, జేవ్ తేర్బోదల్ జేవ్ తెయార్ కెర్ల వాసెన తేల్లు దెరన మెస్సె గెల.

2 జలె, ఒత్త పావెలె, కిచ్చొ దెకిల మెలె, జా సాప్రయ్ డొల్లి కెర్లి మెస్సున్ పెసితి వాట్క డంక తిలో వెల్లి పత్తురు ఒస్సుల్ జా అస్సె మెన దెకిల,

3 పెసిలె, యేసుచి పీనుమ్ జేవ్క డీసె నాయ్.

4 జలె, యేసుచి పీనుమ్ అప్పె నెంజిలిన్చి రిసా కిచ్చొ ఉచరుక గే జేవ్ నేన తతికయ్, ఈందె, దగదగాల్ప మెర్పువ జల పాలల్ గలన్ల దొగుల ఉబెడల్ రిత దూతల్ జోవయించి పాసి టీవెల.

5 ఈంజేవ్ తేర్బోదల్ బియఁ గెచ్చ బుఁయి పక్క దెకితె తతికయ్, జేవ్ దూతల్ జోవయింక కిచ్చొ మెల మెలె, "జీవు తిలోసాక కిచ్చొక మెస్సె చజితను? జో ఇన్నె నాయ్. జో జీవ్ జా ఉట్ట అస్సె.

6 ఈందె, జో తెదొడి గలిలయతె తా ఒత్త తెంతో నే బార్ జతె అగ్గె తుమ్క సంగిలిసి తుమ్ ఏద కెర."

‡ 23:49 23:49 లూకా 8:1-3 దెక.

§ 23:53 23:53 యూదుల్ తెన్ బట్టక దిగిల గండల్ కెర

గుడియపుల, పీనుమ్క. * 23:54 23:54 'సాంజ్ జలె అన్నెక్ దీసి మొదొల్ జా తయెదె-సెలవ్ దీసి; చి రిసా, తెదొడిక వెంట గెలుక నెంజి' మెన జేవ్ యూదుల్చి రితి ఉచర, సాంజ్ సరిగా నే జతె అగ్గె వెంట గెల.

† 23:55 23:55 లూకా 8:1-3 దెక. ‡ 23:55 23:55 యోసేపు తెన్ నీకీదేము మెలో బెద వెంట గెల.

యోహాను 19:39-40. * 24:7 24:7 లూకా 9:22, 24.

7 కిచ్చొ మెలె, “*ఆవ్ మాన్సు జా జెర్మన్ అయ్లోసాక విరోదుమ్ సుదల్ అన్నె పాపుమ్ సుదల్చి అత్తి సార్పు కెర దెంక అస్సె చి, జేవ్ అంక సిలువతె టీవడ మారుక అస్సె, చి తిర్తతక ఆవ్ అన్నె జీవ్ జా ఉట్టుక అస్సె, మెన సంగిలన్, గెద” మెన దూతల్ సంగిల.

8 జేవ్ తేర్బోదల్ యేసుచ తెదోడవ కొడో ఏదస్స కెర్ల,

9 అన్నె, మెన్నె తెంతో పసుల ఉట్ట గెచ్చు, †ఎగరజిన్ యేసుచ సిస్సుల్క చి జోవయింక నంపజల అన్నె ఎత్కిజిన్క జా కబుర్ సంగిల.

10 జేవ్ ఎగరజిన్ యేసుచ †బారికుల్క జో జీవ్ జా ఉట్టిన్చి రుజ్జు సంగిల జేవ్ తేర్బోదల్ కొన్న మెలె, మగ్గల గవ్వెచి మరియు, యోహాన్సు, సీయాకోబుచి అయ్యసి మరియు, చి జోవయింతెన్ తిల *అన్నె తేర్బోదల్.

11 జేవ్ సంగిలీన్క ‘వెర్రి కోడు’ మెన ఈంజేవ్ ఎగరజిన్ ఉచర నంప కెర్రి నాయ్.

12 †గని పేతురు ఉట్ట కెర, మెస్సున్తె నిగ గెలో, అన్నె ఒత్త పాచ వంపొ జా తెడి దెకిలె, యేసుచి పీనుమ్క అగ్గె పంగ్రవ తిలి బట్టయ్, గని పీనుమ్ నాయ్, కిచ్చొ నాయ్. జలె, జర్గు జలిన్క ఆచారిమ్ జా ఉచరన ఉచరన, గెరి ఉట్ట గెలన్.

ఎమ్మాయు గవ్వె దొగుల సిస్సుల్క యేసు దస్సుల్ జా బెద గెలిసి

(మార్కు 16:12-13)

13 జయ్యి దీసి, యేసుచ సిస్సుల్ జల దొగుల ఎమ్మాయు మెంతి గవ్వె గెతె తిల. జా గావ్ యెరూసలేమ్ పట్టుమ్క ఎగర కిలోమిట్లర్లు దూరి తయెదె.

† 24:9 24:9 యేసుక విరోదుమ్ సుదల్చి అత్తి దెర దెలో యూదా మదెనె అత్య కెరన తిలో. మత్తయి 27:5, బారికుల్ 1:18. † 24:10 24:10 ఒగ్గరతె ‘సిస్సుల్’ మెన అస్సె. ‘బారికుల్’ మెలి పుస్తకుమతె పూర్తి

‘బారికుల్’ మెంతె తయెదె. § 24:10 24:10 ఈంజ మరియ యేసుచి అయ్యసి జయెదె; మార్కు 6:3.

* 24:10 24:10 జోవయింతె ఎక్కి ‘సలోమే’ మెలిసి; మార్కు 15:40. † 24:12 24:12 ఈంజ ఎత్కి త్తిలో రెగిడ్ల సగుమ్ పుస్తకల్తె 12 నంబర్చి కోడు తయె నాయ్. † 24:16 24:16 ఎత్కి అదికారుమ్ తిలో దేముడుచి నిలవ్కయ్ జా అడ్డు తయెదె. మార్కు 16:12తె దెకిలె, యేసుచి పోలిక ఇదిల్ మార్కుప జా తిలి.

14 జర్గు జలిన్ ఎత్కిచి రిసా జేవ్ దొగుల లట్టబై తిల,

15 జలె, జేవ్ దస్సి లట్టబై తతికయ్, యేసు సొంత జా వాల్ జా జోవయింతె పాచ కెర, జోవయింతెన్ బెద ఇండుక దెర్లన్.

16 జలె, జోక దెకిలెకి, జోక జేవ్ చినుక †అడ్డు కెర్రి తిలన్, చి చినితి నాయ్.

17 తెదోడి యేసు జోవయింక “తుమ్ ఇండ ఇండ, కిచ్చొచి రిసా ఎక్కిలో తెన్ ఎక్కిలో లట్టబై అస్సున్?” మెన పునిలన్ చి, జేవ్ ముసుర్లు జా ఇదిలిన్ మొకొమ్ కెరన అస్తి.

18 జోవయింతె ఎక్కిలో క్లెయిపా మెలోసా. జో, జలె, “ఈంజ మదెనె యెరూసలేమ్తె జర్గు జలిసి ఒత్త అయ్లస ఎత్కిజిన్ జాన్తి. ఎక్కి తుయి నేన్ని గె?” మెన జోచి ఆచారిమ్ సంగిలో.

19 యేసు జోవయింక “కిచ్చొ జర్గు జలిసి?” మెలన్, చి జేవ్ జోక నజరేతు గవ్వెచో యేసుచి రిసా జర్గు జలిసి. జో దేముడుచ కబుర్లు సంగితోసా జా తిలో. జో కెర్రి బోదన, జో కెర్ల వెల్లెల కమె, దేముడు దిలస చి, జోచి బోదన జోచ కమెక ఎత్కిజిన్ ప్రైజల్ నంప కెర తిల.

20 గని అమ్చ వెల్లెల పూజర్లు చి అమ్చ అదికారుల్ ‘జో మొర్రి సిచ్చు జవున్ తుమ్ మొర్రి సిచ్చు తియ’ రోమ్ దేసిమ్చ అదికారుల్చి అత్తి సార్పు కెర దిల చి, సిలువతె టీవడ మార్ల.

21 ఆమ్, జలె, జోక “ ‘అమ్చ

ఇస్రాయేలుల్క కీరచ్చించుప కెరుక తిలోసా జోయ్యి' మెన ఆస జా తిలమ్. అన్నె, అమ్ సంగిలిసి జర్గు జలి తెంతో, జో మొర్లి తెంతో, అప్పె తిర్రతి జా అస్సె.

22 అన్నె కిచ్చొ మెలె, అమ్చి తెన్ బెదిత సగుమ్జిన్ తేరబోదల్ ఆజి అమ్క ఆచారిమ్చి కోడ్డు సంగిల. రాత్ పాయితె తతికయ్. జేవ్ మెస్సె గెల చి,

23 ఒత్త యేసుచి పీనుమ్ డీసె నాయ్, చి అమ్తె జా కెర అన్నె కిచ్చొ మెల మెలె, దూతల్ అమ్క డీసన్ సేడ్ల చి, యేసుక 'జీవ్ జా ఉట్ట అస్సె' మెన అమ్క సంగిల మెల.

24 అమ్చితె తిలస సగుమ్జిన్ మెస్సె గెచ్చ దెకిల చి, జేవ్ తేరబోదల్ సంగిల్ రితి తిలి. గని యేసుక, దెకితి నాయ్" మెన జేవ్ దొగుల సంగిల.

25 యేసు జోవయింక, "కిచ్చొ గ్యానుమ్ నెంజిలస, తుమ్! దేముడుచ కబుర్లు సంగిల పూర్తులచ కొడొ అర్దుమ్ కెరనుక నంప కెరుక ఆల్సిమ్ కెర్తను, కిచ్చొక?

26 క్రీస్తు రచ్చించుప కెర్తొసా దస బాదల్ సేడ జో గవరుమ్ జతిన్తె గెచ్చుక దొర్కు జలి, గెద" మెన,

27 మోసే చి అత్తి రెగిడ్లి దేముడుచ ఆగ్గుల్, అన్నె దేముడుచ కబుర్లు సంగిల పూర్తులచి అత్తి రెగిడ్ల, జోవి రిసాచ దేముడుచ కొడొతె రెగిడ్ల ఎత్కిచి అర్దుమ్ యేసు సంగిలన్.

28 జలె, జేవ్ గెతి గావ్ పాసి జా జెతికయ్, యేసు అన్నె దూరి గెచ్చుక మెలి రితి జలో,

29 గని, "సాంజ్ జలి. పొద్దు గెతయ్. అమ్చి తెన్ ఇన్నె తుయి నిద్ర తా" మెన జోక బతిమాల్ప జా సంగిల, చి జేవ్

తతిన్తె బెద గెలన్.

30 జలె, జోవయింతెన్ అన్నిమ్ కంక మెన వెసిలో, అన్నె, ఏక పొడి అత్తి దెరన 'ఈంజ తుయి దా దయ కెర్లది' మెన దేముడు అబ్బొన్క జోబర సంగ కెర, జా పొడి మోడ కెర, జోవయింక వంట దిలన్.

31 దస్సి కెర్తికయ్, జోవయింక అంకివొ టేంట జల చి, అర్దుమ్ అయ్లి చి జోక చినిల. చినిలి బేగి, యేసు మాయ జా ఉట్ట గెలో.

32 దస్సి జర్గు జతికయ్. "నిజామి, అమ్ వట్టె జో తెన్ జెతె తిలి పొది, దేముడుచ కొడొచి అర్దుమ్ అమ్క జో దెకయ్తె తిలి పొది అమ్చి వెట్టి డడ్డిల్ రితి సర్ల తిలి, గెద" మెన లట్టబన్ల.

33 జోవయింక ఒగ్గర్ సర్లక బేగి ఉట్ట జయ్యి గడియయ్ బార్ జా యెరూసలేమ్ పట్టుమ్తె అన్నె గెల. ఒత్త పావ కెర, ఎగరజిన్ యేసుచ సిస్సుల్క చి జోవయింతెన్ తిలసక చజిల చి,

34 జేవ్ ఈంజేవ్ దొగులక కిచ్చొ మెల మెలె, "ప్రబు నిజామి జీవ్ జా ఉట్ట అస్సె. *సీమోనుక డీసిలన్!" మెన జేవ్ సంగితికయ్,

35 యేసు ఎమ్మాయున్తె గెతి వట్టె దస్సుల్ జలిసి అన్నె పొడి మోడ్డికయ్ ఈంజేవ్ జోక చినిలిసి ఈంజేవ్ జోవయింక సంగిల.

జోచ ఎగరజిన్ సిస్సుల్క యేసు డీసిలిసి

(మత్త 28:16-20; మార్కు 16:14-18; యోహా 20:19-23; బారి కమ్మొ 1:6-8)

36 జేవ్ దస్సి లట్టబంతె తతికయ్, యేసు డీస జోవయింక నెడిమి

§ 24:21 24:21 నెంజిలి 'అన్నె గెనస విడ్డల్ కెరుక తిలోసా'. మాములుమ్ యూదుల్ జోవయింక ఈంజ లోకుమ్చ బాదల్ తెంతో వడ్డొ జోవయింక ఆక్రమించుప కెర్లి రోమ్ దేసిమ్చి ప్రబుతుమ్ తెంతో చి రచ్చనక ఉచర్తె తిల. బారికల్ 1:6-8 కి దెక. ఈంజేవ్ సిస్సుల్ కి జా రగుమ్ రచ్చనచి రిసా ఉచర్తె తిల, కిచ్చొగె. అప్పచి మట్టుక ముక్కిమ్క పావుమ్ తెంతో చి రచ్చన దొర్కు కెరుక యేసు అయ్లో, చి జాచి రిసా దొర్కు జలి అర్బితుమ్ జలో. లూకా 5:24 యోహాను 3:16-18 దెక. ఎత్కి అదికారుమ్ తిలో దేముడు ఆకర్కయ్ ఆగానుమ్ బూలోకుమ్ మార్పుప కెరెది, చి తెదొడకయ్ యేసు ఎవార్డుమ్ ఏలుప కెరెది, చి ఈంజ లోకుమ్చ బాదల్ పూర్తి గెచ్చుల.

డిసయ్లిన్ 21:3-5, కొరింధీల్క రెగిడ్లి ఏక నంబర్ ఉత్తమ్ 15:24-28. * 24:34 24:34 'సీమోను' మెలె, సేతురు.

టీవీలన్, అన్నె, †“తుమ్క సేంతుమ్ తవున్. తుమ్ బమ్మ జా నాయ్. ఆఁవ్వి, గెద” మెలన్.

37 గని జేవ్ బియ్యం గెచ్చు బమ్మ జల. జోక ‘డుంబొ’ మెన ఉచర్ల.

38 జో, జలె, జోవయింక “తుమ్ కిచ్చొక బమ్మ జతను? తుమ్చి పెట్టి కిచ్చొక అన్యాయమ్ జతను?

39 అంక సిలువతె గలిలి పొది జేవ్ అంచ అత్తిలె చట్టెలె పెట్ట మేకుల్చ మచ్చల్ దెక అంక తుమ్ చిన. ఆఁవ్వి గెద. అంక చడ దెక. డుంబొక ఆఁగ్ తయె నాయ్ అడ్డె తయె నాయ్, గెద, గని అంక అన్నె.”

40 †మెన జోచ అత్తో చట్టో జోవయింక దెకయ్లన్.

41 జలె, జోవయించి సర్లసంతోసుమ్, జోవయించి ఆచారిమ్క జేవ్ తెదొడి ఎద నంప కెరుక ఇదిల్ అల్లర్ జలి రిసా, “ఇన్నె కిచ్చొ జలెకు కతిసి అన్నె గె?” మెన పుసిల్.

42 మొస్సా గండ దిల,

43 జో డుంబొ నెంజిలిన్చి రుజ్జుక జో నజన జోవయించి మొక్కె కయ్లన్.

44 తెదొడి జోవయింక, “ఆవ్ తుమ్చి తెన్ తిలి పొది, ‘మోసే పూర్లుమ్చొచి అత్తి దేముడు రెగ్గయ్ల సీఆగ్గుల్తె అంచి రిసా మోసే పూర్లుమ్చొచి అత్తి రెగిడ్డి దేముడుచ ఆగ్గుల్, దేముడుచ కబుర్లు సంగిల పూర్లుమ్చొచి కోడు, చి *క్రీస్తనల్తె †రెగిడ్డిసి ఎత్తి కచితుమ్

పూర్తి జర్లు జంక అన్నె’ మెన సంగిలయ్, గెద” మెన సంగ కెర,

45 దేముడుచ కొడొతె తిలిసి జేవ్ అర్దుమ్ కెరంతి రితి †అర్దుమ్ దెకయ్లన్.

46 జోవయింక కిచ్చొ మెలన్ మెలె, “దేముడుచి కోడుతె రెగ్గయ్లిసి కిచ్చొ మెలె, ‘దొర్కు జలొ క్రీస్తు రచ్చించుప కెర్తొసా ఒగ్గర్ బాదల్ సేడ మొర తిర్తక అన్నె జివ్ జా ఉట్టుక అన్నె’ మెన సీ అన్నె. అన్నె, ‘కచితుమ్ జర్లు జయెదె’ మెన దేముడుచి అప్పెచి సెలవ్ కిచ్చొ మెలె,

47 మాన్సుల్ జేవ్ కెర్ల పాపల్ చినన జేవ్ పాపల్క దుకుమ్ జా ఒప్పున ములిలె, క్రీస్తు దొర్కు జలి అర్చితుమ్ జలిన్చి రిసా అప్పె జేవ్ కెర్ల పాపల్ చెమించుప జతి వాటు దొర్కు జా అన్నె మెన ఆవ్ క్రీస్తుచి నావ్ తెన్ తొలితో యెరూసలేమ్తె పడ్డె ఒండి లోకుమ్చ ప్రెజల్ ఎత్తిచ మాన్సుల్తె తుమ్ బోదన కెరుక అన్నె.

48 ఈంజ ఎత్తిచి రిసా సాచుల్ జా అన్నున్, చి తుమ్ బుల సాచి సంగుక అన్నె.

49 ఈందె, అంచొ దేముడు అబ్బొ ‘జోవయించి పెట్టి *తెద్రయిందె’ మెన సంగ తిలి జోచి పరలోకుమ్చి దేముడుచి సుద్ది తిలి ఆత్మ తుమ్చి పెట్టి తెద్రయిందె, గని పరలోకుమ్ తెంతొ చి జా ఆత్మసెక్తి తుమ్చి పెట్టి జా తుమ్క తెయార్ కెర్తె ఎదక, ఈంజ మదెనె ఈంజ

† 24:36 24:36 “తుమ్క” తెంతొ 36నంబర్ కోడుచి ఆకర్ కోడు ‘మెలన్’ ఎదచి కోడు ఈంజ ఎత్తి తొలితో రెగిడ్ల నగుమ్ పుస్తకల్తె తయె నాయ్. ‡ 24:40 24:40 ఈంజ ఎత్తి తొలితో రెగిడ్ల నగుమ్ పుస్తకల్తె

40నంబర్చి కోడు తయె నాయ్. § 24:44 24:44 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రగ్గయ్లి అగ్గుల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పావ్ పుస్తకుమ్తె రెగ్గయ్ జా అన్నె. ఈంజ దెకవుక మెన కుమియ బాసతె నొయ ప్రమానుమ్తె మోసే పూర్లుమ్చొచి అత్తి రెగిడ్ల దేముడుచ ఆగ్గుల్ మెన రగ్లవ అన్నె. * 24:44 24:44 జేవ్ కీర్తనల్తె దావీదు రాసె జలొ పూర్లుమ్చొ బగ్గర్ రెగిడ్లన్. † 24:44

24:44 లూకా 18:31, 22:37, కీర్తనలు 20:42. ‡ 24:45 24:45 నెంజిలి ‘సెక్తి తిలన్’. § 24:46 24:46 యెనయా 53:1-9 ఎద జో బాదల్ సేడ మొర్లిన్చి రిసాచి టాలి అన్నె, చి దెన్ను నంబర్ తెంతొ బార నంబర్ ఎద జో అన్నె గప్పురుమ్ జతిన్చి రిసాచి కోడు అన్నె. జో తిర్తకయ్ అన్నె జివ్ జా ఉట్టిన్చి రిసా జా నీ జతె అగ్గె అన్నె పూర్లుమ్చి వాట్ దేముడుచి కొడొతె, ‘జా జర్లు జయెదె’ మెన కేనె టాలి డీస్తయ్ మెలె, యోనా పుస్తకుమ్తె. యోనాక వెల్లో మొస్సా గీడ తిర్తక జోవయింక ఒక్క విడ్డల్ కెర్లిసి. యెసు మొర తిర్తక అన్నె జివ్ జంక తిలిన్చి రిసాచి టాలి జా. * 24:49 24:49 యోవేలు 2:28, 29 దెక.

యెరూసలేమ్ పట్టుమీతె తుమ్ రకితె తా” మెన యేసు జేవ్ ఎగరజిన్క చి ఒత్త తిల జోక సంపజల అన్నె మాన్సుల్క సంగిలన్.

యేసు పరలోకుమీతె వెగ గెలిసి (మార్కు 16:19-20; బారి కమ్మొ 1:9-11)

50 తెదొడి యేసు జోవయించ సిన్సుల్క కడన, †బేతనియ గావ్ పక్క గెల చి, అత్తో ఉక్కుల జోవయింక దీవెన దిలన్.

51 జో దస్సి జా దీవెన దెతె తా, జోవయించి నెడిమి తెంతో ముల ఉక్కిల్ జా పరలోకుమీతె ఉట్ట గెలన్.

52 తెదొడి జేవ్ నెర్ను సేడ జోక బక్తి కెర తా ఒగ్గర్ సర్దసంతోనుమ్ తెన్ యెరూసలేమ్తె అన్నె గెల.

53 రోజుక దేముడుచి గుడితె గెచ్చ, యేసుచి రిసా జో దేముడుచి గవురుమ్ సంగితె తిల.

† 24:50 24:50 బేతనియ గావ్ ఒలివ మెట్టయ్ అస్సె; ఎట్టో పక్కయ్. బారికుల్ 1:6-12వి దెకిలె, జో పరలోకుమీతె వెగ గెలిన్చి రిసా ఒత్తయ్ కి అస్సె.

యోహాను సుబుమ్ కబుర్ యోహాను రెగిడ్డి సుబుమ్ కబుర్

యేసుక్రీస్తు కొన్నొ

1 * మొదొల్ తెంతొ కి దేముడుచి †కోడు తిలో. కిచ్చొ జెర్మున్ నెంజిలి పొది తెంతొ కి జా కోడు దేముడు తెన్ తిలో. జా కోడుయి దేముడు జా తిలో. ‡

2 జొయ్యి కిచ్చొ నెంజిలి జా పొది దేముడు తెన్ తిలో. ఎత్తి జొచి అత్తి కల్లుప జలి.

3 తిలిసి ఎత్తి జొ నెంజితె జెర్మున్ జయె నాయ్.

4 జొచితె జివు తిలి, జా జివు మాన్సుల్ క ఉజిడి జా అస్సె.

5 జా ఉజిడి అందర్ తె ఉజిడి దెతె అస్సె గని అందర్ జా ఉజిడిక చినన్ క నెత్తిర్తయ్ కి.

6 దేముడు తెద్రయ్ తికయ్, ఏక్ మాన్సు బార్ జలన్. జొవయించి నావ్ యోహాను.

7 జొ సాచి సంగుక అయ్ లన్. ఎత్తి జిన్ క్రీస్తుక నంపజా పాపుమ్ తెంతొ రచ్చించుప జతు మెన, 'దొర్కు జలి * ఉజిడి యేసుక్రీస్తుయి' మెన సాచి సంగుక అయ్ లన్.

8 యోహాను, జలె, జా ఉజిడి నెంజె, గని 'క్రీస్తుయి దొర్కు జలి జా ఉజిడి' మెన సాచి సంగుక అయ్ లన్.

9 ఈంజ లోకుమ్ తె జెర్మితె ఎత్తి మాన్సుక ఉజిడి దెతి నిజామ్ జలి ఉజిడి ఈంజ లోకుమ్ తె జెతె అస్సె.

10 జలె, ఈంజ లోకుమ్ తె జొ తిలో. ఈంజ లోకుమ్ జొచి అత్తి జెర్మున్ జలి, గని ఈంజ లోకుమ్ చ మాన్సుల్ జొక చినితి నాయ్.

11 జొచి సొంత గేర్ చి మాన్సుల్ తె జొ అయ్ లన్, గని జొచి సొంత మాన్సుల్ జొక ఒప్పన్ తి నాయ్, నంపజతి నాయ్.

12 దస్సి జలి పొది సగుమ్ జిన్ జొక ఒప్పన బెదవన నంపజా గెల. జొవయింకయి, జలె, 'తెదొడి తెంతొ దేముడుచ బొదల్ తుమ్ జలదు' మెన సెలవ్ దిలన్.

13 జొచ బొదల్ జతి జెర్మున్, జలె, కేన్ సెకుమ్ తె జెర్మిలి రిసా జర్లు జలిసి నెంజె, కేన్ తేర్చి మున్సుసి ఆగేక ఆనచి రిసా జెర్మున్ జలిసి నెంజె. ఈంజ దేముడుచి దయచి రిసా జొచి అత్మ సెక్తి దిలి రిసాచి జెర్మిలన్.

14 జలె, దేముడుచి కోడు ఈంజ లోకుమ్ తె మాన్సు జా జెర్మున్ జా అమ్ మాన్సుల్ తెన్ బెద జిలన్. పూర్తి దయ, పూర్తి సత్తిమ్ తా అమ్ చి తెన్ జిలన్, చి జొచి పరలోకుమ్ చి ఉజిడి దెకిల్ రితి జలమ్, చి 'దేముడు తెంతొ అయ్ లో దేముడుచొ ఎక్కి పుత్తుసి ఈంజొయి' మెన అమ్ క నిజామి రుజ్జు అయ్ లి.

15 జొచి రిసా " 'అంచి కంట పడ్డొ జెతోసా అంచి కంట వెల్లో. కిచ్చొక మెలె, అంచి కంట జొ అగ్గెయ్ తిలోసా' మెన ఇన్నెచి రిసాయి సంగిలయ్ " మెన యోహాను సాచి జా కేక్ గల సాట్టు కెరై తిలో.

16 జొచి ఎదివాట్ బెర్తుతె తిలి దయ తెంతొ అమ్ ఎత్తి జిన్ దయ పడ్డొ దయ పాయ అస్సుమ్.

* **1:1 1:1** సముద్రమ్ బుయె లోకుముల్ కిచ్చొయ్ నెంజిలి పొది † **1:1 1:1** మెలె, ఎక్కిలోచి పెట్టి తిలిసి జొవయించి కోడుతె కిసి చినుక జయెదె గే, దస్సి, ఎత్తి అదికారుమ్ తిలో దేముడు కిసా అస్సె గే చినుక జలె, యేసుక్రీస్తుక దెకుక. పడ్డొ, ఎత్తి అదికారుమ్ తిలో దేముడుచి పెట్టి తిలిసి యేసుక్రీస్తుచి అత్తి జర్లు జయెదె. ‡ **1:1 1:1** 'ప్రబు' మెలె కిచ్చొ అర్లుమ్ తయెదె మెలె, ఎత్తిక ఏలుప కెర్తొ దేముడు, ఎత్తి అదికారుమ్ తిలో దేముడు. దేముడు అబ్సొన్ క కి దేముడు పుత్తున్ క కి 'ప్రబు' మెనుల. బయ్ బిలెచి ఈంజ వాటె ముక్కిమ్ క క్రీస్తుకయ్ 'ప్రబు' మెనుల. § **1:5 1:5** ఈంజ లోకుమ్ చి పాపుమ్ అమన్ అందర్ రితి జలెకి, ఉజిడిక అందర్ కిసి విజవుక నెత్తె గే, క్రీస్తుచి సత్తిమ్ చి ఉప్పిరి పాపుమ్ జినుక నెత్తె. * **1:7 1:7** సత్తిమ్, సెక్తి.

17 మోసే పూర్ణమచొచి అత్తి దేముడుచ ఆగ్గుల్ అగ్గె తెంతో అమ్క దా అస్సె, గని దేముడుచి దయ, నిజుమ్ యేసుక్రీస్తుచి అత్తి దొర్కు జలి.

18 కేన్ మాన్సుకి కెయ్య కి దేముడుక దెకిత్ నాయ్. మాన్సు జోక దన్నీ దెకుక నెంజితయ్. జాకయ్, జోచి పక్కయ్ తిలో దేముడుచొ ఎక్కి పుత్తుని, ఈంజ లోకుమ్తె జెర్మ అమ్చి తెన్ జియ, అబ్బొసి కీసాచొ గే అమ్క దెకవ అస్సె, చి అబ్బొన్క దెకిల్ రితి జా అస్సుమ్.

బాప్తిసుమ్ దెతె తిలో యోహానుక పరిచ్చ కెర్లిసి
(మత్త 3:1-12; మార్కు 1:1-8; లూకా 3:1-9,15-17)

19 †యెరూసలేమ్ పట్టుమ్చ డియూదుల్చ వెల్లెల మాన్సుల్ 'తుయి కో?' మెన పుసితి రిసా, జోవయించ పూజర్లుక చి దేముడుచి గుడిచి నేవ కెర్లి లేవీ పూర్ణమచొచి సెకుమ్చ మాన్సుల్ సగుమ్జినక బాప్తిసుమ్ దెతె తిలో యోహానుతె తెద్దయ్ల.

20 జేవ్ జోక 'తుయి కో' మెన పుసితికయ్, జో అబద్దుమ్ జయె నాయ్. జో కీసి సాచి జలో మెలె, "ఆవ్ క్రీస్తు నెంజి" మెన సత్తిమ్ ఒప్పన్లన్.

21 దస్సి ఒప్పన్తికయ్, "దస్సి జలె, దేముడుచ కబుర్లు సంగిలో ఏలీయా పూర్ణమచొ ఏక్ వేల జస్తె గే?" మెన పుసిల. పుసిలె, "నెంజి" మెన సంగిలన్, చి "దస్సి జలె, దేముడుచ కబుర్లు సంగుక జెంక తిలో జో అన్వెక్లొ జస్తె గే?" మెన పుసిల, గని అన్వె "నెంజి" మెన యోహాను సంగిలన్.

22 జోక జేవ్ అన్వె, "దస్సి జలె, తుయి కొన్సో? అమ్క తెద్దయ్ల వెల్లెల మాన్సుల్క అమ్ సంగుక అస్సె. కొన్సె మెన తుయి సంగితసి?" మెన జో తెన్ పుసిల.

23 జో జోవయింక, "యెసయా పూర్ణమచొచి అత్తి దేముడు రెద్దయ్లి 'ప్రబు జెంక వాట్ సోగ కెర!' మెన బయిలె ప్రదేసిమి కేక్ గల ప్రబుచి అవాడ్ ఆవ్. మెన రెద్ద అస్సె, గెద. ఆవ్ ఎక్కి జో" మెన యోహాను సంగిలన్.

24 పిమ్మట్ యోహానుక జేవ్ పరిచ్చ కెర్లన, జలె, సీపరిసయ్యుల్ తెంతో జా అస్తి,

25 "తుయి క్రీస్తు నెంజిలె, ఏలీయా నెంజిలె, దేముడుచ కబుర్లు సంగిలో అన్వెక్లొ కి నెంజిలె, తుక కిచ్చొ అదికారుమ్ తయెదె, చి *బాప్తిసుమ్ దెతసి?" మెన జేవ్ పుసిల.

26 యోహాను, జలె, "ఆవ్ జలె, మాన్సుల్క పానితె బాప్తిసుమ్ దెతసి, గని తుమ్చి నెడిమి తుమ్ నేన్లొ ఎక్కిలో టీచ అస్సె.

27 జో అంచి కంట పడ్డొ జెంక తిలోసా. జో అంచి పడ్డొ అయ్లె కి, జో కెద్ది ముక్కిమ్చొ మెలె, జోచ జోడ్లుచ వాలివొ యిప్పక అంక విలువ నాయ్!" మెన జేవ్క ఇసి సంగిలన్.

28 ఈంజ ఎత్కి యోర్దాను గాడుక తూర్పు పక్కచి ఒడ్డుతెచి బేతనియ మెలి ఏక్ టాన్తె జర్గు జలి.

ప్రజలచి మొక్కె క్రీస్తుచి రిసా యోహాను సంగిలిసి

† 1:19 1:19 యెరూసలేమ్ పట్టుమ్తె ఎత్కి అదికారుమ్ తిలో దేముడుచి ఎక్కి దేముడుచి గుడి తయెదె. యూదుల్క జయి పట్టుమ్ ముక్కిమ్ జయెదె. ‡ 1:19 1:19 'యూదుల్' మెలె, 'అంచయ్ మాన్సుల్ జా

అంకయ్ జోకర్లు' మెన పూర్ణమ తెంతో ఎత్కి అదికారుమ్ తిలో దేముడు నిసాన్ల ప్రజల్. § 1:24 1:24 పరిసయ్యుల్ మెల పండితుల్, సద్దూకయ్యుల మెల పండితుల్, మోసే తెన్ దేముడు దిలి ఆగ్గుల్ సికడ్డన చి

వెల్లెల పూజర్లు యూదుల్చి వెల్లి నబతె వెసుల. * 1:25 1:25 'బాప్తిసుమ్' మెలె, ఎత్కి అదికారుమ్ తిలో దేముడు మాన్సుచి పాపుమ్ చెమించువ కెర్లి గుర్తుక కెర్లిసి. కీసి ఎక్కిలో బాప్తిసుమ్ సజనుక మెలె, "ఆవ్ పాపుమ్ సుదొ" మెన జో మాన్సు ఒప్పన, పాపుమ్ దోయ జా గతి గుర్తుక పానితె డుజ తా, అన్వె బార్ జంక. ఉపదెసిమ్ దెతోసా బాప్తిసుమ్ దెంక.

29 అన్నెక్ దీసి, యేసు పాసి తతికయ్, యోహాను జోక దెక, “ఈంజ లోకుమ్చ చి పాపుమ్ వయ గెచ్చయ్తో అమ్చో దేముడు దిలో మెండపిల్ల జలోసా ఓదె!” మెన సంగిలో. అన్నె,

30 “ఇన్నెచ్చి రిసాయి ఆవ్ సంగిలి, ‘జో అంచి పడ్డో జెర్మిలెకి, అంచి కంట అగ్గెయ్ తెంతో తిలోసా, చి రిసా అంచి కంట వెల్లో జయెదె’ మెలయ్.

31 ఈంజొ కొన్నొ గే ఆవ్ కి అగ్గె నేన్లయ్, గని ఆవ్ అయ్లిసి జోచి రిసాయి. †ఇస్రాయేలులు ఇన్నెక ‘అమ్చో రచ్చించుప కెర్తొసా’ మెన చినుతు మెన, పాపుమ్ జో గెచ్చయ్తి రిసా పానితె మాన్సుల్క బాప్తిసుమ్ దెతసి.”

32 తెదొడి యోహాను అన్నె కిచ్చొ సాచి సంగిలన్ మెలె, ‡“దేముడుచి నుద్ది తిలి ఆత్మ పార్వ పిట్టచి రితి జా, ఆగాసుమ్ తెంతో ఉత్త్ర జా, జోచి ఉపిర్ టీవిలిసి ఆవ్ దెకిలయ్.

33 ఆవ్ జోక ‘జొయ్యి’ మెన నేన్లయ్. నేన్తయ్, గని పానితెచి బాప్తిసుమ్ ఆవ్ దెంక మెన అంక తెద్రయ్లో జో అమ్చో దేముడు కిచ్చొ గుర్తు సంగ తిలో మెలె, ‘అంచి ఆత్మ ఉత్త్ర జా ఎక్కిలోచి ఉప్పిర్ టీవెదె, కచి ఉప్పిరి ఉత్త్ర జా టీవెదె గే, అంచి పరలోకుమ్చి నుద్ది తిలి ఆత్మక జోక సంవజలసక జొయ్యి బాప్తిసుమ్ దా కెరెదె.’

34 జలె, జోక ‘దేముడుచొ పుత్తుసి ఈంజొయ్’ మెన ఆవ్ రుజ్జు దెక అస్సి, సాచి జా అస్సి” మెన ఒత్త తిలసక యోహాను సాచి సంగిలన్.

యోహానుచ సిస్సుల్తె దొగుల యేసుచి పట్టి గెలిసి

† 1:31 1:31 ‘ఇస్రాయేలులు’ మెలె, యూదుల్క అన్నెక్ నావ్ జయెదె. ‡ 1:32 1:32 ఎత్తి అదికారుమ్ తిలో దేముడుచి నుద్ది తిలి ఆత్మక తెలుగు తెన్ సగుమ్తె ‘పరిశుద్ధాత్మ’ మెంతతి నెంజెలి ‘చెంగిల్ ఆత్మ’ మెంతతి. § 1:41 1:41 ‘క్రీస్తు’ మెలె, మెస్సీయ మెలె, ‘దొర్కు జలొ రచ్చించుప కెర్తొసాక తెద్రయందె’ మెన ఎత్తి అదికారుమ్ తిలో దేముడు పూర్ణమ్ తెంతో సంగ తిలోసా. అన్నె కిచ్చొ అర్దుమ్ తయెదె మెలె, ‘రాసొ’, ‘ఎత్తి అదికారుమ్ తిలో దేముడు ఏలుప కెరయ్లోసా’ మెలి అర్దుమ్.

35 అన్నెక్ దీసి, యోహాను జోచి దొగుల సిస్సుల్ తెన్ టీవ తతికయ్,

36 యేసు జా వాట్ ఇండ గెతె తతికయ్, యోహాను జోక దెక, “పాపుమ్ గెచ్చయ్తో దొర్కు జలి దేముడుచి మెండపిల్ల, ఓదె!” మెన సంగిలన్.

37 యోహానుచ జేవ్ దొగుల సిస్సుల్, జలె, సూన కెర, యేసుచి పట్టి గెచ్చుక దెర్ల.

38 జలె, యేసు వన్ల, జేవ్ పట్టి జెతె తిలిసి దెక కెర, జోవయింక “కిచ్చొ చజతను?” మెన పుసిలన్, చి జేవ్ ‘గురుబాబు’ మెలి అర్దుమ్ తెన్ జోవయించి అరమయ్ బాస తెన్ “రబ్బీ” మెన సంగ, “కేసె బస జా అస్సిసి?” మెన జోక పుసిల.

39 జో “జొమ్మ. జా, దెక” మెన సంగిలన్, చి జేవ్ జో తెన్ గెచ్చ, జో బస జలి టాన్ దెకిల. జలె, పాసి పాసి చెత్తర్ గంటల్ సంజె జలి రిసా, జా దీసి జేవ్ దొగుల యేసుతె తా గెల.

అంద్రెయ పేతురు మెలొ అన్నొన్క యేసుతె బుకారా ఆన్లిసి

40 యోహానుచి జా కోడు సూన యేసుచి పట్టి గెల జేవ్ దొగులతె ఎక్కిలో అంద్రెయ మెలొసా జయెదె. జో కొన్నొ మెలె, సీమోను పేతురుచొ బావొసి.

41 జో జలె, అన్నెక్ దీసి పెందలె కిచ్చొ తొలితొ కెర్లన్ మెలె, సీమోను మెలొ జోచొ అన్నొన్క చజ కెర, “మెస్సయక జలె క్రీస్తుక చజ దెక అస్సుమ్!” మెన సంగిలన్. § ‘మెస్సయ’ మెన జా బాస తెన్ సంగిలె, గ్రీకు బాస తెన్ ‘క్రీస్తు’ మెలి అర్దుమ్ తయెదె.

42 దస్సి సంగ, సీమోనుక అంద్రెయ యేసుతె కడ ఆన్లొ. కడ ఆన్తికయ్,

యేసు సీమోనుక చెంగిల్ దెక, “యోహాను మెలో ఎక్కిలోచో సీమోను మెలో పుత్తుసి, తుయి. జలె, అప్పె తెంతో తుక ‘కేపా’ మెన నావ్ తితసి” మెన సంగిలన్. *‘కేపా’ మెన అరముయ్ బాస తెన్ సంగిలె, గ్రీకు బాస తెన్ ‘పేతురు’ జయెదె.

అన్నె దొగులక యేసు సిస్సుల్ కెరన్లసి

43 అన్నెక్ దీసి, గలిలయ ప్రాంతుమ్ తె ఉట్ట గెచ్చిందె మెన యేసు ఉట్ట గెలన్. ఒత్త పాచ కెర, పిలివ్ మెలో ఎక్కిలోక చజ కెర, “అంచి పట్టి జా అంచో సిస్సుడు జా” మెన, యేసు జోక బుకార్డన్.

44 పిలివ్ బేత్తుయిదా పట్టుమ్చో. అంద్రెయ పేతురు కి జయ్యి పట్టుమ్చ.

45 జలె, నతనియేలు మెలో ఎక్కిలోక పిలివ్ చజ కెర, “అమ్చో, మోసే పూర్ణుమ్చోచి అత్తి దేముడు రెగ్గయ్లి †ఆగ్గుల్తె, క్రీస్తుచి రిసా రెగిడ్లొ, గెద. ‡అమ్చో దేముడుచ కబుర్లు సంగిల పూర్ణుమ్చ కి జోవయించి రిసా రెగిడ్లొ, గెద. జలె, జో క్రీస్తుక అమ్ చజ అస్సుమ్. జో కొన్సొ మెలె, నజరేతు గవ్వొచో యోసేపుచో యేసు మెలో పుత్తుసి. జొయ్యి” మెన నతనియేలుక సంగిలన్.

46 సంగిలె నతనియేలు అన్మానుమ్ జా “నజరేతు గవ్వొ తెంతో కిచ్చొ జలెకు చెంగిల్ తిలిసి బార్ జయెదె గే?” మెన పుసిలన్, గని పిలివ్ జోక “తుయి జా కెర, సొంత దెకు!” మెన జోక యేసుతె కడ ఆన్సొ.

* 1:42 1:42 ‘కేపా’ మెలె, ‘పేతురు’ మెలె, ‘పత్తుర్’ మెలి అర్దుమ్ తయెదె. † 1:45 1:45 తెలుగు బైబిల్ తె ధర్మశాస్త్రమ్ మెలె, మోసిచి అత్తి దేముడు రెగ్గయ్లి ఆగ్గుల్ మెన అమ్ జానుమ్. ఈంజ కొడొ ఎత్తి బైబిల్ తె అగేచి పాచే పుస్సుకుమె రెగ్గయ్ జా ఆస్సె. ఈంజ దెకవుక మెన కుపియ బాసతె నొయ ప్రమానుమ్ తె మోసే పూర్ణుమ్చోచి అత్తి రెగిడ్లి దేముడుచ ఆగ్గుల్ మెన రగ్గవ అస్సె. ‡ 1:45 1:45 ‘ఎత్తి అదికారుమ్ తిలో దేముడుచ కబుర్లు సంగిల పూర్ణుమ్చ’ మెలె, ఎత్తి అదికారుమ్ తిలో దేముడు సగుమ్ జనిచి పెట్టి జోచి అత్తి దా జోచ కబుర్లు సంగయ్లొ, చి రెగ్గయ్లొ. మెలె, జోచి అత్తి జోవయించి చొడి పుట్టవ జోచ కబుర్లు లట్టబడ్లొ, చి జోవయించి మెన్సుతె సెకయ్ తికయ్ రెగిడ్లొ. § 1:51 1:51 ‘మాన్సు జా జెర్మున్ అయ్లోసా’ మెన బయ్ బిల్ తె రెగ్గొ తిలె, జీవచి అర్దుమ్ కిచ్చొ మెలె, ‘ఎత్తి అదికారుమ్ తిలో దేముడు తెర్మయ్లో క్రీస్తు రచ్చొచుచ కెర్లొసా.’ పూర్ణుమ్ తెంతో దస్సి మెన జోవయించి రిసా ప్రబుచ కబుర్లు సంగిలన రెగిడ్లిన్ తె ‘మాన్సు జా జెర్మున్ జెంక తిలోసా’ మెన రెగ్గొ తిలిన్ చి అర్దుమ్ ఒగ్గర్ నదు కెర్లొ యూదుల్ అర్దుమ్ కెరనుల, జెస్సుమ్ తిలె.

47 జలె, నతనియేలు పాసి జెతె తతికయ్, యేసు జోక దెక జోచి రిసా “ఈందె, సత్తిమ్ తిలో ఇస్రాయేలుడు, ఈంజొ. ఇనాచితె కిచ్చొ ఉప్రమెన్సు నాయ్!” మెన సంగిలన్.

48 దస్సి సంగితికయ్, నతనియేలు ఆచారిమ్ జా “తుయి కీసా మాన్సుచి అంచి బుద్ది చినిలది?” మెన యేసుక పుసిలన్, చి యేసు జోక “పిలివ్ తుక నే బుకార్తె అగ్గె, తుయి జో రూక్ మొదొల్ వెన తిలి పొది తుక ఇన్నె తెంతో దెకిలయ్” మెన జబాబ్ దిలన్, చి

49 నతనియేలు జోక “గురుబాబు, దేముడుచి పెట్టిచో దేముడు పుత్తుసి, తుయి! అమ్చ ఇస్రాయేలులుచో రానొ, తుయి!” మెన సంగిలన్.

50 యేసు జోక “‘ఆవ్ తుక రూక్ మొదొల్ దెకిలయ్’ మెన సంగిలి రిసా తుయి అంక నంప కెర్లది, గెద. ఇన్నెచి కంట అన్నె వెల్లెల కమొ దెకితె” మెన సంగ యేసు అన్నె,

51 “జలె, ఆవ్ తుక కిచ్చొ నిజుమి కచితుమ్ సంగితసి మెలె, పరలోకుమ్ ఉగ్గి జతిసి, చి ఆవ్ కీమాన్సు జా జెర్మున్ అయ్లోసాచి ఉప్పిరి దేముడుచి ద్రూతల్ పరలోకుమ్ తె వెగితిసి చి పరలోకుమ్ తెంతో ఉత్త జెతిసి దెకితె” మెన యేసు సంగిలన్.

2

పానిక యేసు ద్రాచ రన్సుమ్ కెర్లిసి

1 దొరతి గెతికయ్, గలిలయ ప్రాంతుమ్ తెచి కానా మెంతి గవ్వొ వక్

పెండ్లి జలి. యేసుచి అయ్యసి ఒత్త జా పెండ్లితె అస్సె.

2 యేసుక, జోచ సిస్సుల్క కి పెండ్లితె బుకారా అస్సి.

3 జలె, పెండ్లి విందుతె అయలన పితి *ద్రాచ రస్సుమ్ ఎత్తి కేడ గెలి. యేసుచి అయ్యసి జోతె జా కెర, “విందుక అన్నె ద్రాచ రస్సుమ్ నాయ్” మెన సంగిలి.

4 యేసు జాక “అంచి తెన్ తుక కిచ్చొ కామ్, అయ? అంచి సమయుమ్ అప్పెక కి జెంక నేతయ్” మెన అయ్యస్క సంగిలన్.

5 తెదొడి అయ్యసి, జా గెరచ గొత్తి సుదల్క “తుమ్ కెరుక మెన ఈంజొ కిచ్చొ సంగెదె గే, జయ్యి కెర” మెన సంగిలి.

6 జలె, ఒత్త పాని దెర్త పత్తుర్ బానల్ సొప్పు అస్సి. ఏక్ బానొ, జలె, పుంజెక్ నెంజెలె పుంజెక్ యాబయ్ కాయల్ పాని దెరెదె. ఇన బానల్తె పాని కిచ్చొక ఒత్త తయెదె మెలె, యూదుల్ సుద్ది కెరంత అలవాట్లు చి రిసా.

7 యేసు, జలె, కిచ్చొ కెర్లన్ మెలె, “తుమ్ ఈంజేవ్ బానల్తె బెర్తు పాని సుచ” మెన, కామ్ కెర్లనక సంగిలన్. సంగితికయ్, జేవ్ బానల్తె పాని బెరయ్ల.

8 తెదొడి జో “అప్పె, బానల్తె తిలిసి తుమ్ డుంబ కెర, విందు వంటితో మాన్సుతె నా దాస” మెన సంగిలన్, చి జోక నా దిల.

9 జలె, జా పాని ద్రాచ రస్సుమ్ మార్పుప జా అస్సె. ద్రాచ రస్సుమ్ మార్పుప జలి జా పానిచి రుసి జో విందు వంటితో మాన్సు చక దెకిలన్. జా ద్రాచ రస్సుమ్ కేనె తెంతో అయ్లి గే పాని

డుంబిలనక ఎర్కె, గని విందు వంటితో మాన్సుక ఎర్కె నాయ్. తెదొడి జో, ఆచారిమ్ జా, †పెండ్లిబూలోక బుకారా కెర, జోక

10 “అమ్చి తెన్ ఇన విందుల్తె కో కి చెంగిలి రస్సుమ్ తొలితో వంట దెవుల. మాన్సుల్ ఒగ్గర్ పిలి పణ్ణె, గర్చి రస్సుమ్ బార్ కెర్లల. గని చెంగిల్చి ఆకర్క పితి రితి తుమ్ తియ తిలదు. కిసి?” మెన పుసిలన్.

11 గలిలయ ప్రాంతుమ్తెచి కానా మెంతి గవ్వె, యేసు ఈంజ వెల్లి కామ్ జర్గు కెర్లె. జోవయించి అదికారుమ్ దెకయ్తె వెల్లెల కెమ్మె ఎత్తితె ఈంజయి తొలితో చి. జోచ సిస్సుల్ జోచి ఉప్పిరి నమ్ముకుమ్ తిల.

12 ఒత్త తెంతో యేసు, జోచి అయ్యసి, జోచ బావుడ్లు, సిస్సుల్, ఇదిల్ ఉత్తర పక్కచి కపర్నూహూమ్ పట్టుమ్తె ఉట్ట గెచ్చ, ఒత్త సగుమ్ దీసల్ తా గెల.

దేముడుచి గుడితె సామన్ వికితనక యేసు ఉదడ్డిసి

(మత్త 21:12-13; మార్కు 11:15-17; లూకా 19:45-46)

13 యూదుల్చి ‡పస్కా పండుగు పాసి అయ్లి. ఈంజు పండుగ్చి రిసా యెరూసలేమ్ పట్టుమ్తె యేసు ఉట్ట గెలన్.

14 జలె, దేముడుచి గుడితె పెన కిచ్చొ దెకిలన్ మెలె, ‘అర్చితల్క’ మెన, బెయిలల్, గొర్రెలు, పార్వ పిట్టల్, దనచ వికుక బెర తిల మాన్సుల్క దెకిలన్. †డబ్బుల్ పల్లయతనచి కామ్ కి దెకిలన్.

15 తెదొడి, వాలివొ తెన్ కొర్డ తెయార్ కెర, జేవ్ ఎత్తిజిన్క, సొమ్ముల్క, గొర్రెల్క, ఎత్తి, దేముడుచి గుడి

* 2:3 2:3 మాములుమ్ ద్రాచ రస్సుమ్ మెలె, ఓస్తు నే గలిలి ద్రాచ రస్సుమ్ జిర్ సూరుచి రితి తియన తయెదె. ఒగ్గర్ పిలెకయ్ మచ్చుక జయెదె. పెండ్లివెతె యూదుల్ దస్సిచి పివుల. † 2:9 2:9 పెండ్లి ఉబెణ్ణె ‡ 2:13 2:13 పూర్ణమ్ పొది యూదుల్ ఐగుప్తు దేసిమి తా గొతిమాన్సు జలిన్ తెంతో ఎత్తి అదికారుమ్ తిలో దేముడు రచ్చించుప కెర్లెసి ఏద కెర్లె పండుగు, ఈంజ. § 2:14 2:14 జోవయింక ఆక్రమించుప కెర్లె రోమ్ దేసిమ్చి ప్రబుతుమ్చి డబ్బుల్ దేముడుచి గుడితె దెంక నెంజె. జేక, జోవయించి డబ్బుల్ దేముడుచి గుడితె కామ్క జెతికయ్ రగుమ్ డబ్బుల్తె పల్లవన, వేర వేర తెంతో అయల బక్తుల్ అర్చితుమ్ దెత గొర్రెల్ పిట్టల్ గట్ట గెనసుల, నెంజెలె దేముడుచి గుడిక డబ్బుల్ దెవుల. జేవ్ డబ్బుల్ పల్లయతన నాయమ్ నెంజెలి ఎదిలి లాబుమ్ కి కెరసుల.

తెంతో ఉదడ గెలన్, అన్నె డబ్బుల్ పల్లయ్తనచి డబ్బుల్ ఎత్తి వించ గెల కెర, జోవయించ బల్లల్ సేడవ దిలన్.

16 దస్సి కెర, పార్వ పిట్టల్ వికితనక ఇసి మెన సంగిలన్: “ఈంజేవ్ ఎత్తి బయిలె దెర గెచ్చు! అంచో దేముడు అబ్బొచ్చో గేర్క బియ్యార్ కెర్తి సంత రితి కెరుక జయె నాయ్!” మెన గోల కెర్లన్.

17 జో దస్సి కెర్తికయ్, దేముడు పూర్ణుమ్ రెగ్గయ్లి ఏక్ కోడు యేసుచ సిస్సుల్ ఏదస్ట కెర్ల.

“తుచో గేరు జతి దేముడుచి గుడి సుద్ది తా తుకయ్ తవుసు మెన అంచి జీవ్ డడ్డెదె”

మెన దేముడు రెగిడ్లి కోడు.

18 తెదొడి, దేముడుచి గుడిచ అదికారుల్ జల యూదుల్చ వెల్లెల మాన్సుల్ యేసుతె జా కెర, “తుయి అప్పె కెర్తి రితి కెరుక తుక కిచ్చొ అదికారుమ్? తుక అదికారుమ్ తిలె, అమ్క రుజ్జు దెకయ్తి రిసా కిచ్చొ వెల్లి కామ్ కెర్తె?” మెన కోపుమ్ తెన్ సంగిల.

19 యేసు, జలె, జోవయింక కిచ్చొ జబాబ్ దిలన్ మెలె, “ఈంజ దేముడుచి గుడి తుమ్ సేడవ గెల, చి తిర్తతి తెడి ఆవ్ అన్నె బందిందె” మెన సంగిలన్.

20 యూదుల్చ జేవ్ వెల్లెల మాన్సుల్ “అప్పెక ఈంజ దేముడుచి గుడి బందుక దొన్ని విసా సొవ్వు వెర్చుల్ దెర అస్సె. సేడయ్లెగిన, తుయి తిర్తతక బందుక కిసి? నెత్తిర్చి!” మెన ఆనిల.

21 గని, ‘దేముడుచి గుడి’ మెన జో కిచ్చొ అర్దుమ్ తెన్ సంగిలన్ గే, జేవ్ వెల్లెల మాన్సుల్ నేస్త. జోచి సొంత ఆగ్రుచి రిసా సంగ తిలో.

22 జలె, వడ్డె, మెలె జో మొర గెచ్చు తిర్తతి తెడి అన్నె జీవ్ జలి వడ్డె, జో ఇసి సంగ తిలో మెన జోచ సిస్సుల్ ఉచార కెరుల. ఉచార కెర్లె, క్రీస్తు “మొర అన్నె

జీవ్ జా ఉట్టెదె” మెన దేముడు పూర్ణుమ్ రెగ్గయ్లి కోడు, చి క్రీస్తు అప్పె సంగిలి కోడు నంప కెరుల.

23 జా వస్కా పండుగు పొది, యేసు యెరూసలేమ్తె తా, కిచ్చొ కిచ్చొ వెల్లెల కమొ కెర్తె తిలన్, చి జేవ్ కమొ దెకితె తా, జోవయింక ‘క్రీస్తు జా తయెదె’ మెన ఒగ్గర్జిన్ మాన్సుల్ నంప కెర్ల.

24-25 గని మాన్సుచి పెట్టి తిలి ఉప్తమెన్సుక యేసు జానె. మాన్సుచి బుద్ది కిసి గే కో జోక సాచి సంగుక నాయ్, జానెచి రిసా, జోవయింక నంప కెరె నాయ్.

3

నీకొదేమొ యేసుతె అందరె అయ్లిసి

1 యూదుల్చో అదికారి ఎక్కిలో, జో పరిసయ్యుల్ మెంత పండితుల్తె ఎక్కిలో, జోచి నావ్ నీకొదేమొ.

2 జో ఏక్ దీసి అందరె యేసుతె అయ్లన్, అన్నె, “గురుబాబు తుయి బోదన కెర్తి రిసా అమ్చో దేముడు తుక తెద్రవ అస్సి మెన జానుమ్. కిచ్చొక మెలె, దేముడు తోడు నెంజిలె, తుయి కెర్తె వెల్లెల కమొ కెరుక కో కి నెత్తిర్తి” మెన యేసుక సంగిలన్.

3 యేసు, జలె, జోక, “తుక ఆవ్ కిచ్చొ నిజుమి కచితుమ్ సంగితసి మెలె, *నొవర నే జెర్చిలె దేముడుచి రాజిమ్ దెకుక నెత్తిర్తి.” మెన సంగిలన్.

4 ఇసి సంగితికయ్, నీకొదేమొ జోక “మంత్రో జలో మాన్సు అన్నెక్ దప్ప జెర్చుక కిసి? అన్నెక్ సుట్టు అయ్యనచి పెట్టి పెన గెచ్చు జెర్చుక జయెదె గె? నెంజె!” మెన సంగిలన్.

* 3:3 3:3 నెంజిలె, ‘ఉప్పిరె తెంతో చి జెర్చున్ జలెకయ్’.

5 యేసు జోక, “దేముడుచి రాజిమ్తె మాన్సు బెదుక జలె, †పానిక చి దేముడుచి సుద్ది తిలి ఆత్మకచి జెర్మన్ జంకయ్. ఈంజ ఆత్మతె జెర్మన్ కో జతి నాయ్ గే, దేముడుచి రాజిమ్తె జో బెదుక నెంజె.

6 ఈంజ లోకుమ్తె ఆగ్తె జెర్మన్ జలె, ఆగ్చి జెర్మన్ జయెదె. ‡దేముడుచి రాజిమ్తె బెదుక జలె, దేముడుచి సుద్ది తిలి ఆత్మతె జెర్మన్ జెంక అస్సె.

7 ‘ఇసి క్విసవర్ జెర్మక అస్సె’ మెన తుక ఆవ్ సంగిలి రిసా తుయి బమ్మ జా నాయ్.

8 ఇసిచి రిసా వాదుక చి దేముడుచి సుద్ది తిలి ఆత్మక టాలి కెరుమ. వాదు, జలె, ఇస్టుమ్ అయ్లి పక్క వీర్తి రితి జతయ్. వీరితి సప్పుడు మాన్సు నూన్లె కి, కేనె తెంతో జెతయ్ గే, కేనె గెతయ్ గే, మాన్సుల్ నేన్తి. జలె, కేన్ మాన్సు దేముడుచి సుద్ది తిలి ఆత్మచి జెర్మన్ జలె, దస్సి. జా కీసి జర్గు జా అస్సె మెన జో మాన్సుచ కొడొతె కమొతె రుజ్జు జతయ్.”

9 నీకొదేమొ, జలె, యేసుక అన్నె “తుయి సంగిలి జెర్మన్ కీసి జర్గు జంక జయెదె?” మెన పునిలన్.

10 యేసు జోక కిచ్చొ జబాబ్ దిలన్ మెలె, “ఇస్రాయేలులుక తుయి సికడ్డొసా

జలెకి, ఇన్నెచి అర్దుమ్ కెరన్సి నాయ్ గె?

11 తుక ఆవ్ కిచ్చొ నిజుమి కచితుమ్ సంగితసి మెలె, అమ్ జాన్తిసి తుమ్క సంగితసుమ్, అమ్ దెకిలిసి తుమ్క సాచి సంగితసుమ్, గని అమ్చి సాచి తుమ్ వెల్లెల మాన్సుల్ నంప కెర్పు నాయ్.

12 మాములుమ్ ఈంజ లోకుమ్తె జర్గు జతినక్ తుమ్క సంగిలే కి తుమ్ నంప నే కెర్లె జలె, దస్సి, పరలోకుమ్చి రిసాచి తుమ్క సంగిలే కి, కీసి నంప కెర్లె!

13 కో మాన్సుయి పరలోకుమ్తె వెగ గెతి నాయ్, చి తుమ్క సికడుక నెతిర్తి, గని ఆవ్ మాన్సు జా జెర్మన్ అయ్లోసా ఒత్త తెంతో ఉత్త జా అస్సి, చి ఒత్తయ్ అన్నె వెగ గెచ్చిందె.

14 నూను, పూర్గుమ్ ‘అయివొ చడితిన తెంతో ప్రెజల్ రచ్చించుప జా జితు’ మెన జా బయిలు దేసిమి మోసే కంచుక తెయార్ కెర్లె *అయిచి బొమ్మక కీసి ఉక్కుల టీచడ్డన్ గే, దస్సి ఆవ్ మాన్సు జా జెర్మన్ అయ్లోసాక ఉక్కుల †టీచడ్డుక అస్సి.

15 కిచ్చొక మెలె, అంచి ఉప్పిరి కో, జోచి నముకుమ్ తివుల గే, ‡పరలోకుమ్చి రాజిమ్తె బెద, మొర్లె పరలోకుమ్తె గెచ్చ కెయ్చ తెయ్చ జివుల” మెన జోక యేసు సంగిలన్.

16 జలె, దేముడు ఈంజ లోకుమ్చక ఎదివాట్ ప్రేమ కెర్లె రిసా, జోచొ సొంత

† 3:5 3:5 1. ‘పానిక’ మెలె, బాప్తిసుమ్చి కోడు మెన సగుమ్జన్ ఉచర్తతి. పరియ్యుల్ యోహాను దెతె తిలి, కెర్లె పావల్ ఒచ్చున చెమించుప జతి గుర్చిచి బాప్తిసుమ్ నజనుక ఎధరె నెసిల. పానికచి బాప్తిసుమ్ జలె, సుద్ది జతినచి గుర్చయి జయెదె. ఆత్మచి కామ్ జలె, సుద్ది జతిన జయెదె. 2. ‘పానిక’ మెలె అన్నె నగుమ్జన్ కిచ్చొ అర్దుమ్ ఉచర్తతి మెలె, మాన్సు మాములుమ్ అయ్యుచి పెట్టి జెర్మన్ జతినచి రిసా సంగితయ్ మెన ఉచర్తతి. ఈంజ అర్దుమ్ ఉచర్లె, దొన్నె రగల్ జెర్మన్ కావల్సుపచి కోడు జయెదె; మెలె, ఆగ్కుచి కి ఆత్మకచి కి. ‡ 3:6 3:6 మత్తయి మెలొ సిస్సుడు రెగిడ్డి సుబుమ్ కబుర్తె ఎత్తి అదికారుమ్ తిలొ దేముడుచి రాజిమ్క ‘పరలోకుమ్చి రాజిమ్’ మెనెదె; మత్తయి 3:2, 13:24. ఎక్కిలొ పరలోకుమ్చి రాజిమ్తె నెదితిన కెయ్చ మెలె, జో మాన్సు నంపజా ప్రబుచి ఆత్మక నొవర్ జెర్మన్ జలి గడియ తెంతో. § 3:7 3:7 నెంజెలి, ‘ఉప్పిరి తెంతో చి జెర్మన్

జంక అస్సె’. * 3:14 3:14 ప్రెజల్ ఒగ్గర్ పాపుమ్ కెర్లె రిసా, ఏక సిచ్చుక ప్రబు ఒగ్గర్ అయివొ తెర్తయ్లన్. చడిలి, మొరుక జయెదె, గని ‘అంచి కోడు నంప కెర్లెన రచ్చించుప జతు’ మెన “మోసె తెయార్ కెర్లె కంచుచి అయిక కో దెకుల గే రచ్చించుప జా జవుల” మెన ప్రబు సంగిలన్, చి జాక దెకిలన చెంగిల్ జా జలె. † 3:14 3:14 యేసుక కీసి టీచడ్డుక మెలె, జోవయింక సిలువతె గల టీచడ్డుక. కో జోవయింక నంపజలె, జోవయించి పాపుమ్ గెచ్చయ్తి రిసా. ‡ 3:15 3:15 ఎక్కిలొ ఎత్తి అదికారుమ్ తిలొ దేముడుచి రాజిమ్తె బెదితిన కెయ్చ మెలె, జో మాన్సు నంపజా ప్రబుచి ఆత్మక నొవర్ జెర్మన్ జలి గడియ తెంతో.

ఎక్కి పుత్తుసి ఈంజ లోకుమ్చ చి పాపుమ్ వయితి రితి జోవయింక తెద్రవ దిలన్. కిచ్చొక మెలె, కోయి జోక నంపజా గెచ్చుల గే, ఎత్తిక నాసెనుమ్ నే జతె, సిచ్చతె నే గెతె పరలోకుమ్తె గెచ్చు కెయంక తెయంక చెంగిల్ తా జివుల.

17 దేముడు జోచొ సొంత పుత్తున్క ఈంజ లోకుమ్తె తెద్రయ్లిసి కిచ్చొక మెలె, లోకుమ్చక పాపుమ్ వయడ సిచ్చతె తెద్రయె నాయ్, గని జోచి ఎత్తిక పాపుమ్ తెంతో జోవయింక రచ్చించువ కెర్రి రిసా తెద్రయిలో.

18 కో జోక నంపజా గెచ్చుల గే, జోవయించి పాపుమ్ జేవ్ వయుక నాయ్. గని కో జోవయింక నంపజతి నాయ్ గే, జోవయించి పాపుమ్ అప్పె కి వయ అస్తి, చి దేముడుచొ సొంత ఎక్కి దేముడు పుత్తున్క నంపజతి నాయ్ చి రిసాయి సిచ్చ జతి మొర్నుతె గెచ్చుల.

19 జేవ్ కిచ్చొక జోవయించి పాపుమ్ వయ సిచ్చతె గెచ్చుక మెలె, ఉజిడి ఈంజ లోకుమ్తె అయ్లె కి, గర్వు కమొ కెరుక ఒగ్గర్జిన్ అలవాట్ జా అస్తిచి రిసా, అందర్ రితి పాపుమ్తె ఇండుక ఆన జా, జా ఉజిడి నెసితి.

20 పాపుమ్ కెరుక ఓజ జల మాన్సుల్, జలె, జా ఉజిడి ఎద్దరె నెన కెర, జోవయించ కమొ బయిలె దెకవన్సుక నెన కెర బియం, జా ఉజిడితె జెతి నాయ్.

21 గని కో సత్తిమ్ ఇండుల గే, జా ఉజిడ్క బింక నాయ్, చి జేవ్ కెర్త కమొక 'దేముడుచ కమొ, జోచి అత్తనెక్కిక సత్తిమ్క కెర్త కమొ' మెన రుజ్జు జతి రితి, దయిరిమ్ తెన్ జోచి జా ఉజిడ్తె జెవుల.

క్రీస్తు వెల్లొ జతిసి యోహాను దాక్ జతిసిచి కోడు

22 ఒత్త తెంతో, యేసు జోచ సిన్సుల్ తెన్ బార్ జా, యూదయ ప్రదేసిమ్చి బయిలె ఉట్ట గెల. జా పొది యేసు జోచ సిన్సుల్ తెన్ తా, జోవయించి అత్తి మాన్సుల్క బాప్తిసుమ్ దెతె తిలో,

23 అన్సె, ఒత్త తెంతో ఇదిల్ దూరిక, సలీము మెలి గవ్విచి పాసి తిలి అయ్నోను మెలి టాన్తె ఒగ్గర్ పాని తతికయ్, యోహాను కి బాప్తిసుమ్ దెతె తతికయ్, మాన్సుల్ జోతె జా కెర బాప్తిసుమ్ నజన్తె తిల.

24 జా పొది యోహానుక హేరోదు రానొ జేలి కెరుక నేతయ్.

25 జలె, యోహానుచ సిన్సుల్ సగుమ్జిన్, సుద్ది కెరంత అలవాట్లు చి రిసా యూదుల్చొ వెల్లొ మాన్సు ఎక్కిలో తెన్ లట్టబుక దెర్ల.

26 తెదొడి జేవ్ యోహానుతె జా కెర, జోవయింక "గురుబాబు, ఈంజ యోర్దాను గాడు ఒత్తల్తో జా పొది తుచి తెన్ తిలోసా, తుయి సాచి సంగిలోసా, జోకి ఇన్నె తుచి రితి బాప్తిసుమ్ దెతయ్, చి ఎత్తిజిన్ జోతె గెతతి" మెన సంగిల.

27 యోహాను జోవయింక కిచ్చొ జబాబ్ దిలన్ మెలె, "పరలోకుమ్చొ దేముడు జా దిలెకయ్ మాన్సుక జా అదికారుమ్ తయెదె. జో కెర్రిసి తప్పు నెంజె.

28 తుమ్క అగ్గె సంగిలయ్, గెద. 'క్రీస్తు నెంజె, గని ఆవ్ జోచొ బారికి జా జో జెతిసి సాట్ట కెరుక మెన దేముడు అంక జోచి పుర్రెతో తెద్రవ అస్సె' మెన తుమ్క ఆవ్ తెదొడి సంగిలయ్. ఆవ్ దస్సి సంగిలిన్క తుమి సాచి జా అస్సెన్.

29 జలె, కేన్ జలెకు పెండ్లితె, పెండ్లిబూలి పెండ్లిబూలోకయ్ గెచ్చెదె, గెద. బూలోచొ మింతుసి జోచి పచ్చెన జా అయ్లె కి, జో ఒత్త టీచ, బూలోక దెక, జోచి అవాడ్ నూన, సర్దనంతోనుమ్ జయెదె. జలె, పెండ్లితె బూలోయి కిసి ముక్కిమ్ జయెదె గే, దస్సి, క్రీస్తు ముక్కిమ్ జా అస్సె, చి అంక సర్దనంతోనుమ్.

30 జో వెల్లొ జంక, ఆవ్ దాక్ జంక" మెన యోహాను సంగిలన్.

క్రీస్తుచి అదికారుమ్చి రిసా సంగిలిసి

31 పరలోకుమ్ తెంతో అయ్లోసా ఎత్కిచి కంట వెల్లో. మాములుమ్ ఈంజ లోకుమ్చ మాన్సుల్, జలె, మాములుమ్ ఈంజ లోకుమ్చి రగ్గుమ్ తా, మాములుమ్ ఈంజ లోకుమ్తె తిలినచి రిసా లట్టబుల. గని యేసుక్రీస్తు పరలోకుమ్ తెంతో అయ్లోచి రిసా, జో ఎత్కిచి కంట వెల్లో.

32 ఒత్త దేముడు అబ్బోన్తె సొంత దెకిలీసి సొంత స్టాన్లీన్చి రిసా జో సాచి సంగిలే కి, మాములుమ్ ఈంజ లోకుమ్చి బుద్ది తిల మాన్సుల్ కోయి జోచి సాచి నంప కెర్తి నాయ్.

33 గని, జోచి సాచి కో నూన నంప కెర్తి గే, 'దేముడు సత్తిమ్చొ' మెన పూర్తి దయిరిమ్ జా జోచి సాచి దెతతి.

34 దేముడు తెద్రయ్లోసా జా, జో దేముడుచ కబుర్లు నిదానుమ్ తెన్ సంగితయ్, అన్నె జోచి పెట్టి దేముడుచి సుద్ది తిలి ఆత్మ ఎదివాట్ దెతయ్.

35 జలె, దేముడు అబ్బోసి దేముడు పుత్తున్క పూర్తి ప్రేమ అన్నె, చి అదికారుమ్ ఎత్కి జోచి అత్తి సార్ప కెర దాయె గెల అన్నె.

36 దేముడు పుత్తున్క కో నంపజా గెచ్చుల గే, పరలోకుమ్చి రాజిమ్తె కచితమ్ బెద, మొర్ల ఒత్త గెచ్చ కెయెక తెయెక జివుల. గని, దేముడు పుత్తున్చి కొడో రితి కో కెర్తి నాయ్ గే, జోచి జా పాపుమ్ వయ అన్సి, చి దేముడు దిలి సిచ్చ జోవయింక కెయ్యెక కి సిట్టె నాయ్.

4

సమరయ ప్రదేసిమ్చి తేర్బోదక యేసు బోదన కెర్లీసి

1 యోహానుచి కంట యేసు అప్పె ఒగ్గర్ సిస్సుల్ కెరన బాప్తిసుమ్ దెతయ్ మెన పరిసయ్యుల్ నూన్ల.

2 యేసు మాత్తుమ్ సొంత బాప్తిసుమ్ దెయె నాయ్, గని జోచ సిస్సుల్చి అత్తి దెతె తిలన్,

3 జలె, "బాప్తిసుమ్క ఎత్కిజిన్ అంచితె జెతిన్చి రిసా పరిసయ్యుల్ నూన అన్సి" మెన యేసు చిన కెర, "జోవయించి కోపుమ్చి రిసా అప్పెచి మట్టుక ఇన్నె తంక బెదె నాయ్" మెన, యూదయ ప్రదేసిమ్ ముల దా, జో వడ్డిలి గలిలయ ప్రాంతుమ్తె గెచ్చుక మెన అన్నె బార్ జలన్.

4 అప్పె యేసుక సమరయ ప్రదేసిమ్చి వాట్ గెచ్చుక జంకయ్.

5 జలె, సిస్సుల్ తెన్ బార్ జా సమరయ ప్రదేసిమ్చి సుకారు మెంతి ఏక్ గావ్ సొడి అయ్ల. జా గావ్ కేనె మెలె, యాకోబు మెలో పూర్గుమ్చొ జోచొ యోసేపు మెలో పుత్తున్క దిలి బుయె పాసి అన్నె.

6 ఊంటక యాకోబు కూనయ్లి కుండి ఒత్త అన్నె. జలె, యేసు ప్రయానుమ్చి రిసా అల్పు జా, జా కుండి సొడి వెసిలన్. పాసి పాసి మెద్దెన్ జా అన్నె.

7 తెదెడి, అన్నిమ్ గెన ఆన్తి రిసా యేసుచ సిస్సుల్ జా గవ్వె పెన గెల. యేసు ఎక్కిలో ఒత్త వెన అన్నె

8 జా సమరయ ప్రదేసిమ్చి తేర్బోద ఎక్కి పాని కడన్తి రిసా అయ్లి. యేసు జాక "పాని దె, పియిందె" మెన సంగిలన్.

9 జలె, యూదుల్ సమరయ సుదల్ తెన్ బెదితి నాయ్ చి రిసా, జా తేర్బోద ఆచారిమ్ జా, "ఆవ్ ఈంజ సమరయతెచి తేర్బోద, తుయి యూదుడు. జలె, 'పాని దే' మెన కిచ్చొక అంచి అత్తి తుయి సంగితసి?" మెన యేసుక సంగిలి.

10 యేసు జాక, "మాన్సుల్క దేముడు దిలి వరుమ్ తుయి చినితది జలె, అన్నె, 'పాని దే, పియిందె' మెన తుక సంగితోసా కొన్నొ జయిందె గే తుయి చినితది జలె, 'జివ్ దెతొ పాని అంక దే' మెన తుయి అంకయ్ సంగితది," మెన యేసు జాక జబాబ్ దిలన్.

11 జలె, జా తేర్బోద అర్దుమ్ కెరనె నాయ్ చి రిసా, "బాబు, ఈంజ కుండి

దీగ్ అన్నె. పాని కడన్తి సామన్ కిచ్చొ నాయ్, తుక. జీవ్ దెత్తో జో పాని కేన్ తెంతో తుక దొర్కు జయెదె?

12 అమ్చొ యాకోబు పూర్గుమ్చొ, జోచ వుత్తర్పులు, జోచ సొమ్ముల్ ఎత్తి. ఈంజయ్ ఊంటుచి పాని పితె తిల్. జొయ్యి అమ్క ఈంజ కుండి దిలన్. తుయి అమ్చొ యాకోబు పూర్గుమ్చొచి కంట వెల్లో గే?" మెన సంగిలి.

13 జా తేర్బోద దస్సి సంగితికయ్, యేసు జాక, "ఈందె, ఈంజ పాని కేన్ మాన్సు పిలెకి, జోక అన్నె తాన్ కెరెదె.

14 గని ఆవ్ దెత్తిసి * 'పాని' కో పివుల గే, జోక కెయడ కి అన్నె తాన్ కెరె నాయ్. ఆవ్ దెత్తో పాని జోచి పట్టి ఊంటు పుట్టి రితి జతె తయెదె, చి † కెయడ తెయడ చెంగిల్ తతి జీవుమ్ జోక దొర్కు జయెదె."

15 జలె, జా తేర్బోద అర్దుమ్ కెరనుక నేతయ్చి రిసా, "అప్పె తెంతో అంక తాన్ నే కెర్తి రితి, పానిక ఆవ్ అన్నె ఇన్నె నే జెతె తతి రిసా, తుయి సంగిలో పాని అంక దె" మెలి.

16 యేసు జాక, "తుయి గెచ్చు, తుచొ మున్నుద్ కడ ఆను" మెన సంగిలన్.

17 జా తేర్బోద జోక "అంక మున్ను నాయ్" మెన సంగిలి, చి యేసు జాక " 'అంక మున్ను నాయ్' మెన తుయి సంగిలి కోడు సత్తిమ్.

18 తుక అప్పె ఎదె పాచ్జిన్ మున్నుర్లు అస్తి, చి అప్పె తిలోసా తుచొ మున్నుది నెంజె. సత్తిమ్ సంగిలది" మెన యేసు సంగిలన్.

19 యేసు ఇసి సంగితికయ్, జా తేర్బోద, "బాబు, ‡ దేముడు తుక కిచ్చొ కిచ్చొ దెకయ్తయ్ మెన అప్పె ఆవ్

చినితసి. జొయ్యి తెద్రయ్లో మాన్సు, తుయి.

20 అమ్చ పూర్గుమ్చ తెంతో అమ్ సమరయ సుదల్ ఈంజ అమ్చి మొక్కె తిలి డొంగురె దేముడుక బక్తి కెర్తనుమ్, గని 'యెరూసలేమ్తె దేముడుచి గుడితె జోక బక్తి కెరుక అస్సి' మెన తుమ్ యూదుల్ సంగితను" మెన జా సంగిలి.

21 యేసు జాక, "అమ్మ, ఇదిల్ పడ్డొక, 'దేముడు అబ్బొక బక్తి కెర్తి రిసా ఈంజ డొంగుర్ జవున్, యెరూసలేమ్ పట్టుమ్ జవున్ ముక్కిమ్ మెనుక నాయ్' మెన మాన్సుల్క అర్దుమ్ జయెదె.

22 తుమ్ సమరయ సుదల్, దేముడుక బక్తి కెర్తి కి, జోవయింక అప్పెక కీదూరి అస్సున్. అమ్ యూదుల్క మాత్తుమ్, జో నిసాన అస్సి. మాన్సుల్క దొర్కు జలో రచ్చించుప కెర్తొసా అమ్ యూదుల్తె జెర్కుక జోచి నెలవ్.

23 జలె, ఇదిల్ పడ్డొక, అప్పె రితి కి, జో దేముడు అబ్బొక నిజుమి నంపజల మాన్సుల్ కో జవుల గే, జోవయించి ఆత్మతె నిదానుమ్ జా జోవయింక సత్తిమ్ తిలి బక్తి కెరుల. దేముడు అబ్బొన్ దస్సు మాన్సుచి రిసా రకితయ్.

24 దేముడు డీస్తాసా నెంజె, గెద. ఆత్మయి, జో. జాకయ్, కో జోక బక్తి కెరుక ఉచరుల గే, జోవయించి ఆత్మయి నిదానుమ్ తెన్ జోక సత్తిమ్ తిలి బక్తి కెరుక అస్సి" మెన యేసు జా తేర్బోదక సంగిలన్.

25 జో ఇసి సంగితికయ్, జా తేర్బోద, " 'దేముడు తెద్రయిందె' మెన సంగ తిలో * 'మెస్సుయ మెలో రచ్చించుప కెర్తొసా జెయెదె' మెన జాని. జో అయ్లి

* 4:14 4:14 ఇన్నె 'పాని' మెలి, జా టాలిచి అర్దుమ్ కిచ్చొ మెలి, పరలోకుమ్చి రాజుమ్తె బెదితి ఆత్మతె జెర్కున్ దెతి జోవయించి సుద్ది తిలి ఆత్మ. † 4:14 4:14 'కెయడ తెయడ చెంగిల్ తతి జీవుమ్' మెలి, పరలోకుమ్చి రాజుమ్తె బెదితి, మొర్లె ఒత్త గిచ్చు జితి, సెక్తి. ‡ 4:19 4:19 నెంజెలి, "తుక 'ఎత్తి అదికారుమ్ తిలో దేముడుచ కబర్లు సంగితోనా ఎక్కిలో' మెన ఆవ్ అప్పె చినితసి". § 4:22 4:22 నెంజెలి, "నేన్ను. అమ్ యూదుల్ మాత్తుమ్, జోవయింక జానుమ్." * 4:25 4:25 'మెస్సియ' మెలి, 'క్రీస్తు' మెలి, అన్నె కిచ్చొ అర్దుమ్ తయెది మెలి, 'రానా', 'ఎత్తి అదికారుమ్ తిలో దేముడు ఏలువ కెరయ్లోసా' మెలి అర్దుమ్. † 4:25 4:25 అరమయ్ బాస తెన్ 'మెస్సియ' మెలి, గ్రీకు బాస తెన్ 'క్రీస్తు' జయెదె.

పోది, జోయ్యి అమ్మక ఎత్తి దెకయెదె” మెన సంగిలి†.

26 జలె, జా దస్సి సంగితికయ్, యేసు జాక “ఆవ్ తుచి తెన్ లట్టబ్బొసా జోయ్యి” మెన సంగిలన్.

27 యేసు ఇసి సంగిలి బేగి, జోచ సిస్సుల్ జా గవ్వొ తెంతో బుల అయ్ల. తేర్బోద తెన్ యేసు లట్టబ్తయ్ మెన దెక అచారిమ్ జల, గని ‘తుక కిచ్చొ కావలె?’ జలెకు, ‘జాచి తెన్ కిచ్చొక లట్టబ్బసి?’ జలెకు మెన కో పుసితి నాయ్.

28 తెదొడి జా తేర్బోద, జాచి గేడి ముల దా నిగ గెచ్చు, జా గావ్ తెడి పెస,

29 “తుమ్ బేగి జా ఎక్కిలోక దెక! ఈంజొ మాన్సు కక్క నే పుసితె, ఆవ్ అగ్గె కెర్లిసి ఎత్తి అంక సంగ దిలో. ఈంజొయి క్రిస్తు జయెదె, కిచ్చొగి” మెన ప్రజల్క బుకార్లి,

30 చి జా తెన్ ఒగ్గర్జిన్ యేసుతె జెంక బార్ జల.

31 జా తేర్బోద గవ్వొ పెస ప్రజల్క బుకార్లి మెద్దెనె, యేసుచ సిస్సుల్ జోక “గురుబాబు, అన్నిమ్ కెరు!” మెన బలవంతుమ్ కెర్ల.

32 గని జో “తుమ్ నేన్లి ఏక్ రగుమ్ అన్నిమ్ అంక అస్సె” మెన జబాబ్ దిలన్.

33 జో ఇసి సంగిలి రిసా, జోచ సిస్సుల్ “ఇన్నెక కో జలెకు కిచ్చొ జవున్ అన్నిమ్ ఆన దా అస్తి గే?” మెన ఎక్కిలో తెన్ ఎక్కిలో లట్టబుక దెర్ల.

34 జేవ్ దస్సి జతికయ్, యేసు జోవయింక, “అంచి అన్నిమ్ కిచ్చొ మెలె, అంక తెద్రయ్లోసాచి ఇన్ఱుమ్ రితి కెరుకయ్. జోచి కామ్ పూర్తి జర్గు కెరుకయ్.

35 “ఈందె, ‘అన్నె చెత్తర్ జొన్సొ గెలెకయ్ పంట్లో లాయ్ ఆనుక జయెదె’ మెన మొక్కల్ రోవితి పొది సంగితను. జలె, ఆవ్ తుమ్క కిచ్చొ మెంతసి మెలె, అదె! అంకివొ ఉగుడ దెక! బట్టిలె

పంటో అప్పె పిక తెయార్ జా రితి, అంక నంపజంక ఎతివాట్జిన్ మాన్సుల్ తెయార్ జలి రితి సమయుమ్ జా అస్సె.

36 ప్రజల్క దేముడుచి రాజిమ్తె బెదయ్తి ఈంజ ఆత్మపంట్లో లాయితితె కో లాయ్ ఆన్తన జవుల గే, జోవయింక ఆత్మజీతుమ్ దొర్కు జయెదె. జాచి రిసా, అంచి సుబుమ్ కబుర్ తిలి బి గలిలస కి, జా ఆత్మపంట్లో లాయ్ ఆన్తన కి, సర్లసంతోసుమ్ జవుల.

37 అంచి ఆత్మపంట్లోచి కామ్తె, జలె, ‘ఎక్కిలో బి గలెదె, అన్నెక్కో పంట్లో లాయ్ ఆనెదె’ మెలి కోడు సత్తిమ్ జయెదె.

38 అల్లె, తుమ్ మొదోల్ నే కెర్లి ఈంజ కామ్తె బెదుక తుమ్క ఆవ్ తెద్రప అస్సి. కో కో కన్ఱుమ్ జా అగ్గె తెంతో ఈంజ కామ్ కెర తతికయ్, తూమ్ కి అప్పె ఈంజ కామ్తె బెద అస్సున్” మెన యేసు జోచ సిస్సుల్క సికయ్లన్.

సమరయచ మాన్సుల్ ఒగ్గర్జిన్ యేసుక నంపజలిసి

39 జలె, ‘ఆవ్ కెర్లిసి ఎత్తి అంక సంగ దిలో’ మెన యేసుచి రిసా జా తేర్బోద సంగిలి సాచి సూన కెర, జా గవ్వొచ సమరయ సుదల్ ఒగ్గర్జిన్ యేసుక నంపజల.

40 జాకయ్, యేసుతె జా కెర, “అమ్చి గవ్వొ జా తా” మెన జేవ్ సమరయ సుదల్ బతిమాల్పా జా సంగిల, చి దొరతి తా గెలన్.

41 జో సొంత బోదన కెర్లికయ్, అన్నె ఒగ్గర్జిన్ జోక నంపజల,

42 చి జా తేర్బోదతె జా కెర, “తుక ‘జయ్యి సంగిలి రిసా నంపజలమ్’ మెన అప్పె తెంతో సంగుమ్ నాయ్. కిచ్చొక మెలె, అమ్ అప్పె జోచి కొడొ సొంత సూన్లి రిసా, ‘ఈంజ లోకుమ్చ ఎత్తిక దొర్కు జలొ రచ్చించుప కెర్తొసా ఈంజొయి’ మెన పూర్తి దయిరిమ్ జా అస్సుమ్” మెన సంగిల.

గలిలయచ మాన్సుల్ యేసుక
మరియాద దెకిలిసి
(మత్త 8:5-13; లూకా 7:1-10)

43 జా దొరతి గెలి పడ్డో, యేసు
జోచ సిన్సుల్ తెన్ ఒత్త బార్ జా గెచ్చు,
గలిలయ ప్రాంతుమ్తె పావెల.

44 'దేముడుచ కబుర్లు సంగితోసా కో
జలెకు సొంత టాన్తె తిలె, సొంత టాన్చ
మాన్సుల్ జోక గవురుమ్ దెకితి నాయ్'
మెన జాన కెర, యేసు సొంత సంగితె
తిలన్. జాకయ్ యూదయ ప్రదేసిమ్
ముల తిలొ.

45 గలిలయ ప్రాంతుమ్చ ప్రెజల్
ఒగ్గరజిన్, జలె, యెరూసలేమ్
పట్టుమ్తె పండుగక జేవ్ కి గెచ్చు
తా అన్నె ఉట్ట జా అస్సి. జేవ్
యెరూసలేమ్తె తిలి పొది, యేసు కెర్ల
కమె ఎత్కి దెక తిల. జేవ్, జలె, జేవ్
గలిలయులు, సర్ల తెన్ జోక మరియాద
కెర్ల.

46 జలె, జా గలిలయ ప్రాంతుమ్తెచి
కానా మెంతి గవ్వె యేసు అన్నె ఉట్ట
అయ్లన్. జా సుట్టు, ఒత్తయ్ పానిక
ద్రాచ రన్సుమ్ మార్పుప కెర తిలొ. జలె,
యేసు అప్పె కానాతె తతికయ్, ఇదిల్
దూరి తిలి కపెర్నహూమ్ మెంతి గవ్వె
హేరోదు రానొచొ వెల్లొ అదికారి ఎక్కిలోచొ
పుత్తుసి జొర్జొ సేడ అస్సె.

47 యేసు యూదయ ప్రదేసిమ్ ముల
దా గలిలయ ప్రాంతుమ్తె జా అస్సె మెన
జో వెల్లొ మాన్సు సూల్లి బేగి, బార్ జా,
యేసుతె అయ్లన్. జోచొ పుత్తుసి
మొర గెచ్చెదె గే జియెదె గే, దస్సి జా
అస్సెచి రిసా, "బేగి జా అమ్చొ పుత్తుక
చెంగిల్ కెరు" మెన యేసుక బతిమాల్ప
జా సంగిలన్.

48 జలె, యేసు జోక, "దేముడు దిలి
అదికారుమ్క రుజ్జు దెకయ్త కమె నే
దెకిలె, తుమ్ నంప కెర్చు నాయ్" మెన
సంగిలన్.

49 యేసు ఇసి సంగితికయ్, జో
"బాబు, అమ్చొ బోబొ నే మొర్తి రితి బే
బేగి జె" మెన జో అన్నె బతిమాల్ప జా
సంగిలన్.

50 తెదొడి యేసు జోక, "గో, తుచొ
పుత్తుది జియెదె!" మెన సంగిలన్.
యేసు సంగిలి కోడు జో మాన్సు నంప
కెర, గెరి గెచ్చుక బార్ జలన్.

51 జో వట్ట గెతె తతికయ్, జోచ గొత్తి
సుదల్ జో తెన్ దస్సుల్ జల. "తుచొ
పుత్తుది జిలొ!" మెన జోక సంగిల.

52 "కెత్తి గంటల్క చెంగిల్ జలొ?"
మెన జో పుసిలన్, చి జేవ్ జోక "కాలి
ఒంటి గంటక జొర్జొ గెలి!" మెన సంగిల.

53 జలె, "తుచొ పుత్తుది జియెదె"
మెన యేసు సంగిలి గడియ జయ్యి మెన
జొర్జొ సేడ్లొ నాడుచొ అబ్బొసి చినన్లొ.
జాకయ్, జోచి గెర్చ మాన్సుల్ ఎత్కిజిన్
యేసుక నంపజా గెల.

54 యూదయ ప్రదేసిమ్ ముల
గలిలయ ప్రాంతుమ్తె తొలితొ ఉట్ట
అయ్లి జా సుట్టు తెంతొ, ఈజొ నాడుక
చెంగిల్ కెర్లిసి తెన్ జోచి అదికారుమ్క
రుజ్జు దెకయ్త కమె దొన్ని జల.

5

యేసు యెరూసలేమ్ పట్టుమ్తె
ఉట్ట గెలిసి

1 ఈంజ జర్గు జలి పడ్డొ,
యూదుల్చి పండుగు అన్నెక్ అయ్లిచి
రిసా దేముడుచి దేవులుమ్ తిలి
యెరూసలేమ్ పట్టుమ్తె యేసు ఉట్ట
గెలన్.

2 జలె, జా పట్టుమ్తె 'మెండల్ వీది'
మెన ఏక్ టాన్ అస్సె. ఒత్త ఏక్ వెల్లొ
కుండి అస్సె. ఎబ్బీ బాస తెన్ జా కుండిచి
నావ్ 'బేతెస్ద'. జా కుండిచి సుట్టునంత,
పావ్ గుమ్మల్ తిలి టాన్ ఏక్ అస్సె.

* 5:4 5:4 గ్రీకు జాన తెన్ ఈంజ తొలితొ రెగిడ్ల సగుమ్ పుస్తకల్తె 4 నంబర్చి కోడు తయె నాయ్.

3 ఒత్త రగరగాల్ రోగల్చ బెర అస్తి, గుడ్డి మాన్సుల్, సొట్ట మాన్సుల్, అత్తో చట్టో లంబ గెల మాన్సుల్, దనచ అస్తి.

4 * కిచ్చొక ఒత్త అస్తి మెలె, గడియ గడియక ఏక్ దూత జా గడ్డె ఉత్త జా కెర, పానికదుల్ కెరెదె, చి జో పానికదుల్ జలి బేగి కో జలికు రోగి తొలితో పానితె ఉత్తెదె గే, జోవయించి జబ్బు గెచ్చు, చెంగిల్ జయెదె.

5 జలె, ముప్పుయ్ అట్టు వెర్సుల్చి జబ్బు తిలో ఏక్ మాన్సు ఒత్త అస్సె.

6 యేసు జా వెల్లి కుండి తిలిన్తె గెచ్చు, జో రోగిక దెక, 'ఒత్త ఎత్తిపాట్ దీనల్ తెంతో జోచి అంతుర్వొతె నిజ తా మాలజ్ జా అస్సె' మెన చిన కెర, "తుక నిజమి చెంగిల్ జంక ఇస్టుమ్ అస్సె గే?" మెన జోక పుసిలన్.

7 జో రోగి "బాబు, పాని కదుల్ జలి బేగి అంక పానితె ఉత్తయ్తోసా కో నాయ్, చి ఆవ్ ఉత్తిర్తె ఎద అన్నె కో గే అంచి కంట అగ్గె ఉత్తెదె" మెన సంగిలన్.

8 యేసు జోక "తుయి ఉట్ట, తుచి అంతుర్వొ వయన ఇండు!" మెన సంగిలన్.

9 సంగిలి బేగి, జో మాన్సు చెంగిల్ జా జోచి అంతుర్వొ వయన ఇండిలన్.

10 జా దీసి, యూదుల్చి బక్తి కెర్తి సెలవ్ కడన్లి దీసి. జలె, యూదుల్చ వెల్లెల మాన్సుల్ సగుమ్జిన్ చెంగిల్ జలో జో మాన్సుక దెకిల. దెక, "ఈంజ సెలవ్ కడన్లి దీసి. తుచి అంతుర్వొ వయక గారు!" మెన సంగిల.

11 దస్సి సంగితికయ్, చెంగిల్ జలో జో మాన్సు " 'తుచి అంతుర్వొ వయన ఇండు' మెన, అంక చెంగిల్ కెర్లొసా సంగిలన్, చి వయన ఇండిలయ్" మెన జోవయింక జబాబ్ దిలన్.

12 " 'తుచి అంతుర్వొ వయన ఇండు' మెలోసా కో?" మెన జేవ్ వెల్లెల మాన్సుల్ పుసిల.

13 జో కొన్సొ జయెదె గే చెంగిల్ జలో

జో మాన్సు నేనె. కిచ్చొక మెలె, ఒత్త ఒగ్గర్జిన్ జనాబ్ తతికయ్, యేసు, కో నే దెకితె, ఉట్ట గెచ్చు తిలో.

యేసు జో మాన్సు తెన్ అన్నె దస్సుల్ జా జాగర్త సంగిలిసి

14 వడ్డొ, చెంగిల్ జలోసాక యేసు దేముడుచి గుడితె చజ కెర, జోక "ఈందె, అప్పె తుయి చెంగిల్ అస్సిసి. అన్నె కిచ్చొ జవున్ వెల్లి బాద నే సేడ్డి రిసా అన్నె పాపుమ్ కెరు నాయ్" మెన జాగర్త సంగిలన్.

15 జో మాన్సు ఒత్త తెంతో గెచ్చు, "అంక చెంగిల్ కెర్లొసా యేసుయి" మెన యూదుల్చ వెల్లెల మాన్సుల్క సంగిలన్.

16 జలె, సెలవ్ కడన్లి దీసి యేసు ఈంజ కామ్ కెర్తి రిసా, యూదుల్చ వెల్లెల మాన్సుల్ జోక అల్లర్ కెరుక దెర్ల.

17 దస్సి జతికయ్, యేసు జోవయింక, "అగ్గె తెంతో ఎద కి అంచొ దేముడు అబ్బొ కామ్ కెర్తె తత్తయ్. ఆవ్ కి జోచి కామ్ కెర్తె అస్సి" మెన సంగిలన్.

18 జలె, 'సెలవ్ కడన్లి దీసి పిట్టవన కామ్ కెర్తయ్' మెన, అన్నె, దేముడు తెన్ సమ్మందుమ్ మెనన్లొ జోక 'అబ్బొ' మెన యేసు సంగిలిన్చి రిసా, యేసుక మారుక మెన అన్నె ఒగ్గర్ ఉచర జల.

యేసుచి అదికారుమ్ కేనె తెంతో జెతయ్

19 జలె, కోపుమ్ జల జేవ్ వెల్లెల మాన్సుల్క యేసు ఇసి మెన సంగిలన్. "ఆవ్ తుమ్క కిచ్చొ నిజమి కచితుమ్ సంగితసి మెలె, దేముడు అబ్బొ కెర్తిసి కేన్ జలెకి ఆవ్ పుత్తుసి దెకిలె, జయ్యి దస్సి కెర్తె తయిందె, వేరచి కిచ్చొ కెరుక నెంజె. అబ్బొ కిచ్చొ కెర్తె, ఆవ్ పుత్తుసి జయ్యి కెర్తెసి.

20 ఆవ్ పుత్తున్క దేముడు అబ్బొ ప్రేమ కెర్తయ్. దేముడు అబ్బొ కెర్తిసి ఎత్తి ఆవ్ జోచొ పుత్తున్క దెకయ్తె తత్తయ్. తుమ్ దెకిల ఈంజేవ్ కమెచి కంట

అన్నె జిన్ల కమొ ఆవ్ పుత్తున్క దేముడు అబ్బొ దెకయెదె. తుమ్ ఆచారిమ్ జస్సె.

21 కీస కమొ మెలె, మొర గెలస ఉట్టవ దేముడు అబ్బొ జోవయింక కీసి అన్నె జియడ్డయ్ గే, దస్సి, కక్క జియడుక సర్ల జయిందె గే, జోవయింక జియడ్ చెంగిల్ కెరిందె.

22 పడ్డె, దేముడు అబ్బొ కక్క సొంత తీర్పు కెరె నాయ్. తీర్పు కెర్తి అదికారుమ్ ఆవ్ జోచొ పుత్తున్క సొర్ప కెరె దా అస్సె.

23 దేముడు అబ్బొక మాన్సుల్ కీసి గవురుమ్ కెర్తతి గే, దస్సి ఎత్కిజిన్ ఆవ్ జోచొ పుత్తున్క కి గవురుమ్ కెర్త మెన, జో సెలవ్ దా అస్సె. ఆవ్ పుత్తున్క కో గవురుమ్ కెర్తి నాయ్ గే, అంక తెద్రయ్లో దేముడు అబ్బొక కి గవురుమ్ కెర్తి నాయ్.

24 “తుమ్క కిచ్చొ నిజమి కచితుమ్ ఆవ్ సంగితసి మెలె, అంక తెద్రయ్లోసొక నంప కెరె కో అంచి కోడు సూన కెరుల గే, పరలోకుమ్చి రాజిమ్తె బెదితి వరుమ్ జోవయింక దొర్కు జా అస్సె. పాపుమ్చి రిసొ జేవ్ మొర గెల రిత జా తిలె కి, జేవ్ కెర్ల పాపల్ చెమించుప జా సిచ్చతె గెతి నాయ్, గని జివ్వి జా అస్సి.

25 “తుమ్క నిజమి కచితుమ్ ఆవ్ కిచ్చొ సంగితసి మెలె, మొర గెలస ఆవ్ దేముడు పుత్తున్చి అవాడ్ సూన్తి సమయుమ్ జెతయ్, అప్పె కి జా అస్సె, కో సూన నంపజవుల గే, నొవర్ జలి రితి జా, దేముడుచి రాజిమ్తె బెదుల.

26 జివ్ కెర్తి సెక్తి జో అబ్బొసి జలొ దేముడుచి అత్తి అస్సె, జలె, దొర్కు జలి జయ్యి సెక్తి ఆవ్ జోచొ అబ్బొ జలొ దేముడు పుత్తున్క దా అస్సె.

27 అన్నె, ఆవ్ మాన్సు జా జెర్మున్ అస్సిచి రిసొ అంక మాన్సుల్క తీర్పు కెరె సిచ్చ కెరుక, చెమించుప కెరుక, అదికారుమ్ దా అస్సె.

28 ఇన్నెచి రిసొ తుమ్ కిచ్చొ ఆచారిమ్ సేడ నాయ్, కిచ్చొక మెలె, మొర

గెల మాన్సుల్, మెన్సున్లతె తిలస ఎత్కి, అంచి అవాడ్ సూన బార్ జతి సమయుమ్ జెయెదె.

29 తెద్రొడ్క జేవ్ బార్ జా, సత్తిమ్ కెర్లస అన్నె జివ్ జా ఉట్ట పరలోకుమ్తె గెచ్చు చెంగిల్ జితె తవుల, సత్తిమ్ నే కెర్లస ఉట్ట, సిచ్చతె గెచ్చుల.

30 “జలె, కిచ్చొ అవ్వి కెరుక అంక అదికారుమ్ నాయ్, దేముడు అబ్బొతె ఆవ్ సూన్తి రితి ఆవ్ తీర్పు కెర్తసి ఆవ్ కెర్తి తీర్పుతె కిచ్చొ తప్పు నాయ్. కిచ్చొక మెలె, ఆవ్ కిచ్చొ వేర ఉచరి నాయ్, గని అంక ఎత్కి ఆస. కిచ్చొ మెలె, అంక తెద్రయ్లోసొచి ఇస్టుమ్ తిలిసి పూర్తి జర్గు కెరుక.

యేసుచి రిసొ సాచి
31 “అంచి రిసొ ఆవ్ ఎత్కిలో సాచి సంగనై, అంచి సాచి సత్తిమ్చి గే అబద్దుమ్చి గే రుజ్జు నాయ్.

32 అంచి రిసొ సాచి సంగితొసొ అన్నెకో అస్సె. జో అంచి రిసొ సాచి సంగిలిసి సత్తిమ్ మెన జాని.

33 మెలె, యోహానుక ‘కిచ్చొ సాచి సంగెదె’ మెన సూన్తి రిసొ తుమి జా సుట్టు సగుమ్జిన్చి అత్తి కబుర్ తెద్రయ్లదు, చి ఆవ్ కొన్నొ గే జో సాచి సంగిలన్.

34 అంచి రిసొచి ముక్కిమ్ జలి సాచి మాన్సు సంగిలిసి నెంజె, గని తుమ్క ‘నంపజా రచ్చించుప జతు’ మెన, యోహానుచి సాచిచి రిసొ తుమ్క ఆవ్ ఉచ్చరయ్తసి.

35 దొర్కు జలిసి మాన్సు చినితి రిసొ దీవు లగితె తిలె కీసి తమ్ముస ఉజిడ్ దెతయ్ గే, దస్సి, ఉజిడ్ రితొ జా, అంచి రిసొ యోహాను సాచి సంగితె తిలొ. జో సంగిలి సాచి సూన, తూమ్ కి గడియయ్ సర్ల తెన్ తిలదు.

36 “గని, యోహానుచి సాచిచి కంట అంక జిన్లి సాచి అస్సె. ఆవ్ కెరుక మెన దేముడు అబ్బొ దిల కమొ, ఈంజేవ్ ఆవ్ కెర్ల కమొయి దెకిలె, జొయ్యి అంక

తెద్రయ్లో మెన ఈంజేవ్ కమొయి అంచి రిసా సాచి సంగితతి.

37 “పడ్డో, అంక తెద్రయ్లో అబ్బొయి అంచి రిసా సొంత సాచి సంగిలన్. తూమ్ కెయ్ జోచి అవాడ్ నూన్సు నాయ్, జోచి రూపుమ్ తుమ్ కెయ్ దెకున్ నాయ్.

38 జోచి కోడు తుమ్చి పెట్టి నాయ్ మెన కిచ్చి రుజ్జు తత్తయ్ మెలె, జో తెద్రయ్లోసాక తుమ్ నంప కెర్చు నాయ్.

39 దేముడుచి రాజిమ్తె బెద పరలోకుమ్తె గెతి రిసా దొర్కు జలి గ్యానుమ్ పున్నిమి దెతిసి దేముడుచ కొడొతె తయెదె మెన దేముడుచ కొడొ తుమ్ రోజుక దెకితసు. జలె, జెవ్వి అంచి రిసా సాచి సంగితతి.

40 జేవ్ కొడొ అంచి రిసా సాచి సంగిలే కి, అంచితె దొర్కు జతి పరలోకుమ్చి జీవ్ సంగితి రిసా తుమ్ అంచితె జెంక ఎద్దెరె నెసుసు. అంక నంపజలె, తుమ్క దొర్కు జతి.

41 “మాన్సు దెతి గవురుమ్ అంక నాయ్.

42 గని దేముడుచి ప్రేమబుద్ధి తుమ్చి పెట్టి నాయ్ మెన జాని.

43 అంచో అబ్బొసి జలో దేముడుచి నావ్ తెన్ ఈంజు లోకుమ్తె ఆవ్ జా అస్సి, గని తుమ్ అంక నంప కెర్చు నాయ్. గని, కో జలెకు వేర మాన్సు అవ్వి కెర అయ్లె, జోకయ్ నంప కెర్తె.

44 మాన్సు సంగితి గవురుమ్ ఎక్కిలోతె ఎక్కిలో తుమ్ సంగితను, గని ఎక్కిలో దేముడు దెతి గవురుమ్క తుమ్ కోరప జసు నాయ్. జాకయ్ తుమ్ కిసి నంప జస్సె, నెతుర్చు.

45 “జలె, అబ్బొసి జలో దేముడుచి మొక్కె తుమ్క నేరిమ్ వయడ్తొసా ఆవ్ మెన తుమ్ ఉచర నాయ్. ‘మోస్చి అత్తి ప్రబు రెగిడ్డి ఆగ్నల్ నంపజలమ్, చి జాకయ్ రచ్చించుప జమ్దె.’ మెన, తుమ్క తుమి ఉచర్తను. గని జయి బోదన తుమ్క నేరిమ్ వయడ్తె అస్సె.

46 మోసే పూర్గుమ్చొచి అత్తి దేముడు రెగిడ్డిసి కోడు తుమ్ నంప కెర్తదు జలె, అంకయ్ నంప కెర్తదు! కిచ్చొక మెలె, అంచి రిసాయి జో రెగిడ్డె.

47 గని మోసే రెగిడ్డిసి తుమ్ నంప నే కెర్లె, ఆవ్ సంగిత కొడొ కిసి నంప కెర్తె!” మెన జేవ్ వెల్లెల మాన్సుల్క యేసు సంగిలన్.

6

పావ్ వెయిల్ జిన్క యేసు అన్నిమ్ దిలిసి

(మత్త 14:13-21; మార్కు 6:30-44; లూకా 9:10-17)

1 ఇన్నెచి పడ్డో యేసు గలిలయ ప్రాంతుమ్తె అన్నె గెచ్చు, జా గలిలయచి సముద్రుమ్ గాడు జిన ఒత్తల్తో గెలన్.

జా గాడుక ‘తిబెరియ గాడు’ కి మెనుల.

2 జలె, జబ్బుల్క జో యేసు చెంగిల్ కెర్త దేముడు అబ్బొసి దిలి అదికారుమ్క రుజ్జు దెకయ్త కమొ జేవ్ దెక తిలి రిసా, ఒగ్గర్జిన్ జనాబ్ గాడుచి ఒడ్డువాట్ ఇండ యేసుచి పట్టి గెచ్చుక బార్ జలె.

3 జలె, యేసు జోచ సిస్సుల్ తెన్ ఏక మెట్టయ్ వెగ, వెన అస్సి.

4 యూదుల్చి *పస్కా మెంతి పండుగు అన్నెక్ సుట్టు పాసి జెతయ్.

5 యేసు దెకిల్ పొది, ప్రెజల్ జట్లు జట్లు తెన్ జోతె జెతిసి దెక, పిలిప్ మెలో సిస్సుడుక “ఈంజేవ్ ప్రెజల్ కతి రిసా అమ్ కిసి అన్నిమ్ గెనుక?” మెన పుసిలన్.

6 కిచ్చొ కెరుక గే యేసు జానె, గని, జోచి రిసా పిలిప్ కెర్ది దయిరిమ్ తెన్ నంపజతయ్ గే దెకితి రిసా దస్సి మెన యేసు పుసిలన్.

7 జలె, పిలిప్ జోక, “ఈంజేవ్ మాన్సుల్ ఎత్తిజిన్క ఇదిల్ ఇదిల్ జవున్

* 6:46:4 పూర్గుమ్ పొది యూదుల్ ఐగుప్తు దేసిమి తా గొతిమాన్సుల్ జలిసి తెంతో ప్రబు రచ్చించుప కెర్సి ఏద కెర్తి పండుగు, ఈంజ. జా పండుగక నే పులయెల పొడియె రిత పొడియె కవుల.

దెంక జలె, †వెయి వెండ్లుచ పోడియె జలెకు నే బెరె” మెన సంగిలన్.

8 గని సీమోను పేతురు మెలో సిస్సుడుచో అంద్రెయ మెలో బావోసి జేవ్ సిస్సుల్తె అస్సె.

9 ఈంజో, జలె యేసుక “ఓదె, ఇన్నె తిలో ఇదిలోసా నాడు ఎక్కిలోక పాచ్ పోడియె చి దొన్ని ఇదుర్లు మొస్సు అస్తి, గని ఎత్కిజిన్క తెడ్దిలి కీసి వంట దెంక జయెదె!” మెన సంగిలన్.

10 యేసు “ఎత్కిజిన్క వెనవ దాస” మెన సిస్సుల్క సంగిలన్. జలె, ఒత్త చెంగిలి వెసితి రితి గర్చి చివర్ల తిలి టాన్ ఒగ్గర్ అస్సె, చి ఎత్కిజిన్ ప్రెజల్ వెసిల. ఎక్కి మున్సుబోదల్క లెక్క కెర్లె, జేవ్ మొత్తుమ్ పాసి పాసి పాచ్ వెయిల్జిన్ జలె.

11 జలె, యేసు జేవ్ పోడియె నజన, “తూయి ఈంజ అన్నిమ్ దా దయ కెర్లెది” మెన దేముడు అబ్బొన్క ఉచర, వెన తిలస ఎత్కిజిన్క పాచితి రితి వంట దిలన్. మొస్సుతెన్ కి దస్సి కెర, జేవ్ పేట్ బెర్తు కతి రితి వంట దిలన్.

12 ఎత్కిజిన్ పేట్ బెర్తు కయ్లి పడ్డె, “ఆరి పాచ్ జవున్ నాయ్ మెన, సేంసిల గండల్ గుడ్ల ఆన” మెన సిస్సుల్క యేసు సంగిలన్.

13 జలె, ఎత్కిజిన్ కయ్ల జేవ్ పాచ్ పోడియెచ సేంసిల గండల్ సిస్సుల్ గుడ్డిల. గుడ్డిలె, బార గంపల్ బెర్తు జలె.

14 జలె, దేముడు అబ్బొసి దిలి అదికారుమ్క రుజ్జు దెకయ్లి ఈంజ కామ్ ప్రెజల్ దెక కెర, “ఒహో, ‘అంచి కబుర్ సూనయ్తోసాక బూలోకుమ్తె బార్ కెరిందె’ మెన దేముడు సంగిలోసా ఈంజోయ్” మెన సంగితె తిల.

15 తెదొడి, జోక రానో కెర్రి రిసా దెరుక మెన ప్రెజల్ కోర్ప జలె, గని జోవయించి ఉద్దెసుమ్ చిన కెర, యేసు జోవయింక ముల దా, ఎక్కిలో గెచ్చ, మెట్టయ్ అన్నె గెలన్.

యేసు పానిచి ఉప్పిరి ఇండితయ్ (మత్త 14:22-27; మార్కు 6:45-52)

16 సాంజ్ జతికయ్, అందర్ జంక దెర తిలి, చి యేసు జోవయింతె అన్నె ఉత్త జెంక నేతయ్చి రిసా సిస్సుల్ “గెరి గెచ్చుము!” మెన గడ్డె గెచ్చ,

17 జోవయించి దోనితె వెగ, గాడు ఒత్తల్తో తిలి కపెర్నూహూమ్ పట్టుమ్తె గెచ్చుక మెన, దోని జినవుక దెర్ల.

18 ఇదిల్ దూరి జినయ్లి పొది, వాదు ఒగ్గర్ కెర్లి, చి వెల్లెల కెర్లల్ కెరుక దెర్లి.

19 దస వెల్లెల కెర్లల్ కెర్లిన్తె జేవ్ పాసి పాసి దొన్ని కోసుల్ దూరిక దోని ఇండయ్తికయ్, యేసు పానిచి ఉప్పిరి ఇండ జా, దోనిక పాసి పాచిలన్. జో దస్సి పాసి ఇండ జెతె తతికయ్, సిస్సుల్ దెక, “డుంబో, కిచ్చో గే!” మెన, బియఁ గెలె.

20 యేసు జోవయింక “తుమ్ బియఁ నాయ్. ఆఁవ్వి జెతసి” మెన దయిరిమ్ సంగిలన్.

21 తెదొడి సర్ల తెన్ జోకయి దోనితె వెగయ్ల, చి బేగి జేవ్ గెతి ఒడ్డుతె దోని పాచ గెలి.

ప్రెజల్ యేసుక చజిలిసి

22 జలె, జా గెలి దీసి పోడియె మొస్సు కయ్ల ప్రెజల్ సగుమ్జిన్, అన్నెక్ దీసి ఎద గాడు ఒత్తల్తో రకితె అస్తి. ‘గెలి దీసి ఎక్కి దోని తిలి’ మెన, ‘యేసు జోచ సిస్సుల్ తెన్ దోనితె వెగె నాయ్, చి జో నెంతె సిస్సుల్ ఉట్టు గెచ్చ తిల’ మెన, జేవ్ ప్రెజల్ ఉచార కెర అస్తి. జాకయ్, యేసుచి రిసా ‘మెట్టయ్ తెంతో ఉత్త జెంక నేతయ్. కిచ్చోగె’ మెన రకితె అస్తి.

23 రకితె తిలె, తిబెరియ పట్టుమ్ తెంతో, వేర దోనివొ అయ్ల. గెలి దీసి యేసు దేముడు అబ్బొన్క ఉచర వంట దిల పోడియె కయ్ల జేవ్ ప్రెజల్ తిలిన్తె, జలె, జేవ్ దోనివొ అయ్ల.

† 6:7 6:7 నెంజెలి, దొన్ పుంజోజిన్ మాన్సుల్క ఏక్ దీన్చి కూలి డబ్బుల్ దెతి ఎదిలి డబ్బుల్.

24 జైతికయ్, జోచ సిస్సుల్ కి యేసు కి ఇన్నె నాయ్ మెన పైజల్ దెక, జేవ్ అప్పె అయ్ల దోనివోతె వెగ, యేసుక చజుక మెన, కపెర్నహూమ్ పట్నుమ్తె గెచ్చు పావెల.

పరలోకుమ్తె బెదితి సెక్తి దెతి పోడియె

25 పైజల్ గాడు జిన, యేసుక చజ, జో తిలిసి జానన “గురుబాబు, కెయ ఉట్ట అయ్లది?” మెన పుసిల.

26 యేసు జోవయింక, “తుమ్ ఆవ్ నిజుమి కచితుమ్ కిచ్చో మెంతసి మెలె, తుమ్ ఒత్త పేట్ బెర్తు పోడియె కా కెర సుకుమ్ జలి రిసా అంక చజుక అయ్లదు, గని అంచి అదికారుమ్క రుజ్జు దెకయ్లె జా కామ్చి గుర్తు అర్దుమ్ కెరన్లి రిసా నాయ్.

27 ఆగ్ నుకుమ్ కెర్తి అన్నిమ్ గట్టచి రిసా తుమ్ ఉచర్తె తా నాయ్. జా ఎత్తి పాడ్ జతిసి. అన్నిమ్, మెన పరలోకుమ్తె బెదితి సెక్తి దెతిన్క టాలి కెర్లె, జయ్యి అన్నిమ్క కోరప జా. జయ్యి అన్నిమ్, జలె, కెయచ తెయచ తా గెతిసి. జయ్యి అన్నిమ్. జలె, ఆవ్ మాస్సు జా జెర్మన్ అయ్లోసా తుమ్క దెయిందె. జయ్యి తుమ్క ముక్కిమ్. జా దెంక అంక అదికారుమ్ కిసి తంక మెలె, దేముడు అబ్బో, దేముడు, అంచి అదికారుమ్చి రిసా సాచి సంగ జోచి ముద్ద దా అస్సె,” మెన పైజల్క యేసు సంగిలన్.

28 తెదొడి జేవ్ పైజల్ జోక “దేముడుచ కమె అమ్ కెరుక మెలె, అమ్ కిచ్చో కెర్లె జయెదె?” మెన పుసిల.

29 యేసు జోవయింక “దేముడు తుమ్క కిచ్చో పూచి తియార్తయ్ మెలె, ఆవ్ జో తెద్రయ్లోసాక తుమ్ పూర్తి నంపజంకయ్” మెన సంగిలన్.

30 సంగితికయ్, జేవ్ జోక “జలె, ‘జో తెద్రయ్లో రచ్చించుప కెర్లెసా తుయి’ మెన అమ్ దయిరిమ్ తెన్ నంపజతి రిసా తుచి అదికారుమ్క కిచ్చో గుర్తు అమ్క దెకయ్తె? కిచ్చో వెల్లి కామ్ కెర అమ్క రుజ్జు దెకయ్తె?

31 అమచ పూర్గుమ్చ వెల్లి బయిలె బుల్తె తిలి పొది, †‘మన్నా’ మెలి పోడియె రితిసి కతె తిల. జాకయ్, పరలోకుమ్తె తెంతో చి పోడియె రితిసి జోవయింక జో దిల్లో మెన దేముడుచ కొడెతె రెగ్గ అస్సె, గెద” మెన సంగిల.

32 పైజల్ యేసుక దస్సి సంగితికయ్, జో జోవయింక, “తుమ్క కిచ్చో నిజుమి కచితుమ్ ఆవ్ సంగితసి మెలె, తుమ్చ పూర్గుల్క పరలోకుమ్ తెంతో చి పోడియె మోసే దిలిసి నెంజె. దేముడు అబ్బోయి దిలిసి. జలె, తుమ్క నిజుమ్ జలి పోడి రితి, నిజుమ్ జలి పోడి దేముడు అబ్బో అప్పె పరలోకుమ్ తెంతో తెద్రవ దా తుమ్క దెతయ్.

33 దేముడు అబ్బో దిలి జయ్యి పోడియె, కిచ్చో జయెదె మెలె, పరలోకుమ్ తెంతో అప్పె రితి ఉత్త అయ్లిసి. జయ్యి పోడి ఒండి లోకుమ్చక సర్తి జతి జివ్ దెతిసి” మెన యేసు సంగిలన్.

34 యేసు దస్సి సంగితికయ్, “బాబు, జయ్యి పోడి అమ్క దెతె తా” మెన పైజల్ సంగిల.

35 జలె, యేసు జోవయింక, “సరి జతి జివ్ దెతి జా పోడి ఆవ్వి. కో అంక పూర్తి నంపజా కి అంచితె జెవుల గే, జోవయింక చూ, తాన్ కెయచ అస్సె కెరె నాయ్.

36 గని, ‘అంక దెకిలెకి తుమ్ నంప కెర్చు నాయ్’ మెన తుమ్క అగ్గె తెంతో సంగితసి.

37 “నంపజా రచ్చించుప జతు’ మెన కక్క దేముడు అబ్బో అంచితె

† 6:31 6:31 జా బయిలు దేసిమి బుల్తె తిలి పొది కిచ్చో కతిసి యూదుల్క నాయ్, చి ఎత్తి అదికారుమ్ తిల్లో దేముడు రోజుక అగాసుమ్ తెంతో జా ‘మన్నా’ మెలిసి సువెతె తిలన్. ఏక రగుమ్ పిట్టలె కి నేడయ్తె తిలన్; ‘పోడ కతు’ మెన. నిర్గమకాండుమ్ 16:1-36. § 6:35 6:35 మెలె ‘అంచి తెన్ బెదుల, అంచి రాజిమ్తె బెదుల’.

తెద్రయెదె గే, జెవుల, చి కో అంక నంపజా జెవుల గే, జోవయింక కెయఁక కి 'తుమ్క నెసి' మెన ఉదడి నాయ్.

38 ఆవ్ పరలోకుమ్ తెంతో అయ్లిసి కిచ్చొక మెలె, అంచి సొంత ఇస్టుమ్ అయ్లి రితి కెరుక నాయ్, గని, అంక తెద్రయ్లోసా సంగిలిసి నెరవెర్చుప కెరుకయ్.

39 అంక నంపజతి రిసా కక్క జో అంచితె తెద్రయెదె గే, జోవయింతె కక్క నే పిట్టయ్తె, వెల్లి తీర్పు కెర్తి జా ఆకర్ దీసిక, జోవయింక జియడ పరలోకుమ్తె బెదవుక అస్సె.

40 మెలె, అంచొ అబ్బొసి జలో దేముడుచి ఇస్టుమ్ కిచ్చొ మెలె, 'దేముడు ప్రబుచొ ఎక్కి పుత్తుసి ఈంజొయ్', మెన 'ఈంజొయి అమ్క దొర్కు జలో రచ్చొంచుప కెర్తొసా' మెన, కో అంక చిన పూర్తి నంపజవుల గే, పరలోకుమ్తె బెదితి జీవ్ జోవయింక దొర్కు జయెదె, చి వెల్లి తీర్పు కెర్తి జా ఆకర్ దీసిక జోవయింక జియడ పరలోకుమ్తె బెదయిందె. ఈంజయ్ అబ్బొసి జలో దేముడుచి ఇస్టుమ్" మెన యేసు సంగిలన్.

యేస్తుచి రిసా యూదుల్ అన్మానుమ్ జలిసి

41 'పరలోకుమ్ తెంతో ఉత్త్ర అయ్లి పోడి ఆవ్వి' మెన యేసు సంగిలి రిసా, ఒత్త తిల జేవ్ యూదుల్చ వెల్లెల మాన్సుల్ జోచి రిసా కోపుమ్ జా,

42 ఇసి మెన లట్టబన్. "ఈంజొ యేసు యోసేపుచొ పుత్తుసి, గెద. జోచ అయ్యన్అబ్బొన్క జానుమ్, గెద. దస్సి జలె, 'పరలోకుమ్ తెంతో ఉత్త్ర అయ్లయ్' మెన కిచ్చొక సంగితయ్?" మెన ఆసెల.

43 జేవ్ దస్సి జతికయ్, యేసు జోవయింక కిచ్చొ జబాబ్ దిలన్ మెలె, "ఆవ్ సంగిలిన్చి రిసా అన్మానుమ్ జా లట్టబన నాయ్.

44 అంక తెద్రయ్లో దేముడు అబ్బొ మాన్సుచి పెట్టి జోవయింక సికడ బుకార్లెకయ్ జేవ్ అంక నంపజా జెవుల. అయ్లె, వెల్లి తీర్పు కెర్తి జా ఆకర్ దీసిక జోవయింక జియడ పరలోకుమ్తె బెదయిందె.

45 పూర్గుల్చి అత్తి సంగిల దేముడుచ కబుర్లుచ కొడొతె రెగ్గ అస్సె.

దేముడు జేవ్ ఎత్కిజీన్క సొంత సికడెదె"

మెన రెగిడ్లి కోడు. దేముడు అబ్బొ జోవయింక సంగిలిసి కో నూన సికుల గే, అంక నంపజా జెవుల.

46 "జోతె తెంతో అయ్లోసొక పిట్టవ, కోయి దేముడు అబ్బొక కెయ దెకితి నాయ్. ఎక్కిలోయి జోక దెక అస్సె.

47 జలె, ఆవ్ తుమ్క కిచ్చొ నిజుమి కచితుమ్ సంగితసి మెలె, అంక కో సత్తిమ్ తెన్ నంపజవుల గే, జేవ్ నంపజలి తెంతో, పరలోకుమ్చి రాజిమ్తె బెదయ్ అస్సి.

48 సరి జతి జీవ్ దెతి పోడి, ఆవ్వి.

49 "తుమ్చ పూర్గుమ్చ జా వెల్లి బయిలె బుల్తె తిలి పొది 'మన్నా' మెలి జా పోడి కయ్లెకి, మాములుమ్ మొర్తి సమయ్యమ్ జా అయ్లె పొది, మొర గెల.

50 ఆవ్ అప్పె సంగితిసి, జలె, పరలోకుమ్ తెంతో దొర్కు జతి ఈంజయ్ పోడి, జలె, కిచ్చొక ఉత్త్ర జా అస్సె మెలె, ఈంజయి పోడి, కో కవుల గే, మొర్లె పొది సిచ్చ తిలి మొర్నుతె గెతి నాయ్.

51 పరలోకుమ్ తెంతో ఉత్త్ర అయ్లి జీవ్ దెతి పోడి ఆవ్వి. ఈంజయ్ పోడి కో కవుల గే, పరలోకుమ్తె గెచ్చ కెయఁక తెయఁక చెంగిల్ జివుల. జలె, 'జోవయించి పాపుమ్చి సిచ్చ జతి మొర్నుతె గెతు నాయ్, గని అంచి వరుమ్ నజ రచ్చొంచుప జతు' మెన

* 6:51 6:51 ఈంజ లోకుమ్చి పాపుమ్ గెచ్చయ్తి రిసా జో అర్పితుమ్ జంక తిలిన్చి రిసా 'అంచి ఆగ్ దెయిందె' మెన యేసు టాలి సంగితయ్.

ఆవ్ కిచ్చొ పోడి దెయిందె మెలె, అంచి *ఆగ్” మెన సంగిలన్.

52 యేసు జా సంగితికయ్, యూదుల్చ వెల్లెల మాన్సుల్ బమ్మ జా, “అమ్ కతి రిసా ఈంజొ మాన్సు జోచి ఆగ్ అమ్క కీసి దెంక జయెదె?” మెన ఎక్కిలో తెన్ ఎక్కిలో లట్టబై తిల.

53 జాకయ్ యేసు జోవయింక, “తుమ్క ఆవ్ నిజుమి కచితుమ్ కిచ్చొ సంగితన్ మెలె, ఆవ్ మాన్సు జా జెర్మున్ అయ్లోసాచి ఆగ్ తుమ్ నే కయ్లె, అంచి లోయి తుమ్ నే పిల్లె, తుమ్చి పెట్టి కిచ్చొ జీవ్ తయె నాయ్.

54 అంచి ఆగ్ కో కవుల గే, అంచి లోయి కో పివుల గే, దేముడుచి రాజిమ్తె బెదితి జీవ్ జోవయింక దొర్కు జా అస్సె, చి వెల్లి తీర్పు కెర్తి జా ఆకర్ దీసిక, జోవయింక జియడ, పరలోకుమ్తె బెదయిందె.

55 జాకయ్, అంచి ఆగ్ ముక్కిమ్ జలి అన్నిమ్, అంచి లోయి ముక్కిమ్ జలి పిత్తిసి జయెదె.

56 కో అంచి ఆగ్ కతి రితి అంచి లోయి పితి రితి జతతి గే, జో అంచి పెట్టి తత్తతి, చి ఆవ్ జోచి పెట్టి తయిందె.

57 “జీవ్ తిలో దేముడు అబ్బొ అంక ఈంజు లోకుమ్తె తెద్రయ్లో. జోచి జీవ్ అంచి పెట్టి అస్సె, చి జోచి జీవ్కయ్ ఆవ్ జితసి. దస్సి అంకయ్ కో కయ్లి రితి జా అంక జోచి పెట్టి తియసుల గే, అంచి జీవ్చి రిసా జేవ్ కి జివుల.

58 పరలోకుమ్ తెంతొ ఉత్త అయ్లి పోడి ఈంజయి. తుమ్చ పూర్ముచ కయ్లి రగుమ్ నెంజె. గని, ఈంజయ్ పోడియొ కో కవుల గే, పరలోకుమ్తె గెచ్చు కెయ్క తెయ్క జివుల” మెన యేసు సికడ్లన్.

59 యేసు కపెర్నహూమ్ పట్టుమ్చి జేవ్ యూదుల్చి సబ గెరి ఇసి మెన సికడ్లన్.

యేసు సంగిలి బోదనచి రిసా జో తెన్

బులుక ములిలిసి

60 యేసుక ఇదిల్ నంపజా సిస్సుల్ జంక దెర్ల మాన్సు, జలె, జో సంగిలిసి సూన కెర, జోవయింతె సగుమ్జిన్ బమ్మ జా, “జా కోడు అల్లర్చి! జా కోడు కో సూసుల!” మెన సంగిల.

61 జో నిసాన్ల సిస్సుల్ కి అన్మానుమ్ లట్టబ్తతి మెన యేసు పెట్టి జానిలన్, చి “ఆవ్ అప్పె సంగిలిన్చి రిసా తుమ్ అన్మానుమ్ జతను గే?

62 జలె, ఆవ్ మాన్సు జా జెర్మున్ అయ్లోసా ఆవ్ అగ్గె తిలిన్తె అన్నె వెగ గెతిసి తుమ్ దెకిలె, కీన్ జస్తె!

63 జీవ్ తిలెకయ్ మాన్సు జియెదె. జీవ్ నెంజిలె, ఆగ్ కామక నెంజె. ముక్కిమ్ జలి ఆవ్ సంగిలి జీవ్ కిచ్చొతె మెలె, ఆవ్ తుమ్క సంగిల కొడతెయ్ అస్సె.

64 గని తుమ్చితె సగుమ్జిన్ నంపజతి నాయ్” మెన జోవయింక సంగిలన్. జోవయింతె కో నంపజతి నాయ్ గే, అన్నె పడ్డొక జోక మార్తనచి అత్తికో దెర దెయెదె గే, యేసు అగ్గె తెంతొ జానె.

65 తెదొడి అన్నె, “జాకయ్ ‘దేముడు అబ్బొ జా సెక్తి దిలెకయ్, నెంజిలె కో కి అంక నంపజంక, అంచితె జెంక నెత్తిర్చి’ మెన తెదొడి సంగిలయ్” మెన సంగిలన్.

66 జలె, జా దీసి జో సంగిలిసి ఓర్పుప జంక నెత్త కెర, జోవయించి పట్టి గెతె తిలసతె ఒగ్గర్జిన్ సిస్సుల్ అన్మానుమ్ జా, ఒత్త తెంతొ జో తెన్ బుల్తి నాయ్.

67 జేవ్ దస్సి జతికయ్, జో నిసాన్ల బారజిన్ సిస్సుల్క యేసు, “తుమ్ కి అంక ముల దా ఉట్ట గెతె గే?” మెన పుసిలన్.

68 “ప్రబు, అమ్ అన్నె కత్తెయ్ గెచ్చుమ్దే? దేముడుచి రాజిమ్తె బెదుక కీసి గే తుచయ్ కొడతె సూసుక జతయ్, గని అన్నె కత్తెయ్ నాయ్.

† 6:69 6:69 దేముడు తెద్రయ్లో రచ్చించువ కెర్తొసా జలోసా,

69 జాకాయ్ 'దేముడుచి నుద్ది తిలోసా† క్రీస్తు తుయి' మెన తుకయ్ అమ్ నంపజా అస్సుమ్, కచితుమ్ జానుమ్" మెన సీమోను పేతురు దయిరిమ్ తెన్ సంగిలన్.

70 తెదొడి యేసు జేవ్ బారజిన్ కిచ్చొ జాగర్త సంగిలన్ మెలె, "తుమ్ బారజిన్ ఎత్కిక ఆవ్ నిసాన్లయ్, గెద. గని, తుమ్చితె కి సయ్తానొ సేవ కెర్తొసా ఎక్కిలో అస్సె" మెన సంగిలన్.

71 కచి రిసా దస్సి సంగిలో మెలె, సీమోను ఇస్కరియోతు మెలో ఎక్కిలోచొ యూదా మెలో పుత్తున్చి రిసా. కిచ్చొక మెలె, పడ్డొ, జేవ్ జోక మార్తి రిసా, విరోదుమ్ సుదల్చి అత్తి యూదా యేసుక దెర దెయెదె మెన తెదొడి కి యేసు జానె.

7

1 జా మదెనె, యూదుల్చ వెల్లెల మాన్సుల్ జోక మారుక కోర్ప జా అస్తి మెన యేసు జానెచి రిసా జోవయింక ముక్కిమ్ తిలి యూదయ ప్రదేసిమ్తె గెచ్చె నాయ్, గని గలిలయ ప్రాంతుమ్తె బుల్తె తిలో.

2 జలె, యూదుల్చి అన్నెక్ పండుగు పాసి జా అయ్లి. జాక 'కుడియల్ పండుగు' మెనుల.

3 జలె, యేసుచ బావుడ్సివొ జోక కిచ్చొ మెల మెలె, "ఒత్త తిల తుచ సిన్సుల్ జల మాన్సుల్ దెకితి రిసా, ఈంజ డొంగుర్ దేసిమ్ ముల దా, *యూదయ ప్రదేసిమ్తె గెచ్చె, తుచ వెల్లెల కమె ఒత్తయ్ కెరు.

4 మెలె, 'అంచి అదికారుమ్ మాన్సుల్ చినుతు' మెన ఎక్కిలోచి ఆన జలె, జోచ కమె కో నెంజిల్తె కెరె నాయ్. ఒగ్గర్జిన్ తిలిన్తె కెరెదె. తుయి వెల్లెల కమె కెర్తెసి జలె, ఎత్కిజిన్ దెకితి రితి ఒత్త కెరు" మెన సికడుక దెర్ల.

5 జోచి అయ్యున్చి పెట్టి జెర్మిల ఈంజేవ్ బావుడ్సివొ కి జోక 'దేముడు తెద్రయ్లో క్రీస్తు రచ్చించుప కెర్తొసా' మెన నంప కెర్తొ నాయ్.

యేసు దిలి జబాబ్
6 జేవ్ దస్సి సంగితికయ్, యేసు జోవయింక, "ఆవ్ గవురుమ్ జతి సమయుమ్ జెంక నేతయ్. తూమ్, మాత్తుమ్, కెడ్డొడ తెదొడ గవురుమ్ జంక జతయ్.

7 జేవ్ కెర్తి రితి తూమ్ కి కెర్తెసుచి రిసా, ఈంజ లోకుమ్చ మాన్సుల్ తుమ్క విరోదుమ్ దెకుక నెత్తిర్తి, గని జోవయించ కమెక 'గర్చు' మెన ఆవ్ తీర్చు సంగితసిచి రిసా అంక విరోదుమ్ దెకితతి.

8 తుమి ఒత్త గెచ్చు పండుగు కెర. ఆవ్ అప్పెచి మట్టుక ఈంజ పండుగ్ గెచ్చె నాయ్. ఆవ్ గెతి సమయుమ్ పూర్తి జెంక నేతయ్" మెన సంగ,

9 యేసు గలిలయతె తా గెలో.

కుడియల్ పండుగు కెర్తెన్తె యేసు గెలిసి

10 జలె, జోవయించ బావుడ్సివొ పండుగ్తె ఉట్ట గెలి ఇదిల్ పడ్డొ, యేసు కి గెలన్. ఎత్కిజిన్ దెకిత్ రితి నాయ్, గని కో నేస్సి రితి గెలన్.

11 జా మదెనె, పండుగ్తె గెల యూదుల్చ వెల్లెల మాన్సుల్ 'యేసు కేతె?' మెన జోక చజెత్తి తిల.

12 ప్రెజల్ కి జోచి రిసా జోవయింతెన్ ఇనయింతెన్ లట్టబై తిల. "జో చెంగిలో మాన్సు" మెన సగుమ్జిన్ సంగితె తిలె, "నాయ్, ప్రెజల్క మోసిమ్ కెర్తయ్" మెన అన్నె సగుమ్జిన్ సంగితె తిల.

13 గని వెల్లెల మాన్సుల్క బియఁ కెర, జోచి రిసా కో ఎదార్దుమ్ లట్టబై నాయ్.

దేముడుచి గుడితె యేసు బోదన కెర్తిసి

* 7:3 7:3 'యూదయ ప్రదేసిమ్తె గొ' మెన కిచ్చొక సికడ్తతి మెలె, యెరూసలేమ్ పట్టుమ్ చి దేముడుచి గుడి జయి ప్రదేసిమి తవుల, చి పండుగ్ మాన్సుల్ ఒత్తయ్ బెర తవుల.

14 జలె, సగుమ్ వండుగ్ కేడ్డి పొది, యేసు దేముడుచి గుడితె గెచ్చు, తెడి పెన, బోదన కెరుక దెర్లన్.

15 జోచి బోదన నూన కెర, యూదుల్చ వెల్లెల మాన్సుల్ “అమ్చి తెన్ ఈంజో మాన్సు కెయ నే సదు కెరై కి, బలే తెలివి తెన్ బోదన కెర్లయ, కీసి?” మెన ఆచారిమ్ తెన్ లట్టుబన్న.

16 జాచి రిసా యేసు జోవయింక కిచ్చొ జబాబ్ దిలన్ మెలె, “ఆచ్ కెర్తి బోదన ఆచ్ ఉచర్లిసి నెంజె. ఈంజ అంక తెద్రయ్లోసాచి బోదన.

17 అంక తెద్రయ్లోసాచి ఇస్టుమ్ రితి కెరుక కో కోర్వ జవుల గే, జెవ్వి అంచి బోదన నూనై, జేవ్ దేముడు సికడ్డిసి జయెదె గే, నాయ్ మెలె, ఆచ్ ఉచర్లిసి జయెదె గే” జోవయించి వెట్టి చినుల.

18 గవురుమ్ ఆనసుక ఆన జలన, జలె, జేవ్ జేవ్చి ఉచర్లిసి సికడుల. గని, జోక తెద్రయ్లోసాచి గవురుమ్ దెకవుక ఆన జలోసా జలె, సత్తిమ్చొ జయెదె, జోతె కిచ్చొ అబద్దుమ్ తయె నాయ్.

19 “మోసే పూర్ముచొ దేముడుచ ఆగ్గుల్ తుమ్చి రిసా దేముడుచ ఆగ్గుల్ రెగ్గ దిలన్. గని ఒత్త తిల ఆగ్గుల్ రితి తుమ్చితె కో కి నిదానుమ్ కెర్చు నాయ్. నెంజిలె, కిచ్చొక అంక మారుక కోర్వ జతసు?” మెన సంగిలన్.

20 యేసు దస్సి సంగితికయ్, ప్రెజల్ తుక “బూతుమ్ దెర అస్సి, కిచ్చొగె, చి దస్సి సంగితసి! కో తుక మారుక కోర్వ జతతి?” మెన సంగిల.

21 జలె, యేసు జోవయింక, “ఆచ్ జా సెలవ్ కడన్లి దీసి జో రోగిక చెంగిల్ కెర్లి కామ్ కెర్లయ, చి ‘కామ్ కెర సెలవ్ కడన్లి దీసిచి ఆగ్గు పిట్టయ్లో’ మెన తుమ్ ఎత్తిజిన్ అంచి రిసా బమ్మ జతసు.

22 తుమ్ ఉచర. ‘తుమ్ యూదుల్క మున్సుబోద జెర్లిలె, జోవయింక

దేముడుచొ మాన్సు జవున్’ మెన సున్నతి కెరనుక, జో బోదక ఇదిలిన్ సుద్ది కెర+ మెన మోసే పూర్ముచొ రెగిడ్డో, గెద.

జా కారిమ్, జలె, మోసే తెన్ మొదొల్ జలిసి నెంజె. జోచి కంట అగ్గచ పూర్ముల్ కి దస్సి కెరై తిల. గని సున్నతి కెర మెన ఆగ్గుల్తె రెగిడ్డన్. జాకయ్, ఏక్ నాడు జెర్మ అట్టు పొదుల్ జలిసి సెలవ్ కడన్లి దీసి సేడ్లె, జా ఆగ్గు పిట్టున్ నాయ్ మెన, జయ్యి దీసి, సెలవ్ కడన్లి దీసి జలెకి, జా కామ్ కెర్లసు.

23 జలె, ‘మోసే రెగిడ్డి దేముడుచి ఆగ్గుల్ తెన్, ఈంజ ఏక్ ఆగ్గు పిట్టున్ నాయ్’ మెన సెలవ్ కడన్లి దీసి కి ఏక్ మాన్సుకి సున్నతి కెరుక జయెదె జలె, సెలవ్ కడన్లి దీసి కి ఏక్ ఒండొయి మాన్సుచి ఆగ్గె చెంగిల్ కెరుక నెంజె గె?

24 జలె, కిచ్చొ జవున్ జర్గు జా తిలె, ఇసి గే దస్సి గే డీసిలి రిసా ‘ఆగ్గు పిట్టి’ జవున్, నాయ్ మెలె, ‘ఆగ్గు పిట్టె నాయ్’ రిత ఆగ్గుల్క నంపజా అస్సున్. దస్సి, అర్దుమ్ నెంతె, కన్యూరుమ్ నెంతె తీర్పు కెరుక పొన. ఆగ్గుచి అర్దుమ్, జర్గు జలిన్చి అర్దుమ్, సరిగా ఉచర తీర్పు కెర” మెన జేవ్ వెల్లెల మాన్సుల్క యేసు సంగిలన్.

యేసుచి రిసా ఈంజొయి క్రీస్తు గే

25 యేసు దస్సి బోదన కెర్తికయ్, యెరూసలేమ్ పట్టుమ్చ మాన్సుల్ సగుమ్జిన్ “జోక మూరుమ్’ మెన వెల్లెల మాన్సుల్ కోర్వ జలోసా ఈంజొయి, కిచ్చొగె.

26 గని, ఈందె, జోవయించి మొక్కె దయిరిమ్ తెన్ బోదన కెర్లయ, గని జోక ‘పొని’ కి మెంతి నాయ్. జలె, జోక ‘తెద్రయిందె’ మెన దేముడు సంగిలో ‘దొర్కు జలో రచ్చించుప కెర్తొసా జతో క్రీస్తు ఈంజొయి’ మెన ఏక్ వేల అదికారుల్క రుజ్జు జా అస్సి గె?

27 నాయ్, కిచ్చొగె. మెలె, ఈంజొ మాన్సు కేనె తెంతో అయ్లో గే †జానుమ్. గని క్రిస్తు అయ్లెగిన, కేనె తెంతో జెతయ్ గే కక్క నేన్తె జయె నాయ్” మెన ఉచర లట్టబన్.

28 జేవ్ ఉచర్లిసి యేసు జాన్లి రిసా, దేముడుచి గుడితె బోదన కెర్తె తిలి పొది, ఇసి మెన కేక్ గలన్. “జోక జానుమ్! జో కేనె తెంతో అయ్లో గే అమ్ జానుమ్! మెన, అంచి రిసా తుమ్ ఉచర్తను జలె. గని నేన్సు. ఆవ్ అవ్వె జెంక నాయ్. అంక తెద్రయ్లోసా సత్తిమ్ తిలోసా. జోక తుమ్ నేన్సు.

29 ఆవ్ మాత్తుమ్, జోక జాని. కిసి మెలె, ఆవ్ జోతె తెంతో ఉత్త అయ్లయ్. జొయ్యి అంక తెద్రయ్లన్” మెన సంగిలన్.

30 యేసు దస్సి సంగితికయ్, జేవ్ వెల్లెల మాన్సుల్ “జోక జేలి కెరుమ్!” మెన ఉచర్ల, గని జోక కో దెర్తి నాయ్. కిచ్చొక మెలె, అబ్బొన్తె జో గెతి సమయ్యుమ్ తెదొడి జెంక నేతయ్.

31 యేసుక వెల్లెల మాన్సుల్ దస్సి విరోదుమ్ జలెకి, మాములుమ్ ప్రెజల్, జలె, ఒగ్గర్జిన్ జోక నంపజల. “ఈంజొ మాన్సు ఒగ్గర్ ఒగ్గర్ వెల్లెల కమె కెర్తయ్. క్రిస్తు మెలో అమ్చొ రచ్చించుప కెర్తొసా అయ్లె ఇసి తయెదె. అన్నె వెల్లెల కమె కెరుక కో తెరితి గే? ఈంజొ జొయ్యి, కిచ్చొగె” మెన నంపజల.

32 ప్రెజల్ యేసుక నంపజలి రితి జా ఎక్కిలో తెన్ ఎక్కిలో ఇసి తిరిమ్ లట్టబంతిసి పరిసయ్యుల్ సూన్లచి రిసా “జోక జేలి కెరుక దెర జా!” మెన దేముడుచి గుడితెచ జమాన్సుక వెల్లెల పూజర్లు చి పరిసయ్యుల్ తెద్రయ్ల.

33 జలె, జా మదెనె యేసు అన్నె బోదన కెర్తె తా, “అన్నె సగుమ్ దీసల్ తుమ్చి తెన్ తయిందె, చి తెదొడక అంక తెద్రయ్లోసాతె అన్నె ఉట్ట గెచ్చిందె.

34 ఆవ్ ఉట్ట గెలి పడ్డొ తుమ్ అంక చజితె, గని అంచితె పాచ్చుక నెతుర్పు. ఆవ్ కేనె తయిందె గే, తుమ్ ఒత్త జెంక నెతుర్పు” మెన సంగిలన్.

35 జాకయ్ యూదుల్చ వెల్లెల మాన్సుల్ ఎక్కిలోక ఎక్కిలో “అమ్ నే పావితి రితి ఈంజొ కేనె గెచ్చెదె? గ్రికు దేసిమి తిల చెదుర్పు జల అమ్చ యూదుల్తె గెచ్చు, గ్రిసు దేసుమ్చ సుద్దల్క బోదన కెర్తెదె గే?

36 నాయ్ మెలె, ‘తుమ్ అంక చజితె కి అంచితె పాచ్చుక నెతుర్పు’ మెన ‘కేనె తయిందె గే, తుమ్ ఒత్త జెంక నెతుర్పు’ మెన కిచ్చొక సంగిలన్?” మెన లట్టబనుక దెర్లె.

37 జా పండుగచి ఆకర్ దీసి అయ్లి. జాక ‘వెల్లొ దీసి’ మెనుల. జా దీసి, ఎత్తిజిన్ బెర తిలిన్తె యేసు టీవ జా, ఇసి మెన కేక్ గలన్. “కక్క జలెకు తాన్ కెర్తె, అంచితె జా పివుసు.

38 కో అంక పూర్తి నంపజవుల గే, దేముడుచి కొడొతె రెగ్గయ్లి రితి, జోచి పెట్టి తెడి ఊంబుట్టి రితి జా, జీవ్ దెతో పాని జోచి ఆత్మచెంగిల్ కెర్తె తయెదె” మెన, ఎత్తిజిన్ సూన్తి రితి యేసు సంగిలన్.

39 ‘జీవ్ దెతో పాని’ మెన కిచ్చొచి గుర్తుక సంగిలన్ మెలె, దేముడుచి సుద్ది తిలి ఆత్మచి గుర్తుకయ్. యేసు మొర దేముడు అబ్బొన్తె అన్నె గెలె, జోక కో నంపజా తవుల గే, జోచి జా ఆత్మ జోవయించి పెట్టి జెయెదె. జలె, యేసు తెదొడి అబ్బొన్తె అన్నె గెచ్చుక, గవురుమ్ జంక, నేతయ్చి రిసా, జో సంగిలి జా ఆత్మ తిలిసి తెదొడి జర్లు జంక నేతయ్.

40 యేసు దస్సి బోదన కెర్తికయ్, సూన కెర జోచి రిసా ప్రెజల్ సగుమ్జిన్ కిచ్చొ మెల మెలె, “‘తెద్రయిందె’ మెన

† 7:27 7:27 ‘సజరితు గవ్వె తెంతో అయ్లో’ మెన ఉచర్తతి. నేన కెర ‘జానుమ్’ మెంతతి గని పరలోకుమ్ తెంతో అయ్లో గెద.

దేముడు సంగిలో జోచ కబుర్లు సంగుక జెంక తిలోసా ఈంజో నిజామ్ జా తయెదె" మెన సంగిల.

41 గని అన్నె సగుమ్జిన్ "తెద్రయిందె మెన దేముడు సంగిలో క్రీస్తు రచ్చించుప కెర్తొసా జా తయెదె" మెల, గని "నెంజె. ఈంజో గలిలయ ప్రాంతుమ్చో మాన్సు. క్రీస్తు, జలె, గలిలయతె జెర్కుక నెంజె.

42 ఈందె, దేముడుచి కొడొతె రెగిడ్డి రితి, అమ్చో రానొ జలో దావీదు పూర్ణుమ్చొచి సెకుమ్తె క్రీస్తు జెర్కొదె. దావీదుచి గావ్ బేత్లెహేమ్. ఒత్తయ్ జో జెర్కుక అస్సె. దస్సి జలె ఈంజో క్రీస్తు జయె కీనాయ్" మెన సంగిల.

43 దస్సి జతికయ్, జోచి రిసా ప్రెజల్ దొన్ని మెన్సు జల.

44 జోవయింతెన్ సగుమ్జిన్ "జోక జేలి కెర్తొ!" మెన కోర్ప జల. గని జోక దెరుక మెన కో చడితి కి *నాయ్.

దేముడుచి గుడిచ అదికారుల్ కోపుమ్ జలిసి

45 తెదొడి, జోక దెర్తి రిసా గెచ్చ తిల జమాన్లు వెల్లెల పూజల్ల చి పరిసయ్యుల్ తిలిన్తె అన్నె అయ్ల. జెతికయ్, జేవ్ పరిసయ్యుల్, పూజల్లు, "కిచ్చొక జోక దెర ఆన్సు నాయ్?" మెన గోల కెర్ల.

46 గోల కెర్తొకయ్, జేవ్ జమాన్లు, "కేన్ మాన్సు కెయ్ తెద్ది చెంగిల్చి బోదన సంగె నాయ్" మెన సాచి సంగిల.

47 పరిసయ్యుల్ కోపుమ్ జా జోవయింక కిచ్చొ జబాబ్ దిల మెలె, "తూమ్ కి జోచ కొడొక మోసిమ్ జలదు గే?

48 అమ్ పరిసయ్యుల్తె జవున్, అమ్చ అదికారుల్తె జవున్ కో జలెకు జోక నంపజా అస్సుమ్ గే? నాయ్, గెద.

దస్సి జలె, తూమ్ కిచ్చొక జోక నంప కెరుక?

49 మాములుమ్ ఈంజేవ్ ప్రెజల్ నంప కెర అస్సి, గని మోసే తెన్ దేముడు దిలి అగ్గుల్ నేన్తి జేవ్క కిచ్చొ పున్నిమ్ నాయ్, దేముడుక నేన్తి" మెన ప్రెజల్ నంపజలిన్క వెల్లెల మాన్సుల్ నిస్కూరుమ్ సంగిల.

50 యేనుతె అగ్గె రాతి లుంకచోరు కిచ్చొగె పుసుక గెచ్చ తిలో నీకొదేమొ మెలో పరిసయ్యుడు, జలె, జో వెల్లెల మాన్సుల్తె అస్సె.

51 అన్నె తిల జేవ్ వెల్లెల మాన్సుల్క జో, జలె, "కేన్ జలెకు మాన్సుక నేరిమ్ వయడ తిలె, దేముడు మోసే తెన్ దిలి అగ్గుల్తె రెగ్గయ్లి రితి జో మాన్సు సంగన్తి సాచి నే సూన్తె అగ్గె, జో కిచ్చొ కెర్లొ గే నాయ్ గే, రుజ్జు నే దెకయ్తె అగ్గె జోక తీర్పు కెర సిచ్చ కెరుక అమ్చి తెన్ నాయిమ్ గే? నాయ్, గెద" మెన జాగర్ల సంగిలన్.

52 జేవ్ అన్నె వండితుల్ నీకొదేమొక కిచ్చొ జబాబ్ దిల మెలె, "తూయి కి గలిలయచో గే, చి జోచి పచ్చెనచి కోడు తుయి సంగితసి? దేముడుచి కొడొ సరిగా నదు కెరు, చి దేముడుచ కబుర్లు సంగితన కో కి గలిలయతె జెర్మితి నాయ్ మెన దెకితె" మెన సంగిల.

53 తెదొడి ఎత్కిజిన్ జోవయించ గెరలె ఉట్ట గెల.

8

వెల్లెల మాన్సుల్ తేర్బోదక దెర యేనుతె కడ ఆస్సిని

§ 7:42 7:42 నిజమి బేత్లెహేమ్తె, దావీదు రానొచి సెకుమ్తె జెర్మిలన్; మత్తయ 1:1, 2:1; గని నేన కెర దస్సి

మెల. * 7:44 7:44 జో అబ్బొన్తె అన్నె గెతి సమయ్యుమ్ జంక నేతయ్చి రిసా దెరుక నెతిర్ల. అన్నె సగుమ్ సుట్టు కి వెల్లెల మాన్సుల్ అల్లర్ కెరుక ఉచర్లె కి, నెతిర్ల; లూకా 4:29-30, యోహాను 7:30, 8:20. జోవయించి సమయ్యుమ్ జా అయ్లి పొది జేవ్ దెరుక జో ఒప్పణ్ణొ, మత్తయ 26:53-54, మార్కు 14:41, యోహాను 18:4, 6. † 7:52 7:52 గని గలిలయతె జెర్మి నాయ్, యూదయ ప్రదెసిమ్చి బేత్లెహేమ్ పట్టుమ్తె జెర్మిలన్, గెద.

1 *యేసు, దేముడుచి గుడి తెంతో బార్ జా, జేవ్చి మొక్కె తిలి †బలీవ మెట్టయ్ ఎక్కిలో గెలన్.

2 చి రాత్ పాయితికయ్, దేముడుచి గుడితె అన్నె ఉట్ట అయ్లో. అయ్లె, ఒగ్గర్జిన్ జనాబ్ అయ్ల, చి జో వెన కెర, జోవయింక బోదన కెరుక దెర్లన్.

3 యేసు బోదన కెరై తతికయ్, మోసి తెన్ దేముడు దిలి ఆగ్గుల్ సికడ్డన, పరిసయ్యుల్, బెద జా, ఏక తేర్బోదక కడ ఆన్ల. జా తేర్బోద లంజె జతె తతికయ్, దెర తిల. జలె, బెర తిల మాన్సుల్చి నెడిమి జాక టీవడ్డ.

4 యేసుక కిచ్చొ మెల మెలె, “గురుబాబు ఈంజ తేర్బోద లంజె జతె తతికయ్, దెర్ల.

5 ‘ఇన లంజె జలనక పత్తల్ తెన్ పెట మారుక అస్సె’ మెన అమ్చొ మోసి పూర్గుమ్చొచి అత్తి రెగిడ్డి దేముడుచి ఆగ్గుల్తె అమ్క ఆగ్గు దిలన్. జలె, ఈంజ తేర్బోదచి రిసా తూయి కిచ్చొ తీర్పు సంగితె?” మెన యేసుక పుసిల.

6 కిచ్చొక దస్సి పుసిల మెలె, జో కిచ్చొ జవున్ తప్పు సంగిలె, నేరిమ్ వయడుమ! మెన దస్సి కెర్ల. యేసు మాత్రమ్, వంపొ జా, బుయ్యె ఊంటి తెన్ కిచ్చొగె రెగిడ్డన్.

7 జేవ్ జోక పుసుక ములితి నాయ్ చి రిసా యేసు టీవ, జోవయింక, “తుమ్చితె కో కిచ్చొ పాపుమ్ నే కెర తయెదె గే, జొయ్యి తొలితో చి పత్తురు జాక గలుక జయెదె” మెన సంగిలన్.

8 చి అన్నె వంపొ జా, బుయ్యె అన్నె కిచ్చొగె రెగిడ్డన్.

9 జలె, జో సంగిలిసి ఎత్కిజిన్ నూన అర్దుమ్ కెరన, తొలితో వెల్లెల మాన్సుల్, పడ్డొ ఎత్కిజిన్ ఎక్కిలోచి పట్టి ఎక్కిలో వర్స తెన్ బార్ జా, ఉట్ట గెల, చి టీవ

తిలి జా తేర్బోదక పిట్టవ, యేసు ఎక్కిలో ఒత్త తిలో.

10 జలె, యేసు అన్నె ఉప్పిరి దెక, జా తేర్బోదక, “అమ్మ, కేతె జేవ్ ఎత్కిజిన్? కో తుక నేరిమ్ వయడ్డి నాయ్?” మెన సంగితికయ్,

11 జా తేర్బోద యేసుక, “బాబు, కోయి నాయ్!” మెన సంగిలి. తెదొడి యేసు జాక, “ఆవ్ కి తుక నేరిమ్ వయడి నాయ్. తుయి గో, చి అన్నె తెంతో పాపుమ్ నే కెరై జి!” మెన సంగ తెద్రవ దిలన్.

“ఈంజ లోకుమ్చక దొర్కు జలి ఉజిడి ఆవ్వి”

12 అన్నెక్ నుట్టు యేసు బోదన కెరై తతికయ్ కిచ్చొ మెన సంగిలన్ మెలె, “ఈంజ లోకుమ్చక దొర్కు జలి ఉజిడి ఆవ్వి. కో అంచి పట్టి ఇండుల గే, అందరతె తిలి రితి అందరబుద్ది ఇండితి నాయ్, గని జీవ్ దెతి ఉజిడి జోవయింక దొర్కు జా జోవయించి పెట్టి తయెదె” మెన సంగిలన్.

13 జో దస్సి సంగితికయ్, పరిసయ్యుల్ జోక, “తుచి రిసా తుయి సాచి సంగితసి; తుచి సాచి సత్తిమ్చి నెంజె” మెన సంగిల.

14 జలె, యేసు జోవయింక, “ఆవ్ సొంత సాచి సంగలై కి, అంచి సాచి సత్తిమి. కిచ్చొక మెలె, ఆవ్ కేనె తెంతో అయ్లయ్ గే, కేనె అన్నె గెతసి గే, ఆవ్ జాని గని కేనె తెంతో ఆవ్ అయ్లయ్ గే, కేనె గెతసి గే, తూమ్ నేన్సు.

15 తూమ్ అవ్వి కెర మాన్సు ఉచర్చి రగుమ్ తీర్పు కెర్తను, గని ఆవ్ అప్పెచి మట్టుక కక్క తీర్పు కెరి నాయ్.

16 గని ఆవ్ తీర్పు కెరుక జలె, అంచి తీర్పు సత్తిమ్ జయెదె. కిచ్చొక మెలె, ఆవ్ అవ్వి కెర కి ఎక్కిలో కి తీర్పు కెరి

* 8:18:1 యోహానుచి సాచి రెగిడ్డ గ్రీకు బాన తెన్ తొలితో రెగిడ్డ సగుమ్ పుస్తకతె ఈంజ మత్తిలె తయె నాయ్. నెంజెలె, వేరతె తయెదె. సగుమ్తె యోహాను 2:25చి పడ్డొ తయెదె. † 8:18:1 ఒత్త బలీవ పండ్లు రూకుల్ తవుల, చి ఇసి నావ్ తయెదె.

నాయ్. ఆవ్, అంక తెద్రయ్లోసా తెన్ని తీర్పు కెరుమ్దే.

17 “కో దొగుల ఎత్తి రితి సాచి సంగుల గే, జా సాచి సత్తిమ్చి జయెదే’ మెన తుమ్చి మోసే పూర్గుమ్చొచి అత్తి దేముడు రెగ్గయ్ల †ఆగ్గుల్తె రెగ్గ అస్సె.

18 జలె, ఆవ్ సొంత సాచి సంగితసి, చి అంక తెద్రయ్లో అబ్బొ కి అంచి రితి ఎక్కి రితి సాచి సంగితయ్” మెన వెల్లెల మాన్సుల్క యేసు జబాబ్ దిలన్.

19 జేవ్ జోక, “అబ్బొది కేతె?” మెన పుసిల. పుసితికయ్, యేసు జోవయింక, “తుమ్ అంక నేన్సు. అంచొ అబ్బొక కి నేన్సు. అంకయ్ జాన్తదు జలె, అబ్బొక కి జాన్తదు” మెన సంగిలన్.

20 బోదన కెర కెర ఇసి సంగిలి పొది యేసు కేనె తిలన్ మెలె, దేముడుచి గుడితెచి డబ్బుల్ పెట్టల్ తిలి గదితె తిలన్. గని జోక జేలి కెర్తి నాయ్. కిచ్చొక మెలె, జో దేముడు అబ్బొన్తె గెతి సమయుమ్ జంక నేతయ్.

21 జేవ్ వెల్లెల మాన్సుల్క యేసు అన్సె, “ఆవ్ ఉట్ట గెచ్చింది. ఉట్ట గెలె, తుమ్ అంక చజిలె కి, తుమ్చ పాపల్ తెన్ని మొర గెతె. మొర గెలె, ఆవ్ గెతిన్తె తుమ్ జెంక నెతుర్పు” మెన సంగిలన్.

22 యూదుల్చ జేవ్ వెల్లెల మాన్సుల్ ఎక్కిలో తెన్ ఎక్కిలో కిచ్చొ మెల మెలె, “ఆవ్ గెతిన్తె తుమ్ జెంక నెతుర్పు’ మెన జో సంగిలిసి కిచ్చొక? జో అత్య కెరన ఎట్టొతో గెచ్చెదె గే?” మెన లట్టబన్ల.

23 జలె, యేసు జోవయింక, “తుమి ఎట్టొచ మాన్సుల్, ఆవ్ ఉప్పిర్ తెంతొచొ మాన్సు. తూమ్ ఈంజ లోకుమ్చ కమె కెర్తన, ఆవ్ ఈంజ లోకుమ్చొ మాన్సు నెంజి.

24 ‘తుమ్చ పాపల్ తెన్ని మొర గెతె’ మెలయ్. కిచ్చొక మెలె ‘దేముడు

తెద్రయ్లో క్రిస్తు, రచ్చించుప కెర్తొసొ, ఈంజొయి’ మెన అంక తుమ్ నే నంపజలె, నిజమి తుమ్చ పాపల్ తెన్ మొర గెతె, పాపుమ్తె గెతె” మెన సంగిలన్.

25 జోక, జేవ్ వెల్లెల మాన్సుల్ యేసుక “తుయి కొన్సొ?” మెన పుసిల. యేసు జోవయింక, “ఆవ్ కొన్సొ జయిందె గే ఆవ్ తుమ్క అగ్గ తెంతొ సంగితసి గెద, జొయ్యి ఆవ్.

26 తుమ్చి రిసొ, తుమ్ కెర్త కమెచి రిసొ ఆవ్ ఒగ్గర్ ఒగ్గర్ తీర్పు సంగుక జయెదె. గని అంక తెద్రయ్లోసొ సత్తిమ్చొ, చి లోకుమ్చక ఆవ్ సూనయ్తిసి కిచ్చొ మెలె, అంక తెద్రయ్లోసొతెయి ఆవ్ నూన్లిసి” మెన సంగిలన్.

27 గని, ‘తెద్రయ్లోసొ’ మెన దేముడు అబ్బొన్చి రిసొ సంగితయ్ మెన వెల్లెల మాన్సుల్ అర్దుమ్ కెరంతి నాయ్, చి రిసొ

28 యేసు అన్సె, “ఆవ్ మాన్సు జా జెర్దున్ అయ్లోసొక తుమ్ టీవడ్తె. టీవడ్తె, అంక ‘జొయ్యి’ మెన పడ్డొక చినితె. తెదొడ్క అంక ‘జో అవ్వొ కెర్తిసి కిచ్చొయ్ నాయ్, గని దేముడు అబ్బొసి సికడ్లి రితి కెర్తె తత్తయ్’ మెన అంచి రిసొ అర్దుమ్ కెరంతె.

29 అంక తెద్రయ్లోసొ అంక తోడు అన్సె, అంచి తెన్ అన్సె. జో కెయ అంక ములె నాయ్. కిచ్చొక మెలె, ఆవ్ కెయక తెయక జోచి ఇన్సుమ్ రితి కెర్తసి” మెన సంగిలన్.

30 జో దన్సి సంగితె తతికయ్, ఒత్త తిలనతె ఒగ్గర్జిన్ జోవయింక నంపజా గెల.

జోక నంప కెరుక దెర్లనక యేసు బోదన కెర్తిసి

† 8:17 8:17 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రగ్గయ్లి ఆగ్గుల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పావ్ పున్సుకుమ్తె రెగ్గయ్ జా అన్సె. ఈంజ దెకవుక మెన కుపియ బాసతె నొయ ప్రమానుమ్తె మోసే పూర్గుమ్చొచి అత్తి రెగ్గి దేముడుచ ఆగ్గుల్ మెన రగ్గవ అన్సె.

31 జోక నంపజంక దెర్ల వెల్లెల మాన్సుల్క యేసు తెదొడి, “ఆవ్ సంగిలి రితి ఇండితె తస్సె జలె, నిజామి అంచ సిస్సుల్ జస్సె.

32 చి సత్తిమ్ జాన్తె, చి జా సత్తిమ్ తుమ్క విడ్డల్ కెరెదె” మెన సంగిలన్.

33 గని, విడ్డల్ జతిసిక మాములుమ్ ఈంజ లోకుమ్తె జతిన్చి అర్దుమ్ జేవ్ కెరన, జోక “ఆమ్ అబ్రాహామ్ పూర్గుమ్చొచి సేకుమ్తెచ మాన్సుల్చి రిసా, కక్క కి కెయ కి గొతిమాన్సుల్ జము నాయ్. జాకయ్ ‘విడ్డల్ జస్సె’ మెన తుయి కిచ్చొక అమ్క సంగిలది?” మెన బమ్మ జా పుసిల.

34 యేసు జోవయింక, “తుమ్క ఆవ్ నిజామి కచితుమ్ కిచ్చొ సంగితసి మెలె, కో కిచ్చొ పాపుమ్ కెరుల గే, పాపుమ్క గొతిమాన్సుల్ జా అస్తి.

35 గొతిమాన్సుల్, జలె, సాపుకరిచొ గేరు కెయక తెయక తంక జోవయింక సెలవ్ నాయ్. గని, సాపుకరిచొ సొంత పుత్తుసి జలె, కెయక తెయక అబ్బొన్చి గెరి తయెదె.

36 తుమ్ కెర్ల పాపల్క తుమ్ దెర్లు సేడ్డిసి తెంతొ దేముడుచొ పుత్తుసి తుమ్క విడ్డల్ కెర్లెగిన, నిజామి విడ్డల్ జస్సె.

37 “అబ్రాహామ్ పూర్గుమ్చొచి సెకుమ్తె తుమ్ జెర్ల అస్సున్ మెన జాని, గని జోచి సెకుమ్తె తుమ్ జెర్లిలెకి, అంచి కొణె తుమ్చి పెట్టి తియనుక నెసున్చి రిసా, అంక మారుక కోర్ప జా అస్సున్.

38 అంచొ అబ్బొతె ఆవ్ దెకిలిన్క ఆవ్ సాచి సంగితసి. తుమ్ మాత్తుమ్, తుమ్చొయ్ అబ్బొది సంగిలిసి కెర్లసు” మెన వెల్లెల మాన్సుల్క యేసు సంగిలన్.

39 యేసు ఇసి సంగితకయ్, జేవ్ వెల్లెల మాన్సుల్ జోక, “అబ్రాహామ్ అమ్చొ అబ్బొ!” మెన సంగిలచి రిసా యేసు జోవయింక అన్సె, “తుమ్

అబ్రాహామ్చ బోదల్ జతదు జలె, అబ్రాహామ్ కెర్ల కమె తుమ్ కి కెర్లదు.

40 దేముడుతె ఆవ్ సూన్లి సత్తిమ్ తుమ్క ఆవ్ సంగ అస్సి, గని అమ్మె అంక మారుక తుమ్ కోర్ప జా అస్సున్. అబ్రాహామ్ దస్సి కెరె నాయ్.

41 గని తుమ్చొ సొంత అబ్బొది కెర్ల కమె తుమ్ కెర్లసు” మెన సంగిలన్. జేవ్ జోక “ఆమ్ లంజెపెట్టి జెర్మిలస నెంజుమ్. అమ్క ఎక్కిలో అబ్బొ జయెదె, మెలె, దేముడు” మెన సంగిల.

42 యేసు జోవయింక, “దేముడు తుమ్చొ అబ్బొది జతో జలె, తుమ్ అంకయ్ ప్రేమ కెర్లదు. కిచ్చొక మెలె, ఆవ్ జోచి పెట్టి తా జోతె తెంతొ బార్ జా ఉట్ట అయ్లయ్. ఆవ్ అవ్వి జెంక నాయ్, జొయ్యి అంక తెద్రయ్లో.

43 ఆవ్ సంగితిసి తుమ్ కిచ్చొక అర్దుమ్ కెరన్సు నాయ్? కిచ్చొక మెలె, అంచ కొణెతెచి సత్తిమ్ తుమ్క అల్లర్ కెర్లయ్, చి సూనుక ఓర్పుప జంక నెతుర్పు.

44 తుమ్చొ అబ్బొది సయ్తాన్. తుమ్ జోచ మాన్సుల్ జా, జో కిసాచొ గే, తుమ్ కి దస్సచ. తుమ్చొ అబ్బొద్చ ఆసల్ తీర్పుప కెరుక తుమ్ కోర్ప జా అస్సున్. మొదొల్ తెంతొ జో కూని కెర్లొసా. సత్తిమ్, జోతె, ఎదిలి కి బెదితి నాయ్. జోతె కిచ్చొ సత్తిమ్ కి నాయ్. జో అబద్దుమ్ సంగుక, జోచి సొంత అబద్దుమ్ జొయ్యి లట్టబెదె. జో పూర్తి అబద్దుమ్చొ. జో అబ్బుదల్క అబ్బొసి.

45 జాకయ్, ఆవ్ సత్తిమ్ సంగితసిచి రిసా, ఆవ్ సంగితిసి తుమ్ నంప కెర్లు నాయ్.

46 ఆవ్ కెయ్య కేన్ పాపుమ్ కెర్లయ్ గే, చి తుమ్తె కో అంక ‘అబద్దుమ్చొ’ మెన సాచి సంగుక జయెదె? కెయ కేన్ పాపుమ కెరి నాయ్, చి కో కి దస్సి సాచి సంగుక నెతుర్పు. జలె, ఆవ్ సత్తిమ్

సంగితని జలె, తుమ్ అంక కిచ్చొక నంప కెర్పు నాయ్? తుమ్ ఉచర.

47 దేముడుచ మాన్సుల్ కో జవుల గే, జో దేముడుచ కొణొ సూనుల. తూమ్ కిచ్చొక జోవయింప కొణొ సూన్సు నాయ్ మెలె. తుమ్ జోవయింప మాన్సుల్ నెంజుసు” మెన వెల్లెల మాన్సుల్క యేసు సంగిలన్.

వెల్లెల మాన్సుల్ యేసుక పత్రల్ గల మారుక ఉచర్చిసి

48 యూదుల్చ జేవ్ వెల్లెల మాన్సుల్, జలె, జోక “కీసమరయ సుదొ జస్తె, చి తుక బూతుమ్ దెర అస్సె మెన అమ్ ఉచర్చిసి సత్తిమ్, కిచ్చొగె” మెన సంగిల.

49 జేవ్ దస్సి సంగితికయ్, యేసు జోవయింక కిచ్చొ జబాబ్ దిలన్ మెలె, “అంక బూతుమ్ దెరె నాయ్. ఆవ్, మాత్రుమ్, దేముడు అబ్బొక గవురుమ్ కెర్తసి, గని తూమ్ అంకయ్ గవురుమ్ కెర్పు నాయ్.

50 అంచి రిసా అంక గవురుమ్ నాయ్. గని అంక గవురుమ్ కెర్తొ ఎక్కిలో అస్సె. జొయ్యి అంచి రిసా తుమ్చి రిసా తీర్పు కెర సత్తిమ్క రుజ్జు దెకయెదె.

51 “జలె, తుమ్క ఆవ్ నిజుమి కచితుమ్ కిచ్చొ సంగితసి మెలె, అంచ కొణొ కో నిదానుమ్ కెరుల గే, కెయఁక కి *మొర్తి నాయ్” మెన సంగిలన్.

52 దస్సి సంగితికయ్, జేవ్ వెల్లెల మాన్సుల్ జోక కిచ్చొ మెల మెలె, “అప్పె రుజ్జు అయ్లి. నిజుమి తుక బూతుమ్ దెర అస్సె. అబ్రాహామ్ మొర గెలన్. దేముడుచ కబుర్లు సంగిల పూర్లుమ్చ కి మొర గెల, గని ‘అంచ కొణొ కో నిదానుమ్ కెరుల గే, కెయఁక †మొర్తి నాయ్” మెన తుయి సంగితసి!

53 అమ్చొ పూర్లుమ్చొ అబ్రాహామ్చి కంట తుయి వెల్లొ గే? జో మొర గెల్. దేముడుచ కబుర్లు సంగిలస కి మొర గెల. తుయి కొన్సొ మెన సంగితసి? సంగు!” మెన యేసుక పుసిల.

54 జలె, యేసు జోవయింక, “ఆవ్ సొంత గవురుమ్ సంగన్లెగిన, అంచి గవురుమ్ ఆరిచి. జలె, ‘అమ్చొ దేముడు’ మెన అంచొ అబ్బొచి రిసా తుమ్ సంగితసు. జొయ్యి అంక గవురుమ్ కెర్తయ్.

55 గని జోక తుమ్ అగ్గె తెంతొ నేన్ను. ఆవ్, మాత్రుమ్, జోక జాని. ‘జోక నేని’ మెన ఆవ్ ఏక వేల సంగితయ్ జలె, తుమ్చి రితి అబద్దుమ్చొ జతయ్. గని, నిజుమి జోక జాని, చి జోచి కోడు నిదానుమ్ కెర్తసి.

56 ఆవ్ ఈంజ లోకుమ్తె జెర్మ తతి దీసి దెకుక మెన తుమ్చొ పూర్లుమ్చొ అబ్రాహామ్, జలె, ఆస తెన్ తిలన్. జలె, అబ్బొసి జలో దేముడుచి సెలవ్ తెన్ ‡దెకిలన్, చి సర్దసంతొసుమ్ జలన్” మెన యేసు సంగిలన్.

57 యూదుల్చ జేవ్ వెల్లెల మాన్సుల్ జోక, “తుక యాబయ్ వెర్పుల్ జంక నేతయ్. దస్సి జలె, తుయి పూర్లుమ్చొ అబ్రాహామ్క కీసి దెక తస్తె! కీనెంజిలె జో తుక దెక తయెదె గే? బెదె నాయ్!” మెన సంగిల,

58 చి యేసు, “తుమ్క ఆవ్ కిచ్చొ నిజుమి కచితుమ్ సంగితసి మెలె, అబ్రాహామ్ నే జెర్మితె అగ్గె తెంతొ ఆవ్వి తిలయ్, అస్సి” మెన సంగిలన్.

59 జో దస్సి సంగితికయ్, ‘దేముడు తెన్ సమ్మందుమ్ సంగితయ్, జా వెల్లి పాపుమ్’ మెన ఉచర, యేసుక పత్రల్ తెన్ పెట మారుక మెన, వెల్లెల మాన్సుల్

§ 8:48 8:48 యూదుల్ తెన్ ఎక్కిలోక ‘సమరయ సుదొ’ మెలె, ‘సూనొ’ మెలి రితి నిస్కారుమ్ కోడు జయెదె.

సమరయ సుదొ మెలి సమరయ ప్రదేసిమ్చొ మాన్సు. * 8:51 8:51 నెంజిలె ‘మొర్పు దెకితి నాయ్’.

† 8:52 8:52 నెంజిలె ‘మొర్పు చకితి నాయ్’. ‡ 8:56 8:56 ఎత్తి అదికారుమ్ తిలో దేముడు దెకయ్లి

సివ్వుతె దెకిలన్, కిచ్చొగె. § 8:57 8:57 ఈంజ మత్తెలి గ్రీకు బాస తెన్ తొలితొ రెగిడ్ల సగుమ్ పుస్తకల్తె ‘నెంజిలె’ తెంతొ ‘తయెదె గే?’ ఎదచి కోడు తయె నాయ్.

పత్రల్ వెంట్ర, గని యేసు నే దెకయ్ జతె, దేముడుచి గుడి తెంతో బార్ జా, ఉట్ట గెలన్.

9

గుడ్డి జా జెర్మిలోసాక యేసు చెంగిల్ కెర్లిసి

1 పడ్డె యేసు జోచ సిస్సుల్ తెన్ వట్టె గెతె తిలి పొది, జెర్మన్ తెన్ గుడ్డి మాన్సు ఎక్కిలోక దెకిల.

2 జోక దెక కెర, యేసుచ సిస్సుల్ కిచ్చొ పుసిల మెలె, “గురుబాబు, ఈంజొ మాన్సు గుడ్డి జెర్మిలిసి జోచి పాపుమ్చి రిసా గే, అయ్యన్ అబ్బొన్చి పాపుమ్చి రిసా గే?” మెన పుసిల.

3 యేసు జోవయింక, “ఈంజొ పాపుమ్ కెర్లిసి నెంజె, అయ్యన్ అబ్బొన్ పాపుమ్ కెర్లిసి కి నెంజె. జలె, ఇన్నెక చెంగిల్ కెర్లిస్ తెన్ దేముడుచి గవురుమ్ జోచితె దెకయ్ జతి రిసాయి దస్సి జెర్మిలన్.

4 మెద్దెన్ తిలి రితి మదెనె, అంక తెద్రయ్లోసాచ కమె ఆమ్ కెర్తె తంకయ్. కిచ్చొక ‘మెద్దెన్’ మెలయ్ మెలె, అందర్ అయ్లె, కో కి కామ్ కెరుక నెంజె.

5 ఆవ్ ఈంజ లోకుమ్తె ఇసి బుత్తె తిలి మదెనె ఈంజ లోకుమ్చక దొర్కు. జలి ఉజడి ఆవ్వి జతసి” మెన యేసు బోదన కెర్లన్.

6 యేసు దస్సి సంగితె తా కిచ్చొ గుర్తు కెర్లన్ మెలె, బుయ్యె తుంక బుర్ల కెర, జా బుర్ల జో మాన్సుచ అంకివొతె గాఁన దా,

7 జోక “తుయి గెచ్చు సిలోయమ్ మెంతి వెల్లో కుండితె దోవను” మెన సంగిలన్. జా సిలోయమ్ మెంతి నావ్చి అర్దుమ్ కిచ్చొ మెలె, ‘తెద్రయ్లిసి’. జలె, యేసు సంగిలి రితి జో మాన్సు ఒత్త గెచ్చు, దోవన కెర, అంకివొ దెకయ్ జా, ఉట్ట అయ్లన్.

8 జో దస్సి చెంగిల్ జా ఉట్ట జెతికయ్, జోచి గవ్విచ మాన్సుల్, జో అగ్గె బిచ్చిమ్

నజితె తిలిసి దెక తిల అన్నె సగుమ్జిన్ కిచ్చొ మెన లట్టబల్ల మెలె, “ఈంజొయి అగ్గె బిచ్చిమ్ నజ నజ రోజుక వట్టె వెన తిలోసా, కిచ్చొగె” మెన లట్టబంతె తిల.

9 సగుమ్జిన్ “జొయ్యి” మెన సంగిల. అన్నె సగుమ్జిన్ “నెంజె, గని జోచి పోలికచొ మాన్సు” మెన సంగిల. గని జో “ఆవ్ జొయ్యి!” మెన సంగిలన్.

10 జేవ్ ప్రెజల్, జలె, జో మాన్సుక, “జలె, కీసి జా అప్పె దెకితసి?” మెన ఆచారిమ్ జా పుసిల.

11 జో మాన్సు జోవయింక, “యేసు మెంతో జో మాన్సు బుర్ల కెర అంచ అంకివొతె గాఁన దా, తుయి గెచ్చు సిలోయమ్ వెల్లో కుండితె దోవను! మెన అంక సంగిలన్. ఆవ్ గెచ్చు దోవన్లయ్, చి అంకివొ డీసిల!” మెన సాచి సంగిలో.

12 “జో అప్పె కేతె?” మెన జేవ్ జోక పుసిల, చి “ఆవ్ నేని” మెన జో సంగిలన్.

పండితుల్ గుడ్డి మాన్సుక పరిచ్చు కెర్లిసి

13 జో గుడ్డి జా జెర్మిలోసాక ప్రెజల్ పరిసయ్యుల్తె కడ నిల.

14 జలె, యేసు బుర్ల కెర జోచ అంకివొతె గాఁన చెంగిల్ కెర్లె దీసి కేన్ దీసి మెలె, జోవయించి బక్తి కెర్తి సెలవ్ కడన్లి దీసి.

15 జాకయ్, పరిసయ్యుల్ కి “తుక అంకివొ డీసయ్లిసి కీసి జర్లు జలి?” మెన పరిచ్చు కెర్ల. చి జో మాన్సు జోవయింక, “జో బుర్ల అంచ అంకివొతె గాఁసిలన్, చి ఆవ్ దోవన్లయ్, చి అప్పె దెకితసి” మెన సంగిలన్.

16 పరిసయ్యుల్తె సగుమ్జిన్ “జో మాన్సు దేముడుతె తెంతో అయ్లోసా నెంజె. కిచ్చొక మెలె, సెలవ్ కడన్లి దీసి పిట్టవన్తయ్” మెన యేసుచి రిసా తీర్పు సంగిల. గని అన్నె సగుమ్జిన్ “పాపుమ్ కెర్తొ మాన్సు, జలె, దేముడుచి

అదికారుమ్ దెకయ్త గుర్తుల్ కెరుక నెత్తిర్” మెల, చి దొన్ని జటల్ జల.

17 జాకయ్, జో గుడ్డి మాన్సుక కిచ్చి మెన అన్నె పరిచ్చి కెర్ల మెలె, “జో తుక అంకివొ డీసయ్లలి రిసా, తుయి జోచి రిసా కిచ్చి ఉచర్లసి?” మెన పుసిల. జో జోవయింక “దేముడుచ కబుర్లు సంగితో ఎక్కిలో జయెదె” మెన జబాబ్ దిలన్.

18 జో ‘నిజుమ్ అగ్గె గుడ్డి తిలో, చి చెంగిల్ జలో’ మెన, యూదుల్చ జేవ్ వెల్లెల మాన్సుల్ మొదొల్క నంప కెర్తి నాయ్ చి రిసా జోచ అయ్యున్ అబ్బొన్ క బుకార్ల.

19 బుకారా కెర, జోవయింక “ఈంజొ తుమ్చొ పుత్తుది గే? జెర్మిల్ తెంతో గుడ్డి తిలో గే? దస్సి జలె, కిసి జా అప్పె దెకితయ్?” మెన పుసిల.

20 అయ్యున్ అబ్బొసి కిచ్చి జబాబ్ దిల మెలె, “ ‘ఈంజొ అమ్చొ పుత్తు’ మెన, ‘ఈంజొ గుడ్డి జా జెర్మిలన్’ మెన జానుమ్.

21 గని అంకివొ అప్పె డీసిలిసి కిసి జర్లు జలి గే, కో జోచ అంకివొ చెంగిల్ కెర్లన్ గే, నేనుమ్. జోక తుమ్ పున దెక. జో ఉబెడొబొద గెద? జొయ్యి సంగెదె” మెన జబాబ్ దిల.

22 అయ్యుసి అబ్బొసి కిచ్చొక దస్సి మెల మెలె, వెల్లొ మాన్సుక బితె తిల. కిచ్చొక మెలె, యేసుక “దేముడు తెద్రయ్లో క్రీస్తు రచ్చించుప కెర్తొసా” మెన కో జలెకు ఒప్పునై, జోవయింక సబగెర్ తెంతో ఉదడ గెలుక అస్సి, చి అన్నె కెయ్క కి పెనడుక జయె నాయ్ మెన వెల్లెల మాన్సుల్ అగ్గె తెంతో ఉచర అస్సి.

23 జాకయ్, “జో ఉబెడొబొద. జోకయ్ పుస!” మెన అయ్యున్ అబ్బొసి సంగ తిల.

24 జాకయ్ తెదొడి, గుడ్డి జా జెర్మ తిలో జో మాన్సుక జేవ్ వెల్లెల మాన్సుల్ అన్నెక్ సుట్టు బుకారా కెర జోక కిచ్చొ మెల మెలె, “జో యేసు పాపుమ్ కెర్లొసా మెన

అమ్ జానుమ్. జాకయ్, తుయి చెంగిల్ జలిన్చి రిసా దేముడుక గపురుమ్ కెరు, గని జో యేసుక పొని” మెన ఆటంకుమ్ కెర్ల.

25 గని జేవ్ దస్సి సంగిలే కి, జో జోవయింక, “జో పాపుమ్ కెర్లొసా గే నెంజె గే ఆవ్ నేని, గని కిచ్చొ కచితుమ్ జాని మెలె, ఆవ్ అగ్గె గుడ్డి జా తిలె కి, అప్పె దెకితసి” మెన సాచి సంగిలన్.

26 దస్సి సంగితకయ్, జేవ్ జోక “తుక జో కెర్లిసి కిచ్చొ? తుచ అంకివొ కిసి చెంగిల్ కెర్లన్?” మెన అన్నెక్ సుట్టు పుసిల.

27 చి జో అన్నె జోవయింక, “ఆవ్ తెదొడి సంగిలయ్, గని తుమ్ నూన్సు నాయ్. కిచ్చొక అన్నెక్ సుట్టు నూనుక కోర్ప జతసు? తూమ్ కి ఏక్ వేల జోచ సిన్సుల్ జంక కోర్ప జతసు గే?” మెన పుసిలన్.

28 జో దస్సి పుసితికయ్, జేవ్ “తూయి జోచొ సిన్సుడు. తుచి ఇష్టుమ్! ఆమ్, మాత్రుమ్, మోసే పూర్లుమ్చొచ సిన్సుల్!

29 మోసేచి అత్తి ఎత్తి, అదికారుమ్ తిలో దేముడు జోచ కబుర్లు సంగ అస్సి మెన జానుమ్. జో యేసు జలె, కేనె తెంతో అయ్లో గే, నేనుమ్” మెన సంగిల.

30 జాకయ్, చెంగిల్ జలో జో మాన్సు జోవయింక అన్నె కిచ్చొ జబాబ్ దిలన్ మెలె, “అబ్బువొమ్మ! అంచ అంకివొ జో అన్నె డీసయ్లలికి, కేనె తెంతో అయ్లో గే తుమ్ నేన్ను గే?

31 ‘కో పాపుమ్ కెర్లొసా జవుల గే, దేముడు జోక దెకె నాయ్ గని, కో జలెకు జోవయింక నత్తిమ్ కెరెదె గే, జోకయ్ జో ప్రబు దెకెదె’ మెన ఎత్తిజిన్ జానుమ్.

32 లోకుమ్ జెర్మయ్లలి తెంతో, కేన్ జెర్మన్ గుడ్డి జా తిలో మాన్సుక కో చెంగిల్ కెర్లిసి కో నూనుక నాయ్.

33 దేముడు తెంతో ఈంజొ మాన్సు జెతో నాయ్ జలె, అంచి బాద గెచ్చవుక

ఎద్దరె నెతిర్తో” మెన వెల్లెల మాన్సుల్క బుద్ది సంగిలన్.

34 జో దస్సి సంగితికయ్, జేవ్ వెల్లెల మాన్సుల్ జోక కిచ్చొ జబాబ్ దిలన్ మెలె, “నిజుమి రితి పాపుమ్ తెన్ జెర్మిలోసా, తుయి అమ్క సికడుక జయె నాయ్” మెన, జో కెయ్క కి అన్నె నే జెతి రితి సబగేర్ తెంతో జోక ఉదడ గెల.

చెంగిల్ జలో మాన్సుక యేసు దయిరిమ్ కెర్లసి

35 జో మాన్సుక వెల్లెల మాన్సుల్ ఉదడ్డి సిచ్చ కెర్లసిచి రిసా యేసు సూన కెర, జోక చజ దెక, “మాన్సు జా జెర్మున్ అయ్లోసాక తుయి నంపజా అస్సిసి గే?” మెన పుసిలన్.

36 జో మాన్సు యేసుక “బాబు, ఆవ్ జోక నంపజంక ఇన్సుమ్ జా అస్సి. జో కేతె?” మెన పుసిలన్, చి

37 యేసు జోక, “తుయి జోక దెక అస్సిసి. తుచి తెన్ అప్పె లట్టబ్బొసా జొయ్యి.” మెలన్.

38 జో మాన్సు “ప్రబు, ఆవ్ నంపజతసి” మెన జోకర బక్తి కెర్లొ.

39 తెదొడి యేసు ఒత్త తిల మాన్సుల్క, “ఆవ్ కంజు లోకుమ్తె అయ్లీసి లోకుమ్చక తీర్పు కెర్లె రితి జతయ్. కిచ్చొక మెలె, ఆవ్ జెతికయ్, గుడ్డి జల మాన్సుల్ దెకితతి, చి గుడ్డి నెంజిల మాన్సుల్ గుడ్డి రితి జతతి” మెన సంగిలన్.

40 జలె, జోచి పాసి తిల పరిసయ్యుల్ సగుమ్జిన్ కంజు కోడ్డు సూన కెర “అమ్క కి ‘గుడ్డి మాన్సుల్’ మెన తుయి సంగితసి గే?” మెన యేసుక పుసిల.

41 యేసు జోవయింక, “తుమ్ నిజుమి గుడ్డి జా తత్తదు జలె, తుమ్క కిచ్చొ పాపుమ్ తత్తి నాయ్. గని ‘అమ్ దెకితసుమ్’ మెన తుమ్ సంగితసుచి రిసా తుమ్చి పాపుమ్ గెచ్చె నాయ్.

10

మెండల్సాడు అన్నె గొవుడు రకితిసి

1 “తుమ్క కచితుమ్ నిజుమి ఆవ్ కిచ్చొ సంగితసి మెలె, మెండల్సాడు ఏక్ తిలె, ఎక్కిలో జా కెర గుమ్ముమ్ వాట్ నే గెతె, కూడ్ డేవ పెసిలె, జో చోరు జయెదె.

2 గని గుమ్ముమ్ వాట్ కో పెసెదె దే, జొయ్యి గొవుడు జయెదె.

3 జా సాడుక గుమ్ముమ్ రకితోసా ఎక్కిలో తిలె, గొవుడుక వాట్ తయెదె. జో గొవుడుచి అవాడ్ జో రకిత మెండల్ కి చినుల, చి జో రకిత మెండల్క జో నవ్వొ తియ తయెదె, చి జోవయింక జో రోజుక బార్ కెరెదె.

4 జొయ్యి సొంత రకిత మెండల్క బార్ కెర్లె, జో కేనె ఉదడెదె గే, జేవ్ గెచ్చుల. కిచ్చొక మెలె, జేవ్ నంపజలో గొవుడుచి అవాడ్ జేవ్ చినితతి.

5 వేర మాన్సు అయ్లె, జోవయించి అవాడ్ నేన్తి, చి నంపజతి నాయ్, చి ఉట్ట నిగుల” మెన యేసు సంగిలన్.

6 * జలె, యేసు జా సంగిలే కి, జేవ్ వెల్లెల మాన్సుల్ అర్దుమ్ కెరంతి నాయ్.

పరలోకుమ్చి రాజిమ్క దొర్కు జలి గుమ్ముమ్ ఆవ్

7 జాకయ్ యేసు జేవ్క అన్నె, “ఆవ్ తుమ్క నిజుమి కచితుమ్ కిచ్చొ సంగితసి మెలె, ఆవ్ సంగిలి మెండల్సాడె పెసితి గుమ్ముమ్ ఆవ్వి.

8 అంచి కంట అగ్గె అయ్ల గొవుడ్లు ఎత్తిజిన్ చోర్లు, చోర్లన జల. మెండల్ జోవయింక అవాడ్ నూన్తి నాయ్.

9 దొర్కు జలి గుమ్ముమ్ ఆవ్వి. ఆవ్ తిలి గుమ్ముమ్ వాట్ కో పెసుల గే, రచ్చించుప జవుల, చి జా సాడు జోవయించి సొంత టాన్ జయెదె, చి పెసుక బార్ జంక జతె తవుల, చి చెంగిల్ అన్నిమ్ జోవయింక దొర్కు జతె తయెదె.

* 10:6 10:6 జేవ్ వెళ్లొ మాన్సుల్కయ్ ‘చోర్లు’ వేర మాన్సుల్ మెన్తయ్. జోకయ్ ‘గొవుడు’ మెనంతయ్.

10 చోరు, జలె, ఆరి మెండల్ క చోరుక, కండ గెలుక, పాడ్ కెరుక జెయెదె. ఆవ్, మాత్రుమ్, కిచ్చొక అయలయ్ మెలె, అంచ మెండల్ జల మాన్సుల్ క 'జితు, ఎదిలి చెంగిల్ †జివ్ జోవయింక దొర్కు జవున్' మెనయ్ అయలయ్.

11 "ఆవ్వి చెంగిల్ గొవుడు జయిందె. గొవుడు చెంగిల్ చొ జలె, మెండల్ కిచ్చొ ప్రమాదుమ్ జతి రితి జలె, జోవయింక 'మొర్తు నాయ్. జితు' మెన జొయ్యి అడ్డు జా, జోవయింక రచ్చించుప కెర్తి రిసా జోచి జివ్ దా మొరెదె. ఆవ్ కి దస్సి జయిందె.

12 ఎక్కిలో జవున్ నిజుమ్ తిలో గొవుడు నెంజితె, ఆరి డబ్బుల్ క జవున్ మంద రకిలె, జేవ్ మెండల్ జోచ సొంత మెండల్ నెంజిలి రిసా, మెండల్ క మారితో కిచ్చొ జవున్ జంతు అయలె, కూలిక రకితో జో మాన్సు ఉట్ట నిగ, మెండల్ నస్టుమ్ జతి రితి ముల దెయెదెచి. ఉట్ట నిగిలె, జో జంతు కేన్ మెండక దెర, తిల మెండల్ క చెదుర్పు కెరెదె.

13 జో వేర మాన్సు కిచ్చొక దస్సి ఉట్ట నిగ మెండల్ క మాలజ్ కెర ములెదె మెలె, ఆరి డబ్బుల్ కయ్ రకితయ్ చి రిసా. జోచ సొంత మెండల్ నెంజితి, చి మొర్లె కి జిలె కి, జోక బాద నాయ్.

14 "ఆవ్ జలె, చెంగిల్ గొవుడు.

15 అంచొ అబ్బొ అంక జానె, ప్రేమ కెర్తయ్. ఆవ్ కి అబ్బొక జాని ప్రేమ కెర్తసి. దస్సి, అంచ మెండల్ క ఆవ్ జాని, ప్రేమ కెర్తసి. జేవ్ కి అంక జాన్తి, ప్రేమ కెర్తతి. అన్నె, జేవ్ అంచ మెండల్ జల మాన్సుల్ క 'మొర్తు నాయ్, గని జితు' మెన ఆవ్ మొర గెచ్చిందె.

16 "అన్నె, వేర దేసిమ్లుచ వేర ప్రెజల్ చ మాన్సుల్ అంక నంపజా అంచ మెండల్ జవుల. జోవయింక కి అంచి మందయ్ బెదవనుక అన్నె. జేవ్ కి

అమ్చి అవాడ్ నూన జెవుల. అయ్లె, జేవ్ కి ఈంజేవ్ కి ఎక్కి మంద జవుల, చి జేవ్ ఎత్కిక ఆవ్ ఎక్కిలో గొవుడు జయిందె.

17 జలె, అంచ మెండల్ జలనక రచ్చించుప కెర్తి రిసా మొర గెచ్చిందె చి రిసా అబ్బొ అంక ఒగ్గర్ ప్రేమ దెకితయ్, చి మొర గెలె కి, అన్నె జివ్ జా ఉట్టిందె.

18 మాన్సుల్ అంక మార గెలె కి, ఆవ్ నే ఒప్పిలె నెతిర్తి. గని, అంచి ఇన్సుమ్ కయ్ మొరిందె. అంచి ఇన్సుమ్ క మొరుక అదికారుమ్ అన్నె, అన్నె, అన్నె జివ్ జా ఉట్టుక కి అంక అదికారుమ్ అన్నె. జా ఎత్కి ఆవ్ నెరవెర్పుప కెరుక మెన అంచొ అబ్బొ తియర్లొ కామ్" మెన యేసు బోదన కెర్లన్.

యేసుచి రిసా వెల్లెల మాన్సుల్ అన్నె దొన్ని జట్లు జలిసి

19 యేసుచ ఈంజేవ్ కొడొచి రిసా యూదుల్ చ ఒత్తచ వెల్లెల మాన్సుల్ అన్నె దొన్ని జట్లు జల.

20 జోవయింతె ఒగ్గర్ జిన్, "జోక బూతుమ్ దెర్లె రిసా వెర్రి జా అన్నె. జోచ కొడొ అమ్ కిచ్చొక నూనుక?" మెన సంగిల.

21 అన్నె సగుమ్ జిన్ "ఇన కొడొ బూతుమ్ దెర్లె కొడొ నెంజితి. అన్నె, గుడ్డి జల మాన్సుల్ క చెంగిల్ కెరుక బూతల్ దెర్లనక సెక్తి తయెదె గే? నాయ్, గెద?" మెన సంగిల.

22 ఇదిల్ పడ్డి, అన్నెక్ పండుగు అయ్లి. 'ఎక్కి దేముడుకయ్ తవున్' మెన పూర్లుమ్ పొది దేముడుచి గుడి సుద్ది కెర్లి ఏక కామ్చి గుర్తుచి పండుగు, జా

23 చల్లె పొది జా, జలె, దేముడుచి గుడితెచి రానొ జలో సాలోమోను పూర్లుమ్ చొచి నావ్ తిలి వెల్లి పేడితె యేసు బుల్లె తతికయ్,

24 యూదుల్చ వెల్లెల మాన్సుల్ జోచి సుట్టునంత బెర జా, జోక అన్నె పరిచ్చ కెరుక దెర్ల. కిచ్చొ మెన పుసిల మెలె, “అన్నె కెత్తి దీసల్ అమ్ నేన తతి రితి కెర్తె? తుయి రచ్చించుప కెర్తొసొ జతో క్రిస్తు జలె, అమ్క సొస్తుమ్ సంగు!” మెన సంగిల.

25 జలె, యేసు జోవయింక, “తుమ్క అగ్గె సంగిలయ్, గని తుమ్ నంప కెర్పు నాయ్. అబ్బొసి జలొ దేముడుచి నావ్ తెన్ ఆవ్ కెర్త కమొ కి అంచి రిసొ ‘జొయ్యి’ మెన సాచి సంగితతి.

26 గని, అంచి మెండల్ మందతెచ తుమ్ నెంజుసీచి రిసొ తుమ్ నంపజంక నెతుర్పు.

27 అంచ మెండల్ జలె, అంచి అవాడ్ సూన్తతి. ఆవ్ జోవయింక జాని, స్రెమ కెర్తసి, చి అంచి పట్టి జెతతి.

28 దేముడుచి రాజిమ్తె బెదితి, మొర్లె పరలోకుమ్తె గెచ్చ కెయెక తెయెక జితి వరుమ్ జోవయింక ఆవ్ దెతసిచి రిసొ, జేవ్ కెయెక కి సిచ్చ జతి మొర్లుతె గెతి నాయ్, అన్నె, కో కి జోవయింక అంచి అత్తి తెంతొ ఉర్లుక నెత్తిర్తి.

29 అంచొ దేముడు అబ్బొ జోవయింక అంచి అత్తి సొర్పు కెర దిలన్. జొయ్యి ఎత్తిచి కంట వెల్లొచి రిసొ, జో అంచొ అబ్బొసి జలొ దేముడుచి అత్తి తెంతొ జోవయింక కో కి ఉర్లుక నెత్తిర్తి.

30 ఆవ్ అంచొ అబ్బొ ఎక్కి” మెన యేసు వెల్లెల మాన్సుల్క సంగిలన్.

31 యేసు ఇసి సంగితికయ్, ‘జోక పత్రల్ తెన్ పెట మార గెలుమ’ మెన, జా దీసీచి రితి వెల్లెల మాన్సుల్ పత్రల్ వెంట్ల.

32 యేసు జోవయింక, “దేముడు అబ్బొ కెరయల చెంగిల్ కమొ ఒగ్గరి తుమ్క దెకవ అస్సి. జేవ్ కమొతె కేన్

కామ్క ‘గర్చి’ మెన తుమ్ అంక పత్రల్ గల మారుక ఉచర్తసు?” మెన పుసిలన్, చి

33 వెల్లెల మాన్సుల్ జోక, “కిచ్చొ చెంగిల్ కామ్ కెర్లి రిసొ పత్రల్ గల మారుమ్ నాయ్, గని తుయి రితొయి మాన్సు దేముడు తెన్ సమ్మందుమ్ సంగుక, జోచి విలువ కడ్డి రిసొయి, జా వెల్లి తప్పుకయ్” మెన సంగిల.

34-35 జాకయ్ యేసు జోవయింక ఇసి మెన జబాబ్ సంగిలన్,

“తుమ్క ‘దేముడు జన్తె’ మెన సంగిలయ్

మెన జోవయించ కబుర్లు సూన నీకడ్ల మాన్సుల్చి రిసొ తుమ్చి మోసే పూర్లుమ్చొచి అత్తి దేముడు రెగ్డయల ఆగ్గుల్తె రెగ్డయ్లో, గెద? జో దేముడు రెగ్డయ్లిసి కో మాన్సు పిట్టవుక నెత్తిర్తి, గెద.

36 జలె, జో దేముడు అబ్బొ అంక జోవయించి కామ్కయ్ నిసాన అదికారుమ్ దా అంక ఈంజ లోకుమ్తె తెద్రయ్లో. తెద్రయ్లో జలె, ‘ఆవ్ దేముడుచొ పుత్తుసి’ మెన ఆవ్ సంగిలి రిసొ ‘జోచి విలువ కడ్డయ్’ మెన తుమ్ కీసి సంగుక జయెదె!

37 ఆవ్ దేముడు అబ్బొచ కమొ కెర్తసి నాయ్ జలె, అంక నంపజంక పొన.

38 గని దేముడు అబ్బొచ కమొ ఆవ్ కెర్తసి జలె, అంకయ్ తుమ్ నే నంప కెర్లె కి, జేవ్ కమొ దెక జేవ్ కమొకయ్ నంపజా. జేవ్ కమొక నంపజలె, దేముడు అబ్బొ అంచి పెట్టి తిలిసి, ఆవ్ జో అబ్బొచి పెట్టి తిలిసి చినితె, చి తుమ్క అర్దుమ్ జెయెదె” మెన యేసు సంగిలన్.

39 యేసు దస్సి సంగితికయ్, జేవ్ వెల్లెల మాన్సుల్ జోక దెరుక దెకిల, గని జోవయించి అత్తి దెర్పు నే సేడ్డె బార్ జా

‡ 10:34-35 10:34-35 తెలుగు బైబిల్తె ధర్మశాస్త్రమ్ మెలె, మోసీచి అత్తి దేముడు రెగ్డయ్లో అగ్గుల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పాచ్ వున్సుకుమ్తె రెగ్డయ్ జా అన్నె. ఈంజ దెకవుక మెన కుపియి బాసతె నొయి ప్రమానుమ్తె మోసీ పూర్లుమ్చొచి అత్తి రెగ్డి దేముడుచ అగ్గుల్ మెన రగ్డ అన్నె.

ఉట్ట గెలన్.

40 యేసు ఉట్ట గెచ్చు, యోర్దాను గాడు ఒత్తలోతో గెచ్చు, అగ్గె యోహాను బాప్తిసుమ్ దెతె తిలిన్తె టాన్తె సగుమ్ దీనల్ ఒత్త తిలన్.

41 ఒత్త తతికయ్, మాన్సుల్ ఒగ్గర్జిన్ జోతె జా కెర, కిచ్చొ మెన సంగితె తిల మెలె, “దేముడుచి అదికారుమ్క గుర్తు దెకయ్త కమె కేన్ కి యోహాను కెరె నాయ్, గని ఈంజొ యేసుచి రిసొ జో సంగిలీసి ఎత్తి సత్తిమ్!”

42 ఒత్త తిలస బలేగ జీన యేసుక ఒత్త తెన్ నంపజల.

11

లాజర్ మెలో మాన్సు మొర గెలిసి

1 లాజర్ మెలో ఎక్కిలో జొర్ణా సేడ్లన్. జో కేన్ గవ్విచొ మెలె, మరియ మార్త మెల దొగుల బేన్సివొ చి బేతనియ గవ్విచొ.

2 వడ్డొ తేర్బోద ఎక్కి యేసుక తేల్ గాన, జాచి సెండి తెన్ జోచ చట్టొ వుంచెది. జయ్యి ఈంజ మరియ జయెది. జొర్ణొ సేడ్లొసొ జేవ్చొ అన్నొసి జయెది.

3 జలె, లాజర్చ బేన్సివొ “ప్రబువ, తుయి ప్రేమ కెర్తొసొ జబ్బు సేడ అస్సె” మెన యేసుతె కబుర్ తెద్రయ్ల.

4 గని యేసు ఈంజ కబుర్ సూన, “ఈంజ జబ్బు సేడ్లిసి జో మొర్తి రిసొయి నాయ్, గని దేముడుచి నావ్ గవురుమ్ జతి రిసొయి, ఆవ్ జోచొ పుత్తున్చి అదికారుమ్ దెకయ్తి రిసొయి” మెన, సిస్సుల్క సంగిలన్.

5 మార్క, జాచి బేన్సిక, లాజర్క, యేసు బలే ప్రేమ తిలో,

6 గని లాజర్ ‘జబ్బు తెన్ అస్సె’ మెన సూన్లె కి, జో తిలి టాన్తె యేసు అన్నె దొరతి తా గెలో.

7 జా దొరతి గెతికయ్, జోచ సిస్సుల్క, “యూదయ ప్రదేసిమి అన్నె గెచ్చుమ్!” మెన యేసు సంగిలన్.

8 జేవ్ సిస్సుల్ జోవయింక “గురుబాబు, ఈంజ మదెనె యూదుల్చ వెల్లెల మాన్సుల్ తుక పత్తల్ గల మారుక ఉచర్తె తిలె కి, తుయి అన్నె ‘ఒత్త గెచ్చిందె’ మెన ఉచర్తసి గే?” మెన బియె గెచ్చు జోక సంగిల.

9 యేసు జోవయింక, “ఒండి మెద్దెనె పాసి పాసి బార గంటల్చి ఉజిడి తయెది, గెద? దస్సి జలె, జా బార గంటల్చి ఉజిడి తిలె పొది మాన్సు ఇండిలె, ఈంజ లోకుమ్చి ఉజిడిచి రిసొ జోక వాట్ డీన్తయ్, చి సేడె నాయ్.

10 గని, జేవ్ అందరె ఇండిలె, ఉజిడి నెంజిలి రిసొ జేవ్ సేడల” మెన సంగిలన్.

11 యేసు జోవయింక దస్సి సంగ అన్నె, “ఆవ్ ప్రేమ కెర్తొ లాజర్ నిజ అస్సె, గని జోవయింక ఉట్టవుక గెతసి” మెలన్, చి

12 సిస్సుల్ “దస్సి జలె, ప్రబు, జో నిజ తిలెగిన, చెంగిల్ జయెది. కిచ్చొ బాద నాయ్” మెలె.

13 జలె, ‘నిజ అస్సె’ మెన జో మొర్లిన్చి రిసొ యేసు సంగ తిలన్. గని, ‘మాములుమ్ నిజ తతిన్చి రిసొ సంగితయ్’ మెన సిస్సుల్ ఉచర్తతి.

14 తెదొడి “లాజర్ మొర గెచ్చ అస్సె” మెన యేసు జోవయింక సొస్టుమ్ సంగ,

15 అన్నె, “జో మొర గెలి పొది ఆవ్ ఒత్త నెంజిలిసి చెంగిలి. కిచ్చొక మెలె, తుమ్చి రిసొయి. మెలె, అంచి రిసొ తుమ్ దయిరిమ్ తెన్ నంపజతి రిసొ ఈంజ ఎత్తి జర్గు జతయ్. అల్లె, జోతె గెచ్చుమ్!” మెన సంగిలన్.

16 ‘కల్వల్ జెర్మిలోసొ’ మెలి ఆసిమ్ నావ్ తిలో తోమా మెలో సిస్సుడు, జలె, తిల సిస్సుల్క, “జొమ్మ, ఆమ్ ఇన్నెతెన్ మొర గెచ్చుక గెచ్చుమ్!” మెన సంగిలన్, చి జేవ్ బార్ జల.

యేసు లాజర్చ బేన్సివొ తెన్ సంగిలిసి

17 జేవ్ బేతనియ గవ్వీ పాసి అయ్లె, యేసు కిచ్చొ కబుర్ సూన్లో మెలె, 'లాజర్ క మెన్నె రోవ చెత్తర్ పొదుల్ జా అస్సె' మెన సూన్లన్.

18 జలె, జా గావ్ యెరూసలేమ్ పట్టుమ్ తెంతో పాసి పాసి ఎక్కి దొన్ని మయిలు దూరి అస్సె. ఒగ్గర్ దూరి నాయ్,

19 చి జేవ్ చి అన్నొసి మొర్లి రిసా మార్తక చి మరియక బురియవుక మెన, యెరూసలేమ్ చ యూదుల్ ఒగ్గర్ జిన్ జా అస్సి.

20 జలె, యేసు జెతయ్ మెన మార్త సూన కెర, జోక దస్సుల్ జంక మెన వాట్ ఎదక అయ్లి, గని మరియ గెరి తా గెలి.

21 మార్త జోక దస్సుల్ జా జోకర, యేసుక, "ప్రబు, తుయి ఇన్నె తత్తది జలె, అంచొ అన్నొ మొర్తో నాయ్.

22 గని అప్పె కి తుయి దేముడుతె కిచ్చొ సంగిలే కి తుక దెయెదె మెన జాని" మెన సంగిలి.

23 యేసు జాక, "తుచొ అన్నొది అన్నె జివ్ జా ఉట్టెదె" మెలన్.

24 మార్త జలె, జోక "ఈంజ లోకుమ్ ఇసి తతిన్ చి ఆకర్ దీసిక, ఈంజ లోకుమ్ చ మాస్సుల్ ఎత్కిజిన్ అన్నె జివ్ జా ఉట్టితి దీసిక, అన్నొ అన్నె ఉట్టెదె మెన జాని" మెన సంగిలి.

25 చి యేసు జాక, "మొర గెలసక ఉట్టయ్లోసా, దొర్కు జలి జివ్ దెతోసా ఆవ్వీ. అంక కో నంపజా గెచ్చుల గె జోవయించి ఆగ్ మొర గెలి కి, జివుల.

26 చి, కో అంక నంప తెన్ జితతి గే, సిచ్చు జతి మొర్తుతె కెయచ కి గెతి నాయ్. అమ్మ, ఈంజ కోడు తుయి నంపజతసి గే?" మెన పుసిలన్.

27 మార్త యేసుక "నంపజా అస్సి ప్రబు. ఈంజ లోకుమ్ తె జెంక తిలో రచ్చించువ కెర్తోసా జతో క్రిస్తు తుయి మెన, దేముడుచొ పుత్తుసి తుయి మెన నంప తెన్ అస్సి" మెన ఒప్పన సంగిలి.

28 జలె, మార్త ఇసి సంగిలి బేగి, యేసుక ఒత్త ముల దా గెరి గెచ్చు, "గురుబాబు జా అస్సె. తుక బుకార్తయ్" మెన బేన్ని జలి మరియక తిరీమ్ సంగిలన్.

29 మరియ ఈంజ కోడు సూన, చట్కున ఉట్ట, యేసుతె గెచ్చుక బార్ జలి.

30 ఈంజ మదెనె, యేసు కేనె అస్సె మెలె, మార్త జోక దస్సుల్ జా ముల దిలి టాన్ తె రక అస్సె. గవ్వీ జెంక నేతయ్.

31 మరియ చట్కున బార్ జతికయ్, జాతె జా తా జాక బురియయ్ తె తిల యూదుల్ దెక, "మెన్నె ఏడుక గెతయ్, కిచ్చొగె" మెన ఉచర, జాచి పట్టి గెల.

32 జలె, యేసు తిలిన్ తె మరియ పావ కెర, జోక దెక జోచి చట్టె సెర్ను సేడ, "ప్రబు, తుయి ఇన్నె తత్తది జలె, అంచొ అన్నొ మొర గెతో నాయ్" మెన సంగిలి.

33 జా ఏడ్డిసి, జేవ్ తెన్ అయ్ల యూదుల్ ఏడ్డిసి దెక, యేసు కన్కారుమ్ జా జోచి ఆత్మతె బాద సేడ,

34 "జోక కేనె రోవిలదు?" మెన పుసిలన్, చి జేవ్ జోక "జా దెకు, ప్రబు!" మెన సంగిలి.

35 యేసు ఆసుమ్ గేడవ ఏడ్డన్.

36 జో ఏడ్డిసి దెక, ఒత్త తిల యూదుల్ సగుమ్ జిన్ "ఆదె, జోవయంక కెద్ది ప్రేమ తిలో, ఈంజో!" మెన దెకయ్ల.

37 జోవయంతె అన్నె సగుమ్ జిన్, మాత్తుమ్, "జో గుడ్డి మాస్సుచ అంకివొ డీనయ్లో, గెద. జలె, లాజర్ నే మొర్తి రితి కెర్తో జలె", మెన సంగిలి.

యేసు లాజర్ క జియడ్డిసి

38 తెదొడి యేసు జోచి ఆత్మతె అన్నె ఒగ్గర్ ఒగ్గర్ కన్కారుమ్ జా, మెన్నె పావిలన్. ఈంజ మెస్సున్ కీసిచి మెలె, మెట్టయ్ తిలి సాప్రయ్ డొల్కి కెర్లి గది. జా డొల్కి కెర్లిన్ క డంక తిలిసి వెల్లో పత్తురు.

39 యేసు, "పత్తురు కడ గెల!" మెలన్. దస్సి మెంతికయ్, మొర

గెలోసాచి మార్త మెలి బేన్ని జోక “ప్రబు, జో మొర గెచ్చ చెత్తర్ పొదుల్ జలి! పినుమ్ వాసిన పెట్టె తయెదె!” మెన సంగిలి.

40 యేసు జాక “ఆవ్ తుక కిచ్చి సంగిలయ్ గే, తుయి నంప తెన్ తిలిగిన, దేముడుచి గవురుమ్ సెక్కిచి రుజ్జు దెకితె.” మెన ఇదిల్ గోల కెర్లన్.

41 జలె, పత్తురు కడ గెల, చి యేసు ఆగాసుమ్ పక్క దెక “ఓ బ, తుయి అంచి ఆస నూన్లది మెన అంక నర్ల.

42 తుచి తెన్ ఆవ్ లట్టబ్బిసి తుయి కెయ్యక తెయ్యక నూన్తసి మెన ఆవ్ పూర్తి జాని, గని తుయి అంక తెద్రయ్ లిన్ చి రుజ్జు దెక నంపజతు మెన, ఇన్నె టీవ తిల పైజలచి రిసా ఇసి చోండి పుట్టవ సంగితసి” మెన సంగ, గట్టిజ ఒర్న,

43 “లాజర్, బార్ జా!” మెన బుకార్లన్.

44 చి జో మొర గెలోసా, జోచ అత్తో చట్టో బందున్ తెన్ తతె, జోచి మొక్కె తువ్వల్ గుడియవ తతె, బార్ జా అయ్లో, చి తిల మాన్సుల్క యేసు “కట్టు యివ, జోక విడ్డల్ కెర!” మెన సంగిలన్.

యేసుక మారుక మెన యూదుల్ అన్నె కుట్ల కెర్లిసి

(మత్త 26:1-5; మార్కు 14:1-2; లూకా 22:1-2)

45 వురియ తెన్ జా తిల యూదుల్తె ఒగ్గర్ జిన్ జలె, యేసు కెర్లిసి దెక, జోక నంపజల.

46 గని జోవయింతె అన్నె సగుమ్ జిన్, పరిసయ్యుల్తె గెచ్చ, యేసు కెర్లిసి జోవయింక సంగిల.

47 వెల్లెల పూజర్లు పరిసయ్యుల్ సబ కెర్లసక వెనవ దా, “అమ్ కిచ్చో కెర్లె జయెదె? ఈంజో మాన్సు ఒగ్గర్ ఒగ్గర్ వెల్లెల కమె కెర్లయ్, చి

48 అమ్ జోక నే ములయ్లె, పైజల్ ఎత్తిజిన్ జోక నంపజా గెచ్చుల. చి రోమ్ దేసిమ్చ సయ్ న్యుమ్ జా కెర, అమ్చి దేముడుచి గుడి కి అమ్చి ఒండి దేసిమ్ కి పాడ్ కెరుల” మెన సంగిల.

49 జలె, జేవ్ వెల్లెల మాన్సుల్తె కయప మెలో ఎక్కిలో తిలో. జా వెర్ని జోయ్యి ఎత్తిక వెల్లో పూజరి జా తిలో. సబతె తిలసక జో కిచ్చో మెన సంగిలన్ మెలె, “తుమ్ కిచ్చోయ్ నేన్సు.

50 ఏక్ కోడ్లు తుమ్ ఉచర. అమ్చ యూదుల్ అమ్చి దేసిమ్ పాడ్ నే జతి రితి ఎక్కిలో మొర్లె తుమ్క చెంగిలి” మెన సంగిలో.

51 జలె, జోక జోయ్యి ఈంజ కోడు సంగె నాయ్. గని జా వెర్ని జో ఎత్తిక వెల్లో పూజరి జా తిలి రిసా, దేముడు జోచి చోండి పుట్టవ సంగయ్లో. జా కబుర్చి అర్దుమ్ కిచ్చో మెలె, యూదుల్తెచ మాన్సుల్క పాపుమ్ తెంతో రచ్చించుప కెర్లి రిసా యేసు మొరుక తిలి.

52 ఎక్కి యూదుల్తెచ మాన్సుల్క నాయ్. గని జోవయింక బోదల్ జల జోక నంపజల మాన్సుల్ ఎత్తిక, జేవ్ కేన్ దేసిమ్చ జలెకి, జేవ్క ఎక్కితె జోవయించి బెదవంతి రిసాయి మొరుక తిలి.

53 జలె జా దీసి తెంతో, ‘యేసుక కిసి మారుమ్’ మెన, వెల్లెల మాన్సుల్ కుట్ల ఉచరై తిల.

54 జలె, జో మొర్లి సమయ్యుమ్ జెంక నేతయ్చి రిసా యేసు, యూదుల్చ వెల్లెల మాన్సుల్ తిలిన్తె నే బుల్లె, ఒత్త తెంతో వెల్లి బయిలు పక్క, ఎప్తాయిమ్ మెంతి గవ్వె ఉట్ట గెచ్చ, జా మదెనె జోవయించ సిన్సుల్ తెన్ ఒత్త తా గెల.

55 యూదుల్చి జా వెర్నిచి *పస్కా పండుగు పాసి జా అయ్లి. జా పండుగు నే జెతె అగ్గె, సుద్ది కెరనుక మెన, యూదుల్ ఎత్తిజిన్ జోవయించ జోవయించ గవ్వెలె తెంతో యెరుసలేమ్తె జా అన్సి.

* 11:55 11:55 పస్కా పండుగచి రిసా 2:13చి ఎట్టోచి కోడు దెక.

56 దేముడుచి గుడితె గెలస యేసుక రకితె అన్తి. ఒత్త రకితె తా కిచ్చి మెన లట్టబంతె అన్తి మెలె, “తుమ్ కిచ్చి ఉచర్తను? ఏక వేల పండుగక జెయె నాయ్ గే?” మెన లట్టబంతె అన్తి.

57 కిచ్చొక మెలె, జా మదెన వెల్లెల పూజర్లు చి పరిసయ్యుల్ జోక జేలి కెరుక మెన ఉచర “జో కేనె తయెదె గే కో జాన్లె, అమ్క సంగ!” మెన ప్రెజల్క ఆడ్ర దా అన్తి.

12

యేసుక వాసెన తేల్ గాస దిలిసి (మత్త 26:6-13; మార్కు 14:3-9)

1 * పస్కా పండుగక సొప్పు పొదుల్ అగ్గె, యేసు బేతనియ గవ్వె అన్నె ఉట్ట అయ్లన్. జా గవ్వె యేసు జియడ్లొ లాజర్ అన్సి.

2 జలె, యేసు ఒత్త తతికయ్, జోచి రిసా విందు దిల. మార్త జొగిడ్లి, చి యేసు తెన్ అన్సిమ్ కయ్లనతె లాజర్ తిలన్.

3 జేవ్ ఎత్కిజిన్ వెన తిలిన్తె, జలె, మరియు ఒగ్గర్ విలువ తిలి ఏక ఎదిలి చెంగిల్ వాసెన తేల్ ఆన్లి. ఆన, యేసుచ చట్టొతె గాస, జాచి సెండి తెన్ పుంచిలి, చి ఒండి గెరి జా తేల్చి వాసెన బెర్రి.

4 జలె, ఇస్కరియోతు యూదా మెలొ యేసుచ సిస్సుల్తె తా, జో కి ఒత్త అన్సి. కొన్సొ మెలె, జో పడ్డొ విరోదుమ్ సుదల్తె యేసుక దెర దెయెదె. జలె, యేసుక మరియు జా తేల్ గాస్తికయ్, జో యూదా జాక,

5 “ఈంజ తేల్ సొప్పు పుంజొ వెండ్లక ఏక గెల్తది జలె, బీద సుదల్క జా డబ్బుల్ దర్ముమ్ దెంక జతి!” మెన గోల కెర్లన్.

6 గని ఆరిక సంగిలొ, బీద సుదల్చి ఉప్పిర్చి కన్యారుమ్క నాయ్. కిచ్చొక

మెలె, జో చోరు. సిస్సుల్చి డబ్బుల్ పెట్టె జోచి అత్తి తిలి, చి జా డబ్బుల్ జో చోర కంక అలవాట్ జా తిలొ.

7 జలె, యూదా జా కోడు సంగితికయ్, యేసు జోక, “జాక గోల కెరు నాయ్. అంక † రోవితి దిసికచి కామ్క ఈంజ గుర్తు తతి రితి జా, జా తేల్ తియ దా తిలి. తవుసు.

8 బీద సుదల్ కెయక తెయక తుమ్చి తెన్ తవుల చి రిసా ఇస్సుమ్ అయ్లి పొది జోవయింక దర్ముమ్ దెంక జయెదె. ఆవ్, మాత్రుమ్, కెయక తెయక తుమ్చి తెన్ ఇసి తయె నాయ్” మెన సంగిలన్.

9 యెరూసలేమ్తె ‡ పండుగక బెర తిల యూదుల్, జలె, యేసుచి రిసా, జో ‘బేతనితె లాజర్తె అన్సి’ మెన నూన కెర, యేసుక దెకుక మెన, చి జో జియడ్లొ లాజర్క దెకుక మెన ఒత్త ఉట్ట అయ్ల.

10-11 జాకయ్, ‘లాజర్క జియడ్లిసిచి రుజ్జు దెక ఒగ్గర్జిన్ అమ్చి ఆచారిమ్ ముల దా యేసుక నంపజతతి’ మెన వెల్లెల పూజర్లు బియక కెర, లాజర్క కి మారుక ఉచర్ల.

యేసు యెరూసలేమ్తె ఉట్ట అయ్లొ (మత్త 21:1-11; మార్కు 11:1-11; లూకా 19:28-40)

12 ‘యేస్సు యెరూసలేమ్తె జెతయ్’ మెన పండుగక బెర తిల మాన్సుల్ అన్నెక్ దిసి నూన కెర,

13 ‘జో తెన్ దస్సుల్ జమ్దె’ మెన, పట్టుమ్ తెంతొ బార్ జా కజారుమ్ రూకుల్చ మట్టల్ మోడ దెరన వట్టె జా తా, యేసు పాసి అయ్లి పొది “అమ్చొ ప్రబుచి నావ్ తెన్ జెతొ రచ్చించుప కెర్తొసాక జిఒర, జొఒర! అమ్చి ఇస్రాయేల్చ ప్రెజల్చొ రానొక ఓసన్న, ఓసన్న!” మెన జోచి రిసా కేకుల్ గల్తె తిల.

* 12:1 12:1 పస్కా పండుగచి రిసా 2:13చి ఎట్టొచి కోడు దెక. † 12:7 12:7 పస్కా పండుగక కిసి మెండపిల్లక అర్పితుమ్ దెవుల గే, దస్సి, ఈంజ జెతె తిలి పస్కా పండుగక యేసుయి పాపల్ గెచ్చయెతి అర్పితుమ్ జయెదె. ‡ 12:9 12:9 2:13చి ఎట్టొచి కోడుక దెక.

14-15 జలె, 'జర్గు జయెదె' మెన దేముడుచి కొడెతె పూర్గుమ్ దేముడు రెగ్డయలి తిలిసి జర్గు జలి. కీసి మెలె, యేసు ఏక్ గాడ్డె పిల్ల దొర్కు కెరన, వెగ, పట్టుమతె అయ్లో.

"ఓ కీసిమోనుచి దువిసి, తుయి అన్నె బి నాయ్!
గాడ్డె పిల్లతె వెగ, తుమ్చొ రానొ జెతయ్!"
మెన రెగిడ్డి కోడు.

16 ఈంజ ఎత్కి జర్గు జతె తిలి పొది యేసుచ సిస్సుల్ కి అర్దుమ్ కెరంతి నాయ్. గని యేసు దేముడు అబ్బొన్తె అన్నె వెగ గెలి వడ్డె, యేసుక ఇసి జలి, చి జోచి రిసా దేముడు అబ్బొసి జా కోడు రెగ్డవ తిలన్ మెన ఉచార కెర్ల.

17 జలె, యేసు జో లాజర్క మెస్సున్ తెంతో బుకారా జియడ తిలిన్తె బెర తిల మాస్సుల్ జేవ్ జా ఇసి సొంత దెకిలిన్క అప్పా సాచి సంగితె తిల.

18 యెరూసలేమ్తెచ ప్రెజల్ కిచ్చొక యేసు తెన్ దస్సుల్ జంక బార్ జా తిల మెలె, లాజర్క యేసు జియడ జోచి అదికారుమ్క రుజ్జు దెకయ్లిన్చి రిసా సూన తిల.

19 ప్రెజల్ యేసుక నంపజతతి మెన పరిసయ్యుల్ దెక, "అయ్యొ, జోవయింక పిట్టయ్తిసి అమ్ అన్నె కిచ్చొ కెరుక కామ్క నెంజె. ఆదె, లోకుమ్ ఎత్కిచ మాస్సుల్ జోచి పట్టి గెచ్చు అస్తి" మెన ఎక్కిలో తెన్ ఎక్కిలో లట్టబన్ల.

20 పండుగు పొది బక్తి కెరుక అయ్లసతె సగుమ్జిన్ గ్రీసు దేసిమ్చ మాస్సుల్ ఒత్త అయ్ల.

21 జేవ్ జలె, గలిలయతె తిలి బేత్నయిదా గవ్వొచొ పిలిప్ మెంతో యేసుచొ సిస్సుడు ఎక్కిలోక చజ కెర జోక "బాబు, యేసు తెన్ లట్టబుక మెన అయ్లమ్" మెన సంగిల.

22 చి పిలిప్ అంద్రెయ మెలో సిస్సుడుక సంగ, జేవ్ దొగుల యేసుతె జా, జోక సంగిల.

యేసు మొర గెచ్చుక తిలిన్చి రిసా సంగిలిసి

23 యేసుక జేవ్ దొగుల సిస్సుల్ జా కబుర్ సంగితకయ్, జో జోవయింక, "ఆవ్ మాన్సు జా జెర్గున్ అయ్లోసా గవురుమ్ జతి సమయ్యుమ్ జా అస్సి.

24 తుమ్క ఆవ్ కిచ్చొ నిజుమి కచితుమ్ సంగితసి మెలె, గోదుమ్ గిడ్డ జవున్ పంటో దెరుక జలె, బుయ్యొ సేడ చొప్పొ కునుడ గెలెకయ్ జయెదె. దస్సి తొలితో మొర్లి రితి నే జలెగిన, ఎక్కి గిడ్డయ్ తాఁ గెచ్చెదె. గని దస్సి మొర్లి రితి జలె, ఒగ్గర్ పంటో దెరెదె.

25 "జోచి జివుక జో కో ప్రేమ కెర రచ్చించుప కెరనుక ఉచరుల గే, జోచి ప్రానుమ్ పాడ్ జా గెచ్చెదె, గని ఈంజ లోకుమ్తె కో జోచి సొంత జివుక విలువ నే దెకితె దేముడుక నిదానుమ్ కెరుల గే, జోచి జివు జోక దొర్కు జా, పరలోకుమ్తె గెచ్చు కెయ్క తెయ్క ఒత్త జివుల.

26 అంచి సేవ కో కెరుల గే, అంచి పట్టి అయ్లి రితి ఆవ్ కెర్లి రితి కెరుక, చి ఆవ్ కేనె తయిందె గే, అంచొ సేవ కెర్టొసా ఒత్తయ్ తంక. కో అంచి సేవ కెరుల గే, జోక కచితుమ్ దేముడు అబ్బొ గవురుమ్ కెరెదె.

27 "ఓ బ, అప్పె అంచి పెట్టి ఒగ్గర్ బాద జతసి. ఆవ్ తుక కిచ్చొ సంగుక? 'ఓ బ, ఈంజ సమయ్యుమ్చి కామ్ అంక పిట్టవు' మెన సంగుక గే? నాయ్, నెంజె. ఈంజ కామ్చి రిసాయి, సమయ్యుమ్చి రిసాయి ఈంజ లోకుమ్తె ఆవ్ అయ్లయ్, గెద?

28 ఓ బ, తుచి నావ్క గవురుమ్ కెరను" మెన దేముడు అబ్బొన్క ప్రార్దన కెర్లన్, చి బేగి, ఆగాసుమ్ తెంతో జో దేముడు జోచి అవాడ్ సూనయ్లన్. కిచ్చొ మెన సూనయ్లన్ మెలె, "అంచి

నావక గవురుమ్ కెర అస్సి, చి అన్నె గవురుమ్ కెరనిందె” మెన సంగిలన్.

29 పాసి టీచ తిల జనాబ్ నూన్ల, చి “ఉర్ముల్ కెర్లి” మెన జోవయింతె సగుమ్జిన్ సంగిల. అన్నె సగుమ్జిన్, మాత్రమ్, “దేముడుచి దూత ఎక్కిలో జో తెన్ లట్టల్లన్” మెన సంగిల.

30 యేసు జోవయింక, “ఈంజ అవాడ్ నూనయ్లిసి అంక దయిరిమ్ కెర్లి రిసా నాయ్, అంక దయిరిమ్ అస్సె. గని త్తుమ్కయ్ ‘నంపజతు’ మెన నూనయ్లిన్.

31 కిచ్చొక మెలె, అప్పె జర్గు జంక తిలిన్చి రిసా ఈంజ లోకుమ్చ తీర్పు జవుల. అప్పె జర్గు జంక తిలిన్చి రిసా, ఈంజ లోకుమ్క అప్పెచి మట్టుక ఏలుప కెర్టొ నయ్తానుక బార్ కెర పెలవ దెయెదె.

32 అన్నె, మాన్సుల్ అంక బుయి తెంతో ఉక్కుల టీచడ్లి పొదిక దేసిమ్లు ఎత్తి తెంతోచ మాన్సుల్క అంచితె బుకారా ఆనిందె” మెన ఒత్త తిలసక యేసు సంగిలన్.

33 ‘ఉక్కుల టీచడ్లి పొదిక’ మెలి కోడుతె కిచ్చొ అర్దుమ్ మెలె, ఏక్ *సిలువతె మాన్సుల్ యేసుక టీచడ్లి, మెలెదె. జో సంగిలిన్తె జయ్యి అర్దుమ్.

34 జలె, యేసు జా కోడు సంగితికయ్, జనాబ్తెచ మాన్సుల్ ఆచారిమ్ జా కిచ్చొ మెల మెలె, “ ‘రచ్చించుప కెర్టొసా జతో క్రిస్తు నే మొర్తె కెయ్క తెయ్క తా గెచ్చెదె’ మెన † మోసే పూర్గుమ్చొచి అత్తి దేముడు రెగ్గయ్ల ఆగ్గుల్తె తిలిసి నూన అస్సుమ్. గని తూయి జలె, ‘ఆవ్ మాన్సు జా జెర్మున్ అయ్లోసొక ఉక్కుల టీచడుక అస్సె’ మెన తుయి సంగితసి.

* 12:33 12:33 ‘సిలువ’ కిసి తయెదె మెలె, ఏక్ టీచేతి చి ఏక్ అర్దుమ్ జతి దొన్సి డేడిన్ రిత డండల్ బెదవుల జా సిచ్చ జతో మాన్సుక జా సిలువతె ఎంగ్లవ కెర, జోవయించ అత్తొ చట్టొ చంపొ కెరవ, అత్తొచట్టొతె మేకుల్ పెట, నెంజెలె వాలివో తెన్ బంద దా, సిలువ బుయ్యె టీచ రోవ కెర దస్సి ములుల. జో సిచ్చ జతోసా దస్సి ఒడయ్ జా మెలెదె. రోమ్ దేసిమ్చి అలవాట్ తెన్ చి సిచ్చ, జా. † 12:34 12:34 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రెగ్గయ్లి ఆగ్గుల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పాచ్ పుక్కుమ్తె రెగ్గయ్ జా అస్సె. ఈంజ దెకవుక మెన కుపియ బాసతె నొయి ప్రమానుమ్తె మోసే పూర్గుమ్చొచి అత్తి రెగ్గి దేముడుచ ఆగ్గుల్ మెన రగ్గవ అస్సె.

దస్సి జలె మాన్సు జా జెర్మున్ అయ్లోసొ క్రిస్తు జయెదె గే, నెంజె గే?” మెన అన్మానుమ్ జల.

35 జేవ్ దస్సి జతికయ్, యేసు జోవయింక, “అన్నె సగుమ్ దీసల్ అంచి ఉజిడి తుమ్చి తెన్ తయెదె. తుమ్ అందర్బుద్దిక దెర్ను నే సేడ్లి రిసా, ఈంజ ఉజిడి తతె తుమ్ ఈంజ ఉజిడ్తె ఇండ్ల, కిచ్చొక మెలె, అందర్తె కో ఇండుల గే, కేనె గెత్తతి గే నేన్తి.

36 తుమ్ ఉజిడిచ పుత్తర్లు జతి రిసా, ఈంజ ఉజిడి తుమ్తె తతె ఎద ఈంజ ఉజిడిక పూర్తి నంపజంక దెర” మెన బోదన కెర్లన్. యేసు ఇసి సంగ కేడయ్లి పడ్డె, ఒత్త తెంతో బార్ జా, యూదుల్ నే చజితి రితి లుంకిల్ రితి తిలో.

యూదుల్ నే నంపజలిన్చి రిసాచి కోడు

37 యేసు జోవయించి మొక్కె జోచి అదికారుమ్క రుజ్జు దెకయ్త ఎత్తివాట్ కమె కెర తిలె కి, జోక జేవ్ నంపజతి నాయ్.

38 జేవ్ నే నంపజతిసి కిచ్చొక మెలె, యెసయా పూర్గుమ్చొచి అత్తి దేముడు రెగ్గి కోడు నెరవెర్చువ జతి రిసాయి.

“ఓ ప్రబువ, అమ్ సంగిలి తుచి కబుర్ నూన్లె కి, కో నంపజా అస్తి? కోయి నాయ్. తుచి అదికారుమ్క రుజ్జు దెకయ్త కమె దెకిలెకి, జోవయించి జా సెక్తి కో చిన అస్తి? కోయి నాయ్” మెన రెగ్గి కోడు.

39 జాకయ్ యేసుక నంపజంక నెత్తిర్ల.

40 పడ్డె జోవయించి సిచ్చుచి రిసా యెసయా పూర్గుమ్చొచి అత్తి జో ప్రబు రెగ్గియ్లిసి అన్నెకతె కి జయ్యి అర్దుమ్.

“జోవయించ అంకివో గుడ్డి కెర్లి రితి కెర, జోవయించి పెట్టి బేడు బందిలి రితి దేముడు కెర అస్సె.

‡ జోవయించ అంకివో దెకుత్ నాయ్, జోవయించి పెట్టి అర్దుమ్ కెరంతు నాయ్, ఆవ్ దెతి వర్దుమ్ నజనుక బుల జెతు నాయ్ మెన అంచి సెలవ్” మెన ప్రబు రెగ్గయిలి కోడు.

41 యెనయా పూర్గుమ్చో కీసి ఇసి మెలన్ మెలె, దేముడు దెకయ్లి సివ్వుతె యేసుచి గవురుమ్చి గుర్తు దెక తిలో, చి జోచి రిసా రెగిడ్లన్.

42 యూదుల్తె ఒగ్గర్జిన్ యేసుక నే నంపజలెకి, జోవయింతె ఒగ్గర్జిన్ వెల్లెల మాన్సుల్ కి నంపజల. గని మాన్సుల్చి మొక్కె ఒప్పన్తి నాయ్. కిచ్చొక మెలె, ‘పరిసయ్యుల్ సూన్లె, అమ్క సబ గెరలె అన్నె పెనయితి నాయ్’ మెన బిల.

43 కిచ్చొక దస్సి బిల మెలె, దేముడు దెతి గవురుమ్చి కంట, మాన్సు దెతి గవురుమ్చయ్ ఆస జా తిల.

44 జలె, ఎత్తిజిన్ సూన్తి రితి కేక్ గల యేసు కిచ్చొ మెన బోదన కెర్లన్ మెలె, “కో అంకయ్ నంపజతతి గే, ఎక్కి అంకయ్ నాయ్, గని అంక తెద్రయ్లోసాక నంపజతతి.

45 అంకయ్ కో దెకితతి గే, అంక తెద్రయ్లోసాక దెకితతి.

46 “ఈంజ లోకుమ్తె కిచ్చొక అయ్లయ్ మెలె, అందర్బుద్ది ఇండిత ఈంజ లోకుమ్చ మాన్సుల్క ‘దస్సి తత్తు నాయ్, గని అంక నంపజా రచ్చించుప జతు’ మెన దొర్కు జలి ఉజిడి తా ఈంజ లోకుమ్తె అయ్లయ్.

47 అంచ కొడొ కో సూన్తతి గని కెర్లి నాయ్ గే, జోవయింక ఆవ్ తీర్పు కెరి నాయ్. కిచ్చొక మెలె, ఆవ్ ఈంజ లోకుమ్తె అయ్లిసి ఈంజ లోకుమ్చక తీర్పు కెర సిచ్చ కెర్లి రిసా నాయ్, గని

జోవయింక రచ్చించుప కెర్లి రిసాయి అయ్లయ్.

48 “గని జాగర్త తా. కిచ్చొక మెలె, కో అంక నంప కెర్లి నాయ్, చి అంచ కొడొ సూన కెరుక నెసితి గే, జోవయింక తీర్పు కెర సిచ్చతె తెద్రయ్తిసి అస్సె. మెలె, ఈంజ లోకుమ్చక తీర్పు కెర్లి జా ఆకర్ దీసిక, ఆవ్ అప్పె సంగిల కొడొ జోవయింక కచితుమ్ తీర్పు కెర సిచ్చతె తెద్రవుల.

49 కిచ్చొక మెలె, అవ్వి కెర ఆవ్ కిచ్చొ సంగి నాయ్. ఆవ్ కిచ్చొ మెన లట్టుబుక గే, కిచ్చొ సంగుక గే, అంక తెద్రయ్లో దేముడు అబ్బొయి అంక ఆడ్ర దా అస్సె.

50 అన్నె కేనె నాయ్, గని జోచి కోడు కెర్లిన్తెయ్ పరలోకుమ్తె బెదితి కెయ్క తెయ్క చెంగిల్ తతి సెక్తి అస్సె మెన కచితుమ్ జాని. జాకయ్ ఆవ్ కిచ్చొ సంగితసి గే, దేముడు అబ్బొయి సంగిల్ రితి ఆవ్ సంగితసి.”

13

యేసు జోచ సిస్సుల్క చట్టా దోవిలిసి

1 ఈంజ లోకుమ్ ముల దా దేముడు అబ్బొన్తె అన్నె ఉట్ట గెతి సమయుమ్ అయ్లి మెన యేసు జానె. జో ఈంజ లోకుమ్తె నిసాన్ల బారజిన్ సిస్సుల్క అగ్గె తెంతో ప్రేమ కెర్తయ్, గని అప్పె, *పస్కా పండుగక ఏక్ దీసి అగ్గె, ఆకర్ ఎదచి జోచి ఎదివాల్ ప్రేమ సొస్టుమ్ దెకయ్లో.

2 జా సంజె, యేసు జోవయించ బారజిన్ సిస్సుల్ తెన్ ఎక్కితె అన్నిమ్ కెర్తతి. ఇస్కరియోతు సిమోనుచో యూదా మెలొ పుత్తుసి జోవయింతె అస్సె. జలె, యేసుక విరోదుమ్ సుదల్చి అత్తి దెర దెంక మెన సయ్తాన్ యూదాక సికడ అస్సె.

‡ 12:40 12:40 నెంజెలె. “నెంజెలె జోవయించ అంకివో దెకిత, జోవయించి పెట్టి అర్దుమ్ కెరంత, చి ఆవ్ చెంగిల్ కెర్లి వరుమ్ నజనుక పసుల జెత”.

* 13:1 13:1 పస్కా పండుగక కీసి మెండపిల్లక అర్పితుమ్ దెవుల గే, దస్సి, ఈంజయ్ పండుగు దీసి యేసుయి పాపల్ గెచ్చయ్తి అర్పితుమ్ జయెదె.

3 గని, 'దేముడు అబ్బొ అంచి అత్తి ఎత్తి సార్లు కెర దా అన్నె, చి దేముడు అబ్బొ తెంతో ఉత్త అయలయ్, చి దేముడు అబ్బొతెయి ఆవ్ అన్నె ఉట్ట గెతసి' మెన యేసు జానె.

4 జలె, అన్నిమ్ కెరై తిలి పొది యేసు ఉట్ట, జో గలన తిలి దిగిల్ సొక్క రితిసి తియ దా, జోవయించ సిస్సుల్క, జో గెత్తి సుదో జతి రితి గుర్తుక, ఏక్ తువ్వల్ కెరంటి బందన్సన్.

5 తెదొడి తప్పెలయ్ పాని సువ కెర, సిస్సుల్చ చట్టో దోవ జో బందన్లి తువ్వల్ తెన్ వుంచుక దెర్సన్. నగుమ్జినచ చట్టో దోవ వుంచ తా,

6 సీమోను పేతురుచ చట్టో దోవుక మెన జోతె పావిలన్. గని పేతురు జోక, "ప్రబు, తుయి అంచ చట్టో దోవుక గే? పోని!" మెన బమ్మ తెన్ సంగిలన్.

7 'పోని' మెన సంగితికయ్, యేసు జోక "ఆవ్ అప్పె కెర్తిసి తుక అప్పె అర్దుమ్ నాయ్. గని పడ్డొక అర్దుమ్ కెరంతె" మెన సంగిలన్.

8 పేతురు జోక అన్నె, "ప్రబు, తుయి అంచయ్ చట్టో కెయళక కి దోవుక ఆవ్ ఒప్పి నాయ్" మెన ఒగ్గర్ జా సంగిలన్. యేసు జోక, "ఆవ్ తుక †సుబ్బుమ్ నే కెరై, అంచి రాజిమ్తె తుక కిచ్చొ వాట తయె నాయ్" మెన సంగిలన్.

9 పేతురు జోక, "ప్రబు, దస్సి జలె, అంచ చట్టో అత్తొ బోడి కి, ఎత్తి దోవ గెలు!" మెన సంగిలన్.

10 తెదొడి యేసు జోక, "కో పాని నాయ తవుల గే, జోచ చట్టొక పిట్టవ, పూర్తి సుబ్బుమ్ జా తవుల. దస్సి, ఎక్కిలోక పిట్టవ, తుమ్ ఎత్తిజిన్ సుబ్బుమ్ జా అస్సున్" మెలన్.

11 యేసు కిచ్చొక దస్సి మెలన్ మెలె, కో జోక విరోదుమ్ సుదల్తె దెర దెయెదె గే జో జానె. జాకయ్ 'ఎక్కిలోక పిట్టవ

తుమ్ ఎత్తిజిన్ సుబ్బుమ్ జా అస్సున్' మెన సంగ తిలొ.

12 సిస్సుల్చ చట్టో దోవ కేడయ్లి పడ్డొ, జోచ పాలల్ అన్నె గలన, అన్నె అన్నిమ్తె వెన, యేసు జోవయింక, "ఆవ్ తుమ్క కెర్లి గుర్తుచి రిసా తుమ్క అర్దుమ్ జలి గే నాయ్ గే?

13 అలై, అంక 'గురు', 'ప్రబు' మెన తుమ్ సంగితసు. బాద నాయ్. ఆవ్ నిజుమి తుమ్చొ గురు, తుమ్చొ ప్రబు.

14 ఆవ్ జలె, తుమ్చొ ప్రబు తుమ్చొ గురు జలెకి, తుమ్క సేవ కెర్తి ఏక్ గుర్తుక తుమ్చ చట్టో దోవితసి జలె, తూమ్ జా గుర్తుచి అర్దుమ్ కెరన తూమ్ కి ఎక్కిలోచ చట్టో ఎక్కిలో దోవలి రితి జా, ఎక్కిలోక ఎక్కిలో సేవ కెరై తంక.

15 ఆవ్ అప్పె కెర్తిసి జా గుర్తుకయ్, తుమ్క ఆవ్ కెర్లి రితి తుమ్ ఎక్కిలోక ప్రేమ కెరై తంకయ్.

16 తుమ్క నిజుమి కచితుమ్ ఆవ్ కిచ్చొ సంగితసి మెలె, సేవ కెర్తొసా జోచొ ఎజొమానిచి కంట వెల్లొ నెంజె. దస్సి, తెద్రయ్ జలొసా, జలె, జోక తెద్రయ్లోసాచి కంట వెల్లొ నెంజె.

17 జలె, ఈంజ ఎత్తిచి అర్దుమ్ కెరన్లదు మెలె, జా బుద్ది ఇండితె తిలె తుమ్క చెంగిలి.

విరోదుమ్ సుదల్తె దెర దెయెదె (మత్త 26:20-25; మార్కు 14:17-21; లూకా 22:21-23)

18 "గని, ఆవ్ అప్పె సంగిలి బుద్ది తుమ్ ఎత్తిజిన్ జసు నాయ్. కిచ్చొక మెలె, ఆవ్ నిసాన్లనచి బుద్ది ఆవ్ జాని. అప్పె జర్గు జతిసి కిచ్చొక జయెదె మెలె, అంచి తెన్ అన్నిమ్ కెర్లొ ఎక్కిలో అంక తావ్ దిలి రితి కెరెదె మెన రెగిడ్డి కోడు అప్పె నెరవెర్చువ జంకయ్.

19 ఈంజ ఎత్తి జర్గు నే జతె అగ్గె ఆవ్ తుమ్క కిచ్చొక సంగితసి మెలె, జా జర్గు

† 13:8 13:8 13:1చి ఎట్టొచి కోడు దక.

జలి మెలె, జా రుజ్జు దెక, 'నిజుమి దేముడు తెద్రయ్లో క్రిస్తు రచ్చించుప కెర్లొసా' మెన అంచి రిసా తుమ్ పూర్తి దయిరిమ్ తెన్ నంప జస్తె.

20 తుమ్క అన్నె కిచ్చొ నిజుమి కచితుమ్ ఆవ్ సంగితసి మెలె, ఆవ్ తెద్రయ్త మాస్సుల్క కో నంపజా మరియాద కెరుల గే, అంకయ్ నంపజా మరియాద కెర్లి రితి జయెదె. అంకయ్ నంపజా కో మరియాద కెరుల గే, అంక తెద్రయ్లోసాక నంపజా మరియాద కెర్లి రితి జయెదె" మెన సంగిలన్.

21 ఈంజేవ్ కొడొ సంగ కెర, యేసు జోచి మెన్నుతె బాద సేడ, సిస్సుల్క కిచ్చొ సాచి సంగిలన్ మెలె, "తుమ్క కిచ్చొ నిజుమి కచితుమ్ ఆవ్ సంగితసి మెలె, తుమ్చితె ఎక్కిలో అంక విరోదుమ్ సుదల్చి అత్తి సార్ప కెర దెయెదె" మెన సంగిలన్.

22 జలె, కిచ్చొ రిసా సంగితయ్ గే నేన్తి, చి ఎక్కిలోక ఎక్కిలో అన్మానుమ్ తెన్ దెక దుకుమ్ జల.

23 గని యేసు ఒగ్గర్ ప్రేమ కెర్లొ సిస్సుడు ఎక్కిలో యేసుచి †గుండెచి ఉప్పిరి వెల వెస అస్సె.

24 జాకయ్, సీమోను పేతురు జో సిస్సుడుక నయ్న కెర, "కచి రిసా సంగితయ్ గే, నూన అమ్క నంగు" మెన సంగిలన్.

25 జాకయ్, యేసుచి గుండెచి ఉప్పిరి వెల తిలో జో సిస్సుడు "ప్రబు, కచి రిసా దస్సి సంగిలది?" మెన పుసిలన్, చి

26 యేసు పొడి గండ దెర, "ఈంజ పొడి గండ రోన్తె బుడ్డవ కక్క దెయిందె గే, జోయ్యి" మెన సంగిలన్. సంగ, జా గండ బుడ్డవ కెర, ఇస్కరియోతు సీమోనుచొ పుత్తన్ జలో యూదాక దిలో.

27 యూదా జా గండ నజ్జి బేగి, నయ్తాన్ జోక దెర్లన్. యేసు జానె, చి "తుయి కెరుక తిలీసి బే బేగి జర్గు కెరు!"

మెన యూదాక సంగిలన్.

28 యేసు యూదాక కిచ్చొక దస్సి సంగిలన్ గే జా అన్నిమ్ కెర్తె తిలసతె కోయ్యి నేన్తి.

29 గని జోచి డబ్బుల్ పెటె యూదాచి అత్తి తిలి, చి 'పండుగు అన్నిమ్క దొర్కు జలిసి గెన ఆను' జలెకు, 'బీద సుదల్క కిచ్చొ జవున్ దర్ముమ్ దేసు' మెన యేసు జా కోడు సంగ తయెదె మెన సగుమ్జిన్ ఉచర్ల.

30 జలె, జా గండ నజన, యూదా చట్టున బార్ జా ఉట్ట గెలన్. తెదొడి అందర్ జా తిలి.

ఎక్కిలోక ఎక్కిలో ప్రేమ కెర్తె తా

31 యూదా బార్ జతికయ్, తిల సిస్సుల్క యేసు, "అప్పెయి జర్గు జతిసి తెన్ ఆవ్ మాస్సు జా జెర్మున్ అయ్లోసాచి గవురుమ్ డీసెదె, చి అంక జర్గు జతిన్చి రిసా దేముడు ప్రబుచి గవురుమ్ డీసెదె.

32 అంచితె జర్గు జతిన్తె దేముడుక గవురుమ్ జెయెదె, చి జా కామ్తె అంక కి జో గవురుమ్ కెరెదె. బేగి గవురుమ్ కెరెదె.

33 "ఓ పుత్తర్లు, అప్పె ఏక్ గడియయ్ తుమ్చి తెన్ ఇసి తయిందె, చి ఉట్ట గెచ్చిందె. ఆవ్ గెలె, అంక చజితె, గని యూదుల్క ఆవ్ సంగిలి రితి, ఆవ్ కేనె గెచ్చిందె గే, తుమ్ అప్పె ఒత్త జెంక నెతుర్పు.

34 "జలె, తుమ్క ఏక్ నొవి ఆగ్గు దెతసి. కిచ్చొ ఆగ్గు మెలె, తుమ్ ఎక్కిలోక ఎక్కిలో ప్రేమ కెర్తె తా. ఆవ్ తుమ్క కెర్తి ప్రేమ దెకవ అస్సి గే, దస్సి తూమ్ కి ఎక్కిలోక ఎక్కిలో ప్రేమ కెర్తె తంక.

35 తుమ్చితె ఎక్కిలోక ఎక్కిలో దస్సి ప్రేమ కెర్తె తిలె, తుమ్క 'అమ్చ సిస్సుల్' మెన ప్రెజల్ ఎత్తి చినుల. జయ్యి జోవయింక రుజ్జు తయెదె" మెన బోదన కెర్లన్.

† 13:23 13:23 జోవయింప విందుల్ రిత అన్నిమ్తె బల్లచి నుట్టునంత బెంచెవో చి ఉప్పిరి ఇదిల్ ఎంర్ల తిలి రితి ఒర్గు జా అన్నిమ్ కెరుల.

36 తెదొడి సీమోను పేతురు “ప్రబు, కేనె గెతి రిసా తుయి సంగితసి?” మెన యేసుక పుసిలన్, చి యేసు జోక, “ఆవ్ కేనె గెతసి గే, తుయి అప్పె అంచి పట్టి జెంక నెతిర్చి, గని పట్టొక జెస్తె” మెన సంగిలన్.

37 జాకయ్ పేతురు జోక, “ప్రబు, ఆవ్ కిచ్చొక అప్పె తుచి పట్టి జెంక నెతిరి? తుచి రిసా ఆవ్ మొరకి గెచ్చిందె!” మెన సంగిలన్.

38 యేసు జోక, “అంచి రిసా తుయి మొర గెచ్చుక దయిరిమ్ గే? తుక కిచ్చొ నిజుమి కచితుమ్ ఆవ్ సంగితసి మెలె. అజి రాతిక, కుకుడొ నే వాస్తె అగ్గె, ‘జోక నేని’ మెన తుయి తివ్వెరి అంచి రిసా సంగితె” మెన సంగిలన్.

14

యేసు సిస్సుల్క దయిరిమ్ సంగిలిసి

1 తెదొడి యేసు సిస్సుల్క, “ఆవ్ ఉట్ట గెలె, తుమ్చ పెట్టి చింత గలన నాయ్. దేముడుక నంపజా దయిరిమ్ తెన్ తా. అంక కి నంప తెన్ తా.

2 జో అంచో అబ్బొసి జలో దేముడుచి గెరి ఒగ్గర్ గదివొ అస్తి. తుమ్క కి ఒత్త టాన్ అస్సె. నెంజిలె తుమ్క సంగితయ్. తుమ్క జా టాన్ తెయార్ కెరుకయ్ ఆవ్ గెతసి.

3 ఆవ్ గెచ్చు తుమ్ తతి టాన్ తెయార్ కెర్లయ్ మెలె, తూమ్ కి అంచి తెన్ తంక మెన, అంచితె కడ నెతి రిసా అన్నె జెయిందె.

4 ఆవ్ గెతి టాన్చి వాట్ తుమ్ జాన్సు” మెన సంగిలన్.

5 జాకయ్ తోమా మెలో సిస్సుడు జోక, “ప్రబు, తుయి కేనె గెతసి గే నేనుమ్. జా వాట్ అమ్ కిసి జానుక జయెదె?” మెన పుసిలన్,

6 చి యేసు జోపయింక, “ఒత్త గెతి వాట్ ఆవ్వి. ఒత్త గెతి రిసా దొర్కు జలి సత్తిమ్ ఆవ్వి. ఒత్త గెతి రిసా దొర్కు జలి జీవు ఆవ్వి. అంక నంపజలెకయ్ మాన్సు దేముడు అబ్బొతె జెంక జయెదె.

నెంజిలె కో జెంక నెతిర్చి. కేన్ వేర వాట్ నాయ్.

7 అంక తుమ్ నిజుమి జాన్తను జలె, అంచో దేముడు అబ్బొకయ్ జాన్తను. అప్పె తెంతో తుమ్ జోక జాన్సు, జోక దెక అస్సున్” మెన సంగిలన్.

8 జలె, పిలిప్క అర్దుమ్ నాయ్ చి రిసా, “ప్రబు, దేముడు అబ్బొద్క అమ్క దెకవు, చి అమ్క అన్నె కిచ్చొ నాయ్” మెన సంగిలన్.

9 యేసు జోక, “ఓ పిలిప్, తుమ్చి తెన్ ఆవ్ ఎత్తి దీసల్ తిలె కి, అప్పెక అంక చినిన్ నాయ్ గే? కో అంకయ్ దెక అస్తి గే, దేముడు అబ్బొన్క కి దెక అస్తి. జాకయ్, దేముడు అబ్బొద్క అమ్క దెకవు మెన తుయి కిచ్చొక పుసుక?

10 ఆవ్, అబ్బొసి జలో దేముడుచి పెట్టి తిలిసి, దేముడు అబ్బొ అంచి పెట్టి తిలిసి, తుయి నంప కెర్చి నాయ్ గే? తుమ్క ఆవ్ సంగితిసి సికడ్డిసి ఆవ్ అవ్వి ఉచర్లసి నెంజె. అంచి పెట్టి తిలొ దేముడు అబ్బొ అంచి అత్తి జోచ కమొ కెర్తయ్.

11 ఆవ్ అబ్బొసి జలో దేముడుచి పెట్టి అస్సి, దేముడు అబ్బొ అంచి పెట్టి అస్సె. ఈంజ కోడు నంప కెరు. నెంజిలె, ఆవ్ సంగిలి రిసా నే నంప కెర్తె, అంచి అత్తి జర్గు జత కమొక ఉచర నంప కెరు.

12 తుమ్క నిజుమి కచితుమ్ ఆవ్ కిచ్చొ సంగితసి మెలె, అంక కో నంపజవుల గే, ఆవ్ కెర్త కమొ జేవ్ కి కెరుల. ఆవ్ కెర్లనచి కంట జిన్లన కెరుల. కిచ్చొక మెలె, ఆవ్ దేముడు అబ్బొతె ఉట్ట గెతసి.

13 అంచి నావ్ తెన్ తుమ్ కిచ్చొ నజితె గే, ఆవ్ పుత్తుసి కెర్లెతె అబ్బొసి జలో దేముడుచి గవురుమ్ డీసున్ మెనయ్, జయి ఆవ్ జర్గు కెరిందె.

14 అంచి నావ్ తెన్ తుమ్ కిచ్చొ జలెకి నజిలె కి, జర్గు కెర దెయిందె.

దేముడుచి సుద్ది తిలి ఆత్మ తెద్రవుక

తిలిన్చి యేసు సంగిలిసి

15 “తుమ్ అంచి ఉప్పిరి ప్రేమ తెన్ తిలె, అంచ *కొడొ రితి ఇండితె తస్సె.

16 తుమ్ దస్సి జలె, దేముడు అబ్బొనక సంగిమ్దె, చి అన్నెక్కో తోడు కెర్తొసాక తుమ్తె తెద్రయెదె. జో తుమ్చి పెట్టి తా, కెయక తెయక తుమ్క తోడు తయెదె.

17 జో కొన్సొ మెలె, పరలోకుమ్చి సత్తిమ్ తిలి సత్తిమ్ దెకయ్తి ఆత్మ. ఈంజ లోకుమ్చి బుద్ది తిల మాన్సుల్ జోక సంపజంక నెతిర్తి. కిచ్చొక మెలె, జో డీస్తాసా నెంజె, చి జోక చినితి నాయ్, నేన్తి. తుమ్ మాత్రుమ్, జోక జాన్సు. కిచ్చొక మెలె, జో తుమ్చి తెన్ తత్తయ్, † చి పడ్డొక తుమ్చి పెట్టి తయెదె.

18 “తుమ్క ములిలె, తుమ్ పొరబోదల్ తతి రితి కెరి నాయ్. తుమ్తె జెయిందె.

19 గడియయ్ తిలె, మాములుమ్ ఈంజ లోకుమ్చ మాన్సుల్ అంక అన్నె దెకితి నాయ్, గని తుమ్ అంక అన్నె దెకితె. మెలె, ఆవ్ జితసిచి రిసా తుమ్ కి జిస్సె.

20 ఆవ్ అబ్బొసి జలో దేముడుచి పెట్టి తిలిసి, తుమ్ అంచి పెట్టి తిలిసి, చి ఆవ్ తుమ్చి పెట్టి తిలిసి, తెదొడకయ్ తుమ్క అర్దుమ్ జెయెదె.

21 అంచ ‡కొడొ కో సూన కెరుల గే, జెవ్వి అంక ప్రేమ కెర్తసయ్. కో అంకయ్ ప్రేమ కెర్తతి గే, అంచో దేముడు అబ్బొ జోవయింకయ్ ప్రేమ కెరెదె. ఆవ్ కి జోక ప్రేమ కెర, అంచి సత్తిమ్చి రిసా జోక రుజ్జుల్ దెకయిందె, జోక ఆవ్ సొస్టుమ్ సొంత డీసిలి రితి” మెన యేసు సంగిలన్.

22 తెదొడి యూదా మెలో ఎక్కిలో, ఇన్సురియోతు యూదా నెంజె, వేరచో జో, జలె, యేసుక “కిచ్చొక ఈంజ లోకుమ్చ మాములుమ్ మాన్సుల్క నాయ్, గని

ఎక్కి అమ్కయ్ డీస్సె, తుచ రుజ్జుల్ దెకయ్తె?” మెన పుసిలో.

23 పుసిలె యేసు జోక, “అంచి ఉప్పిరి కో ప్రేమ తెన్ తవుల గే, అంచి కొడొ రితి కెరుల, దస్సి జలసకయ్ దేముడు అబ్బొ ప్రేమ కెరెదె. దస్సి జలసతయి దేముడు అబ్బొ ఆవ్ జెమ్దె, చి జోచి తెన్ బన జా జో తెన్ తా గెచ్చుమ్దె.

24 అంచి ఉప్పిరి కో ప్రేమ తెన్ తతి నాయ్ గే, జెవ్వి అంచ కొడొ రితి కెర్తి నాయ్. తుమ్ సూన్తి ఈంజ కోడు, జలె, కచి మెలె, ఆవ్ అవ్వి ఉచర్లిసి నెంజె. అంక తెద్రయ్లో అబ్బొసి జలో దేముడుచి కోడు.

25 “జలె, ఆవ్ తుమ్చి తెన్ ఈంజ లోకుమ్తె తతె, ఆవ్వి ఈంజ బోదన ఎత్తి తుమ్క సూనవ అన్సి.

26 గని, ఆవ్ దేముడు అబ్బొతె గెలె, దేముడు అబ్బొ అంచి నావ్ తెన్ తుమ్క తోడు తతోసాక తెద్రయెదె. జో తోడు తతోసా కొన్సొ మెలె, దేముడుచి సుద్ది తిలి అబ్బొసి జలో దేముడుచి సుద్ది తిలి ఆత్మయి. జో అమ్చి ఆత్మయి తతోసా తుమ్క ఎత్తి సికడెదె. ఆవ్ తుమ్క సంగిలిసి ఎత్తి తుమ్క ఉచార కెరయెదె.

27 “జలె, ఆవ్ తుమ్క సేంతుమ్ దా కెర ఉట్ట గెతసి. అంచి సేంతుమ్ తుమ్క దెతసి. ఈంజ లోకుమ్చ దెతి రగుమ్చి నెంజె. జాకయ్ కిచ్చొ బాదల్ అల్లర్ అయ్లె కి, తుమ్చ పెట్టి చింత గలన నాయ్, బయిమ్ తియన నాయ్.

28 ‘ఆవ్ ఉట్ట గెలె కి, తుమ్తె అన్నె జెయిందె’ మెన సంగిలిసి సూన్లదు. తుమ్ అంచి ఉప్పిరి పూర్తి ప్రేమ తత్తదు జలె, ఆవ్ దేముడు అబ్బొతె గెలిన్చి రిసా సర్ద జతదు. కిచ్చొక మెలె, దేముడు అబ్బొ అంచి కంట వెల్లో. ఒత్త గెలె, ఇన్నె తతి కంట అంక చెంగిలి, తుమ్క చెంగిలి.

* 14:15 14:15 నెంజెలె, ‘అంచ అగ్గల్ రితి ఇండితె తస్సె’. † 14:17 14:17 నెంజెలె, ‘చి తుమ్చి పెట్టి అన్నె’. ‡ 14:21 14:21 నెంజెలె ‘అగ్గల్’.

29 జలె, జా ఎత్కి జర్గు నే జతె అగ్గె తుమ్క కిచ్చొక సంగితసి మెలె, తుమ్క 'జా జర్గు జతి పొదిక, పూర్తి నంప తెన్ తా, బమ్మ నెంతె దయిరిమ్ తత్తు' మెనయ్ అంచి ఆస్స.

30 "తుమ్చి తెన్ అన్నె ఒగ్గర్ లట్టబుక సమయుమ్ నాయ్. కిచ్చొక మెలె, ఈంజ లోకుమ్ ఈంజ మదెన ఏలుప కెర్తొసా, నయ్తాన్ జెతయ్. అంచి ఉప్పిరి జోక కిచ్చొ అదికారుమ్ నాయ్,

31 గని దేముడు అబ్బొ అంక తియార్లి కామ్ ఆవ్ కెరుక అస్స. జో సంగిలి రితి ఆవ్ కెర్లె, అంక 'నిజుమి, దేముడు అబ్బొన్క ప్రేమ కెర్తయ్' మెన లోకుమ్ ఎత్కిచ చినుల. అల్లె, జొమ్మ, గెచ్చుమ!" మెన సంగిలన్.

15

ద్రాచ రూక్చి టాలి

1 తెదొడి యేసు ఇసి మెన టాలి సంగిలన్. "ఆవ్ నిజుమ్ జలొ ద్రాచ రూకు జయిందె. అంచొ దేముడు అబ్బొ రూకుక పొస్తొసా జయెదె.

2 జలె, అంచ కొన్నల్తె కేన్ కొన్నతె పంటొ దెరె నాయ్ గే, ఈంజొ రూకు పొస్తొ దేముడు అబ్బొ జా కొన్న గెచ్చవ గెలెదె. గని కేన్ కొన్నతె పంటొ దెరెదె గే, 'అన్నె ఒగ్గర్ పంటొ దెర్లు' మెన, కొన్నల్ కుట్టవ గెలెదె.

3 "తుమ్క ఆవ్ నూనయ్లి కొణ్ణ నూన్లదుచి రిసా, తుమ్ సుద్ది జా అస్సున్.

4 జలె, ఆత్మక అంచి తెన్ బెద తా అంచి తెడి తుమ్ జియ అంచి సెక్కిక ఇండ, అంచి పెట్టి తా. ఆవ్ కి తుమ్చి పెట్టి తయిందె. తీగెచి కొన్న అజ జలె, ఒత్త కిచ్చొ పంటొ దెరుక నెత్తె. తీగె తెన్ ఎక్కి తిలెకయ్ ఒత్త పంటొ దెరెదె. దస్సి, తుమ్ ఆత్మక అంక ముల అజ జలె,

తుమ్తె కిచ్చొ *పంటొ దెర్లి రితి జంక నెతుర్లు. అంచి తెన్ ఎక్కి తిలెకయ్ †పంటొ తుమ్తె దెరెదె.

5 "ద్రాచ రూకు అద్వి, రూక్చి జీవు అంచి పెట్టి అస్సె. తూమ్ అంచ కొన్నల్. ఆత్మక అంచి తెన్ బెద తా అంచి తెడి జియ అంచి సెక్కిక కో ఇండ అంచి పెట్టి తవుల గే, జోచి పెట్టి ఆవ్ తయిందె, చి జో తెన్ ఒగ్గర్ ‡పంటొ దెర్లె తయెదె. ఆవ్ నెంజిలె, తుమ్ కిచ్చొ కెరుక నెతుర్లు.

6 కో ఆత్మక అంచి తెన్ బెద నే తతె అంచి తెడి నే తతె అంచి సెక్కిక నే ఇండితె అంచి పెట్టి తతి నాయ్ గే, కామ్క నెంజిలి కొన్న కుట్టవ వెంట గెలి రితి జయెదె, కొమ్మ జా మొర గెచ్చెదె. కొన్నల్ దస్సి జలె, జోవయింక గుడ్డ కెర ఆగితె గల డయుల. కో ఆత్మక అంచి తెన్ బెద నే తతె అంచి తెడి నే తతె అంచి సెక్కిక నే ఇండితె అంచి పెట్టి తతి నాయ్ గే, దస్సి జవుల.

7 గని ఆత్మక అంచి తెన్ బెద తా అంచి తెడి జియ అంచి సెక్కిక తుమ్ ఇండ అంచి పెట్టి తా అంచి కోడు రితి తుమ్ కెర్లె తిలె, తుమ్ అంచితె కిచ్చొ నజితె గే, తుమ్చి రిసా జర్గు జయెదె.

8 తుమ్ దస్సి జా చెంగిల్ కిపంటొ ఒగ్గర్ తుమ్తె దెర్లె, చి దేముడు అంచొ అబ్బొన్క మాన్సుల్ గవురుమ్ కెరుల. జయ్యి పంటొ జోవయింక గవురుమ్ ఆనెదె, అంచ సిస్సుల్ తుమ్ కచితుమ్ జలిన్క రుజ్జు డీనెదె.

9 "దేముడు అంచొ అబ్బొ అంకయ్ కిసి ప్రేమ కెర్తయ్ గే, ఆవ్ కి తుమ్క దస్సి ప్రేమ కెర అస్సి. అంచి ప్రేమ తెడి తుమ్ త్తా.

10 దేముడు అంచొ అబ్బొచ *కొణ్ణ ఆవ్ కెర్లె తా జోచి ప్రేమచి తెడి తా జోచి ప్రేమ తెన్ ఇండితసి. దస్సి, అంచయ్

* 15:4 15:4 'పంటొ' నెంజిలె 'ఆత్మపంటొ'. † 15:4 15:4 'పంటొ' నెంజిలె 'ఆత్మపంటొ'. ‡ 15:5 15:5 'పంటొ' నెంజిలె 'ఆత్మపంటొ'. § 15:8 15:8 'పంటొ' నెంజిలె 'ఆత్మపంటొ'. * 15:10 15:10 నెంజిలె 'అగ్గుల్' నెంజిలె 'అడ్రల్'.

కొడొ తూమ్ కెర్తె తిలె, అంచి ప్రేమచి తెడి తుమ్ తా అంచి ప్రేమ ఇండితె.

11 'అంచి సంతోసుమ్ తుమ్చి పెట్టి తవున్' మెన, తుమ్క పూర్తి సంతోసుమ్ జా తత్తు' మెనయ్, ఈంజేవ్ కొడొ ఎత్తి ఆవ్ సంగ అస్సి.

12 "ఆవ్ తుమ్కయ్ కిసి ప్రేమ కెర అస్సి గే, తూమ్ కి ఎక్కిలోక ఎక్కిలో ప్రేమ కెర్తె తా, మెన తుమ్క ఆవ్ సంగితసి. ఈంజయి తుమ్క ఆగ్గు జా అస్సి.

13 'జతు' మెన, జోవయించ మింతర్పుల్చి రిసా కో జలెకు మొర్తి కంట, కిచ్చొ జిన్లి ప్రేమ నాయ్.

14 ఆవ్ తుమ్క సంగిల్ రితి తుమ్ కెర్లె, అంచ గోతుసుదల్ జా తస్సి.

15 తుమ్క 'గొత్తి సుదల్' రితి అప్పె తెంతో దెకి నాయ్. కిచ్చొక మెలె, జోవయించొ ఎజొమాని కిచ్చొ కెర్తె తయెదె గే గొత్తి సుదల్ నేన్తి. ఆవ్, మాత్తుమ్, అంచొ అబ్బొనెతె సూన్లిసి ఎత్తి తుమ్క సంగ అస్సి. జాచి రిసా తుమ్క 'గోతుసుదల్' రితి దెకితసి.

16 "తూమ్ అంకయ్ నిసాన్పు నాయ్. ఆవ్ తుమ్కయ్ నిసాన్లయ్. ఆవ్ తుమ్క కిచ్చొక నిసాన అంచి కామ్ తియార్ అస్సి మెలె, తుమ్ ఈంజ లోకుమ్తె బార్ జతు, చి అంచి ఆత్మపంటొ జోవయింతె దెర్తి తవున్ మెన 'జోవయింతె దెర్తి ఈంజ పంటొ కెయెక తెయెక చెంగిల్ తా కామ్క జెతె తవున్'. తుమ్ అంక నిదాసుమ్ తిలెగిన, అంచి నావ్ తెన్ దేముడు అంచొ అబ్బొతె తుమ్ కిచ్చొ నజిలె కి, తుమ్క దెయెదె.

17 తుమ్క కిచ్చొ ఆగ్గు దెతసి మెలె, ఎక్కిలోక ఎక్కిలో తుమ్ ప్రేమ కెర్తె తంకయ్.

18 "ఈంజ లోకుమ్చ మాన్పుల్ తుమ్క విరోదుమ్ జతతి జలె, అంక కి అగ్గె తెంతో విరోదుమ్ జా అస్సి.

19 ఈంజ లోకుమ్చ కమొ కెర్తెన తుమ్ జతదు జలె, ఈంజ లోకుమ్చ మాన్పుల్ తుమ్క ప్రేమ కెర్తె. గని, ఈంజ లోకుమ్చ తెంతో తుమ్క ఆవ్ నిసాన్లయ్, చి ఈంజ లోకుమ్చ కమొ తుమ్ కెర్పు నాయ్ చి రిసా ఈంజ లోకుమ్చ తుమ్క విరోదుమ్ జా అస్సి.

20 "జలె, ఆవ్ తుమ్క సంగిలి కోడు తుమ్ పచ్చ నాయ్. కేన్ కోడు మెలె, 'నేవ కెర్తెసా జోచొ ఎజొమానిచి కంట వెల్లో నెంజె' మెలిసి. ఈంజ లోకుమ్చ మాన్పుల్ అంకయి అల్లర్ కెర అస్సి జలె, తుమ్క కి అల్లర్ కెరుల. జేవ్ అంచయ్ కొడొ రితి కెర్తెతి జలె, తుమ్చయ్ కొడొ సూన కెరుల.

21 అంచి రిసాయి తుమ్క అల్లర్ కెరుల మెలె, కిచ్చొక మెలె అంక తెద్రయ్లో దేముడుక జేవ్ నేన్తి.

22 "ఆవ్ జెతయ్ నాయ్ జలె, జోవయింక సుబుమ్ కబుర్ సంగితయ్ నాయ్ జలె, జా పాపుమ్ జేవ్ వయిత నాయ్. గని, అయ్లయ్, సంగిలయ్, చి అప్పె, 'నేన కెర దస్సి కెర్లమ్' మెన జేవ్ సంగుక నెత్తిర్తి. జా పాపుమ్ వయ అస్సి.

23 మెలె అంకయ్ కో విరోదుమ్ జవుల గే, దేముడు అబ్బొనక విరోదుమ్ జా అస్సి.

24 అన్నె, కేన్ మాన్పుకి కెయ కి నే కెర్తె కమొ ఆవ్ జోవయించి మొక్కె కెర్తయ్ నాయ్ జలె, జా పాపుమ్ వయిత నాయ్. గని అంక దెకయ్ అంక విరోదుమ్ జా అస్సి. జేవ్ అంకయ్ దెక విరోదుమ్ జలిసి జలె, అబ్బొక దెక విరోదుమ్ జలిసి జయెదె. దస్సి జా, అబ్బొనక కి విరోదుమ్ జా అస్సి.

25 జోవయించి †మోసే పూర్ణుమ్చొచి

నంపజలసక ఈంజ లోకుమ్ విరోదుమ్ జవుల

† 15:25 15:25 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రగ్గయ్లి ఆగ్గుల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పావ్ వుస్తకుమ్తె రెగ్గయ్ జా అస్సి. ఈంజ దెకవుక మెన కుపియ బాసతె నొయ ప్రమానుమ్తె మోసే పూర్ణుమ్చొచి అత్తి రెగిడ్డి దేముడుచ ఆగ్గుల్ మెన రగ్గవ అస్సి.

అత్తి దేముడు రెగ్డయల ఆగ్గుల్తె పూర్గుమ్ దేముడు అబ్బొ రెగ్డయలిసి నెరవెర్పువ జంకయ్ ఇసి జా అస్తి. కేన్ కోడు మెలె, 'ఆరిక అంక విరోదుమ్ జల.'

26 "దేముడు అంచొ అబ్బొతె తెంతొ ఆవ్ సంగిలో తోడ్ కెర్టొసాక తుమ్ సిస్సుల్తె తెద్రయిందె. జో అబ్బొచి పెట్టి తెంతొ బార్ జా జెబ్బొసా. నిజుమ్ జలి ఆత్మ, జో. జో తుమ్తె జా కెర, అంచి రిసాయి సాచి సంగెదె.

27 తూమ్ కి అంచి రిసా సాచుల్ జా అస్సున్. కిచ్చొక మెలె, అంచ కమొ మొదొల్ కెర్లి తెంతొ అంచి తెన్ని అస్సున్."

16

1 "ఆవ్ కిచ్చొక తుమ్క ఈంజ ఎత్తి, సంగ అస్సి మెలె, తుమ్క 'తెదొడ్క బమ్మ జా అన్మానుమ్ జతు నాయ్' మెన జేవ్ అల్లర్ నే జతె అగ్గె తుమ్క ఆవ్ సంగితసి.

2 జేవ్ దీసల్క తుమ్క జోవయించ సబ గెరల్ తెంతొ ఉదడ అన్నె పెసయ్తి నాయ్. అన్నె, 'ఇన్నెక మార్లె చెంగిలి, మార్లె దేముడుచి సేవ కెర తమదె' మెన సగుమ్జిన్ ఉచర తుమ్క మార్లె.

3 కిచ్చొక దస్సి కెరుల మెలె, జేవ్ అంక నేన్తె.

4 జా నే జతె అగ్గె తుమ్క ఆవ్ కిచ్చొక సంగ అస్సి మెలె, జా సమయ్యుమ్ జా అయ్లె, 'ఇసి జయెదె మెన సంగిలో' మెన తుమ్ ఉచార కెర్తె. జలె, తుమ్ అంచ సిస్సుల్ జలి మొదొల్ తెంతొయ్ ఈంజ ఎత్తి, తుమ్క ఆవ్ కిచ్చొక సంగుక నాయ్ మెలె, తుమ్చి తెన్ తీలయ్, చి సంగుక నాయ్.

తుమ్క తోడ్ తతి రిసా అమ్చి ఆత్మ తుమ్చితె తెద్రయిందె

5 "అప్పె, అంక తెద్రయ్లోసాతె ఆవ్ అన్నె గెతసి. గని 'కేనె గెతసి?' మెన అప్పె తుమ్చితె కో అంక పుసున్ నాయ్.

6 ఆవ్ ఈంజ ఎత్తి, తుమ్క సంగిలి రిసా దుకుమ్ జా అస్సున్.

7 జలెకి, తుమ్క కిచ్చొ సత్తిమ్ సంగితసి మెలె, ఆవ్ గెలెకయ్ తుమ్క చెంగిలి. కిచ్చొక మెలె, ఆవ్ నే గెలె, అమ్చి ఆత్మ జతో ఆవ్ సంగిలో తోడ్ కెర్టొసా తుమ్క తోడ్ జెయె నాయ్. గని ఆవ్ గెలె, తుమ్తె జోక తెద్రయిందె.

8 "జో అయ్లో మెలె, పాపుమ్చి రిసా, సత్తిమ్చి రిసా, తీర్పు కెర్లిసిచి రిసా ఈంజ లోకుమ్చ మాస్సుల్క రుజ్జుల్ దెకయెదె.

9 లోకుమ్ అంక సంపజయె నాయ్ చి రిసా పాపుమ్ వయ అస్తి మెన అంక సంపనెంజిలసక రుజ్జు దెకయెదె.

10 అంచొ దేముడు అబ్బొన్తె ఆవ్ ఉట్ట గెచ్చిందె, అంక అన్నె తూమ్ ఇసి దెకున్ నాయ్. అంచి పున్నిమ్చి రిసా ఈంజ లోకుమ్చక జో రుజ్జు దెకయెదె.

11 జాచి రిసా ఈంజ లోకుమ్క అప్పెచి మట్టుక ఏలవ కెర్తొ సయ్తాన్ తీర్పు జా, జోచి పాపుమ్ వయ సిచ్చతె గెచ్చుక అస్సి మెన రుజ్జు దెకయెదె.

12 "ఆవ్ తుమ్క సంగితిసి కెత్తిగే అస్సి. గని, అప్పె సంగిలె తుమ్ ఓర్పువ జంక నెతుర్పు.

13 జలె జో, సత్తిమ్ జలి ఆత్మ జలోసా తుమ్చి పెట్టి అయ్లె, జొయ్యి సత్తిమ్తె తుమ్క ఇండయెదె. జోక, జొయ్యి కిచ్చొ సంగె నాయ్. జో ఒత్త అమ్తె కిచ్చొ సూనెదె గే, జయ్యి తుమ్క సంగెదె.

14 జో అంచితె తిలిసియి కడన తుమ్క సూనెదె. జాచి రిసాయి అంక గవురుమ్ కెరెదె.

15 అబ్బొసి జలో దేముడుచి ఎత్తి. అంచి, జాకయ్ 'జో తుమ్క సంగితిసి ఎత్తి అంచి' మెన తుమ్క సంగిలయ్.

పడ్డొక తుమ్క సంతోసుమ్ జెయెదె

16 "ఇదిల్ కాలుమ్ గెలి పడ్డొ అంక తుమ్ దెకుక నెతుర్పు, అన్నె, ఇదిల్ కాలుమ్తె అంక దెకితె మెన సంగిలన్.

17 జోచ సిస్సుల్తె సగుమ్జన్ ఎక్కిలో తెన్ ఎక్కిలో లట్టబ, గడియ గెలె, అంక దెకున్ నాయ్. ఒత్త తెంతో అన్నె గడియ గెలె, అంక అన్నె దెకితె మెన కిచ్చొక సంగిలన్. ఆవ్ దేముడు అబ్బొతె ఉట్ట గెచ్చిందె' మెన కిచ్చొక సంగిలన్?" మెన సంగితె తిల.

18 "గడియ గెలె మెన కిచ్చొ అర్దుమ్ తెన్ సంగితయ్? జో కిచ్చొచి రిసా సంగితయ్ గే నేనుమ్" మెన లట్టబన్.

19 జేవ్ జొయ్యి పుసితతి మెన, నా యేసు జానయ్ జేవ్చి తెన్ ఇసి సంగిలో. అన్నె గడియ గెలె, తుమ్ అంక దెకున్ నాయ్. ఒత్త తెంతో. అన్నె గడియ గెలె, తుమ్ అంక అన్నె దెకితె మెన ఆవ్ సంగిలయ్, గెద. ఇన్నెచి రిసా ఎక్కిలో తెన్ ఎక్కిలో లట్టబ్బను, నాయ్ గే?

20 తూమ్ దుకుమ్ జా ఏడ్డె. గని, లోకుమ్చ సర్ల జవుల తుమ్చి దుకుమ్ సర్లతెను తయెదె మెన తుమ్క కచితుమ్ సంగితన్.

21 లడెన్ జతి తేర్బోద, జలె, జాచి కంట్టు పాచ జా అయ్లి మెలె, ఏడెదె, గెద. గని, లడెన్ జలి మెలె, ఈంజ లోకుమ్తె ఏక్ 'బోద జెర్మిలో' మెన జాచి సర్లక బేగి దుకుమ్ ఎత్తి వచ్చు గెలెదె.

22 దస్సి, ఆవ్ అప్పె గెలె, తుమ్క గడియ దుకుమ్ తయెదె. గని, ఆవ్ తుమ్చి తెన్ అన్నె దస్సుల్ జయిందె, చి తుమ్చి పెట్టి సంతోసుమ్ జా గెతె, చి కోకి తుమ్చితె తిలి సంతోసుమ్ కడుక నెత్తిర్.

23 జేవ్ దీసల్తె అంక తుమ్ కిచ్చొ కి పుసితిసి నాయ్. తుమ్ దేముడు అబ్బొతె కిచ్చొ సంగిలే కి, అంచి నావ్ తెన్ దొర్కు జయెదె మెన తుమ్క కచితుమ్ సంగితన్.

24 అప్పె ఎద అంచి నావ్ తెన్ తుమ్ కిచ్చొ నజుక నాయ్. తుమ్చి సంతోసుమ్ పూర్తి జతి లెక నజ, దొర్కు జయెదె.

25 "ఈంజ సంగతి ఒండి కి అర్దుమ్ లుంకయ్ జలి రితి సంగ అస్సి. జలె ఆవ్

కెయ్యక జలెకి అర్దుమ్ లుంకయ్ జలి రితి తుమ్చి తెన్ నే లట్టబ్బె, అబ్బొన్చి రిసా తుమ్క సొస్తుమ్గ సూనయ్తి గడియ జెతయ్.

26 జా దీసల్ అయ్లి పొది అంచి నావ్ తెన్, తుమ్ నజెతె. గని, దేముడుక తుమ్చి తెన్ ఆవ్ నెడిమి జా ప్రార్దన కెర్రిసి నెంజె మెన సంగుక నాయ్.

27 కిచ్చొక మెలె అబ్బొ తుమ్క ప్రేమించుప కెర్తయ్. తూమ్ అంక ప్రేమించుప కెర, అంక అబ్బొ జలో దేముడు తెంతో బార్ జా అయ్లన్ మెన సంపజలదు.

28 దేముడు అబ్బొ తెంతో ఆవ్ బార్ జా ఈంజ లోకుమ్తె అయ్లయ్. అన్నె, అప్పె ఈంజ లోకుమ్ ముల దా, ఒత్త జోతె అన్నె గెతన్" మెన సంగిలన్.

29 జోచ సిస్సుల్, జలె, "ఈందె, అర్దుమ్ లుంకయ్ జలి రితి కిచ్చొ కి నే సంగితె సొస్తుమ్గ లట్టబ్బని.

30 తుయి ఎత్తి జాన్సి, చి అమ్ నే పుసిలేకి, అమ్చి మెన్ను తిలిసి తుయి జాన్సి మెన అప్పె జానుమ్. దేముడుతె తెంతో తూయి బార్ జా అయ్లదు మెన సంపజా సంగితి క్కాయ్.

31 యేసు జోవయింక దెక, అప్పె తూమ్ సంపజతస్సు గే?

32 ఈందె తుమ్చితె ఒండిజన్క కి కచి గెరి జొయ్యి సెదుర్ప జా అంక ఎక్కిలోకయి ముల దెతి గడియ జెతయ్, జా అస్సి. జలె అబ్బొ అంచితె అస్సి చి రిసా ఆవ్ ఎక్కిలోయి నెంజె.

33 "ఈంజ ఎత్తి కిచ్చొక తుమ్క సంగ అస్సి మెలె, 'అంచి తెడి తుమ్క సేతుమ్ తవున్' మెనయ్. కిచ్చొక మెలె, ఈంజ లోకుమ్తె అల్లర్ సేడ్డె, గని దయ్రిమ్ తెన్ తా. ఈంజ లోకుమ్తెచ అల్లర్చి ఉప్పిరి ఆవ్ జీన అస్సి" మెన సంగిలన్.

17

యేసు ప్రార్దన కెర్రిసి

1 యేసు ఈంజ ఎత్కి నంగ కేడవ, ఆగాసుమ్ పక్క దెక, పరలోకుమ్ తిలో దేముడు అబ్బొన్ క ప్రార్థన కెర్లన్.

“ఓ బ, అంచి సమయుమ్ జా అయ్ లి మెన జాని. ఆవ్ తుచొ పుత్తుది తుచి గవురుమ్ దెకయ్ తి రితి, ఆవ్ పుత్తున్ తా గవురుమ్ కెరు.

2 ఈంజ లోకుమ్ ఎత్కిచ మాన్సుల్ చి ఉప్పిరి ఆవ్ పుత్తుక తుయి అదికారుమ్ దా అస్సిన్. కో అంక నంపజంక తుయి సెలవ్ దా అస్సిన్ గే, జెవ్వి తుచి రాజిమ్ తె బెదితి, మొర్లె పరలోకుమ్ తె గెచ్చ కెయ్ క తెయ్ క జితి రితి ఆవ్ దెంక మెన, తుయి అంచి అత్తి సార్ప కెర దా అస్సిన్.

3 తుయి ఎక్కిలోయి నిజుమ్ జలో దేముడు తుక, తుయి తెద్రయ్ లో అంక, జేవ్ నంపజిసి, అమ్క జేవ్ జాన్ తిసి, ఆవ్ యేసు తుయి తెద్రయ్ లో రచ్చించుప కెర్తొసా జతో క్రిస్తు.

4 తుయి అంక తియార్లా కామ్ ఆవ్ పూర్తి నెరవెర్నుప కెర, ఈంజ లోకుమ్ తె తుక గవురుమ్ ఆన అస్సి.

5 ఓ బ, ఈంజ లోకుమ్ నే జెర్మన్ జతె అగ్గె తెంతో తుచి తెన్ ఆవ్ ఒత్త తతె అంక కిసి గవురుమ్ తిలి గే, అప్పె తుచితె పరలోకుమ్ తె అన్నె దస్సి గవురుమ్ జతి రితి కెరు.

6 “అంచ సిస్సుల్ జతి రితి, ఈంజ లోకుమ్ చ మాన్సుల్ తె సగుమ్ జిన్ క తుయి నిసాన, అంచి అత్తి సార్ప కెర దా అస్సిన్. తుయి కిసాచొ గే ఈంజేవ్ దెకిత్ రితి ఆవ్ ఈంజ లోకుమ్ తె జియ్ అస్సి. తుచయ్ మాన్సుల్ ఈంజేవ్, చి ఇన్నెక అంచి అత్తి తుయి సార్ప కెర దిలది, చి తుచి కోడు రితి ఈంజేవ్ నిదాసుమ్ ఇండ అస్సి.

7 తుయి అంక దిలిసి ఎత్కిచి రిసా ‘వేరచి నెంజె, గని తుయి దిలిసి’ మెన అప్పె జాన్ తి. అంక తుయి తెద్రయ్ లోసా నిజుమ్ మెన చినిల.

8 ‘సంగు’ మెన తుయి సంగిలి కొడొ ఎత్కి ఇన్నెయింక ఆవ్ సంగ అస్సి, చి ఈంజేవ్ నూన, నంపజా, ఆవ్ తుచితె తెంతో ఉట్ట అయ్ లిన్ క ‘నిజుమ్’ మెన జాన్ తి. తుయి అంక తెద్రవ అస్సిన్ మెన నంపజా అస్సి.

9 “ఇన్నెచి రిసాయి ఆవ్ అప్పె ప్రార్థన కెర్తసి. ఈంజ లోకుమ్ చ ఎత్కిజిన్ చి రిసా ఇసి మెన ప్రార్థన కెరి నాయ్, గని ఈంజేవ్ తుయి అంచి అత్తి సార్ప కెర దిలసయ్ చి రిసా ప్రార్థన కెర్తసి. ఈంజేవ్ తుచయ్ మాన్సుల్.

10 అంచి ఒండే తుచయ్, తుచి ఒండే అంచయ్, చి ఈంజేవ్ నిదాసుమ్ జలిన్ తెన్ అంక గవురుమ్ జెతయ్.

11 “ఆవ్ తుచితె అప్పె అన్నె జెతసి చి అప్పె తెంతో ఆవ్ ఈంజ లోకుమ్ తె తయె నాయ్. గని ఈంజేవ్, మాత్రుమ్ తవుల. సుద్ది తిలో ఓ బ, ఈంజేవ్ చెంగిల్ తతి రితి, *తుయి అంక దిలి తుచి నావ్ చి సెక్కిక ఇన్నెక రక్క, చి ఆవ్ తుయి కిసి †ఎక్కి జా అస్సుమ్ గే ఈంజేవ్ కి ఎక్కి జా తంక తుచి నావ్ తెన్ ఇన్నెయింక దెకు.

12 ‡ఆవ్ ఇన్నెయింక బుల్తె తిలి పొది, తుయి అంక దిలి తుచి నావ్ తెన్ ఇన్నెక రకితె తిలయ్. ఆవ్ జేవ్ క జాగరిత తెన్ రకిలయ్ చి, ఇన్నెయింకె కో నాసెనుమ్ జతి నాయ్. నాసెనుమ్ తె గెతో జో ఎక్కిలో పిట్టవ, జలె, తుయి పూర్ణమ్ రెగ్గయ్ లి రితి నాసెనుమ్ జా అస్సి, దేముడు చి కొడొతె తిలి జా కోడు అప్పె నెరవెర్నుప జతి రిసా.

13 “అప్పె, జలె, ఆవ్ తుచితె జెతసిచి రిసా, ‘అంచి సంతోసుమ్

* 17:11 17:11 నెంజెలి, ‘తుయి అంచి అత్తి సార్ప కెర దిల ఈంజేవ్ సిస్సుల్ క తుచి నావ్ చి సెక్కిక రక్క’.

† 17:11 17:11 నెంజెలి, ‘ఎక్కి ప్రేమయ్ అస్సుమ్ గే, ఈంజేవ్ కి ఎక్కిలో తెన్ ఎక్కిలో ఎక్కి ప్రేమయ్ తెన్ తవుల’.

‡ 17:12 17:12 నెంజెలి, తుయి అంచి అత్తి సార్ప కెర దిల ఈంజేవ్ సిస్సుల్ తెన్ ఆవ్ బుల్తె తిలి పొది తుచి నావ్ తెన్ ఇన్నెక రకితె తిలయ్....

ఇన్నెచి పెట్టి నెరవెర్చువ జా కామ్ కెర్చు' మెన ఈంజ ఎత్తి, అప్పె ఈంజ లోకుమ్తె ఆవ్ తతె, ఇన్నెచి మొక్కె తుక సూనయ్తసి.

14 " 'సంగు' మెన తుయి సంగిలిసి ఎత్తి ఇన్నెయింక ఆవ్ సంగ అస్సి. ఆవ్ ఈంజ లోకుమ్చొ నెంజి, చి అంచ సిస్సుల్ ఈంజేవ్ జలి తెంతో, ఈంజేవ్ కి ఈంజ లోకుమ్చ నెంజితిచి రిసా, ఈంజ లోకుమ్చ ప్రెజల్ ఇన్నెయింక విరోదుమ్ దెకితతి.

15 జలె, తుక 'ఈంజ లోకుమ్తె తెంతో ఇన్నెయింక కడ నెవుసు' మెన అంచి ఆస నాయ్, గని 'ఈంజ లోకుమ్తె ఈంజేవ్ తా గెలె, నయ్తాన్క, జోచి సేవక, ఈంజేవ్ దెర్చు నే సేడ్డి రితి రక్క,' మెన తుక ప్రార్దన కెర్తసి.

16 "ఆవ్ కీసి ఈంజ లోకుమ్చొ నెంజి గే, అంక నంపజలి తెంతో ఈంజేవ్ కి ఈంజ లోకుమ్చ నెంజితి.

17 ఈంజేవ్ పూర్తి తుచయ్ జా తుచి సేవ నిదానుమ్ కెర్తె తతి రితి, తుచి సత్తిమ్తె ఇన్నెక సుద్ది కెరు. తుచి కోడు సత్తిమ్.

18 తుయి కీసి అంకయ్ ఈంజ లోకుమ్తె తెద్రయలది గే, మాన్సుల్క ఈంజేవ్ సత్తిమ్ వాట్ దెకయ్తి రితి, ఆవ్ ఇన్నెక తెద్రవ దా అస్సి.

19 ఈంజేవ్ కి తుచి సత్తిమ్తె తుచయ్ జా, తుచి సుద్ది జా తుక నిదానుమ్ తత్తు మెనయ్, అంచి జీవ్ తుచి అత్తి ఆవ్ సార్చు కెర దెతసి.

20 "ఎక్కి ఈంజేవ్ అంచ సిస్సుల్చి రిసా ఇసి ప్రార్దన కెరి నాయ్. ఈంజేవ్ అంచి రిసా సాచి సంగిలె, ఇన్నెయింక కోడు సూన అన్నె కో అంక నంపజా గెచ్చుల గే, జోవయింక రిసా కి ఆవ్ ప్రార్దన కెర్తసి.

21 ఓ బ, తుయి కీసి అంచి పెట్టి అస్సిన్ గే, చి ఆవ్ కీసి తుచి పెట్టి అస్సి గే, దస్సి ఈంజేవ్ కి, జేవ్ కి, అమ్చి పెట్టి తా కీఎక్కి జతు, చి దస్సి ఎక్కి జల మెలె, ఈంజ లోకుమ్చ అన్నె మాన్సుల్ దెకిలె, తుయి అంక తెద్రయ్లిసి జేవ్ కి నంపజవుల.

22 తుచి గవురుమ్తె అంక కీసి తుయి టీవడ అస్సిన్ గే, అంచి గవురుమ్తె ఆవ్ ఇన్నెయింక టీవడ అస్సి, చి ఆవ్, తూయి, కీసి ఎక్కి జా అస్సుమ్ గే, ఈంజేవ్ కి * ఎక్కి జతు మెనయ్ అంచి అస్.

23 దస్సి, ఆవ్ ఇన్నెయింక పెట్టి, తుయి అంచి పెట్టి తవదె, చి ఈంజేవ్ పూర్తి † ఎక్కి జవుల. దస్సి జలె, ఈంజ లోకుమ్చ మాన్సుల్ కిచ్చొ దొన్ని చినుల మెలె, అంక తెద్రయ్లిసా తుయి మెన చినుల, చి తుయి అంకయ్ కెర్ది ప్రేమ కెర అస్సిన్ గే, ఇన్నెయింక కి తుయి తెర్ది ప్రేమ కెర్తసి మెన చినుల.

24 "ఈంజ లోకుమ్ నే జెర్చున్ కెర్తె అగ్గె తెంతో అంచి ఉప్పిరచి తుచి ఎదివాట్ ప్రేమక అంక ఒగ్గర్ గవురుమ్ దా అస్సిన్. జలె, ఓ బ, తుయి అంక దిల సిస్సుల్ కి ‡ ఆవ్ తిలిన్తె అంచి తెన్ తత్తు, చి తుయి అంక దిలి గవురుమ్ దెకుతు, మెన అంచి అస్.

25 పున్నిమ్ తిలొ ఓ బ, ఈంజ లోకుమ్చ తుక నేన తిలె కి, ఆవ్ తుక జాని, చి కచితుమ్ తుయి అంక తెద్రయ్లిసి ఈంజేవ్ సిస్సుల్ జాన్తి.

26 తుయి అంక ప్రేమ కెర్ది ప్రేమ ఇన్నెయింక పెట్టి తవున్ మెన, ఆవ్ ఇన్నెయింక పెట్టి తంక మెన, తుయి కీసాచొ జా అస్సిన్ గే, ఇన్నెయింక ఆవ్ దెకవ అస్సి, దెకయ్తె తయిందె" మెన దేముడు అబ్బొన్క యేసు ప్రార్దన కెర్తన్.

§ 17:21 17:21 ఎక్కి ఉద్దెనుమ్ ఎక్కి ప్రేమచి కోడు. 11 నంబర్ కోడుచి ఎట్టాచి కోడు దెక. * 17:22 17:22 ఎక్కి ఉద్దెనుమ్ ఎక్కి ప్రేమచి కోడు. 11 నంబర్ కోడుచి ఎట్టాచి కోడు దెక. † 17:23 17:23 ఎక్కి ఉద్దెనుమ్ ఎక్కి ప్రేమచి కోడు. 11 నంబర్ కోడుచి ఎట్టాచి కోడు దెక. ‡ 17:24 17:24 నెంజిలె 'ఆవ్ గెతిన్తె జా, అంచి తెన్ తత్తు'.

18

యేసుక విరోదుమ్ సుదల్ దెర్రిసి
(మత్త 26:47-56; మార్కు
14:43-50; లూకా 22:47-53)

1 యేసు ఈంజేవ్ కొణ్డొ సంగ కేడవ,
జోచ సిస్సుల్ తెన్ బార్ జా, కెర్రిను మెంతి
లోయ ఒత్తల్తోచి ఒడ్డుతె జీన గెచ్చు,
సిస్సుల్ తెన్ ఒత్త తిలి తోటత పెసిల.

2 పుండితి రిసా యేసు జోచ సిస్సుల్
తెన్ ఒత్త గెచ్చుక అలవాట్చి రిసా, అప్పె
ఒత్త గెచ్చు తవుల మెన, జోక విరోదుమ్
సుదల్తె దెర దెంక గెలో యూదాక అజ్జ.

3 జో యూదా జలె, వెల్లెల పూజర్లుతె
చి పరిసయ్యుల్తె గెచ్చు, జోచ జమాన్లు
సగుమ్జిన్క, సయన్యమ్ సుదల్
సగుమ్జిన్క కడ ఆన, జేవ్, లాంతెర్లు
దివ్వొ, అయ్దల్ దెరన, యేసు తిలిన్తె
ఉట్ట అయ్ల.

4 జోక జర్లు జంక తిలిసి ఎత్తి
యేసు జానె చి, జేవ్ దెర్లన ఒత్త
పాచ జెతికయ్, జో పురెతో జా, “కక్క
చజితను?” మెన జోవయింక పుసిలన్.

5 జేవ్ జోక, “నజరేతు గవ్వొచొ
యేసుక చజితనుమ్” మెన జబాబ్ దిల,
చి యేసు జోవయింక “అవ్వొ జో!”
మెలన్. జోవయించి అత్తి జోవయింక
దెర దెంక ఒప్పుణ్ణొ యూదా జోవయింతెన్
ఒత్త టీచ అస్సె.

6 జలె, “అవ్వొ జో” మెన యేసు
సంగితికయ్, జోక దెరుక మెన అయ్ల
జనాబ్ వడ్డొ గుంబ బుయ్యొ సేడ గెల.

7 పడ్డొ, “కక్క చజితను?” మెన
యేసు జోవయింక అన్నెక్ సుట్టు
పుసిలన్, చి “నజరేతు గవ్వొచొ
యేసుక” మెన అన్నెక్ సుట్టు సంగిల.

8 సంగిలె, యేసు జోవయింక
“అవ్వొ జో” మెన తుమ్క సంగిలయ్,

గెద. అంకయ్ చజితను జలె, అంకయ్
దెర, గని అంచి తెన్ తిలనక పొన” మెన
జబాబ్ దిలన్.

9 చి యేసు అగ్గె సంగ తిలి ఏక్ కోడు
ఇన్నెయితెన్ * ఏక్ రగుమ్క నెరవెర్చువ
జలి.

“తుయి అంచి అత్తి సార్లు కెర దిలనతె కో
నానెనుమ్ జతి నాయ్”
మెన దేముడు అబ్బొన్క తెదొడి సంగ
తిలి కోడు.

10 జలె, సీమోను పేతురుక ఏక్ కండా
తిలి. జో పేతురు జా కండా కడన, ఎత్తిక
వెల్లో పూజరిచొ గెతిమాన్లు ఎక్కిలోక
కుంద, జోచి ఉజిల్ కండ్లొ సింద గెలన్. జో
గెతిమాన్లుచి నావ్ ‘మల్కు’.

11 పేతురు దస్సి కెర్రికయ్, “కండా
తియ దేన్! దేముడు అబ్బొ అంక
తియార్లి కామ్ దుకుమ్ సైమల్ జతిసి
జలెకి, ఆవ్ జా కామ్ కెరుకయ్, జా
దుకుమ్, జా సైమ ఒర్చువ జంకయ్”
మెన పేతురుక యేసు సంగిలన్.

12 జలె, జేవ్ జమాన్లు, జోవయించొ
అదికారి చి దేముడుచి గుడిచ
సయన్యమ్ సుదల్ యేసుక దెర, బంద
గెల.

13 తొలితో † ‘అన్నా’ మెలోసాతె కడ
నిల. జో కొన్సొ మెలె, కయప మెలో
జా వెర్నిచొ ఎత్తిక వెల్లో పూజరిచొ
మామొసి. ‡

14 ‘అమ్చ యూదుల్ నస్టుమ్ నే
జతి రిసా ఎక్కిలో మొర్లె చెంగిలి’ మెన
యూదుల్చ వెల్లెల మాన్సుల్క, ఎత్తిక
వెల్లో పూజరి కీ అగ్గె సంగ తిలో. ఈంజో
కయప జో ఎత్తిక వెల్లో పూజరి.

జోచొ సిస్సుడు నెంజి మెన పేతురు
సంగిలిసి

(మత్త 26:69-70; మార్కు
14:66-68; లూకా 22:55-57)

* 18:9 18:9 17:12 చి కోడు దెక. అన్నెక్కిచ్చొ రగుమ్క నానెనుమ్ జతి నాయ్ మెలె, జేవ్ మొర్లె అదక యేసుక
నిదానుమ్ తా: గెల. † 18:13 18:13 ‘అన్నా’ అగ్గె ఎత్తి వెల్లో పూజరి జా తిలో. ‡ 18:13 18:13
13-14 ఈంజ మత్తెలి తొలితో రెగెడ్ల పుస్తకల్తె ఏక్ పుస్తకుమ్తె 13 నంబర్ చి కోడు కెడ్లి బేగి 24 నంబర్ చి కోడు
గల అస్సి; 14 నంబర్ చి కోడుచి కంట అగ్గె. § 18:14 18:14 11:50 చి కోడు దెక.

15 యేసుక జేవ్ మాన్సుల్ దెర ఎత్కిక వెల్లో పూజరితె కడ నెతె తిలి పొది, సీమోను పేతురు, అన్నెక్టో సిస్సుడు, దొగుల, జేవ్ దెర్లనచి వట్టి గెల. ఎత్కిక వెల్లో పూజరి జో అన్నెక్టో సిస్సుడుక జానె, చి జో సిస్సుడు కి యేసు తెన్ ఎత్కిక వెల్లో పూజరిచి గెరి తెడి పెసిలన్.

16 గని, పేతురు గుమ్ముమ్ పాసి, బయిలె టీచ జా తిలో. జలె, ఎత్కిక వెల్లో పూజరి జాన్లో జో అన్నెక్ సిస్సుడు అన్నె బార్ జా, గుమ్ముమె రకితి తేర్బోద గొత్తి సుదొక సంగ, పేతురుక తెడి కడ ఆన్లన్.

17 జా తేర్బోద గొత్తి సుదొ పేతురుక దెక, “తుయి కి జో మాన్సుచొ సిస్సుడు, కిచ్చొగె” మెలన్, గని “నెంజి” మెన పేతురు సంగిలన్.

18 జలె, ‘చల్లి’ మెన, ఎత్కిక వెల్లో పూజరిచ గొత్తి సుదల్ దేముడుచి గుడిచ సయన్యుమ్ సుదల్ తెన్ మెసి బొగుల్చి ఆగి లావ తపితె తిల. పేతురు కి, తప్పక మెన గెచ్చ, ఒత్త జోవయింతెన్ అస్సె.

ఎత్కిక వెల్లో పూజరి యేసుక పరిచ్చ కెర్లిసి

(మత్త 26:59-66; మార్కు 14:55-64; లూకా 22:66-71)

19 మదెనె ఎత్కిక వెల్లో పూజరి యేసుక పరిచ్చ కెర్లన్. జోచ సిస్సుల్చి రిసా, జోచి బోదనచి రిసా పరిచ్చ కెర్లన్.

20 యేసు జోక కిచ్చొ జబాబ్ దిలన్ మెలె, “అంచి బోదన, జలె, ఈంజ లోకుమ్చ ఎత్కిజిన్ నూన్తి రితి ఎదార్దుమ్ సంగ అస్సి. అమ్చ యూదుల్చ సబ గెరలె బోదన కెర్తె తిలయ్, చి దూరి పాసి తెంతొ ఎత్కిజిన్ యూదుల్ బెర జెతికయ్ అమ్చి దేముడుచి గుడితె కి బోదన కెర్తె తిలయ్. ఆవ్ కెయ్య కి, కిచ్చొ కి లుంకచోరు సంగి నాయ్.

21 జాకయ్, కిచ్చొక అంకయ్ పునుక? కిచ్చొ కిచ్చొ సంగ అస్సి గే, అంక సూన్లనకయ్ పున” మెన యేసు జబాబ్ దిలన్.

22 యేసు దస్సి సంగితికయ్, పాసి టీచ తిలో సయన్యుమ్ సుదొ ఎక్కిలో యేసుక పెట, “ఎత్కిక వెల్లో పూజరిక తుయి దస్సి జబాబ్ దెంక బెదెదె గే? పోని!” మెన గెల కెర్లన్.

23 యేసు జోక కిచ్చొ జబాబ్ దిలన్ మెలె, “ఆవ్ సంగిలిసి తప్పు తిలెగిన, రుజ్జు దెకవ సాచి సంగ, గని, ఆవ్ సంగిలిసి సత్తిమ్ జతయ్. జాక, కిచ్చొక అంక పెటుక?” మెన సంగిలన్.

24 *తెదొడి అన్నా, యేసుక బందున్ తెన్ ఎత్కిక వెల్లో పూజరి జలొ కయపతె తెద్రయ్లన్.

యేసుచొ సిస్సుడు నెంజి మెన పేతురు అన్నె సంగిలిసి

(మత్త 26:71-75; మార్కు 14:69-72; లూకా 22:58-62)

25 సీమోను పేతురు ఒత్త ఆగి తపితె అస్సె, జలె, ఒత్త తిల మాన్సుల్ జోక “తుయి కి యేసుచొ సిస్సుడు, నెంజిన్ గే?” మెంతికయ్, జో “ఆవ్ నెంజి” మెలన్.

26 గని ఎత్కిక వెల్లో పూజరిచొ గొతిమాన్సుచి కండొ పేతురు అగ్గె సింద తిలో. జలె, జో మాన్సుచొ సొంత మాన్సు ఎక్కిలో ఒత్త తిలో. జో, జలె, పేతురుక “అప్పె తూయి జోవయింతెన్ తోటతె తిలది. తుక దెకిలయ్, గెద?” మెలన్.

27 గని, “నాయ్, జో మాన్సుక నేని!” మెన పేతురు సంగిలన్, చి జో సంగిల్ బేగి కుకుడొ వాసిలన్.

రోమ అదికారి యేసుక పరిచ్చ కెర్లిసి (మత్త 27:1-2,11-31; మార్కు 15:1-20; లూకా 23:1-25)

28 తెదొడి, యేసుక కయప మెలో జో ఎత్కిక వెల్లో పూజరి పున కెర

* 18:24 18:24 13 నంబర్చి కోడుచి ఎట్టొచి కోడుక దెక.

కేడయ్ తికయ్, జా రోమ దేసిమ్ తెంతోచో అదికారిచి మేడతె జోక వెల్లెల మాన్సుల్ కడ నిల. గని, జోక కడ నిలన జా మేడ తెడి పెసితి నాయ్. కిచ్చొక మెలె, జేవ్ యూదుల్ జవుల, చి పస్కా మెలి జోవయించి పండుగు తిలి, చి 'యూదుల్ నెంజిల మాన్సుల్చ గెరలె పెసిలె గార్ జమ్దె, చి గార్ జలె పండుగ్ అన్నిమ్ కంక గారు. పండుగు పిట్టెదె' మెంతతి.

29 జాకయ్, పిలాతు మెలో జో అదికారి బార్ జా, జోవయింతెన్ జా కెర "కిచ్చొ నేరిమ్ కెర్లో మెన ఈంజొ మాన్సుచి రిసా తుమ్ సంగితసు?" మెన యూదుల్చ జేవ్ వెల్లెల మాన్సుల్క పుసిలన్.

30 జేవ్ జోక "ఈంజొ నేరిమ్ కెర్లో నాయ్ జలె, ఇన్నెక తుచితె సార్పు కెరుక మెన క్కడ ఆన్తమ్ గే? నాయ్" మెన జబాబ్ దిల.

31 దస్సి సంగితికయ్, పిలాతు జోవయింక, "తుమ్ ఇన్నెకకడన, తుమి, దేముడు మోసే తెన్ దిలి తుమ్చ సొంత ఆగ్గుల్ రితి ఇన్నెక తిర్పు కెర!" మెలన్. దస్సి మెంతికయ్ జేవ్ జోక "ఆమ్ కెర్తి రితి పత్రల్ గల మార్తి సిచ్చ కెరుక జలె, 'నాయిమ్ నాయ్' మెన, తుమ్ రోమియులు ఒచ్చున్ నాయ్" మెన జబాబ్ దిల.

32 జేవ్ దస్సి జబాబ్ దిలి తెంతో 'సీలువతె మొర గెచ్చిందె' మెలి అర్దుమ్ తెన్, జో మొర్తిసి కిచ్చొ రగుమ్ జర్లు జతిన్చి రిసా యేసు అగ్గె సంగ తిలి కోడు నెరవెర్పువ జలి.

33 పడ్డొ పిలాతు, మేడచి తెడి అన్నె పెన, యేసుక బుకార్చన్. యేసుచి రిసాచ కొడొ నూన తిలో, చి "తుయి

యూదుల్చో రానో గే?" మెన జోక పుసిలన్.

34 ఇసి పున పరిచ్చ కెర్తికయ్, యేసు జోక, "తుయి అజ్జ కెర అంక దస్సి సంగితసి గే? నాయ్ మెలె, కో జలెకు వేర మాన్సు తుక †దస్సి మెన అంచి రిసా సంగ అస్తి గే?" మెన పుసిలన్.

35 జాచి రిసా, పిలాతు జోక "ఆవ్ యూదుడు గే, చి దస్సి మెనిందె? నెంజి, తుచ సొంత యూదుల్చ వెల్లెల మాన్సుల్, వెల్లెల పూజర్లు, తుక అంచితె సార్పు కెర అస్తి. కిచ్చొ కెర అస్సిన్, చి తుక దస్సి కెర్తతి?" మెన పిలాతు పుసిలన్.

36 యేసు, జలె, కిచ్చొ జబాబ్ దిలన్ మెలె, "అంచి రాజిమ్ ఈంజ లోకుమ్చి నెంజె. అంచి రాజిమ్ ఈంజ లోకుమ్చి జతి జలె, యూదుల్చ వెల్లెల మాన్సుల్చి అత్తి ఆవ్ దెర్పు నే సిడ్డి రితి అంచ గొత్తి సుదల్ యుద్దుమ్ కెర్త. గని అంచి రాజిమ్ ఈంజ లోకుమ్చి నెంజె" మెన జబాబ్ దిలన్.

37 యేసు దస్సి సంగితికయ్, పిలాతు జోక "దస్సి జలె, 'రానో' మెన తుయి నిజుమ్ సంగితసి గే?" మెన అన్నె పరిచ్చ కెర్లన్, చి యేసు జోక, " 'రానో' మెన తుయి అంక సంగితసి. ఆవ్ కిచ్చొక జెర్మిలయ్, కిచ్చొక ఈంజ లోకుమ్తె అయ్లయ్ మెలె, సత్తిమ్ దెకవుక, సత్తిమ్చి రిసా సాచి సంగుక అయ్లయ్. జయ్యి అంచి కామ్. కో సత్తిమ్తె బెదితన జవుల గే, అంక నంపజవుల" మెన సంగిలన్.

38 యేసు దస్సి సంగితికయ్, పిలాతు మెలో జో అదికారి, "కేతె, సత్తిమ్?" మెన సంగిలో.

పిలాతు దస్సి సంగ కెర, మేడ తెంతో బార్ జా, యూదుల్చ వెల్లెల మాన్సుల్

† 18:32 18:32 12:32, 33క దెక. 'సీలువ' కీసి తయెదె మెలె, ఏక్ టీవ్ తిచి ఏక్ అర్దుమ్ జతి దొన్ని డేడివో రిత డండల్ బెదవుల. జా సిచ్చ జతో మాన్సుక జా సీలువతె ఎంగ్లవ కెర, జోవయించ అత్తి చట్టొ చంపొ కెరవ, అత్తివట్టొతె మెకుల్ పెట, నెంజిలె వాలివో తెన్ బంద దా, సీలువ బుయ్యె టీవ్ రోవ కెర, దస్సి ములుల. జో సిచ్చ జతోసా దస్సి జటోయ్ జా మొరదె. రోమ్ దేసిమ్చి అలవాట్ తెన్ చి సిచ్చ, జా. † 18:34 18:34 యూదుల్చో రానో మెనంతయ్ మెన యేసుచి రిసా పిలాతుక సంగిలె, అంచి రోమ్ దేసిమ్చి అదికారుమ్ యేసు పిట్టెవుక ఉచర్తయ్ మెన పిలాతు కోవుమ్ జా మొర్తి సిచ్చ దెయెదె మెన యూదుల్చ వెల్లెల మాన్సుల్ కుత్త కెర తిల. లూకా 23:2.

తిలిన్తె అన్నె గెచ్చు, “ఈంజొ కిచ్చొ నేరిమ్ నే కెర్లి రితి అంక డీస్తయ్.

39 తుమ్చి కీపస్కా, పండుగక మాత్రుమ్, జేల్తె తిలో కేన్ జవున్ జేలి జలోసాక తుమ్చి రిసా ఆవ్ విడ్డల్ కెరుక అంక అలవాట్. జలె, కక్క ఆవ్ ముల దెంక? తుమ్చ యూదుల్చొ ఈంజొ రానొక ముల దెంక?” మెన పిలాతు పుసిలన్.

40 గని జేవ్ కీసి జల మెలె, “ఈంజొ మాన్సుక పోని! బరబ్బుక ములు!” మెన ఒర్న దిల. బరబ్బు, జలె, మాన్సుక మొరయ్తెసా.

19

యేసుక సిలువ గల్తి రిసా సిచ్చ కెర్లిసి

1 జలె, పిలాతు తెదొడి కిచ్చొ కెర్లన్ మెలె, *‘పెట్టె సాలు కిచ్చొగె’ మెన ఉచర, కొర్లల్ తెన్ పెటయ్లన్.

2 ఒత్త తెంతొ, నయన్యుమ్ సుదల్ సగుమ్జిన్, యేసుక †మేడచి తెడి కడ నా కెర, ఆరి కొంకడ్డి రితి ‘రానొ’ మెన కంటకంపల్ తెన్ ఏక్ కిరీటుమ్ గంచ, జోచి బోడితె గల, ‡ఊద రంగుచొ పాలుమ్ జోక గల దా తెయార్ కెర,

3 పాసి జా జోకర, “యూదుల్చొ రానొ, తుక జెయ్యి!” మెన మొక్కె పెట్టె.

4 తెదొడి, యూదుల్చ వొల్లెల మాన్సుల్ తిలిన్తె పిలాతు అన్నె బార్ జా, జోవయింక “ఓదె, జో కిచ్చొ నేరిమ్ నే కెర్లి రితి అంక డీస్తయ్, చి జయి గుర్తుక, తుమ్క రుజ్జు దెకయ్తి రితి, తుమ్ తిలిన్తె ఆవ్ జోక బార్ కెర్తసి” మెన సంగితికయ్,

5 కంట కంపల్చి కిరీటుమ్ జోచి బోడి తతె, ఎరన పాలుమ్ జో గలన

తతె, యేసుక బార్ కెర్ల, చి “ఈందె జో మాన్సు!” మెన, పిలాతు దెకయ్లన్.

6 యేసుక దెకిల్ బేగి, వెల్లెల పూజర్లు చి దేముడుచి గుడిచ సయన్యుమ్ సుదల్ కీసి జల మెలె, “జోక సిలువతె గల మొర్తి సిచ్చ కెరు! సిలువతె గల!” మెన ఒర్నిల. జేవ్ దస్సి జతికయ్, “తుమి కడన సిలువతె గల! ఈంజొ కిచ్చొ నేరిమ్ నే కెర్లి రితి అంక డీస్తయ్. జా పూచి నెసి!” మెన పిలాతు సంగిలన్.

7 యూదుల్చ వొల్లెల మాన్సుల్ జోక కిచ్చొ జబాబ్ దిల మెలె, “అమ్క దేముడు మోసే తెన్ దిలి ఆగ్గుల్ అస్సె. జా ఆగ్గు కీసిచి మెలె, అమ్చొ దేముడు తెన్ కో జెలికు సమ్మందుమ్ సంగనై, ‘వెల్లి పాపుమ్ కెర అస్సె’ మెన, జో మాన్సు మొర్తి సిచ్చ జంక అస్సె. ఈంజొ, జలె, ‘దేముడుచొ పుత్తుసి ఆవ్’ మెనన, జయ్యి పాపుమ్ కెర అస్సె, చి మొర్తి సిచ్చ జో జంక అస్సె!” మెన వెల్లెల మాన్సుల్ సంగిల.

పిలాతు యేసుక అన్నె పరిచ్చ కెర్లిసి

8 పిలాతు, జలె, జేవ్ కొడొ నూన, బల్లె కిబియె గెచ్చు, యేసుక అన్నె కడన,

9 జా మేడచి తెడి అన్నె పెన, జోక, “తుయి కేనె తెంతొ అయ్లది?” మెన పుసిలన్. గని యేసు తుక్లె తా జబాబ్ దెయె నాయ్.

10 తుక్లె తతికయ్, పిలాతు జోక, “తుయి కిచ్చొక అంచి తెన్ లట్టబ్బి నాయ్? తుక విడ్డల్ కెరుక జవున్, నెంజెలి మొర్తి సిచ్చ దా సిలువతె గలుక జవున్, అంక అదికారుమ్ అస్సె మెన తుయి నేన్సి గే?” మెన సంగిలన్.

§ 18:39 18:39 పూర్ణుమ్ పొది యూదుల్ ఐగుప్తు దేసిమి తా గొతిమాన్సుల్ జలిన్ తెంతొ ఎత్తి అదికారుమ్ తిలో దేముడు విడ్డల్ కెర్లిసి ఏద కెర్లి రిసా యూదుల్ ఈంజు పస్కా పండుగు కెరుల. ఈంజయి వెర్ని యేసు పాపల్ తెంతొ విడ్డల్ కెర్తొసా జయెదె మెన నేన్తి. * 19:1 19:1 లూకా 23:16, 22క దెక. † 19:2 19:2 మత్తయి 27:27, మార్కు 15:16. ‡ 19:2 19:2 ఎరన చి నీలిమ్ రంగు బెదయ్లె, ఊద రంగు జయెదె. సార్ రంగు,

§ 19:8 19:8 పిలాతుచొ అదికారి జలో రోమ్ దేసిమ్చొ కైసర్ రానొ, జలె, ఎత్తి అదికారుమ్ తిలో దేముడుక సమ్మందుమ్ సంగితయ్ కి, చి ‘జేక అమ్చి రోమ్చి అదికారుమ్చి ఉప్పిరి అస్సె విరోదుమ్ దెకవుల’ మెన, ‘అంక కి జా విరోదుమ్ దెకవుల’ మెన జో పిలాతు బియె తయెదె.

11 జో దన్ని సంగితికయ్, యేసు జోక కిచ్చొ జబాబ్ దిలన్ మెలె, “జా అదికారుమ్, జలె, దేముడు తుక దెతో నాయ్, జలె, అంచి ఉప్పిరి తుక కిచ్చొ అదికారుమ్ తత్తి నాయ్. గని, తుయి ఇన్నె ఏలుప కెరుక నాయిమ్. జాకయ్, తూయి అప్పె కెర్తినచి పాపుమ్ తొక్కి. తుచి అత్తి అంక సొర్ప కెర్తనచి పాపుమ్ ఒగ్గరి!” మెన పిలాతుక యేసు సంగిలన్.

యూదుల్చ అత్తి పిలాతు యేసుక సొర్ప కెర్తసి

12 తెదొడి, యేసుక విడ్డల్ కెరుక మెన పిలాతు ఇన్టుమ్ జా, యూదుల్చ వెల్లెల మాన్సుల్ తిలిన్తె అన్నె బార్ జా, జోవయింక సంగిలన్, గని జేవ్ పిలాతుక కిచ్చొ మెన బియడ్ల మెలె, “ఎక్కిలో ‘రానొ’ మెననై, జో తుచొ అదికారి జలో రోమ్ దేసిమ్చొ *కైసర్ రానొక యుద్దుమ్ కెర్లి రితి జయెదె, చి దసొ మాన్సుక తుయి విడ్డల్ కెర్లె, ‘కైసర్క విరోదుమ్ జలో’ మెన తుచి రిసొ కి నేరిమ్ వయడుక జయెదె” మెన పిలాతుక బియడ్ల.

13 జేవ్ కొడొ సంగ పిలాతుక దన్ని బియడ్డికయ్, ఒత్త జేవ్ తిలిన్తె పిలాతు యేసుక అన్నె బార్ కెరవ, మేడచి పురెచి సదై తిలి తీర్పు కెర్లి టాన్తె వెసిలన్. సద్దుర్క ‘గబ్బతా’ మెన యూదుల్చి ఎబ్బి బాస తెన్ సంగుల.

14 ఈంజ కెయ్ జర్గు జలి మెలె, యూదుల్చి పస్కా వండుగ్కచి సెలవ్ కడన్లె తెయార్ కెర్లి అగ్గ దీసి, పాసి పాసి మెద్దెనె. పిలాతు, జలె, యేసుక అన్నె దెకవ, “అల్లె, తుమ్చొ రానొ, ఈంజో!”

* **19:12 19:12** ‘కైసర్’ నెంజెలి ‘వెల్తో రానొ’ మెనుల. ‘సీజరు’ మెలి, ఇంగ్లీస్ తెన్ బెదితి కోడు, ‘కైసర్’ మెలి, గ్రీకు బాస తెన్ బెదితి కోడు, ‘వెల్తో రానొ’ మెలి, తెలుగు తెన్ బెదితి కోడు. † **19:18 19:18** ‘సిలువ’ కీసి తయెదె మెలె, ఏక్ టీవ్తె చి ఏక్ అడ్డుమ్ జతి దొన్ని డెడివొ రిత డండల్ బెదవుల. జా సిచ్చ జతో మాన్సుక జా సిలువతె ఎగ్గువ కెర. జోవయింక అత్తొ చట్టొ చంపొ కెరవ అత్తొచట్టొ మేకుల్ పెట, నెంజెలి వాలివొ తెన్ బంద, సిలువ బుయ్యె టీవ రోవ కెర, దన్ని ములుల. జో సిచ్చ జతోనా దన్ని ఒడయ్ జా మొరెదె. ‡ **19:18 19:18** యోహాను 20:20, 25. లూకా 24:39.

మెన యూదుల్చ వెల్లెల మాన్సుల్క సంగిలన్.

15 జేవ్, “జోక అమ్చొ రానొ మెంతసి గె? జో గెన్ను! మొర్ను! సిలువతె గలు!” మెన ఒర్చిల. జేవ్ దన్ని జతికయ్, పిలాతు జోవయింక అన్నె, “తుమ్చొ రానొక ఆవ్ సిలువతె గల మారుక గే?” మెన జోవయింక కొంకడ్లన్. చి వెల్లెల పూజర్లు కిచ్చొ మెల మెలె, “ఎక్కి కైసర్ అమ్క రానొ. అన్నె కో నాయ్!” మెన సంగిల.

16 జేవ్ దన్ని సంగితికయ్, యేసుక సిలువతె గల మొర్తి సిచ్చ కెర్లి సెలవ్ దా, జోక జోవయించి అత్తి పిలాతు సొర్ప కెర దిలన్. తెదొడి జమాన్లు యేసుక దెర నిల.

యేసుక సిలువతె గల మార్గిసి
(మత్త 27:32-44; మార్కు
15:21-32; లూకా 23:26-43)

17 తెదొడి, సిలువతె గల మారుక మెన, యేసుక దెర్ల, చి జోక గల్లి సిలువ జొయ్యి వయన బార్ జా, ‘గొల్తోతా’ మెలి మెట్టయ్ ఉట్ట గెల. ఎబ్బి బాస తెన్ జా నావ్చి అర్దుమ్ కిచ్చొ మెలె, ‘గిడ్డి పోలికచి టాన్’.

18 ఒత్త, జా † సిలువతె జోక గల, జోచి ‡ అత్తొచట్టొ మేకుల్ పెట, సిలువతె టీవడ రోవెల. యేసుచి సిలువ నెడిమి రోవ, జోచి డెబ్బి పక్క ఎక్కిలోక, ఉజెతో పక్క అన్నెకోక, దొగుల చోర్లుక కి దన ఎక్కెక్ సిలువల్తె గల, దన్ని టీవడ.

19 ‘యేసుచి సిలువచి బోడి గల’ మెన పిలాతు ఏక్ దార్చిగండతె రెగ్డయిలన్. కిచ్చొ రెగ్డయిలన్ మెలె, “నజరేతు గద్విచొ యేసు, ఈంజో యూదుల్చొ రానొ జయెదె” మెన రెగ్డయిలన్.

20 యేసుకు సిలువతె గలిలి టాన్, జలె, యెరూసలేమ్ పట్టుమ్చి పాసిచి రిసా, యూదుల్ ఒగ్గర్జిన్ జా వాట్ గెచ్చుక జెంక జతె తిల, చి జా దార్చిగండతె కొణొ నదు కెర్ల. తిన్ని బాసల్ తెన్ కి పిలాతు జా దార్చిగండతె రెగ్గవ తిలొ, జోవయించి సొంత వల్లి బాస తెన్ కి, రోమ దేసిమ్చి లాటిన్ బాస తెన్ కి, పడ్డొ ఒగ్గర్ బియ్యారి కెర్తి గ్రీకు దేసిమ్చి గ్రీకు బాస తెన్ కి, రెగ్గవ తిలన్. దస్సి తిలె, కో అయ్లె కి అర్దుమ్ కెరనుల, గెద,

21 చి 'జా దార్చిగండ దెకితన అమ్క ఆసుల' మెన యూదుల్చ వెల్లెల మాస్సుల్క లాజు, కోపుమ్, చి రిసా, జోవయించ వెల్లెల పూజర్లు పిలాతుతె గెచ్చు, " 'యూదుల్చొ రానొ జయెదె' మెన రెగుడుక కిచ్చొక? జా పోని, గని 'యూదుల్చొ రానొ ఆవ్ మెన ఈంజొ మాస్సు సంగణొ' మెన రెగుడు!" మెన పిలాతుక సంగిల.

22 గని పిలాతు, "ఆవ్ రెగ్గయిలిసి ఆవ్ రెగ్గవ అస్సి. దస్సి తవును" మెన, మార్పువ కెరె నాయ్.

యేసుచ పాలల్ సయ్న్యమ్ సుదల్ వంటన్లిసి

23 సయ్న్యమ్ సుదల్, జలె, యేసుకు సిలువతె గల టీచడ్డి వడ్డొ, జోచ పాలల్క చెత్తర్ వాటల్ కెర, వంటన్. జోచి దిగిల్ సొక్క కి తిలి, గని కుటు నెంతె వీంణొ పాలుమ్ జా, చి దస్సే వంటనుక నెంజిలి.

24 జాక, "జా పాలుమ్ చిరుక పోని. చీటి గలుమ, చి కక్క సేడెదె గే, దెకుమ" మెన చీటి గలిల. కిచ్చొక ఇని జర్లు జలి మెలె, దేముడు పూర్లుమ్ రెగ్గయ్లి కోడు నెరవెర్పువ జంకయ్ ఇని జలి.

"అంచ పాలల్ వంటనుల, చి అంచొ ఏక్ పాలుమ్క చీటి గలుల" మెన రెగిడ్డి కోడు.

25 సయ్న్యమ్ సుదల్, జలె, యేసుచ పాలల్క ఆస జా దస్సి కెర్ల, గని యేసుచి అయ్యసి, పడ్డొ క్లోప మెలొ ఎక్కిలొచి తేర్చి మరియ, యేసుచి అయ్యసిచి అప్పుసి జయెదె, యేసుకు పెద్దయసి జయెదె, పడ్డొ మగ్గల పట్టుమ్చి మరియ కి, జేవ్ తేర్బోదల్ యేసుచి సిలువచి పాసి టీచవ అస్తి.

26 జలె, యేసు అయ్యస్క దెకిలన్, చి జో ఒగ్గర్ ప్రేమ కెర్లొ సిస్సుడు కి ఒత్త టీచ అస్సి మెన దెకిలన్, చి జో సిస్సుడుక దెకవ అయ్యస్క "ఓదె, తుచొ పుత్తుది!" మెన సంగ,

27 అయ్యస్క దెకవ, జో సిస్సుడుక "ఈందె, తుచి అయ్యది!" మెన సంగిలన్. జాక జయి గడియ తెంతొ జో సిస్సుడు దెకిత్ తంక మెన, సొర్పు కెర దిలొ, చి జయి గడియ తెంతొ జో సిస్సుడు జాక గెరి కడన, 'అయ్య' మెన జాక పోసిలొ.

యేసు మొర గెలిసి
(మత్త 27:45-56; మార్కు 15:33-41; లూకా 23:44-49)

28 తెదొడి 'అంచి కామ్ ఎత్తి కేడ గెలి' మెన యేసు జానన, "అంక తాన్ కెర్తయ్" మెన సంగిలన్. ఇన్నెతెన్ కి, దేముడు పూర్లుమ్ రెగ్గయ్లి కోడు నెరవెర్పువ జలి.

29 జలె, ఒత్త ఏక్ తప్పెలయ్ అమ్డి ద్రాచ రస్సుమ్ తిలి, చి ఏక్ బూంజు రితిసి జా రస్సుమ్తె బుడ్డవ కెర, ఏక్ రివ్వతె దెరవ కెర, యేసు చుపిర్తి రితి ఒత్తచ సయ్న్యమ్ సుదల్ చంపొ కెర్ల.

30 జలె, యేసు జా రస్సుమ్ చుప్ర కెర, "కీఅంచి కామ్ పూర్తి జలి" మెన సంగ, బోడి వంపొ కెర, జోచి ప్రాసుమ్ దేముడు అబ్బొచి అత్తి సొర్పు కెర దా, మొర గెలన్.

§ 19:30 19:30 జో ఈంజు లోకుమ్తె బుల బుల దేముడు అబ్బొచి ప్రేమ అదికారుమ్ దెకయ్లిచి కామ్ ఇన్నెతెన్ కేడ్డి, గని అన్నె కిచ్చొ మక్కిమ్చి జోవయించి కామ్ ఇన్నెతెన్ కేడ్డి మెలె, జో పావల్ గెచ్చయ్తి దొర్లు జలి అర్చితుమ్ జలిసి, వస్యొ వండుగ్చొ మెండపిల్ల జలిసి.

31 జా దీసి తెయార్ జతి దీసి. అన్నెక్ దీసి, సెలవ్ కడన్లి దీసి, 'మొర్త పీనుమ్లు సిలువల్తె తా గెలె గారు' మెన, 'బేగి మొర్తి చి అగ్గెయ్ ఉత్తవ వెంట గెలుక జయెదె' మెన, యూదుల్చ వెల్లెల మాన్యుల్ పిలాతుతె గెచ్చు కెర, "సిలువల్తె గలిలనచ చట్టో బగయ్తు, చి పీనుమ్లక ఉత్తవ దా బేగి వెంట గెల్తు" మెన సెలవ్ నజీల, చి పిలాతు సెలవ్ దిలన్.

32 జాకయ్, నయన్యుమ్ సుదల్ గెచ్చు కెర, తొలితో ఎక్కిలోచ వడ్డె అన్నెక్లెచ, యేసు తెన్ బెద సిలువల్తె గలిల దొగుల చోర్లచ చట్టో బగవ గెల.

33 గని, యేసుతె అయ్లె, 'నాయ్, అగ్గెయి మొర గెచ్చు అస్సె' మెన దెక, జోక చట్టో బగయితి నాయ్.

34 గని, జోవయింతె ఎక్కిలో యేసుక ఈంటె తెన్ పక్కయ్ బూసిలన్. బూసిల్ బేగి, లోయి కి పాని కి సూయి జలి.

35 తుమ్ ఈంజ నదు కెర్తన కి సూన్తన కి, తుమ్క 'జేవ్ కి పూర్తి నంపజతు' మెనయ్ జా ఎత్తి *దెకిలోసా జోచి సాచి సంగ అస్సె. జో సంగిలి సాచి సత్తిమ్, చి 'సత్తిమ్' మెన జో కచితుమ్ జాన్సె.

36 ఈంజ కిచ్చొక ఇసి జర్గు జలి మెలె, ఇన్నెతెన్ దేముడు పూర్గుమ్ రెగ్గయ్లి కోడు నెరవెర్చువ జలి.

"జో అర్చితుమ్ జలోసాతె కేన్ ఆడు కి బగయితి నాయ్" మెన రెగిడ్లి కోడు, చి

37 "జేవ్ బూసిలోసాక జేవ్ దెక ఉచరుల" మెన అన్నెక్ కోడు అస్సె.

యేసుచి పీనుమ్ మెన్సున్తె ఎంగ్దవ దిలిసి

38 యూదుల్చ వెల్లెల మాన్యుల్తె ఎక్కిలో, అరిమతయ్ మెలి గచ్చొచొ యోసేపు మెలొసా, జో, జలె, యేసుచ

సిస్సుడు, గని అన్నె వెల్లెల మాన్యుల్క బియఁ కెర, ఎదార్దుమ్ ఒప్పునె నాయ్. లుంకచోరు యేసుక సిస్సుడ్ రితో జా అస్సె. జో, జలె, అప్పె పురె జా పిలాతుతె గెచ్చు కెర, "యేసుచి పీనుమ్ కావలె. దెర గెచ్చుమ్దే" మెన సంగితికయ్, పిలాతు సెలవ్ దిలో, చి పీనుమ్ దెర గెచ్చుక మెన, సిలువ తిలిన్తె అయ్లో.

39 అన్నెక్లొ కి అయ్లో. కొన్సొ మెలె, నీకోదేమొ మెలో పరిసయ్యుడు. యేసుచి బోదన నూనుక మెన, ఒగ్గర్ అగ్గెయ్ రాతి, లుంకచోరు యేసుతె జా తిలోసా జొయ్యి. జో, జలె, అప్పె ఒగ్గర్ విలువ తిలి వాసెన సామన్ దెరన అయ్లో. జా వాసెన సామన్ కెడ్డి జాడుచి మెలె, పాసి పాసి యాబయ్ కేజిల్ చి జాడు.

40 జేవ్ దొగుల, జలె, యూదుల్ కెర్తి అలవాట్ కెర, వెల్లొ గండల్ విలువ బట్ట తెన్ జా వాసెన సామన్ బెదవ బెదవ, పీనుమ్క గుడియవ బందిల. పీనుమ్క దస్సి తెయార్ కెర మెన్సి వయ నిల.

41 యేసుక సిలువతె గలిలి టాన్చి పాసి, జలె, ఏక్ తోట అస్సె. జా తోటతె సాప్రయ్ డొల్మి కెర్లి గది తిలి రితి నొవి మెన్సున్ అస్సె. కక్క నే రోవిలిసి.

42 సెలవ్ కడన్లి దీసిక చి పండుగు దీసిక జా దీసి తెయార్ జతి దీసి రిసా 'దూరి వయుక గారు' మెన యూదుల్ సంగులచి రిసా, జా మెన్సున్ పాసి తతికయ్, యేసుచి పీనుమ్ ఒత్తయ్ తెడి ఎంగ్దవ దిల.

20

మెన్సున్ డంపితి పత్తురు ఒన్నుల్ జా తిలిసి

(మత్త 28:1-10; మార్కు 16:1-8; లూకా 24:1-12)

1 యేసుక విరోదుమ్ సుదల్ మార తిర్రత్క, *అయ్తర్ దీసి పెందలె, మగ్దల

* 19:35 19:35 'జా ఎత్తి దెకిలోసా' మెన ఏక్ వేల ఈంజ పుస్తకుమ్ రెగిడ్లి యోహాను సొంతచి రిసా సంగితయ్. * 20:1 20:1 నత్తు పొదుల్తె అగేచి దీసి

పట్టుమచి మరియు మెన్నె అయ్యలి. అయ్యలె, కిచ్చొ దెకిలి మెలె, సాప్రయ్ డొల్లి కెర్లి మెస్సునక డంక తిలొ పత్తురు కిసి గే ఒస్సుల్ జా అస్సె.

2 ఇసి జా అస్సె మెన దెక, బమ్మ జా, సీమోను పేతురు చి యేసు ఒగ్గర్ ప్రేమ కెర్లొ జో అన్యెక్లొ సిస్సుడు దొగుల ఎక్కితె తిలిన్తె మరియు నిగ గెచ్చు, “యేసు ప్రబుచొ పీనుమ్ మెస్సున్ తెంతొ ఉక్లన అస్తి, చి జోక కేనె అన్నె ముల దా అస్తి గే నేనుమ్” మెన జోవయింక సంగిలి.

యేసు జీవ్ జా ఉట్లీన్చి రుజ్జు అయ్యలిసి

3 జా మరియు దస్సి సంగితికయ్, పేతురు, జో అన్యెక్లొ సిస్సుడు మెన్నె గెచ్చుక మెన బార్ జల.

4 జేవ్ దొగుల నిగ గెలె, జో అన్యెక్లొ సిస్సుడు బేగి నిగ, పేతురుచి కంట తొలితో మెన్నె పాచిలన్.

5 ఈంజొ తొలితో పాచ, వంపొజా తెడి ఒయర దెకిలె, రితయ్ బట్ట గండల్ ఒత్త నేడ అస్తి మెన దెకిలన్, గని తెడి పెనె నాయ్.

6 తెదొడి, జోవయించి పడ్డా సీమోను పేతురు నిగ జా పాచిలన్, చి మెస్సున్ తెడిక పెసిలన్. రితయ్ బట్ట గండల్ ఒత్త నేడ అస్సె.

7 చి జేవ్ గండల్క ఇదిల్ దూరిక, యేసుచి బోడి బంద తిలి బట్ట గండ, గుడియయ్ జలి రితి జా, అజ నేడ అస్సె.

8 తెదొడి, జో అన్యెక్లొ సిస్సుడు కి, మెలె, మెన్నె తొలితో పాచిలొసా, మెస్సున్ తెడి పెన దెక, యేసుక ‘జీవ్ జా ఉట్ట అస్సె’ మెన, నంపజలన్.

9 యేసుక “మొర జీవ్ జా ఉట్టుక అస్సె” మెన అగ్గెయ్ తెంతొ దేముడు రెగ్గవ తిలిసి సిస్సుల్ తెదొడి ఉచార అర్దుమ్ కెరనుక నేతయ్.

10 జలె, దెక కెర, యేసుక ‘జీవ్ జా ఉట్ట అస్సె’ మెన నంపజా, జేవ్ దొగుల సిస్సుల్ జోవయించ గెరలె ఉట్ట గెల.

మగ్దల పట్టుమచి మరియు యేసు డీసిలిసి
(మార్కు 16:9-11)

11 మదెనె మగ్దల పట్టుమచి మరియు, ఏడ ఏడ మెన్నెచి బయిలె టీచ అస్సె. తెదొడి, ఏడ ఏడ, మెన్నెచి తెడి ఒయర్ది రిసా వంపొ జలి.

12 ఒయర్దె, కిచ్చొ దెకిలి మెలె, చొక్కిల పాలల్ గలన తిల దొగుల దూతల్ యేసుచి పీనుమ్ అగ్గె ఎండ్ల తిలిన్తె దెకిలి. యేసుచి బోడి అగ్గె తిలిన్తె ఎక్కిలొ, చట్టొ అగ్గె తిలిన్తె ఎక్కిలొ వెన అస్తి.

13 ఈంజేవ్ జాక “అమ్మ, కిచ్చొక ఏడ్డసి?” మెన సంగిల. చి జాజోవయింక “అంచొ ప్రబుక దెర గెచ్చు అస్తి, చి జోక కేనె అన్నె ముల దా అస్తి గే నేని” మెన సంగిలి.

14 దస్సి మెన సంగ, కిసిగె పడ్డా పసిలి, చి యేసు ఒత్తయ్ టీచ తిలిసి దెకిలి. గని ‘జొయ్యొ’ మెన చినుక నెత్త గెలి.

15 యేసు జలె, జాక “అమ్మ, కిచ్చొక ఏడ్డసి? కక్క చజితసి?” మెన సంగిలన్. జా, జోక ‘తోట రూకుల్ పొస్తాసా’ మెన ఉచర, జోక “బాబు, తూయి జలెకు జోక ఉక్కుల వేరతె నిలది జలె, జోక కేనె ముల దా అస్సిన్ గే, అంక సంగు, చి ఆవ్ జోచి పీనుమ్ దెర గెచ్చు రొవిందె” మెన సంగిలి. సంగితికయ్,

16 యేసు జాక “మరియ!” మెన, ఎక్కి జాచి నావ్ సంగిలన్. సంగిల్ బేగి జా, జోక చిన పనుల, “రబ్బీనీ!” మెన సంగిలి. అరమయ్ బాసతె ‘రబ్బీనీ’ మెలె, ‘గురు’ మెలి అర్దుమ్ తయెదె.

17 యేసు, జలె, జాక, “అంక చడు నాయ్. ఆవ్ అన్నె దేముడు అబ్బొతె వెగ గెచ్చుక నేతయ్. గని, తుయి కిచ్చొ కెరకు జయెదె మెలె, అంచ బావుడ్లు జల

అంచ సిస్సుల్తె గో, చి పరలోకుమ్ తిలో తుమ్చో దేముడు తుమ్చో అబ్బొది జలో అంచో దేముడు అంచో అబ్బొతె ఆవ్ ఉట్ట గెతసి మెన యేసుప్రబు సంగిలన్ మెన సంగు” మెన, జాచి అత్తి జోచ సిస్సుల్తె కబుర్ తెద్రయలన్.

18 జాకయ్, మగ్గల పట్టుమ్చి జా మరియ, యేసుచ సిస్సుల్తె గెచ్చు, “యేసుప్రబుక దెక అస్సి!” మెన సంగ, జో సంగిలి కబుర్ ఎత్తి జోవయింక సంగిలి.

యేసు జోచ సిస్సుల్తె డిసిలిసి

19 జా దీసి సంజె, సత్తరెక్క తొల్లి దీసి, మెలె యేసు జీవ్ జలి జా †అయ్తర్ దీసి సంజె, సిస్సుల్ ఎక్కితె బెర తిల. గని యూదుల్చ వెల్లెల మాన్సుల్క బియఁ కెర, కెప్పివో డంపన లుంకిల్ రితి తిల. జేవ్ దస్సి బిలి రితి జా ఒత్త కెప్పివో డంపన తతికయ్, యేసు జా కెర, జోవయించి నెడిమి టీచ, “తుమ్క సేంతుమ్ తవును!” మెన ఉంక్రయలన్.

20 దస్సి ఉంక్రవ కెర, ‘అవ్వి’ మెన దెకయ్తి రిసా, సిలువతె గలిలి పొది మేకుల్ అత్తితె పెట్టిన్చి మచ్చల్, పక్కయ్ బూసిలిన్చి మచ్చ, జోవయింక దెకయలన్, చి జేవ్, ‘యేసుప్రబు’ మెన జోక చిన, సర్దసంతోసుమ్ జల.

21 యేసు, జలె, జోవయింక అన్నె, “అంచి సేంతుమ్ తుమ్చి పెట్టి తవును. పరలోకుమ్ తిలో దేముడు అబ్బొ కంజ లోకుమ్తె అంక కిసి తెద్రయలన్ గే, దస్సి కంజ లోకుమ్చ మాన్సుల్తె తుమ్క ఆవ్ తెద్రయ్తసి” మెన సంగిలన్.

22 ఇసి సంగ కెర, జోవయించి ఉప్పిరి పుజ దా, “దేముడుచి సుద్ది తిలి ఆత్మ తుమ్క ఆవ్ దెత్తసి. నజనా.

23 కచ పాపల్ తుమ్ చెమించుప కెర్తె గే, చెమించుప జా అస్తి. కచ పాపల్ చెమించుప నే జతి రితి తుమ్ కెర్తె గే, జా

పాపుమ్ జోవయింక తయెదె” మెన సంగ యేసు ఉట్ట గెలన్.

24 యేసు జా సుట్టు సిస్సుల్క డిసిలిసి, జలె, ‘కల్వల్తె జెర్మిలోసా’ మెన ఆస్సిమ్ నావ్ తిలో తోమా మెలోసా ఒత్త నాయ్.

25 చి జో తెన్ దన్సుల్ జలి పొది “యేసుప్రబుక దెకిలమ్!” మెన తిల సిస్సుల్ సంగిల. గని, తోమా జోవయింక, “జో జీవ్ జా తిలె, అంక రుజ్జు దెకాయితు. జోచ అత్తొతె దెకిలె, ఒత్త మేకుల్ పెట్ల మచ్చల్ తిలెకయ్, జేవ్ మచ్చల్ ఆవ్ చడ దెకిలెకయ్, వడ్డొ జేవ్ జోక పక్కయ్ బూసిలిన్ తెడి ఆవ్ సొంత ఆతు గల దెకిలెకయ్, ‘జోయ్యి’ మెన నంపజయిందె” మెలన్.

26 జలె, ఒత్త తెంతొ అన్నె అట్టు పొదుల్ గెతికయ్, యేసుచ సిస్సుల్ జా గెరి అన్నె అస్తి. గని, కంజ సుటు తోమా కి జోవయింతెన్ అస్సె. జా సుట్టుచి రితి జేవ్ కెప్పివో డంపన తిలె కి, యేసు జా జోవయించి నెడిమి టీచ, జోవయింక “తుమ్క సేంతుమ్ తవును!” మెన ఉంక్రయలన్.

27 తెదొడి, తోమాక దెక, “తుచి ఊంటి చంప కెర, అంచ అత్తొ చడ దెకు! తుచి ఆతు చంప కెర, అంచి పక్కయ్ బూసిలిన్చి తెడి గల దెకు! అన్మానుమ్ జా నాయ్. నంపజా దయిరిమ్ జా!” మెన, యేసు జోక సంగిలన్.

28 తోమా సర్దసంతోసుమ్ జా, “అంచొ ప్రబు, అంచో దేముడు!” మెన పూర్తి నముకుమ్ జా సంగిలన్.

29 జాకయ్ యేసు జోక, “అంక దెకిలి రిసా తుయి నంపజలది. అంక నే దెకిలెకి కో అంక నంపజవుల గే, జోక చెంగిలి!” మెన సంగిలన్.

30 ఇన్నె రెగిడ్లసచి కంట, జోచి అదికారుమ్ దెకయ్త వెల్లెల కమొ ఒగ్గరి యేసు జోచ సిస్సుల్చి మొక్కె కెర్లన్, గని మొత్తుమ్తె ఎత్లయి రెడ్ల అస్సి.

† 20:19 20:19 సత్తు పొదుల్తె అగేచి దీసి

31 ఈంజేవ్, జలె, కిచ్చొక రెగ్గ అస్సి మెలె, యేసుక 'నిజామి దేముడు తెద్రయ్లో రచ్చించుప కెర్తొసా క్రీస్తు జో' మెన తుమ్క 'నంపజతు' మెనయ్ రెగ్గ అస్సి. తూమ్ కి నదు కెర్తన సూన్తన నంపజలె, తూమ్ కి యేసుప్రబుచి దయచి రిసా జోచి జీవ్క జియ, పరలోకుమ్చి రాజిమ్తె బెదితె.

21

యేసు సిస్సుల్క అన్నె డీసిలిసి

1 యేసు సిస్సుల్క డీస అన్నె సగుమ్ దీసల్ గెలి పడ్డె, తిబెరియ సముద్రుమ్తె, మెలె గలిలయతెచి సముద్రుమ్ రితి గడ్డె, జోచ సిస్సుల్ సగుమ్జిన్ తతికయ్, యేసు జోవయింక అన్నె డీస జో జీవ్ జలిస్క జోచి అదికారుమ్క రుజ్జు దెకయ్లన్. ఇసి జర్గు జలి.

2 ఏక్ దీసి, సీమోను పేతురు, 'కల్పల్తె జెర్మిలోసా' మెన ఆసిమ్ నావ్ తిలో తోమా, జా గలిలయ ప్రాంతుమ్చి కానా గవ్వొచో నతనియేలు, జెబెదయి మెలోసాచ దొగుల పుత్తర్పుల్, చి అన్నె దొగుల సిస్సుల్, మొత్తుమ్ నత్తుజిన్, ఎక్కితె తిల, చి

3 "ఆవ్ మొస్సు దెరుక గెతసి" మెన సీమోను పేతురు సంగ బార్ జంక దెర్రికయ్, తిల సిస్సుల్ "ఆమ్ కి బెద జెమ్దె!" మెన సంగిల. జేవ్ ఎత్కిజిన్ బార్ జా, జోవయించి దోనితె వెగ, మొస్సు దెరుక గెల. గని జియ రాతి ఎక్కి మొస్సొ కి దెర్రి నాయ్.

4 గని, రాత్ పయితె తతికయ్, ఒత్త ఒడ్డుతె యేసు టీవ అస్సి. గని 'యేసు' మెన సిస్సుల్ చినితి నాయ్.

5 జో, జలె, జోవయింక కేక్ గల, "ఒ గోతుసుదల్, మొస్సు దెర అస్సున్ గే?" మెన పుసిలన్. చి "నాయ్, బాబు, కిచ్చొయ్ నాయ్!" మెన జబాబ్ దా కేక్ గల.

6 యేసు, జలె, జోవయింక కిచ్చొ సంగిలన్ మెలె, "దోనిచి ఉజెతో పక్కయ్ వల గల, చి దొర్కు జవుల!" మెన కేక్ గలన్, చి జో సంగిల్ రితి జయ్యి పక్క వల గలిల. గలిలె, ఎత్తివాట్ మొస్సు బెర తిలి రిసా వల కడుక నెత్తిర్ల.

7 దస్సి జతికయ్, యేసు ఒగ్గర్ ప్రేమ కెర్లొ సిస్సుడు జోక చిన కెర, "అమ్చొ యేసుప్రబు, జో!" మెన పేతురుక సంగిలన్. జోక 'అమ్చొ యేసుప్రబు' మెన సీమోను పేతురు సూన్లి బేగి, కామ్చి రిసా జో కడ తిలి సొక్క అన్నె గలన, సముద్రుమ్తె డేవ, యేసుతె గెలన్.

8 గని, తిల సిస్సుల్ దోనితె తా, మొస్సు బెర తిలి వల ఒగ్గడ ఆన, పడ్డె అయ్ల. ఒగ్గర్ దూరి జెంక నాయ్. ఒడ్డు తెంతో పాసి పాసి ఎక్కి పుంజెక్ గజాలు దూరి తిల.

9 జలె, ఒడ్డుతె అయ్లె కిచ్చొ దెకిల మెలె, ఒత్త మెసి బొగుల్చి ఆగి తిలి, చి ఆగితె మొస్సు సిజితె తిల. పోడియొ కి తిల.

10 తెదొడి యేసు జోవయింక "తుమ్ అప్పె దెర్ల మొస్సు సగుమ్ ఆన" మెలన్,

11 చి సీమోను పేతురు దోనితె అన్నె వెగ, వల ఒడ్డుతె ఒగ్గడ ఆన్లన్. ఆన్లె, వెల్లెల మొస్సు బెరయ్ అస్సి. కెత్తి మెలె, పుంజెక్ యాబయ్ తిన్ని వెల్లెల మొస్సు. గని, ఎత్తివాట్ తిలె కి, వల చిరి జయె నాయ్.

12 "అల్లె, కంక జా," మెన యేసు సిస్సుల్క బుకార్లన్. జేవ్ సిస్సుల్తె జలె, "తుయి కో?" మెన కో కి జోక పుసుక దయిరిమ్ నాయ్. జోక 'యేసుప్రబు' మెన జాన్తి.

13 జేవ్ దస్సి ఇదిల్ బితె తతికయ్, యేసు పురె జా, పోడియొ వెంట, వంట దిలన్. దస్సి మొస్సు కి వెంట, వంట దిలన్.

14 యేసు మొర జీవ్ జా ఉట్ట సిస్సుల్క డీసిలిసి ఇన్నెతెన్ తివ్వెర్ జలి.

పేతురుక యేసు చెమించువ కెర్రిసి

15 జేవ్ * అన్నిమ్ కెర కేడయ్లి పడ్డె, సీమోను పేతురుక యేసు బుకారా, ఇదిల్ దూరి కడన, జోక ఇసి మెలన్. “ఓ సీమోను, యోహానుచొ పుత్తుసి, ఇన్నెచి కంట అంక తుయి ఒగ్గర్ ప్రేమ కెర్తసి గే?” మెన పుసిలన్. పుసిలె, పేతురు “ఒయ్యి, ప్రబు, ఆవ్ తుక ప్రేమ కెర్తసి తుయి జాన్చి” మెలన్. యేసు జోక “దస్సి జలె, విలువ జల మెండ పిల్లల్క చెంగిల్ అన్నిమ్ గొవుడు దొర్కు కెర్తె తతి రితి తా!” మెన సంగిలన్.

16 పడ్డె అన్నెక్ సుట్టు, “ఓ సీమోను, యోహానుచొ పుత్తుసి, అంక ప్రేమ కెర్తసి గే?” మెన పుసిలన్. పుసిలె, పేతురు జోక అన్నె, “ఒయ్యి, ప్రబు, ఆవ్ తుక ప్రేమ కెర్తసి తుయి జాన్చి” మెన సంగిలన్. యేసు జోక అన్నె, “దస్సి జలె, విలువ జల మెండల్క చెంగిల్ రకిత్ రితి తుయి దెకితె తా!” మెన సంగిలన్.

17 తెదొడి అన్నెక్ సుట్టు కి, పేతురుక యేసు పుసిలన్. “ఓ సీమోను, యోహానుచొ పుత్తుసి, అంక ప్రేమ కెర్తసి గే?” మెన అన్నె పుసితికయ్, ‘అంక ప్రేమ కెర్తసి గే?’ మెన యేసు పుసిలిసి అప్పె తివ్వెర్ జలి రిసా, పేతురు మెన్ను ఒగ్గర్ దుకుమ్ జలన్, చి “ప్రబు, తుయి ఎత్తి జాన్చి. ఆవ్ తుక ప్రేమ కెర్తసి తుయి దెకితసి!” మెన అన్నె సంగిలన్, చి యేసు జోక “విలువ జల మెండల్క సరి జతి అన్నిమ్ దొర్కు కెర్లి రితి తుయి తా.

18 “తుక ఆవ్ అన్నె కిచ్చొ కచితుమ్ సంగితసి మెలె, తుయి ఉబెడొబొద తిలి పొది, తుకయ్ తూయి తెయార్ కెరన, ఇస్టుమ్ అయ్లి రితి బుల్తె తిలది, గని తుయి మంత్రొ జలె పొది కీసి జస్తె మెలె, తుచ అత్తొ చంపొ కెర్తె, చి వేర నుదొ తుక తెయార్ కెరెదె. చి తుయి ఇస్టుమ్

నెంజిలిన్తె తుక వయ నెయెదె” మెన పేతురుక యేసు సంగిలన్.

19 కిచ్చొక దస్సి సంగిలన్ మెలె, పేతురు మంత్రొ జలె పొది, విరోదుమ్ సుదల్ జోక † మారుల. దస్సి జయెదె మెలి గుర్తుకయ్ యేసు దస్సి మెలన్. జలె, ఒత్త తెంతొ యేసు పేతురుక, ‡ “అంచి పట్టి జే!” మెలన్.

20 తెదొడి పేతురు పస్ల, యేసు ఒగ్గర్ ప్రేమ కెర్లొ సిస్సుడు జోచి పట్టి జెతిసి దెకిలన్. కక్క మెలె, యేసు సిస్సుల్ తెన్ ఆకర్ అన్నిమ్ కెర్లి పొది, యేసుచి గుండెతె వెల వెన తిలొ సిస్సుడు. జొయ్యి, జా సుట్టు ‘తుక విరోదుమ్ సుదల్తె దెర దెతొసా కొన్నొ?’ మెన యేసుక వున దిలన్.

21 పేతురు, జలె, జో సిస్సుడుక దెక కెర, “ప్రబు, ఈంజొ మాన్నుక కిచ్చొ జయెదె?” మెన పుసిలన్.

22 పుసితికయ్, యేసు జోక, “ఆవ్ దేముడు అబ్బొతె పరలోకుమ్తె గెచ్చు ఈంజ లోకుమ్తె అన్నె జెతె ఎదక ఈంజొ తా గెచ్చుక అంచి ఇస్టుమ్ జలె, తుక కిచ్చొ బాద? అంచి వూచి, జా. తుచి వూచి కిచ్చొ మెలె, ఆవ్ తియార్లి కామ్ కెరుక. అంచి పట్టి జే!” మెలన్.

23 జో అన్నెక్లో సిస్సుడుచి రిసా యేసు సంగిలి జా కోడుచి రిసా సగుమ్జిన్ పడ్డొ కిచ్చొ సంగితె తిల మెలె, ‘ఈంజొ అన్నెక్లో సిస్సుడు మొరె నాయ్’ మెంతె తిల. గని జో ‘మొరె నాయ్’ మెన యేసు సంగె నాయ్. ఎక్కి “ఆవ్ అన్నె జెతె ఎదక ఈంజొ తా గెచ్చుక అంచి ఇస్టుమ్ జలె, తుకయ్ కిచ్చొ బాద?” మెనయ్ సంగ తిలొ.

24 ఈంజ ఎత్కిచి రిసా సాచి జలొసా, ఈంజ ఎత్కిచి రిసా రెగిడ్లొసా కొన్నొ మెలె, జొయ్యి సిస్సుడు. యేసు ఒగ్గర్

* 21:15 21:15 యూదుల్ చింబొ కతి నాయ్. ముక్కిమ్క పోడియె కవుల. † 21:19 21:19 వేర పుస్తకల్తె కిచ్చొ అన్నె మెలె, పడ్డె పేతురుక కిసి మార్ల మెలె, జోవయింక బోడి ఎట్టొ చట్టొ ఉప్పిరి ఒడొవ నిలువతె మార్ల. ‡ 21:19 21:19 క్రీస్తుచి రితి నిదానుమ్ ఇండితిన్చి కోడు, పడ్డె నిలువతె జో కి మొర్చిన్చి అర్దుమ్ కి ఇన్నె తయెదె.

ప్రేమ కెల్లొసా. జోచి సాచి సత్తిమ్ మెన
జానుమ్.

²⁵ యేసు కెర్ల కమొ అన్నె ఒగ్గర్ అస్తి.
జేవ్ కమొ ఎత్కిచి రిసా రెగుడుక జలె,
జేవ్ కమొ ఎత్తివాట్ జవులచి రిసా
జోవయించి రిసా రెగిడ్ల పుస్తకల్ ఈంజ
బూలోకుమ్ దెరుక నెత్తె. తెద్దిలి.

బారికుల్ కెర్ల కమొ యేసుక్రీస్తుచ బారికుల్ కెర్ల కమొ

యేసు సుద్ది తిలి ఆత్మ దెతి రిసా సంగిలిసి

1 ఓ దెయొపిలా, ఆవ్ తొలితొ రెగిడ్లి *పుస్తకుమతె కిచ్చొచి రిసా రెగిడ్లయ్ గే జాన్సి. యేసు కెర్ల కమొ, యేసు కెర సికడ్లిసి రిసా రెగిడ్లిసి.

2 మొదొల్ తెంతొ, యేసు పరలోకుమతె తిలో దేముడు జలో అబ్బొనెతె అన్నె వెగ గెలి ఎదకచి రిసా ఎత్తి. జా పుస్తకుమతె రెగిడ్లయ్. పడ్డొ, జో దేముడు అబ్బొనెతె అన్నె వెగ నే గెతె అగ్గె, దేముడుచి సుద్ది తిలి ఆత్మ తెన్, జో అగ్గె నిసాన్సి సిస్సుల్ క ఆడ్ర దా, జోచి †సుబుమ్ కబుర్ కామ్ జేవ్ కెర్తి రిసా, జో ఆగ్గు దా తిలో.

3 జో మొర గెచ్చు అన్నె జీవ్ జలి వడ్డొ, జా అన్నెక్ దొన్ని విసా పొదుల్చి తెడి, జో జోవయింక సగుమ్ సుట్టు డీసయ్ జా, జో అన్నె జీవ్ జలిన్ క జోవయింక ఒగ్గర్ రుజ్జుల్ దెకవ, ‡దేముడుచి రాజిమ్చి రిసా జోవయింక అన్నె సికడ్తె తిలో.

4 జేవ్ దొన్ని విసా పొదుల్చి తెడి ఏక్ సుట్టు, జోవయింతెన్ అన్నిమ్ కత్తె తా, జేవ్ క కిచ్చొ ఆడ్ర దిలన్ మెలె, “తుమ్ కిచ్చొక రకుక మెలె, తుమ్ ఈంజ

యెరుసలేమ్ పట్టుమ్ తెంతొ నే గెతె, ఇన్నె తా. అంచి రిసా సూన్లిసి, అబ్బొ జలో దేముడు తుమ్ క దెయిందె మెన అగ్గె తెంతొ కోడు దిలిసి దొర్కు జతి ఎద రకితె తా.

5 యోహాను జలె, అగ్గె పానితె మాస్సుల్ క బాప్తిసుమ్ దెతె తిలో, గని తుమ్ క అప్పె కిచ్చొ జర్లు జయెదె మెలె, అన్నె ఒగ్గర్ దీసల్ నే గెతె అగ్గె, జా అమ్చి దేముడుచి సుద్ది తిలి ఆత్మతె తుమ్ క బాప్తిసుమ్ దొర్కు జయెదె” మెన యేసు †జోవ్ సిస్సుల్ క సంగిలన్.

6 యేసు సిస్సుల్ తెన్ బెద తిలి పొది, జేవ్ జోక, “*ప్రబువ, అప్పె జలె, తుచి తెడి అమ్ క ఆమి ఏలువ కెరంతి రితి కెర, అమ్చి ఇస్రాయేల్ దేసిమ్ క జోవయింక అన్నె దెస్సెగె?” మెన పుసిల.

7 పుసితికయ్, జోక సిస్సుల్ క, “కేన్ కాలుమ్ క, కేన్ సమయుమ్ క, కిచ్చొ జర్లు జంక అస్సె గే, మెన ఎత్తిచి ఉప్పెరి తిలో దేముడు అబ్బొక అదికారుమతె తియ అస్సె.

8 దేముడుచి సుద్ది తిలి ఆత్మ తుమ్చి పెట్టి అయ్లి మెలె, తుమ్ సెక్తి జస్సె, అంచి రిసా సాచి జతి రితి, తుమ్ యెరుసలేమ్ పట్టుమ్తె, ఈంజ ఒండి యూదయ ప్రదేసిమ్తె, పడ్డొ సమరయ ప్రదేసిమ్తె, పడ్డొ ఒండి లోకుమ్చ దూరి దేసిమ్లుతె కి సాచి దెకయ్తె” మెన సంగిలన్.

యేసు పరలోకుమతె వెగ గెలిసి
9 యేసు ఇసి సంగ కేడయ్లి పడ్డొ, జేవ్ సిస్సుల్ దెకితె తతికయ్, జో

* 1:1 1:1 ‘లూకా’, మెలె యేసుక్రీస్తుచి రిసా లూకా రెగిడ్లి సాచిచి పుస్తకుమ్. † 1:2 1:2 ‘సుబుమ్ కబుర్’ మెలె, ఎత్తి అదికారుమ్ తిలో దేముడు దొర్కు కెర్తి రచ్చునచి కోడు. జో పాపల్ చెమించువ కెర్తెనచి రిసాచి కబుర్. యేసుయి దొర్కు జలో రచ్చుంచువ కెర్తెసా జలిన్చి కబుర్. జో అర్బొతుమ్ జా పాపల్ గెచ్చయ్లి రిసా మాస్సుల్ పరలోకుమ్చి రాజిమ్తె బెదితి అవ్కాసుమ్ దొర్కు జలిన్చి కబుర్. ‘సుబుమ్ కబుర్ కామ్’ మెలె, ఈంజ సుబుమ్ కబుర్ ఎత్తిచి రిసా సాచి జా జా బుల్లిసి, నెంజెలి సొంత టాన్తె కి సాచి సంగితె తతిసి. ‡ 1:3 1:3 ‘ఎత్తి అదికారుమ్ తిలో దేముడుచి రాజిమ్’ మెలె, 1 జోవయింక సంబజల మాస్సుల్చి పెట్టి జో ఏలువ కెర్తెసి, 2 జోవయింక అత్తున్కె కింజ లోకుమ్తె కామ్ కెర్తెసి, 3 ఈంజ ఉగుమ్ మార్పువ జలె జో ఎదార్డుమ్ ఈంజ లోకుమ్తె ఏలువ కెర్తెసి, చి 4 పరలోకుమ్తె జో ఏలువ కెర్తెసి.

§ 1:5 1:5 యూదా అత్తొ కెరన మొర తిలన్ గెద.

* 1:6 1:6 ‘ప్రబు’ మెలె కిచ్చొ అర్దుమ్ తయెదె మెలె, ఎత్తిచి కంట వెల్లి తిలోసా, ఎత్తిక ఏలువ కెర్తెసా. ఒగ్గర్ సుట్టు యేసుకయ్ ‘ప్రబు’ మెనుల, గని ఎత్తి అదికారుమ్ తిలో దేముడు అబ్బొన్ క కి ‘ప్రబు’ మెనుల.

పరలోకుమతె అన్నె గెచ్చుక మెన ఉక్కిల్ జలో. జో వెగ గెతె తతికయ్, ఏక్ మబ్బు జోక లుంకణ్ణి, చి సిస్సుల్ జోక అన్నె దెకుక నెత్తిర్.

10 జో పరలోకుమతె వెగ గెతె తతికయ్, సిస్సుల్ ఆగాసుమ్ పక్క ఆచారిమ్ తెన్ దెకితె తతికయ్, ఆదె, చొక్కిల పాలల్ గలన తిల దేముడుచ దూతల్ దొగుల జోవయించి నెడిమి ఉత్త జా టీవోజ జల,

11 “ఓ గలిలయ ప్రాంతుమ్చ మాన్సుల్, కిచ్చొక దస్సి ఆగాసుమ్ పక్క దెక దెక టీవోజ జా అస్సున్? తుమ్చి నెడిమి తెంతో ఉక్కిల్ జా పరలోకుమతె వెగ గెలో ఈంజో యేసు, పడ్డొక అన్నె ఉత్త జెయెదె. జో కిసి పరలోకుమతె వెగ గెలో గే దెకిల్ రితి, దస్సెయి అన్నె ఉత్త జెయెదె” మెన జేవ్క సంగిల.

సిస్సుల్ యెరూసలేమ్తె ప్రార్దన కెర్లిసి

12 తెదొడి జేవ్ జా †బలీవ మెట్ట తెంతో ఉత్త జా, యేసుచ సిస్సుల్ యెరూసలేమ్ పట్టుమ్తె ఉట్ట అయ్ల. మెట్టక పట్టుమ్ పాసి తయెదె. కెద్ది దూరి మెలె, †నెలవ్ కడన్ణి దీసి యూదుల్ ఇండితి ఎదిలి దూరి.

13 పట్టుమ్తె పాచ కేనె గెల మెలె, జేవ్ సంగ తిలో ఒత్తచో గేరుచి అంతస్తుమ్తెచి గదితె గెల. క్రొన్న మెలె, పేతురు, యోహాను, యాకోబు, అంద్రెయ, పిలిప్, తోమా, బర్తోలోమయి, మత్తయి, అల్పయిచో యాకోబు మెలో పుత్తున్, పడ్డొ సొంత దేసిమ్ ఏలుప కెరంతి ఆస తిలి మందతె తిలో సీమోను, పడ్డొ యాకోబు మెలో ఎక్కిలోచో పుత్తున్ మెలో యూదా; మొత్తుమ్ ఎగరజిన్ సిస్సుల్.

14 జో గెరి తా కిచ్చొ ఎక్కి నిదానుమ్ కెర్తె తిల మెలె, ప్రార్దన కెర్తె తిల. ప్రార్దన కెరుక మెన జోవయింతెన్ అన్నె కో కో జేవ్ పొదులె బెదితె తిల మెలె, యేసుచి అయ్యసి మరియ తెన్, జోక బావుడ్సివో, జోవయింక అన్నె నంపజల తేర్బోదల్ తిల.

15 జేవ్ దస్సి ప్రార్దన కెర్తె తిల పొదులె, ఏక్ దీసి, రమారమి కీసావు విస్సాజిన్ మాన్సుల్ ఒత్త బెర తతికయ్, జేవ్ ప్రబుక నంపజలనచి నెడిమి పేతురు టీవోజ జా, ఇసి మెన సంగిలన్.

16 “ఓ బావుడ్లు, అమ్చో యేసుక జేలి కెర్క దెరవ దిలో యూదాచి రిసా, దేముడుచి సుద్ది తిలి ఆత్మ సికయ్తకయ్, దావీదు మెలో పూర్ణుమ్చోచి అత్తి సంగిలిసి కోడు జా, కచితుమ్ నెరవెర్చుప జంక అస్సి. జాకయ్, యూదాచి రిసా సంగిల్ రితి నెరవెర్చుప జలి.

17 మెలె, యూదా అమ్చి తెన్ యేసు నిసాల్లోసా జలో, చి అమ్ కెర్తి సేవతె జో బెదుక ప్రబు నెలవ్ దా తిలో.”

18 మదెనె యూదాక కిచ్చొ జర్గు జలి మెలె, జో యేసుక విక పావుమ్ కెర్లి డబ్బుల్ తెన్ బుయి గెల్లొ. జా బుయి తిలిన్తె నేడ గెలన్, చి పెట్టి బద్దల్ జతికయ్, పెట్టిచి అంతున్ ఎత్కి నూయి జా గెలి.

19 యెరూసలేమ్ పట్టుమ్చ మాన్సుల్ ఎత్కిజిన్ జాన్లి దీసి తెంతో, జా బుయిక్ ‘అకెల్దామ్’ మెన జోవయించి అర్దమయ్ బాస తెన్ సంగితతి, జా నావ్చి అర్దుమ్ కిచ్చొ మెలె, లోయి నూయి జా తిలి బుయి*.

20 జాకయ్ యూదాక జర్గు జలిసి తెన్, కీర్తన పుస్తకుమతె రెగిడ్డి కోడు నెరవెర్చుప జలి. “జోవయించి టాన్ పాడ్ జలి బయిలు రితి జవ్సన్,

† 1:12 1:12 ‘బలీవ మెట్ట’ మెలె, బలీవ పండ్లు రూకల్ జా మెట్టయ్ తవుల చి జా నావ్ తయెదె. † 1:12 1:12 రమారమి తిన్ని పావ్ కిలోమిటర్లు దూరి జయెదె 1:19 నెంజెలె ‘లోయిచి బాటి’.

§ 1:15 1:15 జెలె పుంజెక్ విస్సెక్జిన్ * 1:19

చి ఒత్త తెంతో కో ఒత్త జితు నాయ్”
 మెన రెగ్గ అస్సె. అన్నెక్ కోడు కి రెగ్గ అస్సె.
 కేన్ కోడు మెలె,
 “జోవయింక ద్దా తిలి టాన్ జోవయింక
 పిట్టున్,

చి వేర మాన్సుక దొర్కు జవున్.”
 మెన రెగిడ్డిసి మెన, బెర తిలనక పేతురు
 సంగిలన్.

21-22 అన్నె కిచ్చొ మెలన్ మెలె, “జా
 కోడుచి రిసా, యేసుప్రబు అన్నె జీవ్
 జా ఉట్టిన్క అమ్చి తెన్ సాచి జా
 జోచి గవురుమ్ దెకయ్తి రిసా, అన్నెక్
 అమ్చి తెన్ బెదుక అస్సె. కొన్సొ
 మెలె, యోహాను బాప్తిసుమ్ దెతె
 తిలి, యేసుప్రబు అమ్చి తెన్ ఈంజ
 లోకుమ్తె బుల్లె తిలి మొదోల్ తెంతో,
 యేసు పరలోకుమ్తె వెగ గెలి ఎదక
 అమ్చి తెన్ బుల్లె తిలోసా ఎక్కిలో
 అమ్చి తెన్ బెదుక అస్సె” మెన పేతురు
 సంగిలన్.

23 సంగితికయ్, జేవ్తె తిల దొగులక
 టీవోజ కెల. జేవ్ దొగుల కొన్సొ మెలె,
 ‘బర్నబా’ మెన ఆసిమ్ నావ్ తిలో
 యోసేపు మెలో యూస్తు మెలో ఎక్కిలో,
 చి మత్తీయ మెలో అన్నెక్కో.

24 జేవ్ దొగులతె ప్రబు కక్క నిసాన్దె
 గే, జానుక జతి రిసా, సిస్సుల్ ప్రార్దన కెర్ల.
 “ఓ ప్రబు, మాన్సుచి పెట్టి తిలి బుద్ది ఎత్తి
 తుయ్ జాన్సి.

25 తుయి దిలి సేవ, తుచొ బారికి జతి
 తుయి దిలి టాన్, యూదా నిస్కారుమ్
 కెర్లి రితి జా నెన కెర, జోచి టాన్తె జో
 గెచ్చు అస్సె. జోక తుయి దా తిలి కామ్
 కెర్లి రిసా, ఈంజేవ్ దొగులతె కక్క నిసాన
 అస్సిన్ గే, దయ కెర అమ్క రుజ్జు దెకవు”
 మెన ప్రార్దన కెర్ల.

26 ప్రార్దన కెర, చీటి గల్లిక మత్తీయచి
 నావ్ సేడ్డి. జా రుజ్జు జతికయ్, ‘అమ్చి

తెన్ ప్రబుచొ బారికి జవున్’ మెన, ప్రబుచి
 సుబుమ్ కబుర్ సూసయ్త ఎగరజిన్
 †బారికుల్ జో మత్తీయక బెదవన్ల, చి
 బారజిన్ అన్నె జా గెల.

2

నంపజలనచి పెట్టి దేముడు జోచొ
 ఆత్మ దిలిసి

1 యేసు మొర అన్నె జీవ్ జా ఉట్ట
 సత్తు సంతల్ గెతికయ్, ‘పెంతెకొన్సు’
 మెన యూదుల్చి పండుగు దీసి,
 యేసుక నంపజలన ఎత్తిజిన్ ఎక్కితె
 బెద్ర అయ్ల.

2 జేవ్ ఒత్త ఎక్కితె బెద్ర తతికయ్,
 ఆగాసుమ్ పక్క తెంతో, వెల్లో వాదు
 గట్టిజ వీర్తి రితి వెల్లి అవాడ్ అయ్లి, చి
 గేర్ ఒండి జా అవాడ్ నప్పుడు బెర్లి.

3 తెదొడి, కిచ్చొ దెకిల మెలె, ఆగి
 లగితి రితిసి డీస ఉత్త జా చెదుర్పు జా,
 జోవయింక ఎక్కిక్లచ బోడివొచి ఉప్పిరి
 ఆగివొ లగిల్ రితి జలి. జోవయింతె కక్క
 నే పిట్టె దస్సి జలి.

4 దస్సి జతికయ్, కక్క నే పిట్టె,
 దేముడుచి సుద్ది తిలి ఆత్మసెక్కి
 జోవయించి పెట్టి బెర అయ్లి, చి
 జోవయించి ఆత్మచి సెక్కి తెన్ దొర్కు జలి
 ఎదిలి, వేర వేర అగ్గే నేన్ బాసల్ తెన్
 జేవ్ లట్టబుక దెర్ల.

5 జేవ్ షాదులె, ఒగ్గర్ ఒగ్గర్
 దేసిమ్లుతె చెదుర్పు జా తిల దేముడుక
 నిదానుమ్ తెన్ జోకర్త యూదుల్ అన్నె
 ఉట్ట జా *యెరూసలేమ్ పట్టుమ్తె జితె
 తిల.

6 జలె, యేసుక నంపజలనచి పెట్టి
 అబ్బొన్చి జోచి ఆత్మ బెర్లి జా అవాడ్
 సూస, కేనె కేనె తెంతో నిగ జా, ఒగ్గర్జిన్
 జేవ్ యూదుల్ జా గెరి అయ్ల.

† 1:26 1:26 మత్తయి, మార్కు, లూకా, యోహాను రెగిడ్డ అగ్గవ పుస్తకల్తె జేవ్ బారజిన్క ‘సిస్సుల్’ మెన రెగ్గ
 తిల, గని యేసు జోవయించి ఆత్మసెక్కి దా అదికారుమ్ దిలి తెంతో జోవయించి రిసా రెగిడ్డన ‘బారికుల్’ మెంతతి.

* 2:5 2:5 ఒండి లోకుమ్క ఎక్కి జా యెరూసలేమ్ పట్టుమ్తె ఎత్తి అదికారుమ్ తిలో దేముడుచి గుడి తిలిచి
 రిసా ఒత్త గెచ్చు తిల.

అయ్లె, ఆచారిమ్ జల. కిచ్చొక మెలె, జోవయించ సొంత వేర వేర బాసల్ తెన్ యేసుచ సిస్సుల్ లట్టబై తిల; జేవ్ బాసల్ కెయ నే సిక తిలె కి,

7 ఆచారిమ్ జా ఎక్కిలోక ఎక్కిలో, “వేర వేర అమ్చ సొంత బాసల్ తెన్ ఈంజేవ్ లట్టబైన గలిలయులు జవుల గెద?

8 అమ్చ బాసల్ నేన్తి దస్సి జలె, కిసి జా అమ్చ బాసల్ తెన్ లట్టబ్తతి” మెన జేవ్ ఆచారిమ్ సంగితె తిల.

9 “అమ్ పార్తి దేసిమ్చ, మాదీయులు, ఏలామియుల్, పడ్డొ మెసొపొతమియ తెంతో చి, యూదయ తెంతోచ, కప్పదొకియ తెంతోచ, పొంతు తెంతోచ, ఆసియా తెంతోచ,

10 ప్రుగియ తెంతోచ, పంపూలియా తెంతోచ, ఐగుప్తు దేసిమ్చ, పడ్డొ కురేనియు పట్టుమ్చి సుట్టునంత తిలి లిబియ దేసిమ్ తెంతోచ. పడ్డొ అన్నె కి అమ్తె సగుమ్జిన్ రోమ్ దేసిమ్ తెంతో ఆజి కాలి ఉట్ట జా అస్తి. జోవయింతె సగుమ్జిన్ యూదుల్ జెర్మిలన. సగుమ్జిన్ అగ్గె యూదుల్ నెంజిలె కి, దేముడుక సంపజా మార్పుప కెరన్లన కి అస్తి.

11 పడ్డొ, క్రేతు దేసిమ్చ, అరేబియ దేసిమ్చ కి ఇన్నె అస్తి. అమ్ ఎత్తివాబ్ దేసిమ్లు తెంతో ఉట్ట అయ్లె కి, అమ్చ సొంత బాసల్ తెన్ ఈంజేవ్ లట్టబ, ఈంజెవు దేముడుచ ఆచారిమ్చ కమొ అమ్క సూనయ్తతి!”

12 జోవయించి ఆచారిమ్చి రిసొ అన్నె కిచ్చొ మెన ఎక్కిలోక ఎక్కిలో సంగితె తిల మెలె, “అప్పె జర్గు జలిన్చి అర్దుమ్ కిచ్చొ?” మెన పుసుక దెర్ల.

13 గని ఒత్త బెర అయ్లనతె అన్యానుమ్ జల మాన్సుల్ సగుమ్జిన్ కి తిల, జేవ్ కిచ్చొ మెల మెలె, “ఈంజేవ్ మచ్చ అస్తి” మెన జేవ్చి రిసొ ఆన్సె

తిల.

వేతురు లట్టబ్బిసి

14 జలె తెదొడి వేతురు, ఎగరజిన్ సిస్సుల్చి నెడిమి టీవొజ జా, బెద తిల మాన్సుల్క సూన్తు మెన, గట్టిజ అవాడ్ కెరన, సంగుక దెర్లన్. జో ఇసి మెన సంగిలన్, “ఓ అమ్చ యూదుల్, ఈంజ యెరూసలేమ్ పట్టుమ్ తిలన ఎత్తిజిని, ఆవ్ అప్పె సంగితిసి సరిగా సూన, అర్దుమ్ కెరన.

15 ఈంజేవ్ తుమ్ దెకిల మాన్సుల్క ‘మచ్చ అస్తి’ మెన తుమ్ మెన్సుతె ఉచర్లి రిసొ మచ్చితి నాయ్. అప్పె పెందలె నొప్పు గంటల్ జా అస్సె!

16 అప్పె జర్గు జలిన్చి రిసొ దేముడు పూర్గుమ్ †జోచ కబుర్లు సంగిలో యోవేలు మెలోసొచి అత్తి సంగిలన్.

17 దేముడు కిచ్చొ సంగితయ్ మెలె, ‘ఆకర్ దీసల్క దేసిమ్లు ఎత్తితె తిల మాన్సుల్చి పెట్టి అంచి ఆత్మ సువ దెయిందె. తుమ్చ పుత్తర్లు, దువిడ్లుచి అత్తి అంచ కబుర్లు సంగిమ్దె. పడ్డొ తుమ్చ ఉబెడ్లు, జలె, ఆవ్ దెకయ్త సిప్పల్ దెకుల, తుమ్చ మంత్రమాన్సుల్ కి ఆవ్ దెకయ్త సిప్పల్ దెకుల.

18 కచితుమ్, మున్సుబోదల్ జలెకి, తేర్బోదల్ జలెకి, అంచ సేవ కెర్తన ఎత్తిజిన్చి పెట్టి అంచి ఆత్మ సువ దెయిందె, చి అంచ కబుర్లు సంగితె తవుల.

19 ఆగాసుమ్తె కి, బూలోకుమ్తె కి, వెల్లెల వెల్లెల కమొ కెర, అంచి అదికారుమ్క రుజ్జుల్ దెకయిందె. లోయి సూయి జతిసి, ఆగి లగితిసి, చి దుమ్మొ జతిసి.

† 2:16 2:16 పూర్గుమ్ పొది ఎత్తి అదికారుమ్ తిలో దేముడు కక్క గే నిసాన, “ఈంజ జా కబుర్ సంగు” మెన జోవయించి ఆత్మనెక్కి జో మాన్సుచి పెట్టి దా లట్టబడెదె.

20 ప్రబు అన్నె ఉత్ర జతి జా వెల్లి దీసి నే జెతి అగ్గె పొద్దు అందరే జయెదె, జోను లోయి రంగు జయెదె.

21 గని, తూయి నిజుమి †పరలోకుమ్చో దేముడు, తుక నంపజతసి, అంక రచ్చించుప కెర! మెన జోవయించి పెట్టి కో అంక ఎక్కి నిదానుమ్ నంపజవుల గే, జోవయించి పావుమ్ చెమించుప కెర, జోవయింక రచ్చించుప కెరిందె.' "

22 "దస్సి ఉచర కెర, ఒత్త బెద తిల యూదుల్క పేతురు అన్నె కిచ్చి మెలన్ మెలె, ఓ ఇస్రాయేలులు మెంత ఆమ్చ యూదుల్, ఏక కోడు తుమ్ నూన. నజరేతు గవ్వొచో యేసు కిసి తిలో గే, తుమ్ జాన్సు. 'జోక దేముడు దిలి అదికారుమ్ రుజ్జు జవున్' మెన, దేముడు జోచి అత్తి తుమ్చి మొక్కె వెల్లెల వెల్లెల కమొ కెరవ, రుజ్జుల్ డీనయలో.

23 జలె, 'జర్లు జతిన్, జర్లు జవున్' మెన దేముడు అగ్గెయి తెంతో రెగిడ్డి రితి, జో యేసుక మూర్కుడ్లుచి అత్తి తుమ్ సార్లు కెర దా, సిసిలువతె గలవ మార్లదు.

24 జోక తుమ్ మార్లె కి, జో మొర్కు తెంతో విడ్డల్ జా, దేముడు జోక అన్నె జియడ్డో; యేసుచి ఉప్పిరి మొర్కుక అదికారుమ్ నాయ్.

25 "యేసు అగ్గె తెంతో జానల్లిన్ కిచ్చి మెలె అమ్చో దావీదు పూర్లుమ్చోచి అత్తి దేముడు రెగ్గయలో మెలె;

*దేముడు కెర్టొడి తెదొడి అంక తోడు అన్నె మెన దెకిలయ్. కిచ్చి కి అంక బమ్మ నే కెర్తె, జో అంచి ఉజెతో పక్క తా తోడు తత్తయ్ మెన దెకిలయ్ చి ఆవ్ కదుల్ నే జయి.

26 జాక, సర్దనంతోసుమ్ జలయ్, చి జో ప్రబుచి గవురుమ్చి రిసా గనుమ్ గాయ్తోన్ జలయ్. జాకయ్, అన్నె, కిచ్చి జర్లు జలెకి, అంచి పెట్టి అంచి ఆగ్ కి ఆస తెన్ తయెదె.

27 ఆవ్ మొర్లె కి, ఆవ్ మొర్కుతె గెలె కి, జో అంక ఒత్త ములె నాయ్, తుచి సుద్ది తిలసచి ఆగ్ కువితి రితి నే ఒప్పన్తె.

28 జతి సెక్కి అంక దా అస్సిన్, చి తుచితె పరలోకుమ్తె తియ తా, తుచితె ఆవ్ తతిన్క అంక పూర్తి సర్దనంతోసుమ్ కెర్తె." †

పేతురు జేవ్ బెర తిల యూదుల్క ఏద్ద కెరవ, అన్నె కిచ్చి మెన బోదన కెర్లన్ మెలె,

29 "ఓ బావుడ్లు, అమ్చో దావీదు పూర్లుమ్చోచి రిసా కిచ్చి మెన కచితుమ్ ఆవ్ సంగితసి మెలె, జో మాములుమ్ మాన్సు జా మొర గెలన్, చి జోక మెన్నె రోవ చి అప్పెక మెన్సున్ దస్సే అన్నె.

30 గని మాములుమ్ మాన్సు జలెకి, దేముడు ఒట్టు గలన్ కిచ్చి మెన నే పిట్టి కచితుమ్ కోడు పూర్లుల్క నూనయలిసి కబుర్లు జో జాన అన్నె. దేముడు జోవయింక కిచ్చి సంగిలన్ మెలె;

తుమ్చి వమ్సుమ్చో ఎక్కిలోక తుచి సింగాసనుమ్తె వెనడిందె"

31 జాకయ్, జో దేముడు సికయ్తికయ్, కిచ్చి అగ్గె తెంతో దెకిలి రితి జా దావీదు రెగ్గ అన్నె మెలె;

"క్రీస్తు మొర్లె కి, మొర్కుతె నే తయెదె, జోచి ఆగ్ నే కువితె, అన్నె జీవ్ జా ఉట్టెదె."

32 "జలె, ఈంజో యేసుకయ్ దేముడు అన్నె జియడ్డో మెన అమ్ ఇన్నె బెర్లన ఎత్తిజిన్ సాచి జా అన్నుమ్.

‡ 2:21 2:21 'పరలోకుమ్చో దేముడు' మెన ఇన్నె రెగిడ్డిన్క గ్రీకు జానతె తోలితో రెగిడ్డ పున్కల్తె 'ప్రబు' మెలి అర్లుమ్చి కోడు అన్నె. 'ప్రబు' మెలె, యేసుచి రిసా ఒగ్గరే సంగితతి, గని దేముడు అబ్బొన్క కి 'ప్రబు' మెన నంగుల జా అర్లుమ్ కిచ్చి మెలె ఎత్తి. ఏలువ కెర్తొసా జో దేముడు అబ్బొన్చి నావ్ 'యెహోవ' జయెదె, గని జా నావ్ దెరుక యూదుల్ బియ: కెర 'ప్రబు' మెనుల. § 2:23 2:23 మూర్కు. 15:24చి ఎట్టచి కోడు దెక. * 2:25 2:25 నెంజెలి 'ప్రబు'. † 2:28 2:28 యేసుక దేముడు అబ్బొన్ అన్నె జియడెదె మెలన్చి రిసాచి కోడు ఈంజ. యేసు దేముడు అబ్బొన్ తెన్ లట్టల్లి రితి కోడు.

33 జో, జలె, అన్నె జీవ్ జా ఉట్ట దేముడు అబ్బొన్తె పరలోకుమ్తె వెగ గెచ్చు గవురుమ్ జా, జోచి ఉజెతో పక్క వెస అస్సె. చి జో దేముడు అబ్బొసి అగ్గె సంగ తిలి రితి, జోచి సుద్ది తిలి ఆత్మ వంట దెతిసి, పూర్తి జో తుమ్ అప్పె దెకిలిసి నూన్సిసి జర్లు కెర అస్సె.

34 “దావీదు, జలె, పరలోకుమ్తె వెగ గెచ్చె నాయ్, గని జో ఇసి సంగిలన్.

దేముడు ప్రబు అంచో ప్రబుక సంగిలన్.

35 ‘తుక విరోదుమ్ జలన తుచి చాటు నుదితి పొద్దో జతి రితి కెర్తె ఎదక, తుయి అంచి ఉజెతో పక్క వెస తా.’

36 “జాకయ్, తుమ్ ఇస్రాయేలులు మెల అమ్చ యూదుల్ ఎత్కిజినక ఆచ్ కిచ్చొ కచితుమ్ సంగితసి మెలె, తుమ్ సిలువ గల మార్లొ యేసు అమ్క దొర్కు జలో రచ్చించువ కెర్తొసా జతో క్రీస్తు జా, ఎత్కిక ఏలువ కెర్తొ ప్రబు జవున్” ఇసి పేతురు రుజ్జు కెర్తన్.

37 ఈంజ ఎత్కి నూన కెర, ఒత్త బెర తిల యూదుల్, “నిజామి దేముడుచో పుత్తున్క మార పాపుమ్ కెర్లమ్ మెన జోవయించి పెట్టి దుకుమ్ తెన్ ఒప్పున, బియఁ గెచ్చ, ఓ బావుడ్లు, అమ్చి పాపుమ్ గెస్సు మెన అమ్ అప్పె కిచ్చొ కెర్తె జయెదె?” మెన పేతురుక చి జోవయింతెన్ తిల యేసుచ అన్నె బారికుల్క పుసిల.

38 జేవ్క, పేతురు, “తుమ్ కెర్ల పాపల్చి రిసా దుకుమ్ జా పాపుమ్ ముల్లి బుద్ది జా యేసుక్రీస్తుక సంవజా, తుమ్చి పాపుమ్ గెచ్చయ్తి గుర్తుక జోచి నావ్ తెన్ బాప్తిసుమ్ కడన్క. దస్సి కెర్లదు మెలె, దేముడుచి సుద్ది తిలి ఆత్మ తుమ్క దొర్కు జయెదె.

39 జోచి కక్క ప్రబు జలో అమ్చో దేముడు నిసాన్దె గె, ‘జోవయించి పెట్టి అమ్చి సుద్ది తిలి ఆత్మ దెయెదె’ మెన, తుమ్చి రిసా కి, తుమ్చ బోదల్చి రిసా

కి, పడ్డొచ మాన్సుల్క కి, పడ్డొ దూరి దేసిమ్లుచ మాన్సుల్చి రిసా కి సంగ అస్సె” ఇసి పేతురు జేవ్క సంగిలన్.

40 పడ్డొ అన్నె సాచుల్ రుజ్జుల్ బెదవ, జోవయింక కిచ్చొ మెన బతిమాల్పా జా సంగిలన్ మెలె, “పాపుమ్బుద్ది తిల ఈంజ ఉగుమ్చ మాన్సుల్చి బుద్ది ముల, విడ్డల్ కెరన, రచ్చించువ జా” మెన సంగిలన్.

41 జోచి కోడు నూన సంపజలన, జలె, బాప్తిసుమ్ నజన్ల. చి జా దీసి రమారమి తిన్ని వెయిల్జిన్ మాన్సుల్ అగ్గె సంపజల సిస్సుల్ తెన్ బెదిల.

42 జా దీసి తెంతో, నిదానుమ్ తెన్ యేసుచ బారికుల్చి బోదన నూన్తె తా, సిస్సుల్ తెన్ సర్ల తెన్ బెద, మాన్సుల్చి పాపుమ్ గెచ్చయ్తిన్క యేసు బలి జలోచి జా గుర్తు దెకయ్తి పోడియె, ద్రాచ రస్సుమ్ కంక పింక అలవాట్ జల, జోవయింతెన్ నిదానుమ్ తెన్ ప్రార్దన కెర్తె తిల.

43 ఎత్కిజిన్ ఉచర ఉచర ఆచారిమ్ తెన్ తిల, చి జేవ్ బారికుల్చి అత్తి ప్రబు ఒగ్గర్ వెల్లెల కము జర్లు జలి.

44 పడ్డొ, సంపజలన ఎత్కిజిన్ సర్ల తెన్ ఎక్కి మెన్సు తెన్ తిల, చి బీద సుదల్, సామ్నార్లు, కోయి మున్క నే జతె, ఎక్కిలోక ఎక్కిలో తోడు దెతె తిల.

45 ఆస్తి తిల మాన్సుల్ జోవయించి వికన, నెంజిల మాన్సుల్క తోడు దెతె తిల. ఎక్కిలోక కొత్కు తిలెగిన, అన్నెక్లో జోక తోడు దెంక.

46 దేముడుచి గుడితె బెద, ప్రబుక ఉచరుక మెన రోజుక గెతె తిల, చి జోవయించి గెరలె, ఎక్కిలోక ఎక్కిలో అన్నిమ్క బుకారా, జా పోడియె కా, జా ద్రాచ రస్సుమ్ పియఁ, సర్లసంతోసుమ్ తెన్ కట్టు తెన్ తిల.

47 దేముడుచి గవురుమ్ సంగితె తిల, చి ఎత్కిజిన్ జోవయింక మెన్సిత్ తిల, చి ప్రబు రోజుక కక్క కక్క నొవ

మాన్యుల్ క నిసాన రచ్చించువ కెర నంపజలన మొత్తుమ్చి సంగుమ్తె బెదయ్తె తిలన్.

3

జెర్మిల్ తెంతో సొట్టో జలొసా చెంగిల్ జలిసి

1 ఏక్ దీసి, ప్రార్దన కెరుక బెదుక మెన, పేతురు చి యోహాను దేముడుచి గుడితె గెతె తిల. తెదొడి తిన్ని గంటల్ జా తిలి.

2 దేముడుచి గుడిక పాసి అయ్లె పొది, జెర్మిల్ తెంతో సొట్టో జలో ఎక్కిలోక మాన్యుల్ వయ నెతె తిల. రోజుక జోక వయన దేముడుచి గుడిచి కోటచి 'నూటి' మెన నావ్ తిలి గుమ్ముమ్ సొడి వెసడ్లె, గుమ్ముమె పెసిత తతె జోమాన్యు దర్ముమ్ నజీతె తిలొ.

3 పేతురు చి యోహాను దేముడుచి గుడి తెడి పెసుక దెర్లిసి, జో దెక, "డబ్బుల్ దా" మెన, దెక నే దెకిల్ రితి జా సంగిలన్.

4 సంగిలె, పేతురు యోహాను జోక చెంగిల్ దెకిల. అన్నె పేతురు జోక, "అమ్క సరిగా దెకు" మెలన్.

5 దస్సి మెంతికయ్, 'కిచ్చో జవున్ దెవుల' మెన ఉచర, జో మాన్యు జోవయింక సరిగా దెకిలన్.

6 గని పేతురు జోక, "అంక వెండి కాసుల్ నాయ్, బజార్ కాసుల్ నాయ్, గని అంక తిలిసి తుక దెయిందె. నజరేతుచో యేసుక్రీస్తుచి నావ్ తెన్ ఉట్ట ఇండు" మెన సంగిలన్.

7 సంగ, జోచి ఉజిల్ ఆతు పేతురు దెర, జోక ఉట్టవ టీవో కెలన్. బేగి, జోచ చట్టో, ఆగ్ అడ్డె డిట్టుమ్ జల.

8 డిట్టుమ్ జతికయ్, జో చట్టున ఉట్ట అద్దుర్ నెంతె టీవో ఇండుక దెర, సర్లక నచ్చు నచ్చు, దేముడుచి గవురుమ్ సంగ సంగ, దేముడుచి గుడితె పెసిలొ.

పేతురు యూదుల్ క బోదన కెర్లిసి

9 జో మాన్యు ఇండితె తిలిసి, దేముడుచి గవురుమ్ సర్ల తెన్ సంగితె తిలిసి ఒత్త బెర్ల ప్రెజల్ ఎత్కి దెక కెర,

10 "ఒరె, ఈంజొయి రోజుక దేముడుచి గుడిచి గుమ్ముమె దర్ముమ్ నజ వెస తతోసా, గని చెంగిల్ జా ఇండితయ్" మెన, బమ్మ జా ఆచారిమ్ తెన్ ఎక్కిలోక ఎక్కిలొ సంగితె తిల.

11 జో మాన్యు, జలె, పేతురుక చి యోహానుక ములుక నెత్తిర్లిసి జా జనాబ్ దెక, ఆచారిమ్ జా, జేవ్ తీర్ల దేముడుచి గుడిచి వెల్లి పేడె గెచ్చు తతికయ్, ఈంజెవు జనాబ్ బెద నిగ గెచ్చు, సొలొమోను రానొచి నావ్ తిలి పేడెక జోచి సుట్టునంత బెర గెల.

12 జేవ్ జనాబ్ దస్సి బెర అయ్లిసి దెక, పేతురు జోవయింక ఇసి మెన బోదన కెరుక దెర్లన్. "ఓ ఇస్రాయేలులు మెల అమ్చ యూదుల్, ఈంజొ మాన్యుచి రిసా తుమ్ కిచ్చోక ఆచారిమ్ జతసు? అమ్క కిచ్చోక దస్సి ఆచారిమ్ తెన్ దెకితసు? అమ్చి సొంత సెక్తి తెన్, సొంత పున్నిమ్చి రిసా జోక చెంగిల్ కెర ఇండయ్ల మెన తుమ్ ఉచర్లసు గె?

13 "అమ్చ పూర్గుల్ జల అబ్రాహామ్క, ఇస్సాకుక చి యాకోబుక దేముడు, జోచొ సేవ కెర్లొసా యేసుకయ్ అన్నె జియడ గవురుమ్ కెర దా అస్సి. తుమి యేసుక దెర పిలాతు అదికారిచి అత్తి సార్పు దిలదు, చి జో పిలాతు 'జోక విడ్డల్ కెరిందె, జో కేన్ తప్పు కెర నాయ్' మెన తీర్పు సంగిలే కి, తూమ్ నే ఒప్పన్తె యేసుచి విలువ కడ్డదు.

14 తుమ్ దస్సి కెర, సుద్ది చి పున్నిమ్ తిలొ క్రీస్తు రచ్చించువ కెర్లొసాచి మరియాద కడ్డదు. అత్య కెర్లొ బరబ్బుక విడ్డల్ కెరు, జోకయ్ కావలె మెన, తుమ్ కోర్ప జా పిలాతుక సంగ.

15 ఎత్కి జీవుల్ క జీవు దెతోసా, ఎత్కిక ఆదారుమ్ జలొ యేసుక తుమ్ మార గెలదు. గని దేముడు జలొ అబ్బొసి జోక అన్నె జియడ్లె మెన ఆమ్ దెక, సాచి జా అస్సుమ్.

16 జోచి అదికారుమ్చి రిసా జొయ్యి

ఈంజీ సొట్టో మెన తుమ్ అగ్గె తెంతో జాన్లో మాన్సుక చెంగిల్ కెర అస్సె. యేసుకయ్ నంపజా జోచి నావ్ తెన్, ఉట్ట ఇండు మెన ఇన్నెక అమ్ సంగితికయ్, యేసుయి ఇన్నెక చెంగిల్ కెర్లన్. తుమ్చి మొక్కె ఈంజీ మాన్సు పూర్తి చెంగిల్ జలిసి కిసి జర్గు జలి మెలె, యేసుయి దయిరిమ్ కెర, నంప కెరవ, చెంగిల్ కెర్లన్.

17 “జలె, అమ్చ బావుడ్డు, ఉచర, తూమ్, తుమ్చ అదికారుల్, నేన కెర దస్సి కెర్లదు మెన జాని.

18 గని, దేముడు పూర్ణమ్ జో కబుర్ తెద్రయ్లన చి అత్తి సంగ తెద్రయ్లిసి, జో ఏలువ కెరయ్తో క్రీస్తు సేడుక తిల సైమల్ ఎత్కిచి రిసా పూర్ణమ్ కబుర్ సంగ తెద్రయ్లిసి. యేసుక తుమ్ మార్గిసి తెన్ జో దేముడు నెరవెర్చువ కెర అస్సె.

19 జలె, అమ్ కెర్ల పాపల్ వుంచి జతు మెన తుమ్ కోరప జలె, తుమ్ కెర్ల పాపల్చి రిసా పెట్టి పూర్తి దుకుమ్ జా, ఆజి తెంతో ప్రబుచి ఇస్తుమ్ రితి కెరుక పూర్తి కోరప జా మార్పుప జా, చి దేముడు తుమ్క పాసి కెరన, తుమ్క సెలవ్ కడన్లి పొది దిలి రితి, తుమ్చి ఆత్మల్క చెంగిల్ కెరెదె,

20 చి తుమ్క పూర్ణమ్ తెంతో సంగ తిలో రచ్చించుప కెర్తొసా జతో క్రీస్తుక తుమ్తె తెద్రయెదె. క్రీస్తు కొన్నో మెలె, యేసు.

21 జో క్రీస్తుయి పరలోకుమ్తె తంక. కెయ్యె ఎద జో ఒత్త తంక అస్సె మెలె, పూర్ణమ్ దేముడుచి కబుర్ సంగిలనచి అత్తి సంగిలిసి ఎత్కి నెరవెర్చువ జతె ఎద.

22 “మోసె పూర్ణమ్చొచి అత్తి దేముడు రెగ్గయిల్ కోడు ఏక కిచ్చో మెలె; అంచ కబుర్లు సంగు మెన పరలోకుమ్చొ ప్రబు జలో దేముడు అంకయ్

కిసి తెద్రయ్లో గే, దస్సి, తుమ్ యూదుల్తె జెర్మిత్ ఎక్కిలోక కబుర్ తెద్రయెదె. తుమ్క జో కిచ్చో అడ్డ దెయెదె గే, జయ్యి తుమ్ కెర్తె.

23 జో కబుర్ జెహ్సాక కో నూన్తి నాయ్ గె. ఆవ్ నిసాన్ల ప్రెజల్తె తుమ్ బెదుక విలువ నాయ్’ మెన జోవయింక దేముడు నాసెనుమ్ కెరెదె.

24 పడ్డె, సమూయేలు పూర్ణమ్చొ తెంతో అప్పెచి కాలుమ్ ఎద దేముడు కబుర్ తెద్రయ్లనతె కక్క నే పిట్టి, జేవ్ ఎత్కిజిన్ ఈంజ కాలుమ్ జర్గు జతిసి, ఆజి జర్గు జతిన్చి రిసా అగ్గె తెంతో సంగ అస్సి.

25 జలె, దేముడుచి కబుర్ సంగ తిల జేవ్ పూర్ణల్చ పుత్తర్లులు తూమ్. పడ్డె తుమ్చి సెకుమ్తె పడ్డెక ఎక్కిలో జెర్మెదె.

జోచి రిసా ఈంజ లోకుమ్చ కుటుంబల్ ఎత్కిక దీవెన దొర్కు జయెదె. జోచి అత్తి అంచి వరుమ్ దెయిందె మెన దేముడు తుమ్చొ అబ్రాహామ్ పూర్ణమ్చొచి అత్తి తుమ్చ పూర్ణల్క నే పిట్టి ప్రమానుమ్ కెర సంగిలన్. జా కోడుచి రిసాచి పుత్తర్లు కి తూమ్ జస్తె.

26 జలె, ‘దొర్కు జలో రచ్చించుప కెర్తొసా’ మెన ప్రబు జోచొ సేవ కెర్తొసా జలో యేసుక టీవడ. జో మొర్తికయ్ అన్నె జియడ, కత్తె తొలితో తెద్రవ అస్సె మెలె, తూమ్ యూదుల్తెయి. కిచ్చొక మెలె, తుమ్క ‘తుమ్చి పాపుమ్బుద్ది ముల చెంగిల్ జతు’ మెన తుమ్కయ్ తొలితో చి తెద్రవ అస్సె” మెన పేతురు ప్రెజల్క బోదన కెర్లన్.

4

పేతురుక యోహానులుక జేల్తె గలిలిసి

1 పేతురు చి యోహాను ప్రెజల్క దస్సి బోదన కెర్తె తతికయ్, యూదుల్చ పూజర్లు, దేముడుచి గుడిచొ ఎజొమాని,

పడ్డో సద్దుకాయ్యలు మెన పండితుల్ జోవయింతె ఉట్ట అయ్ల.

2 యేసు 'మొర అన్నె జివ్ జలో' మెన పైజల్ క పేతురు చి యోహాను సికయ్తె తిలి రిసా, జేవ్ వెల్లో సుదల్ కోపుమ్ జా అస్తి.

3 జోవయింక దెర్ల, గని సాంజ్ జలి రిసా 'కలిక తీర్పు కెరుమ' మెన దస్సి జేల్తె గలిల.

4 జేవ్ వెల్లో సుదల్ దస్సి కెర్లె కి, జేవ్ దొగుల కెర్లె బోదన సూన్లన ఒగ్గర్ జిన్ యేసుక నంపజయి గెల. ఇన్నెతెన్, నంపజలన కెత్తిజిన్ జల మెలె, తేర్బోదల్, బాలబోదల్ క పిట్టవ, రమారమి పాచ్ వెయిల్ జిన్ మున్నుబోదల్ తిల.

పేతురుక యోహానులుక పరిచ్చ కెర్లెసి

5 అన్నెక్ దీసి కిచ్చొ జర్లు జలి మెలె, సబ కెరుక మెన యూదుల్ చ అదికారుల్, వెల్లెల మాన్సుల్, మోసి తెన్ దేముడు దిలి ఆగ్గుల్ సికడ్డన ఎత్తిజిన్ యెరూసలేమ్ పట్టుమ్తె బెర జా అస్తి.

6 జోవయింతె కో కో ముక్కిమ్ జా సబ కెర్లె రిసా జా అస్తి మెలె, అగ్గె ఎత్తిక వెల్లో పూజరి జా తిలో అన్నొన్ చి జావోసి జలో తెదొడిచొ ఎత్తిక వెల్లో పూజరి కయప, ఎత్తిక వెల్లెల పూజర్లు జతనచ కుటుంబల్ చ మున్నుబోదల్ ఎత్తిజిని. ఇనయింతె దొగుల కొన్న మెలె, యోహానుని అలెక్కంద్రు.

7 సబ కెరుక దెర్లె పొది, యోహానుక చి పేతురుక కడ ఆన నెడిమి టీవో కెరన, జేవ్ చెంగిల్ కెర్లె అగ్గె సొట్టో జా తిలో మాన్సుక కి టీవో కెర, జేవ్ దొగులక పరిచ్చ కెరుక దెర్ల. "ఈంజో మాన్సుక కిసి ఇండయ్లదు? తుమ్చి సొంత సెక్తిక నెతుర్లు! కచి సెక్తి, కచి నావ్ తెన్ ఈంజ కామ్ కెర్లదు?" మెన కోపుమ్ తెన్ పరిచ్చ కెర్ల.

పేతురు జబాబ్ దిలిసి

8 తెదొడి పేతురు దేముడుచి సుద్ది తిలి ఆత్మసెక్తి జోచి పెట్టి బెర సెక్తి దెతికయ్, దయిరిమ్ జా, జేవ్ వెల్లెల మాన్సుల్ క ఇసి మెన జబాబ్ దిలన్; "యూదుల్ చ అదికారుల్, వెల్లెల మాన్సుల్, తుమ్క ఆమ్ కిచ్చొ సంగుక?

9 అమ్ సొట్టో మాన్సు ఎక్కిలోక చెంగిల్ కెర్లె రిసా ఆజి తుమ్ అమ్క పరిచ్చ కెర్లెను జలె,

10 నజరేతు గవ్వెచొ యేసుక్రీస్తుచి నావ్ తెన్ని తుమ్చి నెడిమి టీవో జలో ఈంజో మాన్సు చెంగిల్ జా అస్సె. జో యేసుక్రీస్తు తుమి సిలివ గల మార్లదు, గని దేముడు జోక అన్నె జియడ్లన్, చి జొయ్యి ఈంజో మాన్సుక చెంగిల్ కెర అస్సె మెన తుమ్క చి అమ్చి ఇస్రాయేలులు ఎత్తిజిన్ క ఆవ్ కచితుమ్ సంగితసి.

11 "గేరు బంద మాన్సుల్ నెన కెర ములిల పత్తుర్, గేర్ బందత బోడిపత్తుర్ జయెదె. తుమ్ జోక నెసిలె కి, పరలోకుమ్చి రాజిమ్క జొయ్యి వెల్లో జా అస్సె.

12 పాపుమ్ తెంతో విడ్డల్ జా పరలోకుమ్తె గెతి రచ్చన కచితె దొర్కు జతయ్ మెలె, యేసుతెయి అన్నె కత్తెయ్ నాయ్. కిచ్చొక మెలె, ఈంజ ఒండి లోకుమ్తె అన్నె కచి నావ్ తెన్ రచ్చించుప జంక కో కి నెత్తిర్తి" మెన పేతురు సంగిలన్.

13 పేతురుక చి యోహానుక, "ఈంజేవ్ ఒగ్గర్ సదు కెర్ల మాన్సుల్ నెంజితి రిత జాలర్లు ఈంజేవ్, వెల్లెల మాన్సుల్ నెంజితి, గని తెద్ది దయిరిమ్ తెన్ అమ్క బుద్ది సంగితతి" మెన, జేవ్ వెల్లెల మాన్సుల్ ఆచారిమ్ జల. అన్నె, యేసు తెన్ జేవ్ బుల్లె తిలి రిసాయ్ ఇసి తెలివి తెన్ దయిరిమ్ జా అస్తి మెన వెల్లెల మాన్సుల్ చినిల.

14 వడ్డె, అగ్గె సొట్టో జా తిలో మాన్సు అప్పె చెంగిల్ జా జోవయించి నెడిమి టీవోజ అస్సె మెన దెక కెర, జేవ్ అన్నె కిచ్చొ నింద సంగుక నెత్తెర్ల.

15 అన్నె కిచ్చొ సంగుక నెత్తె కెర, యోహానుక చి పేతురుక సబ తెంతో బార్ కెర, వెల్లెల మాన్సుల్ లట్టబన్ల.

16 “ఈంజేవ్ దొగుల మాన్సుల్చి రిసా అమ్ కిచ్చొ కెర్లె జయెదె? కిచ్చొ సిచ్చు కెరుక నెత్తుమ్, కిచ్చొగె. కిచ్చొక మెలె, తెద్ది వెల్లె కామ్ ఇన్నెచి అత్తి జర్లు జా అస్సె మెన ఈంజ యెరూసలేమ్ తెచ మాన్సుల్ ఎత్తిజిన్ జాన్తి. ఆమ్ కి దెక అస్సుమ్, చి కిచ్చొ వేర సంగుక నెంజె.

17 గని, ఈంజ ఎత్తిచి రిసా అన్నె కో సూన్త నాయ్ మెన, ఈంజేవ్ దొగుల జోచి నావ్ తెన్ అన్నె కక్క కిచ్చొ నే సంగిత్ రితి బియడ ఆడ్ర దెమ” మెన తీర్పు సంగిల.

18 తెదొడి, జేవ్ దొగులక అన్నె బుకారా కెర, “తుమ్ జో యేసుచి నావ్ దెరుక నాయ్. జోచి నావ్ తెన్ అన్నె కక్క బోదన కెరుక నాయ్” మెన పేతురుకచి యోహానులుక ఆడ్ర దిల.

పేతురు చి యోహానులు దిలి జబాబ్

19 జేవ్ వెల్లెల మాన్సుల్ దస్సి సంగిలక, పేతురు, యోహాను, నే బితె దయిరిమ్ తెన్ కిచ్చొ సంగిల మెలె, “దేముడు సంగిలి కోడు అమ్ కెర్లె చెంగిల్ గే, తుమ్ మాన్సుల్ సంగిలి కోడు అమ్ కెర్లె చెంగిల్ గే, తూమ్ సరిగా ఉచర. జేవ్ దొన్నిచి రిసా జో దేముడు సొంత కిచ్చొ మెనెదె గే ఉచర.

20 అమ్ దెకిలిసి సూన్సి, ఆమ్ మాన్సుల్క నే సంగితె తంక నెత్తుమ్, నేన” మెన జేవ్ దొగుల యేసుచ బారికుల్ సంగిల.

21 ‘యేసుచి అదికారుమ్చి తెడి జో సొట్టో మాన్సు చెంగిల్ జలో’ మెన ప్రెజల్ ఎత్తిజిన్ దేముడుచి గవురుమ్ సంగితె తిల. జేవ్చి రిసా, ‘జేవ్ దొగులక అమ్ సిచ్చు కెర్లె ప్రెజల్ అమ్క అల్లర్ కెరుల’

మెన కిచ్చొ సిచ్చు కెరుక నెత్తె కెర, ఎక్కి కోడకయ్ జోవయింక అన్నె బియడ కెర, వెల్లెల మాన్సుల్ జోవయింక విడ్డల్ కెర్లె.

22 ప్రెజల్ కిచ్చొక దేముడుచి గవురుమ్ ఒగ్గర్ నముకుమ్ తెన్ సంగితె తిల మెలె, జోవయించి గవురుమ్క రుజ్జు దెకయ్లి జా వెల్లె కామ్ జర్లు కెర్లెసి కక్క చెంగిల్ కెర్లెసి జయెదె మెలె, దొన్ని విసా వెర్సుల్ జలో సొట్టో జెర్మిలో మాన్సుక.

23 పేతురుక యోహానుక వెల్లెల మాన్సుల్ ముల్లికయ్, జోవయించ గోతుసుదల్తె జేవ్ దొగుల గెచ్చు, ఎత్తిక వెల్లెల పూజర్లు చి వెల్లెల మాన్సుల్ జోవయింక సంగిలిసి ఎత్తి సంగ దిల.

24 జేవ్ సూన కెర, జేవ్ ఎత్తిజిన్ ఎక్కి మెన్సు తెన్ బెద దేముడుక ఇసి మెన గట్టిజ అవాడ్ తెన్ ప్రార్దన కెరుక దెర్ల: “ఎత్తిచి కంట వెల్లె తిలో అమ్చొ దేముడు ప్రబువ, పరలోకుమ్ బూలోకుమ్, సముద్రుమ్, జేవ్ ఎత్తితె తతిసి కిచ్చొ నే పిట్ట జెర్మయ్లోసా తూయి.

25 తుమ్చి సుద్ది తిలి ఆత్మ లట్టబ్లికయ్, తుచొ సేవ కెర్లెసా జలో అమ్చొ పూర్గుమ్చొ దావీదుచి చోడివాట్ తూయి సంగిలిసి కిచ్చొ మెలె, దేముడుక నేన్ల దేసిమ్లుచ మాన్సుల్ కిచ్చొక జోవయింక నిస్కారుమ్ ఉచర వెల్లెల మాన్సుల్ మెనన్ల? అమ్చయ్ ప్రెజల్ కి జోవయింక నేన్ల రితె జా, కిచ్చొక కామ్క నెంజిల కుట్లల్ జోవయించి రిసా ఉచర్ల?

26 ఒండి లోకుమ్చ రానలు, అదికారుల్, కుట్ల కెర్లె రితి ఎక్కితె బెద, దేముడుక కి, జో ఏలువ కెరయ్తో క్రిస్తుక కి యుద్దుమ్ కెర్లె రితి జల

మెన దావీదుచి అత్తి రెగ్గ అస్సె.

27 నిజుమి, ఈంజయి పట్టుమ్తె హేరోదు రానొ, షొంతి పిలాతు అదికారి,

యూదుల్ నెంజిలన ఇస్రాయేలులు మెల అమ్చ యూదుల్, ఎత్కిజిని, దేముడుచి సుద్ది తిలో తూయి ఏలుప కెరయ్లో సేవ కెర్తొసా జలో యేసుక కుట్ర కెర, జోవయించి ఉప్పిరి యుద్దుమ్ కెర్తి రితి జల.

28 'జర్గు జవున్' మెన తూయి అగ్గె తెంతో తుచి అదికారుమ్క సెలవ్ దా తిలిసి ఎత్కి, జోవయించి పెట్టిచి విస్సుమ్క జేవ్ జర్గు కెర్ల.

29 అప్పె కి, ప్రబుచ, ఈంజేవ్ తుచ సేవ కెర్తొనక బియడ్డతి. గని ఇన్నెక కన్కారుమ్ దెక,

30 జొర్జొ తిల మాన్సుల్క ఇన్నెచి అత్తి చెంగిల్ కెర్తె తా, సుద్ది తిలో తుచో సేవ కెర్తొసా యేసుచి నావ్ తెన్ జోచి అదికారుమ్క గుర్తు జత వెల్లో కము కెరవ కెరవ, ఈంజేవ్ పూర్తి దయిరిమ్ తెన్ తుచి సుబుమ్ కబుర్ సంగితి రితి ఇన్నెక తోడు తా, మెన ప్రార్దన కెర్తొసుమ్" మెన, బెర తిలన ఎత్కిజిన్ ఎక్కి మెన్సు తెన్ ప్రార్దన కెర్ల.

31 దస్సి ప్రార్దన కెర కేడయ్లి బేగి, కిచ్చొ జర్గు జలి మెలె, జేవ్ సబ కెర్తె తిలి గేరు కదుల్ జంక దెర్రి, చి దేముడుచి సుద్ది తిలి ఆత్మ జోవయించి పెట్టి బెర పూర్తి నెక్తి దెతికయ్, పూర్తి దయిరిమ్ తెన్ దేముడు దిలి బోదన కెర్లెసి ఎత్కి సంగుక దెర్ల.

యేసుక నంపజలన కట్టు తెన్ తిలిసి

32 జేవ్ పొదులె, యేసుప్రబుక నంపతిలన ఎత్కిజిని, ఎక్కి ఆత్మ, మెన్సు, ప్రేమ తెన్ తిల. "అంచయ్" మెన, జోవయింక కలుగు జల ఆస్తుల్చి రిసా జోవయింతె కో కి పొటి సంగితి నాయ్, గని జోవయింక కలుగు జలిన్క 'అమ్ ఎత్కిజిన్చి' మెన, సర్ల తెన్ ఎక్కిలోక ఎక్కిలో తోడు కెర్తె తిల.

33 పడ్డె, దేముడు యేసుచి ఆత్మనెక్తి జోవయించి పెట్టి తిలి రిసా, జేవ్

బారజిన్ జోవయించ బారికుల్ పూర్తి దయిరిమ్ తెన్ యేసుప్రబు మొర అన్నె జలిసిచి రిసా సాచి సంగితె తిల. జో ప్రబుచి దయచి ప్రేమ జేవ్ నంపజలన ఎత్కిజిన్చి పెట్టి బెర కామ్ కెర్తె తిలి.

34 జోవయింతె కక్క కి కొత్తు నాయ్. కిచ్చొక మెలె. జోవయింతె కక్క ఒగ్గర్ బుయి గే గెరల్ గే తయెదె గే, జో విక గెలెదె, చి జా వికిలి డబ్బిల్ ఆన కెర,

35 యేసుచ బారికుల్చి చట్టె తివుల. 'నెంజిలనక దొర్కు జవున్' మెన, నెంజిలనక వంట దెవుల. జాచి రిసా కక్క కి కొత్తు జయె నాయ్.

సత్ప్రీమ జలో బర్నబా

36 యోసేపు మెలో ఎక్కిలో జోవయింతె తిలో. 'దయిరిమ్ కెర్తొసా' మెలి అర్దుమ్ తెన్ జోక 'బర్నబా' మెన, బారజిన్ బారికుల్ ఆసిమ్ నావ్ తియె తిల. జో, యూదుడు జలో లేవీ మెలో పూర్గుమ్చొచి సెకుమ్చొ జయెదె. జో జెర్మిలి దేసిమ్ కేన్ మెలె, కుప్ర మెలి దీవి దేసిమ్.

37 జో కిచ్చొ కెర్తొ మెలె, జోక కలుగు జలి ఏక్ బాటి జో విక కెర, జా వికిలి డబ్బుల్ దెరన, జేవ్ బారజిన్ బారికుల్క చటి తిలన్.

5

అననీయని సప్పీరా

1 అననీయ మెలో ఎక్కిలో, మాన్సు, సప్పీరా మెలి తేర్ని తెన్, దొగుల బెద జోవయించి బుయి ఏక్ విక కెర,

2 తేర్ని కి జాన్తె, జా బుయి వికిలి డబ్బుల్ సగుమ్ తియన కెర, ఎక్కి వాటయేసుచ బారికుల్తె అననీయ ఆన దిల్న్.

3 ఆన్తికయ్, పేతురు జోక, "సయ్తాన్ తుచి పెట్టి సికడ అస్సి, చి దేముడుచి సుద్ది తిలి ఆత్మచి మొక్కె తుయి అబద్దుమ్ జా, జా బుయి వికిలి డబ్బుల్చి ఏక్ వాట తియన కెర, కిచ్చొక సయ్తానుక సూన జా పాపుమ్ కెర్లది?

4 జా బుఁయి నే వికితె అగ్గె, జా పూర్తి తుచి ఆస్తి జా తిలి. జా వికిలి పడ్డొ కి, జా డబ్బుల్ క సత్తిమ్ కెరుక పూర్తి తుచి పూచి. తుయి అప్పె ఉచర్లి మోసిమ్ కిచ్చొక? తుయి కెర్లిన్ చి అర్దుమ్ పూర్తి ఉచరు. తుయి కెర్లిసి మాన్సుక అబద్దుమ్ సంగిలిసి, గని అన్నె ముక్కిమ్ కిచ్చొ పాపుమ్ జలది మెలె, తుయి దస్సి కెర, దేముడుకయ్ అబద్దుమ్ సంగ అస్సిసి” మెన, అననీయక పేతురు తీర్పు సంగిలన్.

5 ఈంజేవ్ కొడొ సూన్లి బేగి, అననీయ బుఁయ్యె సేడ మొర గెలన్. జో తప్పు కెర మొర్లిన్ చి రిసా సూన్లన ఎత్కిజిన్ బియఁ గెల.

6 తెదొడి ఒత్త తిల ఉబెడల్ బట్ట తెన్ జోచి పీనుమ్ డంక, ఉక్కుల వయన, మెన్నె రోవ గెల.

7 రమారమి తిన్ని గంటల్ గెతికయ్, అననీయచి తేర్ని జేవ్ బారికుల్ తిలిన్ తె అయ్ లి. మున్సున్ క జర్గు జలిసి జా నేనె.

8 జెతికయ్, పేతురు జాక పసుల, జా బుఁయి వికిలి డబ్బుల్ చి రిసా జాక పుసిలన్. అననీయ దిలి ఎదిలి డబ్బుల్ చి రిసా సంగ, “తెద్దిలికయ్ జా బుఁయి వికిలదు గె?” మెన పుసితికయ్, జా “తెద్దిలికయ్” మెన సంగిలి.

9 పేతురు జాక, “తుమ్ దొగుతెర కుట్ట కెర అబద్దుమ్ సంగిలిసి, ప్రబుచి ఆత్మక కొంకడ్డి రితి జతయ్ మెన బిస్సు నాయ్ గె? ఆదె! సూను! తుచొ మున్సున్ క రోవిలన అన్నె ఉట్ట జెతికయ్ అవాడ్ జెతయ్. అయ్ లె, తుచి పీనుమ్ ఉక్కుల వయన తుక కి మెన్నె రోవుక గెచ్చుల” మెన సంగిలన్.

10 సంగిల్ బేగి, జా కి జోచి చట్టె సేడ మొర గెలి. ఉబెడల్ గేర్ తెడి జా కెర, జాక, ‘జా కి మొర అస్సె’ మెన దెక కెర, జాక ఉక్కుల వయన మెన్నె గెచ్చు, మున్సున్ చి సొడి జాక రోవిల.

11 జా దీసి జర్గు జలిన్ చి రిసా, యేసుక నంపజలనచి సంగుమ్ చ్చ ఎత్కిజిని, సూన్ల అన్నె మాన్సుల్ ఎత్కిజిని, దేముడు యేసుచి ఆత్మనెక్తిచి రిసా బియఁ గెల.

12 జేవ్ బారజిన్ జోచ బారికుల్ చి అత్తి ప్రబు ఒగ్గర్ ఒగ్గర్ వెల్లెల కమొ జర్గు కెరయ్ లన్. జేవ్ పొదులె, జేవ్ రోజుక దేముడుచి గుడితె పూర్గుమ్ చొచి సాలోమోను నావ్ తిలి పేడె సబ కెరుక అలవాట్ జా తిల.

13 వేర మాన్సుల్ జోవయింతెన్ ఒత్త బెదుక బియఁ గెల, గని ప్రెజల్ ఎత్కిజిన్ జోవయింక ఒగ్గర్ గవురుమ్ దెకిత్ తిల.

14 అగ్గెచి కంట, అన్నె మున్సుబోదల్ ఒగ్గర్ జిన్, తేర్ బోదల్ ఒగ్గర్ జిన్, ఒగ్గర్ జిన్ మాన్సుల్ ప్రబుక పూర్తి నంపజా గెల.

15 ప్రెజల్ అన్నె కిచ్చొ కెర్ల మెలె, పేతురు జోవయించి వాటు జవున్ అయ్ లె, “ఎక్కి జోవయించి నీడ అమ్ క సగుమ్ జిన్ క లయిన్, జవున్” మెన, జోర్ణొ తిల జోవయించ మాన్సుల్ క వయన, మంచల్ తె జవున్, అంతుర్నొ తె జవున్, వాటులె నిజవ దిల.

16 యెరూసలేమ్ పట్టుమ్ చి సుట్టునంతచ గెవ్విలె తెంతొ కి ఒగ్గర్ జిన్ జాఁ కెర, జోవయించ జోర్ణొ తిల మాన్సుల్ క, బూతుమ్ దెర్ల మాన్సుల్ క, కడ ఆన్ల, చి జేవ్ ఎత్కిజిన్ కి చెంగిల్ జల.

బారికుల్ క దెర జేల్ తె గలిలిసి

17 ఎత్కిక వెల్లో పూజరి, మాత్రుమ్, జోవయింతెన్ తిలస ఎత్కిజిని, సద్దుకయ్యులు మెల పండితుల్; యేసుచ బారికుల్ చి ఉప్పెరి పూర్తి గోస జా బార్ జా,

18 జోవయింక దెర, మాములుమ్ జేల్ తె గలిల.

19 గని, జా రాతి, ప్రబుచొ దూత ఎక్కిలో జేల్ తెచ కెచ్చివొ ఉగుడ కెర, బారికుల్ క విడ్డల్ కెర బార్ కెర్లన్. చి జోవయింక,

20 “తుమ్ దేముడుచి గుడితె గెచ్చు పెన, నెడిమి టీవోజ, ప్రబుతె దొర్కు జతి పరలోకుమెత బెదితి ఆత్మతె జెర్నున్ జా జితి రచ్చునచి రిసాచి నుబుమ్ కబుర్ ప్రజల్క పూర్తి బోదన కెర” మెన, దేముడుచ దూత ఆడ్ర దా సంగిలన్.

21 దూతచి కోడు నూన కెర, జేవ్ పెందలె ఉజిడి జలి పొది, దేముడుచి గుడితె పెన, బోదన కెరుక దెర్ల. దేముడుచి గుడితె బారికుల్ పెన బోదన కెర్తె తిలి మదెనె, ఎత్కిక వెల్లో పూజరి, జోవయింతెన్ బెదిలన, జోవయింక ‘విడ్డల్ జా అస్తి’ మెన నేన కెర, ‘సబ కెరుమ’ మెన ఇస్రాయేలుల సబతె వెసితన ఎత్కిజిన్క బుకారా కెర, బారికుల్క కడ ఆన్ తి రిసా, జోవయింక జమాన్లుక జేల్తె తెద్రయల.

22 జేవ్ జేలితె పావెలె, కెప్లివో ఉగిడ్లె, జేవ్ బారికుల్ ఒత్త నాయ్, చి వెల్లెల మాన్సుల్తె అన్నె బుల జా సంగిల.

23 “అమ్ జేల్తె గెలమ్, చి ఒత్త పావెలె, జేల్తెచ కెప్లివో సంజె తెంతో డిట్టుమ్ డంక అస్తి. చి అమ్చ జమాన్లు కెప్లివో సరిగా రకితె తిల, గని అమ్ కెప్లివో ఉగిడ్లె, తెడి కోయి నాయ్” మెన సంగిల.

24 సంగిలె, దేముడుచి గుడిచొ ఎజొమానిచి వెల్లెల పూజర్లు నూన, పూర్తి ఆచారిమ్ జా, “ఇన్నెచి అర్దుమ్ కిచ్చో? అప్పె అన్నె కిచ్చో జర్లు జయెదె?” మెన, బమ్మ జల.

25 తెదిడి కో గే జేవ్ వెల్లో మాన్సుల్తె జా కెర, “తుమ్ జేల్తె గలిలన దేముడుచి గుడితె టీవోజ ప్రెజల్క సికడ్తె” మెన సంగిల.

26 సంగితికయ్, దేముడుచి గుడిచ జమాన్లుచ ఎజొమాని, జోవయింక జమాన్లు తెన్ గెచ్చు, బారికుల్క దేముడుచి గుడి తెంతో బార్ కెర్ల. గని జోవయింక కిచ్చో దెబ్బల్ పెట్టి నాయ్, అల్లర్ కెరుక మెన చడిత్ కి నాయ్. కిచ్చొక మెలె, ‘జోవయింక అల్లర్ కెర్లె

ప్రెజల్ అమ్క పత్తల్ గల మార గెలుల’ మెన బియె గెల.

27 జలె, బారికుల్క దేముడుచి గుడి తెంతో బార్ కెర, జోవయింక సబ కెర్తి గేర్తె కడన, సబ కెర్తనచి మొక్క టీవో కెలచి ఎత్కిక వెల్లో పూజరి జేవ్క పరిచ్చు కెర్లె.

28 “ఈంజ జోచి నావ్ తెన్ తుమ్ ప్రెజల్క సికడుక జయె నాయ్, మెన తుమ్క ఆడ్ర దిలమ్, గని ఒండి ఈంజ యెరూసలేమెతెచ మాన్సుల్ ఎత్కిజిన్క తుమ్ సికడ అస్సున్. అన్నె, అమ్క, ‘తుమి జోవయింక మార్లదు’ మెన, జో మాన్సుచి రిసా అమ్కయ్ నింద కెర, అమ్కయి జా పాపుమ్ వయడుక ఉచర్తసు” మెన బారికుల్క తీర్పు సంగిల.

29 పేతురు, బారికుల్ ఎత్కిచి రిసా కిచ్చొ జబాబ్ దిలన్ మెలె, అమ్ కచి కోడు ముక్కిమ్క నూన కెరుక మెలె, మాన్సుచి కోడు నాయ్, గని దేముడుచి కోడు.

30 తూమ్ యేసుక సిలువతె టీవుడ మార్లదు, గని అమ్చ పూర్లుల్చొ దేముడు ప్రబు జోక అన్నె జియడ్లె.

31 “జలె, యేసుక అన్నె జియడ, అమ్చొ దేముడు కిచ్చొ కెర్లె మెలె, జోక జోచి ఉజెతో పక్క వెనడ, ఇస్రాయేలుల్ మెల యూదుల్క, ‘జేవ్ కెర్లె పాపల్క పెట్టి దుకుమ్ జా ముల జోక సంపజా, జోవయింక పాపుమ్ పుంచి జవున్’ మెన, యేసుక, రచ్చించుప కెర్లెసా, ఏలుప కెర్ను మెన, జోక గవురుమ్ కెర అస్సె.

32 ఈంజ ఎత్కిచి రిసా అమ్ సాచుల్ జా అస్సుమ్. జోచి కోడు రితి కెర్తనక దేముడు దిలి జోచి సుద్ది తిలి ఆత్మ కి సాచి జతయ్.”, మెన పేతురు సంగిలన్.

33 జేవ్ వెల్లెల మాన్సుల్ నూన ఒగ్గర్ కోపుమ్ జా, జేవ్ బారికుల్క మారుక కోర్వ జల.

34 గమలీయేల్ మెలో పరిసయ్యుడు ఎక్కిలో ఒత్త జేవ్ వెల్లెల మాన్సుల్తె తిలో. జో మోసే తెన్ దేముడు దిలి ఆగ్గుల్ సికణ్డోసా జయెదె. జోక ఎత్తిజిని, 'చెంగిల్ మాన్సు' మెన గవురుమ్ కెరుల. జో మాన్సు టీవ, దేముడుచి గుడిచ జమాన్సుక, 'ఈంజేవ్ మాన్సుల్క గడియ బార్ కెర తా' మెన ఆడ్ర దిలన్.

35 బారికుల్క బార్ కెరవ, బెర తిల వెల్లెల మాన్సుల్క గమలీయేల్ ఇసి మెన సంగిలన్: "అమ్చ ఇస్రాయేలులుచ ఒ తుమ్ వెల్లెల మాన్సుల్, జేవ్ మాన్సుల్క తుమ్ కిచ్చొ కెరుక ఉచర్త గె, జాగర్త తా.

36 జా సుట్టు జర్గు జలిన్చి రిసా ఏద కెర. జేవ్ పొదులె దూదా మెలో ఎక్కిలో 'ఆవ్ వెల్లో' మెన సొంత గవురుమ్ సంగుక బుల్తె తిలో, చి రమారమి చెత్తర్ పుంజొజిన్ మాన్సుల్ జోవయింతెన్ బెదిల. గని మాన్సు జోక మార్కియ్, జోచ సిస్సుల్ చెదుర్పు జల, చి జా ఎత్తి ఆరి పాడ్ జా గెలి.

37 జాచి పడ్డో, ప్రెజల్ లెక్క కెర్తె తిల పొదులె, గలిలయ ప్రాంతుమ్చొ యూదా మెలో ఎక్కిలో కి వెల్లో మెనన, సగుమ్జిన్క సికడ సిస్సుల్ కెరణ్ణో. గని జో కి మొర గెలో, చి జోచ సిస్సుల్ కి చెదుర్పు జా గెల.

38 "జాకయ్, తుమ్ అప్పె దెర్ల మాన్సుల్చ రిసా ఆవ్ కిచ్చొ మెంతసి మెలె, ఈంజేవ్ మాన్సుల్క ముల. తుక్లె తా. కిచ్చొక మెలె, ఈంజేవ్ కెర్తిసి, మాన్సుల్ ఉచర్లిసి రిత జలె, జాచి ఇష్టుమ్క పాడ్ జయెదె, చి ఆమ్ పిట్టవుక మెన కిచ్చొ కెరుక నాయ్.

39 గని ఏక్ వేల ఈంజేవ్ కెర్తిసి, దేముడు తియార్లిసి జలె, తుమ్ కెడ్డి సిచ్చ కెర్తె కి, పిట్టవుక నెతుర్పు. జాగర్త తా. ఈంజేవ్ కెర్తిసి దేముడు తియార్లిసి జలె, తూమ్ అల్లర్ కెర్తె, జో దేముడుక విరోదుమ్ సుదల్ కి జస్సై" మెన, జాగర్త

సంగిలన్.

సిస్సుల్ విడ్డల్ జలిసి

40 జో గమలీయేల్ దస్సి సంగితికయ్, వెల్లెల మాన్సుల్ సూన్ల, చి బారికుల్క అన్నె బుకారా కెర, కొర్డల్ తెన్ పెట, "తుమ్ యేసుచి నావ్ తెన్ కక్క కిచ్చొ సికడుక జయె నాయ్" మెన ఆడ్ర దా, విడ్డల్ కెర్ల.

41 బారికుల్, జలె, కిచ్చొ బుద్ది తెన్ జా సబ కెర్లిన్ తెంతో బార్ జల మెలె, 'యేసుప్రబుచి నావ్ గవురుమ్ కెర్తి రిసా జోచి గవురుమ్ దెకయ్లి రిసా, అమ్ నిస్కారుమ్ జంక జలెకి, జొయ్యి అమ్క నిసాన విలువ రితి దెక అస్సె మెన అమ్క పూర్తి సర్ల' మెన, సర్ల సేంతుమ్ తెన్ తిల.

42 అన్నె, దేముడుచి గుడితె కి, గెరి కి, యేసుక, 'జొయ్యి దొర్కు జలో క్రీస్తు రచ్చించుప కెర్తొసా' మెన, ప్రెజల్క రోజుక సికడుక ములితి నాయ్.

6

నిసాన్ల సత్తుజిన్ సత్తిమ్ తిల మాన్సుల్

1 జా పొదులె, ఒగ్గర్జిన్ మాన్సుల్ యేసుక నంపజా, జోచ సిస్సుల్ జా గెతె తిల. జోవయింతె తిల బీద సుద్దల్ ఎత్తిజిన్క అన్నిమ్, కిచ్చొ కిచ్చొ తోడు దెంక ఇష్టుమ్ జలెకి, ఎతివాట్జిన్ జా తిల, చి దొర్కు జలిసి ఎత్తిజిన్క వంటుక నెత్తిర్ల, చి "ఎబ్రీ బాన లట్టబై రండెల్ మాన్సుల్క సరిపుచుప జతిసి దెతతి గని అమ్చక నాయ్" మెన, గ్రీకు బాన లట్టబ్బన గోస కెర్ల.

2 జాకయ్, తెదొడి జేవ్ బారజిన్ యేసుచ బారికుల్ కిచ్చొ కెర్ల మెలె, యేసుక నిదానుమ్ నంపజలస ఎత్తిజిన్క బుకారా కెర, "అము కెడ్డొడి తెదొడి బీద సుదల్క అన్నిమ్ వంటితె

తంక జలె, *ప్రబుచి సుబుమ్ కబుర్ బోదన కెర్తెసి పిట్ట గెచ్చెదె. పిట్ట చెంగిల్ నాయ్.

3 జాక కిచ్చొ కెరుక మెలె, 'బీద సుదల్ క దెకుత్' మెన, తుమ్చి తెంతొ సత్తుజిన్ క నిసాన, కీస మాన్సుల్ జేవ్ సత్తుజిన్ తంక మెలె, 'సరిగా మాన్సుల్ జేవ్' మెన, ఎత్తిజిన్ క జాన్సన జా తంక, చి ప్రబుచి ఆత్మ జోవయించి పెట్టి జేవ్చి కామ్ పూర్తి కెర్తి బుద్ది తిలస జేవ్ తంక; బుద్ది సుదల్ జేవ్ తంక. దస్సు మాన్సుల్ క తుమ్ నిసాన, చి జా సేవచి రిసా అమ్ జోవయింక అదికారుమ్ దెమ్దె.

4 "అమ్, కిచ్చొ కెరుక అస్సె మెలె, ఆము ప్రార్దన కెర్తె తంక, ప్రబుచి సుబుమ్ కబుర్ బోదన కెర్తె తంక" మెన బారజిన్ సంగితికయ్,

5 మొత్తుమ్ సంపజల మాన్సుల్ జా కోడుక సర్ద జల, చి బీద సుదల్ క దెకుక మెన కక్క నిసాన్ల మెలె, సైపను మెలొ ఎక్కిలోక; జో బలే నముకుమ్చొ, జోచి పెట్టి దేముడుచి సుద్ది తిలి ఆత్మ పూర్తి కామ్ కెర్తి బుద్ది జోక తయెదె. అన్నె దస మాన్సుల్తె కక్క నిసాన్ల మెలె, పిలివ్, ప్రాకొరుక, నీకానోరుక, తిమోనుక, పర్మెనాన్క, నీకానోరు, జలె, జెర్మున్క యూదుడు నెంజె, గని దేముడుక సంపజా, యూదుల్చి అలవాట్తె బెద మార్పుప కెరన తిలొ. జో దూరి తిలి అంతియొకయ పట్టుమ్చొ మాన్సు.

6 ప్రెజల్ జేవ్ సత్తుజిన్ క నిసాన బారికుల్తె కడ ఆన్తికయ్, జేవ్ ప్రార్దన కెర జోవయించ బోడివొ చడ అదికారుమ్ దిల.

సైపనుక విరోదుమ్ సుదల్ గోస కెర్తిసి

7 జేవ్ పొదులె, ఒగ్గర్ ఒగ్గర్జిన్ మాన్సుల్ దేముడు దిలి యేసుచి

రిసాచి సుబుమ్ కబుర్ నూన సంపజల, జా యెరూసలేమ్ పట్టుమ్తె ప్రెజల్ ఒగ్గర్జిన్ సంపజల, చి దేముడుచ పూజర్లు కి ఒగ్గర్జిన్ సంపజా నిదానుమ్ జల.

8 వడ్డొ సైపను, ప్రబుచి ఆత్మ జోచి పెట్టి తిలి ఒగ్గర్ ప్రేమ సెక్కిచి రిసా, ప్రెజల్ తిలిన్తె యేసుచి అదికారుమ్ దెకయ్తి గుర్తుచ ఒగ్గర్ ఒగ్గర్ వెల్లొ కమొ కెర్లన్.

9 గని యూదుల్తెచ సగుమ్జిన్ 'విడ్డల్ జలస' మెన నావ్ తియన్లి గుంపుచ జవుల. జోవయింక సొంత సబగేర్ తయెదె. జేవ్, వడ్డొ లిలియ దేసిమ్చి కురేనియు పట్టుమ్చ, ఐగుప్తు దేసిమ్చి అలెక్సంద్రియ పట్టుమ్చ, కిలికియ ప్రదేసిమ్చ, ఆసియా ప్రదేసిమ్చ తెన్, కోపుమ్ జా, "తుచి బోదన తప్పుచి కిచ్చొగె" మెన, సైపనుక ఆరి నింద కెర్ల.

10 గని ప్రబుచి ఆత్మ సైపనుచి పెట్టి సికడ్డికయ్, జో బోదన కెర్తెన్తె బుద్ది గ్యానుమ్ ఒగ్గరి. చి జేవ్ కోపుమ్ జలస జీసుక నెత్త లాజ్ జల.

11 జాకయ్ జేవ్ జోవయించి లాజ్చి రిసాచి గోసక గుట్టు తెన్ కిచ్చొ కెర్ల మెలె, వేర మాన్సుల్క తోడు దెరన, " 'మోసి పూర్ముచొచి అత్తి దేముడు దిలి ఆగ్నల్చి రిసా, చి దేముడుచి రిసా ప్రెజల్క కిచ్చొ కిచ్చొ సికడ, ఈంజొ సైపను మోసేక, దేముడుక, దూసుప కెర అస్సె. ఆమ్ సొంత సూస్లమ్' మెన తుమ్ సంగ" మెన జేవ్ తోడు దెరన్ల మాన్సుల్క అబద్దుమ్ సాచి సికడ్డ.

12 జేవ్ కోపుమ్చ మాన్సుల్ దస్సి ప్రెజల్క, వెల్లెల మాన్సుల్క, మోసి తెన్ దేముడు దిలి ఆగ్నల్ సికడ్డొసా సికడ్డన, సికడ్డికయ్, జేవ్ సైపనుతె జా కెర, జోక దెర, సబ వెసితనతె కడ ఆన,

* 6:2 6:2 నెంజల 'ఎత్తి అదికారుమ్ తిలొ దేముడు దిలి సుబుమ్ కబుర్'. 'సుబుమ్ కబుర్' మెలె, ఎత్తి అదికారుమ్ తిలొ దేముడు దొర్లు కెర్తి రచ్చనచి కోడు. జో పాపల్ చెమెంచుప కెర్తెచి రిసాచి కబుర్. యేసు దొర్లు జలొ రచ్చించుప కెర్తెసా జలిన్చి కబుర్. జో అర్చితమ్ జా పాపల్ గెచ్చయ్లి రిసా మాన్సుల్ పరలోకుమ్చి రాజుమ్తె బెదితి అవ్కాసుమ్ దొర్లు జలిన్చి కబుర్.

13 అబద్దుమ్ సాచి సంగితనక టీవో కెల. “ఈంజో మాన్సు కెడ్డోడె తెదొడి ఈంజ దేముడుచి గుడిచి రిసా, మోసీ పూర్గుమ్చో రెగిడ్డి ఆగ్గుల్చి రిసా, అబద్దుమ్ సికడై తత్తయ్.

14 ఈంజో సంగిలిన కిచ్చో ఆవ్ సూన అన్సుమ్ మెలె, ‘నజరేతు గవ్వొచో యేసు, ఈంజ దేముడుచి గుడిక పాడ్ కెర, మోసీచి అత్తి దిల అమ్చ అలవాట్లు మార్పుప కెరు’ మెన ఈంజో సంగితె తత్తయ్” మెన జేవ్ మాన్సుల్ అబద్దుమ్ సాచి సంగిల.

15 గని ఒత్త నబతె వెసిలన ఎత్కిజిన్ సైపనుక చెంగిల్ దెకిలె, జోచి మొకొమ్ కిసి జా అస్సె మెలె, పరలోకుమ్చో దూతచి మొకొమ్చి రితి డిసిలి.

7

సైపను సంగిలి బోదన

1 తెదొడి, “జేవ్ సంగిలి సాచి నత్తిమ్ గె?” మెన ఎత్కిక వెల్లో పూజరి సైపనుక పుసిలన్.

2 సైపను కిచ్చో జబాబ్ దిలన్ మెలె, “ఓ బావుడ్లు, ఓ వెల్లెల మాన్సుల్, అంచి సాచి తుమ్ సూన. పూర్గుమ్, అమ్చో అబ్రాహామ్ పూర్గుమ్చో హారానుతె నే ఉట్ట గెతె అగ్గె, జో మెసాపొతమియతె జితె తిలి పొది, గవురుమ్ తిలో అమ్చో దేముడు జోక డీన కెర,

3 ‘తుయి ఈంజ తుచి దేసిమ్ ముల, తుమ్చ సొంత మాన్సుల్క ముల, వేర దేసిమి ఉట్ట గో. *జా దేసిమి పాచితె ఎదక వాట్టు దెకయ్తె తయిందె’ మెన సంగితికయ్,

4 అమ్చో అబ్రాహామ్ మెసాపొతమియ తిలి జా కల్లియుచి దేసిమ్ ముల దా ఉట్ట గెచ్చ, హారాను దేసిమి గెచ్చ జితె తిలో. జో అబ్రాహామ్చో అబ్బిసి మొర

గెతికయ్, దేముడు జోక ఒత్త తెంతో తెద్రయ్తికయ్, తుమ్ అప్పె జితె దేసిమి ఉట్ట అయ్లో.†

5 గని జో ఇన్నె జితె తిలి పొది, ఏక్ అడుగుచి ఎదిలి ట్రాన్క సొంత మైనంతి రితి, జోక ప్రబు సెలవ్ దెయ్ నాయ్. గని, అబ్రాహామ్క ‡సంతానుమ్ తెదొడి నెంజిలె కి, దేముడు జోక, పడ్డొక ఈంజ దేసిమ్చి బుయి తుచి సొంత ఆస్తి తుకయ్ దా గెలిందె. తుకయ్, చి తుచి పెట్టి జెర్మితనక; తుచి సెకుమ్చక; కెయ్క తెయ్క తతి రితి దా గెలిందె మెన జో ప్రబు సంగిలన్.

6 “దేముడు జోవయింక అన్నె కిచ్చో సంగిలన్ మెలె, తుమ్చి సెకుమ్తె పడ్డొక జెర్మితన ఏక్ కాలుమ్క, చెత్తర్ పుంజో వెర్నులు వేరె దేసిమి సైమ తెన్ జితె తవుల, ఒత్త గొతిమాన్సుల్ జా జివుల.

7 గని జా కాలుమ్క జేవ్క ఏలువ కెర్తి దేసిమ్చక ఆవ్ సిచ్చ కెరిందె. చి సిచ్చ కెర్తి, తుమ్చి సెకుమ్చక ఒత్త తెంతో విడ్డల్ జా, బార్ జా ఇత్తల్ ఉట్ట జా, జియ్ అంక బక్తి కెర్తి తవుల మెన ప్రబు వరుమ్ దా,§

8 అబ్రాహామ్చి సెకుమ్చ మున్సుబోదల్ ఎత్కిజిన్ జో దేముడుచ మాన్సుల్ జితె గుర్తుచి నున్నతి కెరనుక మెన అన్నెక్ *ప్రమానుమ్ దిలో.† జాకయ్, అబ్రాహామ్ ఇస్సాకు జెర్మ అట్టు పొదుల్క జా గుర్తు కెర్తి నున్నతి కెర దిలో. పడ్డొ ఇస్సాకు యాకోబుక ‡పాయిలన్, చి యాకోబు §పుత్తర్పుల్క పాయిలన్. జేవ్ బారజిన్ జలె, అమ్చి సెకుమ్క తొలితోచ వెల్లెల మాన్సుల్ జల.

సైపను సంగిలి యోసేపుచి కత

9 “జలె, జేవ్ బారజిన్తె దెస్సుజిన్ అన్నసీసి యోసేపు మెలో జోవయించో

* 7:3 7:3 ఆదికాండుమ్ 11:31, 12:1-3. † 7:4 7:4 ఆదికాండుమ్ 12:4-8. ‡ 7:5 7:5 ఆదికాండుమ్ 15:5, 7, 18, 17:8, 16-19. § 7:7 7:7 ఆదికాండుమ్ 15:13-14. * 7:8 7:8 అడ్డ † 7:8 7:8 ఆదికాండుమ్ 17:10-14. ‡ 7:8 7:8 ఆదికాండుమ్ 25:26. § 7:8 7:8 ఆదికాండుమ్ 35:22-26.

బావొన్క గోన జా, జా వాట్ అయ్లచి ఐగుప్తు దేసిమ్చో మాన్సు ఎక్కిలోతె *విక గెల. గని దేముడు జోక తోడు తా,

10 జో సేడ్ల సైమల్ ఎత్కి తెంతో రచ్చించుప కెర్లన్. చి ఐగుప్తు దేసిమ్చో పరో రానో, యోసేపుక దెక, చెంగిలో మాన్సు, బుద్ది తిలోసా ఈంజొ” మెన, జోక మెన్సిలన్, చి జోచి గెర్తె ఎత్కిచి ఉప్పిరి, ఒండి రాజిమ్చి ఉప్పిరి కి, ‘ఏలుప కెర్పు’ మెన జోక వెల్లో కెర్లో. ఒత్త రానొక పిట్టవ యోసేపుక కో వెల్లో జతి నాయ్.

11 “జలె, †యోసేపు ఒత్త ఏలుప కెర్లె తతికయ్, ఒండి ఐగుప్తు దేసిమి, జోచి అన్సుసీసి తిలి కనాను దేసిమి కి కరు అయ్లి. చి ఎత్కిజిన్ గొప్ప సైమల్ జల, చి అమ్చ పూర్లుల్క కతిసి కేన్ కి దొర్కు జయె నాయ్.

12 గని, ‘ఒత్త ఐగుప్తు దేసిమి దాన్ తియ అస్తి’ మెన అమ్చో యాకోబు పూర్లుమ్చో నూన తా, దాన్ గెన్న ఆన్తు మెన, పుత్తర్లు జల అమ్చ పూర్లుల్క ఒత్త తెద్రయ్లన్.

13 దొయ్యెరి తెద్రయ్తికయ్, ఆవ్ తుమ్చో బావొది మెన యోసేపు జోవయింక సంగిలన్. చి జా దీసి తెంతో యోసేపుచి కుటుంబుమ్చ మాన్సుల్ రానో జలో పరో రానో తెన్ అలవాట్ జల,

14 చి అబ్బొసి జలో యాకోబుక, జోచి కుటుంబుమ్చ ఎత్కిక, గెర్చ ఎత్కిక, ‘ఇత్తల్ జా కతు. జతు!’ మెన, యోసేపు సంగ తెద్రయ్లన్. యాకోబుచి కుటుంబుమ్చ, గెర్చ, కెత్తిజిన్ జవుల మెలె, డబ్బయ్ పాచ్జిన్.

15 జలె, ‡యాకోబు జోచ మాన్సుల్ ఎత్కిజిన్ తెన్ ఐగుప్తు దేసిమి ఉట్ట గెల. యాకోబు ఒత్త జియ, ఒత్త మొర్లన్. జోచ పుత్తర్లు కి ఒత్త జియ మొర్ల, చి

16 జోవయింతె కో మొర్లె, కనాను దేసిమ్చి ‘సెకెము’ మెలి జేవ్ అగ్గె జితె తిలి బయిలు దేసిమ్తె పీనుమ్ వయన, రోవిల. కేన్ మెన్నె రోవిల మెలె, జా సుట్టు వెండి కాసుల్క ‘హమోరు’ మెలో ఒత్తచో మాన్సుతె అబ్రాహామ్ మెన్సున్ గెన తిలో. జయ్యె మెన్నె రోవిల.

మోసేచి మత్తెలి సైపను సంగిలిసి

17 “జలె, జేవ్ ఐగుప్తు దేసిమి బన జా రమారమి చెత్తర్ పుంజో వెర్పుల్ జలి పొది, ‘ఐగుప్తుతెకి జేవ్ నే ఉట్ట గెతె అగ్గె అబ్రాహామ్క సంగ తిలి దేసిమి అన్నె ఉట్ట గెతి సమయుమ్ జా అస్సి’ మెన దేముడు దెకిలన్. జా సమయుమ్ జా అయ్లి పొది, అమ్చి సెకుమ్చ జేవ్ బారజిన్ పుత్తర్లుల్చ మాన్సుల్ కెత్తిజిన్ జా తిల మెలె, ఒగ్గర్జిన్ జా జెర్మ అస్తి.

18 జేవ్ దస్సి ఒగ్గర్ ఒగ్గర్జిన్ జా గెతికయ్, అగ్గెచ పరో మెల రానల్ మొర్తికయ్, నొవో పరో ఏలుప కెర్లయ్. జో యోసేపుక నేన్లోసా, జోచ మాన్సుల్క విరోదుమ్ జలోసా.

19 జో అమ్చ పూర్లుల్క మోసిమ్ కెర్లన్. కిసి మెలె, ‘జేవ్ జలె ఒగ్గర్జిన్ జా అమ్క జినుల’ మెన, ఎత్కిక మారుక మెన, జోవయించ నొవర్ జెర్మిల బోదల్క ‘దెర్ను సేడ్డు’ మెన, అబ్బదింసిచి అత్తి పరో సైమ కెర దిలన్.

20 “జేవ్ పొదులె *మోసే జెర్మిలన్. దేముడు జోక ఒగ్గర్ ప్రేమ దెకిలన్, చి తిన్ని జొన్నొ ఎద జోవయించ అబ్బదింసి కిసి గె గెరి లుంకడ పోసిల.

21 గని పడ్డో, జోక అన్నె లుంకడుక నెత్తకెర, అబ్బదింసి బార్ కెర్తికయ్, పరోచి దువిసి జోక ఉక్కుల గెరి నా, ‘సొంత పూత్తు’ మెలి రితి దెక, జోక పోసిలి.

* 7:9 7:9 ఆదికాండుమ్ 37 అద్యయమ్. † 7:11 7:11 ఆదికాండుమ్ 41-50 అద్యయల్. ‡ 7:15

7:15 ఆదికాండుమ్ 46 అద్యయమ్. § 7:17 7:17 17వ ఉప్పిరిచి తత్తి టాన్: నిర్గమకాండుమ్, లేవీయకాండుమ్ నాన్యకాండుము, ద్వితియోపదేశ కాండుము (నిర్గ 1). * 7:20 7:20 నిర్గమకాండుమ్ 2:1-10.

22 జా పోస, ఐగుప్తు దేసిమ్చ గ్యనుమ్ ఎత్కి పండితుల్చి అత్తి సికడ్డి, చి వడ్డిలె, జో ఒగ్గర్ తెలివి తెన్ లట్టబెదె, కేన్ కామ్ కెర్లె కి, తెలివి నిదానుమ్ కెరెదె.

†మోసే తప్పు కెర బయిలు దేసిమి ఉట్ట నిగిలిసి

23 “జలె, మోసేక దొన్ని విసా వెర్పుల్ జలి పొది, ‘అంచ బావుడ్లు జల అమ్చ ఇస్రాయేలుల్తె గెచ్చు దెకిన్దె’ మెన ఉచర్లన్.

24 జో గెలన్, అన్యె, జోవయింతె ఎక్కిలోక ఐగుప్తు దేసిమ్చొ ఎక్కిలో పెట్టిసి దెకిలన్. దెక, జో దెబ్బల్ కయ్లోసాక తోడు గెచ్చు, దెబ్బల్ పెట్టోసాక పెట మార్లన్.

25 దస్సి కెర కిచ్చొ ఉచర్లొ మెలె, అంక లోకుమ్ కెర్లొ అమ్చొ దేముడు జోచి అత్తి అమ్క రచ్చించుప కెరెదె” మెన అమ్చ ఇస్రాయేలులు అర్దుమ్ కెరనుల, మెన ఉచర్లొ, గని దస్సి ఉచర్తి నాయ్.

26 అన్నెక్ దీసి, మోసే జా వాటు అయ్లె, ఇస్రాయేలులు దొగుల పెట్టపుట్టి జా అస్తి మెన దెక కెర, “సేంతుమ్ కెరయిందె” మెన ఉచర పాసి జా, కిచ్చొ మెలొ మెలె, “బావుడ్లు, తుమ్ ఎక్కి సెకుమ్చ మాన్పుల్, తుమ్ కిచ్చొక ఎక్కిలో తెన్ ఎక్కిలో జట్టి జా అన్పున్?” మెన పుసిలన్.

27 పుసితికయ్, తప్పు కెర్లొసా మోసేక సొడి పెలవ దా కిచ్చొ మెలన్ మెలె, తుయి కొన్సొ? అమ్చి ఉప్పిరి తుక అదికారుమ్ నాయ్, అమ్క తీర్పు కెరుక తుక సెక్తి నాయ్.

28 కాలి జో ఐగుప్తుచొ మాన్పుక తుయి పెట మార్ల దెబ్బల్ అంకయ్ ఆజి పెట్టె గె? మెన గగ్గొల్ జలొ.

29 దస్సి సంగితికయ్, ‘అంక మారుల’ మెన, జా ఐగుప్తు దేసిమి తంక బియఁ కెర, మోసే ఉట్ట నిగ, దూరి తిలి బయిలు తిలి మిద్యను మెలి దేసిమి ఉట్ట గెచ్చు, ఒత్త జితె తిలన్. ఒత్త తా, పెండ్లి జా దొగుల పుత్తర్పుల్క పాయిలన్.

‡దేముడు మోసేక డీసిలిసి
30 “అన్నెక్ దొన్ని విసా వెర్పుల్ గెతికయ్, ఏక్ దీసి, మోసే జా బయిలు టాన్చి సీనాయి డొంగె తతికయ్, ఒత్త మాములుమ్ కంటొ రూకు అస్సె, రుక్కి ఆగి లగుక దెర్లి. ఆగి లగితొ జా రూకు తెడి, దేముడుచ దూత రితొ జా మోసేక డీసిలన్.

31 మోసే దెక, ఆచారిమ్ జలొ. సరిగా దెకుక మెన ఇదిల్ పాసి గెచ్చుక దెర్లె, కిచ్చొ సూన్లొ మెలె,

32 ‘ఆవ్ తుచ పూర్లుల్చొ దేముడు. ఆవ్, అబ్రాహామ్చి, ఇస్సాకుచి, వడ్డె యాకోబుచి, దేముడు.’ మెన సంగ, దేముడుచి అవాడ్ అయ్లి. దస్సి జతికయ్, మోసే బియఁ, అద్దుర్ జా, దెకుక దయిరిమ్ జలొ నాయ్.

33 తెదొడి, ప్రబు జోక, ‘తుచ జోడ్లు కడను. తుయి టీవొ జలి టాన్ ఒగ్గర్ సుద్ది అస్సె.

34 జేవ్ ఐగుప్తు దేసిమ్చ అంచ ప్రెజల్క కెర్లొ అల్లర్ సైమల్ ఆవ్ దెక అస్సి. జేవ్ ఏడ్డిసి సూన అస్సి, చి జోవయింక విడ్డల్ కెర బార్ కెరయిందె మెన, ఆవ్ ఉత్త జా అస్సి. అప్పె, జే! జా కామ్చి రిసా ఐగుప్తు దేసిమి తుక అన్నె తెద్రయిందె.’ మెన ప్రబు జలొ దేముడు మోసేక సంగిలన్.

35 “జో క్రిమోసేక జోవయించ మాన్పుల్, ‘అమ్చి ఉప్పిరి తుక అదికారుమ్ నాయ్. అమ్క తీర్పు కెరుక తుక సెక్తి నాయ్’ మెన అగ్గె సంగ తిల, గెద. గని జోవయింక ఏలుప కెరుక

† 7:22 7:23 23వి ఉప్పిరిచి తత్తి టాన్: నిర్గమకాండుమ్ 2:11-22. ‡ 7:29 7:30 30వి ఉప్పిరిచి తత్తి టాన్: నిర్గమకాండుమ్ 2:23, 3 అద్యయిమ్ ఎద. § 7:35 7:35 నిర్గమకాండుమ్ 5-14 అద్యయల్.

కి, జోవయింక విడ్డల్ కెర బార్ కెరుక కి మెన, రూకెతె డీసిలో దూత పోలిక జలోసాచి అత్తి దేముడు జోకయి ఆడ్ర దా తెద్రయ్లో.

36 ప్రబుచి అదికారుమ్ తెడి జోవయింక విడ్డల్ కెర, బార్ కెర, వాట్ దెకయ్తె తిలి పొది, ప్రబుచి సెక్తి తెన్ ప్రబు సంగిల కిచ్చొ కిచ్చొ వెల్లో కమొ మోసే కెర్లన్. ఐగుప్తు దేసిమ్క నే ముత్తె అగ్గె కి, పడ్డొ 'ఎరన' సముద్రుమ్తె, పడ్డొ జేవ్ ప్రెజల్ ఎత్రిజిన్ తెన్ జేవ్ దొన్ని విసా వెర్సుల్ జా బయిలు దేసిమి బుల్తె తిలి పొది కి.

37 "జలె, దేముడు అంకయ్ కీసి తెద్రయ్లన్ గే, జోచ కబుర్లు సూనయ్తి రిసా, జోచి కామ్ జర్లు కెర్తి రిసా, తుమ్చ ఇస్రాయేలుల్తెచొ అన్నెక్లొక పడ్డొక తెద్రవ టీవో కెరెదె" మెన అమ్చ పూర్లుల్క సంగ తిలోసా జో మోసేయి.

38 అమ్చ పూర్లుల్ జల ప్రెజల్ ఎత్రి. జట్టు తెన్ జా బయిలు దేసిమి బుల్తె తిలి పొది, దేముడుచొ దూత *సినాయి డొగ్గె అన్నె డీస, మోసే తెన్ లట్టబ్లన్. చి దూతక చి అమ్చ పూర్లుల్క జో మోసే మదెనె జా, అమ్క దెంక మెన దేముడు సాంత రెగిడ్ల ఆగ్గుల్, జీవ్ దెత ఆగ్గుల్, జోతె నజన్లన్.

39 "గని అమ్చ పూర్లుమ్చ, జో సంగిలి కోడు సూనుక నెస కెర, జోక దూరి కెర్తి రితి జా, జేవ్ ముల దిలి †ఐగుప్తు దేసిమి తిలిన్క అన్నె కోరొప జల,

40 అన్నె, మోసే డొగ్గె తెంతో నే ఉత్త జెతె అగ్గె, అహరోను మెలో మోసేచొ అన్నెన్తె గెచ్చు కెర, అమ్క దేముడ్లు జా అమ్చి పురైతో గెచ్చు అమ్క వాటు దెకయ్తి రిసా, అమ్క బొమ్మల్ తెయార్ కెరు. అమ్క ఐగుప్తు తెంతో కడ ఆన్లో

జో మోసే కేనె ఉట్ట గెచ్చు అన్నె గే, అమ్ నేనుమ్ మెన ప్రెజల్ సంగిల.

41 జేవ్ పొదులె కిచ్చొ కెర్ల మెలె, వస్సా పిల్లచి రితిచి బొమ్మ వీక్ తెయార్ కెర, జా బొమ్మక జోకర బలి దిల, చి జేవ్ కెర్లన్చి రిసా సర్ల కెరన్ల.

42 జాచి రిసా, జేవ్ పొద్దుక, జోనుక, సుక్కల్క జోకర్తి ఇస్టుమ్ తిలె, దస్సచక జోకర్లు! మెన దేముడు జోవయింక ముల, సిచ్చు దిలన్. దస్సి జలిన్చి రిసా, జోవయింక కబుర్లు రెగిడ్లి దేముడుచి కొడెతె రెగ్గవ అన్నె.

ఓ ఇస్రాయేలుచి నెకుమ్చ, తుమ్ బయిలు దేసిమి బుల్తె తిలి పొది, అంకయి గొరెల్ గట్ర కండ బలి దెతె తిలదు గె?

43 నాయ్. 'దేముడ్లు' మెన వేరచక జోకరుక కోరొప జా, 'మొల్లొక' దేముడు మెన, గుడి బంద జోకర్లదు. సుక్కొ గుర్తు తిలో రొంపాయను మెలోసొక దేముడ్లు మెన జోకర్లదు. దస్సచచ బొమ్మల్ కెర జోకర్లదు. తుమ్ దస్సి కెర్తి రిసా, బబులోను దేసిమి ఒత్తల్తో తుమ్ సర్ల నెంతె తతి రితి, తుమ్క ఒత్తచ మాన్సుల్ ఏలుప కెర్తు మెన, జేవ్ కడ నెత్తు, మెన సిచ్చు దెయిందె"

మెన దేముడు రెగ్గ సిచ్చు దిలన్.

44 "జలె, జా బయిలు దేసిమి అమ్చ పూర్లుమ్చ బుల్తె తిలి పొది ఇదిలిసి దేముడుచి గుడి తిలి రితి, టంబుగుడ్డక తెయార్ కెర్తి దేముడుచి ‡గుడి ముక్కిమ్క జోవయింతెన్ తిలి. ఇసి తెయార్ కెర" మెన దేముడు మోసేక కిచ్చొ సంగిలన్ గే, జో సంగిలి పోలిక, జో సంగిల సామన్లుక తెయార్ కెర్ల.

45 ఒత్త తెంతో, మోసే కీమొర యెహోసువ మెలోసా వెల్లో జలి పొది, అమ్చ పూర్లుమ్చ బయిలు దేసిమ్క

* 7:38 7:38 నిర్ణమకాండుమ్ 19, 20 అద్యయల్, 24:12, 31:18. † 7:39 7:39 నిర్ణమకాండుమ్ 32 అద్యయమ్. ‡ 7:44 7:44 నిర్ణమకాండుమ్ 24:10-31 అద్యయమ్ ఎద. § 7:45 7:45 ద్వితియోపదేశ 34 అద్యయమ్. * 7:45 7:45 యెహోసువ 1-6 అద్యయల్.

జీన ఈంజ దేసిమి ఉట్ట అయ్ల.
 *దేముడు తోడు తతికయ్, ఒత్త జితె
 తిల వేర వేర సెకుమ్లుచ మాన్సుల్క
 అమ్చ పూర్గుమ్చ యుద్దుమ్ కెర ఉదడ
 గెల. తెదొడి కి, అమ్చ పూర్గుమ్చ జా
 గుడి వయ ఆన్ల. †ఒత్త తెంతో, అమ్చొ
 పూర్గుమ్చొ దావీదు రానొ తిలి ఎదక కి
 జయ్యి గుడితె దేముడుక బక్తి కెర్తె తిల.

46 జో దావీదుక దేముడు ప్రబు
 ప్రేమ తిలో, చి యాకోబు బక్తి కెర్తె తిలో
 దేముడు ప్రబు కెయ్క తెయ్క తతి
 రితి దేముడుచి గుడి ఆవ్ జవున్
 బందిందె మెన దావీదు ఆస జా ఉచర
 తిలో

47 దసాచొ బందుక మెన జో ప్రబు
 సెలవ్ దెయె నాయ్, చి దావీదుచొ
 పుత్తుసి ‡సాలొమోసు రానొ జలి పొది,
 జొయ్యి బందిలో.

48 “గని, ఎత్కిచి కంట వెల్లో తిలో
 అమ్చొ దేముడు ప్రబు కేనె జితయ్
 మెలె, మాన్సు తెయార్ కెర్ల గుడితె
 తయె నాయ్. జోచి కబుర్లు సంగిలో
 పూర్గుమ్చొచి అత్తి రెగిడ్లి రితి;

49 పరలోకుమ్ అంచి సిజాసనుమ్.
 బూలోకుమ్ అంచ చట్టో
 నుదితి పొద్రో. జాకయ్, అంచి
 విలువచి దేముడుచి గుడి
 తూమ్ కీసి బందితె? అంచి రిసా
 గేర్ బందిలె, ఎక్కి ఒత్త తయిందె
 గె?

50 పరలోకుమ్ బూలోకుమ్ ఎత్కి అచ్చి
 జెర్మయ్లయ్,
 మెన, ఎత్కిచి కంట వెల్లో తిలో అమ్చొ
 ప్రబు రెగ్ల అస్సె.” మెన జోవయింక
 పరిచ్చ కెర్ల వెల్లెల మాన్సుల్క సైపను
 బుద్ది సంగిలన్.

51 “పడ్డె జోక పరిచ్చ కెర్ల జేవ్ వెల్లెల
 మాన్సుల్క సైపను, తుమ్ రాడ్ జీవ్చ
 మాన్సుల్, దేముడు సంగిలి సుద్ది గుర్తుచి
 సున్నతి అమ్ కెరన అస్సుమ్ మెన తుమ్

సంగితను, గని జా ఎత్కి తుమ్క కామ్క
 నెంజె. కిచ్చొక మెలె, తుమ్చి పెట్టి
 సుద్ది జసు నాయ్, తుమ్చ కానొ సూసుక
 నెసితి, చి దేముడుచి సుద్ది తిలి ఆత్మ
 సికడ్డిసి తుమ్ ఒప్పున్ నాయ్. తుమ్చ
 పూర్గుమ్చ కీసి పాపుమ్ కెర్ల గే, తుమ్ కి
 దస్సి.

52 జేవ్ పొదులె, దేముడు కచి
 కచి అత్తి కబుర్లు తెద్రయ్లె, తుమ్చ
 పూర్గుమ్చ జోవయింక అల్లర్ కెరుక,
 జో తెద్రయ్లనతె కక్క నే పిట్టె. పడ్డె,
 ‘పరలోకుమ్చి పున్నిమ్ తిలో క్రీస్తు
 రచ్చించుప కెర్లొసా జెంక అస్సె’ మెన
 జోవయితె కో సంగిల గే, జేవ్ తుమ్చ
 పూర్గుమ్చ జోక మారుక. దస్సి కి, జో
 క్రీస్తు జెతికయ్, తుమి జోక నెస, గోస
 కెర, జోక మార గెలదు.

53 ‘పైజెల్క సికడ్డు’ మెన దేముడు
 దూతలచి అత్తి తుమ్కయ్ జోచ ఆగ్గుల్
 దిలన్, గని జోచ ఆగ్గుల్ రితి తుమ్
 ఇండుక నెస, దస్సి కెర్లదు” మెన అన్నె
 సంగిలన్.

సైపనుక పత్రల్ గల మార్లిసి

54 జేవ్ వెల్లెల మాన్సుల్ ఈంజేవ్
 కొడొ నూన, సైపనుచి ఉప్పిర్చి జేవ్చి
 కోపుమ్క రకుక నెత్త కెర, దంతో చప్లన్.

55 జో, మాత్రుమ్, జోచి పెట్టి
 దేముడుచి సుద్ది తిలి ఆత్మ బెర
 తతికయ్, ఆగాసుమ్ పక్క చెంగిల్ దెక,
 కిచ్చొ దెకిలన్ మెలె, దేముడుచి ఉజిడి
 దెకిలన్, చి జో దేముడుచి ఉజెతో పక్క
 యేసు టీవోజ దెకిలన్.

56 జా దెక సైపను, “అదె, పరలోకుమ్
 ఉగ్గి జలి రితి దెకితసి మెలె, మాన్సు జా
 జెర్మన్ అయ్లో క్రీస్తు రచ్చించుప కెర్లొసా
 దేముడుచి ఉజెతో పక్క టీవోజ అస్సె.”
 మెన సంగిలన్.

† 7:45 7:45 సమూయేలు దొన్నిచి పుస్తకుమ్ 7:1-17. ‡ 7:47 7:47 రానల్ మొదొల్ పుస్తకుమ్ 6 అద్యయిమ్.

57 జో దస్సి సంగితికయ్, జోవయించి కోపుమ్చి ఒర్న దా, జేవ్చి కంగ్గొ డంకన, జట్టు తెన్ జోచి ఉప్పిరి నిగ జా జోక దెర్ల.

58 జోక పట్టుమ్ తెంతో పెలవ దా బార్ కెర, జోక పత్రల్ గల మారుక దెర్ల. సాచి సంగ తిలస జోక పత్రల్ గలిలీనతె బెదిల. పత్రల్ గలుక మెన, జేవ్చ ఉప్పిర్చ పాలల్ కడన కెర, సాపులు మెలో ఉబెడొ ఎక్కిలోచి చట్టె తిల.

59 జేవ్ మాన్సుల్ పత్రల్ గల మార్తె తతికయ్, సైవను ఇసి మెన ప్రార్దన కెర్లన్. “ప్రబు జలో ఓ యేసు, అంచి జీవు తూయి తుచితె కడ నే” మెన కెర,

60 మొగ్రల్ టొక, గట్టిజ అవాడ్ తెన్ ఒర్న దా అన్సె, “ప్రబువ, ఈంజేవ్ అప్పె కెర్తి పాపుమ్ ఇన్నెయింక చెమించువ కెరు!” మెన ప్రార్దన కెర మొర గెలన్.

8

1 సైవను మొర్లిన్తె సాపులు తిలన్. ‘మొర్ను’ మెన జో కి ఒప్పున తిలో.

నంపజలస చెదుర్పు జా వేరతె ఉట్ట గెలిసి

జలె, జా దీసి తెంతో, యెరూసలేమ్ పట్టుమ్తె యేసుక నంపజలస మొత్తుమ్క నంపనెంజిల యూదుల్ ఒగ్గర్ ఒగ్గర్ అల్లర్ కెరుక దెర్ల. అల్లర్ కెర జోవయింక ఉదడ్డికయ్, నంపజలసతె ఒగ్గర్జిన్ చెదుర్పు జల. చెదుర్పు జా ఒండి యూదయ ప్రదేసిమి చి సమరయ ప్రదేసిమి గెల. యేసుచ బారికుల్, మాత్తుమ్, యెరూసలేమ్తె తాఁ గెల.

2 జా మదెనె, ప్రబుక సత్తిమ్ తిల యూదుల్ సగుమ్జిన్ సైవనుక రోవిల, ఏడుకులు జా ఒగ్గర్ దుకుమ్ తెన్ రోవిల.

నంపజలసక సాపులు ఒగ్గర్ ఒగ్గర్ అల్లర్ కెర్తె తిలిసి

3 సాపులు, మాత్తుమ్, యెరూసలేమ్తె క్రీస్తుక నంపజలసచి సంగుమ్క పాడ్ కెరుక ఉచర, జోవయింక ఒగ్గర్ ఒగ్గర్

అల్లర్ కెరుక దెర్లన్. జోవయించ గెరల్ ఎత్తితె గెచ్చు, పెన, జోవయించ మున్సుబోదల్క తేర్బోదల్క, ఎత్తిక దెర, జేల్తె గలయ్లన్.

4 చెదుర్పు జల యేసుప్రబుక నంపజలస, జలె, కిచ్చొ కెర్తె తిల మెలె, జోచి రిసాచి సుబుమ్ కబుర్ సూనయ్తె తా బుల్తె తిల.

5 తెదొడి బారజిన్ బారికుల్తె తిలో పిలివ్ మెలోసా, సమరయ ప్రదేసిమిచి పట్టుమ్ ఏక్తె గెచ్చు, యేసుక్రీస్తు, ‘దొర్కు జలో రచ్చించువ కెర్తొసా జోయ్యి’ మెన ప్రెజల్క బోదన కెర్తె తిలన్.

6 ఒత్తవ ప్రెజల్ జోచి బోదన సూన్స, అన్సె, జోచి అత్తి జర్గు జల యేసుప్రబుచి నావ్ తెన్ వెల్లో కమొ దెక, ఒగ్గర్జిన్ ప్రెజల్ ఎక్కి ప్రేమ జా, జో సంగిలి బోదనక నంప కెర, యేసుక నంపజా గెల.

7 కీస కమొ పిలివ్చి అత్తి జర్గు జల మెలె, బూతల్క ప్రబుచి నావ్ తెన్ ఉదడ్డె, జేవ్ బూతల్ ఒర్నువ జంక నెత్త కెర, గట్టిజ ఒర్న దా, పూర్తి ఉట్ట గెల. పడ్డొ ఉట్టక నెత్తిర్ల మాన్సుల్, సొట్ట మాన్సుల్, చెంగిల్ జల.

8 జాకయ్ జా ఒండి పట్టుమ్తె ఎత్కిజిన్ సర్ల జల.

9 ఏక్ పట్టుమ్తె సీమోను నావ్ తిలో మాన్సు జా. జో అగ్గె, జా పట్టుమ్తె, మంత్తుమ్ కెర్తన కిచ్చొ కిచ్చొ మాయచ గారెడ్లు కెర్తె తిలన్. కిచ్చొ కిచ్చొ వెల్లో కమొ కెర, ‘ఆవ్ వెల్లో’ మెనన, సమరయ ప్రదేసిమిచ ఎత్కిజిన్క ఆచారిమ్ కెరెదె.

10 జోచ కమొ దెక, “దేముడుచి వెల్లి సెక్తి తిలోసా ఈంజొ” మెన, బాల వెల్లో జా ప్రాంతుమ్చ ఎత్కిజిన్ జోక నంపజా తిల.

11 కిచ్చొక జోక దస్సి నంపజా మోసిమ్ జా తిల మెలె, జో ఒగ్గర్ వెర్పులు సయ్తాన్చ దస కమొ కెర కెర జోవయింక ఆచారిమ్ కెర్తె తిలన్.

12 గని, దేముడుచి *రాజిమ్చి రిసా, యేసుక్రీస్తుచి †అదికారుమ్చి రిసా, పిలివ్ ప్రజల్ క బోదన కెర్తె తతికయ్, జోచ కొడొక సంపజా గెచ్చు కెర, తేరబోదల్ కి మున్నుబోదల్ కి, బాప్తిసుమ్ నజన్.

13 సయ్తాన్చ కమొ కెర్తొ జో సీమోసు కి సంపజా, బాప్తిసుమ్ నజన, పిలివ్చి పట్టి బులుక దెర్లన్, అన్నె, యేసుప్రబుచి అదికారుమ్ తెన్ కెర్ల వెల్లో కమొ, జొర్డొల్ బాదల్ జల మాన్సుల్ చెంగిల్ జలిసి దెక దెక, జో కి బల్ ఆచారిమ్ జలో.

పేతురు యోహానులుక సమరయతె తెద్రయ్లీసి

14 జలె, సమరయచ మాన్సుల్ దేముడు దిలి యేసుప్రబుచి రిసాచి సుబుమ్ కబుర్ సూన సంపజా అస్తి మెన యెరూసలేమ్తెచ బారజిన్ బారికుల్ సూన కెర, జోవయింతె గెచ్చు దెకుత్ మెన, పేతురుక చి యోహానుక తెద్రయ్లె.

15 జేవ్ దొగుల ఒత్త పాచ కెర, సంపజలనక 'దేముడుచి సుద్ది తిలి ఆత్మ జేవ్చి పెట్టి దొర్కు జవున్' మెన ప్రార్దన కెర్ల.

16 కిచ్చొక మెలె, తెదొడి ఎద ఎక్కి యేసుప్రబుచి నావ్ తెన్ పానితె బాప్తిసుమ్ నజన తిల. జోచి ఆత్మచి నావ్ తెన్ నేతయ్, చి ఆత్మసెక్తి జేవ్క దొర్కు జంక నేతయ్.

17 జలె, తెదొడి పేతురు చి యోహాను జేవ్ సంపజల ప్రజల్ ఎత్కిజిన్ ఎత్కెక్లక బోడి చడిల, చి దేముడుచి సుద్ది తిలి ఆత్మసెక్తి జోవయింక దొర్కు జలి.

18 జలె, 'యేసుచ బారికుల్ బోడి చడ్లెగిన, సంపజల మాన్సుల్క దేముడుచి సుద్ది తిలి ఆత్మ దొర్కు జతయ్' మెన మంత్రుమ్ కెర్తె తిలో సీమోసు దెక కెర,

19 "అంక కి జా సెక్తి దా, డబ్బుల్ దెయిందె. ఆవ్ కి కక్క బోడి చడిందె గే, జోక కి దేముడుచి సుద్ది తిలి ఆత్మసెక్తి దొర్కు జలి రితి, జా సెక్తి అంక దా" మెన పేతురుక చి యోహానుక సీమోసు సంగిలన్.

20 సంగితికయ్, పేతురు, జోక "డబ్బుల్ దిలె దేముడు దెతి జోచి సుద్ది తిలి ఆత్మసెక్తి వరుమ్ గెనుక జయెదె' మెన తుయి ఉచర్లి రిసా, తుచి డబ్బుల్ తుచి తెన్ నాసెనుమ్తె గెన్ను!

21 తుచి పెట్టి దేముడు తెన్ సత్తిమ్ జంక నాయ్, చి జోచి ఈంజ కామ్తె తుయి బెదుక జయె నాయ్.

22 తుయి ఉచర్లి వెల్లి ఈంజ పాపుమ్ చెమించ్చుప జంక తుయి కోర్వ జతసి జలె, జోచి దయ తిలె తుక రచ్చించ్చుప కెర్ను మెన, తుయి కెర్లి గార్ కామ్ ముల దా, పెట్టి వూర్ది దుకుమ్ జా జోక ప్రార్దన కెర సంగు. జో కిచ్చొ కెరెదె గే జోచి దయ.

23 సయ్తాన్చ పాపుమ్బుద్ది అప్పెక తుచి పెట్టి ఏలుప కెర్తయ్, అప్పెక తుచి పెట్టి ఆసల్ గోసల్ అస్తి మెన ఆవ్ దెక్తిసె" మెన పేతురు సీమోనుక సంగిలన్.

24 జలె, సీమోసు బియఁ గెచ్చు కిచ్చొ మెన బతిమాల్పా జా సంగిలన్ మెలె, "తుయి సంగిలి సిచ్చు అంచి ఉప్పీర్ నే జెతు మెన తుమి ప్రబుక ప్రార్దన కెరు." మెన సంగిలన్.

25 పేతురు, యోహాను, జలె, యేసుప్రబుచి రిసా సాచి సంగ, జోచి సుబుమ్ కబుర్ సూనవ కెర, ఒత్త తెంతొ అన్నె బార్ జా, సమరయచ ఒగ్గర్ ఒగ్గర్ గవ్వెల గెచ్చు, బుల బుల, ప్రబుచి సుబుమ్ కబుర్ సంగ బోదన కెర్తె తా, యెరూసలేమ్తె అన్నె పాచ అయ్లె.

పిలివ్ ఐతియొపీయు దేసిమ్చొ మాన్సుక బోదన కెర్లిసి

* 8:12 8:12 'ఎత్కి అదికారుమ్ తిలో దేముడుచి రాజిమ్' మెలె, 1 జోవయింక సంపజల మాన్సుల్చి పెట్టి జో ఏలుప కెర్లిసి, 2 జోవయింక ఆత్మసెక్తి ఈంజ లోకుమ్తె కామ్ కెర్లిసి, 3 ఈంజ ఉగుమ్ మార్పుప జలె జో ఎదార్లుమ్ ఈంజ లోకుమ్తె ఏలుప కెర్లిసి, చి 4 వరలోకుమ్తె జో ఏలుప కెర్లిసి. † 8:12 8:12 నెంజిల్ 'నావ్'.

26 మదెనె, ప్రబుచో దూత ఎక్కిలో పిలివ్తె జా కెర, “తుయి ఉట్ట ఇన్నె తెంతో బార్ జా, దచ్చెన పక్కచి వట్టె, మెలె యెరూసలేమ్ తెంతో గాజా పట్టుమ్ ఎద పావితీ వట్టె గో” మెన సంగిలన్.

27 పిలివ్ నూన, బార్ జా, జా వట్టె గెలన్. జా వట్టె గెతె తతికయ్, ఐతియొప్పీయు దేసిమ్చో ఆండెరో జా వాట్ జెతె అస్సె. జో ఐతియొప్పీయు దేసిమ్చి ‘కంధాకె’ మెలి రానిచో ఆదికారి, డబ్బుల్ దెకితో ఆదికారి జా అస్సె. దేముడుక బక్తి కెరుక మెన, జో యెరూసలేమ్తె జా తిలో.

28 అప్పె అన్నె జోచి సొంత దేసిమి ఉట్ట గెతె అస్సె. జోచి రదుమ్తె వెన తా, దేముడుచ కబుర్లు సంగిలో యెసయా పూర్లుమ్చోచి అత్తి రెగిడ్డి పుస్తకుమ్ సదు కెర్తె అస్సె.

29 జలె, ప్రబుచి ఆత్మ పిలివ్చి ఆత్మతె, “తుయి దెకితి రదుమ్క పాసి గెచ్చ దెకు” మెన సంగితికయ్,

30 పిలివ్ జా రదుమ్తెచో నిగ గెచ్చ, యెసయా పూర్లుమ్చోచి అత్తి రెగిడ్డిసి పుస్తకుమ్ జో సదు కెర్తిసి నూన కెర, జోక, “తుయి సదు కెర్తిసి తుక అర్దుమ్ జెతయ్ గె?” మెన పుసిలన్.

31 “కో జవున్ అంక అర్దుమ్ సంగిలెకయ్ అంక కీన్ అర్దుమ్ జయెదె?” మెన జో సంగిలన్, చి ‘అర్దుమ్ సంగున్’ మెన, రదుమ్తె పిలివ్క వెగడ వెసడ్లన్.

32 దేముడుచి కేన్ కోడు జో సదు కెర్తె తిలో మెలె, “మెండక కండ బలి కెర్తి రిసా ఉడడ నెత్తి రితి జోక ఆన్ల, నెంజిలె రోమల్ కత్రయ్తి మొక్కె మెండెప్పిల్ల కీసి జమ్న తయెదె గె దస్సి ఈంజో కి చోడి డంకన తుక్కె తయెదె.

33 ఇన్నెచి విలువ కడ్ల, చి ఇన్నెచి రిసా సరిగా తీర్పు జతి రితి ఒప్పితి నాయ్. ఇన్నెక ‘బోదల్ పాయ్లన్’ మెన కీసి సంగుక జయెదె? ఇన్నెక ఈంజ బూలోకుమ్తె జేవ్ మార్ల!”

34 జో ఆండెరో, పిలివ్క కిచ్చో మెన పుసిలన్ మెలె, “దేముడు ప్రబుచ కబుర్లు సంగితో జో పూర్లుమ్చో కచి రిసా ఇసి సంగితయ్? జోచి సొంతచి రిసా గే, కేన్ జవున్ వేర మాన్సుచి రిసా గె?” మెన పుసితికయ్,

35 పిలివ్ చోడి పుట్టవ, జో ఆండెరో సదు కెర్తె తిలి కోడుచి అర్దుమ్ తోలితో సంగ, యేసుచి రిసాచి సుబుమ్ కబుర్ ఎత్తి జోక బోదన కెర్లన్.

ఆండెరో బాప్తిసుమ్ నజన్లసి

36 తెదొడి, జేవ్ దొగుల వట్టె గెతె తా పాని గాడు ఏక్ దెకిల. దెక, “అదె, పాని! ఆవ్ బాప్తిసుమ్ నజనుక కిచ్చో అడ్డు కిచ్చోగె, నాయ్ గద?” మెన జో ఆండెరో సర్ల జా సంగిలన్.

37 †పిలివ్ జోక “తుయి యేసుప్రబుక పెట్టి పూర్తి నంపజలది మెలె, బాప్తిసుమ్ నజనుక జయెదె.” మెన సంగితికయ్, “యేసుక్రీస్తు దేముడు ప్రబుచో పుత్తుని, కీజలో దొర్కు జలో రచ్చించుప కెర్తొసా జయెదె మెన ఆవ్ నంపజతసి.” మెన ఆండెరో సంగిలన్.

38 తెదొడి రదుమ్క జో టీవో కెర, పిలివ్ ఆండెరో దొగుల ఉత్త పానితె ఉత్తిర్ల, చి జో ఆండెరోక పిలివ్ బాప్తిసుమ్ దిలన్.

39 తెదొడి, జేవ్ పానితె తెంతో అన్నె బార్ జతికయ్, *ప్రబుచి ఆత్మ పిలివ్క దెర నిలన్, చి ఆండెరో జోక అన్నె నే దెకిలన్. జో ఒగ్గర్ సర్లసంతోసుమ్ తెన్ సొంత దేసిమి ఉట్ట గెలన్.

† 8:37 8:37 గ్రీకు బాస తెన్ ఈంజ మత్తెలి తోలితో రెగిడ్ల సగుమ్ పుస్తకల్తె 37 నంబరచి కోడు తయె నాయ్.

§ 8:37 8:37 జలో... రచ్చించుప కెర్తొసాచి కోడు దస్సి తయె నాయ్, గని జా అర్దుమ్ ఒత్త తయెదె. * 8:39

8:39 ‘ప్రబుచి ఆత్మ పిలివ్క దెర నిలన్’ నెంజిలె జో మంత్రిచి వెట్టి ప్రబుచి ఆత్మ బెర్తికయ్, జో దెతి సక్తివరుమ్ జోవయింక దొర్కు జలి, చి ప్రబుచి దూత పిలివ్క కడ నిలన్, చి....

40 పిలివ్ ఒత్త తెంతో అజోతు మెలి పట్టుమ్తె డీసిలన్. ఒత్త డీస కెర బార్ జా, ఉత్తర పక్క గెతి వట్టె గెచ్చు గెచ్చు, ఎత్కి పట్టలె గెచ్చిలె ప్రబుచి సుబుమ్ కబుర్ సూనవ సూనవ, క్షెసరియ పట్టుమ్తె పాచిలన్.

9

యేసుక నంపజలసక సావులు అల్లర్ కెరై తిలిసి

1 స్తైవనుక మార్గిన్తె తెదొడి బెద తిలో సావులు, ఈంజ మదెనె కిచ్చొ కెరై తిలో మెలె, యేసుప్రబుక నంపజా జోవయించ *సిస్సుల్ జలసక 'మారిందె' మెన బియడ్తె తిలో. జలె, కిచ్చొ కెరై మెలె, యెరూసలేమ్తె ఎత్కిక వెల్లో పూజరితె గెచ్చు కెర,

2 "దమస్కు పట్టుమ్తెచ అమ్చ యూదుల్చ సబ్బ గెరల్చ అదికారుల్క ఆవ్ దెకయ్తి రిసా అంక ఉత్తల్ దె, చి ఆవ్ ఒత్త గెచ్చు, 'రచ్చన వాటు యేసుయి' మెన జోవయింక నంపజలసక చజిలె, జేవ్ తేరబోదల్ జలెకి, మున్సుబోదల్ జలెకి, జోవయింక దెర బంద, ఇత్తల్ అమ్చి యెరూసలేమ్తె సిచ్చు కెరుక మెన కడ ఆనిందె" మెన సెలవ్ సంగిలన్.

3 జలె, సావులు ప్రయానుమ్ గెతె తా దమస్కు పట్టుమ్క పాసి అయిలి పొది, ఓదె, ఆగాసుమ్ తెంతో అంకి అందర్ కెర ఉజిడి జోచి సుట్టనంత జా అడ్డు కెర్తి.

4 చి జో బుయ్యె సేడ నిజ తిలి పొది ఏక్ అవాడ్, "ఓ సావులు, సావులు, అంక కిచ్చొక సిచ్చల్ అల్లర్ కెర్తెసి?" మెన సంగిలిసి సూన్లన్.

5 బియఁ గెచ్చు, "తుయి కో, ప్రబు?" మెన జో పుసిలన్, చి "తుయి గోస కెర్తె యేసు, ఆవ్.

6 అల్లె, తుయ్ ఉట్ట ఈంజ పట్టుమ్తె గెచ్చు పెను, చి ఒత్త తెంతో తుయి కిచ్చొ కెరుక అస్సి గే, తుక సూనయిందె" మెన యేసు సంగిలన్.

7 సావుల్ తెన్ బెద ప్రయానుమ్ కెరై తిల మాన్సుల్, జలె, జా అవాడ్ సూన్ల, గని కక్క నే దెక, కిచ్చొ మెనుక నెత్త కెర, టక్కున జా తిల.

8 సావులు, మాత్తమ్, బుయ్యె తెంతో ఉట్ట, టీవోజ, అంకివో ఉగిడ్తె, కిచ్చొ దెకుక నెత్తిర్తె. జాకయ్ జేవ్ జోక ఆతు దెర, దమస్కు పట్టుమ్ తెడి ఇండవ నిల.

9 ఒత్త తిర్రతి, కిచ్చొ నే కతె, కిచ్చొ నే పితె చువ్వె తా గుడ్డి జా తిలో.

అననీయక ప్రబు సావుల్తె తెద్దయ్లిసి

10 జలె, జా దమస్కు పట్టుమ్తె యేసుక నంపజలో నిదానుమ్ తిలో సిస్సుడు ఎక్కిలో తిలో. జోచి నావ్ అననీయ. జలె, యేసు సివ్వుతె జోక డీస కెర, జోచి నావ్ దెర్లికయ్, జో "అస్సి, ప్రబు" మెన జబాబ్ దిలన్,

11 ప్రబు జోక, "తుయి ఉట్ట, సోగ మెలి వీది గో, చి యూదా మెలో ఎక్కిలోచి గెరి గెచ్చు, 'తార్పు పట్టుమ్తె జెర్మిలో సావులు మెలోసా తెన్ దస్సుల్ జయిందె' మెన సంగు. జో జా గెరి తా ప్రార్దన కెరై అస్సి.

12 జో ప్రార్దన కెరై తతికయ్, జోక కిచ్చొ సివ్వు దెకవ అస్సి మెలె, అననీయ మెలో ఎక్కిలో జో సావులు తిలి గెరి జా కెర, పెన, జోక 'అన్నె దెకుస్' మెన జోచి బోడి చడెదె మెన, ఆవ్ సావుల్క సివ్వు దెకవ అస్సి" మెన ప్రబు జో అననీయక సంగిలన్.

13 గని అననీయ బియఁ కెర, "జో మాన్సుచి రిసా ఒగ్గర్జిన్ సంగ అస్సి,

* 9:1 9:1 మత్తయి, మార్కు, లూకా చి యోహానుతె 'సిస్సుల్' మెన ఒగ్గర్ సుట్టా సంగిలె యేసుచ బారజన్ సిసుల్కయ సంగితతి, గని ఈంజ కోడుతెచి రితి, కో జోవయింక నంపజా జోవయింక నిదానుమ్ ఇండుల గే, జేవ్ ఎత్కిజిన్క 'జోవయించ సిస్సుల్' మెనుక జయెదె.

యెరూసలేమ్తె తిల తుచయ్ నుద్ది తిల మాన్సుల్క జో ఎదివాట్ అల్లర్ కెర అస్సె.

14 జో ఇత్తల్ అయ్లె, తుచి నావ్ దెర్తన ఎత్కిక దెర, బందుక మెన ఎత్కిక వెల్లెల పూజర్లు జోక సెలవ్ దా అస్తి” మెన సంగిలన్.

15 గని ప్రబు జోక, “ఒత్త గో, ‘యూదుల్ నెంజిల వేర దేసిమ్చ మాన్సుల్క, రానల్క, ఇస్రాయేలుల్క కి, అంచి నావ్ తెన్ అంచి రిసా సాచి జవున్’ మెన ఆవ్ జోక నిసాన అస్సి.

16 జో కి అంచి నావ్ అంచి కామ్చి రిసా ఎత్కివాట్ అల్లర్ బాదల్ సేడెదె. జోక జా ఎత్కి దెకయిందె” మెన ప్రబు జబాబ్ దిలన్.

17 ప్రబు దస్సి సంగితికయ్, అననీయ బార్ జా గెచ్చ, ప్రబు సంగిలో గెరి పెన, సావుల్క బోడి చడ, “ఓ సావులు బావో, తుయి వట్టె జెతె తతికయ్ తుక డీసిలో యేసు తుక ‘దెకున్’ మెన, దేముడుచి సుద్ది తిలి అత్తు తుచి పెట్టి తతి వరుమ్ తుక దొర్కు జవున్ మెన అంక ఇన్నె తెద్రవ అస్సె” మెన అననీయ సంగిలన్.

18 సంగిల్ బేగి, సావుల్చ అంకివో తెంతో పొరల్ రితస కుసిడ్ల, చి జోచ అంకివో అన్నె డీసిల. తెదోడి జో ఉట్ట, బాప్తిసుమ్ నజన,

19 అన్నిమ్ కెర, అన్నె సత్తు జలో.

ఒత్త తెంతో, సావులు జా దమస్కు పట్టుమ్తె యేసుక నంపజల సిస్సుల్ తెన్ సగుమ్ దీసల్ తాఁ గెలో,

20 చి బేగి జోవయింప సబ గెరల్లె యేసుచి రిసా కిచ్చో సాచి సంగితె తిలన్ మెలె, “నిజుమి, అమ్చో దేముడుచో ఎక్కిలో పుత్తున్ దొర్కు జలో రచ్చించుప కెర్తొసా, జో” మెన సాచి సంగిత్ తిలన్.

21 సావులుక, ‘జో ఇసి సాచి సంగితయ్’ మెన నూన, ఎత్కిజిన్ ఆచారిమ్ జా, “యెరూసలేమ్ పట్టుమ్తె ప్రబుచి నావ్ దెర్తన ఎత్కిజిన్క అగ్గె అల్లర్ కెరె తిలొసా ఈంజో, నెంజె గే? ఇన్నెచ నంపజలసక

ఎత్కిక వెల్లెల పూజర్లుచి తీర్పు కెర సిచ్చ కెరవుక మెన దెర బందుక ఉచర, ఇత్తల్ అయ్లో” మెన కిచ్చో ఉచరుక గే నేన గెల.

22 జలె, సావుల్క రోజుక ప్రబు అన్నె సెక్తి దిలో, చి దమస్కుతె జితె తిల యూదుల్చ సబతె జో బోదన కెర కెర, యేసుక, ‘నిజుమి దొర్కు జలో క్రీస్తు రచ్చించుప కెర్తొసా జో’ మెన తెలివి తెన్ రుజుల్ బెదయ్తె తిలో, చి నంపనెంజిల యూదుల్ కిచ్చో జబాబ్ దెంక గే నేన గెల.

సావుల్క మారుక మెన యూదుల్ కుట్ట ఉచర్ల

23 ఒగ్గర్ దీసల్ గెతికయ్, సావుల్క మారుక మెన యూదుల్చ వెల్లెల మాన్సుల్ కుట్ట ఉచర్ల,

24 గని జేవ్ కుట్ట ఉచర్లన్చి రిసా సావులు నూన్లొ. జోక మారుక మెన రోజుక అందరె మెద్దెనె పట్టుమ్చ గుమ్మలె మాన్సుల్ రకితె తవుల, చి రిసా,

25 జోచ సిస్సుల్ కిచ్చో కెర్ల మెలె, ఏక్ దీసి అందరె జోక బోడెవ దా, పట్టుమ్చి డోక్ తిలి కోటతెచి గదితె వెగడ దా, ఏక్ గంపతె వెసడ దా, కిట్కివాట్ వాలివో తెన్ కోట ఒత్తల్తో ఉత్తవ దిల, చి ఉట్ట నిగిలో.

26 జలె, సావులు, యెరూసలేమ్ పట్టుమ్తె పాచ జా, ప్రబుచ ఒత్తచ సిస్సుల్ తెన్ బెదుక ఉచర్లొ, గని జోవయింక “నిజుమి, మార్పుప జా ప్రబుచో సిస్సుడు జా అస్సె” మెన నంప కెర్తి నాయ్, చి బియఁ గెల.

27 గని బర్షబా మెలొసా సావుల్క తోడు జా, బారికుల్తె కడ ఆన కెర, సావులు వట్టె గెతె తిలి పొది ప్రబుక దెకిలిసి, ప్రబు జో తెన్ లట్టల్లిసి, పడ్డొ దమస్కుతె సావులు దయిరిమ్ తెన్ యేసుచి నావ్ తెన్ బోదన కెర్తిసి ఎత్కిచి రిసా బర్షబా బారికుల్క సాచి సంగిలన్.

28 జాకయ్ జా దీసి తెంతో యెరూసలేమ్తెచ ప్రబుచ జేవ్ బారికుల్

జోక సర్ల తెన్ బెదవన్ల, చి జోవయింతెన్ తా, రోజుక

29 ప్రబుచి నావ్ తెన్ దయిరిమ్ తెన్ బోదన కెర్తె తిలన్. పడ్డో, యేసుక నే నంపజల గ్రీకు బాస లట్టబై యూదుల్క ప్రబుచి సాచి సాపులు సంగితె తిలన్. రుజ్జుల్ బెదయ్తె తిలన్, గని జేవ్ జోక మారుక కోర్ప జా తిల.

30 జోక జేవ్ మారుక కోర్ప జలిన్చి రిసా సిస్సుల్ మెన కెర, జోక కైసరియ పట్టుమ్ ఎదక బోడోవ దాఁ కెర, ఓడతె వెగడ, జో జెర్మిలి తార్పు పట్టుమ్తె తెద్రవ దిల.

31 జలె, సాపులు నంపజా మార్పువ జలిన్చి రిసా, జేవ్ పొదులె, ఒండి యూదయ ప్రదేసిమి, గలిలయ ప్రాంతుమ్తె చి సమరయ ప్రదేసిమ్తె యేసుక నంపజలనక కో అల్లర్ కెర్తి నాయ్, చి అన్నె డిట్టుమ్ జల. ప్రబుక బియఁ సత్తిమ్ ఇండితె తిల, చి దేముడుచి నుద్ది తిలి ఆత్మ జోవయింక దయిరిమ్ కెర్తె తిలి, చి అన్నె ఒగ్గర్జిన్ నంపజా, జోవయింతెన్ బెదిల.

32 జేవ్ పొదులె, పేతురు ఒండి బుల్తె తా, నంపజలన ఎత్కిజిన్క దెకితె తిలో, చి లుద్ద మెలి ఏక్ పట్టుమ్తె ప్రబుచయ్ జల మాన్సుల్ జితె తిలిన్తె జో తెన్ అయ్లో.

33 ఐనెయ మెలో ఎక్కిలో అస్సె. జో ఉట్టుక, కదుల్ జంక నెత్త కెర, అట్టు వెర్పుల్ అంతుర్నొతె ఎంగ్గ అస్సె.

34 పేతురు, జలె, జోక దెక, “ఓ ఐనెయ, యేసుక్రీస్తు తుక చెంగిల్ కెర్తయ్. ఉట్ట, తుచి అంతుర్నొ చెంగిల్ కెరను” మెన సంగిలన్. సంగిలి బేగి, జో చెంగిల్ జా ఉట్టో.

35 జో చెంగిల్ జలిసి, లుద్ద పట్టుమ్చ జా సారోను ప్రాంతుమ్చ ఎత్కిజిన్ దెక, జోవయింతె ఒగ్గర్జిన్ ప్రబుక నంపజా మార్పువ జల.

36 జలె, యొప్పే మెలి పట్టుమ్తె తబితా, నెంజలె దొర్కా మెలి నావ్చి తేర్బోద యేసుక సిస్సుళ్ళి జా అస్సె. జా కీసి మాన్సు మెలె, మాన్సుల్క ఒగ్గర్ ప్రేమ దెకితె తయెదె, బీద నుదల్క ఒగ్గర్ తోడు కెర్తె తయెదె.

37 ఏక్ దీసి, జొర్జా సేడ మొర గెలి. జాక దోవ కెర నుబ్దుమ్ కెర, గెర్చి అంతస్తుమ్చి గదితె పీనుమ్ నిజడ దిల.

38 యొప్పే మెలి జా మాన్సు మొర్లి పట్టుమ్క పేతురు తిలి లుద్ద పట్టుమ్ దూరి నాయ్, చి పేతురుక ‘ఒత్త అస్సె’ మెన సిస్సుల్ నూన తా, “బే బేగి జె” మెన దొగులచి అత్తి సంగ తెద్రయెల.

39 పేతురు బేగి ఉట్ట, జోవయింతెన్ గెలన్. జా గెరి జో పాఁచిలె, జోక జా ఉప్పిరిచి గదితె బోడోవ దిల. ఒత్త జా పట్టుమ్చ రండెల్ మాన్సుల్ బెర అస్తి. జేవ్ పేతురుచి నుట్టునంత టీవ ఏడ ఏడ, జా మొర గెలి దొర్కా చెంగిల్ తిలి పొది ‘బీద నుదల్’ మెన, జోవయింక తున తిల పాలల్ ఎత్కి పేతురుక దెకయ్ల.

40 పేతురు, జలె, జేవ్ ఎత్కిజిన్క బార్ కెరవ దా, మొగ్గల్ టెక ప్రబుక ప్రార్దన కెర్లన్. తెదొడి, పీనుమ్క దెకిత్ రితి పసుల, “ఓ తబితా, ఉట్టు!” మెన జాక సంగిలన్. సంగితికయ్, అంకివో ఉగిడ్డి, చి పేతురుక దెక, వెసిలి.

41 పేతురు జాక ఆతు దెర టీవడ్డో, చి రండెల్ మాన్సుల్క చి ప్రబుచయ్ జల ఒత్త తిల అన్నె మాన్సుల్క బుకారా కెర, ‘జివ్ జా అస్సె’ మెన దెకయ్లన్.

42 జా ఒండి యొప్పే ప్రాంతుమ్తెచ మాన్సుల్ జేవ్చి రిసా నూన్ల, చి జోవయింతె ఒగ్గర్జిన్ ప్రబుక నంపజల.

43 పడ్డో పేతురు ఒత్త చమొ పికయ్తో సీమోను మెలో ఎక్కిలోచి గెరి ఒగ్గర్ దీసల్ తా గెలన్.

10

కొర్నేలిక ప్రబు సివ్వుతె కబుర్ తెద్రయ్ లిసి

1 కైసరియ పట్టుమ్తె కొర్నేలి మెలో మాన్సు ఎక్కిలో తిలో. రోమ్ దేసిమ్చి జమాన్లుతెచి ఇటలీ మెలి జటుచొ *పుంజెకజీన్ జమాన్లుక వెల్లో, జో.

2 కీసా మాన్సు మెలె, జో యూదుడు నెంజెలె కి, దేముడుక బియఁ, నిదానుమ్ తెన్ ఎక్కి జోకయి బక్తి కెర్తె తిలో. జోకయి ప్రార్దన కెర్తె తిలో చి యూదుల్చ బీద సుదల్క చెంగిల్ దెక దర్ముమ్ దెతె తయెదె. జోచి గెర్చ మాన్సుల్ ఎత్తిజిన్ కి దస్సి తిల.

3 ఏక్ దీసి, రమారమి తిన్ని గంటల్ మెద్దెనె, ప్రబు దెకయ్ లి సివ్వు ఏక్ దెకిలన్. కిచ్చొ మెన జా సివ్వుతె సొమ్ముమ్ దెకిలన్ మెలె, దేముడుచొ దూత ఎక్కిలో జా గెరి పెన, జోక, “ఓ కొర్నేలి” మెన బుకార్చికయ్,

4 కొర్నేలి అద్దుర్ జా దెక, “ప్రబువ, ఈంజె కిచ్చొ?” మెన పుసిలన్, చి దూత జోక “తుచ ప్రార్దనల్ నూన, బీద సుదల్క తుయి దర్ముమ్ దిలిన్ దేముడు దెక, సర్ద జా అస్సె.

5 తుయి అప్పె కిచ్చొ కెరుక అస్సె మెలె, యొప్పే పట్టుమ్తె మాన్సుల్క కబుర్ తెద్రవు, చి పేతురు మెలో సీమోనుక ఇత్తల్ కడ ఆను.

6 జోక ఒత్త కేనె చజుక మెలె, చమొ పికయ్ తో సీమోను మెలో ఎక్కిలోతె తయెదె. జోచొ గేరు సముద్రుమ్ సొడి తయెదె” మెన దూత సంగ ఉట్ట గెలన్.

7 కబుర్ సంగిలో జో దూత ఉట్ట గెతికయ్, కొర్నేలి దొగుల జోచ గోతు మాన్సుల్క, చి దేముడుక నిదానుమ్చొ జోచి తెడి తిలో జమాను సుదొ ఎక్కిలోక బుకారా కెర,

8 దూత డీసిలిసి సంగిలిసి ఎత్తి. జోవయింక సంగ కెర, యొప్పేతె జోవయింక కబుర్ తెద్రయ్ లన్.

పేతురుక ప్రబు దెకయ్ లి సివ్వు

9 అన్నెక్ దీసి, జేవ్ మాన్సుల్ కొర్నేలి తెంతో ప్రయానుమ్ జెతె తా యొప్పేక పాసి జా గెతికయ్, పేతురు ఒత్త గెరి తా, ప్రార్దన కెరుక మెన, రమారమి మెద్దెనె ఒర్నె వెగిలో.

10 ఒత్త ప్రార్దన కెర్తె తిలె, జోక చూ కెర్తి. ‘కిచ్చొ గె కతిసి కావలె’ మెన కబుర్ తెద్రయ్ తికయ్, ఎట్టొచ మాన్సుల్ తెయార్ కెర్తె తతికయ్, ప్రబుతె పేతురుచి మెన్సు పూర్తి తా, ప్రబు దెకయ్ లి సివ్వు ఏక్ పేతురు దెకిలన్.

11 కిచ్చొ దెకిలో మెలె, పరలోకుమ్ ఉగ్గి జలి, చి ఏక్ వెల్లి తెర జాచ చెత్తర్ కోనల్తె దెరయ్ జా, బుయ్యె ఉత్త జెతె అస్సె.

12 జా తెరచి ఉప్పిరి కిచ్చొ బెర అస్సె మెలె, బూలోకుమ్చ ఎత్తి రకల్ జంతువుల్, సొమ్ముల్, అయివొ, ఆగాసుమ్చ పిట్టలు.

13 అన్నె, “ఓ పేతురు, ఉట్ట, కండ, ప్లోడు కా” మెన ఏక్ అవాడ్ అయ్ లిసి పేతురు సూన్లొ.

14 గని జో, “నాయ్, ప్రబు. నెంజె. ఆవ్ జెర్మిల్ తెంతో కిచ్చొ గార్చి ఆవ్ కెయ్య కయి నాయ్” మెన ప్రబుక సంగిలన్,

15 జలె, అన్నెక్ సుట్టు ప్రబుచి జా అవాడ్చి జోచి తెన్ ఉంక్రయిలన్. కిచ్చొ మెన సంగిలన్ మెలె, “ ‘సుద్ది అస్సె. కంక జయెదె’ మెన కిచ్చొచి రిసొ దేముడు సంగ అస్సె గే, జాక తూయి ‘గారు’ మెన సంగు నాయ్” మెన సంగిలన్.

16 తివ్వెరి ఇసి జలి, చి పరలోకుమ్తె జా ఎత్తి. అన్నె ఉక్కిల్ జలి.

* 10:1 10:1 పుంజెక నయ్ స్యుమ్ మాన్సుల్క ఆదికారి

17 జలె, “ఆవ్ దెకిలి సివ్వుచి అర్దుమ్ కిచ్చొ?” మెన, పేతురు కిచ్చొ. ఉచరుక గే నేన తతికయ్, ఏదె, కొర్నేలీ తెద్రయ్ల మాన్సుల్, “సీమోనుచొ గేరు కేన్ గేరు?” మెన పున నూన తా, ఒత్త గుమ్ముమె టీవొజ తిల.

18 “పేతురు మెలో సీమోను ఇన్నె జితె అస్సె గె?” మెన కేక్ గల.

19 పేతురు, జలె, ‘సివ్వుచి అర్దుమ్ కిచ్చొ?’ మెన ఉచర్తె తతికయ్, ప్రబుచి ఆత్మ జోక, “ఈందె, తీగ్ల మాన్సుల్ తుక చజితతి.

20 తుయి ఉట్ట ఉత్త గో, చి తుక కేనె కడ నెవుల గే, అన్మానుమ్ నెంతె జోవయింతెన్ బెద గో. ఆవ్వి జోవయింక తెద్రవ అస్సి” మెన సంగిలన్.

21 జాకయ్ పేతురు జేవ్ మాన్సుల్తె ఉత్త జా, “తుమ్ చజితోసొ అవ్వి. కిచ్చొక జా అస్సున్?” మెన పుసిలన్.

22 జేవ్, “కొర్నేలీ మెలో పుంజెక్జిన్ జమాన్లక వెల్లో మాన్సు అమ్క తెద్రవ అస్సె. జో దేముడుక బితోసొ, సత్తిమ్ తిలోసొ. తుమ్చ యూదుల్ ఎత్కిజిన్ జోక, చెంగిలో మాన్సు జో, మెన సంగితతి. జోక, జలె, దేముడుచొ దూత ఎక్కిలో డీన కెర, పేతురుక బుకారవన్, చి జో కిచ్చొ సంగెదె గే తుయి నూను, మెన సంగితికయ్, తుక కడ నెతి రిసొ అమ్క జో తెద్రవ అస్సె” మెన జేవ్ తీగ్ల పేతురుక సంగిల. తెదొడి “అన్నిమ్ కా కెర, అజిక ఇన్నె నిద్ర తా” మెన పేతురు గెరి బుకారా, జేవ్క మరియాద కెర్లన్.

పేతురు కొర్నేలీతె గెలిసి

23 అన్నెక్ దీసి పెందలె ఉట్ట, పేతురు, జేవ్ తీగ్ల తెన్, చి యొప్పేతచ ప్రబుక నంపజల అన్నె సొప్పుజిన్ తెన్, కొర్నేలీతె గెచ్చుక బార్ జల.

24 అన్నెక్ దీసి కైసరియ పట్టుమ్తె పాచ, పట్టుమ్తె పెసిలె, కొర్నేలీ జోవయింక రకితె తా. ‘పేతురు కిచ్చొ

మెనెదె గే నూన్తు’ మెన, జోవయింక మాన్సుల్క, జోచ గోతుల్ ఎత్కిక బుకారా కెర తెయార్ జా అస్సి.

25 జలె, పేతురు జోచి గెరి పావితికయ్, కొర్నేలీ దస్సుల్ జా జోచి చట్టె నెర్ను సేడ జొకర్లన్.

26 గని పేతురు జోక ఉట్టవ కెర, “తుయి టీవొజ, ఆవ్ కి తుచి రితో మాన్సు” మెన, జో తెన్ అన్నె లట్టబై తా,

27 గేర్ తెడి పెసిలె, ఒగ్గర్జిన్ జనాబ్ ఒత్త బెర అస్సి.

28 జలె, పేతురు జోవయింక తెదొడి, “ఆమ్ యూదుల్, జలె, యూదుల్ నెంజిలనచ గెరలె పెనుక జలె, యూదుల్ నెంజిలన తెన్ బెదుక జలె, అమ్క గారు మెన తుమ్ జాన్సు. గని, ఆవ్ కిచ్చొ గారు మెనుక జయె నాయ్, కక్క నిస్కారుమ్ దెకుక జయె నాయ్, మెన దేముడు అంక అప్పె దెకవ అస్సె.

29 జాక, తుమ్ సంగ తెద్రయ్తికయ్, కిచ్చొ అన్మానుమ్ నెంతె అయ్లయ్. జలె, కిచ్చొచి రిసొ అంక బుకారా అస్సున్?” మెన పుసిలన్.

30 కొర్నేలీ కిచ్చొ జబాబ్ దిలన్ మెలె, “ఎదిలి వేలయ్, అప్పెక చెత్తర్ పొదుల్ జయెదె, ఆవ్ తిన్ని గంటల్ మెద్దెనె గెరి ప్రార్లన కెరె తతికయ్, చొక్కిల ఉజిడి తిల పాలల్ గలన తిలో ఎక్కిలో అంచి పురె టీవొజ, అంక,

31 ‘ఓ కొర్నేలీ, తుయి ప్రార్లన కెరె తతిసి దేముడు నూన అస్సె. తుయి బీద సుదల్క దర్ముమ్ దెతె తతిసి దెక అస్సె.

32 జాకయ్, యొప్పే పట్టుమ్తె, చమొ పికయ్తో సీమోను మెలో ఎక్కిలో సముద్రుమ్ సొడి జితయ్. జోచి గెరి గెచ్చ, ఒత్త తిలో పేతురు మెలో సీమోనుచి రిసొ పుసుతు మెన మాన్సుల్క కబుర్ తెద్రవ.’ మెన అంక జో దేముడుచొ దూత సంగిలన్.

33 సంగిల్ బేగె, తుచితె కబుర్ తెద్రయ్లయ్, చి తుయి తుచి దయక అయ్లది. అల్లె, సంగు మెన ప్రబు తుక

కిచ్చొ ఆడ్ర దాఁ అస్సె గే, జా నూనుక మెన అమ్ ఎత్కిజిన్ దేముడుచి నావ్ తెన్ బెర అస్సుమ్”.

34 పేతురు చోడి పుట్టవ కిచ్చొ మెన తెదొడి బోదన కెర్లన్ మెలె, “దేముడు తేడల్ దెకె నాయ్ మెన ఆవ్ అప్పె సిక అస్సి.

35 కేన్ దేసిమి కో జోక బితతి, జోచి కోడ్ రితి కెర్తతి గే, జోవయింక తేడల్ నే దెకితె, జో ‘అంచయ్ మాన్సుల్’ మెన చెంగిల్ దెకితయ్ మెన అప్పె దెక అస్సి.

36 “జలె, ఇస్రాయేలులు మెల ఆమ్ యూదుల్తె దేముడు తెద్రయ్లి కబుర్ తుమ్ జాన్సు. యేసుక్రీస్తుచి తెడి పాపుమ్ గెతి వాటు దొర్కు జలి, చి దేముడుక మాన్సుల్క అడ్డు నాయ్ గే, చి సేంతుమ్ దొర్కు జలి మెలి కబుర్ జా, జో యేసుయి ఎత్కిక †ప్రబుయి.

37 జలె, తుమ్ కెర్ల పాపల్క పెట్టి దుకుమ్ జా బాప్తిసుమ్ నజన, మెన యోహాను బోదన కెర కెర పాపుమ్ గెతి గుర్తుక బాప్తిసుమ్ దెతె తిలి తెంతో, గలిలయ ప్రాంతుమ్తె మొదొల్ జా అమ్ యూదుల్చి ఒండి యూదయ ప్రదేసిమి జా సుబుమ్ కబుర్ నూనయ్ జా అస్సి.

38 మెలె, నజరేతు గవ్వొ వడ్డ తిలొ యేసుక ‘ఈంజొయి అమ్చొ ప్రేమ తిలొ పుత్తు, ఈంజొయి దొర్కు జలొ రచ్చించువ కెర్తొసొ’ మెన దేముడు జోచి సుద్ది తిలి ఆత్మచి గుర్తు దెకవ సెక్తి అదికారుమ్ దిలిసి జాన్సు. పడ్డొ, దేముడు జోవయించి పెట్టి తిలి రిసొ, మాన్సుల్క చెంగిల్ దెకితె తా, సయ్తాన్ అల్లర్ కెర్లన ఎత్కిజిన్క చెంగిల్ కెర్తె తా యేసు బుల్తె తిలిసి తుమ్ జాన్సు.

39 “అమ్ యూదుల్చి ఒండి దేసిమ్ కి, అమ్చి యెరూసలేమ్ పట్టుమ్తె కి, జో యేసు కెర్లిసి ఎత్కిక అమ్ సొచి జా

అస్సుమ్. గని జోక సిలువతె ‡టీవొ కెర మార్ల.

40 దేముడు అబ్బొసి తిర్తత్క జోక అన్నె జియడ, జో అన్నె జిలిన్క మాన్సుల్ రుజ్జు దెకిత్ రితి డీసయ్లన్.

41 కక్క డీసిలొ మెలె, ఎత్కిజిన్ ప్రెజల్క నాయ్, గని జో దేముడు నిసొన్ల ఆమ్ కీసాచుల్కయి డీసిలన్. జో జీవ్ జా ఉట్టి పడ్డొ, జో తెన్ సగుమ్ సుట్లు అస్సిమ్ కయ్లమ్.

42 జలె, అమ్క డీస కెర, ప్రెజల్ ఎత్కిక అంచి రిసొ బోదన కెర, జితనక మొర్లనక ఆకర్ దీసిక అవ్వొ తిర్పు కెరుక మెన దేముడు అబ్బొ అదికారుమ్ దా అస్సి. సంగ మెన, జోచి రిసొ ఆమ్ సొచి జంక మెన, జో యేసుయి అమ్క ఆడ్ర దాఁ అస్సి.

43 జోచి రిసొ కో జోక నంపజవుల గే, జోచి నావ్ తెన్ జోవయించ పాపల్ కచితుమ్ చెమించువ జవుల మెన కబుర్ తెద్రయ్లన ఎత్కిజిన్ సొచి జతతి” మెన పేతురు బోదన కెర్లన్.

44 పేతురు దస్సి బోదన కెర్తె తతికయ్, దేముడుచి సుద్ది తిలి ఆత్మ జా కోడు సూన్లన ఎత్కిజిన్చి పెట్టి బెర్లి.

45 పడ్డొ యూదుల్చి గుర్తు తిలి సున్నతి కెరంతి ఆగ్న నంప కెర్తె, పేతురు తెన్ జా తిల, ప్రబుక నంపజల మాన్సుల్ ఆచారిమ్ జల. యూదుల్ నెంజిల జేవ్ అన్నె మాన్సుల్చి పెట్టి కి దేముడుచి సుద్ది తిలి ఆత్మ ప్రబు సువ దిలిన్చి రిసొ.

46 జా సువ దిలిన్క కిచ్చొ గుర్తు దెకిల మెలె, జేవ్ మాన్సుల్ జేవ్ నే సికిల బాసల్ తెన్ లట్టబ, దేముడుచి గవురుమ్ సంగితె తిల. దస్సి జతికయ్, పేతురు,

47 “అమ్క జా సుట్టు జర్గు జలి రితి, ఇన్నెచి పెట్టి కి దేముడుచి సుద్ది తిలి ఆత్మ దొర్కు జా అస్సి. జాకయ్ ఇన్నెక అమ్

† 10:36 10:36 ఎత్కిచి ఉప్పిరి వెళ్లొ తిలొసొ, ఎత్కిక ఏలువ కెర్తొసొ. ‡ 10:39 10:39 మత్తయి 27:32.
 § 10:41 10:41 మత్తయి 28, మార్కు 16, లూకా 24, యోహాను 20, 21 అధ్యాయల్.

బాప్తిసుమ్ దెంక కిచ్చో అడ్డు నాయ్. కో 'పోసి' మెనుక బెదె నాయ్" మెన సంగ,
 48 "జేవ్ ఎత్తిజిన్ యేసుక్రీస్తుచి నావ్ తెన్ బాప్తిసుమ్ నజన్తు" మెన ఆడ్ర దిలన్.

ఒత్త తెంతో "సగుమ్ దీసల్ ఇన్నె తా" మెన పేతురుక బతిమాల్య జా సంగిల.

11

యూదుల్ నెంజిల సుదల్ రచ్చించుప జలిన్

1 యూదుల్ నెంజిల మాన్సుల్ కి *యేసుచి రిసాచి సుబుమ్ కబుర్ సూన్ నంపజా మార్పుప జా అస్తి మెన, సిస్సుల్ తెన్ యూదయ ప్రదేసిమ్చి నంపజలన ఎత్తిజిన్ సూన్.

2 జలె, సగుమ్ దీసల్ గెతికయ్, పేతురు యెరూసలేమ్తె ఉట్ట అయ్లన్. యేసుక నంపజల ఒత్తచ మాన్సుల్, యూదుల్ పేతురుక జేవ్ గోల కెర్ల.

3 "ఆమ్ యూదుల్చి గుర్తుచి సున్నతి నే కెరన్లసచ గెరలె కిచ్చొక గెలది? జోవయింతెన్ కిచ్చొక అన్నిమ్ కయ్లది?" మెన గోల కెర్ల.

4 గోల కెర్లికయ్, జర్గు జలిసి ఎత్తి వర్చు తెన్ పేతురు సంగిలన్.

5 "ఆవ్ యొప్పే పట్టుమ్తె తా ప్రార్దన కెర్తె తిలయ్. ప్రార్దన కెర్తె తా, ప్రబుతె అంచి మెన్సు పూర్తి తతికయ్, ప్రబు దెకయ్లీ సిప్ప ఏక్ దెకిలయ్. జా సివుతె, వెల్లి తెర రితిసి జేవ్చ చెత్తర్ కోసల్తె దెరయ్ జా, పరలోకుమ్ తెంతో ఉత్త జెతె అస్సె. అంచి పాసి ఉత్త అయ్లీ.

6 ఆవ్ సరిగా దెకిలయ్, పోస్త మంద, డొంగుర్చ జంతువుల్, అయివో గట్ట, ఆగాసుమ్చ పిట్టల్ జా తెరచి ఉప్పిరి అస్తి.

7 "పడ్డో ఏక్ అవాడ్ సంగిలిసి సూన్లయ్, 'ఓ పేతురు, ఉట్ట, కండ పోడ కా.' మెన సంగిలిసి సూన్లయ్.

8 గని, 'నెంజె, ప్రబు. ఆవ్ జెర్మిలి తెంతో కిచ్చొ గార్చి ఆవ్ కెయ్య కయి నాయ్' మెన సంగిలయ్.

9 సంగితికయ్, పరలోకుమ్ తెంతో జా అవాడ్ అన్నెక్ సుట్టు లట్టబ, కిచ్చొ మెన జబాబ్ దిలన్ మెలె, 'సుద్ది అస్సె. కంక జయెదె' మెన, కిచ్చొచి రిసా దేముడు సంగెదె గే, జాక తూయి గారు మెనుక జయె నాయ్ మెన సంగిలన్.

10 తివ్వెర్ ఇసి జలి, చి పరలోకుమ్తె జా ఎత్తి అన్నె ఉక్కిల్ జలి.

11 ఉక్కిల్ జలి బేగి, కైసరియ పట్టుమ్ తెంతో అయ్ల మున్సుబోదల్ తీగ్ల ఆమ్ తిలి గెరి పాచ అయ్ల.

12 "జోవయింతెన్ బెద గో మెన ప్రబుచి ఆత్మ అంక ఆడ్ర దెతికయ్, జోవయింక తేడ నే దెకితె, బెద గెలయ్. అమ్చి తెన్ బెద అయ్ల సావ్యుజిన్ ప్రబుక నంపజలన కి, అంచి తెన్ గెల, చి యూదుడు నెంజిలో జో కొర్నేలీచో గెరి పెసిలమ్.

13 ప్రబుచో దూత జా దీసి జోచి గెరి టీచ సంగ తిలిసి అమ్క కొర్నేలీ సంగిలన్. దూత సంగ తిలిసి కిచ్చొ మెలె, 'జెవుసు' మెన సీమోసు పేతురుక కబుర్ తెద్రవు. జో యొప్పేతె అస్సె.

14 జో అయ్లె, అంచి ఏక్ కబుర్ తుమ్క సూనెదె. జా కోడు సూన నంపజలె, తూయి, తుమ్చి గేర్చ మాన్సుల్, సేవ కెర్తన, ఎత్తిజిన్, పాపుమ్ తెంతో రచ్చించుప జస్సె, మెన జోక దూత సంగ తిలన్.

15 "ప్రబుచి సుబుమ్ కబుర్ ఆవ్ సంగుక దెర్లికయ్, ఆమ్ సిస్సుల్క చి అమ్చి తెన్ నంపజల యూదుల్క జా సుట్టు జర్గు జలి రితి, జా గేర్చక కి జర్గు జలి. దేముడుచి సుద్ది తిలి ఆత్మ జోవయించి పెట్టి అయ్లీ.

* 11:1 11:1 మెలె, 'ఎత్తి అదికారుమ్ తిలో దేముడు దిలి సుబుమ్ కబుర్'. 6:7, 8:14 దెక.

16 దస్సి జర్లు జతికయ్, ప్రబు అగ్గె సంగ తిలి ఏక్ కోడు ఏదస్ట కెర్లయ్. 'యోహాను, పాని తెన్ బాప్తిసుమ్ దెతె తిలో, గని పడ్డొక దేముడుచి సుద్ది తిలి ఆత్మ తెన్ తుమ్క బాప్తిసుమ్ దెమ్దె' మెన యేసు సంగిలిసి ఏద కెర, 'ఒహో, ఇన్నెతెన్ నెరవెర్చుప జలి' మెన చినిలయ్.

17 "జలె, ఆమ్ యేసు క్రీస్తు ప్రబుక నంపజతికయ్ దేముడు అమ్చి పెట్టి జోచి ఆత్మ తతి వరుమ్ కిసి దిలన్ గే, జో అప్పె జేవ్ యూదుల్ నెంజిలసక కి దస్సి వరుమ్ దిలన్ మెలె, ఆవ్ మాన్సు, ప్రబుక, తుచి ఇస్టుమ్ పోని మెనుక బెదెదె గె? బెదె నాయ్!" మెన పేతురు సాచి సంగిలన్.

18 ఈంజ సాచి నూన తా జేవ్ గోల కెర తిల బారికూల్, చి ప్రబుక అన్నె నంపజలన, అన్మానుమ్ తంక నెతిర్ల, చి "దస్సి జలె, యూదుల్ నెంజిల మాన్సుల్ కి పాపుమ్బుద్ది ముల దా ప్రబుక నంపజలె, జేవ్ కి జోచి నావ్ తెన్ రచ్చించువ జవుల" మెన సర్ల తెన్ దేముడుక గవురుమ్ కెర్ల.

యూదుల్ నెంజిల మాన్సుల్ ప్రబుక నంపజా మార్చుప జలిసి

19 స్తైపను బోదన కెర్తె తిలి తెంతో గోస జల మాన్సుల్ అల్లర్ కెర్లి రిసా చెదుర్చు జా తిల యేసుక నంపజలన, ఈంజ మదెనె, ఉత్తర పక్క గెచ్చు, సముద్రుమ్చి పాసి తిలి పేనీకే ప్రాంతుమ్ ఎద పడ్డొ సముద్రుమ్ ఒత్తల్తోచి కుప్ర, డిబ్బ దేసిమ్ ఎద, పడ్డొ సిరియ ప్రదేసిమ్చి అంతియొకయ పట్టుమ్ పక్క బుల బుల, తెదొడి ఎద ఎక్కి యూదుల్కయ్ ప్రబుచి కీసుబుమ్ కబుర్ సికడ్డె తిల.

20 గని అన్నె సగుమ్జిన్, కుప్ర డిబ్బ దేసిమ్చ, అన్నె జాక దచ్చెన పక్క తిలి సముద్రుమ్ ఒత్తల్తో తిలి కురేనియు పట్టుమ్చ, జా అంతియొకయ పట్టుమ్తె జా కెర, గ్రీకు బాస లట్టబై యూదుల్ నెంజిలసక కి యేసుప్రబుచి రిసాచి సుబుమ్ కబుర్ బోదన కెర్ల.

21 జేవ్ బోదన కెర్లసక ప్రబు తోడు తతికయ్, జేవ్ గ్రీసు దేసిమ్చ సుదల్తె ఒగ్గర్జిన్ ప్రబుక నంపజా మార్చుప జల.

బర్నబాక అంతియొకయతె తెద్రయ్లిసి

22 'ఒత్తచ యూదుల్ నెంజిలస కి ప్రబుక నంపజా మార్చుప జా అస్తి' మెన యెరూసలేమ్ పట్టుమ్చి సంగుమ్చ నంపజల యూదుల్ నూన కెర, బర్నబాక ఒత్త జా సిరియ ప్రదేసిమ్చి అంతియొకయతె తెద్రయ్ల.

23 జో ఒత్త పావ కెర, 'జోచి దయచి రిసా దేముడు జేవ్ యూదుల్ నెంజిలసక వరుమ్ దా ఈంజ ఎత్కి జర్లు కెర అస్సె' మెన రుజ్జుల్ దెక, సర్ల జలో, అన్నె, "తుమ్ ప్రబుక ఏక్ మెన్సు నిదానుమ్ తా" మెన జోవయింక దయిరిమ్ సంగ బోదన కెర్లన్.

24 జో బర్నబా చెంగిలో మాన్సు. జోచి పెట్టి దేముడుచి సుద్ది తిలి ఆత్మ పూర్తి కామ్ కెర్లి బుద్ది, ప్రబుచి ఉప్పిర్చి నముకుమ్, బెర తిలి. బర్నబా సగుమ్ దీసల్ ఒత్త తా బోదన కెర్లికయ్, అన్నె ఒగ్గర్జిన్ మాన్సుల్ ప్రబుక నంపజా మార్చుప జల.

బర్నబా సావుల్క ఒత్త కడ నిలిసి

25 'తోడు జెవున్' మెన సావుల్క సంగుక మెన, బర్నబా తార్చు పట్టుమ్తె ఉట్ట గెలన్.

† 11:16 11:16 యోహాను 1:5. ‡ 11:17 11:17 'క్రీస్తు' మెలె, ఎత్కి అదికారుమ్ తిలో దేముడు పూర్ణమ్ తెంతో 'తెద్రయందె' మెన బీవడ్డొ దొర్లు జలో రచ్చించువ కెర్లొసా. § 11:19 11:19 'సుబుమ్ కబుర్' మెలె, ఎత్కి అదికారుమ్ తిలో దేముడు దొర్లు కెర్లి రచ్చనచి కోడు. జో పాపల్ చెమించువ కెర్లిన్చి రిసాచి కబుర్. యేసుయి దొర్లు జలో రచ్చించువ కెర్లొసా జతిన్చి కబుర్. జో అర్చితుమ్ జా పాపల్ గెచ్చయలి రిసా మాన్సుల్ పరలోకుమ్చి రాజిమ్తె బెదితి అవ్కాసుమ్ దొర్లు జలిన్చి కబుర్.

26 జోక అంతియొకయ పట్టుమీతె కడ ఆన్సన్, చి వెర్నెక్ పూర్తి ఒత్త తా, ప్రబుక నంపజలసచి ఒత్తచి సంగుమ్తె బెదితె తా, ఒగ్గర్ ఒగ్గర్జిన్ మాన్సుల్క సరిగా బోదన కెర్త. ఒత్త, యేసుక నంపజా సిన్సుల్ జలసక తొలితో అంతియొకయతెయి 'నంపజలస' మెన సంగయ్ జల.

27 జేవ్ పొదులె, అన్నె కిచ్చొ జర్గు జలి మెలె, *ప్రబుచ †కబుర్లు సంగిత నంపజలస సంగుమ్జిన్ అంతియొకయతె అయ్ల.

28 జోవయింతె ఎక్కిలో, అగబు. జో జలె, సబతె టీవ, ప్రబుచి సెక్కిచి రిసా ప్రబుచి కిచ్చొ కబుర్ సంగిలన్ మెలె, 'వలాన్ సమయుమ్క ఒండి లోకుమ్తె ఒగ్గర్ కరువు జెయదె' మెన కబుర్ సంగిలన్. కేన్ కాలుమ్ జో సంగిలి కరువు జర్గు జలి మెలె, క్లాదియ రానొ ఏలుప కెర్తె తిల పొదులె జర్గు జలి.

29 అంతియొకయతె తిల ప్రబుచ ‡సిన్సుల్, జలె, జా కరుచి రిసా సూన కెర, సబ కెర కిచ్చొ ఉచర్ల మెలె, "కచి సెక్కి తిలి ఎది, జేవ్ డబ్బుల్ ఉక్కుల్మ, చి యూదయ ప్రదేసిమి తిల అమ్చ నంపజలస బావుడ్లుక తోడు తెద్రవుమ్దె" మెన,

30 డబ్బుల్ ఉక్కుల, యెరూసలేమ్చి సంగుమ్చ వెల్లెల మాన్సుల్క అంట దెతు మెన, బర్షబా చి సావుల్చి అత్తి ఒత్త యెరూసలేమ్తె తెద్రయ్ల.

12

హేరోదు రానొ నంపజలసక అల్లర్ కెరుక

1 జా కరువు నే జతె అగ్గె, *హేరోదు రానొ యెరూసలేమ్ పట్టుమీచి

సంగుమ్చ నంపజలస సంగుమ్జిన్క అల్లర్ కెరుక దెర్లన్.

2 జోవయింతె ఏక్ దీసి జేవ్ యేసుచ బారికుల్తె ఎక్కిలోక కండ మార్లన్. యోహానుచొ యాకోబు మెలో అన్నొన్క.

3 'యాకోబుక మార్లి రిసా మాములుమ్ యూదుల్చ వెల్లెల మాన్సుల్ సర్ల జల' మెన రానొ దెక, "పేతురుక కి మారిందె" మెన ఉచర, జోక కి జేలి కెర్లొ. గని, నే పులయ్ల పోడియొ కతి యూదుల్చి పస్కా పండుగు జా తిలి రిసా 'అప్పె మారుక నెంజె' మెన,

4 పేతురుక దెర జేలి కెర, 'పండుగు కేడ్లె, ప్రెజల్ సాచి జతి రితి సబ కెర మారిందె' మెన, ఉచర, 'ఎక్కి దడి చెత్తర్జిన్ జమాన్లు జోక రకుత్' మెన సోడ జిన్ జమాన్లుక నిసాన్లన్. చెత్తర్జిన్ సావువు గంటల్ రకిలె అన్నెక్ చెత్తర్జిని సావువు గంటల్ రకుక.

5 దస్సి పేతురుక జేల్తె రకితె తిల, గని జా యెరూసలేమ్తెచి సంగుమ్ సుదల్ పేతురుచి రిసా దేముడుక ప్రార్లన కెరుక ములితి నాయ్. జేవ్ దస్సి ప్రార్లన కెర్తె తతికయ్,

6 కలిక జోవయింక బార్ కెర తీర్పు కెర మారిందె, మెన పండుగు కేడ్డికయ్ హేరోదు ఉచర్లన్. మదెన పేతురుక కిసి అస్సె మెలె, జా రాతి, జోక ఏక్ పక్కయ్ ఎక్కిలోక, అన్నెక్ పక్కయ్ ఎక్కిలోక తా, దస్సి దొగుల జమాన్లుచి నెడిమి జో నిజయి అస్సె. పేతురుచ అత్తిలె గొల్పుల్ బందయ్ తిల. పడ్డె జేల్ చి కెడ్డితె దొగుల జమాన్లు రకితె అస్తి.

7 జలె, పేతురు దస్సి జేలితె తతికయ్, ప్రబుచొ దూత ఎక్కిలో జా కెర, జోచి పాసి టీవో జలన్, చి జా ఒండి గదితె

* 11:27 11:27 యేసుప్రబు దేముడు అజ్బాన్చి ఉజెతో పక్క వెన జోవయింతెన్ ఏలుప కెర్తయ్; ఎబ్రియల్ 1:13. జాచి రిసా 'ప్రబుచ కబుర్లు' మెలె, అజ్బాన్చి యేసుచ కి జవుల. † 11:27 11:27 'ప్రబుచ కబుర్లు సంగితస' మెలె, జోచి అత్తి జోవయిం చి చోడి పుట్టయ్లె, జోచి కబుర్లు జేవ్ సంగుల. ‡ 11:29 11:29 బారికుల్ 9:1 చి ఎట్టాచి కోడు దెక. * 12:1 12:1 హేరోదు రానొ రోమ్ దేసిమ్చి ప్రబుతుమ్చి తెడి ఏలుప కెర్తె తిలన్.

వెల్లి ఉజిడి లగిలి. తెదొడి పేతురుక పక్కయ్ పెట, ఉట్టవ, “బేగి ఉట్టు” మెన సంగిలన్. బేగి, జోచ అత్తిచ గొల్పుల్ కున్డ గెల.

8 పడ్డొ, “తెయార్ జా జోడ్లు గలన” మెన దూత సంగిలన్. జో సంగిలి రితి పేతురు కెర్లన్, చి “తుచి డుప్పటి పంగుర్చి అంచి పట్టి జె” మెన దూత సంగితికయ్, సంగిల్ రితి పేతురు కెర్లన్.

9 దూతచి పట్టి ఇండ బార్ జా గెలన్, గని దూతచి అత్తి జర్గు జలిన్క ‘నిజమి జర్గు జతయ్’ మెన నేనె. ‘ఈంజ సిమ్మ దెకితసి’ మెన జో ఉచర్తయ్.

10 జలె, రకితోసా ఎక్కిలోక ఒత్తల్తో జిన, అన్నెక్లొక ఒత్తల్తో కి జిన, పట్టుమ్తె ఉత్తిర్తి గుమ్ముమ్చి ఇనుముచి టట్టతె పాచ అయ్లె, కిచ్చొ జర్గు జలి మెలె, జాచి ఇస్టుమ్క జా ఇనుము టట్ట ఉగ్గి జలి, చి పేతురు దూతతెన్ బార్ జా ఏక వీది జిన్లె, బేగి దూత జోక ములిలన్.

11 ‘సిమ్మ నెంజె, నిజమి జర్గు జలి’ మెన పేతురు అప్పె పూర్తి అర్దుమ్ కెరన్లన్, చి “హేరోదు జేలి కెర్లసి తెంతొ, గోస జల యూదుల్ ఉచర్లసి ఎత్తి తెంతొ, ఆచ్ విడ్డల్ జతి రిసా ప్రబు జోచొ దూతక తెద్రయ్లో మెన, అప్పె కచితుమ్ జాని” మెన చెంగిల్ ఉచర.

12 ఉచర, వట్టి గెచ్చ, మార్కు మెన అన్నెక్ నావ్ తిలో యోహాను మెలోసాచి అయ్యన్ మరియచి గెరి పాచిలన్. ఒత్త ఒగ్గర్జిన్ మాన్పుల్ బెర, జోచి రిసా ప్రార్లన కెర్తె అన్సి.

13 గుమ్ముమ్చి కెప్పితె జో పెట అవాడ్ కెర్లె, రొదె మెలి తేరబోద దాక్ నాడి కెప్పి ఉగుడుక అయ్లి.

14 పేతురుచి అవాడ్ సూన, జాచి ఒగ్గర్ సర్ల సంతోసుమ్క ఉగుడుక వచ్చ

కెర, గెరి నిగ గెచ్చ, పేతురు కెప్పి పాసి టీచిలిసి మెన సంగిలి.

15 “తుయి వెర్రి జా అస్సిన్” మెన, ఎత్తిజిన్ జాక సంగిల. గని, “నాయ్, నిజమి, జో జాఁ అస్సె” మెన, జా దయిరిమ్ తెన్ సంగితికయ్, “జోచొ †దూత కిచ్చొగె జా తయెదె” మెల.

16 గని పేతురు కెవ్డిక పెట అవాడ్ కెరుక ములి నాయ్, చి సూన, ఉగుడ, జోక దెక ఆచారిమ్ జల.

17 జో, జలె, ‘తుక్లె తా’ మెల సయగ కెర, జో జేలితె తిలె, జేల్తె తెంతొ ప్రబు విడ్డల్ కెర్లసి ఎత్తి కిసి జర్గు జలి గే పూర్తి సంగ కెర, “యేసుచొ బావొసి జలొ యాకోబుక చి బావుడ్లు జల నంపజలన ఎత్తిక ఈంజ ఎత్తి తుమ్ సూనవ” మెన సంగ, పేతురు వేరతె ఉట్ట గెలన్.

అదికారుల్ పేతురుక నే డీసిలి రిసా జర్గు జలిసి

18 పెందలె, పేతురుక ‘విడ్డల్ జాఁ అస్సె’ మెన జాన్తికయ్, జమాన్లు బమ్మ జా ఒగ్గర్ అల్లర్ జల.

19 “పేతురుక జేల్తె తెంతొ బార్ కెర ఆన్తు” మెన హేరోదు ఆడ్డ దిలన్, గని ‘డీసె నాయ్’ మెన సూన, రకితసక పరిచ్చ కెర, జోవయింక మొర్తి సిచ్చ దా, జా యూదయ ప్రదేసిమ్చి యెరూసలేమ్ పట్టుమ్ ముల దా సముద్రుమ్ పక్కచి జా ప్రదేసిమ్చి కైసరియ పట్టుమ్తె గెచ్చ, ఒత్త తెంతొ ఏలుప కెర్తె తిలో.

20 ఉత్తర పక్కచ తూరు పట్టుమ్చ, సిదోను పట్టుమ్చచి రిసా హేరోదు ఒగ్గర్ పెట్టపెట్టి జలొ. జాకయ్ జేచ్ పట్టుమ్చ ఒగ్గర్జిన్ బెద జా, హేరోదుచి మేడతె జాఁ కెర, రానొచొ గేరక దెకితో మంత్రి జలొ భ్లాస్తు మెలోసా తెన్ సినేతుమ్ కెరన, ‘రానొ అమ్క సింతుమ్ దెకున్’ మెన జోవయించి అత్తి సంగ తెద్రయ్ల. జోవయించి పేసికే ప్రాంతుమ్తె కరువు తతికయ్, జో రానొ ఏలుప కెర్తె గలిలయ

† 12:15 12:15 యూదుల్ తెన్ సగుమ్జిన్ కిచ్చొ ఉచర్ల మెలె, ఎత్తి మాన్పుక పరలోకుమ్తె ఏక దూత తయెదె.

ప్రాంతుమతెచ దాన్ జేవ్ కా కా జితతి. జేవ్ జా కంక జో రానో నే ఒప్పిలెగిన, చూడ మొరుల.

21 జాకయ్, జో సంగిలి ఏక్ దీసి, హేరోదు, రానో జలి గుర్తు దెకయ్త జోవయించ చెంగిల పాలల్ ఎత్తి గలన, సింగాసనుమతె వెన, జోవయింక జొయ్యి గవురుమ్ ఆనన్తి రితి, బెర తిల జేవ్ మాన్సుల్క తెలివి తెన్ బోదన కెర్తన్.

22 దస్సి జతికయ్, ప్రైజల్, “ఇన్నెక మాన్సు మెలమ్, గని మాన్సు నెంజె. ఈంజో లట్టబ్బె, దేముడు లట్టబ్బి రితి జతయ్!” మెన కేకుల్ గల పులయ్లె.

23 ‘దేముడు’ మెన పులయ్లె, జో ‘నెంజి’ మెనె నాయ్, ‘జొయ్యి దేముడు’ మెన దేముడుక గవురుమ్ కెరె నాయ్, చి బేగి, దేముడుదూత ఎక్కిలోచి అత్తి జోక మొర్తి సిచ్చ దిలన్, చి జో జితె తస్తె, కివ్వో జోచి ఆగ్ గెల, చి మొర గెలన్.

24 గని ప్రబుచ సిస్సుల్ జోచి సుబుమ్ కబుర్ బోదన కెర్తె తిల, చి అన్నె ఒగ్గర్జిన్ ప్రబుక నంపజా మార్చువ జల.

25 హేరోదు రానో మొర గెచ్చ సగుమ్ దీసల్ గెలి పడ్డె, క్లొవుదియ రానో ఏలువ కెర్తె తిల పొదులె, బర్నబా సావులు యెరూసలేమ్తె గెచ్చ, ‘కరువుక అల్లర్ జల మాన్సుల్క దెంక’ మెన, అంతియొకయతెచ నంపజలిం ఉక్కిలి డబ్బుల్ న దా జోవయించి కామ్ కేడవ కెర, బర్నబాచో సల్లోసి జలో మార్కు మెలో యోహానుక దెరన, యెరూసలేమ్ తెంతో ఉట్ట అయ్ల.

13

ప్రబు బర్నబాక చి సావుల్క తెద్రయ్లిసి

1 అంతియొకయతెచ సంగుమ్తె ప్రబుచ కబుర్లు సంగితన సగుమ్జిన్చి, ప్రబుచి రిసా బోదన కెర్తన సగుమ్జిన్ తిల. జోవయింతె, బర్నబా, పడ్డె

‘నీడొన్లొ’ మెలో సుమెయోను, పడ్డె కురేనియు పట్టుమ్చో లూకియ, చెత్తర్ ప్రాంతుమలు ఏలువ కెర్తె హేరోదు మెలో రానోచి జతతె వడ్డిలో మనయేను, పడ్డె సావులు.

2 ఏక్ దీసి జేవ్ ఎత్తిజిన్ ఎక్కితె తా చువ్వె తా ప్రబుక ప్రార్దన కెర్తె తతికయ్, జోవయింక దేముడుచి సుద్ది తిలి ఆత్మ ఇసి సంగిలన్, “ ‘అంచి ఏక్ వెల్లి కామ్ కెర్తు’ మెన, బర్నబాక చి సావుల్క ఆవ్ నిసాన అస్సి. జా కామ్చి రిసా అంచి అత్తి ఇన్నెక తుమ్ సార్చ కెర దెతి గుర్తు కెర” మెన సంగిలన్, చి

3 అన్నె చువ్వె తా ప్రార్దన కెర జేవ్ దొగులక బోడి చడ తెద్రవ దిల.

4 దేముడుచి సుద్ది తిలి ఆత్మ దస్సి తెద్రయ్తికయ్, బర్నబా చి సావులు, సముద్రుమ్చి ఒడ్డుతెచి సెలూకయ పట్టుమ్తె ఉట్ట గెచ్చ, ఓడతె వెగ, సముద్రుమ్ జిన, సయప్రన్ కుప్ర దేసిమి ఉట్ట అయ్ల.

5 తొలితొ జా దేసిమ్చి సలమీ పట్టుమ్తె గెచ్చ, యూదుల్చ సబ గెరలె *యేసుచి రిసాచి సుబుమ్ కబుర్ సూనవ, సాచి సంగిల. మార్కు మెలో యోహాను జోవయింతెన్ తోడు అయ్లో.

6 ఒత్త తెంతో జా సయప్రన్ దేసిమ్చి ఒత్తల్తో పక్కచి పాపు మెలి వెల్లి పట్టుమ్తె గెలె, దీసరి జా గార్డెల్ మాయల్ కెర్తె ఎక్కిలో అస్సె. ‘యేసుచో పుత్తుసి’ మెలి అర్దుమ్ తెన్, ‘బరయేసు’ మెలి నావ్ జో తియన అస్సె. జో యూదుడు జెర్మిలోసా, గని ఆరిక, ‘దేముడుచి కబుర్ ఈంజ’ మెన, సయ్తాన్ సికడ్లి కోడు జో సంగెదె.

7 జా దేసిమి ఏలువ కెర్తె అదికారితె తయెదె. జో అదికారిచి నావ్ కిచ్చొ మెలె, ‘సెర్గి పవులు’. జో తెలివి మాన్సు జయెదె. జో కిచ్చొ కెర్తె మెలె, దేముడు

* 13:5 13:5 మెలె, ‘ఎత్తి అదికారుమ్ తిలో దేముడు దిలి సుబుమ్ కబుర్’. † 13:7 13:7 యేసుచి రిసాచి సుబుమ్ కబుర్.

దిలి †నుబుమ్ కబుర్ నూనుక ఇస్తుమ్ జా, బర్నబాక చి సావుల్క బుకార్లన్.

8 జలె, ఎలుమ మెన నావ్ తియన్లొ దీసరిక సంగుల. జా నావ్చి అర్దుమ్, దీసరి. జో అప్పె, 'అదికారి క్రీస్తుక నంపజా మార్పువ జవున్ నాయ్' మెన, సావుల్క చి బర్నబాక అడ్డు కెరుక గెలో.

9 రోమ దేసిమ్చి బాస తెన్ 'పవులు' మెన అన్నెక్ నావ్ తిలో జో సావులు, దేముడుచి సుద్ది తిలి ఆత్మచి సెక్తి జోవయించి పెట్టి బెర్దికయ్, జో ఎలుమక చెంగిల్ దెక,

10 "సయ్తాన్చొ పుత్తుసి జస్తె, తుయి. తుచి పెట్టి మాయబుద్ది, ఒగ్గర్ గార్చి, పాపుమ్ తెన్ అస్సిన. సత్తిమ్ ఎత్తిక విరోదుమ్ జస్తె, తుయి, సోగ తిల ప్రబువ వట్టో వంకడ కెర్తొ మాయల్ కెయ్చె ములితె?

11 ఈందె, ప్రబు తుక అప్పె సిచ్చ దెతయ్. తుయి గుడ్డి జా అప్పెచి మట్టుక పొద్దుక కి దెకిన్ నాయ్" పవులు సంగిలన్. సంగిల్ బేగి, జో మాన్సుక అంకివొతె గాండు డంకిలి రితి జా, పూర్తి గుడ్డి జలో, చి జోక ఎత్తి అందర్ జలి. ఒత్త తెంతో, అంక ఆతు దెర కో జలెకు అంక వాటు దెకయ్తు ఎక్కిలో ఇండుక నెత్త కెర బతిమాల్ప జా ఏడ్తె తిలన్.

12 అదికారి, మాత్రుమ్, జర్గు జలిసి దెక కెర, ప్రబుచి చి సెక్తిచి రిసా జలె ఆచారిమ్ జా ప్రబుక నంపజలన్.

పవులు పిసిదియ ప్రాంతుమ్చి అంతియొకయతె బోదన కెర్లెసి

13 తెదొడి పవులు, జోవయింతెన్ తిలన, పాపు పట్టుమ్ ముల దా, ఓడతె వెగ నముద్దుమ్ జిన, అన్నె ఇండ గెచ్చ,

‡ 13:15 13:15 తెలుగు బైబిల్తె ధర్మశాస్త్రమ్ మెల, మోసేచి అత్తి దేముడు రర్గయ్లి ఆగ్నల్ మెన అమ్ జానుమ్. ఈంజ కొడె ఎత్తి బైబిల్తె అగేచి పాచ్ పుస్తకుమతె రెర్గయ్ జా అన్నె. ఈంజ దెకవుక మెన కుపియ బాసతె నొయి ప్రమానుమతె మోసే పూర్గుమ్చొచి అత్తి రెగిడ్డి దేముడుచ ఆగ్నల్ మెన రర్గవ అన్నె. § 13:17 13:17 ఆదికాండుమ్ 12 అద్యయిమ్ తెంతో. * 13:17 13:17 ఆదికాండుమ్ 46 అద్యయిమ్. † 13:17 13:17 నిర్గమకాండుమ్ 1 అద్యయిమ్ తెంతో. ‡ 13:18 13:18 నిర్గమకాండుమ్, లేపియకాండుమ్, సంక్యాకాండుము, ద్విత్తియోపదేశ కాండుము. § 13:19 13:19 యెహోసువ.

పంపూలియా ప్రదేసిమ్చి పెర్గె పట్టుమ్తె అయ్ల. జేవ్ ఒత్త తిలి పొది, మార్పు మెలో యోహాను జోవయింక ముల దా, యెరూసలేమ్తె అన్నె ఉట్ట గెలన్.

14 పావులీంసి, మాత్రుమ్, ఇండ గెచ్చ పెర్గెక జిన, గలతీయ ప్రదేసిమ్చి పిసిదియ ప్రాంతుమ్చి అంతియొకయ మెలి పట్టుమ్తె పావెల. బక్తి కెర్తి సెలవ్ కడన్లి దీసి, యూదుల్చి సబగేరి పెన, వెసిల.

15 †మోసే పూర్గుమ్చొచి అత్తి దేముడు రెర్గయ్ల ఆగ్నల్ జలెకు, పూర్గుల్చి అత్తి సంగిల దేముడుచ కబుర్లుచి ఏక వాట కో గే వెల్లో మాన్సు సదు కెర్దికయ్, "ఓ బావుడ్లు, ప్రెజల్క కిచ్చో బోదన సంగితె గే సంగ" మెన పావులీంసిక జా సబగేర్చ అదికారుల్ పుర్తి బుకార్ల.

16 జాకయ్, పవులు ఉట్ట, ప్రెజల్క 'నూన్తు' మెలి గుర్తుక ఆతు తెన్ సయ్న కెర, "ఓ ఇస్రాయేలులు మెల అమ్చ యూదుల్, పడ్డె అమ్చొ దేముడుక బిత తుమ్ యూదుల్ నెంజిలన, సూన.

17 ఇస్రాయేలులు మెల అమ్చ పూర్గుల్క 'అంచయి మాన్సుల్ జతు' మెన వరలోకుమ్ తిలో అమ్చొ దేముడు కిసిసాన్లన్. సగుమ్ దీసల్ గెతికయ్, జేవ్ *ఐగుప్తు దేసిమి ఉట్ట గెచ్చ ఒత్త అల్లర్ తెన్ తతికయ్, జోవయింక చెంగిల్ దెక, జో ప్రబు, జోవయింక సెక్తిక, జోవయింక ఒత్త తెంతో †విడ్డల్ కెర బార్ కెర్లన్.

18 జేవ్ †దొన్ని విసా వెర్గులు బయిలు దేసిమి బుల్తె తిలి పొది, జోవయించ సిద్దు ఓర్పువ జా, జోవయింక నిదానుమ్

దెకితె తిలన్.

19 ఒత్త తెంతో, కీకనాను దేసిమ్తె సత్తు జాతివొచ మాన్సుల్క యుద్దుమ్తె అమ్చ పూర్ణుమ్చ జీన్తి రితి జో జర్గు కెర, 'ఈంజ దేసిమి ఈంజేవ్ జితు, ఇన్నెచి సొంత టాన్ జవున్' మెన జోవయింక దొర్కు కెర్లన్.

20 "పడ్డో, రమారమి చెత్తర్ వుంజో యాబయ్ వెర్సుల్ గెతికయ్, జోవయింక కబుర్లు సంగితో సమూయేలు మెలో పూర్ణుమ్చొచి కాలుమ్ ఎద, 'ఇన్నెక ఏలువ కెర్తు' మెన, నాయిమ్ వాట్ దెకయ్త ఎక్కిలోచి పడ్డో అన్నెక్కో *తీర్పు కెర్లన్ రితనక జో దేముడు అదికారుమ్ దిలన్.

21 "పడ్డో, †'అమ్క రానో కావలె' మెన అమ్చ పూర్ణుమ్చ బతిమాల్పా జా సంగితికయ్, రానోక జో ప్రబు టీవడ్లన్. కొన్నో తొలితో జోవయింక రానో జలో గే తుమ్ జాన్సు. బెన్యామీను చి వంసుమ్చొ కీషు మెలోసొచొ సావులు మెలో పుత్తుసి అమ్చొ తొలితోచొ రానో జలో. జో దొన్ని విసా వెర్సుల్ ఏలువ కెర్లన్.

22 "పడ్డో సావుల్క దూర్ కెర కెర, 'రానో జవున్' మెన ‡దావీదుక నిసాన జో ప్రబు అదికారుమ్ దిలన్. జో దావీదుచి రిసా ఇసి సంగిలన్ 'యెస్సయిచొ పుత్తున్ దావీదుక ఆవ్ నిసాన అస్సి. జోచి రిసా అంక నర్ల, అంచి పెట్టిచి ఇస్టుమ్ రితి జో నిదానుమ్ కెరెదె.'

23 " 'అమ్చ ఇస్రాయేలులుతె జెర్మ పాపుమ్ గెచ్చయ్తో రచ్చించువ కెర్తొసా జవున్' మెన పూర్ణుమ్ తెంతో ప్రమానుమ్ సంగిల్ రితి జర్గు కెర, జో అమ్చొ దేముడు ఈంజొ దావీదుచి సెకుమ్తె యేసుకయ్ జెర్మవ టీవడ్ల అస్సి.

24 జో నే బార్ జతె అగ్గె, అమ్చి ఒండి ఇస్రాయేలు పైజల్క, 'తుమ్ కెర్ల పాపల్క పెట్టి పూర్తి దుకుమ్ జా బుద్ది జా, జా గుర్తుక బాప్తిసుమ్ నజన' మెన బోదన కెర యోహాను బుల్తె తిలన్.

25 యోహాను జోచి కామ్ కెర కేడయ్తె తిల పొదులె, జోక 'ఈంజొయి ఏక్ వేల అమ్చొ దేముడు పూర్ణుమ్ సంగ తిలో రచ్చించువ కెర్తొసా జయెదె' మెన సగుమ్జిన్ మాన్సుల్ ఉచర్తికయ్, అంక కో మెన ఉచర్లను? దొర్కు జలో జో రచ్చించువ కెర్తొసా ఆవ్ నెంజి. గని అంచి పడ్డో ఎక్కిలో జెయెదె. జో గలన్ల జోడ్లుచ వాలివొ యివ కడుక కి అంక ఏలువ నాయ్, మెన యేసుచి రిసా కీయోహాన్సు సాచి సంగిలన్" మెన పవులు సంగిలన్.

26 పడ్డో పవులు అన్నె ఇసి సంగిలన్, "ఓ అమ్చొ పూర్ణుమ్చొ అబ్రాహామ్చి సెకుమ్చ అమ్చ బావుడ్లు, అమ్చొ దేముడుక బిత తుమ్ అన్నె మాన్సుల్, ఈంజ రచ్చనచి రిసా 'దొర్కు జలి' మెన జో అమ్క కబుర్ తెద్రవ అస్సి.

27 యేసుక 'దేముడు తెద్రయ్లో రచ్చించువ కెర్తొసా జొయ్యి' మెన యెరూసలేమ్తెచ యూదుల్, జోవయింక అదికారుల్ తెన్ చినితి నాయ్. జోవయించి రిసా పూర్ణుమ్ దేముడు సంగ రెగ్డయ్ల కొడె అమ్చ యూదుల్ ఎత్తి సెలవ్ కడన్సి దీసి సదు కెర్తతి, గని అర్దుమ్ నే కెరన, 'జోక మొర్తి సిచ్చ దెమ' మెన తీర్పు కెర, జా దేముడుచ కొడెతె రెగిడ్లిసి నెరవెర్చువ కెర్ల.

28 మొర్తి సిచ్చ జతి కేన్ తప్పు జో నే కెర తిల కి, జోవయింక జేవ్ పాపుమ్ వయడుక నెతిల్లె కి, 'మొర్పు' మెన *పిలాతు అదికారిక బలవంతుమ్ కెర,

* 13:20 13:20 న్యాయాదివతులు. † 13:21 13:21 సమూయేలు మొదొల్ పుస్తకుమ్ 8, 9 అద్యయల్ తెంతో. ‡ 13:22 13:22 సమూయేలు మొదొల్ పుస్తకుమ్ 16 అద్యయమ్ తెంతో. § 13:25 13:25 మత్తయి 3 అద్యయమ్. * 13:28 13:28 మత్తయి 27 అద్యయమ్.

మొరవ.

29 జోచి రిసా పూర్ణుమ్ రెగిడ్డిసి ఎత్తి జేవ్ నెరవెర్చువ కెర, సిలువ తెంతో జోచి పీనుమ్ ఉత్తవ కెర, మెన్నె ఎంగ్గవ దిల.

30 జేవ్ దస్సి మార్లై కి, అమ్చో దేముడు జోక అన్నె జియడ్లై.

31 జలె, యేసు నే మొరై అగై, గలిలయ ప్రాంతుమ్ తెంతో యెరూసలేమ్ ఎద జోచ సిస్సుల్ జో తెన్ బెద జా తిల. జో †జివ్ జా ఉట్ట, ఒగ్గర్ దీనల్ జోక డీస్తై తిలొ. జాకయ్ జేవ్ సిస్సుల్ జోచి రిసా ప్రెజల్ ఎత్తిక నూనయ్త సాచుల్ జా అస్తి.

32 ఆము కి, 'దేముడు అమ్చ పూర్ణుల్క ప్రమానుమ్ సంగిలిసి జెయిమ్ జా అస్సె', నుబుమ్ కబుర్ నూనయ్తి రిసా ఇత్తల్ జా అస్సుమ్.

33 జో ప్రబు పూర్ణుమ్ ప్రమానుమ్ సంగిలిసి అమ్చ పూర్ణుల్చ బోదల్ జల ఆమ్ యూదుల్క వరుమ్ దెతి రితి జో కిసి జర్గు కెర అస్సె మెలె, యేసుక అన్నె జియడ అస్సె. దొన్ని కిర్తనుమ్తె అమ్చో జో ప్రబు కిచ్చొ మెన యేసుచి రిసా రెగ్డయ్లొ, 'తూయి అంచొ పుత్తు, తుకయ్ ఆజి పాయిలయ్.', మెన రెగ్డయ్లన్.

34 'క్రీస్తుక మారుల, గని మొర్నుతె తయె నాయ్. జియడిందె. మొర్నుతె అన్నె గెచ్చె నాయ్' మెలి అర్దుమ్ తెన్ జో అన్నె కిచ్చొ సంగ రెగ్డయ్లన్ మెలె, దావీద్క అవ్ సజిలి రితి, తుక కచితుమ్ జేవ్ సుద్ది తిలి వరల్ దెయిందె" మెన సంగిలన్.

35 జాకయ్, అన్నెక్ కిర్తనుమ్తె రెగిడ్డి రితి, పరలోకుమ్చి సుద్ది తిలొ ఆవ్ పుత్తుచి మొర్నుతె తతి రితి అంచి ఆగు కువుక తుయి ఒప్పిసి నాయ్, మెన దావీదు రెగిడ్లన్.

36 "దావీదు, జలె, జోచి కాలుమ్

దేముడు జోక దిలి కామ్ కెర కేడవ మొర్తికయ్, జోచ పూర్ణుల్క రోవిలి రితి జోక కి రోవిల, చి మొర్నుతె తా గెలన్.

37 గని, దేముడు అన్నె జియడ్లైసా, జలె, ఎద్దర నే కువితె, మొర్నుతె తత్తి రితి గెచ్చె నాయ్.

38 "జాకయ్, బావుడ్లు, తుమ్క కిచ్చొ మెన ఆవ్ కచితుమ్ నూనయ్తసి మెలె, పాపుమ్ చెమించువ కెర్తి రచ్చున కత్తెయ్ దొర్కు జతయ్ మెలె, మాన్సు జలొ యేసుతెయి.

39 అగై తెంతో అప్పె ఎద, 'అమ్చి పాపుమ్ గెస్సు' మెన, మోసే పూర్ణుమ్చొచి అత్తి రెగిడ్డి దేముడుచ ఆగ్గుల్ రితి కెర, జో సికడ్ల ఆగ్గుల్ బియఁ అమ్చ యూదుల్ కెర్తి రితి తుమ్ కెర్తసు. గని కెద్ది కెర్లై కి, పాపుమ్ గెచ్చె నాయ్, గని యేసుక కో పూర్తి నంపజా తత్తతి గే, పాపుమ్ తెంతో విడ్డల్ జతి వరుమ్ జోవయింకయి దొర్కు జా అస్సె.

40 జాకయ్, తుమ్ జాగర్త తా, నెంజిలె, పూర్ణుల్చి అత్తి అమ్చో దేముడు సంగిలి కబుర్ తిలిసి తుమ్క లయెదె.

41 ఆదె, తుమ్ నంప నెంజి ఆన్ఱన తా, తుమ్ దెక బమ్మ జా తుమ్చి పాపుమ్ తెన్ని మొర. తుమ్చి కాలుమ్క ఏక వెల్లి కామ్ అవ్ జర్గు కెరిందె. కెర్లై కి, సాచుల్ తుమ్క జా సంగతి నూనయ్లె కి, తుమ్ కెయఁక కి నంప కెర్చు నాయ్, మెన రెగిడ్డిసి" మెన పవులు బోదన కెర కేడయ్లన్.

42 పవులుచి బర్నబా ఒత్త తెంతో బార్ జతె తతికయ్, అన్నెక్ సెలవ్ కడన్ది దీసి అమ్క ఇసి బోదన సంగ మెన ప్రెజల్ బతిమాల్పా జా సంగిల.

43 జా సబ కుట్టితికయ్, ఒగ్గర్జిన్ యూదుల్, పడ్డై దేముడుక నంపజా మార్చువ కెరన నిదానుమ్ తిల జోవయించ అన్నె బక్తుల్ కి, పవులుచి

† 13:31 13:31 మత్తయి 28, లూకా 24, యోహాను 20, 21 అధ్యాయ్ల.

బర్నబాచి పట్టి గెల. జేవ్ దొగుల జలె, దేముడు కెర్లి దయచి తెడి తా, మెన బతిమాల్పా జా బోదన కెర్ల.

44 అన్నెక్ నెలవ్ కడన్లి దీసి అయ్లి, జలె, †యేసుచి రిసాచి సుబుమ్ కబుర్ పావులీసిచి అత్తి సూనుక మెన, ఒండి పట్టుమ్చ సబతె బెర అయ్ల.

45 జలె ఒత్త బెర అయ్ల జనాబ్ క దెక, యూదుల్చ వెల్లెల మాన్సుల్ ఒగ్గర్ కోపుమ్ తెన్ గోస జా, పవులు సంగిలిన ఎత్తిక 'అబద్దుమ్' మెన వేర సంగ, జోక దూసుప కెర్ల.

46 తెదొడి పవులు బర్నబా తెన్ దయిరిమ్ తెన్ ఇసి సంగిలన్, "దేముడు దిలి సుబుమ్ కబుర్ తుమ్ యూదుల్చయ్ తొల్లితో సూనవుక తిలి, గని 'సత్తిమ్' మెన తుమ్ ఒప్పునుక నెస కెర వెంట గెలి రితి కెర 'దేముడుచి రాజిమ్తె బెద పరలోకుమ్తె గెతి జీవ్ దెతి పరుమ్ ఆమ్ నజనుక విలువ నాయ్' మెలి రితి తుమ్ పిట్టవన్ తిన్ క రుజ్జు జతయ్, చి రిసా యూదుల్ నెంజిలనక సుబుమ్ కబుర్ సూనవుక దెర్లసుమ్.

47 ప్రబు అమ్క కిచ్చొ మెన ఆడ్ర దా అస్సె మెలె,

ఒండి లోకుమ్చక 'రచ్చించుప జతు' మెన, అమ్చి ఉజిడి దెకయ్తి రితి జతి రితి, యూదుల్ నెంజిల మాన్సుల్క సుబుమ్ కబుర్ సూనయ్తి రిసా తుమ్క తెద్రవ అస్సి, మెన ప్రబు సంగ అస్సె".

48 యూదుల్ నెంజిలన, జలె, ఈంజ కోడు సూన, సర్ల జా, దేముడు దిలి జా సుబుమ్ కబుర్క గవురుమ్ కెర్ల, చి 'పరలోకుమ్చి రాజిమ్తె బెదుత్' మెన జోవయింతె కక్క ప్రబు నిసాన తిలో గే, జెద్వి నంపజల.

49 జా ఒండి ప్రాంతుమ్తె కి ప్రబుచి సుబుమ్ కబుర్ సూనయ్ జలి.

50 యూదుల్చ వెల్లెల మాన్సుల్, పట్టుమ్చ వెల్లెల తెర్బోదల్తె మున్సుబోదల్తె గెచ్చొ సికడ, జోవయించి అత్తి పవులుక చి బర్నబాక అల్లర్ కెర, జా పిసిదియ ప్రాంతుమ్ తెంతో ఉదడ గెల.

51 జేవ్ దొగుల, 'ప్రబుచి సుబుమ్ కబుర్ సూనుక, జేవ్ యూదుల్ అవ్కానుమ్ పిట్టవన అస్తి' మెలి గుర్తుక, జేవ్చ చట్టొతెచి దూడి పంప్ల గెల కెర, ఒత్త తెంతో తూర్పు పక్క తిలి ఈకొనియ పట్టుమ్తె ఉట్ట గెల.

52 జా అంతియొకయ పట్టుమ్తెచ ప్రబుక నంపజా జోవయించ సిస్సుల్ జలన మాలజ్ జతి నాయ్. దేముడుచి సుద్ది తిలి ఆత్మ జోవయించి పెట్టి బెర తతికయ్, సర్లసంతోసుమ్ జా, నిదానుమ్తె తిల.

14

పవులు బర్నబా ఈకొనియతె బోదన కెర్లిసి

1 ఈకొనియతె పవులు బర్నబా తా కెర, జా అన్నెక్ పట్టుమ్తె కెర్లి రితి, యూదుల్చి సబగేరి పెన, బోదన కెర్ల. ప్రబుచి ఆత్మనెక్తి తెన్ బోదన కెర్లికయ్, ఒగ్గర్ ఒగ్గర్జిన్, యూదుల్ కి, గ్రీసు దేసిమ్చ కి, నంపజల.

2 గని నంప నే కెర్ల యూదుల్చ వెల్లెల మాన్సుల్, నంపజల బావుడ్లుచి రిసా యూదుల్ నెంజిలనక గోస సికడ అల్లర్ కెరయ్ల.

3 దన్న అల్లర్ తిలె కి, దయిరిమ్ తెన్ ప్రబుచి సుబుమ్ కబుర్ సూనవ, పావులీసి ఒగ్గర్ దీనల్ ఒత్త తా గెల, ప్రబు జేవ్చి అత్తి వెల్లెల అద్బుతుమ్ కమొ కెర, జోచి దయచి రచ్చనచి రిసా సుబుమ్ కబుర్క 'సత్తిమ్' మెలి గుర్తుక రుజ్జుల్ దెకయ్లన్.

† 13:44 13:44 మెలె, 'ఎత్తి అదికారుమ్ తిలో దేముడు దిలి సుబుమ్ కబుర్'.

4 గని జా ఈకొనియ పట్టుమ్చ మాన్సుల్ దొన్ని జట్టు జల. జోవయింతె సగుమ్జిన్ యూదుల్చ వెల్లో మాన్సుల్చి పచ్చెన జల, సగుమ్జిన్ పవులుచి బర్షబాచి పచ్చెన జల.

5 యూదుల్ నెంజిలన సగుమ్జిన్, యూదుల్ జలన సగుమ్జిన్, జోవయించ వెల్లెల మాన్సుల్ కి, 'జోవయింక దెర, పత్రల్ గల మారుమ' మెన కుట్ర ఉచర్ల.

6 గని దస్సి కుట్ర ఉచర అస్తి మెన జేవ్ దొగుల జాన్లి పొదిక, బే బేగి ఉట్ట గెచ్చు లుకయొనియ ప్రాంతుమ్చి లుస్త, పడ్డె దెర్చే మెంత పట్టలె, చి సుట్టునంతచ గెచ్చెలె గెచ్చు,

7 ఒత్తయ్ సుబుమ్ కబుర్ నూనయ్తె తిల.

లుస్తతె ఎక్కిలోక చెంగిల్ కెర్లిసి

8 జలె, పవులు లుస్తతె ఏక్ సుట్టు బోదన కెర్తె తతికయ్, చట్టో కదుల్ కెరుక నెత్తిల్లో మాన్సు ఎక్కిలో వెన తిలో. జెర్మిల్ తెంతో సొట్టో జా అస్సె. చట్టో లంబ అస్తి.

9 పవులు బోదన కెర్లిసి జో నూన్తె తతికయ్, పవులు జోక చెంగిల్ దెక, 'చెంగిల్ జతి నముకుమ్ జోక అస్సె' మెన చిన కెర,

10 అవాడ్ కెరన, "తుయి ఉట్ట సొగ జా టీవోజ" మెన సంగితికయ్, చట్టున ఉట్ట ఇండుక దెర్లె.

11 పవులుచి అత్తి కెర్లిసి జనాబ్ దెక కెర, జా లుకయొనియ ప్రాంతుమ్చి బాస తెన్, "దేముడ్లు మాన్సుల్చి రితి జా అమ్తె ఉత్త్ర జా అస్తి" మెన కేకుల్ గల.

12 బర్షబాక "ద్యుపతి జయెదె" మెన సంగిల, అన్నె జేవ్ దొగులతె పవులు ఒగ్గర్ సంగితయ్చి రిసా, జోక "హెర్మె జయెదె" మెన సంగిల.

13 ద్యుపతి, జలె, పట్టుమ్చి పురెత్తో గుడి తయెదె. జో పూజరి, జలె,

పోతుల్క ఉదడ ఆన, పుల్లో బంతివొ దెరన, పట్టుమ్చి గుమ్ముమె జా కెర, ప్రెజల్ తెన్ జేవ్ దొగులక బలి దెంక ఉచర్ల.

14 దస్సి ఉచర అస్తి మెన ప్రబుచ బారికుల్ జల బర్షబా చి పవులు నూన కెర, దుకుమ్క సొక్కల్ చిరన, జనాబ్ తిలిన్తె నిగ జా,

15 "తుమ్ మాన్సుల్ కిచ్చొక ఇసి జతను? ఆమ్ కి తుమ్చ రితయ్ మాన్సులి. తుమ్క 'ఇన వెర్లి కమొ ముల పరలోకుమ్ బూలోకుమ్ సముద్దుమ్, జాతె తిలిసి ఎత్తి జెర్మయిలో, జివ్ తిలో దేముడ్లుకయ్ నంపజా చెంగిల్ జతు' మెనయ్, సుబుమ్ కబుర్ నూనవుక అయ్లమ్" మెన పవులుచి బర్షబా కేక్ గల.

16 "అగ్గెచ ఉగుమ్తె తిల మాన్సుల్ ఇస్టుమ్ అయ్ల రితి కెర జింక జో పరలోకుమ్చొ ప్రబు సెలవ్ దా తిలె కి,

17 జోచి అదికారుమ్చ, జోచి ప్రేమచ గుర్తులు దెకవుక జో ములె నాయ్. మెలె, చెంగిల కమొ కెర్తె తిలన్, కెర్తె తత్తయ్. కీసచ మెలె, తుమ్క 'సరిపుచువ జతి అన్నిమ్ దొర్కు జవున్, తుమ్క పెట్టితె సర్ల తెన్ జతు కతు' మెన, ఆగాసుమ్ తెంతో పాని పెటవ, బుయిచి పలితుమ్ దెరయ్తయ్" మెన సికడ్ల.

18 గని ఇసి బోదన కెర్లె కి, జేవ్ మాన్సుల్ బలి దెంక ఉచర్లిసి కన్టనె పిట్టయ్ల.

ప్రెజల్ పవులుక పత్రల్ గల మార్క దెకిల

19 తెదొడి పిసిదియ ప్రాంతుమ్చ అంతియొకయ చి ఈకొనియ పట్టల్ తెంతో యూదుల్ సగుమ్జిన్ జా కెర, ప్రెజల్క సికడ్డికయ్, పవులుక పత్రల్ గల మార్ల మొర గెలన్ మెన కెర, జోక 'మొరయి అస్సె' మెన ఉచర, పట్టుమ్ తెంతో ఒర్గొడ నా ములిల.

* 14:20 14:20 ఏక్ వేల అంతియొకయ తెంతో జా తిల.

20 గని ప్రబుచ సిస్సుల్ జలన * అయ్ల అన్నె, జోచి సుట్టునంత బెర్తికయ్, జో చెంగిల్ జా ఉట్టు పట్టుమ్ తెడి అన్నె వెసిలన్. అన్నెక్ దీసి బర్బజా తెన్ బార్ జా, దెర్చే పట్టుమ్తె ఉట్ట గెల.

21 జా పట్టుమ్తె గెచ్చు సుబుమ్ కబుర్ సూనయ్తికయ్, ఒగ్గర్జిన్ మాస్సుల్ నంపజా ప్రబుచ సిస్సుల్ జల, చి ఈంజేవ్ దొగుల బుల జా లుస్తతె, ఈకొనియతె, చి అంతియొకయతె

22 అన్నె బోదన కెర, “తుమ్ నిదానుమ్ తా. దేముడుచ్చి రాజిమ్తె బెదితి వరుమ్ ప్రబు తుమ్క అమ్క దిలెకి, కస్టల్ నెంతె పాచుమ్ నాయ్. కస్టల్ సేడ్తె తమ్దె, గని దయిరిమ్ తెన్ తా” మెన, ప్రబుక నంపజల సిస్సుల్ జలనచి ఆత్మ డిట్టుమ్ కెర్ల.

23 పడ్డొ చువ్వె తా ప్రార్దన కెర, సికడ్డె తత్తు మెన, ఎత్కి సంగుమ్క దెకితె వెల్లెల మాస్సుల్ జతు మెన మాస్సుల్క నిసాన, జేవ్ నంపజలో యేసుప్రబుచి కామ్ జేవ్ కెర్తి రితి జేవ్చి అత్తి సార్చ కెర్ల.

24 అన్నె ఒత్త తెంతో పావులీంసి పిసిదియ ప్రదేసిమ్ వాట్ గెచ్చు, పంపూలియా ప్రదేసిమ్తె జా కెర,

25 పెర్గే పట్టుమ్తె సుబుమ్ కబుర్ సూనవ, అత్తాలియ పట్టుమ్తె పాచ కెర,

26 ఒత్త తెంతో ఓడతె వెగ, సముద్దుమ్ జీన, సిరియ ప్రదేసిమ్చి అంతియొకయతె అయ్ల. ఒత్త అగ్గె, చువ్వె తా ప్రార్దన కెర, ప్రబుచి సుబుమ్ కబుర్ కామ్ ఈంజేవ్ దొగుల కెర్తి రిసా ఇన్నెక్ దేముడుచి అత్తి సార్చ కెర దా బార్ కెర తిల. జా కామ్ అప్పె జెయిమ్ జా అస్సె మెన రుజ్జు దెకయ్తి రిసా,

27 అప్పె ఉట్ట జా ఒత్త పాచ కెర, ఎత్కిజిన్క ఎక్కితె బుకారా కెర, దేముడు జోవయించి అత్తి జర్గు కెర్లిసి ఎత్కిచి రిసా, పడ్డొ యూదుల్ నెంజిలన కి

నంపజా రచ్చించువ జతి కోడు ప్రబు దిలిన్చి రిసా సాచి సంగిల.

28 ఒత్త తెంతో, ప్రబుచ ఒత్తచ సిస్సుల్ తెన్ ఒగ్గర్ దీసల్ తా గెల.

15

1 పవులు బర్బజా దస్సి సిరియ ప్రదేసిమ్చి అంతియొకయతె తిలి పొది, యెరూసలేమ్ పట్టుమ్ తిలి యూదుయ ప్రదేసిమ్ తెంతో సగుమ్జిన్ నంపజల యూదుల్ జా కెర, యూదుల్ నెంజిలసా, “అమ్చొ మోసే పూర్గుమ్చొచి అలవాట్ కెర యూదుల్ జతి గుర్తుచి సున్నతి కెరనైకయ్ పరలోకుమ్తె గెతి రచ్చన తుమ్క దొర్కు జయెదె” మెన సికడ్డె.

2 “జేవ్ నంపజలి పొద్ది కీసి జా సున్నతి నెంతె తిల, దస్సి తత్తు జా సున్నతి నెంతె కి రచ్చించువ జవుల” మెన, పవులుచి బర్బజా జేవ్ మాస్సుల్క జబాబ్ దిల. జేవ్ మాస్సుల్ సికడ్డిసిచి రిసా సగుమ్ దీసల్ బాద సేడ లట్టబై తిలె కి, జా తగు కుట్టె నాయ్. ప్రబుక నంపజలన “బారికుల్తె చి ఒత్తచి అమ్చి సంగుమ్చ అన్నె వెల్లెల మాస్సుల్తె గెచ్చు, ఈంజ తగుచి రిసా పున సూన్తు” మెన, పవులుక చి బర్బజాక చి జేవ్ నిసాన అన్నె సగుమ్జిన్క యెరూసలేమ్తె తెద్రయ్ల.

3 జా కామ్చి రిసా జా అంతియొకయ్ పట్టుమ్చి సంగుమ్తెచ మాస్సుల్ పావులీంసిక ప్రబుచి అత్తి సార్చ కెర దా తెద్రయ్తికయ్, పేనేకే ప్రదేసిమ్ వాట్ చి సమరయ ప్రదేసిమ్ వాట్ గెచ్చు గెచ్చు, యూదుల్ నెంజిలన యేసుక నంపజా మార్పుప జలిన్చి రిసా సూనయ్తె తిల చి, ఒత్తచ నంపజలన ఎత్కిజిన్ ఒగ్గర్ సర్దనంతోసుమ్ జల.

యెరూసలేమ్తె అగ్గె సబ కెర్లిసి

4 జేవ్ యెరూసలేమ్తె ఉట్ట జా పావిలి పొది, ఎత్కిజిన్ జోవయించ వెల్లెల మాస్సుల్ తెన్ చి, బారికుల్ తెన్,

దస్సుల్ జా జోవయింక మరియాద కెల చి, దేముడు జోవయించి అత్తి జర్గు కెర్లిసి, జోవయింక తోడు దిలిసి ఎత్తి సంగిలిసి.

5 గని యేసుప్రబుక సంపజల ఒత్తచ మాస్సుల్ సగుమ్జిన్, అగ్గె తెంతో పరిసయ్యుల్ మెంత పండితుల్చి జట్టుతె అస్తి, “యూదుల్ నెంజిల జేవ్ మాస్సుల్క అమ్చి గుర్తుచి సున్నుతి కెరుక అస్సె చి, అమ్చొ మోసే పూర్గుమ్చొచి అత్తి దేముడు దిల ఆగ్గుల్ రితి జేవ్ కెరుక అస్సె” మెన, బలవంతుమ్ కెర్ల.

6 ఈంజ తగుచి రిసా సరిగా లట్టబ తీర్పు కెరుక మెన, బారికుల్, వెల్లెల మాస్సుల్ తెన్ వెసిల.

7 జా తగు సరిగా సూన ఉచర కేడయ్లి పొది, పేతురు టీచొజ, ఇసి మెన జోవయింక సంగిలన్. “ఓ బావుడ్లు, అమ్క ప్రబు జోచి ఆత్మనెక్కి దిలి తొలితో చి దొరతి, ‘యూదుల్ నెంజిలస కి సుబుమ్ కబుర్ సూన సంపజతు’ మెన, అంచి అత్తి సూనయ్లి రిసా తుమ్ అమ్చొ దేముడు అంకయి నిసాన్లన్, మెన తుమ్ జాన్సు.

8 జలె, మాస్సుచి పెట్టి తిలిసి జాన్లొ దేముడు మెన. నిజుమి, జేవ్ కి సంపజా రచ్చించువ జా అస్తి మెన సాచి జా రుజ్జు దెకవ అస్సె. అమ్చి పెట్టి దిలి రితి, జోవయించి పెట్టి కి జోచి సుద్ది తిలి ఆత్మ దిలన్.

9 అమ్క జోవయింక తేడ నే దెకితె, జోవయించి నముకుమ్చి రిసా, జోవయించి పెట్టి జోవయింక కి సుద్ది కెర్లన్.

10 జలె, దేముడుక సికడుక ఉచర్తసు గే, జోచి సిస్సుల్ రిత జల జేవ్ యూదుల్ నెంజిల మాస్సుల్క దస్సి జాడు వయడుక మెన కిచ్చొక ఉచర్తసు? జేవ్ ఆగ్గుల్ వయితి పూచి అమ్చ పూర్గుల్ కి, ఆమ్ కి, ఓర్పువ జంక, నెరవెర్పువ కెరుక, నెతిర్లమ్.

11 ‘ఎక్కి అమ్చొ ప్రబు యేసుచి దయచి రిసా జేవ్ కి ఆమ్ కి రచ్చించువ జా పరలోకుమతె గెచ్చుమ్దే’ మెన అమ్ సంపజా దయిరిమ్ జా అస్సుమ్” మెన, పేతురు సంగిలన్.

12 పేతురు దస్సి సంగితికయ్, బెర తిల ప్రెజల్ తుక్లె తా, యూదుల్ నెంజిలసతె పావులీంసి గెతికయ్ జేవ్ యూదుల్ నెంజిలసచి రిసా ప్రబు జోవయించి అత్తి కెర్ల వెల్లెల అద్బుతుమ్ కమొ గుర్తులు ఎత్కిచి రిసా బర్నబా చి పవులు సాచి సంగిలిసి సూన్ల.

13 జేవ్ సాచి సంగ కేడయ్లి పడ్డొ, యాకోబు, జేవ్ సబ వెన ఉచర్లిసి బెదవ తీర్పు సంగిలన్. “ఓ బావుడ్లు, సూన,

14 దేముడు యూదుల్ నెంజిలసక ప్రేమ దెక ‘అంచి నావ్చి గవురుమ్ దెకయ్లి రితి, అమ్చ ప్రెజల్ జేవ్ కి జతు’ మెన జేవ్చి తెంతో సగుమ్జిన్క నిసాసుక దెర్లిసిచి రిసా, నీమోసు పేతురు సాచి సంగ అస్సె.

15 దేముడు ప్రబుచ కబుర్లు పూర్గుమ్ రెగిడ్లనవ కొణొ కి జా సాచి తెన్ బెదితయ్.

16 ‘పడ్డొక ఆవ్ అన్నె జెయిందె, చి దావీదు పూర్గుమ్చొచి సేడ తిలి టంబుగేరు అన్నె బందిందె. జా పాడ్ జలిసి అన్నె నొవర్ కెర బందిందె.

17 లోకుమ్చ అన్నె మాస్సుల్, అన్నె, యూదుల్ నెంజిలసతె కో అంచి నావ్ తెడి తవుల గే, ప్రబుక చజ సంపజతు’ మెన,

18 పూర్గుమ్ తెంతో ఈంజ కబుర్ సూనయ్లో దేముడు సంగ అస్సె”

19 జాకయ్ ఆవ్ కిచ్చొ తీర్పు సంగితసి మెలె, దేముడుక సంపజా మార్పువ జల, అమ్చ యూదుల్ నెంజిలసక అమ్ బాద సేడవుక బెదె నాయ్.

20 గని అమ్ కిచ్చొ కెర్లె చెంగిల్ మెన ఆవ్ ఉచర్తిసి మెలె, ‘దేముడ్లు’ మెన బొమ్మల్ గట్టక దిలిసి కతు నాయ్, లంజెకమొ కెర్తు నాయ్, టొట్రొ మోడ మార్లి సిద్ద

కతు నాయ్, లోయిఁ కతు నాయ్ మెన ఉత్తమ్ రెగ్గవ తెద్రవుమ్.

21 కేన్ పట్టుమ్తె కి, అగ్గెయి తెంతో మోసే పూర్ముచోచి అత్తి రెగిడ్డి దేముడుచ ఆగ్గుల్ నూనయ్తతి, ఎత్తి సెలవ్ కడన్లి దీసి అమ్చ సబ గెరలె సదు కెర్తతి, చి ఈంజేవ్ ఆగ్గుల్చి రిసా నూన త్వుల.

ఉత్తమ్ రెగ్గ అంతియొకయతె తెద్రయ్లీసి

22 తెదోడి, బారికుల్క చి యెరూసలేమ్ పట్టుమ్చ సంగుమ్చ అన్నె వెల్లెల మాన్సుల్క, జా సంగుమ్చ మొత్తమ్క కిచ్చో అజ్జ అయ్లీ మెలె, 'పవులు చి బర్నబా తెన్ అమ్తె సగుమ్జిన్ అంతియొకయతె గెలె చెంగిలి' మెన, బర్నబా మెలో యూదాక చి సీలయుక నిసాన. ఒత్తచ నంపజల సుదల్తె ఈంజెవు ముక్కిమ్ మాన్సుల్ జవుల.

23 ఇన్నెచి అత్తి తెద్రయ్తి ఉత్తమ్తె ఇసి రెగిడ్డ.

"అంతియొకయతె, జా ఒండి సిరియ ప్రదేసిమి, చి కిలికియ ప్రదేసిమ్తె తిల యూదుల్ నెంజిల నంపజలన్క, బారికుల్, యెరూసలేమ్చి సంగుమ్చ వెల్లెల మాన్సుల్ జల తుమ్చ బావుడ్లు రెగిడ్డి ఉత్తమ్. తుమ్క 'చెంగిల్ తంక' మెన ప్రబుక రోజుక ఉచర్తసుమ్.

24 కిచ్చోచి రిసా ఈంజ ఉత్తమ్ రెగిడ్డసుమ్ మెలె, అమ్చితె తెంతో సగుమ్జిన్ బార్ జా తుమ్తె గెచ్చు కొడో సంగ తుమ్క మెన్నుతె బాద సేడవ, సిక్కు కెర అస్తి మెన నూన అస్సుమ్, అమ్చి సెలవ్ నెంతె దస్సి కెర అస్తి.

25 జాకయ్ ఆమ్ సబ కెర్లమ్, అన్నె ఎక్కి కట్టు తెన్ ఉచర్లె, 'చెంగిల్' మెన అమ్క కిచ్చో అజ్జ అయ్లీ మెలె, 'అమ్చ

ప్రేమ తిల బర్నబాచి పవులు తెన్ కబుర్ గెతు' మెన సగుమ్జిన్క నిసాన తుమ్తె తెద్రయ్లె చెంగిలి మెన అజ్జ అయ్లీ.

26 యేసుక్రీస్తు ప్రబుచి సుబుమ్ కబుర్ సూనయ్తి రిసా ఈంజేవ్ దొగుల ఎదివాట్ సైమల్ సేడ అస్తి.

27 యూదాక చి సీలయుక ఇనయింతెన్ తెద్రవ అస్సుమ్. ఇన్నె రెగిడ్డి రితి జేవ్ సొంత సంగుల.

28 "దేముడుచి సుద్ది తిలి ఆత్మ అమ్క కిచ్చో బుద్ది సంగితయ్ మెలె, అమ్క కి కిచ్చో చెంగిల్ డీస్తయ్ మెలె, తుమ్క, 'కిచ్చో కిచ్చో అమ్చ ఆగ్గుల్ అలవాట్ కెర్తు' మెన అమ్ జాడు వయడ్లి రితి కెరుక బెదె నాయ్. 'ఎక్కి ముక్కిమ్క కెర్తు' మెన తుమ్క ఉచర్తసుమ్.

29 బొమ్మల్క గట్ట దిలిసి కా నాయ్, లోయి కా నాయ్, టోట్రో మోడ లోయి నే గెచ్చయ్లీ సిద్ద కా నాయ్, చి లంజెకమొ కెర నాయ్. ఈంజేవ్ అలవాట్ కెర్లదు మెలె, తుమ్క చెంగిలి. చెంగిల్ తెన్ తా", మెన రెగ్గ తెద్రయ్ల.

30 జేవ్ తెద్రయ్తికయ్, జేవ్ అంతియొకయతె ఉట్ట గెల, ఒత్త పాచ కెర, నంపజలన్క ఎక్కితె బుకారా కెర, జా ఉత్తమ్ దిల.

31 జేవ్ యూదుల్ నెంజిలన సదు కెర, బుద్ది సంగితి దయిరిమ్ కెర్తి జా కబుర్చి రిసా సర్దసంతోసుమ్ జల.

32 యూదా చి సీలయు, జలె, ప్రబుచి ఆత్మ సికయ్త కబుర్లు సంగితన జవుల, చి ఒత్తచ నంపజలన్క ఒగ్గర్ బోదన కెర, బుద్ది సంగ, దయిరిమ్ కెర్ల.

33 సగుమ్ దీసల్ ఒత్త తా, ప్రబుచ కొడో సంగ సంగ, దయిరిమ్ కెర కెర, జోవయిం చి ఒత్తచి కామ్ కేడయ్తికయ్, 'జోవయింక తెద్రయ్లనతె అన్నె ఉట్ట గెతు' మెన, జా పట్టుమ్చ జోవయింక "సేంతుమ్ తెన్ గెచ్చు" మెన, సర్ద తెన్ యెరూసలేమ్తె అన్నె తెద్రయ్ల.

34 *సీలయు మాత్రుమ్, ఒత్త తంక చెంగిల్ మెన ఉచర్లొ.

35 మదెనె, పవులు చి బర్నబా అంతియొకయతె తా, అన్నె ఒగ్గర్జిన్ తెన్ కి, ప్రబుచి సుబుమ్ కబుర్ సూనయ్తె తిల.

బర్నబా, పవులు వేర వేరతె ఉట్ట గెలిసి

36 సగుమ్ దీసల్ గెలి వణ్ణొ, “జొమ్మ, ప్రబుచి సుబుమ్ కబుర్ సంగ ఆమ్ అగ్గి బోదన కెర్ల ఎత్తి పట్టలె అన్నె గెచ్చ, నంపజలన్తె గెచ్చ, జోవయింక ‘కిసి అన్తి గే’ దెకుమ” మెన, పవులు బర్నబాక సంగిలన్.

37 బర్నబా, మాత్రుమ్, “మార్కు మెలో యోహానుక జేవ్చి తెన్ కడ నెమ” మెన ఇస్టుమ జలన్.

38 గని, జా అగ్గెచి సుట్టు మార్కు జేవ్చి తెన్ బార్ జా తిలె కి, జా కామ్తె సరిగా నే బెదితె, జోక †ముల దా అన్నె ఉట్ట గెచ్చ తిలన్, చి ‘అప్పె కడ నిలె, దస్సి అన్నెములె దిలె కిసి’ మెన, పవులు సంగిలొ.

39 జాచి రిసా దొగుల దొన్ని మెన్నుల్ జా జట్టి జల చి, దొగుల దొన్ని పక్కలె ఉట్ట గెల. బర్నబా మార్కుక కడన, ఓడతె వెగ, నముద్రుమ్ జిన, కుప్ర, డిబ్బ దేసిమి ఉట్ట గెల.

40 గని ‘అంచి తెన్ ఈంజొ జెవున్’ మెన, పవులు సీలక నిసాన్లన్. అన్నె, ఒత్తచ నంపజలన ప్రార్దన కెర, చి కామ్చి రిసా జోవయింక ప్రబుచి అత్తి సార్ప కెర దెతికయ్, జేవ్ ఉట్ట గెల.

41 ఒండి సిరియ ప్రదేసిమి, చి ఒండి కిలికియ ప్రదేసిమత గెచ్చ కేనె నంపజలనచ సంగుమ్లుతె గెచ్చ బోదన కెర డిట్టుమ్ కెర్తె తిల.

* 15:34 15:34 గ్రీకు బాస తెన్ ఈంజ మత్తెలి తొలితో రెగిడ్ల సగుమ్ పుస్తకల్తె 34 నంబర్చి కోడు తయె నాయ్. † 15:38 15:38 బారికుల్ 13:13.

16

తిమోతి పవులు బోదన కెర్లెసి

1 ఒత్త తెంతొ, గలతీయ ప్రదేసిమ్చ లుస్త చి దెర్చే మెల పట్టుమ్లుతె పవులు చి సీలయు గెల. తిమోతి మెలో సిస్సుడు తిలన్. జో యూదుడుయి జలి అయ్యన్ తెన్, జోచి పట్టుమ్తె పవులు అగ్గె జా తిలిసి తెంతొ ప్రబుక నంపజా అన్తి. తిమోతిచొ అబ్బొసి, మాత్రుమ్, యూదుడు నెంజె, గ్రీకు దేసిమ్చొ, జో.

2 జో తిమోతి చి రిసా, “నిదాసుమ్ తిలోసా” మెన లుస్త చి ఈకొనియ పట్టుల్తెచ బావుడ్లు ఎత్తిజిన్ సంగితె తిల.

3 జాకయ్, “జో కి అమ్చి తెన్ చి కామ్తె బెదున్” మెన పవులు సంగిలొ. జో నాడుచొ అబ్బొన్ ‘యూదుడు నెంజె! గ్రీకు దేసిమ్చొ మాన్సు జయెదె’ మెన, జో ‘పుత్తున్క యూదుల్చి గుర్తుచి సున్నతి కెర తయె నాయ్’ మెన, ఎత్తిజిన్ జాన్తి రిసా ‘జా సున్నతి తిమోతి నే కెరన తిలె, ఆమ్ గెతిన్తెచ యూదుల్ నిస్కారుమ్ దెకుల’ మెన, జోక పవులు జా సున్నతి కెర దిలన్.

4 జలె, ఒత్తచ పట్టుల్ ఎత్తితె గెచ్చ గెచ్చ, యెరూసలేమ్తెచ బారికుల్చి ఒత్తచి సంగుమ్చ వెల్లెల మాన్సుల్ ఎత్తి సంగిలి తీర్పు నెరవెర్చువ కెర, మెన జేవ్ తీగ్గ సూనయ్ల.

5 జా ఒండి ప్రాంతుమ్తెచ సంగుమ్లుచ సుదల్ జలె, ప్రబుచి ఉప్పిర్చి నముకుమ్క అన్నె డిట్టుమ్ జల, చి రోజుక అన్నె మాన్సుల్ ప్రబుక నంపజా మార్కువ జా జోవయింతెన్ బెదిల.

పవులు మాసిదోనియ ప్రదేసిమ్తె తెద్దయ్లెసి

6 ఒత్త తెంతొ పవులు సీలయు చి తిమోతి, గలతీయ ప్రదేసిమ్ వాట్ చి

ప్రగియ ప్రాంతుమ్ వాట్ గెల. “ఆసియా ప్రదేసిమ్తె సుబుమ్ కబుర్ నూనవుక పోన” మెన దేముడుచి సుద్ది తిలి ఆత్మ సంగ తిలన్,

7 చి ఉత్తర పక్కచి వాటు గెచ్చు, ముసియ ప్రాంతుమ్తె పాచిలె, బితునియ ప్రదేసిమి గెచ్చుక ఉచర్ల, గని జేవ్ ఒత్త గెచ్చుక కి యేసుచి ఆత్మ ఒప్పె నాయ్.

8 జాకయ్, ముసియ ప్రాంతుమ్ జిన, సముద్దుమ్ సొడిచి త్రోయ పట్టుమ్తె అయ్ల.

9 జేవ్ త్రోయతె నిద్ద తిలె, అందరె, ప్రబు దెకయ్లి సిన్న పవులు దెకిలన్. మాసిదోనియ ప్రదేసిమ్చొ మాన్సు ఎక్కిలో టీవోజ, “అమ్చి మాసిదోనియ దేసిమి ఉట్ట జే, చి అమ్క రచ్చించుప కెరు” మెన బతిమాల్ప జా బుకార్లన్.

10 పవులు జా సిన్న దెకిల్ బేగి, జేవ్తె జర్గు జలిసి * అమ్క సంగితికయ్, ఒత్తచ మాన్సుల్క సుబుమ్ కబుర్ నూనయ్తి రిసా ప్రబు అమ్క మాసిదోనియతె తెద్దయ్తయ్ మెన అమ్ చిన కెర, బేగి పెందలె మాసిదోనియతె గెచ్చుక బార్ జలమ్.

11 జా పెందలె, త్రోయతె ఓడతె వెగ సముద్దుమ్ జిన, సమొత్తాకె మెలి డిబ్బ దేసిమి పాచ నిద్ద తా, అన్నెక్ దీసి సముద్దుమ్ అన్నె జిన, మాసిదోనియ ప్రదేసిమ్చి నెయపొలి రేవుతె పాచ ఉత్తిర్లమ్.

12 ఒత్త తెంతో మాసిదోనియక వెల్లి పట్టుమ్ జలి పిలిప్పితె ఇండ గెచ్చు, ఒత్త సగుమ్ దీసల్ తా గెలమ్. ముక్కిమ్క రోమ దేసిమ్చి ఒగ్గర్జిన్ తతె తిల.

13 జలె, †యూదుల్చి సెలవ్ కడన్ది దీసి, ‘ఒత్త ప్రార్దన కెర్తతి’ మెన, పట్టుమ్చి గుమ్ముమ్ ఒత్తల్తో బార్ జా,

గాడు సొడి తిలిన్తె గెలమ్. గెలె, ప్రార్దన కెరుక మెన, తేర్బోదల్ సగుమ్జిన్ జా అస్తి. జేవ్ తిలిన్తె వెన, బోదన కెరుక దెర్లమ్.

లూదియ మెలి తేర్బోద ప్రబుక నంపజా మార్పువ జలిసి

14 ప్రార్దన కెరుక గెల జేవ్ తెర్బోదల్తె లూదియ మెలి ఎక్కి తిలి. జా సుది బట్టల్ గట్టచి రిసాచి ఊద రంగుచి బియ్యారి కెరెదె. ఆసియా ప్రదేసిమ్చి తుయత్తెర పట్టుమ్చి తేర్బోద, జా. జా అగ్గె తెంతో దేముడుక నిదానుమ్ జా జోక బక్తి కెర్తిసి. నూన్తి బుద్ది తిలిన్చి పెట్టి ప్రబు దెతికయ్, పవులు సంగిలి బోదన నూన, జా నంపజలి.

15 నంపజా, జేవ్చి గెర్చ ఎత్తిజిన్ తెన్ బాప్తిసుమ్ నజన్ల. “అంక ‘ప్రబుక నిజుమి నిదానుమ్ జా అన్స’ తుమ్క రుజ్జు అయ్లి జలె, ఇన్నె బోదన కెర్తె తిలె ఎదిలి సేంపుక అమ్తె తా” మెన అమ్క బలవంతుమ్ కెర్లి.

గుర్మయ్ని జలి రితి తేర్బోద ఎక్కిచి రిసా జర్గు జలిసి

16 జలె, ఏక్ దీసి, ప్రార్దన కెర్తిసితె అమ్ గెతె తతికయ్, గొతిమాన్సు జతి ఉబెడి ఎక్కి దస్సుల్ జలి. జా గుర్మయ్ని జా సివ్వల్ జంక అలవాట్ జలిన్. జాచి జా బుద్దిచి రిసా, జాచ ఎజొమాన్లుక ఒగ్గర్ డబ్బుల్ లాబుమ్ దొర్కు జతె తయెదె.

17 జా పవులీంసిచి పట్టి జెంక దెర, కిచ్చొ మెన కేకుల్ గల, జా తేర్బోద కిచ్చొ మెన సంగిలి మెలె, “ఈంజేవ్, ఎత్కిచి కంట వెల్లి దేముడుచ సేవ కెర్తన. పరలోకుమ్తె గెతి రచ్చన దొర్కు జతి వాట్చి రిసా తుమ్క నూనవుక జా అస్తి” మెన కేకుల్ గల్తె తిలి.

* 16:10 16:10 ఇన్నె తెంతో లూకా మెలో ఈంజ ‘బారికుల్’ చి పుస్తకుమ్ రెగిస్ట్రాసా పాపులీంసి తెన్ సగుమ్ సుట్టు బులితె తిలి. † 16:13 16:13 ఈంజ పుస్తకుమ్ రెగిస్ట్రా లూకా యూదుడు నెంజె.

18 ఒగ్గర్ దీసల్ దస్సి పట్టి జా కేకుల్ గల్తె తతికయ్, పవులు, జోచి పెట్టి ఒగ్గర్ దుకుమ్ జా, జాచి పక్క పనుల, జాక దెర్లి బూతుమ్ తెన్, “ఇన్నెచి పెట్టి తెంతో బార్ జా, ఇన్నెక ములు, యేసుక్రీస్తుచి నావ్ తెన్ తుక సంగితసి” మెన పవులు జా బూతుమ్క ఉదడ గెలన్. చి జయ్యి తెదొడి బూతుమ్ బార్ జా ముల దా గెలన్.

పవులుక చి సీలయుక జేల్తె గలిలిసి

19 ‘జా తేరబోద గుర్తయ్ని జతి తిలి పొది అమ్ దొర్కు కెరంతి డబ్బుల్ లాబుమ్ అప్పె తెంతో నాయ్’ మెన జాచి ఎజోమాన్లు దెక కెర, పవులుక చి సీలక దెర, సంతవీది వెసిత పట్టుమ్చ అదికారుల్తె ఒగ్గడ నిల.

20 “ఈంజేవ్ మాన్సుల్, యూదుల్, అమ్చి పట్టుమ్తె జా కెర ఒగ్గర్ అల్లర్ కెర్తతి.

21 అమ్ రోమియుల్ జా అలవాట్ కెరుక కమొ నాయిమ్ నాయ్ మెలె కి, జోవయించ రితిచ అలవాట్ సికడ్తతి” మెన ఆరిచి నింద గలిల.

22 జనాబ్ ఎత్కి పవులీసిచి ఉప్పిరి కోపుమ్ జల, చి అదికారుల్ జేవ్ దొగులచ పాలల్ దెర కడ, జమాన్లు సుదల్ జోవయింక డండల్ తెన్ పెటుక మెన ఆడ్ర దిల.

23 జోవయింక దస్సి ఒగ్గర్ దెబ్బల్ పెట్టికయ్, అదికారుల్ జేల్తె గల, “జేవ్క జాగర్త దెక” మెన, రకితనక ఆడ్ర దిల.

24 రకితన జోవయింక తెడిచి గదితె గల కెర, జేవ్ నే విడ్డల్ జతి రితి, జోవయించ చట్టాక జాడు తిల బల్లల్క బెదితె డిట్టుమ్ బందిల.

25 జలె నెడుమ్ అందరె, పవులు చి సీలయు ప్రార్దన కెర కెర, దేముడుక గనుమ్ గాయితె తతికయ్, అన్నె జేలి జలన ఎత్కిజిన్ సూన్తె తిల.

26 తెదొడి బుయి కదుల్ జలి, చి పునాది తెంతో ఒండి జేల్ కదుల్ జలి. బేగి కెప్పివో ఎత్కి ఉగ్గి జల, చి జేలి తిలన ఎత్కిజిన్క బందిల గొల్పుల్ యిపి జల.

27 రకితోసా, జలె, చెద్దోయ్ జా, కెప్పివో ఉగ్గి జలిసి దెక కెర, ‘జేలి జలన ఎత్కిజిన్ ఉట్ట నిగ గెచ్చ తవుల’ మెన బియఁ కెర, జోచి కత్తి కడన, జోక జోయ్యి అత్య కెరన్క తయార్ జలొ.

28 గని “తుయి తుక కిచ్చొ అల్లర్ కెరను నాయ్. ఆమ్ ఎత్కిజిన్ ఇన్నె అస్సుమ్” మెన, పవులు కేక్ గల్తికయ్,

29 జో రకితోసా, దివ్వొ లంబడ ఆన కెర, బమ్మ తెన్ జేవ్ తిలి గదితె పెన, బియఁ అద్దుర్ జా, పవులుచి సీలచి చట్టె సెర్ను సేడ, జోకర,

30 తిల జేలి తిలనక అన్నె డిట్టుమ్ బంద, పవులుక చి సీలక బార్ కెర, “బాబు ఇసి, ఆవ్ రచ్చించుప జా జతి రిసా ఆవ్ కిచ్చొ కెరుక?” మెన బతిమాల్పా జా పుసిలన్.

31 తెదొడి పావులీసి, “ప్రబు జలొ యేసుక్రీస్తుచి ఉప్పిరి తూయి నముకుమ్ తియ, తుయి తుచి గెర్చ ఎత్కిజిని, రచ్చించుప జస్తె” మెన,

32 ప్రబుచి సుబుమ్ కబుర్ జోవయింక బోదన కెర్త. జోవయింక, పడ్డొ ఒండి జోవయించి గేర్చక సంగిలన్.

33 జేవ్ దొగులక జయి తెదొడి కడన, దెబ్బల్ పెట్టినచ గావ్వొ ఎత్కి దోవ సుబుమ్ కెర్లి బేగి, జో, జోచి గేర్చ ఎత్కిజిన్ బాప్తిసుమ్ నజన్.

34 జోచి గెరి కడన, జోవయింక అన్నిమ్ దా కెర, జేవ్ ఎత్కిజిని, దేముడుచి ఉప్పిరి నముకుమ్ తిల చి ఒగ్గర్ సర్దనంతోసుమ్ జల.

పవులు చి సీలయు విడ్డల్ జాఁ పట్టుమ్ ములిలిసి

35 అన్నెక్ దీసి పెందలె, “జేవ్ మాన్సుల్క విడ్డల్ కెర” మెన, దెబ్బల్

పెట్ల జమాన్లుక సంగ, అదికారుల్ జేల్తె తెద్రయల.

36 అదికారుల్ సంగిలిసి నూన, “తుమ్క ‘విడ్డల్ జా గెతు’ మెన అదికారుల్ సంగ తెద్రవ అస్తి. జాకయ్, బార్ జా, అల్లర్ నెంతె సేంతుమ్ తెన్ గెచ్చు”, రకితోసా పవులుక సంగిలన్.

37 గని పవులు జమాన్లుక, “ఎత్కిజిన్చి మొక్కె, రుజ్జుల్ నే నూన్తె, తీర్పు నే సంగితె, అమ్క పెట, జేల్తె గల అస్తి. ఆమ్ కి రోమియుల్ జా అస్సుమ్చి రిసా అమ్క దస్సి, తీర్పు నే కెర్తె, సిచ్చ కెరుక నాయిమ్ నాయ్. అప్పె, కోయి సాచి నే జతె అమ్క విడ్డల్ కెరుక ఉచర్తసు, నెంజె. జేవ్ అదికారుల్ పూచి తెన్ సొంత జా కెర విడ్డల్ కెర బార్ కెర్తు” మెన, పవులు జబాబ్ దిలన్.

38 జమాన్లు, జలె, అదికారుల్తె అన్నె గెచ్చు, ఈంజేవ్ కొడె ఎత్కి సంగ దిల, చి జేవ్ దొగులక, ‘జేవ్ కి రోమియుల్ జవుల’ మెన నూన కెర, “తప్పు కెర్లమ్” మెన బియె గెచ్చు,

39 అదికారుల్ జేల్తె జా కెర, తప్పు ఒప్పున, జోవయింక బార్ కెర, “అమ్చి పట్టుమ్ ముల ఉట్ట గెచ్చు” మెన బతిమాల్పా జా సంగిల.

40 జేవ్ పవులుచి సీలయు, జలె, జేల్ తెంతో బార్ జా, లూదియచి గెరి గెచ్చు, బెర తిల బావుడుక దస్సుల్ జా, బుద్దిచి దయిరిమ్ సంగ కెర, ఉట్ట గెల.

17

పవులు చి సీలయు దెస్సలోనిక పట్టుమ్తె గెలిసి

1 పవులు, సీలయు, అంపిపొలి పట్టుమ్ వాట్ గెచ్చు, అపొల్లోనియ పట్టుమ్తె గెచ్చు, అన్నె బార్ జా, ఒండి మాసిదోనియ ప్రదేసిమ్క వెల్లి జలి దెస్సలోనిక పట్టుమ్తె ఉట్ట అయల. ఒత్త, యూదుల్చి సబగేరు ఏక్ అస్సె.

2 పవులు, కేన్ పట్టుమ్తె అయలె, యూదుల్చి సబగేరి గెచ్చుక అలవాట్ కెరన అస్సె. చి ఒత్త కి, తిన్ని సెలవ్ కడన్చి దీసల్ వర్న తెన్ సబతె గెచ్చు, దేముడుచి కొడెతె తిలిసి రుజువు దెకవ దెకవ బోదన కెర్లన్.

3 కిచ్చొ ముక్కిమ్క బెదయలన్ మెలె, “దొర్కు జలొ రచ్చించుప కెర్తొసా జతో క్రిస్తుక దేముడు తెద్రయెదె. తెద్రయలె, జో మొర అన్నె జిశ అస్సె”

దేముడుచి కొడె తెన్ పూర్గుమ్ రెడ్డిలిసి సంగ, “ ‘యేసుయి, దేముడు సంగిలొ క్రిస్తు మెన’ తుమ్క ఆవ్ సంగితసి” మెన పవులు సంగిలన్.

4 సగుమ్జిన్ నంపజా, పవులు చి సీలయు తెన్ బెదిల. దేముడుక నంపజా నిదానుమ్ తిల గ్రీసు దేసుమ్చ ఒగ్గర్జిన్, పడ్డె ఒత్తచ వెల్లొ సుదల్ తేర్బోదల్ కి ఒగ్గర్జిన్ నంపజల.

5 యూదుల్చ వెల్లెల మాన్సుల్, మాత్తుమ్, గోస జా, పట్టుమ్చ మూర్కుడ్లు సగుమ్జిన్క దెర, జనాబ్ ఒగ్గర్జిన్క సికడ, జా ఒండి పట్టుమ్తె గగ్గల్ కెరయల. పావులీసి కచితె జితె తిల మెలె, యాసోను మెలొ ఎక్కిలొతె. తెదొడి, “పావులీసిక దెర బార్ కెర ఎత్కిజిన్చి మొక్కె తీర్పు కెరుమ” మెన, జేవ్ వెల్లొ సుదల్, జనాబ్, జోచి గెరి గెచ్చు, అల్లర్ కెర్ల,

6 గని పవులీసి డీస్తి నాయ్, చి యాసోనుక చి అన్నె బావుడు సగుమ్జిన్క దెర, పట్టుమ్చ అదికారుల్తె ఒగ్గొడ నిల. “ఒండి బూలోకుమ్క మార్పుప కెర్ల జేవ్ దొగుల ఇన్నె కి జా కెర, అమ్కయ్ కి మార్పుప కెరుక ఉచర్తతి.

7 ఈంజొ యాసోను జోవయింతె బెద, జోవయింక టాన్ దా అస్సె. ‘అన్నెక్లో రానొ జా అస్సె’, ‘యేసు జో’ మెన ప్రెజల్క

సికడ, అమ్చో *కైసర్ రానొచి విలువ కడ, కైసర్ సంగిల ఆగ్గుల్ క నే బెదిత రకుమ్లు సికడతి” మెన, కేకుల్ గల.

8 ప్రజల్ ఎత్తి, పట్టుమ్చ అదికారుల్ కి, జా కొడొ నూన, బమ్మ జా,

9 “జేవ్ దొగుల అన్నె అల్లర్ నే కెర్రి రితి తుయి పూచి జా,” మెన, యాసోసుక బలవంతుమ్ కెర, విడ్డల్ కెర్ల.

బెరయ పట్టుమ్తె పవులు సీలయి బోదన కెర్రిసి

10 తెదొడి, అందర్ జెతికయ్ బావుడ్లు బేగి పవులుక చి సీలయి క ఒత్త తెంతో ఇదిల్ దచ్చెన పక్కచి బెరయ పట్టుమ్తె వట్టి తెద్రయ్ల. జేవ్ ఒత్త పాచ, యూదుల్చి సబగేరి గెల.

11 ఒత్తచ యూదుల్చ వెల్లెల మాన్సుల్, జలె, దెస్సలొసీకతెచ యూదుల్చి కంట అమ్మయికుమ్ మాన్సుల్ జవుల. చి సర్ల తెన్ సుబుమ్ కబుర్ నూన, రోజుక, సత్తిమ్బుద్ది తెన్, ‘పావులీసి సంగితిసి దేముడుచి కొడొతె తిలీన్ తెన్ దస్సి అస్సి గే నాయ్ గె?’ మెన, రుజ్జు కెరంతి రిసా, దేముడుచి కొడు నిదానుమ్ పరిచ్చ కెర్రి తిల.

12 దస్సి కెర, ‘నిజుమ్’ మెన, జోవయింతె ఒగ్గర్జిన్ యూదులు యేసుక నంపజల. నంపజలస్ గ్రీకుదేసిమ్చ వెల్లెల సుదల్ చి తేర్బోదల్ సగుమ్జిన్, చి మున్సుబోదల్ కి ఒగ్గర్జిన్ నంపజల.

13 గని, దెస్సలొసీక మెలి పవులీసి అగ్గె గెచ్చ తిలి పట్టుమ్చ కొపుమ్ జల యూదుల్, పవులుక, ‘ఒత్త బెరయ పట్టుమ్తె కి సుబుమ్ కబుర్ నూనయ్తయ్’ మెన నూన తా, బెరయతె ఉట్ట జా, జోవయించి సొంత

పట్టుమ్తె కెర్రి రితి, ప్రజల్చి జనాబ్ క సికడ అల్లర్ కెరవుక ములితి నాయ్.

14 ‘అల్లర్ సేడ్లు నాయ్’ మెన, “సముద్రుమ్ పక్క ఉట్ట గో” మెన పవులుక బావుడ్లు తెద్రయ్ల. సీలయి, తిమోతి తెన్ జా పట్టుమ్తె తా గెల్.

15 మదెనె, పవులుక బొడొవ దెతన జోవయింక సముద్రుమ్ సొడిచి ఏదెన్సు మెలి పట్టుమ్ ఎద కడ నిల, చి ఒత్త పాచ, “బే బేగి అంచితె ఉట్ట జా” మెన, పవులు సీలయి క చి తిమోతిక కబుర్ రెగిడ్డికయ్, “న దేవ్ దె” మెన జోవయింక బొడొవ దా తిలన జా ఉత్తుమ్ నజ, జోవయించి దెస్సలొసీక పట్టుమ్తె బుల గెల.

ఏదెన్సు పట్టుమ్తె పవులు కెర్రి బోదన

16 పవులు ఏదెన్సు తా, సీలయి క చి తిమోతిక రకితె తా, ‘దేముడ్లుచ బొమ్మల్ ఇన్నె ఒగ్గర్ అస్తి’ మెన దెక తా, ‘తప్పు కెర్రితి’ మెన, పెట్టి ఒగ్గర్ దుకుమ్ జా,

17 యూదుల్చి ఎత్తి సబగేరి గెచ్చ యూదుల్ తెన్ చి దేముడుక నిదానుమ్ తిల వేర మాన్సుల్ తెన్ లట్టబ లట్టబ బోదన కెర్రి తా. అయ్తర్ తెంతో సుక్తర్ ఎద, రోజుక పట్టుమ్చి సంతవీదె గెచ్చ, ఒత్త దస్సుల్ జల సుదల్ తెన్ లట్టబ లట్టబ బోదన కెర్రి తిలన్.

18 ఒత్త సంతవీదె ఏక్ దీసి, ఎపికూరీయి చి స్ట్రాయిక్ మెల అలవాట్చ పండితుల్ సగుమ్జిన్ జో తెన్ దస్సుల్ జల. జోవయింతె సగుమ్జిన్ కిచ్చో మెల మెలి “ఈంజో బుల్తోసా కిచ్చో తెల్విచి సంగెదె గే నాయ్ గే దెకుమ” మెన ఉచర్ల. అన్నె సగుమ్జిన్, “వేర దేసిమ్చ దేముడ్లు చి రిసా సికడయ్” మెల. జేవ్ కిచ్చొక ఇసి మెల మెలి, పవులు యేసుచి రిసా,

* 17:7 17:7 ‘కైసర్ రానొ’ ‘సీజరు రానొ’ కి ‘వెల్లొ రానొ’ కి మెనుల; ‘కైసర్’ మెలి గ్రీకు బాస తెన్ బెదితయ్, ‘సీజరు’ మెలి ఇంగ్లీస్ తెన్ బెదితయ్, ‘వెల్లొ రానొ’ మెలి తెలుగు తెన్ బెదితయ్. † 17:13 17:13 నంజిలె ‘ఎత్తి అదికారుమ్ తిలొ దేముడు దిలి సుబుమ్ కబుర్’.

జో మొర అన్నె జీవ్ జలిన్చి రిసా సికడ్డె తిల్లో.

19 తెదొడి పవులుక దెర, 'అరేయొపాగు' మెలి జోవయించి సబ కెర్తి టాన్తె జోవయింక కడన కెర, "తుయి కెర్తి బోదనచి రిసా అమ్క పూర్తి అర్దుమ్ సంగు.

20 ఆమ్ నేన్ల కొణొ అమ్క సూనయ్తసి, చి జా అర్దుమ్ సూనుక ఇస్టుమ్ జతనుమ్" మెన సంగిల.

21 జా ఏదెన్ను పట్టుమ్చ, చి ఒత్త గోతు జెతనచి అలవాట్ కిచ్చొ మెలె, నొవ కొణొ, నొవ కబుర్లు సంగుక జవున్, సూన్తె తంక జవున్, జోవయింక ఆస. ఎత్తి ములుల, గని జయ్యి అలవాట్ జోవయింక ముక్కిమి.

'అరేయొపాగు' సబతె పవులు కెర్తి బోదన

22 పవులు 'అరేయొపాగు' మెలి కెర్తి టాన్తె నెడిమి టీవొజ, "ఓ ఏదెన్ను పట్టుమ్చ మాన్సుల్, దేముడ్లు మెలనచి రిసా తుమ్ ఒగ్గర్ ఉచర్తసు మెన, ఆవ్ దెకితసి.

23 ఆవ్ జెతికయ్ వట్టె తుమ్ జొకర్ల గుడివొ గట్ట దెకిలయ్. ఎత్తివాట్ అస్తి. జేవ్ గుడివొ మొత్తుమ్తె కేన్ దేముడుక పూజ కెర్తి టాన్ తిలిసి ఏక్ దెకిలయ్ మెలె, 'అమ్ నేన్లొ దేముడుచి పూజ కెర్తి టాన్ ఈంజ' మెన ఏక్తె రెగ్ల అస్సున్. తుమ్ అర్దుమ్ నేన్తె జొకర్లొ జో దేముడుచి రిసా తుమ్క సూనయిందె.

24 "జో దేముడు కేన్ దేముడు మెలె, ఈంజ లోకుమ్ జెర్మవ కెర, లోకుమ్తె తిలిసి ఎత్తి కి జెర్మయిలోసా. జో పరలోకుమ్క బూలోకుమ్క వెల్లొ, ప్రబు, చి మాన్సుల్ తెయార్ కెర్ల గుడివొతె జో తయె నాయ్.

25 అమ్ మాన్సుల్ జోక కిచ్చొ తెయార్ కెర్ల జోక లాబుమ్ నాయ్. జోక కిచ్చొ కొత్తు నాయ్. ఎత్తిక జివ్ దెతొసా,

ఎత్తిక జయడ్లొసా జో, దొర్కు జతిసి ఎత్తి దొర్కు కెర్లొసా జొయ్యి.

26 ఎత్తి దేసిమ్లుచ మాన్సుల్క ఎక్కి రితి, ఎక్కి మొదొల్ తెంతో జో జెర్మవ అస్సి. జో ఉచర, వేర వేర కాలుమ్లు దా, 'ఈంజేవ్ మాన్సుల్ ఇన్నె జితు, జేవ్ మాన్సుల్ ఒత్త జితు' మెన, ఈంజ బూలోకుమ్తె ఎత్తిజినక జితి టాన్, జొయ్యి దా అస్సి.

27 ఎత్తిజినక 'అంక ఆస జా చజుతు, అంచి తెన్ బెదుతు' మెన జో పరలోకుమ్చొ ఎత్తి జెర్మవ కెర్లొ దేముడు అవ్కాసుమ్ దా అస్సి. గని ఎత్తి మాన్సుక జో పాసి అస్సి, జేవ్ నేన్లె కి, జాన్లె కి.

28 ఆమ్ జితి సెక్కి, ఆమ్ ఇండితి సెక్కి, ఆమ్ జెర్మితి సెక్కి, కచితె మెలె, జో తెయి.

'ఆమ్ నిజామి జోవయించ బోదల్' మెన తుమ్చ సొంత పండితుల్ సగుమ్జిన్ కి రెగ్ల అస్తి.

29 "పరలోకుమ్చొ ఎత్తి జెర్మయిలో దేముడుచ బోదల్ జవ్దె జలె, జో కిసి బజార్ పొలిక గే, వెండి పొలిక గే, పత్తురు పొలిక గే, మాన్సు కెర్లొ కేన్ పొలిక గే, మాన్సు తెయార్ కెర్లొ కేన్ పొలిక గే, జయెదె? జయె నాయ్.

30 "అగ్గె మాన్సు నేన్లి పొది దస తప్పుల్ కెర్లొచి పాపుమ్ జో దేముడు వయడె నాయ్. గన్ని 'ఒండి లోకుమ్చ మాన్సుల్ అప్పె జోవయించి పాపుమ్ ఒప్పున, జేవ్ కెర్లొ పాపల్క పెట్టి దుకుమ్ జా మార్పువ జతు' మెన జో ఆడ్ర దా అస్సి.

31 కిచ్చొక మెలె దేముడు టీవొ కెర్లొ మాన్సుచి అత్తి ఒండి లోకుమ్చ ఎత్తిక 'సత్తిమ్ జా అస్తి గే పాపుమ్ తెన్ని అస్తి గే' మెన జో సత్తిమ్ తెన్ తీర్పు కెరుక ఏక్ దీన్క నిసాన అస్సి. మొర్ల మాన్సు తెంతో జోక ఉట్టయ్లి రిసా జా నంపజంక మెన అమ్క రుజువు దా అస్సి."

32 ఎక్కిలోక 'మొరై కి అన్నె జియ అస్సె' మెన సూన, సగుమ్జిన్ ఆసిల. గని అన్నె సగుమ్జిన్, "అన్నెక్ సుట్టు ఇన్నెచి రిసా అమ్క బోదన కెర్తొ జలె, సూసుమ్దె" మెల.

33 తెదొడి పవులు జేవ్చి నెడ్మె తెంతొ ఉట్ట గెలన్.

34 గని సగుమ్జిన్ జోచి పట్టి గెచ్చు ప్రబుక నంపజల. జోవయింతె అరేయొపాగీగు మెలి ఒత్తచి సబతె వెసితో దియొనూసియు, పడ్డో, నంపజలి ఎక్కి కొన్ని మెలె, దామరి మెలిసి. జోవయింతెన్ అన్నె సగుమ్జిన్ కి నంపజల.

18

కొరిండ్ పట్టుమ్తె పవులు కెర్తి బోదన

1 ఒత్త తెంతొ ఏదెన్ను పట్టుమ్ తెంతొ బార్ జా, పవులు కొరిండ్ పట్టుమ్తె అన్నె ఉట్ట గెలన్.

2 ఒత్త పాచ, అకుల మెలో యూదుడు ఎక్కిలో తెన్ దస్సుల్ జలో. జో పొంతు ప్రదేసిమి జెర్మిలోసా. జో, ప్రిస్కిల్ల మెలి తేర్చి తెన్, దొగుతెర జా దొరతి ఇటలీ దేసిమ్చి రోమ పట్టుమ్ తెంతొ ఉట్ట జా అస్తి. యూదుల్ ఎత్మిజిన్ అమ్చి రోమ పట్టుమ్ ముల ఉట్ట గెతు, ఒత్త ఏలువ కెర్తొ క్లొదియ రానొ ఆడ్ర దా అస్సి. పవులు జేవ్ దొగుతెరచి గెరి గెలన్, చి జోవయింతెన్ లట్టబ్లన్.

3 పవులు, అకుల ఎక్కి కామ్ కెర్తస జవుల, చి రిసా, పవులు జోవయింతెన్ బన జలో, చి జేవ్ బెద కామ్ కెర్తె తిల. జేవ్ టంబుగుడ్డల్ తున తెయార్ కెర్తిసి.

4 జా పొదుల్, ఎత్మి సెలవ్ కడన్చి దీసి, పవులు యూదుల్చి సబగేరి గెచ్చు, దేముడుచి కొడతె తిలిసి రుజు ద్దెకవ యేసుక్రీస్తుచి రిసా యూదుల్క కి గ్రిసు దేసుమ్చ సుదల్క కి బోదన కెర్తె తిలో.

5 సీలయు చి తిమోతి మాసిదోనియ తెంతొ ఉట్ట అయ్లి పొది, పవులు కిచ్చొ కెర్తె తిలో మెలె, "దేముడు 'తెద్రయిందె' మెన సంగిలో రచ్చించుప కెర్తొసా జతో క్రిస్తు, యేసుయి." మెన సాచి జా రుజ్జుల్ బెదవ దస్సి యూదుల్క బోదన కెర్తె తిలో.

6 యూదుల్, మాత్రుమ్, జా బోదన సూసుక నెన కెర, ఒప్పితి నాయ్, చి జోక దూసుప కెర్త. జేవ్ దస్సి జతికయ్, "తుమ్ నాసెనుమ్తె గెలె తుమ్చి పూచి. తుమ్క సుబుమ్ కబుర్ సూనవుక అంచి పూచి, కుట్టవన అస్సి అంచి పూచి నాయ్. అప్ప తెంతొ యూదుల్ నెంజిలనతె గెచ్చు సుబుమ్ కబుర్ సూనయిందె" మెన, 'ఇన్నెచి దూడి కి లంబుస్ నాయ్' మెలి గుర్తుక, జోచ పాలల్ పంప్ల కెర,

7 సబగేర్ ముల బార్ జా "ఇన్నెయి బోదన కెర్తె తయిందె" మెన, సబగేర్ సాడిచి గెరి గెలన్. జా గేర్, తీతియు యూస్తు మెలో యూదుడు నెంజిలో రోషియుడుచొ గేర్దు. గని దేముడుక జో నంపజా జోకయ్ బక్తి కెర్తయ్.

8 జా పొదులె, యూదుల్చి సబగేర్చొ ఎజొమాని జలో క్రిస్తు యేసుప్రబుక నంపజలో. జో, జోవయించి గేర్చ ఎత్మిజిని, ప్రబుక నంపజల జా కొరిండ్ పట్టుమ్చ యూదుల్ నెంజిల మాన్సుల్ ఒగ్గర్జిన్ కి, నంపజా, బాప్తిసుమ్ నజన్ల.

9 ఏక్ రాతి, ప్రబు సివ్వు తెన్ పవులుక, "తుయి బి నాయ్. అంచి సుబుమ్ కబుర్ తుయి సూనయ్తె తా. తుక్లె తంక నాయ్.

10 ఆవ్ తుక తోడ్ అస్సి, చి కో తుక కిచ్చొ ప్రమాదుమ్ కెర్తి నాయ్. ఈంజ పట్టుమ్చ మాన్సుల్ ఒగ్గర్జిన్ అంచి రిసా సూన నంపజంక అస్సి" పవులుక ప్రబు సంగిలన్.

11 ఒత్త తెంతొ వెర్సెక్ ఆదు ఎద పవులు జా కొరిండ్ పట్టుమ్తె తా, దేముడు దిలి యేసుచి రిసాచి సుబుమ్ కబుర్ తిలిసి ఎత్మి ప్రెజల్క సికయ్తె

తిలన్.

12 జా ఒండి అకయ ప్రదేసిమ్క గల్లియోను మెలోసా అదికారి జా తతికయ్. యూదుల్ ఎక్కి గోసతెన్ పవులుక దెర, అదికారిచి గెరి ఆన,

13 “అమ్చో దేముడు మోసి తెన్ ద్రిలి ఆగ్గుల్తె తిలి రితి దేముడుక బక్తి కెర్తినె నాయిమి నెంజిలి అలవాట్ బెదయ్తి ప్రెజల్క ఈంజో సికయ్తయ్” మెన, నింద కెర్ల.

14 పవులు జబాబ్ దెంక ఉచర్లొ, గని బేగి గల్లియోను యూదుల్క, “ఈంజో మాన్సు కిచ్చొ జవున్ నేరిమ్ కెర్తొ జలె, తుమ్ యూదుల్ సంగితి తీర్పు సూనుక బెదితి,

15 గని, ఈంజ కిచ్చొ నేరిమ్చి నెంజె. తుమ్ యూదుల్చో దేముడుక జోకర్తి అలవాట్చి రిసాచి తగు ఈంజ, రిత కొడెచ అర్తల్చి తగు. ఇన తగుల్ అవ్ సూనుక నెసి” మెన,

16 తీర్పు కెర్తి టాన్ తెంతో జోవయింక ఉదర్లన్.

17 ఒత్త బెర తిల జనాబ్ యూదుల్చి నబక అదికారి జలొ సాస్తానేసుక దెర, తీర్పు కెర్తి టాన్చి పురెతో జోక దెబ్బల్ పెట్ట. గని గల్లియోను అదికారి తుక్లె తిలొ.

ప్రిస్కిల్ల చి అకుల తెన్ పవులు ఎపెను పట్టుమ్ ఎద గెలిసి

18 పవులు అన్నె ఒగ్గర్ దీసల్ ఒత్త తా, బావుడ్లతె సెలవ్ నజన, సిరియ ప్రదేసిమి గెచ్చుక మెన బార్ జలొ. జో తెన్ ప్రిస్కిల్ల చి అకుల, దోగుతెర, గెల. వట్టె గెచ్చ, కెంక్రేయ పట్టుమ్తె పవులు సెండి ఉత్తవన్లొ, దేముడుక ఆతు ఉక్కుల గడియ సెండి ముల తిలన్చి రిసా.

19 జలె, కెంక్రేయతె ఓడతె వెగ, సముద్రుమ్ జీన, ఎపెనుచి రేవుతె పాఠ, ప్రిస్కిల్లక చి అకులక ముల దిలన్. జో యూదుల్చి నబ గెరి గెచ్చ, యూదుల్ తెన్ లట్టబ యేసుచి రిసా ‘జొయ్య

దేముడు తెద్రయ్లొ క్రీస్తు రచ్చించువ కెర్తొసా’ మెన రుజ్జుల్ దెకవ సికర్లొ.

20 “అన్నె సగుమ్ దీసల్ అమ్చి తెన్ తా”, మెన, జోక బలవంతుమ్ కెర్ల గని “దన్నె నే జయె.” మెలన్.

21 గని, బార్ జలి పొది, “దేముడుచి సెలవ్ తిలె, కెయ్యళక జవున్ తుమ్తె అన్నె జెయిందె” మెన సంగ, ఓడతె అన్నె వెగ, ఎపెను పట్టుమ్ ముల ఉట్ట గెలొ.

22 వెల్లి సముద్రుమ్ జీన, యూదయ ప్రదేసిమ్చి కైసరియ రేవుతె బుల జా, ఓడ తెంతో ఉత్త జా యెరూసలేమ్ పట్టుమ్తె ఇండ గెచ్చ, ఒత్తచ బావుడ్లు తెన్ దన్నుల్ జా, బుల జా, ఓడతె అన్నె వెగ, సిరియ ప్రదేసిమ్చి అంతియొకయ పట్టుమ్తె ఉట్ట గెలొ.

23 ఒత్త సగుమ్ దీసల్ తా, అన్నె బార్ జా, దూరి దూరి బుల వేర వేర పట్టుమ్లుతె గెచ్చ, జో అగ్గె గెచ్చ తిలి గలతీయ ప్రదేసిమి చి ప్రుగియ ప్రాంతుమ్లుతె గెచ్చ, సిస్సుల్క అన్నె సికడ సికడ బోదన కెర్తికయ్, జేవ్ అన్నె నిదానుమ్ దయిరిమ్ జల.

అపొల్లో ఎపెనుతె బోదన కెర్తిసి

24 మదెనె, ఐగుప్తు దేసిమ్చి అలెక్సంద్రియ పట్టుమ్చో అపొల్లో మెలొ యూదుడు ఎక్కిలొ, ఆసియా ప్రదేసిమ్చి ఎపెను పట్టుమ్తె ఉట్ట జా అన్నె. బోదన కెరుక, జలె, కొడె చెంగిల్ బెదెదె, చి దేముడుచి కొడెతె తిలిసి చెంగిల్ జానె.

25 అగ్గె తెంతో, యేసు ప్రబుతె రచ్చన జతిన్చి బోదన సూన నంపజా అన్నె, చి ‘వేర మాన్సుల్క సూనయిందె’ మెన, ఒగ్గర్ ఆన జా అన్నె. యేసుచి రిసా దేముడుచి కొడెతె సంగిలిసి చెంగిలి సరిగా బోదన కెరెదె. గని బాప్తిసుమ్చి కోడు, జలె, ఎక్కి యోహాను పానితె బాప్తిసుమ్ దెతె తిలి అలవాట్ జో జానె, గని యేసుక్రీస్తుచి నావ్ తెన్ చి జోచి అత్తు

తెన్ చి బాప్తిసుమ్ చి రిసా, కో జోవయింక సంగుక నేతయ్.

26 జో, యూదుల్ చి సబగేరి దయిరిమ్ తెన్, యేసుచి రిసా 'దొర్కు జలొ రచ్చించుప కెర్తొసా జలొ క్రీస్తు జయెదె' మెన బోదన కెరుక దెర్లన్. గని ప్రీస్కీల్ల చి అకుల నూన కెర, జోవయింక గెరి కడన కెర దేముడు దొర్కు కెర్ల రచ్చన వాటుచి రిసాచి సుబుమ్ కబురతె జో నేన్లిసి ఎత్తి సాస్టుమ్ గ సికడ్ల.

27 జో అకయ ప్రదేసిమ్ తె గెచ్చుక ఇస్టుమ్ జలన్, చి 'చెంగిలి' మెన, ఎపెసుచ బావుడ్లు ఒప్పున, "గో" మెన సంగ, "ఇన్నెక బెదవన" మెన అకయతెచ సిస్సుల్ క ఉత్తమ్ రెగ్ల, జోచి అత్తి తెద్రయ్ ల. పడ్డొ, జో సముద్దుమ్ జిన ఒత్త పాచ, దేముడుచి దయచి రిసా యేసుక సంపజలనక జో ఒగ్గర్ తోడు కెర్లన్.

28 యూదుల్ వేర సంగిలే కి, ఎత్తిజిన్ నూన్ తి రితి, దేముడుచి కొడొతెచ తిలిసి కొడొ వెంట కెర, "యేసుయి దేముడు తెద్రయ్ లొ దొర్కు జలొ రచ్చించుప కెర్తొసా" మెన రుజుల్ దెకయ్ లొ.

19

పవులు ఎపెసుతె ఉట్ట అయ్ లిసి

1 అపొల్లో ఒత్త అకయ ప్రదేసిమ్ చి కొరింది పట్టుమ్ తె తతికయ్ పవులు, డొంగుర్ దేసిమ్ వాట్ ఉట్ట జా, ఎపెసు పట్టుమ్ తె అయ్ లన్. సగుమ్ జిన్ సిస్సుల్ తెన్ పవులు దస్సుల్ జలన్,

2 అన్నె, జోవయింక, "తుమ్ సంపజలి పొది, దేముడుచి సుద్ది తిలి అత్త తుమ్ చి పెట్టి జెతికయ్ నజన్లదు గె?" మెన పునిలన్. జేవ్, "నాయ్. జో అత్త 'అన్నె, మాన్సుక దొర్కు జయెదె' మెన ఆమ్ కెయ్య నూనుమ్ నాయ్" మెన సంగిల.

3 జలె పవులు, "దస్సి జలె, కేన్ బాప్తిసుమ్ నజన్లదు?" మెన పునిలన్.

4 "యోహాను బోదన కెర్లి బాప్తిసుమ్" మెన, జబాబ్ దిల. జాకయ్, పవులు జోవయింక, "యోహాను బాప్తిసుమ్ కెర్లిసి కిచ్చొచి రిసా మెలె, తుమ్ కెర్ల పాపల్ చి రిసా పెట్టి దుకుమ్ జా, అంచి పడ్డొ జెతొసాక సంపజా బోదన కెర్తె తిలన్. జా బుద్ది మార్పుప జతి గుర్తుకయ్ బాప్తిసుమ్ దెతె తిలన్. కచి రిసా 'అంచి పడ్డొ జెతొసా' సంగితె తిలొ మెలె, యేసుచి రిసాయి" మెన పవులు సంగిలన్.

5 జేవ్ సిస్సుల్ నూన, యేసుప్రబుచి నావ్ తెన్ బాప్తిసుమ్ నజన్ల.

6 పడ్డొ పవులు జోవయింక ఎక్కెక్లక బోడి చడ ప్రార్దన కెర్లన్, చి దేముడుచి సుద్ది తిలి అత్త జోవయించి పెట్టి అయ్ లిచి రిసా, జేవ్ అగ్గె నేన్ల వేర వేర బాసల్ తెన్ లట్టల్ల, చి చోండి పుట్టవ, ప్రబుచి అత్త సికడ్ల కబుర్లు సంగుక దెర్ల.

7 జేవ్ రమారమి బారజిన్ తిల.

8 పడ్డొ పవులు యూదుల్ చి సబగేరి గెచ్చుక దెర, తిన్ జొన్సొ ఎద దేముడుచి రాజిమ్ తె బెదితిన్ చి రిసాచి సుబుమ్ కబుర్ సబతె బోదన కెర కెర, దేముడుచి కొడొతెచ కొడొ రుజుల్ క బెదవ, దయిరిమ్ తెన్ బోదన కెర్తె తిలన్.

9 యూదుల్ తె సగుమ్ జిన్ రాడ్ జివ్ చ తిల, చి సత్తిమ్ సూనుక నెస కెర, పట్టుమ్ చ ప్రెజల్ చి మొక్కె 'యేసుక్రీస్తు దొర్కు జలి రచ్చన వాట్ జలొ' మెన ఒప్పన్ తి చి రిసా 'అబద్దుమ్' మెన, సికడ్లె తిల. జాకయ్ యూదుల్ క సికడుక ముల దా, యేసుక సంపజత సిస్సుల్ క అజయి కడన, తూరన్ను మెలొ ఎక్కిలొచి వెల్లి గేరుతె రోజుక గెచ్చు, దేముడుచి కోడు బెదవ బెదవ, పవులు బోదన కెర్తె తిలన్.

10 దొన్ని వెర్సుల్ ఎద, పవులు ఒత్త ఎపెసుతె సికడ్లె తిలొ, చి జా ఒండి ఆసియా ప్రదేసిమ్ చ మాన్సుల్, ఇస్టుమ్ తిల యూదుల్ కి, గ్రీసు దేసిమ్ చ కి, ప్రబుచి సుబుమ్ కబుర్ నూన్ల.

11 పడ్డో, పవులుచి అత్తి దేముడు అద్భుతుమచ వెల్లెల కమె జర్గు కెర్తె తిలన్.

12 మాన్సుక జొర్జొల్ తిలె, కో గే పవులు దెర తిల రుమాలు జలెకు, కచ్చెలివో జలెకు, జేవ్ జొర్జొ తిల మాన్సుల్క నా దిలె, జొర్జొ తిలె గెచ్చెదె, బూతుమ్ దెర తిలె, ములెదె.

13 జా పొదొలె బుల బుల, బూతల్ ఉదడ్డ యూదుల్ సగుమ్జిన్ అవ్వి కెర యేసుప్రబుచి నావ్ దెరుక దెర, “పవులు బోదన కెర్తె యేసుచి నావ్ తెన్ బార్ జా గో!” మెన బూతల్క ఉదడుక దెర్ల.

14 జోవయింతె సగుమ్జిన్, స్కెవ మెలో యూదుడు ఎక్కిలోచొ సత్తుజిన్ పుత్తర్పులు. స్కెవ, ఎత్కిక వెల్లో పూజరి జయెదె.

15 జేవ్ సత్తుజిన్ జోవయించ పుత్తర్పులు, దస్సి యేసుచి నావ్ దెర ఏక్ బూతుమ్ ఉదడుక దెర్లె, బూతుమ్ జబాబ్ దా జోవయింక, “యేసుక జాని, పవులుక జాని గని తూమ్ కొన్స?” మెలన్.

16 చి బూతుమ్ దెర్లొ జో మాన్సు జేవ్ ఉదడుక ఉచర్లనచి ఉప్పిరి నిగ జా, సేడవ, జిన్లన్, చి జేవ్ సత్తుజిన్ దెబ్బల్క, జో గేర్ తెంతొ డుమ్డయ్ నిగ గెల.

17 జా ఎపెసు పట్టుమ్చ ఎత్కిజిన్ యూదుల్క, గ్రీసు దేసిమ్చక, జా జర్గు జలిసి జాన్సి, చి ‘యేసుచి నావ్ వెల్లి, ఆరి దెరుక నెంజె’ మెన చిన, బియ్యం గెల.

18 పడ్డో, జోవయింతె నొవర్ నంపజలన ఒగ్గర్జిన్ జా కెర, జేవ్ కెర్ల పాపల్ ఎదార్డుమ్ ఒప్పన్.

19 జోవయింతె ఒగ్గర్జిన్ అగ్గె తెంతొ సయ్తాన్చ మాయకమె కెర్తెన జా తిల. జేవ్ అప్పె జోవయించ పుస్తకమ్లు గట్ట ఆన కుడవన, ఎత్కిజిన్చి మొక్కె డయ గెల. జేవ్ డయ గెల పుస్తకల్

మొత్తుమ్చి విలువ లెక్క కెర్ల, కెడ్డిచ జల మెలె, యాబయ్ వెయిలు వెండి బిల్లల్ చి విలువ జల.

20 దస్సి, ఒండి జా ప్రాంతుమ్తె సుబుమ్ కబుర్ నూనయ్ జలి, చి ఒగ్గర్ ఒగ్గర్జిన్ మాన్సుల్ ప్రబుక నంపజా మార్పుప జల.

21 ఈంజ ఎత్కి జర్గు జలి పడ్డో, ప్రబుచి ఆత్తు జోవయించి వెట్టి సికడ్డికయ్, “మాసిదొనియచి వాటు, పడ్డో అకయ వాటు గెచ్చె యెరూసలేమ్తె గెచ్చిందె, చి ఒత్త గెలె, రోమ్తె కి ఆవ్ గెచ్చుక అస్సె” మెన పవులు ఒప్పన్లొ.

22 జా పొదులె, పవులుచి కామ్తె బెదితె తిల తిమోతి చి ఎరస్తు జత మాన్సుల్క జోక అగ్గె మాసిదొనియతె తెద్రవ, పవులు ఆసియా ప్రదేసిమ్చి జా ఎపెసు పట్టుమ్తె అన్నె గడియ తా గెలొ.

క్రీస్తుక నంపజతి రిసా అర్తెమి దేవిక జోకర్తన అల్లర్ జలిసి

23 జా పొదులె, యేసుక్రీస్తుక నంపజా రచ్చన జతి *వాటుచి రిసా తగు జలి.

24 కిచ్చొక మెలె, సరాబు జలొ దేమేత్తి మెలోసా అర్తెమి దేవిక జోకర్త బొమ్మల్ వెండి సామన్క తెయార్ కెర్తయ్, చి జోవయింక, జోవయించి కామ్తె బెదితి సరాబుల్క లాబుమ్ ఒగ్గర్ దొర్కు జతె తయెదె.

25 జో ఏక్ దీసి జోతె కామ్ కెర్తనక ఎక్కితె బుకారా కెర, అన్నె సరాబుల్క బుకారా, జోవయింక, “ఈంజ అమ్చి కామ్చి రిసా అమ్క లాబుమ్ చెంగిల్ దొర్కు జతయ్, చి చెంగిల్ జితసుమ్.

26 గని అమ్చి ఎపెసుతె కి అమ్చి ఒండి ఆసియా దేసిమి కి, మాన్సుల్ తెయార్ కెర్ల దేముడ్లు బొమ్మల్ దేముడ్లు నెంజితి, మెన, ఈంజొ పవులు సికడ్ అస్సె, చి అమ్చి అలవాట్ ఒగ్గర్

* 19:23 19:23 మెలె యేసుక నంపజలెకయ్ పరలోకుమ్తె గెచ్చుక జయెదె మెలి బోదన.

ఒగ్గర్జిన్ ముల్లి రితి జో మార్పువ కెర అస్సె మెన తుమ్ దెకితను, సూన్తను.

27 జలె, ఈంజ అల్లర్ నే పిట్టయలె, అమ్చి కామ్ నిస్టోరుమ్ జయెదె. జా, దస్సి అన్నె, అమ్చి వెల్లి అరైమి దేవిక ఒండి ఈంజ ఆసియా దేసిమ్చ, ఒండి లోకుమ్చ జోకర్తతి. ఇన్నెచి గుడి ఆరి పాడ్ జలె, ఇన్నెచి విలువ గెచ్చెదె” మెన సికడ్డన్.

28 జేవ్ సరాబుల్ నూన, ఒగ్గర్ కోపుమ్ జా, “అమ్చి ఎపెనుచి వెల్లి అరైమి దేవిక జెయ్యి, జెయ్యి!” మెన, కేకుల్ గలిల.

29 దస్సి, ఒండి పట్టుమ్ గగ్గోల్ జా గెలి. జా పట్టుమ్క నచ్చగావితె టాన్ మెన, వెల్లి సబ తిలి. గాయియు చి అరిస్తార్కుక మాసిదోనియచ మాన్సుల్, జలె, పవులు తెన్ ఉట్ట జా తిల. జలె, సరాబుల్చి పచ్చెన గెల జా పట్టుమ్చి జనాబ్ జేవ్క దెర, జా నచ్చగావితె టాన్ తెడిక ఒగ్గోడ నిల.

30 “జేవ్క తోడ్ గెచ్చిందె” మెన, పవులు నచ్చగావితె టాన్ జనాబ్ తిలిసెతె పెనుక ఉచర్లన్, గని ఒత్తచ సిస్సుల్ ఒప్పితి నాయ్.

31 పడ్డె, పవులుచ గోతుల్ జల జా ఆసియా ప్రదేసిమ్చ అదికారుల్ సగుమ్జిన్, “పోని, జా నచ్చగావితె టాన్తె పెను నాయ్, ప్రమాదుమ్” మెన, బతిమాల్ప జా కబుర్ తెద్రయల.

32 జా ఒండి బెర తిల జనాబ్తెచ, జలె, సగుమ్జిన్ ఏక్ కోడు, సగుమ్జిన్ వేర కోడు, కేకుల్ గల్లె తిల. జోవయింక ఎక్కి ఉద్దెసుమ్ నాయ్, సిక్కు జా అస్సి. జేవ్ బెర అయ్లిసి కిచ్చొక గే, జోవయింతె ఒగ్గర్జిన్ నేన్తి.

33 యూదుల్ జలె, అలెక్సంద్రు మెలో జోవయించో మాన్సు ఎక్కిలోక పురై తెద్రయల, చి జనాబ్తె అన్నె సగుమ్జిన్ కి జోవయింక సికడ్డికయ్, జో పురై జా,

‘నూన’ మెన సయన కెర, దెర్ను సేడ్ల జేవ్ దోగులచి పచ్చెనచి తీర్పు సంగితో.

34 గని ‘యూదుడుయి జో’ మెన అరైమిక జోకర్లన చిన కెర, ఎక్కి అవాడ్ కెరన, దోన్ని గంటల్ పూర్తి, “అమ్చి వెల్లో దేవిక జెయ్యి, జెయ్యి!” మెన, కేక్ గలుక ములితి నాయ్.

35 పట్టుమ్క అదికారి, కస్టనె జనాబ్క ముద్దో కెర, “అమ్చి ఎపెను పట్టుమ్చ పైజల్, తూమ్ నూన. వెల్లి అరైమి దేవిచి గుడి అమ్చి ఎపెనుతె అస్సె మెన ఒండి లోకుమ్చ జాన్తి. పడ్డె, ఆగాసుమ్ తెంతో సేడ్లి బొమ్మపత్తుర్ ఇన్నెయి అస్సె మెన ఎత్కిజిన్ జాన్తి. జేవ్ దోన్ని అమ్మి రకితనుమ్.

36 జలె, ఈంజ సత్తిమ్క కో ‘అబద్దుమ్’ మెనుక నెత్తిరిచి రిసా తుమ్ కిచ్చొక గగ్గోల్ జతను? బుద్ది నెంజలితె కిచ్చొ బమ్మ కామ్ తుమ్ కెర నాయ్. సేంతుమ్ కెరన.

37 ఈందె తుమ్ కడ ఆన్ల ఈంజేవ్ మాన్సుల్ అమ్చి గుడిచి కిచ్చొ చడితి నాయ్, పాడె కర్తి నాయ్, చి అమ్చి దేవిక దూసుప కెర్తి నాయ్.

38 “జలె, కచి రిసా గే ఈంజో దేమేత్తి, జోవయింతెన్ తిల సరాబుల్ ‘దావ దెమ్దె’ మెన ఉచర్తతి, అదికారిచి సబతె సూనవుక జయెదె, అమ్క తీర్పు కెర్లన అస్సి. ఎక్కిలోచి ఉప్పిరి ఎక్కిలో నాయిమ్ తెన్నె తగు కెర్తు, జలె,

39 గని, అన్నె వేర బాదల్ అస్తి మెలె, మాములుమ్ తీర్పు కెర్లనతెన్, అమ్చి పట్టుమ్చి సబతె తగు సూనవయ్ తీర్పు కెరుక అస్సి.

40 “జాగర్! ఆజి జర్గు జలిన్చి రిసా, ఎపెను పట్టుమ్చ పైజల్ ఇసి గగ్గోల్ జా ప్రబుతుమ్చి మరియాద కడ్ల, మెన, తుమ్చి రిసా నేరిమ్ వయడుక జయెదె. అమ్క ఏలుప కెర్లన అమ్క పుసిలె, ఆజిచి తగు కిచ్చొ బెదితిసి

సంగుక నెత్తుమ్” మెన, పట్టుమ్చొ అదికారి జనాబ్ క సంగిలన్.

41 సంగ, బెర తిల జనాబ్ ఎత్తిక గెరి తెద్రయ్ లన్.

20

పవులు గ్రీకు దేసిమ్తె కెర్లి ప్రబుచి కమె

1 జా పట్టుమ్చి గగ్గల్ కేడ్డికయ్, ఒత్తచ సిస్సుల్ క బుకారా, జోవయింక “దయిరిమ్ తా నిదానుమ్ తెన్ తా” మెన సంగ కెర, పవులు జోవయింతె సెలవ్ నజన, మాసిదోనియ ప్రదేసిమి గెచ్చుక, ఓడతె వెగిలన్.

2 సముద్రుమ్ జీన, మాసిదోనియతె పావ, జా ప్రదేసిమి బుల బుల, ఎత్తిజిన్ క బోదన కెర, దయిరిమ్ సంగ, జా ప్రదేసిమ్ ఒత్తల్ తొ జీన గ్రీకు మెన అన్నెక్ నావ్ తిలి అకయ ప్రదేసిమి పాచిలన్.

3 ఒత్త తిన్ జొన్నొ తా కెర, “ఓడతె వెగ సిరియ ప్రదేసిమి అన్నె ఉట్ట గెచ్చిందె” మెన సంగిలె, యూదుల్ జోక అల్లర్ కెరుక కుట్ట కెర అస్తి మెన జో సూన తా, జా వాటు గెచ్చుక ముల, అన్నె మాసిదోనియ వాట్ బుల గెలన్.

4 జోచి తెన్ అన్నె, బెరయ పట్టుమ్చొ పుర్తుచొ పుత్తుసి సోపత్తు, పడ్డొ దెస్సులోనిక పట్టుమ్చ, అరిస్తార్కుక, చి సెకుందు. పడ్డొ గలతీయ ప్రదేసిమ్చి దెర్చే పట్టుమ్చ, గాయియు చి తిమోతి, పడ్డొ ఆసియా ప్రాంతుమ్చ తుకికు, చి త్రోపిము ఈంజేవ్ కి గెల.

5 జేవ్, అమ్క అగ్గె గెచ్చు సముద్రుమ్ జీన, ఆసియా ప్రదేసిమ్చి త్రోయ రేవుతె గెచ్చు, * అమ్చి రిసా రకితె తిల.

6 గని మాసిదోనియచి పిలిప్పి పట్టుమ్తె అమ్ పావ, నే పులయ్ ల పోడియొ కతి పండుగు కేడ్డికయ్, ఓడతె వెగ, పాచ్ పొదుల్ ప్రయానుమ్ కెర,

త్రోయ రేవుతె ఉత్త, సత్తు పొదుల్ ఒత్త జా పట్టుమ్తె తా గెలమ్.

7 జా † అయ్ తర్ దీసి, సంజె సంగుమ్ సుదల్ ఎక్కిలోక ఎక్కిలో ప్రేమ తతి గుర్తుచి అన్నిమ్ బెద కా యేసుచి ఆగ్ బలి జలి గుర్తుచి పోడియొ కా, జా రస్సుమ్ పింక మెన, తిన్ని మెట్టుచి ఏక్ గేరుచి ఉప్పిర్చి మెట్టుచి గదితె బెద తిలమ్, చి ‘కలిక ఉట్ట గెచ్చిందె’ మెన తా, ఒత్త బెర తిలసక పవులు బోదన కెర కెర, సొక్కు ఎద సికడై తిలన్.

8 అమ్ బెర తిలి జా గదితె, ఒగ్గర్ దివ్వొ లగితె తిల.

9 ఐతుకు మెలో ఉబెడొ ఎక్కిలో కిట్టి ఉప్పిర్ వెన తిలన్. ఒత్త వెసిలె, పవులు అన్నె ఒగ్గర్ సేపు బోదన కెరై తతికయ్, జో ఉబెడొ జుమ కెర, పూర్తి నిజ గెలన్. వెసుక నెత్త కెర, జా ఉప్పిర్ తిలి మెట్టుచి కిట్టివాట్ ఎట్టా సేడ్లన్, చి జోక ఉక్కుల్ క గెల, మొర గెచ్చు అన్నె.

10 పవులు, ఉత్త గెచ్చు, వంపొ జా అత్తొ తెన్ అమ్డ కెర ఉబెడొక గుండెతె పెలన, తిల మాన్సుల్ క దెక, “తుమ్ బియఁ నాయ్. జోచి జీవు జోచి పెట్టి అన్నె” మెన దయిరిమ్ సంగిలన్.

11 తెదొడి పవులు, తిల మాన్సుల్ తెన్ జా గదితె అన్నె వెగ, జా పోడియొ కా జా రస్సుమ్ పియ, జా ప్రేమ అన్నిమ్ కెర తా, కుకుడొ వాసెనె ఎద బోదన కెర్లన్, చి వెందలె ఉట్ట గెలన్.

12 జో ఉబెడొ, మాత్తుమ్, చెంగిల్ జలన్, ‘మొర గెలోసా జీవ్ జలన్’ మెన, ఒగ్గర్ సర్లసంతోసుమ్ తెన్ జోక గెరి నిల.

ఎవెసుతెచ సుదల్ తె సెలవ్ కడన్లసి

13 అన్ను రేవు ఎద గెచ్చుక మెన, బార్ జలమ్. పవులు, మాత్తుమ్, “ఇండ గెచ్చిందె” మెంతికయ్, ‘ఒత్త అన్నుతె

* 20:5 20:5 ‘అంక’ మెలె, ఈంజ ‘బారికుల్’ పుస్తకుమ్ రెగిడ్డొ లూకా. ఇన్నె తెంతొ పవులు తెన్ జో అన్నె బులుక దెరిదె. † 20:7 20:7 సత్తు పొదుల్ తె అగ్గెచి దీసి

ఓడతె వెగడుమ్దె' మెన, ఆమ్ ఓడతె వెగిలమ్.

14 పవులు ఇండ జా అమ్చి తెన్ అన్నుతె దన్నుల్ జతికయ్, జోవయింక ఓడతె వెగడ, మితులేనే మెలి వెల్లి డిబ్బుతె అయ్లమ్.

15 ఒత్త తెంతో ఓడతె అన్నె బార్ జా, అన్నెక్ దీసి, కియొసు మెలి డిబ్బు ఒత్తల్తో పావ, అన్నెక్ దీసి ఆసియా ప్రదేశిమ్చి మిలేతు రేవుతె ఉత్తిర్లమ్.

16 ఎపెసుతె గెచ్చుమ్ నాయ్, పవులు నెసిలన్. ఒత్త గెలె, జా ఆసియా ప్రదేశిమి సగుమ్ దీసల్ తంక జలె, యెరూసలేమ్తె పావుక వాయిద జయెదె. తెర్లె, పెంతెకొస్తు పండుగు దీసి యెరూసలేమ్తె పావ తయిందె మెన, పవులు ఆస జా అస్సె.

17 జాకయ్, మిలేతుతె తా, 'ఎపెసు పట్టుమ్చ సంగుమ్చ వెల్లెల మాన్సుల్ ఇత్తల్ జెతు' మెన, కబుర్ తెద్రయ్లన్.

18 జేవ్ జోచి పురె జెతికయ్ పవులు జోవయింక ఇసి మెలన్. "ఆవ్ తొలితొ ఆసియాతె ఉట్ట అయ్లిసి తుమ్ ఏద కెరె. జా కెర, తుమ్చి తెన్ జితె తా గెలయ్.

19 ఒత్త తా, కిచ్చొ బడాయ్ నే ఉచరంతె, 'ప్రబుక నంపజతు' మెలి ఆసక ఏడ ఏడ, యూదుల్చ కుట్టల్చి రిసా సైమల్ సేడ సేడ ప్రబుచి సేవ కెరె తిలిసి తుమ్ జాన్సు.

20 గని దస బాదల్ సేడ్లె కి, కామ్క జెతికయ్ కిచ్చొ జలెకి, నే ముల్తె నిదానుమ్ తెన్ తుమ్క సికడ్లె తిలయ్, చి నబగేరి ఎదార్లుమ్ కి, గెరల్ గెరల్ బుల కి, బోదన కెరె తిలయ్.

21 దస్సి, యూదుల్క కి గ్రిసు దేశిమ్చ సుదల్క కి, 'తుమ్ కెర్ల పావల్చి రిసా పెట్టి దుకుమ్ జా, దేముడుక నిదానుమ్ జంక, చి ప్రబు జలొ యేసుక్రీస్తుక నంపజంక ముక్కిమ్' సాచి సంగితె తిలయ్.

22 "అప్పె, ఒత్త కిసి జయిందె గే నేని, గని ప్రబుచి ఆత్మ అంక పెట్టి కచితుమ్ సంగిల్ రిసా, ఆవ్ యెరూసలేమ్తె ఉట్ట గెతసి.

23 గని కిచ్చొ జాని మెలె, ఒత్త గెలె, జేలి జతినీ, సైమల్, అంక పిట్టె నాయ్ మెన, ఆవ్ కేన్ పట్టుమ్తె గెలె కి, దేముడుచి సుద్ది తిలి ఆత్మ అంక సికయ్తయ్.

24 గని, ఆవ్ జలె కి మొర్లె కి బాద నాయ్. అంచి జీవుక విలువ దెకి నాయ్. ముక్కిమ్క అంక కిచ్చొ ఆస మెలె, దేముడు కెర్లె దయచి రిసాచి చి సాచి సంగితె తా మెన" యేసుప్రబు అంక కామ్ దా అస్సె. జలె, కెల్క కెల్తినెతె జీనుక మాన్సుక కిసి పూర్తి ఆస తయెదె గే, దస్సి జో ప్రబు దిలి కామ్ పూర్తి నిదానుమ్ కెర కేడవుక అంచి ఆస.

25 "పడ్డొ, ఈందె, తుమ్ ఎత్తిజిన్ ఆవ్ పురలోకుమ్చి రాజిమ్చి రిసాచి సుబుమ్ కబుర్ సూనయ్లస అప్పె తెంతో అంక అన్నె దెకున్ నాయ్ మెన ఆవ్ జాని.

26 జాకయ్, తుమ్ ఎత్తిజిన్చి మొక్కె, తుమ్ ఎత్తిజిన్ సాచి జతి రితి, తుమ్క ఆవ్ కిచ్చొ మెన సాచి సంగితసి మెలె, తుమ్చి రచ్చనచి రిసా అంక అన్నె కిచ్చొ పూచి నాయ్. అంచి జా పూచి కుట్టవన అస్సి.

27 దేముడు అంక సికడ్లెసి ఎత్తి తుమ్క బోదన కెర అస్సి, కేన్ కి ఆవ్ లుకడన్క నాయ్.

28 "తుమ్చి పూచి కిచ్చొ మెలె, ప్రబుచి ఇస్టుమ్ తెన్ జాగర్ల ఇండ, తుమ్ చెంగిల గొవుడ్లు జా, జోచి మంద జల, యేసుక నంపజలన ఎత్తిజిన్క చెంగిల్ దెకితె తా, సికడ్లె తంక. జోచొ సొంత పుత్తనచి లోయి సువడ, జోవయింక కి ప్రబు గెనన అస్సె. తూమ్ జోక దెకితి రిసా, జోచి సుద్ది తిలి ఆత్మ తుమ్చి పెట్టి జో దా అస్సె.

29 అవ్ ఉట్ట గెలె, క్రూరుమ్చ డుర్కొ, జత రిత మాయమాన్సుల్ తుమ్చి నెడమె జా కెర, ప్రబుచి మంద జల, జోక నిదానుమ్ తిలసక అల్లర్ కెరుక పిట్టితి నాయ్.

30 'యేసుచ సిస్సుల్ అమ్చి పట్టి జా జోవయింక పచ్చుత్' మెన, తుమ్చితె తెంతొచ సగుమ్జిసి కి సత్తిమ్ మార్పుప కెర్త కొడొ సంగ సంగ సికడుల.

31 జాకయ్, జేవ్చి రిసా తుమ్ జాగర్త తెన్ తా. అచ్చి కిసి జలయ్? కస్టుమ్ సేడ సేడ తిన్ని వెర్పుల్ పూర్తి, రాతి మెద్దెనె, రోజుక నే పిట్టి, తుమ్క జోవయింక సికడై తిలయ్. జా తుమ్ పచ్చు నాయ్.

32 అప్పె దేముడుచి అత్తి తుమ్క అవ్ సార్పు కెర దెతసి. జో దయ కెర్లిసి ఎత్కిచ కొడొ ఉచరుక ముల నాయ్. జయ్యి నిదానుమ్ పెట్టి తియన్లదు మెలె, తుమ్క అన్నె డిట్టుమ్ కెరెదె, చి జోచ సొంత మాన్సుల్ జంక జో నిసాన్లసక దిలి వాటచ తుమ్క పిట్టి నాయ్.

33 "అవ్ ఇన్నె బుల్లె తిలి పొది, కచి వెండి కచి బజరి, కచి పాలల్క ఆస జయి నాయ్.

34 అవ్ అంచ సొంత అత్తో తెన్ కామ్ కెర కెర, అంచి రిసా, అంచి తెన్ కామ్ కెర్తనచి రిసా కి సరిపుచుప జతిసి దొర్కు కెరన జితె తిలయ్, మెన తుమ్ జాన్సు.

35 'సజితి కంట, దెంక చెంగిలి' మెన, యేసుప్రబు సంగిలి కోడు నే పచ్చితె, దస్సి, సొంత అత్తో తెన్ కామ్ కెరయి, నెత్తిర్లసక తోడు కెర్తె తా, 'దస్సి కెర్లె చెంగిల్' తుమ్క వాట్ దెకయ్లయ్", పవులు బోదన కెర్లన్.

36 ఇసి సంగ కేడవ, పవులు మొగ్రల్ టిక సెర్ను సేడ, జేవ్ ఎత్కిజిన్ తెన్ ప్రార్లన కెర్లన్.

37 జేవ్ ఎత్కిజిన్ దుకుమ్ జల. అంకివొతె ఆసునొ నూయి జలి, చి

జోవయించి గుండెతె ఎక్కెళ్ల పెలన గివెడె దెర అమ్డ చుంబ,

38 కిచ్చొక ఒగ్గర్ దుకుమ్ జల మెలె, "తుమ్ అంక అన్నె దెకున్ నాయ్" మెన జో తెదొడి సంగిలి కోడుచి రిసా, తెదొడి బార్ జా ఓడతె పావెతి ఎద, జోక వట్టె బోడొవ దిల.

21

1 జేవ్ మాన్సుల్తె సెలవ్ నజన, ఓడతె వెగ, ఓడ సొగ జినవ, కోసు మెలి డిబ్బితె పాచ నెర్త తా, అన్నెక్ దిసి రోడెన్ డిబ్బితె పాచ, ఒత్త తెంతొ సముద్రుమ్ జిన, పతర రేవుతె పావెలమ్.

2 ఒత్త పతరతె ఉత్త, పేనీకే ప్రదేసిమ్తె గెతి ఓడ దొర్కు జతికయ్, వెగ బార్ జలమ్.

3 జా ఓడతె పాచ్ పొదుల్ గెచ్చు గెచ్చు, కుప్ర డిబ్బి అమ్చి డెల్లి పక్కయ్ తతి రితి జిన, సిరియ ప్రదేసిమ్ పక్క పాచ, తూరు రేవుతె ఉత్తిర్లమ్. ఓడతె సావుకర్లు దువార్లి సామన్ ఒత్త ఉత్తవుక తిలి.

4 ఒత్తచ నంపజల సిస్సుల్క చజ, సత్తరెక్ జోవయింతె తా గెలమ్. జేవ్, జర్గు జంక తిలిసి ప్రబుచి ఆత్మసెక్కిక చిన కెర, పవులుక, "యెరూసలేమ్తె గెలె తుక ప్రమాదుమ్, పొని" మెన సంగిల.

5 జలె, సత్తు పొదుల్ గెతికయ్, అన్నె బార్ జంక దెర్లమ్. జా తూరు పట్టుమ్చ నంపజలన్ ఎత్కిజిని, తేర్నివొతెన్ బోదల్ తెన్, పట్టుమ్చ గుమ్మల్ ఇత్తల్తో అమ్క బోడొవ దా, సముద్రుమ్చి ఒడ్డుతె పాచడ్ల, చి అమ్ ఎత్కిజిన్ ఒత్త మొగ్రల్ టిక సెర్ను సేడ ప్రార్లన కెర, ఉట్ట, అమ్తె జోవయింతెన్ సెలవ్ నజన,

6 అమ్ ఓడతె వెగెలమ్, జేవ్ గెరి ఉట్ట గెల.

కైసరియ పట్టుమ్తె పావెలిసి

7 తూరు పట్టుమ్క ముల అన్నె ప్రయానుమ్ కెర, తొలెమాయి రేవుతె

ఉత్త, ఒత్తచ బావుడ్లు తెన్ దన్నుల్ జా జోవయింతె ఎక్కి దీసి తా,

8 అన్నెక్ దీసి ఓడతె గెచ్చు, యూదయ ప్రదేసిమ్చి కైసరియ పట్టుమ్చి రేవుతె ఉత్త, సుబుమ్ కబుర్ నూనయితో పిలిప్పిచి గెరి గెలమ్. 'బీద స్తుదల్క దెకుత్' మెన అగ్గెయి యెరూసలేమ్తెచ యేసుచ బారికుల్ సత్తుజిన్క నిసాన తిల. పిలిప్, జేవ్ సత్తుజిన్తె ఎక్కిలో. జోచి గెరి, సగుమ్ దీసల్ తా గెలమ్.

9 పిలిప్పుక చెత్తర్జిన్ పెండ్లి నే జల దువిసివో తిల. ప్రబుచి అత్త జోవయించి పెట్టి కిచ్చో సికడెదె గే, జా కోడు ఈంజేవ్ ఉబెడివో సంగుల.

10 పడ్డో, ఆమ్ ఒత్త తిల పొదుల్, ప్రబుచి అత్త సికడ్డ కబుర్లు సంగితో అగబు మెలో యూదయచి అన్నెక్ పక్క తెంతో కైసరియ పట్టుమ్తె ఉట్ట అయ్లో.

11 జో అమ్తె జా కెర, పవులుచి కెరాంటి బందంతి వాలి నజ, గుర్తుక జోచ సొంత అత్తొ చట్టో బందన, "దేముడుచి సుద్ది తిలి అత్తొ కిచ్చో కోడు సంగితయ్ మెలె, ఆవ్ కీసి అప్పె బందన అస్సి గే, దస్సి, ఈంజ వాలిచో మాన్సుక యెరూసలేమ్ పట్టుమ్చ యూదుల్ బంద, యూదుల్ నెంజిల అదికారుల్తె సొర్పు కెర దెవుల" మెన ప్రబుచి కబుర్ సంగిలన్.

12 జా కోడు నూన, జా పట్టుమ్చ నంపజలన, ఆమ్ కి, "యెరూసలేమ్తెచయి, తుయి గో నాయ్!" మెన బతిమాల్పా జా సంగిలమ్.

13 జలె పవులు జోవయింక, "కిచ్చొక దస్సి ఏడ అంక పెట్టితె దుకుమ్ కెరయ్తను? అంక బందిలె బందుత్, జేలి కెర్తు, అన్నె, ఆవ్ మొర్లె యేసుప్రబుక గవురుమ్ జెయెదె మెలె, మొరిందె కి" మెన సంగిలన్.

14 "ఆమ్ కెద్ది సంగిలే కి, జోక జయి మెన్ను" మెన, ఆమ్ చిన, "దస్సి జలె,

ప్రబుచి ఇన్సుమ్ జర్గు జవున్!" మెన, తుక్కె జలమ్.

యెరూసలేమ్తె ఉట్ట గెలిసి

15 జా పడ్డో, జేవ్ పొదుల్ గెతికయ్, అమ్చి సామన్ సర్లు కెర, దెర, యెరూసలేమ్తె గెచ్చుక బార్ జలమ్.

16 అమ్చి తెన్, కైసరియ పట్టుమ్చ సిస్సుల్ జల నంపజలన సగుమ్జిన్. అగ్గెయి తెంతో సిస్సుడు జలో కుప్ర డిబ్బ దేసిమ్చో మ్మాసానుచి గెరి నిద్ర తతి రిసా ఒత్త అమ్క కడ నిల.

17 ఆమ్ యెరూసలేమ్తె పావితికయ్, బావుడ్లు సర్ల తెన్ అమ్క బెదవన్లు.

18 అన్నెక్ దీసి, పవులు అమ్చి తెన్ యాకోబుతె గెలమ్. ఒత్త సంగుమ్చ వెల్లెల మాన్సుల్ ఎత్తిజిన్ ఒత్త బెర తిల.

19 జోవయింతెన్ దన్నుల్ జా, యూదుల్ నెంజిలనతె జో బుల్లె తిలి పొది జోవయింతెన్ దేముడు జోచి అత్తి జర్గు కెర్లిసి ఎత్తి, వర్న తెన్, పవులు సాచి సంగిలన్.

20 జేవ్, నూన కెర సర్ల జా, "దేముడు జా ఎత్తి జర్గు కెర అస్సి" మెన, జో దేముడుచి గవురుమ్ సంగిల, గని పవులుక కిచ్చో మెల మెలె, "ఓ, బావో, ఇన్నె, అమ్చ యూదుల్తెయి, లచ్చల్జిన్ ప్రబుక నంపజా అస్తి మెన తుయి దెకితసి. మోసిచి అత్తి పూర్లుమ్ దిల ఆగ్గుల్ రితి నిదానుమ్ కెర్తతి.

21 తుచి రిసా కిచ్చో మెన నూన అస్తి మెలె, తుయి యూదుల్ నెంజిలనచ దేసిమ్లుతె గెచ్చు, 'మోసి పూర్లుమ్చోచి అత్తి దేముడు దిలిసి ఆగ్గుల్ తుమ్ పచ్చు, తుమ్చ పుత్తర్లుక అమ్చి గుర్తుచి సున్నతి కెరుక ముల, జా అలవాట్ విడ్డల్ ముల', తుయి అమ్చ యూదుల్క సికడ్డసి.

22 జాకాయ్, అమ్మక కిచ్చొ బాద మెలె, తుక 'ఉట్ట జా అస్సె' మెన కవితుమ్ నూసుల.

23 జాకాయ్, తుయి కిచ్చొ కెర్లె చెంగిల్ మెన తుక అమ్ కిచ్చొ సంగితసుమ్ మెలె, అమ్తె చెత్తర్జిన్ 'సెండి ఉత్తవుమ్దె' మెన, దేముడుక ఆతు ఉక్కుల అస్తి.

24 జలె, జేవ్ చెత్తర్జిన్ తెన్ తుయి సుద్ది కెరన, దేముడుచి గుడితె గెచ్చు, జేవ్ సెండి ఉత్తయ్ తి కర్పు ఎత్తి తూయి దేసు. తుయి దస్సి కెర్లది మెలె, తుచి రిసా జేవ్ నూస్లిన్ క తప్పు మెన చిన, జో కి అమ్చ ఆగ్గుల్ రితి సత్తిమ్ ఇండితయ్ మెన నంపజలన అమ్చ యూదుల్ ఎత్తిజిన్ దెకుల.

25 గని, యేసుక నంపజల యూదుల్ నెంజిలనక బాద నాయ్. జోవయింబి రిసా జోవయింక కిచ్చొ తీర్పు రెగ్గ తెద్రయ్లమ్ మెలె, బొమ్మల్ క దిలిసి తుమ్ కా నాయ్, లోయి కా నాయ్, టొట్రొ మోడ లోయి నే గెచ్చయ్లి సిద్ద కా నాయ్, చి లంజెకమొ కెర నాయ్, మెన, జా ఎక్కి ఆడ్ర దిలమ్" మెన పవులుక యెరూసలేమ్చ సంగుమ్ వెల్లెల మాన్సుల్ సంగిల.

26 జాకాయ్, అన్సెక్ దీసి, పవులు జేవ్ సంగిల చెత్తర్జిన్ తెన్ సుద్ది మెన యూదుల్ సంగితి జా కామ్ కెరన, జోవయింక దేముడుచి గుడితె కడన, "సత్తు పొదుల్ గెలె, అమ్చి సుద్ది జతి కామ్ కేడ్లె, దొర్కు జలి అర్పితుమ్ దెమ్దె" మెన, ఒప్పున్ల.

27 జా కామ్చి జేవ్ ఒప్పున్ల సత్తు పొదుల్ కుట్టిసి పాసి జా, పూర్తి నే జతె అగ్గె, ఆసియా ప్రదేసిమ్చ యూదుల్చ వెల్లెల సుదల్ జా కెర, పవులుక దేవులుమ్తె తిలిసి దెక కెర, ప్రెజల్ ఎత్తిక సికడ్ల, చి జోక దెర్ల.

28 "ఓ అమ్చ ఇస్రాయేలుల్ ఎత్తిజిని, తోడు జా, ఈంజొ మాన్సు కేనె

గెలె కి, అమ్ యూదుల్చి రిసా, అమ్చ ఆగ్గుల్చి రితి, ఈంజ దేముడుచి గుడిచి రిసా, విరోదుమ్ సికడ్లయి. అన్సెక్ కిచ్చొ తప్పు కెర అస్సె మెలె, ఈంజ దేముడుచి గుడి తెడి గ్రీసు దేసిమ్చ సుదల్ కడ ఆన, ఈంజ సుద్ది తిలి టాన్ గార్ కెర అస్సె" మెన ప్రెజల్ క సికడ్ల.

29 కిచ్చొక ఈంజ ఆకర్చి కోడు సంగిల మెలె, అగ్గె ఏక్ సుట్టు, ఎపెసు పట్టుమ్చొ యూదుడు నెంజిలో త్రోపిము మెలోసా తెన్ పవులు పట్టుమ్తె బుల్లె తిలిసి దెక తిల, చి పవులుక, 'జోవయింక దేముడుచి గుడి తెడి కడ నిలో, కిచ్చొగె' మెన ఉచర తిల.

30 ఆసియా ప్రదేసిమ్చ యూదుల్చ జేవ్ వెల్లెల సుదల్, ప్రెజల్ క దస్సి సికడ్లికయ్, పట్టుమ్చ యూదుల్ ఎత్తిజిన్ కోవుమ్ జా, నిగ జా, పవులుక దెర, దేముడుచి గుడి తెంతో ఒర్గొడ నిల. చి బేగి అదికారుల్ దేముడుచి గుడిచ కెచ్చివో డంకిల.

31 పవులుక బార్ కెర, మార గెల్ల, గని ఏలుప కెర్తి రోమ్ దేసిమ్చి జమాన్ సుదల్చి గెరి దేముడుచి గుడిక పాసి తిలి, చి 'ఒండి యెరూసలేమ్ పట్టుమ్చ జనాబ్ గగ్గోల్ జతతి' మెన జమాన్చొ అదికారి దెక కెర,

32 సగుమ్జిన్ జమాన్లుక చి జోవయించ వుంజెక్ జిన్ క వెల్లొక కడ ఆన, జేవ్ జనాబ్ బెర తిలిన్తె నిగ గెల. జేవ్ జనాబ్, జలె, జమాన్లుక చి జోవయించొ అదికారిక దెక కెర, పవులుక పెటుక ముల దిల.

33 తెదొడి జమాన్లుచొ అదికారి పాసి జా, పవులుక దెర, దొన్ని గొల్పుల్ తెన్ జోక బందయ్లన్. "ఈంజొ కొన్సొ? కిచ్చొ కెర అస్సె?" మెన పుసిలన్.

34 జనాబ్చ సగుమ్జిన్ ఏక్ కోడు అన్సె, సగుమ్జిన్ వేర కోడు సంగ, కేకుల్ గల్లె తిల, చి జా గగ్గోల్ క జో అదికారి కిచ్చొ రుజ్జు నూసుక నెత్త కెర, "అమ్చి

గెరితె ఇన్నెక కడన” మెన జమాన్లుక ఆడ్ర దిలన్.

35 పవులుక దెరన జా గెరిచి మేడచి గుమ్ముమె పాచిత పీనెల్తె జమాన్లు వెగుక దెర్లె, జనాబ్ ఒగ్గర్ కోపుమ్ జా, జోచి ఉప్పిరి వెలవెలి జతె తిల చి రిసా, జమాన్లు పవులుక ఉక్కుల వయిల.

36 జనాబ్ ఒగ్గర్ కోపుమ్ తెన్ పట్టి జా, “జోక మొరవ, మొరవ” మెన కేకుల్ గత్తె తిల.

పవులు ప్రెజల్ తెన్ కొడో జలిసి

37 పవులుక జమాన్లు జోవయించి మేడతె కడ నెతె తా, పీనెల్ వెగ గుమ్ముమ్ పాసి పాచిలి పొది, “తుక ఆవ్ ఏక్ కోడు సంగుక సెలవ్ దెస్తె గే?” మెన గ్రీకు బాస తెన్ జోవయించో అదికారిక పవులు పుసిలన్. “గ్రీకు బాస జాన్సి గే?”

38 జా పొదులె, ఐగుప్తు దేసిమ్చో ఎక్కిలో ఈంజ దేసిమి జా కెర, ఈంజ దేసిమ్చక ఆక్రమించుప కెరుక ఉచర, చెత్తర్ వెయిల్జిన్ కత్తివో దెరన్త మాన్సుల్క ప్రబుతుమ్చి ఉప్పిరి విరోదుమ్ సికడ, బయిలు దేసిమి పట్టి కడన తిలో, తూయి జో, కిచ్చోగె” మెన అదికారి సంగిలన్.

39 పవులు జోవయింక జబాబ్ దిలన్, “ఆవ్ యూదుడుయి, కిలికియ ప్రదేసిమ్చి తార్పు పట్టుమ్తె జెర్లిలయ్, చి నాయిమ్క *వెల్లి పట్టుమ్చో జయిందె, ఆవ్ ప్రెజల్క ఏక్ కోడు సంగుక దయ కెర్ర అంక సెలవ్ దె” మెన అదికారిక సంగిలన్.

40 జో అదికారి సెలవ్ దిలన్, చి పవులు, పీనెల్చి ఉప్పిరి టీవో జా కెర, ప్రెజల్క సయ్న కెర్లన్. జేవ్ పూర్తి తుక్లె జతికయ్, జోవయించి ఎబ్రీ బాస తెన్ సంగుక దెర్లన్.

* 21:39 21:39 'వెల్లి పట్టుమ్' మెలె, రోమ్ పట్టుమ్క సంగ తయెదె. అద్యయిమ్ తెంతో.

22

గగ్గోల్ జల యూదుల్క పవులు సంగిలిసి

1 కిచ్చో మెన యూదుల్చి ఎబ్రీ బాస తెన్ పవులు యూదుల్క సంగిలన్ మెలె, “బావుడ్లు, వెల్లో సుదల్, తుమ్ కెర్లి నిందక జబాబ్ సంగిందె. నూన” మెన,

2 ఎబ్రీ బాస తెన్ సంగిలన్. ‘ఆమ్ యూదుల్చి బాస’ మెన నూన, అన్నె తుక్లె జల. జాకయ్ జోచి జబాబ్ జో సంగుక దెర్లన్.

3 ఆవ్ యూదుడుయి, కిలికియ ప్రదేసిమ్చి తార్పు పట్టుమ్తె జెర్లిలయ్, గని, ఈంజయి యెరూసలేమ్ పట్టుమ్తె వడ్డ, వెల్లో జలో అమ్చో గమలీయేల్తె సదు కెర్లయ్. జో సికయ్తికయ్, అమ్చ పూర్గుల్చ అగ్గుల్ రితి నిదానుమ్ సిక కెర్తె తిలయ్, చి తూమ్ అప్పైక కిసి అస్సున్ గే, ఆవ్ కి దేముడుచి సేవ నిదానుమ్ తెన్ కెర్తె తిలయ్.

4 జాకయ్, యేసుతె రచ్చన జతి ఈంజ వాట్క నంపజలనక పూర్తి విరోదుమ్ జా, దెర బంద, మున్సుబోదల్క, తేర్బోదల్క జేల్తె గలయ్లయ్. సగుమ్జిన్క *వూర్లిన్తె బెదిలయ్.

5 జా కోడుక ఎత్తిక వెల్లో పూజరి కి, సబతె వెసిత వెల్లెల మాన్సుల్ ఎత్తిజిన్ కి సాచి జా అస్సి. ‘యేసుక నంపజల ఒత్తచ మాన్సుల్క దెర, బంద, సిచ్చ కెరవుక’ మెన సెలవ్ నజన, దమన్సుక పట్టుమ్తెచ వెల్లెల మాన్సుల్క దెకయ్తి రిసా, ఇన్నెచ ఎత్తిక వెల్లో పూజరితె ఉత్తల్ నజెలయ్.

6 “ప్రయానుమ్ గెతె తా, దమన్సుక పాసి అయ్లి పొది, రమారమి మెద్దెనె, పరలోకుమ్ తెంతో చి వెల్లి ఉజిడి అంచి సుట్టునంత డిసిలి.

* 22:4 22:4 బారికూల్ 8:1, 9

7 ఆవ్ బుయ్యో సెర్ను నేడ. ఏక్ అవాడ్ అంక సంగిలినీ ఆవ్ నూన్లయ్, 'సావులు, సావులు, అంక కిచ్చొక అల్లర్ కెర్తసి?' మెన సంగిలన్.

8 'తుయి కొన్సో, ప్రబు?' మెన జబాబ్ దిలయ్, చి జో అంక, 'తుయి అల్లర్ కెర్తొ నజరేతు గవ్వొచొ యేసు ఆవ్', మెన అంక సంగిలన్.

9 "అంచి తెన్ తిలన, జలె, జా ఉజిడి దెకిల, గని అంచి తెన్ లట్టబ్లోసాచి అవాడ్ సూన్తి నాయ్.

10 తెదొడి, 'ఆవ్ కిచ్చొ కెరుక, ప్రబు?' మెన, ప్రబుక పుసిలయ్, జో అంక, 'తుయి ఉట్ట, దమన్కు పట్టుమ్తె గో, చి తుయి కిచ్చొ కెరుక అస్సె గే తుక ఒత్త సూనయిందె', మెన, అంక సంగిలన్.

11 జలె అంకి అందర్ ఉజిడిచి రిసా, ఆవ్ గుడ్డి జతికయ్, అంచి తెన్ అయ్లన అంక ఆతు దెర, అంక వాట్ దెకయ్ల, చి దమన్కు పట్టుమ్తె పాచిలయ్.

12 "ఒత్త, అననీయ మెలో ఎక్కిలో తిలో. కీసా మాన్సు మెలె, అమ్చొ దేముడుచ ఆగ్గుల్ రితి నిదానుమ్ కెరెదె, ఒత్తచ యూదుల్ ఎత్కిజిన్ జోక 'చెంగిల్ మాన్సు' మెనుల.

13 జో, అంచితె జా కెర, అంచి పాసి టీవోజ, 'సావులు, బావో, తుచ అంకివో డీసుల' మెన సంగిలన్, తెదొడి అంకివో చెంగిల్ జా జోక దెకిలయ్.

14 తెదొడి, జో, 'అంచి ఇస్టుమ్ జో సికున్, పరలోకుమ్చి పున్నిమ్ తిలో క్రిస్తుక దెకున్, జోచి అవాడ్ సూన్సు.' మెన, అమ్చ పూర్లుచొ దేముడు తుకయ్ నిసాన అస్సె.

15 చి తుయి దెకిలిన, తుయి సూన్లినచి రిసా, జోచి రిసా, ఎత్కిజిన్ మాన్సుల్క సాచి సంగెదె.

16 అలె, కిచ్చొక రకితసి? ఉట్ట జోచి నావ్ దెర బాప్తిసుమ్ నజన, తుయి కెర్ల పాపల్ దోయి జా గెతి రిసా, జోచి రచ్చన నజను., మెన అననీయ అంక సంగిలన్.

17 "ఆవ్ యెరూసలేమ్తె అన్నె బుల అయ్లి పొది, ఏక్ దీసి, దేవులుమ్తె గెచ్చ ప్రార్దన కెర్తె తిలె, ప్రబుతె అంచి మెన్సు పూర్తి తా,

18 'బే బేగి యెరూసలేమ్ ముల ఉట్ట గో. ఇన్నె అంచి రిసాచి తుయి సంగితి సాచి సంప కెర్తె నాయ్.', మెన ప్రబు అంక సంగిలన్.

19 ఆవ్ జోక, ప్రబువ, అవ్ అగ్గె అమ్చ యూదుల్చి కేన్ సబగెరి గెలె కి, తుక సంపజలనక చజ, జేతె గలిలయ్, పెటయ్లయ్.

20 పడ్డె, తుచి సాచి జలో స్తెపనుక మార్లిన్తె అవ్ కి పాసి టీవోజ, 'చెంగిల్' మెంతె తిలయ్, జోక మార్లనచ సొక్కల్ గట్ట దెర తిలయ్. ఈంజ ఎత్కి జేవ్ అదికారుల్ కి జాన్తి. ఆవ్ ఇన్నె తాఁ గెలె చెంగిల్ కిచ్చొగె మెన, ప్రబుక ఆవ్ సంగిలయ్.

21 జలె, అంక జో కిచ్చొ మెలన్, మెలె, ఉట్ట, గో. కిచ్చొక మెలె, తుయి దూరి గెచ్చ యూదుల్ నెంజిలనక సుబుమ్ కబుర్ సూనవుక మెన, ఆవ్ తెద్రయ్తసి మెన, ప్రబు అంక సంగిలన్.", మెన పవులు జేవ్ యూదుల్క సంగిలన్.

పవులు సంగితికయ్ జనాబ్ కోపుమ్ జలిసి

22 జా కోడు సంగితె ఎద తుక్లె తా, జోవయింక జేవ్ యూదుల్ సూన్తె తిల. గని, యూదుల్ నెంజిలనచి రిసాచి కోడు సూన, కోపుమ్క గట్టిజ ఒర్న, కిచ్చొ మెన కేకుల్ గల మెలె, "కీసా మాన్సు, ఈంజో! ఈంజ లోకుమ్తె ఈంజో కిచ్చొక జింక! ఇన్నెక మార గెల!" మెన జేవ్ కేక్కుల్ గల.

23 జోవయించి ఒగ్గర్ కోపుమ్క, జోవయించ సొక్కల్ గట్ట కడన దెర పెట్టి రితి సయ్న కెర, మత్తి కి వెంట కెర గల్తె తతికయ్,

24 జమాన్సుచొ అదికారి కిచ్చొ కెరుక నేన కెర, "జోక కమె కెర్తె గేర్తె కడన కొర్డల్ తెన్ వెట పరిచ్చ కెర, కిచ్చొ నేరిమ్ జోక వయడ్తతి గే చి జోచి రిసా కిచ్చొక

దన్ని మెన ఒర్న దిల గే జానుక” మెన, జమాన్లుక ఆడ్ర దిలన్.

పవులు రోమియుడు మెన జాన్సుప జలిసి

25 గని జేవ్ జోవయింక కొర్దల్ తెన్

పెటుక మెన బందితికయ్, పాసి టీవోజ తిలో పుంజెక్జిన్ జమాన్లుక వెల్లోక పవులు ఏక్ కోడు సంగిలన్. “సాచి నే నూన్తె, నే తీర్పు జలో రోమియుడుక పెట్టి సిచ్చ దెంక నాయిమ్ గే?” మెన పుసిలన్.

26 జా కోడు పుసితికయ్, జో పుంజెక్జిన్ జమాన్లుక వెల్లో నూన, వెయి జమాన్లుక వెల్లోతె గెచ్చ, “అమ్ కిచ్చొ కెరుక గే? ఈంజో మాన్సు రోమియుడు” మెన సంగితికయ్,

27 జో అదికారి పవులుతె జా కెర, “తుయి రోమియుడు గే?” మెంతికయ్, “ఆవ్ రోమియుడుయి” మెన పవులు సంగిలన్.

28 జాకయ్, జో అదికారి, “రోమియుడు జతి రిసా ఆవ్ ఒగ్గర్ డబ్బుల్ దిలయ్” మెన పుంజెక్జిన్ జమాన్లుక వెల్లో సంగిలన్. “గని ఆవ్ రోమియుడు జా జెర్మిలయ్” మెన, పవులు జబాబ్ సంగిలన్.

29 బేగి, జోవయింక పెట పరిచ్చ కెరుక ఉచర్లన బియఁ కెర బార్ జల, చి పవులుక, జో రోమియుడు మెన, చి రుజ్జు నే నూన్తె రోమియుల్క సిచ్చ కెరుక, బందుక, నాయిమ్ నాయ్ మెన, ‘తప్పు కెర్లయ్’ మెన పుంజెక్జిన్ జమాన్లుక వెల్లో బియఁ గెలన్.

యూదుల్చ అదికారుల్క సబ వెసయ్లిసి

30 అన్యేక్ దీసి, పెందలె, “యూదుల్ కిచ్చొక జోక నింద కెర అన్తి గే సత్తిమ్ నూనిందె” మెన, జోక బందిల గొల్పుల్ యిప కెర, “వెల్లెల పూజర్లు, యూదుల్చి

సబతె వెసితన ఎత్రిజిన్ జెతు, చి సబ వెసయిందె” మెన పుంజెక్జిన్ జమాన్లుక వెల్లో ఆడ్ర దిలన్. జేవ్ యూదుల్ జెతికయ్, పవులుక ఎట్టొతో జోవయింతె కడ ఆన, జోవయించి మొక్కె టీవో కెలన్.

23

1 పవులు, జలె, నే బితె సబ వెసిలసక దెక, “ఓ బావుడ్లు, ఆజి ఎద అమ్చొ దేముడుక సత్తిమ్ ఆవ్ ఇండితసి.”, మెన, మొదొల్ సంగిలన్.

2 అననీయ మెలో ఎత్రిక వెల్లో పూజరి, “జోక చోడి పెట” మెన పవులుక పాసి తిలసక ఆడ్ర దిలన్.

3 తెదొడి, పవులు జోవయింక, “చున్నమ్ దెరవ ముర్కి లుంకడ్డి కూడు జలో రితో తుయి మాయమాన్సుక దేముడు తుకయ్ పెటెదె! దేముడు మోసే తెన్ దిలి ఆగ్గుల్చి నాయిమ్ తెన్ అంచి రిసాచ రుజ్జుల్ నూన్తి రిసా సబతె వెస అస్సున్, గని నాయిమ్ నెంతె అంక పెటయ్తసి. తుక కిచ్చొ సత్తిమ్?!” మెన, సంగిలన్.

4 పాసి తిలస, “దేముడుచొ ఎత్రిక వెల్లో పూజరిక దన్ని దూసుప కెరుక జయె నాయ్.” మెన సంగిల,

5 చి, “బావుడ్లు, జోక ‘ఎత్రిక వెల్లో పూజరి జయెదె’ మెన ఆవ్ నేని. జాన్తయ్, జలె, దన్ని లట్టబ్తయ్ నాయ్. ‘తుమ్చ అదికారుల్క దూసుప కెరుక జయె నాయ్’ మెన, దేముడుచి కొడెతె రెగ్గ అస్సె” మెన పవులు జబాబ్ దిలన్.

6 పడ్డె, ‘సబ వెసితనతె సద్దూకయ్యులు చి పరిసయ్యుల్ మెల పండితుల్ ఇన్నె అన్తి’ మెన పవులు దెక కెర, సబతె కిచ్చొ మెన కేక్ గలో మెలె, “ఓ బావుడ్లు, ఆవ్ పరిసయ్యుడుయి. అంచ పూర్లుల్ కి పరిసయ్యుల్, ‘మొర్లె అన్నె జీవ్ జా ఉట్టుమ్దె’ మెన

† 22:28 22:28 పవులు యూదుల్చి సెకుమ్చొ జలెకి, అబ్బుదినిచి కాలమ్ తెంతో ‘రోమియులు ఈంజేవ్’ మెన నాయిమ్ తెన్ రుజ్జుల్ దెకయ్త కాగ్ల జోవయించి కుటుంబమ్చక తిల.

ఆవ్ పరిసయ్యుడు దయిరిమ్ తెన్ అన్సిచి రిసా, అంక నింద కెర పరిచ్చ కెరయ్ తతి.", మెన సంగిలన్.

7 జో దస్సి సంగిల్ రిసా, పరిసయ్యుల్ చి *సద్దూకయ్యులు గగ్గోల్ జల.

8 మాన్సుల్ మొర్లె అన్నె జితి నాయ్, దూతల్ తతి నాయ్, ఆత్మల్ బూతల్ డుంబల్ గట్ర తతి నాయ్ మెన సద్దూకయ్యులు సికడ్తతి. పరిసయ్యుల్, 'మొర్లె జిమ్ దె, దూతల్, ఆత్మల్ బూతల్, డుంబల్ గట్ర అన్సి' మెన ఒప్పన్ తతి, చి రిసా, దొన్ని జట్టు జా ఒగ్గర్ గగ్గోల్ జల.

9 తెదొడి, పరిసయ్యుల్ చి జట్టుతెచ సగుమ్ జిన్ మోసి తెన్ దేముడు దిలి ఆగ్గుల్ సికడ్తన టీవ కెర, "ఈంజొ మాన్సుతె కిచ్చొ తప్పు డిసె నాయ్. ఏక్ వేల కేన్ జవున్ ఆత్మ జవున్, దూత జవున్ ఇన్నె తెన్ లట్టళ్లొ" మెన సంగిల.

10 జా కోడు సూన కెర సద్దూకయ్యులు ఒగ్గర్ కోపుమ్ జల, చి జేవోజ జట్టు జలన అన్నె ఒగ్గర్ గగ్గోల్ జతికయ్, జమాన్లుచొ అదికారి, 'యూదుల్ పవులుక ఎక్కె దడి దొన్ని పక్కలె దెర చిర మారుల' మెన బియ్య కెర "తుమ్ జోవయింతె ఉత్ర గెచ్చ, జోక జోవయించి నెడిమి తెంతొ ఉర్ల కడ దెర జా అమ్ చి జమాన్లు గెరిచి మేడతె ఆన జోక రక" మెన, జమాన్లుక ఆడ్ర దిలన్.

పవులుక ప్రబు దయిరిమ్ సంగిలిసి

11 జా రాతి, యేసు ప్రబు పవులుచి పాసి టీవోజ కెర, "తుయి బి నాయ్. ఈంజ యెరూసలేమ్ తె తుయి కిసి అంచి రిసా సాచి సంగ అస్సిన్ గే, దస్సి, తుమ్ క ఏలుప కెర్తి రోమ పట్టుమ్ తె కి అంచి రిసా సాచి సంగితె" మెన ప్రబు జోక సంగిలన్.

పవులుక మారుక మెన యూదుల్ కుట్ర కెర్లిసి

12 అన్నెక్ దిసి పెందలె, యూదుల్ కుట్ర కెర, "పవులుక మార్తె ఎదక చువ్వె తన్నె తమ్ దె" మెన ఆతు ఉక్కిల.

13 కెత్తిజిన్ జా కుట్ర కెర్ల మెలె, దొన్ని విసాజిన్ చి కంట అన్నె ఒగ్గర్ జిన్.

14 జేవ్ వెల్లెల పూజర్లు చి సబచ వెల్లెల మాన్సుల్ తె గెచ్చ, ఇసి మెల, " 'పవులుక అమ్ మార్తె ఎదక చువ్వె తన్నె తమ్ దె' మెన ఆతు ఉక్కుల అస్సుమ్.

15 జాకయ్, తూమ్, సబ వెసి తన ఎత్తిజిన్ తెన్, రోమచ జమాన్లుచొ అదికారితె అప్పె గెచ్చ, 'పవులుక అన్నె సరిగా పరిచ్చ కెర తీర్పు సంగుమ్ దె. జోక కడ ఆను' మెన జో అదికారిక సంగ. జో కడ ఆన్లె, జో పవులు తీర్పు కెర్తి గెరి పాసి నే జెతె అగ్గె, మారుమ్ దె" మెన, కుట్ర కెర్ల.

16 జలె, పవులుక వట్టె దెర మార్తి కుట్రచి రిసా పవులుచి బేస్సిచొ పుత్తుసి సూన తా, జమాన్లు తతిన్ తె గెచ్చ, తెడి పెన, పవులుక సంగిలన్.

17 పవులు పుంజెకజిన్ జమాన్లుక వెల్లో ఎక్కిలోక బుకారా కెర, "జమాన్లుచొ అదికారితె ఈంజొ నాడుక కడ నే. ఏక్ కబుర్ ఈంజొ ఆన అస్సె" మెన సంగితికయ్,

18 అదికారితె కడన కెర, "జేలి జలో పవులు అంక బుకారా కెర, అదికారితె ఈంజొ నాడుక కడ నే. జోక కబుర్ ఆన అస్సె, మెన తెద్రయిలన్", మెన, పుంజెకజిన్ జమాన్లుక వెల్లో సంగితికయ్,

19 అదికారి జో నాడుచి ఆతు దెర, జో తెన్ గెర్చి తెడి పెన గెచ్చ, కో నే సూన్ తె, "అంక తుయి సంగితి కబుర్ కిచ్చొ?" మెన పుసిలన్.

20 "యూదుల్ కుట్ర కెర అన్సి. ఆరిక, పవులుక అన్నె సరిగా పరిచ్చ కెర తీర్పు కెర్తి రితి జా, తుక, 'కలిక సబతె కడ

* 23:7 23:7 మాన్సుల్ మొర్లె అన్నె జితి నాయ్, దూతల్ తతి నాయ్, ఆత్మల్ బూతల్ డుంబల్ గట్ర తతి నాయ్ మెన సద్దూకయ్యులు సికడ్తతి

అన్ను' మొన తుక కబుర్ తెద్రవుక ఉచర అస్తి.

21 గని పొని. పవులుక వట్టె దెర మారుమ మొన, దొన్ని విసొజిన్చి కంట అన్నె ఒగ్గరిజిన్ రకితతి. జోక మార్తె ఎదక చువ్వె తన్నె తమ్దె మొన జేవ్ ఆతు ఉక్కుల అస్తి. తుక 'ఆమ్ ఉచర్లె ఆడ్ర దెవున్' మొన, రకితె అస్తి", పవులుచొ బేన్చిచొ పుత్తుసి జమాన్లుచొ అదికారిక సంగిలన్.

22 జాక జో అదికారి, "అంక తుయి ఈంజ కబుర్ సంగిలిసి కక్కు సంగు నాయ్" మొన నాడుక ఆడ్ర దిలన్.

23 తెదొడి జమాన్లుచొ అదికారి, దొగుల పుంజెక్జిన్ జమాన్లుక వెల్లొక బుకారా కెర, "దొన్ పుంజొజిన్ మాములుమ్ జమాన్లుక, గోడల్తె వెగిత డబ్బుయ్జిన్ జమాన్లుక, దొన్ పుంజొజిన్ ఈంటల్ దెర్త జమాన్లుక ఆడ్ర దేను. నొవ్వు గంటల్ రాతిక తెయార్ జా తత్తు. కైసరియ పట్టుమ్ ఎదక జేవ్క తెద్రయిందె.

24 పడ్డె, పవులు వెగ గెతి రిసొ, గోడలు దొర్కు కెరు. జో కిచ్చొ ప్రమాదుమ్ నే జతె పేలిక్సతె తుమ్ జోక బొడొవ దాస" మొన, జేవ్ దొగుల పుంజెక్జిన్ జమాన్లుక వెల్లొక ఆడ్ర దిలన్.

25 పేలిక్సక దెతి ఉత్తమ్ రెగిడ్డె.

26 "వెల్లొ అదికారి జలొ పేలిక్సక ఆవ్ క్లొదియ లూసియ తెద్రయ్తి ఉత్తమ్.

27 తుచితె ఆవ్ తెద్రయ్తో ఈంజొ మాన్లుక యూదుల్ దెర, మారిత, గని ఆవ్, అంచ జమాన్లు తెన్ జా కెర, దెక, జోక 'రోమియుడు' మొన సూస, రచ్చించుప కెర్తయ్.

28 జోక 'కిచ్చొ నేరిమ్ వయడ్తతి గే సూనిందె' మొన, జోవయించి సబతె టీవొ కెలయ్,

29 'మొర్తి సిచ్చ జవున్, జేల్తె గల్లి సిచ్చ జవున్ ఆనన్తి కిచ్చొ నేరిమ్ కెరె నాయ్, గని ఎక్కి జోవయించి

దేముడుచి నముకుమ్క బెదెతిసి, మొసే తెన్ దేముడు దిలి ఆగ్గుల్చి అలవాట్ పిట్టయ్తయ్ జోక నింద కెర్తతి' మొన, అంక రుజ్జు అయ్లి.

30 తెదొడి, 'జోక మారుక కుట్ట కెర అస్తి' మొన, సూన్లయ్, బేగి తుచితె తెద్రయ్తసి, జోక నింద కెర్తసక, 'జేవ్ కి తుచి తీర్పు కెర్తి టాన్తె గెచ్చు, జేవ్ వయడ్డి నేరిమ్చి రిసొ తుచి మొక్కె జెవ్వి సాచి సంగుత్' మొన ఆడ్ర దా అస్సి" పేలిక్స అదికారిక జమాన్లుచొ అదికారి ఉత్తమ్ రెగిడ్డన్.

31 జాకయ్, జమాన్లుచొ అదికారి సంగిల్ రితి, జమాన్లు జా రాతి అంతిపత్తి మెలి పట్టుమ్ ఎద పవులుక బొడొవ దా కెర,

32 అన్నెక్ దీసి పెందలె 'జోక కైసరియ పట్టుమ్ ఎద బొడొవ దెతు' ఎక్కి గోడల్తె వెగిల జమాన్లుక ముల, తిల జమాన్లు యెరూసలేమ్తె అన్నె బుల గెల.

33 పవులుక బొడొవ దిలస, జోవయింతెన్ కైసరియతె పాచ కెర, అదికారిక ఉత్తమ్ దా కెర, పవులుక జోచి పురె టీవొ కెలన్.

34 తెదొడి అదికారి, జా ఉత్తమ్ సదు కెర, "తుయి కేన్ ప్రదేసిమ్చొ మాన్లు?" మొన పవులుక పుసిలన్. "కిలికియ ప్రదేసిమ్చొ ఆవ్" మొన పవులు జబాబ్ దిలొ

35 "దస్సి జలె, తుక నింద కెర్తస ఇన్నె పాచ అయ్లె, తుచి తగు సూనిందె" మొన సంగ కెర, "హెరోదు రానొచి మేడతె ఇన్నెక కడన రకుత్" మొన పేలిక్స అదికారి ఆడ్ర దిలన్.

24

1 పాచ్ పొదుల్ గెతికయ్, ఎత్తిక వెల్లొ పూజరి అననీయ, సబతెచ వెల్లెల సుదల్ తెన్, పవులు కెర్తి నింద వయడ్డికయ్ తెర్తుల్లు మెలొ ఎక్కిలొ తెన్, ఉట్ట అయ్ల. అదికారిచి గెరితె జా

కెర, పవులుచి రిసా జేవ్ సంగిలి నింద వయడ్ల.

2 తెదొడి, అదికారి పవులుక కడ ఆనయ్తికయ్, జో కెర్తి నిందచి తగు సంగుక మెన, తెర్తుల్లు సంగిలన్. “తూయి ఏలుప కెర్తికయ్, వెల్లో పేలిక్స్ అమ్చి ఒండి ప్రదేసిమ్క సేంతుమ్, చి తుచి దయచి రిసా, అమ్చి దేసిమ్చ కస్టల్ నస్టల్ మార్పుప జా అస్తి.

3 జాకయ్, తుచి ఎదివాట్ తోడుచి రిసా, అమ్చి సర్దసంతోసుమ్ తుక సూనయ్తసుమ్.

4 తుక ఒగ్గర్ కామ్ తయెదె, చి తుక ఒగ్గర్ కొడొ సూనవ అల్లర్ కెరుక నెనుమ్, గని దయ కెర దొన్ని కొడొ జవున్ సూను.

5 ఈంజొ మాన్సు బలే అల్లర్ కెర్తయ్. ఒండి లోకుమ్చ అమ్చి యూదుల్తె గెచ్చు, ప్రబుతుమ్చి ఉప్పిరి విరోదుమ్ కెర్తి రితి సికడ్తయ్. పడ్డె నజరేతు గవ్విచొ యేసుచి అలవాట్ కెర మార్పుప జలసచి జట్టుతె జో ముక్కిమ్.

6 ఈంజు నెంతె అన్నె అమ్చి దేముడుచి గుడిక గారె కెరుక ఉచర్లొ, గని జోక దెర పిట్టయ్లమ్. *అమ్చి ఆగ్గుల్ రితిచి అలవాట్తె కెర్తి రితి జోక తీర్పు కెర్తమ్,

7 గని జమాన్లుచొ అదికారి జలో లూసియ జా కెర, అమ్చి అత్తి తెంతొ జోక ఉర్ల కడన కెర, నేరిమ్ వయడ్లన పేలిక్స్ అదికారిచి తీర్పు కెర్తి టాన్తె గెతు., మెన ఆడ్ర దిలన్.

8 తూయి సొంత జో మాన్సుక పరిచ్చు కెర్లె, అమ్ వయడ్డి నేరిమ్ ఎత్తిచి రిసా తూయి సూన, రుజ్జుల్ దెకితె”.

9 యూదుల్ ఎత్తిజిన్ “సరిగా” మెన, జోచి సాచి బెదవ జేవ్ నేరిమ్లు వయడ్ల.

పవులు జబాబ్ దిలిసి

10 తెదొడి, ‘తుయి జబాబ్ దేసు’ మెన, పవులుక అదికారి సయ్న కెర్లన్, పవులు సంగిలన్. “తుయి ఒగ్గర్ వెర్సులు ఈంజు దేసిమి ఏలుప కెర్లె అస్సినచి రిసా దయిరిమ్ తెన్ ఆవ్ జబాబ్ దెతసి.

11 అప్పెక బార పొదుల్ జంక నేతయ్, దేముడుచి గుడితె ఒక్కి కెరుక మెన, ఆవ్ యెరుసలేమ్తె గెలయ్. తుక రుజ్జు కావలె మెలె, సాచుల్ అస్తి.

12 “ఆవ్ ఒత్త తా, దేముడుచి గుడితె జవున్, సబ గెరలె జవున్, పట్టుమ్తె జవున్, ఆవ్ కిచ్చొ వేర కోడు సికడ్డిసి దెక అస్తి గె? ఆవ్ ప్రెజల్క అల్లర్ కమె సికడ్డిసి దెక అస్తి గె? నాయ్!

13 పడ్డె, అంచి రిసా జేవ్ అప్పె నింద కెర్తినక కిచ్చొ రుజ్జు దెకవుక నెత్తిరి.

14 గని తుచి మొక్కె ఆవ్ కిచ్చొ ఒప్పున్తసి మెలె, ‘తప్పు’ మెన జేవ్ సంగితి ‘యేసుక్రీస్తు దొర్కు జలి రచ్చున వాట్’ మెన ఒప్పున్తసి నాయ్. సుబుమ్ కబుర్క నంపజా ఆవ్ ఇండ, అమ్చి †మోసే పూర్ముచొచి అత్తి దేముడు రెగ్గయ్ల ఆగ్గుల్ జలెకు, పూర్ముచి అత్తి సంగిల దేముడుచి కబుర్లుతె తిలిసి ఎత్తి, జో దేముడుచి కబుర్లు రెగిడ్డిసి ఎత్తి, ఆవ్ నంప కెర్తసి.

15 ఈంజేవ్ ఒప్పున్తసి ఆవ్ కి దయిరిమ్ తెన్ పూర్తి నంప కెర్తసి, సత్తిమ్ ఇండిలన అబద్దుమ్ ఇండిలనకి మొర్లె కి, జీవ్ జా ఉట్ట గెచ్చుల.

16 జాకయ్, దేముడుక కి, మాన్సుల్క కి కిచ్చొ పాపుమ్ నే కెర్తి రిసా, ఆవ్ జాగర్ల దెకన్తసి.

17 “ఒగ్గర్ వెర్సుల్ గెతికయ్,

* 24:6 24:6 గ్రీకు బాస తెన్ ఈంజు మత్తిలి తోలితొ రెగిడ్ల సగుమ్ పుస్తకల్తె 6 సంబర్చి ఆకర్ కోడుచి 7 సంబర్చి కోడు తయె నాయ్; మెలె, ‘అమ్చి’ తెంతొ ‘దిలన్’ ఎద. † 24:14 24:14 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రగ్గయ్ల ఆగ్గుల్ మెన అమ్ జానుమ్. ఈంజు కొడొ ఎత్తి బైబిల్తె అగేచి పావ్ పుస్తకమ్తె రెగ్గయ్ జా అస్సె. ఈంజు దెకవుక మెన కుపియ బాసతె నొయి ప్రమానుమ్తె మోసే పూర్ముచొచి అత్తి రెగిడ్డి దేముడుచి ఆగ్గుల్ మెన రగ్గవ అస్సె.

యూదుల్చ బీద సుదల్క తోడు దెంక మెన, ఒత్తచ మాన్సుల్ దిలి డబ్బుల్ దెరన అయ్లయ్, చి అమ్చో దేముడుక కానుక దెంక మెన, దేముడుచి గుడితె గెలయ్.

18 సుద్ది జతి కారిమ్ కెరన ఆవ్ దేముడుచి గుడితె దస్సి బక్తి కెర్తె తతికయ్, ఆసియా వ్రదేసిమ్చ అమ్చ యూదుల్చ వెల్లెల మాన్సుల్ అంక దెకిల. గని కేన్ జనాబ్ గగ్గిల్ గుగ్గిల్ జలిసి కిచ్చోయ్ నాయ్.

19 అంచి రిసా ఆసియాచ యూదుల్ కిచ్చో నేరిమ్ వయడుక ఇన్సుమ్ జతతి, జెవ్వి అప్పె ఇన్నె తుచి మొక్కె సాచి జంక జలె చెంగిల్ తతి.

20 గని జేవ్ నాయ్, చి ఈంజేవ్ యెరూసలేమ్చ మాన్సుల్ సబ కెర్లిన్తె ఆవ్ నింద జలి పొది, ఆవ్ కిచ్చో తప్పు కెర్లిన్చి రుజ్జు దెకిల గే, సూన్ల గే, సంగుతు.

21 ఎక్కి కోడుచి రిసా జేవ్ సంగుక జయెదె. జోవయించి నెడిమి ఆవ్ టీవోజ తా, 'మొర్రి కి జీవ్ జా ఉట్టుమదె' మెన ఆవ్ సంగితన్చి రిసా అంక ఆజి నింద కెర్తతి." దస్సి పవులు అదికారిక సంగిలన్.

పవులుక తీర్పు నే జతె జేల్తె రకితె తిలిసి

22 అదికారి జలో పేలిక్స్, యేసుక నంపజతి చి రిసా ఇదిల్ ఒగ్గర్ జానె, చి తీర్పు వాయిద కెర్తి రితి, "జమాన్లుచో అదికారి జలో లూసియ ఇత్తల్ ఉట్ట అయ్లె, తుక వయడ్డి నేరిమ్చి తగు నూనిందె" మెన, పవులుక సంగిలన్.

23 వడ్డె, ఒత్త తిలో పుంజెకజీన్ జమాన్లుక వెల్లొక, "ఈంజో మాన్సుక జేలి కెర, గని బంద గట్ర నాయ్, గదితె డంక నాయ్, చి జోచ గోతుసుదల్తె కో గోత్ అయ్లె కి, జోక దొర్కు జలిసి కిచ్చో అన్లెకి, అడ్డు కెర నాయ్" మెన పేలిక్స్ ఆడ్ర దిలన్.

24 సగుమ్ దీసల్ గెలి వడ్డె, పేలిక్స్ అదికారి యూదుడుయి జలి ద్రుసిల్ల మెలి తేర్పిక కడ ఆన, పవులు జేలి తిలిన్తె అయ్ల. పవులుక "జెవ్స్" మెన పేలిక్స్ సంగ తెద్రయ్తికయ్, అయ్లో. యేసుక్రీస్తుచి ఉప్పిరి నముకుమ్ తిలిన్చి బోదన సూన్ల.

25 పవులు బోదన కెర కెర, కిచ్చోచి రిసా సంగుక దెర్లన్ మెలె, పున్నిమ్చి రిసా, ఆన కెరంతి రిసా, చి ఆకర్ దీసిక లోకుమ్చ మాన్సుల్క యేసువ్రబు పరిచ్చు కెర తీర్పు కెరుక తిలిన్చి రిసా సంగిలన్, చి పేలిక్స్, సొంత కెర్త తప్పుల్క ఉచర లాజ్ జా బియ్ కెర, "అప్పెచి మట్టుక ఉట్ట గెచ్చ తా. అంక అవ్కానుమ్ తిలె, తుక కెయ్క గే అన్నె బుకారిందె" మెన జోక తెద్రయ్లన్.

26 వడ్డె, పేలిక్స్ అన్నె కిచ్చోచి రిసా ఉచర్తె తిలో మెలె, 'విడ్డల్ జతి రిసా ఏక్ వేల పవులు లంచుమ్ దెయెదె' మెన ఆన జా తిలో. జాకయ్ ఒగ్గర్ సుట్టు జోక బుకారా బుకారా, జో తెన్ లట్టబ్బో.

27 గని పవులుక ఒత్త జేలి కెర దొన్ని వెర్పుల్ గెతికయ్, పేలిక్స్ అదికారి వేరతె మార్పుప జలో, చి పొర్కియన్ పెస్తున్ అదికారి జలో. మార్పుప జలి పొది, యూదుల్క పులవుక మెన పవులు జేల్తె దస్సి తతి రితి పేలిక్స్ ముల దిలో.

25

పవులుచి రిసా యూదుల్ అన్నె అల్లర్ ఉచర్లిసి

1 ఏలుప కెరుక మెన, పెస్తున్ యూదయ వ్రదేసిమి ఉట్ట జా తిరతి గెలి వడ్డె, జోవయించి మేడ తిలి కైసరియ తెంతో బార్ జా, యెరూసలేమ్తె గెలో.

2 వెల్లెల పూజర్లుచి యూదుల్చ అన్నె వెల్లెల మాన్సుల్ జోతె జా కెర, పవులుచి రిసా సంగిల.

‡ 24:25 24:25 కిచ్చో తీర్పు మెలె, జోవయింక నంపజా సత్తిమ్ జలసక పరలోకుమ్తె కడ నెతిసి, గని నంప నెంజ అబద్ధమ్తె తాఁ గెలసక సిచ్చతె గల్లిసి.

3 అన్నె, “దయ కెర పవులుక యెరూసలేమ్తె తెద్రవు” మెన, బతిమాల్పు జా సంగిల. జో అయ్లె, వట్టె లుంక దెర మారుక మెన ఉచర్తితి.

4 పెస్తున్, “పవులు ఒత్త కైసరియతె జేల్తె అస్సె, చి ఒగ్గర్ దీసల్ నే గెతె ఆవ్ ఒత్త అన్నె గెచ్చిందె” మెన సంగ.

5 “ఆవ్ ఒత్త గెచ్చుక బార్ జలె, తుమ్చ అదికారుల్ అంచి తెన్ బెద జెతు, చి జో మాన్సు కిచ్చో నేరిమ్ కెర తిలె, రుజ్జు దెకవుతు!” మెన సంగిలన్.

పెస్తున్ పవులుచి తగు అన్నెసూన్లిసి

6 పెస్తున్ ఎక్కి అట్టు గే దెన్ను గే పొదుల్ ఒత్త యెరూసలేమ్తె తా కెర, కైసరియతె అన్నె ఉట్ట అయ్లన్, చి అన్నెక్ దీసి పవులుచి తగుచ రుజ్జుల్ సూసుక వెస, పవులుక “జెవున్” మెన ఆడ్డ దిల్.

7 పవులు యెరూసలేమ్ తెంతో అయ్ల. యూదుల్ జోవయించి సుట్టునంత టీవోజ కెర, కిచ్చో కిచ్చో వెల్లెల నేరిమ్లు ఒగ్గర్ సంగిల, గని రుజ్జుల్ దెకవుక నెతిర్ల.

8 తెదొడి పవులు “యూదుల్చ ఆగ్గుల్ రితి కెర్తెన్చి అలవాట్ ఉచర్లె కి, కిచ్చో నేరిమ్ కెరి నాయ్, దేముడుచి గుడిచి రిసా కి కిచ్చో నేరిమ్ కెరి నాయ్, చి అమ్క ఏలుప కెర్తె* కైసర్చి రాజమ్క కి కిచ్చోయ్ ఇదిలిసి నేరిమ్ కి కెరి నాయ్” మెన, జబాబ్ దిలన్.

9 పెస్తున్, మాత్రుమ్, యూదుల్క పులవుక మెన, పవులుక, “యెరూసలేమ్తె గెచ్చు ఈంజేవ్ అంక సూనయ్ల నేరిమ్లుచి రిసా తీర్పు కెరవసుక ఇస్టుమ్ జతసి గే?” మెన పుసిలన్.

10 గని పవులు జబాబ్ దిలన్, “కైసరు వెల్లో రానో ఏలుప కెర్తి రితిచి గెరితె తీర్పు జంక మెన ఇన్నె ఆవ్ టీవోజ అస్సి. ఇన్నెయి అంచి తగు తీర్పు

సరిగా జంక. యూదుల్క ఆవ్ కిచ్చో తప్పు కెరి నాయ్. తుయి కి జా కోడు జాస్సి.

11 ఆవ్ తప్పు కెర్తయ్ జలె, మొర్తి సిచ్చుచి ఎదిలి నేరిమ్ కెర్తయ్ జలె, ఆవ్ మొర్తి కి బాద నాయ్. గని ఈంజేవ్ వయడ్ల నేరిమ్లు ఆరిచ జలె, అంక యూదుల్చి రితి తీర్పు కెర సిచ్చు కెరుక మెన ఇన్నెచి అత్తి అంకకో సొర్పు కెర దెంక నాయిమ్ నాయ్. కైసర్ వెల్లో రానో సొంత అంచి తగు సూన తీర్పు కెర్పు” మెన, సంగిలన్.

12 తెదొడి, పెస్తున్, జోవయించి సబచ అదికారుల్ తెన్ వెస లట్టల్లు, చి పవులు, “కైసరు సొంత అంచి తగు సూన తీర్పు కెర్పు” మెన ఇస్టుమ్ జలది. ఈంజ తగు జా సెలవ్ దెతయ్. కైసరుచి గెరి గో” మెన తీర్పు సంగిలన్.

పెస్తున్ పవులుచి రిసా పెస్తున్ అగ్రిప్పు రానొక సంగిలిసి

13 సగుమ్ దీసల్ గెతికయ్, ‘పెస్తున్ నొవర్ ఏలుప కెర్తయ్’ మెన, ఇదిల్ ఉత్తర పక్కచో రానో జలో అగ్రిప్పు, బేస్సి జలి బెర్నికే తెన్, కైసరియతె గోతే అయ్ల.

14 ఒగ్గర్ దీసల్ ఒత్త తతికయ్, పవులుచి తగుచి రిసా పెస్తున్ జో రానొక సంగిలన్. పేలిక్స్ ఏలుప కెర్తి తెంతో జేలి జలో ఎక్కిలో ఇన్నె అస్సి.

15 జలె, ఆవ్ యెరూసలేమ్తె గెచ్చు తిలి పొది, ఇన దన నేరిమ్లు కెర అస్సి, మెన వెల్లెల పూజర్లు చి యూదుల్చ అన్నె వెల్లెల మాన్సుల్ సంగ, తీర్పు కెర సిచ్చు కెరు మెన, అంక సంగిల.

16 “జేవ్ యూదుల్ దస్సి సంగితికయ్. నేరిమ్ వయడ్లన నేరిమ్ వయిలోసా ఎక్కితె తీర్పు కెర్తి టాన్తె జా తగు సూనవుక నే టీవోజతె అగ్గె,

* 25:8 25:8 వెల్లో రానోచి, రానోచి. † 25:10 25:10 సీబరు వెల్లో రానో, మెలె వెల్లో రానో, రోమ్ పట్టుమ్తె తా ఈంజ ‘బారికుల్’ చి పుస్తకుమ్తె సంగిల ప్రదేసిమ్లు ఎత్తిచి ఉప్పిరి ఏలుప కెర్తయ్. రోమ్ దేసిమ్చి ప్రబుతుమ్క వెల్లో, జో.

నేరిమ్ వయితోసా జేవ్ నింద కెర్తినక జబాబ్ సంగుక అవ్కాసుమ్ నే దెతె అగ్గె, అమ్చ రోమియుల్చి అలవాట్ తేన్ జోక కచి అత్తి సార్పు దెంక జయె నాయ్, మెన, జబాబ్ దిలయ్.

17 జాకయ్, జేవ్ ఇత్తల్ ఉట్ట అయ్లి బేగి, వాయిద నే కెర్తె, అన్నెక్ దీసి తగు సూనవుక మెన తీర్పు కెర్తినతె వెన, జోక జెవున్ మెన, కడ ఆనయ్లయ్.

18 నేరిమ్ వయడ్డన టీవో జలి పొది, కిచ్చొ విలువచ నేరిమ్లు వయడ్డి నాయ్.

19 జేవ్ కిచ్చొచ నిందల్ జోక సంగితె తిల మెలె, జోవయింవో దేముడుచి అలవాట్చి కమొచి రిసా, పడ్డో యేసు మెలో ఎక్కిలోక 'మొర అన్నె జిలో' మెన పవులు సంగిలినక గగ్గోల్ జతె తిల.

20 జాకయ్, దన్న తగులు తీర్పు కెరుక నేన కెర, ఈంజేవ్ సంగిత నిందల్చి రిసా యెరూసలేమ్తె గెచ్చ తగు సూనవ తీర్పు కెరవనుక ఇస్టుమ్ జతసి గె? మెన పుసిలయ్.

21 గని, వెల్లో రానో జలో కైసరు సొంత తీర్పు కెర్పు, మెన మదెనె ఇన్నె జేలి తయిందె మెన పవులు ఇస్టుమ్ జతికయ్, కైసర్తె ఆవ్ తెద్రయ్తి ఎదక జోక రకితె తత్తు మెన, జేలితె అన్నె గలిలయ్," మెన పెస్తున్ సంగిలన్.

22 జాకయ్ అగ్రిప్పు రానో, ఆవ్ సొంత జోచి తగు సూనుక అంక ఇస్టుమ్, మెన సంగిలన్, చి "దస్సి జలె, కలిక జోక సూన్తె" మెన, పెస్తున్ సంగిలన్.

అగ్రిప్పు రానో పవులుచి తగు సూన్లసి

23 జలె, అన్నెక్ దీసి, అగ్రిప్పు రానో, బెర్నీకే మెలి బేన్సి తెన్ బార్ జా, జమాన్లుచ అదికారుల్ తెన్, చి పట్టుమ్చ వెల్లో సుదల్ తెన్, గెరితె ఒగ్గర్ గవురుమ్ తెన్ జా కెర, వెసిల. పవులుక కడ ఆన మెన పెస్తున్ ఆడ్ర దెతికయ్, కడ ఆన్.

24 తెదొడి, బెర తిలనక పెస్తున్ "ఓ రానో జలో అగ్రిప్పు, ఇన్నె అయ్లన ఎత్తిజిన, ఈంజో మాన్సుక తుమ్ దెకితను. ఇన్నెచి రిసా జా సుట్టు యూదుల్ ఎత్తిజిని, యెరూసలేమ్తె కి ఇన్నెకి, అంక బలవంతుమ్ కెర, జో అన్నె జింక కిచ్చొక? మొర్పు! మెన, కేకుల్ గల్తె తిల.

25 గని, 'మొర్పి సిచ్చ జతి కేన్ నేరిమ్ కెరె నాయ్' మెన అంక డీసిలి, చి ఈంజో, కైసరు వెల్లో రానో సొంత అంచె తగు, సూన తీర్పు కెర్పు, మెన కోర్ప జతికయ్, దస్సి జలె, జో తెయి రోమ్తె తుక తెద్రయిందె మెన, ఇన్నెక ఒప్పున్లయ్.

26 గని, ఇన్నెచి రిసా అంచో కైసరు ప్రబుక దెతి రిసా కిచ్చొ నేరిమ్ రెగుడుక నేన అస్సి; కిచ్చొ నేరిమ్ వయడ్డిసి నాయ్ చి రిసా ఎత్తిచి మొక్కె, ముక్కిమ్క తుచి మొక్కె, ఓ అగ్రిప్పు రానో, జోక టీవో కెర అస్సి. కిచ్చొ మెన మెలె, 'జేవ్ జోచి కొణో సూన్లె, అమ్ ఇన్నెక పరిచ్చ కెర్తె, ఇన్నెచి రిసా కిచ్చొ జవున్ రుజ్జు అమ్చో వెల్లో రానో కైసరుక రెగుడుక జయెద'.

27 జలె, జేలి జలో కేన్ మాన్సుక ఆరి, కిచ్చొ నేరిమ్ వయడుక నేన్తె తెద్రవుక బెదితయ్ నాయ్, మెన ఆవ్ ఉచర్తసి" మెన ఇసి సంగిలన్.

26

అగ్రిప్పు రానోచి మొక్కె పవులు సాచి సంగిలిసి

1 తెదొడి, అగ్రిప్పు రానో పవులుక, "తుయి సొంత జబాబ్ దెంక తుక సెలవ్ దెతసి" మెలన్, చి పవులు ఆతు తెన్ సయ్న కెర, ఇసి మెన జబాబ్ దిలన్.

2 "ఓ అగ్రిప్పు రానో, యూదుల్ కెర్ల నిందల్ ఎత్తిచి రిసా తుచి మొక్కె ఆవ్ జబాబ్ దెంక సెలవ్ దొర్కు జలిచి రిసా అంక సర్ల.

3 యూదుల్ కెర్ల రకల్ ఎత్తి, యూదుల్చ తగుల్ ఎత్తి, తుయి జాస్సి. జాకయ్, తుయి 'బమ్మ నెంతె అంచె

సాచి సరిగా నూసుక' మెన, ఆవ్ తుక జొక్కర్తసి.

4 ఆవ్ బాల తతె తెంతో, అమ్చ సొంత మాన్సుల్తె కి ఈంజ యెరూసలేమ్ పట్టుమ్తె కి, ఆవ్ కిసి జిలయ్ గే యూదుల్ ఎత్కిజిన్ జాన్తి.

5 అమ్చి మొత్తుమ్చ ఆగ్గుల్ ఎత్కిజిన్చి కంట నిదానుమ్ కెర్త ఆమ్ పరిసయ్యుల్ బక్తికెర్తి రితి ఆవ్ ఇండిలిసి మెన జేవ్ అగ్గెయ్ తెంతో జాన్తి. జేవ్ సత్తిమ్ సాచి సంగుక ఇన్సుమ్ ఒత్త జలె, ఇసి సంగిత.

6 అప్పె, జలె, కిచ్చొక అంక తగు కెర అస్తి మెలె, అమ్చ పూర్ణుమ్చక అమ్చొ దేముడు సంగిలి కోడు ఆవ్ నంపజా దయిరిమ్ తెన్ తిలి రిసాయి.

7 జా కోడు సంగిలిన్క 'అమ్క జెయిమ్ జవున్!' మెన, అమ్చ బార సెకుమ్లుచ యూదుల్ రోజుక అందరె మెద్దెనె నిదానుమ్ తెన్ బక్తి కెర్తతి. జేవ్ కోర్ప జతిన్చి ఆసచి రిసా మెన ఆవ్ నంపజతసిచి రిసా, ఓ రానొ, అంక నింద కెర్తతి.

8 'మొర్లసక దేముడు జియడ్డయ్' మెన సంగిలె, కిచ్చొక తుమ్ ఎత్కిజిన్ నంప కెరుక నెత్తిర్తసు?

9 "అగ్గెయి, జలె, నజరేతు గవ్వెచొ యేసుక 'జొయ్యి దొర్కు జలొ రచ్చించుప కెర్తొసా' మెన మాన్సుల్ సంగిలె, 'అబద్దుమ్' మెన, మెన్సు నిదానుమ్ ఉచర, ఆవ్ అగ్గె నంపజలన్క జలె అల్లర్ కెర్తె తిలయ్.

10 యెరూసలేమ్తె జోవయింక *అల్లర్ కెర్లయ్. కిసి మెలె, వెల్లెల పూజర్లుచి సెలవ్ నజన, ప్రబుచయ్ జల మాన్సుల్క జేల్తె గలిలయ్, చి 'మొర్తి సిచ్చ జతు' మెన, ఆవ్ ఒప్పన్లయ్.

11 ఎత్కి నబగేరి గెచ్చ జోవయింక సిచ్చల్ కెర్తె తిలయ్, చి 'యేసుక రచ్చించుప కెర్తొసా జతో క్రీస్తు నెంజె మెన సంగ జోవయింక దూసుప కెర్తు'

మెన, జోవయింక అల్లర్ కెర్లయ్. జోవయించి రిసా అంక వెర్తి కోపుమ్చి రిసా, వేర దేసిమ్లుచ పట్టుల్తె గెచ్చ కి, జోవయింక అల్లర్ కెర్తె తిలయ్.

12 "దస్సి, ఏక్ సుట్టు, 'నంపజలన్క అల్లర్ కెరిందె' మెన, వెల్లెల పూజర్లుచి సెలవ్ తెన్ జోవయించి అద్దికారుమ్ తెన్ ఏక్ దిసి దమస్కు పట్టుమ్తె గెతి వట్టె గెతె తతికయ్,

13 ఓ రానొ, మెద్దెనె, పరలోకుమ్ తెంతో చి ఏక్ వెల్లి ఉజిడి దెకిలయ్. పొద్దుచి ఉజిడ్చి కంట వెల్లి ఉజిడి. అంచి సుట్టునంత, అంచి తెన్ ప్రయానుమ్ కెర్తె తిలసచి సుట్టునంత డీస లగిలి.

14 జా దెక, ఆమ్ ఎత్కిజిన్ ఎట్టొ సేడ్డికయ్, అమ్చి ఎబ్బీ బాస తెన్ ఏక్ అవాడ్ సంగిలిసి సూన్లయ్, 'సావులు, సావులు, అంక కిచ్చొక అల్లర్ కెర్తసి? ఆవ్ సికడ్డిసి తుయి నెస కెర, తుకయి తూయి నొప్పి కెరంతసి?', మెన సంగిలన్.

15 'తుయి కొన్సొ, ప్రబు?' మెన పుసిలయ్, 'తుయి అల్లర్ కెర్తొ యేసు అవ్వె.

16 తుయి ఉట్ట, టీవొజ. కిచ్చొక తుక అప్పె డీస అస్తి మెలె, అంచ కమె కిచ్చొ దెక అస్సిన్ గే అన్నె కిచ్చొ అంచ కమె తుయి దెకితె గే, జా ఎత్కిచి రిసా తుయి సాచి సంగుక మెన, తుక ఆవ్ నిసాన తెర్తయ్తసి.

17 యూదుల్చి అత్తి కి, యూదుల్ నెంజిలసచి అత్తి కి, తుయి అల్లర్ సేడ్డె కి, ఆవ్ తుక రచ్చించుప కెరిందె. యూదుల్ నెంజిలసతె తుక తెర్తయ్తసి.

18 జేవ్ గుడ్డి జల రిత జా తిలె కి, దెక, అందర్బుద్ది ముల, ఉజిడ్ బుద్ది జా, సయ్తాన్చి సేవ కెరుక ముల, దేముడుచి సేవ కెర్తు' మెన, 'జేవ్ కెర్ల పాపల్ వుంచి జతు చి అంక

* 26:10 26:10 బారికుల్ 9 అద్యయమ్.

నంపజా నుద్ది జల అన్నె మాన్సుల్ తెన్, జోవయింక కి టాన్ దొర్కు జవున్' మెన తుక 'జోయ్యి అంచి సాచి సంగున్' మెన, తుకయ్ ఆవ్ తెద్రయ్ తసి.", మెన అంక ప్రబు తెదొడి సంగిలన్.

19 "జాక, ఓ అగ్రిప్పు రానొ, పరలోకుమ్ చొ ప్రబు జా దీసి దెకయ్ లిన్ క నూనయ్ లిన్ క నే పిట్టయ్ తె నిదానుమ్ కెర,

20 తొలితొ దమన్కుతె, పడ్డొ యెరూసలేమ్ తె, పడ్డొ ఒండి యూదయ ప్రదేసీమి, పడ్డొ యూదుల్ నెంజిలనచ దేసీమీలుతె గెచ్చు, ఒత్త కి, తుమ్ కెర్ల పాపల్ చి రిసా పెట్టి దుకుమ్ జా ముల, దేముడుక తుమ్ నంపజా మార్పుప జలిన్ క రుజ్జు జతి రితి సత్తిమ్ ఇండ మెన, బోదన కెర్తె తిలయ్.

21 జాకయ్, యూదుల్ దేముడుచి గుడితె అంక దెర, అంక మారుక కుట్ట కెర్ల.

22 "ఆజి ఎదక కి, దేముడు అంక తోడు తత్తయ్ చి రిసా, బాల వెల్లో ఎత్తిజిన్ చి మొక్కె ఈంజ సాచి ఆవ్ సంగితసి. 'జర్గు జయెదె' మెన దేముడుచ కబుర్లు సంగిలన సంగిలిసి తెన్ మోసే పూర్లుమ్ చొచి అత్తి దేముడు సంగిలిన్ తెన్ బెదితి సాచి ఆవ్ సంగితసి. కిచ్చొ వేరచి నెంజె.

23 జేవ్ కిచ్చొ సంగిలిన్ చి రిసా ఆవ్ సంగితసి మెలె, సైమల్ సేడ క్కీస్తు మొరుక అస్సె, చి అన్నె జీవ్ జా ఉట్టితనక జో మొదొల్ సుదొ జయెదె, చి అమ్ చ యూదుల్ క కి, యూదుల్ నెంజిలనక కి జోచి ఉజిడి జో దెకయెదె, మెన, పూర్గుల్ సంగిలి కోడు" మెన పవులు సాచి సంగిలన్.

పెస్తున్, పవులు, అగ్రిప్పు లట్టబ్లిసి

24 పవులు దస్సి సాచి సంగితె తతికయ్, పెస్తున్ గట్టిజ అవాడ్ కెరన, "పవులు, తుయి వెర్రి జా అస్సిన్. తుయి

ఒగ్గర్ నదు కెర్లిసి తుక వెర్రి కెర మార్పుప కెర్తయ్" మెన సంగిలన్.

25 "తుక జోబర, వెల్లో పేస్తున్. ఆవ్ వెర్రి నెంజి! ఆవ్ సంగితిసి సత్తిమ్.

26 రానొక పుసు. ఈంజ ఎత్తి జోక ఎర్కె, చి దయిరిమ్ తెన్ జోవయిం చి మొక్కె ఆవ్ సంగితసి. ఈంజ ఎత్తి కిచ్చొ గుట్టుచి నెంజె. జో కి ఈంజ ఎత్తి కచితుమ్ నూన తయెదె" మెన, పవులు సంగ,

27 రానొచి పక్క వస్ల, "రానొ జలో ఓ అగ్రిప్పు, 'జర్గు జయెదె' మెన అమ్ చొ దేముడుచి కబుర్లు సంగితన పూర్లుమ్ రెగ్గయ్ ల కొడొ తుయి నంపజతసి గే? తుయి 'నంపజతయ్' మెన జాని" మెన, పవులు సంగిలన్.

28 అగ్రిప్పు పవులుక, "అంక బే బేగి మార్పుప జా నంప జవున్, మెన తుయి ఉచర్తసి గే?" మెన పునీలన్,

29 పవులు, "బే బేగి జవున్, అల్సిమ్ జవున్, గని ఎక్కి తుకయి మెని నాయ్. ఆజి అంచి కోడు నూన్ తన ఎత్తిజిన్ కి 'ఈంజేవ్ గొల్పుల్ క పిట్టవ, అంచి రితి జా మార్పుప జతు!' మెన ఆస తెన్ దేముడుక ఆవ్ ప్రార్దన కెర్తసి" మెన, పవులు రానొక సంగిలన్.

30 తెదొడి రానొ, పేలిక్స్, బెర్నీకే, చి జోవయింతెన్ వెన తిలన ఎత్తిజిన్ ఉట్ట, కెర,

31 బార్ జా, ఎక్కిలోక ఎక్కిలో కిచ్చొ మెల మెలె, "ఈంజొ మాన్సు కిచ్చొ మొర్రి సిచ్చుచి ఎదిలి తప్పు జవున్, జేలి జతిన్ చి ఎదిలి తప్పు జవున్, కిచ్చొయ్ కెరె నాయ్" మెన సంగిల.

32 చి పెస్తున్ క అగ్రిప్పు రానొ, "కైసరు వెల్లో రానొ సొంత అంచి తగు నూన్ సు మెన ఈంజొ మాన్సు సంగితొ నాయ్ జలె, ఇన్నెక విడ్డల్ కెరుక జతి!" మెన సంగిలన్.

రోమ పట్టుమీతె పావులీంసి ప్రయానుమ్ గెచ్చుక దెర్లిసి

1 అమ్ ఇటలీ దేసిమి ప్రయానుమ్ గెచ్చుక మెన అదికారుల్ సంగితికయ్, పవులుక చి అన్నె జేలి తిలసక, ఔగుస్తు వెల్లో రానోచి మెలి జమాన్లుతె, పుంజెక్జీన్ జమాన్లుక వెల్లో యూలి మెలో ఎక్కిలోచి అత్తి సార్పు కెర్రి.

2 తెదొడి, వేర దేసిమ్చి అద్దముత్తియ పట్టుమ్చి ఓడ ఆసియా ప్రదేసిమ్చ రేవుల్ వాట్ గెచ్చెదె మెన, జా ఓడతె వెగ బార్ జలమ్. అన్నె మాసిదోనియ ప్రదేసిమ్చి దెస్సలోనిక పట్టుమ్చొ అరిస్తార్కు అమ్చి తెన్ తిలో.

3 ఉత్తర పక్క గెచ్చు గెచ్చు, అన్నెక్ దీసి సీదోను రేవుతె ఉత్తిర్లమ్, చి యూలి, పవులుక చెంగిల్ దెక, జోచ ఒత్తచ గోతుసుదల్తె జో గోత గెచ్చ ఇదిల్ పుండ సుక్కుమ్ జంక మెన, సెలవ్ దిలన్.

4 పుండ, ఓడతె అన్నె వెగ, ఒత్త తెంతొ అన్నె ఉత్తర పక్క గెచ్చు, తెదొడి పడమర పక్క గెచ్చు, కుప్ర డిబ్బక జిన్లమ్. కుప్రక వేర పక్క గెతమ్, జలె, వాదు అల్లర్ కెర్రి.

5 ఒత్త తెంతొ, కిలికియచి పంపూలియా ప్రదేసిమ్లు సాడి ఓడ తెన్ గెచ్చు గెచ్చు, లుకియ ప్రదేసిమ్చి మూర రేవుతె ఉత్తిర్లమ్.

6 ఇటలీతె గెతి అలెక్సంద్రియ పట్టుమ్ తెంతొ చి ఓడ ఒత్త తతికయ్, జా ఓడతె వెగ గెచ్చుక జయెదె మెన పుంజెక్జీన్ జమాన్లుక వెల్లో జాన కెర, అమ్క వెగయ్లన్.

7 సగుమ్ దీసల్ తిరిమ్ తిరిమ్ ఓడ తెన్ గెలమ్, గని తెదొడి వాదు అల్లర్ కెర్రి, చి క్షీదు రేవు పాసి అయ్లి పొది, అన్నె పడమర పక్క గెచ్చుక ఉచర్లె వాదు పూర్తి అడ్డు కెర్రికయ్, దచ్చెన పక్క గెచ్చు, క్రేతు డిబ్బుచి సల్మీనే మెలి కొన్నక కస్తన జిన,

8 క్రేతుచి లాసేయ పట్టుమ్చి పాసి తిలి 'సూటి రేవుల్' మెలి టాన్తె పాచిలమ్.

వెల్లి వాదు అల్లర్ కెర్రిసి

9 ఒత్త సగుమ్ దీసల్ తిలమ్, చి చువ్వె తతి అమ్చి వండుగు కేడ్డికయ్, చల్లి పొది పాసి జెతయ్, చి జా పొదిచి వాదుక ఒత్త ఓడతె గెచ్చుక ప్రమాదుమ్చి రిసా,

10 "గోతుసుదల్, అమ్ అప్పె బార్ జలె, ఓడక, సామన్క, చి అమ్క ప్రమాదుమ్, ఒగ్గర్ నస్తుమ్ జమ్దె మెన దెకితసి" మెన, పవులు జాగర్త సంగిలన్.

11 గని పవులు సంగిలీన్క పుంజెక్జీన్ జమాన్లుక వెల్లో విలువ నే దెకితె, ఓడ ఇండయ్తనచొ ఎజొమాని, అన్నె ఓడచొ ఎజొమాని దొగులచి కోడు సూన్లన్, చి

12 "ఈంజ రేవుతె వాదు సరిగా అడ్డు జయె నాయ్ చి రిసా ప్రమాదుమ్" మెన ఓడతె తిల మాన్సుల్ ఎత్తిజిన్ సంగ, "ఏక్ వేల క్రేతు డిబ్బుచి పీనిక్స్ మెలి అన్నెక్ రేవుతె పాచిలె, ఇదిల్ వేర దిక్కుక మొక్కె జతయ్ మెలె, నైరుతి దిక్కుకచి వాయవ దిక్కుకచి చల్లి పొది ఒత్త రకిలె చెంగిల్ కిచ్చొగె" మెన సంగిల.

13 తెదొడి, దచ్చెన పక్క తెంతొ ఉల్లువుల్లుల్లు వాదు కెర్రికయ్, 'అప్పె బార్ జలె చెంగిల్ కిచ్చొగె' మెన, ఓడక టీవొ కెర్రి లంగరు మెలి ఇనుము సామన్ సముద్రుమ్ తెంతొ కడ కెర, ఇండవుక దెర, క్రేతు డిబ్బుచి గట్టుక పాసి గెచ్చ తా, ఇండయ్తె తిల.

14 గని ఈసాన్యమూల పక్క తెంతొ జెతికయ్ వెల్లి వాదు బుయి పక్క తెంతొ వీరుక దెర్రి,

15 చి జా వాదుక నెత్త కెర, ఓడ పసుల, వాదు గెతి దిక్కుతె వెల్లి జలి.

16 తెదొడి, కీసి గే, కౌద మెలి ఇదిలిసి డిబ్బుచి గట్టుతె జా కెర, ఓడ పడ్డొ కడ దొనిక కస్తన ఓడతె వెగర్లమ్.

17 డిట్టుమ్ జవ్స్ మెన, డిట్టుమ్ వాలివొ తెన్ ఒండి ఓడక బందిల. తెదొడి, సూర్తి మెలి ఇన్ను డిబ్బుతె ఓడ వెల్లి జలె

టక్కున దెరన గెలెదె మెన బియఁ కెర, ఓడ తిరిమ్ ఉట్ట గెన్ను మెన, జేవ్చ వెల్లెల మాన్సుల్ తెరల్ గట్ట ఉత్తయల.

18 గని, వాదు కెర్లల్ ఒగ్గర్ కెర, ఓడక ఒగ్గర్ అల్లర్ కెర్కయ్, అన్నెక్ దీసి, ఓడతె దువారై తిలి సామన్ సముద్రుమ్తె గలుక దెర్ల, ఓడ నుల్కన జవున్ మెన.

19 గని వాదు తగుప జయె నాయ్, చి తిర్రత్త ఎత్తిజిని, బాల వెల్లో, సొంతయ్ బెద, ఓడ ఇండయ్తి సామన్ కి ఉక్కుల సముద్రుమ్తె గలిలమ్.

20 ఒత్త తెంతొ, వాదు పాని గట్టిజ జతికయ్, ఒగ్గర్ దీసల్ జలి పొద్దు డీసె నాయ్, సుక్కల్ డీస్తి నాయ్, చి రచ్చించుప జతి దయిరిమ్ ఎత్తిజిన్క పూర్తి గెలి.

21 జేవ్ మాన్సుల్ ఒగ్గర్ దీసల్ చువ్వె తతికయ్, పవులు జోవయించి నెడిమి పురై జా, “ఆవ్ తెదొడి సంగిలిసి సూన్తద్ జలె, క్రేతు తెంతొ బార్ జతద్ నాయ్, ఈంజ నస్టుమ్ కస్టుమ్ సేడ్తద్ నాయ్.

22 ఈంజ ఓడ పాడ్ జా గెచ్చెదె, గని కేన్ మాన్సు మొర్పు నాయ్, అప్పె తుమ్ దయిరిమ్ తెన్ తా మెన ఆవ్ తుమ్క సంగితస్.

23 క్రీసి జాని మెలె, ఆజి రాతి, ఆవ్ నంపజలొ దేముడుచి దూత ఎక్కిలొ జా కెర, అంచి పాసి టీవ,

24 అంక, ‘పవులు, తుయి బి నాయ్. తుయి కచితుమ్ *కైసర్చి పాసి టీవ జా జోక తుచి తగు సూనయ్తె. పడ్డొ, ఈందె తుచి తెన్ ఓడతె గెతన కి తుచి తెన్ రచ్చించుప జతు దేముడు తుక వరుమ్ దా అస్సి మెన,’ దూత అంక సంగిలన్.

25 జాకయ్, గోతుసుదల్, తుమ్ దయిరిమ్ త్తా. అంక కబుర్ సంగిల్ రితి కచితుమ్ జర్గు జయెదె మెన ఆవ్ నంపజతసి.

26 గని మదెనె, కేన్ జవున్ డిబ్బతె ఓడ వెల్లి జంక అస్సె” ఇసి పవులు

సంగిలన్.

ఓడ డిబ్బచి గట్టుతె వెల్లి జలిసి

27 చొవ్వు పొదుల్ గెతికయ్, అందరె, అద్రియ సముద్రుమ్తె అమ్చి ఓడ ఇండ నే ఇండిలి రితి జా తిరిమి గెతె తతికయ్, ‘అమ్ బుయిక పాసి జెతసుమ్ కిచ్చొగ్’ మెన, ఇండయ్తనక అజ్జ అయ్లి.

28 చి ‘సముద్రుమ్ కెర్ది దీగ్ అస్సె గే దెకుమ’ మెన కొల్ల దెకిలె, పుంజెక్ విస్సెక్ అడుగుల్ దీగ్ అస్సె. అన్నె ఇదిల్ దూరి గెచ్చొ కొల్ల దెకిలె, తొంబయ్ అడుగుల్ దీగ్ జా అస్సె.

29 తెదొడి, “పత్తల్తె వెల్లి జలె అల్లర్ జమ్దె” మెన బియఁ కెర, ‘ఓడ టీవొ కెర’ మెన, ఓడచి పడ్డొ పక్క తెంతొ చెత్తర్ లంగర్లు సముద్రుమ్తె బుడ్డవ తా, “కెదొడ్క రాతి పాయదె.” మెన ప్రార్దన కెర్తె తిల.

30 మదెనె, ‘ఓడక ముల దోనితె వెగ బయిలె బార్ జమ’ మెన ఓడ ఇండయ్తన, ఆరిక “ఓడచి పురైతొచ లంగర్లు బుడ్డయ్తనుమ్” మెన సంగ, లుంకచోరు ఓడచి దోని ఉత్తవ దిల.

31 జా పవులు దెక కెర, పుంజెక్జిన్ జమాన్లుక వెల్లొక చి జమాన్లుక, “ఈంజేవ్ మాన్సుల్ ఓడతె తిలెకయ్ రచ్చించుప జస్సె” మెన సంగిలన్.

32 చి దోనిచ వాలివొ జమాన్లు సుదల్ సింద, దోని ములయ్ల.

33 కుకుడొ వాసెనె, “అప్పె చొవ్వు పొదుల్ జయెదె, తుమ్ ఎత్తిజిన్ బియఁ తా చువ్వె అస్సెన్.

34 జాకయ్, అన్నిమ్ కా సత్తు జా. తుమ్ కిచ్చొయ్ నస్టుమ్ నే జస్సె రచ్చించుప జస్సె, చి తుమ్క సెక్తి తయెదె. జేవ్క కి పవులు బలవంతుమ్ కెర,

35 పొడియె దెర, ఈంజ అన్నిమ్ దా దయ కెర్లచి” మెన, దేముడుక జోకర కెర, ఏక్ గండ మోడ కంక దెర్లన్.

* 27:24 27:24 వెల్లొ రాసెచి.

36 జేవ్ దెక, దయిరిమ్ జా, జేవ్ కి కంక దెర్ల.

37 జా ఓడతె మొత్తుమ్ దోన్ పుంజొ డబ్బయ్ సొప్పు జీన తిల.

38 జలె, ఎత్తిజిన్ సరిపుచుప జలిసి కయ్లి పడ్డొ, ఓడక 'అన్నె సుల్కన జవున్' మెన, సేసిలి గోదుమ్ ఎత్తి సముద్దుమ్తె గలిల.

39 †పొద్దు బార్ జతికయ్, 'ఈంజి కేన్ దేసిమ్చి బుయి గె?' మెన చినితి నాయ్, గని ఏక్ రేవు తిలిసిచి ఇన్క తిలి సదూనుమ్చి ఒడ్డు దెకిల, అన్నె: "ఒత్త పావెలె, ఓడ ఒడ్డుతె ఒర్గొడ నెంక జయెదె" మెన, ఉచర్ల.

40 జాకయ్, జేవ్ బుడ్డవ తిల లంగర్లుచ వాలివొ యిప సముద్దుమ్తె ముల, దిక్కు దెకయ్త చట్టుచ వాలివొ బొడుగ కెర, ఓడక పురై తతి ఇదిలిసి తెర వెగడ, ఒడ్డు పక్క గెచ్చుక దెర్లమ్.

41 సముద్దుమ్ తెడిచి ఏక్ డిబ్బుతె ఓడ పెల్లి జా, దెరన గెలి. పురైతో పక్క టక్కున డిబ్బుతె వెస గెలి, పడ్డొ పక్క కెర్లల్ పెట్టికయ్, ఓడ బద్దల్ జా గెలి.

42 "ఏక్ వేల ఒడ్డుతె పుంగ్ర ఉట్ట నిగుల" మెన, జేలి తిలసచి రిసా జమాన్లు సుదల్ ఉచర, మారుక ఉచర్ల, గని,

43 'పవులుక మొరుక జయె నాయ్' మెన, పుంజెకజీన్ జమాన్లుక వెల్లో అడ్డు కెర్లొ. "పుంగ్రితన, సముద్దుమ్తె డేచ ఒడ్డుతె పుంగ్ర, చి

44 పుంగ్రుక నేన్లన ఓడచ డండల్ బల్లలు దెర, ఒడ్డుతె పావ" మెన ఆడ్ర దిలన్, చి కో నే పిట్టె, ఎత్తిజిన్ ప్రమాదుమ్ తెంతొ ఒడ్డుతె జీన్లమ్.

28

పవులుక అయి చడ్లెకి చెంగిల్ తిలిసి

1 ఆమ్ ఎత్తిజిన్ ప్రమాదుమ్ నెంతె బుయ్యె పావెలె, జా డిబ్బుక మెలితే డిబ్బు మెన చినిలమ్.

2 మెలితే డిబ్బుచ మాన్సుల్, జలె, అమ్క ఎత్తిజిన్క చెంగిల్ మరియాద కెర, 'పాని జా చల్లి కెర్తికయ్', అమ్క ఆగి లావ దిల.

3 జా ఆగిచి రిసా పవులు దొన్నె దారు కుడవ ఆగితె గల్తె తతికయ్, ఒగ్గర్ విన్సుమ్ దెతి అయి వేడిక బార్ జా, పవులుచి అత్తి చడ టక్కున జలి.

4 జోచి ఆతు తెంతొ అయి ఒడ్యెయ్ జా అన్నె మెన జేవ్ మెలితే డిబ్బుచ మాన్సుల్ దెక కెర, "ఒహా, ఈంజొ మాన్సు అత్య కెర్లొసా జా తయెదె. సముద్దుమ్తె నే మొర్లె కి, ఇన్నెచి పాపుమ్క మొరుక అన్నె, కిచ్చొగె" మెన సంగిల.

5 పవులు, మాత్తుమ్, ఆతు వీర దెతికయ్, అయి ఆగితె సేడ్డి, చి పవులు కిచ్చొ ప్రమాదుమ్ జయె నాయ్.

6 "ఈంజొ పుల గెచ్చ టక్కున జా సేడ మొర గెచ్చెదె" మెన ఉచర్ల, గని ఒగ్గర్ సేంపు రకిలెకి, కిచ్చొ జయె నాయ్ మెన దెక కెర, "ఒహా, ఈంజొ దేముడు జా తయెదె" మెన ఉచర్ల.

7 ఒత్త ఆమ్ తిలిన్క పాసి, జా డిబ్బు దేసిమ్క వెల్లో జలొ పొప్లి మెలోసాక బుయి తిలి. జో పొప్లి తెన్ దస్సుల్ జతికయ్, అమ్క తిర్రతి ఒగ్గర్ మరియాద కెర్లన్.

8 జోచొ అబ్బొన్క జొర్లొ, చి పెట్టి దెర తిలిచి రిసా పవులు జోతె గెచ్చ ప్రార్లన కెర జోక బోడి చడితికయ్, జో చెంగిల్ జలన్.

9 దస్సి జర్గు జతికయ్, జా డిబ్బు దేసిమ్చ జొర్లొ తిల మాన్సుల్ ఎత్తిజిన్ పవులుతె జా కెర, చెంగిల్ జల.

10 జాకయ్ అమ్క ఒగ్గర్ గవురుమ్ కెర్ల, చి తిన్ని జొన్నొ గెలె, ఆమ్ అన్నె

† 27:39 27:39 రాతి పాయితికయ్

ఓడతె బార్ జంక దెర్రి పొది, అమ్క దొర్పు. జలిసి ఎత్తి ఓడతె బెరయల.

రోమ్ పట్టుమ్తె పావులీసి పావిలిసి

11 జా తిన్ని జొన్నొ గెతికయ్, ఒండి చల్లి పొది జా డిబ్బతె తిలి ఏక్ ఓడతె వెగ, బార్ జలమ్. జా ఓడ అలెక్కంద్రియ పట్టుమ్ చి. జా ఓడచి బోడితె 'కల్వల్ దేవతల్' మెన బొమ్మల్ తిల.

12 జలె, జా ఓడతె సురకూసు రేవు ఎద ఉత్త, తిర్రతి తిలమ్.

13 ఒత్త తెంతో ఇదిల్ వంకిడి వాటు బుల, రేగియు మెలి రేవుతె పావిలమ్. ఏక్ దీస్ గెతికయ్, దచ్చెన పక్క తెంతో చి వాదు కెర్లి, చి అన్నెక్ దీసి పొతియెలీ రేవుతె పావిలమ్.

14 ఒత్త ఉత్తిరై, నంపజల బావుడ్లు తిల, చి "సత్తు పొదుల్ అమ్చి తెన్ తా" మెన బుకార్ల. జా సత్తు పొదుల్ గెతికయ్, బార్ జా, రోమ్ పట్టుమ్తె గెలమ్.

15 ఒత్త రోమక పాసి అయ్లె, నంపజల బావుడ్లు అమ్క "జా అస్తి" మెన సూన తా, దస్సుల్ జంక మెన, రోమక రమారమి దొన్ని విసా తిన్ని మయిలు దూరి తిలి అప్పీయా మెలి ఏక్ సంతవీది ఎదక, సగుమ్జిన్ అయ్ల. అన్నె సగుమ్జిన్ తిన్ని నిజితి గేర్లు మెలి రోమక ముప్పయ్ పాచ్ మయిలు దూరి తిలి గవ్వి ఎదక అయ్ల. జోవయింక దెక కెర, పవులు అమ్చొ దేముడుక జోచి సర్ల సంగిలన్, చి దయిరిమ్ జలన్.

16 తెదొడి, ఆమ్ రోమతె పావిలి పొది, పవులుక జేల్తె గల్తి నాయ్, గని ఇస్టుమ్ అయ్లీన్తె జో జింక సెలవ్ దా, జమాన్ ఎక్కిలోక రకయ్ల.

17 తిర్రతి గెతికయ్, పవులు ఒత్తచ యూదుల్చ వెల్లో సుదల్క, అదికారుల్క జోతె బుకార్లొ. జేవ్ ఒత్త ఎక్కితె బెదితికయ్, పవులు జోవయింక, "ఓ బావుడ్లు, అమ్చ యూదుల్క కిచ్చొ

అల్లర్ కెరి నాయ్, అమ్చ పూర్లుల్చ విదల్ పిట్టవుక మెన ఆవ్ కిచ్చొ కెరి నాయ్, గని యెరూసలేమ్తె అంక జేలి కెర, రోమియుల్చి అత్తి అంక సొర్ప కెర దిల.

18 రోమియులు అంక పరిచ్చ కెర, అంచి తగు సూన, 'కిచ్చొ మొర్తి సిచ్చ ఆనన్తి తప్పు కెరె నాయ్' మెన, జోవయింక రుజ్జు అయ్లచి రిసా, అంక విడ్డల్ కెరుక ఇస్టుమ్ జల.

19 గని ఒత్తచ యూదుల్ ఒగ్గర్ జతికయ్, అంక అన్నె కిచ్చొ వాటు నాయ్, చి క్షెనరు వెల్లో రానొ సొంత అంచి తగు సూన తీర్పు కెర్పు మెన, ఆవ్ కోర్ప జలయ్. గని అమ్చ యూదుల్చి రిసా అంచి పెట్టి కిచ్చొ విస్సుమ్ నాయ్.

20 "తుమ్క ఆజి కిచ్చొక ఇన్నె బుకార్లయ్ మెలె, తుమ్చి తెన్ దస్సుల్ జంక, చి ఈంజేవ్ గొల్పుల్ తెన్ కిచ్చొక అంక బంద అస్తి మెలె, తెద్రయిందె మెన దేముడు ఆమ్ ఇస్రాయేలుల్క సంగిలొ రచ్చించుప కెర్తొసొక, ఆవ్ నంపజా జోవయించి రిసా సాచి సంగిల్, రిసాయి." మెన సంగిలన్.

21 జలె, జేవ్, "యూదయ తెంతో తుచి రిసా కేన్ ఉత్తల్ జెతి నాయ్, చి ఇత్తల్ అయ్ల అమ్చ యూదుల్ కోయి కి, తుచి రిసా కిచ్చొయ్ అల్లర్ సంగితి నాయ్,

22 గని, తుయి ఉచర్తిసి ఆమ్ సూసుక ఇస్టుమ్ జతసుమ్. తుయి బెదితి జట్టుచి రిసా ఎత్తిజిన్ 'తప్పు' మెన సంగితతి" మెన, పవులుక ఒత్తచ యూదుల్చ వెల్లో సుదల్ సంగిల.

23 జాకయ్, జేవ్ సంగిలి దీసి, జో తిలి గెరి ఒగ్గర్ ఒగ్గర్జిన్ యూదుల్ అయ్ల, చి పెందలె తెంతో సొంజ్ ఎద, దేముడుచి రాజిమ్తె మాస్సుల్ బెదుక అవ్కాసుమ్

దొర్కు జలి చి సాచి సంగ, *మోసే పూర్ణుమ్చొచి అత్తి రెగిడ్డి దేముడుచ ఆగ్గుల్చ కొడొ, పడ్డొ మోసే పూర్ణుమ్చొచి అత్తి దేముడు రెగ్డయల ఆగ్గుల్, అన్నె పూర్ణుల్చి అత్తి సంగిల దేముడుచ కబుర్లుచ కొడొ బెదవ, యేసుక 'జొయ్యి దేముడు సంగ తిలో రచ్చించుప కెర్తొసా' మెన, బోదన కెర్తె తిలన్.

24 జోవయింతె సగుమ్జిన్ జో సంగిలిసి నంప కెర్ల, సగుమ్జిన్ నంప కెర్తి నాయ్.

25 జేవ్ దొన్ని జట్టు జా, ఎక్కి మెన్ను నే జతె ఉట్ట గెల. గని నే గెతె అగ్గెయి, పవులు ఇసి సంగిలన్. "యెసయా పూర్ణుమ్చొచి అత్తి దేముడుచి సుద్ది తిలి ఆత్మ తుమ్చ పూర్ణుల్క సంగిలి కోడు సరిగా అస్సె.

26 'అమ్చ యూదుల్తె గెచ్చ ఇసి మెన సంగ. తుమ్ సూన్తె, గని కచితుమ్ అర్దుమ్ కెరన్ను నాయ్. తూమ్ దెకితె, గని కచితుమ్ నంప కెర్చు నాయ్! మెన సంగు.

27 ఈంజేవ్ అమ్చ మాన్సుల్చి పెట్టి బేడు బంద అస్సె, జోవయించ కంగ్గొ బొయ్ర జా అస్తి, జోవయించ అంకివొ జేవ్ డంకన అస్తి. నెంజిలె, అంకివొ దెకిత, కంగ్గొ సూన్త, పెట్టి అర్దుమ్ కెరంత, చి ఆవ్ జోవయింక చెంగిల్ కెర్తి రితి అంచితె జెత.' మెన సంగిలి కోడు.

28 "జాకయ్, తుమ్క, అమ్చొ దేముడు దిలి రచ్చన యూదుల్ నెంజిలనక జో దా అస్సె. జెవ్వి సూనుల" మెన, పవులు సంగిలన్.

29 †పవులు ఇసి సంగితికయ్, యూదుల్, ఎక్కి మెన్ను నే జతె, దొన్ని జట్టు జా, ఉట్ట గెల.

30 పవులు, సొంత గేరు నజన అద్దె దా దొన్ని వెర్చుల్ ఒత్త జతె తా, కో అయ్లె కి మరియాద కెర,

31 దేముడుచి రాజిమ్చి రిసా, ప్రబు జలో యేసుక్రీస్తుచి రిసా, కో అడ్డు నే కెర్తె, ఎదార్లుమ్ సుబుమ్ కబుర్ బోదన కెర్తె తిలన్.

* 28:23 28:23 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రగ్డయలి ఆగ్గుల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పావ్ పుస్తకుమ్తె రెగ్డయ్ జా అస్సె. ఈంజ దెకవుక మెన కుమియ బాసతె నొయి ప్రమానుమ్తె మోసే పూర్ణుమ్చొచి అత్తి రెగిడ్డి దేముడుచ ఆగ్గుల్ మెన రగ్డవ అస్సె. † 28:29 28:29 గ్రీకు బాస తెన్ 'బారికూల్' చి మత్తెలి తొలితొ రెగిడ్డ సగుమ్ పుస్తకల్తె 29 నంబర్చి కోడు తయ్ నాయ్.

రోమియుల్క రెగిడ్లి ఉత్త్రుమ్. బారిక్ జలో పవులు రోమ్ పట్టుమ్చ సంగుమ్చక రెగిడ్లి ఉత్త్రుమ్

మొదోల్ కోడు

1 రోమ్ పట్టుమ్తెచ దేముడు ప్రేమ కెర్ల జోచి సుద్ది జా జోచయ్ జంక మెన, జో నిసాన బుకార్ల మాన్సుల్క, యేసుక్రీస్తుక *గొత్తి సుదో జలో పవులు రెగిడ్లి ఉత్త్రుమ్. దేముడు దిలి సుబుమ్ కబుర్ నూనయ్తి రిసా ఆవ్ జోచో బారికి జంక మెన, యేసుక్రీస్తు అంక నిసాన బుకారా అస్సె. ఈంజయి కామ్ అంక సార్ప దా అస్సె.

2 ఈంజ సుబుమ్ కబుర్ తెద్రవుక మెన అగ్గయి తెంతో జోచ కబుర్లు సంగిలనచి అత్తి, జో రెగ్గయ్లి జో దిలి దేముడుచి కొడతె ప్రమానుమ్ సంగ తిల్సన్.

3 సుబుమ్ కబుర్ మెలె, జో దేముడుచో ఎక్కి పుత్తున్చి రిసాచి కబుర్. జో పుత్తున్క 'మాన్సు' మెన దెకిలె, అమ్ యూదుల్చో దావీదు పూర్ముచోచి సెకుమ్తె జెర్మిలన్.

4 అమ్చో ప్రబు జలో యేసుక్రీస్తు, జో మొర గెచ్చ అన్నె జీవ్ జా ఉట్లీన్ రిసా దేముడుచి పూత్తు మెన దేముడుచి సుద్ది తిలి ఆత్మచి ఒగ్గర్ సెక్తి తెన్ రుజు కెరన్లన్.

5 జలె, ఎత్కి దేసిమి జోక నంపజా జోచి కోడు నిదానుమ్ కెర జోచి నావ్ గవురుమ్ కెర్తు మెన మాన్సుల్క సుబుమ్ కబుర్ నూనయ్త జోచ బారికుల్ అమ్

జంక మెన, జో ప్రబు జోచి దయ అమ్క దా అస్సె.

6 యేసుక్రీస్తుచ సొంత మాన్సుల్ తూమ్ కి జంక మెన, జేవ్ తెన్ బెదుక మెన వేర వేర దేసిమ్లుతె తుమ్క కి దేముడు బుకారా అస్సె.

7 అమ్క అబ్బో జలో దేముడుచి ప్రబు జలో యేసుక్రీస్తుచి దయ సేంతుమ్ తుమ్చి ఉప్పిరి తవున్!

రోమియుల్క దెకుక మెన పవులుచి ఆస

8 తొలితొ కిచ్చొ మెలె, తుమ్ ఎత్కిజిన్చి రిసా †యేసుక్రీస్తుచి నావ్ దెర అంచో దేముడుక అంచి సర్ల ఆవ్ సంగితసి. ప్రబుచి ఉప్పిరి తుమ్ రోమియుల్ తుమ్చి నముకుమ్ తిలిన్చి రిసా ఒండి లోకుమ్చ మాన్సుల్ నూన అస్సి.

9 జోచో పుత్తున్చి రిసాచి సుబుమ్ కబుర్ నూనవ నూనవ ఆవ్ సేవ కెర్లొ దేముడు అంచి రిసా సాచి జతయ్. ఆవ్ ప్రార్దన కెర్తి పొది, కెయక తెయక నే పిట్టె తుమ్చి రిసా జోక ఆవ్ సంగితసి.

10 తుమ్చి రిసా ఆవ్ ప్రార్దన కెర్తిన్తె ఏక్ కిచ్చొ మెలె, జోచి దయ తిలె, కిసి గే తుమ్తె ఆవ్ అప్పె జెంక వాట్ దెవున్ మెనయ్ ఆవ్ ప్రార్దన కెర్తసి.

11 తుమ్చి ఆత్మక డిట్టుమ్ కెర్తి రితి తుమ్క కిచ్చొ జవున్ ఆత్మసెక్తి దొర్కు కెర్తి రితి కిచ్చొ జవున్ కామ్క జెతిసి కెరుక మెన, తుమ్క దెకుక తుమ్తె గెచ్చుక అంక ఒగ్గర్ ఆస.

12 తుమ్చి ఆత్మక డిట్టుమ్ కెరుక మెన సంగిలె, తూమ్ కి ఆవ్ కి, ఎక్కిలోక ఎక్కిలో నముకుమ్ దెకిలె అన్నె సర్ల దయిరిమ్ జుమ్దె.

* 1:1 1:1 నెంజలె 'గొతి జలో రితో', నెంజలె 'సేవ కెర్లసా'. † 1:8 1:8 మెలె, యేసుక్రీస్తు జోపయింక నంపజలనచి పాపుమ్ వయ గెచ్చయ్లి రిసా 'జొయ్యి మదెనె జతికయ్ ఎత్కి అదికారుమ్ తిలో దేముడు అబ్బోసి అమ్చ ప్రార్దనల్ నూనెదె' మెనయ్, జయ దయిరిమ్క యేసుక్రీస్తుచి నావ్ దెర పవులు దేముడుక ప్రార్దన కెర్తయ్, అమ్ కి జోపయింక ప్రార్దన కెరుక జతయ్.

13 ఓ బావుడ్లు, తుమ్ కిచ్చొ జానుక అంచి ఇస్టుమ్ మెలె, యూదుల్ నెంజిల అన్నె ఒగ్గర్ జిన్ తె ఆవ్ కీసి గెచ్చు ప్రబు దిలి పంటొ జోవయింతె లాయ అస్సి గే, తుమ్ తె గెచ్చు, తుమ్ తె కి దస్సి పంటొ లాయిక మెన ఆవ్ ఒగ్గర్ సుట్లు ఉచర అస్సి, గని అప్పెక అంక వాటు అడ్డు తా అస్సె.

14 †గ్రీసు దేసిమ్ చక కి, గ్రీసు దేసిమ్ చ నెంజిలనక కి, ఒగ్గర్ సదు కెర్లనక కి, సదు నేన్ల మాన్సుల్ కి ఆవ్ సుబుమ్ కబుర్ నూనవుక మెన, ప్రబు అంక వూచి తియార అస్సె.

15 జాకయ్, తుమ్ రోమ్ పట్టుమ్ చక కి సుబుమ్ కబుర్ బోదన కెరుక మెన అంక ఒగ్గర్ ఇస్టుమ్ అస్సె.

నముకుమ్ వాట్ కయ్ రచ్చన దొర్కు జతయ్

16 సుబుమ్ కబుర్ చి రిసా అంక కిచ్చొ లాజ్ నాయ్. సుబుమ్ కబుర్ చి ఉప్పిరి అంక పూర్తి దయిరిమ్. †నంపజతో ఎత్తి మాన్సు పాపుమ్ తెంతొ రచ్చించుప కెర్తి రిసా దేముడుచి నెక్తి సుబుమ్ కబుర్ తెయి అస్సె. జా రచ్చన క్రీస్తుక నంపజతన ఎత్తి జిన్ క, * తొలితొ యూదుల్ క, పడ్డొ యూదుల్ నెంజిలనక.

17 దేముడుచి పున్నిమ్ సుబుమ్ కబుర్ తెయి డీస్తయ్, దొర్కు జతయ్ †. జో దెతి జా పున్నిమ్, జా రచ్చన, అమ్ క కీసి దొర్కు జతయ్ మెలె, †పూర్తి నముకుమ్ వాటు. దేముడుచి కొణె తె జో సొంత రెగ్డయ్ లి రితి, “ప్రబుచి ఉప్పిర్ చి

నముకుమ్ క కో పున్నిమ్⁵ జవుల గే జెచ్చి జవుల”.

దేముడుచి పున్నిమ్ నెసిలనచి రిసాచి తీర్పు

18 దేముడుక విరోదుమ్ జా మాన్సుల్ క పాపుమ్ కెర కెర జోవయించి పెట్టిచి పాపుమ్ తె సత్తిమ్ క లుంకడ్డొ, దస్సి ఎత్తి మాన్సుచి ఉప్పిర్ జోచి కోవుమ్ జో దేముడు పరలోకుమ్ తెంతొ సుడ దా దెకయెదె, లయడెదె మెన రుజ్జు * డీస అస్సె.

19 దేముడుక జేవ్ విరోదుమ్ జలిసిచ్చి అన్నె మాన్సుల్ క జేవ్ కెర్ల పాపల్ క ‘జోవయించి పాపుమ్’ మెన కీసి సంగుక జయెదె మెలె, జో దేముడుచి రిసా జేవ్ జానుక జతిసి ఎత్తి జోవయించి పెట్టి జాన్ తి. కీసి మెలె, జొయ్యి సొంత జోవయింక దెకవ అస్సె.

20 కీసి మెలె, జో నే డీస్తాసా కీసా అస్సె గే, మెలె జోవయింక ‘కెయెఱ తెయెఱ తాఁ గెతి నెక్తి అదికారుమ్ జోకయ్ అస్సె. జొయ్యి దేముడు’ మెలి రుజ్జు లోకుమ్ జెర్మయ్ లి తెంతొ, జో తెయార్ కెర్లన్ ఎత్తి తె సొస్టుమ్ డీస్తయ్, చి తెదొడి తెంతొ మాన్సుల్ పూర్తి చిన అస్సి. జాకయ్, ప్రబుచి మొక్కె “నేనుమ్” మెనుక నెతిరి.

21 దస్సి, జోవయింక ‘జొయ్యి దేముడు’ మెన జేవ్ జాన్లె కి ఒప్పున్ తి నాయ్, జోక గవురుమ్ దెకితి నాయ్, జో దిలిన్ క ‘తుయి దిలది’ మెన ఒప్పున్ తి నాయ్, జోక సర్ల సంగితి నాయ్, గని వెర్రి

† 1:14 1:14 గ్రీసు దేసిమ్ చ మాన్సుల్ క మెనుక జతయ్, గని పవుల కంజ ఉత్తుమ్ రెగిడ్ల పొదులె, యూదుల్ నెంజిల ఎత్తి జిన్ క ‘గ్రీసు దేసిమ్ చక’ మెనుక ఏక అలవాట్ తిలి. § 1:16 1:16 మెలె, క్రీస్తుకయ్ నంపజతో

ఎత్తి మాన్సు. యోహాను 1:12, 3:16, 18, 36. * 1:16 1:16 తొలితొ యూదుల్ క అవ్ కానుమ్ తంక చి పడ్డొకయ్ యూదుల్ నెంజిలనక అవ్ కానుమ్ తంక మెన ఎత్తి అదికారుమ్ తిలో దేముడుచి నెలవ్. లూకా 24:47, బారికుల్ 1:8, 13:46. † 1:17 1:17 జోచి సత్తిమ్ పున్నిమ్ జోవయింక నంపజలనక దొర్కు కెరన్ తి కయ్ అమ్ క అన్నె బెదవంతయ్. † 1:17 1:17 నెంజిలి ‘చి జా సత్తిమ్ పున్నిమ్ అమ్ క దొర్కు జలి, అన్నె నముకుమ్ పలోయ్ తయ్’.

§ 1:17 1:17 నెంజిలి “ప్రబు దెతి పున్నిమ్ జలన జోవయించి ఉప్పిర్ చి నముకుమ్ కయ్ ఇండుక” హాబక్కుకు 2:4 దెక. * 1:18 1:18 సిలవతె యేసు మాన్సుచి పాపుమ్ వయ గెచ్చయ్ లిన్ తె నయ్ తానుక మొర్కుక జిన పాడ్ కెర అస్సె; ఎబ్రీయల్ 2:14. నయ్ తానుక జిన పాడ్ కెర్లన్ తెన్ నయ్ తాను చి సేవ కెర్లిసి ఎత్తి చి ఉప్పిర్ కి యేసు జిన పాడ్ కెర అస్సె.

బుద్ధి జల, చి బుద్ధి నెంజిల జోవయించ పెట్టి అందర్ జా గెల.

22 'జాన్ల మాన్సుల్ ఆమ్' మెననయి జేవ్ బుద్ధి నెంజిలన జా గెల.

23 అన్నె, నే మొర్తో కెయెక తెయెక జీవ్ తతో దేముడుక ముల దా, మాములుమ్ మొర్త మాన్సుల్చి రూపుమ్చ, పిట్టల్ రూపుమ్చ, జంతువుల్ రూపుమ్చ, అయివో రూపుమ్చ బొమ్మల్క ఇస్టుమ్ జా, దసచకయ్ జోకరుక దెర్ల.

24 జాకయ్ దేముడు జోవయింక కిచ్చి సిచ్చ దిలన్ మెలె, "జోవయించి పెట్టిచ అసల్ రితి ఇండ లంజె కమొతె పూర్తి గెచ్చ, ఎక్కిలోక ఎక్కిలో జోవయించ ఆగ్గక నిస్కారుమ్ కెరన, జోవయింక జెవ్వి మరియాద కడన్తి సిచ్చ సేడ్తు, కతు" మెనయ్, దస్సితెయ్ జో జోవయింక సార్ప కెర దిలన్.

25 దేముడుచి రిసాచి సత్తిమ్ గ్యానుమ్ జేవ్ నెస కెర అబద్దుమ్క ఇస్టుమ్ జల, చి జో ఎత్తి జెర్మయ్లోసిచి సేవ కెరుక ముల కెర, జో తెయార్ కెర్లిస్కయ్ జోకరుక దెర, దసచచి సేవ కెర్తి. గని జెర్మయ్లోసాకయ్ కెయెక కి జెయ్య! ఆమేన్.

26 జలె, 'జెర్మయ్లోసాక ముల కెర తెయార్ జలిస్కయ్ జేప్ కోర్వ జలి రిసాయి, జోవయించి ఆగ్గచి పాపుమ్చ అసల్క దెర్ను సేడయ్ తత్తు' మెన, దసితె జో దేముడు సార్ప కెర దిలన్. దస్సి, మాములుమ్ తెర్పిమున్ను జతిన్ ముల దా, జోవయించ తేర్బోదల్ తెన్ లంజె జంక దెర్ల.

27 జోవయించ మున్నుబోదల్ కి దస్సి, తెర్పి తెన్ చెంగిల్ జితిసి ముల దా, ఎక్కిలోక ఎక్కిలో పూర్తి వెర్రి ఆస జా, ఎక్కిలో తెన్ ఎక్కిలో లంజె వెట్కారుమ్ జా, జోవయించ ఆగ్గతె అత్తల్తె జోవయించి జా పాపుమ్ కెలచి, పాడ్ జల.

28 అన్నె, దేముడుక 'అన్నె. జోయ్య దేముడు' మెన జేవ్ ఒప్పునుక నెస కెర జోక పచ్చిల్ రిసా, కామ్క నెంజిలి బుద్ధితె, పొరపాట్ ఇండితీన్తె జోవయింక జో సార్ప కెర దిలన్.

29 జోవయించి పెట్టి కిచ్చి బెర్లి మెలె, ఎత్తి రగల్ పాపుమ్బుద్ది, పాపుమ్ కమొ, అన్నె మాన్సుల్చి ఆస్తిక ఆస జితిసి. కుస్సిదుమ్ కి బెర్లి. జోవయించి పెట్టి బెర్తు గోసల్, అత్తల్ కెర్తి బుద్ది, కొడె జుజవ జట్టి జితిసి, మోసిమ్ కెర్తిసి, కుస్సిదుమ్ ఉచర్తిసి, దస బుద్దుల్ జల. జేవ్ అన్నె కీసచక జల మెలె, సాండెల్ జలన,

30 మాన్సుల్క ఆరిచ నిందల్ సంగ, జోవయించి నావ్ పాడ్ కెర్తన, పరలోకుమ్చో దేముడుక విరోదుమ్ కెర్తన, అన్నె మాన్సుల్క నిస్కారుమ్ కెర్తన, గవురుమ్ ఉచరంతన, 'అన్నె కిచ్చి కిచ్చి గర్ప కమొ కెరుమ' మెన ఉచర్త కుట్టల్ కెర్తన, అయ్యెన్అబ్బొన్చి కోడు నే స్టూన్తన జల.

31 జేవ్ బుద్ధి నెంజిలన, జేవ్ ఒప్పున్లి కామ్ నే కెర్తన, ప్రేమ నేన్లన, కన్కారుమ్ నేన్లన.

32 "దస కమొ కెర్తన, మొర్తి సిచ్చక విలువ జతతి" మెన దేముడు తీర్పు కెర అన్నె మెన జేవ్ జాన్లె కి, దస కమొ ఇండితతి. చి దస కమొ అన్నె మాన్సుల్ ఇండిలె, మెన్సితతి, 'చెంగిల్' మెంతతి.

2

దేముడుచి పున్నిమచి తీర్పు

1 జాకయ్, ఓ మాన్సు కొన్సో జలెకి, తుమ్ ఎక్కిలోక ఎక్కిలో 'గర్ప' మెన తీర్పు సంగిలె, తుమ్చ సొంత పాపల్చి రిసా తుమ్క కి జా తీర్పు లయతయ్. మెలె, అన్నెక్లొక 'గర్ప' మెన తీర్పు సంగిలె, తుమ్క తుమి పాపుమ్ వయడ్తును. తుమ్ తీర్పు సంగిలో

మాన్సు కొన్నో జలెకి, జో కెర్త తప్పులతె తూమ్ కి ఇండితను.

2 అవ్ అగ్గె రెగిడ్డి జాబిత తప్పు కమె కో కెరుల గే, దేముడు జోవయింక తీర్పు కెర, సిచ్చ కెరుక ఒప్పున అస్సె మెన జానుమ్. అస్సె, జో సత్తిమ్చో జతయ్చి రిసా జో కెర్తి తీర్పు సరిగచి మెన జానుమ్.

3 ఓ మాన్సు కో జలెకి, దన కమె కెర్తనక జోవయించి పాపుమ్చి తీర్పు తుమ్ సంగిలె, తూమ్ కి దన కమె కెర్తె, దేముడు దెతి సిచ్చ తుమ్కయ్ పిట్టెదె మెన ఏక్ వేల ఉచరంతను గే?

4 నెంజిలె, అమ్ కిచ్చొ కెర్తె కి జోచి ఎదిపాల్ దయ అమ్చి ఉప్పిరి అస్సె, చి ఓర్పువ జా అమ్క చెమించుప కెరెదె' మెన తుమ్క తూమ్ ఉచరంతను గే? తుమ్క 'జోవయించ పాపల్ ఒప్పున ముల్లు' మెనయ్ జో దేముడు జోచి దయ దెకయ్తయ్ మెన నేన్సు గే?

5 తుమ్చి రాడ్ జివుక తుమ్చ పాపల్ ములుక నెన కెర, జో దేముడు దెతి సిచ్చ తుమ్క తుమి ఆనన్తను. జా సిచ్చ కెయ్చ లయెదె మెలె, ఎత్తిజిన్క తీర్పు కెర సిచ్చ గే, బవుమానుమ్ గే దెతి జోచి సత్తిమ్క రుజ్జు దెకయ్తి వెల్లి దీసికయ్.

6 జోవయించి జీవితుమ్క కేన్ మాన్సు కీన కమె కెర్తె తవుల గే, జయ్యి దీసిక దసచక సరిజతిసి తీర్పుల్ జో జర్గు కెరెదె.

7 జా దీసి నే జతె అగ్గెచి మదెనె సగుమ్జిన్ పరలోకుమ్చి ఉజిడ్తె బెదితి, ప్రబు గవురుమ్ జతిన్తె బెదితి ఆస జా, జో దెతి సత్తిమ్క నిదానుమ్ ఇండుల. "జేవ్ పరలోకుమ్తె అంచ్చి తెన్ కెయ్చ తెయ్చ జితి జీవ్, జో దయెదె.

8 గని సగుమ్జిన్ జోవయించి ఇస్టుమ్ అయ్లీ రితి ఇండుక ఆస జా, సత్తిమ్ ఇండితిసి ముల కెర, పాపుమ్ ఇండితతి. జోవయించి ఉప్పిరి, జో దేముడుచి కోపుమ్ తయెదె, చి జో దెతి సిచ్చ కచితుమ్ జోవయింక లయెదె.

9 దేముడు జా సిచ్చ జర్గు కెర్తె, ముక్కిమ్క తొలితో యూదుల్తె, పడ్డో *గ్రీసు దేసిమ్చతె కి, పాపుమ్ ఇండితో ఎత్తి మాన్సుక బాదల్ దుకుమ్ పిట్టె నాయ్,

10 తొలితో యూదుల్తె, పడ్డో గ్రీసు దేసిమ్చ మాన్సుల్తె కి, సత్తిమ్ ఇండితో ఎత్తి మాన్సుక 'బవుమానుమ్' మెన దేముడు జోవయింక జోచి పరలోకుమ్చి ఉజిడ్తె బెదవ గవురుమ్ దా, సేంతుమ్ దయెదె."

11 దేముడు తేడల్ దెకె నాయ్.

12 అమ్ యూదుల్క జో దిల ఆగ్గుల్ నేన్తె యూదుల్ నెంజిలనతె కో పాపుమ్ కెర తవుల గే, జేవ్ ఆగ్గుల్ నెంతె తీర్పు జా నానినుమ్తె గెచ్చుల, అస్సె, అమ్ యూదుల్ జేవ్ ఆగ్గుల్ జానుమ్. జేవ్ ఆగ్గుల్ జాన్ల అమ్ యూదుల్తె కో పాపుమ్ కెర తవుల గే, ఆగ్గుల్చి తెడి అస్తిచి జేవ్ ఆగ్గులీ జోవయించి ఉప్పిరి సాచి జవుల, చి జోవయించి పాపుమ్చి సిచ్చ జేవ్ వయుల.

13 మోసేచి అత్తి దేముడు దిల ఆగ్గుల్ ఎక్కి సూన్తనయ్ నాయ్, గని జేవ్ ఆగ్గుల్తె బెదితి బుద్ది ఇండితనయి కో జలె, జోవయింకయ్ దేముడు జోవయించి పాపుమ్ నే వయడ్తె జోవయించి దయ్కయ్ 'జోవయింక దొర్కు జలి పున్నిమ్ అస్సె' మెన దెకెదె. దెక జోవయించి సిచ్చ పిట్టయెదె.

14 పడ్డో, యూదుల్ నెంజిలన, మోసే తెన్ దేముడు దిలి ఆగ్గుల్ నెంతె తిలె కి, ఒత్తచ ఆగ్గుల్ జేవ్ నేన తిలె కి, నేన జాన్ల రిత్ జా జేవ్ ఆగ్గుల్ తెన్ బెదితి బుద్ది జేవ్ ఇండిలె, జేవ్ ఆగ్గుల్ జేవ్ కెయ్ నే సూన్లె కి నదు నే కెర్తె కి, జేవ్ ఆగ్గుల్ జోవయించి పెట్టి కామ్ కెర్తి రితి జతయ్.

15 దొర్కు జలి ఇండడి దెకయ్త ఆగ్గుల్ దేముడు కీసి మోసే తెన్ దిలి ఆగ్గుల్తె రెగ్గవ అస్సె గే, 'దస్సి ఇండుతు'

* 2:9 2:9 'గ్రీసు దేసిమ్చ' మెన ఇస్సె సంగిలె, యూదుల్ నెంజిలనక సంగితయ్.

మెన జేవ్ మాన్సుల్చి పెట్టి జో రెగ్ల అస్సె మెన రుజ్జు జతయ్, అస్సె, 'సత్తిమ్' మెన జేవ్ సత్తిమ్ చినితిన్తె, 'పాపుమ్' మెన జేవ్ పాపుమ్ చినితిన్తె కి రుజ్జు జతయ్. అస్సె, జోవయింక జెచ్చి పరిచ్చ కెరన నిందల్ వయడన్లి రితి, నెంజిలె చెమించుప కెరన్లి రితి, జోవయించ సొంత కమె 'చెంగిల్' గే 'గార్' గే జెచ్చి చినన ఒప్పునుల.

16 అమ్ సూనయ్లి సుబుమ్ కబురెత్ కిచ్చో ఏక్ బెదితయ్ మెలె, జేవ్ ఇసి తీర్పు కెరంతిసి కెయడ పూర్తి జర్గు జయెదె మెలె, క్రీస్తు జలో యేసుచి అత్తి దేముడు మాన్సుల్చి పెట్టిచ గుట్టుల్ తిలిసి ఎత్కి తీర్పు కెర్తి జా వెల్లి దీసికయ్, తెదోడకయ్ పూర్తి రుజ్జు జయెదె.

యూదుల్క మోసే తెన్ దేముడు దిలి ఆగ్గుల్

17 గని ఒత్తచ తుమ్ యూదుల్, 'యూదుల్ ఆము' మెనన, 'ఆగ్గుల్ రితి దేముడు అమ్కయ్ దా అస్సెచి రచ్చన జమ్దె' మెన ఆగ్గుల్కయ్ నంప కెర్తసు జలె, 'అమ్ యూదులి దేముడు తెన్ బెద అస్సుమ్' మెన గవురుమ్ ఉచరంతసు జలె,

18 మోసే తెన్ దేముడు దిలి ఆగ్గుల్తె తిలిసి ఎత్కి వెల్లెల మాన్సుల్ తుమ్క సికడ అస్సిచి రిసా, దేముడుచి ఇస్టుమ్ కిచ్చో కిచ్చో జతయ్ గే తుమ్ జాస్సు. జలె, చెంగిల్ తిలిన్తె గార్ తిలిసి నిస చెంగిల్చి మెన్సితసు జలె,

19 పడ్డె 'గుడ్డి జలనక వాట్ దెకయ్తన ఆము' మెన, 'అందర్బుద్దితె తిలనక ఉజిడి దెకయ్తన ఆము' మెన,

20 'బుద్ది నెంజిలనక సికడన ఆము' మెన, 'బాలబోదల్క సికడెసా జలమ్ ఆము' మెన, 'గ్యానుమ్ ఎత్కి సత్తిమ్ ఎత్కి మోసే తెన్ దేముడు దిలి ఆగ్గుల్తె అమ్తెయి, అమ్చ ఆగ్గుల్తెయి అస్సిచి

దేముడు జా పూచి ఎత్కి అమ్కయ్ తియార అస్సె' మెన తుమ్ నిజుమి ఉచర్లె,

21 వేర మాన్సుల్క తుమ్ సికడన తుమ్కయ్ తూమ్ కిచ్చోక సికడన్సు నాయ్! 'చోరుక నాయ్' మెన తుమ్ బోదన కెర్లె కి, చోర్పు నాయ్ గే?

22 'లంజెకమె కెర నాయ్' మెన సంగిలే కి లంజెకమె కెర్తసు గే? 'బొమ్మల్క జోకరుక నాయ్, వెట్కారుమ్!'

మెన ఒప్పున్లె కి, గుడివొతెచ బొమ్మల్ తుమ్ చోర దెర గెతను గే? తుమ్ ఉచర.

23 'దేముడు మోసిచి అత్తి అమ్ యూదుల్కయ్ జోచ ఆగ్గుల్ దా అస్సె' మెన తుమ్ గవురుమ్ ఉచరన్లెకి, ఆగ్గుల్క నిదానుమ్ నే కెర్తె దేముడుచి మరియాద కడ ఇండితను గే?

24 తుమ్ అమ్చ యూదుల్ కి దన పాపల్ కెర్తసు. దేముడుచి కొడెతె పూర్గుమ్ తెంతో రెగిడ్డి రితి, † "తుమ్ యూదుల్చ కమెచి రిసా, యూదుల్ నెంజిల మాన్సుల్ దేముడుచి నావ్ దూసుప కెర్తతి".

25 దేముడు దిల ఆగ్గుల్ రితి పూర్తి తప్పు నెంతె ఇండిలెకయ్ తుమ్ యూదుల్ జోచయ్ మాన్సుల్ జతి గుర్తుచి సున్నతిక విలువ తయెదె. గని జో దిల ఆగ్గుల్ ఇండితిసి తుమ్ పిట్టవన్లె, జోచయ్ మాన్సుల్ జతి గుర్తు దెకయ్తి జా సున్నతి తుమ్ కెరన తిలె కి, నే కెరన్లి రితి జయెదె.

26 జలె, జోచి అగి జా సున్నతి నే కెరన్లొ మాన్సు కో జలెకు దేముడుచ ఆగ్గుల్ తెన్ బెదితి బుద్ది ఇండ ఆగ్గుల్తె సంగిలి దొర్కు జలి సత్తిమ్ నెరవెర్చుప కెర్లి రితి జలె, జో జా సున్నతి నే కెరన్లెకి, ఆత్మకయ్ జో జా సున్నతి కెరన్లి రితి జా అస్సె మెన జో దేముడు దెకె నాయ్ గే? దెకెదె.

27 దస్సి జలె, యూదుల్ నెంజిల మాన్సుల్ జోవయించి అగి జా సున్నతి

† 2:24 2:24 యెనయా పుస్తకుమ్ 52:5, యెహెజ్కేలు 36:22.

నే కెరనైకి, జోవయింతె సగుమ్జిన దేముడుచ ఆగ్గుల్ తెన్ బెదితి బుద్ది ఇండితతి. అన్నె, తుమ్ యూదుల్క మోసే తెన్ జోచ ఆగ్గుల్ దా తిలె కి, తుమ్చితె సగుమ్జిన ఆగ్గుల్చి కోడు నే కెరై పిట్టయ్తను. జలె, లోకుమ్చ ఎత్తిజినక ప్రబు పరిచ్చ కెర్తి వెల్లి దీసి అయ్లె, ఈంజ మదెనె ప్రబుచి బుద్ది ఇండిల జేవ్ యూదుల్ నెంజిలస తుమ్క నేరిమ్ వయడ్డ సాచుల్ జవుల. మెలె, జోవయింక తుమ్క ప్రబు తీర్పు కెర్లె, తుమి తీర్పు సేడ పాపుమ్ వయితె.

28 మెలె, యూదుడు జెర్మ ఎక్కి అగి కెరన్లి గుర్తు తిలోసాక 'నిజుమ్చో యూదుడు' మెనుక నెంజె. పడ్డొ ముక్కిమ్క కలుసుప జలి సున్నతి అగి కెరంతిసి నెంజె.

29 దస్సి జలె "కో నిజుమ్చ యూదుల్ జవుల?" మెన పుసెలె, ఆత్మకయ్ సుద్ది జలో ఎత్తిమాన్సు. సత్తిమ్ దెతి సున్నతి కిచ్చొ మెలె, రెగ్గయ్లి ఆగ్గుల్చి రిసా అగి కెరంతిసి నెంజె, గని మాన్సుచి పెట్టి దేముడుచి సుద్ది తిలి ఆత్మ జర్గు కెర్తిసి. జోవయించి ఆత్మతె కో సుద్ది జా జోచయ్ మాన్సుల్ జా తవుల గే, జెవ్వి నిజుమ్చ యూదుల్ జవుల. జోచయ్ జల మాన్సుల్క కిచ్చొ ముక్కిమ్ మెలె, మాన్సుల్ దెతి గవురుమ్ నాయ్, గని దేముడు దెతి గవురుమ్.

3

దేముడుచి సత్తిమ్ గెచ్చె నాయ్

1 జలె, వేర మాన్సుల్క చి కంట అమ్ యూదుల్క కిచ్చొ జిన్లి వరుమ్ అస్సె గే? నెంజిలె, అమ్ యూదుల్ జలి చినన్తి సున్నతి కెరంతిన్తె కిచ్చొ లాబుమ్, కిచ్చొ విలువ అస్సె గే?

2 అమ్ యూదుల్క లాబుమి, దేముడు తొలి సంగిల ప్రమానల్ దేముడుచ కొడొ అమ్ యూదుల్చి అత్తి

జో సొర్పు కెర దా అస్సె, జాక అమ్ చెంగిల్ దెకుక మెన, ఒత్త తిలిన్క అమ్ సాచి సూనవుక మెన.

3 దస్సి జలె, అమ్ యూదుల్తె సగుమ్జిన్ నముకుమ్ నెంజిలె కిచ్చొ జయెదె? జేవ్ నముకుమ్ నెంజిలిన్చి రిసా జోవయించొ అమ్చొ దేముడుక 'నిదానుమ్చొ నెంజె' మెనుక జయెదె గే?

4 ఎత్తి మాన్సు అబద్దుమ్ జలెకి, దేముడు సత్తిమ్ తయెదె. దేముడుచి కొడొతె పూర్గుమ్ జోవయించి రిసా జోయ్యి రెగ్గయ్లి రితి;

*"తుచ కొడొ నెరవెర్పుప జతిన్తె తుచి సత్తిమ్ రుజ్జు జయెదె, చి మాన్సుల్ తుక పరిచ్చ కెర్లె తుయి జిన్తె".

5 గని అమ్ యూదుల్చి పాపుమ్చి రిసా అమ్ వెట్కారుమ్ నిస్కారుమ్ జా అస్సుమ్. జో దేముడుచి సత్తిమ్, మాత్తుమ్, జోక గవురుమ్ ఆన్తయ్. జలె, అమ్చి పాపుమ్క దెకిలె, జోచి సత్తిమ్క దెకిలె, జా తేడ డిస్సిన్తె జోకయ్ గవురుమ్ జెతయ్ జలె, అమ్ కిచ్చొ ఉచరుక? 'అమ్ పాపుమ్ కెర్తిన్ చి జో సత్తిమ్ కెర్తిన్చి తేడ దెకిలె జోచి గవురుమ్ డిస్టయ్చి రిసా అమ్చి పాపుమ్తె జోకయ్ లాబుమ్' మెన, జవున్, 'అమ్చి పాపుమ్చి రిసా జో అమ్క సిచ్చ కెరుక బెదె నాయ్' మెన అమ్ ఉచరుక గే? మాన్సుల్చి పాపుమ్ బుద్దికయ్ మాన్సు ఇసి ఉచరుక జయెదె.

6 దస్సి ఉచరుక నాయ్. 'ఒండి లోకుమ్చ మాన్సుల్క ఆకర్క పరిచ్చ కెర తీర్పు కెర సిచ్చల్ దెయిందె, బవుమానల్ దెయిందె' మెన జో ఒప్పున అస్సె. జలె, అమ్ యూదుల్చి పాపుమ్క 'కిచ్చొ నెంజె' మెలి రితి జో దెకితో జలె, ఒండి లోకుమ్చ మాన్సుల్క కో కిసి సత్తిమ్చి తీర్పు కెరుక జయెదె! బెదె నాయ్.

* 3:4 3:4 కీర్తనలు 51:4

7 'దస్సి మెను నాయ్' మెంతె. 'అంచి అబద్ధుమ్చి రిసా దేముడుచి సత్తిమ్ సొస్తుమ్ డీస జోచి గవురుమ్ దెకయ్తయ్ జలె, అంచి పాపుమ్చి సిచ్చు ఆవ్ కిచ్చొక వయుక?' మెంతె, ఓ మాన్సు.

8 'చెంగిల్చి జర్గు జవున్ మెనయ్ పాపుమ్ కెరుమ' మెంతె సగుమ్జిన్. అమ్క "జేవ్ కి దస్సి సంగితతి" మెన, అమ్చి మరియాద కడన్తి రితి సగుమ్ జిని అమ్క నింద సంగితతి మెన తుమ్ జాన్సు. జలె, జేవ్ దస్సి సంగితస జోవయించి జా పాపుమ్చి సిచ్చు కి కతి రితి దేముడు లయడెదె. జోచి తీర్పు సరిగా అస్సె.

లోకుమ్ ఎత్తిచ మాన్సుల్ పాపుమ్ కెర్లస

9 జలె, కిచ్చొ ఉచరుక జయెదె? వేర మాన్సుల్చి కంట అమ్ యూదుల్క దేముడుచి సిచ్చు పిట్టయ్తిసి కిచ్చొ జలెకు తయెదె గే? నాయ్, గెద! ఆవ్ జేవ్చి కంట గొప్పు సుదల్ గే, నెంజుమ్ గెద, ఆవ్ ఉప్పిరి రుజ్జు రెడ్డ దెకయ్లి రితి, ఎత్తి మాన్సు. యూదుల్ జలెకి, గ్రీసు దేసిమ్చ జలెకి, కో జలెకి, పాపుమ్క దెర్పు సేడ పాపుమ్ సుదల్ జా అస్సుమ్

10 దేముడుచి కొడెతె పూర్గుమ్ రెగ్గవ తిలి రితి,

† "సత్తిమ్చొ మాన్సు కేనె కి నాయ్. ఎక్కిలో కి నాయ్.

11 కోయి బుద్ది తతోసా నాయ్, జివ్ తిలో దేముడుక చజతోసా కోయి నాయ్.

12 ఎత్తి మాన్సు సత్తిమ్ ముల, కామ్క నెంజితిన్తె సేడ గెప్పు అస్తి.

కోయి సత్తిమ్ కెర్తి నాయ్, ఎక్కిలో కి నాయ్."

13 † "జోవయించి డొంగొ ఉగిడ్ల మెన్సున్, జోవయించ కొడె గని.

మోసిమ్ కెర్తి రిసాయి జీబు చోడి బులయ్ తత్తి అయివొచి విస్సుమ్ జోవయించ ఒట్టోతయి అస్సె."

14 † "జోవయించి చోడి బెర్తు సాపెనల్ మూర్కుమ్ విస్సుమ్ అస్సె.

15 * జోవయించ వట్టో లోయి దెకుక మెన బే బేగి నిగుల.

16 నాసెనుమ్ కష్టుమ్ జోవయించి ఇండితి వట్టె అస్సె.

17 సేంతుమ్ వాట్ ఇండుక ఎర్గెరె నేన్తి.

18 † దేముడుక ఎదిలి కి బితి నాయ్."

19 మోసే తెన్ దేముడు దిలి ఆగ్గుల్తె కిచ్చొ కోడు తిలె కి, కక్క సంగితయ్ మెలె, జా ఆగ్గుల్చి రితి తెడిచ మాన్సుల్కయ్. కిచ్చొక మెలె, జోవయింతె కోయి దేముడుక జబాబ్ దెంక నెత్తిర్తి రితి ఎత్తి చోడి ముద్దొ జంక, చి యూదుల్ కి నే పిట్టె, ఒండి లోకుమ్చ ఎత్తి మాన్సు దేముడుచి సిచ్చుక జలిలెక జవుల, దేముడుచి పరిచ్చు జోవయించి తీర్పు జంక.

20 మెలె, దేముడు మోసే తెన్ దిలి ఆగ్గుల్చి రితి ఇండితి వాటు దేముడుచి మొక్కె ఈంజ లోకుమ్చొ కేన్ మాన్సుచి పాపుమ్ పుంచె నాయ్, చి ఆగ్గుల్ రితి మాన్సుల్క తీర్పు కెర్తె, జో కక్కయ్ 'పున్నిమ్చొ' మెనుక బెదె నాయ్. ఆగ్గుల్ అమ్చి పాపుమ్ పుంచితి నాయ్. అమ్చి పాపుమ్ దెకయ్తతి. జేవ్ ఆగ్గుల్తె తిలిన్చి రిసా అమ్చి పాపుమ్ చినితసుమ్.

యేసుక్రీస్తుక సంవజలె పున్నిమ్

21 ఆగ్గుల్తె నాయ్. గని వేరతెయ్ దేముడు జోవయించి పున్నిమ్

† 3:10 3:10 10-12 కీర్తనలు 14:2, 3 చి 53:3. † 3:13 3:13 కీర్తనలు 5:10, చి 139:4. † 3:14

3:14 కీర్తనలు 10:7. * 3:15 3:15 15-17: యెసయా 59:7-8. † 3:18 3:18 కీర్తనలు 36:2.

‡ 3:21 3:21 తెలుగు బైబిల్తె ధర్మశాస్త్రమ్ మెలె, మోసిచి అత్తి దేముడు రర్గయ్లి ఆగ్గుల్ మెన అమ్ జానుమ్.

ఈంజ కొడె ఎత్తి బైబిల్తె అగేచి పావ్ పుస్తకుమ్తె రెగ్గయ్ జా అస్సె. ఈంజ దెకవుక మెన కుపియ బాసతె నొయ ప్రమానుమ్తె మోసే పూర్ముచొచి అత్తి రెగిడ్డి దేముడుచ ఆగ్గుల్ మెన రర్గవ అస్సె.

మాన్యుల్ క దొర్కు కెర అస్సె. జాకయ్ ఃమోసె పూర్గుమ్ చొచి అత్తి దేముడు రెగ్గయల ఆగ్గుల్, అన్నె పూర్గుల్ చి అత్తి సంగిల దేముడు చ కబుర్లు కి అగ్గె తెంతొ జా రుజ్జు డీస్తయ్. జలె, జా పున్నిమ్ ఆగ్గుల్ రితి నాయ్, గని వేరతెయ్ దొర్కు జలిసి అప్పెయి మాన్యుల్ క జానయ్ జా అస్సె.

22 జా పున్నిమ్ యేసుక్రీస్తుచి ఉప్పిరి కో జోచి నముకుమ్ తివుల గే, జేవ్ ఎత్తిజిన్ కయ్ 'పున్నిమ్' మెలి రితి దేముడు దెకెదె, జేవ్ కొన్న జలెకి జోచి పున్నిమ్ తె జోవయింక వాట దెయెదె.

మాన్యుల్ తె జో తేడల్ దెకె నాయ్.

23 మెలె, కో కి పాపుమ్ కెర దేముడు దెకయ్ లి సత్తిమ్ ఇండుక నెత్త కెర, జోచి మొక్కె ఓడువ జా అస్సి.

24 జాకయ్, జో కిచ్చొ వాటు మాన్యుల్ చి పాపుమ్ పుంచ అస్సె మెలె, జోచి దయకయ్ ఆరి అమ్క నీతిస్సుదల్ కెర అస్సె. కీసి మెలె, క్రీస్తు జలొ యేసు అమ్చి పాపుమ్ వయిలిసక జో దేముడు అమ్క సయ్తాన్ చి రాజిమ్ తెంతొ నెత్తొవ గెల అస్సె.

25 అమ్ కెర్ల పాపల్ క అమ్ జెతికయ్ సిచ్చ పిట్టయ్ తి బలి జో జంక జోచి లోయి నూవుక మెన దేముడు అబ్బొసి జోవయింక టీచుడ్లన్. జా రచ్చన వరుమ్ అమ్ మాన్యుల్ క కి, క్రీస్తుచి ఉప్పిరి అమ్ అమ్చి నముకుమ్ తింక. జో అబ్బొసి జా బలి దిలిసి ఏక్ రుజ్జు దెకయ్ తయ్. పాపుమ్ క 'పాపుమీ. జా పాపుమ్ గెలెకయ్ మాన్యుల్ క అంచి తెన్ అన్నె బెదవనుక జయెదె' మెన జో సత్తిమ్ చి తిర్పు కెర్లన్ చి రుజ్జు దెకయ్ తయ్. కిచ్చొక మెలె, జోచి పరలోకుమ్ చి కన్కారుమ్ బుద్దిక అమ్చ అగ్గెచ పాపల్ సిచ్చ కెరుక వాయిద కెర తిలన్.

26 జో సత్తిమ్ చ తిర్పుల్ కెర్లొసా జలిన్ చి జా రుజ్జు ఈంజయి కాలుమ్ క దెకవుక మెనయ్ వాయిద కెర్లన్.

అన్నె కిచ్చొక మెలె, 'కో యేసుకయ్ నంపజవుల గే, జోవయిం చి పాపుమ్ పుంచి జయెదె, జోవయింకయి పున్నిమ్ దెకిన్ దె' మెనయ్ రుజ్జు దెకయ్ తి రిసాయి వాయిద కెర్లన్.

27 జాకయ్, 'అమ్ యూదుల్ కయ్ దేముడు మోసె తెన్ దిలి ఆగ్గుల్ తె పున్నిమ్' మెన అమ్ కీసి గవురుమ్ అననుక జయెదె! నెంజె. కిచ్చొచి రిసా, దేముడు మోసె తెన్ దిలి ఆగ్గుల్ చి రితి అమ్ మాన్యుల్ కెర్ల కమొ కామ్క నెంజిలిన్ చి రిసా నాయ్, కామ్క అయ్ లి రిసా నాయ్, గని నముకుమ్ వాటు అమ్క రచ్చన దొర్కు జతయ్.

28 నిజమి, కిచ్చొ ఒప్పున్ తసుమ్ మెలె, కేన్ ఆగ్గుల్ రితి ఇండిత్ నె తె పున్నిమ్ నాయ్, జా నేన్లిన్ చి రిసాయి కో నాసెనుమ్ తె గెతి నాయ్, గని, ప్రబుచి ఉప్పిరి నముకుమ్ తిలెకయ్ మాన్యుచి పాపుమ్ పుంచి జయెదె, చి దేముడు జో మాన్యుక పున్నిమ్ మెలి రితి దెకెదె మెన ఒప్పున్ తసుమ్. జా రచ్చన రితి నముకుమ్ వాటు దొర్కు జతిసి.

29 నెంజిలె, దేముడు ఎక్కి యూదుల్ కయ్ దేముడు జయెదె మెంతె గే? యూదుల్ నెంజిలనక కి జో దేముడు జయె నాయ్ గే? నిజమి, యూదుల్ నెంజిలనక కి జొయ్య దేముడు.

30 కిచ్చొక మెలె, ఎత్తిక జో దేముడు, జో ఎక్కిలో. ఎక్కిలో తె ఏక్ రగుమ్ అన్నెక్కొ తె అన్నెక్ రగుమ్ జతొసా నెంజెచి రిసా వేర వేర రచ్చన కెరె నాయ్, గని యూదుల్ జతి గుర్తుచి సున్నతి కెరన్లనక క్రీస్తుక నంపజా గెలె, జేవ్ నంపజలి రిసాయి జోవయిం చి పాపుమ్ జో పుంచెదె చి జోవయింక 'పున్నిమ్' మెలి రితి దెకెదె. అన్నె, జా సున్నతి నే కెరన్లన జోవయింక నంపజా గెలె, జోవయిం చి నముకుమ్ చి రిసాయి జోవయిం చి పాపుమ్ కి, జో పుంచ జోక కి 'పున్నిమ్' మెలి రితి దెకెదె.

31 దస్సి జలె, ఎక్కి జోచి ఉప్పిర్చి అమ్చి నముకుమ్చి రిసాయి అమ్క 'పున్నిమ్ జల' మెలి రితి జో దెకెది మెలె, జో దిల ఆగ్గుల్ అమ్ వెంట గెలుక గే? నెంజె. అమ్చి నముకుమ్చి రిసాయి జో దిల ఆగ్గుల్ తెన్ బెదితి సత్తిమ్ అమ్ ఇండుకయ్. దస్సి, జేవ్ ఆగ్గుల్తె తిలిసి నెరవెర్చుప కెరుమ్దే.

4

నముకుమ్ వాల్, దేముడుచి దయ వాటు రచ్చన

1 జలె, అమ్ యూదుల్చొ పూర్గుమ్చొ అబ్రాహామ్చి రిసా కిచ్చొ మెనుమ? ఆగ్ రగుమ్చి అమ్చి జెర్చున్చి రిసా ఉచర్లె, అమ్ యూదుల్చి సెకుమ్క జో అబ్బొ జయెదె.

2 జలె, ఏక్ వేల జోచ కమొచి రిసాయి అబ్రాహామ్క పున్నిమ్ కలుగు జతి జలె, జో అబ్రాహామ్ గవురుమ్ ఉచరసుక జతి, గని జోవయించ కమొచి రిసాయి జోవయింక పున్నిమ్ మెన మాన్సుల్ ఉచర్లె కి, దేముడు దస్సి దెకె నాయ్.

3 * "అబ్రాహామ్ దేముడు సంగిలి కోడు నంప కెర్లి రిసాయి 'జోక పున్నిమ్' మెలి రితి జో ప్రబు దెకిల్" మెన దేముడుచ కొడొతె రెర్ల అస్సె.

4 జలె, కో జలెకు కామ్ కెర్లె 'కామ్ కెర్లె' మెన దెతి కూలి దానుమ్ నెంజె, జా, చి అబ్రాహామ్ "నంప కెర్లి రిసాయి 'జోక పున్నిమ్' మెలి రితి ప్రబు దెకిల్" మెన దేముడుచి కోడు తెన్ రెర్లవ అస్సె.

5 దస్సి, అబ్రాహామ్ తెన్ కిసి జర్లు జలి గే, అన్నె మాన్సుల్ తెన్ కి దస్సి జయెదె. మెలె, కిచ్చొ కామ్క జెతికయ్ కామ్ జేవ్ నే కెర్లె కి, కిచ్చొ కామ్ కి కామ్క నెంజిలె కి, పాపుమ్ కెర్లసక జోచి దయకయ్, జోవయించి పాపుమ్ వుంచితొ దేముడుకయ్ కో నంప కెర్లె,

జోవయించి నముకుమ్చి రిసాయి అంచి పున్నిమ్ జోవయింక దా అస్సి' మెలి రితి జో పాపుమ్ వుంచితొ దేముడు దెకెదె.

6 దస్సి, "జోవయించ కమొచి రిసా నాయ్, గని జోచి దయచి రిసా దేముడు కక్క కక్క 'జోవయింక పున్నిమ్' మెలి రితి దెకెదె గే, జోవయింకయ్ చెంగిలి" మెన దావీదు పూర్గుమ్చొ ఏక్ కోడు రెర్ల అస్సె.

7 † "కిచ్చొ తప్పుల్ చెమించుప జా అస్తి గే,

కచ పాపల్ వుంచి జా అస్తి గే, జోవయింకయ్ చెంగిలి.

8 కేన్ మాన్సుచి పాపుమ్ ప్రబు జోవయింక వయడె నాయ్ గే, జోకయ్ చెంగిలి" మెన రెర్ల అస్సె.

9 జలె, ఈంజ చెంగిల్ వరుమ్ కక్క దొర్కు జతయ్? ఎక్కి యూదుల్ జతి గుర్తుచి సున్నతి కెరన్లసకయ్ దొర్కు జతయ్ గే జా సున్నతి నే కెరన్లసక కి దొర్కు జతయ్ గే? అబ్రాహామ్ నంపజలిన్కయ్ 'జోక పున్నిమ్' మెలి రితి ప్రబు జోచి దయక దెకిలన్ మెంతసుమ్.

10 జలె, ప్రబు జోక 'జోవయింక పున్నిమ్' మెలి రితి దెకిలిసి కెయ్ తెంతొ? జా సున్నతి జో నే కెరంతె అగ్గె తెంతొ గేర్ కెరన్ల పడ్డొ గే? పడ్డొ తెంతొ నాయ్. అగ్గెయ్ తెంతొ.

11 జా సున్నతి నే కెరంతె అగ్గె తెంతొ జో నంపజలిన్చి రుజ్జా దెకయ్తి గుర్తుకయ్ పడ్డొ జో జా సున్నతి కెరన్లొ. దస్సి, జా సున్నతి నే కెరంతె కో నంపజా ప్రబు ఆరి దెతి పున్నిమ్ జా తవుల గే, జోవయింకయ్ అబ్రాహామ్ అబ్బొసి జయెదె. దస్సికయ్, జా సున్నతి నే కెరంతె అగ్గె కి ప్రబు 'జోవయింక పున్నిమ్' మెలి రితి అబ్రాహామ్క దెకిల్.

* 4:3 4:3 ఆదిసాండుమ్ 15:6. † 4:7 4:7 కిర్లసలు 32:1-2.

12 అన్నె, దస్సి కి, కో జా సున్నతి కెరన తిలె కి, జా సున్నతి నే కెరంతె అగ్గె తెంతో దేముడుచి కోడు నంప కెర్లొ అబ్రాహామ్చి రితి జవుల గే, మెలె, జోచి రితి నంపజవుల గే, జోవయింకయ్ కి అబ్రాహామ్ అబ్బొసి జయెదె.

13 దస్సి, “ఈంజ లోకుమ్ ఏలుప కెర్తి వాట తుమ్క దొర్కు కెరిందె” మెన అబ్రాహామ్క చి ‘జోచి సెకుమ్తె పడ్డొ జెర్ముక తిలసక’ మెలి కోడు, దేముడు సంగిలి ప్రమానుమ్ కేన్ వాట్ అయ్లి మెలె, ఆగ్గుల్ రితి వాట్ నాయ్, గని జో దేముడుచి కోడు జో నంపయ్ కెర్లన్చి రిసా ‘జోవయింక పున్నిమ్’ మెలి రితి జో దెకిలన్.

14 ఏక్ వేల దేముడు మోసే తెన్ దిలి ఆగ్గుల్ రితి కెర్తస, జేవ్ జా ఆగ్గుల్ రితి కెర్లి రిసాయి అబ్రాహామ్చ పుత్తర్లు జా ఏలుప కెరుక తత్తి జలె, దేముడు సంగిలి ప్రమానుమ్ కామ్క నెంజిలి, జా ప్రమానుమ్చి ఉప్పిర్చి నముకుమ్ కామ్క నెంజిలి.

15 అమ్ ఆగ్గుల్ తిలసచి ఉప్పిర్చి తీర్పు కిచ్చొ మెలె, ‘పున్నిమ్ జా అస్తి’ మెన కచి రిసా ఆగ్గుల్ సాచి జతి నాయ్. ఆగ్గుల్ తిలె, అమ్చ కమొక ‘పాపుమ్చయ్’ మెన రుజ్జు దెకవయ్ అమ్చి పాపుమ్చి రిసాచి సిచ్చు ఆన్తతి. అన్నెక్ కిచ్చొ మెలె, ఆగ్గుల్ నెంజిలిన్తె, ఆగ్గుల్ నేన్లసతె కో పాపుమ్ కెర అస్తి గే, నెంజిలె ఏక్ వేల పున్నిమ్ కెరుక జతి జలె ‘పున్నిమ్ కెర అస్తి’ గే ఆగ్గుల్ వాట్ రుజ్జు కెరుక నెంజె.

16 జేవ్ దొన్ని అల్లర్చి రిసా మాన్సుచి రచ్చునక దేముడు కిచ్చొ దిలొ మెలె, జొయ్యి ఆదారుమ్ కెర్లిసి కిచ్చొ మెలె,

కమొ నెంజె, గని రితి నముకుమ్ తెన్. కిచ్చొక మెలె, కమొ నాయ్, గని నముకుమ్ ఆదారుమ్ జలె, జా ప్రమానుమ్ జెయిమ్ జతినక దేముడుచి దయయ్ సాలు, అన్నె, జా ప్రమానుమ్ జోచి దయచి రిసా జెయిమ్ జయెదె జలె, అబ్రాహామ్చ పుత్తర్లు జలస ఎత్కిజినకయ్ జా ప్రమానుమ్ జెయిమ్ జయెదె. అబ్రాహామ్చ పుత్తర్లు యూదులి, అమ్చి దేముడు మోసే తెన్ దిలి ఆగ్గుల్ అమ్చ తిలసయ్ గని అన్నె కోయి నాయ్ మెన నాయ్, పడ్డొ ‘అమ్ యూదుల్ ఎత్కిజిని’ మెన నాయ్. గని అబ్రాహామ్చి రితి దేముడుచి కోడు నంప కెర్తస ఎత్కిజిని, జేవ్ యూదుల్ జలెకి నెంజిలె కి జోచ పుత్తర్లు జవుల. జోచి రితి నముకుమ్ తిల ఎత్కిజినక జో అబ్రాహామ్ అబ్బొ జయెదె.

17 దేముడుచ కొడొతె రెగ్గయ్లి రితి, కి “ఒగ్గర్ దేసిమ్లుచ సెకుమ్లుచ మాన్సుల్క తూయి అబ్బొసి జతి రితి ఆవ్ సంగ అస్సి.”

మెన అబ్రాహామ్క జో సంగిలన్. దస్సి, మొర్లనక జియడ్డొ, అగ్గె నెంజిలిన్క తిలిసి రిత బుకార్తొ దేముడుక అబ్రాహామ్ నంప కెర్లొ, దేముడుచి మొక్కె అమ్ జో దేముడుచి కోడు నంప కెర్తస ఎత్కిజినక అబ్రాహామ్ అబ్బొ జా అస్సి.

18 ఒగ్గర్ దేసిమ్లుచ సెకుమ్లుచక జో అబ్బొ జతిసి జెయిమ్ జతిసి జో అబ్రాహామ్క రుజ్జు నే డీసిలెకి, జో జా ఆస తెన్ తిలన్, అన్నె,

* “అగాసుమ్చ సుక్కల్ కిసి ఎత్తివాట్ అస్తి గే,

‡ 4:16 4:16 ‘అబ్రాహామ్క ఎత్కి అదికారుమ్ తిలొ దేముడు సంగిలి కోడు’ మెలె, జోవయింపి సెకుమ్తె పడ్డొ జెర్ముక పడ్డొక ఏలుప కెర్లిన్చి రిసాచి కోడు. జేవ్ పడ్డొ ఏలుప కెర్లిన్క యేసుక్రీస్తు ముక్కిమ్చొ జయెదె, చి జోవయింతెన్ ఏలుప కెరుల. పడ్డొ జో ఎత్కి అదికారుమ్ తిలొ దేముడుచ కొడొ ఎత్కి నంప కెరుక ముక్కిమ్, గని ముక్కిమ్క ‘జోవయింపి కోడు’ మెలె, యేసుయి; యోహాను 1:1-2, 14; చి యేసుచి రిసాచి సుబుమ్ కబుర్, జోవయింపి రిసా దేముడు మోసే తెన్ దిలి ఆగ్గుల్ సంగిలిసి ఎత్కి.

* 4:18 4:18 అదికాండుమ్ 15:5.

§ 4:17 4:17 అదికాండుమ్ 17:5.

దస్సి తుమ్చి సెకుమ్తె పడ్డొ జెర్మితన
 ఎతివాట్జన్ జవుల”

మెన జో దేముడు ప్రమానుమ్ సంగిలిసి
 జో నంప కెర్లన్.

19 అఁగుక జో మంత్రొ జా పుంజెక వెర్సుల్
 జా తా మొర్తి వయసు జా తిలె కి,
 తేర్ని జలి సారా గొడ్డు జా తిలె కి, జో
 అన్మానుమ్ జయె నాయ్.

20 కేన్ సుట్టు జా ప్రమానుమ్చి ఉప్పిరి
 అన్మానుమ్ జయె నాయ్, గని దేముడుక
 ‘జా జెయిమ్ కెరెదె’ మెన నముకుమ్
 తా జోక గవురుమ్ దెతె తిలన్, చి జోచి
 నముకుమ్ అన్నె డిట్టుమ్ జలి.

21 ‘జో సంగిలి రితి దేముడు కెరుక తెరె’
 మెన పూర్తి నముకుమ్ తెన్ తిలో.

22 జాకయ్, ‘జోచి నముకుమ్, జోక
 పున్నిమ్ జలి రితి జతయ్’ మెన
 దేముడు తీర్పు కెర్లొ.

23 గని ‘జోచి నముకుమ్, జోక పున్నిమ్
 జలి రితి జతయ్’ మెలి కోడు ఎక్కి జోచి
 రిసా నాయ్,

24 గని అమ్చి రిసా కి. అమ్చొ ప్రబు
 జలో యేసుక అన్నె జియడ్లొ దేముడు
 అబ్బొన్చి ప్రమానుమ్ అమ్ నంప కెర్లె,
 అన్నె మాన్సుల్క కి ‘జోచి నముకుమ్ జోక
 పున్నిమ్ మెలి రితి జతయ్’ మెంతి తీర్పు
 జోచి ధయక కెరెదె.

25 అమ్చయ్ పాపల్ వయితి రిసా ప్రబు
 జలో యేసు అమ్క జెతి సిచ్చ సేడ్లన్. జా
 సిచ్చ అమ్క లయితిసి పిట్టవుక మెన.
 అన్నె, అమ్చి పాపుమ్ దస్సి †పుంచి
 జలిసి రుజ్జు జవున్ మెనయ్ దేముడు
 అబ్బొసి జోక అన్నె జియడ్లన్.

5

యేసుక్రీస్తుచి అత్తి అమ్క సేంతుమ్
 జలిసి

1 జలె, నముకుమ్ వాట్ అమ్చి
 పాపుమ్ పుంచి జా అస్సె. అమ్చొ ప్రబు
 జలో యేసు అమ్చి పాపుమ్ పుంచిలి

బలి జలి రిసా దేముడు తెన్ అమ్క
 సేంతుమ్ జలి.

2 దేముడుచి దయచి రిసా నముకుమ్
 తెన్, జో అమ్క రచ్చున దొర్కు కెర అస్సె.
 ఈంజ రచ్చున అమ్క కేన్ వాట్ దొర్కు
 జా అస్సె మెలె, జో యేసుప్రబు అమ్చి
 పాపుమ్ పుంచితి బలి జలి వాటు, అన్నె
 జా రచ్చున అమ్క దొర్కు జలి తెంతొ,
 దేముడుచి పరలోకుమ్చి ఉజిడతె అమ్
 బెదుమ్దె మెలి ఆస అమ్క దొర్కు జా
 అస్సె, చి అమ్క ఒగ్గర్ సర్దనంతోసుమ్
 జతసుమ్.

3 అన్నె కిచ్చొ మెలె, సుబుమ్ కబుర్
 సూనయ్తి ప్రబు అమ్క దిలి కామ్చి
 రిసా, అమ్ బాదల్ సేడ్డిన్చి రిసా కి
 అమ్క సర్దనంతోసుమ్. బాదల్ సేడ్డె
 ఓర్పువ జా, నిదానుమ్ సికుక జయెదె.

4 జేవ్ బాదల్ సేడ్డిసి అమ్క ఏక
 పరిచ్చ కెర్లి రితి జయెదె, చి అమ్ ఓర్పువ
 జా నిదానుమ్ సికిలె అమ్క “పరిచ్చతె
 జిన్ల” మెన దేముడు జోచి సర్ద దెకవ
 అమ్చి పెట్టి అమ్క అన్నె ఆస దెయెదె,
 అమ్క అన్నె దిట్టుమ్ కెరెదె, చి

5 జా ఆసచి రిసా అమ్ నంపజలిసి
 జెయిమ్ జయెదె, లాజు జము నాయ్.
 దేముడు అమ్క దిలి దేముడుచి సుద్ది
 తిలి ఆత్మ తెన్ జోచి ప్రేమ అమ్చి పెట్టి
 సువ బెరవయ్ దా అస్సె. జయి అమ్క
 రుజ్జు.

6 అమ్క కిచ్చొ సెక్తి నెంజిలి పొది,
 ‘చెంగిల్ సమయిమ్’ మెన అమ్
 పాపుమ్ సుదల్క నయ్తాన్చి రాజిమ్
 తెంతొ రచ్చించుప కెర్లి రిసాయి క్రీస్తు
 మొర అమ్చి రిసాచి అర్పితుమ్ జలన్.

7 జలె, పున్నిమ్ డిస్తా కేన్ జవున్
 మాన్సుక కిచ్చొ జవున్ బాద తెంతొ
 రచ్చించుప కెరుక మెన కో మాన్సుల్
 సొంత జీవు దెవుల గే? దెతి నాయ్. కేన్
 గే ఏక సుట్టు కో జవున్ చెంగిలో మాన్సుక
 రచ్చించుప కెరుక మెన కో జెలికు మాన్సు
 దయిరిమ్ జా మొరెదె.

† 4:25 4:25 చి ఒత్త తెంతొ అమ్క జో ‘పున్నిమ్’ మెలి రితి దెకిలిసి.

8 గని, దేముడుచి ప్రేమ అమ్క కిసి రుజ్జు జతయ్ మెలె, అమ్ పాపుమ్ కెర్లస జా తతికయ్, అమ్క రచ్చించుప కెర్తి రిసా క్రీస్తు జోచి జీవు దిలన్.

9 జలె, దొర్కు జలి అర్పితుమ్ జో దిలిన్చి లోయిచి రిసా అమ్చి పాపుమ్ అప్పె పుంచి జా అస్సెచి రిసా, అన్నె, దేముడు అమ్క దెంక తిలి సిచ్చ అమ్క నే లయితి రితి, జో యేసుయి పిట్టవ అస్సె. జా సిచ్చ అమ్ సేడుక నాయ్.

10 మెలె, దేముడుక అమ్ విరోదుమ్ సుదల్ జా తిలి పొది, అమ్చి పాపుమ్ గెచ్చయ్తి రిసా జోచొ పుత్తుసి మొర్లిసి, అమ్క జోతె అన్నె బెదవ దిలన్. కెయ్ మెలె, జోక అమ్ విరోదుమ్ జా తిలి పొది. జలె, అన్నె, అమ్ అప్పె జో తెన్ అన్నె బెదయ్ అస్సుమ్ జలె, జో అన్నె జీవ్ జా, జీవ్ తతిన్చి రిసా నాసెనుమ్తె నే గెతె, పరలోకుమ్తె జోతె గెతి రచ్చన కచితుమ్ జమ్దె.

11 జో, పడ్డొ అన్నె కిచ్చొ మెలె, అమ్చొ ప్రబు జలో యేసుక్రీస్తు జర్గు కెర్లిన్చి రిసా దేముడు అమ్క అన్నె బెదవన్లి రిసా, జో దేముడుచి తెడి అమ్ అప్పె అస్సుమ్చి రిసా, జోచి ఉప్పిరి అమ్క నర్లసంతోసుమ్ జతసుమ్.

ఆదామ్ తెంతొ మొర్ను యేసు తెంతొ జీవుమ్

12 ఎక్కిలో మాన్సు, తొలితోచొ మాన్సు జలో ఆదాము, పాపుమ్తె సేడ్లిన్ తెన్ ఒండి లోకుమ్తె పాపుమ్ అయ్లి, అన్నె పాపుమ్చి రిసా మొర్ను అయ్లి. జాకయ్ ఒత్త తెంతొ ఎత్తి మాన్సు పాపుమ్ కెర అస్తి, కెర్తతి, చి ఎత్తిజిన్క మొర్ను అయ్లి.

13 దస్సి, కచితుమ్, దేముడు ఆగ్గుల్ రితి నే దిలి అగ్గెయి తెంతొ ఈంజ

లోకుమ్తె పాపుమ్ అస్సె. 'గని ఆగ్గుల్ రితి నెంజిలిన్తె జా పాపుమ్చి రుజ్జు సరిగా డీసె నాయ్, చి తీర్పు కెర సిచ్చ కెరుక నెంజె'.

14 జలెకి, ఆగ్గుల్ దిలిన్క *మదెనె జలో మోసే నే జెతె అగ్గె కి, తొలితోచొ ఆదాము తెంతొ కి మాన్సుల్క మొర్ను ఏలుప కెర్తె తిలన్. †వేర పాపల్ జేవ్ కెర్తె కి, దేముడుచి కోడు పిట్టవన్లొ ఆదాము కెర్లి రగుమ్ పాపుమ్ నే కెర్లసచి ఉప్పిరి కి మొర్నుయి ఏలుప కెర్తె తిలన్. జలెకి, పడ్డొ జెంక తిలొ యేసుక ‡తొలితోచొ ఆదాము అమ్క టాలి జతయ్. ఆదాము ఏక్ కాలుమ్క మొదొల్చొ, కిపాపుమ్చి మొర్ను ఏలుప కెర్తి కాలుమ్. పడ్డొ యేసు అన్నెక్ కాలుమ్క మొదొల్చొ, పాపుమ్ గెచ్చవ పరలోకుమ్చి రాజిమ్ ఏలుప కెర్తి కాలుమ్.

15 పాపుమ్తె సేడ్లన్క చి రచ్చన దిలిన్క తేడ. మెలె, ఎక్కిలో మాన్సు పాపుమ్ కెర్లిన్చి రిసా ఒగ్గర్జిన్ మొర్లమ్. గని దేముడుచి దయచి రిసా జో అన్నెక్లొ మాన్సు జలో యేసుక్రీస్తు జోచి ప్రేమక ఆరి దిలి రచ్చనచి ఒగ్గర్జిన్క జో దేముడు నెతోవ కెరయ్ అస్సె.

16 అన్నె, జోచి దయక దేముడు దిలి వరుమ్క జర్గు జతిన్క చి జో ఎక్కిలో కెర్లి పాపుమ్క జర్గు జలిన్క ఒగ్గర్ తేడ. జా ఎక్కి పాపుమ్చి రిసాచి తీర్పు కిచ్చొ ఆన్లి మెలె, దేముడు దెతి సిచ్చ. గని, పడ్డొ, అమ్ ఎత్తిజిన్ మాన్సుల్ ఒగ్గర్ పాపుమ్ కెర కెర అమ్ కెర్ల పాపల్ ఒగ్గర్ నిల్వ జా గెలి పొది, జో దేముడు జోచి దయక దిలి రచ్చన కిచ్చొ ఆన్లి మెలె, అమ్చి పాపుమ్ పుంచ దిలిసి.

17 దేముడు సంగిలి *కోడు జో ఎక్కిలో పిట్టవ పాపుమ్తె సేడ్లిసి

* 5:14 5:14 నిర్గుమకాండుమ్ 19, 20 అద్యయల్. † 5:14 5:14 ఆదాము తెన్ ఎత్తి అదికారుమ్ తిలొ దేముడు సంత లట్టబ ఏక్ కోడు తిన్నగ సంగి తిలన్. తిన్నగ సంగిలి జా ఆడ్ర ఆదాము పిట్టయలన్. ఆదికాండుమ్ 2:15-17 చి 3 అద్యయమ్. ‡ 5:14 5:14 1 కొరింధిల్ 15:22, 45 § 5:14 5:14 ఆదికాండుమ్ 3 అద్యయమ్. * 5:17 5:17 14 నంబర్ కోడుచి ఎట్టొచి. 17 నంబర్? కోడు దెక.

తెంతో జా పాపుమచి సిచ్చు, మెలె మొర్నుయి, ఏలుప కెర్తయ్. జలెకి, అన్నె కిచ్చొ ముక్కిమ్క జగ్గు జయెదె మెలె, జో అన్నెక్లో జలో యేసుక్రీస్తుచి అత్తి దేముడుచి దయచి రిసాచి, జో ఆరి దిలి పున్నిమ్ కక్క కక్క దొర్కు జయెదె గే, జిత్తిన్తె, మెలె పరలోకుమచి రాజిమ్తె, జేవ్ ఏలుప కెర్తుల.

18 దస్సి జలె, ఎక్కిలో పాపుమ్ కెర్లిసి కిసి ఎత్తిజిన్క సిచ్చుతె సేడయలి గే, దస్సి, జో అన్నెక్లో పున్నిమ్ కెర్లిసి †జోక నంపజల ఎత్తిజిన్చి పాపుమ్ పుంచ జోవయింక జియడ్డయ్.

19 మెలె, ఎక్కిలో మాన్సు దేముడు సంగిలి కోడు నే కెర్లిన్చి రిసా ఏ ఎత్తిజిన్ పాపుమ్ సుదల్ జా గెలమ్. దస్సి, జో అన్నెక్లో, దేముడు అబ్బొన్చి కోడు సూన కెర్లిన్చి రిసా * ఒగ్గర్జిన్క ‘జేవ్ పున్నిమ్ జల రిత జా అస్తి’ మెన జో దేముడు కచితుమ్ దెకెదె.

20 ఆగ్గుల్ రితి మదెనె అయలి, గని కిచ్చొక మెలె, మాన్సుల్ పాపుమ్ ఇండితిన్చి రుజ్జు సొస్టుమ్ డీసున్ మెనయ్ దేముడు జా ఆగ్గుల్ రితి మదెనె దిలన్. గని మాన్సుచి పాపుమ్ దస్సి సొస్టుమ్ రుజ్జు జలెకి, అమ్క కిచ్చొ రుజ్జు అయలి మెలె, దేముడుచి దయ జా పాపుమచి జా ఆగ్గుల్ రితి జిన అన్నెయ్ కామ్ కెర్లి.

21 మెలె, పాపుమ్ మొర్ను ఆన, జా పాపుమ్ మొర్ను వాట్ కిసి ఏలుప కెర్తె తిలి గే, దస్సి, అమ్చొ ప్రబు జలో యేసుక్రీస్తు మొర అమ్చి పాపుమ్ పుంచ, జోచి పున్నిమ్ అమ్క ఆరి దిలిన్కయ్ జోచి దయ ఏలుప కెర్పు మెనయ్, దేముడుచి దయయ్ జిన అస్సి. అమ్క ‘పరలోకుమచి రాజిమ్తె

బెద పరలోకుమచి జీవుక కెయక తెయక జియ ఆకర్కయ్ ఒత్తయ్ గెతు’ మెనయ్ జా వరుమ్ దిలన్.

6

నంపజా పాపుమ్ ముల సత్తిమ్ ఇండుక

1 జలె, కిచ్చొ మెనుమ? ‘అమ్చి పాపుమ్ దేముడు చెమించుప కెర్లిన్తె జోచి దయ ఒగ్గర్ డీసుక, ఒగ్గర్ అవ్కాసుమ్ దెమ’ మెన అమ్ పాపుమ్ ఇండితె తంక గే?

2 దస్సి ఉచరుక నాయ్. పాపుమ్ ముల అమ్చి సొంత ఆత్మక మొర్ల రిత జలమ్ మెలె, పాపుమ్తె కిసి అన్నె ఇండుమ్దె?

3 యేసుక్రీస్తుచి నావ్ తెన్ బాప్తిసుమ్ జల అమ్ ఎత్తిజిని, జలె, జో మొర పాపుమ్ గెచ్చయలిన్చి గుర్తు జతి బాప్తిసుమ్ కడన్లిన్తె జో మొర్లిన్ తెన్ బెదిల్ రితి, జా మొర్ల రిత జలమ్ మెన నేన్సు గే?

4 జో యేసుచి ఆగ్గె మొర్లిన్తె అమ్ బెద, అమ్చి ఆత్మక మొర జో తెన్ రోయి జలి గుర్తుకయ్ అమ్ బాప్తిసుమ్ నజ్వుమ్. దస్సి, అబ్బొన్ జలో దేముడుచి నెక్కిక క్రీస్తు కిసి మొర్ను తెంతో అన్నె జీవ్ జా ఉట్లన్ గే, దస్సి, అమ్ ఈంజ బత్తుకయ్ నొవర్ జెర్మున్ జోచి ఆత్మతె జెర్మున్ జా సత్తిమ్ ఇండుకయ్ మెన, జో దేముడు అమ్క జియడ అస్సి.

5 జలె, జో మొర్లిన్తె ఆత్మక బెద జో తెన్ అంటుప జలి రితి జలమ్ మెలె, జో అన్నె జీవ్ జా ఉట్లి జీవుక కచితుమ్ అమ్ కి జిమ్దె, చి మదెనె ఆగ్గెక అమ్ మొర్లె, ఆకర్క జోచి రితి అమ్ కి జీవ్ జా ఉట్టుమ్దె.

† 5:17 5:17 తిమోతిక రెగిడ్డి 2 నంబర్ ఉత్తమ 2:12. డీనయలిసి 5:10, 20:4, 6 చి 22:5. ‡ 5:18 5:18 నెంజిలె ‘పాపుమ్ పుంచి జతి అవ్కాసుమ్, జోవయింబి రాజిమ్తె జతి అవ్కాసుమ్, ఎత్తిజిన్క దొర్కు కెర్తయ్’. గని దొర్కు కెర్లి కి, జా నజిలెకయ్. కిసి నజుక మెలె, యేసుక్రీస్తుకయ్ నంప కెర్తుకయ్. యోహాను 3:18, 1:12. § 5:19 5:19 3:10-12, 23 దెక. * 5:19 5:19 18 నంబర్ కోడు దెక.

6 అమ్చి ఆగుతె ఏలుప కెరై తిలి అగ్గెచి పాపుమ్బుద్ది పూర్తి గెస్సు మెనయ్, పాపుమ్చి సేవ అమ్ అప్పె తెంతో కెరుక నాయ్ మెనయ్, పాపుమ్ అమ్చి అగ్గెచి ఆత్మ జో తెన్ సిలువతె గలి జా మొర్లి మెన జానుమ్.

7 అమ్చి పాపుమ్చి ఆత్మ మొర తిలె, పాపుమ్ అమ్క ఏలుప కెర్తిన్ తెంతో విడ్డల్ జా అస్సుమ్.

8 గని అన్నె, క్రీస్తు తెన్ మొర్లమ్ మెలె, 'జో తెన్ జిమ్దె' మెన కి అమ్క దయిరిమ్ అస్సె.

9 కిచ్చొక మెలె, క్రీస్తు మొర తా అబ్బొన్ అన్నె జియడ్లొసా జా కెయ్క అన్నె మొరె నాయ్ మెన జానుమ్. అప్పె జోచి ఉప్పిరి మొర్నుక కిచ్చొయ్ అదికారుమ్ నాయ్.

10 జో మొర్లిన్, జలె, మాన్సుల్చి పాపుమ్ గెచ్చయ్తి బలి జలిసి. జా కామ్, జలె, ఎక్కి సుట్టుక పూర్తి జెయిమ్ జలిసి, కేడ్డిసి. గని జో అప్పె జితిసి, జలె, దేముడుచి గవురుమ్ కెయ్క తెయ్క దెకయ్తి రితి జో జితయ్. జో మొర్లిన్ ఎక్కి సుట్టుచి కామ్, జోచొ అబ్బొన్చి గవురుమ్ దెకయ్తిసి కెయ్క తెయ్క చి కామ్, కేడ్డిసి నెంజె.

11 జాకయ్ తూమ్ కి కిసి దెకనుక మెలె, అమ్చి పాపుమ్ గలి. అమ్చి పాపుమ్చి ఆత్మ మొర్లి' మెనయ్, క్రీస్తు జలొ యేసుచి జీవుకయ్ నొవర్ జియ్ అస్సుమ్, చి దేముడుచి గవురుమ్ దెకయ్తి రితి అమ్ ఇండితె తంకయ్ మెన అర్దుమ్ కెరన దస్సి ఇండుక.

12 జాకయ్, మొర్ల తుమ్చ ఆగ్గెతె పాపుమ్ ఏలుప కెర్ను నాయ్, నెంజిలె తుమ్చి ఆగ్గెచ ఆసల్ ఇర్గు కెరై, పొన.

13 పాపుమ్ కమొ కెర్త అయ్దల్ జేవ్ జతి రితి, పాపుమ్తె తుమ్చ ఆగ్గెచ వాటల్ తుమ్ బెదవ నాయ్. గని, 'మొర్ను తెంతో జో అమ్క నెతోవ కెర జో తెన్ బెదవన దేముడు అమ్క జియ్డయ్ అస్సె, అమ్క జివ్వి కెర అస్సె' మెనయ్,

జోచి అత్తి తుమ్చి ఆత్మ సొర్ప కెర దా, జోచి సత్తిమ్ దెకయ్త కమొచి రిసొచ అయ్దల్ జేవ్ జతి రితి, తుమ్చ ఆగ్గెచ వాటల్ జోచి అత్తి సొర్ప కెర దాన.

14 జోచి అత్తి సొర్ప కెర దిలదు మెలె తుమ్చి ఉప్పిరి పాపుమ్ ఏలుప కెరె నాయ్. కిచ్చొక మెలె, తుమ్ ఆగ్గుల్చి రితి తెడి నాయ్, గని జో దేముడుచి దయచి తెడి అస్సున్.

15 జలె, 'అప్పె ఆగ్గుల్ రితి తెడి ఆమ్ నాయ్. జోవయించి దయక దేముడు అమ్క చెంగిల్ దెకితయ్, చి అమ్ పాపుమ్ కెరై బాద నాయ్' మెంతసు గె? దస్సి ఉచరుక నాయ్.

16 జోచి సేవ కెరుక మెన కచి అత్తి తుమ్క తుమ్ ఒప్పున కెరన తస్సె గే, జోచయ్ గతిమాన్సుల్ జా అస్సున్ మెన నేస్సు గే? పాపుమ్తె సొర్ప కెరనై, పాపుమ్చ గతిమాన్సుల్ జస్సె, చి మొర్నుతె గతె. దేముడుచి కోడు కెర్లిన్తె ఒప్పున కెరంతె జలె, జో దెతి పున్నమ్ జస్సె.

17 దేముడుక జెయ్యి! పాపుమ్చి సేవ కెర పాపుమ్చ గతిమాన్సుల్ తుమ్ అగ్గె జా తిలదు, గని తుమ్క అప్పె సికడ్లి తుమ్క అప్పె దిలి కోడె రితి ఇండుక తుమ్చి పెట్టి కోరప జా అస్సున్.

18 అన్నె, పాపుమ్ ఏలుప కెర్తిసి తెంతో దేముడు తుమ్క విడ్డల్ కెర, సత్తిమ్ ఇండితిన్క తుమ్ గతిమాన్సుల్ జతి రితి కెర అస్సె.

19 మాన్సుల్ రోజుక అర్దల్ సంగితి రితి, టాలిక్య 'గతిమాన్సుల్' మెంతసి. కిచ్చొక మెలె, ఆత్మకమొచి రిసొచ కొడొ అర్దుమ్ కెరనుక తుమ్క ఇదిల్ బాద, చి 'అర్దుమ్ కెరంతు' మెనయ్ ఇసి టాలి తెన్ సంగితసి. జా అర్దుమ్ కిచ్చొ మెలె, లంజె వెట్కారుమ్చ కమొతె, పాపుమ్చి ఉప్పిరి పాపుమ్చ కమొతె తుమ్చ ఆగ్గెచ వాటల్ అగ్గె బెదవంతె తిలదు, గని అప్పె తెంతో

తుమ్ కిచ్చొ కెరుక మెలె, దేముడు తుమ్క దిలి సుద్ది పూర్తి నెరవెర్చువయ్ జతి రితి, సత్తిమ్ కమొక ఇండితిన్తెయ్, తుమ్చ ఆగ్గేచ వాటల్ తుమ్ సొర్ప కెర దాస్.

20 పాపుమ్చి సేవ కెర్త పాపుమ్చ గొతిమాన్సుల్ తుమ్ తిలి పొది సత్తిమ్ ఇండితి ముద్దొతెను నాయ్, 'ఆమ్ సత్తిమ్ ఇండుక నాయ్' మెన ఇష్టుమ్ అయ్లి రితి ఇండితె తిలదు.

21 గని జా పొదిచ తుమ్చ కమొచ్చి రిసా అప్పె ఉచర్లె తుమ్క లాజు. జేవ్ కమొ తుమ్క కిచ్చొ లాబుమ్ ఆన్స? కిచ్చొ పలితుమ్ దెర్ల? లాబుమ్ నాయ్, కిచ్చొ చెంగిల్ పలితుమ్ నాయ్. దన్న కమొ మాన్సుక కేనె నెతతి మెలె, నాసెనుమెతె, మొర్నుతెయి.

22 గని, పాపుమ్ ఏలుప కెర్తిన్ తెంతొ విడ్డల్ జా దేముడుచ గొతిమాన్సుల్ తుమ్ జలి తెంతొ, అప్పె కిచ్చొ పలితుమ్ దెర్తయ్ మెలె, జో దెతి సుద్ది జా, తుమ్ సుద్ది రితి ఇండితను, చి జో దెతి సుద్ది తుమ్క పరలోకుమెతె బెదయ్తయ్, తుమ్క కెయ్చ తెయ్చ జియ్డయ్.

23 జలె, పాపుమ్ జేవ్చి సేవ కెర్తనక బట్టొడి మొర్నుయి. గని, దేముడు జోవయించి సర్లక అమ్క ఆరి దిలి వరుమ్, అమ్చొ ప్రబు జలొ యేసుక్రీస్తుచి తెడి పరలోకుమెతె గెచ్చు కెయ్చ తెయ్చ జితిసి.

7

ఆగ్గుల్ తెంతొ విడ్డల్ జా క్రీస్తుచి తెడి తిలిన్

1 జలె, దేముడు మోసే తెన్ దిలి ఆగ్గుల్ జానీల బావుడ్లు, మాన్సు మొర తిలె నాయ్, గని జివ్వి తిలె పొదికయ్ జోచి ఉప్పిరి ఆగ్గుల్క అదికారుమ్ తయెదె మెన నేన్సు గే?

2 గని, కేన్ జవున్ తేర్బోదచొ మున్సుసి జివ్వి తిలి ఎదిలి, ఆగ్గుల్చి రిసా జోచి తెడి జా తయెదె, జా ఆగ్గు

పిట్టవుక నెంజె. గని మున్సున్ మొర గెలె, తెర్నిమున్సు చెంగిల్ తతి జా ఆగ్గు జేవ్చి ఉప్పిరి తయె నాయ్.

3 జాకయ్, మున్సుసి జీవ్ తిలె పొది జా తేర్బోద అన్నెక్లొక గెలె, జాక 'లంజె' మెనుల, గని మున్సుసి మొర గెలె, జా ఆగ్గు ముద్దొ కెర్లిన్ తెంతొ జా పిట్టవ జా అన్సు, చి అన్నెక్లొక పెండ్లి జలె లంజె నెంజె.

4 దన్నె, బావుడ్లు, క్రీస్తుక నంప కెర జో తెన్ తుమ్ బెదిలి రిసా, జో యేసుక్రీస్తుచి ఆగ్గే మొర్లిన్ తెన్ తుమ్ కి మొర అన్సున్, చి రిసా తుమ్చి ఉప్పిరి ఆగ్గుల్క అదికారుమ్ నాయ్. దన్నె, తుమ్ అప్పె ఆగ్గుల్చి తెడి నాయ్ చి రిసా తుమ్ అన్నెక్లొచి అదికారుమ్చి తెడి తంక వాట్ తవున్ మెనయ్ దేముడు ఇసి జర్లు కెర్లన్. జో దేముడుచి గవురుమ్ దెకయ్తి రితి అమ్ ఆత్మపలితుమ్ దెరుక మెనయ్, మొర జీవ్ జా ఉల్లో జో క్రీస్తుచి తెడి అమ్ తంకయ్ మెనయ్ ఇసి జర్లు కెర్లన్.

5 ఈంజ ఆగ్గేచ అమ్చి పాపుమ్చ అసల్క అమ్ జితె తిలి పొది ఆగ్గుల్ అమ్చి పెట్టిచ అసల్క 'పాపుమ్చయ్' మెన దెకయ్తె తిల, చి జేవ్ ఆగ్గుల్ 'దస కమొ పొస' మెన సంగితికయ్, జేవ్ పాపల్ కెర్తి ఆన ఒగ్గర్ జా గెలి. పాపుమ్ కెర్తి జా ఆన ఒగ్గర్ జా అమ్చి ఆగ్గేచ వాటల్తె బార్ జా జేవ్చి కామ్ కెర్తె తా మొర్ను ఆనీతి పలితుమ్ దెర్తె తిలి.

6 గని అప్పె, క్రీస్తు తెన్ బెద అమ్ 'మొర్లి' తెంతొ, ఆగ్గుల్ తెంతొ పిట్టవ జా అన్సుమ్. అమ్క దెర బంద తిలి జా ఆగ్గుల్క అమ్చి ఉప్పిరి అదికారుమ్ నాయ్ చి రిసా రెగిడ్ల ఆగ్గుల్చి తెడి నాయ్ గని దేముడుచి సుద్ది తిలి ఆత్మకయ్ నొవర్ జెర్మున్ జా, జయ్యి సెక్తికయ్ జోచి సేవ కెర్తసుమ్.

ఆగ్గుల్తె పాపుమ్ వాట్ చజ ఒగ్గర్

జా గెతిన్

7 జలె, కిచ్చొ మెనుమ? 'ఆగ్గులీ పాపుమ్' మెనుక జయెదె గే? నెంజె. దస్సి మెనుక జయె నాయ్. గని ఆగ్గుల్ తత్త నాయ్ జలె, 'ఆవ్' మెనుమ, 'ఆవ్ పాపుమ్ కెర్లొసా' మెన ఆవ్ సరిగా చినంతయ్ నాయ్. "అన్నె మాన్సుల్చి ఆస్తిక ఆస జా నాయ్" మెన ఆగ్గుల్తె తత్తి నాయ్ జలె, అన్నెక్లొచి ఆస్తిక ఆస జతిన్క 'పాపుమ్' మెన నేన్తయ్, ఆవ్ కి దస్సి పాపుమ్ కెర్తిసి చినంతయ్ నాయ్.

8 గని, పాపుమ్బుద్ది అంచి పెట్టి అగ్గె తెంతొ తిలన్, చి "అన్నె మాన్సుల్చి ఆస్తిక ఆస జా నాయ్" మెన ఆగ్గుల్తె తతికయ్, అంచి పెట్టిచి పాపుమ్ బుద్దికయ్ "దస్సి జలె, అన్నె మాన్సుల్చి ఆస్తిక ఆస జయిందె" మెనయ్ ఆస జలయ్, చి అన్నె ఒగ్గర్ ఆసల్, కిచ్చొ కిచ్చొచ ఆసల్ ఎత్తి జలయ్. ఆగ్గుల్ నేనై, అమ్చి పాపుమ్ నిజల్ రితి, జీవ్ నెంజిల్ రితి తా కామ్ కెరె నాయ్.

9 'ఆవ్' మెనుమ, అగ్గెయి ఆగ్గుల్చి తెడి నే తస్సె, అంచి పాపుమ్క 'అస్సె' మెన నేన కెర, అంచి ఇస్టుమ్ అయ్లి రితి సర్ద తెన్ జెతె తిలయ్, గని జా ఆగ్గు సూన్సి తెంతొ పాపుమ్ అంచి పెట్టి అన్నె జీవ్ జలన్, చి ఆవ్ మొర్లయ్.

10 దస్సి, 'జీవ్ దెతి వాట్ దెకయెదె' మెన ఆవ్ నంప కెర్లి ఆగ్గు అంక మొర్తి సిచ్చ ఆన్లన్.

11 కీసి మెలె, పాపుమ్బుద్ది అంక మోసిమ్ కెర, 'చెంగిల్' మెన ఆవ్ నంప కెర్లి ఆగ్గు వాటీ బార్ జలన్.

12 మెలె, దేముడు మోసే తెన్ దిలి ఆగ్గుల్ సుద్ది అస్సి, ఒత్తచి ఎత్తి ఆగ్గు సుద్ది అస్సె, సత్తిమ్చ తీర్పుల్ దెకయ్తయ్, చెంగిల్ అస్సె.

13 దస్సి జలె, 'ఆవ్' మెనుమ, చెంగిల్చి అంక మార్లన్ గే? నాయ్. ఆగ్గుల్ చెంగిల, గని జా చెంగిల్

తిలిన్చి ఆగ్గు పిట్టవ పిట్టవ, పాపుమీ అంచి పెట్టి జేవ్చి కామ్ కెర కెరయి మార్లి. దేముడుచి సెలవ్ కిచ్చొ మెలె, ఆగ్గుల్ వాట్ పాపుమ్ జేవ్చి కామ్ కెర్తె తతిన్తెయి పాపుమ్క, పాపుమీ మెన మాన్సుల్ చినుత్ మెనయ్, పాపుమ్ ఆగ్గుల్ వాట్ పుల పుల కెర్ది మూర్కుమ్ జా గెతయ్ గే చినుక నెంజిలిన్చి జేవ్చి కామ్ పూర్తి డెనుకయ్ మెన, దేముడు సెలవ్ దిలన్.

14 జలె, దేముడు మోసే తెన్ దిలి ఆగ్గుల్క దేముడుచి సుద్ది తిలి ఆత్మకయ్ దిలన, జోచి ఆత్మతెయ్ బెదితన, మెన ఆమ్ జానుమ్, గని ఆవ్ మాన్సుక మాములుమ్ మాన్సుచి ఆగి, మాములుమ్ మాన్సుచి బుద్ది అస్సె, చి ఈంజ ఆగ్గెతె ఆవ్ తతి ఎదిలి సేంపు పాపుమ్ అంక నేన్లి రితి అస్సె. పాపుమ్చి గొతిమాన్సు ఆవ్.

15 ఆవ్ సొంత ఇండితిసి ఆవ్ అర్దుమ్ కెరనుక నెతిర్తసి. 'సత్తిమ్ కెరిందె' మెలె కి నెత్త తా, 'గర్చి' మెన ఆవ్ నెసితిసి ఆవ్ జర్గు కెర గెల సిక్కు జా గెతసి.

16 జలె, 'పాపుమ్' మెన ఆవ్ నెసితిసి ఆవ్ కెర్తసి జలె, జా పాపుమ్ నెసిలిసి తెన్ 'దేముడు దిల ఆగ్గుల్ చెంగిలి' మెన ఒప్పున్లి రితి జతయ్.

17 తెడిక తెడి దేముడుక ప్రేమ కెర్లొ అచ్చి జా పాపుమ్ కెర్లొసా నెంజి, గని ఆవ్ మాన్సుచి ఆగి తిలి పాపుమీ జా కామ్ కెర్తయ్.

18 మెలె, అంచి సొంత సెక్తిక, అంచి ఆగి, అంక కిచ్చొ సత్తిమ్ నాయ్ మెన జాని. 'చెంగిల్చి కెరిందె' మెన ఉచరిందె, గని మాన్సుచి అంచి సెక్తిక జర్గు కెరుక నెతిరి.

19 నెత్త, 'చెంగిల్' మెన ఆవ్ ఇస్టుమ్ జలిసి జర్గు నే కెర్తె, నెసిలి పాపుమ్ జర్గు కెరయ్ గెల్లసి.

20 జలె, 'పాపుమ్' మెన ఆవ్ నెసితిసి ఆవ్ కెర్తసి జలె, దేముడుక ప్రేమ

కెళ్తో అందరి జర్లు కెర్లిసి నెంజె, గని అంచి అఁగి జేవ్చి ఇస్టుమ్ కెర, పాపుమ్ జర్లు కెర్తయ్.

21 దస్సి, కిచ్చొ ఆగ్గు డీప్తయ్ మెలె, 'సత్తిమ్ కెరిందె' మెన ఆవ్ ఉచరై పొది, పాపుమ్ పాసి రకితె అస్సి.

22 మెలె, అంచి పేట్ తెడి దేముడు మోసే తెన్ దిలి ఆగ్గుల్ రిసా ఇస్టుమ్ కెరుక ప్రేమయ్ అస్సి,

23 గని అంచి అఁగి కిచ్చొ ఆగ్గు జర్లు జతిసి ఆవ్ చినితసి మెలె, అంచి మెన్సుతె తిలిన్చి ఉప్పిరి జా వేరచి యుద్దుమ్ కెర, అంచి అఁగిచ వాటల్ తెన్ నెరవెర్లుప జతి పాపుమ్తె అంక దెర్లు సేడయ్తయ్.

24 అయ్యె! కెద్ది బాద సేడ్తసి, జా ఎత్తి రిసా! మొర్లు ఆన్తి ఈంజ పాపుమ్చి అఁగి తెంతో కో అంక రచ్చించుప కెరుల?

25 అమ్చొ ప్రబు జలో యేసుక్రీస్తుచి రిసా దేముడుక జోబర! జొయ్యి రచ్చించుప కెరెదె! జొయ్యి అమ్క జీనవ అస్సె! జలె, అప్పెచి మట్టుక అంచి మెన్సుక, జో తిలి ఆత్మక, దేముడు మోసే తెన్ దిలి ఆగ్గుల్చి రిసా దేముడుచి సేవ ఆవ్ కెర్తసి, గని అంచి అఁగిక పాపుమ్చి సేవ కెర్తసి.

8

యేసు అమ్క పాపుమ్ తెంతో మొర్లు తెంతో పిట్టవ కెర్లిసి

1 జలె, క్రీస్తు జలో యేసుచి తెడిచ మాన్సుల్క జో జోచి పాపుమ్ పుంచ అస్సెచి రిసా లోకుమ్చ ఎత్తిక జో తీర్పు కెర్తి పొది జేవ్చి కిచ్చొ సిచ్చ జంక నాయ్. నాసెనుమ్తె జేవ్ గెచ్చుక నాయ్.

2 కిచ్చొక మెలె, అమ్క ఏలుప కెర్తె పాపుమ్ చి మొర్లుచి ప్రమానుమ్చి సెక్తి తెంతో జీవ్ దెతి దేముడుచి సుద్ది తిలి ఆత్మచి ఆగ్గుతె అమ్క పిట్టవ కెరయ్

అస్సె. జో యేసుచి అత్తి, యేసుతె జర్లు జలి కామ్వాట్ విడ్డల్ కెరయ్ అస్సె.

3 మెలె, మాన్సుచి అఁగి పాపుమ్ ఏలుప కెర్తయ్. అమ్చి అఁగి ఏలుప కెర, ఆగ్గుల్ నెరవెర్లుప కెరుక తిలిసి పాపుమ్ పిట్టయ్లి. జాకయ్ ఆగ్గుల్ అమ్చి పాపుమ్ గెచ్చుక అమ్క చెంగిల్ కెరుక నెత్తిర్తి. జలె, దేముడు అమ్చి పాపుమ్ గెచ్చువ అమ్క సుద్ది కెరుక మెన మాన్సుచి ఈంజ పాపుమ్చి అఁగి రూపుమ్ జోచొ సొంత పుత్తున్క ఈంజ లోకుమ్తె తెద్రయ్లన్. దస్సి పాపుమ్ పుంచితి బలి జో జతి రిసా అమ్చి అఁగి కామ్ కెర్తి పాపుమ్ జాక జెతికయ్, జో యేసుచి అఁగి వాట్ పాపుమ్క సిచ్చ కెర గెల తీర్పు కెర్తన్*.

4 కిచ్చొక పాపుమ్క తీర్పు కెర్తన్ మెలె, ఆగ్గుల్తె సంగిలి దొర్కు జలి పున్నిమ్ అమ్చితె నెరవెర్లుప జవున్ మెనయ్. కచితె మెలె, అమ్చి అఁగిచ ఆసల్క నాయ్ గని దేముడుచి సుద్ది తిలి ఆత్మచి సెక్తికయ్ కో ఇండుమ్దె గే, అమ్మి.

5 మాములుమ్ మాన్సుచి బుద్దిక, ఈంజ అఁగిచ అమ్చి పాపుమ్చ ఆసల్క కో జితతి గే, ఈంజయి లోకుమ్తె తిలిన్ ఎత్తిక, ఈంజ అఁగిచ ఆసల్ తిలిన్ ఎత్తికయ్ కోర్వ జతతి, ఉచరై తత్తతి. గని దేముడుచి సుద్ది తిలి ఆత్మచి సెక్తిక కో జితతి గే, జా ఆత్మయి సెక్తికయ్ కోర్వ జతతి, ఉచరై తత్తతి.

6 ఈంజయ్ లోకుమ్చి, అమ్చి అఁగిచ ఆసల్ జర్లు కెర్తినక కోర్వ జతిసి మాన్సుక మొర్లుతె నెయెదె, గని దేముడుచి సుద్ది తిలి ఆత్మకకోర్వ జతిసి అమ్క జీవు దెతిసి, సేంతుమ్ దెతిసి జాఁ అస్సె.

7 మెలె, ఈంజ లోకుమ్చ, అమ్చి అఁగిచ ఆసల్ జర్లు కెర్తినక కో కోర్వ జతతి గే, జో ఎత్తి అదికారుమ్ తిలో

* 8:3 8:3 యోహాను 12:31-33 దెక, కొలోస్సియల్ 2:15 దెక.

దేముడుక విరోధుడేమీ జా అస్తి, విరోధుడేమీ కెర్తతి. దన్ని పాపుమచి ఆత్మ తిలస దేముడుచి ఆగ్గుల్ నూన్తి నాయ్, కెర్తి నాయ్. నెత్తిర్తి.

8 మాములుమ్ మాన్సుచి జోచి సొంత బుద్దిక, జోచి ఆగ్చవ ఆసల్క ఇస్టుమ్ అయ్లి రితి ఇండితన, దేముడుచి ఇస్టుమ్ కెరుక నెత్తిర్తి, జోక సర్ద కెరుక నెత్తిర్తి.

9 తుమ్, మాత్తుమ్, మాములుమ్ మాన్సుచి పాపుమ్బుద్దిచ నెంజున్, ఈంజ ఆగ్చవ ఆసల్క జితన నెంజును, నాయ్ గెద? దేముడుచి సుద్ది తిలి ఆత్మ తుమ్చి పెట్టి అస్సె జలె, జోచి ఆత్మకయ్ జితను. కేన్ మాన్సుచి పెట్టి క్రిస్తుచి ఈంజ ఆత్మ తయె నాయ్ గే, జో మాన్సు క్రిస్తుచొ నెంజె.

10 తుమ్చి పాపుమ్చి రిసా తుమ్చవ ఆగ్ మొర్ల రిత జా అస్తి, గని క్రిస్తు తుమ్చి పెట్టి అస్సె జలె, క్రిస్తుచి పున్నిమ్చి రిసా జోచి ఆత్మక తుమ్ జివ్వి అస్సెన్.

11 జో యేసుక అన్నె జియ్థో దేముడు అబ్బొన్చి ఆత్మ తుమ్చి పెట్టి జితయ్ జలె, క్రిస్తు జలొ జో యేసుక మొర్లు తెంతో విడ్డల్ కెర జియ్థో జో అబ్బొసి, మొర్ల తుమ్చవయ్ ఆగ్చక కి జియ్డెదె. తుమ్చి పెట్టి జితి జోచి ఆత్మవాటు, తుమ్చి పెట్టి జో దెతి జోచి ఆత్మకయ్ జియ్డెదె.

యేసు తెన్ అమ్ అబ్బొన్చ పుత్తర్లు

12 జాకయ్, బావుడ్లు, అమ్ పూచి జా అస్సుమ్. జా పూచి అమ్ కిసి కుట్టవక? మాములుమ్ మాన్సుచి బుద్దిక నాయ్, అమ్చి ఆగ్చవ ఆసల్ జర్లు కెర్తిన్క నాయ్. జా ఎత్తి పోన.

13 కిచ్చొక మెలె, మాములుమ్ మాన్సుచి బుద్దిక, తుమ్చి ఆగ్చవ ఆసల్క, తుమ్ జితను జలె, ఆత్మక మొర్తి. గని దేముడుచి సుద్ది తిలి ఆత్మచి

సెక్కిక ఈంజ ఆగ్చవ కమొ గెచ్చవనయ్ గెల్తె జలె, మార్తె జలె, ఆత్మక జిస్తి.

14 కిచ్చొక మెలె, దేముడుచి సుద్ది తిలి ఆత్మసెక్కిక ఇండితో ఎత్తి మాన్సు, జో దేముడుచి పుత్తర్లు జవుల.

15 మెలె, జోచి ఆత్మ తుమ్చి పెట్టి అయ్లిసి తుమ్క గొతిమాన్సుల్ కెర బియ్డిసి నెంజె. తుమ్చి అగ్గెచి బుద్దిచి రిసాచి బిడ్కి తెన్ తుమ్ అప్పె తంక నాయ్. జోచి ఆత్మ తుమ్చి పెట్టి అయ్లిసి తుమ్క జోవయించ పుత్తర్లులి కెర్తిసి. అప్పె “అంచ పుత్తర్లు తుమ్” మెన జో అమ్క దెకితయ్, చి “ఓ బ, ఓ బ” మెన జోక అమ్ ఉంక్రయ్లె, కిచ్చొ సెక్కిక ఉంక్రయ్తనుమ్ మెలె,

16 జోచ బోదల్ అమ్ జలిన్చి రిసా, జోచి సొంత ఆత్మ అమ్చి ఆత్మతె జోచ బోదల్ మెన సాచి దెతయ్చి, దన్ని ఉంక్రయ్తనుమ్.

17 అన్నె, జోవయించ బోదల్ జలమ్ మెలె, జోచి పుత్తున్ జలొ క్రిస్తు తెన్ జో దేముడుక తిలిన్తె అమ్క వాట జెయ్డె, జా వాట అమ్క కిసి సేడెదె మెలె, జో యేసు సేడ్ల బాదల్తె అమ్ బెద ఓర్పువ జా జిన్లె, జోచి పరలోకుమతెచి ఉజిడ్తె జో గవురుమ్ జతిన్తె కి బెదుమ్దె.

18 జలె, బాదల్ సేడ్డిన్చి రిసా, చి యేసు తెన్ అమ్ గవురుమ్ జతిన్చి రిసా కిచ్చొ మెంతసి మెలె, దేముడు జా ఆకర్ దీసిక అమ్క కెర్తి గవురుమ్చి రిసా ఉచర్లె, ఈంజ ఉగుమ్చ బాదల్ కెత్తి జలెకి కిచ్చొ నెంజె.

19 జో దేముడుచ పుత్తర్లు అమ్ జలిసి, జా దీసిక అమ్ గవురుమ్ జతిన్తె పూర్తి రుజ్జు జతె ఎదక జెర్మయ్లిన్ ఎత్తి. ఆస తెన్ రకితె అస్సె.

20 కిచ్చొక మెలె, తయార్ జలిన్ ఎత్తి అగ్గె తెంతో కిచ్చొ కిచ్చొ అల్లర్ సేడ సిక్కు జా అస్సె. జాచి ఇస్టుమ్క నాయ్, గని “కచితుమ్ సమయమ్ జా అయ్లి మెలె చెంగిల్ కెరిందె” మెన దేముడుచి

సెలవ్ నెరవెర్చువ జతిన్ కయ్ 'కచితుమ్ జర్గు జయెదె' మెలి రితి దయిరిమ్ తెన్ తిలి రితి రకితయ్.

21 మెలె, దేముడుచ బోదల్ పూర్తి విడ్డల్ జా గవురుమ్ జతి పొదిక జెర్మయ్ లిసి ఎత్కి కి జా పాడ్ జతిన్ తె నాసెనుమ్ జతిన్ తె సిడ్డిన్ తెంతో విడ్డల్ జయెదె.

22 తేరబోద లడెన్ జంక మెన కంట్లు పాచ జా అయ్ లి పొది కిసి కస్టల్ నొప్పల్ జా టింకితయ్ గే, దస్సి, జెర్మన్ జలిన్ ఎత్కి మొత్తుమ్ అప్పె ఎద కస్టల్ నొప్పల్ తెన్ టింకయ్ తయ్ మెన జానుమ్.

23 తెద్దిలి నాయ్ అమ్క జెతికయ్ దేముడుచి సుద్ది తిలి ఆత్మచి మొదోల్చి పంటో అమ్చి పెట్టి అస్సె. జలె, "అమ్చ ఆగ్గక, ఈంజ లోకుమ్చ బాదల్ ఎత్కి తెంతో, దేముడు అన్నె గెనన్సిసి, అమ్ జోచ పుత్తర్లు జలిసి, కెయ్క పూర్తి డీసెదె? అమ్ అన్నె కెద్ది రకుక?" మెన ఆమ్ అమ్చి పెట్టి టింక టింకయ్ రకితసుమ్.

24 అమ్చ ఆగ్గక మార్పుప కెర్తిన్ జో జర్గు కెర్తిన్ కయ్ జో అమ్క రచ్చించుప కెర అస్సె' మెనయ్ ఆస తెన్ రకితసుమ్. జలె, ఉచరుమ, దెకిలిసి జర్గు జలిన్ కయ్ 'ఆస తెన్ రకితసుమ్' మెనుక బెదె నాయ్. దెకిలిసి జర్గు జలిన్ కయ్ కో ఆస తెన్ రకితి నాయ్.

25 గని అప్పెక నే దెకిలిన్ క 'కచితుమ్ జర్గు జయెదె' మెన అమ్క ఆస తిలె, నిదానుమ్ తెన్ రకుమ్ దె.

అమ్చ ప్రార్దనల్ తె కి దేముడుచి సుద్ది తిలి ఆత్మ అమ్క తోడ్ తతిన్

26 దేముడుచి సుద్ది తిలి ఆత్మ అమ్క నెక్తి నెంజిలిన్ ఎత్కి తె కి అమ్క తోడు తత్తయ్. ప్రార్దన కెరుక జలె, కిసి ప్రార్దన కెర్కుగే నేనుమ్, గని దేముడుచి సుద్ది తిలి ఆత్మ సొంత అమ్చి పెట్టి అమ్చ

ప్రార్దనల్ తె బెద అమ్ లట్టబుక నేన్సిన్, సంగుక నెతిర్లిన్ క తోడు తత్తయ్, అమ్క సికడ్తయ్, చి అమ్ సంగుక నెతిర్లిన్ క లట్టబుక నేన్సిన్ క అమ్చి పెట్టి అమ్ టింకితిన్ చి అర్దుమ్ బెదయ్ తయ్.

27 జలె, జోచి సుద్ది తిలి ఆత్మ అమ్ జోచయ్ జల అమ్చ ప్రార్దనల్ తె తోడు తా, దేముడుచి ఇస్టుమ్ తిలిసి ఒత్త బెదయ్ తయ్. జోచి ఆత్మ కిచ్చో అర్దుమ్ బెదయ్ తయ్ గే జోయ్యి జానె. దస్సి, అమ్చి పెట్టి తిలిన్ ఎత్కి పరిచ్చు కెర్టోసాచి ఆత్మ సొంతయ్ అమ్చ ప్రార్దనల్ తె అమ్క తోడ్ తత్తయ్, బెదితయ్.

దేముడు అమ్క జినయ్ తిసి డిట్టుమ్ కెర్తిసి

28 అన్నె కిచ్చో దయిరిమ్ జతసుమ్ మెలె, దేముడుక ప్రేమ కెర్తనక, మెలె జోచయ్ జంక మెన దేముడు జోచి ఇస్టుమ్ క బుకార్లనక కిచ్చో బాదల్ అయ్ లె కి, జేవ్ బాదల్ తె కి చెంగిల్ పలితుమ్ దెర్తి రితి జా ఎత్కి చెంగిల్ క బెదిత్ రితి జో నెరవెర్చుప కెర్తయ్ మెన జానుమ్.

29 కో యేసుక్రీస్తుక నంపజా జో దెతి రచ్చన నజనుక గే జో దేముడు అగ్గె తెంతో జానె. జలె, జోచో సొంత పుత్తున్ యేసుచ రిత అమ్ జంక మెన అమ్కయ్ జో నిసాన, జా జర్గు కెరుక ఒప్పున్. దస్సి, అమ్ ఒగ్గర్ ఒగ్గర్ బావుడ్డివో జలనక యేసు తొల్పుర్ జలన్.

30 జలె, 'యేసుచ రిత జతు' మెన జో కక్క కక్క నిసాన్ల గే, జోవయింక బుకార్లన్. కక్క కక్క బుకార్లన్ గే, జోవయించి పాపుమ్ వుంచ 'అప్పె తెంతో పున్నిమ్ జా అస్తి' మెలి రితి దెకిలన్, చి కచి కచి పాపుమ్ వుంచ 'పున్నిమ్ జా అస్తి' మెలి రితి దెకిలన్ గే, "జోవయింక పరలోకుమ్ తె కడ నెయిందె, అంచి ఉజ్డితె అంచి గవురుమ్ తె బెదయిందె" మెనయ్ ఒప్పున్, చి జర్గు కెరెదె.

31 జలె, ఈంజ ఎత్కి బెదవ కిచ్చో మెనుమ? దేముడు అమ్క తోడు అస్సె జలె, కో అమ్క పాడ్ కెరుక తెరితి! నెత్తిరి!

32 జోచో సొంత పుత్తున్క బాదల్ నే పిట్టయ్తె, అమ్ ఎత్కిజిన్క పాపుమ్ తెంతో రచ్చించుప కెర్రి రిసా జోక బలి కెర మొర్నుతె సార్పు కెర దిలో. అమ్చి ఉప్పిరి జోవయింక తెద్ది ప్రేమ తిలి జలె, జో పుత్తున్క దెతిసి ఎత్కితె అమ్క కి వాట దెయె నాయ్ గే? దెయెదె.

33 దేముడు నిసాన్లచి ఉప్పిరి కో కిచ్చోయ్ నింద వయడుక తెరితి గే? కోయి నెత్తిరి! జో దేముడు సొంతయ్ అమ్చి పాపుమ్ వుంచ అస్సె. అమ్క 'పున్నిమ్' మెలి రితి దెకితయ్.

34 అమ్ జో నిసాన్లక కో తీర్పు కెర, నాసెనుమతె తెద్దవుక తెరితి గే? కో నెత్తిరి! మొర అన్నె ముక్కిమ్క అన్నె జివ్ జా ఉట్టిలో క్రీస్తు జలో యేసు అబ్బోస్ దేముడుచి ఉజెతో పక్క వెస అస్సె. జోయ్యి అమ్క సిచ్చ దెయెదె గే? నాయ్. జో సొంత అమ్చి పచ్చెనచి తీర్పు సంగితయ్.

35 జలె, క్రీస్తుచి ప్రేమ తెంతో కో జలెకి కిచ్చో జలెకి అమ్క పిట్టవ కెరుక తెరితి గే? జోవయింక అమ్క వీడుప కెరుక బాద్దల్ జవున్ తెరితి గే? ఇర్కుల్ జవున్ తెరితి గే? మాన్సుల్ కెర్త గోసల్ అల్లర్ తెరితి గే? చువ్వె తతిసి జవున్ తెరె గే? పాలల్ నెంజిలిన్ జవున్ తెరె గే? ప్రమాదల్ జవున్ తెరితి గే? మొర్తి సిచ్చ జవున్ తెరె గే? కిచ్చోయ్ అమ్క జోక వీడుప కెరుక నెత్తిరి!

36 దేముడుచ కొడెతె పూర్ణమ్ రెగ్గయ్లి రితి,

+ "తుచి నావ్చి రిసా ఒండి మెద్దెనె అమ్క మార్తతి,

'కండ కత మెండల్ జేవ్' మెలి రితి అమ్క దెకితతి" మెన రెగ్గ అస్సె.

† 8:36 8:36 క్రిస్తసలు 44:22.

37 జో అమ్క ప్రేమ కెర అమ్చి పాపుమ్ వయిలోసాచి సెక్కిక ఇన బాదల్ ఎత్కితె అమ్ పూర్తి జిన అస్సుమ్, జినుమ్దె.

38 అమ్క కిచ్చో పూర్తి దయిరిమ్ మెలె, మొర్ను జవున్, జివ్ తతిన్ జవున్, కేన్ లోకుమ్చ దూతల్ జవున్, బూతల్ జవున్, అప్పె జర్గు జతిసి జవున్, పడ్డొక జర్గు జతిసి జవున్, కేన్ లోకుమ్చ సెక్కివో జవున్,

39 ఈంజ లోకుమ్క ఉప్పిరి తిలిసి జవున్ ఎట్టో తిలిసి జవున్, జెర్మున్ జలిసి అన్నె కిచ్చో జలెకి, అమ్చో ప్రబు జలో క్రీస్తుయేసు అమ్క దొర్కు కెర్లి దేముడుచి ప్రేమ తెంతో వీడుప కెరుక నెత్తె మెన అంక పూర్తి దయిరిమ్ అస్సె.

9

దేముడు పూర్ణమ్ నిసాన్ల యూదుల్

1-2 అంచి పెట్టి ఒగ్గర్ దుకుమ్ బాద కెర్లొడ్ తెదొడ్ తాఁ గెతయ్. నిజామి, క్రీస్తుచో మాన్సు ఆవ్ సత్తిమ్ సంగితసి. జా దుకుమ్చి రిసా అంచి ఆత్మతె దేముడుచి సుద్ది తిలి ఆత్మ అంక సాచి జతయ్.

3 అంచి దుకుమ్ కిచ్చొక మెలె, జయ్యి సెకుమ్తె ఆవ్ జెర్మిలి రిసా జేవ్ అంచ సొంత మాన్సుల్ అంచ బావుడ్లు జవుల, చి జోవయింక 'యేసుక్రీస్తుక నంపజతు' మెన అంక కెద్ది ఆస మెలె, ఆవ్ క్రీస్తు తెంతో పిట్టవ జా నాసెనుమతె గెలె జోచి రచ్చున జోవయింక దొర్కు జతి జలె, జోచి ఉప్పిరిచి అంచి ప్రేమక జోవయింతె తెంతో విడ్డల్ జతయ్.

4 జోవయించి రిసా కిచ్చొక అంక తెద్ది ఆస అస్సె మెలె, 'అంచయ్ మాన్సుల్ జా అంకయ్ బక్తి కెర్తు, అంచి గవురుమ్ దెకయ్తు' మెన దేముడు పూర్ణమ్

నిసాన * ఇస్రాయేలులు జోచ పుత్రులు
 జతి జోచి †ఉజిడి, జోవయించి నెడిమి
 తతి వరుమ్ పూర్ణుమ్ తెంతో దేముడు
 జోవయింక జోచి ‡ప్రమానుమ్ కోడు
 దిలన్, జోచ కీఆగ్నల్ దిలన్, జోచి *బక్తి
 కెర్తి ఆగ్న దిలన్, †రచ్చించుప కెర్తొసా
 జెంక దిలిన్చి రిసాచ ప్రమానల్ దిలన్.

5 అబ్రాహామ్, ఇస్సాకు, యాకోబు
 జోవయించయ్ పూర్ణుమ్చ. అన్నె,
 జో మాన్సు జలిన్చి జెర్మున్క దెకిలె,
 జోవయించి సెకుమ్తె రచ్చించుప కెర్తొసా
 జలో క్రీస్తుయి జెర్మిలన్. †ఎత్తిచి ఉప్పిరి
 అదికారుమ్ తిలో దేముడుక జోబర్!
 కెయ్క తెయ్క జోవయింక గవురుమ్
 తవున్! ఆమేన్.

6 గని యూదుల్ ఒగ్గరజిన్
 అన్మానుమ్ జలిసి దెకిలె 'దేముడు
 పూర్ణుమ్ సంగిలి ప్రమానుమ్ కోడుక
 పిట్టి' మెన తుమ్ ఉచర నాయ్. పిట్టి
 నాయ్. కిచ్చొక ఇసి మెంతసి మెలె,
 †ఇస్రాయేలుచి సెకుమ్తె జెర్మిలసతె
 సగుమ్జిన్క 'ఇస్రాయేలులు' మెనుక
 నెంజె,

7 *అబ్రాహామ్చి సెకుమ్తె జెర్మిలస
 సగుమ్జిన్క 'జోవయించ బోదల్
 జవుల' మెనుక నెంజె. అబ్రాహామ్చి
 పెట్టిచ సగుమ్జిన్ జోచ నిజామ్చ
 బోదల్ నెంజిలిన్చి అర్దుమ్ కిచ్చొ మెలె,

పూర్ణుమ్ దేముడు అబ్రాహామ్క,
 †"తుచి సెకుమ్చ ఎత్తితె ఎక్కి
 ఇస్సాకుచి తెడి జెర్మిలసకయ్

'తుచయ్' మెనిందె"
 మెన ప్రమానుమ్ సంగిలన్.

8 ఈంజ టాలిచి అర్దుమ్ కిచ్చొ
 మెలె, మాములుమ్ †ఆగ్ జెర్మున్క
 జోచి సెకుమ్తె జెర్మిలస నాయ్, గని
 దేముడుచి †ప్రమానుమ్కయ్ జెర్మిలసక
 'అబ్రాహామ్చి సెకుమ్చ' మెనుక
 జయెదె.

9 జా ప్రమానుమ్ సంగిలి పొది దేముడు
 అబ్రాహామ్క,

*"సంగిలి సమయుమ్ జా అయ్లి
 మెలె, ఆవ్ అన్నె జెయిందె,
 చి సారాక పుత్తుది జెర్మెదె"
 మెన ప్రమానుమ్ సంగిలన్.

10 జా ఏక్, అన్నె, అమ్చొ పూర్ణుమ్చొ
 ఇస్సాకుచి తేర్చి రిబ్బా జో ఎక్కి మున్సున్
 తెన్ కల్వల్క అంగి జలి పొది,

11 జేవ్ కల్వల్ ఇన్నె నే జెర్మితె
 అగ్గె, జోవయింతె కో సత్తిమ్ కో పాపుమ్
 కెరుక నేతయ్ జలెకి, 'కచ కమొచి రిసా
 నాయ్, గని కక్క నిసాన్ల అంచి ఇష్టుమ్
 తయెదె గే, జోవయింకయ్ నిసాన' మెన
 మాన్సుల్క నిసాన బుకార్తి జోచి ఇష్టుమ్
 జెయిమ్ జంక మెనయ్,

12 రిబ్బాక దేముడు,

* 9:4 9:4 'ఇస్రాయేలులు' మెలె, తోలితో యాకోబు పూర్ణుమ్చొక ఎత్తి అదికారుమ్ తిలో దేముడు జా నావ్
 తిలో, అదికాండుమ్ 32:28. వడ్డె జోవయించి సెకుమ్ మొత్తుమ్క 'ఇస్రాయేలులు' మెన నావ్ తిలన్. † 9:4
 9:4 నిర్గమకాండుమ్ 33:18-23. ‡ 9:4 9:4 అదికాండుమ్ 15:18, 17:1-21, 28:13, నిర్గమకాండుమ్
 2:24, 6:2-8, 19:5, 34:10-27, సమాయేలు దొన్నెచి పుస్తకుమ్ 23:5. § 9:4 9:4 నిర్గమకాండుమ్
 20:1-17, ద్వితియోపదేశ కాండుము 5:1-22, 10:1-5. * 9:4 9:4 నిర్గమకాండుమ్ 25-31 అద్యయల్.
 † 9:4 9:4 యెనయా 53 అద్యయమ్, యిర్మీయా 23:5-6. ‡ 9:5 9:5 నెంజెలె, 'ఎత్తిచి ఉప్పిరి అదికారుమ్
 తిలో దేముడు జొయ్యి, జోవయింక జెయ్యి!...' § 9:6 9:6 మెలె 'యాకోబుచి'. * 9:7 9:7 యాకోబుక
 అబ్రాహామ్ మంత్రో అన్నెసి; అబ్బొన్చొ అబ్బొన్ జయెదె. † 9:7 9:7 అదికాండుమ్ 21:12. అబ్రాహామ్చి
 తేర్చి సారాక బోదల్ నెంజతికయ్, 'అంచి గొతిమాన్సు జలి హాగు తెన్ అంచి నావ్ తెన్ బోద పాయి' మెన సారా
 సంగితికయ్, అబ్రాహామ్ దస్సి కెర్లన్, చి 'ఇస్సాయేల్' మెన పుత్తు పాయిలన్. అదికాండుమ్ 16 అద్యయమ్.
 ‡ 9:8 9:8 తేర్చి సారాచి గొతిమాన్సు హాగు తెన్ అబ్రాహామ్ పాయిల్ పుత్తున్ ఇస్సాయేల్ ఆగుతె జెర్మున్
 జలిసా జయెదె. మాన్సుచి ఇష్టుమ్కయ్ పాయిలోసా జోచి రిసా మాములుమ్ అబ్రాహామ్చి సెకుమ్తె జెర్మిలసక
 ఇస్సాయేల్చి పెట్టి జెర్మిలస, ఇస్సాయేల్చి సెకుమ్చ టాలి జయెదె. § 9:8 9:8 ఇస్సాకు ఎత్తి అదికారుమ్
 తిలో దేముడుచి ప్రమానుమ్కయ్ జెర్మిలసాచి రిసా ఎత్తి అదికారుమ్ తిలో దేముడుచి ప్రమానుమ్ నంప కెర్లసక,
 మెలె యేసుక్రీస్తుక నంప కెర్లసకయ్ ఇస్సాకుచి పెట్టి జెర్మిలస ఇస్సాకుచి సెకుమ్చ టాలి జయెదె. * 9:9 9:9

+“దకిలోచి సేవ వెల్లో కెరెదె”

మెన సంగిలన్.

13 అన్నె, అన్నెక్తె జో,

+“దకిలో జలో యాకోబుక ప్రేమ కెర్లయ్, గని వెల్లో జలో ఏసావుక విరోదుమ్ జలయ్”

మెన రెగ్లయ్లన్.

14 జలె, అమ్ కిచ్చొ మెనుక? ఎత్తి, అదికారుమ్ తిలో దేముడు కెర్లిన్క ‘నాయిమ్ నాయ్, సత్తిమ్ నాయ్’ మెనుక జయెదె గే? జయె నాయ్. దస్సి మెనుక నాయ్.

15 కిచ్చొక మెలె, మోసేక జో,

§“కచి ఉప్పిరి దయ తియిదె గే, తియిదె.

కక్క కన్నారుమ్ దెకిన్దె గే, దెకిన్దె”

మెన సంగిలన్.

16 కేన్ మాన్సుచి ఇస్తుమ్తె నాయ్, కేన్ మాన్సుచ కమొతె నాయ్, గని దేముడుచి దయతె.

17 అన్నె, దేముడుచ కొడొతె రెగిడ్లి రితి, పడ్డొ ఇస్రాయేలుల్క అల్లర్ కెర్తె తిలో ఐగుప్తు దేసిమ్చొ రాడ్ జీవ్ తిలో పరో రానొక దేముడు,

*“ఒండి లోక్కుమ్తె అంచి నావ్ సాడువ జవున్ మెన,

తుచితె జర్లు జతి కామ్తె అంచి సెక్తి దెకయ్తి రిసాయి

తుక ఆచ్ టీవడ అస్సి”

మెన సంగ తెద్దయ్లన్.

18 కచి ఉప్పిరి జోచి దయ తియెదె గే, జోచి ఇస్తుమ్. కచి జీవ్ రాడ్ కెరెదె గే, జోచి ఇస్తుమ్!

19 దస్సి సంగిలె, “దస్సి జలె, దేముడుచి ఇస్తుమ్క జో కెర్లిసి జోచి పూచి. జాకయ్, జో కిసి కక్క పాపుమ్ వయడుక జయెదె! అమ్ రచ్చించువ జంక జోచి సెలవ్ నెంజిలె, కిసి అమ్చి పూచి జయెదె! జా పాపుమ్ వయుక కిసి అమ్చి పూచి జయెదె!” మెంతె,

20 గని, ఓ మాన్సు, తుయి కొన్నొ, చి దేముడుచి కోడుక జబాబ్ అన్నె దెతె! మత్తిక తెయార్ కెర్లి గేడి జాక తెయార్ కెర్లొ కుమ్మరొక +“కిచ్చొక ఈంజయి రూపుమ్ అంక దిలది?”

మెన పునెదె గే?

21 నాయ్. జా మత్తిచి ఉప్పిరి కుమ్మరొక పూర్తి అదికారుమ్. జయ్యి మత్తిబెండక సూటిచి గవురుమ్చి కెరెదె గే, గవురుమ్ నెంజిలి కామ్చి రిసాచి కెరెదె గే, జోచి ఇస్తుమ్.

22-23 జలె, పాపుమ్చి ఉప్పిర్చి జోవయించి కోపుమ్ దెకవుక మెన, జోచి సెక్తిచి రుజ్జు దెకవుక మెన దేముడుక ఇస్తుమ్ జలెకి, జోచి పరలోకుమ్చి ఉజడితె, గవురుమ్తె పడ్డొక బెదవనుక మెన జో అగ్గె తెంతొ నిసాన్ల గేడివొక జో కెర్తి ఎదివాట్ దయ జాన్తి ఎదక జోవయించి సిచ్చ జత నాసెనుమ్తె గెత, గేడివొ ఒండి పాపుమ్ జో మదెనె ఒగ్గర్ సేంపు ఓర్పువ జా రకితె తిలె, జోచి దయ!

24 జో ఎదివాట్ దయ కెర్లొ నిసాన్ల గేడివొ కొన్న మెలె, ఆము. ఆమ్ కొన్న మెలె, యూదుల్ తెంతొ ఆమ్ సగుమ్జిన్క జో బుకారా అస్సి, గని యూదుల్ నెంజిలస తెంతొ కి అన్నె మాన్సుల్క బుకారా అస్సి.

25 జోచ కబుర్లు పూర్లుమ్ సంగితె తిలో హోసెయ అత్తి దేముడుచ కొడొతె రెగిడ్లి రితి,

+“‘అంచయ్ మాన్సుల్’ మెన ఆచ్ అగ్గె నే సంగిలసక

తెదొడ్క ‘అంచయ్’ మెనిందె.

ఆచ్ అగ్గె ప్రేమ నెంజిలిన్క ‘ఆచ్ ప్రేమ కెర్లిసి’

మెనిందె.”

26 §“అన్నె, ‘తూమ్ అంచ మాన్సుల్ నెంజుసు’ మెన అగ్గె జో సంగిలి టాన్తె

‡ 9:13 9:13 మలాకి 1:2-3. § 9:15 9:15 నిర్గమకాండుమ్ 33:19. * 9:17 9:17 నిర్గమకాండుమ్ 9:13-16. † 9:20 9:20 మెసయా 29:16, 45:9. ‡ 9:25 9:25 హోసెయ 2:23. § 9:26 9:26 హోసెయ 1:10.

తెదొడక 'జీవ్ తిలో, జీవ్ దెతో దేముడుచ
పుత్తర్లు జేవ్' మెన మాన్సుల్
సంగుల."

27 అన్నె, ఇస్రాయేలులు మెల అమ్చ
యూదుల్చి రిసా దేముడుచ కబుర్లు
సంగితె తిలో యెసయా పూర్లుమచొ కిచ్చొ
సాడుప కెర్లి రితి జలన్ మెలె,

*"నముద్రుమచి ఒడ్డుచి ఇస్కుచ గిడ్డల్
కెత్తి జవుల గే,

ఇస్రాయేలుచ పుత్తర్లు జల యూదుల్
దస్సి ఎత్తివాట్ జిన్ జవుల,
గని జోవయింతె సేసీల రిత ఎక్కి దొన్ని
రిత రచ్చించువ జవుల.

28 కిచ్చొక మెలె, ఈంజ లోకుమ్చ
మాన్సుల్చి ఉప్పిరి కిచ్చొ
సిచ్చుచి

తీర్పు ప్రబు ఉచరెదె గే,
సత్తు తెన్ తంద్రతెన్ జో జర్గు కెరెదె."'
మెన రెగ్డ అస్సె.

29 అన్నె జా నే జతె అగ్గె తెంతో
జో యెసయాచి అత్తి జో దేముడు ప్రబు
రెగ్డయ్లి రితి జర్గు జా అస్సె. కిచ్చొ మెన
మెలె,

†"అమ్క సిచ్చు నే జత బోదల్
సగుమ్జిన్ సేన్తి రితి
పరలోకుమ్చ ఎత్తి అదికారుమ్ తిలో
దేముడు ప్రబు సెలవ్ దెతో
నాయ్ జలె,

‡సాదోమ అన్నె గొమొరా పట్నల్చి
రితి సిచ్చు జా కుడ్డె నాసెనుమ్
జతమ్"

మెన రెగిడ్డి కోడు.
30 జలె, కిచ్చొ మెనుమ? ఈంజయి.
సత్తిమ్ వాట్ నే చజిల యూదుల్
నెంజిలన దేముడు దెతి పున్నిమ్ జా
అస్సి. కిసి మెలె, నముకుమ్ వాట్.
యేసుక్రీస్తుక నంపజలి వాటు.

31 గని ఆగ్గుల్ వాట్ పున్నిమ్ జంక
ఉచర్ల అమ్చ ఇస్రాయేలుల్ మెల

యూదుల్ ఆగ్గుల్చ కమ్మొవాట్ పున్నిమ్
ఇండుక నెత్త ఆగ్గుల్ తిలిసి నెరవెర్చుప
నే కెర, ఓడుప జల.

32 నముకుమ్ వాట్ నాయ్ గని కమ్మొ
వాటీ రచ్చన దొర్కు కెరనుక ఉచర్ల.
వట్టెచొ పత్తె పిస్త్ర సేడ్ల రిత జాః ఓడుప జా
అస్సి.

33 వట్టెచొ పత్తురు మెలె, యేసుక్రీస్తు.
యేసుక్రీస్తుచి ఉప్పిరి నంపజతిసి నే
జతిన్చి రిసా అన్నెక్ కోడుతె తిలి రితి.
కేన్ కోడు మెలె,
§"ఈందె, 'సీయోను' మెల అమ్చ
యూదుల్చి వట్టె ఏక్ పత్తురు
ఆవ్ గల్తసి.

జేవ్ నంప నెంజ జో పత్తె, జో సాప్రయ్
పిసిర సేడుల,
గని జోచి ఉప్పిరి కో జో నముకుమ్
తివుల గే,
జెవ్వి కచితుమ్ లాజ్ జతి నాయ్,
ఓడుప జతి నాయ్"
మెన రెగ్డ అస్సె.

10

యేసుక్రీస్తుకయ్ నంపజలెకయ్
రచ్చించువ జంక జతిన్

1 బావుడ్లు, నంపనెంజిల అమ్చ
యూదుల్చి రిసా "జేవ్ కి నంపజా
రచ్చించువ జతు" మెన అంక జీవు డడ్డ
దేముడుక ఆవ్ ప్రార్దన కెర్తె తత్తసి.

2 నిజుమి దేముడుచి సేవ కెరుక
యూదుల్ ఆస తెన్ అస్సి మెన ఆవ్ సాచి
జతసి, గని జో దెతి రచ్చన కిసిచి గే
అర్దుమ్ నే కెరన పొరపాట్ జా గెచ్చు అస్సి.

3 మెలె, దేముడు దెతి పున్నిమ్ కేన్
వాటు దొర్కు జతయ్ గే, అర్దుమ్ నే
కెరంతె జోవయించి సాంత సెక్తిక పున్నిమ్
జంక ఉచర. దేముడు పున్నిమ్ దెతి
వరుమ్ నజన్తి రితి దాక్ కెరంతి నాయ్.

4 మెలె, ఎక్కి క్రీస్తుచి, తెడి ఆగ్గుల్
సికడ్డి పున్నిమ్ దొర్కు జతయ్,

* 9:27 9:27 యెసయా 10:22, 23. † 9:29 9:29 యెసయా 1:9. ‡ 9:29 9:29 అదికాండుమ్
13:13, 18:20, 19:24-25. § 9:33 9:33 యెసయా 8:14, 28:16, యోవేలు 2:32.

ఆగ్నుల్తె కోర్వ జా జలిసి కుట్టయ్తోసా నెరవెర్పుప కెర్తోసా జోయ్యి, చి జోచి ఉప్పిరి కోజోవయించి నముకుమ్ తివుల గే, జోవయించి పాపుమ్ జో పుంచెదె.

5 మోసేచి అత్తి రెగిడ్డిసి ఏక్ కిచ్చొ అస్సె మెలె,

*“ఆగ్నుల్తెచి పున్నిమ్ కో పూర్తి నిదానుమ్ ఇండుల గే,

జేవ్చి తెన్ జివుల”

మెన రెగ్డ అస్సె.

6 †గని నముకుమ్ వాల్ పున్నిమ్ జతిన్చి రిసాచి ఏక్ కోడు ఉచర్చుమ. “పరలోకుమతె కో వెగ గెచ్చుల? “క్రీస్తుక ఉత్తవ కడ ఆన్తి రిసా’ మెనుమ.”

7 నెంజిలె, “బూలోకుమ్క ఎట్టొ లోకుమతె కో ఉత్త గెచ్చుల?”; “క్రీస్తుక మొర్ను తెంతొ వెగవ కడ ఆనుక’ మెనుమ. నాయ్, దస్సి మెన నాయ్.

8 నముకుమ్ వాల్ చి రచ్చనచి కోడు కేనె గెతిసి నెంజె, కిచ్చొ కామ్ కెర్రిసి నెంజె. రచ్చన దూరి నాయ్. రచ్చనచి కోడు పాసి అస్సె. తుమ్చి చోడితె, తుమ్చి పెట్టి అస్సె. మెలె, క్రీస్తుచి ఉప్పిర్చి నముకుమ్చి రిసా అమ్ సుబుమ్ కబుర్ బోదన కెర్తనుమ్. జయ్యి కోడు.

9 మెలె, యేసుక ‘పరలోకుమచొ ప్రబు జోయ్యి’ మెన మాన్సుచి మొక్కె కో సంగ ఒప్పున, ‘మొర్ను తెంతొ దేముడు అబ్బొసి జోక విడ్డల్ కెర అన్నె జియడ్లన్’ మెన పెట్టి నిదానుమ్ నంపజవుల గే, జెవ్వి రచ్చించుప జవుల.

10 కిచ్చొక మెలె, †మాన్సు జోచి పెట్టి నంపజలె, జోచి పాపుమ్ పుంచి జయెదె. జోచి చోడి ఒప్పనె, జో రచ్చించుప జయెదె.

11 దేముడుచ కొడొతె రెగ్డయ్లిన్ ఉప్పిరి ఏక్ దెకిలమ్. కిచ్చొ మెలె,

* 10:5 10:5 లేవీయకాండుమ్ 18:5. † 10:6 10:6 6-7 ద్విత్వియోపదేశ కాండుము 30:12-14చి కోడు పవులు ఇన్నె బెదయ్తయ్. ‡ 10:10 10:10 నెంజిలె, మాన్సు జోవయించి పెట్టి నంపజా జోవయించి చోడి ఒప్పనె, జోవయించి పాపుమ్ పుంచి జయెదె, జో రచ్చించుప జయెదె. § 10:11 10:11 యోవేలు 2:32, రోమియుల్ 9:33. * 10:13 10:13 యోవేలు 2:32. † 10:15 10:15 యెనయా 52:7. ‡ 10:16 10:16 యెనయా 53:1.

§“జోచి ఉప్పిరి జోచి నముకుమ్ తిలొ కేన్ మాన్సుకి

కచితుమ్ లాజ్ జతి నాయ్ ఓడుప జతి నాయ్”

మెన రెగ్డ అస్సె.

12 కొన్న మెలె, యూదుల్క గ్రీసు దేసిమ్చ సుదల్క కక్కయ్ దేముడు తేడ దెకె నాయ్. జోయ్యి ప్రబు ఎత్కికయ్ ప్రబు, చి జోక నంపజా, జో దెతి రచ్చన నజితొ ఎత్కి మాన్సుక జోచి వరుమ్ జో దెయెదె.

13 దేముడుచి కొడొతె రెగ్డయ్లి రితి;

*“ప్రబుచి రచ్చన నజితొ ఎత్కి మాన్సు తుచితెయి రచ్చన అస్సె మెన ఒప్పున రచ్చించుప జయెదె” మెన అస్సె.

సుబుమ్ కబుర్ సూనయ్తి పూచిచి రిసాచి కోడు

14 జలె, మాన్సుల్ క్రీస్తుక నంప నే జలె, జోవయించి రచ్చన కిసి నజుల! జోచి రిసా నే సూన తిలె, జోక కిసి నంపజవుల! కో బోదన కెరుక నే గెలె, కిసి జోచి రిసా సూసుల!

15 అన్నె దేముడు నే తెద్రయ్లె, మాన్సుల్ కిసి జోచి బోదన కెరుల! దేముడుచి కొడొతె రెగ్డయ్లి రితి;

†“సుబుమ్ కబుర్ కో బోదన కెరుల గే, జోవయించ చట్టొ కెద్ది సూటి!” మెన అస్సె.

16 గని సూన్ల అమ్చ ఇస్రాయేలుల్ ఎత్కిజిన్ నంపజా అస్తి మెన ఉచర నాయ్. యెనయాచి అత్తి దేముడు అన్నె రెగ్డయ్లి రితి;

‡“ప్రబు, అమ్ సూనయ్లిసి కో నంపజా అస్తి?”

మెన రెగిడ్డి కోడు.

17 జలె, కొడొ సూనయ్లెకయ్ మాన్సుల్ నంపజవుల. జేవ్ కిచ్చొ

నూనుక మెలె, క్రీస్తుచి రిసొచి నుబుమ్ కబుర్ నూనవ బోదన కెర్చిసి.

యూదుల్ ఒగ్గర్జిన్ నూనుక నెసిలిన్

18 జలె, అమ్చ యూదుల్క 'నుబుమ్ కబుర్ నూన తతి నాయ్ గే?' మెన ఆవ్ పుసితసి. నూనయ్ అస్తి. జా ఒండి లోకుమ్తె నూనయ్ జలిన్చి రిసొ దేముడుచి కొడొతె రెగ్గయ్లి ఏక్ కోడు బెదితయ్.

§ "జోవయించి అవాడ్ ఒండి లోకుమ్తె నూనయి జా అస్సి, ఎత్తి దిక్కుతె కెద్ది దూరి జలెకి, జోవయించ కొడొ నూనయ్ జా అస్తి" మెన రెగ్గ అస్సి.

19 జలె, ఆవ్ అన్నె పుసితసి; 'ఇస్రాయేలు ప్రెజల్ అర్దుమ్ కెరంతి నాయ్ గే?' మెన పుసితసి జలె, మోసేచి అత్తి దేముడు,

* "అంచ యూదుల్ నెంజిలసక తుమ్ యూదుల్ గోస జతి రితి కెరిందె, బుద్ది నెంజిలి దేసిమ్చచి ఉప్పిరి తుమ్క కోపుమ్ జెతి రితి ఏక్ కామ్ జర్లు కెరిందె"

మెన యూదుల్ నెంజిలస నంపజలిన్చి రిసొ యూదుల్ గోస జతిన్చి రిసొ రెగిడ్డి కోడు.

20 పడ్డా, యూదుల్ నెంజిలస క్రీస్తుక నంపజా దేముడు తెన్ బెదితిన్చి రిసొ అన్నె సొమ్మమ్చి కోడు దేముడు యెసయాచి అత్తి రెగ్గ అస్సి.

† "అంక చజుక నే ఉచర్లన, అంక చజ అస్తి.

అంచి రిసొ నే పుసిలసక, ఆవ్ డీస అస్సి"

మెన రెగిడ్డి కోడు.

21 గని అమ్చ ఇస్రాయేలుల్చి రిసొ జోచి అత్తి కిచ్చొ రెగ్గ అస్సి మెలె,

‡ "కోడు నే నూన్త ఇస్టుమ్ అయ్లి రితి బుల్త ప్రెజల్క

ఒండి మెద్దెనె అత్తో చంపొ కెర బుకార్తె తిలయ్, గని ఆవ్ దెతి వరుమ్ నెసిల" మెన రెగ్గ అస్సి.

11

యూదుల్క దేముడు పూర్తి నే ములిలిన్

1 అప్పె కిచ్చొ పుసితసి? జోవయించ యూదుల్క దేముడు పూర్తి ముల అస్సి గే? నాయ్! ఆవ్ సొంత కి ఇస్రాయేలుడు, అబ్రాహామ్చి సెకుమ్తె జెర్మిలోసొ, బెన్యామీను చి తెగతె జెర్మిలోసొ.

2 జో దెతి రచ్చన తంక మెన జో అగ్గె తెంతో జాన్ల నిసొన మాన్సుల్క దేముడు ములె నాయ్. జా పొదిచ ఇస్రాయేలుల్చి రిసొ కిచ్చొ మెన దేముడుచి మొక్కె ఏలీయా పూర్లుమ్చొ ఏడ తీర్పు సంగిలన్ గే దేముడుచి కొడొతె అస్సి.

3 * "ప్రబు, తుచ కబుర్లు సంగితసక మార అస్తి.

తుచి నావ్ తెన్ బందిల గుడివొ బొసుడవ అస్తి.

అప్పె ఆవ్ ఎక్కిలొయి తుచ కబుర్లు సంగితొసొ అస్సి,

చి అంక కి మారుక కోర్ప జతతి" మెన ఏలీయా విడ్లన్.

4 గని దేముడు జోక

† "బయలు దేముడు" మెలొసొక నే జోకరై అంకయ్ నిదానుమ్ తత్తు మెన సత్తు వెయిల్జిన్ యూదుల్ జా పాపుమ్తె నే సేడ్డి రితి పిట్టవ అస్సి"

మెన సంగిలన్.

5 అప్పె కి దేముడుచి దయక జో నిసొన సేసిల యూదుల్ అస్తి.

6 గని జోవయించి రచ్చన కమ్మొవాట్ నాయ్, గని జోచి దయ వాటు జోవయించ

§ 10:18 10:18 కిర్వనలు 19:4. * 10:19 10:19 ద్విత్వీయోపదేశ కాండుము 32.21. † 10:20

10:20 యెసయా 65:1. ‡ 10:21 10:21 యెసయా 65:2. * 11:3 11:3 రాసల్ మొదొల్ పుస్తకుమ్

19:10, 14. † 11:4 11:4 రాసల్ మొదొల్ పుస్తకుమ్ 19:18.

దొర్కు జా అస్సె. కమ్మోవాట్ నాయ్, నెంజిలె దయ మెన సంగితిక, దయ జయె నాయ్.

7 జలె, కిచ్చొ రుజ్జు డీస్తయ్ మెలె, జేవ్ చజుక ఉచర్లిసి అమ్చ ఇస్రాయేలుల్క పిట్ట అస్సె. జోవయింతె కక్క దేముడు నిసాన్లన్ గే, జోవయింక దొర్కు జా అస్సె, గని తిలసక జోవయించి జీవ్ రాడ్ జా గెచ్చు, జా రచ్చున జేవ్ నజనుక నాయ్.

8 దేముడుచి కొణెతె రెగ్గయ్లి రితి;

‡“అప్పె ఎద కి ‘దెకుత్ నాయ్, సూనతు నాయ్’ మెనయ్, జేవ్ గుడ్డి బోయ్ రొ తతి రితి, జుమితస తతి రితి, దేముడు జర్గు కెర అస్సె”

మెన రెగిడ్డి కోడు.

9 పడ్డొ, దావీదు పూర్గుమ్చొచి అత్తి రెగిడ్డి రితి కి;

§“జోవయించి విందు అన్నిమ్ జోవయింక బోను జలి రితి జా, జోవయింక దెర్ను సేడవ్సు, సిచ్చ ఆస్సు.

10 జేవ్ గుడ్డి జా దెకుత్ నాయ్, చి జోవయించి పాటి కుబ్బి జలి రితి జా, జోవయించి పాపుమ్చి జాడు కెయెక తెయెక వయుతు”

11 జలె, జేవ్ ఇస్రాయేలుల్ పిసిర్లిసి జలె, ‘పూర్తి సేడయ్ గెతు’ మెలి ఉద్దెనుమ్కయ్ దేముడు జర్గు కెర్లన్ గే? మెన ఆవ్ పుసితసి. నాయ్! గని జేవ్ ఇస్రాయేలుల్ నంప నెంజి పొరపాట్ జతికయ్, రచ్చున దొర్కు జతి వాటు యూదుల్ నెంజిలసక దొర్కు జా అస్సె. ‘జేవ్ యూదుల్ నెంజిలస రచ్చించుప జతిసి అమ్చ ఇస్రాయేలుల్ దెక గోస జా బుద్ది ఉచరంతు’ మెనయ్ దేముడు దస్సి జర్గు కెర అస్సె.

12 జలె, జేవ్ ఇస్రాయేలుల్ పొరపాట్ జలిసి ఒండి లోకుమ్చక దేముడు దెత్తి సొమ్సారుమ్ దొర్కు కెర అస్సె జలె, జేవ్

ఇస్రాయేలుల్ ఓడుప జలిసి యూదుల్ నెంజిలసక సొమ్సారుమ్ కెర అస్సె జలె, జేవ్ యూదుల్ జల ఇస్రాయేలుల్ ఎత్తిజిన్ పడ్డొక రచ్చించుప జలె, లోకుమ్క అన్నె కెడ్డి సొమ్సారుమ్ జయెదె!

13 అప్పె, జలె, ఒత్త తిల తుమ్ యూదుల్ నెంజిలసక, జలె, ఆవ్ కిచ్చొ సంగితసి మెలె, తుమ్కయ్ సుబుమ్ కబుర్ నూనవుక మెన ప్రబు అంక జోచొ బారికి కెర తెద్రవ అస్సె. ఈంజ కామ్చి రిసొ ఆవ్ ఒగ్గర్ సర్ద జతసి.

14 తూమ్ రచ్చించుప జతిసి అమ్చ యూదుల్ దెకిలె, ఇదిల్ జవున్ గోస జా, జోవయింతె సగుమ్జిన్ ప్రబుచి రిసొచి సుబుమ్ కబుర్క ఇస్టుమ్ జవుల, చి జో దొర్కు కెర్తి రచ్చున నజనుల. దస్సి జలె, జేవ్ కి రచ్చించుప జతి కామ్తె ఆవ్ ఇదిల్ బెద తయిందె.

15 ఈంజ కిచ్చొక అంచి ఆస మెలె, దేముడు అమ్చ యూదుల్క గడియ ములయ్లి రిసొ, ఒండి లోకుమ్చ అన్నె మాస్సుల్ కి జోవయింతెన్ బెదుక వాటు అయ్లి. దస్సి కి దేముడు అమ్చ యూదుల్కయ్ అన్నె బెదవన్లె, మొర్కు తెంతొ పిట్టవ జా జేవ్ కి నొవర్ జివుల.

రూకెత్ కొమ్మల్ అంటుప కెర్తిన్

16 ‘నొబ్బొ’ మెన తొలితో బలి దిలి పాకుమ్ దేముడుక దిలి రిసొ సుద్ది జా అస్సె జలె, జా ఒండి పాకుమ్ సుద్ది జలి రితి జతయ్. అన్నె, రూక్చి చేరు సుద్ది జలె, కొమ్మల్ కి సుద్ది జవుల.

17 జలె, దేముడు నిసాన్ల ఇస్రాయేలుల్క ‘ఒలీవ రూకు’ మెనుమ. తుమ్ యూదుల్ నెంజిలసక ‘వెర్తి ఒలీవ రూక్చ కొమ్మల్’ మెనుమ. జలె, జో చెంగిలో ఒలీవ చెట్టెచ కొమ్మల్ సగుమ్ కండి జా సేడ అస్సి మెనుమ, అన్నె జా రూక్చ కొమ్మల్ గెలిన్తె తూమ్

యూదుల్ నెంజిల జా వెర్రి ఒలీవ రూక్చ కొమ్మల్ అంటుప జలదు, జో చెంగిలో రూక్చి చేరు దెతి సెక్తికె బెద తుమ్ చెంగిల్ జతి రిసాయి, జేవ్చి జీవుక తుమ్ జితి రిసాయి.

18 దస్సికయ్, 'జో చెంగిలో రూక్చ కొమ్మల్ జలమ్ ఆము' మెన తుమ్ గవురుమ్ ఉచరన నాయ్. గవురుమ్ ఉచరనుక దెర్లె, తుమ్ కిచ్చొ ఉచార కెర మెలె, తుమ్చి సెక్తిక చేరు జియె నాయ్, గని చేరుచి సెక్తికయ్ తుమ్ జియె అస్సున్.

19 తూమ్ కిచ్చొ ఉచర్తె మెలె, "అము అంటుప జతి రిసాయి ఎజోమాని కొమ్మల్ సేడయ్లన్".

20 జా కోడు కి నిజుమ్, గని జేవ్ జోవయించి అన్మానుమ్చి రిసా సేడయ్ జల. గని తుమ్ నముకుమ్ వాటు అంచుప జా టీవ్తినీ. జేవ్క ఉప్పిరి తుమ్చి రిసా తుమ్ గవురుమ్ ఉచరన నాయ్, గని దేముడుచి దయక తుమ్ బియె.

21 కిచ్చొక మెలె, జో రూక్చ సొంత కొమ్మల్ అన్మానుమ్ జలిన్క జో జోవయింక సిచ్చతె గలిలన్ మెలె, తూమ్ దస్సి అన్మానుమ్ జలె, తుమ్క కి కండ వెంట గెలెదె.

22 దేముడుచి దయచి రిసా కి, జో దెతి సిచ్చచి సెక్తిచి రిసా కి, తుమ్ చెంగిల్ ఉచర. పొరపాట్ జా సేడ్లనక జేవ్ విలువ జలి సిచ్చ జో దెయెదె, గని జోచి దయచి తెడి తుమ్ తా నముకుమ్ వాట్ ఇండితె తిలె, జోవయించి దయ తుమ్చి ఉప్పిరి తయెదె. తుమ్ జా నముకుమ్ వాట్ నే ఇండిలె, తుమ్క కి కండ వెంట గెలెదె.

23 జేవ్ కి, జోవయించి అన్మానుమ్ ములిలె, జా రూక్తె అన్నె అంటుప జవుల. కిచ్చొక మెలె, జోవయింక అన్నె అంటుప కెర్తి సెక్తి దేముడుచి అత్తి అస్సె.

24 తూమ్ జలె, వెర్రి ఒలీవ రూక్చ కొమ్మల్ కండి జా తుమ్ మాములుమ్ నే బెదితో తోట ఒలీవ రూక్తె అంటుప జా అస్సున్ జలె, అన్నె సొంత జెర్యున్క తోట రూక్తె తా కండి జా తిల కొమ్మల్క జో ఒత్త అన్నె అంటుప కెరుక జయెదె!

25 తుమ్ సొంత గవురుమ్ నే ఉచరంతి రిసా, జో దేముడు బార్ కెర్లి ఈంజ గుట్టు సరిగా అర్దుమ్ కెరన, బావుడ్డు. కిచ్చొ మెలె, 'నంపజంక' మెన జో కెత్తిజన్ యూదుల్ నెంజిలనక నిసాన్ల గే, జేవ్ ఎత్కిజన్ ప్రబుతె జెతె ఎదక, ఏక్ వెల్లి వాట ఇస్రాయేలుల్ రాడ్ జివ్ జా అస్తి.

26 గని యూదుల్ నెంజిలనతె కక్క కక్క జో నిసాన అస్సె గే, జేవ్ ఎత్కిజన్ నంపజల మెలె, ఇస్రాయేలుల్ ఎత్కిజన్ రచ్చించుప జవుల. దేముడుచి కొడతె, * "† సీయోనుతె రచ్చించుప కెర్తిసా జెర్తెదె.

'యాకోబు' మెన్ నావ్ తిల అమ్చ యూదుల్ తెంతో పాపుమ్బుద్ది జో ఉదడెదె" అన్నె,

27 † "జోవయించి పాపల్ ఆవ్ కెయెక గెచ్చువ గెలిందె గే, తెదొడక అంచి ఈంజ నే పిట్టి ప్రమానుమ్ కోడు నెరవెర్చుప జయెదె" మెన రెగ్ల అస్సె.

28 తుమ్కయ్ 'నంపజా రచ్చించుప జతు' మెన, అప్పెచి మట్టుక సుబుమ్ కబుర్చి రిసా దేముడుక జేవ్ యూదుల్ విరోదుమ్ సుదల్ జా అస్తి. గని జో జోవయింక నిసాన దెకిలె, జోవయించ పూర్గుల్క జో సంగిలి ప్రమానుమ్ కోడుచి రిసా, జో జోవయింక ప్రేమయ్ అస్సె.

29 కిచ్చొక మెలె, దేముడు దెతి వరుమ్, జో కక్క కక్క నిసాన బుకార్లిసి, జో మార్చుప కెరె నాయ్. జో దసాచొ నెంజె.

* 11:26 11:26 యెసయా 59:20, 21. † 11:26 11:26 'సీయోనుతె' మెలె, యూదుల్తె, ఇస్రాయేలుల్తె. ‡ 11:27 11:27 యిర్మీయా 31:34, యెసయా 27:9.

12

30 తుమ్ అగ్గె దేముడుచ కొడొ నే సూన్తె పాపుమ్ తెన్ తిలదు, గని జేవ్ యూదుల్ జోచి కోడు ములిలి రిసొ, జో తుమ్చి ఉప్పిరి దయ తియ తుమ్చి పాపుమ్ వుంచ అస్సె.

31 దస్సి జేవ్ అప్పె జోచి కోడు నే సూన్తె పాపుమ్ తెన్ అస్తి. కిచ్చొక మెలె, తుమ్క జో దేముడు రచ్చించువ కెర్లి వాట్కయ్ జేవ్ కి రచ్చించువ జతి రిసొయి.

32 యూదుడు జలెకి, యూదుడు నెంజిలె కి, ఎత్కి మాన్సుక జోచి దయ దెకవుక మెనయ్, ఎత్కిజిన్ ఎక్కి రితి జోచి కోడు నే సూన్లి పాపుమ్తె దెర్ను సేడుక మెనయ్ జో నెలవ్ దా అస్సి.

దేముడుచి గవురుమ్

33 దేముడుచి దయచి సొమ్మారుమ్, జోచి బుద్ది, జోచి గ్యానుమ్ కెర్లి తమ్మనచి! జోచ తీర్పుల్ కెర్లి తెల్వచ! కెర్లి తెలివి మెలె, అమ్ మాన్సుల్ కోయి అర్దుమ్ కెరనుక నెత్తుమ్, మెనుక నెత్తుమ్! జోచ కమె అమ్ కోయి పరిచ్చ కెరుక నెత్తుమ్!

34 దేముడుచి కొడొతె,

శి“ప్రబుచి పెట్టి తిలిసి కో కెయ జాన అస్తి?

జోక కో బుద్ది సంగుక జయెదె? కోయి నాయ్”

మెన అస్సె,

35 *“జో రునుమ్ జతి రితి కో కెయ జోక కిచ్చొ దా అస్తి?

కోయి నాయ్, కెయ నాయ్, కిచ్చొయ్ నాయ్”

మెన రెగ్గ అస్సె.

36 కిచ్చొక మెలె, ఎత్కి జోతె తెంతో జెతయ్, జో జెర్మయ్లో. ఎత్కి జోచి తెడి అస్సె, చి జోచి గవురుమ్ దెకయ్తి రిసొయి అస్సె. కెయక తెయక జోవయింక జోబర! ఆమేన్.

ప్రబుచి ఆత్మసెక్తిక జయ

1 దేముడు దెతి రచ్చన జోచి దయకయ్ తుమ్క దొర్కు జలి రిసొ, బావుడ్లు, అవ్ బతిమాల్పా జా తుమ్క కిచ్చొ సంగితసి మెలె, జేవ్ జోచయ్ తతి రితి, దేముడుక సర్ల కెర్లి రితి, జోక తుమ్చ ఆగ్ జీవ్ తిలి బలి దిలి రితి తుమ్ బుద్ది ఇండ. ఈంజ సేవ తుమ్క సరి జలిసి.

2 ‘ఎత్కిజిన్ ఇన దన కమె కెర్తితి, అమ్ కి కెరుమ’ మెలి రితి ఈంజ కాలుమ్చ కమె రితి తుమ్ ఇండ నాయ్. తుమ్చి ఆత్మతె నొవ మాన్సుల్ జా, చి ప్రబుచి ఇస్టుమ్ కిచ్చొ కిచ్చొ గే పూర్తి అజ్జ జస్సె. జోచి ఇస్టుమ్ కిచ్చొ మెలె, చెంగిల్ తిలిసి ఎత్కి, జోక సర్ల కెర్లిసి ఎత్కి, కిచ్చొ పొరపాట్ నెంజిలిన్ ఎత్కి మెన పూర్తి తుమ్ అజ్జ జస్సె.

3 మెలె, దేముడు అంక దిలి దయ తెన్ తుమ్క ఆవ్ కిచ్చొ బతిమాల్పా జా సంగితసి మెలె, తుమ్ కో గవురుమ్ ఉచరన నాయ్, గని తుమ్ ఎత్కి మాన్సు జాగర్ల తెన్ సరిగా పరిచ్చ కెరన, నముకుమ్చి రిసొ దేముడు కక్క కిచ్చొ సెక్తివరుమ్ దా అస్సె గే, తుమ్చితె ఎత్కి మాన్సు చినన, తుమ్క దిలి సెక్తి వాడిక కెర.

4 మెలె, ఎక్కి ఆగ్తె ఒగ్గర్ వాటల్ తవుల, అన్నె ఎత్కి వాటల్క ఎక్కి రితి కామ్ తయె నాయ్, గని ఏక్ వాటక ఏక్ కామ్, అన్నెక్ వాటక అన్నెక్ కామ్ తయెదె.

5 దస్సి, అమ్ ఒగ్గర్జిన్ జలెకి, క్రిస్తుచి తెడి ఎక్కి ఆగ్ జా అస్సుమ్, చి ఎక్కిలోక ఎక్కిలో అమ్ తోడు తంక అమ్చి పూచి,

6 జాకయ్, అమ్చితె కక్క ప్రబు కిచ్చొ సెక్తివరుమ్ దా అస్సె గే, అమ్ ఎత్కి మాన్సు బుద్ది తెన్ జా సెక్తి వాడిక కెరుక.

ప్రబుచ కబుర్లు సంగితి సెక్తి తిలోసా జలె, ప్రబు దిలి నముకుమ్ తెన్ సంగున్.

7 ప్రబు దిలి కిచ్చొ సేవ కెర్తొసా జలె, జా సేవ కెర్చు. ప్రబుచి బోదన కెర్తొ సెక్తి తతొసా జలె, బోదన కెరుక.

8 ప్రబు దిలి సెక్తిక మాన్సుల్క జాగర్తల్ సంగితో దిట్టుమ్ దయిరిమ్ కెర్తొసా జలె, జాగర్తల్ సంగుక, దయిరిమ్ సంగుక. మాన్సుల్క తోడు దెంక సెక్తి తిలోసా జలె, దర్ముమ్ తెన్ దెవుసు. సంగుమ్క ఏలుప కెర్తొ సెక్తి తిలోసా జలె, జోవయించి జా కామ్ నిదానుమ్ దెకన్చు. బాదల్ సేడ కన్కారుమ్ జలసక దెకితి సెక్తి తిలోసా జలె, సర్లబుద్ది తెన్ దెకున్.

సర్లబుద్ది ప్రేమబుద్ది తెన్ తా

9 ఎక్కి మెన్చు మాయ నెంతె మాన్సుల్క తుమ్ ప్రేమ దెకితె తా. గర్చి ఎత్తి దూరి కెర, చెంగిల్ తిలిసి దెరన.

10 బాబేన్క దెకితి సత్తిమ్ తెన్ ఎక్కిలోక ఎక్కిలో ప్రేమ దెకితె తా. దాకు కెరన ఎక్కిలోక ఎక్కిలో వెల్లో మెలి రితి దెక.

11 కెయళ బద్దుకుమ్ జా నాయ్, గని దేముడుచి సుద్ది తిలి ఆత్మ, తుమ్చి ఆత్మతె దీవు లగిల్ రిత తా, కెర్టొడ్ కి ప్రబుచి సేవ కెర్తొనె తె తుమ్చి ఆత్మ పూర్తి బెదవ.

12 పరలోకుమ్తె తుమ్ బెదితి రచ్చన కచితుమ్ నెరవెర్చుప జంక తిలిన్చి దయిరిమ్క సర్లసంతోసుమ్ తా, బాదల్ ఓర్చుప జా, ప్రార్దన కెర్తొ తా,

13 అన్నె నంపజలసక కొత్తుల్ తిలె, తుమ్క తిలిన్క తోడు దాస, చి అన్నె మాన్సుల్క గెరి బుకారా మరియాద దెక.

14 “జోక చెంగిల్ దెకు” మెన, తుమ్క అల్లర్ కెర్తనచి రిసా ప్రబుక తుమ్ ప్రార్దన కెర. “జోక ప్రబు సిచ్చ కెర్చు” మెన

తుమ్ ఉచర నాయ్. జా పోన, గని ‘జోక చెంగిల్ దెకున్’ మెనయ్ తుమ్ కోర్ప జా.

15 అన్నె, సర్ల తెన్ తిలస తెన్ సంతోసుమ్ జా, ఏడ్తన తెన్ ఏడ్డి రితి తోడు తా.

16 ఎక్కిలో తెన్ ఎక్కిలో ఎక్కి మెన్చు తెన్ జియ. * గవురుమ్ జతిన్క ఆస నే జతె, బడాయ్ నెంజిలిన్తె బెద, కిచ్చొ గవురుమ్ ఉచరన నాయ్. తుమ్క తుమీ బుద్ది తిలస మెన ఉచర నాయ్.

17 కో తుమ్క కిచ్చొ నస్టుమ్ కెర తిలె, జోక తుమ్ కిచ్చొ నస్టుమ్ అన్నె కెర నాయ్. † గని కో తుమ్క నింద కెర్చుక నెతిరి రితి, ఎత్తిజిన్ చినితి రితి సత్తిమ్ ఇండ.

18 ఎత్తిజిన్ తెన్ సేంతుమ్ తెన్ తంక ఆస జా. దస్సి, ఎక్కి మెన్చు తెన్ తతిసి తుమ్ పిట్టవ నాయ్. జేవ్ పిట్టయ్లె, జోవయించి పూచి, గని తూమ్ పిట్టవ నాయ్.

19 ప్రేమ తిల బావుడ్లు, మాన్సుల్ తుమ్క అల్లర్ కెర్తొ, జోవయంకయ్ తుమ్ అల్లర్ కెర నాయ్. పోన, దేముడు సిచ్చ కెర్తొ, కెర్చు, గని తుమి తుక్లె తా. దేముడుచి కొడెతె,

‡ “సిచ్చ కెర్తొ సెక్తి అంచి. ఏ జేవ్ అల్లర్ కెర్తనక ఆవ్వి

సిచ్చ కెరిందె మెన ప్రబు సంగితయ్” మెన రెగ్ల అస్సె.

20 § “తుమ్చొ విరోదుమ్ సుదొక చూ తిలె, జోక అన్నిమ్ దాస.

జోక తాన్ తిలె, పితిసి దాస. తుమ్ దస్సి కెర్తొ మెలె, జోచి బోడి ఆగి సువ దిలి రితి జయెదె, చి జో పూర్తి లాజ్ జా తప్పు చినంతిసి జోవయంక నొప్పి దెయెదె.”

మెన దేముడుచ కొడెతె రెగ్ల అస్సె.

21 అన్నెక్లొ తుమ్క కెర్లి గార్ తుమ్క జిన్తి రితి తుమ్ కోపుమ్ జా నాయ్, గని జో కెర్లి గార్ ఓడుప జా ప్రేమయ్ జిన్తి

* 12:16 12:16 సామెతల్ 3:7. † 12:17 12:17 సామెతల్ 3:4. ‡ 12:19 12:19 ద్విత్వియాపదేశ

కాండుము 32:35 § 12:20 12:20 సామెతల్ 25:21, 22.

రితి, తుమ్చ విరోదుమ్ సుదల్క తుమ్ ప్రేమయ్ దెక.

13

అదికారుల్క బియఁ కెర ఇండ
 1 దేసిమ్క ఏలుప కెర్త అదికారుల్క ఎత్తి మాన్సు బితు. కిచ్చొక మెలె, దేముడు సెలవ్ దెతో నాయ్ జలె, అదికారుల్ జా తత్త నాయ్, అన్నె, తిల అదికారుల్ ఏలుప కెరుక జో దేముడుచి ఇస్టుమ్.

2 జాకయ్, అదికారుల్చి కోడుక కో విరోదుమ్ కెర్తతి గే, దేముడు దిలిన్చి ఉప్పిరి విరోదుమ్ కెర్తతి, అన్నె, కో జోచి సెలవ్చి ఉప్పిరి విరోదుమ్ కెర్తతి గే, జోవయింక జోయ్యి జెతి సిచ్చ కవుల.

3 అన్నెయ్ కిచ్చొక అదికారుల్క మరియాద దెకుక మెలె, చెంగిల్ బుద్ది ఇండితసక నాయ్, గని గర్బ కమె కెర్తసకయ్ సిచ్చ కెరుల. అదికారి జలో కేన్ మాన్సుక 'సిచ్చ కెరెదె' మెలె బయిమ్ నెంతె జింక ఇస్టుమ్ జతసు జలె, సత్తిమ్ కెర, చి తుమ్క చెంగిల్ దెకెదె.

4 తుమ్క 'చెంగిల్ తత్త' మెనయ్ దేముడు జోవయింక జా సేవ దా అస్సె. గని తుమ్ నేరిమ్లు కెర్తె జలె, తుమ్ బియఁ. కిచ్చొక మెలె, సిచ్చ కెరుక జోక అదికారుమ్ అస్సె. 'నేరిమ్ కో కెరుల గే, సిచ్చ కెర్చ' మెనయ్ దేముడు జోవయింక అదికారుమ్ జోవయింక దా అస్సె.

5 జాకయ్, సిచ్చ నే సేడ్డి రిసా కి, గని అన్నెయ్ 'దేముడుచి మొక్కె అమ్ అదికారుల్క దస్సి దెకుక మెనయ్, అమ్చి పెట్టి సేంతుమ్ తంక జలె, దస్సి కెరుక అస్సె' మెనయ్ కి, అదికారుల్చి కోడు అమ్ బింక అస్సె.

6 ఇన్నెచి రిసా కి సిస్టు గట్ట దెతసు. కిచ్చొక మెలె, సిస్టు నజీత సుంకర్లు చి అన్నె అదికారుల్ ఏలుప కెర తుమ్క

దెకుక మెన, జోవయింక కామ్ దేముడు జోవయింక దా అస్సె.

7 జేవ్ ఎత్తిజిన్క దెతిసి జోవయింక దాస. సిస్టు నజుక అదికారుమ్ తిలసక సిస్టుచి డబ్బుల్ దాస, ప్రబుతుమ్క దెతిసి ప్రబుతుమ్క దాస. గవురుమ్క విలువ తిలసక గవురుమ్ దెక, చి మరియాదక విలువ తిలసక మరియాద దెక. దస్సి ఎత్తిజిన్క జేవ్చి జేవ్చి మరియాద కెరుక.

ఎక్కిలోక ఎక్కిలో ప్రేమ కెర్తె తతిసి

8 ప్రేమ కెరుకయ్, గని వేర రునుమ్ కత్తెయ్ జా నాయ్. కిచ్చొక మెలె, అన్నె మాన్సుల్క కో ప్రేమ ఇండితయ్ గే, ఆగ్గుల్ ఎత్తితె దొర్కు జలిసి నెరవెర్చుప కెర్తయ్.

9 * "లంజెకమె కెర నాయ్" మెలిన్ జలెకు, "నరు అత్య కెర నాయ్" మెలిన్ జలెకు, "చోర నాయ్" మెలిన్ జలెకు, "అన్నె మాన్సుల్చి ఆస్తిక ఆస జా నాయ్" మెలిసి జలెకు, దేముడుచ ఆగ్గుల్ ఎత్తితె తిలిసి కి ఎక్కి ఒడుగుతె బెదితయ్. కేన్ ఒడుగుతె మెలె,

† "తుక తూయి కెద్ది ప్రేమ కెరంతసి గే, తుచి పాసిచో మాన్సుక తెద్ది ప్రేమ తుయి కెరుక"

మెన దేముడుచ కొడెతె రెగ్లవ అస్సె.

10 అమ్చి పెట్టి ప్రేమ తిలె, పాసిచో మాన్సుక కిచ్చొ అల్లర్ కెరుక నెసుమ్. జాకయ్, ప్రేమతెయి ఆగ్గుల్ ఎత్తి నెరవెర్చుప జతయ్.

ప్రబు అన్నె ఉత్త జెతి వెల్లి దీసి పాసి జెతయ్

11 అన్నె, ప్రబు సంగిలి సమయుమ్ పాసి జా అస్సె మెన జాన్సు. మెలె, అగ్గె నిజ తిలె కి, అప్పె ఉట్ట తెలివి జా తంకయ్ అస్సె. సమయుమ్ జా గెచ్చ అస్సె. అమ్ తొలితొ నంపజలి కంట, అమ్చి రచ్చన పాసి జా అస్సె.

* 13:9 13:9 నిర్ణయకాండుమ్ 20:13-15, 17. ద్వితీయాపదేశ కాండుము 5:17-19, 21. † 13:9 13:9 లేవీయాకాండుమ్ 19:18.

12 రాత్ పాయితి రితి, ఉజిడ్ జయెదె. జాకయ్ అందర్బుద్దిచ కమె వెంట గెల కెర, ఉజిడ్ బుద్దిచ అయ్దల్ గలనుమ.

13 మెద్దెనెచి ఉజిడ్తె బెదిత కమొతె ఇండుమ. మెలె, 'సర్ల కెర్లనుమ్' మెన వెట్కారుమ్ జతిసి, మచ్చితిసి పోన. లంజెకమొ, ఆగ్చె ఆస ముద్దో నే కెరంతిసి పోన. కొడొ జుజవ జట్టి జతిసి, గోసల్ కెర్తిసి, పోన.

14 గని ప్రబు జలో యేసుక్రీస్తుచి బుద్ది గలన, మాన్సుచి ఆగ్చ తుమ్చ ఆసల్ నెరవెర్పుప నే కెరంతి రితి జాగర్ల తా, దసచక కిచ్చో వాటు దాస నాయ్.

14

ఇసి కెర్లె గారు దస్సి కెర్లె చెంగిలి

1 సంపజలన కీసి ఇండుక గే ఇదిల్ నేన్లొ కేన్ సంపజలనక బెదవన, గని ముక్కిమ్ నెంజిలీన్చి రిసా జోవయింతెన్ కామ్క నెంజిల కొడొ జుజవుక పోన.

2 ఏకీచి రిసా ఉచరుమ. "కిచ్చో కి కంక జయెదె" మెన, దయిరిమ్ తిలోసా ఉచరెదె, గని "ఈంజ జా గారు" మెంతి అలవాట్ తెంతో పూర్తి విడ్డల్ నే జలోసా కో జలెకు ముక్కల్ గట్ట కయె నాయ్.

3 జలె, తుమ్చితె నే కతోసాక, కతోసా నిస్కారుమ్ దెకున్ నాయ్, చి కతోసాక, నే కతోసా నిస్కారుమ్ దెకున్ నాయ్. కిచ్చొక మెలె, దేముడు ఇన్నెక కి జోవయింక కి బెదవన అస్సె.

4 అన్నెక్లొచో సేవ కెర్తొన్చి రిసా తుమ్చితె కో తీర్పు కెరుక కొన్సు? జోవయింక 'చెంగిల్' మెనుక గే 'గార్' మెనుక గే కచి సెక్తి మెలె, జోచో సొంత ఎజొమానిచి సెక్తి, అన్నె కచి నాయ్. జో నిజామి సంపజలోన్ జలె, కో వేర ఉచర్లె కి, జో టీవెదె. కిచ్చొక మెలె, జోక టీవెడుక ప్రబుక సెక్తి అస్సె.

5 పడ్డొ, ఏకీ దీసిచి కంట అన్నెక్ దీసిక 'ఎల్లకాలుమ్చి రిసా ముక్కిమ్చి' మెన ఎక్కిలో ఉచరెదె, గని అన్నెక్లొ జలె, ఎత్తి దినాల్క ఎక్కి రితి దెకితయ్. ఎత్తి మాన్సు ఈంజేవ్ దొన్నెతె కేన్ రగుమ్ ఉచర్లసు గే, సరిగా ఉచర తా. ఎత్తి మెన్సు నిదానుమ్ ఇండ.

6 దీసిక, "ప్రబుచి గవురుమ్ దెకయ్తి రిసా ఈంజ జా కామ్ పలాన దీసి కెర్లె చెంగిల్" మెన కో ఉచర్లయ్ గే, ప్రబుచి గవురుమ్ ఉచర్లయ్. దస్సి, 'తుయి దిలిసి' మెన దేముడుక ఉచరయ్ కో ముక్కల్ కతయ్ గే, ప్రబుక గవురుమ్ దెతయ్. దస్సి కి, ముక్కల్ నే కతోసా కో జలె, జో కతిన్క 'తుయి దిలిసి' మెన దేముడుక ఉచర్లె, జో కి ప్రబుక గవురుమ్ దెతయ్.

7 అమ్చి రిసా అమ్మి జిము నాయ్, మొరుమ్ నాయ్.

8 అమ్ జలె, ప్రబుచి సేవచి రిసాయి జితనుమ్. అమ్ మొర్లె, జా కి జోచి సేవ. జాకయ్, అమ్ జలె కి మొర్లె కి, జోచయ్ మాన్సుల్ అమ్. జోయ్యి అమ్చో ఎజొమాని.

9 ఇసికయ్ క్రీస్తు మొర్లన్ చి అన్నె జిలన్. మెలె, మొర్లుక జీన కెర, మొర్లనక కి, జితనక కి జో ప్రబు జా, ఎజొమాని జా, ఏలుప కెరుకయ్.

10 తుమ్క బావుడ్లు జల అన్నె సంపజలన్ చి రిసా తుమ్ కిచ్చొక అల్లర్చ తీర్పుల్ ఉచర్లసు, నిస్కారుమ్ ఉచర్లసు? లోకుమ్చక జో పరిచ్చ కెర్తి వెల్లి దీసిక అమ్ ఎత్తిజిన్ ప్రబుచి మొక్కె టీవ, జోచి అత్తి తీర్పు జమదె.

11 దేముడుచి కొడొతె, "ఆవ్ కచితుమ్ జివ్వి అస్సి. దస్సి, కచితుమ్, అంచి చట్టె ఎత్తి మాన్సు మొగ్రల్ టెక సెర్ను సేడుల, చి

‘తుయి దేముడు. తీర్పు కెరుక తుచి అత్తి అస్సె’

మెన ఎత్కి చోండి ఒప్పునుల మెన ప్రబు సంగితయ్”

మెన రెగ్గవ అస్సె.

12 జలె, ఈంజ లోకుమ్తె అమ్ ఇండిలి బుద్దిచి రిసా దేముడు సొంతచి మొక్కె తెదోడక అమ్ ఎత్కి మాన్సు సాచి నజనుక తయెదె.

13 జాకయ్, అప్పె తెంతో ఎక్కిలోచి ఉప్పిరి ఎక్కిలో తీర్పుల్ కెరుమ నాయ్, గని కేన్ బావొ ఆత్మక నే పిసిర్ది రితి, కేన్ పొరపాట్ నే జతి రితి, జో ఆత్మక డిట్టుమ్ జతిసి నే పిట్టి రితి, ఎక్కి మెన్సు తెన్ ఇండుక అమ్చి పెట్టి ఒప్పునుమ.

14 ప్రబుచి తెడి తా కిచ్చొ జాని, కిచ్చొ పూర్తి దయిరిమ్ తెన్ అస్సి మెలె, జేవ్చి సొంత సెక్తిక కిచ్చొ వస్తువచి రిసా ‘గార్’ మెనుక నెంజె. గని జాక ‘గార్’ మెన కో దెకితయ్ గే, జోకయ్ జా గారు జయెదె.

15 జాకయ్, తుమ్ కేన్ జవున్ రగుమ్ కతిసి అన్నెక్టొచి ఆత్మతె జోవయింక అల్లర్ కెరెదె మెన తుమ్ జాన జానయ్ కయ్లె, తుమ్ ప్రేమయ్ ఇండుక ముల తస్తె. తుమ్ కేన్ జవున్ రగుమ్ కయ్లె ప్రబు మొర రచ్చించువ కెర్లొ అన్నెక్టొచి ఆత్మతె జోక పాడ్ కెరెదె జలె, జా కంక పొన.

16 జాకయ్, ‘చెంగిల్’ మెన కేన్ అలవాట్చి రిసా తుమ్ జాన్సు జలెకి, వేర మాన్సుల్చి మొక్కె జా కామ్చి రిసా ప్రబుచి నావ్ నిస్కారుమ్ జయెదె జలె, జా నే కయ్లె చెంగిలి.

17 కిచ్చొక మెలె, దేముడుచి రాజిమ్తె బెదితిన్క కతిసి పితిసి ముక్కిమ్ నాయ్, గని దేముడుచి సుద్ది తిలి ఆత్మ దెతి సత్తిమ్ సేంతుమ్ అన్నె సంతోసుమ్, జేవ్ ముక్కిమ్.

18 ఈంజివ్ వరుమ్ ఇండితి రితి కో క్రిస్తుచి సేవ కెరుల గే, ‘చెంగిల్’ మెన దేముడు కి మాన్సుల్ కి దెకుల.

19 జాకయ్, ఎక్కి మెన్సు తెన్ తతిన్చి రిసా, ప్రబుచి ఉప్పిర్చి అన్నె మాన్సుల్చి

నముకుమ్ డిట్టుమ్ కెర్తినచి రిసా కిచ్చొ కిచ్చొ కామ్క జెయెదె గే, జయ్యి ముక్కిమ్ ఉచర్తె తమ.

20 ఎక్కి కతిసి నే కతిన్చి రిసా మాన్సుచి పెట్టి దేముడు కెర్తి కామ్ తుమ్ పాడ్ కెర నాయ్. నిజమి ఎత్కిక కి ‘కంక జయెదె’ మెనుక జయెదె, సుద్ది అస్సి, గని అమ్ కతిన్చి రిసా, అన్నెక్టొ జోచి ఆత్మతె తప్పు జలి రితి జయెదె జలె, అమ్చి తప్పు.

21 తుమ్ ముక్కల్ కతిసి జవున్, కేన్ రగుమ్ పితిసి జవున్, కిచ్చొ కామ్ కెర్తిన జవున్, తుమ్చొ బావొ జతో కేన్ సంపజలనచి ఆత్మతె జోవయింక పాడ్ కెరెదె జలె, జా కామ్ తుమ్ ములిలె చెంగిలి.

22 జలె, ‘ఇసి దస్సి కెర్లె చెంగిల్’ మెన తుమ్చి పెట్టి కిచ్చొ నముకుమ్ అన్సున్ గే, తుమ్చి పెట్టి దేముడుకయ్ ఒప్పున. ‘ఆవ్ కయ్లె తప్పు నెంజె’ మెన కక్క దయిరిమ్ తయెదె చి ‘ఆవ్ కయ్లె కచి ఆత్మతె జోవయింక పాడ్ కెరె నాయ్’ మెన జో జొన్లె, జో మాన్సుక చెంగిలి.

23 గని ‘కయ్లె తప్పు’ మెన కో ఉచరయ్ కయ్లె, ప్రబుచి సిచ్చు ఆనన్తయ్. కిచ్చొక మెలె, జో కయ్లిసి జోచి పెట్టి జో ఉచర్లిన్ తెన్, జోవయించి నముకుమ్ తెన్, బెదె నాయ్. ‘పలాన కామ్ కెర్లె చెంగిల్’ మెలి దయిరిమ్ అమ్చి పెట్టి నెంజిలె, జా కామ్ అమ్ కెర్లె పాపుమ్ జతసుమ్.

15

దేముడుచి గవురుమ్ దెకవుక

1 అమ్ ఆత్మక డిట్టుమ్ తిలన జలె, డిట్టుమ్ నెంజిలనచి జాడు వయిలి రితి జోవయించ అన్మానల్ ఓర్పువ జా అమ్చి ఇస్తుమ్ గడియ ములిలె చెంగిలి.

2 అన్నె మాన్యుల్ క 'ఆత్మక డిట్టుమ్ జా చెంగిల్ జతు' మెన, జోవయించి ఇష్టుమ్ తిలిన్ క మరియాద్ దెకుమ.

3 కిచ్చొక మెలె, క్రీస్తు ఎక్కి జోచి సొంతయ్ ఇష్టుమ్ కిచ్చొ కెరె నాయ్, గని దేముడుచి కొడొతె రెగిణ్ణిసి జొయ్యి సంగిలి

*"దేముడు ఓ బ, తుక మాన్యుల్ కెర్ల నిందల్ అంకయ్ లయ అస్తి"

మెన జో సంగిల్ రితి అస్సె.

4 జలె, పూర్ణుమ్ రెగిణ్ణిసి కిచ్చొక రెర్ల అస్సె మెలె, అమ్ కయ్ 'సిక్కుత్' మెనయ్ రెర్ల అస్సె. దస్సి, దేముడుచి కొడొతె రెర్లయ్ లిసి అమ్ క నిదానుమ్ దయిరిమ్ సికణ్ణె, అమ్ దయిరిమ్ డిట్టుమ్ జమ్ దె.

5 యేసుయి జో ఇండిలిన్ క తుమ్ క వాట్ దెకయ్ లి రితి తుమ్ ఎక్కిలో తెన్ ఎక్కిలో దస్సి ఎక్కి మెన్సు తెన్ జితి రితి, నిదానుమ్ దెతో దయిరిమ్ దేముడు తుమ్ క సెక్కి దెవుసు,

6 చి తుమ్ ఎక్కి మెన్సు తెన్ ఎక్కి అవాడ్ రితి జా, అమ్ చొ ప్రబు జలో యేసుక్రీస్తుచొ అబ్బొన్ జలో దేముడుచి గవురుమ్ దెకయ్ తె తస్సె.

7 జాకయ్, క్రీస్తు తుమ్ కయ్ బెదవన్లి సర్ల తెన్, దేముడుచి గవురుమ్ దెకయ్ తి రిసా తూమ్ కి ఎక్కిలోక ఎక్కిలో బెదవన.

8 కిచ్చొక మెలె, తుమ్ క ఆవ్ కిచ్చొ మెంతసి మెలె, క్రీస్తు † యూదుల్ క సేవ కెర్తొసా రితో జలో. కిచ్చొక మెలె, దేముడుచి సత్తిమ్ దెకవుక. కీసి మెలె, జోవయించ పూర్ణుల్ క దేముడు దిల ప్రమానల్ నెరవెర్చుప కెర్తి రిసా.

9 అన్నె కిచ్చొచి రిసా మెలె, యూదుల్ నెంజిలసక కి జో దెతి రచ్చన జో దొర్కు కెర్లె, జోవయించి దయ కన్కారుమ్ చి

రిసా జేవ్ కి దేముడుక గవురుమ్ దెతు మెనయ్. దేముడుచి కొడొతె దావీదు పూర్ణుమ్ చొ;

† "జేవ్ కి, యూదుల్ నెంజిలస తెన్ కి సర్ల జా,

గాయ గాయ తుచి నావ్ గవురుమ్ కెరుమ్ దే"

మెన రెర్ల అస్సె.

10 పడ్డొ దేముడుచి కొడొతె,

‡ "జోవయించ సొంత మాన్యుల్ తెన్ తూమ్ కి, యూదుల్ నెంజిలస, సర్లసంతోసుమ్ జా"

మెన మోసేచి అత్తి రెర్ల అస్సె.

11 పడ్డొ దావీదుచి అత్తి అన్నె రెగిణ్ణిసి,

* "యూదుల్ నెంజిల ఎత్తి దేసిమ్ చ, ఒండి లోకుమ్ చ మాన్యుల్, ప్రబుచి గవురుమ్ గాయ"

మెన రెర్ల అస్సె.

12 పడ్డొ అన్నె, యెసయాచి అత్తి దేముడుచి కొడొతె,

† "యెస్సయిచి సెకుమ్ తె ఎక్కిలో జెర్మెదె.

జొయ్యి ఉట్ట, యూదుల్ నెంజిలసక ఏలుప కెర్మెదె, చి

జోచి ఉప్పిరి నముకుమ్ తియ, జేవ్ యూదుల్ నెంజిలస రచ్చనచి దయిరిమ్ తెన్ తవుల"

మెన రెగిణ్ణి కోడు.

13 జలె, రచ్చన జతి దయిరిమ్ దెతో దేముడు సొంత తుమ్ చి పెట్టి జోచి నముకుమ్ చి సర్ల సేంతుమ్ దెవుసు, చి దేముడుచి సుద్ది తిలి ఆత్మచి సెక్కి తుమ్ చి ఆత్మతె తా, తుమ్ చి ఆత్మ పూర్తి డిట్టుమ్ దయిరిమ్ జా గెచ్చెదె.

యూదుల్ నెంజిలసతె పవులు ప్రబుచి కామ్ కెర్మెసి

14 ఆవ్, బావుడ్లు, తుమ్ చి రిసా కిచ్చొ దయిరిమ్ తెన్ అస్సి మెలె,

* 15:3 15:3 కీర్తనలు 69:9. † 15:8 15:8 ఈంజ ఉత్తుమ్ తొలితొ రెగిణ్ణి కార్గల్ తె కిచ్చొ అస్సె మెలె, 'యూదుల్ జతి గుర్తుచి సున్నతి కెరన్లసక సేవ కెర్తొసా...' ‡ 15:9 15:9 నమూయేలు దొన్నిచి పుస్తకుమ్ 22:50, కీర్తనలు 18:49. § 15:10 15:10 ద్వితీయాపదేశ కాండుము 32:43. * 15:11 15:11 కీర్తనలు 117:1. † 15:12 15:12 యెసయా 11:10.

తుమ్చి పెట్టి ప్రబుచి సత్తిమ్ అస్సె. జో దెతి గ్యానుమ్ అస్సె, చి ఎక్కిలోక ఎక్కిలో బుద్ది సంగుక తుమ్క సెక్తి అస్సె. జా ఎత్కిచి రిసా అంక దయిరిమ్.

15 గని, సగుమ్ కమొచి రిసా తుమ్క ఇదిల్ గట్టిజ సంగిల్ రితి రెగ్గ అస్సి, తుమ్క పచ్చుత్ నాయ్ మెన. దేముడు అంక దిలి అదికారుమ్ వరుమ్చి రిసా ఆవ్ జా రెగుడుక జయెదె.

16 జో దిలి అదికారుమ్ వరుమ్ మెలె, యేసుక్రీస్తుచి రిసాచి జోచి సుబుమ్ కబుర్ నూనవ నూనవ, జో దేముడుచి సేవ కెర్తొ పూజరి మెలి రితో ఆవ్ జంక మెన జో నిసాన కామ్ తియార్లి వరుమ్. మెలె, యూదుల్ నెంజిలనక క్రీస్తుక నంపజా దేముడుచి సుద్ది తిలి ఆత్మచి సెక్తిక జేవ్ జోచయ్ జా, సుద్ది జా దేముడుక సరి జలి బలి జతి రితి, జోచి అత్తి ఆవ్ సార్పు కెర దెంక.

17 జలె, దేముడుచి సేవ ఆవ్ కెర్లిన్చి రిసా 'చెంగిల్చి' మెన క్రీస్తు జలొ యేసుచి తెడి అంక దయిరిమ్.

18 మెలె, యూదుల్ నెంజిలన జోవయించి ఉప్పిర్చి నముకుమ్ ఇండితి రితి క్రీస్తుయి అంచి అత్తి జర్గు కెర్లిన్చి రిసాయి ఆవ్ సంగితసి. జో ప్రబు కిసి ఈంజ కామ్ అంచి అత్తి జర్గు కెర్లన్ మెలె, ఆవ్ బోదన కెర్లిన్తె, ఆవ్ ఇండిలి బుద్దితె,

19 జో అంచి అత్తి కెర్ల జోచి గుర్తుచ వెల్లో కమొతె, జో దిలి దేముడుచి సుద్ది తిలి ఆత్మచి సెక్తికయ్ జర్గు కెర్లన్. దస్సి, జోచి సెక్తికయ్, యెరూసలేమ్ పట్టుమ్ తెంతో తుమ్క సముద్రుమ్ ఒత్తల్తోచి ఇల్లారికు ప్రదేసిమ్చి ఎదిలి దూరిక క్రీస్తుచి సుబుమ్ కబుర్ జా ఎత్కితె ఆవ్ నూనవ అస్సి.

20 దస్సి, అంచి ఆస కిచ్చొ మెలె, వేర మాన్సు పునాది కెర్లి ఉప్పిరి బందుక నెన, క్రీస్తుక మాన్సుల్ నంపజా తిలిన్తె

నాయ్, గని వేరతెయ్, మాన్సుల్ జోక నేన్లిన్తెయ్ సుబుమ్ కబుర్ నూనవుక అంచి ఆస.

21 దేముడుచి కొడొతె;
‡“జోచి రిసా కో అగ్గె నే నూనయ్లన నూన,
జేవ్ గుడ్డి మెలి రితి జలిసి గెచ్చు, దెకుల.
జోచి రిసా కెయ్క నే నూన్లన అర్దుమ్ కెర్లనుల”
మెన రెగ్గయ్లి కోడు.

రోమ్ పట్టుమ్చ గెచ్చుక మెన పవులు ఉచర్లిసి

22 జలె, సుబుమ్ కబుర్ నే నూన్ల టాన్లుతె గెచ్చు నూనవుక అంచి కామ్ తిలి రిసా, అప్పెక తుమ్తె జెంక అంక వాటు తయ్ నాయ్.

23 గని అప్పె, ఈంజేవ్ ప్రాంతుమ్లుతె అంక అన్నె కామ్ నాయ్ మెన, ఒగ్గర్ వెర్పుల్ తెంతో తుమ్తె జెంక అంచి ఆసచి రిసా,

24 స్పాయిను దేసిమి ఆవ్ గెతి పొదిక, వట్టె తుమ్తె గోత్ జా తుమ్క దెకుక ఉచర్లిసి. సర్ల తెన్ గడియ తుమ్చి తెన్ తా పుండిలయ్ మెలె, తుమి అంక బార్ కెర వట్టె తెర్లయ్తె.

25 గని అప్పె యెరూసలేమ్తె ఉట్ట గెతసి; ఒత్తచ నంపజలన్క తోడు న దెంక.

26 మాసిదోనియచ చి అకయచ నంపజలన్క యెరూసలేమ్చ యూదుల్చ బీద జల న్నంపజలన్క తోడు ఉక్కుల తెర్లవుక ఇస్టుమి జల.

27 ఈంజేవ్ ఇస్టుమ్ జల, గని అన్నె జేవ్ యెరూసలేమ్చ నంపజలన్తె రునుమ్ జలి రితి జా అస్తి. మెలె, యూదుల్కయ్ దేముడు దిల ఆత్మవరల్తె ఈంజేవ్ యూదుల్ నెంజిలనక వాట అయ్లి రిసా రునుమ్ జలి రితి జా అస్తి, చి జేవ్ యూదుల్క కిచ్చొ జవున్ ఈంజ లోకుమ్తె కామ్క జెతికయ్ తోడు ఈంజేవ్ యూదుల్ నెంజిలన దిలె, చెంగిలి.

‡ 15:21 15:21 యెసయా 52:15.

28 జాకయ్, ఈంజేవ్ ఉక్కిలి తోడు నా దెతి కామ్ కుట్టయలయ్ మెలె, స్పాయిన్తె గెతి వట్టె తుమ్తె జెయిందె,

29 చి తుమ్తె పావ అయ్లె, క్రీస్తు దెతి ఆత్మసెక్తి అంచి వెట్టి బెర తా జా సెక్తి తెన్ని జెయిందె మెన జాని.

రోమియుల్ పవులుచి రిసా ప్రార్థన కెరుక

30 బావుడ్లు, 'అమ్చొ ప్రబు జలో యేసుక్రీస్తుచి నావ్ తెన్ చి దేముడుచి సుద్ది తిలి ఆత్మచి ప్రేమక, అంచి రిసా దేముడుక తుమ్ ప్రార్థన కెర కెర అంక తోడు తా' మెన తుమ్క ఆవ్ బతిమాల్పా జా సంగితసి.

31 కిచ్చొచి రిసా మెలె, ఆవ్ అప్పె గెతి యూదయ ప్రదేసిమ్చ యేసుచి రిసా అన్యానుమ్ తిలసతె ఆవ్ దెర్ను నే సేడ్డి రిసా, పడ్డొ ఒత్తచి యెరూసలేమ్ పట్టుమ్చ నంపజలసచి రిసాచి అంచి సేవ జోవయింక చెంగిల్ సేడ్పు మెనయ్ తుమ్ ప్రార్థన కెర.

32 దస్సి జెయిమ్ జలి మెలె, సర్దసంతోసుమ్ తెన్ ఆవ్ తుమ్తె జెంక జయెదె, చి తుమ్చి తెన్ తా సర్ద తెన్ వుండుక జయెదె.

33 సేంతుమ్ దెతో దేముడు సొంత తుమ్చి తెన్ తవున్! అమేన్.

16

సర్ద తెన్ సంగుమ్తె బెదవనుక

1 క్రీస్తుచి తెడి అమ్క అప్ప జలి పీబే, కెంక్రేయ పట్టుమ్చి సంగుమ్తె వెల్లో తేర్బోద జా ప్రబుచి సేవ కెర్తయ్. జాక 'సత్తిమ్చి' మెన ఆవ్ సాచి జతసి.

2 తుమ్తె జా అయ్లె, ప్రబుచయ్ జల మాన్సుల్క దెకితి మరియాద తెన్ జాక బెదవన, చి కిచ్చొ కామ్తె జేవ్ కి తోడు కావలె మెలె, తోడు తా. కిచ్చొక మెలె, అగ్గె తెంతొ ఒగ్గర్జిన్ నంపజలసక జా తోడు కెర అస్సె, అంక కి.

3 యేసుక్రీస్తుచి కామ్ అంచి తెన్ బెద కెర్ల ప్రిస్కిలక చి అకులక అంచి ప్రేమ సంగ.

4 అంక 'మొర్ను నాయ్' మెన జా సుట్టు జెవ్వి ప్రమాదుమ్ జల. ఎక్కి ఆవ్ మెన నాయ్, గని యూదుల్ నెంజిల బావుడ్లుచ సంగుమ్లు ఎత్కి జేవ్ దొగులచి కామ్చి రిసా అంచి తెన్ జోవయింక సర్ద కి సంగితసుమ్.

5 జోచి గెరి సబ కెర్తి సంగుమ్చ ఎత్కిజిన్క అంచి ప్రేమ సంగ. ప్రేమ తిలో ఎపైనెటుక అంచి ప్రేమ సంగ. ఒండి ఆసియా ప్రదేసిమ్తె జొయ్యి తోలితో ప్రబుక నంపజా మార్పుప జలో.

6 తుమ్చితె నిదానుమ్ కామ్ కెర్లి మరియక కి సంగ,

7 పడ్డొ అంచ బందుగుల్ జత అంధ్రోనిక చి యూనియక కి. అంచి తెన్ జేవ్ జేలి జా తిల. ప్రబుచి సుబుమ్ కబుర్ సంగిత బారికుల్తె జోవయింక గవురుమ్ దెకితతి, చి అంచి కంట అగ్గెయి క్రీస్తుచ మాన్సుల్ జల.

8 పడ్డొ, ప్రబుచి తెడి ఆవ్ ప్రేమ తిలో అంప్లియతునక అంచి ప్రేమ సంగ.

9 పడ్డొ క్రీస్తుచి కామ్తె అమ్చి తెన్ బెదిలో ఊర్బానుక, చి ప్రేమ తిలో స్టాకునక అంచి ప్రేమ సంగ.

10 క్రీస్తుక సత్తిమ్ తిలో అపెల్లెక చి అరిస్టాబూలుచి కుటుంబుమ్చ ఎత్కిజిన్క సంగ.

11 అస్సె, అంక బందుగుడు జతో హెరోదియోనుక చి నార్కిస్సు చి కుటుంబుమ్తె ప్రబుక నంపజలసక సంగ.

12 పడ్డొ, ప్రబుచి కామ్ కెర్త త్రువైనా చి త్రుపోసా మెల తేర్బోదల్క జోబర సంగ. పడ్డొ ప్రబుచి కామ్ నిదానుమ్ కెర్లొ ప్రేమ తిలో పెర్నిసుక జోబర సంగ.

13 పడ్డొ ప్రబుచి తెడి ఒగ్గర్ బుద్ది సుదొ జలో రూపుక చి అంక అయ్య మెలి రితి జలి జోచి అయ్యన్క అంచి ముద్దుచి జోబర సంగ.

14 పడ్డో అసుంక్రితుక, ప్లెగోసుక, హెర్మోకుక, పత్రిబక, హెర్మాకుక చి జోవయింతెన్ తిల బావుడ్లు ఎత్తిక అంచి ప్రేమ జోబర సంగ.

15 పడ్డో పిలోలోగుక, యూలియాక, నేరియక, జోవయించి బేనిక, ఒలుంపాకుక, చి జోవయింతెన్ తిల బావుడ్లు ఎత్తిజిన్క అంచి ప్రేమ సంగ.

16 ఎక్కిలోక ఎక్కిలో తుమ్చి ప్రేమ దెకయతి రితి ప్రబుచి నావ్ తెన్ ఎక్కిలోక ఎక్కిలో సుద్ది తిలి ముద్దు తెన్ జొకర. ప్రబుచ సంగుమ్లు ఎత్తి తుమ్క జోవయించి ప్రేమ సంగ తెద్రయతతి.

17 జలె, బావుడ్లు, తుమ్క కిచ్చొ బతిమాల్పు జా సంగితసి మెలె, తుమ్క సికడ్లి బోదన నాయ్, గని వేరచి సికడ జట్లు కెర్త అన్యానల్ కెర్తన కొన్సగె చిన కెర, జోవయింక తుమ్ సూన నాయ్. దూరి కెర.

18 దస మాన్సుల్ అమ్చొ ప్రబు జలొ క్రిస్తుక నాయ్, గని జోవయించ సొంత ఆసల్కయ్ సేవ కెర్తతి, అన్నె, తేలిక లట్టబ మాన్సుల్క పులవ, ఒగ్గర్ తెలివి నెంజిల మాన్సుల్క మోసిమ్ కెర్తతి.

19 ప్రబుచి కోడు తుమ్ సొంత నిదానుమ్ కెర్తిసి ఎత్తిజిన్ జాన్తి, చి తుమ్చి రిసొ అంక సర్ల, గని తుమ్క 'చెంగిల్చితె తెలివి తత్తు, గని గర్చి నేన్తు' మెనయ్, తుమ్చి రిసొ అంక ఆస.

20 దస్సి జలదు మెలె, తుమ్చ చట్టొ సయ్తాన్క సుద బీడవ జిన్తి రితి, సేంతుమ్ దెతో దేముడు జినవదె. అమ్చొ ప్రబు జలొ యేసుక్రీస్తుచి దయ తుమ్చి తెన్ తవున్!

21 అంచి తెన్ ప్రబుచి కామ్ కెర్తొ తిమోతి తుమ్క జోచి ప్రేమ సంగ తెద్రయతయ్. దస్సి కి లూకియ, యాసోను చి సోసీవత్తు, అంచ బందుగులు.

22 పవులు సంగితి ఈంజ ఉత్తుమ్ రెగిడ్డొ తెర్తియు మెలొ ఆవ్ ప్రబుచి తెడి అంచి ప్రేమ సంగ తెద్రయతసి.

23 ఆవ్ ఈంజ ఉత్తుమ్ సంగ రెగ్డయ్తో పవులుక టాన్ దిలొ, ఒండి సంగుమ్క ట్రాన్ దెతో గాయియు తుమ్క జోవయించి ప్రేమ సంగ తెద్రయతయ్. దస్సి కి ఈంజ పట్టుమ్చ కమొచి డబ్బుల్ దెకితో ఎరస్తును, చి అమ్చొ బావొ జలొ క్వర్తును జోవయించి ప్రేమ సంగ తెద్రయతయ్.

24 *అమ్చొ ప్రబు జలొ యేసుక్రీస్తుచి దయ తుమ్ ఎత్తిజిన్ తెన్ తవున్! ఆమ్మేన్.

25 జలె, 'సూనవు' మెన అంక దిలి సుబుమ్ కబుర్ వాటు యేసుక్రీస్తుచి రిసొ బోదన కెర్తె వాటు తుమ్క డిట్టుమ్ కెర్తొ దేముడుక జోబర! జా సుబుమ్ కబుర్తె బెదితి గుట్టు జో అప్పె బార్ కెర అస్సి. మదెనె, అగ్గె తెంతొ లుంకడ తిలొ.

26 జలె, యూదుల్ నెంజిలనక కి జోవయించి రచ్చన దొర్కు జలి రిసొచి, ఈంజ గుట్టు జో అప్పె బార్ కెర అస్సి, చి జోవయించ కబుర్లు పూర్లుమ్ సంగిలన రెగిడ్డిసి సూనయ్ జతిన్తె ఒండి లోకుమ్తె ఎత్తి దేసిమ్చక జాన్సున్ మెన కెయ్క తెయ్క తా గెతో దేముడుచి ఆడ్ర, ఒండి లోకుమ్తె మాన్సుల్ నంపజా జోచి కోడ్ రితి ఇండుత్ మెనయ్.

27 జలె, యేసుక్రీస్తుచి అత్తి జర్గు జలి కామ్చి రిసొ ఎత్తి గ్యానుమ్ తిలొ ఎక్కిలో దేముడుక కెయ్క తెయ్క జోబర!

* 16:24 16:24 ఈంజ ఉత్తుమ్ రెగిడ్ల తొలితొచ పుస్తకుమ్ సగుమ్తె 24నంబర్చి కోడు తయె నాయ్.

కొరిందియుల్క రెగిడ్లి మొదొల్చి ఉత్తమ్ బారిక్ జలో పవులు కొరిండ్ పట్టుమ్చి సంగుమ్చక రెగిడ్లి మొదొల్చి ఉత్తమ్

మొదొల్ కోడు

1 యేసుక్రీస్తుచి తెడి సుద్ది జా దేముడచయ్ మాన్సుల్ జల కొరింది పట్టుమ్చి సంగుమ్ సుదల్క పావులు అమ్చొ బావుడు జలో సొస్సెనేసు తెన్ రెగిడ్లి ఉత్తమ్.

2 క్రీస్తు జలో యేసుచి రిసా సుబుమ్ కబుర్ నూనయ్తో జోచొ బారికి అవ్ జంక మెనయ్ దేముడు జోచి ఇష్టుమ్క అంక నిసాన అస్సె. అమ్చొ ప్రబు జోచొ ప్రబు జలో యేసుక్రీస్తుతె 'తుచితెయ్ రచ్చన అస్సె. తుయి ప్రబు' మెన జోచి నావ్ దెరన్తన ఎత్తిజిన్ తెన్ తుమ్క కి 'అంచి సుద్ది జా అంచయ్ మాన్సుల్ జతు' మెనయ్, దేముడు బుకార అస్సె.

3 జలె, అమ్క తుమ్క అబ్బొ జలో దేముడుచి ప్రబు జలో యేసుక్రీస్తుచి దయ సేంతుమ్ తుమ్చి ఉప్పిరి తవున్!

4 తుమ్చి రిసా ఎత్తి అదికారుమ్ తిలో దేముడుక రోజుక ప్రార్దన కెర అంచి సర్ద జోక నూనయ్తసి. కిచ్చొచి రిసా మెలె, యేసుక్రీస్తుక తుమ్ నంపజా అప్పె జోచి తెడి తిలి రిసా జోచి దయక దేముడు తుమ్క దిలి రచ్చనచి రిసాయి.

5 మెలె, జా రచ్చన దిలి తెంతొ క్రీస్తుచి తెడి గ్యనుమ్ ఎత్తి, జా గ్యనుమ్ బోదన కెర్తె సెక్తి ఎత్తి, తుమ్క కలుగు జలి రిసా పూర్తి ఎత్తితె సొమ్నారుమ్ జా అస్సెన్.

6 దస్సి, క్రీస్తుచి రిసా అమ్ సంగిలి సాచి తుమ్చి పెట్టి రుజ్జు జా అస్సె.

7 జాకయ్, అమ్చొ ప్రబు జలో యేసుక్రీస్తు జోచి గవురుమ్ తెన్ అన్నె ఉత్త జెతినక తుమ్ రకితె ఎద, అవ్నురుమ్ జలి కిచ్చొ ఆత్మసెక్తి కి తుమ్క పిట్టె నాయ్.

8 ఆకర్ దీసల్క లోకుమ్చక ప్రబు జలో క్రీస్తు వెల్లి పరిచ్చ, వెల్లి తీర్పు కెర్తె ఎదక, తుమ్ పొరపాట్ నే జతి రితి జొయ్యి తుమ్క జా సెక్తి దెతె తయెదె.

9 పుత్తున్ జలో అమ్చొ ప్రబు జలో యేసుక్రీస్తు తెన్ తుమ్ బెదితి రిసా తుమ్క బుకార్లో దేముడు నిదానుమ్చొ, జో సంగిల్ రితి కెరెదె, జో సంగిలిసి జర్గు కెరెదె.

గోనల్ పొన మెన పావులు గోల కెర్లిసి

10 ఓ బావుడ్లు, అమ్చొ ప్రబు జలో యేసుక్రీస్తుచి నావ్ తెన్ కిచ్చొ మెన అవ్ తుమ్క బతిమాల్ప జా సంగితసి మెలె, తుమ్ జట్టి నే జతె, ఎక్కి మెన్సు జా, ఎక్కి కట్టు జా, తుమ్ ఎక్కి బుద్ది ఎక్కి మెన్సు జా చెంగిల్ జా.

11 బావుడ్లు, కిచ్చొక ఇసి మెంతసి మెలె, తుమ్తె సగుమ్జిన్ జట్టి జా అస్తి మెన క్లోయెచ గెర్చ సుదల్ అంక సంగ అస్సి.

12 మెలె, "అవ్ పావుల్చొ సుదొ" జవున్, "అవ్ అపొల్లోచొ సుదొ" జవున్, "అవ్ కేపాచొ సుదొ" జవున్, నెంజిలె "అవ్ క్రీస్తుచొ సుదొ" జవున్ మెన తుమ్ ఎత్తిజిన్ తేడల్ ఉచరన సంగన్తసు మెన్ ఆవ్ జాని.

13 క్రీస్తుచి ఆగ్ సింద వాటల్ కెర అస్సున్ గే? తుమ్చి పాపుమ్ గెచ్చయ్తి రిసా అవ్ పావులు సిలువతె మొర్లయ్ గే? అవ్ పావులుచి నావ్ తెన్ బాప్తిసుమ్ నజన్లదు గే?

14 నాయ్. క్రీస్తుక చి గాయియుక పిట్టవ అవ్ కక్క బాప్తిసుమ్ నే దిలి రిసా అంక చెంగిలి.

15 కక్క కక్క బాప్తిసుమ్ దెతయ్ జలె, 'పావుల్చి నావ్ తెన్ బాప్తిసుమ్

సంగిలమ్' మెన ఏక్ వేల తుమ్తె సగుమ్జిన్ సంగిత.

16 స్తైపనుచి గేర్చక బాప్తిసుమ్ దిలయ్, గని అన్నె కక్క బాప్తిసుమ్ దిలయ్ గే నాయ్ గే పచ్చ అస్సి. నాయ్, కిచ్చొగి.

17 క్రీస్తు అంక తెద్రయ్లిసి బాప్తిసుమ్ దెతి రిసా నాయ్, గని సుబుమ్ కబుర్ సూసవ అవ్ బోదన కెర్తి రిసాయి. పడ్డె, ఒగ్గర్ తెల్వచ కొడొచి ఉప్పిరి కొడొ బెదయ్తి రితి అవ్ బోదన కెర్తి రితి తెద్రయ్ నాయ్. దస్సి బోదన కెర్తయ్ జలె, క్రీస్తు సిలువతె మొర మాన్సుల్క పాపుమ్ తెంతో రచ్చించుప కెర్లిన్ ముక్కిమ్ జలిన్క లుంకడ్లి రితి జతి. రచ్చించుప కెర్తి సెక్తి జో మొర అర్పితుమ్ జలిన్తెయి అస్సి.

క్రీస్తు దేముడుచి సెక్తి గ్యానుమ్

18 మొర పాపుమ్తె గెతన, జలె, ప్రబు సిలువతె మొర అర్పితుమ్ జలిన్చి కోడు సూన్లె, నాసెనుమ్ జతనక కి వెర్తి గని ఆమ్ రచ్చించుప జతనక, జలె, దేముడుచి సెక్తి మెన జానుమ్.

19 కిచ్చొక మెలె, దేముడుచి కొడొతె,

* "పండితుల్చి గ్యానుమ్క పాడ్ కెరిందె, తెలివి మాన్సుల్చి తెలివి పిట్టుయందె" మెన రెద్దవ అస్సి.

20 ఒగ్గర్ బుద్ది తిల సుదొ కేతె? మోసే తెన్ దేముడు దిలి ఆగ్గుల్ సికడ్డన కేతె? ఈంజ ఉగుమ్తె తెలివి తెన్ కొడొ బెదవ రుజ్జుల్ దెకయ్తన కేతె? ఈంజ లోకుమ్చి గ్యానుమ్క 'గ్యానుమ్ నెంజె' మెన, దేముడు దెకవ అస్సి.

21 కిసి మెలె, కెద్ది గ్యానుమ్ కలుగు జలెకి, ఈంజ లోకుమ్చ మాన్సుల్ దేముడుక నేన్ల. 'మాన్సుచి సొంత గ్యానుమ్ జోవయించి సొంత సెక్తిక జేవ్ నెత్తిర్లెకయ్ చెంగిలి' మెన, జోచి పెట్టిచి గ్యానుమ్క దేముడు జానయ్ దస్సి

జర్గు కెర్లన్. జాకయ్, అమ్ బోదన కెర్తి సుబుమ్ కబుర్ 'గ్యానుమ్ నెంజె' మెన జోవయించి సొంత సెక్తి మాన్సుల్ ఉచర్లె కి, జా సుబుమ్ కబుర్ తెయి మాన్సుల్క రచ్చించుప కెరుక జో దేముడు సర్ల జలొ. గని సుబుమ్ కబుర్ నంప కెర్లిన్క 'తెలివి నాయ్' మెన మాన్సుల్ సంగితతి.

22 మెలె, 'జోచి సత్తిమ్క రుజ్జు దెకయ్త వెల్లెల కమె దెకయ్లెకయ్ నంపజమ్దె, నెంజిలె నాయ్' మెన యూదుల్ సంగిల. 'కొడొ తెలివి తెన్ బెదయ్లెకయ్ జా బోదనక విలువ దెకుక జయెదె' మెన గ్రీకుల్ సంగిల.

23 గని "క్రీస్తు సిలువతె మొర అర్పితుమ్ జలిన్తెయి మాన్సుచి రచ్చన" మెన అమ్ బోదన కెర్తుమ్. ఇసి బోదనక అడ్డు మెన యూదుల్ సంగితతి, 'తెలివి నాయ్' మెన యూదుల్ నెంజిలన సంగితతి.

24 గని దేముడు నిసాన బుకార్లనక, జేవ్ యూదుల్ జలెకి, † గ్రీకుల్ జలెకి, జో దేముడుచి సెక్తి కి గ్యానుమ్ కి క్రీస్తుతెయ్ అస్సి. క్రీస్తు దేముడుచి సెక్తి, జోయ్యి జోచి గ్యానుమ్.

25 దేముడు కెర్లిన్క 'బుద్దిచి నెంజె' మెన మాన్సుల్ ఉచర్లె కి, జా కేన్ మాన్సుచి గ్యానుమ్చి కంట వెల్లి. జో దేముడుచి అప్పు కేన్ మాన్సుచి సెక్తిచి కంట ఒగ్గర్ సెక్తిచి.

26 బావుడ్లు, ప్రబు తుమ్కయ్ నిసాన బుకార్లొ. జలె, తుమ్తె తొక్కిజిన్క ఈంజ లోకుమ్చి గ్యానుమ్ ఒగ్గర్ కల్లుప జా అస్సి. తుమ్తె తొక్కిజిని వెల్లెల మాన్సుల్ జా అస్సున్. తుమ్తె తొక్కిజిని వెల్లెల కుట్టుంబల్తె జెర్పిలదు.

27 గని దేముడు, ఈంజ లోకుమ్తె తెలివి నెంజిలనకయ్ నిసాన్లన్. కిచ్చొక మెలె, తెలివి తిలనక కి లాజ్ కెరుక మెన. సెక్తి తిలనక కి లాజ్ కెరుక

* 1:19 1:19 యెసయా 29:14. † 1:24 1:24 ఇస్సె 'గ్రీకుల్' మెలె, యూదుల్ నెంజిలన మొత్తుమ్క సంగితయ్.

మెన ఈంజ లోకుమ్తె సెక్తి నెంజిలసక దేముడు నిసాన్లన్.

28 పడ్డో ఈంజ లోకుమ్తె విలువ జలిన్క 'కిచ్చొ నెంజె' మెన రుజ్జు తంక ఈంజ లోకుమ్తె విలువ నెంజిలసక, నిస్కారుమ్ జలసక, కిచ్చొ నెంజిలసక జో దేముడు నిసాన్లన్.

29 కిచ్చొక మెలె, దేముడుచి మొక్కె కేన్ మాన్సు గవురుమ్ ఉచరనుక బెదె నాయ్ మెన రుజ్జు దెకవుక.

30 యేసుక్రీస్తుచి తెడి తుమ్క జియడ్డో దేముడు జొయ్యి, అమ్చి గ్యానుమ్, అమ్చి పున్నిమ్, అమ్చి సుద్ది, అమ్చి రచ్చున క్రీస్తుతెయ్ మెన దేముడు అబ్బొసి జోకయ్ అమ్చి రిసా బీవో కెలన్.

31 జాక దేముడుచి కొడొతె,

‡“మాన్సుల్ గవురుమ్ సంగుక ఇస్తుమ్ జలె, కచి రిసా సంగుత్ మెలె, ప్రబుచి రిసాయి”
మెన రెగ్గవ అస్సె.

2

1 ఓ బావుడ్లు, ఆవ్ తుమ్తె తెదొడి జా కెర దేముడుచి చి సాచి సూనయ్లి పొది ఒగ్గర్ తెలివి గ్యానుమ్ కొడొ బెదవయ్ బోద్దన కెరి నాయ్.

2 ఆవ్, యేసుక్రీస్తుచి రిసాయి మెలె, సిలువతె మొర జర్గు కెర్లి యేసుక్రీస్తుచి రిసా నెంజిలె, అన్నె కిచ్చొ కి తుమ్చి మదెనె అన్నె కిచ్చొ నేని మెన వేరచి బెదవుక నెంజె' మెనయ్ దస్సి కెర్లయ్.

3 పడ్డో తుమ్చితె తిలి పొది, 'సొంత సెక్తిక కిచ్చొ కెరుక నెతిరి' మెన బయిమ్ తెన్ బలె అద్దుర్ తెన్ తిలయ్.

4 తుమ్చి నముకుమ్ మాన్సుల్చి గ్యానుమ్ తెన్ నే జతె, గని దేముడుచి సెక్తి తెన్ ఆదారుమ్ కెరన తంక మెన,

5 ఆవ్ లట్టబ్బె కి చి సాచి సూనయ్లి కి, తెలివి గ్యానుమ్చ తియాన కొడొ నే

బెదయ్తె, సుద్ది తిలి ఆత్తుచి దేముడుచి సెక్తి దెకయ్తి రిసాయి మెన సంగితసి మెనయ్ ఇని జర్గు జంక మెన జోచి సెలవ్.

అత్తుతె వడ్డెలసక ప్రబుచి గ్యానుమ్ సికడ్డిసి

6 అత్తుతె వడ్డెలసక గ్యానుమ్ తెన్ సికడ్డుమ్, జా గ్యానుమ్ కేడయ్ గెతి చి జా ఈంజ ఉగుమ్చి గ్యానుమ్ నెంజె, ఈంజ ఉగుమ్తె విలువ కెర్తనచి గ్యానుమ్ నెంజె.

7 ఆమ్ సికడ్డి గ్యానుమ్ దేముడుచి గుట్టు తెన్ తిలి లుంకడ్డి గ్యానుమ్; ఈంజ గ్యానుమ్ గుట్టు తెన్ లుంకడ తయె నాయ్. ఉగల్ ఎత్తిచి కంట అగ్గెయి దేముడు అమ్చి రిసా 'పరలోకుమ్చి ఉజిడ్తె బెదుతు' మెన ఉచర జర్గు కెర్లి గ్యానుమ్.

8 ఈంజ ఉగుమ్చ అదికారుల్ కోయి ఈంజ గ్యానుమ్క అర్దుమ్ కెరంతి నాయ్; జా అర్దుమ్ జోక జతి జలె గొప్ప ఉజిడ్చొ రుపుమ్చొ గవురుమ్ తిలొ ప్రబుక సిలువ గల మారిత నాయ్.

9 గని దేముడుచి కొడొతె, “ఇన్నెచి రిసా దేముడు తెయార్ కెర అస్సె”

జోక ప్రేమ కెర్తనక కిచ్చొ దెంక మెన తెయార్ కెర్లిసి

*“జా కేన్ అంకితె డీసె నాయ్, కేన్ కండ్డొతె సుని జయె నాయ్, కేన్ మాన్సు జోచి పెట్టి ఉచరుక నెతిర్లిసి”
మెన రెగ్గవ అస్సె.

10 అమ్క జలె దేముడు ఎత్తి జోచి ఆత్తు తెద్దవ రుజ్జు దెకవ అస్సె; జా ఆత్తు ఒండిక, దేముడు గుట్టుల్చి రుజ్జుల్ కి జోచి ఆత్తు రుజ్జు దెకయెదె.

11 ఏక్ మాన్సుచి ఉద్దెనుమ్ జోచితె తిలి మాన్సుచి సొంత ఆత్తుక పిట్టవ, జో మాన్సుచి పెట్టి తిలిసి కో జాన్తి

గే? దస్సి, దేముడుచి ఉద్దెనుమ్లు దేముడుచి సుద్ది తిలి ఆత్మకముల, జోచి ఉద్దెనుమ్ అన్నె కొయి నేనేతి.

12 దేముడు అమ్క దిల ఆత్మ కీసిచి గే అమ్ అర్దుమ్ కెరనుక. అమ్ ఈంజ లోకుమ్చి ఆత్మ నెంజె, గని దేముడు తెంతో చి జతి సుద్ది తిలి ఆత్మయి అమ్ పాయ అస్సుమ్.

13 మాన్సుచి గ్యానుమ్ సికడ్డ కొడొ తెన్ నాయ్, ఆత్మ సమ్మందుమ్ జలి కారిమ్చి కామ్ ఆత్మ సమ్మందుమ్ జలి కారిమ్చి కామ్ సరి కెరన, ఆత్మ సికడ్డి కొడొ తెన్ ఈంజ సుద్ది తిలి ఆత్మ అమ్క సికడ్డిసి, అమ్ సికడ్డునుమ్.

14 లోకుమ్చో సమ్మందుమ్ జల మాన్సు దేముడుచి సుద్ది తిలి ఆత్మచ కబుర్లు నెనె, దనచ జోక వెర్రిలెక అస్సి, జో అర్దుమ్ కెరనుక నెత్తె. దనచక ఆత్మతె జెర్నున్ తిలెకయి అర్దుమ్ కెరనుక జయెదె గని జోవయింక జా ఆత్మ నాయ్ చి నెత్తిర్తి.

15 ఆత్మ సమ్మందుమ్ జలోసా మాన్సుల్క ఒండి అర్దుమ్ కెరనెదె, గని జోక కేన్ మాన్సు తిర్పు కెరుక నెత్తిర్తి.

16 †“ప్రబుచి పెట్టి తిలిసి జాన జోక సికడుక తెరిలనకో? అమ్క జలె క్రిస్తుచి మెన్సు అస్సి.”

3

ఆత్మక వడ్డిలన నెంజున్

1 బావుడ్లు, తుమ్చి తెన్ ‘ఆత్మక వడ్డిల మాన్సుల్ తెన్ కొడొ జలి రితి ఆవ్ కొడొ జంక నెత్తిర్లయి. ఈంజ లోకుమ్చ ఆగ్గచ సమ్మందుమ్చ మాన్సుల్ మెనయ్, క్రిస్తుతె బాలబోదలీ’ మెన, తుమ్చి తెన్ కొడొ జంక తిలి.

2 అగ్గె తుమ్క సత్తు నాయ్ చి రిసా రితి దూదు పియడ్లయ్, చి పోసిలయ్ గని

చింబో కవడ తుమ్క పోసి నాయ్. తుమ్ అప్పక కి ఆగ్గెచి సమ్మందుమ్చ రితి జా అస్సున్చి రిసా అప్పెక కి తుమ్ వడితన్ నాయ్.

3 తుమ్చితె కుసిదుమ్, గోసల్ తిలె, తుమ్ ఆగ్గెచి సమ్మందుమ్చ మాన్సుల్చి రితి ఇండితన నెంజున్ గే?

4 ఎక్కిలో ఆవ్ పావుల్చో సుదో, అన్నెక్కో ఆవ్ అపొల్లోచో సుదో, మెన సంగ్రిలె పొది తుమ్ లోకుమ్చ సమ్మందుమ్ జల మాన్సుల్ నెంజున్ గే?

5 అపొల్లో కొన్నో? పవులు కొన్నో? సేవ కెర్తసయ్ గెద. ఎక్కిక్లక ప్రబు దిలిసి తెన్ జేవ్చి తెంతోయ్ తుమ్ నంపజలదు

6 ఆవ్ రోవిలయ్, అపొల్లో పాని సువిలన్, జియడ వడ్డయ్లోసా దేముడి.

7 జాకయ్, జియడ వడ్డయ్లో దేముడుతెయి గని, రోవిలోసాతె జలెకి, పాని సువిలోసాతె జలెకి కిచ్చో కి నాయ్.

8 రోవిలోసాక పాని సూవిలోసాక ఎక్కి ఉద్దెనుమ్. ఎత్తి జిన జేవ్ కెర్లి కామ్చి కస్తుమ్కయ్ జీతుమ్ నజనుల.

9 అమ్ దేముడు తెన్ బెద కామ్ కెర్తునుమ్; తుమ్ దేముడుచి పంబో పికయ్లి బుయి, దేముడుచి గేరు జా అస్సున్.

ప్రబుచి ఆత్మగేర్చి టాలి

10 దేముడుచి దయక జో అంక దిలి ఇదిలి సెక్కిక, గేర్ బందుక చెంగిల్ జాన్లొ బందితోసాచో రితో జా, ఆవ్ పునాది తెయార్ కెర్లయ్, చి జేవ్చి ఉప్పిరి అన్నెక్కో గేర్ బందితయ్. జా పునాదిచి ఉప్పిరి తుమ్ ఎత్తిజిన్ తుమ్చి వాట కీసి బందితె గే జాగర్త తా.

11 ఎక్కి పునాదిచి ఉప్పిరి జా గేర్ బందిలెకయ్ జా గేర్ తయెదె; మెలె, యేసుక్రిస్తు జలి పునాదిచి ఉప్పిరి బందిలెకయ్. వేర పునాది తెయార్ కెరుక కో నెత్తిర్తి.

12 జలె, జా పునాదితె కో బజార్ తెన్, కో వెండి తెన్, కో వజ్రమానిక్యల్ తెన్, కో దారు తెన్, కో పెయ్యడి తెన్, కో పీరి తెన్ గేర్ బందిలె,

13 జేవ్ ఎక్కెళ్ల బందిలిన్క 'తయెదె గే నాయ్ గే' ఆకర్కయ్ డీసెదె. ప్రబు సంగిలి వెల్లి దీసికయ్ డీసెదె. కీసి మెలె, ఆగిచి పరిచ్చతె డీసెదె. ఎక్కెళ్లచ కమె కీసచగె ఆగితె పరిచ్చ జలి రితి జా డీసెదె.

14 జో పునాది కెలోసాతె బందిలి కేన్ మాన్సుచి కామ్ జా పరిచ్చతె జీన్లె, జో మాన్సుక బవుమానుమ్ దొర్కు జయెదె.

15 జో పునాదితె బందిలి కేన్ మాన్సుచి కామ్ డడ్డ గెచ్చెదె గే, జోక నస్టుమ్ తయెదె, గని జోయ్యి రచ్చించుప జయెదె. గని ఆగి తెంతో కీసి గే ఉర్లి జలి రితి జా జో రచ్చించుప జయెదె.

నంపజలస ప్రబుచి దేముడుచి గుడి జవుల

16 దేముడుచి గుడి తుమ్ జస్సె మెన నేన్సు గే? జోచి ఆత్మ తుమ్చి పెట్టి అస్సె మెన నేన్సు గే?

17 జలె, దేముడుచి గుడి కో పాడ్ కెరెదె గే, జోక, జో దేముడుయి పాడ్ కెరెదె. కిచ్చొక మెలె, దేముడుచి గుడి జోకయ్ సుద్ది తంక అస్సె. జా దేముడుచి గుడి తుమి జా అస్సున్.

18 తుమ్క తుమ్ మోసిమ్ కెర నాయ్. ఈంజ ఉగుమ్చి గ్యానుమ్క ఆవ్ తెలివి' మెన కో ఉచరనెదె గే, పరలోకుమ్చి గ్యానుమ్ జో దొర్కు కెరంతి రితి ఈంజయ్ ఉగుమ్చి గ్యానుమ్క గవురుమ్ కెరుక ముల నేన్లొ రితో జవున్.

19 కిచ్చొక మెలె, ఈంజయ్ లోకుమ్చి గ్యానుమ్ దేముడుచి మొక్కె గ్యానుమ్ నెంజె. జో రెగ్డయ్లి కేన్ కోడుతె ఈంజ సత్తిమ్ డీస్తయ్ మెలె,

* "తెలివి తిల జోవయించ మోసిమ్లుతెయి దేముడు జేవ్ తెలివి మాన్సుల్క దెర

జేవ్ ఉచర్లసి పిట్టయ్తయ్" మెన రెగిడ్లి కోడు.

20 జోచి అన్నెక్ దస్సి కోడు కిచ్చొ మెలె, † "ఈంజ లోకుమ్చి గ్యానుమ్క నంపజలసచి పెట్టి ఉచర్లసక కామ్క నే జయె మెన ప్రబు జానె" మెన రెగిడ్లి కోడు.

21 జాకయ్, కేన్ మాన్సుక 'జోయ్యి వెల్లొ' మెలి రితి మాన్సుక గవురుమ్ కెర నాయ్. ఎత్తి తుమ్చి జా అస్సె.

22 పవులు కి, అపొల్లో కి, కేపా కి, అమ్ సికడ్లస తుమ్ ఎత్తిజిన్క దొర్కు జా అస్సుమ్. ఈంజ లోకుమ్ కి, జివు కి, మొర్ను కి, ఈంజ ఉగుమ్ కి, జెతి ఉగుమ్ కి, ఎత్తి తుమ్చి జా అస్సె.

23 పడ్డొ, తుమ్ క్రీస్తుచి తెడి అస్సున్, తుమ్క జోయ్యి ఏలుప కెర్తయ్; చి క్రీస్తు దేముడు అబ్బొన్చి తెడి అస్సె.

4

అపొల్లోక చి పవులుక కీసి దెకుక

1 తుమ్ అమ్క కీసి దెకుక మెలె, యేసుక్రీస్తుచ సేవ కెర్లస ఆము. తుమ్ 'పాడ్ జంక నాయ్' మెన దేముడుచ గుట్టుల్ రకితస ఆమ్. అమ్ దస్సి జలిన్క తుమ్ మరియాద దెకుక తుమ్చి పూచి,

2 అన్నె, కేన్ జవున్ ఎజోమానిచి ఆస్తిక రకితోసా, జలె, నిదానుమ్ తెన్ నముకుమ్ జతోసా తంక జోచి పూచి. జాక, ఆమ్ దస్సి నిదానుమ్ తెన్ నముకుమ్ జతస జంక అమ్చి పూచి.

3 గని తుమ్ జవున్, మాన్సుచి కేన్ తీర్పు కెర్తి గేర్ జవున్, అంక పరిచ్చ కెర తీర్పు కెర్లె, అంక బాద నాయ్. ఆవ్ కి సొంత తీర్పు కెరనీ నాయ్.

4 దేముడుచి మొక్కె పూచి తెన్ జోచి కామ్ ఆవ్ కెర అస్సె. జా కామ్ కెర్లెన్తె ఆవ్ కిచ్చొ పొరపాట్ కెర్లెసి ఆవ్ నేని.

గని అంక 'తప్పు జో నెంజె' మెన ఎక్కి అంచి సొంత కోడు రుజ్జు దెకవ నాయ్. జో ప్రబుయి అంక తీర్పు కెర్తొసా.

5 జాకయ్, జా సమయుమ్ నే జతె అగ్గె, మెలె, ప్రబు అన్నె నే జతె అగ్గె, తుమ్ అంక తీర్పు కెర నాయ్. మాన్సుల్క దస్సి తీర్పు కెర్తిసి తుమ్ ముల. అందరతె లుంకిల్ రితి తిలిసి ఎత్తి, మాన్సుచి పెట్టిచ ఉద్దెసుమ్లు ఎత్తి జొయ్యి జోచి ఉజిడతె పరిచ్చ కెర తీర్పు కెరెదె. తెదొడకయ్ దేముడు సొంత ఎత్తిజిన్క జేవ్చ కెర్ల కమె తీర్పుల్ సంగెదె.

6 అంచి రిసాచి అపొల్లోచి రిసా ఆవ్ ఇస టాలివొ కిచ్చొక సంగ అస్సి మెలె, తుమ్చి రిసా, బావుడ్లు, తుమ్క 'సిక్కుత్' మెనయ్, దేముడు రెగ్గయిలినచి కంట కిచ్చొ వేరచి అమ్ దొగుల కిచ్చొ బెదవుమ్ నాయ్, దస్సి తుమ్ కి వేరచి జా బోదనతె బెదవు నాయ్. ఆవ్ అపొల్లో, జలె, అమ్ దొగుల సుబుమ్ కబురతె కిచ్చొ వేరచి బెదవుమ్ నాయ్, చి అమ్తె కక్క 'వెల్లో' మెన తుమ్ సంగుక నాయ్. 'ఆవ్ వెల్లో' మెన జవున్ ఆవ్ సంగి నాయ్, జో సంగి నాయ్. దస్సి తుమ్చితె కో కిచ్చొ వేరచి నే బెదయ్లె, తుమ్చితె కి 'ఆవ్ వెల్లో, జో ధాక్' మెన తేడల్ దెకన బులుక బెదె నాయ్.

7 జలె, తుమ్క దెకిలె, కక్క 'వెల్లో' కక్క 'ధాకు' మెనుక జతయ్ గే? దేముడు దిలి కంట తుమ్క కిచ్చొ అస్సె గే? దేముడు తెంతొ పయిలిసి జలె, జా జొయ్యి నే దిలి రితి కిచ్చొ తుమ్ గవురుమ్ సంగితసు!

8 'ఎత్తితె సామ్నారుమ్ జా అస్సుమ్' మెన తుమ్ ఉచరంతసు. అమ్క పడ్డొ ముల తుమ్ రానల్ జా అస్సున్, జలె! తుమ్ నిజుమి ఏలుప కెర్తదు జలె, ఆమ్ కి తుమ్చి తెన్ ఏలుప కెరుక జతి! నర్ల

జతమ్!

పావులీంసి నిస్కారుమ్ జలిన్

9 అమ్ క్రీస్తుచి సుబుమ్ కబుర్ సూనయ్త బారికుల్క మాన్సుల్ ఎత్తిచి కంట అమి నిస్కారుమ్ డీస్తసుమ్, *మొర్తి సిచ్చ కలుగు జల మూర్కుడ్లు రిత డీస్తసుమ్, మెన దేముడు సెలవ్ దిలి రితి అంక డీస్తయ్. అన్నె మాన్సుల్ జోవయింక దెక ఆస్తతి గే, అమ్ యేసుచ బారికుల్క కి లోకుమ్ ఎత్తిచ, జేవ్ దూతల్ జలెకి మాన్సుల్ జలెకి, ఆసిల్ రితి జతతి.

10 'క్రీస్తుచి సుబుమ్ కబుర్ సూనవుక ముక్కిమ్' మెనయ్, అమ్ నేన్ల మాన్సుల్ రిత డీస్తసుమ్. తూమ్ మాత్రుమ్, క్రీస్తుచి తెడి బుద్ది సుదల్ జా అస్సున్, కిచ్చొ గే! తుమ్క 'దస్సి ఉచరంతతి' మెలి రితి డీస్తయ్, అమ్, జలె, సెక్తి నెంజిల్ రితి డీస్తసుమ్. అమ్కయ్ సెక్తి అస్సె మెన తుమ్క తుమి ఉచర్తసు. నిజుమి, మాన్సుల్ తుమ్కయ్ గవురుమ్ దెకితతి, అమ్కయ్ నిస్కారుమ్ దెకితతి.

11 అప్పె ఎద ఆమ్ చువ్వె తన్నె అస్సుమ్. అమ్క సరిపుచుప జత పాలల్ నాయ్, మాన్సుల్ అమ్క పెట్టి తతి, అమ్క గెరల్ నాయ్.

12 సొంత అత్తో తెన్ కామ్ కెర జితసుమ్. మాన్సుల్ అమ్క దూసుప కెర్లె, చెంగిల్ తత్తు మెన అమ్ ప్రార్లన కెర్తసుమ్. జేవ్ అమ్క అల్లర్ కెర్లె, ఓర్పుప జతసుమ్.

13 అమ్చి నావ్ జేవ్ కడ్డె, సేంతుమ్ కెర్తసుమ్. మాన్సుచి మొక్కె ఒండి లోకుమ్చి తొక్కు ఉస్సొ జా అస్సుమ్.

14 ఇసి మెన ఆవ్ తుమ్క కిచ్చొక రెగిడ్లసి మెలె, తుమ్క లాజ్ కెర్తి రిసా నాయ్, గని తుమ్ అంచ బోదల్ రిత

* 4:9 4:9 మొర్తి సిచ్చ కలుగు జల మాన్సుల్ జోవయింక జా సిచ్చతె వట్ల గెత తిలె పొది కిసి అన్నె మాన్సుల్ జోవయింక దెక ఆస్తతి గే, అమ్ యేసుచ బారికుల్క కి లోకుమ్ ఎత్తిచ, జేవ్ దూతల్ జలెకి మాన్సుల్ జలెకి, ఆసిల్ రితి జతతి.

జత, చి తుమ్క 'బుద్ధి తిలి' మెనయ్ ఇసి రెగ్గితసి.

15 కిచ్చొక మెలె, క్రీస్తుచి తెడి తుమ్క సికడ్డన ఒగ్గర్జిన్ తిలి కి, జోవయించి తెడి ఒగ్గర్జిన్క 'అబ్బి' మెనుక నెతుర్పు. సుబుమ్ కబుర్ అవ్వి తొలితో నూనయ్లి రిసా, క్రీస్తు జలో యేసుచి తెడి అవ్వి తుమ్క అబ్బిది జా అస్సి.

16 జాకయ్, 'అంకయ్ దెక సిక అంచి రితి ఇండ' మెన తుమ్క ఆవ్ బతిమాల్య జతసి.

17 జాకయ్ ప్రేమ తిలో నిదాసుమ్ తిలో ప్రబుచి తెడి అంక పూత్తు జలో తిమోతిక తుమ్కతె ఆవ్ తెద్రవ అస్సి. కిచ్చొక మెలె, ఆవ్ క్రీస్తుచి తెడి కిసి ఇండితసి గే, సంగుమ్లు ఎత్తితె కిచ్చొ బోదన కెర్తసి గే, తుమ్క జో ఉచార కెరయ్తి రిసా, తుమ్క 'ఉచార కెర బుద్ధి తత్తు' మెనయ్.

18 ఆవ్ 'అమ్కె అన్నె జెయె నాయ్' మెన తుమ్కతె సగుమ్జిన్ ఉచార పుల అస్సున్.

19 గని ప్రబు సెలవ్ దిలె, తుమ్కతె బే బేగి జెయిందె, చి జేవ్ పులిల మాన్సుల్చ కొణెచి రిసా రుజ్జుల్ నూసుక నెసి, గని జోవయించి సెక్తిచ రుజ్జుల్ పరిచ్చ కెరిందె.

20 కిచ్చొక మెలె, దేముడుచి రాజిమ్ మాన్సుచి పెట్టి తిలిన్క కిచ్చొ రుజ్జు జయెదె మెలె, మాన్సుచ కొణె నాయ్, గని ప్రబుచి ఆత్మసెక్తి మాన్సు ఇండితి బుద్ధితెయి డీసెదె, జయ్యి రుజ్జు జయెదె.

21 జలె, తుమ్చి ఇస్టుమ్ కిచ్చొ ఆవ్ అయ్లె, సిచ్చ కెర్తి డండె దెరన్లి రితి జెంక గే, ప్రేమ ముద్దు తెన్ జెంక గే? ప్రేమ ముద్దు తెన్ ఆవ్ అయ్లె సర్ద జస్తె, జలె, తుమ్ బుద్ధి ఇండ.

5

లంజె జలో ఎక్కిలోచి రిసా పవులు తీర్పు సంగిలిసి

1 తుమ్చితె ఎక్కిలోక, అన్నెక్లొచి ఉపిరి జలె, 'లంజె వంసుమ్చొ జా జితయ్' మెన సంగితతి. అన్నె, జొయ్యి జతి రగుమ్, జలె, ప్రబుక నేన్ మాన్సుల్ కి తెద్ది పాపుమ్ తెన్ జతి నాయ్! కిసి లంజె జా అస్సె మెలె, అబ్బిన్చి తేర్చి తెన్ లంజె జితయ్!

2 జలెకి, తుమ్ లాజు జసు నాయ్, పుల అస్సున్! కిసి! జా పాపుమ్చి రిసా తుమ్ విసారుమ్ జతదు జలె, జతి! జా పాపుమ్ కెర్తొసాక తుమ్ దూరి కెర తుమ్చి తెన్ అన్నె బెదవన నాయ్.

3 ఆగుక, జలె, ఆవ్ తుమ్చి తెన్ నెంజిలె కి, ఆత్మక తుమ్చి తెన్ అస్సి. తుమ్చి తెన్ ఆవ్ పూర్తి తిలి రితి అస్సి.

4 జలె, దస్సి పాపుమ్ కెర్లొ జో మాన్సుచి రిసా ఆవ్ అప్పెకి తీర్పు ఉచర అస్సి. తుమ్ సంగుమ్కె బెదిలె పొది, ఆత్మక ఆవ్ కి తుమ్చి తెన్ బెదిల్ రితి జయిందె, చి యేసుక్రీస్తుచి సెక్తి తుమ్చి తెన్ తా,

5 జో మాన్సుచి ఆగ్ పాడ్ జతి రితి జోక నయ్తాన్చి అత్తి తుమ్ సార్ప కెర దాస; సిచ్చ జో జలె, ప్రబు జలో యేసు లోకుమ్చక తీర్పు కెర్తి జా ఆకర్ దీసిక జో మాన్సుచి ఆత్మయి రచ్చించువ జతయి.

అన్నె బుద్దుల్ చి రిసా తీర్పు సంగిలిసి

6 దస్సి పాపుమ్ కెర్లిన్చి రిసా 'అమ్చి సెక్తిక అమ్ ఇండితనుమ్' మెన తుమ్ పులిలిసి చెంగిల్ నాయ్. పోడియె కెర్తి పాకుమ్కె పులయ్తి పీట్ ఇదిలిదిల్ తిలి కి, ఒండి పాకుమ్ పులెదె మెన నేన్సు గే?

7 అగ్గెచి పాపుమ్ కెర్లి బుద్ధిచి తుమ్ గెచ్చవన గెల; తుమ్ సుద్ది జతి రిసా, *పాపుమ్ గెచ్చయ్లి గుర్తుచి పస్సా.

* 5:7 5:7 పస్సా వండుగు దీసి యేసు అమ్చి పాపుమ్ గెచ్చయ్తి అర్చితుమ్ జలన్.

పండుగు మెండపిల్ల రిత, క్రీస్తు అమ్చి పాపుమ్ గెచ్చయతి అర్చితుమ్ జలి తెంతో తుమ్క 'సుద్ది జల' మెన దెకితయ్.

⁸ జాకయ్, జా పండుగు కెర్లి రితి జా, జో అమ్క సుద్ది కెర్లిన్చి రుజ్జు డీస్సి రితి ఇండుమ. అమ్చి ఆత్మక పాడ్ కెర్లి అగ్గెచి బుద్ది, మెలె మూర్కుమ్ బుద్ది, పాపుమ్బుద్ది, అమ్క గార్ కెరెదె, చి జా పోన. జా పులయ్తి పీట్ నెంజిలి పాకుమ్తె బెదితి నిదానుమ్ సత్తిమ్ జా సుద్ది జమ.

⁹ 'లంజెచ మాన్సుల్ తెన్ బెద నాయ్' మెన అగ్గెచి ఉత్తమ్తె తుమ్క రెగిడ్లయ్.

¹⁰ మాములుమ్ ప్రబుక నేన్ల ఈంజ లోకుమ్చ లంజె జలన, ఆసల్ జలన, చోర్లు, బొమ్మల్క జొకర్తనచి రిసా సంగి నాయ్. దన మాన్సుల్ తెన్ ఎద్దరె నే బెదుక జలె, ఈంజ లోకుమ్క పూర్తి ములయ్ తయెదె.

¹¹ కిచ్చొ అర్దుమ్ తెన్ దస్సి రెగిడ్లయ్ మెలె, కో జలెకు 'నంపజలన' మెనల్లొసా లంజె జతొసా, ఆసల్ జతొసా, బొమ్మల్క జొకర్తొసా జలె, మాన్సుక దూసెనల్ కెర్తొసా జలె, మత్తిలోసా జలె, చోరు జలె, దసొచొక తుమ్ బెదవన నాయ్. జోవయింతెన్ అన్నిమ్ కి కెర నాయ్.

¹² జలె, నంపజలన్ నెంజిలనక తీర్పు కెరుక అంచి కామ్ నెంజె. గని ప్రబుచి సంగుమ్తె బెదిలనకయ్ తీర్పు కెరుక, మాత్తుమ్, సంగుమ్చ తుమ్ నంపజలనచి పూచి.

¹³ సంగుమ్తె నే బెదిలనక తీర్పు కెర్తొసా దేముడు, గని

+ "తుమ్చి తెన్ బెదిలో కొన్సొ జలెకు పాపుమ్ కెర్తొసా జలె,

తుమ్తె తెంతో ఉదడ గెల" మెన ప్రబు జోచయ్ జల మాన్సుల్చి రిసా పూర్గుమ్ రెగ్డయ్లి తీర్పుకోడు అస్సె.

6

నంపజలన తీర్పు కెర్లి గేర్చ తగు కెరుక పోన

¹ తుమ్చితె ఎక్కిలోక ఎక్కిలో జట్టి జా తిలె, నంపజలనచి ముక్కె నే గెతె, కిచ్చొక ప్రబుక నంప నెంజిలనతె జోవయించి తీర్పు కెర్లి గేర్తె తగు కెర్తను? జా తప్పు.

² నంపజలన ఒండి లోకుమ్చక తీర్పు కెరుల మెన నేన్సు గే? ఒండి లోకుమ్చక తుమ్ తీర్పు కెరుక అస్సె జలె, ఇన ఇదుద్ల తగుల్ తుమ్ సంగుమ్తె సూసుక నెతుర్పు గే?

³ దూతల్క కి అమ్ తీర్పు కెరుక అస్సె మెన కి నేన్సు గే? దస్సి కెరుమ్దే జలె, ఈంజయ్ లోకుమ్చ తగుల్ సూసుక అమ్క అన్నెయ్ అదికారుమ్ అస్సె.

⁴ జలె, తుమ్క ఈంజ లోకుమ్తె తగుల్ తిలె, కిచ్చొక ప్రబుచి సంగుమ్క కామ్క జెత మాన్సుల్చి మొక్కె నే సూనయ్తె వేర మాన్సుల్చ తగుల్తె కుట్టయ్తను?

⁵ తుమ్క లాజ్ నాయ్ గే? ప్రబుక నంపజల తుమ్ బావుడ్లుతె కో బుద్ది మాన్సు తయె నాయ్ గే, చి జోచి మొక్కె సూనయ్లె జో తగు కుట్టవుక నెంజె గే?

⁶ జలె, తుమ్ నంపజలన బావొక బావొ తగుల్ కెర్తను, చి ప్రబుక నంపనెంజిలనక వెనడ్డను!

⁷ అన్నె కిచ్చొ మెంతసి మెలె, ఎక్కిలోక ఎక్కిలో తుమ్ తగు కెర్లె, నంపనెంజిల మాన్సుల్ దెకిలె తుమ్క ఆఁసుల. తుమ్ నంపజలనచి నావ్ దెకెదె. దన తగుల్ జతి కంట మాన్సుల్ తుమ్క కెర్త తప్పుల్ ఓర్పువ జంక చెంగిలి, మోసిమ్ జంక చెంగిలి.

⁸ తుమ్చ సొంత బావుడ్లుక కి తుమ్, ఎక్కిలోక ఎక్కిలో పాపుమ్ కెర మోసిమ్ కెర్తను.

నుద్ది నెంజిలస దేముడుచి రాజిమ్తె బెదుక నెంజె

9 నుద్ది నెంజిల మాన్సుల్ దేముడుచి రాజిమ్తె బెదుక నెంజె మెన నేన్సు గే? తుమ్ మోసిమ్ జా నాయ్. పెండ్లి నే జతస, జలస లంజెకమొ కెర్తస, బొమ్మల్క జొకర్తస జలెకు, మున్సుబోదల్ తెన్ మున్సుబోదల్, తేర్బోదల్ తెన్ తేర్బోదల్ లంజె జతస జలెకు,

10 చొర్లు జలెకు, డబ్బుల్క ఒగ్గర్ ఆస జతస జలెకు, మత్వాలల్ జలెకు, మాన్సుల్క దూసుప కెర్తస జలెకు, మాన్సుల్క బియడ లాబుమ్ కెరంతస జలెకు, దేముడుచి రాజిమ్తె బెదుక నెత్తిర్.

11 తుమ్ అగ్గెయి దస మాన్సుల్ జా తిలదు, గని ప్రబు జలొ యేసుక్రీస్తుచి నావ్ తెన్, చి దేముడుచి నుద్ది తిలి ఆత్మతె తుమ్ దోయి జా, ప్రబుచయ్ జా, పాపుమ్ నే కెర తిలి రితి నుద్ది జలదు, చి తుమ్క 'పున్నిమ్ జల' మాన్సుల్ జా అస్సున్.

12 జలె, "అంక ఇస్టుమ్ జలిసి కేన్ కి కెరుక అంక అక్కు అస్సె, గని సగుమ్ కమొ కెర్లె చెంగిల్ నాయ్. అంక ఇస్టుమ్ జలిసి కేన్ కి కెరుక అంక అక్కు అస్సె, గని కిచ్చొ అలవాట్క గొతిమాన్సు రితొ అవ్ జా తయిందె.

13 "అన్నిమ్ మాన్సుచి పేట్కయ్, పేట్ అన్నిమ్కయ్" మెన సంగితసుమ్, చి ఆకర్క దొన్ని కి ప్రబుయి గెచ్చవ గెలెదె. గని, మాన్సుచి ఆగ్ లంజె జతి రిసా నెంజె గని ప్రబుచి రిసాయి, దస్సి ప్రబు ఆగ్చి రిసాయి.

14 అస్సె, యేసుప్రబుక దేముడు అబ్బొసి అన్నె జియడ్లొ, చి జోచి సెక్తి అమ్క కి జియడెదె.

15 క్రీస్తుచి ఆగ్క తుమ్చ ఆగ్ వాటల్ జవుల మెన తుమ్ నేన్సు గే? జేవ్ దస్సి

జలె, క్రీస్తుచ వాటల్ కడ గెల కెర సానిక బెదవుక బెదెదె గే? నెంజె!

16 సాని తెన్ కో బెదెదె గే, జా తెన్ ఎక్కి ఆగ్ జతయ్ మెన నేన్సు గే? కిచ్చొక మెలె,

* "జేవ్ దొగుల ఎక్కి ఆగ్ జా తవుల" మెన దేముడుచి కొడొతె రెగ్గయిలయ్ అస్సె.

17 గని, ప్రబు తెన్ కో బెద అస్సి గే, జో తెన్ ఎక్కి ఆత్మయి జా తవుల.

18 జాకయ్, లంజెకమొ దూరి కెరస. దసితె ఎగ్గరె బెద నాయ్. మాన్సుల్ కెర్తి అన్నె ఎత్తి పాపుమ్, జలె, జోచి ఆగ్క దూరి అస్సె, జోచి ఆగ్క బయిలె అస్సె, గని కో లంజె జయెదె గే, జోచి సొంత ఆగ్కుక పాపుమ్ కెర పాడ్ కెర్తయ్.

19 తుమ్చి ఆగ్, తుమ్చి పెట్టి తిలి దేముడు దిలి జోచి నుద్ది తిలి ఆత్మక గుడి జా అస్సె మెన తుమ్ నేన్సు గే? తుమ్క తుమి ఇస్టుమ్ అయ్లి రితి ఏలుప కెరనుక తుమ్క అద్దికార్ము నాయ్.

20 దేముడు ఒగ్గర్ కర్దీక తుమ్క † గన అస్సె. జాక, తుమ్చి ఆగ్ తెన్ జోక గవురుమ్ కెర్తి రితి తుమ్ నుద్ది తెన్ ఇండ.

7

పెండ్లి జతిన్ చి నే జతిన్

1 జలె, తుమ్ రెగ్గ పుసిలిన్క జబాబుల్ రెగిడిందె. పెండ్లి నే జా తిలొ మున్సుబోద, జలె, తేర్బోదక నే చడ్లె చెంగిలి.

2 గని జో మాన్సు పెండ్లి నే జా తిలె, నయ్తాన్ ఉచర్తిసి రితి లంజెకమొ నే కెరవుక మెన, ఎత్తి మున్సుబోదక సొంత తెర్తి తిలె, ఎత్తి తేర్బోదక సొంత మున్సుసి తిలె చెంగిలి.

3 మున్సుసి తేర్తిక జోచి పూచి తిలిసి దెంక, తేర్తి మున్సున్క జేవ్చి పూచి తిలిసి దెంక.

* 6:16 6:16 ఆదికాండుమ్ 2:24. † 6:20 6:20 మెలె, జోవయింబి లోయి సువ జోవయింబి పాపుమ్ పువ నయ్తాన్చి రాజిమ్ తెంతొ జోవయింక నెత్తవన అస్సె.

4 కిచ్చొక మెలె, జాచి సొంత ఆగ్గక ఇస్టుమ్ అయ్లి రితి ఏలుప కెరుక తేర్చిక అదికారుమ్ నాయ్; మున్నుసి ఏలుప కెర్తయ్. దస్సి, జోచి సొంత ఆగ్గక ఇస్టుమ్ అయ్లి రితి ఏలుప కెరుక మున్నుసక అదికారుమ్ నాయ్; తేర్చి ఏలుప కెర్తయ్.

5 తుమ్తె కేన్ జవున్ దొగుతెర ఎక్కి ఉద్దెనుమ్ ఉచర ప్రార్దన నిదానుమ్ కెర్తి రిసాయి గడియకయ్ ఎక్కిలోక ఎక్కిలో దూర్ జా తంక జయెదె, నెంజిలె పొన. గని ప్రార్దన కెర్తి జా కామ్ కెర కేడయ్లదు మెలె, అన్నె మాములుమ్ బెద, నెంజిలె తుమ్ *ఆగ్గక ఆసక ముద్దొ కెర నెత్తిర్లె, సయ్తాన్ తుమ్క పాపుమ్ కెరవుక ఉచరెదె.

6 ప్రార్దనల్చి రిసా గడియ అంక తంక జయెదె మెన కిచ్చొక సంగితసి మెలె, ఆడ్ర నెంజె, గని దస్సి కెరుక చెంగిల్ జయెదె.

7 అన్నె, తుమ్ ఎత్కిజిన్ అంచి రితి పెండ్లి నెంతె తత్తదు జలె, 'చెంగిలి' మెన్తయ్, గని ఎత్కి మాన్సుక దేముడు దిలి వరుమ్ జోకయ్ తయెదె; ఎక్కిలోక ఏక్ వరుమ్, అన్నెక్లొక అన్నెక్ వరుమ్ దా అస్సె.

8 పెండ్లి నే జలసక చి రండెల్ మాన్సుల్క ఆవ్ కిచ్చొ మెంతసి మెలె, 'అంచి రితి జేవ్ దస్సి తిలె జోవయింక చెంగిలి'.

9 గని, జేవ్ ఓర్పుప జంక నెత్తిర్లె, పెండ్లి జతు. కిచ్చొక మెలె, ఒగ్గర్ ఆగ్గ ఆసక వడ్డితి కంట పెండ్లి జంక చెంగిలి.

10 పెండ్లి జలసక కిచ్చొ ఆడ్ర దెతసి మెలె; ఆవ్ నాయ్, గని ప్రబుచి ఆడ్ర ఈంజ; తేర్చి మున్నుసక ములుక నెంజె.

11 గని ఏక్ వేల ముల దిలె, దస్సి తవున్, నెంజిలె మున్నుస్ తెన్ అన్నె బెదున్. వడ్డొ మున్నుసి తేర్చిక ములవుక పొని.

12 తుమ్తె అన్నె సగుమ్జిన్క కిచ్చొ మెంతసి మెలె; ప్రబు సంగిలిసి నెంజె, గని అవ్వి సంగితసి. ప్రబుక నంపజలొ కేన్ బావొచి తేర్చి ప్రబుక నంపనెంజిలిసి జయెదె గే, జా 'జో తెన్ జియిందె' మెన్తయ్ జలె, జో జాక ములుక నెంజె.

13 దస్సి, కేన్ నంపజలి తేర్బోదచొ మున్నుసి నంపనెంజిలొసా జలె, 'జా తెన్ జియిందె' మెన జో సంగిలె, జా కి జోక ములుక నెంజె.

14 కిచ్చొక మెలె, నంపజలి తేర్చిచి సుద్దిచి రిసా, నంపనెంజిలొ మున్నుసి కి సుద్ది జయెదె, చి నంపజలొ మున్నున్చి సుద్దిచి రిసా నంపనెంజిలి తేర్చి కి సుద్ది జయెదె. నెంజిలె, తుమ్చితె దస్సి జల కుటుంబల్చ బోదల్ సుద్ది జత నాయ్. గని అప్పె సుద్ది జా అస్సి.

15 గని జేవ్ దొగుతెరతె నంపనెంజిలొ మున్నుసి జలెకు నంపనెంజిలి తేర్చి జలెకు ములుక కోర్ప జతయ్ జలె, ములుసు. దస్సి జా తిలె, నంపతిలొసా జవున్ నంపతిలిసి జవున్ మున్నుస్ తెన్ గే తెర్చి తెన్ గే తంక పూచి నాయ్. కిచ్చొక మెలె, 'సేంతుమ్ తెన్ జతు' మెనయ్ ప్రబు అమ్క బుకారా అస్సె.

16 నంపనెంజిలొ మున్నుసి తుచి తెన్ తత్తో జలె, మున్నుది ప్రబుక నంపజా రచ్చించుప జతి రితి తుయి జోక సికడుక తెరితది గే నెత్తిర్ది గే నేన్సి. దస్సి, నంపనెంజిలి తేర్చి, మున్నుబోద తుచి తెన్ తత్తి జలె, జా నంపజా రచ్చించుప జతి రితి సికడుక తెరితది గే నెత్తిర్ది గే, నెసి. జాకయ్ తుమ్ సిచ్చ కెరన నాయ్.

ప్రబు బుకార్లి పొది కీసి తిలె, దస్సి తంక

17 ప్రబుచ సంగుమ్లు ఎత్కిచి రిసా కిచ్చొ ఆడ్ర కెర అస్సి మెలె, కేన్ మాన్సుక ప్రబు కిచ్చొ వరుమ్ దా అస్సి గే, జో మాన్సు జయ్యి వరుమ్ రితి జింక. కీసి

* 7:5 7:5 ఆగ్గక ఆసక ఓర్పుప జంక నెత్తిర్లె

జింక మెన దేముడు జోక బుకారా అస్సె గే, దస్సి జింక.

18 ప్రబు బుకార్లి పొది కో యూదుల్చి గుర్తుచి సున్నతి కెరన తిల గే, జా గుర్తుచ మచ్చల్ గెచ్చవుక పోన. ప్రబు బుకార్లి పొది కో జా గుర్తు కెరన తతి నాయ్ గే, కెరనుక ఉచర్తు నాయ్.

19 కిచ్చొక మెలె, దేముడుచ కొడొ రితి ఇండుకయ్ ముక్కిమ్.

20 ప్రబు బుకార్లి పొది కీసి తిల గే, ఎత్తి మాన్సు దస్సి తంక.

21 ప్రబు బుకార్లి పొది గొతిమాన్సుల్ జా తిలదు గే, బాద నాయ్. విడ్డల్ జంక వాటు తిలె, విడ్డల్ జా. కీసి తిలె కి, బాద నాయ్.

22 కిచ్చొక మెలె, గొతిమాన్సు తిలి పొది ప్రబు బుకార్లిసా జలె, ప్రబుచి తెడి +విడ్డల్ జలొసా జతయ్. దస్సి కి, విడ్డల్ తిలి పొది కక్క ప్రబు బుకారా అస్సె గే, జో క్రిస్తుచొ గొతిమాన్సు జతయ్.

23 క్రిస్తుచి లొయి తెన్ దేముడు ‡తుమ్క గెన అస్సె. జాక, మాన్సుచి ఇన్లుమ్ రితి తుమ్ ఇండుక నాయ్.

24 జాకయ్, బావుడ్లు, ప్రబు బుకార్లి పొది కీసి ఎత్తి మాన్సు తిలదు గే, దేముడుచి తెడి దస్సి తత్తు.

పెండ్లి నే జలసచి జలసచి రిసా సంగిలిసి

25 పెండ్లి నే జలసచి రిసా, జలె, ప్రబు అంక కిచ్చొ ఆడ దెయె నాయ్, గని ప్రబు అంక సంప అస్సె, జోవయించి దయ అంచి ఉప్పిరి అస్సెచి రిసా నిదానుమ్ అస్సి, చి ఆవ్ ఉచర్దిసి ఆవ్ సంగిందె.

26 కిచ్చొ ఆవ్ ఉచర్తిసి మెలె, అప్పె జెత అల్లరిచి రిసా దస్సి తంక చెంగిలి.

27 కేన్ మున్సుబోద తెర్ని ఆన తిలె, విడ్డల్ జంక ఉచర్చు నాయ్. తెర్ని నే ఆన తిలె, పెండ్లి జంక ఆన జవున్ నాయ్.

28 గని ఏక్ వేల పెండ్లి కెరన్లె పాపుమ్ నెంజె. దస్సి తేర్బోద కి పెండ్లి కెరన్లె పాపుమ్ నెంజె. గని పెండ్లి జలసక ఈంజ లోక్కుమ్చ బాదల్ తయెదె. దస బాదల్ తుమ్ సేడుక అంక ఇన్లుమ్ నాయ్.

29 బావుడ్లు, కిచ్చొక ఇసి మెన ఆవ్ సంగితసి మెలె, అప్పె తెంతో ఆకర్ దీసి ఎద తొక్కి సమయుమ్ అస్సె. జాకయ్, తెర్ని ఆన్లన అప్పె తెంతో తెర్ని నే ఆన్లి రితి ప్రబుచి కామ్కయ్ నిదానుమ్ జితు.

30 'కిచ్చొ జలెకి, ప్రబుచి కామ్ ముక్కిమ్' మెనయ్, ఏడ్తన నే ఏడ్తసి రితి జితు, సర్ల తెన్ తిలస సర్ల నెంజెల్ రితి జితు. ఆస్సి గెన్లన కీసి జింక మెలె, కిచ్చొ నెంజిలి రితి జితు.

31 అన్సె, ఈంజ లోకుమ్తె తిలిసి వాడిక కెర్తన కీసి జింక మెలె, దస్సిచిక దెర్చు నే నేడ్డి రితి జితు. అప్పె సంగిలిసి ఎత్తి కిచ్చొక మెలె, ఈంజ లోకుమ్చి రితి తిలిసి ఎత్తి పూర్తి పాడ్ జా గెతిసి.

32 'తుమ్చి మెన్సుతె ఈంజ లోకుమ్చ బాదల్ తత్తు నాయ్' మెనయ్ తుమ్చి రిసా అంచి ఆన. పెండ్లి నే జలొ మున్సుబోద, జలె, ప్రబుచ కమొచి రిసా మెన్సు దెతయ్, ప్రబుచ ఆసల్ కెరుక ఆన జతయ్.

33 పెండ్లి జలొ మున్సుబోద ఈంజయ్ లోకుమ్చ కమొచి రిసాచి తేర్చిచ ఆసల్ జర్గు కెరుక అల్లర్ జతయ్.

34 చి జోవయింక దొన్ని మెన్సుల్ తత్తయ్. దస్సి, పెండ్లి నే జలి తేర్బోద గే, ఉబెడి గే జలె, ప్రబుచ కమొచి రిసా మెన్సు దెతయ్, ఆగుక కి ఆత్మక కి సుద్ది తంక, ప్రబుక ఎక్కి నిదానుమ్ తంక ఆన జతయ్. గని పెండ్లి జలి తేర్బోద, జలె, ఈంజ లోకుమ్చ కమొచి రిసా కి, మున్సున్చ ఆసల్ జర్గు కెరుక కి అల్లర్ జతయ్.

† 7:22 7:22 సయ్తాన్చి రాజిమ్ తెంతో విడ్డల్ జలొసా. ‡ 7:23 7:23 నెంజెలి, 'సయ్తాన్చి రాజిమ్ తెంతో తుమ్క నెతోవన అస్సె'.

35 ఈంజ ఎత్తి తుమ్క కిచ్చొక ఆవ్ సంగితసి మెలె, తుమ్క 'చెంగిల్ తత్తు' మెనయ్ సంగితసి. తుమ్క జాడు వయడ్లి రిసా నాయ్, గని బుద్దివాటు దెకయ్తి రిసాయి. తుమ్క 'ప్రబుక ఎక్కి మెన్సు నిదానుమ్ జతు' మెన అంచి ఆస.

36 జోక దెంక సంగ తిలి నాడిక ఎక్కిలో నే ఆన్లె, ఆసక ఓర్పువ జంక నెత్తిరై, రకనుక నెత్తిరై, పెండ్లి జతి జోచి ఇస్తుమ్ కెరన్సు. పెండ్లి జంక పాపుమ్ నెంజె.

37 గని, కక్క మెన్సు డిట్టుమ్ తిలె, జో ఓర్పువ జంక తెర జోచి ఆస రకనుక తెరై, జా దుయిన్క మింతున్ జా, నే ఆనుక దుయిరిమ్ తిలె, దస్సె తాఁ గెలె, చెంగిలి.

38 జాక, జో సంగ తిలి దుయిన్క కో పెండ్లి జలె చెంగిలి, గని కో పెండ్లి జయె నాయ్ గే, జోక ఒగ్గర్ చెంగిలి.

39 మున్సుసి జీవు తిలె ఎద, తేర్చి జోకయ్ తంక. గని మున్సుసి మొర గెలె, జా ఇస్తుమ్ జలోసాక పెండ్లి జంక జయెదె; గని ప్రబుచి సెలవ్ రితి జలెకయ్.

40 జా దస్సె తాఁ గెలె, జాకయ్ చెంగిలి, మెన ఆవ్ ఉచర్తసి. దేముడుచి సుద్ది తిలి ఆత్మ కి దస్సె మెన అంచి పెట్టి సికడ్తయ్ మెన ఆవ్ ఉచర్తసి.

8

బొమ్మల్క దిలిసి కతిన్చి రిసాచి కోడు

1 జలె, బొమ్మల్క దిలి అన్నిమ్చి రిసా ఉచరుమ. తుమ్ తుమ్చి ఉత్తుమ్తె రెగిడ్లి రితి 'అమ్ ఎత్తిజిన్క గ్యానుమ్ అస్సె' మెన జానుమ్. గని 'గ్యానుమ్ మాన్సుక పులయ్తయ్' మెన కి జానుమ్. ప్రేమయ్, మాత్తుమ్, మాన్సుక డిట్టుమ్ కెర్తయ్.

2 "అంక గ్యానుమ్ అస్సె" మెన కో ఉచరంతయ్ గే, జో జానుక ముక్కిమ్ తిలిసి జో అప్పెక నేనె.

3 గని, దేముడుక కో ప్రేమ కెర్తయ్ గే, జో దేముడు జోకయ్ జానె.

4 జాకయ్, బొమ్మల్క అన్నిమ్ దిలిన్చి రిసా ఉచరై, ఈంజ లోకుమ్చ 'బొమ్మల్క కిచ్చొ జీవు నాయ్' మెన జానుమ్, అన్సె, 'జివ్ తిలో దేముడు ఎక్కిలోయి అస్సె. అన్సె కోయి నాయ్' మెన కి జానుమ్.

5 మెలె, అన్సెక్ లోకుమ్తె కి బూలోకుమ్తె కి ఒగ్గర్ వేర వేర వస్తువల్క 'దేముడ్లు జతతి' మెన మాన్సుల్ సంగితతి. నిజామి మాన్సుల్క కిచ్చొ కిచ్చొ 'దేముడ్లు' 'ప్రబులు' ఒగ్గర్ జతతి.

6 మాన్సుల్ దస్సె సంగిలే కి, అమ్క ఎక్కిలోయి దేముడు. కొన్సె మెలె, ఎత్తికయ్ అబ్బొ జలో దేముడు. జో ఎత్తి జెర్మయిలోసా, చి జోచి రిసాయి అమ్ ఎత్తిజిన్ జతనుమ్. పడ్డో అమ్క ఎక్కిలో ప్రబు. కొన్సె మెలె, యేసుక్రీస్తు. *జోచి అత్తి ఎత్తి జెర్మన్ జలి, జోయ్యి అంక జెర్మయ్లన్ చి రిసా అమ్ జతనుమ్.

7 జలెకి, 'బొమ్మల్క సెక్తి నాయ్' మెన సగుమ్జిన్ అప్పెక నేనెతి; జా గ్యానుమ్ జేవ్క నాయ్. సగుమ్జిన్ అగ్గె తెంతో బొమ్మల్క జోకరుక అలవాట్ జా తిల, చి 'బొమ్మల్క దిలిసి అమ్ నంపజలన కయ్లె అమ్క పాడ్ కెరెదె' మెన బితతి, చి జోవయించి మెన్సుతె బమ్మ జవుల. కయ్లె, 'గార్ జలమ్, పొరపాట్ జలమ్' మెన 'మెన్సుక పాడ్ జలమ్' మెన నిస్సారుమ్ దెకనుల.

8 అమ్ కతిసి, జలె, దేముడుక పాసి ఆనె నాయ్, దూరి కెరె నాయ్. నే కయ్లె నస్టుమ్ నాయ్ కయ్లె లాబుమ్ నాయ్.

* 8:6 8:6 యోహాను 1:1-4 దెక. † 8:9 8:9 రోమియల్ 14 అద్యయమ్, ముక్కిమ్క 14:13-23 దెక.

9 గని, కిచ్చించి రిసా తుమ్ జాగర్త తంక మెలె, 'కంక జయెదె' మెన తుమ్ ఇస్తుమ్ అయ్లి రితి కెర్లె, ఏక్ వేల †మెన్సు డిట్టుమ్ నెంజిలో అన్నెక్టో నంపజలన తుక దెక, జో కి పడ్డొ కయ్లె, 'తప్పు కెర్లయ్' మెన ఉచరన ఉస్సర్ జయెదె, చి జోచి మెన్సుతె జో పొరపాట్ కెర్లి రితి జయెదె.

10 దస్సి తుమ్చితె కో జలెకు కేన్ జవున్ బొమ్మచి గుడితె వెన బలి దిలిసి కయ్లె, ఆత్మక డిట్టుమ్ నెంజిలో నంపజలన కో జలెకు జోక ఒత్త దెకిలె, 'జో గ్యానుమ్ తిలోసా కతయ్, ఆవ్ కి కయ్లె బాద నాయ్, కిచ్చొగె' మెన దయిరిమ్ నెంజ, దయిరిమ్ జా జో కి కయ్లె, 'వేర దేముడ్లుక దిలిసి కయ్లయ్. క్రీస్తుక ములిల్ రితి జతయ్' మెన జో పడ్డొ బమ్మ జయెదె.

11 దస్సి జలె, జో మాన్సుక 'పాపుమ్ తెంతో రచ్చించుప జవున్' మెనయ్ క్రీస్తు మొర తిలె కి, తుమ్చి 'గ్యానుమ్' చి రిసాయి ఆత్మక డిట్టుమ్ నెంజిలో జో మాన్సు జోచి ఆత్మతె పాడ్ జలి రితి జయెదె.

12 దస్సి, జేవ్ ఆత్మక డిట్టుమ్ నెంజిలనచి ఆత్మ పాడ్ కెర తుమ్ పాపుమ్ కెర, క్రీస్తుక కి పాపుమ్ కెర్లి రితి జతసు.

13 జాకయ్, ఆవ్ ముక్కల్ జవున్ కతిసి జలెకు బావొ జలో కేన్ జవున్ నంపజలనక †పాపుమ్ కెరయెదె జలె, ఆవ్ ముక్కల్ కయి నాయ్!

9

ప్రబు నిసాన్లోచి రిసా పవులు రుజ్జు జలీన్

1 అంక పరిచ్చ కెర్లయ్ జలె, క్రీస్తుచి తెడి ఆవ్ విడ్డల్ జలోసా నెంజి గే? జోచి చి రిసా జోచొ బారికి ఆవ్ జయి నాయ్ గే? అమ్చొ ప్రబు జలో యేసుక ఆవ్ సొంత దెకుక నాయ్ గే? తుమ్ ప్రబుచి తెడి ఆవ్ మార్పుప కెర్లనచి పలితుమ్ తుమ్ నెంజున్ గే?

2 ఆవ్, 'ప్రబుచొ బారికి నెంజె' మెన వేర మాన్సుల్ అంచి రిసా ఉచర్లె కి, దసాచొ ఆవ్ తిలిన్క తుమ్ సాచుల్ జస్తె. ప్రబుచి బారికి కామ్క జో అంక నిసాన్లినె. కిచ్చొతె రుజ్జు జతయ్ మెలె, తుమ్ ప్రబుచి తెడి తిలిసి, అంచి అత్తి జోచి రిసా సూన నంపజలదు, అంక జో దిలి కామ్ తుమ్చితెయ్ జెయిమ్ జలి.

3 అంక పరిచ్చ కెర్లనక అంచి జబాబ్ ఈంజయి.

4 ప్రబుచి ఈంజ కామ్ కెర్లన, కంక పింక విలువ నాయ్ గే, నాయిమ్ నాయ్ గే, బెదె నాయ్ గే?

5 ప్రబుచ బావుడ్నివొ చి *కేపా చి ప్రబుచ అన్నె బారికుల్చి రితి అమ్ తెర్ని ఆన అమ్చి పట్టి కడ నెంక అమ్క విలువ నాయ్ గే?

6 ప్రబుచ బారికుల్ మొత్తుమ్తె ఎక్కి బర్బుబా చి ఆవ్, జలె, అత్తో తెన్ కామ్ కెర కెరయ్ జింక ములుక విలువ నాయ్ గే? ఎక్కి అమ్మి కామ్ కెర కెరయ్ జింక ములుక విలువ నాయ్ గే?

7 జమాను సుదొ సొంత గెర్చి డబ్బుల్ ఆనన జమాన్లుచ కామ్ కెరెదె గే? కో ద్రాసతోట గల కెర ఒత్తచ కాయల్ జో కంక నెంజి గే? మంద రకితో గొవుడు మందచి దూదు నె పితె కో తవుల?

8 ఆవ్ మాన్సు అవ్వొ కెరయ్ ఇసి సంగితసి గే? దేముడుచ్చ †మోసే పూర్ణమ్చొచి అత్తి రెగ్గయ్ల దేముడుచ ఆగ్గుల్ కి ఇసి సంగితసి.

9 † "గిడ్డల్ కెల్నె సుదయ్తె పొది

‡ 8:13 8:13 8:9 దెక, చి రోమియల్ 14:23. * 9:5 9:5 మెలె, 'పేతురు'. † 9:8 9:8 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రగ్గయ్లి ఆగ్గుల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పావ్ పున్సుకుమ్తె రెగ్గయ్ జా అస్సె. ఈంజ దెకవుక మెన కుపియ బాసతె నొయ ప్రమానుమ్తె మోసే పూర్ణమ్చొచి అత్తి రెగ్గి దేముడుచ ఆగ్గుల్ మెన రగ్గచ అస్సె. ‡ 9:9 9:9 ద్వితియోపదేశ కాండుము 25:4.

నుడయ్యేటో బెయిలుచి మూఁతి బండుక పోన” మొన మోసే పూర్ణుమచోచి అత్తి రెగిడ్డి దేముడుచి ఆగ్గుల్తె ఇసి రెగ్గవ అస్సె. జలె, ఎక్కి బెయిలల్ చి రిసా జో ఉచర్తయ్ గే?

10 కచితుమ్ అమ్చి రిసాయ్ ఈంజ కోడు సంగితయ్ మొన ఆవ్ సంపజతసి. కిచ్చొక మెలె, కేస్తాసా కేసిలె, పంటొ లాయితోసా పంటొ లాయిలె, జోకి ఈంజొ కి ‘పంటొచి వాట నజనుక జయెదె’ మొన ఆస తెన్ తవుల, నజనుక విలువ జవుల.

11 ఆమ్, జలె, తుమ్చితె ఆత్మచి బిఱ గల అస్సుమ్ మెలె, అమ్క తుమ్ కిచ్చొ జవున్ దెంక నెంజె గే? అమ్క కిచ్చొ జవున్ వాట జెంక బెదె నాయ్ గే?

12 ప్రబుచి కామ్ కెర్ల వేర మాన్సుల్ తుమ్చితె వాట నజనుక విలువ తిలె, అమ్ అన్నె విలువ జము నాయ్ గే? అమ్మి తొలితొ తుమ్క సుబుమ్ కబుర్ సూనయ్లమ్, గెద. జలె, జా నజనుక అమ్ విలువ జలెకి, జా అమ్ నజనుక నాయిమ్ తిలె కి, అమ్క జెతిసి నజనుమ్ నాయ్. ప్రబుచి సుబుమ్ కబుర్ తుమ్ సూనతిన్క కిచ్చొ అడ్డు కెరుక నెన కెర, కిచ్చొ కస్టుమ్ కి ఓర్పుప జమ్దె.

13 దేముడుచి గుడిచి కామ్ కెర్ల సేవ కెర్తన, జలె, దేముడుచి గుడిచి జేవ్చి వాట నజ కతతి. బలిచి కామ్ కెర్ల సేవ కెర్తన జా బలి దిలి టాన్తె దెతిసి జోవయించి వాట నజ కతతి మొన నేన్సు గే?

14 దస్సి, “సుబుమ్ కబుర్ సూనయ్తన జోవయించి జా కామ్చి రిసాచి వాటక జితు కతు” మొన ప్రబు అడ్డ దిలన్.

15 జలెకి దస్సి ఆవ్ కిచ్చొ జలెకి నజనుక నాయిమ్ తిలె కి, ఆవ్ నజనుక నాయ్. చి ‘దస్సి తోడు దొర్కు కెరనుక ఉచరయ్ ఉత్తల్ రెగిడ్డయ్’ మొన తుమ్ అంచి రిసా ఉచర నాయ్. కిచ్చొక మెలె, ‘ఆవ్ నజి నాయ్’ మొన ఆవ్ గవురుమ్

సంగితిన్క కో అడ్డు కెర్లి కంట మొరుక కి సర్ల జయిందె.

16 సుబుమ్ కబుర్ సూనయ్తి రిసా కిచ్చొ గవురుమ్ నజనుక బెదె నాయ్. కిచ్చొక మెలె, జా సుబుమ్ కబుర్ నే సూనయ్లె నెంజె, అయ్యె! ఆవ్ సుబుమ్ కబుర్ నే సూనయ్లె, అంక నస్టుమ్!

17 ఎక్కి అంచి సొంత ఇస్టుమ్కయ్ ఈంజ కామ్ కెర్తయ్ జలె, ‘జో కెర్లి రిసా జోవయింక బవుమానుమ్ దెంక అస్సె’ మెనుక జతి. గని ఆవ్ ఈంజ కామ్ కెర్లిసి ఎక్కి ఆవ్ ఇస్టుమ్ జలిసి నెంజె. ఆవ్ ఈంజ కామ్ కెరుక మొన ప్రబు అంక పూచి కెర అస్సె. కిచ్చొ దొర్కు జలెకి, నే దొర్కు జలెకి, ఈంజ కామ్ కెరుకయ్ అంచి పూచి.

18 జలె, అంచి బవుమానుమ్ కిచ్చొ మెలె, సుబుమ్ కబుర్ సూనయ్తి రిసా ఆవ్ నజనుక విలువ తిలిన్క ఆవ్ ఆస నే జతె, ‘తుమ్క ఆరి దొర్కు జవున్’ మొనయ్ ఆవ్ కిచ్చొ నే నజితె, తుమ్క జాడు వయడుక నెన కెర, డబ్బుల్ గట్ర నే నజితె ఆరి బోదన కెర్తసి.

ఎత్తి రగల్ మాన్సుల్క సుబుమ్ కబుర్ సూనవుక

19 దస్సి, ఆవ్ కేన్ మాన్సుచొ గొతిమాన్సు నెంజిలె కి, ఒగ్గర్జిన్క ‘ప్రబుక సంపజా రచ్చించువ జతు’ మొనయ్ అంచి సర్లక ఎత్తిజిన్క గొతిమాన్సు రితో జా అస్సి.

20 ‘యూదుల్ సంపజతు’ మొన, యూదుడు రితో జలయ్. మెలె, పూర్ణుమ్ మోసేచి అత్తి దేముడు దిల ఆగ్గుల్క బితనక ‘సంపజతు’ మొనయ్, దేముడు మోసే తెన్ దిలి ఆగ్గుల్క బితోసా రితో జలయ్. ఆవ్ జా అలవాట్ తెంతో ఆత్మక విడ్డల్ జా తిలె కి.

21 దేముడు మోసే తెన్ దిలి ఆగ్గుల్ రితి నే కెర్తనక, మెలె యూదుల్ నెంజిలనక, జలె, ‘జేవ్ కి ప్రబుక

నంపజా రచ్చించుప జతు' మెనయ్, యూదుడు నెంజిలో రితో జలయ్. మెలె, దేముడుక నిదానుమ్ తా, జోచి కోడ్ రితి నిదానుమ్ ఇండితె తిలయ్, గని క్రిస్తు సంగిలి ఆగ్గుల్చి రితి, క్రి'ప్రేమయ్ ముక్కిమ్' మెనయ్, జోచి ప్రేమ తెడి అమ్చ యూదుల్చ ముక్కిమ్ నెంజిల దేముడు మోసే తెన్ దిలి ఆగ్గుల్చి జాడు యూదుల్ నెంజిలనక వయడి నాయ్.

22 ఆత్మక డిట్టుమ్ నెంజిలనక 'జేవ్ కి ప్రబుక నంపజా రచ్చించుప జతు' మెనయ్, 'బమ్మ కెర్లె అన్మానుమ్ జవుల' మెనయ్, జోవయింక బమ్మ నే కెర్లి రిసా జోవయించో రితో జలయ్. 'కిసి జలె సగుమ్జిన్కయ్ జవున్ రచ్చించుప కెరిందె' మెనయ్ జోవయింప విడ్డల్క, ఆత్మల్క నిస్కారుమ్ నే దెకితె, ఎత్కిజిన్క మరియాద దెక అస్సి.

23 'ఎత్కిజిన్ సుబుమ్ కబుర్ నూన్తు, నంపజా రచ్చించుప జతి అవ్కానుమ్ నజన్తు' మెనయ్, పడ్డె, 'నంపజలన ఎత్కిజిన్ తెన్ ఆవ్ కి సుబుమ్ కబుర్ తెచ వరల్తె బెదిందె' మెనయ్.

పరలోకుమ్చి బవుమానుమ్

24 కేన్ జవున్ నిగితి కెల్తితి ఒగ్గర్ జిని నిగుల, గని ఎత్కిచి కంట బే బేగి నిగితోసా ఎక్కిలో జినెదె, చి జోకయ్ బవుమానుమ్ దొర్కు జయెదె మెన తుమ్ నెసు గే. పరలోకుమ్చి బవుమానుమ్ దొర్కు కెరంతి రిసా తుమ్చితె ఎత్కి మాన్సుకి నిదానుమ్ నిగ జిన.

25 నిగిత కెర్లయ్తె బెదితన, జలె, జోవయింపి ఆగ్ డిట్టుమ్ జతి రితి, ఆగ్గుక ఎత్కి రగల్ కచితుమ్ ముద్దో కెరుక సికనుల. జేవ్ దస్సి సిచ్చ రితి కెరంతిసి కిచ్చొక మెలె, ఆరి పాడ్ జతి ఈంజయ్ లోకుమ్తె బెదితి

బవుమానుమ్ దొర్కు కెరనుక. ఆమ్, మాత్రుమ్, కిచ్చొక కచితుమ్ ముద్దో కెరంతనుమ్ మెలె, పాడ్ నే జతి పరలోకుమ్చి బవుమానుమ్కయ్.

26 ఆవ్ కేనె గెత్సి గే పాచ్చిల్ రితి నిగి నాయ్. వాదు తెన్ పొరాటుమ్ జలి రితి నే జయి, దెబ్బ కేనె నే లయితి రితి కెల్లి నాయ్.

27 అంచి ఆగ్గుక ఆవ్ ముద్దోచి బుద్ది సికయ్తసి కెర్తసి, అంచ ఆసల్క ముద్దో కెరంతసి. నెంజిలె, తొలితొ వేర మాన్సుల్క బోద కెర సికడ తిలె కి, ఏక్ వేల అవ్వి ఓడుప జలె, కెర్లి తప్పు జయిందె. అంక జెతికయ్ జా బవుమానుమ్ నజన్తి అవ్కానుమ్ ఆచ్చి పిట్టవన్లె, కెర్లి పాపుమ్!

10

యూదుల్చి రితి పొరపాట్ జతిన్తె తుమ్ కెరుక నాయ్

1 తుమ్ కిచ్చొక జాగర్త తెన్ తంక మెలె, బావుడ్లు, అమ్చ పూర్లుమ్చ కిసి జల గే, ఉచరుమ. తుమ్ పచ్చ నాయ్. ఉచర్లె, కామ్క జెయెదె. దేముడు జోవయింపి పురె ఇండయ్లి *మబ్బుచి ఎట్టో జేవ్ ఎత్కిజిన్ వెల్లి బయిలె బుల్తె తిల, †నముద్దుమ్చి బుయి వాట్ జేవ్ ఎత్కిజిన్ నముద్దుమ్తె ఇండ గెల.

2 దస్సి, మబ్బుచి పట్టి ఇండ, నముద్దుమ్ దస్సి డేవ, మోసే తెన్ బాప్తిసుమ్ నజన్లి రితి జల.

3 ఎత్కి ఎక్కి ‡ఆత్మ అన్నిమ్ కయ్ల,

4 ఒండిజిన్ క్రి'ఆత్మ నమ్మందుమ్ జలి పాని పిల. ఆత్మ నమ్మందుమ్ జలి రంగ్ని తెంతొ సుచి జలిసి పాని జేవ్ పిల. జో ఆత్మ రెంగ్ని కొన్సో మెలె, *క్రిస్తు.

5 దస్సి జలెకి, జోవయింతె ఒగ్గర్జిన్చి ఇండిలిసి రిసా అమ్చో దేముడుక సర్ల

§ 9:21 9:21 మత్తయి 22:37-40, యోహాను 13:34-35, 15:12, 17. * 10:1 10:1 నిర్గమకాండుమ్ 13:21, 14:19. † 10:1 10:1 నిర్గమకాండుమ్ 14:16. ‡ 10:3 10:3 నిర్గమకాండుమ్ 16 అద్యయమ్.

§ 10:4 10:4 నిర్గమకాండుమ్ 15:22-25, 17:5-6. * 10:4 10:4 యోహాను 4:10-14.

తయె నాయ్. అన్నె, జా వెల్లి బయిలె జేవ్ †పాపుమతె గెతికయ్, దేముడు సంగ తిలి దేసిమి జేవ్ నే పావితె మొరుక మెన జో సిచ్చ దిలన్.

6 జలె, జేవ్ ఆస జలి రితి ఆమ్ ఆస జంక నాయ్ మెల, అమ్క బుద్ది సికితి రితి జా ఎత్తి అమ్క కిచ్చొ కామ్క జెయెదె మెలె, అమ్క జాగర్త దెకయ్తయ్.

7 †“ప్రెజల్ కంక పింక వెన, నచుక ఉట్టిల”

మెన జేవ్ సగుమ్జిన్ పాపుమ్ జా బొమ్మక జొకర్తిన్చి రిసా దేముడుచి కొడెతె రెగ్గవ అస్సె. జా పాపుమ్ తుమ్ కెరుక పోన.

8 పడ్డొ, జోవయింతె కీబగర్ జిని లంజె జా ఎక్కె దీసి విస్సెక్ తిన్ని వెయిల్ జిని మొర గెల. ఆమ్ నంపజలన్ జా పాపుమ్ కెరుక నాయ్.

9 పడ్డొ, జోవయింతె సగుమ్జిన్ దేముడు ప్రబుక కొకర్ణి రితి పాపుమ్ కెర్ల, చి జో *అయివొ తెద్రయ్తికయ్, చడ్డ, చి జయ్యి సిచ్చ జల. ప్రబుక అమ్ నంపజలన్ పరిచ్చ కెర్లి రితి కొంకడుక నాయ్.

10 పడ్డొ, జో దేముడు ప్రబు తోడు తిలె కి, జోవయించి రిసా కోపుమ్ జతె తిల, చి మొరయ్తోసా దేముడుదూతచి అత్తి జేవ్ మొర గెల.

11 జోవయింతెచ మాన్సుల్క జేవ్ సిచ్చల్ కిచ్చొక కామ్క అయ్లి మెలె, జోవయింక ‘జాగర్త తెన్ తత్తు’ మెన రుజ్జుల్ దెకయ్లి. పడ్డొ, జో దేముడు కిచ్చొక జా ఎత్తిచి రిసా దేముడుచి కొడెతె రెగ్గయ్లో మెలె, ఆమ్ ఉగుమ్చి ఆకర్తె జత మాన్సుల్క ‘సిక్కుతు’ మెనయ్ రెగ్గవ అస్సె.

12 జాకయ్ కో ‘ఆవ్ చెంగిల్ అస్సి’ మెన ఉచరంతయ్ గే, పాపుమతె దెర్ను

నే నేడ్డి రితి జాగర్త దెకన్ను.

13 తుమ్క దెరుక జెత పావల్ అగ్గెయ్ తెంతొ మాన్సుల్క దెర్తి, కిచ్చొ నొవచ నెంజితి, గని దసచతె తుమ్ దెర్నునే నేడ్డి రితి తుమ్ కిచ్చొ దయిరిమ్ తంక జయెదె మెలె, దేముడు నిదానుమ్ తతోసా, చి సత్తిమ్ ఇండుక తుమ్క ఇస్సుమ్ తిలె, సయ్తాన్ తుమ్క పాపుమ్ కెరయ్తి రితి దేముడు సైలవ్ దెయె నాయ్. తుమ్ జా పాపుమ్ నే కెర్లి రితి తుమ్క దొర్కు జలి సెక్తి దెయెదె, కేన్ సమయుమ్క సయ్తాన్ దస్సి అల్లర్ కెరుక జెయెదె గే, తుమ్ ఓర్పువ జా జినుక తెరితి రిసా విడ్డల్ జతి వాటు జో దేముడు దెకయెదె.

బొమ్మల్క జొకర్తిన్చి రిసా జాగర్త సంగిలిసి

14 ప్రేమ తిల బావుడ్లు, బొమ్మల్క జొకర్తిన్క దూరి తా, దసితె బెద నాయ్.

15 తుమ్క ‘బుద్ది తిలన’ మెన ఆవ్ తుమ్క ఇసి సంగితసి. ఆవ్ అస్సె సంగితిన్చి రిసా తుమ్ సొంత చెంగిల్ ఉచర.

16 ‘తుయి దిలిసి ఈంజ’ మెన ప్రబుచి నావ్ తెన్ అమ్ జొబర కెర ద్రాచ రస్సుమ్ పిలె, జోచి నూయి జలి లోయిచి రిసా దొర్కు జలి రచ్చనతె అమ్ బెదిలిన్చి గుర్తు జయెదె. జోచి నావ్ తెన్ అమ్ పోడి గండల్ కెర కయ్లె, జోచి ఆగ్ మొర అమ్చి పాపుమ్ జో వయ్లిన్తె అమ్ బెదితి గుర్తు జతయ్.

17 జా ఎక్కి పోడి కతి ఎక్కి గుర్తు అమ్ ఎత్తిజిన్ నంపజలన్క తనుమ్చి రిసా, అమ్ ఒగ్గర్జిన్ జలెకి, జా ఎక్కి పోడి కయ్లి రిసా, అమ్ క్రిస్తు తెన్, ఎక్కిలో తెన్ ఎక్కిలో ఎక్కి ఆగ్ జా అస్సుమ్.

18 పూర్ణుమ్చి రితి దేముడుక బలి దెత అమ్చ ఇస్రాయ్లుల్చి రిసా ఉచర. జా బలి దిలిసి కయ్లె, జా కతన

† 10:5 10:5 నిర్గమకాండుమ్ 14:20-24, 28-35, ద్విత్వీయోపదేశ కాండుము 1:34-40. ‡ 10:7

10:7 నిర్గమకాండుమ్ 32 అద్యయమ్. ముక్కిమ్క 32:2-6. § 10:8 10:8 సంక్యాకాండుము 25:1-9.

* 10:9 10:9 సంక్యాకాండుము 21:4-9.

ఎత్తిజిన్ జా బలి దిలిన్తె బెదిలి గుర్తు జతయ్.

19 జలె, బొమ్మక దిలి కిచ్చొ బలిక కిచ్చొ సెక్తి అస్సె గే? బొమ్మక కిచ్చొ సెక్తి తయెదె గే? కిచ్చొ నాయ్.

20 కిచ్చొ మెంతసి మెలె, దేముడుక నేన్ల మాన్సుల్ బలి దెతిసి కక్క దెతతి మెలె, దేముడుక నాయ్, గని బూతల్కయ్. తూమ్ బూతల్క జొకర, జోవయింతెన్ బెదుక అంక ఇష్టుమ్ నాయ్!

21 కిచ్చొక మెలె, ప్రబు తెన్ బెద పిలి పడ్డొ, బూతల్ తెన్ బెద పింక ఎద్గరె బెదె నాయ్. ప్రబుచి అన్నిమ్ చి బూతల్చి అన్నిమ్ ఎక్కిలో మాన్సు కో జలెకు కంక బెదె నాయ్. దొన్ని బెదితి నాయ్.

22 దస్సి జలె, ప్రబుక అమ్ కొంకడ కోపుమ్ కెరుక జయెదె గే? నెంజె, గెద. జోచి కంట అమ్క సెక్తి గే? నాయ్ గెద.

నంపజలసక అక్కు

23 జలె, “కిచ్చొచి రిసా కి ‘గార్’ మెనుక నెంజె” మెన సంగితసుమ్. జా నిజుమ్, గని అమ్ సగుమ్ కమొ కెర్లె, అన్నె మాన్సుల్క చెంగిల్ తయె నాయ్. “కిచ్చొచి రిసా కి ‘గార్’ మెనుక నెంజె” మెన అమ్ నంపజలస సంగితసుమ్ గని సగుమ్ కమొ కెర్లె, మాన్సుచి నముకుమ్క చెంగిల్ కెరె నాయ్.

24 కో నంపజలస సొంత లాబుమ్క ఆస జతు నాయ్, గని అన్నె మాన్సుల్కయ్ ‘చెంగిల్ జతు’ మెనయ్, ఆస తెన్ తంక.

25 తుమ్చి మెన్సు నే కెరతె, నే పుసితె కటికి సుదొతెచి ముక్కల్ గెనుక జలె, ‘బలి దిలిసి జయెదె గే నెంజె గే?’ మెన నే బితె, లాజ్ నెంతె గెన్న కంక జయెదె.

26 కిచ్చొక మెలె, దేముడుచి కొణతె రెగ్గయ్లి రితి, “లోకుమ్ కి, లోకుమ్తె తిలిసి కి, ఎత్తి ప్రబుచి” మెన రెగిడ్లిసి సత్తిమ్.

27 పడ్డొ, ప్రబుక నంపనెంజిలో కేన్ మాన్సు తుమ్క అన్నిమ్క బుక్కార్లె, ఇష్టుమ్ తిలె, గెచ్చు, చి కిచ్చొ లాజ్ నెంతె కిచ్చొ నే పుసితె, జో కిచ్చొ దెయెదె గే, కా.

28 గని “ఈంజ బొమ్మక బలి దిలిసి” మెన తుమ్క కో జాకు సంగిలె, ‘జేవ్ జా కయ్లె జోక పాపుమ్ కెరవ తయిందె చి అంక పాపుమ్ లయెదె’ మెనయ్ జో మాన్సు సత్తిమ్క తుమ్క జాగర్ల సంగిలిన్చి, సత్తిమ్ జోక పిట్టున్ నాయ్ మెన, జో అన్మానుమ్ నే జతి రిసా జా కా నాయ్.

29 తుమ్చి పెట్టిచి సత్తిమ్ తతి రిసా నాయ్, గని సత్తిమ్కయ్ జో మాన్సు తుమ్క సంగ తయెదె, చి జో అన్మానుమ్ నే జతి రిసాయి తుమ్ కా నాయ్. ‘కంక నెంజె’ మెన వేర మాన్సుల్చి మెన్సు తెన్ అంక కిచ్చొక తీర్పు జర్గు జయెదె.

30 ‘ప్రబు దిలో’ మెన ఆవ్ సర్ల తెన్ జా కయ్లె, కో మాన్సుల్ అంక నింద కెరుక తెరితి గే? నెతిర్రి. ప్రబుచి నావ్ తెన్ జోబర సంగ కెర ఆవ్ కయ్లె, జాచి రిసా అంక కో నింద కెరుల?

31 గని కంక జలెకి, పింక జలెకి, కిచ్చొ కామ్ కెరుక జలెకి, దేముడుచి గవురుమ్ దెకయ్లి రితి కెర.

32 యూదుల్ జవున్, గ్రీసు దేసిమ్చ జవున్, దేముడుచి ఆగ్ జతి సంగుమ్ జత నంపజలస పొరపాట్ నే జతి రితి తుమ్ కిచ్చొ అడ్డు కెర నాయ్.

33 అంచి సొంత లాబుమ్ పోని, గని ఎత్తిజిన్క ‘జేవ్ రచ్చొంచుప జా చెంగిల్ జతు’ మెనయ్, కిచ్చొ కామ్ తిలె కి ఆవ్ ఎత్తిజిన్క మరియాద కెర్రి రితి ఇండితసి.

11

సంగుమ్లుతె కేన్ తంక గే

1 ఆవ్ క్రీస్తుక దెక కిసి ఇండితసి గే, తుమ్ కి అంక దెక దస్సి ఇండ.

2 అంక తుమ్ కెడ్డొడి తెడ్డొడి ఉచార కెర్లసు, చి రిసా బావుడ్డు, ఆవ్

సూనయ్యల రితి, అమ్ నంపజలసక దిలిసి తుమ్ కెర్తను, చి రిసా అంక సర్ద.

3 అమ్చ మున్నుబోదల్ ఎత్తిజన్క *బోడి కొన్సొ మెలె, క్రీస్తు. పడ్డొ, ఎత్తి తేరబోదక బోడి కొన్సొ మెలె, మున్నుసి. పడ్డొ క్రీస్తుక బోడి కొన్సొ మెలె, దేముడు మెన తుమ్ జానసుక అస్సె.

4 కేన్ మున్నుబోద బోడి డంకనయ్ ప్రార్దన కెర్లె జవున్, దేముడుచ కబుర్లు సంగిలె జవున్, జోచి బోడిక నిస్కారుమ్ కెరంతయ్.

5 కేన్ తేరబోద బోడి నే డంకింతె ప్రార్దన కెర్లె జవున్ దేముడుచ కబుర్లు సంగిలె జవున్, జాచి బోడి నిస్కారుమ్ కెరంతయ్; జాచి బోడి బోడన్లి రితి జతయ్.

6 కేసి మెలె, తేరబోద బోడి డంకనుక నెసిలె, జాచి నెండి కత్రవన్లెకయ్ చెంగిలి, గని నెండి బోడనుక జవున్ కత్రవనుక జవున్ నెంజె మెలె, బోడి డంకనయ్ తంక.

7 కిచ్చొక ఇసి సంగితసి మెలె, మున్నుబోదక జెర్మయ్లి పొది, “అంచి పోలిక అంచి గవురుమ్ ఇన్నెతె డీసున్” మెన, దేముడు జెర్మయ్లన్. గని తేరబోద జలె మున్నుబోదచి గవురుమ్ దెకయ్తయ్.

8 కిచ్చొక మెలె, మొదొల్క మున్నుబోద తేరబోద తెంతొ జెర్మన్ జయె నాయ్. మున్నుబోద తెంతొ తేరబోద జెర్మన్ జలి.

9 తేరబోదక తోడు తతి రిసా మున్నుబోద జెర్మయ్ జయె నాయ్, గని మున్నుబోదక తేరబోద తోడ తతి రిసాయి తేరబోదక జెర్మవ అస్సె.

10 జాకయ్, దూతల్ కి దెకితతి రిసా, తేరబోదచి ఉప్పిర్చొ మున్నున్చి అదిసారుమ్చి గుర్తు దెకయ్తి రిసాయి జా తేరబోద బోడి డంకనుక అస్సె.

11 జలె ప్రబుతె మున్నున్క అంగ తేరబోద నాయ్, తేరబోదక అంగ మున్నుబోద నాయ్. క్రీస్తుచి తెడి తేర్చిక

మున్నుసి తోడు, మున్నున్క తేర్చి తోడు అస్తి.

12 తొలితొ తేరబోద మున్నుబోదచి తెంతొ జెర్మన్ జలెకి, అప్పె తేరబోదచి పెట్టి మున్నుబోద జెర్మితయ్. మున్నుబోదల్ కి, తేరబోదల్ కి, ఈంజ లోకుమ్తె తిలిసి ఎత్తి కి దేముడు జెర్మయ్లొ. ఎత్తిచి మొదొల్ దేముడు.

13 తుమ్ సొంత తీర్పు ఉచర. బోడి నే డంకింతె తేరబోద దేముడుక ప్రార్దన కెరుక సూటి గే?

14 ఒండి లోకుమ్క దెకిలె, ‘మున్నుబోదచి నెండి దీగు జా తిలె నూటి నాయ్’ మెన నేనుమ్ గే?

15 ‘తేరబోదక నెండి దీగు తిలె జాక గవురుమ్’ మెన నేనుమ్ గే? కిచ్చొక మెలె, జాక మరియొద తెన్ డంకితయ్. దస్సికయ్ దేముడు జాక దిగిల్ నెండి దా అస్సె.

16 ఈంజ కోడుచి రిసా కో జలెకు వేర సికడుక ఉచర్తయ్ గే, తుమ్ కిచ్చొ జానుక మెలె, కిచ్చొ వేర రిత కెరుక నెంజె మెన ఒప్పన్, పడ్డొ ప్రబుచ సంగుమ్లు ఎత్తితె ఇసి కెర్తతి.

ప్రబుచి ఆగ్చి లోయిచి గుర్తు తిలి పోడి, ద్రాచ రస్సుమ్

17 వేరచి రిసా తుమ్క మెన్సుక జతయ్ జలెకి, ఏక కోడుచి రిసా అంచి విసారుమ్ ఆవ్ సంగుక అస్సె. కిచ్చొచి రిసా మెలె, ప్రబుచి నావ్ తెన్ తుమ్ సంగుమ్తె సబ కెరుక బెదిలె, కామ్క జెతికయ్ బుద్ది తెన్ నాయ్, గని కామ్క నెంజిలి బుద్ది తెన్ బెదితను.

18 కిచ్చొ బుద్దిచి రిసా ఆవ్ సంగితసి మెలె, ఎక్కి, ‘సంగుమ్’ మెన తుమ్ బెదితి పొది ఎక్కి మెన్సు తెన్ నాయ్. జల్లు జలి రితి జతను, మెన తుమ్చి రిసా ఆవ్ నూన అస్సి. జా కోడు ఇదిల్ నంప కెరుక జతయ్.

* 11:3 11:3 ఎఫెసు 1:22-23, 4:15-16, 5:23. కొలోస్సియల్ 1:18, 2:10.

19 తుమ్తె కో నత్తిమ్ అస్తి గే, కో నాయ్ గే చినితి రిసా దస జట్టు తంకయ్ మెన ఏక్ వేల తుమ్ ఉచర్తను గే? దస్సి ఉచరుక పిట్టె నాయ్.

20 తుమ్ బెద సబ కెర్తి పొది పొడి చి ద్రాచ రన్సుమ్ కయ్లి పిట్టె, 'యేసుప్రబు దిలి అన్నిమ్ ఈంజ' మెన తుమ్ సంగిలే కి, దస్సి మెనుక నెంజె.

21 కిచ్చొక మెలె, తుమ్ సొంత ఆన్సిసి కక్క, నే దెతె, సొంత జాయ్ గెతను, చి సగుమ్జినక నెంజె తా జోవయింక పెట్టి బెరె నాయ్. చి సగుమ్జిన మచ్చ గెతతి!

22 అబ్బవోమ్మ! తుమ్క గెరల్ నాయ్ గే, చి నే జెతె అగ్గె చూ తాన్ గెచ్చవంతి రితి గెరి కంక పింక నెంజె గే? నెంజెలె, ప్రబుచి సంగుమ్తె బెదిలసక నిస్కారుమ్ ఉచర, జోవయింతె నెంజెలసక నిస్కారుమ్ కెరుకయ్ మెన దస్సి కెర్తను గే? తుమ్క ఆవ్ కిచ్చొ సంగిలె జయెదె? దస్సి కామ్చి రిసా తుమ్క 'చెంగిల్ కెర్తతి' మెన ఆవ్ సంగుక బెదెదె గే? నాయ్, గెద, బెదె నాయ్! నెంజె!

23 ప్రబుతె అంక దొర్కు జలిన్చి రిసా, ఆవ్ తుమ్కయ్ సార్ప కెర దిలిసి కిచ్చొ మెలె, జోక విరోదుమ్ సుదల్చి అత్తి సార్ప కెర దిలి జా రాతి, యేసుప్రబు పొడి దెర,

24 దేముడు అబ్బొన్క జోబర సంగ ప్రార్దన కెర, మోడ కెర, "ఈంజ, తుమ్చి రిసా బలి జతి అంచి ఆగుక గుర్తు. ఈంజ కెర అంక ఉచార కెర కెయ్క కంక, అంచి రిసాయి ఉచర్తె తా" మెన ప్రబు సిస్సుల్క దిలన్.

25 జా అన్నిమ్ కయ్లి పణ్ణె, ద్రాచ రన్సుమ్చి గలన్ దెర ప్రార్దన కెర, "ఈంజ గలన్చి రన్సుమ్ కిచ్చొ గుర్తుచి రిసా మెలె, అంక నంపజతనచి పాపుమ్ పుంచితె అంచి లోయిచి గుర్తు ఈంజ. ఈంజ, అంచి నోవి ప్రమానుమ్ జర్గు

జతిన్చి గుర్తు. ఈంజ కెర అంక ఉచార కెర కెయ్క పిలెకి, అంచి రిసాయి ఉచర్తె తా" మెన సంగ పియ్డన్.

26 కిచ్చొక మెలె, జా పొడియొ కెయ్క కయ్లె, జా ద్రాచ రన్సుమ్ కెయ్క పిలె, ప్రబు మొర అర్పితుమ్ జలిన్చి గుర్తు దెకయ్తను, సాడుప కెర్లి రితి జతను. జో ఈంజ లోకుమ్తె అన్నె జెతె ఎదక జయ్యి గుర్తు దెకయ్తె తా.

27 జలె, కిచ్చొ వేర బుద్ది తెన్ కో జా పొడియొ కయ్లె, జా ద్రాచ రన్సుమ్ పిలె, ప్రబుచి ఆగుక జోచి లోయిక దూసుప కెర్లి రితి, విలువ నే దిలి రితి, పాపుమ్ వయుల.

28 జాకయ్, కేన్ మాన్సు జా పొడి కయెదె గే, జా లోయి పియెదె గే, తొలితో జోక జొయ్యి పరిచ్చ కెరన, సిలువతె ప్రబు జర్గు కెర్లి కామ్ ఉచరయ్ కవున్ పివును.

29 కిచ్చొక మెలె, 'ప్రబుచి ఆగుచి గుర్తు, జోచి లోయిచి గుర్తు ఈంజ' మెన సరిగా నే ఒప్పన్తె కో ఈంజ కవుల గే, పివుల గే, జో సిచ్చకయి జాక పియ జా పాపుమ్ వయనుల.

30 దస్సికయ్ తుమ్చితె ఒగ్గర్జిన చెంగిల్ నెంతె జబ్బుల్ జా అస్సున్, చి సగుమ్జిన కి మొర గెచ్చ అస్సి.

31 అమ్ సొంత పరిచ్చ కెరన బుద్ది కెరంతె తత్తమ్ జలె, ఇన సిచ్చల్ జతె తత్తమ్ నాయ్.

32 గని ప్రబు అమ్క అప్పె సిచ్చ కెర్లి, కిచ్చొక జా సిచ్చ కెర్తయ్ మెలె, అమ్క "అప్పె సిక్కుత్, చి ఈంజ లోకుమ్చి రితి కెర్తనక లయతి జా ఆకర్ దీసిచి జా వెల్లి సిచ్చ జతు నాయ్." మెనయ్, ప్రబు అమ్క రచ్చించుప కెర్తయ్.

33 జాకయ్, బావుడ్లు, జా పొడి కంక, జా రన్సుమ్ పింక తుమ్ బెదిలె, బమ్మ నే జతె ఎక్కిలోక ఎక్కిలో రక.

34 నెంజిలె, కిచ్చొ ఆస బుద్ది తెన్ కయ్లె పిల్లె, తీర్పు జా ప్రబుచి సిచ్చ జస్సె. కక్క చూ తిలె, గెరి అన్నిమ్ కెర్పు. వేర ఇస ఆక్షల్, జలె, తుమ్చితె అయ్లె సంగిమ్దె.

12

ప్రబు దెత సెక్తివరల్

1 అన్నె మాన్సుల్చి పెట్టి ప్రబు దిల జోచి ఆత్మ దా సెక్తి వరల్చి రిసా తుమ్ నేన తంక, అంక ఇస్టుమ్ నాయ్.

2 తుమ్ ప్రబుక నేన్సి పొది మోసిమ్ జా, నయ్తాన్ ఉదడ్డి రితి ఇత్తల్ ఒత్తల్ గెతె తా, జివ్ నెంజిల బొమ్మల్క జొక్కరై తిల్దు.

3 తుమ్ అన్నె దస్సి మోసిమ్ నే జతి రిసా తుమ్ కిచ్చొ అర్దుమ్ కెరనుక అంచి ఆస మెలె, దేముడుచి సుద్ది తిలి ఆత్మ కచి పెట్టి తిలె, జో మాన్సు యేసుక దూసుప కెరుక జోచి పెట్టి తయె నాయ్. జోక సాపెనచి కోడు జో సంగుక నెత్తె. పడ్డె, జో ప్రబుచి ఆత్మ మాన్సుచి పెట్టి తిలెకయ్ “యేసు దేముడు ప్రబుయి” మెన జో మాన్సు ఒప్పునుక తెరె.

4 దేముడుచి సుద్ది తిలి ఆత్మ ఎక్కిలొయి, వేర వేర సెక్తివరల్ దెయెదె. వేర వేర సెక్తివరల్, వేర వేర మాన్సుల్క జో దిలెకి, జో ఎక్కిలొచి ఆత్మయి జేవ్ ఎత్తి సెక్తివరల్ దెతోసా.

5 దేముడు జోచి ఆత్మవాటు వేర వేర సేవల్ వేర వేర మాన్సుల్క జో దెయెదె, గని జా సేవ ఎక్కిలొ ప్రబుచి రిసాయి.

6 దేముడు రగల్ రగల్ కమె కెరెదె, ఎక్కిలొ ఇని కెరెదె, అన్నెక్కో దస్సి కెరెదె, గని జేవ్ కమె కెర్త సెక్తివరల్ ఎత్తి దెతోసా ఎక్కి దేముడు.

7 దేముడు ఎత్తి మాన్సుక జోచి ఆత్మసెక్తి వరుమ్ దా అస్సె, ఈంజ అమ్

దెకితనుమ్, జోక నంపజల మాన్సుల్ మొత్తుమ్ ‘చెంగిల్ తత్తు’ మెన, ఎత్తి మాన్సుక ఆత్మసెక్తి వరుమ్ దేముడు దెయెదె.

8 కిచ్చొ మెలె, సుద్ది తిలి జోచి ఆత్మ ఎక్కిలొచి పెట్టి తా, జో మాన్సు ఒగ్గర్ బుద్ది తెన్ ప్రబుచి బోదన కెరుక జో సెక్తి దెతయ్. అన్నెక్కోచి పెట్టి ప్రబుచి జయ్యి ఆత్మ తా, ఆత్మతె గ్యానుమ్ జో మాన్సు సంగుక ప్రబు సెక్తివరుమ్ దెతయ్.

9 అన్నెక్కోచి పెట్టి జయ్యి ఆత్మ తా నముకుమ్, సెక్తివరుమ్ దెతయ్. అన్నెక్కోచి అత్తి వేర వేర జబ్బుల్ తిల మాన్సుల్క చెంగిల్ కమె జర్లు జతు మెన ఒగ్గర్ కెర్త సెక్తివో జో దెతయ్.

10 అన్నెక్కోక జోవయించి అదికారుమ్ దెకయ్త రకుమ్లు అద్దుతుమ్ కమె కెర్తి సెక్తి, అన్నెక్కోచి చొడి పుట్టవ ప్రబు జోచ కబుర్లు సంగెదె, అన్నెక్కోక వేర వేర బుద్దివొక ‘ప్రబు సికడ్లన గే నెంజితి గే’ చినితి సెక్తివరుమ్ దెయెదె. అన్నెక్కో వేర రగల్ జో అగ్గె నే సికిల బాసల్ తెన్ లట్టబుక సెక్తివరుమ్ దెతయ్. అన్నెక్కోక బాసల్చి అర్దుమ్ సంగుక సెక్తివరుమ్ దా అస్సె.

11 ఈంజేవ్ సెక్తివరల్ ఎత్తి కేనె తెంతో జెతయ్ మెలె, ప్రబుచి ఎక్కి ఆత్మయి, జేవ్ ఎత్తిజిన్చి పెట్టి జేవ్ వేర వేర కమె కెర్తయ్. కేన్ మాన్సుక కేన్ సెక్తివరుమ్ జో దెయెదె గే, జోచి ఇస్టుమ్.

ఎక్కి ఆగ్ ఒగ్గర్ వాటల్

12 కేన్ జవున్ ఆగ్ కిసి ఒగ్గర్ వాటల్ తవుల గే, జేవ్ వాటల్ ఒగ్గర్ జలెకి బెద ఎక్కి ఆగ్ కిసి జయెదె గే, దస్సి, క్రీస్తుచి ఎక్కి ఆగ్ జా నంపజలన మొత్తుమ్ బెదిలిసి.

13 అమ్ యూదుల్ జలెకి, *గ్రీసు దేసిమ్చ జలెకి, గొత్తి మాన్సుల్ జలెకి,

* 12:13 12:13 గ్రీసు దేసిమ్చ మాన్సుల్క సంగుల, గని ఇన్నె ‘గ్రీసు దేసిమ్చ’ మెన సంగిలె, యూదుల్ నెంజిలన మొత్తుమ్కయ్ సంగితయ్.

గొత్తి మాన్యుల్ నెంజిలె కి, ఎక్కి ఆగ్నేతె ఎక్కి ఆత్మతె అమ్ నంపజలన జా బాప్తిసుమ్తె బెదిలమ్; అమ్ ఎత్కిజిన్క ప్రబు జోచి ఎక్కి ఆత్మతెయి పియడ్లన జలమ్, అమ్క ఒండిక ఎక్కి ఆత్మయి దా అస్సె.

14 అమ్చి ఆగ్నేక ఎక్కి వాట తయె నాయ్. అమ్చి ఆగ్నేక ఒగ్గర్ వాటల్ తవుల.

15 “ఏక్ వేల చాటు ఆప్ ఆతు నెంజి, జలె ఆప్ ఈంజ ఆగ్నేక వాట నెంజి” మెన సంగిలే కి, ఆగ్నేక జా చాటు కచితుమ్ ఏక్ వాట జా తత్తయ్.

16 “ఆప్ అంకి నెంజిచి రిసా ఆగ్నేక వాట నెంజి” మెన కండ్లొ జవున్ ఏక్ వేల సంగిలే కి, జా ఆగ్నేక జా కండ్లొ కచితుమ్ వాట జా తత్తయ్.

17 జలె ఆగ్ ఒండి అంకి జలె, కిసి సూసుక జతి? ఆగ్ ఒండి కండ్లొ జలె, కిసి జుంగుక జతి!

18 ప్రబు జాన జానయ్ ఆగ్నేకె కిచ్చొ కిచ్చొ వాటల్ జో ఉచర్లి రితి బెదవ అస్సె.

19 జేవ్ ఎత్కి ఎక్కి వాట జత జలె, ఆగ్ ఒండి కేనె తత్తి?

20 నిజుమి ఆగ్ ఒగ్గర్ వాటల్ తిలె కి ఎక్కి ఆగ్ జతతి.

21 జాకయ్, “తుయి తంక అంక నాయ్” మెన ఆతుక అంకి సంగుక బెదె నాయ్. “తుయి తంక అంక నాయ్” మెన చట్టొక బోడి సంగుక బెదె నాయ్.

22 జలె, నాయ్, ఆగ్నేతెచ అప్పు డిస్త వాటల్ నెంజిలె, జింక నెంజి,

23 చి ఆగ్నేతె గవురుమ్ నెంజిల వాటల్క ‘డిసిలె లాజు’ మెన, గవురుమ్ కెర్ల పాలల్ గలంతసుమ్. దెకుక సూటి నెంజిల అమ్చి ఆగ్నేతె వాటల్ ఒగ్గర్ సూటి దెకయ్త.

24 ‘డిసుక సూటి’ మెన, తిల వాటల్క లుంకడుక నాయ్.

25 జలె దేముడు, ఒండి ఆగ్ ఎక్కి సేంతుమ్ తతి రితి, ఆగ్చి వాటల్ ఎత్కి అన్నె ఆగ్ వాటల్క గవురుమ్ దెకిత్ రితి,

తొక్కి గవురుమ్చ ఆగ్ వాటల్క ప్రబు ఒగ్గర్ గవురుమ్ దెతి రితి బెదవ అస్సె.

26 ఒండి ఆగ్చి ఏక్ వాటక నొప్పి అయ్లె, తిల వాటల్ ఎత్కిక బాద. ఒండి ఆగ్నేచి ఏక్ వాటక గవురుమ్ అయ్లె, తిలి ఎత్కి వాటల్క సర్ల.

27 జలె, తుమ్ జోక నంపజలన మొత్తుమ్ క్రిస్తుచి ఆగ్ జా అస్సున్, చి తుమ్చితెచొ ఎత్కి మాన్సు క్రిస్తుచి ఆగ్చి వాట జయెదె.

28 పడ్డొ, దేముడు మొత్తుమ్ సంగుమ్తె వేర కమొచి రిసా, ప్రబు వేర వేర మాన్యుల్క నిసాన అస్సె. తొలితొ జోచి నావ్ తెన్ బుల బుల సుబుమ్ కబుర్ సూనయ్త బారికుల్, పడ్డొ జోచ కబుర్లు సంగితసక, పడ్డొ బోదన కెర్తన, పడ్డొ జోచి సెక్కిక జోచి అదికారుమ్ దెకయ్త వెల్లెల కమొ కెర్తన, పడ్డొ జబ్బు తెన్ తిల మాన్యుల్క చెంగిల్ కెర్తన, పడ్డొ బాదల్ తిల మాన్యుల్క తోడు కెర్తన, పడ్డొ సంగుమ్చ కిచ్చొ కిచ్చొ కమొక ఏలుప కెర్తన, పడ్డొ వేర వేర బాసల్ తెన్ ప్రబుచ కొడ్డొ సంగితసక తిలన్.

29 ఎత్కిజిన్ ప్రబుచ బారికుల్ జవుల గే? ఎత్కిజిన్ జోచ కబుర్లు సంగితస జవుల గే? ఎత్కిజిన్ బోదన కెర్తన జవుల గే? ఎత్కిజిన్ వెల్లెల వెల్లెల కమొ కెర్తన జవుల గే?

30 ఒండి జబ్బుల్ తిల మాన్యుల్క చెంగిల్ కెర్లె సెక్కి ఎత్కిజిన్క తయెదె గే? వేర వేర బాసల్ తెన్ ప్రబుచ కొడ్డొ సంగితి వరుమ్ ఎత్కిజిన్క తయెదె గే? జేవ్ వేర బాసల్ తెన్ కొడ్డొచ అర్దల్ సంగుక ఎత్కిజిన్క సెక్కి తయెదె గే?

31 జలె తుమ్చి పెట్టి ముక్కిమ్చయ్ ఆత్మవరల్క తుమ్ ఆస జా. ఈంజయి నెంజి, అన్నె చెంగిలి వాటు దెకయిందె.

13

ఎత్కిచి కంట ప్రేమయ్ ముక్కిమ్

1 మాన్యుల్చ బాసల్ తెన్ కి, దూతల్చ బాసల్ తెన్ కి ఆవ్ లట్టబ్లె కి, అంచి పెట్టి ప్రేమ నెంజిలె, రితి టమ్ము జవున్, కంచు గంటి బజయ్లి అవాడ్ రితి జతయ్.

2 వడ్డొ, ఏక్ వేల ప్రబుచ కబుర్లు సంగుక అంక సెక్తి తిలె కి, ప్రబుచ గుట్టుల్ ఎత్తి జోచి రిసాచి గ్యానుమ్ ఎత్తి ఆవ్ జాన్లె కి, డొంగ్రల్ ఉట్టువ ఎదిలి నముకుమ్ అంక తిలె కి, అంచి పెట్టి ప్రేమ నెంజిలె, కామ్క నెంజిలోసా జయిందె.

3 అంక కలుగు జలిసి ఎత్తి ఏక్ వేల బీద సుదల్క పూర్తి వంట దిలెకి, 'పున్నిమ్' మెన బలి జతి రితి ఆవ్ ఏక్ వేల అంచి ఆగ్ ఆగితె డయాడ్లెకి. అంచి పెట్టి ప్రేమ నెంజిలె, అంక ఎద్గెల్ కామ్క నెంజె.

4 ప్రేమ, జలె, అమ్చి పెట్టి తిలె, బాదల్ ఓర్పువ జా జినుమ్దె. మెత్తన తా మాన్యుల్క కన్యారుమ్ దెకుమ్దె. ప్రేమ అమ్చి పెట్టి తిలె, గోసల్ జము నాయ్. అమ్చి సొంత గవురుమ్ సంగనుమ్ నాయ్. సొంత గవురుమ్ ఉచరనుమ్ నాయ్.

5 అన్నె మాన్యుల్చి మరియాద కడుమ్ నాయ్. ప్రేమ అమ్చి పెట్టి తిలె, అమ్చి సొంత ఇస్టుమ్ జర్గువ కెరుక ఆస జము నాయ్. కోపుమ్ దెకవుమ్ నాయ్. పెట్టి కోపుమ్ తియనుమ్ నాయ్.

6 అమ్చి పెట్టి ప్రేమ తిలె, పాపుమ్ దెకిలె సర్ల జము నాయ్, గని సత్తిమ్ తిలి కిచ్చొ జవున్ కామ్ దెకిలె, సర్లయ్ జమ్దె.

7 అమ్చి పెట్టి ప్రేమ తిలె, అన్నెక్ మాన్యుల్చ తప్పుల్క ఓర్పువ జమ్దె. నముకుమ్ తెన్ తమ్దె. 'ఎత్తి చెంగిల్ జయెదె' మెన దయిరిమ్ తెన్ తమ్దె. ఎత్తి బాదల్ ఓర్పువ జా నిదానుమ్ తమ్దె.

8 ప్రేమ, జలె, కెయక కి కేడె నాయ్. గని ప్రబుచ కబుర్లు సంగితి కాలుమ్, మాత్రుమ్, కేడెదె. వేర వేర బాసల్ తెన్

ప్రబుచ కొడొ లట్టబ్లిసి కి కేడెదె. గ్యానుమ్ సికడ్లిసి కేడెదె.

9 కిచ్చొక మెలె, అప్పె ఆవ్ గ్యానుమ్ ఇదిలిన్ జానుమ్. ప్రబుచ కబుర్లు సంగితిసి కి ఇదిలిదిల్ సంగితనుమ్.

10 గని పూర్తి జతిన్చి కాలుమ్ అయ్లె, అమ్ ఇదిలిదిల్ జాన్లిసి కేడెదె.

11 ఆవ్ బాల తిలి పొది బాలబోదచి రితి లట్టబ్లె తిలయ్, బాలబోదచి బుద్ది తెన్ తిలయ్, బాలబోదచి రితి ఉచర్తె తిలయ్. గని వడ్డిలి తెంతొ, బాలబోదచి రితి ఇండుక ములిలయ్.

12 అప్పెచి మట్టుక ప్రబుచి ఎత్తి కిసి చినితనుమ్ మెలె, గాండు డంకిల్ రితి స్వాస్టుమ్ డీసె నాయ్; అర్దుమ్తె దెకిలి రితి. గని తెదొడకయ్, కిచ్చొ అడ్డు నెంతె, స్వాస్టుమ్ దెకుమ్దె, అర్దుమ్ కెరనుమ్దె. ఆవ్, జలె, అప్పె ఇదిలిదిల్ జాని. తెదొడకయ్ పూర్తి అర్దుమ్ జెయెదె. ప్రబు అప్పె కి అగ్గె తెంతొ అంకయ్ కిసి పూర్తి జానె గే, దస్సి, తెదొడకయ్ జోక ఆవ్ పూర్తి జానిందె, అంక పూర్తి అర్దుమ్ జెయెదె.

13 జలె, తిన్ని పాడ్ నే జతె కెయక తెయక తా గెచ్చుల. కిచ్చొ కిచ్చొ మెలె, ప్రబుచి రిసాచి నముకుమ్, వడ్డొ ప్రబుచి తెడిచి ఆస, వడ్డొ ప్రబు దెతి ప్రేమయి. గని, జేవ్ తిన్నితె ప్రబు దెతి ప్రేమయి గొప్పచి.

14

ఎత్తిజిన్ జాన్లి బాస తెన్ ప్రబుచ కబుర్లు సంగితిసి

1 ప్రబుచి ప్రేమ తెన్ తంక తుమ్ ఆస జా, వడ్డొ, జోవయించి ఆత్తుచ సెక్తివరల్క ఆస జా. జేవ్ వరల్తె ముక్కిమ్క దేముడుచ కబుర్లు సంగితి సెక్తివరుమ్కయ్ ఆస జా.

2 కిచ్చొక మెలె, కేన్ జవున్ వేర బాస తెన్ ఎక్కిలో లట్టబ్లె, ప్రబు తెన్ని లట్టబ్తయ్, గని మాన్యు తెన్ నాయ్.

మెలె, దేముడుచి నుద్ది తిలి ఆత్మచి తెడి ప్రబుచ గుట్టుల్ జో మాన్సు సంగితయ్, గని నూన్తో కేన్ మాన్సుక అర్దుమ్ జెయె నాయ్.

³ గని, తిలస ఎత్కిజిన్ జాన్తి బాస తెన్ ప్రబుచ కబుర్లు కో సంగిలె, నూన్తసక జోవయించి ఆత్మతె డిట్టుమ్ కెరెదె. జేవ్ నేన్లిసి జేవ్ సికుక జయెదె, చి నెతిర్లిన్క దయిరిమ్ జంక జయెదె.

⁴ తిలస నేన్లి బాస తెన్ కో లట్టల్లె, జో లట్టల్లె సొకయ్ లాబుమ్, గని తిలస జాన్లి బాస తెన్ ప్రబుచ కబుర్లు కో సంగిలె, నంపజల సంగుమ్ మొత్తుమ్కయ్ లాబుమ్.

⁵ జలె, తుమ్ ఎత్కిజిన్ ప్రబు దెత వేర బాసల్ తెన్ లట్టల్లె అంక సర్ద, గని అన్నె కిచ్చో ఆస జతసి మెలె, తుమ్క 'మాన్సుల్ అర్దుమ్ కెరంతి రితి ప్రబుచ కబుర్లు సంగుతు' మెనయ్ అంచి ఇష్టుమ్. సంగుమ్చ మాన్సుల్ అర్దుమ్ కెరంతి రితి సొంత బాస తెన్ కో జలెకు అర్దుమ్ సంగిలెకయ్, నూన్తసక లాబుమ్, ఆత్మతె వడ్డుల తిలస నేన్లి బాస తెన్ ప్రబుచి కిచ్చో జవున్ కోడు సంగితి కంట, తిలస జాన్లి బాస తెన్ ప్రబుచి కబుర్ సంగిలె చెంగిలి.

⁶ బావుడ్లు, ఆవ్ తుమ్చితె జా కెర తుమ్ నేన్లి బాస తెన్ లట్టల్లె, తుమ్ అర్దుమ్ కెరంతి రితి ప్రబు దెకయ్లిసి కిచ్చో జలెకు నే సంగిలె తుమ్క కిచ్చో లాబుమ్? ఆవ్ తుమ్చి పాసి జా దేముడుచి సత్తిమ్ నూనవుక నెంజిలె, దేముడుచి రిసా తుమ్క నొచి గ్యానుమ్చి సికడ్లె జలెకు, జో సంగిలి కబుర్ నే నూనయ్లె జలెకు, జోచి బోద నే సంగిలె జలెకు, అవ్ దస్సి నే కెర్లె తుమ్క కిచ్చో లాబుమ్! కిచ్చో లాబుమ్ నాయ్.

⁷ మూరి జలెకు, వీన జలెకు జివ్ నెంజిల రితయ్ బజింత్రలు, కి అవాడ్ జయెదె. బజెనక ఉచర్లె సొన్టుమ్ నే

బజిలె, మాన్సుల్ రాగుమ్ కిసి చినుల?

⁸ పడ్డో, జమాన్లుచి నప్పిర్మూరి జవున్ సొన్టుమ్ నే బజిలె, యుద్దుమ్ కెరుక మెన జేవ్ జమాన్లుతె కో తెయార్ జవుల?

⁹ తుమ్చి తెన్ కి దస్సి, తుమ్ సొన్టుమ్ అర్దుమ్ కెరంతి రితి తుమ్చి జిబ్ తెన్ నే లట్టల్లె, లట్టల్లె బాస తెన్ తుమ్ కిచ్చో సంగిలిసి కిసి జాసనుమ్దె? తుమ్ మాన్సుల్క నాయ్, గని ఆరి వాదు తెన్ లట్టల్లె రితి తస్తె.

¹⁰ నిజుమి, ఈంజ లోకుమ్తె ఒగ్గర్ ఒగ్గర్ బాసల్ తవుల, చి జేవ్ బాసల్ ఎత్కితె అర్దుమ్ నెంజిల కొడో తయె నాయ్.

¹¹ గని, కేన్ బాస ఆవ్ నేన్లె, జా బాస తెన్ ఎక్కిలో లట్టల్లె, జో అంక వేరయ్ దేసిమ్చ మాన్సు జయెదె, ఆవ్ కి జోక వేరయ్ దేసిమ్చ మాన్సు జయిందె.

¹² తుమ్చి తెన్ కి దస్సి. ప్రబుచ ఆత్మవరల్క తుమ్క ఆస అస్సిచి రిసా, ముక్కిమ్క నంపజలన మొత్తుమ్ ఆత్మక వడ్డితి రితి ప్రబు దిల వరల్ బుద్ది తెన్, నిదానుమ్ తెన్ దెరనుక అస్సె.

వేర బాస తెన్ లట్టల్లె కిన్ తంక

¹³ ఎత్కిజిన్క కామ్క జెతి, ప్రబుచి కోడు కో వేర బాస తెన్ లట్టల్లె, 'జా అర్దుమ్ సంగితి సెక్తి దొర్కు జవున్' మెనయ్ తుమ్ ప్రార్దన కెర.

¹⁴ అమ్ నేన్లి బాస తెన్ ఆవ్ జవున్ ప్రార్దన కెర్లె, అంచి ఆత్మయి ప్రార్దన కెర్తయ్, గని అర్దుమ్ నెంజిలి రిసా అంచి బుద్దితె పలితుమ్ దెరె నాయ్.

¹⁵ జాకయ్, ఆవ్ కిచ్చో కెరుక? ఆత్మ తెన్ కి ప్రార్దన కెరెందె, మెన్సు తెన్ కి ప్రార్దన కెరెందె. ప్రబుచ గనుమ్లు ఆత్మ తెన్ గాయెందె, చి మెన్సుతె అర్దుమ్ తెన్ కి గాయెందె.

16 నెంజిలె, ఏక్ ఆత్మ తెన్ని తుమ్చితె ఎక్కిలో ప్రబుక కిచ్చో జవున్ సర్ల తెన్ జోబర సంగిలె, జా సెక్తివరుమ్ నెంజిలస జో సంగిలిన్చి కోడుచి అర్దుమ్ నేన కెర, జో మాన్సుచి సర్లచి జా ప్రార్దనతె కిసి జోచి మెన్సు బెదవ 'తెద్దిలి' మెన ఒప్పునుల? నెత్తిరి!

17 నిజుమి జో మాన్సు జోచి సర్ల సంగ తయెదె, గని నూన్తో మాన్సుక కిచ్చో లాబుమ్ నాయ్.

18 తుమ్ ఎత్కిజిన్చి కంట ఆవ్ వేర బాసల్ తెన్ ఒగ్గర్ లట్టబ్బసిచి రిసా ప్రబుక అంచి సర్ల ఆవ్ సంగితసి.

19 గని, సంగుమ్తె ఆవ్ తిలి పొది అన్నెక్లో అర్దుమ్ నే కెరంతి, జేవ్ నేన్లి బాస తెన్ దెన్సు వెయిలు కొడో లట్టబ్బి కంట, జేవ్ అర్దుమ్ కెరంత బాసచ పావ్ కొడో జోవయింక బోదన కెర్తి రితి లట్టబుక అంక ఇస్తుమ్.

నంపజలస ఆత్మక వడ్డిత్ రితి సంగుమ్తె కిచ్చో కెరుక

20 బావుడ్లు, బాలబోదల్చి బుద్ది తెన్ తుమ్ తా నాయ్. పాపుమ్చి కామ్క జలె, నేన్ల బాలబోదల్ రిత తా, గని బుద్దిచి కామ్క జలె వడ్డిల రిత జా.

21 †మోసే పూర్గుమ్చొచి అత్తి దేముడు రెగ్గయల ఆగ్గుల్తె రెగ్గయలి కోడు కిచ్చో మెలె,

‡ "వేర బాసల్ తెన్ వేర దేసిమ్లుచ మాన్సుల్చి చోడివాట్

ఈంజ దేసిమ్చక బోద కెరిందె.

కెర్లె కి, నూన్తి నాయ్' మెన

ప్రబు సిచ్చచి తీర్పు సంగితయ్."

22 జా కోడు సదు కెర్లె, నంపతిలసక నాయ్, గని నంపనెంజిలసకయ్ జేవ్క అన్మానుమ్చి పాపుమ్ లయితి

గుర్తుకయ్ జేవ్ నేన్ల బాసల్ తెన్ లట్టబ్బిన్క ప్రబు సెలవ్ దెతయ్. జాన్లి బాస తెన్ ప్రబుచ కబుర్లు సంగితిసి, మాత్తుమ్, నంపనెంజిలసచి రిసా నాయ్, గని నంపజతసకయ్ 'అర్దుమ్ కెరంతు' మెనయ్ ప్రబు సెలవ్ దెతయ్.

23 జలె, నంపజలస మొత్తుమ్ సంగుమ్తె బెదితి పొది ఎత్కిజిన్ జేవ్ వేర వేర బాసల్ తెన్ లట్టబ్బె తిలె, వేర మాన్సుల్ జలెకు, ఎద్దరె నంప నెంజిలస జలెకు తెడి అయ్లె, తుమ్ ఎత్కిజిన్క 'వెర్తి జా అస్తి' మెనుల.

24 జాన్లి బాస తెన్ ప్రబుచ కబుర్లు ఎత్కిజిన్ సంగిలె, నంపనెంజిలోసా జవున్, వేర మాన్సు జవున్ తెడి అయ్లె, ఎత్కిజిన్ సంగితిసి నూన, జోవయించి పాపుమ్ చినన, జేవ్ ఎత్కిజిన్చి అత్తి సంగిలిన్క జో మాన్సు పరిచ్చ జలి రితి జతయ్. దేముడు దెతి తీర్పుల్ నూన్తయ్, చి

25 జోవయించి పెట్టి తిల గుట్టుల్ జోవయింక సొస్తుమ్ డీసుల, చి జోవయించి మొక్కె సెర్నునేడ, ప్రబుక బక్తి కెరెదె, చి దేముడు తుమ్చి తెన్ తిలిసి జో ఒప్పునెదె.

26 జలె, అన్నె కిచ్చో తుమ్క సంగుక, బావుడ్లు? తుమ్ సంగుమ్తె బెద వెసితి పొది తుమ్చితె ఎత్కి మాన్సుక కిచ్చో జవున్ ఆత్మసెక్తి తయెదె. ఎక్కిలోక ఏక్ గనుమ్ గయిందె మెన తయెదె, అన్నెక్లోక కిచ్చో జవున్ బోదన కెరుక మెన తయెదె, అన్నెక్లోక ప్రబు కిచ్చో జవున్ దెకవ తిలిసి సంగుక మెన తయెదె, అన్నెక్లోకేన్ జవున్ ఆత్మబాస తెన్ కిచ్చో జవున్ సంగెదె మెన తయెదె, అన్నెక్లోక జా కోడుచి అర్దుమ్ సంగెదె మెన తయెదె. సంగుమ్తె కిచ్చో

* 14:16 14:16 తెద్దిలి మెలె ఆమేన్.

† 14:21 14:21 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రెగ్గయలి ఆగ్గుల్ మెన అమ్ జానుమ్. ఈంజ కొడో ఎత్కి బైబిల్తె అగేచి పావ్ పున్సుకుమ్తె రెగ్గయ్ జా అన్సు. ఈంజ దెకవుక మెన కుసియ బాసతె నొయి ప్రమానుమ్తె మోసే పూర్గుమ్చొచి అత్తి రెగ్గి దేముడుచ ఆగ్గుల్ మెన రగ్లవ అన్సు. ‡ 14:21 14:21 యెసయా 28:11-12, ద్విత్వియావదేశ కాండుము 28:49.

కెరై కి ఎత్తిజినక కామక జెతి రితి తుమ్ కెరై.

27 కో ఆత్మబాసల్ తెన్ లట్టబ్బున తిలె, ఎక్కి, దొగుల గే తీర్ల వర్స తెన్ జేవ్ బాసల్ తెన్ లట్టబ్బు, చి ఎక్కిలో జా అర్దుమ్ సంగును.

28 గని, అర్దుమ్ సంగితొసా ఒత్త నెంజిలె, వేర వేర బాసల్ తెన్ లట్టబ్బొసా సంగుమ్తె తుక్లె తా. జోక జొయ్యి బాసల్ ప్రబు తెన్ లట్టబ్బుక, గని కో నూనతి రితి నాయ్.

29 పడ్డొ, ప్రబుచ కబుర్లు సంగితన దొగుల తీర్ల జోచ కబుర్లు సంగుతు, చి తిల మాన్సుల్ జేవ్ సంగితిన్చి అర్దుమ్ ఉచరంతు.

30 అన్నెక్లొక ఒత్త వెన తిలోసొక ప్రబు కిచ్చొ దెకయ్లె, అగ్గెచొ తుక్లె తంక.

31 కిచ్చొక మెలె, ఎత్తిజిన వర్స తెన్ని ఎక్కిలోచి పడ్డొ అన్నెక్లొ ప్రబుచ కబుర్లు సంగుక జయెదె. దస్సి వర్స తెన్ లట్టబ్బె, ఎత్తి మాన్సు కిచ్చొ జవున్ సికుక జయెదె, ఎత్తి మాన్సు కిచ్చొ జవున్ అర్దుమ్ నూనుక జయెదె; జాగర్ల సంగితిన్ జలెకి, దయిరిమ్ సంగితిన్ జలెకి.

32 ప్రబుచి కబుర్ జో సంగితి సెక్తిక ముద్దొ కెర్రి సెక్తి జోచి అత్తి అస్సె. తుక్లె తంక నూటి తిలె, తెరె.

33 దేముడు జోచి సంగుమ్తె సేంతుమ్ దెతోసా గని జో అల్లర్లు కెర్టొసా నెంజె.

34 ప్రబుచ మాన్సుల్చ సంగుమ్లు ఎత్కితె కెర్రి రితి, ఒత్తచి సంగుమ్తె కి తేర్బోదల్ తుక్లె తంక. జేవ్ లట్టబ్బుక సెలవ్ నాయ్, దేముడు మోసే తెన్ దిలి ఆగ్గుల్తె రెగిడ్లి రితి మున్సర్సుల్చి తెడి జేవ్ తంక.

35 జేవ్ కిచ్చొ జవున్ పుసుక మెలె, మున్సర్సుల్క గెరి పున తంక. తేర్బోద సంగుమ్తె లట్టబ్బుక చెంగిల్ నాయ్.

36 తుమ్ వేర ఉచర్లును జలె, దేముడుచి కోడు తుమ్చితెయ్ మొదొల్ జలి గే? నెంజిలె, ఎక్కి తూమ్ నూన అస్సున్ గే?

37 'ప్రబుచ కబుర్లు సంగితొసా ఆవ్' మెన అన్నె కో ఉచర్లె, 'ప్రబుచి ఆత్మసెక్తి తతోసా ఆవ్' మెన అన్నె కో ఉచర్లె, ఆవ్ తుమ్క రెగిడ్లిన్క 'ప్రబుయి దిలిసి ఆడ్ర' మెన జో ఒప్పునుక.

38 జో ఈంజ ఒప్పునె నాయ్ గే, జో మాన్సుక 'ప్రబుచి ఆత్మసెక్తి తిలోసా' మెన ఆవ్ ఒప్పునుమ్ నాయ్.

39 జలె, బావుడ్లు, ప్రబుచ కబుర్లు సంగిమ్దె మెన తుమ్ ఆస జా, చి జోచి ఆత్మసెక్తిక వేర బాసల్ తెన్ లట్టబ్బిన్క అడ్డు కెర నాయ్,

40 గని కిచ్చొ కెర్రి కి, బుద్ది తెన్ మరియాద్ తెన్ సేంతుమ్ తెన్ కెరన.

15

యేసుక్రీస్తు మొర కచితుమ్ అన్నె జీవ్ జలిన్

1 జలె, అప్పె బావుడ్లు, సుబుమ్ కబుర్ సంగితి రిసొచి తుమ్క ఉచార్ల కెరయిందె. ఈంజ సుబుమ్ కబుర్ తుమ్క నూనయ్లి పొది కిచ్చొ కిచ్చొ సంగిలమ్ గే, తుమ్ ఉచర. జా ఎత్కి తుమ్ నూన నంపజలదు.

2 ఆవ్ సంగిలి సుబుమ్ కబుర్చి తుమ్ నే పచ్చితె నిదానుమ్ జా అస్సున్ జలె, జాచి రిసొ రచ్చించుప జతె అస్సున్. గని నంపజలన తెన్ తుమ్ బెదిలిసి ఆరిచి జలె, తుమ్క నముకుమ్ నాయ్.

3 జలె, అంక దిలిన్క 'ఎత్కిచి కంట ముక్కిమ్చి, జా' మెనయ్ తుమ్క ఆవ్ అన్నె తిలయ్. కిచ్చొ కోడు మెలె, 'జర్లు జయెదె' మెన పూర్లుమ్ దేముడుచి కొడొతె రెగ్డయ్లి రితి, అమ్చ పాపల్ గెచ్చయ్తి బలి జతి రిసొ క్రీస్తు మొర,

4 రోయి జా, 'జగ్గు జయెదె' మెన దేముడుచి కొడొతె అగ్గె రెగిడ్డి రితి తిర్రతక అబ్బొసి జోక అన్నె జియడ ఉట్టయలన్.

5 *కీపాక, పడ్డొ బారజిన్ సిస్సుల్ మొత్తుమ్క డీసిలన్.

6 పడ్డొ పాచ్ పుంజొ జిన్చి కంట ఒగ్గర్జిన్ నంపజలనక ఎక్కె సుటు డీసిలన్. జోవయింతె అప్పెక ఒగ్గర్జిన్ జివ్వి అస్తి, గని సగుమ్జిన్ మొర గెల.

7 పడ్డొ, యాకోబుక డీసిలన్. పడ్డొ సుబుమ్ కబుర్ నూనవుక మెన జో నిసాన్ల బారికుల్ ఎత్తిజిన్క డీసిలన్.

8 పడ్డొ, ఆచ్ అగ్గె జోచొ సిస్సుడు నెంజ తా, ఆచ్ సరి జతి సమయుమ్క నే జెర్మిలోసా జలె కి, ఆకర్క అంక కి డీసిలన్.

9 జోచ బారికుల్ ఎత్తిచి కంట ఆచ్ దాక్ జయిందె. 'జోచొ బారికి' మెననుక ఆచ్ విలువ కి నాయ్. కిచ్చొక మెలె, జో దేముడుచ బక్తుల్ జల నంపజలన్క ఆచ్ అగ్గె †అల్లర్ కెరై తిలయ్.

10 గని జో దేముడుచి దయచి రిసా †రచ్చించుప జా జోచొ బారికి ఆచ్ జా అస్సి, చి అంక కెర్లి దయ ఆరిచి నెంజె. జేచ్ ఎత్తిజిన్చి కంట ఆచ్ ఒగ్గర్ కామ్ కెర అస్సి, జా అంచి సొంత సెక్తి తెన్ నాయ్, గని అంచి పెట్టి తిలి దేముడుచి దయయ్ అన్నె ఈంజ కామ్ కెరవ అస్సె.

11 ఆచ్ సుబుమ్ కబుర్ నూనయ్లె కి, జేచ్ నూనయ్లె కి, అమ్ ఒండి ఈంజయ్ ఎక్కి సుబుమ్ కబుర్ బోదన కెర్తసుమ్చి, తుమ్ నంపజలదు.

క్రీస్తు అన్నె జీవ్ జా ఉట్టిని మాన్సుల్ అన్నె జీవ్ జా ఉట్టుక

12 జలె, క్రీస్తు 'మొర్లికయ్, దేముడు జోక అన్నె జియడ ఉట్టయలన్' మెన సుబుమ్ కబుర్ తిలె, 'మొర్లస అన్నె

జీవ్ జా ఉట్టిని నాయ్' మెన తుమ్చితె సగుమ్జిన్ కిసి సంగుక జయెదె?

13 మొర, అన్నె జీవ్ జా ఉట్టుక నెంజె మెలె, క్రీస్తు కి 'జీవ్ జా ఉట్టి నాయ్' మెనుక జయెదె.

14 క్రీస్తు అన్నె జీవ్ జా ఉట్టి నాయ్ జలె, ఆచ్ బోద కెర్తిసి, తుమ్చి నముకుమ్ ఎత్తి, ఆరి.

15 అన్నె దస్సి తిలె, దేముడుచి రిసాచి అమ్చి సాచి అబద్దుమ్చి జా తయెదె. కిచ్చొక మెలె, జోక 'క్రీస్తుక అన్నె జీవ్ కెర ఉట్టయలన్' మెన సాచి సంగిలమ్. గని 'మొర్లస జీవ్ జా ఉట్టిని నాయ్' మెలిన్ ఏక్ వేల నిజమ్ జలె, యేసుక కి జో దేముడు జియడ ఉట్టవ తయె నాయ్.

16 కిచ్చొక మెలె, మొర్లస అన్నె జీవ్ జా ఉట్టిని నాయ్ మెలె, 'క్రీస్తు కి అన్నె జీవ్ జా ఉట్టి నాయ్.'

17 క్రీస్తు అన్నె జీవ్ జా ఉట్టి నాయ్ మెలె, తుమ్చి నముకుమ్ ఆరి అస్సె మెనుక జతి, చి అప్పెక తుమ్చ పాపల్ తెన్ని అస్సున్ మెనుక జయెదె.

18 జా నిజమ్ జలె, క్రీస్తుక నంపజలన మొర్లస కి నానెనుమ్తె గెచ్చ తవుల.

19 ఎక్కి ఈంజ లోకుమ్తెచి అమ్చి జీవితమ్చి రిసా క్రీస్తు అమ్క కామ్క జయెదె మెన అమ్చి నముకుమ్ తిలె, ఈంజ లోకుమ్చ మాన్సుల్ ఎత్తిచి కంట, అమ్మి నిస్కారుమ్ తిలస జమ్దె.

20 గని నిజమి క్రీస్తు మొర్సు తెంతొ జీవ్ జా ఉట్ట కెర, మొర అన్నె జీవ్ జా ఉట్టుక తిలసకతె తొల్పుర్ జా అస్సి.

21 క్రొలితోచొ మాన్సు ఆదాము పాపుమ్ కెర్లిన్చి రిసా మొర్సు మొదొల్ జా అయ్లి. గని మొర్సు తెంతొ అన్నె జీవ్ జా ఉట్టుక అన్నెకొ మాన్సు తెంతొ అయ్లి.

22 ఆదాముచి తెడి ఈంజ లోకుమ్చ ఎత్తిజిన్ మొర గెతతి, దస్సి క్రీస్తుచి తెడి

తిలస ఎత్కిజిన్ అన్నె జీవ్ జా ఉట్టుల.

23 గని ఎత్కిజిన్ సరిగా వర్స తెన్ అన్నె జీవ్ జా ఉట్టుక అస్సె. తొలితొ తొల్పుర్ జలో క్రీస్తు అన్నె జీవ్ జా ఉట్టు అస్సె. పడ్డొ, జో ఈంజ లోకుమ్తె అన్నె ఉత్త జెతి దీనిక జోచయ్ జల మాన్సుల్ కి జీవ్ జా ఉట్టుల.

24 జా జర్గు జలి పడ్డొక, ఆకర్క, *అదికారుమ్ తిలిన్ ఎత్కిచి ఉప్పిరి, †అదికారుమ్ ఎత్కిచి ఉప్పిరి, ‡సెక్తివొ ఎత్కిచి ఉప్పిరి జో జీన గెచ్చ కెర, యేసు జోచి రాజిమ్ దేముడు అబ్బొన్చి అత్తి అన్నె సార్ప కెర దెయెదె. తెదొడి ఆకర్ జయెదె.

25 మదెనె, జోచ విరోదుమ్ సుదల్ ఎత్కిక, జో జిన్తె ఎదక, క్రీస్తు సొంత ఏలుప కెరుక అస్సె.

26 జా ఆకర్క నాసెనుమ్ జలి విరోది, మొర్పు.

27 §“జో ఏలుప కెర్తి రిసా, దేముడు ఎత్కి జోచి అత్తి సార్ప కెర దా అస్సె” మెన రెగ్గ అస్సె. మదెనె క్రీస్తుచి అత్తి ఎత్కి సార్ప కెర దిలోసా అబ్బొసి. జో అబ్బొన్కయ్ పిట్టవ, ఎత్కి క్రీస్తుచి అదికారుమ్ తెంతొ అస్సె.

28 క్రీస్తు ఎత్కిక జీన కేడయ్లె, ఈంజ మదెనె జోచి అత్తి జా ఎత్కి సార్ప కెర తిలో అబ్బొన్చి అత్తి తెదొడకయ్ జొయ్యి అన్నె సార్ప కెర దా, జొయ్యి అబ్బొన్చి తెడి కి తయెదె. దస్సి దేముడు అబ్బొసి ఎత్కిక పూర్తి సొంత ఏలుప కెరెదె.

అన్నె జీవ్ జా ఉట్టుమ్దెచి రిసా బుద్ది ఇండ

* 15:24 15:24 ఎపెసు 1:21 దెక. జేవ్ పాదులె ఈంజేవ్ తిన్ని కొడొ సంగిలె, దూతల్ బూతల్ గట్రచి రిసా సంగితె తిల. కొలోస్సియుల్ 1:16 కి దెక. † 15:24 15:24 ఎపెసు 1:21 దెక. జేవ్ పాదులె ఈంజేవ్ తిన్ని కొడొ సంగిలె, దూతల్ బూతల్ గట్రచి రిసా సంగితె తిల. కొలోస్సియుల్ 1:16 కి దెక. ‡ 15:24 15:24 ఎపెసు 1:21 దెక. జేవ్ పాదులె ఈంజేవ్ తిన్ని కొడొ సంగిలె, దూతల్ బూతల్ గట్రచి రిసా సంగితె తిల. కొలోస్సియుల్ 1:16 కి దెక. § 15:27 15:27 కీర్తనలు 8:6. * 15:30 15:30 మెలె, జో దస్సి మెన సుబుమ్ కబుర్ నూనయ్తె తత్తయ్, చి జా కొడు సూసుక నెనిలస కొపుమ్ జా జోవయింక మారుక ఉచర కిచ్చొ కిచ్చొ సిచ్చల్ కెర్తెతి. † 15:32 15:32 యెసయా 22:13.

29 మొర్లస అన్నె జీవ్ జా ఉట్టితినాయ్ మెలె, సగుమ్జిన్ కిచ్చొక మొర్లసచి రిసా బాప్తిసుమ్ నజన్తతి? మొర్లస ఎద్గరె అన్నె జీవ్ జా ఉట్టితినాయ్ జలె, జోవయించి రిసా సగుమ్జిన్ కిచ్చొక బాప్తిసుమ్ నజన్తతి?

30 మొర్లస అన్నె జీవ్ జా ఉట్టితినాయ్ జలె, ‘మొర్లిసి జీవ్ జా ఉట్టుల’ మెన ఆవ్ కిచ్చొక కెర్టొడ్ తెదొడ్ మొర్తి ప్రమాదుమ్ ఆనయ్తసి? జీవ్ జా ఉట్టుక నెంజె మెలె, ఇసి జతె తత్తయ్ గే?*

31 నాయ్, బావుడ్లు, తుమ్ సంపజలి రిసా ఆవ్ ప్రబుచి తెడి కెర్ది గవురుమ్ ఉచరంతసి గే, తెద్ది కచితుమ్ ఆవ్ కిచ్చొ సంగితసి మెలె, రోజుక ఆవ్ మొర్లసి.

32 ఎపెసు పట్టుమ్తె, జేవ్ కెల్క కెల్లి రితి ఆవ్ జంతువుల్ తెన్ జుజ్జల్ రితి జలయ్. ఆవ్ దస్సి జతిన్తె ఈంజయ్ లోకుమ్తె అంక కిచ్చొ లాబుమ్! కిచ్చొయ్ లాబుమ్ నాయ్. మొర్లస అన్నె జీవ్ జా ఉట్టితినాయ్ జలె, ప్రబుచి రిసా కిచ్చొ అల్లర్ సేడ్లె కక్క లాబుమ్ నాయ్, చి

†“కలిక ఆవ్ మొరిందె చి రిసా ఆజి కంక, పియ కెర, ఎదిల్ సర్గ కెరుమ!” మెనుక జుతి.

33 తుమ్ మోసిమ్ జా నాయ్! “పాపుమ్బుద్దిచ మాన్సుల్ తెన్ బెదిలె, చెంగిల్ బుద్ది తిలోసా కి పాడ్ జయెదె” మెన సంగితి కొడు నిజుమ్.

34 అల్లె, ఉట్ట! బుద్ది జా పాపుమ్ ముల! సగుమ్జిన్ దేముడుక ఎద్గరె నేన్తతి, చి జోవయించ రుజ్జుల్ దెకవుక అస్సె! తుమ్క ‘లాజ్ జా జతు’ మెనయ్ ఆవ్ ఇసి సంగితసి.

మొర, నొవి పోలిక జా పరలోకుమతె జెర్మితిన్

35 గని తుమ్చితె కో గే కిచ్చొ పునెదె మెలె, “మొర గెలస కిసి జా అన్నె జీవ్ జా ఉట్టల? ఉట్టె, కిచ్చొ రగుమ్ ఆగ్ తెన్ తవుల?” మెన పునెదె.

36 ఓ బుద్ధి నెంజొలోసా, తుక వెర్రి! కిచ్చొ జవున్ బి గలిలె, ఉప్పిరచి చామ్ మొర్లెకయ్ జియ మొక్క జయెదె!

37 బీ గలితోసా గోదుమ్ గే, కిచ్చొ జవున్ వేర గిడ్డల్ గే పంటొ జంక జలె, జేవ్చి రూపుమ్ జా గలిలి బీక వేర జతయ్. జా గలిలి బి ఎత్కి గిడ్డయ్, జా ఉట్టితిసి మొక్కయ్.

38 గని జా బి జీవ్ జా ఉట్ట గజ్జల్ జంక జలె, జో నిసాన్లొ రూపుమ్ దేముడు దెయెదె. ఏక్ రగుమ్ గిడ్డల్చ మొక్కల్క ఏక్ రూపుమ్, అన్నెక్ రగుమ్ గిడ్డల్చ మొక్కల్క అన్నెక్ రూపుమ్ జో దెయెదె.

39 ఆగ్ తిలసక జలె, వేర వేర రగల్ రూపుమ్లు తవుల. మాన్సుల్క ఏక్ రగుమ్, జంతువుల్క అన్నెక్ రగుమ్, పిట్టల్క అన్నెక్ రగుమ్, మొస్సక అన్నెక్ రగుమ్.

40 పడ్డొ వేర లోకుమ్చ జివుల్క ఏక్ రగుమ్ రూపుమ్లు తవుల, గని ఈంజ లోకుమ్చ జివుల్క వేర రగుమ్ రూపుమ్లు తవుల. వేర లోకుమ్తె తిలిసచి ఉజిడి ఏక్ రగుమ్ డీసెదె, ఈంజ లోకుమ్తె తిలిసచి ఉజిడి అన్నెక్ రగుమ్ డీసెదె.

41 పొద్దుక ఏక్ రగుమ్ ఉజిడి తయెదె, సుక్కల్క ఏక్ రగుమ్ ఉజిడి తయెదె, జోనుక అన్నెక్ రగుమ్ ఉజిడి తయెదె. అన్నె ఏక్ సుక్కొచి ఉజిడి ఏక్ రగుమ్, అన్నెక్ సుక్కొచి ఉజిడి అన్నెక్ రగుమ్ తవుల.

42 మొర్లస అన్నె జీవ్ జా ఉట్టితిన్ తెన్ కి దస్సి. బి గలిలి ఈంజ ఆగ్ జలె, మొర్తిసి. అన్నె జీవ్ జా ఉట్టితిసి, జలె,

మొర్తిసి నెంజె.

43 బి గలిలి ఈంజ ఆగ్ గవురుమ్ నాయ్. అన్నె జీవ్ జా ఉట్టి మాత్రుమ్, అమ్చి ఆగ్ పరలోకుమ్చి ఉజిడ్ తెన్ గవురుమ్ తెన్ తయెదె. బి గలిలి ఈంజ ఆగ్ సెక్తి నాయ్, గని అన్నె జీవ్ జా ఉట్టె, అమ్చి ఆగ్ పరలోకుమ్చి సెక్తి తెన్ తయెదె.

44 బి గలిలి ఈంజ ఆగ్ ఈంజ లోకుమ్చి ఆగుచి జయెదె, గని అన్నె జీవ్ జా ఉట్టె, పరలోకుమ్చి ఆగ్ రగుమ్ తయెదె. ఈంజ లోకుమ్చి ఆగ్ రగుమ్చ ఆగ్చ అస్తి జలె, పరలోకుమ్చి ఆగ్చ రగుమ్చ ఆగ్చలు కి తవుల.

45 దేముడుచి కొడొతె రెగ్గయ్లి రితి; †“దేముడు తొలితో జెర్మయిలో మాన్సు ఆదాము జీవ్ తిలి ప్రానుమ్ జలన్”

క్రీస్తు జలో ఆకర్చొ ఆదాము, మాత్రుమ్, జీవ్ దెతో ఆత్మయి జలన్.

46 ఆత్మతె జెర్మన్ జలసి తొలితో జయె నాయ్. తొలితో ఆగ్కయ్ జెర్మన్ జయెదె. పడ్డొకయ్ ఆత్మతె జెర్మన్ జయెదె.

47 తొలితోచొ మాన్సు బుయిచి మత్తి తెంతొ జెర్మిలోసా జలన్. పడ్డొచొ మాన్సు, మాత్రుమ్, పరలోకుమ్ తెంతొ జెర్మిలన్.

48 మత్తి తిలోసా కిసా తిలో గే, జోచి పడ్డొ జెర్మిల మత్తి తెన్ తిలస ఎత్కిజిన్ దస్సయ్. పరలోకుమ్ తిలోసా కిసా గే, పరలోకుమ్చి జెర్మన్ జలస ఎత్కిజిన్ కి దస్సయ్ జవుల.

49 అప్పొ మత్తితె తిలోసాచి పోలికతెన్ అస్సుమ్. దస్సి, పరలోకుమ్ తిలోసాచి పోలిక కి జమ్దె.

50 బావుడ్లు, ముక్కిమ్క తుమ్క ఆవ్ కిచ్చొ సంగితసి మెలె, ఈంజ లోకుమ్చి ఆగ్ ఈంజ లోకుమ్చి లోయి దేముడుచి రాజిమ్తె బెదుక నెత్తె. మొర్తిసి నే మొర్తిన్తె గెచ్చుక నెత్తె. మొర్తిన్క ఒత్తయ్ వాట తయె నాయ్.

జాకాయ్, ఒత్తయ్ గెచ్చుక జలె, మొర్తిన్ జతిక నే మొర్తిన్క పాయె నాయ్.

51 ఈందె, దేముడు దెకయ్లి గుట్టు తుమ్క సంగితసి. ఆమ్ ఎత్కిజిన్ మొరుమ్ నాయ్, అమ్ నంపజలస ఎత్కిజిన్ మార్పువ జమ్దె.

52 ఈంజ ఉగుమ్చి ఆకర్క ప్రబు నప్పిర్మూరి పుజిలె, అంకి రెప్పు నే పెడ్డె బేగి మార్పు జమ్దె. జో నప్పిర్మూరి పుజిలె, మొర్లస పరలోకుమ్తె బెదితి నే మొర్తి పోలిక జా అన్నె జీవ్ జా ఉట్టుల కి, జీవ్ తిలసయ్ కి దస్సి పోలిక జా మార్పువ జవుల.

53 కిచ్చొక మెలె, పాడ్ జతి ఈంజ ఆగ్ పాడ్ నే జతి రగుమ్ జా మార్పువ జంక అస్సె. మొర్తి ఈంజ ఆగ్ నే మొర్తి రగుమ్ జా మార్పువ జంక అస్సె.

54 పాడ్ జతిసి పాడ్ నే జతిసి జా మార్పువ జలి మెలె, దేముడుచి కొడ్డెతె రెగ్గయ్లి కోడు తెదొడ్కయ్ నెరవెర్పువ జయెదె.

55 "మొర్తుక పాడ్ కెర గెల కెర, పరలోకుమ్చో దేముడు జిన అస్సె" మెన ఏక్, పడ్డె,

56 "ఓ మొర్పు, కేతె జిన్దది? ఓ మొర్పు, కేతె తుచి విస్సుమ్?!" మెన అన్నెకో కోడు నెరవెర్పువ జయెదె.

56 జలె, మొర్పుచి విస్సుమ్ కేతె మెలె, పాపుమ్తె. †దేముడు తొలితో దా తిలి ఆగ్గుల్ పాపుమ్చి సెక్కి.

57 గని, జో దేముడుక జెయ్యి! అమ్చో ప్రబు జలో యేసుక్రీస్తుచి అత్తి జో అమ్క జినవ అస్సె!

58 జాకాయ్, ప్రేమ తిల బావుడ్లు, డిట్టుమ్ తా అన్మానుమ్ నే జతె, ప్రబుచి తెడి తుమ్ నైమ సేడ కెర్తి కామ్ ఆరి కామ్క నెంజిలిసి నెంజె మెన జానయ్, జోచి కామ్ తుమ్ నిదానుమ్ తెన్ కెర్తె తా.

16

బీదల్చి రిసా డబ్బుల్ ఉక్కుల్క

1 జలె, యెరూసలేమ్తెవ యూదుల్తెచ్చ బీద జల నంపజలసచి రిసా డబ్బుల్ ఉక్కులిన్చి రిసా కిచ్చొ మెంతసి మెలె, గలతీయ ప్రాంతుమ్చ సంగుమ్ల్క ఆవ్ సంగిలి రితి, తుమ్కయ్ కి "దస్సి కెర" మెన ఆవ్ సంగితసి.

2 మెలె, ఎత్కి అయ్తరి తుమ్చితె ఎత్కి మాన్సు, గెలి సత్తరెక్క ప్రబు కెడ్డి లాబుమ్ జోవయింక దొర్కు కెర తయెదె గే జేవ్ దెక, జాక ఏక్ వాట తియ తంక, చి సత్తరెక్క సత్తరెక్క సర్దు కెర్తె, ఒగ్గర్ జా తయెదె. చి ఆవ్ జెతి పొదిక ఉక్కుల్క తుమ్ బమ్మ జంక నాయ్.

3 పడ్డె, ఆవ్ అయ్లె, 'నిదానుమ్ కెరుల' మెన తుమ్ కక్క కక్క నిసాన్తె గే, జా గుర్తుక ఆవ్ ఉత్తల్ రెగ్గ దెయిందె, చి తుమ్ ఉక్కుల దెతి డబ్బుల్ యెరూసలేమ్ పట్టుమ్తె జోవయించి అత్తి తెద్రయిందె.

4 ఆవ్ కి గెలె చెంగిల్ మెన డీసిలె, అంచె తెన్ జేవ్ జెవుల.

కొరిందిల్తె పవులు గోత్ గెచ్చుక ఉచర్లిన్

5 ఆవ్ మాసిదోనియ వాట్ గెచ్చుక ఉచర అస్సి, చి ఒత్త గెలయ్ మెలె, తుమ్తె గోత్ జెయిందె,

6 చి ఏక్ వేల ఇదిల్ ఒగ్గర్ సేంపు తుమ్చి తెన్ తయిందె, నెంజిలె ఒండి చల్లి పొది కి ఒత్త తంక జయెదె, చి ఒత్త తెంతో ఆవ్ కేన్ ప్రయానుమ్ గెలె కి, తుమి అంక బార్ కెర తెద్రవుక జయెదె.

7 ఆవ్ అప్పె వాట్ గెతి పొది తుమ్క గడియ దెక ఉట్ట గెచ్చుక నెసి, గని ప్రబు సెలవ్ దిలె, పడ్డె గెలె, తుమ్చి తెన్ సగుమ్ సేంపు తా గెచ్చుక జయెదె. జయ్యి అంచె ఆస.

8 గని మదెనె, పెంతెకొస్తు పండుగు ఎద ఇన్నె ఎవెసుతె తయిందె.

9 కిచ్చొక మెలె, అప్పె ఇన్నె సుబుమ్ కబుర్ కామ్ ఒగ్గర్ కెరుక అంక వాటు దొర్కు జా అస్సె. గని విరోదుమ్ సుదల్ ఒగ్గర్జిన్ పిట్టవుక ఉచర అస్తి, చి ఆవ్ తిలెకయ్ చెంగిలి.

తిమోతి కొరింద్తె గెచ్చుక తిలిసి

10 తిమోతి తుమ్తె అయ్లె, తుమ్ సర్ల తెన్ బెదవన. ఆవ్ కెర్తి రితి, జో కి ప్రబుచి కామ్ కెర్తయ్.

11 జాకయ్, జో దాకు జలెకి కో జోక నిస్సారుమ్ దెక నాయ్. జో అంచితె అన్నె ఉట్ట జెంక మెన బార్ జతి పొదిక సర్ల తెన్ తుమ్ జోక అన్నె తెద్రవ. ఆవ్ తెద్రయ్ల అన్నె బావుడ్లు తెన్ జో ఉట్ట జెతిస్క ఆవ్ రకితసి.

12 అన్నె బావుడ్లు తెన్ తుమ్తె గోత్ గెన్ను మెన, అమ్చొ బావొ జలొ అపొల్లోక బలవంతుమ్ కెర్తయ్, గని అప్పె గెచ్చుక జోక సెలవ్ నాయ్. జోక వాటు తిలె, పడ్డొకయ్ తుమ్తె జెయెదె.

13 తుమ్ తెలివి తెన్ జాగర్త తెన్ తా, తుమ్చి నముకుమ్ డిట్టుమ్ దెరన, దయిరిమ్ తెన్ ఇండ, డిట్టుమ్ తా.

14 తుమ్ కిచ్చొ కెరుక జలెకి, ప్రేమయ్ తెన్ కెర.

15 జలె, బావుడ్లు, ఒండి అకయ ప్రాంతుమ్తె సైపనుచి గెర్చ తొలితొ ప్రబుక సంపజల, చి ఎక్కి నిదానుమ్ తెన్ సంపజలస్క దెక తోడు తా అస్తి.

16 దస మాన్సుల్క చి అమ్చి తెన్ సైమ సేడ ప్రబుచి కామ్ నిదానుమ్ కెర్త ఎత్తిజిన్క తుమ్ మరియాద దెక.

17 సైపను, పొర్మానాతు, చి అకయక ఇన్నె ఉట్ట అయ్లిన్చి రిసొ అంక ఒగ్గర్ సర్ల. కిచ్చొక మెలె, తుమ్ ఇన్నె నెంజిలె కి, జేవ్ అయ్లిన్ తెన్ తుమ్ అంచి తెన్ తిలి రితి జతయ్.

18 తుమ్చి ఆత్మక జేవ్ కిసి అన్నె డిట్టుమ్ కెర్ల గే, దస్సి అంకయ్ కి సర్ల కెర అస్తి. దస మాన్సుల్క తుమ్ మరియాద దెక.

కచి కచి ముద్దు సంగ తెద్రయ్లిసి

19 ఆసియా ప్రదేసిమ్చ సంగుమ్ల ఎత్తి తుమ్క జోవయిచి ప్రేమ సంగ తెద్రయ్తతి. పడ్డొ అకుల ప్రిస్కిల్ల జోవయిచి గెరి సబ కెర్తి సంగుమ్చ ఎత్తిజిన్ తెన్ ప్రబుచి నావ్ తెన్ చి జోవయిచి ప్రేమ కి సంగ తెద్రయ్తతి.

20 సంపజల ఇన్నెచ బావుడ్లు ఎత్తిజిన్ జోవయిచి ప్రేమ సంగ తెద్రయ్తతి. ఎక్కిలోక ఎక్కిలో తుమ్చి ప్రేమ దెకయ్తి రితి ప్రబుచి నావ్ తెన్ సుద్ది తిలి ముద్దు తెన్ జొకర.

ఆకర్ కోడు

21 ఆవ్ పవులు సొంత ఆతు తెన్ ఈంజ ఆకర్ కోడు రెగిడ్డసి. ఆవ్ రెగ్గయ్లిసి తుమ్ జాన్పు.

22 తుమ్చితె కో ప్రబుక ప్రేమ కెరె నాయ్ గే, ప్రబు జోక సిచ్చతె తెద్రవున్. అమ్చొ ప్రబు, తుయి జె!

23 ప్రబుచి దయ తుమ్చి తెన్ తవున్.

24 యేసుక్రీస్తుచి తెడి అమ్చి ప్రేమ కి తుమ్చి తెన్ తవున్. * తెద్దిలి.

కొరిందియుల్క రెగిడ్లి దొన్నిచి ఉత్త్రుమ్ బారిక్ జలో పవులు కొరింద్ పట్టుమ్చ సంగుమ్చక రెగిడ్లి దొన్నిచి ఉత్త్రుమ్

మొదొల్ కోడు

1 దేముడుచి సెలవ్చి రిసా, క్రీస్తు జలో యేసుచి రిసా సుబుమ్ కబుర్ సూనయ్యతో జోచొ బారికి జా అస్సి పవులు రెగిడ్లిసి. కొరింద్ పట్టుమ్తెచి దేముడుచ సంగుమ్చక, చి ఒండి అకయ ప్రదేసిమ్తెచ జోచయ జల అన్నె మాన్సుల్క ఆవ్ పవులు తిమోతి తెన్ రెగిడ్లి ఉత్త్రుమ్.

2 అమ్క అబ్బొ జలో దేముడుచి ప్రబు జలో యేసుక్రీస్తుచి దయ సేంతుమ్ తుమ్చి ఉప్పిరి తవున్.

3 ఎత్తి దయక అబ్బొ జలో, అమ్చి ఆత్తుతె అమ్క డిట్టుమ్ దయిరిమ్ కెర్తొ దేముడు జలో, అమ్చొ ప్రబు జలో యేసుచొ దేముడు అబ్బొస్కయ్ జోబర.

4 అమ్చ బాదల్ ఎత్తితె జో అమ్క డిట్టుమ్ దయిరిమ్ కెర్తయ్, చి జో అమ్కయ్ కెర్తి డిట్టుమ్ దయిరిమ్చి రిసా, అన్నె కీస బాదల్ సేడ్లక ఆమ్ కి డిట్టుమ్ దయిరిమ్ కెరుక జతయ్.

5 కీసి మెలె, క్రీస్తు సేడ్ల సైమల్తె ఆమ్ కీసి బెదితసుమ్ గే, దస్సి, జోచి తెడి తా, జో దెతి డిట్టుమ్తె దయిరిమ్తె కి అమ్ బెదితసుమ్.

6 తుమ్క 'డిట్టుమ్ దయిరిమ్ జతు, రచ్చించుప జతు' మెనయ్ అమ్ సైమల్ సేడ్లసుమ్. తుమ్కయ్ 'డిట్టుమ్ దయిరిమ్ జతు' మెనయ్ ప్రబుయి అమ్కయ్ డిట్టుమ్ దయిరిమ్ కెర్తయ్. ఆమ్ సేడ్ల అల్లర్ తూమ్ కి సేడ బమ్మ

నే జతె ఓర్పువ జలె, జోచి డిట్టుమ్ దయిరిమ్ తూమ్ కి జస్సె.

7 తుమ్చి రిసాచి అమ్చి నమ్ముక్కుమ్ పిట్టె నాయ్. కిచ్చొక మెలె, ఆమ్ సేడ్ల సైమల్ తూమ్ కి సేడ్లె, అమ్కయ్ దొర్కు జతి డిట్టుమ్ ఆస దయిరిమ్ తుమ్కయ్ కి దొర్కు జయెదె.

8 ఓ బావుడ్లు, ఆసియా ప్రదేసిమ్తె అమ్ సేడ్లి బాద కెర్ది గే తుమ్ నే జాన్తి రితి జలె, చెంగిల్ నాయ్ మెన అమ్ ఉచర్తసుమ్. జా బాద కెర్ది మెలె, అమ్క కెర్ది వెల్లితె తిలి మెలె, 'ఓర్పువ జంక నెత్తుమ్ ఒగ్గర్ మొరుమ్దె గె కిచ్చొగె' మెలి రితి అన్మానుమ్ అమ్క వెలిత్ తిలి.

9 నిజుమి, మొర్తి సిచ్చ అమ్ వయిలి రితి అమ్క వెట్టి డీసిలి; తెద్ది బాద తిలి. గని అమ్ తెద్ది బాద సేడుక ప్రబు కిచ్చొక సెలవ్ దిలన్ మెలె, అమ్చి సొంత సెక్కిక అమ్ నే నంప కెర్తె, మొర్తనక అన్నె జియడ్తె దేముడుకయ్ అమ్ నంప కెరుకయ్ అస్సిచి రిసాయి జో జా సెలవ్ దిలన్. సొంత సెక్కిక కిచ్చొ నెత్తుమ్.

10 తెద్ది ప్రమాదుమ్ తెంతో జో అమ్క రచ్చించుప కెర్లన్, చి అన్నె దస్సి అల్లర్ సేడ్లె, అన్నె అమ్క రచ్చించుప కెరెదె మెన అమ్క దయిరిమ్. 'జొయ్యి అమ్క అన్నె రచ్చించుప కెరెదె' మెన, జోచి ఉప్పిరి అమ్ పూర్తి నముక్కుమ్ తియ అస్సుమ్.

11 అమ్చి రిసా తూమ్ కి ప్రార్దన కెర కెర అమ్క తోడు తా, చి ఒగ్గర్జన్ ప్రార్దన కెర్తి రిసా ప్రబు అమ్క రచ్చించుప కెర్లొ మెనయ్, ఒగ్గర్జన్ జోచి సర్ద సంగుల.

కొరిందిల్క పవులు నిదానుమ్ కెర్లిసి

12 జలె, సర్ద తెన్ కిచ్చొ సాచి సంగితసుమ్ మెలె, ప్రబుచి సుద్ది తెన్ జోచి ఎక్కి నిదానుమ్ తెన్ ఈంజ లోకుమ్తె, ముక్కిమ్క తుమ్చితెయ్ ఇండ అస్సుమ్; మాన్సుచి సెక్కి

గానుమక నాయ్, గని దేముడుచి దయచి సెక్కిక.

13 దస్సి, కిచ్చొ లుంకడ్డి రితి నాయ్, గని ఎత్తి తుమ్ సొస్టుమ్ అర్దుమ్ కెరంతి రితి జయ్యి అర్దుమ్ అమ్ రెగ్గితనుమ్.

14 ప్రబు జలొ యేసు ఈంజ లోకుమ్చక తీర్పు కెర్తి వెల్లి దీసిక 'చెంగిల్ అస్సి' మెన తుమ్చి రిసొ అమ్ కిసి సర్ల జమ్దె గే, అమ్చి రిసొ తుమ్క దస్సి సర్ల తంక జయెదె మెన తుమ్ అప్పె ఇదిల్ అర్దుమ్ కెరన అస్సున్. తుమ్క 'జా కోడు పూర్తి అర్దుమ్ కెరంతు' మెనయ్ అంచి ఆస.

15 అంచి ఈంజ దయిరిమ్చి రిసొ తుమ్తె తొలితో జెంక ఉచర తిలయ్, గెచ్చుక జతి జలె, తుమ్క దొవ్వెర్ దెకితయ్, తివ్వెర్ సర్ల జతయ్.

16 తొలితో మాసిదోనియ ప్రదేసిమి గెతె తిలి వట్టె తుమ్తె గోత్ గెచ్చుక చి జా మాసిదోనియ ప్రదేసిమ్ తెంతొ అన్నె వట్టె ఉట్ట అయలె పొది కి తుమ్తె జెంక ఉచర తిలయ్. దస్సి, ఆవ్ అన్నె యూదయ ప్రదేసిమ్తె గెచ్చుక బార్ జలె పొది తుమి అంక బార్ కెర తెద్రయ్తదు.

17 జలె, దొన్ని మెన్నుల్ తా 'జెయిందె' మెలయ్ గే? పూములుమ్ ఈంజ లోకుమ్చి బుద్ది తెన్ 'జెయిందె' జవున్ మెన దొన్ని మెన్నుల్ తా ఆరి సంగిమ్దె గే? జెంక ఉద్దెనుమ్ నెంజిలె 'జెయిందె' మెనిందె గే?

18 ఆవ్ దసొ మాన్ను నెంజి. కచితుమ్ దేముడు నముకుమ్చొ, జాకయ్ అమ్ తుమ్క సంగితి దేముడుచి కొడొ ఆరి నెంజె గని కెయ్యక కి నిజామి.

19 దేముడుచొ పుత్తుసి జలొ యేసుక్రీస్తు; *సిల్వాను తిమోతి చి ఆవ్ తుమ్తె బోదన కెర్తొ క్రీస్తు; దసొచొ నెంజె. సంగిల్ రితి జో కెరెదె. ఆమ్ కి దస్సి.

20 దేముడు అబ్బొసి సంగ తిలి ఎత్తి కోడు, ఎత్తి ప్రమానుమ్

క్రీస్తుతెయ్ కచితుమ్ నెరవెర్చుప జతయ్. దస్సికయ్, క్రీస్తుచి నావ్ తెన్ని †తెద్దిలి మెన సంగితనుమ్. ఇసి ఒప్పున్లె, దేముడుక గవురుమ్ దెతనుమ్; 'క్రీస్తుతెయ్ ఎత్తి నెరవెర్చుప కెర్తయ్' మెనయ్.

21 అన్నె, దేముడు అబ్బొసి సొంత అమ్క తుమ్క క్రీస్తుచి తెడి డిట్టుమ్ కెర్తయ్, చి జోచి కామ్ కెరుక మెన అమ్క నిసొన అదికారుమ్ దా అస్సి.

22 జొయ్యి అమ్క 'అంచయ్ మాన్నుల్' మెన జోచి ముద్ర గల అస్సి, చి జోతె అమ్క దొర్కు జతి వాటక 'కచితుమ్ దెయిందె' మెన అమ్క అప్పె కి రుజ్జు తతి రిసొ, అమ్చి పెట్టి జోచి ఆత్మ దా అస్సి.

కొరిందిల్క పవులు దుకుమ్ కెరుక నెసిల్చి కొడు

23 గని దేముడు అంచి రిసొ సాచి జవున్! తుమ్తె కొరిందెతె ఆవ్ కిచ్చొక అన్నె జెంక నేతయ్ మెలె, తుమ్క సిచ్చు కెరుక నెసి.

24 తుమ్చి నముకుమ్చి ఉప్పిరి ముద్దొ కెరుక అమ్క అదికారుమ్ నాయ్, తుమ్క ఏలుప కెరుక అమ్క ఇస్తుమ్ నాయ్. నముకుమ్క జలె, డిట్టుమ్ అస్సున్. గని, తుమ్క 'సర్లనంతొనుమ్ తెన్ తత్తు' మెనయ్, తుమ్క తోడె తంకయ్ అమ్చి ఉద్దెనుమ్.

2

1 జాకయ్, జా సుట్టుచి రితి ఆవ్ తుమ్తె జా తుమ్క దుక్కుమ్ కెరుక నెసి.

2 ఆవ్ తుమ్క దుక్కుమ్ కెర్లె, తుమ్చి దుక్కుమ్క ఆవ్ దుక్కుమ్ జతిసి అన్నె కో అంక సర్ల కెర్తొసొ తయెదె? తూమ్ కి దుక్కుమ్ జా తస్సె, ఆవ్ కి దుక్కుమ్ జా తయిందె.

3 జా ఉత్తుమ్తె కిచ్చొక జా ఏక్ కోడు రెగిడ్లయ్ మెలె, ఆవ్ తుమ్తె దస్సి

* 1:19 1:19 జోపయింది అస్సెక్ నావ్ సీలయ్యు. బారికుల్ 15:27. † 1:20 1:20 గ్రీకు బాస తెన్ 'అమేన్' మెనుల.

అయ్యలె తుమ్ అంక సర్ద తెన్ బెదవంతన అంక దుకుమ్ కెర్తదు. జా ఓర్పుప జంక నెత్తిర్తయ్. అగ్గె తెంతో తుమ్క ఆవ్ నంప కెర తిలయ్, చి 'అంక సర్ద తిలె తుమ్కయ్ కి సర్ద తయెదె' మెన ఉచర తిలయ్.

4 జా సుట్టు తుమ్క ఉత్తమ్ రెగిడ్డిసి, జలె, తుమ్క దుకుమ్ కెరయ్తి ఇస్టుమ్ తెన్ రెగ్గె నాయ్, గని తుమ్క అంచి ఒగ్గర్ ప్రేమ దెకయ్తి రిసాయి దస్సి రెగిడ్డయ్. పెట్టి ఒగ్గర్ బాద సేడ ఏడ, ఏడయ్ రెగిడ్డయ్.

5 జో మాన్సు అంక దుకుమ్ కెరయ్లిసి, జలె, ఎక్కి అంకయ్ దుకుమ్ కెరయ్లిసి నెంజె. దస్సి కెర తుమ్ ఎత్తిజిన్క కి ఇదిల్ జవున్ దుకుమ్ కెర తయెదె. గని జోక జా పూచి ఒగ్గర్ వయడుక నెసి.

6 ఎత్తిజిన్ జోక సిచ్చ రితి కెర్లిసి సరి జలి.

7 జాకయ్, ఒగ్గర్ దుకుమ్క జో పాడ్ నే జతి రిసా తుమ్ అప్పె జోక చెమించుప కెర బెదవన డిట్టుమ్ దయిర్మి కెర.

8 'జోచి రిసాచి తుమ్చి ప్రేమ జోక దెకవ' మెన ఆవ్ బతిమూల్ప జా సంగితసి.

9 అంచి కోడు స్కూన కెరుల్ గే నాయ్ గె మెన రుజ్జు దెకుక 'జోక తుమ్ సిచ్చ కెర' మెన జా తుమ్క ఉత్తమ్తె రెగిడ్డయ్.

10 తుమ్ కక్క చెమించుప కెర్లె, ఆవ్ కి జోక చెమించుప కెర్తసి. ఆవ్ కిచ్చి చెమించుప కెరుక తిలి మెలె, తుమ్చి రిసాయి చెమించుప కెర్లయ్ మెలె, క్రీస్తుచి మొక్కె ఆవ్ సంగితసి.

11 కిచ్చొక మెలె, సయ్తాన్ అమ్చి ప్రేమ పిట్టవుక ఉచరెదె. జోచి కుత్తల్ జానుమ్చి రిసా 'జో అమ్చి ఉప్పిరి జినున్ నాయ్' మెనయ్ ఆవ్ ఇసి తీర్పు కెర అస్సి.

పవులు మాసిదోనియ ప్రదేసిమ్తె గెలిన్

12 జలె, క్రీస్తుచి సుబుమ్ కబుర్ కామ్చి రిసా ఆవ్ త్రోయ పట్టుమ్తె గెచ్చు పావెలయ్. సుబుమ్ కబుర్ ఆవ్ సూనయ్తి రిసా ప్రబు అగ్గెచి అవ్కాసుమ్ దిల్న్.

13 గని, బావొ జలొ తీతు తుమ్చితె తెంతో ఒత్త బుల జెంక నేతయ్చి రిసా బాద సేడ జా పట్టుమ్చతె సెలవ్ నజన, అన్నె బార్ జా సముద్దుమ్ జీన, మాసిదోనియ ప్రదేసిమి ఉట్ట గెలయ్.

సుబుమ్ కబుర్ కామ్చి రిసాచి సర్ద

14 గని దేముడుక జోఒర, సయ్తాన్ అల్లర్ కెర్లె కి, క్రీస్తుచి తెడి జో దేముడు అమ్క జీనయ్తయ్, చి జిన్లో క్రీస్తుచి పట్టి అమ్ కేనె గెలె కి, కెయ్క తెయ్క జోక జాన్తినచి వాసెన అమ్చి అత్తి జో ఒండి దెకయ్తయ్.

15 క్రీసి మెలె, రచ్చన జతసక కి, నాసెనుమ్ జతసక కి దేముడు అబ్బొన్క డయిలి దూపుమ్ వాసెన రితో క్రీస్తుచి వాసెన ఆవ్.

16 జా వాసెనక దెక, జలె, నాసెనుమ్ జతసక కి అమ్ మొర్పుచి వాసెన, గని రచ్చించుప జతసక కి జివుమ్చి వాసెన జా అస్సుమ్. దస్సి జలె, ఇసి ప్రబుచి కామ్ కెరుక కేన్ మాన్సు విలువ జవుల?

17 ఆవ్, జలె, జేవ్ వేర మాన్సుల్చి రితి లాబుమ్క ప్రబుచి కోడు సికయ్తన నెంజుమ్. అమ్ విలువ నెంజిలె కి, ఎక్కి నిదానుమ్ తెన్ తిలిసి తిలి రితి, నెంజిలిసి నే తిలి రితి దేముడుచి మొక్కె జోచి అదికారుమ్ తెన్ క్రీస్తుచి తెడి తా జోచి కోడు సూనయ్తనుమ్.

3

అమ్చి సత్తిమ్చి రుజ్జుక ప్రబు సాచి

1 అమ్ అన్నె అమ్చి సొంత గవురుమ్ నజనుక దెర అస్సుమ్ గే? నెంజిలె, అమ్చి సత్తిమ్చి రుజ్జుక తుమ్తె సాచి ఉత్తల్ నజనుమ్దె గే? సగుమ్జిన్క దస సాచి రుజ్జుల్ తంక, గని అమ్క నాయ్.

2 తుమ్కయ్ దెకిలె, అమ్చి సత్తిమ్క రుజ్జు దెకయ్తి ఉత్తమ్ రితి తుమి జతను; తుమ్చి పెట్టి రెగిడ్డి జా ఉత్తమ్ ఎత్కిజిన్ సదు కెర అర్దుమ్ కెరనుక జయెదె.

3 పడ్డె, అన్నె కిచ్చొ సొస్తుమ్ డీస్తయ్ మెలె, క్రీస్తు సొంత రెగిడ్డి అమ్చి అత్తి వేర మాన్సుల్తె తెద్రయ్లి ఉత్తమ్, తుమ్ జస్తె మెన డీస్తయ్. సిర్త తెన్ రెగిడ్డిసి నెంజె, గని జీవ్ తిలో దేముడుచి సుద్ది తిలి ఆత్మయి రెగిడ్డిసి జా, పత్రె రెగిడ్డిసి నెంజె, గని మాన్సుచి పెట్టి రెగిడ్డిసి.

4 క్రీస్తుచి తెడి, దేముడు అబ్బొన్చి మొక్కె దస్సి మెన అమ్క దయిరిమ్.

దేముడు దిలి అగ్గెచి ప్రమానుమ్

5 అమ్చి సొంత సెక్కిక కిచ్చొ కెరుక తెరుమ్ మెన ఉచరుమ్ నాయ్, నెత్తమ్. అమ్చి సెక్కి కేనె తెంతొ జెతయ్ మెలె, దేముడు తెంతొయ్.

6 యెనుక సంపజత మాన్సుల్క జో దిలి నొవి ప్రమానుమ్చి రిసా అమ్ సూనవుక మెన జొయ్యి అమ్క సెక్కి దా అస్సె. ఈంజ నొవి ప్రమానుమ్ తిలిసి కిచ్చొ పత్రె గే, పున్తుకమ్తె గే రెగిడ్డి కిచ్చొ కిచ్చొ ఆగ్గుల్చి నెంజె, గని జో దేముడుచి సుద్ది తిలి ఆత్మ మాన్సుచి పెట్టి రెగిల్లిసి.

*పత్రల్తె జవున్, కాగ్గుల్తె జవున్, రెగిడ్డి ఆగ్గుల్ అమ్ మాన్సుల్చి పాపుమ్ దెకవయ్ అమ్క నింద కెర మార్త, గని మాన్సుచి పెట్టి దేముడుచి సుద్ది తిలి ఆత్మ రెగిడ్డిసి మాన్సుక †జియడ్డయ్.

7 జలె, పత్రె రెగిడ్డి ఆగ్గుల్చి మాన్సుల్క మార్తి సేవ దేముడు మోసే పూర్గుమ్చొచి అత్తి దిలి పొది, జో దేముడుచి పరలోకుమ్చి ఒగ్గర్ ఉజిడి తెన్ గవురుమ్ తెన్ దొర్కు జలి. కెద్ది ఉజిడి కెద్ది గవురుమ్ మెలె, దేముడు తెన్ జో దస్సుల్ జా తిలిన్చి ఉజిడ్క

గవురుమ్క ఇస్రాయేలు ప్రెజల్ మోసేచి మొక్కె దెకుక నెత్తిర్. పూర్గుమ్చి జా ఆగ్గుల్ తెన్ చి ప్రమానుమ్చి ఉజిడి గవురుమ్, మాత్తుమ్, తొక్కి జా జా, కేడ గెలి.

8 దస్సి కేడయ్ గెతి గవురుమ్ ఉజిడిచి కంట, దేముడుచి సుద్ది తిలి ఆత్మచి సెక్కిచి సేవచి గవురుమ్ ఉజిడి ఒగ్గర్ జయె నాయ్ గె? జయెదె.

9 కిచ్చొక మెలె, మాన్సుక నింద కెర్తి ఆగ్గుల్ సేవచి గవురుమ్ ఉజిడి ఒగ్గర్ తిలె, మాన్సుచి పాపుమ్ పుంచ జోవయింక పున్నిమ్ దెతి సేవక అన్నె ఒగ్గర్ గవురుమ్ ఒగ్గర్ విలువ తయెదె.

10 ఇన్నెచి రిసా కిచ్చొ మెనుక జయెదె మెలె, జాచి కంట జిన్లి గవురుమ్ జిన్లి విలువ తిలిన్చి రిసా, అగ్గెయ్ గవురుమ్చి విలువ తిలిన్క అప్పెయి కిచ్చొ గవురుమ్ కిచ్చొ విలువ నాయ్.

11 కేడయ్ గెలిన్క గవురుమ్ విలువ తిలి జలె, కెద్దొడ్ తెదొడ్ తా: గెతిన్క అన్నె ఒగ్గర్ గవురుమ్ ఒగ్గర్ విలువ తయెదె.

12 ఇసి మెన అమ్క దయిరిమ్చి రిసా, దయిరిమ్ తెన్ ఈంజ నొవి ప్రమానుమ్చి రిసాచి సత్తిమ్ సూనయ్తసుమ్.

13 మోసేచి రితి అమ్ జము నాయ్. జో, జలె, కేడ గెతి జా ఉజిడి కేడ గెతిసి ఇస్రాయేలుల్ మెలె అమ్చ ప్రెజల్ దెకుత్ నాయ్, మెనయ్, దేముడుతె తెంతొ ఉట్ట అయ్లి పొది లాజ్ జా మొక్కొమ్ డంకన్లొ.

14 జలె, జేవ్ ఇస్రాయేలుల్ కీన జలె మెలె, జోవయించి పెట్టి బేడు బందీల్ రితి జలె, చి ఆజి ఎదె కి అగ్గెచి ప్రమానుమ్చి వాట జేవ్ సదు కెర్లె పొది, మొక్కొమ్ డంకన తతి రితి పెట్టి సత్తిమ్ చినితి నాయ్. కిచ్చొక మెలె, క్రీస్తుచి తెడి మాన్సు తిలెకయ్ జా డంకిలిసి దేముడు కడ వెంట గెలెదె.

* 3:6 3:6 రోమియల్ 7:5, 8-11, నిర్లమాండుమ్ 24:12, 31:18. † 3:6 3:6 రోమియల్ 6:6.

15 నిజమి, ఆజి ఎద మోసేచి అత్తి రెగిడ్డిసి దేముడుచ కొణొ జేవ్ కెయ్య సదు కెర్లె కి, జోవయించి పెట్టి యేసుక్రీస్తుచి రిసొచి సత్తిమ్ చినుక నెత్తిర్తి.

16 గని, మాన్సు మార్పుప జా ప్రబుతె అయ్లె, జా డంక అడ్డు జలిసి కడి జతయ్, చి జో ప్రబుచి సత్తిమ్ చినుల.

17 అన్నె, ప్రబు ఆత్మయి జయెదె, చి దేముడుచి సుద్ది తిలి ఆత్మ కేనె తయెదె గే, ఒత్తయ్ రచ్చన తయెదె. ప్రబుచి ఆత్మ అమ్చి పెట్టి తిలె, ఆగ్గుల్చి సేవచ గొతిమాన్సుల్ తము నాయ్, విడ్డల్ జా తమ్దె.

18 అన్నె, దేముడుచి సుద్ది తిలి ఆత్మతె జెర్మున్ జల అమ్ ఎత్కిజిని, కిచ్చొ డంకిలిసి అడ్డు నెంతె ప్రబుచి ఉజిడి జోచి గవురుమ్ దెకితె తా, జోచి ఉజిడెత గవురుమ్తె బెద, జోచి పొలిక జతి రితి తిరిమ్ తిరిమ్ మార్పుప జతె అస్సుమ్, చి జోచి ఉజిడి జోచి గవురుమ్ తిరిమ్ తిరిమ్ అగ్గెచి కంట అమ్ ఇండితిన్తె అన్నె డీస్తయ్. ఈంజ ఉజిడి ఈంజ గవురుమ్ దేముడుచి సుద్ది తిలి ఆత్మయి జలో ప్రబు తెంతోయ్ జెతయ్. జోయ్యి జా కామ్ జర్గు కెర్తయ్.

4

సుబుమ్ కబుర్ కామ్ నిదానుమ్ తెన్ కెర్

1 జలె, దేముడుచి దయక చి సేవ అమ్క జో సొంత తియార్ అస్సెచి రిసొ, అమ్చి నిదానుమ్ దయిరిమ్ పిట్టె నాయ్.

2 కిచ్చొ పాపుమ్ తెన్ మాయ తెన్ బోదన కెరుక నెసిలమ్, నెనుమ్. కిచ్చొ మోసిమ్ కెరుమ్ నాయ్, ప్రబుచి సుబుమ్ కబుర్తె కిచ్చొ వేరచి బెదవుమ్ నాయ్, గని సొన్టుమ్ సత్తిమ్ సంగితనుమ్. దస్సికయ్ కో నూన్లె కి 'సత్తిమ్' మెన

* 4:5 4:5 నెంజిలె, 'గొతిమాన్సుల్, గొత్తి మాన్సుల్'.

అమ్చి రిసొ ఒప్పునుక జయెదె. 'సత్తిమ్' మెన దేముడు కి ఒప్పునెదె.

3 అమ్ బోదన కెర్లెన్ సుబుమ్ కబుర్చి అర్దుమ్ ఇదిల్ లుంకిల్ రితి జలె, కక్కయ్ లుంక తయెదె మెలె, నాసెనుమ్ జతనకయ్.

4 జోవయింకయ్, జలె, జేవ్ నంప నే జతనకయ్, ఈంజ లోకుమ్క ఏలుప కెర్తొ సయ్తాన్; నాసెనుమ్ జతన జోక 'దేముడు' మెనుల; జోయ్యి జోవయించి మెన్సుక గుడ్డి కెర అస్సె. కిచ్చొక మెలె, 'దేముడుచి పొలిక మార్తి తిలో క్రీస్తుచి గవురుమ్ దెకయ్తి సుబుమ్ కబుర్చి ఉజిడ్ జతి సత్తిమ్ దెకుత్ నాయ్' మెనయ్ జేవ్ మాన్సుల్క జో సయ్తాన్ జోవయించి మెన్సుతె గుడ్డి కెర అస్సె.

5 అమ్ బోదన కెర్లెసి, జలె, అమ్చి రిసొచి నెంజె, గని యేసుక్రీస్తుక 'ఎత్కిక ఏలుప కెర్పు' మెన దేముడు అబ్బొసి జోక ప్రబు కెరయ్ అస్సె మెనయ్ అమ్ బోదన కెర్తసుమ్. జో యేసుచి సేవ చి ప్రేమచి రిసొ తుమ్చ *సేవ కెర్తన రిత జా అస్సుమ్.

6 కిచ్చొక మెలె,

† "అందర్ తెంతో ఉజిడ్ జవున్" మెన సంగిలో దేముడు అమ్చి పెట్టి జోచి ఉజిడి దా అస్సె. కిచ్చొక మెలె, క్రీస్తుచి మొక్కె డీస్తి ఆవ్ దేముడుచి గ్యానుమ్ ఉజిడి మాన్సుల్ దెక చిన అంక జాన్తు అంచి ఉజిడెతె జెతు మెనయ్, జో దేముడు ఈంజ సేవతె అమ్క బెదవ అస్సె.

ప్రబుచ కామ్ జోచి అత్తి జో జోచి సెక్తి తెన్ కెర్తయ్

7 దేముడు జోచి ఈంజ ఉజిడ్ సొమ్నారుమ్ రితయ్ గేడివొతె బెరవ అస్సె. కిచ్చొక మెలె, అమ్ గేడివొక సెక్తి నాయ్, విలువ నాయ్ చి రిసొ అమ్ సెక్తి నెంజిలసచి అత్తి జో జోచి కామ్ కెర్లె,

† 4:6 4:6 అదికాండుమ్ 1:3.

'దేముడుచియి, మాన్సుచి నెంజె' మెన జా సెక్తిక మాన్సు చినుక జయెదె.

8 రగరగాల్చ బాదల్ అమ్క పెలిలెకి, పెల్లి జా బీడ గెచ్చుమ్ నాయ్; జోచి సెక్తిచి రిసా, సగుమ్ బాదల్ కిచ్చొక సేడ్డుసుమ్ గే అమ్ అద్దుమ్ కెరనుక నెత్తిర్లె కి, జో దిలి కామ్చి రిసా ఆస నెంజిలస జము నాయ్.

9 విరోదుమ్ సుదల్చి అత్తి అమ్ అల్లర్ జలెకి ప్రబు అమ్క ములె నాయ్. అమ్చ విరోదుమ్ సుదల్ అమ్క బూసిల్ రితి కెర్లె కి, మొరుమ్ నాయ్.

10 యేసు కిసి మొర్తి రితి జతె తా బాదల్ సేడ్డె తిలన్ గే, ఆమ్ కి ఈంజ జీవితముక మొర్తె తతి రితి అస్సుమ్. గని ఆమ్ మొర్తి రితి జా సెక్తి నెంజిలిన్తెయి యేసుచి సెక్తి డీస్తయ్. యేసు అన్నె జీవ్ జా పరలోకుమ్తె ఏలుప కెర్తి సెక్తి, అమ్ సెక్తి నెంజిలస రచ్చన జతిన్తె డీస్తయ్.

11 కిచ్చొక మెలె, యేసుచి జీవ్ అమ్చి మొర్తి ఆగ్తె డీసున్ మెనయ్, అమ్చి ఈంజ జీవితముక యేసుక్రీస్తుచి నావ్చి రిసా అమ్ మొర్తుక దెర్ను సేడ్డుసుమ్.

12 జలె, ఆమ్ మొర్తుసుమ్, తూమ్ జితసు!

13 గని

‡“నంప జలయ్ చి సంగిలయ్” మెన పూర్గుమ్ సంగిలో రితి ఆమ్ కి నంపజా అస్సుమ్చి రిసా ఆమ్ కి అమ్చి నముకుమ్ తిలిసి సంగితసుమ్.

14 ఇసి దయిరిమ్ తెన్ అమ్ నంపజలిసి కిచ్చొక సంగితె తత్తుసుమ్ మెలె, ప్రబు జలొ యేసుక అన్నె జియడ ఉట్టయ్లోసా జోవయించి నావ్ తెన్ అమ్కయ్ కి అన్నె జియడ ఉట్టవ, తుమ్క అమ్క జోతె కడ నెయెదె మెన జానుమ్.

15 కిచ్చొ కిచ్చొ బాదల్ కిచ్చొక ఒర్పుప జతసుమ్ మెలె, తుమ్చి రిసాయి. మెలె, ప్రబుచి రచ్చన అన్నె ఒగ్గరజిన్క పాచిలె, ప్రబుచి దయచి రిసా అన్నె

ఒగ్గరజిన్ జోక జోచి సర్ల తెన్ జొబర సంగ జోక గవురుమ్ కెరుల.

16 జాకయ్ అమ్చి దయిరిమ్ పిట్టె నాయ్. అమ్చి ఈంజ లోకుమ్చి ఆగ్ పాడ్ జతె తిలె కి కువితె తిలె కి, రోజుక అమ్చి ఆత్తు అన్నె నొవర్ జెర్మిల్ రితి జా సెక్తి జతయ్.

17 ఈంజ మదెనె చి ఇదిలిదిల్ అల్లర్ కిచ్చొ కామ్క జెతయ్ మెలె, పరలోకుమ్తెచి నే కేడ్డి ఒగ్గర్ ఉజిడతె గవురుమ్తె అమ్ బెదితి రిసా అమ్క దొర్పు జయెదె.

18 అప్పె డీస్తిన్చి ఉప్పిరి నముకుమ్ తిము నాయ్; పరలోకుమ్తెచి నే డీస్తిన్కయ్ నంప కెర్తుసుమ్. కిచ్చొక మెలె, డీస్తిని పాడ్ జతిసి, నే డీస్తిని పరలోకుమ్తెచి జలె, తాఁ గెచ్చెదె.

5

పరలోకుమ్తె ఆమ్ తతిసి

1 అన్నె కిచ్చొ జానుమ్ మెలె, ఈంజ లోకుమ్తె అమ్ జితి కుడియ జితి అమ్చి ఆగ్ పాడ్ జలెకి, పరలోకుమ్తె అమ్క కెయక తెయక తాఁ గెతి గేర్ అమ్చొ దేముడు అమ్క దా అస్సి. కేన్ మాన్సు తెయార్ కెర్లిసి నెంజె, దేముడు తెయార్ కెర్లిసి, జా.

2 నిజుమి, ఈంజ లోకుమ్తె తిలె పొది దుకుమ్ జతసుమ్, చి పరలోకుమ్చి అమ్చి గేర్ నజనుక ఆస జతసుమ్.

3 జా గేర్ మెలిసి నజనై, పాలుమ్ గలన్లి రితి జయెదె, చి ఆమ్ డుమ్డి తయె నాయ్.

4 ఈంజ అప్పెచి కుడియతె అమ్ తతి పొది, అమ్చ బాదల్ చి రిసా దుకుమ్ తెన్ అస్సుమ్. ఈంజ కుడియ, ఈంజయ్ పాలుమ్, గెన్ను మేనుమ్ నాయ్, గని అన్నె చెంగిల్ గేర్ చెంగిల్ పాలుమ్ గలన్తి రిసా, పరలోకుమ్చి జా గేర్ జయి పాలుమ్ గలన్లమ్ మెలె, అమ్చి ఈంజ లోకుమ్చి మొర్తుక

పరలోకుమచి నే కెడ్డి జీవు తతిసి జిన గెచ్చెదె.

5 పరలోకుమతె జితి రిసా అమ్క తెయార్ కెర్లొసా దేముడుయి, చి 'జర్గు జయెదె' మెన అమ్క కిచ్చొ గుర్తు జో దా అస్సె మెలె, దేముడుచి సుద్ది తిలి ఆత్మ అమచి పెట్టి జో దా అస్సె.

6 జాకయ్, కిచ్చొ జలెకి అమ్క దయిరిమ్. ఈంజయ్ ఆగెతె, ఈంజయ్ లోకుమతె అమ్ జితి పొది, ప్రబుక దూరి అస్సుమ్ మెన జానుమ్.

7 పరలోకుమతెచి ప్రబు అమ్క దిలి అప్పె దస్సి డీసె నాయ్, గని జాక 'అస్సె' మెలి నముకుమ్ తెన్ని ఇండితనుమ్.

8 'అమ్ పరలోకుమతె గెచ్చుమదె' మెన దయిరిమ్ తెన్ అస్సుమ్, చి 'ఈంజ ఆగెకు ముల ప్రబుతె గెచ్చ జిలె చెంగిలి' మెన జానుమ్.

ప్రబుచి ఇస్టుమ్ రితి కెర్తి ప్రేమ

9 జలె, ఇన్నె ఈంజ అగె అమ్ జింక తిలె కి, ఒత్త పరలోకుమతె గెచ్చుక తిలె కి, అమచి ఆన కిచ్చొ మెలె, ప్రబుక నర్ల కెర జోచి ఇస్టుమ్ రితి కెరుకయ్.

10 ఈంజ లోకుమతె ఈంజ అగె తిలె పొది అమచితె కో సత్తిమ్తె ఇండిల గే పాపుమతె ఇండిల గే, క్రీస్తుచి అత్తి అమ్ తీర్పు జంక, అమ్ జోచి మొక్కె టీవో జితి జా దీసిక జలె, ఈంజ జీవితుమతె కో సత్తిమ్ ఇండ తవుల గే, జోక బవుమానుమ్, కో పాపుమతె ఇండ తవుల గే, జోవయింకయ్ సిచ్చ ప్రబు దెయెదె.

11 ప్రబు లోకుమచక పరిచ్చ కెర తీర్పు కెరెదె మెన జానయ్, జా బయిమ్ తెన్ మాస్సుల్క సికడ్డనుమ్. అమచి సత్తిమ్ జో దేముడు జానె, చి తుమచి పెట్టి తూమ్ కి చినితను, కిచ్చొగె. తుమ్క 'చినుత్' మెనయ్ అమచి ఆన.

12 తుమతె అమ్క గవురుమ్ దొర్కు జెయదె మెన తుమ్ ఉచర నాయ్. గని, మాస్సుచి పెట్టి తిలిసి నే చినితె

మాస్సు ముక్కిమ్చొ రితో డీసిలెకయ్ గవురుమ్ కెర్లస సగుమ్జిన్ అమచి రిసా తుమ్క అన్యానుమ్ సికడ్డతి. తుమ్క 'జేవ్ అన్యానుమ్ సికడ్డసక కిసి జబాబ్ దెంక గే జాన్తు' మెనయ్ అమ్ ఇసి సొంతచి రిసాచి సాచి రెగిడ్డసుమ్. అమచి సత్తిమ్ జానె, తుమ్ జబాబ్ దెంక జాన్తె, జాకయ్ తుమ్క సంగితనుమ్. గవురుమ్ ఆననుక ఉచర కిచ్చొయ్ కెరుమ్ నాయ్.

13 జలె, అమ్క 'వెర్తి జల' మెన తుమ్ తీర్పు ఉచర్లె జలె, 'అమ్ వెర్తి రితి డీస్తనెతె దేముడుక లాబుమ్ తిలె దస్సి డీసుమ్' మెంతసుమ్. జోచి కామ్ కెర్తి ఆనకయ్ ఇసి జతనుమ్. నాయ్ మెలె, 'బుద్దికయ్ దస్సి సంగితతి' మెన అమచి రిసా తుమ్ ఒప్పునె, చెంగిలి. తుమ్కయ్ 'చెంగిల్ జతు' మెనయ్ ఇసి జతనుమ్.

14 క్రీస్తు ప్రేమచి రిసా అమ్ తుక్లె తంక నెత్తుమ్. అమ్క జోచి ప్రేమ పెలయ్తయ్. క్రీస్తు ఎక్కిలో అమ్ ఎత్తిజిన్చి పాపుమ్ గెచ్చయ్తి రిసా మొర్లన్ మెన అమ్ దెకితనుమ్. జో మొర్లన్ తెన్ అమ్ ఎత్తిజిన్ మొర్లె రిత జా జోక నంపజలి తెంతో సొంత ఇస్టుమ్ జర్గు కెర్తి రితి ఇండుమ్ నాయ్.

15 కిచ్చొక మొర్లన్ మెలె, అమ్ జితన ఎత్తిజిన్క 'సొంత ఇస్టుమ్ అయ్లి రితి నాయ్, గని జోచి రిసా మొర అన్నె జితొసాక గవురుమ్ కెర్తి రితి జితు' మెనయ్ జో మొర్లన్.

క్రీస్తుచి తెడి నొవ మాస్సుల్

16 అప్పె తెంతో మాములుమ్ జోచి ఈంజ లోకుమచి జెర్మున్క కక్కయ్ దెకుమ్ నాయ్. అగ్గెయ్ క్రీస్తుచి మాములుమ్ ఈంజయ్ లోకుమచి జెర్మున్కయి కిసి తిలో గే, దస్సి జోక దెకిత్ తిలమ్, గని అప్పెయి జోక దస్సి దెకుమ్ నాయ్. జో దేముడు జలిన్ రుజ్జు జలిన్కయ్ జోక దెకితనుమ్.

17 గని, కో క్రీస్తుచి తెడి తవుల గే, జోచి అగ్గెచి జెర్మున్క మొర్లి రితి జా తా జోచి ఆత్మతె జెర్మున్ జా నొవర్ రగుమ్ జా అస్తి. నొవర్ జెర్మున్ జలి రితి జా అస్తి. అగ్గెచి గెచ్చు, నొవిచి బార్ జా అస్సి, చి నొవిచి కయ్ దెకితసుమ్.

18 మాన్సు నొవర్ జతి ఈంజ వరుమ్ కేనె తెంతో జెతయ్ మెలె, దేముడు తెంతో. జో క్రీస్తుచి నావ్ తెన్ అమ్చి పాపుమ్ పుంచ కెర అమ్క జోక అడ్డు తిలి పాపుమ్ గెచ్చువ గెల కెర అమ్క అన్నె బెదవన్లన్, చి 'వేర మాన్సుల్ కి అమ్చొ క్రీస్తుక నంపజలె జోవయింక కి దస్సి అన్నె బెదవనిందె' మెనయ్ జోచి సుబుమ్ కబుర్ సూనయ్ తి సేవ జో దేముడు అమ్క తియార అస్సి.

19 మెలె, క్రీస్తు బలి జలిన్ తెన్ జోవయించి పాపుమ్ పుంచ నే వయడై, దేముడు లోకుమ్చక బెదవంతె అస్సి, చి జో బెదవంతిన్చి కబుర్ సూనయ్ తిసి అమ్చి అత్తి జో సార్పు కెర దా అస్సి.

20 జాకయ్, క్రీస్తుచ బారికుల్ జా అస్సుమ్. 'క్రీస్తుక నంపజతు' మెనయ్ దేముడు అబ్బొసి అమ్చి అత్తి మాన్సుల్క బుకార్తయ్. జాకయ్, 'దేముడు తెన్ బెదితి వరుమ్ తుమ్ నజనా' మెనయ్, క్రీస్తుచి నావ్ తెన్ తుమ్క అమ్ బతిమాల్పా జా సంగితసుమ్.

21 అమ్క 'అంచి పున్నిమ్ జతు' మెనయ్ పాపుమ్ నెంజిలో పాపుమ్ నేన్లొ జోచొ పుత్తుసి అమ్చి పాపుమ్ రితి దేముడు అబ్బొసి జోక టీచణ్ణె.

6

రచ్చన నజన్తి సమయుమ్ నిజుమి జా అస్సె

1 జలె, "దేముడుచి రచ్చన నజనా" మెన సంగితసుమ్, గని జోచి నావ్ తెన్

అన్నె కిచ్చొ మెంతసుమ్ మెలె, జోచి దయ్ ఆరి నజన తా నాయ్.

2 కిచ్చొక మెలె,

* "చెంగిల్ సమయుమ్క తుమ్చ ప్రార్దన సూన అస్సి, చి ఆవ్ రచ్చన కెర్తి కాలుమ్క తుమ్క తోడు జా అస్సి"

మెన పూర్గుమ్ తెంతో దేముడుచి కొడొతె రెగ్గవ అస్సి. అల్లె! 'చెంగిల్' మెలి జా సమయుమ్ అప్పాయి. రచ్చన జతి జా కాలుమ్ అప్పాయి.

సుబుమ్ కబుర్ రిసొ పవులు అల్లర్ జలిసి

3 అమ్ ప్రబుచి సేవ కెర్తిన్తె కేన్ నింద నే జెతె, కో కిచ్చొ సంగుక నెత్తిర్తి రితి, కచి నమకుమ్ పిట్టయ్ తి కిచ్చొయ్ అడ్డు కెరుమ్ నాయ్.

4 ప్రబుచి సేవ పూర్తి నిదానుమ్ కెర్తునుమ్ మెన సాచి సంగన్తనుమ్. ఇన్నెచి రుజ్జు కిచ్చొ మెలె, కిచ్చొ కిచ్చొ ఒగ్గర్ అల్లర్ ఒర్పువ జా నిదానుమ్ తెన్ అస్సుమ్. కిచ్చొ అల్లర్ మెలె, బాదల్, సైమల్, కళ్లల్, ఇర్కులు,

5 కొర్డల్చ దెబ్బలు, జేలి జలిసి, జట్టు తెన్ నిగ జా మాన్సుల్ అమ్క అల్లర్ కెర్లిసి, ఒగ్గర్ కామ్ కెర టక్కిలిన్, గూన్ నెంజిలిసి అందర్లు, చువ్వె తిలిసి; దసచ ఎత్తి నిదానుమ్ తెన్ ఒర్పువ జా అస్సుమ్.

6 పడ్డొ జోచి సేవచి అమ్చి నిదానుమ్ అమ్ ఇండిలి బుద్దితె కి డీస్తయ్. వేర బుద్దుల్ అమ్ నే జలిన్తె, ప్రబుచి ఎత్తి అమ్ జాన్తిన్తె, మాన్సుల్చ తప్పల్ అమ్ ఒర్పువ జతిన్తె, మాన్సుల్క అమ్ మరియాద దెకితిన్తె, దేముడుచి సుద్ది తిలి ఆత్మ అమ్చి పెట్టి తిలిన్తె, మాయ నెంజిలి అమ్చి ప్రేమతె.

7 సత్తిమ్చి బోదన అమ్ కెర్తిన్తె, దేముడుచి సెక్తి అమ్చ కమొతె డీస్టిన్తె,

ఈంజ ఎత్తితె అమ్చి నిదానుమ్ డీస్తయ్. డెబ్బి పక్క కి, ఉజెతో పక్క కి, కామ్క జెత పున్నిమ్చి అయ్దల్ వాడిక కెరన నిదానుమ్ తత్తసుమ్.

8 జాకయ్, గవురుమ్ జలెకి, నిస్కారుమ్ జలెకి, మాస్సుల్ అమ్క 'చెంగిల్చ' మెలె కి, 'గార్చ' మెలె కి, నిదానుమ్ తత్తసుమ్. సగుమ్జిన్ అమ్క 'మాయచ' మెంతతి, గని సత్తిమ్ కెర్తసుమ్.

9 సగుమ్జిన్ అమ్క విలువ దెకిత్ నాయ్, గని సగుమ్జిన్ విలువ దెకిత్తి. 'బే బేగి మొరుల' మెన అమ్క సగుమ్జిన్ ఉచర్తతి, గని జితసుమ్. దెబ్బల్ కతసుమ్ గని మొరుమ్ నాయ్.

10 అమ్చ బాదల్క ధుకుమ్ జంక జతయ్, గని సర్దనంతోసుమ్ తెన్ అస్సుమ్. ఈంజ లోకుమ్చి ఆస్తిక ఉచర్లె బీద అస్సుమ్, గని ఒగ్గరజిన్క సామ్సారుమ్ కెర్తసుమ్. అమ్క కిచ్చి నెంజిలె కి, ఎత్తి కలుగు జలి రితి జా అస్సుమ్.

అమ్క కి తుమ్ ఎదిలి ప్రేమ కెర

11 ఓ తుమ్ కొరిందిలు, కిచ్చి నే లుంకడ్డె ఈంజ ఎత్తి తుమ్క ఎదార్దుమ్ సొస్తుమ్ సంగ అస్సుమ్. అమ్చి పెట్టితె తుమ్క ఒగ్గర్ ప్రేమయ్ అస్సుమ్.

12 అమ్చి రిసాచి తుమ్చి ప్రేమక ఆమి కిచ్చి ఇర్కు కెరుమ్ నాయ్. తుమ్చి సొంత పెట్టి తుమి ఇర్కు కెరంతసు.

13 అంచ బోదల్ జల రిత ఓ తుమ్ కొరిందిల్, తుమ్క ఆవ్ కిచ్చి మెంతసి మెలె, ఆమ్ తుమ్కయ్ కీసి ప్రేమ అస్సుమ్ గే, తూమ్ కి దస్సి అమ్కయ్ ప్రేమ కెర మెన ఆవ్ బతిమాల్పా జా సంగితసి.

14 ప్రబుక నంప నెంజిలస తెన్ తుమ్ లంకె జా నాయ్. పాపుమ్తె పున్నిమ్

తిలిసి కీసి బెదెదె?! నెంజిలె, అందర్బుద్ది తెన్ ఉజెడ్ బుద్ది కీసి బెదెదె? బెదె నాయ్!

15 'బెలియాల్' మెలో సయ్తాన్ తెన్ క్రిస్తు కీసి బెదెదె? బెదె నాయ్! నంపనెంజిలోసా తెన్ నంపజిలోసాక కీసి వాట తియిదె? తయె నాయ్!

16 దేముడుచి గుడి, జలె, బొమ్మల్క జొకర్దెన్ తెన్ కీసి బెదెదె? నెంజె! కిచ్చొక ఆవ్ ఇసి సంగితసి మెలె, జివ్ తిలో దేముడుచి గుడి ఆము. పూర్ణమ్ దేముడుచి కొడెతె రెగ్గయ్లి రితి,

+ "జోచి పెట్టి ఆవ్ జియిందె, జోచి తెన్ ఆవ్ బులిందె, ఆవ్ జోవయింబో దేముడు జియిందె. జెచ్చి అంచ ప్రజల్ జవుల"

మెన అన్నె,

17 † "జాకయ్ 'అంక నంప నెంజిలస తెంతో తుమ్ బార్ జా' మెన 'సుద్ది నెంజిలిసి తుమ్ చడ నాయ్.

దస్సి ఎక్కి నిదానుమ్ జలదు మెలె, తుమ్క బెదవనిందె' మెన ప్రబు సంగితయ్"

మెన అన్నె,

18 ‡ "అంచ బోదల్ మెనయ్ తుమ్కయ్ అబ్బొది జియిందె,

చి అంక 'అబ్బొ మెనయ్ అంచ పుత్తర్లు దువొ జస్త'

మెన ఎత్తి సెక్కి అదికారుమ్ తిలో ప్రబు సంగితయ్."

మెన రెగ్గ అన్నె.

7

సుద్ది జతిన్

1 జాకయ్, ప్రేమ తిల బావుడ్లు, దేముడు అమ్క ఈంజెవ్ ప్రమానల్ సంగ అస్సెచి రిసా, అమ్చి ఆగ్క, అమ్చి ఆత్మక కిచ్చి గార్ కెరెదె గె, జా గెచ్చవన గెల కెరయ్, దేముడు ప్రబుక

† 6:16 6:16 లేవియకాండుమ్ 26:12, యిర్మీయా 32:38, యెహెజ్కేలు 37:27. ‡ 6:17 6:17 మెనయూ

52:11, యెహెజ్కేలు 20:34, 41. § 6:18 6:18 సమూయేలు దొన్నెచి పుస్తకుమ్ 7:14, 7:8. * 7:1

7:1 కొరిందిల్క రెగిడ్డి దొన్నె నంబర్ ఉత్తమ్ 3:18, దెన్నెలోనికుల్క రెగిడ్డి ఏక నంబర్ ఉత్తమ్ 5:23.

బియ్యం కెర, అమ్ సుద్ది జంక* దెర్లిసి పూర్తి జతి రితి జోచి సుద్ది ఆననుము.

2 అమ్క తుమ్చి పెట్టితె బెదవన. అమ్ కక్క తప్పు కెరుమ్ నాయ్, కక్కయ్ పాడ్ కెరుమ్ నాయ్, కక్కయ్ మోసిమ్ కెర లాబుమ్ కెరనుమ్ నాయ్.

3 తుమ్క నింద కెర్లి రిసా ఇసి సంగి నాయ్, అగ్గె కిచ్చో మెన రెగిడ్లయ్ మెలె, 'అమ్చ జీవుతె తుమ్చి రిసా ప్రేమయ్ అన్నుమ్' బెద మొరుమ్దె, బెద జిమ్దె.

4 తుమ్చి రిసా అంక నముకుమ్ ఒగ్గర్ అస్సి, తుమ్ అంచి అత్తి సూన నంపజలదు చి రిసా ఆచ్ గవురుమ్ సంగితసి, తుమ్చి రిసా అంచి పెట్టి పూర్తి దయిరిమ్ అస్సి. అమ్చ బాదల్ ఒగ్గర్ జలెకి, అంచి పెట్టి సంతోసుమ్ బెరయ్ అస్సి.

5 †మాసిదోనియ ప్రదేసిమి అమ్ ఉట్ట అయ్లి పొది అమ్చి ఆగ్క సుక్కుమ్ నాయ్, గని ఎత్కి రగల్ బాదల్ సేడ్డయ్ తిలమ్; విరోదుమ్ సుదల్ కెర్ల అల్లర్చి రిసా కి, అమ్చి పెట్టిచి బయిమ్చి రిసా కి,

6 గని ముసుర్న జలసక డిట్టుమ్ దయిరిమ్ కెర్తో దేముడు, జలె, తీతుక అమ్తె తెద్రవ అమ్క దయిరిమ్ కెర్తో.

7 ఎక్కి తీతు అయ్లిసి తెన్ దయిరిమ్ జము నాయ్, గని తుమ్చి నిదాసుమ్ దెక జ్యోయ్ దయిరిమ్ జలిన్క అమ్కయ్ కి జో దయిరిమ్ కెర్తో. మెలె, అంక అన్నె దస్సుల్ జంక చి తుమ్చి ఆస, అంక తుమ్ దుకుమ్ కెర తిలిన్చి రిసాచి తుమ్చి దుకుమ్, అంచి రిసాచి తుమ్చి ప్రేమ నిదాసుమ్చి రిసా అమ్క సంగిలన్, చి అన్నె ఒగ్గర్ సర్ల జలయ్.

8 అంచి ఉత్తమ్తె ఆచ్ రెగిడ్లిన్ తెన్ తుమ్క ఆచ్ దుకుమ్ కెర్లె కి, ఆచ్ ఉచర్క నాయ్. విసారుమ్ జా తిలయ్, గని తప్పు కెరి నాయ్ మెన జాని. జా

ఉత్తమ్ తుమ్క దుకుమ్ కెర్లి, గని గడియకయ్ మెన ఆచ్ దెకిత్తసి.

9 జలె, అంక సర్ల. తుమ్క దుకుమ్ కెర్లి రిసా నాయ్, గని తుమ్ దుకుమ్ జా తప్పు ఒప్పున చెంగిల్ జలదు చి రిసాయి. మెలె, తుమ్చి దుకుమ్ ప్రబుచి సత్తిమ్ తుమ్క ఉచరవడ్లిన్చి రిసాయి తుమ్క అమ్ కెర్లిసి కిచ్చో సంతోసుమ్ కెరె నాయ్.

10 కిచ్చొక మెలె, ప్రబు ఉచర్లిసి దుకుమ్ అమ్ మాన్సుల్చి పెట్టి అయ్లె, అమ్ కెర్ల పాపల్ ఒప్పున బుద్ది జంక ఇస్టుమ్ జిమ్దె, చి ప్రబుచి రచ్చన నజనుమ్దె. జా రచ్చనచి రిసా 'చెంగిల్ జలమ్' మెనయ్, అన్నె దుకుమ్ తయె నాయ్. గని ఈంజయ్ లోకుమ్చి బుద్దిచి దుకుమ్ అమ్ పెట్టి తియ్లె, అమ్క మొర్ను జెయెదె.

11 ఈందె, దేముడు తెద్రయ్లి దుకుమ్ తుమ్చి పెట్టి కెర్లి నిదాసుమ్ ఉట్టవ అస్సి! నిజామ్, తుమ్చి సత్తిమ్ దెకయ్తి ఆస ఉట్టవ అస్సి! జా తప్పుచి రిసా లాజ్ జా తుమ్చి ఉప్పిరి తుమి కోపుమ్ జలదు, దేముడుచి తీర్పుక బిలదు, అమ్చి తెన్ అన్నె బెదుక ఆస జలదు, సత్తిమ్ జంక ఆస జలదు. జా తప్పుచి రిసా సరిగా తీర్పు కెర్లదు. జా ఎత్కితెయి తుమ్ అప్పె సత్తిమ్ జలిసి డిస్యయ్.

12 జాకయ్, ఆచ్ తుమ్క రెగిడ్లిసి దుకుమ్చి తిలె కి, ఒత్త కిచ్చో లాబుమ్ మెలె, ముక్కిమ్క తప్పు కెర్లోసాక ఉచరి నాయ్, ముక్కిమ్క అల్లర్ సేడ్డోసాక ఉచరి నాయ్, గని జా ఉత్తమ్చి రిసా ముక్కిమ్క కిచ్చొచి రిసా ఉచర్లసి మెలె, అమ్చి రిసాచి తుమ్చి ఒగ్గర్ ఆస, ప్రబుచి మొక్కె తుమ్ అప్పె చినన అస్సున్.

13 తుమ్ చెంగిల్ జలిన్చి రిసా అమ్క సర్ల, అమ్క అన్నె డిట్టుమ్ దయిరిమ్

† 7:5 7:5 జేవ్ కొరిం దిల్ తిలి అకయ ప్రదేసిమ్క మాసిదోనియ ప్రదేసిమ్ ఉత్తర పక్క అస్సి.

కెర్తి. అమ్ సొంత సర్ల జలిన్చి కంట కిచ్చొక అన్నెయ్ సంతోసుమ్ జా అన్నుమ్ మెలె, తీతు తుమ్తె జా దెకిలి తెంతో, తుమ్చి రిసొచి జోచి అగ్గెచి అన్నానుమ్ నాయ్, చి సర్లసంతోసుమ్ జో జా అస్సె.

14 తుమ్చి రిసొ అంచి సర్ల, ఆవ్ గవురుమ్ ఉచరంతిసి, జోక అగ్గె తెంతో సంగితె తిలయ్, చి జో తుమ్తె గెలి పొది జోచి మొక్కె కిచ్చొ తప్పుల్ కెర అంక లాజ్ కెరయ్సు నాయ్, అంచి మరియాద కడ్పు నాయ్. అమ్ తుమ్కయ్ సంగిలిసి ఎత్కిచి సత్తిమ్ కిసి రుజ్జు జలి గే, దస్సి తుమ్చి రిసొ ఆవ్ తీతుక సంగిలిసి నిజుమ్ జలి.

15 అప్పె జో తుమ్క అగ్గెచి కంట ఒగ్గర్ ప్రేమ ఉచర్తయ్. ప్రబుచి ఇస్టుమ్ తుమ్ ఎత్కిజిన్ కెర్తినచి రిసొ కి, తుమ్ ఎత్కిజిన్ బియిఁ అద్దుర్ తెన్ జోక బెదవల్లిన్చి రిసొ కి జో ఉచార కెర్తయ్.

16 జలె, తుమ్చి రిసొ ఆవ్ పూర్తి దయిరిమ్ జా అస్సిచి రిసొ అంక ఒగ్గర్ సర్లసంతోసుమ్.

8

యెరూసలేమ్చి సంగుమ్చ తోడు దెత్తినచి రిసొ

1 అప్పె, బావుడ్లు, తుమ్క కిచ్చొ సంగితసుమ్ మెలె, మాసిదోనియ ప్రదేసిమ్చ ప్రబుచ సంగుమ్లుచ మాన్సుల్చి పెట్టి దేముడు ప్రేమ సికడ్లసి రుజ్జు జా అస్సె.

2 కిసి మెలె, జోవయించి నిదానుమ్ పరిచ్చు జలి రితి జా జేవ్ ఒగ్గర్ కస్టల్ సేత్తె తిలె కి, జేవ్ ఒగ్గర్ బీద జలెకి, ప్రబుచి, జోవయించి ఎదివాట్ సర్లచి రిసొ ఒగ్గర్ దర్ముమ్ తెన్ అన్నె జేవ్క * తోడు దా అస్సి.

3 జేవ్చి రిసొ ఆవ్ కిచ్చొ సొచి సంగితసి మెలె, జోవయించి సెక్తి తిలి

ఎదిలి, నాయ్, గని జోవయించి సొంత ఇస్టుమ్క తెర్లి ఎదిలి కంటయ్ అన్నె జేవ్ ఒగ్గర్ దా అస్సి.

4 † 'యెరూసలేమ్చ సంపజలసక తోడ్ దెత్తినతె ఆవ్ కి బెదుమ్దె' మెనయ్ అమ్క బలవంతుమ్ కెర్ల.

5 'ఇసి దస్సి కెరుల' మెన మాములుమ్ అమ్ ఉచర్లి రితి నాయ్, గని 'అమ్చి అత్తి ప్రబు జోవయించి ఇస్టుమ్ పూర్తి కెర్పు' మెన, తొలితో ప్రబుచి అత్తి జోవయించి జీవ్ సొర్పు కెర, పడ్డో జోవయించి తెడి అమ్చి అత్తి దిల.

6 జాకయ్ తుమ్ కొరిందిల్చి రిసొ కి అమ్ ఉచర్లమ్, చి బీద సుదల్క దెతి దర్ముమ్ † తుమ్ ఉక్కిల్తినె, తీతు మొదోల్ కెర్తినక 'పూర్తి జర్లు జవున్' మెన, తీతుక బలవంతుమ్ కెర అన్నుమ్.

7 జలె, నముకుమ్క, ప్రబుచి గ్యానుమ్క, జోచి గ్యానుమ్ సొస్టుమ్ బోదన కెర్తినక, నిదానుమ్క, చి అమ్చి ఉప్పిర్చి తుమ్చి ప్రేమక, దస్సిచి ఎత్కిక తుమ్ కిసి నిదానుమ్ జా అన్నున్ గే, దస్సి ఈంజ దర్ముమ్ దెత్తినక కి దయ ఒగ్గర్ జతి రితి తుమ్ దెకన.

8 ఆవ్ ఇసి సంగితిసి ఆడ్ర దెత్తినె నెంజె, గని మాసిదోనియ ప్రదేసిమ్చ జేవ్ అన్నె మాన్సుల్ తోడు దా సత్తిమ్ కెర్తినక తూమ్ దెక తుమి పరిచ్చు కెరన్లె, బీద సుదల్క తోడు కెర్తి తుమ్చి ఉద్దెసుమ్క 'నిజుమ్చి' మెన తుమ్ రుజ్జు దెకయ్తి అవ్కాసుమ్ తుమ్క దొర్కు జవున్ మెనయ్ ఆవ్ తుమ్క ఉచరయ్తసి.

9 ప్రబు జలొ యేసుక్రీస్తు సొంత కి జోచి దయక కిచ్చొ కెర్లన్ గే జానుమ్. మెలె, పరలోకుమ్చి సొమ్నారుమ్ జోక తిలె కి, తుమ్చి రిసొ బీద కెరన్లె; తుమ్క సొమ్నారుమ్ కెరుక మెనయ్ జో బీద

* 8:2 8:2 రోమియల్ 15:25-27. † 8:4 8:4 యెరూసలేమ్ పట్టుమ్చి యూదయ ప్రదేసిమి కారు జా తతికయ్, వేర తెంతొచ సంపజలస తోడు తెద్రయ్ల. బారికుల్ 1:28-30. ‡ 8:6 8:6 కొరిందిల్క రెగిడ్లి వీక నంబర్ ఉత్తుమ్ 16:1-4.

జలన్.

10 జలె, ఈంజ డబ్బుల్ ఉక్కిల్లి కామ్చి రిసా కిచ్చొ ఉచర తుమ్క ఆవ్ సంగితసి మెలె, వెర్నెక్ అగ్గె తుమ్ ఇస్టుమ్ జా మొదోల్ కెర్లిసి తుమ్ అప్పె పూర్తి జర్గు కెర్లె చెంగిలి.

11 తుమ్క జా ఇస్టుమ్ అస్సె. జలె, జా జర్గు కెర్లెకయ్ జా ఇస్టుమ్ నెరవెర్చువ జయెదె. తుమ్ తెర్లి ఎదిలికయ్ జర్గు కెర.

12 ఎక్కిలో దెంక మెన తెయార్ మెన్సు తెన్ తిలె, జాక సెక్తిక జిన్లిన్ నెంజె గని తిలిస్తెయ్ సర్ల తెన్ దిలె ఇస్టుమ్ జయెదె. నెతిర్లిసి నే కెర్లె, మాన్సుక నింద నాయ్.

13 వేర మాన్సుల్క జేవ్చి పూచి వయడ నాయ్, తుమ్కయ్ జా జాడు ఎత్తి వయతు మెని నాయ్,

14 గని, 'ఎత్తిక సమానుమ్ జతిసి తవున్' మెన జోవయింక నెంజిలిసి రిసా తుమ్చి సామానుమ్క తుమ్ అప్పె దాస. ఏక్ వేల పడ్డొక తుమ్కయ్ కొత్తు తిలె, జేవ్ తుమ్కయ్ తోడు కెరుక జయెదె, చి ఎత్తిజినక సమానుమ్ జతిసి తయెదె.

15 పూర్గుమ్ దేముడుచి కొడొతె రెగ్గయ్లి ఏక్ కోడుచి అర్దుమ్ తుమ్ ఉచర.

“ఒగ్గర్ కుడవన్లొసాక కిచ్చొ సేసె నాయ్, గని తొక్కి కుడవన్లొసాక కిచ్చొ కొత్తు తయె నాయ్” మెన రెగిడ్లి కోడు.

తీతుక కొరిండ్ పట్నుమ్తె అన్నె తెద్రయ్లి

16 దేముడుక జోఒర! తుమ్చి రిసా జో తీతుచి పెట్టి కి జోవయించి ప్రేమ దా అస్సె.

17 “కొరిండ్తె ఈంజ కామ్క గో” మెన అమ్ బతిమాల్పా జా సంగితికయ్, “గెచ్చిందె” మెలన్. గని ఎక్కి ఆమి సంగిల్ రిసా నాయ్, గని అన్నెయ్,

తుమ్చి రిసాచి జోచి ప్రేమకయ్ జోచి సాంత ఇస్టుమ్కయ్ జెతయ్.

18 జో తెన్ అన్నె కక్క తెద్రయ్తనుమ్ మెలె, జో సుబుమ్ కబుర్ సూనయ్తన్చి రిసా ఎత్తి సంగుమ్లుతె, ఎత్తిజిన్ మెన్సుతో బావొక తెద్రయ్తనుమ్.

19 పడ్డొ, ‘ప్రబుచి గవురుమ్ దెకయ్తి అమ్చి ప్రేమ దెకయ్తి ఈంజ తోడు దెతి కామ్తె అమ్చి తెన్ బులున్’ మెనయ్ సంగుమ్లుచ జోక నిసాన అస్తి. జో, జలె, తీతు తెన్ గెతయ్.

20 అమ్ డబ్బుల్ ఉక్కుల వంట దెతి ఈంజ దర్దుమ్చి సేవచి రిసా కో అమ్క నింద నే కెర్లి రితి, ఈంజ కామ్తె కిచ్చొ పొరపాట్ బెదవుమ్ నాయ్, కిచ్చొ పొరపాట్ బెదయ్లి రితి డీసుక కి నెసుమ్,

21 చి ప్రబుచి మొక్కె కి, మాన్సుచి మొక్కె కి, కిసి సత్తిమ్ కెరుక గే సరిగా ఉచర అస్సుమ్. జాకయ్, సంగుమ్లుచ నిసాన మాన్సుక కి అమ్చి తెన్ ఈంజ తోడు దెతిన్తె బెదవన అస్సుమ్.

22 అన్నె, జేవ్ దొగుల తెన్ అన్నెకొ బావొక తెద్రయ్తనుమ్. ఇన్నెక అగ్గె తెంతొ కిచ్చొ కిచ్చొ కమొ దా అస్సుమ్ చి కిచ్చొ కామ్తె కి నిదానుమ్ కెర్తయ్ మెన రుజ్జుల్ దెక అస్సుమ్. తుమ్చి రిసాచి జోవయించి ఒగ్గర్ నముకుమ్చి రిసా, వేర కమొచి కంట తుమ్తెయ్ గెచ్చుక అన్నె ఒగ్గర్ ప్రేమ ఈంజో జా అస్సె.

23 తీతు, జలె, తుమ్చి రిసాచి అంచి సేవతె జో అంచి తెన్ ఎక్కి రితి బెద అస్సె. జేవ్ అన్నె దొగుల బావుడ్లు, జలె, సంగుమ్లుచి నావ్ తెన్ జోవయించ బారికుల్ జల రిత జా గెతతి, క్రీస్తుచి గవురుమ్ దెకయ్తతి.

24 జాకయ్, తుమ్చి ప్రేమక, చి ఈంజేవ్క ఆవ్ తుమ్చి రిసా నముకుమ్ సంగిలిన్క, నిజుమి

జో సంగిల్ రితి జా అస్తి' మెనయ్ నంగుమ్లు రుజ్జు దెకిత్ రితి కెర.

9

దర్ముమ్ ఉక్కుల దెతినచి రిసా అన్నె సంగిలిసి

1 జలె, *యెరూసలేమ్తెచ నంపజలసక దెతి తుమ్ ఉక్కిల్లి డబ్బుల్చి రిసా అమ్ అన్నె రెగుడుక కిచ్చొక?

2 జా ఉక్కుల దెంక తుమ్ కోర్ప జలిసి ఆవ్ జాని, చి మాసిదోనియ ప్రదేసిమ్చ నంపజలసక తుమ్చి రిసా ఆవ్ సంగితిసి. కిచ్చొ సంగితసి మెలె, “†అకయ ప్రదేసిమ్చ నంపజలస పూర్ణమ్ తెంతో జోవయించి డబ్బుల్ దెంక తెయార్ జా అస్తి” మెన ఆవ్ సంగితసి. జా దర్ముమ్ ఉక్కుల దెతి తుమ్చి సర్దచి రిసా సూల్లి రిసాయి జేవ్ మాసిదోనియచ ఒగ్గర్ జిని జా కామ్తె బెదుక కోర్ప జా అస్తి.

3 జలె, ఈంజేవ్ బావుడ్లుక కిచ్చొక తుమ్తె తెద్రయ్తసి మెలె, ‘జా డబ్బుల్ ఉక్కుల తెయార్ జా అస్తి’ మెన తుమ్చి రిసా అమ్ సర్ద సంగిలిసి అబద్దుమ్ నే జతి రితి తుమ్క ‘నిజుమి తెయార్ జాఁ తత్తు’ మెన ‘తుమ్ దెక’ మెనయ్ ఆవ్ జేవ్క తెద్రయ్తసి.

4 నెంజిలె, పడ్డో అంచి తెన్ ఈంజ మాసిదోనియచ నంపజలస నగ్గుమ్జిన్ తుమ్తె అయ్లె, తుమ్ తెయార్ నే జా తిలె, అమ్చి మరియాద గెచ్చెదె; అమ్చి కి తుమ్చి కి. ‘సత్తిమ్ కెరుల’ మెన అమ్ దయిరిమ్క సంగిలిసి పిట్ట తయెదె చి రిసా.

5 జాకయ్, ‘అంచి కంట జేవ్ అగ్గె గెచ్చ తుమ్ సంగిలి దర్ముమ్ దెతినకయ్ తుమ్క తెయార్ కెర తత్తు’ మెనయ్

జేవ్క బలవంతుమ్ కెర్లయ్. దస్సి, తుమ్ అగ్గెయి జా డబ్బుల్ తెయార్ కెర తిలె, సర్ద తెన్ దెతె, ఆరి ఇస్టుమ్ నెంజిల్ రితి నాయ్.

ముస్కి బుద్దిచి రిసాచి దర్ముమ్ బుద్దిచి రిసాచి కోడు

6 ఆవ్ కిచ్చొ మెంతసి మెలె, కో ముస్కి తెన్ బి గలెదె గే, తొక్కి పలితుమ్చి పంటో లాయెదె. కో దర్ముమ్ తెన్ బి గలెదె గే, ఒగ్గర్ పంటో లాయెదె.

7 ఎత్తి మాన్సు సరిగా ఉచర, ‘దెంక చెంగిలి’ మెన కెదిలిచి రిసా ఉచరై గే, తెద్దిలి దెంకయ్. గని కో బలవంతుమ్ కెర్లి రితి దుకుమ్ తెన్ పోన, సర్ద తెన్చి. సర్ద తెన్ దెతొసాక దేముడు ప్రేమయ్ దెకెదె.

8 చెంగిల్ తిలిసి ఎత్తి దయ తుమ్క మొచ్చ తెన్ దెంక దేముడుచి అత్తి అస్సి, చి తుమ్క సరిపుచుప జతిసి కి, పడ్డో కిచ్చొ కిచ్చొ చెంగిల్ కమొక తుమ్ మొచ్చ తెన్ దెంక తెరితి రిసా కి, సరిపుచుప జతిసి తుమ్క దెంక జోచి ఇస్టుమ్.

9 దేముడుచ కొడొతె పూర్ణమ్ రెగ్గయ్లి అస్సి.

‡“జోవయింక తిలిసి జో వంట దెతయ్, బీద సుదల్క జో దర్ముమ్ తెన్ దెతయ్, జోవయించి జా సత్తిమ్ కెయ్క తెయ్క తాఁ గెచ్చెదె.”

10 తుమ్ బి గల్లి రిసా బి దెతొ ప్రబు, తుమ్ కతి రిసా అన్నిమ్ దెతొ ప్రబు, సరిపుచుప జతిసి తుమ్క దెయెదె, పలితుమ్ దెయెదె, చి తూమ్ దర్ముమ్ తెన్ బెదయ్తిన్ చి సత్తిమ్చి పలితుమ్ జో ఒగ్గర్ తయెదె.

11 తుమ్ దర్ముమ్ తెన్ దెతి రిసా ఎత్తితె సామ్నూరుమ్ రితి జస్తె. అమ్చి అత్తి తుమ్ జా దిలె, అమ్ బీద సుదల్క

* 9:1 9:1 క్రీస్తు యెరూసలేమ్తె మొర జివ్ జలన్, గెద, చి తొలితో ఒత్తయ్ మాన్సుల్, క్రీస్తుచ సిస్సుల్ తెన్, జోవయింక నంపజల. యెరూసలేమ్ పట్టుమ్చి యూదయ ప్రదేసిమి కారు జా తతికయ్, వేర తెంతెచ నంపజలస తోడు తెద్రయ్ల; అకయ ప్రదేసిమ్చ కి మాసిదోనియ ప్రదేసిమ్చ కి; బారికుల్ 1:28-30. † 9:2 9:2 ఆజ కాలి అకయ ప్రదేసిమ్క చి మాసిదోనియ ప్రదేసిమ్క ‘గ్రీకు ప్రదేసిమ్’ మెంతతి. ‡ 9:9 9:9 క్రీస్తులు 112:9.

దేమీదె, చి దేముడుక జేవ్ జోచి నర్త దెకవ జోక గవురుమ్ కెరుల.

12 దస్సి, ఈంజ దర్ముమచి సేవ కెర్లె, బీద జల నంపజలనక కామ్క జెత్తిసి దొర్కు జలిసి దా తస్సె, పడ్డె అన్నె, “దేముడు దొర్కు కెరయ్లో” మెన జోక జోకర జేవ్ ఒగ్గర్ గవురుమ్ కెరుల.

13 ఈంజ కామ్ తుమ్క ఏక్ పరిచ్చ రితి జయెదె. ఈంజ సేవ తుమ్ చెంగిల్ కెర్లె, తుమ్చి నత్తిమ్క రుజ్జు జయెదె. చి క్రీస్తుచి సుబుమ్ కబుర్ ఒప్పున జోక బియఁ తుమ్ ఈంజ నత్తిమ్ కెర్లెన్చి రిసా, దేముడుక గవురుమ్ జయెదె. పడ్డె, జేవ్ బీద జల నంపజలనక చి అన్నె బావుడ్లు ఎత్కిక తుమ్ కోడ్ దిలిన్చి దర్ముమచి రిసా గే దేముడుక గవురుమ్ జయెదె.

14 అన్నె, తుమ్చి పెట్టి దేముడు జోచి దయక దర్ముమ్ బుద్ది దిలి రిసా జేవ్ మాన్సుల్ తుమ్క ఒగ్గర్ ప్రేమ జా, తుమ్క దెకుక మెన ఆన తెన్, తుమ్చి రిసా కి జేవ్ ప్రార్దన కెరుల.

15 క్రీస్తుచి అత్తి దేముడు అమ్క దిలి వరుమ్ కెర్లె గే కో సంగుక నెత్తిర్ది. జోచి ఎదివాట్ దర్ముమచి రిసా జోక జోబర.

10

బుద్ది నే జా తిలె సిచ్చ కెరుక తయెదె

1 క్రీస్తు కిసి మెత్తన తా మాన్సుల్క కన్కారుమ్ దెకితె తిలన్ గే తుమ్ జాన్సు. జలె, ఆవ్ పవులు, క్రీస్తుచి కన్కారుమ్ దెకితి దస్సి బుద్ది తెన్ సొంత తుమ్క బతిమాల్ప జతిసి. అమ్చి రిసా నగుమ్జిన్ మాన్సుల్ సంగితిన్ కిచ్చొ మెలె, తుమ్చి మొక్కె మెత్తన అస్సి, గని ఉట్ట గెలె పడ్డె దయిరిమ్ తెన్ ఆవ్ గోల కెర్లెసి, బెర్లె!

2 జలె, కిచ్చొ అప్పె బతిమాల్ప జా ఆవ్ సంగితసి మెలె, ఆవ్ తుమ్తె అన్నె అయ్లె పొదిక ఆవ్ ఇసి దయిరిమ్ తెన్ గోల కెరుక నెంజితి రితి, జేవ్ అల్లర్చ

మాన్సుల్ బుద్ది జా తత్తు, నెంజిలె అప్పె కిసి డీస్తయ్ మెలె, అయ్లె కచితుమ్ జోవయింక గోల కెరుక తయెదె. అమ్క ‘మామ్ములుమ్ ఈంజయ్ లోకుమ్చ అసలె ఇండితతి’ మెన జేవ్ మాన్సుల్ అమ్క నింద కెర్తి, గెద.

3 జలె, అమ్ ఈంజయ్ లోకుమ్తె జలె కి, అమ్ కెర్తి యుద్దుమ్ ఈంజయ్ లోకుమ్చి రగుమ్చి యుద్దుమ్ నెంజె. ఆత్మయుద్దుమ్ ఈంజ.

4 పాపుమ్చి ఉప్పిరి యుద్దుమ్ కెర్లె అమ్చ అయ్దల్ ఈంజయ్ లోకుమ్చ నెంజితి. అమ్చయ్ అయ్దల్ దేముడుచి సెక్కిచ అయ్దల్, చి సయ్తాన్చి సెక్కి తిలిన్ ఎత్కిచి ఉప్పిరి; కేన్ ఒగ్గర్ సెక్కిచి జలెకి; ఈంజేవ్ అయ్దల్ జీనుల.

5 దేముడు దిల ఆత్మఅయ్దల్ తెన్ని జోవయించి ఉప్పిరి విరోదుమ్ జత కొడొచి ఉప్పిరి జిన్తనుమ్, జోవయింక మాన్సుల్ జాన్తిన్క పిట్టయ్తి బడాయ్ తిల కొడొ ఎత్కిచి ఉప్పిరి జిన్తనుమ్, చి మాన్సుచి మెన్ను తిలి ఎత్కి ఉచరన మార్పుప జా క్రీస్తుక బితి రితి, జోవయించ జేవ్ ఉచరన మార్పుప కెర్లెనుమ్.

6 అన్నె, దేముడుచి ఇస్తుమ్ రితి ఇండితి రితి తుమ్ కొరిందిల్ బుద్ది జలదు మెలె, అమ్ అయ్లె కో సేసిల మాన్సుల్ బుద్ది నే జా తిలె, జోవయించ తప్పుల్క ప్రబుచ అయ్దల్ తెన్ సిచ్చ కెరుక బిమ్ము నాయ్.

7 తుమ్చి మొక్కె తిలిన్కయ్ తుమ్ దెకితె తత్తను. ‘క్రీస్తుచ ఆము’ మెన తుమ్చితె కో ఉచరంతతి గే, జేవ్ కిసి క్రీస్తుచ జా అస్తి గే, అమ్క ‘జేవ్ కి క్రీస్తుచ’ మెనయ్ ఒప్పునతు.

8 తుమ్క పాడ్ కెరుక నాయ్ గని క్రీస్తుచి తెడి డిట్టుమ్ కెరుకయ్ మెనయ్ జోవయించి కామ్చి రిసా ప్రబు అంక అదికారుమ్ దా అన్నె, జా అదికారుమ్చి రిసా ఆవ్ ఏక్ వేల ఇదిల్ ఒగ్గర్ సంగిలె

కి, అంచి మరియు ద గెచ్చుక జో సెలవ్ దెయె నాయ్.

9 ఆరి బియడ్డి రిసా ఇన ఉత్తల్ రెగ్గి నాయ్. దస్సి ఉచర నాయ్.

10 “జోవయించ ఉత్తల్తె డిట్టుమ్ డీస్తయ్, గట్టిజ సంగితయ్, గని ఇన్నె తిలె పొది జో బియఁ కెర జా కిచ్చో గట్టిజ సంగె నాయ్” మెన అంచి ఉప్పిరి గోస జలస సంగితతి.

11 జలె, జేవ్ మాన్సుల్ కిచ్చో అర్దుమ్ కెరంతు మెలె, అమ్ నెంజిలె పొది ఉత్తుమ్తె కిచ్చో రెగుడుమ్దె గే, అయ్లె పొది కచితుమ్ జర్గు కెరుమ్దే.

12 జోవయించి సొంత గవురుమ్ సంగనీత జేవ్ సగుమ్జిన్క దెకిలె, ‘జోవయింతెన్ సమ్మందుమ్ జలస ఆము’ మెననుక నెసుమ్, జోవయింక దెక పరిచ్చ కెరనుక నెసుమ్. బెదె నాయ్. జేవ్ ఎక్కిలోక ఎక్కిలో దెక దస తీర్పుల్ కెరంతిసి వెల్లో మెనంతిసి సూటి నాయ్. దస్సి జా జా, బుద్ది నెంజిల రిత జతతి.

పావులీంసి సొంత గవురుమ్ సంగన్లి రితి జలిన్

13 సత్తిమ్ జతి కంట అన్నె గవురుమ్ సంగనుమ్ నాయ్. గని దేముడు అమ్క వంట దిలి ఎదిలి గవురుమ్ సంగనుమ్దె; సుబుమ్ కబుర్ తెన్ తుమ్చి ఎద అమ్ పావుక మెన జో అమ్క దా అస్సె. చి జాచి రిసా సంగనుమ్దె.

14 తుమ్తెయ్ గెత్తి రితి అమ్క దిలి సేవ పావెతి నాయ్ జలె, అమ్ తుమ్కయ్ కిచ్చో సంగుక బెదితి నాయ్. గని దూరి జలెకి, క్రీస్తుచి సుబుమ్ కబుర్ సూనయ్తి రిసాయి ఎత్తిచి కంట ఆమి తొలితో తుమ్తె అయ్లమ్.

15 సత్తిమ్చి కంట అన్నెయ్ గవురుమ్ సంగనుమ్ నాయ్. వేర మాన్సు సైమల్ సేడ కామ్ కెర్లినక ‘ఆమ్ కెర్లమ్’ మెనుమ్ నాయ్. గని అమ్చి ఆస కిచ్చో మెలె, తుమ్చి నముకుమ్ వడ్డిలె, తుమ్చి

ప్రాంతుమ్తె అన్నె ఒగ్గర్ గచ్చెలె ప్రబుచి కామ్ అమ్ కెర్లె వాల్ దొర్కు జయెదె,

16 చి తుమ్చి ఒత్తల్తోచ ప్రాంతుమ్లతె కి అమ్ సుబుమ్ కబుర్ సూనవుక జయెదె; వేర మాన్సుల్ కెర్లినక ‘ఆమ్ కెర్లమ్’ మెన నే సంగితె.

17 జలె,
*“కో కచి గవురుమ్ సంగుక జలె, ప్రబుచి గవురుమ్ సంగుతు”

మెన దేముడుచి కొడొతె రెగ్గ అస్సె, గెద.

18 కిచ్చోక మెలె, సొంత గవురుమ్ సంగన్లె కిచ్చో గవురుమ్ నెంజె, గని ప్రబు కక్కయ్ గవురుమ్ కెరెదె గే, జో మాన్సు నిజమి గవురుమ్ జయెదె.

11

తప్పచి బోద సూన మోసిమ్ జతు నాయ్

1 ఆవ్ అప్పె ఇదిల్ తెలివి నెంజల్ రితి లట్టల్లె, దయ కెర ఒర్పుప జా! అంచి రిసా కిసి జలెకి తుమ్ దస్సి కెర్తను.

2 తుమ్క ‘ప్రబుతె పూర్తి నిదానుమ్ జతు’ మెనయ్ అంక ఆస. ఎక్కి మున్సున్క నిదానుమ్ తిలి తేర్ని తుమ్ జతి రితి, పెండ్లిక క్రీస్తుక తుమ్క నావ్ కెర సార్ప దిలయ్.

3 గని పూర్గుమ్ అయి రూపుమ్ జా తిలో సయ్తాన్ జోచి మాయక కిసి *హవ్వక మోసిమ్ కెర్లొ గే, దస్సి తుమ్క ‘క్రీస్తుక ఎక్కి మెన్సు నిదానుమ్ తత్తు నాయ్’ మెన, తుమ్చి చెంగిల్ బుద్ది జో సయ్తాన్ మార్పుప కెరెదె మెన అమ్క బయిమ్.

4 ఆవ్ కిచ్చోక ఇసి ఉచర్లసి మెలె, కో జలెకు తుమ్తె జా కెర, యేసుచి రిసా అమ్ బోదన కెర్లెసి నాయ్, గని వేరచి సికడ్లె, తుమ్ బే బేగి జో మాన్సుక నంప కెర్తను. నెంజిలె, తుమ్క దిలి దేముడుచి సుద్ది తిలి ఆత్మ నాయ్ గని వేరయ్ ఆత్మ తుమ్క దొర్కు జలె, నెంజిలె తుమ్

* 10:17 10:17 యిర్మీయా 9:24.

* 11:3 11:3 ఆదికాండుమ్ 3:1-7.

నంపజలి సుబుమ్ కబుర్ నాయ్ గని వేరయ్ కోడు సూనై, తుమ్ జా వేరచిక నంపజా తుమ్ బే బేగి మార్పుప జతను.

5 వేర సికడ్డ 'ఒగ్గర్ వెల్లో బారికుల్' మెన తుమ్ సంగిత జేవ్ వేర మాన్సుల్చి కంట ఆవ్ ఎద్దికి దాక్ జయి నాయ్ మెన ఆవ్ జాని.

6 లట్టుబుక ఆవ్ తెలివి నెంజిలె కి, ప్రబుచి గ్యానుమ్ అంక అస్సె. కెయ్ క కి కిసి జలె కి ఈంజ గ్యానుమ్ తుమ్క సొస్తుమ్ జానవ అస్సి.

7 తుమ్క 'చెంగిల్ జతు' మెన, తుమ్తె కిచ్చో తోడు నే నజితె దాక్ కెరన్య దేముడుచ్చి సుబుమ్ కబుర్ ఆవ్ సికడ్డిసి పాపుమ్ గే?

8 వేర సంగుమ్లుచి డబ్బుల్ ఆవ్ నజన చోర్లి రితి జా అస్సి. ప్రబుచి నావ్ తెన్ తుమ్కయ్ సేవ కెర్తి అంచి అసచి రిసా జా డబ్బుల్ జోవయింతె నజిలయ్.

9 పడ్డె, తుమ్చి తెన్ ఆవ్ తిలి పొది అంక కొత్తు తిలె, తుమ్చితె కక్కయ్ కి జా జాడు వయడి నాయ్. మాసిదోనియ ప్రదేసిమ్ తెంతో అయిల బాపుడ్డు అంక కొత్తు తిలిసి ఎత్తి దిల. జాకయ్ తెదొడి తుమ్క జా జాడు వయడి నాయ్, చి అప్పె తెంతో కి కిచ్చో జాడు కి తుమ్క వయడుక నెసి.

10 క్రిస్తుచి సత్తిమ్ అంచి పెట్టి కిసి అస్సి గే, ఈంజ ఒండి అకయ్ ప్రదేసిమ్తె ఆవ్ డబ్బుల్ గట్ట నే నజితినచి రిసా కో వేరయ్ సంగుత్ నాయ్. జేవ్ వేర సంగుక వాట్ దెయి నాయ్. ఆవ్ అప్పెక కెర్తి రితి దస్సి కెర్తె తయిందె.

11 కిచ్చొక? తుమ్క ప్రేమ కెరి నాయ్ గే? తుమ్క ఆవ్ ప్రేమ కెర్తిసి 'నిజమి' మెన దేముడు జానె.

మోసిమ్ కెర్తె బారికుల్

12 'సుబుమ్ కబుర్ కామ్చి రిసా డబ్బుల్ నజనయ్ అమ్చి రితి జేవ్ కి కెర్తె' మెన, డబ్బుల్ ఆసక సుబుమ్ కబుర్ సూనయ్త జేవ్ అన్నె మాన్సుల్ అమ్చి రిసా సంగితతి. ఈంజ కామ్

జేవ్ కెరుక అదికారుమ్ నాయ్. పడ్డె, జోవయించి రితి అమ్ నే కెర్తెనక రుజ్జు తతి రితి, ఆవ్ అప్పె ఎద డబ్బుల్ గట్ట నే నజితె సుబుమ్ కబుర్ కామ్ ఆరి కెర్తె తయిందె.

13 దస మాన్సుల్ అబద్దుమ్కయ్ "ప్రబు అమ్క ఈంజ కామ్ తియార అస్సె. జోవ బారికుల్ ఆమ్" మెనన ఆరి సంగితతి. మోసిమ్ కెర్తస, జేవ్. ఆరిక క్రిస్తుచ బారికుల్ ఆమ్ మెనంతతి.

14 దస్సి కెర్తెతి మెన తుమ్ ఆచారిమ్ జంక నాయ్. సయ్తాన్ కి మోసిమ్ కెర్ పరలోకుమ్చి ఉజిడచో దూత రితో డీసుక జానె.

15 జాకయ్ జోచ సేవ కెర్తస కి 'పరలోకుమ్చి సత్తిమ్చ సేవ కెర్తస అమ్' మెన ఆరి సంగనుల ఆచారిమ్ నెంజె. గని జేవ్ కెర్ల కమె కొల్లి ఆకరిక సిచ్చయ్ జవుల.

16 జలె, అన్నెక్ సట్టు ఆవ్ సంగితసి. కిచ్చో మెలె, అంక వెర్లి మెన కో ఉచర నాయ్. గని 'వెర్లి' మెన ఉచర్లె, అంక బెదవన జా, చి అంక ఇదిల్ జవున్ గవురుమ్ తయెదె.

17 ఆవ్ అప్పె సంగితిసి ప్రబు సంగిలిసి మెన నెంజె, గని దయిరిమ్ తెన్ ఇసి గవురుమ్ సంగుక తెలివి నెంజిల్ రితో జతసి.

18 ఒగ్గర్జిన్ ఈంజ లోకుమ్చ కమెచి రిసా గవురుమ్ సంగనుల. ఆవ్ కి గవురుమ్ సంగనిందె.

19 తుమ్క బుద్ది అస్సెచి రిసా బుద్ది నెంజిలసక సర్ల తెన్ ఓర్పుప జతను!

20 మెలె, ఎక్కిలో తుమ్క దెర్పు సేడయ్లె, నెంజిలె మోసిమ్ కెర తుమ్చి అత్తి లాబుమ్ కెరన్లె, నెంజిలె బడాయ్ జా వెల్లో మెననై, నెంజిలె తుమ్క మొక్కె పెట్టె, తుమ్ ఓర్పుప జతను!

21 దస అల్లర్ కమె కెరుక ఆమ్ నెతిర్లమ్ మెన లాజ్ తెన్ ఆవ్ ఒప్పునుక, ఏక్! గని జోవయింతె కో కిచ్చొచి రిసా గవురుమ్ సంగనై; ఆవ్ అప్పె తెలివి

నెంజిల్ రితి లట్టబ్బసి; ఆవ్ కి దస్సిచి రిసా గవురుమ్ నజనుక దయిరిమ్ అస్సె. ఆవ్ తెలివి నెంజిల్ రితి కొడొ జతసి.

22 జేవ్ ఎబ్రీయుల్ జవుల గే? ఆవ్ కి ఎబ్రీయుడు! జేవ్ ఇస్రాయేలుల్ జవుల గే? ఆవ్ కి ఇస్రాయేలుడు. జేవ్ అబ్రాహామ్ చి సెకుమ్తె జెర్మిల గే? ఆవ్ కి జోచి సెకుమ్తె జెర్మిలయ్.

23 జేవ్ క్రీస్తుచ సేవ కెర్తన గే? జలె, జోవయించి కంట ఆవ్ చెంగిల్చి. ఆవ్ అప్పె వెర్రి రితి లట్టబ్బె తుమ్ చెమించుప కెర. జోవయించి కంట ఆవ్ కీసి చెంగిల్చి జోచో సేవ కెర్తసా జయిందె మెలె, జోచి సుబుమ్ కబుర్ నూనయ్తి రిసా జోవయించి కంట ఆవ్ అన్నె ఒగ్గర్ కామ్ కెర అస్సి, ఈంజ కామ్ చి రిసా అన్నె ఒగ్గర్ సుట్టు జేలి జా అస్సి, ఒగ్గర్ సుట్టు దెబ్బల్క సిచ్చ జా అస్సి, ఒగ్గర్ సుట్టు మొర్తి రితి జా తిలయ్.

24 యూదుల్చ వెల్లెల మాన్సుల్ పాచ్ సుట్టు కొర్త తెన్ ముప్పయ్నొప్పు దెబ్బల్చి సిచ్చ అంక పెట అస్సి.

25 తివ్వెరి డండల్ తెన్ అంక పెట అస్సి, ఏక్ సుట్టు పత్రల్ గల అంక మారిత, తివ్వెరి ఓడతె గెలి పొది ఓడ పత్రె లయితయిక్యం డుజ గెతయ్, ఏక్ సుట్టు ఒండి మెద్దెనె ఒండి సరారాతి సముద్దుమ్తె సేడ తిలయ్.

26 ఒగ్గర్ సుట్టు దూరి ప్రయాసుమ్ గెచ్చ అస్సి. దసితె గణ్డొ జీన్తి ప్రమాదుమ్, చోర్లుచి రిసాచి ప్రమాదుమ్, అంచి సొంత దేసిమ్చ మాన్సుల్చి రిసాచి ప్రమాదుమ్, యూదుల్ నెంజిలసచి అత్తి ప్రమాదుమ్ కి జా అస్సి. పట్నల్తె, బయిలు దేసిమ్లుతె, సముద్దుమ్తె కి ప్రమాదల్ జా అస్సి. మోసిమ్క 'సంపజలస ఆమ్' మెనన్లసచి అత్తి కి ప్రమాదల్ జా అస్సి.

27 ఒగ్గర్ కామ్ కెర కెర స్రెమల్ సేడ అస్సి. ఒగ్గర్ రాతివో నిజె నాయ్, ఒగ్గర్ సుట్టు చువ్వె తన్నె తా అస్సి, ఒగ్గర్ సుట్టు అంక అన్నిమ్ దొర్కు జయె నాయ్, ఒగ్గర్ సుట్టు చల్లిక, పాలల్ నెంజిలిన్క బాద సేడ అస్సి.

28 జేవ్ ఆవ్ సేడ్ల బాదల్ ఎత్కిక పిట్టవ అన్నె కిచ్చో మెలె, ప్రబుచ సంగుమ్లు ఎత్కిక 'చెంగిల్ తత్తు' మెనయ్ ఉచర్తె తతిసి అంక పెల్లితయ్, కామ్ రితి జతయ్.

29 కో డిట్టుమ్ నెంజిలె, ఆవ్ కి డిట్టుమ్ నెంజిలి రితి దుకుమ్ జతసి; జోవయించి జాడు వయిలి రితి. కో పాపుమ్తె దెర్ను సేడ్లె, అంక ఒగ్గర్ దుకుమ్ తయె నాయ్ గే? ఒగ్గర్ దుకుమ్ జతసి.

30 జలె, ఆవ్ గవురుమ్ నజనుక జలె, కిచ్చోచి రిసా గవురుమ్ సంగనిందె మెలె, ఆవ్ అప్పు తిలిసచి రిసాయి గవురుమ్ సంగనిందె.

31 ఆవ్ సంగిలిన్ ఎత్కిక 'అబద్దుమ్ నెంజె' మెన ప్రబు జలొ యేసుక అబ్బొన్ జలొ కెయ్క తెయ్క మెచుప జతోసా మెన దేముడు జానె.

32 పణ్డొ, అన్నె ఏక్ బాద ఆవ్ సేడ్డిన్చి రిసా గవురుమ్ నజనుక పచ్చ గెలయ్. కిచ్చోచి మెలె, దమస్కు పట్టుమ్తె అంక 'దెర్తు' మెన జా సుట్టు అరెత రానొచి తెడిచో అదికారి జా పట్టుమ్చ సయ్న్యుమ్ సుదల్క రకడ్లన్,

33 గని నంపజలస అంక గంపతె వెనడ పట్టుమ్చి కోటచి ఉప్పిర్చి గదితె వెగడ దా, కిట్కివాట్ వాలివో తెన్ కోటచి ఒత్తల్తె ఉత్తవ దిల, చి జో అదికారితె దెర్ను నే సేడ్లె ఉట్ట అయ్లయ్.

12

పవులు చి సిచ్చ

† 11:23 11:23 బారికుత్ 9:1-31, 11:24-30, చి 13 అద్యయిమ్ తెంతో 28 అద్యయిమ్ ఎద సదు కెర.

‡ 11:33 11:33 బారికుత్ 9:23-25.

1 జలె, ఆవ్ గవురుమ్ నజనుక అస్సె. గవురుమ్ సంగగ్నె అంక లాబుమ్ నాయ్, గని ప్రబు దెకయ్ల సివ్వులచి రిసా, జో దెకయ్ల రుజ్జుల్చి రిసా ఆవ్ సంగిందె.

2 క్రీస్తుచో మాన్సు ఎక్కిలోక జాని. అప్పె చొప్ట వెర్సుల్ జలి, ఈంజో మాన్సు పరలోకుమ్తె ప్రబు తిలిన్తె ఉక్కిల్ జలో. ఈంజో మాన్సు ఇన్నెచి ఆగ్ తెన్ని ఒత్త ఉక్కిల్ జలో గే ఎక్కి ఇన్నెచి ఆత్మయి ఉక్కిల్ జలి గే నేని, దేముడు జానె.

3 గని పరలోకుమ్చి ఒత్తచి పరదీసుతె నిజుమ్ ఉక్కిల్ జలో మెన జాని. ఇన్నెచి ఆగ్ తెన్ని ఒత్త ఉక్కిల్ జలో గే ఎక్కి ఇన్నెచి ఆత్మయి ఒత్త గెలి గే నేని, గని దేముడు జానె.

4 ఒత్త కిచ్చో సూల్లో గే కేన్ మాన్సుకి అన్నె సంగుక నెత్తె, సంగుక నెంజె.

5 ఈంజో మాన్సుచి రిసా ఆవ్ గవురుమ్ సంగిందె, గని అంచి నావ్ తెన్, జలె, ఎక్కి ఆవ్ అప్పు తిలిన్చి రిసాయి సంగనిందె. గని వేరచి రిసా, జలె, గవురుమ్ సంగి నాయ్.

6 ఆవ్ గవురుమ్ నజనుక ఉచర్లె, అంక వెర్రి మెనుక, బుద్ది నెంజిలోసా మెనుక నెంజె. కిచ్చోక మెలె, ఆవ్ సంగితిసి సత్తిమ్ గని అంచితె దెకితి కంట సూన్తి కంట కో అంక అన్నె గవురుమ్ ఉచరుక అంక ఆస నాయ్ చి రిసా తుక్లె తయిందె.

7 పడ్డో, ప్రబు అంక ఒగ్గర్ రుజ్జుల్ దెకయ్లిన్చి రిసా ఆవ్ నే పులితి రితి, అంక ఏక్ బాద తంక జో నెలవ్ దా అస్సె. కిచ్చో మెలె, సయ్తాన్ అంక అల్లర్ కెర్రి రితి అంచి అగి కంటో బూస్తి రితి ఏక్ బాద దా అస్సె; అంక 'పులుస్ నాయ్' మెన.

8 జలె, 'ఈంజ బాద అంక ములుస్' మెన, తివ్వెరి ప్రబుక బతిమాల్పా జా ప్రార్దన కెర్లయ్,

9 గని జో అంక, "అంచి దయ తుక సరిపుచుప జయెదె. తుయి అప్పు తిలె, తుచి అత్తి ఆవ్ కెర్రిన్తె అంచి సెక్కి

పూర్తి డీసెదె" మెనయ్, ప్రబు సంగిలన్. జాకయ్ ఆవ్ అప్పు తిలిసి అన్నె సర్ల తెన్ ఒప్పునిందె, చి క్రీస్తుచి సెక్కి అంచితె కామ్ కెరెదె.

10 జాకయ్, క్రీస్తు గవురుమ్ జతి రిసా ఆవ్ అప్పు తిలె, మాన్సుల్ అంక నిస్కారుమ్ కెర్లె, ఆవ్ సైమల్ సేడ్లె, విరోదుమ్ సుదల్ అంక అల్లర్ కెర్లె. ఆవ్ కస్టల్ సేడ్లె, అంక సర్ల. కిచ్చోక మెలె, ఆవ్ అప్పు తిలె పొది, ఆవ్ అప్పు తిలిన్తె ప్రబుచి సెక్కి బార్ జా జోచి గవురుమ్ దెకయ్తయ్.

సత్తిమ్ నెంజిల 'బారికుల్'

11 ఆవ్ ఈంజ ఎత్తి, సంగిలిసి తెలిచి నెంజిల్ రితి, గని ఆవ్ సంగిత్ రితి తుమి వెలయ్లదు. తుమి అంచి రిసా 'సత్తిమ్చో' మెన సాచి సంగితదు జలె, జతి. కిచ్చోక మెలె, జేవ్ వేరయ్ మాన్సుల్; 'ఒగ్గర్ వెల్లో బారికుల్' మెన తూమ్ సంగితన; కిచ్చో నెంజిలె కి ఆవ్ జోవయిం చి కంట ఇద్దికి దాక్ నెంజి.

12 క్రీస్తుక సత్తిమ్చో బారికి ఆవ్ జలిన్క రుజ్జుల్ దెకయ్త కమె తుమ్చి మొక్క జర్గు జల. మెలె, ఒగ్గర్ బాదల్ సేంతుమ్ తెన్ ఓర్పుప జలయ్, చి ప్రబు జోవయిం చి సెక్కిచ రుజ్జుల్ దెకయ్లో, ఈంజ లోకుమ్తె నెంజిల కమె దెకయ్లో, వెల్లెల వెల్లెల కమె జర్గు కెర్లె.

13 జలె, ప్రబుచ అన్నె సంగుమ్లుచి కంట తుమ్క కిచ్చో పిట్టి? ఎక్కి పిట్టి మెలె, ఆవ్ జతి డబ్బుల్ తుమ్తె నజీ నాయ్. ఈంజ తప్పు అంక చెమించుప కెర, 'తప్పు' మెంతను జలె!

అమ్తె లాబుమ్ కెరన్లది, అమ్క మోసిమ్ కెర్లది

14 ఈంధె, అన్నెక్ సుట్టు తుమ్తె జెంక తెయార్ జా అస్సి. ఇన్నెతెన్ ఆవ్ అయ్లిసి తివ్వెరి జయెదె. అయ్లె, తుమ్క కిచ్చో జాడు వయడి నాయ్.

కిచ్చొక మెలె, తుమ్చి ఆస్తి ఆవ్ నెసి, గని తుమ్చి ప్రేమకయ్ అంచి ఆస. * అయ్యన్క అబ్బొన్క పోస్తి రితి బోదలి కుడవ్క కెరనుక వూచి నాయ్, గని జోవయించ బోదల్క పోస్తి రిసా అయ్యసి అబ్బొన్ కుడవ్క కెర అస్సె.

15 తుమ్చ ఆత్మల్క 'చెంగిల్ జతు' మెన ఆవ్ నర్ల తెన్ నస్తుమ్ జయిందె, అంచి జీవు దెయిందె. ఆవ్ తుమ్క ఒగ్గర్ ప్రేమ కెర్లె, తుమి అంక తొక్కి ప్రేమ కెర్లె చెంగిల్ గే? తుమ్ ఉచర.

16 నాయ్, ఆవ్ జితిన్చి జాడు తుమ్క వయడి నాయ్, గని 'జో మోసిమ్చొ, తెలివి తెన్ అమ్క మోసిమ్ కెర్లొ' మెన తుమ్ అంక సంగితను.

17 జలె, తుమ్తె ఆవ్ తెద్రయ్లన చి అత్తి తుమ్తె కెయ్ కిచ్చొ లాబుమ్ కెరన్లయ్ గే? నాయ్, గెద.

18 'గో' మెన తీతుక బలవంతుమ్ కెర్లయ్, చి జో తెన్ జో అన్నెక్ బావొక తెద్రయ్లయ్. తీతు జవున్ తుమ్క మోసిమ్ కెర్లొ గే? నాయ్, గెద. ఆమ్ కి జోచి బుద్ది తెన్ ఇండుమ్ నాయ్ గే? ఆమ్ కి జోచి రితి జిము నాయ్ గే?

తుమ్తె జెతి పొదిక తుమ్ సత్తిమ్ జా త్తా

19 అమ్చి సత్తిమ్ సంగితిన్క 'ఎక్కి జోవయించి సొంత నావ్ తతి రిసాయి అమ్చి మొక్కె సంగితతి' మెన ఉచర్లె తిలదు గే? నాయ్, అమ్చి ఉద్దెసుమ్ దస్సి నాయ్. క్రీస్తుచి తెడి దేముడుచి మొక్కె సంగిలమ్, సంగితనుమ్.

20 కిచ్చొక మెలె, ఆవ్ తుమ్తె తిలె, తుమ్ వేర మార్పుప జా తస్తె మెన, పడ్డొ తుమ్ అంకయ్ దెకిలె, 'జో దస్సి అస్సె, చి అమ్క ఇస్తుమ్ నాయ్' మెన తుమ్ సంగితె మెనయ్ అంక బయిమ్. అన్నె కిచ్చొ మెలె, తుమ్ జట్లు తెన్, గోసల్ తెన్, కోపల్ తెన్, 'అన్నె మాన్సుల్ కిన్

జలె జతు గని అమ్మి చెంగిల్ కెరనుమ్' మెలి రితి బుద్ది తెన్ ఏక్ వేల తస్తె. ఎక్కిలోచి రిసా ఎక్కిలో ఆరిచ నిందల్, సొండెల్ కొడొ సంగితె తస్తె, పుల తస్తె, ముద్దొ నెంతె తస్తె మెన ఆవ్ బితసి.

21 అన్నె కిచ్చొచి రిసా ఆవ్ బితసి మెలె, ఆవ్ తుమ్తె అన్నె అయ్లె, తుమ్చి రిసా దేముడుచి మొక్కె లాజ్ జయిందె, చి తుమ్చి తెచ పాపుమ్ కెర అప్పెక పాపుమ్ నే ఒప్పున్లనచి రిసా ఆవ్ ఏడుక తయెదె. కేన్ పాప్లల్ మెలె, లంజెబుద్ది, లంజెకమొ, ఆగ్చవ ఆసల్ ముద్దొ నే కెరంతిసి, దనచ జేవ్ ఇండితిసి.

13

ప్రబుచి సెక్తి తెన్ తీర్పు కెరుక తయెదె

1 ఆవ్ తుమ్తె అన్నె అయ్లె ఇన్నెతెన్ తివ్వెరి జయెదె. అయ్లె, కక్క తీర్పు కెరుక జలె, దొగుల తీర్ల సాచుల్చి సాచి బెద, రుజ్జు జంక.

2 అగ్గె పాపుమ్ కెర్లనక చి జేవ్ అన్నె ఎత్తిజిన్క అగ్గె జాగర్త సంగిలయ్; సిచ్చ కెరుక జయెదె, మెన. ఆవ్ అప్పె ఒత్త నెంజిలె కి, జా సుట్టు ఆవ్ ఒత్త గెచ్చ తిలి పొది; తెదొడి ఆవ్ తివ్వెరి తుమ్తె జా తిలయ్, గెద. జలె, తెదొడి సంగిలి రితి, అప్పె కి కిచ్చొ సంగితసి మెలె, ఆవ్ అయ్లె పొది జేవ్ చెంగిల్ నే జా తిలె, కచితుమ్ తీర్పు కెర సిచ్చ దెయిందె.

3 "తుయి సంగితిన్క 'క్రీస్తు సంగిలిసి' మెన అమ్ చినితి రిసా రుజ్జు దెకవు" మెన అంక తుమ్ కొంకడ్లను. ఆవ్ అయ్లె, రుజ్జు దెకితె. తుమ్చి రిసా క్రీస్తు అప్పు జయె నాయ్. తుమ్తె జోచి సెక్తి దెకయ్తయ్!

4 నిజుమి, జో మాన్సు జెర్మన్ జలిన్క అప్పు తతికయ్, సిలువతె జోక మార్ల, గని దేముడుచి సెక్తిక జో జీవ్ జా ఉట్ట

* 12:14 12:14 పవులు జేవ్ కొరిందల్క అయ్యన్ అబ్బొన్ రితి జయెదె, గెద. జొయ్యి జోవయింక తొలితొ సుబుమ్ కబుర్ సూనయ్లో, గెద.

జితయ్. అన్నె, జో తెన్ ఆమ్ కి అప్పు, అస్సుమ్, గని తుమ్క 'చెంగిల్ జతు' మెనయ్ అమ్ తుమ్క బుద్ది సంగుక సిచ్చ కెరుక మెలె, యేసుక జియడ్లో దేముడుచి సెక్కికయ్ జర్గు కెరుమ్దే. క్రీస్తు తెన్ జయి సెక్కిక జతసుమ్.

5 తుమ్, తుచి నముకుమ్తె నిదానుమ్ జా అస్సున్ గే నాయ్ గే, తుమ్క తుమి పరిచ్చ కెరన. రుజుల్ దెకన. యేసుక్రీస్తు తుమ్చి పెట్టి అస్సె మెన తుమ్క తుమి నేన్గు గె? గని ఏక్ వేల జో తుమ్చి పెట్టి నాయ్ జలె, చి పరిచ్చతె తుమ్ ఓడుప జా అస్సున్.

6 జా పరిచ్చతె ఆమ్, జలె, ఓడుప నే జలిసి తుమ్క రుజు డీసున్ మెన అంచి ఆస.

7 అమ్చి సత్తిమ్ రుజు జతి రిసా నాయ్, గని ఆమ్ ఓడుప జలి రితి డీసిలెకి నే డీసిలెకి, 'చెంగిల్ తిలిన్ కెర్తు' మెన, 'పాపుమ్ కెర్తు నాయ్' మెన, తుమ్చి రిసా దేముడుక అమ్ ప్రార్దన కెర్తునుమ్.

8 సత్తిమ్ పిట్టవుక నెత్తుమ్, సత్తిమ్ పిట్టవుక అమ్క ఇస్టుమ్ నాయ్. సత్తిమ్ కెర్తి రిసాయి అమ్చి ఆస.

9 అమ్ అప్పు తిలె, తూమ్ డిట్టుమ్ తిలె, అమ్క సర్ద. అమ్ కిచ్చోచి రిసా ప్రార్దన కెర్తునుమ్ మెలె, తుమ్క 'అప్పెచి కంట ఆత్మక అన్నె చెంగిల్ జతు' మెనయ్ ప్రార్దన కెర్తునుమ్.

10 తుమ్క ఆవ్ దూరి తిలి ఫొది ఆవ్ కిచ్చోక ఇసి రెగిడ్డిసి మెలె, ఆవ్ అయ్లె పొదిక ప్రబు దిలి అంచి అదికారుమ్క తుమ్క సిచ్చ కెరుక నెంజిలె, అంక సర్దయ్ తయెదె. జా అదికారుమ్ ముక్కిమ్క అంక కిచ్చోక ప్రబు దా అస్సె మెలె, సంపజలసక పాడ్ కెరుక నాయ్, గని జోవయించి ఆత్మక డిట్టుమ్ కెరుకయ్ దా అస్సె.

11 జలె, బావుడ్లు, తుమ్ చెంగిల్ తా, పూర్తి బుద్ది తెన్ ఇండుక ఆస జా మార్పుప కెరన మెన ఆవ్ బతిమాల్లు జా సంగిలిసి దెరన, ఎక్కిలో తెన్ ఎక్కిలో ప్రేమ తెన్ తా. సేంతుమ్ తెన్ బెద కట్టు తెన్ జియ, చి ప్రేమ తిలో సేంతుమ్ తిలో దేముడు తుమ్చి తెన్ తయెదె.

12 ఎక్కిలోక ఎక్కిలో తుమ్చి ప్రేమ దెకయ్తి రితి ప్రబుచి నావ్ తెన్ సుద్ది తిలి ముద్దు తెన్ జోకర.

13 ఇన్నెచ సంపజల బావుడ్లు ఎత్కిజిన్ తుమ్క జోవయించి ప్రేమ సంగ తెద్రయ్తతి.

14 ప్రబు జలో యేసుక్రీస్తుచి దయ, దేముడుచి ప్రేమ, అన్నె జోచి సుద్ది తిలి ఆత్మ దెతి కట్టు తుమ్ ఎత్కిజిన్చి పెట్టి తవున్, తుమ్చి నెడిమి తవున్.

గలతీయుల్క రెగిడ్లి ఉత్త్రుమ్ బారిక్ జలో పవులు గలతీయు పట్టుమ్చ సంగుమ్చక రెగిడ్లి ఉత్త్రుమ్

మొదొల్ కోడు
1-2 కేన్ మాన్సు నిసాన తెద్రయలిసి నెంజె, కేన్ మాన్సు తెంతో జలిసి నెంజె, యేసుక్రీస్తు, జోక అన్నె జియడ్లొ దేముడు అబ్బొసి తెన్ని, సొంత అంక నిసాన 'అమ్చొ బారికి' మెన యేసుక్రీస్తుచి సుబుమ్ కబుర్ కామ్ కెర్తి రిసొ జో దిలి అదికారుమ్ తెన్ బులితో జోక్ బారికి జలో పవులు, చి అంచి తెన్ తిల బావుడ్లు, గలతీయ ప్రదేసిమ్చ సంగుమ్చక రెగిడ్లి ఉత్త్రుమ్.

3 దేముడు అబ్బొన్చి అమ్చొ ప్రబు జలో యేసుక్రీస్తుచి దయ సేంతుమ్ తుమ్చి ఉప్పిరి తవున్!

4 అమ్చ పావల్ వయన గెచ్చయ్తి రిసొ, ఈంజ పాపుమ్చి ఉగుమ్చి నయతాన్చి తెంతో అమ్క ములవుక మెన మెనయ్, అమ్చొ అబ్బొ జలో దేముడుచి ఇస్టుమ్క, జో క్రీస్తు జోచి సొంత జీవు దా మొర గెలన్.

5 జా కామ్చి రిసొ కెయ్క తెయ్క దేముడు అమ్చొ అబ్బొక జోబర!

* ఆమేన్.

నత్తిమ్ బోద సంగితిన్చి రిసొచి కోడు

6 'అంచ మాన్సుల్ జతు' మెన క్రీస్తు కెర్తి దయ వాట్ తుమ్క బుకార్లొ దేముడుక తుమ్ గడియ నంపజలిన్

* 1:5 1:5 తెద్ది మెన ఆమేన్ † 1:7 1:7 బారికుల్ 15:1, 5, 24 'అమ్చొ మోసి పూర్ణుమ్చొచి రితి కెర యూదుల్ జతి గుర్తుచి సున్నతి కెరన్లెకయ్ పరలోకుమ్తె గెతి రచ్చన తుమ్క దొర్కు జయదె' మెన సిరియ ప్రదేసిమ్చి అంతియొకయ్తె కీసి సికడ తిల గే గలతీయుల్క కి మాన్సుల్ దస్సి సికడ తిల. ‡ 1:10 1:10 నెంజెలి 'గొతిమాన్సు రితో' నెంజెలి 'గొతి జలి రితి'. § 1:13 1:13 బారికుల్ 9:1-2.

తెంతో, తెద్ది బే బేగి ముల 'సుబుమ్ కబుర్' మెన వేర మాన్సుల్ సికడ్లిసి తుమ్ సూన్తనుచి రిసొ అంక ఆఛారిమ్!

7 జా వేర కోడుక 'సుబుమ్ కబుర్' మెనుక నెంజె, గని సగుమ్జిన్ క్రీస్తుచి రిసొచి సుబుమ్ కబుర్ † మార్పుప కెరుక ఇస్టుమ్ జా, తుమ్క సిక్కు కెర్తతి.

8 జలె, ఆమ్ కి, పరలోకుమ్చొ కేన్ జవున్ దూత కి, ఆమ్ సూనయ్లి కంట వేరచి 'సుబుమ్ కబుర్' కో సికడ్లె, జోచి సిచ్చ వయన నాసినుమ్తె గెతు.

9 అమ్ అగ్గె సంగిల్ రితి, అప్పె ఆవ్ అన్నె దస్సి సంగితసి. తుమ్ తెదొడ్లి నంపజలి చి కంట 'సుబుమ్ కబుర్' మెన కో తుమ్క కిచ్చొ వేరచి సికడ్లె, దేముడు దెతి జోచి సిచ్చ వయన నాసినుమ్తె గెతు!

సుబుమ్ కబుర్ క్రీస్తుతెయ్ సికిలిసి

10 జలె, 'వేరచి పొన. ఆవ్ సికడ్లిసి దె' మెన, మాన్సుతె జవున్, దేముడుతె జవున్ గవురుమ్ ఆనన్తి రిసొయి ఆవ్ సంగితసి గే? మాన్సుల్క మెన్చ వడంతి రిసొ ఇసి జతసి గే? నాయ్, మాన్సుల్క మెన్చ వడనుక అప్పెక అంక ఆస తత్తి జలె, క్రీస్తుక ‡ గొత్తి సుదొ రితో జతయ్ నాయ్.

11 ముక్కిమ్క తుమ్ కిచ్చొ జానుక అస్సె మెలె, అంచి అత్తి సికడ్లి సుబుమ్ కబుర్ మాన్సు అచ్చొ ఉచర్లిసి నెంజె.

12 'అమ్క దిలిసి' మెన కేన్ మాన్సు సంగిలి బోదన సూన్లి వాట్ నాయ్, కేన్ మాన్సు అంక సికడ్లి వాట్ నాయ్, గని సుబుమ్ కబుర్ అంక కేన్ వాట్ అయ్లి మెలె, యేసుక్రీస్తు సొంతయ్ అంక డీన దెకయ్లన్.

13 అమ్చ యూదుల్చి రితి ఆవ్ అగ్గె కెర్తె తిలిసి, సంగుమ్లు ఎత్తిక ఆవ్ అగ్గె

సిగట్టిజ సిచ్చల్ కెరై తిలిసి నూన అస్సున్. దేముడుచ జేవ్ సంగుమ్లు మొత్తుమ్క పూర్తి పాడ్ కెరుక ఆవ్ ఉచరై తిలయ్.

14 అన్నె, అమ్చ పూర్గుమ్చ దిలి రితి నెరవెర్పువ కెరుకయ్ మెన అంక ఒగ్గర్ ఒగ్గర్ ఆస తిలి, చి అమ్ యూదుల్చి గ్యానుమ్ అమ్ యూదుల్చ అలవాట్క దెకిలె, అమ్చ ప్రెజల్తెచ అంచి జతచ ఉబెడల్తె అవ్వె ఒగ్గర్ సిక తిలయ్.

15 గని కిచ్చొ జలి మెలె, ఆవ్ నే జెర్మితె అగ్గె తెంతో అంక నిసాన్లొ జోచి దయక అంక బుకార్లొ దేముడు

16 అంక జోచొ దేముడు పుత్తున్క *డిసయ్లన్; యూదుల్ నెంజిలసతె ఆవ్ గెచ్చ జో యేసుచి రిసా నూనయ్తి రిసాయి మెన, జో అంక బుకార్తికయ్, మాన్సుక పుసి నాయ్.

17 అన్నె, అంచి కంట అగ్గె యేసు ప్రబుచ బారికుల్ జలసక పుసుక మెన యెరూసలేమ్తె గెచ్చి నాయ్, గని అరేబియ దేసిమ్చి బయిలు దేసిమి †ఉట్ట గెలయ్, చి ‡పడ్డొ దమస్కు పట్టుమ్తె అన్నె ఉట్ట అయిలయ్.

యెరూసలేమ్తె పవులు గెచ్చ తిలిన్

18 ఒత్త తెంతో, అగ్గె నాయ్, గని తిన్ని వెర్పుల్ గెతికయ్, ప్రబుక బారికి జలో కీపేతురు తెన్ దస్సుల్ జంక మెన, *యెరూసలేమ్తె గెలయ్, చి జో తెన్ పనర పొదుల్ తిలయ్.

19 గని ఒత్త తిలి పొది ప్రబుక బావొన్ జలో యాకోబుక దెకిలయ్, గని ప్రబుచ అన్నె బారికుల్ తెన్ తెదొడి దస్సుల్ జయ్యి నాయ్.

* **1:16 1:16** దమస్కు పట్టుమ్తె పవులు గెతె తిలి వట్టె డిసయ్లన్. బారికుల్ 9:3-9. † **1:17 1:17** ఏక వేల ప్రార్దన కెరుక చి జో మార్పువ జలిసిచి రిసా చెంగిల్ ఉచరుక మెన ఒత్త గెలన్. 'బారికుల్' పుస్తకుమ్తె జో ఒత్త గెలిసిచి రిసా సంగె నాయ్. ‡ **1:17 1:17** బారికుల్ 9:22, 23 మొదొల్. § **1:18 1:18** నెంజిలె 'కేపా' మెన, పేతురుక అరమయ్ బాస తెన్ సంగుల. ఈంజ ఉత్తుమ్ రెగిడ్ల తొలితొవ పుస్తకుమ్ సగుమ్తె 'కేపా' మెన రెగ్ల అస్సి. * **1:18 1:18** బారికుల్ 9:26-29. † **1:21 1:21** జో జెర్మిలి పట్టుమ్ తార్పు కిలికియ ప్రదేసిమి తిలి. తార్పుతె గెలిన్క బారికుల్ 9:30 దెక. జా ప్రాంతుమ్ జేవ్ అన్నె బారికుల్ తిలి యెరూసలేమ్క ఒగ్గర్ దూరి తయెది. ‡ **1:22 1:22** యెరూసలేమ్ యూదయ ప్రదేసిమ్తె అస్సె. * **2:1 2:1** బారికుల్ 15:1-4. † **2:2 2:2** బారికుల్ 15:4, 12. ముక్కిమ్క పేతురుచి మొక్కి చి యాకోబుచి మొక్కి సంగిలన్. బారికుల్ 15:7, 13.

20 ఈంజేవ్ ఆవ్ రెగిడ్ల కొడొక 'కిచ్చొ అబద్దుమ్ నెంజితి' మెన, దేముడు సాచి జతయ్.

21 ఒత్త తెంతో కేనె గెలయ్ మెలె, సిరియ చి †కిలికియ ప్రాంతుమ్లుతె గెలయ్.

22 తెదొడి ఎద కి యెరూసలేమ్తె నాయ్, గని ‡యూదయ ప్రదేసిమ్తెచ అన్నె సంగుమ్లుచ నంపజలన్క అంక దెకిలె, అంక 'జొయ్యి' మెన నేన్తి.

23 తెదొడి ఎద అంక జేవ్ దెకుక నేతయ్, గని అమ్క అగ్గె అల్లర్ కెరై తిలొసా జో. అగ్గె పాడ్ కెరుక జో ఆస తిలి ప్రబుచి ఉప్పిర్చి నముకుమ్ జొయ్యి ఆజి బోదన కెర్తయ్' మెన అంచి రిసా నూన్ల,

24 అన్నె, అంచి రిసా దేముడుక గవురుమ్ సంగితె తిల.

2

యూదుల్ జతి గుర్తుచి తగు

1 ఒత్త తెంతో అన్నెక్ చొద్ద వెర్పుల్ గెతికయ్, ఆవ్ తీతుక కడన బర్నబా తెన్ *యెరూసలేమ్తె అన్నె గెలమ్.

2 'గో' మెన ప్రబుయి అంక జోచి ఇష్టుమ్ దెకయ్తికయ్ గెలయ్, చి 'నుబుమ్ కబుర్' మెన యూదుల్ నెంజిలసతె ఆవ్ కిచ్చొ ఎత్తి బోదన కెరై తత్తసి గే, యెరూసలేమ్తెచ సగుమ్జిన్ వెల్లొ మాన్సుల్చి మొక్కి †సాచి సంగిలయ్. కచి కచి మొక్కి మెలె, 'సత్తిమ్చ' మెన తుమ్ నంపజలస జాన్తనచి మొక్కి. కిచ్చొక జోవయించి మొక్కి సంగిలయ్ మెలె, ఆవ్ నూనయ్తి

† **1:17 1:17** బారికుల్ 9:3-9. † **1:17 1:17** బారికుల్ 9:22, 23 మొదొల్. § **1:18 1:18** నెంజిలె 'కేపా' మెన, పేతురుక అరమయ్ బాస తెన్ సంగుల. ఈంజ ఉత్తుమ్ రెగిడ్ల తొలితొవ పుస్తకుమ్ సగుమ్తె 'కేపా' మెన రెగ్ల అస్సి. * **1:18 1:18** బారికుల్ 9:26-29. † **1:21 1:21** జో జెర్మిలి పట్టుమ్ తార్పు కిలికియ ప్రదేసిమి తిలి. తార్పుతె గెలిన్క బారికుల్ 9:30 దెక. జా ప్రాంతుమ్ జేవ్ అన్నె బారికుల్ తిలి యెరూసలేమ్క ఒగ్గర్ దూరి తయెది. ‡ **1:22 1:22** యెరూసలేమ్ యూదయ ప్రదేసిమ్తె అస్సె. * **2:1 2:1** బారికుల్ 15:1-4. † **2:2 2:2** బారికుల్ 15:4, 12. ముక్కిమ్క పేతురుచి మొక్కి చి యాకోబుచి మొక్కి సంగిలన్. బారికుల్ 15:7, 13.

సుబుమ్ కబుర్ క 'తప్పు నెంజె' మెన జేవ్ రుజ్జు సంగుత్ మెన. నెంజెలె, జేవ్ రుజ్జు నే సంగిలె, సగుమ్ జిన్ ఏక్ వేల అన్మానుమ్ తెన్ తత్త, చి అంచి కామ్ పాడ్ కెరుక ఉచర్త.

3 జలె, అంచి తెన్ తీతు ఒత్త తిలో. గని, జో గ్రీసు దేసీమ్ చో జలెకి, యూదుడు జతి గుర్తుచి సున్నతి జో కెరనుక మెన జేవ్ సత్తిమ్ చ వెల్లెల మాన్సుల్ బలవంతుమ్ కెర్తి నాయ్.

4 సత్తిమ్ నెంజెల నంపజలసక మాత్తుమ్, కో గే లుంకచోరు ఒత్త కడ ఆన తిల. జేవ్ కిచ్చొక ఒత్త వెసిల మెలె, అమ్ చ యూదుల్ చ వూర్గుల్ చ ఆగ్గుల్ చి జా సున్నతి కెరంతి జాడు అమ్ నంపజలస నే వయితిసి దెకిలె, జేవ్ †జాడ్లు అమ్ వయితి రితి అమ్ క సికడుక మెన ఉచర తిల. జెవ్వి అమ్ క అల్లర్ కెర్త.

5 గని, దేముడుచి దయచి రిసాచి క్రీస్తుచి తెడిచి రచ్చనచి రిసాచి సుబుమ్ కబుర్ తె కిచ్చొ కారిమ్ లు, యూదుల్ చ ఆగ్గుల్ చి నే బెదయ్ తె తుమ్ క దస్సె దొర్కు జస్తి తవున్ మెనయ్, ఎక్కి నిమ్ముమ్ కి జేవ్ సంగిలి కోడుక బియఁ, అమ్ సంగిలి సుబుమ్ కబుర్ మార్పుచ కెరుమ్ నాయ్.

6 పడ్డొ 'వెల్లెల మాన్సుల్' మెన ఎత్కిజిన్ సంగితన కి ఆవ్ సంగితి సుబుమ్ కబుర్ తె కిచ్చొ వేరచి బెదయ్ తి నాయ్. జేవ్ వెల్లెల మాన్సుల్ జలెకి నెంజెలె కి అంక తేడ నాయ్; దేముడు తేడల్ దెక నాయ్. జేవ్ వెల్లెల మాన్సుల్ మెలసతె కిచ్చొ నోవిచి సిక్కి నాయ్.

7 † యూదుల్ తె జో గెచ్చుక సుబుమ్ కబుర్ సాట్ట కెరుక మెన ప్రబు పేతురుక కిసి అదికారుమ్ దా అస్సి గే, దస్సి, * యూదుల్ నెంజెలసతె ఆవ్ గెచ్చుక మెనయ్, ప్రబు తెద్రవ అస్సి మెన జేవ్ యెరుసలేమ్ తెచ వెల్లెల మాన్సుల్ దెక బప్పన్.

8 † యూదుల్ జలసతె పేతురుక తెద్రవ జోచి అత్తి కామ్ కెర్తొ ప్రబు, అంచి అత్తి యూదుల్ నెంజెలసతె కామ్ కెర్తయ్.

9 జలె, జోచొ బారికి జతి ప్రబు అంక దిలి వరుమ్ జేవ్ వెల్లెల మాన్సుల్ చిన కెర, యూదుల్ చ నంపజలసక ముక్కిమ్ జలో యాకోబు, † పేతురు అన్నె యోహాను కిచ్చొ కెర్ల మెలె, † బర్నబాక చి అంక ప్రేమ తెన్ ఆతు దెర జోకర, యూదుల్ నెంజెలసతె అమ్ గెచ్చుక మెన, * యూదుల్ తె జేవ్ గెచ్చుక మెన, బప్పన్.

10 అమ్ క ఎక్కి కామ్ చి రిసా బలవంతుమ్ కెర్త. కిచ్చొ మెలె, యూదుల్ తెచ బీద్ర జల నంపజలసక ఆము చి యూదుల్ నెంజెల నంపజలసక నే వచ్చితె తోడు దెంక. జా కోడు, సర్ల తెన్ బప్పన్లయ్, దస్సి కెర్తనుమ్.

పేతురు తెన్ తేడల్ దెకిలిన్
11 గని † పేతురు జా సుట్టు అంతియొకయతె ఉట్ట అయ్ లి పొది, జోక అడ్డు నెంతె ఎదార్దుమ్ తీర్పు సంగిలయ్. కిచ్చొక మెలె, జో పొరపాట్ జా తిలన్.

12 కిసి మెలె, 'సున్నతి కెరనుక ముక్కిమ్' మెంతస నగుమ్ జిన్ యాకోబు తెంతో నే ఉట్ట జెతె అగ్గె, యూదుల్ నెంజెలసతె జో పేతురు

‡ 2:4 2:4 యూదుల్ జతి గుర్తుచి సున్నతిచి రిసాచి కోడు. బారికుల్ 15:1, 5 దెక. జా సున్నతి కెరన్లె, యూదుల్ చ ఆగ్గుల్ ఎత్కి కి జేవ్ నిదానుమ్ కెరుక మెన బలవంతుమ్ కెరుక ఉచరల. § 2:7 2:7 నెంజెలె,

'యూదుల్ జతి గుర్తుచి సున్నతి కెరన్లె సతె'. * 2:7 2:7 'యూదుల్ జతి గుర్తుచి సున్నతి నే కెరన్లె సతె'.

† 2:8 2:8 నెంజెలె, 'యూదుల్ జతి గుర్తుచి సున్నతి కెరన్లె సతె'. ‡ 2:9 2:9 నగుమ్ తె 'కేపా' మెన అరమయ్

బాన తెన్ వి జోవయిచి నావ్ రెగ్ల అస్తి. § 2:9 2:9 బారికుల్ 15:22-35. * 2:9 2:9 నెంజెలె 'యూదుల్

జతి గుర్తుచి సున్నతి కెరన్లె సతె'. † 2:11 2:11 నగుమ్ తె పేతురుక 'కేపా' మెన జోవయిచి అన్నెక్ నావ్ రెగ్ల అస్తి.

కంక అలవాట్ల జా తిలన. గని జేవ్ జెతికయ్, యూదుల్ జతి గుర్తుచి సున్నతి కెరనైకయ్ రచ్చించుప జంక జయెదె' మెంతి కోడు బియఁ కెర, గుంచ యూదుల్ నెంజిలనతె కంక ములిలన్.

13 ఒత్తచ యూదుల్ జల నంపజల ఎత్కిజిన్ కి జో తెన్ దస్సి గుంచ దొన్ని మెన్సుల్ ఇండిల, చి బర్నబా కి జోవయించి ఉప్తమెన్సుతె ఇదిల్ బెదిల్ రితి జల్.

14 దస్సి కెర, 'దేముడుచి దయకయ్ యేసుక్రీస్తు పాపుమ్ గెచ్చయ్లిన్చి రిసాయి రచ్చించుప జమ్దె' మెన జోవయించి పెట్టి జాన్లె కి, 'యూదుల్చ ఆగ్గు కారిమ్లు ముక్కిమ్చి' రితి జేవ్ ఇండిలె, సుబుమ్ కబుర్తె ముక్కిమ్ తిలిన్క అడ్డు కెర్లి రితి జతయ్. దస్సి జతతి మెన దెక కెర, జేవ్ ఎత్కిజిన్చి మొక్కె పేతురుక కిచ్చొ మెలయ్ మెలె, "తుయి యూదుడు జెర్మ యూదుడు నెంజిలో రితో జియ ఎత్కిజిన్ తెన్ బెదితసి జలె, యూదుల్ జతి రితి జేవ్ జంక మెన యూదుల్ నెంజిలనక తుయి కిచ్చొక బలవంతుమ్ కెర్తసు!" మెన గోల కెర్లయ్.

యేసుకయ్ నంపజలిన్తెయి అమ్చి రచ్చన

15 జెర్మన్తె యూదుల్ జల ఆమ్, ఆగ్గుల్ నేన్ల పాపుమ్ కెర్లన జల యూదుల్ నెంజిలన నెంజిలె కి,

16 యేసుక్రీస్తుక నంపజలికయ్ అమ్చి పాపుమ్ పుంచి 'జయెదె' మెన జానుమ్. 'పున్నిమ్ జా అస్తి' మెలి రితి ప్రబు దెకితి వరుమ్ ఆగ్గుల్ రితి ఇండితిన్తె కక్కయ్ దొర్కు జయె నాయ్ మెన అమ్ జాన, ఆగ్గుల్చి ఉప్పిరి నముకుమ్ నే తితె, క్రీస్తుకయ్ అమ్ నంపజలె అమ్చి పాపుమ్ పుంచ అమ్క 'పున్నిమ్ జా అస్తి' మెలి రితి దేముడు

దెకెదె మెన జానయ్, ఆమ్ కి క్రీస్తు జల్ యేసుక నంపజా అస్సుమ్.

17 యూదుల్ నెంజిలనక 'అమ్చి ఆగ్గుల్ రితి కెర్లి నాయ్ చి పాపుమ్ కెర్లన, జేవ్' మెన అమ్చ యూదుల్ సంగితతి, గెద. జలె, ఎక్కి క్రీస్తుకయ్ అమ్ నంపజలె అమ్చి పాపుమ్ పుంచ అమ్క 'పున్నిమ్ జా అస్తి' మెలి రితి దేముడు దెకెదె, మెలె అమ్ యూదుల్చ నంపజలన ఆగ్గుల్ రితి ములిలి రిసా యూదుల్ నెంజిలన తెన్ ఆమ్ కి పాపుమ్ కెర్లన జతసుమ్ మెనుక జలె, క్రీస్తుక 'జోయ్యి పాపుమ్ కెరయ్లో' మెనుక జతి. దస్సి మెన జోచి విలువ కడ్డిసి ఉచరుక పోన!

18 జలె, నేడ గెలిసి అన్నె ఆవ్ బందిలె అంక అవ్ పాపుమ్ కెర్లొసా జయిందె గెద?

19 కిచ్చొక మెలె, ఆవ్ ఆగ్గుల్ రితి అగ్గె ఇండ తా, 'రచ్చనక కామ్క నెంజె' మెన, ఆగ్గుల్క నంప కెర్లి రితిచి తెడి జింక ములిలయ్. కిచ్చొక మెలె, దేముడుచి రిసా జితసుమ్.

20 క్రీస్తు సిలువతె మొర్లిన్తె ఆవ్ బెద మొర అస్సి. కిఅప్పె అంచి సొంత జిపు జియి నాయ్. క్రీస్తుచి రిసా ఆవ్ జితసి, అన్నె, ఈంజ అగి ఆవ్ అప్పె జితిసి కిచ్చొ సెక్తిచి మెలె, అంక ప్రేమ కెర అంచి రిసా జోక జోయ్యి అర్చితుమ్ జా జోచి జిపు దా రచ్చించుప కెర్లొ దేముడు పుత్తున్చి ఉప్పిర్చి నముకుమ్కయ్ ఆవ్ జితసి.

21 దేముడు దయ కెర్లిన్క 'సరిపుచుప జయె నాయ్' మెలి రితి ఇండి నాయ్. కిచ్చొక మెలె, ఆగ్గుల్ వాట్ తుమ్చి పాపుమ్ పుంచి జా పున్నిమ్ జంక జతి జలె, క్రీస్తు ఆరికయ్ మొర గెలన్.

3

యేసుక్రీస్తుచి ఉప్పిర్చి నముకుమ్

‡ 2:14 2:14 నగుమ్తె పేతురుక 'కేపా' మెన జోచి అన్యెక్ నావ్ రెగ్గ అస్సి. § 2:20 2:20 నెంజిలె, 'అప్పె ఆవ్వి జియి నాయ్, గని క్రీస్తుయి అంచి పెట్టి జతయ్చి రిసా ఆవ్ జితసి', అన్నె...

సాలూ

1 బుద్ధి పట్టవన్న ఓ తుమ్ గలతీయుల్, తుమ్క కో ఇసి మోసిమ్ కెర అస్తి? యేసుక్రీస్తు నిలువతె మొర్లిసి తుమ్ సొంత దెకిల్ రితి జతి రితి తుమ్క సొమ్ముమ్ దెకవ తిలయ్. మదెనె కీసి జా మోసిమ్ జలదు!

2 తుమ్క ఎక్కి పునిందె; దేముడుచి యేసుచి ఆత్మ తుమ్చి పెట్టి అయిలిసి కిచ్చొచి రిసా? ఆగ్గుల్చ కమొచి రిసా గే, యేసుక్రీస్తుచి రిసాచి సుబుమ్ కబుర్ సూన జోక సంపజలిన్చి రిసాయి గే? సుబుమ్ కబుర్ సూన సంపజలిన్చి రిసాయి గెద.

3 తుమ్క ఎదిలి బుద్ధి కి నాయ్ గే? ప్రబుచి ఆత్మకయ్ చెంగిల్ జంక దెర, మాన్సుచి సెక్తిచ కమొ తెన్ పూర్తి కెరనుక ఉచర్తను గే?

4 ప్రబు తుమ్చితె జర్గు కెర్లిసి ఎత్తి ఆరి గే? ఏక్ వేల జా ఆరి జర్గు జంక జతి జల్లె.

5 జోచి ఆత్మ దా తుమ్తె జోచి అదికారుమ్ దెకయ్త వెల్లో కమొ కెర్లొసా, జలె, ఆగ్గుల్చి రిసా జెయిమ్ కెర్తయ్ గే, మాన్సుల్ జోవయించి సుబుమ్ కబుర్ సూన సంప కెర్లి రిసాయి జర్గు కెర్తయ్ గే, తుమ్ చెంగిల్ ఉచర. జోవయించి సుబుమ్ కబుర్ మాన్సు సూన సంప కెర్లి రిసాయి.

నముకుమ్ తితనకయ్ దేముడు 'పున్నిమ్' మెన దెకితయ్

6 దస్సి అమ్చొ పూర్గుమ్చొ అబ్రాహామ్చి రిసా రెగ్గ అస్సె. కిచ్చొ మెన మెలె, "దేముడు ప్రబుచి కోడు జో నంప కెర్లన్చి రిసా జోక 'పున్నిమ్ జా అస్సె' మెలి రితి జోచి దయక జో దెకిలో" మెన రెగిడ్డిసి.

* 3:8 3:8 తెలుగు బైబిల్తె ధర్మశాస్త్రమ్ మెలె, మోసిచి అత్తి దేముడు రెగ్గయ్లి ఆగ్గుల్ మెన అమ్ జానుమ్. ఈంజ కొడె ఎత్తి బైబిల్తె అగేచి పాచే పుస్తకమ్తె రెగ్గయ్ జా అస్సె. ఈంజ దెకవుక మెన కుపియ బాసతె నొయ ప్రమానుమ్తె మోసి పూర్గుమ్చొచి అత్తి రెగిడ్డి దేముడుచ అగ్గుల్ మెన రగ్గవ అస్సె. † 3:8 3:8 అదికాండుమ్ 12:3, 18:18, 22:18. ‡ 3:10 3:10 ద్విత్వీయోపదేశ కాండుము 27:26. § 3:11 3:11 హాబక్కుకు 2:4.

7 జా కోడుతె కిచ్చొ రుజ్జు డీస్తయ్ మెలె, ప్రబుక సంపజతనయ్ అబ్రాహామ్చ పుత్తర్లు జవుల.

8 దస్సికయ్, జోవయించి నముకుమ్చి రిసా యూదుల్ నెంజిలనక దేముడు జోక 'పున్నిమ్ జా అస్సి' మెలి రితి దెకెదె మెనయ్ *మోసి పూర్గుమ్చొచి అత్తి రెగిడ్డి దేముడుచ అగ్గుల్తె అగ్గె తెంతొ రెగ్గ అస్సె. అగ్గెయి తెంతొ అబ్రాహామ్క సుబుమ్ కబుర్ సంగిలి కోడుతె,

† "తుచి వంసుమ్ వాట్ దేసిమ్లు ఎత్తిక చెంగిల్ వరుమ్ దొర్కు కెరిందె" మెన జో దేముడు రెగిడ్డి కోడు.

9 జలె, ఇన్నెతెన్ కిచ్చొ రుజ్జు జతయ్ మెలె, ప్రబుచి ఉప్పిరి నముకుమ్ తితన కో జవుల గే, ప్రబుచి ఉప్పిరి నముకుమ్ తిలో అబ్రాహామ్ తెన్ జోవయింక కి ప్రబుచి దీవెన దొర్కు జతయ్.

క్రీస్తు జా సిచ్చ తెంతొ అమ్క విడ్డల్ కెర అస్సె

10 'ఆగ్గుల్ రితితె అమ్చి రచ్చన' మెన ఉచరంతన జలె, నాసెనుమ్ జతి, సిచ్చచి సాపెనతె దెర్ను సేడ అస్సి. కిచ్చొక మెలె, మోసి పూర్గుమ్చొచి అత్తి దేముడు రెగ్గయ్ల ఆగ్గుల్ రెగిడ్డి రితి,

‡ "మోసి పూర్గుమ్చొచి అత్తి దేముడు రెగ్గయ్ల ఆగ్గుల్తె రెగ్గయ్లి ఎత్తి ఆగ్గు కో పూర్తి నిదానుమ్ నే కెర్లె, నాసెనుమ్ జతి ఆచ్ దిలి సిచ్చతె గెచ్చుల"

మెన సెలవ్ రెగ్గ అస్సె.

11 జలె, కిచ్చొ రుజ్జు డీస్తయ్ మెలె, ఆగ్గుల్ రితి కెర్లిసి జో దేముడుచి మొక్కె కేన్ మాన్సుచి పాపుమ్ పుంచె నాయ్, జోవయింక పున్నిమ్ దెయె

నాయ్. కిచ్చొక మెలె, దేముడుచి కొడొతె
 కీఅన్నొకతె కిచ్చొ రెగ్గ అస్సె మెలె,

*“కో పున్నిమ్ మాన్సుల్ జవుల గే,
 జెవ్వి నముకుమ్ జా జివుల”
 మెన రెగ్గ అస్సె.

12 దేముడు మోసే తెన్ దిలి ఆగ్గుల్ తెన్
 తిలి నముకుమ్చి రిసా నాయ్, గని జా
 ఆగ్గుల్చి కో ఇండుల గే జేవ్ జివుల.

†“జా ఆగ్గుల్ రితి కో జలె పూర్తి నిదానుమ్
 కెరుల గే,
 జెవ్వి జేవ్ ఆగ్గుల్చి సెక్కిక జివుల”
 మెన రెగ్గ అస్సె. గని కోయి పూర్తి
 నిదానుమ్ కెరుక నెత్తిర్తి.

13 జలె, క్రీస్తు అమ్చి పాపుమ్చి
 రిసాచి సిచ్చ వయన, ఆగ్గుల్ రితిచి జా
 సిచ్చచి సాపెన తెంతో అమ్క నెతోవ కెర
 విడ్డల్ కెర అస్సె. అమ్చి పాపుమ్ జో
 వయిలి కోడుక కిచ్చొ రుజ్జు మెలె,

‡“సిలువతె ఒడొయ్ జా మొర్తి సిచ్చ
 జతో ఎత్తి మాన్సుచి సాపెన
 వయెదె”
 మెన దేముడుచి కొడొతె రెగ్గ అస్సె.

14 జో అమ్చి పాపుమ్ కిచ్చొక వయిలన్
 మెలె, అమ్చొ అబ్రాహామ్ పూర్ణుమ్చొక
 దిలి రచ్చన వరుమ్ జో క్రీస్తు జలొ
 యేసుచి తెడి నముకుమ్ తెన్ యూదుల్
 నెంజిలనక కి దొర్కు జవున్ మెన,
 దేముడు సంగిలి ప్రమానుమ్ నెరవెర్చుప
 జవున్ మెనయ్.

ఆగ్గుల్ వాట్ నాయ్, గని దేముడుచి
 ప్రమానుమ్ వాట్ రచ్చన

15 ఓ బావుడ్లు, మాముల్ మాన్సుల్
 తెన్ జర్గు జతిన్చి ఏక టాలి ఉచరుమ.
 కేన్ జవున్ మాన్సుచి అత్తి దెతిసి
 కీప్రమానుమ్, సాచుల్చి మొక్కె జలి
 పిమ్మటి, కోయి వేర మాన్సు జా మార్పుప
 కెరుక జయె నాయ్. ‘కామ్క నెంజె’

మెనుక జయె నాయ్, కిచ్చొ వేరచి
 బెదవుక జయె నాయ్.

16 జలె, అబ్రాహామ్క చి జోచి
 సెకుమ్తె పడ్డొ జెర్కుక తిలొసాకయ్
 దేముడు ప్రమానుమ్ కెర సంగిలన్.
 ఒగ్గర్జిన్క సంగితి రితి, “తుచి
 సెకుమ్తె జెర్కుక తిలనక” మెన జో
 రెగిడ్డిన్తె నాయ్. ఎక్కిలొయిచి రిసా
 సంగితి రితి; “తుచి సెకుమ్తె జెర్కుక
 తిలొసాక” మెన రెగ్గ అస్సె. కచి రిసా
 మెలె, క్రీస్తుచి రిసాయి.

17 జలె, ఆవ్ సంగితి అర్దుమ్ కిచ్చొ
 మెలె, అగ్గె అబ్రాహామ్చి మొక్కె దేముడు
 జేవ్ ప్రమానల్చి కోడు సంగ ముద్ర
 దిలన్. ఒత్త తెంతో, చెత్తర్ పుంజొ
 ముప్పయ్ వెర్చుల్ గెలకయ్ జో ఆగ్గుల్
 రితి దిలన్. జో అగ్గె సంగ తిలి
 ప్రమానుమ్క, కామ్క నెంజె రితి పడ్డొ
 అయ్ల ఆగ్గుల్ మార్పుప కెరుక నెత్తిర్తి.

18 జలె, దేముడు దెతి వాట దొర్కు
 జతి వరుమ్ ఆగ్గుల్ వాట్ జెతి జలె,
 జోచి ప్రమానుమ్ కామ్క నెంజితి, గని
 ప్రమానుమ్ వాట్కయ్ అబ్రాహామ్క జోచి
 దయ తెన్ వరుమ్ దిలన్.

19 దస్సి జలె, ఆగ్గుల్ రితి కిచ్చొ కామ్క
 జెతయ్? కిచ్చొ మెలె, రచ్చన వరుమ్చి
 దేముడు సంగిలి ప్రమానుమ్ నెరవెర్చుప
 కెర్తొ జెర్కుక తిలొసా నే అయ్లి మదెనె
 కామ్క అయ్లి; మాన్సుల్చి బుద్దిక
 ‘పాపుమ్చి’ మెన రుజ్జుల్ దెకయ్తె తతి
 రిసా అయ్లి. పడ్డొ, మదెనె జతో మాన్సు
 జలొ మోసేచి అత్తి దూతల్ జేవ్ ఆగ్గుల్
 దిల.

20 జలె, ఆగ్గుల్ దిలిన్తె దూతల్,
 మోసే, మదెనె జల, గని అగ్గె తెంతో చి
 ప్రమానుమ్ సంగిలిసి జలె, దేముడు,
 సొంత, కోయి మదెనె నే జతె జా

* 3:11 3:11 ఈంజ కోడుచి అర్దుమ్ దీగు తెన్ సంగిలె, ఇసి జయెదె: ప్రబచి ఉప్పిరి కో నముకుమ్ తివుల
 గే, జోవయిచి నముకుమ్చి రిసా జోవయిచి పాపుమ్ పుంజ జోవయింకయ్ ‘పున్నిమ్’ మెలి రితి జో దెకెదె, చి
 రచ్చించుప జా జివుల. † 3:12 3:12 లేవీయకాండుమ్ 18:5. ‡ 3:13 3:13 ద్వితియోపదేశ కాండుము

ప్రమానుమ దిలో, దేముడు ఎక్కిలో.

21 జలె, దేముడుచ ప్రమానల్క జో దిల జేవ్ ఆగ్గుల్ విరోదుమ్ అస్తి గే? నాయ్. *పరలోకుమ్తె అమ్ బెదితి రచ్చన దెతి సెక్కిచి ఆగ్గు జో దెతో జలె, అమ్ పున్నిమ్ జతి రచ్చన నిజమి ఆగ్గుల్ వాటి దొర్కు జతి.

22 గని దేముడుచి కొణొ నదు కెరై కిచ్చొ రుజ్జు డిస్తయ్ మెలె, ఎత్కి కి పాపుమ్తె దెర్పు సేడయ్ అస్తి; జేలి జలి రితి; చి ఎత్కి జోవయించి సిచ్చ వయక అస్సె. కో యేసుక్రీస్తుక సంపజవుల గే, జా పాపుమ్ జా సిచ్చ తెంతొ జెవ్వి రచ్చించుప జా మెన దేముడు ప్రమానుమ్ సంగ తిలో.

23 జలె, యేసుక సంపజతి వాటు నే జెతె అగ్గె, ఆగ్గులి అమ్క ముద్దొ కెరై తిల. యేసుక సంపజా రచ్చించుప జతి జా వాట్ డిసిల్ ఎదక ఆగ్గులి అమ్క జేలి కెర తిల.

24 దస్సి, క్రీస్తు అయ్లి సమయుమ్ ఎద ఆగ్గుల్ అమ్క ఇండయ్తోసా జలి రితి జా, అమ్క ముద్దొ కెరై తిల; జో అయ్లె, జోచి ఉప్పిరి అమ్చి నముకుమ్ తిలె, దేముడుచి ఆసచి రిసా జా నముకుమ్ వాట్కయ్ అమ్క పున్నిమ్ దొర్కు జవున్.

25 గని, యేసుచి ఉప్పిరిచి నముకుమ్ వాటు దొర్కు జలి తెంతొ, జా ఇండయ్తోసా జతి ఆగ్గుల్చి ముద్దొతె అమ్ నాయ్.

26 కిచ్చొక మెలె, †క్రీస్తు జలొ యేసుచి ఉప్పిరిచి తుమ్చి నముకుమ్చి రిసాయి, జోవయించి తెడి తుమ్ ఎత్కిజిన్ దేముడుచ పుత్తర్పులు జలదు.

27 మెలె, క్రీస్తుచ సొంత మాన్సుల్ జతి గుర్తుక తుమ్తె కో బాప్తిసుమ్ నజన అన్నున్ గే, నొవ పాలల్ గలన్లి రితి క్రీస్తుక

గలన అన్నున్.

28 దస్సికయ్, తుమ్చితె 'యూదుడు' మెన, 'గ్రీసుడు' మెన, 'గొతిమాన్సు' మెన, 'గొతి నెంజిలో మాన్సు' మెన, 'మున్సుబోద' మెన, 'తేర్బోద' మెన, తేడల్ నాయ్. కిచ్చొక మెలె, తుమ్ ఎత్కిజిన్ క్రీస్తు జలొ యేసుచి తెడి ఎక్కి జా అన్నున్.

29 తుమ్ క్రీస్తుచ మాన్సుల్ జలదు మెలె, 'ఒగ్గర్జిన్ తుచ పుత్తర్లు రిత జవుల' మెన దేముడు అబ్రాహామ్క సంగిలన తుమ్ జా అన్నున్, జో అబ్రాహామ్చి వాట తుమ్కయ్ కి సేడ్తయ్.

4

దేముడుచి దయచి రిసా జోచ పుత్తర్లు

1 జలె, ఆవ్ కిచ్చొ మెంతసి మెలె, ఎజొమానిచొ పుత్తుసి బాల తతె, గొతిమాన్సుచి రితి దాకు జా అబ్బొన్చి తెడి తయెదె; అబ్బొన్చి అస్తి ఎత్కి జోచి అస్తి జయెదె మెలె కి.

2 జా మదెనె, అబ్బొసి అగ్గె తెంతొ రెగిడ్లి దీసి ఎద, జో ఉబెణొ జోక దెకిత వెల్లెల మాన్సుల్చి, ఇండయ్తోసాచి, ముద్దొచి తెడి తయెదె.

3 అమ్చి తెన్ కి దస్సి, ఆత్మక అమ్ బాలబోదల్ రిత తిలె పొది, మాములుమ్ ఈంజ లోకుమ్చి, బాలబోదల్ అర్దుమ్ కెరంతి ఎదిలి గ్యానమ్క గొతిమాన్సుల్ రిత జా తిలమ్.

4 గని కాలుమ్ బెర్తు జా అయ్లి పొది, దేముడు జోచొ సొంత పుత్తున్క తేర్బోదచి పెట్టి జెర్మయ్లి రితి, ఆగ్గుల్ రిత యూదుల్తె జెర్మయ్లి రితి ఈంజ లోకుమ్తె తెద్రయ్లన్.

5 కిచ్చొక మెలె, ఆగ్గుల్చి తెడి అమ్ తిలనక జా ఆగ్గుల్ రితి పాపుమ్

* 3:21 3:21 నెంజిలె జివు దెతి సెక్కిచి ఆగ్గు.... † 3:26 3:26 'క్రీస్తు' మెలె, పూర్ణమ్ తెంతొ 'తెద్రయిందె' మెన ఎత్కి అదికారుమ్ తిలో దేముడు సంగిలో దొర్కు జలొ రచ్చించుప కెరైసా.

వయస్థుని తేంతో నెత్తవ గెల ములయలో మెనయ్, అమ్ ఎత్తిజిన్ నంపజలసక 'అంచ పుత్తర్లు జతు' మెనయ్, జో దేముడు అబ్బొసి జోచొ పుత్తున్క తెద్రయ్లన్.

6 పడ్డొ తుమ్క 'జేవ్ కి నిజుమి జోవయించ పుత్తర్లు జల' మెన అమ్ జాన్లి రిసా, దేముడు జోచొ పుత్తున్చి ఆత్మ అమ్చి పెట్టి తెద్రవ అస్సె, చి జా కోడు ఒప్పున్తి సర్లక 'ఓ బ, ఓ బ' మెన అమ్ జోక ఉంక్రయ్తనుమ్.

7 దస్సి, దేముడుచి దయచి రిసా, తుమ్ అప్పె తెంతో అగ్గెచి రితి గొతిమాన్సుల్ నెంజుసు. జోచ పుత్తర్లు జా అస్సున్, చి జోచ పుత్తర్లు జలదు మెలె, జోచి రాజిమ్తె తుమ్క వాట అస్సె.

గలతీయల్క జాగర్త సంగిలిసి

8 అగ్గెయి, దేముడుక తుమ్ నేన్లి పొది, 'దేముడ్లు' మెన దేముడ్లు నెంజిలసక గొతిమాన్సుల్ రిత జా తిలదు.

9 గని, అప్పె, తుమ్ దేముడు తెన్ బెదిలి తెంతో, మెలె, జో తుమ్క కి బెదవన్లి తెంతో, తుమ్ జోచ గొతిమాన్సుల్ రిత అన్నె జంక ఇష్టుమ్ జలి రితి జా, కిచ్చొక దస ఎధరె సెక్తి నెంజిల కమెతె అన్నె బెదిల్ రితి జంక దెర్తసు?

10 దీసిక, జోసుక, కాలుమ్క, వెర్కుక కిచ్చొ కారిమ్లు కెర్లె కామ్క జెయెదె మెన *జాడ్లు వయడ్త ఆగ్గుల్తె తుమ్ అన్నె దెర్ను సేడ్తసు!

11 జాకయ్, 'దస అల్లర్ తెంతో విడ్డల్ జతు' మెన తుమ్చి రిసా ఆవ్ సైమ

సేడ్డిసి ఎత్తి. ఆరి పాడ్ జా గెతయ్ మెన ఆవ్ బితసి.

పవులుచి రిసా గలతీయల్ అన్మానుమ్

12 ఓ బావుడ్లు, తుమ్క ఆవ్ కిచ్చొ బతిమాల్పా జా సంగితసి మెలె, తూమ్ అంచి రితి జా. ఆవ్ కి తుమ్చొ రితొ జా అస్సి.†

ఆవ్ తుమ్చి తెన్ తిలి పొది, తుమ్ అంక కిచ్చొ పొరపాట్ కెర్చు నాయ్.

13 అంచి అగ్గె ఏక్ బాద తిలి రిసాయ్, తుమ్తె తెదొడి తా సుబుమ్ కబుర్ సూనవుక అంక వాట్ అయిలి మెన జాన్సు.

14 తెదొడి అంచి బాద తుమ్క అల్లర్ కెర్లె కి, అంక ఆసున్ నాయ్, నిస్కారుమ్ దెకున్ నాయ్, గని దేముడుచొ దూత ఎక్కిలో జో, నెంజిలె 'క్రిస్తుయెసు రితొ' మెలి రితి అంక దెక, మరియాద కెర్లదు.

15 జలె, అంచి రిసాచి తుమ్చి తెదొడిచి సర్ల అప్పె కేతె? తెదొడి అంచి బాద చి రిసా, తెర్లె తుమ్చ సొంత అంకివొ కడ కెర అంక దెతదు మెన ఆవ్ సాచి సంగితసి.

16 దస్సి జలె, మదెనె "ఆగ్గుల్ వయడ్డి జాడు వయ్తినతె తుమ్ అన్నె గెచ్చు పొరపాట్ జతసు" మెన తుమ్క ఆవ్ సత్తిమ్ సంగిలి రిసా 'తుమ్క విరోదుమ్ జా అస్సె' మెన అంచి రిసా ఉచర్తసు గే?

17 ఆగ్గుల్క నంపజా బలవంతుమ్ కెర్తస, జలె, తుమ్క పులయ్తతి; గని బుద్ది నెంజిలి కామ్ ఉచరయ్ దస్సి కెర్తతి. మెలె, జోవయంకయ్ తుమ్ వెల్లో మెన దెకుక జోవయించి ఆస, చి అంక తుమ్క దూరి కెరుక ఉచర అస్తి.

18 చెంగిల్ కామ్క, జలె, మాన్సు అమ్క మెన్సిలె చెంగిలి. అంక, జలె, ఎక్కి ఆవ్ తుమ్చి తెన్ తిలి పొది

* 4:10 4:10 జేవ్ యూదుల్ నెంజిలసచ సిస్టల్తె దస ఆగ్గుల్ తవుల, యూదుల్చి అలవాట్తె కి దస ఆగ్గుల్ తిల మెనుక జయెదె. జేక, జేవ్ గలతీయల్చ నంపజలస యూదుల్ జతి గుర్తుచి సున్నతి కెరంతిసి గట్టచ ఆగ్గుల్క బిలె, జోవయించి అగ్గెచి రితచ ఆగ్గుల్తె, మెలె, ఈంజ జా కెర్లె గార్ మెంత ఈంజ జా కెర్లె పున్సిమ్ మెంత ఆగ్గుల్తె అన్నె దెర్ను సేడ్డి రితి జతయ్. † 4:12 4:12 జో యూదుడు జెర్కెలికి, జోవయంతెన్ బెద జోవయించి రితి జా తిలన్. జేక, జేవ్ జోవయంక దెక జోతె ఇదిల్ సికుక జయెదె.

నాయ్, గని ఆచ్ ఉట్ట అయ్లె పొది కి సర్ల తెన్ దెకితదు, జలె, సర్ల జతయ్.

19 ఓ పుత్తర్లు, క్రీస్తు తుమ్ ఇండితి రితితె సరిగా డీసై ఎదక అన్నె అంక బోద పాయితి తేర్బోదచి రితి నొప్పి!

20 తుమ్చి తెన్ ఆచ్ అప్పె తంక జతి, జలె, తుమ్క 'నాయ్, నిదానుమ్ అస్తి' మెన ఆచ్ రుజ్జు దెకుక జతి, జలె, సర్ల జతయ్. మదెనె, తుమ్చి రిసా కిచ్చొ కెరుక గే ఆచ్ నేన గెచ్చు అస్సి.

గొతిమాన్సు గొతి నెంజిల్ మాన్సు

21 దేముడు మోసే తెన్ దిలి ఆగ్గుల్చి రితిచి తెడి తంక తుమ్ ఇస్టుమ్ జలస అంక జబాబ్ సంగ. దేముడు మోసే తెన్ దిలి ఆగ్గుల్తె తిలిసి నూన్సు నాయ్ గే?

22 ఒత్త రెగిడ్లిసి ఏక్ కిచ్చొ మెలె, అబ్రాహామ్క దొగు పుత్తర్లు తిల. ఎక్కిలో హాగరు మెలి గొతిమాన్సుచి పెట్టి జెర్మిలన్. అన్నెక్లో, జలె, తేర్చి జలి సారాచి పెట్టి జెర్మిలన్.

23 జా గొతిమాన్సు జలి హాగరు చి పెట్టి జెర్మిలోసా, జలె, †మాన్సుచి ఇస్టుమ్కయ్ జెర్మిలన్. గని, తేర్చి జలి సారాచి పెట్టి జెర్మిలోసా, జలె, దేముడు సంగిలి కీప్రమానుమ్చి రిసా జెర్మిలన్.

24 ఈంజ మత్తెలి, జలె, అమ్క టాలి దెకయ్తయ్. ఈంజేవ్ దొగుల తేర్బోదల్క దెకిలె, దేముడు సంగిల దొన్ని ప్రమానుమ్చి రితి జతయ్. ఏక్ ప్రమానుమ్ జో సినాయి డొంగురతె ఆగ్గుల్ దిలిన్చి ప్రమానుమ్. అన్నెక్ ప్రమానుమ్, హాగరు మెలి జా గొతిమాన్సుచి రితి జా, గొతి జత మాన్సుల్ పాయితయ్.

‡ 4:23 4:23 ఆదికాండుమ్ 16:1-5. సంతానుమ్ నెంజితికయ్, 'అంచి గొతిమాన్సు హాగరు తెన్ సంతానుమ్ పాయి' మెన సారా మున్సున్ జలె అబ్రాహామ్క సికడ్లన్, చి హాగరు పుత్తు పాయి సారాక నిస్కారుమ్ దెకుక దెర్లన్.

§ 4:23 4:23 ఆదికాండుమ్ 17:15-19. * 4:27 4:27 యెసయా పుస్తకుమ్ 54:1. † 4:27 4:27 సారా. ‡ 4:27 4:27 సారా. § 4:27 4:27 హాగరు. * 4:27 4:27 సారా. † 4:27 4:27 యెసుక్రీస్తుక సంపజిల్ ఎత్తి మాన్సు ఆత్మక అబ్రాహామ్చి గొతి నెంజిలి సంతానుమ్ జవుల. జోవయిం చి రిసా 'ఒగ్గర్జిన్ పుత్తర్లు' మెన పవులు ఇన్నె సంగితయ్.

25 అరేబియ దేసిమ్చి సినాయి డొంగురతె దిలి ఆగ్గుల్క టాలి జతయ్. జలె, అప్పె ఈంజ లోకుమ్చి యెరూసలేమ్ పట్టుమ్కకి టాలి జయెదె. కీసి మెలె, యెరూసలేమ్ పట్టుమ్, యూదుల్ జల జేవ్చ బోదల్ తెన్, ఆగ్గుల్క గొతి జా అస్సె.

26 గని సారా టాలి జలి పరలోకుమ్ తిలి యెరూసలేమ్ పట్టుమ్, జలె, గొతి జలిసి నెంజె. యెసుప్రబుక సంపజలసక జయ్యి అయ్యి.

27 సారాక చి హాగరుక జర్లు జలిన్చి రిసా దేముడుచి కొడెతె రెగిడ్లి రితి,

* "† గొడ్డు జలి తేర్బోద, తుయి సర్ల జా! ‡ నొప్పుల్ నే జలి తేర్బోద, తుచి సర్లక కేక్ గలు!

కిచ్చొక మెలె, కీమున్సున్ తెన్ అగ్గె తెంతో బోద పాయిలి గొతిమాన్సుచి కంట,

జా గొతిమాన్సు నిస్కారుమ్ దెకిలి అగ్గె బోదల్ నెంజిలి * తేర్బోదక అన్నె ఒగ్గర్జిన్ † పుత్తర్లులు జెర్మి అస్తి."

28 అబ్రాహామ్చి తేర్చి జతి సారాక "తుచి పెట్టి అబ్రాహామ్క సంతానుమ్ దెయిందె" మెన దేముడు సంగ తిలన్. జా ప్రమానుమ్క జెర్మిలోసా ఇస్సాకు. జలె, బావుడ్లు, ఇస్సాకుచి రితి, అమ్ యేసుక సంపజలస ప్రమానుమ్చి రిసాచ బోదల్ జలమ్.

29 జలె, జా పొది, దేముడుచి సుద్ది తిలి ఆత్మచి ఇస్టుమ్క జో జెర్మయ్లో ఇస్సాకుక, మాన్సుచి ఇస్టుమ్క జెర్మిలో హాగరు చి పెట్టిచొ ఇష్టాయేల్ అల్లర్ కెర్తె తిలన్. అప్పె కి, ఆగ్గుల్ రితి గొతి జలి రితి జా ఆగ్గుల్చి రితి సేవ కెర్తస

జా గొతి ప్రమానుమ్ తెంతో విడ్డల్ జల నంపజలనక అల్లర్ కెర్తతి.

30 గని, దేముడుచి కొడొతె రెగ్గయలిసి కిచ్చొ మెలె,

‡“గొతిమాన్సుక చి జేవ్ తెన్ జేవ్చొ పుత్తున్క ఉదడ గెలు.

కిచ్చొక మెలె, గొతి నెంజిలి మాన్సుచొ కీపుత్తున్క దొర్కు జతి

వరుమ్తె గొతి తిలి మాన్సుచొ *పుత్తున్క వాట

నాయ్” మెన రెగిడ్లి కోడు.

31 జలె, బావుడ్లు, అమ్ యేసుచి ఉప్పిరి నముకుమ్ తిలస గొతిమాన్సుల్చ

బోదల్ నెంజుమ్. గొతి నెంజిలి మాన్సుల్చ ఆము.

5

యూదుల్ జతి గుర్తుచి సున్నతి రిసా పవులు తీర్పు సంగిలిసి

1 అమ్క ‘ఆగ్నల్ ప్రమానుమ్చి గొతి సేవ తెంతో విడ్డల్ జలి రితి ఇండుత్’

మెనయ్, క్రీస్తు అమ్క విడ్డల్ కెర అస్సె. జాకయ్, తుమ్ జోవయించి తెడి డిట్టుమ్

తా, ఆగ్నల్క గొతిమాన్సుల్ రిత జతిన్తె అన్నె దెర్ను సేడ నాయ్.

2 జలె, ఆవ్ పవులు తుమ్క కిచ్చొ మెంతసి మెలె, యూదుల్ జతి గుర్తుచి

జా సున్నతి తుమ్ కెరన్లె, క్రీస్తుక విరోదుమ్ జలి రితి, చి క్రీస్తు ఆరి దొర్కు కెర్లి రచ్చనక

తుమ్ నే విలువ దిలి రితి జయెదె. 3 జా సున్నతి కెరనుక ఉచర్తొ ఎత్తి

మాన్సుక ఆవ్ కిచ్చొ రుజ్జు సంగితసి మెలె, యూదుల్చ ఆగ్నల్చి ఎత్తి కోడు

జో మాన్సు నిదానుమ్ కెరుక అస్సె, కెరుక ఒప్పున అస్సె.

4 ‘యూదుల్చ ఆగ్నల్ వాట్ అమ్క పున్నిమ్ దొర్కు జయెదె, అమ్చి పాపుమ్

గెచ్చెదె’ మెన కో ఉచర్తును జలె, తుమ్ క్రీస్తుక విరోదుమ్ జలి రితి జా ముల

అస్సున్. మెలె, జోచి దయ వాటు దొర్కు జలి రచ్చనచి తెడి తెంతో ఎట్టొ సేడ

అస్సున్. 5 అమ్ ఎక్కి ప్రబుచి ఉప్పిరి నముకుమ్

తియ, అమ్చి పెట్టి దిలి జోచి ఆత్తు తెన్, జొయ్యి అమ్చి పాపుమ్

పుంచ అస్సె, చి జోచి పున్నిమ్చి రిసా దయిర్లిమ్ తెన్ రకితసుమ్.

6 క్రీస్తుచి తెడి తిలె, యూదుల్చి గుర్తుచి

సున్నతి కెరన తిలె లాబుమ్ నాయ్, నే కెరన్లె నస్టుమ్ నాయ్.

జా కెరంతిన్తె నే కెరంతిన్తె కిచ్చొ నాయ్. గని కిచ్చొ కామ్క జెతయ్ మెలె,

ఎక్కి క్రీస్తుకయ్ నంపజతిసి, చి ప్రేమ ఇండితిన్తె జా నముకుమ్ దెకయ్తిసి.

7 తుమ్ అగ్గెయి నముకుమ్తె ఇండితె తిలదు. ప్రబుచి దయ వాటుచి రచ్చనచి

సత్తిమ్ తెన్ బెదితి రితి తుమ్ ఇండితిసి కో అడ్డు కెర్ల?

8 జా సున్నతి కెరంతి ఆగ్నల్చి రితి అప్పె ఉచర్తి కామ్ తుమ్క బుకార్లొ క్రీస్తు

సికడ్లసి నెంజె. 9 జాగర్త, పాకుమ్తె ఇదిలిదిల్ పులయ్తి

పీట్ సేడ తిలె, ఒండి పాకుమ్ పుల గెచ్చెదె, గెద. 10 జలె, తుమ్క ‘అంచి కంట వేర

ఉచర్తి నాయ్’ మెన, ప్రబుచి తెడి అంక దయిర్లిమ్. అస్సె, తుమ్క సిక్కు కెర్తొసా,

జో కొన్సొ జలెకి, జోచి పాపుమ్చి సిచ్చ జో వయెదె.

11 బావుడ్లు, ఆవ్ అప్పెక ‘యూదుల్చి గుర్తుచి సున్నతితె,

యూదుల్ జతిన్తె రచ్చన’ మెన సికడ్లొసా ఆవ్ జతయ్ జలె, కిచ్చొక

జేవ్ అంక అల్లర్ కెర్తతి? ఆవ్ అప్పెక దస్సి సికడ్లయ్ జలె, ‘యేసు సిలువతె

‡ 4:30 4:30 ఆదికాండుమ్ 21:10. § 4:30 4:30 యేసుచి ఉప్పిరి నముకుమ్ తిలసకచి టాలి.

* 4:30 4:30 ఆగ్నల్చి ఉప్పిరి నముకుమ్ తియ ఆగ్నల్క గొతిమాన్సుల్క చి టాలి.

సాలు' మెన ఆవ్ సంగుక నెంజితి, చి జోవయింక నొప్పి దెతయ్ నాయ్.

12 జలె, తుమ్క సిక్కు కెర్తస జోవయింక జెచ్చి ఒండి కుటవన గార్ కెరంతు, మెన అవ్ ఉచర్తసి!

యేసుక నంపజలస ప్రబుచి ఆత్మక ప్రేమతె ఇండుక

13 'ఆగ్నల్చి ప్రమానుమ్క గొతి సేవ తెంతో విడ్డల్ జలి రితి ఇండుత్' మెన ప్రబు తుమ్క బుకార్లన్, బావుడ్లు. గని 'ఆగ్నల్చ గొతిమాన్సుల్ నెంజుమ్, చి ఆగ్నల్ ఇస్టుమ్ అయ్లి రితి ఇండుక జయెదె' మెన తుమ్ ఉచర నాయ్, గని ప్రబుచి ప్రేమ తెన్ తా, ఎక్కిలోక ఎక్కిలో సేవ కెర్తె తా.

14 కిచ్చొక మెలె, దేముడు మోసే తెన్ దిలి ఆగ్నల్ ఎత్కి ఎక్కి ఈంజ కోడుతె బెదితయ్. కేన్ కోడుతె మెలె,

*"తుమ్కయ్ తుమ్ కెడ్డి ప్రేమ కెరంతును గే, పక్కయ్చొక తుమ్ తెడ్డి ప్రేమ కెరుకయ్" మెన రెగిడ్డి కోడు.

15 గని తుమ్ కుస్సిదుమ్ తెన్ తా ఎక్కిలోక ఎక్కిలో చప్ల చుప్లి రితి జతసు జలె, తుమ్ ఎత్కిజన్ ఎక్కిలోచి అత్తి ఎక్కిలో ఆత్మక నాసెనుమ్ నే జతి రితి జాగర్త తెన్ తా.

16 జలె, ఆవ్ కిచ్చొ సంగితసి మెలె, దేముడుచి సుద్ది తిలి ఆత్మచి సెక్తిక ఇండ, తుమ్చి ఆగ్నచ ఆసల్ జర్గు కెర్తి రితి ఇండుక పోన.

17 కిచ్చొక మెలె, అమ్ మాన్సుల్చి ఆగ్నచ ఆసల్, దేముడుచి సుద్ది తిలి ఆత్మక విరోదుమ్ జతయ్, అన్నె, మాన్సుచి ఆగ్నచ ఆసల్క జోచి ఆత్మచి ఇస్టుమ్క విరోదుమ్ జతయ్, చి రిసా జేవ్ దొన్ని యుద్దుమ్ రితి కెరంతిన్తె తుమ్ నెడిమి సేడ, తుమ్ ఇస్టుమ్ జలిసి జర్గు కెరుక నెతుర్చు.

18 గని తుమ్ దేముడుచి సుద్ది తిలి ఆత్మచి సెక్తిక ఇండితను జలె, దేముడు మోసే తెన్ దిలి ఆగ్నల్ తెడిచ మాన్సుల్ నెంజున్.

19 జలె, మాన్సుచి ఆగ్నచ ఆసల్ రితి ఇండితిన్తె ఇనచ తయెదె మెన కిచ్చొ కిచ్చొచి రిసా ఎత్కిజన్ చినుక జయెదె మెలె, లంజెకమె, లంజెబుద్ది, ఆగ్నచి ఆస ముద్దో నే కెరంతిసి,

20 బొమ్మల్క జొకర్తసి. అన్నెక్ కిచ్చొ మెలె, మెంగిర్తిసి, దోసుమ్ గట్ట కెర్తిసి, గుర్మయ్ గట్ట వెసితిసి, దస్సిచి. పడ్డె, విరోదుమ్, కొడె జుజవ ఎక్కిలోక ఎక్కిలో గగ్గల్ జతిసి, గోసబుద్ది, కోపుమ్, గార్ ఆసల్, జట్లు జతిసి, ఎక్కిలో ఉచర్తిన్చి ఉప్పిరి అన్నెక్ నిస్కారుమ్ ఉచర్తిసి,

21 గోసల్ కెర్తిసి, మచ్చితిసి, 'సర్ద కెర్తసుమ్' మెన వెట్కారుమ్ జతిసి, దస్సు కమె. దసచ పోన. ఆవ్ అగ్గ తెంతో జాగర్త సంగిల్ రితి, అప్పె కి తుమ్క కిచ్చొ జాగర్త సంగితసి మెలె, దస కమె కెర్తస జలె, దేముడుచి రాజిమ్తె జోవయింక కిచ్చొ వాట తయె నాయ్.

ప్రబుచి ఆత్మపలితుమ్ దెర్త కమె

22 గని, దేముడుచి సుద్ది తిలి ఆత్మ అమ్చి పెట్టి తిలె, కిచ్చొ పలితుమ్ దెరెదె మెలె, ప్రేమ, సంతోసుమ్, సేంతుమ్, ఒగ్గర్ సేంతుమ్, దయ దర్ముమ్, చెంగిల్ బుద్ది, నముకుమ్, ఓర్పుప జా మెత్తన తతిబుద్ది, దర్ముమ్ నిదానుమ్ బుద్ది,

23 గవురుమ్ నే దెకన్తె అన్నె మాన్సుల్క మరియాద దెకితిసి, ముద్దో కెరంతిసి. ఇనచక కేన్ ఆగ్న కి పోన మెనె నాయ్.

24 అన్నె, క్రీస్తు జలొ యేసుక నంపజా సొంత జల మాన్సుల్, జోవయించ ఆగ్నచ పాపుమ్చి బుద్దిచి సొంత ఆసల్ క్రీస్తు మొర్లి సిలువతె గల ముల దా అన్తి.

* 5:14 5:14 లేవీయకాండుమ్ 19:18, మత్తయ 19:19.

25 దేముడుచి నుద్ది తిలి ఆత్మ తేన్ జీవ్ జా అస్సుమ్ జలె, జోచి ఆత్మసెక్తిక దస్సి ఇండుమ.

26 దస్సి, అమ్చి పెట్టి కిచ్చొ గవురుమ్ ఉచరనుక పోన. ఎక్కిలోక ఎక్కిలోకోపల్ కెరవుక పోన, ఎక్కిలోచి ఉప్పిరి ఎక్కిలో గోసల్ జంక పోన.

6

ఎత్తిక చెంగిల్ కెర్తినచి

1 బావుడ్లు, తుమ్తె కేన్ మాన్సు కిచ్చొ పాపుమ్తె దెర్ను సేడ అస్సె జలె, జో అన్నె బుద్ది జతి రితి, తుమ్ ఆత్మవడ్డలన జోవయింక బమ్మ నే కెర్తి బుద్ది తేన్ జోవయింక చెంగిల్ వాటు దెకవ. పడ్డొ, తుమ్ సొంత పాపుమ్ నే సేడ్డి రితి, జాగర్త దెకన.

2 ఎక్కిలోచ జాడ్లు అన్నెక్కో వయితి రితి, ఎక్కిలోక ఎక్కిలో తోడు తా. దస్సి కెర్లె, ప్రేమచి రిసాచి క్రీస్తు దిలి *ముక్కిమ్ ఆగ్గు నెరవెర్చుప కెర్తె.

3 కిచ్చొక మెలె, కో జలెకు ఆరిచొ జాఁ తా, జోక జోయ్యి నిసాన్లో మాన్సు మెన ఉచరంతయ్ గే, జోక జోయ్యి మోసిమ్ కెరంతయ్.

4 జాకయ్, ఎత్తి మాన్సు జోవయించి సొంత కామ్ పరిచ్చ కెరన్సు, చి అన్నె మాన్సుల్చ కమెచి రిసా తీర్పు నే కెర్తె, సొంతయ్ కామ్ దెకన జాక 'చెంగిల్' గే 'గార్' గే చిననుక జయెదె, చి 'చెంగిల్' మెలె, జో సర్ద జంక జయెదె.

5 కిచ్చొక మెలె, సొంత కామ్చి రిసా ఎత్తి మాన్సుక జోచి పూచి.

6 ప్రబుచి కోడు సంగితోసాక సికితన, జోక తిలిన్ ఎత్తితె సికడ్డనక చెంగిల్ వాట దెంక అస్సె.

7 తుమ్ మోసిమ్ కెరన నాయ్. దేముడుక కొంకడ్డి రితి కెర్తె జినుక నెంజె. కిచ్చొక మెలె, ఎత్తి మాన్సు కిచ్చొ రగుమ్ బి గలెదె గే, దస్సిచి పంటో లాయెదె.

8 సొంత ఆగ్చ ఆసల్ జర్గు కెరంతి రితి బి కో గలుల గే, జా దెర్తి పంటో కిచ్చొ లాయిల మెలె, జోవయించి సొంత నాసెనుమ్. గని, దేముడుచి నుద్ది తిలి ఆత్మక చి బి కో గలుల గే, జా దెర్తి పంటో కిచ్చొ లాయిల మెలె, పరలోకుమ్తె బెద కెయ్చక తెయ్చక చెంగిల్ జితిసి.

9 అన్నె, చెంగిల్ కమె కెరుక బద్దుకుమ్ జమ నాయ్. కిచ్చొక మెలె, చెంగిల్ కమె కెరుక మదెనె అమ్చి మెన్సు నే బగిలె, జా చెంగిల్ పంటో లాయుమ్దె.

10 జాకయ్, కేన్ వాటు అయ్లె, ఎత్తిజిన్ మాన్సుల్చ చెంగిల్చి కెరుమ, తోడు కెర్తె తమ; ముక్కిమ్క, ప్రబుచి ఉప్పిరి నముకుమ్ తిలి రిసా జోవయించి కుటుంబుమ్ జలనకయ్.

సున్నతిచి రిసా బలవంతుమ్ కెర్తిసిచి రిసా

11 కెర్తి వెల్లో అలవాట్లు తేన్ ఆవ్ సొంత ఆత్మ తేన్ తుమ్క రెగిడ్డసి గే చిన.

12 'యూదుల్ జతి గుర్తుచి సున్నతి తుమ్ కెరన' మెన తుమ్క బలవంతుమ్ కెర్తన కిచ్చొక దస్సి జతతి మెలె, జేచి గవురుమ్కయ్ కెర్తతి. 'ఎక్కి క్రీస్తు సిలువతె మొర్లిన్తెయి అమ్చి రచ్చన' మెన ఒప్పునెగిన, అన్నె మాన్సుల్ జేచి అల్లర్ కెరుల మెనయ్ బియఁ కెర, జేవ్ దస్సి కెర్తతి.

13 పడ్డొ, జేవ్ జా సున్నతి కెరన్లనయ్ కి యూదుల్చ ఆగ్గుల్క నిదానుమ్ కెర్తి నాయ్, గని 'జోవయింక కి అమ్మి మార్చుప కెర్లమ్' మెన గవురుమ్ ఆననుక ఉచరయ్, తుమ్క 'సున్నతి కెరంతు' మెన బలవంతుమ్ కెర్తతి.

14 ఆవ్, జలె, ఎక్కిక పిట్టవ, కిచ్చొ వేరచిచి ఉప్పిరి గవురుమ్ ఉచరనుక నెసి. ఎక్కి అమ్చొ ప్రబు జలో క్రీస్తు సిలువతె మొర్లిన్కయ్ గవురుమ్ ఉచర్తసి. జో మొర అంక పాపుమ్ తెంతో

* 6:2 6:2 మత్తయి 22:37-40, మార్కు 12:28-31.

రచ్చించువ కెర్లి రిసా, ఈంజ లోకుమ్తె తిలిసి ఎత్తి అంక మొర్లి రితి జా అస్సె. ఆవ్ కి ఈంజ లోకుమ్తె తిలిన్కయ్ సిలువ గెలన అస్సి, చి అంచి ఉప్పిరి జా ఎత్తిక కిచ్చొ సెక్తి నాయ్, దస్సిచిక అంక ఆస్ నాయ్.

15 యూదుల్చి గుర్తుచి సున్నతి కెరన తిలె కి లాబుమ్ నాయ్. నే కెరన తిలె కి నస్టుమ్ నాయ్. కిచ్చొ ముక్కిమ్ మెలె, దేముడుచి సుద్ది తిలి ఆత్మ తెన్ నోవర్ జెర్పిలిసి.

16 యేసుక నంపజా నిజామ్చ ఇస్రాయేలులు జల దేముడు నిసాన్ల జోచయ్ మాన్సుల్క, జోచి ఆత్మక జెర్మ జోచి ఆత్మ నే సెక్తిక ఇండిత మాన్సుల్కయ్ జో సేంతుమ్, కన్కారుమ్ దెకున్.

17 జలె, ఈంజ తగుచి రిసా అప్పె తెంతో అన్నె కో అంక అల్లర్ కెర్తు నాయ్. అంచి సత్తిమ్క రుజ్జు కావలె మెలె, యేసుచి నావ్చి రిసా ఆవ్ సైమల్ సేడ్ల మచ్చల్ అంచి అఱి అస్తి.

18 తుమ్చి ఆత్మ తెన్ ప్రబు జలో అమ్చొ యేసుక్రీస్తుచి దయ తా తుమ్క తోడు తవుసు, బావుడ్లు. ఆమేన్†.

ఎపెసియుల్ క రెగిడ్లి

ఉత్త్రమ్

బారిక్ జలో పవులు ఎపెసు పట్టుమ్చ సంగుమ్చక రెగిడ్లి ఉత్త్రమ్.

మొదొల్ కోడు

1 దేముడుచి సెలవచి రిసా క్రీస్తు రచ్చించుప కెర్తొసా జలో యేసుచి సుబుమ్ కబుర్ కామ్ కెర్తి రిసా, జో దిలి అదికారుమ్ తెన్ జోక బారికి జలో ఆవ్ పవులు, *ఎపెసు పట్టుమ్తెచ †క్రీస్తు జలో యేసుక నంపజా, సుద్ది జా జోచయ్ మాస్సల్ జా, జోచి తెడి తా నిదానుమ్ జలనక, రెగిడ్లి ఉత్త్రమ్.

అగ్గె తెంతో దేముడు ఉచర్లి రచ్చన

2 అమ్క అబ్బొ జలో దేముడుచి ప్రబు జలో యేసుక్రీస్తుచి దయ, సేంతుమ్, తుమ్చి ఉప్పిరి తవున్!

3 అమ్చొ ప్రబు జలో యేసుక్రీస్తుక దేముడు జలో అబ్బొన్ జలో దేముడుక జెయ్యి! క్రీస్తుచి అత్తి జో అమ్క దయ కెర, †జోచి రాజిమ్తె అమ్క బెదవ, ఆత్మవరల్ ఎత్తి అమ్క జో దా అస్సె.

4 దస్సి, అమ్క, 'క్రీస్తుచి తెడి జోచి పరలోకుమ్చి సుద్ది జా అంచి మొక్కె పున్నిమ్ జతు' మెన, లోకుమ్ నే జెర్మితె అగ్గె తెంతో జో అమ్క నిసాన్లన్.

5 అగ్గె తెంతో, జోచి ప్రేమక ఉచర, జోచి సొంత ఇస్టుమ్క, 'అంచొ పుత్త్రు జలో యేసుక్రీస్తుచి తెడి జేవే కి అంచ

పుత్తర్లు జవుల' మెన, అమ్క వరుమ్ దిలన్.

6 పూర్తి ప్రేమ జలో పుత్తున్చి అత్తి గవురుమ్ జలి జోచి ఎదివాట్ కిదయ అమ్చి ఉప్పిరి జో తిలన్; జోచి నావ్ గవురుమ్ జవున్!

7 జో యేసుయి సిలువతె జోచి లోయి గేడవ అమ్చి పాపుమ్ పుంచ, అమ్ కెర్ల పాపల్ చెమించుప కెర, అమ్క *నెతోవ గెల అస్సె;

8 జోచి ఎదివాట్ దయ అమ్చి ఉప్పిరి దేముడు అబ్బొసి తిలి రిసా అమ్క †నెతోవ గెల అస్సె.

9 ఎత్తి అర్దుమ్ చినుత్ బుద్ది తెన్ జో దేముడు అబ్బొసి అగ్గె తెంతో ఉచర్లిసి మదెనె గుట్టు తిలి రితి జా తిలె కి, అమ్ సూన్తి రితి, జో అప్పె బార్ కెర అస్సె.

10 మెలె, క్రీస్తు జలో రచ్చించుప కెర్తొసాక తెద్రవుక మెన, దేముడు ఉచర్ల దీసల్ బెర్తి కాలుమ్క జెయిమ్ కెరిందె మెన జో అగ్గె తెంతో ఉచర్లిసి. కిచ్చొక క్రీస్తు జలో రచ్చించుప కెర్తొసాక జో తెద్రవుక తిలి మెలె, పరలోకుమ్తె తిలిసి ఎత్తి కి, బూలోకుమ్తె తిలిసి ఎత్తి కి ఎత్తి కి జో క్రీస్తుచి తెడి ఎక్కి కట్టు జతి రితి బెదవుక.

11 జోచి సొంత ఇస్టుమ్క ఎత్తి జర్లు కెర్తొ దేముడు 'చెంగిల్' మెన కిచ్చొ ఉచర్తయ్ గే, జా ఎత్తి కచితుమ్ జర్లు జయెదె. 'జర్లు జవున్' మెన అమ్చి రిసా జో ఉచర్లిసి కి జో క్రీస్తుచి అత్తి జర్లు జలి.

12 కిచ్చొ మెలె, జో దేముడుచి గవురుమ్ ఈంజ లోకుమ్తె డీస్తి రితి అమ్ ఇండుక మెన, క్రీస్తుక నంపజా జోవయించి తెడి ధయిరిమ్ జలనక అగ్గెయి తెంతో జోవయించి సెలవ,

* 1:1 1:1 బయ్బిల్ తొలితో రెగిడ్ల సంగుమ్ పుస్తకల్తె ఈంజ కోడుతె ఎపెసు పట్టుమ్తెచి కోడు తయె నాయ్.
 † 1:1 1:1 'క్రీస్తు' మెలె 'తెద్రయిందె' మెన పూర్ణుమ్ ఎత్తి అదికారుమ్ తిలో దేముడు యూదుల్క సంగిలో దొర్కు జలో రచ్చించుప కెర్తొసా. † 1:3 1:3 పరలోకుమ్తె అమ్క బెదితి కోడు, ఈంజ. § 1:6 1:6 అమ్క ఎద్దెరె పున్నిమ్ నెంజలి కి జోచి ఎదివాట్ దయ, ఆరి, అమ్క దిలన్; * 1:7 1:7 నెంజలి 'విడ్డల్ కెర అస్సె', నెంజలి 'రచ్చించుప కెర అస్సె'. † 1:8 1:8 నెంజలి 'విడ్డల్ కెర అస్సె', నెంజలి 'రచ్చించుప కెర అస్సె'.

అగ్గెయి తెంతో జా వరుమ్ దా అమ్క జోయ్యి నిసాన అస్సె.

13 సత్తిమ్ తిలి †కోడు, మెలె తుమ్ యూదుల్ నెంజిలన కి రచ్చించుప జతి వరుమ్ దొర్కు జతి సుబుమ్ కబుర్ తూమ్ కి సూన నంపజా అయ్లి రిసా, 'జా వరుమ్ దిలి రుజ్జుక అంచ మాన్సుల్చి పెట్టి అంచి ఆత్మ దెయిందె' మెన దేముడు ప్రమానుమ్ కెర తిలి జోచి సుద్ది తిలి ఆత్మ తుమ్చి పెట్టి కి దా తుమ్క 'అంచయ్' మెన జోచి ముద్ద దా అస్సె.

14 అమ్ నంపజలనక కీనెతోవ గెల అస్సి, చి పరలోకుమ్తె బెదితి వాట తుమ్క కచితుమ్ దొర్కు కెర అస్సి మెనయ్ జో ప్రమానుమ్ కెర్లసి పూర్తి జర్గు జతె ఎదక ఈంజు బజాన్ జయ్దె. ఈంజు ఎత్తిచి రిసా జోచి గవురుమ్ డీసెదె.

పవులు ప్రార్దన కెర్లసి

15 ఈంజు తుమ్క జోచి సుద్ది తిలి ఆత్మ దిలి వరుమ్చి రిసా, ప్రబు జలో యేసుచి ఉప్పిరి తుమ్ నముకుమ్ తిలి రిసా, పడ్డో జోచయ్ జల మాన్సుల్ ఎత్తిజిన్క తుమ్ ప్రేమ కెర్లన్చి రిసా అమ్ సూన్చి రిసా,

16 ఆవ్ ప్రార్దన కెర్తె పొది తుమ్చి రిసా అమ్చో దేముడుక అంచి సర్ద సంగుక ములి నాయ్.

17 తుమ్చి రిసా ఆవ్ కిచ్చొ ఆన జా ప్రార్దన కెర్తసి మెలె, అమ్చో ప్రబు జలో యేసుక్రీస్తుక దేముడు జలో, పరలోకుమ్చి ఉజ్జె జలో అబ్బొన్ జలో, గవురుమ్ తిలో దేముడు, తుమ్చి పెట్టి జోచి ఆత్మ తా కామ్ కెర కెర, జోక తుమ్ పూర్తి జాన్తి రితి తుమ్క బుద్ది గ్యానుమ్ దెవును, దొర్కు జలిసి దెకవును.

18 తుమ్చ ఆత్మ అంకివో దస్సి చెంగిల్ దెకిత్ రితి జలె, తుమ్ *కిచ్చొ దయిరిమ్ జతి రితి జో తుమ్క నిసాన, దేముడుక నంపజలన తెన్ 'తుమ్క దెయిందె' మెన జో ప్రమానుమ్ కెర్లి పరలోకుమ్చి ఎదివాట్ సామానుమ్ వాట కీసిచి గే, కెర్ది విలువచి గే,

19 పడ్డో, అమ్ నంపజలనచి పెట్టి జోచి కామ్ కెర్తి ఆత్మనెక్తి కెర్ది సెక్తి గే, జా ఎత్తి తుమ్ సికితె, జయ్యి అంచి ఆన.

యేసుక దేముడు అబ్బొసి అదికారుమ్ దిలిన్

20 క్రీస్తుతెయ్ జోచి జా ఎదివాట్ సెక్తి తిలిసి ముక్కిమ్క కత్తె నెరవెర్చుప కెర్లన్. జోచి సెక్తిచి రిసాచి జా కామ్ ఎత్తి కీసి ముక్కిమ్క జెయిమ్ కెర్లన్ మెలె, క్రీస్తుక అన్నె జియడ ఉట్టవ, పరలోకుమ్తె కడ నా, ఒత్త జోచి సొంత ఉజిల్ పక్కయ్ గవురుమ్ తెన్ వెసవాన అస్సె.

21 ఒత్త జోక అబ్బొసి కెర్ది గవురుమ్ దిలన్ మెలె, †కిచ్చొ అదికారుమ్ తిలిసి ఎత్తిచి ఉప్పిరి, ఎత్తి[‡]అదికారుల్చి ఉప్పిరి, కీసెక్తివోచి ఉప్పిరి, *ఎలుప కెర్తి ఎత్తి సెక్తి అదికారుమ్ తిలనచి ఉప్పిరి, జేవ్ మాయలోకుమ్చ జలెకి, కేన్ లోకుమ్చ జలెకి, కిచ్చొ నావ్ తిలిసి నే పిట్టె ఎత్తిచి ఉప్పిరి, ఈంజు ఉగుమ్తె జర్గు జతిన్చి ఉప్పిరి కి, జెతి ఉగుమ్తె జర్గు జతిన్చి ఉప్పిరి కి, జోక అబ్బొసి ఎత్తిచి ఉప్పిరి వెల్లో కెర అస్సె.

22 జెర్మయ్లి ఎత్తి క్రీస్తుచి చట్టె అబ్బొసి తియ, నంపజలనక కిచ్చొ కామ్చి రిసా జలె కి, క్రీస్తు బోడి జతి రితి జో కెర అస్సె.

‡ 1:13 1:13 నెంజిల 'కబుర్'. § 1:14 1:14 7 నంబరచి ఎట్టెచి కోడు దెక. * 1:18 1:18 రోమియలు 8:18-25, కొలోస్సియిల్ 1:5 దెక. † 1:21 1:21 జేవ్ పొదులె ఈంజేవ్ చెత్తర్ కొడో ఎత్తి సగుమ్ సుట్టు దూతల్, బూతల్ ఆత్మల్ గట్టక సంగుల. ‡ 1:21 1:21 జేవ్ పొదులె ఈంజేవ్ చెత్తర్ కొడో ఎత్తి సగుమ్ సుట్టు దూతల్, బూతల్ ఆత్మల్ గట్టక సంగుల. § 1:21 1:21 జేవ్ పొదులె ఈంజేవ్ చెత్తర్ కొడో ఎత్తి సగుమ్ సుట్టు దూతల్, బూతల్ ఆత్మల్ గట్టక సంగుల. * 1:21 1:21 జేవ్ పొదులె ఈంజేవ్ చెత్తర్ కొడో ఎత్తి సగుమ్ సుట్టు దూతల్, బూతల్ ఆత్మల్ గట్టక సంగుల.

23 నంపజలన మొత్తుమ్క 'క్రీస్తుచి ఆగ్' మెనుక జయెదె. జోచి ఆగ్ పూర్తి జంక ఎత్తి పూర్తి కెర్తొసా జొయ్యి.

2

దేముడుచి దయకయ్ క్రీస్తు తెన్ ఏలుప కెర్తిసి

1 తుమ్ కెర్ల తప్పుల్ పాపల్చి రిసా తుమ్ మొర తతికయ్, తుమ్క జో, క్రీస్తు తెన్ జీవ్ కెర దిల్వన్.

2 అగ్గె పాపుమ్ ఇండితె తా, ఈంజ లోకుమ్చి బుద్దిచ, ఈంజ ఉగుమ్చ కమొతె తుమ్ గెతె తిలదు. పాడ్ జల ఆత్తుల్ బూతల్ గట్ట ఎత్తిక ఏలుప కెర్తొ నయ్తాన్చి పట్టి గెతె తిలదు. దేముడుచి కోడ్డు కెర్తొక నెసిత ఎత్తిజినచి వెట్టి జో నయ్తాన్చి ఆత్తు జోవయించి కామ్ కెర్తయ్.

3 దేముడుచి కోడ్డు కెర్తొక నెసిత ఎత్తిజినచి రితి ఆమ్ కి అగ్గె మొర తా, పాపుమ్చ ఆసల్ జితె తా, అమ్చి ఆగ్చి ఆసల్, అమ్చ సొంత వేర వేర బుద్దుల్చ ఆసల్ రితి ఇండితె తిలమ్చి రిసా, లోకుమ్చ మాములుమ్ ఎత్తిజిన్ కిసి సొంత సెక్తిక దేముడు దెతి సిచ్చతె గెతి జెర్తున్ తెన్ అస్తి గే, ఆమ్ కి దస్సి తిలమ్.

4 గని, దేముడు ఎదివాల్ కన్కారుమ్ దెకితోసాచి రిసా, జోచి ఎదివాల్ ప్రేమ అమ్చి ఉప్పిరి తియ,

5 అమ్ కెర్ల పాపల్చి రిసా, అమ్ ఆత్తుక మొర్లన జలెకి, క్రీస్తు అన్నె జిలిన్ తెన్ అమ్క జియడ్లన్. పూర్తి జోచి దయచి రిసా తుమ్ *రచ్చించుప జలదు.

6 జలె, దేముడు అబ్బొసి క్రీస్తు యేసుక జియడ్లిన్ తెన్ అమ్క జియడ, జోచి పరలోకుమ్చి రాజిమ్తె కిసి వెగడ ఒత్త వెనడ్లన్. ఆమ్ జోచయ్ జలి రిసా,

అమ్క కి జా రాజిమ్తె వెగడ, అమ్క కి ఒత్త వెనడ్లి రితి కెర అస్సి. మెలె, ఆమ్ కి జో తెన్ జోచి †రాజిమ్తె ఏలుప కెర్తొనుమ్.

7 జో దేముడు కిచ్చొక అమ్క దస్సి దయ కెర అస్సి మెలె, యేసుక్రీస్తు కెర్లిన్ ఎత్తి తెన్ జో అమ్క ఎదివాటు దయ కెర్తిసి. పడ్డొ జెత ఉగల్తె పలితుమ్ దెర, జోవయించి దయ కెర్తి మొచ్చుచి గే రుజ్జు దెకయెదె. జోచి దయ కెర్తి గే కో మీనుక నెత్తిర్తి.

8 ముక్కిమ్క కిచ్చొ అర్దుమ్ తుమ్ కెరన మెలె, తుమ్ నయ్తాన్చి రాజిమ్ తెంతొ రచ్చించుప జలిసి తుమ్ కిచ్చొ కెర్లిన్చి రిసాచి నెంజె; పూర్తి దేముడుచి దయచి రిసాచి కామ్ జా. పడ్డొ, జో దయ కెర్తిసి తుమ్ నంపజా నజన్తికయ్, తుమ్క దొర్కు జలి.

9 కేన్ మాన్సు కెర్ల కిచ్చొ కమొచి సెక్తిక జో మాన్సు రచ్చించుప జంక నెత్త. నెంజిలె, జోవయించ సొంత కమొచి సెక్తిక రచ్చించుప జంక జతి జలె, మాన్సుల్ పులుక జతి. గని జోవయించి సొంత సెక్తిక కో నెత్తిర్తి, చి పులుక నెంజె.

10 అమ్ ఆత్తుక జిలిసి జొయ్యి అమ్క నొవర్ జెర్తయ్లిసి. యేసుక్రీస్తుచి అత్తి దేముడు ఆత్తుక అమ్క కిచ్చొక నొవర్ జెర్తయ్లో మెలె, అమ్క 'సత్తిమ్ ఇండుతు' మెన, జో అగ్గె తెంతొ ఉచర్ల కమొ అమ్ నిదానుమ్ కెరుకయ్ మెనయ్ దస్సి కెర్తొ.

యూదుల్ నెంజిలన అప్పె పాసి జా అస్తి

11 జాకయ్, తుమ్ పచ్చునాయ్. కిచ్చొ మెలె, ఆగ్గుక దెకిలె తుమ్ యూదుల్ నెంజిలన జస్తి. తుమ్ యూదుల్ నెంజిలనక యూదుల్ తిలన అగ్గె,

* 2:5 2:5 నెంజిలె, పాపుమ్ తెంతొ, తుమ్చి పాపుమ్చి రిసాచి సిచ్చ తెంతొ, ఆత్తుమొర్కు తెంతొ. † 2:6 2:6 ఆకర్క పరలోకుమ్తె జోవయింతెన్ ఏలుప కెర్తొమదె. పరలోకుమ్ జోవయించి ఆత్తురాజిమ్, చి జా రాజిమ్తె అమ్ బెదయ్ జలి రితి జా బెద అస్సుమ్, చి అప్పె తెంతొ కి జోవయింతెన్ ఏలుప కెరుక దెర అస్సుమ్ మెనుక జయెదె. డీసయ్లిసి 5:10, 20:6 కి దెక.

‘దేముడు దిలి అమచి గుర్తుచి సున్నతి కెరంతి నాయ్, చి ఆత్మక సుద్ది జతి నాయ్’ మెన, రితి ఆగి మాన్సులి కెర్తి జా గుర్తు కెర్సు నాయ్ చి రిసా తుమ్క నిస్కారుమ్ దెకిత్ తిల.

12 జలె, తుమ్ కిచ్చొ పచ్చ నాయ్. మెలె, జా పొది క్రీస్తుక దూరి తిలదు, పడ్డొ ‘అమచి ఇస్రాయేల్చ ప్రెజల్’ మెలి దేముడుచి రాజిమతె తుమ్ బెదుక నెంజిలినీ, అన్నె, జో దేముడు ప్రమానుమ్ కెర్ల తెదొడచ నే పెట్ట సరిగచి కోడచ్చ వరల్తె తుమ్క వాట తిలి నాయ్, చి జోచి రచ్చున తుమ్క నే దొర్కు జలి రిసా, ఈంజ లోకుమతె దేముడు నెంజిలన జా తిల.

13 గని అప్పె, యేసుక్రీస్తు ఈంజ లోకుమచ చి పాపుమ్ వయ జోచి లోయి సువ దా జా పాపుమ్ వుంచినచి రిసా, తుమ్ అగ్గె జోవయింక దూరి తిలసక దేముడుక జో యేసు పాసి కెర అస్సె.

యూదుల్క యూదుల్ నెంజిలసక కి ఎక్కి రాజిమతె బెదయ్లినీ

14 ‘ఆమ్ యూదులి’ మెన, ‘తుమ్ యూదుల్ నెంజిలన’ మెన, అమ్ యూదుల్చి దేముడుచి గుడితె అమ్క తుమ్క † అడ్డు కెర్తి అగ్గుల్ తయెదె. జలె, క్రీస్తుయి మొర అమ్ దొన్ని జట్టుచక మదెనె జా అమ్క దొర్కు జలి సేంతుమ్ జొయ్యి జా, అమ్క తుమ్క అడ్డు తిలి విరోదుమ్ జొయ్యి సేడవ అస్సె. జలె, జో దస్సి సేంతుమ్ కెరవ, అము తూమ్ ఎక్కి జట్టుచ జతి రితి కెర అస్సె.

15 కీసి మెలె, పూర్ణమచ ఆగ్గుల్క ఆడ్రల్క నంప కెర్తి రితి పొన, అప్పె తెంతొ కామ్క నెంజిలి, అగ్గె దొన్ని జట్టు జల అమ్ మాన్సుల్క సేంతుమ్ కెరయ్లి రితి, ‘అంచె తెడి ఎక్కి జట్టు జతు’ మెన, ఈంజ లోకుమచ చి పాపుమ్ జొయ్యి జోచి అగి వయన, అర్చితుమ్ జలన్.

16 ‘జేవ్ దొన్ని జట్టు తెంతొచ మాన్సుల్ అంక నంపజా ఎక్కి ఆగ్గె జతి రితి దేముడు అబ్బొ తెన్ అన్నె బెదయ్ జతు’ మెన యేసు సిలువతె మొర్లి కామ్ తెన్ అమచి తుమ్చి అగ్గెచి విరోదుమ్ గెచ్చవ గెలన్.

17 అన్నె, తుమ్ దేముడుక దూరి తిలసక కి, దేముడుక పాసి రిత జల అమ్ యూదుల్క కి, జో సేంతుమ్ దెత్తినచి రిసా బోదన కెరుక కి అయ్లన్.

18 మెలె, యేసుచి అత్తి తుమ్క కి అమ్క కి జోచి అబ్బొన్చి ఎక్కి ఆత్మ దొర్కు జా అస్సెచి రిసా, తూమ్ కి ఆమ్ కి దేముడు అబ్బొన్ తెన్ బెద ఎక్కి జట్టు జంక వాట్ అయ్లి.

19 జలె, ఈంజ ఎత్కిచి రిసా తుమ్ అప్పె వేర మాన్సుల్ నెంజున్. తూమ్ కి దేముడుచి గేర్తె బెద, అమ్ నంపజలన్ తెన్ జోచయ్ మాన్సుల్ జా, తూమ్ కి దేముడుచి రాజిమచ జా అస్సెన్.

20 జోచి గేర్క పునాది కిచ్చొ జయెదె మెలె, సుబుమ్ కబుర్ సంగిత జోచ బారికుల్, చి జోచి ఆత్మసెక్తిక జోచ కబుర్లు సంగితన. జా కెర ఎత్కిక బోడిపత్తుర్ కొన్నొ మెలె, యేసుక్రీస్తు.

21 జా గేరు మొత్తుమ్ జోచి సెక్తిక బెద, ప్రబు తెన్ టీచ, దేముడుచి సుద్ది తిలి గుడి జతి రితి వడ్డితయ్.

22 దేముడు జతి జా దేముడుచి సుద్ది తిలి ఆత్మ గుడి జతిన్తె తూమ్ కి క్రీస్తుచి తెడి తా వాటల్ జా బెద బండుక అస్సెన్.

3

యూదుల్ నెంజిలసతె సుబుమ్ కబుర్ సూనవుక ప్రబు పవులుక తెద్రయ్లినీ

1 జలె, తుమ్ యూదుల్ నెంజిలసకయ్ సుబుమ్ కబుర్ ఆవ్ సూనవుక మెన యేసుక్రీస్తు అంక తెద్రయ్లి. తుమ్క సూనయ్లి రిసా,

† 2:14 2:14 యూదుల్చి దేముడుచి గుడితె నిజమి దస్సి అడ్డు కెర్తి కోట తిలి.

అంక, అమ్చ యూదుల్ *జేలి కెరన అస్తి.

2 తుమ్కయ్ 'సుబుమ్ కబుర్ నూన నంపజా అంచి ఆత్మగేర్తె జేవ్ కి బెదుత్' మెనయ్. దేముడు జోచి దయచి రిసా అంచి అత్తి జా సుబుమ్ కబుర్ నూనయ్తి కామ్ సార్ప కెర్లెన్చి రిసా తుమ్ నూన అస్సున్.

3 పడ్డొ, జోచి జా గుట్టు జా తిలిసి ప్రబు సొంతయ్ అంక †దెకయ్లన్ మెన కి, నూన అస్సున్. ‡ఈంజ గుట్టుచి రిసా ఇదిల్ కొట్టు సంగ ఈంజ ఉత్తమతె అగ్గె రెగ్గ అస్సి.

4 ఈంజ తుమ్ సదు కెర్లె, క్రీస్తుచి గుట్టు తిలిసిచి రిసా ఆవ్ జాన్లిసి తుమ్ అర్దుమ్ కెరంతె.

5 జా గుట్టు, జలె, అగ్గెచ ఉగల్తె ఈంజ లోకుమ్చ మాన్సుల్క జాన్తి నాయ్. గని జోచి సుద్ది తిలి ఆత్ తెన్ దేముడుచి సుద్ది జల కబుర్లు సంగితనక, జోచి రిసాచ బారికుల్క, క్రీస్తు జా గుట్టు అప్పె జానవ అస్సి.

6 జా గుట్టు కిచ్చొ మెలె, క్రీస్తుక నంపజల యూదుల్ నెంజిలన కి అమ్చి తెన్ దేముడు దెతి రచ్చన వాట నజన్తి వాటు అయ్లిసి. సుబుమ్ కబుర్ నూనయ్లి తెంతొ, జేవ్ కి క్రీస్తుక నంపజా దేముడుచ పుత్తర్లు జా క్రీస్తుచి కిఆగ్ జతినతె బెద, క్రీస్తు జలొ యేసుచి తెడి జేవ్ తిలి రిసా, దేముడు ప్రమానుమ్ కెర్లెసి ఎత్కితె జోవయింక కి వాట దొర్కు జా అస్సి.

7 అంచి పెట్టి కమొ కెర్లె జోచి ఆత్మసెక్కిచి రిసా, దేముడు అంక దిలి జోచి దయక

వరుమ్చి రిసా ఆవ్ ఈంజయ్ సుబుమ్ కబుర్ నూనయ్తో సేవ కెర్తొసా జలయ్.

8 జోచయ్ జల మాన్సుల్ మొత్తుమ్తె తొక్కి విలువచచి కంట ఆవ్ అన్నె తొక్కి విలువచొ బలెకి, జోచి దయక జో అంకయ్ దిలన్. క్రీస్తుతె దొర్కు జతి పరలోకుమ్చ సామ్సారుమ్ కెర్ది గే, కేన్ మాన్సు పూర్తి అర్దుమ్ జంక నెతిర్లె కి, తుమ్ యూదుల్ నెంజిలనక ఆవ్ బోదన కెరుక మెనయ్, జో అంక నిసాన్లన్.

9 అన్నె, తుమ్ యూదుల్ నెంజిలనక కి జో రచ్చన దొర్కు కెర్లెన్చి రిసాచి ఎత్కి జెర్మయ్లొ దేముడు అగ్గెచ ఉగల్తె లుంకడ్డి గుట్టు ఈంజ లోకుమ్ ఎత్కిచ అర్దుమ్ కెరంతి రితి ఆవ్ నూనవుక నిసాన్లన్.

10 కేన్ లోకుమ్చ *ఆత్మల్ దూతల్ బూతల్, ఎత్కి కి, యేసుప్రబుక నంపజలన బెదిలిసి మొత్తుమ్క దెకిలె, దేముడుచి ఎదివాల్ సత్తిమ్ కెర్ది గే, కిసి నెరవెర్పువ జతయ్ గే, చినుతు మెనయ్, జోయ్యి అంక ఈంజ కామ్ దా అస్సి.

11 తుమ్ యూదుల్ నెంజిల నంపజలన కి జోచి ఆత్మగేర్తె బెదితినక 'జర్లు కెరిందె' మెన దేముడు అగ్గెయి తెంతొ ఉచర్లెసి అమ్చొ ప్రబు జలొ యేసుక్రీస్తుచి అత్తి †జర్లు కెర్లె.

12 'ఈంజొ యేసుక్రీస్తు అమ్చి పాపుమ్ గెచ్చయ్తి అర్పితుమ్ జలి రిసా, అమ్ జోక నంపజలి రిసా, లాజ్ నెంజితె దేముడుతె గెచ్చుమ్దే' మెన అమ్క పూర్తి దయిమ్ అస్సి.

13 జాకయ్, తుమ్క ఆవ్ సుబుమ్

* 3:1 3:1 రోమ్ పట్టుమ్తె జో జేలి జా తిలి పొది ఈంజ ఉత్తమ పవులు రెగ్గొ, మెన ఒగ్గెజన్ ఉచర్తె. బారికుల్ 28:16, 30, 31 దెక. కైసరియతె కి జేలి జా తిలొ; బారికుల్ 23:25, పిలిప్పితె కి; బారికుల్ 16:23, చి యెరూసలేమ్తె కి; బారికుల్ 21:33 జేలి జా తిలొ. ఎపెసుతె కి మెన నగమ్జెన్ ఉచర్తె, గని రుజ్జు నాయ్. పిలిప్పితె చి యెరూసలేమ్తె జేలి జలిసి తొక్కి దీనల్చి. † 3:3 3:3 బారికుల్ 9:3-6, 15, గలతియల్ 2:9 దెక. ‡ 3:3 3:3 1:9, 10 చి 2:11-22 దెక. § 3:6 3:6 రోమయల్ 12:4, 5, కొరింధల్ 1 నంబర్ ఉత్తమ 12 అధ్యయిమ్, ముక్కిమ్క 12:12, చి ఎపెసు 1:23 దెక. * 3:10 3:10 నెంజిల, 'అదికారుమ్ తిలన, అదికారుల్ ఎత్కి కి'. ఇన్నె 'అదికారుమ్ తిలన', 'అదికారుల్' మెలె, ఆత్మల్ దూతల్ బూతల్చి అర్దుమ్ కెరనుక జయెదె. 1:21 దెక చి 1:21చి ఎట్టొచి కొడు దెక. † 3:11 3:11 మెలె, యేసు అమ్చి పాపుమ్ వయ గెచ్చవ జీవ్ జా జోవయింది ఆత్మ దొర్కు కెర్లెన్ తెన్ని జర్లు కెర్లె.

కబుర్ సూనయ్లి రిసా ఆవ్ అప్పె జేలి జా సైమల్ సేడ్డిన్చి రిసా తుమ్ బమ్మ జా అన్మానుమ్ జా నాయ్. తుమ్ యూదుల్ నెంజిలసకయ్ 'చెంగిల్ జతు' మెనయ్ ఇసి జలయ్. జాకయ్ తుమ్ సర్ద తెన్ తా.

దేముడుచి గవురుమ్ డీస్తై తవును! ఆమేన్.

4

తుమ్ ఎక్కి ప్రేమతె ఇండ

పవులు ప్రార్దన కెర్లిసి

14 జలె, పరలోకుమ్తె కి బూలోకుమ్తె కి కేన్ కుటుంబుమ్చ జలెకి, దేముడు అబ్బొనచి రిసాయి జేవ్ ఎత్కిక నావ్ అస్సె.

1 జలె, ఆవ్ పవులు, ప్రబుచి సుబుమ్ కబుర్ సూనయ్లి రిసా *జేలి జలొసా, తుమ్క కిచ్చొ బలవంతుమ్ జా సంగితసి మెలె, ప్రబు తుమ్క నిసాన తుమ్ జోచయ్ జా సత్తిమ్ ఇండితి రిసా తుమ్క బుకారా అస్సె. జో తుమ్క బుకార్లి వరుమ్క విలువ దెకితి ఎదిలి సత్తిమ్తె తుమ్ జీవ.

15 మొగ్రల్ టిక జోవయింక ఆవ్ కిచ్చొ మెన ప్రార్దన కెర్లిసి మెలె,

2 కీసి మెలె, తుమ్క తూమ్ గవురుమ్ నే ఉచరంతె మెత్తన తా, సేంతుమ్ తెన్ అల్లర్ ఓర్పుప జా, ఎక్కిలోక ఎక్కిలో ప్రేమ తెన్ తుమ్ జోవయింక ఓర్పుప జా,

16 జోచి †ఎదివాల్ సత్తిమ్క, తుమ్చ అత్తులతె జోచి ఆత్మ తా, తుమ్క పూర్తి డిట్టుమ్ కెర్పు మెన,

3 ఎక్కి ఆత్మ, ప్రబుచి ఆత్మ తా, కట్టు తెన్ తతి ఆన తెన్ తా, దస్సి కట్టు తెన్ తతి రితి తుమ్ దెకన. ప్రబుచి సేంతుమ్ తుమ్చి పెట్టి తిలె, దస్సి ఎక్కి కట్టు తెన్ తస్సె.

17 అస్సె, తుమ్చి నముకుమ్ తెన్ చి జోచి ఆత్మ తెన్ తుమ్చి పెట్టి క్రీస్తు జివున్ మెన, ఆవ్ ప్రార్దన కెర్లిసి. దస్సి, జోచి ప్రేమతె చెర్రి గలిల్ రితి జస్సె, జోచి ప్రేమతె తుమ్ డిట్టుమ్ జస్సె,

4 కిచ్చొక మెలె, ప్రబుక నంపజల అమ్ ఎత్కిజిన్ జోచి ఎక్కి ఆగ్ జా అన్నుమ్, అమ్ ఎత్కిజిన్చి పెట్టి జోచి ఎక్కి ఆత్మ అస్సె, చి అమ్చి తెన్ పరలోకుమ్తె గెతి వరుమ్ తుమ్క దొర్పు జవున్ మెన దేముడు తుమ్క బుకార్లి రిసా అమ్ ఎత్కిక ఎక్కి ఆన.

18 చి ప్రబుచొ సుద్ది జలన ఎత్కిజిన్ తెన్ తుమ్క కిచ్చొ సెక్తి జెయెదె మెలె, జోచి ప్రేమ కెర్ది రూండు కెర్ది దీగు గే, తుమ్క అర్దుమ్ జెయెదె.

5 పడ్డొ, అమ్ నంపజలన ఎత్కిజిన్క అస్సె కిచ్చొ మెలె, అమ్క ఎక్కిలో ప్రబు, ఎక్కి నముకుమ్, ఎక్కి బాప్తిసుమ్.

19 జలె కో జానుక నెతిరి క్రీస్తుచి ఎదివాల్ ప్రేమ తుమ్ జాన్తె, చి దేముడు తుమ్చి పెట్టి బెర, తుమ్క పూర్తి కెరెదె. జయ్యి ఎత్కి అంచి ఆన.

6 అమ్ ఎత్కిజిన్క ఎక్కిలో దేముడు, ఎక్కిలో అబ్బొ. ఎత్కిచి కంట వెల్లో జలొసా, జో. జో ఎత్కితెయి అస్సె, జోచ పైజల్ ఎత్కిజిన్చి పెట్టి జో జితయ్.

20 అప్పె, జలె, అమ్చొ దేముడుక ఒగ్గర్ ఒగ్గర్ గవురుమ్ కలుగు జవున్! అమ్ నజిల్ కంట, అమ్ ఉచర్లి కంట, ఒగ్గర్ చెంగిల్ కెరుక తెరితోసా జో. కీసి మెలె, జోవయించి ఆత్మసెక్తి అమ్చి పెట్టి కామ్ కెర కెరయ్ అమ్క చెంగిల్ కెరెదె!

21 జాక, ఉగుమ్చి ఉప్పిరి ఉగుమ్క, కెయ్క తెయ్క నే పిట్టె, కీక్రీస్తు జలొ యేసుతె, చి జోచి ఆగ్ జల జోక నంపజలన మొత్తుమ్ ఇండితిన్తె

ప్రబుచి ఆత్మ జోచ మాన్సుల్చి పెట్టి తా

‡ 3:16 3:16 నెంజిలె 'ఎదివాల్ సామ్నారుమ్క'. § 3:21 3:21 1:1 చి ఎట్టొచి కోడు దెక. * 4:1 4:1 3:1 చి ఎట్టొచి కోడు దెక.

§ 3:21 3:21 1:1 చి ఎట్టొచి కోడు దెక. * 4:1 4:1

7 పడ్డొ క్రీస్తుచి దయచి రిసా జో అమ్ ఎత్కిజిన్ ఎక్కెక్క జోచి ఆత్మనెక్కి వరుమ్ దా అస్సె. కెడ్డి సెక్కి దెయెదె గే, కీసి సెక్కి దెయెదె గే, జోచి దయ.

8 జాకయ్, పూర్గుమ్ దేముడుచి కొడతె రెగ్గయలి రితి,

†“జోవయించ విరోదుమ్ సుదల్క జిన జేలి కెర్లె రితి జా,

జో పరలోకుమ్తె గెచ్చు జోవయించ మాన్సుల్క ఆత్మవరల్ దిలన్” మెన అస్సె.

9 జోక ‘ఒత్త వెగ గెలన్’ మెలె, కిచ్చొ అర్దుమ్ మెలె, జో తొలితొ జోచి గవురుమ్ ముల పరలోకుమ్ తెంతొ ఉత్త జా, బూలోకుమ్చి కంట ఎట్టొక మెలి రితి ఉట్ట జా అయ్లో.

10 ఉత్త జా అయ్లోసా అన్నె ఎత్కిచి కంట ఉప్పిర్ వెగిల్ రితి జా, పరలోకుమ్తె అన్నె వెగ గెలన్; జో తిలిన్క జోచి సెక్కిక ఎత్కిక పూర్తి కెర్తి రిసా.

11 జో దిల ఆత్మనెక్కి వరల్ కిచ్చొ కిచ్చొ మెలె, జోచ మాన్సుల్ సగుమ్జిన్ బారికుల్ జంక మెన జో నిసాన, పడ్డొ †జోచి ఆత్మనెక్కిక జోచ కబుర్లు నూన సంగితి రిసా అన్నె సగుమ్జిన్క నిసాన్లన్. పడ్డొ జోక నేన్ల మాన్సుల్క జోచి రిసా సికడ్డి రిసా, అన్నె సగుమ్జిన్క నిసాన్లన్. పడ్డొ, జోక నంపజలనక గొప్పుడు జా సికడ్డి రిసా అన్నె సగుమ్జిన్క నిసాన్లన్.

12 జేవ్ వేర వేర సెక్కివొ జోచయ్ జల మాన్సుల్క కిచ్చొక జో దా అస్సె మెలె, జోచి జేవ్ కెర్తి సేవక సెక్కి తంక, పడ్డొ, క్రీస్తుచి ఆగ్గ పూర్తి జతి రితి నంపజలన మొత్తుమ్ బెదితిసి పూర్తి జంక, చి

13 అమ్ ఎత్కిజిన్ ఎక్కి నముకుమ్ జా దేముడు పుత్తున్చి రిసా ఎక్కి రితి

జాన, అమ్ పూర్తి ఆత్మవలితుమ్ దెర్తి రితి ఆత్మక పూర్తి వడ్డిల్ రితి జా, క్రీస్తు కీసి సత్తిమ్క పూర్తి జా అస్సె గే, అమ్ కి దస్సి పూర్తి జంక.

14 ఆత్మక దస్సి వడ్డిలమ్ మెలె, బాలబోదల్చి రితి అమ్ పొరపాట్ జతె తంక నాయ్. కో నొవి కోడు సంగిలె నంప కెర, కో వేర కోడు సంగిలె నంప కెరుక జతె తా, మాన్సుల్ అవ్వొ ఉచర్ల మోసిమ్ కొడొ నూన్తె తా, జోవయించ మాయకమొక నంపజా, వాడుక ఇత్తల్ ఒత్తల్ గెత్తె కెర్తల్ రితి జంక నాయ్. గని, ప్రబుచి తెడి ఆత్మక పూర్తి వడ్డిలమ్ మెలె, ఇత్తల్ ఒత్తల్ గెత్తె తము నాయ్, గని ఎక్కి నిదానుమ్ తెన్ తవ్దె.

15 అమ్ దస్సి ఇత్తల్ ఒత్తల్ నే గెతి రితి జంక మెలె, పూర్తి జంక మెలె, పూర్తి ప్రేమ తెన్ ఎక్కిలోక ఎక్కిలో ఎక్కి సత్తిమ్ సంగితె తంక, చి బోడి జలో క్రీస్తుచి ఆత్మతె బెద, ఎత్కితె బుద్ది జతి రితి ఆత్మక అమ్ వడ్డుక.

16 క్రీస్తు అమ్క బోడి జయెదె, చి జోచి ఆగ్గచ వాటల్ కిచ్చొ జవుల మెలె, అమ్ జోచి ఆగ్గచ వాటల్ మొత్తుమ్ జోచి తెడి తా జోచి సెక్కి తెన్ చెంగిల్ కట్టు తెన్ తా అమ్ ఎక్ఎక్ల వాట, అమ్క దిల కమొ నిదానుమ్ కెర్తి తిలె, ఈంజ ఆగ్గ ప్రేమ తెన్ వడ్డ తా, పూర్తి డిట్టుమ్ జయెదె.

అగ్గెచ బుద్దివొ తుమ్ పూర్తి ముల

17 జలె, ప్రబుచి కీనావ్ తెన్ ఆవ్ తుమ్క కిచ్చొ ముక్కిమ్క బలవంతుమ్ కెర సంగితసి మెలె, దేముడుక నేన్ల యూదుల్ నెంజిలన క్రీసి జోవయించి మెన్సు చి వెర్తి ఉద్దెసుమ్లక ఇండితతి గే, తూమ్ దస్సి ఇండ నాయ్.

18 జేవ్చి ఆత్మతె గుడ్డి జా జోవయించి పెట్టి బుద్ది నెంజిలి రిసా దేముడుచి సుద్ది తిలి ఆత్మజీవ్ జతిన్క

† 4:8 4:8 కీర్తనలు పుస్తకము 68:18. ‡ 4:11 4:11 జోవయించి ఆత్మ జోవయించి చోడి పుట్టయ్లె జోవయించ కబుర్లు సంగుల. § 4:17 4:17 నెంజిలె ‘ప్రబుచి తెడి తా’.

దూరి అస్తి, జోవయింక వేరయ్ మాన్సుల్ జా అస్తి. కిచ్చొక మెలె, జోవయించి సత్తిమ్ జేవ్ నెన, రాడ్ జీవచ జా అస్తి.

19 రాడ్ జీవచ జా, కన్కారుమ్ పచ్చు, ఎద్దరె ముద్దొ నే కెరంతె లంజె ఆసల్చ కమొతె పూర్తి గెచ్చు, గర్చ కమొ ఎత్కితె ఆస జా గెచ్చు అస్తి.

20 తుమ్ క్రీస్తుచి తెడి సికిలిసి దస్సి నాయ్;

21 తుమ్ జోచి కోడు సూన్లదు మెలె, జోచి తెడి తా జోతెయ్ సికిలదు మెలె. నాయ్, గెద, యేసుతె సత్తిమ్ అస్సి.

22 జలె, జోచి కోడు సూన్లదు మెలె, జోతె సికిలదు మెలె, ఈంజ లోకుమ్చ మాన్సుల్చి బుద్ది తుమ్ అగ్గె ఇండితె తిలిసి పోన. ముర్కి పాలుమ్ తుమ్ కడ వెంట గెలి రితి జా, అగ్గెచి బుద్ది ముల. జా ఎత్కి బెర్తు ఆసల్చ మోసిమ్లు జా, పూర్తి నాసెనుమ్ కెర్తిసి.

23 జా గర్చి ఎత్కి ముల, తుమ్చి పెట్టి తుమ్చి ఆత్మ తుమ్చి మెన్సుతె నొవర్ జా బుద్ది జా.

24 దేముడు దెతి నొవర్ ఆత్మతె జెర్మున్ గలన జయ్యి రితి ఇండ. జో ఆత్మతె జెర్మున్ మెలె, దేముడుచి రితి జతి రితి జోచి సత్తిమ్క జోచి నుద్దిక తుమ్చి ఆత్మతె నొవర్ జెర్మున్ జలి రితి జతిసి.

కీన బుద్దివొ ముల, కీసి బుద్ది జంక

25 తుమ్ సత్తిమ్ జంక మెన జో తుమ్క నొవర్ జెర్మయ్లో, తుమ్ అబద్దుమ్ ముల ఎత్కిజిన్ ఎక్కిలో తెన్ ఎక్కిలో సత్తిమ్ కొణొ జా. కిచ్చొక మెలె, అమ్ ఎత్కిజిన్ యేసుప్రబుచి ఎక్కి ఆగ్గెక వాటల్ జా అన్సుమ్.

26 తుమ్ కోపుమ్ జంక జలె, పాపుమ్ జతి రితి నెరవెర్పువ కెర నాయ్. కోపుమ్ జలె, పొద్దు నే గెతె నీంతుమ్ జా,

27 నెంజిలె తుమ్చి కోపుమ్ నెరవెర్పువ కెర తుమ్క పాపుమ్

కెరయ్తి రితి సయ్తానుక వాట్ దా తస్సె, పోన.

28 అగ్గె చోర్తె తిలస అప్పె తెంతో చోర్తు నాయ్, గని బాద సేడ్లసక తోడు నెంజిలసక తోడు దెతి రిసా, జోచ అత్తో సత్తిమ్ కమొ కెర కెర, మాములుమ్ కామ్ కెర కెర జియ్ కతు.

29 తుమ్ లట్టబ్బిన్తె కిచ్చొ గర్చి బెదవ నాయ్, గని కిచ్చొ కామ్ తిలె, ఒత్త చెంగిల్క కామ్క జెతిసి కిచ్చొ జలె జయ్యి లట్టబ, చి తుమ్ లట్టబ్బిసి సూనతసతె బుద్ది పలితుమ్ దెరెదె.

30 పడ్డొ, 'సయ్తాన్చి రాజిమ్ తెంతో తుమ్క ఆవ్ నెత్తోవ గెలిసి కచితుమ్ జెయిమి జయెదె' మెన జా రుజ్జుక దేముడు తుమ్చి పెట్టి జోచి నుద్ది తిలి ఆత్మ దా జోవయించి ముద్ద దా అస్సి. జాకయ్, జా ఆరి తిలి రితి దేముడుచి నుద్ది తిలి ఆత్మక దుకుమ్ కెర నాయ్.

31 పెట్టి విన్సుమ్ తతిసి, కోపుమ్ దెకయ్తిసి, కోపుమ్ దెరన్తిసి, గగ్గల్, దూసెనల్, కుస్సిదుమ్ ఎత్కి తుమ్క దూరి కెర.

32 చి ఎక్కిలోక ఎక్కిలో మెత్తన తా, కన్కారుమ్ దెక, యేసుక్రీస్తుచి అత్తి దేముడు అబ్బొసి తుమ్క కీసి చెమించుప కెర అస్సి గే, తూమ్ కి దస్సి ఎక్కిలోక ఎక్కిలో చెమించుప కెర.

5

ప్రబుచి ప్రేమతె తుమ్ ఇండ

1 దేముడుచ ప్రేమ తిల బోదల్ తుమ్ అప్పె జలి రిసా, జో కీసి కెర్తయ్ గే దెక, తూమ్ కి దస్సి కెర,

2 చి క్రీస్తు కీసి అమ్క ప్రేమ తా దేముడు అబ్బొన్క దెతి దొర్కు జలి చెంగిల్ వాసెన తిలి అర్చితుమ్ జా, అమ్చి పాపుమ్ పుంచితి రిసా జోచి సొంత జీవ దా మొర గెలన్ గే, తూమ్ కి దస్సి ప్రేమతె ఇండ.

3 లంజెకమొచి రిసాచ కొణొ జలెకు, లంజెబుద్దిచి రిసాచ కొణొ జలెకు, అన్నె

మాన్యుల్చి అస్తిక ఆస జత కమొచి రిసొచ కొణొ జలెకు తుమ్ లట్టబా కి నాయ్. దసచచి రిసొ ప్రబుచ నుద్ది జల మాన్యుల్ లట్టబుక కి బెదె నాయ్.

4 తుమ్ లట్టబ్బిన్తె వెట్కారుమ్చ కొణొ పొస, కామ్క నెంజిత కొణొ పొస, వెర్రి కొణొ పొస; దసచ నూటి నాయ్. దసచ ఎత్కి పొస, గని దేముడు కెర్లి దయచి రిసొ జోక తుమ్చి సర్ల సంగిత కొణొయ్ లట్టబ.

5 కేన్ కోడు ఏక్ తుమ్ కచితుమ్ దెరన మెలె, కేన్ లంజె ఇండితొసొ, లంజెబుద్ది సికడ్తొసొ, అన్నె మాన్యుల్చి అస్తిచి ఆసక జితొసొ కో జలెకు, జోవయించి ఆస జోవయింక దేముడు రితి జా, దేముడుక 'జో అమ్క నాయ్' మెలి రితి విరోదుమ్ కెర్లి రితి జతయ్, గెద; కో దస బుద్దివొచ జలె, క్రీస్తుచి దేముడు అబ్బొన్చి రాజిమ్తె జోవయింక కేన్ వాట కి దొర్కు జయె నాయ్.

ఉజిడబుద్దితె తుమ్ ఇండ

6 కామ్క నెంజిత కొణొ లట్టబ దస పాపుమ్ కమొచి రిసొ కో తుమ్క మోసిమ్ కెర్లి రితి తుమ్ దెర్ను సేడ నాయ్. దస పాపల్చి రిసొ జోచి కోడు నే సూన్త మాన్యుల్క దేముడు జోచి కోపుమ్చి సిచ్చ దెయెదె.

7 జాకయ్ దస కమొతె తుమ్ బెద నాయ్.

8 కిచ్చొక మెలె, తుమ్ అగ్గె అందర్బుద్దితె ఇండిలదు, గని అప్పె *ప్రబుచి తెడి ఉజిడ జా అస్సున్. ఉజిడచ బోదల్ రితి ఇండ.

9 కిచ్చొక మెలె, ఉజిడచి పలితుమ్ దెర్రిసి కిచ్చొతె చినుక జయెదె మెలె, చెంగిల్ తిలిసి ఎత్కితె, పొరపాట్ నెంతె తిలిన్ ఎత్కితె, సత్తిమ్ తిలిన్ ఎత్కితె.

10 పడ్డొ, కిచ్చొ ఎత్కిక చెంగిల్ మెన ప్రబు మెనెదె గే, తుమ్ అజ్జ కెరన.

11 అందర్బుద్దిచ కమొతె తుమ్ ఎద్దరె బెద నాయ్. దస్స కమొ కిచ్చొ

చెంగిల్ పలితుమ్ దెర్రి నాయ్. అన్నె మాన్యుల్ దస్సచతె దెర్ను నే సేడ్డి రితి, ఉజిడచి పాసిక దస్స కమొ ఆస, జోవయింక 'పాపుమ్చ' మెన రుజ్జుల్ దెకవ.

12 జేవ్ మాన్యుల్ గుట్టు తెన్ కెర్లె కమొచి రిసొ సంగుక కి లాజు.

13 గని, కిచ్చొ జలెకు అందర్ తిలిసి ఉజిడక పాసి అయ్లె, జాక 'జా పాపుమ్చి' మెన, రుజ్జు డిస్తయ్. కిచ్చొక మెలె, జా ఉజిడి ఒత్తయ్ దెకయ్ జా దెకయ్తయ్.

14 అమ్ ఒప్పన్తి కోడు ఏక్ ఇన్నె బెదితయ్. కేన్ కోడు మెలె, "ఓ నిజలొసొ, తెలిచి జా ఉట్టు!

మొర తిలొసొ, జీవ్ జా ఉట్టు, చి క్రీస్తు తుక జోచి ఉజిడి దెకయెదె" మెలిసి.

15 తుమ్ కిసి ఇండితె గే చెంగిల్ ఉచర, జాగర్ల తెన్ తా. బుద్ది నెంజిలనచి రితి తుమ్ ఇండ నాయ్, గని చెంగిల్ బుద్దితె ఇండ.

16 కిచ్చొ కిచ్చొ చెంగిల కమొ కెరుక వాట్ అయ్లె, తెలిచి తెన్, జా వాట్ అడ్డు నే కెర్లి రితి, నే పిట్టయ్తె, చెంగిల్ పలితుమ్ దెర్రి రితి జేవ్ కమొ తుమ్ కెర. కిచ్చొక మెలె, ఈంజ కాలుమ్ ఒగ్గర్ పాపుమ్చి, చి చెంగిల కమొక కెర్లి సమయమ్ తయెదె గే, నేనుమ్.

17 జాకయ్, బుద్ది నేన్ల మాన్యుల్ రిత తుమ్ జా నాయ్, గని కిచ్చొ బుద్ది తుమ్ ఇండుక ప్రబుచి ఇస్టుమ్ అస్సె గే, తుమ్ అర్దుమ్ కెరన.

18 తుమ్ సూరు పియ మచ్చ నాయ్. కిచ్చొక మెలె, జా చెంగిల్చిక పాడ్ కెర నాసెనుమ్ కెర్తిసి. గని దేముడుచి నుద్ది తిలి ఆత్మ తుమ్చి పెట్టి వేర జతయ్.

19 ఎక్కిలొ తెన్ ఎక్కిలొ ప్రబుచి గవురుమ్ సంగిత కిచ్చొ కిచ్చొ రగల్ గనుమ్లు గాయితె తా. జేడ్ గనుమ్లుతె కిచ్చొ ఏక్ రగుమ్ తుమ్

* 5:8 5:8 నెంజిల ప్రబుచి తెడి అస్సున్ చి జోవయించి ఉజిడి జా అస్సున్.

గాయ మెలె, కీర్తనలు. తుమ్చి పెట్టి పూర్తి సర్ల తెన్ ప్రబుచి గవురుమ్ సంగిత గనుమ్లు, బజెన తెన్ కి గాయతె తా,
 20 కెయక కి, కిచ్చొ జలె కి, కిచ్చొచి రిసా కి 'జొయ్యి దిలో' మెన, అమ్చొ ప్రబు జలో యేసుక్రీస్తుచి నావ్ తెన్ అబ్బొన్ జలో దేముడుక తుమ్చి సర్ల తుమ్ సంగితె తా.

తెర్నిమున్ను ప్రేమ దెకితిన

21 క్రీస్తుక మరియాద దెకితి రితి, తుమ్ ఎక్కిలోక ఎక్కిలో పోటి నే కెర్తె, ఎక్కిలోతె ఎక్కిలో దాక్ కెరన, ఎక్కిలోక ఎక్కిలో సేవ కెర్తె తా.

22 తుమ్ తేర్బోదల్ తుమ్చ మున్నుర్లుచి తెడి తా, దాక్ కెరన జోవయించి కోడు సూన, ప్రబుకయ్ గవురుమ్ కెర్లె రితి అంపొ జా తంక.

23 కిచ్చొక మెలె, క్రీస్తుక నంపజలన మొత్తుమ్ జోచి ఆగ్ జతనుమ్. జా ఆగ్ జో క్రీస్తు బోడి. జా ఆగ్ జో సొంత రచ్చించువ కెర్తొసొ జయెదె. దస్సి కి, తేర్నిక మున్నుసి బోడి జయెదె.

24 జోచి ఆగ్ జత నంపజలన మొత్తుమ్ క్రీస్తుచి తెడి అస్సుమ్, గెద. దస్సి, ఎత్కిచి రిసా తేర్ని మున్నున్చి తెడి అస్సె, జోవయించి కోడు సూసుక అస్సె.

25 తుమ్ మున్నుబోదల్ తుమ్చ తెర్నివొక ప్రేమ కెర్తె తా. కిచ్చొక మెలె, క్రీస్తుచి ఆగ్ జత నంపజలన సంగుమ్క 'చెంగిల్ జతు' మెన, బోడి జలో క్రీస్తు జోచి జీవ్ దిలన్.

26 కిచ్చొక మెలె, †పాని సువ సుద్ది కెర్లె రితి, జా ఆగ్ జోచి కోడు తెన్ దోవితి రితి కెర, జా ఆగ్ జోచి జా గెతి రితి, పూర్తి సుద్ది కెర్లె రిసా దస్సి కెర్లన్.

27 కిచ్చొక మెలె, జోచి ఆగ్ జత అమ్, నంపజలన మొత్తుమ్ జోక పూర్తి సూటి తిలి తెర్ని జతి రితి, జొయ్యి గవురుమ్

తెన్ ఆనన్తి రిసా, జా పూర్తి సూటి జతిసి కీసి మెలె, కిచ్చొ ఆత్మ మచ్చల్ సర్లల్, దస్సుచ కిచ్చొయ్ నెంతె, జా పూర్తి ప్రబుచి, పూర్తి పొరపాట్ నెంజ, సుద్ది సూటి జతిసి.

28 జలె, జోచి ఆగ్ జల నంపజలన సంగుమ్క ప్రబు కీసి ప్రేమ కెర సుద్ది కెర్తయ్ గే, మున్నుసి కీసి జోవయించి ఆగ్ జొయ్యి కీసి ప్రేమ కెరెదె గే, జో దస్సి జోవయించి తేర్నిక ప్రేమ దెకుకయ్. కో తేర్నిక ప్రేమ కెర్తయ్ గే, జోకయ్ జొయ్యి ప్రేమ కెరన్లె రితి జతయ్.

29 కేన్ మాన్నుల్ కి జోచి సొంత ఆగ్ కుక కెయ విరోదుమ్ జతి నాయ్. నాయ్, గెద. పొసనుల, చెంగిల్ దెకనుల. దస్సి, క్రీస్తు జోచి ఆగ్ జత నంపజలన మొత్తుమ్ బెదిలిన్క పొస్తయ్, దెకితయ్.

30 అమ్ జోచి సొంత ఆగ్ జలి రిసా.
 31 దేముడుచి కోడుతె రెగ్గయ్ లిన్ కీసి అస్సె మెలె,

కీ"జాకయ్, మున్నుబోద, అయ్యన్ అబ్బొన్క ముల, తెర్ని ఆన,
 జా తెన్ ఎక్కి నిదానుమ్ జయెదె, చి జేవ్ దొగుతెర ఎక్కి ఆగ్ జా గెచ్చుల"
 మెన రెగ్గ అస్సె.

32 క్రీస్తుక నంపజలన మొత్తుమ్ బెద జోచి ఆగ్ జతిన్క పెండ్లి జా చెంగిల్ దెకితి ఈంజ టాలిచి అర్దుమ్ వెల్లి.

33 గని మాములుమ్ తెర్నిమున్ను చి అర్దుమ్ కి ఉచరుక జయెదె. మెలె, తుమ్చి తెచ మున్నుబోదల్ కో జలెకి, తేర్నివొక ప్రేమ దెకుత్. పడ్డె, తేర్ని మున్నున్క మరియాద దెకుక అస్సె.

6

బోదల్ అయ్యన్ అబ్బొన్

† 5:23 5:23 1:23, 4:4 దెక. ‡ 5:26 5:26 నెంజిలె, 'బాప్తిసముక చి జోవయించి కోడుక జేక పూర్తి సుద్ది కెర జా జోచి జా గెతి రితి కెర్లె రిసా'. § 5:31 5:31 ఆదికాండుమ్ 2:24.

1 తుమ్ బాలబోదలు, * ప్రబుచి తెడి అయ్యన్ అబ్బొన్ చి కోడు నూన. ఈంజ ప్రబుచి ఇస్టుమ్.

2 పూర్ణుమ్ దేముడు రెడ్డయ్ లి జా కోడు కిచ్చొ మెలె,

+ "అయ్యన్ అబ్బొన్ క గవురుమ్ కెర. ప్రమానుమ్ తెన్ ఆగ్గుల్ క ఈంజ తొలితో చి.

3 మెలె, అయ్యద్ అబ్బొద్ క గవురుమ్ కెరై, తుమ్ క చెంగిల్ తయెదె, చి ఈంజ లోకుమ్ తె ఒగ్గర్ దీనల్ జస్సై" మెన రెడ్డ అస్సె.

4 తుమ్ అబ్బుదింసి, జలె, ఆరి తుమ్ చ బోదల్ క కోపుమ్ కెరవ నాయ్, గని ప్రబు దెతి బుద్ది తెన్ జోవయింక ముద్దొ కెర, ప్రబుచి ఎత్కి సికడ పోస.

సేవ కెర్తన ఎజొమాన్లు

5 కో గొతిమాన్సుల్ జలె, క్రీస్తుక గవురుమ్ కెర్తి రితి తుమ్ చ పెట్టితె ఎజొమాన్లుక బియ, ఎక్కి నిదానుమ్ తా, జోవయించి కోడు రితి కెర.

6 మాములుమ్ మాన్సుల్ చి గవురుమ్ ఆనన్ తి బుద్ది తిలి రితి, ఆరి డీసుకయ్ నిదానుమ్ తిలి రితి తుమ్ జా నాయ్. గని దేముడు చి ఇస్టుమ్ రితి కెర్తి రిసాయి తుమ్ క్రీస్తు చ సేవ కెర్తన తిలి రిసా, తుమ్ చి పెట్టి చి ప్రేమ తెన్ కెర.

7 మెలె, మాన్సుల్ క మెన్సు వడంతి రిసా నాయ్, గని ప్రబుక సర్ద తెన్ సేవ కెర్తి రితి, తుమ్ చ ఎజొమాన్లు చి సేవ తుమ్ సర్ద తెన్ కెర.

8 కేన్ మాన్సు, గొతిమాన్సు జలెకి నెంజలె కి, కిచ్చొ చెంగిల్ చి కెరై కి, ప్రబు జోవయింక చెంగిల్ దెక బవుమానుమ్ దెయెదె మెన జాన్సు.

9 తుమ్ ఎజొమాన్లు, తుమ్ చ గొతిమాన్సుల్ క దస్సి ప్రేమ దెక, జోవయింక బియడె నాయ్. జోవయింక తుమ్ క ఎజొమాని జత్తో దేముడు పరలోకుమ్ తె అస్సె, చి జో కక్క మొకమాటుమ్ దెకె నాయ్.

సయ్ తానుక జీన్ తి రిసా ఆత్మ డిట్టుమ్ కెరనుక అస్సె

10 జలె, ఆకర్ కిచ్చొ మెన ఆవ్ రెగిడ్డసి మెలె, ప్రబుచి తెడి డిట్టుమ్ తా, జో చి ఆత్మ నెక్తి దెరన ఇండ.

11 సయ్ తానుక తుమ్ జీన్ తి రితి, దేముడు దెతి కిచ్చొ నే లయితి ఇనుము సొక్క తుమ్ గలన.

12 కిచ్చొ క మెలె, మాన్సుల్ క మాన్సుల్ కెర్తి యుద్దుమ్ నెంజె, ఈంజ, గని కో కో యుద్దుమ్ కెర్తన చి ఉప్పిరి అమ్ జీనుక అస్సె మెలె, కీవలప కెర్త గర్చ ఆత్మల్ చి ఉప్పిరి, * జోవయించి తెడి ఏలుప కెర్త ఆత్మల్ చి ఉప్పిరి, ఈంజ ఉగుమ్ చి అందర్ తిలి సయ్ తాన్ చి రాజిమ్ తె ఏలుప కెర్త ఒగ్గర్ గార్ చి నెక్తి చి ఉప్పిరి, మాన్సుల్ క పాడ కెర్త బూతల్ చి ఉప్పిరి, మాయలోకుమ్ చ సెక్తివొ ఎత్కి చి ఉప్పిరి అమ్ జీనుక అస్సె.

13 జాకయ్, కేన్ సమయుమ్ క సయ్ తాన్ చ జేవ్ సెక్తివొ అల్లర్ కెరుక ఉచరుల గే, దేముడు జా యుద్దుమ్ క దిలి కిచ్చొ నే లయితి 'ఇనుము సొక్క' మెన టాలి క సంగితిన్ ఎత్కి తుమ్ గలన తెయార్ జా తా, చి జా యుద్దుమ్ క టీవ్ క తుమ్ క సెక్తి తయెదె, చి జీన టీవ్ తె.

14 కిచ్చొ నే లయితి జా కిచ్చొ కిచ్చొ తుమ్ గలన మెలె, సత్తిమ్ తుమ్ క పట్క రితి జయెదె. ప్రబు దిలి పున్నిమ్ తుమ్ క ఇనుము సొక్క జయెదె,

* 6:1 6:1 మెలె 'ప్రబుచి తెడి అస్సెన్ చి జోవయించి ప్రేమబుద్ది తుమ్ చి పెట్టి తిలె జోవయించి ప్రేమకయ్ అయ్యద్ అబ్బొద్ చి కోడు నూన్ తె'. † 6:2 6:2 ద్విత్వీయోపదేశ కాండుము 5:16. ‡ 6:6 6:6 నెంజలె 'క్రీస్తుక గొత్తి మాన్సుల్ రితి తిలి రిసా', నెంజలె 'క్రీస్తుక గొత్తి రితి జలి రిసా'. § 6:12 6:12 నెంజలె, 'అదికారుమ్ తిలిసి ఎత్కి చ ఉప్పిరి'. * 6:12 6:12 నెంజలె, 'అదికారుల్ ఎత్కి చి ఉప్పిరి'.

15 మాన్యుల్ క దేముడు తెన్ బెదయ్ తి సేంతుమ్ దెతిస్ చి రిసా చి సుబుమ్ కబుర్ నూనయ్ తి రిసా తెయార్ జతిసి తుమ్ క డిట్టుమ్ చ జోడ్లు జయెదె.

16 పడ్డె అన్యె, ప్రబుచి ఉప్పిర్ చి నముకుమ్ తుమ్ క డాలు జయెదె. జో గలన్యె, ఆగి లగిత సయ్ తాన్ విందిత కండ్లె నే లయితి రితి నెతోవ విజయ్ తె.

17 పడ్డె, ప్రబు దెతి రచ్చన తుమ్ చి బోడిక ఇనుము లోపి జయెదె. పడ్డె ఎత్తి అదికారుమ్ తిలో దేముడు రెగ్డయ్ ల కొడె జోచి ఆత్మచి కండా దస్సి తుమ్ గలన.

18 అన్యె, దేముడుచి సుద్ది తిలి ఆత్మసెక్తి తుమ్ చి పెట్టి తోడు తా, కెడ్డెడ్ కి ప్రార్దన కెర, ప్రబుచి తోడు నజన్ తె తా. ప్రార్దన కెరె తతి రిసా తెలివి తెన్ తా, ఎక్కి నిదానుమ్ తా, దేముడుచి సుద్ది సుదల్ ఎత్తిచి రిసా 'చెంగిల్ తత్తు' మెన తుమ్ ప్రార్దన కెర.

19 పడ్డె, †చి గుట్టు ఆవ్ దయిరిమ్ తెన్ సుబుమ్ కబుర్ నూనయ్ తి రితి ప్రబు అంక సెక్తి దెవున్ మెన, అంచి రిసా కి తుమ్ ప్రార్దన కెరె తా.

20 జా సుబుమ్ కబుర్ నూనయ్ లి రిసా ప్రబుచి అదికారుమ్ తెన్ తిలో బారికి రితో జా ఆవ్ ఇసి జేల్ తె తా గొల్పుల్ తెన్ బందయ్ జా అస్సి. జలెకి, ప్రబుచి ఇస్టుమ్ కిసి తిలె ఆవ్ దయిరిమ్ తెన్ ఈంజ సుబుమ్ కబుర్ నూనయ్ తి రితి జో ప్రబు సెక్తి దెవున్ మెన, అంచి రిసా తుమ్ ప్రార్దన కెర.

21 జలె, ఆవ్ కిసి అస్సి గే కిచ్చొ కెర్తసి గే తుమ్ జాన్ తి రిసా, ప్రేమ జలో అమ్ క బావో జతో, ప్రబుచి తెడి అంక తుమ్ క సేవ నిదానుమ్ కెర్తొ తుకికు తుమ్ క సంగెదె.

22 జాకయ్ జోక ఆవ్ తెద్దవ అస్సి. అమ్ కిసి సంతోసుమ్ గే తుమ్ క జానవుక మెన, తుమ్ చి పెట్టి

తుమ్ దయిరిమ్ జతి రితి జో తుమ్ క దయిరిమ్ సంగెదె.

ఆకర్ కోడు
23 దేముడు అబ్బొసి దెతి ప్రబు జలో యేసుక్రీస్తు దెతి సేంతుమ్, ప్రేమ, నముకుమ్ ప్రబుచి తెడి తిల ఒత్తచ బావుడ్లు ఎత్తిక కలుగు జవున్!

24 అమ్ చొ ప్రబు జలో యేసుక్రీస్తుక కో పూర్తి నే మొర్తి ప్రేమ కెర్తసు గే, జోచి దయ తుమ్ చి ఉప్పిరి తవును!

† 6:19 6:19 చి రిసాయి 'చి గుట్టు' మెన సంగితయ్, నెంజిలె, యూదుల్ నెంజిలన కి పాపుమ్ తెంతొ రచ్చించువ జతి, ఎత్తి అదికారుమ్ తిలో దేముడు తెన్ జేవ్ బెదితి వాటు అయ్ లన్ చి రిసా సంగితయ్. 1:9-10, 3:1-6.

పిలిప్పియుల్క రెగిడ్లి ఉత్త్రమ్ బారిక్ జలో పవులు పిలిప్పి పట్టుమ్చ సంగుమ్చక రెగిడ్లి ఉత్త్రమ్

మొదొల్ కోడు

1 పిలిప్పి పట్టుమ్తెచ *క్రీస్తు జలో యేసుక నంపజా జోచి సుద్ది జా జోచయ్ జా, జోచి తెడి తిల మాన్సుల్క, పడ్డో తుమ్చ సేవ కెర్తొన్క చి జోచి తెడి సంగుమ్చి సేవ కెర్త అన్నె వెల్లెల మాన్సుల్క, యేసుక్రీస్తుచి సేవ కెర్త జోచ †గొత్తి మాన్సుల్ జల పవులు, అన్నె తిమోతి రెగిడ్లి ఉత్త్రమ్.

2 అమ్క అబ్బో జలో దేముడు అన్నె ప్రబు జలో యేసుక్రీస్తుచి దయ సేతుమ్ తుమ్చి ఉప్పిరి తవున్!

పిలిప్పియుల్చి రిసా పవులుచి సర్ద

3 తుమ్చి రిసా ఆవ్ కెయ్క ఉచర్లె కి, తుమ్చి రిసా అంచి సర్ద ఆవ్ దేముడుక సంగితసి.

4 తుమ్చి రిసాచి ఎత్కి అంచి ప్రార్దన పూర్తి సర్ద తెన్ కెర్తసి.

5 కిచ్చొక ఒగ్గర్ సర్ద జతసి మెలె, తుమ్ నంపజలి †మొదొల్ తెంతో, అప్పె ఎద కి తుమ్ అంచి తెన్ బెద, సుబుమ్ కబుర్ నూనయ్తినతె అంక †తోడు అన్నున్.

6 దేముడు తుమ్చి పెట్టి మొదొల్ కెర్లి చెంగిల్ కామ్, యేసుక్రీస్తు ఈంజ లోకుమ్తె అన్నె ఉత్త్ర జెతి దీసి ఎదక, జో దేముడు అబ్బోసి జా కామ్ సొంత పూర్తి జర్గు కెరెదె మెన, అంక దయిరిమ్ అన్నె.

7 తుమ్ ఎత్కిజినచి రిసా ఆవ్ ఇసి ఉచరుక చెంగిల్. కిచ్చొక మెలె, తుమ్చి రిసా అంక ఒగ్గర్ ప్రేమ, అంక దిలి దేముడుచి దయ తెన్ అంచి తెన్ తూమ్ బెద అన్నున్. సుబుమ్ కబుర్చి రిసా ఆవ్ *జేలి జలి సైమతె కి, చి రిసా జబాబుల్ దెతినతె కి, రుజ్జుల్ దెకయ్తినతె కి, తుమ్ ఎత్కిజిన ఆత్మతె అంచి తెన్ బెద తోడు అన్నున్.

8 క్రీస్తు జలో యేసు అమ్క కెర్లి ప్రేమ దెకితయ్ గే, దస్సి ప్రేమ తెన్ తుమ్క ఆవ్ తెద్ది ఉచర్లె తత్తసి మెన, దేముడు సాచి అన్నె.

9 తుమ్చి అప్పెచి ప్రేమ అన్నె ఒగ్గర్ జవున్ మెన అంచి ప్రార్దన. ప్రబుచి రిసాచి గ్యూనుమ్చి కిచ్చొ కిచ్చొ ఎత్కి అర్దుమ్ కెరంతి కిచ్చొ కిచ్చొ ఎత్కి చినితి బుద్ది జా ప్రేమతె ఒగ్గర్ జవున్ మెన ప్రార్దన కెర్తసి.

10 ఆత్మక దస్సి వడ్డిలదు మెలె, చెంగిల్ తిలిన్క గార్ తిలిన్క నిసుక జాన, చెంగిల్చిక మెన ఇస్టుమ్ జస్తె, చి క్రీస్తు అన్నె ఉత్త్ర జా తిర్పు కెర్లి జా వెల్లి దీసి ఎదక తుమ్ ఎత్కిజిన ఎక్కి మెన్ను నిదానుమ్ జస్తె, చి తుమ్క 'పొరపాట్ జల' మెన కో సంగుక నెత్తిర్.

11 తుమ్ దస్సి ప్రేమ, ఆత్మచి గ్యూనుమ్ జలె, యేసుక్రీస్తుతె దొర్పు జతి

* 1:1 1:1 'క్రీస్తు' మెలె, 'తెర్దయదె' మెన పూర్ణమ్ ఎత్కి అదికారుమ్ తిలో దేముడు యూదుల్క సంగ తిలో దొర్పు జలో రచ్చించువ కెర్తొసా. † 1:1 1:1 నెంజెలి 'గొతిమాన్సుల్ రిత్'. ‡ 1:5 1:5 బారికుల్ 16:12-40.

§ 1:5 1:5 పిలిప్పియుల్ 1:19 ప్రార్దన కెర తిల. 2:25-30 ఎవప్రాదితుక పవులుతె తోడు తెర్దవ తిల, చి 4:10-11 చి 14-18 డబ్బుల్ తెర్దవ తిల. * 1:7 1:7 పవులు రోమ్తె జేలి జలి పొది ఈంజ ఉత్త్రమ్ రెగిడ్లి మెన ఒగ్గర్జిన ఉచర్తె. బారికుల్ 28:16, 30, 31 దెక. పిలిప్పియుల్ 4:22 దెక. కైసర్ రానో రోమ్ పట్టుమ్తె తయెదె. పిలిప్పియుల్ 1:13 దెక. ప్రేతొరియచ అదికార్లు కి రోమ్తె తవుల. కైసరియ పట్టుమ్తె కి పవులు జేలి జా తిలో; బారికుల్ 23:23-24:27. పిలిప్పి తె కి; బారికుల్ 16:23, అన్నె యెరూసలేమ్తె; బారికుల్ 21:33..., గని పిలిప్పి తె చి యెరూసలేమ్తె ఒగ్గర్ దీసల్ జేలి తయె నాయ్. ఎపెసుతె కి జేలి జా తిలన్ మెన సగుమ్జిన ఉచర్తె, గని రుజ్జు నాయ్.

పున్నిమ్చి పూర్తి పలితుమ్ తుమ్చి పెట్టి దెర్తె తయెదె, చి దేముడుచి నావ్, జోచి గవురుమ్ టీవెదె.

పవులు జేలి జా చెంగిల్ పలితుమ్ దిలిసి

12 బావుడ్లు, తుమ్ కిచ్చో జాననుక మెన అవ్ ఆస జతసి మెలె, అంక జర్గు జలి కస్తుమ్ ఆరి తయె నాయ్, గని సుబుమ్ కబుర్ నూనయ్తినక కామ్క జా అస్సె.

13 కిసి మెలె, క్రీస్తుక ఆవ్ నిదానుమ్ తిలి రిసాయి ఆవ్ జేలి జలిసి మెన వెల్లో అదికారిచి గేర్ జలి అదికారుల్క, అన్నె ఎత్తిజిన జాన అస్సి.

14 వడ్డె అన్నె, ఆవ్ జేలి జలి తెంతో ఇన్నెచ నంపజలన ప్రబుచి తెడి ఒగ్గర్ దయిరిమ్ జా, బయిమ్ నెంతె దేముడుచి కోడు ఒగ్గర్ దయిరిమ్ తెన్ నూనయ్తతి.

15 సగుమ్జిన జోవయించి పెట్టిచి అంచి ఉప్పిర్చి గోసక, కుస్సిదుమ్ ఉచర సుబుమ్ కబుర్ నూనయ్తతి, గని అన్నె సగుమ్జిన అమ్చి తెన్ సర్ద తెన్ తా నూనయ్తతి.

16 ఈంజేవ్ జలె, ప్రేమకయి నూనయ్తతి. చి సత్తిమ్ ఆవ్ రుజ్జు దెకయ్తి రిసాయి ఆవ్ ఇన్నె జేలి తెన్ తంక దేముడుచి సెలవ్ మెన ఈంజేవ్ జాన్తి.

17 జేవ్ గోసచ, జలె, వెల్లో కెరనుక ఉచర గార్ ఆస తెన్ సుబుమ్ కబుర్ నూనయ్తతి. జోవయించి పెట్టి నిదానుమ్ తతి నాయ్, గని ఆవ్ జేలి జలొసాక అంక నొప్పి దెంక ఉచరయ్ నూనయ్తతి.

18 జలె, కిచ్చో? జోవయించి పెట్టిచి బుద్ది మాయచి జలెకి, సత్తిమ్చి జలెకి, క్రీస్తుచి రిసాయి జేవ్ సాడుప కెర్తతి. జాచి రిసా అంక ఒగ్గర్ సర్ద.

మొర్లె చెంగిల్ గే జలె చెంగిల్ గే

19 పడ్డె, అన్నె కిచ్చో సర్ద కచితుమ్ జయిందె మెలె, తుమ్ ప్రార్దన కెర్తి రిసా, యేసుక్రీస్తుచి ఆత్మ అంక తోడు తిలి రిసా, ఈంజేవ్ బాదల్ ఎత్కితె రచ్చించుప జయిందె మెన జాని.

20 కిసి మెలె, ఆవ్ ఓడుప జయి నాయ్, గని ఆవ్ పూర్తి దయిరిమ్ తయిందె, చి అప్పె కి కెయ్క కి, ఆవ్ జలె కి మొర్లె కి, అంచి అగి క్రీస్తుచి గవురుమ్ డీసెదె మెన అంచి ఆస, అంచి దయిరిమ్.

21 కిచ్చోక మెలె, ఈంజ అగి ఆవ్ జలె, క్రీస్తుచి రిసాయి జితసి, జోచి కామ్ కెర్తి రిసాయి జితసి. ఆవ్ మొర్లె, జోతె గెచ్చిందె, చి అంకయ్ లాబుమ్.

22 ఆవ్ ఈంజయ్ అగి జింక జలె, క్రీస్తుచి కామ్క జెయిందె. గని జితిన్తె మొర్లెన్తె కేన్ నిసాన్దె గే, నేని.

23 ఈంజేవ్ దొన్ని మెన్సుల్ తా ఆవ్ అల్లర్ జతసి. అంచి సొంత ఇష్టుమ్ కేన్ మెలె, మొర క్రీస్తుతెయ్ గెచ్చుక; ఈంజ లోకుమ్తె ఆవ్ తతి కంట అంక జయ్యి లాబుమ్.

24 గని తుమ్చి రిసా ఆవ్ ఈంజ అగి జలె చెంగిలి. జాకయ్ జయ్యి ముక్కిమ్.

25 ఈంజ కోడు నిజుమ్ మెనయ్, తుమ్ ఆత్మక అన్నె వడ్డితి రితి క్రీస్తుచి తెడి నముకుమ్ తెన్ తుమ్ సర్దనంతోనుమ్ తతి రితి, ఇసి తా తుమ్చి తెన్ తయిందె మెన ఆవ్ కచితుమ్ జాని.

26 దస్సి, తుమ్చితె ఆవ్ అన్నె అయ్లె, యేసుక్రీస్తుచి తెడి అంచి రిసా తుమ్క ఒగ్గర్ సర్ద జస్సె.

క్రీస్తుచి తెడి ఎక్కి నిదానుమ్ తా

27 క్రీస్తుచి సుబుమ్ కబుర్క గవురుమ్ కెర్తి రితి ముక్కిమ్క బుద్ది ఇండ, చి తుమ్క సొంత దెకిత్ రితి ఆవ్ తుమ్తె అయ్లె కి, నాయ్ మెలె నెత్త వేరతె తిలె

† 1:14 1:14 మెలె, 'పవులు జేలి జలెకి ప్రబు జోవయింక తోడు అస్సె మెన రుజ్జుల్ దెక దయిరిమ్ జా....'

‡ 1:14 1:14 నెంజిలె 'సుబుమ్ కబుర్', నెంజిలె 'కబుర్'.

కి, తుమ్మక 'ఎక్కి ఆత్మ నిదానుమ్ తా డిట్టుమ్ టీఁవ, నుబుమ్ కబుర్చి సత్తిమ్ వేర మాన్సు నంప కెర్తి రితి ఎక్కి మెన్సు, ఎక్కి కట్టు తెన్ బెద,

28 కిచ్చొచి రిసా కి విరోదుమ్ నుదల్క నే బితె క్రీస్తుచి పచ్చెనచి కామ్ కెర్తతి' మెన తుమ్చి రిసా నూనిందె. తుమ్చి నిదానుమ్ తుమ్చ విరోదుమ్ నుదల్క కిచ్చొ రుజ్జు దెకయెదె మెలె, జేవ్ నాసెనుమ్ జతిసి, అన్నె తూమ్ రచ్చన జతిసి. కిచ్చొక మెలె, దేముడు సొంత ఇసి జర్గు కెర్తయ్.

29 మెలె, క్రీస్తుచి నావ్ గవురుమ్ జతి రిసా తుమ్ జోక నంప కెరుక మెన, గని అన్నె కిచ్చొ మెలె, అల్లర్ సేడ ఓర్పువ జా జినుక మెన, దేముడు తుమ్క వరుమ్ దా అస్సె.

30 కిచ్చొక మెలె, తుమ్ అంచితె దెకిలి రితి, అంక తిలిసి మెన అప్పె తుమ్ నూన్లి రితి అల్లర్ తుమ్క కి అస్సె.

2

క్రీస్తుచి రితి, దాక్ కెరన

1 జలె, క్రీస్తుతె తిలి పొది తుమ్క దయిరిమ్ దొర్కు జతయ్ మెలె, ప్రేమ తుమ్క పెల్లితయ్ మెలె, దేముడుచి సుద్ది తిలి ఆత్మ తుమ్చి పెట్టి అస్సె మెలె, తుమ్చి పెట్టి ముద్దుచి కన్కారుమ్ అస్సె జలె,

2 ఎక్కి ఉద్దెసుమ్ తెన్, ఎక్కి ప్రేమ తెన్, పూర్తి ఎక్కి కట్టు తెన్, ఎక్కి మెన్సు తా, చి అంక పూర్తి సర్దనంతోసుమ్ కెర్తె.

3 సొంత గార్ ఆసక, సొంత గవురుమ్క, తుమ్ కిచ్చొ కెర నాయ్, గని దాక్ కెరన, ఎక్కిలోక ఎక్కిలో జోచి కంటి వేర మాన్సుల్క గవురుమ్ దెకిత్ తా.

4 తుమ్తె ఎత్తి మాన్సు ఎక్కి సొంత దెకన నాయ్, గని, ఎక్కిలోచి రిసా ఎక్కిలో 'చెంగిల్ జతు' మెన తుమ్ వేర మాన్సుల్క కి చెంగిల్ దెక.

5 క్రీస్తుక తిలి జోచి తెడి దొర్కు జతి బుద్ది తుమ్చి పెట్టి తుమ్ తియన.

6 కిచ్చొ నే జెర్మయ్లి అగ్గె తెంతో కి దేముడు తెన్ జో ఎక్కి జలెకి, 'దేముడు' మెనన గవురుమ్ ఆనసుక ఉచరె నాయ్,

7 గని, జొయ్యి దాకు కెరన, మాన్సు జా జెర్మన్ జా, గొత్తి సుదొ రితో జలన్.

8 దస్సి, మాన్సు జా జెర్మన్ జా జో జోకయి దాకు కెరన దేముడు అబ్బొనచి సెలవ్ కోడు జర్గు కెర,

మాన్సు సేడ్డి మొర్నుతె సేడ్డన్; సిలువతె మొర గెలో.

జలె,

9 దేముడు అబ్బొనచి సెలవ్ కోడు జర్గు కెర జో మొర్లి రిసా, దేముడు అబ్బొసి జోక ఎత్తిచి కంట వెల్లో కెర జోక ఎత్తి నవ్వొచి కంట వెల్లి నావ్ తియ అస్సె.

10 'జో యేసుచి నావ్ నూన ఎత్తి మాన్సు మొగ్రల్ టెక జోవయింక జోకర' మెనయ్.

జేవ్ పరలోకుమ్తె తిలె కి, బూలోకుమ్తె తిలె కి,

పాతలలోకుమ్తె తిలె కి, కేనె తిలె కి జోక జోకర్లు మెనయ్

దస్సి కెర అస్సె;

11 చి 'యేసుక్రీస్తు ప్రబుయి' మెన

ఎత్తి చొడి తెనె బప్పన్తు మెనయ్, చి జోకయ్ గవురుమ్ జవున్

దేముడు అబ్బొనకయ్

గవురుమ్ జెయెదె, దస్సి కెర అస్సె.

బుద్ది ఇండితీనతె ప్రబుచి సత్తిమ్చి రుజ్జు తుమ్ దెకవ

12 జలె, బావుడ్లు, అగ్గె తెంతో ఆవ్ తుమ్చి తెన్ తిలి పొది అంచి కోడు నూన్దదు. దస్సి అప్పె, ఆవ్ నెంజిలి పొది

ఒగ్గర్ బియ్యం దేముడు దిలి * రచ్చన తెన్ బెదితి బుద్ది తుమ్ ఇండితె తా.

13 కిచ్చొక మెలె, జోచి ఇస్తుమ్ రితి కెర్తినక తుమ్ ఏక్ ఇస్తుమి జతి రితి నాయ్, గని తుమ్ జర్లు కెరుకయ్ మెన, తుమ్చి పెట్టి జో కామ్ కెర తుమ్క దేముడు సెక్కి దెతయ్.

14 తుమ్ మూర్కుమ్ జల వండ్లో జల మాన్సుచి నెడమె పాపుమ్ నెంజిలన రిత, మచ్చల్ నెంజిలన, అన్నె నింద నే గల్లి రితి దేముడుచి పుత్తర్లులు జతి రితి తంక, ఆగాసుమ్తె జోచి ఉజిడి దెకయ్త సుక్కల్ రిత తుమ్ జస్తె.

15 కిచ్చొ కామ్ తిలె కి, తెడి తెడి నే బాద సేడ, నే అన్మానల్ జా ఎత్తి కమె తుమ్ కెర.

16 పడ్డొ, జీవు దెతి సుబుమ్ కబుర్ తుమ్ డిట్టుమ్ దెరన, చిక్కిన్ అన్నె ఉత్త జా ఈంజ లోకుమ్చక తీర్పు కెర్తి వెల్లి దీసిక, 'అంచి సైమ, అంచి కామ్ ఆరి కామ్క జెతిసి నెంజె' మెన దెక కెర, ఆవ్ సర్ద జయిందె.

17 తుమ్క క్రిస్తు ప్రబుక నంపజా నిదానుమ్ తెన్ జోచి సేవ కెర్తసి చి రిసా ఆవ్ ఏక్ వేల సుడ దిలి బలి జతి రితి జంక జలెకి, తుమ్ ఎత్తిజిన్చి సర్దతె ఆవ్ బెదితసి.

18 తూమ్ కి ఇసి సర్ద తెన్ తా, అంచి సర్దతె బెద.

తిమోతిక జోవయింతె తెద్రవుక

19 తుమ్చి రిసాచి కబుర్ సూన్లె సర్ద జయిందె మెన, ప్రబు జలొ యేసు సెలవ్ దిలె తిమోతిక తుమ్తె బే బేగి తెద్రవుక మెన అవ్ ఆన జతసి.

20 తిమోతిక ముల అన్నె కో దన మాన్సుల్ అంక తోడు నాయ్. తుమ్క

చెంగిల్ జతు మెన జోయ్యి పూర్తి నిదానుమ్ తయెదె.

21 జేవ్ తిల మాన్సుల్ జలె, యేసుక్రిస్తుచి కామ్ కెరుక పచ్చితె తా, ఎత్తిజిన్ జోవయించి సొంతయ్ లాబుమ్ దెకన్తతి.

22 గని తిమోతి చి నిదానుమ్ జాన్సు. అంక జో అబ్బొ మెన దెకిల్ రితి జా, పుత్తు రితో జా, సుబుమ్ కబుర్చి రిసా అంచి తెడి జో ప్రబుచి సేవ కెర్లిసి జాన్సు.

23 జాకయ్, ఆవ్ కిసి †జయిందె గే తుమ్ సూన్లె, బేగి జోక తుమ్తె తెద్రయిందె.

24 అన్నె, †ప్రబుచి తెడి అంక కిచ్చొ నముకుమ్ మెలె, జో సెలవ్ దిలె, ఆవ్ కి సొంత జెంక వాట్ తయెదె మెన అవ్ ఉచర్తసి.

ఎపప్రాదితుక జోతె తెద్రయ్ లిన్చి

25 ఎపప్రాదితుక తుమ్తె తెద్రయ్ లె చెంగిలి మెన ఆవ్ తెద్రయ్ తసి. అంక జో బావొ జా అస్సె, అంచి తెన్ బెద సుబుమ్ కబుర్ కామ్ కెర అస్సె, అంచి తెన్ జా కామ్చి రిసా బాదల్ ఓర్పుప జా అస్సె, తూమ్ జోచి అత్తి అంక తోడు కెర్లి రితి, తుమ్చి తెంతో కబుర్ జా అంక తోడు కెర అస్సె.

26 కిచ్చొక జోవయింక తుమ్తె అన్నె తెద్రయ్ తసి మెలె, ఒగ్గర్ దీసల్ జలి తుమ్క దెకె నాయ్ చి ఒగ్గర్ ఉచర్తయ్. పడ్డొ, జో జొర్ణొ సేడ్లిన్చి రిసా తుమ్ సూన్లిన్చి రిసా చింత గలన తవుల మెన జో దుకుమ్ సేడ అస్సె.

27 నిజుమి, జో మొర్తి రితి జలె, గని దేముడు జోక కన్కారుమ్ రచ్చించుప కెర్లన్. జోకయ్ నాయ్ అంక దుకుమ్చి ఉప్పిరి దుకుమ్ నే కలుగు జతి రితి కన్కారుమ్ దెకయ్ లో.

* 2:12 2:12 'రచ్చన', 'రచ్చించుప జతిసి' మెన ఇన్నె సంగిలె, పాపుమ్ తెంతో చి రచ్చనక సంగితనుమ్. అమ్ కెర్ల పాపల్చి రిసా లయితి సిచ్చు తెంతో నయ్తాన్చి రాజమ్ తెంతో అమ్క ఎత్తి అదికారుమ్ తిలొ దేముడు యేసుచి అత్తి రచ్చించుప కెర్లిసి. † 2:16 2:16 నెంజెలె 'సూనయ్తె తా'. ‡ 2:23 2:23 ఏక్ వేల జో జేలి జలిన్క రకుమ్లు జతిన్క ఉచర్తయ్. § 2:24 2:24 మెలె 'ప్రబుచి తెడి ఆవ్ తిలి రిసా' అన్నె 'ప్రబుచి ఒగ్గర్ సెక్కి చి రిసా'.

28 జాకాయ్, జోక అన్నె దెక తుమ్ నర్ల జతి రిసా, జోక తుమ్తె బే బేగి తెర్లవుక ఆవ్ ఆస జా అస్సి. దస్సి, గెలో మెలె తుమ్చి రిసా ఆవ్ ఇసి బాద సేడుక నాయ్.

29 జాకాయ్, *ప్రబుచి తెడి ఒగ్గర్ నర్ల తెన్ జోక తుమ్ అన్నె బెదవన. అన్నె దస మాస్సుల్ ఎత్తిజినక తుమ్ గవురుమ్ దెక.

30 కిచ్చొక మెలె, అంచి రిసా తుమ్ ఉచర కెరుక నెత్తిర్లి తోడు పూర్తి జర్లు కెరుకయ్ మెన, క్రీస్తుచి కామ్చి రిసా తెదోడి జో మొర గెతో.

3

ప్రబుచి తెడి నర్ల తతిన

1 అన్నె, ముక్కిమ్క బావుళ్లు, *ప్రబుచి తెడి తుమ్ నర్లనంతోసుమ్ తా. తుమ్క ఈంజ ఎత్తి అన్నె రెగుడుక అంక బాద నాయ్, చి ఆత్మక తుమ్క చెంగిల్ జర్లు జయెదె.

2 నూనర్లు రిత ప్రబుక విరోదుమ్ జలనచి, చెంగిల్ కెర్లసుమ్ మెన, గార్ కెర్లతి రిసా తుమ్ జాగర్ల తెన్ తా. మాస్సుచి అగి చి జోవయించి గుర్తుచి †సున్నతిచి రిసా జేవ్ బలవంతుమ్ కెర్లనచి రిసా తుమ్ జాగర్ల తెన్ తా.

3 ముక్కిమ్క ప్రబుకయి కెర్తి సున్నతి కెర్లన కొన్ల మెలె, ఆము. కీసి మెలె, దేముడుచి సుద్ది తిలి ఆత్మచి సెక్తిక జోచి సేవ కెర్తె తా, ఆగుక కమొచి నంప నే కెర్తె, రచ్చించుప జంక జలె క్రీస్తుయి సాలు మెనయ్ ఎక్కి క్రీస్తు జలొ యేసుచి ఉప్పిరి

* 2:29 2:29 మెలె, 'ప్రబుచి తెడి తుమ్ తిలి రిసా, అన్నె ప్రబు సొంత జోవయింక బెదవన అన్నెచి రిసా పూర్తి...' * 3:1 3:1 మెలె, 'తుమ్ జోవయించి తెడి అస్సున చి జో తెయి నర్లనంతోసుమ్ అన్నెచి రిసా, నర్ల...' † 3:2 3:2 నగమ్జిన నంపజలన జల యూదుల్, చి యూదుల్ నెంజల నంపజలనతె గెతె తా, జోవయించి సున్నతిచి రిసా బలవంతుమ్ కెర్తె తిల; జా సున్నతి కెర్లయ్ పాపుమ్ తెంతె రచ్చించుప జంక జయెదె, పరలోకుమతె గచ్చుక జయెదె; మెన సెక్తి తిలి. ‡ 3:5 3:5 'ఇస్రాయేలుడు' మెలె, యూదుడు, 'ఎబ్రీయుల్'

మెలె 'యూదుల్'. § 3:5 3:5 'ఇస్రాయేలుడు' మెలె, యూదుడు, 'ఎబ్రీయుల్' మెలె 'యూదుల్'. * 3:5 3:5 'పరిసయ్యుడు' మెలె, యూదుల్తె పరిసయ్యుల్కయ్ ఒగ్గర్ గ్యాసుమ్ తయెదె, యూదుల్చ ఆగ్గుల్ జెచ్చి ఒగ్గర్ నిదానుమ్ కెరుల, జేవ్ ఆగ్గుల్చి రిసా బలవంతుమ్ కెరుల, చి దూతల్, బూతల్, డుంబల్, ఆత్మల్క 'అస్సి' మెన నంప కెరుల, చి 'మొర్లె అన్వేక్ లోకుమతె గచ్చుమదే' మెన నంప కెరుల.

అమ్చి నముకుమ్ తియ, జోచి రిసాయి దయిరిమ్ తెన్ నర్ల తెన్ అస్సుమ్.

4 ఆగుక నంప కెర్తినచి రిసా ఉచర్లె జలె, దస్సిచిక నంప కెరుక కామ్క జెతి జలె, అచ్చి పవులు ఒగ్గర్ దయిరిమ్ తంక జతి. 'అగి జర్లు కెర్తినచి రిసా అంక చెంగిలి' మెన కో ఉచరంతతి గే, జోవయించి కంట అంకయ్ చెంగిల్ మెనుక జతి.

5 మెలె, యూదుల్చ ఆగ్గుల్ రితికయ్, ఆవ్ జెర్లు అట్టు పొదుల్క అంక జా గుర్తుచి సున్నతి కెర్ల. ఆవ్ ‡ఇస్రాయేలుడు, బెన్యామీను చి సెకుమ్తె జెర్మిలయ్, †ఎబ్రీయుల్తె జెర్లు ఎబ్రీయుడు జా జియ అస్సి. యూదుల్చ ఆగ్గుల్ రితి కెర్తినక దెకిలె, *పరిసయ్యుడు జయిందె. అమ్ పరిసయ్యుల్ చి నిదానుమ్ రితి ఆవ్ కెర్తె తిలయ్.

6 జా రితి అంచి ఒగ్గర్ నిదానుమ్ ఆవ్ కిసి నెరవెర్లుప కెర్తె తిలయ్ మెలె, నంపజలనక సిచ్చల్ కెర్తె తిలయ్. చి అమ్చ ఆగ్గుల్చి పున్నిమ్చి రితి ఆవ్ కెర్తె తిలిన్క దెకిలె. పొరపాట్ నెంతె తిలయ్.

7 గని, జా ఎత్తితె అంక కిచ్చొ లాబుమ్ తిలి గే, క్రీస్తుకయ్ పూర్తి నిదానుమ్ జంక మెన, ఎక్కి జోచి ఉప్పిరి అంచి నముకుమ్ పూర్తి తింక మెనయ్, జా వేరచి ఎత్తిక 'నంతోసుమ్' మెన దెక, ముల అస్సి.

8 నిజుమి 'అంచొ ప్రబు జలొ రచ్చించుప కెర్తొసా జలొ క్రీస్తు జలొ

యేసుక జాన జో తెన్ ఇండితిసి ఎత్కిచి కంట చెంగిలి' మెనయ్, వేరచి ఎత్కిక నస్టుమ్ మెన దెకితసి, క్రీస్తుచి రిసాచి అంచి ప్రేమచి రిసా వేరచి ఎత్కి పిట్టవన అస్సి, వేరచి ఎత్కిక ఉస్టా మెన దెకితసి. కిచ్చొక మెలె, ముక్కిమ్క క్రీస్తుయి అంక కావలె, జొయ్యి అంక లాబుమ్,

9 చి జోచి తెడి తా, అంచి సొంత సెక్తిచి పున్నిమ్, మెలె ఆగ్గుల్ రితి కెర్తి పున్నిమ్ తెన్ తయె నాయ్; కక్క దస్సిచి పున్నిమ్ దెయె నాయ్, గని అంక కిచ్చొ పున్నిమ్ తయెదె మెలె, క్రీస్తుక నంపజలి వాట్క దొర్కు జతి పున్నిమ్. మెలె, జోక కో నంపజా గెలె, 'అంచొ క్రీస్తుచి పున్నిమ్ జోక' మెన దేముడు జోచి నర్లక అమ్క దెకితయ్.

10 వేరచి ఎత్కి ముల ఆవ్ అన్నెకిచ్చొ ఆస జతసి మెలె, జోవయింక జానయ్ జో అన్నె జివ్ జలి సెక్తిచి వరుమ్ నజన, జా సెక్తిక జోవయింతెన్ ఇండుక పూర్తి అలవాట్ జా, జో సేడ్ల నైమల్తె బెద, జో మొర్లి షొది కీసి తిలొ గే, ఆవ్ కి దస్సి బుద్ది జంక,

11 చి దేముడు అబ్బొన్చి దయ తిలె, ఆవ్ మొర్లె, పరలోకుమతె గెచ్చిందె.

ప్రబు దెతి బవుమానుమ్ నజన్తి రితి నిదానుమ్ నిగుక మెలి టాలి

12 'ప్రబు దెతి బవుమానుమ్ నజన్తి రితి జిన్లయ్' మెని నాయ్, 'ఆవ్ పూర్తి పున్నిమ్ జా అస్సి' మెని నాయ్, గని జోచొ సొంత మాన్సు జంక మెన క్రీస్తుయేసు అంక బెదవన అస్సె చి రిసా, జా బవుమానుమ్ నజనుక మెన ఆవ్ ఒగ్గర్ సెక్తి తెన్ నిగితసి.

13 బావుడ్లు, అంచి సెక్తికయ్ జిన అస్సి మెని నాయ్, గని ఎక్కి కిచ్చొ కెర్తసి మెలె, అగ్గెచి ఎత్కి పచ్చు గెల కెర, పుర్రెతో తిలి గురితె దొర్కు జతిసి నజనుక మెన ఎక్కి ఆస జా,

14 యేసుక్రీస్తుచి నావ్ తెన్ దేముడు దెతి బవుమానుమ్ నజనుక మెన, గురి దెక నిగితసి.

15 అమ్తె ఆత్మక కో వడ్డ అస్తి జలె, ఇసి బుద్ది తెన్ తమ. 'పూర్తి పున్నిమ్ జలమ్' మెన జవున్, 'జా గురితె నిగితి ఆస రితిసి నాయ్' మెన జవున్ తుమ్చితె కో ఏక్ వేల వేర ఉచర్లె, తుమ్క దేముడు దెకవ సికడెదె.

16 గని ముక్కిమ్క అప్పెక కిచ్చొ బుద్ది జో అమ్క సికడ అస్సె గే, జయ్యి నిదానుమ్ ఇండుమ.

17 బావుడ్లు, ఆవ్ కీసి ఇండితసి గే దెక తూమ్ కి ఇసి ఇండ, చి ఆవ్ ఇండితి రితి కో ఇండితతి గే దెక.

18 కిచ్చొ జాగర్ల ఆవ్ సంగితసి మెలె, ఆవ్ అగ్గె తెంతో తుమ్క సగుమ్జిన్చి రిసా ఒగ్గర్ సంగ అస్సి, చి అప్పె కి ఏడ ఏడయ్ సంగితసి. కిచ్చొక మెలె, 'పరలోకుమచి సుద్ది జా, జా సుద్ది రితి ఇండుతు' మెనయ్, క్రీస్తు సిలువతె మొర జోవయింక రచ్చించుప కెర్లన్, గని జాచి ఉప్పిరి విరోదుమ్ కెర్లి రితి జేవ్ ఒగ్గర్జిన్ తప్పు బుద్దితె ఇండితతి.

19 జేవ్ నాసెనుమతె గెచ్చుల, జోవయించి పెట్టి జోవయింక దేముడు, జోవయించి పాపుమ్చి రిసా జోవయింక నర్ల, ఈంజయ్ లోకుమతె తతిసి ఎత్కికయ్ జోవయింక ఆస.

20 గని, ఆవ్ జతి రాజిమ్ పరలోకుమీ, చి ఒత్త తెంతో అన్నె జెతో రచ్చించుప కెర్లొసొక, ప్రబు జలొ యేసుక్రీస్తుకయ్ అమ్ రకితసుమ్.

21 కీసి మెలె, ఎత్కి జోచి తెడి తియ ఏలుప కెర్తి జోచి సెక్తికయ్ జో అమ్చి ఈంజ మాములుమ్ ఆగ్గ్ మార్పుప కెర, పరలోకుమచి ఉజిడ్ తెన్ చి జోచి ఆగ్గ్ ఈంజ జతి రితి తెదొడ్క మార్పుప కెరెదె.

4

ప్రబుచి తెడి తుమ్ డిట్టుమ్ టీచ

1 అంక, ప్రేమ తిల బావుడ్లు, * ప్రబుచి తెడి తుమ్ డిట్టుమ్ టీచ. తుమ్క ఆవ్ ప్రేమ అస్సి, తుమ్తె గెచ్చుక ఒగ్గర్ ఇస్టుమ్ జా అస్సి. తుమ్ అంచి సర్ద, అంచి బవుమానుమ్.

2 తుమ్ జట్టి జలిసి ముల † ప్రబుచి తెడి ఎక్కి కట్టు తా మెన, యువోదియక చి నుంటుకేక ఆవ్ బతిమాల్పా జా మెన సంగితసి.

3 పడ్డో తూయి, అంచి తెన్ ప్రబుచి కామ్తె బెద అంక సత్తిమ్ కెర్తొ బావో, ఈంజేవ్ తేరబోదల్క సేంతుమ్ కెరవు. అగ్గె తెంతో అంచి తెన్ బెద ప్రబుచి నుబుమ్ కబుర్చి కామ్ కెరుక మెన సైమల్ సేడ అస్సి. అన్నె కచి తెన్ మెలె, క్లెమెంతు తెన్, చి 'పరలోకుమ్తె గెచ్చుల' మెన దేముడు కచ కచ నవ్వొ రెగిడ్డి జోచి పున్నకుమ్తె నవ్వొ తిల మాన్సుల్ ఎత్తిజిన్ తెన్ కి తోడు కెరవు.

కెడ్డోడి కి సర్దనంతోసుమ్ తెన్ ప్రార్దన కెర

4 కెడ్డోడ తెదొడి † ప్రబుచి తెడి తుమ్ సర్దనంతోసుమ్ తా. అన్నె సంగితసి. 'సర్దనంతోసుమ్ తా' మెంతసి.

5 తుమ్ ఇసి మెత్తన తతిసి ఎత్తిజిన్ దెక చినితి రితి తుమ్ ఇండ. ప్రబు కిపాసి జా అస్సె.

6 కిచ్చొచి రిసా కి తుమ్ చింత గలన నాయ్, గని కిచ్చొచి రిసా కి ప్రార్దన కెర్తె తా తుమ్క కోర్ప జలిసి సంగ, జో దిలిసి ఎత్తిచ రిసా తుమ్చి సర్ద సంగ, తుమ్చ ఆసల్ దేముడుకయ్ తుమ్ సంగ.

7 దస్సి, అమ్ మాన్సుల్ * మీనుక నెత్తిర్లి దేముడుచి ఎదివాట్ సేంతుమ్, చి క్రీస్తు జలో యేసుచి తెడి తా, జా

సేంతుమ్ తుమ్చి పెట్టి తుమ్చి మెన్సుతె రకితె తయెదె.

8 ఆకర్క, బావుడ్లు, కిచ్చొ మెంతసి మెలె, సత్తిమ్ తిలిసి ఎత్తి, మరియాద తిల కమె ఎత్తి, నాయిమ్ తిలిసి ఎత్తి, సుద్ది తిలిసి ఎత్తి, సూటి తిలిసి ఎత్తి, 'చెంగిల్' మెన ఎత్తిజిన్ సర్ద జతిసి ఎత్తి, కిచ్చొ జలెకి చెంగిల్చి, 'చెంగిల్' మెన దేముడు ఒప్పునతిసి ఎత్తి, దసచయ్ ఎత్తిక ఉచర్తె తా, దస్సుయ్ కమె తుమ్ కెర్తె తా.

9 అంచితె తుమ్ సికిలిసి, దెకిలిసి, సూన్సి, 'సత్తిమ్' మెన ఒప్పున్సి, జా ఎత్తి కెర, చి సేంతుమ్ దెతో అమ్చో దేముడు తుమ్చి తెన్ తయెదె.

తిలె కి నెంజిలె కి ప్రబు సేంతుమ్ దెతిసి

10 తుమ్ అప్పె అన్నెక్ సుట్టు అంచి రిసా ఉచర్తె మెన సూన తా ప్రబుచి తెడి ఒగ్గర్ సర్ద తెన్ అస్సి. అగ్గె తెంతో కి అంచి రిసా ఉచర్తె తిలదు, గని అంక తోడు దెంక తుమ్క అగ్గె వాటు తయె నాయ్.

11 అంకనెంజిలిన్చి రిసా ఏడుక మెన సంగి నాయ్. కిచ్చొక మెలె, ఆవ్ కిసి జలెకి, అంక కిచ్చొ జలెకి, చింత నే గలంతె సేంతుమ్ తెన్ ఓర్పుప జంక మెన సిక అస్సి.

12 ఎక్కెక్ సుట్టు కొత్తుచి రిసా బాదల్ సేడ అస్సి, ఇదిల్ ఒగ్గర్ తిలిన్చి రిసా కి సర్ద జా అస్సి. దొన్ని కి జాని. కిచ్చొచి రిసా కి, కిచ్చొ జలెకి, తిలె కంక నెంజిలె చువ్వె తంక, సొమ్నారుమ్ తిలె కి, కొత్తు తిలె కి, కిసి ఓర్పుప జంక గే ఆవ్ సిక అస్సి.

13 మెలె, క్రీస్తు అంక సెక్తి దెతె తత్తయ్చి రిసా కిచ్చొ జలెకి కెరుక తెరి.

* 4:1 4:1 మెలె, ప్రబుచి తెడి తా, జోచి డిట్టుమ్క తుమ్ డిట్టుమ్ టీచ. † 4:2 4:2 మెలె, 'జోవయిచి తెడి అస్సున్, చి జో కట్టు దెతోసా. జాచి రిసా తుమ్క కి జా కట్టు బుద్ది తంకయ్'. ‡ 4:4 4:4 మెలె, ప్రబుచి తెడి అస్సున్. జో సర్దనంతోసుమ్ దెతోసా. జేక, జోవయిచి సర్దనంతోసుమ్ నజన జోవయిచి సర్దనంతోసుమ్ తెంతో! జోవయిచి తెడి తిలె, దస్సి బుద్ది తంక తయెదె.

§ 4:5 4:5 నెంజిలె, 'అన్నె జెతిసి పాసి జా అస్సె'.

* 4:7 4:7 నెంజిలె 'అర్దుమ్ కెరసుక నెత్తిర్లి...'

14 జలెకి, అంచి అప్పెచి బాదతె తుమ్ బెద తోడు దిలిసి చెంగిలి.

15 ఆవ్ సుబుమ్ కబుర్ నూనవుక దెర్లి మొదోల్క, ఆవ్ తుమ్చి మాసిదోనియ ప్రదేసిమ్ ములిలి పొది, ఎక్కి తుమి గని వేర సంగుమ్లుతె ఎక్కి కి తోడ్ దెతి నాయ్, ఎక్కిలోక ఎక్కిలో తోడ్ దెతిన్తె అమ్చి తెన్ ఎక్కి తుమి బెదిలదు.

16 ఆవ్ దెస్సలోనిక పట్టుమ్తె తిలి పొది కి అన్నె అన్నె తోడు తెద్రయ్లదు.

17 జలె, తోడుకయ్ అంక ఆస నాయ్, గని అంచి ఆస కిచ్చొ మెలె, కిచ్చొచి రిసా ఆవ్ సర్ద జతసి మెలె, తుమ్ తోడు దిలిసి తుమ్కయ్ లాబుమ్ దెతయ్.

18 నాయ్, గెద, అంక పూర్తి తోడు దా అస్సున్. నాయ్, దొర్కు జలి కంట అన్నెయ్ తోడు ఈంజ. తుమ్ తెద్రయ్లి తోడు ఎత్తి ఎపప్రాదితు అంక దా అస్సి. జా తోడు దిలిసి కిసి జయెదె మెలె, దేముడుక చెంగిల్ దూపుమ్ డయిలి రితి, బలి దిలి రితి, జోక సర్ద కెరెదె.

19 జలె, తుమ్క కిచ్చొ కొత్కు గే, బాద గే అయ్లె కి, జోచి పరలోకుమ్చి సామ్సారుమ్క దేముడు కవలుసుప జలిసి ఎత్తి క్రీస్తు జలొ యేసుచి తెడి తుమ్క దొర్కు కెరెదె.

20 ఉగుమ్చి ఉప్పిరి ఉగుమ్క అమ్చొ దేముడు అమ్చొ అబ్బొక జెయ్యి! †ఆమేన్.

21 క్రీస్తు జలొ యేసుచి తెడి తిలొ జోవయించి సుద్ది జలొ ఒత్తచొ ఎత్తి మాన్సుక తుమ్ అంచి ప్రేమ సంగ. అంచి తెన్ తిల బావుడ్లు కి తుమ్క జోవయించి ప్రేమ సంగ తెద్రయ్తతి.

22 జో ప్రబుచి సుద్ది జా జోచయ్ జల మాన్సుల్ ఎత్తి తుమ్ పిలిప్పి పట్టుమ్చక జోవయించి ప్రేమ సంగ తెద్రయ్తతి. ముక్కిమ్క కొన్స మెలె,

క్రైస్తవ్ రానొతె కామ్ కెర్త నంపజలనక సంగ.

23 ప్రబు జలొ యేసుక్రీస్తుచి దయ తుమ్చి ఆత్మ తెన్ తవున్.

† 4:19 4:19 యేసుచి తెడి జేవ్ నంపజలన అస్సిచి రిసా, చి జోవయించ వరల్ ఎత్తి యేసుచి అత్తి దెతయ్చి రిసా 'యేసుచి తెడి' మెన రెగ్ల అస్సి. † 4:20 4:20 ఈంజేవ్ పుస్తకుమ్ తొత్ రెగిడ్లి గ్రీకు బాన తెన్ 'తెద్దిలి'

మెలిన్క 'ఆమేన్' మెనుల. § 4:22 4:22 నెంజెలి 'వెల్లో రానొతె'.

కొలోస్సియుల్ క రెగిడ్లి ఉత్త్రమ్

బారిక్ జలో పవులు కొలోస్సి పట్టుమ్చ సంగుమ్చక పవులు రెగిడ్లి ఉత్త్రమ్

మొదొల్ కోడు

1 కొలోస్సి పట్టుమ్తెచ క్రీస్తుక సంపజా జోచి సుద్ది జా జోచయ్ జల జోచి తెడి తా నిదానుమ్ జల బావుడ్లుక,

2 దేముడుచి సెలవ్చి రిసా *క్రీస్తు జలో యేసుచి రిసాచి సుబుమ్ కబుర్ కామ్ కెర్తి రిసా జో దిలి అదికారుమ్ తెన్ జోచొ బారికి జలో ఆవ్ పవులు, బావొ జలో తిమోతి తెన్, రెగిడ్లి ఉత్త్రమ్.

అమ్క అబ్బొ జలో దేముడుచి దయ సేంతుమ్ తుమ్చి ఉప్పిరి తవుసు!

జేవ్ కొలోస్సి పట్టుమ్చచి రిసా పవులు జోవయించి సర్ల సంగ ప్రార్థన కెర్తె తిలిన్చి కోడు

3 తుమ్చి రిసా కెయ ప్రార్థన కెర్లె కి, అమ్చొ ప్రబు జలో యేసుక్రీస్తుచొ అబ్బొన్ జలో దేముడుక తుమ్చి రిసా అమ్చి సర్ల సంగితనుమ్.

4 కిచ్చొక మెలె, జో క్రీస్తు యేసుచి ఉప్పిరి తుమ్ సంపతిలిన్చి రిసా, పడ్డొ జోచయ్ జల సంపజలన ఎత్కిజిన్క తుమ్ ప్రేమ కెర్తిన్చి రిసా, అమ్ సూన అస్సుమ్.

5 పరలోకుమ్తె తుమ్చి రిసా తియ్ తెలిసి ఆసతె దెకితె తిలి రిసా, తుమ్క పెట్టి తిలి నముకుమ్చి ప్రేమచి, రిసా తుమ్ ఇసి జా అస్సున్. జా ఆసతె దెకితె తిలిన్చి రిసా తుమ్ సత్తిమ్చి †కబుర్తె, మెలె సుబుమ్ కబుర్తె, అగ్గె సూన్లదు.

6 సుబుమ్ కబుర్ తుమ్క దొర్కు జా అయ్లి తెంతొ, ఎక్కి తుమ్కయ్ దొర్కు జలి మైన నాయ్. ఒండి లోకుమ్తె సూనయ్ జతయ్, చి కేనె సూనయ్ జలెకి, ఆత్మపలితుమ్ జెతయ్. దస్సి, తుమ్ తొలితొ సూన ప్రబుచి దయచి వరుమ్చి రిసా పూర్తి అర్దుమ్ కెర్లె దిసి తెంతొ, తుమ్తె కి సుబుమ్ కబుర్ ఆత్మపలితుమ్ జెతయ్.

7 ప్రేమ జలో అమ్చి తెన్ ప్రబుచొ సేవ కెర్తొసా జలో ఎపప్రా, జలె, ప్రబుచి ఈంజ సుబుమ్ కబుర్ సరిగా, కిచ్చొ వేరచి నే బెదయ్తె సికడ్డికయ్, పూర్తి అర్దుమ్ కెర్లెదు. అమ్ ఒత్త గెచ్చుక నెత్తిర్లి రిసా జొయ్యి అమ్చి నావ్ తెన్ మెలి రితి, క్రీస్తుక నిదానుమ్ తిలొ సేవ కెర్తొసా జా ఒత్త తుమ్క సుబుమ్ కబుర్ సూనవ సికడ అస్సె.

8 పడ్డొ, ప్రబుచి ఆత్మతుమ్చి పెట్టి దెతి తుమ్చి ప్రేమచి రిసా జో ఎపప్రా అమ్క సంగ అస్సె.

9 జాకయ్, తుమ్చి నముకుమ్చి అన్నె సంపజలనక చి ఉప్పిర్చి తుమ్చి ప్రేమచి రిసా, అమ్ సూన్లి దిసి తెంతొ, తుమ్చి రిసా ప్రార్థన కెరుక ములుమ్ నాయ్. ఆత్మచి బుద్ది, ఆత్మతె గ్యానుమ్ ఎత్కి దేముడు తుమ్చి పెట్టి బెరవును, చి అమ్ జోచ మాస్సుల్ జా ఇండుక మెన జోచి ఇస్టుమ్ కిచ్చొ కిచ్చొ జతయ్ గే, తుమ్ పూర్తి జాన్తు మెనయ్ తుమ్చి రిసా ప్రార్థన కెర్లెనుమ్.

10 జోచి ఇస్టుమ్ జాన్లె, జోచి బుద్ది గ్యానుమ్ తెన్ తిలె, ప్రబుచి విలువ దెకయ్తి రితి తుమ్ ఇండితె. దస్సి, చెంగిల్ కమె ఎత్కితె ఇండ పలితుమ్ దెర దెర, అగ్గెచి కంట దేముడుక రోజుక ఒగ్గర్ జాన జాన, జోచి ఇస్టుమ్ రితి ఇండ ఇండ, జోక పూర్తి సర్లసంతోసుమ్ కెర్తె.

* 1:2 1:2 'క్రీస్తు' మెలె, 'తెర్లయిందె' మెన ఎత్కి అదికారుమ్ తిలొ దేముడు పూర్ణమ్ సంగిలొ దొర్కు జలో రచ్చిండువ కెర్తొసా. † 1:5 1:5 నెంజిలె 'కోడుతె'.

11 అన్నె కిచ్చొ మెన అమ్ ప్రార్దన కెర్తసుమ్ మెలె, జోచి పరలోకుమ్చి నెక్కిక తుమ్చి పెట్టి జోచి నెక్కి బెరవ డిట్టుమ్ కెర్సు, చి తుమ్చి పెట్టి జో దెతి సంతోసుమ్క తుమ్ ఎత్తి బాదల్ సేంతుమ్ తెన్ ఓర్పువ జా నిదాసుమ్ తా

12 ఎత్తిక అబ్బొ జలో దేముడుక తుమ్చి సర్ద సంగితె. కిచ్చొక మెలె, జోచయ్ సుద్ది జల మాస్సుల్ ఎత్తిజిన్ తెన్ జోచి ఉజిడ్ రాజిమ్తెచి సొమ్సారుమ్తె అమ్క వాట సేడ్డి రితి జోవయించి దయక అమ్క విలువ దెక అస్సె.

13 మెలె, సయ్తాన్ ఏలుప కెర్రి అందర్ రాజిమ్ తెంతో అమ్క విడ్డల్ కెర, ప్రేమ తిలొ జోచొ సొంత పుత్తున్చి రాజిమ్తె అమ్క జో అబ్బొన్ బెదవ అస్సె.

14 మెలె, జో పుత్తున్తెయి అమ్చి రచ్చున. †అమ్ కెర్ల పాపల్ జొయ్యి చెమించుప కెర, నెతోవ గెల అస్సె.

ఎత్తిక ఆదారుమ్ జలోసొ యేసుయి

15 యేసుతె అమ్, నే డిస్తా దేముడుచి పొలిక డిస్తయ్. కిజెర్మన్ ఎత్తిక జో తొల్పూర్, జో వెల్లో.

16 కిచ్చొక మెలె, ఎత్తి కి యేసు తెన్ జెర్మన్ జలి. కేనె తిలె కి, పరలోకుమ్తె తిలె కి, బూలోకుమ్తె తిలె కి, కేన్ లోకుమ్తె తిలె కి, నే డిస్సిసి జలెకి, డిస్సిసి జలెకి, కేన్ లోకుమ్చ వ సిజాననల్తె తిలస కి, ఏలుప కెర్రి నెక్కి అదికారుమ్ తిలస కి, అదికారుమ్ తిలిసి ఎత్తి, అదికారుల్ ఎత్తి, పరలోకుమ్చ జలెకి, బూలోకుమ్చ జలెకి, ఎత్తి కి జోచి అత్తి

‡ 1:14 1:14 ఈంజ ఉత్తమ్ తొలితో రెగిడ్ల సగుమ్ పుస్తకల్తె కిచ్చొ అస్సె మెలె, జోచి లొయి సువ, అమ్క నెతోవ గెల అస్సె, మెలె, అమ్చి పాపుమ్ చెమించుప కెర అస్సె. § 1:15 1:15 నెంజలె, 'జెర్మయ్లిసి ఎత్తిక'.

గని జెర్మయ్లిసి జయె నాయ్, జో. దేముడి జా జో ఎత్తిచి కంట అగ్గెయ్ తిలొ. యోహాను 1:1-2, 14. * 1:17 1:17 'తొలితో' మెలె, జో తొలితో తెంతో అస్సె, చి జొయ్యి ముక్కిమ్చొ. † 1:18 1:18 ఎపెను 1:22-23, 4:16. ‡ 1:20 1:20 రోమియల్ 8:20-23. § 1:20 1:20 ఎపెను 1:9-10. * 1:23 1:23 27వి కోడు, చి 1:5చి కోడు దెక.

జెర్మయ్ జలి. జోచి రిసొయి జెర్మయ్ జలి.

17 * ఎత్తిచి కంట తొలితో తిలొ సుదొ జొయ్యి, ఎత్తిక ఆదారుమ్ జలోసొ జొయ్యి, జో నెంజలె, జేవ్ తత్త నాయ్.

18 పడ్డొ, జోచి †ఆగ్ జల నంపజలస బెదితిన్ మొత్తుమ్క జో బోడి, జో మొదొల్. మొర్కుక జిన జితసక జో తొల్పూర్. కిచ్చొక మెలె, కిచ్చొచి రిసొ కి జో వెల్లో తంక.

19 క్రీస్తుచి పెట్టి పూర్తి తంక మెన, దేముడుచి ఇస్టుమ్ జలి.

20 పడ్డొ యేసుక్రీస్తు నిలువతె అర్చితుమ్ జా జోచి లొయి సువెలి వాటు పాపుమ్ పుంచితినచి నెక్కిక ‡బూలోకుమ్తె తిలిసి ఎత్తి, పరలోకుమ్తె తిలిసి ఎత్తి, కేన్ లోకుమ్తె తిలిసి ఎత్తి క్రీస్తుచి తెడి జేవ్ ఎత్తి జో తెన్ కిసేంతుమ్ జతి రితి అన్నె బెదవనసుక మెన దేముడుచి సర్ద జలి.

యేసుచి అత్తి దేముడు బెదవన్నన

21 తుమ్ కొలొస్సియిల్ కి అగ్గె జోక వేరయ్ మాస్సుల్ జా, తుమ్చ ఆత్తుల్తె జోక విరోదుమ్ జా తిలి రిసొ వెర్రి వెర్రి కమొ కెర్తె తిలదు.

22 గని, జోచి ఆగ్ మొర్లిన్ తెన్ తుమ్చి పాపుమ్ వయ తుమ్క కి జో బెదవన అస్సె. కిచ్చొక మెలె, తుమ్ జోచి సుద్ది జా, జోచయ్ జా, తప్పు నెంతె, కిచ్చొ గర్చికి నెంతె జా, దేముడు అబ్బొన్చి మొక్కొ జో తుమ్క టీవొ కెరెదె.

23 గని జా జర్గు జంక మెలె, తుమ్ ఆత్తుక డిట్టుమ్ జా జొయ్యి పునాది జతిన్తె టీవ, * 'పరలోకుమ్తె గెతి

వాటు అమ్మక దొర్కు జలి' మెంతి దయిరిమ్ దెతి తుమ్ సూన్లి సుబుమ్ కబుర్ నే ముల్తె అన్యానుమ్ నే జతె, వేరతె నే గెతె, ప్రబుచి ఉప్పిర్చి నముక్కుమ్ తుమ్ నిదానుమ్ తంక్. జెర్మయిలిసి ఎత్కిక ఈంజ సుబుమ్ కబుర్ ఈంజ ఒండీ లోకుమ్తె సూనయ్ జా అస్సె. ఆవ్ పవులు కి ఈంజ సుబుమ్ కబుర్ సూనయ్తి రిసా, ప్రబుచో సేవ కెర్తొసా జా అస్సి.

24 ఆవ్ జలె, 'తుమ్క లాబుమ్ దొర్కు జవున్' మెన ఆవ్ †అల్లర్ సేడ్డె కి, అంక సర్ద. కిచ్చొక మెలె, ఆవ్ ఇన అల్లర్ సేడ్డిసి కిసి జతయ్ మెలె, క్రిస్తు సేడ్డె అల్లర్తె ఆవ్ బెద ఒత్త సేంసిలిసి ఆవ్ ఒర్నుప జా కుట్టయ్లి రితి జతయ్. కిచ్చొక మెలె, జోచి అగ్ జల జోచయ్ సంగుమ్క 'జోచి కబుర్ సూన్తు' మెనయ్, ఆవ్ ఈంజేవ్ సైమల్ సేడ్డిసి.

25 జోచయ్ జల మాన్సుల్ మొత్తుమ్క ఆవ్ ఈంజ ‡సేవ కెర్తి రిసా ప్రబు అంక తెద్రవ అస్సె. దస్సి, తుమ్చి రిసా కి, అంచి కోడు పూర్తి తుమ్ జానుక మెనయ్, జోయ్యి అంక తెద్రవ అస్సె.

26 జా కోడు కిచ్చొ జయెదె మెలె, ఉగల్చి ఉప్పిరి ఉగల్చవ మాన్సుల్ నే సూన్తి రితి జో కిలుంకడ తిలి గుట్టు. జా అగ్గె లుంకడ తిలె కి, అప్పెయి జోక నంపజల జోచయ్ జల మాన్సుల్క జో సూనవ అస్సె.

27 తుమ్తె తెద్రయిందె మెన యూదుల్క దేముడు సంగ తిలో దొర్కు జలో రచ్చించుప కెర్తొసా జలో క్రిస్తు, ఉజిడ్ తిలి గవురుమ్చి ఆస తుమ్ యూదుల్ నెంజిలనచి పెట్టి కి అస్సె. పరలోకుమ్తె గెతి వరుమ్చి దయిరిమ్ తుమ్కయ్ కి దొర్కు కెర అస్సె. జయ్యి కోడు జోచి గుట్టు జా తిలి. జా రచ్చన

కెత్తిజిన్ యూదుల్ నెంజిలనక కెద్ది సామ్సారుమ్ కెర్తయ్! కెద్ది వెల్లి కోడు, ఈంజ. జయ్యి గుట్టు జోచయ్ జల మాన్సుల్కయ్ జో జానవుక ఇస్టుమ్ జలో!

28 జలె, ఆకర్క తీర్పు జంక మెన ఎత్కిజిన్ దేముడుచి మొక్కె టీవో కెరుక మెన, క్రిస్తుక నంపజల మాన్సుల్ ఆత్మ తెన్ పూర్తి వడ్డిల మెలె, జోవయింతె ఎత్కి మాన్సు పూర్తి జా జోవయించి మొక్కె టీవో జలె, అమ్ జోవయింక బవుమానుమ్ దిలి రితి జయెదె. జాకయ్, * 'ఆత్మ తెన్ పూర్తి వడ్డుతు' మెనయ్, క్రిస్తుచి రిసా బాల వెల్లో ఎత్కిజిన్క అమ్ సూనయ్తె తా, వేర బుద్దివోచి రిసా జాగర్త సంగితనుమ్, జోచి రిసాచి గ్యానుమ్ ఎత్కి జోవయింక సికడ్డనుమ్.

29 జోక ఆత్మక పూర్తి వడ్డుత్! మెనయ్, అంచి పెట్టి జో మొచ్చు తెన్ దెతి జోచి ఎదివాల్ నెక్తి ఎత్కి తెన్ని, పూర్తి మెన్సు దా, జోచి కామ్ ఆవ్ కెర్తె తత్తసి.

2

1 తుమ్చి రిసా కి, లవొదికయ పట్టుమ్చ నంపజలనచి రిసా కి, అస్సె, అంక నే దెకిల అన్నె నంపజలనక ఎత్కిజిన్చి రిసా కి, 'ఆత్మతె వడ్డుత్' మెన ఆవ్ కెద్ది ఆస తెన్ ఉచర్తసి గే ప్రార్దన కెర్తసి గే తుమ్ జానుక మెన అంచి ఆస్.

2 తుమ్ జేవ్ ఎత్కిజిన్చి రిసా ఆవ్ కిచ్చొ మెన ఆస జతసి మెలె, జేవ్ ఎత్కిజిన్ మొత్తుమ్ ఎక్కి ప్రేమ ఎక్కి కట్టు జా జోవయించి పెట్టి దయిరిమ్ డిట్టుమ్ జతు, చి జోవయింక పూర్తి అర్దుమ్ జెయెదె, చి క్రిస్తుచి తెడి అస్సుమ్చి చెంగిల్ తమ్దె మెన పూర్తి దయిరిమ్

† 1:24 1:24 జోజేలి జా తిలన్. 4:3, 10 దెక. ‡ 1:25 1:25 ఎవెసు 3:1-13. § 1:26 1:26 ఎవెసు 1:9, 3:3-4. * 1:28 1:28 ఎవెసు 4:12-14.

జవుల, చి దేముడుచి గుట్టు జానుల, మెలె క్రీస్తుకయ్ జానుల మెన తుమ్చి రిసా ఆవ్ ఆన జతసి.

3 జో క్రీస్తుచి పెట్టి బుద్ధి గ్యానుమ్చి సామ్సారుమ్ ఎత్తి ఒత్తయ్ లుంకిల్ రితి అస్సె.

4 తుమ్క కిచ్చొక ఆవ్ ఇసి సంగితసి మెలె, సూటి డీస్త తెలివి కొడొ తెన్ కా తుమ్క మోసిమ్ నే కెర్తి రితి తుమ్ జాగర్త తా.

5 ఆగ్గక మెలె, ఆవ్ తుమ్క దూరి అస్సి, గని ఆత్మక తుమ్చి పాసి తా, తుమ్ అప్పె సుద్ది ఇండితిసి, క్రీస్తుచి ఉప్పిర్చి తుమ్చి నముకుమ్ డిట్టుమ్ తిలిన్చి రిసా ఆవ్ సూన్లి రిసా, సర్ల తెన్ అస్సి.

6 జలె, ప్రబు జలొ క్రీస్తు యేసుక తుమ్ నంపజా తిలదు.

7 జలె, జోచితె *చెర్తొ గల డిట్టుమ్ టీవొ జా తిలి రితి, చెంగిల్ గేర్ జా తంక మెన కీసి డిట్టుమ్ పునాదితె జా తంక ముక్కిమ్ మెలె, దస్సి, జో క్రీస్తు పునాది జతినచి ఉప్పిరి తుమ్ టీవొ డిట్టుమ్ జా, చి జోచి తెడి ఆత్మతె వడ్డ, క్రీస్తుచి ఉప్పిర్చి నముకుమ్చి రిసా ఎపప్రా తుమ్క సికడ్డిసి ఎత్తి దెరన, అన్నె డిట్టుమ్ జతె తా. జో ప్రబు కెర్తి దయ ఎత్తిచి రిసా జోక తుమ్చి సర్ల దెకయ్తె తా, జోచి తెడి జియ జో దెతి బుద్ధితె తుమ్ ఇండ.

8 తెలివి తెన్ కొడొ బెదవ వేర బోదన కెర్తిసి తెన్ రితయ్ కొడొ తెన్ మాన్సుల్ అవ్వి ఉచర్ల అలవాట్ కమొ, †ఆగ్గుల్క, ఆత్మల్క, దూతల్క బూతల్క, బిత అలవాట్ కమొ మాన్సుల్ సికడ తుమ్క మోసిమ్ కెరుక ఉచర్లు. దసితె తుమ్ దెర్చు నే సెడ్డి రితి తుమ్ జాగర్త తా. జా

క్రీస్తు సికడ్డిసి నెంజె ఈంజ లోకుమ్తె బెద్దితిసి.

9 దేముడు కిచ్చొనే పిట్టె, జొయ్యి పూర్తి ఆగ్గ రూపుమ్ తెన్ క్రీస్తుచి పెట్టి జతయ్.

10 చి †అదికారుమ్ తిలిన్ ఎత్తిచి ఉప్పిరి, †అదికారుల్ ఎత్తిచి ఉప్పిరి తిలొ క్రీస్తుచి తెడి తుమ్ ఆత్మక పూర్తి దా అస్సున్.

11 పూర్గుమ్చి అలవాట్ తెన్ అమ్చ యూదుల్ 'దేముడుచ మాన్సుల్ ఆము' మెనన, జోచి సుద్ది కారిమ్చి సున్నతి కెరనుల. జా, జలె, ఎక్కి అగి జర్గు జతసి. తూమ్, మాత్తుమ్, అప్పె క్రీస్తుచి తెడి కీసి జా అస్సున్ మెలె, క్రీస్తుచి తెడి సుద్ది కెర్తి సున్నతి కెరన్లి రితి జా అస్సున్. మాన్సు అగి కెరన్లి సున్నతి నెంజె, గని ఈంజ ఆగ్గచ ఆనల్ బుద్దుల్ సింద వెంట గెలిసి.

12 క్రీస్తు మొర్లిన్ తెన్ తుమ్చి ఈంజ ఆగ్గచ ఆనల్చి జీవ్ మొర గెలన్, ఈంజ ఆత్మజీవ్ తుమ్క కీసి దొర్కు జలి మెలె, క్రీస్తుక మొర్తన తెంతో జియడ్డొ దేముడుక నెక్కి తుమ్ నంపజలదు. చి జో అన్నె జీవ్ జా ఉట్టిన్ తెన్ జోచి ఆత్మక తుమ్ ఆత్మజీవ్ జా ఉట్లదు. ఇన్నెచి గుర్తుక బాప్తిసుమ్ నజన్లదు.

13 పడ్డొ, తుమ్ పాపుమ్ కెర్తె తా అగ్గె ఆత్మక మొర్తనయ్ జా తిలదు, ఆగ్గక యూదుల్చి సుద్ది సున్నతి నెంతె తిలదు, తుమ్ దస్సి మొర్తనయ్ జా తతికయ్, దేముడు అబ్బొసి క్రీస్తుక అన్నె జియడ, జో తెన్ కి తుమ్క జియడ్డన్. కీసి మెలె, జోక నంపజల ఎత్తిజిన్చ పాపల్ ఎత్తి అమ్క చెమించుప కెర్లన్.

14 మెలె, పూర్గుమ్ తెంతొచ ఆగ్గుల్ అమ్చి ఉప్పిరి దావ రెగిడ్డి రితి జతయ్.

* 2:7 2:7 ఎపెసు 3:17 దెక. † 2:8 2:8 నెంజెలె, 'బాలబోదల్ అర్దుమ్ కెరంతి ఎదిలి గ్యానుమ్చ సెన్లు'.

‡ 2:10 2:10 ఆత్మల్, దూతల్, బూతల్చి అర్దుమ్ కి ఈంజీవ్ కొడొతె ఉచరుక జయెదె. కొలొస్సియుల్ క్రీస్తుక నే నంపజతె అగ్గె, ఆత్మల్ దూతల్ బూతల్చి అర్దుమ్ కి ఈంజీవ్ కొడొతె ఉచరుక జయెదె. కొలొస్సియుల్ క్రీస్తుక నే నంపజతె అగ్గె, ఆత్మల్ దూతల్ బూతల్చి ఎత్తిక బితె తిల.

గని, జా ఆగ్నుల్చ నిందల్ ఎత్తి జో దేముడు అబ్బొసి వుంచ గెలన్. కీసి మెలె, క్రీస్తు మొర్లి సిలువతె జా ఆగ్నుల్క మేకుల్ తెన్ పెట ముల దిలి రితి వుంచ గెలన్.

15 దస్సి కెర, దస ఆగ్నుల్చ నిందల్చ కోడ్లు వయడ్డ అమ్క పాపుమ్ సికడ్డ అత్తుల్, దూతల్, బూతల్, గట్టచి సెక్తి పాడ్ కెర గెల కెర, ఎత్తిచి మొక్కె జోవయింక లాజ్ కెరవ, క్రీస్తు జోవయించి ఉప్పిరి జిన్లన్. అమ్ క్రీస్తుక సంపజలసచి ఉప్పిరి దసచక కి కిచ్చొ సెక్తి నాయ్.

16 జాకయ్, కతిసిచి రిసా పితిసిచి రిసా 'ఈంజ గార్, జా గార్' మెన జవున్, నెంజెలె, 'పండుగు దీసి, అమన్ దీన్చి రిసా, నెంజెలె బక్తి కెర్తి సెలవ్ కడన్ల దీసి రిసా, కిచ్చొ కిచ్చొ కెర్ల గార్' మెన తుమ్క కో సంగుత్ అవ్కానుమ్ దాస నాయ్, సికడ్ల సూస నాయ్.

17 పడ్డె జర్లు జతిన్క దసచ ఎత్తి ఎక్కి నీడ. జా నీడ గల్తాసా క్రీస్తు.

18 జాకయ్, "చువ్వె తా దూతల్ గట్టక తుమ్ జొకర" మెన కో సికడ్ల, తుమ్ దెర్లు సేడ నాయ్. "దసచక నే జొకర్లె కిచ్చొగె పిట్టెద" మెన బియడ్లసక తుమ్ బియఁ నాయ్. దస కమొ సికడ్లెసా కో జలెకు కిచ్చొక నంప కెర్లయ్ మెలె, రిత సిప్పల్క, దస్సి జోచి సొంత మెన్సు తిలిన్క 'వెల్లిచి' మెన పుల.

19 క్రీస్తుక, మెలె బోడిక, జో మాన్సు అజ జా ముల అస్సె. జో బోడి తెన్ బెద తిలెకయ్ ఆగ్క పున్లె తా, అత్కుల్ నరల్ ఎత్తి తమ్మస కట్టు తెన్ తా, దేముడు దెతి జివుకయ్ వడ్డితె తయెదె.

20 క్రీస్తు తెన్ తుమ్ బెద, జో మొర్లిన్ తెన్ బెదిల్ రితి జా, తుమ్చి ఈంజ లోకుమ్చి పాపుమ్చి మొర్లి అత్తు మొర, *మాయలోకుమ్చ బూతల్, దూతల్, అత్తుల్, గట్టచి సేవ కెరుక ముల విడ్డల్

జలదు జలె, కిచ్చొక జా పాపుమ్చి అత్తు తెన్ అప్పెక తిలి రితి ఇండితను?

21 మెలె, మాన్సుల్ వాడిక కెర కేడయ్త రిత ఆగ్నుల్చి రిసా, అలవాట్చ కమొచి రిసా 'దెరుక గారు, కంక గారు' నెంజెలె, 'చడుక గారు' మెల వెర్లి ఆగ్నుల్క కిచ్చొక బితను?

22 దసచ ఒండి మాన్సుల్ ఆరి ఉచర సికయ్లసి.

23 మాన్సుల్ అవ్వి కెర్ల దస జాడ్లు రిత వయన్లె, సిచ్చల్ కెరన్లె, ఆగ్క సిచ్చల్ కెరన్లె, గ్యానుమ్ రితి పున్నిమ్ రితి డీసెదె, గని అమ్చి పట్టిచి పాపుమ్బుద్దిచ ఆసల్క దస ఆగ్నుల్ ముద్దొ కెరుక నెతిరి, గెచ్చువుక నెతిరి.

3

పరలోకుమ్ తిలిన్క ఆస జంక

1 క్రీస్తు తెన్ తుమ్ బెద జో తెన్ జీవ్ జా ఉట్ట, జోచి అత్తుతె తుమ్ జీవ్ జలదు. జలె, జో జీవ్ జా ఉట్ట, ఉప్పిరి, దేముడు అబ్బొసిచి ఉజెతో పక్క పరలోకుమ్తె వెస అస్సె. జాకయ్, జో ఉప్పిర్ వెస తిలిన్తెచి ఎత్తిక తుమ్ ఆస జా.

2 ఈంజ లోకుమ్తె తిలిన్క ఆస జా నాయ్. పరలోకుమ్చిక ఆస జా.

3 కిచ్చొక మెలె, ఈంజ లోకుమ్తె తుమ్ మొరయి అస్సున్, చి దేముడుచి తెడి క్రీస్తుతెయ్ తుమ్చి జీవు క్రీస్తుతె దేముడుచి తెడి లుంకడ అస్సె.

4 అమ్చి జీవు తిలొ క్రీస్తు కెయఁక అన్నె ఉత్తె జా డీసెదె గే, తుమ్ కి తెదొడిక జో తెన్ పరలోకుమ్చి గవురుమ్ తెన్ జతిన్తె డీస్సె.

5 జాకయ్, తుమ్చి పెట్టి ఈంజ లోకుమ్చి బుద్దిచి కిచ్చొ జలెకు తయెదె గే, జాక తుమ్ గెచ్చువ గెల; జాక మార. కీస బుద్దివొ మెలె, లంజెకమొ, లంజెబుద్ది, ఆగ్కచి ఆస ముద్దొ నే కెరంతిసి, గార్చిచి ఉప్పిర్చి ఆస, పడ్డె

* 2:20 2:20 నెంజెలె, 'బాలబోడల్చి ఎదిలి గ్యానుమ్చి అలవాట్ ముల...'

అన్నె మాన్యుల్చి అస్తి దొర్కు కెరంతి అస; ఇసిచి జలె, సత్తిమ్ తిలో దేముడుక ముల వేర దేముడు మెలోసాక ప్రేమ కెర్లి రితి జతయ్, జాక 'దేముడు' మెలి రితి కెర్లి బొమ్మక జోబర కెర్లి రితి జతయ్.

6 దస కమెచి రిసా *జోచి కోడు రితి కెరుక నెసిల మాన్యుల్చి దేముడుచి కోపుమ్చి సిచ్చ లయెదె.

7 అగ్గె తుమ్ జేవ్చి నెడెమె జతి పొది దసచ ఎత్తి కెర ఇండితె తిలదు.

8 గని అప్పె దసచ ఎత్తి కి తుమ్క దూరి కెర. కీసచ మెలె, కోపుమ్ దెకయ్తిసి, కోపుమ్ దెరన్తిసి, కుస్సిదుమ్, దూసినల్, వెట్కారుమ్చ క్కొడె.

9 పడ్డె, ఎక్కిలోక ఎక్కిలో అబద్దుమ్ సంగ నాయ్, కెర నాయ్. కిచ్చొక మెలె ఈంజ లోకుమ్చి పాడ్ జలి ఆగ్చి జెర్మున్ ఇండితిసి కడ వెంట గెల కెర,

10 తుమ్ జేవ్చి ముల, నొవి మాన్యుక గలన అస్సన్. ఈంజ గ్యానుమ్ తెన్ జా జెర్మయ్లో దేముడుచి రూపుమ్ తెన్ నొవి బుద్ది దెరన అస్సన్.

11 ఈంజ నొవి ఆత్మతె జెర్మున్ జల మాన్యుల్చె కిచ్చొ తేడల్ నాయ్. 'గ్రీసు దేసిమచ' మెన దేముడు సంగె నాయ్, 'యూదుల్' మెన నాయ్. 'యూదుల్చి గుర్తుచి నున్నతిచ' మెనె నాయ్, 'జా నున్నతిచ గుర్తు నెంజిలస' మెనె నాయ్, 'నేన్ల మాన్యుల్' మెనె నాయ్, 'ణెంగుర్ దేసిమచ' మెనె నాయ్, 'గొతిమాన్యుల్' మెనె నాయ్, 'గొతి నెంజిలస' మెనె నాయ్. జోచి మొక్కె దస తేడల్ నాయ్, గని ఎత్తిజిన్క క్రీస్తుయి ముక్కిమ్, అన్నె కేన్ రగమ్చ మాన్యుల్ జలెకి, జోచ మాన్యుల్ ఎత్తిజిన్చి పెట్టి జో అస్సె.

12 జలె, దేముడు నిసాన్ల తుమ్ జోచయ్ నుద్ది జల జో ప్రేమ కెర్లస, తుమ్ ఎత్తిజిన్ కిచ్చొ కిచ్చొ బుద్దివో గలన మెలె, కన్కారుమ్ దెకితిసి, మెత్తన తతిసి,

గవురుమ్ నే ఉచరంతె, అన్నెమాన్యుల్క మరియాద దెకితిసి, సేంతుమ్ తెన్ బాదల్ ఓర్పువ జా

13 ఎక్కిలోక ఎక్కిలో ఓర్పువ జతిసి. పడ్డె, కిచ్చొ జవున్ తప్పుచి రిసా ఎక్కిలో అన్నెక్కోక నింద కెరుక జతి జలె, చెమించువ కెర. ప్రబు తుమ్క కీసి చెమించువ కెర అస్సె గే, తూమ్ కి ఎక్కిలోక ఎక్కిలో చెమించువ కెరుక అస్సె.

14 ఎత్తిచి కంట ముక్కిమ్క తుమ్ కిచ్చొ బుద్ది గలన మెలె, ప్రేమయ్. కిచ్చొక మెలె, ఎత్తి ఎక్కి కట్టు తెన్ తతి రిసా ప్రేమ ఆదారుమ్ జతయ్, జయ్యి బెదెవెదె.

15 పడ్డె, క్రీస్తు దెతి సేంతుమ్ తుమ్చి పెట్టి ఏలువ కెర్లి రిసా వాట్ దాస. ఎక్కిలో తెన్ ఎక్కిలో సేంతుమ్ తతి రిసాయి జోచి ఎక్కి ఆగ్చె తుమ్ బెదుక మెన జో బుకార్లన్. పడ్డె, జో కెర్లి దయచి రిసా జోక తుమ్చి సర్ల తుమ్ దెకవ.

16 పడ్డె, క్రీస్తుచ కొడె తుమ్చి పెట్టి బస జా కామ్ కెర్లి తతి రితి తుమ్ టాన్ దాస, చి జో దెతి బుద్ది తెన్ నిదానుమ్ తెన్ ఎక్కిలోక ఎక్కిలో జోచి సత్తిమ్ సికడ్డె తా. తుమ్తె కో పొరపాట్ నే జతి రితి బుద్ది సంగ జాగర్ల సంగితె తా, చి దేముడు కెర్లి దయ ఎత్తిచి రిసా తుమ్చి సర్ల జోక దెకయ్తి రితి, జోచి గవురుమ్ సంగిత గనుమ్లు గాయితె తా. జేప్ గనుమ్లుతె కిచ్చొ ఏక్ రగమ్ తుమ్ గాయ మెలె, కీర్తనల్ గట్టె.

17 తుమ్ కిచ్చొ లట్టబుక జలెకి, కిచ్చొ కెరుక జలెకి, ప్రబు జలో యేసుచి నావ్ తెడి లట్టబ జవున్, జర్గు కెర జవున్, చి జోచి నావ్ తెన్ దేముడు జలో జోచి అబ్బొన్క తుమ్చి సర్ల తుమ్ సంగ.

కేన్ గేరుచ జలెకి ఎక్కిలోక ఎక్కిలో దెకితిసి

* 3:6 3:6 'జోవయిచి' తెంతో 'మాన్యుల్చి' ఎదచి కోడు ఈంజ ఉత్తమ్ తొలితొ రెగిడ్ల సగుమ్ పుస్తకలెతె తయె నాయ్.

18 తేర్బోదలు, జలె, తుమ్చ మున్నర్లుచి తెడి దాక్ కెరన, జోవయించి కోడు సూన్తె తా. ప్రబుచి తెడి అస్సునచి ఇసి కెర్లె సూటి,†

19 మున్నర్లులు, జలె, తెర్దివొక ప్రేమ కెర, జోవయింక కుస్సిదుమ్ దెక నాయ్.

20 బోదల్ జలె, కేన్ కామ్చి రిసా జలెకి, అయ్యన్అబ్బోనచి కోడు సూన. 'దస్సి కెర్లెకయ్ తుమ్క చెంగిలి' మెన ప్రబుచి కోడు.

21 తుమ్ అబ్బుదింసి ఆరి తుమ్చ బోదల్క కోపుమ్ కెరవ నాయ్, నెంజిలె అన్మానుమ్ జా సిక్కు జవుల.

22 గొతిమాన్సుల్ జలె, కేన్ కామ్చి రిసా కి, ఈంజ లోకుమ్చ తుమ్చ ఎజొమాన్సుచి కోడు సూన, జేవ్ సంగిల్ రితి కెర. ఆరి డీనుక, మాన్సుల్క మెన్సు వడంతి రిసా నాయ్, గని ఎక్కి మెన్సు ప్రబుకయ్ గవురుమ్ కెర్లి రితి తుమ్చ ఎజొమాన్సుక నిదానుమ్ సేవ కెర.

23 కేన్ కామ్ కెరుక మెలె కి, ఎక్కి మాన్సుచి సేవ కెర్లి రితి పొన, గని ప్రబుచి సేవ కెర్లి బుద్ది తెన్సి, సర్ల తెన్ కెర.

24 కిచ్చొక మెలె, తుమ్ నిదానుమ్ కెర్లి రిసాచి బావుమానుమ్క ప్రబు సొంత జోచి రాజిమ్తె వాటల్ తుమ్క దెయెదె మెన జాన్సు, గెద. దస్సి నిదానుమ్ కెర్లిసి జలె, ప్రబు జలో క్రీస్తుచి సేవ కెర్లిసి జయెదె.

25 కో పాపుమ్ కెర్లె, జోచి సిచ్చ జోక లయెదె. జో దాక్ జలెకి, వెల్లో జలెకి, అన్యె, సిచ్చ దెతిన్తె కి దేముడు కక్క మొకమాటుమ్ దెకె నాయ్, ఎజొమాన్సుక చి గొతిమాన్సుల్క జవున్ తేడల్ దెకె

నాయ్.

4

'ప్రార్దన కెర్తె తా'

1 ఎజొమాన్సు, తుమ్చ గొతిమాన్సుల్క సరిగా చెంగిల్ దెకితె తా, జోవయింక దెతిసి దాస. తుమ్క కి పరలోకుమ్తె ఎజొమాని అస్సి.

2 నిదానుమ్ తెన్ బద్దుకుమ్ నే జతె దేముడుచి దయ ఎత్కిచి రిసా జోవయింక తుమ్చి సర్ల సంగ ప్రార్దన కెర్తె తా.

3 అమ్చి రిసా కి ప్రార్దన కెర. కిచ్చొక మెలె, అమ్ కిసి గే జోవయించి సుబుమ్ కబుర్ కోడు, మెలె క్రీస్తుచి రిసాచి *గుట్టు, అమ్ సూనయ్తె తతి రిసా, జో అమ్క వాట్ దెవుసు మెన ప్రార్దన కెర. జా సుబుమ్ కబుర్ జా గుట్టు ఆవ్ సూనయ్లి రిసా ఆవ్ †జేలి జా అస్సి.

4 జా సుబుమ్ కబుర్ జా గుట్టు అన్యె సూనవుక అస్సి, చి ఆవ్ కిసి సంగిలె సొస్టుమ్ జయెదె గే జో అంక సికడ్పు మెన తుమ్ ప్రార్దన కెర.

మరియాద తెన్ ఇండ, లట్టబా

5 తుమ్క దిలి సమయుమ్ పాడ్ నే కెరంతి రితి, దేముడుచి క్రీస్తుచి గవురుమ్ దెకయ్త అవ్కానుమ్ గెనల్లి రితి, వేర మాన్సుల్క తుమ్ మరియాద దెకితె తా.

6 తుమ్ లట్టబ్బిసి సూటి తవున్. బమ్మ తెన్ లట్టబా నాయ్, గని సరిగా ఉచర, చెంగిల్ బెదవ, కామ్క జెతిసి లట్టబ, చి కక్క కిచ్చొ జబాబ్ దెంక గే, అజ్జ తయెదె.

† 3:18 3:18 మెలె, ప్రబుచి తెడి అస్సి, చి మున్నర్లుల్క గవురుమ్ దెకిలె, ప్రబుక గవురుమ్ దెకిల్ రితి జయెదె.

కొరిందిల్క రెగిడ్డి ఏక్ నెంబర్ ఉత్తుమ్ 11:3, ఎపెసు 5:22-24. * 4:3 4:3 'క్రీస్తుచి రిసాచి గుట్టు' మెన సంగిలె, క్రీస్తు రచ్చించువ కెర్లెసా జలిన్చి రిసా సంగితయ్, కొలోస్సియులు 2:2. నెంజిలె క్రీస్తుతెచి రచ్చన యూదుల్ నెంజిలెసక కి దొర్కు జలిన్చి రిసా సంగితయ్, కొలోస్సియులు 1:26-27, ఎపెసు 3:3-6. నెంజిలె ఎత్కి కి క్రీస్తుచి తెడి ఎత్కి అదికారుమ్ తిలో దేముడు బెదవంతిన్చి రిసా, ఎపెసు 1:9-10. † 4:3 4:3 రోమ్ పట్టుమ్తె జో జేలి జా తిలి పొది ఈంజ ఉత్తుమ్ వవులు రెగిడ్డి, మెన బగ్గర్జన్ ఉచర్తతి. బారికుల్ 28:16, 30, 31 దెక. కైసరియతె కి జేలి జా తిలో; బారికుల్ 23:25, పిలిప్పీతె కి; బారికుల్ 16:23, చి యెరూసలేమ్తె; బారికుల్ 21:33. ఎపెసుతె కి మెన సగుమ్జన్ ఉచర్తతి, గని రుజ్జా నాయ్. పిలిప్పీతె చి యెరూసలేమ్తె జేలి జలిసి తొక్కి డీనల్చి.

7 ఆవ్ ఇన్నె కీన్ అస్సి గే, తుకికు తుమ్క జానయెదె. ప్రబుచి తెడి అమ్క జో ప్రేమ జలో బావో జయెదె, చి నిదానుమ్ సేవ కెర్తొసా జా, అమ్చి తెన్ ప్రబుచో గొతిమాన్సు రితో జో జయెదె.

8 తుమ్తె ఆవ్ జోక కిచ్చొక తెద్రవ అస్సి మెలె, ఇన్నె అమ్ కీసి అస్సుమ్ గే తుమ్క జో ఒత్త సంగితి రిసా, చి తుమ్క మెన్సుతె జో దయిరిమ్ కెర్తె రిసా,

9 పడ్డొ, నిదానుమ్ తిలో ప్రేమ తిలో బావో జలో తుమ్చో సొంత మాన్సు ఒనేసిముక కి తెద్రయ్తసి. ఇన్నె జర్గు జలిసి ఎత్తి తుమ్క జేవ్ దొగుల సంగుల.

పవులు తెన్ తిలసచి ప్రేమ సంగ తెద్రయ్లిసి

10 ఇన్నె కో కో తుమ్క జోవయించి ప్రేమ సంగ తెద్రయ్తతి మెలె, అంచి తెన్ †జేలితె తిలో అరిస్తార్కుక, పడ్డొ బర్నబాచో సల్లోసి మార్కు ఇన్నెచి రిసా అగ్గె తుమ్క కబుర్ తెద్రవ అస్సి. జో తుమ్తె అయ్లె, టాన్ దాస.

11 పడ్డొ యూస్తు మెన అన్నెక్ నావ్ తిలో యేసు మెలోసా కి జోచి ప్రేమ తుమ్క సంగ తెద్రయ్తయ్. దేముడుచి రాజిమ్చి రిసాచి సుబుమ్ కబుర్ కామ్ ఆవ్ కెర్తినె, ఎక్కి ఈంజేవ్ తీగ్లయ్ యూదుల్ బెద అస్సి. ఈంజేవ్ అంక ఒగ్గర్ తోడు జా అస్సి.

12 పడ్డొ, క్రిస్తు జలో కీయేసుక సేవ కెర్తొసా జలో తుమ్చో సొంత మాన్సు ఎపప్రా కి తుమ్క జోచి ప్రేమ సంగ తెద్రయ్తయ్. తుమ్క 'ఆత్మక పూర్తి వడ్డ డిట్టుమ్ టీచ, పూర్తి దయిరిమ్ తెన్ ప్రబుచి ఇస్టుమ్ రితి ఇండితె తత్తు' మెన, తుమ్చి రిసా కెర్డొడ్ తెదొడి జో ప్రార్దన కెర్తె తత్తయ్.

13 జోచి రిసా ఆవ్ కిచ్చొ సాచి సంగితసి మెలె, తుమ్చి రిసా కి, లవొదికయ పట్టుమ్చచి రిసా కి, చి హియోరాసాలి పట్టుమ్చచి రిసా కి, జో ఒగ్గర్ కామ్ కెర్తయ్.

14 పడ్డొ, ప్రేమ జలో డాక్టర్ జలో లూకా చి దేమా తుమ్క జోవయించి ప్రేమ సంగ తెద్రయ్తతి.

15 లవొదికయ పట్టుమ్తెచ బావుడ్లు జల నంపజలసక చి నుమ్పాక, చి జేవ్చి గెరి సబ కెర్తె సంగుమ్చక అంచి ప్రేమ సంగ.

16 పడ్డొ, తుమ్తె ఈంజ ఉత్తుమ్ సదు కెర సూనయ్లదు మెలె, లవొదికయ పట్టుమ్తెచ సంగుమ్తె కి సదు కెరవ సూనవ. పడ్డొ, జా లవొదికయ పట్టుమ్తె సంగుమ్తె ఆవ్ తెద్రయ్లి ఉత్తుమ్ తూమ్ కి సదు కెర.

17 పడ్డొ, 'ప్రబు తుక దిలి కామ్ తుయి నిదానుమ్ తెన్ పూర్తి కెర కుట్టవు' మెన అర్కిప్పుక కి తుమ్ సంగ.

18 ఆవ్ పవులు సొంత ఆతు తెన్ ఈంజ ముద్దు సంగితి ఆకర్ కోడు రెగ్గితసి. ఆవ్ జేలి జలిన్చి రిసా తుమ్ ప్రార్దన కెరుక పచ్చ నాయ్. ప్రబుచి దయ తుమ్చి తెన్ తవును!

† 4:10 4:10 జో అరిస్తార్కుక నిజుమి జేలి జా తిలో గే ఎక్కి జో పవులు తెన్ బెద జా బాద ఒర్నువ జలి రిసా దస్సి మెన్తయ్ గే సేనుమ్. § 4:12 4:12 నెంజలె 'యేసుక గొత్తి సుదొ రితో జలో', నెంజలె 'యేసుక గొత్తి రితో జలో'.

దెస్సలొనీయుల్క రెగిడ్లి మొదొల్చి ఉత్త్రుమ్ బారిక్ జలొ పవులు దెస్సలొనీక పట్టుమ్చ సంగుమ్చక రెగిడ్లి మొదొల్చి ఉత్త్రుమ్

మొదొల్ కోడు

1 దేముడు అబ్బొనక చి ప్రబు జలొ యేసుక్రీస్తుక నంపజా జోచి తెడి తిల దెస్సలొనీక పట్టుమ్చి సంగుమ్చక *సిల్వానన్ చి తిమోతి, పవులు రెగిడ్లి ఉత్త్రుమ్.

†దేముడు అబ్బొనచి యేసుచి దయ సేంతుమ్ తుమ్చి ఉప్పిరి తవున్.

జేవ్ దెస్సలొనీకుల్ చి రిసొచి సర్ల

2 అమ్ కెయ ప్రార్లన కెర్లె కి, కెయఁక తెయఁక దెస్సలొనీకచ తుమ్ ఎత్తిజిన్చి రిసొ దేముడుక అమ్చి సర్ల అమ్ సంగితనుమ్.

3 జో అమ్క అబ్బొ జలొ దేముడుక అమ్చి సర్ల సూనయ్తె తత్త్రుమ్. ప్రబు జలొ అమ్చొ యేసుక్రీస్తుచి ఉప్పిర్చి తుమ్చి నముకుమ్, తుమ్చ కమొతె బార్ జతయ్చి రిసొ; సైమల్ సేడుక జలెకి, జోవయిం చి ఉప్పిర్చి తుమ్చి ప్రేమచి రిసొ తుమ్ ఒగ్గర్ కామ్ కెర్లను; పడ్డొ, †జోవయిం చి ఉప్పిర్చి తుమ్చి దయిరిమ్చి రిసొ తుమ్ ఎత్తి బాదల్ ఒర్నుప జా నిదానుమ్ తత్త్రు.

* 1:1 1:1 నెంజలె, సిల్వానన్క 'సీలయు' కి మెనుల. † 1:1 1:1 'ఎత్తి...యేసుచి' ఎదచి కోడు ఒత్త తయె నాయ, గని జా అర్దుమ్ తయెదె. ‡ 1:3 1:3 10 నంబరచి కోడుతె దెకిలె, యేసుక్రీస్తు ఈంజ లొకుమ్తె అన్నె ఉత్త్ర జెయెదె మెనయ్ దయిరిమ్ తెన్ అన్నె, జోవయింక రకితతి. § 1:5 1:5 రోమయిల్ 1:16 దెక.

* 1:6 1:6 బారికుల్ 17:1-8 దెక. † 1:7 1:7 ఆజి కాలి ఈంజేవ్ దొన్నె ప్రదేసిమ్ల మొత్తుమ్క 'గ్రీకు దేసిమ్' మెనుల. ‡ 1:7 1:7 సావులింసి అకయ ప్రదేసిమ్చి కొరిండ్ పట్టుమ్తె తిలి పొది బెర్తె ఈంజ ఉత్త్రుమ్ రెగిడ్లి.

ఈంజేవ్ రిసొ అమ్చి సర్ల జోవయింక సంగితనుమ్.

దెస్సలొనీకచ దేముడు నిసొన్లించి రుజ్జు

4 జలె, దేముడు ప్రేమ కెర్లె ఓ బావుడ్లు, జోవయిం చి సేవ తుమ్. కెర్లె రిసొ తుమ్క జో నిసొన అన్నె మెన జానుమ్.

5 అమ్చి అత్తి తుమ్తె అయ్లి సుబుమ్ కబుర్ రిత కొడ్యోయ్ సూనయ్లిసి నెంజె. నాయ్, గెద, దేముడుచి సుద్ది తిలి ఆత్మచి సెక్తి జా సుబుమ్ కబుర్తె కీతతికయ్, 'పలితుమ్ దెరెదె' మెన అమ్చి పెట్టి దయిరిమ్ తిలి, అన్నె, ప్రబుచి జా ఆత్మ తుమ్చి పెట్టి సికడ్డికయ్ తుమ్చి పెట్టి ఈంజ చి సత్తిమ్ తుమ్ చిన, పూర్తి దయిరిమ్ జా నంపజలద్దు తుమ్చి తెన్ అమ్ తిలి పొది, తుమ్క ప్రబుచి సత్తిమ్ దెకుత్' మెన కిచ్చొ బుద్ది ఇండితె తిలమ్ గే తుమ్ దెక అమ్చి సత్తిమ్ రుజ్జుల్ దెకిలదు గెద.

6 దస్సి, అమ్క దెక సిక తుమ్ అమ్చి రితి జలదు, ప్రబుచి బుద్ది దెరన్లదు. మెలె, సుబుమ్ కబుర్ తుమ్ సర్ల తెన్ సూన్తికయ్ మాన్సుల్ *పిట్టవుక ఉచర అల్లర్ కెర్లె కి, దేముడుచి సుద్ది తిలి ఆత్మ తుమ్చి పెట్టి సికడ్డికయ్, జో దెతి సర్ల తెన్ తుమ్ నంపజలదు.

7 దస్సి, తూమ్ నంపజలి సర్ల నిదానుమ్ దెకయ్, తుమ్చి ఒండి †మాసిదొనియ ప్రదేసిమ్తె కి, ‡అమ్ అప్పె తతి ఒండి అకయ ప్రదేసిమ్తె కి, ప్రబుక నంపజలన సికితతి.

8 ప్రబుచి సుబుమ్ కబుర్ మొదొల్క తుమ్తె, పడ్డొ తుమ్చి ఒండి మాసిదొనియతె కి ఈంజ ఒండి అకయతె

కి నూనయ్ జా అస్సె, అన్నె దూరితె కి. గని అన్నెయ్ కిచ్చొ సర్ద జతనుమ్ మెలె, ప్రబుక తుమ్ నంపజలిసి కేన్ పక్క కి జాన్సుప జా అస్సె, చి తుమ్క నంపజా ఆస్తి మెన ఆమ్ కక్కయ్ సాచి సంగుక నాయ్.

⁹ ఎత్తిజిన్ రుజ్జుల్ దెక తా జెచ్చి అమ్కయ్ సాచి సంగితతి. కిచ్చొ సాచి మెలె, అమ్ తుమ్తె గెలిసి తుమ్తె పలితుమ్ దెర్లిసి సంగితతి. మెలె, బొమ్మల్క జొకరుక ముల, నిజుమ్ తిలొ జీప్ తిలొ దేముడుచి సేవ కెరుమ్దే మెన తుమ్ మార్పుప జలదు.

¹⁰ జో దేముడుచొ పుత్తుసి యేసు అమ్ మాన్సుల్చి పాపుమ్ వయన సిలువతె మొర, అమ్చి పాపుమ్చి రిసా అమ్ ఆకర్ దీసి జంక తిలి సేచ్చు అమ్క పిట్టయ్లన్. జో యేసుక దేముడు అబ్బొసి అన్నె జియడ్లన్. చి జో పరలోకుమ్తె గెలిన్ తెంతొ బూలోకుమ్తె అన్నె ఉత్త జెంక అస్సె. జో అన్నె ఉత్త జెతినక తుమ్ దెస్సలొనీకుల్ నిదానుమ్ తెన్ రకితినచి రిసా కి జేవ్ ఎత్తిజిన్ సాచి సంగితతి.

2

* అమ్ సుబుమ్ కబుర్ నూనయ్లిసి కిచ్చొ వేర బుద్దిక కెర్లిసి నెంజె' మెన పవులు జబాబ్ దిలి రితి సంగిలిసి.

¹ బావుడ్లు, అమ్ తుమ్తె గెలిన్క 'ఆరిచి నెంజె' మెన తుమ్ సొంత కి జాన్సు.

² అమ్ తుమ్చి దెస్సలొనీకతె నే గెతె అగ్గె పిలిప్పి పట్టుమ్తె ప్రబుచి సుబుమ్ కబుర్ నెతికయ్. అమ్క ఒత్తచ మాన్సుల్ కెర్తి అల్లర్ కెర తిలి, కెర్తి నిస్కారుమ్ కెర తిల, తుమ్ జాన్సు. ఒత్త దన అల్లర్ జలెకి, 'దేముడు అమ్క తోడు తయెద' మెన దయిరిమ్ తా,

తుమ్తె గెచ్చు జో తెద్రయ్లి సుబుమ్ కబుర్ నూనయ్లమ్, ఒత్త కి †మాన్సుల్ పిట్టవుక ఉచర అల్లర్ కెర్తె కి.

³ అమ్ బోదన కెర్తిసి తప్పుచి నెంజె, కిచ్చొ లంజెబుద్ది ఉచర బోదన కెర్లిసి నెంజె, చి కక్క మోసిమ్ కెరుక ఉచర్లిన్ నెంజె.

⁴ దేముడు అమ్క నంప కెర, జోచి సుబుమ్ కబుర్ అమ్ జాన్సుప కెర్తి రిసా అమ్క నిసాన బులయ్తయ్చి రిసా, 'సికడ' మెన జో అమ్క కిచ్చొ సికడెదె, జయ్యి అమ్ బోదన కెర్తనుమ్. మాన్సుల్క మెన్స వడనుక అమ్చి ఆన నాయ్. దేముడు సొంత తియార్లి కామ్ కెరుకయ్ అమ్చి ఆన. అమ్చి పెట్టిచి బుద్ది జోకయ్ ఎర్కె.

⁵ కెయ కిచ్చొ పులయ్త కొణొ లట్టబుమ్ నాయ్. పడ్డొ డబ్బుల్ ఆనక కి, కిచ్చొయ్ ఆనక కి, కిచ్చొయ్ మాయ కెరుమ్ కి నాయ్, తుమ్ జాన్సు. దేముడు కి అమ్చి సత్తిమ్క సాచి జతయ్.

⁶ పడ్డొ, తుమ్తె కి కత్తె కి మాన్సుల్తె గవురుమ్ ఆననుక ఉచరుమి నాయ్. క్రీస్తుచ బారికుల్ జా అస్సుమ్చి రిసాచి అమ్చి అదికారుమ్చి రిసా తుమ్ అమ్క విలువ దెకుక కి బెదెదె, గని అమ్క జా ఆన కి నాయ్.

తుమ్క బాద నే సేడయ్తి రితి మెత్తన తా సొంత కామ్ కెర కెరయ్ జిలమ్

⁷ తుమ్తె గెచ్చు తా తుమ్క మెత్తన తిలమ్, బోదల్క అయ్యసి కిసి ముద్దు కెర్తె తా పొసెదె గే, ఆము తుమ్కయ్ దస్సి దెకితె తిలమ్.

⁸ అన్నె, తుమ్క దస్సి ముద్దు తా, 'జేవ్ కి దేముడుచి సుబుమ్ కబుర్ నూన †రచ్చించుప జతు' మెన ఆన జా సుబుమ్ కబుర్ నూనయ్లమ్. గని, తుమ్క 'జతు' మెనయ్ అమ్చి జీవు కి దెతమ్; తుమ్క తెడ్డి ప్రేమ జా తిలమ్.

* 2: 2:1 సగుమజిన్ విరోడుమ్ సుదల్ బెర్తి, 'కిచ్చొగె మాయకాయ్ బోదన కెర్తయ్' మెన గోన సికడ తిల.

† 2:2 2:2 బారికుల్ 7:1-8 దెక. ‡ 2:8 2:8 మెలె, పాపుమ్ తెంతొ, నయ్తానీ దె రాజిమ్ తెంతొ.

9 అమ్ ఒత్త కస్తుమ్ సేడ సేడ కిటంబుగుడ్డల్ తెయార్ కెర కెరయ్ జితె తిలిసి తుమ్ ఏద కెర్తె. రాతి మెద్దెనె జా *కామ్ కెర్తె తిలమ్. కిచ్చొక మెలె, దేముడుచి సుబుమ్ కబుర్ బోదన కెర్తి రిసా తుమ్తె తిలి పొది అమ్క పొన్తి రిసా కక్క నైమ సేడవుక నెన కెర, దస్సి కామ్ కెర కెరయ్ జితె తిలమ్.

వవులీసి అబ్బదింసి రిత జా బోదన కెర్తె తిలిచి

10 తుమ్తె అమ్ సుద్ది ఇండిలిసి, సత్తిమ్ ఇండిలిసి, వేర వాట్ నెంతె సరిగా ఇండిలిసి తుమ్ ప్రబుక నంపజలన దెక సాచుల్ జా అస్సున్. దేముడు కి సొంత సాచి అస్సె.

11 బోదల్క అబ్బొసి కో జలెకు దొర్కు జలిసి ఎత్తి కిసి ప్రేమ తెన్ జోవయింక సికడెదె, దస్సి తుమ్క ఎక్కెక్క కి కిసి నిదానుమ్ ఇండుక గే సికడ సికడ దయిరిమ్ సంగితె తిలమ్.

12 అన్నె జోవయించి సొంత రాజిమ్తె తుమ్ బెద్దితి రితి జోవయింతెన్ తుమ్ గవురుమ్ జతి రితి జోవయించి దయ్క దేముడు తుమ్క నిసాన అస్సె. 'జోవయింక గవురుమ్ కెర్తి రితి తుమ్ ఇండ' మెన బతిమాల్ప జా సంగితె తిలమ్, తుమ్ జాన్సు.

సుబుమ్ కబుర్క దెస్సులోనికుల్ నంపజలిన్చి

13 జలె, అన్నె కిచ్చొచి రిసా దేముడుక రోజుక అమ్చి సర్ద సంగితనుమ్ మెలె, జోవయించి అమ్ సూనయ్యే స్సుబుమ్ కబుర్ తుమ్ సూన, జాక మోస్సు కచి ఉచర్తిసి నెంజె, గని దేముడు సొంతయ్చి కోడు ఈంజ' మెన తుమ్ సత్తిమ్ చిన నంపజలదు. జయ్యి సుబుమ్ కబుర్ అప్పె తుమ్ నంపజలన్ చి పెట్టి కామ్ కెర్తయ్.

14 క్రిస్తు జలొ యేసుక నంపజల దేముడుచి తెడిచ యూదయ ప్రదేసిమ్చ సంగుమ్ల్చక కిసి జలె గే, తూమ్ కి, బావుడ్లు, దస్సి జలదు. మెలె, తూమ్ తుమ్చి దేసిమ్చచి అత్తి సేడ్ల అల్లర్లు జేవ్ కి జోవయించ సొంత యూదుల్చి అత్తి జేవ్ సేడ్ల.

15 జేవ్ యూదుల్చ వెల్లెల మాన్సుల్ అన్నె అగ్గె ప్రబు జలొ యేసుక మార్ల, చి అన్నె అగ్గె, దేముడు అబ్బొన్చ కబుర్లు సంగిల పూర్గుల్క కి మార్ల. అమ్కయ్ కి జేవ్ అల్లర్ కెర †ఉదడ్ల.

16 యూదుల్ నెంజిలసక 'ప్రబుక నంపజా †రచ్చించుప జతు' మెన అమ్ బోదన కెరుమ్దే మెలె, జేవ్ అడ్లు కెరుక ఉచర్తతి. దస్సి కెర, దేముడుక కి ఈంజ లోకుమ్చ మాన్సుల్ ఎత్తిక కి విరోదుమ్ సుదల్ రిత జతతి. దస్సి కెర, జోవయించి పాపుమ్ పూర్తి బెరవంతతి. గని దేముడు దెతి సిచ్చ కచితుమ్ జోవయింక ఎదిలి కి పిట్టె నాయ్. మొదొల్ జా అస్సె.

దెస్సులోనికతె గెచ్చుక వవులు ఆస జలిసి

17 ఓ బావుడ్లు, తుమ్చి తెన్ అమ్ అప్పె సగుమ్ దీసల్ నెంజిల్ రిసా, పొరబోదల్ రిత అమ్ జా అస్సుమ్. గని అప్పె దూరి జా తిలె కి, ఆత్మక పాసి అస్సుమ్ మెలి కోడు. తుమ్తె అన్నె బే బేగి గెచ్చ తుమ్క సొంత అన్నె దెకుక జలె ఆస తెన్ అస్సుమ్.

18 గెతమ్, ఆవ్ వవులు సర్ద తెన్ 'బార్ జా గెచ్చిందె' మెన ఒగ్గర్ సుట్టు ఉచర్లయ్, గని సయ్తాన్ అమ్క పిట్టయ్లో.

19 తుమ్ అన్మానుమ్ జా నాయ్. అమ్చి దయిరిమ్, అమ్చి సర్ద, అమ్చి

§ 2:9 2:9 బారికుల్ 18:3 దక.

* 2:9 2:9 కిచ్చొగె లాబుమ్ దొర్కు కెరంతి రిసా సుబుమ్ కబుర్క కెర్తయ్

మెన విరోదుమ్ సుదల్ గోసక సంగ తిల. † 2:15 2:15 బారికుల్ 17:1-13. ‡ 2:16 2:16 మెలె పాపుమ్ తెంతి, నయ్తాన్చి రాజిమ్ తెంతి.

గవురుమ్ కిచ్చొ మెలె, ప్రబు జలొ అమ్చొ యేసు ఈంజ లోకుమ్తె అన్నె ఉత్త జెతికయ్ దీనిక ఆమ్ జోవయించి మొక్కె టీవెలె, తుమి కి అమ్చి తెన్ ఒత్త టీవెతె.

20 తుమ్ అమ్చి బవుమానుమ్ జలి రితి జా అన్నున్, తుమ్ అమ్చి సర్ద.

3

తిమోతిక దెస్సలొనీకతె తెద్రయ్లినచి

1 జలె, తుమ్క అమ్ దూరి తిలిసి అమ్ అన్నె ఓర్పువ జంక నెత్త కెర, 'అమ్ *విదెస్సుతె మాలజ్ జా తంక జలె తమ, గని తిమోతిక జవున్ దెస్సలొనీకతెచ బావుడ్లుతె తెద్రవుమ్' మెన,

2 జోవయింక తుమ్తె తెద్రయ్లమ్. జో బావొ కి క్రీస్తుచి రిసొచి సుబుమ్ కబుర్ సూనయ్తి రిసొ దేముడుచొ సేవ కెర్తొసొ జా అన్నె, చి ప్రబుచి ఉప్పిర్చి తుమ్చి నముకుమ్చి అన్నె డిట్టుమ్ కెర్పు, చి కిచ్చొయ్ అల్లర్ తుమ్తె కచి నిదానుమ్ పిట్టయ్తు నాయ్ మెన తుమ్క బుద్ది దయిరిమ్ సంగున్ మెనయ్ తెద్రయ్లమ్.

3 తుమ్చి నముకుమ్చి రిసొ కో కో తుమ్క అల్లర్ కెర్తెతి. అమ్ ప్రబుక నంపజలన దస సైమల్ సేడుక అన్నె మెన తూమ్ కి జాన్ను.

4 తుమ్చి తెన్ అమ్ తిలి పొది కి "అమ్ ఇన సైమల్ సేడుక అన్నె" మెన సంగితె తిలమ్, దస్సి జర్గు జలి జాన్ను.

5 జలె, తుమ్క అమ్ దూరి తిలె, తుమ్క 'కిసి జా అస్తి గె' నేన్లింకచి దుకుమ్ ఓర్పువ జంక నెత్తిర్లయ్చి రిసొ 'ఏక్ వేల సయ్తాన్ కిసిగె జోవయింక అల్లర్ కెర, జోవయించి నిదానుమ్ పిట్టవ తయెదె. పిట్టవ తిలె, ఆరి ఒత్త సైమ సేడ తమ్దె' మెన, 'నంప తెన్ అస్తి గె నాయ్

గే సూనిందె' మెనయ్, తిమోతిక తుమ్తె తెద్రయ్లమ్.

తిమోతి అన్నె ఉట్ట జా సర్ద కోడు సంగిలిసి

6 దస్సి అప్పె తుమ్తె తెంతో తిమోతి అమ్తె అన్నె ఉట్ట జా, ప్రబుచి ఉప్పిర్చి తుమ్చి నముకుమ్చి రిసొ, తుమ్చి ప్రేమచి రిసొ, సర్దచి కోడు ఆన అన్నె. పడ్డె, అప్పెక అమ్క తుమ్ ప్రేమ తిలిసి, అమ్క నే పచ్చ తిలిసి, ఆము తుమ్కయ్ దెకుక కెద్ది ఆన తెన్ అన్నుమ్ గే తూమ్ అమ్కయ్ దెకుక తెద్ది ఆన తెన్ అన్నున్ మెనయ్ జో అప్పె అమ్క సంగ అన్నె.

7 బావుడ్లు, ఈంజ మదెనె అమ్ ఒగ్గర్ సైమల్ బాదల్ సేడ్తె తిలె కి, తుమ్క నిదానుమ్ అస్తి మెన తుమ్చి నముకుమ్చి రిసొచి కోడు అమ్ సూన్చి రిసొ, అన్నె దయిరిమ్ జా అన్నుమ్.

8 తుమ్ ప్రబుచి తెడి నిదానుమ్ తిలె, అమ్క సరి జతయ్. జా కోడు సూన అన్నె జలి రితి జా అన్నుమ్.

9 తుమ్చి రిసొ దేముడు అమ్చి పెట్టి దిలి సర్ద సంతోసుమ్చి రిసొ, అమ్చి సర్ద జోవయింక దెకయ్తి రిసొ జోవయింక కిచ్చొ దిలె జయెదె?

10 తుమ్తె గెచ్చు తుమ్క సొంత దెకుక కి, అన్నె, తుమ్ పూర్తి సికితినతె కిచ్చొ జలెకు నముకుమ్తె ఇదిల్ పెట తిలె జా చెంగిల్ కెరుక కి, బలె ఆన జా అన్నుమ్ చి రాతి మెద్దెనె ప్రార్దన కెర్తె తత్తనుమ్.

దెస్సలొనీకుల్క పవులు ప్రార్దన కెర్లిసి

11 అమ్ తుమ్తె జెతికయ్ రితి అమ్క అబ్బొ జలొ అమ్చొ దేముడు సొంత, అన్నె పుత్తున్ జలొ ప్రబు జలొ అమ్చొ యేసు అమ్క వాట్ దెకయ్ దె.

* 3:1 3:1 పవులు ఎక్కిలొ విదెస్సుతె గెలన్; బారికుల్ 17:14-15. గని ఒత్త తెంతో తిమోతి ఉట్ట అయ్లొ కిచ్చొగె, చి ఒత్త తెంతో పవులు జోవయింక దెస్సలొనీకతె అన్నె తెద్రయ్లన్. ఒత్త తెంతో పవులు కొరింద్ పట్టుమ్తె గెలన్; బారికుల్ 18:1. జో కొరింద్తె తిలి పొది; బారికుల్ 18:5; తిమోతి ఉట్ట అయ్లన్, చి తెదెడి, జెతె, పవులు ఈంజ ఉత్తుమ్ రెగిడ్లన్; తిమోతి చి సిల్వాన్స్ తెన్.

12 వడ్డొ, అము తుమ్కయ్ కిసి ప్రేమ అస్సుమ్ గే, దస్సి ఎక్కిలోక ఎక్కిలో, అన్నె ఎత్తిజిన్క, తూమ్ రోజుక అన్నె ఒగ్గర్ ప్రేమ కెర్తి రితి తుమ్చి పెట్టి ప్రబు సికడ్సు.

13 అన్నె, తుమ్చి పెట్టి పూర్తి నిదానుమ్ దెవుసు, చి ప్రబు జలో అమ్చొ య్సెసు పరలోకుమ్ తెంతొ జోవయించయ్ జలన ఎత్తిజిన్ తెన్ ఈంజ లోకుమ్తె అన్నె ఉత్త జెతికయ్ దీసిక, తుమ్క 'పొరపాట్ నెంతె పూర్తి సుద్ది జా, అంచయ్ జా అస్తి' మెన, అమ్క అబ్బొ జలో అమ్చొ దేముడు ఒప్పుసుక జయెదె.

4

తుమ్ దేముడుక సర్ల కెర్తి రితి ఇండ

1 జలె, తుమ్క అన్నె కిచ్చొ సంగుక మెలె, బావుడ్లు, దేముడుక సర్ల కెర్తి రిసొ కిచ్చొ బుద్ది రితి ఇండుక గే అమ్తె తుమ్ సికిలదు. దస్సి నత్తిమ్ ఇండుక దెర అస్సున్చి రిసొ అమ్క సర్ల, జలె. "నత్తిమ్ ఇండుక అన్నె రోజుక సికితె తా" మెన అమ్క ప్రబు జలో య్సెసు దిలి అదికారుమ్క అమ్ తుమ్క ముక్కిమ్క బతిమాలూ జా సంగితనుమ్.

2 ప్రబు జలో య్సెసుచి నావ్ తెన్ తుమ్క కిచ్చొ కిచ్చొ ఆడ్రల్ దిలమ్ గే జాన్సు, గెద.

3 దేముడుచి ఇస్టుమ్ ఏక్ కిచ్చొ మెలె, తుమ్ అగ్గెచ బుద్దుల్ ముల, జోచి సుద్ది జా పూర్తి జోచయ్ మాన్సుల్ తుమ్ జా గెచ్చుక.

జలె, దస్సి పూర్తి చెంగిల్ సుదల్ జంకయ్ జా; కెర, కిచ్చొ మెలె, లంజె కమొతె నే కెర్తె, పూర్తి దస బుద్దుల్ ములుక ఈంజ దేముడచి ఉద్దెనుమ్.

4 లంజె పాపుమ్ నే జతి రితి, తుమ్ ఎత్తిజిన్ తుమ్చి ఆగ్గెచ ఆసల్ ముద్దొ కెరన, సుద్ది తెన్ తా మరియాద తెన్ తా, చి పెండ్లి జలె, తెర్నిమున్ను జా నత్తిమ్ తా.

5 దేముడుక నేన్ల మాన్సుల్, జలె, జోవయించి ఆగ్గెచి ఆసల్ జోవయించి ఇండయెదె, తూమ్ దస్సి జా నాయ్.

6 తుమ్చితె కో కి కక్క కి దస్సి పాపుమ్ కెర నాయ్, దస్సి మోసిమ్ తుమ్చి బావుడ్లి కి కెర నాయ్. దస్సి పాపుమ్ కెర్లదు మెలె, ప్రబు పచ్చు నాయ్. కచితుమ్ సిచ్చు దెయెదె. అగ్గె తుమ్క గట్టిజ సంగిలమ్.

7 దేముడు కిచ్చొచి రిసొ అమ్క నిసొన అస్సె మెలె, అమ్క 'లంజె జతు' మెన నాయ్, గని అమ్ జోవయించి పరలోకుమ్చి సుద్ది జా జోచయ్ జతి రిసొయి.

8 దస్సి రిసొ, లంజె నే జతిన్చి ఈంజ ఆగ్గు తుమ్తె కో పిట్టయ్లె, మాన్సుచి మరియాద కడ్డయ్. గని అన్నె, ముక్కిమ్క, దేముడుచి మరియాద కడ్డి రితి జతయ్. తుమ్క 'సుద్ది జతు' మెనయ్ దేముడు జోచి సుద్ది తిలి ఆత్తు తుమ్చి పెట్టి దెతయ్.*

ఎక్కిలోక ఎక్కిలో ప్రేమ దెకితిసి

9 ఎక్కిలోక ఎక్కిలో ప్రేమ కెర్తినచి రిసొ తుమ్ కో కిచ్చొ కబుర్ రెగుడుక నాయ్. ఎక్కిలోక ఎక్కిలో ప్రేమ కెర్తిసి దేముడు సొంతయ్ తుమ్చి పెట్టి సికడ అస్సె.

10 అన్నె, 'ఒండి మాసిదోనియ ప్రదేసిమ్తెచ బావుడ్లుక ప్రేమ కెర్తతి' మెన, నిజామి తుమ్చి రిసొ సంగుక జతయ్. గని, 'రోజుక అన్నెయ్ ప్రేమ కెరుక తుమ్ సిక్క, బావుడ్లు' మెన, తుమ్క బతిమాలూ జా సంగితనుమ్.

* 4:8 4:8 కొరిందీల్ రెగ్గి ఏక్ నంబర్ ఉత్తమ్ 6:15-20 దెక. అమ్చి ఆగ్గె ప్రబుచి దేముడుచి గుడి. జోవయించి దేముడుచి గుడి లంజెతె బెదయ్లె, జోచి మరియాద కడ్డి రితి జతయ్.

11 పడ్డో బమ్మ నెంతె జింక ఆస జా, అన్నె మాన్సుల్క పోటి నే కెర్తె, సొంత కామ్ తుమ్ దెకన్తె తా, అన్నె, అమ్ అగ్గె ఆడ్ర దిలి రితి, బద్దుకుమ్ నే జతె తుమ్ జితి కామ్ నిదాసుమ్ కెర కెర కతె జితె తా.

12 దస్సి సొంత కామ్ కెర కెర జితె తిలె, తుమ్ కత్తె కత్తె నజీత్ తంక నాయ్, చి అన్నె మాన్సుల్చి మొక్కి నిస్కారుమ్ జసు నాయ్, గని తుమ్క 'సత్తిమ్ మాన్సుల్' మెన గవురుమ్ దెకుల.

ప్రబు ఉత్ర జెతిసి

13 ప్రబుక నంపజా మొర గెలసచి రిసా, బావుడ్లు, తుమ్ †అన్యానుమ్ జా నాయ్. కిసి జవుల గే తుమ్ నేన తంక అమ్క ఇస్సుమ్ నాయ్.

యేసుప్రబుక నేన్లసచ మాన్సుల్ కో జలె మొర్లె, ఒగ్గర్ దుకుమ్ జా ఏడుకుడు జవుల, 'యేసుప్రబుక నంపజలె పరలోకుమ్తె గెతి వాటు తయెదె' మెన నేన్తి చి రిసా జోవయించి ఉప్పిర్చి నమ్ముకుమ్చి ధయిరిమ్ జోవయింక నాయ్. జలె, తూమ్ దస్సి దుకుమ్ జంక నాయ్.

14 కిచ్చొక మెలె, యేసు మొర అన్నె జివ్ జా ఉట్లన్ మెన అమ్ నంపజతసుమ్. దస్సి, యేసుక నంపజా మొర్ల మాన్సుల్ జోవయించి తెడి అస్తిచి రిసా, దేముడు యేసుక ఈంజ లోకుమ్తె అన్నె తెద్రయతి పొదిక, జోవయింతెన్ జోవయింకయ్ కి కడ ఆనెదె.

15 ప్రబు సొంత జాన కెర ఏక్ కోడు కిచ్చొ మెన తుమ్క అమ్ సంగితసుమ్ మెలె, యేసుప్రబు అన్నె ఉత్ర జెతి ఎద ఈంజ లోకుమ్తె కో నంపజలస జితె తమ్దె గే, నంపజా మొర్లసచి కంట అగ్గె జము నాయ్, జోవయించి కంట తొలితో జోవయింతెన్ బెదుమ్ నాయ్.

16 తెదొడక కిచ్చొ జర్లు జయెదె మెలె, పరలోకుమ్చ దూతల్తె చొ, వెల్లో దూత ఎక్కిలో కేక గల సాడుప కెర్లె, పరలోకుమ్చి బజెన చి దేముడు బజన నప్పిర్మూరి అవాడ్ తెన్, చి యేసుప్రబు అదికారుమ్ తెన్ పరలోకుమ్ తెంతో ఉత్ర జెయెదె. నంపజా మొర్లస తొలితో జివ్ జా ఉట్టుల.

17 పడ్డో, ఆగాసుమ్తె ప్రబు తెన్ దస్సుల్ జతి రిసాయి అమ్ ఈంజ లోకుమ్తె జితన కి, జేవ్ మొర జివ్ జా అన్నె ఉట్లన్ తెన్ మబ్బుతె ఎక్కితె ఉక్కిల్ జమ్దె. ఒత్త తెంతో కెయెక తెయెక జో తెన్ తమ్దె.

18 జాకయ్, ప్రబుక నంపజా తుమ్చితె కచగి మాన్సుల్ మొర తిలె, తుమ్ ఎక్కిలోక ఎక్కిలో ఈంజేవ్ కొడె ఉచరవడ దయిరిమ్ సంగితె తా.

5

ప్రబు కెయెక అన్నె జెయెదె గే కో మాన్సు నేన్సిచి

1 గని, బావుడ్లు, ప్రబు కెయెక కిసి కాలుమ్క అన్నె జెయెదె గే, జా, జాచి రిసా తుమ్క అమ్ కో అన్నె కిచ్చొ రెగ్గ సికడుక నాయ్.

2 ప్రబు అన్నె ఉత్ర జా ఈంజ లోకుమ్చక పరిచ్చ కెర తీర్పు కెర్లె జా వెల్లి దిసి చోరు అందరి అయ్లి రితి జెయెదె. కో *నేన్లె పొది జెయెదె.

3 జేవ్ దినాల్క, ఈంజ లోకుమ్చ మాన్సుల్ కిసి జతె తవుల మెలె, "ఈంజ లోకుమ్క బాదల్ నాయ్, సేంతుమ్ సుక్కుమ్ తెన్ అస్సుమ్" మెన జేవ్ ఉచరన ప్రబుక పచ్చ తిలె పొది జా దిసిచి జేవ్ నే ఉచర్లి వెల్లి సిచ్చ, నాసెనుమ్ జతిసి, జోవయింక చట్టున లయెదె. తేర్బోదక కంట్లు పావ అయ్లె

† 4:13 4:13 'ప్రబు బే బిగి అన్నె ఉత్ర జెయెదె, చి అమ్క జోతె కడ నెయెదె' మెలి రితి సూన తిల, కిచ్చొగె, చి మదెన జోవయింతె తిలన సగుమ్జెన మూర తిల కిచ్చొగె, చి 'జేవ్ కిసి జవుల గే?' మెన బియె తిల. కిచ్చొగె.

* 5:2 5:2 మత్తయి 24:42-44చి కొడె దెకిలె, యేసు సొంత కి ఇసి సంగిలన్. † 5:3 5:3 అన్నె ఒగ్గర్ పూర్ణుమ్ రెగ్గిసి ఏక్ దెక. యిర్మీయా 6:14-15, 8:11-12.

పొది జేవ్ నొప్పుల్ కిసి పిట్టవనుక నెంజె గే, దస్సి. జా సిచ్చ అయ్లె, పిట్టవనుక నెతిరి.

ప్రబుక నంపజలసక దయిరిమ్ జాగర్త నంగ రెగిడ్డిసి

4 తూమ్, బావుడ్లు, నంపజలస, అందర్బుద్దిచ సయ్తాన్చి రాజిమ్చ మాన్సుల్ నెంజున్చి రిసా, జా దీసి కెయ్చ జెయెదె గే అమ్ నేన్లె కి, అయ్లె, చోరు అయ్లి రితి తుమ్క జా బమ్మ కెరుక నాయ్.

5 కిచ్చొక మెలె, తూమ్ ఆము ప్రబుక నంపజలస ఎత్తిజిన్ జోచి ఉజిడ్ తిలి ఆత్మక నొవర్ జెర్మిలస జా, మెద్దెన్చి తెలివి త్తిలి రిత్తి జోవయింక రక్కుక అస్సె. జోచి ఇన్సుమ్ రితి ఇండుక అస్సె. అందర్బుద్దిచ, సయ్తాన్చి రాజిమ్చ నెంజుమ్.

6 జాకయ్, నిదానుమ్ నెంజిల జుమ నిజిల్ రిత జల జేవ్ వేర మాన్సుల్చ రిత అమ్ జంక పోని. ఆము, నే జుమిల రిత తా, నే మచ్చిల రిత తా, బుద్ది తంక.

7 కిచ్చొక మెలె, నిజితిసి, జలె, అందర్తె బెదితిసి. మచ్చితిసి అందర్తె బెదితిసి.

8 గని జోచి ఉజిడ్చి ఆత్మ తెన్ అమ్ జెర్మ అన్సుమ్చి రిసా అమ్చి ఆత్మ నే మచ్చిల్ రితి తా అమ్ బుద్ది తంక అస్సె. ప్రబుచి ఉప్పిరి పూర్తి నముకుమ్ తియ, తుమ్ ఎక్కిలోక ఎక్కిలో ప్రేమ కెర్తె తా. యుద్దుమ్తె గుండెచి పురైతో ఇనుము డాలు దెర తిలె కిసి ఈంట గట్ట లయె నాయ్, దస్సి ప్రబుచి ఉప్పిర్చి నముకుమ్చి ఎక్కిలోక ఎక్కిలో ప్రేమ కెర్తిసి అందర్బుద్దిచి ఉప్పిర్చి యుద్దుమ్తె అమ్క కామ్క జెయెదె. పడ్డె, యేసుప్రబు తుమ్క తుమ్చి పాపుమ్చి సిచ్చ తెంతో రచ్చించుప కెర్తయ్చి రిసాచి దయిరిమ్ తెన్ తా. అందర్బుద్దిచి ఉప్పిర్చి యుద్దుమ్తె అమ్క బోడి కిచ్చొ నే లయితి రిసా గలంతి

ఇనుము టోపిచి రితి జా దయిరిమ్ జయెదె.

9 కిచ్చొక మెలె, ప్రబుక నంపనెంజిల మాన్సుల్ సిచ్చ జతిసి అమ్ సేడుక దేముడు సెలవ్ దెయె నాయ్. గని ప్రబు జలో అమ్చొ యేసుక్రీస్తుక అమ్ నంప కెర్తికయ్, అమ్చి పాపుమ్చి రిసాచి సిచ్చ అమ్క నే లయితి రితి జో యేసుచి అత్తి అమ్ రచ్చించుప జంక మెనయ్ జోచి సెలవ్.

10 జో యేసు అన్నె ఉత్త జెతికయ్ పొదిక, అమ్ జివ్ తిలె కి మొర తిలె కి, జోవయింతెన్ అమ్ బెద జితి రిసాయి జో యేసు మొర అమ్చి పాపుమ్ గెచ్చయ్లిసి.

11 ఈంజేవ్ కొడొచి రిసా తుమ్ ఎక్కిలోక ఎక్కిలో దయిరిమ్ కెరంతను. అన్నె, తుమ్ ఎత్తిజిన్ పూర్తి కిచ్చొయ్ అన్మానుమ్ నెంతె డిట్టుమ్ జతి రితి, ఈంజ ఎత్తిచి రిసా ఎక్కిలోక ఎక్కిలో దయిరిమ్ కెర్తె తా.

బుద్ది ఇండితన్చి రిసా ఆకర్ కొడొ

12 ఆకర్చి, బావడ్లు, తుమ్క అన్నె కిచ్చొ ముక్కిమ్క బతిమాలపా జా సంగితసుమ్ మెలె, ప్రబుచి కామ్ తుమ్తె కెర్తె తా జోచి అదికారుమ్చి తెడి తుమ్క దెకిత బుద్ది సికడ్తనక తుమ్ మరియాద దెకితె తా.

13 జోవయింబి కామ్చి రిసా జోవయింక ఒగ్గర్ ప్రేమ గవురుమ్ దెకితె తా. పడ్డె, ఎక్కిలో తెన్ ఎక్కిలో తుమ్ కట్టు తెన్ తా.

14 పడ్డె అన్నె కిచ్చొ బుద్ది సంగితసుమ్ మెలె, బావడ్లు, బద్దుకుమ్ జలసక బుద్ది సికడ్, దయిరిమ్ నెంజిలసక దయిరిమ్ కెర, ఆత్మక తొక్కి సెక్తి తిలసక తోడు తా, చి జోవయింతె కక్క జోవయించ తప్పల్క కోపుమ్ నే దెకయ్తె, జేవ్ సికితిసి, డిట్టుమ్ జతిసి పాడ్ నే కెర్తి రితి ఓర్పువ జా.

15 కో తుమ్క అల్లర్ కెర్తె, జోవయింక తుమి అల్లర్ కెర నాయ్. తుమ్ దస్సి

తప్పు నే జతి రితి జాగర్త దెకన. కెడ్డొడి కి ఎక్కిలోక ఎక్కిలో కామ్క జెతికయ్ రితి తోడు కెరై తంక ఆన జా. ఎక్కి ప్రబుక నంపజలనకయ్ మెన నాయ్, కక్కయ్ కి.

16 కిచ్చొ జర్గు జలెకి, సర్ల తెన్ తా.

17 బద్దుకుమ్ నే జెజె ప్రార్దన కెరై తా.

18 కిచ్చొ జర్గు జలెకి 'ఈంజ జర్గు జంక తుయి సెలవ్ దిలది' మెన, దేముడుక సర్ల తెన్ని ఒప్పున, సర్ల తెన్ తా. †క్రీస్తు జలో యేసుచి తెడి అస్సుచి రిసొ కిచ్చొ జలెకి తుమ్ దస్సి బుద్ది తంక దేముడుచి ఇస్టుమ్.

19 దేముడుచి సుద్ది తిలి ఆత్మ జర్గు కెరైసి పిట్టవుక పొన.

20 మాన్సుచి అత్తి ప్రబుచ కబుర్లు సంగితిన్క నిస్కారుమ్ కెరై నాయ్.

21 గని, 'ప్రబుచి కబుర్ ఈంజ' మెన కో జవున్ కిచ్చొ జవున్ కోడు సంగిలె, 'ప్రబు సికణ్ణిన్ తెన్ బెదితయ్ గే నాయ్ గే' మెన అజ్జ కెరంతి రిసొ జా కోడు తుమ్ పరిచ్చ కెర. ప్రబు సికణ్ణిన్ తెన్ బెదితయ్ మెలె, దెరన.

22 గని బెదె నాయ్ జలె, 'గర్చి' మెన దూరి కెర; కిచ్చొ గర్చి కామ్ జలెకి.

23 తుమ్ జోచయ్ జా పూర్తి సుద్ది జతి రితి, మాన్సుల్క సేంతుమ్ ఆన్తో దేముడు సొంత తుమ్క మార్పుప కెరై తవును, చి ప్రబు జలో అమ్చొ యేసుక్రీస్తు ఈంజ లోకుమ్తె అన్నె ఉత్త జెతికయ్ ఎద తుమ్ ఎత్కిజిన్క తుమ్చి ఆత్మ జివు ఆగ్ పూర్తి పొరపాట్ నెంతె తవును.

24 తుమ్క బుకార్లొ కెర్లొ అమ్చొ దేముడు నముకుమ్ జలోసొ. ఈంజ ఎత్కి జొయ్యి జర్గు కెరెదె.

25 బావుడ్లు, అమ్చి రిసొ తుమ్ ప్రార్దన కెరై తా.

26 ప్రబుచి ప్రేమచి రిసొచి అమ్చి ముద్దు ఒత్త నంపజల బావుడ్లు

ఎత్కిజిన్క దెకయ్లి రితి తుమ్ జోవయింక సుద్ది తిలి ముద్దు తెన్ జొకర.

27 ఒత్త నంపజలన ఎత్కిజిన్ సూన్తి రితి ఈంజ ఉత్తమ్ తుమ్ సదు కెర మెన ప్రబుచి నావ్ తెన్ తుమ్క ఆవ్ సంగితసి.

28 ప్రబు జలో అమ్చొ యేసుచి దయ తుమ్చి తెన్ తవున్!

† 5:18 5:18 నెంజలె, కిచ్చొ జలెకి తుమ్ దస్సి బుద్ది తంక మెన ఎత్కి అదికారుమ్ తిలో దేముడుచి ఇస్టుమ్, క్రీస్తుచి అత్తి అమ్క జో దెకయ్లి రితి.

దెస్సలొనీయుల్క రెగిడ్లి దొన్నిచి ఉత్తుమ్ బారిక్ జలొ పవులు దెస్సలొనీక పట్టుమ్చ సంగుమ్చక రెగిడ్లి దొన్నిచి ఉత్తుమ్

మొదొల్ కోడు

1 అమ్క అబ్బొ జలొ దేముడుక చి ప్రబు జలొ యేసుక్రీస్తుక నంపజా జోచి తెడి తిల దెస్సలొనీక పట్టుమ్చ సంగుమ్చక *సిల్వానన్ చి తిమోతి, పవులు రెగిడ్లి ఉత్తుమ్.

2 దేముడు అబ్బొనీచి ప్రబు జలొ యేసుక్రీస్తుచి దయ సేంతుమ్ తుమ్చి ఉప్పిరి తవున్!

3 తుమ్చి నముకుమ్ అన్నె ఒగ్గర్ జా గెతయ్, చి తుమ్ ఎత్కిజిన్ ఎక్కిలోక ఎక్కిలో రోజుక అన్నె ఒగ్గర్ ప్రేమ కెర్తసుచి రిసా, దేముడుక అమ్చి సర్ద నే సంగిలె నెంజె. తుమ్చి రిసా రోజుక అమ్చి సర్ద జోవయింక సంగితసుమ్.

4 అన్నె ప్రబుక విరోదుమ్ జలస, తుమ్క ఒగ్గర్ అల్లర్ కెరై తిల కి, తుమ్ కిచ్చొ కిచ్చొ ఒగ్గర్ బాదల్ సేడ్డె తిల కి, తుమ్ నిదానుమ్ తా ఓర్పువ జతసు, చి తుమ్చి నముకుమ్ పిట్టె నాయ్. జాకయ్ దేముడుచు కేన్ సంగుమ్లుతె గెలె జవున్, కబుర్ తెద్రయెలె జవున్, తుమ్చి రిసాయి దయిరిమ్ తెన్

అమ్చి సర్ద అన్నె నంపజలసక అమ్ సంగితసుమ్.

5 జోచి రాజిమ్తె తుమ్ బెదిల్ రిసా తుమ్ †అల్లర్ సేడుక మెన దేముడు తుమ్క విలువ మెలి రితి దెక అస్సె. 'దస్సి తీర్పు కెర అస్సె' మెన, అన్నె జా తీర్పుక 'సత్తిమ్చి' మెన కిచ్చొతె రుజ్జు జతయ్ మెలె, తుమ్ ఈంజేవ్ బాదల్ ఓర్పువ జా నిదానుమ్ తిలిన్తెయి రుజ్జు జతయ్; ‡జోచి రాజిమ్తె తుమ్ బెదిల్ రిసా తుమ్ జేవ్ అల్లర్ సేడ్డెను.

6 దేముడు సత్తిమ్ తీర్పు కెర్తొసా జలిన్చి రుజ్జు కిచ్చొతె డీస్తయ్ మెలె, తుమ్క అల్లర్ కెర్తసక జో సిచ్చ కెరెదె.

7 చి జోచి కామ్క బాదల్ సేడ అమ్ ఎత్కిజిన్క జో సుక్కుమ్ దెతి పొదిక తూమ్ కి దన బాదల్ సేడ్డెసక కి జా సుక్కుమ్ దెయెదె. కెయ్చ మెలె, ప్రబు జలొ యేసు కీజోచి అదికారుమ్ దెకయ్త పరలోకుమ్చ దూతల్ తెన్, సుట్టనంత ఆగి లగితి రితి జా జో ఉత్త జా జోవయించి గవురుమ్ రుజ్జు జతి పొదిక ఈంజ ఎత్కి జర్గు జయెదె.

8 చి దేముడుక నేస్తసక, ప్రబు జలొ అమ్చొ యేసుచి సుబుమ్ కబుర్ రితి నే కెర్తసక సిచ్చ కెరెదె.

9 జోవయించి సిచ్చ కిచ్చొ మెలె, *నాసెనుమ్తె గెచ్చు నాసెనుమ్తెయి కెయ్చ తెయ్చ తాఁ గెచ్చుల, చి ప్రబుతె జేవ్ గెచ్చుక నెతిర్రి, జోవయించి ఒగ్గర్ సెక్కిచి రిసాచి జోచి ఒగ్గర్ ఉజిడ్చి రిసా జేవ్ జోవయింక దెకుక నెతిర్రి.

10 జా కెయ్చ జర్గు జయెదె మెలె, జో అన్నె ఉత్త జెతికయ్ దీసిక. జో జెతిసి కిచ్చొచి రిసా మెలె, జోక నంపజా జోచి

* **1:1 1:1** నెంజెలి 'సిలయు' బారికుల్ 15:22, 16:19, 17:4, వడ్డా కొరిందిల్క రెగిడ్లి 2 నంబర్ ఉత్తుమ్ 1:19, చి పేతురు రెగిడ్లి 1 నంబర్ ఉత్తుమ్ 5:12 దెక. † **1:5 1:5** బారికుల్ 5:41క దెకిలె, జోవయించి నావ్ జోవయించి కామచి రిసా, అమ్ అల్లర్ బాదల్ సేడుక జో సెలవ్ దిల కిచ్చొ రుజ్జు దెకయ్తయ్ మెలె, జోవయింతెన్ బెదుకజో అమ్క విలువ మెలి రితి దెకిలిసి. ‡ **1:5 1:5** నెంజెలి, 'అన్నె తుమ్ పరలోకుమ్తె గెతెచి రిసా మదెనె ఈంజేవ్ బాదల్ వాట్ తుమ్క అత్తక డిట్టుమ్ పూర్తి కెర తెయ్చ కెర్తయ్.' యాకోబు 1:2-4 దెక. **S 1:7 1:7**

నెంజెలి 'జోవయించి ఒగ్గర్ సెక్కిచి పరలోకుమ్చ దూతల్ తెన్ ఉత్త జా....' * **1:9 1:9** నెంజెలి, 'మొర్పుతె'. మెలె, అత్తమొర్పుతె, ఆకరచి మొర్పుతె. డీసయ్లిసి 2:11, 20:6, 20:14, 21:8.

నుద్ది జా జోచయ్ జలస జో తెన్ బెద గవురుమ్ జతిన్తె గవురుమ్ జతి రిసా, చి జేవ్ జోక దెక ఆచారిమ్ చి సర్ద జతి రిసా. జోచి రిసా అమ్ తుమ్క సంగిలి సాచి తుమ్ నంపజలదు, చి తూమ్ కి బత్త బెదితె.

దెస్సలొనీకవ పవులీంసి ప్రార్దన కెర్లసి

11 జెంక తుమ్చి రిసా రోజుక ప్రార్దన కెర్తసుమ్. కిచ్చొ మెన మెలె, తుమ్ జోచయ్ జా, జోచి పరలోకుమ్చి రాజిమ్తె తుమ్ బెదుక మెన దేముడు తుమ్క బుకార అస్సె, చి జో తుమ్క బుకార్లి కెర్లిన్క తుమ్ విలువ జతి రితి కెర్పు. తుమ్ ఉచర్లి కేన్ చెంగిల్ కామ్ కి, తుమ్చి నముకుమ్చి రిసాచి ఎత్తి కామ్ కి జోవయించి ఆత్మసెక్కిక జెయ్యిమి కెర్పు.

12 తుమ్ ఇండితిన్తె అమ్చొ ప్రబు జలో యేసుచి నావ్ గవురుమ్ జయెదె, జోవయించి తెడి తూమ్ కి గవురుమ్ జస్సె. దేముడుచి ప్రబు జలో యేసుక్రీస్తుచి దయయ్ ఈంజ ఎత్తి జర్గు జతి రిసా ప్రార్దన కెర్తసుమ్.

2

1 బావుడ్లు, అమ్చొ ప్రబు జలో యేసుక్రీస్తు అన్నె ఉత్త జెతిన్చి రిసా, జోక నంపజలస ఎత్తిజిన్ జోతె గెచ్చు జో తెన్ ఎక్కితె బెదితిన్చి రిసా, తుమ్క ఆవ్ కిచ్చొ మెన అప్పె బతిమాల్ప జా సంగితసి మెలె,

2 జా దీసి నే జెతె అగ్గె, అబద్దుమ్క, “దీసి పాచ అయ్లి గె. సిప్ప దెకిలయ్, ప్రబుచి కోడు, ఈంజ” మెన కో జవున్ కిచ్చొ జవున్ ఆత్తుచి సెక్కిక సంగిలె, నెంజిలె “దీసి పాచ అయ్లి గె” మెన కేన్ జవున్ మాన్సు సొంత సెక్కిక ఉచర

సంగిలె, నెంజిలె “దీసి పాచ అయ్లి మెన అమ్చి తెన్ ఉత్తమ్తె అయ్లి” మెన కో జవున్ సంగిలె, తుమ్చి మెన్సు తుమ్ బమ్మ జా నాయ్, నంప కెర నాయ్.

3 కోయి దస కొడొ సంగిలె, తుమ్ మోసిమ్ సేడ నాయ్. కిచ్చొక మెలె, ప్రబు అన్నె జెతికయ్ జా దీసి నే జతె అగ్గె, తొలితో, ఒండి లోకుమ్చ ఎతివాట్జిన్ మాన్సుల్ దేముడుక విరోదుమ్ జతి వెల్లి బాద జర్గు జంక అస్సె. దేముడు సంగిలిన్ ఎత్తిక విరోదుమ్ జలో *పూర్తి వెల్లి మూర్కుమ్ బుద్ది జలోసా ఈంజ లోకుమ్తె బార్ జంక అస్సె, జో పూర్తి నాసెనుమ్ జా గెతొసా.

4 జో వెల్లి మూర్కుడు కిసి జయెదె మెలె, కేన్ దేముడు మెలోసాక కి కేన్ జొకర్తి వస్తువక కి జో విరోదుమ్ కెర, “ఆవ్ వెల్లి” మెనన, దేముడుచి గుడితెచి ముక్కిమ్ జలి టాన్తె వెన కెర, “ఆవ్ దేముడు” మెనన సంగెదె.

5 తుమ్చి తెన్ ఆవ్ తిలి పొది కి తుమ్క ఈంజ ఎత్తి సంగిలయ్. ఏద కెర్పు నాయ్ గె?

6 జలె, దేముడు సెలవ్ దిలి కాలుమ్కయ్ జో మూర్కుడు బార్ జంక జయెదె. గని అప్పె నే బార్ జంక కిచ్చొ అడ్డు తయెదె గే తుమ్ జాన్సు.

7 మదెనె జో మూర్కుడుచి బుద్ది ఈంజ లోకుమ్తె జేవ్చి పాపుమ్ లుంక, చోరు తిరిమ్ తిరిమ్ కెర్తయ్, గని జోక అడ్డు కెర్తొసా అడ్డు కెరుక ములిలెకయ్, జా బాద ఎదార్దుమ్ జా పూర్తి అల్లర్ కెరెదె.

8 తెదొడ్కయ్ జో మూర్కుడు బార్ జా జోవయించి కామ్ ఎదార్దుమ్ కెరెదె. గని ప్రబు జలో యేసు అన్నె ఉత్త జా డీస్త్రిన్కయ్ జొయ్యి జో మూర్కుడుచి సెక్కి గెచ్చవయ్ గెలెదె. చి రితి జోచి చోడి

* 2:3 2:3 డీసయ్లిన్చి పుస్తకుమ్తె దసా మాన్సుచి రిసాచ కొడొతె ‘జంతు’ మెన టాలి తెన్ సంగితయ్. డీసయ్లిన్ 12:9, చి 13 అద్యయిమ్ తెంతో 17 అద్యయిమ్ ఏద, చి 19, 20 అద్యయల్ దెక. † 2:8 2:8 నెంజిలె ‘కోడుక’. డీసయ్లిన్ 19:21తె సయ్తాన్చి సేవ కెర్తె తిలసచ సయ్సుములెక ప్రబు జోవయించి చోడితెచి కధుమ్క మారెదె. జా కండా జోవయించి కోడుకయ్ టాలి జతయ్. ఇన్నె కోడుచి అర్దుమ్ కి ఉచరుక జయెదె.

తెంతో జైతికయ్ †వాదుకయ్ జోవయింక మారయ్ గెలెదె.

9 జో మూర్కుడు జలొసా కేనె తెంతో జా తయెదె మెలె, నయ్తాన్చి సెక్తి తెంతో బార్ జా తయెదె. అయ్లె, జో నయ్తాన్చి ఒగ్గర్ సెక్తి తెన్ అబద్దుమ్చ ‡మాయల్ జత వెల్లో వెల్లో కమొ గట్టిజ కెర కెర,

10 నాసెనుమ్తె గెచ్చుక తిలసక మోసిమ్ కెరెదె. కిచ్చొక మెలె, సత్తిమ్ తిలిసి జేవ్ ప్రేమ కెరుక నెసిలచి రిసా రచ్చన జతి నాయ్.

11 సత్తిమ్ జేవ్ నెసిలి రిసా, 'అబద్దుమ్, జలె, నంప కెర్తు' మెన, 'జేవ్ ఆత్మ గుడ్డి జతి రితి జా మోసిమ్తె దెర్ను సేడ్తు' మెన దేముడు సొర్పు కెర తయెదె.

12 దస్సి, కో సత్తిమ్ నంప కెర్తి నాయ్, గని పాపుమ్క ఆస జవుల గే, సిచ్చతె గచ్చుల.

ప్రబుక నంపజలన రచ్చనతె గెతినచి

13 ప్రబు ప్రేమ కెర్త ఓ బావుడ్లు, తుమ్చి రిసా దేముడుక అమ్చి సర్ద నే సంగిలె నెంజె. రోజుక తుమ్చి రిసా జోవయింక అమ్చి సర్ద సంగితనుమ్. కిచ్చొక మెలె, †తుమ్ *రచ్చించుప జంక మెన మొదొల్ తెంతో జో నిసాన్లన్. కిసి రచ్చించుప జంక మెలె, తుమ్ జోవయించయ్ జతి రితి జోవయించి సుద్ది తిలి ఆత్మ తుమ్క సుద్ది కెర్తి వాటు, చి సత్తిమ్ తుమ్ నంప కెర్తి వాటు.

14 ప్రబు జలొ అమ్చొ యేసుచి గవురుమ్తె తుమ్ బెదితి రిసా, తుమ్ ఇసి సుద్ది జంక సత్తిమ్ నంప కెరుక మెన దేముడు తుమ్క బుకార్లన్. కేన్ వాటు బుకార్లన్ మెలె, అమ్ సుబుమ్ కబుర్ నూనయ్లొ వాటు.

‡ 2:9 2:9 డీసయ్లొనీ 12:9, చి 13 అద్యయిమ్ దెక. 13:13తె మాయచ వెల్లో వెల్లో కమొచి కోడు అస్సె.

§ 2:13 2:13 నెంజెలె, ప్రబుక నంపజతన మొత్తుమ్తె తూమ్ నొవొ జతి రితి తొలితొ నంపజంక మెనయ్ జో నిసాన్ల మెన ఈంజ ఎత్తి తొలితొ రెగిడ్ల సగుమ్ వుస్తకల్తె అస్సె. * 2:13 2:13 మెలె, పాపుమ్తె తెంతో, జేవ్ కెర్ల పాపల్చి సిచ్చ తెంతో, చి నయ్తాన్చి రాజిమ్ తెంతో రచ్చించుప జంక.

15 జాకయ్, బావుడ్లు, తుమ్ డిట్టుమ్ టీచ, చి అమ్చి అత్తి దిలిసి ఎత్తి, మెలె, అమ్ ఒత్త తిలి పొది సికడ్డిసి కి ఇన్నె తెంతో ఉత్తుమ్ రెగ్ల సికడ్డిసి కి, తుమ్ డిట్టుమ్ దెరన, జయి రితి ఇండ.

దెస్సలొనీకచ రిసా పవులొసి ప్రార్దన

16 ప్రబు జలొ అమ్చొ యేసుక్రీస్తు, అన్నె అమ్క అబ్బొ జలొ దేముడు జోవయించి దయక అమ్క ప్రేమ తా, కెయ్క తెయ్క తిలి దయిరిమ్ దెతి పరలోకుమ్తె గెచ్చ జతి దయిరిమ్ కి అమ్ ఎత్తిజిన్క దా అస్తి.

17 జలె, 'తుమ్చి పెట్టి తుమ్క జోవయించి ఆత్మకచి దయిరిమ్ కెర్తె తా తుమ్ కెయ్క తెయ్క సత్తిమ్ ఇండితి రితి సత్తిమ్ లట్టబ్బి రితి తుమ్క డిట్టుమ్ నిదానుమ్ కెర్తె తత్తు' మెన అమ్ ప్రార్దన కెర్తసుమ్.

3

అమ్చి రిసా కి ప్రార్దన కెర

1 పడ్డొ అన్నె కిచ్చొ మెలె, బావుడ్లు. ప్రబుచి సుబుమ్ కబుర్ తుమ్తె నూనయ్తికయ్ జా కిసి తుమ్తె పలితుమ్ దెర్లి గే, అమ్ ఇన్నె సుబుమ్ కబుర్ నూనయ్తిసి కి అడ్డు నెంతె జిన పలితుమ్ దెర్తె తవున్ మెన అమ్చి రిసా తూమ్ ప్రార్దన కెర.

2 బుద్ది నెంజెల కుస్సిదుమ్చ మాస్సుల్ కెర్త అల్లర్ తెంతో అమ్ రచ్చించుప జతి రితి తుమ్ ప్రార్దన కెర. సగుమ్జిన్ ప్రబుక నంప కెర్తి నాయ్, గెద.

3 ప్రబు, నముకుమ్ జలొసా, చి తుమ్ ఆత్మక డిట్టుమ్ తతి రితి జో సెక్తి దెయెదె, చి నయ్తాన్ కెరయ్త అల్లర్ తుమ్క నే లయితి రితి జొయ్యి అడ్డు దెయెదె.

4 తుమ్చి రిసా 'అమ్ సంగిల్ రితి నిదానుమ్ కెర్తతి, నిదానుమ్ కెర్తె తవుల' మెన ప్రబుచి తెడి దయిరిమ్ తెన్ అస్సుమ్.

5 జోవయించి ఇస్టుమ్ రితి తుమ్ కెర్తి రితి, దేముడుచి ప్రేమ క్రిస్తు పుత్తున్చి నిదానుమ్, తుమ్చి పెట్టి ప్రబు దెవును.

కామ్ కెర కెర జితిన్చి రిసా

6 బావుడ్లు, ప్రబు జలో అమ్చో యేసుక్రిస్తుచి నావ్ తెన్ తుమ్క కిచ్చొ ఆడ్ర దెతనుమ్ మెలె, ప్రబుక నంవజలో కేన్ బావొ కిచ్చొ కామ్ నే కెర్తె బద్దుకుమ్ జా జితయ్ గే, 'నిదానుమ్ తెన్ కామ్ కెర కెర జియ్' మెన అమ్ సంగిలిసి పిట్టవన్తయ్. దసాచొక తుమ్ దూరి తొ

7 ఆమ్ కెర్తి రితి తుమ్ దెక సికిలె చెంగిలి మెన తుమ్ సొంత జాన్సు. తుమ్చి తెన్ అమ్ తిలి పొది బద్దుకుమ్ జము నాయ్.

8 చి డబ్బుల్ నే దెతెకచి అన్నిమ్ కమె నాయ్, గని కక్క బోద నే కెర్తి రిసా, సైమ సేడ సేడ రాతి మెద్దెన * సొంత కామ్ కెర కెరయ్ జితె తిలమ్.

9 జితిసి గట్ల తుమ్తె ఆరి నజుక జతి, చి అమ్చి కామ్చి రిసా, గని 'అమ్క దెక జేవ్ కి బుద్ది సిక్కుత్' మెన, దస్సి సొంత కామ్ కెర కెరయ్ జిలమ్.

10 కిచ్చొక మెలె, "కో కామ్ కెరె నాయ్ గే, కవున్ కి నాయ్" మెన ఆడ్ర దిలమ్.

11 తుమ్క కిచ్చొక సంగితనుమ్ మెలె, తుమ్తె సగుమ్జిన్ బద్దుకుమ్ జా కామ్ నే కెర్తె, ఆరి బుల బుల వేర మాన్సుల్చి కామ్ పిట్టయ్తతి మెన నూన అస్సుమ్.

12 దస మాన్సుల్చి రిసా ప్రబు జలో యేసుక్రిస్తుచి నావ్ తెన్ కిచ్చొ ఆడ్ర దెతనుమ్, కిచ్చొ బతిమాల్పా జా సంగితనుమ్ మెలె, "బమ్మ నెంతె పూచి తెన్ తుమ్ సొంత కామ్ కెరెనయి జియ్" మెంతనుమ్.

13 బావుడ్లు, చెంగిల్ కామ్క జెతిసి ఎత్తి కెరుక తుమ్ బద్దుకుమ్ జా నాయ్.

14 ఈంజ ఉత్తుమ్తె అమ్ సంగిల్ రితి కో కెరె నాయ్ గే, 'జోవయింక బుద్ది జెతికయ్ రితి గడియ లాజ్ జవున్' మెన, జో కొన్సొ గే తుమ్ దెక చి జోవయింక జా మదెనె తుమ్తె బెదవన నాయ్.

15 జోవయింక విరోదుమ్ దెక నాయ్, గని జోవయింక 'క్రిస్తుచి తెడి బావొ జయెదె' మెన, జోవయింక బుద్ది జెతె ఎదక జోవయించి పూచి జో కెర్తి రితి జోవయింక సికడ.

ఆకరచి ప్రార్దన

16 సేంతుమ్ దెతొ ప్రబు సొంత తుమ్చి పెట్టి జోవయించి సేంతుమ్ పూర్తి దెతె తవున్. తుమ్ ఎత్తిజిన్క ప్రబు తోడు తవున్.

17 ఆవ్ పవులు సొంత ఆతు తెన్ ఈంజ ఆకర్ కోడు రెగిడ్డసి. అంచి ఎత్తి ఉత్తుమ్క 'అంచి' మెన ఆవ్ ఇసి రెగిడ్డిసి గుర్తు జవున్. అంచి రెగ్గుక ఇసి తయెదె.

18 అమ్చో ప్రబు జలో యేసుక్రిస్తుచి దయ తుమ్క ఎత్తిజిన్ తెన్ తవున్!

* 3:8 3:8 పవులు టంబుగుడ్డల్ తున తెయార్ కెరెదె.

తిమోతిక రెగిడ్లి మొదొల్చి ఉత్త్రమ్ బారిక్ జలో పవులు తిమోతిక రెగిడ్లి మొదొల్చి ఉత్త్రమ్

మొదొల్ కోడు

1-2 యేసుక్రీస్తుచి రిసా అంచితె సిక సంపజా నిదానుమ్ జా అంచొ పుత్తు జలో రితొ ప్రేమ తిలో తిమోతిక జో *క్రీస్తు జలో యేసుచి రిసాచి సుబుమ్ కబుర్ కామ్ కెర్తి రిసా జోచొ బారికి జలో ఆవ్ పవులు రెగిడ్లి ఉత్త్రమ్.

† సుబుమ్ కబుర్ నూనయతి రిసా ఆవ్ బులుక మెన అమ్చొ రచ్చించుప కెర్తొసా జలో ‡ దేముడు, పరలోకుమ్తె అమ్ బెదితి దయిరిమ్ దిలో క్రీస్తు జలో యేసు ఆడ్ర దా అస్తి.

§ అబ్బొస్ జలో దేముడుచి అమ్చొ ప్రబు జలో క్రీస్తుచి దయ కన్యారుమ్ సేంతుమ్ తుమ్చి ఉప్పిరి తవున్!

సగుమ్జిన్ వేర కోడు సికడ్డిన్చి రిసా

3 ఆవ్ మాసిదొనియ ప్రదేసిమి గెతె తిలి షొది తుక ఆవ్ బలవంతుమ్ కెర్లిసి కిచ్చొగె జాన్సి. జా కోడు తుయి నిదానుమ్ కెరు. కిచ్చొ మెలె, “ఒత్తచ అమ్చ నంపజలనతెచ జేవ్ సగుమ్జిన్ వేర కోడు నే సికయతి రితి తుయి ఎపెసు పట్టుమ్తె తా జోవయింక ఆడ్ర దా కెరు” మెలయ్. ఆవ్ అన్నె దస్సి సంగితసి.

* 1:1-2 1:1-2 ‘క్రీస్తు’ మెలె, ‘దొర్కు జలో రచ్చించుప కెర్తొసాక తెర్తయిందె చి అంచయ్ జల మాన్సుల్క జో ఏలుప కెరెదె’ మెన ఎత్తి అదికారుమ్ తిలో దేముడు పూర్ణమ్ తెంతొ సంగ తిలో. జలె, యూదుల్ తెన్ ‘క్రీస్తు’ మెలె, జో రచ్చించుప కెర్తొసాచి అర్థమ్ తయెదె. † 1:1-2 1:1-2 ‘సుబుమ్ కబుర్’ మెలె, యేసుక్రీస్తు ఈంజ లోకుమ్తె జా అమ్చి పాపుమ్ వయ అమ్క నయతాన్చి రాజమ్ తెంతొ విడ్డల్ కెర పరలోకుమ్చి రాజమ్తె బెదయ్లిన్చి రిసాచి కబుర్. ‡ 1:1-2 1:1-2 నెంజిలె, ‘దేముడు, పరలోకుమ్తె అమ్ బెదితి వాబు జలో క్రీస్తుయేసు; యోహాను 14:4, 6; ఆడ్ర దా అస్తి. పరలోకుమ్తె అమ్ బెదితి వాబు క్రీస్తుచి రిసా జోచి ఉప్పిరి అమ్చి దయిరిమ్ అస్సి, జోయ్యి అమ్క దొర్కు జలి దయిరిమ్.’ § 1:1-2 1:1-2 నెంజిలె ‘అమ్క అబ్బొ జలో....’

4 మాన్సుల్ కచి ఉచర్ల రితయ్ మత్తెలివొ, ఉగల్చి ఉప్పిరి ఉగల్చ, పూర్ణుల్చ సెకుమ్లుతె జెర్లిలసచి రిసాచ మత్తెలివొచ, కొడొచి ఉప్పిరి కొడొచ తగులు ఉచర్తె తత్తతి. జా కామ్క నెంజె. దసచచి రిసా ఉచర్తె తిలె, ఆరి సత్తిమ్ నెంజిలిన్ కి ఒత్త బెద తయెదె, చి ఆరి లట్టబై తవుల, చి ముక్కిమ్క దేముడు దిలి కామ్క అడ్డు కెరెదె. జోవయించి కామ్ జర్లు కెర్తినక కిచ్చొ ముక్కిమ్ మెలె, యేసుక్రీస్తుచి ఉప్పిరిచి నముకుమ్.

5 ఈంజ ఆడ్ర అమ్ కిచ్చొక దెతసుమ్ మెలె, జేవ్ మాన్సుల్ కెర్తి రితి తగుల్ కెరయతి రితి నాయ్, గని తుమ్చి ఉప్పిరిచి ప్రేమయ్చి రిసా. ఈంజ అమ్చి ప్రేమ కిచ్చొ మాయచి నెంజె. అంచి పెట్టిచి సత్తిమ్కయ్, ‘సత్తిమ్ కెర్తసుమ్’ మెన జాన్తి దయిరిమ్ జయి, చి కిచ్చొ మాయ నెంజిలి అమ్చి నముకుమ్కయ్చి ప్రేమయ్ ఈంజ.

6 సగుమ్జిన్ మాన్సుల్, వేర బుద్ధుల్తె బెదిత కామ్క నెంజిల కొడొ లట్టబ్బిన్తె అలవాట్ జా దసితె గెచ్చు మార్పుప జా అస్తి.

7 ‘దేముడుచ ఆగ్గుల్ సికడ్డన అమ్’ మెనంతతి, గని జేవ్ సొంత సంగితిన్చి అర్థమ్ నేన్తి, చి ‘ఈంజేవ్ జేవ్ కొడొచ ఆగ్గుల్చ అర్థల్ ఇసి దస్సి’ మెన జేవ్ సంగిలే కి, జేవ్ అర్థల్ జేవ్ కి నేన్తి.

8 దేముడు మోసే తెన్ దిలి ఆగ్గుల్చి అర్థమ్ సరిగా నాయిమ్ తెన్ సికడ్డె తిలె చెంగిలి మెన అమ్ జానుమ్.

9 గని తుమ్ ముక్కిమ్క కిచ్చొ ఉచర్ మెలె, సత్తిమ్ ఇండిత మాన్సుల్చి

రిసా నాయ్, గని దేముడు పూర్ణుమ్ తెంతో ఆగ్నల్ దా అస్సె మెలె, ఆగ్నల్ తెన్ బెదితి బుద్ది నెంజిల చి సొంత ఇస్టుమ్ అయ్లి రితి ఇండితనచి రిసా, దేముడుక విరోదుమ్ జలి రితి ఇండితన చి పాపుమ్ సుదల్చి రిసా, దేముడుచి సుద్ది బుద్ది నెంజిలన చి జోవయింక ఆన్తనచి రిసా ఆగ్నల్ దా అస్సె. అన్నె కచి రిసా మెలె, అబ్బదింసిక జవున్, అయ్యుఅబ్బి అత్య కెర్తనచి రిసా, కేన్ మాన్సుక జవున్ అత్య కెర్తనచి రిసా,

10 లంజెబుద్ది ఇండితనచి రిసా, మున్సుబోదల్ తెన్ మున్సుబోదల్ లంజెకము కెర్తనచి రిసా, మాన్సుల్క దెర లాబుమ్ కెరంతనచి రిసా కి, అబద్దుమ్బుద్ది ఇండితన చి అబద్దుమ్ సాచి సంగితనచి రిసా కి, మెనయ్ దేముడు ఆగ్నల్ దా అస్సె. అన్నె, జో దేముడు సికడ్డిన్తె కిచ్చో బుద్ది జలెకి బెదె నాయ్ గే, జా ఎత్కిచి రిసా జో ఆగ్నల్ దా అస్సె.

11 దేముడు సికడ్డిని కేనె ముక్కిమ్క డీస్తయ్ మెలె, అంక 'నూనవు' మెన పరలోకుమ్చి సంతోసుమ్ తిలొ దేముడుచి పరలోకుమ్చి ఉజిడి పరలోకుమ్చి గవురుమ్చి రిసాచి సుబుమ్ కబుర్ తెయి డీస్తయ్.

దేముడు పవులుక దయ కెర్లన్

12 ఈంజ సుబుమ్ కబుర్ కామ్తె అంక బుకార్లో అమ్చో ప్రబు జలో యేసుక్రీస్తుక అంచి నర్ల ఆవ్ సంగితసి. అంక 'నిదానుమ్ కెరెదె' మెన అంక నంప కెర్లి రితి, ఆవ్ జోవయించి సేవ కెరుక ఆవ్ విలువ తిలి రితి జో దెక, అంక నిసాన ఈంజ సేవక దొర్కు జలి నెక్తి ఎత్కి జో దా అస్సె.

13 అగ్గె, జలె, జోవయింక 'దేముడు నెంజె' మెన ఆవ్ దూసుప కెర్తె తిలయ్, జోవయింక విరోదుమ్ జా జోవయించ మాన్సుల్క అల్లర్ కెర్తె తిలయ్, జోవయింక నిస్కారుమ్ దెకితె

తిలయ్. గని ఆవ్ నేన కెర అన్మానుమ్ జా దస్సి కెర్లయ్, చి జోవయించి దయక జో అంక చెమించుప కెర్లన్,

14 అన్నె, అమ్చో దేముడు ప్రబుచి ఎదివాల్ దయక యేసుక్రీస్తుక నంపజతనకయ్ దొర్కు జతి నముకుమ్ ప్రేమయ్ అంచి పెట్టి జెర్తయ్లన్.

15 కేన్ కోడుచి సత్తిమ్ కచితుమ్ జో దస్సి కెర్లిసి దెకయ్తయ్ మెలె, 'పాపుమ్ సుదల్చయ్ రచ్చించుప కెర్లి రిసాయి యేసుక్రీస్తు ఈంజ లోకుమ్తె బార్ జలన్' మెలిసి. ఆవ్ కి పూర్తి పాపుమ్చో, ఎత్కిజిన్చి కంట ఆవ్ ఒగ్గర్ పాపుమ్చో.

16 గని జో దేముడు కిచ్చోచి రిసా అంచి ఉప్పిరి జోవయించి దయ తిలన్ మెలె, ఆవ్ పూర్తి పాపుమ్చో కెర్ల అల్లర్ జో ఓర్పువ జా చెమించుప కెర్లిన్ తెన్ జోవయించి ప్రేమ పూర్తి రుజ్జు జంకయ్. దస్సి, జో నిసాన్లనతె కో అంక దెకిలె, ఆమ్ కి రచ్చించుప జా పరలోకుమ్తె గెచ్చుమ్దే మెన దయిరిమ్ జా నంపజవుల.

17 ఎత్కి ఉగలు ఏలువ కెర్లొ రానొ జలొ నే మొర్లొ, నే డీస్తొ ఎక్కి దేముడుక ఉగల్చి ఉప్పిరి ఉగల్క పరలోకుమ్చి గవురుమ్, మరియాద కలుగు జవున్! ఆమేన్.

తిమోతిక పవులు దిలిసి ఆడ్ర

18 తిమోతి, అంచో పుత్తన్, కిచ్చొ ఆడ్ర తుక దెతసి మెలె, కిచ్చొ కామ్ తుచి అత్తి సార్ప కెర దెతసి మెలె, తుక 'అంచి సుబుమ్ కబుర్ కామ్చి రిసా బుల్తు' మెన జా దీసి జోవయించ కబుర్లు సంగితనచి అత్తి దేముడు సంగిలిసి తుయి జర్లు కెరు. పాపుమ్చి ఉప్పిరిచి ఆత్మయుద్దుమ్తె జా దీన్చ జో సంగిల కొడొ తుక ఆత్మాయ్దల్ జతు; జోవయించి సుబుమ్ కబుర్ వేర బుద్దుల్ చి ఉప్పిరి జిన్తి రితి

19 చి సత్తిమ్మక నిదానుమ్ తా, పాపుమ్ నే ఇండితె, 'చెంగిల్' మెన తుయి జాన్లిసి పూర్తి మెన్సు నిదానుమ్ కెరయ్ దయిరిమ్ తెన్ ప్రబుచి కామ్ కెరు. సగుమ్జిన్, జలె, 'చెంగిల్' మెన జేవ్ జాన్లిసి నెన ముల కెర, జేవ్ అగ్గె ఒప్పున తిలి సముకుమ్ జెవ్వి పాడ్ కెరన గెల అస్సి.

20 జోవయింతె కొన్సు మెలె, హుమెనెయిను చి అలెక్కంధ్రు. దస్సి కెర, దేముడుచి మరియాద కడ అస్సి. 'దస్సి పాపుమ్ ముల సిక్కుతు' మెనయ్, జేవ్ సిచ్చ జతి రితి జోవయింక క్రీస్తుచి నావ్ తెన్ సయ్తాన్చి అత్తి ఆవ్ సార్పు కెర దా అస్సి.

2

డాక్వెల్లో చి రిసా సంగుమ్చ ప్రార్దన కెర్తినచి రిసాచి కోడు

1 తొలితో తుక ఆవ్ కిచ్చో మెంతసి మెలె, తుమ్ ప్రార్దన కెర్తినచి రిసా కిచ్చో ఏక్ కోడు ఆవ్ బతిమాల్పా జా సంగితసి మెలె, దాకువెల్లో ఎత్తిజిన్చి రిసా, జోవయింక కామ్క జెతిసి దొర్కు జతి రితి తుమ్ ప్రార్దనల్ కెర. జోవయింక ప్రబు తోడు తతి రితి ప్రార్దనల్ కెర, చి ప్రబు కెర్ల దయ కమెచి రిసా కి జోవయింక తుమ్చి సర్ల సంగ.

2 అన్నె కిచ్చో మెలె, దేసిమ్క ఏలుప కెర్ల అదికారుల్ ఎత్తిజిన్చి రిసా అమ్క చెంగిల్ దెకుత్ మెనయ్ తుమ్ ప్రార్దన కెర. అమ్ ఎత్తిజిన్ అల్లర్ నెంతె సేంతుమ్ తెన్ జింక జయెదె, అడ్డు నెంతె ప్రబుక బక్తి కెరుక జయెదె, చి మరియాద తెన్ జిమ్దె.

ఎత్తిజిన్ నంపజా రచ్చించుప జతు మెన ప్రబుచి ఉద్దెనుమ్

3 దస్సి ప్రార్దన కెర్లె చెంగిలి, అన్నె 'చెంగిలి' మెన అమ్చో రచ్చించుప కెర్లొసా జలొ దేముడు ఒప్పున్తయ్.

4 కిచ్చోక మెలె, 'సత్తిమ్ జాన్తు! రచ్చించుప జతు' మెనయ్ మాన్సుల్ ఎత్తిజిన్చి రిసా జోవయింక ఉద్దెనుమ్.

5 కిచ్చో సత్తిమ్ జాన్తు మెన ఇస్తుమ్ జతయ్ మెలె, జో ఎక్కిలొయి దేముడు జలిసి, చి జోవయింక చి మాన్సుల్క మదెనె జతోసా ఎక్కిలొయి తిలిసి, మాన్సు జా జెర్మన్ అయ్లొ రచ్చించుప కెర్లొసా జలొ క్రీస్తు జలొ యేసుయి. అన్నెయ్ కిచ్చో సత్తిమ్ జేవ్ జానుక జోవయింక ఇస్తుమ్ మెలె,

6 జో కెర్లి ముక్కిమ్ కామ్. మెలె, 'సయ్తాన్చి రాజిమ్ తెంతొ రచ్చించుప జతి వరుమ్ ఒండి లోకుమ్చ మాన్సుల్ సంగితి అవ్కాసుమ్ తవున్' మెనయ్ జోవయింక సొంత జిమ్ దా మొర గెచ్చ, అమ్క సయ్తాన్ తెంతొ జో నెతోవ గెలిసి. ఈంజయ్ కోడుచి సత్తిమ్ సరిగా సమయుమ్ దేముడు అమ్క రుజ్జు దెకయ్లొ.

7 దస్సి, "తుయి అంచొ బారికి జా అంచి అదికారుమ్ తెన్ యూదుల్ నెంజిల ఎత్తిజిన్క, మాన్సుల్తె గో, చి జోవయింక సుబుమ్ కబుర్ సూనవ బోదన కెరు" మెనయ్ ప్రబు అదికారుమ్ దా అంక తెద్రవ అస్సి. కో జవున్ వేర సంగిలె, తుమ్ నంప కెర నాయ్. ఆవ్ సత్తిమ్ సంగితసి.

ప్రబుక కిసి మరియాద దెంక గే

8 ప్రార్దనల్చి రిసా జలె, అంచి ఇస్తుమ్ కిచ్చో మెలె, తుమ్ కేన్ బెద జెతి పొది మున్సుబోదల్ ప్రార్దన కెర్లు. దేముడుక పూర్తి సత్తిమ్ తా, పెట్టి కిచ్చో కోపుమ్ నెంతె, కిచ్చో జట్టి జతిసి నెంతె. సుద్ది తిలి అత్తో ఉక్కుల ప్రార్దన కెర్లు.

9 దస్సి, కి, తేర్బోదలు కక్కయ్ లాజ్ నే కెర్తి రితి, బుద్ది తెన్ బడాయ్ నెంతె, చెంగిల్ బందన తంక. సెండి తెన్ బడాయ్చి పోసి. బజార్ గే వెండి గే ముత్యల్ గే తియనుక పోసి. బడాయ్చ పాలల్ కి పోసి. మరియాద తెన్ని తంక.

10 దేముడుక బక్తి కెర్తి కేన్ తేర్బోదక కి సూటి కెర్తిన కిచ్చొ ముక్కిమ్ మెలె, మాన్సుల్క కన్కారుమ్ దెకిత జేవ్చ కమొ.

11 తేర్బోదల్, జలె, ప్రార్దనక బెద జెతన, తుక్లె తా వెన కిచ్చొ గవురుమ్ నే ఉచరంతె, సూన సూన సికితె తత్తు.

12 ప్రార్దనక బెద జెతన కేన్ తేర్బోద కి బోదన కెరుక ఆవ్ ఒప్పి నాయ్, మున్సుబోదల్చి ఉప్పిరి అదికారుమ్ జేవ్ ఆనసుక ఆవ్ ఒప్పి నాయ్, తుక్లె తంకయ్.

13 ఆదాము మెలొ మున్సుబోదక దేముడు తొలితొ జెర్మయ్లన్. పడ్డెకయ్ తేర్చి జలి హవ్వక జెర్మయ్లన్.

14 పడ్డె, సయ్తాన్చి అత్తి తొలితొ మోసిమ్ జలొసా ఆదాము నెంజె, హవ్వ మెలి జా తేర్బోద సయ్తాన్చి కోడు సూన పూర్తి మోసిమ్ జా గెచ్చు, దేముడుచి సెలవ్కోడు పిట్టవ తొలితొ పొరపాట్ జలి.

15 ఒత్త తెంతొ, కస్టల్ నొప్పుల్ తెన్ తేర్బోదల్, బోదల్ పాయిక మెన దేముడు దా అస్సె. గని జేవ్ కస్టల్ జలెకి, కేన్ తేర్బోద ప్రబుక నంపజా నిదానుమ్ తా ప్రేమ తెన్ ఇండ, వేర బుద్దుల్ నెంతె, ప్రబుచి సుద్ది తెన్ సత్తిమ్ తెన్ ఇండెదె, జయ్యి రచ్చించుప జయెదె.

3

కిసా మాన్సు సంగుమ్చొ పాస్టర్ జంక

1 'ప్రబుచి కోడు' మెన ఏక్ కిచ్చొ కచితుమ్ తుమ్ దెరనుక మెలె, సంగుమ్క పాస్టర్ జంక కో ఉచర్తయ్, చెంగిల్ కామ్ ఉచర్తయ్.

2 జలె, పాస్టర్ జతొసా కిసా మాన్సు తంక మెలె, జోవయింక 'సత్తిమ్చొ

మాన్సు' మెన ఎత్తిజిన్ చినితి రితి జో తంక. జోవయింక ఎక్కిలి తేర్చి తంక, *కిచ్చొతె కి నిదానుమ్ బుద్ది ఇండితొసా జో తంక, బుద్ది సుదొ జో జంక, †జో ఇండితినక వేర మాన్సుల్చి మరియాద నే కడ్డెసా, వేర తెంతొ జెత మాన్సుల్క మరియాద కెర్తొసా జా, జోవయింక అన్నిమ్ గే టాన్ గే దెంక, చి తెలివి తెన్ బోదన కెర్తొసా జో తంక.

3 సూర్ పితొసా, బేగి కోపుమ్ జతొసా పొని, మెత్తన మాన్సు కావలె. గగ్గిల్ జతొసా పొని, డబ్బుల్ ఆన జతొసా పొని.

4 జోవయించి సొంత గేరుక జో బుద్ది తెన్ ఏలుప కెరుక, చి జో సంగిలి కోడు జేవ్ సూనతి రితి, జోవయించి అన్నె మాన్సుల్క జేవ్ మరియాద దెకిత్ రితి, జోవయించ బోదల్క జో సికడుక.

5 కిచ్చొక మెలె, జోవయించి సొంత గేర్క బుద్ది తెన్ ఏలుప కెరుక జో నేన్లె, దేముడుచి సంగుమ్చ మాన్సుల్క కిసి దెకెదె!

6 నొవర్క నంపజలొసా పాస్టర్ జంక బెదె నాయ్. దస్సి అదికారుమ్ నొవర్క నంపజలొసాక దిలె, గవురుమ్క పులెదె. ‡సయ్తాన్ మొదొల్క దస్సి పులిలన్, చి జో సిచ్చు జంక అస్సె. జలె, జో మాన్సు దస్సి పులిలె, జో కి జా సిచ్చు సేడుక జయెదె.

7 పాస్టర్ జతొసాక వేర మాన్సుల్ 'సత్తిమ్చొ మాన్సు' మెన చినితి రితి జో ఇండుక. నెంజిలె, †జోవయించి మరియాద గెలె, 'జిన్లయ్' మెన సయ్తాన్ సర్ద జయెదె.

సంగుమ్చి వెల్లెల మాన్సుల్ కిన్ తంక

8 సంగుమ్చి సేవ కెర్త అన్నె వెల్లొ జతన కి దస్సి మరియాద అనన్తి సుద్ది

* 3:2 3:2 గ్రీకు బాన చి జా కోడుతె సూరు గట్ర పితిన్ ముద్దొ కెరంతినచి అర్దుమ్ కి, వేర కమొ ఎత్తితె ముద్దొ కెరంతినచి అర్దుమ్ కి, తయెదె. † 3:2 3:2 నెంజిలె 'ప్రబుచి గవురుమ్ దెకయ్తి సుద్ది తెన్ తతొసా తంక'.

‡ 3:6 3:6 తొలితొ సయ్తాన్ దూత జా తిలన్. § 3:7 3:7 అన్నయ్ సంగుమ్చి మరియాద కి గెచ్చెదె, ఎత్తి అదికారుమ్ తిలొ దేముడుచి మరియాద కి గెలి రితి డీసెదె.

ఇండితన తంక. కిచ్చొ మాయబుద్ధి నెంజిలన జేవ్ తంక. మాయకొణ్ణో లట్టబ్బన పోని. సూర్ నే పితోసా, డబ్బుల్ ఆస తిలన పోని.

9 జోవయించి పెట్టి కిచ్చొ మాయ నెంతె ప్రబు సికణ్ణిసి, చి ప్రబుక నంప కెర్త ఎత్తిజిన్క రచ్చన దొర్కు జతయ్చి రిసాచి జో బార్ కెర్తి గుట్టు, పూర్తి నిదానుమ్ జేవ్ నంపజా తంక.

10 జా సేవక జోవయింక నే నిసానై, జా కామ్ నే దెతె అగ్గె, జేవ్ నంపజా నిదానుమ్ తతిసి జేవ్ ఇండితిసి సరిగా పరిచ్చ జా రుజ్జు డీనుక. జోవయింక 'నిజుమి నంపజా సత్తిమ్ ఇండితతి' మెన రుజ్జు అయ్లె, జా సేవతె బెదవుక జయెదె.

11 దస్సి కి, దస్సి కామ్తె బెదిత తేర్బోదలు కి మరియాద ఆనన్తి సుద్ది ఇండితన తంక. సాండెలివో పోని. కిచ్చొతె కి నిదానుమ్ కెరన బుద్ధి ఇండుతు. కిచ్చొ రగుమ్ కామ్ జేవ్ కెర్లె కి, నముకుమ్ జల మాన్సుల్ జతు.

12 జలె, జా సేవ కెర్త మున్సుబోదల్ అన్నె కీస మాన్సుల్ తంక మెలె, ఎక్కి తెర్ని తెన్ తంక, పడ్డో జోవయించ బోదల్క జోవయించి గేర్క చెంగిల్ ఏలువ కెర్తన జా తత్తు.

13 కిచ్చొక మెలె, కో దస్సు వెల్లెల మాన్సుల్ రిత జా సంగుమ్చి సేవ నముకుమ్ తెన్ నిదానుమ్ కెరుల గే, మాన్సుల్ జోవయింక గవురుమ్ దెకుల, అన్నె యేసుక్రీస్తుచి సుబుమ్ కబుర్ కామ్ జేవ్ లాజ్ నెంతె కెరుక ఒగ్గర్ దయిరిమ్ జవుల, అన్నె, జా సుబుమ్ కబుర్క 'సత్తిమ్' మెన మాన్సుల్ దయిరిమ్ జవుల.

ప్రార్థనక బెద జెతి పొది కిసి తంక

14-15 తుమ్చితె బే బేగి గెచ్చుక అంక ఇస్తుమ్, గని 'ఏక్ వేల ఆవ్ ఆల్నిమ్ జా గెలె, ప్రబుచి కుటుంబుమ్ జల రిత సంగుమ్చి కిసి ఇండుక

గే, సంగుమ్తె కిసి నిదానుమ్ తెన్ తంక గే మదెనె సిక తత్తు' మెనయ్ ఈంజేవ్ కొడో ఆవ్ రెగిడ్డిసి. ప్రబుక నంపజలన మొత్తుమ్ జీవ్ తిలో ఎక్కిలో దేముడుకయ్ కుటుంబుమ్ రితి గేర్ రితి జయెదె. జా కుటుంబుమ్క గేర్క దెకిలె, దేముడుచి బోదనచి సత్తిమ్క డిట్టుమ్ టీవణ్ణి స్తంబుమ్ రితి జయెదె.

16 దేముడుచి గుట్టు కో అగ్గె నేనై కి, అప్పె జానయ్ జా గుట్టు కెర్ది ముక్కిమ్చి మెలె, "జో ఈంజ లోకుమ్తె మాన్సు జా జెర్మున్ అయ్లన్, చి జోవయింక 'అస్సె' మెన మాన్సుల్క రుజ్జు అయ్లి.

జోవయించి ఆత్మసెక్తిక 'నిజుమి దేముడుచొ పుత్తుసి జయెదె' మెనయ్ రుజ్జు అయ్లి. పరలోకుమ్చి దూతల్ కి జోవయింక దెకితె తిల. ఒండి లోకుమ్చి దేసిమ్లుతె జోవయించి రిసా సూనయ్ జతయ్.

ఈంజ లోకుమ్తెచి మాన్సుల్ ఒగ్గర్ జిన్ జోవయింక నంపజయి అస్సి. ఉక్కిల్ జా పరలోకుమ్తె వెగ గెచ్చు గవురుమ్ జయి అస్సె" మెన ఒప్పున అస్సుమ్ గెద. జా నిజుమ్.

4

తిమోతిక దెతి బోదన

1 దేముడుచి సుద్ది తిలి ఆత్మకిచ్చొ ఏక్ కోడు కచితుమ్ సంగితయ్ మెలె, పడ్డోక సంగుమ్జిన్ క్రీస్తుచి ఉప్పిర్చి నముకుమ్ పిట్టవన, మోసిమ్ కెర్త ఆత్మల్క చి బూతల్ సికడ్డిన్క సూనుల.

2 కిసి దస్సి మోసిమ్ జవుల మెలె, కిచ్చొ చెంగిల్ గే పాపుమ్ గే చినితి సెక్తి పిట్టవన్ల మాన్సుల్ 'సత్తిమ్' మెన జోవయింక అబద్దుమ్ సంగుల.

3 'పెండ్లి జంక గారు' మెనుల, అన్నె, కిచ్చొ కిచ్చొచి రిసా 'జా కంక

గారు' మొన దన అబద్ధుడవ మాన్సుల్ సికడుల; 'సర్ల తెన్ కతు' మొనయ్ ఎత్తి అదికారుమ్ తిలో దేముడు జెర్వువ జోవయింక సంపజా సత్తిమ్ జాన్తనక జేవ్ వస్తువల్ దా తిలె కి.

4 నాయ్, గెద, దేముడు జెర్వుయ్లిసి ఎత్తి చెంగిలి, చి "తుయి దిలది" మొన సర్ల తెన్ జోవయింక ఒప్పునై, కిచ్చొయ్ కి కంక జయెదె.

5 కిచ్చొక మెలె, "కంక జయెదె" మొన దేముడు సంగిలి కోడుచి రిసా గే, పడ్డొ కతోసా జోవయింక ప్రార్దన కెర్లి రిసా కి జా వస్తువ సుద్ది అస్సె.

6 జలె, ఒత్తచ సంపజలసక తుయి ఈంజ ఎత్తి సికడై, క్రీస్తు జతో యేసుక చెంగిలో సేవ కెర్తొసా జస్తె. అస్సె, క్రీస్తుచి ఉప్పిర్చి నముకుమ్చి బోదన, సరిగచి బోదన, తుయి అప్పెక నిదానుమ్ ఇండిలి సత్తిమి తుచి పెట్టి పలితుమ్ దెరెదె.

7 మాన్సుల్ అచ్చి ఉచర్లి దేముడుక విరోదుమ్ జతిసి చి మంతిరివొచ వెర్లి వెర్లి కొడొ చి జోవయించ మత్తెలివొక తుక దూరి కెరు.

ప్రబుచి సేవ ఎక్కి నిదానుమ్ కెరుక పూచి తెన్ అలవాట్ కెరను.

8 కిచ్చొక మెలె, కామ్ కెర కెర ఆగ్ డిట్టుమ్ కెరంతి అలవాట్ చెంగిలి, గని ప్రబుచి సేవ కెర్లినతె *ఆత్మక నిదానుమ్ కెరనై, ఆత్మకయ్ డిట్టుమ్ జలె, మాన్సుక ఒగ్గర్ చెంగిలి. కిచ్చొక మెలె, ఈంజ లోకుమ్తె కి కామ్క జెతయ్, పరలోకుమ్తె గెలె కి కామ్క జయెదె.

9 ప్రబుచి కోడు, ఈంజ' మొన కచితుమ్ దెరను.

10 కిచ్చొక మెలె, అమ్ ఆత్మక ప్రబుక పూర్తి నిదానుమ్ జా ఆత్మక డిట్టుమ్ జతి రిసా కిచ్చొక బద్దుకుమ్ నే జతె నైమల్ కెరన్లి రితి ఒత్త అస్సుమ్ మెలె, జీవ్ తిలో ఎక్కిలో దేముడుచి ఉప్పిరి అమ్చి

దయిరిమ్ తియ అస్సుమ్. జోయ్యి ఎత్తిజిన్క రచ్చించుప కెర్తొసా, అన్సె ముక్కిమ్క జోవయింక సంపజలసకయ్.

11 ఈంజ బోదన ఎత్తివ్ కొడొ తుయి అదికారుమ్ తెన్ సికడై తా.

12 తుయి ఉబెడొ రితి దాక్ జలెకి, తుక జేవ్ నిస్కారుమ్ నే దెకితె తుక దెక సెకిత్ రితి తుయి ప్రేమ తా, ప్రబుచి ఉప్పిర్చి నముకుమ్క డిట్టుమ్ నిదానుమ్ తా, ప్రబుచి సుద్ది తా, చెంగిల్ లట్టబై తా, సత్తిమ్ ఇండితె తా. తుయి దస్సి జలె, తుక దెక జేవ్ కి సికుల.

13 ఆవ్ జెతె ఎదక సంగుమ్తె దేముడుచి కొడొ సదు కెర్తె తా, బుద్ది సెకడై తా, చి బోదన కెర్తె తా.

14 పడ్డొ, జా సుట్టు, ప్రబుచి సంగుమ్చ వెల్లి మాన్సుల్చి సబతె తిలన తుక †బోడి చడ ప్రార్దన కెర్లికయ్, జోవయించ కబుర్లు సంగితో ఎక్కిలోచి అత్తి దేముడు తుచి రిసా కోడు సంగిలన్. జో దేముడు తెదొడి దిలి వరుమ్ తుయి పాడ్ కెరు నాయ్; నిదానుమ్ వాడిక కెర్తె తా.

15 జలె, తుచి పూచి తిలి ఈంజ ఎత్తి తుయి ఎక్కి మెన్సు నిదానుమ్ కెర్తె తా, చి తుక 'ఆత్మక వడ్డ అస్సె, డిట్టుమ్ అస్సె, జోవయింక సంప కెరుక జయెదె' మొన ఎత్తిజిన్ చినుల.

16 తుయి జాగర్ల దెకను. తుయి కిచ్చొ సెకడై గే సరిగా ఉచర, సిక్కడు. జా బోదన సరిగా నిదానుమ్ సెకడై తా. కిచ్చొక మెలె, జా సుబుమ్ కబుర్ తెయి తుచి రచ్చన కి, సూన్తనచి రచ్చన కి.

5

వేర వేర మాన్సుల్క కిసి దెకుక గే సంగిలిసి

1 కేన్ జవున్ మంత్రో మాన్సుల్క కిచ్చొ జవున్ కెర తిలె సరి కెర గని, జోవయింక గోల కెర నాయ్. గని అబ్బొద్క కిసి

* 4:8 4:8 కొరింథిల్క రెగిడ్లి ఏక్ నంబర్ ఉత్తమ్ 9:24-27 దెక. † 4:14 4:14 1:8, చి తిమోతిక రెగిడ్లి 2 నంబర్ ఉత్తమ్ 1:6 దెక.

మరియాద తెన్ సంగుక జయెదె, ప్రేమ తెన్ జో మాన్సుల్క సంగు. ఉబెడల్క 'అన్సోబావో' మెలి రితి దెక.

2 మంత్రివో తేర్బోదల్క 'అయ్యు' మెలి రితి దెక, ఉబెడివోక 'బేని' మెలి రితి పూర్తి సుద్ది తిలి మెన్సు తెన్ దెక.

3 పూలజ్ జా నిజుమ్ రండెల్ జల తేర్బోదల్క గవురుమ్ దెక తోడె కెర చెంగిల్ దెకితె తా.

4 గని, కేన్ రండెల్ మాన్సుక పుత్తర్లు జవున్, దువిసివో జవున్, నత్తుర్నివో జవున్, నత్తిన్నివో జవున్ అన్తి జలె, జెవ్వి ముక్కిమ్క జోవయించి సొంత మాన్సుల్క దెకితి పూచి కెరనుక సిక్కుతు, అయ్యుసిసి పాయిలి సైమ నెతోయిలి రితి. 'దస్సి కెరుక చెంగిలి' మెన దేముడు సంగితయ్.

5 గని కో నిజుమ్ రండెలి జా, జాక కోయి మాన్సు తోడు నెంజిలె, దేముడుక 'జోయ్యి రచ్చించుప కెర్ను' మెన, జా మాన్సు రాతి మెద్దెనె జోవయింక ప్రార్దన కెర్తె తయెదె. జో తెన్ తోడె నజితె తయెదె.

6 గని వేర బుద్దుల్ చి జలె, జేవ్చి అసల్కయ్ సుకుమ్ తెన్ జిలె కి, దస్సి జలె జితె పొది ఆత్మక మొర్లి రితి జా తయెదె.

7 జలె, రండెల్ మాన్సుల్చి మరియాద నే గెతి రితి జేవ్ జితి రిసా, ఇసి ఆడ్ర దేసు.

8 కో జలెకు జోవయించ సొంత మాన్సుల్క, అన్నె ముక్కిమ్క సొంత కుటుంబుమ్క చెంగిల్ దెకె నాయ్ గే, పోసె నాయ్ గే, జో మాన్సు ప్రబుక నే నంపజలి రితి జా, నంపనెంజిలోసాచి కంట పాపుమ్చో జయెదె.

9 కేన్ రండెల్ మాన్సుచి వయసు అరవయ్ వెర్చుల్క తొక్కి నెంజిలె, జా ఎక్కిలోక పెండ్లి జా తిలిసి జలె, సంగుమ్చి సేవ కెర్తెసతె జాక టీవడుక జయెదె.

10 గని జాక కిసి మాన్సు మెన ఎత్కిజిన్ జానుక మెలె, కన్కారుమ్ దెకితి మాన్సు జా తంక, జేవ్చి బోదల్క

చెంగిల్ పోస తంక, వేర తెంతో అయ్ల మాన్సుల్క మరియాద కెర తతె తంక, గోత్ అయ్ల నముకుమ్ జల వెల్లెల మాన్సుల్క చట్టో దోవ తంక, బాదల్ తిలసక తోడు కెర తంక. కిచ్చో జలెకి చెంగిల కమొ కెర్తి మాన్సు జా తంక.

11 గని తొక్కి వయసుచ రండెల్ మాన్సుల్క సంగుమ్చి సేవతె తుమ్ టీవడ నాయ్. వేర ఆసల్ జా ప్రబుక పచ్చిల్ రితి జలె, అన్నె పెండ్లి జంక ఆస జవుల.

12 జేవ్ "ప్రబుచి సేవ కెర్తె తయిందె, అన్నె పెండ్లి జంక నెసి" మెన తొలితొ సంగ తా, జా సేవతె బెదిలె పడ్డో అన్నె పెండ్లి జా ములిలె, అబద్దుమ్ జలి నింద సేడుల.

13 పడ్డో, రండెల్ జల ఉబెడిబ రితసక ఎత్కి తోడు దిలె, బద్దుకుమ్ జా పేడివో పేడివో బుల బుల, సొండెల్ కొణ్ణో సికుల. వేర మాన్సుల్చి కామ్చి నెడిమి జా జోవయించి కామ్ పిట్టవుల, నెంజిల కొణ్ణో లట్టబుల.

14 జాకయ్, తొక్కి వయసుచ రండెలివో అన్నె పెండ్లి బోదల్ పాయ జోవయించి గేర్ తిలిసి ఎత్కి చెంగిల్ దెకుత్, చి జోవయించి రిసా అమ్ కో సయ్తాన్చ మాన్సుల్ అమ్క నింద కెరుక వాట్ తయె నాయ్.

15 రండెల్ జల ఉబెడిబ్బ సగ్గుమ్జిన్ ప్రబుచి సేవ ముల దా సయ్తాన్ సికడ్డి బుద్దితె గెచ్చ అన్తి.

రండెల్ మాన్సుల్క కో దెకుక

16 జలె, ప్రబుక నంపజలి కేన్ మాన్సుచ మాన్సుల్తె రండెల్ మాన్సుల్ అన్తి జలె, జా నంపజలి మాన్సు జోవయింక దెకితె తవున్. జేవ్చయ్ రండెలివోక సంగుమ్ పోసుక పోసి. చి ఎద్దె తోడె నెంజిల రండెలివోక తోడు కెర్తి డబ్బుల్ సేనడ జోవయింకయ్ తోడె దెత్తె.

17 ప్రబుచి సంగుమ్చి సేవ కెర్తె వెల్లో మాన్సుతె కో చెంగిల్ ఏలుప కెర్తెతి,

ముక్తిమక జోవయింతె కో నిదానుమ్ బోదన కెర్తతి బుద్ది సికడ్తతి, వేర వెల్లో మాన్సుల్క చి కంట జోవయింక ప్రెజల్ ఒగ్గర్ విలువ దెక అన్నెయ్ తోడు దెతు.

18 కిచ్చొక మెలె, దేముడుచి కోడు మోసాచి అత్తి రెగిడ్డినతె కిచ్చొ మెన ఏక టాలి ఉచరుక జయెదె మెలె,

*“కెల్లె గిడ్డల్ దాన్ సుదయ్తె పొది సుదయ్త బెయిలల్క మూంతి బందుక నెంజె. పోన” పడ్డొ, †“కామ్ కెర్తొసా జోవయించి జతమ్ నజనుక నాయిమ్” మెన సంగిలి కోడుచి అర్దుమ్ తుమ్ కెరన.

19 సంగుమ్చ వెల్లెల మాన్సుల్తె కక్క జవున్ కో జలెకు కిచ్చొ జవున్ నింద కెర తిలె, దొగుల తీగ్ల సాచుల్చి సాచి సూన్లెకయ్, జా సాచి బెదిలెకయ్, జా నింద సూన్తి రితి విలువ దెకు.

20 గని కో సంగుమ్చ వెల్లెల మాన్సుల్ పొరపాట్ జస్తె తత్తతి గే, సంగుమ్చ ఎత్తిజిన్చి మొక్కె జోవయింక తీర్పు సంగు, చి దెక తా తిల మాన్సుల్ దస తప్పుల్ కెరుక బియుల.

21 దేముడుచి మొక్కె, యేసుక్రీస్తుచి మొక్కె, పరలోకుమ్చ దూతల్చి మొక్కె, తుక ఆవ్ ముక్తిమక సంగితసి మెలె, రుజ్జుల్ సరిగా నే సూన్తె తీర్పుల్ కెరు నాయ్ అన్నె కక్క మొకమాటుమ్ నే దెకితె తీర్పు కెరు.

22 పడ్డొ, బమ్మ తెన్ కక్క బోడి చడ ప్రబుచి కామక అదికారుమ్ దేసు నాయ్. చెంగిలొ నెంజిలొ మాన్సుక దస్సి అదికారుమ్ దిలె, జోవయించి పాపుమ్తె తుయి బెదిల్ రితి జయెదె. అన్నె మాన్సుల్చి పాపుమ్తె తుయి బెదు నాయ్. దసితె దెర్ను నే సేడ్డె, ప్రబుచి సుద్ది తెన్ తా.

23 పడ్డొ, సుద్ది కావలె మెన తుయి రితి పాని పితసి, కిచ్చొగె. గని అప్పె తెంతొ తుచి పెట్టిచి బాద చి తుచి ఆగ్చ అన్నె బాదల్ చి రిసా ఓస్తు మెన ఇదిల్ ద్రాచ రస్సుమ్ పి.

24 జలె, తీర్పు కెర్తినచి రిసా అన్నె కిచ్చొ మెలె, బమ్మ తెన్ తీర్పు కెరు నాయ్. సగుమ్జిన్ పాపుమ్ కెర్తసి సొస్టుమ్ డీస్తయ్, చి రుజ్జు కెరుక జతయ్. గని అన్నె సగుమ్జిన్ కెర్తి పాపుమ్ లుంక తా, ఎక్కి పడ్డొకయ్ డీసెదె.

25 దస్సి కి, సత్తిమ్ కమొ సొస్టుమ్ డీసుల, గని మొదొల్కయ్ నే డీసిలెకి, ఎల్లకాలుమ్ లుంకడుక నెంజె.

6

ఎజొమాన్సుక గొతిమాన్సుల్, గొతిమాన్సుల్క ఎజొమాన్సు కిసి దెకుక గే సంగిలిసి

1 కో నంపజల గొతిమాన్సుల్ జా అస్సి గే, జోవయించ ఎజొమాన్సుక గవురుమ్ దెకితె తత్తు, చి జేవ్ ఇండితి బుద్దిచి రిసా ప్రబుచి నావ్క జవున్ జోవయించి సుబుమ్ కబుర్ జవున్ కో నిస్కారుమ్ ఉచరుక నాయ్.

2 జేవ్ గొతి మాన్సుల్తె కచ ఎజొమాన్సు నంపజల జవుల గే, * అమ్చ ఎజొమాన్సు ఆము ఎక్కి రిత జలమ్ గే మెన ఉచరుక జలెకి, జేవ్ గొతిమాన్సుల్ జోవయించ ఎజొమాన్సుక గవురుమ్ దెకుక ముల్తు నాయ్. ‘జేవ్ ఎజొమాన్సు కి ప్రబుక నంపజలస’ మెనయ్ జయి ప్రేమకయ్ అగ్గెచి కంట అన్నె నిదానుమ్ జోవయించి సేవ కెరుక. ఇస నిదానుమ్ బుద్దుల్ తుయి సికడు.

డబ్బుల్ ఆసక వేర బుద్దుల్ చి రిసా సంగిలిసి

3 జలె, ప్రబు జలొ యేసుక్రీస్తుచ చెంగిల్ కెర్త బుద్ది కొడొక చి జోవయింతెన్

బెదితి సుద్దిబోదనక కో నెన కెర వేర సికడై,

4 గవురుమ్క జాని మెననై కి, జో కిచ్చోయ్ నేనె. ప్రబుచి సర్దబుద్ది జోవయించి పెట్టి నెంజిలి రిసా, ఆరిచ కొడొచి ఉప్పిరి కొడొ తెలివి తెన్ బెదవ జుజయ్తి ఆసయి తెన్ జో మాన్సు తయెదె. కొడొ తెన్ దస్సి జుజయ్తిసి, చి దస్సిచిక జట్టు జతిసి, జలె, కిచ్చో పలితుమ్ దెర్తయ్ మెలె, గోసల్, టంటల్లు, దూసెనల్, ఎక్కిలోచి ఉప్పిరి అన్నెక్కో అన్యానల్ జతిసి,

5 నే కుట్టిత తగులు, దసయ్ బాదల్. దసయ్ బుద్దుల్ జత మాన్సుల్చ ఆత్మల్ పాడ్ జా అస్తి, జోవయించి పెట్టి కిచ్చోయ్ సత్తిమ్ నాయ్. 'దేముడుచి కామ్ కెర్తి రితి అమ్ డీసిలె, డబ్బుల్ లాబుమ్ జయెదె' మెన ఉచర నాయ్ దేముడుచి రిసా దస తెలివి కొడొ మాన్సుల్క సికడైతి.

6 నిజుమి దేముడుచి కామ్ కెర్తి లాబుమ్ తయెదె. గని డబ్బుల్చి లాబుమ్ నెంజె, అన్నె 'జో దిలిసి సాలు' మెలి రితి సేంతుమ్ అమ్చి పెట్టి తిలెకయ్ అమ్క జా లాబుమ్, ఆత్మయి రగుమ్ లాబుమ్ తయెదె.

7 'జో దిలిసి సాలు' మెలి బుద్ది తెన్ అమ్ కిచ్చోక తంక మెలె, అమ్ జెర్మ ఈంజ లోకుమ్తె కిచ్చో ఆనుమ్ నాయ్, చి మొర్లె కచితుమ్ ఈంజ లోకుమ్ తెంతో కిచ్చోయ్ నెము నాయ్.

8 గని అమ్క కతిసి గలంతిసి తిలె, సాలు.

9 గని ఈంజ లోకుమ్చి సామ్సారుమ్ జంక ఆస జలస సయ్తాన్చ కమై కెరయ్తిన్తె దెర్ను సేడ్తతి, బోనుతె సేడ్లి రితి. దస్సి ఆస తిల మాన్సుల్ బుద్ది నెంజిల పాడ్ కెర్త ఆసల్తె దెర్ను సేడ్తతి. దస ఆసల్ మాన్సుల్క పూర్తి పాడ్ కెర నాసెనుమ్ కెర్తతి.

10 కిచ్చోక మెలె, పాపల్ ఎత్కిక డబ్బుల్ ఆస చేరు రితి జా ఆదారుమ్ జయెదె. దస్సి ఆస జలి రిసా, సగుమ్జిన్ నంపజల ప్రబుక ముల, ఒగ్గర్ బాదల్ జా జోవయించి పాపుమ్ కతతి.

నిదానుమ్ తా మెన తిమోతిక పవులు రెగిడ్డిసి

11 తుయి, మాత్తుమ్, దేముడుచో మాన్సు. దస్సి పాపుమ్చి ఎత్కిక తుయి దూరి తా. కిచ్చోచి రిసా తుయి ఆస జంక మెలె, సత్తిమ్ ఇండితిసి, ప్రబుక పూర్తి నిదానుమ్ తతిసి. నముకుమ్ తతిసి, ప్రేమ, బాదల్ ఓర్పుప జతి సెక్తి, గగ్గల్ నే జతి సేంతుమ్ బుద్ది మెత్తన బుద్ది తతిసి, దసచకయ్ తుయి ఆస జా.

12 తుచి నముకుమ్చి బవుమానుమ్ దొర్పు జతె ఎదక తుయి పూర్తి నిదానుమ్ ప్రబుచి కామ్ కెర్తె తా. ఒగ్గర్జిన్ సాచుల్చి మొక్కె ప్రబుక తుయి నంపజలిసి తుయి ఒప్పున్లి తెంతో, పరలోకుమ్తె గెచ్చ కెయ్క తెయ్క తా గెతి చి జోవయింతెన్ అప్పె ఇండితి వరుమ్ తుక ప్రబు దిలన్, గెద. జా వరుమ్ దెరను.

13 యేసుక్రీస్తు †పొంతి పిలాతు అదికారిచి మొక్కె సాచి సంగ ఒప్పున్లో, గెద. జలె, ఎత్కిక జివ్ దెతో జివ్ తిలో దేముడుచి మొక్కె పడ్డై జో క్రీస్తుచి మొక్కె

14 తుక కిచ్చో ఆడ్ర అఁవ్ దెతసి మెలె, ప్రబు జలో అమ్చో యేసుక్రీస్తు ఈంజ లోకుమ్తె అన్నె ఉత్త జెతి ఎదక, ప్రబుచి సుద్దిచి రుజ్జు తతి రితి, జోవయించి గవురుమ్ నే కడై రిసా, ప్రబు తుక తియార్లి కామ్ తుక దిల ఆడ్రల్ ఎత్కి తుయి నిదానుమ్ కెర్తె తా.

15 యేసుప్రబు కెయ్క అన్నె ఉత్త జెయెదె మెలె, దేముడు అబ్బోసి కెయ్క జర్గు కెరెదె గే, తెదొడకయ్. జో దేముడు అబ్బోసి ఎత్కిచి కంట వెల్లో తిలో

ఎక్కిలో దేముడు, రాసల్క రానో జలో, ఎజోమాన్లక ఎజోమాని జలోసా.

16 జో దేముడు అబ్బోసి ఎక్కిలో నే మొరై ఎల్లకాలుమ్ తతోసా. జో జితి పరలోకుమ్చి ఉజిడి కెద్ది మెలె, కోయి ఇదిల్ పాసి కి గెచ్చుక నెతిరి. కో మాన్సు కెయ్య కి జోవయింక దెకితి నాయ్, దెకుక నెతిర్తి. జోవయింక గవురుమ్ అదికారుమ్ కెయడ తెయడ తవున్! ఆమేన్.

సామ్సార్లుక సంగిలి కొడొ

17 జలె, ఈంజ లోకుమ్చి ఆస్తి కలుగు జల సామ్సార్లు జల నంపజలన్క తుయి కిచ్చొ ఆడద దేసు మెలె, గవురుమ్ ఉచరంతు నాయ్, పణ్డొ, సామ్సారుమ్క నంప కెర్తు నాయ్. జా ఎత్తి పాడ్ జితిసి. గని దేముడుచి ఉప్పిరి జోవయించి నముకుమ్ పూర్తి తిత్తు. అమ్ మాన్సుల్ సంతోసుమ్ తెన్ వాడిక కెర్తి రితి అమ్క దొర్కు. జలిసి ఎత్తి దెతోసా జొయ్యి, గెద.

18 జేవ్ సామ్సార్లు, జలె, కిసి తంక మెలె, అన్నె మాన్సుల్క కన్కారుమ్ దెకిత ఒగ్గర్ కమొ కెర్తు. దస్సి తిలె, ఆత్మక సామ్సారుమ్ జవుల. జేవ్ ముస్కు నే జతె, నెంజిలసక సర్ద తెన్ దర్కుమ్ తెన్ దెతు.

19 దస్సి ఇండిలె, జోవయింక కలుగు జితి ఆత్మ సామ్సారుమ్ పణ్డొక కి జోవయింక కామ్క జెయెదె, మొరై పరలోకుమ్తె గెచ్చు కెయడ తెయడ చెంగిల్ జితి వరుమ్ ప్రబు దిలిసి జోవయింక జెయిమ్ జయెదె.

ఆకర్ కోడు

20 ఓ తిమోతి, ప్రబు తుచి అత్తి సార్లు కెర దిలి, జోవయించి కామ్ తుయి కెర్తి వరుమ్ దెర నాయ్, జోవయించి సత్తిమ్ సికడ్తె తా. సుద్ది నెంజిల ఆరిక ఆరిచ కొడొ, దేముడుక దస కొడొ విరోదుమ్ జతతి, గెద, దస కొడొక, చి 'గ్యానుమ్'

మెన గ్యానుమ్ నెంజిలిన్క, చి మాన్సుల్ కొడొ జుజయ్తిన్క తుయి దూరి కెరు.

21 కిచ్చొక మెలె, 'గ్యానుమ్' మెన గ్యానుమ్ నెంజిలిన్క 'జయ్యి సత్తిమ్' మెన సగుమ్జిన్ సంగ సికడ, నంపజల సుబుమ్ కబుర్తె ముక్కిమ్ తిలిసి పిట్టవన, పొరపాట్ జా అస్తి.

ప్రబుచి దయ తుమ్చి తెన్ తవున్.

తిమోతిక రెగిడ్లి దొన్నిచి ఉత్త్రమ్ బారిక్ జలో పవులు తిమోతిక రెగిడ్లి దొన్నిచి ఉత్త్రమ్

మొదొల్ కోడు
1-2 ప్రేమ తిలో అంక పుత్తు జలో రితో తిమోతిక, దేముడుచి సెలవ్చి రిసొ యేసుక్రీస్తుచి రిసొ సుబుమ్ కబుర్ కామ్ కెర్తి రిసొ జోచొ బారికి జలో ఆవ్ పవులు రెగిడ్లి ఉత్త్రమ్.

“అంచొ పుత్తు జలో యేసుక్రీస్తుక కో నంపజవుల గే, జేవ్ పరలోకుమ్చి రాజిమ్తె బెద, మొర్లె అంచి తెన్ జింక ఆవ్ వరుమ్ దెతసి” మెన ప్రమానుమ్ కెలో దేముడు అంక జోవయించి కామ్క నిసాన అదికారుమ్ దా అస్సె.

జలె, దేముడు అబ్బొన్చి అమ్క ప్రబు జలో క్రీస్తు జలో యేసుచి దయ కన్యారుమ్ నేంతుమ్ తుచి ఉప్పిరి తవున్!

తిమోతి చి నముకుమ్చి రిసొ పవులు సర్ల జలిసి

3 దేముడుచి సేవ పొరపాట్ నెంతె సత్తిమ్ తెన్ ఆవ్ కెర్తసి మెన అంక దయిరిమ్. అంచ పూర్గుమ్చ కి జోకయ్ జొకర్తె తిల. ఆవ్ కెయ్య ప్రార్దన కెర్లె కి, తుక నే పచ్చితె, తుచి రిసొ జో దేముడుక అంచి సర్ల ఆవ్ నంగితసి.

4 తుక అన్నె దెకుక కోర్ప జా, రాతి మెద్దెనె ఉచర్తె తత్తసి. తుక అన్నె దెకిలె, పూర్తి సర్ల జయిందె. తుయి ఏడ్లిసి ఆవ్ ఏద కెర్తసి,

5 చి మాయ నెంజిలి తుచి నిదానుమ్చి నముకుమ్చి రిసొ ఉచర్లె, మంతిరఅప్పది జలి లోయి చి అయ్యద్

జలి యునీకే చి అగ్గె తెంతో చి నముకుమ్ తిలిసి ఆవ్ ఏద కెర్తసి. జోవయించి ఎదిలి నముకుమ్ తుచి పెట్టి కి తయెదె.

6 జాకయ్ తుక ఆవ్ అప్పె కిచ్చొ ఉచరవడ్లసి మెలె, జా సుట్టు ఆవ్ తుక బోడి చడ ప్రార్దన కెర్లెన్ తెన్ దేముడు తుచి పెట్టి దిలి వరుమ్ అన్నె ఒగ్గర్ పలితుమ్ దెర్తి రితి తుయి వాడిక కెర్తె తా.

7 కిచ్చొక మెలె, జోవయించి ఆత్మ అమ్చి పెట్టి దిలిసి అమ్క బియ్యారల్ తత్తు మెన నాయ్, గని “అంచి పరలోకుమ్చి ఆత్మనెక్తి, అంచి ప్రేమ, అంచి తిరించి బుద్ధి జోవయించి పెట్టి కామ్ కెర్తె తా పలితుమ్ దెర్పు”.

8 జాకయ్, పూర్తి దయిరిమ్ తెన్ తా, అమ్చొ యేసుప్రబుచి రిసొచి సాచి సంగుక తుయి లాజ్ జా నాయ్, గని తుచి పెట్టి తిలి దేముడుచి సెక్తిక సుబుమ్ కబుర్ నూనయ్తి రిసొచి అల్లర్ తుయి కి ఓర్పువ జా. పడ్డొ, జోవయించి రిసొ ఆవ్ జేల్తె తిలిన్క లాజ్ జా నాయ్.

9 ఈజొ దేముడు అమ్క నిసాన సయ్తానచి రాజిమి తెంతో రచ్చించుప కెర, జోవయించి సుద్ది అమ్ ఇండిత్ రితి అమ్క బుకారా అస్సె. అమ్క కిచ్చొ పున్నిమ్ అమ్ కెర్లెన్చి రిసొ నాయ్, గని “క్రీస్తు రచ్చించుప కెర్తొసొ జతో యేసుచి అత్తి జోవయించి ఉప్పిరి అంచి దయ తియిదె” మెనయ్, కిచ్చొ నే జెర్మయ్లి అగ్గె తెంతో సొంత * ఇస్తుమ్ జా అమ్క జా వరుమ్ దిలన్.

10 అమ్చొ రచ్చించుప కెర్తొసొ జలో యేసుక్రీస్తు ఈంజ లోకుమ్తె బార్ జలిసి తెన్ ఈంజ జో దిలి వరుమ్ రుజ్జు జా అస్సె. యేసుప్రబు మొర్పుచి ఉప్పిరి జిన పాడ్ కెర గెల కెర, పరలోకుమ్తె గెతి జివ్, ‘పరలోకుమ్తె గెతి అవ్కాసుమ్ దొర్కు జయెదె’, ‘నానెనుమ్తె గెచ్చుక పిట్టుక జయెదె’ మెన రుజ్జు దెకవ, జా

* 1:9 1:9 రోమియల్ 8:29-30, ఎవెసు1:5.

రుజ్జు జలిన్చి రిసాచి సుబుమ్ కబుర్ అమ్క దొర్కు కెర అస్సె.

11 జలె, ఈంజ సుబుమ్ కబుర్ ఆవ్ నూనవ బోదన కెర్తి రిసా జోవయించి బారికి జా బులుక మెన, ప్రబు అంక నిసాన అదికారుమ్ దిలన్.

12 ఈంజయి కామ్ ఆవ్ కెర్తి రిసా ఆవ్ ఇన సైమల్ సేడ్డిసి. గని అంక లాజ్ నాయ్. కిచ్చొక మెలె, ఆవ్ నంపజలొసాక జాని, చి †జోచి అత్తి ఆవ్ సార్ప కెర్తిసి కిచ్చొ పాడ్ నే జతి రితి, లోకుమ్చ మాన్సుల్క తీర్పు కెర ఏలుప కెరుక మెన ప్రబు గవురుమ్ తెన్ అన్నె జెతికయ్ జా వెల్లి దీసి ఎదక జో దెకుక జోక సెక్తి అస్సె మెన అంక పూర్తి దయిరిమ్ అస్సె.

13 జలె, అంచితె తుయి సూన్ల బోదన కొడొ రితి యేసుక్రీస్తుచి తెడిచి నముకుమ్చి ప్రేమ తెన్ తుయి నంపజలన్క సికడుక ములు నాయ్.

14 దేముడుచి సుద్ది తిలి ఆత్మ అమ్చి పెట్టి సికణ్ణొ ప్రబు తుచి అత్తి సార్ప కెర దిలి సత్తిమ్ కిచ్చొ పాడ్ నే జతి రితి తుయి జాగర్త దెకితె తా.

15 ఆసియా ప్రదేసిమ్చ ఎత్తిజిన్ అంక ములీల మెన జాన్సి. జోవయింతె పుగెల్లు చి హెల్కొగెనే, గెద.

16 గని ఒనేసిపారుక, జలె, జోవయించి గెర్చ ఎత్తిజిన్క ప్రబు కన్కారుమ్ దెకితె తవున్. జో ఒగ్గర్ సుట్టు అంక ప్రేమ దెకవయ్ దయిరిమ్ కెర్లన్. ఆవ్ జేలతె తిలిన్చి రిసా జో లాజ్ జయె నాయ్.

17 జో ఇత్తల్ ఈంజ రోమ్ పట్టుమ్తె జా, సర్ల తెన్ అంక చజ జా తోడు దిలన్.

18 'యేసుప్రబు అన్నె ఉత్త్ర జా లోకుమ్చక తీర్పు కెర్తి జా వెల్లి దీసిక ఒనేసిపారుచి ఉప్పిరి జో కన్కారుమ్ తితి రితి దేముడు వరుమ్ దెవున్' మెనయ్

అంచి ప్రార్దన ఎపెనుతె జో తోడ్ కెర్లిన్ ఎత్తి తుయి పూర్తి జాన్సి.

2

తిమోతిక పవులు అన్నె నిదానుమ్ సంగిలిసి

1 అంచొ పుత్తు, క్రీస్తు జలొ యేసుచి దయక తుకజోదిలి సెక్తిక తుయి డిట్టుమ్ తా.

2 చి ఒగ్గర్ సాచుల్చి మొక్కె తుయి అంచితె సూన్సి ఎత్తి జేవ్ కి అన్నె మాన్సుల్క సికడ్డి రితి, నిదానుమ్ తిల అన్నె మాన్సుల్క తుయి సికడు.

3 పడ్డొ, చెంగిలొ తిలొ కేన్ జమాను కీసి బాదల్ ఒర్పుప జా నిదానుమ్ కెరెదె గే, తుయి కి ప్రబుచి కామ్చి రిసా బాదల్ సేడ్డిసి తుయి కి ఒర్పుప జా నిదానుమ్ తా.

4 పడ్డొ, జమాన్తుతె బెదితోసా చెంగిలొచొ జలె, కామ్తె తిలె, వేర మాములుమ్ మాన్సుల్చ కమొతె జో బెదె నాయ్, నెంజిలె వేరచితె బెదిలె, సిక్కు జా జోవయింక దిలి కామ్ పిట్టయెదె. జోచొ ఎజొమాని మెన్సితి రితి జో తియార్లి కామ్ చెంగిల్ కుట్టవుక మెన మెన్సు దా ఎక్కి నిదానుమ్ కెరెదె.

5 పడ్డొ, నిగితి కెల్క జవున్ బెదితోసా జలె, జేవ్ కెర్లయ్చి బెదితి రితి కెర్లయ్ జో జీన గురి నజనుక జయెదె.

6 పడ్డొ, పంటొ లాయిలె పొది, కో తొలితో జోవయించి వాట నజనుక విలువ మెలె, నిదానుమ్ కామ్ కెర్లొ తిలొసా విలువ, బద్దుకుమ్చొ నాయ్, గని నిదానుమ్ కెర్లొసా.

7 ఆవ్ ఇన్నె రెగిడ్ల టాలివొచి రిసా చెంగిల్ ఉచరు. తుయి పూర్తి అర్దుమ్ కెరంతి రితి ప్రబు తుక సికడెదె.

చి సెక్తి

8 యేసుక్రీస్తు దావీదు పూర్ణమ్చొచి సెకుమ్తె జెర్మ మొర అన్నె జిలిసి

† 1:12 1:12 నెంజిలె, 'అంచి అత్తి జో సార్ప కెర్తిసి కిచ్చొ....'

ముక్తిమక తుయి ఉచార కెరంతె తా. జోచి రిసా ముక్తిమక ఆవ్ సుబుమ్ కబుర్ బోదన కెరుక మెన ప్రబు అంచి అత్తి కామ్ సార్ప కెర దా అస్సె, గెద.

9 జయ్యి సుబుమ్ కబుర్ ఆవ్ సూనయ్తె తిలి రిసా ఇన సైమల్ సేడ అస్సి, కిచ్చో జవున్ నేరిమ్ కెర్లొసా మెన దెకిల్ రితి అంక ఈంజేవ్ గొల్పుల్ బంద అస్తి. గని అంక కిచ్చో దయిరిమ్ మెలె, దేముడుచి సుబుమ్ కబుర్ కోడు బందుక నెత్తిర్రి.

10 జాకయ్ దేముడు నిసాన్లసక 'సూన నంపజా క్రిస్తు జలో యేసుచి నావ్ తెన్ పాపుమ్ తెంతో రచ్చించుప జా పరలోకుమ్తె గెచ్చు కెయ్తె తెయ్తె చెంగిల్ తత్తు' మెనయ్, కిచ్చో సైమల్ జలెకి ఆవ్ ఓర్పుప జతసి.

11 'దేముడుచి కోడు ఈంజ' మెన ఏక్ కిచ్చో కచితుమ్ దెరన్తనుమ్ మెలె,

"జోవయింతెన్ మొర్లమ్ మెలె,

కచితుమ్ జోవయింతెన్ జిమ్దె.

12 జోవయించి నావ్చి రిసా బాదల్ ఓర్పుప జలమ్ మెలె,

కచితుమ్ జోవయింతెన్ *ఏలుప కెరుమ్దె.

'జోవయింక నేనుమ్' మెలి రితి ఇండిలె, జో కి అమ్క 'జోవయింకయ్ నేని' మెన జో అమ్క తియనె నాయ్.

13 అమ్ నిదానుమ్ నెంజిలె కి, జో ఎక్కి నిదానుమ్ తా గెతయ్."

జోవయించి సత్తిమచి రిసా జో అబద్దుమ్ కెరుక నెత్తె, జోవయించి కోడు పిట్టవుక నెత్తె.

కామ్క నెంజిత కొడొ జుజయ్తిన్చి రిసా జాగర్త సంగిలిసి

14 ఈంజ ఉప్పిర్చి కోడుచి రిసా ఒత్తచ నంపజలన్క తుయి ఏద కెరవు, చి 'కామ్క నెంజిలె రితయ్ కొడొ జుజయ్తిసి ముల' మెన ప్రబుచి నావ్ తెన్ జోవయింక జాగర్త సంగు.

15 తుచి కామ్క 'చెంగిల్ కెర్తయ్' మెన దేముడు ఒప్పన్తి రితి జోవయింక ఎక్కి నిదానుమ్ జంక తుయి ఎక్కి ఆన జా, డొంగె సోగ వాటు గగ్గడ్డి రితి, సూన్తన పూర్తి అర్దుమ్ కెరంతె రితి, దేముడుచి సుబుమ్ కబుర్ సరిగా సిక్కడు. దస్సి నిదానుమ్ తిలె, తుక జో దిలి కామ్క 'నిదానుమ్ కెర్తయ్' మెనయ్ తుయి లాజ్ జంక నాయ్.

16 జలె, దేముడుచి మరియాద కడ రితి కామ్క నెంజిలె కొడొ లట్టబ్బిసి, కొడొ జుజయ్తిసిక దూరి తా. దన కొడొతె బెదిలె, మాన్సుల్ అన్నె ఒగ్గర్ పాడ్ జతి రితి దేముడుక జోవయింక దూరి కెర్లి రితి జయెదె.

17 కిచ్చో జలి గాపు ఒగ్గర్ జలె, ఒండొయి మాన్సుక కా గెల కిసి పాడ్ కెరెదె గే, దస్సి, దన కామ్క నెంజిలె కొడొ లట్టబ్బిసి మాన్సుచి ఆత్తుక పాడ్ కెరెదె. దస్సి జల మాన్సుల్, హుమెనెయను చి పిలెత్తును.

18 జేవ్ కిచ్చో ఏక్ తప్పు సికడ్డితి మెలె, "మొర్ల మాన్సుల్క దేముడు జియడెదె మెలిసి వడ్డొకయ్ జర్గు జయెదె మెలిసి అబద్దుమ్. అగ్గెయి తెంతో ఆత్తు రగుమ్క జర్గు జా అస్సె. అగ్గె రగుమ్క జర్గు జంక నెంజె" మెన జేవ్ సికడ, సగుమ్జిన్చి నముకుమ్ పాడ్ కెర్తతి.

19 గని దేముడుచి రాజిమ్క 'గేరు' మెన దెకిలె, జా గేరుచి పునాదితె కిచ్చో రెగ్ల అస్సె మెలె,

† "కో జోవయింక నిదానుమ్ తా జోచయ్ జా అస్సి గే ప్రబు జానె" వడ్డె,

"ప్రబుచి నావ్ కో దెర్తతి గే,

పాపుమ్తె బెదుత్ నాయ్, గని ముల దెతు!" మెన రెగ్ల అస్సె.

20 జలె, కేన్ జవున్ వెల్లో గెరి ఎత్తి రగల్ గెర్చి కామ్చ సామన్లు తవుల. సగుమ్ బజర్చ, సగుమ్ వెండిచ, గని దారు తెన్ కి మత్తి తెన్ తెయార్ కెర్లస

* 2:12 2:12 కొరింథిల్ రెగిడ్డి 1 నంబర్ ఉత్తమ్ 4:8, డీనయ్లిసి 5:10, 20:4, 6 చి 22:5. † 2:19 2:19 సంక్యాకాండుము 16:5, 26.

కి తవుల. జేవ్ సామన్లుతె నగుమ్, జలె, మాములుమ్ మరియాదచ కమొక వాడిక కెర్తన. నగుమ్, జలె, నిస్కారుమ్ కమొక వాడిక కెర్తన.

21 జలె కేన్ మాన్సు అత్తు నిస్కారుమ్ కెర్తి పాపుమ్ గెచ్చవన గెలె, జలె, మరియాద కామ్ కెర్తి సామన్చి రితి జయెదె. జో దస్సి సుద్ది జలె, కేన్ చెంగిల్ కామ్చి రిసా కి జో గేర్చొ ఎజ్జోమానిక జో కామ్క జెయెదె. ప్రబుచి కామ్క తుయి దస్సి సుద్ది తిలి కామ్క జెతికయ్ వస్తు జ్జా.

22 జాకయ్, బుద్ది నెంజిల ఉబెడల్ జత ఆసల్క తుయి దూరి తా, సుద్ది అత్తు తెన్ ప్రబుక ఎక్కి నిదానుమ్ తా జోవయించి నావ్ దెర్తన ఎత్తిజిన్ తెన్, సత్తిమ్బుద్ది, నిదానుమ్చి నముకుమ్, ప్రేమ, సేంతుమ్కయ్, జేవ్ తుయి కోర్ప జతె తా.

23 బుద్ది నెంజిల కామ్క నెంజిల కొడొ జుజయ్తిన్క దూరి తా. దనచతె బెదిలె మాన్సుల్ ఎక్కిలోక ఎక్కిలో గగ్గోల్ జా జట్టి జతతి.

24 వడ్డొ, ప్రబుచి సేవ కెర్తొ కేన్ మాన్సు జలెకి, గగ్గోల్ జతొసా జంక జయె నాయ్. జో కిసా తంక మెలె, మెత్తన తా ఎత్తిజిన్క చెంగిల్ దెకితొసా, తెలివి తెన్ చెంగిల్ బోదన కెర్తొసా, కుస్సిదుమ్ నే జతె బాదల్ ఓర్పుప జతొసా జంక.

25 వడ్డొ, చి బోదనక వేరయ్ సంగిత మాన్సుల్చి ఉప్పిరి గగ్గోల్ నే జతె జో మాన్సు మరియాద తెన్ సరిగా అర్దుమ్ సంగుక సికుక. దస్సి మరియాద తెన్, 'జో మాన్సు తప్పు ఒప్పున విసారుమ్ జా సత్తిమ్ దెరన్ను' మెన ఏక్ వేల దేముడు సెలవ్ దెయెదె,

26 చి నయ్తాన్తె దెర్ను సేడ్డిన్ తెంతొ, జోవయించి ఇస్టుమ్ రితి కెర్తి తిలిన్తె తెంతొ జో మాన్సు విడ్డల్ జయెదె, చి బుద్ది జా ప్రబుచి ఇస్టుమ్ రితి కెరుక దెరెదె.

3

ఆకర్ దినాల్క మాన్సుల్చ బుద్ది

1 అప్పొ, మాత్తుమ్, కిచ్చొ మెన తుయి చిను మెలె, ఈంజ ఉగుమ్చ ఆకర్ దినాల్క నెంజిల బాదల్ జెవుల.

2 తెదొడ్క మాన్సుల్ కిసి జవుల మెలె, వేర మాన్సుల్చ బాదల్క నే ఉచర్తె, 'అమ్మి చెంగిల్ తమ' మెనయ్ ఎక్కి జోవయింకయ్ జెవ్వి ఉచరంతె తవుల, డబ్బుల్ ఆస జయె గెచ్చుల, సొంత గవురుమ్ సంగితె తవుల, బడాయ్ జతె తవుల, మాన్సుల్క చి దేముడుక దూసుప కెర్తె తవుల, అయ్యసిసిచి కోడు నే సూనెతె, జేవ్ పాయ పోసిలి సైమ సేడ్డిన్ నేన్లి రితి జేవ్ అయ్యసిసిక తోడ్ కెరుక ములుల, దేముడుచి సుద్ది నెంజిలన జవుల,

3 కన్కారుమ్ నేనెతె తవుల, మాన్సుల్ కట్టు తెన్ తంక నెసుల, కుస్సిదుమ్క అన్నె మాన్సుల్చి ఉప్పిరి ఆరిచ నిందల్ సంగితె తవుల, నే నేన్లన జవుల, మాన్సుల్క బియడ్డన జవుల, చెంగిల్ తిలిసి ఎత్తిక విరోదుమ్ సుదల్ జవుల,

4 ఉప్రమెన్ను తెన్ తవుల, 'వేర మాన్సుల్క బాద కెర్తసుమ్' మెన నే దెకితె ఇస్టుమ్ అయ్లి రితి కెరుల, పుల తా బులుల, దేముడుక పచ్చ ఇస్టుమ్ అయ్లి సర్ల కెరంతె తవుల,

5 చి 'దేముడుక జొకర్తసుమ్' మెనన మాన్సుల్చి మొక్కొ కిచ్చొ కిచ్చొ కమొ కెర్లె కి, జేవ్ ఇండితిసి దెకిలె, జోవయించి ఆత్మనెక్కిక జతి నాయ్, చి జేవ్ సంగితిన్ తెన్ జేవ్ ఇండితిసి బెదె నాయ్, జోవయించి సెక్కిచి రుజ్జు దెకయ్తి నాయ్. దన మాన్సుల్క తుమ్ బెదవన నాయ్, జోవయింక దూరి తా.

6 ఉప్రమెన్నుక "దేముడుచి కామ్ కెర్తసుమ్" మెన, దన మున్నుబోదల్తె సగుమ్జిన్ కిచ్చొ కెర్తతి మెలె, కచ కచ గెరలె సినేతుమ్ కెరన, తకు బుద్దిచ

తేర్బోదల్క దెర్ను సేడవ, ఇస్టుమ్ అయ్లి రితి సికడ్తతి. దస తేర్బోదల్ తవుల. జేవ్ కిచ్చొ కిచ్చొ పాపల్ కెర కెర పాపుమ్ వయన తా విడ్డల్ జంక నెత్త కిచ్చొ కిచ్చొ ఆసల్క దెర్ను సేడ.

7 కేన్ వెర్రి కోడు సికడ్తతి నూన, సత్తిమ్ చినుక ఎగ్గరె నెత్తిర్తి.

8 పూర్గుమ్, మోసిచి కోడు ఒప్పునుక యన్నేస్ చి యంబ్రే నెస కెర కిసి వేరయ్ సికడ్త గే, దస్సి ఈంజేవ్ అప్పెచ మాన్సుల్ సత్తిమ్ నెస కెర, వేరయ్ సికడ్తతి. ఈంజేవ్ ఆత్తుక పాడ్ జలన, సత్తిమ్చి నముకుమ్ నెంజిలన.

9 గని జినుక నెత్తిర్తి. కిచ్చొక మెలె, జేవ్ పూర్గుమ్చ దొగులచి పొరపాట్ బుద్ది కిసి రుజ్జు జలి గే, దస్సి ఈంజేవ్ అప్పెచ మాన్సుల్చి బుద్దిక కి 'పాపుమ్చి' మెన ఎత్తిజిన్ చినుల.

పవులు తిమోతిక సికడ్తసి

10 అప్పె, మాత్రమ్, తుక కిచ్చొ రెగిడ్తసి మెలె, అంచి బోదన, ఆవ్ ఇండితి బుద్ది, ప్రబుచి కామ్ కెర్తి ఆస తెన్ ఆవ్ జితిసి, అంచి నముకుమ్, బాదల్ ఓర్పువ జా ఆవ్ సేంతుమ్ తతిసి, అంచి ప్రేమ, అంచి నిదానుమ్,

11 మాన్సుల్ అంక కెర్ల అల్లర్లు, ఆవ్ సేడ్ల బాదల్, పడ్డొ* అంతియొకయ పట్టుమ్తె ఈకొనియ పట్టుమ్తె, చి లుస్త్ర పట్టుమ్తె విరోదుమ్ సుదల్ కెర్ల అల్లర్ ఓర్పువ జలయ్ గే, తుయి దెక అస్సిన్. గని జేవ్ కెత్తి అల్లర్ కెర్లె కి, ఎత్తి తెంతో ప్రబు అంక రచ్చించుప కెర్లె.

12 గని ఆవ్వి మెను నాయ్. కో బెత్తికి యేసుక్రీస్తుచి తెడి సత్తిమ్ ఇండుక మెన్సు దా అస్తి గే, కచితుమ్ విరోదుమ్ సుదల్చి అత్తి నైమల్ సేడుల.

13 పాపుమ్ ఇండితన, ఉప్రమెన్సుచి మాన్సుల్, మాత్రమ్, వేర మాన్సుల్క

మోసిమ్ కెర్తె తా, జెవ్వి కి మోసిమ్తె దెర్ను సేడ అన్నె అన్నెయ్ పాడ్ జతె తవుల.

14 తుయి, మాత్రమ్, తుయి సికిలిసి తుయి దయ్రిమ్ జా డిట్టుమ్ నంపజలిసి ఎగ్గరె నే ములితె, పూర్తి నిదానుమ్ తా. కత్తె కత్తె తొలితో సికిలది గే పచ్చు నాయ్.

15 పడ్డొ, దేముడుచి కొడెతె రెగ్గయ్ల కొడె బాల తెంతో పూర్తి అలవాట్ జా అస్సి. క్రీస్తు జలొ యేసుక నంపజా రచ్చించుప జతిసి జేవ్ కొడెతెయ్ జానయ్ జతయ్.

16 దేముడుచి కొడె ఎత్తి జోచి ఆత్తు మాన్సుల్చి అత్తి రెగ్గయ్లొ. ఇసి రెగ్గయ్లొ కొడె ఎత్తి, జో సికడ్తసి అమ్ ఒత్తయ్ సికుక జయెదె. పాపుమ్చి రిసా జాగర్త సంగితిసి ఒత్తయ్ తయెదె, పాపుమ్ ముల కిసి బుద్ది జంక గే సికడ్తసి ఒత్తయ్ తయెదె, చి సత్తిమ్ ఇండుక సికయ్తిసి ఎత్తి ఒత్తయ్ తయెదె.

17 దేముడుచి సేవ కెర్తొ కేన్ మాన్సుకి జేవ్ కొడె పెట్టి నిదానుమ్ తియన్లె, జా కామ్ నిదానుమ్ కెర్తి రితి దొర్కు జలి గ్యానుమ్ ఎత్తి నెక్తి ఎత్తి దేముడుచి కోడు నదు కెర్తిన్తెయ్ దొర్కు జయెదె.

4

పవులు తిమోతిక నిదానుమ్ సంగిలిసి

1 మొర్లసక జితసక 'నంపజల గే నాయ్ గే' మెన బవుమాన్ల గే సిచ్చల్ గే దెంక మెన క్రీస్తు ఆకర్ దీసిక పరిచ్చ కెర తీర్పు కెరుక అస్సి. పడ్డొ జో తెదొడ్క అన్నె ఉత్త్ర జా అయ్లె, జోవయించి అదికారుమ్ నజన ఏలుప కెరుక అస్సి. జలె, దేముడుచి మొక్కె, క్రీస్తు జలొ యేసుచి మొక్కె, జోవయించి నావ్ తెన్ తుక ఆవ్ జాగర్త సంగితిసి మెలె,

* 3:11 3:11 బారికుల్ 13:50-14:20 దెక.

2 క్రీస్తుని రిసా తుయి సుబుమ్ కబుర్ నూనయ్తె తా. కెయ్చ కి, ఇస్టుమ్ తిలె కి నెంజిలె కి, కెడ్డొడ్ తెదొడ్ నిదానుమ్ తెన్ జా సుబుమ్ కబుర్ నూనయ్తె తా. పాపుమ్చి రిసా తీర్పుల్ సంగు, పాపుమ్ కెర్లిన్చి రిసా జాగర్తల్ సంగు, బుద్ది సికడ నంపజలన్క డిట్టుమ్ కెరు, చి అల్లర్ జలెకి, బద్దుకుమ్ నే జతె, బమ్మ నే జతె, బోదన కెర్తె తా.

3 ఏక్ కాలుమ్ జెతయ్. జా కాలుమ్క ఒగ్గరిజిన్ మాస్సుల్ కీసి జవుల మెలె, బుద్ది కొడొ సూసుక నెన కెర, జోవయింప కంఠల్క కజ్జర్ తిలి రితి కిచ్చొ కిచ్చొ వేర వేర నొవ కొడొ సూసుక ఆన జా, కో జేవ్ నూసుక ఇస్టుమ్ జలిసి సికడుల గే, దన మాస్సుల్క ఎక్కిలోచి పడ్డొ అన్నెక్కోక ఆనవ.

4 సత్తిమ్ సూసుక ముల, మాస్సుల్ జెచ్చి ఉచర్ల మత్తెలివొ నంప కెరుల.

5 తుయి, మాత్తుమ్, మచ్చిల్ రితి బుద్ది నే జతె, తెలివి నిదానుమ్ తెన్ తా, బమ్మ నే జతె బాదల్ ఓర్పుప జా, క్రీస్తుని రిసాచి దేముడు సుబుమ్ కబుర్ నూనయ్తె తా, జో దేముడు తియార్లి కామ్ పూర్తి కెరు.

6 ఆవ్, జలె, *ప్రబుచి అత్తి అంచి ప్రానుమ్ ఆవ్ సార్పు కెర్తె సమయుమ్, ఆవ్ ఉట్ట గెతి పొది, పాసి జా అస్సె.

7 చెంగిలో జమాను యుద్దుమ్తె కీసి నిదానుమ్ కెరెదె గే, కెర్లయ్తె నిగితోసా కీసి ఎక్కి మెస్సు తెన్ నిగెదె గే, ఆవ్ దస్సి నముకుమ్తె నిదానుమ్ కెర అస్సి.

8 జాకయ్, ఆవ్ సత్తిమ్ కెర్లిన్చి బవుమానుమ్ అంక రకితయ్. కేన్ బవుమానుమ్ మెలె, సత్తిమ్ తీర్పు కెర్తొ తీర్పు కెర్తొసా జతో ప్రబుయి ఉత్త జా జో తీర్పు కెర్తె వెల్లి దీసిక దెతిసి. ఎక్కి

అంకయ్ బవుమానుమ్ తయెదె మెను నాయ్, గని జేవ్ ఎత్తిజిన్కయ్ కో జో అన్నె ఉత్త జెతిన్క రక నిదానుమ్ కెర తవుల గే.

పవులు మాలజ్ జా తిమోతిక బుకార్లిసి

9 తెర్తె, అంచితె బే బేగి జే.

10 కిచ్చొక మెలె, దేమా, జలె, ఈంజ లోకుమ్తె తతిన్క ప్రేమ తా, అంక మోసిమ్ కెర ముల దా దెస్సులోసిక పట్టుమ్తె ఉట్ట గెచ్చు అస్సె. క్రేస్సె, జలె, గలతీయ ప్రదేసిమ్తె, తీతు, జలె, దల్మతీయ ప్రదేసిమ్తె ఉట్ట గెచ్చు అస్సి.

11 ఎక్కి లూకా అంచి తెన్ అస్సె. తుయి జెతి పొది మార్కుక కడ ఆను. జో అంచి కామ్తె అంక జలె తోడ్ తయెదె, చెంగిల్ సేవ కెరెదె. అగ్గె తెంతో దస్సి అస్సె.

12 తుకికుక ఎపెసుతె తెద్రవ అస్సి.

13 తుయి జెతి పొది, త్రోయ పట్టుమ్తె కర్పుచి గెరి ఆవ్ ములిలి గొంగైల, పడ్డొ అంచ పుస్తకల్, చి ముక్కిమ్క ఆవ్ రెగిడ్ల పుస్తకుమ్ ఆను.

14 సరాబు జలో అలెక్సాండ్రు, జలె, అంక ఒగ్గర్ సైమ సేడయ్లో. ప్రబుయి తీర్పు కెర జోవయింప కమొచి రిసాచి సిచ్చు జోవయింక దెయెదె.

15 తుయి, మాత్తుమ్, జోవయించి రిసా జాగర్త తా. కిచ్చొక మెలె, అమ్ సంగిలి చి ఉప్పిరి జో బలే విరోదుమ్ కెర్తొ.

16 †అదికారుల్చి మొక్కె అంక తోలితో పరిచ్చు కెర్లిన్తె కోయి అంక తోడు సంగితి నాయ్. మాయబుద్ది తిలి రితి జేవ్ ఎత్తిజిన్ తుక్లె తా అంక ములిల రితి జలె. జోవయించి జా పాపుమ్ జేవ్ నే వయితి రితి ప్రబు చెమించుప కెర్పు!

* 4:6 4:6 నెంజిలె, 'ఆవ్ బలి జతి సమయుమ్...'. జో నిజామి బలి జయె నాయ్, గని జో మొరుక తిలిన్చి టాలిక్య దస్సి సంగితయ్. † 4:16 4:16 ఈంజ ఉత్తుమ్ రెగిడ్లి పొది పవులు రోమ్తె జేలి జా తిలో, బెర్తె. బారికుల్ 28:16-31 దొస్సి వెర్పుల్ ఒత్త ఒగ్గర్ అల్లర్ నెంతె తిలన్, చి పడ్డొ, బెర్తె, జోవయించి తగు సూన్.

17 గని తెదోడి జా అదికారుల్చి మొక్కె ప్రబుయి అంక తోడు తా, ఒత్త బెర తిల యూదుల్ నెంజిలన నూన్తి రితి సుబుమ్ కబుర్ పూర్తి ఆవ్ నూనయ్తి రితి అంక సెక్తి దిలన్. చి జొయ్యి తోడు తతికయ్, ప్రమాదుమ్ నే జతి రితి రచ్చించుప జలయ్‡, వాగుచి చోడి తెంతో రచ్చించుప జలి రితి.

18 కచితుమ్, సయ్తాన్ కెరయ్త ప్రమాదల్ ఎత్తి తెంతో ప్రబు అంక రచ్చించుప కెర, పరలోకుమ్తె అంక తియనెదె. జోవయింక కెయ్తెయ్త ఉగల్చి ఉప్పిరి ఉగల్క గవురుమ్ కెరై తత్తు! ఆమేన్.

ఆకర్ కోడు
19 ప్రిస్కిల్లక చి అకులక పడ్డొ ఒనేసిపారుచి గెర్చ ఎత్తిజిన్క అంచి ముద్దు సంగు.

20 ఎరస్తును కొరింది పట్టుమ్తె తా గెలో. త్రోపిముక, జోక జివ్ చెంగిల్ నాయ్ చి రిసా మిలేతు పట్టుమ్తె ముల దిలయ్.

21 తెరై, చల్లి పొది నే జెతె జే. యుబూలస్, పుదెస్సె, లీను, క్లొదియ చి ఇన్నెచ నంపజల బావుడ్లు జల రిత ఎత్తిజిన్ తుక జోవయించి ప్రేమ సంగ తెద్రయ్తతి.

22 ప్రబు తుచి ఆత్మ తెన్ తవున్! జోవయించి దయ తుమ్ ఎత్తిజిన్చి ఉప్పిరి తవున్!

‡ 4:17 4:17 జా సుట్టు పవులుచి తగు నూన్సి విడ్డల్ కెరై, బెరై, గని పడ్డొ అన్నెక్ సుట్టు దెర, తగు కెర, బోడి గండల్ కెర మార్ల మెన సగుమ్జిన్ ఉచర్తతి.

తీతుక రెగిడ్లి ఉత్త్రమ్ బారిక్ జలో పవులు తీతుక రెగిడ్లి ఉత్త్రమ్

నుబుమ్ కబుర్ కామ్ కెర్తి రిసా పవులుక ప్రబు నిసాన్లసి

1 దేముడు నిసాన్లసచి నముకుమ్చి రిసా,

2 నే మొర్తె కెయడ తెయడ జితి బత్తుచి రిసా, ఆస తెన్ బక్తిక మూలుమ్ జతి నిజుమ్తి రిసా, “పరలోకుమ్తె మాన్సుల్ బెదితి వాటు ఆవ్ దొర్కు కెరిందె” మెన, అబద్దుమ్ కెయ్య నే జతో దేముడు కిచ్చో నే జెర్మయతె అగ్గె తెంతో ప్రమానుమ్ సంగ దిలో. జొయ్యి జా ప్రమానుమ్ సంగిలి రిసా అమ్క పూర్తి దయిరిమ్.

3 “పరలోకుమ్తె మాన్సుల్ బెదితి రచ్చునచి వాటు ఆవ్ దొర్కు కెర్లిన్చి కోడు పలాన్ ప్రమయుమ్క బార్ కెరిందె” మెన జో అమ్చో రచ్చించుప కెర్టొసా జలో దేముడు అగ్గె తెంతో ఉచరయ్ తిలన్, చి “తుయి నూసవు” మెన ఆడ్ర దా అంచి అత్తి సార్ప కెర దిలి నుబుమ్ కబుర్ ఆవ్ నూసయ్ లిన్ తెన్ అప్పె జా కోడు బార్ కెర అస్సె.

4 సొంత పుత్తు జలో రితో తీతుక, అమ్చి ఎక్కి నముకుమ్చి రిసా అబ్బొసి జలో రితో ఆవ్ పవులు రెగిడ్లి ఉత్త్రమ్. దేముడు అబ్బొన్చి అమ్చో రచ్చించుప కెర్టొసా జలో *క్రీస్తు యేసుచి దయ సేంతుమ్ తుచి తెన్ తవున్.

5 ఒత్త క్రేతు డిబ్బుతె తుక కిచ్చొక ములిలయ్ మెలె, ఒత్తచ సంగుమ్లుతె

కిచ్చొ కిచ్చొ పిట్ట అస్సె గే, తుయి చెంగిల్ నెరవెర్పుప కెర్తి రిసా. జేవ్ కమొతె కిచ్చొ ఏక్చి రిసా సంగిలయ్ మెలె, జాన్సి, గెద. “ఒత్తచ ఎత్కి పట్టుమ్తెచ సంగుమ్ల్క జేవ్ దెకిత్ రిసా †వెల్లెల మాన్సుల్క నిసాన్లొ, చి జోవయింక అదికారుమ్ దేసు” మెలయ్. దస్సి కెరు.

6 కీన మాన్సుల్క జా అదికారుమ్ దెంక మెలె, ‘జేవ్ పొరపాట్ ఇండితస నెంజితి’ మెన ఎత్కిజిన్ జానుక. ఎక్కి తెర్పితెన్చో మాన్సు, చి జోచ బోదల్, యేసుప్రబుక నంపజా తా, ఆరి సొంత ఇస్టుమ్ కెర్తి రితి డబ్బుల్ గట్ట పాడ్ నే కెర్తస జా తంక, చి జోవయించ ‡అయ్యుస్ అబ్బొన్చి కోడు నూన్తస జేవ్ బోదల్ తంక.

7 కిచ్చొక మెలె, సంగుమ్క ప్లాస్టర్ జతో కేన్ వెల్లో మాన్సు దేముడుచి గేర్చి కామ్ దెకిత్సొ జయెదె. జాకయ్ జో సత్తిమ్ ఇండితోసా తంక, పొరపాట్ ఇండితోసా తంక నాయ్. అన్నె మాన్సుల్క నే నూన్తె సొంత ఇస్టుమ్ అయ్లి రితి కెర్టొసా జో తంక నాయ్, బేగి కోపుమ్ సేడ్డొసా నే జా జంక, మత్తిలోన్ జవున్, పెట్టొసా బియడ్డొసా జవున్, గార్ వాట్తె డబ్బుల్ ఆస జతోసా జవున్ జో తంక నాయ్.

8 వేర తెంతో అయ్లసక మరియాద దెకిత్సొ, చెంగిల్ తిలిన్ ఎత్కిక ప్రేమ కెర్టొసా, చెంగిల్ బుద్ది సుదొ, సుద్ది తెన్ సత్తిమ్ నాయిమ్ ఇండితోసా, ప్రబుచి సేవ ఎక్కి సత్తిమ్ తెన్ కెర్టొసా, ముద్దొ కెర్ంతోసా జా తంక.

9 పడ్డొ, దేముడు అమ్క దిలి జోచి నిదానుమ్ తెన్ చి యేసుచి రిసాచి చి బోద్దన అమ్ జోచ బారికుల్క సేకడ అస్సుమ్. జయ్యి బోద్దన జో ఎక్కి నిదానుమ్ దెరనుక అస్సె. కల్తి నెంజిలిసి సరి జతి బోద్ కెరుక జోక సెక్తి తయెదె,

* 1:4 1:4 ‘క్రీస్తు’ మెలె, దొర్కు జలో రచ్చించుప కెర్టొసాక పడ్డొక తెర్తయందె; మెన పూర్ణమ్ తెంతో ఎత్కి అదికారుమ్ తిలో దేముడు యూదుల్క ప్రమానుమ్ సంగ తిలో. గ్రేకు బాస తెన్ జో రచ్చించుప కెర్టొసాక ‘క్రీస్తు’ మెనుల, ఎబ్రీ బాస తెన్ జోవయింక ‘మస్సీయస్’ మెనుల. † 1:5 1:5 జేవ్ వెల్లెల మాన్సుల్ జతినెత్వయసు ముక్కిమ్ నాయ్, గని ప్రబుచి బుద్ది జోవయింక తిలిసి ముక్కిమ్. ‡ 1:6 1:6 జా బుద్ది తిలె, అన్నె వెల్లెల మాన్సుల్చి కోడు కి నూసుల, గెద.

చి జా సుబుమ్ కబుర్ నెన వేర సికడ్డనక సరిగా జబాబ్ దెంక జోక సెక్తి తయెదె.

10 సరిగా జబాబ్ దెంక పాస్టర్ క సెక్తి తంక ముక్కిమ్. కిచ్చొక మెలె, కోడు నే నూనీత బుద్ది నెనీత మాన్సుల్ ఒగ్గర్ జిన్ అస్తి. ఆరిచ కొడొ జేవ్ లట్టబై తవుల. మోసిమ్ చి బోదన కెర్తె తవుల. దస్సి కెర కో కో ఒగ్గర్ అల్లర్ కెర్తతి మెలె, 'యూదుల్ చి సుద్ది గుర్తుచి సున్నతి నే కెరన్లె సత్తిమ్ నాయ్' మెన సికడ్డన.

11 జోవయింక ముద్దొ కెరుక అస్సె. కిచ్చొక మెలె, జేవ్ సికడుక నాయిమ్ నెంజిలి అబద్దుమ్ జేవ్ లాబుమ్ ఆననుక ఉచర సికడ, పూర్తి సగుమ్ కుటుంబల్ క సిక్కు కెర, జోవయింక కీనముకుమ్ పాడ్ కెర్తతి. జెవ్వి చోడి డంకవుక అస్సె.

12 జేవ్ మోసిమ్ కెర్తనతెచొ సొంత ఎక్కిలో సొంత కిచ్చొ ఏక్ మెన అస్సె మెలె, "అమ్ చ *క్రీతీయులు అగ్గె తెంతొ అబద్దుమ్ చి, మూర్కుడ్లు, బద్దుకుమ్ చ, జోవయింక పెట్టి బెరవంతి ఆసక జితనయ్" మెన సంగ అస్సె.

13 జా సాచి సత్తిమ్. జాకయ్, జోవయింక తప్పు జేవ్ పూర్తి అర్దుమ్ జతి రితి సొస్టుమ్ గట్టిజ సంగు, చి

14 అమ్ చ యూదుల్ చ పూర్గుల్ తెంతొచ మాన్సుల్ అచ్చి ఉచర్ల మత్తెలివొ కి, సత్తిమ్ నెనీత మాన్సుల్ సికడ్డ †కొడొ కి బింక పిట్టవన, యేసుప్రబుచి ఉప్పీర్ చి నముకుమ్ తెన్ బెదితి బోద జేవ్ ఎక్కి నిదానుమ్ నంప కెర, ఆత్మక చెంగిల్ జంక జయెదె.

15 ఆత్మక సుద్ది జలన, జలె, కతిసి

పితిసి చడితిసి చెంగిల్ మెనుల. కిచ్చొ వస్తువ కి జోక †సుద్ది తయెదె. గని, జోవయింక పాపుమ్ క ఆత్మ పాడ్ జా ప్రబుచి ఉప్పీరి అన్మానుమ్ జలన, జలె, జోవయింక కిచ్చొ వస్తువ సుద్ది తయె నాయ్. జోవయింక సొంత మెన్సు కి పూర్తి గార్ జా అస్తి, చి కిచ్చొ కెర్లె చెంగిల్ మెన జాన్లె కి, చెంగిల్ ఇండుక పిట్టవన, జోవయింక బుద్ది గార్ జా జోవయింక ఆత్మ పాడ్ కెరన అస్తి.

16 "దేముడుక జానుమ్" మెనంతతి, గని జోవయింక కమొక దెకిలె, 'దేముడుక నేనీతి' మెన పూర్తి రుజ్జు జతయ్. జేవ్* వెట్కారుమ్ జా అస్తి, ప్రబుచి కోడు నూనీతి నాయ్, జేవ్ చి కిచ్చొ చెంగిల్ కామ్ క నెంజితన.

2

తీతు కిచ్చొ కిచ్చొ బుద్దుల్ సికడుక గే పవులు రెగిడ్డిసి

1 తుయి, మాత్రుమ్, తీతు, ముక్కిమ్ క తుయి కిచ్చొ కెరుక మెలె, సరి జతి బోదనతె బెదితిసి ఎత్తి సికడ్డె తా

2 మంత్రమాన్సుల్ క తుయి కిచ్చొ బుద్ది సికడు మెలె, కిచ్చొతె కి *ముద్దొ కెరన బుద్ది ఇండుతు, మరియాద బుద్ది ఇండుతు, బుద్ది సుదల్ తత్తు, చి ప్రబుచి ఉప్పీర్ చి నముకుమ్ క, ప్రేమక, చి నిదానుమ్ క జోవయింక ఆత్మతె చెంగిల్ దెరనుక జా తత్తు.

3 పడ్డొ మంతిర్ మాన్సుల్ క కిచ్చొ సిక్కుడు మెలె, జేవ్ కి దేముడుక గవురుమ్ దెతి రితి జోచి సుద్ది మరియాద ఇండుతు, †సొండెల్ జతు

§ 1:11 1:11 మెలె, ఎత్తి అదికారుమ్ తిలో దేముడుచి దరు వాటు, యేసుక్రీస్తుక నంపజతి వాటుయి రచ్చింపవ జంక జయెదె చి నముకుమ్. రోమియుల్ 3:23, 24, 28, 30, చి 4 అద్యాయిమ్, చి గలతీయుల్ 2:16. * 1:12 1:12 మెలె, 'క్రీతు డిబ్బుచ మాన్సుల్'. † 1:14 1:14 తివొతిక రెగిడ్డి ఏక్ నంబర్ ఉత్రుమ్ 4:3-4. ‡ 1:15 1:15 తివొతిక రెగిడ్డి ఏక్ నంబర్ ఉత్రుమ్ 1:4-5. § 1:15 1:15 తివొతిక రెగిడ్డి ఏక్ నంబర్ ఉత్రుమ్ 4:2. * 1:16 1:16 ప్రబుచి మొక్కె చి మాన్సుల్ చి మొక్కె. * 2:2 2:2 గ్రీకు బాన చి జా కోడుతె సూర్లు గట్టి పితిసి ముద్దొ కెరంతిన్ చి అర్దుమ్ కి వేర కమొ ఎత్తితె ముద్దొ కెరంతిన్ చి అర్దుమ్ కి తయెదె. † 2:3 2:3 నెంజిలి, 'జట్టి కెరయత ఆరిచ నిందల్ కెర్లు నాయ్'.

నాయ్, చి సూరు గట్రక దెర్ను నేడ్డు నాయ్. జేవ్ కిచ్చో ముక్కిమక కెరుక మెలె, చెంగిల్ తిలిసి ఎత్తి సికడ.

4 జోవయించ ఉబెడివొక బుద్ది ఆసవుక. కీన బుద్దుల్ జోవయింక జేవ్ సికడుక మెలె, జోవయించ మున్నర్పుల్క చి బోదల్క జేవ్ ప్రేమ దెకితె తంక,

5 జేవ్ బమ్మబుద్ది ముద్దో కెరన బుద్ది ఇండుక, లంజె కెర్నితె ఉవర్నితె ఎద్దరె నే బెదుక, గెర్చి కామ్ చెంగిల్ నిదానుమ్ కెరుక, మాన్సుల్క చెంగిల్ దెకితె తంక, చి జోవయించ మున్నర్పుల్చి తెడి తా దాక్ కెరన, జోవయించి కోడు సూనుక. సంగుమ్చ తేర్బోదల్ కిచ్చొక ఇన బుద్దుల్ ఇండుక మెలె, ఇసి ఇండిలె, 'నాయ్ గెద, పొరపాట్ జతి నాయ్' మెన దెక, దేముడు దిలి తుమ్ సూనయ్తి యేసుచి రిసాచి సుబుమ్ కబుర్క ఒత్తచ కేన్ మాన్సుల్ నిస్కారుమ్ ఉచరుక నెత్తిర్.

6 దస్సి, ఉబెడల్క కిచ్చొ సిక్కడు మెలె, "అసల్ రకన తుమ్ బుద్ది ఇండ" మెన తుయి బలవంతుమ్ కెరు.

7 అన్నె, జేవ్ తుచ కమె దెక సికిత్ రితి చెంగిల కమె కిచ్చొ జలెకి నిదానుమ్ కెర్తె తా. అన్నె, తుయి బోదన కెర్నితె సత్తిమ్బుద్ది చి మరియాద దెకవు.

8 అన్నె, జా బోదనతె కీన కొడొ కావలె మెలె, నిజుమ్తె వడితె కొడొయ్, 'తప్పు' మెన కో సంగుక నెతిర కొడొయ్. దస్సి తిలె, కో వేర సంగితొసా జలె, కిచ్చొ తప్పుచి రిసా అమ్క సంగుక నెత్త, లాజ్ జా, జోచి తప్పు చినెదె.

9 పడ్డొ గొతిమాన్సుల్క తుయి కిచ్చొ బుద్ది సిక్కడు మెలె, †'అమ్ కి నంపజలన జా అస్సుమ్ చి వెల్లో జలమ్' మెన నే ఉచరంతె పోటి నే

కెర్తె జోవయించ ఎజొమాన్సుచి తెడి తా జోవయించి కోడు సూన, కిచ్చొ కామ్చి రిసా జలెకి, జోవయింక సత్తిమ్ కెర్తె తత్తు. జా కామ్ జేవ్ కీసి కెరుక ఎజొమానిచి ఇస్టుమ్ తయెదె గే, దస్సి కెరుక. పడ్డొ, జోవయించ ఎజొమాన్సుచి కోడు నెత్తోవుక నాయ్.

10 పడ్డొ చోరుక నాయ్. గని పూర్తి సత్తిమ్ నిదానుమ్ తత్తు. కిచ్చొక మెలె, దస్సి సత్తిమ్ ఇండిలె, దేముడు అమ్చొ రచ్చించుప కెర్తొసా దిలి చి బోదనచి సత్తిమ్ జేవ్ ఇండితిన్తె రుజ్జు డీనెదె, చి జాకయ్ 'సత్తిమ్' మెన అన్నె మాన్సుల్ దెక ఒప్పనుల.

11 దస్సి, 'బూలోకుమ్చ కీ కేన్ రగుమ్చ మాన్సుల్క కి రచ్చించుప జతి వాటు దొర్కు కెరిందె' మెన దేముడు కెర్తి దయ అస్సి, డీన అస్సి.

12 జా దయ అమ్క కిచ్చొ సికడ్తయ్ మెలె, దేముడుక విరోదుమ్ జల వెర్రి కమె వెర్రి ఆసల్ ముల మార్పుప జా, బుద్ది జా, సత్తిమ్ ఇండ, జో దేముడుచి గవురుమ్ రుజ్జు జతి రితి ఈంజ లోకుమ్తె జియ.

13 'జర్గు జయెదె' మెన అమ్ పూర్తి దయిరిమ్ నముకుమ్ తిలి జో దెతి సర్దవరుమ్ జెయిమ్ జతిన్క అమ్ నిదానుమ్ రకితె తంక. మెలె, ఎత్తిచి కంట వెల్లో జలో పరలోకుమ్చొ దేముడు అమ్చొ రచ్చించుప కెర్తొసా జలో యేసుక్రీస్తు ఉత్త జెతిన్క చి జో అన్నె ఉత్త జెతిన్ తెన్ పరలోకుమ్చి గవురుమ్ డీస్తిన్క అమ్ ప్రేమ తెన్ రకితె తంక.

14 పాపుమ్ ఎత్తి తెంతో అమ్క *నెత్తోవ్తి రిసా, చి 'అంచ సొంత మాన్సుల్ జా సత్తిమ్ కమె కెర్తి ఆస తెన్ ఇండుత్' మెన అమ్క సుద్ది కెర్తి రిసా,

† 2:9 2:9 తిమోతిక రెగిడ్డి ఏక్ నంబర్ ఉత్తుమ్ 6:1-2 దెక.

§ 2:11 2:11 మెలె, మున్నుబోదల్క, తేర్బోదల్క బాల వెల్లోక, గొతిమాన్సుల్క, గొతి నెంజిల మాన్సుల్క, ఎత్తి జాతుల్చక, దేసిమ్లు ఎత్తిక, బాసల్ ఎత్తిక. కొరిందల్క రెగిడ్డి ఏక్ నంబర్ ఉత్తుమ్ 12:13, గలతియల్ 3:28, కొలోస్సియల్ 3:11, డీనయ్లిసి

5:9. * 2:14 2:14 నెంజిలె 'అమ్క అన్నె గెనన విడ్డల్ కెర్తి రిసా....'

అమ్మచి రిసా యేసు జోచి జీవ్ దా మొర గెలన్.

15 జలె, తీతు, ఈంజ ఎత్కి తుయి సికడై తా. ఒత్తచ నంపజలన సత్తిమ్ ఇండుక అన్నె నిదానుమ్ సికిత్ రితి, ప్రబు తుక దిలి అదికారుమ్ తెన్ జోవయించ తప్పుల్ జోవయింక దెకవు, చి జేవ్ బుద్ది జతి రితి జోవయింక సత్తిమ్ దెకవ దయిరిమ్ నిదానుమ్ సంగు. జా ఎత్కితె తుక కో నిస్కారుమ్ నే దెకిత్ రితి గని తుక మరియాద దెకిత్ రితి తుచి కామ్ కెరు ఇండు.

3

చెంగిల్ కమొ కెరుక

1 ఒత్తచ నంపజలోసక తుయి కిచ్చొ ఉచార కెరవు మెలె, దేసిమ్ ఏలుప కెర్తసచి అదికారుల్చి కోడు సూన, జోవయింక మరియాద కెరుక. ప్రబుతుమ్చ ఆడ్రచి రితి జేవ్ ఇండుక. *కేన్ చెంగిల్ కామ్ అయ్లె కి, తోడు కెర్తి బుద్ది తెన్ జా కామ్ కెర్తు.

2 వడ్డొ, కక్క దూసుప కెర్తు నాయ్, చి జట్టు జతిసి దూరి కెరంతు, మెత్తన తత్తు, కేన్ మాన్సుల్ కి పూర్తి మరియాద కెర్తె తత్తు.

3 ఆమ్ కి సొంత అగ్గె బుద్ది నెంతె తిలమ్, కోడు నే సూన్తన తిలమ్, మోసిమ్ జా పాపుమ్తె గెతె తిలమ్, వేర వేర అసల్ ఊసిల్ క దెర్ను నేడ తిలమ్, కుస్సిదుమ్ తెన్ గోసల్ తెన్ జితె తిలమ్, అమ్ ఇండిత్ తిలి బుద్ది దెకిలె అన్నె మాన్సుల్ అమ్క 'వెట్కారుమ్చ' మెంతె తిల, చి ఎక్కిలోక ఎక్కిలో విరోదుమ్ కెర్తె తిలమ్.

4 గని దేముడు అమ్చొ రచ్చించుప కెర్తొసాచి దయ ప్రేమ †రుజ్జు జా అమ్క డీసిల్ తెంతొ,

5 జో అమ్క రచ్చించుప కెర్తొ, అమ్ కిచ్చొ పున్నిమ్ కెర్తె రిసా నాయ్, గని పూర్తి జోచి పెట్టిచి కన్కారుమ్చి రిసా అమ్క నొవర్ జెర్మయ్లి రితి కెర, జోచి సుద్ది తిలి ఆత్తుక అమ్చి పెట్టి దా అమ్క దోవ, సుద్ది కెర, అమ్క మార్పుప కెర్తన్.

6 దేముడుచి సుద్ది తిలి ఆత్తు జోవయించి ఎదివాల్ దర్ముమ్ తెన్ అమ్చి ఉప్పిరి సుచ దిలన్. అమ్చొ రచ్చించుప కెర్తొసా జలో ‡యేసుక్రీస్తుచి అత్తి సుచ దిలన్.

7 కిచ్చొ దొన్నిచి రిసా మెలె, అమ్ అగ్గె తెంతొ పూర్తి పాపుమ్ సుదల్ జలెకి అమ్ పున్నిమ్ జలి రితి జో దెకుక జోచి సర్ద. జోచి దయ వాటు అమ్ జోచ పుత్తర్లు జా పరలోకుమ్చి రాజిమ్తె బెదితి వరుమ్ దొర్కు జలి దయిరిమ్ అమ్క తంక మెనయ్ ఈంజ ఎత్కి జర్లు కెర్తన్.

8 "ప్రబుచి కోడు ఈంజ" మెన కచితుమ్ దెరను. అమ్చొ దేముడుక నంపజలన బుద్ది జా †చెంగిల కమొ నిదానుమ్ ఇండుక ఎక్కి ఆస జంక సిక్కుత్ మెన ఈంజేవ్ కొడొ తుయి దయిరిమ్ తెన్ గట్టిజ సంగితె తా మెన అంచి ఆస. చెంగిల కమొ ఇండిలె, ఎత్కిజిన్క కామ్క జెయెదె.

9 గని తెలివి డీసుక ఉచర నగుమ్జిన్ కిచ్చొ కిచ్చొ కొడొ పుసితె తత్తతి. దన బుద్ది నెంజిల తగుల్ పొన, పూర్గుల్చ సెకుమ్లుతె జెర్మిలసచి రిసాచ ఆరిచ మత్తెలివొ పొన, కొడొ జుజవ జట్టి జతిసి పొన, అమ్ యూదుల్చ ఆగ్గుల్చి రిసాచ కొడొచ్చ తగుల్ పొన. దనచతె లాబుమ్ నాయ్, కామ్క నెంజిలి, కిచ్చొ చెంగిల్ దెర్తి నాయ్ చి రిసా దనచ దూరి కెరు.

10 కేన్ మాన్సు జలెకు కొడొ

* 3:13:1 నెంజిలె, 'దేసిమ్క తోడు కెర్తి కేన్ కామ్....' † 3:43:4 యేసు అయ్లిన్ తెన్, జో అమ్చి పాపుమ్ గెచ్చయతి అర్పితుమ్ జలిన్ తెన్. ‡ 3:63:6 జో మొర పరలోకుమ్తె ఉత్త గెలిన్క చి జో ప్రార్తన కెర్తినక యేసు అబ్బొన్చి జోవయించి సుద్ది తిలి ఆత్తు జితెయ్ వాటు దొర్కు కెర్తన్. యోహూను 14:16, 16:17. § 3:83:8 నెంజిలె 'చెంగిల్ కామ్ దొర్కు కెరనుక దెకనుక సిక్కుత్' మెన....

జూజయ్‌తీన్ గట్టక ఒత్తచ నంపజలసక
జట్టు జట్టు కెరయ్‌తి రితి జలె, తొలితో
చి సుట్టు జవున్, తివ్వెరి జవున్, జోక
జాగర్ల సంగ తా, చి ఒత్త తెంతో జో అన్నె
అల్లర్ కెరె, జో తెన్ బెద నాయ్.

11 దసా మాన్సు మార్పుప జా గార్ జా
అస్సె, పాపుమ్ జా అస్సె మెన తుయి
జాన్సి. జోచి పాపుమ్ జోచ కమొతె రుజ్జు
జతయ్. జోచి పాపుమ్ జో వయ జోచి
సొంత సిచ్చ ఆనన అస్సె.

తీతుక పవులు బుకార్లిసి

12 అరైమాక గే, తుకికుక గే తుచితె
ఆవ్ తెద్రయ్‌లె, నికొపొలి పట్టుమ్‌తె
అంచితె బే బేగి జెంక చజు. చల్లి పొది
ఒత్తయ్ తంక ఉచర అస్సి.

13 పడ్డొ, ఆగ్గుల్‌చ తీర్పుల్
రుజ్జుల్ సంగితో జేనాను చి అపొల్లో
ప్రయానుమ్‌క అన్నె బార్ జతి పొదిక
ప్రయానుమ్‌క జోక కిచ్చొ కొత్కు నే తతి
రితి, కామ్‌క జెతిసి ఎత్కి దొర్కు కెరు.

14 పడ్డొ, అమ్‌చ నంపజలొసక ఆరి
పలితుమ్ నే దెర్తి రితి కామ్‌క నెంజిలి
రితి నే జితె, బాద తిల తోడు నెంజిల
మాన్సుల్‌క తోడు దెతి రిసొ *చెంగిల్
కమొతె బెద కమొతె నిదానుమ్ కెరుక
జేవ్ అలవాట్ జత.

15 అంచి తెన్ తిలస ఎత్కిజిన్ తుక
జోవయించి ప్రేమ సంగ తెద్రయ్‌తతి.
అమ్‌చి తెన్ ప్రబుచి ఉప్పిర్‌చి ఎక్కి
నముకుమ్ తా ఒత్త తిల అమ్‌క ప్రేమ
కెర్లసక అమ్‌చి ప్రేమ సంగు.

తుమ్ ఒత్త తిలస ఎత్కిజిన్‌చి ఉప్పిరి
ప్రబుచి దయ తవున్!

* 3:14 3:14 నెంజిలి 'చెంగిల్ కామ్ దొర్కు కెరనుక దెకనుక సిక్కుత్'.

పిలేమోసుక రెగిడ్లి ఉత్త్రమ్ బారిక్ జలో పవులు పిలేమోసుక రెగిడ్లి ఉత్త్రమ్

మొదొల్ కోడు
1-2 ప్రేమ తిలో అమ్చి తెన్ ప్రబుచి కామ్తె బెదిలో *పిలేమోసుక, పడ్డో అమ్చి బేని జలి అప్పియక, చి అమ్చి తెన్ చి కామ్ కెర్తొ †అర్కిప్పుక కి, పడ్డో తుచి గెరి సబ కెర్తి సంగుమ్చ ఎత్కిక, క్రీస్తు జలో యేసుచి సుబుమ్ కబుర్ ఆవ్ నూనయ్లి రిసా ఆవ్ ‡జేలి జలో పవులు అమ్చొ బావో జలో తిమోతి తెన్ రెగిడ్లి ఉత్త్రమ్.

3 అమ్క అబ్బొ జలో దేముడుచి, ప్రబు జలో యేసుక్రీస్తుచి దయ సేంతుమ్ తుమ్చి ఉప్పిరి తవున్!

పిలేమోసుచి రిసా పవులు సర్ద రెగిడ్లిసి

4 ఓ పిలేమోసు, ప్రార్దన కెర్తె పొది తుక కెయెడ ఉచర్లె కి, అంచొ దేముడుక తుచి రిసా అంచి సర్ద ఆవ్ సంగితసి.

5 కిచ్చొక మెలె, ప్రబు జలో యేసుక తుయి సంపజలిన్చి రిసా, చి జోవయింక సంపజా సుద్ది జా జోచయ్ జల మాన్సుల్ ఎత్కిజిన్క తుయి ప్రేమ కెర్తె తతిన్చి రిసా ఆవ్ నూన్తె తత్తసి.

* **1:1-2 1:1-2** జో సాన్సారి జా తిలో, కిచ్చొగె, జోవయింక గొతిమాన్సు తిలో, 10-16వి కొడె. అన్నె, మాన్సుల్ గోత అయెలె, జేవ్ తతా గదివో జోవయింబి గెరి తిల, బెర్తె; 22వి కోడు దెక. † **1:1-2 1:1-2** కొలోస్సియుల్ 4:17 దెక. కొలోస్సియుచి సంగుమ్తె జో అర్కిప్పుక కి ప్రబుచి కామ్ కెరెదె, కిచ్చొగె. ‡ **1:1-2 1:1-2** రోమ్ పట్టుమ్తె జో జేలి జా తిలి పొది ఈంజ ఉత్త్రమ్ రెగిడ్లి, మెన ఒగ్గర్జన్ ఉచర్తతి. బారికుల్ 28:16 దెక. నెంజిలె, కైసరయ్ పట్టుమ్తె, బారికుల్ 23:23-24:27, నెంజిలె ఎపెను పట్టుమ్తె, గని ఎపెనుతె జో జేలి జలిన్క రుజ్జా నాయ్. పిలిప్పితె; బారికుల్ 16:23; చి యెరూసలేమ్తె; బారికుల్ 21:33; కి జేలి జా తిలన్, గని ఒగ్గర్ దీసల్ నాయ్. § **1:10 1:10** పవులు జోవయింక సికడ్డికయ్, కిచ్చొగె, జో ఒనేసిము క్రీస్తుక సంపజలో, చి దస్సికయ్, చి జోవయింబి ప్రేమకయ్, దస్సి సంగితయ్.

6 అన్నె మాన్సుల్ క్రీస్తుక సంపజతి రితి, జోచి ఉప్పిర్చి తుచి నముకుమ్తె తుయి జోవయింక బెదవంతసి. తుయి దస్సి జతిసి పలితుమ్ దెర్చు చి క్రీస్తుచి తెడి అమ్క దొర్కు జతి చెంగిల్ తిలిసి ఎత్కిచి రిసా అర్దుమ్ కెరన జేవ్ అన్నె మాన్సుల్ కి దెరన్తు మెన కి ఆవ్ ప్రార్దన కెర్తసి.

7 అన్నె కిచ్చొచి రిసా ఆవ్ ప్రార్దన కెర్తినతె అంచి సర్ద సంగితసి మెలె, బావో, తుచి ప్రేమచి రిసా అంక ఒగ్గర్ సర్దసంతోసుమ్ జా అస్సె. కిచ్చొక మెలె తుచి ప్రేమచి రిసా ప్రబుచయ్ జల మాన్సుల్ ఎత్కిజిన్చి పెట్టిచి దయిరిమ్ తుయి అన్నె జియడ్లి రితి కెర అస్సిసి.

ఒనేసిముక పిలేమోసుతె అన్నె తెద్రయ్లిసి

8 జాకయ్, ఏక్ కామ్చి రిసా తుక సంగుక అంక దయిరిమ్. జా కామ్ తుయి జర్గు కెరుక ముక్కిమ్చి రిసా తుక ఆడ్ర దెంక కి క్రీస్తుచి తెడి అంక దయిరిమ్ అస్సె,

9 గని అంచి ప్రేమక తుక ఆడ్ర దెయ్ నాయ్, గని ఆవ్, మంత్రొ మాన్సు, క్రీస్తు జలో యేసుచి సుబుమ్ కబుర్ నూనయ్లి రిసా జేలి జలో పవులు, తుక ఆవ్ ప్రార్దన కెర్లి రితి బతిమాల్పా జా

10 కిచ్చొ నజితసి మెలె, అన్నె పుత్తు రితో జలో ఒనేసిముచి రిసా తుక ఆవ్ బతిమాల్పా జతసి. ఆవ్ జేలి జలి తెంతో జోవయింక కి అబ్బొసి రితో జా అస్సి.

* **1:11 1:11** కొలోస్సి పట్టుమ్చొ మాన్సు జయెదె. కొలోస్సియుల్ 4:8-9 దెక. † **1:11 1:11** 'ఒనేసిము' మెలి నావ్ కిచ్చొ అర్దుమ్ తయెదె మెలె, 'కామ్క జెతోసా'. ఒగ్గర్జన్ గొతిమాన్సుల్క, బెర్తె, జా నావ్ తిలి. జో అగ్గె కిచ్చొక కామ్క నెంజిలో మెలె, జో ఉట్ట నిగ తిలి రిసా; 15వి కోడు, చి ఏక్ వేల చొర తిలో, 18-19వి కోడు.

11 అగ్గె, మాత్రుమ్, జో * ఒనేసిము తుక గొతిమాన్సు జలెకి, తుక †కామ్క నెంజిలో. గని అప్పె, జలె, తుక కి అంక కి కచితుమ్ కామ్క జెయెదె.

12 జలె, అంచి సొంత జీవు తెద్రయ్లి రితి; తుచితె జోవయింక ఆవ్ అన్నె తెద్రయ్తసి.

13 నుబుమ్ కబుర్ ఆవ్ నూనయ్లి రిసా ఆవ్ జేలి జలిన్తె జో అంక అన్నె తోడు తతి రితి, జోక అత్తి తుయి అంక తోడు దిలి రితి, జోక ఇన్నె అన్నె సేంపు తియంతయ్,

14 గని, తుచి సెలవ్ నెంతె అన్నె తియంతయ్ జలె, తుక బలవంతుమ్ కెర్లి రితి జయెదె మెన, నెసిలయ్. తుచి ఇస్టుమ్క తుయి సొంత తెద్రయ్లె జలె, బాద తయె నాయ్.

15 తుచితె తెంతో జో ఉట్ట నిగ గడియ వేరతె తిలిసి కిచ్చొక గే జర్గు జలి మెన ఆవ్ ఉచర్తిసి కిచ్చొ మెలె, జో అప్పె తెంతో అగ్గెచి బుద్ది నెంతె తుక నిదానుమ్ తా ఒగ్గర్ దీసల్చి చెంగిల్ సేవ కెర్తి రిసాయి ఇసి జర్గు జంక ప్రబు సెలవ్ దిలన్.

16 అప్పె తెంతో జో తుక రితొయి గొతిమాన్సు నెంజె. †అంక తుక జో గొతిమాన్సు జయెదె, గని అన్నె జో కిప్రబుక నంపజా, బుద్ది మార్పువ జా ఆత్మక తుక ప్రేమ తిలో బావొ కి జా అస్సెచి, పూర్తి నిదానుమ్ తయెదె. ఇన్నె అంక దస్సి నిదానుమ్ తిలో. అన్నె తుకయ్ కి దస్సి నిదానుమ్ తయెదె.

17 జాకయ్, ‘ప్రబుచి సుబుమ్ కబుర్ కామ్తె జో అంచి తెన్ బెద అస్సె’ మెన తుయి అంక ప్రేమ అస్సిన్ జలె, తుయి అంకయ్ కిసి బెదవంతె గే, జో ఒనేసిముక కి దస్సి బెదవను.

18 జో తుక కిచ్చొ నస్టుమ్ కెర తయెదె గే, జో తుక కిచ్చొ రునుమ్ జా అస్సె మెలె, ఆవ్వి పూచి జా తుక దెయిందె.

19 ఆవ్ పవులు, సొంత ఆతు తెన్ ఇసి మెన రెగిడ్డసి. ఆవ్ సొంత పూచి జా, ఒనేసిము తుక దెంక తిలిసి ఆవ్వి దా గెలిందె. తూయి, మాత్రుమ్, తుచి ఆత్మ తెన్ జెర్మున్చి రిసా అంకయ్ రునుమ్ జలి రితి జా అస్సిసి, గని తుక సంగుక నెసి.

20 గని, బావొ, * ప్రబుచి తెడి అంక ఇదిల్ జవున్ లాబుమ్ తుచితె దొర్కు జతి రితి, దయ కెర, అంచి పెట్టి ఆవ్ సర్ద జతి రితి, ప్రేమచి రిసా జో మాన్సుక తుయి చెమించువ కెరు.

21 ‘సంగిలి కోడు సూనెదె. నాయ్, అన్నెయ్ చెంగిల్ కెరెదె’ మెన తుచి రిసా అంక దయిరిమ్చి రిసా, ఆవ్ ఇసి మెన తుక కబుర్ రెగిడ్డసి.

22 మదెనె, అంచి రిసా ఒత్త ఏక్ గది తెయార్ కెర. అంక ‘విడ్డల్ జా అమ్తె గోత్ జెవున్’ మెన అంచి రిసా ప్రార్దన కెర్తసు. జలె, తుమ్చ ప్రార్దనల్చి రిసా ప్రబు అంక వాట్ దెవున్ మెన అంచి ఆన.

ఆకర్ కోడు
23 క్రీస్తు జలో యేసుచి తెడి అంచి తెన్ †జేలి రితో జలో †ఎపస్త్రా తుక జోచి ప్రేమ సంగ తెద్రయ్తయ్.

24 అన్నె కొన్సు మెలె, అంచి తెన్ ప్రబుచి కామ్ కెర్తన మార్కు, అరిస్తార్కు, దేమా, చి లూకా, జోవయించి ప్రేమ కి సంగ తెద్రయ్తతి.

25 ప్రబు జలో యేసుక్రీస్తుచి దయ తిలిసి ఎత్తి. తుమ్చి ఆత్మతె తవున్.

‡ 1:16 1:16 నెంజెలి ‘తుయి కి జో కి కొలోస్సియుల్చి రిసా ఆగ్గెక తుక బావొ జయెదె, గని అన్నె....’

§ 1:16 1:16 నెంజెలి ‘ప్రబుచి తెడి తుక ప్రేమ తిలో....’ * 1:20 1:20 నెంజెలి ‘ప్రబుచి తెడి తుయి కి ఆవ్ కి అన్సుమ్, చి....’ † 1:23 1:23 జో ఎపస్త్రా నిజుమి జేలి జా తిలో గే ఎక్కి. జో పవులు తెన్ బెద జా బాద ఒర్పువ జలి రిసా దస్సి మెన్తయ్ గే నేనుమ్. ‡ 1:23 1:23 జో ఎపస్త్రా కి కొలోస్సియుడు; కొలోస్సియుల్ 4:12; చి కొలోస్సియెచి సంగుమ్ మొదోల్ కెర తిలో; కొలోస్సియుల్ 1:7.

ఎబ్రియూల్ క రెగిడ్లి ఉత్త్రుమ్* ఎబ్రియూల్ క రెగిడ్లి ఉత్త్రుమ్

యేసుక్రీస్తు ఒగ్గర్ ముక్కిమ్

1 ఒగ్గర్ వేర వేర రగల్ తెన్ జోచ కబుర్లు సంగిలనచి అత్తి దేముడు అమ్చ పూర్ణుల్క జా పొది జోచ కొడొ లట్టబ్బన్.

2 గని, ఈంజ ఉగుమ్చి ఆకర్చ పొదులె, జోచొ సొంత పుత్తునచి అత్తి అమ్క జోచి †కోడు లట్టబ అస్సె. 'జోచి ఈంజ ఎత్తి' మెనయ్, ఎత్తి కి జోక అక్కునుదొ మెనయ్, దేముడు జో పుత్తునక నిసాన అదికారుమ్ దా అస్సె. జో పుత్తునచి అత్తి ఎత్తి లోకుమ్క జెర్మయ్లన్.

3 జో పుత్తునతె దేముడుచి పరలోకుమ్చి ఉజిడి గవురుమ్ పూర్తి డీస్తయ్, చి నిజుమ్ దేముడు కీసా అస్సె గే, పుత్తుని కిచ్చొ నే పిత్తె కీదస్సాయి అస్సె. జో పుత్తుని జోచి నెక్కి కోడుకయ్ లోకుమ్లు ఎత్తి కి జోయ్యి ఏలుప కెర్తయ్. అన్సె, పాపల్ వుంచి జతి మాన్సుల్ నుద్ది జతి వాటు జో తెయార్

* : 1:0 ఈంజ ఉత్త్రుమ్ రెగిడ్లిసా ఈంజ ఉత్త్రుమ్తె కిచ్చొ ముక్కిమ్ దెకయ్తయ్ మెలె, ఈంజయి లోకుమ్చ యూదుల్చి దేముడుచి గుడి, పరలోకుమ్క, మెలె ఎత్తి అదికారుమ్ తిలో దేముడు తతి టాన్క ఎక్కి టాలి జతయ్, నీడయ్ జతయ్. దస్సి, యూదుల్ కెర్తి రితి సేవ కెర్త వెల్లెల పూజర్లుచి కామ్ యేసు పరలోకుమ్తె కెర్తి సేవక ఎక్కి టాలి జతయ్, నీడయ్ జతయ్. 'యేసు జోవయింక నంపజలనచి పాపుమ్ గెచ్చవ, పరలోకుమ్తె దేముడు అబ్బొనచి మొక్కి అమ్క తోడు తతి తెంతో జా అగ్గెచి రితి నాయ్' మెన ఈంజ ఉత్త్రుమ్తె రెగిడ్లిని రుజ్జు దెకయ్తయ్. † 1:1 1:1 దేముడుచ కబుర్లు సంగిలన మెలె, జా కామ్క కక్క, జో నిసాన తయెదె గే, జోవయించి ఆత్మక జోవయించి చొండి పుత్తువ జోవయించ కబుర్లు సంగెదె. జోవయంతె నగుమ్జన్చి అత్తి కి జోవయించ కొడొ రెగ్గయ్లన్, పూర్ణుమ్ పొది. ‡ 1:2 1:2 క్రీస్తు సంగిలిసి, జో బోదన కెర్తిసి, జో కెర్త కమె, జో ఇండిలి బుద్ది, జో మొర అన్సె జలిసి, జా ఎత్తితెయి ఎత్తి అదికారుమ్ తిలో దేముడు జోవయించి అత్తి అమ్క జోవయించి కోడు సంగల్ రితి జతయ్; జో ఎత్తి అదికారుమ్ తిలో దేముడుచి కోడు జో యేసుక్రీస్తుయి, మెలి రితి. యోహాను 1:1-4, 14 దెక. § 1:3 1:3 కొలొస్సియూల్ 1:15-17, 19, చి 2:19 దెక. * 1:5 1:5 కీర్తనలు 2:7 † 1:5 1:5 సమూయేలు దొన్చి పుస్తకమ్ 7:14. ‡ 1:6 1:6 ద్వితియోపదేశ కాండుము 32:43, కీర్తనలు 97:7. § 1:7 1:7 కీర్తనలు 104:4.

కెర తా, పరలోకుమ్తె దేముడుచి ఉజెతో పక్క వెసిలన్.

4 జో ఒత్త నే వెసితె అగ్గె, దూతల్చి కంట జోచి విలువ ఒగ్గర్ తిలిన్చి రుజ్జు అయ్లి. జోచి నావ్ జోవయించి నావ్చి కంట కెడ్డి విలువ జతయ్ గే, తెద్ది వెల్లో జో జా అస్సె.

5 కిచ్చొక జో ఇదిలి వెల్లో జా అస్సె మెన జానుమ్ మెలె, దేముడుచి కోడుతె రెగ్గయ్లి రితి, కేన్ దూతక;

* "తుయి అంచొ సొంత పుత్తు, తుక ఆజి ఆవ్ జెర్మయ్లయ్ అస్సి." మెన దేముడు కెయ్య సంగిలన్ గె? నాయ్ గెద, కేన్ దూతక జో దస్సి సంగె నాయ్. నెంజిలె, † "జోక అబ్బొసి జయిందె, చి జో అంక పుత్తు జయెదె" మెన కేన్ దూతక కెయ్య సంగిలన్ గె? జోవయింక దస్సి సంగె నాయ్.

6 వడ్డె, అన్సె, జో తొల్పర్ జతో క్రీస్తుక ఈంజ లోకుమ్తె దేముడు జెర్మయ్లి పొది, ‡ "ఆవ్ దేముడుచ దూతల్ ఎత్తి, జోకయ్ బక్కి కెర్త!" మెలన్.

7 పడ్డె దూతల్చి రిసా కిచ్చొ మెన్తయ్ మెలె, § "జో జోచ దూతల్క వాదుల్ రిత, జోచ సేవ కెర్తనక ఆగివొ లగితి రిత జో జర్లు కెర్తయ్." మెన సంగితయ్.

8 గని జోచొ సొంత పుత్తుసి రిసొ కిచ్చొ మెన్తయ్ మెలె,
 *“ఓ దేముడు, తుచి సిజాసనుమ్ కెయఁక తెయఁక తతినీ,
 నీతి మెల్లో రానొచి డండొ తెన్ తుయి ఏలువ కెర్తసి.

9 నీతిచి ఉప్పిరి ప్రేమ తా, గని అబద్దుమ్ ఎద్గరె నెస అస్సిన.

జాకయ్ తుయి అన్నె తుచి తెన్ తిలి ఎత్తి జీవులచి కంట వెల్లో జంక మెన

దేముడు, తుచొ దేముడు, తుచి ఉప్పిరి పూర్తి నర్దసంతోసుమ్ జా తుక నిసాన అదికారుమ్ దా, తుచి బోడితె జోచి తేల్ సువ దా అస్సె.”

10 దేముడు అన్నె కిచ్చొ మెన్తయ్ మెలె, †“తుయి, ప్రబు, కిచ్చొ నెంజిలి పొది బూలోకుమ్ జెర్మయ్లది, చి ఆగాసుమ్ తిలిసి ఎత్తి తుచి అత్తిచి కమొ.

11 బూలోకుమ్ ఆగాసుమ్ జలె, పాడ్ జయెదె గని తుయి తియొఁ జా తస్తె.

పాలల్చ రిత జేవ్ పొర్న జా పాడ్ జవుల,

12 చి డుప్పటిక కిసి మడ్త కెరుక జయెదె గే, దస్సి జాక తుయి మడ్త కెరై, చి మార్పుప జయెదె.

గని తుయి కిసి అస్సిన గే, దస్సి తాఁ జస్తె, కెయఁక తెయఁక తాఁ జస్తె”

మెన దేముడు పుత్తున్క సంగితయ్, గని,

13 †“జలె తుచ విరోదుమ్ సుదల్క తుచి సుదితి పొర్లో జేవ్ జతి రితి ఆఁవ్ జర్గు కెరై ఎదక,

అంచి ఉజిల్ పక్క తుయి వెస తా” మెన కేన్ దూతక కెయ్యు జవుకు సంగిలయ్ గె?

14 జేవ్ దూతల్ కిచ్చొ జవుల మెలె, రచ్చన దొర్కు జత ప్రబుచ మాన్సుల్క

‘చెంగిల్ తత్తు’ మెనయ్ జోవయింక దెకిత దేముడుచి సేవ కెర్త జీవుల్ మెన దేముడు జోవయింక జా సేవ దా అస్సె. జేవ్ జోచి సేవ కెర్తసయ్.

2

యేసు మాన్సుల్చి పాపుమ్ గెచ్చయ్లిసి

1 జలె, అమ్ జేవ్చి సత్తిమ్ నే పచ్చితి రితి, నే ముల్తి రితి ఆమ్ పెట నే దెర గెతె సూన్లిన్చి చి రిసొ చెంగిల్ ఉచర, అమ్ ఏదాన్త కెరుక.

2 మెలె పూర్గుమ్చి *ఆగ్గుల్చి ప్రమానుమ్చి రిసొ దూతల్ జానవ కెర ఎత్తి కోడు నిజుమ్చి జలె, అన్నె, మాన్సుల్ ఆగ్గుల్చి కోడు పిట్టయ్లె, దేముడుచి కేన్ జవున్ కోడు నే కెరై, కిసి జేవ్ దూతల్చి అత్తి జో సంగిలి ఎదిలి సరిగా సిచ్చ జవుల జలె,

3 అప్పెచి ప్రబు దెతి ఈంజ వెల్లి రచ్చనక ఆమ్ విలువ నే దెకిలె, విలువ నే కెరై, అమ్చి సిచ్చ కిసి పిట్టెదె? పిట్టె నాయ్. ఈంజ రచ్చన, జలె, యేసుప్రబు తొలితొ సొంతయ్ జానయ్లి రిసొ, జోక తొలితొ సూన్లన అమ్కయ్ సాచి సంగిల.

4 వడ్డొ, అన్నె, జో యేసుక్రీస్తుచి అత్తి జో దెతి రచ్చనచి రిసొ దేముడు సొంత వేర వేరతె రుజ్జుల్ దెకయ్లన్. కిచ్చొ కిచ్చొతె జా రచ్చనచ రుజ్జుల్ దెకయ్లన్ మెలె, జోచి అదికారుమ్ దెకయ్త వెల్లో కమొ కెర్తినె, చి దేముడుచి సుద్ది తిలి జోచి ఆత్మవరల్ జోచి ఇస్తుమ్క కక్క. కక్క వంట దిలిన్తెయ్ ఈంజ రచ్చనచి రిసొ జోచి సాచి దా అస్సె.

5 అమ్ సంగితి †జెతికయ్ లోకుమ్ ఏలువ కెరుక దూతల్చి అత్తి దేముడు సొర్ప కెర దెయె నాయ్.

* 1:8 1:8 కీర్తనలు 45:6-7. † 1:10 1:10 కీర్తనలు 102:25-27. ‡ 1:13 1:13 కీర్తనలు 110:1, మత్తయి 22:44, ఎబ్రియల్ 10:13. * 2:2 2:2 నిర్గమకాండుమ్ 20 అద్యయిమ్, 31:18 చి ద్వితియోపదేశ కాండుము 5:6 దెక. † 2:5 2:5 యెసయా 65:17, 66:22, లూకా 21:33, డీసయ్లిసి 5:10, 21:1, తిమోతిక రెగిడ్ 2 నంబర్ ఉత్తమ్ 2:12.

6 కేనె గే రెగిడ్లి ఇసి సాచి అస్సె. ఇసి మెలిసి;

‡“మాన్సుక తుయి ఉచరన్క జో కిచ్చొ విలువసా?

నెంజిలె, మాన్సు జా జెర్మున్ అయ్లోసాక కిచ్చొక తుయి విలువ దెకితసి?

7 దూతల్చి కంట జోక ఇదిలి దాక్ తతి రితి తుయి జర్గు కెర్లది,

గని అప్పె జోక గవురుమ్ కెర అదికారుమ్ దా,

జోక ఏలువ కెరవ అస్సిసి.

8 జోచి చాటు సుదితి రితి ఎత్తి జోచి అత్తి

తుయి సార్పు కెర దా అస్సిసి”

మెన రెగ్ల అస్సె. జలె, దేముడు ఎత్తి జోచి అత్తి సార్పు కెర దా అస్సెచి రిసా జో

ఏలువ నే కెర్లిసి కిచ్చొ కి నాయ్. ఎత్తి జోచి అత్తి తతిన్చి రుజ్జు అప్పెచి మట్టుక

అమ్క సరిగా డీసె నాయ్.

9 గని ఇన్నె ‘మాన్సు జా జెర్మున్ అయ్లోసా’ మెన యేసుకయ్

సంగితనుమ్ యేసుకయ్ దెకితనుమ్. జో గడియయ్ దూతల్చి కంట దాకు

జలొ, గని దేముడు అబ్బొసిచి దయచి రిసా ఎత్తి మాన్సుచి నావ్ తెన్

అమ్చి సిచ్చ వయంతి రిసా జో బాదల్ సేడ మొర్లిన్చి రిసా జో అప్పె ఎత్తి

అదికారుమ్ గవురుమ్ జా కిరీటుమ్ గలన ఏలువ కెర్లయ్.

10 కిచ్చొక ఇసి జర్గు జలి మెలె, ఒగ్గరజిన్ మాన్సుల్క జోచి పరలోకుమ్చి

ఉజిడతె గవురుమ్తె బెదవంతి రిసా మాన్సుల్క రచ్చన దొర్పు కెర్లొసా

‡బాదల్ ఓర్పువ జతి వాటుయి జీన సరి జలొ రచ్చించువ

కెర్లొసా పూర్తి జంక ఎత్తిక ఆదారుమ్ తిలొ, ఎత్తి ఏలువ కెర్లొ దేముడు

జర్గు కెర్లిసి చెంగిలి, పూర్తి బెదితయ్.

11 నిజుమి, సుద్ది కెర్లొ యేసుక చి జో యేసు సుద్ది కెర్లొనక ఎక్కి మొదొల్;

దేముడు అబ్బొసి. జాకయ్, జోవయింక ‘అంచ బావుడ్లు’ మెనుక యేసుక లాజ్ నాయ్.

12 * “అంచ బావుడ్లుతె తుచి నావ్ తుచి గవురుమ్ సూనయిందె,

సంగుమ్చి నెడమె తుచి గవురుమ్ గాయిందె”

మెలి కోడుతె, అన్నె,

13 † “జోచి ఉప్పిరి అంచి నముకుమ్ తియిందె”

చి అన్నె,

‡ “ఇన్నె ఆవ్ అస్సి, చి దేముడు అంక దిల జోచ బోదల్ అంచి తెన్ అస్సి”

మెన యేసు సంగిల్ రితి రెగిడ్ల కోడుతె ఇసి ఒప్పణ్ణొ.

14 జలె, ఎక్కి ఆగ్, ఎక్కి లొయి బోదల్ ఎత్తిక తయెదె చి రిసా, సొంత

కి ఈంజయ్ అమ్ మాన్సుల్చి ఆగుతె, ఈంజయి లొయితె జో యేసు మాన్సు

జా జెర్మున్ జా బెదిలన్. కిచ్చొక మెలె, మాన్సు సేడ్డి మొర్ను జో సేడ జీన,

మొర్నుచి ఉప్పిరి అదికారుమ్ తిలొ సయ్తాన్చి ఉప్పిరి జీనుక మెనయ్

అమ్చి అగు అమ్చి లొయి జో దెరన్లన్.

15 జోవయించి ఒండ్డి జివితుమ్క మొర్నుచి ఉప్పిరిచి బయిమ్క దెర్ను సేడ్ల

ఎత్తిజిన్క విడ్డల్ కెరుక మెనయ్ దస్సి జా జీనుక ఒప్పన, దస్సి జా జీన్లన్.

16 కీసి మెలె, ఈంజ ఎత్తి కక్కయ్ రచ్చించువ కెరుక మెలె,

దూతల్క రచ్చించువ కెరుక నాయ్ గని † అబ్రాహామ్చి సెకుమ్తె జెర్మిలనక

‘రచ్చించువ జతు’ మెనయ్.

17 జాకయ్, దేముడుచి సేవ కెర్లొ కన్కారుమ్ దెకితొ నిదానుమ్చొ పూజరి

జా, ప్రెజల్చ పాపల్ పుంచ దా జోవయింక దేముడు తెన్ అన్నె బెదయ్తి

రితిచి అర్పితుమ్ జతి రిసాయి, ఎత్తి

‡ 2:6 2:6 కీర్తనలు 8:4-6. § 2:10 2:10 18చూ కోడు దెక. * 2:12 2:12 కీర్తనలు 22:22.

† 2:13 2:13 యెసయా 8:17. ‡ 2:13 2:13 యెసయా 8:18. § 2:16 2:16 గలతీయూల్ 3:6-9, చి రోమీయూల్ 4 అద్యాయమ్ దెక. ‘అత్తిక అబ్రాహామ్చి సెకుమ్తె జెర్మిలన’ మెలె, అబ్రాహామ్చి రితి నముకుమ్ తిలన.

రగల్కక ఎత్తి బాదల్తె వైజల్ జల జోవయించ బావుడ్లుచి రితి జో జంక తిలి. జో మాన్సుల్చి రితి జా జోవయించ జెత రగల్ బాదల్ జో ఓర్పువ జలెకయ్ జో చెంగిలో పూజరి జా కన్కారుమ్ దెకెదె మెనయ్.

18 దస్సి, జో సొంత బాదల్ సేడ పరిచ్చు జా జిన్లి రిసా, జేవ్ బాదల్ సేడ పరిచ్చు జత అన్నె మాన్సుల్క జో తోడు తంక తెరె.

3

మోసే కంట దేముడుచో పుత్తుసి వెల్లో

1 జాకయ్, ప్రబుచి సుద్ది జా జోచయ్ జల ఓ బావుడ్లు, పరలోకుమ్తె బెదుక తుమ్ నిసాన జా జో బుకార్లస, దేముడుచో బారికి జలో, చి జోచో ఎత్తిక వెల్లో పూజరి జలో మెన యేసుచి రిసా అమ్ ఒప్పున అస్సుమ్. జలె, జోచి రిసా ఉచరుమ్.

2 దేముడుచి గేర్ జల యూదుల్తె తా మోసే కిసి జో దేముడుచి కామ్ నిదానుమ్ కెరై తిలో గే, దస్సి ఈంజ బారికి జతి రితి కామ్ ఎత్తిక వెల్లో పూజరి కెర్తి రితి, కామ్క నిసాన్లో దేముడుక యేసుయి నిదానుమ్ తిలన్.

3 గని గేరుచి కంట అన్నె గేర్ బందిలోసాక కిసి ఒగ్గర్ విలువ తయెదె గే, దస్సి, దేముడుచి గేర్చతె తిలో మోసేచి కంట యేసుయి జా గేర్ బందితోసా జా తా, అన్నె ఒగ్గర్ గవురుమ్క విలువ జతయ్.

4 ఎత్తి గేరు, కచి అత్తి గే బందిలిసి, గని ఎత్తి బందితోసా దేముడుయి.

5 జలె, దేముడు పడ్డొక సంగిత కొణెచి రిసా సాచి గుర్తు సంగితి రిసా,

జో దేముడుచి గేర్ ఎత్తితె మోసే నిదానుమ్చో సేవ కెర్తొసా జలో.

6 గని క్రిస్తు ఈంజ లోకుమ్తె జా కెర, జో పుత్తుసి జలి రిసా, దేముడుచి గేరు నిదానుమ్ ఏలువ కెరై తిలన్. ఆకర్ ఎద జోచి ఉప్పిరిచి అమ్చి డిట్టుమ్ దెరన్లె, జో రచ్చున దా అమ్క పరలోకుమ్తె బెదయ్లిన్చి అమ్చి దయిరిమ్, ఆస అమ్ దెరన్లె, జోచి గేర్చయ్ ఆము జా అస్సుమ్.

యేసు దెతి విస్తాంతి రచ్చున తుమ్ పిట్టవన నాయ్

7 “జాకయ్, దేముడుచి సుద్ది తిలి ఆత్మ సంగిలి రితి;

*జేవ్ అగ్గచ వైజల్చి పెట్టి బేడు బందిల్ రితి జా, జోచి కోడు నే నూన్లి రితి జల.

తుమ్, జలె, ఆజి జోచి అవాడ్ తుమ్ నూన్లె,

దస్సి నే జతి రితి, జాగర్త దెకన.

8 పూర్గుమ్, †జోచి కోడు నూనుక నెన

జా బయిలు దేసిమి బుల్తె తిలి పొది వైజల్ జోక పరిచ్చు కెర్తి రితి, రాడ్ జీవు జతె తిల.

9 జో దేముడు సంగిలి రితి; అంచి ఉప్పిరి అన్మానుమ్ జా పరిచ్చు కెర్తి రితి జా

జేవ్ జా దొన్ని విస్సాన్ వెర్పుల్ అంచ కమె దెకిలెకి కిసి జల గే, తుమ్ దస్సి జా నాయ్.

10 జేవ్ దస్సి అన్మానుమ్ జతికయ్, జా ఉగుమ్చచి రిసా ఆవ్ కోపుమ్ జా,

జోవయించి పెట్టి, కెయక తెయక అంచి వాటు ముల పీట గెతతి. అంచి ఇస్టుమ్ నేన్లి రితి ఇండితతి మెలయ్, చి

* 3:7 3:7 కీర్తనలు 95:7-11. † 3:8 3:8 నిర్ణమకాండుమ్ 13-40 అద్యయల్, లేవీయకాండుమ్, సంక్యాకాండుము, ద్వితియోపదేశ కాండుము. ముక్కిమ్క నిర్ణమకాండుమ్ 32 అద్యయిమ్, చి సంక్యాకాండుము 14 అద్యయిమ్ దెక. ‡ 3:11 3:11 తెదొణెచి జో దెంక ఉచర తిలి విస్తాంతి కిచ్చి మెలె, కనాను దేసిమ్ జోవయించి తా గతి రితి దెతిసి. జా దేసిమ్ అప్పె పరలోకుమ్కయ్, జా విస్తాంతి పరలోకుమ్చి విస్తాంతికయ్, టాలి జయెదె.

11 'అంచి †సుక్కుమ్తె జేవ్ కెయెక బెదుక ఆవ్ ఒప్పి నాయ్' మెన ఒట్టు గలన అంచి కోపుమ్క ఒప్పన్లయ్" మెన, సంగితయ్.

12 జలె, బాపుడ్లు, జివ్ తిలో జివ్ దెతో దేముడుక తుమ్ దూరి నే జతి రితి, తుమ్తె కిచ్చొ పెట్టి గర్చి జోచి ఉప్పిర్ అన్మానుమ్చి ఆత్మ నే తతి రితి, తుమ్ జాగర్త దెకన.

13 గని 'ఆజి' మెనన ఈంజ కాలుమ్క కెత్తి పొదుల్ సేసతయ్ గే, రోజుక తుమ్ ఎక్కిలోక ఎక్కిలో జాగర్త సంగ, దయిరిమ్ సంగ; పాపుమ్చి మోసిమ్క తుమ్తె కో దెర్చు నే నీడ్డి రితి, తుమ్చి పెట్టి బేడు నే బందితి రితి,

14 అమ్ సంపజలి మొదొల్ తెంతొ చి జోవయించి రిసొచి ధయిరిమ్ అమ్ ఆకర్ ఎద దెరన్లెకయ్ క్రిస్తు తెన్ వాట నజన తమ్దె.

15 § "ఆజి, జోచి అవాడ్ తుమ్ సూన్లె, జోచి కోడు నెసిల జేవ్ అగ్గెచ ప్రెజల్చి రితి జా నాయ్. తుమ్చి పెట్టి జోచి రితి బేడు నే బందిత్ రితి జాగర్త దెకన్."

మెన రెగిడ్డిసి తుమ్ పచ్చు నాయ్.

16 జలె, జేవ్ సూన నెసిలన కొన్చు మెలె, మోసే పూర్లుమ్చొచి తెడి గరుప్పు దేసిమ్ తెంతొ, జేవ్ గొతిమాన్సుల్ జలిన్ తెంతొ, బార్ జా ముల విడ్డల్ జల అమ్చ యూదుల్ ఎత్కిజిని.

17 అన్నె, జేవ్ దొన్ని విస్సా వెర్చుల్ పూర్తి కచి రిసొ దేముడు కోపుమ్ జలొ మెలె, *పాపుమ్ కెర్తనచి రిసొ జా బయిలు దేసిమి జేవ్ మొర్తి రితి జో దేముడు సిచ్చు దిలన్.

18 పడ్డొ, జోచి సుక్కుమ్తె నే బెదుక మెన కచి రిసొ జో ఒట్టు గలన్లొ మెలె, జోచి కోడు నే కెర్తనచి రిసొయి గెద?.

19 జాకయ్ కిచ్చొ అమ్క జానుక జతయ్ మెలె, జోవయించి అన్మానుమ్చి రిసొ జా సుక్కుమ్తె జేవ్ బెదుక వాటు నే దిలొ.

4

ప్రబుచయ్ జల మాన్సుల్క దొర్కు జతి విస్తాంతి

1 జలె, జో ప్రమానుమ్ సంగిలి రితి, జోచి *సుక్కుమ్తె బెదితి వాల్ తతె ఎద, తుమ్తె కో జా సుక్కుమ్తె పావుక నే పిట్టవన్తి రితి జిమ.

2 కిచ్చొక మెలె, పూర్లుమ్చ మాన్సుల్కయ్ కెయెక కి తత్తిసి సుక్కుమ్చి అవ్కాసుమ్చి రిసొచి సుబుమ్ కబుర్ దొర్కు జలి. దస్సి, అమ్క కి సుక్కుమ్చి అవ్కాసుమ్చి రిసొచి సుబుమ్ కబుర్ దొర్కు జా అస్సె. గని జేవ్ సూన్లి జా కోడు జోవయింక కామ్క నెంజిలి. కిచ్చొక మెలె, నిజుమ్కయ్ సూన్లనచి పెట్టిచి రితిచి నముక్కుమ్ తిల తెన్ బెదిత్ నాయ్. జాకయ్ సూన్లి కొడొ జోవయింక కామ్క నెంజిల్ రితి జలి.

3 అమ్ యేసుక్రీస్తు ప్రబుక సంపజలన, మాత్రుమ్, జా సుక్కుమ్తె బెదితసుమ్. జేవ్ పూర్లుమ్చచి పాపుమ్చి రిసొ దేముడు సంగిలి తీర్చు అగ్గె రెగిడ్డయ్. †

‡ "అంచి సుక్కుమ్తె జేవ్ కెయెక బెదుక ఆవ్ ఒప్పి నాయ్, మెన ఒట్టు గలన అంచి కోపుమ్క ఒప్పన్లయ్" మెన రెగిడ్డి కోడు. జో దేముడు, మాత్రుమ్, లోకుమ్ జెర్తయ్లి పొది జో సొంత జోచయ్ కమె కేడవన జో తెదొడి

§ 3:15 3:15 కీర్తనలు 95:7-8. * 3:17 3:17 నిర్దుమకాండుమ్ 32 అద్యయిమ్, సంక్యాకాండుమ్ 14, ముక్కిమ్క 14:27-30. * 4:1 4:1 పూర్లుమ్చ యూదుల్క జతి, తెదొడిచి ప్రమానుమ్క చెంగిలి ఈంజయ్ లోకుమ్చి కనాను దేసిమి జేవ్ గెచ్చుక అవ్కాసుమ్ తిలి, గని పిట్టవన్. అమ్క, జతి, అప్పెచి అవ్కాసుమ్ కిచ్చొ మెలె, ఎత్కి అదికారుమ్ తిలొ దేముడుచి సేంతుమ్తె బెదితిసి చి పరలోకుమ్తె గెతిసి. † 4:3 4:3 3:11 దెక ‡ 4:3 4:3 కీర్తనలు 95:11. § 4:4 4:4 అదికాండుమ్ 1 అద్యయిమ్.

సెలవ్ కడన తిలె కి, జోవయింక దస్సి మెన ఒప్పున్లన్.

4 'సెలవ్ కడన్లన్' మెన సంగిలె, కీసాప్పు పొదుల్ ఆగాసుమ్, బూలోకుమ్, లోకుమ్తె తిలిసి ఎత్తి జెర్మయ్లి పడ్డో, అన్నెక్ దీసి * 'సెలవ్ కడన్ల దీసి' మెనయ్ జోచి జా సెలవ్ కడన్ల దీసిచి రిసా కేనె గే కిచ్చొ సంగ అస్సె మెలె,

† "అంచ కమె సొప్పు పొదుల్ కెర కేడవ, అన్నెక్ దీసి సెలవ్ కడన్లయ్" మెన సంగ అస్సె.

5 జేవ్ పూర్గుల్, జలె, అమ్ అగ్గె రెగిడ్లి రితి:

‡ "అంచి సుక్కుమ్తె జేవ్ కెయచ బెదుక ఆవ్ ఒప్పి నాయ్"

మెన జోవయించి రిసా జో సంగ అస్సె.

6 జలె, అన్నె సగుమ్జిన్ దేముడుచి సుక్కుమ్తె బెదుక జలస బెదుక నేతయ్. జా ఏక్, పడ్డో అన్నెక్ కిచ్చొ మెలె, జా సుక్కుమ్చి రిసాచి సుబుమ్ కబుర్ అగ్గె సూన్లన జో దేముడుచి కోడు కెరుక నెసిలి రిసా జోచి జా సుక్కుమ్తె బెదితి నాయ్.

7 అన్నెక్ దీసి మెలి కోడు జో నిసాన, జోచి సుక్కుమ్తె బెదుక అమ్క అన్నెక్ అవ్కాసుమ్ దా కెర, ఈంజ అవ్కాసుమ్క 'అజి' మెన, అమ్ అగ్గె రెగిడ్లిన్తె సంగిల్ రితి,

§ "అజి జోచి అవాడ్ తుమ్ సూన్లె, తుమ్చి పెట్టి బేడు నే బందిత్ రితి

తుమ్ జాగర్త దెకన" మెన్తయ్.

8 మెలె, దేముడు సంగిలి కనాసు దేసిమి జేవ్ పాచ పెసితి రితి యెహోసువ కడ నిలన్, గని జా తెన్ జా కోడు పూర్తి

నెరవెర్పువ జతి జలె, అన్నెక్ దీసిచి రిసా 'తెదొడ్కయ్ సుక్కుమ్ దొర్కు కెరిందె' మెన దేముడు సంగితో నాయ్, సంగుక జతి నాయ్.

9 జాకయ్, దేముడుచి సెలవ్ కడన్ల దీసితె బెదితి వాటు మాన్సుల్క అప్పెక దొర్కు జతయ్.

10 మెలె, దేముడు జోచి కామ్ కేడవ కిసి సెలవ్ కడన్ల గే, దస్సి జో దెతి సుక్కుమ్తె కో బెదెదె గే, జో మాన్సుకి జోచి కామ్ కెర కేడవ సెలవ్ కడనెదె.

11 జాకయ్, జా సుక్కుమ్తె ఆమ్ కి బెదితి రితి నిదానుమ్ కెరుమ; జేవ్ పూర్గుల్చి రితి జోచి కోడు నెన అమ్తె కో దస్సి పాపుమ్తె నే సేడ్డి రితి.

12 కిచ్చొక మెలె, దేముడుచి కోడు దొన్ని పక్కలె వాండి తిలి ఎత్తి కత్తిచి కంట * లగున్ అస్సె, చి జా కోడు జివ్వి తా కామ్ కెర కెరయ్ మాన్సుచి ఆత్మ చి జిప్ప అత్కు జతిన్తె, అత్కుల్ చి ఆడుచి ములువ బెదితిన్తె బెర, మాన్సుల్చి పెట్టిచ ఉద్దెసుమ్లు పరిచ్చ కెర, జోవయింక 'చెంగిల్ అస్తి' గే నాయ్ గే మెన తీర్పు కెర్తయ్.

13 అన్నె, జెర్మయ్లిన్ ఎత్తి కి జోచి మొక్కె లుంకుక నెత్తె, గని అమ్క పరిచ్చ కెర్తొసాచి మొక్కె ఎత్తి డుమ్డి తా ఎదార్డుమ్ డీస్తయ్; అమ్చ ఉద్దెసుమ్లు కి ఆకర్కయ్ జోచి మొక్కె అమ్ ఎత్తిజిన్ సాచి నజనుక తయెదె.

యేసు అమ్చి రిసా ఎత్తిక వెల్లో పూజరి జా అస్సె

14 జలె, యేసు దేముడుచొ సొంత పుత్తుసి జా తా, పరలోకుమ్తె తెడిక తెడి దేముడు అబ్బొన్తెయి పెన గెచ్చ

* 4:44:4 అదికాండుమ్ 2:1-3. † 4:44:4 అదికాండుమ్ 2:2. ‡ 4:54:5 కిర్తనలు 95:11. § 4:7 4:7 3:7-8 దెక. * 4:12 4:12 డీసయ్లిసి 1:16. † 4:14 4:14 మాములుమ్ ఈంజయ్ లోకుమ్చి దేముడుచి గుడితె జర్గు జతిసి ఉచర్లె, యూదుల్క ఎక్కిలొయి యెరూసలేమ్చి జోవయించి ఎక్కి దేముడుచి గుడితె తెడిక తెడిచి గదితె గెచ్చ అర్పితుమ్ దెంక జయెదె. వెర్సిక ఎక్కి సుట్టు జా గదిక అడ్డు కెర్తి తెరక జిన ఒత్తె పెన జా కామ్ కెరెదె. జొయ్యి మాన్సుక 'ఎత్తిక వెల్లో పూజరి' మెనుల. ఎబ్రియూల్ 9:1-7 దెక. ఈంజయ్ లోకుమ్చి దేముడుచి గుడితె జర్గు జతిసి, జలె, యేసు పరలోకుమ్తె జర్గు కెర్తినక టాలి జతయ్.

తా, అమ్చి రిసాచొ వెల్లో † ఎత్తిక వెల్లో పూజరి జా అస్సెచి రిసా, జోచి రిసా అమ్ ఒప్పున్ తిసి డిట్టుమ్ పోసనుమ.

15 కిచ్చొక మెలె, అమ్చొ ఎత్తిక వెల్లో పూజరి జతో జో యేసు అమ్చి సెక్తి నెంజిలిసి నేన్లొసా అమ్చి సెక్తి నెంజిలిన్చి ఉప్పిర్చి కన్కారుమ్ నేన్లొసా నెంజె, గని అమ్చ బాదల్ ఎత్తి జొయ్యి కి సేడ, అమ్చి రితి పరిచ్చు జా అస్సె. గని జో పాపుమ్ నే కెర్తె జిన అస్సె.

16 జలె, కామ్క జెతికయ్ సమ్మయుమ్క జోచి తోడు తతి రితి జో అమ్క కన్కారుమ్ దెకితి వరుమ్ అమ్ నజనుక, జోచి దయ అమ్ చజనుక మెన, దయరిమ్ తెన్ జోచి దయ దెతి సిజాసనుమ్క పాసి జెమ.

5

1 మాన్సుల్ తెంతో దేముడు నిసాన ఎత్తి ఎత్తిక వెల్లో పూజరిచి కామ్ కిచ్చొ మెలె, 'మాన్సుల్చి పాపుమ్ గెన్ను' మెనయ్ దేముడుచి మొక్కె జేవ్ మాన్సుల్చి నావ్ తెన్ బలివొ దెంక అస్సె.

2 జో పూజరి కి మాములుమ్ మాన్సు జా సొంత సెక్తి నెంజిలొసాచి రిసా నేన్లొసక చి తప్పు జలసక మెత్తన దెకెదె.

3 జోవయించి సొంత సెక్తి నెంజిలిన్చి రిసా, ఎక్కి అన్నె మాన్సుల్చ పాపల్చి రిసా నాయ్, గని సొంత పాపల్చి రిసా కి జో బలివొ దెంక అస్సె.

4 అన్నె, ఎత్తిక వెల్లో పూజరి ఎక్కిలొ జతిసి జో మాన్సుచి సొంత ఇష్టుమ్క జర్గు జతిన్ నెంజె. 'ఆవ్ పూజరి' మెన జో మాన్సు సొంత ఇష్టుమ్క టీవ్క నాయ్. దేముడు సొంత నిసాన జో ఎత్తిక వెల్లో పూజరి జంక జోక అదికారుమ్ తయెదె. దేముడు టీవ్కెకయ్, యూదుల్చొ పూర్గుమ్చొ

తొలితొచొ ఎత్తిక వెల్లో పూజరి జలొ అహరోనుక కిసి దేముడు బుకార్లో గే, దస్సి, జో దేముడు సొంత జో మాన్సుక బుకారుక.

5 దస్సి కి క్రిస్తు ఎత్తిక వెల్లో పూజరి జతిసి సొంత ఇష్టుమ్క గవురుమ్ కెరన్లొసి నెంజె, గని జోచి రిసా:

* "తుయి అంచొ సొంత పుత్తు, ఆజి తుక పాయ అస్సి"

మెన సంగిలొ దేముడు సొంత జోక నిసాన అదికారుమ్ దిలన్. 6 దేముడు అన్నెకతె సంగ రెగ్గయ్లి రితి;

† "మెల్కినెదెక్ కిసా పూజరి తిలొ గే, తుయి దసా పూజరి జా కెయ్క తెయ్క తా జా కామ్ కెర్తె" మెన జోచి రిసా రెగ్గ అస్సి.

7 యేసు మాన్సు జా జెర్మున్ జా ఈంజ లోకుమ్తె బుల్తె తిలి పొది, జలె, గట్టిజ కేకుల్ గల ఏడ ఏడ, జోక మొర్ము తెంతో పిట్టవుక సెక్తి తిలొ దేముడుక ప్రార్దనల్ కెర్తె తిలన్, చి దేముడు అబ్బొన్క జో బిలొసాచి రిసా, జో దేముడు అబ్బొసి జోచ ఆసల్ సూన్తె తిలన్.

8 జలె, జో జోచొ పుత్తున్ జలెకి, దేముడుచి కోడు పూర్తి నిదానుమ్ కెర్లె కిసి తయెదె గే, కిచ్చొ సైమల్ దుకుమ్ నొప్పుల్ జంక జయెదె గే, జొయ్యి దస్సి పూర్తి ఓర్పువ జా అజ్జయ్ జలొ, చి జో జేవ్ బాదల్ ఓర్పువ జలిన్ తెన్ జో దేముడు అబ్బొన్చి కోడు పూర్తి కెర్లెన్చి రుజ్జు అయ్లి.

9 అన్నె, జేవ్ బాదల్ సేడ ఓర్పువ జలిన్తె జోచి సెక్తి జోచి సత్తిమ్ పూర్తి రుజ్జు జతికయ్, పరలోకుమ్తె బెద కెయ్క తెయ్క తతి రచ్చున జోచి కోడు సూన కెర్తె ఎత్తి మాన్సుకయ్ జొయ్యి దొర్కు కెర్లెన్.

* 5:5 5:5 కిర్దనలు 2:7. † 5:6 5:6 కిర్దనలు 110.4, చి వల్లియుల్ 7:7 దెక. ‡ 5:6 5:6 జో మెల్కినెదెక్ రానొ కి పూజరి కి జా తిలొ. అదికారుమ్ 14:18. జో యెరూసలేమ్తె ఏలువ కెర్తె తిలొ, ఒగ్గర్ పూర్గుమ్ పొది, యూదుల్ ఒత్త నే బన జత అగ్గె. క్రిస్తు ఈంజ లోకుమ్తె బుల్తె తిలి పొది, యూదుల్చి దేముడుచి గుడి యెరూసలేమ్తె తిలి. 7:1-3 కి దెక.

10 కిసి మెలె, 'మెల్మీసెదెక్చో రితో జో జంక' మెన దేముడు జోక 'ఎత్కిక వెల్లో పూజరి' మెనయ్ నావ్ తిలి.

అత్తుక నే వడ్డితె నేన్ల బాలబోదల్ రిత తా

11 ఈంజ ఎత్కిచి రిసా అమ్ ఒగ్గర్ సంగుక జతి, గని తుమ్చ కండ్లల్ బోయ్ ర జల రిత జలి రిసా జా అర్దుమ్ సంగుక అల్లర్ జతసుమ్.

12 కిచ్చొక మెలె, తుమ్ ఎదిలి ఎద అన్నె మాన్సుల్క సికడ్డన జంక జతి, గని దేముడుచి కోడుతె ముక్కిమ్ తిలిసి ఎత్కి మొదొల్ తెంతో తుమ్క సికడుక అవ్సురుమ్ జలి. తుమ్క అప్పెక కి దూదు అవ్సురుమ్, మాములుమ్ అన్నిమ్ కతి రితి తుమ్ వడ్డుక నేతయ్.

13 కో రితి దూదుక జితయ్ గే, బాలబోదల్ రితో తా, సత్తిమ్చి రిసాచి బోదన అర్దుమ్ కెరసుక నెత్తె, సత్తిమ్ ఇండితిన్చి రిసాచి బోదన నెరవెర్సుప కెరుక నెత్తె.

14 గని మాములుమ్ సెక్తిచి అన్నిమ్ కక్క కవడుక జయెదె మెలె, కిచ్చొ కిచ్చొక 'గద్దె' గే 'చెంగిల్చి' గే నిసితి రితి అలవాట్ కెరన సత్తిమ్ ఇండితి వాట్ సిక కెర అగ్గె ఇండితసకయ్.

6

ప్రబుక నంప కెర పడ్డో అన్నె ముల్లిన్చి రిసా

1 జాకయ్, క్రీస్తుచి రిసా మొదొల్క ఇదిలిదిల్ సికితినతె నే టీచ్చు తతె, అత్తుక వడ్డుమ. ఎక్కి మొదొల్ తెంతో చి ఇదిలి నముకుమ్తె తంక నాయ్. కీసచతె మెలె, కామ్క నెంజిత కమొక దుకుమ్ జా ముల దేముడుక నంపజంక దెర్తిసి,

2 సుద్ది కెరంతి *దొవన్తిన్చి రిసాచి బోదన, బోడిలె చడితిన్చి రిసాచి బోదన, మొర్లన అన్నె జీవ్ జంక తిలిన్చి రిసాచి

బోదన, ఆకర్ దీసిక చి వెల్లి పరిచ్చు చి జేవ్చ తీర్పుల్చి రిసాచి బోదన.

3 ఇని దసచ ఎత్కి కి మొదొల్, చి ప్రబు సెలవ్ దిలె, ఎక్కి దసచక ఉచరుక ముల దా, అత్తుక వడ్డుమ్దె.

4 కిచ్చొక మెలె, కేన్ జవున్ మాన్సు తొలితో నంపజా ప్రబుచి ఉజిడతె జా, పరలోకుమ్చి రచ్చన వరుమ్ చక దెక, దేముడుచి సుద్ది తిలి అత్తుకె వాట దొర్కు జలి,

5 దేముడుచి కోడుచి రుసి చక తా, జెతికయ్ ఉగుమ్చి సెక్తి చక తిలె, పట్టో జేవ్ పొరపాట్ జా క్రీస్తుక ములిలె, జోవయించి పాపుమ్చి రిసా జేవ్ దుకుమ్ జతి రితి జేవ్క చెంగిల్ వాట్తె అన్నె కడ ఆసుక నెంజె. కో నెత్తిర్తి.

6 కిచ్చొక మెలె, జేవ్ జోక ములిలిసి జేవ్ సొంత, దేముడుచి పుత్తుక అన్నె సిలువతె గల మార్లి రితి జతయ్, చి అన్నె మాన్సుల్ జోక నిస్కారుమ్ కెర జొక్కర్లి రితి జోచి నావ్ కడ్డి రితి జతయ్.

7 కిసి మెలె, జేవ్తె ఒగ్గర్ సుట్లు పెట్టి పాని కేన్ బుయి పియ తా, జా బుయ్యె పంటో పికడ్డనక చెంగిల్ కామ్క జెతికయ్ పంటో దిలె, దేముడు తెంతో జేవ్చి వాటచి వరుమ్ జా బుయి నజన్తయ్.

8 గని, జా బుయి రితయ్ కంట రూకుల్ గట్ట దిలె, కామ్క నెంజిలిసి, చి జొక సాపెనల్ దెంక జయెదె. ఆకర్క జేవ్క డయ గెలుకయ్ తయెదె.

దయిరిమ్ కొడొ సంగిలిసి
9 అమ్ ఇని జాగర్ల సంగిలె కి, తుమ్చి రిసా, బావుడ్లు, కిచ్చొ ఉచర్లసుమ్ మెలె, ఈంజ రచ్చనతె బెదిత అన్నె చెంగిలి వరల్ తుమ్క దొర్కు జవున్ మెన అమ్క దయిరిమ్.

10 కిచ్చొక మెలె, దేముడుచి రిసాచి తుమ్చి కామ్, అగ్గె కి అప్పె కి జోచయ్ జల మాన్సుల్క తుమ్ తోడు కెర, జోచి ఉప్పిర్చి తుమ్చి ప్రేమ దెకయ్లిసి జో

* 6:2 6:2 నెంజెల 'బాప్తిసుమ్ నజన్తిన్చి రిసాచి....'

పచ్చె నాయ్ మెన, దస్సి పొరపాట్ తీర్పుచో నెంజె మెన, అమ్క దయిరిమ్.

11 తుమ్చి రిసా అన్నె కిచ్చో ఆస జా అస్సుమ్ మెలె 'జర్గు జయెదె' మెన తుమ్ నంపజలిసి పూర్తి నెరవెర్పువ జతి రితి తుమ్ ఎక్కి నిదానుమ్ ఎక్కి ఆస తంక.

12 తుమ్ దస్సి నిదానుమ్ తాఁ గెలె, బడ్డుకుమ్ నే జతె, దేముడు ప్రమానుమ్ సంగిలిన్చి వాట జోవయించి నముకుమ్చి జోవయించి నిదానుమ్చి రిసా కలుగు జతె అన్నె మాన్సులచి రితి తుమ్ ఇండితె, జయ్యి అమ్చి ఆస.

అబ్రాహామ్ నంపజా నిదానుమ్ తతికయ్ జెయిమ్ జలిన్

13 అబ్రాహామ్ పూర్గుమ్చొక దేముడు ప్రమానుమ్ సంగిలి పొది, జో దేముడు సొంతచి కంట కెయ్ కో వెల్లో తతి నాయ్ చి రిసా, అన్నె వెల్లో సుదొచి నావ్ దెర ఒట్టు గలుక అవ్కానుమ్ నాయ్ చి రిసా, జోచి సొంతయ్ నావ్ తెన్ ఒట్టు గలన,

14 కిచ్చో ప్రమానుమ్ సంగిలన్ మెలె, †“తుక కచితుమ్ దీవెన దా జెయిమ్ కెర తుమ్చి సెకుమ్చ ఒగ్గరిజిన్ జతి రితి జర్గు కెరిందె”

15 దస్సికయ్, అబ్రాహామ్ నిదానుమ్ తా ఎత్తి ఓర్పువ జతికయ్, జా ప్రమానుమ్ తిలిసి జోక దొర్కు జలి.

16 మాన్సుల్, జోవయించి కంట కేన్ జవున్ వెల్లో సుదొచి నావ్ దెర ఒట్టు గల్తతి, చి జోవయించ తగుల్ ఎత్కితె ఒట్టు గలిలె, 'నిజామ్' మెంతతి.

17 దస్సి జో సంగిలి ప్రమానుమ్తె వాట నజన్తనక జోచి కోడు పిట్టె నాయ్ మెన, జోచి ప్రమానుమ్చి నత్తిమ్చి రుజ్జు

దెకవుక మెన, జో ప్రమానుమ్ కెర్లిన్క 'నిజామ్ జర్గు జయెదె' మెలి గుర్తుక దేముడు ఒట్టు గలన్లన్.

18 దస్సి, దొన్ని నే పిట్ట కమొచి రిసా, మెలె ప్రమానుమ్చి రిసా కి జో ఒట్టు గలన్లిన్చి రిసా కి, జో దేముడు అబడ్డుమ్ జంక నెత్తెచి రిసా, అమ్ పర్లలోకుమ్తె పాఁవితి వరుమ్చి ప్రమానుమ్చి ఉప్పిర్చి దయిరిమ్, అమ్ డిట్టుమ్ దెరన్తి రితి, అమ్ జోచి రచ్చనతె నిగ అయ్లన దయిరిమ్ తంక జయెదె.

19 కేన్ జవున్ దొన్ని, జలె, వేరతె నే గెతి రితి లంగరు కీసి జాక డిట్టుమ్ టీవడెదె గే, దస్సి, పరలోకుమ్తె జో అమ్క పాఁవడ్డి వరుమ్చి ఈంజ అమ్చి దయిరిమ్ అమ్చి ఆత్మక అమ్క డిట్టుమ్ టీవడ్డయ్. అమ్క జో దిలి ఈంజ వరుమ్, జలె, అమ్క అడ్డు తిలి తెర ఒత్తల్తో అమ్ జీన తెడిక తెడిచి గదితె పెసితి రితి, పరలోకుమ్తెయి పాఁవడ జీన్యత్యం.

20 ఒత్త జా †తెర ఒత్తల్తో మెలి కోడు యేసు అమ్చి నావ్ తెన్, అమ్క రచ్చన దొర్కు కెర్తి రిసాయి పురెతో నిగ గెచ్చు పాఁవ అస్సి గెద, చి రానొ జలో మెల్కిసెదెకవ్ రితో ఎత్కిక వెల్లో పూజరి జో జా, కెయ్క తెయ్క అమ్క దేముడు అబ్బొన్చి మొక్కె తోడు తయెదె.

7

మెల్కిసెదెకు కెయ్క తెయ్క పూజరి

1 ఈంజొ మెల్కిసెదెకు, జలె, ఒగ్గర్ పూర్గుమ్ పొది సాలేమ్క రానొ జలోసా, ఎత్కిచి ఉప్పిరి వెల్లో జలో దేముడుచి

† 6:14 6:14 అదికాండుమ్ 22:17. ‡ 6:20 6:20 యూదుల్చి దేముడుచి గుడితె తెడిక తెడిచి గదితె ఎత్కి ఎత్కిక వెల్లో పూజరి గని అన్నె లోయి నే గెతి రితి తెర అడ్డు తయెదె. పరలోకుమ్తెవ్ ఎత్కిక వెల్లో పూజరి, జలె, యేసుయి. జోయ్యి ఒత్త అడ్డు తిలిన్క జీన అస్సి, చి జోవయింక నంపజలనకయ్ కి జీన్యత్యం. యేసు మొర్లిన్ తెన్ని యెరూసలేమ్తె యూదుల్చి దేముడుచి గుడితెచి తెర ఉప్పిరి తెంతో ఎట్టో ఎద పూర్తి చిరి జా గండల్ జలి. దస్సి జర్గు జలిసి టాలి జా అమ్క కిచ్చో రుజ్జు దెకయ్తయ్ మెలె, జో మొర్లిన్ తెన్ని అమ్క చి ఎత్కి అదికారుమ్ తిలొ దేముడుక అడ్డు తిలి పాపుమ్ గెచ్చయ్లిసి. మత్తయి 27:51, మార్కు 15:38, లూకా 23:45, వల్లియుల్ 9:1-3, 10:19-20.

సేవ కెర్టో పూజరి జలోసా, జలె. రాసల్క జీన మార్గిన్ తెంతో * అబ్రాహామ్ పూర్ణుమ్చో బుల జెతె తిలి షొది, జో మెల్కీసెదెక్ జోవయింక దస్సుల్ జా జోక చెంగిల్ వరుమ్ దిలన్.

2 వరుమ్ దెతికయ్, జో మెల్కీసెదెక్క మరియాద కెర్తి రితి అబ్రాహామ్ జోక కలుగు జలిసి ఎత్కితె దెస్సు వాటల్క ఏక్ వాట దిలన్. జో మెల్కీసెదెక్, జలె, ముక్కిమ్క జోచి నావ్చి అర్దుమ్ తిలి రితి † పున్నిమ్క రానో జలోసా, పడ్డో సాలేమ్ పట్టుమ్క కి జో రానో. ‡ సాలేమ్క జో రానో జయెదె మెలె, సాంతిక సేంతుమ్క జో రానో జయెదె.

3 జోవయింక కేన్ అబ్బొన్ అయ్యున్ పాయితి నాయ్, జో కేన్ సెకుమ్చో నెంజె, చి జోచి జీవితమ్క 'మొదోల్ జలి' జవున్ 'కేడ గెలి' జవున్ మెనుక నెంజె. దసచ జోక నాయ్, చి దేముడుచో పుత్తున్ రితో జా, కెయ్క తెయ్క జోచో పూజరి జా తత్తయ్.

4 జో మెల్కీసెదెక్ కెర్టో వెల్లో సుదో జయెదె గే, అప్పె ఆవ్ రెగిడ్డ కొడెతె తుమ్ అర్దుమ్ కెరస. అమ్చో పూర్ణుమ్చో జలో అబ్రాహామ్ కి జోక కలుగు జలిసి ఎత్కితె దెస్సు వాటల్క ఏక్ వాట దా గెలన్. జో దస్సి కెర్లిన్ తెన్ మెల్కీసెదెక్క 'ఒగ్గర్ వెల్లో' మెన ముక్కిమ్చో అమ్చో పూర్ణుమ్చో అబ్రాహామ్ ఒప్పన్లన్ మెన రుజ్జు జతయ్.

5 అహారోనుచి తెడి ప్రెజల్ ఎత్కిక కీలేవీ పూర్ణుమ్చోచి తెగచ మున్నుబోదల్ పూజర్లు జా, దేముడుచి కొడెతె రెగిడ్డి రితి, ప్రెజల్ ఎత్కిక కలుగు జలిసిచి దెస్సు వాటల్కె ఏక్ వాట నజనుక దేముడుచి ఆగ్గు జా అస్సె. కత్తెయ్ జేవ్ సంగుక మెలె, జోచ

బావుడ్లు జల అబ్రాహామ్చి సెకుమ్చ అన్నె తెగల్చతె; జేవ్ కి అబ్రాహామ్చి సెకుమ్చ జలెకి.

6 పడ్డో, కేన్ సెకుమ్ నెంజిలో ఈంజి మాన్సు జలో మెల్కీసెదెక్, మాత్తుమ్, అబ్రాహామ్చి అత్తి దెస్సు వాటల్కె ఏక్ వాట నజన్లొ. పడ్డో, దేముడు ప్రమానల్ దిలో జో అబ్రాహామ్క మెల్కీసెదెకు చెంగిల్ వరుమ్ దిలన్.

7 దాకు సుదోక వెల్లో సుదో దీమెన కెరెదె మెన ఎత్కిజిన్ జాన వేర సంగితి నాయ్.

8 పడ్డో, ఈంజి లోకుమ్తె దెస్సు వాటల్కె ఏక్ వాట నజిన్తస మొర్తయ్ మాన్సుల్ జవుల, గని పరలోకుమ్తె నజన్తోసా, జలె, జోవయింక 'జివ్వి అస్సె' మెన దేముడుచి కొడెతె పూర్తి రుజ్జు జా అస్సె.

9 పడ్డో అన్నె కిచ్చో మెనుక జయెదె మెలె, దెస్సు వాటల్కె ఏక్ వాట నజితె తిలో లేవీ పూర్ణుమ్చో, జోచి సెకుమ్తె జెర్మిల పడ్డెచ పూజర్లు తెన్ సాంత అబ్రాహామ్చి అత్తి మెల్కీసెదెక్క దెతి వాట దిలన్, దెతతి, మెనుక జయెదె.

10 కిసి మెలె, అబ్రాహామ్ తెన్ మెల్కీసెదెక్ దస్సుల్ జలి షొది, జో * లేవీ తెదోడి కి అబ్రాహామ్చి పెట్టి తిలన్ మెనుక జయెదె. అబ్రాహామ్చి సెకుమ్తె పడ్డో జెర్మిలన్.

మెల్కీసెదెక్ జలో రితో క్రిస్తు పూజరి

11 పడ్డో, 'లేవీచి తెగతె జెర్మిలస పూజర్లు జేవ్ కెర్తి కమెతె మాన్సుల్చి పాపుమ్ జా వాల్ గెలి చి పున్నిమి పూర్తి జా అస్సి' మెనుక జతి జలె; జయ్యి ప్రమానుమ్చి తెడి ప్రెజల్క ఆగ్గుల్ దోర్కు జలి, గెద; జలె, ఒత్త సుద్ది జతిసి పూర్తి జతిసి దోర్కు జతి జలె, అహారోనుచి రితి, మెలె, లేవీయుల్చి రితి ముల,

* 7:1 7:1 ఆదికాండుమ్ 14:17-20. † 7:2 7:2 జోవయింక నావ్చి అర్దుమ్ కిచ్చో మెలె, 'పున్నిమ్ అంచో రానో'. ‡ 7:2 7:2 'సాలేమ్' మెలి నావ్చి అర్దుమ్ కిచ్చో మెలె, 'సేంతుమ్' 'సాంతి'. § 7:5 7:5 నిర్లమకాండుమ్ 32:25-29, 38:21. * 7:10 7:10 లేవీచి సెకుమ్తె పూజర్లు పడ్డో జెర్మిల. జయ్యి సెకుమ్తె జెర్మిల.

‘మెల్కిసెదెక్చో రితో పూజరి జంక’ మెన కిచ్చొక యేసుక దేముడు టీవో కెలాన్?

12 వేర రగుమ్ పూజరి జతి రితి మార్పుప కెర్తె, వేర రగుమ్ ఆగ్గుల్ కి మార్పుప జెతయ్.

13 ఈంజేవ్ కొడొ కచి రిసా గే, జో అగ్గెచ పూజర్లు జెర్మిలి తెగచో నెంజె. ఇన్నెచి తెగతెచ కోయి అగ్గె పూజర్లు జతి నాయ్.

14 మెలె, లేవీచి తెగతె నాయ్, గని యూదాచి తెగతెయి అమ్చో యేసుప్రబు జెర్మిలన్ మెన ఎత్కిజన్ జాన్ల, చి ఈంజె తెగచి రిసా పూజర్లు జతి కేన్ కోడు కి అమ్క ఆగ్గుల్ దిలో మోసే పూర్గుమ్చో సంగె నాయ్.

15 అగ్గెచి ప్రమానుమ్చి, అప్పెచి ప్రమానుమ్చి తేడ కీసి అన్నె సొస్టుమ్ డిస్తయ్ మెలె, మెల్కిసెదెక్చో రితోచో ఈంజో అన్నెక్కో పూజరి అయ్లిన్ తెన్ని డిస్తయ్.

16 మెలె, ఈంజో పూజరి జలిసి కీసిచి మెలె, ఆగ్గుల్చి మొక్కె నాయిమ్ తిలి రితి కేన్ జవున్ తెగతె జెర్మిలి రిసా ఎక్కిలో పూజరి జతిన్చి రితి నెంజె, గని కెయెక తెయెక నే మొర్తె చెంగిల్ తతి జివ్వి జో యేసు తిలిన్చి సెక్తికయ్ జో పూజరి జా అస్సె.

17 మెలె జోచి రిసా దేముడుచి కోడు సాచి సంగిలి రితి;

†“మెల్కిసెదెక్ కీసా పూజరి జా తిలో గే, తుయి దసా పూజరి జా కెయెక తెయెక తా జా కామ్ కెర్తె”

మెన రెగిడ్డిసి.

18 జలె, అగ్గెచ ఆగ్గుల్క దెకిలె, జేవ్చి సెక్తి నెంజిలిన్చి రిసా జా కామ్క నెంజిలి రిసా “జా పోని” మెన దేముడు సంగితయ్.

19 †కిచ్చొయ్ పూర్తి జతి రితి జా ఆగ్గు రితి కో జర్గుప కెరుక నెతిర్తి. గని నొవి కోడు బార్ జలి తెంతో, అన్నె

వెల్లి వరుమ్చి రిసాచి దయిరిమ్ అమ్క దొర్కు జా అస్సె. మెలె, ఈంజె వరుమ్చి రిసా, ఈంజయ్ వరుమ్చి ఉప్పిర్చి దయిరిమ్చి రిసా, అమ్ దేముడుక పాసి జా జెతసుమ్.

20 అన్నె, యేసు పూజరి జతి ఈంజె నొవి వరుమ్ ఒట్టు నెంజిలిసి నెంజె. ఒట్టు తెన్ చి జతయ్, చి అన్నె విలువ అస్సె.

21 అగ్గెచి ప్రమానుమ్క పూజర్లు జలస, జలె, ఒట్టు నెంతె పూజర్లు జల, గని ఈంజె నొవి వరుమ్ జలె, ఒట్టు గలిలిసి. కిచ్చొ ఒట్టు గలిలిన్ మెలె,

‡“తుయి కెయెక తెయెక తతో పూజరి, మెన

అవ్ దేముడు ఒట్టు గలస అస్సి, చి అంచి మెన్ను అవ్ మార్పుప కెరసి నాయ్”

మెన దేముడు యేసుచి రిసా ఒట్టు గలస అస్సి.

22 దస్సి, అగ్గెచి ప్రమానుమ్ కోడుచి కంట యేసు మదెనె జతి ప్రమానుమ్ కోడు కచితుమ్ జెయిమ్ జతిసి మెనయ్ ఈంజె కోడుతె రుజ్జు జతయ్.

23 అగ్గెచ పూజర్లు ఒగ్గర్జిన్ జల. కిచ్చొక మెలె, జేవ్ మొర్తనయ్ జవులచి రిసా కెయెక తెయెక పూజర్లు జా తంక నెతిర్తి. ఎక్కిలో మొర్తె, *అన్నెక్కో పూజరి జంక, మెలి రితి జతతి.

24 గని ఈంజో యేసు కెయెక తెయెక తా గెతోసా జా అస్సెచి రిసా ఈంజోయి పూజరి జలిసి కెయెక తెయెక తా గెతిసి.

25 జాకయ్, ఇన్నెచి తెడి కో ఎద్దికి అదికారుమ్ తిలో దేముడుక పాసి మెలి రితి జెతతి గే, జేవ్ కెయెక తెయెక రచ్చనతెయి తతి రితి పూర్తి రచ్చన దెంక ఈంజోయి తెరె; దేముడుక చి అమ్క ఈంజోయ్ మదెనె జా అమ్ నంపజల మాన్పులచి రిసా దేముడుచి మొక్కె టీవ

† 7:17 7:17 కీర్తనలు 110:4 చి ఎబ్రియల్ 5:6 దెక. ‡ 7:19 7:19 రోమియల్ 3:20-22, 8:3-4.

§ 7:21 7:21 కీర్తనలు 110:4. * 7:23 7:23 ఎక్కె దడి మొత్తుమ్ విస్సెక్ చెత్తర్జిన్ మాములుమ్ పూజర్లు తవుల, పణ్ణె ఎత్కిక వెల్లో పూజరి కి తయెదె.

ప్రార్థనల్ కెర్తతి రితి కెయక తెయక జివ్వి అస్సె.

26 పరలోకుమచి సుద్ది తిలో కిచ్చొ పొరపాట్ నెంజిలో, కిచ్చొ గర్బి నెంజిలో, ఎద్గరె పాపుమ్ నెంజిలో, ఆగాసుమచి ఉప్పిరి వెగ వెల్లో పూజరి అమ్క దొర్కు జంక దొర్కు జలో.

27 జేవ్ అన్నె ఎత్తిక వెల్లెల పూజర్లుచి రితి జో రోజుక అర్పితల్ దెంక నాయ్. జెచ్చి పూజర్లు, జలె, తొలితో జోవయించ సొంత పాపల్చి రిసా, పడ్డొ పైజల్చ పాపల్చి రిసా, అర్పితల్ దెతతి. జో, జలె, పాపుమ్ సుదొ నెంజె, చి సొంతచి రిసా అర్పితుమ్ దెంక, నాయ్, చి పైజల్చి రిసా ఎక్కి సుట్టు జోచి సొంత జీవ్ దా, కెయక తెయక కామ్క జెతిన్ జలి అర్పితుమ్ జలన్.

28 దస్సి, కిచ్చొ దెకితసుమ్ మెలె, నెక్తి నెంజిల మాన్సుల్ పూజర్లు జతిసి ఆగ్గుచి ప్రమానుమతె తయెదె, గని ఆగ్గుచి కంట పడ్డొ అయలి జో ఒట్టు గలన్ల కోడుకయ్ దేముడు కిచ్చొ సెలవ్ దిలో మెలె, పూర్తి జలో జోచొ పుత్తున్కయ్ 'కెయక తెయక తతో పూజరి జవున్' మెనయ్ జో దేముడు జోక టీవడ అస్సె.

సుద్దిచి, తెడిక తెడిచి గదితె, జోచి నేవ కెర్తయ్.

3 జలె, బలివొ అర్పితల్ దెంక మెన ఎత్తి పూజరి నిసాన అస్తి. జాకయ్, ఈంజొ పూజరి కి కిచ్చొగె బలి దెంక జోచి అత్తి కిచ్చొ జకు తంక అస్సి.

4 జలె, బూలోకుమతె అప్పె తత్తో జలె, ఈంజొ పూజరి జా తత్తో నాయ్. కిచ్చొక మెలె, ఆగ్గుల్ రితి తెన్ బలివొ దెత పూజర్లు లేవీచి సెకుమచ అస్తి. ఈంజొ, మాత్తుమ్, జా సెకుమచొ నెంజె.

5 అమ్ యూదుల్చ ఈంజొయ్ లోకుమచ జేవ్ పూజర్లు, జలె, జోవయించి కామ్ కీసిచి మెలె, పరలోకుమచి దేముడుచి గుడితె జర్లు జతిన్క టాలి రితి నీడ రితి జా, ఒత్తచి టంబుగుడ్డ ఒత్తచి దేముడుచి గుడితె జర్లు జతిన్క ఇదిల్ అర్దుమ్ జవున్ దెకయ్తయ్. కీసి మెలె, జా టంబుగుడ్డ పూర్లుమ్ మోసి బందవుక దేముడు సంగిలి పొది, జో దేముడు ప్రబు కిచ్చొ మెన జోక ఆడ్ర దిలన్ మెలె, *“జా డొంగురుతె తుక ఆవ్ దెకయ్లి రూపుమ్కయ్ ఎత్తి తెయార్ కెరుక దెకను. జయ్యి రూపుమచి బందవు” మెలన్.

8

నొవి ప్రమానుమచి రిసాచి కోడు

యేసు పరలోకుమతె అబ్బొన్చి ఉజెతో పక్క వెన అస్సి

1 జలె, అమ్ సంగితిన్చి అర్దుమ్ కిచ్చొ మెలె, దసా కెయక తెయక తతో పూజరి అమ్క అస్సె. జో పరలోకుమచొ వెల్లో రానొ జలో దేముడు అబ్బొన్చి ఉజెతో పక్క వెన తా,

2 మాన్సుచి అత్తి నాయ్ గని దేముడు ప్రబుచి అత్తి తెయార్ జలి పరలోకుమచి నిజుమ్ జలి టంబుగుడితె, పరలోకుమచి ఒగ్గర్

6 ఈంజొ యేసు అప్పె అన్నె ఒగ్గర్ ప్రమానల్క కి నిసాన జా, అన్నె ఒగ్గర్ ఆగ్గుల్క నెడిమిచొ జా తంక మెన, అన్నె ఎత్తిక వెల్లో కామ్ కెర్తసా జలో. కిచ్చొక మెలె, అన్నె ఈంజ చెంగిల్ ప్రమానల్ జర్లు జతిసి.

7 తొలితో చి ప్రమానుమ్ కిచ్చొ పిట్టిన్ నెంజిలిసి జతి, జలె, అన్నెక్ ప్రమానుమ్ దొర్కు జతి నాయ్.

8 జా ప్రమానుమ్ దొర్కు జలనక 'జా ప్రమానుమతె పిట్ల, పిట్లవన్ల' మెన ఎత్తి

* 8:5 8:5 నిర్గమకాండుమ్ 25:40.

అదికారుమ్ తిలో దేముడు ఒప్పున్ తిసి
కిచ్చొ కోడుతె రుజ్జు జతయ్ మెలె,

† “ఇస్రాయేలుచి గేర్చక చి కియూదాచి
గేర్చక ఆవ్
నొవి ప్రమానుమ్ దెత దీసల్ జెవుల”
మెన ప్రబు సంగితయ్.

9 “జా నొవి ప్రమానుమ్, జలె,
జోవయించ పూర్గుల్క ఆవ్ దిలి
ప్రమానుమ్చి రితిచి నెంజె.

జోవయించి ఆత్తు దెర జోవయింక
ఐగుప్తు దేసిమ్ తెంతో విడ్డల్
కెర

కడ దెర నిలి దీసి జా ప్రమానుమ్ దిలయ్.

గని, అంచి జా ప్రమానుమ్క సత్తిమ్ కెర్తి
నాయ్,

సత్తిమ్ ఇండితి నాయ్ చి రిసా ఆవ్
పసుల

జోవయింక ములిల్ రితి జా దెకి నాయ్,
మెన ప్రబు సంగితయ్.”

మెన జో దేముడు రెగ్డయ్లి కోడు అస్సె.
గని ఒత్త తెంతో కిచ్చొ దయిరిమ్ దెతి
కోడు సంగితయ్ మెలె,

*
10 “గని, అమ్చ ఇస్రాయేలుల్ మెలి
గేర్చక పడ్డెచ దీసల్క

నొవి ప్రమానుమ్ దెయిందె మెన
ప్రబు కిచ్చొ సంగితయ్ మెలె,

జోవయించ ఆత్మల్తె అంచ ఆగ్గుల్ ఆవ్
తియిదె,

జోవయించి పెట్టి అంచ ఆగ్గుల్ రెగిడిందె,
చి

అవ్ జోవయించో దేముడు జయిందె, చి
జేవ్ అంచయ్ ప్రెజల్ జా తవుల.

11 అస్సె, జేవ్ దీసల్క జేవ్ ఎక్కిలోక
ఎక్కిలో బుద్ది సికడుక తయె
నాయ్.

జోవయించ బావుడ్డివొక ప్రబు తెన్
తుమ్ బెద, మెన

ఎత్తి మాన్సు సికడుక తయె నాయ్.
కిచ్చొక మెలె,

జేవ్ దీసల్క జేవ్ బాల వెల్లో కి ఎత్తిజిన్
అంక జానుల.

12 కిచ్చొక మెలె,
జోవయించ పాపల్ ఆవ్ చెమించువ
కెరిందె,

జోవయించ తప్పుల్ ఆవ్ పచ్చ
గెలిందె”

మెన దేముడు ప్రబు సంగితయ్.

13 దస్సి నొవి ప్రమానుమ్చి రిసా
సంగ, అగ్గెచిక ‘కామ్క నెంజె’ మెన

ఒప్పున్తయ్. అస్సె, కామ్క నెంజిలి రితి
జతిసి పొర్ని జా పూర్తి కేడయ్ గెచ్చెదె.

9

దేముడుచి గుడితె కిచ్చొ కిచ్చొ తిలిసి

1 జలె, అగ్గెచి ప్రమానుమ్తె కిసి బక్తి
కెరుక గే ఆగ్గుల్ తిలి, చి ఈంజ లోకుమ్చి
రగుమ్చి ప్రబుక బక్తి కెర్తి టాన్ తిలి.

2 మెలె, టంబుగుడ్డ తెయార్ కెర్ల,
చి యూదుల్చ ప్రెజల్ ఎత్తిజిన్
పెసితి పురైతిచి టంబుగుడ్డ గదితె
దీవుకంబుమ్చి పోడియె బలి దెతి బల్ల
తిల. జా గదిక దేముడుక సుద్ది తతి టాన్
మెనుల.

3 వడ్డె, జా వెల్లి గదిచి గుమ్ముమె
తెర ఒడొవ తిల, అస్సె తెడిక, జా
గది జీన్లె, అన్నెక్ టంబుగుడ్డ గది తిలి.
జాక ‘దేముడుక ఒగ్గర్ సుద్ది తతి టాన్’
మెనుల. జాక అన్నెక్ తెర గూడు తిలి.

4 జా తెడిక తెడిచి గదితె దూపుమ్
డయితి బజర్చి పీటుమ్ తిలి, చి
దేముడుచి తెదొడెచి ప్రమానుమ్క గుర్తు
జతి పెట్టె తిలి. జా పెట్టెతె ఎత్తి పక్కలె
ఉప్పిరి బజార్ పుజడ తిల. జా పెట్టెచి

తెడి *మన్నా మెన పరలోకుమ్ తెంతో
దేముడు పూర్గుమ్ సువ తిలి అన్నిమ్
ఇదిల్ దెర్తి బజర్చి మర్రముంత తిలి.
పడ్డె అస్సె అగ్గె ఐగుప్తు దేసిమి జేవ్

† 8:8 8:8 యిర్మీయా 31:31-32. ‡ 8:8 8:8 యూదుల్క ‘ఇస్రాయేలుచి గేర్చ’ మెనుల కి. § 8:8 8:8

‘యూదా’ మెలె, ఇస్రాయేల్ మెలె యాకోబుచొ పుత్తున్ జిలో యూదా. * 8:9 8:9 యిర్మీయా 31:33-34.

* 9:4 9:4 నిర్గమకాండుమ్ 16:1-35. † 9:4 9:4 నిర్గమకాండుమ్ 7:8-13.

అమ్చ యూదుల్ తిలి పొది గజ్జల్ జా తిలి అహరోనుచి †టెక్నొ డండొ, వడ్డొ జా పొర్నిప్రమానుమ్చ ఆగ్నల్ రెగిడ్ల †పత్రల్ తిల.

5 జా పెట్టెచి ఉప్పిరి, మెలె, దేముడు పాపల్ చెమించువ కెర్తి గుర్తుచి జా పెట్టెచి ఉప్పిరి దొన్ని బజర్చ దూతల్చ బొమ్మల్ టీవ, జా పెట్టెక దెకిల్ రితి వంపొ జా తిల. ఈంజ ఎత్కిచి రిసా అన్నె ఒగ్గర్ సంగుక నెత్తుమ్.

6 జా ఎత్కి తెయార్ జలి తెంతొ, జా టంబుగుడ్డచి పురైతొచి గదితె పూజర్లు గెచ్చుక జెంక జతె తా జోవయించి సేవచ నీతికమొ కెరై తత్తతి.

7 గని తెడిక తెడిచి గదితె ఎక్కి, ఎత్కిక వెల్లో పూజరి, వెర్సెక్ ఎక్కి సుట్టు గెతయ్. గెలె, లోయి నెంజతె బెరుక నాయ్. నే జాన్తి రితొ కెర్ల జోవ పాపల్చి రిసాచి, ప్రైజల్చ పాపల్చి రిసా బలి దెతి లోయఁ తెన్ బెరుక అస్సె.

8 ఈంజ టాలి దెకవ దేముడుచి సుద్ది తిలి ఆత్మ కిచ్చొ అర్లుమ్ దెకయ్తయ్ మెలె, జా పురైతొచి గదిచి తెడిచి తెర అడ్డు టీవ్తి ఎదిలి సేంపు, దేముడుక ఒగ్గర్ సుద్ది తిలి తెడిక తెడిచి గదితె పెసుక మాన్సుల్క వాటు నాయ్.

9 జా పురైతొచి గదితె ఒడొయ్ జలి జేవ్చి జా తెర కిచ్చొచి రిసా టాలి జయెదె మెలె, ఈంజయి ఉగుమ్కయ్ టాలి జతయ్. దేముడుక ఈంజ ఉగుమ్తె కో నంపజా గెచ్చుల గే, ఉగుమ్ కేడ్లె జోతె గెచ్చుక అడ్డు తయె నాయ్. జా రితితె, జలె, బక్తి కెర్తొసాచి ఆత్మక సుద్ది కెరుక నెత్తెర బలివొ అర్పితల్ దెతతి.

10 దసచ రితి అన్నిమ్, పితిసి, ఆగ్ గె దొవన్తిసి, ఎక్కి ఆగ్కయ్ కామ్క జెత ఆగ్నల్ జతతి. నొవి ఆగ్నల్, నొవి వరుమ్ జర్లు నే జతె అగ్గె రకితె తిలిసి, జా.

క్రీస్తు పూజరి జా అర్పితుమ్ జలిసి

11 గని చెంగిల్ ప్రమానుమ్ అయ్లిన్క క్రీస్తు ఎత్కిక వెల్లో పూజరి జా అయ్లిన్ తెన్, మాన్సు తెయార్ నే కెర్లి, ఈంజయ్ రగుమ్ జెర్మున్ నే జలి, అన్నె వెల్లి అన్నె పూర్తి జలి రగుమ్చి టంబుగుడ్డతె, మెలె పరలోకుమ్తె దేముడు అబ్బొన్ తిలిన్తెయి పెన,

12 దేముడుక ఒగ్గర్ సుద్ది తతి టాన్తె కెయఁక తెయఁక కామ్క జెతికయ్, ఎక్కి సుట్టుయి యేసు పెసిలన్. పెన, గొరైల్చి, వసాన్సి పిల్లల్చి లోయి నాయ్, గని జోచి సొంత లోయి దా కెర, అమ్ అన్నె కెయఁక విడ్డల్ నే జతి రితి అమ్క అన్నె నెత్తోవన అమ్క జత బెదయ్లన్.

13 మెలె, గార్ జల మాన్సుల్చి ఉప్పిరి గొరైల్చి జవున్, వసాన్సి పిల్లల్చి జవున్ లోయి చించితిసి, నెంజిలె వస్సి పిల్లక డయిల్చి సార్ వించితిసి, ఎక్కి జోవయించి ఆఁగుచి కీడు గెచ్చయ్తి రితి జతయ్.

14 గని అమ్చి పాపుమ్ గెచ్చయ్తి అర్పితుమ్ జంక మెనయ్ క్రీస్తు జోచి పరలోకుమ్చి తాఁ గెతి ఆత్మసెక్తిక జోచి జీవ్ దా మొర్లన్. జా అగ్గెచి ప్రమానుమ్చ ఆర్పితుమ్లు మాన్సుచి ఆఁగుక సుద్ది కెర్తయ్ జలె, జోవయించి ఆత్మక యేసు దిలి సొంత లోయి అన్నె కెర్తి కామ్ కెరెదె! జాకయ్, జీవ్ తిలొ జీవ్ దెతి దేముడుచి సేవ ఆమ్ కెర్తి రితి, కామ్క నెంజిల మొర్తి రిత అమ్చ కమొ జో పుంచ గెల కెర, అమ్ లాజ్ జంక నెంజితి రితి, అమ్చి ఆత్మ జో సుద్ది కెరెదె,

15 దస్సి, ఈంజ నొవి ప్రమానుమ్క ఈంజొయి దేముడు అబ్బొన్క చి అమ్క మదెనె జతొసా జా అస్సె. దస్సి, ఈంజొ మొర దొర్కు జలి అర్పితుమ్ జలిన్ తెన్ అగ్గెచి ప్రమానుమ్చ కొడొ అమ్ పిట్టవన పాపుమ్ జలిన్చి సిచ్చ తెంతొ అమ్క

† 9:4 9:4 నిర్ణయకాండుమ్ 32:15-16.

విడ్డల్ కెర నెతోవ గెల అస్సె. కిచ్చొక ఇసి జర్గు కెర అస్సె మెలె, కక్క జో బుకారా తయెదె గే, ప్రమానుమ్ జలి కెయెడ తెయెడ చెంగిల్ తతి వాట్ జోవయింక దొర్కు కెరుక మెనయ్.

16 అన్నె కిచ్చొ ఉచరుక జయెదె మెలె, 'ఆవ్ మొర్రె అంచి అస్సి ఇసి దస్సి వంట దెతు' మెన మాన్సు ఏక్ కాగ్తుమ్ రెగ్గ తిలె, జేవ్ వాటల్ వంట దెంక జలె, తొలితో జో మాన్సు మొర్లిన్చి రిసా రుజ్జు జంక.

17 కిచ్చొక మెలె, మాన్సు మొర్రెకయ్ జో రెగిడ్లి దస్సి కాగ్తుమ్ కామ్క జెయెదె, గని జా రెగ్గయ్లోసా జీవ్ తిలి పొది కామ్క జెయె నాయ్. దస్సికయ్ జోచి అస్తిచి వాట జోచ మాన్సుల్క దొర్కు జవున్ మెనయ్ యేసు మొర గెలన్.

18 ఇసి, తొలితో చి ప్రమానుమ్ కి లోయి నూయి జలిన్చి జలి.

19 మెలె, ప్రెజల్ ఎత్తిక దేముడుచ ఆగ్గుల్చి ఎత్తి ఆగ్గు మోసే పూర్గుమ్చో నూనవ కేడయ్లి పడ్డో వస్సా పిల్లల్క చి, గొరెల్క కండ జోవయించి లోయి దెరన, పాని, ఎరన ఊలు, హిస్సొపు మొక్కచ రొడ్డల్ తెన్ జేవ్ ఆగ్గుల్ రెగిడ్లిన్చి ఉప్పిరి కి, ప్రెజల్ ఎత్తిచి ఉప్పిరి కి చించ దా,

20 "ఇసి కెర మెన దేముడు తుమ్క ఆడ్ర దిలి ప్రమానుమ్చి గుర్తుచి లోయి ఈంజ" మెన సంగిలన్.

21 దస్సి కి, జా టంబుగుడ్డతెచి బక్తి కెర్లిన్తె వాడిక కెర్లి సామన్ ఎత్తితె జా లోయి చించ దిలన్.

22 నిజుమి, ఆగ్గుల్ రితి తెన్, కేన్గె ఏక్క ముల, ఎత్తి వస్తవక లోయికయ్ సుద్ది కెరుల, చి లోయి నే నూయి జలె, పాపల్ చెమించువ జయె నాయ్.

యేసు అమ్చి పాపుమ్ పుంచ దా

23 దస్సి పరలోకుమ్తె జతిన్క టాలి జతిసి ఎత్తి లోయి నూయి జతిన్ తెన్ దస కమొకయ్ సుద్ది జంక అగ్గెయ దొర్కు జా తిలి, గని పరలోకుమ్తె బెదితిసి ఎత్తి అన్నె చెంగిలి బలి జతిన్కయ్ సుద్ది

జంక దొర్కు జలి. మెలె, క్రీస్తు బలి జలిన్కయ్.

24 మెలె, దేముడుక సుద్ది తతి టాన్తె క్రీస్తు పెస అస్సె. జా టాన్ మాన్సు తెయార్ కెర్లిన్ నెంజె, గని పరలోకుమీ, చి దేముడుచి సొంతచి మొక్క క్రీస్తు టీచ అమ్చి పచ్చెన జతయ్.

25 పడ్డో అన్నె, జోచి సొంత నెంజిలి లోయి దెరన, మాములుమ్ ఎత్తిక వెల్లో పూజి కో జలెకు వెర్నెక్క ఏక్ సుట్టు ఈంజయ్ లోకుమ్తె తిలి దేముడుచి గుడితెచి, ఒగ్గర్ సుద్ది తిలి టాన్తె పెనుక జతయ్. గని ఒగ్గర్ సుట్టు క్రీస్తు అర్పితుమ్ జంక నాయ్, కెయెడ తెయెడ అర్పితుమ్ జతె తంక నాయ్.

26 దస్సి జతి జలె, లోకుమ్ జెర్మయ్ జలి మొదొల్ తెంతొ ఒగ్గర్ సుట్టు జో జా సైమ నేడుక తత్తి. గని, ఉగుమ్చి ఆకర్ పొది జోచి సొంత జీవ్ దా, మాన్సుల్చి పాపుమ్ గెచ్చయ్తి అర్పితుమ్ జా, పాపుమ్ గెచ్చవుక మెన ఎక్కి సుట్టు జో టీవెలిన్ సరి జా అస్సె.

27 అన్నె, మాన్సుల్ కీసి ఎక్కి సుట్టు మొరుక అస్సె గే, చి పడ్డో దేముడుచి పరిచ్చు జవుల గే,

28 దస్సి, క్రీస్తు, ఒగ్గర్జినచ పాపల్ వయన గెచ్చవ గెలుక మెన సరిపుచువ జతి జా, ఎక్కి సుట్టు మొర గెలన్. చి అన్నెక్ సుట్టు డీసెదె; పాపుమ్ గెచ్చయ్తి రిసా నాయ్ గని సర్ద తెన్ జోవయింక రకితన రచ్చన జతిసి పూర్తి నెరవెర్చువ జతి రితి జర్గు కెరుకయ్ మెన జో అన్నె డీసెదె.

10

యేసు ఎక్కి సుట్టు మొర్లిన్కయ్ అమ్ సుద్ది జలిన్

1 జలె, వెర్నెక్క వెర్నెక్క దేముడుక బలివొ దెతతి అన్నె 'ఇసి కెర్లె దేముడుక పాసి జెమ్దె' మెన ఉచర్తతి, గని వెర్నెక్క

వెర్నెక్క, జేవ్ బలివో దిలెకి జోవయించి పాపుమ్ గెచ్చె నాయ్. జేవ్ బలివో దెతి ఆగ్గుల్ రితి సొంతయ్ రచ్చున దొర్కు కెర్రిసి నెంజె, గని జా రచ్చున జర్గు జతిన్క ఎక్కి టాలి ఎక్కి నీడయ్ జతయ్.

2 జేవ్ బలివో పాపుమ్ గెచ్చవుక తెరితి జలె, 'జెయిమ్ జలి' మెన అమ్చ యూదుల్ దనచ ములిత. నాయ్ గె? మెలె, బక్తి కెర్లన ఎక్కి సుట్టుకయ్ సుద్ది జత జలె, బలి దిలి పడ్డె 'పాపుమ్ తెన్ అస్సుమ్' మెన అన్నె ఉచర్త నాయ్.

3 గని ఈంజేవ్ బలివో దెతిన్ తెన్ వెర్నెక్క వెర్నెక్క మాన్సుల్ జోవయించి పాపుమ్చి రిసా ఉచరుక జతయ్. అమ్క ఏదాస్ట కెరయ్తయ్.

4 కిచ్చొక మెలె. వస్సా పిల్లల్చి గొర్రెల్చి లోయి అమ్చి పాపుమ్బుద్ది గెచ్చవుక ఎధరె నెత్తె.

5 జాకయ్, క్రీస్తు ఈంజ లోకుమ్తె అయ్లి పొది దేముడు అబ్బొన్ తెన్ జో లట్టల్లి రితి కిచ్చొ అస్సె మెలె,

*"బలివో అర్పితల్ తుయి నెసిలది, గని 'దొర్కు జలి బలి' మెన అంక తుయి ఆగ్ తెయార్ కెర అస్సిసి.

6 డయిత అర్పితల్చి రిసా, పాపల్ గెచ్చయ్తి గుర్తుచ అప్పెకచ అర్పితల్చి రిసా

తుక కిచ్చొ ఇస్టుమ్ నాయ్.

7 తెడొడి, దేముడుచి కొడొతె అంచి రిసా తుయి రెగ్గయ్లి రితి,

ఆవ్ కిచ్చొ మెలయ్ మెలె,

ఈందె, దేముడు ఓ బా,

తుచి ఇస్టుమ్ జెయిమ్ కెరుక మెన

ఆవ్ జా అస్సి" మెలయ్.

8 జలె, జా కోడు దెకిలె, "బలివో, అర్పితల్, డయిల బలివో, అప్పెకచ పాపుమ్ గెచ్చయ్తి గుర్తుచ బలివోచి రిసా తుక కిచ్చొ ఇస్టుమ్ నాయ్, దనచ

నెసిలది" మెన జో సంగ కెర; ఆగ్గుల్ రితి దనచ దెతతి, జలె, జో దస్సి సంగ కెర

9 అన్నె కిచ్చొ కోడు ఒత్త బెదయ్లో మెలె, "ఈందె తుచి ఇస్టుమ్ జెయిమ్ కెరుక మెనయ్ ఆవ్ జా అస్సి" మెలన్. జో దస్సి సంగిలిన్ తెన్ పొర్ని ప్రమానుమ్క 'జా పొన. కామ్క నెంజె' మెన్తయ్. 'నొవిచి ప్రమానుమ్ అవ్సురుమ్. ఈంజయి దొర్కు జలిసి' మెన నొవిచికి టీచడ్డి రిసా పొర్నిచి ముల దిల.

10 జోచి ఈంజయ్ సెలవ్క, యేసుక్రీస్తుచి ఆగ్ జా ఎక్కి సుట్టు మొర్లిన్కయ్, కెయ్క తెయ్క చెంగిల్ తతి రితి జోచి సుద్ది అమ్ జా జోచయ్ జా అస్సుమ్.

11 పడ్డె యూదుల్చొ ఎత్తి పూజరి రోజుక జోసేవ కెర్రిన్తె టీచ ఏక్చి ఉప్పిరి అన్నెక్, జాచి ఉప్పిరి అన్నెక్ ఒగ్గర్ బలివో దెతె తత్తయ్; పాపుమ్ గెచ్చవుక నెత్తిర్ బలివో దెతె తత్తయ్.

12 గని ఈంజొ క్రీస్తు, కెయ్క తెయ్క కామ్క జెతి రితి ఎక్కి సుట్టు పాపుమ్ గెచ్చయ్తి దొర్కు జలి అర్పితుమ్ దా కెర, దేముడుచి ఉజెతో పక్కి వెసిలన్.

13 ఒత్త వెన తా జోక విరోదుమ్ సుదల్ జలన జోచ చట్టో సుదితి పొద్రొ జతె ఎదక రకితయ్.

14 దస్సి ఎక్కి సుట్టు జో సొంత అర్పితుమ్ జా, సుద్ది జా, జోచయ్ జల మాన్సుల్క పూర్తి కెర్రిసి కెయ్క తెయ్క కామ్క జెతి రితి జో జర్గు కెర అస్సె.

15 అమ్క జో పూర్తి కెర్రిన్చి రిసా దేముడుచి సుద్ది తిలి ఆత్మ ఇసి మెన సాచి సంగ అస్సె.

16 † "ప్రబు సంగితిసి కిచ్చొ మెలె, జేవ్ దీసల్కచి పడ్డొక జోవయింక కిచ్చొ ప్రమానుమ్ దెయిందె మెలె, జోవయించి వెట్టి అంచ ఆగ్గుల్ తియిందె,

* 10:5 10:5 కీర్తనలు 40:6-8. † 10:16 10:16 యెర్మీయా 31:33.

జోవయించ ఆత్మతె అంచ ఆగ్నల్
రెగిడిందె”

మెన సంగ అన్నె కిచ్చి మెన్తయ్ మెలె,
17 † “తెదొడ్ తెంతో జోవయించ పాపల్,
జోవయించ తప్పుల్

ఆవ్ ఏదాస్ట నే కెరై పచ్చయ్ గెలిందె”

మెన దేముడు సంగితయ్.

18 జలె, పాపల్ చెమించుప జా అస్సి
మెలె, పాపుమ్ గెచ్చయ్త అన్నె అర్పితల్
నాయ్.

దేముడుక పాసి గెచ్చ సత్తిమ్
ఇండుమ

19 జాకయ్, బావుడ్లు, అమ్చి
పాపుమ్ గెచ్చయ్తి రిసా యేసుక్రీస్తు
జోచి లోయి సువ దిలి రిసా, దేముడుచి
పరలోకుమ్చి జోచి గుడితె, జోచి సుద్ది
టాన్తె అమ్ పెనుక అమ్క దయిరిమ్చి
రిసా,

20 మెలె, జోవయించి దేముడుచి గుడి
అగ్గె డంక తిలి తెరచి తెడి పెసితి
నోవి, జివ్ తిలి జివ్ దెతి వాటు, మెలె,
సిజోచి ఆగ్ గాట్ గెచ్చుక మెలి కోడుచి
దయిరిమ్ దా అస్సె.

21 అన్నె, దేముడుచి గెరి అమ్క వెల్లో
పూజరి జో జా కెర తోడు అస్సె.

22 అమ్చి పెట్టి నిదానుమ్ తా
జోవయించి ఉప్పిర్చి నముకుమ్చి రిసా
పూర్తి దయిరిమ్ తా, అమ్చి ఆత్మతె
‘అమ్క పాపుమ్ నాయ్, జో అమ్క సుద్ది
కెర అస్సె’ మెలి దయిరిమ్ అమ్ జతి
రితి, అమ్చి ఆత్మక సుద్ది కెరై పానిక జో
అమ్క చించ దిలి రితి కెర అస్సె, అమ్చి
ఆగ్ * దోవిలి రితి కెర అస్సె మెన, జోక
పాసి జెము.

23 అమ్చి దయిరిమ్ ఒప్పున్తిసి
అన్యానుమ్ నే జతె దెరనుమ. కిచ్చొక
మెలె, ‘ఆవ్ దెతి రచ్చన వరుమ్ కో
నజనుల గే, కచితుమ్ రచ్చించుప

జవుల’ మెన అమ్క ప్రమానుమ్
సంగిలోసా నిదానుమ్చొ.

24 అన్నె, ప్రేమ కెరయ్తి రితి, చెంగిల
కమె కెరయ్తి రితి, ఎక్కిలోక ఎక్కిలో
కిసి చెంగిల్ కెరుక గే, ప్రేమ దెకవుక గే
ఉచర్తై తమ.

25 సంగుమ్చ సబతె బెదుక నే పిట్టె,
సగుమ్జిన్ జెంక ములితతి గెద, జలె,
సబతె బెదుక నే పిట్టె ఎక్కిలోక ఎక్కిలో
డిట్టుమ్ దయిరిమ్ కెరై తమ. ముక్కిమ్క
కిచ్చొక ఇసి జమ మెలె, ప్రబుచి వెల్లి దీసి
పాసి జా జెతయ్.

సత్తిమ్ జాన జానయ్ ముల్తినచి
రిసా జాగర్

26 జలె, సత్తిమ్ చిన నంప కెర్లమ్
మెలె, జాచి పడ్డె జాన జానయ్ పాపుమ్
ఇండితె తిలె, పాపల్ గెచ్చయ్తి రిసా జో
అర్పితుమ్ జలిసి అమ్క అన్నె బలివో
నాయ్.

27 దస్సి జలె అమ్క కిచ్చొ రకితయ్
మెలె, ప్రబు పరిచ్చ కెర సిచ్చ కెర్రిసి, చి
జోక విరోదుమ్ సుదల్ జలస ఎత్తిక గల్తి
వెల్లి ఆగి గోయ్తె గలి జతిసి.

28 మోసే పూర్గుమ్చొచి అత్తి దేముడు
దిల ఆగ్గల్ కో పిట్టవ తప్పు కెర్తతి గే,
జోవయించ పరిచ్చ కెర్రిన్తె ‘జో నిజుమ్
తప్పు కెర్లొ’ మెన దొగుల తీగ్గచి సాచి
రుజ్జు దెకయ్లె, కన్కారుమ్ నెంతె జోక
మొర్తి సిచ్చ దెవుల.

29 జలె, దేముడుచొ పుత్తున్క నంప
కెరుక నిదానుమ్ కెరుక నెన, సుద్ది
కెర్రి జా నోవి ప్రమానుమ్చి రిసా సువ
దిలి యేసుచి లోయి దూసుప కెర,
ప్రబుచి దయ కెర్రి జోచి రచ్చన దెతి
జోచి పరలోకుమ్చి ఆత్మక కో కోపుమ్
కెరవ తవుల గే, జోక అన్నెయ్ కెర్రి సిచ్చ
లయ్దె.

30 కిచ్చొక మెలె,

† 10:17 10:17 యిర్మీయా 31:34. § 10:20 10:20 మెలె, జోవయించి ఆగ్ మొర అర్పితుమ్ జలి

రిసా పరలోకుమ్తె బిదితి వాటు అయ్లె. * 10:22 10:22 బాప్తిసుమ్చి రిసా సంగితయ్ మెన సగుమ్జిన్

సంగితతి. † 10:30 10:30 ద్విత్వీయోపదేశ కాండుము 32:35.

†“సిచ్చ కెర్తి కామ్ అంచి.

దెంక తిలి సిచ్చ ఆవ్ కచితుమ్ దెయిందె”

మెన సంగిలో దేముడుక జానుమ్. పడ్డొ, జో అన్నె సంగిలిసి కిచ్చొ జానుమ్ మెలె,

‡“జోచ ప్రజల్క ప్రబు తీర్పు కెర సిచ్చల్ గే, బవుమానల్ గే దెయెదె”

మెలిసి.

31 సిచ్చ జంక మెన జీవ్ తిలో జీవ్ దెతో దేముడుచి అత్తి మాన్పు దెర్ను సేడ్లె బింకయ్ జయెదె!

ప్రబు అన్నె ఉత్త జెతిన్క రకితె తా

32 గని, అగ్గెచ దీసల్ తుమ్ ఏదాన్ల కెర. తెదొడి క్రిస్తుచి రిసాచి సత్తిమ్ తుమ్ తొలితో నూన చినిలి పొది ఒగ్గర్ సైమల్ బాదల్ సేడ్లె కి ఓర్పుప జలదు.

33 సగుమ్ సుట్టు కి ఎదార్లుమ్ ఎత్తిజిన్చి మొక్కె దూనుప జలదు, కస్తల్ సేడ్లదు, చి అన్నె దస బాదల్ సేడ్లనచి జాడు బెద వయిలి రితి జలదు.

34 కీసి మెలె, జేలి జలసక కన్యారుమ్ జలో, చి విరోదుమ్ సుదల్ తుమ్చి అస్తి దెర గెతికయ్, పరలోకుమ్తె అన్నె చెంగిల్చి, అన్నె తా అస్తి గెతిసి దొర్కు జా అన్నె మెన జాన కెర, సర్ల తెన్ తిలదు.

35 జాకయ్, తుమ్చి డిట్టుమ్ తుమ్చి ద్దుయిరిమ్ తుమ్ వెంట గెల నాయ్. జేవ్తె వెల్లి బవుమానుమ్ దొర్కు జతయ్.

36 జాకయ్, దేముడుచి ఇస్తుమ్చి రితి ఇండ. జో ప్రమానుమ్ సంగిలిసి తుమ్ నజన్తి రిసా తుమ్క ఒగ్గర్ నిదానుమ్ తంక.

37 కిచ్చొక మెలె, జో సంగిలిసి కిచ్చొ మెలె,

§“అన్నె గడియయ్ గెలె జెతె తిలోసా జెయెదె, ఆల్నిమ్ నే కెర్తె జయెదె.

38 గని, ఆవ్ దిలి రచ్చన అంచి పున్నిమ్ కో జా తవుల గే,

జోవయింబి నముకుమ్చి నిదానుమ్క జివుల,

గని జోవయింతె కో పడ్డొ గుంచెలె,

జోవయింబి రిసా అంక ఆత్మతె కిచ్చొ సర్ల తయె నాయ్”

మెన దేముడు సంగిత్తయ్.

39 గని జలె ఆమ్ పడ్డొ గుంచ నాసెనుమ్తె గెతన్ నెంజుమ్. నిదానుమ్ నముకుమ్ తా అమ్చి ఆత్మ చెంగిల్ తతి రితి దెకన్తన ఆము.

11

పూర్ణుమ్చ నముకుమ్ తెన్ డిట్టుమ్ తిలిసి

1 జలె, నముకుమ్ కిచ్చొ మెలె, అమ్ ఆస జలి కిచ్చొ జవున్ కామ్క ‘కచితుమ్ జర్లు జయెదె’ మెలి ఆస, నే డీసిలిన్క ‘అన్నె’ మెన అమ్చి పెట్టి కచితుమ్ జాన్తీసి.

2 జా నముకుమ్ కామ్క జెతయ్ మెన కీసి జానుమ్ మెలె, జోవయింబి నముకుమ్చి రిసాయి అమ్చ క్కో క్కో పూర్ణులచి రిసా దేముడు సర్ల జా జేవ్ అంచయ్ మాన్పుల్’ మెన ఒప్పున్లన్.

3 అన్నె, దేముడుచి *కోడుకయ్ లోకుమ్ జెర్మిలి మెన నముకుమ్కయ్ ఆమ్ చినితసుమ్. దన్సి, ఈంజ డిస్తి లోకుమ్, డిస్తిన్ తెనె నే తెయార్ జలి మెన ఆమ్ నముకుమ్ తెన్ జాన అస్సుమ్.

4 హేబెలు †జోచి నముకుమ్చి రిసా అన్నొన్ జలొ కయానుచి కంట చెంగిల్ అర్పితుమ్ దిలిసి దేముడు మెన్నిలన్. జోచి జా నముకుమ్చి రిసాయి ‘జోక పున్నిమ్’ మెలి రితి దేముడు హేబెలుక దెకిలో. కీసి జానుమ్ మెలె, జో హేబెలు దిలిసి రిసా దేముడు సర్ల తెన్ సంగిలో మెన ఆమ్ జానుమ్. జో హేబెలు, జలె,

‡ 10:30 10:30 ద్విత్వియోపదేశ కాండుము 32:36, కీర్తనలు 135:14. § 10:37 10:37 హాబక్యూకు 2:3-4. * 11:3 11:3 ఆదికాండుమ్ 1:1-2. † 11:4 11:4 ఆదికాండుమ్ 4:1-7. ‡ 11:5 11:5 ఆదికాండుమ్ 5:24.

మొర్లన్, గని జోచి నముకుమ్ అప్పొక అమ్క లట్టబ్తయ్.

5 జోచి నముకుమ్చి రిసా †హనోకు నే మొర్లె పరలోకుమతె ఉక్కిల్ జలన్. అన్నె, దేముడు సొంతయ్ జోక కడ నిలి రిసా ఒత్త తెంతో కో జోక చజుక నెత్తిర్ల. జో నే గెతె అగ్గె కి 'ఆవ్ మెన్నితోసా' మెన దేముడు రుజ్జుల్ దెకవ తిలొ.

6 నముకుమ్ నెంజెలి, దేముడుక నర్ల కెరుక నెత్తుమ్. మెలె, కో దేముడుక పాసి జెంక ఇస్తుమ్ జలె, దేముడు 'అస్సె' మెన, చి 'జోక ఇస్తుమ్ జా చజితనక దెకితయ్' మెన జో మాన్సుక నముకుమ్ తంకయ్.

7 తెదొడి అన్నె, నే జర్గు జలిన్క 'జర్గు జయెదె' మెన దేముడు క్రినోపహుక సంగితికయ్, జోచి నముకుమ్చి రిసాయి 'నిజుమ్ జర్గు జయెదె' మెన దేముడుక బియఁ నోపహు దయిరిమ్ జా దేముడు సంగిలి రితి కెర, జోచి కుటుంబుమ్చక ఉగుమ్ గెడ్డువ కెర్లిన్ తెంతో రచ్చించుప కెర్లి రిసా, జా వెల్లి ఓడ రితిసి బందిలొ. దస్సి కెర, లోకుమ్చ ఎత్తి నంపనెంజెలనక జోవయించి పాపుమ్చి సిచ్చుచి రుజ్జు దెకయ్లొ, చి నముకుమ్ వాట్ జెతికయ్ పున్నిమ్తె జోయ్యి వాట నజన్లొ.

8 'జోక పడ్డో ఆవ్ దొర్కు కెరుక తిలి కానాను దేసిమ్తె గెస్సు' మెన, "బార్ జా" మెన దేముడు * అబ్రాహామ్క బుకార్తికయ్, జో కేనే గెచ్చెదె గే వాట్ నేన్లె కి, జోచి నముకుమ్చి రిసా అబ్రాహామ్ నూన కెర బార్ జలన్;

9 దస్సి, జోచి నముకుమ్చి రిసా, జా జోచి సొంత దేసిమ్ నెంజెలి కి, "తుక చి తుచి సెకుమ్చక దెయిందె" మెన దేముడు ప్రమానుమ్ కెర తిలి కానాను దేసిమి బుల్లె తిలొ, అన్నె జో, జా ప్రమానుమ్తె జో తెన్ వాట నజిత జోచి

పెట్టిచొ ఇస్సాకు కి, ఇస్సాకుచి పెట్టిచొ యాకోము కి టంబుగుడ్డల్తె జియ బుల్లె తిల.

10 కిచ్చొక మెలె, చెంగిల్ పునాది తిలి †పట్టుమ్క 'జెయెదె' మెన అబ్రాహామ్ నంప తెన్ తిలన్. కేన్ పట్టుమ్ మెలె, దేముడు సొంత బందితిసి, జెర్మయ్లి పట్టుమ్.

11 దస్సి, జాచి నముకుమ్చి రిసా అబ్రాహామ్చి తేర్చి †సారా, జా మంతిరి జా గెచ్చు, బోదల్ పాయితి వయసు జీన తిలె కి, జా ప్రమానుమ్ సంగిలొ దేముడుక 'జో సంగిల్ రితి జర్గు కెరెదె' మెన నంపజలి రిసా, అంగి జతి సెక్తి జాక దొర్కు జలి.

12 జలె, ఎక్కిలొ మాన్సు అబ్రాహామ్చి పెట్టి జో మొర్లొ రితో మంత్రొ జా తిలె కి, ఆగానుమ్చ సుక్కల్చ రిత, సముద్రుమ్చి ఒడ్డుచి ఇన్సుచ గిడ్డల్ రిత, కీసి కో లెక్క కెరుక నెత్తిర్లి, దస్సి ఎతివాట్జిన్ మాన్సుల్ జోచి సెకుమ్తె జెర్మన్ జల.

ఈంజ బూలోకుమ్తె టాన్ నెంజెలన ఆము

13 అమ్ ఉప్పిరి సంగిల మాన్సుల్ ఎత్తిజిని, జోవయింక ప్రమానుమ్ సంగిలిసి జర్గు నే జతె అగ్గె, జాకయ్ 'కచితుమ్ జర్గు జయెదె' మెన నముకుమ్ తెన్ని మొర గెల. దూరి తెంతో దెకిల్ రితి జా, జా ప్రమానుమ్ సంగిలిసి నజన్లి రితి జాయి మొర్ల. 'ఈంజ బూలోకుమ్తె టాన్ నెంజెలన ఆము, అమ్క ముక్కిమ్ జలి లోకుమ్ వేరచి' మెన చిన కెర మొర్ల.

14 జలె, ఇసి లట్టబ్లె, జేవ్ సొంత దేసిమ్ చజితత్ మెన రుజ్జు దెకయ్లి రితి జతయ్.

§ 11:7 11:7 ఆదికాండుమ్ 6:5-8:22. * 11:8 11:8 ఆదికాండుమ్ 11:31-12:9. † 11:10 11:10 పరలోకుమ్క, పరలోకుమ్చి 'సవి యెరూసలేమ్' మెలిన్క టాలి జయెదె. డిసయ్లిసి 21:2 దెక. ‡ 11:11 11:11 ఆదికాండుమ్ 18:1-15.

15 జేవ్ ముల దా బార్ జలి దేసిమ్క అన్నె గెచ్చుక మెన ఆస తిలి పొది, జేవ్ ఒత్త అన్నె గెచ్చుక వాటు తత్తి.

16 అన్నె చెంగిలి దేసిమ్క ఆస జా అన్సి; కేన్ మెలె, పరలోకుమచి. జో జేవ్చో దేముడు జా తంక దేముడు లాజ్ జయొక నాయ్, జోవయింక ఏక్ పట్టుమ్ జో తెయార్ కెర్లిన్ తెన్ రుజ్జు జతయ్.

17 అబ్రాహామ్ దేముడుచి అత్తి పరిచ్చ జలి పొది, 'తుక సంతానుమ్ దెయిందె' మెన ప్రమానుమ్ సంగ తిలో దేముడుక జోచో ఎక్కిలో పుత్తున్ ఇస్సాకుక నముకుమ్ తెన్ కీఅర్పితుమ్ దెంక కి తెయార్ జలన్.

18 మెలె, జో పుత్తున్చి రిసా

* "ఇస్సాకుచి తెడి తుచి సెకుమ్తె ఒగ్గర్జిన జెర్నుల"

మెన దేముడు సంగ తిలి కి. 19 దస్సి 'మొర గెలసక దేముడు జియడుక తెరె' మెన కి అబ్రాహామ్ నముకుమ్ తెన్ తిలో. జాకయ్, జో మొరుక తిలో ఇస్సాకుక అన్నె జియడ, దేముడు జోక అబ్రాహామ్ అబ్బోస్క అన్నె దొర్కు కెర్లన్.

20 దేముడుక 'చెంగిల్ వరల్ దెతొసా జో' మెనయ్, జోచి నముకుమ్చి రిసా, †ఇస్సాకు జోచ పుత్తర్లు జల యాకోబుక చి ఏసాపుక దయిరిమ్ తెన్ చెంగిల్ వరుమ్లు సంగిలన్.

21 దస్సి కి, జోవయించి నముకుమ్చి రిసా ‡యాకోబు, జోచి మొర్ను పురె జా అయ్లి పొది, జోచి టెక్ని డండోచి ఉప్పిరి బోడి వంపొ కెర దేముడుక ఉచర, జోచో పుత్తుసి యోసేపుచ దొగుల పుత్తర్లు ఎక్కెక్క చెంగిల్ వరల్ సంగిలన్.

22 జోచి నముకుమ్చి రిసా †యోసేపు, జో మొర్తి సమయుమ్ జా అయ్లి పొది, జోచ ఇస్సాయేలుల్ పడ్డొక

ఐగుప్తు దేసిమ్ తెంతొ బార్ జంక తిలిన్చి రిసా, చోడి పుట్టవ సంగ కెర, జోచి పీనుమ్ ఐగుప్తు తెంతొ దెర గెచ్చ జేవ్ కేనె నా రోవుక గే సంగిలన్.

23 *మోసే జెర్మిలి పొది, జోక 'నూటిచో' మెన దెక కెర, జోచి నముకుమ్చి రిసా 'జోక మార్తసతె జో దెర్ను సేడ్పు నాయ్' మెనయ్, అయ్యసి అబ్బోసి తిన్ని జొన్నొ పూర్తి జోక లుంకడ తిల; జో రానొ "ఇదుద్ల నాడ్లు ఎత్తి మొరుక" మెన ఆత్ర దిలిన్క నే బితె.

24 పడ్డొ, జో మోసే వెల్లో మాన్పు జలి పొది, జోచి నముకుమ్చి రిసా †మోసే జో రానొచి దువిన్చి పుత్తున్ నే బుకారవన్క,

25 జా రాజిమ్చితె నే బెదితె, దనచి సర్లల్ నెస పిట్టవన, దేముడుచ జోచయ్ మాన్సుల్చ కస్టల్తె బెదుక సర్ల జలో.

26 జలె, 'దేముడు అబ్బోస్చి ఇష్టుమ్ తిలిన్ జర్లు కెరుకయ్ ముక్కిమ్' మెన యేసుక్రీస్తుచి రిసా కిసి సైమల్ సేడ్లె, 'ఐగుప్తు దేసిమ్చి సొమ్నారుమ్ కలుగు కెరంతి కంట దేముడుచి కామ్ జర్లు కెరుకయ్ ముక్కిమ్' మెనయ్ ఒప్పుణ్ణో. కిచ్చొక మెలె, 'దేముడు దెతి బవుమానుమ్ ముక్కిమ్' మెన దెకితె తిలన్.

27 జోచి నముకుమ్క, జో పరో రానొచి కోపుమ్క నే బితె ఐగుప్తు దేసిమ్ ముల దిలో. కిసి మెలె, నే డీస్తా దేముడుక దెకితె తిలి రితి జా, నిదానుమ్ తెన్ ఎత్తి ఒర్పువ జలన్.

28 జోచి నముకుమ్చి రిసా, ‡ఐగుప్తు దేసిమ్చ తొల్పర్ బోదల్క మార్తో దేముడుచి దూత జోవయించ ఇస్సాయేలుల్చ బోదల్క నే చడితి రితి, 'పస్కా వండుగు' మెన దేముడు సంగిలి రితి మొదొల్ కెర్లన్, చి

§ 11:17 11:17 ఆదికాండుమ్ 22:1-18. * 11:18 11:18 ఆదికాండుమ్ 21:12. † 11:20 11:20

ఆదికాండుమ్ 27:1-41. ‡ 11:21 11:21 ఆదికాండుమ్ 48:8-20. § 11:22 11:22 ఆదికాండుమ్

50:24-25. * 11:23 11:23 నిర్గమకాండుమ్ 1:22:2:2. † 11:24 11:24 నిర్గమకాండుమ్

2:11-16. ‡ 11:28 11:28 నిర్గమకాండుమ్ 12:1-36.

జేవ్ ఇస్రాయేలుల్చ గెరల్ ఎత్కిచ దార్బంద్రల్తె మెండపిల్లచి లోయి చించ దిల.

29 “తుమ్క ఐగుప్తు దేసీమ్ తెంతో రచ్చించువ కెరిందె” మెన దేముడు సంగిలిన్చి ఉప్పిరిచి జోచి నముకుమ్చి రిసా, మాములు వాట్ ఇండిలి రితి జా, ‘ఎరన’ మెలి సముద్రుమ్ ఇస్రాయేలుల్చ ప్రజల్ ఇండ జీన్ల. గని ఐగుప్తు దేసీమ్చ “అమ్ కి దస్సి జీనుమ్చె” మెన ఉచర కెరె పొది బుడ్డ గెల.

30 ‘దేముడు అమ్క తోడ్డు తయెదె’ మెన జోవయించి నముకుమ్చి రిసా జేవ్ పూర్ముచ ఇస్రాయేలులు సత్తు పొదుల్ రోజుక *యెరికో పట్నుమ్చి వెల్లి కోటచి సుట్టునంత ఇండ బుల్లికయ్, జా కోట సేడయ్ గెలి.

31 లంజె జియ తిలి †రాహోబు, అమ్ యూదుల్క వేరయ్ మాన్సు జలెకి, దేముడుక ‘జొయ్యి వెల్లో, జొయ్యి పరలోకుమ్చొ దేముడు’ మెలి జాచి నముకుమ్చి రిసా, దేముడుక నంపనెంజిల జా పట్నుమ్చ అన్నె మాన్సుల్ తెన్ తెదొడి మొరె నాయ్. కిచ్చొక మెలె, దేముడుచి నావ్ తెన్ లుంకచొరె పట్నుమ్ దెకుక అయ్ల ఇస్రాయేలుల్క మరియాద కెర తిలి.

నముకుమ్చి రిసా దేముడు జర్గు కెర్సి

32 అన్నె కిచ్చొ మెనుమ? గిద్యోను, బారాకు, సమ్నాను, యెప్తా, దావీదు, సమూయేలు, దేముడుచ కబుర్లు సంగిల మాన్సుల్ ఎత్కిచి రిసా సంగుక సమయమ్ నాయ్.

33 జోవయించి నముకుమ్చి రిసా రాజిమ్లుక జీన్ల, సత్తిమచ తీర్పుల్చ రుజ్జుల్ దెకవ, తప్పుల్ కెర్లసక సిచ్చు దా, ప్రజల్క బుద్ది సికడ్ల, దేముడు జోక ప్రమానల్ దా జెయిమ్ కెర్లికయ్ సర్ల జల.

సింపుమ్లు జేవ్క కంక మెన మొక్కె అయ్లి పొది జేయ్చి చొండివొ డంకిల.

34 వెల్లో ఆగివొ విజయ్ల, యుద్దుమ్తె కత్తివొ తెనె కండితిన్ పిట్టవన్ల, అన్కు తిలి పొది సెక్తి జల, యుద్దుమ్తె జోవయించ విరోదుమ్ సుదల్చి ఉప్పిరి జీన ఉదడ్ల.

35 జేవ్తె మొర్లసక దేముడు అన్నె జియడ్లికయ్, జోవయించ తేరబోదల్క అన్నె దొర్కు జల. దేముడుక నిదానుమ్ తిల అన్నె సగుమ్జిన్, ‘అన్నె చెంగిలి లోకుమ్తె పడ్డొక అన్నె జీవ్ జా ఉట్టుమ్చె’ మెనయ్, సిచ్చల్ తెంతో విడ్డల్ నె కెరంతె, జేవ్ సిచ్చల్తె మొర్ల.

36 అన్నె, విరోదుమ్ సుదల్ దూసుప కెర్సి, కొర్డల్చ దెబ్బల్ అదికారుల్ పెట్టిసి, గొల్సుల్ తెన్ బందితిసి, జేవ్తె గల్తిసి అన్నె సగుమ్జిన్ ఓర్పువ జల.

37 సగుమ్జిన్ మాన్సుల్క పత్రల్ తెన్ వెట మార్ల, సగుమ్జిన్ మాన్సుల్క రంపుమ్ తెన్ సింద దొన్ని గండల్ కెర గెల. సగుమ్జిన్ కత్తిచ దెబ్బల్క మొర్ల, సగుమ్జిన్ మెండల్చ గొర్రెల్చ చమొ గలన బులిల, మాలజ్ జా, సైమల్ సేడ, మాన్సుల్చి అత్తి నిస్కారుమ్ జల.

38 బయిలె, డొంగ్రెల, పత్రాలె పారతె, బుయి గొయితె నిద్ద తా బుల్లె తిల. జేవ్ చెంగిల మాన్సుల్ ఈంజ లోకుమ్తె తంక ఈంజ పాపుమ్చి లోకుమ్క జేవ్ విలువ కెర్తి నాయ్.

39 అన్నె, జేవ్ ఎత్కిజిన్ జోవయించి నముకుమ్ డిట్టుమ్ తిలిన్చి రిసా దేముడు జోవయించి రిసా చెంగిల్ సాచి దెకయ్లెకి రుజ్జుల్ దెకయ్లెకి, జో దేముడు ప్రమానుమ్ సంగిలిసి జోవయించయ్ పొదులె జర్గు జంక నాయ్.

40 కిచ్చొక మెలె, అమ్కయ్ కి జోవయింతెన్ బెదవనుక మెనయ్ జో

దేముడు అన్నె చెంగిల్చి జర్గు కెరుక ఉచర తిలో. మెలె, ఆమ్ నెంతె జేవ్ కి పూర్తి నే జతి రితి జా జో సంగిలి ప్రమానుమ్ జర్గు కెర్లన్; అమ్ వడ్డొ జెర్మిలన కి జోవయింతెన్ జా ప్రమానుమ్తె బెదుకయ్ మెన వాయిద కెర్లన్.

12

క్రీస్తుచి రితి ఆమ్ కి బాదల్ ఓర్పువ జంక

1 జాకయ్ పూర్గుమ్ తెంతో దేముడుచి ఉప్పిర్చి నముకుమ్తె ఇండిలన ఈంజేవ్ ఎతివాట్జిన్ సాచి జతన మబ్బుల్ రితి అమ్చి సుట్టునంత తా, అమ్క వాట్ దెకయ్లి రితి జా అస్తిచి రిసా, అమ్క అడ్డు కెర్తి ఎత్కి జాడు, అమ్క లంబితి ఎత్కి పాపుమ్ ముల దా, ప్రబు అమ్క నిగయ్తి పందెమ్తె నిగుము.

2 కిచ్చొ సెక్తిక అమ్ నిగుక మెలె, అమ్చి నముకుమ్ మొదొల్ కెర్లొ చి పూర్తి కెర్లొ యేసుక దెక, దెకయ్ నిగుము. జో, జలె, జోక తియ తిలి సర్ల సంతోసుమ్క ఉచర, సిలువతె గల్లి సిచ్చ ఓర్పువ కెర్లన్. దస్సి నిస్కారుమ్ జతిసి నే బితె, చి అప్పె దేముడు అబ్బొన్చి సిజాననుమ్చి ఉజెతో పక్కయ్ జో వెన అస్సె.

3 తుమ్ అల్పువ నే జతి రిసా అన్మానుమ్ నే జతి రిసా, జలె, పాపుమ్ కెర్లనచి అత్తి, జోచి ఉప్పిర్చి విరోదుమ్చి రిసాచ సిచ్చల్ ఓర్పువ జలొ, జోకెద్ది బాద సేడ్లె కి నిదానుమ్ తిలొ యేసుచి రిసా తుమ్ ఉచర.

4 తూమ్, జలె, పాపుమ్చి ఉప్పిర్చి ఈంజ యుద్దుమ్ కెర్తినతె, తుమ్ జోచి నావ్చి రిసా అల్లర్ సేడ అస్సున్, గని అప్పెక తుమ్చి లొయి సూయి జతి రితి, మెలె, మొర్తి రితి ఎదిలి సైమ తుమ్

సేడుక నేతయ్. తుమ్ అన్మానుమ్ నే జతె ఎత్కి ఓర్పువ జా.

కక్కయ్ దేముడు ప్రేమ తయెదె గే, జోకయ్ సిచ్చల్ దా సికడెదె

5 అన్నె, తుమ్ జోచ పుత్తర్లు జలిన్చి రుజ్జు దెకయ్తి తీర్పు దేముడుచి కొడొతె రెర్లయ్లిసి తుమ్ పచ్చ గెలదు గె? కిచ్చొ తీర్పు సంగిలిసి మెలె,

*“ఓ అంచొ పూత్తు, దేముడు తుక బుద్ది సికడ్ల సిచ్చల్క

‘కిచ్చొ నెంజితి’ మెలి రితి తుయి ఉచరు నాయ్.

అన్నె, జో తుక దస్సి సిచ్చ కెర్లె, తుయి దయిరిమ్ పిట్టవన అన్మానుమ్ జా నాయ్.

6 కిచ్చొక మెలె, కక్క జో ప్రేమ తయెదె గే, ‘సిక్కుత్’

మెనయ్ జోకయ్ సిచ్చ కెరెదె, చి జో బెదవణ్ణొ ఎత్కి పుత్తున్క

‘బుద్ది జవున్’ మెనయ్ సిచ్చల్ దెయెదె” మెన సంగ రెగ్గవ అస్సె.

7 జలె, ఇన బాదల్ తుమ్ ఓర్పువ జంక జిలిసి కిచ్చొక మెలె, తుమ్ దేముడు అబ్బొన్తె సిక డిట్టుమ్ జతి రిసాయి జో దేముడు తుమ్క “అంచ పుత్తర్లుయి” మెన దెకితయ్. మెలె, కేన్ పుత్తున్క అబ్బొసి కిచ్చొ సిచ్చ దా సికడె నాయ్ గె? మాన్సుచొ అబ్బొసి జలె, సిచ్చ దా సికడెదె.

8 అబ్బుదింసిచి అత్తి ఎత్కిజిన్ జత బుద్ది సికడ్ల కిచ్చొ సిచ్చల్ తుమ్ నే జలె, లంజెపెట్టి జెర్మిల రిత జా, జో ప్రబుచ సొంత పుత్తర్లు నెంజిల రిత జతదు.

9 అన్నె, ఈంజ లోకుమ్చ అమ్ ఎత్కిజిన్చ అబ్బుసింసి అమ్క సిచ్చల్ దా బుద్ది సికడె అస్తి, చి జాకయ్ జేవ్క మరియాద దెక అస్సుమ్. దసె జలె, అమ్చ ఆత్మల్క అబ్బొ జతో దేముడుచి

* 12:5 12:5 సామెతల్ 3:11-12.

తెడి తా, జోచి కోడు సూన అమ్ బుద్ది జలె, ఆత్మక జిమ్దె, అన్నె చెంగిల్ జిమ్దె.

10 అమ్చ ఈంజ లోకుమ్చ అబ్బుసింసి గడియ జోవయించి ఇస్టుమ్ అయ్లి రితి సిచ్చల్ దిల, గని అమ్క 'చెంగిల్ జతు. అంచి సుద్దితె బెదుతు' మెనయ్ అమ్క బుద్ది సికడ్డ సిచ్చల్ దేముడు అమ్చో అబ్బొయి దెతయ్.

11 జా సిచ్చ జతి గడియయ్ ఎత్తి, సిచ్చ నర్ల నే దెయె, గని నొప్పి దెతయ్. జలె పడ్డె జేవ్చి రిసాచి ముద్దొ జలనక జా సిచ్చ పాయితి రిసా కిచ్చొ లాబుమ్, మెలె, జో దెతి పున్నిమ్ అన్నె సేంతుమ్ దొర్కు జయెదె.

దేముడు దిలి వరుమ్ కెద్దిచి గే ఏదాస్త కెరన డిట్టుమ్ జా

12 జాకయ్, కొర్ప జల తుమ్చ అత్తో, సెక్కి నెంజిల తుమ్చ మొగ్రల్ తుమ్ నే ముచ్చిల్తె దెకన.

13 ఇదిల్ సొట్టి జలిసి అన్నె సొట్టి నే జతె పూర్తి చెంగిల్ జతి రిసా తుమ్చ చట్టొ చెంగిల్ ఇండిత్ రితి, సోగ వాటు తుమ్ తెయోర్ కెర.

14 అన్నె, ఎత్తిజిన్ మాన్పుల్ తెన్ సేంతుమ్ కట్టు తెన్ తతి రితి తుమ్ దెకన. అన్నె, ప్రబు దెతి సుద్ది జంక తుమ్ ఆస జా. జయ్యి సుద్ది నెంజిలె, కో కి దేముడుక దెకుక నెత్తిర్తి.

15 తుమ్చితె కక్క కి ప్రబుచి రచ్చన నే పిట్టి రితి తుమ్ దెకన. కోడ్ దెతి కేన్ చెరొ తుమ్చితె నే ఉట్టితి రితి తుమ్ దెకన. దస్సి కోడ్చి చేర్ కేన్ జలెకి ఉట్టె, జాచి రిసా గలిబిలి జా కెర ఒగ్గర్జిన్ ఆత్మక పాడ్ జంక జయెదె, జా పోన.

16 పడ్డెక, తుమ్చితె కో లంజె నే జతి రితి దెకన. పడ్డె †ఏసావు పూర్ణుమ్చో జలి రితి తుమ్ జా నాయ్. జో ఎక్కి

పూటచి అన్నిమ్ దొర్కు కెరంతి ఆసకయ్ అబ్బొన్ దెంక తిలి జో తొల్పుర్ జెర్మిలిన్చి రిసాచి దొర్కు జతి అక్కు బావొన్తె విక గెలో.

17 పడ్డె జా వాట దొర్కు జతి అక్కు నజనుక ఉచర్లొ, గని అబ్బొసి నే దిలొ, చి జో కెద్ది ఏడ్డెకి, జో జర్గు కెరన్లిసి మార్పువ జంక వాటు తిలి నాయ్.

18 తుమ్ పాచ అయ్లి టాన్, సీయోను డొంగ్రు నెంజె. జా డొంగ్రు ఈంజయ్ లోకుమ్చి. చడితిసి, జా. పూర్ణుమ్చ అమ్చ ఇస్రాయేలులు జా డొంగ్రుతె జా కెర కిచ్చొ దెకిల నూన్ల మెలె, ‡వెల్లి ఆగి, అందర్, చిమ్మున జలిసి, తుపాన్ జతిసి.

19 నప్పిర్మూరి బజతిన్చి అవాడ్, బింక జతి వెల్లి నీఅవాడ్. తెదొడి పూర్ణుమ్ జా వెల్లి అవాడ్క బియె కెర, "అప్పె తెంతో జా వెల్లి అవాడ్ జలొసా అమ్క కోడ్ లట్టబ కబుర్లు సంగుక నాయ్" మెన ప్రెజల్ బతిమాల్పా జా సంగ తిల.

20 కిచ్చొక మెలె,

*"కేన్ జంతు కి ఈంజ డొంగుర్ చడిలె,

జాక పత్రల్ గల మారుక అస్సె"

మెన దేముడుచి జా అవాడ్ ఆడ్ర దిలన్. జా ఆడ్ర సంగిలిసి ఓర్పువ జంక అమ్చ ఇస్రాయేలుల్ నెత్తిర్.

21 అన్నె, తెదొడి జర్గు జలిసి దెకుక కి కెద్ది బయిమ్చి మెలె, జేవ్ ప్రెజల్క ఏలువ కెర్తె తిలొ వాట్ దెకయ్తె తిలొ మోసే కి "బియె అద్దుర్ జా గెలో" మెన సంగిలన్.

† 12:16 12:16 ఆదికాండుమ్ 25:27-34. ‡ 12:18 12:18 నిర్గమకాండుమ్ 19:16-19, 20:18-21.

§ 12:19 12:19 నిర్గమకాండుమ్ 19:8-9. * 12:20 12:20 నిర్గమకాండుమ్ 19:12, 13.

22 జేవ్ పూర్ణమచ తెదొడి పావిలి సీయోను డొంగ్రు, జలె, †బయిమ్చి, గని తూమ్ కేనె పాచ అస్సున్ మెలె, పరలోకుమ్చి †సీయోను డొంగ్రుతె, జీవ్ తిలో, జీవ్ దెతో దేముడుచి పట్టుమ్తె, †పరలోకుమ్చి యెరూసలేమ్ పట్టుమ్తె, పడ్డొ కో లెక్క కెరుక నెతిర్ల ఎతివాట్జిన్ దూతల్ పండుగు కెర్తి రితి సర్ద తిల బెర్లిన్తె, జా అస్సున్.

23 అన్నె కిచ్చొతె జా అస్సున్ బెద అస్సున్ మెలె, *తొల్పొర జెర్తిల రిత పరలోకుమ్తె బెదిలసచి †పదుతె తిలసతె, అన్నె, ఎత్తిచి ఉప్పిరి దేముడు జలో మాన్సుల్ ఎత్తిక పరిచ్చ కెర తీర్పు కెర్తొసా† తిలిన్తె, అన్నె, దేముడుక సత్తిమ్ ఇండిల ప్రబుచి సుద్ది జా పూర్తి జల మాన్సుల్చ అత్తల్ తిలిన్తె జా అస్సున్,

24 అన్నె ముక్కిమ్క కత్తె మెలె, దేముడు దిలి నొవి ప్రమానుమ్క, జోక చి మాన్సుల్క నెడమె జతో యేసుతె, చి పూర్ణమచొ సోహెలు చి లోయిచి కంట చెంగిల్ లట్టబ్బి, చించ గెలి యేసుచి లోయితె పాచ జా అస్సున్.

25 తుమ్చి తెన్ లట్టబ్బొ దేముడుక తుమ్ నే సూన్తి రితి, నంప నే జతి రితి తంక నాయ్ మెన తుమ్ జాగర్ల దెకన. కిచ్చొక మెలె, ఈంజ బూలోకుమ్తె తిలో మోసే పూర్ణమచొ జోక జాగర్ల సంగిలిసి జేవ్ నే సూన్లి రిసా జేవ్

పూర్ణమచ సిచ్చ పిట్టవనుక నెతిర్ల. జలె, పరలోకుమ్ తెంతో అమ్క జాగర్ల సంగితో దేముడుక ఆమ్ నే సూన్లె, అన్నె కిసి సిచ్చ పిట్టవనుక జయెదె?! జయె నాయ్!

26 *జా దీసి జోచి అవాడ్ ఒండి బూలోకుమ్క కదుల్ కెర్తి. గని అన్నె 'కచితుమ్ జర్గు కెరిందె' మెన కిచ్చొ ప్రమానుమ్ జో సంగ అన్నె మెలె, †“అన్నెక్ సుట్టుక ఎక్కి బూలోకుమ్కయ్ నాయ్,

గని అన్నె, ఆగాసుమ్క కి కదుల్ కెరిందె” మెన్తయ్.

27 అన్నె అన్నెక్ సుట్టుక' మెన సంగిలిసి అమ్క కిచ్చొ అర్దుమ్ దెకయ్తయ్ మెలె, జెర్తయ్ జలిన్ కదుల్ కెర్లిన్క జాక గెచ్చవ గెల్లి సమయుమ్. జయి గెచ్చవుక కిచ్చొక మెలె, కదుల్ కెర్లి కి పాడ్ జంక నెతిర్లిన్క 'తా: గెన్ను' మెనయ్.

28 జాకయ్, కో కదుల్ కెర పాడ్ కెరుక నెతిరి పరలోకుమ్చి రాజిమ్ అమ్క దొర్కు జా అన్నెచి రిసా, దేముడు దిలి జా వరుమ్చి ఉప్పిరి సర్ద జా, సరి జతి బక్తి కెర జోక మరియాద కెర, బియ: ఇండుమ.

29 కిచ్చొక మెలె, అమ్చొ దేముడు డయితో ఆగిచొ రితో అన్నె.

13

ప్రేమ, సత్తిమ్, సేంతుమ్ తెన్ ఇండుక

1 'అమ్చ బావుడ్డు' మెన దెకిల్ రితి తుమ్ నంపజలసక ఎక్కిలోక ఎక్కిలో ప్రేమ కెర్తె తా.

† 12:22 12:22 'బయిమ్చి' మెలె, ఒత్త 'సీనాయి' డొంగ్రుతె ఎత్తి అదికారుమ్ తిలో దేముడు మోసక ఆగ్గుల్ దిలన్. జేవ్ ఆగ్గుల్ తెన్ సిచ్చల్ కి దిలన్, పడ్డొ తెదొడి ప్రెజల్ జో ఎత్తి అదికారుమ్ తిలో దేముడుక పాసి గెచ్చుక ప్రమాదుమ్. గని ఈంజ 22 నంబర్చి కోడుతె సంగితి 'సీయోను' డొంగ్రుతె, మెలె పరలోకుమ్తె, దస్సి బయిమ్ తంక నాయ్. యేసుక నంపజల మాన్సుల్చి పాపుమ్ గెలి రిసా అడ్డు నెంతె బయిమ్ నెంతె జోతె గెచ్చుక జయెదె.

జా తేడ ఇన్నె దెకయ్తయ్. † 12:22 12:22 డీసయ్లిసి 14:1 దెక. § 12:22 12:22 డీసయ్లిసి 21:2. * 12:23 12:23 రోమియల్ 8:29, కొలోస్సియల్ 1:15, 18, డీసయ్లిసి 1:5, చి ఎబ్రియల్ 2:11-14 దెక. † 12:23 12:23 లూకా 10:20, పిలిప్పియల్ 4:3, డీసయ్లిసి 13:18, 17:8, 20:15, 21:27 దెక. † 12:23 12:23 అదికాండుమ్ 18:5, ఎబ్రియల్ 4:13, 10:30. § 12:24 12:24 అదికాండుమ్ 4:2-16, ముక్కిమ్క 4:10. హేబెలు చి లోయి 'సిచ్చ దేన్, సిచ్చ దేను!' మెలి రితి కేక్ గల్తయ్.

యేసుచి లోయి 'చెమించుప కెరు, చెమించుప కెరు!' మెన కేక్ గల్తయ్. * 12:26 12:26 నిర్గమకాండుమ్ 19:18. † 12:26 12:26 హగ్గుయ 2:6.

2 వేర తెంతో జెత మాన్సుల్క మరియాద దెకుక తుమ్ పచ్చ నాయ్. కిచ్చొక మెలె, 'దూతల్' మెన నేన్లె కి, గోత్ అయ్ల దూతల్క కి సగుమ్జిన్ మరియాద కెర అస్సి.

3 జేలితె గలిలసక కన్కారుమ్ ఉచర దెక, జోవయింతెన్ తుమ్ జేలితె తిలి రితి ఉచరన, జోవయించి జాడు వయన. పడ్డొ, తుమ్ జోవయింతెన్ ఎక్కి ఆగ్గితె బెదిలన మెన, అన్నె మాన్సుల్చి అత్తి వేర వేర అల్లరలు సేడ్ల నంపజలసక దస్సి తోడు తా.

4 పెండ్లి మెలిన్క చెంగిలి మెన ఎత్తి విలువ దెక గవురుమ్ కెరుక అస్సె. పెండ్లితె తెర్చిమున్ను చి నెడమె సత్తిమ్ తంక మెన తుమ్తె కో లంజె జా నాయ్. లంజె ఉచర్తసక చి లంజె జతసక దేముడు తీర్పు కెర సిచ్చ దెయెదె.

5 తుమ్చి జీవితముతె డబ్బుల్ ఆన దూరి కెరన, తుమ్క తిలిన్క 'జయెదె' మెన సేంతుమ్ తెన్ జియ.

*"తుమ్క కెయెక కి ములి నాయ్, పవ్సి నాయ్." మెన దేముడు ప్రమానుమ్ కెర సంగ అస్సె.

6 జాకయ్, †"ప్రబు అమ్క తోడు అస్సె, ఆవ్ బియిఁ నాయ్.

అంక పాడ్ కెర్తి రితి మాన్సుల్ అంక కిచ్చొ కెరుక నెత్తిర్తి" మెన అమ్ దయిరిమ్ తెన్ సంగుక జతయ్.

తుమ్క దెకయ్ల వెల్లో సుదల్క నే పచ్చితె, చెంగిల్ ఇండ

7 దేముడుచి సుబుమ్ కబుర్ తుమ్క సూనయ్ల, తుమ్క వాట్ దెకయ్లసక తుమ్ పచ్చ నాయ్. జేవ్ జోవయించి జీవితముక ఇండిలిన్క కిచ్చొ పలితుమ్ దెర్ల గే తుమ్ ఉచర. జోవయించి

నముకుమ్చి ఎదిలి నముకుమ్ తూమ్ జోవయించి పట్టి ఇండ.

8 యేసుక్రీస్తు కాలి కీసా తిలో గే, ఆజి కి దస్సాయి తా, కెయెక తెయెక కి దస్సాయి తయెదె.

9 వేర వేర నముకుమ్చి బోదన సూన తుమ్ మోసిమ్ జా సత్తిమ్ తిలిసి తుమ్ ముల నాయ్. మెలె, జేవ్చ కమొచ పండుగ్ అన్నిమ్ జవున్, కిచ్చొ కిచ్చొ కతిన్ నే కతిసి జవున్, జోవయింక నంప కెర్ల మాన్సుల్క చెంగిల్ కెరె నాయ్. ముక్కిమ్క ప్రబుచి దయ జో అమ్క దెతిన్కయ్ అమ్చి పెట్టిచి ఆత్మ డిట్టుమ్ జంక అస్సె.

10 అమ్ నంపజలసక వేర బలి దెతి టాన్ మెలి కోడు దొర్కు జా అస్సె. యేసు మొర్చిసి. ఈంజయ్ బలి దెతి టాన్తె దిలి బలి అగ్గెచి రితిచి టంబుగుడ్లచి సేవ కెర్త, ఆగ్గుల్క నంప కెర్తి రితిచి ఉప్పిరి నముకుమ్ తితన కంక నాయిమ్ నాయ్.

11 జయ్యి రితి ఎత్తిక వెల్లెల పూజర్లు గొరెల్క దేముడుచి గుడితె ఆన 'ప్రెజల్చి పాపుమ్ గెస్సు' మెన గొరెల్చి లోయి తెడిచి ఒగ్గర్ సుద్ది తిలి గదితె ఆన, సువ తా, జేవ్ గొరెల్చ పీనుమ్లుక బయిలె కడన కెర, జా బయిలె డయ గెల్తె.

12 కిచ్చొక మెలె, దస్సి, దేముడు అబ్బోన్తె అన్నె బెదవుక మెన, జోచి సొంత లోయి తెన్ ప్రెజల్క సుద్ది కెరుక మెన, యేసు కి †పట్టుమ్చి కోట ఒత్తల్తోచి బయిలె మొర్లన్.

యేసు సైమల్ సేడ్లిన్తె అమ్ కి బెదుమ

13 జాకయ్, అమ్ కి, గావ్ ఒత్తల్తోచి బయిలె జోతె గెచ్చ, జో సేడ్ల సైమల్ అమ్ కి సేడుమ.

14 కిచ్చొక మెలె, కెయెక తెయెక తాఁ గెతి పట్టుమ్ ఇన్నె అమ్క నాయ్, గని

* 13:5 13:5 ద్విత్వీయాపదేశ కాండుము 31:6. † 13:6 13:6 కీర్తనలు 118:6 ‡ 13:12 13:12 యెహూసలేమ్ ఒత్తల్తో. లూకా 23:32-33, యోహాను 19:17-18, మార్కు 15:20-22, మత్తయి 27:31-33.

§ 13:14 13:14 మెలె, వరలోకుమ్. డీసయ్లిసి 21:2 దెక.

దస్సిచి తిలి కీచెంగిల్ పట్టుమ్చి రిసా రకీత్తునుమ్.

15 రోజుక దేముడుక బలి దిలి రితి, జో అమ్క దిలి ఆత్మసెక్కిక జోక గవురుమ్ కెరుము. కీసి బలి మెలె, జోచి నావ్చి విలువ ఒప్పున గవురుమ్ సంగితిసి.

16 అన్నె, మాన్సుల్క చెంగిల్ దెకుక, చి తుమ్క కలుగు జలిన్క అన్నె మాన్సుల్క తోడు దెక ముల నాయ్. కిచ్చొక మెలె, దసచ్చక 'బలివొ' మెనయ్ దేముడుక సర్ద.*

తుమ్క సికడ్డనక మరియాద కెర

17 తుమ్క సికడ్డనచి కోడు తుమ్ నూన, దాక్ కెరన, తుమ్చి సొంత ఇస్టుమ్ కెరుక ముల దా, జోవయించి కోడుక మరియాద కెర. కిచ్చొక మెలె, తుమ్చ ఆత్మల్క 'చెంగిల్ తత్తు' మెనయ్ సికడ్డతి, అన్నె, క్రీస్తు ఈంజ లోకుమ్తె అన్నె ఉత్త జా ఎత్తిజిన్క పరిచ్చు కెర్తి దీసి జెయెదె. అయ్లె, "దేముడు అమ్క దిలి కామ్క 'చెంగిల్ కెర్లమ్' గే 'గార్ కెర్లమ్' గే జో దేముడుచి మొక్కె అమ్ సాచి నజనుక తయెదె" మెన జానయ్ తుమ్క జేవ్ సికడ్డతి, దెకీతతి. జేవ్ తుమ్క సికడ్డన దుకుమ్ నెంతె సర్ద తెన్ ఏలుప కెర్తి రితి తుమ్ జోవయించి తెడి తా. జోవయింక అల్లర్ కెర్లె, దుకుమ్ జవుల చి తుమ్క లాబుమ్ తయె నాయ్.

అమ్చి రిసా ప్రార్దన కెర

18 అమ్చి రిసా తుమ్ ప్రార్దన కెర్లె తా. 'అమ్ ప్రొరపాట్ జము నాయ్ గ్గని ఎత్తిక సత్తిమ్ కెరుక ఆన తెన్ అస్సుమ్' మెన అమ్చి పెట్టి అమ్ జానుమ్.

19 అన్నె కిచ్చొక 'ప్రార్దన కెర్లె తా' మెన తుమ్క ఆవ్ బతిమాల్పా జా సంగితసి మెలె, ఆవ్ అన్నె బే బేగి తుమ్తె అన్నె జెంక దేముడు వాటు దెవున్ మెనయ్ తుమ్ ప్రార్దన కెర.

20 జలె, జోచ మెండల్ జల అమ్ నంపజలనక ముక్కిమ్ జలొ గొప్పుడు జలొ అమ్చొ ప్రబు జలొ యేసుక అన్నె జియన్లొ సేంతుమ్ దెతో దేముడు, కెయ్క తెయ్క కామ్క జెతికయ్ జోచి ప్రమానుమ్చి రిసాచి నూయి జలొ లొయిచి సెక్కి తుమ్క తోడు తవున్.

21 జోచి ఇస్టుమ్ రితి తుమ్ ఇండితి రితి తుమ్క దొర్కు జలిసి ఎత్తి దెవున్, చి జో మెన్సిత్తి బుద్ది తుమ్చి పెట్టి తతి రితి తుమ్చి పెట్టి కామ్ కెర్లె తవున్. యేసుక్రీస్తుచి అత్తి ఈంజ ఎత్తి జర్లు కెరెదె. జోక కెయ్క తెయ్క పరలోకుమ్చి గవురుమ్ తవును! ఆమేన్.

ఆకర్ కోడు

22 జలె, బావుడ్లు, ఇదిల్ కొట్టు తెన్ ఆవ్ రెగిడ్లి ఈంజ జాగర్ద సంగితి దయిరిమ్ సంగితి ఉత్తుమ్ తుమ్ ఓర్పుప జా.

23 అమ్చొ బావొ జలొ తిమోతిక †విడ్డల్ కెర అస్సి మెన తుమ్ జాన్క మెన ఆవ్ ఆన జతసి. జో బే బేగి ఉట్ట అయ్లె, అంచి తెన్ జో జెయెదె, చి బెద తుమ్తె జా తుమ్క దెకుమ్దె.

24 తుమ్క బోదన కెర్లె ఎత్తిజిన్క చి ప్రబుచయ్ జల అన్నె ఎత్తిజిన్క అమ్చి ప్రేమ తుమ్ సంగ. ఇటలీ దేసిమ్ తెంతొచ నంపజలన్ ఎత్తిజిన్ తుమ్క జోవయించి ప్రేమ సంగ తెద్రయ్తతి.

25 తుమ్ ఎత్తిజిన్ తెన్ ఎత్తి అదికారుమ్ తిలొ దేముడుచి దయ తవున్! ఆమేన్‡.

* 13:16 13:16 కొందిల్క రెగిడ్లి ఏక్ నంబర్ ఉత్తుమ్ 10:31 దెక. † 13:23 13:23 జెయిల్తె తెంతొ, కిచ్చొగె. ‡ 13:25 13:25 తెద్దిలి

యాకోబు రెగిడ్లి ఉత్త్రుమ్ బారిక్ జలో యాకోబు రెగిడ్లి ఉత్త్రుమ్

1 దేముడుచి, ప్రబు జలో యేసుక్రీస్తుచి నేవ కెర్తొ జోచొ * గొత్తి సుదొ జలో † యాకోబు, వేర వేర దేసిమ్లుతె చెతుర్పు జల ‡ బార తెగల్చ యూదుల్క, జోబర సంగ కెర రెగిడ్లి ఉత్త్రుమ్.

అల్లర్ సేడ్డిసచి రిసా దయిరిమ్ కోడు

2 బావుడ్లు, తుమ్ వేర వేర అల్లర్ సేడ పరిచ్చు రితి జలె, 'చెంగిల్' మెన పూర్తి సర్ల తెన్ తా

3 కిచ్చొక మెలె, తుమ్చి నముకుమ్ అల్లర్లు వాల్ పరిచ్చు జలె, జీన్లె, తుమ్చి పెట్టి పూర్తి నిదానుమ్ జస్తె.

4 ప్రబుచి ఆత్మక తుమ్ పూర్తి జతి రితి, తప్పు నే జతి రితి, తుమ్చి ఆత్మతె కిచ్చొ చెంగిల్చి నే పిట్టి రితి, జేవ్చి కామ్ పూర్తి జర్గు కెర్తి రితి తుమ్ నిదానుమ్ కెరన.

5 ఇన అల్లర్ పరిచ్చుల్తె కీసి ఇండుక గే తుమ్తె కో జలెకు నేన్లెగిన, దేముడుక పున. కో పుసిలె, నే గోల కెర్తె, దర్ముమ్ తెన్ జో బుద్ది తయెదె.

6 గని ముక్కిమ్క ఎక్కి నముకుమ్ తెన్, కిచ్చొ అన్మానుమ్ నెంతె, పున. కిచ్చొక మెలె, కక్క అన్మానుమ్ తయెదె గే, గట్టిజ వాదు వీర్లె సముద్దుమ్చ కెర్తల్ కీసి ఇత్తల్ ఒత్తల్ లయెదె గే, జో మాన్సు దస్సి జయెదె.

7 నిజుమి, దసా మాన్సుక దొన్ని మెన్సుల్ తయెదె. కిచ్చొ కామ్తె కి జోక ఎక్కి నిదానుమ్ తయె నాయ్.

8 దసా మాన్సు, జలె, కీసి ప్రబుతె నజన్లె కి కిచ్చొ కి దొర్కు జయెదె మెన ఉచరుక జయె నాయ్!

అల్లర్ సేడ్డిసి ఓర్పుప జతిన్చి కొడొ

9 కిక్సేన్ జవున్ బావొ దాక్ జలె, బీద సుదొ జలె, దేముడు జోక గవురుమ్ రితి కెర అస్సె, జోక ఆత్మ సామ్నారుమ్ కెర అస్సెచి రిసా సర్ల జవున్.

10 దస్సి, సామ్సారి జలో బావొ కో జలెకు ప్రబుచి తెడి దాక్ జంక జలెకి, ఏక్ వేల బీద జంక జలెకి, జో కి జోచి పెట్టి సర్ల తియన్సు. కిచ్చొక మెలె, బయిలుచి చివ్వర్చ పుల్లొ కీసి పొర్ను జా సుకులగె, జో మాన్సుకి ఆకర్క మొరెదె.

11 బయిలుచి చివ్వర్ జలె, పొద్దు బార్ జా గట్టిజ వాదు ఒప్పుడ్ కెర్లె, జేవ్చ పుల్లొ సుకిల్ రితి పాడ్ కెర్తయ్. దస్సి సుకా గెచ్చు గెస్త గెతతి. జోవయించి నూటి గెతయ్. దస్సి, జోచ కమొ కెర్తె కెర్తె సామ్సారి కి మొరెదె.

12 ప్రబుచి రిసా కో నిదానుమ్ తెన్ కిచ్చొ కిచ్చొ అల్లర్ ఓర్పుప జవుల గే, జోక చెంగిలి. కిచ్చొక మెలె, పాపుమ్తె దెర్పు నే సేడ్లె జేవ్ అల్లర్ సేడ్లి పరిచ్చుతె జీన్లె, దేముడు దెతి పరలోకుమ్తె జేవ్ గెతి కిరీటుమ్ జోక దొర్కు జయెదె. దేముడు ప్రమానుమ్ కెర్లి కోడు 'కో అంక ప్రేమ కెర్తి రితి ఇండుల గే, జోవయింకయ్ బెదవనిందె'.

13 గని అల్లర్ సేడ్ల పరిచ్చుల్ జతె పొది, కో పాపుమ్ కెరుక ఉచర్లె జవున్, పాపుమ్ కెరుక దెర్లె జవున్, "దేముడు అంక పాపుమ్ కెరయ్తయ్" మెనున్ నాయ్. కిచ్చొక మెలె, దేముడు పాపుమ్తె బెదితోసా నెంజె, పాపుమ్తె ఎద్దరె బెదె నాయ్, కో కి, కిచ్చొ కి జోక పాపుమ్ కెరవుక నెత్తిర్, చి 'పాపుమ్ కెర్పు' మెన

* 1:1 1:1 నెంజలి 'గొతిమాన్సు' నెంజలి 'నేవ కెర్తొసా'. † 1:1 1:1 ఈజొ యాకోబు యేసుచొ బావొన్ జా తిలో, బెర్తె. మరియు చి యోసేపుచి పెట్టిచొ. యెరూసలేమ్చ నంబజలనచి నబక వెల్లొ తిలో. బారికుల్ 15:6-29, 21:18, గలతి 1:19, 2:9, 12. ‡ 1:1 1:1 'బార తెగల్' మెలె, ఒగ్గర్ పూర్ణుమ్ తెంతొ, యాకోబుచ బార పుత్తర్లు తెంతొ యూదుల్తె బార తెగల్ అస్సి. ఎత్తి పుత్తున్ తెంతొ ఏక్ తెగ. § 1:9 1:9 1 కొరింది 7:22 దెక.

కిచ్చొ రిసా ఉచరె నాయ్, కేన్ పాపుమ్ కెరె నాయ్.

14 మాన్సుక పాపుమ్ సికయ్ తిసి కిచ్చొ మెలె, జోచి సొంత *పెట్టిచ గార్ ఆసలి జోక సికయ్ తయ్, పెలయ్ తయ్.

15 మాన్సుచి పెట్టి ఆస మొదొల్ జా జెర్మ, గజ్జల్ జా వడ్డ, పాపుమ్ వీరయ్ తయ్. ఒత్త తెంతొ, జా పాపుమ్ వడ్డ వడ్డ పూర్తి జా, మొర్ను వీరయ్ తయ్.

చెంగిల్ తిలిసి ఎత్కి దేముడు తెంతొ జెత్తిసి

16 నాయ్, బావుడ్లు, తుమ్ మోసిమ్ నీడ నాయ్.

17 చెంగిల్ తిలిస్ ఎత్కి, సత్తిమ్ తిలిస్ ఎత్కి వరలోకుమ్ తెంతొ జెతయ్. ఉజిడ్ ఎత్కిక అబ్బొసి జలో దేముడు తెంతొ జెతయ్. జో మార్పుప జతోసా నెంజె, జోచి ఉజిడి కెయ్య నీడ జయె నాయ్.

18 జోచి సొంత ఇస్టుమ్క, జోచి సత్తిమ్ కోడుచి సెక్తికయ్ అమ్క జో జెర్మయ్ లన్. కిచ్చొక మెలె, జో జెర్మయ్ లన కెర్లస ఎత్కితె అమ్ జోక దిలి † నొవొ జతి రితి అమ్క నొవర్ జెర్మయ్ లన్.

19 ప్రేమ తిల బావుడ్లు, ముక్కిమ్క తుమ్ కిచ్చొ దెరన మెలె, తుమ్తె ఎత్కి మాన్సు బుద్ది కొడె సరిగా సూన్తన జా, బమ్మ తెన్ లట్టబ్బన నే జతె, బే బేగి కోపుమ్ జా నాయ్.

20 కిచ్చొక మెలె, మాన్సుచి కోపుమ్ దేముడుచి పున్నిమ్క వాట్ దెయె నాయ్, జోచ పున్నిమ్ కమొ జర్గు కెరె నాయ్.

21 జాకయ్, మర్కటుమ్ బుద్ది ఎత్కి, తుమ్చి పెట్టి గుడియయ్ జలి కుస్సిదుమ్ ఎత్కి తుమ్చి పెట్టి తెంతొ వెంట గెల కెర, దాక కెరన, కోపుమ్ నే జతె, దేముడు తుమ్చి పెట్టి రోవీలి జోచి కోడు సేంతుమ్ తెన్ తుమ్ సూన సూన జాక పోసన. జా కోడు తుమ్చ ఆత్మల్క రచ్చించుప కెరుక తెరె.

22 గని దేముడుచి కోడు ఎత్కి సూన్తనయ్ తుమ్ జా నాయ్. ఎత్కి సూన్తనయ్ గని జోచి కోడు నే కెర్లస జలె, తుమ్ మోసిమ్ కెరన తస్తె. జోచి కోడ్ రితి ఇండ, చి తుమ్చి ఆత్మతె పలితుమ్ దెరెదె.

23 జోచి కోడు ఎత్కి సూనయ్ కో దస్సి ఇండె నాయ్ గే, కిసి జతయ్ మెలె, అద్దుమ్తె మాములుమ్ మొకోమ్ దెకన్తోసొచి రితి జతయ్.

24 జో మాన్సు అద్దుమ్తె దెకన పస్ల ఉట్ట గెచ్చ, కిసి డీసిలో గే బేగి పచ్చ గెల్తయ్.

25 గని, ఎత్కిక ‡ ఆదారుమ్ తిలి ఆగ్గు కో చెంగిల్ అర్దుమ్ కెరన పోసన జా ఆగ్గుచి ఉప్పిరి నిదానుమ్ జయెదె గే, జోచి రితి సూన పవేన్తోసొ నే జతె, జా ఆగ్గు కెర్తోసొయి జయెదె, చి జా ఆగ్గు రితి జో ఇండితిసి పాపల్, తప్పుల్, ఇండితిస్ తెంతొ జో మాన్సుక విడ్డల్ కెరెదె, చి జా ఆగ్గు రితి ఇండితిస్తె జోక చెంగిల్ జయెదె, ఆత్మపలితుమ్ దెరెదె.

దేముడుచి నిజామ్చి బక్తి

26 “దేముడుచి బక్తి ఆవ్ కెర్తసి” మెన కో ఉచరంతయ్ గే, జోచి చోండి తెన్ ఇస్టుమ్ అయ్లి రితి లట్టబ్తయ్ గే, జోవయించి పెట్టి జోక జొయ్యి మోసిమ్ కెరంతయ్. జోవయించి బక్తి ఆరి జతయ్.

27 అమ్క అబ్బొ జలో దేముడుచి మొక్కె మాన్సు కెర్తి కిచ్చొ బక్తి సత్తిమ్చి నిజామ్చి జయెదె మెలె, అమ్ జోచి సేవ కెర్తినక ‘సత్తిమ్చి నిజామ్చి’ మెన కీస కమొ రుజ్జు దెకవుల మెలె, పోర బోదల్చ, రండెల్ మాన్సుల్చ బాదల్ దెక అమ్ తోడ్ కెర్తసి, పడ్డొ ఈంజ లోకుమ్చ పాపుమ్ కమొతె అమ్ నే బెదితె ఆత్మ సుద్ది తతిసి.

* 1:14 1:14 3:15 దక. † 1:18 1:18 సంక్యా 15:19-21, ద్వితీ 18:3-4, రోమి 11:16. ‡ 1:25 1:25 2:18 దక.

2

సామ్యార్థుక బీద సుదల్క తేడల్ నే దెకుత్

1 బావుడ్లు, పరలోకుమచి ఉజిడి తిలొ అమ్చొ ప్రబు జలొ యేసుక్రీస్తుక తుమ్ సంపజలి రిసా, తిలసక నెంజిలసక తేడల్ దెక నాయ్.

2 మెలె, దొగుల సబతె అయ్లె, ఎక్కిలో జలె, బజర్చవ ముద్దివొ ఉంగారల్ తియన చెంగిల్ పాలల్ గలన అయ్లె, గని అన్నెక్లొ బీద తా పొర్న పాలల్ గలన తా జోకి అయ్లె,

3 చెంగిల పాలల్ తిలొసొక తుమ్ చెంగిల్ దెక, “ఈందె, ఇన్నె చెంగిల్తె వెసు” మెన పురె బుకార్లె, గని బీద సుదొక “ఒత్తటివ” జవున్, “అంచి చట్టె వెసు” మెన జవున్ సంగిలె,

4 తుమ్ దొన్ని మెన్నుల్ జా తప్పుచ తీర్పుల్ కెర్తన జా తన్న.

5 తుమ్ నూన, ప్రేమ తిల బావుడ్లు. ఈంజ లోకుమచి దనుమ్క దెకిలె, ఒగ్గర్జిన్ బీద సుదల్ అస్తి. జలె, *జోవయింతె ఒగ్గర్జిన్క దేముడు నిసాన, జోచి నముకుమ్ జతు మెనయ్, జోక ప్రేమ కెర్తనక జో దెతి వాటతె బెదుత్ మెనయ్, మెలె, పరలోకుమతె బెదుత్ మెనయ్.

6 తుమ్, బీద సుదల్క నిస్కారుమ్ దెక అస్సున్. తుమ్క కో నస్థల్చ మోసిమ్లు కెర్తతి గే తుమ్ ఉచర. బీద సుదల్ నాయ్, గని సామ్యార్థుయి దస్సి కెర్తతి. జెవ్వి తుమ్క తీర్పు కెర్తి గెరితె వెలన తగుల్ కెర్తతి.

7 పడ్డొ, తుమ్ క్రీస్తుక సంప కెర్తికయ్, జోచి నావ్ తెన్ బాప్తిసుమ్ నజన్లదు, గెద. జలె, జోచి నావ్, గవురుమచి నావ్, కో దూసుప కెర్తతి మెలె, బీద సుదల్ నాయ్, గని సామ్యార్థుయి.

* 2:5 2:5 కొరింథీల్క రెగిడ్లి 2 నంబర్ ఉత్తము 1:27-29. † 2:8 2:8 లేవీయకాండుమ్ 19:18 మత్తయి 22:39, చి యోహాను 13:34 దెక. ‡ 2:11 2:11 నిర్గమకాండుమ్ 20:14, ద్విత్వీయోపదేశ కాండుము 5:18. § 2:11 2:11 నిర్గమకాండుమ్ 20:13, ద్విత్వీయోపదేశ కాండుము 5:17. * 2:12 2:12 1:25, చి 2:8 అన్నె దెక.

8 దేముడుచి కొడతె రెగిడ్లి రితి,

† “తుమ్క తుమ్ కెర్ది ప్రేమ కెరంతసు గే, తుచి పాసిచొ మాన్సుక కి తెద్ది ప్రేమ కెర్తె తా”

మెన పరలోకుమచొ రానొ జలొ దేముడు దిల ముక్కిమ్చి ఆగ్గు తుమ్ ఇండితినతె నెరవెర్నుప కెర్తె, తుమ్క చెంగిలి.

9 గని, జా ఆగ్గు నెరవెర్నుప నే కెర్తి రితి తుమ్ తేడల్ దెకిలె, పాపుమ్ ఇండితను, చి ఆగ్గుల్చి మొక్క పాపుమ్ సుదల్చి సిచ్చక విలువ జా అస్సున్.

10 కిచ్చొక మెలె, ఆగ్గుల్ ఎత్కి నిదాసుమ్ కో కెర్తె, గని మొత్తుమ్తె ఎక్కి జవున్ పిట్టయ్లె, మొత్తుమి పిట్టయ్లొసా జతయ్, చి మొత్తుమ్చి సిచ్చక జో మాన్సు విలువ జా అస్సి.

11 కిచ్చొక మెలె,

‡ “లంజెకమొ కెర నాయ్”

మెన సంగిలొసా,

§ “నరు అత్య కెర నాయ్”

మెన సంగిలొసా ఎక్కిలొయి. జలె, తుమ్ లంజెకమొ నే కెర్తె కి నరు అత్య కెర్తెగిన, జో దేముడు దిల ఆగ్గుల్ మొత్తుమ్చి మొక్క పాపుమ్ కెర్తన జా అస్సున్.

12 జలె, అమ్చ పాపుమ్చ ఆసల్, తప్పుల్ తెంతొ అమ్క విడ్డల్ కెర్తి *మాన్సుల్క ప్రేమ కెర్తి కన్కారుమ్ దెకితి ఆగ్గుక దెకయ్ దేముడు తుమ్క తీర్పు కెరెదె. అమ్క ‘జయ్యి ఆగ్గు రితి ఇండిల గే నాయ్ గే’ మెన జో తీర్పు కెరెదె. జయి కోడు నే పచ్చితె తుమ్ లట్టబా, ఇండ.

13 కిచ్చొక మెలె, కో అన్నె మాన్సుల్క కన్కారుమ్ దెకె నాయ్ గే, దేముడు జోకయ్ తీర్పు కెర్తిన్తె జోకయ్ కన్కారుమ్ దెకుక బెదె నాయ్. గని, కో అన్నె మాన్సుల్క కన్కారుమ్ దెకితయ్ గే,

జోక తీర్పు కెర్తి పొదిక జో ప్రబు జోకయ్ కన్కారుమ్ దెకెదె.

14 బావుడ్లు, “ప్రబుక నంప కెర్తసి” మెన ఎక్కిలో సంగిలె కి, జో బుల్లి బుద్ది దస్సి నముకుమ్ తెన్ నే బెదిలె, కిచ్చోయ్ లాబుమ్! ‘నముకుమ్’ మెన జో మాన్సు రితి సంగితిసి జోక రచ్చించుప కెరుక తెరె గే? తుమ్ ఉచర.

15 నంపజలొన్తె కేన్ జవున్ బావొక గే, బేనిక గే, సరిపుచుప జత పాలల్ నెంజిలె జవున్, సరిపుచుప జతి రోజుకచి అన్నిమ్ దొర్కు కెరంతి సెక్తి జవున్ నెంజిలె,

16 క్రో జలెకు జోక “చెంగిల్ తా. తుమ్క పాలల్ చి అన్నిమ్ దొర్కు జవున్” మెన సంగిలె, గని సరి జతి తోడు నే దిలె, కిచ్చో లాబుమ్! కామ్క నెంజె.

17 దస్సి, రితి నముకుమ్ సంగల్లె, గని కామ్క జెతికయ్ కామ్ నే కెర్లె, జా నముకుమ్ ఆరిచి.

18 “తుకయ్ నముకుమ్, గని అంకయ్ కమె” మెన కో జలెకు అన్నెక్కోక సంగిలె, జో అన్నెక్కోక ఆవ్ కిచ్చో జబాబ్ దెయిందె మెలె, “తుచ కమె నెంతె తుచి నముకుమ్ అంక రుజ్జు జయె నాయ్. కేన్ జవున్ కామ్ కెర్లెకయ్ నముకుమ్ చినుక జయెదె. ఆవ్, జలె, అంచ కమెకయ్ అంచి నముకుమ్ దెకయిందె” మెనయ్ జబాబ్ దెయిందె.

19 † “ఎక్కిలో దేముడు ఎక్కిలోయి అస్సె” మెన తుమ్ నంప కెర్తను. జా సరిగా, గని దస్సి మెన బూతల్ కి ఒప్పున్తతి. గని ఒప్పున జేవ్ జంక బియఁ అద్దుర్ జా గెతతి.

20 చెంగిలి నే ఉచర్తొ ఓ మాన్సు, తుయి కో జలెకు, కమెతె నే రుజ్జు జతి నముకుమ్క ‘ఆరిచి’ మెన, ఆవ్ తుక రుజ్జు దెకవుక తుక కావలె గే?

21 జలె, ‡ “ ‘బలి’ మెన పుత్తుద్క కండ దె” మెన దేముడు సంగిలి రితి పుత్తున్ జలొ ఇస్సాకుక అబ్రాహామ్ బలి దెతి టాన్తె బంద తెయార్ కెర్లిన్ తెన్, జో కెర్లి జా కామ్చి రిసాయి, “నిజుమి అన్నె పూర్తి నంప కెర్తయ్, సత్తిమ్ తెన్ అస్సె” మెన, దేముడు ‘జోక పున్నిమ్’ మెలి రితి అబ్రాహామ్క తీర్పు దెకె నాయ్ గే?

22 మెలె, జో అబ్రాహామ్చ కమెతె జోచి నముకుమ్ బెద కామ్ కెర్లె తిలి, చి జోవయించ కమెతె జోచి నముకుమ్ బార్ జా నెరవెర్చుప జలి.

23 దస్సి, జా కామ్తె జోచి నముకుమ్ రుజ్జు జలి రిసా,

§ “అబ్రాహామ్ దేముడు సంగిలి కోడు నంప కెర్లి రిసాయి ‘జోక పున్నిమ్’ మెలి రితి ప్రబు దెకిలన్”

మెన రెగిడ్లిన్క ‘నిజుమ్’ జతయ్. * ‘దేముడుచొ మింతున్’ మెన కి అబ్రాహామ్చి రిసా దేముడుచి కొడెతె రెగ్గ అస్సె.

24 దస్సి, ఎక్కి సంగల్లి నముకుమ్చి రిసా నాయ్, గని జా నముకుమ్ జోచి కమెతె బార్ జా రుజ్జు జలి రిసాయి, దసా మాన్సుక ‘సత్తిమ్చొ. పున్నిమ్చొ’ మెలి రితి దేముడు దెకితయ్.

25 అగ్గె లంజె జియ తిలి రాహాబు తెన్ కి దస్సి. జేవ్చి † ఏక్ కామ్చి రిసా, మెలె, జా సుట్టు కబుర్ అయ్ల పూర్గుల్క జా మరియాద కెర, జోచి విరోదుమ్ సుదల్తె జేవ్ దెర్చు నే సేడ్డి రితి లుంకడ, వేర వాట్ తెద్రవ దిలి రిసా, ‘జాక పున్నిమ్’ మెలి రితి దేముడు దెకిలన్.

26 జలె, జివ్ నెంజిలె ఆగ్గె కిసి మొర తయెదె గే, దస్సి, మాన్సు ఇండిత కమెతె నే బార్ జలె, జో సంగితి నముకుమ్ కామ్క నెంజె, మొర అస్సె.

† 2:19 2:19 గలతీయల్ 3:20, రోమియల్ 3:30, మార్కు 12:29. ‡ 2:21 2:21 ఆదికాండుమ్ 22:1-18. § 2:23 2:23 ఆదికాండుమ్ 15:6, రోమియల్ 4:3, 5, 9. * 2:23 2:23 2 దిన: 20:7. † 2:25 2:25 యెహోసువ 2:1-24, 6:1-25.

3

కొడొ లట్టబ్బిన్తె జాగర్త దెకనుక

1 బావుడ్లు, తుమ్తె ఒగ్గర్జన్ బోదన కెర్తస జతు నాయ్. కిచ్చొక మెలె, అమ్ బోదన కెర్తసచి పూచి ఒగ్గరి, చి ఆకర్ దీసల్క ప్రబు అమ్క పరిచ్చు కెర తీర్పు కెర్తి పొదిక, అమ్క జో తియార్లి జా కామ్చి రిసా ముక్కిమ్క అమ్కయ్ తీర్పు కెరెదె.

2 అమ్తె కో కి తప్పుల్ సంగుక జయెదె, చి కొడొ లట్టబ్బిన్తె కో కిచ్చొ తప్పుల్ నే సంగుక తెర్లె, జో మాన్సుక 'జోచి ఆఁగుచి ఉప్పిరి జో పూర్తి ఏలుప కెర్తయ్, జో మాన్సుతె కిచ్చొయ్ పొరపాట్ నాయ్' మెనుక జతయ్.

3 జేవ్ కేన్ దిక్కు ఇండుక అమ్చి ఇన్లుమ్ తయెదె గే, ఒత్తయ్ ఇండుత్ మెన, గోడల్చ చోడిలె కలెమ్ చప్లయ్లె జోచి ఒండి ఆఁగుక బులవుక జయెదె.

4 ఒడల్ తెన్ కి దస్సి. ఒడ వెల్లి జలెకి, దిక్కు దెకయ్తి జాచి చట్టు జాచి కంట ఇదిలిసి జయెదె. జలె, జా ఒడక గట్టిజ వాదు పెలిలెకి, ఒడచి కంటొ దిక్కు దెకయ్తి జా చట్టు ఇదిలిసి జలెకి, ఇండయ్తొసా జా చట్టు బుడ్డవ కేన్ పక్క దెకయెదె గే, జయ్యి పక్క ఒడ గెచ్చెదె.

5 దస్సి, ఒండి ఆఁగుక జీబు ఇదిలిసి జలెకి, లట్టబ్బె జాక కెర్తి సెక్తి! అన్యె, కెర్తి డొంగుర్చ రూకుల్క ఏక్ ఇదిలిసి ఆగి డయ్ గెలెదె!

6 దస్సి, జీబు ఆగిచి రితి జయెదె. అమ్చి ఒండి ఆఁగుతె జీబు కెర్తి పాపుమ్ కెరయెదె! అమ్చి ఒండి ఆఁగుక గార్ కెరెదె. అమ్ జెర్లిల్ తెంతో మొరై ఎదక ఈంజ లోకుమ్తెచి అమ్చి బత్తుతె జర్గు జతీసి ఎత్కిక జీబు ఏలుప కెర్తయ్. మాన్సు జాగర్త నెంజిలె, అమ్చి చోడితె వెల్లి ఆగి సేడ్లి రితి జయెదె.

7 మెలె, ఎత్కి రగుమ్ జంతువుల్క, పిట్టల్క, అయివో గట్టక, మొస్స గట్టక

మాన్సు ముద్దో కెరుక జయెదె. జేవ్క మాన్సుల్ ముద్దో కెర అస్తి, గని

8 జీబుక కేన్ మాన్సు ముద్దో కెరుక నెత్తిర్తి. జీబు తుక్లె తంక నెత్త, ఒగ్గర్ ప్రమాదుమ్ దెకయ్తయ్, జాచితె మొర్తి విస్సుమ్ బెర్తు తయెదె.

9 జీబు తెన్ అబ్బొ జలొ దేముడు ప్రబుక గవురుమ్ సంగితనుమ్, గని మాన్సుల్క దూసుప కెర్తసుమ్, జోచి పొలిక జేవ్ జెర్మున్ జలెకి. దస్సి, కెర్తి తప్పు కెర్తనుమ్!

10 ఎక్కి చోడి తెంతో గవురుమ్ సంగితిసి, దూసుప కెర్తిసి బార్ జతయ్. బావుడ్లు, ఈంజ తప్పు. ఇనిచి పొస.

11 ఎక్కి గొయి తెంతో ఉంబ పుట్టె, చెంగిలొ పానిచి కారు జలి గర్చి పాని దెయెదె గే? నాయ్ గెద.

12 పడ్డె, బావుడ్లు, *అంజూరుమ్ రూక్తె ఒలివ పండ్లు దెరుల గే? నెంజిలె, ద్రాచ చెట్లె బొడ్డ పండ్లు దెరుల గే? నాయ్, గెద. దస్సి, కారు జలి పానిచి ఉంబ చెంగిలొ పాని దెయె నాయ్.

పరలోకుమ్ తెంతో చి గ్యానుమ్ కిసి తయెదె

13 తుమ్తె కక్కయ్ బుద్ది గ్యానుమ్? 'అంకయ్ గ్యానుమ్' మెన కో ఉచరన్లె, జా గ్యానుమ్తె బెదితి బుద్ది తెన్, గవురుమ్ నే ఉచరంతె, జా గ్యానుమ్తె బెదిత కమె ఇండ రుజ్జు దెకవుసు.

14 గని తుమ్చి పెట్టి గోసచి విస్సుమ్ తిలె, సొంత గవురుమ్ ఆసన్తి ఆస తిలె, 'అమ్ సత్తిమ్చ' మెన తుమ్ ఉచరన నాయ్, అబద్దుమ్ జస్తె.

15 తుమ్చి పెట్టి దస్స బుద్దుల్ తిలె, తుమ్చి గ్యానుమ్ కేనె తెంతో జెతయ్ మెలె, పరలోకుమ్ తెంతో నాయ్, గని ఈంజయ్ లోకుమ్చి తెంతోయ్, మాములుమ్ †ఆగ్ రగుమ్, బూతల్ తెంతో చి రగుమ్ జతయ్.

* 3:12 3:12 అంజూరుమ్ రూకు బొడ్డ రూకు రితి తయెదె. † 3:15 3:15 1:14 దెక.

16 గోసలు, సొంత గవురుమ్ ఆనన్త ఆసల్ కేనే తవుల గే, ఒత్తయ్ కిచ్చి ముద్దొ తయె నాయ్, గొడ్బల్ తయెదె, చి మాన్సుల్ ఎత్తి పాపుమ్ ఇండుక అలవాట్ జవుల.

17 గని పరలోకుమ్ తెంతొ అయ్లి గ్యానుమ్, ప్రబుచి సుద్ది తెన్, సేంతుమ్ బుద్ది తెన్, మెత్తన బుద్ది తెన్, సొంత ఇస్టుమ్ జర్గు కెరుక ఒగ్గర్ నే తతె, వేర మాన్సుల్చి కోడు మరియాద తెన్ సూన్తి బుద్ది తెన్ తా, కిచ్చొయ్ ఉప్రమెన్సు నెంతె తయెదె.

18 అన్నె, పున్నిమ్ కేనె పలితుమ్ దెరెదె మెలె, సేంతుమ్ కెరయ్త మాన్సుల్చి అత్తి సేంతుమ్చి బీ గలిలిన్తయ్ పలితుమ్ దెరెదె.

4

దేముడు సంగిలి రితి ఇండుక

1 తుమ్చితె తగుల్ జతిసి, జట్టి జతిసి కేనె తెంతొ జెతయ్ గే తుమ్ ఉచర. కేనె తెంతొ మెలె, తుమ్చి ఆగుతె జట్టి జత ఆసల్ తెంతొయ్.

2 కిచ్చొ జలెకి ఆస జతను, చి జా దొర్కు నే జలె, అన్నెక్లొక మార్తను. దస గోసల్ తెన్ తత్తను, గని తుమ్ ఆస జలిసి దొర్కు నెంజె, చి గొడ్బల్ తగుల్ జతె తత్తను. కిచ్చొక తుమ్క దొర్కు జలిసి దొర్కు నెంజె మెలె, దేముడుక పుసున్ నాయ్.

3 నెంజలె, పుసిలెకి, దొర్కు నెంజె. కిచ్చొక మెలె, గర్చి బుద్ది తెన్ పుసితను. మెలె, తుమ్చి పెట్టిచ ఆసల్ జర్గు కెరన్కయ్ ఉచర పుసితను.

4 కేన్ జవున్ తేర్బోద మున్సున్క ముల దా లంజె జలి రితి, తుమ్ దేముడుక ముల, ఈంజయ్ లోకుమ్చి బుద్దితె గెచ్చు అస్సున్! ఈంజయ్ లోకుమ్చి ధనుమ్క ఆస జతిసి దేముడుక విరోదుమ్ జతయ్ మెన నేన్సు గే? జాకయ్, ఈంజయ్ లోకుమ్చి

పచ్చెన కో గెతయ్ గే, దేముడుక విరోదుమ్ సుదొ జతయ్.

5 * “అమ్ మాన్సుల్చి పెట్టి జో దిలి ఆత్మ జోకయ్

నిదానుమ్ తవున్ మెన జోచి ఆస” మెన అగ్గె తెంతొ దేముడుచి కొడొతె రెద్ద అస్సె. జా కోడు ఆరి ఒత్త అస్సె మెన ఉచర్తను గే?

6 అన్నె, అమ్ వేర ఆసల్ నే జతి రితి ప్రబు అమ్క దయ కెర దొర్కు జలి తోడు తయెదె. జాకయ్, దేముడుచి కొడొతె అన్నె కిచ్చొ రెద్ద అస్సె మెలె,

† “గవురుమ్ ఉచరంతసక దేముడు దూరి కెర్తయ్, గని కో దాక్ కెరనుల గే, జోవయింకయ్ జోచి దయచి తోడు దెయెదె” మెన రెద్ద అస్సె.

7 జాకయ్, దేముడుచి తెడి జా, దాక్ కెరన జోవయించి ఇస్టుమ్ రితి ఇండుక తుమ్ కోర్ప జా. దస్సి జలదు మెలె, సయ్తాన్ పాసి అయ్లి రితి జా జోచ్చి బుద్ది సికడుక జవున్ కిచ్చొ వేర అల్లర్ కెరుక జవున్ ఉచర్లె, జోక “ఉట్ట గో!” మెలె, జో ఉట్ట నిగెదె.

8 దేముడుక పాసి జా, చి జో తుమ్కయ్ పాసి జెయెదె. తుమ్ పాపుమ్ కెర్లన తుమ్చి ఆత్మచ అత్తో సుద్ది కెరన. తుమ్ దొన్ని మెన్సుల్ తిలన, తుమ్చి పెట్టి ఎక్కి ప్రబుచయ్ జా జోచి సుద్ది జా, జోక ఎక్కి నిదానుమ్ జా.

9 తుమ్చ కమొచి పాపుమ్ ఉచరన పెట్టి బాద సేడ, లాజ్ జా దుకుమ్ జా ఏడ, దస కమొ ముల. పాపుమ్ కమొచి ఆగుక ముల్లి బుద్ది జా తుమ్ ఏడ. పాపుమ్ కమొచి సర్ద ముల్లి బుద్ది జా తుమ్ దుకుమ్ జా.

10 దేముడుచి మొక్క దాక్ కెరన, చి జో తుమ్క టీవడెదె. ‡

మాన్సుల్క తీర్పు నే కెరుక

* 4:5 4:5 నిర్గుమకాండుమ్ 20:5-6. † 4:6 4:6 సామెతల్ 3:34. ‡ 4:10 4:10 పేతురు రెగిడ్డి ఏక్ నంబర్ ఉత్తమ్ 5:5-10.

11 బావుడ్లు, ఎక్కిలోచి రిసా అన్నెక్లో దూసుప కెర్త తీర్పు కొడొ లట్టబా నాయ్. అన్నెక్లోచి రిసా దూసుప కెర్త తీర్పు కొడొ కో లట్టబుల గే, దేముడు దిలి కి ఆగ్గుక కి దూసుప కెర తీర్పు కెర్తయ్. దేముడుచి ఆగ్గుచి ఉప్పిరి తుమ్ తీర్పు కెర్తసు జలె, జోచి ఆగ్గు రితి ఇండున్ నాయ్, గని జోచి ఆగ్గుచి కంట వెల్లో కెరనుక ఉచర్లి రితి జతసు.

12 *మోసే పూర్ముచొచి అత్తి ఆగ్గుల్ దెతోసా తీర్పు కెర్తోసా ఎక్కిలోయి. అన్నె కోయి నాయ్. రచ్చించుప కెరుక నాసెనుమ్ కెరుక అదికారుమ్ తిలోసా. ఎక్కిలోక అన్నెక్లో తీర్పు కెరుక తూమ్ కొన్స!

అమ్చి బత్తు దేముడుచి అత్తి అస్సె

13 అల్లె, “ఆజి గే కలిక గే పలాన్ పట్టుమ్తె గెచ్చు వెర్సెక్ క రోజుక బియ్యార్ కెర కెర లాబుమ్ కెరనుమ్దె” మెన జవున్ తుమ్ దయిరిమ్ ఉచర్తన జాగర్త ఉచర్.

14 కలిక కిచ్చొ జర్లు జయెదె గే నేన్సు. తుమ్చి బత్తు కిసిచి? తుమ్ కిసి జన్తె మెలె, గాండుచి రితి జా, కెయ గే డీస, గడియయ్ తా, అన్నె డీసున్ నాయ్.

15 నాయ్, సొంత సెక్కిక దస్సి దయిరిమ్ నే జతె, తుమ్ కిచ్చొ ఉచరుక చెంగిల్ మెలె, “ప్రబు సెలవ్ దిలె జిమ్దె, చి ఈంజ జా కామ్ కెర్ముదే” మెన.

16 అప్పె తుమ్ కిసి జతసు మెలె, తుమ్చి సొంత సెక్కిక నంపజా, దయిరిమ్ గవురుమ్ ఉచరంతసు. దస్సి సొంత సెక్కిక దయిరిమ్ గవురుమ్ ఉచరంతిసి తప్ప.

17 జలె, కిచ్చొ కెర్లె కిసి ఇండిలె చెంగిల్ గే కో జాన జానయ్ దస్సి నే కెర్లె నే ఇండిలె,

జో మాన్సుక జా తప్పు పాపుమ్ జతయ్.

5

మాన్సుల్క మోసిమ్ కెర్లెన్చి రిసా తీర్పు

1 అల్లె, తుమ్ సొమ్మార్లు కో జలెకు, పాసి జెత తుమ్క లాయిత కస్టల్చి రిసా తుమ్ ఏడుక దెర.

2 తుమ్చి సొమ్మారుమ్ కువ గెచ్చు అస్సె, తుమ్చ పాలల్క నుస్సి కా గెల అస్సె,

3 తుమ్చి బజార్ సామన్, వెండి సామన్క చెద్ద కా గెల అస్సె. తూమ్ కి పాడ్ జతిన్క ఈంజ సామన్ ఎత్తి కువిలిసి చెద్ద కా గెలిసి రుజ్జు జయెదె.

కిచ్చొ రుజ్జు మెలె, ఈంజ నాసెనుమ్ ఆగి డడ్డిల్ రితి తుమ్చి ఆగ్గక కి కా గెలెదె. దస్సి, ఆకర్ దీసల్చి రిసా ఈంజ సిచ్చు సంపాదన కెరన అస్సున్. ఆకర్క దస్సి సిచ్చు జన్తె.

4 ఆదె, తుమ్చి బుయిచి పంటో లాయిల కూలి మాన్సుల్చి కూలి డబ్బుల్ తుమ్ మోసిమ్ కెర తియిన్లదు. జా కూలి డబ్బుల్ కేక్ గల తుమ్క నింద సంగితయ్. జా పంటో లాయిలనచి ఏడుక ఎత్తిక ఏలుప కెర్లె పరలోకుమ్చొ ప్రబు నూన అస్సె.

5 ఈంజయ్ లోకుమ్తె సుక్కుమ్ తెన్ తుమ్చి పెట్టి ఇస్సుమ్ అయ్లి రితి జియ అస్సున్. ‘కండుక’ మెన తుమ్ బెయిలల్ గొర్రెల్ గట్టక కిసి బలుమ్ కెర్తసు గే, దస్సి, మొర్తి సిచ్చు కతి రిసా తుమ్క తుమి బలుమ్ కెరన అస్సున్!

6 పాపుమ్, నత్తిమ్చ మాన్సుల్క నిందల్ కెర మార అస్సున్. తుమ్క జేవ్ జబాబ్ నే దెతె తుక్లె అస్సి.

S 4:11 4:11 ముక్కిమ్ జలి ఆగ్గు జలె, ఎత్తి అదికారుమ్ తిలో దేముడుక చి అన్నె మాన్సుల్క ప్రేమయ్ కెర్లెసి.

మత్తయి 22:37-40, మార్కు 12:30, 31, 33 చి లూకా 10:27. యాకోబు 2:8 కి దెక. * 4:12 4:12 తెలుగు బైబిల్తె ధర్మశాస్త్రమ్ మెలె, మోసేచి అత్తి దేముడు రగ్గయ్లి ఆగ్గుల్ మెన అమ్ జానుమ్. ఈంజ కొడొ ఎత్తి బైబిల్తె అగేచి పావ్ పున్సుకుమ్తె రెగ్గయ్ జా అస్సె. ఈంజ దెకవుక మెన కుపెయ బాసతె నొయ ప్రమానుమ్తె మోసే పూర్ముచొచి అత్తి రెగిడ్లి దేముడుచ ఆగ్గుల్ మెన రగ్గవ అస్సె.

యేసు అన్నె జెతె ఎదక నిదానుమ్ తెన్ రకుక

7 జలె, బావుడ్లు, ప్రబు అన్నె జెతె ఎదక తుమ్ నిదానుమ్ తా రక. ఈందె, రయ్తు బి గల తిలె, తొలి పాని ఆకర్ పాని పెట పంటొ పికిత్ ఎదక, ఈంజ లోకుమ్చి జా విలువచి పంటొ లాయిత్తి సమయుమ్ జెతె ఎదక బమ్మ నెంతె, జో రయ్తు రకెదె.

8 తూమ్ కి దస్సి నిదానుమ్ తెన్ రక. నిజామి, తుమ్చి ఆత్మతె డిట్టుమ్ జా. కిచ్చొక మెలె, ప్రబు అన్నె జెతికయ్ సమయుమ్ పాసి జా అస్సె.

9 ఎక్కిలోచి రిసా అన్నెక్కో నిందల్ ఉచర నాయ్, చి ప్రబు తుమ్కయ్ నిందల్ కెరుక తయె నాయ్. ఓదె, ఈంజ లోకుమ్చి గుమ్ముమ్ ఒత్తల్తో మెలి రితి తీర్పు కెర్తొసా జతో జో ప్రబు టీవ, మాన్సుల్క పరిచ్చ కెర తీర్పు కెరుక మెనయ్ రకితయ్.

10 బావుడ్లు, బాదల్ ఓర్పుప జతిన్చి నిదానుమ్చి రిసా తుమ్క రుజ్జు తంక మెలె, దేముడు ప్రబుచి నావ్ తెన్ జోచ కబుర్లు సూనయ్ల పూర్గుల్చి రిసా తుమ్ ఉచర. జోవయించి నిదానుమ్ దెక, తూమ్ కి దస్సి నిదానుమ్ జా.

11 ఈందె, జోవయింతె కో నిదానుమ్ తా గెల గే, 'జోవయింకయ్ చెంగిలి' మెన సంగితసుమ్. *యోబు పూర్గుమ్చొ ఒగ్గర్ ఒగ్గర్ అల్లర్ సేడ్లె కి, జో నిదానుమ్ తా గెలిన్చి రిసా సూన అస్సున్. జో యోబు నిదానుమ్ తతికయ్, దేముడు జర్గు కెర్లిసి, కన్కారుమ్ దెకిలిసి, రచ్చించుప కెర్లిసెచి రిసా సూన అస్సున్, గెద. దస్సి, తూమ్ కి దేముడుచి దయ దెక అస్సున్.

ఒట్టు నే గలనుక

12 ముక్కిమ్క, బావొ, పరలోకుమ్చి సాచి జవున్, బుయిచి సాచి జవున్, కిచ్చొచి సాచి జలెకి ఒట్టు గలన నాయ్.

'నాయ్' మెనుక జలె, 'నాయ్' మెన. 'ఎఁ ఎఁ' మెనుక జలె, 'ఎఁ ఎఁ' మెన. దస్సి, ఒట్టు నే గలంతె రితి సత్తిమి సంగ.

13 తుమ్తె కో కిచ్చొ జవున్ అల్లర్ సేడ అస్సె జలె, ప్రార్దన కెర్పు. తుమ్చితె కక్క సర్ల అస్సె గే, ప్రబుచి గవురుమ్ గాయును.

14 తుమ్చితె కక్క జొర్లొ గే జబ్బు గే అస్సె జలె, ప్రబుక సంపజలసచి సంగుమ్చ వెల్లెల మాన్సుల్క బుకార్డు, చి జేవ్, ప్రబుచి నావ్ తెన్, జా బాద తిలోసాచి తేల్ సుప, జోచి రిసా ప్రార్దన కెర్తు.

15 ప్రబుచి ఉప్పిర్చి నముకుమ్ తిలి ప్రార్దన, జా బాద తిలోసాక రచ్చించుప కెరెదె, చి ప్రబు జోక చెంగిల్ కెరెదె. అన్నె, జో బాద సేడ్లిసి కిచ్చొ జవున్ జో కెర్లి పాపుమ్చి రిసాచి జలె, జా పాపుమ్ కి జోక చెమించుప జయెదె.

16 జాకయ్, తుమ్ కెర్ల పాపల్ ఎక్కిలోచి మొక్కె అన్నెక్కో ఒప్పున, ఎక్కిలోచి రిసా అన్నెక్కో ప్రార్దన కెర, తుమ్చ బాదల్ ప్రబు చెంగిల్ కెర్లి రితి, తుమ్క జో చెంగిల్ దెతి రితి. ప్రబుక సత్తిమ్ నిదానుమ్ తిలో మాన్సు ప్రార్దన కెర్లె, జా ప్రార్దన జలె కామ్ కెర్తయ్.

17 †వలీయా పూర్గుమ్చొ జలె, అమ్చొ రితొ మాములుమ్ మాన్సు, చి "పాని పెటున్ నాయ్" మెన జా సుట్టు ఎక్కి మెన్సు తెన్ ప్రార్దన కెర్లికయ్, తిన్ని వెర్పుల్ సొప్పు జొన్నొ పూర్తి జా దేసిమి పాని పెటె నాయ్.

18 తెదొడి అన్నె ప్రార్దన కెర్లన్, చి ఆగాసుమ్ తెంతొ పాని పెట్టి, చి ఈంజ బాలోకుమ్తె పలితుమ్ అన్నె దెర్లి.

19 బావుడ్లు, సత్తిమ్ ముల కో జలెకు పాపుమ్త ఉట్ట గెచ్చ తయెదె జలె, జోక కో సత్తిమ్ వాట్ అన్నె దెకవ ఆనుల గే,

20 జో కిచ్చొ జానున్ మెలె, జో పాపుమ్

* 5:11 5:11 యోబు పుస్తకుమ్ దెక. † 5:17 5:17 రానల్ మొదొల్ పుస్తకుమ్ 17:1, 18:41-45.

కెర్లొసా పాపుమ్ వాటు అన్నె నే గెతి
 రితి జోక కో సత్తిమ్తె అన్నె కడ ఆనుల
 గే, మొర్నుతె జో మాన్సు నే గెతి రితి
 జోక రచ్చించుప కెర తమ్దె, చి జోచ
 ఒగ్గర్ పాపల్ చెమించుప జతి రితి
 అవ్కాసుమ్ దొర్కు కెర తయెదె.

పేతురు రెగిడ్లి మొదొల్చి ఉత్త్రమ్ బారిక్ జలో పేతురు రెగిడ్లి మొదొల్చి ఉత్త్రమ్

1 యేసుక్రీస్తు బారికి జలో పేతురు, పొంతు, గలతీయ, కప్పదొకియ, ఆసియా చి బితునియ ప్రదేసిమ్లుతె సొంత టాన్ నెంజిల వేర వేరతెచ తిల నంపజలన్క, రెగిడ్లి ఉత్త్రమ్.

2 యేసుక్రీస్తుచి ఇస్టుమ్ రితి తుమ్ ఇండుక మెన, జోచి సుచి జలి లోయిక తుమ్చి పాపుమ్ వుంచి జంక మెన, అబ్బొస్ జలో దేముడు * అగ్గె తెంతొ ఉచర తుమ్క నిసాన అస్సె, చి దస్సి జతి సెక్తి తుమ్క తంక మెన, తుమ్ జోచయ్ మాన్సుల్ జంక మెన, తుమ్క దేముడుచి సుద్ది తిలి ఆత్మ సుద్ది కెర అస్సె. జలె, ప్రబుచి దయ, జోచి సేంతుమ్ తుమ్క కొత్తు. నెంజితె తవున్.

దేముడు దిలి రచ్చనచి రిసొచి దయింపమ్

3 అమ్చొ ప్రబు జలో యేసుక్రీస్తుచొ దేముడు అబ్బొస్క జోబర! జోచి ఎదివాల్ దయక, అమ్క నొవర్ జెర్వువ అస్సె. యేసుక్రీస్తు మొర్ను తెంతొ అన్నె జీవ్ జా ఉట్లీన్చి రిసొ ఆమ్ కి అన్నె జీవ్ జా ఉట్ట పరలోకుమ్తె గెచ్చుమ్దే మెన

4 జీవుమ్ తెన్ బెద తిలి ఆనతె అమ్క నొవి జెర్మున్చి రిసొ, నే గార్ జతి, కల్లి నెంజిలిసి పరలోకుమ్తె తుమ్క దేముడు దిలి వాట తుమ్క రకితయ్.

5 ఆకర్ దీసల్క పూర్తి డీసుక తెయార్ తిలి రచ్చన తుమ్క నే పిట్టుక మెన, దేముడు ప్రబు జోచి సెక్తిక తుమ్చి నముకుమ్ వాల్ తుమ్క తోడ్ అస్సె.

6 ఆకర్ దీసల్చి రచ్చనచి రిసొ తుమ్ సర్ల తెన్ జతసు. గని రకుమ్ రకుమ్చ కస్తుమ్ తెన్ అప్పె ఇదిల్ కాలుమ్క తుమ్క దుకుమ్ జయెదె.

7 జేవ్ అర్ల సేడ్డిన్తె కిచ్చొ లాబుమ్ మెలె, తుమ్చి నముకుమ్క సత్తిమ్చి గే నెంజె గే తుమ్ జేవ్ అర్ల సేడ్డిన్తె డీసెదె. బజర్క 'సత్తిమ్చి గే నెంజె గే' మెన రుజ్జు తంక మెలె, జేవ్క ఆగితె పరిచ్చ కెరుల. బజార్ జలె, విలువ జలెకి పాడ్ జతి వస్తువ. జలె, తుమ్చి నముకుమ్ బజర్చి కంట ఒగ్గర్ విలువ, చి జా పరిచ్చ జలె, జీనె, యేసుక్రీస్తుచి పరలోకుమ్చి ఉజిడి గవురుమ్ పూర్తి డీస్తి ఆకర్ దీస్క జా తుమ్చి నముకుమ్క 'సత్తిమ్చి' మెన, జోచి పరలోకుమ్చి ఉజిడతె గవురుమ్తె తుమ్క జో వాట దెయెదె.

8 జోక తుమ్ సొంత అంకివొ తెన్ నే దెకితెకి, జోక ప్రేమయ్ అస్సున్. జోక అప్పె దెకుక నెంజిలె కి, జోక నంపజా అస్సున్, చి మాన్సు అర్దుమ్ కెరుక నెత్తిర్తి పరలోకుమ్చి ఎదివాల్ సర్లనంతొనుమ్ తుమ్చి పెట్టి బెరయ్ అస్సె.

9 తుమ్చి జా నముకుమ్చి రిసొ, తుమ్చ ప్రానుమ్క రచ్చన తుమ్క దొర్కు జా అస్సె.

10 తుమ్క దొర్కు జతి ఈంజ రచ్చనచి రిసొచ దేముడుచ కబుర్లు పూర్లుమ్ సంగిలన, ఈంజయి రచ్చనచి రిసొ ఒగ్గర్ వుసితె తిల.

11 కిచ్చొ వుసిల మెలె, "అమ్చి పెట్టి క్రీస్తుచి ఆత్మ సంగిల జో సేడుక తిల బాదల్ జో పడ్డొక గవురుమ్ జంక తిలిసి కేన్ సమయుమ్క జర్లు జంక, కిసి సమయుమ్క జర్లు జంక అస్సె?" మెన వుసిల.

12 దేముడు జోవయింక దెకయ్లన్, కిచ్చొ దెకయ్లన్ మెలె, జేవ్ జా కబుర్ సంగితి సేవ కెర్తిక జోవయించి రిసొ

* 1:2 1:2 రోమియల్ 8:29-30, ఎఫెసు 1:5, 11-12 చి తిశు 1:1 దెక.

నాయ్, గని తుమ్చి రిసాయి మెన దేముడు జోక దెకయ్లన్†. జా సుబుమ్ కబుర్ తుమ్ రచ్చించుప జతిన్చి రిసా, పరలోకుమ్ తెంతో తెద్రయ్లి దేముడుచి సుద్ది తిలి ఆత్మచి తెడి, తుమ్క సుబుమ్ కబుర్ బోదన కెర్ల మాన్సుల్చి అత్తి జానయ్తెయ్. జా సుబుమ్ కబుర్తె తిలిసి ఎత్తి పూర్తి అర్దుమ్ కెరనుక పరలోకుమ్చ దూతల్ కి ఒగ్గర్ ఆస తెన్ అస్తి.

దేముడుచి సుద్దిచి రితి ఇండ

13 జలె, ప్రబు జలొ యేసుతెచి రచ్చన తుమ్కయ్ దొర్కు జలి రిసా, తుమ్చ మెన్సు తుమ్ డిట్టుమ్ కెరన, నే మచ్చిల్ రితి, ముద్దొ కెరన, తెలివి తా, జో అన్నె ఉత్త జా జోచి పరలోకుమ్చి ఉజిడి గవురుమ్ పూర్తి డిస్తి ఆకర్ దిసిచి రిసా ఆస తా, తుమ్క దెతి దయచి రిసా ఉచర, జా రచ్చన కచితుమ్ దొర్కు జతి రితి పూర్తి దయిరిమ్ జా, జయ్యి నముకుమ్ పూర్తి డిట్టుమ్ దెరన.

14 జో ప్రబుచి ఇష్టుమ్ నిదానుమ్ కెర్ల బోదల్ జా, తుమ్ అగ్గె నేన్సి పొదిచ తిల ఆగ్గెచి గార్ ఆసల్ రితి తుమ్ ఇండ నాయ్.

15 తుమ్క నిసాన బుకార్లొసా కిసి పూర్తి సుద్ది అస్సె గే, తుమ్ కి కిచ్చొ కామ్తె కి కెయక తెయక దస్సి సుద్ది తెన్ ఇండ.

16 దేముడుచి కొడొతె,

‡“ఆవ్ కిసి సుద్ది అస్సి గే, తుమ్ కి ఇసి సుద్ది తంకయ్” మెన రెగిడ్లన్.

† 1:12 1:12 మెలె, జేవ్ పూర్తుల్చి కాలుమ్ నాయ్, గని పడ్డొ అయ్లనచి కాలుమ్ యేసు బార్ జంక తిలి, చి ఎక్కి యూదుల్ నాయ్, గని యూదుల్ నెంజిలన కి యేసుచి తెడిచి రచ్చన నజనుక ఈంజయ కాలుమ్ అవ్కాసుమ్ దొర్కు జలి. రోమియుల్ 11:11, 25, గలతియుల్ 3:8, 9, 14, ఎపెసు 3:6, చి పేతురు రెగిడ్లి వ్క నంబర్ ఉత్తమ్ 1:20 దెక. ‡ 1:16 1:16 లేవీయకాండుమ్ 11:44-45, 19:2, 20:7. § 1:17 1:17 జేవ్ నంపజలన వేర వేరతె నంపజలన నెంజిలనతె జతె తిల, పడ్డొ ‘సొంత టాన్ నెంజిలిసి’ మెలన్క అన్నె కిచ్చొ అర్దుమ్ తయెదె మెలె, పరలోకుమ్ నంపజలనచి సొంత టాన్ జయెదె, చి రిసా బూలోకుమ్క ‘అమ్చి సొంత టాన్ నెంజె’ మెనుక జయెదె. కొరింథిల్క పవులు రెగిడ్లి దొస్సి నంబర్ ఉత్తమ్ 5:1-2, వీలిప్పియుల్ 3:20, ఎబ్రియుల్ 11:9, 10, 13. * 1:19 1:19 యోహాసు 19:17-37, ముక్కిమ్క 34, 37. లూకా 22:44, మత్తయ 26:28, లూకా 22:30, యోహాసు 6:53-56.

17 కక్కయ్ మొకమాటుమ్ నే దెకితో, ఎత్తి మాన్సుక జేవ్ కెర్ల కమొ కొల్లి తీర్పు కెర ‘చెంగిల్’ గే ‘గార్’ గే సంగితొసాక ‘అబ్బొ’ మెన ఉంక్రయ్తను జలి, ఈంజ తుమ్చి సొంత టాన్ నెంజిలిన్తె తుమ్ గడియ జతె పొది జోవయించి మరియాద దెకయ్తి రితి జాగర్ల తెన్ నిదానుమ్ ఇండ.

18 తుమ్చ పూర్తుల్ దిలి అగ్గెచి కామ్క నెంజిలి ఇండుక తెంతో, తుమ్ విడ్డల్ జంక మెనయ్ దేముడు ప్రబు తుమ్క నెతోవ్లొ మెన జాన్సు. కిసి నెతోవ్లొ మెలె, వెండి గే బజార్ గే దన పాడ్ జత పస్సువల్ దా గెనె నాయ్,

19 గని కిచ్చొ గార్ నెంజిలి కిచ్చొ మచ్చిల్ సర్దల్ నెంజిలి గొరెక బలి దిలి రితి జోచొ పుత్తున్ జలొ క్రిస్తుచి లొయి * సువ దిలన్.

20 ఈంజ లోకుమ్ జెర్మిన్ నే జతె అగ్గె తెంతో దేముడు అబ్బొసి “క్రిస్తు రచ్చించుప కెర్లొసాక తెద్రయిందె” మెన నిసాన్ల తిలన్, గని కెయ క్రిస్తు మెన జలన్ మెలె, తుమ్చి రిసాయి ‘రచ్చించుప జతు’ మెనయ్ ఈంజ ఆకర్ సమయ్యుమ్తెయ్ బార్ జలన్.

21 క్రిస్తుచి రచ్చన నజన తా జోచి తెడి దేముడుచి ఉప్పిరి తుమ్చి నముకుమ్ తియ అస్సున్. “జో రచ్చించుప కెరెదె” మెన, జోచి ఉప్పిరి దయిరిమ్ జా అస్సున్. మెలె, క్రిస్తుక జో మొర్ను తెంతో జియడ గవురుమ్ కెర్లొచి రిసా, తుమ్చి నముకుమ్ తుమ్చి దయిరిమ్ దేముడుచి ఉప్పిరి అస్సి.

22 జలె, దేముడుచి సత్తిమ్ కోడు దెరన జా కోడ్ రితి ఇండుక ఒప్పన

తుమ్చి ఆత్మక సుద్ధి కెరన అస్సున్, చి దస్సి జా తిలె, కిచ్చొ మాయ నెంతె తుమ్ ఏక్ బావొక అన్నెక్లో ప్రేమ కెరుక జయెదె. జాకయ్, తుమ్చి పెట్టి పూర్తి నిదానుమ్ ఎక్కిలోక ఎక్కిలో ప్రేమయ్ కెర.

23 తుమ్ నొవర్ జెర్మ అస్సున్. జా నొవర్ జెర్మన్ జలిసి నాసెనుమ్ జతి బి గలిలిసి నెంజె, గని జీవ్ తిలి, కెయఁక కి తా గెతి దేముడుచి కోడు తెన్ ఈంజ జెర్మన్ తుమ్ జెర్మన్ జలదు.

24 దేముడుచి కోడుతె జో రెడ్డవ తిలి రితి,

+“ఈంజ లోకుమ్చ మాన్సుల్ ఎత్తి చివ్వర్చి రితి జతతి, జోవయిం చి గవురుమ్ చివ్వర్చ పుల్లొచి రితి జతయ్.

జా చివ్వర్ వాడువ జతయ్, జేవ్చ పుల్లొ సుకా గెప్ప గెస్త గెతతి.

25 దేముడుచి కోడు, మాత్తమ్, కెయఁక తెయఁక తాఁ గెచ్చాదె”

జలె, జీవ్ దెతి తాఁ గెతి జోవయిం చి కోడు కిచ్చొ మెలె, తుమ్క బోదన కెర్లి సుబుమ్ కబుర్.

2

1 జాకయ్, దేముడు చెంగిల్ సుదొ మెన తుమ్ చక దెక తిలె, కుస్సిదుమ్ ఎత్తి, మోసిమ్బుద్ది ఎత్తి, మాయబుద్ది ఎత్తి, గోస జతిసి ఎత్తి, దూసువ కెర్లిసి, గోస లట్టబ్బిసి ఎత్తి తుమ్తె తెంతొ వెంట గెల.

2 తుమ్చి రచ్చనతె వడ్డితి రిసా, నొవర్ జెర్మిల బోదల్ రిత జా, కిచ్చొ వేరచి నే బెదిలి సత్తిమ్ తిలి దేముడుచి కోడు జలి ఆత్మయి దూదుక తుమ్ ఆన జా తంక.

3 జాకయ్, జా దయచి రచ్చనతె తుమ్ డిట్టుమ్ జా తా.

4 మాన్సుల్ నెసిలో గని దేముడుచి మొక్కె గవురుమ్ తిలో విలువ జలో జీవ్ తిలో, జీవ్ దెతో *పత్రె తుమ్ జా.

5 జోతె అయ్లె, తుమ్ కి జీవ్ తిల పత్రల్ రిత జా, ప్రబుచి ఆత్మతె గేర్ బెద బందితి రితి సుద్ధి తిల పూజర్లు జా, దేముడుచి సేవతె బెద, జో యేసుక్రీస్తుచి తెడిచ దేముడు మెన్పితె ఆత్మ బలుల్ దెతన జస్తి.

6 దేముడుచి కొడొతె +“ఈందె, సీయోసా డొంగ్రుతె, ఏక్ పత్తుర్క టీఁవడ్డసి.

అంచి గేరుక బోడిపత్తుర్ జో జా, ఎత్తిక ఆదారుమ్ జయెదె. జో ఆవ్ నిసాన్లో గవురుమ్ కెర్లొ, అంక ఒగ్గర్ ఏలువ జలోసా జయెదె.

జోవయింక కో నంపజవుల గే, కచితుమ్ జేవ్ అంచి మొక్కె లాజ్ జంక నాయ్”

మెన రెగ్ల అస్సి.

7 జాకయ్, తుమ్ నంపజలసక జో విలువ జతయ్. గని నంపనెంజిలసక జో కిసి జతయ్ మెలె, దేముడుచి అన్నెక్ కోడుతె అస్సి. కేన్ కోడు మెలె,

+“ ‘కామ్క నెంజె’ మెన కీబందిలన జో ఏక్ పత్తురు పిట్టవుక మెన ఉచర్లె కి, జొయ్యి పత్తురు బోడిపత్తుర్ జయి అస్సె”

మెన రెగిడ్డిసి.

8 అన్నెక్ కి,

*“నంప నెంజిలన పిసిర్తో పత్తురు జో జయెదె, జోవయింక సేడయ్తో సాప్త జో జయెదె” మెన రెగిడ్డిసి. ఈంజ కోడు కిసి నెరవెర్పువ జతయ్ మెలె, ‘జర్లు జయెదె’

† 1:24 1:24 యెసయా 40:6-8. * 2:4 2:4 యేసుక్రీస్తుచి రిసా సంగితయ్. లూకా 20:17-18, మత్తయి 21:42-44, మార్కు 12:10, రోమియుల్ 9:32-33. † 2:6 2:6 యెసయా 28:16. ‡ 2:7 2:7 కీర్తనలు

118:22. § 2:7 2:7 ‘దేముడుచి గుడి బందిలన’ మెలె, జోవయింక నంప నే కెర్ల యూదుల్చ వెల్లెల మాన్సుల్. ఎత్తి అదికారుమ్ తిలో దేముడుక బక్తి కెర్ల యూదుల్చ సికడ్డన, జేవ్, గని యేసుక ‘జొయ్యి ఎత్తి అదికారుమ్ తిలో దేముడు తెర్లయ్లో క్రీస్తు రచ్చించువ కెర్లొసా’ మెన ఒప్పుసుక నెసిల, మార్గ. మత్తయి 21:42-46

దెక. * 2:8 2:8 యెసయా 8:14.

మెన అగ్గె తెంతో దేముడు సంగిలి రితి, జోవయించి కోడు నే నూన్లి రిసా జేవ్ నే కెర్లి రిసా వాట్ పిట్టవన్తతి. జయి జోవయించి తీర్పు.

9 గని తుమ్క, దేముడు కిసి దెకితయ్ మెలె, 'ఆవ్ నిసాన్లి సెకుమ్చ' మెన, 'అంచి రాజిమ్చ †పూజర్లు' మెన, 'అంచి సుద్ది తిల జాతి' మెన, 'అంచ సొంత ప్రెజల్' మెనయ్ జో దెకితయ్. అందర్ తెంతో తుమ్క బుకారా కెర, జోచి పరలోకుమ్చి ఉజిడతె గవురుమ్తె బెదయ్లో యేసు ప్రబుచ ఒగ్గర్ వెల్లో కమొచి రిసా తుమ్ సాచి సూనవుక మెనయ్ తుమ్క దస్సి నిసాన అస్సె.

10 అగ్గె తుమ్ 'దేముడుచ మాన్సుల్ ఆము' మెననుక నెతిర్లదు, గని అప్పె దేముడుచ ప్రెజల్ జా అస్సన్. అగ్గెయి తుమ్క కన్కారుమ్ దొర్కు జయె నాయ్, గని అప్పె దేముడు తుమ్క కన్కారుమ్ దెక రచ్చించువ కెర అస్సె.

11 ప్రేమ తిల బావుడ్లు, తుమ్క ఆవ్ కిచ్చొ బతిమాలూ జా సంగితసి మెలె, తుమ్ గడియ తుమ్చి సొంత టాన్ నెంజిలిన్తె అస్సన్. జలె, ఈంజ తుమ్చి సొంత ‡టాన్ నెంజిలిన్తె తుమ్ జితె తా, తుమ్చి అత్తచి ఉప్పిరి యుద్దుమ్ కెర్ల ఈంజ లోకుమ్చి ఆగుచ ఆసల్ జర్లు నే కెర్లి రితి, తుమ్ ముద్దొ కెర్ల.

12 దేముడుక నేన్ల యూదుల్ నెంజిల ఒత్తచ మాన్సుల్తె తా తుమ్ చెంగిల్ బుద్ది తెన్ ఇండ, చి జోవయింతె ఏక్ వేల కో గే తుమ్క 'తప్పుల్ కెర్ల' మెన దూసుప కెర్లె, తుమ్ సత్తిమ్ ఇండితిన్చి రుజ్జు జేవ్ దెకిలె, ప్రబు తీర్పు కెరుక జెతి దీసిక తుమ్చి రిసా దేముడుక గవురుమ్ కెరుల.

అదికారుల్క మరియాద దెకుత్

13 ప్రబుచి మరియాద టీచడ్డి రిసా, ఈంజ లోకుమ్చొ ఎత్తి అదికారిక తుమ్ మరియాద దెక. దేసిమ్క వెల్లో జా ఏలుప కెర్లొసాక కి,

14 'నేరిమ్ కెర్లసక సిచ్చు కెర్లు' మెన జవున్ 'చెంగిల్ కెర్ల మాన్సుల్క బవుమానుమ్ దెతు' మెన జవున్ దేసిమ్క ఏలుప కెర్లొసా తెద్రయల అదికారుల్క కి తుమ్ మరియాద దెక.

15 కిచ్చొక మెలె, తుమ్ సత్తిమ్ ఇండితిన్ తెన్, నేన్ల మాన్సుల్చి వెర్రిక, తప్పు మెన తుమ్ రుజ్జు దెకవ ముద్దొ కెరుక దేముడుచి ఇస్టుమ్.

16 †ఆగ్గుల్క గొతిమాన్సుల్ జల రిత తుమ్ జియ నాయ్. దనచ నెంజున్. గని ఆగ్గుల్చ గొతిమాన్సుల్ నెంజుమ్, చి ఇస్టుమ్ అయ్లి రితి జింక జయెద' మెన తుమ్ ఉచర నాయ్, దస్సి పాపుమ్తె గెచ్చు నాయ్. గని, దేముడుచ కామ్ కెర్లస, జోచయ్ గొతిమాన్సుల్ రిత జా, జోచి ఇస్టుమ్ రితి తుమ్ ఇండ.

17 ఎత్తిజిన్ మాన్సుల్క తుమ్ మరియాద దెక. బావుడ్లు జల నంపజలన్క ప్రేమ దెక. దేముడుక తుమ్ బియ. దేసిమ్క వెల్లో రానొక గవురుమ్ కెర.

18 గొతిమాన్సుల్ కి జలెకి, తుమ్చ ఎజొమాన్సుక మరియాద దెక. *మెత్తన తా కన్కారుమ్ దెకిత ఎజొమాన్సు జేవ్ జలెకి, కన్కారుమ్ నేన్లన జేవ్ జలెకి జేవ్ సంగిలి కోడు కెర.

19 కిచ్చొక మెలె, తప్పు నే కెర్లెకి, కచి గే అత్తి తుమ్చితె కో అర్ల సేడ దేముడుచి గవురుమ్ టీచడ్డి రితి ఓర్సుప జలె, జో దేముడు జో మాన్సుక 'చెంగిలొసా చొ' మెనెదె.

† 2:9 2:9 డీసయ్లిసి 1:6 దెక. ‡ 2:11 2:11 జేవ్ నంపజలన వేర వేరతె నంపజలన నెంజిలనతె జితె తిల, పడ్డొ 'సొంత టాన్ నెంజిలిన్' మెలిన్క అన్నె కిచ్చొ అర్దుమ్ తయెదె మెలె, పరలోకుమ్ నంపజలనచి సొంత టాన్ జయెదె, చి రిసా బూలోకుమ్క 'అమచి సొంత టాన్ నెంజె' మెనుక జయెదె. కొరిందీల్క వవులు రెగ్గె 2 నంబర్ ఉత్తుమ్ 5:1-2, వీలిప్పియల్ 3:20, ఎబ్రియల్ 11:9, 10, 13. § 2:16 2:16 గలతీయల్ 5:1.

* 2:18 2:18 ఎపెసు 6:5-10, కొలోస్సియల్ 3:22-4:1.

20 తుమ్ తప్పు కెర్లి రిసా దెబ్బల్ కయ్లె పొది సేంతుమ్ తెన్ ఓర్పుప జలె, కిచ్చో పున్నిమ్ నాయ్! గని, తుమ్ సత్తిమ్ కెర్లె కి సిచ్చ సేడ్లె సేంతుమ్ తెన్ ఓర్పుప జలె, దేముడు తుమ్క 'చెంగిలచ' మెన్తయ్.

21 దస్సి సేంతుమ్ తెన్ తుమ్ తంక మెనయ్ దేముడు తుమ్క బుకారయ్ అస్సె. కిచ్చొక మెలె, తుమ్చి పాపుమ్ గెన్ను మెనయ్ క్రిస్తు బాదల్ ఓర్పుప జా, తూమ్ కి జోచ అజ్జుల్తె ఇండుక మెలి కోడు తుమ్క జో వాట్ దెకవ అస్సె.

22 జో, జలె, కెయ్య కిచ్చోయ్ పాపుమ్ కెరె నాయ్. కిచ్చోయ్ మోసిమ్ కోడు లట్టబె నాయ్.

23 మాన్సుల్ జోక దూసుప కెర్లె, జోవయింక జో దూసుప నే కెర్తె తుక్లె తిలొ. జోక జేవ్ అర్ల కెర్లె కి, జోవయింక జో బియడె నాయ్, గని సత్తిమ్ తీర్పు కెర్తొ దేముడు అబ్బొన్చి అత్తి జోచి జీవ్ జో సార్పు కెర దిలన్.

24 జో యేసు సాంత ఆమ్ కెర్లె పాపల్ జోచి ఆగి వయన, సిలువతె మొర్లన్. పాపుమ్ ముల అమ్చి సాంత ఆత్మక మొర్లె రిత జా సత్తిమ్ ఇండితి రితి అమ్ జింక మెనయ్. జో యేసు కయ్ల దెబ్బలు తుమ్క చెంగిల్ కెర అస్సె.

25 తుమ్ అగ్గెయి వాట్ పిట్టవన చెదుర్ప జల మెండల్చ రిత జా తిలదు, గని అప్పె తుమ్చ ఆత్మల్ రకితో చెంగిలొ గొప్పడుతె అన్నె బుల జా అస్సన్.

3

తేర్బోదల్ బుద్ది ఇండుక

1 తుమ్ తేర్బోదల్ కి, దాక్ కెరన తుమ్చ మున్సర్లుచి అదికారుమ్క మరియాద దెక. తుమ్ దస్సి ఇండిలె, జోవయింతె సగుమ్జిన్ అప్పెచి ఎదక ప్రబుచి కొడొ రితి నే ఇండిలెకి,

జోవయింక తుమ్ తేర్బోదల్ ప్రబుచి కోడు నే సికడ్లెకి,

2 తుమ్చి సత్తిమ్చి ఇండుక, మరియాదచి ఇండుక, జేవ్ దెక దెక, ప్రబుక నంపజా, మార్పుప జవుల.

3 తుమ్ తేర్బోదలు “*సూటి కెరసుమ్దె” మెలె, మాములుమ్ డీస్టిన్క ముక్కిమ్ నే ఉచరై, సెండి సూటి కెరంతిన్ జవున్, బజార్ గట్ల తియంతిన్ జవున్, చెంగిల చెంగిల పాలల్ బందంతిసి గలంతిసి జవున్ తుమ్ విలువ దెక నాయ్.

4 గని, తుమ్క కిచ్చో సూటి కెర్పు మెలె, దేముడుచి మొక్కె ఒగ్గర్ విలువ జతి, కెయ్యక నాసెనుమ్ నే జతి పేట్చి తెడిచొ మాన్సు ప్రబుచి మెత్తన బుద్ది, సేంతుమ్ బుద్ది జా తుమ్చి పెట్టి తవున్.

5 అగ్గెచ పొదులె దేముడుచి ఉప్పిరి నముకుమ్ తిల తేర్బోదల్ జోవయించి సుద్ది తిలి ఆత్మచి సూటిక తెయార్ జా మున్సర్లుల్చి అదికారుమ్క మరియాద దెకితె తిల.

6 పూర్ణుమ్చి సారా దస్సి మున్సున్ జలొ అబ్రాహామ్క ‘ఎజొమాని’ మెన, జోచి అదికారుమ్క మరియాద దెకితె తిలి. జోచి కోడు సూన్తె తిలి. తూమ్ కి సత్తిమ్ ఇండిలె, తుమ్ కిచ్చొక కి బమ్మ జంక నాయ్, చి జా సారాచ బోదల్ రిత జస్సె.

మున్సుబోదల్ తేర్బోదల్ కిసి దెకుక

7 దస్సి, తుమ్ మున్సుబోదల్, తుమ్చ తేర్బోదల్ బమ్మ నే కెర్లి బుద్ది తెన్ పొస. జోవయింతెన్ జియ తేర్బోదక తొక్కి సెక్తి తయెదె మెన చిన, తుమ్తె ఎత్తి మున్సుబోద తేర్బోక మరియాద్ దెక. జోవయింక జాకయ్ కిచ్చొక దొగుతెర ఇసి ప్రేమ దెకుక మెలె, తుమ్ ఎత్తి దొగుతెరకయ్ దేముడు జోవయించి దయక జోవయించి రచ్చన పరుమ్చి వాట దా అస్సె. తుమ్ మున్సుబోదల్ తుమ్చ తెర్బోక ఇసి ప్రేమ దెకిలె,

* 3:3 3:3 ఎపెసు 6:5-10, కొలోస్సియల్ 3:22-4:1.

అడ్డు నెంతె దేముడు తుమ్చ ప్రార్థనల్ నూనెదె. తుమ్చ ప్రార్థనల్క అడ్డు నే జతి రితి జోవయింక ఇసి ప్రేమ దెకుత్.

ఎక్కిలోక ఎక్కిలో ప్రేమ తెన్ తంక

8 జలె, తుమ్ ఎత్కిజిన్ ఎక్కి ప్రేమయ్ తా, ఎక్కిలోక ఎక్కిలో కన్యారుమ్ దెక, నంపజలన ఎత్కిజిన్క బాబేన్ దెకితి ప్రేమ దెక, ముద్దు కెర, సొంత గవురుమ్ నే ఉచరంతె, ఎక్కి మెన్సు తెన్ తా.

9 ఎక్కిలోక అన్నెక్లో అర్ల కెర తిలె, జో అర్ల సేడ్లొసా అర్ల కెర్లొసాక అన్నె అర్ల కెరుక పోసి. ఎక్కిలోక అన్నెక్లో దూసుప కెర తిలె, దూసుప జలొసా, దూసుప కెర్లొసాక అన్నె దూసుప కెరుక పోసి. జో ఎక్కిలోక జో అన్నెక్లో 'చెంగిల్ తవున్' మెన దెకున్. తుమ్క దేముడుచి దయ దొర్కు జవున్ మెనయ్ తుమ్ ఇసి ప్రేమయ్ ఇండుక మెనయ్, తుమ్క జో నీసాన అస్సె.

10 పూర్గుమ్ దేముడుచి కొడొతె రెగ్లయ్లి రితి,

†“నర్ల తెన్ జింక చి చెంగిలి సమయుమ్ దెకుక మెన కో జలెకు ఇస్టుమ్ జయెదె గే, జోవయించి చోడి కిచ్చొ గర్చి నే లట్టబ్బి రితి, జోవయించ ఒట్టొ కిచ్చొ మోసిమ్ నే లట్టబ్బి రితి దెకన్ను.

11 దసా మాన్సు పాపుమ్ దూరి కెరన సత్తిమ్ ఇండును,

సేంతుమ్ చజ సేంతుమ్ ఇండును.

12 కిచ్చొక మెలె, పున్నిమ్ ఇండితనక ప్రబు దెకెదె,

జోవయించ ప్రార్థనల్ జో నూనెదె, గని పాపుమ్ ఇండితనక జో దెకె నాయ్, గని నూనె నాయ్.”

13 చెంగిల్ కమె కెర ఇండితి ఆన రితి తుమ్ ఇండిలె తుమ్క కో అర్ల కెరుల? కోయి నాయ్!

14 గని, సత్తిమ్ తుమ్ ఇండిలి రిసా ఏక్ వేల కో జలెకు అర్ల కెర్లె, దేముడు తుమ్క 'చెంగిల్' మెనెదె. దస అర్ల కెర్లొసక తుమ్ బియఁ నాయ్. జోవయించి రిసా బమ్మ నే జతె,

15 'పరలోకుమ్చొ ప్రబుయి జో మెన, తుమ్చి పెట్టి నిదానుమ్ క్రీస్తుక దెతి గవురుమ్ దాన. జో ప్రబుచి రిసాచి తుమ్చి పెట్టిచి దయిరిమ్చి రిసా కో “జేవచి సత్తిమ్క తుమ్ రుజ్జు దెకవ” మెన కెయఁ జవున్ తుమ్క పుసిలె, సరి జతి జబాబ్ దెంక తెయార్ జా తా. గని, †జబాబ్ దెంక జలె, బడాయ్ నెంతె మరియాద తెన్ లట్టబా.

16 అన్నె, 'సత్తిమ్' మెన తుమ్చి పెట్టి జాన్తిసి జర్గు కెర్లి రితి తుమ్ ఇండ, చి క్రీస్తుచి తెడి తుమ్ సత్తిమ్ ఇండితిన్చి రిసా తుమ్క బియడ్డన దూసుప కెర్లె, జేవ్ కెర్లె నిందల్క 'ఆరిచ' మెన జేవ్ చినన, లాజ్ జవుల.

17 తప్పు కెర్లి రిసా సిచ్చ జతి కంట, సత్తిమ్ కెర్లి రిసా సిచ్చ జంక చెంగిలి. తుమ్ సత్తిమ్ కెర్లి రిసా సిచ్చ జంక ఏక్ వేల దేముడుచి సెలవ్ తయెదె.

18 మెలె, క్రీస్తుక దెకిలె, క్రీస్తుకి దస్సి, జో పూర్తి సత్తిమ్ తిలె కి, పాపుమ్ జలొసక 'జోవయించి పాపుమ్ గెన్ను' మెన జో మొర్లన్ తెన్ అమ్చి పాపుమ్ పూర్తి గెచ్చవయ్ గెలన్. జా కిఎక్కి సుట్టు జో బలి జలిసి సరిపుచ్చువ జెయెదె. అమ్క దేముడు అబ్బొన్తె అన్నె కడ ఆన్తి రిసా మొర అమ్చి పాపుమ్ గెచ్చయ్లన్. ఈంజ లోకుమ్చి ఆగ్ రగుమ్క జోక మార్ల, గని జోచి అత్తుక దేముడు అబ్బొసి జోక అన్నె *జియడ్డన్.

19 జో మొర్లి పొది యేసు కేనె గెలన్ మెలె, బూలోకుమ్క ఎట్టొ లోకుమ్తె జేలి

† 3:10 3:10 కీర్తనలు 34:12-16. † 3:15 3:15 మత్తయి 10:19, మార్కు 13:11, లూకా 12:12.

§ 3:18 3:18 రోమియల్ 6:10, ఎబ్రియల్ 7:27, 9:12, 28 చి 10:10 దెక. * 3:18 3:18 లూకా 24:39 దెక. అత్తు రగుమ్చి ఆగ్ తెన్ యేసు అన్నె జలన్. కొరిందల్క పవులు రెగిడ్లి ఏక్ నంబర్ ఉత్తమ్ 15:44, పిలిప్పియల్ 3:21. చి ఎబ్రియల్ 10:5 దెక.

జల, ఆకర్ దీసిచి పరిచ్ఛక సిచ్ఛక రకిత ఆత్మల్ తిలినతె జోవయించి ఆత్మక జో ఉత్త గెచ్చ, దేముడు అబ్బొనచి కోడు సాడుప కెర్లన్.

20 అగ్గెయ, పూర్లుమ్ పొది, †నోవహుచి కాలమ్తె “అంక సంపజా రచ్చించుప జతు” మెన దేముడు సిచ్చ వాయిద కెర రకిలకి, జో నోవహు, జా ఓడ బందితె తిలి పొది జోచి కోడు స్పూనుక నెసిలనచ ఆత్మల్క సుబుమ్ కబుర్ కోడు సాడుప కెర్లన్. జలె, జా ఓడతె తొక్కిజిని, మెలె, ఎక్కి అట్టు జిన్ మాన్సుల్ పానితె రచ్చించుప జల.

21 జా సమయుమ్తె జేవ్ దన్ని పానితె రచ్చించుప జలిసి, జలె, బాప్తిసుమ్క టాలి జతయ్. మెలె, పానితె బాప్తిసుమ్ జతిసి తుమ్క రచ్చించుప కెర్తి గుర్తు జతయ్. కిసి మెలె, తుమ్చి ఆగ్గుచి ముర్కి, దొవనతినచి రిసా నాయ్, గని యేసుక్రీస్తు అన్నె జీవ్ జా ఉట్టి రిసా దేముడుచి మొక్కె తుమ్చి పాపుమ్ గెలి గుర్తుయి బాప్తిసుమ్ దెకయ్తయ్. ప్రబుక సంపజలన జోవయించి బుద్ది మార్పుప జా ప్రబుకయ్ గవరుమ్ కెర్తి రితి ఇండుక ఇస్టుమ్ జలినచి గుర్తు బాప్తిసుమ్తెయి దెకయ్తతి.

22 జలె, జో క్రీస్తు జీవ్ జా ఉట్ట కెర పరలోకుమ్తె వెగ గెచ్చ, దేముడు అబ్బొనచి ఉజెతో పక్క వెస తా, ‡దూతల్చి ఉప్పిరి, అదికారుల్చి ఉప్పిరి, సక్తుల్ ఎత్కిచి ఉప్పిరి ఏలుప కెర్తయ్.

4

ఆగ్గక బాదల్ సేడ్లె బుద్ది చెంగిల్ జతిన్చి కోడు

† 3:20 3:20 ఆదికాండుమ్ 6-9 అద్యయల్. ‡ 3:22 3:22 ఎవెసు 1:21, 6:12, కొలోస్సియుల్ 1:16, 2:10, 15, చి తిత్తు 3:1 దెక. * 4:1-2 4:1-2 రోమియుల్ 8:17, వెలిప్పియుల్ 1:29-30, తిమోతిక పవులు రెగిడ్డి 2 నంబర్ ఉత్తమ్ 2:12. † 4:6 4:6 3:19 దెక.

1-2 క్రీస్తు, జలె, మాన్సుచి జోచి ఆగ్గుతె బాదల్ సేడ్లెన్. జాకయ్, * ‘అమ్ కి జోచి రితి బాదల్ సేడ ఓర్పుప జమ’ మెన తుమ్ డిట్టుమ్ కెరన. కిచ్చొక మెలె, జో తెన్ మెలి రితి ఆగ్గుక కో బాదల్ సేడ తయెదె గే, ఒత్త తెంతో ఈంజ అగ్గె జితె ఎదిలి సేంపుక మాన్సుచ అసల్ రితి నాయ్, గని దేముడుచి ఇస్టుమ్ కిసి అస్సె గే, దన్ని ఇండుక మెన, జో మాన్సు పాపుమ్ ముల అస్సె.

3 దేముడుక నేన్లనచి రితిచి తుమ్చి అగ్గెచి ఇండుక అగ్గెయ్చి మెన, తుమ్ దసితె అన్నె గెచ్చ నాయ్. దేముడుక నేన్లన జోవయించి ఆగ్గెచి ఆన ముద్దొ నే కెరంతి రితి, ఆసల్ రితి, మచ్చితి రితి, ‘సర్ల కెర్లసుమ్’ మెన వెట్కారుమ్ జతి రితి, ‘సర్ల కెర్లసుమ్’ మెన సూర్లు పితి రితి, వెట్కారుమ్ జా బొమ్మల్క జొకర్తి రితి జితతి.

4 తుమ్ అప్పె జోవయింతెన్ దన బుద్ది నెంజిల అలవాట్లుతె బెదుస్ నాయ్ చి రిసా జేవ్ ఆచారిమ్ జా తుమ్క దూసుప కెర్తతి.

5 గని ఆకర్క, మొర్లనక జీవ్ తిలనక తీర్పు కెరుక తెయార్ జలొ ప్రబుచి మొక్కె జేవ్ జోవయించి పాపుమ్ ఒప్పన సిచ్చ జంక అస్సె.

6 దన్నికయ్, † మొర్లనక కి సుబుమ్ కబుర్ సూనయ్లొ కిచ్చొక మెలె, మాన్సుచి జోవయించి ఆగ్గక మాన్సుల్ సేడ్లి జోవయించి పాపుమ్చి సిచ్చ జేవ్ జలెకి, దేముడు జోవయించి ఆత్మక కిసి జితయ్ గే, జేవ్ కి దన్ని జింక అవ్కాసుమ్ తంక.

7 ఈంజ ఎత్కిక ఆకర్ దీసి పాసి జా జెతయ్. జాకయ్, ప్రార్లనల్ కెర్తె తతి రిసా తుమ్ మచ్చిల్ రితి నే జతె తెలివి తా ముద్దొ కెరన, బుద్ది ఇండుక జాగర్ల తా.

8 ముక్కిమక, ఎక్కిలోక ఎక్కిలో పూర్తి ప్రేమయే ఇండ దెకితె తా. దస్సి ప్రేమ దెరన. కిచ్చొక మెలె, †బగ్గర్ తప్పుల్క ప్రేమయే ఓర్పుప జా చెమించుప కెర్తయే.

9 అన్నె, తుమ్చితె ఎక్కిలోతె అన్నెక్కో అయ్లె, కోపుమ్ నెంతె గడ్డు నెంతె, సర్ద తెన్ జోవయింక మరెయాద కెర.

10 దేముడు తుమ్క కిచ్చొ సెక్తి దా తిలె, జోచి దయచ, జో దెత వేర వేర సెక్తివరల్ పొరపాట్ నెంతె జోచి బుద్ది రితి, అన్నె మాన్సుల్ చెంగిల్ తతి రితి తుమ్ వాడిక కెర దాసా.

11 దస్సి, బోదన కెర్తొసా జలె, దేముడుచి తెడి తా జోయ్యి దిల కొడొ లట్టబ్బు. దస్సి కి, కో అన్నె మాన్సుల్క తోడ్ కెర్తొసా జలె, దేముడు దెతి సెక్తికయ్ జో జా తోడ్ కామ్ కెర్పు. తుమ్ దస్సి ఇండిలిగిన, యేసుక్రీస్తుచి రిసా దేముడుచి గవురుమ్ ఎత్తితె రుజ్జు డీసెదె. కెయ్క తెయ్క జోవయింక గవురుమ్ అదికారుమ్ తవును!

జెత బాదల్ చి రిసా దయిరిమ్ సంగితిసి, జాగర్త సంగితిసి

12 అన్నె, ప్రేమ తిల బావుడ్లు, తుమ్క అప్పె జెతికయ్ ఆగి మెలి రితిచి పరిచ్చుచి రిసా తుమ్ ఆచారిమ్ జా నాయ్. 'అమ్క దస్సిచి కిచ్చొక లయిక?' మెన తుమ్ ఉచర్లె, జా జర్గు జతిసి కిచ్చొ ఆచారిమ్చి నెంజె. కిచ్చొక తుమ్క జర్గు జతయ్ మెలె, తుమ్చి నిదానుమ్ పరిచ్చు జా రుజ్జు జంక.

13 'క్రీస్తు సేడ్ల బాదల్తె ఆమ్ కి బెదితనుమ్' మెన తుమ్ సర్దసంతోసుమ్ జా, చి జోచి గవురుమ్ పూర్తి డీస్తి దీసిక ఒత్తయ్ కి జో తెన్ సర్దసంతోసుమ్ జస్తి.

14 "అమ్ నంపజలన" మెన తుమ్ ఒప్పున్లి రిసా మాన్సుల్ తుమ్క దూసుప

కెర్లె, తుమ్క చెంగిలి. కిచ్చొక మెలె, దేముడుచి ఉజిడిచి ఆత్మ తుమ్చి తెన్ తా గెచ్చు తుమ్క తోడు తా సెక్తి దెతె తత్తయ్.

15 గని, మార్టోన్ జలెకి, 'చోర్టాన్' జలెకి, 'నేరిమ్ కెర్తొసా' జలెకి, 'వేర మాన్సుల్చి కామ్చి నెడిమి జా పోటి కెర్తొసా' జలెకి, మెన తుమ్చితె కక్క కో నింద కెర్తి రితి వాల్ దాస నాయ్. దస కమొ కెర బాద సేడ్ల తుమ్క చెంగిల్ నాయ్.

16 గని, 'నంపజలన' మెన తుమ్ ఒప్పున్లి రిసాయి తుమ్చితె కో కచి అత్తి బాదల్ సేడ్లె, లాజ్ జంక నాయ్. 'నంపజలన' మెన జా నావ్ దెరన్లిసి చెంగిల్ మెన, జో నంపజలన దేముడుక గవురుమ్ దెవును!

17 కిచ్చొక మెలె, దేముడు మాన్సుల్క పరిచ్చు కెర్తి సిచ్చు కెర్తి సమయుమ్ పాసి జా అస్సి. జలె, జో పరిచ్చు కెర్తిసి తీర్పు కెర్తిసి అమ్ నంపజలనతయ్ మొదొల్ జతయ్ జలె, దేముడుచి సుబుమ్ కబుర్ రితి ఇండుక నెసిత మాన్సుల్ ఆకర్క కెర్ది సిచ్చు జవుల!

18 జో దేముడు పూర్గుమ్ రెగ్డయ్లి రితి;

* "సత్తిమ్ జలొ మాన్సు †కన్వనె రచ్చించుప జతయ్ జలె, దేముడుక నే బితన, పాపుమ్ కెర్లన, కీసి రచ్చించుప జవుల! రచ్చించుప జంక నెత్తిర్!"

19 జాకయ్, దేముడుక నిదానుమ్ తా జోవయించి సెలవ్క కో ఈంజ లోకుమ్తె సిచ్చల్ అర్ల సేడ్లతి గే, ఎత్తిక జెర్మున్ కెర్లొ నిదానుమ్ తిలొ జో దేముడుచి అత్తి జోవయించ ఆత్మల్ సార్పు కెర దా, చెంగిల్ కమొ కెర్తె తత్తు!

‡ 4:8 4:8 ఎత్తి అదికారుమ్ తిలొ దేముడు అమ్చ బగ్గర్ తప్పుల్ జోవయించి ప్రేమయెచి రిసా ఓర్పుప జా చెమించుప కెర్తయ్. దస్సి ప్రేమ అమ్చి పెట్టి తా, అమ్ కి దస్సి అన్నె మాన్సుల్చ తప్పుల్ ఓర్పుప జా చెమించుప కెరుక. పడ్డె, అమ్ దస్సి ప్రేమ కెర్లె, జయి కి జో దెక అమ్క కన్కారుమ్ దెకెదె. మత్తయ 6:12, 14, 15 దెక.

§ 4:10 4:10 రోమియుల్ 12:6-8 దెక. * 4:18 4:18 సామెతల్ 11:31. † 4:18 4:18 కన్వనె మెలె, రచ్చించుప నే జలి రితి జా కీసి గే రచ్చించుప జతయ్.

5

సంగుమ్చ వెల్లెల మాన్సుల్ కిసి ఇండుక

1 తుమ్చి తెచ సంగుమ్చ వెల్లెల మాన్సుల్క, జలె, ఆవ్ ఏక్ కోడు సంగిదె. తుమ్చి తెన్ కి సంపజలసక ఆవ్ వెల్లో జలోసా తా, క్రీస్తు సేడ్ల బాదల్ సొంత దెకిలోసా జా, పడ్డొ తెదొడక రుజ్జు జా డీసుక తిలి పరలోకుమ్చి ఉజిడతె గవురుమ్తె బెదితోసా జా, ఆవ్ తుమ్తెచ వెల్లో మాన్సుక కిచ్చి బతిమాల్పా జా సంగితసి మెలె,

2 తూమ్ దెకితి వాట దేముడుచ మెండల్ జల సంపజలసక తుమ్ నిదానుమ్ దెకితె తా, తుమ్క కో బలవంతుమ్ కెర్తి రితి నాయ్, గని దేముడుచి ఇస్తుమ్ రితి పూర్తి మెన్సు దా జోవయింక సర్ల తెన్ దెకితె తా. డబ్బుల్ అసక నాయ్, గని సర్లబుద్ది తెన్ కెర్తె తా.

3 పడ్డొ, జా మందతెచ మాన్సుల్క బియడ్డి రగుమ్ ఏలుప కెర నాయ్, గని జేవ్ కిసి సత్తిమ్ ఇండుక గే దెకిత్ రితి తూమ్ దస్సి సత్తిమ్ ఇండ దెకవ.

4 తూమ్ దస్సి ఇండ వాట్ దెకయ్లదు మెలె, ఎత్కిచి కంట వెల్లో గొవుడు జతో క్రీస్తు ఆకర్ దీసిక ఎత్కిజిన్క డీస్తి పొదిక ప్రబుచి గవురుమ్ నే గెతి బవుమానుమ్ తుమ్ ఎత్కిజిన్క దొర్కు జయెదె.

5 పడ్డొ, సంగుమ్క దెకిత వెల్లెల మాన్సుల్చి తెడి తుమ్ అన్నె సంపజలస దాక్ కెరన, జేవ్ వెల్లెల మాన్సుల్చి కోడుక మరియాద కెర. తుమ్ ఎత్కిజిన్ సొంత గవురుమ్ నే ఉచరంతె, ఎక్కిలోచి మొక్కె ఎక్కిలో దాక్ కెరన, ఎక్కిలోచి సేవ ఎక్కిలో కెర. పూర్ణుమ్ దేముడుచి కొడొతె రెగ్గయ్లి రితి,

*"సొంత గవురుమ్ ఉచరంతసక దేముడు దూరి కెర్తయ్, గని కో దాక్ కెరనుల గే,

* 5:5 5:5 సామెతల్ 3:34, యాకోబు 4:6.

జోవయింకయ్ జోచి దయచి తోడు జో దెయెదె" మెన రెగిడ్డి కోడు.

6 జాకయ్, ఎత్కిచి కంట సెక్తి తిలో దేముడుచి అత్తి తుమ్చి బత్కు సార్ప కెర దా జోచి తెడి దాక్ కెరన, చి జో ఒప్పున్లి సమయుమ్క గవురుమ్ తెన్ తుమ్క టీవడెదె.

7 బాదల్ సేడ్లి తుమ్చి బయిమ్ ఎత్కి జో వయితి రితి తుమ్ సార్ప కెర దాన. కిచ్చొక మెలె, తుమ్క 'చెంగిల్ తత్తు' మెన, తుమ్చ బాదల్ వయక జో ఇస్తుమ్ జతయ్.

8 మచ్చిల్ రితి బుద్ది నే జతె తుమ్ ముద్దొ కెరన, తెలివి తా జాగర్ల తా. కిచ్చొక మెలె, తుమ్క నేరిమ్ వయడుక ఇస్తుమ్ జలో సయ్తాన్ కక్క జలెకు గీడుక కోర్ప జా, ఒర్పొత్తి సింపుమ్చి రితి బులితె తత్తుయ్.

9 ఒండి లోకుమ్చ బావుడ్లు జల సంపజలసక కి ఇన బాదల్ సేడుక అస్సె మెన జాన, తుమ్చి నముకుమ్ డిట్టుమ్ తా జో సయ్తాన్చి ఉప్పిరి జీసుక తుమ్ టీవ.

10 అన్నె, గడియ బాదల్ సేడ ఒర్పువ జలదు మెలె, క్రీస్తుచి నావ్ తెన్ తుమ్ జోచి కెయ్క తెయ్క తత్తి పరలోకుమ్చి ఉజిడతె గవురుమ్తె బెదుక మెన తుమ్క నిసాన బుకార్లొ ఎత్కి దయ కెర్తి దేముడు సొంత తుమ్క పూర్తి కెర, డిట్టుమ్ కెర, జీన్తి సెక్తి దెయెదె.

11 జో కెయ్క తెయ్క ఏలుప కెర్పు! ఏలుప కెరెదె. జోక జోబర! ఆమేన్.

అకర్ కోడు

12 'ఈంజి నుబుమ్ కబుర్ నిజుమి దేముడు దిలిసి' మెన సాచి సంగ తుమ్క డిట్టుమ్ కెరుక మెన, జోక 'నిదానుమ్ తిలో బావొ' మెన సిల్వొనన్క సంపజా జోచి అత్తి తుమ్క ఈంజి ఉత్తుమ్ రెగ్గవ అస్సి. ప్రబు దిలి ఈంజి నిజుమ్ జలి దయతె తుమ్ డిట్టుమ్ టీవ.

13 దేముడు అమ్క తుమ్క కీసి
 నిసాన అస్సె గే, దస్సి అంచయ్
 మాన్సుల్ జతు' మెనయ్ ఈంజ
 †బబులోను పట్టుమ్తె కి మాన్సుల్క
 నిసాన అస్సె. జో నిసాన్లిసి ఈంజ
 సంగుమ్చ కి తుమ్క జోవయించి జోబర
 సంగితతి. అంక పుత్తు జలో రితో మార్కు
 జోచి జోబర సంగితయ్.

14 ప్రబుచి ప్రేమక తుమ్ ఎక్కిలోక
 ఎక్కిలో జోకర.

క్రీస్తుచి తెడిచ తుమ్ ఎత్రిజిన్క జోచి
 సేంతుమ్ తవున్!

† 5:13 5:13 'బబులోను' మెలె, ఏక్ వేల రోమ్ పట్టుమ్క టాలి జతయ్. డీసయ్లిసి 17 అద్యయిమ్చి జా
 అద్యయిమ్తెచ కొడెచ ఎట్టెచ కొడె దెక.

పేతురు రెగిడ్లి దొన్నిచి ఉత్త్రమ్ బారిక్ జలో పేతురు రెగిడ్లి దొన్నిచి ఉత్త్రమ్

మొదోల్ కోడు

1 అమ్చో దేముడు అమ్క రచ్చించుప కెర్తొసా జలో యేసుక్రీస్తుచి పున్నిమ్చి రిసా, జోచి దయక అమ్ నంపజలన తెన్ ఎక్కి విలువచి నముకుమ్ తిల నంపజలనక, యేసుక్రీస్తుక *సేవ కెర్తొసా జా జోచి బారికి జలో †సీమోను పేత్తు రెగిడ్లి ఉత్త్రమ్.

2 దేముడుచి ప్రబు జలో అమ్చో యేసుక్రీస్తుచి ఉప్పిర్చి గ్యానుమ్ తుమ్చి పెట్టి జాన్సుప జా, జోక తుమ్ రోజుక అన్నెయ్ జాన్తిన్చి రిసా తుమ్క జోచి దయ జోచి సేతుమ్ అన్నె ఒగ్గర్ జవున్!

3 దేముడు జోచ్చి పరలోకుమ్చి సెక్తి అదికారుమ్కయ్ తెన్, జోచి సొంత పరలోకుమ్చి గవురుమ్చి ఉజ్జిడతె, జోచి చెంగిల్చి రిసా అమ్క నిసాన బుకర్లొసాక అమ్ జాన్తి వాటు పరలోకుమ్తె బెదితి జీవ్, పరలోకుమ్చి సత్తిమ్ సుద్ది ఇండితి సెక్తి అమ్క దొర్కు జతి రితి, ఎత్తి అమ్క దా అస్సె.

4 దస్సి, ఎత్తిచి కంట విలువ తిల జోచ ప్రమానల్ అమ్క దా అస్సె. కిచ్చొక మెలె, జేవ్ ప్రమానల్చి సెక్తిక ఈంజ ఆగ్చ గార్ ఆనల్చి రిసాచి ఈంజ లోకుమ్చి పాపుమ్ తెంతో తుమ్ పిటవన్క, చి అన్నె, జోచి అత్తు తుమ్చి పెట్టి జా, దేముడుచి రితి తుమ్ మార్పుప జా జోచి తెన్ పావుక మెన తుమ్క దా అస్సె.

5 జాకయ్, తుమ్ నిదానుమ్ చజ దెరన తుమ్చి నముకుమ్తె చెంగిల్ గునుమ్ బెదవుక అస్సె. జా చెంగిల్ గునుమ్తె గ్యానుమ్,

6 జా గ్యానుమ్తె ఆన ముద్దొ కెరంతిసి బెదవ, ఆన ముద్దొ కెరంతిన్తె నిదానుమ్ బెదవ, జా నిదానుమ్తె దేముడుక బితిసి బెదన,

7 జా దేముడుక బితిసి తెన్ నంపజలనక ముద్దు కెర్తి ప్రేమయ్ బెదవ, చి ప్రేమయ్ తెన్ కన్యారుమ్ బెదవ తంక.

8 ఇన బుద్దుల్ తుమ్ ఇండుక దెర అన్నె అలవాట్ జలె, అమ్చో ప్రబు జలో యేసుక్రీస్తుక జాన్తిన్తె తుమ్ కామ్క నే అయ్లన్ నే జస్తె, జోచి రిసా పలితుమ్ దెర్తె.

9 ఇన బుద్దుల్ కక్క తయె నాయ్ గే, జో మాన్సు గుడ్డి జలి రితి జా, జోచ అత్తు అంకివొ సరిగా డీప్తి నాయ్, జోక దూరి తిలిసి నే డీసిల్ రితి జతయ్, చి జో అగ్గె పాపుమ్ ఇండిలిన్తె జో అన్నె నే ఇండిత్ రితి దేముడు జోక విడ్డల్ కెర్లిసి, చెమించుప కెర్లిసి, జో వచ్చు అస్సె.

10 జాకయ్, బావుడ్లు, తుమ్క దేముడు నిసాన బుకార్లి వాట్ ఇండుక ఆన జా అన్నె నిదానుమ్ జతి రితి తుమ్ దెకన. తుమ్ ఇని నిదానుమ్ జలె, వెర్రి బుద్దితె అన్నె సేడ్పు నాయ్.

11 దస్సి కి అమ్చో ప్రబు అమ్చ రచ్చించుప కెర్తొసా జలో యేసుక్రీస్తుచి పరలోకుమ్చి రాజిమ్తె తుమ్ బెదుక మెన జో పూర్తి సర్ల తెన్ తుమ్క వాట్ దెయెదె.

12 తుమ్క దిలి సత్తిమ్తె తుమ్ డిట్టుమ్ జలెకి, ఈంజ ఎత్తి తుమ్ జాన్లె కి, కెయొక కి తుమ్క ఆవ్ ఉచార కెర్యొతె త్రయిందె.

13 అవ్ ఈంజ †కుడియ్ జలి రితి మెర్తి ఆగ్గెతె తతి ఎద తుమ్క ఉచార కెర్వుక అంచె పూచి మెన జాని.

* 1:1 1:1 నెంజిలె, 'గొత్తిమాన్సు', నెంజిలె 'గొత్తి సుదో'. † 1:1 1:1 నెంజిలె 'సీమోను'. జోవయిచి అన్నెక్ నావ్ 'పేతురు'. బారికుల్ 15:7, 14 దెక. ‡ 1:13 1:13 కొరిందిల్క పవులు రెగిడ్లి 2 నంబర్ ఉత్త్రమ్ 5:1, 4 దెక. § 1:14 1:14 యోహాను 21:18-19 దెక.

14 అమ్చో ప్రబు జలో యేసుక్రీస్తు అంక కీదెకయ్లి రితి, ఆవ్ ఈంజ కుడియ జలి రితి మొర్తి ఆగ్ ముల్లి నమయుమ్ పాసి జెతయ్ మెన జాని.

15 జాకయ్, అన్నె ఆవ్ ఉట్ట గెలిపడ్డో కి ఈంజ ఎత్తి తుమ్ ఉచార కెర్తి రితి *దెకిందె.

16 అమ్చో ప్రబు జలో యేసుక్రీస్తుచి నెక్తి తిలిన్చి రిసాచి జో అన్నె ఉత్త జెతిన్చి రిసా తుమ్క అమ్ జానవ కెర, కో తెలివి మాన్సు అచ్చి ఉచర్చిసి నెంజె. జోచి †పరలోకుమ్చి గవురుమ్ తిలి ఉజడి జో జతిసి అమ్ సొంత దెక అన్నుమ్.

17 కెయ్ మెలె, కీసి మెలె, దేముడు అబ్బొసి జోక గవురుమ్ ఉజడి కెర్లిన్తె, చి

‡“ఈందె, ఈంజొయి అంచో ప్రేమ తిలో పూత్తు.

ఇన్నెచి రిసా అంక ఒగ్గర్ సర్దనంతోసుమ్” మెన పరలోకుమ్చో దేముడు అబ్బొసి జోచి అవాడ్ సూనయ్లి పొది,

18 పరలోకుమ్ తెంతో చి జా అవాడ్ అమ్ సొంత సూన్లమ్. కీసి మెలె, అమ్ కి సొంత జో తెన్ జా సుద్ది తిలి డొంగై తిలమ్.

19 పూర్ణమ్ దేముడు జోచ కబుర్లు సంగిలనచి అత్తి సంగిలిసి ఎత్తి కచితుమ్ జర్లు జయెదె, మెన అమ్ తెదొడి దెకిలిన్చి రిసా అమ్క రుజ్జు అయ్లి. జాకయ్, దేముడు సంగిలి ఈంజ కబుర్ తుమ్ డిట్టుమ్ దెరన, రాత్ పాయితి పెందాలె దీస్తి సుక్కో తుమ్చి పెట్టి ఉజడి జతి రితి ప్రబు అన్నె జెతికయ్ జా వెల్లి దీసి జెతె ఎదక అందర్తె ఉజడి దీస్తి దీవు రగుమ్ జా అస్సె. జాకయ్ తుమ్ జాగర్త తెన్ దెకన్లె తుమ్క చెంగిల్ తయెదె.

20 ముక్కిమ్క తుమ్ కిచ్చొ అర్దుమ్ కెరన మెలె, దేముడుచి కోడుతె రెగ్గయ్లిన్తె జోచి కేన్ కోడు కి కీసి అర్దుమ్ కెరనుక జలె, మాన్సు సొంత జొయ్యి అర్దుమ్ ఉచరన్తి రితి జయె నాయ్. జో దేముడు సొంత దిలి అర్దుమ్ అమ్ కెరనుక అస్సె.

21 కిచ్చొక మెలె, దస కబుర్లుతె కేన్ కి కెయ్క కి మాన్సుచి సొంత పెట్టిచి ఉచరన్తతి తెంతో చి నెంజె. గని దేముడుచి సుద్ది తిలి ఆత్మ కేన్ కేన్ మాన్సుల్క దెర్లి గే, దేముడుచి సొంత కొడె జేవ్ మాన్సుల్ లట్టల్ల, రెగిడ్ల. జేవ్ జోచయ్ కొడె.

2

అబద్దుమ్క సంగితన సికడ్డి రిసా

1 “దేముడుచ కబుర్లు సంగితనుమ్”

మెన అగ్గెచ పొదులె, పూర్ణమ్, అబద్దుమ్క కి అమ్చ పైజల్తె, అమ్చ ఇస్రాయేలుల్తె, సగుమ్జిన్ బార్ జల. దస్సి, తుమ్తె కి అబద్దుమ్చి బోదన కెర్తన తవుల. జేవ్ మాన్సుల్ కిచ్చొ కెరుల మెలె, నాసెనుమ్ కెర్త ఇన్లుమ్ అయ్ల జోవయించ అబద్దుమ్ తిరిమ్ తిరిమ్ సికడ, ‘పాపుమ్ తెంతో రచ్చించువ జతు’ మెన జోచి జీవ్ దా జోవయింక గెనల్లో *ప్రబుక ‘దేముడు నెంజె’ మెన సంగిల్ రితి జా, జోచి మరియాద కడ్డి రితి ఇండుల. జేవ్ దస్సి కెర, జోవయింక జెచ్చి చట్కున పూర్తి నాసెనుమ్ ఆననుల.

2 జేవ్ లాజే నెంతె కెర్త పాపల్ దెక దెక, అన్నె ఒగ్గర్జిన్ జోవయించి పట్టి గెచ్చుల, చి “ఒహో, సత్తిమ్ తిలో దేముడుక జొకర్తతి, గని దసయ్ కము కెర్తతి” మెన, అన్నె మాన్సుల్ నిస్కారుమ్

* 1:15 1:15 పేతురు బోదన కెర కెర సంగిలిన్ ఎత్తి మార్కు రెగ్ల చి రిసాచి జోవయించి సాచి రెగిడ్లన్, మెన మాన్సుల్ సంగితతి. జేక, ఇన్నె జా మార్కుచి రిసా ఏక్ వేల సంగితయ్ మెన సగుమ్జిన్ ఉచర్తతి. † 1:16

1:16 మత్తయి 17:1-5, మార్కు 9:2-7, లూకా 9:28-35 దెక. ‡ 1:17 1:17 మత్తయి 17:5. * 2:1 2:1 యూదా, చెత్తర్ నంబర్చి కోడు దెక.

సంగుల, చి జోవయించి ఇండుకతె ప్రబుచి సత్తిమ్ వాటు నిస్కారుమ్ డీసెదె.

3 జోవయించి పెట్టిచ ఆసల్క తెలివి కొడొ బెదవ బెదవ, తుమ్ కి అబద్దుమ్ నంపజ్జతి రితి తుమ్క మోసిమ్ కెర లాబుమ్ కెరసుల. జలె, అగ్గె తెంతో జోవయించి సిచ్చ దేముడు సంగ అస్సె, జోవయించి సిచ్చ రకితె అస్సె, చి జోవయించి నాసెనుమ్ కచితుమ్ జోవయింక లయెదె.

4 అగ్గెయి పరలోకుమ్చ దూతల్ సగుమ్జిన్ †పాపుమ్ కెర పాపుమ్తె సేడ్డి రిసా, దేముడు జోవయింక సిచ్చ కెరుక నే పిట్టయ్తె, వెల్లి అగిచి గొయిచితె ఎత్కిచి కంట ఎట్టో తిలిన్తె జోవయింక గల దా, ఎత్కిక తీర్పు కెర్రి ఆకర్ దీసిచి వెల్లి సిచ్చ జతె ఎదక జేవ్ రకితి రిసా, జోవయింక ఎత్కిచి కంట ‡అందర్ తిల బోన్లుతె గలయ్ అస్సె.

5 వడ్డొ, పూర్గుమ్చ మాన్సుల్చి రిసా ఉచర్లె, జోవయించి పాపుమ్చి సిచ్చ జోవయింక నే పిట్టయ్తె, జేవ్ పొదులె సత్తిమ్ సాడువ కెర్రి తిలో ఎక్కి కీనోవహుక చి జో తెన్ అన్నె సత్తుజిన్ జోచి కుటుంబుమ్చ మాన్సుల్క రచ్చించువ కెర, ఒండి లోకుమ్చ పాపుమ్చ మాన్సుల్ ఎత్కిజిన్ మొర్తి రితి, దేముడు వెల్లో పాని పెటవ బూరుమ్తె డుజడ గెలన్.

6 వడ్డొ, పూర్గుమ్ పొదిచ *సాదొమ చి, గొమొరా మెల పట్నల్ సార్ జజితి రితి దేముడు సిచ్చ దా, కిచ్చొ జివ్ నే తతి రితి పూర్తి నాసెనుమ్ కెర పుంచ దా, వడ్డొక

పాపుమ్ ఇండిత మాన్సుల్క 'పాపుమ్తె గెలె, సిచ్చ జంక అస్సె' మెన రుజ్జు తతి రితి దేముడు జర్గు కెర్రి.

7 గని, ఒత్తచ పాపుమ్ సుదల్ ముద్దొ నే కెరంతిసి, జోవయించ ఆసల్చ కము దెక దెక బాద సేడ్డొ సత్తిమ్ ఇండిలో †లోతుక రచ్చించువ కెర్రి.

8 జో సత్తిమ్చొ మాన్సు జేవ్ పాపుమ్చ మాన్సుల్తె జితె తా దెకిలిన్ నూన్లినచి రిసా, జేవ్ కెర్రి తిల జోవయించ ఆసల్ ముద్దొ నే కెరంత పాపల్చి రిసా, రోజుక జోచి పెట్టి దుకుమ్ సేడ్డె తిలో.

9 జలె, ఈంజ ఎత్కి బెదయ్లె కిచ్చొ దెకితనుమ్ మెలె, జోవయింక నిదానుమ్ తిలనక బాదల్ తెంతో రచ్చించువ కెరుక కి, వడ్డొ వెల్లి తీర్పు కెర్రి ఆకర్ దీసిచి సిచ్చ జతె ఎదక సత్తిమ్ నెంజిలనక సిచ్చతె రకుక కి దేముడు జానె.

10 ‡ముక్కిమ్క కక్క సిచ్చ దెంక మెలె, మరియాద గెత ఆసల్ రితి ఇండితనక చి అదికారుమ్క నే బితనక. జోవయించ వెట్కారుమ్చ ఆసల్క ఇండిత, అదికారుమ్క నే బిత మాన్సుల్, జలె, సొంత సెక్కిక నంపజా తా దయిరిమ్ తెన్ ఇస్టుమ్ అయ్లి రితి ఇండితన జా, దేముడు కబుర్ తెద్రయ్త పరలోకుమ్చి ఉజిడిచి గవురుమ్ తిల దూతల్ గట్రక కీదూసువ కెరుక కి బితి నాయ్.

11 *పరలోకుమ్చ దూతల్, మాత్రుమ్, జేవ్ మాన్సుల్చి కంట జోవయింక ఒగ్గర్ సెక్కి అదికారుమ్ తిలె కి, ప్రబుచి మొక్కె జేవ్ తిలె కి, జేవ్

† 2:4:2:4 అదికాండుమ్ 6:1-7. ‡ 2:4:2:4 నెంజిలె, 'గొల్వల్ తెన్ బంద అస్సె, గెద'. యూదాతె 6 నంబర్ కోడు కి దెక. § 2:5:2:5 అదికాండుమ్ 6, 7 అద్యయల్. * 2:6:2:6 అదికాండుమ్ 18:20-29. యూదాతె 7 నంబర్ చి కోడు కి దెక. † 2:7 2:7 అదికాండుమ్ 19:12. ‡ 2:10 2:10 యూదా 8 నంబర్ చి కోడు

దెక. § 2:10 2:10 పూర్గుమ్, ఎత్కి అదికారుమ్ తిలో దేముడు దెతి సిచ్చ జర్గు కెరుక మెన మాన్సు రూపుమ్ జల దొగుల దూతల్ ఏక సుట్టు సాదొమ పట్టుమ్తె గెతికయ్, జా పట్టుమ్చ మున్సుబోదల్ జేవ్ దూతల్క లంజె కెర జోవయించి మరియాద కడుక ఉచర్లె. ఎత్కి అదికారుమ్ తిలో దేముడు జోవయింక అడ్డు కెర గుడ్డి కెర్లన్. అదికాండుమ్ 18:20, 22, చి 19:1-11. పేతురు ఈంజ ఉత్తమ్ రెగిడ్డి పొదులె కి ప్రబుచ కబుర్లు నంగిల మాన్సుల్క పాపుమ్చ మాన్సుల్ దూసువ కెర్రి తిల. చి అగ్గెచి ఇన్యక టాలె జతయ్. * 2:11 2:11 యూదా 9 నంబర్ చి కోడు దెక. † 2:12 2:12 యూదా 10 నంబర్ చి కోడు దెక.

మాన్యులక దూసుప కెర్తి తీర్పు నే సంగితె తుక్కై తత్తతి.

12 †జేవ్ మాన్యుల్, మాత్తుమ్, కీస జతతి మెలె, జంతువుల్చ రిత, జంతువుల్ రిత గునుమ్ తా, జోవయించి పెట్టి అయ్లిసి అర్దుమ్ నెంతె దస్సి జర్గు కెర్తతి, చి బోనుతె దెర్ను సేడ మొర్తి రిసాయి జెర్మ తవుల. జలె, జేవ్ మాన్యుల్, దస్సి, జేవ్ నేన్లిసిచి రిసా దూసుప కెర్తి తీర్పుల్ సంగ సంగ, జంతువుల్చి రితి జోవయించి నానినుమ్ జెచ్చి జవుల.

13 జోవయించి పాపుమ్ జెచ్చి కవుల. కీస కమొతె జేవ్ మాన్యుల్ సర్ద జతతి మెలె, లాజ్ నెంతె మెద్దెన్చి ఉజిడతె కి ఇస్టుమ్ అయ్ల కమొ కెర్తతి. †ముర్కిచ మర్కల్ రిత జా, ప్రబుచి ప్రేమ దెకయ్త తుమ్చ అన్నిమతె బెద కతె తా, జా సుద్దిచిక వెట్కారుమ్ కెర్తి రితి, జోవయింక ఇస్టుమ్ అయ్ల జోవయించి పెట్టిచ ఆసల్ లాజ్ నెంతె జర్గు కెరంతతి.

14 జోవయించ అంకివో బెర్దు లంజె దెకుక. జేవ్ జా పాపుమ్ కెరుక కెయ్ల ముల్తి నాయ్. డిట్టుమ్ నెంజిల నంపజలనక సికడ పాపుమ్ కెరయ్తతి. ఆసచి అలవాట్ కెరనయి అస్తి, రితి పాపుమ్చ బోదల్, జేవ్.

15 సత్తిమ్చి వాటు ముల దా, ఇస్టుమ్ అయ్లి వేర వాట్ బుల, బెయోరుచో పుత్తున్ కీబిలామ్చి పట్టి గెచ్చ, జో గెలి వాట్ గెచ్చ అస్తి. పాపుమ్తె లాబుమ్ కెరనుక జోవయించి అలవాట్, జోచి సర్ద!

16 జో * బిలామ్చి సొంత పాపుమ్చి రిసా, దేముడు జోక తీర్పు కెర్తన్. మెలె, నే లట్టబ్బి గాడై మాన్యుచి అవాడక లట్టబ,

బిలామ్క కోడు సంగ, జో ఉచర్లి వెర్రి కామ్ అడ్డు కెర్తి.

17 జలె, పాపుమ్చ జేవ్ మాన్యుల్ కీస జతతి మెలె, పాని నెంజిల ఉటల్చి రిత, †వాదు పెట్టనిలి పాని నెంజిల్ మబ్బుల్చ రిత జా అనున్. ఆకర్ దీసిచి రిసా కిచ్చో వాట జోవయింక రకితయ్ మెలె, అందర్చి ఉప్పి రి అందర్.

18 కిచ్చోక మెలె, వెర్రి కమొచి రిసా గవురుమ్ లట్టబన, పాపుమ్ తెంతో నొవర్ విడ్డల్ జల నొవ నంపజలనక సికడ సికడ, ఆగెచ ఆసల్ జర్గు కెరంతిన్తె జోవయింక అలవాట్ కెర్తతి.

19 †“ఆగ్గుల్చ గొతిమాన్యుల్ నెంజున్, ఆగ్గుల్ తెంతో విడ్డల్ జా అస్సున్. తుమ్ కిచ్చో కెర్లి కి బాద నాయ్” మెన సికడ, వేర అర్దుమ్ బెదవ పాపుమ్ సికయ్తతి. గని జేవ్ దస్సి సికడ్చ కిచ్చోచ గొతిమాన్యుల్ జా అస్తి మెలె, మొర్ను దెత ఆసల్చ గొతిమాన్యుల్ జా అస్తి. కిచ్చోక మెలె, కేన్ అలవాట్ మాన్యుక ఎలుప కెర్తయ్ గే, జా అలవాట్తె జో మాన్యు గొతిమాన్యు జా అస్సి.

20 దస్సి అమ్చో ప్రబు అమ్చో రచ్చించుప కెర్తొసా జలొ యేనుక్కిస్తుక జాన్లి సెక్కిక ఈంజయ్ లోకుమ్చి పాపుమ్ ఇండుక తెంతో విడ్డల్ జా తా, జేవ్ జా పాపుమ్ వాట్ అన్నె గెచ్చు సిక్కు జా దెర్ను సేడ్లె, జేవ్ అగ్గెయి తిలి పాపుమ్చి కంట అన్నెయ్ నానినుమ్ జా గెచ్చ అస్తి.

21 దేముడు దిలి పరలోకుమ్చి సుద్ది సెలవ్ జేవ్ జాన జానయ్ ములిలి కంట, జా సత్తిమ్ వాట్ జేవ్ కెయ్య నే జాన్లె చెంగిల్ తత్తి.

‡ 2:13 2:13 యూదా 12 నంబర్చి కోడు దెక. § 2:15 2:15 యూదా 11 నంబర్చి కోడు దెక. * 2:16 2:16 యూదా 11 నంబర్చి కోడు కి దెక. బిలామ్ ఎత్తి అదికారుమ్ తిలో దేముడుచ కబుర్లు సంగితొసా జలెకి, చెత్తర్ తప్పుల్ కెర్తొ. ఎత్తి అదికారుమ్ తిలో దేముడుచి కోడు మార్చుప కెరుక ఉచర్లొ ఎత్తి అదికారుమ్ తిలో దేముడుక విరోదుమ్ తిల మాన్యుల్ “డబ్బుల్ దెమ్దె” మెంతికయ్, జా డబ్బుల్ ఆసకయ్ ఎత్తి అదికారుమ్ తిలో దేముడుచి కోడు పిట్టవుక ఉచర్లొ, సంక్యాకాండుము 22:2-35, 31:16. పడ్డె, బొమ్మల్క బలి దిలిసి ప్రజెల్ కంక సికడ్లె, చి ప్రజెల్ లంజె జతి రితి సికడ్లె, డీనయ్లిసి 2:14. † 2:17 2:17 యూదా 12, 13 నంబర్చి కోడు దెక. ‡ 2:19 2:19 యూదా 4 నంబర్చి కోడు దెక.

22 సత్తిమ్ తిలి టాలితె సంగిల్ రితి, జోవయింక జర్గు జా అస్సె. మెలె, సొంత ఒక్కస్లిసి అన్నె కతయ్ నూనొ, చి అండ్రి దోయి జా తిలె, బుర్లతె ఎంగ్ల జా అన్నె ముర్కి కలోయ్ జతయ్.

3

క్రీస్తు ప్రబు అన్నె ఉత్త జెతి దీసి

1 ఈది తుమ్క ఆవ్ రెగ్గిలి దొన్నిచి ఉత్తుమ్. ప్రేమ తిల బావుడ్లు, చి దొన్నితె కి అంచి ఉద్దెసుమ్ కిచ్చొ మెలె, సత్తిమ్చి నిదానుమ్చి తుమ్చి మెన్గుతె తుమ్క ఏక్ కోడు ఉచర్తసి రిసా, తుమ్క ఆత్మ డిట్టుమ్ కెర్తి రిసా.

2 కిచ్చొ కోడు మెలె, *“జర్గు జయెదె” మెన దేముడుచ కబుర్లు సంగిలన సంగిలిసి ఎత్తి, వడ్డొ ప్రబు జలో రచ్చించువ కెర్తొసొ జోవయించ బారికుల్చి అత్తి తుమ్క సంగిల సెలవ్ కొడొ ఎత్తి తుమ్ కెర మెనయ్ ఈంజ ఉత్తుమ్ రెగిడ్డసి.

3 తొలితొ ముక్కిమ్క కిచ్చొ అర్దుమ్ తుమ్ కెరనుక మెలె, ఆకర్ దీసల్క †అన్మానల్చ మాన్సుల్ సత్తిమ్చి ఉప్పిరి ఆన్దన జా కెర, జోవయించి పెట్టిచి పాపుమ్చ ఆసల్ రితి ఇండ.

4 కీస కొడొ లట్టబుల మెలె. †“అన్నె జెయిందె, మెన జో క్రీస్తు సంగిలిసి కేతె జర్గు జలి? అమ్చ మాన్సుమ్చ జియ మొర్లి తెంతొ కి, అన్నె అగ్గె తెంతొ, లోకుమ్ జెర్మున్ జలి తెంతొ కి, ఎత్తి మాములుమ్ అగ్గెచి రితి జర్గు జతయ్.” మెన సంగుల.

5 దస్సి సంగితన జాన జానయ్ కిచ్చొ కోడు ఉచరుక నెసితి మెలె, ఒగ్గర్ ఒగ్గర్ అగ్గెయ్ తెంతొ ‘జర్గు కెరిందె’ మెన దేముడు ఒప్పన్తికయ్, ఆగాసుమ్

అస్సె, చి కీపాని తెంతొ, పానితె జర్గు జలిన్చి రిసా, బూలోకుమ్ జెర్మున్ జలి.

6 అన్నె, బూలోకుమ్ తెదొడి తిలిసి వెల్లొ పానిచి *బూరుమ్క సిచ్చు జా నాసెనుమ్ జలి.

7 జలె, దేముడుచి దస్సి సెలవ్ కి, జోచి కోడుకయ్, అప్పెచి ఈంజయ్ బూలోకుమ్ ఈంజయ్ ఆగాసుమ్ కి డడ్డ గెతి సమయుమ్క రకితె అస్తి. జో వెల్లి తీర్పు కెర్తి, జోక నెస పాపుమ్ ఇండిల మాన్సుల్క నాసెనుమ్ కెర్తి దీసి ఎదక దేముడు రకితె అస్సి.

8 గని, ప్రేమ తిల బావుడ్లు, ఏక్ కోడు తుమ్ పచ్చు నాయ్. కిచ్చొ మెలె, ప్రబుచి మొక్కె ఎక్కి దీసి వెయి వెర్పుల్చి రితి జతయ్, చి వెయి వెర్పులు ఎక్కి దీసిచి రితి జతయ్.

9 ప్రబు సంగిలి ప్రమానుమ్ జో నెరవెర్పువ కెరుక ఆల్సిమ్ కెర్తయ్ మెన సగుమ్జిన్ ఉచర్లె కి, జో ఆరి ఆల్సిమ్ కెరె నాయ్. కిచ్చొక మెలె, “జోవయింతెన్ కోయి నాసెనుమ్తె గెతు నాయ్, గని జేవ్ ఎత్తిజిన్ జోవయించి పాపుమ్ చినన ముల్తు” మెన, తుమ్చి రిసాయి జో ఆల్సిమ్ కెర్తయ్.

10 గని, జా వెల్లి దీసి జెతిసి కిసి తయెదె మెలె, కో నేన్లె పొది చోరు అయ్లి రితి జెయెదె. తెదొడ్క వెల్లి అవాడ్ వీర్లి రితి కెర, ఆగాసుమ్తె తిలిసి డడ్డ గెచ్చు ఆగాసుమ్ కేడయ్ గెచ్చెదె, చి ఈంజ బూలోకుమ్ జేవ్చ కమె తెన్ని †డడ్డయ్ గెచ్చెదె.

11 అప్పె తిలిసి ఎత్తి దస్సి జా గెచ్చుక అస్సె. జలె, కీస మాన్సుల్ జా తుమ్ ఇండుక మెలె, మాన్సుల్చి మొక్కె సుద్ది తెన్ ఇండ, దేముడు తెన్ బెద నిదానుమ్ ఇండ,

* 3:2 3:2 యాదా 17 సంబర్చి కోడు దెక. † 3:3 3:3 యాదా 18 సంబర్చి కోడు దెక. ‡ 3:4

3:4 యోహాను 14:3, 28 దెక. § 3:5 3:5 ఆదికాండుమ్ 1:2, 6, 7. * 3:6 3:6 ఆదికాండుమ్ 6-8 అధ్యాయల్. † 3:10 3:10 డీసయ్లిసి 8:7, 21:1, మత్తయి 5:18, 24:35, మార్కు 13:31, లూకా 21:33, యోహాను రెగిడ్డి ఏక్ సంబర్ ఉత్తుమ్ 2:17.

12 జోచి వెల్లి దీసి జెతె ఎదక ఎక్కి, అస నిదానుమ్ †రకితె తా, జో కిజే బేగి జెతినకయ్ రితి ప్రార్దన కెర, సత్తిమ్ ఇండ. జా దీసిచి కామక ఆగాసుమ్ డడ్డ గెచ్చు కేడెదె, చి జా ఆగిక ఒత్త తిలిసి ఎత్తి, జూర గెచ్చెదె.

13 జలెకి, జో ప్రమానుమ్ సంగిలిన్క రకితసుమ్. కిచ్చొక మెలె, *నొవి ఆగాసుమ్క, చి సత్తిమ్ బెర్లి నొవి బూలోకుమ్క రకితసుమ్.

14 జాకయ్, ప్రేమ తిల బావుడ్లు, ఇన్నెక తుమ్ రకితసు చి రిసా, ప్రబు జా కెర తుమ్క చజలె, కిచ్చొ ముర్కి నెంతె కిచ్చొ పొరపాట్ నెంతె, జోచి సేంతుమ్ తుమ్చి పెట్టి కామ్ కెర్తె తా, సుద్ది తంక తుమ్ దెకన.

15 అన్నె, అమ్చొ ప్రబు ఆల్సిమ్ కెర్నిన్క ఉచర్లె, తుమ్ కిచ్చొ చిన మెలె, జో వాయిద కెర్తెన్తె అన్నె మాన్సుల్ రచ్చించుప జంక జో అవ్కాసుమ్ దెతయ్. ప్రబు జోక దిలి గ్యానుమ్చి రిసా పవులు కి ఇన్నెచి రిసా ఇసి సంగ రెగిడ్లన్†

16 జోచ ఉత్తల్ ఎత్కితె రెగిడ్లి రితి. జోచ ఉత్తల్తె తిలిసి సగుమ్ అర్దుమ్ కెరసుక ఇదిల్ అల్లర్ జంక జతయ్. జేవ్ కొడొ సగుమ్జిన్ నేన్ల మాన్సుల్, దొన్ని మెన్సుల్ తిల మాన్సుల్, జోవయించి సొంతయ్ ఇస్టుమ్ అయ్లి రితి మార్పుప కెర, వేరయ్ అర్దుమ్ సికడ్తతి. దేముడుచి కొడొతెచ అన్నె కొడొ కి దస్సి మార్పుప కెర్తతి. జలె, జోవయింక జెచ్చి నాసెనుమ్ కెరంతతి.

17 జలె, ప్రేమ తిల బావుడ్లు, ఈంజ ఎత్తి జర్గు నే జతె అగ్గె నూన జాన్సుచి రిసా, దేముడుచి కోడు నే నూన్త

మాన్సుల్చి పట్టి తుమ్ నే గెతి రితి, తుమ్చి సొంత నిదానుమ్ తుమ్ నే పిట్టవన్తి రితి, తుమ్ జాగర్త తెన్ తా.

18 అమ్చొ ప్రబు, అమ్చొ రచ్చించుప కెర్తొసా జలొ యేసుక్రీస్తుచి దయతె ఇండ, జోచి గ్యానుమ్ పొసన, ఆత్మక తుమ్ వడ్డ. అప్పె, కి, జా ఆకర్ దీసి ఎద కి కెయ్క తెయ్క కి జోక జొబర! ఆమేన్.

‡ 3:12 3:12 దెస్సలొసికుల్క రెగిడ్లి 1 నంబర్ ఉత్తమ్ 1:10, రోమియుల్ 8:19-25, కొరింథిల్క రెగిడ్లి 1 నంబర్ ఉత్తమ్ 1:7, గలతియుల్ 5:5, వెలిప్పియుల్ 3:20, ఎబ్రియుల్ 9:28. § 3:12 3:12 “జెవన్” మెన ప్రార్దన కెరుక జయెదె, మత్తయ 6:10, చి ఒండి లోకుమ్తె సుబుమ్ కబుర్ నూనయ్ జలె జా దీసి జెయెదె’ మెన కేనె డీస్టయ్ మెలె, మత్తయ 24:14తె. * 3:13 3:13 డీసయ్లిసి 21:1. † 3:15 3:15 నంబర్ కోడుచి ఎట్టచి కోడు దెక. రోమియుల్ 2:4, చి డీసయ్లిసి 2:21 కి దెక.

యోహాను రెగిడ్లి మొదొల్చి ఉత్త్రుమ్ బారిక్ జలో యోహాను రెగిడ్లి మొదొల్చి ఉత్త్రుమ్

1 మొదొల్ తెంతొ తిలిసి, అమ్ సూన్లసి, అమ్చ సొంత అంకివొ దెకిలిసి, దెక సొంత అత్తో చడ్లిసి చి రిసొ తుమ్క సూనయ్తనుమ్, రెగ్లితనుమ్.* మెలె, †ఎత్కిక దొర్కు జలి జీవ్ జలిసి, దొర్కు జలి జీవ్ జోతె దొర్కు జతిన్చి రిసొచి దేముడుచి కోడు జలి జీవ్ దెతి దేముడుచి కోడుతె తిలిన్చి రిసొ రెగ్లితనుమ్.

2 క్రీస్తు జలో దెకయ్ జలి జీవుక †ఈంజ లోకుమ్తె జో జెర్మన్ జా అయ్లిన్ జలిన్ తెన్ అమ్క రుజ్జు జా అస్సె. అమ్ దెకిలమ్, సాచి జా సంగితనుమ్, చి జో 'ఎత్కిచి కంట అగ్గె తెంతొ దేముడు తెన్ తిలి కెయ్క తెయ్క తాఁ గెతి జీవు, చి జో ఈంజ లోకుమ్తె జెర్మన్ జా అమ్క డీన అస్సె' మెన ఒప్పన, తుమ్క సూనయ్తనుమ్.

3 అమ్ దెకిలిసి, అమ్ సూన్లసి కిచ్చొక తుమ్కయ్ సూనయ్తనుమ్ రెగ్లితనుమ్ మెలె, తుమ్క ప్రబు దెతి రచ్చన, జో దెతి సర్దచి వాటతె అమ్చి తెన్ బెదుత్. అమ్చి తెన్ తుమ్చి తెన్ బెదితిన్చి కట్టు దేముడు అబ్బొన్ తెన్ చి జోచొ పుత్తున్ జలో యేసుక్రీస్తు తెన్ అమ్క బెదవ అస్సె.

4 అమ్చి సర్దసంతోసుమ్ పూర్తి జవున్ మెనయ్ ఈంజ ఉత్త్రుమ్ రెగిడ్లినుమ్.

దేముడుచి ఉజిడతె ఇండ
5 ప్రబుతె నూన తుమ్కయ్ అమ్ సూనయ్తి కబుర్ కిచ్చొ మెలె, దేముడు †ఉజిడి జా అస్సె, చి జోతె కిచ్చొ అందర్ నాయ్.

6 జో తెన్ బెద జో తెన్ ఇండితనుమ్ మెనంతనుమ్, గని *అందర్బుద్ది తెన్ ఇండితనుమ్ జలె, అబద్దుమ్చ జా సత్తిమ్ ఇండుమ్ నాయ్.

7 గని, జో కిసి ఉజిడి అస్సె గే, అమ్ కి దస్సి †ఉజిడ్ బుద్ది తెన్ ఇండితనుమ్ జలె, ఎక్కిలో తెన్ ఎక్కిలో బెద ఎక్కి కట్టు తెన్ ఇండితనుమ్, చి జోచొ పుత్తుసి యేసు †సిలువతె జో మొర అర్చితుమ్ జల్లిన్చి జోచి నూఁయి జలి లోయి అమ్చి పాపుమ్ ఎత్కి పుంచ అమ్క సుద్ది కెర్తె అస్సె.

పాపుమ్ ఒప్పన్తిన్చి రిసొ

8 'అమ్క పాపుమ్ నాయ్' మెన అమ్ ఏక్ వేల సంగనై, అమ్క ఆవి మోసిమ్ కెరంతనుమ్, సత్తిమ్ అమ్చి పెట్టి నాయ్.

9 గని అమ్ కెర్ల పాపల్ దేముడుచి మొక్కె అమ్ ఒప్పనై, జో నిదానుమ్ సత్తిమ్ కెర్తొసొ, చి అమ్చి పాపుమ్ చెమించువ కెర అమ్ పాపుమ్ తెన్ నే తతి రితి జో అమ్క సుబ్బుమ్ కెరెదె.

10 అమ్ కెర్లి పాపుమ్క 'పాపుమ్ కెరుమ్ నాయ్' మెన అమ్ సంగిలె, జోకయ్ 'అబద్దుమ్చొ' మెన సంగిల్ రితి జతనుమ్, చి జోచి కోడు అమ్చి పెట్టి

* 1:11:1 నెంజలె, 'మెలె, దొర్కు జలి జీవ్ తిలి దొర్కు జలి జీవ్ దెతి కోడు జలో యేసుక్రీస్తుచి రిసొ రెగిడ్లినుమ్'. యోహాను 1:1-4, 14 దెక. † 1:11:1 యోహాను 1:4, బారికుల్ 5:20 దెక. ‡ 1:2 1:2 యోహాను 1:14.

§ 1:5 1:5 యోహాను 1:4, 5, 9, 14, 8:12, 9:5, 12:46, యోహోబు 1:17 దెక. * 1:6 1:6 యోహాను 3:19, 20, 11:9-10, 12:35, కొరిందిల్క రెగిడ్లి 2 నంబర్ ఉత్త్రుమ్ 6:14. † 1:7 1:7 మత్తుయ 5:14, 16, యోహాను 3:21, 12:36, బారికుల్ 13:47, రోమియుల్ 13:12, ఎపెను 5:8, దెస్సలొనీకుల్క రెగిడ్లి 1 నంబర్ ఉత్త్రుమ్ 5:5 దెక. ‡ 1:7 1:7 కొలోస్సియుల్ 1:20, 2:14, పేతురుక రెగిడ్లి 1 నంబర్ ఉత్త్రుమ్ 2:24, మత్తుయ 27:32-54, మార్కు 15:21-39, లూకా 23:26-48, యోహాను 19:17-37 దెక. § 1:10 1:10 రోమియుల్ 3:10, 23, 5:12.

నాయ్, 'పాపుమ్ సుదల్' మెన జో అమ్క సంగిలి కికోడు ఒప్పునుమ్ నాయ్.

2

పాపుమ్ కెరుక పొన

1 అంచ ప్రేమ తిల పుత్తర్లు, తుమ్క 'పాపుమ్ కెర్తు నాయ్' మెనయ్ తుమ్క ఆవ్ ఈంజ రెగిడ్డసి. గని ఏక్ వేల అమ్ కో పాపుమ్ కెర్లె, ఎత్తిక అబ్బొ జలో దేముడు లోకుమ్ ఎత్తిచ మాన్సుల్క తీర్పు కెర్తినతె, అమ్క ఎక్కిలో తోడ్ సంగితోసా అస్సె. పూర్తి పున్నిమ్ తిలో యేసుక్రీస్తు.

2 అమ్ కెర్లె పాపల్ గెచ్చయ్ తి * బలి జో జా అస్సె. ఎక్కి అమ్మి కెర్లె పాపల్ మెన నాయ్, గని ఒండి లోకుమ్చ మాన్సుల్ కెర్లె పాపల్ గెచ్చయ్ తోసా జో జా అస్సె.

3 'జోక అమ్ జానుమ్' మెన అమ్ కిసి జాన దయిరిమ్ తంక జయెదె మెలె, జోచ ఆగ్గుల్ రితి ఇండితనుమ్ జలెకయ్.

4 'జోక జాని' మెన కో జలెకు సంగితయ్ గని జోచ ఆగ్గుల్ నే నూన్లి రితి జా కెర్తయ్ నాయ్ జలె, జో మాన్సు అబద్దుమ్చో, చి జోచి పెట్టి సత్తిమ్ నాయ్.

5 గని, ప్రబుచి కోడు కో కెర్తయ్ గే, జోచి పెట్టి దేముడుచి ఉప్పిరిచి ప్రేమ పూర్తి జా అస్సె. జలె, 'దేముడుచి రచ్చనచి తెడి అస్సుమ్' మెన అమ్ కిసి పూర్తి దయిరిమ్ జంక జయెదె మెలె,

6 '†జోచి తెడి అస్సుమ్. జో తెన్ బెద అస్సుమ్. జోచి జీవ్క జితనుమ్' మెన సంగనై, యేసుక్రీస్తుయి ఇండిలి రితి ఆమ్ కి ఇండుకయ్.

ఎక్కిలోక ఎక్కిలో ప్రేమ కెర

7 ప్రేమ తిల గోతుసుదల్, తుమ్క ఆవ్ రెగిడ్డిసి నోవి ఆగ్గు నెంజె, గని మొదోల్ తెంతో తుమ్క దొర్కు జలి ఆగ్గు. అగ్గె తెంతో చి జా ఆగ్గు తుమ్ సూన్లి కోడు.

8 జలెకి, యేసుక్రీస్తు దిలి ‡నోవి ఆగ్గు తుమ్క ఆవ్ రెగిడ్డసి. తుమ్ ఎక్కిలోక ఎక్కిలో ప్రేమ కెరుకయ్. ఈంజ ఆగ్గు జో యేసుక్రీస్తుచి తెడి నెరవెర్చుప జతయ్, తుమ్చి తెడి కి నెరవెర్చుప జతయ్. కిసి మెలె, అందర్ కేడ గెతె అస్సె, చి నిజుమ్చి ఉజిడి అప్పె కి లగుక దెర అస్సె.

9 'ఉజిడ్చి తెడి అస్సి' మెన కో సంగనై కి జోచో కేన్ బావొక జో విరోదుమ్ అస్సె జలె, జో అప్పెక అందర్చి తెడి అస్సె.

10 జోవయించ బావుడ్డు జల రిత అన్నె మాన్సుల్క కో ప్రేమ కెర్తయ్ గే, జోయ్యి ఉజిడ్చి తెడి జితయ్, చి ఈంజ ఉజిడెతె కక్క తప్పు కెరయ్ తిసి కిచ్చొ కి తయె నాయ్.

11 గని, బావొ జలో అన్నె కేన్ మాన్సుక కో విరోదుమ్ కెర్తయ్ గే, అందర్చి తెడి అస్సె. అందర్చి తెడి ఇండితయ్, చి జో కేనె గెతయ్ గే జో నేనె. కిచ్చొక మెలె, అందర్ జోక గుడ్డి కెర అస్సె.

12 ప్రేమ తిల బోదల్, తుమ్క కిచ్చొక రెగిడ్డసి మెలె, జో యేసుక్రీస్తుచి నావ్చి రిసా జోచి నావ్చి తెడి తుమ్ కెర్లె పాపల్ చెమించుప జా అస్తి.

13 తుమ్ అబ్బుదింసి మొదోల్ తెంతో జోక తుమ్ జాన్సుచి రిసా తుమ్క రెగ్గితసి. తుమ్ ఉబెడల్, పాపుమ్ కెరయ్తో సయ్తానచి ఉప్పిరి తుమ్ జిన అస్సున్చి రిసా తుమ్క రెగ్గితసి. తుమ్ బాలబోదల్, ఎత్తిక అబ్బొ జలో దేముడుక తుమ్ జాన్సుచి రిసా తుమ్క రెగ్గితసి.

14 అబ్బుదింసిక, తుమ్ మొదోల్ తెంతోచొక తుమ్ జోక జాన్సుచి రిసా తుమ్క రెగ్గితసి. ఉబెడల్, తుమ్ ఆత్మతె డిట్టుమ్ జా అస్సున్, చి దేముడుచి

* 2:2 2:2 1:7 చి ఎట్టాచి చి కోడు దెక. † 2:6 2:6 యోహాను 15:3-10 దెక. ‡ 2:8 2:8 యోహాను 13:34 చి మత్తయి 22:37-40.

కోడు తుమ్చి పెట్టి అస్సె, తుమ్చి పెట్టి కామ్ కెర్తయ్, చి నయ్తానుక తుమ్ జీన అస్సున్చి రిసా తుమ్క రెగ్డ అస్సి.

15 ఈంజ లోకుమ్క చి ఈంజ లోకుమ్చి కిచ్చోకి తుమ్ ప్రేమ జా నాయ్. ఈంజ లోకుమ్చి కో ప్రేమ అస్సి గే, ఎత్కిక అబ్బో జలో దేముడుచి ఉప్పిర్చి ప్రేమ జోచి పెట్టి నాయ్.

16 కిచ్చోక మెలె, ఈంజ లోకుమ్తె తిలిన్ ఎత్కి, ఆగ్ ఆన జతిసి, అంకివో ఆన జతిసి, ఆస్తిచి గవురుమ్ కి, ఎత్కిక అబ్బో జలో దేముడుచి తెంతో చి బుద్ది నెంజె, గని ఈంజయ్ లోకుమ్చి బుద్దిచి, జా.

17 అన్సె, ఈంజ లోకుమ్, ఈంజ లోకుమ్చి ఆస్తిచి ఉప్పిరి ఆన జతిసి ఎత్కి కేడయ్ గెతిసి, గని దేముడుచి ఇస్టుమ్ రితి కో ఇండుల గే, జెవ్వి కెయ్క తెయ్క తా గెచ్చుల.

క్రీస్తుక విరోదుమ్ తిలోసా

18 ప్రేమ తిల పుత్తర్లు, ఆకర్చి గడియ, ఈంజ. క్రీస్తుచి ఉప్పిరి విరోదుమ్ తిలోసా బార్ జయెదె మెన నూన అస్సున్, గెద. దస్సి, అప్పె క్రీస్తుచి ఉప్పిరి విరోదుమ్ జలన ఒగ్గర్జిన్ బార్ జా అస్సి. జాకయ్, ఇన్నెక 'ఆకర్చి గడియ ఈంజ' మెన జానుమ్.

19 'జోచి ఉప్పిరి జేవ్ విరోదుమ్ జలన అమ్చితె తెంతో బార్ జా గెల' మెనుక జయెదె, గని జోవయింక 'అమ్చి తెన్ ఎక్కి జా తిల' మెనుక నెంజె. కిచ్చోక మెలె, అమ్చి తెన్ ఎక్కి జత జలె, అమ్చి తెన్ తా గెత. గని నాయ్, బార్ జా ముల దిల, చి అమ్చి తెన్ ఎక్కి నెంజితి మెన రుజ్జు డీస్తయ్. జేవ్ ముల్చిన్ తెన్ జా రుజ్జు డీసుక మెన సెలవ్ తిలి.

20 తూమ్, మాత్రుమ్, పరలోకుమ్చి సుద్ది తిలోసా జోచి ఆత్మక తుమ్క బోడి

ఉప్పిర్ సువిల్ రితి జా, 'అంచయ్' మెలి రితి తుమ్క జోచి గుర్తు కెర అస్సె. జాకయ్, తుమ్ జోచయ్ జలన ఎత్కిజిన్ సత్తిమ్ జాన్సు.

21 జలె, తుమ్క 'సత్తిమ్ నేన్తి' మెన రెగ్డి నాయ్, గని సత్తిమ్ జాన్సుచి రిసాయి రెగిడ్డసి. కేన్ అబద్దుమ్ తిలె, సత్తిమ్ తెంతో జెయె నాయ్ మెన కి జాన్సు.

22 జలె, కొన్సె జో అబద్దుమ్ జతోసా జయెదె మెలె, యేసుక 'జోచి రాజిమ్తె మాన్సుల్క బెదయ్తో రచ్చించుప కెర్తెసా జతి దేముడు తెద్రయ్లో క్రీస్తు జో నెంజె' మెన సంగితోసా సికడ్డోసా. క్రీస్తుచో దేముడు అబ్బోన్క 'అబ్బోన్ నెంజె', క్రీస్తు పుత్తున్క 'దేముడుచో పుత్తున్ నెంజె' మెన కో సంగితయ్ సికడ్డయ్ గే, జోయ్యి క్రీస్తుచి విరోదుమ్ జలోసా.

23 క్రీస్తు పుత్తున్క 'దేముడుచో పుత్తున్ నెంజె' మెన కో సంగితయ్ సికడ్డయ్, జోక ఎత్కిక అబ్బో జలో జో దేముడుచో మాన్సు నెంజె, జో మాన్సుచి పెట్టి నాయ్. క్రీస్తు పుత్తున్క కి 'దేముడుచో పుత్తుసి నిజామి జోయ్యి జయెదె' మెన కో * ఒప్పన్తయ్ గే, దేముడు అబ్బోన్చో మాన్సుకి జో జా అస్సె, జోవయించి పెట్టి ఎత్కిక అబ్బో జలో దేముడు అస్సె.

24 క్రీస్తుచి రిసా తుమ్ మొదోల్ తెంతో సూన్సి తుమ్చి పెట్టి తా గెన్సు. తుమ్ మొదోల్ తెంతో సూన్సి తుమ్చి పెట్టి తా గెలె, కామ్ కెర్తె తిలె జలె, దేముడు పుత్తున్చి తెడి కి దేముడు అబ్బోన్చి తెడి కి తా గెతె, జోచి తెన్ † ఇండితె తస్సె. ‡

25 జోచి రాజిమ్తె అప్పె కి బెదితి, పరలోకుమ్తె కెయ్క తెయ్క జితి చెంగిల్ తతి వాట అమ్క తుమ్క జో ప్రమానుమ్ సంగిలిసి కోడు.

§ 2:23 2:23 3:23, 4:15, 5:1, 5, 13, 20 డక. 10:9-10 డక. † 2:24 2:24 2:6 డక. ‡ 2:24 2:24 యోహాను 15:4-10.

* 2:23 2:23 మత్తయి 10:32-33 చి రోమయ్యల్

26 తుమ్మక మోసిమ్ కెరుక ఉచర్తనచి రిసా తుమ్మక ఈంజ రెగ్గితసి.

27 గని ప్రబు జోచి ఆత్మ తేల్ తుమ్మక బోడి ఉప్పిర్ సువిల్ రితి జలి గుర్తు తుమ్మచి పెట్టి తత్తయ్ కామ్ కెర్తయ్. మెలె, జోచి ఆత్మ తుమ్మచి పెట్టి తత్తయ్ తుమ్మక సికడ్డయ్, చి తుమ్మక కో మాన్సు సికడుక నాయ్. బలె, జోచి ఆత్మ తుమ్మక కిసి ఎత్కిచి రిసా సికడ్డయ్ గే, చి జోచి ఆత్మ కిసి సత్తిమ్ తా కిచ్చో అబద్దుమ్ జయె నాయ్ గే, జా ఆత్మ తుమ్మక సికడ్డి రిసా, యేసుప్రబుచి తెడి తుమ్ తా జోచి జీవ్క జోచి ఆత్మసెక్కిక జో తెన్ ఇండితె.

28 అన్నె, అప్పె, ప్రేమ తిల పుత్తర్లు, 'యేసుప్రబుచి తెడి తుమ్ తా. జోచి జీవ్కయ్ జోచి ఆత్మసెక్కిక జియె జో తెన్ ఇండ' మెన అన్నె సంగతసి. ఇసి తాఁ గెలమ్ మెలె, జో అన్నె జెతి పొదిక, అన్నె డీస్తి పొదిక అమ్ లాజ్ నే బెట్టి, నే గుంచితె, దయిరిమ్ తెన్ తమ్మదె.

29 జో 'పున్నిమ్చొ' మెన జాన్సు జలె, అన్నె కో సత్తిమ్ ఇండితతి గే, జేవ్ కి జోచి ఆత్మ తెన్ జెర్చున్ జా అస్తి మెన తుమ్ జాన.

3

1 ఎత్కిక అబ్బొ జలొ దేముడు అమ్క * "అంచయ్ బోదల్, తూమ్" మెన అమ్క నావ్ తియ అమ్క కెద్ది ప్రేమ కెర అస్సె గే తుమ్ ఉచర! జో దస్సి కెర్తికయ్, నిజుమి జోచ బోదల్ జలమ్! దస్సి మెన ఈంజయ్ లోకుమ్చి బుద్దిచ మాన్సుల్ కిచ్చొక తుమ్క చినితి నాయ్ మెలె, †జోకయ్ నేన్తి.

2 ప్రేమ జల గోతుసుదల్, అమ్ అప్పె కి దేముడుచ బోదల్ జా అస్సుమ్. అమ్ తెదొడక కిసి జమ్దె గే అప్పె డీసె నాయ్,

గని కిచ్చొ జానుమ్ మెలె, యేసుప్రబు అన్నె డీసెలె, †జోచి రితి పూర్తి జమ్దె. జో కిసి అస్సె గే, తెదొడకయ్ కిచ్చొ అడ్డు నెంతె జోక సొస్టుమ్ దెకుమ్దె.

3 అన్నె, మదెనె, జోచి ఉప్పిరి కో ఇసి దయిరిమ్ తత్తచి జోక రకితతి గే, జో కిసి సుద్ది అస్సె గే, జేవ్ కి జోచి రితి సుద్ది కెరంతి రితి దెకన్తె తవుల.

4 పాపుమ్ కెర్తొ ఎత్కి మాన్సు ఆగ్గుల్ పిట్టయ్తయ్. ఆగ్గుల్ పిట్టయ్తసి ఎక్కి పాపుమ్.

5 పాపల్ గెచ్చువుక మెన యేసుప్రబు బార్ జలొ మెనయ్, పడ్డొ జోతె కిచ్చొయ్ పాపుమ్ కి నాయ్ మెనయ్, తుమ్ జాన్సు.

6 †జోచి తెడి తతో కేన్ మాన్సు పాపుమ్ ఇండె నాయ్. కో పాపుమ్ ఇండితయ్ గే, ప్రబుక * దెకిలోసా నెంజె, జోక జాన్లోసా నెంజె.

7 ప్రేమ తిల పుత్తర్లు, తుమ్క కో మోసిమ్తె సేడవుక తుమ్ వాట్ దాస నాయ్. మెలె, కో సత్తిమ్ ఇండితయ్ గే, జో యేసుచి రితి జోచి తెన్ పున్నిమ్చొ జతయ్.

8 కో పాపుమ్తె ఇండితయ్ గే, సయ్తాన్చొ జయెదె. మొదొల్ తెంతొ సయ్తాన్ పాపుమ్ కెర్తొసా. సయ్తాన్చ కమొ గెచ్చువ గెలుకయ్ దేముడుచొ పుత్తుసి ఈంజ లోకుమ్తె బార్ జలొ.

9 దేముడుచి సుద్ది తిలి ఆత్మతె జెర్చున్ జలొ కేన్ మాన్సు పాపుమ్ ఇండె నాయ్. దేముడుచి సుద్ది తిలి ఆత్మ జోచి పెట్టి అస్సె, చి జో జా ఆత్మక జెర్చిలి రిసా జో మాన్సు పాపుమ్ ఇండుక నెత్తె.

10 ఇసికయ్ కో దేముడుచ బోదల్ జవుల గే, కో సయ్తాన్చ బోదల్ జవుల గే, చినుక జయెదె. కో సత్తిమ్ ఇండె నాయ్ గే, పడ్డొ †జోచ బావుడ్లు జల

* 3:13:1 యోహాను 1:12-13. † 3:13:1 యోహాను 1:10-11, 8:54-55, 14:7, 17, 16:2-3, 17:25.

‡ 3:2:3:2 రోమియల్ 8:19, 29, కొరింధిల్క రెగ్గి 2 సంబర్ ఉత్తమ్ 3:18, వీలిప్పియల్ 3:21, కొరింధిల్క రెగ్గి 1 సంబర్ ఉత్తమ్ 15:49-50. § 3:6:3:6 2:6, 24, 27, 28 దెక, చి 3:24, 4:13, 16 దెక. * 3:6

3:6 యోహాను రెగ్గి 3 సంబర్ ఉత్తమ్ 11 సంబర్ కోడు దెక. † 3:10 3:10 2:9, 10 దెక.

అన్నె మాన్సుల్క ప్రేమ దెకె నాయ్ గే, జో దేముడుచి సుద్ది తిలి ఆత్మ జెర్మున్చో మాన్సు నెంజె.

ఎక్కిలోక ఎక్కిలో ప్రేమ కెరుక

11 తుమ్ మొదోల్ తెంతో సూన్సి కబుర్ ఈంజ, అమ్ ఎక్కిలోక ఎక్కిలో ప్రేమయ్ తంక.

12 బావోన్క మార్లో, ఎత్కిక పాపుమ్ సికడ్డో సయ్తాన్ తెన్ బెదిలో కయూనుచి రితి తంక నాయ్. అన్నె, జో కిచ్చొక బావోన్క మార్లో మెలె, జోచ సొంత కమొ పాపుమ్చ, బావోన్చ కమొ పున్నిమ్చచి రిసా దెకుక నెత్త గోసక మార్లో.

13 బావుడ్లు, ఈంజ లోకుమ్చ మాన్సుల్ తుమ్చి విరోదుమ్ జలిన్క తుమ్ ఆచారిమ్ జా నాయ్.

14 మొర్ముక ముల జీవ్ జతిన్తె పాచ జా అస్సుమ్ మెన జానుమ్. నంపజల బావుడ్లుక ప్రేమ కెర్తసుమ్చి రిసా జానుమ్. కో ప్రేమ తెన్ తయె నాయ్ గే, మొర్ముతెయి అస్సె మెన జానుమ్.

15 జోచో కేన్ బావొచి ఉప్పిరి కో విరోదుమ్ తత్తయ్ గే, అత్య కెర్తొసా జతయ్, చి అన్నె కిచ్చొ జానుమ్ మెలె, అత్య కెర్తొ కేన్ మాన్సుచి పెట్టి పరలోకుమ్తె బైదితి కెయ్క తెయ్క చెంగిల్ తతీ జీవ్ నాయ్.

16 కిచ్చొతె సత్తిమ్చి ప్రేమ చినుక సికిలమ్ మెలె, 'పాపుమ్ తెంతో రచ్చించుప జతు' మెనయ్ యేసుప్రబు అమ్చి రిసా జోచి జీవ్ దా మొర్లన్. అన్నె, అమ్చ బావుడ్లుక 'చెంగిల్ జతు' మెనయ్ అమ్ కి అమ్చి జీవ్ దిలె, చెంగిలి.

17 గని కక్క ఈంజయ్ లోకుమ్చి అస్తి తత్తయ్ గే, చి జోచో కేన్ బావుడ్డిక కొత్తు అస్సి మెన దెకిలె, గని జోక కన్కారుమ్ దెకె నాయ్ గే, దేముడుచి ప్రేమ జో మాన్సుచి పెట్టి అస్సి మెన కిసి సంగుక జయెదె! బెదె నాయ్.

18 ప్రేమ తిల పుత్తర్లు, రిత కొణొకయ్ అమ్ ప్రేమ కెరుక పొన, గని సత్తిమ్చి ప్రేమ అమ్చి పెట్టి తా, అమ్చ కమొతెయి అమ్చి ప్రేమ దెకవుమ, అమ్చ కమొతెయి నెరవెర్చుప జవున్!

19 ఇసి, అమ్చి ప్రేమ అన్నె మాన్సుల్క తోడ్ కెర్త కమొతెయి బార్ కెర్లకయ్ 'సత్తిమ్ జలమ్' మెన చినుమ్చె, చి కెయ్క జవున్ కి 'సత్తిమ్చ నెంజుమ్ సిచ్చుక విలువ జలన ఆము' మెన లాజ్ జా అమ్చి పెట్టి బాద సేడ్లె, 'జో దిలి ప్రేమ అమ్చ కమొతె నెరవెర్చుప కెర్తసుమ్' మెన ఉచార కెరన.

20 ప్రబుచి మొక్కె అన్నె దయిరిమ్ జమ్చె, 'లాజ్ నెంతె జోచి మొక్కె టీవ్క జయెదె' మెన అమ్చి పెట్టి అన్నె దయిరిమ్ జమ్చె. కిచ్చొక మెలె, *అమ్చి పెట్టి తిలిన్చి కంట జో వెల్లో, చి జో ఎత్కి జానె.

21 జలె, ప్రేమ తిల గోతుసుదల్, అమ్చ కమొచి రిసా అమ్చి పెట్టి అమ్ లాజ్ జంక నాయ్ జలె, దేముడుచి మొక్కె అమ్క దయిరిమ్ తయెదె.

22 అన్నె, జోవయించి మొక్కె అమ్ లాజ్ జంక నాయ్ జలె, జోచి ఇస్టుమ్ రితి ఇండితసుమ్చి రిసా జో మెస్సితిసి కెర్తసుమ్చి రిసా, జోతె అమ్ కిచ్చొ సంగిలె, జో అమ్క దొర్కు కెర్తయ్.

‡ 3:11 3:11 2:7-11 దెక. § 3:19 3:19 డిసయ్లిసి 12:9-11 దెకిలె, సయ్తాన్ అమ్క 'ఇసి దస్సి కెర్ల' మెన ఎత్కి అదికారుమ్ తిలో దేముడుచి మొక్కె అమ్క నేరిమ్లు వయడుక ఉచర్తయ్, గని క్రిస్తు అమ్చి పాపుమ్ వయ గెచ్చయ్లి రిసా ఎత్కి అదికారుమ్ తిలో దేముడు అమ్క జా నేరిమ్ వయడె నాయ్, చి సయ్తాన్ ఓడువ జతయ్. * 3:20 3:20 కిచ్చొ జవున్ అమ్ కెర్లె కామ్క 'తప్పు కెర్లమ్' నెంజెలి, 'ఏక్ వేల తప్పు కెర్లమ్. లాజా' మెన అమ్చి పెట్టి బాద సేడ్లె, జా కామ్క 'తప్పు గే నెంజె గే' జోయ్య జానె, చి కిచ్చొక దస్సి కెర్లమ్ గే జోయ్య జానె, చి తప్పు కెర్లె కి జో చెంచుచుప కెరుక జోవయింక సెక్కి అస్సె. చి అమ్చి ఉప్పిర్చి అమ్చి అన్యాయమ్ జో గెచ్చవుక తెరె. † 3:23 3:23 2:23, 4:15, 5:1, 5, 13 చి 5:20 దెక.

23 ఈంజయి జోచి ఆగ్గు. జోచో పుత్తున్ జలో యేసుక్రీస్తుచి నావ్చి ఉప్పిరి అమ్క నముకుమ్ తంక, యేసుక †నిజుమి దేముడుచో పుత్తుని, నిజుమి జోచో పుత్తున్ జా జోచి అదికారుమ్ తిలో తెద్రయిందె మెన జో సంగ తిలో క్రీస్తు రచ్చించువ కెర్తొసా జోయ్యి మెనయ్ జోచి ఉప్పిరి అమ్ అమ్చి నముకుమ్ తింక, చి జో క్రీస్తు ప్రబు అమ్క ఆడ్ర దిలి రితి, ఎక్కిలోక ఎక్కిలో అమ్ ప్రేమయ్ కెరుక.

24 జోచ ఆగ్గుల్ రితి ఇండితన ఎత్తిజిన్ †జోచి తెడి తత్తతి, జోచి జీవక జోచి ఆత్మసెక్కిక జితతి, చి జోవయించి పెట్టి జోయ్యి తత్తయ్, జోవయింక జోయ్యి తోడు తత్తయ్, అన్నె, అమ్చి పెట్టి జో తత్తిసి జో అమ్క తోడే తత్తిసి అమ్ కీసి జానుమ్ మెలె, అమ్చి పెట్టి జో దిలి జోచి ఆత్మ తతికయ్ జానుమ్.

4

ఆత్మల్క కీసి చినుక జయెదె

1 ప్రేమ తిల గోతుసుదల్, ఎత్తి ఆత్మ సంగితిన్క 'దేముడుచి కోడు ఈంజ' మెన నే పరిచ్చ కెర్తె తుమ్ నంప కెర నాయ్. గని నిజుమి దేముడుచ జితతి గే నాయ్ గే, తుమ్క కిచ్చో కిచ్చో సికడ్డనచ ఆత్మల్ తుమ్ పరిచ్చ కెర. కిచ్చొక మెలె, 'దేముడుచ కబుర్లు అమ్మి సంగితసుమ్' మెన అబద్దుమ్క ఒగ్గర్జిన్ ఈంజ లోకుమ్తె బార్ జా అస్తి.

2 దేముడుచి సుద్ది తిలి ఆత్మ తెంతో తిలిసి కీసి చినుక జయెదె మెలె, యేసుక 'జో నిజుమి క్రీస్తు జలో దొర్కు జలో రచ్చించువ కెర్తొసా, నిజుమి దేముడుచో పుత్తున్ జా, జో మాన్సు జా జెర్మున్ జా బార్ జలన్' మెన కేన్ ఆత్మ ఒప్పనుల గే, జో ఆత్మ దేముడు తెంతోచ మెనయ్ చినుక జయెదె,

3 అన్నె, యేసుక 'జోయ్యి' మెన కేన్ ఆత్మల్ ఒప్పన్తి నాయ్ గే, జేవ్ దేముడు తెంతోచ ఆత్మల్ నెంజితి. 'బార్ జయెదె' మెన తుమ్ సూన్లి ఆత్మ, మెలె, క్రీస్తుచి ఉప్పిరి విరోదుమ్ జలోసాచి ఆత్మ, అప్పెయి కి ఈంజ లోకుమ్తె బార్ జయె అస్సి.

4 ప్రేమ తిల పుత్తర్లు, తుమ్ దేముడుచ మాన్సుల్ జా అస్సున్, జోచి ఆత్మతె జెర్మున్ జా అస్సున్, చి జేవ్ అబద్దుమ్చచి ఉప్పిరి తుమ్ జీన అస్సున్. కీసి మెలె, ఈంజ లోకుమ్తె తతోసాచి కంట తుమ్చి పెట్టి తతోసా వెల్లో.

5 జేవ్ అబద్దుమ్చ ఆత్మల్చ మాన్సుల్ ఈంజయి లోకుమ్చ జవులచి రిసా, జేవ్ సంగితిసి ఈంజయ్ లోకుమ్చి బుద్దిచి, చి జోచి కోడు ఈంజయి లోకుమ్చ మాన్సుల్ సూన్తతి.

6 ఆమ్, మాత్తుమ్, దేముడుచ మాన్సుల్ జా అస్సుమ్, జోచి ఆత్మ తెన్ జెర్మున్ జా అస్సుమ్, చి జో దేముడుక కో జాన్తి గే, అమ్చి కోడు సూన్తతి, చి కో దేముడుచ మాన్సుల్ జతి నాయ్ గే, అమ్చి కోడు జేవ్ సూన్తి నాయ్. ఇసి, జలె కేన్ ఆత్మ నత్తిమ్చి గే కేన్ ఆత్మ తప్పుచి గే చినుక జయెదె.

దేముడు ప్రేమయ్

7 ప్రేమ తిల గోతుసుదల్, ఎక్కిలోక ఎక్కిలో ప్రేమ కెరుమ! ప్రేమ దేముడు తెంతో చి, చి కో ప్రేమ ఇండితయ్ గే, జో దేముడుచి సుద్ది తిలి ఆత్మ తెన్ జెర్మున్ జా అస్సి, చి దేముడుక జో జానె.

8 గని కో ప్రేమ ఇండితి నాయ్ గే, దేముడుక నేన్తి. కిచ్చొక మెలె, దేముడు ప్రేమయి జా అస్సి.

9 కిచ్చొతె దేముడుచి ప్రేమ డీన అమ్క రుజ్జు జలి మెలె, జో దేముడు

జోచొ సొంత పుత్తునక ఈంజ లోకుమ్తె తెద్రయ్లన్. జో బలి జలిన్క అమ్చి పాపుమ్ గెచ్చవ పరలోకుమ్తె బెదితి జిప్ అమ్క దెతి రిసా.

10 ప్రేమ ముక్కిమ్క కిచ్చొతె డీస్తయ్ మెలె, అమ్ దేముడుక కిచ్చొ ప్రేమ కెర్లిన్తె నాయ్, మాన్సుల్చి అమ్చి ప్రేమ కిచ్చొ నెంజె, గని జోయ్యి అమ్క ప్రేమ కెర, అమ్ కెర్ల పాపల్ పుంచితె అర్పితుమ్ జో జతి రిసా, జోచొ పుత్తునక ఈంజ లోకుమ్తె తెద్రయ్లో.

11 జలె, ప్రేమ తిల గోతుసుదల్, ఎత్తి అదిసారుమ్ తిలొ దేముడు అమ్క తెద్ది ప్రేమ కెర్లొ జలె, అమ్ కి ఎక్కిలోక ఎక్కిలో తెద్ది ప్రేమ కెరుక.

12 కేన్ మాన్సు కెయ్ దేముడుక దెకుక నాయ్. గని అమ్ ఎక్కిలోక ఎక్కిలో ప్రేమ కెర్లనుమ్ మెలె, దేముడు అమ్చి పెట్టి తత్తయ్, చి అమ్చితె జోచి ప్రేమ పూర్తి జా నెరవెర్చుప జతయ్, రుజ్జు జతయ్. జోచి ప్రేమక జయ్యి రుజ్జు మాన్సుల్ దెకుక జతయ్.

13 *ప్రబుచి తెడి తత్తునుమ్, జోచి జిప్క జితనుమ్, చి జో అమ్చి పెట్టి తత్తయ్ మెన కిసి జానుమ్ మెలె, జోచి సొంత అత్త అమ్చి పెట్టి జో దిలిన్చి రిసా.

14 ఈంజ లోకుమ్చ మాన్సుల్క దొర్కు జలొ రచ్చించుప కెర్లొసా జో జంక మెన, జోచొ పుత్తునక ఎత్తిక అబ్బొ జలొ దేముడు తెద్రవ అస్సె మెన అమ్ దెక కెర సాచి నంగితనుమ్.

15 యేసుక †దేముడుచొ పుత్తుసి మెన కో ‡బప్పునుల గే, జోవయించి పెట్టి దేముడు తత్తయ్, చి జేవ్ దేముడుచి తెడి అస్సి, జోచి జిప్క జితతి.

16 దస్సి, దేముడు అమ్చి ఉప్పిరి ప్రేమ తిలిసి, అమ్చి ఉప్పిర్చి జోచి

ప్రేమ, జానుమ్ నంపజా అస్సుమ్. దేముడు ప్రేమయి, చి కో ప్రేమయ్చి తెడి తత్తయ్ ప్రేమ ఇండితయ్ గే, దేముడుచి తెడి తత్తయ్, జోచి జిప్కయ్ జితయ్, చి దేముడు జో మాన్సుచి పెట్టి తత్తయ్.

17 కిచ్చొక దేముడుచి ప్రేమ అమ్చి తెన్ కిపూర్తి జా నెరవెర్చుప జంక జోచి సెలవ్ మెలె, అమ్క ఎత్తిజిన్క పరిచ్చ కెర్తి వెల్లి దీసికయ్ 'సత్తిమ్ కెర్లమ్' మెన దయిరిమ్ తత్తు మెనయ్ జో జా సెలవ్ దెతయ్. జా దయిరిమ్ అమ్ కిచ్చొక జంక జయెదె మెలె, జో కిన్ జా అస్సె గే, అమ్ ఈంజయ్ లోకుమ్తె దనయ్ అనుమ్. జోయ్యి కిసి ప్రేమ అస్సె గే, అమ్ కి జోచి ప్రేమక మాన్సుల్క ప్రేమయ్ కెర్లనుమ్.

18 ప్రేమచి తెడి అమ్ తిలె, ప్రేమ అమ్ ఇండిలె, అమ్చి పెట్టి కిచ్చొ బయిమ్ తయె నాయ్. గని ప్రేమ పూర్తి తిలె, జా ప్రేమ బయిమ్ గెచ్చవ గెల్లయ్. బయిమ్ సిచ్చ జతిన్ తెన్ బెదితిసి, 'సిచ్చ జమ్దె' మెన అమ్ ఉచర్లె బిందె, చి కో బితయ్ గే, జోచి పెట్టి ప్రేమ పూర్తి జంక నెరవెర్చుప జంక నేతయ్ మెన రుజ్జు జతయ్.

19 దేముడు తొలితొ అమ్కయ్ ప్రేమ కెర్లొచి రిసాయి అమ్ జోక ప్రేమ కెర్లనుమ్.

20 జలె, దేముడుక ఆవ్ ప్రేమ కెర్లన్ మెన కో సంగితయ్ గే, జో జోచి బావుడ్డిక ప్రేమ కెరె నాయ్ గే, జో అబద్దుమ్చొ. కిచ్చొక మెలె, కేన్ జవున్ దెకిలొ బావొక కో ప్రేమ కెర్లయ్ నాయ్ గే, జో నే దెకిలొ దేముడుక కిసి ప్రేమ కెరెదె! నెత్తె!

21 అస్సె, జో కిచ్చొ ఆగ్గు అమ్క దా అస్సె మెలె, కో దేముడుక ప్రేమ అస్తి గే, జోచ బావుడ్డివొక ప్రేమ కెరుకయ్.

5

* 4:13 4:13 2:6, 24, 27, 28 చి 3:6, 24 చి 4:16 దెక, చి యోహాను 15:3-10 దెక. † 4:15 4:15 2:23, 3:23, 5:1, 5, 13 చి 5:20 దెక. ‡ 4:15 4:15 మత్తయ్ 10:32-33 చి రోమియుల్ 10:9-10 దెక.

§ 4:17 4:17 12 సంబర్ కోడు దెక.

క్రీస్తుచి ఉప్పిర్చి నముకుమ్చి ప్రేమ

1 యేసుక *తెద్రయిందె మెన దేముడు పూర్ణమ్ సంగిలో దొర్కు జలో రచ్చించుప కెర్తొసా జలో క్రీస్తు జొయ్యి మెన నంప కెర్తొ ఎత్తి మాన్సు దేముడుచొ బోద జయెదె, అన్నె, కో అబ్బొన్క ప్రేమ కెర్తయ్ గే, జో అబ్బొన్క అన్నె బోదల్క కి ప్రేమయ్ కెర్తయ్.

2 దేముడుచ బోదల్క అమ్ ప్రేమ కెర్తిసి కిచ్చొ రుజ్జుతె డీస్తయ్ మెలె, దేముడుకయ్ అమ్ ప్రేమ తా, అమ్ జోచి అగ్గుల్ రితి †ఇండితిన్తె,

3 దేముడుచి ప్రేమ అమ్చి పెట్టి తిలె, జోచ అగ్గుల్ రితి ఇండుమ్దె. అన్నె, జోచ అగ్గుల్ జాడు వయడ్డన నెంజితి.

4 కిచ్చొక మెలె, దేముడుచి నుద్ది తిలి ఆత్మతె జెర్మన్ కో జా తవుల గే, ఈంజ లోకుమ్చ ‡బుద్దివొచి ఉప్పిరి జీన్తతి. ఈంజయ్ లోకుమ్చ బుద్దివొచి ఉప్పిరి జీన్తతిసి కిచ్చొ మెలె, యేసుచి ఉప్పిర్చి అమ్చి నముకుమ్.

5 మెలె, కో ఈంజ లోకుమ్చ బుద్దివొచి ఉప్పిరి జీన్తతి మెలె, యేసుకయ్ 'జొయ్యి దేముడుచొ పుత్తుసి' మెన కో నంపజా అస్తి గే, జెద్వి.

6 పాని వాట్ లోయి వాట్ గెచ్చ అన్నె బార్ జా జో దేముడుచొ పుత్తున్ జలిన్ రుజ్జు జలోసా, జో రచ్చించుప కెర్తొసా జలో, యేసుక్రీస్తు. జో ఎక్కి పాని వాట్ గెచ్చ బార్ జయె నాయ్ గని పాని తెన్ లోయి తెన్ బార్ జా అన్నె. అన్నె ఈంజ చి రిసా దేముడుచి నుద్ది తిలి ఆత్మ సాచి సంగితయ్, కిచ్చొక మెలె దేముడుచి నుద్ది తిలి ఆత్మ సత్తిమ్ జా అన్నె.

7 అన్నె, యేసుక 'దేముడుచొ

పుత్తుసి జొయ్యి', 'దేముడు తెద్రయ్లో రచ్చించుప కెర్తొసా జలో క్రీస్తు జొయ్యి' మెన పానితెచి సాచిచి జోవయించి నూయి జలి లోయిచి సాచి తెన్ బెదితి సాచి సంగితొసా కొన్నొ మెలె, దేముడుచి నుద్ది తిలి ఆత్మయ. జోవయించి ఆత్మచి సాచి ముక్కిమ్. కిచ్చొక మెలె, జోవయించి ఆత్మ సత్తిమ్చి.

8 జోక, †దొర్కు జల తిన్ని సాచుల్ అస్తి, చి జోవయించి సాచి బెదితయ్, కిచ్చొ కిచ్చొ సాచుల్ మెలె, జా పాని, జా లోయి, చి దేముడుచి నుద్ది తిలి ఆత్మ.

9 అమ్ మాన్సుల్చి సాచి నంప కెర్తసుమ్ జలె, దేముడుచి సాచి అన్నెయ్ నంపజతిసి. అన్నె, దేముడుచి సాచి కిచ్చొ మెలె, యేసుక 'ఈంజొయి అంచొ పుత్తు' మెన జొయ్యి సాచి సంగ అన్నె.

10 పడ్డొ, దేముడుచొ పుత్తున్కయ్ 'నిజామి జోచొ పుత్తుసి' మెన కో నంపజవుల గే, జోవయించి పెట్టి దేముడుచి సాచి అన్నె. 'ఈంజొ అంచొ పుత్తు' మెన దేముడు సాచి సంగిలిన్చ ఉప్పిరి కో నముకుమ్ తితి నాయ్ గే, జోచి కోడు నంపజతి నాయ్ చి రిసా, జోక 'అబద్దుమ్చొ' మెన సంగిల్ రితి జతయ్.

11 జలె, సత్తిమ్చి సాచి కిచ్చొ మెలె, పరలోకుమ్చి రాజమ్తె జతి వాట, జాక దొర్కు జలి జీవు, దేముడు అమ్క దా అన్నె, చి ఈంజ జీవ్ కచి తెడి అన్నె. కత్తెయ్ దొర్కు జతయ్ మెలె, జోచొ పుత్తున్చి తెడి అన్నె, జో తెయి దొర్కు జతయ్.

12 కచి పెట్టి దేముడుచొ పుత్తున్ అన్నె గే, జోకయ్ జా జీవు. దేముడుచొ పుత్తుసి కచి పెట్టి తయె నాయ్ గే, పరలోకుమ్తె గెతి వాట, జాక దొర్కు జలి జీవు, జోకయ్

* 5:1 5:1 2:23, 3:23, 4:15, 5:5, 13, 20 దెక. † 5:2 5:2 మెలె, అమ్ కిస కిస మాన్సుల్క ప్రేమ దెకవుక గే జోవయించ అగ్గుల్తె, యేసుక్రీస్తుచ కొడతె, మోసే తెన్ దేముడు దిలి అగ్గుల్ ఎత్తితె జో దెకవ అన్నె.

‡ 5:4 5:4 కిస బుద్దివొ మెలె, గోనల్, అసల్, చోర్బుద్ది, కోవుమ్బుద్ది, దనచ ఎత్తి. § 5:8 5:8 యూదుల్చ అగ్గుల్ తెన్ 'దొగుల తిర్గ సాచుల్ సంగిలిన్ బెదిలె సత్తిమ్' మెంతతి.

దొర్కు జయె నాయ్.

13 దేముడుచొ పుత్తున్చి నావ్క 'జయ్యి. జొయ్యి క్రిస్తు రచ్చించుప కెర్లొసా' మెన తుమ్ జోక నంపజలసక 'పరలోకుమతె గెతి కెయ్క తెయ్క తాఁ గెతి వాటచి జాక దొర్కు జలి జీవు దొర్కు జలిన్చి రిసా తుమ్క దయిరిమ్ తవున్' మెనయ్ ఈంజ ఆవ్ రెగిడ్డసి.

14 అన్నె, జోచి తెడి అమ్క అన్నెయ్ కిచ్చొ దయిరిమ్ మెలె, జోచి ఇస్తుమ్ తెన్ బెదితిసి కిచ్చొ జవున్ జోతె అమ్ నజీలె, జోస్ూన్తయ్.

15 అన్నె, 'అమ్ కిచ్చొ నజీలె జో సూన్తయ్' మెన జానుమ్ జలె, జోతె అమ్ సంగిలిన్క 'దొర్కు జలి' మెన ఒప్పున్లి రితి, 'కచితుమ్ దొర్కు జయెదె' మెన జానుమ్.

16 నంపజలొ కేన్ జవున్ బావొ మొర్నొ ఆన్తి పాపుమ్ కెర్లెగిన, అన్నెక్లొ బావొన్ దెకిలె, జా పాపుమ్ జోక మొర్తి సిచ్చ నే ఆన్తి రిత, "జోక చెమించుప కెరు మెన" జో అన్నెక్లొ దేముడుక ప్రార్దన కెర్లె, చి కచి పాపుమ్ మొర్తి సిచ్చ ఆన్తిన్ నెంజె జలె, జో అన్నెక్లొ ప్రార్దన కెర్లి రిసా, జో పాపుమ్ కెర్లొసాక దేముడు జీవ్ దెయెదె. గని మొర్తి సిచ్చ ఆన్తి పాపుమ్ కి తయెదె. కో దస్సి పాపుమ్ కెర్లె, జోచి రిసా ప్రార్దన కెర మెని నాయ్.

17 గార్చి కిచ్చొ జలెకి పాపుమీ, గని సగుమ్ రగల్ పాపుమ్ మొర్తి సిచ్చ ఆన్తన నెంజితి.

18 'కో దేముడుచి తెన్ జెర్మున్ జా అస్తి గే, పాపుమతె ఇండితి నాయ్' మెన జానుమ్. దేముడుచి పెట్టిచొ క్రిస్తు దన మాన్సుల్క రకితయ్చి రిసా, పాపుమ్ సికడ్డొ సయ్తాన్ జెవ్వి మాన్సుల్క చడె నాయ్.

19 అమ్మి జలె, 'దేముడుచ బోదల్ జా అస్సుమ్' మెన జానుమ్, అన్నె, అమ్మెక ఒండి లోకుమ్ జో పాపుమ్ కెరయ్తో సయ్తాన్చి అత్తి అస్సి మెన కి జానుమ్.

20 అన్నెయ్ కిచ్చొ జానుమ్ మెలె, నిజుమ్చొ దేముడుక అమ్ జాన్తి రితి జో దేముడుచొ సొంత పుత్తుసి బార్ జా కెర, జోక చినితి జోక జాన్తి సెక్తి అమ్క దా అస్సి మెన జానుమ్. అన్నె, సత్తిమ్ తిలొ దేముడుచి తెడి, జోచొ పుత్తున్ యేసుక్రిస్తుచి తెడి అస్సుమ్. ఈంజొయి నిజుమ్ తిలొ ఎక్కిలొ దేముడు. పరలోకుమతె బెదితి కెయ్క తెయ్క చెంగిల్ తత్తి వాట యేసుక్రిస్తుతెయ్ దొర్కు జతయ్, జోక దొర్కు జలి జీవ్ జొయ్యి.

21 ప్రేమ తిల పుత్తర్లు, బొమ్మల్క జోకర్తినక తుమ్ దూరి తా.

యోహాను రెగిడ్లి దొన్నిచి ఉత్త్రమ్

బారిక్ జలో యోహాను రెగిడ్లి దొన్నిచి ఉత్త్రమ్

1 దేముడు నిసాన్ని * అమ్మకచి ఆవ్ చి సత్తిమ్ జాన్తన ఎత్కిజన్ నిజమి ప్రేమ కెర్త తుచ బోదల్ క ఆవ్ వెల్లో జలోసా రెగిడ్లి ఉత్త్రమ్.

2 కిచ్చొక ఇసి ప్రేమ తెన్ అస్సుమ్ మెలె, దొర్కు జలి † సత్తిమ్ అమ్చి పెట్టి అస్సె, చి కెయెక తెయెక అమ్చి తెన్ తాఁ గెచ్చెదె.

3 ఎత్కిక అబ్బొ జలో దేముడు తెంతొ చి జో అబ్బొన్చొ పుత్తున్ జలో యేసుక్రీస్తు తెంతొ జోచి దయ జోచి కన్నారుమ్ జోచి సేంతుమ్ అమ్చి తుమ్చి తెన్ తయెదె, చి జోచి సత్తిమ్ జోచి ప్రేమ తెన్ తమ్దె.

4 ఎత్కిక అబ్బొ జలో దేముడు దిలి ఆగ్గు రితి తుచ బోదల్ జల నంపజలనతె సగుమ్జన్ సుబుమ్ కబుర్తె తిలిన్చి సత్తిమ్ ఎత్కి నిదానుమ్ నంప తా, జా సుబుమ్ కబుర్తె తిలిన్ తెన్ బెదితి సత్తిమ్ ఇండితతి మెన నూన ఒగ్గర్ సర్ద జలయ్.

5 అన్నె, అప్పె, అమ్మ, తుమ్క ఏక్ కోడు బతిమాల్పా జా రెగిడ్లిసి. తుమ్క నొవి ఆగ్గు రెగిడ్లిసి నెంజె, గని మొదొల్ తెంతొ చి ఆగ్గు ఈంజ. కిచ్చొ మెలె, అమ్ ఎక్కిలోక ఎక్కిలో * ప్రేమయ్ కెరుక.

* **1:1 1:1** 'అమ్మ' ఇన్నె సంగిలె, కేన్ జప్పన్ సంగుమ్క టాలి జతయ్ మెన, చి 'తుచ బోదల్' మెన సంగిలె, జా సంగుమ్తెచ మాస్సుల్కయ్ టాలి జతయ్ మెన సగుమ్జన్ ఉచర్తతి. † **1:2 1:2** యోహాను 14:6, 16-17 దెకిలె, యేసుయి దొర్కు జలి సత్తిమి, చి జోవయిచి పరలోకుమిచి సుద్ది సత్తిమ్ తిలి ఆత్మ అమ్చి పెట్టి జో దా అస్సె. యోహాను 8:32, 36 కి దెక. పడ్డె, యేసు సంగిలిసి, దేముడు అబ్బొన్ సంగిలిసి, జోవయిచి సుబుమ్ కబుర్ సత్తిమి; యోహాను 8:45-47, చి యోహాను రెగిడ్లి ఈంజ 2 నంబర్ ఉత్త్రమ్ 9-10, గలతీయల్ 2:5. కొల్లోన్యూల్ 1:5 కి దెక. ‡ **1:5 1:5** యోహాను రెగిడ్లి 1 నంబర్ ఉత్త్రమ్ 2:8 దెక, చి యోహాను 13:34, చి మత్తయి 22:37-40. § **1:7 1:7** యోహాను రెగిడ్లి 1 నంబర్ ఉత్త్రమ్ 2:23, 3:23, 4:15, 5:1, 5, 13, 20 దెక.

* **1:9 1:9** యోహాను రెగిడ్లి 1 నంబర్ ఉత్త్రమ్ 2:23, 5:12 దెక.

6 అన్నె, ప్రేమ కిచ్చొ జతయ్ మెలె, ఎత్కిక అబ్బొ జలో దేముడుచ ఆగ్గుల్ రితి అమ్ ఇండుక. మొదొల్ తెంతొ తుమ్ నూన్సి ఆగ్గు కిచ్చొ మెలె, తుమ్ ప్రేమయ్ ఇండుక.

మోసిమ్ బోదచి రిసా జాగర్

7 అన్నె, ఒగ్గర్జిన్ మోసిమ్ సంగితన ఈంజ లోకుమ్తె బార్ జా బుల్తతి, యేసుక 8 'దేముడుచొ పుత్తుసి జో, జో దొర్కు జలో రచ్చించువ కెర్తొసా జలో క్రీస్తు జా, మాన్సు జా జెర్మన్ జా అస్సె' మెన ఒప్పునుక నెనితన. దన మాన్సుల్ మోసిమ్చ, క్రీస్తుచి ఉప్పిరి విరోదుమ్ జలన.

8 జలె, తుమ్ సైమ సేడ దొర్కు కెరన్లి బవుమానుమ్ నే పిట్టవన్తి రితి, గని తుమ్చి బవుమానుమ్ పూర్తి దొర్కు కెరంతి రితి జీన్తి రితి, తుమ్ దెకన.

9 కో పుర్తి గెతి రితి వెల్లో మెనన క్రీస్తుచి బోదనక నిదానుమ్ తయె నాయ్ గే, జో మాన్సు * దేముడుచొ నెంజె. దేముడు అబ్బొన్ కి జోచి పెట్టి నాయ్. గని, క్రీస్తుచి బోదనకయ్ కో నిదానుమ్ అస్సి గే, అబ్బొన్ జలో దేముడుచ కి పుత్తున్ జలో యేసుచ కి జా అస్సి. అబ్బొన్ కి పుత్తున్ కి జోచి పెట్టి అస్సె.

10 ఈంజయ్ బోదన నే ఆన్తె కో తుమ్తె అయ్లె, గెరి టాన్ దాన నాయ్, జోక జోకర నాయ్.

11 కిచ్చొక మెలె, కో జోక జోకర్తయ్ బెదవంతయ్ గే, జో మాన్సుచి తప్పు కామ్తె బెదిల్ రితి జతయ్.

12 తుమ్క అన్నె ఒగ్గర్ రెగుడుక జతి, గని కార్దుమ్క సిర్క రెగుడుక నెసి. తుమ్క అమ్క పూర్తి సర్దనంతోనుమ్ కెర్తి

రితి తుమ్తె సొంత జా దెకయి లట్టబుక
ఇస్టుమ్ జతసి.

¹³ దేముడు నిసాన్లి తుచి ఇన్నెచి
†బయ్దిచ ‡బోదల్ రిత జలస తుమ్క
జోచి జొబర సంగితతి.

† **1:13 1:13 1** నంబర్ కోడుతె తిలి రితి, 'బేన్ది' మెలిసి ఏక్ వేల అన్నెక్ సంగుమ్క టాలి జతయ్. చి 'బేన్దిచ బోదల్' మెన సంగిలె, జా అన్నెక్ సంగుమ్తెచ మాన్సుల్కయ్ టాలి సంగితయ్. ‡ **1:13 1:13 1** నంబర్ కోడుతె తిలి రితి, 'బేన్ది' మెలిసి ఏక్ వేల అన్నెక్ సంగుమ్క టాలి జతయ్. చి 'బేన్దిచ బోదల్' మెన సంగిలె, జా అన్నెక్ సంగుమ్తెచ మాన్సుల్కయ్ టాలి సంగితయ్.

యోహాను రెగిడ్లి తిన్నిచి ఉత్తమ్ బారిక్ జలో యోహాను రెగిడ్లి తిన్నిచి ఉత్తమ్

1 సత్తిమ్క ఆవ్ ప్రేమ తిలో గాయుక ఆవ్ వెల్లో జలోసా రెగిడ్లి ఉత్తమ్.

2 ప్రేమ తిలో మింత, తుక చెంగిల్ తవున్, మెన ఆవ్ ప్రార్దన కెర్తసి. తుచి అత్తుతె చెంగిల్ అస్సిన్ మెన జాని.

3 కీసి మెలె, బావుడ్లు జల సగుమ్జన్ అయ్లి పొది, తుయి సత్తిమ్ ఇండితిసి రిసా సాచి సంగిల, చి ఒగ్గర్ సర్దసంతోసుమ్ జలయ్.

4 ఎత్తిచి కంట అంక కిచ్చో కోడు ఒగ్గర్ సర్ద కెర్తయ్ మెలె, అంచ బోదల్ సత్తిమ్ ఇండితిసి ఆవ్ నూన్లె, జయ్యి అంక ఒగ్గర్ సర్దసంతోసుమ్ కెర్తయ్. జాచి కంట అంక జిన్ని సర్ద నాయ్.

5 ప్రేమ తిలో మింత, బావుడ్లుక తుయి కిచ్చో తోడు కెర్లె, నిదానుమచి కామ్, జా, ముక్కిమ్క వేర తెంతో అయ్లనక, జలె,

6 ఇన్నెచి సంగుమచి మొక్కె తుచి ప్రేమచి రిసా, ఇన్నె అయ్ల బావుడ్లు సంగ అస్సి. దేముడుచి సేవక బెదితి ప్రేమ తెన్ దస మాన్సుల్క మరియాద దెక జేవ్ గెతి వాట్క సరి జతి తోడ్ దాయె అన్నె తెద్రయ్లె, చెంగిలి. దస్సి కెర్లె తా.

7 కిచ్చొక మెలె, 'ప్రబుచి సేవకయ్' మెన జేవ్ బార్ జా అస్సి, చి ఎత్తి అదికారుమ్ దేముడుక సంప నే జలసతె కిచ్చొయ్ తోడు నజీతి నాయ్.

8 జాకయ్, అమ్ సంపజలసక కి దస మాన్సుల్క తోడు దెంక చెంగిలి. దస్సి కెర్లె, సత్తిమ్చి రిసాచి జోవయించి సేవతె ఆమ్ కి జోవయింతెన్ బెద తమ్దె.

9 తుమ్తెచి సంగుమ్క కిచ్చొగె రెగ్లి అస్సి గని దియొత్రెపె సొంత గవురుమ్ ఉచరన వెల్లో మెనన, అంచి అదికారుమ్క 'అస్సె' మెన ఒప్పునె నాయ్.

10 జాకయ్, ఆవ్ తుమ్తె అయ్లె, జో అంచి రిసా గర్చ కొడె, ఆరిచ నిందల్చ కొడె సంగితె తత్తిన్చి రిసాచి తీర్పు సంగుమ్దె. జా తప్పుచి కంట అన్నె కిచ్చొ తప్పు జో కెర్తయ్ మెలె, సత్తిమ్చ వేర తెంతోచ బావుడ్లుక మరియాద దెకె నాయ్, చి 'మరియాద దెకుమ్దె' మెన ఇస్టుమ్ జత అన్నె మాన్సుల్క పిట్టవ, సంగుమ్ తెంతో ములయ్తయ్.

11 ప్రేమ తిలో మింత, గర్చిక దెక తుయి సిక్కు నాయ్, గని చెంగిల్చిక దెక దస్సి ఇండు. కో సత్తిమ్ ఇండితయ్ గే, దేముడుచో మాన్సు జతయ్. కో గర్చి బుద్ది ఇండితయ్ గే, దేముడుక *నే దెకిలోసా మెలి రితి జతయ్.

12 దేమెత్తి చి రిసా ఎత్తిజిన్ 'చెంగిలోసా' మెన సాచి సంగితతి, జోచి సత్తిమ్ కి జోచి రిసా సాచి జతయ్. ఆవ్ కి జోచి రిసా 'చెంగిలోచా' మెన సాచి సంగితసి, అన్నె, అంచి సాచిక 'సత్తిమ్చి' మెన తుయి జాస్సి.

13 తుక అన్నె ఒగ్గర్ రెగుడుక జతి, గని పుస్తకుమచి సిర్ర తెన్ రెగుడుక నెసి.

14 బే బేగి తుమ్తె జెంక ఉచర్తసి, చి అయ్లె, ఆవ్ తూయి ఎక్కిలోక ఎక్కిలో దెక సొంత లట్టబుమ్దె.

15 తుక సేంతుమ్ తవున్. తుచ అమ్చ గోతుసుదల్ తుక జోవయించి జోబర సంగితతి. ఒత్తచ గోతుసుదల్ ఎత్తిజిన్క అంచి జోబర సంగు.

* 1:11 1:11 యోహాను రెగిడ్లి 1 నంబర్ ఉత్తమ్ 3:6 దెక.

యాదా రెగిడ్లి ఉత్తమ్ బారిక్ జలో యాదా రెగిడ్లి ఉత్తమ్

1 దేముడు అబ్బోన్చి తెడి ప్రేమ తిల, * యేసుక్రీస్తుచి రచ్చనచి తెడి తిల, జేవ్ నిసాన బుకార్లనక యేసుక్రీస్తుక † సేవ కెర్తొసా జలో, యాకోబుచో బాబొన్ జలో, యాదా రెగిడ్లి ఉత్తమ్.

2 ప్రబుచి కన్యారుమ్, సేంతుమ్చి ప్రేమ అన్నె తుమ్క ఒగ్గర్ కలుగు జవున్!

దేముడుక విరోదుమ్ జలిన్చి రిసా జాగర్త తత్తి కోడు

3 ప్రేమ తిల బావుడ్లు, అంచి తుమ్చి రచ్చనచి రిసా తుమ్క ఉత్తమ్ రెగుడుక ఒగ్గర్ ఇస్తుమ్ జలయ్. గని, కిచ్చొచి రిసా ముక్కిమ్క అప్పెయి రెగుడుక మెన అంక జానయ్ జలి మెలె, ఆము తూమ్ ప్రబుచి సుద్ది జా జోచయ్ జల మాన్సుల్క ముక్కిమ్క దిలి సుబుమ్ కబుర్ మొత్తమ్చి నముకుమ్ పాడ్ నే జతి రితి తుమ్ దెక, వేర మాన్సుల్ వేర సికడ్లె ప్రబు అమ్క దిలి జా బోదచి రిసా చెంగిల జబాబుల్ తుమ్ దాస.

4 కిచ్చొక మెలె, “ఈంజ బోదనక జేవ్ నిదానుమ్ నెంజిలి రిసా సిచ్చ జతు” మెన దేముడు ఒగ్గర్ అగ్గె తెంతో రెగిడ్లన సగుమ్జిన్ తుమ్చి సంగుమ్తె ఉప్రమెన్సుక లుంకచోరు ‡ బెద అస్తి. దేముడుక నేన్ల జోవయించి ఉప్పిరి విరోదుమ్ జల జేవ్ మాన్సుల్ కిచ్చొ

కెర్తతి మెలె, కీదేముడు అమ్క ఆగ్గుల్ రితి తెంతో విడ్డల్ కెర అస్సె, చి అమ్ కీసి ఇండిలెకి బాద నాయ్. అమ్ కిచ్చొ కెర్లె కి, జోచి దయక అమ్క రచ్చించుప కెరెదె మెన సంగ, దేముడుచి కోడు మార్పుప కెర్తతి, చి జోవయించి ఆగ్చ అసల్ ముద్దో నే కెరంతె “దస్సి ముద్దో కెరనుక నాయ్” మెన అన్నె మాన్సుల్క కి సికడ్లె, చి అమ్చో ఎత్తి ఎజొమాని, ఎక్కి ప్రబు జలో యేసుక్రీస్తుక * దేముడు నెంజె మెన సంగిల్ రితి జా, జోచి మరియాద కడ్లి రితి ఇండితతి.

5 జలె, తుమ్క “కెయెక పచ్చుత్ నాయ్” మెన తుమ్క అమ్ అగ్గె పూర్తి సూనయ్లమ్. తెదొడి సూన్తదు జలె, జతి. గని తుమ్క అన్నె ఉచార కెరయిందె. ఐగుప్తు దేసిమ్ తెంతో అమ్చ పైజల్ జల ఇస్రాయేలుల్క రచ్చించుప కెర్లె దేముడు పడ్డో జేవ్ పైజల్తెచ జోవయింక నంపనెంజిలనక † మొర్తి సిచ్చ దిలన్.

6 అన్నె, జోవయింక దిలి కామ్, జోవయింక దిలి ట్రాన్ ములిల ‡ దేముడుచి దూతల్క దేముడు కిచ్చొ సిచ్చ దా అస్సె మెలె, ఎత్తిక తీర్పు కెర్తి ఆకర్ దీన్క, ముక్కిమ్ జలి దీసిక జేవ్ సిచ్చ జతె ఎదక, ఎట్టొచి కంట ఎట్టొ తిలిన్చి అందరె జేవ్ రకితి రితి, కో కెయెక యిప్పుక నెతిర గొల్పుల్ తెన్ జో బంద దా అస్సె.

7 దస్సియి కి, అమ్క అన్నెక్ కామ్ జాగర్త దెకయ్తయ్. కేన్ మెలె, కీసాదొమ చి గొమొరా పట్టల్ చి జోవయించి సుట్టునంతచ పట్టల్చ మాన్సుల్ కి దేముడు సెలవ్ నే దిలి రితి

* 1:1 1:1 నెంజెలి, యేసుక్రీస్తుచి సేవ కెర్త మెన తుమ్ నాసెనుమ్ నే జతి రితి ఎత్తి అదికారుమ్ తిలొ దేముడు దెక తిల,.... † 1:1 1:1 నెంజెలి గొతిమాన్సు నెంజెలి గొత్తి సుదె. ‡ 1:4 1:4 పేతురు రెగిడ్లి 2 నంబర్ ఉత్తమ్ 2:1 చి కోడుతె ‘దస్సి జర్గు జయెదె’ మెన సంగిలన్. ఇన్నె, యాదా రెగిడ్లిన్తె ‘జర్గు జలి’ మెన దెకితనుమ్. § 1:4 1:4 పేతురు రెగిడ్లి 2 నంబర్ ఉత్తమ్ 2:19 దెక. * 1:4 1:4 పేతురు రెగిడ్లి 2 నంబర్ ఉత్తమ్ 2:1 దెక. † 1:5 1:5 నిర్గమకాండుమ్ 32:1-28, 35, సంక్యాకాండుము 11:1, 14:29, 30, 35. ‡ 1:6 1:6 అదికాండుమ్ 6:1-7, పేతురు రెగిడ్లి 2 నంబర్ ఉత్తమ్ 2:4. జేవ్ దూతల్ మాన్సుల్చ తెరబోదల్ తెన్ లంజె జల. § 1:7 1:7 అదికాండుమ్ 18:20-29 చి పేతురు రెగిడ్లి 2 నంబర్ ఉత్తమ్ 2:6 దెక.

వేరయ్ ఆసల్ జా, మున్నుబోదల్ తెన్ మున్నుబోదల్ సాని జతె తిల. అమ్క జాగర్త దెకయ్తి రిసా జోవయించి సిచ్చు కిచ్చొ మెలె, ఆగితె సిచ్చు జల, చి కెయెచ నే విజితి ఆగితె జేవ్ సిచ్చు జవుల.

8 దస్సి, *తుమ్చి సంగుమ్తె బెదిల ఉప్రమెన్నుచి ఈంజేవ్ మాన్సుల్ కి, వెర్రి సిమ్మల్ దెకిల్ రిత జా, లంజెకమొ కెర జోవయించి ఆగ్ గార్ కెరంతతి, దేముడుచి అదికారుమ్క బితి నాయ్, చి జో దేముడు కబుర్ తెద్రయ్ల పరలోకుమ్చి గవురుమ్చి ఉజిడ్చ దేముడుచ దూతల్క †దూసుప కెర్తతి.

9 †గని మోసే పూర్గుమ్చొ కీమొర్లిన్తె జోచి ఆగ్చి రిసా వెల్లో దూత జలొ మికాయేలుచి ఉప్పిరి నయ్తాన్ వాదన కెర్లి పొది, మికాయేలు నయ్తానుక దూసుప కెర్లి తీర్పు సంగుక అదికారుమ్ ఉచరనె నాయ్, గని ఎక్కి ఈంజ, “ప్రబుయి తుక తుచి తప్పుచి తీర్పు సంగున్” మెలన్.

10 *అమ్ అప్పె సంగిత ఉప్రమెన్నుచ మాన్సుల్, మాత్రుమ్, జేవ్ అర్దుమ్ నే కెరన్లిసి కిచ్చొ జలెకి జేవ్క దూసుప కెర్తతి, అన్నె, జంతువుల్ రిత అర్దుమ్ నెంతె జోవయించి ఆగెచ ఆస్రల్ కీసి దస్సి జర్గు కెరంతతి గే మెన జేవ్ కి దస్సి, బుద్ది నెంతె, జోవయించి ఆగెచ ఆసల్

కెర కెర పాడ్ కెరంతతి. జా ఆస జర్గు కెరంతిసి జోవయింక సొంత పాడ్ కెర్తయ్.

11 అయ్యొ! జోవయించి సిచ్చు కెర్లి సిచ్చు! కిచ్చొక మెలె, †బావోన్క మార్లో కయూను పూర్గుమ్చొ గెలి వాట్ ఇండతతి, చి కిచ్చొ కిచ్చొ డబ్బుల్ లాబుమ్క ఆస జా, †బిలామ్ పూర్గుమ్చొ కెర్లి తప్పుతె జేవ్ కి జోవయించి బుద్ది వికంతతి, చి కీకోరహు పూర్గుమ్చొ కీసి మోసేచి దేముడు దిలి అదికారుమ్ పాడ్ కెరుక ఉచర్లో గే, జేవ్ కి దస్సి, దేముడుచి కామ్ జోచి అదికారుమ్ పిట్టవుక ఉచర్తతి, చి కోరహు చి జోచి పచ్చెన గెల మాన్సుల్చి రితి నాసెనుమ్చి సిచ్చు జా *మొరుల.

12 వడ్డొ, ప్రబుచి తెడిచి తుమ్చి ప్రేమ దెకయ్తి గుర్తుచి †అన్నిమ్ కెర్తినతె జేవ్ ఉప్రమెన్నుచ మాన్సుల్ బెద, అన్నె మాన్సుల్క నాయ్, గని జోవయింక జెవ్వొ దెకన, ఇస్టుమ్ అయ్లి రితి గమ్మత్ తెన్ కతినక, జేవ్ మరియాద నెంజిలిన్క ముర్కి మర్కల్ రిత జా, జా ప్రేమ దెకయ్తి గుర్తుచి అన్నిమ్చి విలువ కడ్డతి. అన్నె జేవ్, †నాదు కెర్లె మబ్బు తిలె కి పాని నే జెతె కీసి ఉడ్డ గెతయ్, గే, జేవ్ కి దస్సి. జేవ్ కి జా మబ్బుచి రితి కామ్క నెంజితి. అన్నె, అంజూరుమ్ రూకు చెంగిల్ తిలె, చల్లి పొది పాసి

* 1:8 1:8 పేతురు రెగిడ్లి 2 నంబర్ ఉత్త్రమ్ 2:10 దెక. † 1:8 1:8 పూర్గుమ్ ‘దేముడు దెతి సిచ్చు జర్గు కెరుక’ మెన మాన్సు రూపుమ్ జల దొగుల దూతల్ ఏక్ సుట్టు సొదొమ పట్టుమ్తె గెతికయ్, జా పట్టుమ్చ మున్నుబోదల్ జేవ్ దూతల్క లంజె కెర జోవయించి మరియాద కడుక ఉచర్త. ఎత్తి అదికారుమ్ తిలో దేముడు జోవయింక అడ్డు కెర గుడ్డి కెర్తన్. ఆదికాండుమ్ 18:20, 22, చి 19:1-11. యాదా ఈంజ ఉత్త్రమ్ రెగిడ్లి పొదులె కి ప్రబుచ కబుర్లు సంగిల మాన్సుల్క పాపుమ్చ మాన్సుల్ దూసుప కెర్తె తిల, చి అగ్గెచి ఇన్నెక టాలి జతయ్. † 1:9 1:9 పేతురు రెగిడ్లి 2 నంబర్ ఉత్త్రమ్ 2:11 దెక. § 1:9 1:9 ద్వితీయాపదేశ కాండుము 34:1-8. * 1:10 1:10 పేతురు రెగిడ్లి 2 నంబర్ ఉత్త్రమ్ 2:12. † 1:11 1:11 ఆదికాండుమ్ 4:1-16. † 1:11 1:11 పేతురు రెగిడ్లి 2 నంబర్ ఉత్త్రమ్ 2:15 దెక. బిలామ్ ఎత్తి అదికారుమ్ తిలో దేముడుచ కబుర్లు సంగితొనా జలెకి, చెత్తర్ తప్పుల్ కెర్లె. ఎత్తి అదికారుమ్ తిలో దేముడుచి కోడు మార్పుప కెరుక ఉచర్లె, ఎత్తి అదికారుమ్ తిలో దేముడుచ విరోదుమ్ తిల మాన్సుల్ “డబ్బుల్ దెమ్దె” మెంతికయ్, జా డబ్బుల్ ఆసకయ్ ఎత్తి అదికారుమ్ తిలో దేముడుచి కోడు పిట్టవుక ఉచర్లె, సంక్యాకాండుము 22:2-35, 31:16. వడ్డొ, బొమ్మల్క బలి దిలిసి ప్రజెల్ కంక సికడ్ల, చి ప్రెజల్ లంజె జతి రితి సికడ్ల, డీసయ్లిసి 2:14. § 1:11 1:11 సంక్యాకాండుము 16:1-35. * 1:11 1:11 కేరహుక చి జోవయించ సగుమ్జన్ మాన్సుల్క బుయి గిడ గెలన్, చి జోవయించ అన్నె సగుమ్జన్ మాన్సుల్ ఆగిక డడ్డయ్ గెల. † 1:12 1:12 పేతురు రెగిడ్లి 2 నంబర్ ఉత్త్రమ్ 2:13. † 1:12 1:12 కేరహుక చి జోవయించ సగుమ్జన్ మాన్సుల్క బుయి గిడ గెలన్, చి జోవయించ అన్నె సగుమ్జన్ మాన్సుల్ ఆగిక డడ్డయ్ గెల.

అయ్యలె పొది రూకీతె పండ్లు దెరుల, గని పంటో లాయితి పొది పాసి అయ్యలె కి, జేవ్ మాన్సుల్ కామ్క నెంజితో రూకు రిత జా, చి కీదొవ్వెర్ మొర్ల రిత జతతి.

13 అన్నె జేవ్, సముద్దుమ్తెచ వెర్రి కెర్లల్చ రిత జా, జోవయించి సొంత పాపుమ్చి పొగ్గుర్ ఉడ్డిత్ రితి కెర్తతి. అన్నె కీస జతతి మెలె, ఎక్కితె సొంత టాన్తె వాట్ పిట బుల్తె తిల సుక్కల్చ రిత తవుల, చి దేముడు దిలి జోవయించి సిచ్చు కిచ్చొ మెలె, *ఎత్కిచి కంట అందర్ తిలిన్తె గెచ్చుల.

14 తొలితొచొ మాన్సు ఆదాము ఎక్కిలో తెంతో హనోకు ఎద వర్చ తెన్ సత్తు కుటుంబల్ జలి. హనోకు దేముడుచి సుద్ది తిలి ఆత్మ తెన్ ఇనాయంచి రిసొ ఇనెయి మెన సంగిలన్.
“ఆదె, జోవయించ పరలోకుమ్చ ఎతివాట్జిన్ దూతల్ ఎత్కి తెన్

15 ‘ఎత్కిక తీర్పు కెరుక, చి దేముడుక నేళ్లస నెసిలస ఎత్కిక, జోచి మరియాద కడ్డ జేవ్ కెర్ల పాపుమ్ కమొచి రిసొ జోవయించి నేరిమ్ వయడుక, చి జోవయించి రిసొ జేవ్ పాపుమ్లు సంగిల ఎత్కి కోపుమ్ కోడుచి నేరిమ్ వయడుక’ మెన ప్రబు ఉత్త అయ్యలన్.”

16 ఉప్తమెన్నుచి అమ్ సంగిల మాన్సుల్ నిజామి తిరిమ్ తిరిమ్ గోసల్ లట్టబ్బన, దేముడుచి ఉప్పిరి సేంతుమ్ నెంజి వేర వేరచి ఒగ్గర్క ఆస జతస, జోవయించ ఆసల్ రితి ఇస్టుమ్ అయ్యలి రితి ఇండితస, బడాయ్ లట్టబ్బన,

లాబుమ్క అన్నె మాన్సుల్క పులయ్యతస జవుల.

సత్తిమ్చ నంపజలసక అన్నె జాగర్ల సంగిలిసి

17 తూమ్, ప్రేమ తిల బావుడ్లు, తుమ్ కిచ్చొ ఉచార కెర మెలె, †అమ్చొ ప్రబు జలో యేసుక్రీస్తుచ బారికుల్ జోచి సెక్కిక సంగిలిసి.

18 జేవ్ జోవయించ బారికుల్ తుమ్క, †“ఆకర్ దినాల్క సత్తిమ్చి ఉప్పిరి ఆన్తస బార్ జవుల.

దేముడుక విరోద్దుమ్ జల జోవయించి పాపుమ్చ ఆసల్ రితి ఇండుల” మెన తుమ్క సంగిల.

19 జేవ్ సంగిల్ రితి ఈంజేవ్వి మాన్సుల్ నంపజలసతె జట్లు కెరయ్యతతి, దేముడుచి సుద్ది జోవయించి పెట్టి తయె నాయ్, చి జోవయించి సొంత ఆగుచ ఆసల్ రితి ఇండితత్తి.

20 గని తూమ్, ప్రేమ తిల బావుడ్లు, ప్రబుచి సత్తిమ్చి చి తుమ్చి నముకుమ్తె డిట్టుమ్ కెరన. దేముడుచి సుద్ది తిలి ఆత్మసెక్కిక ప్రార్దన కెర.

21 దేముడుచి ప్రేమ ఇండుక దెకన. పరలోకుమ్తె బెద కెయ్యక తెయ్యక జితి వరుమ్ అమ్చొ ప్రబు జలో యేసుక్రీస్తు జర్గు కెరె ఎదక, జాక నిధానుమ్ రక.

22 పడ్డొ, సగుమ్జిన్ అన్మానుమ్ జా అస్తి. జోవయించి ఉప్పిరి కన్యారుమ్ జా, సత్తిమ్ దెకవ.

23 సగుమ్జిన్క ఆగి తెంతో ఉర్లిల్ రితి సయ్యతాన్చి తెంతో రచ్చించువ కెర, పడ్డొ, సగుమ్జిన్క, జోవయించి పాపుమ్తె నే బెదితి రితి జాగర్ల తా, బియ్య జోవయించ కన్యారుమ్ దెక.

ఆకర్ కోడు

§ 1:12 1:12 మాములుమ్ మొర్పు కి తయెదె, ఆకర్చి మొర్పు కి తయెదె. ఆకర్చి మొర్పు మెలె, ప్రబుక విరోదుమ్ జలస వెల్లి ఆగి గొయ్యె సిచ్చ జతిసి, ఈంజ. డీసయ్యలిసి 2:11, 20:6, 14 చి 21:8 దెక. మెలె, మొర్లొ రూకు రిత జా, వలితుమ్ దెర్రి నాయ్, చి జేవ్ వలితుమ్ దెర్రిన్చి రుజ్జు డీసిలి పడ్డొక ఉట్టి. జా పూర్తి మొరుల.

* 1:13 1:13 పేతురు రెగిడ్డి 2 నంబర్ ఉత్తమ్ 2:17. † 1:17 1:17 పేతురు రెగిడ్డి 2 నంబర్ ఉత్తమ్ 3:2 దెక. ‡ 1:18 1:18 పేతురు రెగిడ్డి 2 నంబర్ ఉత్తమ్ 3:3 దెక.

24 జలె, తుమ్ పాపుమ్తె అన్నె నే
 నేడ్డి రితి తుమ్క రకుక తెర్లొ, జోపయించి
 పరలోకుమ్చి ఉజిడతె తుమ్ షొరపాట్
 నెంతె సర్ల తెన్ జోచి మొక్కె టీవ్తి రితి
 దొర్కు జలిసి జెయిమ్ కెరుక తెర్లొ

25 ఎక్కిలో దేముడు జలో, అమ్చొ
 ప్రబు జలో యేసుక్రీస్తుచి అత్తి అమ్క
 రచ్చించుప కెర్లొసొ జలో దేముడుక
 పరలోకుమ్చి ఉజిడి, గవురుమ్,
 అదికారుమ్, సెక్తి, కిచ్చొ నెంజిలి అగ్గె
 తెంతొ తా, అప్పె కి, కెయలక తెయలక
 కి నే పిట్ట తవున్! ఆమేన్!

ప్రకటన పుస్తకము

జర్గు జంక తిలిసి దేముడు

బారిక్ జలో యోహానుక

డీసయ్ లిసి

మొదొల్ కోడు

1 యేసుక్రీస్తు, జోచ సేవ కెర్తనక దెకవుక మెన బే బేగి జర్గు జంక తిలిసి దేముడు అబ్బొసి జోక దిలన్. బే బేగి జర్గు జంక తిలిసి జా ఎత్తి, జోచో సేవ కెర్తొసా యోహానుక జోచో దూతచి అత్తి డీసవ దిలయ్.

2 జలె, దేముడుచి ఈంజ కబుర్ చి రిసా, యేసుక్రీస్తు దెకయ్ లి ఈంజ సాచిచి రిసా, జా ఎత్తి దెకిలిన్ చి రిసా యోహాను ఇన్నె సాచి రెగిడ్డసి.

3 జర్గు జంక తిలిన్ చి ఈంజ కబుర్ అన్నె కో నదు కెరుల గే, ఇన్నెక కో సూన ఇన్నె సంగిల్ రితి కెరుల గే, జోక చెంగిలి. కిచ్చొక మెలె, ఈంజ జర్గు జంక దెర్తి సమయుమ్ పాసి జా జెతయ్.

4 ఆసియా ప్రదేసిమ్ చ *సత్తు †సంగుమ్ ల్ చక ఆవ్ యోహాను కిచ్చొ కబుర్ రెగిడ్డసి మెలె, కెయ్ క తెయ్ క తిలొసా, త్తొసా, జెంక తిలొసా తెంతొ, పడ్డొ జోచి సింగానసుమ్ చి పురెత్తో తతా ‡సత్తు ఆత్మల్ తెంతొ,

5 పడ్డొ నంపజతి సాచి నిదానుమ్ తె ఇండ, మొర అన్నె జీవ్ జతనక తొల్పొర్ జతొ, ఒండి లోకుమ్ చ రాసల్ క ఏలుప కెర్తొ యేసుక్రీస్తు తెంతొ దయ, సేంతుమ్,

* **1:4 1:4** యూదుల్ తెన్, 'సత్తు' మెలి నంబర్ క కిచ్చొ అర్దుమ్ మెలె, పూర్తి తిలిసి ఇన్నె దొన్నుచి తిన్ని నంబర్లు అద్యయల్ తె ఏక్ సత్తు సంగుమ్ లుచ నవ్వొ దెర జోవయింక ఎక్కెక్ కబుర్లు సంగెదె, గని ఏక్ వేల ఈంజ 'సత్తు' నంబర్ ఒండి లోకుమ్ చ నంపజలనచ సంగుమ్ లు మొత్తుమ్ క ఏక్ టాలి జయెదె. † **1:4 1:4** 'సంగుమ్' మెలె, ఏక్ తెచ నంపజలన మొత్తుమ్ క 'సంగుమ్' మెనుక జతయ్. ‡ **1:4 1:4** సత్తు ఆత్మల్ మెలె, ఎత్తి అదికారుమ్ తిలొ దేముడుచి నుద్ది తిలి ఆత్మక సంగితయ్. ఇన్నె సత్తు మెలె, పూర్తి తిలిన్ చి అర్దుమ్ కి, పూర్తి సత్తిమ్ తిలిన్ చి అర్దుమ్ కి తయెదె. పూర్తి నెక్తి తిలిన్ చి అర్దుమ్ కి ఉచరుక జయెదె. పడ్డొ ఒండి లోకుమ్ తె తిలిసి ప్రబుచి ఆత్మ దెకిలిన్ చి అర్దుమ్ కి ఉచరుక జయెదె; జెకర్యా 4:10. § **1:6 1:6** ఎబ్రీ బాస తెన్ ఇన్నె 'ఆమేన్' మెనుల. జా కోడుచి అర్దుమ్ కిచ్చొ మెలె, 'తెద్దిలి!'. 'జర్గు జవున్!' * **1:7 1:7** ఎబ్రీ బాస తెన్ 'ఆమేన్!' మెనుల. కుపియ బాస తెన్ తెద్దిలి మెన నవుల

తుమ్ చి ఉప్పిరి తవున్. యేసుక్రీస్తు అమ్ క ప్రేమ కెర, జోచి మొర్చిచి అర్చితుమ్ జలి సొంత లోయి నువడ కెర, అమ్ చ పాపల్ చి సిచ్చ తెంతొ అమ్ క విడ్డల్ కెర్లన్.

6 జో అమ్ క జోచో దేముడు జలొ జోచో అబ్బొన్ చి రాజమ్, పూజర్లు జతి రితి, సేవ కెరుక మెన జో జర్గు కెర అస్సె. జా ఎత్తిచి రిసా జో యేసుక్రీస్తుక కెయ్ క తెయ్ క గవురుమ్ అదికారుమ్ తవున్! § ఆమేన్!

7 ఈందె, మబ్బుల్ తెన్ జో పరలోకుమ్ తెంతొ అన్నె ఉత్త జెయెదె, చి ఎత్తి అంకివొ జోక దెకుల. జోక మార్లన ఎత్తిజిన్ కి. అన్నె జోక అగ్గె మార తిలన్ జలె 'బలే తప్పు కెర్లమ్' మెన ఒండి లోకుమ్ చ సెకుమ్ లుచ మాన్పుల్ ఏడుకుడు జవుల. దస్సి జర్గు జవున్! * ఆమేన్!

8 కెయ్ క తెయ్ క తిలొసా, త్తొసా, జెంక తిలొసా, ఎత్తి అదికారుమ్ తిలొ ప్రబు జలొ దేముడు, జొయ్యి మొదొల్ జొయ్యి ఆకర్ మెన అర్దుమ్ జలి, "ఆవ్ అల్పా, ఆవ్ ఓమెగ" మెన సంగితయ్.

పత్మాన్ డిబ్బుతె యోహాను తిలి పొది యేసుప్రబు డీసిలిసి

9 ఆవ్ తుమ్ చొ బావొ జలొ యోహాను, జలె, యేసుచి తెడి తుమ్ చి తెన్ ఈంజ కాలుమ్ చ బాదల్ సేడ తుమ్ చి తెన్ ఓర్పుప జతసుమ్. తుమ్ చి తెన్ యేసుచి తెడి జోచి రాజిమ్ తె, బెద ఏలుప కెర్తనుమ్. జలె, ఆవ్ యోహాను, దేముడు దిలి సుబుమ్ కబుర్, యేసుచి రిసాచి సాచి,

నూనయ్యతె తిలి రిసా జేలి జా పత్మాన్ డిబ్బుతె తిలయ్.

10 ఒత్త తిలె, ప్రబుచి బక్తి కెర్తి సెలవ్ కడన్ల దీసి, దేముడుచి జో యేసుప్రబుచి ఆత్మతె అంచి ఆత్మ తెన్ ఆవ్ బెరవ తిలి పొది, అంచి పడ్డో, నప్పిరమురిచి అవాడ్ కిసి గట్టిజ జయెదె గే, దన్ని ఏక్ ఒగ్గర్ అవాడ్ సూన్లయ్.

11 “తుయి అప్పె కిచ్చొ దెకితె గే, ఏక్ †పుస్తకుమతె రెగ్గ, సంపజలసచ ఆవ్ సంగిత సత్తు సంగుమ్లుతె తెద్రవు. ఎపెను, స్మర్తు, పెర్గము, తుయత్తెర, సార్దీస్, పిలదెల్చియ, అన్నె లవోదికయ పట్టుమ్తెచి సత్తు సంగుమ్లుతె తెద్రవు” మెన జా అవాడ్ అంక సంగిలన్.

డిసన్ సేడ్డిసి

12 తెదొడి అంక జా కోడు సంగిలి అవాడ్ తిలొసాక దెకుక మెన, ఆవ్ పసిల్లె, సత్తు దివ్వొ తిత బజర్క తెయార్ కెర్ల తంబల్ దెకిలయ్.

13 జేవ్ తంబల్చి నెడ్మె ఎక్కిలో టీవోజ తిలొ. జో కిసా తిలొ మెలె, †మాన్సు జా జెర్మిలో రిత్ డీస, చట్టె పావితీ దిగిల్ లాల్చి గలన తా, గుండె బజర్చి పట్టు. †బందన తిలొ.

14 జోచి *బోడిచి సెండి, పూర్తి చొక్కిలి ఉాలుచి ఎదిలి, మంచుచి ఎదిలి చొకు తయెదె. జోచ అంకివో, ఆగివో లగిలి రితి తిల.

15 జోచ చట్టో, ఆగితె డడ్డ దగదగాల్పు మెర్పువ జతి కంచుచి రితి తిల. జోచి అవాడ్, వెల్లి బూరుమ్చి పాని నూయి జతి అవాడ్చి రితి బడబడాల్పు జయెదె.

16 జోచో ఉజిల్ అత్తి సత్తు సుక్కల దెర తిలన్, చి జోచి చోడి తెంతో దొన్ని పక్కలె

వాండి తిలి కండా బార్ జతె తిలి, చి జోచి మొకోమ్, పొద్దు పూర్తి సత్తు తెన్ ఉజిడి లగితె పొది కిసి తయెదె గే, దన్ని జలె.

17 జోక దెకిల్ బేగి, మొర్లొ రిత్ జా జోచి చట్టె సేడ గెలయ్. గని జోచో ఉజిల్ ఆత్తు తెన్ అంక చడ, అంక కిచ్చొ మెలన్ మెలె, “తుయ్ బి నాయ్. ఆవ్ తొలితొచో కి ఆకర్చో కి.

18 ఆవ్ జీవ్ తిలొసా జీవ్ దెత్తొసా. ఆవ్ మొర్లయ్, గని అన్నె జీవ్ జా కెయచ తెయచ జివ్వి తయిందె, అన్నె మొర్కుక చి మొర్లన్క రకితి టాన్కచి †తాలుమ్ అంచి అత్తి అన్సి.

19 జాకయ్ తుయి కిచ్చొ అప్పె దెకితసి గే, రెగుడు. అప్పెచి కి పడ్డొక జర్గు జంక తిలిసి కి.

20 పడ్డొ అంచో ఉజిల్ అత్తి తిల సత్తు సుక్కల్, చి బజర్క తెయార్ కెర్ల సత్తు దీవుకంబల్చి అర్దుమ్, సత్తు సుక్కల్ సత్తు సంగుమ్లుచ దూతల్ జవుల, చి సత్తు దీవుకంబల్, జేవ్ సత్తు సంగుమ్లుయి జవుల” మెలన్.

2

ఎపెను పట్టుమ్తెచ సంగుమ్చక చి ఉత్త్రమ్

1 “ఎపెను పట్టుమ్చ సంగుమ్చో దూతక ఇసి మెన రెగుడు. *సత్తు సుక్కల్ జోచి ఉజిల్ అత్తి దెరిత్తో, దివ్వొ తిత సత్తు బజర్చ తంబల్చి నెడిమి బులిత్తొసా తుమ్క సంగిలిన్ కిచ్చొ మెలె,

† 1:11 1:11 నెంజిలె ‘వెల్లి పుస్తకుమ్’. జేవ్ పొదులె ఏక్ వెల్లి పుస్తకుమ్తె రెగ్గ, నదు కెర తియ తతి పొది, నుట్టువ కెర తియ తవుల. † 1:13 1:13 దానియేలు 7:13, 14. † 1:13 1:13 యూదుల్చి అలవాట్ తెన్ దసా దిగిల్ పాలుమ్ చి బజార్ రగుమ్ పట్టు. ఎత్తి. అదికారుమ్ తిలొ దేముడుక ఎత్తిక వెల్లి పూజరి జలొ కేన్ జవున్ మాన్సు గలన బందన తయెదె. ఇన్నె, యేసుక ‘జో ముక్కిమ్ జలొ’ పూజరి’ మెన ఈంజ టాలి రుజ్జు దెయ్తయ్. * 1:14 1:14 దానియేలు 7:9. † 1:18 1:18 మెలె, మాన్సు ఒత్త తంక, నెంజిలె విడ్డల్ జా పరలోకుమ్తె నెంజిలె ఆగి గొయితె గెచ్చుక సెలవ్ దెతి సెక్తి కచి మెలె, యేసుచి. * 2:1 2:1 1:20 దెక.

2 † తుచి కమొ కీసచ గే, తుయి అంచి కామ్ కెర కెర ఓర్పువ జా నిదానుమ్ తతిసి ఆవ్ జాని. మెలె, పాపుమ్తె ఇండిత మాన్సుల్క తుయి సంగుమ్తె నే బెదవంతె, 'క్రీస్తుచ బారికుల్ ఆవ్' మెన అబద్దుమ్క సంగిత గార్ మాన్సుల్క పరిచ్చ కెర, 'క్రీస్తుచ నెంజితి' మెన తుమ్ రుజ్జు కెర్లసి కి ఆవ్ జాని.

3 అంచి నావ్చి రిసా తుమ్ ఒగ్గర్ నిదానుమ్ తెన్ ఓర్పువ జా అన్మానుమ్ నే జలిసి ఆవ్ జాని.

4 "గని తుచి ఏక్ తప్పుచి రిసా అంక కిచ్చో బాద అస్సి మెలె, కిచ్చో తీర్పు సంగుక అస్సి మెలె, అంచి రిసాచి తుచితె తిలి తొలితొచి ప్రేమ పచ్చ ముల దిలదు.

5 జాకయ్, అగ్గె కీసి అంక ఒగ్గర్ ప్రేమ కెరై తిలదు, అప్పె కీసి అస్సున్ గే ఉచర. అప్పెచి తప్పు ఒప్పున పెట్టి దుకుమ్ జా, తుమ్ తొలితొ నంపజలి పొది ఇండిలి ప్రేమ కమొ అప్పె తెంతొ అన్నె ఇండ. నెంజిలె, జా తప్పు ఒప్పున చెంగిల్ జతి రితి తుమ్ మార్పువ నే జలె, తుమ్తె ఆవ్ జా కెర, తుమ్చి దీవుకంబుమ్ ఉర్ల వెంట గెలిందె.

6 జలె తుమ్తె చెంగిల్ కామ్ ఏక్ అప్పెక అస్సి. కిచ్చో మెలె, జేవ్ † 'నీకొలాయితులు' మెలనచ కమొ దూర్ కెర్లను. ఆవ్ కి ఎర్ధరె నెనిత కమొ తుమ్ కి నెనితసు.

7 "జలె, సంగుమ్లక్ కిదేముడుచి సుద్ది తిలి ఆత్మ ఇన్నెతెన్ కిచ్చో సంగితయ్ గే, కంగ్గొ తిలోసా సూన్తు. కో అంచి పరిచ్చతె జీనుల గే, దేముడుచి

పరలోకుమ్చి తోటతె తిలి జీవ్ దెతి రూక్చ పండ్లు కంక దెయిందె.

స్మూర్న పట్నుమ్చ సంగుమ్చక చి ఉత్తమ్

8 "పడ్డొ స్మూర్న పట్నుమ్చ సంగుమ్చొ దూతక ఇసి మెన రెగుడు.

"తొలితొ తిలో, ఆకర్క తిలో మొర అన్నె జీవ్ జలోసా తుమ్క సంగిలిన్ కిచ్చో మెలె,

9 తుమ్ సేడ్డ అల్లర్, తుమ్ బీద తిలిసి ఆవ్ జాని. బీద జలె కి, ఆత్మక సామ్నారుమ్ జా అస్సున్. పడ్డొ 'యూదుల్ ఆవ్' మెనన సత్తిమ్చ యూదుల్ నెంజిలస; సయ్తాన్చి సంగుమ్తె బెదితన జేవ్; జలె, తుమ్క దూసుప కెర్లసి ఆవ్ జాని.

10 తుమ్ అప్పె సేడుక తిల అల్లర్చి రిసా తుమ్ బియఁ నాయ్. ఈందె, తుమ్తె సంగుమ్జిన పరిచ్చ జతి రితి, సయ్తాన్ జోక జేలెత గలెదె, చి దెస్సు పొదుల్క అల్లర్ తెన్ తస్తె. మొరుక జలెకి తుమ్ నిదానుమ్ తా, చి తుమ్ జిన పరలోకుమ్తె తుమ్ కెయఁక తెయఁక జింక మెన బవుమానుమ్ దెయిందె.

11 "సంగుమ్లక్ అమ్చి దేముడుచి సుద్ది తిలి ఆత్మ ఇన్నెతెన్ కిచ్చో సంగితయ్ గే, కంగ్గొ తిలోసా సూన్తు. ఈంజ లోకుమ్తెచ అల్లర్తె కో అంచి ఆత్మసెక్కిక జీనుల గే, జా అన్నెక్ మొర్పు. సయ్తాన్తె సిచ్చ జతి మొర్పు, జోవయింక తయె నాయ్.

పెర్లము పట్నుమ్చ సంగుమ్చక చి ఉత్తమ్

† 2:2 2:2 దొన్నిచి తిన్ని నంబర్లు అద్యయల్తె 'సత్తు సంగుమ్లచ దూతల్క' మెన ఎక్కిక్ కబుర్లు జోవయింక రెగ్గ అస్సి. ఎత్తి సంగుమ్చొ దూతక ఏక్ కబుర్. గ్రీకు బాస తెన్ ఈంజ 'డీనయ్లిసి' మెలి వున్తుకుమ్తె ఈంజీవ్ సత్తు కబుర్లు రెగ్గిన్తె ఎత్తి కబుర్తె 'తుయి', 'తుచి', 'తుక' మెల కొడొ రెగ్గ అస్సి. గని ఎత్తి సంగుమ్చొ దూత జోవయింక సంగుమ్చ మాన్సుల్ మొత్తుమ్క టాలి రితి జయెదె మెన, తుక తుమ్, తుచిక తుమ్చి, తుకక 'తుమ్క' మెన రెగ్గ అస్సుమ్. దస్సి 2:2 కోడుతె తుచ కమొక 'తుమ్చ కమొ' మెన, 2:3 నంబర్ కోడుతె తుయి ఒగ్గర్ తెన్ నిదానుమ్ ఓర్పువ జా అన్మానుమ్ నే జలిన్క తుమ్ ఒగ్గర్ తెన్ నిదానుమ్ ఓర్పువ జా అన్మానుమ్ నే జలిసి మెన రెగ్గ అస్సుమ్. దొన్నిచి తిన్ని నంబర్లు అద్యయల్ మొత్తుమ్తె ఈంజ సాస్సుమ్ కెర అస్సుమ్. † 2:6 2:6 ఏక్ వేల బిలామ్ సికడ్లసి; మెలె, బొమ్మల్క దిలిసి కతిసిచి లంజె కమొతె బెదితిసి; జేవ్ నీకొలాయితులు సికడ్ల. 2:14,

15 దెక. § 2:7 2:7 మెలె, దేముడు అబ్బొనచి యేసుచి ఆత్మ.

12 “పడ్డొ పెర్గము పట్టుమ్తెచ సంగుమ్చొ దూతక ఇని మెన రెగుడు.

“దొన్ని పక్కలె వాండి కెర్లి కండా దెర్లొసా తుమ్క సంగిలిన్ కిచ్చొ మెలె,

13 తుమ్ జితిసి కేనె గే జాని. కేనె మెలె, సయ్తాన్చి సింగాసనుమ్ తిలిన్తెయి. అంచి నావ్ డిట్టుమ్ దెరన్తను,

పడ్డొ అంక నిదానుమ్ నముకుమ్ తిలో అంచి సాచి సంగితె తిలో అంతిపయను బుల్తె తిలి పొది కి, తుమ్చి నెడిమి సయ్తాన్ జితిన్తె జో అంతిపయను జేవ్ మార్లె కి, అంచి రిసాచి తుమ్చి నముకుమ్ ఒప్పునుక ములున్ నాయ్.

14 గని, తుమ్ కెర్త సగుమ్ తప్పుల్చి రిసా అంక బాద, తీర్పు సంగుక అస్సె. కిచ్చొ మెలె, తుమ్చి తెన్ బెదిలస సగుమ్జిన్ బిలామ్ సికడ్డిసి సిక ‘చెంగిలి’ మెంతతి. అమ్చ ఇస్రాయేలులు దేముడుక సత్తిమ్ ఇండితిసి పిట్టయతి రితి, బొమ్మల్క దిలిసి కంక చి లంజె కమొతె బెదుక బాలాకుక *బిలామ్ సికడ్డన్.

15 దస్సి, ‘నీకొలాయతులు’ మెలస సికడ్డిసి సంప కెర్తస సగుమ్జిన్ తుమ్తె అస్సి.

16 జాకయ్, తుమ్ తప్పు జలిసి ఒప్పున, పెట్టి దుకుమ్ జా, జా తప్పుల్ ముల. నెంజిలి, బే బేగి తుమ్తె జా కెర్, అంచి చొండి తెంతొ బార్ జలి †కండా తెన్ జేవ్ మాన్సుల్చి ఉప్పిరి యుద్దుమ్ కెరిందె.

17 “సంగుమ్ల్క దేముడుచి సుద్ది తిలి ఆత్మ ఇన్నెతెన్ కిచ్చొ సంగితయ్ గే, కంర్ణొ తిలోసా సూన్తు. ఈంజ లోకుమ్ సికడ్డిన్చి ఉప్పిరి కో జీనుల గే, లుంకిల్ రితి తిలి పరలోకుమ్ తెంతొ ఆవ్ సువితి ‘మన్నా’ మెలి అన్నిమ్ జోక దెయిందె, చి అన్నె కిచ్చొ దెయిందె మెలె, జోక ఎక్కెళ్లక చొక్కెల పతల్ దెయిందె. జోతె ఎత్తి మాన్సుక జోచి పత్రె, జోక నొవి నావ్ రెగ్గ

దెయిందె. కేన్ నావ్ కక్క దెయిందె గే, ఎక్కె జోకయ్ సొంత ఎర్రె జయెదె, గని అన్నె కక్కయ్ నాయ్.

తుయత్తెర పట్టుమ్తెచ సంగుమ్చచ చి ఉత్తమ్

18 “పడ్డొ తుయత్తెర పట్టుమ్చ సంగుమ్చొ దూతక ఇని మెన రెగుడు.

“ఆగి లగిత రిత అంకివొ తిలో, దగదగాల్న మెర్పుప జతి కంచు డీన్స రిత చట్టొ తిలో, దేముడుచొ పుత్తుసి తుమ్క సంగ తెద్రయ్త కొడొ ఈంజేవ్.

19 “తుమ్ కెర్త కమొ, తుమ్చి ప్రేమ, తుమ్చి నిదానుమ్చి నముకుమ్, తుమ్చి సేవ, బాదల్ ఒర్పుప జతి తుమ్చి నిదానుమ్, పడ్డొ తుమ్ తొలితొ సంపజలి కంట, తుమ్ అప్పె అన్నె ఒగ్గర్ చెంగిల కమొతె ఇండితిసి ఆవ్ జాని.

20 గని తుమ్చి రిసా అంక కిచ్చొ బాద, కిచ్చొ తీర్పు సంగుక అస్సి మెలె, ‘దేముడుచ కబుర్లు సంగితిసి ఆవ్’ మెన ఆరి సంగుమ్తె తేర్బోర్లె యెజెబెలు అంచ సేవ కెర్తసక పాపుమ్ సికడ్డెకి, తుమ్ తీర్పు నే సంగితె తుక్లె తత్తను. అమ్చ సేవ కెర్తస లంజెతె గెతి రితి, బొమ్మల్క దిలిసి కతి రితి, జా సికడ్డయ్.

21 జాక ‘తప్పు ఒప్పున పెట్టి దుకుమ్ జా, జా పాపుమ్ ములు’ మెన అగ్గెయ్ తెంతొ జాక అవ్కానుమ్ దా అస్సి, గని జాచి లంజెచి రిసా విసారుమ్ కి జయె నాయ్.

22 ఈందె, జాక జబ్బు తెద్రయిందె, చి జాచి తెన్ లంజె జతస ఎత్కిజిన్క గొప్ప అల్లర్ సేడయిందె. జాచ కమొ, జా కెర్లిన్చి రిసా, జాచి దుకుమ్ జా నే ములిలిగిన,

23 పడ్డొ, జాచ బోదల్ జల జాచ కొడు సూన్సక మొర్పు లయడిందె. దస్సి సిచ్చ కెర్లె, ఎత్తి సంగుమ్చక కిచ్చొ చినుల మెలె, ఎత్తి మాన్సుచి బుద్ది, ఎత్తి మాన్సుచి

* 2:14 2:14 సంక్యాకాండుము 22:1-35, 25:1-2, 31:16. † 2:16 2:16 ‘యేసుచి చొండి దెర్లి కథుమ్’ మెలె, జో తీర్పు కెర్లి కొడు. ఎత్తియల్ 4:12.

పెట్టి తిలిసి ఆవ్ దెకితిసి సికుల, చి తుమ్తె ఎత్తి మాన్సుచ కమె ఎద తుమ్క తీర్పు జర్గు కెరిందె మెన చినుల.

24 “గని, తుమ్ తుయత్తెరచి నంపజలనతె కో జా వెర్రి సికితీన్తె బెదున్ నాయ్, అన్నె ‘సయ్తాన్చి గుట్టు’ మెన జేవ్ సగుమ్జిన్ సికయ్తీసి కో సికున్ నాయ్. తుమ్కయ్ కిచ్చొ మెంతసి మెలె, తుమ్క కిచ్చొ వేర జాడు వయడుక నెసి.

25 గని ఆవ్ అన్నె జెతె ఎదక తుమ్క తిలి ప్రేమ నిదానుమ్, ఆవ్ తుమ్క దిలి కిచ్చొ ఆస్తి జలెకి డిట్టుమ్ దెరన.

26 కో జీన ఆకర్ ఎద అంచ కమె నిదానుమ్ ఇండుల గే, అంక నేన్ల మాన్సుల్చి ఉప్పిరి జోవయింక అదికారుమ్ దెయిందె.

27 జో నిదానుమ్ తిలస గొవుడుచి ఇనుముడండొ దెరన్లి రితి గేడివొ పుట్టయ్లి రితి కెర, అంక నేన్లసచి సెక్తి పాడ్ కెర్లి రితి కెర, జోవయింక ఏలుప కెరుల. దేముడు అబ్బొ కిసి అంకయ్ అదికారుమ్ దా అస్సె గే, దస్సి జో నిదానుమ్ తిలసకయ్ ఆవ్ అదికారుమ్ దెయిందె,

28 చి ముక్కిమ్ జలి పెందలెచి ఒగ్గర్ ఉజిడి దిలి †సుక్కి జోక దెయిందె.

29 “సంగుమ్లక్ అమ్చి దేముడుచి సుద్ది తిలి ఆత్మ కిచ్చొ సంగితయ్ గే, కంగ్గొ తిలోసా సూన్తు.

3

సార్దీన్ పట్టుమ్చ సంగుమ్చక చి ఉత్తమ్

1 “సార్దీన్ పట్టుమ్చ సంగుమ్చొ దూతక ఇసి మెన రెగుడు.

“దేముడుచ *సత్తు ఆత్మల్ తిలో †సత్తు సుక్కుల్ దెర్లొసా తుమ్క సంగిలిన్ కిచ్చొ మెలె, తుమ్చ కమె ఆవ్ జాని.

తుమ్క ‘జివ్వి అస్తి’ మెన మాన్సుల్ ఉచర్తతి, గని తుమ్ మొరయ్ అస్సున్.

2 తుమ్ చెద్దొయ్ జా, చి మొర్లి రితి నే మొర ఇదిలిదిల్ సేసిలితె డిట్టుమ్ కెరన. కిచ్చొక మెలె, తుమ్చ కమె ‘అంక దేముడుచి మొక్కె పూర్తి చెంగిల్చ నెంజిలి’ మెన దెక అస్సి.

3 “జాకయ్, తుమ్క అగ్గె దిలిసి, తుమ్ సూన నంపజలిసి, గుర్తు కెరన, పోసన, తుమ్చి తప్పు ఒప్పున పెట్టి దుకుమ్ జా తప్పు ముల. తుమ్ ఇసి చెద్దొయ్ నే తిలె, జలె, అవ్ చోర్ రితి జా జెయిందె, చి కేన్ గడియక తుమ్తె జెయిందె గే, తుమ్ నేన్సు.

4 “జలె, ఒత్త సార్దీన్తె తుమ్తె, జోవయించ పాలల్ ముర్కి నే కెరన్లన సగుమ్జిన్ అప్పెక కి అస్సి. జేవ్, జలె, అంచి పరలోకుమ్చి ఉజిడ్తె బెదుక జేవ్ విలువ మెలి రితి ఆవ్ దెకితసి, చి చొక్కెల పాలల్ గలన అంచి తెన్ ఇండుల.

5 కో దస్సి జీనుల గే, దస్సి జోక చొక్కెల పాలల్ దెయిందె, చి గలనుల, చి పరలోకుమ్తె బెదితనచ నవ్వొ ఆవ్ రెగిడ్డి పుస్తకుమ్తె జోచి నావ్ ఆవ్ పుంచి నాయ్. అంచొ అబ్బొ జలో దేముడుచి మొక్కె కి జోచ దూతల్చి మొక్కె కి ‘జోచి నావ్ అస్సె’ మెన ఒప్పున్దె.

6 “సంగుమ్లక్ దేముడుచి సుద్ది తిలి ఆత్మ ఇన్నెతెన్ కిచ్చొ సంగితయ్ గే, కంగ్గొ తిలోసా సూన్తు.

పిలదెల్పొయ్ పట్టుమ్చ సంగుమ్చక చి ఉత్తమ్

7 “పిలదెల్పొయ్ పట్టుమ్చ సంగుమ్చొ దూతక ఇసి మెన రెగుడు. పరలోకుమ్చి సుద్ది తిలో, సత్తిమ్ తిలో, దావీదు రానొచి తాలల్ దెరితో, జో ఉగిడ్లె కో డంకుక నెతిర్తి, జో డంకిలె కో ఉగుడుక నెతిర్తి, జో తుమ్క సంగిలిన్ కిచ్చొ మెలె,

‡ 2:28 2:28 డిసయ్లిసి 22:16 దెక.

* 3:1 3:1 1:4 చి ఎట్టొచి కోడు దెక.

† 3:1 3:1 1:20 చి ఎట్టొచి కోడు దెక.

8 తుమ్చ కమొ ఆవ్ జాని. ఈందె, తుమ్క 'పెనుత్' మెన ఉగ్గి జలి కెడ్లి తుమ్చి మొక్కె ఉగ్గ దా అస్సి. కో జాక డంకుక నెత్తిర్తి. తుమ్క సెక్తి ఒగ్గర్ నాయ్ మెన ఆవ్ జాని. జలెకి, అంచి కోడు నిదానుమ్తె ఇండ అస్సున్, చి అంచి నావ్చి మరియాద్ కడ్లి రితి కెర్చు నాయ్.

9 ఈందె, 'యూదుల్ అమ్' మెన అబద్దుమ్క సంగిత, నిజుమ్చ యూదుల్ నెంజిల, సయ్తాన్చి సంగుమ్తె బెదితనక కిచ్చొ కెరిందె మెలె, తుమ్చి చట్టె జేవ్ సెర్చు సేడ్తి రితి జర్గు కెరిందె, చి తుమ్క ఆవ్ ప్రేమ అస్సి మెన జేవ్ జాన్లి రితి కెరిందె.

10 "ఆవ్ సంగిలి రితి తుమ్ నిదానుమ్క ఎత్తి ఒర్చుప జా అస్సున్చి రిసా, బూలోకుమ్తె జిత మాస్సుల్ ఎత్తిజిన్క పరిచ్చు కెర్తి కాలుమ్చి బాద తుమ్క పిట్టయిందె.

11 ఆవ్ బే బేగి అన్నె జెయిందె. తుమ్క తిలీన్ నిదానుమ్ తెన్, డిట్టుమ్ దెరన; తుమ్చి బవుమానుమ్ కో కి నే ఉర్లితి రితి తా.

12 కో జీనుల గే, అంచొ దేముడుచి పరలోక్చుమ్చి గుడితెచ టీవో కెల స్తంబుమ్ జేవ్ జతి రితి కెరిందె. జోచి జా దేముడుచి గుడిక జేవ్ కెయ్ ములితి నాయ్. అంచొ దేముడుచి నావ్, పడ్డా జో అంచొ దేముడుచి పట్టుమ్చి నావ్; మెలె, అంచొ దేముడు తెంతో పరలోకుమ్ తెంతో ఉత్త జెతికయ్ నొవి యెరూసలేమ్ పట్టుమ్చి నావ్; పడ్డా అంచి సొంత నొవి నావ్, జేవ్ జిన్తనచి ఉప్పిర్ రెగిడిందె.

13 "సంగుమ్లక్ అమ్చి దేముడుచి సుద్ది తిలి ఆత్మకిచ్చొ సంగితయ్ గే, కంగ్గొ తిలొసా సూన్తు.

లవొదికయ పట్టుమ్చ సంగుమ్చక చి ఉత్తమ్

14 "లవొదికయ పట్టుమ్చొ సంగుమ్చొ దూతక ఇని మెన రెగుడు.

‡ " 'అమేన్' మెలొ, నిదానుమ్ తిలొ, సత్తిమ్ సాచి జలొసా, దేముడు జెర్మయ్లీసి ఎత్తిక ఆదారుమ్ తిలొసా తుమ్క సంగిలీన్ కిచ్చొ మెల,

15 "తుమ్చ కమొ ఆవ్ జాని. తుమ్ ఉనుమ్ రితి నాయ్, సీడొ రితి నాయ్! తుమ్ ఉనుమ్ తంక అంచి ఆస. నాయ్ మెలె, సీడొ జలె, సీడొ మెనుక జతి.

16 జలె, తుమ్క ఉనుమ్ మెనుక నెంజె, సీడొ మెనుక నెంజె, గని దొన్నిచి నెడిమి తా, 'చెంగిల్ అస్సుమ్' మెన దస్సే తత్తనుచి రిసా తుమ్క అంచి చోడి తెంతో తుంక గెలిందె.

17 కిచ్చొక మెలె, 'సొమ్మారుమ్ జా అస్సుమ్, చెంగిల్ జా అస్సుమ్, చి అమ్క కిచ్చొ కొత్తు నాయ్' మెన తుమ్ ఉచరల్లెకి, ఆత్మక దెకిలె, తుమ్ బాద తెన్, నిస్కారుమ్ జా, బీద జా, గుడ్డి జా, డుమ్డయ్ జా అస్సున్ మెన నేన్చు.

18 "జాకయ్, తుమ్క ఆవ్ కిచ్చొ బుద్ది సంగితసి మెలె, తుమ్ సొమ్మారుమ్ జతి రితి, అంచి ఆగితె డయ్ పూర్తి చెంగిల్ కెర్లి బజిరి గెనన. తుమ్ డుమ్డయ్ తతిసి నే డిస్తి రితి గలనుక మెన ఆవ్ దెత చొక్కెల పాలల్ గెనన, చి తుమ్చ అంకివొ చెంగిల్ జా డిస్తి రితి, కాటిక అంచితె గెనన.

19 ఆవ్ కక్క ప్రేమ అస్సి గే, జోచి తప్పుల్చి రుజ్జు దెకవ, 'సమయుమ్ తెన్ని బుద్ది జతు' మెనయ్ సిచ్చు దెతసి. జాకయ్, చెంగిల్ జంక ఆస జా, తుమ్చ తప్పుల్ ఒచ్చన, పెట్టి దుకుమ్ జా, జా తప్పుల్ ముల.

20 ఈందె, తుమ్చి కెడ్లి ఇత్తల్తో ఆవ్ టీవోజ పెట్టసి. తుమ్తె కో అంచి అవాడ్ సూన కెడ్లి ఉగుడుల గే, జోచి తెడి జా పెన జెయిందె, చి జో తెన్ అన్నిమ్ కయిందె, చి జో అంచి తెన్ అన్నిమ్ కయెదె.

21 కో జీనుల గే, ఆవ్ కిసి జిన కెర అంచొ అబ్బొ జలొ దేముడుచి

‡ 3:14 3:14 మెలె, సత్తిమ్ కెర్తొ, నిజుమ్ తిలొ, ఎత్తి జర్గు కెర్తొసా.

సింగాసనుమతె జో తెన్ బెద వెన అస్సి గే, దస్సి, జేవ్ అంచి తెన్ అంచి సింగాసనుమతె వెసుక మెన, వరుమ్ దెయిందె.

22 “సంగుమల్క అమ్చి దేముడుచి సుద్ది తిలి ఆత్మ కిచ్చొ సంగితయ్ గే, కంగ్గొ తిలోసా సూన్తు.”

4

పరలోకుమతె సిజాసనుమ్

1 ఇన్నెచి పడ్డె ఆవ్ దెకిలయ్, పరలోకుమతె పెసితి కెడ్డి ఉడ్డి జా అస్సె! అన్నె, అగ్గె తొలితో ఆవ్ సూన్సి * అవాడ్ నప్పిర్మూరిచి అవాడ్చి రితి ఎక్కిలోచి అవాడ్, అంక, “ఇత్తల్ వెగ జే, చి ఇన్నెచి పడ్డొక కిచ్చొ జర్గు జంక అస్సె గే, తుక దెకయిందె” మెన సంగిలన్.

2 సంగిల్ బేగి, దేముడుచి యేసుచి ఆత్మసెక్కిక ఒత్త పరలోకుమతె తిలయ్, ఒత్త ఏక్ సిజాసనుమ్ అస్సె, చి సింగాసనుమతె ఎక్కిలో వెన అస్సె!

3 జో ఒత్త వెసిలోసా కిసి డిసిలన్ మెలె, వజ్రుమ్చి రితి చొకు, చి రితి ఎరన ఉజిడి లగిలన్, చి సిజాసనుమ్చి సుట్టునంత పచ్చన రంగుచి దూన్చి ఉజిడి లగితె తిలి.

4 జా సింగాసనుమ్చి సుట్టునంత అన్నె విస్సెక్ చెత్తర్ సిజాసనల్ తిల, చి జేవ్ సిజాసనల్ ఎక్కితె విస్సెక్ చెత్తర్జిన్ చొక్కిల పాలల్ గలన్ల, బోడి బజర్చ కిరిటల్ గలన్ల, విస్సెక్ చెత్తర్జిన్ వెల్లెల మాన్సుల్ వెన అస్సి.

5 జా సిజాసనుమ్ తెంతో బిజిలి మొల్కితయ్, చి అవాడ్లుచి ఉర్ముల్చి అవాడ్ జెతయ్. సింగాసనుమ్చి పుర్రెతో వత్తివొచ నత్తు దివ్వొ లగితతి. జేవ్ దివ్వొ దేముడుచి † సత్తు ఆత్మల్.

6 పడ్డె సిజాసనుమ్చి పుర్రెతో గాజుచి రితి టేంటచి సముద్దుమ్ తిలి. పడ్డె సింగాసనుమ్చి సుట్టునంత, జేవ్చ

చెత్తర్ పక్కలె, చెత్తర్ జివుల్ తిల. ఏక్ పక్క ఏక్ జివు. జోవయింతె బెర్తు అంకివొ, ముకొమ్ పక్క పడ్డె పక్క కి తిల.

7 తొలితోచొ జివు కీసాచొ మెలె, సింవుమ్చొ రితొ. అన్నెక్ జివు వసొన్సి పిల్లచొ రితొ, అన్నెక్ జివుక మాన్సుచి మొకొమ్ చి, అన్నెక్ జివు ఉడ్డితో గిద్దుచొ రితొ డీసిలన్.

8 జేవ్ చెత్తర్ జివుల్ ఎత్కిక, ఏక్ ఏక్ జివుక సొవు రెప్పల్ తిల, అన్నె, ఉప్పిరి కి, జోవయింబి రెప్పల్ తెడి కి బెర్తు అంకివొ తిల, చి రాతి మెద్దెనె కిచ్చొ గనుమ్ గాయుక ముల్తి నాయ్ మెలె,

“ఎత్కిచి ఉప్పిరి అదికారుమ్ తిలో దేముడు, అగ్గె తిలోసా, అప్పె తతోసా, కెయక తెయక తంక తిలోసా, ఎత్కి సుద్ది తిలోసా, ఎత్కి సుద్ది తిలోసా, ఎత్కి సుద్ది తిలోసా!”

మెన గాయితె తత్తతి.

9 పడ్డె, సింగాసనుమ్తె వెసిలో కెయక తెయక జితోసాక జేవ్ చెత్తర్ జివుల్ కెయక గవురుమ్, మరియాద దెతతి, కెయక జో కెర్లి దయక జోచి నర్ల సంగితె తతి పొది,

10 విస్సెక్ చెత్తర్జిన్ జేవ్ వెల్లెల మాన్సుల్ సింగాసనుమ్తె వెసిలోసాచి చట్టె నెర్ను సేడ, జేవ్ కెయక తెయక జితోసాక జొకర్తతి. సిజాసనుమ్చి పుర్రెతో జోవయించ కిరిటల్ తియ దా గనుమ్ గాయితతి.

11 “తుయి అమ్చొ ప్రబు, అమ్చొ దేముడు విలువతిలోసా గవురుమ్, మరియాద, అదికారుమ్ తుక కలుగు జంక. కిచ్చొక మెలె, ఎత్కిక కి తూయి జెర్ముయలది, చి

ఇసి జర్గు జంక తుచి ఇస్టుమ్ జా, జేవ్చ జెర్ముయలది.” మెన గాయితె తత్తతి.

* 4:14:1 1:10 దెక † 4:5 4:5 ఎత్కి అదికారుమ్ తిలో దేముడుచి సుద్ది తిలి ఆత్మక ఈంజ టాలి జతయ్. 1:4చి ఎట్టెచి చి కొణా దెక.

5

సుట్టుప కెర్లి పుస్తకుమ్ మెండపిల్ల నదు కెర్లిసి

1 పడ్డొ కిచ్చొ దెకిలయ్ మెలె, సిజాసనుమ్తె వెస తిలోసాచొ ఉజిల్ అత్తి సుట్టుప కెర్లి పుస్తకుమ్ దెకిలయ్. జా పుస్తకుమ్చి తెడి, ఉప్పిరి కి రెగిడ్లిన్ తిలి. చి కో ఇస్తుమ్ అయ్లి రితి జా సుట్టుప కెర్లి పుస్తకుమ్ నే ఉగుడుక మెన, నత్తు ముద్దల్ తెన్ ముద్ద గెల తిల.

2 తెదొడి కిచ్చొ దెకిలయ్ మెలె, డిట్టుమ్చొ దూత ఎక్కిలో గట్టిజ అవాడ్ కెరన కిచ్చొ మెన సాడుప కెర్లన్ మెలె, “ఈంజ సుట్టుప కెర్లి పుస్తకుమ్చ ముద్ద కడ ఉగుడుక తగుప జలోసా కో?” మెన కేక్ గల్లో.

3 గని సుట్టుప కెర్లి జా పుస్తకుమ్ ఉగుడుక జలెకు, ఒత్త తిలిసి దెకుక జలెకు, బూలోకుమ్తె కి పరలోకుమ్తె కి, బూలోకుమ్క ఎట్టొ లోకుమ్తె కి తగుప జలోసా కో కి డీసె నాయ్ చి రిసా,

4 ఆవ్ ఏడ గెలయ్; జా సుట్టుప కెర్లి పుస్తకుమ్ ఉగుడుక కి ఒత్త తిలిసి దెకుక కి కో తగుప జలోసా డీసె నాయ్ చి రిసా.

5 తెదొడి, ఒత్తచ వెల్లెల మాన్సుల్తె ఎక్కిలో అంక, “ఏడు నాయ్. ఈందె, యూదా పూర్ణుమ్చొచి సెకుమ్తె జెర్మిలో వెల్లో సింవుమ్ జలో రితొసా, దావీదుచి సెకుమ్తెచి చేరుతె బార్ జలోసా, జిన అస్సె, చి సుట్టుప కెర్లి జా పుస్తకుమ్ ఉగుడుక, చి జేవ్ నత్తు ముద్దల్ కడుక జో తగుప జా తిలోసా” మెన సంగిలన్.

6 తెదొడి, జా సింగాసనుమ్క చి జేవ్ *చెత్తర్ జివుల్క చి జేవ్ విస్సెక్ చెత్తర్జన్ వెల్లెల మాన్సుల్చి నెడమె ఏక్ †మెండపిల్ల టీవొజి తిలిన్ దెకిలయ్. కిసా తిలో మెలె, అర్పితుమ్క కండయ్ జలి రితి జా తిలన్, చి జోక నత్తు కొమ్ముల్ చి నత్తు అంకివొ తిల. ఈంజేవ్

కిచ్చొ జవుల మెలె, దేముడు ఒండి బూలోకుమ్తె తెద్దయ్ల జోచ ‡నత్తు అత్తుల్.

7 జా మెండపిల్ల, జలె, పురె జా, జా సింగాసనుమ్తె వెస తిలోసాచి ఉజిల్ అత్తి తెంతొ సుట్టుప జలి జా పుస్తకుమ్ నజీలన్.

8 సుట్టుప జలి జా పుస్తకుమ్ నజీతికయ్, జేవ్ చెత్తర్ జివుల్, జేవ్ విస్సెక్ చెత్తర్జన్ వెల్లెల మాన్సుల్, జా మెండపిల్లచి మొక్కె సెర్ను సేడ్ల. జేవ్ ఎత్తిజిన్తె ఎత్తి సుదల్ కిచ్చొ దెర తిలో మెలె, ఎక్కె వీనెల్, చి బజర్చ గిన్నలు. జేవ్ గిన్నల్తె కిచ్చొ తిలి మెలె, బెర్తు దూపుమ్ తిలి. జా దూపుమ్చి అర్దుమ్ కిచ్చొ మెలె, ప్రబుచ సొంత జల మాన్సుల్చ ప్రార్దనల్.

9 తెదొడి జేవ్ ఏక్ నొవి గనుమ్ గాయిల.

“ఈంజ సుట్టుప జలి జా పుస్తకుమ్ నజ, జేవ్చి ముద్ద కడుక తూయి తగుప జలోసా! కిచ్చొక మెలె, తూయి అర్పితుమ్ జా మొర,

దేముడుచ జా గెతు మెన తుచి నూయి జలి లోయి తెన్ మాన్సుల్క అన్నె గెన్లెద్ది.

జేవ్ మాన్సుల్క ఎత్తి సెకుమ్ తెంతొ, ఎత్తి బాసల్ తెంతొ,

ఎత్తి పైజల్ తెంతొ, ఎత్తి రాజిమ్ తెంతొ గెనన, జోవయింక

10 ‘అమ్చొ దేముడుచి రాజిమ్తెచ రాసల్ జేవ్ జా జోవయింక పూజర్లు జతు’ మెన, జర్లు కెర అస్సిసి,

చి బూలోకుమ్చి ఉప్పిరి జేవ్ ఏలుచ కెర్లు.”

మెన గనుమ్ గాయిల.

11 పడ్డొ అన్నె దెకిలయ్, చి సింగాసనుమ్చి, జేవ్ జివుల్చి, వెల్లో మాన్సుల్చి సుట్టునంత కిచ్చొ సూన్లయ్ మెలె, ఒగ్గర్ ఒగ్గర్ దూతల్చ, వెయిలుచి

* 5:6 5:6 4:6-8 దెక. † 5:6 5:6 యోహాను 1:29, 36. ‡ 5:6 5:6 1:4చి ఎట్టచచి కొణొ దెక.

ఉప్పిరి వెయిలు, కోట్లుచి ఉప్పిరి కోట్లుచ దూతల్చ అవాడ్లు సూన్లయ్.

12 గట్టిజ అవాడ్ కెరన కిచ్చొ మెన కేక్ గెల్తె తిల మెలె,

“అర్పితమ్ జలో ఈంజొ మెండపిల్ల జతోసా జలె, అదికారుమ్, సామ్మారుమ్, గ్యానుమ్, సెక్కి,

మరియాద, గవురుమ్, చి మాన్సుల్ జోచి గవురుమ్ గాయితిసి జోకయ్ కలుగు జంక జొయ్యి తగుప జలోసా!”

మెన కేకుల్ గెల్తె తిల.

13 పడ్డొ పరలోకుమ్తెచ, బూలోకుమ్తెచ, చి బూలోకుమ్క ఎట్టొ లోకుమ్తెచ, చి సముద్దుమ్తెచ, జేవ్ చెత్తర్తెచ ఎత్తి జివు ఎత్తి వస్తువ కేక్ గలిసి కిచ్చొ మెన సూన్లయ్ మెలె,

“సింగాసనుమ్తె వెసిలోసాచి, చి మెండపిల్లచి గవురుమ్ ఎత్తి

కెయక తెయక గాయుతు! మరియాద గవురుమ్, అదికారుమ్ ఎత్తి

జోక కలుగు జవున్, జోక కెయక తెయక తవున్!”

మెన కేక్ గెల్తె తిలిసి సూన్లయ్.

14 తెదొడి, “కొఆమేన్!” మెన జేవ్ చెత్తర్ జివుల్ సంగిల, చి వెల్లెల మాన్సుల్ సెర్పు సేడ సింగాసనుమ్తె వెసిలోసాక చి మెండపిల్లక జోకర్ల.

6

సుట్టుప కెర్లి పుస్తకుమ్చ సత్తు ముద్దల్

1 తెదొడి కిచ్చొ దెకిలయ్ మెలె, మెండపిల్ల జేవ్ సత్తు ముద్దల్తె తొలితో

§ 5:14 5:14 ఎట్టి బాస తెన్ ‘ఆమేన్’ మెనుల. *

6:1 6:1 4:6-8 దక. † 6:2 6:2 జా కిరిటుమ్ ఎత్తి.

అదికారుమ్ తిలో దేముడు సాంత జో గోడొతె వెగిలోసాక దిలన్ గే మెండపిల్ల జలో యేసు దిలన్ గే, కచిగె అత్తి జోపయిక దావడ్ల గే, గని జా జర్గు జంక ఎత్తి అదికారుమ్ తిలో దేముడు కచితుమ్ సెలవ్ దా తిలన్, నెంజిలె జర్గు జతి నాయ్. ఈంజేవ్ కమె ఎత్తి జొయ్యి జర్గు కెర్తయ్, గెద. † 6:4 6:4 కో దిల గే నేనుమ్. § 6:6 6:6 ఈంజ దేసిమి కీసి ముక్కిమ్క చింబొ కవుల గే, జా దేసిమవ ముక్కిమ్క గోదుమ్క కెర్లి పోడియె గే పోడియె గే రంధ దనచక అన్నిమ్ కెరుల. గని కారు తిల, ఎత్తి కరీది జా గెలె, ఈంజ దేసిమి కీసి తండుడచి కంట డేరో తొక్కి కరీది జయెది, చి చింబొ నెంజిలె కులర్ కవుల గే, దస్సి జా దేసిమి గారు తిల, బార్లి దాన్క అన్నిమ్ రందుల; గెనుక సవుక ఒత్తచి రిసా.

చి కడ్లన్, చి జేవ్ * చెత్తర్ జివుల్తె ఎక్కిలో, ఉర్ముల్చి రితి అవాడ్ కెరన “ఇన్నె జే!” మెలన్.

2 ఆవ్ దెకిలె, ఆదె! చొక్కిలో గోడొ డిసిలి, చి జా గోడొతె వెగిలోసాక దూన్ తిలి, చి జోక ఏక్ కిరిటుమ్ † దిల, చి బార్ జా, యుద్దుమ్ కెర జిన, ఒండి జీసుక మెన గెలో.

3 జలె, మెండపిల్ల దొన్నిచి ముద్ద కడ్డికయ్, కిచ్చొ సూన్లయ్ మెలె, జేవ్ చెత్తర్ జివుల్తె అన్నెక్ జివు “ఇన్నె జే!” మెన కేక్ గలన్, చి

4 అన్నెక్ గోడొ; ఒగ్గర్ ఎరనచొ; బార్ జలన్. జా గోడొతె వెగిలోసాక కిచ్చొ సెలవ్ తిలి మెలె, ఒండి బూలోకుమ్తెచి సేంతుమ్ పిట్టవుక; మాన్సుల్ ఎక్కిలోక ఎక్కిలో మార్తి రితి; చి వెల్లి కండా జోక ‡ దిల.

5 జలె మెండపిల్ల తిన్నిచి ముద్ద కడ్డికయ్, తిన్నిచొ జివు “ఇన్నె జే!” మెన కేక్ గలిసి సూన్లయ్. ఆవ్ దెకిలె, ఆదె! నీడొ గోడొ, చి జాతె వెగిలోసాచి అత్తి తక్కిడి అస్సె.

6 అన్నె, జేవ్ చెత్తర్ జివుల్చి నెడమె తెంతొ ఏక్ అవాడ్ కిచ్చొ సంగిలిసి సూన్లయ్ మెలె, “ఏక్ దీసిచి కూలిచి ఎదిలి డబ్బుల్క ఎక్కి పాత్రెక్ గోదుమ్, చి ఏక్ దీసిచి కూలిచి ఎదిలి డబ్బుల్క తిని పొర్ని కిబార్లి దాన్ దొర్కు జయెది. గని తేలుక చి ద్రాచ రస్సుమ్క గార్ కెరుక నాయ్!” మెన జా అవాడ్ కేక్ గలన్.

7 మెండపిల్ల చెత్తర్చి ముద్ద కడ్డికయ్, “ఇన్నె జే!” మెన చెత్తర్చొ జివు కేక్ గలిలిసి సూన్లయ్.

8 అన్నె దెకిలయ్, చి ఆదె! కిచ్చొ రంగుగె సంగుక నే బెదిలిసి రితొ ఏక్ గోడె. జాతె వెసిలోసాచి నావ్, 'మొర్చు', చి మొర్లనక రకితి లోకుమ్ జోచి పట్టి గెతయ్. అన్నె, 'మొర్చు' మెలోసాక చి మొర్లన రకితి లోకుమ్క కిచ్చొ సెలవ్ తిలి మెలె, యుద్దుమ్ వాట్, కకుర్తి వాట్, జబ్బుల్ వాట్ చి డొంగెచ జంతువుల్ గెతి వాట్ మాన్సుల్క మార్తి సెలవ్ తిలి. ఒండి లోకుమ్క చెత్తర్ వాటల్ తిలె, జేవ్ చెత్తర్ వాటల్తె ఏక్ వాటతె మాన్సుల్క దస్సి మారుక సెలవ్ జా తిలి.

9 మెండపిల్ల పాంచెచి ముద్ర కడ్డికయ్, పరలోకుమ్తెచి బలి దెతి ట్రాన్చి తెడి కిచ్చొ దెకిలయ్ మెలె, విరోదుమ్ మాన్సుల్ మార్లనచ జీవుల్క దెకిలయ్. దేముడుచి సుబుమ్ కబుర్ జేవ్ నూనయ్లి రిసా, చి యేసుచి రిసా జేవ్ సాచి సంగిలి రిసా, జేవ్ విరోదుమ్ మాన్సుల్ జోవయింక మార తిల.

10 జేవ్ దస్సి మొర్లనచ జీవుల్ గట్టిజ అవాడ్ కెరన కిచ్చొ మెన కేక్ గల మెలె, "ఎత్తిచి ఉప్పిరి అదికారుమ్ తిలో ప్రబువ, తుయి ఎత్తి సుద్ది తిలోసా, నిజుమ్ తిలోసా, బూలోకుమ్తె జితన అమ్క మార అమ్చి లోయి సుద్దిలి రిసా కెయ్క జోవయింక సిచ్చ కెర్తె గే?" మెన కేక్ గలిల.

11 తెదొడి జోవయింతె ఎత్తి మాన్సుల్క చొక్కిలో పాలల్ *దా, కిచ్చొ మెల మెలె, "అన్నె ఇదిల్ రక. మాన్సుల్ తుమ్కయ్ కిసి మార్ల గే, దస్సి, తుమ్చ బావుడ్లు జత ప్రబుచ అన్నె సేవ కెర్తనక మారుల. జేవ్ దస్సి మొర్లన ఎత్తిజిన్చి లెక్క బెర్తె ఎదక రక, చి తుమ్క, జోవయింక మార్లనక సిచ్చ దెయెదె" మెన జబాబ్ దిలన్.

12 మెండపిల్ల సొప్పుచి ముద్ర కడ్డికయ్, ఆదె! వెల్లి బూకంపుమ్ జలి.

పడ్డె పొద్దు నీడిచి కంట నీడి జా గెలి, చి ఒండి జోను లోయి రంగు జా గెలి.

13 ఆగాసుమ్చ సుక్కలు బూలోకుమ్తె సేడ్ల. వెల్లి వాదు కెర్లె †అంజూరుమ్ రూక్చ చల్లి పొదిచ కాయల్ కిసి జేడ గెచ్చుల గే, దస్సి జేవ్ సుక్కల్ జేడ గెల.

14 పడ్డె, కేన్ జవున్ పుస్తకుమ్ ముద్దొ కెర్లె కిసి జయెదె గే, దస్సి, ఆగాసుమ్ ముద్దొ జా డీసె నాయ్, చి జోవయింక జోవయింక టాన్లు తెంతొ ఎత్తి డొంగ్రల్, ఎత్తి డిబ్బు ఒత్త తెంతొ గెలి.

15 తెదొడి బూలోకుమ్చ రానలు, ముక్కిమ్చ వెల్లెల మాన్సుల్, జమాన్లుచ అదికారుల్, సామాన్లు, బలుమ్ సెక్తిచ మాన్సుల్, ఎత్తి మాన్సు, గొతిమాన్సు జలెకి, గొతి నెంజిలన జలెకి, డొంగ్రెచ పరోతె, రంగ్గి బొరల్తె లుంక తవుల.

16 జేవ్ డొంగ్రల్, జేవ్ రంగ్గి పత్తల్క కిచ్చొ మెన కేకుల్ గలిల మెలె, "సింగాస్తనుమ్తె వెసిలోసా అమ్క నే దెకిత్ రితి, అమ్చి ఉప్పిరి సేడ. మెండపిల్లచి కోపుమ్చి సిచ్చ అమ్క నే లయితి రితి అమ్క లుంకడ.

17 జోచి కోపుమ్చి సిచ్చచి వెల్లి దీసి జా అస్సె, చి జా సిచ్చచి సెక్తిక అమ్ టీవ్క నెత్తుమ్" మెన కేక్ గల సంగిల.

7

దేముడుచ సేవ కెర్తనక తోడు తతి ముద్ర

1 ఇన్నెచి పడ్డె కిచ్చొ దెకిలయ్ మెలె, బూలోకుమ్చ చెత్తర్ పక్కలె చెత్తర్ దూతల్ టీవోజ తా, చెత్తర్ దిక్కుల్చి వాదు దెర, కేన్ వాదు బుయ్యె కి సముద్దుమ్తె కి, కేన్ రూక్తె కి నే వీర్తి రితి అడ్డు కెర్తతి.

2 తెదొడి, పొద్దు బార్ జతి పక్క తెంతొ అన్నెక్ దూత, ఉప్పిర్ జెంక, జివ్ తతొ

* 6:11 6:11 పాలల్ కో దిల గే, కో 'రక' మెల గే నేనుమ్, గని ఎత్తి అదికారుమ్ తిలో దేముడు జర్లు కెరవ తయెదె మెన జానుమ్. † 6:13 6:13 అంజూరుమ్ పండ్లు బొడ్డ పండ్లుచ రిత కాయల్ జవుల.

జీవ్ దెతో దేముడుచి ముద్ద గల్లి బిల దెర తా వెగ గెతిసి దెకిలయ్. గట్టిజ అవాడ్ కెరన, బూలోకుమక సముద్దుమక అల్లర్ కెరుక మెన సెలవ్ తిల జీవ్ చెత్తర్ దిక్కుల్చి వాదు దెర్త చెత్తర్ దూతల్క,

3 “అమ్చో దేముడుచ సేవ కెర్తన ఎత్తిజినచ నిర్దలె జోచి ముద్ద గల్తె ఎదక, బుయిక, సముద్దుమక, రుకాలె కిచ్చొ అల్లర్ కెర నాయ్!” మెన కేకే గల్లొ.

4 పడ్డొ, జీవ్ తిలొ జీవ్ దెతో దేముడుచి ముద్ద జోవయించ నిర్దలె గలంతన కెత్తిజిన్ జవుల గే, నూన్లయ్. కెత్తిజిన్ మెలె, పుంజెక దొన్ని విసా చెత్తర్ వెయిల్జిన్ జోచి ముద్ద గలంతన జవుల. కేనె కేనెచ మెలె, అమ్చ *ఇస్రాయేలులుచ ఎత్తి సెకుమ్లుతె బెదిలన.

5 యూధాచి సెకుమ్తె బార వెయిల్ జిన్క, రూబేనుచి సెకుమ్తె బార వెయిల్ జిన్క, గాదుచి సెకుమ్తె బార వెయిల్ జిన్క,

6 ఆసేరు సెకుమ్తె బార వెయిల్ జిన్క, సఫ్తాలిచి సెకుమ్తె బార వెయిల్ జిన్క, మనస్సేచి సెకుమ్తె బార వెయిల్ జిన్క,

7 సిమ్యానుచి సెకుమ్తె బార వెయిల్ జిన్క, లేవీచి సెకుమ్తె బార వెయిల్ జిన్క, ఇస్సాకారు సెకుమ్తె బార వెయిల్ జిన్క,

8 జెబులూనుచి సెకుమ్తె బార వెయిల్ జిన్క, యోసేపుచి సెకుమ్తె బార వెయిల్ జిన్క, చి బెన్యామీను చి సెకుమ్తె బార వెయిల్ జిన్క జో జోచి ముద్ద గల తయెదె.

ప్రబుచయ్ జల మాన్సుల్ జోచి గవురుమ్ సంగిలిసి

9 ఇన్నెచి పడ్డొ అన్నె దెకితె తిలె, ఆదె! కేన్ మాన్సు లెక్క కెరుక నెతిరి జనాబ్

ఒత్త తిల. ఎత్తి రాజిమ్ తెంతో, ఎత్తి సెకుమ్ తెంతో, ఎత్తి పైజల్ తెంతో, ఎత్తి బాసల్ తెంతోచ జా తా, సింగాసనుమ్చి పురైతో, చి మెండపిల్లచి పురైతో టీవోజ తా, చొక్కిల పాలల్ గలన అస్తి, చి జోవయించ అత్తిలె కజురుమ్ రూక్చ మట్టల్ దెరన తా,

10 గట్టిజ అవాడ్ కెరన, “మాన్సుచి రచ్చున దేముడుతెయి చి మెండ పిల్లతెయి అస్సె!” మెన కేకే గల్ల.

11 అన్నె, సింగాసనుమ్చి సుట్టునంత, విస్సిక్ చెత్తర్జిన్ వెల్లెల మాన్సుల్చి సుట్టునంత, †చెత్తర్ జీవుల్చి సుట్టునంత దూతల్ ఎత్తి టీవోజ తా, జోచి మొక్కె సెర్ను సేడ కిచ్చొ మెన సంగ దేముడుక జోకర్ల మెలె,

12 “అమ్మేన్!‡ మాన్సుల్ జోచి గవురుమ్ గాయితిసి, గవురుమ్, గ్యాగుమ్, జోచి దయచి రిసా, మాన్సుల్ జోచి సర్ద

సంగితిసి, మరియాద దెకితిసి, సెక్తి అన్నె అదికారుమ్ ఎత్తి

అమ్చో దేముడుక కలుగు జవున్ కెయడ తెయడ నే పిట్టె జోక తవున్!

అమ్మేన్!” మెన కేకే గల్ల.

ఒగ్గర్ బాదల్తె ప్రబుచయ్ జల మాన్సుల్ జిన్నిసి

13 తెదొడి వెల్లెల మాన్సుల్తె ఎక్కిలొ అంక పుసిలన్. “ఈంజేవ్ చొక్కిల పాలల్ గలన తిలన కొన్న? కేనె తెంతో జా అస్తి?”

14 జాకయ్ కిచ్చొ మెలయ్ మెలె, “బాబు, తుయి జాన్సి” మెలయ్, చి జేవ్, “ఒగ్గర్ అల్లర్ జంక తిలి జా వెల్లి

* 7:4 7:4 బయ్బిల్తె ‘ఇస్రాయేలులు’ మెలె, మాములుమ్ యూదుల్చి రిసా ‘ఇస్రాయేలులు’ మెనుల, పడ్డొ యూదుల్ నెంజలనతె కో యెసుక నంపజతగి గే, జోవయంక కి ‘అమ్చ ఇస్రాయేలులు’ మెన ఎత్తి అదికారుమ్ తిలొ దేముడు దెకితయ్. జేక ఇన్నె ‘ఇస్రాయేలులు’ మెలె, ప్రబుక నంపజలన మొత్తుమ్క టాలి జతయ్. ‘పుంజెక దొన్ని విసా చెత్తర్ వెయిల్జిన్’ మెలి నంబర్చి అర్దుమ్ కిచ్చొ మెలె, ‘పూర్తి జలిసి’, ‘మొత్తుమ్ నంపజలనచి లెక్క పూర్తి జలిసి’; టాలి జతయ్. † 7:11 7:11 4:6-8. ‡ 7:12 7:12 ఎల్లి బాస తెన్ ‘అమ్మేన్’ మెనుల.

బాదతె తెంతో జీన అయ్లన. ఈంజేవ్, మెండపిల్లచి లోయితె జోవయించ పాలల్ కెడన చొకు కెరన అస్తి.

15 జాకయ్, జేవ్ దేముడుచి సింగాసనుమ్చి మొక్కె అస్తి, చి రాతి మెద్దెనె జోచి దేవులుమ్తె జోచి సేవ కెరై తత్తతి.

అన్నె, సింగాసనుమ్తె వెసిలోసా జోవయింక జోతె రక రక, జేవ్ కిచ్చొ అల్లర్ నే జతి రితి జోచి నీడతె డంకెదె,

16 జోవయింక అప్పె తెంతో కెయ్క కి చూ కెరె నాయ్. తాన్ కెరె నాయ్. ఒప్పుడక సుకా గెతి నాయ్, కేనెచి ఒగ్గర్ తాత్ లయె నాయ్.

17 కిచ్చొక మెలె, సింగాసనుమ్చి నెడిమి తెంతో మెండపిల్ల జోవయింక గొవుడు జా రకెదె, చి జీవ్ దెత పానివొ దెకవ పియడెదె. అన్నె, జోవయించ అంకివొతె ఆనునొ పూర్తి పుంచ గెలెదె.” మెన జో వెల్లో మాన్సు సంగిలన్.

8

నుట్టుప కెరై పుస్తకుమ్చి ఆకర్చి ముద్ర మెండపిల్ల కడ్డిసి

1 మెండపిల్ల సత్తుచి ముద్ర కడ్డికయ్, రమారమి అర గంట్ల ఎద పరలోకుమ్తె కిచ్చొ అవాడ్ నాయ్.

2 పడ్డై, దేముడుచి మొక్కె టీవోజ తిల సత్తు దూతల్క దెకిలయ్. జోవయింక ఎక్కెక్ నప్పిర్మూరివొ *దిల.

3 తెదొడి అన్నెళ్లో దూత జా కెర, బజర్చి గిన్న దెరన బలి దెతి టాన్చి పురై టీవో జలన్. చి ‘ప్రబుచయ్ జల మాన్సుల్చ ప్రార్దనల్ తెన్ బెదున్’ మెన, సింగాసనుమ్చి పురైతొచి బలి దెతి టాన్చి జేవ్చి దుమ్మొ ఉడ్డితి రిసా జో

దూత డయింక మెన, జోక ఒగ్గర్ దూపుమ్ †దిల.

4 చి దేముడుచి మొక్కె పావితి రితి, జోవయించయ్ జల మాన్సుల్చ ప్రార్దనల్ తెన్ జా దూపుమ్చి దుమ్మొ బెద, జో దూతచి అత్తి తెంతో ఉడ్డ దేముడుచి మొక్కె గెలి.

5 తెదొడి జో దూత జా దూపుమ్ డయితి గిన్న దెరన, బలి దెతి టాన్చి ఉప్పిర్చి ఆగి ఇంగుడ్లు సగుమ్ ఒత్త బెరవ కెర, బూలోకుమ్చి ఉప్పిరి గల దిలన్, చి ఉర్ముల్ కెరై, అవాడ్లుచి అవాడ్ అయ్లి, బిజిలి మొల్కొలి, చి బూకంపుమ్ జలి.

సత్తు నప్పిర్మూరివొతె ఏక్ చెత్తర్ వర్పు తెన్ పుజిలిసి

6 తెదొడి సత్తు నప్పిర్మూరివొ దెర్ల సత్తుజిన్ దూతల్ జేవ్ నప్పిర్మూరివొ పుజుక తెయార్ జల.

7 తొలితొచొ దూత జోచి నప్పిర్మూరి పుజిలన్, చి కిచ్చొ తెదొడి బార్ జలి మెలె, లోయి తెన్ కలొయ్ జలి కరపత్తల్చి ఆగి సేడ, బుయ్యె సూయి జలి, చి ఒండి బూలోకుమ్తెచి తిన్ని వాటల్తె ఏక్ వాట పూర్తి డడ్డ గెలి, చి రూక్చ తిన్ని వాటల్తె ఏక్ వాట పూర్తి డడ్డ గెల, చి చివ్వర్ ఎత్కి డడ్డ గెలి.

8 తెదొడి దొన్నిచొ దూత జోచి నప్పిర్మూరి పుజిలన్, చి వెల్లి డొంగ్రు జతి రితిసి, ఆగిక డడ్డ కెర, సముద్రుమ్తె గలి జలి.

9 అన్నె, ఒండి సముద్రుమ్చి తిన్ని వాటల్తె ఏక్ వాట లోయి జాఁ గెలి. సముద్రుమ్తెచి జివుల్చ తిన్ని వాటల్క ఏక్ వాట మొర గెల, చి ఒడల్ మొత్తుమ్చ తిన్ని వాటల్తె ఏక్ వాట నాసెనుమ్ జాఁ గెల.

* 8:2 8:2 ఎత్కి అదికారుమ్ తిలొ దేముడు దిలన్ గే, మెండపిల్ల జలొ యేసు దిలన్ గే, కచిగ అత్తి జోవయింక దొవడ్ల గే, గని జేవ్ నప్పిర్ జోవయింక తంక కచితుమ్ ఎత్కి అదికారుమ్ తిలొ దేముడుచి సెలవ్ జా తయెదె.

† 8:3 8:3 కో దిల గే నేనుమ్.

10 తెదొడి తిన్నిచొ దూత జోచి నప్పిరమూరి పుజిలన్, చి పరలోకుమ్ తెంతో వెల్లో సుక్కో నేడ, వత్తిచి దీవు లగిలి రితి జా, ఒండి బూలోకుమ్చ గడ్డెచ తిన్ని వాటల్తె ఏక్ వాట గడ్డెతె చి ఊటల్తె సేడ్లన్.

11 జో సుక్కోచి నావ్ 'ఃకోడు వాసన', చి ఒండి బూలోకుమ్చ పానివొక తిన్ని వాటల్తె ఏక్ వాట కోడ్ జా గెల్. జా కోడు తిలో పాని పిలి రిసా, ఒగ్గర్జిన్ మాస్సుల్ మొర గెల్.

12 తెదొడి చెత్తర్చొ దూత జోచి నప్పిరమూరి పుజిలన్, చి పొద్దుక తిన్ని వాటల్తె ఏక్ వాటక, జోనుచ తిన్ని వాటల్తె ఏక్ వాటక, చి సుక్కల్చ తిన్ని వాటల్తె ఏక్ వాటక దెబ్బ లయిలి. జోవయించి ఉజిడి అందర్ జా గెలి. ఒండి మెద్దెన్చ తిన్ని వాటల్తె ఏక్ వాటక పొద్దుచి ఉజిడి లగె నాయ్, చి ఒండి రాతిచ తిన్ని వాటల్తె ఏక్ వాటక జోనుచి సుక్కల్చి ఉజిడి లగె నాయ్.

13 తెదొడి ఆవ్ అన్నె దెకిలయ్, చి కిచ్చొ సూన్లయ్ మెలె, పొద్దు ఆగాసుమ్చి మదెనె ఏక్ ఏక్ గిద్దు ఉడ్డితె తా గట్టిజ ఒర్న దా కిచ్చొ మెన ఒర్నితె తిలి మెలె, "అయ్యెయ్య! అయ్యెయ్య! అయ్యెయ్య! అన్నెక్ తిన్ని దూతల్ వర్న తెన్ జోవయించ నప్పిరమూరిచొ అప్పె పుజుక తిలిన్క బూలోకుమ్తె జితన ఎత్తిజిన్క కెద్ది కన్ఱుమ్ కెద్ది నన్ఱుమ్!" మెన సంగ గిద్దు ఉడ్డితె తిలన్.

9

పాచెచొ దూత జోచి నప్పిరమూరి పుజిలిసి

‡ 8:11 8:11 జా సుక్కోచా మాచిపత్తి మెన నావ్. జాచి అర్దుమ్ విస్సుమ్ అన్నెకోడు కి అస్సు. మాస్సుల్ కో కయ్లె మొర గెప్పుల. * 9:1 9:1 జా తాలల్ దేముడు సొంత జో సుక్కో జతొసాక దిలన్ గే మెండపిల్ల జలో యేసు దిలన్ గే కచిగె అత్తి జోవయింక దావడ్ల గే, గని జా జర్గు జంక ఎత్తి, అదికారుమ్ తిలో దేముడు కచితుమ్ సెలవ్ దా తిలన్, నెంజిలె జర్గు జతి నాయ్. † 9:3 9:3 జా తాలల్ దేముడు సొంత జో సుక్కో జతొసాక దిలన్ గే మెండపిల్ల జలో యేసు దిలన్ గే కచిగె అత్తి జోవయింక దావడ్ల గే, గని జా జర్గు జంక ఎత్తి, అదికారుమ్ తిలో దేముడు కచితుమ్ సెలవ్ దా తిలన్, నెంజిలె జర్గు జతి నాయ్.

1 తెదొడి పాచెచొ దూత జోచి నప్పిరమూరి పుజిలన్, చి కిచ్చొ దెకిలయ్ మెలె, పరలోకుమ్ తెంతో బూలోకుమ్ ఎద ఏక్ సుక్కో నేడ్లన్, చి జో సుక్కో జతొసాక ఏక్ తాలుమ్ *దిల. మట్టు నెంజిలి దిగిలి గొయితె సేడ్తి వాట్ ఉగిడ్డి తాలుమ్.

2 మట్టు నెంజిలి జా గొయితె సేడ్తి వాట్ ఉగిడ్లన్, తెదొడి వెల్లి జా గొయి తెంతో వెల్లో ఆగి గొయచి రితిచి ఆగిచి దుమ్మొ బార్ జలన్, చి జా గొయి తెంతో బార్ జతి దుమ్మొక పొద్దు కి ఆగాసుమ్ కి గాండు డంకిలి రితి జా అందర్ జల.

3 వడ్డె, జా దుమ్మొ తెంతో చిట్కల్ బూలోకుమ్తె బార్ జా బెర్ల, చి విస్సుమ్ కుర్దుచి ఎదిలి సెక్తి జోవయింక †దిల.

4 జోవయింక కిచ్చొ ఆడ్ల దిలి మెలె, బుయ్యెయ్యి చివ్వర్ గే కిచ్చొ మొక్కల్ గే, కేన్ రూకుక గే పాడ్ కెరుక జయె నాయ్. గని, కేన్ మాస్సుల్క దేముడుచి ముద్ద జోచి నిర్దె తయె నాయ్ గే, జోకయ్ సిచ్చ కెరుక.

5 పాచె జొన్నొ ఎద జోవయింక సిచ్చచ నొప్పుల్ కెరుక మెన జేవ్ చిట్కల్క సెలవ్ తిలి. గని కక్క మారుక సెలవ్ నాయ్. జేవ్ నొప్పి దెతిసి కిసిచి మెలె, మాస్సుక విస్సుమ్ కుర్దు చప్పిల్తె కిసి నొప్పి కెరెదె గే, తెద్ది నొప్పి జల.

6 జా పొదులె కిసి తయెదె మెలె, 'మొర్ను జెవున్' మెన మాస్సుల్ కోర్ప జవుల, గని మొరుక నెతిరి. మొరుక ఆనయి జవుల, గని మొర్ను జోవయింక కొంకడ ఉట్ట నిగెదె.

7 డీసుక జలె, జేవ్ చిట్కల్ కిస తిల మెలె, యుద్దుమ్క తెయార్ జల గోడల్చ రిత త్తిల. జోవయించ బోడిలె బజర్చ కిరిటల్ రిత తిల. జోవయించ

మొకొమ్లు మాన్సుల్చ మొకొమ్లు రిత తిల.

8 జోవయించ రోమల్ తెర్బోదల్చి నెండిచి రితి, జోవయించ దంతో సింపుమ్లుచి దంతో రిత తిల.

9 ఇనుము డొల్లు రిత డీస్త పొరల్ జోవయించి చామ్తె తవుల, చి ఉడ్డిలె జోవయించ రెప్పల్ కదుల్ జతి అవాడ్ కీసి మెలె, గోడలు జమాన్లుచి రదుమ్ కడన యుద్దుమ్తె నిగ గెతి రితి అవాడ్ జతె తవుల.

10 జోవయించ తోకల్ కీస మెలె, విస్సుమ్ కుర్దుచి తోకల్చి రితి బూసుల. జోవయించ తోకల్తె పాచ్ జొన్నొ ఎద మాన్సుల్క నొప్పి దెతి సెక్తి తయెదె.

11 జోవయించి ఉప్పిర్చొ రానొ కొన్సొ జయెదె మెలె, మట్టు నెంజిలి గొయి రకితో దూత. ఎబ్రీ బాస తెన్ జో దూతచి నావ్ 'అబద్దొను', చి జా నావ్క అర్దుమ్ 'నానెనుమ్ కెర్తొసా'. గ్రీకు బాస తెన్ జా నావ్ 'అపొల్లుయోను' మెనుల.

12 జా సిచ్చుచి గండిమ్ తొలితో చి. ఒత్త తెంతో దస సిచ్చల్ అన్నె దొన్ని జర్గు జంక జయెదె.

సొప్పుచొ దూత జోవయించి నప్పిర్మూరి పుజిలిసి

13 తెదొడి సొప్పుచొ దూత జోచి నప్పిర్మూరి పుజిలన్, చి దేముడుచి మొక్కెచి బలి దెతి బజార్ టాన్చ చెత్తర్ కొమ్ముల్ తెంతో ఏక్ అవాడ్ అయ్లిసి సూన్లయ్.

14 జా అవాడ్ సొప్పుచి నప్పిర్మూరి దెరితో ఈంజొ దూతక, "యాప్టీసు మెలి వెల్లి గడ్డె బంద తిల చెత్తర్ దూతల్క విడ్డల్ కెరు" మెన జా అవాడ్ సంగిలన్.

15 జాకయ్ జేవ్ చెత్తర్ దూతల్క బందిలిసి ఈంజొ దూత డీసిలన్. జేవ్ జయ్యి గడియ, జయ్యి దీసి, జయ్యి జొన్ని, జయ్యి వెర్ని విడ్డల్ జా ఒండి లోకుమ్చ ప్రెజల్క తిన్ని వాటల్తె ఏక్

వాట జిన్క మార్తి రిసా రకితి రితి తెయార్ జొ తిల.

16 జేవ్ దూతల్చి తెడి జా సిచ్చు జర్గు కెర్త గోడల్తె వెగిల సయ్న్యుములు కెత్తిజిన్ జవుల మెలె, విస్సెక్ కోట్లు జిన్, జా లెక్క ఆవ్ సూన్లయ్.

17 జలె, జా డీసిల్ సిచ్చుతె జేవ్ సయ్న్యుమ్ వెగిల గోడలు అంక కీస డీసిల మెలె, జోవయింతె వెగిలనక గుండె ఆగి రంగు, నీలిమ్ రంగు చి ఎడ్డి రంగు బెదిల. ఎక్కెక్ డాలు జత రిత ఇనుము సొక్కల్ గలన తిల, చి జేవ్ గోడల్చ బోడివొ కీస తిల మెలె, సింపుమ్లుచ బోడివొ రిత డీసిల, చి జోవయించి చోడి తెంతో ఆగి, దుమ్మొ, చి ఎడ్డి రితి దుమ్మొ బార్ జతె తిల.

18 జోవయించి చోడి తెంతో బార్ జతి ఆగి, దుమ్మొ, ఎడ్డి దుమ్మొ బార్ జతె తిలిన్క ఒండి బూలోకుమ్చ మాన్సుల్చ తిన్ని వాటల్తె ఏక్ వాటజిన్ మొర్ల.

19 కిచ్చొక మెలె, జేవ్ గోడలు అల్లర్ కెర్తి సెక్తి కిచ్చొతె మెలె, జోవయించి చోడితె చి జోవయించ తోకల్తె తిల. జోవయించ తోకల్ కీస మెలె, అయివొచ రిత జా బోడివొ తెన్ తవుల, చి జోవయించ తోకల్కయ్ మాన్సుల్క గాయిమ్ కెరుల.

20 జలె, జా డీసిలిన్తె అన్నె కిచ్చొ జలి మెలె, ఈంజేవ్ సిచ్చల్ నే మార్ల సేంసిల మాన్సుల్ కీసి జల మెలె, జేవ్ కెర్త కమొక విసారుమ్ జతి నాయ్, ములితి నాయ్, చి బూతల్క, చి బజర్క, వెండిక, కంచుక, పత్తుర్క, దారుక తెయార్ కెర్ల బొమ్మల్క జొకరుక ములితి నాయ్. దన్న బొమ్మల్ దెకుక గే సూసుక గే ఇండుక గే నెతిర్లె కి.

21 అన్నె, జేవ్ మాన్సుల్ కెర్ల హత్యలు, మెంగుర్ కమ్మొ, లంజెకమొ, చోర్ కమొక, విసారుమ్ జతి నాయ్, ములితి నాయ్.

ఒగ్గర్ నత్తుచో అన్నెక్ దూత

1 పడ్డో, ఒగ్గర్ నత్తుచో అన్నెక్ దూత పరలోకుమ్ తెంతో ఉత్త జెంక దెకిలయ్. జో మబ్బు గలన్లి రితి జా, మబ్బుచి తెడి తా, జోచి బోడిచి ఉప్పిరి పచ్చన వయ్డూరుమ్ రంగుచి దూని లగిల్ రితి జా, జోచి మొకోమ్ పొద్దుచి రితి ఉజిడి తా, జోచ చట్టో ఆగి రిత తంబల్ రిత తా.

2 ఏక్ ఇదిలీన్ పుస్తకుమ్ జోచి అత్తి తిలి. అగ్గె సుట్టువ జా తిలి, గని అప్పె ఉగ్గి జా అస్సె. జలె, జోచో ఉజిల్ చాటు సముద్దుమ్తె తియ, డెబ్రి చాటు బుయ్యె తియ సుద,

3 సింవుమ్చి అవాడ్ రితి గట్టిజ అవాడ్ కెరన, ఒర్నిలన్. ఒర్నితికయ్, సత్తు ఉర్ముల్ కెర జబాబ్ దిల.

4 సత్తు ఉర్ముల్ కెర్తికయ్, ఆవ్ జేవ్ సంగిలిసి రెగిడ్తయ్, గని పరలోకుమ్ తెంతో అయ్లి ఏక్ అవాడ్ సూన్లయ్. అంక కిచ్చొ సంగిలన్ మెలె, “జేవ్ సత్తు ఉర్ముల్ సంగితిసి గుట్టు తతి రితి కెరు, రెగుడ్ నాయ్” మెన ఆడ్ర దిలన్.

5 తెదొడి సముద్దుమ్తె బుయ్యె టీవోజ, ఆవ్ దెకిలో దూత జోచో ఉజిల్ ఆతు పరలోకుమ్ పక్క ఉక్కుల.

6 “కెయ్క తెయ్క నే పిట్టె జితో, పరలోకుమ్ చి ఒత్త తిలిసి ఎత్తి, బూలోకుమ్చి ఒత్త తిలిసి ఎత్తి, అన్నె సముద్దుమ్చి ఒత్త తిలిసి ఎత్తి జెర్మున్ కెర్లొసా సాచి” మెన ఒట్టు గలన, కిచ్చొ సాడుప కెర్లన్ మెలె, “సమయుమ్ జా అయ్లి. అన్నె వాయిద కెరుక నెంజె.

7 గని, సత్తు దూతల్తె ఆకర్చో దూత జోచి నప్పిర్మూరి పుజుక తిల దినాల్క, దేముడు జోచ నేవ కెర్తన జల, జోచ

* 10:9 10:9 యెహెజ్కెలు 3:1-3. * 11:1 11:1 ఎత్తి అదికారుమ్ తిలో దేముడు దిలన్ గే మెండపిల్ల జలో యేసు దిలన్ గే అన్నె కచిగి అత్తి జోవయంక దావడ్ల గే, గని ఎత్తి అదికారుమ్ తిలో దేముడుచి నెలవ నెంజెలె, జోవయంక దొర్కు జతి నాయ్. 3 నంబర్ కోడుక దెకిలె, ఎత్తి అదికారుమ్ తిలో దేముడు, నెంజెలె మెండపిల్ల జలో యేసు లట్టబ్తయ్ మెన ఉచరుక జయెదె. గని గ్రీకు బాన తెన్ ఈంజ ‘డీసయ్లిసి’ తొలితో రెగిడ్ల సగుమ్ పుస్తకల్తె ఆడ్ర దిలోసాక ‘దూత’ మెన. నంబర్ కోడుతె అస్సె. సగుమ్తె దస్సి సంగి నాయ్. † 11:2 11:2 దొన్ని కి రహారమి తిన్ని నర వెర్పుల్ జయెదె.

కబుర్లు సంగిల పూర్గుల్క సంగిలి రితి, జోచి గుట్టు తిలిసి నెరవెర్పువ జంక అస్సె” మెన జో దూత ఒట్టు గలన సాడుప కెర్లన్.

8 ఆవ్ అగ్గె సూన్లి పరలోకుమ్ తెంతో చి అవాడ్ అంక అన్నె సంగిలిసి కిచ్చొ సూన్లయ్ మెలె, “అల్లె, తుయి గో! చి సముద్దుమ్తె బుయ్యె టీవోజ దూతచి అత్తి తిలి పుస్తకుమ్ నజు” మెలన్.

9 జో దూతతె ఆవ్ గెచ్చు, “అంక జా ఇదిలీన్ పుస్తకుమ్ దె” మెన సంగిలయ్, చి జో అంక, “నజన *కా, ఈంజ తుచి పెట్టి తుక కోడు జయెదె, గని తుచి చోడితె ఒండల్ తేల్చి రితి తియనయ్ తయెదె.” మెలన్.

10 జాకయ్ జా ఇదిలీన్ పుస్తకుమ్ జో దూతచి అత్తి తెంతో నజన కయ్లయ్. అంచి చోడితె ఒండల్ తేల్చి రితి తియన తిలి, గని, జా కతికయ్, అంచి పెట్టి కోడు జలి.

11 తెదొడి అంక ఆడ్ర దిలిసి కిచ్చొ మెలె, “ఒగ్గర్ ప్రెజల్చి రిసా, ఒగ్గర్ రాజిమలుచి రిసా, ఒగ్గర్ బాసల్చి రిసా, ఒగ్గర్ రాసల్చి రిసా ఆవ్ తుక అన్నె దెకయ్తిసి రెగ్గ మాన్సుల్క జాసవుక” మెన అంక ఆడ్ర అయ్లి.

11

దొగుల సాచుల్
1 తెదొడి కట్టణ్ణి ఏక్ డండో అంక *దిల, చి అంక కిచ్చొ ఆడ్ర అయ్లి మెలె, “ఉట్టు, దేముడుచి గుడిచి బలి దెతి టాన్చి ఒత్త బక్తి కెర్తనక కట్టణ్ణ దెకు.

2 గని దేముడుచి గుడి ఒత్తల్తెచి బయ్లెచి డర్తుక నే కట్టణ్ణ ములు. కిచ్చొక మెలె, దేముడుక నేన్ల మాన్సుల్చి

* 11:2 11:2 దొన్ని కి రహారమి తిన్ని నర వెర్పుల్ జయెదె.

అత్తి జా టాన్ అప్పెచి మట్టుక తంక సెలవ్ అస్సె. †దొన్ని విస్సా దొన్ని జొన్నొ పూర్తి ఈంజ సుద్ది జలి పట్టుమ్ జేవ్ సుద గెల అల్లర్ కెరుల.

3 అన్నె, †బార పుంజొ తిన్ని విస్సా ప్రొదులు అంచ దొగుల సాచులు †బస్తబట్టల్ గలన అంచ కబుర్లు సాడుప కెరుక మెన సెక్తి దెయిందె” మెన అంక ఆడ్ర అయ్లి.

4 ఈంజేవ్ దొగుల సాచుల్ కొన్న జవుల మెలె, బూలోకుమ్ ఏలుప కెర్తొ ప్రబుచి మొక్కె టీవోజ తిల, దొన్ని ఒలీవ రూక్లు చి దొన్ని దీవుకంబల్, మెన *టాలి జయెదె.

5 అన్నె, కో ఇన్నెయింక కిచ్చొ అల్లర్ కెరుల గే, ఇన్నెయింక చొండి తెంతొ ఆగి బార్ జా, ఇన్నెయింక విరోదుమ్ జలసక లయ గెలెదె. కో ఈంజేవ్ దొగులక అల్లర్ కెరుల గే, జేవ్ ఇసి మొరుకయ్.

6 ఈంజేవ్ దొగుల సాచుల్క అన్నె కిచ్చొ సెక్తి మెలె, దేముడుచ కబుర్లు ఈంజేవ్ సంగితె ఎద పాని †నే పెట్టి రితి అడ్డు కెరుక. పడ్డొ అన్నె, †లోయి జతి రితి పానివొక మార్పుప కెరుక, చి కెత్తి సుట్లు ఇన్నెయింక ఇస్టుమ్ అయ్లె, ఎత్తి రగుమ్, అల్లర్క బూలోకుమ్చక సిచ్చల్ కెరుక సెక్తి అస్సె.

7 పడ్డొ, ఇన్నెయింక సాచి సంగ కేడయ్లి పడ్డొ, మట్టు నెంజిలి జా వెల్లి గొయి తెంతొ వెగ జెతో జంతు ఇన్నెయింక ఉప్పిరి యుద్దుమ్ కెర జీన కెర, ఇన్నెయింక మారెదె.

8 ప్రబుక సిలువతె టీవో కెర మార్లి వెల్లి పట్టుమ్తె ఇన్నెయింక పీనుమ్లు సేడ తవుల. జా పట్టుమ్క టాలిక

‡‘సొదొమ’ చి ‘ఐగుప్తు’ మెన సంగుక జయెదె.

9 తిన్ని నర పొదుల్ పూర్తి ఎత్తి. ప్రెజల్ తెంతొ, ఎత్తి సెకుమ్ తెంతొ, ఎత్తి బాస తెంతొ, ఎత్తి రాజిమ్ తెంతొచ మాన్సుల్ ఇన్నెయింక పీనుమ్లుక దెక దెక, ఇన్నెయింక మెన్నె రోవుక సెలవ్ నే దెతి.

10 ఈంజేవ్ దొగుల సాచుల్ సంగ తిల కబుర్లు, ఈంజేవ్ కెర్ల కమొ బూలోకుమ్తె జేవ్ జితసక అల్లర్ కెర్లి రిసా; లాజ్ కెరయ్లి రిసా, బూలోకుమ్తె జితస ఈంజేవ్ మొర్లిన్చి రిసా వెర్లి సర్ల జా, సర్ల కెరన, జోవయింక వెర్లి సర్లచి గుర్తుక ఎక్కిలోక ఎక్కిలో బవుమానల్ దెతె తవుల.

11 జలె, జేవ్ తిన్ని నర పొదుల్ గెలె, దేముడు పుజిలి అత్తు ఈంజేవ్ సాచుల్చి పెట్టి వెన జియడ్లన్, చి ఉట్ట సొగ టీవో జల, చి ఇన్నెయింక దెకిలన పూర్తి బియఁ గెల.

12 తెదొడి, ఈంజేవ్ జివ్ జల సాచుల్ పరలోకుమ్ తెంతొ చి ఏక్ అవాడ్ సూన్ల. కిచ్చొ మెన జా అవాడ్ సంగిలన్ మెలె, “ఇత్తల్ వెగ జా!” మెలన్, చి ఇన్నెయింక విరోదుమ్ జలనచి మొక్కె మబ్బు తెన్ పరలోకుమ్తె వెగ గెల.

13 జయ్యి గడియయ్ వెల్లి బూకంపుమ్ జలి. జా పట్టుమ్చ దెన్ను వాటల్తె ఏక్ వాట నాసెనుమ్ జా గెలి. జా బూకంపుమ్తె సత్తు వెయిల్జిన్ మాన్సుల్ మొర గెల. సేంసిల మాన్సుల్ బియఁ కెర, పరలోకుమ్తె తిలో దేముడుక గవురుమ్ దిల.

14 సిచ్చల్చ గండిమ్లు, కస్తుమ్లు ఇన్నెతెన్ దొన్ని జా గెలి. మొత్తుమ్

‡ 11:3 11:3 దొన్ని కి రమారమి తిన్ని నర వెర్పుల్ జయెదె. § 11:3 11:3 కిచ్చొ గుర్తు దెకవుక మెన యూదుల్ తెన్ బస్తబట్టల్ గలవ బులుల మెలె, జోవయింక పెట్టిచి దుకుమ్ దెకవుక. * 11:4 11:4 జెకర్యా 4 అద్యయిమ్తె ఇసి టాలి అస్సె. † 11:6 11:6 ఏలీయా పూర్లుమ్చొ దస్సి కెర తిలన్. రానల్ మొదెల్ పుస్తకుమ్ 17:1. ‡ 11:6 11:6 మోసి పూర్లుమ్చొ దస్సి కెర తిలన్. నిర్దువకాండుమ్ 7:14-18. § 11:8 11:8 సొదొమ పట్టుమ్చ మాన్సుల్చి ఐగుప్తు దేసిమ్చ మాన్సుల్ ఎత్తి అదికారుమ్ తిలో దేముడుక చి జోవయింక మాన్సుల్క పూర్లుమ్ విరోదుమ్ కెర తిల. దస్సి, యెరూసలేమ్ పట్టుమ్చ మాన్సుల్ యెసుక విరోదుమ్ కెర మార్ల, చి ఈంజేవ్ సాచుల్చ పీనుమ్లు ఒత్తయ్ సేడ్ల.

తిన్ని సిచ్చల్ జతి రితి అన్నెక్ దస్సి సిచ్చ కచితుమ్ జర్గు జంక అస్సె.

సత్తుజిన్ దూతల్తె ఆకర్చో జోచి నప్పిర్మూరి పుజిలిసి

15 సత్తుచో దూత జోచి నప్పిర్మూరి పుజిలన్, చి కిచ్చో జలి మెలె, పరలోకుమతె గట్టిజ అవాడ్చ అవాడ్లు కిచ్చో మెల మెలె, “బూలోకుమచి రాజిమ్ అమచో ప్రబుచి చి జోచో క్రిస్తు పుత్తునచి రాజిమ్ జా మార్పుప జా అస్సె. కెయళ తెయళ జో ఏలుప కెరెదె” మెన సంగిల.

16 తెదొడి దేముడుచి పురెతో జోచ సిజాసనల్తె వెనిత విస్సెక్ చెత్తర్జిన్ వెల్లెల మాన్సుల్ దేముడుచి మొక్కె నెర్పు సేడ, జోక కిచ్చో మెన బక్తి కెర్ల మెలె,

17 “ఎత్తి సెక్తి అదికారుమ్ తిలో ఎత్తిక ఏలుప కెర్తొ దేముడు ప్రబువ, తుయి అప్పె తతోసా, అగ్గె తెంతో తిలోసా, తుయి తుచి సెక్తి అదికారుమ్ దెరన, ఏలుప కెరుక దెర అస్సిసి మెన, తుక అమచి సర్ల సంగితనుమ్.

18 తుక నేన్ల మాన్సుల్ మొత్తుమ్ తుచి ఉప్పిరి కోపుమ్ దెకయల, గని తుచి కోపుమ్ తుయి దెకవ జోవయింక సిచ్చ కెర్లది.

మొర్లసక పరిచ్చ కెర తుచ సేవ కెర్లన జల తుచ కబుర్లు సంగితసక

చి తుచ సొంత జల అన్నె మాన్సుల్క, తుక బిత ఎత్తిజిన్క,

జేవ్ బాల వెల్లో జలె కి, జోవయింక బవుమానుమ్ దెంక, పడ్డొ బూలోకుమచక నాసెనుమ్ కెర్లసక నాసెనుమ్ కెరుక మెన, సమయుమ్ జా అయలి.” మెన జో దేముడుచి మొక్కె బప్పన్ల.

19 తెదొడి పరలోకుమచి దేముడుచి గుడిచి కెప్పి ఉగ్గి జలి, చి జోచి జా దేముడుచి గుడిచి తెడిక తెడిచి గదితె జోచి నే పిట్టి ప్రమానుమచి గుర్తుచి *పెటె డీసిలి. అన్నె, బిజిలి మొల్కొలి, అవాడ్లు అయలి, ఉర్కుల్ కెర్లి, చి బూకంపుమ్ కెర్లి, చి వెల్లెల కరపత్తల్ పెట్టె.

12

తేర్బోదచి వెల్లి అయిచి టాలి

1 తెదొడి ఆచారిమచి వెల్లి ఏక్ గుర్తు ఆగానుమతె డీసిలన్. కిచ్చో మెలె, పాలుమ్ మెలి రితి పొద్దు గలన్లి రితి జలి తేర్బోద. జాచి చట్టె జోను, జాచి బోడి *బార సుక్కల్ తిలి కిరిటుమ్.

2 జా అంగి జా తిలి, చి జాచి కంట్లు పాచ అయలి నొప్పుల్క, లడెన్ జంక మెన, ఒర్నితె తిలి.

3 తెదొడి, ఆగానుమతె అన్నెక్ వెల్లి గుర్తు డీసిలి. ఆదె! వెల్లో అయి రితో ఆగి రితో ఎరన జంతు. జోక సత్తు

* **11:19 11:19** తెదొడక ఎద, ఎత్తి అదికారుమ్ తిలో దేముడుచి గుడితె జా పెటె తిలి తెడిక తెడిచి గదితె ఎక్కి, ఎత్తిక వెల్లో పూజరి, గని అన్నె కోయి నాయ్ గెచ్చుక జయెదె, అన్నె వెర్సిక ఎక్కి సుట్టు జో ఒత్త పెనుక జయెదె. ఇన్నె సంగిల్ రితి జా పెటె డీసిలి, కిచ్చో అర్దుమ్ తయెదె మెలె, జా డీసిలి తెంతో ఎత్తిజిన్ ఎత్తి అదికారుమ్ తిలో దేముడుచి గపురుమ్, జో కీసా అస్సె గే, పూర్తి దెకుక జయెదె.

* **12:1 12:1** యూదుల్తె బార సెకుమ్లె తిల, గెద. యూదుల్క ‘ఇస్తాయేలులు’ మెనుల కి, పడ్డొ యేసుక సంబజలసక ‘అమచ సత్తిమచ ఇస్తాయేలులు’ మెన ఎత్తి అదికారుమ్ తిలో దేముడు దెకితయ్, జేవ్ యూదుల్ జలెకి నే జలెకి. జేక జేవ్ బార సుక్కల్ తిలి కిరిటుమ్క ‘ప్రబుచయ్ జలన మొత్తుమ్’ మెన అర్దుమ్ కెరనుక జయెదె. యూదుల్ తెంతో క్రిస్తు రప్పించుప కెర్లొసా జెర్లిలో. సయ్తాన్ జోవయింక అల్లర్ కెర్లొ, గని జినె నాయ్. జా తేర్బోదక ఏక్ రగుమ్ ఉచర్లె, ‘యేసుచి అయ్యసి మరియ’ మెన ఉచరుక జయెదె. గని అన్నెక్ రగుమ్ ఉచర్లె, సంబజలన మొత్తుమచి అత్తు సంగుమ్ మెనుక జయెదె. జా అత్తు సంగుమ్చ బోదల్ జల క్రిస్తుచ బాపుడ్లు జల సంబజలసక కి సయ్తాన్ అల్లర్ కెర్లయ్, 12:17, గని ఆకర్క జినె నాయ్. 12:12 దెక. † **12:3 12:3** సత్తు బోడివో, దెన్ను కొమ్ముల్, చి సత్తు కిరీటల్చి అర్దుమ్ కిచ్చో మెలె, అప్పెచి మట్టుక జో బూలోకుమతె ఏలుప కెరుక పూర్తి అదికారుమ్ తిలిసి. పడ్డొక ఓడువ జయెదె, గెద. సత్తు సంబర్క ‘పూర్తి’ మెలినిచి అర్దుమ్, గెద.

బోడియొ చి దెన్ను కొమ్ముల్, చి జోచ నత్తు బోడివోత †నత్తు కిరిటల్ తిల.

4 జోచి తోక తెన్ ఆగాసుమచ సుక్కల్ మొత్తుమచ తిన్ని వాటల్తె ఏక్ వాటక కడ, బూలోకుమచి ఉప్పిరి సేడవ దిలన్. తెదొడి, జా తేర్బోద లడెన్ జతికయ్, జా లడెన్ జతో బోదక గీడ గెలుక మెన ఉచర, జాచి పురై జో వెల్లో అయి టివోజ తిలన్.

5 జలె, జా పూత్తుక లడెన్ జలి. క్రిసా పూత్తు మెలె, గవురుమచి ఇనుముడండొ రితిసి దెరన దేముడుక నేన్ల మాన్సుల్ ఎత్తిజిన్క ఏలువ కెరుక దిలోసా. గని జో అయితె దెర్ను నే సేడ్డె జో బోద దేముడుతె జోచి సింగాననుమతె ఉక్కిల్ జలో.

6 బయిలు దేసిమి జా తేర్బోద ఉట్ట నిగిలి. ఒత్త 'జాక' మెన దేముడు ఏక్ టాన్ తెయార్ కెర తిలన్. ఏక్ †వెయి దొన్ని పుంజో అరవయ్ పొదుల్ ఒత్త జా కంక జింక అస్సె.

సయ్తాన్చి ఉప్పిరి యుద్దుమ్ కెర జిస్సిసి

7 తెదొడి పరలోకుమతె యుద్దుమ్ జలి. ఒత్త మికాయేలు మెలో వెల్లో దూత ఎక్కిలో, జోచి తెడిచ దూతల్ తెన్, జో వెల్లో అయి రితోసాచి ఉప్పిరి యుద్దుమ్ కెర్ల. జో అయిచి జాచి తెడిచ దూతల్ కి యుద్దుమ్ కెర్ల.

8 గని ఓడుప జల, చి ఒత్త తెంతో పరలోకుమతె జోక అన్నె టాన్ నాయ్.

9 జో వెల్లో అయి, జో పూర్ణుమచో అయి; జోక 'సయ్తాన్' మెనుల, ఒండి లోకుమచక మోసిమ్ కెర్లసా, బూలోకుమతె జేడ సేడ గెలో, చి జో తెన్, జోచ దూతల్ ఎట్టో జేడ సేడ గెల.

సయ్తాన్ ఓడుప జలిసి

10 తెదొడి పరలోకుమతెచి గట్టిజ ఏక్ వెల్లి అవాడ్ నూన్లయ్. కిచ్చొ మెలి మెలె, "అమ్చో దేముడు దెతి రచ్చున, జోచి సెక్తి, జోచి రాజిమ్, పడ్డె జోచొ క్రిస్తుచి అదికారుమ్, అప్పె నెరవెర్చుప జా పాచ జా అస్సె. కిచ్చొక మెలె, అమ్చ బావుడ్డుక నిందల్ సంగితె తిలోసా ఎట్టో జేడ సేడ అస్సె. అగ్గె అమ్చ బావుడ్డుక రోజుక రాతి మెద్దెనె దేముడుచి మొక్కా జో నిందల్ సంగితె తిలో.

11 గని జేవ్ అప్పె మెండపిల్లచి నూయి జలి కీలోయిచి సెక్తిక, పడ్డె జేవ్ సాచి సంగిలిన్చి నిదానుమ్క, జేవ్ దొన్నిచి రిసా, జో సయ్తాన్చి ఉప్పిరి జేవ్ జిన అస్తి. 'జేవ్ సాచి సంగిలిన్చి నిదానుమ్' మెలె, జోవయిచి సొంత జిప్పక విలువ నే దెకన్తె, జా మెండపిల్లచి నావ్క విలువ దెక, జోచి రిసాచి సాచి జేవ్ సంగిలి రిసా మాన్సుల్ మొర్ల.

12 జలె, సయ్తానుక జిన అస్తి. జాకయ్, ఓ పరలోకుమ్, ఒత్త జితన ఎత్తిజిని, సర్దసంతోసుమ్ జా! గని, ఓ బూలోకుమ్, ఓ నముద్దుమ్, అయ్యె! తుమ్క ఒగ్గర్ కస్తుమ్ సన్దుమ్! కిచ్చొక మెలె, సయ్తాన్ ఒగ్గర్ కోపుమ్ తెన్ తుమ్తె ఉత్త జా అస్సె. జోచి ఒగ్గర్ కోపుమ్ కిచ్చొక మెలె, జోక అప్పె ఒగ్గర్ సమయుమ్ సేసె నాయ్ మెన జో జాన అస్సె!" మెన పరలోకుమచి జా అవాడ్ సంగిలి.

13 'అంక ఒగ్గర్ సమయుమ్ నాయ్' మెన జో వెల్లో అయి దెక కెర, జో మున్నుబోదక లడెన్ జలి జా తేర్బోదక చజ అల్లర్ కెరుక మెన గెలన్.

14 గని జా తేర్బోదక దేముడు వెల్లి గిడ్డురాసొచ దొన్ని రెప్పల్ దిలన్. జా అయితె జా దెర్ను నే సేడ్డె బయిలు దేసిమి

‡ 12:6 12:6 మెలె, తిన్నినర వెర్చుల్. § 12:11 12:11 మెలె, జో అర్పితుమ్ జలిన్చి సెక్తిక. * 12:14 12:14 "ఏక్ కాలుమ్, దొన్ని కాలుములు చి ఏక్ అర కాలుమ్" మెన రెగ్డ అస్సె. తిన్ని నర వెర్చుల్చి అర్దుమ్ జా కోడుక తయెదె. 11:2 దెక.

జా ఉడ్డ గెచ్చుక మెన, జా దొన్ని రెప్పల్ దిలన్. జా కేనె ఉడ్డ గెచ్చుక మెలె, *తిన్ని వెర్పుల్ నర కతె జితె చెంగిల్ తంక తిలి టాన్తె జా ఉడ్డ గెచ్చుక.

15 జలె, 'బూరుమ్ జాక గుడ్డ దెర గెస్సు' మెన, జా తేరబోదచి పట్టి జో అయి జోచి చోడి తెంతో గాడు రితి పాని సువ దిలన్.

16 గ్గని జా తేరబోదక బుయి తోడు తా జాచి చోడి పాడ, జోచి చోడి తెంతో వెల్లో జో అయి సువ దిలి గాడుక బుయి గీడ గెలి.

17 తెదొడి జో వెల్లో అయి జా తేరబోదచి ఉప్పిరి ఒగ్గర్ కోపుమ్ జా, జాచ అన్నె బోదల్చి ఉప్పిరి యుద్దుమ్ కెరుక మెన ఉట్ట గెలన్. దేముడుచ కొడొ నిదానుమ్ ఇండ యేసుచి రిసా సాచి జతనయిచి ఉప్పిరి యుద్దుమ్ కెరుక మెన గెలన్.

సముద్దుమ్ తెంతో సయితాన్చి సేవ కెర్తొ వెర్రి జంతు బార్ జలిసి

18 తెదొడి సముద్దుమ్చి ఒడ్డుచి ఇన్కతె జో వెల్లో అయి టీవో జలన్.

13

1 తెదొడి కిచ్చొ దెకిలయ్ మెలె, సముద్దుమ్ తెంతో ఏక్ వెర్రి జంతు బార్ జతె తిలసిని దెకిలయ్. జోక దెస్సు కొమ్ముల్ చి సత్తు బోడివో. జోచ ఎక్కెక్ కొమ్ముల్తె ఎక్కెక్ కిరీటల్, చి జోచి ఎత్తి బోడివోతె దేముడుక దూసుప కెర్తి ఏక్ నావోల్ తిల.

2 ఆవ్ దెకిలె జో జంతు కీసా డీసిలో మెలె, డుర్కో వాగు రగుకమ్, చి జోచ చట్టో వెలుగుచ చట్టో రిత, జోచి మూతి సింపుమ్చి మూతిచి రితి తిల. జో జంతుకయ్ జో వెల్లో అయి జోచి సెక్కి, జోచి సిజానసుమ్, ఒగ్గర్ అదికారుమ్ దిలన్.

3 జో జంతుచి సత్తు బోడివోతె ఏక్ బోడి మొర్తి రితి గాయిమ్ జా తిలి రితి

తిలి. గని మొర్తి జా గాయిమ్ అన్నె చెంగిల్ జా తిలి, చి ఆచారిమ్ జా ఒండి బూలోకుమ్చ మాన్సుల్ జో జంతుచి పట్టి గెతె తిల.

4 జో వెల్లో అయి జోచి అదికారుమ్ జో జంతుక దిలి రిసా, మాన్సుల్ జో అయిక గవురుమ్ కెర జోకర్తె తిల. "జో జంతుచో రితో కోయి నాయ్. జో జంతుతె యుద్దుమ్ కెర జోచి ఉప్పిరి కో జీసుక నెత్తిర్" మెన జంతుక గవురుమ్ కెర జోకర్తె తిల.

5 జో జంతుక కీసి చోడి తిలి మెలె, గవురుమ్ సంగనత కొడొ, దేముడుక దూసుప కెర్త కొడొ సంగితి చోడి తిలి. *దొన్ని విసా దొన్ని జొన్నా జో ఏలుప కెర్తి రితి జోక సెలవ్ తిలన్.

6 దేముడుక, చి జోచి నావ్క, చి జోచి టాన్క దూసుప కెర కెర చోడి పుట్టయ్తె తిలన్. దేముడుచి టాన్ మెలె, జోచి పరలోకుమ్తె జితన.

7 పడ్డొ అన్నె, జోక కిచ్చొ సెలవ్ తిలి మెలె, యేసు ప్రబుచయ్ జల మాన్సుల్చి ఉప్పిరి యుద్దుమ్ కెర జీసుక మెన సెలవ్ తిలి. జా పొది ఎత్తి సెకుమ్చి ఉప్పిరి, ఎత్తి ప్రెజల్చి ఉప్పిరి, ఎత్తి బానల్చి ఉప్పిరి, ఎత్తి రాజిమ్చి ఉప్పిరి, జా జంతుక అదికారుమ్ తంక సెలవ్ తిలి.

8 జా పొది ఒండి బూలోకుమ్తె జితన ఎత్తిజిన్ జోక బక్తి కెరుల. లోకుమ్ నే జెర్మయ్తె అగ్గె తెంతో తిలో విరోదుమ్ సుదల్ మార్ల మెండపిల్లచి పుస్తకుమ్తె, కచ నవ్వొ తతి నాయ్ గే, జెవ్వి జో జంతుక బక్తి కెరుల.

9 కంగ్గొ తిలోసా సూన్తు. కిచ్చొ మెలె, 10 "కక్క దెర గెచ్చుక మెన తిలె, జేవ్క దెర గెచ్చుక జయెది.

కో జలె కండాతె మొరవుక మెన తిలె, జేవ్ కండా తెన్ మొరవుక జయెది."

మెన రెగిడ్లి కోడు. ఈంజ కోడుతె కిచ్చొ జాగర్ల బెదితయ్ మెలె, ప్రబుచయ్ జల

* 13:5 13:5 మెలె, తిన్ని నర వెర్పుల్. 11:2, 3. 12:6, 14 దక.

మాన్సుల్ నిదానుమ్ తా బాదల్ ఓర్పువ
జా నముకుమ్ తెన్ తంకయ్.

బుఁయి తెంతో వెర్రి జంతు బార్
జలిసి

11 తెదొడి అన్నెక్ వెర్రి జంతు
బుఁయి తెంతో బార్ జలిసి దెకిలయ్.
మెండపిల్లచి రితి జోక దొన్ని కొమ్ముల్
తిల, గని వెల్లి అయిచి రితి జో లట్టబ్బో.

12 జో తొలితోచొ జంతుచి నావ్ తెన్
జోచి కామ్ ఈంజియ్ జర్గు కెర్తయ్,
చి మొర్తి గాయిమ్ చెంగిల్ జా తిలో
జో తొలితోచొ జంతుక ఒండి లోకుమ్,
ఒండి లోకుమ్చ మాన్సుల్ జోకర్తె రితి,
ఈంజియి జంతు జేవ్క సికడ్తయ్.

13 ఆచారిమ్చ వెల్లెల వెల్లెల కమె
ఈంజి జర్గు కెర్తయ్. కిచ్చొ మెలె,
'మాన్సుల్ దెకుత్' మెన జోచి మొక్కె
ఆగాసుమ్ పక్క తెంతో బుఁయిచి ఉప్పిరి
ఆగి నూఁయి జతి రితి కెర్తయ్.

14 అన్నె, జో తొలితోచొ జంతుచి
మొక్కె ఈంజి జర్గు కెరుక సెలవ్
తిల ఆచారిమ్చ వెల్లెల కమెచి సెక్కిక
బూలోకుమ్తె జితనక ఈంజి మోసిమ్
కెర్తయ్. దస్సి, కిచ్చొ ఏక్ మోసిమ్ కెర్తయ్
మెలె, కథ్ఠుమ్క మొర్తి సెక్కిచి గాయిమ్
జలెకి జీవ్ తిలో జో అన్నెక్ జంతుచి రిసా
ఏక్ బొమ్మ జేవ్ తెయార్ కెర జొకరుక
మెన, ఈంజి జంతు బూలోకుమ్తె
జితనక సికడ్తయ్.

15 జో తొలితోచొ జంతుచి బొమ్మ
లట్టబ్బి రితి జీవ్ దెంక కి ఈంజి జంతుక

† 13:12 13:12 నముదుమ్ తెంతో బార్ జలోసా.

‡ 13:18 13:18 గ్రీకు బాన చి ఎబ్రి బాన రెగిడ్ రితితె

ఎత్తి అచ్చుమ్క ఏక్ విలువ తయెదె. జేక, ఏక్ మాన్సుచి నావ్చ అలనాట్టు చి లెక్క బెదవుక జయెదె. 'సీరో
క్వెనర్' మెలో రోమ్ దేసిమ్చో అగ్గె వెల్లి రానో జలోసా ఎక్కిలోచి నావ్క సావ్వు పుంజో అరవయ్ సావ్వు నంబర్చి
లెక్క బెదవుక జయెదె, చి యోహాను ఈంజి పుస్తకుమ్ రెగిడ్ దినాలక్ ఇదెల్ అగ్గె, జో సీరో క్వెనర్ నంపజలనక
అల్లర్ కెర్తె తిలో. గని పడ్డె అయిల నంపజలనక అల్లర్ కెర్తె, మాన్సుల్చ నవ్వుక కి జయి లెక్క తయెదె. జేక,
కచి రిసా నంగితయ్ గే నేనుమ్.

* 14:1 14:1 'సీయోను డొంగ్రు' చి 'యెరూసలేమ్ పట్టుమ్' మెలె,
ఎత్తి అదికారుమ్ తిలో దేముడు జతి టాన్క, మెలె పరలోకుమ్క, టాలిచ నవ్వు జవుల. † 14:1 14:1
మెలె యేనుప్రబు. ‡ 14:1 14:1 ఈంజి నంబర్చి అర్దుమ్ కిచ్చొ మెలె, 'పూర్తి జలిసి', 'ఒగ్గర్ జలిసి', చి
ఇన్నె, 'యేనుక నంపజలన మొత్తుమ్చి లెక్క పూర్తి జలిసి'. ఈంజి నంబర్ జయి టాలిచి నంబర్. ఎక్కి జయి
నంబర్చి ఎత్తయి జవుల మేనుమ్ నాయ్, గని 'జోవయింక నంపజలన ఒగ్గర్ ఒగ్గర్జన్ జవుల' మెలె అర్దుమ్
ఇన్నెతెన్ కెరనుమ్చె. పూర్ణుమ్ తెంతో యూదుల్తె బార సెకుమ్లెల తిల, చి యేనుక బారజన్ సిస్సుల్ తిల. పడ్డె
జోవయింక బారజన్ సిస్సుల్ జోవయింక బారజన్ బారికుల్ జల. 144,000 మెలె, బార బార వెయిలు. మెలె
12వెయిలు x 12వెయిలు x 1000 = 144,000.

సెలవ్ తిలి, చి జో జంతుచి బొమ్మక నే
జోకర్తనక మొరవుక కి ఈంజి, జంతుక
సెలవ్ తిలి.

16 పడ్డె అన్నె కిచ్చొ ఏక్ అల్లర్ ఈంజి
అన్నెక్ జంతు, బుఁయి తెంతో బార్ జలో
జంతు, కెర్తయ్ మెలె, ఎత్తిజిని, బాల,
వెల్లో, సామాస్సారి, బీద నుదో, గతి నెంజిలో
మాన్సు. గతి జలో మాన్సు, ఉజిల్
అత్తి నెంజిలె నిర్దె ఏక్ గుర్తు కెరవంతి రితి
ఈంజి వెలయ్తయ్.

17 అన్నె, జా గుర్తు నే కెరవంతె కో కిచ్చొ
గెనుక గే వికుక గే సెలవ్ తయె నాయ్.
జా గుర్తుతె కిచ్చొ తయెదె మెలె, జంతుచి
నావ్, నెంజిలె జోచి నావ్చి గుర్తుచి అంకె.

18 ఇన్నెచి అర్దుమ్ కెరనుక జలె,
ముక్కిమ్చి గ్యానుమ్ అవ్నురుమ్.
కక్క దస్సి గ్యానుమ్ అస్సి మెలె, జో
జంతుచి అంకె లెక్క కెర్తె. †జేవ్చి అంకె
ఏక్ మాన్సుచి నావ్ తెన్ బెదితి అంకె. జా
అంకె కిచ్చొ మెలె, సావ్వు పుంజో తిన్ని
విసా సావ్వు (666).

14

మెండపిల్ల తెన్ జోచయ్ జల
మాన్సుల్ టీవెలిసి

1 తెదొడి అన్నె దెకిలయ్, ఈందె!
*సీయోను డొంగ్రె జో †మెండపిల్ల టీచ
తా, జో తెన్ అన్నె కొన్న టీవోజ
తిల మెలె, †పుంజెక్ దొన్ని విసా
చెత్తర్ వెయిల్జన్ జోవయింక నావ్,

దేముడుచి నావ్ జోవయించ నిర్దైలె రెగ్గవన్ల మాన్సుల్ తిల.

2 అన్నె, ఒగ్గర్ పానివొ సూయి జతి అవాడ్ రితిచి, ఉర్ముల్ కెర్లె వెల్లి అవాడ్ రితిచి, పరలోకుమ్ తెంతో చి, ఏక్ అవాడ్ సూన్లయ్. ఆవ్ సూన్లి అవాడ్ అన్నె కిసి తిలి మెలె, వీనెల్తె బజయ్తి అవాడ్చి రితి తిలి.

3 జలె, జేవ్ ఎతివాట్జిన్ మాన్సుల్ సింగాసనుమ్చి మొక్కె, సిజాసనుమ్చి సుట్టునంత టీవోజ తా కీచెత్తర్ జివుల్చి మొక్కె, చి *విస్సెక్ చెత్తర్జిన్ వెల్లెల మాన్సుల్చి మొక్కె, నొవి గనుమ్ గాయితె తిల. ఈంజ బూలోకుమ్చి రాజిమ్ తెంతో గెనన్ల, ఈంజేవ్ పుంజెక్ దొన్ని విసా చెత్తర్ వెయిల్జిన్ మాన్సుల్క పిట్టవ, జా గనుమ్ అన్నెకో సికుక నెత్తిర్చి.

4 ఈంజేవ్ మాన్సుల్ కీస మాన్సుల్ మెలె, సుద్ది తా, తేర్బోదల్ తెన్ నే బెదిల సుదల్, లంజె నే జలస. ఈంజేవ్ దేముడుక, మెండపిల్లక ముల్లి నాయ్, వేర 'దేముడ్లు' మెలసచి పట్టి గెతి నాయ్. ఈంజేవ్, జలె, మెండపిల్ల కేనె గెలె కి, జోచి పట్టి గెతతి. ఒండి లోకుమ్చ మాన్సుల్ తెంతో దేముడుచి మెండపిల్లక దిలి తొలి వండ్లు జతి రితి ఇన్నెయింక మెండపిల్ల అన్నె † గెననయ్ అన్నె.

5 జోచి పున్నిమ్ ఇన్నెయింకయ్ జోయ్యి దా అన్నెచి రిసా, ఇన్నెచి చోడితె కిచ్చొ అబద్దుమ్ తయె నాయ్.

సుబుమ్ కబుర్ సూనయ్తో దూత ఉడ్డితె తిలిసి

6 తెదొడి, అన్నెక్ దూతక దెకిలయ్. పొద్దు ఆగాసుమ్చి మదెనె జో ఉడ్డితె తిలొ. కిచ్చొక మెలె, బూలోకుమ్తె జితన్క, ఎత్కి రాజిమ్చక, ఎత్కి సెకుమ్చక, ఎత్కి బాసచక, కెయక

తెయక తతి పాడ్ నే జతి సుబుమ్ కబుర్ ఎత్కి ప్రెజల్క సూనవుక మెన, జా సుబుమ్ కబుర్ దెరన గెతె తిలొ.

7 అన్నె, జో గట్టిజ అవాడ్ కెరన కిచ్చొ మెన కేక్ గలన్లొ మెలె, "దేముడుక బియకెర జోక గవురుమ్ కెర! కిచ్చొక మెలె, జో ఎత్కి మాన్సుల్క పరిచ్చొ కెర సిచ్చొ కెరుక, బవుమానుమ్ దెతి గడియ పాచ జా అన్నె. అన్నె పరలోకుమ్, బూలోకుమ్, సముద్దుమ్, పానిచ ఊంటలు జెర్మయ్లొ జోకయ్ నంపజా బక్తి కెర!" మెన సాడుప కెర్లన్.

8 అన్నెక్ దూత, జలె, ఇన్నెతెన్ దొన్నిచొ, జో అగ్గెచొ చి పట్టి ఉడ్డ గెచ్చొ, కిచ్చొ మెలన్ మెలె, † "వెల్లి బబులోసు పట్టుమ్ సేడ అన్నె. ఎత్కి ప్రెజల్క జాచి లంజె ఆస, రగుమ్చి ద్రాచ రస్సుమ్ పియడ్డిసి జా." మెన సాడుప కెర్లన్.

9 పడ్డొ అన్నెక్ దూత, ఇన్నెతెన్ తిన్నిచొ; జేవ్ దొన్ని దూతల్చి పట్టి ఉడ్డితె తా కిచ్చొ మెన సంగిలన్ మెలె, "కో జో జంతుక చి జోచి బొమ్మక బక్తి కెరుల గే, జోచి గుర్తు కచి నిర్దె గే అత్తి గే, గలవనుల గే,

10 జోవయించి తప్పుక దేముడుచి కోపుమ్చి సిచ్చొచి ద్రాచ రస్సుమ్ కచితుమ్ కిచ్చొ పాని గట్ర నే బెదయ్తె, జోచి ఒగ్గర్ కోపుమ్చి గిన్నతె పివులచి పరలోకుమ్చి సుద్దిచ జోచ దూతల్చి మొక్కె, చి మెండపిల్లచి మొక్కె, ఎరన జతి ఎడ్డి జతి ఆగి లగితి వెల్లి ఆగి గొయ్తెచ బాదల్ సేడుల.

11 జేవ్చి జా సిచ్చొచి దుమ్మొకెయక తెయక బార్ జతె తా వెగ గతయ్. జో జంతుక చి జోచి బొమ్మక జొకర్లనక చి జోచి గుర్తు గలవన్లనక, రాతి మెద్దెనె కిచ్చొ నే పుండితె తవుల." మెన దూత సాడుప కెర్లన్.

§ 14:3 14:3 4:6-8. * 14:3 14:3 4:4. † 14:4 14:4 నెంజెల 'నెతోవ అన్నె'. ‡ 3 నంబరె కి అన్నె గెనన్లక గెనన్లక నెతోవలన మెనుక జయెదె. ‡ 14:8 14:8 టాలిక రోమ్ పట్టుమ్క 'బబులోసు' మెంతతి, ఈంజ 'డినయ్లీన్' చి పున్లకుమ్తె.

12 ఈంజు కోడుతె కిచ్చొ జాగర్ల బెదితయ్ మెలె, యేసు ప్రబుచయ్ జల మాన్సుల్, మెలె దేముడుచి కోడు రితి ఇండితన, యేసుచి ఉప్పిర్చి నముకుమ్తె ఇండితన, జేవ్ బాదల్ ఓర్పుప జా నిదానుమ్తె తంకయ్.

ప్రబుచి తెడిచి విస్తాంతిచి రిసా పరలోకుమ్ తెంతో అవాడ్

13 తెదొడి పరలోకుమ్ తెంతో చి ఏక్ అవాడ్ సంగిలీసి కిచ్చొ సూన్లయ్ మెలె, “ఏక్ కోడు రెగుడు. అప్పె తెంతో యేసుప్రబుచి తెడి తా కో మొరుల గే, జోవయింకయ్ చెంగిలి. మెలె, దేముడుచి నుద్ది తిలి ఆత్మ కిచ్చొ మెన్తయ్ మెలె, కిచ్చొక జోవయింక చెంగిలి మెలె, జేవ్ ఇండిలి బుద్ది జోవయింతెన్ బెదయ్ జెతయ్, చి జోవయించ కమొ కెర కేడయ్లీనక అప్పె సెలవ్ తెన్ తవుల.” మెన సంగితయ్ మెన పరలోకుమ్ తెంతో చి జా అవాడ్ సంగిలన్.

బూలోకుమ్చి పంటో

14 అన్నె ఆవ్ దెకితికయ్, ఆదె! కిచ్చొ మెలె, చొక్కీలి మబ్బు, చి జా మబ్బుతె కో వెస అస్సె మెలె, మాన్సు జా జెర్పున్ అయ్లి రగుమ్చొ ఎక్కీలో వెస అస్సె. జోచి బోడితె బజర్చి కిరీటుమ్, జోచి అత్తి వాండి కెర్రి కొడ్వెలి అస్సె.

15 తెదొడి అన్నెక్ దూత దేముడుచి గుడి తెంతో బార్ జా, గట్టిజ అవాడ్ కెరన, జా మబ్బుతె వెసిలోసాక కిచ్చొ మెన కేక్ గలన్లొ మెలె, “బూలోకుమ్చి పంటో పూర్తి పిక అస్సెచి రిసా, లాయితి నమయుమ్ జా అయ్లి. జాకయ్, తుచి కొడ్వెలి దెరన లాయి!” మెన కేక్ గలో.

16 తెదొడి మబ్బుతె వెసిలోసా బూలోకుమ్చి పంటో పూర్తి జోచి కొడ్వెలి తెన్ సీసప్ప కెర కేడయ్లన్.

బూలోకుమ్చి పంటో దూత లాయిలీసి

17 తెదొడి అన్నెక్ దూత పరలోకుమ్చి దేముడుచి గుడి తెంతో బార్ జలన్. జో వాండి కెర్రి కొడ్వెలి దెరన అస్సె.

18 తెదొడి, అన్నె, ఒత్తచి బలి దెతి టాన్ తెంతో అన్నెక్ దూత బార్ జలన్. ఈంజొ దూతక ఆగిచి ఉప్పిరి అదికారుమ్ తిలి. వాండిచి కొడ్వెలి దెర్రి దూతక కేక్ గల కిచ్చొ మెన గట్టిజ అవాడ్ కెరన ఆగిచి ఉప్పిరి అదికారుమ్ తిలో దూత సంగిలన్ మెలె, “తుచి కొడ్వెలి దెరన, ద్రాచ గెలల్చ, గొచ్చుల్చ పండ్లుచి పంటో లాయి! జా పండ్లు పిక అస్తి!” మెన సంగిలన్.

19 జాకయ్, జో దూత బూలోకుమ్తె జోచి కొడ్వెలి తెన్ బూలోకుమ్ ఎత్కిచి ద్రాచ పంటో లాయిలన్, చి దేముడుచి కోపుమ్చి సిచ్చ జతి జోచి గన్నతె గల దిలన్.

20 వట్టుమ్చి కోట ఒత్తల్తోచి జా రస్సుమ్ గెచ్చయ్తి గన్నతె పండ్లు సుదిల, చి జా సుదిలీన్చి గన్న తెంతో లోయి సూయి జా గెలి. కెర్రిచి మెలె, ఏక్ గోడొక చప్లయితి కలమ్చి ఎదిలి డొంకుతె జా లోయి బెర కెర్రి దూరిక పావిలి మెలె, దొన్ పుంజొ మయిలుచి ఎదిలి దూరి పావిలి.

15

ఆకర్క దెత సత్తు సిచ్చల్

1 వడ్డొ, పరలోకుమ్తె అన్నెక్ వెల్లి గుర్తు దెకిలయ్. జా వెల్లిచి, ఆచారిమ్చి గుర్తు కిచ్చొ మెలె, దేముడుచ సత్తు సిచ్చల్ అత్తి దెర తిల సత్తు దూతల్క దెకిలయ్. ఈంజు ఆకర్చన సిచ్చల్ జవుల. కిచ్చొక మెలె, ఇన్నెయింతెన్ దేముడుచి కోపుమ్చ సిచ్చల్ కుటుల.

2 తెదొడి కిచ్చొ దెకిలయ్ మెలె, సీస రితి బేంటచి గాడు తెన్ ఆగి బెదిల్ రితి

తిలిసి. అన్నె, జా సీన రితి టేంట తిలి గాడు సాడి, దేముడు దిల వీనెలు దెరన, జో జంతుక జీన, జోచి బొమ్మచి ఉప్పిరి చి జోచి నావ్చి ఉప్పిరి జిన్ల మాన్సుల్ టీవోజు తిలిన్ దెకిలయ్.

3 జేవ్ దేముడుచొ సేవ కెర్తాసా జలా మోసేచి గనుమ్ చి మెండపిల్లచి గనుమ్ గాయితె తిల,
 “ఎత్తి నెక్తి అదికారుమ్ తిలో దేముడు ప్రబు,

తుచ కమొ వెల్లెల, అన్నె ఆచారిమ్చ!
 ఎత్తి ఉగఉగల్క ఏలుచ కెర్తొ వెల్లొ రానొ,
 తుచ కమొ సరి జతిక, సత్తిమ్చ!

4 ఓ ప్రబుచ, తుచి నావ్ కో కి బియఁ కెర,
 గవురుమ్ కెరుక!

తుయి ఎక్కిలోయి పరలోకుమ్చి సుద్ది తిలోసా,

ఎత్తి రాజిమ్లుచ జా కెర, తుక బక్తి కెరుక జా అన్తి;

తుచ తీర్పుల్క, తుచ సిచ్చల్క
 ‘సత్తిమ్చ’ నాయిమ్చ మెన

రుజ్జు అయ్లి రిసా”
 మెన, గనుమ్ గాయిల.

5 ఇన్నెచి పడ్డొ అన్నె ఆవ్ దెకితికయ్,
 పరలోకుమ్తె దేముడుచి గుడి జలి *టంబుగుడ్డతెచి ఆగ్గుల్ తిలి తెడిక తెడిచి గది ఉగ్గి జలి.

6 జా దేవులుమ్చి తెడిక తెడిచి గది తెంతొ †సత్తు సిచ్చల్ దెర్త సత్తు దూతల్ బార్ జల. కిచ్చొ గలన బార్ జల మెలె, ‡ఉజిడచ వూర్తి సుబ్బుమ్చ బట్టల్చ పాలల్, చి జోవయించ గుండెల్తె ఎక్కెక్ బజార్ రగుమ్ పట్టల్ బందన తిల.

7 తెదొడి, శిచెత్తర్ జివుల్తె ఏక్ జివ్, జేవ్ సత్తు దూతల్క ఎక్కెక్ సత్తు బజర్చ గిన్నల్ దిలన్. జేవ్ గిన్నల్తె కిచ్చొ

* 15:5 15:5 పూర్ణమ్, యూదుల్ బయలు దేసిమి దొన్ని విసా వెర్పుల్ బుల్లె తిలి సొది, ‘ఎత్తి అదికారుమ్ తిలో దేముడుచి గుడి’ మెన జోవయింక జో తెయార్ కెరయ్లి టంబుగుడ్డ తిలి. జేవ్చి తెడిక తెడిచి గదితె జో ఆగ్గుల్ రెగిడ్ల పత్రల్ తిలి పెటి తిలి. పడ్డొ చెంగిల్ గేర్ బంద ‘దేముడుచి గుడి’ మెన ఒత్తచి తెడిక తెడిచి గదితె జా ఆగ్గుల్ తిలి పెటి తిల. † 15:6 15:6 15:1. ‡ 15:6 15:6 ఎత్తి అదికారుమ్ తిలో దేముడుచి గుడితె పూజ్జు దన పాలల్ గలన దన పట్టల్ బందన తవుల.

బెర తిలి మెలె, కెయఁక తెయఁక జితో దేముడుచి కోపుమ్చి సిచ్చ.

8 జా దేముడుచి గుడిచి తెడిక తెడిచి గదితె దేముడుచి ఉజిడి తెంతొ చి జోచి నెక్తి తెంతొ చి దుమ్మొ బెర తిలి, చి జేవ్ సత్తు దూతల్ దెర్ల సత్తు సిచ్చల్ కుట్టితె ఎదక, కోయి జా దేముడుచి గుడిచి తెడిక తెడిచి గదితె పెసుక నెత్తిర్ది.

16

సత్తు సిచ్చల్ సత్తు దూతల్ బూలోకుమ్తె సువ దిలిసి

1 అన్నె కిచ్చొ సూన్లయ్ మెలె, ఏక్ వెల్లి అవాడ్ పరలోకుమ్తెచి జా దేముడుచి గుడి తెంతొ సత్తు దూతల్క, “తుమ్ గెచ్చు, దేముడుచ సత్తు గిన్నల్చి కోపుమ్చి సిచ్చ బూలోకుమ్తె సువ గెల.” మెన సంగిలన్.

2 జాకయ్, తొలితొచొ దూత గెచ్చు, బుయిచి ఉప్పిరి జోచి గిన్నచి సిచ్చ సువ దిలన్. జో జంతుచి గుర్తు కెరవన జోచి బొమ్మక జొకర్ల ఎత్తి మాన్సుచి అఁగి ఒగ్గర్ అల్లర్చ గవ్వో జల.

3 దొన్నిచొ దూత జోచి గిన్నచి సిచ్చ సముద్రుమ్తె సువ దిలన్, చి మొర్లొ మాన్సుచి లోయిచి రితి జలి, చి సముద్రుమ్తెచి ఎత్తి జివుల్ మొర్ల.

4 తిన్నిచొ దూత జోచి గిన్నచి సిచ్చ గడ్డొచి ఉప్పిరి, ఊటల్చి ఉప్పిరి సువ దిలన్, చి లోయి జా గెల.

5 పితి పాని లోయి జతి సిచ్చుచొ జో దూత కిచ్చొ సంగిలిసి సూన్లయ్ మెలె,

“తుయి అగ్గె తిలోసా, అప్పె తతోసా, పరలోకుమ్చి సుద్ది తిలోసా,

తుచ తీర్పులు సిచ్చలు ఎత్తి సరిగా అన్తి.

6 కిచ్చొక మెలె, తుచయ్ జల మాన్సుల్చి లోయి, చి తుచ కబుర్లు సంగిల మాన్సుల్చి లోయి

విరోదుమ్ జల మాన్సుల్ సుచితికయ్, జేవ్ తుచ మాన్సుల్చి లోయి సుచిలసయ్ పింక మెన జోవయింకయ్ లోయి దా అస్సిసి.

జోవయింక జెతి బట్వాడ్, జా! జోవయించి పాపుమ్ జెచ్చి కతతి!”

మెన జో దూత సంగిలన్.

7 తెదొడి బలి దెతి టాన్ కిచ్చొ మెన కేక్ గల్లీన్ సూన్లయ్ మెలె,

“నిజుమి, ఎత్తి, సెక్తి అదికారుమ్ తిలో దేముడు ప్రబు,

తుచ తీర్పులు సిచ్చులు సరిగచ, నత్తిమ్చ!”

మెన సంగితి సూన్లయ్.

8 తెదొడి, చెత్తరచొ దూత పొద్దుచి ఉప్పిరి జోచి గిన్నచి సిచ్చ సువ దిలన్, చి జాచి ఆగిక మాన్సుల్క డయిక మెన, పొద్దుక సెలవ్ అయ్లి.

9 జేవ్చి ఒగ్గర్ వేడిక మాన్సుల్ డడ్డిల, చి దేముడుచి నావ్ దూసుచ కెర్ల. కిచ్చొక మెలె, ఈంజేవ్ సిచ్చల్చి ఉప్పిరి జోక అదికారుమ్ అస్సె, చి ఈంజేవ్ సిచ్చల్ జో దిలన్చి రిసా. అస్సె, జేవ్ కెర్ల పాపల్క విసారుమ్ జతి నాయ్, ముల్తి నాయ్, చి జోక గవురుమ్ దెతి నాయ్.

10 పాచ్చొ దూత జోచి గిన్నచి సిచ్చ, జో వెరి జంతుచి సిజాసనుమ్చి ఉప్పిరి సుచిలన్, చి జంతుచి రాజిమ్ అందర్ జా గెలి. మాన్సుల్, జలె, జేవ్క అయ్లి నైమల్చి రిసా, జోవయించ జిబుల్ చప్పన్తె తిల.

11 జోవయించి నొప్పి జోవయించ గావ్వొచి రిసా పరలోకుమ్ తిలో దేముడుక సాపెనల్ సంగిల, గని జేవ్

కెర్ల కమొక విసారుమ్ జతి నాయ్, ములిత్ నాయ్.

సావ్వుచొ దూత సువ దిలి సిచ్చ

12 సావ్వుచొ దూత జోచి గిన్నచి సిచ్చ *యూప్రటీసు మెలి వెల్లి గాడుచి ఉప్పిరి సుచ దిలన్, చి తూర్పు పక్క తెంతో జెత రానల్ జెతికయ్ వాటు తెయార్ జతి రిసా జాచి పాని అట్టు గెలి.

13 పడ్డొ †వెల్లొ జో అయిచి చోడి తెంతో, ‡వెరి జో జంతుచి చోడి తెంతో అన్నెక్ దేముడుచ కబుర్లు సంగిలోసా ఆవ్ మెన అబద్దుమ్క సంగితోసాచి చోడి తెంతో మండుకుల్చ రిత తిన్ని బూతల్ బార్ జలిసి దెకిలయ్.

14 జేవ్, నయ్తాన్చి నేవ కెర్ల బూతల్ జవుల, చి వెల్లెల వెల్లెల కమొ కెర కెర, ఒండి లోకుమ్చ రానల్తె గెతతి. కిచ్చొక మెలె, ఎత్తి, సెక్తి అదికారుమ్ తిలో దేముడు జోచి సెక్తి అదికారుమ్ దెకయ్తి వెల్లి సిచ్చ కెర్లి దీసిచి యుద్దుమ్క తెయార్ జతి రిసా, జేవ్ రానల్క ఎక్కితె కుడవుక.

15 జలె, ఎబ్లి బాస తెన్ *‘హార్మెగిడ్డొసు’ మెలి టాన్తె జేవ్ రానల్క జేవ్ బూతల్ కుడయ్ల.

16 యెసుప్రబు సంగిలిసి ఏక్ కిచ్చొ మెలె, “ఈందె, మాన్సుల్ నే ఉచర్లె పొది కిసి చోరు జెయెదె గే, దస్సి ఆవ్ జెయిందె. అయ్లె, కో తెలివి తా, డుమ్డయ్ నే జతె లాజ్ నే బెట్టిత్ రితి జోవయించ పాలల్ సుద్ది తతి రితి దెకసుల గే, జోవయింకయ్ చెంగిలి” మెన ప్రబు సంగితయ్.

17 సత్తుచొ దూత జోచి గిన్నచి సిచ్చ ఆగాసుమ్చి వాదుచి ఉప్పిరి సువ దిలన్, చి పరలోకుమ్చి దేముడుచి గుడి తెంతో, సిజాసనుమ్ తెంతో, గట్టిజ

* 16:12 16:12 యూదుల్చి దేసిమ్క జా గాడు తూర్పు పక్కయ్ తయెదె. ఇదిల్ దూరి తయెదె. † 16:13

16:13 సయ్తాన్ జయెదె. 12:3, 9. ‡ 16:13 16:13 13:1 దెక. § 16:13 16:13 బుయె తెంతోచొ

జంతు; 13:14, 19:20. * 16:15 16:15 ‘హార్మెగిడ్డొసు’ ఏక్ వేల యూదుల్చి దేసిమ్క ఉత్తర పక్కచి ‘హార్మెగిడ్డొసు’ మెలి టాన్ జయెదె. జేవ్ రాసలు సుకా గెలి యూప్రటీసు గాడ్ వాట్ జెవుల, గెద. జా యూప్రటీసు వెల్లి గాడు యూదుల్చి దేసిమ్క తూర్పు పక్క జయెదె.

అవాడ్ తెన్ కిచ్చొ సంగిలన్ మెలె, “జర్గు జలి!” మెలన్,

18 చి బిజిలి మొల్కిలి, అవాడ్ అయ్లి, ఉర్ముల్ కెర్లి, చి ఒగ్గర్ వెల్లి బూకంపుమ్ అయ్లి. కెర్లి వెల్లిచి మెలె, మాన్సుల్ బూలోకుమ్తె తొలితో తిలిసి తెంతో కెయ్య నే జర్గు జలి ఎదిలి బూకంపుమ్ అయ్లి.

19 జా బూకంపుమ్ జతికయ్, వెల్లి పట్టుమ్ తిన్ని వాటల్ జా గెలి, చి దేముడుక నేన్ల మాన్సుల్చ రాజిమ్లచ పట్టల్ పాడ్ జల. చి జోచి ఎదివాట్ కోపుమ్చి సిచ్చుచి గిన్నయ్ తిలిసి జా †వెల్లి బబులోసు పట్టుమ్చ మాన్సుల్ పూర్తి పియ గెల్లి రితి, దేముడు నే పచ్చితె జర్గు కెర్లన్.

20 పడ్డొ ఎత్తి డిబ్బ ఉట్ట నిగిల్ రితి జా డిస్తి నాయ్, చి కేన్ డొంగుర్లు డిస్తి నాయ్.

21 అన్నె, వెల్లి వెల్లెల కరపత్తల్ ఆగాసుమ్ తెంతో మాన్సుల్చి ఉప్పిరి సేడ్ల. ఏక్ ఏక్ కరపత్తర్ దొన్ని చిసా దెసు కేజిల్ చి ఎదిలి జాడు తవుల, చి జా సిచ్చ కెర్లి అల్లర్ కెర్లి మెలె, ఒగ్గర్ ఒగ్గర్ అల్లర్చి రిసా, జా సిచ్చుచ దెబ్బల్క మాన్సుల్ దేముడుక సాపెనల్ కెర్ల.

17

వెల్లి లంజెచి తేర్బోద మెన వెల్లి బబులోసు

1 తెదొడి, సత్తు గిన్నల్ దెర తిల సత్తు దూతల్తె ఏక్ దూత అంచితె జా కెర కిచ్చొ సంగిలన్ మెలె, “తుయి ఇన్నె వెగ జే! ఒగ్గర్ పానివొచి ఉప్పిరి వెస తిలి వెల్లి లంజె జలి తేర్బోద సిచ్చ జతిసి దెకయిందె.

2 జాచి తెన్ బూలోకుమ్చ రానల్ లంజె జా అస్తి, చి జాచి లంజెచి ద్రాచ రన్నుమ్ పియ పియ, బూలోకుమ్తె జితన మచ్చయి అస్తి” మెన సంగిలన్.

3 తెదొడి జో దూత అంక ఏక్ బయిలె కడ నిలన్, చి దేముడుచి సుద్ది తిలి ఆత్మసెక్కి కిచ్చొ దెకిలయ్ మెలె, ఒగ్గర్ ఎరన తిలి జంతుతె ఏక్ తేర్బోద వెస తిలి. జా జంతు కిసా తిలో మెలె, జాచి ఆగ్ ఎత్తిచి ఉప్పిరి దేముడుక దూసుప కెర్ల నవ్వు, కొదొయ్ని గలన తిలన్. జాక సత్తు బోడివొ, దెన్ను కొమ్మల్ తిల.

4 జా తేర్బోద్ *ఉడ రంగు చి ఎరన రంగుచ పాలల్ గలన తా, బజరి, రత్నాలు, ముత్యల్, తియన తిలి. జాచి అత్తి కిచ్చొ తిలి మెలె, జాచి లంజెచ వెట్కారలు కిడ్లు బెర తిలి బజర్చి గిన్న దెర తిలి.

5 పడ్డొ జాచి నిర్దె గుట్టుచి ఏక్ నావ్ రెగ్ల తిలి. †వెల్లి బబులోసు పట్టుమ్, లంజె జల తేర్బోదల్క అయ్యసి, బూలోకుమ్చ వెట్కారల్క అయ్యసి’ మెలి నావ్ రెగ్ల తిలి.

6 అన్నె, జా తేర్బోద కిసి తిలిసి దెకిలయ్ మెలె, దేముడుచ జల మాన్సుల్చి లోయిక, చి యేసుచి నావ్చి రిసా విరోదుమ్ సుదల్ మార్ల మాన్సుల్చి లోయిక, జా తేర్బోద మచ్చ తిలి. జా తేర్బోదక దెక, బలే ఆచారిమ్ జలయ్.

7 గని దూత అంక, “కిచ్చొక ఆచారిమ్ జతసి? జా తేర్బోదచి రిసా, చి సత్తు బోడివొ దెన్ను కొమ్మల్ తిలి, జా వెసిలో జంతుచి రిసాచి గుట్టుచి అర్దుమ్ తుక సంగిందె.

† 16:19 16:19 ఈంజ ‘డిసయ్లిన్’ చి పుస్తకుమ్తె కేన్ సుట్టు ‘బబులోసు పట్టుమ్’ మెలె, రోమ్ పట్టుమ్క టాలి జతయ్, బెర్లె. గని పడ్డొ తిల అన్నె దన అల్లర్చ పట్టల్ రాజిమ్లుచి రిసా కి ఉచరుక జయెదె. * 17:4

17:4 ఉడ రంగు మెలె, ఎరన చి నిలిమ్ రంగు బెదయ్లె ఉడ రంగు జయెదె. † 17:5 17:5 ‘వెల్లి బబులోసు’ మెలె, రోమ్ పట్టుమ్క టాలి జతయ్. జా పట్టుమ్ జా రాజిమ్చ రానల్ నంపజలనక జేవ్ పొదులె ఒగ్గర్ అల్లర్ కెర్ల తిల. ఒత్త తెంతో ఒగ్గర్ రాజిమ్లుచ కి దన అల్లర్ కెర అస్తి.

8 జలె, తుయి దెకిలో †జంతు అగ్గె తిలన్, గని అప్పె నాయ్, చి కీమట్టు నెంజిలి జా వెల్లి గొయి తెంతో జో వెగ జా, నాసెనుమ్ జా గెచ్చుక అస్సె. జలె, 'పరలోకుమ్తె జా జితు' మెన లోకుమ్ నే జెర్తయిలి అగ్గె తెంతో మెండపిల్ల జలో యేను ఏక్ *పుస్తకుమ్తె జోక నంపజతనచ నావ్సొ రెగ్గ అస్సె. జలె, బూలోకుమ్తె జితనతె కచ నవ్సొ జా పుస్తకుమ్తె తయె నాయ్ గే, జో జంతుక దెకుకయ్ ఆచారిమ్ జవుల. జో తిలో, అప్పె నాయ్, గని పడ్డొక అన్నె బార్ జయెదె.

9 †ఈంజ ఎత్తి అర్దుమ్ కెరనుక జలె, బుద్ది గ్యానుమ్ అవ్సురుమ్. జంతుచ సత్తు బోడివొ కిచ్చొ జవుల మెలె, జా తేర్బోద వెన తిల †సత్తు మెట్టల్.

10 అన్నె, సత్తు రానల్ జేవ్ జవుల. జేవ్ రానల్తె పావ్జెన్ కేడ అస్తి, ఎక్కిలో అప్పె అస్సె, చి అన్నెక్కో జెంక నేతయ్, అన్నె, జో అయ్లె, ఎక్కి గడియకయ్ తయెదె.

11 అగ్గె తిలో అప్పె నెంజిలో జో జంతు, జలె, జో అట్టుచొ రానొ జయెదె, గని జేవ్ అన్నె సత్తుజినతె బెదితోసా జయెదె, చి జో నాసెనుమ్ జా గెచ్చుక అస్సె.

12 †పడ్డొ తుయి దెకిల దెన్ను కొమ్ముల్ కిచ్చొ జవుల మెలె, ఏలుప కెర్తి అదికారుమ్ నేతయ్ గని అదికారుమ్ దొర్కు జా దెన్నుజిన్ రానల్ జవుల. జేవ్చి సమయుమ్ జా అయ్లె, జో జంతు తెన్ ఎక్కి గడియకయ్ రానల్ జా ఏలుప కెర్తి సెక్తి జేవ్చి దొర్కు జయెదె.

13 ఈంజేవ్ ఎక్కి ఉద్దెనుమ్ తా, జో జంతుచి అత్తి జోవయించి సెక్తి

జోవయించి అదికారుమ్ సొర్ప కెర దా, జోవయించి కామ్ జర్గు కెర దెవుల.

14 ఈంజేవ్ జో మెండపిల్లచి ఉప్పిర్ యుద్దుమ్ కెరుల, చి †మెండపిల్ల జోవయించి ఉప్పిరి జినెదె. కిచ్చొక మెలె, ప్రబుల్క ప్రబు, రానల్క రానొ జో, చి జో తెన్ తిలనక కిచ్చొ మెనుక జయెదె మెలె, జో నిసాన బుకార్లన, జోక నిదానుమ్ తిలన మెన జో దూత అంక అర్దుమ్ సంగిలన్.

15 †తెదొడి అన్నె, జా తేర్బోద వెన తిలి టాన్ తుయి దెకిల పానివొ కిచ్చొ జవుల మెలె, ప్రెజల్, జనాబ్, రాజిమ్లు అన్నె బాసల్ కొడొ జతనక.

16 పడ్డొ, తుయి దెకిల దెన్ను కొమ్ముల్ జల రానల్, జలె, జంతు తెన్ బెద, లంజె జా తిలి తేర్బోదక జేవ్ ఒగ్గర్ విరోదుమ్ జవుల. జేవ్ జాక కీపాడి కెర, డుమ్డి కెర, జాచి ఆగెచి సిద్ద కాకెర, జాక ఆగితె డయ్ గెలుల.

17 కిచ్చొక మెలె, దేముడు సంగిల కొడొచి కామ్ పూర్తి నెరవెర్చుప జతె ఎదక, జేవ్ ఎక్కి మెన్ను తా జోవయించి ఇస్తుమ్ జర్గు కెరుక మెన, జో జంతుచి అత్తి జోవయించి రానల్చి సెక్తి అదికారుమ్ జేవ్ సొర్ప కెర దా, జోచి కామ్ జర్గు కెరుక మెన, దేముడుయి జర్గు కెర అస్సె.

18 అన్నె, తుయి దెకిలి తేర్బోద కొన్ని మెలె, బూలోకుమ్చ రానల్చి ఉప్పిరి అదికారుమ్ తిలి *వెల్లి పట్టుమ్ జయెదె," మెన దూత అంక సంగిలన్.

18

‡ 17:8 17:8 ఏక్ వేల రోమ్ దేసిమ్చ నిరో కైసర్ రానొక; మెలె వెల్లో రానొక; 'జంతు' మెన సంగితయ్ మెన నగుమ్జిన్ ఉచర్తతి. జో నిరో నంపజలనక ఒగ్గర్ అల్లర్ కెర తా అత్తొ కెరన్, గని జోవయించి బుద్ది తిలో దేమితియన్ మెలోసా సగుమ్ వెర్చల్ గెలి పడ్డొ కైసర్ రానొ జలన్, చి జో కి నిరోచి రితి నంపజలనక ఒగ్గర్ అల్లర్ కెర్తన్. జో కి 'ఆవ్ ఎత్తి అదికారుమ్ తిలో దేముడు' మెన సంగితె తిలన్. అన్నె దన అల్లర్ కెర్తన పడ్డొ తిల.

§ 17:8 17:8 11:7 డక. * 17:8 17:8 3:5, 13:8 డక. † 17:9 17:9 రోమ్ పట్టుమ్ సత్తు మెట్టల్చి ఉప్పిరి తిలి. ‡ 17:14 17:14 యేనుప్రబు, గెద. § 17:16 17:16 పడ్డొ రోమ్ పట్టుమ్చి రాజిమ్ దన అల్లర్ జలి. * 17:18 17:18 జేవ్ పొదులె రోమ్ పట్టుమ్క దస్సి సెక్తి తిలి. పడ్డొ అన్నె సగుమ్ దేసిమ్లు దన అల్లర్ కెర అస్సి.

బబులోను చి తీర్పు

1 ఇన్నెచి పడ్డొ కిచ్చొ దెకిలయ్ మెలె, అన్నెక్ దూత పరలోకుమ్ తెంతొ ఉత్త అయ్లీసి దెకిలయ్. జోక ఒగ్గర్ అదికారుమ్ తిలి. జోచి ఒగ్గర్ ఉజిడిక ఒండి బూలోకుమ్ ఉజిడ్ జా గెలి.

2 పడ్డొ గట్టిజ అవాడ్ కెరన కిచ్చొ మెన ఒర్న దిలో మెలె,

“వెల్లి బబులోను సేడ గెచ్చు అస్సె, సేడ గెచ్చు అస్సె.

జా బూతల్ జితి టాన్ జా అస్సె; ఎత్కి వెట్కారుమ్చి బూతుమ్ రకితి టాన్,

ఎత్కి గర్చి పిట్ట రకితి టాన్ జా అస్సె.

3 కిచ్చొక మెలె, జేవ్చి లంజె ఆసచి రస్సుమ్ పియ

రాజిమ్లు ఎత్కిచ మాన్సుల్ మచ్చు గెచ్చు అస్తి, చి

జేవ్ తెన్ ఈంజ లోకుమ్చ రానలు లంజె జా అస్తి,

చి జేవ్చి పాపుమ్చ ఆసల్చి సామ్సారుమ్క

ఈంజ లోకుమ్చ సావుకర్లు సామ్సారుమ్ జా అస్సె.”

మెన జో దూత సంగిలన్.

4 తెదొడి, పరలోకుమ్ తెంతొ చి అన్నెక్ అవాడ్ కిచ్చొ సంగిలిసి సూన్లయ్ మెలె,

“జాచ పాపల్తె తూమ్ నే బెదితి రిసా, జాచ సిచ్చల్చ దెబ్బల్ తుమ్క నే జెతి రిసా

అంచ పైజల్, జాచి తెంతొ తుమ్ బార్ జా.

5 జా కెర్ల పాపల్ కెత్తి మెలె, ఆగాసుమ్ ఎద పాచెత్ రితి కొట్టు జతతి, చి జా కెర్ల జాచ పాపల్

దేముడు నే పచ్చితె ఏదస్ట కెర్తయ్.

6 జా దిలి ఎదిలి జాక దా, జా కెర్ల కమెచి కంట అన్నె జాక దొన్ని

వాటల్ కెర, జా కయ్లి గిన్నచి విస్సుమ్చి జా పితి రితి

అన్నె దొన్ని వాటల్ కలోవ దాస.

7 జాక జయ్యి కిసి గవురుమ్ ఉచరన పోకిరి కెరన్లి కొల్లి

జయ్యి నొప్పి జా ఏడ్డి రితి, సిచ్చ దాస. ‘ఆవ్ రాని జా వెస అస్సి,

రండెల్ మాన్సు నెంజి, ఆవ్ కెయ్క ఏడుకుడు జంక నాయ్’

మెన జాచి పెట్టి ఉచరంతయ్.

8 జాక, ఎక్కి దీసి, జాక సిచ్చల్చ దెబ్బల్ లయ్యుల.

కిచ్చొ సిచ్చల్ మెలె, మొర్పు, దుకుమ్, చి కరు జతిసి, చి ఆగితె డడ్డ గెచ్చెది.

కిచ్చొక మెలె, జాక తీర్పు కెర సిచ్చ దెత్తొ ప్రబు జలో దేముడు సత్తుచొ”

మెన జా అవాడ్ సంగిలన్.

వెల్లి బబులోనుక నంపజల మాన్సుల్

9 దస్సి, వెల్లి బబులోను తెన్ లంజె జా పోకిరి జల బూలోకుమ్చ రానల్ జా

డడ్డితి సిచ్చుచి దుమ్మొ దెక, జాచి రిసా ఏడుకుడు జవుల.

10 జా సిచ్చ జత బాదల్క బియ్ కెర, దూరి టీవోజ తా కిచ్చొ మెన ఏడుల మెలె,

“అయ్యె! అయ్యె! తుయి వెల్లి పట్నుమ్, తుయి వెల్లి బబులోను పట్నుమ్!

ఎక్కి గడియయ్ తుచి సిచ్చ జర్లు జలి!”

మెన ఏడుల.

11 అన్నె, బూలోకుమ్చ సావుకర్లు జాచి రిసా ఏడుకుడు జవుల. జా గెలె, జాచి సామన్ అన్నె కోయి గెంతి నాయ్ చి రిసా ఏడుకుడు జవుల.

12 కిస సామన్లు మెలె, బజార్ సామన్, వెండి సామన్, రత్నాలు, ముత్యల్,

చెంగిలి బట్ట, బట్టతె దెరయ్తి ఊద రంగు, సిల్కా బట్ట, ఎరన బట్ట, ఎత్కి

రగల్ వాసనచి దారు, ఏనుగు కోరల్క తెయార్ కెర్ల వస్తుల్, ఒగ్గర్ విలువచి

దారుక తెయార్ కెర్ల వస్తుల్, కంచు సామన్, ఇనుము సామన్, సూటి రగల్

పత్రల్క కెర్లి సామన్,

13 * దాల్చిమ్ చెక్కల్, బోడి గాఁనంతి చెంగిల్ వాసిన తేలు, దూపుమ్, † అత్తర్ తేలు, గందుమ్, ద్రాచ రస్సుమ్, ‡ మాములుమ్ తేలు, మెత్తన పీట్టు, గోదుము, సొమ్ముల్, మెండల్, గోడలు, రదుమ్లు, గొతిమాస్సుల్; మెలె మాస్సుల్చ జివుల్.

14 ఇన్నెతెన్ కిచ్చొ ఏక్ కోడు బెదితయ్ మెలె, “తుయి పెట్టి ఆన జలి పంటో తుక ముల దా అస్సె, అన్నె తుక కెయ్క అన్నె నే దొర్కు జతి రితి, తుచి సుక్కుమ్ తుచి బడాయ్ జలిన్ పూర్తి గెలి.”

15 జా లంజెచి పట్టుమ్తె జోవయించి సామన్ దొర్కు కెరన ఇన పుస్తకల్ వికిల సావుకర్లు కి దూరి టీవోజ, జాచి సిచ్చచ బాదల్క బియ్ కెర, ఇసి మెన ఎదార్డుమ్ ఏడుకుడు జవుల.

16 “అయ్యో! అయ్యో! చెంగిల చెంగిల బట్టల్, ఊద రంగుచ, ఎరన రంగుచ పాలల్ గలన, బజరి, రత్నాలు, ముత్యల్ తియన్లి వెల్లి పట్టుమ్ కెద్ది నస్తుమ్ జా అస్సె!

17 ఎక్కి గడియయ్ జాచి సొమ్సారుమ్ పూర్తి పాడ్ జా అస్సె!” మెన ఏడుకుడు జవుల.

పడ్డో, ఓడల్ ఇండయ్త ఎజోమాన్లు, సముద్రుమ్తె గెతన, ఓడల్తె కూలి కామ్ కెర్తన, చి సముద్రుమ్ జిన బియ్యారి కెర్త ఎత్తిజిన్ దూరి టీవోజ,

18 జా లంజెచి పట్టుమ్ డడ్డితిన్చి దుమ్మొ దెక, కిచ్చొ మెన ఒర్చిల మెలె, “ఈంజ పట్టుమ్చి ఎదిలి కేన్ పట్టుమ్ అస్సె?” మెన దుకుమ్క కేక్ గల.

19 జోవయించ బోడిలె దూడి వించన ఏడుకుడు జా కిచ్చొ మెన అన్నె కేక్ గల మెలె,

“అయ్యో! అయ్యో! సముద్రుమ్తె గెత ఓడల్ తిలన ఎత్తిజిన్ జేవ్చి సొమ్సారుమ్క సొమ్సారుమ్ జలి వెల్లి పట్టుమ్

కెద్ది నస్తుమ్ జా అస్సె! ఎక్కి గడియయ్ పూర్తి నాసెనుమ్ జా గెచ్చు అస్సె!

20 ఓ పరలోకుమ్, దేముడుచ ఓ మాస్సుల్, జోచ బారికుల్ జలన, జోచ కబుర్లు సంగిలన, జాచి రిసా సర్ద జా!

కిచ్చొక మెలె, జా తుమ్క అల్లర్ కెర్లి రిసా, దేముడు జాక తీర్పు కెర, సిచ్చ కెర అస్సె.” మెన కేక్ గల్ల.

21 తెదొడి, సత్తుచొ ఏక్ దూత ఎక్కిలో తిర్వేలిచి ఎదిలి జాడుచి ఏక్ పత్తురు ఉక్కుల, సముద్రుమ్తె గల కిచ్చొ మెన సంగిలన్ మెలె, “ఓ బబులోను వెల్లి పట్టుమ్, తుయి ఇసి డీన గలి జా అన్నె కెయ్క కి డీసె నాయ్.

22 అన్నె వీన బజాయ్తి అవాడ్, ఎత్తి బజెన బజాయ్తిసి, మూరి పుజీతిసి, నప్పిర్మూరి పుజీతిసి, అప్పె తెంతో కెయ్క కి తుచితె కో సూన్తి నాయ్. అన్నె, కిచ్చొ రగుమ్ కామ్ కెర్తన కి తుచితె కెయ్క అన్నె తతి నాయ్. అన్నె, తిర్వేలి బులితి అవాడ్ తుచితె కెయ్క అన్నె కోయి సూన్తి నాయ్.

23 అన్నె, తుచితె కేన్ దీవుచి ఉజిడి అన్నె కెయ్క లగె నాయ్.

* 18:13 18:13 తియన వస్తువల్తె రోసుల్తె గలుక జయెదె. † 18:13 18:13 ఏక్ రగుమ్ చెంగిల్ వాసిన తేలు. ‡ 18:13 18:13 జా దస్సి ఒలివ పండ్లుచి తేలు వాడిక కెరుల.

అన్నె, పెండ్లి ఉబెడొ పెండ్లి ఉబేడ్చి
 అవాడ్లు
 తుచితె అన్నె కెయఁక కో నూన్తి నాయ్.
 కిచ్చొక మెలె, తుచ సావుకర్లు ఒండి
 లోకుమ్క వెల్లో జా తిల,
 చి తుచి మెంగుర్ కామ్క ఎత్తి,
 రాజిమ్లుచ మాన్సుల్ మోసిమ్
 జా గెల.
 24 అన్నె, జేవ్తెయి దేముడుచ కబుర్లు
 సంగితనచి,
 జోవయించయ్ జల మాన్సుల్
 ఎత్తిజినచి,
 అన్నె బూలోకుమ్తె మాన్సు మార్లస
 ఎత్తిజినచి
 లోయి జా పట్టుమ్తె డీసిలిచి సిచ్చ
 జలి”
 మెన సత్తుచొ జో దూత సంగ
 నముద్దుమ్తె వెల్లో పత్తురు గలిలన్.

19

జా లంజెచి పట్టుమ్క ప్రబు సిచ్చ
 కెర్లిసి

1 ఇన్నెచి పడ్డొ, పరలోకుమ్తెచ
 ఒగ్గర్జిన్ జనాబ్ జట్టు తెన్ కేక గలిన్చ
 అవాడ్లు నూన్లయ్. కిచ్చొ మెన కేక గల
 మెలె,

“*దేముడుక జెయ్యి!
 రచ్చన, గవురుమ్, సెక్కి, అమ్చొ
 దేముడుతెయి అస్సె!

2 “జోచ తీర్పులు సిచ్చలు సత్తిమ్చ,
 సరిగచ.

జేవ్చ లంజె కమ్మొక ఒండి లోకుమ్క
 నానెనుమ్ కెర్లి జా వెల్లి లంజెక

జో తీర్పు కెర సిచ్చతె గల అస్సె,
 చి జోచ సేవ కెర్తనచి లోయి జా నువ దిలి
 రిసొచి సిచ్చ
 జో నెరవెర్పువ కెర అస్సె.”

* 19:1 19:1 జోవయించి బాస తెన్ ‘హల్లెలూయా!’ మెన కేక గలుల, ‘ఎత్తి అదికారుమ్ తిలొ దేముడుక
 జెయ్యి! మెలి అర్దుమ్ తెన్ † 19:4 19:4 4:4 దెక. ‡ 19:4 19:4 4:6-8 దెక. § 19:7 19:7
 ‘మెండపిల్లక గెతి బూలి’ మెలి కిచ్చొ అర్దుమ్ తయెదె మెలె, యెనుక్కిసుక నంపజలన మొత్తుమ్, నంపజలన
 మొత్తుమ్చి సంగుమ్, ఎవెను కచి ఉత్తుమ్ 5:31-32, యిర్మీయా 2:1-3, యెసయా 49:18, 69:10. పడ్డొ జేవ్
 నంపజలన గెచ్చ జుంక తిలి నొవి యెరుసలేమ్, మెలి పరలోకుమ్చి పట్టుమ్క కి ‘మెండపిల్లచి బూలి’ మెనుల.
 21:9, 10.

మెన కేక గల,
 3 అన్నెక్ సుట్టు ఇసి మెన కేక గల,
 “దేముడుక జెయ్యి!
 జా లంజె జలి వెల్లి పట్టుమ్ డడ్డ గెలి
 దుమ్మొ
 నే కుట్టితె కెయఁక తెయఁక వెగ
 గెతయ్!”
 మెన కేక గలిల.

4 తెదొడి †విస్సెక్ చెత్తర్జిన్ వెల్లెల
 మాన్సుల్, చి ‡సింగాసనుమ్చి
 సుట్టునంత టీవొజ తా చెత్తర్ జివుల్
 సెర్లు సేడ, సింగాసనుమ్తె వెస తిలొ
 దేముడుక,
 “అమేన్! దేముడుక జోబర!”
 మెన సంగ బక్తి కెర్ల.

5 అన్నె, కిచ్చొ మెన సంగ సిజాసనుమ్
 తెంతొ ఏక అవాడ్ అయ్లి మెలె,
 “తుమ్ జోచ సేవ కెర్తన, తుమ్ జోక
 బితన, బాల వెల్లో ఎత్తిజిని,
 అమ్చొ దేముడుచి గవురుమ్ గాయ!”
 మెన అవాడ్ అయ్లి.

మెండపిల్లచి పెండ్లి
 6 తెదొడి ఒగ్గర్ పానివొ నూయి జతి
 అవాడ్ అయ్లి రితి, ఒగ్గర్ ఉర్ముల్
 కెర్లిన్చి అవాడ్ అయ్లి రితి, ఒగ్గర్జిన్
 జనాబ్చ అవాడ్లు రితి నూన్లయ్. కిచ్చొ
 మెన కేక గల్ల మెలె,
 “ఎత్తి సెక్కి అదికారుమ్ తిలొ దేముడుక
 జోబర!
 ప్రబు జలొ అమ్చొ దేముడు ఏలువ
 కెర్తయ్!

7 మెండపిల్లచి పెండ్లి జతి సమయుమ్
 జా అయ్లి, చి
 †పెండ్లి ఉబేడ్ తెయార్ కెరన అస్సెచి
 రిసొ
 ఆవ్ సర్లనంతొనుమ్ జా, జోక గవురుమ్
 కెరుమ!

8 పెండ్లి ఉబేడ్ చొక్కిల్చి పూర్తి సుద్దిచి చెంగిలి బట్ట గలనుక మెన

జాక దిల!" మెన కేక్ గల్ల. జా చెంగిల్ బట్టక కిచ్చి అర్దుమ్ మెలె, *ఎత్తి అదికారుమ్ తిలొ దేముడుచ జల మాన్సుల్చ పున్నిమ్చ కమొ జవుల.

9 అన్నె జో దూత అంక కిచ్చొ సంగిలన్ మెలె, "ఇసి రెగుడు, 'మెండపిల్లచి పెండ్లి విందుతె బుకార్లనక చెంగిలి' మెన రెగుడు" మెలన్, చి అంక అన్నె, "ఈంజ కొడొ దేముడుచి సత్తిమ్చ కొడొయ్" మెలన్.

10 తెదొడి, బక్తి కెరుక మెన, జో దూతచి చట్టె సెర్ను సేడ్లయ్, గని అంక జో, "దస్సి కెరుక నాయ్. తుచి రితి, యేసుక నంప కెర్ల తుచ బావుడ్లుచి రితి జయిందె. మెలె, దేముడుక సేవ కెర్తొసా జయిందె. అంక పొని, గని దేముడుకయ్ జొకరు." మెలన్. కిచ్చొక మెలె, యేసు సంగిలి జో దెకయ్లి సాచి, దేముడు సంగిలొ కబుర్లు ఎక్కి ఆత్మ తెంతొచ.

చొక్కిలొ గోడొతె వెగ జెతోసా

11 తెదొడి కిచ్చొ దెకిలయ్ మెలె, పరలోకుమ్ ఉగ్గి జా తిలిన్ దెకిలయ్, చి ఆదె! చొక్కిలొ గోడొ! జోతె వెసిలొసాచి నావ్ కిచ్చొ మెలె, 'నిదానుమ్చొ, సత్తిమ్చొ'. చి సత్తిమ్చ తీర్పుల్ కెర, 'దేముడుచి సత్తిమ్ జినున్' మెన, యుద్దుమ్ కెర్తయ్.

12 జోచ అంకివొ కీస మెలె, ఆగి లగిల్ రితి, చి జోచి బోడితె ఒగ్గర్ కిరిటల్ అస్తి. జోచి అఁగి రెగిడ్లి నావ్ ఏక్ అస్సె. గని కిచ్చొ నావ్ గే ఎక్కి జోకయ్ ఎర్కె, గని అన్నె కక్కయ్ నాయ్.

13 లోయితె బుడ్డ తిలొ పాలుమ్ జో గలన అస్సె, చి జోక తిలి నావ్ కిచ్చొ

మెలె, 'దేముడుచి †కోడు' మెలి నావ్ తిలన్.

14 అన్నె, పరలోకుమ్చ సయ్న్యుములు కి, సుద్ది తిలి చొక్కిలి చెంగిలి బట్టచ పాలల్ గలన, చొక్కిల గోడల్తె జేవ్ కి వెగ, జోచి పట్టి గెతతి.

15 ఎత్తి అదికారుమ్ తిలొ దేముడుక †నేన్ల మాన్సుల్క మార్తి వాండి తిలి కండా జోచి చోడి తెంతొ బార్ జతయ్. గొప్పుడుచి ఇనుముడండొ తెన్ జోవయింక ఏలుప కెరెదె. ఎత్తి సెక్తి అదికారుమ్ తిలొ దేముడుచి సిచ్చుచి కోపుమ్చి గిన్నతె జో సుడ, జేవ్ మాన్సుల్క కెర్తి సిచ్చ జో జర్గు కెరెదె.

16 జోచి పాలుమ్తె చి జోచి జంగయ్ చి ఉప్పిరి ఏక్ నావ్ అస్సె. 'రానల్క రానొ, ప్రబుల్క ప్రబు' మెలి నావ్.

ఆకర్చి యుద్దుమ్

17 తెదొడి కిచ్చొ దెకిలయ్ మెలె, పొద్దుచి ఉజిడతె టీవోజ తా ఏక్ దూత గట్టిజ అవాడ్ కెరన, పొద్దు ఆగాసుమ్చి మదెనె టీవోజ, పక్కయ్ ఉడ్డిత ఎత్తి పిట్టల్క కిచ్చొ మెన కేక్ గలొ మెలె, "తుమ్ జా! చి దేముడు దొర్కు కెర్తి వెల్లి విందుక తెయార్ జా తా.

18 రానల్చి సిద్ద, వెయి జమాన్లుక వెల్లొచి సిద్ద, ఒగ్గర్ సెక్తిబలుమ్ మాన్సుల్చి సిద్ద, గోడల్చి సిద్ద, జోవయింతె వెగితనచి సిద్ద, ఎత్తి రగల్ మాన్సుల్చి సిద్ద; జేవ్ గొతి నెంజిలన జలెకి, గొతిమాన్సుల్ జలెకి; బాల వెల్లొచి సిద్ద కన్నె" మెన, దూత పిట్టల్క సంగిలన్.

19 తెదొడి కిచ్చొ దెకిలయ్ మెలె, జో పాపుమ్చొ జంతు, చి ఒండి లోకుమ్చ రానలు, జోచ సయ్న్యుముల్ తెన్ ఎక్కితె బెర్ల. కిచ్చొక మెలె, జో గోడొతె వెసిలొసాచి ఉప్పిరిచి జోచ

* 19:8 19:8 నెంజిలి 'ప్రబుచయ్ జల మాన్సుల్' మెనుక జయెదె. † 19:13 19:13 యోహాను 1:1.

‡ 19:15 19:15 నెంజిలి 'నెసిల మాన్సుల్క' మెనుక జయెదె. § 19:20 19:20 సముద్దుమ్ తెంతొ బార్ జలొసా 13:1.

సయన్యుముల్చి ఉప్పిరి యుద్దుమ్ కెరుక మెన బెర్ల.

20 తెదొడి కిజంతు దెర్ను సేణ్ణో, చి జో తెన్, జోచి నావ్ తెన్ వెల్లో మాయకము కెర్లో అన్నెక్ *జంతు కి దెర్ను సేణ్ణో. జో అబద్దుమ్క దేముడుచ కబుర్లు సంగితోసా ఆవ్ మెన అగ్గ సంగ తిలన్. అన్నె, జో జంతుచి గుర్తు కెరవన, జోచి బొమ్మక బక్తి కెర తిలనక మోసిమ్ కెర తిలో. జో కి దెర్ను సేణ్ణో. జలె, జేవ్ దొగులక జీవ్ తత్తె, ఎడ్డి రంగు లగితి వెల్లో ఆగి గోయ్చి గడ్డె గల దిల.

21 తెదొడి, గోడతె వెసిలోసా జోచి కండా తెన్ రాసల్కచి జేవ్ సయన్యుములు ఎత్కిక మారయ్ గెలన్. జోచి చొండి తెంతో బార్ జతి కండా తెన్ అన్నె, ఎత్కి పిట్టల్ జేవ్ మొర్లన ఎత్కిజినిచి సిద్ర కా గెల కెర, పేట్ బెర్తె కయ్ల.

20

సయతాన్ మట్టు నెంజిలి గొయితె వెయి వెర్నుల్ తతి సిచ్చ జతిసి

1 అన్నె కిచ్చొ దెకిలయ్ మెలె, పరలోకుమ్ తెంతో దూత ఎక్కిలో ఉత్త జెతె తిలిసి దెకిలయ్. జోచి అత్తి మట్టు నెంజిలి జా *వెల్లి గొయిచి తాలుమ్ కడి, చి జాడు తిలి ఏక్ ఇనుము గొల్పు తిల.

2 తెదొడి వెల్లొచొ జో అయిక, జలె పూర్నుమ్ తెంతొచొ అయిక, మెలె, సయతాన్ జలొ సయతానుక దూత దెర కెర, వెయి వెర్నుల్ జో దస్సి తతి రితి జోక బంద గెల కెర,

3 మట్టు నెంజిలి జా గొయితె గల దా, వెయి వెర్నుల్ గెతె ఎదక దేముడుక నేన్ల మాన్సుల్క జో అయి అన్నె నే మోసిమ్ కెర్తి రిసా, జోచి ఉప్పిరి డంక దిలన్. జా

వెయి వెర్నుల్ గెలె, జోక గడియ విడ్డల్ కెరుక.

క్రీస్తు తెన్ వెయి వెర్నులు ఏలుప కెరుక

4 తెదొడి కిచ్చొ దెకిలయ్ మెలె, సిజాసనల్, చి జోవయించి ఉప్పిరి కో వెన తిల మెలె, బూలోకుమ్చ దేసిమ్లు ఎత్కిక ఏలుప కెర్తి రిసా దేముడు సెలవ్ దిలన. కొన్న మెలె, యేసుచి రిసా జేవ్ సాచి సంగ తిలి రిసా, చి దేముడుచి కోడు జేవ్ దెరన్లి రిసా, బోడి గండల్ జలన, చి అన్నె కొన్న మెలె, జో పాపుమ్చొ జంతుక చి జోచి బొమ్మక బక్తి నే కెర్లన, జోచ నెర్తిలె అత్తిలె జోచి గుర్తు నే కెరవన్లన. జేవ్ జలె, జీవ్ జా ఉట్టిల, చి వెయి వెర్నులు క్రీస్తు తెన్ ఏలుప కెర్ల.

5 ఈంజయ్ జీవ్ జా ఉట్టిన్క 'తోలితో చి' మెనుక జయెదె. తోలితోచి ఈంజ జీవ్ జా ఉట్టిన్కె బెదితనక చెంగిలి. ఎత్కి అదికారుమ్ దేముడుచ జేవ్ జవుల! కిచ్చొక మెలె, జోవయించి ఉప్పిరి †పణ్ణొకచి మొర్నుక కిచ్చొ అదికారుమ్ తయె నాయ్.

6 తోలితో చి జీవ్ జా ఉట్టిసి జతన దేముడుక చి క్రీస్తుక పూజర్లు రిత జవుల, చి వెయి వెర్నుల్ పూర్తి జో తెన్ ఏలుప కెరుల.

సయతాన్ అన్నె విడ్డల్ జా యుద్దుమ్ కెర్తిసి

7 జేవ్ వెయి వెర్నుల్ కేడ్డె, జో జేలి జలిసి తెంతొ సయతాన్ విడ్డల్ జా,

8 'గోగు' 'మాగోగు' మెన బూలోకుమ్చ చెత్తర్ల పక్కలెచ దేముడుక నేన్ల మాన్సుల్ యుద్దుమ్క తెయార్ జతి రితి, జో సయతాన్ జోవయింక మోసిమ్ కెరెదె. జేవ్ మాన్సుల్చి లెక్క కెర్తి మెలె, సముద్రుమ్తెచి ఇన్సుగిడ్డల్ కెత్తి జా లెక్క కెరుక నెంజె గే, తెదివాట్ జీన్ జవుల.

* 19:20 19:20 బుయి తెంతొ బార్ జలొసా 13:11. * 20:1 20:1 9:1 దెక. † 20:5 20:5 మెలె, వెల్లో ఆగి గోయ్చి సిచ్చతె గెతిసి. 20:14. ‡ 20:9 20:9 దొన్ని అర్థల్ ఉచరుక జయెదె. ఏక్ మెలె, మాములుమ్ యెరూసలేమ్ పట్టుమ్. అన్నెక్ మెలె, కెనె ప్రబువయ్ మాన్సుల్ తవుల గే, ఒత్తయ్ మెన ఉచరుక జయెదె.

9 తెదొడి జేవ్ బూలోకుమ్చి రుందిలి టాన్తె వెగ జా, దేముడుచ జల మాన్సులచి సుట్టునంత, చి జో ప్రేమ తిలి పట్టుమ్చి సుట్టునంత బెర అయ్ల. గని పరలోకుమ్ తెంతో దేముడు తెంతో ఆగి సూయి జా జోవయింక డయ గెలి.

10 జోవయింక మోసిమ్ కెర్లొ నయతాన్ సిచ్చు జతె తంక ఎడ్డి ఆగి లగితి వెల్లి ఆగి గోయ్తె గలి జలొ. జో పాపుమ్చో జంతు, అన్నె అబద్దుమ్క 'దేముడుచ కబుర్లు సంగితోసా ఆవ్' మెనన్లొసా కి ఒత్తయ గలి జా అన్తి. జేవ్ రాతి మెద్దెనె కెయక తెయక నే పిట్టి, ఒత్త సిచ్చల్ బాదల్ జతె తవుల.

మొర్లసక ఆకర్చి తీర్పు జతిసి

11 అన్నె కిచ్చొ దెకిలయ్ మెలె, వెల్లి చొక్కిలి సిజాసనుమ్, చి జాచి ఉప్పిర్ వెసిలొసాక దెకిలయ్. జోతె తెంతో బూలోకుమ్ ఆగాసుమ్ నిగ గెల, చి జేవ్క అన్నె కేన్ టాన్ నాయ్.

12 తెదొడి కిచ్చొ దెకిలయ్ మెలె, బాల వెల్లొ మొర్లస ఎత్కిజిన్ సింగాసనుమ్చి పురె టీవ తతికయ్, పుస్తకల్ * ఉగిడ్ల. పడ్డొ అన్నెక్ పుస్తకుమ్ ఉగిడ్ల; పరలోకుమ్తె జింక సెలవ్ తిలసచ నవ్వొ రెగిడ్లి పుస్తకుమ్. జలె, మొర్లస జేవ్ కెర్లొ కమొచి రిసా జేవ్ పుస్తకల్తె రెగ్గ తిలి రితి తీర్పు జల.

13 తెదొడి, జేవ్తె మొర్లసక నముద్దుమ్ సార్పు కెర దిలి, అన్నె మొర్లు చి మొర్లస రకితి టాన్ ఒత్త తెంతో తిలసక సార్పు కెర దిల, చి నముద్దుమ్తె మొర్లస, చి మొర మొర్లస, రకితి టాన్తె తిలస ఎత్కిజిన్ జీవ్ జా, సింగాసనుమ్చి పురె టీవ, జేవొజ, జేవ్క కమొచి రిసా తీర్పు జవుల.

14 తెదొడి మొర్లు చి మొర్లస రకితి టాన్ వెల్లొ ఆగి గోయ్చి గడ్డె † గలి జల. వెల్లి ఆగి గోయ్తె గల్లిని దొన్నిచి మొర్లు జయ్దె.

15 అన్నె, పరలోకుమ్తె జింక సెలవ్ తిలసచ నవ్వొ రెగిడ్లి పుస్తకుమ్తె కచి నావ్ తయె నాయ్ గే, జెవ్వి వెల్లి ఆగి గోయ్తె ‡ గలి జల.

21

నవి ఆగాసుమ్, నవి బుయి

1 తెదొడి ఆవ్ కిచ్చొ దెకిలయ్ మెలె, నవి ఆగాసుమ్, నవి బుయి. అగ్గెచి ఆగాసుమ్ అగ్గెచి బుయి కేడ తిలి, చి నముద్దుమ్ కి నాయ్.

2 పడ్డొ, పరలోకుమ్చి సుద్దిచి పట్టుమ్, నవి యెరూసలేమ్ పరలోకుమ్ తెంతో దేముడు తెంతో, మున్నుక జెతికయ్ పెండ్లి ఉబేడ్ రితి తెయార్ జా తా, ఉత్త జెతిసి దెకిలయ్.

3 అన్నె, సింగాసనుమ్ తెంతో చి గట్టిజ అవాడ్చి అవాడ్ కిచ్చొ సంగిలిసి సూన్లయ్ మెలె, "ఈందె, దేముడు జతి టాన్ మాన్సుల్తెయి అన్నె. జోవయింతెన్ జో జయెదె. జేవ్ జోచయ్ ప్రెజల్ జా తవుల, చి జో సొంతయ్ జేవ్ తెన్ తయెదె, జేవ్క దేముడు జా తయెదె.

4 జోవయించ అంకివొతె ఆనునొ కెయక అన్నె నే జెతి రితి, జోవయించ ఆనునొ జోయ్యి పుంచ గెలెదె, చి అప్పె తెంతో కిచ్చొ మొర్లు తయె నాయ్. ఏడుకుడు జతిసి, ఏడ్డిసి, నొప్పి కి తయె నాయ్. కిచ్చొక మెలె, పొర్నిచి ఎత్కి ఉట్ట గెల." మెన జా అవాడ్ సంగిలన్.

5 తెదొడి, సింగాసనుమ్తె వెసిలొసా, "ఈందె, ఎత్కి నవి తెయార్ కెర్లొసి" మెన, అన్నె, "ఈంజ ఎత్కి రెగుడు. ఈంజేవ్ కొడ్లె సత్తిమ్చ, నంపజతన" మెన జో సంగిలన్.

§ 20:10 20:10 ఎత్కి అదికారుమ్ తిలొ దేముడు ఒత్త గలయ్లొ, గెద. * 20:12 20:12 కో ఉగిడ్ల గే సంగి నాయ్. † 20:14 20:14 ఎత్కి అదికారుమ్ తిలొ దేముడు ఒత్త గలయ్లొ, గెద. ‡ 20:15 20:15 ఎత్కి అదికారుమ్ తిలొ దేముడు ఒత్త గలయ్లొ, గెద.

6 తెదొడి అంక, “పూర్తి జగ్గు జలి, ‘అల్పా, ఓమెగ’ మెన ఆవ్ మొదొల్చొ, ఆకర్చొ. కక్క తాన్ కెర్లె, డబ్బుల్ నే దెతె, జీవ్ దెతొ పాని అంచి ఊంట తెంతొ ఆరి దెయిందె.

7 కో జీనుల గే, అంచి రాజిమ్చి ఈంజ వాట జోక దెయిందె, చి ఆవ్ జోచొ దేముడు జయిందె, జో అంక పూత్తు జా తయెదె.

8 గని అంచి సాచి జంక బితస, నముకుమ్ నెంజిలస, నిదానుమ్ నెంజిలస, హత్య కెర్తస, లంజె జతస, మెంగ్ర మాన్సుల్, బొమ్మల్క జొకర్తస, అబద్దుమ్ జతస, అబద్దుమ్ కెర్తస, సయ్తాన్చి వెట్కారుమ్ జలస, జేవ్క సిచ్చ, గందకము తెన్ ఆగి లగితి వెల్లి ఆగి గొయ్తె గలుల. ఈంజ దొన్నిచి మొర్చు.”

మెండపిల్లక తేర్చి జతసి నొవి యెరూసలేమ్

9 తెదొడి సత్తు ఆకర్చ సచ్చల్ బెర్ల సత్తు గిన్నల్ అగ్గె దెర సువ తిల సత్తు *దూతల్తె ఎక్కిలో అంచితె జా కెర కిచ్చొ మెన అంక సంగిలన్ మెలె, “జో మెండపిల్లక తేర్చి జతి పెండ్లి ఉబేడక తుక దెకయిందె” మెలన్.

10 తెదొడి దేముడుచి యేసుచి ఆత్మసెక్తిక జో దూత అంక ఒగ్గర్ డొంక్ తిలి డొంగ్రుతె కడ నిలన్, చి జో అంక దెకయ్తికయ్, ప్రబుచి జా ఆత్మసెక్తిక కిచ్చొ దెకిలయ్ మెలె, జోచి †సుద్ది తిలి యెరూసలేమ్ పట్టుమ్ దెకిలయ్.

11 జా పట్టుమ్చి ఉజిడి కిసి తిలి మెలె, దేముడుచి ఉజిడ్ తెన్ తా, ఒగ్గర్ విలువచి రత్తుమ్చి రితి ఉజిడి లగిలి,

వజ్రుమ్చి రితి సీనచి రితి టేంటచి ఉజిడి లగిలి.

12 జా పట్టుమ్క వెల్లి కోట ఒగ్గర్ డొంక్ తిలి. జా కోటతె బార గుమ్మల్ తిల. జేవ్ బార గుమ్మల్తె ఎక్ ఎక్ దేముడుచొ దూత తిలి. జేవ్ బార గుమ్మల్తె ‡ఇస్రాయేలుచ బారజిన్ పుత్తర్చుల్చ సెకుమ్లుచ ఎక్కిక్ నవ్వొ, ఎక్కిక్ గుమ్మలె రెగ్గ తిల.

13 తూర్పు పక్క తిన్ని గుమ్ముమ్లు, ఉత్తర పక్క తిన్ని గుమ్ముమ్లు, దచ్చెన పక్క తిన్ని గుమ్ముమ్లు, చి పడమర పక్క తిన్ని గుమ్ముమ్లు తిల.

14 వడ్డొ పట్టుమ్చి కోటక బార పునాద్దు, చి జేవ్ పునాద్దుతె మెండపెల్లచి చి రిసాచ బారజిన్ బారికుల్చ నవ్వొ ఎక్కిక్ రెగ్గ తిల.

15 అంచి తెన్ లట్టబ్బొ జో దూతక, జా పట్టుమ్కచి జేవ్చ గుమ్ముమ్ల్కచి కోటక కికటార్తి రిసా, బజర్క తెయార కెర్లె కటార్తి డండొ తిలి.

16 పట్టుమ్క చెత్తర్ కోనల్, చి జేవ్చ పక్కల్చ కొల్తల్ సమానుమ్ అస్తి, జేవ్చ కోనల్చ కొల్తల్ సమానుమ్ అస్తి. తెదొడి జోచి డండొ తెన్ పట్టుమ్క కటార్లన్.

* దొన్ని వెయిల్ దొన్ని పుంజొ కిలోమీటర్లు దూరి జేవ్చి కొల్త. చెత్తర్ పక్కల్ కి సమానుమ్; కెర్లె దీగు జయెదె గే, తెద్ది రూండు, తెద్ది డొంకు కి జయెదె.

17 జేవ్చి కోట కి కటార్లన్. †అరవయ్ చెత్తర్ మీటర్లు డొంకు, మాన్సు కటార్తి రితి, మెలె జో దూత కటార్లన్.

18 జా కోట వజ్రుమ్చి వస్తుతె తెయార కెర్లెసి, చి పట్టుమ్ రితి బజరి తిలి, చి

* 21:9 21:9 15, 16 అద్యయల్. † 21:10 21:10 19:8 దెక. ‡ 21:12 21:12 జోవయింక అన్నెక్ నావ్ యాకోబు. ‘ఇస్రాయేలు’ మెలె, జో యాకోబుక అన్నెక్ నావ్ జయెదె, చి టాలిక్ ‘యూదుల్’, నెంజిలె ‘సంపజలస మొత్తుమ్’ చి అర్దుమ్ కెరసుక జయెదె. § 21:15 21:15 మీంతి * 21:16 21:16 రవారమి 1,400 మైలు † 21:17 21:17 అరవయ్ చెత్తర్ మీటర్లు మెలె, డబ్బయ్ దొన్ని గజాలు జయెదె, మెలె పుంజెక్ దొన్ని వీసా చెత్తర్. పుంజెక్ దొన్ని వీసా చెత్తర్ మెలె, బార బారలు, మెలె 144 = 12 x 12. బార సెకుమ్లుచ యూదుల్ తిల, యేసుక బార బారికుల్ కి తిల. జేక ఈంజ నంబర్ ఏక్ టాలి జయెదె.

జేవ్చి ఉజడి కీసి మెలె, అద్దుమ్ రితి టేంటు లగిలి.

19 జా పట్టుమ్చి కోటచ పునాద్దుతె ఎత్తి రగల్ రత్నాలు లగిల. తొలితొ చి వజ్రమ్, చొక్కిల్ లగిలి. అన్నెక్ రత్నుమ్ నీలిమ్ రగుమ్ లగిలి, అన్నెక్ రత్నుమ్ 'యమునా' మెంతిసి ఎరన లగిలి, అన్నెక్ రత్నుమ్ పచ్చన లగిలి.

20 అన్నెక్ రత్నుమ్ నారింజ రంగు లగిలి, అన్నెక్ రత్నుమ్ అన్నెక్ ఎరన రగుమ్ లగిలి, అన్నెక్ రత్నుమ్ తామర్ పూల్చి ఎడ్డి రంగు లగిలి, అన్నెక్ రత్నుమ్ సముద్రుమ్చి పచ్చన రంగు లగిలి, అన్నెక్ రత్నుమ్ అన్నెక్ రగుమ్ ఎడ్డి రంగు లగిలి, అన్నెక్ రత్నుమ్ చీంచ్ అక్షల్ నొవర్ పలొయ్లి రంగు లగిలి, అన్నెక్ రత్నుమ్ గులాప్ రంగు లగిలి, అన్నెక్ రత్నుమ్ ఊద రంగు లగిలి.

21 వడ్డొ బార గుమ్మల్చ టట్టల్ కిచ్చొ వస్తుతె తెయార్ జా తిల మెలె, బార ముత్యల్క. ఎత్తి టట్ట ఏక్ ముత్యల్క తెయార్ జలిసి, అన్నె, పట్టుమ్చి వీది రితి బజరి తా, అద్దుమ్చి ఎదిలి టేంటు లగిలి.

22 అన్నె, జా పట్టుమ్తె కిచ్చొ దేముడుచి గుడి డీసె నాయ్. కిచ్చొక మెలె, ప్రబు జలొ ఎత్తి సెక్తి అదికారుమ్ తిలొ దేముడు అన్నె మెండపిల్ల సొంత జా పట్టుమ్క దేముడుచి గుడి జవుల.

23 అన్నె, జా పట్టుమ్క ఉజడి దెంక పొద్దు గే జోను గే నాయ్. కిచ్చొక మెలె, దేముడుచి ఉజడి జాక దొర్కు జలి ఉజడి, చి మెండపిల్ల జాక దీవు.

24 జాచి ఉజడిక పైజల్ ఇండుల, చి ఒత్త కిచ్చొయ్ అందర్ తయె నాయ్.

25 అన్నె, రాతి మెద్దెనె కెయక కి జా పట్టుమ్చి గుమ్మల్ డంకితి నాయ్, అన్నె, ఈంజ నొవి బూలోకుమ్చ రానలు ఒత్త జోవయించి గవురుమ్, జోవయింక

గవురుమ్ దెతిసి ఎత్తి ఒత్త ఆనుల.

26 ఎత్తి పైజల్క దొర్కు జలి గవురుమ్, ఎత్తి పైజల్క దొర్కు జలి సొమ్నారుమ్ ఒత్త ఆనుల.

27 గని కిచ్చొ పాపుమ్చి ఒత్త పెసె నాయ్, చి మర్కటుమ్ గే, అబద్దుమ్ గే ఇండితన ఒత్త పెసెతి నాయ్. కో ఒత్త పెసుల మెలె, 'పరలోకుమ్తె బెదుతు' మెన మెండపిల్లచి పుస్తకుమ్తెకచ నవ్వొ తవుల గే జెవ్చి పెసుల.

22

జీవ్ దెతో పానిచి గాడు జీవ్ దెతి పలుమ్చొ రూకు

1 అన్నె జో దూత అంక కిచ్చొ దెకయ్లన్ మెలె, పరలోకుమ్చి జీవ్ దెతో పానిచి గాడు. కీసి తిలి మెలె, అద్దుమ్చి ఎదిలి టేంటు తా, దేముడుచి అన్నె మెండపిల్లచి సింగాసనుమ్ తెంతొ బార్ జా,

2 పట్టుమ్చి వీదిచి నెడిమి ఉట్ట గెతయ్. వడ్డొ అన్నె కిచ్చొ మెలె, పరలోకుమ్చి జీవ్ దెతో రగుమ్ *రూకుల్ జా గాడుచ దొన్ని పక్కలె అన్ని. జేవ్ రుకాలె బార రగల్ వండ్లు, చి ఎత్తి జొన్ని వండ్లు పిక తత్తతి. జో రూక్చ అక్షల్ కిచ్చొక కామ్క జెతతి మెలె, ఒండి పైజల్చక చెంగిల్ కెర్తయ్.

3 ఒత్త తెంతొ, కిచ్చొచి రిసా గార్చి సాపెనల్ తిలిసి తయె నాయ్. దస్సిచి కిచ్చొ కి తయె నాయ్, గని జా పట్టుమ్తె దేముడుచి జో మెండపిల్లచి సింగాసనుమ్ తయెదె, చి జోచ సేవ కెర్తన జోక బక్తి కెర్త తవుల.

4 జోచి మొకొమ్ జేవ్ దెకుల, చి జోవయించి నిర్దె జోచి నావ్ తయెదె.

5 వడ్డొ, ఒత్త తెంతొ అందర్ తయె నాయ్, చి ఒత్త తిలనక దీవుచి జవున్ పొద్దుచి జవున్ ఉజడి నాయ్. కిచ్చొక మెలె, ప్రబు జలొ దేముడుచి ఉజడి

తయెదె, చి జేవ్ కెయక తెయక ఏలువ కెరుల.

6 అన్నె, “ఈంజేవ్ కొడొ సత్తిమ్చ, నంపజతన. అన్నె, ప్రబు జలో, జోచ కబుర్లు సంగితసచి ఆత్మతె సికడ్డొ దేముడు జోచొ దూతక తెద్రవ అస్సె; జర్గు జంక తిలిసి జోచ సేవ కెర్తనక దెకవుక మెన,” అంక జో దూత సంగిలన్.

యేసుప్రబు బే బేగి అన్నె జెయిందె

7 “ఈందె, ఆవ్ బే బేగి అన్నె జెయిందె” మెన యేసు సంగితయ్. ఈంజ పుస్తకుమ్తె తిలి కబుర్చ కొడొ కో దెరనుల గే, జోవయింక చెంగిలి.

8 ఆవ్ యోహాను ఈంజ ఎత్తి సూన్లొసా దెకిలొసా. అన్నె, ఈంజ ఎత్తి సూన దెకిల్ బేగి, అంక ఈంజ ఎత్తి దెకయ్లో దూతచి చట్టె సెర్ను సేడ జోక బక్తి కెర్లయ్,

9 గని జో అంక, “తుయి దస్సి కెరుక నాయ్! ఆవ్ తుచొ రితొ, దేముడుచ కబుర్లు సంగిత తుచ బాచొదివొ తెన్ కి, తుచి రితొ సేవ కెర్లొసా జయిందె. దేముడుకయ్ జోకరు!” మెలన్.

10 తెదొడి జో అంక, “ఈంజ పుస్తకుమ్చి కబుర్చ కొడొ ముద్ర కెరు నాయ్, లుంకడు నాయ్; కిచ్చొక మెలె సమయుమ్ పాసి జా అస్సె.

11 పాపుమ్తె ఇండితన అప్పె కి పాపుమ్తె ఇండితె తత్తు, మర్కటుమ్చ అన్నె మర్కటుమ్ ఇండుతు, పున్నిమ్ జలస అన్నె పున్నిమ్తె ఇండితె తత్తు, సుద్దిచ అన్నె సుద్ది ఇండితె తత్తు.” మెన దూత సంగిలన్.

12 యేసుప్రబు సంగిలిసి అన్నె కిచ్చొ మెలె, “ఈందె, ఆవ్ బే బేగి జెయిందె. అయ్లె, ఎత్తి మాన్సు కెర్ల కమొ కొల్లి జోవయించి కూలి దెయిందె.

13 ‘అల్ఫా’ ‘ఓమెగ’ మెన, †తోలితోచొ, కర్వడ్చొ, మొదొల్చొ ఆకర్చొ ఆవ్వి” మెన యేసు సంగిలన్.

14 పరలోకుమ్చి జీవ్ దెతో చెట్టెచ పండ్లు కంక సెలవ్ దొర్కు కెరంతి రిసా, చి పరలోకుమ్చి గుమ్ముమ్ వాట్ పెనుక సెలవ్ దొర్కు కెరంతి రిసా, కో ‡జోవయించ పాలల్ కేడన తవుల గే, జోవయింకయ్ చెంగిలి.

15 గని గుమ్ముమ్ ఒత్తల్తోచి బయిలె కో అస్తి మెలె, సూనర్లు రిత మాన్సుల్, మెంగ్ర మాన్సుల్, లంజె జతన, అత్య కెర్తన, బొమ్మల్క జొకర్తన, చి అబద్దుమ్క ప్రేమ తా, అబద్దుమ్ కెర్తన ఒండి అస్తి.

16 యేసు, “అంక నంపజలనచ సంగుమ్లు సూన్తు” మెన, ఈంజ సాచి తుక దెకయ్తి రిసా యేసు మెలొ ఆవ్ అంచొ దూతక తెద్రవ అస్సి. దావీదు పూర్ణుమ్చొ జలో రానొచి సెకుమ్క ఆవ్ చేరు జలొసా, జోచి సెకుమ్తె జెర్మిలొసా, దేముడుచి రాజిమ్చి నొచి దీసిక దొర్కు జలి ఉజిడి దెతో సుక్కి ఆవ్” మెన సంగిలన్.

నంపజా మెన మాన్సుల్క బుకార్లిసి

17 “తుమ్ జా” మెన దేముడుచి సుద్ది తిలి ఆత్మ అన్నె యేసుచి కీతేర్ని జతిసి సంగితతి. అన్నె, ఈంజ కోడుకో సూనుల గే, జేవ్ కి జా మెన అన్నె మాన్సుల్క బుకార్లు. అన్నె, కక్క తాన్ తిలె, జో జెవున్, చి కో ఇస్టుమ్ జవుల గే, డబ్బుల్ నే దెతె ఆరి పరలోకుమ్చి జీవ్ దెతో పాని నజ పితు.

18 ఈంజ పుస్తకుమ్చి కబుర్చ కొడొ సూన్త ఎత్తిజిన్క ఆవ్ కిచ్చొ జాగర్త సంగితసి మెలె, ఈంజేవ్ కొడొతె అన్నె కిచ్చొ వేరచి బెదయ్లె, ఈంజ

† 22:13 22:13 నెంజిలె ‘తోలితో మొదొల్ తెంతొ ఆకర్ ఎదచొ ఆవ్వి” మెన యేసు సంగిలన్. ‡ 22:14

22:14 నెంజిలె ‘ప్రబుచ కొడొ రితి ఇండితె గి’. § 22:17 22:17 19:7-8, 21:2. యేసుచి తేర్ని మెలె, నంపజలన మొత్తుమ్ గెతి జోవయించి సుద్ది పట్టుమ్, చి జా పట్టుమ్తె బెదితన, నంపజలనయ్ మొత్తుమ్. యెసయా 49:18, 61:10, యిర్మీయా 2:1-3, ఎఫెసు కచి ఉత్తమ్ 5:31-32.

పుస్తకుమతె సంగ దెకయ్ల సిచ్చల్ జో
మాస్సు సేడ్డి రితి దేముడు సిచ్చ కెరెదె.

19 అన్నె, ఈంజ జోచి కబుర్చి
పుస్తకుమచ కొడతె కో కిచ్చొ కడ గెలె,
ఈంజ పుస్తకుమతె రెగ్గ దెకయ్లి జో
జివ్ దెతి రూక్చి, చి జోచి పరలోకుమచి
నుద్దిచి పట్టుమతెచి జోచి వాట, ఎత్కి

అధికారుమ్ తిలో దేముడు కడ గెలెదె.
20 “కచితుమ్, ఆవ్ బే బేగి
జెయిందె” మెన ఈంజ ఎత్కిక సాచి
జతోసా సంగితయ్. *ఆమేన్, జే, ప్రబు
యేసు!

21 జోచయ్ జల మాస్సుల్ ఎత్కిజిన్చి
ఉప్పిరి ప్రబు జలో యేసుచి దయ
తవున్. ఆమేన్.